

আহমদ শরীফ রচনাবলী

৫

ড. পৃথ্বীলা নাজনীন নীলিমা
সম্পাদিত

AMARBOI.COM



আগামী প্রকাশনী

প্রথম প্রকাশ বৈশাখ ১৪২০ এপ্রিল ২০১৩

প্রকাশক ওসমান গনি আগামী প্রকাশনী ৩৬ বাংলাবাজার
ঢাকা-১১০০ ফোন ৭১১ ১৩৩২, ৭১১ ০০২১

প্রচ্ছদ কাইয়ুম চৌধুরী

মুদ্রণ স্বরবর্ণ প্রিন্টার্স ১৮/২৬/৪ শুকলাল দাস লেন, ঢাকা

মূল্য : ১০০০.০০ টাকা

Ahmed Sharif Rachanavali-5 Collected works of Ahmed Sharif.

Published by Osman Gani of Agamee Prakashani
36 Bangla Bazar, Dhaka-1100 Bangladesh.
e-mail : info@agameepublishani-bd.com

First Print : April 2013

Price : Tk. 1000.00 only

ISBN 978 984 04 1567 0

ভূমিকা

ড. আহমদ শরীফ প্রয়াত হয়েছেন চৌদ্দ বছর হয়ে গেল। এর মধ্যে আহমদ শরীফ রচনাবলীর প্রথম খণ্ড বেরিয়েছিল ২০০০ সালে, দ্বিতীয় খণ্ড ২০০৬, তৃতীয় খণ্ড ও চতুর্থ খণ্ড ২০১০ এবং পঞ্চম খণ্ড বের হল ২০১৩ সালে।

বিশেষভাবে উল্লেখ্য যে, পঞ্চম খণ্ডটি শুধুমাত্র একটি গ্রন্থ নিয়ে প্রকাশ। গ্রন্থটি বাঙালী ও বাঙলা সাহিত্য (দ্বিতীয় খণ্ড), যা ড. আহমদ শরীফের অতি সুখ্যাত গ্রন্থ। মধ্যযুগের বাংলা সাহিত্যের ইতিহাস বিষয়ক গ্রন্থটি তাঁর সুদীর্ঘ গবেষণার ফল, এটি বাংলা সাহিত্যের একটি বিশ্লেষণমূলক পূর্ণাঙ্গ ইতিহাস নিয়ে রচিত। গ্রন্থটিতে বাংলা ভাষাভাষী মানুষের ইতিহাস, নৃতত্ত্ব, সামাজিক-রাজনৈতিক চেতনা, ভাবসাধনা, ধর্মদর্শন, সাহিত্য, সংস্কৃতি ইত্যাদি প্রসঙ্গ নিয়ে বিস্তৃত আলোচনা রয়েছে। ড. আহমদ শরীফ নিজেই এই গ্রন্থের নিবেদনে বলেছেন :

‘মধ্যযুগের ও আধুনিককালের সাহিত্যের শতাব্দী ইতিহাস রচিত হলেও আজো মধ্যযুগের কিংবা আধুনিককালের বাঙলা সাহিত্যের একটিও পূর্ণাঙ্গ ইতিহাস প্রণীত হয়নি। তার কারণ কোলকাতাস্থ ইতিহাসকারগণ মুসলিম রচিত সাহিত্য সম্বন্ধে তেমন জিজ্ঞাসু নন। ...এ গ্রন্থে মধ্যযুগের বাঙলা সাহিত্যের পূর্ণাঙ্গ চেহারা তুলে ধরতে চেষ্টা করেছি। সাহিত্য ক্ষেত্রে কোন বাঙালীর রচনাকে তুচ্ছ ভাবিনি।’

লেখকের এই অভিব্যক্তি থেকে বোঝা যায়, লেখক অত্যন্ত পরিশ্রম করে তাঁর সুদীর্ঘ গবেষণা জীবনের শ্রম, অভিজ্ঞতা, নিজস্ব জ্ঞান, বুদ্ধি এবং প্রজ্ঞা দিয়ে বর্তমান ইতিহাস ভিত্তিক গ্রন্থটি রচনা করেছেন, যা আবার গুরুত্বপূর্ণ হিসেবে উভয় বঙ্গে বহুল পঠিত, প্রয়োজনীয় এবং অত্যাৱশ্যকীয় হিসেবে ইতিহাস ও বাংলা সাহিত্যের গবেষক শিক্ষার্থী ও শিক্ষকদের কাছে সমাদৃত।

ড. আহমদ শরীফ রচনাবলী প্রথম থেকে চতুর্থ খণ্ড পর্যন্ত সম্পাদনা করেছিলেন ঢাকা বিশ্ববিদ্যালয়ের বাংলা বিভাগের প্রাক্তন অধ্যাপক, আমার শিক্ষকতুল্য অধ্যাপক আহমদ কবীর। তাঁর সুনিপুণ সম্পাদনায় প্রকাশিত রচনাবলীর মান অত্যন্ত উঁচু মানের, কিন্তু অতি সম্প্রতি তাঁর শারীরিক অসুস্থতার কারণে প্রকাশকের বিশেষ অনুরোধে আমাকে এই গুরু দায়িত্ব নিতে হল। এখানে প্রকাশ করা অপ্রাসঙ্গিক হবে না যে, ড. আহমদ শরীফ-এর রচনাবলী সম্পাদনা করা আমার জন্য অত্যন্ত গৌরবের এবং সম্মানের। পরিশেষে, পঞ্চম খণ্ডটি আমাকে সম্পাদনার গুরু দায়িত্ব অর্পণ করার জন্য আগামী প্রকাশনীর স্বত্বাধিকারী জনাব ওসমান গনিকে ধন্যবাদ জ্ঞাপন করছি।

ড. পৃথ্বীলা নাজনীন নীলিমা

বইমেলা ২০১৩

অধ্যাপক, বাংলা বিভাগ
জাহাঙ্গীরনগর বিশ্ববিদ্যালয়
সাভার, ঢাকা

সূচিপত্র

বাঙালী ও বাঙলা সাহিত্য

প্রথম অধ্যায় : ভাব বিপ্লব : চৈতন্যদেব ও বৈষ্ণবসাহিত্য

চৈতন্যবাদ ও বাঙলার রেনেসাঁস ১৩ ভক্তিবাদের প্রাবল্যের কারণ ১৫ ভক্তিতত্ত্বের শাস্ত্রীয় উৎস ১৯ বাঙলা ভক্তিবাদের ভিত্তি ২২ ভক্তিবাদ ও ইসলাম : মতসমন্বয় ২৩ ভক্তিবাদ, সাধনসঙ্গীত ও ইসলাম ২৫ সুফীর স্রষ্টাসৃষ্টি সম্পর্কতত্ত্ব ২৮ সুফীতত্ত্বের স্থানীয় বিকাশ ২৯ বৈষ্ণবমতের স্বরূপ ও প্রভাব ৩৩ অচিন্ত্য দ্বৈতাদ্বৈততত্ত্ব : চৈতন্যদর্শন ৩৬ বৈষ্ণবের দ্বাদশতত্ত্ব ৩৯ পদাবলীর রসতত্ত্ব ৪২ চৈতন্যজন্ম কালের বাঙলাদেশ ৪৩ চৈতন্যদেবের জীবনকথা ৪৪ চৈতন্যবাণী ৪৯ চৈতন্যদেবের অবদান ৫০ ষড়গোষ্ঠাস্বামী ও চৈতন্যপার্বদ-পরিকর পরিচিতি ৫১ চরিতকথার স্বরূপ ৬০ চৈতন্যচরিতগ্রন্থ সংস্কৃত ভাষায় ৬২ সমাজ ও সংস্কৃতি ৭১ প্রক্ষিপ্ত রচনা ও জালগ্রন্থ ১০২ সহজিয়াবৈষ্ণবদের গ্রন্থ ১০৫ পদাবলী ১০৯ ব্রজবুলি ১১২ পদকারপরিচিতি ১১৫ মুসলিম পদকার পরিচিতি ১২৫ চট্টগ্রামের হিন্দু কবির পদসাহিত্য ১৩৭ বৈষ্ণবসাহিত্যে ষোলশতকের বাঙলা ও বাঙাল ১৪৩

দ্বিতীয় অধ্যায় : আবৃত্ত ও কৃষ্ণমঙ্গল

কৃষ্ণভক্তি প্রচারমূলক পাঁচালী ১৫১ সতেরো-আঠারো শতকের কৃষ্ণলীলা বিষয়ক গ্রন্থাবলী ১৫৬

তৃতীয় অধ্যায় : অনুবাদ সাহিত্য

রামায়ণ [অনুবাদ-১] অনুবাদকের যোগ্যতা ১৫৮ রামকথা ও ভারতকথা ১৫৯ রামকথার উৎস ও কাল ১৬০ অন্ত্যত-বাশিষ্ট অধ্যাত্ম রামায়ণ ১৬১ রামকথার বিশ্বরূপ ১৬২ রামায়ণ ও অনুবাদকগণ ১৬৫

চতুর্থ অধ্যায় : মহাভারত

[অনুবাদ-২] জাতীয় মহাকাব্য মহাভারত পরিচিতি ১৭০ মহাভারত উত্তরাপথের সম্পদ ১৭৩ বাঙালির চোখে মহাভারত ১৭৪ মহাভারতের বাঙলায় অনুবাদ-প্রেরণা ১৭৫ কবিপরিচিতি ১৭৬ কবীন্দ্র পরমেশ্বর দাস ১৭৬ পরাগল খান ও ছুটি খান ১৮১ রামচন্দ্র খান ১৮৮ সঞ্জয়কৃত মহাভারত ১৮৯ কাশীরাম দাস ১৯৩

পঞ্চম অধ্যায় : প্রণয়োপাখ্যান

[অনুবাদ-৩] উপাখ্যানতত্ত্ব ২০২ মধ্যযুগের মুসলিমরচিত বাঙলাসাহিত্য ও চট্টগ্রাম ২০৫ ষোলশতকের প্রণয়োপাখ্যান ২০৭ মনোহর-মধুমালতী উপাখ্যান ২০৭ বিদ্যাসুন্দর উপাখ্যান ২১৯ লায়লী-মজনু উপাখ্যান ২২৯

সতেরোশতকে রোসাঙ্গে বাঙলাসাহিত্য : ক. রোসাঙ্গরাজ্য পরিচিতি ২৪১ খ. রোসাঙ নামের উৎপত্তি ২৪২ গ. রোসাঙ্গে বাঙলাসাহিত্য সৃষ্টির রাজনৈতিক, সামাজিক ও সাংস্কৃতিক কারণ ২৪৩ ঘ. 'রোসাঙ্গে বাঙলাসাহিত্য' নামের যাথার্থ্য ২৪৪ ঙ. 'মঘ' নামের উৎপত্তি ২৪৫ চ. রোসাঙ্গ শহরের কবি ও কাব্য পরিচিতি ২৪৭ কাজী দৌলত ২৪৭ মাগনঠাকুর ২৫১ আলাউল ২৫৬ মরদন ২৮২ শমসের আলী ২৮৫

সতেরোশতকের অন্যান্য উপাখ্যানপ্রণেতা : ফারসী-উর্দু-হিন্দি ২৮৮ উপাখ্যানে জীবনচিত্র ২৮৯ সয়ফুলমুলুক-বদিউজ্জামান ২৯০ দোনাগাজী ২৯৩ আবদুল হাকিম ২৯৪ শরীফশাহ ২৯৮ গেয়াস খান ২৯৯ মুহম্মদ আকবর ২৯৯ মুকুল ওর্ফে মঙ্গল ৩০২ নওয়াজিস খান ৩০২ আঠারো শতকের উপাখ্যান প্রণেতা : মুহম্মদ আলী রাজা ৩০৭ পরাগল ৩০৮ মুহম্মদ আলী ৩১০ মুহম্মদ আকবর ৩১১ মুহম্মদ রফিউদ্দিন ৩১১ মুহম্মদ আবদুর রাজ্জাক ৩১১ মুহম্মদ জীবন ৩১১ উনিশ শতকের প্রণয়োপাখ্যানের রচয়িতাগণ ৩১৩ আঠারো শতকের প্রণয়োপাখ্যানের হিন্দু রচয়িতাগণ ৩২৬

ষষ্ঠ অধ্যায় : জননামা বা যুদ্ধকাব্য

জিনীষা ৩৩৩ মাগাজী ৩৩৪ মার্সিয়া সাহিত্য ৩৩৪ পূর্বকথা ৩৩৫ শিয়াপরিচিতি ৩৩৬ জয়কুমাররাজ লড়াই ৩৩৭ জয়গুণের কিসসা ৩৩৭ সিকান্দরনামা ৩৩৮ আবদুল নবী ৩৪১ কবি গেয়াস খান ৩৪৩ নসরুল্লাহ খোন্দকার ৩৪৩ শেখ ফয়জুল্লাহ ৩৪৩ দৌলতউজির বাহরাম খান ৩৪৫ মুহম্মদ খান ৩৪৭ হামিদ ৩৫৫ হায়াত মাহমুদ ৩৫৬

সপ্তম অধ্যায় : মুসলিম ধর্মসাহিত্য

[অনুবাদ-৫] গোড়ার দিকের দেশজ মুসলিমসমাজ ৩৬৪ অনুবাদের বাধা ৩৬৫ অনুবাদের আগ্রহ ৩৬৬ মুসলিম ধর্মসাহিত্যের ধারা : বাঙলায় ইসলামের রূপ ৩৬৬ ক্রিয়া-প্রতিক্রিয়া ৩৬৯ কয়েকজন কবির জীবৎকাল নিরূপণ প্রসঙ্গ ৩৭০ কবিপরিচিতি ৩৭৩-৪১১ শেখপরাণ ৩৭৩ নেয়াজ ৩৭৩ শেখ মুতালিব ৩৭৩ আশরাফ ৩৭৫ আলাউল ৩৭৬ মুজাম্মিল ৩৮০ আবদুল হাকিম ৩৮৩ সৈয়দ নুরউদ্দীন ৩৮৫ নসরুল্লাহ খোন্দকার ৩৮৮ মুহম্মদ ফসীহ ৩৯৫

অষ্টম অধ্যায় : সওয়ালা সাহিত্য

[অনুবাদ-৬] মুহম্মদ আকিল ৪১৪ শেখ সাদী ৪১৫ এতিম আলম ৪১৯ আলি রজা ৪২০ সেরবাজ চৌধুরী ৪২৩ সৈয়দ নুরউদ্দীন ৪২৫ আবদুল করিম খোন্দকার ৪২৫ নসরুল্লাহ খোন্দকার ৪২৬

নবম অধ্যায় : চরিত্রকথা

সৈয়দ সুলতানের জন্মভূমি-পরিচয় এবং সৈয়দ সুলতানের ভাব-শিষ্য কবিগণ ও আবির্ভাবকাল ৪২৯ নবীবংশ ৪৩৮ রসুল চরিত ৪৪৯ বাঙলা কাশাসুল আমিয়া, রসুল চরিত ও রসুল বিজয় ৪৫৪

দশম অধ্যায় : চণ্ডীমঙ্গল

চণ্ডী পরিচিতি ৪৬৬ চণ্ডীমঙ্গলের উপাখ্যান দুটোর সারাংশ ৪৬৮ বণিক ঋণ : ধনপতি সদাগরের
কাহিনী ৪৬৯ মানিক দত্ত ৪৭০ দ্বিজমাধব ৪৭১ কবিকঙ্কণ মুকুন্দরাম চক্রবর্তী ৪৭৩
দ্বিজ রামদেব ৪৭৯ রামানন্দ যতি ৪৭৯ কৃষ্ণরামদাস ৪৮১

একাদশ অধ্যায় : মনসামঙ্গল

নারায়ণদেব ৪৮৪ গঙ্গাদাস সেন ৪৮৬ দ্বিজবংশী দাস ৪৮৬ কালিদাস ৪৮৭
কেতকা দাস ক্ষেমানন্দ ৪৮৮ বিষ্ণুপাল ৪৯০

দ্বাদশ অধ্যায় : কালিকামঙ্গল

কঙ্ক ৪৯৫ গোবিন্দ দাস ৪৯৫ কৃষ্ণরাম দাস ৪৯৬ প্রাণরাম চক্রবর্তী ৪৯৬ বলরাম
চক্রবর্তী ৪৯৭ রামপ্রসাদ সেন ৪৯৭ রায়গুণাকর ভারতচন্দ্র রায় ৪৯৮

বিবিধ অপ্রধান দেবদেবীর পাঁচালী

শীতলা ৫০৮ নিত্যানন্দ চক্রবর্তী ৫০৮ বল্লব ৫০৮ কৃষ্ণরাম দান ৫০৯ মানিক রাম
গাঙ্গুলী ৫০৯ ষষ্ঠীমঙ্গল ৫০৯ কৃষ্ণরাম দাস ৫০৯ রুদ্ররাম চক্রবর্তী ৫০৯ শঙ্কর ৫১০
সারদামঙ্গল ৫১০ দয়্যারাম দাস ৫১০ বীরেশ্বর ৫১০ রাজা রাজসিংহ ৫১০

ত্রয়োদশ অধ্যায় : শিবমঙ্গল

সর্বভারতীয় দেবতা শিব ৫১২ বাঙলার শিব ৫১৩ কবিগণ : রামকৃষ্ণরায় ৫১৭ কবিচন্দ্র শঙ্কর
চক্রবর্তী ৫১৮ রামেশ্বর ভট্টাচার্য ৫১৮ রামরাজা ৫২০ দ্বিজ রতিদেব ৫২০

চতুর্দশ অধ্যায় : আপোসমুখী সাহিত্য : পীরপাঁচালী

ক. পীর-নারায়ণ সত্য

শাস্ত্রের ও সমাজের বিবর্তন ধারা ৫২২ শাস্ত্র ও সমাজ বিপ্লব ৫২৩ শ্রেণীদ্বন্দ্ব ৫২৩ ষোলশতক
থেকে আর্থ-সামাজিক অবক্ষয় ধারা ৫২৪ জীবন ও ঐহিকতা ৫২৭ পীর-নারায়ণ সত্য-এর
উদ্ভবতত্ত্ব ৫২৮ সত্যপীরের জন্ম বৃত্তান্ত ৫৩০ শেখ ফয়জুল্লাহ ৫৩১ ভৈরব ঘটক,
ফকির গরীবউল্লাহ ৫৩৫ আরিফ ৫৪০

খ. কাল্পনিক, ঐতিহাসিক এবং দরবেশ পীরপাঁচালী

পূর্বকথা ৫৪৫ পীরদের উৎস ৫৪৮ হিন্দুরচিত পাঁচালীতে দক্ষিণ রায় ও
বড়খী গাজী ৫৫১

পঞ্চদশ অধ্যায় : অবক্ষয়যুগ : যুগসন্ধিরকাল

ক. দোভাষী সাহিত্য : দোভাষীপুথির ভাষা ৫৭০ দোভাষীপুথির ইতিকথা ৫৭৯ দোভাষী
সাহিত্যের পাঁচটি ধারা ৫৮৬ শায়ের পরিচিতি ৫৮৮

খ. কবিওয়ালা ও কবিগান

আঠারো-উনিশ শতকের বন্দর-নগরের কবিওয়ালা ৬২৫

ষোড়শ অধ্যায় : বিবিধ রচনা

ইতিহাসের উপকরণ : বাস্তব ঘটনা নির্ভর রচনা ৬৩২ মহারাষ্ট্রপুরাণ ৬৩৪ পাঠান প্রশংসা ৬৩৬
 জোরওয়ারসিংহ প্রশস্তি ৬৩৭ আওরা দ্য বারোজ ৬৩৮ খণ্ডে কুকির হামলার ইতিকথা
 প্রভৃতি এবং ছড়া, গান ও কবিতাংশ ৬৪০ গোপীদাস রচিত চৈতন্যমঙ্গল ৬৪৯ ব্রজমোহন দাস
 রচিত চৈতন্যতত্ত্বদীপ ৬৫১ রহিমুননিসা রচিত বিলাপ ৬৫৯ তামাকুপুরাণ ৬৬৩ মুহম্মদ
 দানিশ ৬৬৮ নিকাহমঙ্গল ৬৬৯ একটি বৈষ্ণবপদরহস্য ৬৭২ সন্নীতশাস্ত্র ৬৭৩
 ফালনামা ৬৮৫ লোকসাহিত্য ৬৮৭

সপ্তদশ অধ্যায় : সাহিত্য বিম্বিত সমাজ-সংস্কৃতির রূপরেখা

বৃত্তিগতশ্রেণীবিন্যাস ৬৯৮ শিক্ষা ৭০৩ লেখাপড়ার উপকরণ ৭০৪ চিকিৎসাবিদ্যা ৭০৫
 খাদ্য ৭০৬ পোশাক ৭০৭ অলঙ্কার ৭০৯ নারী ৭১০ বিবাহ ৭১১ আদবকায়দা ৭১৩
 লোকচরিত্র ৭১৪ নেশা ৭১৬ গানরাজনা ৭১৭ বেলাধূলা ৭১৭ দাসপ্রথা ৭১৮ ঘরবাড়ি ৭১৮
 মুদ্রা-বিনিময় ৭১৯ কৃষিশিল্পদ্রব্য ৭১৯ ব্যবসা-বাণিজ্য ৭১৯ যুদ্ধ ও যুদ্ধান্ত্র ৭২২ লোকাচার ও
 কুসংস্কার ৭২২ জনগণের আর্থিক অবস্থা ৭২৪ গ্রাম্যসমাজ ৭২৭ উপসংহার ৭২৮

পাদটীকা : ৭২৯

পরিশিষ্ট : ৭৩৭

তথ্যসঙ্কেত : ৭৫২

০

বাঙালী ও বাঙলা সাহিত্য
[দ্বিতীয় খণ্ড]

উৎসর্গ

জীবনের অন্তিম লগ্ন আসন্ন আশঙ্কায় এ বইয়ের বুকে
অঙ্কিত রাখলাম এক সারি প্রিয়জনের নাম :

অধ্যাপক সুখময় মুখোপাধ্যায়,
যিনি বাঙলার, বাঙালীর ও বাঙলাসাহিত্যের ইতিহাসের
অনেক জটিল গ্রন্থ মোচন করেছেন।

পৌত্র নাফিস করিম কান্ত,
যাঁর মধ্যে অসামান্য কিছু প্রত্যক্ষ করছি।

জীবনসঙ্গিনী সঙ্গোহা,
যিনি সংসার-তরীর কর্ণ নিপুণ হাতে নিয়ন্ত্রণ করে
আমাকে চিরসিক্ত রেখেছেন।

আত্মীয় আবু রশীদ মাহমুদ,
যিনি আমার পক্ষে সব দায়িত্ব বহন করে
আমাকে স্বত্তিতে রেখেছেন।

কন্যাকল্প মা শাহীন আখতার,
যিনি কিছুকাল আমার বৈকালিক ভ্রমণে সঙ্গী হয়ে নানা তত্ত্বালোচনায়
আমার বৃদ্ধিবৃত্তিকে উদ্দীপিত রেখেছিলেন।

এবং ছোটভাই ডাক্তার আহমদ জহীর,
যাঁর প্রতি আমার সব দায়িত্ব পালন করা গেল না।

আ. শ.

প্রথম অধ্যায়

ভাববিপ্লব : চৈতন্যদেব ও বৈষ্ণবসাহিত্য

১. চৈতন্যমতবাদ ও বাঙলার রেনেসাঁস

বাঙলাসাহিত্যের যুগবিভাগ প্রসঙ্গে একবার বলেছি যে, সেকালে রাজ্যজয়, ধর্মপ্রচার ও বাণিজ্যসূত্রে বিদেশী-বিজাতি-ভিভাষী-বিধর্মীর সঙ্গে কোন দেশের মানুষের পরিচয় ঘটতো। কেননা সেকালের বাহ্যাবলীভিত্তিক প্রত্যাশারহিত নিরক্ষর মানুষের অনাড়ম্বর জীবন-জীবিকা গাঁয়ের পরিসরে থাকতো নিবদ্ধ। উচ্চ আকাঙ্ক্ষা মাত্রই ছিল অসম্ভবের পর্যায়ে। জীবনবিকাশের উপায় ছিল স. ধারণের অজ্ঞাত। বর্ণে ও কর্মে বিন্যস্ত সমাজে স্বাধীনতা গড়ার সুযোগও ছিল সীমিত। তা' ছাড়া চাওয়া-পাওয়া তুচ্ছ অশন-বসন কেন্দ্রী বস্ত্র-এবং তার প্রাপ্তি গাঁয়ের পণ্য ও শ্রম বিনিময়েই নিবদ্ধ বলে এবং শতকরা নিরানব্বই জনের পক্ষে ভাগ্যাশ্বেষে দূরযাত্রা নিরর্থক বলে দেশের অভ্যন্তরে যোগাযোগ ব্যবস্থা ছিল সীমিত। পথ ছিল প্রায়ই দুর্গম, দূরতীক্রম্য ও দস্যুসঙ্কুল। ফলে গা-গঞ্জ ছিল বহির্জগৎ থেকে বিচ্ছিন্ন। নগর-বন্দরের ও রাজধানীর সমীর ও সংবাদ গাঁয়ের বুকে পৌছতে সময়-সুগত। দ্বিতীয় মহাযুদ্ধপূর্ব ব্রিটিশ আমলেও দেখা গেছে গাঁয়ের ইংরেজি-অজ্ঞ নিরক্ষর মানুষের ঘরে-মনে বিলাতী হাওয়া ছিল প্রায়ই অনুপস্থিত।

আজকের যন্ত্রযুগে রুদ্ধ ঘরে চোখ বন্ধ করে থাকলেও বিশ্বের বহু কিছু জানা হয়ে যায়। তারে-বেতারে-শব্দে-চিত্রে পত্র-পত্রিকায় এবং দূর-দূরান্তরে যাওয়া-আসার সহজতায় পৃথিবীর পরিসর নিত্যন্ত সংকীর্ণ হয়ে একটা বিশাল শহরের মাসনরূপ নিয়েছে। রাজ্যই আজকের মানুষের পক্ষে রূপকথার যুগের অসীম অজ্ঞাত জগতের স্বরূপ কল্পনা করাও দুঃসাধ্য। তবু সেকালেও আত্মপ্রত্যয়ী ও উচ্চাভিলাষী রাজকুমারেরা ছিল, ছিল অভিযাত্রী বণিকনন্দন, ছিল উদ্যোগী পুণ্যার্থী শাস্ত্রপ্রচারক ও তীর্থযাত্রী। আরো ছিল দুঃসাহসী নিরুদ্দেশ পর্যটক। তাদের মাধ্যমেই দূরদেশের মানুষে মানুষে হতো পরিচয়। অবশ্য নগর-বন্দরেই হতো সাধারণত সে পরিচয়ের ও প্রভাবের গুরু। তারপর ক্রমে মধুরভাবে ও অলক্ষ্যে গাঁয়েও সংক্রমিত হতো সেভাবে। এমন দেশজয়, বাণিজ্যসম্পর্ক ও ধর্মপ্রচার সূত্রে কোন দেশে বিদেশী-বিভাষী-বিধর্মী এলে স্থানীয় মানুষের উপর ঐ নতুন মানুষের মন-মত, রীতি-নীতি ও আচার-আচরণের প্রভাব পড়ে। তখন গ্রহণে-বরণে-অনুকরণে-অনুসরণে-নির্মাণে-মেরামতে স্থানীয় মানুষের ব্যবহারিক ও মানসিক জীবনে সে প্রভাব স্পষ্ট হয়ে উঠত। তিন প্রকারে বিদেশী প্রভাব দেখা দেয়-বস্ত্রগত, ভাবগত ও পদ্ধতিগত। বস্ত্রগত প্রভাবের মধ্যে পড়ে আসবাব ও তৈজস, পোশাক-পরিচ্ছদ, অস্ত্র-শস্ত্র, ফল-মূল, ভাষা-কৃৎকৌশল, স্থাপত্য ও ভাস্কর্য, অলঙ্কার ও প্রসাধনসামগ্রী, খাদ্যদ্রব্য ইত্যাদি। ভাবগত প্রভাবে মেলে ধর্মতত্ত্ব, মূল্যবোধ, নাচ-গান-বাজনা, আদব-কায়দা, আচার, আচরণ, সাহিত্য-শিল্প-সংস্কৃতি প্রভৃতি। আর পদ্ধতিগত প্রভাব বলতে প্রশাসনিক, বাণিজ্যিক, শৈক্ষিক প্রভৃতি বোঝায়। নগর-বন্দরে ও বিজয়প্রভাব নগরে-বন্দরে

সনাতন সমাজে চাঞ্চল্য ও দ্রোহ সৃষ্টি করে—একদল হয় রক্ষণশীল, অন্যদল হয় পুরোনোদ্রোহী ও গ্রহণশীল। ফলে সমাজে ঘটে উপদ্রব ও বিপ্লব। উনিশ শতকী কোলকাতায়-মাদ্রাজে-বোম্বাইতে ইংরেজি শিক্ষিত ব্রিটিশ প্রভাবিত সমাজে ব্যবহারিক ও মানসিক যেসব দ্বিধা-দ্বন্দ্ব ও পরিবর্তন ঘটেছে, পূর্বকালেও পার্সী-খ্রীক-শক-হুন-ইউচি-কুষাণ প্রভাবে তেমনিও তাই ঘটেছে। ব্রিটিশ প্রভাবে যেমন পর্তুগীজ ও অন্যান্য যুরোপীয় প্রভাব আচ্ছন্ন হয়ে গেছে, তেমনি মধ্যএশিয়ার তুর্কী-মুঘল-ইরানী প্রভাব পূর্বতন শক-হুন-কুষাণ অবদান আবৃত করে রেখেছে। আমরা জানি সভ্য জাতির সভ্যতা-সংস্কৃতি মাত্রই মিশ্র, বহু যুগের বহু ও বিচিত্র মানুষের অবদানে তা পুষ্ট।

উনিশ শতকে কোলকাতায় ব্রিটিশ প্রভাবিত সমাজে মনে-মতে তজ্জাত আচারে-আচরণে যে পরিবর্তন এল, তাকে কেউ কেউ রেনেসাঁস বলে অভিহিত করেন, যদিও তাতে মৌলিক চিন্তা-চেতনা ছিল দুর্বল, জীবনের ও মননের সর্বক্ষেত্রে মেরামত প্রয়াসই ছিল প্রকট। বস্তুত অনুকরণে ও অনুসরণে মৌলিকতা থাকা প্রায় অসম্ভব, ফলে তা অবশ্যই ছিল অপ্ৰত্যাশিত। কিন্তু সর্বক্ষেত্রে অনুকৃতির আশ্রয়ে কিছু সংস্কার, পরিহার, পরিবর্তন ও গ্রহণ-বরণের কাজ চলতে থাকে।

আমরা আর্থবিজয়ের পরে বিজেতা-বিজিতের দ্বন্দ্বমিলনে এক সমন্বিত ধর্ম-সংস্কৃতি পেয়েছিলাম। আবার দেব-দ্বিজ-বেদের নামে ব্রাহ্মণ্যপীড়ন যখন প্রবল হল, তখন গৌতম-মহাবীরের নেতৃত্বে উৎপীড়িত অনার্যের বিদ্রোহ নব শ্রেণীর প্রচ্ছায় স্বস্তি সন্ধান করেছে। এমনি করেই সমাজ ও সংস্কৃতির বিবর্তন ঘটে। একেশ্বরবাদী আরবদের সিন্ধু বিজয়ের ফলে স্থানীয় লোকের সঙ্গে বিদেশীর ধর্ম-সংস্কৃতির পরিচয়জাত আত্মজিজ্ঞাসাই শঙ্করকে স্বশাস্ত্রে অদ্বৈতবাদ আবিষ্কারে অনুপ্রাণিত করেছিল, যেমন করেছিল ইংরেজ আমলে রামমোহন প্রভৃতিকে। শঙ্করের সংস্কার-প্রয়াস একাধারে সুদূরপ্রসারী ও আচর্য ফলপ্রসূ হয়েছিল। এতে একদিকে বৌদ্ধ-জৈন সমাজ যেমন বিলুপ্ত হয়েছিল, তেমনি ব্রাহ্মণ্য সমাজও নতুন করে সমন্বিত ও সংহত হওয়ার দিশা পেয়েছিল। তাঁর মায়াবাদ-জ্ঞানবাদ-অদ্বৈততত্ত্বের অনুসরণে দাক্ষিণাত্যে ভক্তিবাদের উদ্ভব—যার ক্রমবিকাশ ও ক্রমপরিবর্তন ঘটেছে রামানুজ, নিম্বার্ক, মধ্ব, ভাক্কর, বল্লভ প্রভৃতির মতবাদে ও চর্যায়। আবার উত্তরভারতে তুর্কী আফগান বিজয়ের ফলে ইসলামী সাম্য ও একেশ্বরবাদ বর্ণাশ্রিত সমাজে যে চাঞ্চল্য ও দ্রোহ সৃষ্টি করে তার ফলে বিশেষ করে অস্পৃশ্য সমাজে ব্রাহ্মণ্যপীড়ন মুক্তিলাভ মানুষ কবীর, নানক, রামানন্দ, দাদু, রামদাস, মীরাবাই প্রমুখ সন্তের নেতৃত্বে ভক্তিবাদী সম্প্রদায়সমূহ গড়ে তোলে। তাঁরা মন্দির ছাড়ল বটে কিন্তু প্রবেশ করল না মসজিদে। ইতিপূর্বে মদীনা থেকে মুলতান অবধি সবাই ইসলাম বরণ করেছিল। এখানে সন্ত-আন্দোলনের প্রচ্ছায় ভারতীয় সমাজ আত্মরক্ষা করল। তুর্কীবিজয়ে ভারতের সর্বত্র উনিশ শতকী বাংলাদেশের মতো প্রথমে শিক্ষিত শহরে সমাজে আত্মরক্ষা ও আত্মসমর্পণমূলক আন্দোলন চলে এবং পরেও সুস্থ ও স্বস্থ হওয়ার জন্যে শাস্ত্রসংস্কার, আচার-আচরণ সমন্বয় ও নতুন জ্ঞান-প্রজ্ঞা-মত গ্রহণ ও সমন্বিত করার জন্যে সাহিত্যিক, সাংস্কৃতিক ও তাত্ত্বিক-দার্শনিক প্রয়াস চলেছিল। সে যুগের অযান্ত্রিকতার ও দুর্গমতার পরিবেশ উনিশ শতকী কোলকাতায়ও একশ' বছর (১৭৬০-১৮০৬ খ্রীঃ) প্রায় দুশ' বছরের মতো লেগেছিল। চণ্ডীদাস, কৃতিবাস, মালাধর বসু ও বিজয় গুপ্ত, বিশ্বদাস প্রভৃতির রচনায় এ স্বস্থ হওয়ার সূচনা এবং উনিশ শতকের মধুসূদন-বঙ্কিমচন্দ্র-রবীন্দ্রনাথের মতোই রঘুনন্দন প্রমুখের ও চৈতন্যদেবের আবির্ভাব ঘটে। ধর্মের, দর্শনের, এবং আচারের ও সমাজের ক্ষেত্রে এ- সব বিপ্লব-বিদ্রোহ ছাড়াও ইংরেজ

আমলের মতোই আসবাবে-তৈজসে, পোশাকে-পরিচ্ছদে, ভাষায়, আচারে ও আচরণে, জীবিকায়, সাহিত্য-শিল্পে, স্থাপত্যে-ভাস্কর্যে- এক কথায় ব্যবহারিক ও মানসিক জীবনে শাসকগোষ্ঠীর এভাবে রূপান্তর ঘটে। উনিশ শতকী মানস-পরিবর্তন যদি রেনেসাঁস হয়, ব্যবহারিক পরিবর্তন যদি যুগান্তর বলে চিহ্নিত হয়, তাহলে আরব-তুর্কী-আফগান বিজয়েও দক্ষিণাপথে ও উত্তরাংশে তেমনি রেনেসাঁস ও যুগান্তর ঘটেছিল, বরং তার গভীরতা ও ব্যাপকতা বেশি ছিল বলেই মনে হয়। কারণ তা বাহ্য আচার-আচরণে নিবদ্ধ ছিল না, চিন্তালোকে আত্মজিজ্ঞাসা জাগিয়েছিল, যার ফলে যে-ধর্মবোধের অপর নাম জীবন-চেতনা তার প্রায় আমূল পরিবর্তন ঘটেছিল, ভারতব্যাপী প্রায় অধিকাংশ মানুষ এভাবে নবজীবন লাভ করেছিল।

বাঙলাদেশেও তুর্কীবিজয়ের ফলে ভাববিপ্লব ও সামাজিক উপপ্লব দেখা দিয়েছিল, শাস্ত্রীয় সংস্কার প্রয়োজন হয়েছিল এখানেও। এটি ছিল যথার্থই জীবনের জাগরণ।

২. ভক্তিবাদের প্রাবল্যের কারণ

অষ্টম শতকের অদ্বৈতবাদী শঙ্করাচার্যের মায়াবাদের সঙ্গে জ্ঞানবাদ বিশেষ প্রতিষ্ঠা লাভ করে। আর মায়াবাদ-বিরোধী উত্তর সাধক ভাস্কর, রামানুজ, নিম্বার্ক, মধ্ব প্রমুখ তাত্ত্বিক-দার্শনিকেরা ভক্তিবাদকে জনপ্রিয় করে তোলেন। এঁরা দাক্ষিণাত্যের সুবিড়। আগেও নারদ, শুক, প্রহ্লাদ, ব্যাস প্রভৃতি কেউ অবিমিশ্র আর্য় ছিলেন না। এবং অদ্বৈতবাদ এবং তাঁদের ভক্তিবাদও ছিল ব্যক্তিক মানসপ্রবণতাপ্রসূত মত। দাক্ষিণাত্যের প্রচারকেরা একে দার্শনিক তত্ত্বে উন্নীত ও প্রতিষ্ঠিত করেন। এঁরা সবাই ভারতে মুসলিম আগমনের পরে আবির্ভূত, এজন্যে অদ্বৈতবাদ ও ভক্তিবাদ ইসলাম ও সুফী প্রভাবিত বলে মনে করার কারণ আছে। বিদ্বানেরা আজকাল তা' স্বীকারও করছেন।

৪. এ ব্যাপারে বিনয় ঘোষ বলেন :

“বুদ্ধ আর যীশুর মর্মবাণী আত্মসাৎ করে ‘মহম্মদ’ ইসলামের বাণী নতুন করে শোনালেন মানুষকে। তাই বিশ্বমানব আবার নতুন করে ইসলামের আহ্বানে সাড়া দিল। নীতিদ্রষ্ট আদর্শদ্রষ্ট ভারতের নিপুণ মানুষও যে সাড়া দেবে তাতে আর বিস্ময়ের কি আছে? দক্ষিণ ভারত ইসলামের আহ্বানে সাড়া দিয়েছিল। ইসলামের বাণী ইসলামের আদর্শ সমুদ্রপথে প্রথমে পৌঁছল দক্ষিণ ভারতে। তাই বোধ হয়, অষ্টম শতাব্দীর পর থেকেই ভারতের সংস্কৃতির ইতিহাসে এক যুগান্তকারী পরিবর্তনের সূচনা হয়। দক্ষিণ ভারত নতুন যুগের ভারতসংস্কৃতির পথ প্রদর্শক হয়ে ইতিহাসের রঙ্গমঞ্চে অবতীর্ণ হয়েছে।... অষ্টম শতাব্দীর পর থেকেই ধর্ম-সমন্বয় ও সংস্কৃতি-সমন্বয়ের নতুন ধারার প্রবর্তক হল দক্ষিণ ভারত, দাক্ষিণাত্য। শঙ্করাচার্য, রামানুজ, বল্লাভাচার্য নিম্বাদিত্য সকলেই দক্ষিণ ভারতের। একেশ্বরবাদ, ভক্তিবাদ, বৈষ্ণবধর্ম ও শৈবধর্মের জন্ম হল দ্রাবিড় দেশে; নবীন ইসলাম ধর্মের সঙ্গে নব্য হিন্দুধর্মের ঘাত-প্রতিঘাতের ফলেই দক্ষিণ ভারতে এই নতুন ধর্মসমন্বয় ও সংস্কৃতিসমন্বয়ের ধারা প্রবর্তিত হয়েছে। ভারতের সংস্কৃতি সমন্বয়ের ইতিহাসে দক্ষিণ ভারত পুরোভাগে এসে দাঁড়িয়েছে। ... দক্ষিণ ভারতের দু' একজন রাজা পর্যন্ত যে ইসলাম ধর্মে দীক্ষা নিয়েছিলেন তা' থেকেই বোঝা যায়, ইসলাম তখন হিন্দু সমাজের উপর বেশ প্রভাব বিস্তার করেছে। ... ইসলামের এক দেবতা ও এক ধর্মের বিপুল বন্যার মুখে শঙ্কর আপোসহীন ‘অদ্বৈতবাদ’ প্রচার করেছেন। ... শঙ্করাচার্যের

আপোসহীন অদ্বৈতবাদ মনে হয় যেন নবীন আরবি ইসলামের একেশ্বরবাদের ভারতীয় রূপ। বেদ উপনিষদ তার উৎস হলেও ইসলামের প্রভাবেই যে সে উৎস-সঙ্কানের প্রেরণা এসেছে তা স্বীকার না করে উপায় নেই। শঙ্করাচার্যের পরে রামানুজ বিষ্ণুস্বামী মাধবাচার্য ও নিম্বার্কের দর্শনের সঙ্গে ইসলামের সম্পর্ক আরো ঘনিষ্ঠ হয়েছে দেখা যায়। ... ইসলাম ধর্মের প্রভাব বিস্তারের সঙ্গে সঙ্গে শঙ্করাচার্যের কেবলাদ্বৈতবাদ থেকে রামানুজের বিশিষ্টাদ্বৈতবাদ ও নিম্বার্কের দ্বৈতাদ্বৈতবাদের প্রগতির ধারা বিশেষভাবে লক্ষ্য করার বিষয়। ... ইসলামের আত্মনিবেদন, ইসলামের প্রেম, ইসলামের গণতন্ত্রের আদর্শ মুসলমান সাধকরা সহজ ভাষার সোজাসুজি যখন এদেশে প্রচার করছেন, রামানুজ ও নিম্বার্ক তখন শঙ্করের শুদ্ধ জ্ঞানের স্তর থেকে শ্রদ্ধা ভক্তি প্রীতির স্তরে নেমে এলেন।”^১

খ. তারাজাদ বলেন :

"The establishment of this monotheistical tendency received a powerful impetus from the appearance of so uncompromisingly monotheistic a religion as Islam. Sankara was born at time when Muslims were begining their activities in India, and if tradition is correct, when they had gained a notable success in the extension of their faith by converting the king of the land. He was born and brought up at a place where many ships from Arabia and the Persian Gulf touched, If his extreme monoism, his stripping of the one of all semblances of duality, his attempt to establish his monosim of the authority of revealed scriptures, his desire to purge the Cult of many abuses, had even a faint echo of the new noises, that were abroad, it would not be a matter of great surprise or utter incredulityHis successors Ramanuja, Visnuswami, Madhava and Nimbarka and the hymn-makers in their speculation and religious tone, show closer parallelism. In the give and take of Culture between Muslims and Indians it is difficult to assess accurately the share of the each.... But the fact remains that a number of elements were absorbed into Hinduism through its direct contact with Islam and these elements where presented to India impressed with the Islamic mould"^২

...Ramanuja's parpatti and Guru-Bhakti—"It is more likely however, that they came from Islam. Both were very prominent features of that religion (Islam). The word Islam means surrender and the Muslim is verily a prapanna ...Historically also there is on insuperable difficulty in supposing that Ramanuja adopted it from Islam"^৩ This sufi conception of diedied teacher was incorporated in medieval Hinduism."^৪

^১ বাঙলার নবজাগৃতি, পৃ: ১২১-২৪

^২ Influence of Islam on Indian Culture, pp. 111-12

^৩ Influence of Islam on Indian Culture, pp. 114

^৪ Do pp. 110

গ. লিঙ্গায়তবাদ সম্বন্ধে তারাগদ বলেন :

It is difficult to resist the inference that lingayatism was a result of the influence which these Muslims exerted in these parts of India. No other hypothesis appears sufficient to explain the revolutionary character of its doctrines and customs. The abandonment of such a deeprooted Hindu idea as that of metempsychosis and of such customs as cremation and purificatory death ceremonial, the abolition of inequalities of caste and sex and the reform of marriage, the Conceptions of the Community of brave warriors led by their sanctified preceptor, and of god (allama) whose very name is probably of Muslim origin, point unmistakably to the source of inspiration that is Islam." pp 119-20 or ².

The reform movement of Ramananda, Chaitanya Kabir, Nanak show the stimulus of Islam. [The Hindu View of Life by Dr. Sarbapalli Radhakrishna p. 18]

ঘ. ডক্টর সুনীতি চট্টোপাধ্যায়ও বলেন :

As a living people the Hindus have always imbibed new objects and ideas from other peoples. Our contact with the Muslims, that is to say, the Turks and the Persians [who, over and above their won national mental make-up and ways of life, had imbibed certain ideologies from the Arabs in the shape of Islam] has not been without any effect upon us, say from 1000 A.D. onwards. We have taken over from the Persians and the Turks hundreds of new things in the material domain, and profited considerably by them. In the domain of thought and ideas also we have been profoundly affected. From the fourteenth century onwards North-Indian Hindu music has been largely a mixture of ancient Hindu music with elements contributed by the music of Arabia, music of Persia and of Central Asia. In the sphere of religion, too, there has been a very strong influence of Islam : the muslim insistence upon a Saguna-Brahma, without any form (Nirakara), forms the fundamental Muslim conception of the Divinity, and this kind of conception we find in all the Sant-Margisaints and poets including Kabir and Nanak, Certain ideologies and practices from the Sufi form of Islam also have become accepted into the mediaeval Vaishnav schools of India, including our Gaudiya (Bengali) Vaishnavism. So in this way Hindu civilisation have been moving on, taking whatever it could absorb from the thought of the world of Islam. Consequently I cannot think of excluding Islam from a consideration of our dynamic Hindu or Indian thought in its history during

the last 800 years. The scriptural theology of orthodoxy of orthodox Quranic Islam is a different matter; and I do not know to what extent that has been extended and developed by Indian Muslims. But Sufism in India certainly has had its own history and that I look upon it as an integral part of our Indian cultural development. Bengali and other Indian Muslims I cannot consider to be foreigners at all, because they are the blood and flesh of our flesh although they might express their formal adherence to a creed which developed outside India; but that I consider perfectly immaterial.”^১

“Through Sufism the character of Indian civilisation—Hindu civilisation, was very deeply modified, particularly in North India. In my article published long ago, ‘Islamic Mysticism, Iran and India,’ I mentioned that even in our Gaudiya Vaisnavism certain Sufi influences actually strengthened it.”^২

ঙ. এ প্রসঙ্গে উমেশচন্দ্র ভট্টাচার্য বলেন :

“আমরা এই সিদ্ধান্ত করতে পারি যে, মুসলমানদের ভারত আক্রমণের সঙ্গে সঙ্গে হিন্দুরা ইসলামের একেশ্বরবাদের সহিত কমবেশী পরিচিত হইতেছিল। ... একেশ্বরবাদ ভারতেও ছিল বাহির হইতেও আসিয়াছিল, উভয়ে মিলিয়া দশম-একাদশ শতাব্দীতে একটা পরিপুষ্ট আকারে দেখা দেয়। ঋণ স্বীকার কার ভাল।”^৩ যেশ্বর করিয়াই হউক শঙ্করের দুই তিন শত বৎসর পরে বেদান্ত দর্শনের সাহিত্যে এই একেশ্বরবাদের প্রভাব স্পষ্ট পরিলক্ষিত হয়।^৪ তাহাদের [মুসলমানদের] একেশ্বরবাদের সংস্পর্শে আসিয়া ভারতের একেশ্বরবাদ বিশেষত বৈষ্ণব একেশ্বরবাদে উদ্ভূত হইয়া ওঠে নাই এমন কথা বলিতেও আমাদের সঙ্কোচ বোধ হইতেছে।”^৫ সুনীতিকুমার চট্টোপাধ্যায়ও বলেন ‘সুফীমত হইতে মধ্যযুগের বৈষ্ণব ও সন্তবিচার কিছু জিনিস আত্মসাৎ করিয়াছে। ... গৌড়ীয় বৈষ্ণব সম্প্রদায়ের গঠনে, বাঙলার বৈষ্ণব পদাবলী সাহিত্যে সুফী প্রভাব আছে।’^৬

বিদেশী বিধর্মী পদানত উত্তর ভারতের লোকের শাসকগোষ্ঠীর প্রতি স্বাভাবিক বিরূপতা ছিল, তাই এদের উপর মুসলিম মানবসংস্কৃতির প্রভাব পড়েছিল মম্বুর গতিতে। মুক্ত দ্রাবিড় অঞ্চল এই প্রভাব দ্রুত ও সর্বগামী হয়। আর প্রাচীন আলোয়ার সম্প্রদায়ের কৃষ্ণলীলা বিষয়ক প্রেমগান ভক্তিবাদ প্রসারে পরোক্ষ সহায়তা দিয়েছে। তবু দ্রাবিড় দার্শনিকদের তত্ত্বে লক্ষ্মী বা শ্রীর স্থান নগণ্য।

^১ সুরজিৎ দাশগুপ্তকে লিখিত পত্র- সুনীতিকুমার স্মারক সংখ্যা, পরিচয়, আগস্ট-সেপ্টেম্বর ১৯৭৭ পৃ. ৫৭-৫৮।

^২ ঐ পৃ. ৬৪।

^৩ ভারতদর্শন- পৃ. ৬৪-৬৭।

^৪ ঐ পৃ. ২৬৭।

^৫ ঐ পৃ. ২৬৭।

^৬ প্রাক্ত সুরজিৎ দাশগুপ্তকে লিখিত পত্র, তারিখ ১১/৭/৫ এবং ১/৫/৫২।

শাসকদের প্রতি বিরূপতা যখন মন্দা হয়ে এল, তখন উত্তর ভারতেও ভক্তিবাদ প্রসার লাভ করল। তাও এল দক্ষিণ ভারত থেকে; নইলে রাম-সীতাই রাধা-কৃষ্ণের স্থান গ্রহণ করতেন।

‘ভক্তি দ্রাবিড় উপজি লায়ে রামানন্দ।

প্রকট কিয়া কবীরনে সন্তদীপ নবখণ্ড।’

এই উক্তিই আমাদের সিদ্ধান্তের সাক্ষ্য। রামানন্দ, কবীর, দাদু প্রভৃতি উত্তর ভারতে ভক্তিবাদ প্রচারক। এই অবধি বৈষ্ণবমতে রাধা-কৃষ্ণলীলা এবং প্রেম অনুপস্থিত। ভক্তির সঙ্গে কৃপা ও করুণাই যুক্ত থাকে— প্রেম নয়। ভক্তিরই উপজাত [by product] হচ্ছে প্রেম— এ কারো মতে ভক্তির পরিণতি আর কারো কাছে ভক্তির বিকৃতি।

৩. ভক্তিতত্ত্বের শাস্ত্রীয় উৎস

দেবী, শ্রী, রাত্রি প্রভৃতি সূক্ত ছাড়াও ঋগ্বেদে বশিষ্ঠ প্রভৃতির উক্তি ভিত্তি করে বরুণ, বায়ু, ইন্দ্র, অগ্নি, বিষ্ণু, ব্রহ্মা প্রভৃতির সঙ্গে ভক্তির সম্পর্ক লক্ষ্য করা হয়েছে। বৃহদারণ্যক, শতপথ-ব্রাহ্মণ, কঠ, ছান্দোগ্য, তৈত্তিরীয় প্রভৃতি এবং পঞ্চরাত্র, শৈবসংহিতা, নারদের ‘ভক্তিসূত্র’ শাস্ত্রিল্যের ‘শাঙ্খিল্যসূত্র’ প্রভৃতির আলোকে ভক্তিমতের অভিজাত্য ও প্রাচীনতার আস্থা দৃঢ় করবার প্রয়াস থাকলেও কার্যত মতবাদ হিসেবে নয়-দশ শতকের পূর্বে এর অস্তিত্ব স্বীকার করা যায় না। তেমনি মুসলমান বিজয়ের পূর্বে ‘ভক্তি’ প্রেমবাদে পরিণত হয়নি। আর ষোল শতকে চৈতন্যের মত প্রচারের আগে রাধা-কৃষ্ণলীলা জীবাত্ম-পরিমাতার প্রণয়লীলার রূপ ধরেনি। তখনো পুরুষ ও প্রকৃতি তথা মৈথুন তত্ত্বের রূপক হিসেবেই রাধা-কৃষ্ণলীলা ব্যাখ্যাত ও আবাদিত হয়েছে। এর প্রমাণ মেলে আলোয়ার সুফিদের গানে ও গাথায়। এদের কৃষ্ণপ্রিয়া রাধা নয়— নাপল্লিনাই। আমরা দেখেছি শক্তি ও শক্তিমান রূপে এক ‘আদিম যুগলে’ বিশ্বাস অনার্য ভারতের বৈশিষ্ট্য। এই যুগলতত্ত্বই নানা বিবর্তনের মাধ্যমে রাধা-কৃষ্ণলীলার রূপ নিয়েছে।

বিষ্ণু-শ্রীতে মৈথুনতত্ত্ব আরোপিত হলেও এ পর্যন্ত আমরা রসলীলা বা রাসলীলা দেখিনি। শশিভূষণ দাশগুপ্ত বলেন— “বিশেষ কোন দার্শনিক তত্ত্বমতের অবলম্বনে রাধাবাদের উৎপত্তি হয় নাই; রাধাবাদ মুখ্যত পুরাণমূলকও নহে।”^১

ক. কেউ কেউ বলেন— ‘রাধা-কৃষ্ণ’ উপাখ্যান আসলে আকাশের সূর্য ও নক্ষত্রের মনোময় রূপক কাহিনী। বিষ্ণু সূর্যের এবং রাধা তারার নাম। যোগেশচন্দ্র রায় বিদ্যানিধি বলেন— “রাধা নাম পুরাতন এবং বিশাখা নক্ষত্রের নামান্তর ছিল। কৃষ্ণ যজুর্বেদ বিশাখা, অনুরাধা ইত্যাদি নক্ষত্রের নাম আছে। রাধার পর অনুরাধা, অতএব বিশাখার নাম রাধা। অথর্ববেদে ‘রাধো বিশাখে’ স্পষ্ট উক্তি আছে। ... রাধা অর্থে সিদ্ধি। ... কালক্রমে রাধা ও বিশাখা একত্র হইয়া গিয়াছে। মহাভারতের কণ্ঠের ধাত্রীর নাম রাধা। ... গো-রশ্মি, গোপ-কৃষ্ণ, গোপী-তারা। কবি কৃষ্ণ-রাধাকে রাসমধ্যস্থ ও গোপী-তারাকে মণ্ডলাকারে সাজাইয়াছেন।”^২ এই ব্যাখ্যা তথ্যভিত্তিক বলে মনে হয়। কেননা আদি কৃষ্ণলীলায় সোমভা, অনুরাধা, চিত্রা, কৃত্তিকা, ভদ্রা, রোহিণী, রেবতী, বৃষভানু, চন্দ্রাবলী প্রভৃতি রাশি ও নক্ষত্র সূচক নাম পাচ্ছি। মনে হয় এই

^১ শ্রীরাধার ক্রমবিকাশ, পৃ: ৯৫।

^২ ভারতবর্ষ, মাঘ, ১৩৪০ সন— যোগেশচন্দ্র বিদ্যানিধির প্রবন্ধ।

রূপকেই পরে মানবীয় ভাব আরোপিত হয়ে পল্লবিত বৃন্দাবনলীলায় পরিণত হয়েছে। রূপ-গোষ্ঠামীর ‘ললিতমাধন’ নাটকে তারা, আকাশ ও পৌর্ণমাসীর রূপক ব্যবহৃত হয়েছে।^৭

খ. ভাগবতে কৃষ্ণের রাসলীলা এবং প্রধানা গোপীর সঙ্গে কৃষ্ণের ঘনিষ্ঠতার কথা আছে। এই ক্ষীণ ও অস্পষ্ট সূত্র ধরে বৈষ্ণবেরা প্রধান গোপীকেই ‘রাধা’ বলে চিহ্নিত করেন। কিন্তু ইতিহাসের বিচারে তা’ মেনে নেয়া যায় না। হরিবংশ ও বিষ্ণুপুরাণে রাধার নাম নেই। মৎস্য, বায়ু, বরাহ প্রভৃতি পুরাণে কুচিং রাধার নাম উল্লেখিত আছে। পুরাণেই প্রথম রাধার উল্লেখ পাই। কিন্তু এখানেও রাধা কৃষ্ণের বিশিষ্টা লীলাসঙ্গিনী নন। তবে রাধিকা কৃষ্ণেরই প্রকৃতি, শক্তি ও বল্লভা রূপে পদ্মপুরাণের পাতালখণ্ডে বর্ণিত হয়েছেন এবং এখানে সখীপরিবৃত রাধাকৃষ্ণকে একাসনে আসীম দেখা যায়। এক্ষেত্রে রাধা লক্ষ্মীর অবতার ও বিষ্ণুর শক্তি। অতএব বৈষ্ণবতন্ত্রের পূর্ণ আভাস এখানেই সূচিত হয়েছে।

শশীভূষণ দাশগুপ্ত পদ্মপুরাণ ও পঞ্চরাত্রের রাধাকাহিনীর প্রামাণিকতায় সংশয় প্রকাশ করেছেন। তাঁর মতে এই সব অংশ পরবর্তী যোজনা হওয়া সম্ভব।^৮ ব্রহ্মবৈবর্ত পুরাণে রাধাবাদের বৈষ্ণবতাত্ত্বিক ব্যাখ্যা আছে। এজন্যে পণ্ডিতেরা এর প্রাচীনতায় সন্দেহান। মোটামুটি বলা যায়, নবম শতকের দিকে রাধা নামটি ব্যবহৃত হতে থাকে। আর কৃষ্ণের রাসলীলার উদ্ভবও বিষ্ণুপুরাণের কালে অথবা কিছু পরে। এর মূল ছিল আভীর জাতির ‘রাখালিয়া গানে’। এবং দাক্ষিণাত্যের আলোয়ার কল্পিত কৃষ্ণলীলা ভিত্তি করেই ভাগবত ও বিষ্ণুপুরাণের রাসলীলার প্রকাশ। আলোয়ারদের কৃষ্ণসঙ্গিনী রাধা নন— নাস্তি। আর সাহিত্যে রাধার প্রথম উল্লেখ পাচ্ছি সাতবাহনরাজ হালের ‘গাহা সন্তসদ্র’ নামের পদসংগ্রহের একটি পদে। হালকে খ্রিস্টীয় প্রথম শতকের লোক মনে করা হয়। কিন্তু এখানে কতগুলো পদ তত প্রাচীন নয় বলেই কোন কোন বিদ্বানের মত। অতএব রাধাবিষয়ক পদটিও অর্বাচীন অর্থাৎ নবম শতকের দিকের হওয়া বিচিত্র নয়। আনুমানিক সাত-আট শতকের কবি ভট্টনারায়ণের ‘বেণীসংহার’ নাটকের নান্দী শ্লোকে এবং আনন্দবর্ধনের ধন্যলোকে উদ্ধৃত একটি শ্লোকে রাধা-কৃষ্ণের উল্লেখ রয়েছে। ইনিও নয় শতকে বর্তমান ছিলেন বলে পণ্ডিতগণের ধারণা। তারপর কুন্তকের [১০-১১ শতক] ‘বক্রোক্তি-জীবিতে’ ত্রিবিক্রমের [১০ শতক] ‘নলচম্পুতে বল্লভদেবের [১০ শতক] ‘মাঘের শিশুপাল বধের টীকা’য় সোমদেব সূরির [১০ শতক] ‘যশস্তিলকে’ এবং তারপর ‘সুভাষিতরত্নকোষ’ প্রভৃতি গ্রন্থে রাধা ও রাধা-কৃষ্ণলীলার প্রত্যক্ষ ও পরোক্ষ উল্লেখ আছে। এর পরে বারো শতকের জয়দেবের ‘গীতগোবিন্দ’ই রাধা-কৃষ্ণলীলার প্রায় পূর্ণাঙ্গ গ্রন্থ।

অনার্যপ্রভাবে বৈদিক ধর্মের ক্রমবিকাশ ও বিবর্তন অনুসরণই আমাদের লক্ষ্য। এই অনার্যপ্রভাব এত বেশি এবং সুদূরপ্রসারী যে, তা সহজে হৃদয়ঙ্গম করা একরূপ অসম্ভব। এখানে আমাদের আলোচনার ফলশ্রুতি দেয়া হল : আর্যগণ শুধু ঋগ্বেদ সম্বল করে ভারতে এসেছিলেন, এবং সংখ্যাগুণে খুব বেশি এসেছিলেন বলে মনে করবার কোন কারণ নেই, সুতরাং বৈদিক ধর্মশাস্ত্রের যে ক্রমপরিণতি ও প্রসার ঘটেছে তাতে অনার্য অবদান তুচ্ছ নয়। অথর্ববেদ ও সামবেদের কোন কোন সূক্ত এদেশেই রচিত হয়। ব্রাহ্মণ ও আরণ্যকও রচিত হয় এখানে। আরণ্যক বিধিতে যে ভাববাদী দ্রাবিড় প্রভাব পড়েছে, তাতে সন্দেহের অবকাশ নেই। কেননা ত্রিয়ারসর্বস্ব বৈদিকধর্মের সহসা কল্পনাশ্রয়ী হবার অন্য কোন কারণ খুঁজে পাওয়া যায় না।

^৭ শ্রীরাধার ক্রমবিকাশ, পৃ: ৯৬-০৭।

^৮ শ্রীরাধার ক্রমবিকাশ, পৃ: ১০৩-০৭।

এখানে কয়েকটি বিষয় প্রগিধানযোগ্য : ১. বৈদিক সাধন-ভজন যজ্ঞের মারফতেই চলত ২. কোন বিশেষ দেবতার প্রতি আনুগত্য বা ভক্তি প্রদর্শন অপরিহার্য নয়, কারণ দেবতার যজ্ঞমারফৎ ভোগ পেলেই মূল্যস্বরূপ অতীষ্ট বরদানে বাধ্য। ৩. ভক্তিমার্গ ও জ্ঞানমার্গ তখনো প্রচলিত হয়নি। শুধু কর্মমার্গই ছিল। ৪. সৃষ্টি বা স্রষ্টা, জগৎ ও জীবন সম্বন্ধে গভীরতর জিজ্ঞাসা তখনো প্রবল হয়নি। ৫. তখনো পৌত্তলিকতা প্রশ্রয় পায়নি। এর পরের স্তরের বৈদিক আর্যধর্মের মিশ্র বিকাশ হয় সাংখ্য ও যোগ দর্শনে। পরবর্তী যোগশাস্ত্র জটিল ও বিভিন্নমুখী হয়েছে। কপিল সাংখ্যসূত্র বোধ হয় খ্রিস্টীয়পূর্ব ৩য়-৪র্থ শতকে রচিত হয় আর খ্রিস্টপূর্ব ২য় শতকে পতঞ্জলি যোগসূত্র রচনা করেন। খ্রিস্টীয় প্রথম শতকের চরক ও আড়ঢ় ঋষি সাংখ্যমত নিয়ে আলোচনা করেছিলেন বলে প্রমাণ পাওয়া যাচ্ছে। আধুনিক সাংখ্যমতের ভিত্তি হচ্ছে খ্রিস্টীয় ৩য় শতকে রচিত ঈশ্বরকৃষ্ণের সাংখ্যাকারিকা। সূত্রাং সাংখ্য ও যোগ যে বৌদ্ধ-জৈন প্রভাবিত তাতে সন্দেহ নেই। সাংখ্যসিদ্ধান্ত প্রকৃতি ও পুরুষ তত্ত্বভিত্তিক। যোগ ঈশ্বরবাদী, সাংখ্য নিরীশ্বর।

বেদান্তদর্শনের শঙ্কর বা ভাস্কর সিন্ধুদেশে আরববিজয়ের পরে আবির্ভূত হন। জ্ঞানমার্গ শঙ্করেরই সৃষ্টি। প্রজ্ঞা দ্বারাই মুক্তি বা মোক্ষ লাভ ঘটে। “তজ্জন্য কোন প্রকার যাগযজ্ঞ, সন্ধ্যাবন্দনাদি নিত্যকর্ম; গ্রহণ প্রভৃতিতে স্নান; দান প্রভৃতি নৈর্ব্যক্তিক কর্ম; কিংবা নানা পূজা-অর্চনাদি কার্যকর্ম করিবার প্রয়োজন নাই। যাহারা বেদসিদ্ধি নিষেধাদি মানিয়া চলিবেন তাঁহারা তত্ত্বজ্ঞানের অধিকারী নন।”^১ শঙ্করের মায়াবাদ ভাস্করাদী বৈরাগ্যপ্রবণ দ্রাবিড় মানসপ্রসূত। আনুষ্ঠানিক ধর্মের অস্বীকৃতি বৈদিক প্রভাবমুক্তির পরিচায়ক। জীব ও জগৎ প্রাতিভাসিক সত্য মাত্র-পূর্ণজ্ঞানের অর্থাৎ ব্রহ্মজ্ঞানের উন্মেষের সঙ্গে এর বিলুপ্তি। এই মায়াবাদ বৈরাগ্যবাদের জন্ম দেয়। শঙ্করের মতবাদকে অদ্বৈতবাদ বলে-তাঁর মতে ব্রহ্ম ছাড়া আর কিছুই নেই, সব মিথ্যে, অবিদ্যা বা অজ্ঞানতার দরুন জীবন বা জগৎ সত্য বলে প্রতীয়মান হচ্ছে মাত্র। কাজেই ব্রহ্ম ছাড়া আর সব মিথ্যে-“একম এবং অদ্বিতীয়ম”। শঙ্কর জ্ঞান-প্রজ্ঞা লাভের সাধনা ছাড়া অন্য অসাধনা স্বীকার করেননি। শঙ্করের এই অদ্বৈতবাদ বা জ্ঞানমার্গের প্রবর্তনে ইসলামের প্রভাব আছে।

তারপর তুর্কী-আফগান বিজয়ের সঙ্গে সঙ্গে এবং তার আগেও ইরানি সুফীতত্ত্বের প্রভাবে ভারতে ‘ভক্তিবাদের’ উদ্ভব হয়। ভাস্করের ভেদাভেদবাদ, শঙ্করের অদ্বৈতবাদ, রামানুজের বিশিষ্টাদ্বৈতবাদ, মধ্বের দ্বৈতবাদ, নিম্বার্কের দ্বৈতাদ্বৈতবাদ, বল্লভের শুদ্ধদ্বৈতবাদ ও চৈতন্যদেবের অচিন্ত্যদ্বৈতাদ্বৈতবাদ ইসলামের প্রভাবেই উদ্ভূত হয়। এই ভক্তিবাদের মধ্যে অন্তঃসলিলা ফক্বর মতো বৈরাগ্যবাদই জয়ী হল। মূলত শঙ্করের মায়াবাদে ব্যবহারিক জীবনের অর্থাৎ পার্থিব জীবনের যে অসারত্ব ঘোষিত হয়েছে, তাই ভক্তিবাদের আবরণে স্বীকৃত হল। জগৎ সত্য হলেও নিত্য নয়, সুখময় নয়। কাজেই যা নিত্য, যা চরম, যা পরম, যা হলে নিশ্চিত হওয়া চলে, নিবন্ধ হওয়া সম্ভব হয়-তাকে পাওয়ার সাধনাই জীবনের চরম ও পরম হওয়া উচিত। কাজেই অনিত্য সংসারের প্রতি ঔদাসীণ্য প্রদর্শন করাই হচ্ছে বুদ্ধিমত্তা ও প্রজ্ঞাবানের লক্ষণ।

গীতায় কর্মের কথা আছে, শঙ্করে জ্ঞানের কথা রয়েছে। এই কর্মবাদের সঙ্গে আর্যদের মানসসম্পর্ক গভীরতর, জ্ঞানমার্গের সঙ্গেও যোগ সুদৃঢ়। তাই বর্ণ-হিন্দুগণ গীতা ও অদ্বৈতবাদ

^১ ভারতীয় দর্শনের ভূমিকা সুরেন্দ্রনাথ দাসগুপ্ত, পৃঃ ১৭।

সহজে গ্রহণ করেছিলেন। কিন্তু ভক্তিবাদের প্রসার অনার্যদের মধ্যেই বেশি। প্রজ্ঞালব্ধ মুক্তি সবার পক্ষে সম্ভব নয়, কর্মলব্ধ মুক্তিও কি সহজ? তাই ভক্তিবাদ আজিজাত্যহীন জনসমাজে সাদরে গৃহীত হল। বৈরাগ্য-সম্পৃক্ত এই ভক্তিবাদ। নবম শতক থেকেই রাধাবাদের তথা রাধা-কৃষ্ণলীলার উদ্ভব। রাসও ‘কৃষ্ণ-নাগ্নিন্নাই’ লীলার প্রভাবেই পরিকল্পিত। আর চৈতন্য সমকালে ভক্তিবাদ প্রেমবাদে পরিণত হয়।

এদিকে যোগের ও সাংখ্যের প্রভাবে তাত্ত্বিক ও যোগ সাধনার বহুল প্রচলন হল। সুতরাং দেখা যাচ্ছে, আর্য ব্রাহ্মণ্যবাদীদের মধ্যে গীতার কর্মবাদ ও শঙ্করের জ্ঞানবাদ আর জনসাধারণের মধ্যে যোগ ও তন্ত্র প্রাধান্য লাভ করেছিল। এর ফলে বৌদ্ধ বজ্রযানে নাথ-সহজিয়া মতের উদ্ভব হয়। তার জের রয়েছে বাউল মতে ও বৈষ্ণব সহজিয়ায়। “এই তন্ত্রসাধনার একটি ধারা বৌদ্ধ দোহাকোষ ও চর্যাগীতিগুলির ভিতর দিয়া যে সহজ রূপ লাভ করিয়াছে, তাহারই ঐতিহাসিক ক্রম পরিণতি বাংলাদেশের বৈষ্ণব সহজিয়া সাধনায় এবং বিশেষ বিশেষ বাউল সম্প্রদায়ের মধ্যে”^২ এবং “সহজিয়া ধর্মের সহিত সাদৃশ্য থাকায় সুফীবাদের সামাজ্যসংবিধান হইয়া বাউল সম্প্রদায়ের সৃষ্টি হয়।”^৩

৪. বাঙলার ভক্তিবাদের ভিত্তি

এবার বাঙলার কথায় আসা যাক। বাংলাদেশে ভক্তিদর্শনের উদ্ভব সম্বন্ধে ডক্টর সুকুমার সেন বলেন—“মহাযানের উপাস্য নরদেবতা অবলোকিতেশ্বর বাংলাদেশে লোকনাথ নাম নিয়ে বিষ্ণুর রূপান্তরে পরিণত হয়েছিলেন। এবং উত্তরাংশে বাসুদের কৃষ্ণকে অবলম্বন করে যেমন ভক্তিপরায়ণ ভাগবত মত উদ্ভূত হয়েছিল, বাংলাদেশেও তেমনি লোকনাথকে আশ্রয় করে ভক্তিদর্শনের অঙ্কুর উদ্গত হয়েছিল। বাংলাদেশের রাধা-কৃষ্ণের প্রেমকাহিনী বহুকাল থেকে প্রচলিত থাকলেও এই কাহিনীকে অবলম্বন করে অত সহজে ভক্তিদর্শনের বিকাশ হয়নি, যত হয়েছিল অবলোকিতেশ্বর লোকনাথকে আশ্রয় করে। বৌদ্ধমতের ভক্তিভাবের সঙ্গে রাধা-কৃষ্ণের কথাশ্রিত ভক্তিভাবের একটু তফাৎ আছে। বৈষ্ণবমতে ভক্তি জ্ঞানশূন্য এবং লীলাস্বরূপ সাধনার একটা প্রধান অঙ্গ, কিন্তু বৌদ্ধমতে ভক্তি জ্ঞানেরই অঙ্গ।”^৪ এখানে নাথ ও সহজপন্থ স্মরণীয়। সদগুরু থেকে ‘জ্ঞান’ (মহাজ্ঞান) না পেলে সাধনার সিদ্ধি নেই। বৌদ্ধভক্তিবাদ চৈতন্য ও তাঁর আগের যুগে জয়দেব মিশ্র, চণ্ডীদাস, মাধবেন্দ্রপুরী প্রভৃতিকে পরোক্ষভাবে প্রভাবিত করেছে। [প্রত্যক্ষ প্রভাব এসেছিল সুফীমত এবং উত্তর ও দক্ষিণ ভারত থেকে]।

সুতরাং বাঙলায় বৈষ্ণব, সহজিয়া, বাউল, নাথপন্থ ও বৌদ্ধ সহজিয়া প্রভৃতি মত অনার্য মনোভঙ্গিরই প্রকাশ। ডক্টর সুকুমার সেন বলেন, “বাংলাদেশে শাস্ত্রীয় বৈষ্ণবধর্মের মধ্যে যেমন পূর্বকার ব্রাহ্মণ্য বৌদ্ধ ভক্তিবাদের যুক্তবেণী প্রবাহিত হয়ে এসেছে, তাত্ত্বিক বৈষ্ণব অর্থাৎ বাউল-সহজিয়া ইত্যাদি মতের মধ্যে তেমনি পূর্বযুগের শৈব ও বৌদ্ধ তাত্ত্বিক মতবাদের পরিণতি দেখা যায়। অষ্টম শতাব্দী কিংবা আরও পর থেকে বাংলাদেশে অনুন্নত শ্রেণীর মধ্যে তাত্ত্বিক ভারের দুটি ধর্মমত চলিত ছিল—শৈবনাথ মত এবং বৌদ্ধ সহজিয়া মত [নাথপন্থ ও চর্যাপদের সহজিয়া] এই দুই মতের সাধনায় ও দর্শনে বিশেষ পার্থক্য ছিল না। নাথ সন্ন্যাসীরা

^২ শশীভূষণ দাশগুপ্ত : বিশ্বভারতী পত্রিকা : মাঘ-চৈত্র সংখ্যা, ১৩৬২, পৃ: ১৯৪।

^৩ উনবিংশ শতাব্দীর বাংলা নব জাগরণ : সুনীলকুমার গুপ্ত, পৃ: ৬

^৪ প্রাচীন বাংলা ও বাঙালী।

নিজেদের 'যোগী' বা 'কাপালিক' বলত, এরা কানে নরাহ্মি কুণ্ডল, নরাহ্মি মালা, পায়ে নুপুর ও হাতে নরকপাল ধারণ করত এবং গায়ে ছাই মাখত। এদের আহার-বিহার ছিল কদর্য, তাই গ্রামের বাইরে ছিল এদের কুঁড়েঘর। যোগীদের নামের শেষে শব্দ হত 'নাথ', বর্তমান সময়ে যুগীজাতির (তাঁতি) মধ্যে নাথ পদবী ও পূর্বকার আচার-অনুষ্ঠান কিছু কিছু চলিত আছে। শৈব ও বৌদ্ধ সহজ সাধকেরা দেহতত্ত্বের সাধনা করত এবং আবশ্যক হলে যোগিনী বা অবধূতী অর্থাৎ সাধনসঙ্গিনী গ্রহণ করত। এদের সাধনার সঙ্কেত নিহিত আছে চর্যাপদে।—চর্যাপদগুলো বাংলা পদাবলীর রূপ।^১

৫. তত্ত্ববাদ ও ইসলাম : মতসমন্বয়

তুর্কী-আফগানদের ভারত অধিকার ভারতবর্ষের সামাজিক ও সংস্কৃতির ইতিহাস এক অভূতপূর্ব ও বিশেষ গুরুত্বপূর্ণ ঘটনা। ইতিপূর্বে শক-হুনদল এসেছিল; ভারতবাসীরা অনায়াসে তাদের গ্রহণ করতে পেরেছিল। কিন্তু বহিরাগত তুর্কী-আফগান মুসলিমকে এদেশীয় সমাজ আত্মস্থ করতে পারেনি। তার কারণ, মুসলমানেরা শুধু বিশেষ আকৃতি, প্রকৃতি ও বাহ্যিক সঞ্চল করে আসেনি, এসেছিল যুক্তিনির্ভর এবং প্রত্যয়দৃঢ় ধর্ম, সমাজ, আচার আর রাষ্ট্রাদর্শ নিয়ে, যার সামাজিক ও পারমার্থিক প্রভাব ছিল অসাধারণ। এত অসাধারণ যে, তা' আজকের দিনের সাম্য ও সমাজবাদের চেয়েও সর্ব্বাঙ্গী এবং আণবিক বোমার চেয়েও বিস্ময়কর। ফলে, মুসলমানদের এক দেহে লীন করা কোন মতেই সম্ভব হয়নি। কিন্তু আচারনিষ্ঠ ব্রাহ্মণ্যধর্মও পর্যুদস্ত হবার নয়। এর অন্তর্নিহিত শক্তিও এই নব শক্তির সঙ্গে প্রতিদ্বন্দ্বিতা করবার যোগ্য ছিল। ফলত ব্রাহ্মণ্য ধর্ম না হলে ইসলামে বিলীন, আর বা পারল মুসলমানদের বিলীন করতে। বিজেতা ও বিজিতের তথ্য শাসক ও শাসিতের মধ্যেকার এ স্নায়বিক দ্বন্দ্ব বড় তীব্র হয়ে দেখা দিল। কেউ কাউকে না পারে গ্রহণ করতে, না পারে গ্রহণ করাতে। অবস্থাটা যেন, 'কেহ পারে নাহি জিনে সমানে সমান'। উভয় পক্ষই বুঝল এ অবস্থা অসহ্য। এর আশু সমাধান প্রয়োজন। কিন্তু এসব অভিজাত হিন্দুর কথা।

এদিকে বর্ণাশ্রম কটকিত অনুদান রক্ষণশীল হিন্দুসমাজে নিপীড়িত শূদ্রগণ ইসলামের সাম্য ও ভ্রাতৃত্বের চুম্বকধ্বজে এতই বিচলিত হয়েছিল যে, স্বধর্মে সুস্থির থাকা তাদের পক্ষে আর সম্ভব হচ্ছিল না। আগ্রহ প্রবল হলেও মন যা চায়, তা পাওয়া অধিকাংশের পক্ষে সহজ ছিল না। নবধর্ম গ্রহণে বাধা ছিল ত্রিবিধ : প্রথমত, প্রাচীন সংস্কারের মোহ ও ভয়, দ্বিতীয়ত, হিন্দু-সমাজপতির কোপ-দৃষ্টি, তৃতীয়ত, ইসলাম সম্বন্ধে অনিশ্চিত জ্ঞান। ধর্ম, সমাজ ও রাষ্ট্রীয় অধিকারবঞ্চিত নিপীড়িত নিম্নবর্ণের হিন্দুগণ ইসলামের উদার সমাজ-ব্যবস্থা ও সাম্য দর্শনেই প্রলুব্ধ হয়েছিল এবং আজন্ম পোষিত মায়াবাদের সঙ্গে বহু-শ্রুত সুফীতত্ত্বের অপূর্ব সামঞ্জস্য দর্শনে কিছুটা আশ্রয়ও হয়েছিল। এভাবে নিম্নবর্ণের হিন্দুগণের বাঁধান আলগা হয়ে গেল, তারা পথে নামলো, কিন্তু ইসলামের আশ্রয় নিতে পূর্বোক্ত কারণে ছিল প্রচুর শঙ্কা। দাদুর ভাষায়—হিংদু তুরুক ন হোইবা সাহিব সেতী কাজ'। কাজেই 'নির্ভে নির্পথ হোই।' তাই ঘরে থাকাও নয়, গন্তব্যে যাওয়াও নয়, পথ চলে পথের দিশা পাওয়ার প্রয়াস দেখা দিল। হিন্দুর মায়াবাদ ও মুসলমানের সুফীতত্ত্বের সমন্বয়ে নবদর্শন আবিস্কৃত হল, অর্থাৎ নতুন ধর্ম সৃষ্টি হল। সকেটিসের

^১ প্রাচীন বাংলা ও বাঙালী পৃ: ৪২।

'knoweth thyself', উপনিষদের 'আত্মানং বিদ্ধি' ইসলামের 'মান আরাফা নাফসাহ ফাকাদ আরাফা রাব্বাহ।' বা উপনিষদের 'তৎ বেদাৎ পুরুষং বেদ মা বো মৃত্যু পরি ব্যথাঃ। এই হল নবধর্মের মূল দর্শন বা মন্ত্র। ধর্ম সাধনার উদ্দেশ্য যখন 'মনের মানুষকে পাওয়া, তখন হিন্দুয়ানির মুসলমানির বেড়া জালে আটকে পড়ার দরকার কি? শঙ্করাচার্যের দর্শন তখনো আলোচিত তত্ত্ব এবং পারস্য-সাহিত্যের মারফত হাফেয-জামী-রুমী-আত্তার-খৈয়ামের বাণী মুখে মুখে উচ্চারিত সত্য। কাজেই এ আন্দোলনের ইন্ধন ছিল হাতের কাছেই।

এরূপে ভারতের দিকে দিকে ধর্মসমন্বয়ের ও ঐক্যের বাণী ধ্বনিত-প্রতিধ্বনিত হতে লাগল। রামানন্দ, একলব্য, দাদু, নানক, কবির, চৈতন্যদেব, রামদাস, বল্লাভাচার্য প্রমুখ সাধক-প্রচারকদের আবির্ভাব ঘটলো। শাস্ত্রের অধিকার লাভের, সামাজিক সত্তায় মর্যাদা আরোপের ও জীবনে নিরাপত্তাবোধের অবচেতন প্রেরণা থেকেই হয়তো এসব ধর্মআন্দোলন শুরু হয়। কিন্তু অনতিকাল মধ্যে এগুলো ইসলাম ও দণ্ডধর মুসলিমশক্তিকে বাধা দেবার বা বিতাড়িত করার সচেতন প্রয়াস হিসেবে প্রকট হয়ে ওঠে। শিখ বা বৈষ্ণব আন্দোলনে যে এ-উদ্দেশ্য স্পষ্ট হয়ে উঠেছিল তার বহু প্রমাণ রয়েছে। রাষ্ট্রিক প্রয়োজনে বাদশাহ আকবর থেকে গান্ধীর কাল পর্যন্তও সমন্বয়সাধন অব্যাহত ছিল। এ পথে গান্ধীর 'রামধূন' সংগীত ও নজরুলের কয়েকটি কবিতাকে শেষ প্রয়াস বলে ধরে নেয়া যেতে পারে। সুফী কবির দিওয়ান, গজল ও রুবাই প্রভৃতির অনুকরণের অধ্যাত্ম সংগীত রচিত হয়েছে। চর্যাঙ্গীতির ও দোহার কাল থেকেই গণভাষায় রচিত পদ ও দোহা ধর্মমত ও তত্ত্ব প্রচারের বাহন রূপে ব্যবহৃত হচ্ছে।

এদের উদ্দেশ্য ও সাধনা সার্থক হয়েছিল। ইসলাম সত্য সত্যই বড় বাধা পেল। এর গতি প্রায় স্তব্ধ হয়ে গেল। ইসলাম আর বিশেষ প্রচার বা প্রসার লাভ করল না। এর আগে মদিনা থেকে পশ্চিম পাক্সাব অবধি ইসলামে দীক্ষা অপ্রতিহত ছিল। শুধু তা-ই নয়, কিছু মুসলমান তাঁদের মতে দীক্ষাও নিল বিশেষতঃ খ্রিষ্ট ও বৈষ্ণব ধর্মে। প্রকৃতপক্ষে হিন্দুধর্মের আওতায়ও তারা রইল না। এগুলো হিন্দু-মুসলিম ধর্মদর্শনের সমন্বয়ে সম্পূর্ণ নতুন ধর্ম। কিন্তু প্রচারকগণ নামে হিন্দু হওয়ায় ও ব্রহ্মা, বিষ্ণু, শিব, রাধা-কৃষ্ণ প্রভৃতি নামসার হিন্দুয়ানির রেশ থাকাতে এরা জাতি অর্থে হিন্দুই রয়ে গেল। তাতে উত্তরকালে রাজনীতি ক্ষেত্রে ব্রাহ্মণ্যবাদীদের প্রচুর সুযোগ-সুবিধা হয়। সূতরাং এরা নামগত জাতিতে হিন্দু ও ধর্মগত জাতিতে আলাদা। যেমন-রাজা রামমোহন রায়ের নামমাহাত্ম্যে ব্রাহ্মগণ নিজেদের ব্রাহ্মণ্যধর্মের শাখানুসারী বলে মনে করে। ফলত, এরা জাতিতে হিন্দুই রয়ে গেল। বস্তুত রামমোহনের ব্রাহ্মধর্মও সচেতনভাবে খ্রিস্টধর্মের প্রসার রোধ কল্পে প্রবর্তিত হয়েছিল আর উদ্দেশ্য সিদ্ধও হয়েছিল।^১

উক্ত ভাবসাধকদের মধ্যে জোলা শেণীর কবীর এবং ধুনকর সম্প্রদায়ের দাদু ও রজ্জব মুসলমান ছিলেন। মুসলমান হয়েও তাঁরা ধর্মআন্দোলন করেছিলেন- তার কারণ তাঁরা নিম্নশ্রেণীর উৎপীড়িত হিন্দুসমাজ থেকে ইসলাম গ্রহণ করেছিলেন সুফীদের হাতে। শরিয়তী ইসলামের সঙ্গে পরিচয়ের অভাব, পূর্ব সংস্কারগত মায়াবাদের প্রভাব এবং সুফীতত্ত্বের উদার আবহাওয়া

^১ "এই সময় ব্রাহ্মধর্ম প্রবর্তিত হইয়া সংশয়বাদী চিন্তের আশ্রয়স্থল হইয়াছিল এবং যাহারা খ্রিস্টধর্ম গ্রহণ করিতেন তাহারা অনেকেই ব্রাহ্মধর্মের শরণ লইয়াছিলেন। এই ভাবে ব্রাহ্মধর্ম সমাজের ভাঙ্গনকে রোধ করিতে যথেষ্ট সহায়তা করিয়াছিল। ... ব্রাহ্মধর্ম যাহারা গ্রহণ করিয়াছিল, তাহারা হিন্দু সমাজের সহিত যোগসূত্র রক্ষা করিয়া চলিত। বস্তুত হিন্দু ধর্মাদর্শে বিশ্বাস ছিল না অথচ ধর্মান্তর গ্রহণ করে নাই এই রূপ সংখ্যাই ইংরাজ বেসলের মধ্যে বেশি ছিল।"- উনিবিংশ শতাব্দীর বাঙলার নব জাগরণ : সুশীলকুমার গুপ্ত, পৃ. ২৩৭-৩৮।

তাদেরকে ভাবরসে বা প্রেমসাধনায় উদ্বুদ্ধ করেছিল। বৈচিত্র্য ও বিভেদের মধ্যেও যে আত্মার স্বরূপ এক ও অবিকৃত এই সমন্বয়পন্থীগণ তা-ই প্রচার করেছেন। এসব ধর্মান্দোলনের ব্যবহারিক উদ্দেশ্য ছিল বর্ণভেদপ্রথা ও শাস্ত্রে অনধিকার রহিতকরণ আর মনুষ্য-সত্তায় মর্যাদা দান। তা' পুরোপুরি সফল হল। তাই ইসলাম আর প্রসার লাভ করেনি। তবে তার প্রভাবই সমাজ সংস্কারে প্রয়োজনীয় ফল দান করল। যেমন- যুরোপে ইসলামের অনুকরণে প্রোটেষ্ট্যান্ট মত প্রচারই নবযুগ সৃষ্টির পক্ষে যথেষ্ট ছিল।

ভাগবতে ভক্তিবাদের উল্লেখ ছিল। কিন্তু তা মুসলিম বিজয়ের পূর্বে প্রসার লাভ করেনি। 'গীতগোবিন্দে' আধাত্মিকতা নেই। বিদ্যাপতিতেও নেই। গীতগোবিন্দ-বিদ্যাপতির পদাবলী, শ্রীকৃষ্ণবিজয়, কৃষ্ণধামালী, শ্রীকৃষ্ণকীর্তন শিব-শিবানীর ছড়া বা গাথা প্রভৃতি আদি রসাত্মক রচনা সামাজিক জীবনের বিকৃতির এবং রাজনৈতিক নিবীৰ্যতার যুগে নৈতিকতা-শিথিল গণ-মনের রসপিপাসা মিটাবার জন্যেই রচিত হয়েছিল।

বিপরীতধর্মী দুই সংস্কৃতির মোকাবিলায় নিপীড়িত নিম্নবর্ণের হিন্দুর সমাজ মনে, তার ধর্মবিশ্বাসে ও জীবনদর্শনে যে সাড়া জাগল, তারই ফলে বাঙলায় বৈষ্ণব-বাউল মতবাদের উদ্ভব ও পরিণতি। অবশ্য দক্ষিণ ভারতেই এর প্রথম বিকাশ। এখানে ভক্তিবাদে যে মনোবৃত্তির প্রকাশ তাতে দ্রাবিড়সুলভ ভাবাবেগের প্রাচুর্য ছিল। আর ছিল তীব্র প্রাণময়তা। দ্রাবিড় রক্তের উত্তরাধিকারী বাঙলায়ও বৈষ্ণব ভক্তিবাদ একই রূপে উচ্ছ্বাস ও উত্তেজনা সৃষ্টি করলো। এমনিতেই বাঙালী চিরকাল ভাবপ্রবণ ও স্পর্শকাতর। সামান্য কারণেই উচ্ছ্বসিত, উত্তেজিত, উন্মত্ত বা অভিভূত হয়ে পড়ে। এজন্যেই এরা হৃদয় সাহিত্য সৃষ্টি করে, তখন তা গীতিকবিতা হয়ে ওঠে, সামাজিক আন্দোলনে সাময়িক ঝড় তোলে, রাজনীতিতে ভয়ঙ্কর ক্ষণবিপ্লব ঘটায়। এজন্যেই এরা তর্ক করে, যুক্তি মানে কিছু হৃদয়ানুভূতি গোচর না হলে আচরণ করে না।

৬. ভক্তিবাদ : সাধনসঙ্গীত ও ইসলাম

ভাবপ্রবণ আন্তিক মানুষের মনে মাঝে মাঝে পরমের বিরহবোধ জাগে। তখন তার পক্ষে 'হরি বিনে দিন ও রাতিয়া' যাপন অসহ্য হয়ে ওঠে, সে অভিসারে যাত্রার উপায়ও খুঁজে পায় না, কারণ 'হরি রহে (অনতিক্রম্য) মানস সুরধুনী পার।' তাই চিরকাল আন্তিক মানুষের ঘটে ঘটে বিচ্ছেদকাতর রাধা আজো কাঁদছে। এ কান্না ও বিলাপ কেবল গানেই ধ্বনিত করা সম্ভব। তাই মরমীদের সাধনভজন গানেই চলে। জালালউদ্দীন রুমী, খাজা মঈনউদ্দীন চিশতির, নিজামউদ্দীন আউলিয়ার নাচগানবাজনার মাধ্যমে সাধনাপদ্ধতি স্মর্তব্য।

বাঙালী মুসলমানেরাও যে সঙ্গীতকে অপার্থিব উৎকর্ষের তথ্য আধ্যাত্মজিজ্ঞাসার নিবৃত্তির ও সাধনার বাহন করেছিল, তা' চিশতিয়া, কাদিরিয়া, কলন্দরিয়া প্রভাবের প্রমাণ ছাড়াও, আঠারো শতকের কবি আলি রজার জবানীতে পাচ্ছি :

আলি হস্তে সে সকল সন্ন্যাসী ফকিরে
শিথিল সকল যন্ত্র রহিল সংসারে।
ভাবের বিরহ সব শান্ত হৈতে মন
রাগতাল কৈল প্রভু সংসারে সৃজন।
সর্বদুঃখ দূর হয় গীতযন্ত্র রাএ
গীতযন্ত্র শুনি মহামুনি ভ্রম যাএ।

গীতযন্ত্র মহামন্ত্র বৈরাগীর কাম
 রাগযন্ত্র মহামন্ত্র প্রভুর নিজ নাম ।
 জীববস্ত্র যত আছে ভুবন ভিতর
 সর্বঘটে যন্ত্রে বাজে গীতের সুস্বর ।
 ঘটে গুণ যন্ত্র গীত যোগিগণে বুঝে
 তে কারণে সর্বজীবে সে সবারে পূজে ।
 গীতযন্ত্র সুস্বর বাজায় যে সকলে
 মহারসে ভুলি প্রভু থাকে তার মেলে ।
 শুদ্ধভাবে ডুবি নৃত্য করে যেই জনে
 গীতরসে মজি প্রভু থাকে তার সনে ।

অপর একজন কবিও বলেন :

কহে হীন দানিশ কাজী ভাবি চাহ সার
 রাগযন্ত্র নাদ সব ঘটে আপনার ।
 অষ্টাঙ্গ তন মধ্যে আছএ যে মিলি
 তনাস্তরে মন-বেশী করে নানা কেলি ।
 মোকামে মোকামে তার আছএ যে স্থিতি
 ছয় ঋতু তার সঙ্গে চলে প্রতিনিতি ।...
 রাগঋত অস্ত্র মুষ্টি পারে চিনিবার
 জীবন মরণ ভেদ পারে কহিবার ।
 কিবা বুদ্ধ কিবা রাগ কিবা তার রূপ
 ধ্যান্যে বসিয়া দেখ ঘটে সর্বরূপ ।

বাঙালী মুসলিম সমাজে সংগীতচর্চা যে সুফীপ্রভাবেরই ফল, আমাদের সে অনুমান উক্ত চরণ কয়টির দ্বারা প্রমাণসিদ্ধ হল। আগেই বলেছি, বাঙালী মুসলিম মরমীরা যে সাধনপন্থ গ্রহণ করেছেন, তা মূলত ইসলামী নয়। ভারতিক সুফী মতবাদও একান্তভাবে আরব-ইরানি নয়। এর অবয়বে যেমন ভারতিক প্রভাব পড়েছে, বাঙালী মরমীদের দর্শনে, ধর্মে ও আচারেও তেমনি প্রচুর দেশজ তথা ভারতিক উপাদান রয়েছে। কাজেই এদেশে হিন্দু-মুসলমান চিরকাল হাতে হাত মিলিয়ে ও মনে মন মিশিয়ে অধ্যাত্মসাধনা করেছে। এভাবেই বাঙলাদেশে হিন্দু-মুসলমানের মিলিত সাধনায় মরমীদের উপমতগুলো সৃষ্টি হয়েছে।

বলেছি, মুসলিম অধিকারের পূর্বে ও পরে ভারতে যারা ইসলাম প্রচার করেন-বাহ্যানুষ্ঠানের সঙ্গে তাদের বিশেষ সম্পর্ক ছিল না। অথচ সাধারণের পক্ষে ধর্ম আচারিক ও আনুষ্ঠানিক না হলে ধর্মাচরণ দুঃসাধ্য হয়ে ওঠে। ফলে মুসলমানেরা তাদের চার পাশেই অবলম্বন খুঁজেছে। এভাবেই তাদের তত্ত্বদর্শনে পীরপূজা ও দেহচর্চা মুখ্য হয়ে উঠেছে, তাদের তত্ত্বপ্রকাশের মাধ্যম হয়েছে ভারতিক রূপকল্প। আরাধ্যের প্রতীক হলেন রাম-সীতা ও রাধা-কৃষ্ণ, এমনকি কালীও।^১

^১ মুসলিম কবির পদসাহিত্য : আলি রজ্জা হোসেন আলি, ক্রমিক সংখ্যা ৩৭২, ৩৯৩, পৃ. ১৯১।

অধিকাংশ মুসলমান এদেশী জনগণেরই বংশধর। উক্ত সব ধর্ম দর্শন ও সংস্কার তাদের অস্থিমজ্জার সঙ্গে মিশে রয়েছে। তাতে আবার শরীয়তের সঙ্গে সাক্ষাৎ-সম্পর্ক রাখাও সম্ভব হয়নি অশিক্ষা ও সুফীমতের প্রাবল্যের দরুন। কাজেই সুফীমতের সঙ্গে যেখানেই সাদৃশ্য-সামঞ্জস্য দেখা গেছে, সেখানেই মুসলমানেরা অংশ গ্রহণ করেছে। এভাবে বৌদ্ধ নাথপন্থ, সহজিয়ার তান্ত্রিক সাধনা, শাক্ততন্ত্র, যোগ, ইউনানী দর্শন প্রভৃতি তাদের আকৃষ্ট করেছে। এবং এক্ষেপে তারা মিশ্র-দর্শন খাড়া করেছে। ডক্টর সুনীতি চট্টোপাধ্যায় বলেন, “পীর ফকির, দরবেশ, আউলিয়া প্রভৃতির প্রচার এবং কেলামতীর ফলে, মুখ্যত ব্রাহ্মণদের প্রতি বিদ্বেষপরায়ণ বৌদ্ধ ও অন্যান্য মতের বাঙালী, ইসলাম ধর্ম গ্রহণ করে। ... বাংলাদেশে ইসলামের সুফীমত বেশি প্রসার লাভ করে। সুফীমতের ইসলামের সহিত বাঙ্গালার সংস্কৃতির মূল সুরটুকুর তেমন বিরোধ নাই। সুফীমতের ইসলাম সহজেই বাঙ্গালার প্রচলিত যোগমার্গ ও অন্যান্য আধ্যাত্মিক সাধনমার্গের সঙ্গে একটা আপোষ করিয়া লইতে সমর্থ হইয়াছিল।”^১ আবদুল করিম সাহিত্যবিশারদও বলেন, “আধ্যাত্মিক বা মারফতী সাহিত্যে ইরানের সুফী প্রভাবও রয়েছে এবং বাউল-মুর্শিদা সাহিত্য ছাড়াও নিছক দার্শনিকতত্ত্ব এখানে কম মেলে না। এসব বিভিন্ন ধারার সমন্বয়ের কারণ বোধ হয় এই যে মানুষের হৃদয়ানুভূতিতে ও মননে এমন একটি স্তর আছে যেখানে সব ভেদাভেদের অস্তিত্ব বিলুপ্ত হয়ে যায়। আমাদের দেশের সাধকগণ অতিমাত্রায় আচারবর্জিত ও মর্মনিষ্ঠ। তাই এমন নির্বিচার সমন্বয় সম্ভব হয়েছে। হরগৌরী সন্বাদ, জ্ঞান-প্রদীপ, যোগ-কলন্দর, আগম-জ্ঞানসাগর, আবদুল্লাহর সওয়াল, মুসার সওয়াল, মল্লিকার সওয়াল, ইউনান দেশের পুঁথি, গোরক্ষবিজয়, সিরাজ সবিল, নূরজামাল প্রভৃতি গ্রন্থ এ শ্রেণীর।”^২

সুতরাং দেখা যাচ্ছে, বাঙালী মুসলমান মরমীরা যে, সাধনপন্থ আবিষ্কার করেছে তা একান্তভাবে ইসলামী নয়। বস্তুত ভারতীয় সুফীমতবাদেও ভারতীয় দর্শনের যেমন প্রচুর প্রভাব পড়েছে, তেমনি বাঙালী মরমীয়াদের দর্শনে ও ধর্মে প্রচুর দেশজ তথা ভারতীয় উপাদান রয়েছে। অবশ্য নিরক্ষর জনগণের ধর্ম ও দর্শন বলে এগুলো আশানুরূপ পুষ্ট হয়নি। একথাও অনস্বীকার্য যে, বৈষ্ণবমতই প্রথম হিন্দু-মুসলমানকে একই সাধন ক্ষেত্রে কিছুটা আকৃষ্ট করে। অতএব এগুলো কোন বিশেষ ধর্ম, বিশ্বাস বা সংস্কারের পরিচয় বহন করে না। জগৎ ও জীবনের রহস্য সম্বন্ধে মানুষের চিরন্তন জিজ্ঞাসা এবং তার রহস্য উদঘাটনের চির কৌতুহল থেকেই এর জন্ম। এ প্রয়াস তাই ধর্মনিরপেক্ষ। এ স্তরের অনুভূতিতে মানবমনে দেশ-কাল পাত্রের ও বিশ্বাসের ভেদাভেদ ঘুচে যায়, এগুলো সে স্তরের অনুভূতি ও উপলব্ধির অভিব্যক্তি। তাই সৈয়দ সুলতান, শেখ চাঁদ প্রভৃতি ইসলাম ও নবী কাহিনী যেমন গুনিয়েছেন, তেমনি আবার এসব মরমীবাদও প্রচার করেছেন।

পীর দরবেশ আউলিয়া প্রচারিত ধর্মে দীক্ষিত হয়ে ভারতের প্রথম যুগের মুসলমানেরা মুসলিম সংস্কৃতি গ্রহণ করবার সুযোগ পায়নি। ভারতীয় মুসলমানদের মধ্যে পীরপূজা প্রচলিত হয় এভাবেই। তাতে কোন হিন্দুপ্রভাব নেই। তবে এই পীরবাদের সঙ্গে বৌদ্ধ-হিন্দুর গুরুবাদের পূর্ণ সামঞ্জস্য রয়েছে।

^১ জাতি, সংস্কৃতি ও সাহিত্য পৃ: ২৫-২৬।

^২ ক. পুঁথি সাহিত্যের বিষয়বস্তু এলান- ১৯৫২ খ্রিঃ।

খ. সওয়াল সাহিত্য, মৎসসম্পাদিত, বাঙলা একাডেমী, ১৯৭৬ সন।

৭. সুফীর স্রষ্টা-সৃষ্টি সম্পর্কে তত্ত্ব

সুফীদের মূল বক্তব্য হচ্ছে সৃষ্টি স্রষ্টার আনন্দজাত। তিনি চাইলেন— ‘কুনফায়াকুন’ [Be it so, and it is so] অর্থাৎ সৃষ্টি কারো অনুরোধে বা গরজে হয়নি। স্রষ্টা তাঁর খেয়াল খুশীর খাতিরে আনন্দসহচর হিসেবেই তা’ করেছেন। এ তাঁর লীলা। অসমানে প্রণয় হয় না। নির্বন্দ, নির্বিঘ্ন ও অকৃত্রিম আনন্দ পেতে হলে বন্ধুসাহচর্যই কাম্য। কারণ হৃদয়ের অসংকোচ প্রকাশ একমাত্র প্রণয়ের সম্পর্কেই সম্ভব। সুতরাং স্রষ্টা যেখানে আমোদ উপভোগের জন্যেই জগৎ সৃষ্টি করেছেন, সেখানে সৃষ্টির সেরা মানুষের সঙ্গে তাঁর বান্দা-মনিব সম্পর্ক হতে পারে না। তা হলে সে সৃষ্টির সার্থকতা থাকে না। স্রষ্টার উদ্দেশ্যই যে ব্যর্থ হয়! যেখানে প্রণয় আছে, সেখানে গতিবিধি অবাধ হওয়াই স্বাভাবিক। কোন নিয়ম-শৃঙ্খলার বাধা সেখানে অবাস্তিত নয় শুধু, অসম্ভবও। কাজেই আল্লাহর সঙ্গে যেখানে মানুষের প্রণয়ের সম্পর্ক, সেখানে বান্দা-মনিবের, পিতা-পুত্রের, ভক্ত-ভগবানের সম্পর্ক কল্পনা করাও বাতুলতা। অতএব নামাজ-রোজার বা এই প্রকার আনুগত্যের প্রশ্ন অবান্তর। ফলে শরীয়ত সেখানে নিরর্থক। অনুরাগে প্রণয়ের উন্মেষ, বিরহবোধে উপলব্ধি এবং মিলনে এর সার্থকতা। প্রেমের ধর্ম হচ্ছে— প্রেমিক প্রেমাস্পদ পরস্পর পরস্পরকে আত্মস্থ করতে আকুল হবে, পরস্পরের মধ্যে আত্মবিলোপ কৃতার্থ হবে। এ প্রেম জীবাত্মার সঙ্গে পরমাত্মার প্রেম। জীবাত্মা হচ্ছে পরমাত্মার খণ্ডিতাংশ। বিন্দু বিন্দু বারি নিয়ে সমুদ্র। কিন্তু বিন্দুর একক শক্তি কতটুকু। তাই তার অস্তিত্ব রক্ষার গরজেই সমুদ্রের জন্যে তার আকুলতা। নইলে যে তার অপমৃত্যু সুনিশ্চিত! বিন্দুরূপ জীবাত্মার তাই পরমাত্মার জন্যে এমনি আকুলতা। গরজ জীবাত্মার : তাই সে প্রেমিক— তাই সে রাধা। পরমাত্মারও গরজ আছে, যেমন— সমুদ্রও বারি বিন্দুর উপর নির্ভরশীল। কিন্তু কোন বিশেষ বিন্দুর জন্যে তার কোন বিশেষ আকুলতা নেই। এজন্যেই জীবাত্মা সদা-উদ্বিগ্ন পাছে সে বাদ পড়ে। তাই রাধা বলে, — ‘এই ভয় উঠে মনে এই ভয় উঠে, না জানি কানুর প্রেম তিলে জনি টুটে।’ প্রেমের পরিণতি একাত্মতায়, যখন বলা চলে ‘আনল হক বা সোহম’। এ অবস্থাটা সুফীর ভাষায় রফানাবিল্লাহ কিংবা, বাকাবিল্লাহ, বৈষ্ণবের কথায় যুগ রূপ বা অভেদরূপ। [তুঃ চৈতন্যদেব মুই সেই, মুই সেই] ... এই দুটো কথায় সূক্ষ্ম দার্শনিক অর্থের মারপ্যাচ আছে। তবে অবস্থা ও অভিপ্রায়টা মূলত একই। একেই ‘সামরস্য’ অবস্থা বলা হয় সহজিয়া তান্ত্রিকদের ভাষায়।

‘কুনফায়াকুন’ দ্বৈতবাদের পরিচায়ক। পক্ষান্তরে ‘একোহম বহস্যাম’ অদ্বৈতবাদ নির্দেশক। সুফীরা মুসলমান, তাই দ্বৈতবাদী, কিন্তু অদ্বৈতসত্তার অভিলাষী। বৈষ্ণবগণ ব্রহ্মবাদের প্রচ্ছায় গড়া, তবু তাদের সাধনা চলে দ্বৈতবোধে এবং পরিণামে অদ্বৈতসত্তার প্রয়াসে। সুফী ও বৈষ্ণব উভয়েই পরমের কাঙাল। মানবাত্মার সুগু বিরহবোধের উদ্বোধনই সুফী-বৈষ্ণবের প্রধান কাজ। কেননা রুমীর কথায় :

দানা চুঁ অন্দর জমিন পেনহা শওয়াদ।

বাদ আজো সারে সবজি বস্তা শওয়াদ।

জীবাত্মা তখন বাঁশির মতো বলে— ‘বশোনো আজনায়ে চুঁ হেকায়েত মি কুনন্দ। ... এজন্যে রবীন্দ্রনাথও বলেন,

বিরহানলে জ্বালে রে তারে জ্বালে

রয়েছে দীপ না আছে শিখা, এইকি ভালে ছিলে লিখা

ইহার চেয়ে মরণ সে যে ভালো।

দুনিয়ার পাঠক এক হও! ~ www.amarboi.com ~

তাই সুফীগানে ও বৈষ্ণবপদে আমরা মিলন-পিপাসু বিরহী আত্মার করুণ ক্রন্দন ধ্বনি শুনতে পাই। সুফীর গজল ও বৈষ্ণবপদসাহিত্য মানবাত্মার চিরন্তন Tragedy-র সুর ও বাণী বহন করেছে। না-পাওয়ার বেদনা আর পেয়ে হারানোর শঙ্কা—কোনটার চেয়ে কোনটা কম! তাই চিরকাল ‘হিয়ার পরশ লাগি হিয়া’ যেমন ‘কাঁদে’ এবং লাখ লাখ যুগ হিয়ে হিয়া রাখলু, তবু হিয়া জুড়ন না গেলি, তেমনি ‘দুঁহঁ ক্রোড়ে দুঁহঁ কাঁদে বিচ্ছেদ ভাবিয়া।’ এর শেষ নেই, সমাধান নেই। সুফীর গজল-দিওয়ান-রুবাই আর বৈষ্ণবপদাবলী ঐ চির বিরহবোধকে ধ্বনিত করারই প্রয়াস গ্রসূন। এ সাধনাও বড় কঠিন সাধনা। ঘৃণা-লজ্জা-ভয়—এ তিন থাকতে কিছু হয় না। ধন-জন-মনের আকাঙ্ক্ষা ত্যাগ করলে, তবে ঘৃণা-লজ্জা-ভয় ঘুচে যায়। এজন্যেই এতে সবার অধিকার নেই। সুফী বৈষ্ণবেরা তাই পণ্ডিত ও ধর্মধ্বজীদের উপহাস করেন। হাফেজ বলেন,

ঢাল সুরা সখি, সাজাও পেয়ালা, পরম আছে কি তায়,
শ্রেমের মরম তারা কি জানে লো—ধরম যাহারা চায়।

চণ্ডীদাস বলেন :

মরম না জানে ধরম বাখানে এমন আছএ যারা
কাজ নাই সখি, তাদের কথায় বাহিরে রহন তারা।

স্মার্ত রঘুনন্দন ও রঘুনাথ শিরোমণির ব্রাহ্মণ্য আন্দোলনকে ব্যর্থ করে দিয়ে বৈষ্ণববিপ্লবের যে প্রাবন এলো, তাতে পশ্চিমবঙ্গেও ক্রিষ্ট সবাই চৈতন্যপ্রবর্তিত বৈষ্ণবমতে দীক্ষিত হয়নি, রাধাকৃষ্ণের রূপকে ভক্তি বা বৈরাগ্যসাধনা করেনি।

৮. সুফীতত্ত্বের স্থানীয় বিকাশ

বাঙালী মুসলমানদের মধ্যে অনেককাল ‘রাধাকৃষ্ণ’ রূপকে পদসাহিত্য সৃষ্টি করে গেছেন। তাঁদের কেউ করেছেন নেশার ঝোঁকে আর কেউ করেছেন পেশা হিসেবে। নেশার ঝোঁকে করার কারণ দুটো। ১. সুফীমতবাদের সাথে বৈষ্ণবদর্শনের আত্যন্তিক সাদৃশ্য ও আচারিক মিল এবং ২. জগৎ ও জীবনের চিরাবৃত্ত রহস্য, জীবাত্মা ও পরমাত্মার সম্পর্ক নির্ণয়ের কৌতূহল প্রভৃতি মানুষের মনে যে-জিজ্ঞাসা জাগায়, তার সদুত্তর সন্ধানের প্রয়াসজাত যে অভিব্যক্তি তাতে দেশে বহুল প্রচলিত রাধাকৃষ্ণ রূপকের ব্যবহার। বৈষ্ণবদের নামকীর্তন, জীবোদয়া, বর্ণভেদ-প্রথার বিলোপ সাধন, বিনয়, নামে রুচি, দশা, সখীভাব, ঐশ্বর্য প্রদর্শন, রাগানুগাভক্তি, তালুকপ্রথা, পুনর্বিবাহ প্রভৃতি সুফীদের যিকর, খিদমত সামা, হাল, সদাসোহাগ, কেরামতি, তরিকত, হরিকত, মারফত প্রভৃতির অনুকরণ মাত্র। ফানাফিল্লাহ বা বাকাফিল্লাহ রাধা-কৃষ্ণের অভেদতত্ত্ব বা যুগলরূপ পরিকল্পনার উৎসস্বরূপ। এমনকি অদ্বৈতবাদী হিন্দুর দ্বৈতাদ্বৈতবাদও সুফীর দ্বৈতবাদ থেকে উদ্ভূত। অবশ্য বেদান্ত প্রভাবে পরে সুফীদের কেউ কেউ দ্বৈতাদ্বৈতবাদী হয়েছিলেন। সুতরাং সুফীমতাসক্ত বাঙালী মুসলমানদেরকে বৈষ্ণবসাধনা অনুপ্রাণিত করবে তাতে আশ্চর্য কি? এজন্যেই সাধক নূর কুতবে আলম এবং সৈয়দ মুর্তজা ফারসি গজল যেমন লিখেছেন, তেমনি রচনা করেছেন বাঙলা রাধা-কৃষ্ণ পদও। তাঁরা দুই তত্ত্ব অভিন্নরূপে দেখেছেন। রাধা-কৃষ্ণ যে জীবাত্মা ও পরমাত্মার, দেহ ও প্রাণের এবং ভক্ত ও ভগবানের পরিভাষা রূপে ভারতবর্ষে সর্বত্র গৃহীত হয়েছিল, এঁদের ও ভারতবর্ষের বিভিন্ন ভাষার মুসলিমরচিত পদ ও দোহাই তার প্রকৃষ্ট প্রমাণ। দ্বিতীয়ত, মানুষ স্বাভাবিকভাবেই জগৎ ও জীবনের রহস্য সম্বন্ধে চিরজিজ্ঞাসু। সেই অনাদিকাল থেকে মানুষ নানাভাবে এ প্রশ্নের সদুত্তর

সন্ধান করছে। এই চিরন্তন জিজ্ঞাসার রূপ মানুষ অবিশেষে একই। কাজেই চিন্তাধারাও কমবেশি একই রূপ। কেননা সবারই 'চিন্তাকাড়া কালার বাঁশী লাগিছে অন্তরে।' ইরানি ভাষায় ও সাহিত্যে অপটু বাঙালী মুসলমান তাই রাধা-কৃষ্ণের দেশীয় রূপককে জগৎ ও জীবনের এবং আত্মা-পরমাত্মার রহস্য উদঘাটনে প্রয়াসী হয়েছে। শুধু বাঙালী মুসলমানই বা বলি কেন, দাদু, কবীর, রজব, তাজ প্রভৃতি অবাঙালী মুসলমানও রাম ও রাধা-কৃষ্ণকে বাদ দিতে পারেননি। রাধা-কৃষ্ণ রূপক তাদের মনন প্রকাশের বাহনরূপে কাজ করেছে। সতেরো শতকের দরিয়া সাহেব বলেন :

আদি অংগ মেরা হৈ রাম।
উন বিন গুর সকল বেকাম॥
কহা করু যে মান বড়াই।
রাম বিনা সব হী দুখদাই॥
সোচ ধাম ধন কো।
সোক লেস নেকহ
কলেসকৌ ন লেস রহ্যো।
সুমরি শ্রীগোক লেস
গো কলেস মনকৌ।

মইজদ্দিন বলেন :

বৃন্দাবনকী কুঞ্জ লগিন সৈ
চুংচত চুংচত হারী
দৈহৌ দরস মোহি আপনি
মৌজ মে এহো কৃষ্ণ মুরারি
পিয়া মোহি আস তিহারী।

আফসোস বলেন :

নিশিদিন কৃষ্ণ মিলন কো সঁখিয়া
আস লগায়ে ঠাড়ি রহত হৈ
আফসোস পিয়াকী নেহ-সুরতিয়া
নিরখত নর গু নারী রতে হৈ।

কবি কাইম বলেন :

হরি হেরত মৈ ফিরতী বাবরী
নৈননি মৌ কব আবৈ
হরি কো লগি কাইম সঁখিয়া সৌ
কাহেন ধুম মচাবৈ।

কবি শেখ বলেন :

চর কমল হী কী
'লোচন মে লোচ ধরী
রোচন হবৈ রাচ্যো
সাধক এয়ারী বলেন :
হৌ তো খেলৌ পিয়া সংগ হোরী
জবতে দৃষ্টি পরৌ অবিনাসী

লাগী রূপ-ঠগৌরী

কহুয়ারী যাদ করু হরিকী
কোই কহৈ কো কহৌরী।

দরিয়া সাহেবও বলেন :

মুরলী কৌন বাজাবৈ হো
গগন মংডল বীচ?
যা মুরলীকে ধুন সে

সহজ রচা বৈরাট।

যা মুরলীকী টেরহি সুন সুন
বহী গোপিকা মোহী
সধ ধুন মিরদংগ বজত হৈ

বারহ মাস বসংত।

অমহদ ধ্যান অখংড আতুরবে
ধ্যাবত সবহী সংত।
কানহ গোপী করত নৃত্যহি।

চরণ বপু হি বিনা
নৈন বিন দরিয়াব দেখে
আনন্দরূপ ঘনা।

একেত সাধারণ শ্রেণীর মুসলমানগণ ধর্মাস্ত্রিত ভারতীয়দের বংশধর, তাদের রক্তসংস্কারে ভারতিক প্রভাব বিদ্যমান, তার উপর ইসলামের একটি বিশিষ্ট শাখা-সুফীমতবাদ ভারতে প্রাধান্য লাভ করে। সুতরাং মুসলমানদের মনের, ইন্দ্রিয়ের, আত্মার ও ধর্মের সঙ্গে সঙ্গতিপূর্ণ

ভারতীয় ভক্তিবাদ তাদের সহজেই প্রভাবিত করতে পেরেছিল। তাই বাঙালী কবি শাহ নুরের কথায় মুসলমানদের রাধা-কৃষ্ণ রূপক গ্রহণের সঙ্গত কারণ খুঁজে পাই :

সৈয়দ শাহনুরে কয় রাধাকানু চিন হয়
রাধাকানু আপনার তনে রে।

আরো স্পষ্ট হয় যখন শুনি : ‘তন রাধা মন কানু শাহনুরে বলে।’

অথবা :

সৈয়দ শাহনুরে কয়, ভব কূলে আসি
রাধার মন্দিরে কানু আছিল পরবাসী।

অথবা ওসমানের কথায় :

রাধা-কানু এক ঘরে কেহ নহে ভিন
রাধার নামে বাদাম দিয়া চালায় রাজিদিন।
কানুরাধা একঘরে সদায় করে বাস
চলিয়া যাইবা নিষ্ঠুর রাধা কানু হইবা নাশ।

সৈয়দ মুর্তাজাও বলেন :

আনন্দমোহন মওলা খেলাএ ধামধাম
আপে মন আপে তন আপে মন হরি।
আপে কানু আপে রাধা সূটে সে মুরারি
সৈয়দ মুর্তাজা কহে, মিস, মওলা গোপতের চিন।
পুরান পিরীতি খানি ভাবিলে নবীন।

এ সঙ্গে তুলনীয় :

রাধা-কৃষ্ণ এক আত্ম দুই দেহ ধরি
অন্যোন্মোহে বিলাসে রস আশ্বাদন করি। [চৈতন্যচরিতামৃত]

বিকৃত বৈষ্ণবসাধক-বাঙলার বাউল ও অন্যান্য সম্প্রদায়ের অনেকগুলোই রাধাকৃষ্ণের রূপকে দেহতত্ত্ব জানার তথা জীবাত্মার ও পরমাআর রহস্যভেদে প্রয়াসী। শুধু তাই নয়, আধুনিক উর্দু কবি হাফিজ জালঙ্গরী থেকে বাঙালী কবি নজরুল, জসীমউদ্দীন প্রভৃতি অনেককেই এ রাধা-কৃষ্ণ কাব্য প্রেরণা দান করেছেন।

আমরা দেখেছি, তারাতাঁদ ‘Influence of Islam on Indian Culture’ গ্রন্থে, বিনয় ঘোষ ‘বাঙলার নবজাগৃতি’ গ্রন্থে এবং ভারতদর্শনসার গ্রন্থে উমেশচন্দ্র ভট্টাচার্য অদ্বৈতবাদ ও ভক্তিবাদের বিকাশ মুসলিম প্রভাবপ্রসূত বলে অনুমান করেছেন। সুকুমার সেন তাঁর ‘বাঙ্গালা সাহিত্যের ইতিহাসে’ চৈতন্য প্রবর্তিত বৈষ্ণবধর্ম মুসলিম প্রভাবজ বলে এক রকম স্বীকার করেছেন। আর উপেন্দ্রনাথ ভট্টাচার্য তাঁর ‘বাংলার বাউল ও বাউল গান’ গ্রন্থে বাউল মত

^১ বাঙলা সাহিত্যের ইতিহাস (৩য় সং পূর্বাবধি) : “রাজসভাপ্রিত উচ্চতর সমাজে হিন্দু-মুসলমানের মধ্যে সাংস্কৃতিক আপোস কিছু হয়েছিল। ইহার পিছনে দরবেশ ফকীরদেরও প্রভাব ছিল এবং এই সূত্রে গৌড়ীয় বৈষ্ণবধর্মে সূক্ষ্ম প্রভাবের কিছু ছাপ পড়িয়াছিল বলিয়া মনে হয়।” পৃ ২৪৫।

বাঙালী মুসলিম মানস উদ্ভূত বলে সিদ্ধান্ত করেছেন। সুনীতিকুমার চট্টোপাধ্যায়ও বৈষ্ণবমতে ও পদসাহিত্যে সুফী প্রভাব স্বীকার করেছেন।^২

তবু এসত্য অস্বীকার করবার উপায় নেই যে প্রভাবটি পারস্পরিক হয়েছিল। কবীর, দাদু, লজ্জব, আউল লালন ফকির প্রভৃতি দেশীয় মুসলমান আর শাহ বুআলি কলন্দর, গাউস গোয়ালিয়র, বুলেহ শাহ, শাহ আবদুল লতিফ থেকে বাঙালার সৈয়দ আইনুদ্দীন প্রভৃতি বিদেশাগত মুসলিম বংশধরগণ অবধি সবাই নানাভাবে অল্প বিস্তর প্রভাবিত হয়েছেন ভারতীয় তত্ত্বচিন্তার দ্বারা।

সুফীমতবাদী হলেও একেশ্বরবাদী মুসলমানের মনে রাধা-কৃষ্ণের রাস, মৈথুন প্রভৃতির কল্পনা প্রশয় পাওয়ার কথা নয়। তাই তাঁরা রূপ, অনুরাগ, বংশী, অভিসার, মিলন, বিরহ প্রভৃতিতে জীবাত্মা-পরমাত্মার সম্পর্ক সূচক ও ব্যঞ্জনক বলে গ্রহণ করতে পারলেও বস্ত্তহরণ দান, সঙ্কোচ, ঋতিতা, বিপ্রলঙ্ঘ্য প্রভৃতির সঙ্গে তাঁদের অধ্যাত্মতত্ত্বের মিল খুঁজে পাননি, তাই মুসলমানের লেখায় ও-সব শ্রেণীর পদ সাধারণত পাওয়া যায় না। তাদের রচনায় অনুরাগ ও বিরহবোধ এবং জীবন জিজ্ঞাসাই বিশেষরূপে প্রকট। সৃষ্টিলীলা দেখে স্রষ্টার কথা মনে পড়ে-এটিই রূপ; এ সৃষ্টি বৈচিত্র্য দেখে স্রষ্টার সঙ্গে সম্পর্কবোধ জন্মে- এটিই অনুরাগ; এবং তাঁর প্রতি কর্তব্যবুদ্ধি জাগে- এটিই বংশী; আর সাধনার আদিত্তরে পাওয়া-না-পাওয়ার সংশয়বোধ থাকে- তারই প্রতীক নৌকা। এর পরে ভাবপ্রবণ মনে আত্মসমর্পণ ব্যঞ্জনক সাধনার আকাজক্ষা উগ্ধ হয়- এটিই অভিসার। এ ভাবে সাধনার এগিয়ে গেলে অধ্যাত্মশক্তি আসে- তাই মিলন। এরও পরে চরমাকাজক্ষা- একাত্ম হওয়ার বাঞ্ছা যার নাম বাকাবিল্লাহ- এই বিরহ। মৃত্যুর আগে সাধারণের চরম মিলন নেই- তাই বাকাবিল্লাহ সূচক পদ নেই। কেউ কেউ সে দুর্লভ সৌভাগ্য লাভ করেন- তাঁরাই বাকাবিল্লাহ হন - আর বলেন 'আনল হক' - যেমন মনসুর, বায়েযীদ প্রমুখ সাধক বলেছেন। সৈয়দ মূর্তজার ফারসি গজলে রাধাকৃষ্ণ নেই এবং নূর কুতুব-ই-আলমের বাংলা পদে রাধাকৃষ্ণ আছেন। এ আলোকে যাচাই করলে রাধা-কৃষ্ণ লীলা যে সুফীতত্ত্ব প্রকটের দেশী রূপক সে সম্বন্ধে নিঃসংশয় হওয়া যায়। এজন্যই মুসলিমরচিত প্রদ রাগানুগ নয়। এ ব্যাপারে ডক্টর শশিভূষণ দাশগুপ্তের মন্তব্য উল্লেখ্য : “একথা নিঃসন্দেহে বলা যাইতে পারে যে বাংলার মুসলমান কবিগণ রাধাকৃষ্ণকে লইয়া যে পদ রচনা করিয়াছেন তাহা কোনও বিধিবদ্ধ বৈষ্ণব ধর্মের আওতায় রচিত নহে। ...বৈষ্ণবের মতে রাধাকৃষ্ণের যত লীলা তাহার ভিতর মানুষের কোন স্থান নাই। লীলা হইতেছে নিত্যকাল অপ্রাকৃত বৃন্দাবনে (স্বরূপ-ধামে) কৃষ্ণ এবং তাহার হৃদিন্যাত্মক স্বরূপশক্তি রাধার সঙ্গে; জীব সেখানে লীলা পরিকর-ভূত সাক্ষী মাত্র, সে দূর হইতে লীলাদর্শন ও আনন্দান করে এবং কথায় সুরে সেই লীলাকীর্তন করে। শ্রীরাধা এবং স্বরূপভূত নিত্যসিদ্ধ গোপগোপীগণ ব্যতীত অন্য কাহারও ভগবান শ্রীকৃষ্ণের সহিত লীলার কোনও অধিকার নাই; শ্রীকৃষ্ণের সহিত মিলন বাসনাও বৈষ্ণব সিদ্ধান্ত বিরুদ্ধ। ...কিন্তু অন্যরূপ পরিণতির সম্ভাবনা দেখা দিল মুসলমান কবিগণের ভিতরে, কারণ তাঁহারা চৈতন্য প্রবর্তিত একটি সাধারণ প্রেমধর্মের প্রভাব সামাজিক-উত্তরাধিকার সূত্রে লাভ করিলেন; একটা সাহিত্যিক বিষয়বস্ত্ত এবং প্রকাশভঙ্গিও উত্তরাধিকার সূত্রেই পাইলেন, কিন্তু পাইলেন না রাধাকৃষ্ণ লীলা সম্বন্ধে কোন স্থিরবদ্ধ ভাবদৃষ্টি। সুতরাং বাংলার জনসমাজে যে

^২ পরিচয় সুনীতিকুমার স্মরণ সংখ্যা : সুরজিৎ দাসগুপ্তকে লেখা চিঠি। পৃঃ ৪৬, ৫১।

সাধারণ ভক্তিদর্ম ও যোগধর্ম প্রচলিত ছিল এই সকল কবিগণ রাধাকৃষ্ণের প্রেমলীলাকে সেই সকলের সঙ্গেই যুক্তি করিয়া লইলেন।

“বাংলাদেশের প্রেমপন্থী মুসলমান সাধকগণ অল্পবিস্তর সকলেই সুফীপন্থী। সুফীমতে প্রেমই হইল ভগবানের পরম স্বরূপ, প্রেমের দ্বারাই আবার এই জগৎ সৃষ্টি। নিজের অনন্ত প্রেম আশ্বাদনের জন্যই এক পরম স্বরূপের বহুরূপে লীলা-ইহাই হইল সৃষ্টি তাৎপর্য। জীব হইল এই ‘একে’র সৃষ্টি লীলার প্রধান শরিক— লীলা দোসর। ... সুফীপ্রেমধর্ম এবং বাংলার প্রিমধর্ম জনগণের মধ্যে যে একটি জনপ্রিয় সহজ সমন্বয় লাভ করিয়াছে, বাংলাদেশের মুসলমান কবিগণ সেই সমন্বয়জাত প্রেম-ধর্মের আদর্শের সহিত অনেক স্থলে মিলাইয়া লইয়াছেন। ফলে রাধার যে পূর্বরাগ অনুরাগ বিরহের আর্তি তাহা কবিগণের জ্ঞাতে অজ্ঞাতে পরম দয়িতের জন্য নিখিল প্রেম সাধকগণের পূর্বরাগ বিরহের আর্তিতেই পরিণতি লাভ করিয়াছে এবং সেই আর্তির ক্ষেত্রে কবি নিজেকে শুধু দর্শক বা আশ্বাদক রূপে খানিকটা দূরে সরাইয়া লন নাই, নিখিল আর্তির সহিত নিজের চিত্তের আর্তিকেও মিলাইয়া দিয়াছেন। ইহারই ফলে গৌড়ীয় বৈষ্ণব কবিগণের ভাবদৃষ্টি হইতে বঙ্গীয় মুসলমান কবিগণের ভাবদৃষ্টি অনেক স্থানে পৃথক হইয়া পড়িয়াছে। আমরা মুসলমান কবিগণের রচিত রাধাকৃষ্ণ লীলা সম্বন্ধীয় পদগুলির ভাগিতা লক্ষ্য করিলেই এই কবিগণের মূল ভাবদৃষ্টিরও ইঙ্গিত পাইব।”

৯. বৈষ্ণবমতের স্বরূপ ও প্রভাব

ষোল শতকে বৈষ্ণবমতের উদ্ভবে যে ভাববিপ্লব দেখা দিল, তার প্রভাব গণমনের সংকীর্ণতা ও ত্রুষ্ণ সাম্প্রদায়িক ভেদবুদ্ধি দূর করেছিল। উদার মানবিক বোধে বাঙালীর চিত্তের প্রসার, এবং রুচির বিকাশ ঘটেছিল, চৈতন্যোত্তর যুগের মুগ্ধলকাব্যগুলোতে অসূ্যামুক্ত আবহাওয়া সৃষ্টি করা তাই সম্ভব হয়েছিল। এ সময়ে নিশ্চিতই রাধা-কৃষ্ণ লীলামহিমা বাঙালীর চিত্তহরণ করেছিল। নরে নারায়ণ দর্শন কিংবা জীবে ব্রহ্মের স্থিতি অনুভব করা যুগের রেওয়াজ হয়ে দাঁড়িয়েছিল। সমাজে ধর্মে ও রাষ্ট্রশাসনে আকবরের উদার নীতি এই বোধ আরো উজ্জীবিত করেছিল। তাই ষোল শতক বাঙালী জীবনে ছোটখাট রেনেসাঁসের যুগ।

এই শতক অনিবার্য কারণে বাঙলা সাহিত্যেরও সোনার যুগ। পনেরো শতকের বাঙালীর রচনা বিচ্ছিন্ন ও বিরল প্রয়াসে সীমিত। কিন্তু ষোল শতকের নব বৈষ্ণবীয় উচ্ছল ভাববন্যায় বাঙালী হৃদয় প্রাবিত হয়ে ভাষা-সাহিত্যের আঙিনায়ও উপছে পড়েছিল। কবির সংখ্যাধিকো, সৃজন পটুতায়, রচনার প্রাচুর্যে ও বৈচিত্র্যে এই শতক গোটা মধ্যযুগের মধ্যমণি। ভাবের, ভাষার এবং রূপের ও চিত্রকল্পের স্বতোৎসারে এই শতকের সাহিত্য অনন্য।

কিন্তু এ রেনেসাঁস একান্তই বৈষ্ণবের। এ প্রাণপ্রাচুর্য চৈতন্যদেবেরই দান। তাই অবৈষ্ণবেরা এই বিপ্লব-বন্যায় বিমূঢ় ও স্তব্ধ হয়ে গিয়েছিল। ষোল শতকে অবৈষ্ণবের রচনা বিরল। এই বন্যার প্রথম তোড় মন্দা হবার মুখে ষোল শতকের শেষ পাদে অবৈষ্ণবেরা সখিং ফিরে পেতে থাকে। কিন্তু তখন তাদেরও অজ্ঞাতে তাদের চিত্ত চৈতন্যদেবের প্রেমবাদে সমর্পিত। যোগতান্ত্রিক বৌদ্ধদের যারা ইসলাম ও ব্রাহ্মণ্য সমাজের প্রচ্ছন্ন নিজেদের ধর্মমত প্রচ্ছন্ন রেখেছিল, তাঁরাও চৈতন্য-অদ্বৈত-নিত্যানন্দ-বীরভদ্রের দোহাই দিয়ে রাধা-কৃষ্ণের

^১ শ্রীরাধার ক্রমবিকাশ, পৃ. ৩২১-৩০

লীলাবাদকে সম্বল করে নিল। এরাই নতুন বৈষ্ণবসহজিয়া। শাক্তসমাজে শক্তির বাৎসল্য ও করুণাময়ী রূপের প্রাধান্য, শৈবসম্প্রদায়ে ভোলানাথ শিবের জনপ্রিয়তা এবং তান্ত্রিক কাঠিন্যে প্রীতিরসের প্রবণতা বৈষ্ণবপ্রভাবের প্রত্যক্ষ ফল।

ষোল শতকে চৈতন্যোত্তর কালে তথা ষোল শতকের শেষ পাদে আমরা নিশ্চিত রূপে দুইজন হিন্দু কবির সাক্ষাৎ পাই। দুইজনই রচনা করেছেন চণ্ডীমঙ্গল। এবং উভয়েই চৈতন্যচরণে আত্মনিবেদন করেছেন। দ্বিজমাধব বা মাধবাচার্য তাঁর গঙ্গামঙ্গলের এক ভণিতায় বলেছেন :

চিন্তিয়া চৈতন্যচন্দ্র চরণকমল

দ্বিজ মাধবে কহে গঙ্গামঙ্গল।

পনেরো শতকের হিন্দুকবি : বড়ু চণ্ডীদাস, কৃষ্ণিবাস, মালাধর বসু, বিজয় গুপ্ত, বিপ্রদাস পিপিলাই, কবিচন্দ্রমিশ্র আর ষোল শতকের প্রথম পাদের কবি হচ্ছেন, কবীন্দ্র পরমেশ্বর দাস শ্রীকর নন্দী ও দ্বিজ শ্রীধর। এঁদের মধ্যে পাঁচজন সুলতান বা সামন্ত প্রতিপোষণেই লেখনী ধারণ করেছিলেন। অতএব এঁদের সাহিত্যিক প্রয়াস নতুন গড়ে ওঠা সাংস্কৃতিক-পরিমণ্ডলের প্রথম দান।

নতুন সাংস্কৃতিক পরিবর্তনের দ্বিতীয় দান বাঙলায় ব্রাহ্মণ্যধর্মের ও সমাজের সংস্কার প্রয়াস এবং হিন্দুর মনে নতুন জীবন-স্বপ্নের উদ্ভাস। [গৌড়ে ব্রাহ্মণ রাজা হৈব হেন আছে]।

এর তৃতীয় দান উত্তর ভারতের সন্ত ধর্মের অনুসরণে সুফীপ্রভাব দক্ষিণ ভারতের অমৈততত্ত্বের ও ভক্তিবাদের ভিত্তিতে নব অচিন্ত্যতত্ত্বতত্ত্ববাদ ও প্রেমবাদের উদ্ভব। চৈতন্যের ব্যক্তিক মনীষার ফসল এই নব অধ্যাত্মবাদ প্রচারিত হলেও এ কোন আকস্মিক অকারণ ঘটনা নয়।

জনাযুগে বিন্যস্ত সমাজে নিম্নবর্ণের সাধারণ মানুষের জীবন নিয়তির অমোঘ বিধানের মতো পৈতৃক পেশার নিগড়ের মাধ্যমেই নিয়ন্ত্রিত হত। ফলে পুরুষানুক্রমিক পীড়ন, তাচ্ছিল্য ও অপমান থেকে নিষ্কৃতি পাওয়ার কোন উপায় ছিল না তাদের। এতে দেহ, মন ও আত্মার উপর যে জুলুম হত, নতুন কোন আশার বা আদর্শের আলোর অনুপস্থিতির দরুন তা সহ্য করতেও তারা অভ্যস্ত ছিল। কিন্তু মুসলিম বিজয়ের ফলে তারা চোখের সামনে দেখল, আজ যে ক্রীতদাস বুদ্ধি, সামর্থ্য ও নৈপুণ্য বলে কাল সে বাদশাহী তখত অলঙ্কৃত করছে। দিল্লীতে ও গৌড়ে এই আজব কাণ্ড হামেশাই ঘটছে। দেখতে পাচ্ছে সামান্যের মধ্যে রূপকথার নায়ককে। মানুষের আত্মপ্রসারের এই অনিঃশেষ ক্ষেত্রে সন্ধান পেয়ে তারা ব্রাহ্মণ্য সমাজের বাঁধন ছিঁড়বার জন্যে চঞ্চল হয়ে উঠল। মানুষ অবিশেষের জীবনের বিরাট সম্ভাবনার সন্ধান যখন একবার পেল, তখন তাদের ধরে রাখা দুঃসাধ্য হয়ে উঠল। ব্রাহ্মণ্যসমাজ বাঁধন যত শক্ত করতে চাইল, ছিঁড়বার আশঙ্কা ততই বাড়ল। কারণ পাখি যখন নব দিগন্তের সন্ধান পেয়েছে, সে উড়বার চেষ্টা করবেই।

ব্রাহ্মণ্যবাদীর এ প্রয়াস যখন ব্যর্থ হল তখনই শুরু হল চৈতন্যদেবের নেতৃত্বে স্মৃতি ও শাস্ত্র দ্রোহী সমাজ গঠনের আন্দোলন। এবং এ উদ্দেশ্যে মোটামুটি সিদ্ধ হয়েছে। কেননা, অন্যথায় যারা ইসলাম গ্রহণ করত, মুখ্যত তারাই বৈষ্ণব হলো, যেমন সমাজে পতিত হবার পর খ্রিস্টধর্ম বরণ করা ছাড়া যাদের অন্য উপায় রইল না, তারাই ব্রাহ্মণ্যমত সৃষ্টি করে নতুন-পুরাতনে সন্ধি ঘটিয়ে স্বধর্মের প্রচ্ছায় আত্মরক্ষা করলো।

আগেই বলেছি বৈষ্ণব সাধন-পদ্ধতিতে ও সামাজিক আচার-আচরণে ইসলামী রীতিনীতির হুবহু অনুকৃতি রয়েছে অনেক। তবু মানুষের চারিত্রিক স্বলনপতনকে ক্ষমাসুন্দর দৃষ্টিতে দেখা আর পতিতাত্মার জন্যে করুণাবোধ করা বৈষ্ণবীয় উদারতার সুন্দরতম প্রকাশ।

অতএব, মুসলিম সংস্কৃতির মোকাবেলায় দক্ষিণ ও উত্তর ভারতে যা ঘটেছে, যোল শতকের বাঙলায়ও একই ঐতিহাসিক প্রাতিবেশিক কারণে তাই ঘটেছে। চৈতন্যের জ্যেষ্ঠ সমসাময়িক ঈশ্বরপুরী, অদ্বৈতাচার্য ও নিত্যানন্দের মধ্যে ভক্তিতত্ত্বের সূচনা আগেই হয়েছিল, তা এই উপায়ে সিদ্ধ হলো। বাঙালীর সবাই অবশ্য বৈষ্ণব হয়নি। কিন্তু এসত্য অবশ্যস্বীকার্য যে, কেউই আর স্বধর্মে ও স্বমতে সুস্থির থাকতে পারেনি, অবচেতনভাবে বৈষ্ণবীয় উদার মানবিকতার প্রভাবে পড়েছিল। তারা স্বস্থ থাকতে পারল না বটে, তবে সুস্থ মানস-আবহাওয়া পেল। কিন্তু বৈষ্ণব সমাজ সে উদারতা অবৈষ্ণবের মতো কাজে লাগাতে পারেনি, যেমন শিখেরা পারেনি নানকের মতসমস্বয়ী উদার আদর্শকে ধরে রাখতে। তারা সাম্প্রদায়িক ভেদবুদ্ধি নিয়ে আত্মপ্রতিষ্ঠায় উৎকর্ষ ও উগ্র হয়ে ওঠে। এবং এ উদ্দেশ্যে তারা সংকীর্ণতাকেই সম্বল করে। আত্মরতি সর্বাবস্থায় পরপ্রীতির পরিপন্থী। এ কেবল ব্যক্তি জীবনে নয়, সামাজিক ও জাতীয় জীবনেও সত্য। শিখদের মতো বৈষ্ণবেরাও উদার দৃষ্টি সংকুচিত করে নবগঠিত সম্প্রদায়ের আচার-আচরণ নিয়ন্ত্রণবিধি প্রণয়নে ও তাদের ধর্মতত্ত্বে অভিজাত্য আরোপপ্রচেষ্টায় সময়ের, শক্তির ও মনীয়ার অপচয় করিতে থাকে। দৃষ্টি এমনি সংকীর্ণ লক্ষ্যে নিবদ্ধ হওয়ায় তারা নতুনভাবে সাম্প্রদায়িক ভেদবুদ্ধির শিকার হয়ে উঠল। নিজেদের মধ্যেও গড়ে তুলল বিভিন্ন মতের উপসম্প্রদায় চৈতন্যের ও তাঁর পার্শ্বদের নামে।

জীবনী গ্রন্থগুলো তাদের সংকীর্ণতার ব্যুৎপত্তি বহন করছে। যেমন বৃন্দাবন দাস অবৈষ্ণব হিন্দুকে পাষণ্ডী বলেই জানতেন। বৈষ্ণব সুলভ বিনয় কিংবা সহিষ্ণুতাও তাঁর ছিল না। মনের মধ্যে তিনি সবসময়ই পাষণ্ডীর প্রতি ক্রোধ ও ঘৃণাপ্রসূত উত্তেজনা বহন করতেন। তাঁর একটি গালি তিনি ধূয়ার মতো আবৃত্তি করেছেন, 'এতো পরিহারেও যে পাপী নিন্দা করে, তবে লাখি মারো তার শিরের উপরে।' ফলে বিচ্ছিন্নতা ও স্বাতন্ত্র্যের আর একটি প্রাচীর উঠল। মিলন ময়দানের পরিসর আর একটু সংকীর্ণ হল মাত্র। বৈষ্ণবেরা এভাবে যখন বাস্তব জীবন ও প্রয়োজনকে আড়াল করে পারলৌকিক জীবনস্থলে অভিভূত এবং দৃষ্টি মাটি থেকে সরিয়ে নিয়ে আকাশে নিবদ্ধ করেছে, মুঘলবিজয়ে তখন নতুন হাওয়া বইতে শুরু করেছে।

কাজেই দাক্ষিণাত্যের ভক্তিবাদ, উত্তর ভারতের সন্তধর্ম ও বাঙলার বৈষ্ণবধর্ম একই পরিবেশ ও সমস্যাগ্রস্ত মতবাদ। তবু কেবল বৈষ্ণবধর্মেই ভক্তির প্রেমরূপে মহিমামণ্ডিত প্রকাশ ঘটেছে।

বৈষ্ণব মতে সৃষ্টি এবং স্রষ্টা অভিন্নও বটে— আর ভিন্নও বটে। যেমন পানি বিহীন ঢেউ হয় না, কিন্তু পানি ছাড়া ঢেউয়ের একটা রূপ কল্পনা করা যায়। তেমনি রোদ ও সূর্যকে একাধারে অভেদ ও পৃথক করে কল্পনা করা সম্ভব। তাত্ত্বিক কবি হাজী মুহম্মদের ভাষায় :

বীজ হোন্তে বৃক্ষ যেন বৃক্ষ হোন্তে ফল।

ফল, বৃক্ষ, বীজ— এই তিন নাম হয়

একে হয় তিন জান তিনে এক হয়।

বীজ বৃক্ষ ফল হোন্তে কেহ ভিন্ন নয়

তথাপি ফলেরে বৃক্ষ কহন না যায়

কিন্তু

তেন মত জানিও যে আল্লা আর বান্দা
 আল্লা হোস্তে বান্দা সব হইয়াছে পয়দা ।
 গাছ আর ফল যেন হয় এক কায় ।
 তথাপি ফলের দুঃখে গাছ দুঃখী নয়
 তেন রূপে জানিও বান্দা আর খোদায় ।
 বান্দার আজাবে কভু খোদা না পীড়য়
 বান্দার মরণে কভু খোদা না মরয় ।
 আছিল আছিবে সে যে আছে সর্বক্ষণ
 জন্মমৃত্যু নাহি তান আওনাগমন ।
 [ইত্যাদি পূর্বে সুফীসাহিত্য প্রসঙ্গে উদ্ধৃত ।]

কৃষ্ণদাস কবিরাজও বলেন :

রাধা পূর্ণ শক্তি কৃষ্ণ পূর্ণ শক্তিমান
 দুই বস্তু ভেদ নাহি শাস্ত্র পরমাণ ।
 মৃগমদ তার গন্ধ যৈছে অবিচ্ছেদ
 অগ্নি জ্বালাতে যৈছে নাহি কভু ভেদ
 রাধাকৃষ্ণ যৈছে সদা একই স্বরূপ
 লীলারস আশ্বাদিতে ধরে দুইরূপ ।

এমন সূক্ষ্ম ভেদ-অভেদ তত্ত্বভিত্তিক বুলেই বৈষ্ণবমতবাদের নাম অচিন্ত্যদ্বৈতদ্বৈতবাদ । ইসলামের দ্বৈতবাদের প্রভাবেই ভারতের বৈদান্তিক অদ্বৈতবাদ বিচলন ঘটে ফলে দ্বৈতবাদ, দ্বৈতদ্বৈতবাদ বিশিষ্ট দ্বৈতদ্বৈতবাদ, অচিন্ত্যদ্বৈতদ্বৈতবাদ প্রভৃতির উদ্ভব ।

১০. অচিন্ত্যদ্বৈতদ্বৈত তত্ত্ব : চৈতন্য-দর্শন

বৈষ্ণবমতানুসারে মানুষ ও ভগবানের সম্পর্কটা সংক্ষেপে এই, 'আদিতো পরমপুরুষ স্বরূপ বিধাতা এক ছিলেন। তিনি নিঃসঙ্গ বোধ করলেন, তাই নিজ অংশ থেকে নারী স্বরূপাকে সৃষ্টি করে 'যুগল' হলেন। এখানেই পুরুষ-প্রকৃতি মায়াব্রহ্ম ও বিষ্ণুশ্রী তত্ত্বের উদ্ভব। নারীই শক্তি স্বরূপা, নারীসম্পর্কেই পুরুষ হয় শক্তিমান। মৈথুন তত্ত্বেরও উদ্ভব হয় এভাবেই। পুরুষ-প্রকৃতির তথা নারীপুরুষের মিলনেই সৃষ্টির উদ্ভব। তাঁদের সম্পর্কও প্রেমের। কাজেই সৃষ্টি প্রেমজ। তিনি চাইলেন— একোহম বহস্যাম। কেননা আমি নিজেকে বিচ্ছিন্নভাবে উপভোগ করতে চাই। আর তাই সৃষ্টি স্রষ্টার আনন্দসহচর। যেখানে স্রষ্টার সঙ্গে মানুষের আনন্দের তথা প্রণয়ের সম্পর্ক সেখানে নিয়মরীতির ব্যবধান থাকতে পারে না। কাজেই আনুষ্ঠানিক ধর্মের সেখানে ঠাই নেই। অনুরাগে প্রেমের উন্মেষ, বিরহবোধে এর উপলব্ধি এবং মিলনে এর সার্থকতা। বৈষ্ণবের কথায় এ মিলন মানে যুগলরূপ ও অভেদরূপ। এর অন্য নাম রাগাত্মিকা ভক্তি। এ সাধনার বৈষ্ণবীয় নাম 'রাধাভাব'। সাধারণের জন্যে এ সাধনা নয়। সাধারণ মানুষ ভগবানের কৃপাকামীমাত্র তাই তার কেবল গোপীভাবে সাধনা করা। গোপী গুরু, জীব শিষ্য। রাধাকৃষ্ণের লীলায় গোপীর

^১ এ সঙ্গে এ গ্রন্থের ১৫৯-৬২ পৃষ্ঠার পাঠ স্মর্তব্য ।

ভূমিকা লীলাসহচরীর :

দুই মুখ নিরখিব

দুই অঙ্গ পরশিব

সেবা করিব দোহাকার।

ললিত বিশাখা সঙ্গে

সেবন করিব রঙ্গে

মালা গাঁথি দিব নানা ফুলে।

এজন্যেই রাধার সাধনা রাগাত্মিকা আর গোপীর তথা বৈষ্ণবের সাধনা রাগানুগা।

এক প্রাচীন গোপজাতির লোককথার নায়ক প্রেমিক কৃষ্ণ এবং মহাভারতের নায়ক অবতার কৃষ্ণ কালে লোকশ্রুতিতে অভিন্ন হয়ে ওঠেন। গোপীপ্রধানা রাধার সঙ্গে তাঁর প্রণয়ই হ্রীবাঙ্গা-পরমাত্মার প্রণয়লীলার রূপক হিসেবে প্রতিষ্ঠা পেয়ে ধর্ম-দর্শনের ও সাধন-ভজনের অবলম্বন হয়েছে।

বৈষ্ণবের মতে :

আত্মেন্দ্রিয় প্রীতি ইচ্ছা তারে বলি কাম

কৃষ্ণেন্দ্রিয় প্রীতি ইচ্ছা ধরে প্রেম নাম।

বৈষ্ণবেরা এই কৃষ্ণেন্দ্রিয় প্রীতির উন্মেষ-পদ্ধতির কথা এভাবে বলেন :

সাধন ভক্তি হইতে হয় রতির উদয়

রতি গাঢ় হৈলে তার প্রেম নাম হয়।

প্রেমবৃদ্ধি ক্রমে স্নেহ মান প্রণয়

রাগ অনুরাগ ভাব মহাভাব হয়।

বৈষ্ণবের মতে ভগবান রস স্বরূপ : রসো বৈ সঃ। আবার তিনি সবার প্রিয়, বন্ধু ও আত্মীয়রূপ : প্রেষ্ঠো ভবান তনুভূত্যাং কিল বন্ধুরাত্মা। তিনি এক ছিলেন, জীবনলীলা আত্মদানের জন্যে বহু হলেন : 'একোহম বহুস্যাম'। সৃষ্টির মাধ্যমে তিনি লীলারস আত্মদান করেছেন : পিতা, পুত্র, মাতা, কন্যা, ভগ্নী, জায়া, সখা প্রভৃতি রূপে তিনি প্রেম দিচ্ছেন এবং নিচ্ছেন। 'শান্ত দাস্য সখ্যা বাৎসল্য মধুর নাম'/'কৃষ্ণভক্তিরস মध्ये এ পর্যন্ত প্রধান।' 'হাস্যাত্ত্বত বিয় করুণ, রৌদ্র, বীভৎস ভয়/পঞ্চবিধ ভক্তে গৌণ সপ্তরস হয়।' রবীন্দ্রনাথও বলেন :

বন্ধু হয়ে পিতা হয়ে জননী হয়ে

আপনি তুমি ছোট হয়ে এস হৃদয়ে।

আবার তিনি রূপময়ও। তিনি যেমন মধুর, তেমন সুন্দর। সৃষ্টি তাঁর সৌন্দর্যেই প্রথম আকৃষ্ট হয়। তাই সৃষ্টির প্রধান উপাস্য-রূপ।

চোখের দাবী মিটলে পরে তখন ঝোঁজে মন

তাই তো প্রভু সবার আগে রূপের আকিঞ্চন। (সত্যেন দত্ত)

রবীন্দ্রনাথ বলেন :

তোমায় আমায় মিলন হবে বলে

আলোয় আকাশ ভরা,

তোমায় আমায় মিলন হবে বলে

এমন ফুলশ্যামল ধরা।

দুনিয়ার পাঠক এক হও! ~ www.amarboi.com ~

ভগবান রূপের আকর এবং গুণের ভাণ্ডার। এমনকি ‘রূপ দেখি আপনার কৃষ্ণ হয় চমৎকার/আশ্বাদিতে স্বাদ উঠে মনে।’ এমনি অবস্থায় : ‘রূপের পাথারে আঁখি ডুবিয়া’ থাকে, যৌবনের বনে মন হারাইয়া’ যায়, ‘ঘরে যাইতে পথ অফুরান’ হয়। তখন : ‘রূপ লাগি আঁখি ঘুরে গুণে মন ভোর’ হয় এবং ‘প্রতি অঙ্গ লাগি প্রতি অঙ্গ কাঁদে। রূপময় এবং রসময় ভগবানের প্রতি এই হচ্ছে পূর্বরাগ ও অনুরোধ। তখন : ‘হিয়ার পরশ লাগি হিয়া কাঁদে’ এবং ‘পরান পিরীতি লাগি থির নাহি বাঁধে।’

রবীন্দ্রনাথও বলেন :

এই পেয়েছি সঙ্গ তব সুন্দর হে সুন্দর
ধন্য হল অঙ্গ মম পুণ্য হল অন্তর।

অথবা, আমার সকল রসের ধারা তোমাতে আজ হোক না হারা
জীবন ব্যোপে লাগুক পরশ
ভুবন ব্যোপে জাগুক হরষ
তোমার রূপে মরুক ডুবে
আমার দুটি আঁখি তারা।

অথবা, গায়ে আমার পুলক জাগে
চোখে লাগে ঘোর
হৃদয়ে মোর কে বেঁধেছে
রাঙা রাখির ডেকি।
আনন্দ আজ কিসের ছলে
কাঁদিতো চায় নয়ন জলে
বিরহ আজ মধুর হয়ে
করেছে প্রাণ ভোর।

অথবা, আকাশ জুড়ে আজ লেগেছে তোমার আমার মেলা
দূরে কাছে ছড়িয়ে গেছে তোমার আমার খেলা।

তখন কানের কাছে, - ‘মনের মাঝে বাঁশী বাজে- সে বাঁশী ডাকে’। তখন ‘চিন্তাকাড়া কালার বাঁশী (সবারই) অন্তরে লাগে’; তখন বাঁশী ‘কানের ভিতর দিয়া মরমে পশিয়া’ প্রাণ আকুল করে।

রবীন্দ্রনাথ ও বলেন :

আমি যে আর সইতে পারি নে
সুর বাজে মনের মাঝে গো
কথা দিয়ে কইতে পারি নে।

তখন বিনা প্রয়োজনের ডাকে ডাকবো তোমার নাম
সে ডাকে মার শুধু শুধুই পূর্বে মনস্কাম।

এমনি অবস্থায় ঘরে থাকা দায়। কেননা তখন ‘বেদনার ঢেউ উঠে জাগি সুদূরের লাগি’। এরই নাম বিরহ। মানবাত্মার সুগু বিরহবোধের উদ্বোধনই সুফী-বৈষ্ণবের সাধ্য। তাই সুফী গজলে ও বৈষ্ণবপদে আমরা মিলন পিপাসু বিরহী আত্মার করুণ কান্নার ধ্বনি শুনতে পাই।

দুনিয়ার পাঠক এক হও! ~ www.amarboi.com ~

কেননা 'জনম অবধি রূপ নেহারলে'-ও নয়ন তৃপ্ত হয় না, আর 'লাখ লাখ যুগ হিয়ে হিয়া' রাখলেও হিয়া জুড়ায় না। শুধু কি তাই! ক্ষণে ক্ষণে 'বেদনার ঢেউ উঠে জাগি' আর তাই 'আজিও কাঁদিছে রাধাহৃদয়কুটির'। না-পাওয়ার বেদনা আর পেয়ে হারানোর শঙ্কা মানবাত্মায় যে চিরন্তন দুঃখ জাগিয়ে রেখেছে, তার সীমা-শেষ নেই। এজন্যেই যখন সাক্ষাৎ হয়, তখনো 'দুইকোড়ে দুই কাঁদে বিচ্ছেদ ভাবিয়া'। খণ্ড মানবাত্মা অখণ্ড ব্রহ্মে লীন হতে চায়। তাই বিচ্ছেদের-বিরহের এ বেদনা ও আকুলতা। সে আকুলতার আতিশয্যেই 'পর্বত আকাশের নিরুদ্দেশ মেঘ হতে চায় এবং 'তরুণশ্রী পাখা মেলি মাটির বন্ধন ফেলি' ছুটে।

বৈষ্ণবেরা চিরসুন্দর, চিরমধুর চিরনবীন ও চিরকরণাময় ভগবানের মধুররূপেরই উপাসক। এই জন্যেই বৈষ্ণবমত প্রধানত রূপধর্ম।

কৃষ্ণের মধুররূপ গুন সনাতন

সর্বপ্রাণী করে আকর্ষণ।

এমন কি 'রূপ দেখি আপনার, কৃষ্ণ হয় চমৎকার, আনন্দিত হৈ স্বাদ জাগে মনে।'

- এর জন্যেই রূপের পাথারে আঁখি ডুবে থাকে।

১১. বৈষ্ণবের ষাটশতক

১. যুগলরূপ : রসস্বরূপ কৃষ্ণ এবং মহাভাব স্বরূপিনী রাধা তত্ত্ব এক এবং অভিন্ন :

রাধা পূর্ণশক্তি কৃষ্ণ পূর্ণ শক্তিমান

দুই বস্তু ভেদ নাই শাস্ত্র পরমাণ।

এই যুগল রূপই বৈষ্ণবের উপাস্য।

আবার রাধা 'হ্রাদিনী' শক্তি।

কৃষ্ণকে আহ্বাদে তাতে নাম হ্রাদিনী।

হ্রাদিনীর সার অংশ তার প্রেম নাম :

প্রেমের পরম সার মহাভাব জানি

সেই মহাভাবরূপ রাধা ঠাকুরাণী।

হেন মহাভাব যার মনে উপজয়

বেদধর্ম তেজি সে যে কৃষ্ণকে ভজয়।

২. প্রকাশ ও বিলাস : ভগবান নিজে বিলাস-ইচ্ছায় বিচিত্র-সৃষ্টিক্রমে প্রকটত হয়েছেন। রসিক এবং করুণাময় রূপেই তাঁর এই বিলাসলীলা চলে। তিনি একাধারে বস্তু ও ভোক্তা।

রসিক শেখর কৃষ্ণ পরম করুণ।

এই দুই হেতু হৈতে ইচ্ছায় উদগম।

৩. রসাস্বাদন :

রাধাকৃষ্ণ এক আত্মা দুই দেহ ধরি।

অন্যোন্মো বিলাস রস আস্বাদন করি।

ভগবান এক ছিলেন, লীলা-রস উপভোগের জন্যেই নিজ অংশ থেকে রাধাকে সৃষ্টি করলেন সঙ্গিনীরূপে। আর একই কারণে তিনি সৃষ্টিক্রমে বহু হলেন। তাই কৃষ্ণ বলেন :

দুনিয়ার পাঠক এক হও! ~ www.amarboi.com ~

রাই তুমি সে আমার গতি

তোমার কারণে রসতত্ত্ব লাগি গোকুলে আমার স্থিতি ।

৪. পরস্পর ভজনা : স্রষ্টার জন্যে সৃষ্টির যেমন আকুলতা, সৃষ্টির জন্যেও স্রষ্টার তেমন আকর্ষণ । রাধা-কৃষ্ণ পরস্পর পরস্পরের প্রতি আকৃষ্ট হচ্ছেন ।

তাই কৃষ্ণ বলেন :

না জানি রাধার প্রেমে আছে কত বল

যে বলে আমারে করে সর্বদা বিহ্বল ।

অথবা, সুন্দরি আমারে कहিছ কি ।

তোমারি লাগিয়া ভাবিয়া বিভোর হইয়াছি ।

রাধাও বলেন : [কৃষ্ণ] পাখিক পাখ মীনক পানি

জীবক জীবন হাম ঐছে জানি ।

পরস্পরের সম্বন্ধটা এরূপ :

এমন পিরীতি কতু দেখি নাই শুনি

পরানে পরাণ বাধা আপনা আপনি

দুই কোঁড়ে দুই কাঁদে বিচ্ছেদ ভাবিয়া

তিল আধ না দেখিলে যায় যে সুরিয়া ।

৫. ভগবান ও মানুষ : মানুষ ভগবানের অংশ । মানুষ ভগবানের পরাপ্রকৃতি :

অনন্ত ক্ষটিকে যৈছে এক সূর্য ভাসে

তৈছে জীব গোবিন্দের অংশ প্রকাশে ।

তাই, কৃষ্ণের যতেক-স্ত্রী সর্বোত্তম নরলীলা

নরবপু তাহারি স্বরূপ ।

৬. মানবের সাধ্যবস্ত্ত : মানুষের সাধ্যবস্ত্ত প্রেম । এই প্রেমের আলোকেই স্রষ্টাকে বোঝা যায়, তার প্রসন্ন প্রসাদ লাভ ঘটে ।

৭. মানবের সাধন : কেবল গোপীভাবে দ্বারাই স্রষ্টার কৃপালাভ করা সম্ভব । নিষ্কামভাবে তথা ফলাকাঙ্ক্ষা না করে রাধাকৃষ্ণকে ভালবাসার নামই

গোপীভাব : সেই গোপীভাবামতে যার লোভ হয়

বেদধর্ম তেজি সেই কৃষ্ণকে ভজয় ।

এবং রাগানুগামার্গে ভজনাই গোপীভাবে সাধনা :

রাগানুগামার্গে তারে ভজে যেই জন

সেইজন পায় ব্রজে ব্রজেন্দ্র নন্দন ।

বৈষ্ণবেরা সৃষ্টিদের মতে স্রষ্টার সঙ্গে একাত্ম হবার সাধনা করে না, রাধাকৃষ্ণের লীলাসহচর রূপেই তাদের সিদ্ধি । গোপীরা যেমন রাধাকৃষ্ণের লীলা সহচরী, অর্থাৎ এদের লীলা দেখা, শোনা, জানা ও সহায়তা করাই গোপীদের লক্ষ্য,

এতেই তাদের তৃপ্তি :

রাধার স্বরূপ- কৃষ্ণ প্রেমলতা

সখীগণ হয় এই লীলার পুষ্টি পুষ্পপাতা ।

সখী বিনু এই লীলার পুষ্টি নাহি হয়
সখী লীলা বিস্তারিত সখী আশ্বাদনয়।
সখী স্বভাব এক অকথ্য কথন
কৃষ্ণসহ নিজ লীলায় নাই সখীর মন।
কৃষ্ণসহ রাধিকার সে লীলা করায়
নিজ কেলি হোতে তাহে কোটি সুখ পায়।

তেমনি গোপীভাবের সাধক বৈষ্ণবদেরও তাই কামনা। এজন্যই বৈষ্ণবেরা :

অতএব গোপীভাব করি অঙ্গীকার
রাত্রি দিন চিন্তে রাধা-কৃষ্ণের বিহার।
সিন্ধুদেহে চিঙ্কি করে তাহাঞি সেবন
সখীভাবে পায় রাধা-কৃষ্ণের চরণ।

হৃদয়রূপ বৃন্দাবনে রাধারূপ জীবাাত্রার সঙ্গে কৃষ্ণরূপ পরমাত্রার প্রণয়লীলার অনুধ্যানই বৈষ্ণবব্রত।

৮. পূর্বরাগ-অনুরাগ : প্রেমের উন্মেষে রূপানুরাগই প্রথম স্তর-এটাই পূর্বরাগ, রূপ ও গুণমুগ্ধতাই অনুরাগ- এটি দ্বিতীয় স্তর।

৯. অভিসার : মিলনসাধনার গুরুই অভিসার।

১০. বাসকসম্বন্ধ : হৃদয়ে ভগবানের আবির্ভাবের প্রতীক্ষাই বাসকসম্বন্ধ।

১১. মিলন : ভগবানের সান্নিধ্য উপলব্ধিই মিলন।

১২. গৌরাঙ্গ : রাধাকৃষ্ণের যুগলাবতার গৌরাঙ্গ-চৈতন্যদেব। তাঁকে শরণ করেই রাধাকৃষ্ণের সাধনা করতে হবে :

শ্রীরাধার ভাবকান্তি করি অঙ্গীকার

নিজ রূপ আশ্বাদিতে হইলা অবতার।

তাই গৌরাঙ্গ-গৌরচন্দ্র চৈতন্য-লীলা দিয়েই আরম্ভ হয় কীর্তনগান-যার নাম গৌরচন্দ্রিকা।

কৃষ্ণের নারী-লীলা নতুন নয়। দাক্ষিণাত্যে নাক্সিন্নাই ও মায়বন যথাক্রমে রাধা ও কৃষ্ণের পূর্বরূপ। তামিল সাহিত্যে এ লীলার বহুপদ রয়েছে। তাছাড়া গাথা সপ্তশতী, অমরুশতক, সদুক্তিকর্ণামৃত, সুভাষিত রত্নকোষ, আর্ঘ্যসপ্তশতী, প্রাকৃতপৈঙ্গল প্রভৃতি সব সংকলন গ্রন্থেই শিব-উমার বিশেষ করে রাধা-কৃষ্ণের প্রণয়-লীলার শ্লোক ও পদ মেলে। পদ্ম, ভবিষ্য, ঋদ্ধ, মৎস্য পুরাণেও রাধাকৃষ্ণ লীলার কথা বর্ণিত রয়েছে। তাছাড়া গীতগোবিন্দ, শ্রীকৃষ্ণকীর্তন চণ্ডীদাসরচিত পদাবলী শ্রীকৃষ্ণবিজয় প্রভৃতিতে আছেই। নববৈষ্ণবেরা তথা গৌড়ীয় বৈষ্ণবেরা তাতে জীবাাত্রা পরমাত্রা লীলার রূপক আরোপ করেছে মাত্র। বস্তুত রাধা-কৃষ্ণ প্রেমলীলা কাব্যের সর্বভারতীয় বিষয়বস্তু। তামিলে, সংস্কৃতে, প্রাকৃতে ও অবহট্টে বহু কবি এ লীলা বর্ণনা করে পদ রচনা করেছেন।

১২. পদাবলীর রসতত্ত্ব

বৈষ্ণবপদাবলীতে পাঁচটি রস আছে— শান্ত, দাস্য, সখ্য, বাৎসল্য ও মধুর। শান্ত ও দাস্যরসের পদ নিতান্ত কম। সখ্য ও বাৎসল্যের পদও বেশি নয়। মধুর বা উজ্জ্বল রসের পদই বেশি। আদিরসেরই বৈষ্ণবীয় নাম মধুর রস। মুখ্যত এই মধুর রস আশ্বাদনের মাধ্যমেই বৈষ্ণব সাধনা চলে। এর নামই কান্তাপ্রেম' এবং এইটি সর্বসাধ্যসার। আর রাধা-প্রেম সাধ্য শিরোমণি। 'পহিলি' রাগ নয়ন ভঙ্গ ভেল, অনুদিন বাঢ়ল অবধি না গেল।' পূর্বরাগ ক্রমে অনুরাগে পরিণত হয়, অনুরাগের প্রেরণায় অভিসারের প্রয়াস জাগে, অভিসারে মিলন ঘটে। মিলনের পর মাথুর [বিরহ], তারপর আত্মনিবেদন ও প্রার্থনা।

পদের আবার লীলানুগ উপবিভাগও আছে। রাধাকৃষ্ণ লীলাকে একটি গীতিনাট্য কল্পনা করলে এই উপবিভাগগুলোর সার্থকতা বোঝা যায়। এই উপবিভাগগুলি : জন্ম, বাল্য, গোষ্ঠ, উত্তরগোষ্ঠ, দান, নৌকা, অভিসার, মিলন, বংশীশিক্ষা, বসন্ত ও হোলী, ঝুলন, রাস, মান, বিরহ ভাবসম্মিলন, নিবেদন ও প্রার্থনা। আর গৌরান্বিত বিষয়ক পদকে রাধাকৃষ্ণ গীতিনাট্যের নান্দী বা সূচনা হিসেবে গ্রহণ করা হয় বলে এগুলোকে বলে গৌরচন্দ্রিকা।

অবস্থানুসারে মধুর রস দু' প্রকার— বিপ্রলম্ব ও সঙ্গেগ। বিপ্রলম্ব আবার চার প্রকার: পূর্বরাগ, প্রেমবৈচিত্র্য [মিলনেও বিরহবোধ], মান ও প্রবাস [বিরহ]। এ চারটির প্রত্যেকটির আটটি করে উপবিভাগ আছে। বিপ্রলম্ব বিরহবোধেরই নামান্তর, কেননা, এর পূর্বরাগে, প্রেমবৈচিত্র্যে, মানে ও প্রবাসে বিরহই মুখ্য। সঙ্গেগেরও চারটি প্রধান রূপ এবং প্রত্যেকটির আটটি করে উপশাখা আছে। এভাবে চৌষট্টি অবস্থান্তরের আলেখ্য পাওয়া যায়। আবার নায়িকার বিভিন্ন অবস্থা, আচরণ ও মনোভাবের পরিচায়ক চৌষট্টি রসশ্রিত কীর্তনের ব্যবস্থা আছে। নায়িকার অষ্টাবস্থা এবং প্রত্যেকটির আটটি করে উপবিভাগ আছে : ১ অভিসারিকা—জ্যোত্স্নাভিসারিকা, জ্যোত্স্নাভিসারিকা, বর্ষাভিসারিকা, দিব্যভিসারিকা, কুজঝটিকাভিসারিকা, তীর্থযাত্রাভিসারিকা, উন্মত্তাভিসারিকা (বংশী শুনে), অসমঞ্জস্যভিসারিকা (অসংবৃত বেশে)। ২. বাসকসঙ্গা— মোহিনী (সুবেশা), জাগ্রতিকা (প্রতীক্ষায়) রোদিতা (বিলম্ব হেতু), মধ্যোক্তিকা (স্বগত-উক্তিযুক্ত), সুপ্তিকা [কপট নিদ্রিতা] কৃষ্ণভ্রমে ভ্রষ্টা, চকিতা [নিজ অঙ্গচ্ছায়া দর্শনে], সুরসা [গানে আগমনা, উদ্দেশ্যা [দূত প্রেরণেচ্ছুক]। ৩. উৎকণ্ঠিতা— দুর্মতি, বিকলা, স্তম্ভা, উচ্চকিতা, অচেতনা, সুখ্যাৎকণ্ঠিতা, মুখরা, নির্বন্ধা। ৪. বিপ্রলম্বা— বিকলা, প্রেমমত্তা, ক্রেশা, বিনীতা, নির্দয়া, প্রখরা, দৃত্যাদরা, ভীতা। ৫. খণ্ডিতা— নিন্দা, ক্রোধা, ভয়ানকা, প্রগলভা, মধ্যা, মুগ্ধা, কম্পিতা, সন্তপ্তা। ৬. কলহান্তরিতা— অগ্রহ, ক্ষুধা, ধীরা, অধীরা, কুপিতা, সমা, মৃদুলা, বিধুরা। ৭. প্রোষিতভর্তৃকা— ভাবি, ভবন, ভূত, দশদশা, দূতসংবাদ, বিলাপা, সুখ্যাতিকা, ভাবোল্লাসা। ৮. স্বাধীনভর্তৃকা— কোপনা, মানিনী, মুগ্ধা, মধ্যা, সমুজ্জিকা, সোল্লাসা অনুকূলা, অভিধিক্তা। দশদশা এরূপ : চিন্তা, জাগরণ, উদ্বেগ, কৃশতা, জড়তা, প্রলাপ, ব্যাধি, উন্মাদ, মোহ ও মৃত্যু।

বাঙলাদেশে বৈষ্ণবধর্ম তত প্রসার লাভ করেনি, কিন্তু বৈষ্ণবসাহিত্য এক সময়ে জাতিধর্মবর্ণ নির্বিশেষে সকলের মনে রসের তরঙ্গ তুলেছিল। সুলতান সুবাদারের প্রতিপোষকতায় বাঙলা ভাষা ও সাহিত্যের বুনিয়াদ তৈরি হয়, আর বৈষ্ণব রচনার দ্বারা ভাষাসাহিত্যের দ্রুত প্রসার ও বিকাশ ঘটে। কেবল সাহিত্যসৃষ্টির ও ভাষার পুষ্টির ক্ষেত্রে নয়, সামগ্রিকভাবে বাঙলার ধর্মের সমাজে সংস্কৃতিতে এবং মননেও এর প্রভাব ও দান অপরিমেয়। পরবর্তীকালে পাশ্চাত্যপ্রভাবের বিপুলতার ও বৈচিত্র্যের সঙ্গে কেবল এর তুলনা চলতে পারে।

বৈষ্ণবধর্মাসন্দোলনের ফলে এদেশের বহুলোক বৈষ্ণবমতবাদ গ্রহণ করে। এ মতবাদের প্রত্যক্ষ প্রভাবে বৈষ্ণবসহজিয়া ও বাউলমতবাদ সৃষ্ট ও পুষ্ট হয়। বৈষ্ণবমতবাদের প্রত্যক্ষ প্রভাবে শাক্তসম্প্রদায়ের ভক্তিবাদ প্রবল হয়ে ওঠে এবং প্রধানত বাৎসল্য রসশ্রিত শাক্তপদাবলী রচিত হয়। মুসলমানেরাও রাধাকৃষ্ণকে জীবাাত্রা-পরামাত্রার, দেহ-মনের, এবং ভক্ত-ভগবানের রূপক হিসেবে গ্রহণ করে পদ রচনা ও আব্বাদন করেছে। লৌকিক প্রণয়গীতিতেও নায়িকা অর্থে 'রাই' এবং নায়ক অর্থে 'কাল' সাধারণভাবে গৃহীত হয়েছে। এ সম্বন্ধে রবীন্দ্রনাথ বলেছেন, 'বর্ষাঋতুর মতো মানুষের সমাজে এমন এক একটা সময় আসে যখন হাওয়ার মধ্যে ভাবের বাষ্প প্রচুররূপে বিচরণ করিতে থাকে। শ্রীচৈতন্যের পরে বাংলাদেশের সেই অবস্থা আসিয়াছিল তখন সমস্ত আকাশ প্রেমের রসে আর্দ্র হইয়াছিল। তাই দেশে সেই সময় যেখানে যত কবির মন মাথা তুলিয়া দাঁড়াইয়াছিল সকলেই সেই রসের বাষ্পকে ঘন করিয়া কত অপূর্ব ভাষা এবং নতুন ছন্দে কত প্রাচুর্য এবং প্রবলতায় তাহাকে দিকে দিকে বর্ষণ করিয়াছিল [সাহিত্য সৃষ্টি-সাহিত্য পৃঃ ৯৬]। 'ব্রজবুলি' নামে একটি কৃত্রিম সাহিত্যিক ভাষার সৃষ্টি হয়েছে। কীর্তনের পাঁচ প্রকার সুর-তাল-পদ্ধতিও গড়ে ওঠে— ক. গড়েরহাটি খ. মনোহর শাহী, গ. রেণেটী, ঘ. মন্দারিণী ঙ. ঝাড়খণ্ডী। কীর্তন গানে কথা, দোঁহা, আখর, তুক, ছুট, ঝুমুর— এ ছয়টি অঙ্গ রয়েছে। বাদ্যযন্ত্রের মধ্যে খোল করতালই প্রধান। ভাগবতাদির কথা বাদ দিলে চোখে দেখা রক্তমাংসের মানুষের চরিতাখ্যান রচনাও শুরু হয় এ সময় থেকেই। বাঙলায় গীতিকবিতা রচনার এবং অলঙ্কার ও দর্শন শাস্ত্রে আলোচনার সূত্রপত্তি করেন বৈষ্ণবরাই।

১৩. চৈতন্যের জন্মকালের বাঙলাদেশ

বাঙলাদেশে যখন তুর্কীবিজয় ঘটে, তখন ১২০১-৪ খ্রীস্টাব্দে ভারতের অন্যান্য অঞ্চলের মতো নতুন চিন্তা-চেতনার অভিঘাতে এখানেও বিশেষ করে নিম্নবর্ণের ও নিম্নবিস্তের মানুষের মনে জাগে প্রশ্ন, ফলে তাদেরও জীবনচেতনার ও জগৎভাবনার দিগন্ত হয় প্রসারিত। মুক্তিযুগে তাদেরও করে আকুল। এরূপ ক্ষেত্রে সমাজের সুবিধাজোগীরা হয় সনাতনী ও রক্ষণশীল, আর বঞ্চিতরা হয় বিদ্রোহী। এমনি অবস্থায় রক্ষণশীলেরা হয় কূর্মস্বভাবপ্রিত। আত্মগোপন করেই তারা আত্মরক্ষায় হয় প্রয়াসী, ঘর রুদ্ধ করেই বাইরের হাওয়া ঠেকানোর চেষ্টায় থাকে নিরত। বাঙলাদেশেও তুর্কীপ্রভাব ঠেকিয়ে রাখার ও এড়িয়ে চলার জন্যে স্মৃতি-সংহিতার ব্যাখ্যা-ভাষ্য তৈরি করে সমাজবন্ধন দৃঢ় করবার চেষ্টায় নামলেন শাস্ত্রবিদ ও সমাজপতিরা। রঘুনন্দন, রঘুনাথ শিরোমণি, রামনাথ প্রমুখ অনেকেই ভাঙনের পথ বন্ধ করতে চাইলেন। কিন্তু বঞ্চিত মানুষ মুক্তির আশ্বাস এবং সামাজিক সাম্যের প্রসাদ ও বৃত্তি পরিবর্তনের ভাগ্যগড়ার পথের সন্ধান যখন একবার পেয়েছে, তখন দেব-দ্বিজের দোহাই সে মানবে কেন? তারা চোখের সামনে দেখতে পেল, শুনতেও পেল আজকের বাজারে কেনা মানুষ — মামলুক [কীর্তদাস] কাল জামাতা এবং পরন্তু সুলতান, এ যে শুধু দিল্লীতেই ঘটছিল তা নয় নবগত প্রায় যে-কোন তুর্কীর জীবনে তারা এ বাস্তব সত্য প্রত্যক্ষ করল। কীর্তদাস মানস ও কায়িক যোগ্যতা বলে সর্দার-সওদাগর-রাজপুরুষ হচ্ছে, গুণে-মানে মাহাত্ম্য সে কারো চাইতে খাটো থাকছে না। সেদিনকার বর্ণে ও বৃত্তিতে বিন্যস্ত অস্পৃশ্য ও দরিদ্র সমাজে স্বভাগ্য গড়ার এমনি সুযোগ ছিল হাতে চাঁদ পাওয়ারই নামান্তর। কারণ কামার-কুমার তাঁতী-মুচি-নাপিত ধোপা-জেলের ধনী হবার কোন উপায় ছিল না সমাজে। তারা বুঝল উচ্চবিস্তের অভিজাতরা দেব-দ্বিজ বেদের নামে তাদের ঠকিয়েছে চিরকাল। এবার জনাসূত্রে নয়, কর্মসূত্রেই জীবন হবে নিয়ন্ত্রিত।

ফলে রঘুনন্দনদেব শ্মৃতি-শাসন পাশে বাঁধা গেল না নিম্নবর্ণের ও নিম্নবিত্তের মানুষকে। এমনি অবস্থায় উত্তরভারতীয় আদলে হিন্দুর সমাজরক্ষায় এগিয়ে এলেন চৈতন্যদেব। সেদিনকার হিন্দু সমাজে তাঁর ভূমিকা ছিল অনেকটা উনিশ শতকের রামমোহনের মতো। রামমোহনও চেয়েছিলেন নতুন পরিবেশে হিন্দুর শাস্ত্রকে ও সমাজকে মেরামতের মাধ্যমে যুগোপযোগী করে খ্রীস্টধর্মের প্রসার ঠেকাতে এবং প্রতীচা শিক্ষাপ্রাণ ও সনাতন সমাজবদ্ধিত মানুষদের সমাজেই ঠাঁই করে দিতে। রামমোহন তাঁর প্রয়াসে সফল হয়েছিলেন, তাই কোলকাতা খ্রীস্টানবহুল মাদ্রাজ কিংবা সিংহল হলো না। চৈতন্যদেবের ধর্মাদোলনও সার্থক হয়েছিল, ইসলামের প্রসার বাঙলাদেশে রুদ্ধ হয়েছিল, যেমনটি হয়েছিল দাক্ষিণাত্যে ও উত্তরভারতে। ব্রাহ্মণ্যসমাজের এসব ধর্মাদোলনে স্বরূপত গীতা-শ্মৃতি সংহিতাশাসিত ধর্ম অস্বীকৃত হয়েছে বটে, কিন্তু যেহেতু সত্তরা সব হিন্দু সমাজেরই ছিলেন, তাই বাহ্যত এক প্রকারের জ্ঞাতিত্ব রয়ে গেল, যার ফলে তারা হিন্দু জাতি—এ সাধারণ সত্তায় ও সংজ্ঞায় তাদের ধর্মীয় ও রাজনীতিক সংহতি রক্ষিত হল। রাজনীতি ক্ষেত্রে এ অভিন্ন সত্তাবোধ তাদের পক্ষে একালে সুফলপ্রসূ হয়েছে।

১৪. চৈতন্যদেবের জীবনকথা

আমরা ঐতিহাসিকের দৃষ্টিতেই চৈতন্যদেবকে একজন চিন্তানায়ক, সমাজনেতা, শাস্ত্র-সংস্কারক ও যুগপুরুষ রূপে দেখব। অর্থাৎ আমরা বৈষ্ণবসুলভ বিশ্বাসবশে তাঁকে রাধাকৃষ্ণের যুগলাবতার রূপে বিচার করবো না, তাঁর অসামান্য ব্যক্তিত্ব ও যুগদুর্লভ চিন্তা-চেতনার মূল্যায়নই আমাদের লক্ষ্য। অবশ্য বৈষ্ণবেরা জানে ও মানে যে চৈতন্য স্বদেহে রাধার ভাবকান্তি এবং আত্মার কৃষ্ণের অংশ ধারণ করে রাধা-কৃষ্ণের যুগলাবতার রূপে মানবজন্ম গ্রহণ করেছিলেন। অর্থাৎ—তিনি ছিলেন নবরূপে নারায়ণ। একাধারে জীবাত্মা-পরমাত্মা। তাই বৈষ্ণব জীবনীকারেরা নন্দদুলাল কৃষ্ণের আদলে তাঁর অবতারসুলভ অলৌকিক জীবনকথা রচনা করেছেন। আমাদের দৃষ্টিতে মানুষ চৈতন্যদেব অবশ্যই একাধারে যুগন্ধর ও যুগস্রষ্টা।

সেদিন বিদেশী বিধর্মীর ধর্ম ও সংস্কৃতির মোকাবেলায় হিন্দুসমাজে বিচলন ও দ্রোহ দেখা দিয়েছিল, যার প্রতিরোধ নানা উপায় গ্রহণেও সম্ভব হয়নি। জৈন-বৌদ্ধ-ঐতিহ্যের এই অনার্থ-অধ্যুষিত দেশে চৈতন্যদেব ইসলামী সাম্য ও সুফী প্রেমবাদভিত্তিক যে প্রেমধর্ম প্রচার করলেন, তাতেই তিনি বলতে গেলে স্বকালেই আশ্চর্য সাফল্য অর্জন করলেন। অসামান্য আত্মপ্রত্যয়, উদারতা, মননশীলতা এবং যুগসমস্যার মূল কারণোপলব্ধির মতো প্রজ্ঞা, সংস্কারমুক্তি আর গণশ্রদ্ধা আকৃষ্ট করবার মতো চরিত্রগুণ ও ব্যক্তিত্ব না থাকলে এ কখনো সম্ভব হত না। আমরা এ সব চরিত্রগুহ্য থেকেই প্রত্যক্ষ প্রমাণে ও পরোক্ষ-অনুমাণে রক্তমাংসের বাস্তব মানুষ চৈতন্যদেবের জীবনের ও কৃতির রূপরেখা আবিষ্কারের চেষ্টা করবো। এর বেশি কিছুতে আমাদের এক্ষেত্রে প্রয়োজনও নেই।

জীবনে সমাজে ধর্মে কোনো সমস্যা দেখা দিলে সাধারণ মানুষ দুনিয়ার সর্বত্র একইভাবে চিন্তা করে। দেশে রাজনৈতিক, আর্থিক কিংবা নৈতিক বিপর্যয় দেখা দিলে নির্জিত দরিদ্র ও নীতিশিথিল জাতি মনে করে, ধর্মভাবহীনতাই বুঝি দুর্দিন-দুর্ভোগের পরাভব-পরাদীনতার মূল কারণ। তাই দেশপ্রাণ ও সমাজহিতৈষী সাধারণ নেতারা জনমনে ধর্মভাব ও শাস্ত্রানুগতা জাগানোর চেষ্টা করেন। সেন্ট অগাস্টিন, মার্টিন লুথার থেকে উনিশ শতকের বাঙলার ব্রাহ্ম, আর্যসমাজী, ওহাবী, ফরায়ীজী আন্দোলনে, কিংবা হালীতে ইকবালে তা আমরা প্রত্যক্ষ

করেছি। চৈতন্যের জন্মের পূর্বে ও চৈতন্যের বাল্যকালে বাঙলাদেশেও হিন্দুর শাস্ত্র সংস্কার করে হিন্দুর মনে শাস্ত্রানুরাগ জাগিয়ে মানুষকে শাস্ত্রানুগত করে তাদের রাজনৈতিক, আর্থিক, সামাজিক, নৈতিক ও শাস্ত্রিক দুর্গতি ঘুচানোর চেষ্টা হয়েছিল রঘুনন্দন প্রমুখ শাস্ত্রবিদের ও সমাজ-সর্দারের নেতৃত্বে। তখন হিন্দুর মনোবল বৃদ্ধির জন্যে রটিয়ে দেওয়া হয়েছিল যে, পুনর্জন্মত ব্রাহ্মণ্যশক্তি তুর্কীদের তাড়িয়ে স্বাধীন গৌড়রাজ্য পুনঃপ্রতিষ্ঠিত করবে। ‘গৌড়ে ব্রাহ্মণরাজ্য হবে হেন আছে।’- এ কথা জ্যোতিষ গণনায় প্রাপ্ত তথ্য হিসেবে প্রচারিত হল হিন্দুসমাজে। গৌড়-সুলতান সৈয়দ আলাউদ্দিন হোসেন শাহ (১৪৯৩-১৫১৯ খ্রীঃ) এ রটনাকে গুরুত্ব দিয়ে হিন্দুর অভ্যুত্থান সম্বন্ধে সতর্ক থাকতেন। ‘পিরল্যাগ্রামেতে বৈসে যতেক যবন’- তারা সুলতানকে জানাল, ‘গৌড়ে বিপ্ররাজ্য হবে হেন আছে।’ কাজেই নিশ্চিন্তে না থাকিও প্রমাদ হৈব পাছে।’ যখন ‘নিকটে [এই] যবন রাজ্য বড়ই দুর্বীর’ তখন নদীয়ায় চৈতন্য আন্দোলনের শুরু। নদীয়া উচ্ছন্ন কর রাজ্য আত্মা দিলা।’ ‘আচম্বিতে নবদ্বীপে হৈল রাজভয়’। ‘প্রাণভয়ে স্থির নহে নবদ্বীপবাসী’। তবে দ্বন্দ্বটি নিবন্ধ ছিল শাসক যবনে ও সমাজ সর্দার ব্রাহ্মণে, ‘ব্রাহ্মণে যবনে বাদ যুগে যুগে আছে।’

মিথিলায় তুর্কী সুলতানদের প্রভাবের দরুন ঐনবার বংশীয় রাজাদের পতনের ফলে হিন্দুর সাহিত্য, শাস্ত্র ও সংস্কৃতি চর্চার কেন্দ্র বাঙলার উত্তর ও পশ্চিমবঙ্গের প্রায় মধ্যস্থলে নবদ্বীপে স্থানান্তরিত হয়। চৈতন্যের আবির্ভাবের কালে নবদ্বীপ ব্রাহ্মণ পণ্ডিতদের বিদ্যা ও শাস্ত্র চর্চার শ্রেষ্ঠ কেন্দ্র হয়ে ওঠে। তাই নানা অঞ্চল থেকে ব্রাহ্মণেরা এখানে স্থায়ী নিবাস গড়ে তোলে। বৃন্দাবন দাসের মতে নদীয়ায় তখন প্রায় ঘরে ঘরে টোল এবং সেখানে পড়ুয়ার অন্ত নেই। নবদ্বীপে এলে লোকে যথার্থ বিদ্যারস পায়। অতএব তখন নবদ্বীপ ব্রাহ্মণ্য শাস্ত্র-সংস্কৃতির, সংস্কৃতভাষার ও সাহিত্যের চর্চার এবং সংস্কার কেন্দ্র আর ব্রাহ্মণ্যশাস্ত্রবিদের ও সমাজপতির নিবাস। এ কারণে শ্রীহট্ট থেকেও নীলাম্বর চক্রবর্তী, জগন্নাথ মিশ্র, চন্দ্রশেখর, মুরারি গুপ্ত প্রভৃতি এসে নবদ্বীপে বাস করছিলেন।

বাঙলাদেশে দুইবার একদেহে অসামান্য রূপগুণের সমাবেশ হয়েছিল। একবার চৈতন্যদেহে, অন্যবার রবীন্দ্র শরীরে। ‘এক অঙ্গে অত রূপ [এবং গুণও] নয়নে না হেরি’। বিমুক্ত দীনেশচন্দ্র সেন চৈতন্যকে প্রমুখ প্রেমরূপে বর্ণনা করেছিলেন- ‘প্রেম একবার মাত্র এই পৃথিবীতে রূপ পরিগ্রহ করিয়াছিল, সে বঙ্গদেশে’। সত্যেন্দ্রনাথ দত্তও বুঝেছিলেন ‘বাঙালীর হিয়া অমিয় মথিয়া নিমাই ধরিছে কায়া’। একথাগুলো নিতান্ত আবেগসর্বশ্ব নয়।

মিশ্র বাচির একঘর ব্রাহ্মণ উড়িষ্যার জাজপুরে বাস করত। ‘চৈতন্য গোসাঞির পূর্বপুরুষ আছিল জাজপুরে। শ্রীহট্ট দেশের পালাঞা গেল রাজা ভ্রমরের ডরে’। আবার শ্রীহট্টের জয়পুর গাঁ থেকে জগন্নাথ মিশ্র সম্ভবত প্রতিবেশী নীলাম্বর চক্রবর্তীর প্রবর্তনায় তাঁর সঙ্গে নবদ্বীপে বাস করতে আসেন। নদীয়ায় জগন্নাথ মিশ্র নীলাম্বর চক্রবর্তীর কন্যা শচীদেবীকে বিয়ে করেন।

১৪০৭ শকের ২৩ শে ফাল্গুন তারিখে দোল পূর্ণিমার সন্ধ্যায় চন্দ্রগ্রহণের সময়ে [১৪৮৬ খ্রীস্টাব্দের ১৮ই ফেব্রুয়ারি তারিখে] চৈতন্যদেবের জন্ম হয়। ব্রজমোহন দাস তাঁর চৈতন্যতত্ত্বপ্রদীপ গ্রন্থে চৈতন্যদেবের জন্মক্ষণ এভাবে দিয়েছেন : ‘শাকে চৌদ্দশত আর সপ্তবৎসর। বিষ্ণু বিংশতি তৃতীয় বৎসর অন্তর। ফাল্গুনী পূর্ণিমা বা বিষ্ণুতজান। ত্রয়োবিংশ দিনে আবির্ভাব ভগবান’। পিতা জগন্নাথ মিশ্র ও মাতা শচীদেবী। নামকরণ হয় ১৪০৭ শকের ১২ই

চৈত্র [১৪৮৬ সনের ৯ই মার্চ] বিশ্বস্তুর নাম হইল বিংশতি দিবসে' [জয়ানন্দ]। উপনয়ন হয় ১৪১৬ শকে [১৪৯৪ খ্রীঃ]।

সপ্ত বৎসরে তার কর্ণভেদ কৈল

নবম বৎসরে তার যজ্ঞ উপবীত দিল [চৈতন্যভট্টপ্রদীপ ও লোচন দাস]।

প্রথম সন্তান বিশ্বকৃপের জন্মের পরে পর পর ছয়টি নবজাতকের মৃত্যুর পরে হওয়ায় কুসংস্কার বশে চৈতন্যের নাম রাখা হয় নিমাই। ছয়পুত্র 'ছলিয়াছে নড়ছ্যাতে দেখিয়া। পিতামাতা থুইল নাম নিমাই বলিয়া' [ব্রজমোহন দাস]।- যাতে নিম তিতো বলে অথবা মাতৃহীন বলে যমের অরুচি অথবা করুণা হয়। হিন্দুদের এককড়ি, তিনকড়ি, পাঁচকড়ি নামও সন্তান বাঁচানোর জন্যে জন্ম মুহূর্তে কড়ি নিয়ে বিক্রয় করা জ্ঞাপক। নিমাই-র পোষাকী নাম রাখা হয়েছিল বিশ্বস্তুর। গৌরবর্ণ ছিলেন বলে প্রতিবেশীরা শৈশবে-বাল্যে তাঁকে গোরা, গোরাচাঁদ বা গৌরান্ন বলেও ডাকতো।

শ্রীহট্টের লাউড অঞ্চলেই ছিল অদ্বৈত আচার্যের পূর্বনিবাস। তিনি ছিলেন শচীদেবীর গুরু ও প্রতিবেশী। অদ্বৈতপন্থী সীতাদেবীর সঙ্গে মিশ্র পরিবারের ঘনিষ্ঠতা ছিল। অদ্বৈতআচার্যের কাছে বাল্যে ও কৈশোরে শিক্ষালাভ করে বিশ্বরূপ যৌবনের প্রারম্ভে সন্ন্যাস অবলম্বন করেন। তাই পিতামাতা অতি স্নেহবশে নিমাইকে প্রশ্রয় দিতেন। হয়তো তাই বাল্যে-কৈশোরে নিমাই প্রাণবন্ত ও দুরন্ত ছিলেন। নাইলে পাঁচশ' বছর আগেও কিশোর 'ভাব' করে [হেনমতে দোঁহা চিনি দোঁহা গেলা ঘর] সুন্দরী মেয়ে লক্ষ্মীপ্রিয়াকে বিয়ে করার জন্যে মা-বাপের কাছে নিঃসংকোচে আবদার করতে পারতেন না। বিয়ের সময়ে [১৫০১-০২ খ্রীঃ] নিমাইয়ের বয়স পনেরো ঘোলের বেশি ছিল না। ষোড়শ বৎসর প্রভুর যৌবন' [বৃন্দাবন দাস]। তবু লেখা-পড়ায় তাঁর অবহেলা ছিল না, যথাসময়ে এই অধাবী বুদ্ধিমান কিশোর ব্যাকরণে ও অলঙ্কার বিষয়ে ব্যুৎপন্ন পণ্ডিত হলেন। বায়ুরোগ বিশেষে তিনি কিছুদিন অপ্রকৃতস্থ বা পাগলপ্রায়ও ছিলেন। পিতৃবিয়োগের ফলে হয়তো আর্থিক অসাচ্ছল্য দেখা দেয়। তাই তিনি রওয়ানা [আঃ ১৫০৬ খ্রীঃ] হলেন শ্রীহট্টে পিতৃ পুরুষের সম্পত্তির সন্ধানে। নদীয়া থেকে শ্রীহট্টে যাতায়াতে তাঁর দু'বছর লেগেছিল। তরুণ ব্রাহ্মণপণ্ডিত পথে পথে নানা অনুষ্ঠানে যোগ দিয়ে হয়তো আপন বিদ্যাবত্তার পরিচয় দিচ্ছিলেন আর সে সঙ্গে উপার্জন করছিলেন। সে যুগে সাধারণের জন্যে ডাক ব্যবস্থা ছিল না। কাজেই বাড়ি ফিরে এসে শুনলেন তাঁর প্রেমের ও প্রাণের লক্ষ্মীপ্রিয়ার সর্পদংশনে মৃত্যু ঘটেছে। যে নারী ছিল তাঁর জীবনচেতনার উৎস, যাকে ঘিরে তিনি রচনা করেছিলেন জীবন-স্বপ্ন, যে ছিল তাঁর সকল উদ্যমের ও কর্মপ্রেরণার আকর, তার বিয়োগে সংসারযাত্রা নিরর্থক হয়ে গেল।^১ মিথ্যে হয়ে গেল জীবন-যৌবন, ধন-মান-যশ। স্বপ্ন ভঙ্গে মন হল তাঁর বিবাগী। প্রেমপ্রতিমার বিকল্প হয় না। তাই আত্মীয়-স্বজন জোর করে তাঁকে পুনর্বিয়েতে প্রবর্তনা দিলেও [আঃ ১৫০৮ খ্রীঃ] দ্বিতীয় পত্নী বিষ্ণুপ্রিয়া তার ভাঙামন জোড়া দিতে পারলেন না, ধরে রাখতে পারলেন না তাঁকে সংসারজীবনে। যে তরুণ পণ্ডিত ছিলেন বিদ্যাবুদ্ধি প্রসূত আত্মপ্রত্যয় বশে বয়োধর্মের প্রভাবে উদ্ধত, আত্মসম্বরণ, যশলিন্দু, দান্তিক, বিদ্যাগবী, পরিহাসরসিক প্রেয়সী স্ত্রীর বিয়োগে তাঁর মনে, মেজাজে ও আচরণে এল অভাবিত পরিবর্তন। বৃকের জ্বালা ও মনের অশান্তি দূর করার জন্যে তিনি ধর্মভাবে আত্মনিমগ্ন হবার বাসনায় দীক্ষা

^১ লক্ষ্মীর অগত্যত মৃত্যুই চৈতন্যদেবের সংসারে ধৈর্যগোচর অন্যতম কারণ। বঙ্গভাষা ও সাহিত্য ৮ম সং পৃঃ ১৭২ পাদটীকা।

নিলেন [১৫০৮ খ্রীঃ, তীর্থ পর্যটনে গেলেন। তাঁর প্রথম দীক্ষাগুরু হলেন পুরী-শাখার কৃষ্ণভক্ত মাধবেন্দ্রপুরীর শিষ্য ঈশ্বরপুরী। তখনো জীবিকা অর্জনের জন্যে মুকুন্দের চণ্ডীমণ্ডপে টোল চালান বটে [১৫০৯ খ্রীঃ অবধি], কিন্তু মন তাঁর তখন রাধাকৃষ্ণের অনুধ্যানে আচ্ছন্ন। শ্রীরাম পণ্ডিতের বাড়িতে মুকুন্দ দত্ত প্রভৃতি কয়েকজন বন্ধুর সঙ্গে অবসর সময়ে কৃষ্ণভক্তি উদ্দীপক গানের আসর করেন। ক্রমে তাঁর সঙ্গীতসহচরের সংখ্যা বাড়ল। হরিদাস, নিত্যানন্দ, স্বরূপ রামানন্দ এমনকি মাতামহের বয়সী অদ্বৈতাচার্যও জুটলেন তাঁর সঙ্গে।

এসময়েই তিনি কৃষ্ণভক্তি উদ্দীপক সঙ্গীত গুনতেন। ১. চণ্ডীদাস বিদ্যাপতি রায়ের নাটক গীতি / ২. বিদ্যাপতি চণ্ডীদাস শ্রীগীতগোবিন্দ / এই তিন গীতে করে প্রভুর আনন্দ [চৈতন্যচরিতামৃত]। ৩. বিদ্যাপতি চণ্ডীদাস শ্রীগীতগোবিন্দ / ভাবানুরূপ শ্লোক পড়ে রায় রামানন্দ (চৈ-চরিতামৃত)। ক্রমে দল বিপুল হল। এবার গুরু হল পথে পথে কীর্তন-নর্তন। রুখে দাঁড়াল সনাতনীরা, তাঁদের বিরুদ্ধে রটানো হল নানা কুৎসা।

এগুলো সকলে মধুমতি সিদ্ধি জানে
রাত্রি করি মন্ত্র পড়ি পঞ্চ কন্যা আনে।
খাইয়া তা' সবা সনে বিবিধ রমণ।

সনাতনীদের পক্ষ হয়ে জগাই-মাধাই দুই উচ্ছৃঙ্খল যুবক ভাই পথে কীর্তন কালে নিত্যানন্দকে প্রহার করে। এ সময়ে সনাতনীরা প্রতিবেশীর শান্তি-স্বস্তি বিনষ্টকারী এবং নিত্যধর্মদ্রোহী ভট্টচরিত্র মাতাল বলে চৈতন্যদলের বিরুদ্ধে নবদ্বীপস্থ আব্দুরামুলকের কাজীর কাছে নালিশ করে। কাজী একদিন পথ-কীর্তন কালে সিপাহি পাঠিয়ে ওদের ছত্রভঙ্গ করে দিলেন এবং নগরকীর্তন নিষিদ্ধ হল। চৈতন্যদেব শুনে রাত্রির প্রথম প্রহরে দলবল নিয়ে নগরকীর্তনে বের হলেন এবং ঘেরাও করলেন কাজীর বাড়ি। এর মধ্যে অনন্যতা আছে। মধ্যযুগের বিক্ষুব্ধ নিরস্ত নাগরিকের রাজশক্তির বিরুদ্ধে সম্ভবত এটিই প্রথম প্রত্যক্ষ বিদ্রোহ ও প্রকাশ্য প্রতিশোধ প্রয়াস। অসহায় কাজী স্তোকবাক্যে চৈতন্যকে শাস্ত করে আত্মরক্ষা করলেন। কিন্তু এই অস্তত শক্তির প্রবলতা ও গুচ্ছত্যা সম্বন্ধে গোঁড়ে খবর পাঠালেন। এতকাল সুলতান সনাতনী হিন্দুর দ্রোহের আশঙ্কায় ছিলেন, এখন তাদের মধ্যে শাস্ত্রীয় মতভেদ দেখা দিয়েছে দেখে ঐ বিরোধ গাঢ় ও বিভেদ ত্বরান্বিত করার জন্যেই শাস্তির বদলে চৈতন্যদলের প্রতি আনুকূল্য করবার নির্দেশ দিলেন কাজীর প্রতি। কাজীও কাবু হয়েছে দেখে চৈতন্যদলে আরো লোক জুটে গেল। অনুরাগীর সংখ্যা বৃদ্ধির ফলে নদীয়ার গৃহাঙ্গন ও নগরপথ হরিসংকীর্তনে আর নর্তনে মুখরিত ও কম্পিত হয়ে উঠল। হোসেন শাহ দেখলেন এখন এই নতুন দল অধিকতর প্রবল, এবং অধিকতর সংহত ও সজ্জবদ্ধ। বিপদ যদি আসে তবে এবার চৈতন্যদল থেকেই আসবে, তাই তিনিও সতর্ক হয়ে রইলেন। এ খবর নিশ্চয়ই চৈতন্যদেবের কাছে পৌছেছিল। বিশেষ করে কেশব ছত্রী, রূপ, সনাতন, অনুপম তখন দরবারে প্রবল। এমনি সময়ে একদিন নিমাই তীর্থ ভ্রমণে বের হয়ে কাটোয়ায় কেশব ভারতীর কাছে সন্ন্যাসব্রতের দীক্ষা নিলেন, সে দিন ছিল ২৯ শে মাঘ ১৪০১ শক বা ১৫১০ সনের ২৬ শে জানুয়ারি :

ততঃশুভে সংক্রমণে রবেঃ ক্ষণে কুন্ডং প্রয়াতি মকবাম্বনীধী [মুরারি গুপ্ত]

মকর লেউটে কুন্ড আইসে যেই বেলে। সন্ন্যাসের মন্ত্র গুরু কহে সেই বেলে।

সন্ন্যাসে দীক্ষা নেয়ার পর তাঁর ভাবোন্মাদনা বেড়ে গেল। বৈষ্ণব কবির মানসচক্ষে তখন তাঁর অবস্থা :

স্ত্রী বিষ্ণুপিয়া জীবিতা ছিলেন। তখন তাঁর বয়স কিশোরবয়সে। ক. আষাঢ় মাসের তিথি সপ্তমী দিবসে তৃতীয় প্রহরে বেলা রবিবার দিন' [লোচন দাস], 'আষাঢ় সপ্তমী শুক্লা অঙ্গীকার করি' [জয়ানন্দ] গ. চৌদ্দ শত সাত শকে জন্মের প্রমাণ। চৌদ্দশত পঞ্চান্ন হৈল অন্তর্ধান [কৃষ্ণদাস কবিরাজ]। চৈতন্যদেব জীবনের শেষ বারো বছর প্রায়ই বাহ্যজ্ঞানশূন্য অবস্থায় থাকতেন।

শেষ যে রহিল প্রভুর ঘাদশ বৎসর।

নিরন্তর হয় প্রভুর বিরহ উন্মাদ

ভ্রমময় চেষ্টা সদা প্রলাপময় বাদ। (চৈ, চ)

প্রথম জীবনেও তাঁর একবার কিছুকালের জন্যে একরূপ অবস্থা হয়েছিল। বৈষ্ণবেরা একে দিব্যোন্মাদ অবস্থা বলে।

১৫. চৈতন্যবাণী

চৈতন্যদেব কোন গ্রন্থ রচনা করেননি কিংবা ভক্তদের জন্যে কোন নির্দিষ্ট শাস্ত্রও তৈরি করেননি। বৈষ্ণব শাস্ত্র, আচার ও চর্চা গড়ে উঠেছে ষড়গোষ্ঠামীর হাতে, [রূপ, সনাতন, জীব, রঘুনাথ দাস, রঘুনাথ ভট্ট, গোপাল ভট্ট]। 'শ্রীরূপ শ্রীসনাতন ভট্ট রঘুনাথ। শ্রীজীব গোপাল ভট্ট দাস রঘুনাথ।' [চৈতন্যচরিতামৃত]। চৈতন্য মুখনিঃসৃত উক্তি ও বাণী হিসেবে নিম্নলিখিত বাঙলা ও সংস্কৃত কথাগুলো বহুল প্রচলিত :

১. কৃষ্ণবিহীন কেবল 'রাধা' নাম উচ্চারণের বিরুদ্ধে তাঁর ছাত্রদের উদ্দেশ্যে উচ্চারিত রূপক ছড়া -

করিনু পিপ্পলী খণ্ড কফ নিষারিতে

উলটিয়া আরো কফ বাড়িল দেহেতে।

২. আটটি শ্লোকে তিনি শিষ্যদের তত্ত্ব, ধ্যান, স্তুতি ও চর্চা জানিয়ে দিতেন। শ্লোকগুলো 'শিক্ষাষ্টক' নামে পরিচিত :

১. সংকীর্তন মাহাত্ম্য :

চেতোদর্পণমার্জিনং ভব-মহাদাবাগ্নি-নির্বাণং

শ্রেয়ঃ কৈরবচস্তুতিকা-বিতরণং বিদ্যাবধূ জীবনং।

আনন্দাযুধি বর্ধনং প্রতিপদং পূর্ণমৃত্যুদানং

সর্বাভ্যুদয়পনং পরং বিজয়তে শ্রীকৃষ্ণসঙ্কীর্তনং।

২. নামে রুচি :

নাম্মাকারি বহুধা নিজসর্বশক্তি

স্তত্রার্চিতা নিয়মিতঃ স্মরণে ন কালঃ।

এতাদৃশী তব কৃপা ভগবন্মমাপি-

দূর্দৈবমীদৃশমিহাজনি নানুরাগঃ।

৩. বিনয়, সহিষ্ণুতা :

তৃণাদপি সূনীচেন তরোবির সহিষ্ণুনা।

অমানিনা মানদেন কীর্তনীয়ঃ সদা হরিঃ।

৪. ভক্তি :
ন ধনং ন জনং ন সুন্দরীং কবিতাং বা জগদীশ কাময়ে ।
মম জন্মানি জন্মনীষরে ভবতান্ত্রিকিরহৈতুকী তুয়ি ।।
৫. কৃষ্ণ-শরণ :
অয়ি নন্দতনুজ কিঙ্করং পতিতং মাং বিষমে ভরাযুধৌ ।
কৃপয়া তব পাদপঙ্কজস্থিত-ধূলিসদৃশং বিচিস্তয় ।
৬. নামকীর্তন :
নয়নং গলদশ্রুধারয়া বদনং গদগদরুদ্ধয়া গিরা ।
পুলকৈর্নিচিৎ বপুঃ কদা তব নামগ্রহণে ভবিষ্যতি ।
৭. কৃষ্ণবিরহবোধ :
যুগায়িতং নিমেষেণ চক্ষুষা প্রাবৃষায়িতং ।
শূন্যায়িতং জগৎ সর্বং গোবিন্দবিরহেন মে॥
৮. প্রেমিক নিষ্ঠা :
অশ্লিষ্য বা পাদরতাং পিনষ্টু মামদর্শনার্থহতাং করোতু বা ।
যথা তথা বা বিদধাতু লম্পটো মং প্রাণনাথস্তু স এব নাপরঃ ॥

১৬. চৈতন্যদেবের অবদান

চৈতন্যদেবের বড় অবদান হচ্ছে সুফীমতের প্রভাবে ভক্তিদর্মকে প্রেমধর্মে উন্নীত করা। চৈতন্যের প্রেমচর্যার সাধন-ভজনের বিশেষ নিয়ম-পদ্ধতি ছিল না, অনন্যচিত্তে রাধাকৃষ্ণ লীলা স্মরণ ও রাধাকৃষ্ণ নাম উচ্চারণ সাধনভজন 'কলিযুগই ধর্ম হয় হরি সংকীর্তন'। তাই গানেই চলত সাধন-ভজন- 'নামলীলাগুণাদীনা মুচৈতভাষা তু কীর্তনম' [রূপ গোস্বামী ভক্তিরসামৃতসিঙ্ক]। কিশ্কিন্ধিনী পাঁচশ বছর আগে চৈতন্যদেব ব্রাহ্মণ্য সর্বসংস্কার ও গীতা-স্মৃতির সর্বপ্রকার শাসনমুক্ত হতে পেরেছিলেন। আজো আমরা যা পারিবে সেই সংস্কারাক্ত তামসযুগেই তিনি শ্রীবাসের ভ্রাতৃকন্যা বিধবা নারায়ণীর অবৈধ সন্তানের বেঁচে থাকার অধিকার এবং নারায়ণীর সম্মানিত সামাজিক স্থিতির অধিকার উচ্চকণ্ঠে ঘোষণা করেছিলেন। আবার ব্যক্তিভূ ও চরিত্রবলে গণমনে ব্যক্তির গুণ-মান-মাহাত্ম্য কত প্রবল ও গভীর হলে এমন দেশ-কাল শাস্ত্রবিরোধী পোতি জনগণ প্রসন্নচিত্তে গ্রহণ করে তাও এসূত্রে স্মর্তব্য। 'নারায়ণী হলেন বৈষ্ণবের মাতা, তাঁর সন্তান বৃন্দাবন দাস বৈষ্ণবদের ব্যাস। জৈন-বৌদ্ধ ঐতিহ্যের দেশে সুপুণ্য সাম্যচেতনা ও মানব মর্যাদাবোধ ইসলামের স্পর্শে চৈতন্যদেবের জীবনে ও বাণীতে নবরূপে পুনর্জাগ্রত হলো। বাঙালী নতুন করে উপলব্ধি করল 'সবার উপরে মানুষ সত্য তাহার উপরে নাই'। চৈতন্য প্রভাবে বর্ণাশ্রিত হিন্দুসমাজে উচ্চবর্ণের মানুষ- যারা শূদ্রাদি অস্পৃশ্য মানুষকে গৃহপোষ্য পশুর বেশি মর্যাদা দিত না, - কুলগৌরব, আভিজাত্যবোধ, বর্ণগর্ব, বিদ্যাভিমান, সংস্কৃতিচেতনা ও কুলবাচি স্বেচ্ছায় ও সানন্দে পরিহার করে ভক্ত মানুষের ভিড়ে মিশে স্বাতন্ত্র্য হারিয়ে হলো ধন্য ও কৃতার্থ। বাঙলাদেশে চর্যা হিসেবে বৈষ্ণব মত তেমন গৃহীত হয়নি, কিন্তু চৈতন্যের 'নরে নারায়ণ ও জীবে ব্রহ্মদর্শন' ধর্মভেদ নির্বিশেষে সবাইকে প্রভাবিত করেছিল। তাই গোটা ষোল শতক ধরে বাঙালী চৈতন্যদেবের প্রেমধর্মের প্রভাবে বিনয়াচরণে, অহিংসায় ও রাধাকৃষ্ণ সঙ্গীতে অভিভূত ছিল। প্রায় আড়াইশ' তিনশ' বছর ধরে অবৈষ্ণব সমাজেও সঙ্গীত, সংস্কৃতি ও

সংবেদন ক্ষেত্রে 'কানু ছাড়া গীত' এবং 'রাধা ছাড়া সাধা' ছিল না। হৃদয়রূপ বৃন্দাবনে জীবাত্মা-পরমাত্মারূপী রাধাকৃষ্ণ লীলা না হোক কাম-প্রেমের অনুভব ও প্রকাশ কালা-কানু-রাধা-রাই ব্যতীত সম্ভব হয়নি। অবৈষ্ণব হিন্দু ও মুসলিম রচিত পদসাহিত্য তার সাক্ষ্য। ঈর্ষা-অসূয়া-ক্রুরতা-সংকীর্ণতাদুষ্ট বাঙালী চৈতন্য প্রভাবে মানবতার সুউচ্চ স্তরে উন্নীত হল। কিছুকালের জন্যে সুমধুর হৃদয়বৃত্তি বুদ্ধিবৃত্তি ও স্বার্থবুদ্ধিকে আচ্ছন্ন করে রাখল। স্বামী-স্ত্রীতে, পিতা-সন্তানে, প্রতিবেশী-পরিচিত জনের সর্বত্রই পারস্পরিক বন্ধন হচ্ছে কেবল প্রীতির। এই প্রীতিই ঈশ্বর। এক কথায় বাঙালী পরোক্ষ নব জীবনচেতনা ও উদার জগৎ ভাবনা লাভ করল চৈতন্যপ্রসাদে। তাই ষোলশতক সর্বার্থেই অবিশেষ বাঙালী জীবনে রেনেসাঁসের যুগ। বস্তৃত বাঙালীর মনে-মননে, সমাজে, ধর্মমতে উদার মানবিকবোধজাত প্রীতিসুন্দর বিনয়মধুর বাসন্তী হাওয়ার স্পর্শ লাগল, যার ফলে সাহিত্যে সংস্কৃতিতে সোনার ফসল ফলেছিল। চৈতন্য ধর্মাম্বোলন সেদিন বাঙালীর মনুষ্যত্ব বিকাশের বিশেষ সহায়ক হয়েছিল, যদিও বৈষ্ণবিক ও রাজনৈতিক জীবনে পরবর্তীকালে বৈষ্ণবীয় বৈরাগ্য ক্ষতির কারণ হয়ে দাঁড়িয়েছিল। সাংসারিক দায়িত্বে কর্তব্যে-কর্মে অনীহা, তজ্জাত শিক্ষাবৃত্তির মহিমাশ্রিত প্রসার, ক্ষমা ও সহিষ্ণুতার নামে বল-বীর্ষ্যে ঘৃণা, ব্যবহারিক জীবনে আত্মপ্রতিষ্ঠার ও ধনসম্পদের গুরুত্বহাস প্রভৃতি এ প্রেমবাদের মুখ্য কুফল। অবশ্য দেশকালের পরিবেষ্টনী ও সমস্যার কথা অনুধাবন করলে বলতেই হবে সেদিন হিন্দুসমাজের বিপন্ন অস্তিত্ব চৈতন্যদেবের অসামান্য দূরদৃষ্টির ফলে ও ব্যক্তিত্বগুণে নিরাপদ হয়েছিল। তাঁর মতবাদে হিন্দুর শাস্ত্র জখম হল বটে, কিন্তু হিন্দুর জাতীয় সত্তা রক্ষা পেল।

১৭. ষড় গোস্বামী ও চৈতন্য পার্শ্বদ-পরিকল্প পরিচিতি

ক. ষড় গোস্বামী— বলেছি চৈতন্যদেব কোন বিধিবদ্ধ শাস্ত্র রেখে যাননি শিষ্যদের জন্যে। তাঁর উচ্চারিত বাণীর মধ্যে কেবল শিক্ষাষ্টিকই পাই। চরিতকারগণ যেসব তত্ত্ব ও তথ্য তার মুখে উচ্চারিত বলে বর্ণনা করেছেন, সেগুলো প্রমাণসিদ্ধ নয়। গল্প নাটকের মতো লেখকের উদ্দিষ্ট লক্ষ্যে রচিত মাত্র। কিন্তু চৈতন্য তিরোধানের পর এই গৌড়ীয় নববৈষ্ণবদের চর্যার ও আচার-আচরণ বিধির প্রয়োজন হল। বিধি নিষেধের শাস্ত্র যেমন আবশ্যিক, তেমনি বিশ্বাস ও মতকে অবিকৃত রাখার জন্যে উপলব্ধ তত্ত্বের ও গৃহীত তথ্যের একটা দার্শনিক যৌক্তিক ভিত্তিরও ছিল প্রয়োজন। খোলাফায়ে রাশেদীনের মতো একাজ যারা যোগ্যতার সঙ্গে সম্পন্ন করলেন তাঁরাই বৈষ্ণবসমাজে 'ষড় গোস্বামী' নামে স্মরণীয় ও পূজনীয়। এই ছয়জন শাস্ত্রকার ও দার্শনিকদের তিনজনই একপরিবারের— রূপ ও সনাতন দু'ভাই ও তাঁদের অপর ভ্রাতা অনুপমের [বল্লভ] পুত্র জীব। অন্য তিনজন হলেন গোপাল ভট্ট, রঘুনাথ ভট্ট ও রঘুনাথ দাস। চৈতন্যদেবের জীবৎকালেই তাঁর নির্দেশ রূপ ও সনাতন চৈতন্যপ্রবর্তিত গৌড়ীয় নববৈষ্ণবমতবাদ প্রচারের জন্যে এবং বৈষ্ণবতীর্থরূপে বৃন্দাবনকে গড়ে তুলতে বৃন্দাবনে বাস করতে থাকেন।

চৈতন্যদেবের অন্তরঙ্গজন অদ্বৈতাচার্য, নিত্যানন্দ, বাসুদেব সার্বভৌম, রামানন্দ, তপনমিশ্র প্রভৃতি চৈতন্যদেবের জীবৎকালে চৈতন্যের হয়ে নবমত প্রচার ও ব্যাখ্যা করেছেন, সেসব সূত্র ধরে ষড় গোস্বামী চৈতন্যপ্রচারিত প্রেমবাদকে একটি শাস্ত্রীয় ও দার্শনিক ভিত্তি দান করেন। 'ছয় গোস্বামি' কৃষ্ণদাস কবিরাজ রচিত 'চৈতন্যচরিতামৃত' সূত্রে প্রসিদ্ধি লাভ করেছেন।

শ্রীরূপ সনাতন ভট্ট-রঘুনাথ

শ্রীজীব গোপাল ভট্ট দাস রঘুনাথ।

এই ছয় গোসাঁওর করি চরণ বন্দন

যাহা হৈতে বিঘ্ননাশ অতীত পূরণ ।

এর পূর্ববর্তী চৈতন্যচরিত গ্রন্থে একত্রে ছয় জনের নামও মেলে না। ষড় গোস্বামী বৃন্দাবনেই বাস করতেন।

খ. সনাতন গোস্বামী- সনাতন ও তাঁর ভ্রাতৃপুত্র জীব গোস্বামীর আত্ম পরিচিতি সূত্রে জানা যায়, তাঁরা কর্ণাটী ব্রাহ্মণ এবং জমিদারবংশীয় ছিলেন। তাঁদের বংশপীটিকা নিম্নরূপ :

জগদগুরু - অনিরুদ্ধ - রূপেশ্বর - পদ্মনাভ - মুকুন্দ - কুমারদেব

জ্যেষ্ঠ মেঘা সনাতন রূপ অনুপম [জীব গোস্বামী]

এঁরা প্রথমে নৈহাটিতে (নবহট্টে) পরে চন্দ্রদ্বীপে (বাকলায়-বরিশালে) এবং চৈতন্য অনুচর হবার প্রাক্কালে যশোহরে নিবাস স্থাপন করেন। সনাতন, রূপ, অনুপম এবং তাঁদের জ্যেষ্ঠভ্রাতা [নাম অজ্ঞাত] হোসেন শাহ'র উচ্চপদস্থ কর্মচারী ছিলেন। রূপ ছিলেন দবিরখাস [একান্ত সচিব-খাসমুণী]। সনাতন ছিলেন সাকর মল্লিক, অনুপম বা বভুভ ছিলেন টাঁকশালের অধ্যক্ষ। এঁদের জ্যেষ্ঠভ্রাতা চন্দ্রদ্বীপের প্রশাসক ছিলেন, প্রজাপীড়ন ও অর্থভ্রাতৃসাতের দায়ে হোসেন শাহ তাঁকে পদচ্যুত করেন। সম্ভবত সেখানে তিনি বিদ্রোহী হিসেবে বাস করেন :

তোমার বড় ভাই করে দুস্ম ব্যবহার

জীব বহু মারিয়া বাকুল্য কেল খাস ।

(চৈতন্যচরিতামৃত, মধ্যলীলা, পরিচ্ছেদ-১৯)

সনাতন চৈতন্যভক্ত হওয়ার পর রাজকার্যে অবহেলা দেখান, উড়িষ্যা অভিযানে সুলতানের মন্ত্রী হতেও অস্বীকার করেন, দরবারেও অনুপস্থিত থাকেন চৈতন্যদেবকে দেশত্যাগ করে উড়িষ্যায় যাবার পরামর্শ কেশব ছত্রীর মতো বোধ হয় সনাতনও দিয়েছিলেন। বিশেষত রামকেলীতে রূপ ও সনাতন গোপনে ছদ্মবেশে রাত্রে চৈতন্যদেবের সঙ্গে সাক্ষাৎ করেছিলেন বলে চৈতন্যচরিতে উল্লেখ রয়েছে। তাঁরা চাকরী ছাড়ার পূর্বেই অর্থ-সম্পত্তিরও বিলি ব্যবস্থা করেছিলেন। কাজেই আত্মরক্ষার্থে কিংবা চৈতন্যধর্মের নিরাপত্তার জন্যে তাঁরা ষড়যন্ত্র করেছিলেন। যে কারণেই হোক, বিরক্ত হয়ে ও সনাতনের উপর আস্থা হারিয়ে হোসেন শাহ তাঁকে কারারুদ্ধ করেন। কারারক্ষীকে ঘুষ দিয়ে বশ করে তিনি পালিয়ে গিয়ে চৈতন্যদেবের সঙ্গে মিলিত হলেন। ইতিপূর্বে রূপ ও অনুপম যশোরে পরিবার-পরিজনদের নিরাপদ স্থানে সরিয়ে রাখলেন। সনাতন বিদ্বান ও বুদ্ধিমান ছিলেন। তাঁদের নিবাস ছিল পৌড়ের রামকেলী গ্রামে। ব্রজমোহন দাস তাঁর চৈতন্যভক্তপ্রদীপে বলেছেন যে,

১. দবির খাসের প্রভু পরিচয় দিলা...

রূপ সনাতন নাম থুইল দোহার ।

ভক্তি গ্রন্থ দোহে বহু করিল প্রচার ।

২. দবীর খাস দুই ভাই গেলা নীলাচলে

দবির খাসে ঘুচাইলা সংসার বন্ধন ।

দুই ভাইর নাম হইল রূপ-সনাতন ।

[জয়ানন্দ, পৃ: ২৩২]

জীব গোশ্বামীর তালিকানুসারে সনাতন রচিত গ্রন্থ চারটি :

ক. বৃহৎ ভাগবতামৃত— নববৈষ্ণবধর্মের পটভূমিকারূপে এ কাব্য রচিত। গ্রন্থে পুরাণের রীতি ও আদর্শ অনুসৃত হয়েছে।

খ. বৈষ্ণবতোষিণী [বা দশম টিপ্পনী]— ভাগবতের দশম স্কন্ধের টীকা। ১৫৫৪ খ্রীস্টাব্দে রচিত। চৈতন্যদেব এই গ্রন্থে অবতার রূপে বন্দিত—

বন্দে শ্রীকৃষ্ণচৈতন্যং ভগবন্তং কৃপার্ববং।

প্রেম ভক্তি বিদ্যানার্থং গৌড়দেশেশ্ববতায় যঃ।

গ. হরিভক্তি বিলাস—[গোপাল ভট্টের নামে চলে] ‘হরিভক্তি বিলাস আর ভাগবতামৃত। ‘দশম টিপ্পনী আর দশমচরিত। এই সব গ্রন্থ কৈল গোসাঞিঃ।’ সনাতন’ [চৈ. চ] ‘লীলাস্তব দশমচরিত যারে কয়’ (ভক্তিরত্নাকর)।

ঘ. লীলাস্তব বা দশমচরিত (অপ্রাপ্ত)। সুখময় মুখোপাধ্যায়ের মতে ১৪৮২ খ্রীস্টাব্দে সনাতনের জন্ম। এবং ১৫৬২ সনের শ্রীনিবাস আচার্যের বৃন্দাবন গমনের পূর্বেই তাঁর মৃত্যু হয়।

গ. রূপ গোশ্বামী— সনাতন, রূপ ও অনুপম সম্পত্তি সুরক্ষিত বা হস্তান্তর করেন এবং অর্থ নিয়ে রূপ-অনুপম প্রয়াগে পালিয়ে গেলেন। কারারক্ষীকে ঘুষে বশ করে সনাতনকে মুক্ত করার জন্য রেখে গেলেন দশ হাজার টাকা। রূপও বিদ্বান এবং কবি-নাট্যকার ছিলেন। তিনি বহুগ্রন্থ প্রণেতা :

১. কাব্য : হংসদূত, উদ্ধব সন্দেশ, সুবম্বলা, উৎকলিকাবল্লী, ছন্দোহষ্টাদশকম, গোবিন্দ বিরুদাবলী, প্রেমেন্দুসাগর প্রভৃতি এবং ৪১টি গীতাবলীও রয়েছে যা কেউ কেউ এগুলো সনাতন রচিত বলেও মনে করেন যথা—

ক. শ্রীল সনাতন কয়ল গীতাবলী [গোপীকান্ত দাস, পদকর্তা]

খ. গোসাঞি সনাতন কয়ল গীতাবলী। [গৌরসুন্দর দাস]

২. নাটক : বিদগ্ধমাধব, ললিত মাধব, দানকেনীকৌমুদী।

৩. রসতত্ত্ব, দর্শন ও অলঙ্কারশাস্ত্র — ভক্তিরসামৃতসিদ্ধি, উজ্জ্বলনীলমণি।

৪. কাব্য সংকলন : পদ্যাবলী, মথুরামহিমা।

৫. নাট্যতত্ত্ব : নাটকচন্দ্রিকা।

৬. ধর্মতত্ত্ব : সংক্ষিপ্ত ভাগবতামৃত।

৭. লঘুবৈষ্ণবতোষিণী।

এগুলো ছাড়াও রাধা-কৃষ্ণ গণোদ্দেশদীপিকা, অষ্টকালিকা, শ্রোকাবলী, গোবিন্দ বিরুদাবলী প্রভৃতি আরো কয়েকখানি পুস্তক তাঁর রচিত বলে কথিত। অধ্যাপক সুখময় মুখোপাধ্যায়ের মতে ১৪৮৪ খ্রীস্টাব্দে তাঁর জন্ম এবং ১৫৬২ সনের আগেই তাঁর মৃত্যু হয়। তাঁর গ্রন্থাবলী বৈষ্ণবসমাজে গুরুত্বসহকারে আজো পঠিত হয়। বিশেষ করে তাঁর উজ্জ্বলনীলমণি ও ভক্তিরসামৃতসিদ্ধি শাস্ত্রগ্রন্থের মর্যাদায় ও গুরুত্বে প্রতিষ্ঠিত। বস্তুত রূপ ও জীব গোশ্বামীই বৈষ্ণবদের মূল ধারার শাস্ত্রকার, তাত্ত্বিক ও দার্শনিক।

গ. জীব গোশ্বামী— সনাতনের ভাই অনুপম গৌড় সুলতান সৈয়দ আলাউদ্দীন হোসেন শাহর টাকশালের অধ্যক্ষ ছিলেন। পালিয়ে প্রয়াগে চৈতন্যদেবের সঙ্গে মিলিত হওয়ার কিছুকাল পরে তাঁর মৃত্যু হয়। তাঁর পুত্র জীব অল্পবয়সেই বিয়ের আয়োজন হচ্ছে দেখেই নাকি গৃহত্যাগ করে চৈতন্যভক্ত হন। জীব গোশ্বামী তাঁর পিতৃব্যদের চাইতেও প্রতিভাবান ছিলেন। তাঁর রচনাই বলতে গেলে বৈষ্ণবদের শাস্ত্রীয় দর্শন দৃঢ়ভিত্তিক করে এবং পরিবারের এই তিনজনের গ্রন্থাবলীই বৈষ্ণবদের মূলশাখার বন্ধন অটুট রাখে। নইলে মতবৈষম্য বৈষ্ণব সমাজকে খণ্ড-বিখণ্ডিত করে দিত। এতেও ভাঙন পুরো রোধ করা যায়নি। চৈতন্যতিরোভাবের অল্পকাল পরেই খড়দহে, শ্রীখণ্ডে ও নবদ্বীপে তিনটে গুরুসম্প্রদায় গড়ে ওঠে। কাশীতে জীব তাঁর শিক্ষাগুরু মধুসূদন বাচস্পতির কাছে ব্যাকরণ, স্মৃতি ও বেদান্ত পাঠ করে প্রাজ্ঞ পণ্ডিত হয়েছিলেন। তিনিও বৃন্দাবনেই বাস করতেন। তবে বাঙলাদেশে তাঁদের গ্রন্থ প্রচারে বিশেষ অগ্রহী ছিলেন তিনি। সে সূত্রে বাঙলার বৈষ্ণব সমাজের সঙ্গে তাঁর সম্পর্ক অবিচ্ছিন্ন ও ঘনিষ্ঠ ছিল। তাঁর রচিত গ্রন্থের সংখ্যা অনেক :

১. কাব্য : গোপালচম্পু [১৫৯২ খ্রীঃ] সঙ্কল্পকল্পদ্রুম মাধবমহোৎসব [সপ্ত সপ্তমণোশাকে- ১৪৫৫ খ্রীঃ রচিত], গোপাল বিরুদাবলী [অপ্রাপ্ত]।

২. ব্যাকরণ, রসতত্ত্ব ও অলঙ্কার : হরিণামৃত ব্যাকরণ, সূত্রমালিকা [অপ্রাপ্ত], রসামৃতশেষ, দুর্গমসঙ্গমণি, লোচনরোচনী, ধাতুসংগ্রহ, ভাবার্থসূচক চম্পু।

৩. স্মৃতি, তত্ত্ব ও দর্শন : কৃষ্ণার্চাদীপিকা [অপ্রাপ্ত], গোপালতাপনী, ব্রহ্মসংহিতা, ক্রমসন্দর্ভ, লঘুতোষিণী, ভাগবতসন্দর্ভ, ষটসন্দর্ভ, সর্বসংবাদিনী।

৪. ভক্তিরসামৃতসিন্ধুর, উজ্জ্বলনীলমণির, যোগসারস্বতের, অগ্নিপুরণে গায়ত্রীর ভাষ্য, এবং পদ্মপুরাণের রাধাকৃষ্ণ প্রভৃতির টীকাও তিনি রচনা করেন।

ঘ. রঘুনাথ ভট্ট— ইনি চৈতন্যদেবের প্রথম শিষ্য। পূর্ববঙ্গীয় তপন মিশ্রের পুত্র। তপন মিশ্র সপরিবারে কাশীবাসী হয়েছিলেন। রঘুনাথ বাল্যকালে চৈতন্যদেবকে তাঁদের বাড়িতেই দেখেছিলেন। কথিত আছে যে তিনি মুঘল সেনাপতি-সুবাদার অম্বররাজ মানসিংহের গুরু ছিলেন। যৌবনে তিনি নীলাচলে আটমাস করে দুইবার চৈতন্য সান্নিধ্যে ছিলেন এবং চৈতন্যদেবের খাদ্য রান্না করতেন [রঘুনাথ ভট্ট পাকে অতি সুনিপুণ-চৈ. চ]। ভাগবত আবৃত্তিতে ও কীর্তনগানে তিনি পটু ছিলেন।

ঙ. রঘুনাথ দাস— ইনি সপ্তগ্রামের জমিদার গোবর্ধন মজুমদারের পুত্র। গৌতম বুদ্ধের মতোই ঐশ্বর্য আর রূপসী স্ত্রীর আকর্ষণও তাঁকে গৃহবন্দী করতে পারেনি। কিশোর বয়সেই তিনি চৈতন্যদেবকে দেখবার জন্যে [১৫৪১ সনের দিকে] শান্তিপুরে অশ্বৈত্তগৃহে গিয়েছিলেন। তখনই সন্ন্যাস গ্রহণের ইচ্ছা প্রকাশ করলে চৈতন্যদেব তাঁকে নিরস্ত করেন :

“স্থির হৈয়া ঘরে যাও না হও বাতুল
ক্রমে ক্রমে পায় লোকে ভবসিদ্ধকূল।”

তবু তিনি ছিলেন গৃহী-বৈরাগী। নিত্যানন্দের নির্দেশে তিনি বহু অর্থ ব্যয়ে বৈষ্ণবদের দই-চিড়ে ভোজন করাতেন। নিত্যানন্দের পরিহাসের ভাষায় এ ছিল ভক্ত ‘রঘুনাথের অর্থদণ্ড’। এই ‘লঙ্গরখানা’ ‘ভাতারা’ নামে ছিল পরিচিত এবং এ ভোজন-উৎসবের নাম হল দণ্ডোৎসব। অবশেষে পালিয়ে গিয়ে তিনি নীলাচলে চৈতন্য সান্নিধ্যে রইলেন এবং স্বরূপ দামোদরের কাছে

বৈষ্ণবতত্ত্ব অধ্যয়ন করলেন। চৈতন্যতিরোধানের পরে তিনি বৃন্দাবনেই অবশিষ্ট জীবন অতিবাহিত করেন। তিনি ভোগবিমুক্ত নিষ্ঠ সাধক ছিলেন। কৃষ্ণদাস কবিরাজ ছিলেন তাঁর ভক্ত সেবক। তিনি অনেক শব্দ প্রায় ২৮/২৯টি রচনা করেছিলেন। তাঁর রচিত গ্রন্থাবলী :

১. স্তবমালা : বিলাপকুসুমাজলি, প্রেম পরাবিধ স্তোত্র প্রভৃতি।
২. কাব্য : মুক্তাচরিত্র, দানকেলিচিন্তামণি।
রঘুনাথ দাস গোস্বামীর গ্রন্থত্রয়।
স্তবমালা নাম স্তবাবলী যারে কয়।
শ্রীদানচরিত মুক্তাচরিত মধুর।
যাহার শ্রবণে মহাদুঃখ হয় দূর। [ভক্তিরত্নাকর]

চ. গোপাল ভট্ট— গোপাল ভট্টের মুখ্য কাজ ছিল দীক্ষাকামীদের দীক্ষা দান ও বৈষ্ণববাচারে উপদেশ দান। তিনি শ্রীনিবাস আচার্যের দীক্ষাগুরু। তিনি গোস্বামীদের মধ্যে স্বল্প পরিচিত। কৃষ্ণদাস কবিরাজের চৈতন্যচরিতামৃত, নরহরি চক্রবর্তীর ভক্তিরত্নাকরে, মনোহর দাসের অনুরাগবল্লীতে ও প্রেমবিলাসে তাঁর সম্বন্ধে সামান্য উল্লেখ আছে। বৈষ্ণববাচার ব্রতাদির স্মৃতিগ্রন্থ হরিভক্তিবিলাস বা ভগবদভক্তিবিলাস [মতান্তরে সনাতন রচিত] তাঁর রচিত গ্রন্থ বলেই সাধারণভাবে স্বীকৃত।

মঙ্গলাচরণ শ্লোক : ভক্তে বিলাসাত্মিক্তে প্রয়োজনন্দস্যশিষ্যো ভগবৎ প্রিয়স্য গোপাল ভট্ট রঘুনাথ দাসং সন্তোষয়নরূপ-সনাতনোচ চৈ। চ. উপাদানের পৃঃ ১৬৭। গোপালভট্ট দাক্ষিণাত্যের শ্রীরঙ্গমবাসী ত্রিমল্লভট্টের পুত্র। দাক্ষিণাত্য ভ্রমণকালে চৈতন্যদেব বর্ষাকালে চার মাস যাবৎ ত্রিমল্লভট্টের গৃহে অতিথি হিসেবে অবস্থান করেন।

ত্রিমল্লভট্টের ঘরে কৈল প্রভু বাস
তাহাঞি রহিল প্রভু বর্ষা চারিমােস চৈ-চরিতামৃত।

যত মন তত মত। কাজেই সঙ্গত ও স্বাভাবিক কারণেই বৈষ্ণবসমাজে মত ও পথভেদ দেখা দেয়— এ মতপার্থক্য পঞ্চতত্ত্ব নামে পরিচিত : ১. চৈতন্যপন্থ, ২. নিত্যানন্দপন্থ, ৩. অদ্বৈতপন্থ, ৪. শ্রীবাসপন্থ, ও ৫. গদাধরপন্থ। এদের মতপার্থক্য তেমন প্রকট ছিল না। পরে গোড়সম্প্রদায় [নবদ্বীপকেন্দ্রী] ও বৃন্দাবনসম্প্রদায়ের ব্যাখ্যাত তত্ত্বেও সাধনপন্থায় পার্থক্য প্রকট হতে থাকে। তার পরে আবার নদীয়া [শান্তিপুরে] খড়দহ ও শ্রীখণ্ড— এ তিন কেন্দ্রানুগত বৈষ্ণবদের মধ্যেও মতান্তর দেখা দেয়। নদীয়া শান্তিপুরে অদ্বৈতচার্য ও তাঁর পত্নী সীতাদেবী, খড়দহে নিত্যানন্দ ও তাঁর পত্নী জাহ্নবা দেবী, পুত্র বীরভদ্র, এবং শ্রীখণ্ডে নরহরি সরকার ও মুকুন্দ দাস নেতৃত্বদান করেন। বৈষ্ণবদের মধ্যে কেউ কেউ চৈতন্যদেবকে বিষ্ণু বলে গ্রহণ করেছিলেন। তাঁর মূর্তিপূজারও আগ্রহ জেগেছিল। যারা কৃষ্ণকে বাদ দিয়ে প্রমূর্ত প্রেম-ভক্তিরূপ চৈতন্যদেবের ভজনাই কর্তব্য বলে মনে করেন, তাঁরাই গৌরপারম্যবাদী, চৈতন্যদেবেই প্রমূর্ত Ultimate Reality—এ তত্ত্বেও ও সত্যে বিশ্বাসী নামে খ্যাত। কাঁচড়াপাড়ার পদকার শিবানন্দ সেন, নবদ্বীপের মুরারি গুপ্ত ও শ্রীখণ্ডের নরহরি সরকার এ মতের প্রবক্তা ও প্রবর্তক। ‘শ্রীচৈতন্যচন্দ্রামৃত’ প্রণেতা প্রবোধানন্দ সরস্বতীও এ মতবাদী ছিলেন। চৈতন্যদেবকে এরা পরম তত্ত্বরূপে গ্রহণ করেছিলেন বলে গোপাল মন্ত্বে’র পরিবর্তে এরা ‘গৌরমন্ত্বে’ দীক্ষা গ্রহণ করতেন। এঁরা চৈতন্যদেবকেও গোপীবল্লভ কৃষ্ণরূপে কল্পনা করে নিজেদের গোপীভাবে ভাবিত

করবার সাধনপন্থা বরণ করেছিলেন। এই নবগোপীভাবের উদ্দীপন মানসেই তাঁরা চৈতন্যদেবকে ‘গৌরনাগর’ হিসেবে কল্পনা করেন। এই তত্ত্বের নাম ‘গৌরনাগরবাদ’। মনে হয় পরবর্তীকালে বীরভদ্র-জাহ্নবা শিষ্যদের মধ্যে সহজিয়াতত্ত্বের দ্রুত প্রসারে এই গৌরপারম্যবাদ বিশেষ সহায়ক হয়েছিল।

৩. খ. চৈতন্যদেবের প্রধান সহচর ও পরিকর

বলেছি বিদেশী-বিধর্মীর বিজয়ে বিচলিত ও নবপরিচিত শাস্ত্রের, সমাজের ও সংস্কৃতির অভিঘাতে চঞ্চল ভারতে আটশতকে শঙ্করাচার্যের নেতৃত্বে ঔপনিষদিক ব্রাহ্মণ্যধর্মের প্রবলতার ও সমাজের পুনর্জাগরণের শুরু। তারপর ভাস্কর, রামানুজ, নিম্বার্ক, মধ্ব, বল্লভ, রামানন্দ, কবীর, নানক, রামদাস, দাদু প্রভৃতি বহু সাধু-সন্ত-সন্ন্যাসী জ্ঞান ও কর্মমার্গ পরিহার করে ভক্তিমাগের সাধনা জনপ্রিয় করে তোলেন। ফলে গীতা-স্মৃতি-সংহিতা ও বেদান্তধর্ম উচ্চবর্ণের, বৃত্তির ও বিস্তার সমাজে নিবদ্ধ হয়ে রইল। মুমুকু অস্পৃশ্য ঘৃণ্য বৃত্তিজীবী নির্জিত মানুষ এবং অধ্যাত্মতত্ত্বরসিক বিরাগী মানুষ ভক্তিপন্থ গ্রহণ করে জীবনে সমাজে এবং অধ্যাত্মজিজ্ঞাসায় সন্তি পেল।

আট শতকের পরে ব্রাহ্মণ্যসমাজে ‘সন্ন্যাস’ জনপ্রিয় সাধনপন্থা হয়ে ওঠে। জৈন-বৌদ্ধ থেকে দীক্ষিত ব্রাহ্মণ্যবাদীর পক্ষে এ মূলত জৈন-বৌদ্ধ-শ্রমণ-ভিক্ষু-সিদ্ধার ঐতিহাসিক স্মরণ মাত্র। ক্রমে হিন্দু সমাজে গুরুবাদী বহু সন্ন্যাসী সম্প্রদায় পড়ে ওঠে যেমন পুরী, গিরি, অরণ্য, তীর্থ, ভারতী, আনন্দ, সরস্বতী, যতি, আশ্রম, অরুণী প্রভৃতি গুরুকেন্দ্রী সম্প্রদায় বা শাখা গোটা ভারতে ছড়িয়ে পড়ে।

চৈতন্যের আবির্ভাবপূর্ব কাল থেকেই বাঙলাদেশেও ভক্তিবাদী সন্ন্যাসদের প্রভাব প্রবল হয়েছিল। চৈতন্যদেবের আবির্ভাবকালে মাধবেন্দ্রপুরীর ও ঈশ্বরপুরীর নদীয়াঞ্চলে শিষ্য ও অনুরাগীর সংখ্যা নগণ্য ছিল না। বিশেষত মাধবেন্দ্রপুরীকে প্রেমধর্মের আদি প্রচারক বলে বৈষ্ণবেরা মান্য করে এবং রাধাকৃষ্ণ লীলার অনুধ্যানী বলে তাঁর শিষ্যদের মধ্যে ঈশ্বর, পরমানন্দ, ব্রহ্মানন্দ, বিষ্ণু, কেশব, কৃষ্ণানন্দ, সুখানন্দ, রঙ্গ, রামচন্দ্র প্রভৃতি পুরীকে, কেশব, ব্রহ্মানন্দ প্রভৃতি ভারতীকে, নৃসিংহ তীর্থকে এবং অষ্টোতাচার্য কৃষ্ণভক্ত পূর্বসূরী ও সাধকরূপে বৈষ্ণবেরা স্মরণ করে। বলা বাহুল্য চৈতন্যদেব ঈশ্বরপুরী ও কেশবভারতীর শিষ্য ছিলেন। ব্রজমোহন দাস তার চৈতন্যতত্ত্বপ্রদীপে ‘ভক্তিবৃক্ষের ‘নব’ মূল এর সন্ধান দিয়েছেন :

ভক্তিকল্পবীজ প্রভু আরোপিতা
প্রথম অঙ্কুর শ্রীমাধবপুরী হৈলা।
ঈশ্বরপুরী সে অঙ্কুর পুষ্ট কৈল;
পরমানন্দপুরী আর কেশবভারতী
ব্রহ্মানন্দপুরী ব্রহ্মানন্দ ভারতী।
বিষ্ণুপুরী কেশবপুরী কৃষ্ণানন্দপুরী
নৃসিংহতীর্থ আর সুখানন্দপুরী।
এই নবভক্তি বৃক্ষমূলরূপ
পরমানন্দপুরী মধ্যজড়ের স্বরূপ।

আপনেনই মহাপ্রভু হৈলা আদিকঙ্ক
দুইদিকে দুই স্বাক্ষ অদ্বৈত নিত্যানন্দ।

অতএব উক্ত নয়জনেরই প্রয়াসে-প্রচারে চৈতন্যবাদ প্রসার লাভ করে।

মনে হয় রাধাকৃষ্ণের লীলানুধ্যান ও কীর্তন তাঁদের সাধন-ভজনের অঙ্গ ছিল। কারণ নদীয়াশান্তিপুরে চৈতন্যেরও আগে উৎসব-পার্বণে হরিসংকীর্তন করা হত। ব্রহ্মাওপুরাণেও হরিনাম সংকীর্তনের উল্লেখ আছে। দাক্ষিণাত্যের আলোয়ার সন্ন্যাসীরাও কীর্তনগান করত, সহজযানী বৌদ্ধদের মধ্যেও কীর্তনগান চালু ছিল। চৈতন্যদেব তিন প্রকারের কীর্তন প্রবর্তন করেন- লীলাকীর্তন, গুণকীর্তন ও নামকীর্তন। চৈতন্য প্রভাবিত হবার আগেই মাধবেন্দ্রপুরী, অদ্বৈতাচার্য, চন্দ্রশেখর, শ্রীবাস মুকুন্দ, হরিদাস, নিত্যানন্দ ও ঈশ্বরপুরী নদীয়া-বর্ধমান অঞ্চলে রাধাকৃষ্ণের লীলানুগ ভক্তিমন্ত্রে দীক্ষিত ছিলেন, দেখতে পাই। কৃষ্ণভক্তিকে কৃষ্ণপ্রেমে ভক্তিকে প্রেমে এবং ভক্তকে প্রেমিকে উন্নীত করাই চৈতন্যদেবের নবাবদান। বস্তুত কোন ভাব-চিন্তা অনুভবই দেশকাল পরিবেশ নিরপেক্ষ নয়। আগুনের যেমন নিরবলম্ব কোন অস্তিত্ব নেই, তেমনি কোন চিন্তা-চেতনাই নিরবলম্ব ও আকস্মিক হতে পারে না, ঘরে সমাজে পরিবেশেই জীবন-জীবিকার অবচেতন অবচেতন প্রয়োজন-প্রেরণা থেকেই চিন্তা-চেতনার বীজ উগ্ধ হয়। আজ্ঞপ্রত্যয়ী, সচেতন ও বুদ্ধিমানের মনে চিন্তা-বীজ অঙ্কুরিত হয়ে ও বৃক্ষরূপে ঋদ্ধ ও পল্লবিত হয়ে মানুষকে সমাজকে ফুল ফল ও ছায়াদানে সার্থক হয়, মানুষের শাস্ত্র-সভ্যতা সংস্কৃতি ও মানবতা এভাবেই হয় বিকশিত। অতএব, চৈতন্যদেবেরও তাঁর নবমত প্রচারে অনুকূল পরিবেশ পেয়েছিলেন। কষিত তুঁইয়ে যেমন বীজ নির্বিঘ্নে উগ্ধ ও অঙ্কুরিত হয় চৈতন্য মতবাদও তেমনি উচ্চারণ মুহূর্তেই গ্রহণ করবার মতো কিছু মন আগে থেকেই তৈরি ছিল- ঐতিহাসিক কারণে তাঁদের এ সূত্রে স্মরণ করতে হয় :

নিগুড়ে অনেক আঁর বৈসে নদীয়ায়

পূর্বেই জন্মিলা সবে ঈশ্বর আজায়।

শ্রীচন্দ্রশেখর জগদীশ গোপীনাথ ...

ভক্তি রসে আদি মাধবেন্দ্র সূত্রধার। [চৈতন্যভাগবত]

অদ্বৈতাচার্য-অদ্বৈতাচার্যের পিতৃদত্ত নাম কমলাক্ষ বা কমলাকর। শ্রীহট্টের লাউড় গ্রামে ছিল তাঁদের নিবাস। অদ্বৈতাচার্য বারেন্দ্রশ্রেণীর ব্রাহ্মণ। শ্রীহট্ট থেকে এসে তিনি শান্তিপুরে বাস করেন। অদ্বৈত ছিলেন গৃহী বৈষ্ণব এবং পেশায় টোলার পণ্ডিত। তিনি মাধবেন্দ্রপুরীর শিষ্য এবং চৈতন্যের পূর্বেই বৈষ্ণবভক্তিবাদে দীক্ষিত। অতএব অদ্বৈতাচার্য বৈষ্ণব অগ্রগণ্য [চৈতন্যভাগবত] ঈশান নাগরের 'অদ্বৈতপ্রকাশে', হরিচরণ দাসের 'অদ্বৈতমঙ্গলে' লাউড়িয়া কৃষ্ণদাসের বাল্যলীলা সূত্রে, লোকনাথ দাসের 'সীতাচরিত্রে' বিষ্ণুদাসের 'সীতাগুণকদম্বে' অদ্বৈত ও তাঁর পত্নী সীতা-দেবীর জীবনকাহিনী বর্ণিত রয়েছে। কিন্তু এসব গ্রন্থের অকৃত্রিমতা বিশেষজ্ঞেরা স্বীকার করেন না।

অদ্বৈতাচার্য চৈতন্যদেবের বয়োজ্যেষ্ঠ এবং দীর্ঘজীবী ছিলেন। চৈতন্যতিরোভাবের পরেও তিনি প্রায় ১৭/১৮ বছর জীবিত ছিলেন। বাঙলাদেশে চৈতন্যের অনুপস্থিতিতে চৈতন্যধর্ম প্রচার করেন অদ্বৈতাচার্য ও নিত্যানন্দ। অদ্বৈতাচার্য চৈতন্যদেবকে নারায়ণের অবতার বলে পূজাও করেছিলেন, চৈতন্যদেব তা পছন্দ করেননি। অদ্বৈত ও সীতাদেবী নদীয়া শান্তিপুরে আমরণ নেতৃত্বদান করেন। পরে তাঁদের সন্তানেরাও গুরু হন এবং অদ্বৈতপন্থী শাখার বিস্তার হয়।

চৈতন্যচরিতামৃতে চৈতন্যদেবের কাছে প্রেরিত তাঁর রচিত একটি তর্জা উদ্ধৃত রয়েছে :

বাউলকে কহিও লোকে হইল বাউল
বাউলকে কহিও হাটে না বিকায় চাউল।
বাউলকে কহিও কাজে নাহিক আউল
বাউলকে কহিও ইহা কহিয়াছে বাউল।

১৫১৪ খ্রীস্টাব্দে চৈতন্যদেব শান্তিপুরে অদ্বৈতগৃহে যখন যান, তখন অদ্বৈতপুত্র প্রখ্যাত বৈষ্ণব অচ্যুতানন্দের [জন্ম ১৫০৯ খ্রীঃ] বয়স ছিল পাঁচ বছর- ‘পঞ্চ বর্ষ বয়স মধুর দিগম্বর’ [চৈঃ ভাঃ]। ব্রজমোহন দাস চৈতন্যতত্ত্বপ্রদীপে অদ্বৈতের জন্মের স্থান ও মাস উল্লেখ করেছেন- ‘জন্মিলা অদ্বৈত গোসাই শান্তিপুরতে। দীপাবিতা অমাবস্যা কার্তিক মাসেতে।’

হরিদাস- যশোহর জেলার বুড়ুণ পরগনার ভাটকলাগাছি গ্রামে ছিল হরিদাসের নিবাস। তিনি ছিলেন চৈতন্যদেবের বয়োজ্যেষ্ঠ এবং নীলাচলে চৈতন্যদেবের নিত্যসঙ্গী। চৈতন্যের মৃত্যুর কয়েক মাস [১৫৩৩ সনের ৯ই মার্চ] আগে নীলাচলে তিনি দেহত্যাগ করেন, চৈতন্যদেব স্বয়ং তাকে সমুদ্র সৈকতে সমাধিস্থ করেন। জয়ানন্দের মতে ইনি হিন্দু সন্তান পিতৃমাতৃহীন অবস্থায় মুসলিম ঘরে লালিত। তাঁর পিতামাতার নাম মনোহর ও উজ্জ্বলা। বৃন্দাবন দাসের মতে যখন হরিদাস ‘হরিগাম’ উচ্চারণের জন্যে অর্থাৎ স্বধর্ম ত্যাগের অপরাধে স্থানীয় প্রশাসক কর্তৃক লাঞ্চিত হয়েছিলেন। চৈতন্যদেব তাঁর উচ্ছিষ্ট খেয়ে বৈষ্ণবসমাজে তাঁকে বিশেষ মর্যাদার আসনে প্রতিষ্ঠিত করেন এবং তিনি ‘হরিদাস ঠাকুর’ রূপে পরিচিত হন।

নিত্যানন্দ- নিত্যানন্দ ‘মাঘে শুক্লা ত্রয়োদশী ভূমিসূত বারে [মঙ্গলবারে চৈতন্যতত্ত্বপ্রদীপ]’ জন্মগ্রহণ করেন। তাকে ভক্তরা বলরামের অবতার মনে করত ‘ভক্ত স্বরূপা নিত্যানন্দ ব্রজে যঃ হলায়ুদ [গৌরগণোদ্দেশদীপিকা] নিত্যানন্দের বাল্যনাম ছিল কুবের- “মা বাপে থুইলা নাম কুবের পণ্ডিত” [লোচনদাস] নিত্যানন্দ চৈতন্যদেব থেকে তেরো বছরের বড় ছিলেন। অতএব ১৪৭৩ খ্রীস্টাব্দের ১২ই জানুয়ারি মাসে তাঁর জন্ম। বীরভূম জেলার একচাকা বা একচক্র গায়ে ছিল তাঁর নিবাস। মাতার নাম পদ্মাবতী পিতার নাম হাড়াই পণ্ডিত ওর্ফে মুকুন্দ পণ্ডিত- তিনি ছিলেন তৈর্যিক সন্ন্যাসী। ‘অষ্টাদশ বৎসরে ছাড়িল গৃহবাস’ [জয়ানন্দ]। অতএব ১৪৯১ খ্রীস্টাব্দে তিনি সন্ন্যাস গ্রহণ করেন। কিন্তু পরিণত বয়সে দুটো স্ত্রী গ্রহণ করে তিনি গৃহী হন। তাঁর স্ত্রীদের নাম বসুধা ও জাহুবা বা জাহুবী। এঁরা সূর্য সারথেলের কন্যা। এই জাহুবা ও পুত্র বীরভদ্র [বসুধার পুত্র, জয়ানন্দ] সহজিয়া বৈষ্ণবমতের প্রবর্তক প্রচারক হিসেবে প্রখ্যাত হয়েছেন। ডক্টর সুকুমার সেনের ভাষায় ‘নিত্যানন্দ ছিলেন বেশে অবধূত, আকারে মহামল্ল, ভোজনে পানে নির্বিকার, মেজাজে ক্ষণে রুষ্ট ক্ষণে তুষ্ট।’ বাংলাদেশে নিত্যানন্দই চৈতন্য প্রতিনিধি হিসেবে অদ্বৈতচার্যের সহযোগিতায় চৈতন্যধর্ম প্রচার করেন। চৈতন্যদেবকে তিনি রাধাকৃষ্ণের যুগল-অবতার রূপে স্বীকার করে তাঁর মূর্তি পূজারও ব্যবস্থা করেছিলেন। এবং তিনি বৈষ্ণব-আচার বিরোধী ‘সোনা রূপা মুক্তা পট্টবাস, চন্দ্রমালা ধারণ করতেন’ [চৈঃ ভাঃ]। এজন্যে বোধ হয় কোন কোন বৈষ্ণব নিত্যানন্দবিরোধী ছিলেন। কীর্তনের আসরে কেউ কেউ ‘নিত্যানন্দ নাম শুনি উঠিয়া পালায়’। খড়দহে তাঁর মতবাদ তাঁর স্ত্রী জাহুবা ও পুত্র বীরভদ্রের হাতে আরো বিকৃত হয়ে জনপ্রিয়তা লাভ করে এবং ভিন্ন মতের বৈষ্ণবশাখা প্রতিষ্ঠিত হয়। চৈতন্যভাগবতকার বৃন্দাবন দাস ছিলেন নিত্যানন্দের শিষ্য। কবি জয়ানন্দ বীরভদ্রের এবং কবি কৃষ্ণদাস কবিরাজ স্বপ্নের নিত্যানন্দের কৃপাপ্রাপ্ত ছিলেন বলে স্ব-স্ব গ্রন্থে উল্লেখ করেছেন।

নিত্যানন্দের মৃত্যু তিথি : আশ্বিন মাসেতে যোগ কৃষ্ণাষ্টমী তিথি। নিত্যানন্দ বৈকুণ্ঠ চলিলা ছাড়ি ক্ষিতি। [জয়ানন্দ]। বৈষ্ণব দিগদর্শনী অনুসারে ১৫৪২ সনের উক্ত তিথিতে ঘটে তাঁর মৃত্যু। নিত্যানন্দ উড়িষ্যারাজ প্রতাপরুদ্রের শ্রদ্ধেয় ছিলেন। তিনি 'নানা ধন দিয়া নিত্যানন্দে কৈল পূজা' [জয়ানন্দ, পৃঃ ২১৭]। নিত্যানন্দ উদার অবধূত ছিলেন— জাতিভেদ না করিমু ব্রাহ্মণে চণ্ডালে' [জয়ানন্দ, পৃঃ ২৩৫]।

নরহরি সরকার— কবি লোচনদাসের গুরু, পদকর্তা গৌরনাগরবাদের প্রবর্তক নরহরি সরকার। তিনি ও তাঁর ভাই মুকুন্দ দাস এবং মুকুন্দ দাসের পুত্র রঘুনন্দন কাটোয়ার নিকটে শ্রীখণ্ডী [শ্রীবৈদ্য খণ্ড] সম্প্রদায় বা গৌরনাগরবাদী সম্প্রদায় গড়ে তোলেন। কীর্তনে-সঙ্গীতের বিশেষ চর্চা ও উৎকর্ষ তাদের হাতেই হয়। কেউ কেউ তাঁদেরও বৈষ্ণব সহজিয়া মতের উদ্ভবের জন্যে দায়ী করেন, কেননা—তাঁরা আদিরসাত্মক নাগরীভাবের সাধক ছিলেন। রঘুনন্দন পরে শ্রীখণ্ডকেন্দ্রী শিষ্য সম্প্রদায়ের নেতৃত্ব দান করেন।

বাসুদেব সার্বভৌম— নীলাচলে প্রথমাধি চৈতন্যদেবের সহচর। তিনি সার্বভৌম ভট্টাচার্য রূপেই পরিচিত ছিলেন। বাসুদেব সার্বভৌম সহস্রনাম শ্লোকে চৈতন্যচরিতও রচনা করেছিলেন বলে জয়ানন্দ উল্লেখ করেছেন :

সার্বভৌম ভট্টাচার্য ব্যাস অবতার

চৈতন্য চরিত্র আগে করিল প্রচার।

চৈতন্যসহস্রনাম শ্লোক প্রবন্ধে

সার্বভৌম রচিল কেবল প্রমানন্দে।

চৈতন্যের মাতামহ নীলাধর চক্রবর্তী সার্বভৌমের পিতা নরহরি [বা মহেশ্বর] বিশারদের সহপাঠী ছিলেন—

সার্বভৌম কহে নীলাধর চক্রবর্তী

বিশারদের সমাধ্যায়ী এই তাঁর খ্যাতি।

মিশ্রপুরন্দর [জগন্নাথ মিশ্র] তার মান্য হেন জানি

পিতার সম্বন্ধে দোঁহা পূজ্য করি মানি।

অতএব বাসুদেব সার্বভৌম ভট্টাচার্য চৈতন্যদেবের বিশ-পঁচিশ বছরের বয়োজ্যেষ্ঠ ছিলেন। সার্বভৌম সম্ভবত নীলাচলে গিয়ে রাজা প্রতাপরুদ্রের সভাপণ্ডিত কিংবা পুরোহিত হয়েছিলেন। ন্যায়ে ও বেদান্তে তিনি বিশেষ ব্যুৎপন্ন বলে খ্যাত ছিলেন। সম্ভবত রঘুনাথ শিরোমণির ও সনাতন গোস্বামীর শিক্ষাগুরু ছিলেন এই সার্বভৌম।

স্বরূপ দামোদর— বৃন্দাবন দাসের, মতে স্বরূপ দামোদরের অন্য নাম ছিল পুরুষোত্তম আচার্য। নদীয়াপ্রবাসী চট্টগ্রামের জমিদার ভক্তবৈষ্ণব পুণ্ডরীক বিদ্যানিধির বন্ধু ছিলেন ইনি। ইনিও চৈতন্যদেবের বয়োজ্যেষ্ঠ ছিলেন। স্বরূপ দামোদর চৈতন্যচরিতসূত্র [কড়চা] রচনা করেছিলেন বলে নান্যগ্রন্থে উল্লেখ রয়েছে এবং এই রচনার সাহায্যও নেয়া হয়েছে চৈতন্যচরিতামৃত ও কবিকর্ণপুর পরমানন্দ সেনের গৌরগণোদ্দেশদীপিকায়, নরহরি চক্রবর্তীর ভক্তিরত্নাকরেও দামোদরের শ্লোক উদ্ধৃত হয়েছে। কিন্তু মূল কড়চা আজো অপ্রাপ্ত। স্বরূপ দামোদর নীলাচলে চৈতন্যদেবের নিত্যসঙ্গী ও কীর্তনে-নর্তনে সহযোগী ছিলেন। তিনি

চৈতন্যলীলার অন্যতম তত্ত্ব :

অতি গূঢ় হেতু সেই ত্রিবিধ প্রকার
দামোদর স্বরূপ হইতে যাহার প্রচার ।
অত্যন্ত নিগূঢ় এই রসের সিদ্ধান্ত
স্বরূপ গোসাঞি মাত্র জানেন একান্ত [চৈঃ চরিতামৃত]
প্রভুর যে শেষ লীলা স্বরূপ দামোদর
সূত্র করি গাঁথিলেন গ্রন্থের ভিতর । [ঐ]
আদিলীলা-সূত্ররূপে মুরারি শুণ্ড করিল গ্রন্থিত ।
মধ্য শেষ প্রভুলীলা স্বরূপ দামোদরে
সূত্র করি গাঁথিলেন গ্রন্থের ভিতর । [চৈতন্যতত্ত্বপ্রদীপ]

রায় রামানন্দ- ইনি পদকার এবং নীলাচলে চৈতন্যদেবের নিত্যসঙ্গী ও চৈতন্যপ্রবর্তিত প্রেমতত্ত্বের ভাষ্যকার। চৈতন্যচরিতামৃতে এর মুখেই চৈতন্যগ্রন্থের উত্তরে চরমতত্ত্ব অভিযুক্ত হয়েছে। রামানন্দ শাস্ত্রসম্মত ভক্তিদর্ম ও সাধ্যবস্ত্র ব্যাখ্যা করেছিলেন। কিন্তু সেসব ব্যাখ্যা চৈতন্যদেবের মনঃপূত হয়নি। রামানন্দ যতরকম ব্যাখ্যাভাষ্য দিচ্ছিলেন, চৈতন্যদেব বার বার 'এহো বাহ্য আগে কহো আর' বলে তা প্রত্যাখ্যান করছিলেন। অবশেষে রামানন্দ বলেন- 'কান্তভাব প্রেমসাধ্য সার'। তখন চৈতন্যদেব তাঁর অনুমোদন করলেন- 'প্রভু কহে এই সাধ্যবিধি সুনিশ্চয়।' রায় রামানন্দের পদেই এই তত্ত্ব রয়েছে 'পহিলি রাগ নয়ন ভঙ্গ ভেল ... এবং ন সো রমণ, ন হাম রমণী'- একে মধুরী ভাব বা গোপীভাব বা সখীভাব বলে। এর অন্য নাম 'কৃষ্ণেন্দ্রিয় প্রীতিইচ্ছা'। আবার চৈতন্য স্বয়ং রাধাকৃষ্ণের যুগলাবতার। চৈতন্যকে রায় [রামানন্দ] কহে-

রাধিকার ভাব-কান্তি করি অঙ্গীকার
নিজ রস আশ্বাদিতে করিয়াছ অবতার ।
[তুল : 'রূপ দেখি আপনার কৃষ্ণ হয় চমৎকার
আশ্বাদিতে সাধ উঠে মনে ।']

গদাধর পণ্ডিত- ইনি নদীয়ার মাধবমিশ্রের পুত্র এবং চৈতন্যের বাল্যবন্ধু ও অকৃত্রিম ভক্ত। গদাধর পণ্ডিত কবি জয়ানন্দের গুরু। ইনি নীলাচলে চৈতন্যসান্নিধ্যে তাঁর সহচর রূপে ছিলেন। অন্যমতে পিতাপুত্রের পূর্বনিবাস ছিল চট্টগ্রামে। [চৈ.চঃ উপাদান, পৃঃ ৫৭৩]

৪. চরিতকথার স্বরূপ

এক হিসেবে জীবনচরিতে ও কাব্য উপন্যাসে পার্থক্য সামান্য। রক্তমাংসের বাস্তব মানুষের জন্ম থেকে মৃত্যু অবধি সারা জীবনের ভাব-চিন্তার, আচার-আচরণের কর্মের এবং তৎসংশ্লিষ্ট ঘটনার ও দেশ-কাল-মানুষের বর্ণনা সম্বলিত গ্রন্থকে আমরা জীবনীগ্রন্থ বা চরিতকথা বলে থাকি। কৃতী ও কীর্তিমান মানুষ, ধনী-মানী কিংবা রাজা-বাদশাহ অথবা সাধু-সন্ত, ফকির-সন্ন্যাসী প্রভৃতি লোকশ্রুত, লোকবন্দ্য, লোকনিন্দ্য মানুষেরই জীবনী রচিত হয়। এদের ব্যক্তিত্ব গুণ, মান, মাহাত্ম্য, প্রভাব-প্রতাপ, দর্প-দাপট, চিন্তা-চেতনা, আচার-আচরণ, কৃতি-কীর্তি অন্য মানুষের মনে কৌতূহল ও জিজ্ঞাসা জাগায়। এগুলো লোকশিক্ষার উদ্দেশ্যও সিদ্ধ করে- সৎ ও মহৎ

স্বভাবে ও কর্মে অনুপ্রাণিত করা কিংবা অসৎ-অপকর্মে নিবৃত্তি দান করা প্রভৃতি নানা উদ্দেশ্যেই জীবনবৃত্তান্ত রচিত হতে পারে।

কাব্য কিংবা উপন্যাসও মানুষের মনে শ্রেয়োবোধ জাগানো ও সমাজহিতৈষণা লক্ষ্যে দেশ-কাল-মানুষের শাস্ত্রিক-নৈতিক-সামাজিক-আর্থিক-শৈক্ষিক-রাজনৈতিক জীবন সম্বন্ধে লেখকের জ্ঞান-অভিজ্ঞতার, মননের ও প্রজ্ঞালব্ধ চেতনার ও ভাবনার অনির্দেশ্য নৈর্ব্যক্তিক ও আদর্শায়িত আলোচনা-এ জীবনায়নে যা' আছে, তার চিত্র যেমন মেলে, যা' হওয়া উচিত তারও নকশা তেমন দেয়া থাকে।

কাব্যে-উপন্যাসে মানুষের প্রকৃতি ও প্রবৃত্তি, চিন্তা ও চেতনা, ঘটনা ও আচরণ, লেখকের অভিপ্রায়ের অনুগত। বাস্তব মানুষের ক্ষেত্রে লেখক দর্শক ও ভাষ্যকার মাত্র- দুটোতে পার্থক্য এটুকুই। এ টীকা-ভাষ্য দানের অধিকার রয়েছে বলেই উদ্ভিত ব্যক্তির ভক্ত বা নিন্দক তিলকে তাল করার এবং তালকে তিল করার এবং ঘটনা ও আচরণবাদ দেয়ার ও বানানোর স্বাধীনতাই সাধারণত প্রয়োগ করেন। ফলে অপরের জীবনচরিত কিংবা আত্মকথা, স্মৃতিকথা সবটাই কাব্য-উপন্যাসের গা ঘেঁষে চলে। বিশ্বাস অবিশ্বাসের অবাধ অধিকারও তাই পাঠকের থেকে যায়। এ ক্রটি থেকে বিবরণকে মুক্ত রাখা কিংবা এ মানস প্রবণতা থেকে মুক্ত থাকা লেখকের পক্ষে অসম্ভব। মানুষের মন হচ্ছে জট-পাকানো সুতোর মতো, আর মানুষের বৃদ্ধি হচ্ছে সীমিত। তাই মানুষ মাত্রেরই এক একটি অনন্ত রহস্যের আধার। কাজেই পরের কিংবা নিজের মনের গতি-প্রকৃতি স্বরূপে উপলব্ধি করা দুঃসাধ্য- আসে থেকে আঁচ করা তো অসম্ভব বটেই। কাজেই মানুষের কর্মের ও আচরণের সঠিক ব্যাখ্যা-বিশ্লেষণ অতি বড় প্রতিভার ও সামর্থ্যাতীত। যে অদৃশ্য কাণ্ডের মনের, কর্মের ও আচরণের অধিকর্তা, সে তো চির অচেনা ও অধরা। অতএব অভিপ্রায়ের স্বরূপ ও যথার্থ কারণ জানার উপায় নেই বলেই কর্মের ও আচরণের নির্ভুল ও অভিন্যূন্যর্থক তাৎপর্য নিরূপণ মানুষের সূক্ষ্মসাধ্যতীত।

চৈতন্যদেব ও তাঁর পার্শ্বদদের চরিত্রগ্রন্থ আলোচনার উপক্রম হিসেবেই কথাগুলো বলতে হল। কারণ চৈতন্যচরিতই পঁচিশ বছর আগে দেখা রক্তমাংসের বাঙালী মানুষের প্রথম সংস্কৃত-বাঙলা জীবনীগ্রন্থ বটে, কিন্তু তাঁকে ভক্তরা মানুষরূপে প্রত্যক্ষ করেননি, করেছেন নররূপী নারায়ণ হিসেবে। ফলে তাঁর ও পার্শ্বদ-পরিকরের জীবনীগ্রন্থগুলোও হয়েছে দেব-অবতারের মঙ্গলগাঁচালী। আচারে-আচরণে, চিন্তায়-চেতনায়, কর্মে-শক্তিতে ঐশ্বর্যে-অলৌকিকতায় এঁরা প্রমূর্ত দেবতা। চৈতন্য-নিত্যানন্দ অদ্বৈত-সীতা-জাহ্নবা-বীরভদ্র প্রভৃতি রাধাকৃষ্ণ, বলরাম, শিব প্রমুখের অবতার। কাজেই চৈতন্য ও চৈতন্যপার্শ্বদদের জীবনীগ্রন্থগুলো কালান্তরে ও রূপান্তরে এবং নামান্তরে নব মহাভারত, নব ভাগবত ও নব দেবগাঁচালী। অতএব গ্রন্থের নায়করা নামে মাত্র মানুষ। এগুলি দেব মঙ্গলের অনুসৃতি মাত্র এবং উনিশ শতকের আগে আমাদের ভাষায় আধুনিক সংজ্ঞায় জীবনচরিত রচিত হয়নি। তবু জলে যে যতটুকু নামে, সে ততটুকু ভিজে। কৃষ্ণলীলার আদলে নরনারায়ণের জীবনলীলা বর্ণনা করতে গিয়েও লেখকরা দেশ-কাল পরিবেশ এড়াতে পারেননি। তাই নানা প্রসঙ্গে আনুষঙ্গিকভাবে এসেছে বাস্তব গাঁ, গঞ্জ, নগর, গিরি, নদী, কান্তার, ব্যক্তি, সমাজ, শাস্ত্র, শাসক, প্রশাসক এবং নৈতিক সামাজিক সাংস্কৃতিক জীবনকথা ও ঘটনা। দাক্ষিণাত্য থেকে উত্তর ভারতের বৃন্দাবন অবধি গোটা এলাকার নানা সাময়িক সংবাদ নানা সূত্রে রয়েছে বর্ণিত। সেগুলো ষোল শতকের শাস্ত্রিক-সামাজিক-ভৌগোলিক, সাম্প্রদায়িক, প্রশাসনিক, নৈতিক, আর্থিক, সাংস্কৃতিক ও রাজনৈতিক অবস্থা ও অবস্থানের সংবাদ চিত্র বহন করছে। চরিত্রাখ্যানগুলোর সর্বাধিক গুরুত্ব এখানেই।

৫. চৈতন্য চরিত্রম্

ক. সংস্কৃত ভাষায়

১. মুরারি গুপ্তের শ্রীকৃষ্ণচৈতন্যচরিতামৃতম

১৬২০ খ্রীস্টাব্দে রচিত ব্রজমোহন দাসের চৈতন্যভট্টপ্রদীপ গ্রন্থ সূত্রে জানা যায় মুরারি গুপ্তের কড়চাই চৈতন্যদেবের আদি চরিত্রগ্রন্থ এবং চৈতন্যদেবের জীবৎকালে শ্লোক সূত্রাকারে রচিত। মুরারি গুপ্ত চৈতন্যজীবনের আদিকাণ্ড তথা সন্ন্যাসজীবন অবধি [গয়া থেকে প্রত্যাবর্তন পর্যন্ত] বর্ণনা করেছিলেন। কাজেই তাঁর নামে প্রচলিত গ্রন্থের মধ্য ও শেষ লীলা অপর কারো যোজনা। কৃষ্ণদাস কবিরাজের চৈতন্যচরিতামৃতে স্পষ্ট ভাষায় এ তথ্যের সমর্থন মেলে :

“আদি লীলা মধ্য যত প্রভুর চরিত
সূত্ররূপে মুরারি গুপ্ত করিল গ্রন্থিত।
মধ্য শেষ প্রভুলীলা স্বরূপ দামোদর
সূত্র কবি গাঁথিলেন গ্রন্থের ভিতর।”

স্বরূপ দামোদরের চৈতন্যচরিতসূত্র পাওয়া যায় না। মুরারি গুপ্তের কড়চায় বর্ণিত মধ্য ও শেষ লীলা হয়তো স্বরূপ দামোদরেরই রচনা। দামোদরের ভণিতা বাদ দিয়ে পরবর্তী কেউ মুরারি গুপ্তের নামে চালিয়ে দিয়েছে। উল্লেখ্য যে মুরারি গুপ্ত চৈতন্যপারম্যবাদের অন্যতম প্রবক্তা ও প্রবর্তক, ‘দশাক্ষর গোপাল’ মন্ত্রের পরিবর্তে গৌরমন্ত্রে দীক্ষাও দিতেন তিনি। কাজেই তাঁর শিষ্য সম্প্রদায়ের কাছে তাঁর রচনার স্বীকৃতি অপরিস্রব। তাছাড়া এখনকার মুদ্রিত গ্রন্থটি প্রমোদপুরে রচিত, বক্তা মুরারি এবং শ্রোতা দামোদর। তাতেও মনে হয় দামোদরের রচিত চরিত্রসূত্রও মুরারির নামে চলে। তাছাড়া গ্রন্থে রয়েছে ভক্ত হিসেবে মুরারির নাম; তার প্রশস্তি ও নিত্যানন্দ প্রশস্তি। মুরারির যখন নিত্যানন্দের মতো, নিজেরই একটা মতাদর্শ ছিল তখন একের অপরের প্রতি শ্রদ্ধা কম থাকারই কথা। নিজেকে ‘বৈদ্যসিংহ’ বলে উল্লেখ, আর গ্রন্থের বিন্যাসে বিপর্যয় অন্যের হস্তাবলম্বের প্রমাণ। বিশেষ করে কবিকর্ণপুর পরমানন্দ সেন আদি লীলার পরে যখন আর মুরারি গুপ্তের অনুসরণ করেননি, তখন এ তথ্যকেও প্রমাণক হিসেবে গ্রহণ করা সম্ভব। চৈতন্যচরিতামৃতে কৃষ্ণদাস কবিরাজ আরো বলেছেন :

দামোদর স্বরূপ আর গুপ্ত মুরারি
মুখ্য মুখ্য সূত্র লিখিয়াছে বিচারি।
সেই অনুসারে লিখি লীলা সূত্রগণ
বিস্তারি বর্ণিয়াছে দাস বৃন্দাবন।

বৃন্দাবন দাসই কবিরাজের মুখ্য অবলম্বন ছিল। একারণেই হয়তো কৃষ্ণদাস কবিরাজের গ্রন্থে মুরারি গুপ্তের কিংবা দামোদরের শ্লোক বেশি উদ্ধৃত হয়নি। যদিও কৃষ্ণদাস কবিরাজ মুরারি গুপ্তের গ্রন্থকে কড়চা [জীবনচরিত অর্থে] বলে উল্লেখ করেছেন। কিন্তু মুরারি গুপ্তের গ্রন্থনাম ‘শ্রীকৃষ্ণচৈতন্যচরিতামৃতম’। সে যুগে বোধ হয় সাধারণ অর্থে বাস্তব ঘটনা বা কর্ম বা আচরণের বিবরণ বা বৃত্তান্তকে ‘কড়চা’ বলা হত। ‘কড়চা’ ভট্টর সুকুমার সেনের মতে সংস্কৃত কৃতকৃত্য-এর অপভ্রংশ। তাই যদি হয়, তা হলে জীবনকাহিনীর যথার্থ পরিভাষা কড়চাই। এবং কৃষ্ণদাস কবিরাজও সে-অর্থেই ব্যবহার করেছেন— ‘আর আর কড়চা-কর্তা রহে দূর দেশে’।

মুরারি গুপ্ত চৈতন্যের বয়োজ্যেষ্ঠ সহপাঠী ও ভক্তবন্ধু ছিলেন। রামভক্ত মুরারি গুপ্ত চৈতন্যকে রাম বা কৃষ্ণ স্বরূপ দেখতেন। তাই পুরীতে সঙ্গীদের সঙ্গে জগন্নাথ দর্শনে যাত্রা করেও তিনি ফিরে গিয়ে প্রথমে চৈতন্যদেবের সঙ্গে সাক্ষাৎ করেন। বৃন্দাবন দাস, ব্রজমোহন দাস, নরহরি চক্রবর্তী, লোচন দাস, কবিকর্ণপুর পরমানন্দ সেন প্রমুখও মুরারি গুপ্তের কড়চা ব্যবহার করেছেন।

বৃন্দাবন দাসের কিংবা লোচন দাসের সময়েই মুরারি গুপ্তের ও দামোদরের রচনা অভিন্ন সত্তা লাভ করে। তাই লোচন দাসের চৈতন্যমঙ্গলে ও কবিকর্ণপুরের শ্রীচৈতন্যচরিতামৃত মহাকাব্যে মুরারি গুপ্তের কড়চা ‘শ্রীকৃষ্ণচরিতামৃতে’র বহুল ও প্রায় আক্ষরিক অনুসৃতি মেলে। কৃষ্ণদাস কবিরাজ নিশ্চয়ই বিশ্বস্তজনদের মুখে শুনেছিলেন কিংবা লিখিত রচনায় পড়েছিলেন যে মুরারি গুপ্ত আদি লীলা এবং স্বরূপ দামোদর মধ্য ও শেষ লীলা বর্ণনা করেছিলেন। কাজেই আমরা মনে করি কড়চার সংশোধিত রচনা কালটি—

‘চতুর্দশশতাব্দীতে পঞ্চত্রিংশতি বৎসরে

আষাঢ় সিতসপ্তম্যাং গ্রহোহয়ং পূর্ণতাংগতঃ।’

অতএব ১৪৩৫ শকাব্দে আষাঢ়ের শুক্ল সপ্তম তারিখে গ্রহ সমাগু হয় [১৫১৩ খ্রীঃ]। কড়চা ভক্তের রচনা। কাজেই চৈতন্যজীবনের ও তাঁর পার্শ্বদেবের বাস্তব জীবনের কিছু কর্মের, আচরণের ও সম্পর্কের কথাই কেবল অবৈষ্ণব পাঠকের উজ্জীব্য।

২. কবিকর্ণপুর পরমানন্দ দাস [সেন] রচিত

ক. শ্রীচৈতন্যচরিতামৃত মহাকাব্যম্

খ. শ্রীচৈতন্যচন্দ্রোদয় নাট্যম্

গ. শ্রীগৌরগণোদ্দেশদীপিকা

ঘ. শ্রীকৃষ্ণাঙ্কিক কৌমুদী।

চৈতন্যদাস রামদাস আর পরমানন্দ সেন

তিনপুত্র শিবানন্দের প্রভুর ভক্ত শূর [চৈ. চ.]

পিতরংশ্রীশিবানন্দং সেনবংশপ্রদীপকং (গৌরগণোদ্দেশদীপিকা)।

পদকার শিবানন্দ সেনের নিবাস ছিল কাঁচড়াপাড়ায়। গৌরপারম্যবাদের তিনিও ছিলেন একজন প্রবক্তা। পরমানন্দ সেন ভগিনীয়ায় প্রায়ই রমানন্দ দাস নামে আত্মপরিচয় দিয়েছেন। চৈতন্যচরিতামৃতে বলা হয়েছে যে, চৈতন্যনির্দেশেই শিবানন্দ পরমানন্দপুরীর নামানুসারে কনিষ্ঠ পুত্রের নাম রাখেন— ‘এবার তোমার যেই হইবে কুমার/পুরীদাস বলি নাম ধরিহ তাহার। প্রভুর

^১ সম্প্রতি ডক্টর তারাপদ মুখোপাধ্যায় প্রমাণ করতে চেয়েছেন (মাসিক চতুরঙ্গ, মে ১৯৮৫ কলিকাতা, পৃঃ ৫৭-৭০) যে আসলে চৈতন্যচরিতামৃত মহাকাব্য কবিকর্ণপুরের রচনা নয়। এর রচনাকাল ও ১৫৪২ খ্রীষ্টাব্দ নয়। মহাকাব্যের রচয়িতা অজ্ঞাত। রচনাকাল সপ্তদশ শতাব্দীর সপ্তম বা অষ্টম দশক। একথা স্বীকার করতে হয় যে সপ্তদশ শতাব্দীর শেষার্ধ্বে মুরারি গুপ্ত আর কৃষ্ণদাস কবিরাজের চৈতন্যচরিতের আধারে বিষ্ণুদাস গোস্বামী প্রমুখেরা কবিকর্ণপুরের নামের আড়ালে আত্মগোপন করে শ্রীকৃষ্ণচৈতন্যচরিতামৃত মহাকাব্য নামক গ্রন্থখানি রচনা করেছিলেন। (পৃঃ ৬৮)

আজ্জায় ধরিল নাম পরমানন্দ দাস'। তাঁর কৃতিত্ব ও ভক্তির জন্যে তিনি 'কবিকর্ণপুর' উপাধি লাভ করেছিলেন। পরমানন্দের গুরু ছিলেন 'শ্রীচৈতন্যমতমঞ্জুষা' নামের ভাগবত টীকা প্রণেতা শ্রীনাথ। মুরারি গুপ্ত প্রসঙ্গে আমরা দেখেছি যে পরমানন্দ তাঁর চৈতন্যচরিতামৃতকাব্যে মুরারির নামে প্রচলিত কড়চা বা শ্রীকৃষ্ণচৈতন্যচরিতামৃত প্রায় আক্ষরিকভাবে অনুসরণ করেছেন। এ কাব্যের রচনা কাল—

'বেদা রসাঃ শ্রুতয় ইন্দুরিতি প্রসিদ্ধি'
শাকে তথা বলু শুচো শুভগে চ মাসি।
বারে সুধাকিরণনাম্নাসিত দ্বিতীয়া—
তিথ্যন্তরে পরিসমাণ্ডিরভূদমুখ্য।

বেদা-৪, রসা-৬, শ্রুতয়-৪, ইন্দু-১, 'অঙ্কস্যাবামা গতি' নিয়মে ১৪৬৪ [১৫৪২ খ্রীঃ ২৯ শে মে] শকের আষাঢ় মাসের কৃষ্ণা দ্বিতীয়া তিথিতে সোমবারে এ কাব্য রচিত হয়। কবিকর্ণপুর চৈতন্যদেবকে বাল্যকালে দেখেছিলেন এবং তাঁর কৃপা পেয়েছিলেন—

শিবানন্দ সেই বালক যবে মিলাইল
মহাপ্রচুর পদাঙ্কুট তার [পরমানন্দের] মুখে দিল। [চৈ.চ.]

এ কাব্য শিশু পরমানন্দ দাসের ষোল বা আঠারো বা বিশ বছর বয়সের অগরিণত রচনা, তাই মুরারি গুপ্তের কড়চার একাদশ সর্গ অবধি অনুসরণ আবশ্যিক হয়েছিল। তিনি মুরারির ঋণ স্বীকারও করেছেন :

... নমাম্যহমসৌ স মুরারিসংজ্ঞং...
যৎপ্রসাদাচ্চৈতন্যচরিতামৃতমক্ষিপীতং।

অথবা আশৈশবং প্রভুচরিতাবিলাসবিজ্ঞেঃ কোচিনুরারি ...
... স্তব্ধদ্বিলোক্য বিলিলেখ শিশুঃ স এষঃ।

বাদবাকী অংশ তাঁর পিতা শিবানন্দ ও অন্যান্য ভক্তদের মুখে শুনে লিখেছিলেন। এতেও মনে হয় মুরারি গুপ্ত তাঁর নামের পুরো কড়চার রচয়িতা নন। চৈতন্যচন্দ্রোদয় নাটক তাঁর পরিণত বয়সের রচনা। এবং এটি 'শাকে চতুর্দশশতে রবিবাজিযুক্ত' সনে অর্থাৎ ১৪৯৪ শকে বা ১৫৭২-৭৩ খ্রীস্টাব্দে রচিত। তবে নাটকের প্রস্তাবনা সূত্রে এ-ও স্বীকার করতে হয় যে রাজা প্রতাপরুদ্রের [মৃত্যু ১৫৪০ খ্রীঃ] আদেশে তাঁর জীবৎকালেই রচনা শুরু করেছিলেন কবি। এবং হয়তো প্রতাপরুদ্রের মৃত্যুর ফলে সাময়িকভাবে রচনা বন্ধ থাকে। তা হলেই কবির প্রস্তাবনার উক্তি এবং নাটক সমাপ্তিকালীন উক্তি দুটো সত্য বলে স্বীকৃত হতে পারে এবং তাৎপর্যপূর্ণও হয় :

১. গজপতিনা প্রতাপরুদ্রোদ্যোগোহমি। [সুপ্রধার]
২. এতাং তৎপ্রিয়মণ্ডলে শিব শিবশ্চতৈকশেষং গতে
কো জানাতু শৃণোতু কঃ স্তদনবাক্ষঃ স্বয়ং প্রীয়তাং।

—অর্থাৎ চৈতন্যদেবের প্রিয়মণ্ডল [পরিকরেরা] স্মৃতি লোকে, কে জানবে আর শুনবে এ নাট্যকথা গৌরগণোদ্দেশদীপিকা [চৈতন্য পরিকর পরিচিতি মূলক রচনা]। এটি 'শাকে বসুন্ধরমিতে মনুনৈব যুক্ত' সনে তথা ১৪৯৮ শকে বা ১৫৭৬-৭৭ খ্রীস্টাব্দে রচিত। অন্য

একখানি পুথির 'শাকে রসারসমিতে মননৈবযুক্ত' পাঠ [১৪৬৭ শক] সম্ভবত ভুল। কারণ এ গ্রন্থে বৃন্দাবন দাস 'বেদব্যাস' রূপে প্রথংসিত। কিন্তু ১৪৬৭ শকের দিকে বৃন্দাবন দাসের চৈতন্যমঙ্গল [ভাগবত] রচিত ও প্রচারিত হয়েছিল কিনা নিঃসন্দেহে বলবার উপায় নেই। পরমানন্দ [দাস বা সেন] সংস্কৃতে পদরচনা করেছিলেন। রূপগোষ্ঠামীর পদ্যাবলীতে পরমানন্দের একটি পদ সংকলিত রয়েছে।

৩. প্রবোধানন্দ সরস্বতী রচিত শ্রীচৈতন্যচন্দ্রামৃত

প্রবোধানন্দ সরস্বতী পণ্ডিতকবি ছিলেন। চৈতন্যচন্দ্রামৃতে তিনি তাঁর জ্ঞান, প্রজ্ঞা, সাহিত্যরুচি, বৈদম্ব্য, ভক্তি সব কিছু সুনিপুণভাবে প্রয়োগ করেছেন। এটি ১৪৩ টি শ্লোকবিশিষ্ট স্তোত্রকাব্য। বারোটি প্রকরণে এটি বিন্যস্ত, যথা - স্তুতি, নতি, আশীর্বাদ, চৈতন্যভক্তমহিমা, চৈতন্য-অভক্তনিন্দা, দৈন্য, উপাস্যনিষ্ঠা, চৈতন্যের উৎকর্ষ, চৈতন্যাবতার মাহাত্ম্য, লোকশিক্ষা, রূপোল্লাস ও শোচন। এতে প্রায় সর্বপ্রকার সংস্কৃত ছন্দ ব্যবহৃত হয়েছে। স্তোত্র কাব্য মাত্রই ভক্তির আতিশয্যদুষ্ট এ কাব্যও তাই।

প্রবোধানন্দ সরস্বতীর সশুদ্ধ উল্লেখ রয়েছে পরবর্তী গ্রন্থ গৌরগণোদ্দেশদীপিকায়, অনুরাগবল্লীতে, ভক্তিরত্নাকরে এবং জীব গোষ্ঠামীর, দৈবকীনন্দনের, বৃন্দাবন দাসের ও ব্রজমোহন দাসের বৈষ্ণব বন্দনায়। প্রবোধানন্দ সরস্বতী ত্রিমল্ল ও বেক্ট ভট্টের কনিষ্ঠ ভ্রাতা ও ষড়্গোষ্ঠামীর অন্যতম গোপাল ভট্টের পিতৃব্য, শিক্ষা ও দীক্ষাগুরু। 'অধ্যয়ন উপনয়ন যোগ্য আচরণে/পূর্বত সকল শিক্ষা পিতৃব্যের স্থানে' [অনুরাগবল্লী]। প্রবোধানন্দ... চন্দ্রামৃতং রচিতং যৎশিষ্যো' গোপাল ভট্ট। [জীব গোষ্ঠামীর বৈষ্ণব বন্দনা]। মনে হয় সরস্বতীসম্প্রদায়ভূক্ত প্রবোধানন্দ চৈতন্য সান্নিধ্যে [চৈতন্যচন্দ্রামৃতের সাক্ষ্য, ৩৭, ৪১, ৫৮, ১৪১ সংখ্যক শ্লোক] এসে কৃষ্ণরূপ চৈতন্যকেই সাধ্যরূপে গ্রহণ করেন। তিনিও তাই গৌরপারম্যবাদী। তাঁর শিষ্য গোপাল ভট্টও গৌরপারম্যবাদী ছিলেন— 'স্বয়ং ভগবান জানি শ্রীকৃষ্ণ চৈতন্য/সেবিলেন গোপাল ভট্ট কায় বাক্য মনে [অনুরাগবল্লী— মনোহর দাস]। চৈতন্য-পরিকরচরিত্রবৈশিষ্ট্য নির্দেশসূত্রে তিনি আদর্শ বৈষ্ণবের লক্ষণ বর্ণনা করেছেন :

তৃণাদপি চ নীচতা সহজসৌম্য মুম্বাকৃতিঃ

সুধামধুর ভাষিতা বিষয়গন্ধ— থৃৎকৃতিঃ।

হরিপ্রণয়বিহ্বলা কিমপি ধীরনালম্বিতা

ভবন্তি কিল সদগুণা জগাত গৌরভাজামমী। [২৪ সং শ্লোক]

খ. বাঙলা ভাষায়

১. বৃন্দাবন দাসের চৈতন্যভাগবত

বৃন্দাবন দাসের 'চৈতন্যমঙ্গল' কৃষ্ণভাগবতের মতো বৈষ্ণবসমাজে চৈতন্য ভাগবত রূপে নামে-গুণে মাহাত্ম্যে বিশিষ্ট স্থান অধিকার করে রয়েছে। আর তত্ত্ব-দর্শন গ্রন্থ হিসেবে অনন্য মর্যাদা পায় কৃষ্ণদাস কবিরাজের 'চৈতন্যচরিতামৃত'।

বৃন্দাবন দাস বালবিধবা নারায়ণীর অবৈধ সন্তান। তাই তিনি শ্রীবাস বা শ্রীনিবাসের ভ্রাতৃকন্যা নারায়ণীর সন্তান বলে আত্মপ্রচয় দিয়েছেন। এমনকি তাঁর মাতামহের নামও উল্লেখ করেননি। শ্রীবাস পণ্ডিতের নাম যে শ্রীনিবাসই ছিল তার প্রমাণ আছে 'চৈতন্যভাগবতে'

প্রভু বোলে শুন শুন শ্রীবাস পণ্ডিত
আমি নিত্যানন্দ দুই নন্দন তোমার,
শ্রীনিবাস চরণে রহুক নমস্কার
গৌরচন্দ্র নিত্যানন্দ নন্দন যাহার। [চৈ. ভাঃ]

চৈতন্যতত্ত্বপ্রদীপেও পাই— ‘শ্রীনিবাস পণ্ডিতের দুহিতা ভ্রাতার। নারায়ণী নাম তার চারি বৎসরের।’ শ্রীবাসেরা চার ভাই— শ্রীনিবাস, শ্রীরাম, শ্রীপতি, শ্রীকান্ত বা শ্রীনিধি— এসব নাম ভক্তিরত্নাকরে ও নরোত্তমবিলাসে মেলে। প্রেমবিলাস মতে এঁদের মৃত জ্যেষ্ঠভ্রাতা নলিন পণ্ডিতই ছিলেন নারায়ণীর পিতা। অন্যমতে নারায়ণীর পিতার নাম শ্রীরাম। কলকাত্তত্ত্বজ্ঞানের জন্যে প্রেমবিলাসে বৃন্দাবন দাসের পিতার নামও উদ্ভাবন করা হয়েছে—

বৃন্দাবন দাস যবে আছিলেক গর্ভে
তার পিতা বৈকুণ্ঠ দাস চলি গেল স্বর্গে।

পিতার পিওদান উপলক্ষে বিশ্বম্ভর (নিমাই) গয়া থেকে নদীয়ায় শ্রীবাসের বাড়ি যান। তখন নিমাইয়ের বয়স তেইশ বছর [১৪৩০ শক বা ১৫০৮ খ্রীঃ]। এ সময়ে শ্রীবাসের ভ্রাতৃকন্যা নারায়ণীর বয়স ছিল চার বছর [চৈ. ভাঃ] তিনি চৈতন্যদেবের ‘চর্বিত পান’ রূপে কৃপা পেয়েছিলেন [চারি বৎসরের সেই উন্নত চরিতা— চৈ. ভাঃ] শ্রীবাস ভ্রাতৃতনয়া ভর্তৃকা মধুর দুতি [মুরারি গুপ্ত]

“শ্রীনিবাস পণ্ডিতের দুহিতা ভ্রাতার
নারায়ণী নাম তার চারি বৎসরের।
মহাভাবময় প্রভু দেখিয়া সম্মুখে
চর্বিত চর্বন প্রভু দিল তার মুখে।
‘আল রাঢ়ি’ বলি তেঞি কহেন তাহারে
বৃন্দাবন দাস জন্ম যাহার উদরে।” [চৈতন্যতত্ত্ব প্রদীপ]

মুরারি গুপ্ত, কবিকর্ণপুর প্রমুখ সবাই স্বীকার করেছেন যে নারায়ণী বালবিধবা। পদকর্তা উদ্ধবদাস বলেন :

‘প্রভুর চর্বিত পান স্নেহবশে কৈল দান
নারায়ণী ঠাকুরাণী হাতে
শৈশবে বিধবা ধনি সাধ্বীসতী শিরোমণি
সেবন করিল সে চর্বিতে।’

আজো সমাজে অবৈধ সন্তান বাঁচিয়ে রাখা যায় না, তেমন মা-ও পায় না সমাজে ঠাই। সেদিন চৈতন্যপ্রভাবে তাও সম্ভব হয়েছিল বাঙলাদেশে-নদীয়ায়। ব্যাসের মতো বৃন্দাবনও হয়েছিলেন চৈতন্যবেদব্যাস পরম ভক্তিভাজন মহাজন! নারায়ণী সপুত্র আশ্রয় পেয়েছিলেন বাসুদেব দত্ত স্থাপিত নবদ্বীপের মামগাছি সেবাপাটে। কৃতজ্ঞ বৃন্দাবন দাস তাই পরোক্ষ বাসুদেব দত্তের ঋণ স্বীকারও করেছেন ...

জগতের হিতকারী বাসুদেব দত্ত
সর্বভূতে কৃপালু চৈতন্য রসে মত্ত।
গুণগ্রাহী অদোষ-দরশী সবা প্রতি
ঈশ্বরে বৈষ্ণবে যথাযোগ্য রতি মতি। [চৈ. ভাঃ]

ব্রজমোহন দাস বলেছেন :

নারায়ণী 'আলরাড়ি' ঘোষণা যাহার

বৃন্দাবন দাস হন যাহার কুমার ।-

মামগাছি পাট বোধ হয় এখানকার নারায়ণীর পাট ।

বাসুদেব দত্ত 'জন্ম হোক যথা তথা কর্ম হোক সত্য'-এ মানবিক মূল্যবোধে আস্থাবান ছিলেন ।

বৃন্দাবন দাসের জন্মকাল

বৃন্দাবন দাস তাঁর গ্রন্থে রচনাকাল উল্লেখ করেননি। সম্ভাব্য রচনাকাল নিরূপণের জন্যে বিদ্বানেরা বৃন্দাবনের জন্ম সন অনুমান করতে প্রয়াসী। চৈতন্যের জীবিতকালেই বৃন্দাবন দাসের জন্ম হয়। কিন্তু শেষ আঠারো বছর ব্যাপী নীলাচলবাসী চৈতন্যদেবকে বৃন্দাবন কখনো দেখেননি। কথিত আছে যে, নিত্যানন্দ বারো বছর বয়সে তৈর্থিক সন্ন্যাসীর সহচর হন এবং বিশ বছর পরে বত্রিশ বছর বয়সের নিত্যানন্দ নবদ্বীপে তেইশ বছর বয়সের [১৪৩০ শক] চৈতন্যদেবের সঙ্গে যোগ দেন। তাহলে নিত্যানন্দ চৈতন্যদেবের চেয়ে নয়-দশ বছরের বড়। এ বছরেই অর্থাৎ ১৪৩০ শকে [১৫০৮ খ্রীঃ] নারায়ণী ছিলেন চার বছরের বালবিধবা। অতএব নারায়ণীর জন্ম হয় ১৪২৫-২৬ শকে। নারায়ণীর যৌবনসময়ই যদি বৃন্দাবন দাসের জন্ম হয় তাহলেও ১৪৪১-৪২ শকের আগে বৃন্দাবন দাসের জন্ম হওয়া স্বাভাবিক নয় এবং চৈতন্যভাগবত দৃষ্টে বোঝা যায় বৃন্দাবন দাস তরুণ বটে, কিন্তু বিদ্যা-বুদ্ধিতে কাঁচা নন, এজন্যে অন্তত পঁচিশ বছর বয়স দরকার। অতএব তিনি অন্তত পঁচিশ বছর বয়সে অর্থাৎ ১৪৬৬-৬৭ শকে ভাগবত রচনা শুরু করেন। পূর্বসূরীর গ্রন্থ দেখে, জ্যেষ্ঠবৈষ্ণবদের থেকে জেনে এবং নদীয়ার নানা লোক থেকে শুনে তাঁকে এ গ্রন্থ লিখতে হয়েছে-১, 'তাহা লিখি যাহা গুনিয়াছি ভক্ত স্থানে', ২, 'নিত্যানন্দ প্রভু মুখে বৈষ্ণবের তত্ত্ব/কিছু কিছু শুনিলো সবাব মহন্ত', ৩, 'অদ্বৈতের শ্রীমুখের এ সকল কথা', ৪, 'গদাধর শ্রীমুখের কথা কিছু লিখি [তুল : চৈতন্যের অবশেষ পাত্র নারায়ণী]', ৫, 'নিত্যানন্দ হেন প্রভু যাহার হারায/ কোথাও জীবনে সুখ নাহিক তাহার'। ৬, 'জয় প্রভু গৌরচন্দ্র/দিলো নিলাও তুমি প্রভু নিত্যানন্দ'।- এতে বোঝা যায় গ্রন্থারম্ভে যারা জীবিত ছিলেন, সমাপ্তির দিকে তাঁরা তিরোহিত। গ্রন্থের উপকরণ সংগ্রহ কালে অদ্বৈতাচার্য, শ্রীবাস, নিত্যানন্দ, গদাধর প্রমুখ বেঁচে ছিলেন। রচনা করতে যে বেশ কয়েক বছর লেগেছিল, এ-ও তার প্রমাণ। কাজেই গ্রন্থরচনা দ্রুত অগ্রসর হতে পারেনি। এ গ্রন্থ রচনা করতে অন্তত ৮/১০ বছর লাগার কথা। জয়ানন্দের উক্তি থেকে গুরুত্ব দিলে স্বীকার করতে হবে যে আদি, মধ্য ও শেষ খণ্ড আলাদাভাবে ও সময়ের ব্যবধানে রচিত। জয়ানন্দ বলেছেন :

আদিখণ্ড মধ্যখণ্ড শেষখণ্ড করি

বৃন্দাবন দাস প্রচারিল সর্বোপরি ।

জয়ানন্দ বইয়ের নাম বলছেন না, এর সরল অর্থ এই- বৃন্দাবন দাস আদিখণ্ড রচনা করে প্রচার করেন, তারপর কালের ব্যবধানে মধ্যখণ্ড, তারও পরে শেষখণ্ড রচনা করেন। অর্থাৎ- তিনখণ্ড এক সঙ্গে রচিত ও প্রচারিত হয়নি। চৈতন্যভাগবতে সে প্রমাণও রয়েছে। বৃন্দাবন বৃদ্ধ নিত্যানন্দের কাছেই দীক্ষা নেন। ঠিক আঠারো বছর বয়সে যদি দীক্ষা নেন, তাহলেও আমাদের হিসেবে ১৪৫৯-৬০ শকের আগে তিনি দীক্ষিত হননি। এসময়ে নিত্যানন্দের বয়স ৬২-৬৩

বছর ছিল। তা হলে মানতে হবে নিত্যানন্দের জীবৎকালে গ্রন্থরচনার শুরু বটে :

১. অন্তর্যামী নিত্যানন্দ বলিলা কৌতুকে
চৈতন্যচরিত কিছু লিখিতে পুস্তকে।
২. নিত্যানন্দ স্বরূপের আঙ্কা করি শিরে
সূত্র মাত্র লিখি আমি কৃপা অনুসারে।
৩. তাহান [নিত্যানন্দের] আঙ্কায় আমি কৃপা অনুক্রমে
কিছু মাত্র সূত্র আমি লিখিল পুস্তকে।
৪. সেই প্রভু কলিয়ুগে অবধূত রায়
সূত্র মাত্র লিখি আমি তাহান আঙ্কায়।

কিন্তু গ্রন্থ রচনাকালে বৈষ্ণবসমাজে সাম্প্রদায়িক ভেদ-বিদ্বেষ প্রবল হয়ে উঠেছিল, তখন গৌরনাগরবাদীরা, অদ্বৈতশিষ্যরা, গদাধর সম্প্রদায়, নিত্যানন্দের মত বিরোধী সম্প্রদায় প্রভৃতি একে অপরের প্রতি বিদ্বেষ ও অবজ্ঞাপরায়ণ [অবশ্য যদিও চৈতন্যের জীবৎকালেই এসব মতভেদ ক্ষীণাকারে আত্মপ্রকাশ করছিল]— এটি কালিক ব্যবধানের সাক্ষ্য :

১. অতএব যত মহামহিম সকলে
গৌরান্ধ নাগর হেন স্তর নাহি করে।
২. অদ্বৈতরে গাইলেক শ্রীকৃষ্ণ করিয়া
অদ্বৈতরে ভঞ্জে গৌরচন্দ্রে করে হেলা।
৩. অদ্বৈতের পক্ষ হইয়া নিন্দে গদ্যধর।
৪. এই অবতারে কেহো গৌরচন্দ্র গায়
নিত্যানন্দ নাম শুনি উঠিয়া পালায়।
৫. নিত্যানন্দ নিন্দা করে [যাইবেক নাশ] হবে সর্বনাশ
[—এটি বার বার উচ্চারিত হয়েছে]।

এসব ভেদ-বিদ্বেষ দ্বন্দ্ব প্রকট ও প্রচার হতে চৈতন্যোত্তর পন্থারো বিশ বছর সময় লাগার কথা। চৈতন্যের জীবৎকালে নিত্যানন্দ বলরামের অবতাররূপে পূজনীয় ছিলেন, এবং বয়োবৃদ্ধ অদ্বৈতকে, চৈতন্যের নিত্যসঙ্গী সহপাঠী গদাধরকে প্রকাশ্যে নিন্দা করবার লোক ছিল না ১৫৩৩ সন অবধি। কাজেই দ্বন্দ্ব হচ্ছিল নতুন উত্তরপুরুষের মধ্যে।

১৫৭৬ খ্রীস্টাব্দে অর্থাৎ ১৪৯৮ শকে রচিত কবিকর্ণপুরের গৌরগণোদ্দেশদীপিকায় বৃন্দাবন দাসকে ‘বেদব্যাস’ ভূলা বলে উল্লেখ করা হয়েছে। তাতে বিদ্বানেরা মনে করেন যে, কবিকর্ণপুরের উক্ত গ্রন্থ রচনার বেশ কয়েক বছর আগে রচিত না হলে বৃন্দাবন দাসের ‘বেদব্যাস’ খ্যাতি দিকে দিকে ছড়িয়ে পড়ত না। কিন্তু এ যুক্তি অকাটা নয়। কেননা বৃন্দাবন দাসকে ‘বেদব্যাস’ বলে অভিহিত করেছেন বিদ্বান, ভক্ত এবং গুরু শ্রেণীর বৈষ্ণবেরা। বৃন্দাবন নবদ্বীপবাসী, কবিকর্ণপুরও সেখানকার শিবানন্দ সেনের পুত্র, তা ছাড়া বৃন্দাবন দাসই হচ্ছেন বাঙলায় প্রথম পূর্ণাঙ্গ চৈতন্যচরিতকার, যদিও গুরু নিত্যানন্দের প্রতি শ্রদ্ধাবশে চৈতন্যের অন্ত লীলা, গঙ্গীর লীলা বা দিব্যোন্মাদকালীন বারো বছরের বর্ণনা দেননি। সে অর্থে চৈতন্যলীলা এ গ্রন্থে অসম্পূর্ণ [নিত্যানন্দ বর্ণনে হৈল আবেশ। চৈতন্যের শেষলীলা রহিল অবশেষ— চৈ. ভা.]। নীলাচলে আঠারো বছর বাস করেন চৈতন্য, তাই বাঙলার বৈষ্ণবধর্ম প্রচারক নিত্যানন্দের কথা

আর বাঙলার বৈষ্ণব মতের প্রসার বর্ণনা সমার্থক। কাজেই এ বই লেখার সময়ে এবং রচনা সমাপ্তির সঙ্গে সঙ্গেই শান্তিপুরে, নবদ্বীপে, খড়দহে, শ্রীখণ্ডে ও বৃন্দাবনে প্রচারিত হওয়ারই কথা, ঐ সব কেন্দ্রের যেকোন বিদ্বান ও রসিক এবং চৈতন্য ও নিত্যানন্দ ভক্ত পাঠকই মুগ্ধচিত্তে তাঁকে চৈতন্যভাগবতের নব 'বেদব্যাস' বলে সোচ্ছায়ে প্রচার করতে পারেন, তার জন্যে স্বল্প সংখ্যক প্রবীণ, বিদ্বান ও গুরুতর প্রয়োজন মাত্র— যাঁদের উচ্চারিত প্রশংসা শিষ্যদের মুখে মুখে দ্রুত প্রচার হওয়া ছিল সম্ভব এবং হতও তাই। বিশেষত, প্রথম পাঠকের মনেও তাঁকেই স্বয়ং 'বেদব্যাস' বলে আখ্যাত করার ইচ্ছা জাগবার মতো কারণ চৈতন্যভাগবতেই ছিল। ভক্ত বৃন্দাবন দাস চৈতন্যকে কৃষ্ণাবতার ও নিত্যানন্দকে বলরামের অবতার বলে মানতেন। তাই চৈতন্যলীলার বজ্রাণ্ড যে 'নব বেদব্যাস' নামেই অভিহিত হওয়া বাঞ্ছনীয়, তা' বৃন্দাবন দাস নিজেই পরোক্ষ একাধিকার উল্লেখ করেছেন :

১. মধ্য খণ্ডে আছে আর কত কোটি লীলা

বেদব্যাস বর্ণিবেন সে সকল খেলা।

২. দৈবে ইহা কোটি কোটি মুনি বেদব্যাসে

বর্ণিবেন নানা মতে অশেষ বিশেষে।

কাজেই ডক্টর বিমানবিহারী মজুমদার [চৈ. চ. উ. পৃ. ১৮৮-৮৯] প্রমুখ বিদ্বানদের প্রদর্শিত যুক্তি তেমন দৃঢ় নয়। অতএব বিভিন্ন বিদ্বান কর্তৃক গৃহীত বৃন্দাবন দাসের জন্ম সন— ১৪২৯, ১৪৫৯, ১৪৫৭, ১৪৪০ শক— এগুলোর মধ্যে ১৪৪০ শকই গ্রহণযোগ্য। কেউ কেউ বৃন্দাবন দাসের একটি উক্তিও গুরুত্ব দিয়ে বলেন যে, চৈতন্যতিরোভাবের পরই বৃন্দাবন দাসের জন্ম।— 'হৈল পাপিষ্ট জন্ম না হৈল তখন' [এ উক্তি চৈতন্যের নবদ্বীপ লীলাপ্রসঙ্গে উচ্চারিত]। কাজেই নবদ্বীপবাসী কবির পক্ষে চৈতন্যের নবদ্বীপ লীলার সময়ে জন্ম না হওয়ায় এ আফসোস স্বাভাবিক, কারণ কবির জন্মকালে নদীয়ার চৈতন্য তখন নীলাচলবাসী।

বৃদ্ধগুরু নিত্যানন্দের জীবৎকালে বৃন্দাবন তাঁর সান্নিধ্য ঘন ঘন পেয়েছিলেন বলে মনে হয় :

বিশেষ সুকৃতি অতি বড়গাছী গ্রাম

নিত্যানন্দ স্বরূপের বিহারের স্থান। [চৈ. ভা.]

বড়গাছী বৃন্দাবন দাসের মামগাছীর নিকটবর্তী গ্রাম। দেনুড়ে বৃন্দাবন দাসের শ্রীপাঠ আছে। লোকশ্রুতি এই যে, তিনি ঐ দেনুড়ে বসে ভাগবত রচনা করেছিলেন। এ গ্রন্থ রচনায় দীর্ঘ সময় লাগলে অনুমান করা চলে ১৪৬৭ শকে যদি শুরু হয়, তা হলে অন্তত ১৪৭৫-৭৭ শক তথা ১৫৪৫ থেকে ১৫৫৩-৫৫ খ্রীষ্টাব্দ অবধি এই বিপুলকায় শ্রমবহুল, তথ্যপূর্ণ ও বর্ণনাবহুল গ্রন্থ রচিত হওয়ার কথা। অধিকানাথ ব্রহ্মচারী আবিষ্কৃত রচনাকাল যদি অকৃত্রিম হয়, তা হলে ১৫৭৫ সন অবধি এ গ্রন্থ রচিত হওয়া অসম্ভব নয়। [চৌদ্দশত সাতানব্বই শকের গণন/নিত্যানন্দ ধ্যানে গ্রন্থ হৈল সমাপন।] রামগতি ন্যায়রত্নের ও বিমানবিহারী মজুমদারের মতে রচনাকাল ১৫৪৮ খ্রীষ্টাব্দ। চৈতন্যের জীবৎকালে এ গ্রন্থের যে রচনা শুরু হতে পারে না, তার পূর্বোক্ত কারণগুলো ছাড়াও অন্য কারণ ভাগবতেই রয়েছে। বৃন্দাবন দাসই বলছেন, চৈতন্য জীবৎকালে তাঁর সম্বন্ধে কিছু বলতে লিখতে চৈতন্য স্বয়ং নিষেধ করেছিলেন— 'যাবত থাকএ মোর এই অবতার/তাবত কহিলে কারে করিব সংহার' [চৈ. ভা.]।

তাছাড়া অন্য ইঙ্গিতও রয়েছে— ‘সর্বশেষ ভৃত্য তান বৃন্দাবন দাস/অবশেষ পাত্র নারায়ণী গর্ভজাত।’ বোঝা যাচ্ছে গ্রন্থরচনা কালে উল্লেখযোগ্য প্রবীণ চৈতন্যপার্বদ দূর্লভ হয়ে উঠেছেন। এ অনুমান আরো স্পষ্ট হয় যখন বৃন্দাবন দাস বলেন;

অদ্যাপিহ বৈষ্ণবমণ্ডলে যার ধ্বনি
চৈতন্যের অবশেষ পাত্র নারায়ণী।

মনে হয় যেন তখন কেবল নারায়ণীই জীবিত রয়েছেন, অদ্বৈত, গদাধর, শ্রীবাস, নিত্যানন্দও তখন নেই।

গ্রন্থ নাম

চৈতন্যভাগবত বাঙলাভাষায় প্রথম পূর্ণাঙ্গ চৈতন্যচরিত। কথিত আছে যে, বৃন্দাবন দাস তাঁর গ্রন্থের কোন নির্দিষ্ট নাম দেননি। প্রথমে এটি ‘চৈতন্যমঙ্গল’ নামে পরিচিত ছিল। বৃন্দাবন দাসকে যখন সবাই চৈতন্যলীলার সূত্রকার ‘নবব্যাস’ রূপে চিহ্নিত করল, তখন তাঁর গ্রন্থকেও ভাগবতের অনুরূপে চৈতন্যভাগবত নামে অভিহিত করে। অপর মতে লোচনদাসও প্রায় সম সময়ে ‘চৈতন্যমঙ্গল’ রচনা করেন, তখন অভিনু নামের দুই গ্রন্থের সনাক্তিসমস্যা এড়ানোর জন্যে মাতা নারায়ণীর পুণ্যমর্শে বৃন্দাবন দাস তাঁর গ্রন্থের নাম পরিবর্তন করে ‘ভাগবত’ রাখেন। কিন্তু লোচনদাস স্বয়ং বৃন্দাবনের গ্রন্থের এভাবে উল্লেখ করেছেন :

শ্রীবৃন্দাবন দাস বন্দিব একচিহ্নে
জগত মোহিত যার ভাগবত গীতে।

ব্রজমোহন দাস ‘চৈতন্যভাগবত’ [১৬২০ খ্রীঃ] চৈতন্যমঙ্গল ও ভাগবত উভয় রূপেই উল্লেখ করেছেন :

চৈতন্যমঙ্গলে শ্রীবৃন্দাবন দাস
শ্রবলরামের রাস লিখেন বিশেষ।
চৈতন্যলীলার ব্যাস দাস বৃন্দাবন
শ্রীচৈতন্য ভাগবত যে কৈলা বর্ণন।

এবং নাম পরিবর্তনের কথাও তিনি বলেছেন :

চৈতন্যভাগবতের নাম চৈতন্যমঙ্গল ছিল
বৃন্দাবনের মহান্তরা ভাগবত আখ্যা দিল।

কৃষ্ণদাস করিবাঙ্গু চৈতন্যমঙ্গল বলেই উল্লেখ করেছেন, কাজেই বৃন্দাবন দাসের ‘ব্যাস’-খ্যাতির পরেই তাঁর গ্রন্থ বৈষ্ণবসমাজে ‘ভাগবত’ রূপে পরিচিত হয় বলে অনুমান করি।

নিত্যানন্দ শিষ্য বৃন্দাবন দাস নিমাই-নিতাইকে কৃষ্ণ-বলরামের অবতার বলে বিশ্বাস করতেন, কাজেই তিনি কৃষ্ণলীলার আদলে চৈতন্যলীলা কল্পনা করেছেন। তাঁর বর্ণিত চৈতন্যের শৈশবের-বাল্যের এবং অবতাররূপে অমৃত্যুর অলৌকিক অতিপ্রাকৃত ঘটনাবলী বৈষ্ণবদের অভিভূত করেছিল, তাই তিনি বেদব্যাস রূপে প্রশংসিত। অবৈষ্ণব পাঠকের কাছেও এ গ্রন্থ মূল্যবান, কেননা অতিশয়োক্তি ও কাল্পনিক কিছু ঘটনা ধাকা সত্ত্বেও সমকালীন শাসক-শাসিতের সম্পর্ক, রাজনৈতিক অবস্থা, দেশে শাসকগোষ্ঠীর সাংস্কৃতিক প্রভাব, হিন্দুর লৌকিক ধর্ম,

শাস্ত্রাচারের শৈথিল্য, ব্রাহ্মণ্যসমাজের নীতিশিথিলতা ও দুর্নীতি, শিক্ষাব্যবস্থা, সমাজবিপ্লব, প্রশাসনিকব্যবস্থা, হিন্দু-মুসলিম সম্পর্ক, বৈষ্ণবসমাজের উপমত, উচ্চবিত্তের মানুষের বিলাসবহুল জীবনচিত্র প্রভৃতি তাঁর গ্রন্থে মেলে।

এত বড় বই সাধারণ পাঠক কখনো পড়বেন না অনুমান করেই ইতিহাসের উপাদান উপকরণগুলো দীর্ঘ হলেও এখানে সংকলন করে দিলাম। এ সূত্রে কেবল ব্রাহ্মণে যবনে বাদও স্বর্তব্য।

সমাজ ও সংস্কৃতি

বৃন্দাবন দাসের গ্রন্থ নানা তথ্যের আকর :

১. চৈতন্যের উক্তি : মোর জাতি মোর সেবকের জাতি নাঞি
আমার ভক্তের পূজা আমা হইতে বড়।
২. ইষ্টদেব বন্দো মোর নিত্যানন্দ রায়
চৈতন্যকীর্তন স্কুরে যাহার কৃপায়। [নিত্যানন্দগুরু]
বৃন্দাবন গুরু নিত্যানন্দ বলরামের অবতার।
তাঁর জন্ম মাঘ মাসে শুক্লা ত্রয়োদশী শুভদিনে।
৩. কাষ্ঠের পুতলি যেন কুহকে নাচায় [চৈতন্যকথা]
এই মত গৌরচন্দ্র মোরে যে বোলায়
বুদ্ধরূপে দয়াধর্ম করহ প্রকাশ। [অকতার বুদ্ধ]
৪. চৈতন্যজন্ম-গৌরচন্দ্র প্রকাশ ফাঙ্কনী পৌর্ণমাসী। [চৈতন্যলীলাসূত্র]
৫. কলিযুগে ধর্ম হয় হরিসংকীর্তন
এতদর্থে অবতীর্ণ শ্রীশচীনন্দন। [কলিযুগ পরিণাম]
[নবদ্বীপ জীবন ও সমাজ চিত্র]
৬. নবদ্বীপ-সম্পত্তি কে বর্ণিবারে পারে। কৃষ্ণমা ভক্তিশূন্য সকল সংসার।
এক গঙ্গাঘাটে লক্ষ লোক স্নান করে।। প্রথম কলিতে হইল ভবিষ্য আচার।।
ত্রিবিধ বৈসে এক জাতি লক্ষ লক্ষ। ধর্ম কর্ম লোক সবে এই মাত্র জানে।
সরস্বতী দৃষ্টিপাতে সবে মহা দক্ষ।। মঙ্গলচণ্ডীর গীত করে জাগরণে।।
সবে মহা অধ্যাপক করি গর্ব ধরে। দম্ব করি বিষহরি পূজে কোন জন।
বালকেও ভট্টাচার্য সনে কক্ষা করে। পুত্তলি করয়ে কেহো দিয়া বহুধন।।
নানা দেশ হইতে লোক নবদ্বীপে যায়। ধন নষ্ট করে পুত্র-কন্যার বিভায়।
নবদ্বীপে পড়ি লোক বিদ্যারস পায়।। এইমত জগতের ব্যর্থ কাল যায়।।
অতএব পড়ুয়ার নাহি সমুচ্চয়। যেবা ভট্টাচার্য, চক্রবর্তী মিশ্র সব।
লক্ষকোটি অধ্যাপক নাহিক নির্ণয়।। তাহারাও না জানয়ে গ্রন্থ অনুভব।।
রমা-দৃষ্টিপাতে সর্বলোক সুখে বাসে। শাস্ত্র পড়াইয়া সবে এই কর্ম করে।
ব্যর্থ কাল যায় মাত্র ব্যবহার রসে।। শ্রোতার সহিতে যম-পাশে ডুবি মরে।।

না বাখানে যুগধর্ম কৃষ্ণের কীর্তন ।
 দোষ বিনা গুণ কার না করে কথন ।।
 যেবা সব বিরক্ত তপস্বী অভিমानी ।
 তা সভার মুখেতেও নাহি হরিধ্বনি ।।
 অতি বড় সুকৃতি যে স্নানের সময় ।
 'গোবিন্দ' পুণরীকাক্ষ নাম উচ্চারণ ।।
 গীতা ভাগবত যে যে জনেতে পড়ায় ।
 ভক্তির বাখান নাহি তাহার জিহ্বায় ।
 ভক্তিযোগ শূন্য দেখি লোক দুঃখ পায় ।।
 সকল সংসার মত্ত ব্যবহার রসে ।
 কৃষ্ণপূজা বিষ্ণুভক্তি কারো নাহি বাসে ।।
 বাসুলী পূজয়ে কেহো নানা উপচারে ।
 মদ্য-মাংস দিয়া কেহো যক্ষ পূজা করে ।।
 নিরবধি নৃত্য গীত বাদ্য কোলাহল ।
 না শুনি কৃষ্ণের নাম পরম মঙ্গল ।।
 কিছু নাহি জানে লোকে ধন-পুত্ররসে ।
 সকল পাশও মিলি বৈষ্ণবের হাসে ।।
 চৈতন্যপ্রবর্তিত কীর্তন ও প্রতিবেশীর
 প্রতিক্রিয়া]

৭. চারি ভাই শ্রীবাস মিলিয়া নিজঘরে
 নিশা হৈলে হরিনাম গায় উচ্চৈঃস্বরে ।
 শুনিয়া পাষণ্ডী বলে “হইল প্রমাদ ।
 এই ব্রাহ্মণ করিবেক গ্রামের উৎসাদ ।।
 মহাতীব্র নরপতি যবন ইহার ।
 এ আখ্যান শুনিলে, প্রমাদ নদীয়ার” ।।
 কেহ বোলে, “এ বামনে এই গ্রাম হৈতে ।
 ঘর ভাঙ্গি ঘুচাই ফেলাই নিঞা স্রোতে ।।
 এ বামনে ঘুচাইলে গ্রামের মঙ্গল ।
 অন্যথা যবনে গ্রাম করিবে কবল ।।
 জগত প্রমত্ত ধন-পুত্র মিথ্যারসে ।
 দেখিলে বৈষ্ণব মাত্র সতে উপহাসে । [এ]
 আর্থা তর্জা পড়ে সব বৈষ্ণব দেখিয়া ।
 “যতি” সতি, তপস্বীও যাইব মরিয়া ।
 ‘তারে বলি সুকৃতির যে দোলা ঘোড়া চড়ে ।
 দশ বিশ জন যার আগে পাছে রড়ে ।
 এতে যে গোসাঞিভাবে করহ ক্রন্দন ।
 তবু ত দারিদ্র-দুঃখ না হয় খণ্ডন ।
 ঘন ঘন ‘হরি হরি’ বলি ছাড় ডাক ।
 ক্রুদ্ধ হয় গোসাঞি শুনিলে বড় ডাক ।।

পঢ়য়ার অন্ত নাহি নবদ্বীপ পুরে ।
 পড়িয়া মধ্যাহ্নে সবে গঙ্গাস্নান করে ।।
 একো অধ্যাপকের সহস্র শিষ্যগণ ।
 অন্যোন্নে কলহ করেন অনুক্ষণ ।
 ৮. কন্যা বিবাহ দিব পঞ্চ-হরিতকী দিয়া ।
 এই আজ্ঞা সতে তুমি আনিবে মাগিয়া ।।
 খই, কলা, সিন্দুর, তাম্বুল, তৈল দিয়া ।
 স্ত্রীগণের আই তুষিলেন হর্ষ হৈয়া ।।
 [নবদ্বীপের পণ্ডিত সমাজ]
 ৯. যদ্যপিহ নবদ্বীপ পণ্ডিত সমাজ ।
 কোট্যর্বুদ অধ্যাপক নানা শাস্ত্র-রাজ ।
 ভট্টাচার্য চক্রবর্তী মিশ্র বা আচার্য ।
 অধ্যাপনা বিনা কারো নাহি কোন কার্য ।।
 যদ্যপিহ সতেই স্বতন্ত্র সতে জয়ী ।
 শাস্ত্রচর্চা হৈলে ব্রহ্মারেও নাহি সহি ।।
 [চৈতন্য-রসিকতা]
 ১০. বিশেষ চালেন প্রভু দেখি শ্রীহট্টিয়া ।
 “কদর্থেন সেই মত বচন বলিয়া ।।
 ত্রোদধে শ্রীহট্টিয়াগণ বোলে ‘হায় হায় ।
 তুমি কোন দেশী তাহা কহত নিশ্চয় ।।
 পিতা-মাতা আদি করি যতেক তোমার ।
 বোল দেখি শ্রীহট্টে না হয় জন্ম কার ।।
 বুড়ণ গ্রাম্যেতে অবতীর্ণ হরিদাস
 [হরিদাস পরিচিতি]
 ১১. ফুলিয়ারে রহিলেন প্রভু হরিদাস ।।
 গঙ্গাস্নান করি নিরবধি হরিনাম ।
 উচ্চ করিয়া লইয়া বুলেন সর্বস্থানে ।।
 কাজী গিয়া মূলকের অধিপতি স্থানে ।
 কহিলেন তাহান সকল বিবরণে ।
 “যবন হইয়া করে হিন্দুর আচার ।
 ভালমতে তারে নাহি করহ বিচার ।।”
 পাপীর বচন শুনি সেই পাপমতি ।
 ধরি আনাইল তারে অতি শীঘ্রগতি ।।
 কত ভাগ্যে দেখ তুমি হৈয়াছ যবন ।
 তবে কেনে হিন্দুর আচারে দেহ মন ।।
 আমরা হিন্দুরে দেখি নাহি খাই ভাত ।
 তাহা তুমি ছোড় হই মহাবংশজাত ।।
 শুন বাপ! সভারই একই ঈশ্বর ।।

নাম মাত্র ভেদ করে হিন্দুরে যবনে ।
পরমার্থে এক কহো কোরান পুরাণে ।।
হিন্দুকুলে কেহো যেন হইয়া ব্রাহ্মণ ।
আপনহে গিয়া হয় ইচ্ছায় যবন ।।
হিন্দু বা কি করে তারে যার যেই কর্ম ।
আপনে যে মৈল তারে মারিয়া কি ধর্ম ।।
শুনিয়া সন্তোষ হইল সকল যবন ।
হরিদাস ঠাকুরের সুসত্য বচন ।।
সবে এক পাপী কাজী মুলকপতিরে ।
বলিতে লাগিলা, “শান্তি করহ ইহারে ।।
এই দুষ্ট আরো দুষ্ট করিব অনেক ।
যবন কুলে অহমিকা আনিবেক ।।
[কীর্তনগানে বিক্ষুব্ধ হিন্দুর প্রতিক্রিয়া]

১২. এ বামনগুলো রাজ্য করিবেক নাশ ।
ইহা সভা হৈতে হইব দুর্ভিক্ষ প্রকাশ ।।
এ বামনগুলো সব মাগিয়া খাইতে ।
ভাবক-কীর্তন করি নানা ছলা পাতে ।।
গোসাঁঞের শয়ন হয় বর্ষা চারি মাস ।
ইহাতে কি জুয়ায় ডাকিতে বড় ডাক ।।
নিদ্রা-ভঙ্গ হৈলে ত্রুঙ্ক হৈব গোসাঁঞি
দুর্ভিক্ষ করিব দেশে ইথে দ্বিধা নাঞি ।।
কেহো বোলে “যদি ধান্যে কিছু মূল্য চড়ে ।
তবে এগুলারে ধরি কিলাইমু ঘাড়ে ।।
কেহো বোলে “রায়ে নিদ্রা যাইতে নাপাই ।
কেহো বলে “গোসাঁঞি রুগিড ঘন ডাকে ।।
এগুলার সর্বনাশ হৈব এই পাকে ।।”
কেহো বোলে “জ্ঞানযোগ করিয়া বিচার ।
পরম উদ্ধত হেন সভার ব্যভার ।।”
কেহো বোলে “কিসের কীর্তন কেবা জানে ।
এত পাক করে এই শ্রীবাস বামনে ।।
মাগিয়া খাইতে লাগি মিলি চারি ভাই ।
‘হরি’ বলে ডাক ছাড়ে যেন মহা বাই ।।
মনে মনে বলিরে কি পুণ্য নাহি হয় ।
রাত্রি করি ডাকিলে কি পুণ্য জনময় ।।
কেহো বোলে “আরে ভাই! পড়িল প্রমাদ ।
শ্রীবাসের বাদে হৈল দেশের উৎসাদ ।।
আজি মুঞি দেওয়ানে শুনিলুঁ সব কথা ।
রাজার আজ্ঞায় দুই নাও আইসে এথা ।।

শুনিলে নদীয়ার কীর্তন বিশেষ ।
ধরিয়া নিবারে হৈল রাজার আদেশ ।
চৈতন্যদেব অদ্বৈতের উক্তি :
১৩. স্ত্রী-শূদ্র আদি যত মূর্খেরে সে দিবা ।।
বিদ্যাধন-কুল আদি তপস্যার বাদে ।
তোর ভক্ত, তোর ভক্তি যে যে জনে বাধে ।
সে পাপিষ্ঠ সব মরুক পুড়িয়া ।
চণ্ডাল নাচুক তোর নাম গুণ গ্যায়া ।।

[পুণ্ডরীক বিদ্যানিধি]

১৪. বিষয়ীর প্রায় তাঁর পরিচ্ছদ সব ।
চিনিতে না পারে কেহো তিহঁা যে বৈষ্ণব ।।
চাট্রামে জন্ম বিপ্র পরম-পণ্ডিত ।
পরম-আচার সর্বলোকে অপেক্ষিত ।।
কৃষ্ণ-ভক্তি-সিন্দু মাঝে ভাসে নিরন্তর ।
অশ্রু-কম্প-পুলক-বেষ্টিত কলেবর ।
গঙ্গাস্নান না করেন পাদস্পর্শ ভয়ে ।
গঙ্গা দরশন করে নিশির সময়ে ।।
গঙ্গায় যে সব লোক করে অনাচার ।
কুল্লোল, দন্তধাবন, কেশ-সংস্কার ।।
এসব দেখিয়া পায়েন মনে ব্যথা ।
এতেক দেখেন গঙ্গা নিশায় সর্বথা ।।
বিচিত্র বিশাল আর এক গুন তান ।
দেবার্চন-পূর্বে করে গঙ্গাজল পান ।।
তবে সে করেন পূজা-আদি নিত্যকর্ম ।
ইহা সর্ব পণ্ডিতের বুঝায়েন ধর্ম ।।
চাট্রামে আছেন, এথাহঁা বাড়ী আছে ।
আসিবেন সম্প্রতি দেখিয়া কিছু পাছে ।।
[পুণ্ডরীকের বিলাস-বসন]

১৫. বসিয়া আছেন পুণ্ডরীক মহাশয় ।
রাজপুত্র হেন করিয়াছেন বিজয় ।।
দিব্য খট্টা-হিঙ্গুল-পিত্তলে শোভা করে ।
দিব্য চন্দ্রতাপ তিন তাহার উপরে ।।
তঁহি দিব্য শয্যা শোভা অতি সূক্ষ্ম বাসে ।
পট্ট নেত বালিস শোভায় চারিপাশে ।।
বড় ঝারি ছোট ঝারি গুটি পাঁচ সাত ।
দিব্য পিতলের বাটা, পাকা পান তাত ।।
দিব্য আলবাটি দুই শোভা দুই পাশে ।
পান খাঞা অধর দেখি দেখি হাসে ।।

দিব্য ময়ূরের পাখা লই দুই জনে ।
 বাতাস করিতে আছে দেহ সর্বক্ষণে ।।
 চন্দনের উর্ধ্বপুত্র তিলক কপালে ।
 গন্ধের সহিত তথি ফাগু বিন্দু মিলে ।।
 কি কহিব সেবা কেশভারের সংস্কার ।
 দিব্যগন্ধ আমলকী বই নাহি আর ।।
 ভক্তির প্রভাবে দেহ মদন সমান ।
 যে না চিনে আর হয় রাজপুত্র-জ্ঞান ।।

[শিব-সঙ্গীত]

১৬. একদিন আসি এক শিবের গায়ন ।
 ডমরু বাজায়-গায় শিবের কথন ।।
 আইল করিতে ভিক্ষা প্রভুর মন্দিরে ।
 গাইয়া শিবের গীত বেড়ি নৃত্য করে ।।

[চৈতন্যপার্বদ]

নিত্যানন্দ, গদাধর, অদ্বৈত, শ্রীবাস ।
 বিদ্যানিধি, মুরারি, হিরণ্য হরিদাস ।।
 গঙ্গাদাস, বনমালি, বিজয়, নন্দন ।
 জগদানন্দ, বুদ্ধিমন্তুখান, নারায়ণ ।।
 কাশীশ্বর, বাসুদেব, রাম, গরুড়াই ।
 গোবিন্দ, গোবিন্দানন্দ সকল তথাই ।
 গোপীনাথ, জগদীশ, শ্রীমান, শ্রীধর ।।
 সদাশিব, ব্রহ্মেশ্বর, শ্রীগর্ভ, শুক্লাধর ।।
 ব্রহ্মানন্দ, পুরুষোত্তম, সঙ্করাদি যত ।
 অনন্ত চৈতন্য-ভূত্য- নাম জানি কত ।।

[প্রতিবেশীদের বৈষ্ণবনিন্দা]

১৭. গুনিয়া পাষণ্ডী-সব মরয়ে বল গিয়া ।
 “নিশায় এগুলো খায় মদিরা আনিয়া ।।
 এগুলো সকল মধুমতী সিদ্ধি জানে ।
 রাত্রি করি মস্তপড়ি পঞ্চ কন্যা আনে ।।
 চারি-প্রহর নিশি- নিদ্রা যাইতে না পাই ।
 ‘বোল বোল’ হুঙ্কার গুনিয়ে সদাই ।।”
 যতেক পাষণ্ডী সব না পাইয়া ঘর ।
 বাহিরে থাকিয়া মন্দ বোলয়ে অপার ।।
 কেহো বোলে “এগুলো সকল নাহি খায় ।
 চিনিলে পাইবে লাজ- ঘর না ঘুচায় ।।”
 কেহো বোলে “সত্য সত্য এই যে উত্তর ।
 নহিলে কেমনে ডাকে এ অষ্ট প্রহর ।।”
 কেহো বোলে “অরে ভাই! মদিরা আনিয়া ।

সভে রাত্রি করি খায় লোক লুকাইয়া ।।”
 কেহো বোলে “ভাল ছিল নিমন্ত্রণ পণ্ডিত ।
 তোর কেনে নারায়ণ কৈল হেন চিত্ত ।।”
 কেহো বোলে “হেন বুঝি পূর্বের সংস্কার ।
 কেবা বোলে সঙ্গদোষ হইল তাহার ।।
 নিয়ামক বাপ নাহি, তাতে আছে বাই ।
 এতদিনে সঙ্গদোষে ঠেকিলা নিমাই ।।
 রাত্রি করি মস্ত পড়ি পঞ্চ কন্যা আনে ।
 নানাবিধ দ্রব্য আইসে তা’ সভার সনে ।।
 ভক্ষ্য, ভোজ্য, গন্ধ, মালা বিবিধ বসন ।
 খাইয়া তা সভা সঙ্গে বিবিধ রমণ ।।
 ভিন্ন লোক দেখিলে ভিন্ন- না হয় আর সঙ্গ ।
 এতেক দুয়ার দিয়া করে নানা রঙ্গ ।।”
 কেহো বোলে “কালি হুঁট যাইব দেয়ানে ।
 কাঁকালি বান্ধিয়া সব নিব জনে জনে ।।
 যে না ছিল রাজ্য দেশে আনিয়া কীর্তন ।
 দুর্ভিক্ষ হইল সব গেল চিরন্তন ।।”
 দেবে হরিলেক বৃষ্টি জানিল নিশ্চয় ।
 ধান্য মরি গেল, কড়ি উৎপন্ন না হয় ।।
 যতেক পাষণ্ডী বলে শ্রীধরের ডাকে ।
 “রাত্রে নিদ্রা নাহি যাই, দুই কর্ণ ফাটে ।।
 মহাচাষা বেটা ভাতে পেট নাহি ভরে ।
 ক্ষুধায় ব্যাকুল হৈয়া রাত্রি জাগি মরে ।।

[নারায়ণী]

১৮. শ্রীবাসের ভাতৃসূতা- বালিকা অজ্ঞান ।
 তাহারে ভোজন-শেষ প্রভু করে দান ।।
 অদ্যাপিহ বৈষ্ণবমণ্ডলে যায় ধবনি ।
 শ্রীগৌরাস্তের অবশেষ পাত্র নারায়ণী ।।
 [জগাইমাধাই]

১৯. একদিন পথে দেখে দুই মাতোয়াল ।
 মহাদস্যু-প্রায় দুই মদ্যপ বিশাল ।।
 সেই জনের কথা কহিতে অপার ।
 তারা নাহি করে, হেন পাপ নাহি আর ।।
 ব্রাহ্মণ হইয়া মদ্য-গোমাংস-ভক্ষণ ।
 ডাকা, চুরি, পরগৃহ দাহে সর্বক্ষণ ।
 দেয়ানে নাহিক দেখা, বোলায় কোটাল ।
 মদ্যপান বিনে আর নাহি যায় কাল ।
 দুইজন পথে পড়ি গড়াগড়ি যায় ।

যাহারে যে পায় তাহারে সে কিলায় ।।
 সর্বলোক নদীয়ার পুরুষে পুরুষে ।
 তিলাধেকো দোষ নাহি এ দোহার বংশে ।।
 এই দুই গুণবস্ত্র পাসরিব ধর্ম ।
 জন্ম হৈতে এমত করয়ে অপকর্ম ।।
 ছাড়িল গোষ্ঠীয়ে বড় দুর্জন দেখিয়া ।
 মদ্যপের সঙ্গে বুলে স্বতন্ত্র হইয়া ।।
 এ দুই দেখিয়া সব নদীয়া ডরায় ।
 পাছে কারো কোনদিন বসতি পোড়ায় ।।
 হেন পাপ নাহি যাহা না করে দুইজন ।
 ডাকা, চুরি, মদ্য-মাংস করয়ে ভক্ষণ ।
 সে দুয়ের নাম প্রভু জগাই-মাধাই ।
 ব্রাহ্মণের পুত্র দুই জন্ম এক ঠাঞি ।।
 সঙ্গদোষে তা সভার হেন হৈল মতি ।
 আজন্ম মদিরা বহি আর নাহি গতি ।।
 সে দুয়ের ভয়ে নদীয়ার লোক ডরে ।
 হেন নাহি যার ঘরে চুরি নাহি করে ।।

[কাজীর কীর্তনিয়াপীড়ন ।]

২০. একদিন দৈবে কাজী সেই পথে যায় ।
 মৃদঙ্গ মন্দিরা শব্দ শুনিবারে পায় ।
 হরি-নাম-কোলাহল চতুর্দিকে মন্ত্রি-
 গুনিয়া শ্রাবণে কাজী আপনার শাস্ত্র ।
 কাজী বোলে “ধর ধর আজি করো কার্য ।
 আজি বা কি করে তোর নিমাঞি আচার্য্য ।”
 আথে ব্যথে পলাইল নগরিয়াগণ ।
 মহাত্মাসে কেশ কেহো না করে বন্ধন ।।
 যাহারে পাইল কাজী, মারিল তাহারে ।
 ভাঙ্গিল মৃদঙ্গ অনাচার কৈল দ্বারে ।।
 কাজী বোলে “হিন্দুয়ানী হইল নদীয়া ।
 করিমু ইহার শাস্তি নাগালি পাইয়া ।।”
 ক্ষমা করি যাও আজি, দৈব হৈল রাত্রি ।
 আর দিন লাগি পাইলেই লৈব জাতি ।।
 এই মত প্রতিদিন দুষ্টগণ লৈয়া ।
 নগরে ভ্রময়ে কাজী কীর্তন চাহিয়া ।
 দুঃখে সব নগরিয়া থাকে লুকাইয়া ।
 হিন্দু কাজী সব আরো মারে কদথিয়া ।।
 [কাজী বাড়ি আক্রমণ, চৈতন্যদেব কর্তৃক]

২১. কেহো বোলে “এবে কাজী বেটা
 গেল কোথা ।
 লাগি পাও এখানে ছিড়িয়া ফেলো মাথা ।”
 রড দিয়া যায় কেহো পাষণ্ডী ধরিতে ।
 কেহো পাষণ্ডীর নামে কিলায় মাটিতে ।।
 কাজীর বাড়ির পথ ধরিল ঠাকুর ।
 বাদ্য-কোলাহল কাজী শুনয়ে প্রচুর ।।
 কাজী বোলে “জান ভাই কি গীত বাচন ।।
 কিবা করো বিভা, কিবা ভুতের কীর্তন ।।
 মোর বোল লজিয়া কে করে হিন্দুয়ানী ।
 ঝাট জানি আয় তবে চলিব আপনি ।”
 কাজীর আদেশে তার অনুচর ধায় ।
 সমৃদ্ধ দেখিয়া আপনার শাস্ত্র গায় ।।
 অনন্ত অর্বুদ লোক বোলে “কাজী মার ।”
 ডরে ফেলাইল তবে বেটন মাথার ।
 রড দিয়া কাজীকে কহিল ঝাট গিয়া ।
 কাজী বোলে “হেন বুঝি নিমাঞি পণ্ডিত ।
 বিহা করিবারে বা চলিলা কোন ভিত ।।
 এ বা নহে— মোরে লজি হিন্দুয়ানী করে ।
 তবে জাতি নিমু আজি সভার নগরে ।”
 আসিয়া কাজীর দ্বারে প্রভু বিশ্বম্ভর ।
 ক্রোধাবেশে হুকুম করয়ে বহুতর ।।
 ক্রোধে বোলে প্রভু “আরে কাজী বেটা কোথা ।
 ঝাট আন ধরিয়া কাটিয়া ফেলো মাথা ।।
 নির্যবন করো আজি সকল ভুবন ।
 পূর্বে যেন বধ কৈল সে কালযবন ।।
 প্রাণ লঞা কোথা কাজী গেল দিয়া দ্বার ।
 “ঘর ভাঙ্গ ভাঙ্গ” প্রভু বোলে বার বার ।।
 প্রভু বোলে “অগ্নি দেহ বাড়ীর ভিতর ।।
 পুড়িয়া মরুক সর্বগণের সহিতে ।
 সর্ব-বাড়ি বাড়ি অগ্নি দেহ চারিভিতে ।।
 দেখো মোরে কি করে উহার নরপতি ।
 কাজীর ভাঙ্গিয়া ঘর সর্ব নগরিয়া ।
 মহাশব্দে ‘হরি’ বলি যাবেন নাচিয়া ।।
 [হোসেন শাহের চোখে চৈতন্যদেব]

২২. যবনেও বোলে ‘হরি’ অন্যের কি দায় ।
 যবনেও দূরে থাকি করে নমস্কার ।।

যদ্যপি যবন রাজা পরম দুর্বীর।
 কা শুনি চিন্তে বড় হৈল চমৎকার।।
 কেশব-খানেরে রাজা ডাকি আনাইয়া।
 জিজ্ঞাসায় রাজা বড় বিস্ময় হইয়া।
 “কহত কেশবখান। কেমত তোমার।
 শ্রীকৃষ্ণচৈতন্য বলি নাম বোল যার।।
 কেমত তাহার কথা কেমত মনুষ্য।
 কেমত গোসাঞি তিহঁ কহিব অবশ্য।।
 চতুর্দিকে থাকি লোক তাঁহারে দেখিতে।
 কি নিমিত্তে আইসে কহিবে ভাল মতে।।” ২৪. মূর্খ নীচ দরিদ্র ভাসাব প্রেম সুখে।
 শুনিয়া কেশবখান-পরম সজ্জন।
 ভয় পাই লুকাইয়া কহেন কখন।।
 কে বোলে গোসাঞি এক ভিক্ষুক সন্ন্যাসী।
 দেশান্তরি গবরি বৃক্ষের তলবাসী।।”
 রাজা বোলে গরিব না বোলে কভু তানে।
 মহাদোষ হয় ইহা শুনিলেও কানে।।
 হিন্দু যারে বোলে ‘কৃষ্ণ’ খোদায় যবনে।
 সেই তিহঁ নিশ্চয় জানিহ সর্বজনে।।
 আপনার রাজ্যে সে আমার আজ্ঞা রহে।
 তার আজ্ঞা সর্বদেশে শিরে করি বহে।
 তাহারে সকল দেশে কায়-বাক্য-মনে
 ঈশ্বর নহিলে বিনা অর্থে ভজে কেনে।।
 রাজা বোলে “এই মুঞি বলিঁ সভারে।
 কেহো পাছে উপদ্রব করয়ে তাঁহারে।
 যেখানে তাহান ইচ্ছা, থাকুন সেখানে।
 আপনার শাস্ত্রমত করুন বিধানে।।
 সর্বলোক লই মুখে করুণ কীর্তন।
 কি বিরলে থাকুন যে লয় তাঁর মন।।
 কাজী বা কোতাল বা তাহাকে কোনো জনে।
 কিছু বলিলেই তার লইমু জীবনে।।”
 যে হুসেন-শাহা সর্ব উড়িয়ার দেশে।
 দেবমূর্তি ভাঙ্গিলে দেউল বিশেষে।।
 হেন যবনেও মানিলেক গৌরচন্দ্র।
 তথাপিহ এবে ন মানয়ে যত অন্ধ।
 মাথা মুড়াইয়া সন্ন্যাসীর বেশ ধরে।
 চৈতন্যের যশ শুনি পোড়ায়ো অন্তরে।।

[সমকালীন ধর্মীয় অনাচার]

২৩. কৃষ্ণযাত্রা অহোরাত্রি কৃষ্ণ-সঙ্কীর্তন।
 ইহার উদ্দেশ্যে নাহি জানে কোন জন।।

ধর্ম-কর্ম লোক সব এই মাত্র জানে।
 মঙ্গলচণ্ডীর গীত করে জাগরণে।।
 দেবতা জ্ঞানেন সবে ষষ্ঠী বিষহরী।
 তাও সে পূজেন সেহো মহাদম্ভ করি।।
 ধন বংশ বাড়ুক করিয়া কাম্য মনে।
 মদ্য-মাংসে দানব পূজয়ে কোন জনে।।
 যোগিপাল ভোগিপাল মহীপাল গীত।
 ইহাই শুনিতে সর্বলোক আনন্দিত।।
 [প্রেমধর্ম প্রচার : নিত্যানন্দ]
 ২৪. মূর্খ নীচ দরিদ্র ভাসাব প্রেম সুখে।
 তুমিও নিত্যানন্দ থাকিলা যদি মূনিধর্ম করি।।
 আপন উদ্ধাম ভাব সব পরিহরি।।
 তবে মূর্খ নীচ যত পতিত সংসার।
 বোল দেখি আর কেবা করিব উদ্ধার।।
 ভক্তিরসদাতা তুমি, তুমি সংবরিলে।
 তবে অবতার বা কি নিমিত্তে করিলে।।
 এতক্ষণ আমার বাক্য যদি সত্য চাও।
 তবে অবিলম্বে তুমি গৌড়দেশে যাও।।
 মূর্খ নীচ পতিত দুর্গথিত যে জন।
 ভক্তি দিয়া করো গিয়া সভার মোচন।।

[কাজীকে হুমকি দান]

২৫. সেই গ্রামে কাজী আছে পরম দুর্বীর।
 কীর্তনের প্রতি ঘেঁষ করয়ে অপার।।
 পরানন্দে মত্তা গদাধর মহাশয়।
 নিশাভাগে গেলা সেই কাজীর আলায়।
 যে কাজীর ভয়ে লোক পালায় অন্তরে।
 নির্ভয়ে চলিলা নিশাভাগে তার ঘরে।।
 নিরবধি হরি ধ্বনি করিতে করিতে।
 প্রতিষ্ট হইল গিয়া কাজীর বাড়ীতে।।
 দেখে-মাত্র রহিয়া কাজীর সর্বগণে।
 কাহারো বলিতে কিছু না আইসে বদনে।।
 গদাধর বোলে “আরে” কাজী বেটা কোথা।
 ঝাট কৃষ্ণ বোল, নহে ছিঠো এই মাথা।।”
 অগ্নি হেন ক্রোধে কাজী হইল বাহির।
 গদাধর দাস দেখি মাত্র হইল স্থির।।
 কাজী বোলে “গদাধর তুমি কেনো এথা।”
 গদাধর বোলেন “আছয়ে কিছু কথা।।”
 শ্রীচৈতন্য নিত্যানন্দ প্রভু অবতীর।
 জগতের মুখে বোলাইলা হরি হরি।।

সবে তুমি মাত্র নাহি বোল হরিনাম ।
তাহা বোলাইতে আইলাঙ তোমা স্থান । ।
পরম মঙ্গল হরি নাম বোল তুমি ।
তোমার সকল পাপ উদ্ধারিব আমি" । ।
যদ্যপিহ কাজী মহা হিংসক চরিত ।
তথাপি না বোলে কিছু হইল স্তম্ভিত । ।
হাসি বোলে কাজী “শুন দাস গদাধর ।
কালিকা বলিবাঙ হরি আজি যাহ ঘর । ।
হরিনাম মাত্র শুনিলেন তার মুখে ।
গদাধর দাস পূর্ণ হৈল প্রেমমুখে । ।
যে কাজীর বাতাস না লয় সাধুজনে ।
পাইলেই মাত্র জাতি লয় সেইক্ষণে । ।
হেন জন পাসরিল সর্ব হিংসাধর্ম ।

[নিত্যানন্দ চরিত]

সোনা রূপা মুক্তা যে সকল কলেবরে । ।
কাষায় কৌপীন ছাড়ি দিব্য পট্টবাস ।
ধরেন চন্দনমালা সদাই বিলাস ।
দণ্ড ছাড়ি মোছ দস্ত ধরেন না কেনে ।
শূদ্রের আশ্রমে সে থাকেন সর্বক্ষণে । ।
শাস্ত্রমত মুণ্ডি তান না দেখে আচার ।
এতেক মোহের চিত্তে সন্দেহ অপার । ।
বড় লোক বলি তাঁরে বোলে সর্বজনে ।
তথাপি আশ্রমাচার না করেন কেনে । ।
পদ্মপত্রে কভু যেন না লাগয়ে জল ।
এই মত নিত্যানন্দস্বরূপ নির্মল ।
মদিনা যবনী যদি নিত্যানন্দ হরে ।
তথাপি ব্রহ্মার বন্দ্য কহিল তোমারে ॥

[রূপ-সনাতন]

২৬. নবদ্বীপ গিয়া নিত্যানন্দ অবধূত ।
কিছুতে না বুঝে মুণ্ডি করেন কিরূপ । ।
সন্যাস আশ্রম তান বোলে সর্বজন ।
কপূর তাধুল সে ভক্ষণ অনুক্ষণ । ।
ধাতুদ্রব্য পরশিতে নাহি সন্ন্যাসীরে ।

২৭. শাকর মল্লিখ আর রূপ- দুই ভাই ।
দুই প্রতি কৃপাদৃষ্টে চাহিলা গোসাঞি ।
শাকরমল্লিক- নাম ঘুচাইয়া তান ।
সন্ন্যাসিন অনধূত থুইলেন নাম । ।
অদ্যাপিহ দুই ভাই রূপ সনাতন ।

২. জ্ঞানন্দের চৈতন্যদেব

গদাধরশিষ্য জ্ঞানন্দ ছিলেন পেশায় গায়ক । তাই তিনি পালাগান হিসেবেই রচনা করেছিলেন চৈতন্যমঙ্গল । ‘ইবে শব্দ চামর সঙ্গীত বাদ্য রসে / জ্ঞানন্দ চৈতন্যমঙ্গল গাএ শেষে’, অথবা ‘সর্বলোক হরি বোল জ্ঞানন্দ বলে । জয় জয় দেহ তবে শ্রীলোক সকলে’ । ‘চৈতন্যমঙ্গল’ নয়টি পালাগানে বিভক্ত গৃহস্থের মানতপূর্তি, পুণ্যার্জন, লোকশিক্ষা ও লোকরঞ্জন উদ্দেশ্যে আসরে গেয় পালাগুলোর প্রত্যেকটি যদিও বক্তব্যবিষয় হিসেবে স্বয়ংসম্পূর্ণ তবু তার মধ্যে চৈতন্যলীলার ঐতিহাসিক ক্রম ও পারস্পর্য রক্ষিত হয়নি, জীবনচরিতের পক্ষে তা’ ছিল আবশ্যিক ।

তাছাড়া বৈষ্ণব অবৈষ্ণব সব রকমের গণশোভার উদ্দেশ্যে রচি ও গেয় বলে তাতে বৈষ্ণবসুলভ ঐকান্তিক নিষ্ঠা, ভক্তি ও ভক্তিতত্ত্ব অবিমিশ্রভাবে অভিব্যক্তি পায়নি । ব্রাহ্মণ্য-পুরাণ আশ্রিত ও সনাতন যোগ-তন্ত্র ও কায়াসাধনশাস্ত্র প্রভাবিত পৌরাণিক ব্রাহ্মণ্য নিয়মে গণেশবন্দনা দিয়ে কাব্য শুরু, যেমন :

প্রথমে বন্দিব দেব শিবের নন্দনে
যাহার স্মরণে বিঘ্ন না রহে ভুবনে ।
দেহতত্ত্ব : আউট হাত ঘরখানি তাতে দশদ্বার
তার মাঝে আছে ছয় রসের ভাগার ।
একাদশ চোর তাহে দস্যু পাঁচজন
গঙ্গা-যমুনা নদী বহে সর্বক্ষণ ।
হংস ক্রীড়া করে তাহে চরে দশাঙ্গুলে ।
ইঙ্গলা পিঙ্গলা নারী সুমুনার মূলে ।

[বৈরাগ্য ১৯, পৃঃ ১৫]

-এসব বৌদ্ধ বজ্জয়ানী সহজয়ানীদের এবং পরবর্তী বৈষ্ণবসহজিয়া ও বাউলদের প্রিয় ও সাধ্যতত্ত্ব। এবং ইন্দ্র-জালিন্দ্রযুদ্ধ, বৃন্দা-হরির সম্পর্ক, ধ্রুব, জড় ভরত, সত্যবতী, জুয়াড়ী, অজামিল প্রভৃতির কাহিনী জয়ানন্দের কালে চৈতন্যাবতারে বিশ্বাসী বৈষ্ণবসমাজে কিছুতেই গ্রহণ করতে পারেনি। চৈতন্যলীলার এ পাঁচালী তাই বৈষ্ণবসমাজে সমকালে গৃহীত হয়নি। নগেন্দ্রনাথ বসু আবিস্কৃত, পরিচায়িত [১৩০৪-০৫ বঙ্গাব্দে] ও সম্পাদিত [১৩২২ বঙ্গাব্দে] এই চৈতন্যমঙ্গল বস্তুত ১৩০৪ বঙ্গাব্দ থেকেই নতুন করে বিদ্বানদের ও বৈষ্ণবদের নজরে পড়ে। ১৯৭১ সালে ডক্টর বিমানবিহারী মজুমদারের ও অধ্যাপক সুখময় মুখোপাধ্যায়ের যুগ্ম সম্পাদনায় জয়ানন্দের চৈতন্যমঙ্গলের একটি সংস্করণ এশিয়াটিক সোসাইটি থেকে প্রকাশিত হয়েছে। এটির পাঠই এখানে উদ্ধৃত।

বর্ধমান জেলার আমাইপুরা (মাঞিপুরা) গায়ে ছিল জয়ানন্দের নিবাস। তাঁর পিতা সুবুদ্ধি মিশ্র চৈতন্যভক্ত ছিলেন। চৈতন্যদেব নীলাচল থেকে গয়া যাবার পথে অথবা গয়া থেকে নবদ্বীপ হয়ে নীলাচলে ফেরার পথে আমাইপুরা গায়ে সুবুদ্ধি মিশ্রের বাড়িতে আতিথ্য গ্রহণ করেন। জয়ানন্দ তখন শিশু এবং তাঁর নাম ছিল গুহিঞা। চৈতন্যদেবই তাঁর নতুন নাম রাখেন জয়ানন্দ। জয়ানন্দের মা রোদনী গুহিঞাকে কোলে নিয়ে চৈতন্যের জন্যে রান্না করছিলেন, তাঁর সেই শ্রুতি-স্মৃতি গ্রহভুক্ত করেছেন জয়ানন্দ [পৃঃ ২১৯]। জয়ানন্দ ও তাঁর পিতা [গোসাঞির পূর্বশিষ্য] সুবুদ্ধি মিশ্র গুরু গদাধর গোস্বামীর কাছেই দীক্ষা নেন। জয়ানন্দ ভগিতায় পুনঃ পুনঃ চৈতন্য ও গদাধরকে একই সঙ্গে স্মরণ করেছেন-

চিন্তিয়া চৈতন্য গদাধর পদদ্বন্দ্ব
আদিখণ্ড জয়ানন্দ করিল প্রসঙ্গ।

কিংবা- আনন্দেতে তীর্থ খণ্ড গাঞি জয়ানন্দ ইত্যাদি।

জয়ানন্দ চৈতন্যলীলা বর্ণনায় পূর্বসূরী হিসেবে 'চৈতন্যসহস্রনাম' স্তোত্র প্রণেতা সার্বভৌম ভট্টাচার্য, চৈতন্যভাগবত প্রণেতা বৃন্দাবন দাস, চৈতন্যমঙ্গল রচয়িতা গোপাল বসু [অপ্রাপ্ত] এবং 'গোবিন্দদাসবিজয়গীদ' রচক পরমানন্দ গুপ্তের [অপ্রাপ্ত] নাম উল্লেখ করেছেন। বৃন্দাবন দাস সম্ভবত ১৪৪৭ থেকে ১৪৭৫-৭৭ [বা তারও পরে অর্থাৎ আনুঃ ১৫৪৫ সনে শুরু হয় ১৫৫৩-৫৫ খ্রীস্টাব্দের দিকে সমাপ্ত] শকের সময় পরিসরে তাঁর তথ্যবহুল বিপুলাকায় গ্রন্থ রচনা করেন। কাজেই জয়ানন্দ সাতের বা আটের দশকে তাঁর চৈতন্যমঙ্গল রচনা করেছিলেন। এ অনুমানের অন্যভিত্তিও রয়েছে, যেমন চৈতন্যের ব্যক্তিত্বপ্রভাবিত বৈষ্ণবসমাজে যখন পূর্বে আবেগ ও নিষ্ঠা মন্দীভূত হয়েছে, পৌরাণিক ব্রাহ্মণ্য শাস্ত্রের সঙ্গে সমন্বিত করার একটা প্রয়াস চলছে পূর্ব সংস্কারের প্রভাববশে [কোন দেবালয়ে কেহ সেই বৃত্তি করি/ পরিবার পুণ্ড্রবেক বৈষ্ণব রূপ ধরি] এবং মৌলিক যোগতত্ত্ব, দেহতত্ত্ব যখন আবার জনগণকে আকৃষ্ট করছে, [বীরভদ্র গোসাঞির প্রসাদ মালা পাঞা], তখনই জয়ানন্দ পালা রচনা করেছেন। বৈষ্ণবসমাজেও নানা গুরুমুখী উপশাখার মধ্যে ভেদ-দ্বন্দ্ব-দ্বেষ্ট দেখা দিয়েছে এবং বৈরাগ্য ও ভক্তির চেয়ে পার্থিবতা বৃদ্ধি পেয়েছে [নানা অলঙ্কারে কেহ দিব্যপরিচ্ছেদে। 'দোলায় ঘোড়ায় যাব কেহ মহান্ত সপদে'], সে সময়েই চৈতন্যমঙ্গল রচিত বলে মনে হয়।

চৈতন্যদেব যখন গয়া বা নীলাচলের পথে [১৪১৫ শকে] জয়ানন্দের বাড়ি গিয়েছিলেন [জ্যৈষ্ঠ মাসের তাতে/উত্তপ্ত সিকতা পথে/ বর্ধমান সান্নিকটে/ ক্ষুদ্র এক গ্রাম বটে/ মাঞিপুরা তার নাম, পৃঃ ২১৯] তখন জয়ানন্দ কোলের শিশু। অতএব জয়ানন্দের জন্ম হয় ১৪১৩-১৪ খ্রীস্টাব্দে [ভক্সা দ্বাদশী তিথি বৈশাখ মাসে পৃঃ ২১৮]। পালাগানের দলের গায়ন ও অধিকারী হতে তাঁর বয়স চল্লিশ বছরের মতো হয়েছিল অনুমান করলে ১৫৫৪-৫৫ খ্রীস্টাব্দের দিকে

তাঁকে প্রখ্যাত গায়ের রূপে পাই। চৈতন্যমঙ্গলপালা রচনাকালে দেখা যাচ্ছে বীরভদ্রও প্রতিষ্ঠিত গুরু। বীরভদ্রের জন্ম সম্ভবত ১৫৩৬ খ্রীস্টাব্দের দিকে। কেননা নিত্যানন্দ সূর্যদাস সারখেলের দুই কন্যা বসুধা ও জাহ্নবাকে বিয়ে করেন চৈতন্যের ১৫৫৩ খ্রীস্টাব্দে তিরোভাবের পরে। গুরুর বয়স ৩০/৩৫ বছরের মতো হওয়ার কথা। কাজেই জয়ানন্দ ১৫৬৫-৬৬ সনের আগে চৈতন্যমঙ্গল রচনা করেননি বলে মনে হয়। আর নিত্যানন্দ যদি চৈতন্যের জীবৎকালে ১৫২২ খ্রীস্টাব্দের দিকে বিয়ে করেন তা হলে অবশ্য ৩০/৩৫ বছর বয়স্ক বীরভদ্রকে ১৫৫৩ সনে মেলে। চৈতন্যমঙ্গল শোনাকথা ও বানানো গল্পের আকর। এতেও মনে হয় [পঞ্চাশের মতো বয়সে] চৈতন্য পার্শ্বদবিরল, ও বিভেদে দুর্বল বৈষ্ণবদের পক্ষ থেকে প্রতিবাদের আশঙ্কামুক্ত হয়ে প্রবীণ গায়ক চৈতন্যলীলার গান বেঁধেছেন স্বাধীনভাবে— পেশার খাতিরে ও সাধারণ জনগণের মনোরঞ্জন মানসে অবৈষ্ণবীয় ঢঙে। প্রমাণস্বরূপ বলা যায় :

১. দরিদ্র চিঃ ভাঃ— কিছু নাই সুদরিদ্র। জগন্নাথ মিশ্রকে তিনি ধনী বলে বর্ণনা করেছেন। দাস দাসী যত মিশ্রের মন্দিরে খাটে/ নিমাইর গলায় মণিমুক্তা প্রবাল হার।

২. জয়ানন্দের মতে, ছাত্রাবস্থায় জগন্নাথ কীর্তনে উন্মত্ত হতেন। অন্য গ্রন্থে আছে জগন্নাথমিশ্রের পিতার নাম উপেন্দ্র মিশ্র, জয়ানন্দের মতে জনার্দন। এমনি তথ্যের ভুল সর্বত্র দৃশ্যমান। জয়ানন্দের মতে লক্ষ্মীপ্রিয়ার মৃত্যুসংবাদেই চৈতন্যমনে বৈরাগ্য দেখা দিয়েছিল :

লক্ষ্মীর বিয়োগ কথা লোকমুখে গুনি
প্রেমানন্দে কীর্তনে নাচেন দ্বিজমণি।

এবং সন্ন্যাস গ্রহণের সংকল্প ব্যক্ত করে বিশ্বপ্রিয়াকে চৈতন্য বলছেন :

গৌরাঙ্গ বলেন আমার বৈরাগ্য স্বধর্ম
বৈরাগ্য ছাড়িয়া আমার নাই কোন কর্ম।
কুলধর্ম যুগধর্ম আমি না পালিব
কেমতে সংসারে লোকধর্ম প্রচারিব।

তবু জয়ানন্দ কতগুলো নির্ভুল তথ্যও পরিবেশন করেছেন, যেগুলো অন্যান্য চরিত্রগ্রন্থে সঠিকভাবে মেলে না। অধ্যাপক সুখময় মুখোপাধ্যায় কয়েকটি বিশিষ্ট ও নির্ভুল তথ্যের পরিবেশনের কৃতিত্ব জয়ানন্দের বলে উল্লেখ করেছেন^১

যথা :

ক. চৈতন্যের জন্ম— সন্ধ্যায় তাঁদের পূর্ণগ্রহণ ছিল [জয়ানন্দ : ফাল্গুন মাসের রাহ চন্দ্রে সর্বগ্রাস, পৃঃ ২১৬]।

খ. চৈতন্যতিরোভাব ঘটেছিল— ‘আষাঢ় সপ্তমতিথি শুক্রাতে— ১৪৫৫ শকের শুক্লা সপ্তমী তিথি ছিল রবিবারে।

গ. যবন হরিদাসের নিবাস ছিল বুঢ়ণ পরগনার ভাটকলাগাছি গায়ে। পিতার নাম মনোহর এবং মাতার নাম উজ্জ্বলা।

ঘ. যবন হরিদাসের মৃত্যু হয়— ১৪৫৫ শকের ফাল্গুনের শুক্লা চতুর্দশীর উদয়লগ্নে [৯ই মার্চ, ১৫৩৩]।

ঙ. চৈতন্যদেব সুবুদ্ধি মিশ্রের [ইনিই সম্ভবত চৈতন্যচরিতামৃত ও বৈষ্ণববাচার দর্পণ— উক্ত সুবুদ্ধি মিশ্র] আতিথ্য গ্রহণ করেছিলেন ১৪৩৭ শকের জ্যৈষ্ঠ মাসে।

^১ ভূমিকা—জয়ানন্দ দাস রচিত চৈতন্যমঙ্গল।

চ. জয়ানন্দের পিতৃব্যরা বাণীনাথ, মহানন্দ, কবীন্দ্র, বৈষ্ণবমিশ্র, রামানন্দ মিশ্র। ধার্মিক ও তৈরিক হলেও রঘুনাথ উপাসক ছিলেন। এঁরা বন্দ্যোপাধ্যায় ব্রাহ্মণ। কেবল তাঁর পিতা সুবুদ্ধিই সম্ভবত নিমাই (চৈতন্যদেবের) পণ্ডিতের ছাত্র। তাহে সুবুদ্ধি মিশ্র গোস্বামির (চৈতন্য?) পূর্ব শিষ্য ছিলেন। এজন্যেই সঙ্কোভে জয়ানন্দ বলেন- ‘খুড়া জেঠা পাষণ্ড চৈতন্যে অল্প ভক্তি’। জয়ানন্দের মা রোদনীও নিত্যানন্দের শিষ্যা ছিলেন- ‘মাতা রোদনী মোর নিত্যানন্দের দাসী’ [পৃঃ ১২৮]।

ছ. জয়ানন্দ মাতামহের ঘরে বৈশাখ মাসের শুক্লা দ্বাদশী’র তিথিতে জন্ম গ্রহণ করেন।

জ. চৈতন্য পার্শ্বদ গদাধর পণ্ডিতের আদেশে জয়ানন্দের চৈতন্যমঙ্গল রচিত। নিত্যানন্দশিষ্য অভিষ্যাম গোস্বামী তাঁকে ‘বল’ বা গ্রন্থ রচনায় সাহস তথা উৎসাহ যুগিয়েছিলেন এবং বীরভদ্র তাঁকে ‘প্রসাদমালা’ দিয়ে ধন্য করেছিলেন।

ঝ. যদুনাথ দাসের ‘শাখা নির্ণয়ামৃত’ গ্রন্থে গদাধর শিষ্যরূপে জয়ানন্দের নাম মেলে।

ঞ. বাঙলা-বিহার-উড়িষ্যার যে সব স্থান জয়ানন্দ পর্যটন করেছিলেন, সে সব স্থানে সঠিক বিবরণ রয়েছে তাঁর চৈতন্যমঙ্গলে।

ট. চৈতন্য জন্মের অব্যবহিত পূর্বে গৌড়ে নবদ্বীপে দুর্ভিক্ষ দেখা দিয়েছিল।

ঠ. উড়িষ্যারাজ প্রতাপরুদ্রের সঙ্গে গৌড়ের সুলতান সৈয়দ আলাউদ্দীন হোসেন শাহ’র শত্রুতা ছিল। প্রতাপরুদ্রকে গৌড়সুলতানের সঙ্গে যুদ্ধে নিরস্ত করেছিলেন স্বয়ং চৈতন্যদেব।

ড. কেবল জয়ানন্দই চৈতন্যদেবের মৃত্যুর কারণ বর্ণনা করেছেন :

আষাঢ় বসন্ত (১) -রুই বিজয় নাচিতে
ইটাল বাজিল বামু পায় আচমিতে। ...
চরণে বেদনা ঝড় ষষ্ঠী দিবসে
সেই লক্ষে টোটেটা শয়ন অবশেষে। ...
কলি দশ দণ্ড রাত্রে চলিব সর্বথা ...
মায়া-শরীর থাকিল ভূমে পড়ি [জয়ানন্দ, পৃঃ ২৩৪]

তা ছাড়া নিত্যানন্দের ও অষ্টমের মৃত্যুতিথিও রয়েছে এ গ্রন্থে :

আশ্বিন মাসেতে যোগ কৃষ্ণাষ্টমী তিথি
নিত্যানন্দ বৈকুণ্ঠ চলিল ছাড়ি ক্ষিতি। [পৃঃ ২৩৬]

অষ্টম : পৌষ মাসে শুক্লা ত্রয়োদশী তিথি হৈলা
আচার্য গোস্বামি বৈকুণ্ঠবিজয় করিলা। [পৃঃ ২৩৬]

গ্রন্থ শেষে [উত্তর খণ্ডে] চৈতন্যের মর্ত্যলীলার সার ও সূত্র দেয়া হয়েছে।

চৈতন্য চরিত্রগ্রন্থের মধ্যে কেবল জয়ানন্দই বিচ্ছেদকাতরা বিষ্ণুপ্রিয়া’র মুখে ‘বারমাস্য’ বর্ণনা করেছেন। এ গ্রন্থে শচীর বিলাপ ও স্ত্রী বারমাস্য কারুণ্যের নির্ঝর। চৈতন্যমঙ্গলে বর্ণিত কাহিনী সূচী এরূপ :

প্রথমে ত আদিখণ্ড যুগধর্ম কর্ম।
দ্বিতীয়ে নদীয়াখণ্ডে গৌরাসের জন্ম।।
তৃতীয় বৈরাগ্যখণ্ডে ছাড়ি নিজ বাস।

চতুর্থে সন্ন্যাসখণ্ড প্রভুর সন্ন্যাস ।।
 পঞ্চমে উৎকলখণ্ডে গেলা নীলাচলে ।
 ষষ্ঠমে প্রকাশখণ্ডে প্রকাশ উজ্জ্বলে ।।
 সপ্তমে তীর্থখণ্ডে নানা তীর্থ করি ।
 অষ্টমে বিজয়খণ্ডে গেলা বৈকুণ্ঠপুরী ।।
 নবমে উত্তরখণ্ডে গীত সাক্ষোপাঙ্গ ।
 যুগাবতারে যত করিলা গৌরাঙ্গ ।।
 এই নবখণ্ড গীত চৈতন্যমঙ্গল ।

জয়ানন্দ তাঁর পূর্ববর্তী চৈতন্যলীলা-লেখকদের নাম উল্লেখ করেছেন। এঁদের মধ্যে অনেকেরই রচনা আজো অপ্রাপ্ত-কালে বিলুপ্ত হয়েছে। এ সূত্রে তিনি তাঁর পূর্ববর্তী অন্যান্য কবিদের স্মরণ করেছেন :

রামায়ণ রচিল বাল্মীকি মহাকবি
 পাঁচালী করিলা কৃষ্ণিবাস অনুভবি ।
 শ্রীভাগবত কৈল ব্যাস মহাশয়
 গুণরাজ খান কৈল শ্রীকৃষ্ণবিজয় ।
 জয়দেব বিদ্যাপতি আর চণ্ডীদাস
 কৃষ্ণের চরিত্র তারা করিল প্রকাশ
 সার্বভৌম ভট্টাচার্য ব্যাস অবতার
 চৈতন্যচরিত্র আগে করিল প্রচার ।
 চৈতন্য সহস্রনাম শ্লোক প্রবন্ধে
 সার্বভৌম রচিল কৈবল্য প্রেমানন্দে ।
 পরমানন্দপুরী গোস্বামি মহাশয়
 সংক্ষেপে করিলেন তিহঁ গৌরাঙ্গবিজয় ।
 আদিখণ্ড মধ্যখণ্ড শেষখণ্ড করি ।
 বৃন্দাবন দাস প্রচারিল সর্বোপরি ।
 গৌরীদাস পণ্ডিতের কবিত্ব সুশ্রেণী
 সঙ্গীত প্রবন্ধে তার পদে পদে ধ্বনি ।
 সংক্ষেপে করিল অতি পরমানন্দগুণ
 গৌরাঙ্গবিজয়গীত শুনিতে আনন্দ ।
 গোপাল বসু করিলেন গীতত [সঙ্গীত] প্রবন্ধে
 চৈতন্যমঙ্গল তারা চামর বিছন্দে । [পৃঃ ৪]

সমাজ ও সংস্কৃতি চিত্র

চৈতন্যের আবির্ভাব মুহূর্তে জয়ানন্দের চোখে ও ভাষায় দেশের ও সমাজের অবস্থা ছিল একরূপ :
 চৈতন্যের পূর্বপুরুষ :

চৈতন্য গোস্বামির পূর্বপুরুষ
 আছিল জাজপুরে উৎকলের।
 শ্রীহট্ট দেশেরে পালাইয়া গেলো
 রাজা ভ্রমরের ডরে ।

দেশে কলির কুলক্ষণ :
 এথা কলি যুগে বড় হইল অনাচার ।
 পৃথিবী কান্দিআ গেলা ব্রহ্মার দুয়ার ।
 প্রজাপতির চরণে করিল নিবেদন ।
 কলি যুগে হইল যত যত অলক্ষণ ।
 ব্রাহ্মণ ক্ষত্রিয় বৈশ্য শূদ্র চারি বর্ণ ।
 কলিযুগে ছাড়ে লোক নিজ নিজ কর্ম ।।
 পৃথিবী হরিল শস্য ইন্দ্র হরে নীর ।
 পুষ্প গন্ধ করিল কপিল হরে ক্ষীর ।।
 আসুরীর ভাব হইল প্রতি ঘরে ঘরে ।
 স্ত্রী হত্যা স্বামীর বচন নাঞি ধরে ।
 বৃক্ষলতা ফল হরে রাজা স্নেহে জাতি ।
 মৎস্য মাংসে প্রিয় হৈল বিধবা যুবতী ।।
 রাজা নাঞি পালে প্রজা স্নেহের আচার ।
 দুই তিন চারি বর্ণ হৈল একাকার ।।
 দেবতা ব্রাহ্মণে হিংসা করে স্নেহে জাতি ।
 ক্ষত্রীয়কে শক্তিহীন নাঞি যতি সতী ।।
 গোপোষণ বলি যজ্ঞ ছাড়িল বৈশ্য দেবা ।
 শূদ্র সব ছাড়িলেক ব্রাহ্মণের সেবা ।
 কপটী লোলুপ দ্বিজ শূদ্রান্ন ভোজন ।
 সর্বলোক হইল শিল্পোদর পরায়ণ ।
 ব্রত যজ্ঞ উপবাস নাঞি কার শক্তি ।
 গঙ্গা তুলসীর সেবা নাহি বিমুগ্ধজি ।।
 মা বাপ ছাড়িল পুত্র স্বতন্ত্রা যুবতী ।
 পরদারে রত হইল লঙঘে নিজ সতী ।।
 স্নানসঙ্ক্যা দেবার্চন ছাড়িল ব্রাহ্মণে ।
 গুদ্রের জীবিকা করে ভয় নাঞি মানে ।।
 শূদ্রত্বী সঙ্গম করে শূদ্র ভক্ষ্যে রত ।
 মৎস্য-মাংসে লোলুপ ব্রাহ্মণ সব যত ।।
 সুতার শঙ্কম (২) ঘর নগর চাতর ।
 ইষ্টকার চিত ঘর প্রাচীর ভিতর ।।
 নাটশাল পাঠশাল চৌখণ্ডী বাঙ্গালী ।
 ধ্বজ কল হংস পারাবত করে কেলি ।।
 বৃক্ষ :
 নারিকেল পনস গুবাক আম্র বটে ।
 বকুল চম্পক তাল কদম্ব নিকটে ।।
 অশস্থ তেতুল নিম্ব জাম্বু, খজুরে ।
 নারেক্স ছোলঙ্গ বিধ লবঙ্গান্তপুরে ।।

হিন্দুল হরিতাল শুভ চন্দ্রার্ক তিলাকে ।
 ময়ূর সারস শুক রহি ঘর মুখে ।।
 চৌখণ্ডী চৌতারা টঙ্গী কত শাস্ত্রশালা ।
 প্রসাদ মন্দির প্রপা রক্ষ জাল মাল ।।
 শ্রীহট্ট :
 শ্রীহট্ট দেশে অনাচার দুর্ভিক্ষ জন্মিল ।
 ডাকা চুরি অনাবৃষ্টি মরক লাগিল ।।
 উচ্ছন্ন হইল দেশ অরিষ্ট দেখিয়া ।
 নানা দেশে সর্বলোক গেল পালাইয়া ।।
 নীলাম্বর চক্রবর্তী মিশ্র জগন্নাথে ।
 সবাক্বে জয়পুরে ছাগিল উৎপাতে ।। ...
 অনাচার দেশে বসতি যোগ্য নহে ।
 শ্রীহট্টে উত্তম জন তিলার্থ না রহে ।। ...
 নবদ্বীপে ব্রাহ্মণ পাড়ন :
 আচম্বিতে নবদ্বীপে হৈল রাজভয় ।
 ব্রাহ্মণ ধরিয়া রাজা জাতি প্রাণ লয় ।
 নবদ্বীপে শঙ্কধ্বনি শুনে যার ঘরে ।
 ধন প্রাণ লএ তারে জাতি নাশ করে ।।
 কপালে তিলক দেখে যজ্ঞ সূত্র কান্ধে ।
 ঘর দ্বার লুটে তার লৌহ পাশে বান্ধে ।।
 দেউল দেহারা ভাঙ্গে উপাড়ে তুলসী ।
 জীবন ভএ স্থির নহে নবদ্বীপবাসী ।।
 গঙ্গাস্নান বিরোধিল হাট ঘাট যত ।
 অশ্বখ পনস বৃক্ষ কাটে শত শত ।।
 পিরল্যা গ্রামেতে বসে যতেক যবনে ।
 উচ্ছন্ন করিল নবদ্বীপের ব্রাহ্মণে ।।
 ব্রাহ্মণে যবনে বাদ যুগে যুগে আছে ।
 বিষম পিরল্যাগ্রাম নবদ্বীপ কাছে ।।
 গৌড়েশ্বর বিদ্যামনে দিল মিথ্যাবাদ ।
 নবদ্বীপে বিপ্র তুমার করিব প্রমাদ ।।
 গৌড়ে ব্রাহ্মণ রাজা হবে হেন আছে ।
 নিশ্চিন্তে না থাকিহ প্রমাদ হএ পাছে ।।
 নবদ্বীপের ব্রাহ্মণ অবশ্য হব রাজা ।
 গন্ধর্বে লিখন আছে ধনুর্ময় প্রজা ।।
 এই মিথ্যা কথা রাজার মনেতে লাগিল ।
 নদীয়া উচ্ছন্ন কর রাজা আজ্ঞা দিল ।
 খাদ্য :
 ঘটান্ন সভারে দিল শাক মুগ সুপ ।
 ছেনা বড়ি লফারা পটোল বস্তক ।।

হিঙ্গ ঝাল ঝোল ভাজা তলা কাঁজি বড়া।

বড়াষু শর্করা নাড়ু মিঠামুখ বিড়া।

খিরি অমৃত গুটিকা খেবাড়া নবাত।

মনোহর পুরি দুধপুলি দুধজাত।।

আস্যা নারিকেল পুলি শাকর কাঁকরা।

চন্দ্রকাতি পাএস পরমান্ন শর্করা।

পুটিকা ভালিমা মধু শ্রবাসাত পুলি।

মন সন্তোষ নয়ন সুখ গঙ্গাজল শিঅলি।

মচা ছেনা দুধ পুলি কোবা মুণ্ড শর।

অনুপাম জগন্নাথ ভোগ সর্বসুখ মার।।

পিঠা পানা ভোজনে বৈষ্ণবে সন্তোষিলা।

মালা চন্দন দিয়া সভারে ভূষিলা।।

কর্পুর তাম্বুল দিল দিল সরু বাস।

অর্থ :

অর্থ উপার্জন বিনে সংসার না চলে।

বন্ধদেশে জাই আমি অর্থের ছলে।।

অর্থ বিনা সংসার কভু নাহি চলে।

অর্থবিদ্যা অর্থরূপ সর্বলোক বলে।।

জগাই-মাধাই :

নবদ্বীপে ব্রাহ্মণ দৈত্য জগাই মাধাই
ভূতালিয়া সিধলিয়া চোর দস্যু দুই ভাই।।

মনসরিয়া বৃত্তি করে থাকে নল বনে।

মহাপাপী জগাই-মাধাই দুইজনে।।

দস্যুগণ সঙ্গে থাকে বনে তেপান্তরে।

নিন্দ না জাএ কেহো জগাই মাধাইর ডরে।

অনু যোনি বিচার নাহিক দুই ভাই।

স্নান সন্ধ্যা বিবর্জিত জগাই মাধাই।।

গোবধ ব্রহ্মবধ স্ত্রীবধ জত।

বলে ছলে গুরুপত্নী হরে কত শত।।

গোমাংস শূকরমাংস করে সুরাপান।

ধর্মকথা না শুনে না করে গঙ্গাস্নান।।

শিশু সব আছাড়িয়া মারে শিলাপাটে।

কতশত গর্ভবতীর গর্ভ ফাটে।।

গলে যজ্ঞসূত্র বান্ধা জেন সিংহনাদ।

উত্তর বধির প্রায় মহা পরমাদ।

উদয়াস্ত জ্ঞান নাহি মদিরা ভক্ষণে।

ঘৃণিত লোচন চারুপূর্ণ শক্রাসনে।।

দস্যুগণ সঙ্গে থাকি ঘরে অগ্নি দেই।

বুকে বাঁশ দিয়া কারো সর্বস্ব লেই।।

খড়গ তোদগু ভ্রমে গঙ্গাতটে।

অপবাধ খণ্ডে যদি গঙ্গার ঘাট বন্ধ।।

প্রভুর আজ্ঞায় মাধাই ঘাট বান্ধিল।

পাপহরণ ঘাট তার নাম থুইল।

নবদ্বীপে গঙ্গাএ মাধাইর বান্ধা ঘাটে।।

স্নানমাত্র প্রেমযোগ বাড়িবে নিকটে।।

বৎসর ভিতরে এক মেরায় কাটে।

নর বা মেরায়াবলি :

কোটাল দেবভট্ট চণ্ডীমণ্ডপে সে খাটে।।

পূজার সময় তার হইল আসিয়া।

ধরা মেরায়া ভএ গেরা পালাইয়া।।

মেরায়া না পায়্যা কোটাল জড় ভরতেরে।

ধরিয়া আনিল সেই মণ্ডপ ভিতরে।

মেরায়া কাটিতে রাজা গেলা রাত্রিকালে।

হাতে খড়্গ সতে হৈল পশুবধশালে।

মেয়াদি বলিয়া জড়ভরতে উছর্গে।

আগে ছাগ মহিষ বলি দিল সেই পূর্বে।।

মেরায়া কাটিতে রাজা খড়্গ তুলিল।

মেরায়া না গেল কাটা হাতে খড়্গ রইল।।

দেহতত্ত্ব :

আউট হাথ ঘর খানি তাহে দশ দ্বার।

তার মধ্যে আছে ছয় রসের ভাগর।।

একাদশ চোর তাহে দস্যু পাঁচজন।

গঙ্গায়মুনা নদী বহে সর্বক্ষণ।

হংস ক্রীড়া করে তাহে চরে দশাঙ্গুলে।।

ইন্দ্রা পিত্রা নাড়ি সুবৃন্দার মূলে।।

সহস্রদল পদ্ম মধ্যে শতদল পদ্ম।।

তার মধ্যে রত্নসিংহাসন দেব সম্ম।।

কীর্তনমাহাত্ম্য :

নৃত্য সঙ্কীর্তন করি বিহরে নদীয়া পরী

ভোজন শয়ন সুখ ছাড়ি।

বৈষ্ণবী মালিনী সীতা নারায়ণী ধাত্রী মাতা

গদাধর জগদানন্দে বেড়ি।।

প্রতি ঘরে ঘরে গিয়া হরিনাম মন্ত্র দিয়া

সভারে কহিল একে একে।

শুনরে নদীয়ার লোক ছাড়িয়া সংসার শোক

কীর্তন করিয়া প্রেম সুখে।।

কীর্তন সকল কর্ম কীর্তন সকল ধর্ম
 কীর্তন সকল ব্রহ্মজ্ঞান ।
 কীর্তন আগম বেদ রাজসূয় অশ্বমেধ
 কীর্তন শ্রবণ গঙ্গান্নান । ।
 কীর্তন সকল তীর্থ কীর্তন আবেশনৃত্য
 শিব গুপ্ত সভার গোচর ।
 কীর্তন বৈকুণ্ঠ পদ কীর্তন সমুদ্র নদ
 কীর্তন সভার পরাপর । ।
 কীর্তন অবলম্বন মাত্রে অধর্ম না রহে গাত্রে ।
 কীর্তন দর্শনে পাপ ক্ষয় ।
 কীর্তন রসের ভক্তি কীর্তন নর্তন মুক্তি
 কীর্তন মার্জনে সর্বজয় । ।
 কলিকাল সর্প দংশিবে সর্বজীব ।
 সঙ্কীর্ণ বিনা কার না কইল শিব ।
 বিষ্ণুপ্রিয়া :
 গুন গুন বিষ্ণুপ্রিয়া না কর ক্রন্দন ।
 পতি আজ্ঞা লজ্জিলে কি ধর্মের প্রয়োজন ।
 অরুণ উদয় কালে গঙ্গান্নান করি ।
 মন্দিরে আসিয়া দিব্য ধৌত বস্ত্র পরি । ।
 এক মুষ্টি আতপ তুণ্ড ভূমে পেলি ।
 একটি তুণ্ড লয়া হরে কৃষ্ণ বলি ।
 হরিনাম বত্রিশ অক্ষর সাক্ষ হইলে ।
 সেই তুণ্ড গুটি থুইবে গঙ্গাজলে । ।
 এই মত তিন প্রহরে যত পার ।
 রন্ধন করিয়া কৃষ্ণ নিবেদন কর । ।
 সেই অন্ন ভক্ষণ করিও দেহ রক্ষা হেতু ।
 তুমার চরিত্র লোকে ধর্মশিক্ষা সেতু । ।
 কলিকাল :
 কলি যুগে হবেক যতেক দুরাচার ।
 একে একে কহেন সকল সারোদ্ধার । ।
 ব্রাহ্মণে হরিবেক বেদ ইন্দ্র হরিবেক জল ।
 নানা ছলে রাজা অর্থ হরিবেক সকল । ।
 পৃথিবী হরিবেন শস্য রাজা স্বেচ্ছ জাতি । ।
 কপিল হরিবে ক্ষীর স্বতন্ত্রায়ুবতী । ।
 ব্রাহ্মণ হরিবেক বেদ শূদ্র বৈশ্যচার ।
 ভগিনী হরিবে ভাই যুগের বেভার । ।
 গুরুপত্নী হরিবেক শিষ্য পাপমতি ।
 স্থাপ্য হরিবেক যত উত্তম জাতি । ।

ব্রহ্মস্ব দেবস্ব সব হরিব উত্তম ।
 নীচ উচ্চ হবেক উত্তম অধম । ।
 কুলধর্ম হরিবেক যত বৃক্ষ লতা ।
 কুলবধু লজ্জা ভয় হরিব সর্বথা । ।
 গঙ্গা হরিবেন জল ছাড়িব তুলসী ।
 যবনে উচ্ছন্ন করিবেক বারাগসী । ।
 পূজা চর্চা হরিবেক যত দেবালয় ।
 তীর্থ আগম্য হরিবেক জানিহ নিশ্চয় । ।
 দেউল দেহারা মঠ ভাঙ্গিবে যবনে ।
 সন্ধ্যাবেদ দেবার্চনা ছাড়িব ব্রাহ্মণে । ।
 ক্ষেত্রি সত্ত্বহীন হবে যুদ্ধ শূণাল ।
 তিন জাতি সবে লক্ষ্মী বাড়িবে বিশাল ।
 গোপোষণ বাণিজ্য ছাড়িব বৈশ্য দেবা ।
 শূদ্র সব ছাড়িবেক ব্রাহ্মণের সেবা । ।
 পৃথিবী ছাড়িব অবধূত যতি সতী ।
 মাংস মৎস্য খাবে বিধবা যুবতী । ।
 পিতৃ লজ্জিবেক পুত্র গুরু লজ্জিবেক শিষ্য ।
 বিধবা ব্রাহ্মণী সব খাইব আমিষ্য । ।
 স্বামী লজ্জিবে স্ত্রী কপটী সংসার ।
 ভাল বংশে জন্মিয়া হবেক দুরাচার । ।
 ব্রাহ্মণে ছাড়িব একাদশী যজ্ঞ দান ।
 শূদ্রসব করিবেক পূরণ বাখান । ।
 চণ্ডালিনী শূদ্রী করিব একাদশী ।
 উত্তম জনের ঘর ছাড়িব তুলসী । ।
 শূদ্রাণী লইয়া ঘর করিবে সন্ন্যাসী ।
 অর্থ সঞ্চয় করিবেক জত তীর্থবাসী । ।
 শূদ্রাণী লইয়া ঘর করিবে ব্রাহ্মণ ।
 ব্রাহ্মণী লইয়া ঘর করিব সর্বজন । ।
 সন্ন্যাসী করিব অর্থ সঞ্চয় বাণিজ্য ।
 শূদ্র দেবালয়ে হবে কৃষ্ণ পরিচর্যা । ।
 নাহা লুহা লবণ বেচিবে ব্রাহ্মণে ।
 কন্যা বেচিবেক যে সর্বশাস্ত্র জানে । ।
 ব্রাহ্মণ রাখিব দাড়ি পারস্য কহিবে ।
 মোজা পাগড়ি হাতে কামনো ধরিবে । ।
 মনসবি আবৃত্তি করিবে দ্বিজবরে ।
 ডাকা চুরি ঘাটি সাধিবেক নিরন্তরে । ।
 শূদ্রে পূজিবেক মূর্তি শালগ্রাম শিলা ।
 কার্যপণে বিকাবেক সুরভি কপিল । ।

ঘৃত মধু তিল কুশ যব জাতাকুর ।
 দধি লাজ দূর্বা ধান স্বস্তিক সিন্দুর ।
 এসব ছাড়িবেক পৃথ্বী কলি অবশেষে ।
 অশ্বখ কদম্ব নিম্ব না থাকিবে দেশে ।।
 শঙ্খ ঘণ্টা মৃদঙ্গ চামর চন্দ্রাতাপ ।
 কলি শেষে পৃথিবী ছাড়িবে এসব ।।
 ছাগী প্রায় ধেনু হবে নৃত্য প্রায় মেঘ ।
 অল্পাষ্ট প্রায় মনুষ্য পতঙ্গ প্রায় বেগ ।।
 সাত আট বৎসরে স্ত্রী গর্ভ ধরিবে ।
 এক গর্ভে পাঁচ সাত ছাওয়াল জন্মিবে ।।
 শূদ্র জগৎগুরু হবে স্রেচ্ছ হবেক রাজা ।
 রাজা সর্বশ্রম নিবেক দুঃখী হবে প্রজা ।।
 দাতা দরিদ্র হবেক কৃপণ হবে হীন ।
 পাপী দিঘা পূর্বটি মারিবেক সদগুণ ।।
 অল্প বিদ্যায় হবেক মহা বিদ্বান ।
 অল্প ধনে হবেক সে মহা ধনবান ।।
 গৌড়ে উৎকলে শত্রুতা :
 গৌড়ে উৎকলে পড়িল মহা শারি ।।

প্রতাপরুদ্র গৌড় জিনিতে করে আশা ।
 গুনিয়া গৌড়েন্দ্র তার করেন উপহাস ।।
 চৈতন্য দেবের রাজা আজ্ঞা মাগিল ।
 প্রভু বলেন প্রতাপরুদ্র কুবুদ্ধি লাগিল ।।
 কালযবন রাজা পঞ্চ গৌড়েশ্বর ।
 সিংহ শার্দূল দেখ কতেক আস্তর ।।
 উদ্র দেশ উচ্ছন্ন করিবেক যবনে ।
 জগন্নাথ নীলাচল ছাড়িবেন এতোদিন ।।

কবির পিতার গৃহে চৈতন্যদেব :
 জ্যৈষ্ঠ মাসের তাতে উত্তম সিকতা পথে
 তরুতলে করিল শয়ন ।।
 বর্ধমান সন্নিকটে ক্ষুদ্র এক গ্রাম বটে
 মাঞিপুরা তার নাম ।
 তাহে সুবুদ্ধি মিশ্র গোসাঞির পূর্ব শিষ্য
 তার ঘরে করিল বিশ্রাম ।
 তাহার নন্দন গুহিয়া জয়ানন্দ নাম থুয়া
 রোসানী রাখিল তার লঞা ।।

৩. লোচন দাস

লোচন দাস তাঁর গ্রন্থে আত্মপরিচয় দিয়েছেন। তাঁর পিতার নাম কমল দাসকর, মাতার নাম সদানন্দী, মাতামহের নাম পুরুষোত্তম গুপ্ত, মাতামহী অভয়া দাসী, দীক্ষাগুরু শ্রীখণ্ডের নরহরিদাস সরকার। কবির নিবাস বর্ধমানের কোগ্রাম। এঁরা বর্ণে বৈদ্য। নরহরি সরকার ছিলেন গৌরপারম্যবাদী, কাজেই লোচন দাসও সে-মতবলম্বী এবং গ্রন্থে গৌরনাগরবাদ প্রকট।

লোচন দাস চৈতন্য অবতারের পটভূমি ও প্রমাণ হিসেবে ভাগবত, ব্রহ্মসংহিতা ব্রহ্মবৈবর্ত-পুরাণ, ভবিষ্যপুরাণ, নারদপঞ্চরাত্র, মহাভাগবত প্রভৃতি অনুসরণ করেছেন। কিন্তু চৈতন্যলীলার মূলসূত্রগুলো মুরারি গুপ্তের কড়চাভিড়িক, যদিও তার সঙ্গে নরহরির কাছে শোনা ও অন্যসূত্রে জানা কাহিনীও যুক্ত হয়েছে। এবং বিমানবিহারী মজুমদারের মতে উড়িয়া কবি মাধবের চৈতন্যবিলাস অবলম্বনে লোচন দাস চৈতন্যের সন্ধ্যাস সম্পর্কিত ঘটনা বর্ণনা করেছেন। [চৈ. চ. উ. পৃঃ ২৮৩]। অতএব, লোচন মুখ্যত মুরারি ও মাধবের অনুসারী। লোচন নিজেই স্বীকার করেছেন যে মুরারি গুপ্তের গ্রন্থই তাকে চৈতন্যমঙ্গল রচনায় অনুপ্রাণিত করেছে। চৈতন্যলীলার লেখক হিসেবে তিনিও পূর্বসূরীদের শ্রদ্ধার সঙ্গে স্মরণ করেছেন :

পরমেশ্বর দাস আর বৃন্দাবন দাস
 কানীশ্বর রূপ সনাতন পরকাশ ।
 গোবিন্দ মাধব ঘোষ বাসু ঘোষ আর
 সবে মিলি আসি কৈশ ভকতি প্রচার । (পৃঃ ৩৪)

লোচন দাস বৃন্দাবন দাসের গ্রন্থকে 'ভাগবতগীত' বলেই জানতেন- 'শ্রীবৃন্দাবন দাস বন্দিব এক চিতে। জগতে মোহিত যার ভাগবতগীতে'। কাজেই লোচন দাসের চৈতন্যমঙ্গল পাঠ করে বা লোচনের অনুরোধে বৃন্দাবন দাস তাঁর চৈতন্যমঙ্গল এর নাম পরিবর্তন করে চৈতন্যভাগবত রেখেছিলেন বলে যে কাহিনী বৈষ্ণবসমাজে চালু রয়েছে, তা বানানো। আমরা বৃন্দাবন দাসের চৈতন্যভাগবত আলোচনা প্রসঙ্গে ব্যাস ও ভাগবত যে স্বতঃস্ফূর্ত নাম তা ব্যাখ্যা করে বলেছি। তাছাড়া লৌকিক দেবতার মঙ্গলগানের পাঁচালীর প্রভাবে চৈতন্যলীলাবিষয়ক কাহিনী মাত্রই মঙ্গল এবং সূত্র মাত্রই কড়চা বা বিজয়- এই সাধারণ নামে অভিহিত হয়েছে বলেই মনে হয়। বহুকাল পরে কৃষ্ণদাস কবিরাজ বলেছেন, 'বৃন্দাবন দাস কৈল চৈতন্যমঙ্গল'। আর একটি জনশ্রুতিমূলক কথা চালু আছে যে লোচনদাস চৌদ্দ বছর বয়সে চৈতন্যমঙ্গল রচনা করেন। এটি যে ভিত্তিহীন ও অসম্ভব তার প্রমাণ লোচনের কাব্যে বৈদ্যের ও জ্ঞান প্রজ্ঞার নিদর্শন রয়েছে।

'অতএব নির্ণয় কথা কেমনে বাখানি' (সূত্রখণ্ড পৃঃ ৩৩) কবির এ উক্তি থেকে গুরুত্ব দিয়ে ডক্টর বিমানবিহারী মজুমদার লোচন দাসের গ্রন্থ ১৫৭৬ খ্রীস্টাব্দের মধ্যে রচিত বলে সিদ্ধান্ত করেছেন, কিন্তু এটি অকাট্য যুক্তি নয়, কারণ 'গৌরগণোদ্দেশদীপিকা' আগে রচিত হলেও লোচন সে-গ্রন্থ নাও পড়তে পারেন, পড়লেও পাপপুণ্য সম্পৃক্ত তত্ত্বে বিশ্বাস দৃঢ়মূল না হওয়ায় তা শুনে বা জেনে গ্রহণ করতে চাননি। তাই হয়তো কবির বলেছেন,

অতএব নির্ণয় কথা কেমনে বাখানি।

মহাশূরের মুখে যেই গুনিয়াছি কানে

তাহা কহিবারে নারি সঙ্কোচ পরাণে।

ডক্টর দীনেশচন্দ্র সেন বলেন, কথিত আছে যে তিনি ১৫৭৫ খ্রীস্টাব্দে নরহরি সরকারের আদেশে এ গ্রন্থ রচনা করেন। লোচন দাসের গ্রন্থে পূর্বসূরী হিসেবে জয়ানন্দের উল্লেখ নেই, বৃন্দাবন দাসের নাম আছে। কাজেই লোচন দাস জয়ানন্দের ও কৃষ্ণদাস কবিরাজের পূর্বেই চৈতন্যলীলা রচনা করেছিলেন এ অনুমান অসঙ্গত নয়। সতেরো শতকে রচিত রামগোপাল দাসের 'শাখানির্ণয়ে' বৈদ্য বংশীয় লোচন দাস সম্বন্ধে এরূপ তথ্য মেলে :

আর এক শাখা বৈদ্য লোচন দাস নাম।

শ্রীচৈতন্যলীলা যেহ করিল বর্ণন

গুরুর অর্থে বিকাইলা ফিরিঙ্গি সদন।

-এর তাৎপর্য যদি এরূপ হয় যে, গুরু নরহরি সরকারের কিংবা কোন শিক্ষা গুরুর জন্যে ফিরিঙ্গির (ফরাসির বা পর্তুগীজের) কাছে জামিন থেকে তিনি অর্থ ঋণ করেছিলেন, এবং পরে সে ঋণের দায়ে জামিন লোচন দাসকেই ফিরিঙ্গি উত্তমর্গ কয়েদ করেছিল, তা হলে লোচন দাস নিশ্চিতই ষোল শতকের শেষাবধি জীবিত ছিলেন। কেননা, ষোল শতকের তৃতীয় পাদেও পর্তুগীজ কিংবা অন্য যুরোপীয়দের সঙ্গে ব্যবসায় অথবা মহাজনী সূত্রে দেশীলোকের এতো ঘনিষ্ঠতা হবার কথা নয়। ডক্টর বিমানবিহারী মজুমদার মনে করেন, তিনটি উদ্দেশ্যে লোচন দান চৈতন্যমঙ্গল রচনা করেন : এক, গুরু নরহরি সরকারকে চৈতন্যদেবের ঘনিষ্ঠপাৰ্শদ রূপে পরিচিতি করা, দুই নরহরি সরকারকে পঞ্চতত্ত্বের মধ্যে ঠাঁই দেয়া, তিন, গৌরনাগর উপাসনা প্রচারের জন্যে নাগরীভাবে জনপ্রিয় করা (চৈঃ উপাদান, পৃঃ ২৫৭)। শিয়া মুসলমানদের

যেমন পাকপঞ্জাতন [রসুল, আলি, ফাতেমা, হাসান, হোসেন] তেমনি বিষ্ণুর বা কৃষ্ণের অবতারের পার্শ্ব প্রচারক ভক্ত হিসেবে পাঁচজন চৈতন্যের কিছু আগে-পরে নবদ্বীপে ও তার চার উপকণ্ঠে আবির্ভূত হন। কবিকর্ণপুরের গৌরগণোদ্দেশদীপিকায় স্বরূপ দামোদরের হিসেবে চৈতন্য, অদ্বৈত, নিত্যানন্দ, গদাধর ও শ্রীনিবাস। লোচন দাসের হিসেবে চৈতন্য, অদ্বৈত, নিত্যানন্দ, গদাধর ও নরহরি-‘জয় নরহরি গদাধর প্রাণনাথ [সূত্র খণ্ড, পৃঃ ২ ও আদি খণ্ড]। কৃষ্ণদাস কবিরাজের মতে চৈতন্য নিত্যানন্দ-অদ্বৈত-শ্রীবাস-গদাধর (পৃঃ-৪)। কিন্তু সনাতন গোষ্ঠ্যমীর বৃহৎ বৈষ্ণব হিতৈষীণিতে বন্দনায় নামক্রম একরূপ-চৈতন্য, মাধবেন্দ্রপুরী, শ্রীধরস্বামী সার্বভৌম ভট্টাচার্য, বিদ্যাচাম্পতি, বিদ্যাভূষণ, পরমানন্দ ভট্টাচার্য, রামচন্দ্র, বাণীবিলাস, তারপরে অদ্বৈতাচার্য, শ্রীবাস পণ্ডিত, নিত্যানন্দ অবধূত ও গদাধর পণ্ডিত। অতএব সনাতন স্পষ্টত পঞ্চতত্ত্ব মানে নি। নারায়ণের নির্দেশে কলিযুগে সংকীর্তন ধর্ম’ পালনের জন্যে ভাগবতরূপে চৈতন্যপরিকরদের মানব জন্ম গ্রহণ (চঃ ভাঃ পৃঃ ৯)। লোচন দাস বর্ণিত ও ব্যাখ্যাত নাগরী ভাব রাধা-কৃষ্ণলীলা স্মরণ করিয়ে দেয়। নদীয়ার নারীমাত্রাই এক অঙ্গে অপরূপ রূপ দেখে কামে-প্রেমে আবেগতাড়িত, গৌরান্ধু যেন কখনো কখনো বিচলিত। ‘গৌরান্ধের নয়ন-সন্ধান শরঘাতে মানিনীর মান-মৃগ পালায় বিপথে।’ শিশু নিমাইয়ের এক অঙ্গে এত রূপ দেখে নদীয়ার নাগরীদের ‘অলসল অঙ্গ সভার শূন্য নীবিবন্ধ’। কেবল তাই নয় ‘মরমে মদন জুরে ঢলিয়া পড়িল’। কেউবা ‘গর গর কামে উলমতা’। কাজেই গৌরপারম্যবাদীরা চৈতন্যকে কৃষ্ণের মতো কাম-প্রেমের আধার বলে জেনেছিল এবং রাধাভাবে সাধ্য বলেই মেনেছিল। বৌদ্ধ সহজিয়া মতবাদপুষ্ট বৈষ্ণবসহজিয়া মত এই গৌরপারম্যতত্ত্ব ভিত্তি করেই প্রবল হয়।

লোচন দাস একটি পদে চৈতন্যদেবের মৃত পার্শ্বদেবের স্মরণ করেছেন :

গোরাগুণে আছিল ঠাকুর নরহরি
স্বরূপ রূপ সনাতন মুকুন্দ মুরারি।
প্রিয় গদাধর আর ঠাকুর শ্রীনিবাস
নিত্যানন্দের পরিচয় :
নিত্যানন্দ রায় বন্দো রোহিনী সূত।
অন্যত্রঃ পদ্মাবতী উদরে জনম বলরাম
পিতা হাড়ো ওঝা সে পরমানন্দ নাম।
পিতামাতা নাম থুইল কুণ্ডের পণ্ডিত
সন্ন্যাস আশ্রমে নিত্যানন্দ সূচরিত।
গুড়া ত্রয়োদশী শুভ যোগ মাঘ মাসে।
পৃথিবী জনম লৈল পরম হরিষে।
আদ্যোপান্তে যেইরূপে প্রেম প্রচারিল।
দামোদর পণ্ডিত সর্বপুছিল তাহারে
আদ্যোপান্ত যত কথা কহিল প্রকারে।
শ্লোকবন্ধে হৈল পুঁথি গৌরান্ধচরিত
দামোদর সম্বাদ মুরারি মুখোদিত

শুনিয়া আমার মনে বাড়িল পীরিত
পাঁচালী প্রবন্ধে কহে গৌরান্ধচরিত।
পঞ্চতত্ত্ব :
জয় জয় গদাধর শ্রীগৌরান্ধ নরহরি
জয় জয় নিত্যানন্দ সর্বশক্তিধারী।
জয় জয় অদ্বৈত আচার্য মহেশ্বর।
লোক শিক্ষা হেতু প্রভু কৈল অবতার।
সার্বভৌম বসি তথা বেদান্ত পড়ায়।
সন্ন্যাসীর ধর্ম নহে নর্তন কীর্তন।
চৈতন্য জন্মলগ্ন :
শুভ দিন শুভ ক্ষণ পূর্ণিমার তিথি
ফাল্গুনের শুভ নিশি হিমকর জুতি।
রাহ চন্দ্র গরাসয়ে অজুত বেলে
প্রভু জন্ম পৃথিবীতে হেন বেলে।
ষষ্ঠীপূজা ষষ্ঠী পূজাবারে যাই বটতলে।
মৃত পার্শ্বদেবের স্মরণ করেছেন :
প্রিয় বাসুদেব আর প্রাণ হরিদাস।

পরাণের পরাণ গেল শ্রীরঘুনন্দন
না মরে এসব শোকে না দাস লোচন।
যোগতত্ত্ব :
(মুরারির) সনে যোগশাস্ত্র বাখানে
সমাজ ও সংস্কৃতি :
চৈতন্য বিবাহ উৎসবে
গুবাক, চন্দন, মালা ব্রাহ্মণের দিল।
শত শত কুলবধু সিন্দুর পরিল।।
খাদি, কদলক আর তৈল হরিদ্রা।
প্রত্যেক সভারে দিল শচী সুচরিতা।।
বাদ্য :

শঙ্খ, দুন্দুভি বাজে ভেউর কাহাল।
মৃদঙ্গ পটাহ বাজে কাংস্য করতাল।।
ঢাকের দুড়দুড়ি গুনি যোজনেক পথে।
গুনিঞা জুড়ায় হিয়া শাহিনী-শবদে।।
বীণা, বেণু, কুপিলা সব বংশীর নিশান।
রবাব, উপাঙ্গ, পাখোয়াজ একতান।।
দামামা দগড় বাজে পটাহ মৃদঙ্গ।
দোহরি মোহরি বাজে গুনিতে আনন্দ।।
নর্তক নাচয়ে গত গাএত গায়েন।
গুভক্ষণ করি কৈল মন্তকমুগুন।।
নর্তক ও ভাট :
নর্তকে রে দিল দ্রব্য, আর ভাটগণে।
সভার সম্ভাষণকৈল নানাদ্রব্য দানে।।
বরস্নান বিবাহ-উচিত প্রভু করে পুনঃস্নান।
নাপিতে নাপিতক্রিয়া করিল সেকালে।
শ্রীঅঙ্গ-মার্জনা করে কুলবধু মেলে।।
সম্মুখে নাটুয়া নাচে গায়েন গায় গীত।।
ব্রাহ্মণেতে বেদপঠে ভাটে কারবার।
কুলবধু মেলি, দেহ হলহালি,
আনন্দে মঙ্গল গাহারে।।

সজ্জা :
হার কেয়ূর, কঙ্কন, কিঙ্কিনী
নৃপুর পরহ না কাট।
অলকা নিকপে, সিন্ধুর ললাটে,
চন্দনবিন্দু তার হেট।।
তামুর অধরে, তামুল বাম করে
নীলায় ঢুলি ঢুলি যায়।
বধুবরণ :
পুত্র আর বধুকোলে করে শচীদেবী।
দুর্বা ধান্য ঘৃতবাতি দিয়ে কোলে হও চিরজীবী।
জগাই মাধাই :
সেই নবধীপে এক আছায়ে দুরন্ত।
অতি দুরাচার সেই- পাপে নাহি অন্ত।।
মহাপাপী ব্রহ্ম সে আছে দুই ভাই।
নবধীপের ঠাকুর যে জগাই মাধাই।।
ব্রাহ্মণী-মবনী, গুর্বারঙ্গা নাহি এড়ে।
সুরঙ্গান পাইলে সকল কর্ম ছাড়ে।।
দেব-গুরু-ব্রাহ্মণের হিংসা নিরন্তর।
বাহির হইলে বিনা বধে না যায় ঘর।।
ব্রহ্মবধ, গোবধ, স্ত্রীবধ শত শত।
গুভযাত্রা :
চুয়া-চন্দনের ছড়া দিল রাজপথে।।
খদি, দধি, মঙ্গল দুর্বা, কুঙ্কুম, কস্তুরি।
সূক্ষ্মপুষ্প উম্জল, দীপ জ্বালে সারি সারি।।
যোগীবেশে :
মুণ্ডি মুণ্ড মুড়াইয়া হইয়া নাড়ি।।
রক্তবস্ত্র পরিব-কুণ্ডল দিমু কানে
যোগিনী হইয়া আমি যাব তোমার সনে।।
চৈতন্য সহস্র নামভোক্তা :
স্ততি করে সার্বভৌম গদগদস্বর।।
গদগদ-স্বরে পড়ে সহস্রেক শব্দ।
'চৈদন্যসহস্র' নামে জানে লোক সব।।

৪. কৃষ্ণদাস কবিরাজ

বৈষ্ণবসমাজে চৈতন্যচরিতামৃত কেবল চৈতন্যলীলার বর্ণনাগ্রন্থ রূপে নয়, বৈষ্ণবতত্ত্ব গ্রন্থ রূপেও সমাদৃত। বস্ত্রত তত্ত্বশাস্ত্রের আকর রূপে এটি ধর্মগ্রন্থের গুরুত্ব ও মর্যাদা পেয়েছে। এ গ্রন্থে অবতার চৈতন্যের মর্ত্যলীলা, চৈতন্যতত্ত্ব, কৃষ্ণতত্ত্ব, ভক্তিতত্ত্ব সাধ্যসাধনতত্ত্ব উচ্চ দার্শনিক

সূক্ষ্মতায় বর্ণিত ও ব্যাখ্যাত হয়েছে। বৈষ্ণবদের ও দার্শনিকদের কাছে ‘চৈতন্যচরিতামৃত মহৎ বই, মহৎ লেখকের লেখা, মহৎ শ্রোতার জন্যে লেখা’ (সুকুমার সেন, পূর্বাব্দ পৃঃ ৩৪৫)। চৈতন্যলীলা বর্ণনায় তার প্রধান অবলম্বন ছিল স্বরূপ দামোদর, মুরারি গুপ্ত ও বৃন্দাবন দাস।

কবির ভাষায় :

দামোদর স্বরূপ আর গুপ্ত মুরারি
মুখ্য মুখ্য লীলা সূত্র লিখিয়াছে বিচারি।
সেই অনুসারে লিখি লীলা সূত্রগণ
বিস্তারি বর্ণিয়াছেন তাহা দাস বৃন্দাবন।
চৈতন্যলীলার ব্যাস বৃন্দাবন দাস।
মধুর করিয়া লীলা করিলা প্রকাশ।
গ্রন্থ বিস্তারের ভয়ে তেহোঁ ছাড়িল যে যে স্থান
সেই সেই স্থান করিব বাখান।

চৈতন্যলীলা রত্নসার/স্বরূপের ভাণ্ডার/ তিই খুইলা রঘুনাথের কঠে/ তাহা কিছু যে গুনিল/
তাহা ইহা বিচারিল/ ভক্তগণে দিল এই ভেটে। (চৈ.চ.)

অন্যত্র- স্বরূপ গোসাঞি আর রঘুনাথ দাস
এই দুই কড়চাতে এ লীলা প্রকাশ (পৃঃ ৫৭৯)

-এতে মনে হবে রঘুনাথ দাসও একটি কড়চা লিখেছিলেন।

বিশেষত বৃন্দাবন দাসের-

নিত্যানন্দ বর্ণনেই হইল আবেশ
চৈতন্যের শেষ লীলা রহিল অবশেষ।

এবং বৃন্দাবন দাস যে কিছু বর্ণিল সেই সংক্ষেপ করিয়া, লিখিতে না পারি-গ্রন্থে রাখিয়াছে লিখিয়া’ (পৃঃ ৬২৪), আর আশা করেছিলেন ভবিষ্যতে ‘বিস্তারিয়া (চৈতন্য লীলার) বেদব্যাস করিব বর্ণনে’। কৃষ্ণদাস কবিরাজ বৃন্দাবন দাসের উদ্দিষ্ট সেই ভাবী বেদব্যাস। কৃষ্ণদাসও তাঁর বক্তব্যের সমর্থনে পদ্ম, আদি, কূর্ম, গরুড়, বৃহৎ নারদীয়, স্কন্দ, ব্রহ্ম পুরাণ এবং রামায়ণ, মহাভারত, নারদপঞ্চরাত্র, বৃহৎ গৌতমীয়তন্ত্র প্রভৃতি থেকে শ্লোক ও প্রমাণ উল্লেখ করেছেন। কৃষ্ণদাস কবিরাজ বিদ্বান ছিলেন- ‘কাব্যনাটক কত’ / পরমানন্দাদি শত শত / পড়িলেন বিধি প্রকারে। চৈতন্যচরিতামৃতশাস্ত্র সিদ্ধি মথি কত / লিখে কবিরাজ কৃষ্ণদাস’ (উদ্ধবদাস, পদ)। চৈতন্যচরিতামৃতে চৈতন্যজীবনের কিছু ঘটনা বর্ণিত হয়েছে, যেগুলো তাঁর পূর্ববর্তী চরিতকারদের গ্রন্থে নেই। তিনি ষড়গো স্বামী- ব্যাখ্যা চৈতন্যতত্ত্ব ও বৈষ্ণবের সাধ্যতত্ত্বের অনুসরণ করেছেন। এবং ঐ মূল তত্ত্বের আলোকে তিনি চৈতন্যের অন্তর্লোকের আলোখা অঙ্কন করেছেন। এজন্যেই চৈতন্যচরিতামৃত ষড়গোস্বামী প্রভাবিত বৃন্দাবনী বৈষ্ণবসম্প্রদায়ের শাস্ত্রগ্রন্থ :

কৃষ্ণলীলা গৌরলীলা একত্র বর্ণন
চৈতন্যচরিতামৃতে গোসাঞির লিখন।
ভাবতত্ত্ব, প্রেমতত্ত্ব, রসতত্ত্ব আর
ক্রমে ক্রমে লিখিয়াছেন করিয়া বিচার।

জ্ঞানযোগ বিধিভক্তি রাগ নিরূপণ

কাঁছ নাহি দেখি শুনি এমন বর্ণন।

(সিদ্ধান্তচন্দ্রোদয়-মুকুন্দ বিরচিত)

কৃষ্ণদাস কবিরাজের প্রথম কাব্য ‘গোবিন্দলীলামৃত’ সংস্কৃতভাষায় ২৫৮৮ শ্লোক সম্বলিত বিপুলকাব্য গ্রন্থ। এ কাব্য লিখেই হয়তো তিনি কবিরাজ উপাধি পেয়েছিলেন।

কৃষ্ণদাস ছিলেন বর্ণে বৈদ্য। প্রথম জীবনে তিনি গৃহী ছিলেন। তখন তাঁর বাড়িতে মাঝে মাঝে কীর্তনোৎসব হত— ‘আমার বাড়িতে অহোরাত্র সংকীর্তন’। তিনি নিমাই-নিতাইকে কৃষ্ণ-বলরামের অবতার বলেই মানতেন—

‘দুই ভাই একতনু সমান প্রকাশ,...

একে মানি আর না মানি এই মত ভণ্ড।’

গৃহী হিসেবেও গৃহদেবতা কৃষ্ণের নিত্যপূজার ব্যবস্থা করেছিলেন। পূজারী ব্রাহ্মণের নাম ছিল গুণার্ণব মিশ্র। কাটোয়ার অনতিদূরে ঝামটপুর গায়ে ছিল তাঁর নিবাস। তাঁর অন্তত একটি ছোট ভাইও ছিল। স্বপ্নে নিত্যানন্দের আদেশ পেয়ে তিনি বৃন্দাবনবাসী হন। কাজেই নিত্যানন্দ তখন মৃত। বৃন্দাবনে যখন গেলেন তখন সনাতন ছাড়া অন্য গোশ্বামীরাজ জীবিত। নিত্যানন্দের মৃত্যু যদি ১৫৪২ সনেও হয়, ত’ হলেও বলতে হবে কৃষ্ণদাস হয় তখন অজাত অথবা তখন তাঁর বাল্যকাল। এদিকে ১৫৬২ খ্রিস্টাব্দে শ্রীনিবাস ষোড়শ বৃন্দাবনে যান, তার আগেই কোন সময়ে সনাতনের মৃত্যু [আঃ ১৫৫৮ খ্রীঃ] হয়েছিল। অতএব গৃহী কৃষ্ণদাস ১৫৭০ খ্রীষ্টাব্দের পরে মধ্যবয়সেই [৪০ বছর বয়সে] বৃন্দাবনে স্থান বলে অনুমান করি। তখন বীরভদ্রও সুখ্যাত গুরু। বৃন্দাবন যাত্রার পূর্বে—

সেই বীরভদ্র গোস্বামীর লইনু স্মরণ

যাহার প্রসাদে হয় অভীষ্ট পূরণ। (চৈ. চ.)

১৫৬০ খ্রিস্টাব্দের পরেই ত্রিশোত্তর বয়সে বীরভদ্রের একরূপ প্রতিষ্ঠা হওয়া সম্ভব। তা’ছাড়া কৃষ্ণদাস কবিরাজ পরিণত বয়সে— বৃদ্ধ বয়সে তাঁর চৈতন্যচরিতামৃত গ্রন্থ রচনা করেন— ‘আমি জরাতুর নিকট জানিয়া মরণ/ অন্তলীলার কোন সূত্র করিয়াছি বর্ণনা’। তাঁর গ্রন্থসমাপ্তির বিশ্বাসযোগ্য তারিখ হচ্ছে—তাঁর গ্রন্থোক্ত এই শ্লোকটি :

শাকে সিদ্ধগ্নি বাগেন্দৌ জৈষ্ঠ বৃন্দাবনান্তরে

সূর্যোহুসিত পঞ্চম্যাং গ্রন্থোহয়ং পূর্ণতাংগত।

সিদ্ধু-[প্রাচীন মতে ৭ নয়]-৪, অগ্নি-৩, বাণ-৫, ইন্দু-১ অক্ষয়বামাগতি হিসেবে সূর্যাহু-রবিবার, অসিত পঞ্চমী— কৃষ্ণপঞ্চমী তিথি। ১৫৩৪ শক বা ১৬১২ [৭ই জুন] খ্রীষ্টাব্দ হয়, অথবা সমুদ্র ৭ ধরলে ১৬১৫ [৭ই মে] খ্রীষ্টাব্দ হবে। গ্রন্থসমাপ্তি কালে কৃষ্ণদাস বৃদ্ধ। ‘প্রেমবিলাস’ মতে বাঙলাদেশে শ্রীনিবাসের হাতে তাঁর গ্রন্থ পাঠানোর কালে পথে তা দস্যু কর্তৃক অপহৃত হওয়ার সংবাদে রাধাকৃষ্ণে ঝাঁপ দিয়ে তিনি আত্মহত্যা করেছিলেন বলে [অবিশ্বাস্য] জনশ্রুতি আছে। গ্রন্থ রচনা করতে যদি বারো বছর সময় লাগে এবং ১৬১২ বা ১৬১৫ সনে যদি কৃষ্ণদাসের বয়স ৭৫ বছর হয়,— [বৃদ্ধ জরাতুর আমি অন্ধ বধির] তাহলে তাঁর আনুমানিক জন্ম সন ১৫৪০ খ্রীষ্টাব্দ এবং তাঁর বৃন্দাবন বাসের শুরু [৪০ বছর বয়সে] ১৫৮০ খ্রীষ্টাব্দে। এবং তিনি সেখানে তাঁর প্রথম গ্রন্থ বিপুল কলেবর কাব্য গোবিন্দলীলামৃত রচনা

করেন এবং শ্রীকৃষ্ণলীলামৃত-এর টীকা লেখেন। বিমানবিহারী মজুমদার ১৫২৭ খ্রীস্টাব্দে (চ. চ. উ. পৃঃ ২৯৬), সুখময় মুখোপাধ্যায় ১৫২৫ খ্রীস্টাব্দে কৃষ্ণদাসের জন্ম বলে মেনে নিয়েছেন, তা হলে গ্রন্থ সমাপ্তি ঘটে কবির ৮৫ বা ৮৮ বছর বয়সে যা অসম্ভব। ৮০ বছরের উর্ধ্বে বাঁচার কল্পনা একালেও কেউ করতে পারে না, কুচিৎ কেউ বাঁচে। এবং এও মানতে হবে যে চৈতন্যচরিতামৃত রচনাকালে ষড়গোশ্বামীর কেউ বেঁচে থাকার কথা নয়, তবু তিনি প্রায় সব ভণিতায় ‘শ্রীরূপ রঘুনাথ পদে যার আশ’ বলে দু’জনকে স্মরণ করেছেন। কৃষ্ণদাসের গোবিন্দলীলামৃতে রূপ, জীব, রঘুনাথ ভট্ট ও রঘুনাথ দাসের নাম আদেষ্ঠা রূপে উল্লেখ করেছেন। কিন্তু কৃষ্ণদাস চৈতন্যচরিতামৃতের আদেষ্ঠা রূপে কোন চৈতন্যপরিকরপার্ষদের নাম করেননি, বরং যাঁরা তাঁকে এ গ্রন্থ রচনায় প্রবর্তনা দিয়েছেন, তাঁরা সবাই দ্বিতীয় বা তৃতীয় উত্তরপুরুষ বা প্রজন্মের লোক, যেমন-গদাধর গোশ্বামীর প্রশিষ্য হরিদাসপণ্ডিত, চৈতন্যপণ্ডিত, কাশীরামের শিষ্য গোবিন্দ, শ্রীজীবসঙ্গী যাদবাচার্য, অদ্বৈতশিষ্য শিবানন্দ চক্রবর্তী, প্রেমী কৃষ্ণদাস, মুকুন্দ চক্রবর্তী প্রভৃতি [চি. চ. আদিলীলা, ৮ম সর্গ]। জীবগোশ্বামী ১৫৯২ খ্রীস্টাব্দে তাঁর ‘গোপালচম্পু’ রচনা শেষ করেন এবং এর অল্পকাল পরে তাঁর তিরোভাব ঘটে। বর্ধমান সাহিত্যসভায় রক্ষিত পাতড়া অনুসারে ১৬১০ খ্রীস্টাব্দে জীবগোশ্বামীর প্রয়াণ ঘটে।’

যদুনাথ দাস ‘গোবিন্দলীলামৃত’ অনুবাদ করেছিলেন। যদুনাথের মতে কৃষ্ণদাস তিনখানি গ্রন্থপ্রণেতা—

চৈতন্যচরিতামৃত গ্রন্থে প্রকাশিত...
 শ্রীগোবিন্দলীলামৃত নিগূঢ় জ্ঞান...
 কৃষ্ণকর্ণামৃত ব্যাখ্যা কেঁসে তাহা জানে
 তাহার নিগূঢ় কথা কেঁলা প্রকটনে।

সহজিয়ারা ‘বীরভদ্রের শিক্ষামূলক কড়চা’, ‘স্বরূপ বর্ণনা প্রকাশ’ প্রভৃতি কয়েকখানি জালগ্রন্থও কৃষ্ণদাস কবিরাজের নামে চালিয়েছে।

কৃষ্ণদাস কবিরাজ আক্ষরিক অর্থেই বিনয়ী বৈষ্ণব ছিলেন—

১. জগাই মাধাই হৈতে মুঞি সে পাপিষ্ঠ
 পুরীষের কীট হৈতে মুঞি সে লঘিষ্ঠ।
২. চৈতন্যচরিতামৃত যেই জন শুনে
 তাঁহার চরণ ধুঞা করোঁ মুঞি পানে।
 স্রোতার পদরেণু করো মন্তকে ভূষণ।

আবার তিনি ‘বিশ্বাসে মিলএ ধর্ম তর্কে বহুদূর’ তত্ত্বেও আস্থাবান ছিলেন, তাই বিরুদ্ধ পক্ষের যুক্তি ও মত তিনি সহ্য করতেন না :

১. তর্কে ইহা নাহি মানে যেই দূরাচার
 কুস্তীপাকে পচে তার নাহিক নিস্তার।
২. তর্ক না করিও তর্কে হয় বিপরীত [পৃঃ ৪৯৬]

^১ সুখময় মুখোপাধ্যায় : মধ্যযুগের বাংলাসাহিত্যের তথ্য ও কালক্রম (পৃঃ ১৯৭)

আবার স্বধর্মের শ্রেষ্ঠত্ব ও পরধর্মের অপকর্ষ প্রদর্শনেও তাঁর উৎসাহ অশেষ। ইসলামের, বৌদ্ধধর্মের এবং শঙ্কর, মাধব প্রভৃতির মতবাদের নিন্দায় তিনি মুখর। চৈতন্যাবতারে অবিশ্বাসী পামর-পাষাণদের তিনি দৈত্য ও অসুর বলে গালও দিয়েছেন। তাঁর কালের রাজধর্মের অসারতাও তিনি কাজীর মুখে স্বীকার করিয়েছেন :

আধুনিক আমার শাস্ত্র বিচার বিচারসহ নয়
কল্পিত আমার শাস্ত্র আমি সব জানি
জাতি অনুরোধে তবু সেই শাস্ত্র মানি।

অবশ্য এ কৃষ্ণদাসের দোষ নয়, আমরা জানি আন্তিক মানুষ মাত্রই পরধর্মে অবজ্ঞাপ্রায়ণ— এ তার ধর্মবিশ্বাসের ভিত্তি বা মৌল শর্ত। পরধর্মের প্রতি সীমিত অর্থে উদার ও সহিষ্ণু হওয়া ব্যক্তিবিশেষের পক্ষে সম্ভব, কিন্তু শ্রদ্ধাবান হওয়া অসম্ভব। কেননা, সেক্ষেত্রে শ্রদ্ধার সে পরিমাণেই স্বধর্মে নিষ্ঠা হ্রাস পাবে। তাছাড়া আধুনিক ব্যবসায়িক বিজ্ঞাপনের মতো ধর্মপ্রচার করতে হলে স্বমতের শ্রেষ্ঠত্ব ও পরমতের অপকর্ষ প্রতিপাদন করতেই হয়। তাই প্রচার ও প্রচারণা প্রায় সমার্থক। এই প্রচারের ও প্রচারণার জন্যে তিনি বহু বহু মৌলিক ব্যাখ্যা-ভাষ্য তৈরি করেছেন এবং লৌকিক-অলৌকিক গল্প বানিয়েছেন।

উক্ত বিমানবিহারীর মতে, ‘কবিরাজ গোস্বামীর গোবিন্দলীলামৃত ও চৈতন্যচরিতামৃত পাঠ করিয়া মনে হয় ভৃক্ষদেব্য বর্ণনা করার প্রতি তাঁহার ঐক্য ছিল।—ভক্তি সিদ্ধান্ত স্থাপনের সময়েও কৃষ্ণদাস কবিরাজ আহার্য বিষয় হইতে উপমা সংগ্রহ করিয়াছেন।’ যথা :

১. প্রেম বৃদ্ধি ক্রমে নাম সুক্লি, মান প্রণয়
রাগ, অনুরাগ, ভাব, সুহৃদ্যভাব হয়।
যেছে বীজ ইক্ষু রস, গুড়, খণ্ড, সার
শর্করা সিঁতা মিশ্রি উত্তম মিশ্রি আর।
২. সাত্ত্বিক ব্যাভিচারী ভাবের মিলনে
কৃষ্ণভক্তি রস হয় অমৃত আনন্দনে।
যেছে দধি, সিঁতা, ধৃত মরিচ কর্পূর
মিলনে রসাল হয় অমৃত মধুর।

[চৈ. চ. উ. পৃঃ ৩০৮]

এরূপ অদ্বৈতগৃহে, প্রতাপরুদ্র প্রেরিত জগন্নাথের প্রসাদরূপে এবং সার্বভৌমগৃহে চৈতন্যের ভোক্তাদেবের দীর্ঘ তালিকা রয়েছে।

সমাজ ও সংস্কৃতি চিত্র

‘জাতিবৈর’ তথা হিন্দু-মুসলিম বৈরিতার কথা প্রথম খণ্ডে আলোচিত হয়েছে, তবু এখানে একটি বিষয়ে পাঠকের দৃষ্টি আকর্ষণ করা প্রয়োজন বলে মনে করি। বিজয়গুপ্ত, বিপ্রদাস পিপলাই, বৃন্দাবন দান, জয়ানন্দ, কৃষ্ণদাস কবিরাজ থেকে ভারতচন্দ্র অবধি অনেকের গ্রন্থেই মুসলিম শাসকদের হিন্দুপীড়নের কথা কিংবা হিন্দুর ধর্মের প্রতি অবজ্ঞার কথা বর্ণিত হয়েছে। এবং তখনো গাঁয়ে গঞ্জে বাঙলাভাষী সাক্ষর বা শিক্ষিত দেশজ মুসলিম ছিল, রাজশক্তির প্রতি প্রযুক্ত এসব অকারণ বা সকারণ নিন্দার জন্যে কোন দেশজ মুসলিম পাঠক বা শ্রোতা সেদিনকার রাজসরকারে নালিশ করেনি, বা নালিশ করলেও রাজশক্তি সে অপরাধের জন্যে কোন কবিকে

রাজদণ্ড দেয়নি, এতে মনে হয়, তুর্কী-মুঘল শাসনকালে হিন্দুদের বাকস্বাধীনতা ছিল, অথবা এসব মিথ্যা অপবাদ বা কাব্যিক অতিশয়োক্তি বলে প্রশাসকরা এসব নিন্দাবাক্যে কোন গুরুত্ব দেননি। দাঙ্গাও বাধেনি। চরিত্রমূর্তি বর্ণিত চৈতন্য ও কাজী এবং চৈতন্যশিষ্য দরজী সংক্রান্ত ঘটনা পাঠকালে একথাগুলো স্মরণ রাখা বাঞ্ছনীয়।

শ্রীবাসের দরজী :

শ্রীবাসের বস্ত্র সিয়ে দরজী যবন
প্রভু তারে নিজরূপে করাইলা দর্শন।
দেখিনু দেখিনু বলি হৈল পাগল
প্রেমে নৃত্য করে হৈল বৈষুব আগল।

বৌদ্ধদের ষড়যন্ত্র :

প্রভুকে বৈষ্ণব জানি বৌদ্ধ ঘর গেলা
সর্ব বৌদ্ধ মিলি তবে কুমন্ত্রণা কৈলা।
অপবিত্র অন্ন খালিতে করিয়া।
প্রভু আগে আনিল বিষ্ণুপ্রসাদ করিয়া।
এ ষড়যন্ত্রের অপরাধে বৌদ্ধ পণ্ডিতের
মাথাকাটা গেল ও পরে চৈতন্য-দয়ায়
পুনর্জীবন লাভ করল।

ইসলামী শাস্ত্রে :

আধুনিক আমার শাস্ত্র বিচার সহ নয়
কল্লিত আমার শাস্ত্র আমি সব জানি
জাতি অনুরোধে তবু সেই শাস্ত্র মানি।

ফল :

আম্র, পনস, পিয়াল, জম্বু, কবিদার-
তুলসী মালতী যুথি মাধবী মল্লিকা

স্লেচ্ছ ভয় :

স্লেচ্ছ ভয়ে গোপাল আইল মথুরা নগরে।
হুসেন শাহ ও কেশব ছত্রীর কথোপকথন।

ষড়গোস্বামী :

শ্রীরূপ সনাতন ভট্ট রঘুনাথ।
শ্রীজীব গোপালভট্ট, দাস রঘুনাথ।।
এই ছয় গুরু শিক্ষাগুরু যে আমার।

অদৈততত্ত্ব :

অনন্ত স্ফটিকে যৈছে এক সূর্য ভাসে।
তৈছে জীবে গোবিন্দের অংশ পরকাশে।।

চারিরস :

দাস্য, সখ্য, বাৎসল্য, শৃঙ্গার-চারি রস।
চারিভাবের ভক্ত যত কৃষ্ণ তার বশ।।
দাস সখা পিতামাতা কান্তাগণ লঞা।
ব্রজে ক্রীড়া করে কৃষ্ণ প্রেমাস্তি হঞা।।

স্বকীয়া-পরকীয়াতত্ত্ব :

অতএব মধুর রস কহি তার নাম।
স্বকীয়া-পরকীয়া ভাবে দ্বিবিধ সংস্থান।।
পরকীয়াভাবে অতি রসের উল্লাস।
ব্রজ বিনা ইহার অন্যত্র নাহি বাস।।

অভেদতত্ত্ব :

রাধাকৃষ্ণ এক আত্মা দুই দেহ ধরি।
অন্যোন্মন্যে বিলাসে রস আশ্বাদন করি।।
সেই দুই এক এবে চৈতন্য গোসাঞি।
ভাব আশ্বাদিতে দোহে হৈলা এক ঠাই।।

মহাভাবস্বরূপ শ্রীরাধা ঠাকুরাণী।
সর্বগুণ-যনি কৃষ্ণ-কান্তা শিরোমণি।
রাধা পূর্ণশক্তি কৃষ্ণ পূর্ণশক্তিমান।
দুই বস্তু ভেদ নাহি শাস্ত্রে পরমাণ।।

মৃগমদ তার গন্ধ যৈছে অবিচ্ছেদ।
অগ্নি জ্বালাতে যৈছে নাহি কভু ভেদ।।
রাধাকৃষ্ণ ঐছে সদা একই স্বরূপ।
লীলারস আশ্বাদিতে ধরে দুইরূপ।।

অভিগঢ় হেতু এই ত্রিবিধ প্রকার।
দামোদর স্বরূপ হৈতে যাহার প্রচার।।
স্বরূপ গোসাঞি প্রভুর অতি অন্তরঙ্গ।
তাহাতে জানেন প্রভুর এসব প্রসঙ্গ।।

রাধিকার ভাবমূর্তি প্রভুর অন্তর
সেইভাবে সুখ-দুঃখ উঠে নিরন্তর।।
শেষ লীলায় প্রভুর কৃষ্ণবিরহ-উন্মাদ।
ভ্রমময় চেষ্টা আর প্রলাপময় বাদ।।

অত্যন্ত নিগূঢ় সেই রসের সিদ্ধান্ত।

স্বরূপ গোসাঞি মাত্র জানেন একান্ত ।।
 গোপীগণের প্রেম অধিকৃত্ত ভাব নাম ।
 বিশুদ্ধ নির্মল প্রেম কতু কহে কাম ।।
 কাম প্রেম দোহাকার বিভিন্ন লক্ষণ ।
 লৌহ আর হেম যৈছে স্বরূপে বিলক্ষণ ।।
 আত্মেন্দ্রিয় প্রীতি ইচ্ছা তারে বলি কাম ।
 কৃষ্ণেন্দ্রিয় প্রীতি ইচ্ছা-ধরে প্রেম নাম ।।
 কামের তাৎপর্য নিজ সম্ভোগ কেবল ।
 কৃষ্ণসুখ তাৎপর্য হয় প্রেম ত প্রবল ।
 সর্ব ত্যাগ করি করে কৃষ্ণের ভজন ।
 কৃষ্ণসুখ হেতু করে প্রেম সেবন ।।
 ইহাকে কহিয়ে কৃষ্ণ দূর অনুরাগ ।
 স্বচ্ছ ধৌত বস্ত্রে যৈছে নাহি কোন দাগ ।।
 অতএব গোপীগণে নাহি কামগন্ধ ।
 কৃষ্ণসুখ লাগি মাত্র কৃষ্ণ সে সম্বন্ধ ।।
 গোপীভাব :
 আর এক অদ্ভুত গোপীভাবের স্বভাব ।
 বুদ্ধির গোচর নহে যাহার প্রভাব ।।
 গোপীগণ করে যবে কৃষ্ণ দরশন ।
 সুখ বাঞ্ছা নাহি সুখ হয় কোটি গুণ ।।
 গোপিকা দর্শনে কৃষ্ণের যে আনন্দ-হয় ।
 তাহা হৈতে কোটিগুণ গোপী আশ্বাদয় ।।
 তাঁ সবার নাহি নিজ সুখ অনুরোধ ।
 তথাপি বাড়য়ে সুখ পড়িল বিরোধ ।।
 কিন্তু কৃষ্ণের সুখ হয় গোপীরূপ গুণে ।
 তাঁর সুখে সুখ বৃদ্ধি হয় গোপীগণে ।।
 অতএব সেই সুখ কৃষ্ণ সুখ পোষে ।
 এই হেতু গোপীপ্রেমে নাহি কাম দোষে ।।
 সেই রাধার ভাব লঞা চৈতন্যাবতার ।
 যুগধর্ম নাম প্রেম কৈল পরচার ।।
 পঞ্চতত্ত্বভক্ত :
 পঞ্চতত্ত্ব অবতীর্ণ শ্রীচৈতন্যের সঙ্গে ।
 পঞ্চতত্ত্ব মিলি করে সংকীর্তন রঙ্গে ।।
 পঞ্চতত্ত্ব এক বস্তু নাহি কিছু ভেদ ।
 রস আশ্বাদিতে তবু বিবিধ বিভেদ ।।
 ইথে ভক্তভাব ধরে চৈতন্য গোসাঞি ।
 ভক্ত স্বরূপ তার নিত্যানন্দ ভাই ।।

ভক্ত অবতার তার আচার্য গোসাঞি ।
 এই তিন তত্ত্ব সর্বরাধা করি মানি ।
 চতুর্থ যে ভক্ততত্ত্ব আরাধক জানি ।।
 শ্রীবাসাদি যত কোটি কোটি ভক্তগণ ।
 শুদ্ধ-ভক্ত-তত্ত্ব মধ্যে সবার গণন ।
 গদাধর আদি প্রভুর শক্তি অবতার ।
 অন্তরঙ্গ ভক্ত করি গণন যাহার ।।
 বৃন্দাবন দাসের গ্রন্থ :
 কৃষ্ণলীলা ভাগবতে কহে বেদব্যাস ।
 চৈতন্যলীলায় ব্যাস বৃন্দাবন দাস ।।
 বৃন্দাবন দাস কৈল চৈতন্যমঙ্গল ।
 যাহার শ্রবণে নাশে সর্ব অমঙ্গল ।।
 বৃন্দাবন দাস কৈল চৈতন্যমঙ্গল ।
 তাহাতে চৈতন্যলীলা বর্ণিল সকল ।।
 সূত্র করি সবলীলা করিলা গ্রন্থন ।
 পাণ্ডে বিস্তারিয়া তার কৈল বিবরণ ।।
 বিস্তার দেখিয়া কিছু সংকোচ হৈল মন ।
 সূত্রধৃত কোন লীলা না কৈল বর্ণন ।।
 নিত্যানন্দ-লীলা বর্ণনে হইল আবেশ ।
 চৈতন্যের শেষ লীলা রহিল অবশেষ ।।
 ভক্তিকল্পতরু :
 শ্রীচৈতন্যমালাকর পৃথিবীতে আনি ।
 ভক্তি কল্পতরু রূপিলা ইচ্ছাপানি ।।
 জয় শ্রীমাধবপুরী কৃষ্ণপ্রেমপুর ।
 ভক্তি কল্পতরু তেহৌ প্রথম অঙ্কুর ।।
 শ্রীঈশ্বরপুরী রূপে অঙ্কুর পুষ্ট হৈল ।
 আপনে চৈতন্যমালী স্কন্ধ উপজিল ।।
 পরমানন্দপুরী আর কেশবভারতী ।
 ব্রহ্মানন্দপুরী আর ব্রহ্মানন্দ ভারতী ।।
 বিষ্ণুপুরী কেশবপুরী পুরী কৃষ্ণানন্দ ।
 শ্রীনৃসিংহ-তীর্থ আর পুরী সুখানন্দ ।।
 এই নবমূল নিকলিল বৃক্ষমূলে ।
 চৈতন্যজীবনকথা :
 এই নব মূলে বৃক্ষ করিল নিষ্ঠলে ।।
 শ্রীকৃষ্ণচৈতন্য নবদ্বীপে অবতরি ।
 অষ্টচল্লিশ বছর প্রকট বিহরি ।।
 চৌদ্দ শত সাত শকে জন্মের প্রমাণ ।

চৌদ্দশত পঞ্চান্নে হইল অন্তর্ধান ।।
 চব্বিশ বছর শেষে করিয়া সন্ধ্যাস ।।
 চব্বিশ বছর কৈল নীলাচলে বাস ।।
 তার মধ্যে ছয় বৎসর গমনাগমন ।।
 কভু দক্ষিণ, কভু গৌড়, কভু বৃন্দাবন ।।
 অষ্টাদশ বৎসর রহিলা নীলাচলে ।।
 কৃষ্ণপ্রেম নামামৃতে ভাসাইল সকলে ।।
 গার্হস্থ্যে প্রভুর লীলা-আদি লীলাখ্যান ।।
 মধ্য-অন্তলীলা-শেষ লীলার দুই নাম ।।

চৈতন্যচরিতকার :

আদিলীলা মধ্যে প্রভুর যতেক চরিত ।।
 সূত্ররূপে মুরারি গুণ্ড করিলা প্রথিত ।।
 প্রভুর যে শেষ লীলা স্বরূপ দামোদর ।।
 সূত্র করি গাঁথিলেন গ্রন্থের ভিতর ।।
 এই দুই জনের সূত্র দেখিয়া-তনিঞা ।।
 বর্ণনা করেন বৈষ্ণব ক্রম যে করিঞা ।।
 বালা, পৌগণ্ড, কৈশোর যৌবন-চারি ভেদ ।।
 অতএব আদি খণ্ডে লীলা চারি ভেদ ।।

চৈতন্য জন্মলগ্ন :

ফাঘুন-পূর্ণিমা-সন্ধ্যায় প্রভুর জন্মোদয় ।।
 -সেই কালে দৈবযোগে চন্দ্রগ্রহণ হয় ।।
 দামোদর- স্বরূপ আর গুণ্ড মুরারি ।।
 মুখ্য মুখ্য লীলা সূত্রে লিখিয়াছে বিচারি ।।
 সেই অনুসারে লিখি লীলাসূত্রগণ ।।
 বিস্তারি বর্ণিয়াছেন তাহা দাস বৃন্দাবন ।।
 চৈতন্যলীলার ব্যাস বৃন্দাবন দাস ।।
 মধুর করিয়া লীলা করিলা প্রকাশ ।।
 গ্রন্থ-বিস্তার ভয়ে তেহোঁ ছাড়িল যে যে স্থান ।।
 সেই সেই স্থান কিছু করিব ব্যাখ্যান ।।
 প্রভুর লীলামৃত তেহোঁ কৈল আশ্বাদন ।।
 তাঁর ভুক্ত শেষ কিছু করিয়ে চর্চণ ।।
 চৌদ্দ শত সাতশকে মাস যে ফাঘুন ।।
 পৌর্ণমাসী সন্ধ্যাকালে হৈল শুভলক্ষণ ।।
 রাজ ভয় ও গ্রাম আক্রমণ :
 অনুকূট নাম গ্রামে গোপালের স্থিতি ।।
 রাজপুত-লোকের সেই গ্রামেতে বসতি ।।
 একজন আসি রাত্রে গ্রামীকে বলিল ।।

তোমার গ্রাম মারিতে তরুণধারী সাজিল ।।
 আজি রাতে পলাহ গ্রামে না রহ একজন ।।
 ঠাকুর লইয়া ভাগ, আসিবে কাল যবন ।।
 গ্রাম উজাড় হৈল পালাইল সর্বজন ।।
 ঐহে স্নেহভয়ে গোপাল ভাগে বারে বারে ।।
 হেনকালে তাঁহা আসোয়ার দশ আইল ।।
 স্নেহ পাঠান ঘোড়া হৈতে উত্তরিল ।।
 প্রভুকে দেখিয়ে স্নেহ করয়ে বিচার ।।
 এই যতিপাশ ছিল সুবর্ণ অপার ।।
 এই চারি বাটোয়ার ধুতুরা খাইয়া ।।
 মারি ভাগিয়াছে যতির সব ধন লৈয়া ।।
 তবে সেই পাঠান চারি জনেরে বান্ধিল ।।
 সেই স্নেহ মধ্যে এক পরম গম্ভীর ।।
 কাল বস্ত্র পরে সেই লোকে কহে পীর ।।
 নিজ শাস্ত্র দেখ তুমি বিচার করিয়া ।।
 কিবা লিখিয়াছে শেষে নির্ণয় করিয়া ।।
 স্নেহ কহে যেই কহ সেই সত্য হয় ।।
 শাস্ত্রে লিখিয়াছে কেহো লইতে না পারয় ।।
 আর এক পাঠান তার নাম বিজুলী খান ।।
 অল্প বয়স তাহার রাজার কুমার ।।
 সেই ত পাঠান সব বৈরাগী হৈলা ।।
 পাঠান বৈষ্ণব বলি হৈল তার খ্যাতি ।।
 হোসেন শাহের উড়িয়াবিজয় ও সনাতন :
 তোমার বড়ভাই করে দস্যু-ব্যবহার ।।
 জীব পশু মারি সব বাকলা কৈলা খাস ।।
 এথা তুমি কৈলে মোর সব কার্য নাশ ।।
 সনাতন কহে তুমি স্বতন্ত্র গৌড়েশ্বর ।।
 যেই যেই দোষ করে দেহ তার ফল ।।
 এত তুমি গৌড়েশ্বর উঠি ঘরে গেলা ।।
 পালাইবে বলি সনাতনেরে বান্ধিলা ।।
 হেন কালে গেল রাজা উড়িয়া মারিতে ।।
 সনাতনে কহে তুমি চল মোর সাথে ।।
 তেহোঁ কহে যাবে তুমি দেবতায় দুঃখ দিতে ।।
 মোর শক্তি নাহি তোমার সঙ্গে যাইতে ।।
 তবে তাঁরে বান্ধি রাখি করিলা গমন ।।
 কীর্তন, কাজী ও চৈতন্যদেব :
 মৃদঙ্গ করতাল সংকীর্তন উচ্চধ্বনি ।।

হরি হরি ধ্বনি বিনা অন্য নাহি গুনি ।।
 গুনিয়া যে ক্রুদ্ধ হৈল সকল যবন ।
 কাজী পাশে আসি সবে কৈল নিবেদন ।।
 ক্রোধে সন্ধ্যাকালে কাজী এক ঘরে আইল ।
 মৃদঙ্গ ভাঙ্গিয়া লোকে কহিতে লাগিল ।।
 এতকাল কেহ নাহি কৈল হিন্দুয়ানি ।
 এবে যে উদ্যম চালাও, কেন বল জানি ।।
 কেহ কীর্তন না করিয় সকল নগরে ।
 আজি আমি ক্ষমা করি যাইতেছি ঘরে ।।
 আর যদি কীর্তন করিতে লাগ পাইমু ।
 সর্বশ্ব দণ্ডিয়া তার জাতি যে লইমু ।।
 এত বলি কাজী গেল, নগরিয়া লোক ।
 প্রভু-স্থানে নিবেদিল পাণ্ডা বড় শোক ।।
 প্রভুআজ্ঞা দিল যাহ করহ কীর্তন ।
 আমি সংহারিব আজি সকল যবন ।।
 ঘরে গিয়া সব লোকে করে সংকীর্তন ।
 কাজীর ভয়ে স্বচ্ছন্দ নহে- চমকিত মন ।।
 সন্ধ্যাতে দেউটি সব জ্বালে ঘরে ঘরে ।
 দেখো কোন কাজী আসি মোরে মানা করে ।।
 এত কহি সন্ধ্যাকালে বলে গৌররায় ।
 কীর্তনের কৈল প্রভু তিন সম্প্রদায় ।।
 আগে সম্প্রদায়ে নৃত্য করি হরিদাস ।
 মধ্যে নাচে আচার্য গোসাঞি পরম উল্লাস ।।
 পাছে সম্প্রদায়ে নৃত্য করে গৌরচন্দ্র ।
 তার সঙ্গে নাচি বুলে প্রভু নিত্যানন্দ ।।
 বৃন্দাবন দাস ইহা চৈতন্যমঙ্গলে ।
 বিস্তারি বর্ণিয়াছেন প্রভু কৃপাবলে ।।
 এত মত কীর্তন করি নগরে ভ্রমিলা ।
 ভ্রমিতে ভ্রমিতে সবে কাজীর দ্বারে গেলা ।।
 তর্জ গর্জ করে লোকে করে কোলাহল ।
 গৌরচন্দ্র বলে লোক প্রশ্নয়ে পাগল ।।
 কীর্তনের ধ্বনিতে কাজী লুকাইল ঘরে ।
 তর্জন গর্জন গুনি না হয় বাহিরে ।।
 উদ্ধতলোকে ভাঙ্গে কাজীর পুষ্পবন ।
 বিস্তারি বর্ণিলা ইহা দাস বৃন্দাবন ।।
 তবে মহাপ্রভু তার দ্বারেতে বসিলা ।
 ভব্যালোক পাঠাইয়া কাজীরে বোলাইলা ।।
 প্রসাদ লইয়া কোলে করেন ক্রন্দন ।

দূর হৈতে আইলা কাজী মাথা নোয়াইয়া ।
 কাজীরে বসাইল প্রভু সন্মান করিয়া ।।
 কাজী কহে- তুমি আইলা ক্রুদ্ধ হইয়া ।
 তোমা শান্ত করাইতে রহিনু লুকাইয়া ।।
 গ্রাম সম্বন্ধে চক্রবর্তী হয় মোর চাচা ।
 দেহ সম্বন্ধ হৈতে হয় গ্রাম সম্বন্ধ সাঁচা ।।
 নীলাম্বর চক্রবর্তী হয় তোমার নানা ।
 সে সম্বন্ধে হও তুমি আমার ভাগিনা ।।
 ভাগিনার ক্রোধে মামা অবশ্য সহ্য ।
 মাতুলের অপরাধ ভাগিনা না লয় ।।
 গুনি শুদ্ধ হৈল কাজী নাহি ক্ষুরে বাণী ।
 বিচারিয়া কহে কাজী পরাভব মানি ।।
 তুমি যে কহিলে পণ্ডিত সেই সত্য হয় ।
 আধুনিক আমার শাস্ত্র বিচারসহ নয় ।।
 কলিত আমার শাস্ত্র আমি সব জানি ।
 জাতি-অনুরোধে তবু সেই শাস্ত্র মানি ।।
 চৈতন্যের বিরুদ্ধে হিন্দুর অভিযোগ :
 হেনকালে পাষণ্ডী হিন্দু পাঁচ সাত আইল ।।
 আসি কহে- হিন্দুর ধর্ম ভাঙ্গিল নিমাই ।
 যে কীর্তন প্রবর্তাইল কতু গুনি নাই ।।
 মঙ্গলচণ্ডী বিষহরি করি জাগরণ ।
 তাতে বাদ্য নৃত্য-গীত যোগ্য আচরণ ।।
 পূর্বে ভাল ছিল এই নিমাই পণ্ডিত ।
 গয়া হৈতে আসিয়া চালায় বিপরীত ।।
 উচ্চ করি গায় গীত দেয় করতালি ।
 মৃদঙ্গ করতাল শব্দে কর্ণে লাগে তালি ।।
 না জানি কি খাণ্ডা মত্ত হঞা নাচে গায় ।
 হাসে কান্দে পড়ে উঠে গড়াগড়ি যায় ।।
 নিমাই নাম ছাড়ি এবে বোলায় গৌরহরি ।
 হিন্দুধর্ম নষ্ট কৈল পাষণ্ড সঙ্ঘরি ।।
 কৃষ্ণের কীর্তন করে নীচ বাওরাড় ।
 এই পাপে নবদ্বীপ হইবে উজাড় ।।
 খাদ্য :
 একদিন শাল্যন্ন ব্যঞ্জন পাঁচ সাত ।
 শাক মোচাঘন্ট ভুট পটোল নিষপাত ।।
 লেবু, আদাখণ্ড দুধি দুগ্ধ খণ্ডসার ।
 শালগ্রামে সমর্পিলেন বহু উপহার ।।

নিমাত্রির প্রিয় মোর এসব ব্যঞ্জন ।।
 এই মত বলিয়া আশ্রয় নারঙ্গ কাঠাল ।।
 যাঁহা যাঁহা দূর ধামে শুনে আছে ভাল ।।
 এই মতে চিড়া ছুড়ম সন্দেশ সকল ।।
 এই মতে পিঠা পানা ক্ষীর ওদন ।।
 পরম পবিত্র সেবা করে সর্বোত্তম ।।
 কাশন্দি আচার আদি অনেক প্রকার ।।
 পীত সুগন্ধি ঘৃতে অন্ন সিক্ত কৈল ।।
 চারিদিকে পাতে ঘৃতে বহিয়া চলিল ।।
 দশপ্রকার শাক নিম্ব শুকতার ঝোল ।।
 মরিচের ঝাল, ছেনাবড়া বড়ীঘোল ।।
 দুগ্ধতুঘি, দুগ্ধকুন্দাণ্ড, বেসারি লাফরা ।।
 মোচাঘণ্ট, মোচা ভাজা বিবিধ শাকরা ।।
 বৃদ্ধ কুন্দাণ্ড বড়ীর ব্যঞ্জন অপার ।।
 ফুলবড়ী ফলমূলে বিবিধ প্রকার ।।
 নববিশ্বপত্রসহ ভট্টবার্তাকী ।।
 ফুলবড়ী পটোল ভাজা কুন্দাণ্ড মানচাকী ।।
 ভট্ট মাষ মুদ্রাসূপ অমৃতর নিন্দয় ।।
 মধুরান্ন, বড়ামাদি অন্ন পাঁচ ছয় ।।
 মুগ্ধবড়া মাষবড়া কলাবড়া মিষ্ট ।।
 ক্ষীরপুলি নারিকেলপুলি আর যত পিষ্ট ।।
 কাজিবিড়া দুগ্ধচিড়া দুগ্ধকলকী ।।
 আর যত পিঠা কৈল কহিতে না শকি ।।
 ঘৃতসিক্ত পরমান্ন মৃৎকুণ্ডিকা ভরি ।।
 চাপাকলা ঘনদুগ্ধ আশ্রয় তাহা ধরি ।।
 রসালা মথিত দধি সন্দেশ অপার ।।
 গৌড়ে উৎকলে যত ভক্ষ্যের প্রকার ।।
 শ্রদ্ধা করি ভট্টাচার্য্য সব করাইল ।।
 বৈষ্ণবের লক্ষণ :
 এই সব গুণ হয় বৈষ্ণব লক্ষণ ।।
 সব কথা না যায় করি দিগদর্শন ।।
 কৃপালু, অকৃতদ্রোহ, সত্যসার সম ।।
 নির্দোষ, বদান্য, মৃদু, শূনি, অকিঞ্চন ।।
 সর্বোপকার, শান্ত, কৃষ্ণকশরণ ।।
 অকাম, নিরীহ, স্থির বিজিত-ষড়্গুণ ।।
 মিতভুক, অপ্রমত্ত, মানদ, আমানী ।।
 গভীর, করুণ, মৈত্র, কবি, দক্ষ, মৌনী ।।

প্রেম ও সাধনতত্ত্ব :

শ্রবণ, কীর্তন, স্মরণ, পূজন, বন্দন ।।
 পরিচর্যা, দাস্য, সখ্যা আত্মনিবেদন ।।
 অশ্রে নৃত্য, গীত, বিজ্ঞপ্তি, দণ্ডবৎ নতি ।।
 অভ্যর্থান, অনুব্রজা, তীর্থগৃহগতি ।।
 পরিক্রমা, স্তবপাঠ, জপ সংকীর্তন ।।
 ধূপ মালা গন্ধ মহাপ্রসাদ ভোজন ।।
 অনর্থ নিবৃত্তি হৈতে ভক্ত্যে নিষ্ঠা হয় ।।
 নিষ্ঠা হৈতে শ্রবণানন্দে রুচি উপজয় ।।
 রুচি হৈতে ভক্ত্যে হয় আসক্তি প্রচুর ।।
 আসক্তি হৈতে চিত্তে জনে কৃষ্ণে প্রীত্যকুর ।।
 সেই ভাব গাড় হৈলে ধরে প্রেম নাম ।।
 সেই প্রেম প্রয়োজন সর্বানন্দধাম ।।
 প্রেম ক্রমে বাড়ে হয় স্নেহ, মান, প্রণয় ।।
 রাগ, অনুরাগ, ভাব, মহাভাব, হয় ।।
 বীজ ইক্ষুরস গুড় তবে খণ্ড সার ।।
 শর্করা সিতা মিছরি শুদ্ধ মিছরি আর ।।
 ইক্ষু যেহে ক্রমে নির্মল, ক্রমে বাড়ে স্বাদ ।।
 রতি প্রেমাদিতে তৈছে বাঢ়য়ে আশ্বাদ ।।
 অধিকারী ভেদে রতি পঞ্চ প্রকার ।।
 শান্ত, দাস্য, সখ্যা, বাৎসল্য, মধুর রতি আর ।।
 এই পঞ্চ স্থায়ীভাব হয় পঞ্চ রস ।।
 যে রসে ভক্ত সুখী, কৃষ্ণ হয় বশ ।।
 প্রেমাদিক স্থায়ীভাব সামগ্রী মিলনে ।।
 কৃষ্ণভক্তি রস স্বরূপ পায় পরিণামে ।।
 বিভাব, অনুভাব, সান্ত্বিক, ব্যভিচারী ।।
 স্থায়ীভাব রস হয় মিলে এই চারি ।।
 দধি যেন খণ্ড মরিচ কর্পূর মিলনে ।।
 রসালাখ্য রস হয় অপূর্বাস্বাদনে ।।
 দ্বিবিধ বিভাব অবলম্বন উদ্দীপন ।।
 বংশীস্বরাদি উদ্দীপন, কৃষ্ণাদি আলম্বন ।।
 অনুভাব, শ্রিত, নৃত্য-গীতাদি উদ্ভাস্বর ।।
 শুভ্রাদি সান্ত্বিক অনুভাবের ভিতর ।।
 নির্বেদ হর্ষাদি ত্রেত্রিশ ব্যভিচারী ।।
 সব মিলি রস হয় চমৎকারকারী ।।
 পঞ্চবিধ রস শান্ত দাস্য সখ্যা বাৎসল্য ।।
 মধুর নাম শৃঙ্গার রস সবাতো প্রাবল্য ।।

শান্তরসে শান্ত রতি প্রেম পর্যন্ত হয় ।
 দাস্যরতি রাগ পর্যন্ত ক্রমেতে বাড়য় ।।
 সখ্য বাৎসল্য রতি পায় অনুরাগ সীমা ।
 সুবলাদোর ভাব পর্যন্ত প্রেমের মহিমা ।।
 শান্তাদি রসের যোগ বিয়োগ দুই ভেদ ।
 সখ্য বাৎসল্য যোগাদির অনেক বিভেদ ।।
 উদঘূর্ণবিবশচেষ্ঠা দিব্যোন্মাদ নাম ।
 বিরহে কৃষ্ণকৃতি, আপনাকে কৃষ্ণ জ্ঞান ।।
 সন্ভোগ, বিপ্রলম্ব, দ্বিবিধ শৃঙ্গার ।
 সন্ভোগ অনন্ত অঙ্গ নাহি অন্ত তার ।।
 বিপ্রলম্ব চতুর্বিদ পূর্বরূপ, মান ।
 প্রবাসখ্য, আর প্রেমবৈচিত্র্য আখ্যান ।।
 সুবুদ্ধি রায়ের বৃত্তান্ত :
 পূর্বে যবে সুবুদ্ধি রায় ছিল গৌড় অধিকারী ।
 হুসেন খাঁ সৈয়দ করে তাঁহার চাকরী ।।
 দীঘি খোদাইতে তাঁরে মনসার কৈল ।
 ছিদ্র পাঞা রায় তাঁকে চাবুক মারিল ।।
 পাছে যবে হুসেন খাঁ গৌড়ে রাজা হৈল ।
 সুবুদ্ধি রায়ের তিহো বহু বাড়াইল ।।
 তার স্ত্রী তার সঙ্গে দেখি মারণের চিন্তে
 সুবুদ্ধি রায়কে মারিতে কহে রাজহাম্মি ।
 রাজা কহে আমার পোষ্টা রায় হয় পিতা ।
 তাহারে মারিব আমি ভাল নহে কথা ।।
 স্ত্রী কহে জাতি লহ যদি প্রাণে না মারিবে ।
 রাজা কহে জাতি নিলে এহো নাহি জীবে ।।
 স্ত্রী মারিতে চাহে, রাজা সঙ্কটে পড়িল ।
 করোয়ার পানি তাঁর মুখে দেয়াইলা ।।
 তবু সুবুদ্ধি রায় সেই হস্ত পাইয়া ।
 বারাগসী আইলা সব বিষয় ছাড়িয়া ।।
 প্রায়শ্চিত্ত পুছিল তেহ পণ্ডিতের স্থানে ।
 তারা কহে তও ঘৃত খাঞা ছাড় প্রাণে ।।
 কেহ কহে এত নহে অল্প দোষ হয় ।
 গুনিয়া রহিল রায় করিয়া সংশয় ।।
 তবে যদি মহাপ্রভু বারাগসী আইলা ।
 তাঁরে মিলি রায় আপন বৃত্তান্ত কহিলা ।
 প্রভু কহে ইহা হৈতে যাহ বন্দাবন ।
 নিরন্তর কৃষ্ণনাম কর সংকীর্তন ।।

চৈতন্যচরিতামৃত সম্বন্ধে কবির উক্তি :
 কৃষ্ণতত্ত্ব, ভক্তিতত্ত্ব, প্রেমতত্ত্ব আর ।
 ভাবতত্ত্ব, রসতত্ত্ব, লীলাতত্ত্বসার ।।
 মধ্যলীলা সংক্ষেপেতে করিল বর্ণন ।
 অন্ত্যলীলা-বর্ণন কিছু শুন ভক্তগণ ।।
 মধ্যলীলা মধ্যে অন্ত্যলীলার সূত্রগণ ।
 পূর্ব গ্রন্থে সংক্ষেপেতে করিয়াছি বর্ণন ।।
 আমি জরায়ুশূন্য, নিকট জানিয়া মরণ ।
 অন্ত্য কোন লীলা করিয়াছি বর্ণন ।।
 রাজশ ও দুষ্ট রামচন্দ্র খান :
 সেই দেশাধ্যক্ষ নাম রামচন্দ্র খান ।
 বৈষ্ণবদেবী সেই পাষণ্ড প্রধান ।।
 দস্যবৃত্তি করে রামচন্দ্র, না দেয় রাজকর ।
 ক্রুদ্ধ হঞা স্বেচ্ছ উজির আইল তার ঘর ।।
 আসি সেই দুর্গামণ্ডপে বাসা কৈল ।
 অবধারিত করি মাংস সে ঘরে রাখাইল ।
 স্ত্রীপুত্রের সহিত রামচন্দ্রেরে বান্ধিয়া ।
 তার ঘর গ্রাম লুণ্ঠে তিন দিন রহিয়া ।।
 সেই ঘরে তিন দিন করে অমেধ্য-রন্ধন ।
 আর দিন সবা লঞা করিলা গমন ।।
 জাতি-ধন-জন খানের সব নষ্ট হৈল ।
 বহুদিন পর্যন্ত গ্রাম উজাড় রহিল ।।
 মুলুকপতি ও হিরণ্যদাস রঘুনাথ বৃত্তান্ত :
 হেনকালে মুলুকের স্বেচ্ছ অধিকারী ।
 সপ্তগ্রাম মুলুকের সেই হয় ত চৌধুরী ।
 হিরণ্যদাস মুলুক নিল মোক্তা করিয়া ।
 তার অধিকার গেল, মরে দেখিয়া ।।
 বার লক্ষ দেন রাজায় সাধনে বিশ লক্ষ ।
 সে তুরুক কিছু না পাঞা হৈল প্রতিপক্ষ ।।
 রাজ ঘরে কৈফিয়ত দিয়া উজির আনিল ।
 হিরণ্য মজুমদার পলাইল রঘুনাথেরে বান্ধিল ।।
 প্রতিদিন রঘুনাথে করয়ে ভর্ৎসনা ।
 বাপ জ্যোষ্ঠা আনহ নহে পাইবি যাতনা ।।
 বিনতি করিয়া কহে সেই স্বেচ্ছ পায় ।।
 তুমি সর্বশাস্ত্র জ্ঞান, জিন্দাপীর প্রায় ।।
 এত গুনি সেই স্বেচ্ছের মন অর্দ্র হৈল ।
 দাড়ি বাহি অশ্রু পড়ে কান্দিতে লাগিল ।।

স্বেচ্ছ বলে আজি হৈতে তুমি মোর পুত্র ।
 আমি ছাড়াইমু তোমা করি একসূত্র ॥
 উজিরে কহিয়া রঘুনাথে ছোড়াইল ।
 প্রীতি করি রঘুনাথে কহিতে লাগিল ॥
 তোমার জ্যেষ্ঠা নির্বন্ধি অষ্ট লক্ষ খায় ।
 আমি ভাগী, আমারে কিছু দিবারে জুয়ায় ॥
 যাহ তুমি, তোমার জ্যেষ্ঠা মিলাহ আমারে ।
 যে মতে ভাল হয় করুন, তার দিল তাঁরে ॥
 রঘুনাথ আমি তবে জ্যেষ্ঠা মিলাইল ।
 স্বেচ্ছ সহিত বশ কৈল, সব শান্ত হৈল ॥
 বাঙালীর বিচিত্রভাবে দধি-চিড়া-মুড়ি ভক্ষণ :
 ধনিয়া মহরী তগুল চূর্ণ করিয়া ।
 নাড়ু বান্ধিয়াছে চিনির পাক করিয়া ॥
 গুঠিখণ্ড, নাড়ু আর আমপিত্ত হর ।
 পৃথক পৃথক বান্ধি বস্ত্রের কুথলী ভিতর ॥
 কোলি গুঠি, কোলি চূর্ণ কোলি খণ্ড আর ।
 কত নাম লব শত প্রকার আচার ॥
 নারিকেল খণ্ড নাড়ু আর নাড়ু গন্ধাজল ।
 চিরস্থায়ী খণ্ডবিকার করিল সকল ॥
 চিরস্থায়ী ক্ষীরসার মগুদি বিকার ।
 অমৃত কর্পূর আদি অনেক প্রকার ॥
 শালি কাঁচুড়ি ধান্যে আতপ চিড়া করি ॥
 নূতন বস্ত্রের বড় কুথলী সব ভরি ॥
 কতক চিড়া হুড়ুম করি ঘূতেতে ভাজিয়া ।
 চিনি পাকে নাড়ুকৈল কর্পূরাদি দিয়া ॥
 শালি তগুল-ভাজা চূর্ণ করিয়া ।
 ঘৃত সিদ্ধ চূর্ণ কৈল চিনিপাক দিয়া ॥
 কর্পূর মরিচ এলাচ লবঙ্গ রসবাস ।
 চূর্ণ দিয়া নাড়ু কৈল পরম সুবাস ॥
 শালি ধান্যের খই পুন ঘূতেতে ভাজিয়া ।
 চিনিপাকে উখড়া কৈল কর্পূরাদি দিয়া ॥
 ফুট কলাই চূর্ণ করি ঘূতে ভাজাইল ।
 চিনিপাকে কর্পূরাদি দিয়া নাড়ু কৈল ॥
 হরিদাসের কবর :
 হরিদাসে সমুদ্রজলে স্নান করাইল ।
 প্রভু কহে সমুদ্র এই মহাতীর্থ হৈল ॥
 হরিদাসের পাদোদক পিয়ে ভক্তগণ ।
 হরিদাসের সঙ্গে দিল প্রসাদ চন্দন ॥
 ডোর কড়ার প্রসাদ বস্ত্র অঙ্গে দিল ।
 বালুকায় গর্ত করি তাহে শোয়াইল ॥

রাহাজানি :
 বারাগসী পর্যন্ত স্বচ্ছন্দ যাবে পথে ।
 আগে সাবধানে, যাবে ক্ষত্রিয়াদি সাথে ॥
 কেবল গৌড়িয়া পাইলে বাটপাড় করি বান্ধে ।
 সব লুটি বান্ধি রাখে যাইবারে না দে ॥
 যোগী হঞা হইল ভিখারী ॥
 চৈতন্যের যোগী বেশ :
 কৃষ্ণলীলা মণ্ডল, শুদ্ধ শঙ্খ কুণ্ডল,
 গড়িয়াছে শুক কারিকর ।
 সেই কুণ্ডল কানে পরি, তৃষ্ণা-লাউ-খালি ধরি
 আশা-বুলি কান্ধের উপর ॥
 চিন্তা-কাহ্না উড়ি গায়, ধূলিবিভূতিমলিনকায় ।
 হাহা কৃষ্ণ উ প্রলাপ উত্তর ।
 কাঁহা কারো কাঁহা যাও, কাঁহা গেলে কৃষ্ণপাও
 দুহে মরে কহ সে উপায় ॥
 এই মত গৌর প্রভু প্রতিদিনে দিনে ।
 চৈতন্যের কাব্য ও কৃষ্ণনাম আশ্বাদন :
 বিদ্যাপন করেন স্বরূপ রামানন্দ সনে ॥
 সেই দুই জন প্রভুর করে আশ্বাসন ।
 স্বরূপ গায়, রায় করে শ্লোক পঠন ॥
 কর্ণামৃত বিদ্যাপতি শ্রীগীতগোবিন্দ ।
 ইহার শ্লোকগীতে প্রভুর করায় আনন্দ ॥
 ভাবানুরূপ গীত গায় স্বরূপ মহাশয় ॥
 বিদ্যাপতি চণ্ডীদাস শ্রীগীতগোবিন্দ
 ভাবানুরূপ শ্লোক পড়েন রায়রামানন্দ ॥
 তর্জা :
 তরজা প্রহেলি আচার্য কহে ঠারে ঠারে ।
 প্রভুমাত্র বুঝে কেহ বুঝিতে না পারে ॥
 প্রভুকে কহিও আমার কোটি নমস্কার ।
 এই নিবেদন তার চরণে আমার ॥
 বাউলকে কহিও লোকে হইল বাউল ।
 বাউলকে কহিও হাটে না বিকায় চাউল ।
 বাউলকে কহিও কার্যে নাহিক আউল ।
 বাউলকে কহিও ইহা কহিয়াছে বাউল ॥
 শিক্ষাষ্টক :
 পূর্বে অষ্টশ্লোক করি লোক শিখাইল ।
 সেই অষ্ট শ্লোকের অর্থ আপনে আশ্বাদিল ॥
 প্রভুর শিক্ষাষ্টক শ্লোক যেই পড়ে শুনে ॥
 কৃষ্ণে প্রেমভক্তি তার বাড়ে দিনে দিনে ॥

৫. গোবিন্দদাসের কড়চা

শান্তিপুরবাসী অদ্বৈতাচার্যবংশীয় শিক্ষক ও কবি-ঔপন্যাসিক জয়গোপাল গোস্বামীর কাছে জেনে ১৮৯২ খ্রীষ্টাব্দে এ গ্রন্থের প্রাসঙ্গিক উল্লেখ করেন শিশিরকুমার ঘোষ 'বিষ্ণুপ্রিয়া' পত্রিকায় প্রকাশিত এক প্রবন্ধে। ১৮৮৫ খ্রীষ্টাব্দে জয়গোপাল গোস্বামী 'গোবিন্দদাসের কড়চা' নামে তা' তাঁর সম্পাদনায় প্রকাশিত করেন। তারপর গত ৮৭ বছর ধরে দীনেশচন্দ্র সেন, হরপ্রসাদ শাস্ত্রী, মতিলাল ঘোষ, জগদ্বন্ধু ভদ্র, নলিনীকান্ত ঘোষ, বিপিনবিহারী দাশগুপ্ত প্রমুখ অনেকেই এবং বাঙলা সাহিত্যের ইতিহাসকারগণ 'গোবিন্দদাসের কড়চার অকৃত্রিমতায় সন্দেহ ও অনাস্থা প্রকাশ করেছেন। পার্থক্য এই— কেউ বলেছেন, আংশিক কৃত্রিম আর কেউ বলেছেন, পুরোটাই জাল। অবিশ্বাসের কারণ কড়চাকার কর্মকার গোবিন্দদাস বলে চৈতন্যদেবের খড়ী-খড়ম বাহক কোন অনুচরের নাম চৈতন্যদেবের দাক্ষিণাত্য ভ্রমণ বর্ণন প্রসঙ্গে কোন কড়চাকার, চরিতকার কিংবা কবি-নাট্যকার উল্লেখ করেননি। মুরারি গুপ্তের মতে চৈতন্যভৃত্য বিষ্ণুদাস, চৈতন্যচরিতামৃত মতে চৈতন্যভৃত্যের নাম দ্বিজ বা কালা কৃষ্ণদাস। জয়ানন্দের চৈতন্যমঙ্গলই কেবল অন্য প্রসঙ্গে এক গোবিন্দ কর্মকারের উল্লেখ মেলে। তাও পাঠান্তরে মুকুন্দ কর্মকার।

মুকুন্দ দত্ত বৈদ্য আর গোবিন্দ কর্মকার [পাঠান্তরে মুকুন্দ কর্মকার]

মোর সঙ্গে আইস কাটোয়া গঙ্গাপার।

গোবিন্দ দাস বা গোবিন্দ নামে এক অনুচর অবশ্য চৈতন্যদেবের ছিল।

ব্রজমোহনদাসের চৈতন্যতত্ত্বপ্রদীপে কীর্তনীয়া গোবিন্দ দত্ত অনুচর চৈতন্য গোবিন্দ ও গোবিন্দনন্দের নাম মেলে।

‘রামদাস মাধব বাসুদেব ঘোষ গোবিন্দ

প্রভুর সঙ্গে রহিলা হরিষে।

জয়গোপাল বর্ণিত পুথিটি কেউ দেখেনি, এ পুথির অন্য প্রতিলিপিও মেলেনি। দাক্ষিণাত্যের যেসব গাঁ-গঞ্জ-নগরের নাম রয়েছে এ গ্রন্থে, সেগুলোর কয়েকটা নিতান্ত আধুনিক, যেমন— রসালকোণ্ডা (Russell Konda), [পূর্ণনগর পুনা যা আধুনিক নগর বটে কিন্তু ষোল শতকে এক অখ্যাত নাম] এবং কড়চার ভ্রমণবৃত্তান্ত অন্য কড়চা ও চরিত গ্রন্থের সঙ্গে মেলে না। জানালা প্রভৃতি বহু শব্দ ও ভাষা আধুনিক। ‘অষ্টখানি করলার ভাজা খাই সুখে’। দাক্ষিণাত্যে নাকি আজো উচ্ছে-করলা অজ্ঞাত।^১ আজকাল এ গ্রন্থ জাল বলেই সাধারণ্যে স্বীকৃত। এ বিষয়ে বিস্তৃত আলোচনা রয়েছে অসিতকুমার বন্দ্যোপাধ্যায়ের বাঙলা সাহিত্যের ইতিবৃত্ত দ্বিতীয় খণ্ডে।

৬. চূড়ামণি দাসের গৌরাজ বিজয়

চূড়ামণি দাসের 'গৌরাজ বিজয়' পুথির সন্ধান নগেন্দ্রনাথ বসু, হরপ্রসাদ শাস্ত্রী ও দীনেশচন্দ্র সেন জানতেন। এ পুথি দুর্লভ। ডক্টর সুকুমার সেন আদ্যন্ত খণ্ডিত একমাত্র পুথি সম্পাদনা করে ১৯৫৭ খ্রীষ্টাব্দে প্রকাশিত করেছেন। অন্যান্য চৈতন্যচরিতগ্রন্থের মতো এটিতেও চৈতন্যের

^১ সুখময় মুখোপাধ্যায় সম্পাদিত, পৃঃ ১২৫

^২ সুকুমার সেন, বাঙলা সাহিত্যের ইতিহাস, ১ম খণ্ড, পূর্বার্ধ, পৃঃ ৩৭০

আদি, মধ্য ও অন্তলীলা তিন খণ্ডে বর্ণিত। হয়তো গোড়ায় প্রতি খণ্ড আলাদা করে রচিত ও প্রচারিত হয়েছিল।

আদি খণ্ড মধ্য খণ্ড শেষ খণ্ড কহিব
গৌরাঙ্গ বিজয় তিন খণ্ডে পূর্ণ হৈব।
গয়া দেখি আইলে পূর্ণ আদি খণ্ড পুথি।

প্রাপ্ত অংশে ভক্ত সুলভ আবেগের ও ভক্তির আতিশয্য দুর্লক্ষ্য। তাই বোধ হয় গৌরাঙ্গবিজয় বৈষ্ণব পাঠকদের আগ্রহ জাগায়নি এবং অবহেলায় বিলুপ্ত হচ্ছিল।

চূড়ামণি দাস নিত্যানন্দশিষ্য ধনঞ্জয় পণ্ডিতের শিষ্য ছিলেন। মনে হয় বাল্যকালে চূড়ামণি দাস নিত্যানন্দের ঘনিষ্ঠ সান্নিধ্যও পেয়েছিলেন। অতএব চূড়ামণি দাসের জন্মস্থান একচাকা বড়গাছী বা খড়দহ ছিল।

কহিছে নিতাই গদাধর ধনঞ্জয়ে
সংসর্গে শুনিয়া আছো কহিল নিচয়ে।
কহিছেন নিত্যানন্দ/ এই সব পদবন্ধ/গদাধর ধনঞ্জয় মনে।

গুণু তা-ই নয়, উত্তরকালে নিত্যানন্দের স্বপ্লাদেশেই চূড়ামণি দাস গৌরাঙ্গালীলা রচনায় ব্রতী হন :

সুখপু কহিয়াছে নিত্যানন্দ রাঞ
চূড়ামণি দাস কহে এই ভুল্লীসাঁএ।

মনে হয় শ্রুতি-স্মৃতিই চূড়ামণি দাসের গ্রন্থ রচনায় মুখ্য অবলম্বন ছিল। তাই অন্যত্র মেলে না এমন অনেক চৈতন্য-নিত্যানন্দ-মাধ্বপ্রসঙ্গ সম্পর্কিত ঘটনা বর্ণিত রয়েছে। মুরারি গুপ্তের বা স্বরূপ দামোদরের চৈতন্যলীলা সূত্রের প্রত্যক্ষ সাহায্যও গ্রহণ করেননি তিনি। এ গ্রন্থে নিত্যানন্দের বাল্যকাল ও ঘরোয়া জীবনের পরিচয়ও রয়েছে। নিত্যানন্দ-জ্ঞাতি আখণ্ডল আচার্যের বাস্তবঘেঁষা চরিত্রটি প্রত্যক্ষদর্শী অঙ্কিত বলে মনে হয়। এজন্য চূড়ামণি দাসের নিবাস নিত্যানন্দের স্বর্গায়েই ছিল বলে অনুমান করি। আর চূড়ামণির গ্রন্থ রচনাকালেও বীরভদ্র বালক মাত্র, তাই নিত্যানন্দ-পুত্র হিসাবেও বীরভদ্র কবির কাছে উল্লেখযোগ্য বলে বিবেচিত হননি। অতএব চূড়ামণি দাস ১৫৫০-৬০ খ্রিস্টাব্দের মধ্যে গৌরাঙ্গবিজয় রচনা করেন বলে অনুমান করা সম্ভব। সুকুমার সেন বলেন : “১৫৪২ হইতে ১৫৫০ খ্রীষ্টাব্দের মধ্যে গৌরাঙ্গবিজয় রচিত হইয়া থাকিবে।” সুখময় মুখোপাধ্যায় ১৫৫০ থেকে ১৫৮০ খ্রীষ্টাব্দের মধ্যে গৌরাঙ্গবিজয় রচিত বলে অনুমান করেন।^১ ১৫৮০ খ্রীষ্টাব্দের মধ্যে চৈতন্যলীলাগ্রন্থ সংস্কৃত ও বাঙলায় কয়েকখানি রচিত হয়েছে, সে-অবস্থায় চূড়ামণি দাসের পক্ষে সেসব গ্রন্থের দ্বারা প্রভাবিত হওয়া, গ্রন্থের বা গ্রন্থকারের নাম উল্লেখ করা ছিল স্বাভাবিক। কাজেই তাঁর অনুমতি কাল-পরিসর অমৌক্তিকভাবে দীর্ঘ। চৈতন্য জন্মগ্রহণ করায় বৌদ্ধেরা আনন্দিত হয়েছিল বলে চূড়ামণি দাস উল্লেখ করেছেন। তাই নগেন্দ্রনাথ বসু (বিশ্বকোষ) চূড়ামণি দাসকে প্রচ্ছন্ন বৌদ্ধ বলে অনুমান করেছেন, হরপ্রসাদ শাস্ত্রীর মতে তখন বাংলাদেশে বৌদ্ধ থাকার কথা নয়। কিন্তু যক্ষ, বাসুলী, ক্ষেত্রপাল, ধর্ম ঠাকুরের পূজারীরা ও বজ্র-সহজযানী-যোগীতান্ত্রিক বৌদ্ধেরা যোল শতকে

^১ মধ্যযুগের বাংলা সাহিত্যের তথ্য ও কালক্রম পৃঃ ১১০ :

হয়তো বৌদ্ধ নাম বা চিহ্ন পুরো ঘুচাতে পারেনি। চূড়ামণি দাসের উক্তির লক্ষ্য হয়তো তাঁরাই। চূড়ামণি দাসের একটি পদ [তাও হয়তো গৌরাঙ্গ বিজয়ের অংশ] পদকল্পতরুতে সংকলিত রয়েছে [পদ, সং ১১৪২]। চূড়ামণি কাব্যে [নাচাড়িগানে] ব্রজবুলির ব্যবহারও রয়েছে।

গ. প্রক্ষিপ্ত রচনা ও জ্ঞান গ্রন্থ

মানুষের বৃত্তি-প্রবৃত্তি ও মন-মননের গতি-প্রকৃতি বিচিত্র ও অদ্ভুত। এর দিশা কিংবা নাগাল পাওয়া ভার। তাই মানব চরিত্র চির রহস্যের আকর। মানুষ অকারণে মিথ্যে বলে, বানিয়ে গল্প করে, অপ্রয়োজনেও তোয়াজ করে, আবার অহেতুক নিন্দা করে। মানুষ অন্যের ক্ষতি যেমন করে, তেমনি স্বেচ্ছায় সাহায্যও করে। মানুষ ভালোও নয়, মন্দও নয়, সে কখনো ভালো, কখনো মন্দ, কারো জন্যে ভালো, কারো জন্যে মন্দ, কারো মিত্র, কারো শত্রু। সে কারণে অকারণে মিথ্যে যেমন বানায়, তেমনি সত্যও স্বীকার করে। সে ভালো লাগলেই ভালোবাসে, তেমনি পছন্দ না হলেই সে হয় বিরূপ। তাই সত্য-মিথ্যা এবং নিন্দা-প্রশংসা দুই-ই তার স্বভাবের এপিঠ-ওপিঠ। তার কাছে দুটোই সমমূল্যের। যাকে ভালো লাগে, সে বানিয়ে তার গুণ-মান-মাহাত্ম্য প্রচার করে তৃপ্তি পায়, তেমনি যাকে তার অপছন্দ, সে তার দোষ আবিষ্কার করে আর নিন্দায় হয় মুখর। ওতেই তার সুখ। এজন্যেই দেখা যায় সৎকর্মে ও সদাচারে প্রবৃত্তি দানের জন্যেও মানুষ মিথ্যে ঘটনা রটায়, কাল্পনিক গল্প তৈরি করে, দোহাই কাড়ে আল্লাহর বা ইস্ট দেবতার। মনে করে উপাস্যের অভিপ্রায়ের রূপমূর্থে মিথ্যা ভাষণেও পুণ্য। যেন উপাস্যও একজন মর্ত্যমনিব! প্রিয়জনের মান-যশ-গৌরী বীরবৃদ্ধির এবং দুষমনের গুণ-মান-মাহাত্ম্য অপহরণের প্রয়াস মানুষের সহজাত বৃত্তিরই আভিযুক্তি। তাই আমরা আদিকাল থেকেই পরম ধর্মিক, জ্ঞানী-গুণী-মনীষীকেও সদ্ভুক্তি বশে ও সদুদ্দেশ্যে মানব-হিতৈষণা লক্ষ্যে স্বশাস্ত্রে মিথ্যার মিশাল ও ভেজালের ভিয়ান দিচ্ছেন দেখতে পাই। স্ব স্ব ধর্মগুরুকে নবী-অবতার বানানোর জন্যে কিংবা মহৎ ও শক্তিদর বলে প্রমাণের জন্যে কত কত 'যাদুর খেল' উদ্ভাবন করতে হয়েছে এবং আজো হচ্ছে তার ইয়ত্তা নেই। মানুষের কৃতি-কীর্তির, সত্যতা-সংস্কৃতির ও ভাব-অনুভবের ইতিকথার অনেকখানি জুড়ে রয়েছে এ বানানো ভাষণ। সেই মিথ-লিজেভ-পুরাণ সিন্দাবাদের ভূতের মতো মানুষের মন-মস্তিষ্ক জুড়ে আজো অচল ও অটল হয়ে অবিসম্বাদী সত্য রূপে চেপে রয়েছে। তাই আজো মানুষের মন-মেজাজ-মনন, ভাব-চিন্তা-কর্ম-আচরণ ওই বিশ্বাসের ভূতই নিয়ন্ত্রণ করে।

কাজেই সেদিনকার বৈষ্ণবদের বেলায়ও এর ব্যতিক্রম হতে পারেনি। কৃষ্ণের আদলে চৈতন্যদেবের স্বভাবচরিত্র, কৃতি-কীর্তি ও আচরণ পরিকল্পিত। 'অবতার' চৈতন্যের মধ্যে 'মানুষ' চৈতন্য বলতে গেলে বিলীন হয়ে গেছেন, তা ছাড়াও চৈতন্য পার্শ্বদ-পরিকর-পঞ্চতত্ত্বরাও এক একজন হারুন কিংবা বলরাম- বিশেষ করে মাধবেন্দ্র, অদ্বৈত, নিত্যানন্দ, নরহরি, বীরভদ্র। এদেরও গুণ মান-মাহাত্ম্য প্রতিষ্ঠার জন্যে প্রয়োজন হয়েছে বানানো কৃতির, ঘটনার ও আচরণের। লেখা হয়েছে নামে-বেনামে ছোট বড় গ্রন্থ। এ শতকের বিদ্বানেরা সেসব গ্রন্থের অকৃত্রিমতা অস্বীকার করেছেন। তেমন কয়েকটি গ্রন্থ হচ্ছে- অদ্বৈত-মঙ্গল, সীতাচরিত্র, নিত্যানন্দের বংশবিস্তার, বিবর্তবিলাস, প্রেমবিলাস, গোবিন্দদাসের কড়চা, শ্রীকৃষ্ণচৈতন্যো-দয়াবলী প্রভৃতি। তাছাড়া অকৃত্রিম বলে স্বীকৃত জীবনচরিতগুলোতে বানানো কাহিনী ছাড়াও কালে ও ক্রমে সংযোজিত প্রক্ষিপ্ত অংশ তো রয়েইছে। এমনকি বিকৃতি-বিদ্রূপও রয়েছে : 'মাগুর মাছের ঝোল/ভর-যুবতীর কোল/বোল হরি বোল'।

১. ১৮৯২-৯৩ খ্রীষ্টাব্দে (৪০৭ চৈতন্যাব্দে) প্রদ্যুম্ন মিশ্রের শ্রীকৃষ্ণচৈতন্যোদয়াবলী প্রকাশিত করেন চৈতন্যচরণ দাস। এক প্রদ্যুম্ন মিশ্র চৈতন্যপার্বদ ছিলেন, এ গ্রন্থ তাঁর রচিত এবং একখানি অতি প্রাচীন পুথির সম্পাদিত রূপ বলে দাবি করা হয়েছে। গ্রন্থটি ১৪৩২ শকে তথা ১৫১০ খ্রীষ্টাব্দে রচিত। তখন চৈতন্যলীলার শুরু মাত্র, তাছাড়া প্রদ্যুম্ন মিশ্র ছিলেন উড়িয়া-সিলেটী নন, এসব কারণে পুথিটি জাল বলেই বিদ্বানেরা মনে করেন।

২. ঈশান নাগর রচিত 'অদ্বৈতপ্রকাশ'- ঈশান নাগর অদ্বৈতাত্মচার্যের আশ্রিত ও ভৃত্য ছিলেন। 'অদ্বৈতপ্রকাশ' গ্রন্থটি তাঁর নামেই চলে। অচ্যুতচরণ তত্ত্বনিধি এ পুথির আবিষ্কর্তা। এ গ্রন্থ নানা গুণে বিশিষ্ট। এ গ্রন্থে চৈতন্যজীবনের প্রধান, বিশ্বাসযোগ্য ও স্বীকৃত ঘটনাগুলো আধুনিক ঐতিহাসিকের দৃষ্টি ও নৈপুণ্যে সংগ্রহিত। সন-তারিখও আধুনিক ইতিহাসের মতো বিন্যস্ত। এ জন্যেই বিদ্বানেরা এ গ্রন্থকেও 'জাল' মনে করেন। যিনি এ গ্রন্থ ঈশান নাগরের নামে রচনা করেছেন- বিদ্যায়, বুদ্ধিতে, ভাষায় ও যৌক্তিক বাকবিন্যাসে তাঁর অসাধারণ যোগ্যতা অবশ্যই স্বীকার্য।

ঈশান নাগর গ্রন্থে বলছেন যে, অদ্বৈতপুত্র অচ্যুতচরণ ও ঈশান সমবয়সী। মায়ের সঙ্গে পাঁচ বছর বয়স থেকেই অদ্বৈতগৃহে লালিত। চৈতন্যের ছাত্র অচ্যুতের, অদ্বৈতের নিত্যানন্দের, পদ্মনাভ চক্রবর্তীর ও শ্যামদাসের মুখে শুনে এবং নিজের প্রত্যক্ষ জ্ঞানের ভিত্তিতে চৈতন্যের লীলা তিনি লিপিবদ্ধ করেন। আর একটি মাত্র গ্রন্থ নাউড়িয়া কৃষ্ণদাসের 'বাল্যলীলাসূত্র' তিনি পড়েছিলেন। অদ্বৈতাত্মচার্যের গৃহেই ঈশান নিমন্ত্রিত চৈতন্যকে দেখার ও সেবার সুযোগ পেয়েছিলেন। আহারের পর চৈতন্যপদসেবার সুযোগ পেয়ে কৌতূহলবশে ঈশান চৈতন্যের সঙ্গে আলাপ করেন :

দয়া করি কহ কিছু এই ভক্তিশূন্যে ।
সহাস্যে মধুর ভাষে গৌরাঙ্গ কহিলা
শুনহ ঈশান শাস্ত্র, যাহা প্রকাশিলা ।

বিমানবিহারী মজুমদার এ গ্রন্থের কৃত্রিমতায় সন্দেহের অনেক কারণ উল্লেখ করেছেন এবং কৃষ্ণদাস কবিরাজের ও নরহরি সরকারের প্রভাবের দৃষ্টান্তও দিয়েছেন (চৈ. চ. উ. পৃঃ ৪২৪-৩৫)।

৩. হরিচরণ দাসের অদ্বৈতমঙ্গল-রসিকচন্দ্র বসু ১৭৩১ শকে (১৭৯১-৯২ খ্রীষ্টাব্দে) লিপিকৃত একখানি পুথি পেয়েছিলেন। এটিই সম্ভবত বঙ্গীয় সাহিত্য পরিষৎ পুথিশালার সংরক্ষিত রয়েছে। অজ্ঞাতনাম কবির রচনা হিসেবে এর কিছু অংশ সম্ভবত খণ্ডিত পুথি অবলম্বনে ব্রজমোহন সান্যাল ১৩০৮ সালে (১৯০১-০২ খ্রীষ্টাব্দে) সম্পাদনা করেন।

আমি ক্ষুদ্র জীব হইয়া কি বর্ণিতে পারি ইহা
শ্রীঅচ্যুতানন্দ আজ্ঞা মানি
প্রভুর যে পুত্র সব শিষ্য যত বড় সব
তাথে আমি ক্ষুদ্র অভিমानी
শ্রীঅদ্বৈত চরণ ধূলি মন্তকেতে লই তুলি
হৃদয়েত করি পাদপদ্ম ।.....

প্রভুর আনন্দ আর শিষ্যাদি সকলে
আমারে আজ্ঞা দিল হৃদয় প্রবালে ।

দুনিয়ার পাঠক এক হও! ~ www.amarboi.com ~

এতে মনে হয় অচ্যুতানন্দই কবির গুরু ও গ্রন্থ রচনার আদেষ্ঠা এবং অন্যান্য গুরু ভাইয়ের অনুরোধও তাঁকে গ্রন্থ রচনায় অনুপ্রাণিত করে। কবিকর্ণপুরের 'চৈতন্যচরিতামৃতকাব্যম' কিংবা 'গৌরগণোদ্দেশদীপিকা' হরিচরণের পড়া ছিল। তাই তিনি বলেছেন :

'চৈতন্যলীলা বর্ণিলা কবিকর্ণপুর

আমি বর্ণিতে সে হয় পুনরুক্তি'

মুরারি গুপ্তের কড়চার, জয়ানন্দের চৈতন্যমঙ্গলের ও বৃন্দাবন দাসের চৈতন্যভাগবতের বর্ণিত কোন কোন ঘটনার সঙ্গে হরিচরণ-বর্ণিত ঘটনার মিল নেই। এসব নানা কারণে এ গ্রন্থে অচ্যুতানন্দ শিষ্য হরিচরণের হতে পারে না বলেই বিদ্বানদের বিশ্বাস (চৈ. চ. উ. ৪৪৩-৪৮৯)। হরিচরণ দাসের অদ্বৈতমঙ্গলে উদ্ধৃতি সূত্রেই অদ্বৈতাশিষ্য শ্যামদাস রচিত অদ্বৈতাষ্টক মেলে। এ গ্রন্থে চৈতন্যের জন্ম থেকে সন্ন্যাস গ্রহণ, শান্তিপুরে আগমন, অদ্বৈতগৃহে জলকেলি ও দানলীলা অভিনয় অবধি বর্ণিত। বিষয়সূচী এরূপ :

প্রথম সংখ্যায় হয় গুর্বাদি বর্ণন

কৃষ্ণলীলা অনুক্রম বস্ত্র নিরূপণ।

দ্বিতীয় সংখ্যায় পঞ্চ অবস্থার সূত্র

বিজয়পুরী আগমন পরম চরিত্র।

তৃতীয় সংখ্যায় বিজয়পুরীর সম্বাদ

শ্রীভাগবত অর্থ প্রভুর আশ্বাদ

প্রেমে গদগদ পুরী দুর্বারা প্রাঙ্কায়

শ্রীমাধবেন্দ্র সতীর্থ হয় যে বিখ্যাত।

এমনি জাল গ্রন্থ হচ্ছে লাউড়িয়া কৃষ্ণদাস [রাজাদিব্যাসিংহ] রচিত 'বাল্যলীলা সূত্রম', বিষ্ণুদাসরচিত [অদ্বৈত পত্নী] 'সীতাশুগকদম্ব' লোকনাথ দাস রচিত [অদ্বৈত পত্নী] 'সীতাচরিত্র'। এ সম্পর্কে ডক্টর বিমানবিহারী মজুমদারের সাধারণ মন্তব্য এই : 'আমি সীতা ও অদ্বৈতচরিত্র গ্রন্থসমূহের মধ্যে পাঁচখানি [অদ্বৈত প্রকাশ ও অদ্বৈতমঙ্গলসহ] পরিচয় দিলাম। আমার বিচারে পাঁচখানি গ্রন্থই জাল বিবেচিত হইল। জাল শব্দের অর্থ যে গ্রন্থগুলি যে যে ব্যক্তির দ্বারা লিখিত বলিয়া প্রকাশ, তাঁহারা উহা লেখেন নাই। পাঁচখানি গ্রন্থের প্রত্যেকখানিই সীতা বা অদ্বৈতের কৃপাপাত্র ও প্রত্যক্ষদর্শী লেখকের দ্বারা লিখিত বলিয়া প্রকাশ করা হইয়াছে। 'বাল্যলীলা সূত্রের গ্রন্থকার কৃষ্ণদাস অদ্বৈতের পিতার সমসাময়িক রাজাদিব্যাসিংহ, অদ্বৈতপ্রকাশের গ্রন্থকার অদ্বৈতগৃহে পালিত ও তাঁহার শিষ্য ঈশান নাগর 'সীতাচরিত্রের' গ্রন্থকার শ্রীচৈতন্য অপেক্ষা বয়োজ্যেষ্ঠ ও নরোত্তম ঠাকুর মহাশয়ের গুরু লোকনাথ, 'সীতাশুগকদম্বের' গ্রন্থকার সীতার বিবাহের ঘটক বিষ্ণুদাস; আর অদ্বৈতমঙ্গলের লেখক হরিচরণ অদ্বৈতের শিষ্য ও অচ্যুতের আদেশে গ্রন্থ রচনায় প্রবৃত্ত। ইহারা যদি সত্য সত্যই গ্রন্থগুলির রচয়িতা হইতেন, তাহা হইলে ইহাদের বর্ণনার সহিত মুরারি গুপ্ত, কবিকর্ণপুর ও বৃন্দাবন দাসের বর্ণনার গুরুতর বিরোধ দেখা যাইত না। অথচ উক্ত লেখকগণের বর্ণনার সঙ্গে সামঞ্জস্য রাখিতে গেলে অদ্বৈতকে শচী-জগন্নাথের মন্তগুরু বলা যায় না। অদ্বৈতের নিকট বিশ্বম্ভরের ভাগবত পাঠের কথা বলা যায় না, অচ্যুতকে বিশ্বম্ভরের ছাত্র করা যায় না এবং সীতা, অদ্বৈত ও অচ্যুতের নানারূপ অলৌকিক ঐশ্বর্য প্রদর্শনের কথাও লেখা চলে না। তাই এই সমস্ত গ্রন্থের প্রকৃত রচয়িতারা মুরারি গুপ্ত প্রভৃতি প্রামাণিক লেখকের উক্তির বিরুদ্ধে কথা বলিতে বাধ্য হইয়াছেন। উক্ত পাঁচখানি গ্রন্থের মধ্যে পরস্পরবিরোধী উক্তি আছে যথেষ্ট"। (চৈ. চ. উ. পৃঃ ৪৬৩)।

‘বাল্যলীলাসূত্র ও অদ্বৈতপ্রকাশ’ ছাপার সময় সংশোধনের নামে অনেক কিছু অদল-বদল ও সংযোজনা করা হইয়াছিল (পৃঃ ৪৬৪)।

‘শ্রীচৈতন্যভাগবত’ হইতে জানা যায় যে অদ্বৈতের কোন কোন পুত্র চৈতন্যকে ঈশ্বর বলিয়া স্বীকার করেন নাই এবং নিজেদের পিতাকেই স্বতন্ত্র ঈশ্বর বলিয়া ঘোষণা করিয়াছিলেন। সেই জন্য অদ্বৈতের বংশধরদের লইয়া সমাজে কিছু আন্দোলন চলিতেছিল। সম্ভবতঃ এই আন্দোলনের গতিরোধ করার জন্য উক্ত পাঁচখানি গ্রন্থ রচিত হইয়াছিল।” (পৃঃ ৪৬৪)

অপর একটি গ্রন্থ হচ্ছে কর্ণানন্দ- এটি শ্রীনিবাস আচার্যের কন্যা হেমলতা ঠাকুরাণীর শিষ্য রঘুনন্দন দাসরচিত। কাটোয়ার নিকটবর্তী গ্রাম মালিহাটির বৈদ্যবংশে তাঁর জন্ম। গঙ্গীতীরবর্তী ‘বুধুইপাড়াতে রহি শ্রীমতি নিকটে’ কবি পঞ্চদশ শত আর বৎসর উনত্রিশে/বৈশাখ মাসেতে আর পূর্ণিমা দিবসে। ‘বুধুইপাড়ায় হেমলতা ঠাকুরাণীর নিকটে থেকে ১৫২৯ শকে তথা ১৬০৭ খ্রীস্টাব্দের বৈশাখী পূর্ণিমায় গ্রন্থ রচনা সমাপ্ত করেন।

হেমলতাই গ্রন্থের ‘শ্রীমুখে রাখিলা নাম কর্ণানন্দ’। তাঁর আরো দুখানা গ্রন্থ রয়েছে- ‘রাধা-কৃষ্ণলীলারসকদম্ব’ ও ‘গোবিন্দলীলামৃত’।

৪. নরহরি চক্রবর্তীর ভক্তিরত্নাকর ও নরোত্তম বিলাস- নরহরি চক্রবর্তীর আত্মপরিচয় এক্রপ :

বিশ্বনাথ চক্রবর্তী সর্বত্র বিখ্যাত
তাঁর শিষ্য মোর পিতা বিশ্বজগন্নাথ।
না জানি কি হেতু হৈল মোর দুই নাম
নরহরি দাস আর দাস ঘনশ্যাম।

অতএব তাঁর অপর নাম ঘনশ্যাম চক্রবর্তীও ছিল। নরহরি চক্রবর্তীর পিতার গুরু বিশ্বনাথ চক্রবর্তী ১৭০৫ খ্রীস্টাব্দে ভাগবতের টীকা রচনা করেন। ১৬৯৬ খ্রীস্টাব্দে রচিত অনুরাগবল্লীর উল্লেখ রয়েছে ভক্তিরত্নাকরে। অতএব ভক্তিরত্নাকর ও নরোত্তম বিলাস আঠারো শতকের মধ্যভাগে রচিত বলে অনুমান করা যায়। যদিও গ্রন্থ দুটো বৈষ্ণবসমাজের প্রিয় তবু শ্রুতি-স্মৃতি ও পূর্বসূরীদের গ্রন্থনির্ভর এবং বৈষ্ণবমতবাদ প্রচারের দৃশ্য বছর পরবর্তীকালের এসব গ্রন্থের ঐতিহাসিক মূল্য সামান্য। ভক্তিরত্নাকর বৃহদাকার গ্রন্থ। চৈতন্যের এবং তাঁর পার্শ্বদ-পরিকরের ও শিষ্যদের বৃত্তান্ত এতে লিপিবদ্ধ হয়েছে। নামেই প্রকাশ নরোত্তম বিলাস নরোত্তম ঠাকুরের জীবনকাহিনী।

৫. মনোহর দাসের অনুরাগবল্লী বৃন্দাবনে ‘বসুচন্দ্রকলায়ুক্ষে’- ১৬১৮ শকে বা ১৬৯৬ খ্রীস্টাব্দে রচিত। শ্রীনিবাস আচার্যের ও তাঁর শিষ্যসম্প্রদায়ের বিষয় আলোচিত।

৬. গোপীজন বল্লভদাসের রসিকমঙ্গল ১৬৬০ খ্রীস্টাব্দে রচিত। এটি শ্যামানন্দশিষ্য রসিকানন্দের চরিতকথা।

ঘ. সহজিয়াবৈষ্ণবদের গ্রন্থ

সহজিয়াবৈষ্ণবরা বামাচারী ও পরকীয়া সাধক। বৌদ্ধযুগের সহজয়ানীরাই বৌদ্ধবিলুপ্তির ফলে হিন্দু ও মুসলমান নামের আবরণে তাদের শাস্ত্র ও চর্যা রক্ষা করে আসছে। তারা নানা গুরুনামী

সম্প্রদায়ে ও শাখায় বিভক্ত। সাধারণভাবে তারা বাউল নামে পরিচিত। তাদের মধ্যে যারা বাহ্যত বৈষ্ণবমতবাদ গ্রহণ করেও ঐতিহ্যানুসারী, তাই বৈষ্ণবসহজিয়া নামে পরিচিত, চৈতন্য-নিত্যানন্দ-জাহ্নবা-বীরভদ্রকে তারা এ মতের প্রবর্তক ও গুরুপরম্পরা বলে প্রচার করে। নরোত্তম দাস ঠাকুরের নামে সহজিয়াদের অনেক গ্রন্থও লিপিবদ্ধ রয়েছে। গৌরপারম্যবাদ, গৌরনাগরবাদ ও মঞ্জরীতত্ত্বের মধ্যেই সহজিয়ারা তাদের স্বমতের সমর্থন খুঁজে পায়। এসব তত্ত্বের বিকৃত ব্যাখ্যা সতেরো-আঠারো শতকে বহুল প্রচারিত হয়। অকিঞ্চনের বিবর্তবিলাস, নিত্যানন্দ দাসের প্রেমবিলাস, রামদাস রচিত অভিরামলীলামৃত, বৃন্দাবনদাস রচিত নিত্যানন্দের বংশবিস্তার, কৃষ্ণদাস কবিরাজে (?) বীরভদ্রের শিক্ষামূলক কড়চা, স্বরূপবর্ণনাপ্রকাশ, মুকুন্দের সিদ্ধান্তচন্দোদয় এবং আগমসার, আনন্দবৈভব, অমৃতরত্নাবলী, অমৃতরসাবলী, রসভাবপ্রাপ্ত প্রভৃতি বেনামী সহজিয়াগ্রন্থ প্রসিদ্ধ।

মঞ্জরীতত্ত্বের প্রথম মঞ্জরী রূপগোশ্বামী- তিনিই রূপমঞ্জরী। তারপর সনাতন রতি বা লবঙ্গমঞ্জরী, রঘুনাথদাস রসমঞ্জরী, গোপালভট্ট গুণমঞ্জরী, রঘুনাথভট্ট, রাগমঞ্জরী, জীব বিলাসমঞ্জরী, কৃষ্ণদাসকবিরাজ কন্তুরীমঞ্জরী, জাহ্নবা আনন্দমঞ্জরীরূপে পরিকীর্তিত।

শ্রীরূপ মঞ্জরীসার

শ্রীরতি মঞ্জরী আর

অনঙ্গমঞ্জরী মঞ্জুলীলা

শ্রীরসমঞ্জরী সঙ্গে

কন্তুরীকা আদি সঙ্গে

প্রেম সেবা করি কুতুহলা।

এসব অনুগা হৈয়া

প্রেম সেবানিব চাইয়া

ইঙ্গিতে বুঝিব সব কাজ

[প্রেমভক্তিচন্দ্রিকা নরোত্তমদাস]

-এসব মঞ্জরী বিকশিয়া পুষ্প হয়

পুষ্প হৈয়া করে নিত্য লীলার সহায় [রাগমালা : নরোত্তম দাস] ভক্ত-ভগবান প্রথমে রাধা-কৃষ্ণরূপে পরে ভক্তগোপী বা স্বধীরূপে এবং গুরুমঞ্জরী বা সেবাদাসী বা স্বধীসহায় রূপে পরিকল্পিত। নারীভাবে পরমপুরুষের প্রেমাকর্ষণ তত্ত্বের প্রশ্নেই প্রাচ্য সহজযানীরা চৈতন্যমতবাদে বামাচারী তাত্ত্বিকপন্থার পরোক্ষ সমর্থন লাভ করে। তাছাড়া পরকীয়া সাধনা নতুনও নয়। ছান্দোগ্য উপনিষদেও তার জড় মেলে। কেউ কেউ রূপগোশ্বামীর উজ্জ্বলনীলমণিতেও পরকীয়া প্রেমের সমর্থন পেয়েছে 'পারতন্ত্র্যাদ্বিযুক্তয়োঃ ইত্যাদি। সহজিয়ারা স্বমতের সত্যতা প্রমাণের জন্যে বিদ্যাপতি-লছমী, চণ্ডীদাস-রজকিনী, জয়দেব-পদ্মাবতী ও তার বোন রোহিণী রূপ-মীরাবাই প্রভৃতির পরদারসম্পর্ক উদ্ভাবন করেছে। এমনকি চৈতন্যদেবও :

বাহ্যেতে প্রকৃতি নিন্দে অন্তরে তন্ময়

বিধবা ব্রাহ্মণী সঙ্গে প্রয়োজন হয়। [রসভাবপ্রাপ্ত]

কৌলজ্ঞাননির্ণয়াদি বজ্র-সহজযাত্রী তন্ত্রেও ব্রাহ্মণ্যতন্ত্রে বামাচারী পরকীয়া নায়িকার গুণ ও শ্রেণী বর্ণিত রয়েছে চণ্ডালী, রজকী, ব্রাহ্মণী, ডোমনী প্রভৃতি।

মুণ্ডিতমস্তক বৌদ্ধ ভিক্ষু শ্রমণ (অবজ্ঞার্থে) নির্দেশক নেড়া থেকেই প্রথমে বৌদ্ধ পরকীয়া সাধকরা তথা বজ্র-সহজযানীরা নেড়ানেড়ী আখ্যায় পরে জাহ্নবা-বীরভদ্র শিষ্যসম্প্রদায় নেড়ানেড়ী রূপে নিন্দার্থে চিহ্নিত হয়। প্রথম দিককার মাদারী ও কলন্দরী ফকিররাও মাথা নেড়া করত। সেই সূত্রেই অথবা নিন্দিত বৌদ্ধসূত্রেই মুসলমানরাও নেড়া বলে অবজ্ঞাত।

আইয়োনিয়ান যবন যেমন পরে তুর্কী মুঘল ও মুসলমান অর্থে যোগরূঢ় হয়, কিংবা বিলাত বলতে যেমন কেবল ইংল্যাণ্ড বোঝায়, এও তেমনি। সুকুমার সেনের মতে 'আগে হিন্দুরাজাদের খাসভূত্বের মাথা নেড়া থাকিত। তাহা ইহাতে রাজা-জমিদারের প্রিয় পার্শ্বচর ভূত্বের সাধারণ নাম হয় নাড়া-নাড়ী (> নেড়া - নেড়ী)।' বার শত নাড়া আর তের শত নাড়ী/কেহ বহে গঙ্গাজল কেহ শোধে বাড়ী' [নিত্যানন্দের বংশবিস্তার]।

৭. নিত্যানন্দ দাসের প্রেমবিলাস

শ্রীখণ্ডবাসী নিত্যানন্দ দাস প্রেমবিলাস নামের গ্রন্থে মুখ্যত শ্রীনিবাস আচার্য, নরোত্তম দাস ও শ্যামানন্দের জীবনী রচনা করেছেন। গ্রন্থটির বিভিন্ন সংস্করণে বিন্যাসবিরোধ রয়েছে। পৃথিতে ষোল বিলাস রামনারায়ণ বিদ্যারত্নের প্রথম সংস্করণে আঠারো এবং দ্বিতীয় সংস্করণে বিশ বিলাস দেখা যায়, আবার যশোদারঞ্জন তালুকদারের সংস্করণে সাড়ে চব্বিশ বিলাস মেলে। কবির আত্মপরিচিতি এরূপ :

মোর দীক্ষাগুরু হয় জাহ্নবা ঈশ্বরী
বীরচন্দ্র প্রভু মোর শিক্ষাগুরু হয়।
মাতা সৌদামিনী পিতা আত্মারাম দাস
অঘট কুলেতে জন্ম শ্রীখণ্ডে বাস।
বলরাম দাস নাম পূর্বে মোর ছিল।
এবে নিত্যানন্দ দাস সীমুখে রাখিলা।

কবির 'নিত্যানন্দ দাস' নাম জাহ্নবাদেবী বা বীরচন্দ্র প্রদত্ত। গ্রন্থরচনার নির্দেশ দেন জাহ্নবাদেবী। এ গ্রন্থের অনেকাংশ প্রসিদ্ধ (অদ্বৈত, নিত্যানন্দ, গদাধরচরিত, কুলপঞ্জী প্রভৃতি) এবং শেষ ছয়টি বিলাস পরে সংযোজিত বলে বিদ্বানেরা মনে করেন। প্রসিদ্ধ গ্রন্থগুলোর সঙ্গে এ গ্রন্থের তথ্যগত পার্থক্যও বহু। তবে শ্রীনিবাস আচার্য, নরোত্তম দাস ও শ্যামানন্দ দাস ষোল শতকের শেষ পাদে, সতেরো শতকের প্রথম পাদে বৈষ্ণবসমাজের নেতৃত্ব দান করেন। বলতে গেলে বৃন্দাবনের ষড়গোশ্বামী উদ্ভাবিত ও ব্যাখ্যাত বৈষ্ণবমতের বাঙলা-উড়িষ্যার তাঁরাই প্রবর্তক ও প্রচারক।

১. শ্রীনিবাস আচার্য— ষোল শতকের শেষার্ধ্বে থেকেই বৈষ্ণবসমাজের অন্যতম নেতা এবং পরম শ্রদ্ধেয় ব্যক্তি। শ্রীনিবাস যখন কিশোর ও চৈতন্যদর্শন উদ্দেশ্যে নীলাচলের পথে, তখন চৈতন্যদেবের তিরোভাব ঘটে। সুখময় মুখোপাধ্যায়ের ধারণায় ১৫১৯-২০ সনে তাঁর জন্ম। শ্রীনিবাসের জন্মস্থান মাতুলালয় যাজ্জিগ্রাম। পিতার নাম গঙ্গাধর ভট্টাচার্য ওর্ফে চৈতন্যদাস এবং মাতার নাম লক্ষ্মী। নিবাস নবদ্বীপের চাখন্দী গ্রাম (অধুনালুপ্ত)। নীলাচলে তিনি বাসুদেব সার্বভৌম, গদাধর পণ্ডিত ও রায় রামানন্দের সাক্ষাৎ পান। পরে এক সময়ে তিনি বৃন্দাবনে যান, তখন দেশে ও নীলাচলে চৈতন্যপার্ষদ গদাধর পণ্ডিত, নিত্যানন্দ, অদ্বৈত প্রভৃতি পরলোকে। বৃন্দাবনেও রঘুনাথ ভট্ট, সনাতন ও রূপ মৃত এবং গোপাল ভট্ট, রঘুনাথ দাস ও জীবগোশ্বামী জীবিত। গোপাল ভট্টের কাছে তিনি দীক্ষা নেন। আর জীবগোশ্বামীর কাছে

^১ বাঙ্গালা সাহিত্যের ইতিহাস, ১ম খণ্ড, পূর্বার্ধ, পাদটীকা, পৃ. ৪২৮।

ভক্তিশাস্ত্র অধ্যয়ন করেন। বৃন্দাবনেই নরোত্তম দাসের ও শ্যামানন্দ দাসের সঙ্গে তাঁর পরিচয় হয়। বাঙলাদেশে এঁরা বৈষ্ণব মত প্রচারে তাঁর সহযোগী হন। শ্রীনিবাস প্রবীণ বয়সে দুই স্ত্রী [দৌপদী ও গৌরান্ধ্রিয়া] গ্রহণ করেন এবং কয়েকটি সন্তানের জনক হন। জীবনগোষ্ঠামীর লিখিত পত্রসূত্রে তা জানা যায়। বিষ্ণুপুররাজ বীরহাষীর (আনুঃ ১৫৭০-১৬১৬ খ্রীঃ) তাঁর শিষ্য ছিলেন। বীরহাষীর সম্বন্ধে [১৫৯০, ১৬০৮, ১৬১৪ খ্রীষ্টাব্দের দিকের] আকবরনামায় ও বাহারিস্তানগয়বীতে কিছু সংবাদ মেলে।

ভক্তিরত্নাকরে, প্রেমবিলাসে, শ্রীনিবাসশিষ্য নরসিংহ কবিরাজরচিত ‘নবপদ্যে’ শ্রীনিবাসশিষ্য কর্ণপুর কবিরাজরচিত ‘শ্রীনিবাসআচার্যগুণলেশসূচকে’ এবং অন্য অনেক গ্রন্থে শ্রীনিবাস সম্পর্কে তথ্য মেলে। বনবিষ্ণুপুর অঞ্চলই বিশেষ করে তাঁর কর্মস্থল ছিল। মনোহরশাহী কীর্তনের প্রবর্তকও শ্রীনিবাস। শ্রীনিবাস আচার্যের অল্পকিছু বাঙলা-সংস্কৃত রচনা পাওয়া গিয়েছে। ভক্তিরত্নাকরে একটি পদ রামগোপাল দাসের রসকল্পবতী’ ও মনোহর দাসের অনুরাগবতীতে একটি পদ মেলে। [দ্রঃ সুখময় মুখোপাধ্যায়, পৃঃ ১১১-৩১] বৃন্দাবনের গোষ্ঠামীদের উদ্ভাবিত ও ব্যাখ্যাত তত্ত্বই শ্রীনিবাস, নরোত্তম ও শ্রামানন্দ বাঙলায়-উড়িষ্যাতে প্রচার করেন। এঁদের প্রচেষ্টাতেই বৈষ্ণবমতের মুখ্যধারা দৃঢ়ত্ব লাভ করে।

২. নরোত্তম দাস (দত্ত)- ইনি শ্রীনিবাসের সহযোগী ও বৈষ্ণবমত প্রচারক। এঁর পিতার নাম কৃষ্ণানন্দ, মাতা নারায়ণী। নিবাস ছিল রাজশাহী জেলার নিকটস্থ গোপালপুরে। ইনি ধর্মীর সন্তান। গৌড়দরবারের পদস্থ কর্মচারী পুরুষোত্তম দাস ছিলেন তাঁর পিতৃব্য। নরোত্তমের শিষ্য ও পুরুষোত্তমের পুত্র সন্তোষ দত্ত ছিলেন খেতরী উৎসবের উদ্যোক্তা। মনে হয় সতেরো শতকের প্রথম দশকেও নরোত্তম দাস জীবিত ছিলেন। নরোত্তম দাস পদকারও ছিলেন। কিন্তু তাঁর নামে সহজিয়ারা এবং বিভিন্ন মতের বৈষ্ণবেরা বহুখুশু চালায়। এদের মধ্যে কোন কোনটি নরোত্তমের রচনা তা নির্ণয় করা দুঃসাধ্য। খেতরী কেন্দ্রে নেতৃত্ব ছিল নরোত্তম দাসের। খেতরী উৎসব [সম্মেলন] হয়েছিল তাঁর আশ্রয়েই। গড়েরহাটা চণ্ডের কীর্তনের প্রবর্তক নরোত্তম দাসই।

৩. শ্যামানন্দ দাস- এঁর পূর্বনাম নাকি ছিল দুঃখীকৃষ্ণদাস। এঁর জন্মস্থান মেদিনীপুর জেলার ধারেন্দা-বাহাদুরপুর। এঁর পিতার নাম শ্রীকৃষ্ণ মণ্ডল। মাতার নাম দুরিকা। ইনি বর্ণে সদগোপ। এর গুরুর নাম হৃদয়চৈতন্য বা হৃদয়ানন্দ। পদকার দুঃখীশ্যামদাস ও শ্যামদাস অভিন্ন ব্যক্তি কিনা সন্দেহ আছে। সম্ভবত এঁরা দুই ভিন্ন ব্যক্তি। শ্যামদাসের নামে কয়েকটি সাধননিবন্ধ মেলে- উপাসনাসার, ভাবমালা, অদ্বৈততত্ত্ব, বৃন্দাবনপরিক্রমা। গোবিন্দমঙ্গল রচয়িতা (দুঃখী) শ্যামদাসের জন্মস্থান মেদিনীপুর জেলার কেদারকুণ্ড পরগনার হরিপুর। বর্ণে কায়স্থ দুঃখীশ্যামদাস বা শ্যামদাসের পিতা-মাতার নাম শ্রীমুখ ও ভবানী। গোবিন্দমঙ্গল ষোল শতকের শেষপাদে সম্ভবত রচিত। শ্যামানন্দ উৎকলে বৈষ্ণবমত প্রচারে নেতৃত্ব দান করেন।

৪. জাহ্নবাবাদেবী ও বীরভদ্র [বা বীরচন্দ্র] সূর্যদাস সরখেলের দুই কন্যা বসুধা ও জাহ্নবাকে বিয়ে করেন নিত্যানন্দ। বসুধার সন্তান বীরভদ্র বা বীরচন্দ্র। নিত্যানন্দের তিরোভাবের পর তাঁর পত্নী জাহ্নবাবাদেবী এবং পুত্র বীরভদ্র নিত্যানন্দ শিষ্যসম্প্রদায়ে নেতৃত্ব দান করেন। উভয়ের ব্যক্তিত্ব ও প্রভাব ছিল অসাধারণ। চৈতন্যের জীবিতকালেই নিত্যানন্দের মতাদর্শে স্বাতন্ত্র্য ছিল। নিত্যানন্দ ভোগী, বিলাসী ও গৃহী ছিলেন, তাঁর পুত্র বীরভদ্রও ছিলেন দর্পদাপটের লোক। পিতাপুত্রের আচার-আচরণ ছিল সামন্তসুলভ। জাহ্নবাও চলতেন রাণীর মতো। ভৃত্য অনুচরসহ

অস্বারোহণে সাড়ম্বরে তাঁরা চলাফেরা করতেন। অদ্বৈতাচার্যের সঙ্গে নিত্যানন্দের মনের-মতের মিল ছিল না। অদ্বৈতপন্থীরা নিত্যানন্দের নিন্দাও করতেন। স্বয়ং অদ্বৈত নিত্যানন্দের আচার-আচরণে ও মত-পথে বিরক্ত হয়ে তর্জা [বাউলকে কহিও ইত্যাদি] মাধ্যমে নীলাচলবাসী চৈতন্যদেবকে তাঁর ক্ষোভ জানিয়েছিলেন। খড়দহে ছিল নিত্যানন্দের আখড়া বা শ্রীপাট। কিন্তু জাহ্নবদেবীর বা বীরভদ্রের নেতৃত্বে নিত্যানন্দপন্থী বৈষ্ণব সংখ্যা বৃদ্ধি পায় নির্বিচার দীক্ষাদানের ফলে জাহ্নবা বা বীরভদ্র দীক্ষিত শিষ্যরা [যারা ছিল শূন্যবাদী বজ্রসহজযানী প্রচ্ছন্ন বৌদ্ধ ঐতিহ্যের ধারক] ক্রমে প্রকাশ্যে তান্ত্রিক ও সহজিয়া মতবাদী হয়ে ওঠে। এবং অচিরে বৈষ্ণবসহজিয়া সম্প্রদায় বিপুল ও প্রবল হয়। অবৈষ্ণব বজ্রযানীরা তথা বাউলরাও জুটে যায় ঐ দলে। ফলে জাহ্নবা-বীরভদ্র পরবর্তীকালে সহজিয়ার বাউলগুরু রূপেই প্রখ্যাত ও স্মরণীয় হয়ে থাকেন। সহজিয়ারা পরকীয়া বামাচারী সাধনায় আগ্রহী। মূলত ঘৃণ্য মানুষের চিহ্নরূপ হয়তো দাস বা ভূত্যদের [মস্তক মুগুনের] মাথামুড়ানোর নিয়ম ছিল। তা থেকে নাড়া বা নেড়া ভূত্যের নামান্তররূপে চালু হয়। বৌদ্ধ-জৈন-শ্রমণ-ভিক্ষু-শ্রাবকরা হয়তো দীনতা-হীনতার প্রতীকরূপেই মাথা নেড়া করতেন। এককালে নেড়া-নেড়ী বলতে মুণ্ডিতমস্তক বৌদ্ধদের এবং বামাচারী বৌদ্ধদের বোঝাত। বৌদ্ধবিবৃণ্ডির পরে মুণ্ডিতমস্তক মাদারিয়া-কলন্দরিয়া ফকিরদের বোঝাত। সম্ভবত সতেরো শতক থেকে প্রচ্ছন্ন বৌদ্ধ সহজিয়ারা বৈষ্ণবসহজিয়ারূপে যখন আত্মপ্রকাশ করে, তখন বামাচারী বলেই নিন্দার্থে তাদের নেড়া-নেড়ীকূপে আখ্যাত করে ভিন্ন সম্প্রদায়ের লোকেরা। জাহ্নবা-বীরভদ্রের শিষ্যসম্প্রদায় বৈষ্ণব-অবৈষ্ণব সবার কাছেই নেড়া-নেড়ী। 'নিত্যানন্দের বংশবিস্তারে' উভয় তাৎপর্যেই নাড়া-নেড়ী ব্যবহৃত :

বারশত নাড়া আর তেরশত নেড়ী

কেহো বলে গঙ্গাজল কেহো শোধে বাড়ি। ...

নাড়ি সৃষ্টি করিলোটার তেজ ক্ষয় হৈল।

তথাপি নাটার তেজ ব্রহ্মাও ভেদয়।

সহজিয়ারা বিভিন্ন প্রসিদ্ধ বৈষ্ণব তান্ত্রিক ও কবির নামে অনেক গ্রন্থ রচনা করে প্রচার করেছে। এভাবে কৃষ্ণদাস কবিরাজের নামে অন্তত তেরো খানা, নরোত্তম দাসের নামে এগারো খানা, মুকুন্দ দাসের নামে ছয় খানা, বৃন্দাবন দাসের নামে তিনখানা, বলরাম দাসের নামে তিন খানা এবং অন্য অনেকের নামে এক খানা দু'খানা মুদ্রিত গ্রন্থ মেলে। আর চণ্ডীদাসের নামে চলে অনেক জাল পদ।

[বাউল-সহজিয়াদের সম্বন্ধে বিস্তৃত আলোচনা প্রচ্ছন্ন বৌদ্ধসাহিত্য অধ্যায়ে দ্রষ্টব্য]

১৭. পদাবলী

চৈতন্য-পূর্বে হর-পার্বতী, রাম-সীতা, মায়বন-নাগ্নিনাই, রাধা-কৃষ্ণ ছিল লৌকিক প্রণয়রস সৃষ্টির ও আশ্বাদনের মাধ্যম। চৈতন্যোত্তর কালে গৌড়ীয় নববৈষ্ণবতন্ত্রের অনুশীলন ও সাধনচর্যার বাহনরূপে রাধা-কৃষ্ণের প্রণয়লীলার বহুধা ও বিচিত্র রূপ অনুধ্যান ও কীর্তন বৈষ্ণবমাত্রেরই পক্ষে আবশ্যিক হয়। তাই সাধন-ভজন-কীর্তনের অবলম্বন হয় পদাবলী। প্রয়োজনের তাগিদে লিখতে হয় নানা রসের ও লীলার নতুন নতুন পদ। ফলে প্রতিভাবান ও শিক্ষিত বৈষ্ণবদের পক্ষে পদরচনা দায়িত্ব ও কর্তব্য হয়ে দাঁড়ায়। প্রমাণে অনুমানে বোঝা যায়, ন্যূনাদিক তিনশ' কবি প্রায় দশ হাজার পদ রচনা করেছেন ষোল, সতেরো ও আঠারো শতকে। লক্ষণীয় যে,

বাঙলায় বৈষ্ণবমতের প্রসার ও প্রভাব ক্ষেত্র মুখ্যত সীমিত ছিল প্রাচীন সুন্দ-রাঢ় অঞ্চলে বা আধুনিক প্রেসিডেন্সী ও বর্ধমান বিভাগে। পদকারদের প্রায় সবাই ঐ এলাকার। চট্টগ্রামের হিন্দু-মুসলিম পদকারেরা বৈষ্ণবভক্তানুগ কোন পদ রচনা করেননি।

তেমনি পদ সংকলন গ্রন্থগুলোও পশ্চিমবঙ্গীয় এবং সবগুলোই আঠারো শতকে সংকলিত।

সংকলন	সংকলক	পদসংখ্যা	কাল
১. ঋণদাগীত চিত্তামণি	শিবনাথ চক্রবর্তী ওফে বল্লভ দাস	৩০৯/৩১৫	আঠারো শতকে
২. গীতচন্দ্রোদয়	ঘনশ্যাম ওফে নরহরি চক্রবর্তী	১১৬৯	আঠারো শতকের ২য় পাদ
৩. পদামৃতসমুদ্র	রাধামোহন ঠাকুর	৭৪১	আঠারো শতকের মাঝামাঝি
৪. পদকল্পতরু	বৈষ্ণব দাস [গোকুলানন্দ সেন] সতীশচন্দ্র রায় সম্পাদিত	৩১০১	আঠারো শতকের ৩য় পাদ
৫. কীর্তনানন্দ	গৌরসুন্দর দাস	১১১৯	১৭৬৬ খ্রীঃ
৬. সংকীর্তনামৃত	দীনবন্ধু দাস	৪৯১	
৭. পদরস সার	নিমানন্দ দাস	২৭০০	আঠারো শতকের ৩য় দশক
৮. পদরত্নাকর	কমলাকান্ত দাস	১৩৫৮	১৮০৬ খ্রীঃ
৯. পদকল্পলতিকা	[অপ্রকাশিত]	আনুঃ ১৪০০	আঠারো শতক
১০. অপ্রকাশিত পদরত্নাবলী	সতীশচন্দ্র রায় সংকলিত	৬০০	- -
১১. বঙ্গীয় সাহিত্য পরিষদের ২০১ সংখ্যক পুথি		৭০০	- -

আর প্রাচীন কাব্য সংগ্রহ, প্রাচীন কবিতা সংগ্রহ, গৌরপদতরঙ্গিনী, মহাজন পদাবলী প্রভৃতি বহু সংকলন গ্রন্থ আজ অবধি মুদ্রিত হয়েছে। এ সূত্রে উল্লেখ্য মুসলিম কবির পদসাহিত্য [সাড়ে তিন শ' পদ] এবং চট্টগ্রামের হিন্দু কবির পদ সাহিত্য অবৈষ্ণব কবিদের রচনা।^১

বাঙলাদেশে আমরা সংস্কৃতে, প্রাকৃতে ও অবহট্টে রাধাকৃষ্ণের প্রণয়লীলার রূপ ও আলঙ্কারিক উল্লেখ আগেও দেখেছি। বাঙলাভাষায় লিখিতরূপে পাচ্ছি শ্রীকৃষ্ণকীর্তনে, শ্রীকৃষ্ণবিজয়ে, চণ্ডীদাস-যশোরাজ খানের ও রায় রামানন্দের পদে। যশোরাজ খান ও রায় রামানন্দ অবশ্য চৈতন্যের সমকালীন। এসব ছিল অধ্যাত্মতত্ত্ব বর্জিত সাহিত্যিক প্রয়াস। চৈতন্যোত্তর যুগে সাধন-ভজন-কীর্তনের অবলম্বন হিসেবে বৈষ্ণবভক্তানুগ [রাগাভিরা ও রাগানুগা] চৌষষ্টি রসে বিন্যাসযোগ করে পদ রচিত হতে থাকে।

^১ “পদসংকলন” গ্রন্থের পূর্ণ তালিকা আমার ‘মুসলিম কবির পদসাহিত্য’ গ্রন্থের পরিশিষ্টে দ্রষ্টব্য।

ডক্টর বিমানবিহারী মজুমদার^১ পদকারদের পাঁচ বর্গে বিভক্ত করে আলোচনা করেছেন। প্রথম বর্গে রয়েছেন চৈতন্যপ্রভাবমুক্ত পদকার, বিদ্যাপতি-চণ্ডীদাস, যশোরাজ খান, রায় রামানন্দ। দ্বিতীয় বর্গে আছেন— চৈতন্যের সন্ন্যাস গ্রহণের পূর্বে ১৫১০ খ্রীস্টাব্দের মধ্যে যারা তাঁর নবদ্বীপ লীলায় বা আদি লীলায় সাহচর্য পেয়েছিলেন তারা— মুরারি গুপ্ত, নরহরি সরকার, গোবিন্দ ঘোষ, মাধব ঘোষ, বাসু ঘোষ, গোবিন্দ আচার্য, রামানন্দ বসু, শিবানন্দ সেন, গৌরী দাস, মুকুন্দ দত্ত, পরমানন্দ গুপ্ত, বংশীবদন, যদুনাথ, কবিচন্দ্র, বলরাম দাস ও শঙ্ক ঘোষ—এই পনেরো জন।

তৃতীয় বর্গে রয়েছেন যারা, তাঁরা চৈতন্যের মধ্য ও শেষ লীলার সঙ্গী ও সাক্ষী (রূপ গোস্বামী, রঘুনাথ দাস গোস্বামী, রঘুনাথ ভাগবতাচার্য, কানাই খুঁটিয়া, অনন্ত আচার্য, দৈবকী নন্দন, নয়নানন্দ মিশ্র ও কানুরাম দাস—এই আট জন।

চতুর্থ বর্গে স্থান পেয়েছেন, চৈতন্যদেবের তিরোভাবের পরে (১৫৩৩ থেকে) আবির্ভূত কিন্তু শ্রীনিবাস-নরোত্তমের প্রভাবমুক্ত (১৫৭০-এর পূর্বে) পদকারগণ (জ্ঞান দাস, বৃন্দাবন দাস, লোচন দাস, কৃষ্ণদাস কবিরাজ, মাধবাচার্য (কৃষ্ণমঙ্গল-রচক) ও কৃষ্ণদাস— এই ছয় জন।

পঞ্চম বর্গে আছেন শ্রীনিবাস আচার্য, গোবিন্দদাস কবিরাজ, গোবিন্দ চক্রবর্তী, বীর হাথীর, নৃসিংহ দেব, নরোত্তম ঠাকুর, বসন্ত রায়, বদ্রভ দাস, চম্পতি, শ্যামানন্দ— এ এগারো জন এবং শেখর রায়, যদুনাথ চক্রবর্তী, দিব্য সিংহ, উদ্ধব দাস, গোবিন্দ গতি প্রভৃতি।

ডক্টর বিমানবিহারী মজুমদার তাঁর ‘ষোড়শ শতাব্দীর পদাবলী সাহিত্যে’ একচল্লিশ জন বৈষ্ণবপদকার সম্বন্ধে আলোচনা করেছেন। এরা পদ রচনা করেছেন ১৫০০ থেকে ১৬২৫ খ্রীস্টাব্দের মধ্যে। সতেরো শতকের দ্বিতীয় পাদ থেকে আঠারো শতক অবধি প্রথানুগত্যবশে পদরচনা করেছেন বহু কবি। আগেই বলেছি, প্রায় দশ হাজারের মতো পদাবলী রচিত হলেও রসোত্তীর্ণ পদের সংখ্যা চার-পাঁচশর বেশি নয়। অসার্থক অনুকৃতি, তরল ভাব ও আঙ্গিক দীনতা অধিকাংশ পদের মূল্যহীনতার কারণ। পদকারদের মধ্যে আজো যারা রসোত্তীর্ণ পদাবলীর জন্যে পাঠকমাত্রেই প্রিয় তারা হলেন— বিদ্যাপতি, চণ্ডীদাস, জ্ঞানদাস, গোবিন্দ দাস (কবিরাজ) এবং যারা অনেকগুলো সুন্দর পদরচনা করেছেন তাঁরা হলেন— বলরাম দাস, অনন্ত দাস, উদ্ধব দাস, চম্পতি পতি, জগদানন্দ, নরোত্তম দাস, নরহরি সরকার, বংশীবদন, বাসুদেব ঘোষ, যদুনন্দন, যদুনাথ, রাধামোহন, রামানন্দ বসু ও রায় শেখর। অন্যান্যদের দু-একটি করে উৎকৃষ্ট পদ থাকলেও সাধারণভাবে তাঁদের পদ আকর্ষণীয় নয়। রাধাকৃষ্ণের যুগলাবতার রূপে স্বীকৃতি দিয়ে গৌরাস্বিষয়ক প্রথম পদ রচনা ও গান করেন অদ্বৈতাচার্য। সেই থেকেই চৈতন্য কিংবা রাধাকৃষ্ণ বিষয়ক পদ বৈষ্ণবতত্ত্ব সম্বলিত হতে থাকে।

একদিন অদ্বৈত সকল ভক্ত প্রতি

বলিলেন পরমানন্দে মগ্ন হই অতি।

শুন ভাই সব এক কর সমবায়

মুখভরি গাই আজি শ্রীচৈতন্যরায়।

আজি আর কোন অবতার গাওয়া নাঞি

সর্বঅবতারময় চৈতন্য গোসাঞি।...

^১ ষোড়শ শতাব্দীর পদাবলী সাহিত্য, পৃঃ ৪-৬।

আপনে অদ্বৈত চৈতন্যের গীত করি
 বোলাইয়া নাচে প্রভু জগৎ বিস্তারি
 “শ্রীচৈতন্য নারায়ণ করুণাসাগর
 দুঃখিতের বন্ধু প্রভু মোরে দয়া কর।”
 অদ্বৈত সিংহের শ্রীমুখের এই পদ
 ইহার কীর্তনে বাড়ে সকল সম্পদ। (চৈ. ভা.)

অবতাররূপে স্বীকৃত গৌরাঙ্গ বা গৌরচন্দ্র লীলাবিষয়ক পদও রচিত হতে থাকে চৈতন্যের জীবৎকালেই। পরে রসানুগ কীর্তনের আসরেও চৈতন্যের বন্দনা ও লীলানুগ পদ দিয়ে কীর্তন শুরু হতো, এখনো হয়। এসব পদই ‘গৌরচন্দ্রিকা’ বা প্রারম্ভগান হিসেবে আখ্যাত হয়েছে। রাধার অনুরাগ ও বিরহানুভূতিই চৈতন্যে আরোপিত। তাই চৈতন্যই ছিল ভক্তদের কাছে রূপসী অনুরাগিনী কিংবা বিরহিণী প্রমুখ রাধা :

১. নীরদ নয়ানে নীর ঘন সিঞ্চনে
 পুলক-মুকুল-অবলম্ব।
 শ্বেদ-মকরন্দ বিন্দু বিন্দু চুয়ত
 বিকশিত ভাব-কদম্ব।।
২. চম্পক, শোণ কুসুম কনকাচল
 জিতল গৌরতনু লাভগিরে
 উন্নত গীম সীম নাহি অনুভব
 জগ-মন-মোহন ভাঙনি রে।
৩. কুন্দ-কনয় কলেবর কাঁড়ি
 প্রেমভরে ঝর ঝর লোচনে চায়।
৪. বিমল হেম জিনি তনু অনুপাম রে ...
৫. আজ হাম কি পেখলুঁ নবদ্বীপচন্দ
 করতল করই বয়ন অবলম্ব।

আবার কৃষ্ণরূপেও—

১. গৌরবরণ মণি আভরণ
 নাটুয়া মোহন বেশ
 দেখিতে দেখিতে ভুবন ভুলল
 টলল সকল দেশ।
২. মরমে লাগিল গোরা না যায় পাসরা
 নয়ানে অঞ্জন হৈয়া লাগি রৈল পারা।

ব্রজবুলি : পদকার ও পদাবলী আলোচনার পূর্বে ব্রজবুলি রীতির পরিচয় জানা প্রয়োজন। ডক্টর সুকুমার সেনের মতে, “ব্রজবুলির মূলে আছে প্রধানত দুইটি ভাষা। একটি অবহট্ট, অপরাটি মৈথিল। ব্রজবুলি গানের ছন্দ পুরাপুরি অবহট্টের, ভাষাতে অবহট্টের চিহ্ন আছে। ... ব্রজবুলিতে মৈথিল অংশই বেশি। এ মৈথিল ত্রয়োদশ- চতুর্দশ শতাব্দির ভাষা। বিদ্যাপতি এই

ভাষা অবলম্বন করিয়াছিলেন, কিন্তু তাঁহার সময়ের (মেথিল) কথ্য ভাষা হুবহু সমগ্র পূর্বভারতে রাজপুট শিষ্ট দেশীয় সাহিত্যে গীতিকবিতার আদর্শ যোগাইয়াছিল। ...নেপালে, মোরঙ্গে বাঙ্গালায়, উড়িষ্যায়, আসামে।”^১

এর মত মেনে নিলে স্বীকার করতে হবে যে ব্রজভাষা বা ব্রজভাষার সঙ্গে ব্রজবুলি নামের কোন সম্পর্ক নেই। কেননা ব্রজভাষায় তথা হিন্দি-আওধি ভাষায় লেখ্য শিষ্ট সাহিত্য সৃষ্টি শুরু হয় ষোল শতকের শেষার্ধ্বে। সুকুমার সেন ‘ব্রজাওলি’ (ব্রজ সম্বন্ধীয়) থেকে ব্রজবুলি নাম এসেছে বলে মনে করেন।

উড়িষ্যার ‘পরশুরামবিজয়’ নাটিকায় (১৪৩৫-৬৬ খ্রীঃ) একটি ব্রজবুলি গান রয়েছে :

এতোর চন্দ্রবদন মেঘে কি ঢাঙ্কিলা জেহ
তাহা দেখি বিকল মোর মন না।
আবর দেখই অব্টি রাজ্যেত রুধির বৃষ্টি
পুর বেড়ি রোদন্তি শৃগাল না।

[বা. সা. ই. /পৃ. ৩. পৃঃ ১০০]

বাংলাদেশে প্রাপ্ত প্রাচীনতম নিদর্শন হচ্ছে যশোরাজ খানের (১৪৯৩-১৫১৯ খ্রীঃ) একটি পদ :

এক পয়োধর চন্দন লেপিত আর পয়োধর গোর
হিম ধরাধর কনক ভূধর কোরে মিলিল জোর
মাধব, তুয়া দরশন কাজে

আধপদচারি [পদ চালন] করত সুন্দরী বাহির দেহলি মাঝে

ডাহিন লোচন	কাজরে রাঙিত	ধবল রহল বাম
নীল ধবল	কমল ভূষণ	চান্দ পূজল কাম
শ্রীযুত হুসন	জগৎ ভূষণ	সোই ইহ রস জান
পঞ্চ গৌড়েশ্বর	ভোগপুরন্দর	ভণে যশোরাজ খান।

[রসমঞ্জরী, পীতাম্বর দাস]

দ্বিতীয় পদটি উৎকলবাসী রায় রামানন্দের রচিত এবং প্রখ্যাত—

পহিলিহি রাগ নয়ন ভঙ্গ ভেল
অনুদিন বাঢ়ল অবধি না গেল।
না সো রমণ না হাম রমণী
দুঁহ মন মনোভব পেশল জনি।...
বর্ধনরুদ্র-নরাধিপ মান
রামানন্দ রায় কবি ভাণ।

যশোধরেরও একটি পদ আছে :

ভণই জসোধর নব কবিশেখর
পূহবী তেসর কাঁহা

^১ বাঃ মাঃ ইং-১/পূর্বার্ধ/৩য় সং পৃঃ ৯৯-১০০।

সাহ হুসেন ভুঙ্গসম নাগর
মালতি সেনিক তাঁহা

—এ যশোধর সম্ভবত মৈথিল কবি এবং তাঁর পদোক্ত শাহ হুসেনও হুসেন শাহ শরী।

ত্রিপুরার রাজা ধন্যমানিক্যেরও সভাপণ্ডিত রচিত একটি পদ মেলে :

প্রথম তোহর	প্রেম গৌরব	গৌরব বাঢ়লি গেলি
অধিখ আদরে	লোভে লুবধলি	চুকলিতে রতি খেড়ি
খেমহ এক অপ-	রাধ মাধব	পলটি হেরহ তাহি
তোহ বিন জঞা	অমৃত পিএ	তৈঞা ন জীবএ রাহি।
কালি পরসুঈ	মধুর যে ছলি	আজ সে ভেলি তীতি
আনুহ বোলব	পুরুষ নির্দয়	সহজে— তেজ পিরীতি
বৈরিহু কে এক	দোষ মরসিঅ	রাজপণ্ডিত ভাণ
বারি কমলা	কমল-রসিয়া	ধন্যমাণিক জান।

(সুকুমার সেন উদ্ধৃত)

এ পদটি নেপালে বিদ্যাপতির পদসংগ্রহে মিলেছে— ত্রিপুরায় বা বাঙলায় মেলেনি, তবু ধন্যমাণিক্য যে ত্রিপুরার রাজা এবং পদটিও যে এ রাজ্যের রাজপণ্ডিত রচিত, সে সম্বন্ধে নিশ্চিত প্রমাণ উপস্থিত করেছেন অধ্যাপক সুখময় মুখোপাধ্যায় ‘রাজামালা’ থেকে— ‘ত্রিহৃত দেশ হতে নৃত্যগীত আনি। রাজ্যেতে শিখায় গীত নৃত্য নৃপমাণি।’

লক্ষণীয় যে উড়িষ্যার প্রতাপরুদ্র ত্রিপুরার ধন্যমাণিক্য, গৌড়ের হোসেন শাহ এবং শরীয়ারাজ হোসেন শাহ সবাই ষোল শতকের প্রথম পাদে বর্তমান ছিলেন। কাজেই কবিগণও সমসাময়িক। ষোল শতকের প্রথমার্ধের নরনারায়ণ-গুরুধ্বজের আমলে অসমীয়া কবি শঙ্কর দেবও (মৃত্যু : ১৫৬৮ খ্রীঃ) ব্রজবুলি রীতিতে পদ রচনা করেছেন, যথা—

আয়ে জনক-সুতা করো পরবেশ
পেক্ষয়ে বদন মন মম্বথ ক্রেশ।
মাণিক মুকুট কুণ্ডল করু কাঙ্ক্ষি।
দশন ওতিম নব মুক্তিম পাঙ্ক্ষি।
ঈষত হাসি চন্দক রুচি চোর
নীল অলকে লোলে লোচন চকোর।
কঙ্কন কেয়ুর রঞ্জন কায়
রামন চরণ চিস্তি চিন্ত লগায়।
পদপঙ্কজ পঙ্ক্তি করু বোল
রূপে ভুবন ভুলে শঙ্করে বোলে।

(বা. সা. ই-১/পৃ/৩, পৃঃ ২৬৮)

কাজেই দেখা যাচ্ছে পনেরো শতকের শেষ পাদ থেকে অবহট্ট-মিশ্রিত রীতিতে পদ বা গীতি রচনার রেওয়াজ বিহারে-বাঙলায়-উড়িষ্যা-আসামে-নেপালে চালু ছিল। এমনি কৃত্রিম

রীতি চালু করার দুটো কারণ অনুমান করা যায়,—এক, সাম্প্রতিক লালিত্য সৃষ্টির প্রয়োজন, দুই, বিস্তৃত অঞ্চলে—পূর্ব-দক্ষিণ ও উত্তর ভারতে জনবোধ্য করার উদ্দেশ্যে কৃত্রিম মিশ্র ভাষার উদ্ভাবন ও সচেতন প্রয়োগ। এজন্যেই মধ্যাঞ্চলের অর্বাচীন অবহট্ট যা' শিষ্ট শৌরসেনীরই ভাঙা রূপ—গৃহীত হয়েছে। মুখ্যত বিদ্যাপতির ললিত মধুর পদাবলীই বৈষ্ণবদের মনোহরণ করে এবং তা' বৈষ্ণব পদকার গোবিন্দদাস কবিরাজ প্রমুখ বহুল প্রয়োগে বাঙলায় জনপ্রিয় করে তোলেন এবং সম্ভবত তাঁদেরও বাসনা ছিল উত্তর ভারতেও তাঁদের রচিত পদ গণবোধ্য ও লোকগ্রাহ্য হয়ে গৌড়ীয় বৈষ্ণবমত প্রসারের সহায়ক হোক।

১৮. পদকার পরিচিতি

১. যশোরাজ খান— বৈদ্যখণ্ডের তথা শ্রীখণ্ডের লোক তিনি হোসেন শাহর পদস্থ কর্মচারী ছিলেন :

যশরাজ খান দামোদর মহাকবি

কবিরঞ্জন আদি সবে রাজসেবী

(রসকল্পবল্লী—রামগোপাল দাস)

২. রামানন্দ রায়— ইনি উৎকলবাসী। এরই 'জগন্নাথবল্লভম' নাটকের রাধা-কৃষ্ণলীলাগীতি চৈতন্যদেব আশ্বাদন করতেন :

চণ্ডীদাস বিদ্যাপতি রায়ের নাটক গীতি

(কৃষ্ণ) কর্ণামৃত শ্রীগীতগোবিন্দ.....

স্বরূপ (দামোদর) রামানন্দ (বসু) সনে

মহাপ্রভু গায় শুনে পুণ্য আনন্দ।

রামানন্দ রায় উড়িষ্যার দক্ষিণাঞ্চলের প্রশাসক বা শাসনকর্তা ছিলেন, চৈতন্যপ্রভাবে ইনি কর্মত্যাগ করে পুরীতে বাস করতে থাকেন।

৩. নরহরি সরকার— তিনি শ্রীখণ্ডে গৌরনাগরবাদের প্রবর্তক। কীর্তনে নতুন ঢঙ ও সুর প্রবর্তন তাঁর অন্যতম কীর্তি। তিনিও শ্রেষ্ঠ পদকারদের একজন। নরহরি সরকার চৈতন্যপার্ষদ-পরিকরের একজন।

'চৈতন্য' ব্রজরস গায়ত নরহরি সঙ্গ।—(শিবানন্দ সেন)

অথবা বাসু ঘোষ রামানন্দ শ্রীবাস জগদানন্দ

নাচে প্রভু নরহরি সঙ্গ।—(গোবিন্দ ঘোষ)

* ছুঁও ছুঁওনা বধু ঐখানে থাক,

* পিরীতি বলিয়া এক কমল রসের সায়ার মাঝে

* বঁধুহে কহ না রসের কথা শুনি

* সুজন কুজন যে জন না জানে—

প্রভৃতি চণ্ডীদাসের নামে চালু পদগুলো নরহরি সরকারের ভগিতায়ও পাওয়া যায় (ঘো. শ. প. সা. পৃঃ ৮)। তাছাড়া নরহরি সরকারেরও পরবর্তী পদকার নরহরি চক্রবর্তীর পদাবলী আলাদাভাবে চিহ্নিত করা দুঃসাধ্য।

৪. মুরারি গুপ্ত— 'কড়াচা' নামের আদি চৈতন্যচরিত রচয়িতা ও চৈতন্য সহপাঠী বন্ধু ও ভক্ত মুরারি গুপ্তও পদকার ছিলেন।

* ধর ধর ধর / ওরে নিতাই / আমার গৌরে ধর

আছাড় সময়ে / অনুজ বলিয়া / বারেক করুণা কর

- * সখি হে ফিরিয়া আপন ঘরে যাও
জীবন্তে মরিয়া যে আপনা খাইয়াছে
তারে তুমি কি আর বুঝাও,-এই পদদুটো প্রখ্যাত।

৫. ভ্রাতৃত্ব- গোবিন্দ ঘোষ, মাধব ঘোষ ও বাসু ঘোষ-চৈতন্যভক্ত ভ্রাতৃত্ব নবদ্বীপে চৈতন্যের অনুচর ও কীর্তনের সাথী ছিলেন :

গোবিন্দ, মাধব, বাসুদের তিন ভাই,
যা সবার কীর্তনে নাচে চৈতন্য গোসাঞি (চৈ. চ)

এঁদের মধ্যে আবার মাধব ঘোষের মতো 'তেন কীর্তনীয়া নাহি পৃথিবী ভিতর'। (চৈ.ভা.)

গোবিন্দ ঘোষের পদ :

- * হেদেরে নদীয়াবাসী কার মুখ চাও
- * জয় রাধা- মাধব কেলি,
- * গোরা গেল পূর্বদেশ নিজগণ পায় ক্রেশ
- ভাইদের মধ্যে বাসুদের ঘোষই শ্রেষ্ঠ পদকার ছিলেন। ইতি গৌরান্বিতবিষয়ক পদই বেশি রচনা করেছেন :
- * মরমে লাগিল গোরা না যায় পসরা
- * শচীর আঙ্গিনায় নাচে বিশ্বস্তর রায়
- * আজুরে গৌরান্বিত মনে কিভাব উঠিল
- * কহ সখি জীবন উপায়
- * শ্রীদাস সুবল সঙ্গে
- * বিলাপয়ে কত পর কার।
- * গৌরচাঁদ কিবা তোমার বদনমণ্ডল।
- * এক মুখে কি কহব গৌরচাঁদের লীলা
- * গৌরান্বিত চাঁদেরে হেরি
- * আঁখি ফিরাইতে নারি।
- * পহঁ করুণা সাগর গোরা-
- প্রভৃতি পদ প্রখ্যাত।

মাধব ঘোষের পদ :

- * উলসিত মঝু হিয়া। আজু আয়ব পিয়া।
- দৈবে কৈল শুভবাণী
- * শারদ সুধাকর কিয়ে মুখ-শোভা
- * সজল ধনী চন্দ্রবদনী
- * কারে কর মণ্ডিত মণ্ডলী মাঝ
- * যশোদানন্দন ফাণ্ড খেলে
- * নিজ নিজ মন্দির যাইতে
- * শক্তি ক্ষীণ অতি

৬. রামানন্দ বসু- চৈতন্যের পার্যদ ও কীর্তনের সাথী বৈষ্ণব সমাজে একজন বিশিষ্ট ব্যক্তি। রামানন্দ বসু 'শ্রীকৃষ্ণবিজয়' রচয়িতা কুলীনমামবাসী গুণরাজ খান মালধর বসুর বংশধর কিংবা পুত্র।

- * মলুঁ মলুঁ শ্যাম অনুরাগে
- * ধনি ঠমকি ঠমকি চলি যায়
- * চূড়া বান্ধে মস্ত্র পড়ে
- * চৌদিকে গোবিন্দ ধ্বনি
- * তোমারে কহিয়ে সখি স্বপন কাহিনী

* প্রাণনাথ কি আজু হৈল

* ভাল শোভা ময়ূরের পাখে

সম্ভবত 'দীন-হীন' রামানন্দ নামের আর একজন পদকারও ছিলেন।

৭. বংশীবদন, বংশী, বংশীদাস- উষ্টর বিমানবিহারী মজুমদারের মতে পদকল্পতরুতে বংশীবদন ভগিতায় ২৫টি, বংশীদাস ভগিতায় ৮টি ও বংশী ভগিতায় ৯টি পদ আছে। কিন্তু এরূপ বিভিন্ন প্রকারের নাম থাকা সত্ত্বেও তিন নাম একই কবির, কেননা একই পালায় বিভিন্ন পদে বিভিন্ন প্রকার ভগিতায়ুক্ত নাম পাওয়া যায়। ... সুতরাং একজন কবিই ছন্দের অনুরোধে তিন প্রকারের নামে ভগিতা দিয়াছেন। এই কবি বিষ্ণুপ্রিয়া ও শচীমাতার রক্ষণাবেক্ষণ করিতেন। এই কথা নরহরি চক্রবর্তী ভক্তিরত্নাকরে লিখিয়াছেন। সুতরাং এই বংশীদাস শ্রীনিবাস আচার্যের শিষ্য বংশীদাস হইতে পারেন না" (যো. শ. প. সা. পৃঃ ৩৬-৩৭) নবদ্বীপবাসী এই বংশীবদন (চট্ট) অন্যতম শ্রেষ্ঠ পদকার। তাঁর বহু পদ জনপ্রিয়।

* আজু দেখিলুঁ রূপ কদম্বের তলে

* রাই কানু যমুনার মাঝে

* ঘুচাও ঘুচাও আরে সখি

* রাই সাজে বাঁশি বাজে

* চিকন শ্যামল রূপ

* হেল রূপে কেন যাও

* ঝমকি ঝমকি পড়িছে

* স্টার নন্দন গোরা ও চাঁদ

* দানী কহে ফির ফির

* নীল পীত ধরা নন্দ পরায় আপনি

* নয়নে লাগিল

* বিনোদিনী মো বড় উদার দানী।

* আল সহি, কি হৈল মোরে প্রেমজ্বালা

* যমুনার দুকূল করিল আলা নায়্যার রূপে

* না বাও হে না বাও হে নবীন কাণ্ডারী

* কেলি কদম্ব মূলে ও না নব মেঘের কোড়া

* না যাইও না যাইও রাই

* রাম ভুজ আঁখি সঘনে নাচিছে

* আর না হেরিব প্রসর কপালে

৮. বলরাম দাস- এই নামে দুইজন পদকার রয়েছেন। একজন ছিলেন ব্রাহ্মণ এবং চৈতন্যদেবের সমকালীন। অপরজন বৈদ্য এবং প্রখ্যাত পদকার গোবিন্দদাস (কবিরাজ)-এর বংশোদ্ভূত সতেরো শতকের কবি। পদকল্পতরুতে সংকলক বৈষ্ণবদাস বলেছেন : “কবি-নৃপ (-কবিরাজ) বংশজ/ভুবনবিদিত / ঘনশ্যাম বলরাম”

দেবকীনন্দন বৈষ্ণববন্দনায় ব্রাহ্মণ কবি বলরামের নিম্নরূপ পরিচয় দিয়েছেন :

সঙ্গীত কারক বন্দো শ্রীবলরাম দান

নিত্যানন্দ চন্দ্রে যার অকথ্য বিশ্বাস।

এই বলরাম সাধারণত বাঙলায় পদ রচনা করেছেন এবং গোবিন্দদাস কবিরাজের বংশধর গোবিন্দদাস কবিরাজের অনুকরণে ব্রজবুলি পদই রচনা করেছেন বলে উষ্টর সুকুমার সেনের ও উষ্টর বিমানবিহারী মজুমদারের ধারণা। বৈদ্য বলরাম অনুকারক কবি (যো. শ. প. সা. পৃঃ ৪৮-৪৯)।

আদি ও ব্রাহ্মণ বলরামের বাঙলা পদ লালিত্যে মধুর ও কবিত্বসম্পদে স্বদ্ধ। এর কয়েকটি পদ।

- | | |
|---------------------------------------|---------------------------------|
| * অঙ্গে অঙ্গে মণি মুকুতার খেচনি | * গোঠে আমি যাব না গো |
| * আজু কানাই হারিল দেখ | * চাঁদ মুখে বেণু দিয়া |
| * আন্ধার ঘরের কোণে থাকি একেশ্বরী | * দুখিনীর ব্যথিত বন্ধু |
| * একদিন গোপীভাবে জগৎ ঈশ্বর | * ভাল রঙ্গে নামে মোর শচীর দুলাল |
| * কপাল চন্দ চাঁদ | * যমুনার তীরে কানাই |
| * কি রূপ দেখিনু সই | * শ্রীদাস-সুদান দাম |
| * কিবা সে মোহন বেশ | * সবে বলে সুজন পীরিত |
| * কে মোরে মিলায়া দিবে সে চান্দ বয়ান | |

ব্রাহ্মণ বলরাম দাস শ্রেষ্ঠ পদকারদের একজন।

৯. যদুনাথ দাস— ইনি চৈতন্যদেবের সমসাময়িক ও স্বগ্রামবসী। ইনি সম্ভবত নিত্যানন্দের কাছেই দীক্ষা নিয়েছিলেন। এর উপাধি ছিল 'কবিচন্দ্র'। এর পিতা রত্নগর্ভ আচার্য। চৈতন্যচরিত গ্রন্থগুলোতে এর উল্লেখ রয়েছে। এর অপর দুই ভাইয়ের নাম কৃষ্ণানন্দ ও জীব।

ক. তিন পুত্র তাঁর [রত্নগর্ভের] কৃষ্ণপদ করন্দ
কৃষ্ণানন্দ, জীব, যদুনাথ কবিচন্দ্র। (চৈ.ভা.)

খ. মহাভাগবত যদুনাথ করিচন্দ্র
তাঁহার হৃদয়ে নৃত্য করে নিত্যানন্দ। (চৈ. চ.)

তিনি নবদ্বীপে চৈতন্যলীলার প্রত্যক্ষ সাক্ষী।

ক. চৈতন্যের 'অরুণ	নয়ানে বরুণ আলায়
বহয়ে প্রেমসুধা জল	
যদুনাথ দাস বলে	যেন সোনার কমলে
প্রসবিছে মুকুতার ফল।	

(ষো, শ, সা, উদ্ধৃত, পৃঃ ৬৪)

খ. মুখ পাখালিয়া গৌরহরি	নদীয়া নগরে হেন বিলাস
বৈসে নিজগণ চৌদিকে বেড়ি	যদুনাথ দেখে গদাই পাশ (এ)

এর কয়েকটি বিশিষ্ট পদ :

- | | |
|---------------------------------------|-------------------------------|
| * অল্প বয়সে মোর শ্যাম রসে জর জর | * গোপীর ক্রন্দন শুনি কান্দে |
| * আসিবে আমার গৌরাক্ষ সুন্দর | * ধনি তুই দূতি, ধনি তুয়া কান |
| * ওরে রে মদন তুমি | * বৃন্দাবন তরুলতা |
| * আর শ্যামের মুখখানি পূর্ণিমার বাঁশী। | * রাই কত পরখসি আর |
| * কষিল কনয়া কমল কিয়ে | * শুন শুন মধুকর |
| * কি পেখলুঁ যমুনার তীরে | * কি বলিলে সুধামুখি |
| * খলরে ভ্রমর তুমি | আমি মাঠে ধেনু রাখি |

- * জননী কোড়ে বিলসত নন্দদুলাল
- * বাঁশীরব শুনি কানে চিশ্তে ধৈরজ না মানে
- * সে যে বিনোদনাগর বড় রসিয়া

১০. কানুরাম দাস— এর পিতা পুরুষোত্তম এবং পিতামহ সদাশিব কবিরাজও চৈতন্যভক্ত ছিলেন। এঁরা নিত্যানন্দ শিষ্য। 'চৈতন্যচরিতামৃত'ে এঁদের পরিচয় রয়েছে :

শ্রীসদাশিব কবিরাজ বড় মহাশয়
 শ্রীপুরুষোত্তমদাস তাঁহার তনয়।
 আজন্ম নিমগ্ন নিত্যানন্দের চরণে
 তাঁর পুত্র মহাশয় শ্রীকানু ঠাকুর।

কানু দাসের বা কানুরাম দাসের পদাবলী অনুভব-সুন্দর, প্রাঞ্জল ও ললিত মধুর। এর কয়েকটি পদ :

- * না কহ না কহ সখি
- * রসের হাটেতে আইলাম
- * পনবক পরশাই বিচলিত

১১. অনন্ত দাস, রায় অনন্ত, অনন্ত আচার্য, অনন্ত— এই চার ভগিতায় অভিন্ন কবির কিংবা একাধিক কবির পদ 'মেলে, তা' নিরূপণ করা সহজ নয়। পদকল্পতরুতে ও অগ্রকাশিত পদরত্নাবলীতে অনন্তের ভগিতায় এবং রায় অনন্তের ভগিতায়ও অনেক পদ মেলে। অনন্ত আচার্য ভগিতায়ও কয়েকটি পদ রয়েছে। তাই মনে হয় অনন্ত দাস ও রায় হয়তো অভিন্ন ব্যক্তি এবং অনন্ত আচার্য ভিন্ন এক কবি। উক্ত বিমানবিহারীর মতে অনন্ত আচার্যই বিভিন্ন ভগিতায় সব পদ রচনা করেছেন।

- * আহির রমণী মত—অনন্ত আচার্য
- * দুই মুখ সুন্দর কি দিব তুলনা—এ
- * চল চল মাধব করহ পয়ান—অনন্ত
- * ধনি ধনি বনি অভিসারে—এ
- * চল চল মিঠ মিঠ রস বঞ্চক—অনন্ত
- * নব নায়রি নব নায়র—এ
- * নব জলধর তনু থির—অনন্ত
- * বাজত তাল রবাব পাখোয়াজ—এ
- * না বোল না বোল কানুর বোল—অনন্ত
- * কি কচ সরোজ ভাগ মুখমণ্ডল—এ
- * আজু রসের বাদর নিশি—অনন্ত দাস
- * সজনী, মনে লাগল নন্দ কিশোর—এ
- * কি হেরিলুঁ কদম্ব তলাতে—এ
- * সরস বসন্ত সময় বন শোহন—এ

১২. চরিতকার বৃন্দাবন দাস এবং লোচন দাসও অনেক উৎকৃষ্ট পদ রচনা করেছেন। বৃন্দাবন দাসের 'বিমল হেম জিনি' পদটি এবং লোচন দাসের 'এস এস বঁধু এস' আরো শুনেছ অ লো সেই গোরাভাবের কথা' পদ দুটো প্রখ্যাত।

১৩. জ্ঞানদাস—নিত্যানন্দের জীবৎকালই যে জ্ঞানদাসের জন্ম এবং বাল্যে যে জ্ঞানদাস নিত্যানন্দকে প্রত্যক্ষ করেছিলেন, তা' কবির কোন কোন পদে কীর্তনমত্ত নিত্যানন্দের আলেখ্য থেকে অনুমান করা যায়। কবির যে নিত্যানন্দ শাখার বৈষ্ণব ছিলেন, তাও তাঁর রচিত পদ থেকে বোঝা যায় :

- ক. চৌদিকে নিতাই মোর হরিবোল বোলায়
 জ্ঞানদাস নিশিদিশি নিতাইর গুণ গায়।
- খ. অখিল লোক যত ইহ রস উনমত্ত
 জ্ঞানদাস নিতাই গুণ গানে।

জ্ঞানদাসের জন্মস্থান বর্ধমান জেলার কাঁদড়া গ্রামে। এখানে জ্ঞানদাসের মঠ আছে। কাঁদড়া নিত্যানন্দের জন্মস্থান একচাকা গাঁয়ের তিন-চার মাইল দূরে অবস্থিত। জ্ঞানদাস জাহ্নবার শিষ্য বলে বৈষ্ণবসমাজে লোকপ্রসিদ্ধি আছে। প্রথম জীবনে জ্ঞানদাস মৈথিল কবি বিদ্যাপতির অনুকারক ছিলেন এবং ব্রজবুলি পদ রচনায় তাঁর আসক্তি ছিল সে কারণেই। বিমানবিহারী মজুমদার তাঁর অনুকৃত পদের কিছু নমুনা দিয়েছেন। যেমন :

- ক. বিদ্যাপতি- কে কহে বালা কো কহে তরুণী
জ্ঞানদাস- কি যে ধনি বালা কিয়ে বরনারী
- খ. বি- বদর সবিস কুচ পরসব লহ
কত সুখ পাওব করিত উহ্ উহ্
জ্ঞা- উরজ উঠল জনু বদরি
করে জনি ঝাপহ সগরি।
- গ. বি- কাঁচ কমলে ডমরা ঝিক ঝোর
জ্ঞা- কলিকা কমলে ডমর নহ মেলি (ষো. শ. প. সা. পৃঃ ৮৬-৮৭)

বিমানবিহারী মজুমদার বলেন, “শিক্ষানবিশীর যুগে জ্ঞানদাস বিদ্যাপতি চণ্ডীদাস ও বসু রামানন্দের পদ সামনে রাখিয়া গীত রচনা করিয়াছিলেন শুটে, কিন্তু তাঁহার কবিত্বপ্রতিভা স্বকীয় বৈশিষ্ট্যে ফুটিয়া উঠিতে বেশি সময় লয় নাই। তিনি বিদ্যাপতির আলঙ্কারিক রীতি পরিত্যাগ করিয়া চণ্ডীদাসের ও নরহরি সরকারের সহজ-সরস মরমী রীতিতে পদ রচনা করিতে আরম্ভ করিলেন। এই পথে তাঁহার সাফল্য হইল অনুপ্রাণিতসাধারণ। দেহের সঙ্গে মনের যে নিবিড় সম্পর্ক তাহা জ্ঞানদাসের পদে যেমন অভিব্যক্ত হইয়াছে, এমনটি আর কোন বৈষ্ণব মহাজনের পদে নগে” (পৃঃ ৮৯)। বিদ্যাপতি চণ্ডীদাসের পরেই জ্ঞানদাসের স্থান।

পদাবলী সাহিত্যের পাঠকের কাছে চণ্ডীদাসের অনুসারী রূপে জ্ঞানদাস ও বিদ্যাপতির অনুকারক রূপে গোবিন্দ দাস পরিচিত। বস্তুত এই চারজনের রচনাই বৈষ্ণব সাহিত্যকে লোকপ্রিয় রেখেছে :

জ্ঞানদাসের প্রখ্যাত পদাবলী :

- * লাখ বাণ কাঞ্চন জিনি
- * কিরূপ হেরিলুঁ কালিন্দী কূলে
- * কমল বয়ান কনক কাঁতি
- * রূপ লাগি আঁখি বুঝে গুণে মনে ভোর
- * কিবা রূপে কিবা গুণে মোর মন বান্ধে
- * আ লো মুঞি কেন গেলুঁ কালিন্দীর জলে
- * তরুমূলে কিরূপ দেখিলুঁ কালা কানু
- * একা কুন্ড কাঁখে করি যমুনাতে জল ভরি
- * মনের মরম কথা তোমারে কহিয়ে এথা
- * মুরলীর স্বরে রহিবে কি ধরে
- * সুখের লাগিয়া এ ঘর বাঁধিনু

- * কানু অনুরাগে হৃদয় ভেল কাতর
- * মেঘ যামিনী অতি ঘন আন্ধার
- * রাঁধা তুয়া অনুরাগে হাম নিমগ্ন
- * আবেশে সখীর অঙ্গে অঙ্গ হেলাইয়া
- * সুন্দরি কাছে কহসি কটু বাণী
- * চাহ মুখ তুলি রাই চাহ মুখ তুলি
- * আওরে ঝতুরাজ বসন্ত
- * দেখরি সখী শ্যামচন্দ
- * ফুটল কুসুম অলিকুল মেলি
- * সুন্দরি আমারে কহিছ কি
- * চূড়াটি বান্ধিয়া উচ্চ কি দিল ময়ূর পুচ্ছ
- * পেখলুঁ নাগর পঙ্খ কি মাঝ

* বিনোদিনী পহিলে চাপিলা গিয়া নায়

* এই বনে মনে দানী হইয়াছ

* বৃষভানুন্দিনী রমণীর শিরোমণি

* এ ঘোর রজনী মেঘের গরজী

‘জ্ঞানদাসের প্রতিভার শ্রেষ্ঠ দান হইতেছে তাঁহার পূর্বরাগ, অক্ষেপানুরাগ, দান ও নৌকাবিলাসের পদাবলী।’ [বিমানবিহারী মজুমদার]

রূপ লাগি আঁখি বুঝে গুণে মন ভোর
প্রতি অঙ্গ লাগি কান্দে প্রতি অঙ্গ মোর।
হিয়ার পরশ লাগি হিয়া মোর কান্দে
পরশ পিরীতি লাগি থির নাহি বান্ধে।

কিংবা-
রূপের পাথারে আঁখি ডুবিয়া রহিল
যৌবনের বনে মন হারাইয়া গেল।
ঘরে যাইতে পথ মোর হৈল অফুরান
অন্তরে অন্তর কান্দে কিবা করে প্রাণ।

অথবা,
সুখের লাগিয়া এ ঘর বান্ধিনু অনলে পুড়িয়া গেল
অমিয়া সাগরে সিনান করিতে সকলি গরল ভেল।

এসব পদ তত্ত্বের দিক দিয়ে, বাস্তব জীবনের উপশ্লিষ্ট তথ্যের দিক দিয়ে যেমন জীবনসত্য উদঘাটিত করেছে, তেমনি আবেগের তীব্রতায়, সোচ্ছন্দ্যের বিস্তারে, অভিযুক্তির লাভাণ্যে, অলঙ্কারের সহজ সুপ্রয়োগে, রসমাধুর্যে অসাধারণ ও চির-মানবের সম্পদ। জ্ঞানদাস যে সঙ্গীতবিদও ছিলেন তার প্রমাণ, তাঁর রচিত ‘মুরলী করাও উপদেশ’ পদটি।

১৪. গোবিন্দদাস (কবিরাজ)— বৈদ্য গোবিন্দদাস শ্রীখণ্ডের [তথা বৈদ্য খণ্ডের] সুনন্দা ও চিরঞ্জীব সেনের পুত্র, মাতামহের নাম দামোদর। জীবগোষ্ঠামী গোবিন্দদাসের পদের অনুরাগী ছিলেন এবং কবির কাছে দুটো পত্র লিখে তিনি তাঁর কাব্যরস মুগ্ধতার উল্লেখ করেছেন। তাঁরই জ্যেষ্ঠ ভ্রাতা ছিলেন পণ্ডিত রামচন্দ্র কবিরাজ। বর্ধমানের কুমারনগর ত্যাগ করে তৈলিয়া বুধরি [ভাগবানগোলায়] গিয়ে তাঁরা নিবাস তৈরি করেন। দুই ভাই ছিলেন শ্রীনিবাস আচার্যের শিষ্য।

তাছাড়া গোবিন্দদাসের কোন কোন পদের ভণিতায় প্রতাপাদিত্য ও চম্পতি রায়ের উল্লেখ রয়েছে ... ‘ও রস গাহক প্রতাপাদিত্য দাস গোবিন্দ ভাণরে। প্রতাপ আদিত্য এরস ভাসিত। দাস গোবিন্দ গান। রায় চম্পতি রচন মানিয়ে দাস গোবিন্দ ভাণ রে। -কবির মাতামহ ছিলেন কবি। গোবিন্দ দাস (কবিরাজ) ‘সঙ্গীতসাধক’ নামের গ্রন্থও রচনা করেছিলেন,^১ [ভক্তিরত্নাকর]। অতএব, গোবিন্দ দাস (কবিরাজ) ষোল শতকের শেষ পাদেও বর্তমান ছিলেন। গোবিন্দদাসের পুত্র দিব্যসিংহও কবি ছিলেন গোবিন্দদাস বিদ্যাপতির অনুসারী ছিলেন এবং ব্রজবুলিতে পদ রচনা করেছেন। তিনি এক কথায় আলঙ্কারিক কবি। অনুভবের গভীরতায় নয়, ছন্দ শব্দ ও অলঙ্কারের ঘটাই তাঁর পদাবলীকে বিশেষ জনপ্রিয় করেছে। তাই অঙ্গে ও অবয়বে গোবিন্দদাসের পদ বিশিষ্ট। তবে রূপের এ জৌলুসের সঙ্গে হৃদয়-মনের অকৃত্রিম স্পর্শ কুটিং সুলভ। রূপচিত্রণে আর পূর্বরাগ, অভিসার, মিলন, আক্ষেপানুরাগ ও বিবহ বিষয়ক পদ

^১ সুখময় মুখোপাধ্যায়, তথ্য ও কালক্রম, পৃঃ ১১৪-৪৬

রচনায় তাঁর কৃতিত্ব বাঙালী কবিদের মধ্যে অতুল্য। কোন কোন ক্ষেত্রে গোবিন্দ চক্রবর্তী ও গোবিন্দদাসের পদের পার্থক্য নিরূপণ করা কষ্টসাধ্য। পরবর্তীকালে সতেরো-আঠারো শতকে গোবিন্দদাসের অনেক অনুকারক কবি ছিলেন।

গোবিন্দদাসের অসংখ্য জনপ্রিয় পদের কয়েকটি :

রূপ :

- * চম্পক শোণ কুসুম
- * নীরদ নয়নে নীর ঘন সিঞ্চনে
- * পতিত হেরিয়া কান্দে
- * কুন্দ-কনয় কলেবর কাঁতি
- * কুবলয় নীল রতন দলিতাঞ্জন
- * নন্দ নন্দন চন্দ-চন্দন গন্ধ-নিন্দিত অঙ্গ
- * ঢল ঢল কাঁচা অঙ্গের লাবণি
- * সুরপতি ধুন কি শিখওক চূড়ে

অভিসার :

- * কাননে সবহঁ কুসুম পরকাশ
- * কঙ্ক চরণযুগ যাবক রঞ্জন

মিলন :

- * দুহঁ জন নিতি নিতি নব অনুরাগ।
- * দুহঁ দোঁহা দরশনে উলসিত ভেল
- * দোঁহেঁ দোঁহাঁ দরশনে ভাবে বিভোঁলি
- * দুহঁজন আওল কুঞ্জক মাহ
- * আদরে আওসরি রাইক হৃদয়ে ধরি
- * কিয়ে শুভ দরশনে উলসিত লোচনে
- * কুঙ্কিত কেশিনী নিরুপম-বেশিনী
- * যাঁহা যাঁহা নিকসয়ে তনু তনু জ্যোতি
- * রূপে ভরল দিঠি সোণ্ডর পরশ মিঠি
- * আধক আধ আধ দিঠি অঞ্চলে
- * চম্পক দাম হেরি চিত অতি কম্পিত
- * মন্দ মন্দ মধুর তান

দান :

- * এই মনে বনে দানী হইয়াছে
- * রাধা মাধব নীপমূলে হো

মান :

- * শুনইতে কানু মুরলী রব মাধুরী
- * অঙ্কল প্রেম পহিল নাহি জানলুঁ
- * পদনখ হৃদয়ে তোহারি

* শ্যাম অভিসারে চনু বিনোদিনী রাধা

* দিনমণি কিরণে মলিন মুখমণ্ডল

* মন্দির বাহির কঠিন কপাট

* কুল মরিয়াদ কপাট উদঘাটলুঁ

* কষ্টক গাড়ি কমল সম পদতল

* অধরে ডম্বর ভরু নব মেহ

* নীলিম যুগমদে তনু অনুলেপন

* মেঘ যামিনী চলল কামিনী।

* ভীতক চীত ভুজগ হেরি যে ধনি

* কুন্দ কুসুমে তরু কবরীক ভার

* মাধবী-উপন তপ্ত পথ বালুক

* মাধব কি কহব দৈব বিপাক

* কাহা নখ চিহ্ন চিহ্নি তুহঁ সুন্দরী

* চরণে লাগি হরি

* রাইক হৃদয়-ভাব বুঝি মাধব

* রাই অনাদর হেরি রসিক বর

* যাকর চরণ নখর রুচি হেরইতে

* সুবাসিত বারি ঝারি ভরি তৈখনে

বসন্ত :

* শিশিরক অন্তরে আওয়ে বসন্ত

* খেলত ফাগু-বৃন্দাবন চান্দ

রাস :

* ঝর ঝর জলধর

* বৃষভানু নন্দিনী নব অনুরাগিনী

* অপরূপ ঝুলন নানা ফুল শোভন

* শরদ চন্দ পবন মন্দ

* বিপিনে মিলল গোপনারী

* রাধা শ্যাম নাচে রে

বিরহ :

* এই ত মাধবী তলে

* তুহঁ রহিল মধুপুর

* যাঁহা যাঁহা পই অরুণ চরণে চলি যাত

১৫. শ্রীনিবাস আচার্য, নরোত্তম ঠাকুর, শ্রীনিবাস পুত্র গোবিন্দ গতি, (বিজ্ঞ) বসন্ত রায়, বিষ্ণু পুররাজ বীর হাথীর, মানভূমরাজ নৃসিংহ দেব, বল্লভদাস, গোবিন্দ চক্রবর্তী প্রমুখও পদ রচনা করছেন।

১৬. যদুনন্দন দাস— ইনি শ্রীনিবাসকন্যা হেমলতা ঠাকুরাণী শিষ্য ছিলেন। ইনি বর্ণে বৈদ্য। নিবাস মালিহাটি গ্রামে। যদুনন্দন ‘গোবিন্দলীলামৃত’ ‘বিদম্ভমাধব’, ‘কৃষ্ণকর্ণামৃত’ প্রভৃতি সংস্কৃত গ্রন্থের অনুবাদকও। অনূদিত গ্রন্থে তাঁর আত্মপরিচয় ও জীবৎকাল মেলে :

ক. শ্রীচৈতন্য দাসের দাস ঠাকুর শ্রীনিবাস
আচার্য সূতা যে হেমলতা
তার পাদপদ্ম আশ এ যদুনন্দন দাস
অমষ্ট প্রাকৃতে কহে কথা। (গোবিন্দলীলামৃত)

খ. দীন যদুনন্দন বৈদ্য দাস নাম তার
মালিহাটি গ্রামে স্থিতি প্রেমহীন ছার। (কৃষ্ণকর্ণামৃত)

গ. পঞ্চদশ শত আর বৎসর উনত্রিশে
বৈশাখ মাসেতে আর পূর্ণিমা দিবসে
নিজ প্রভুর পাদপদ্ম মন্তকে ধরিয়া
সম্পূর্ণ করিল গ্রন্থ গুন দিয়া মন। (কৃষ্ণকর্ণামৃতের অনুবাদ)

এতে ৫২৯ শক বা ১৬০৬ খ্রীস্টাব্দ মেলে।

১৭. দৈবকী নন্দন সিংহ, কবিরঞ্জন কবিশেখর, রায় শেখর ও বিদ্যাপতি— এতগুলো উপাধিধারী কবি বিভিন্ন পদের ভণিতায় সব কয়টিই ব্যবহার করে পাঠকের ও ঐতিহাসিকের বিভ্রান্তির কারণ ঘটিয়েছেন। ইনি গোপালচরিত, গোপীনাথ বিজয়, গোপাল বিজয় ও দণ্ডাজিকাপদাবলী প্রণেতা। ‘তবে মহাকাব্য কৈল গোপালচরিত/ গোপীনাথ বিজয় নাটক কৈল/ আর তবে কৈল গোপালের কীর্তন অমৃত/ তবে সে পাঁচালী করি গোপাল বিজয়ে/ সিংহ বংশে জননাম দৈবকীনন্দন/ শ্রীকবি শেখর নাম বলে সর্বজন/ বাপ শ্রীচতুর্ভুজ মা হীরাবতী’ শ্রীখণ্ডে ছিল কবির নিবাস—সুখময় মুখোপাধ্যায়, মধ্যযুগের তথ্য ও কালক্রম পৃঃ ৮৬-৮৭)। ঐ কাব্যে কবিশেখর, শেখর ও রায়শেখর ভণিতাও দৃষ্ট হয়। সতেরো শতকের রামগোপাল দাসের ও রসিক দাসের ‘শাখানির্ণয়’ গ্রন্থে কেবল রঘুনন্দনাশিষ্য কবি-শেখরের উল্লেখ মেলে। রামগোপাল দাস তাঁর রসকল্পবল্লীতে কবিশেখরকে ‘গোপালবিজয়’ রচয়িতা বলে উদ্ধৃতি প্রসঙ্গে চিহ্নিত করেছেন। কবিরঞ্জনও রঘুনাথশিষ্য। রামগোপাল দাস আবার স্পষ্টই বলেছেন যে কবিরঞ্জনই ছোট ‘বিদ্যাপতি’ নামে খ্যাত— ‘ছোট বিদ্যাপতি বলি যাহার খেয়তি।’ এবং ‘কবিরঞ্জন যশোরাজ খান দামোদর মহাকবি। কবিরঞ্জন আদি সবে রাজসেবী’—(শাখানির্ণয়) তথা গৌড়দরবারের কর্মচারী (রাজসেবী) ছিলেন।

এঁর কয়েকটি পদ :

* গগনে অব ঘন হে দারুণ— রায় শেখর
* দুই মুখ সুন্দর—ঐ
* হে দে রে নিলাজ কানাই—ঐ
* অপরূপ রাধা মাধব—ঐ

* দেখ দেখ গোরা নটরঙ্গ—ঐ
* নাচত নাগর কান—ঐ
* মনোহর কেশ বেশ মনোহর—ঐ
* বঁধু তোমার গরবে গরবিনী হাম—ঐ

- * খেলা রসে ছিল কানাই-এ * আরে সখি বাজাত বংশী মধুর-কবিরঞ্জন
 * জানল ঘর পর নিন্দে ভেল ভোর-এ * মরিব মরিব সখি নিচয় মরিব-এ
 * দণ্ডবৎ করি মায় চলিলা যাদব রায়-এ * ঝর ঝর বরিখে সঘন-শেখর
 * দূরে আওত নাগর বায়-এ * শুন শুন সজনি কি কহব-এ

১৭. নানা সূত্রে জানা যায় দুইজন বলরাম [বৈদ্য ও ব্রাহ্মণ] দুইজন নরহরি -সরকার ও চক্রবর্তী), দুইজন উদ্ধব দাস (দাস), দুইজন গোবিন্দ [বৈদ্য কবিরাজ ও চক্রবর্তী] ছিলেন। এজন্যে এঁদের পদ নিরূপণে বিভ্রান্তি ঘটে। মেথিল কবি বিদ্যাপতির আগে দশ শতক থেকে বারো শতকের মধ্যে আরো চারজন কবি বিদ্যাপতি সংস্কৃতে কবিতা বা শ্লোক রচনা করেছিলেন। এক বাঙালী শ্রীখণ্ডবাসী বিদ্যাপতিও বৈষ্ণবপদ রচনা করেছেন। তারও উপাধি ছিল কবিরঞ্জন। তাঁর পদ :

- * যব ধরি পেখলুঁ সো মুখ লাবণি
 * যশোদা নন্দন দেখি আনন্দে পূর্ণিত আঁখি
 * সজনি সো বর নাগররাজ।

১৮. সতেরো শতকের পদকারদের মধ্যে গোবিন্দদাস কবিরাজের পুত্র দিব্যসিংহও শ্রীনিবাসের শিষ্য ছিলেন। তাঁর একটিমাত্র পদ মেলে সংস্কৃতভাষায়, পদটির আরম্ভ :

যব ধরি পেখলুঁ কালিন্দীতীর
 নয়নে ঝরএ কত বারি অস্তির।

শেষ : দিব্যসিংহ কহে শুন ব্রজরামা।
 রাই কাহু একতুল্য দুই এক ঠামা।

১৯. গোবিন্দদাস কবিরাজের পৌত্র এবং দিব্যসিংহের পুত্র ঘনশ্যাম কবিরাজও পদকার ছিলেন এবং তিনি ব্রজবুলি পদরচনা করেছেন। বিদ্যাপতির বা শেখরের অনুকরণে রচিত একটি পদের আরম্ভ ও শেষ :

ডাকে ডাহকী/ঝমকে ঝুমকল/ ঝি ঝি ঝদকত ঝাঁঝিয়া
 ... নন্দ নন্দন / চরণে ভণ ঘন/ শ্যামদাস নমস্তিয়া।

আঠারো শতকের নরহরি চক্রবর্তী নামের এক ব্যক্তিও ‘ঘনশ্যাম’ ভণিতায় পদ রচনা করেছিলেন।

২০. রাধাবল্লভ দাস, রাধাবল্লভ চক্রবর্তী, রাধাবল্লভ ভণিতায় তিন জনের বা একজনের পদাবলীও মেলে। শুধু বল্লভদাসও রয়েছেন। ইনি সম্ভবত নরোত্তমশিষ্য শ্রীবল্লভ চৌধুরী। বল্লভ ও শ্রীবল্লভ ভণিতাও মেলে।’

এছাড়া শিবরাম দাস, রাঘবেন্দ্র রায়, রসিকানন্দ, রাধানন্দ, বিপ্রদাস, ঘোষ, শশিশেখর, চন্দ্রশেখর, নিমানন্দ, প্রেমদাস, দুর্লভ রায়, বিশ্বনাথ চক্রবর্তী, রাধামোহন ঠাকুর, বৈষ্ণব দাস, গৌরসুন্দর দাস, দীনবন্ধু দান, গোকুলচন্দ্র প্রভৃতি অনেকেই সতেরো-আঠারো শতকে পদরচনা করেছেন, এগুলো প্রাণহীন মাধুর্য রহিত অনুকৃত রচনা, তাই মূল্যহীন। বিশেষ করে দেশকালের পরিসরে জীবনের প্রয়োজন যে চিন্তা-চেতনার উদ্ভব এবং অভিব্যক্তি তা কালান্তরে অনুকৃত হলেও তার উপযোগ থাকে না- তখন তা পিছিয়ে পড়া মন-মানসেরই সাক্ষ্য মাত্র।

১৮. মুসলিম পদকার পরিচিতি

অনন্ত— এঁর জাতি নির্ণয় করা দুঃসাধ্য। রচনার প্রমাণে মনে হয় মুসলমান। কিন্তু নামে হিন্দু এমন অনেক নাম আজো আছে, যেগুলো হিন্দু-মুসলমানের সাধারণ ঐতিহ্য। কাজেই ‘অনন্ত’ মুসলমানের নাম হওয়া বিচিত্র নয়। পদকল্পতরু প্রভৃতির পদকার অনন্ত ভিন্ন ব্যক্তি।

আইনুদ্দীন (সৈয়দ)— আইনুদ্দীন ও মনোহর এক শাহ আইনুদ্দীনকে তাঁদের পীর বলে উল্লেখ করেছেন। অবশ্য পদকার সৈয়দ আইনুদ্দীনই যে তাঁদের পীর তা জোর করে বলা যায় না। এক শাহ আকবর আইনুদ্দীনের পীর ছিলেন। একে কেউ কেউ পদকার আকবর অনুমান করেন। আকবর শাহর পদটি গৌরপদতরঙ্গিনীতে প্রথম সংকলিত হয়। এতে মনে হয় তিনি হয়তো পশ্চিম বাঙলার লোক ছিলেন। আইনুদ্দীন সম্ভবত চট্টগ্রামবাসী ছিলেন। তাই পদকার শাহ আকবর আইনুদ্দীনের পীর ছিলেন বলে মনে হয় না। নিকাহমঙ্গল নিবন্ধটিও আইনুদ্দীনের রচনা (পুথি পরিচিতি পৃঃ ৩১)। আইনুদ্দীন সম্ভবত সত্তেরো শতকের কবি।

আকবর আলী— হাদিসের কথা, চোরার হেঁকায়েত, সখিনার বারমাস, হানিফার বারমাস প্রভৃতি রচয়িতা আকবর আলীই সম্ভবত আমাদের আলোচ্য পদকার। যতীন্দ্রমোহন ভট্টাচার্যের ‘বৈষ্ণবভাবাপন্ন মুসলমান কবি’ গ্রন্থের পদকার শ্রীহট্টবাসী সৈয়দ আকবর আলি শাহ্ ভিন্ন ব্যক্তি। আলোচ্য আকবর আলী সম্ভবত আঠারো শতকের শেষপাদে চট্টগ্রামে বর্তমান ছিলেন।

আকবর শাহ— সম্ভবত পশ্চিমবাঙলার লোক এবং ব্রজবুলির প্রধান কবিদের মতো তিনিও ষোল শতকের কবি বলে আমাদের ধারণা। সম্ভ্রাট আকবর ও পদকার আকবর শাহ্ অভিন্ন ব্যক্তি বলে কল্পনা করা বাতুলতা মাত্র। এক্ষেত্রে আকবর শাহ পণ্ডিতের রাগমালাও আছে (পু. পরিচিতি পৃঃ ৪৫২)।

আফজল আলি— ইনি একটি পুঁজে সম্ভবত গৌড়সুলতান সৈয়দ আলাউদ্দিন হোসেন শাহর পৌত্র ও নুসরত শাহর পুত্র সৈয়দ ফিরোজ শাহর (১৫৩২-৩৩) নামোল্লেখ করেছেন। আমাদের অনুমান সত্য হলে ইনি ষোল শতকের তৃতীয়-চতুর্থ দশকে বর্তমান ছিলেন। চট্টগ্রামের সাতকানিয়া থানার বিখ্যাত দরবেশ শাহ রুস্তমের এক শিষ্য আফজল আলি আঠারো শতকের পীরের আদেশে ‘নসিয়তনামা’ রচনা করেন। পদকার আফজল আলি ভিন্ন ব্যক্তি।

আফজল (সৈয়দ)— ইনি সম্ভবত কবি এতিম নাসিরের পীর শাহ আফজল। আফজলও তাঁর পীর শাহ কাতালের প্রশস্তি গেয়েছেন। এই ‘কাতাল’ এর নামেই সম্ভবত চট্টগ্রাম শহরের একটি অঞ্চল কাতালগঞ্জ হয়েছে।

আবাল ফকির— এক বালক ফকির ফায়দুল মুকতদী ও বুরহানুল আরেফিন নামে ধর্ম বিষয়ক গ্রন্থ ও চৌতিশা রচনা করেছেন। বালক ফকির শাহ আলী রজার মুরিদ ছিলেন :

শাহ আলী রজা গুরু পদে নমস্কারী

বালক ফকিরে ভণে কিতাব বিচারি।

অতএব বালক ফকির আঠারো শতকের শেষার্ধের কবি। এই বালক ফকিরই যে আবাল ফকির তা জোর করে বলার উপায় নেই। তবে বালক আর আবাল একার্থবোধক।

আব্বাস—পরিচয় অজ্ঞাত।।

আক্ষান ও আমান— আক্ষান ও আমানকে আমরা অভিন্ন ব্যক্তি বলে মনে করি। এক

আমানকে আমরা 'সখীর বারমাস' রচয়িতা বলে জানি (পুথি পরিচিতি পৃঃ ৩৭৪)। আমাদের অনুমান তিন লেখকই অভিন্ন ব্যক্তি।

আলাউল- 'পদ্মাবতী' প্রভৃতি বহু কাব্যের অনুবাদক। ইনি পদকারও ছিলেন এর পরিচিতি রোসাঙ্গ পরিচ্ছেদে দৃষ্টব্য।

আলাউল খান- উটর মুহম্মদ শহীদুল্লাহ সম্পাদিত পদ্মাবতীর (১ম খণ্ড) ভূমিকায় উদ্ধৃত এক পদে এক সাধক আলাউল খানের উল্লেখ আছে। কিন্তু "সই বড় অপক্লপ সাজে" পদের ভণিতায় বিকল্পে যে আলাউল খান আছে, তা আমাদের ধারণায় 'ভাণ' স্থলে খান হয়েছে। বরিশালের আলাউল খান ভিন্ন ব্যক্তি।

আলিমুদ্দিন- এক আলিমুদ্দিন যোগকলন্দা পুথির লিপিকর ছিলেন। লেখা শেষ করে তিনি বলেছেন,

এক পুস্তক যে মুই সমাপ্ত করিলুম
আসলেও এহার অধিক না পাইলুম।
আর এক নিবেদন শুন গুণিগণ
লিপি করিলুম নাম থাকিতে কারণ।
মনবাঞ্ছা অধীনের এইমত ছিল
দিন 'মারফত' এই প্রচার করিল।
নতু কেহ নাম মোর করিলে বিচার
উপরের পঞ্চপদে পাইবেক সার।

আসলেত যে মত বচন পাইলুম।
কবি স্মরি মান্য করি যতনে রাখিম।
পদের আদ্যক্ষর একত্র করিয়া
অধীনের নাম সবে চাহিবে পড়িয়া।
শ্যাম্বে মঘী সহস্র যে কুরুপুত্র জান
গেত্র শেষে দ্রুপ-সুতা-পতি হয় মান।
ফাঘনের রোজ দিন তারিখ যে গণি
এই মতে হিসাব যে নও পরিমাণি।
(পুথি পরিচিতি, পৃঃ ৪৪৩-৪৫)

সহস্র-১০০০, কুরুপুত্র-১০০, গেত্র-৩, দ্রুপসুতাপতি-৫, অথবা ১১৩৫ মঘী পাওয়া যায়।

অতএব আলিমুদ্দিন ১১৩৫ মঘী বা ১৭৭৩ খ্রীস্টাব্দে যোগকলন্দার নকল করেন। ঐর অমরত্বের বাঞ্ছা ও কবিতা রচনার প্রবণতা দেখে আমাদের মনে হয় ইনিই পদকার আলিমুদ্দিন। আমাদের ধারণা সত্য হলে ইনি আঠারো শতকের মাঝামাঝি সময়ে বর্তমান ছিলেন।

আলি মিয়া- গুলে বকাউলির [উনিশ শতকের প্রথমার্ধের] কবি মুহম্মদ মুকিম তাঁর সমকালীন চট্টগ্রামবাসী কবি হিসাবে সম্ভবত এই আলি মিয়ার নাম উল্লেখ করেছেন। 'হারি নাম' আলি মিয়া পদেত সালাম' (পৃঃ পরিচিতি পৃঃ ১০১)। তা হলে আলি মিয়া উনিশ শতকের প্রথমার্ধের লোক। লোকশ্রুতি অনুসারে তাঁর নিবাস ছিল চট্টগ্রামের রাউজান থানার সুলতানপুর গ্রামে। সুলতানপুর মুকিমের কর্মস্থল ছিল। আলি মিয়া সাধারণ্যে 'পণ্ডিত' বলে খ্যাত ছিলেন। পদকার মুহম্মদ হাসিমের পুত্র কবি আলি মিয়া ভিন্ন ব্যক্তি।

আলী রজা [জন্ম : ১৭৫৯ -মৃঃ ১৮৩৭ খ্রীঃ] আলী রজা ওরফে কানু ফকির বহু গ্রন্থ প্রণেতা। সুফীসাহিত্য পরিচ্ছেদে তাঁর বিস্তৃত পরিচিতি দেয়া হয়েছে। তাঁর দুই পুত্র সরফতুল্লাহ এবং এর্শাদুল্লাহও কবি ছিলেন। এঁরা পিতাকেই পীর করেছিলেন। এঁরা উনিশ শতকের শেষার্ধেও জীবিত ছিলেন।

আসক- পরিচয় অজ্ঞাত।

আসাদুদ্দীন— কবি মনোহরের পীরভাই ছিলেন। অতএব উভয় কবি সমসাময়িক ছিলেন। তাদের পীর আইনুদ্দিন যদি পদকার সৈয়দ আইনুদ্দিনই হন, তাহলে তিন কবি একই সময়ে বর্তমান ছিলেন। এঁরা সবাই আঠারো শতকের কবি বলে অনুমান করা যায়।

এতিম কাসেম— তিনি চট্টগ্রামের ফটিকছড়ি থানার ইসাপুরবাসী ছিলেন। তাঁর ‘আওরা দ্য বারোজ প্রশস্তি’ নামের রচনায় তাঁর কিছু আত্মপরিচয় আছে। নিঃস্ব কবি স্থানীয় পর্তুগীজ জমিদারের বিধবা আওরা দ্য বারোজের কাছে যাচঞা প্রসঙ্গে এ প্রশস্তি রচনা করেছেন। পরোক্ষ প্রমাণে জানা যায় তিনি লর্ড ওয়ারেন হেস্টিংসের আমলে (১৭৭২-৮৫ খ্রীঃ) উক্ত প্রশস্তি রচনা করেন। কাজেই এতিম কাসেম আঠারো শতকের শেষার্ধের কবি। [বাঙলা একাডেমী পত্রিকা, ২য় বর্ষ : ভাদ্র-চৈত্র সংখ্যা, ১৩৬৩ সন দ্রষ্টব্য]

এবাদত ও এবাদুল্লাহ— সম্ভবত অভিন্ন ব্যক্তি। পুথি পরিচিতির ক্রমিক ৩৯৬ এবং ৪০৮ সংখ্যক রাগমালায় এবাদতের পদ আছে। এবাদুল্লাহর নাম রাগমালাগুলোর কোথাও নেই। কাজেই ব্রজসুন্দর সান্যালের ‘মুসলমান বৈষ্ণব কবি’ তৃতীয় খণ্ডে বিধৃত একটি পদের ভগিতায় যে এবাদুল্লাহ আছেন, তিনি সম্ভবত এবাদত। আমাদের ধারণা লিপিকর প্রমাদে— হয় এবাদত এবাদুল্লাহ হয়েছে, নয়তো এবাদুল্লাহ এবাদত হয়েছে।

এর্শাদুল্লাহ— কবি আলী রজার পুত্র। নিবাসও পুর্নাবাদ, পিতাকেই পীর করেছিলেন। তিনি উনিশ শতকের শেষার্ধেও বর্তমান ছিলেন।

শেখ কবীর— শেখ কবীর ও কবীরকে আমরা অভিন্ন ব্যক্তি বলে অনুমান করি। সুলতান নাসির শাহর (১৫১৯-৩২ খ্রীঃ) প্রশস্তির প্রমাণে তাঁকে চৈতন্য সমসাময়িক ও ষোল শতকের প্রথমার্ধের লোক বলে মনে নিতে হয়। কোন কোন বিদ্বানের মতে কবি শেখরই লিপিকর প্রমাদে ‘শেখ কবীর’ হয়েছেন।

কমর আলী (পণ্ডিত)— চট্টগ্রামের খিটাবচরে ও সতরপটুয়ার পাশের গ্রামে করুল ডেঙ্গাতেই কমর আলী পণ্ডিতের জন্ম। ইনি শরীয়ৎ বিষয়ক সরসালের নীতি, রাখার সম্বাদ বা ঝতুর বারমাস নামের পদবন্ধ ও পদাবলী রচয়িতা। করুলডেঙ্গায় তাঁর বংশধরেরা আজো সাধারণ্যে কমর আলীর পরিচয়ে চলে।

সরসালের নীতির রচনাকাল—

চন্দ্রশত বসু ঋত সন যদি হৈল
ছরসালের নীতি হীনে পঞ্চলী রচিল।
নবী করিয়াছে এই হিজরীর সন
বৈশাখেতে মঘী সন চৈত্রতে পূরণ।

এতে ১০৮৬ হিজরী বা ১৬৭৬-৭৭ খ্রীঃ। অতএব, কবি সতেরো শতকের শেষার্ধে বর্তমান ছিলেন।

খলিল— ‘চন্দ্রমুখী’ উপাখ্যান রচয়িতা খলিল সিলেটের অধিবাসী ছিলেন। মিসর রাজকুমার গুলসনওয়ার ও গঙ্গবর রাজকন্যা চন্দ্রমুখীর প্রণয়কাহিনী নিয়ে এ কাব্য রচিত। কবি মুহম্মদ আকবরও এ কাহিনী নিয়ে ‘গুলসনওয়ার’ নামে উপাখ্যান রচনা করেছেন। ইনি সম্ভবত উনিশ শতকের প্রথমপাদে বর্তমান ছিলেন।

গেয়াস খান- গএস, গেয়াস, গেয়াস খান বা গএয়াস যে 'গিয়াস' এর বিকৃতি তা বুঝতে কষ্ট হয় না। মুকিম গুলেবকাউলির উপক্রমে তাঁর পূর্বসূরী হিসেবে অন্যান্য কবির সঙ্গে গেয়াসেরও নাম করেছেন :

গেয়াস খা (গেআছক) মুজাম্মিল সুধার উপাম। (পুথি পরিচিতি পৃঃ ১০১)

অতএব, গেয়াস খানও সতেরো শতকে কিংবা আঠারো শতকের গোড়ার দিকে বর্তমান ছিলেন।

গোলাম হোসেন- সম্ভবত শ্রীহট্টবাসী ছিলেন। শ্রীহট্ট সাহিত্য সংসদের এক পুথিতে এর কিছু গান সংকলিত আছে বলে জানা গেছে। ইনি আঠারো শতকের শেষপাদে কিংবা উনিশ শতকের প্রথম পাদে বর্তমান ছিলেন বলে অনুমান করি।

গরীব খান- পদের ভাব, ভাষা ও ভঙ্গি দেখে মনে হয় ইনি বাউল কবি। অতএব উনিশ শতকের কবি হওয়াই সম্ভব।

চম্পাগাজী- পদাবলী ও রাগতালনামা রচয়িতা চম্পাগাজীর নিবাস চট্টগ্রামের সতরপটুয়া গাঁয়ে। এখানে তাঁর বংশধরেরা আছেন এবং এ পরিবার আজো 'চম্পাগাজীর বাড়ি' নামে পরিচিত। চম্পাগাজী পণ্ডিত ও হাড়িদের সংগীত শিক্ষক ছিলেন। তাঁর রাগনামার এক ভণিতা থেকে তাঁর পিতার নাম জানা যায় :

'আব্দুল কাদির সূত চম্পাগাজী নাম' (পুথি পরিচিতি পৃঃ ৪৫২)

ইনিই সম্ভবত কাজী বদিউদ্দিনের বাঙালী শিক্ষক ছিলেন। কেননা সতরপটুয়া ও খিতাবচর পাশাপাশি গ্রাম, তখন হয়তো এক নামেই উভয় গ্রাম পরিচিত ছিল। এবং কবি চম্পাগাজী ও কাজী বদিউদ্দিন যে সমসাময়িক ছিলেন তা তাঁদের উত্তর পুরুষ পরস্পরের হিসাবেও প্রমাণিত হয়। একটি ভণিতা :

এক গৃহের দশ দুয়ার ধরিয়াছে মুখে

শ্রীমুখের ধ্যান কহিলাম সুখে।

শাহ সুলতান পদে মানি চম্পাগাজী কহে

লাহুতের ঢেউ পড়ে মাণিক্য পলায়।

চম্পাগাজী আঠারো শতকের শেষার্ধ্বে বর্তমান ছিলেন।

চাঁদ কাজী- এর 'বাঁশী বাজান জান না' পদটি খুব জনপ্রিয়। এর প্রকৃত পরিচয় অজ্ঞাত। তবে কেউ কেউ অনুমান করেন যে চৈতন্যদেবের সময়ে ইনি নদীয়ার কাজী ছিলেন। ইনি প্রথমে জনসাধারণের অভিযোগক্রমে চৈতন্যের নবধর্মের প্রতি বিরূপ ছিলেন, পরে চৈতন্যের মত প্রচারে বিশেষ আনুকূল্য দেখান। ডক্টর দীনেশচন্দ্র সেনের মতে নদীয়ার উক্ত কাজীর নাম ছিল গৌরাই কাজী- চাঁদ কাজী নয়। কিন্তু এখন আবার কেউ কেউ বলছেন, চাঁদ কাজীই নদীয়ার শাসনকর্তা এবং হোসেন শাহর পীর ছিলেন।

চামারু- চামারু পণ্ডিত নানা পুথির লিপিকর ছিলেন। এর লিপিকৃত সৈয়দ সুলতানের নবীবংশের একখানা পাণ্ডুলিপির নানা স্থানে চামারু নিজের নাম- ঠিকানা এবং ৩৩ ক পৃষ্ঠায় আদেষ্টার পরিচয় দিয়েছেন। ৭খ পৃষ্ঠায় লেখা রয়েছে 'লিখিত শ্রীচামারু পণ্ডিত সাং- ছুলতানপুর'।

লিপিকাল নেই: কিন্তু দেখে মনে হয় পুথিখানি দুই শ' বছরের পুরোনো। কাজেই চামারু (পণ্ডিত) যে আঠারো শতকের শেষার্ধ্বে বর্তমান ছিলেন, সে সম্বন্ধে আমরা নিঃসংশয়। মুকিম-উল্লেখিত 'চামু'ই চামারু কিনা বলা যায় না।

জীবন- পরিচয় অজ্ঞাত। ইনিও 'বানু হোসেন বাহরাম গোর' রচয়িতা মুহম্মদ জীবন অভিনু কিনা বলা যায় না। জীবন আলি পণ্ডিত নামে আর একজন পদকার [?] ছিলেন উনিশ শতকের শেষপাদে পটিয়ার খানমোহানগাঁয়ে।

তাহির মাহমুদ- এর নামও মুকিম পূর্ববর্তী কবি হিসাবে উল্লেখ করেছেন- 'ফাজিল নাসির, তাহির সকল।' অতএব, তাহির মাহমুদ সতেরো শতকে বা আঠারো শতকের গোড়ার দিকে বর্তমান ছিলেন। তাহির মাহমুদও রাগতালনামা রচনা করেছেন।

তুফানুদ্দিন- পরিচয় অজ্ঞাত।

দানিশ (কাজী)- ইনি রাগনামা ও পদাবলী রচয়িতা। গুলে বকাউলির কবি মুহম্মদ মুকিম একে জ্যেষ্ঠ সমসাময়িক কবি হিসেবে শ্রদ্ধা জানিয়েছেন :

'শ্রীযুত দানিশ কাজী পদ প্রণমিয়া।'

পদকার বক্সা আলী এর শিষ্য ছিলেন। অতএব, ইনি আঠারো শতকের শেষপাদের ও উনিশ শতকের প্রথমার্ধের কবি এবং চট্টগ্রামবাসী ছিলেন।

দুলামিয়া- পরিচয় অজ্ঞাত। সম্ভবত আঠারো শতকের কবি।

নওয়াজিস ঝান- এর বিস্তৃত পরিচয় প্রণয়ীপাখ্যান পরিচ্ছেদে রয়েছে।

নব বালক- পরিচয় অজ্ঞাত।

নজর মুহম্মদ- পরিচয় অজ্ঞাত।

নাসির মুহম্মদ- নাসির মুহম্মদ সম্ভবত ভিন্ন ব্যক্তি। তাঁর পদ দুটোর একটি পদকল্পতরুতে এবং অপরটি রমণীমোহন মল্লিকের 'মুসলমান বৈষ্ণব কবি'তে প্রথম সংকলিত হয়। বৈষ্ণবদাসের পদকল্পতরু আঠারো শতকের গোড়ার দিকে সংকলিত হয়। কাজেই নাসির মুহম্মদ ষোল কিংবা সতেরো শতকের লোক হবেন।

নাসির মুহম্মদ (ফাজিল)- নাসির মুহম্মদ ও ফাজিল নাসির একই ব্যক্তি। কবির পুরো নাম ফাজিল নাসির মুহম্মদ। নামটি দীর্ঘ হওয়ায় ইনি কখনো ফাজিল নাসির আবার কখনো নাসির মুহম্মদ বলে ভণিতা করেছেন। ইনি চট্টগ্রামের সুলতানপুর গ্রামের জমিদার ওয়াহিদ মুহম্মদ চৌধুরীর আদেশে ১৭২৭ খ্রীস্টাব্দে রাগনামা রচনা করেন। তাঁর গ্রন্থের নাম 'ধ্যাননামা' এবং রাগতালের বইয়ের মধ্যে তার ধ্যাননামা সর্বশ্রেষ্ঠ। কবির পীরের নাম জান মুহম্মদ :

সর্বশাস্ত্রে অবধান

রূপে নব পঞ্চবাণ

শ্রীযুত জান মোহম্মদ।

মান্যগুরু শিরোমণি

জ্ঞানের সমুদ্র জানি

পুন পুনি প্রণামি সে পদ।

আদেষ্টা পরিচিতি :

অধিক উত্তমস্থান সুলতানপুর
সেই রাজ্যের অধিপতি শ্রীমন্ত শ্রীমত
ওয়াহেদ মোহাম্মদ সর্বগুণযুত ।
শ্রীল শ্রীযুত ওয়াহিদ মোহাম্মদ
মুখশশী পারদ নির্মদ
আয়ু দীর্ঘ রোগনাশ পুর নর হাভিলাষ
শত্রু তান হোক পদতল ।
তাহান আদেশ পালি নিজ মনে অবকলি
ফাজিল নাসির মোহাম্মদ ।
বেয়াল্লিশ রাগের বাণী রঙ্গের প্রসঙ্গ জানি
'ধ্যানমালা' বিরচিত পদ ।

রচনাকাল :

ষষ্ঠ ঋত রাগ আদি সমাপ্ত হইল যদি
এবে কহি শাকের নির্ণয়
মঘীকৃত অক্ষ হএ শকাদ কতেক কহে
দিবা দণ্ড কহিমু নিচয়
মঘী সন পরিমাণি হাজার ন আশি জানি ।
শকাদ ঘোল শুনে চাশিশে ।
পৌষ মাস বহি গেল সংক্রান্তি দিবস ভেল
বিংশদণ্ড অনিবার দিবসে ।
অক্স যোহর সমে লেখা ভেল অনুক্রমে
সমাপ্ত হইল রাগমালা
পূর্ব সরা ধনু শশী তিথি কৃষ্ণ চতুর্দশী
সপ্তবিংশ জমাদিল আউয়ালা ।

অতএব, ১০৮৯ মঘী বা ১৬৪৯ শকে তথা ১৭২৭ খ্রীস্টাব্দে ইনি গ্রন্থ রচনা করেন ।
কাজেই ফাজিল নাসির মুহম্মদ আঠারো শতকের প্রথমার্ধে বর্তমান ছিলেন ।

নাসিরউদ্দিন (সৈয়দ)- 'সিরাজ সবিল' রচয়িতা সৈয়দ মুহম্মদ নাসির এবং 'বিসমিল্লার
বয়ান' রচয়িতা নাসিরউদ্দিন আর সৈয়দ নাসিরউদ্দিন অভিন্ন ব্যক্তি বলেই মনে হয় । সৈয়দ
নাসিরউদ্দিন ওহাবের শিষ্য হলে আঠারো শতকের শেষার্ধে বর্তমান ছিলেন ।

নাসির (এতিম)- আমরা নাসির মুহম্মদ ও ফাজিল নাসির মুহম্মদকে এক ব্যক্তি এবং
নাসিরউদ্দিনকে অপর কবি এবং নাসির মাহমুদকে ভিন্ন কবি বলে মনে করি আর এতিম নাসির
চতুর্থ কবি । কাজেই আমাদের ধারণায় নাসির চার জন । ঐর পীর ছিলেন শাহ আফজল । এই
শাহ আফজল সম্ভবত পদকার সৈয়দ আফজল ।

পীর মুহম্মদ- পরিচয় অজ্ঞাত । সম্ভবত আঠারো শতকের কবি ।

পোতন- পরিচয় অজ্ঞাত । পোতন ও পদকার ফতন আর ফতে খান অভিন্ন ব্যক্তি হওয়া
অসম্ভব নয় ।

ফকির ওয়াব- ‘বেনজির বদর-ই-মুনির’ ও ‘সিরাজ সবিল’ (পুথি পরিচিতি পৃঃ ৩৭৬ ও ৫৯৬) রচয়িতা সৈয়দ মুহম্মদ নাসির তাঁর সিরাজ সবিলে বলেছেন :

আব্দুল ওহাব পীর জ্ঞানের সাগর
যুগপদে তাহান প্রণামি বহুতর ।

ওহাব ফকির ও সৈয়দ মুহম্মদ নাসিরের পীর আব্দুল ওহাব সম্ভবত অভিন্ন ব্যক্তি । সৈয়দ মুহম্মদ নাসির এবং পদকার সৈয়দ নাসিরউদ্দিনও হয়তো অভিন্ন ব্যক্তি । অবশ্য নাসিরউদ্দিনের পীরের নাম ‘শাহ আবদুল্লাহ’ । ‘আবদুল ওহাব’ লিপিকর প্রমাদে আব্দুল্লাহ হওয়া অসম্ভব নয় । যা হোক সিরাজ সবিলের কবি সৈয়দ মুহম্মদ নাসির আলী রজার সিরাজ কুলুব গ্রন্থের নাম করেছেন :

সিরাজ কুলুব নামে কিতাব আছে
খন্নাসের বিবরণ লেখিয়ে আছে ।

এতে মনে হয় ইনি আলী রজার কনিষ্ঠ সমসাময়িক বা পরবর্তী কালের কবি ছিলেন । (জন্ম : ১৭৪৯- মৃঃ ১৮৭৩ খ্রীঃ) অতএব ফকির ওহাব ও তাঁর শিষ্য সৈয়দ মুহম্মদ নাসিরউদ্দিন উনিশ শতকের শেষার্ধের লোক ছিলেন বলে অনুমান করা যায় । ব্রজসুন্দর সান্যাল ওহাব ফকিরকে চট্টগ্রামের বোয়ালখালি থানার হাওলা (খরস্বীপ) বাসী বলে অনুমান করেছেন ।

ফকির ভোলা শাহ- সিলেটের ‘বালগঞ্জ’ থানার এক গাঁয়ে এর জন্ম । ইনি বাউল কবি । এর ‘খবর নিশান’ নামে গীতগ্রন্থ আছে । ইনি সম্ভবত উনিশ শতকের কবি ।

ফকির শাহ- পরিচয় অজ্ঞাত ।

ফকির হাবিব- পরিচয় অজ্ঞাত ।

ফতন- পরিচয় অজ্ঞাত । পদকার পোতন ও ফতে খান আর ফতন অভিন্ন ব্যক্তিও হতে পারেন ।

ফতে খান- ইনি যে নবীবংশ রচয়িতা পীর মীর সৈয়দ সুলতান (শাহর) এর মুরিদ ছিলেন, তা এর ভণিতাতেই প্রকাশ । অতএব ইনি ষোল শতকে কিংবা সত্তেরো শতকের প্রথমার্ধে বর্তমান ছিলেন । পোতন, ফতন ও ফতে খান অভিন্ন ব্যক্তি কিনা বলা যায় না ।

ফয়জুল্লাহ (মীর, মীর্জা, শেখ)- ‘নাথসাহিত্য’ পরিচ্ছেদে ঐর বিবৃত্ত পরিচিতি রয়েছে ।

বকসা আলী- বকসা আলী রাগতালের পুথিও রচনা করেছেন । একটি রাগমালায় তাঁর ভণিতার মধ্যে কিছু আত্মপরিচয় আছে :

১. দানেশ কাজীর পদ শিরেত বন্দিয়া
কহে হীন বকসা আলী পয়ার রচিয়া ।
২. কহে হীন বকসা আলী চট্টগ্রামে স্থিতি
আরব আলী চৌধুরী বেটা সায়ের মুহম্মদের নাতি ।
৩. কহে হীন বকসা আলী বেলমোড়িতে বাড়ী
পিতার নাম মোহাম্মদ আরব চৌধুরী ।

এ থেকে জানা যায় কবির নিবাস বেলমোড়ি গাঁয়ে । পিতার নাম মোহাম্মদ আরব আলী চৌধুরী, পিতামহের নাম শায়ের মুহম্মদ চৌধুরী এবং কবির পীর হচ্ছেন দানিশ কাজী । মুকিম

তাঁর গুলেবকাউলিতে দানিশ কাজীকে জ্যেষ্ঠ সমসাময়িক কবি বলে শ্রদ্ধা জানিয়েছেন : ‘শ্রীযুক্ত দানিশ কাজী পদ গ্রন্থমিয়া’ দানিশ কাজী রাগমালা ও পদাবলী রচনা করেছেন।

অতএব, বকসা আলী উনিশ শতকের শেষার্ধের কবি। কবি মুহম্মদ হারি জগৎ ও জীব সৃষ্টি বিষয়ক সৃষ্টি পতন ও ‘জৈতনের বারমাসী’ রচনা করেছিলেন। তাঁরও বকসা আলী নামে এক পুত্র ছিল। কিন্তু আলোচ্য বকসা আলী ভিন্ন ব্যক্তি।

বদিউদ্দিন (কাজী)- পদাবলী ছাড়াও ইনি কায়দানী কেতাব, ফাতেমার সুরতনামা ও সিয়ৎ-ই-ইমান নামে তিনখানা পুস্তিকা রচনা করেছিলেন। ‘ধর্মসাহিত্য’ পরিচ্ছেদে এর পরিচিতি রয়েছে।

বদিউজ্জামান- পরিচয় অজ্ঞাত।

বহরাম- পদকার বহরামের কোন পরিচয় পাওয়া যায়নি। আলি রজার জ্ঞানসাগরের ১৪৪ সংখ্যক পাণ্ডুলিপিতে তাঁর তিনটি পদ পাওয়া গেছে (পুথি পরিচিতি পৃঃ ১৬৭-৬৮)। এর সঙ্গে লায়লী-মজনু ও কারবালাকাহিনী রচয়িতা দৌলত উজির বাহরাম খানের কোন সম্পর্ক নেই বলেই আমাদের বিশ্বাস।

বোলন- পরিচয় অজ্ঞাত।

মহনজাত - পরিচয় অজ্ঞাত।

মনোহর, মনওয়ার, মনুরর, মনুসর- একই ব্যক্তি। উচ্চারণ বিকৃতির ফলেই নাম বিভিন্ন রূপ পেয়েছে। মনোহরের আর কোন পরিচয় জানা যায় না। এক শেখ মনোহর আঠারো শতকের শেষার্ধে শমশের গাজীনাма ও গীত রচনা করেছেন। তাঁর বাড়ী ছিল ফেনী অঞ্চলে। তিনিই আলোচ্য পদকার মনোহর কিনা বলবার উপায় নেই। পদকার মনোহর শাহ আইনুদ্দিনের শিষ্য ও পদকার আসাউদ্দিনের পীর ভাই ছিলেন।

মর্তুজা (সৈয়দ, গাজী, আলি)- পিতৃভূমি বেরিলী। পিতা সৈয়দ হাসানই সম্ভবত মুর্শিদাবাদের জঙ্গীপুর এলাকার বালিয়াঘাটাতে বসবাস করতে থাকেন। এখানেই তাঁর জন্ম হয় বলে লোকশ্রুতি আছে। আনন্দময়ী নামে এক ভৈরবী সাধিকা তাঁর সঙ্গিনী ছিলেন বলে তাঁদের উভয়কে নাকি ‘মর্তুজানন্দ’ বলা হত। মর্তুজার পীরের নাম সৈয়দ আব্দুল রাজ্জাক শাহ। মর্তুজা সাধক হিসেবে খ্যাত ছিলেন।

জঙ্গীপুরের কাছে সুতীর্গায়ে তাঁর দরগাহ আছে। এখানে আজো উরস হয়। গৌড়ের ফিরোজপুরের শাহ নিয়ামতুল্লাহ নাকি সৈয়দ মর্তুজার সমসাময়িক ও বন্ধু ছিলেন। ১৬৬৪ খ্রীস্টাব্দে নিয়ামতুল্লাহর মৃত্যু হয়। কাজেই সৈয়দ মর্তুজা সতেরো শতকের লোক ছিলেন বলে নিসংশয়ে অনুমান করা যায়। এদিকে সৈয়দ কাসিম শাহ ১১৫৫ হিজরীতে বা ১৭৪২-৪৩ খ্রীস্টাব্দে বালিয়াঘাটে এক মসজিদ তৈরি করেন। ইনি নাকি মর্তুজার পৌত্রী (কেউ কেউ বলেন কন্যা) আসিয়াকে বিয়ে করেন। এতেও সৈয়দ মর্তুজাকে সতেরো শতকে পাচ্ছি। মুফতী গোলাম হোসেন সরওয়ার লাহোরী ‘খজীনা তুল আফসিয়া’ এছে সৈয়দ মর্তুজার পরিচিতি আছে। তাতে মর্তুজাকে গজল গায়ক দরবেশ বলে উল্লেখ করা হয়েছে। এ কারণেই সৈয়দ মর্তুজার নামের সঙ্গে ‘আনন্দ’ যুক্ত হয়েছে বলে কারুর কারুর ধারণা। তিনি বাঙলা পদ রচনায় যুগের রেওয়াজ মতো রাধাকৃষ্ণ রূপক গ্রহণ করেছেন, কিন্তু তাঁর ফারসি গজলে তা নেই।

আলোচ্য বালিয়াঘাটাবাসী মর্তুজা ও চট্টগ্রামের পুথিতে পাওয়া পদাবলীর রচয়িতা মর্তুজা অভিন্ন ব্যক্তি কিনা বলা যায় না। চট্টগ্রামের পাওয়া পদের একটিতে মর্তুজা আলি, অপর একটিতে মর্তুজা গাজী ভণিতা পাওয়া গেছে। সৈয়দ মর্তুজা 'যোগ কলন্দর' রচনা করেননি, একখানি যোগ কলন্দরের শেষ পত্রে পাওয়া—

বাপে দিল জনমখানি মায় দিল ক্ষীর
সৈয়দ মর্তুজা কহে জনমের ফকির।

ভণিতাটি আসলে একটি পদের ভণিতা, যোগকলন্দরের নয়।^১

(পুথি পরিচিতি পৃঃ ৪৩৭, ৪৬৪)

মানিক দাস— পরিচয় অজ্ঞাত। নাম দেখে মনে হয় তিনি হিন্দু, কিন্তু পদ দেখে মনে হয় মুসলমান। মুসলমানের আজও 'মানিক মিয়া' নাম রাখা হয়।

মীর্জা কান্দালী— পদকার মীর্জা কান্দালীর কোন পরিচয় জানা যায়নি। কুলবাচী সাদৃশ্যে ব্রজসুন্দর সান্যাল কান্দালী ও ফয়জুল্লার অভিন্ন ব্যক্তিত্ব কল্পনার প্রবণতা দেখিয়েছেন। কিন্তু এরা যে দুই ভিন্ন কবি সে সম্বন্ধে আমাদের অনুমাত্র সন্দেহও নেই।

মোহন আলী বা মোহসেন আলী— আফজল আলীর নসিয়তনামার লিপিকরের নামও মোহন আলি। 'মোকাম মঞ্জিলের কথা' রচয়িতা মোহসেন আলীর গুরু ছিলেন শাহ্ মইনুদ্দীন—

শাহ্ মইনুদ্দীন গুরু জানেক শইরী।
কহে হীন মোহসেন আলী গুরু পদ স্মরি।

(পুথি পরিচিতি ৪৩৭-৮)

নসিয়তনামায় লিপিকরের পুস্পিকা এরূপ :

এই পুস্তক লিখিলাম মোহন আলী হীন।

সাল হৈল ২৪ চব্বিশ মঘীর ১ আশ্বিন দিনে। হরফ দেখে ১২২৪ মঘী বলেই অনুমান করতে হয়। এই মোহসেন আলীই যদি পদকার হন; তাহলে তিনি উনিশ শতকের প্রথমার্ধে বর্তমান ছিলেন। আমাদের ধারণা লিপিকর, পদকার ও মোকাম মঞ্জিলের কথা রচয়িতা অভিন্ন ব্যক্তি।

মুহম্মদ— পরিচয় অজ্ঞাত।

মোমতাজ— পরিচয় অজ্ঞাত। 'মোমতাজ' কবি 'মহনতাজ' নামের বিকৃতি কিনা বলবার উপায় নেই।

^১ সৈয়দ মর্তুজা সম্বন্ধে বিভিন্ন মতের আলোচনা পাওয়া যাবে নিম্নোক্ত রচনাগুলোতে :

ক. সুখা-১ম বর্ষ, ৪র্থ সংখ্যা (মাঘ) নিখিলনাথ রায়ের প্রবন্ধ।

খ. Journal of the Asiatic Society of Bengal - 1924

গ. মুসলমান বৈষ্ণব কবি- ১ম খণ্ড ব্রজসুন্দর সান্যাল।

ঘ. পদকল্পতরু- ৫ম খণ্ড সতীশচন্দ্র রায়।

ঙ. বৈষ্ণবভাবাপন্ন মুসলমান কবি- যতীন্দ্রমোহন ভট্টাচার্য।

চ. মুসলিম বাঙলা সাহিত্য- ড. মুহম্মদ এনামুল হক।

ছ. খজীনাতুল আফসিয়া- মুফতী গোলাম হোসেন সরওয়ার লাহোরী।

মুহম্মদ আলী- ইনি হায়রাতুল ফিকাহ এবং শাহপরী-মল্লিকাজাদ ও হাসনাবানু নামে দু'খানা উপাখ্যান রচনা করেন। 'হায়রাতুল ফিকাহ'তে কবির আত্মপরিচয় আছে প্রণয়োপাখ্যান ও ধর্মসাহিত্য অধ্যায়ে এর পরিচিতি রয়েছে।

মুহম্মদ আলি রজা (অধীন রজা, পদের ক্রমিক সংখ্যা : ৯৫) এর পুরো নাম মুহম্মদ আলি রজা। নিবাস ছিল ফটিকছড়ি থানার বখতপুর গ্রামে। ইনি 'তমিম গোলাল চৈতন্য ছিলাল', ও 'মিশরীজামাল' নামে দু'খানি উপাখ্যান রচনা করেন। প্রণয়োপাখ্যান অধ্যায়ে এর পরিচিতি রয়েছে। ইনিও উনিশ শতকের প্রথমার্ধের কবি।

মোহাম্মদ পরাগ- এই পরাগ কায়দানী কেতাব, নূরনামা রচয়িতা ও শেখ মুতালিবের পিতা সীতাকুণ্ডবাসী শেখ পরাগ নন। মোহাম্মদ পরাগ রাগনামা রচয়িতা। এছাড়া তাঁর আর কোন পরিচয় পাওয়া যায় না :

ছান্দন করিয়া তারে দিয়া মৃত চর্ম।
মাটির দবর বানাই করিলেক মর্ম।
অনলে পুড়িয়া তারে করিল নির্মাণ
গুরু গুরু বলিয়া দরবে দিল সান।
ছান্দন করিল তারে দিয়া মৃত চর্ম।
আনন্দে তুলিয়া লৈলুম বাহিত্তে যে মর্ম।
মোহাম্মদ পরাগে কহে স্মৃতিতে ভাবিয়া
হয় কি না হয় চাহ শক্তি বিচারিয়া।

(পুষ্টি পরিচিতি পৃঃ ৪৫০-১৬)

মুহম্মদ হাসেম বা হাসিম- চট্টগ্রামের পটিয়া থানার শ্রীমতি বা শ্রীমাই গ্রামে এর জন্ম। সাধারণ্যে ইনি হাসিম পণ্ডিত নামে পরিচিত ছিলেন। হাসিম উনিশ শতকের প্রথমার্ধে জীবিত ছিলেন। এর পুত্র আলি মিয়াও কবি ছিলেন। অপরিণত বয়সে এর মৃত্যু হয়। আমাদের পদকার আলি মিয়া ভিন্ন ব্যক্তি।

মুহম্মদ হানিফ- পরিচয় অজ্ঞাত।

রজব আলী- পরিচয় অজ্ঞাত।

রেয়াছক বা রেয়াস খাঁ- 'রেয়াছক' সম্ভবত রেয়াস খাঁর বিকৃতি। যেমন 'গেয়াস খাঁ-র বিকৃতি 'গ আছক' মুকিমের গুলেবকাউলিতে দেখা যায়। (পুষ্টি পরিচিতি : পৃঃ ১০১)।

লাল বেগ- পরিচয় অজ্ঞাত।

শমসের- এক শমসের আলীকে 'গুল ও হরমুজ' ও অসমাপ্ত রেজওয়ান শাহ (পরে আসমান সমাপ্তি দান করেন) উপাখ্যান রচয়িতা বলে জানি। শমসের আলী সত্তেরো শতকের শেষ পাদে কিংবা আঠারো শতকের প্রথম পাদে বর্তমান ছিলেন। পদকার শমসের ও উপাখ্যান রচয়িতা শমসের আলী অভিন্ন কিনা বলবার উপায় নেই।

শেখ চান্দ- পদটি সের চান্দের ভণিতা পাওয়া যায়। সের চান্দ সম্ভবত লিপিকর প্রমাদজাত বিকৃতি। শেখ চান্দ সাধক পীর শাহদৌলার সাগরেদ এবং নিজেও সাধক ছিলেন। চরিত্রসাহিত্য পরিচ্ছেদে এর পরিচিতি রয়েছে।

শেখ ভিকন— পরিচয় অজ্ঞাত। কারো কারো মতে ইনি মাগনঠাকুরের ভাই বা জ্ঞাত।

শেখ লাল— পরিচয় অজ্ঞাত। পদকার ‘লাল বেগ’ বোধ হয় ভিন্ন ব্যক্তি।

সফরুজুদ্দাহ— কবি আলী রজার পুত্র। নিবাসও ওশখাইন। পিতার কাছেই মুরিদ হন। ১৮৮০ খ্রীস্টাব্দের দিকে প্রায় আশী বছর বয়সে মৃত্যু বলে প্রকাশ।

সাল বেগ বা সালেহ বেগ— ইনি উড়িষ্যাবাসী ছিলেন। ‘দার্যভক্তি’ গ্রন্থে এর পরিচিতি আছে। মুসলমান সেনাধ্যক্ষের ঔরসে ও হিন্দু বিধবার গর্ভে এর জন্ম। ইনি বৈষ্ণব ছিলেন বলে লোক-শ্রুতি আছে। মিথিলায় বিদ্যাপতি যেমন বাঙলারও কবি, উড়িষ্যার সালেহ বেগও তেমনি বাঙলার বৈষ্ণব কবির অন্যতম বলে স্বীকৃত।

সিরতাজ বা সেরতাজ— পরিচয় অজ্ঞাত।

সুন্দর ফকির— চট্টগ্রামের প্রখ্যাত পীর দরবেশের নাম করতে গিয়ে মুকিম গুলে বকাউলিতে সুন্দর ফকিরের নামোল্লেখ করেছেন :

শাহ জাহিদ, শাহ পন্ডি আর শাহপীর
হাদি বাদশা আর শাহ সুন্দর ফকির।

অতএব, সুন্দর ফকির ষোল-সতেরো শতকের লোক।

সেরবাজ— শেখ সেরবাজ চৌধুরী মন্সির হাজার সওয়াল বা ফক্করনামা, কাসেমের লড়াই ও ফাতেমার সুরতনামা রচয়িতা। পদকার সেরবাজ ও ইনি অভিন্ন ব্যক্তি। তাঁর পীর ছিলেন বদিউদ্দিন, ওস্তাদ ছিলেন হাসান গুজ্রাফি এবং ফক্করনামা রচনায় আদেষ্ঠা ছিলেন সৈয়দ বায়েজিদ। সেরবাজ আঠারো শতকের কবি।

সৈয়দ সুলতান— ইনি মধ্যযুগের বাঙলা সাহিত্যে একজন কবিগুরু। ‘চরিত শাখায়’ পরিচিতি দ্রষ্টব্য।

হাসমত আলী— ইনি কমরুচ রাজা ফুগফুর শাহ তথা মলয়া-মাহমুদ নামের উপাখ্যান রচয়িতা। কাব্যে রাণী ভিক্টোরিয়ার উল্লেখ আছে। অতএব ১৮৫৮ খ্রীস্টাব্দের পরে কোন সময়ে এ উপাখ্যান রচিত হয়। চট্টগ্রামের ফটিকছড়ি থানার ভোজপুর গ্রামে এক জমিদার পরিবারে কবির জন্ম হয়। ইনি আলেফ লায়লার অনুবাদ করেছিলেন বলেও শোনা যায়।

হযরত— পরিচয় অজ্ঞাত। এটি পদকারের নাম কিনা তাও নিঃসংশয়ে বলা যায় না।

আবদুল ওহাব— (রাগমালা সতীময়না রচয়িতা)

‘পিতা মম তমিজউদ্দিন প্রকাশ সারাং ...

নিবাস ওয়াহেদপুর থানা মীরেরসরাই

সম্ভবত উনিশ শতকের শেষার্ধের লোক। তাঁর একটি পদ (রাগমালা সতী ময়না পৃঃ ৬০):

দারুন নিষ্ঠুর কালা সর্বলোকে বলে ভাল

মুখে মায়া আঁখি পালটিয়া

শাশুড়ীর বিড়ম্বনে ননদীর পূর্বছলে

সখিসবে করে কানাকানি

পাড়াপড়শী লোকে কুবচন বলে মোকে
 হইল রাধের দু'কূল হানি ।
 যতেক গোকুল নারী করে আঁখি ঠারাঠারি
 সবে বলে রাধে কলঙ্কিনী
 আর ও না সহ্যে প্রাণি ।
 গরল ভক্ষিযু নিশ্চয় মরিযু
 অভাগিনী ।
 আবদুল ওহাবে কহে এমত উচিত নহে
 বৈরী সবে কি করিতে পারে
 যারে বন্ধু দয়া করে কিসের ভাবনা তারে
 এক দৃষ্টে সদায় হেরে যারে ।^১

AMARBOI.COM

^১ সংকলিত পদাবলীর ও পদকারদের বিত্তত পরিচয়ের জন্যে আমার 'মুসলিম কবির পদসাহিত্য' গ্রন্থ দ্রষ্টব্য ।

চট্টগ্রামের হিন্দু কবির পদ-সাহিত্য

১.

‘রাগনামা’ ও ‘তালনামা’ গুলোতে অজ্ঞাত কিংবা স্বল্পজ্ঞাত হিন্দু পদকারের পদও পেয়েছিলাম।

এসব পদের কোন কোনটি আবদুল করিম সাহিত্যবিশারদ বিভিন্ন পত্রপত্রিকায় ছাপিয়ে দিয়েছিলেন। সে-সব পদের ঢাকায় বসে খোঁজ নেয়া যেমন দুষ্কর, সন্ধান পাওয়াও তেমনি দুঃসাধ্য। এজন্যে আমরা সব পদ একত্রে প্রকাশ করছি। এ পদগুলো তেত্রিশখানি ‘রাগ-তালনামা’ থেকে সংগৃহীত। সুপরিচিত পদকারদের মধ্যে বিদ্যাপতি, চণ্ডীদাস, জ্ঞানদাস ও গোবিন্দদাসের কয়েকটি করে পদ পুথিগুলোতে কৃষ্টিং পাওয়া যায়।^১ আমাদের সংকলিত পদাবলীর কবিদের কোন পরিচয় জানারও উপায় আপাতত নেই। প্রচলিত পদাবলীর সংকলন গ্রন্থগুলোতেও তাঁদের কারুর পদ বিধৃত হয়নি। এজন্যেই মনে হয়, তারা সবাই বাঙলার প্রত্যন্ত অঞ্চলের ও একদা আরাকান রাজ্যের অন্তর্গত চট্টগ্রামেরই অধিবাসী।

চট্টগ্রামের পদকারদের মধ্যে মহিলাকবি শ্রীবরের ঝি (দুহিতা) এবং হীরামণিও আছেন। পুরুষ কবিরা হচ্ছেন :

দ্বিজ রঘুনাথ, গোবিন্দ বল্লভ, শ্যামদাস, জয়রাম দাস, নট ঘনশ্যাম, শিবরাম দাস, দ্বিজ জানকীনাথ, দ্বিজ কুমুদ, কানুদাস, দ্বিজ পার্বতী দীপ (দ্বিজ) ভবানন্দ, উদয়াদিত্য, প্রতাপাদিত্য, নন্দলাল রায়, (পাগল) শঙ্কর, শিবচরণ দাস, কৃষ্ণদেব দাস, মর্কট বল্লভ, দ্বিজমাধব, মোহন দাস, হীরামণি, শ্রীবরের ঝি [হীরামণি], দ্বিজ রামগোপাল, নটহি দাস, রাধাবল্লভ, হরিদাস, বংশীবদন, দীনবন্ধু, নট ভুঁইয়া, মিত্র, চাঁদরায়, নবচন্দ্র দাস, বাসুদেব, নিত্যানন্দ ও দ্বিজ গদাধর। আর ‘সারদামঙ্গল’ (১৭৪৭ খ্রীঃ) রচয়িতা শাক্ত কবি মুক্তারাম সেনের দুটো, দ্বিজ রামগোপালের একটি এবং মাধবানন্দের একটি শাক্ত পদও মিলেছে।

পাঁচজন হিন্দু কবি ‘রাগতাল’ বিষয়ক গ্রন্থও রচনা করেছিলেন, তাঁরা হচ্ছেন— দ্বিজ রামতনু, দ্বিজ ভবানন্দ তনু, দ্বিজ রঘুনাথ, দ্বিজ রামগোপাল ও দ্বিজ পঞ্চানন। তাঁদের পূর্ণাঙ্গ গ্রন্থ পাওয়া যায়নি। কিন্তু তাদের রচনাংশ রাগ-তালনামায় সংকলিত রয়েছে।

২.

তত্ত্ববিদের চোখে যা-ই হোক, সাধারণের অনুভবে কামে ও প্রেমে পার্থক্য সামান্য এবং বিজ্ঞানীর চোখে নিরেট জৈবিক বৃত্তি। কৈশোর থেকে প্রৌঢ় বয়স অবধি মানুষ মাত্রেরই হৃদয়ে কাম-প্রেমের লঘু-গুরু লীলা চালু থাকে। কাজেই কাম মানুষের প্রবলতম বৃত্তি। সে বৃত্তি অভিব্যক্তি পায় প্রেমরূপে এবং কখনো কখনো সুহে, প্রীতি ও ভক্তিরূপে। সবার চেতনায় প্রেমের প্রভাব থাকলেও সবার জীবনে প্রেম প্রকাশ ও বিকাশ পায় না। অবদমিত ও অবচেতন বাঙ্খা তখন পরোক্ষ উপায় খোঁজে উপভোগের। শৃঙ্গার তথা রতিরস তাই কর্ম ও কলার মুখ্য

^১ ‘পুথি পরিচিতি’ আবদুল করিম সাহিত্যবিশারদ : ঢাকা বিশ্ববিদ্যালয়, দ্রষ্টব্য।

অবলম্বন হয়েছে। এ কারণেই আদি মানুষের সমাজে Art ও Ritual ছিল অভিন্ন। অন্ন ও আনন্দ-প্রয়াস, কর্ম ও ধর্মসাধনা এক ধারায় ছিল একাকার। রাগ-বিরাগের ক্রিয়া-প্রতিক্রিয়ার গতি পেয়েছে জীবন।

আদি কৃষিজীবী সমাজে মৈথুন ছিল ফসল উৎপাদনে প্রতীক ও সহায়। পৃথিবীর বিভিন্ন অনুন্নত সমাজে আজো তা অবিলুপ্ত— এ দেশের ধর্মগ্রন্থেই রয়েছে এ তত্ত্ব— বাজসনৈয়ি-সংহিতায়, ব্রাহ্মণে, বৃহদারণ্যকে, মহাভারতে ও ছান্দোগ্যে। এ-তত্ত্বের ক্রমবিকাশে পাই সাংখ্য, যোগ ও তন্ত্র এবং সহজিয়া, বাউল, শৈব, শাক্ত, বৈষ্ণব, গাণপত্য, লিঙ্গায়ত প্রভৃতি ধর্মসম্প্রদায়। অতএব দেবতত্ত্বের ও মানবমনের বিকাশ ধারায় রূপের ও রতিবোধের দান গভীর ও ব্যাপক।

শিল্প-সাহিত্যের সব শাখাই রূপ ও রতিভিত্তিক। অন্য কথায় রূপ ও রতি একাধারে কারণ ও কার্য এবং বীজ ও ফসল। এ দৃষ্টিতে রূপ ও রতির অনুধ্যানেরই প্রসূন মানুষের সংস্কৃতি ও সভ্যতা।

চিত্র ও মূর্তিশিল্প,— ভাস্কর্য ও স্থাপত্যশিল্প, নাচ ও গান, কবিতা ও গাথা, ধর্ম ও দর্শন, রূপকথা ও উপন্যাস সবকিছুই ক্রমবিকাশ লাভ করেছে রূপ-রতি ভিত্তি করেই। বলতে গেলে মানুষের জীবনধারায় থাকে কাম-প্রেমেরই বিচিত্র বিকাশ। এর প্রকাশ প্রতিবেশ-নির্ভর। সেজন্যে এর অভিব্যক্তি ও বিকাশ সরল ও একরঙা হয়নি। জীবনপ্রবাহ ঋণাধারার মতোই উপল ও বাঁক মেনে চলে তাই জীবনে আসে বৈচিত্র্য, বিকৃতি ও বক্রতা।

জগতের শ্রেষ্ঠ চিত্র, মূর্তি সাহিত্য, নৃত্য ও সঙ্গীত— তাই প্রেম প্রতীক। এমন কি, বহু ধর্ম আর দর্শনও প্রেমবাদী।

পৃথিবীব্যাপী আদি সমাজে মানুষের মনে ও মননে, কর্মে ও ধর্মে, শৃঙ্গারই প্রাধান্য পেয়েছে। শৃঙ্গারের নামও তাই আদিরস। সভ্যতা ও সংস্কৃতির এক বিশেষ স্তরে জীবনের ক্ষেত্রে এ আদিরসের বিচিত্র ও বহুধা প্রভাব স্বীকার করে ধন্য হয়েছে মানুষ, ধন্য করেছে দেবতাদের। গ্রীক ও হিন্দু পুরাণ তার সাক্ষ্য।

৩.

পরকীয়াতেই প্রেমের স্কৃতি। তবু সমাজ-বিকাশের বিশেষ স্তরে সমাজ শৃঙ্খলা রক্ষার জন্যে দাম্পত্যপ্রেমকেই আদর্শ ও মহিমান্বিত করার প্রয়াস চলল। এই নৈতিক চেতনার যুগেই আমাদের দেশে হর-গৌরী, ইন্দ্র-শচী, রাম-সীতা, বিষ্ণু-লক্ষ্মী প্রমুখের দাম্পত্য প্রেমের মহিমা কীর্তনচলে নিজের প্রণয়াকতি প্রকাশ করেছে মানুষ। কিন্তু এই কৃত্রিম প্রয়াসে মানুষের তৃষ্ণা মেটেনি, ভরে ওঠেনি তার বুক। তাই আবার পরকীয়া রসে সিক্ত হয়েই প্রস্ফুটিত হল তার চিত্ত-উৎপল। এই রসেই তার হৃৎ-কমলে সঞ্চিত হল মধু, সৃষ্টি হল আত্মার আনন্দলোক। এভাবে নর-নারীর পরকীয়া প্রেম হল মহিমান্বিত। মানুষের অবদমিত ও অবচেতন বাঞ্ছা-অপূর্ণতার আকৃতি গানে, গাথায়, গল্পে, কবিতায়, উপন্যাসে, চিত্রে, নৃত্যে, প্রতিমায়, অধ্যাত্ম-জিজ্ঞাসায় আজো অভিব্যক্তি পাচ্ছে বিচিত্র ও বর্ণালি হয়ে।

ইউসুফ-জোলেখা, লায়লী-মজনু, শিরি-ফরহাদ, কৃষ্ণ-নাগিনাই বা রাধাকৃষ্ণ এ প্রেম প্রকাশের আদর্শ এবং বিকাশের অবলম্বন হয়ে প্রায় দেড় হাজার বছর ধরে মানুষের মনের

আকুতি মিটিয়েছে। সমাজ-কলেবর বৃদ্ধির সাথে সাথে নৈতিক চেতনা যতই প্রবল হয়েছে, ততই সূক্ষ্ম অনুভবের স্তরে উন্নীত হয়েছে স্থূল প্রয়োজন, বাস্তব চাহিদা পেয়েছে মানসোপভোগে চরিতার্থতা। তাই বাস্তব জীবনে যা পাপ (sin), যা নৈতিক দোষ (vice) ও সামাজিক অপরাধ (crime) এবং সেহেতু ঘৃণ্য ও পরিহার্য, (ভাবলোকে তা-ই আত্মার উল্লাস জাগায়। এ কেবল জীবনে আনন্দানুভবের উৎস হয়ে থাকেনি, পারত্রিক সুখ-স্বপ্নেরও আধার হয়েছে।

দেহে রূপ, রূপে কাম, কামে প্রেম আর প্রেমেই আত্মার মুক্তি। সূফী-বৈষ্ণবের এ ধারণা একদিনে গড়ে ওঠেনি। মানুষ অভিজ্ঞতা দিয়ে বুঝেছে চাওয়া ও পাওয়ার মধ্যে ব্যবধান থাকে বিস্তর বাধা থাকে দুর্লভ্য। বাঞ্ছিত বস্তু মাঝেই দুর্লভ ও দুঃসাধ্য। অথবা দুর্লভ না হলে কিছু বাঞ্ছনীয় হয় না। কাজেই তার জন্যে দীর্ঘ দিনের প্রতীতি ও প্রয়াস প্রয়োজন। ধৈর্য ও অধ্যবসায়ই এ সাধনার সম্বল, হৃদয়ে দাহ ও চোখে অশ্রু প্রেমিকের নিয়তি, আর মিলনাকাজক্ষা তথা বিরহবোধই তার প্রেরণা ও সামর্থ্যের উৎস। এজন্যে পৃথিবীর শ্রেষ্ঠ সাহিত্য বিরহী আত্মার কান্নায় করুণ।

৪.

এই রূপ ও রতি, কাম ও প্রেমবাঞ্ছা অভিব্যক্তি পেয়েছে রাধা-কৃষ্ণ বিষয়ক পদাবলীতে। চৈতন্য-পূর্ব যুগে এগুলোতে অধ্যাত্ম তত্ত্ব ছিল না। এ দৈহিক প্রেম ঐহিক জীবনে আনন্দিত স্বপ্ন জাগানোতেই ছিল সীমিত। চৈতন্যের প্রেমধর্ম প্রচারিত হওয়ার পরে এ সঙ্গীত পারত্রিক ত্রাণের অবলম্বন হল। তখন অপ্রাকৃত হৃৎবল্লবীর জীবাত্মা-রূপিনী রাধার ও পরমাত্মারূপী কৃষ্ণের প্রণয়লীলার অনুধ্যান ও আশ্বাদনই এর অপার্থিব মহৎ ও পরম লক্ষ্য হয়ে দাঁড়াল। এভাবে প্রেমকে তত্ত্বের অনুগত করে রাধা-কৃষ্ণের অবৈধ প্রেমকে করা হল মহিমাম্বিত ও অনন্য। চৈতন্য-পূর্ব যুগে গোটা ভারতব্যাপী যা ছিল শৃঙ্গার রস উপভোগের বাহন, চৈতন্যোত্তরকালে তা-ই হল অধ্যাত্ম রসের আকর।

জয়দেব, বিদ্যাপতি ও বড় চণ্ডীদাসের পদাবলী ছিল শারীর প্রেমের আকুতিমুখর। বৈষ্ণবভক্তের চোখে পাদকারেরা হলেন মহাজন ও গৌস্বামী : এর পদাবলী হল সাধনশাস্ত্র ও ভজনগীতি। তারপরে চৈতন্যোত্তর যুগের রাধা-কৃষ্ণ বিষয়ক প্রায় সব সঙ্গীতই অধ্যাত্ম রসান্বিত।

যদিও জাতি-ধর্ম-বর্ণ নির্বিশেষে ভারতবাসীরা রাধা-কৃষ্ণ, রাম-সীতা কিংবা হরগৌরী বিষয়ক পদ অভিন্ন লক্ষ্যে রচনা ও আশ্বাদন করেছেন, তবু তত্ত্বগত পার্থক্য যে ছিল না, তা নয়, কেবল দ্বৈতাদ্বৈতবাদে নয়, ভক্তি আর প্রেমতত্ত্বেও ছিল তফাৎ। দ্বিজ চণ্ডীদাস, জ্ঞানদাস, গোবিন্দদাস, দীন চণ্ডীদাস, মীরাবাই, তুলসীদাস, আবদুর রহিম খানখানান, দাদু, এয়ারী, দরিয়া, রজব, তাজ বেগম, আহমদ, রসখান কিংবা চাঁদ কাজী, সৈয়দ সুলতান, আলাওল, সৈয়দ মুর্তাজা, আলি রজা, মীর ফয়জুল্লাহ প্রমুখের পদের আধ্যাত্মিক তাৎপর্য তাই অভিন্ন নয়।

৫.

আরো একটি বিষয় লক্ষণীয়। চৈতন্যদেব বাঙালী এবং ষোল শতকের ধর্ম ও সমাজ-সংস্কারক গণ-নেতা। হয়তো বাঙলাদেশে থাকেননি বলেই বাঙলায় বৈষ্ণবধর্মের বিস্তার আশানুরূপ

হয়নি। কিন্তু তাঁর প্রেমবাদ, তাঁর সাম্যের, প্রীতির ও করুণার বাণী, তাঁর উদার মানবতাবোধ বাঙালীকে গভীরভাবে প্রভাবিত করেছিল। গৌতমবুদ্ধের ও ইসলামের বাণীর ঐতিহ্য তাঁর মাধ্যমে নতুন করে পেয়ে বাঙালীর চিন্তা সজ্জীবিত হল। এ জন্যে ষোল শতক বাঙালীর চিত্র-প্রকর্ষের কাল-রেনেসাঁসের যুগ। আশ্চর্য, তবু ষোল-সতেরো শতকে পদাবলী রচয়িতা বাংলাদেশের সর্বত্র মেলে না। এই সময়কার প্রায় সব বৈষ্ণব কবিই পশ্চিমবঙ্গে তথা প্রেসিডেন্সী ও বর্ধমান বিভাগের।

কিন্তু এক রকম আকস্মিকভাবে আমরা ষোল শতকের শেষপাদে আরাকান রাজ্যভুক্ত চট্টগ্রামে এবং সতেরো শতকের শেষার্ধ্বে ও আঠারো শতকে মুঘল সাম্রাজ্যভুক্ত চট্টগ্রামে হিন্দু-মুসলিম বহু পদকার পাচ্ছি। এই স্থানিক জনপ্রিয়তার ঋজু কারণ দুর্লভ্য। একটি চৈতন্য-পার্বদ চট্টগ্রামবাসী পুণ্ডরীক বিদ্যানিধি, মুকুন্দ ও বাসুদেব দত্তের প্রভাবের ফল!

আমরা দেখছি, রাষ্ট্রিক বিচ্ছিন্নতা সত্ত্বেও সাহিত্যের ও সংস্কৃতির ক্ষেত্রে চট্টগ্রামে বাংলাদেশের তথা উত্তর ভারতের সঙ্গে ঘনিষ্ঠযোগ রক্ষা করে চলেছিল। মধ্যযুগের বাঙলা সাহিত্যে মুসলমানের রচনা বলতে প্রায় সবটাই তো চট্টগ্রামেরই দান, এমনকি, বাংলাদেশের যে-কোন অঞ্চলের হিন্দুর চাইতে চট্টগ্রামের হিন্দুর দানও কম নয়। হয়তো আন্তর্জাতিক বন্দর এলাকার লোক বলেই সাহিত্য, সংস্কৃতি ও বাণিজ্যের ক্ষেত্রে যুগের আহ্বানে তারা সহজেই সাড়া দিতে পেরেছিল।

মধ্যযুগের চট্টগ্রামী হিন্দু কবিদের মধ্যে ষোল শতকে পাচ্ছি চট্টগ্রামে প্রবাসী কবীন্দ্র পরমেশ্বরকে ও শ্রীকরনন্দীকে। এঁরাই বাঙালী মহাভারতের প্রথম অনুবাদক। সতেরো শতকে পাচ্ছি মৃগলুক প্রভৃতি রচয়িতা দ্বিজ রত্নদেবকে ও লক্ষণ দ্বিজয়ের কবি দ্বিজ ভবানীনাথকে। আর আঠারো শতকে পাই 'সারদামঙ্গল' প্রণেতা মুক্তারাম সেন, মার্কেণ্ডে চণ্ডী মাহাত্ম্য লেখক ব্রজলাল সেন (ইনি মুক্তারামের ভাই), কালিকামঙ্গল রচক নিধিরাম আচার্য ও গোবিন্দদাস, মনসার ভাসান প্রণেতা রামজীবন বিদ্যাতৃষণ, মৃগলুকসম্বাদ রচক রামরাজা, গোকুলমঙ্গল লেখক ভক্তরামদাস, সত্যনারায়ণ পাঁচালী রচক ফকির চাঁদ প্রমুখ ছাড়াও শঙ্করদাস, শঙ্কর ভট্ট, বলরাম দেব, রামতনু আচার্য, সদানন্দ ভট্ট প্রমুখকে।

সবচেয়ে উল্লেখ্য বিষয় হচ্ছে আঠারো শতক থেকে বাঙালী হিন্দুরাও প্রণয়োপাখ্যান রচনা শুরু করেন। এবং 'চন্দ্রাবলী' রচয়িতা দ্বিজ পত্নপতি ব্যতীত সবাই চট্টগ্রামবাসী। কাজেই এক্ষেত্রে পথিকৃতের গৌরব এঁদেরই। আজ অবধি আমরা আঠারো শতকের রামজীবন দাসের 'শশিচন্দ্রের উপাখ্যান', সুশীল মিশ্রের 'রূপবতী রূপবান উপাখ্যান', বাণীরাম-এর 'শীত বসন্ত', গোপীনাথ দাসের 'মনোহর মধুমালতী' এবং উনিশ শতকের কবি মহেশচন্দ্র দাস চৌধুরীর 'সয়ফুলমল্লুক জরুখভান' পেয়েছি। [প্রণয়োপাখ্যান অধ্যায় দ্রষ্টব্য]

৬.

আমাদের সংকলিত পদগুলোর বহিঃরূপ বৈষ্ণব পদাবলীর মতো হলেও অনেক পদেই বৈষ্ণবীয় ভাব-সত্যের অভাব লক্ষণীয়। এমন কি, ভণিতাগুলোও অনেক ক্ষেত্রে মহাজন-পদাবলীসুলভ নয়, বরং মুসলিম-রচিত পদের মতোই। এ-ও হয়তো আঞ্চলিক বিচ্ছিন্নতার ফল। মধ্যযুগে

আঞ্চলিক বিচ্ছিন্নতা বাঙলা সাহিত্যের বিভিন্ন শাখার সর্বাঞ্চলিক বিকাশের বাধা হয়ে দাঁড়িয়েছিল। এজন্যে চণ্ডীমঙ্গল ও ধর্মমঙ্গলের উদ্ভব ও বিকাশ কেবল রাঢ় অঞ্চলেই নিবন্ধ দেখি। আবার পূর্ববঙ্গেই যেন মনসাকাহিনীর জনপ্রিয়তা ছিল সর্বাধিক। বৈষ্ণব সাহিত্যের উদ্ভব এবং বিকাশও সীমিত দেখি পশ্চিমবঙ্গে এবং আধুনিক চট্টগ্রাম বিভাগে (সিলেট ব্যতীত) বাউল সম্প্রদায় চিরকালই অনুপস্থিত। এমন কি, বহুকাল ধরে মুসলমানদের বাঙলা সাহিত্য চর্চাও বিশেষ করে নিবন্ধ ছিল চট্টগ্রামে ও রোসাঙ্গে। তেমনি দোভাষী রীতির ও দোভাষী সাহিত্যের উন্মেষ ও বিকাশ এবং কবিওয়ালাদের আবির্ভাব সীমিত ছিল পশ্চিমবঙ্গের এখনকার প্রেসিডেন্সী বিভাগে। আবার দক্ষিণ-পশ্চিমবঙ্গেই বিশেষ চর্চা হয়েছিল লৌকিক উপদেবতা ও পীরকাহিনীর এবং গাথা-গীতিকা রচিত হয়েছে বিশেষ করে ময়মনসিংহ ও চট্টগ্রামে।

অতএব, মধ্যযুগের বাঙলা সাহিত্যের একটি সর্ববঙ্গীয় চারিত্র্যের ও রূপের অনুধ্যানে যতই আমরা আনন্দিত হতে চাই এবং অখণ্ডতা ঐক্যবোধের আগ্রহে যতই কোন সামগ্রিক রূপ-কল্পনাকে প্রশয় দিই, ভৌগোলিক দূরত্ব যে বিভিন্ন অঞ্চলের বাঙলাভাষীদের পারস্পরিক মানসযোগ রক্ষার অন্তরায় ছিল, তা অস্বীকার করা যাবে না।

৭.

সংকলিত সব পদে কবিত্ব কিংবা লাবণ্য নেই। আঙ্গিক সৌন্দর্যও অনেক পদে অনুপস্থিত। তবু মধ্যে মধ্যে জীবন্ত চিত্র, অনুভূতির মাধুর্য ও আবেগের শিহরণ দুর্লভ নয়।

রাঘব রায়ের পদে রাখাল কৃষ্ণের বিচলিত অবস্থা বর্ণনাগুণে দৃষ্টিগ্রাহ্য হয়ে উঠেছে।

‘রহ রহ ধবলী শ্যামল’- পাছে পাছে ধাএ
নীলগিরি পাছে করি চাঁদ চলি যাএ।
খসিল মোহন চূড়া উরে মন্দ বাএ
বান্ধিতে বান্ধিতে চূড়া ধবলী চলি যাএ।
ঘর্মেতে তিতিল তনু বিন্দু বিন্দু ঝরে
মরকত মণি জিনি মুকতা উদগরে।.....
অবিরত ঝঙ্কার নৃপুর রাস্তা পাএ
তছু পাএ পদ ধূলি রাঘব রাএ।

আবার উদ্ভট পাণ্ডিত্য প্রকাশের প্রয়াসও আছে। শ্যামদাসের পদে আছে :

কুন্তীর নন্দন মূলে কশ্যপ-নন্দন দোলে
তা দেখিয়া মন মূরছাএ।
গাঙেন্দ্র নিকটে রসীন্দ্রে পুরএ বাঁশি
যোগীন্দ্র মুনীন্দ্র মন মোহে
ভব-অনুজ রথ তাহার বিনতাসুত
উপরে কুমু-বন্ধু দোলে।

অর্থাৎ অর্জুন বৃক্ষ মূলে ময়ূর নাচে (ময়ূর পুচ্ছেধারী কৃষ্ণ দোলে), তা দেখে মন মুগ্ধ হয়। যমুনার নিকটে রসিক শ্রেষ্ঠ (কৃষ্ণ) বাঁশি বাজিয়ে শ্রেষ্ঠ যোগী ও শ্রেষ্ঠ মূনির মন মুগ্ধ করে। হর-পুত্র কার্তিকের বাহন ময়ূরের উপরে চাঁদ দুলছে। এ সূত্রে বিদ্যাপতির প্রহেলিকা স্মর্তব্য।

আর একটি পদাংশ :

মুররীর আলাপনে পবন রহিয়া শুনে
যমুনা কি ধরিল উজান
না চলে রবির রথ ভাবিয়া না দেখি পথ
ধারা বহে দারুণ পাষণ ।....
কান্দিতে না পারি রাএ শোকে বৃক ফাটি যাএ
এ না দুঃখ কৈমু কার ঠাই

গোবিন্দবল্লভের এ পদ চণ্ডীদাস-জ্ঞানদাসকে স্মরণ করিয়ে দেয়।

ভবানন্দ দীনের মুখে রূপমুগ্ধা রাধার আকৃতি মর্মস্পর্শী হয়ে উঠেছে :

যে-বোল সে-বোল মোক যার মনে যেই দেখ
ননদিনী বলৌক অসতী
গুরু গরবিত জন যে বোলে ননদীগণ
ছাড়ে বা ছাড়ৌক নিজপতি।

মকটবল্লভের রাধা বলে :

খাইতে নারি শুইতে নারি রইতে নারি মরে
নিরবধি ডাকে বাঁশি- আর কদমতলে।

আবার দ্বিজ রঘুনাথের রাধার মুখেও একই কথা শুনি :

খাইতে না দে, শুইতে না দে, রহিতে না দে ঘরে
নাম ধরি ডাকে বন্ধের বাঁশি আয় আয় কদমতলে রে।
যাইমু রাতে যা'ক বাঁশি তার লাগ পাম
কাটারে কাটিয়া বন্ধের বাঁশি সাগরে ভাসাম রে।

[তুল : মজনুর চন্দ্রনিন্দা : লায়লী-মজনু- দৌলত উজির]

দ্বিজমাধবের রাধার আকৃতি বড় করুণ। সে কৃষ্ণকে মিনতি জানাচ্ছে :

বদলে থুইয়া যাও বাঁশি
তবে সে আসিবা হেন বাসি।
ও বাঁশি যতনে থুইম গন্ধ চন্দন দিয়ু
হীরামণি মাণিক্য জড়িয়া
যখনে তোমার তরে ও বৃক বেদনা করে
নিবারিমু দুখ-বাঁশি বুকে দিয়া।

মহিলা কবি হীরামণি নারীমনের প্রবণতা দিয়ে রাধার মনের কথাই বলেছেন :

আগের দ্বারে প্রাণের বন্ধু
গাছের দ্বারে রাক্ষি
ভিজা খড়ি গাছি আনল ভেজাইয়াছি
ধুয়ার ছলনায় বসি কান্দি।

বিচ্ছেদকাতর উদ্বিগ্ন-উৎকণ্ঠ মানুষের প্রিয়মিলনাকুতি দাহ-দারুণ ও কান্নাকরুণ ভাষায় ও সুরে ধ্বনিত হয়েছে পদাবলীতে।'

২১. বৈষ্ণব সাহিত্যে ষোল শতকের বাঙলা ও বাঙালী

তেরো শতকের প্রভাতে বাঙলার একাংশে তুর্কী বিজয় ঘটে। শাসকগোষ্ঠীর ধর্ম, সমাজ, সংস্কৃতি, আচার-আচরণ, ভাষা, বসন-ভূষণ, দেহাকৃতি প্রভৃতি কোনটাই ইতিপূর্বে এ দেশের কারো পরিচিত ছিল না। কাজেই এদের নিস্তরঙ্গ নিরুদ্যম জীবন-চেতনার ও জীবন-যাত্রায় একটা ঝড়ো হাওয়ার অভিঘাত আকস্মিকভাবে চিন্তা-চেতনায় ও সনাতন জীবন-পদ্ধতির ভিত নেড়ে দিল। নির্জিত নির্যাতিত প্রচ্ছন্ন বৌদ্ধের তুর্কীবিজয়কে মুক্তির আশ্বাসরূপে বরণ করল [নিরঞ্জনর রুম্মা বা কলিমা জালাল], হিন্দুরা একে 'দেবতার মার' বলে মানল [উমাপতি ধরের শ্লোক, শেখ গুতোদয়া]। সাধারণত যেমনটি এমনি অবস্থায় হয়, তাই হল—অনেকেই ব্যক্তিব্যার্থে তুর্কীদের সঙ্গে জুটে গেল আখের গুহানোর লোভে, অন্যরা অনুগত হল জীবন-জীবিকার তাগিদে। কিছু সংখ্যক স্বশাস্ত্র ও স্বসমাজ-প্রেমিক এবং আত্মমর্যাদাসম্পন্ন ব্যক্তি ক্ষোভে, উদ্বেগে ও গ্লানিতে ব্যাকুল হয়ে উঠল। একেশ্বরবাদ, সামাজিক সাম্য, প্রাণ-মনের স্বাস্থ্য এবং কর্মোদ্যম নিয়ে যে শাসকগোষ্ঠী এল, তাদের দেখে জন্মসূত্রে বর্ণে ও কর্মে বিন্যস্ত নিম্ন বর্ণের, বৃত্তির ও বিস্তের লোকের মনে জাগল বিক্ষিপ্ত ও প্রতারণিত হওয়ার ক্ষোভ। মানবিক মর্যাদা লাভের ও স্বাধীনভাবে জীবন বিকাশের স্বাভাবিকতা এবং বুদ্ধি, প্রত্যয় ও উদ্যম বলে আত্মবিকাশের ও আত্মবিস্তারের অশেষ সম্ভাবনাই চঞ্চল করে তুলল তাদের। ফলে শাস্ত্র ও সমাজ দ্রোহিতায় ঘটল এসবের প্রথম প্রকাশ। বলা বাহুল্য যেকোন চিন্তা-চেতনা-দ্রোহ-আন্দোলন সমাজক্ষেত্রে প্রকটিত ও ফলপ্রসূ হতে দীর্ঘ সময় লাগে। বাঙলায়ও তাই হয়েছিল। তেরো শতকে উগ্ধ ও অন্ধুরিত এবং চৌদ্দ শতকের বর্ধিত ও পল্লবিত হয়ে পনেরো-ষোল শতকে তা' ফলপ্রসূ হল। লৌকিক দেবতার জনপ্রিয়তায়, লোকায়ত লোকধর্মের প্রসারে ও গীতা-স্মৃতি-সংহিতার প্রভাব-সংকোচনে এ বিপ্লবের প্রকাশ ও ক্রমস্ফীতি লক্ষণীয়।

নব চিন্তা-চেতনার উন্মেষকালে সমাজ দ্বিধা বিভক্ত হয়—রক্ষণশীল ও প্রগতিবাদীতে। নবচেতনা যেমন প্রাণধর্মী মানুষে বাসন্তী-লাবণ্য দান করে, তেমনি রক্ষণশীলকে সতর্ক প্রহরীর ভূমিকায় অবতীর্ণ করায়—সবাই অস্থির থাকে। তখন ক্রিয়া-প্রতিক্রিয়া সংঘর্ষ-সংঘাত অনিবার্য হয়ে ওঠে, তখন বাধার আর প্রতিরোধের সংগ্রাম তীব্র হয়ে দেখা দেয়, বাঙলাদেশেও তাই-হয়েছিল। রক্ষণশীলরাও নিষ্ক্রিয় ছিল না। ইসলামের আকর্ষণে যখন নিম্নবর্ণের ও নিম্নবিস্তের মানুষেরা ইসলামে আশ্রিত হচ্ছিল, তখন উদ্বিগ্ন শাস্ত্রী ও সমাজপতিরা ভাঙনরোধে মরীয়া হয়ে ওঠেন। তার প্রমাণ—রাজা দত্তখাস বা দত্তখানের জাতিমালা কাচারী ও রাঢ়ীয় ব্রাহ্মণদের সাতান্নতম সমীকরণ ব্যবস্থা, উত্তরবঙ্গে উদয়নাচার্য ভাদুড়ীর পাটি, ও কাপ বন্ধন মাধ্যমে 'পরিবর্ত মর্যাদা' নিরূপণ, রাঢ়ে দেবীবর ঘটক কর্তৃক 'ছত্রিশ মেল' বিন্যাস, ধ্রুবানন্দ মিশ্রের মহাবংশাবলী নামের কুলজী রচনা, স্মার্ত রঘুনন্দনের স্মৃতির নবভাষ্য ও পাতি, রঘুনাথ শিরোমণির নবন্যায়, নুলু পঞ্চাননের 'গোষ্ঠীকথা'য় নবমেলবন্দন, লৌকিক দেবতার পৌরাণিক

^১ বিবৃত্ত বিবরণ ও সংকলিত পদাবলী চট্টগ্রামের হিন্দুকবির পদসাহিত্য—বাংলা একাডেমী পত্রিকা : মাঘ-চৈত্র, ১৩৭৮ সন প্রবৃত্ত।

স্বীকৃতি প্রভৃতি,- এসব করেও ইসলামের প্রসার প্রতিরোধের ব্যবস্থা সৃষ্ট হয়নি- 'প্রধান কারণ তার যবন অধিকার'। যবন অধিকারে 'কলিকালের লোক সব বড় দুরাচার'ই হচ্ছিল (প্রেম-বিলাস)। এ সময়ে এবং সতেরো শতকে উড়িষ্যা দারুণ জগন্নাথ ও চৈতন্যদেব প্রতীকে বৌদ্ধমতের পুনঃস্মরণ চলছিল। সতেরো শতকে বাঙলায় কবি রামানন্দ ঘোষ নিজেকে বুঝাবতার বলে দাবী করে লাক্ষিত হয়েছিলেন ব্রাহ্মণ্যবাদীদের হাতে। তিনি ছিলেন প্রচ্ছন্ন বৌদ্ধদের পুনরুত্থানবাদী- 'যবন শ্লেচ্ছের রাজ্য বলে কাড়ি লব/একচ্ছত্র রাজ্য করি দারুণক্কে (জগন্নাথে) দিব।'।

সফল হল চৈতন্যদেবের প্রয়াস। এতে হিন্দুর শাস্ত্র অস্বীকৃত 'হল বটে, কিন্তু সুদূরপ্রসারী অর্থে হিন্দুর সমাজ ও জাতি টিকে রইল। বোঝা গেল, নতুনদের প্রভাব প্রতিরোধ করে নয়, স্বীকার করেই টিকে থাকা সম্ভব। চৈতন্যদেবের মতবাদে ইসলামের সামাজিক, সাম্য ও ভ্রাতৃত্ব, একক দেবতার আরাধনা, নারীর অধিকার ও মর্যাদা দান, সতীদাহ উচ্ছেদ, সূফীর ইশক (শ্রেষ্টাপ্রেম), যিকর (নামে রুচি), দারা ও সমা (নৃত্য ও নামকীর্তন), নামে রুচি, জীবে দয়া, নিরামিষ ভোজন, দশা (হাল), এবং রাধা-কৃষ্ণ লীলায় আশিক-মাসুক, সাকী, সমআ ও পরওয়ানা, প্রেম-শরাব, হিয়ান, বিশাল, বিরহ-মিলন, কিরামত (ঐশ্বর্য) প্রভৃতির প্রভাব, অনুসৃতি ও আকস্মিক আদল মেলে। চৈতন্য চৈতন্য জৈন-বৌদ্ধ প্রভাবও রয়েছে। দেব-দ্বিজ-বেদ বর্জন করে তিনি লৌকিক রাধা-কৃষ্ণ প্রেমের রূপকে হৃদয়-রূপ বৃন্দাবনে জীবাত্মা-পরমাত্মার প্রণয়লীলার অনুধ্যান ও আশ্বাদন করতেন। জয়দেব-চণ্ডীদাস-বিদ্যাপতি রচিত প্রণয়গীতি তাঁকে নাচাত, কাঁদাত ও হাসাত। এসব গান নেচে নেচে গেয়ে আর শুনেই তিনি রাধাকৃষ্ণসিদ্ধি লাভ করলেন। চৈতন্য-সংস্কৃতির শ্রেষ্ঠ অবদান 'নরেন্দ্র-নারায়ণ ও জীবে ব্রহ্ম দর্শন।' বর্ণে ও কর্মে বিন্যস্ত অবিচল সমাজে মানুষের মর্যাদা ও মানবিক মূল্যবোধ শতগুণে বৃদ্ধি পেল। সৌজন্যে, বিনয়ে, প্রীতির পরিচর্যায়, সহিষ্ণুতায় সেদিন দ্বন্দ্ব-কোন্দল জর্জরিত বাঙালীকে সহাবস্থান মন্ত্রে নবতর দীক্ষাদানে আশ্বস্ত করেছিলেন তিনি। বাঙালী সেদিন প্রীতির আবেশে ও প্রণয়রসের আশ্বাদন-সুখে ঈর্ষা-অসূয়া-অসহিষ্ণুতা অনেকাংশে পরিহার করতে সমর্থ হয়েছিল। নৈতন্যোত্তর বাঙলাসাহিত্য তারই প্রমাণ।

চৈতন্য ও তাঁর পার্শ্বদেবের চরিত্রহুণ্ডলো থেকে নানা প্রসঙ্গের ফাঁকে ফাঁকে ষোল শতকের বাঙালীর জীবন ও জীবিকার এবং সমাজ, ধর্ম ও জীবনযাত্রার একটা স্থূল চিত্র পাই। পূর্বপরিচ্ছেদে উদ্ধৃতাংশগুলো স্মর্তব্য।

১. হিন্দুর ধর্মজীবন : বৃন্দাবন দাসের বর্ণনা অনুসারে বোঝা যায়, পনেরো ষোল শতকের পশ্চিম বাঙলায় তথা গোটা বাঙলায় গীতা-স্মৃতি-সংহিতা নির্দেশিত ধর্মচারের চেয়ে লোকায়ত ধর্ম ও আচার প্রবল ছিল। জনসমাজে লৌকিক দেবতা চণ্ডী, মনসা, যক্ষ, বাসুলী প্রভৃতির পূজার বহুল প্রচার ছিল। দস্যুরাও চণ্ডী পূজা করত। বৌদ্ধ যুগের যক্ষ, তারা, বাসুলী ছাড়াও যোগিপাল ভোগিপাল মহীপাল গীতির- তার সঙ্গে হয়তো নাথ-গীতিকারও- পার্বণিক আনুষ্ঠানিক চর্চা ছিল। চালু ছিল হর-গৌরী লীলাগীতিও। ভিক্ষাজীবীরা শিবগান গেয়ে গেয়ে ভিক্ষা করত। যদিও পশ্চিমবঙ্গে মাধবেন্দ্রপুরী, ঈশ্বরপুরী, অদ্বৈতাচার্য প্রভৃতির প্রভাবে ভক্তিমার্গে সাধনা চালু হচ্ছিল, তবু তা জনপ্রিয় ছিল না (এই মত অদ্বৈত বৈসেন নদীয়ায়। ভক্তিযোগ শূন্য লোক দেখি দুঃখ পায়।) বাউলবৈরাগীরও প্রাদুর্ভাব ছিল। 'বাউল' শব্দের বহুল প্রয়োগই তার প্রমাণ।

আনন্দ, পুরী, তীর্থ, গিরি, সরস্বতী, ভারতী, যতি, অবদূত প্রভৃতি শ্রেণীর সন্ন্যাসী ও গুরুবাদী সাধক সম্প্রদায় ছিল। স্বয়ং চৈতন্যদেব মাধবপন্থী সাধক ছিলেন। পরকীয়া সাধক প্রাচীন বৌদ্ধসহজিয়া নেড়ানেড়ীরাও (বাউল নামে?) ছিল। রাম বা শিব বা হরি সংকীর্তন তখনো উৎসব-পার্বণ উপলক্ষে চালু ছিল। শৈব-শাক্ত বৈষ্ণবদের মতো রামউপাসকও ছিল, তাই রামমন্দিরও ছিল। পনেরো-ষোল শতকেই সূষ্ঠভাবে গড়ে উঠেছিল পঞ্চোপাসক হিন্দুসমাজ। ধর্মীয় দ্বন্দ্ব-কোন্দলও হ্রাস পেয়েছিল। সংখ্যাগুরু লোকায়ত লোকধর্মের কাছে সংখ্যালঘু সনাতন ব্রাহ্মণপন্থীরা হার মানে। উভয় মতের সমন্বয় ও সামঞ্জস্য সাধনের জন্যে পুরাণগুলো স্ক্রীতকায় হতে থাকে। গীতা-স্মৃতি-সংহিতা পন্থীরাও মঙ্গলচণ্ডী, মনসা, তারা, লক্ষ্মী, সরস্বতী, বাসুলী, শিব-শিবানী, রাধা-কৃষ্ণ প্রভৃতির পূজা-পাঁচালী স্বীকার করতে বাধ্য হয়। এবং তবু লোকধর্মের প্রাবল্যের কালেও রামায়ণ-মহাভারত-ভাগবত, গীতা-স্মৃতি-সংহিতা-তন্ত্র প্রভৃতি অনুবাদের মাধ্যমে প্রচার করে উচ্চবর্ণের ও উচ্চবিশ্বের কায়স্থ, বৈদ্য ও ব্রাহ্মণেরা সনাতন ব্রাহ্মণধর্মও চালু রাখার চেষ্টা করেন। পরিণামে পারম্পরিক স্বীকৃতির ভিত্তিতে আপোস হয় এবং ফলে লৌকিক-পৌরাণিক ব্রাহ্মণ্য শাস্ত্র স্থিতি পায়।

চৈতন্য, অদ্বৈত ও নিত্যানন্দের মতবাদে কিছু সূক্ষ্ম পার্থক্য ছিল। তাঁদের তিরোভাবের পরে শিষ্যদের মধ্যে তা প্রকট হয়। অদ্বৈত সন্তানেরা (অচ্যুতানন্দ ব্যতীত) অদ্বৈতকে কৃষ্ণাবতার বলে প্রচার করেন, অদ্বৈত নিত্যানন্দেও অপ্রকট দ্বন্দ্ব ছিল। এবং গৌরনাগরবাদ, গৌরপারম্যবাদও বৈষ্ণবদের মত-পার্থক্য তীব্র করে। ফলে শান্তিপূরী, শ্রীখণ্ডী, খড়দেহী ও বৃন্দাবনী মতবাদ বৈষ্ণবের সমাজ ও সম্প্রদায় সংহতি নষ্ট করে। এমন কি ষোল শতকের মাঝামাঝি সময়ে অখ্যাত ব্যক্তিও অবতারত্ব দাবি করে। 'রঘুনাথ করি আপনারে কেহ বোলে (চৈঃ ভাঃ), 'রাঢ়ে এক মহা ব্রহ্মদৈত্য আছে' সে পাপিষ্ঠ আপনারে বোলায় গোপাল" (চৈঃ ভাঃ)।

২. নৈতিক, সাংস্কৃতিক ও সামাজিক জীবন : বৌদ্ধ বিলুপ্তির পরে বাঙলায় আবার বৃত্তিতে ও বর্ণে বিন্যস্ত সমাজ গড়ে ওঠে। বহু বহু ব্রাহ্মণ, বৈদ্য ও কায়স্থ সাক্ষর ও শিক্ষিত ছিল। শৈব-শাক্ত-বৈষ্ণব-রাম উপাসকদের আচারে ও আচরণে শৈথিল্য ছিল। সমাজে সমাজপতিদের দাপট ছিল, নৈতিক-শাস্ত্রিক অপরাধে সমাজে পতিত হতে হত। দেশে দস্যু-তরুরের ভয় ছিল। ধনী মানীরাও দস্যুবৃত্তি গ্রহণ করত যেমন রামচন্দ্র খান, বীর হাশির প্রভৃতি। পথ-ঘাট নিরাপদ ছিল না রাজপুরুষেরা ঘুম উৎকোচ গ্রহণ করত, সনাতন ঘুম দিয়েই কারাযুক্ত হন। সামন্ত আর প্রশাসকরাও বিদ্রোহী হত। রূপ-সনাতনের জনপদ-শাসক জ্যেষ্ঠ ভ্রাতা হোসেন শাহর আমলে বাকলায় বিদ্রোহ করে স্বাধীনভাবে শাসন করতে থাকেন। যশোরের জমিদার রামচন্দ্র খান ও বিষ্ণুপরের বীর হাশির, বাকলার জমিদার (সনাতনের ভাই)-ও দস্যু ছিলেন। ব্রাহ্মণসন্তানেরাও রাহাজানিতে, গৃহদাহে ও খুন-জখমে আসক্ত ছিল। লোকেরা নাচে-গানে, জুয়ায়, ল্যাম্পটো এবং গাঁজা চরসে, তাহাযুক্ত ও মদে আসক্ত ছিল, নিমাই শ্রীবাসের বাড়িতে কীর্তন শুরু করলে প্রতিবেশীরা তাঁদের পঞ্চ-মকারের সাধক বলে সন্দেহ করেছিল। দারুটোনা তুক-তাক যাদুতে ও ডাকিনী-যোগিণীতে লোকের আস্থা ছিল। নবদ্বীপে ব্রাহ্মণসমাজে বিদ্যার বহুল চর্চা ছিল, বিদ্বান ব্রাহ্মণরা সব টোল খুলে জীবিকা অর্জন করতেন। ন্যায়-স্মৃতি-ব্যাকরণ-অলঙ্কার বেদ-বেদান্ত-সাহিত্য প্রভৃতি বিভিন্ন শাখায় বিশেষজ্ঞ হতেন পণ্ডিতেরা। পণ্ডিত সভায় বিতর্কের মাধ্যমে বিদ্যার পরীক্ষা ও স্বীকৃতি হত। রঘুনাথ, রঘুনন্দন, রামনাথ, মাধবেন্দ্রপুরী, অদ্বৈতাচার্য

প্রভৃতির নেতৃত্বে ইসলামের অভিঘাতে বিচলিত হিন্দুর শাস্ত্র ও সমাজ সংস্কারের আন্দোলন পনেরো-ষোল শতকে ব্যাপক ও প্রবল হয়ে ওঠে। বৈষ্ণবসমাজে কায়স্থ-বৈদ্য ও কিছু শূদ্র ব্রাহ্মণের মর্যাদা লাভ করেন এবং নারীরা পায় স্বাধীনতা ও শ্রদ্ধা। পুণ্ডরীক বিদ্যানিধি, নিত্যানন্দ, জাহ্নবা ও বীরভদ্রের জীবনযাত্রায় মুঘলাই বিলাসের প্রভাব ছিল। সমাজে পাপাচার বৃদ্ধির ফলে মানুষ আর্থিক প্রাকৃতিক দুর্ভোগের শিকার হয় বলে কুসংস্কার ছিল— এ ব্রাহ্মণ (নিমাই) করবেক গ্রামের উৎসাদ। এ পাপে ধানে কিছু মূল্য চড়ে বলেও আশঙ্কা। তখন সপ্তগ্রাম বর্ধিষ্ণু বন্দর।

হিন্দুদের ঘরে ঘরে নানা পার্বণ অনুষ্ঠান হত— বালকউত্থান, নামকরণ, অনুপ্রাশন, কর্ণভেদ, হাতে খড়ি, উপনয়ন, দুর্গা, চণ্ডী, বাসুলী, ষষ্ঠী, শীতলা, মনসা, যক্ষ, ক্ষেত্রপাল প্রভৃতির পূজাও কমবেশী চালু ছিল। পূজা-পার্বণ উপলক্ষে প্রতিমা নির্মাণ এবং বাদ্যযন্ত্র সহকারে কীর্তন, বেদ-পুরাণ পাঠের আসর, পাঁচালী গান, বিতর্ক সভা, পুতুল নাচ, যাত্রা প্রভৃতি ব্যবস্থাও থাকত। অবৈষ্ণব ব্রাহ্মণরাও কপালে তিলক কাটত। তান্ত্রিক আচার চালু ছিল, পঞ্চমকার ও মধুমতী সিদ্ধি এবং পরকীয়া বামাচার বিরল ছিল না। সমাজে যৌতুক এবং পণপ্রথাও ছিল, তা পঞ্চ হরীতকী থেকে ধেনু, ভূমি দাসদাসী, বস্ত্র, অলঙ্কার, বহুমূল্য সামগ্রী, শয্যা কিংবা তঙ্কাও হতে পারত। ধনীরা নানা উপলক্ষে ভোজনোৎসব করত এবং দানসামগ্রী ছাড়াও গন্ধ, চন্দন, তাম্বুল ও মালা প্রভৃতি দিয়ে ব্রাহ্মণদের এবং দরিদ্রদের বস্ত্র ও অর্থ দিয়ে আপ্যায়িত করত। বিবাহোৎসবে নৃত্যগীতবাদ্যের স্বেচ্ছা থাকত। গরীবেরা খই, কলা, দই, চিড়া, সিন্দূর, পান ও তেল দিয়েই নিমন্ত্রিত ও বরযাত্রীদের সেবা-সংস্কার করত বলে মনে হয়। চৈতন্যের বিবাহে দরিদ্র শচীদেবী এ সব অঙ্গোজনই করেছিলেন। ঘট, প্রদীপ, ধান, দূর্বা, দই, নারিকেল, আম্রসার প্রভৃতি বরগড়ালার উপকরণ ছিল। গৃহদ্বারের নিকটে কলা গাছ ও মঙ্গল ঘট থাকত। বিবাহোৎসবে বাজি পোড়ানো হত। ধনীরা নানা বর্ণের পতাকা (বানা) সজ্জাও করত। বৈষ্ণবরা সতীদাহ বিরোধী ছিল— বিষ্ণুপ্রিয়া-জাহ্নবা প্রমাণ। তখন সহমরণে বিরত থাকা নিন্দনীয় ছিল না। সতীদাহ বোধ হয় কুচিৎ হত, প্রমাণ শচীদেবী। হিন্দু নারীরাও পর্দা করত। হিন্দুরা অস্পৃশ্য মনে করত মুসলমানদের। তুর্কি প্রভাবে (উনিশ শতকের এজুদের মতো) শহরে উচ্চবর্ণের হিন্দুদের অনেকেই শাস্ত্রাচারে উদাসীন ছিল, জুয়া, লাম্পট্য ইত্যাদি নানা কুক্রমও করত।

ক. সে যুগের বৈষ্ণবের তথা হিন্দুর খাদ্য ও গয়না : “সে যুগের খাদ্যের মধ্যে প্রধান ছিল নারিকেল, সন্দেশ, মেওয়া, ক্ষীর, ককটিকা ফল, আখ, দই, দুধ ঘি, সর, ননী, মুগ, কলা, চিড়া, চালভাজা, লাফরা, পিঠা, পানা, ছানাবড়া, তেঁতুল পাতার অম্বল, নানা ধরনের শাক— যথা অচ্যুৎ পটোল, বাহ্যক, কাল শালিঙ্গা, হিলিঙ্গা প্রভৃতি। বৈষ্ণবদের অল্পের উপরে তুলসী মঞ্জরী দেওয়া হত। গরীবেরা খোলায় ভাত খেত ও পিতলের বাটি ব্যবহার করত। যারা খোলা বিক্রি করত, তারা খোড়, কলা এবং মূল্যও বেচত। সে যুগে পান খাওয়ার বেশ চলন ছিল। সে যুগে লোকে আমলকী দিয়ে কেশ সংস্কার করত। কেবল নারীরা নয়, পুরুষেরাও নানা রকম অলঙ্কার পরতেন, যেমন— অঙ্গদবলয়, আংটি, নূপুর, কুণ্ডল; এই সব গয়না সোনার তৈরি হত, তার সঙ্গে সময় সময় রূপাও থাকত এবং মরকত, প্রবাল, মুক্তা, বিড়ালক্ষ প্রভৃতি রত্নও গয়নায় ব্যবহৃত হত।”

(বাংলার ইতিহাসের দুশো বছর, সুখময় মুখোপাধ্যায়, পৃঃ ৫০৮)

- খ. “সে যুগে লোকদের বাড়ীতে শৌচাগারের পাট ছিল না, প্রয়োজনমত বাড়ীর বাইরে গিয়ে তারা মলমূত্র ত্যাগ করত।”
- গ. চিকিৎসা : ‘সে যুগে আয়ুর্বেদ ও টোটকা মতে লোকদের চিকিৎসা হত। কারও বায়ুরোগ হলে মাথায় বিষ্ণুতৈল, নারায়ণতৈল ও আরও সব সুগন্ধি পাক-তৈল দেওয়া হত, শুধু তাই নয়, তাকে তিনদ্রোণে (তেলে ভর্তি বিরাট পাত্রে) রাখা হত। অনেক সময় বায়ুরোগগ্রস্ত ব্যক্তিকে বেঁধেও রাখা হত, তাকে খেতে দেওয়া হত ডাবের জল : বায়ুর প্রকোপ বেশি হলে শিবাঘৃত প্রয়োগ করা হত। কফ রোগের ওষুধ ছিল পিঙ্গলি খণ্ড।”
- ঘ. ফুল ও ক্রীড়া : “সে যুগ যে সব ফুলের সমাদর ছিল, তার মধ্যে প্রধান (জয়ীর, কদম্ব ও দমনক (দনা)। লোকেরা জলে সাঁতার কাটতে খুব ভালবাসত। বাংলাদেশে ‘কয়া’ নামে এক ধরনের জলক্রীড়া প্রচলিত ছিল, তাতে লোকেরা জলে নেমে ‘কয়া’ বলে হাত তালি দিয়ে জলে বাদ্য বাজাত।” (প্রাগুক্ত, পৃঃ ৫০৯)
- ঙ. ১. ব্যঞ্জন, ফলমূল ও পিষ্টক : “নানা ধরনের শাক, নিম শুকতার ঝোল, মরিচের ঝাল, ছানা বড়া, বড়ী, দুগ্ধতুষী, দুগ্ধ কুন্মাণ্ড, বেসারি, লাফরা, মোচাভাজা, বৃদ্ধ কুন্মাণ্ড বড়ীর ব্যঞ্জন, ফুলবড়ী, নব নিম্বপত্র সমেত ভূট বার্তাকী (বেগুনভাজা), পটোলভাজা, মানচাকী, ভূটমাষ, মুদগসূপ (মুগের ডাল), মধুরাস (মিষ্টি ও টকের অফল), বড়ান্ন (বড়ার অফল), মুদগবড়া, মাষবড়া, বলাবড়া, ক্ষীরপুলী, নরিকেল পুলী, কাঞ্জিবড়া, দুগ্ধলকলকী, দুগ্ধচিড়া, নানা ধরনের পিঠা, ঘৃতসিক্ত পরম্পন্ন, চাপাকালা, ঘনদুধ, আম-কাঠাল ও নানা ধরনের ফলমূল, দই, সন্দেশ অমৃতগুটিকা (?) পিঠাপানা- এইগুলি ছিল বৈষ্ণবদের বিশিষ্ট খাদ্য।” (এ পৃঃ ৫১১) ২. দ্বৈধপথ পাড়ি দেবার সময় অথবা দূরদেশে অবস্থিত প্রিয়জনদের উপহার দেবার জন্য লোকে এমন সব খাদ্যদ্রব্য নিয়ে যেত, যা সহজে নষ্ট হয় না। এই সব খাদ্যদ্রব্যের মধ্যে প্রধান- আম্রকাসুন্দী, আদাকাসুন্দী, ঝালকাসুন্দী, নেমু (লেবু), আদা, আম্রকোলি, আমসী, আম্রখণ্ড (আমসবু?), তৈলাম্র, আমতা, পুরোনো সুকুতার গুঁড়া, ধনিয়া, মুহুরী ও চাল গুঁড়া চিনি দিয়ে পাক করা নাড়ু, শুক্খীখণ্ড নাড়ু, (কড়াইগুঁটি ও মিছরির নাড়ু) কোলিতুষ্ঠী, কোলিচূর্ণ, কোলিখণ্ড, নারকেল খণ্ড নাড়ু, চিরস্থায়ী খণ্ড বিকার (?), চিরস্থায়ী ক্ষীর, ক্ষীর সার ও মগা, অমৃত কর্পূর, শালি কাঁচুটি, ধানের আতপ চিড়া, ঘিয়ে ভাজা চিড়া ও মুড়ি চিনি দিয়ে পাক করা নাড়ু, ঘি মেশানো শালি চালভাজার গুঁড়া, কর্পূর মরিচ এলাচ-লবঙ্গ রসবাসের বিভিন্ন ধরনের নাড়ু, ঘিয়ে ভাজা শালি ধানের খই, চিনি দিয়ে পাক করা, কর্পূর মেশানো উখড়া, ঘিের ভাজা ফুটকলাই গুঁড়া প্রভৃতি।” (এ পৃঃ ৫১১-১২)

৩. রাজনৈতিক ও সামাজিক জীবন : শাসক-শাসিতের মধ্যে লঘু-গুরু অবজ্ঞা বিদ্রোহ স্বাভাবিক কারণেই ছিল। বিশেষত নদীয়ায় রঘুনন্দন প্রভৃতির শাস্ত্র ও সমাজ সংস্কার প্রয়াসের মধ্যে ওহাবী ফরায়াজী প্রভৃতির মতো গণমনে যবন বিতাড়নের আকাঙ্ক্ষা জাহ্নত করার প্রাসঙ্গিক চেষ্টাও ছিল, তাই গৌড়ে ব্রাহ্মণ রাজা হবে হেন আছে বলে গুজব ছড়িয়ে পড়ে, তাতেই গৌড়সুলতান হোসেন শাহ সম্ভবত নদীয়ায় সৈন্যসমাবেশ করেন ও ধরপাকড় শুরু হয় (আচম্বিতে নদীয়ায় হৈল রাজভয়। ব্রাহ্মণ ধরিয়া রাজা জাতি প্রাণ লয় ইত্যাদি)। যশোহর খুলনা বশিরহাট অঞ্চলে সেনানী শাসক পীর খান জাহান আলী খান ও নবদীক্ষিত তাহের ঠাকুর

প্রভৃতির আশ্রয়ে ইসলামে দীক্ষার সুপরিচালিত প্রয়াস চলে এবং স্নেহস্পর্শ দোষে বহু হিন্দু সমাজে পতিত হয়ে ইসলাম বরণ করে। এতে অন্যান্য অঞ্চলের হিন্দুরা শঙ্কিত হয়ে ওঠে। হিন্দুর শাস্ত্রী ও সমাজপতি ব্রাহ্মণদের নেতৃত্বে ইসলামের প্রসারের মুখে হিন্দুর শাস্ত্র ও সমাজ রক্ষার প্রয়াস চলে বলেই কেবল 'ব্রাহ্মণে যবনে বাদ যুগে যুগে আছে' বলে উক্ত হয়েছে। শাসকগোষ্ঠী ও বর্ণশ্রেষ্ঠ ব্রাহ্মণই যথাক্রমে দেশ এবং শাস্ত্র সমাজ শাসনের কর্তা ছিল। তাই আঠারো শতকের কবি ভারতচন্দ্রও বলেছেন— যবনে ব্রাহ্মণে সমভাবে গণে তুল্যমূল্য গজে মেঘেরে।' (মানসিংহ খণ্ড) নবদীক্ষিত দেশজ মুসলমানদের কেউ কেউ চৈতন্যমতও গ্রহণ করে। তুর্কী-মুঘলদের শাসিত ও পৌত্তলিক বলে অবজ্ঞা ছিল হিন্দুর প্রতি— যেমন ছিল ইংরেজদের ভারতীয়দের প্রতি। তাই কাজী বলেছেন :

আমরা হিন্দুরে দেখি নাহি খাই ভাত ...

তাহা তুমি ছাড় হই মহাবংশজাত।

আবার স্বজাতিপ্রেমিক হিন্দুর ছিল তুর্কী মুঘল তথা তুর্কক যবনের প্রতি স্বাভাবিক বিদ্বেষ : 'নির্যবন করো আজি সকল ভুবন।'

কাজী ছিলেন বিচারক, তাঁর অধীনে শাস্তি-শৃঙ্খলারক্ষী পুলিশও থাকত। রাজস্ব আদায়ের জন্যে খেফতার করার রেওয়াজ ছিল। প্রশাসক ফৌজদারীশ ছোটখাট সৈন্যবাহিনীর অধিনায়ক থাকতেন। দেওয়ান ও দেওয়ানী ছিল বেসামরিক প্রশাসন ও ভূমিরাজস্ব ব্যবস্থার জন্যে। পরবর্তীকালের শাসক ইংরেজের প্রভাবের মধ্যে তুর্কী মুঘলদেরও ধর্মের, আচার-আচরণের, আদব-কায়দার বসন-ভূষণের, খানাপিনার, সরবরাহী ভাষার প্রভাব পড়েছিল শহুরে শিক্ষিত হিন্দুর উপর। তাই ব্রাহ্মণও ফার্সী পড়ে, জালালউদ্দীন রুমীর রূপককব্য 'মসনবী'র বয়েত (শ্লোক) আবৃত্তি করে, তুর্কী মুঘলের মতো পোশাক ও জুতা-মোজা পরে, দাড়ি রাখে, গোমাংস খায়, সেলাই করা কুর্তা তখন ব্রাহ্মণেও পরে— 'শ্রীবাসের বস্ত্র সিয়ে দরজী যবন'। এসব স্বধর্মপ্রেমী ও আচারনিষ্ঠ হিন্দুর বেদনা ও ক্ষোভের কারণ ছিল। রাজবৈদ্য বা রাজপণ্ডিতের পদে নয় কেবল, দবীরখাস ও শাকেরমল্লিক কিংবা জনপদ প্রশাসকের এবং দেওয়ানের (রাজস্ব বিভাগের সর্বোচ্চ পদে) এমনকি সেনাপতির পদেও (রাজ্যধর) হিন্দু নিযুক্ত থাকত। গৌরমল্লিক, যশোরাজ খান, অনুপম (বল্লভ), গোপীনাথ বসু, পরমানন্দ খান, কেশব ছত্ৰী, মুকুন্দ প্রভৃতি রাজকর্মচারী ছিলেন। সুযোগ পেলে জমিদার প্রশাসক বিদ্রোহ করত। বাকলার প্রশাসক রূপ-সনাতনের জ্যেষ্ঠ ভ্রাতা ও যশোরের রামচন্দ্র খান তার প্রমাণ। ১৫১০ খ্রীস্টাব্দের দিকে হোসেন শাহর সঙ্গে উড়িষ্যার প্রতাপরুদ্রের যুদ্ধ হয়। ঈশান নাগরের নামে চালু 'অদ্বৈতপ্রকাশ' নামের জাল গ্রন্থে হরিদাসের মুখে দেবমূর্তি ভাঙার, পূজাসামগ্রী নষ্ট করার, ভাগবতাদি শাস্ত্র পুড়িয়ে ফেলার, ব্রাহ্মণের হাত থেকে শঙ্খ-ঘণ্টা কেড়ে নেয়ার, তুলসীর মূলে ও দেবমন্দিরে মল-মূত্র ত্যাগ করার ও পূজারত ব্রাহ্মণের গায়ে কুলকুচার পানি ছিটানোর অভিযোগ রয়েছে স্নেহ তথা যবনদের বিরুদ্ধে।— এগুলো বানানো। নবদ্বীপে রাজভয় অপসৃত হওয়ার কারণ ও কালীর কাছে অঙ্গীকারবদ্ধ হোসেন শাহর সুশাসনের কথা জয়ানন্দ এভাবে বলেছেন :

গৌড়েন্দ্রের আজ্ঞা নবদ্বীপ সুখে বসু

রাজকর নাহি সর্বলোক চাষ চষ।

আজি হৈতে হাট ঘাট বিরোধ যে করে

দেউল দেহারা ভাঙ্গে অশ্বখ যে কাটে

ত্রিশূলে চড়াই তারে নবদ্বীপের হাটে ।।

যে হোসেন শাহ উড়িয়া অভিযানে দেউল-দেহারা ভেঙ্গেছিলেন, পরে 'এহেন যবনেও মানিলেক গৌরচন্দ্র' (চৈঃ ভাঃ)। বঙ্কত, হোসেন শাহ, নুসরৎ শাহ, গিয়াসউদ্দীন মাহমুদ শাহ, শের শাহ, ইসলাম শাহ— সবাই ছিলেন সূশাসক ও পরমতসহিষ্ণু। তাই চৈতন্যদেব ও তাঁর পার্শ্বদ পরিকরেরা নির্বিঘ্নে নব মত প্রচার করতে, এমনকি মুসলমানকেও দীক্ষিত করতে পেরেছিলেন ('যবনেহ নাচে গায় লয় হরিনাম' — বলরাম দাস)। যবন হরিদাসও মুলুকপতির ছাড়পত্র পেয়েছিলেন— 'আপন ইচ্ছায় তুমি থাক যথাতথা। যে তোমার ইচ্ছা তাই করহ সর্বথা (চৈঃ ভাঃ)।

খাজনা আদায় করতে না পারলে কিংবা সামন্তের বা প্রশাসকের কোন কারণে পীড়ন বাড়লে অথবা জীবিকা সংকট দেখা দিলে লোকে গোপনে অন্য জমিদারের এলাকায় অন্য অঞ্চলে পালিয়ে যেত। শ্রীহট্ট থেকে জগন্নাথ মিশ্র, অষ্টৈত, নীলমণি প্রভৃতি নৈহাটিতে, এবং বাকলায় যশোরে রূপ-সনাতনরা বাসস্থান নির্মাণ করেছিলেন। চৈতন্য-শিক্ষক গঙ্গাদাসও রাজভয়ে পালিয়ে ছিলেন। পথে ঘাটে নারীর সম্মানও নিরাপদ ছিল না। সনাতন গোস্বামীর বৃহত্তাগবতামৃত নামের টীকাগ্রন্থে গৌড় সুলতানদের প্রতাপশক্তি ও মহল-সংস্কৃতির পরোক্ষ ইঙ্গিত মেলে বলে বিদ্বানদের ধারণা।

১. "সনাতন রাজমন্ত্রী ছিলেন। তাই রাজা, মহারাজা ও সার্বভৌম নৃপতির বৈশিষ্ট্য তিনি কয়েক স্থলে উল্লেখ করিয়াছেন। (১/১/৪৫-৪৬; ২/১/১)। গ্রামের এক একজন অধিকারী থাকতেন; কতকগুলি গ্রামের উপর এক একজন মণ্ডলেশ্বর থাকতেন; তাঁহাদের উপর মহারাজ ও সর্বোপরি সার্বভৌম বা রাজচক্রবর্তী। মণ্ডলেশ্বরের উপাধি ছিল রাজা।— মণ্ডলেশ্বর ব্রিটিশ আমলের ভারতীয় রাজন্যদের মতন পর রাষ্ট্রের আক্রমণ হইতে নিরুদ্বেগ বাস করিতে পারিতেন না।— রাজচক্রবর্তী সর্ব মহলের অধিপ সম্রাটের বিবিধ আদেশ, যথা ইহা কর 'উহা করিও না' ইত্যাদিরূপ আদেশ পরিপালন করিতে যাইয়া অনুভব হইত যে, তিনি অভ্যতন্ত্র বা পরাধীন।"

[বিমানবিহারী মজুমদার, ষোড়শ শতাব্দীর পদাবলী সাহিত্য, পৃঃ ২৯৯-৩০০]

২. "গোপকুমার বৈকুণ্ঠের প্রাসাদের গোপুরে বা প্রবাল ঘরে উপস্থিত হলে দ্বারপাল তাকে বহির্দ্বারে অপেক্ষা করতে বলে তার 'প্রভু'কে অর্থাৎ উর্ধ্বতন কর্মচারীদের সংবাদ দিতে গেলেন। 'প্রভু' গোপকুমারের আগমন সংবাদ শুনে প্রাসাদে প্রবেশের অনুমতি দিলেন। তারপর প্রতি দ্বারে দ্বারপালেরা নিজের নিজের অধ্যক্ষকে জানিয়ে গোপকুমারকে প্রবেশ করাতে লাগলেন। বৈকুণ্ঠেশ্বরের যত কাছে যে দ্বারপাল থাকেন, তিনি তাঁর চেয়ে দূরে অবস্থিত দ্বারপালের মাননীয়। দ্বারপালের এক দ্বার থেকে অন্য দ্বারে গমন করে সেই দ্বারের অধিবাসীদের প্রমাণ করতে লাগলেন। গোপকুমার দেখলেন যে, যারা প্রাসাদে প্রবেশ করেছেন তাঁরা শুধু হাতে যাচ্ছেন না, নানা রকম ভেট নিয়ে যাচ্ছেন। বৈকুণ্ঠেশ্বরের সভায় প্রবেশ করে গোপকুমার দেখলেন যে, রত্নখচিত সুন্দর সুবর্ণময় সিংহাসনে গদি পাতা রয়েছে এবং তার উপরে সুন্দর সুন্দর সব তাকিয়া রয়েছে,

বৈকুণ্ঠেশ্বর তাকিয়ায় কনুই রেখে বসে আছেন।” [এ বর্ণনা সুলতানী আমলের প্রভাবজ্ঞ]
[সুখময় মুখোপাধ্যায়, বাংলার ইতিহাসের দশো বছর : স্বাধীন সুলতানদের আমল, পৃঃ
৪৯১-৯২]

ষোল শতকে নবদ্বীপ শহর হয়ে উঠেছিলো— শিক্ষা ও ব্যবসার কেন্দ্র হিসাবে ছিল সুখ্যাত। বিভিন্ন অঞ্চলের লোক কর্মোপলক্ষে এসে এখানে স্থায়ী নিবাস গড়ে তোলে। বিদ্যার্থী ও অধ্যাপক ছাড়াও তাঁতী, গোয়ালী, গন্ধবণিক, তামুলী, মালাকার শঙ্খবণিক, খোলাবেচা, সন্ন্যাসী, যোগীরা যেমন ছিলো, তেমনি ফারসি শিক্ষিত লোকেরও অভাব ছিল না, তাঁরা মসনবী আবৃত্তি করত, কামান ধরত, জুতা মোজা পরত, তুর্কী পোশাকও হয়তো পরত। রাজদরবার ও টোল বসত দিনে দুইবার— সকালে ও বিকালে। ঘোড়া ও দোলা ছিল ধনী লোকের বাহন। তাঁদের অনুচর-সহচর থাকত অনেক। গুরুদক্ষিণা রূপে ধনী সম্ভানদের থেকে সোনা, রূপা, জলপাত্র, আসন দামী কমল প্রভৃতি মিলত। কিন্তু পনেরা শতকে নবদ্বীপ বিদ্যাচর্চার জন্য বিখ্যাত ছিল না। তাই ফুলিয়ার কুড়িবাস উত্তরবঙ্গে গিয়েছিলেন বিদ্যা অর্জনের জন্যে।

AMARBOI.COM

দ্বিতীয় অধ্যায় ভাগবত ও কৃষ্ণমঙ্গল

কৃষ্ণভক্তি প্রচারমূলক পাঁচালী

পাণ্ডববর্জিত এ অস্ট্রিক-মঙ্গোল অধ্যুষিত বাংলাদেশের অঞ্চলবিশেষে গুপ্ত অধিকারে গীতাশ্রুতি-সংহিতা অনুগ শাস্ত্র ও আচার চালুর চেষ্টা নিশ্চয়ই ছিল— এ অনুমান অসঙ্গত নয়। তারপর আবার পাল শাসনকালে সে-সমাজে সংখ্যাগুরু বৌদ্ধ প্রভাবে আচারশৈথিল্য এসেছিল— এ অনুমানও অযৌক্তিক নয়। এ অনুমানের সমর্থনে বলা যায় লোকশ্রুতির আদিশূর কিংবা ইতিহাসের সেনরাজা বল্লাল সেন এদেশে শাস্ত্রসম্মত শিশু ব্রাহ্মণ্যসমাজ গড়ে তুলতে প্রয়াসী হয়েছিলেন। সাগ্নিক যাজ্ঞিক ব্রাহ্মণেরও অভাব ছিল এদেশে, সর্বজন স্বীকৃত ও মান্য ব্রাহ্মণ শাস্ত্রীও ছিল দুর্লভ। তাই দেশের ব্রাহ্মণ্যবাদী সমাজেও শাস্ত্র আর শাস্ত্রাচার ছিল অনেকটা শ্রুতি স্মৃতিনির্ভর ও লোক-সংস্কারদুষ্ট। সেনরাজার রাজকীয় প্রয়াসও যে রাজধানীর বাইরে বিশেষ সফল হয়নি, তার প্রমাণ পনেরো-ষোল শতকের আগে এখানে রামোপাসক বা বিষ্ণুভক্ত লোক ছিল বিরল। ভাগবতও ছিল না জনপ্রিয়, বস্তুত পনেরো শতকের আগে ভাগবত ছিল অজ্ঞাত। লৌকিক রাধা-কৃষ্ণ প্রেমকথার মতো রামায়ণ কথা ছিল, কিন্তু রামমূর্তি, রামমন্দির রামায়েৎ সম্প্রদায় ছিল না। পনেরো শতকে কিছু বিষ্ণুভক্ত (উত্তর ভারতীয় প্রভাবে) রঘুনাথ উপাসকের সন্ধান মেলে। তাও ভক্তিবাদের আবরণে।

মনে হয় মাধবেন্দ্রপুরীর প্রভাবেই রাঢ় অঞ্চলে বিষ্ণু বা কৃষ্ণভক্তি বিশেষ প্রসার লাভ করে। মধব সম্প্রদায়েরও প্রভাব এ অঞ্চলে প্রবল হতে যাচ্ছিল। আনন্দ, পুরী গিরি, তীর্থ প্রভৃতি সম্প্রদায় পনেরো-ষোল শতক থেকে উত্তর-পশ্চিম বঙ্গে সুলভ হতে থাকে। মালাধর বসুর 'শ্রীকৃষ্ণবিজয়' বা 'গোবিন্দমঙ্গল' তথা গোবিন্দবিজয়ই সম্ভবত সত্তপ্রভাবপ্রসূত ভক্তিমূলক প্রথম লিখিত গ্রন্থ।^১ অনুবাদমূলক হলেও রাগরাগিণীযুক্ত এই গেয় পাঁচালী রাধা-কৃষ্ণ প্রেম-প্রতীকে ভক্তিবাদ প্রচার উদ্দেশ্যেই রচিত। এই প্রথম ভাগবতের অংশবিশেষের সঙ্গে লোক সমাজের প্রত্যক্ষ পরিচয় ঘটলো। আমরা দেখেছি তুর্কী বিজয়ের ফলে নৃপতি ও শাস্ত্রীর হুম-ছমকি মুক্ত গণমানব তাদের পুরুষানুক্রমিক সংস্কার-সৃষ্ট ও পুষ্ট লৌকিক দেবতার গুণ-পূজা-মাহাত্ম্য প্রচারে উৎসাহী হয়ে ওঠে, সনাতন ব্রাহ্মণ্য-শাস্ত্রপন্থীদেরও দ্বিমুখী প্রতিরোধ প্রয়াসে সংগ্রামী হয়ে উঠতে হয়— এদিকে ইসলামের প্রসার রোধ করে সমাজের ভাঙন বন্ধ করা, অন্যদিকে লোকধর্মের প্রসার প্রতিরোধ করে ব্রাহ্মণ্য শাস্ত্র ও আচার চালু রাখা উচ্চবর্ণের ও উচ্চবিশ্বের ব্রাহ্মণ-বৈদ্য-কায়স্থদের পবিত্র দায়িত্ব হয়ে দাঁড়াল— তাঁদের সামাজিক ও আর্থিক প্রতিষ্ঠা ও অবস্থান রক্ষার জন্যেই— আত্মরক্ষার জন্যেই তা' আবশ্যিক হয়ে উঠেছিল। তাই

^১ শ্রীকৃষ্ণকীর্তন ও স্মৃতির পাঠক এক হও! ~ www.amarboi.com ~

রাজসেবীরাই অর্থাৎ দরবারের পদস্থ কর্মচারী কায়স্থ-ব্রাহ্মণ-বৈদ্যরাই বাঙলার পুরাণ রচনায় নেতৃত্ব দেন। আবার লোকায়ত লোকধর্মের প্রসার ও স্থিতি লক্ষ্যেই গণমানবরা যেমন তাদের সৃষ্ট দেবতাদের জন্যে গীতা-স্মৃতি-সংহিতার সমর্থন ও স্বীকৃতি অবশ্য প্রয়োজনীয় বলে উপলব্ধি করছিল, তেমনি ব্রাহ্মণ্যবাদীরা স্বশাস্ত্র চালু রাখার জন্যে সংখ্যাগুরু গণমানবের সঙ্গে আপোসের জন্যে মন তৈরি করছিল ন্যায়-স্মৃতি-কাপ-পটি-মেল প্রভৃতির সংস্কার ও বিন্যাস করে। বিদেশাগত নব মতের উপদ্রব থেকে আত্মরক্ষার গরজে উভয় পক্ষের মধ্যে সমন্বয় ও সান্নিধ্যের ভিত্তিতে আপোস হয়ে গেল। এবং ইসলামের প্রভাব (সাম্য ও সূফীমত) আংশিক স্বীকার করেই ইসলামের প্রসার ঠেকানো যে সম্ভব দক্ষিণ ও উত্তর ভারতীয় সে-উপলব্ধিবশে পনেরো-ষোল শতকে বিষ্ণু বা কৃষ্ণ ভক্তিবাদ উত্তর পশ্চিমবঙ্গে (আসামেও) প্রচারিত হতে থাকে। এটিকেই ‘যুগধর্ম’ বলে স্বজাতিবৎসল শাস্ত্রী ও সমাজপতিরা মানল। মাধবেন্দ্রপুরী, অদ্বৈতাচার্য, ঈশ্বরপুরী, কেশবভারতী, মালাধর বসু প্রমুখ দিয়ে এ আন্দোলনের গুরু এবং চৈতন্যদেবে তার পূর্ণ প্রকাশ ও বিকাশ।

অতএব শ্রীকৃষ্ণবিজয়ই বাঙলার প্রথম ভক্তিবাদ প্রচারমূলক গ্রন্থ। তারপর চৈতন্যপ্রভাবে ভাগবতের জনপ্রিয়তা ও কৃষ্ণবিজয় গ্রন্থ রচনার বাহুল্য দেখা যায়। এর আগে গীতগোবিন্দ থেকে শ্রীকৃষ্ণকীর্তন অবশিষ্ট নিজেকে দেব-নারায়ণ বলে পরিচয় দিয়েও ভক্তির কথা দূরে থাক-রাধার সামান্য আস্থা অর্জন করাও ছিল কৃষ্ণের পক্ষে দুঃসাধ্য। কিন্তু পনেরো শতকের শেষপাদ থেকে রচিত বাঙলা পাঁচালী মাত্রই ভক্তিরসপ্রিত-রম্যায়ণ-মহাভারত ভাগবত কিংবা চণ্ডী-শিব-মনসার পাঁচালী যা-ই হোক না কেন!

কৃষ্ণমঙ্গল রচয়িতাগণ

১. যশোরাজ খান রচিত ‘কৃষ্ণমঙ্গল’: ষোল শতকের দ্বিতীয় পাদের গোড়ার দিকে সৈয়দ নাসিরউদ্দীন নুসরৎ শাহর (১৫১৯-৩২ খ্রীঃ) পদস্থ কর্মচারী যশোরাজ খান উপাধিধারী পদকার যশোরাজ খান একখানি ‘কৃষ্ণমঙ্গল’ রচনা করেছিলেন। পীতাম্বর দাসের ‘কৃষ্ণমঙ্গল’ আজো অপ্রাপ্ত। যশোরাজ খান কৃষ্ণভক্ত হলেও চৈতন্যপ্রভাব স্বীকার করেছিলেন বলে মনে হয় না। চৈতন্যবাদী বৈষ্ণব কবিরাজ বা প্রতিপোষকের নাম ভণিতায় যুক্ত করেননি কখনো। কিন্তু যশোরাজ খানের প্রাপ্ত পদের ভণিতায় রাজস্ব্রতি রয়েছে।

২. গোবিন্দ আচার্য রচিত কৃষ্ণমঙ্গল- গোবিন্দ আচার্য পদকারও ছিলেন। কৃষ্ণমঙ্গলের বিভিন্ন ভণিতা সূত্রে বোঝা যায়, মাতৃভক্ত ও গোপাল মন্ত্রে দীক্ষিণ গোবিন্দ আচার্য গৌর-নিতাইয়ের ভক্ত ছিলেন :

- ক. প্রণমিয়া জননীর চরণ কমলে
গোপাল ভাবিয়া দ্বিজ গোবিন্দ বলে।
- খ. চিন্তিয়া চৈতন্যদেবের চরণ কমল
দ্বিজগোবিন্দ বোলে শ্রীকৃষ্ণ মঙ্গল।
- গ. নিতাই চৈতন্যপাদ পাইয়া সরস
গান দ্বিজগোবিন্দ কৃষ্ণকথা রস।
- ঘ. দ্বিজগোবিন্দ গাএ চৈতন্য চরণে। [বাঃ সাঃ ইঃ ১। পৃ. ৩ পৃঃ ৪৪৬]

দেবকীনন্দনের বৈষ্ণব বন্দনায় গোবিন্দ আচার্যের নাম মেলে

গোবিন্দ আচার্য বন্দো সর্বগুণশালী

যে করিল রাধা-কৃষ্ণের বিচিত্র ধামালী।

কবি কর্ণপুরের গৌরগণোদ্দেশদীপিকায়ও গোবিন্দ আচার্যকে কবি বলে উল্লেখ করা হয়েছে- ‘আচার্য শ্রীল গোবিন্দ গীত পদকারক’।

এই-গোবিন্দ আচার্য চৈতন্যদেবের ব্যোজ্যেষ্ঠ ছিলেন। দেবকীনন্দনোক্ত ‘ধামালী’ এবং কবি কর্ণপুরোক্ত পদ্যাদি সম্ভবত কৃষ্ণমঙ্গলই নির্দেশ করছে। তাহলে দ্বিজগোবিন্দ ও গোবিন্দ আচার্য অভিন্ন ব্যক্তি বলে অনুমান করা সম্ভব।

৩. পরমানন্দ রচিত ‘কৃষ্ণলীলা’ বা ‘কৃষ্ণস্তবাবলী’।- এই পরমানন্দ কবি কর্ণপুর পরমানন্দ দাস (সেন) নন, ইনি মঞ্জরীভাবের সাধক (একটি পদের ভণিতায় ‘শ্রুপমঞ্জুর হৃদয়ে ধরি’- পদকল্পতরু ২৯০৬ সংখ্যক পদ) পরমানন্দ গুপ্ত। ‘গৌরগণোদ্দেশদীপিকায়’ ‘পরমানন্দ গুপ্তো যৎকৃতা কৃষ্ণস্তবাবলী’ বলে ঐর উল্লেখ রয়েছে। জয়ানন্দও চৈতন্যমঙ্গলে ঐকে ‘গৌরান্ধবিজয়’ রচয়িতা বলে উল্লেখ করেছেন :

‘সংক্ষেপে করিলেন তিহঁ পরমানন্দ গুপ্ত

গৌরান্ধবিজয় গীত গুণিতে অদ্ভুত।’

কৃষ্ণদাস কবিরাজও ‘চৈতন্যচরিতামৃতে’ বলেছেন:

‘পরমানন্দ গুপ্ত কৃষ্ণস্তবাবলী

পূর্বে যার ঘরে নিত্যমুখের বসতি।’

অতএব গৌর-নিতাইর প্রত্যক্ষদর্শী ও লীলাআশ্বাদক নবদ্বীপবাসী পদকার পরমানন্দ ও কৃষ্ণস্তবাবলী বা কৃষ্ণলীলা ও গৌরান্ধবিজয় রচয়িতা অভিন্ন ব্যক্তি। ইনি হয়তো শেষ বয়সে বৃন্দাবনী তত্ত্বধারার প্রভাবে মঞ্জরীভাবের সাধক হয়েছিলেন। কৃষ্ণলীলার পুথির পরমানন্দের পিতার নাম দুর্লভ (রাঃ সাঃ ই। ১। পৃ। ৩ পৃঃ ৪৪৭)।

৪. রঘুনাথ পণ্ডিত ভাগবতাচার্য রচিত কৃষ্ণপ্রেমতরঙ্গিনী-এ গ্রন্থ ভাগবতের মূলানুগ সংক্ষিপ্ত অনুবাদ। ভাগবতের প্রথম নয় স্কন্দ সংক্ষেপে এবং শেষ তিন স্কন্দ পুরো অনুবাদ করেছেন। ঐর নিবাস ছিল বরাহনগরে। চৈতন্যদের নাকি গোড় থেকে নীলাচলের পথে ঐর বাড়িতে বিশ্রাম করেছিলেন। এই রঘুনাথ ভাগবতাচার্য উপাধি স্বয়ং চৈতন্যদে থেকেই- ‘প্রভু বোলে ভাগবত এমত পড়িতে। কভু নাহি গুনি আর কাহারো মুখেতে। এতেকে তোমার নাম ভাগবতাচার্য’ (চৈঃ চঃ)। এবং এই নামেই তিনি সমধিক পরিচিত। তাঁর কাব্যের ভণিতায়ও ‘ভাগবতাচার্য’ বহুল ব্যবহৃত। ভণিতা কহে রঘুপণ্ডিত গোবিন্দগুণগান’। চৈতন্যভক্ত রঘুনাথ ভাগবতাচার্য রচিত ব্যবহৃত। ভণিতা ‘কহে রঘুপণ্ডিত গোবিন্দগুণগান’। চৈতন্যভক্ত রঘুনাথ ভাগবতাচার্য রচিত কৃষ্ণপ্রেমতরঙ্গিনী’ আদি বৈষ্ণবসমাজে সুপরিচিত ও জনপ্রিয় ছিল এবং কবিও ছিলেন বৈষ্ণবপূজ্য।

১. নির্মিতা পুস্তিকা যেন কৃষ্ণপ্রেমতরঙ্গিনী

শ্রীমদ্ভাগবতাচার্য গৌরান্ধাতান্ত বহুভঃ।

-গৌরগণোদ্দেশদীপিকা, কবিকর্ণপুর।

২. বন্দে ভাগবতাচার্য্যগৌরাঙ্গপ্রিয়পাত্রকম
যেনা করি মহাশ্রদ্ধে নাম্না প্রেমতরঙ্গিণী।

—শাখানির্ণয়ামৃতম, যদুনাথ দাস।

রঘুপণ্ডিত পণ্ডিত গোসাঞি শ্রীযুক্ত গদাধর তথা চৈতন্যপার্ষদ গদাধর পণ্ডিতের শিষ্য ছিলেন। এ গ্রন্থ যে ষোল শতকের প্রথমার্ধে রচিত তাতে সন্দেহ নেই।

৫. দ্বিজ মাধব রচিত কৃষ্ণমঙ্গল (ভাগবতসার)— ষোল শতকের কবি দ্বিজ মাধব বহুগ্রন্থ প্রণেতা। তাঁর রচিত গঙ্গামঙ্গল, চণ্ডীমঙ্গল (মঙ্গলচণ্ডীর গীত) বা সারদাচরিত ও কৃষ্ণমঙ্গল কাব্য প্রকাশিত হয়েছে। ষোল শতকে (পরেও) কোন চৈতন্যমতাবলম্বী অন্য লৌকিক দেবতার মাহাত্ম্যকথা রচনা করেননি। কাজেই দ্বিজ মাধবও সম্ভবত বৈষ্ণব ছিলেন না, যদিও ভণিতায় তার চৈতন্যভক্তি সুপ্রকট :

১. চিন্তিয়া চৈতন্যচন্দ্র চরণ কমল
দ্বিজ মাধব কহে গঙ্গামঙ্গল। (গঙ্গামঙ্গল)
২. চিন্তিয়া চৈতন্যচন্দ্র চরণ কমল
দ্বিজ মাধবকহে শ্রীকৃষ্ণমঙ্গল। (কৃষ্ণমঙ্গল)

মনে হয় বৈষ্ণব অধ্যুষিত সপ্তগ্রাম অঞ্চলের (আধিবাসী কবি দ্বিজ মাধব বৈষ্ণবতোষণ লক্ষ্যেই চৈতন্য চরণ ধ্যান করেছেন, অথবা কৃষ্ণমঙ্গলের বৈষ্ণব লিপিকর পাঠক ভণিতা বদল করেছেন এবং শ্রীকৃষ্ণমঙ্গলের চৈতন্যযুক্ত ভণিতা প্রস্তুত। দ্বিজ মাধবের পিতার নাম পরাশর :

- ক. পরাশর নামে দ্বিজকুলে অবতার
মানব তাহার পুত্র বিদিত সংসার।। (কৃষ্ণমঙ্গল)
- খ. পরাশর সূত হয় মাধব তার নাম
কলিয়ুগে ব্যাসতুল্য গুণে অনুপাম। (চণ্ডীমঙ্গল)
- গ. সেই পঞ্চগৌড় মধ্যে সপ্তগ্রাম স্থল
ত্রিবেণীতে গঙ্গাদেবী ত্রিধারে বহে জল।
সেই মহানদী তটবাসী পরাশর
যাগযজ্ঞে জপে-তলে শ্রেষ্ঠ দ্বিজবর।
মর্যাদায় মহোদধি দানে কল্লতরু
আচারে বিচারে বুজ্যে সম সুরভরু।
অথবা-
- ঘ. তাহার তনুজ আমি মাধব আচার্য
ভক্তিভাবে বিরচিনু দেবীর মাহাত্ম্য। (চণ্ডীমঙ্গল)

বোঝা যাচ্ছে কবির পিতা পরাশর স্ব-এলাকায় প্রখ্যাত ধনী, মানী ও দানশীল ব্রাহ্মণ পণ্ডিত ছিলেন। দ্বিজ মাধবের 'গঙ্গামঙ্গল' ও চণ্ডীগীত সুদূর চট্টগ্রাম অবধি প্রচারিত ছিল। মনে হয় দ্বিজ মাধব কর্মসূত্রে চট্টগ্রামে দীর্ঘকাল বাস করেছেন এবং সে কারণে তাঁর পাঁচালীগুলো

সেখানে লোকপ্রিয় হয়েছিল। দ্বিজ মাধব মাধবাচার্য নামে পরিচিত ছিলেন :

মাধব আচার্য বন্দো কবিত্ব শীতল
যাহার রচিত গীত শ্রীকৃষ্ণমঙ্গল

-বৈষ্ণববন্দনা, দেবকীনন্দন।

তাঁর চণ্ডীগীতিতে রচনাকাল রয়েছে :

ইন্দুবিন্দু বাণ ধাতা শক নিয়োজিত
দ্বিজ মাধবে গায় সারদাচরিত।

এর থেকে ১৫০১ শক বা ১৫৭৯-৮০ খ্রীস্টাব্দ মেলে। এ গ্রন্থে চার বছর আগে বঙ্গবিজেতা সম্রাট আকবরের স্তুতিও রয়েছে :

“পঞ্চাগৌড় নামে স্থান পৃথিবীর সার
তাহে একাক্ষর বাচা (বাদশা) অর্জুন অবতার।
প্রতাপে সকল জিনে বুঝে বৃহস্পতি
কলিযুগে রামতুল্য প্রজাপালে ক্ষিতি।”

মনে হয় কৃষ্ণরাম দাস-উক্ত ‘দক্ষিণ রায়’ পাঁচালীও সম্ভবত দ্বিজ মাধব রচিত। বৈষ্ণব প্রাবল্যের যুগে কৃষ্ণমঙ্গল বৈষ্ণব সমাজে গৃহীত হয়, অন্য রচনাগুলো তখন রচনাস্থল অতিক্রম করতে পারেনি। এঁর এবং পরবর্তী কবি দ্বিজ ভবানন্দের কাব্যেরও এক বিলুপ্ত রাধাকৃষ্ণলীলাসম্বলিত সংস্কৃত ‘হরিবংশ’ অবলম্বন ছিল।

৬. শ্যামদাস রচিত ‘গোবিন্দমঙ্গল’- দুঃখী শ্যামদাস, শ্যামানন্দ দাস সম্বন্ধে পদকার প্রসঙ্গে আলোচনা করা হয়েছে। গোবিন্দমঙ্গল রচয়িতা দুঃখী শ্যামদাসের মাতার নাম ভবানী এবং পিতার নাম শ্রীমুখ। ইনি বর্ণে ভরদ্বাজবংশীয় কায়স্থ। নিবাস মেদিনীপুর জেলার কেদারকুণ্ড পরগনার হরিপুরে। কবি কাশীরাম দাসের পিতামহের কনিষ্ঠ ভ্রাতারও নাম ছিল শ্রীমুখ, তিনিও ছিলেন দে বংশীয় কায়স্থ, তাঁরও নিবাস ছিল হরিপুরে। গোবিন্দমঙ্গল সম্পাদক ঈশান বসু পরিবেশিত ভথ্যের ভিত্তিতে ডক্টর সুকুমার সেন শ্যামদাসকে কাশীরাম দাসের পিতৃব্যস্থানীয় জ্ঞাতি বলে অনুমান করেছেন এবং গোবিন্দমঙ্গলের রচনাকাল ষোল শতকের মাঝামাঝি বলে মেনেছেন। সুখময় মুখোপাধ্যায় এ সিদ্ধান্তে ক্রটি দেখেছেন। তাঁর মতে “কাশীরাম দাসের খুল্লপিতামহ বর্ধমান জেলার ইন্দ্রানী পরগনায় থাকতেন, আর কাশীরাম দাসের অনুজ গদাধর দাস লিখেছেন যে, তাঁরা শাণ্ডিল্য গোত্রীয় কায়স্থ, ভরদ্বাজ গোত্রীয় নন।”

৭. কবিশেখর দৈবকীনন্দন রচিত ‘গোপালবিজয়’- কবিশেখর দৈবকীনন্দন সম্বন্ধে ‘পদকার’ প্রসঙ্গেও আলোচনা রয়েছে। তাঁর আত্মপরিচিতি এরূপ :

“সিংহ বংশে জন্ম নাম দৈবকীনন্দন
শ্রীকবি শেখর নাম বলে সর্বজন।
বাপ শ্রীচতুর্ভুজ মা হীরাবতী
কৃষ্ণ যার প্রাণধন কুলশীল জাতি।”

এঁর রচিত সর্বগ্রন্থই কৃষ্ণবিষয়ক। এঁর অন্যান্য গ্রন্থ- ‘গোপালচরিতমহাকাব্য’, ‘গোপালের কীর্তনামৃত’, ‘গোপীনাথবিজয়’ নাটক। অতএব কৃষ্ণ যথাযথই তাঁর প্রাণধনকুলশীল জাতি।

শেখর, কবি শেখর, রায় শেখর, কবি শেখর রায় ভগিতায় তাঁর পদাবলীও রয়েছে। সুকুমার সেন 'তিনজন কবি শেখর'-এর অন্তত দুইজনে আস্থা রাখেন।

৮. কৃষ্ণদাস রচিত 'শ্রীকৃষ্ণ মঙ্গল'- কৃষ্ণমঙ্গলের গ্রন্থোক্ত নাম- মাধবচরিত 'মাধব চরিত গান যাদবনন্দন'। কৃষ্ণদাসের পিতার নাম যাদবানন্দ এবং মাতার নাম পদ্মাবতী। নিবাস 'জাহুবী পশ্চিম কূলে'। তিনি ছিলেন অপর কৃষ্ণমঙ্গল রচয়িতা মাধবাচার্যের ভৃত্য বা সেবক- 'আচার্য গোসাঞির স্থানে করি ভৃত্য কার্য, দেখিয়া করিল দয়া মাধবাচার্য'। তাই মাধবের নির্দেশ তাকে মানতে হয়েছিল। স্ব এলাকায় তাঁর গ্রন্থ প্রচার করা সম্ভব হয়নি-

'দক্ষিণে তোমার গ্রন্থ হইলে প্রচার
এখানে গাহিতে গ্রন্থ রহিল আমার।'

এই মাধবাচার্য চৈতন্যদেবের শ্যালক ও প্রতিবেশী।

৯. মাধবাচার্য রচিত 'কৃষ্ণমঙ্গল'- ইনি কৃষ্ণদাসের প্রভু এবং চৈতন্যদেবের শ্যালক বা খুড়তুতো শ্যালক ছিলেন। অতএব ইনিই দ্বিজ মাধব (দ্রষ্টব্য ৫ সংখ্যক) যিনি 'গঙ্গামঙ্গল', -চণ্ডীমঙ্গল রচনা করেছিলেন।

ক. সব অবতার শেষ কলি পরবেশ
শ্রীকৃষ্ণচৈতন্যচন্দ্র গুণ্ড প্রতিবেশ।
প্রেমভক্তি রস করেন প্রকাশ
কহে দ্বিজ মাধব তাহার দাসের দাস।

খ. কলিযুগে চৈতন্য প্রকাশ
কহে দ্বিজ মাধব তার দাসের দাস।

কবিরব্রত রচিত রসকদম্ব নামের বৈষ্ণব তত্ত্বগ্রন্থেও রাধা-কৃষ্ণলীলার প্রাসঙ্গিক বর্ণনা রয়েছে। এ গ্রন্থের রচনাকাল 'বিংশতি অধিক পঞ্চদশ শত' তথা ১৫২০ শক বা ১৫৯৮ খ্রীস্টাব্দ। ব্রজবীর পিতার নাম রাজব্রজ। মাতার নাম বৈষ্ণবী। নিবাস করতোয়া তীরে মহাস্থানের সমীপে আরোড়া গ্রামে। কবির গুরুর নাম উদ্ধব দাস। 'সখি কি পুছসি অনুভব মোয়'- এই অনন্য পদটি হয়তো এরই রচনা।

সতেরো-আঠারো শতকের কৃষ্ণলীলা বিষয়ক গ্রন্থাবলী

সমাজবদ্ধ মানুষের দেশকালের পরিবেশে ও প্রয়োজনে যে ভাব-চিন্তা-চেতনার উন্মেষ ঘটে, তার সঙ্গে সমকালীন মানুষের প্রাণ-মনের নিবিড় যোগ থাকে। তখন তা' প্রাণধর্মের তাগিদে, অনুভবের অকৃত্রিমতায়, উপলব্ধির স্বচ্ছতায় থাকে সমুজ্জ্বল ও স্বাভাবিক। কালান্তরে তা-ই প্রথাগত কৃত্রিম অনুসৃতি ও প্রাণহীন অনুকৃতিতে স্নান ও পৌনঃপুনিকতাদুষ্ট হয়ে যায়। সতেরো-আঠারো শতকের কৃষ্ণলীলা গ্রন্থগুলোও তেমনি কৃত্রিম সাহিত্যিক অনুশীলনের বিষয়বস্তু হয়ে ওঠে- তাতে না আছে বৈষ্ণবসাধকের নিষ্ঠা, না আছে বৈষ্ণবতত্ত্বের নিষ্ঠা অনুসরণ। অধিকাংশ ক্ষেত্রে কাম-প্রেমের উত্তেজক ইন্ধনই মুখ্য বিষয়। এবং গীত হওয়ার জন্যে, কথকতার জন্যে অথবা কাহিনী হিসেবে বর্ণিত ও শ্রুত হওয়ার জন্যে রচিত। তবু দীন ভবানন্দ অনূদিত অধুনালুপ্ত সংস্কৃত 'হরিবংশ' সাহিত্য হিসেবে বিশেষ উল্লেখ্য।

ভবানন্দ দীন- ‘হরিবংশ’ গ্রণেতা বা অনুবাদক তাঁর প্রায় সব ভণিতায় নিজেকে দীন ভবানন্দ বা ভবানন্দ দীন বলে পরিচয় দিয়েছেন। তাঁর সম্বন্ধে প্রায় কিছুই জানা যায় না। তাঁর কাব্যটি ১৯৩২ খ্রীস্টাব্দে সতীশচন্দ্র রায়ের সম্পাদনায় ঢাকা বিশ্ববিদ্যালয় থেকে প্রকাশিত হয়েছিল। দীন ভবানন্দের পিতার নাম শিবানন্দ- ‘শিবানন্দ সুত কহে দীন ভবানন্দ।’ ভবানন্দের দাবি তাঁর কাব্য ব্যাসরচিত হরিবংশের সংক্ষিপ্ত অনুবাদ :

সত্যবতী সূত মুনি [ব্যাস] নারায়ণ অংশ
সংক্ষেপে রচিল পুণ্যশ্লোক হরিবংশ^①
সেই শ্লোক বাখান করিয়া পদবন্ধে
লোক বুঝিবারে বোলে দীন ভবানন্দে।

তবে ভবানন্দের হরিবংশ আদিরসাত্মক একটি সুখপাঠ্য কাব্য। রাধা-কৃষ্ণ প্রেমলীলা বর্ণনায় শ্রীকৃষ্ণকীর্তন ও পদাবলীর সন্মিলন ও গীতিময় লালিত্য রয়েছে। সাধারণভাবে কাব্যের কাঠামো পুরাণানুগ। ভবানন্দ সম্ভবত কিশোরগঞ্জ বা সিলেট অঞ্চলের লোক ছিলেন। তিনি সতেরো শতকের কবি, তাঁর কাব্যের প্রাপ্ত প্রাচীনতম প্রতিলিপি কাল ১০৯৬ সাল বা ১৬৮৯ খ্রীস্টাব্দ।

নরহরি দাস (ভাগবত), অচ্যুত দাস, কবিচন্দ্র শঙ্কর চক্রবর্তী (গোবিন্দমঙ্গল বা ভাগবতামৃত), দ্বিজ মাধবেন্দ্র (ভাগবতসার), অভিরাম দাস, বলরাম দাস (কৃষ্ণমঙ্গল), দ্বিজ রামেশ্বর, দ্বিজ রামনাথ (কৃষ্ণবিজয়), নরসিংহ দাস, শিবরাম, পঞ্চগনন প্রমুখ অনেকেই কৃষ্ণবিষয়ক রচনায় ভাষা সাহিত্যকে ঋদ্ধ করেছেন।

তৃতীয় অধ্যায় অনুবাদ সাহিত্য রামায়ণ

১. অনুবাদকের যোগ্যতা

অনুবাদের প্রয়োজন ও গুরুত্ব সম্পর্কে আমরা প্রথম খণ্ডের পঞ্চম অধ্যায়ে আলোচনা করেছি। এখানে অনুবাদকের আবশ্যিক যোগ্যতা সম্পর্কে বলছি। শুদ্ধ, সুষ্ঠু ও সুন্দর অনুবাদ এক কল্প নয়। জ্ঞান-বিজ্ঞানের ক্ষেত্রে শুদ্ধ অনুবাদ আবশ্যিক। ধর্মশাস্ত্র, আইন ও দর্শনের ক্ষেত্রে সুষ্ঠু অনুবাদ প্রয়োজন আর সাহিত্যে সুন্দর অনুবাদই বাঞ্ছনীয়। কারণ সাহিত্য তত্ত্বও নয়, তথ্যও নয়; সাহিত্য মনগড়া ভাবের ও অনুভবের আর ব্যক্তিক উপলব্ধির অভিব্যক্তি মাত্র। অতএব তথ্যের শুদ্ধ, তত্ত্বের সুষ্ঠু এবং সাহিত্যের সুন্দর অনুবাদই অভিপ্রেত।

সাহিত্যের অনুবাদ শিল্পসম্মত হওয়া আবশ্যিক বলেই সাহিত্যের অনুবাদ বিশেষত কাব্যের অনুবাদ আক্ষরিক হতেই পারে না। ভিন্ন ভাষার শব্দ সম্পদের পরিমাণ, প্রকাশক্ষমতা ও বাগভঙ্গি অনুযায়ী ভিন্ন ভাষায় ব্যক্ত কথার সংকোচন, প্রসারণ, বর্জন ও সংযোজন আবশ্যিক হয়।

তাই সাহিত্য-অনুবাদকের তিনটি গুণ থাকা আবশ্যিক। এ তিন গুণের যে কোন একটির অভাব থাকলে, সে অনুবাদকে অযোগ্য বলেই মানতে হবে।

১. অনুবাদক স্বভাষায় ব্যুৎপন্ন হবেন।

২. যে ভাষা থেকে তিনি গ্রন্থ অনুবাদ করবেন, সে ভাষার বাগধারা, প্রবাদ, প্রবচন ও বুলির সঙ্গেও তার ঘনিষ্ঠ পরিচয় থাকবে, নইলে গাঁট-কাটা আর ঠোট কাটার অর্থপার্থক্য বোঝা তার পক্ষে সম্ভব হবে না।

৩. তিনি অবশ্যই সৃষ্টিশীল লেখক বা সৃষ্টিপ্রবণ সাহিত্যরসিক হবেন, সুরুচি ও বৈদগ্ধ্য হবে তাঁর বিশেষগুণ।

অনুবাদকের এ তিন গুণ না থাকলে গদ্য বা পদ্যে তাঁর অনুবাদ ক্রটিপূর্ণ ও শিল্পসুসমাহীন তথা অসার্থক হবেই। সাহিত্যে তথ্যানুগ অনুবাদের ব্যর্থতার নজীর একটা দুটো নয় বহু।

অনুবাদকের কৃতি বিচারে ও অনুবাদের মূল্যায়নে মূল গ্রন্থ অনূদিত গ্রন্থ থেকে শ্রেষ্ঠ-এ অঙ্গীকার থাকা চাই। কেননা তর্জমা মূলের অবয়বের ভাস্কর মূর্তিমাত্র- অন্যকথায় কাগজের ফুলের মতো কিংবা খেলনার ফলের মতো। রূপে-লাবণ্যে মূল গ্রন্থের মতো প্রমূর্ত হয়ে উঠলেও রচয়িতার প্রাণের কথা যে-প্রাণের ভাষায় অভিব্যক্ত হয়েছে ভিন্ন ভাষার শব্দ প্রয়োগে ভিন্নজন তা' কখনো অবিকল্পিতরূপে প্রাপ্ত হইবে! ~ www.amarboi.com ~

২. রামকথা ও ভারতকথা

প্রচলিত কিংবদন্তী অনুসারে রাম ত্রেতাযুগের এবং কৃষ্ণ দ্বাপর যুগের অবতার। অতএব রাম কৃষ্ণের এক যুগ আগে আবির্ভূত। কাজেই রাম-কথা কৃষ্ণ-কাহিনীর আগেই চালু ছিল বলে মানতে হয়। কিন্তু বাল্মীকি রামায়ণে আমরা রাম-কাহিনী যেভাবে পাই তাতে নিঃসংশয়ে বোঝা যায় এই রামায়ণ কৃষ্ণকথার আধার মহাভারতের মূল কাহিনীধারার পরবর্তী রচনা। উইন্টারনিজ, হপকিন্স, জেকোবী প্রভৃতি বিদ্বানের মতেও বাল্মীকি রামায়ণ মহাভারতের পরে রচিত। অবশ্য উভয় কাব্যেই গল্পে ও তত্ত্বে পরবর্তী যোজনা অনেক,- কালে কালে মুখে মুখে কাহিনী বিভিন্ন তাৎপর্যে পল্লবিত হয়ে হয়ে এবং গায়ক-কথক লিপিকর (সূত, ভাট, মাগধ) পরম্পরায় লিপিবদ্ধ ও সংযোজিত হয়ে বিপুল কলেবর লাভ করেছে। বাল্মীকি রামায়ণের প্রথম কাণ্ড তথা বালকাণ্ড এবং শেষকাণ্ড তথা উত্তরকাণ্ড যে বাল্মীকির রচনা নয় তা এখন আর কেউ অস্বীকার করে না। তাছাড়াও বাল্মীকিরচিত বলে স্বীকৃত অন্য পাঁচকাণ্ডেও প্রক্ষিপ্তাংশ কম নয়। ভাব ও ভাষার কালিক ব্যবধান ও অসঙ্গতির চিহ্নও দূর্লভ নয়। বাল্মীকি রামায়ণের প্রথম ও শেষ কাণ্ড মহাভারতের কাহিনী ও তত্ত্ব প্রভাবিত। রামায়ণের ভাষা ও ছন্দ মহাভারতের প্রাচীনতর অংশের তুলনায় অর্বাচীন। খ্রীস্টপূর্ব দ্বিতীয় শতকের ভাষাতাত্ত্বিক বৈয়াকরণ পাণিনি তাঁর 'অষ্টাধ্যায়ী' নামে ভাষাতত্ত্বের গ্রন্থে মহাভারতের বাসুদেব, অর্জুন, যুধিষ্ঠির প্রভৃতির নাম দৃষ্টান্তরূপে উল্লেখ করেছেন, কিন্তু রামায়ণের কোন চরিত্রের উল্লেখ নেই। এতে বোঝা যায়, পাণিনির কালে বাল্মীকির রামায়ণ রচিত হয়নি বা রামকথা তখন জনপ্রিয় বা সর্বভারতীয় হয়ে ওঠেনি কিংবা গ্রন্থীভূত হয়ে প্রচ্যাত হয়নি।

মহাভারতে পাই শাস্ত্র-সমাজ-সংস্কৃতি-সভ্যতার গঠনযুগের বা যুগান্তরের সন্ধিকালের কাহিনী- সেখানে যৌনজীবনে বিবাহ আবশ্যিক নয়, নারীও বহুপতিক, সমাজপতিদের অনেকেই হয় ক্ষেত্রজ নয়তো আকস্মিক মিলনজাত সন্তান, নারী তখনো বীরভোগ্যা ও হরণযোগ্যা। কুন্তী, দ্রৌপদী, জাহ্নবী, সত্যবতী, শান্তনু, ধৃতরাষ্ট্র, পাণ্ডু, ভীষ্ম, বিদুর, শুক, নারদ, ব্যাস কর্তৃক প্রভৃতির জন্ম ও জীবন এ ধারণাই দান করে। মহাভারতে কালে কালে নানা তত্ত্ব ও তাৎপর্য সম্বলিত বহু শাখা-উপশাখা কাহিনী সংযোজিত হয়েছে। ফলে মহাভারত সঙ্গতি ও সামঞ্জস্যহীন হলেও শাস্ত্রীয় গ্রন্থের মর্যাদায় উন্নীত হয়েছে। উল্লেখ্য যে গীতা মূলত মহাভারতেরই একটি অধ্যায়। পঞ্চান্তরে রামায়ণ জীবনচেতনায় ও জগৎভাবনায় একটি শ্রেয়োবাদমূলক কাব্য।

ভারতীয় শাস্ত্র, সমাজ, সংস্কৃতি ও সভ্যতা যখন দৃঢ়ভিত্তিক ও সুগঠিত হয়েছে, বাল্মীকির রামায়ণ তখনকার রচনা। নারীর সতীত্বই এর কেন্দ্রীয় বিষয়। সতীত্বের ও পবিত্রতার এ ধারণা আজো সমাজে অটুট। তখন নারী মহাভারতীয় কুন্তী-দ্রৌপদীর মতো স্বাধীন নয়। তা ছাড়া হিন্দুর পারিবারিক ও সামাজিক রীতি-রেওয়াজ এবং ন্যায়-নীতিও রামায়ণে প্রায় মধ্যযুগীয় পরিপূর্ণতা পেয়েছে। রামায়ণ একটি প্রায়-ঋজু কাহিনীর মাধ্যমে নৈতিক, পারিবারিক, সামাজিক ও রাজনীতিক জীবনবোধ হিসেবে তথা আদর্শ জীবনানুচরণ শিক্ষাদান লক্ষ্যে রচিত। এ গ্রন্থের প্রথম খণ্ডে এ বিষয়ে সংক্ষিপ্ত আলোচনা রয়েছে। রামায়ণ মুখ্যত মানুষ ও মনুষ্যত্বের আদর্শ নায়ক রামের জীবনকথা। যখন এ কাব্য রচিত হয় তখন রাম ইষ্ট বা উপাস্য দেবতা নন। কাজেই এটি একটি শিক্ষামূলক আদর্শ কাব্য। অযোধ্যাকাণ্ডে ঈর্ষা-অসূয়া যে পারিবারিক জীবনের সুখ-শান্তি বিনাশী, কিল্কিল্যাকাণ্ডে রাজনীতিক গৃহবিবাদে প্রাসাদঘড়যন্ত্রে বিদেশী-

বিজ্ঞাতির সহায়তা গ্রহণ যে নামাস্তরে পরাধীনতা বরণ এবং লঙ্কাকাণ্ডে কামুকতা ও নারীর মর্যাদা হানিজাত পাপ যে আত্মবিনাশী এবং জ্ঞাতিদ্রোহিতা ও পরানুগ্রহ যে পরিণামে অকল্যাণকর তা-ই তিনটে শিথিলগ্রন্থে কাহিনী মাধ্যমে পরিব্যক্ত। প্রথমটি উত্তর ভারতের নরসমাজ, দ্বিতীয়টি দাক্ষিণাত্যের বানরসমাজ এবং তৃতীয়টি লঙ্কার রাক্ষস সমাজ সম্পৃক্ত কাহিনী। অতএব ঘটনা সর্বভারতে পরিব্যাপ্ত। এখানে কালিক প্রয়োজনে রাজার আদর্শ, ভ্রাতার আদর্শ, সাপত্ন্যের আদর্শ, স্ত্রীর আদর্শ, পুত্রের আদর্শ, মাতার আদর্শ, সততার আদর্শ, সত্যবাদিতার আদর্শ, বিচারের আদর্শ, ত্যাগের আদর্শ, তিতিক্ষার আদর্শ, বীরের আদর্শ, অনুচর-পরিজনের আদর্শ, ভৃত্য ও ভক্তের আদর্শ, শত্রুর আদর্শ প্রভৃতি জগতে ও জীবনে মানুষের নিত্য প্রয়োজনীয় ও আচরণীয় আদর্শসমূহ চরিত্রসমূহের ভাবে-চিন্তায় ও কর্মে আচরণে প্রতিফলিত করার সচেতন প্রয়াস লক্ষণীয়। নানা তত্ত্বের তাৎপর্যের উপকথা কণ্টকিত মহাভারতে জগৎচেতনার ও জীবনভাবনার এমন কোন স্পষ্ট ও ঋজু ধারণা মেলে না। তাই স্বীকৃত অবতার কৃষ্ণ নির্দেশিত অনুসৃতব্য শাস্ত্রগ্রন্থের মর্যাদায় অবিসম্বাদিতরূপে গৃহীত হওয়া সত্ত্বেও মহাভারতের চেয়ে হিন্দুর ঘরোয়া জীবনে রামায়ণের প্রভাবই বেশি। যদিও বারো শতকের আগে রাম-সীতা বিষ্ণু-লক্ষ্মীর অবতার রূপে স্বীকৃত হননি এবং সম্ভবত এ কারণেই পরবর্তীকালে রাম পূজক 'রামায়ত' সম্প্রদায় গড়ে ওঠে এবং উত্তর ভারতে কালে রাম-সীতা অবতারের মর্যাদায় ও গুরুত্বে সামাজিক ও শাস্ত্রিক প্রতিষ্ঠা পান। চৈত্রমাসে রামনবমী উপলক্ষে পূজা এবং রামমূর্তি ও রামমন্দির প্রতিষ্ঠা প্রভৃতি বারো শতক থেকেই চালু হয় বলে বিদ্বানদের ধারণা। 'মহাভারত' শাস্ত্রগ্রন্থ রূপে সম্মানিত বলে রচয়িতা ব্যাসকে কবিরূপে চিহ্নিত বা অভিহিত করা হয় না এ জন্যই এবং নিছক কাব্যরূপে রচিত বলেই আর হয়তো ত্রেতাযুগের অবতার রামকথার রচয়িতা বলেই ঐশ্বর্য্যিক আদি কবির সম্মান দেয়া হয়। রামকথা কৃষ্ণকথার চেয়ে প্রাচীনতর হলেও ঐশ্বর্য্যিক রামায়ণ যে মূল মহাভারতের পরবর্তী রচনা সেকথা পূর্বেই আলোচিত হয়েছে।

৩. রামকথার উৎস ও কাল

বাল্মীকি-রামায়ণ বিভিন্ন অঞ্চলে উত্তর-পশ্চিমে উত্তর-দক্ষিণে উত্তর-পূর্বে কাহিনীগত ও বর্ণনাগত পার্থক্য নিয়ে চালু রয়েছে। এগুলোর মধ্যে উত্তর দক্ষিণাঞ্চলে চালু রামায়ণটিই অধিকতর প্রামাণ্য বা মূলানুগত বলে কোন কোন বিদ্বানের বিশ্বাস অর্থাৎ পূর্বাঞ্চলে গৌড়ীয় পুথি, উত্তরাঞ্চলের উদীচ্য পুথি ও দাক্ষিণাত্যের পুথি দাক্ষিণাত্যে অধিক। বাল্মীকি রামায়ণের রচনাকাল ২০০ খ্রীঃ পূর্বাব্দ থেকে ২০০ খ্রীস্টাব্দ অবধি বলে বিশেষজ্ঞদের অনুমান। বাল্মীকি রামায়ণ অনুষ্টপ ছন্দে রচিত ২৪০০০ শ্লোকে গ্রথিত। এগুলোর মধ্যে ৬০০০ শ্লোকই বাল্মীকির রচনা বলে পণ্ডিত জেকোবী মনে করেন। রামায়ণ আঙ্গিকে, আদর্শবোধে, সত্যতায়, ন্যায়পরায়ণতায়, কর্তব্যনিষ্ঠায়, ধৈর্যে, অধ্যবসায়ে এবং বীর্যে ও চরিত্রে নরশ্রেষ্ঠ রামের জীবনকথা। রাম পুরাণের ও মহাভারতের প্রভাবে ব্রহ্মও অবতার রূপে আর নানা তত্ত্ব ও তাৎপর্যে চিত্রিত হয়েছেন প্রথম ও শেষ কান্ডে-যা পরবর্তী যোজনা বলে স্বীকৃত।— এ দুটোর প্রভাবেই রাম বিষ্ণুর অবতার ও ব্রহ্ম রূপে পূজা হয়েছেন বারো শতক থেকে। বিষ্ণুর অবতার রূপে তিনি ভক্তিবাদেরও উৎস হয়েছেন।

পদ্ম, অগ্নি, মৎস্য, কূর্ম, ভাগবত, দেবীভাগবত, বৃহদ্রম, কঙ্কি, জৈমিনি ভারতে রাম-কথা বর্ণিত। এবং বিষ্ণুপুরাণে ও বায়ুপুরাণে রাম বিষ্ণুর অবতার রূপে স্বীকৃত হন।

এই গ্রন্থের প্রথম খণ্ডে আমরা রামকথার বিভিন্ন ধারার ও রূপকার্থের আলোচনা করেছি। বেবর, দ্বিজেন্দ্রনাথ ঠাকুর প্রমুখ বিদ্বানরা আদি রূপকার্থের সমর্থক। অন্য রূপকার্থেও রামায়ণ পরবর্তীকালে রচিত ও ব্যাখ্যাত হয়েছে, যেমন অদ্ভুত রামায়ণ, যোগবাশিষ্ঠ রামায়ণ ও অধ্যাত্মরামায়ণ। বানরেরা দক্ষিণাত্যের দ্রাবিড়। আর্যদের তুলনায় অবয়বে শ্রীহীন বলেই তারা বানর নামে এবং লঙ্কাবাসীরা রাক্ষস নামে অবজ্ঞায় অভিহিত অথবা তাদের 'টোটম'-'টেবু' অনুযায়ী তারা যথাক্রমে বানর ও রাক্ষস রূপে ছিল পরিচিত। যা হোক বৌদ্ধ রচিত 'লঙ্কাবতার সূত্রে' (রচনাকাল ২য়-৩য় শতক), দক্ষিণাত্যবাসী জৈন হেমচন্দ্র রচিত রামায়ণে (১২০০ শতক) কিংবা বৌদ্ধ লেখক ধর্মকীর্তির হাতে স্বজাতি রাবণই উত্তর ভারতের রামের চেয়ে মহত্তর ব্যক্তির রূপে চিত্রিত ও কীর্তিত হওয়াই ছিল স্বাভাবিক।

৪. অদ্ভুত-বাশিষ্ঠ-অধ্যাত্ম রামায়ণ

অন্য তিন ধরনের রামায়ণ মরমীয়াবাদের ও ঔপনিষদিক দার্শনিক তত্ত্বজিজ্ঞাসার প্রসার সত্ত্বে। যেমন অদ্ভুত রামায়ণ বাল্মীকির রচনা হতেই পারে না। অথচ বাল্মীকির নামে ১৩৬০ শ্লোকে রচিত ও সাতাশ সর্গে বিভক্ত এই অদ্ভুত রামায়ণে সাংখ্য-যোগ প্রভৃতি তত্ত্বের আবরণে তাত্ত্বিক শাস্ত্র ভক্তিবাদ বর্ণিত হয়েছে। এ গ্রন্থে সীতা রাবণকল্প। রাবণ এখানে সহস্রশির বা সহস্রানন এবং রাবণ হস্তী হচ্ছে সীতা আর রাম হচ্ছেন ব্রহ্ম। অধ্যাত্ম রামায়ণ কৃষ্ণদ্বৈপায়ন ব্যাসের নামে চলে। এখানে মহাদেব পার্বতীর কাছে রামের ব্রহ্মত্ব ও তৎসংক্রান্ত অধ্যাত্মতত্ত্ব ব্যাখ্যা করেছেন। মূলত এটি বৈদান্তিক ব্রহ্মতত্ত্বের রামাশ্রিত ব্যাখ্যা। যোগবাশিষ্ঠ রামায়ণও বাল্মীকির নামে চলে। এতে ঋষি বাশিষ্ঠ উপদেশদ্বারা বিষয়বিরাগী রামচন্দ্রকে কর্তব্যে প্রবর্তনা দিয়েছেন ষড়দর্শনের নানাতত্ত্ব ব্যাখ্যা করে। ঋগ্বেদীয় আর্যেরা বিজেতা হলেও ভারতে ছিল নিতান্ত সংখ্যালঘু। ফলে দেশী বিশ্বাস সংস্কারের শাস্ত্র সমাজের ও রীতি-রেওয়াজের প্রভাব তারা এড়াতে পারেনি। জন্মান্তরবাদ, নারী, পশু ও বৃক্ষদেবতার পূজা, মূর্তি ও মন্দির উপাসনা, সাংখ্য যোগ ও তন্ত্র এবং দেহতত্ত্ব ও ধ্যান প্রভৃতি তারা অতি অল্পকালের মধ্যেই গ্রহণ করে এবং তত্ত্বজিজ্ঞাসা প্রসারের পরিণামে উপনিষদ ও পুরাণ প্রভৃতি রচিত হতে থাকে। এই ধারার তাত্ত্বিক জিজ্ঞাসার উত্তর স্বরূপ উপনিষদ ও পুরাণের সংখ্যা এবং কলেবর যেমন ক্ষীণ হতে থাকে, তাত্ত্বিক ব্যাখ্যা, ভাষ্য এবং তত্ত্ব প্রতীক উপকথাও তেমনি বহু বিচিত্র এবং পরস্পর সম্মতিহীন ও জটিল হতে থাকে। বাল্মীকি রচিত মূল জাগতিক-বৈষয়িক জীবনকথাও কালে কালে ও ক্রমে ক্রমে মানবিক তত্ত্ব প্রবণতার ফলে অদ্ভুত, অধ্যাত্ম ও যোগবাশিষ্ঠ রামায়ণের রূপ পায়। 'এক রামায়ণ শত সহস্র প্রকার। কে জানে প্রভুর লীলা কত অবতার'-কৃত্তিবাস।—কৃত্তিবাসও জৈমিনি ভারত, নানা পুরাণ বা লোক প্রচলিত উপকথা থেকে কাহিনী তাঁর রামায়ণে সংযোজন করেছেন বা পরে কেউ কেউ তাঁর গ্রন্থে সংযোজিত করেছেন। বলেছি মোটামুটি বারো শতকের আগে থেকেই রাম-সীতা বিষ্ণু-লক্ষ্মীর অবতার রূপে দ্বাপরযুগের পূর্ববর্তী ত্রেতাযুগের অবতার রূপে কিংবা বৈদান্তিক ব্রহ্মরূপে তাত্ত্বিক স্বীকৃতি পুরাণে ভাগবতে পেতে থাকলেও বারো শতকের আগে রাম কৃষ্ণের মতো উপাস্য ও পূজ্য হয়ে ইষ্ট দেবতা হয়ে

ওঠেননি। কিন্তু বৈদান্তিক ও দার্শনিক তত্ত্বের অবলম্বন হয়ে রাম পুরাণাদির আবশ্যিক অংশ রূপে সমাজমনকে প্রভাবিত করেন। এবং বারো শতক থেকে ভক্তিবাদের অবলম্বন হয়ে রাম উত্তর ও দক্ষিণ ভারতে বিভিন্ন সাধক সম্প্রদায়ের সমুর্তি উপাস্য ও ইষ্ট দেবতা হয়ে ওঠেন। ‘রামায়তে’ সম্প্রদায়ের নয় শুধু মধ্ব, রামানুজ, রামানন্দ প্রভৃতি সমুদ্রপ্রবর্তিত ভক্তিমতবাদেও রাম-সীতা-হনুমান সাধন-ভজনের অবলম্বন হলেন। তবু বাঙলাদেশে রাম ইষ্ট দেবতা বা উপাস্যের মর্যাদা কখনো সামাজিক ভাবে পাননি। এবং সংস্কৃতে অভিনন্দ ও সন্ধ্যাকর নন্দী রামচরিত রচনা করেছেন বটে, কিন্তু সম্ভবত কৃতিবাসের বাঙলা রামায়ণের প্রভাবে অথবা বাল্মীকি রামায়ণ কাহিনীর ক্ষতিফলে বাঙালীর ঘরোয়া জীবনে রাম-লক্ষণ-সীতা চরিত্র গভীর ও ব্যাপক প্রভাব বিস্তার করেছে। বাঙালী হিন্দুর অন্তর্জীবন ও পারিবারিক সামাজিক আচরণে আজো রাম-লক্ষণ-সীতার আদর্শে নিয়ন্ত্রিত।

৫. রামকথার বিশ্বরূপ

মৃত্যুর কিছুকাল আগে ডক্টর সুনীতিকুমার চট্টোপাধ্যায় রামকথার উৎস সম্বন্ধে নতুন কথা বলেছিলেন, তাতে স্বজাতির ঐতিহ্যগর্বি হিন্দুরা বিস্মুদ্ব হয়ে সুনীতিকুমারের নিন্দা করেন এবং তাঁর উচ্চারিত তথ্য ও তত্ত্বের প্রতিবাদে মুখর হন। বই লিখে তাঁর মত প্রতিষ্ঠিত করার ইচ্ছে ছিল সুনীতি চট্টোপাধ্যায়ের। কিন্তু আয়ুতে কলোয়ান। সুকুমার সেন তাঁর অভিপ্রায়ক্রমে ‘রামকথা’ রচনা করেছেন। আমরা এখানে সুনীতিকুমারের বক্তব্যের সারাংশ তুলে দিলাম :

“রামায়ণী কাহিনীর মূল উৎস কোথায় তাহা সঠিক নির্ধারণ করা সহজ নহে। আমরা বাল্মীকির সংস্কৃত রামায়ণকেই মূল বলিয়া মানিয়া রাখিয়াছি বটে কিন্তু এখনো এদেশে ও বৃহত্তর ভারতে বাল্মীকির রামায়ণ হইতে অল্প বিস্তার বিভিন্ন বহু রামায়ণী গল্প প্রচলিত আছে। বহু রামায়ণী গল্প বিভিন্ন গল্পের সংমিশ্রণে, বহু উৎস হইতে রস আহরণ করিয়া বর্তমান অবস্থায় দাঁড়াইয়াছে। এই গল্পে যে বহু জোড়া-তাড়া আছে তাহার যথেষ্ট প্রমাণ পাওয়া যায়। এমন কি ইহাও প্রমাণ হইয়াছে যে আর্যদিগের ভারতবর্ষে আসিবার পূর্বেই অনার্য জাতিসমূহের মধ্যেও এই গল্প প্রচলিত ছিল। সম্ভবত অনার্যেরাই এই গল্পের আদি জনাদাতা। অন্তত পালি ‘দশরথ জাতক’ পাঠে মনে হয় যে, তখনও গল্পটি স্পষ্ট আকার ধরিয়া উঠিতে পারে নাই, তখনও নানাদিক হইতে অন্য নানা গল্পের দ্বারা ইহার পরিপুষ্ট সাধন চলিতেছিল। ইহা খ্রীস্টপূর্ব পাঁচশত বৎসর পূর্বকাল কথা। কিন্তু ব্রাহ্মণেরা এই গল্পের মালমসলা হাতে পাইয়া ইহাকে একটি নতুন রূপ দান করিলেন হুন্দে ও ভাবৈশ্বর্যে যাহা অপরূপ। সম্ভবত ব্রাহ্মণ্য সাহিত্যের ইহাই প্রথম সজ্জন শিল্পসৃষ্টি প্রচেষ্টা। এই ঘটনাটা আন্দাজ খ্রীস্টপূর্ব দ্বিতীয় শতকে ঘটিয়াছিল। ব্রাহ্মণগণ রামায়ণের নায়ককে বিষ্ণু-অবতার রূপে খাড়া করিয়া অন্যান্য বীর, বানর, রাক্ষস অযোধ্যার রাম ও লঙ্কার রাবণকে একই সূত্রে গ্রথিত করিয়া একটি মহাকাব্য গড়িয়া তুলিলেন। এই সংস্কৃত মহাকাব্য বাল্মীকির নামের সহিত যুক্ত হইল। ইহাই রামায়ণের আদর্শ গল্প বলিয়া বিবেচিত হইলেও অন্যান্য রামায়ণী গল্পও চলিতে লাগিল। এই কাহিনী জনসাধারণের অত্যন্ত প্রিয় হইয়া উঠিল এবং নানা দেশে বিভিন্ন গল্প লইয়া ইহার বিভিন্ন পাঠান্তর দেখা যাইতে লাগিল। ব্রাহ্মণগণের দ্বারা প্রচারিত রামায়ণে যে সকল ঘটনা বিবৃত হয় নাই এমন সকল

ঘটনাও ভিন্ন ভিন্ন রামায়ণী গল্পে ক্রমশঃ যুক্ত হইয়া গেল। এই সকল পৃথক রামায়ণী গল্প আজিও ভারতবর্ষে, হিন্দুচীনে ও দ্বীপময় ভারতে প্রচলিত।”^১

“প্রাধান্যে রামায়ণী চিত্রাবলীর শিল্প-কলার দিক দিয়া প্রাধান্য ছাড়া ভারতীয় কথাসাহিত্য ও পুরাণ কাহিনীর দলিল স্বরূপেও এগুলি অমূল্য। এগুলির দ্বারা প্রমাণিত হয় যে শিল্পীরা বাল্মীকির রামায়ণ ছাড়িয়া অন্য কোনও প্রচলিত রামায়ণ কাহিনীকেই চিত্রবদ্ধ করিয়াছিলেন।”^২

প্রাচীনতর ভারতীয় মাইথলজি-তে রাবণের অনুরূপ রূপকল্পনা দেখা যায় না, প্রাচীন গ্রীক সৃষ্টি-পুরাণকথায় কয়েকটি চরিত্রের [চারমাথাওয়ালা ফেনেস আর শতভুজ ত্রিয়ারিয়াস প্রভৃতি] কতিপয় আধা মানুষ মানবের রূপকল্পনার সঙ্গে রাবণের রূপকল্পনার একটা মিল দেখতে পাওয়া যায় আর রামায়ণ মহাকাব্য গড়ে উঠবার আগেই গ্রীসের সঙ্গে ভারতের সাংস্কৃতিক যোগাযোগ ঘটেছিল।^৩ সুনীতিকুমার চট্টোপাধ্যায়ের অনুমানে বাল্মীকি রামায়ণকথার আদি রচয়িতাও সম্ভবত চ্যবনমুনি।

বাঙলাভাষায় আদি রামায়ণ রচক কৃতিবাস। তিনি বাল্মীকি রামায়ণ হুবহু তর্জমা করেননি। গ্রহণে বর্জনে সংযোজনে তা বলতে গেলে মৌলিক রচনাই। তাছাড়া আদর্শে, উদ্দেশ্যে ও বর্ণনায়ও স্বকীয়তা সর্বত্র প্রকট। তিনি বাল্মীকি রামায়ণের অনেক অংশ বর্জন করেছেন, অল্পত রামায়ণ, অধ্যাত্ম রামায়ণ যোগবশিষ্ট রামায়ণ ছাড়াও জৈমিনিভারত ও পুরাণ থেকেও স্বকল্পিত কাহিনী যোজনা করেছেন। অথবা গায়ক কথক লিপিক্তররা তাঁর মূল রচনার সঙ্গে কালে কালে সংযোজিত করেছেন। কৃতিবাসের রামায়ণের সব কাণ্ডেই বর্ণনাগত ও ভাষাগত আঞ্চলিক ও কালিক বিকৃতি, সংযোজন, বর্জন, সংক্ষেপণ প্রভৃতি এতো অধিক ও বিচিত্র যে তাঁর গ্রন্থ সম্পাদনা আজ অবধি কেউ তেমন নিরর্থকযোগ্য সাফল্য লাভ করেননি। এমনকি সম্পাদকেরা কেউ কেউ অসাধ্য কার্য দেখে হতাশ হয়ে সম্পাদনার ইচ্ছা ত্যাগও করেছেন। তাই কৃতিবাসী রামায়ণে কৃতিবাসের রচনা কতটুকু আছে তা নির্ণয় করা আজ আর সম্ভব নয় বলে কোন কোন বিদ্বানের ধারণা। সম্প্রতি অধ্যাপক সুখময় মুখোপাধ্যায় কৃতিবাসের রচনার মূল রূপ প্রতিষ্ঠার চেষ্টা করেছেন তাঁর সম্পাদিত রামায়ণে। কৃতিবাস-পরবর্তী রামায়ণ রচয়িতাদের মধ্যে কেউ আর সম্পূর্ণ রামায়ণ অনুবাদ বা রচনা করেননি বললেই চলে। বিভিন্ন কাণ্ডের অনুবাদ অনেকেই করেছেন। তাঁরাও কেউ বাল্মীকিকে নিষ্ঠভাবে অনুসরণ করেননি।

ডক্টর সুকুমার সেন ‘রামকথার প্রাক ইতিহাস’ নামে ডক্টর সুনীতিকুমার চট্টোপাধ্যায়ের অভিপ্রায় ক্রমে যে গবেষণা পুস্তিকা রচনা করেছেন তা থেকে বোঝা যায় দিওয়ানা মদিনার মতো এক অজ্ঞাতনাম রাজমহিষীর সংসন্তান বিদ্রোহই ছিল এ কাহিনীর মূলে। কালে তা পল্লবিত ও কলেবরে স্ফীত হয়ে দশরথ রাজার [বৌদ্ধ জাতক কাহিনীতে যার জড় মেলে-৪৬১ সংখ্যক জাতক দশরথ ও তাঁর পুত্রগণ] উপদেশাত্মক ক্ষুদ্র গল্পে সীমিত রয়েছে। এরই তাত্ত্বিক অংশ মেলে সুস্তুপিতকের খুদ্দক নিকায়ের তেরোটি শ্লোকে। এ মূল কাহিনীর সঙ্গে পরে তত্ত্বকথার আধাররূপে আরো দুটো গল্প সংযোজিত হয়েছে-বানরকুলের / বালি-সুগ্রীবকাহিনী এবং লঙ্কার রাক্ষস রাবণকাহিনী। কালে নায়ক-নায়িকা রূপে রাম-সীতা সূত্রে গ্রথিত হয়ে তা

^১ পরিচয় : সুনীতি স্মারক সংখ্যা আগস্ট-সেপ্টেম্বর, ১৯৭৭ সন, পৃঃ ২১৮।

^২ পরিচয় : সুনীতি স্মারক সংখ্যা আগস্ট-সেপ্টেম্বর, ১৯৭৭ সন, পৃঃ ২২০।

^৩ পরিচয় : সুনীতি স্মারক সংখ্যা আগস্ট-সেপ্টেম্বর, ১৯৭৭ সন, পৃঃ ২৪০।

মহাকাব্যের আকার ধারণ করেছিল বাল্মীকির হাতে। কিন্তু মানতেই হবে বাল্মীকির আগেই অন্তত মুখে মুখে কাহিনী পল্লবিত ও জটিল হয়ে সুদীর্ঘ হয়েছিল বহুমনের কল্পিত সংযোজনে ও বহুজনের বিবৃত অবদানে। তা-ই সমুদ্রবাপী নাগ-রাবণ কাহিনীসহ পরে ভারত বহির্ভূত বৌদ্ধ জগতে স্মৃতি বিভ্রাটে সংযোগসূত্রের অভাবে ও অজ্ঞতার ফলে নানা বিকৃতি লাভ করেছে কাহিনী বিন্যাসে, পাত্রপাত্রীর নামে ও পরিণামে। স্বদেশেও কালিক ব্যবধানে এবং সাম্প্রদায়িক প্রয়োজনে রামকথা কাহিনীগত নানা বৈচিত্র্যে ও তাত্ত্বিক বিভিন্নতায় লঘু-গুরু বিকৃতি লাভ করেছে। সুকুমার সেন রামকথার আভাস পেয়েছেন ঋকবেদের একটি শ্লোকে (১০-৩-৩ রামকথার প্রাক ইতিহাস পৃঃ ৪)। শ্লোকের অর্থ 'ভদ্রার পাশাপাশি একা এগিয়ে গেলেন। ভগিনীর পিছনে প্রেমিক চলছে। সমুজ্জ্বল জ্যোতি নিয়ে স্থির হয়ে অগ্নি জ্যোতির্ময় আভা দিয়ে রামকে বিদায় দিলেন।'— সুকুমার সেনের ধারণায় ঋকবেদীয় ভাবনায় রামকথার তিনজনের ভাইবোন ও বাপের আবছা ছবি জেগেছে; দশরথ যেন ছেলে-মেয়েদের বনে পাঠাচ্ছেন। (পৃঃ ৪)।

মহাভারতের শান্তিপর্বে, দ্রোণপর্বে, বনপর্বে, হরিবংশে, বিষ্ণুপুরাণে, অশ্বঘোষের বুদ্ধচরিতে, কালিদাসের রঘুবংশ, ভট্টিকাব্যে, অভিনন্দের রামচরিতে রামকথার ভিন্ন ভিন্ন অংশ ঈষৎ বিভিন্নতায় ও তাৎপর্যে প্রসঙ্গক্রমে বর্ণিত হয়েছে। বৌদ্ধ পালি-প্রাকৃতে বা সংস্কৃতে তিনটিতে, জৈন সংস্কৃত ভাষায় একটিতে এবং প্রাকৃতে কয়েকটি কাব্যে কাহিনী ভিন্ন আকারে, নামে ও তাৎপর্যে বর্ণিত রয়েছে।

অতএব, রামকথার তিনটে কাহিনী অর্থাৎ অযোধ্যার ঘরোয়া বিপর্যয়, বানররাজের গৃহবিবাদ এবং রাবণের পাপজনিত পরিস্রাম কালে কালে এবং মুখে মুখে বিবর্তিত, বিস্তৃত এবং নানা উদ্দেশ্যে সংশ্লিষ্ট ও একীভূত হয়ে ব্রাহ্মণ্য বাল্মীকে রামায়ণে ও জৈন-বৌদ্ধ দশরথ ও রাম-রাবণ কাহিনীতে সংহত হয়েছে। পরে ব্রাহ্মণসমাজেও রামায়ণ বিভিন্ন তাৎপর্যে স্থানিক ও কালিক বিবর্তন, বিকাশ ও বিকৃতি লাভ করেছে।— অহীরাবণ মহীরাবণ ও সীতাতত্ত্ব এবং যোগবাসিষ্ঠ ও অধ্যাত্ম রামায়ণ তার প্রমাণ। এমনকি, বাঙলা রামায়ণের তরণীসেন প্রভৃতিও তার সাক্ষ্য। এ কাহিনী তিনটে সর্বমানবিক কোন মটিফের অন্তর্গত। সে অর্থে এতে রয়েছে মানবিক উত্তরাধিকার ও আন্তর্জাতিক-আন্তর্দৈশিক ঐক্য ও ঐতিহ্য। তাই ডক্টর সুকুমার সেন বলেন, "একথা ঠিক যে রামকথাকালির মালমশলা এদিক ওদিক বাইরে থেকে এলেও গাঁথুনি হয়েছিল ভারতবর্ষের জলহাওয়ায় ও মাটিতে। তবে সে গাঁথুনি কোন একজন কবির কণ্ঠে অথবা লেখনীতে হয়নি, বহুজনের মুখে মুখে ঘুরে ফিরে লালিত হয়ে এসেছিল। সেইজন্যই রামকথার এত বিভিন্ন রূপ ও বিচিত্র রস।" (পৃঃ ৫৬ রামকথার প্রাক ইতিহাস)।

সুনীতিসুমার চট্টোপাধ্যায় রামায়ণ রচয়িতা হিসেবে চ্যবন মুনির উল্লেখ করেছেন। সুকুমার সেনের মতে প্রচৈত বা বরুণপুত্র হচ্ছেন ভৃগু। ভৃগুর অপত্য মাত্রই ভার্গব। এবং ভার্গব মাত্রই প্রাচৈতসও। কালিদাস রামায়ণের কবিকে তাই প্রাচৈতস বলেছেন। ভৃগুরা সঙ্গীত শিল্পী। এবং চ্যবন বাল্মীকির পূর্বপুরুষ বা পিতা। সে হিসেবে চ্যবনও গোত্রনাম। মহাভারতে রামকথার বক্তা মার্ত্তণ্ডেয় ও ভার্গব। অতএব, বাল্মীকি একাধারে ভার্গব ও চ্যবন- চারণ কবি, গীতিকার ও গায়ক।

৬. রামায়ণ ও অনুবাদকণ [ঘোল, সতেরো ও আঠারো শতক]

কৃত্তিবাসকে আমরা পনেরো শতকের কবি বলে জেনেছি। তারপরে গোটা ঘোল শতকে আমরা আর কোন রামায়ণ রচয়িতার সন্ধান পাইনি। এর তিনটে কারণ অনুমান করা চলে : এক, ঘোল শতকে যারা রামায়ণ রচনা করেছেন, উৎকর্ষের অভাবে তাঁদের রচনা লোকপ্রিয় হয়নি, বর্ণনাগুণে ও কাব্যরসে হৃদয়গ্রাহী কৃত্তিবাসী রামায়ণের তুলনায় নিকৃষ্ট বলে ঘোল শতকের কোন কাব্যই কথক, গায়ক, পাঠক ও লিপিকরের স্বীকৃতি পায়নি। দুই, চৈতন্য-চৈতন্যর প্রবল প্রভাবে বাঙলাদেশে যখন 'রাধা ছাড়া সাধা নেই, কানু ছাড়া গীত নেই,' তখন সাহিত্যের আর সব শাখার প্রতি হিন্দুর আকর্ষণ বিলুপ্ত। তাই চর্চা বন্ধ এবং নতুন উদ্যোগ অনুপস্থিত। উল্লেখ্য যে সাধারণভাবে ঘোল শতকের দ্বিতীয়-তৃতীয় পাদে হিন্দুরা মহাভারত কিংবা মঙ্গলকাব্যও বিশেষ লেখেননি। এ সময়ে যেন চৈতন্যের প্রেমবাদ ও তজ্জাত রাধা-কৃষ্ণ প্রণয়তত্ত্ব কাঙালার অবৈষ্ণব হিন্দুকে অভিভূত ও বিমূঢ় রেখেছিল। তিন, সৈয়দ নাসির উদ্দীন নুসরত শাহর (১৫৩২ খ্রীঃ) পর থেকে বাঙলায় রাজনীতিক ও প্রশাসনিক অস্থিরতা দেখা দেয়। আবদুল বদর ওর্ফে গিয়াসুদ্দীন মুহম্মদ শাহ, শেরশাহ ও তাঁর বংশধরদের রাজত্বে শামসুদ্দীন মুহম্মদ গাজী, গিয়াসুদ্দীন বাহাদুর, তাজ খান কররানী, সোলেমান, দায়ুদ ও মুঘল শাসনে এখানে নির্বিবাদ নিশ্চিত অবস্থা ছিল না, বস্তুত ১৬১৭ সনেই মুঘলশাসন এদেশে সুদৃঢ় ও নিষ্কটক হয়। তখনো গোড়া ব্রাহ্মণ্য সমাজে শাস্ত্রপতি ও সমাজনেতাদের মধ্যে রামায়ণ-মহাভারত-ভাগবত প্রভৃতি ব্রাহ্মণ্য শাস্ত্রসম্পৃক্ত কাহিনীর বাঙলায় অনুবাদ পাপকৃত্তম বলে বিবেচিত। স্মর্তব্য যে কৃত্তিবাসই বিধর্মীর রাজশক্তির প্রশ্রয়প্রাপ্ত প্রথম দ্রোহী অসীমচারী ব্রাহ্মণ যিনি শাস্ত্রবিরুদ্ধ অনুবাদকর্মে আত্মনিয়োগ করেন, অন্যরা—মালাধর বসু, পরমেশ্বর দাস, শ্রীকর নন্দী প্রমুখ সবাই কায়স্থ এবং বিদেশী-বিভাগী-বিধর্মী রাজশক্তির আশ্রিত। কাজেই ১৫৩২-১৬১৭ খ্রীস্টাব্দের মধ্যে ব্রাহ্মণ্য শাস্ত্র-সাহিত্যের অনুবাদ অধিক পরিবেশের [রাজশক্তির প্রশ্রয়ের] অভাবে না হওয়ারই কথা, কবীন্দ্র পরমেশ্বর বা শ্রীকর নন্দীর রচনা হোসেন শাহর আমলের।

আবার সতেরো শতকেই যখন চৈতন্য-চৈতন্য প্রাথমিক উচ্ছাসবিরহী, চৈতন্য মতবাদীরা দলীয় কোন্দলে আসক্ত এবং দৃঢ়মূল মুঘলশাসনে প্রশাসনিক, সামাজিক ও আর্থিক জীবন স্থিতিশীল আর লোকায়ত দেবতার পূজা-পার্বণ গণমানবে প্রসারমান, তখন ব্রাহ্মণ্য ধর্ম-সমাজ-সংস্কৃতি রক্ষণের সচেতন প্রয়াসে উচ্চবর্ণের ও উচ্চবিশ্বের শিক্ষিত মানুষ লৌকিক দেবতার প্রভাবরোধ লক্ষ্যে গীতা-শ্রুতি-সংহিতা সম্পৃক্ত রামায়ণ-মহাভারত-ভাগবত প্রভৃতির বাঙলামাধ্যমে চর্চা ও প্রচার প্রয়োজনীয় বলে মনে করে। বৃহত্তর স্বার্থবশে বঙ্গানুবাদ তখন শাস্ত্রবিরোধী বলে মনে করা হয়নি। তখন হয়তো সর্বনাশের মুখে অর্ধেক ত্যাগ করার সুবুদ্ধি সমাজকে চালিত করেছে। তাই সতেরো-আঠারো শতকে আমরা রামায়ণ মহাভারতের এত অনুবাদকের সন্ধান পাচ্ছি।

সতেরো শতকে যারা সম্পূর্ণ বা বিভিন্ন কাণ্ড রামায়ণ রচনা করেছেন, তাঁদের মধ্যে চন্দ্রাবতী নিত্যানন্দ অমৃত্যুচার্য, কৈলাস বসু, রামশঙ্কর দত্ত (অমৃত্যুচার্য), দ্বিজ লক্ষণ, দ্বিজ ভবানী দাস, দ্বিজ গঙ্গানারায়ণ, ঘনশ্যাম, গুণরাজ প্রভৃতির পুঁথি সংগৃহীত ও নাম ইতিহাসভুক্ত হয়েছে। আর আঠারো শতকে পাই জগৎরাম, রামানন্দ ঘোষ, শঙ্কর চক্রবর্তী, কবিচন্দ্র, দ্বিজ সীতাসুত, কৃষ্ণদাস, রামগোবিন্দ দাস, ভবানীশঙ্কর বন্দ্যোপাধ্যায়, গঙ্গারা দত্ত, দ্বিজ সাফল্য রাম, দ্বিজ ধনঞ্জয়, দ্বিজ রাজীব, কুমুদ দত্ত, দ্বিজ পঞ্চানন্দ, দ্বিজ মানিকচন্দ্র, দ্বিজ রামচন্দ্র, দ্বিজ

শিবরাম (বন্দ্যোপাধ্যায়), দ্বিজ শঙ্করসুত, উৎসবানন্দ, রামনারায়ণ, দ্বিজ দুর্গারাম, কল্যাণদেব, মনোহর সেন, জীত ঘটক (ইনি মহাভারত প্রণেতাও), দ্বিজ দর্পনারায়ণ, লক্ষ্মীরাম, দ্বিজ রঘুরাম, দ্বিজ রুদ্রদেব, দেবীনন্দন, দ্বিজ ব্রজসুন্দর, লোকনাথ শর্মা, সারদানন্দ, বংশীমোহন প্রভৃতির রচিত বিভিন্ন কাণ্ড পাওয়া গেছে। এদের কেউ কেউ গায়ন কথক মাত্র ছিলেন বলে মনে হয়। এসব গ্রন্থ হয়তো স্থানীয়ভাবে গীত ও পঠিত হয়েছে। এবং কালে বিলুপ্ত হবার পথে ছিল।

অন্য প্রসঙ্গে আগেই বলেছিল, মানুষের মন-মনন, রুচি-সংস্কৃতি ও আচার-সভ্যতা অনেক ক্ষেত্রেই বহুতাল নদীর মতো। চলমান জীবন যতই মধুর হোক, পরিবর্তন বিবর্তন থাকেই। নতুন সূর্যোদয়ে জীবনের নতুন বাকে নতুন কিছু অর্জিত ও সঞ্চিত হয়ই। স্থানান্তরে ও কালান্তরে সে পরিবর্তন, বিবর্তন বা বিকাশ-বিকৃতি স্পষ্ট হয়ে ওঠে।

রামায়ণ-কাহিনীর ব্যাপারে আমরা তা দেখতে পাই। বাল্মীকি রামায়ণ যে সংস্কৃত ভাষাতেই কালিক বিবর্তন ও ক্ষীতি লাভ করেছিল তা নয়, আধ্যাত্মিক ও যোগতাত্ত্বিক তাৎপর্যমণ্ডিত হয়ে কাহিনীও বিবর্তিত ও ভিন্নতর হয়েছে। বাঙলা রামায়ণেও আমরা বিভিন্ন মন-মননের এবং স্থানের ও কালের প্রভাব লক্ষ্য করি। এখানেও নানা তাৎপর্যে কাহিনী উদ্ভাবিত, বিকৃত, পল্লবিত, বর্জিত ও সংযোজিত হয়েছে।

অহীরাবণ, মহীরাবণ, তরণীসেন, পাতালপুরীর সীতা নয় কেবল, চৈতন্য প্রভাবে বিনয়, সহিষ্ণুতা, শ্রেম-ভক্তি প্রভৃতিও মন-মননের মুহূর্ত-সংস্কৃতির লাভ্য বহুলাংশে বাড়িয়েছে, বাঙালীর জীবন-জীবিকার পদ্ধতির ও বাঙালীর পরিবেষ্টনীর প্রভাবও ছায়া ফেলেছে সব রচয়িতার সব রকমের রচনায়। বাঙালীর চাওয়া-পাওয়ার, নীতি-রীতির গাড় বা তরল ছাপ পড়েছে সবার সব লেখায়। কোন তার্কিক-আচরণই ব্যক্তিক চিন্তা-চেতনা মুক্ত থাকতে পারে না। তাই আমরা রামায়ণেও খণ্ড কবিতা রূপে 'রায়বার' নামের রচনার সাক্ষাৎ পাই। উষ্টর সুকুমার সেন রায়বার 'রাজদ্বার' জাত বলে মনে করেন, তাঁর মতে 'রায়বার' শব্দের অর্থ, রাজদ্বারের অর্থাৎ রাজসভার বর্ণনা এবং রাজস্বত্তি।' (বা-সা-ই-অপ/১৯৬২ সন, পৃঃ ৪০৫)।

যুদ্ধকাব্যে এবং প্রণয়োপাখ্যানে আমরা 'রায়বার' প্রেরণ দেখছি। সেখানে আমরা রায়বারকে রাজদূত বা রাজার মুখপাত্র (envoy) বা এক রাজার বক্তব্য বা প্রস্তাব অন্য রাজার কাছে পেশ করবার জন্যে প্রেরিত ব্যক্তি বা বক্তা কিংবা বাণীবাহক রূপে পাই। আঠারো-উনিশ শতকে রামায়ণের বিভিন্ন পাত্রের যেমন অঙ্গদ, বিভীষণ, কালনেমী প্রভৃতির রায়বার লিখেছেন রাড়ের মল্লভূমের ব্রাহ্মণ কবি সত্যনারায়ণ পাঁচালী, (১৭০১-০২) রচক ফকিররাম কবিভূষণ, জয়রামপুরনিবাসী রামনারায়ণ, রামচন্দ্র, লক্ষ্মীপুরনিবাসী কাশীরাম, দ্বিজ তুলসী, মতিরাম, খোশাল শর্মা, জগন্নাথ দাস, আমুদাননিবাসী দ্বিজ দুলাল প্রভৃতি (বা-সা-ই/অপ, পৃঃ ৪০৫-০৬)। আঠারো-উনিশ শতকে আরো এক প্রকার খণ্ড কাহিনী পালাগান রূপে চালু হয়েছিল, যেমন শিব-রামযুদ্ধ, সহস্রমুণ্ড রাবণ বধ, ইন্দ্র-দশরথ, রাবণ কন্যা সীতা, লক্ষ্মণভোজন, তরণীসেনের যুদ্ধ, মহীরাবণ বধ, নরমেধযজ্ঞ প্রভৃতি প্রণেতা বাল্মীকি পুরাণ-পূর্বোক্ত দ্বিজ দয়ারাম, দ্বিজ সর্বানীনন্দন, দ্বিজ লক্ষ্মণ, দ্বিজ সীতানুত প্রভৃতি অনেকে এ সবার রচয়িতা। বাঙলায় রামকথার ধর্ম-বর্ণে ও কাল নিরপেক্ষ ফলশ্রুতি হচ্ছে জ্ঞাতিদ্রোহিতার পরিণামচেতনা ও ঘৃণা-ঘরের শত্রু বিভীষণ, নারীঘটিতে ক্ষমার অযোগ্য পাপাচার আর অহঙ্কারের পরিণাম

চেতনা- ‘এক লক্ষ পুত্র যার শোয়া লক্ষ নাতি- কেহ না রহিল বংশে দিতে বাতি।’- রাবণের অনিবার্ণ চিত্ত-ভীতি বা বিভীষিকা। এবার কয়েকজন কবি সম্বন্ধে নানা সূত্রে জানা কিছু তথ্য পরিবেশন করছি। অনেকের পুঁথি অপ্রকাশিত। কাজেই আমাদের প্রত্যক্ষ কোন জ্ঞান নেই এঁদের সম্বন্ধে।

১. অদ্ভুতাচার্য বা নিত্যানন্দ আচার্য- অদ্ভুতাচার্য ভণিতায় ইনি সংস্কৃত অদ্ভুত রামায়ণেরও অনুসরণে রামকথা রচনা করে বিশেষ প্রসিদ্ধি অর্জন করেছিলেন। সংস্কৃত অদ্ভুত রামায়ণে সহস্রমুগ্ধ রাবণের কাহিনী বিধৃত ছিল। মূলত বাণীকি রামায়ণের অনুবাদ হলেও অদ্ভুত রামায়ণও অনুসৃত বলেই বটু বা বড়ু নিত্যানন্দ অদ্ভুতাচার্য ভণিতায় আত্মপ্রকাশ করেছেন। ‘অদ্ভুত আচার্যের কবিত্ব মধুর ভারতী’ অথবা ‘রাম’ আজ্ঞা করিল রচিত রামায়ণ। নিত্যানন্দের অদ্ভুত আচার্যনাম তাহার কারণ’। পিতার নাম শ্রীনিবাস আচার্য এবং মায়ের নাম মেনকা। আধুনিক পাবনা জেলার সোনাবাজু পরগনার সাঁতোলের নিকটবর্তী করতোয়া তীরে অমৃতকুণ্ড গায়ে ছিল তাঁর নিবাস। (করতোয়া কূলে বাড়ী অমৃতকুণ্ড গ্রাম)। সাঁতোলের রাজা রামকৃষ্ণ ছিলেন তাঁর প্রতিপোষক। ডক্টর সুকুমার সেনের মতে ‘নিত্যানন্দের জীবৎকাল সপ্তদশ শতাব্দির শেষ।’ (বা-সা-ই, অপ-পৃঃ ১২৩)- অদ্ভুতাচার্য রামকর্তক ‘ঋগ্বেদ’ হয়ে রামায়ণ রচনা করেছেন বলে দাবি করেছেন- ‘ঋগ্বেদে সাক্ষাৎ হইল রঘুপতি।’ নিত্যানন্দ আচার্যের তিনপুত্র জয়ানন্দ, বিজয়ানন্দ এবং শিবানন্দও সম্ভবত রামায়ণ গায়ক ছিলেন- ‘তিন ভাইকে এক বর দিল রামচন্দ্র’ নিত্যানন্দ তাঁর কাব্যে অনেক লোকায়ত-রাম-সীতা কাহিনী সংযোজন করেছেন।

২. চন্দ্রাবতী- সতেরো শতকের মনসমঞ্জলের কবি দ্বিজ বংশীদাস (চক্রবর্তী)। তাঁর কন্যা চন্দ্রাবতী অদ্ভুত রামায়ণ অবলম্বন গাথার বা গীতিকার আকারে রামকথা রচনা করেছিলেন। চন্দ্রাবতীর ব্যক্তিগত প্রেম ও তার ঐশ্বর্য্য দিয়ে রচিত করুণ রসের শ্লোকগাথা চন্দ্রনাথ দে সংগৃহীত ও দীনেশ চন্দ্র সেন সম্পাদিত ময়মনসিংহ গীতিকায় বিধৃত রয়েছে। চন্দ্রাবতীর রামায়ণগাথাও পূর্ববঙ্গ গীতিকার চতুর্থ খণ্ডে প্রকাশিত হয়েছে। গাথার সংগ্রাহক চন্দ্রনাথ দে এবং সম্পাদক দীনেশ চন্দ্র সেন। চন্দ্রাবতী সম্ভবত বাঙলা ভাষায় দ্বিতীয় মহিলা কবি প্রথম কবি চৈতন্যদেবের কালের মাধবী। রাধাকৃষ্ণপদরচয়িতা হরিধরের ঝি (কন্যা) আঠারো শতকের বলে মনে হয়। চন্দ্রাবতী রচিত এই গাথা নারীসমাজেরই সম্পদ, তারাই গায় ও শোনে। এটি অদ্ভুতরামায়ণের স্বাধীন ও সংক্ষিপ্ত অনুসৃতি অথবা লোকায়ত রামকাহিনী-অনুবাদ নয়। মুখে মুখে চালু এই গাথার ভাবে ও কাহিনীতে চন্দ্রাবতীর মূল রচনার কতটুকু রয়েছে, তা আর বলবার উপায় নেই। ভাষা নিঃসন্দেহে আধুনিক। মসনার ভাসান এবং মলুয়া ও কেনারাম দস্যু নামের গাথা চন্দ্রাবতীর রচনা বলে অনুমিত হয়।

৩. সতেরো শতকে কবি কৈলাস বসু, ডক্টর অসিতকুমার বন্দ্যোপাধ্যায়ের মতে, সংস্কৃতে রচিত অদ্ভুতরামায়ণের আক্ষরিত অনুবাদ করেছিলেন। রাম-শঙ্কর, দ্বিজ লক্ষণ ও ভবানী দাস, অসিত বন্দ্যোপাধ্যায়ের মতে, অদ্ভুত ও অধ্যাত্ম রামায়ণের প্রতি অধিকতর আকৃষ্ট হয়েছিলেন।

৪. ঢাকার মানিকগঞ্জের অদিবাসী রামশঙ্কর দত্ত রায়। ইনি কবিরাজ বা চিকিৎসক ছিলেন- ‘পদবন্ধ করি কহে ভিষক শঙ্কর।’ ইনি বাণীকি রামায়ণ, যোগবাশিষ্ঠ, অদ্ভুত ও অধ্যাত্ম রামায়ণ থেকে ইচ্ছে মতো কাহিনী গ্রহণ করে রামায়ণ রচনা করেন।

৫. **দ্বিজ লক্ষণ**— অধ্যাত্ম, যোগবাসিষ্ঠ ও অদ্ভুত রামায়ণের কাহিনী নিয়ে তাঁর কাব্য রচনা করেন। তাঁর রচিত জনপ্রিয় পালা ‘শিব-রামের যুদ্ধ’-এর একটি প্রতিলিপি ১০৬১ শকাব্দের বা ১৬৫৪ খ্রীস্টাব্দের। অপর একটি পুথির লিপিকাল ১১০৫ বঙ্গাব্দ (১৬৯৮-৯৯)। অতএব কবি যে সত্তেরো শতকের তাতে সন্দেহ নেই।

৬. **ঘনশ্যামে দাসের** একখানি পুথির প্রতিলিপির সন ১০৩৫ বঙ্গাব্দ বা ১৬১৮-১৯ খ্রীস্টাব্দ। কাজেই কবি সত্তেরো শতকের বলে অনুমান করি। ঘনশ্যামের সীতার বনবাস জৈমিনী ভারত থেকে নেয়া।

৭. **দ্বিজ গঙ্গানারায়ণ** কৃতিবাসের একই বংশে উদ্ভূত বলে অভিহিত। তাঁর রচিত রামলীলার পুথি সংগৃহীত হয়েছে। ভারতচন্দ্র রায়ও ছিলেন এ বংশীয়।

৮. **গুণরাজ ঝান** (ষষ্ঠীর দত্ত) মহাভারতের বনপর্বে বর্ণিত রামকথা অনুসরণে পাঁচালী রচনা করেছিলেন সম্ভবত সত্তেরো শতকেই।

৯. **দ্বিজ জগৎরাম**— আঠারো শতকের শেষ পাদে (১৭৯১ খ্রীঃ) জগৎরাম রায় তাঁর পুত্র রামপ্রসাদের সহযোগিতায় অদ্ভুত রামায়ণ রচনা করেছিলেন। পঞ্চকোটের নিকটবর্তী ভুলুই গ্রামের অধিবাসী ছিলেন এঁরা। এঁদের অদ্ভুত রামায়ণ নয় কাণ্ডে বিভক্ত ছিল আদি, অযোধ্যা, অরণ্য, কিষ্কিন্ধ্যা, সুন্দর, লঙ্কা, পুষ্প, রামরাস ও উৎসবকাণ্ড। রচনাকাল ১৭১২ শকাব্দ। দুর্গাপঞ্চরাত্রি (১৬৯২ শকাব্দ) আধ্যাত্মিক তত্ত্বাবোধ (১৭০৯ শকাব্দ) প্রভৃতির রচয়িতা। ডক্টর সুকুমার সেন এঁর বিস্তৃতি পুথি দিয়েছেন (পৃঃ ৪১২-১৫)। আর অধ্যাত্ম রামায়ণ রচনা করেছিলেন শঙ্কর চক্রবর্তী।

১০. **ষষ্ঠীর সেন ও পদ্মদাস**— মাদার্পুরে পিতা ও পুত্র। এঁদের নিবাস ছিল ঢাকা জেলার জিনারদি (দীনারদ্বীপ) গ্রামে। এঁরা উভয়েই রামায়ণ রচক। ষষ্ঠীরের মনসার ভাসানও রয়েছে।

১১. **দ্বিজ কবিচন্দ্র** (নাম : শঙ্কর)। ইনি বাঁকুড়া জেলার ‘লেগোর দক্ষিণে ঘর পাতুয়ায় বসতি’ বলে ভণিতায় বলেছেন। বিষ্ণুপুরের বলি হাধীর, রঘুনাথ সিংহ, বীর সিংহ ও গোপাল সিংহ— এ চারজানের নামোল্লেখ করেছেন। ১৭১২ খ্রীস্টাব্দে এই দীর্ঘায়ু কবির মৃত্যু হয় বলে জানা যায়।

১২. **দ্বিজ ভবানী দাসের** লক্ষণদিক্ষিজয়ে আদেষ্ঠা রামচন্দ্রের নাম রয়েছে। এক ভবানী দাসের রামের স্বর্গারোহণ নামের পুথি মিলেছে। অন্য এক দ্বিজ ভবানীনাথ চট্টগ্রামবাসী ছিলেন। তিনি রাজা জয়চন্দ্র নামের চক্রশালার এক সামন্তের আমলে (কারো কারো মতে ১৪৮২-১৫৩৭ খ্রীঃ) অধ্যাত্ম রামায়ণের অনুসরণে ‘লক্ষণ দিক্ষিজয় বা রামচন্দ্রের রাজ্যাভিষেক’ কাণ্ডটি রচনা করেন। ডক্টর সুকুমার সেনের মতে তিনি নোয়াখালির ভুলুয়ার অধিবাসী ছিলেন। ত্রিপুরারাজ জগৎ মাণিক্যের আদেশে তিনি অধ্যাত্ম রামায়ণ অনুসরণে ‘রাম-সীতা কাহিনী’ রচনা করেন বলে মনে করেছেন।

১৩. **রামানন্দ ঘোষ** (বুদ্ধাবতার)— ইনি রামলীলা রচয়িতা। ইনি নিজেকে বুদ্ধাবতার বলে দাবি করতেন এবং ভণিতায় বুদ্ধ নাম ব্যবহার করেন। রামানন্দ ঘোষ সম্ভবত সত্তেরো শতকের শেষ পাদের বা আঠারো শতকের মধ্যভাগের কবি। আর এক রামানন্দ যতিও রামকথা বা

রামতত্ত্ব ও চণ্ডীমঙ্গল (১৭৬৬ খ্রীঃ) রচনা করেছিলেন- উভয়ে অভিন্ন ব্যক্তিও হতে পারেন। তাঁর ভণিতার কয়েকটি নমুনা-

কলি যুগে রামানন্দ বুদ্ধ অবতার।
আমি বুদ্ধ আমি অস্তে কঙ্কি অবতার।
শূদ্র কুলে রামানন্দ জন্ম লয়েছিল
বুদ্ধ বেশ ধরি এবে তত্ত্ব লিখে গেল।

আবার তাঁর লক্ষ্য ছিল-

যবন স্নেহের রাজ্য বলে ক্যাড়ি লব
একচ্ছত্র রাজা করি দারু ব্রহ্মে দিব।

ইনি শেষ জীবনে হতবাক্সার বেদনায় ভুগেছিলেন :

ক্ষুধায় না মিলে অনু পিয়াসে না পানি
মিথ্যা ধন্ধে গেল মোর দিবস রজনী।
দারা ছাড়ি পাপ ভরা ভরিনু অপার
অস্থি চর্ম সার কৈলা অভিশাপ তার।
দারা সুত সুতা আর বন্ধু কেহ নাই।
অবশেষে কি হইবে নাহি মিলে থাই (ঠাই)।

নিরন্ন কবি দেবতার উপরও আস্থা হারিয়েছিলেন

দারুব্রহ্মে সেবা করি জেরমায়ে হেল
বৃথাকাষ্ঠ সেবি কালকাট্টে মনে ভাল।
বস্ত্রহীন বিগ্রহ সেবিয়া নহে কাজ-
নিজ কষ্ট দায় আর লোক মধ্যে লাজ।

এতে মনে হয়, শূদ্র রামানন্দ বর্ণবিদ্যাস্ত সমাজের বিরুদ্ধে বিদ্রোহী ছিলেন, ঘৃণ্য শূদ্রবর্ণের অভিশাপ এড়াতে চেয়েছিলেন। আর পূর্বোক্ত (১১ সং) আঠারো শতকে কবিচন্দ্র শঙ্কর চক্রবর্তী রচনা করেছিলেন রামলীলা উপাখ্যান বা শ্রীরামমঙ্গল। তার অঙ্গদের রায়বার, কুন্তকর্ণের রায়বার, শিব-রামের যুদ্ধ প্রভৃতি পালার অনেক পুথি সংগৃহীত হয়েছে। বিষ্ণুপুরের রাজা দ্বিতীয় রঘুনাথের আমলে ১৭০২ খ্রীস্টাব্দে তিনি রামমঙ্গল রচনা করেছিলেন।

এভাবে এ সব কবি-কাব্য পরিচিতির গুরুত্ব বা সার্থকতা নেই বলেলেই চলে। মন-মননের ও সমাজ-সংস্কৃতির ইতিহাসের উপাদানের আধার স্বরূপ এসব পালা-পাঁচালী সম্পাদিত ও মুদ্রিত হলে তুলনামূলক আলোচনার মাধ্যমে গ্রন্থ থেকে উপাদান-সংগ্রহ করে সমাজ-সংস্কৃতির কালিক-স্থানিক বিবর্তনধারার ইতিহাস রচনা ও আলোচনা করা সহজে সম্ভব হত।

চতুর্থ অধ্যায়

মহাভারত

১. জাতীয় মহাকাব্য মহাভারত পরিচিতি

জাতীয় মহাকাব্য ও অনুবাদ সাহিত্য সম্বন্ধে এ গ্রন্থের প্রথম খণ্ডে আলোচনা রয়েছে। আগ্নিকের আদলে মহাকাব্য না হলেও মহাভারত ব্রাহ্মণ্যবাদীদের জাতীয় মহাকাব্যই নয় কেবল, এটি তাদের প্রাচীন শাস্ত্র, সমাজ, সংস্কৃতি ও সভ্যতার আকর গ্রন্থও। এ অর্থেই 'যা নেই মহাভারতে, তা নেই জগতে'।- প্রবাদের সার্থকতা। তুল : "যদি হস্তি তদন্যত্র; যন্তে হস্তি ন তৎকৃচিৎ।"- এতে যা আছে, তা অন্যত্র থাকতে পারে, এতে যা নেই তা কোথাও নেই। বস্তুত জৈন-বৌদ্ধেরাও এ গ্রন্থের কাছে নানাভাবে স্বার্থী। এক অর্থে ব্যাসরচিত মহাভারত প্রাচীন ও মধ্যযুগীয় ভারতকোষ। হিন্দুর চোখে মহাভারত পঞ্চম বেদ- ধর্ম, অর্থ ও কামশাস্ত্র। এটি কথা-উপকথার কাব্য নয়- নীতিকথার ও লোকাহিনীর আকর। এতে ভারতবর্ষের ভূগোল, প্রকৃতি, প্রাণিজগৎ, জনজীবন, রাজনীতি, বিশ্বাস-সংস্কার, রীতি-রেওয়াজ, ন্যায়-নীতি, জীবিকাপদ্ধতি, ধর্মার্থকামমোক্ষপন্থ, দ্বন্দ্ব-মিলন, আর শাস্ত্র-সাহিত্য-দর্শন-ইতিহাস বিম্বিত, চিত্রিত ও বিধৃত রয়েছে। ব্যাসের নামে চললেও হাজার বছরের কালপরিসরে কালিক-সামাজিক প্রয়োজনে শত শত মানুষের চিন্তা-ভাবনা, আদর্শ-উদ্দেশ্য নানা নব নব কাহিনীর মাধ্যমে রূপায়িত ও সংযোজিত হয়েছে এ গ্রন্থে। তাই কলেবরে স্তীত যেমন, তেমনি অসমঞ্জস অপ্রাসঙ্গিক ও অসংহত আদর্শে, লক্ষ্য, বক্তব্যে, তত্ত্বে ও তথ্যে মহাভারত বিচিত্র ও জটাজটিল রূপ লাভ করেছে। এতে ভারতীয় শাস্ত্র, সমাজ, সংস্কৃতি ও সভ্যতার বিবর্তনধারার যেমন একটি প্রায় স্পষ্ট সামগ্রিক ছবি মেলে, তেমনি ব্যক্তিক বা সাম্প্রদায়িক মত-পন্থের দ্বন্দ্বিক ও স্বতন্ত্র উদ্ভব-বিকাশের তথ্য ও তত্ত্ব এতে দুর্লভ নয়। তাই মহাভারত আজো ব্রাহ্মণ্যবাদীর জীবনবেদ- প্রায় তিন হাজার বছর ধরে এ বিপুলকলেবর গ্রন্থ নানা যুগের, বিচিত্র মনের, অসংখ্য মতের মানুষের জীবন-ভাবনা ও জগৎচেতনা ধারণ করে রয়েছে- উৎস হয়ে রয়েছে প্রেরণার ও প্রয়োজনের। পৃথিবীর অন্যতম শ্রেষ্ঠ গ্রন্থ এই মহাভারতকে মানুষের উচ্চারিত চিন্তা-চেতনার আকর হিসেবে মহাসাগর ও তার কল্লোলের সঙ্গে অথবা গ্রন্থাগার ও তার গ্রন্থরাজিধৃত অশ্রুত ধ্বনিমুখর চিন্তা-চেতনার সঙ্গে তুলনা করা চলে। আজো পঞ্চাশ কোটি মানুষের মহাভারতই একাধারে সহচেতনার, সংহতির, সাধর্ম্যের, জাতীয়তার যোগসূত্র বা রাখিবন্ধন; অন্যকথায় মহাভারত জাতীয় আত্মার বা জাতিসত্তার নামান্তর। রামায়ণে যেমন রামই নায়ক, তেমনি বিষ্ণু অবতার কৃষ্ণই এ কাব্যের নায়ক। কৃষ্ণই এ কাব্যের পটভূমিকার উদ্ভাবক। মাধ্যমে পরিব্যক্ত কৃষ্ণের ব্যাধীই হিন্দুর ধর্মশাস্ত্র।

গীতা মূলত ঐ মহাভারতেরই একটি অধ্যায়। গীতানুসারী মাত্রই জ্ঞানকর্মবাদী ও মূলত বিষ্ণু উপাসক। তাই বিষ্ণু বা কৃষ্ণউপাসক বৈরাগী ও ভক্তিবাদীদের স্বতন্ত্রভাবে 'বৈষ্ণব' নামে চিহ্নিত করা হয়। মহাভারতই হিন্দুর চিন্তা চেতনার ও কর্ম-আচরণের ঐতিহ্য শাস্ত্র, সাহিত্য, দর্শন ও ইতিহাস। তাই মহাভারত একাধারে তার জাতীয় জীবনবেদ, জাতীয় আত্মার জাতীয় মহাকাব্য; তার জাতিসত্তার মূল বা বৃ্ত্ত।

দু হাজার বছরের ভারতীয় সাহিত্যের উপকরণ-উপাদান, আদর্শ ও বক্তব্য যুগিয়েছে রামায়ণ ও মহাভারত। সংস্কৃতে, প্রাকৃতে, অবহট্টে কিংবা আধুনিক ভারতীয় ভাষায় সাহিত্যের দেহের ও প্রাণের জন্যে রামায়ণ-মহাভারতের কাছেই বিশেষভাবে ঋণী।

মহাভারতের মূল কাহিনীর উদ্ভবকাল, কুরু-পাণ্ডবের সম্পর্ক, মহাভারতের আদি রচনাকাল ও রচক সম্বন্ধে পণ্ডিতদের মধ্যে মতভেদ রয়েছে। বিশেষ বিতর্কের আশঙ্কা না করে বলা চলে মহাভারতের মূল অংশ হচ্ছে কৌরবপাণ্ডবের যুদ্ধ- এ অংশের রচয়িতা মৎস্যগন্ধাসত্যবতীসন্তান কৃষ্ণদ্বৈপায়ন ব্যাস। এ অংশের রচনাকাল আনুঃ ৪০০ খ্রীঃ পূর্বাব্দ। কুরু ও পাণ্ডু বা পাঞ্চাল দুই পৃথক গোত্র নয়, পরস্পর জ্ঞাতি। এবং দুশ্মন্ত-শুকুন্তলার সন্তান ভরতের বংশধর। এই ভরতের রাজ্যই ভারতবর্ষ নামে আখ্যাত। রাম যেমন সূর্যবংশীয়, কুরু-পাণ্ডব তেমন চন্দ্রবংশীয়। পতঙ্গলির 'মহাভাষ্যে' ভীম, নকুল ও সহদেব কুরু বংশীয় তথা কৌরব বলে উল্লেখিত। বৌদ্ধ জাতকে (৪৯৫ সং) কৌরব (কোরব) যুধিষ্ঠির (জুধিটিল) ইন্দ্ৰপ্ৰস্থে (ইন্দ্রপত্তে) রাজত্ব করতেন বলে বর্ণিত। কৌরব-পাণ্ডব দুই ভিন্ন গোত্রীয় নয়। ভরতের নারশংসী বা বংশধরের বিবরণ বলেই গ্রন্থনা ভারত বা মহাভারত অথবা কলেবরে বিপুল ও ভারী বলেই কিংবা মহাকাব্যের ভারী বলেই ভারত বা মহাভারত। দুটো নামই চালু ছিল। কেউ কেউ মনে করেন ছোট আকারের আদি কাহিনী 'ভারত' নামে খ্যাত ছিল। কলেবর বৃদ্ধির ফলে নাম মহাভারত হয়েছে। ৪০০ খ্রীঃ পূর্বাব্দ থেকে ৪০০০ খ্রীস্টাব্দ অবধি নানা সূত বা সারণি, মাঘধ, ভাট-ব্রাহ্মণ পাঠক-গায়ক-লিপিকরের মনের, মতের, আদর্শের ও উদ্দেশ্যের প্রশ্নে মহাভারতের মূল বক্তব্য পল্লবিত, বিকৃত বিবর্জিত এবং নানা উদ্দেশ্যে নানা প্রাসঙ্গিক-অপ্রাসঙ্গিক সঙ্গত-অসঙ্গত, সদৃশ ও স্ববিরোধী কাহিনী ও উপকথা কালে কালে মানুষের নৈতিক-সামাজিক-শাস্ত্রিক-রাজনীতিক প্রয়োজনে কল্পিত, রচিত ও সংযোজিত হয়েছে এ গ্রন্থে। কাজেই বর্তমান আকারে উত্তরাপথে বা দাক্ষিণাত্যে প্রচলিত মহাভারত কোন ব্যক্তিক রচনা নয়- জাতীয় সৃষ্টি।

লিখিত কিংবদন্তী অনুসারে মহাভারতের যুদ্ধকালীন যুদ্ধকাহিনীর প্রথম বিবরণদাতা সম্ভব, শ্রোতা স্বয়ং অন্ধরাজা ধৃতরাষ্ট্র ব্যাস লিখিত কাব্যিক বিবরণের প্রথম শ্রোতা বা পাঠক হলেন ব্যাস-শিষ্য বৈশম্পায়ন। তখন শ্লোক সংখ্যা ছিল ৮৮০০। সেসময়ে শ্রোতা ছিলেন আরো চার জন, ব্যাস পুত্র শুকদেব ও ব্যাসের অপর তিন শিষ্য সুমন্ত, জৈমিনি ও পৈল। মহাভারতের আদি পর্বের দুটো শ্লোকসূত্রে [১ম অধ্যায়, ৮৮-৮৯ শ্লোক] প্রকাশ- ব্যাস তাঁর পুত্র শুকদেবসহ পাঁচজন শিষ্যকে বেদ পড়িয়ে পরে মহাভারত পড়ালেন- এবং গুঁরা পরে প্রত্যেকেই একটি করে ভারতসংহিতা রচনা করেছিলেন :

বেদানধ্যাপয়াসাস মহাভারত পঞ্চমান ।

সুমন্তং জৈমিনিং পৈল শুকদ্বৈব স্মমাত্মজম ।।

প্রভুবরিষ্ঠো বরদো বৈশম্পায়নমোবচ

সংহিতাস্তৈ পৃথকভ্বেন ভারতস্য প্রকাশিতাঃ ।^১

সর্পদংশনে যখন রাজা পরীক্ষিতের মৃত্যু ঘটে, তাঁর পুত্র রাজা জনমেজয় সর্পসত্রের বা সর্পযজ্ঞের ব্যবস্থা করেন। এই যজ্ঞকালে বৈশম্পায়ন জনমেজয়ের নির্দেশে ‘মহাভারত’ কাব্য পাঠ করেন। তখন শ্লোক সংখ্যা বৃদ্ধি পেয়ে হয় ২৪০০০। বৈশম্পায়নই হয়তো নানা তত্ত্ব ও মন্তব্যযোগে অতিরিক্ত ১৫২০০ শ্লোক রচনা করে গুরুর কাব্যের কলেবর বৃদ্ধি করেন। সর্পসত্রে উপস্থিত শ্রোতা সূত তথা সারথি উগ্রশ্রবা: পরে নেমিষারণ্যে শৌনক ঋষি আয়োজিত যজ্ঞে উপস্থিত ঋষিদের কাছে মহাভারত কাহিনী পড়ে বা মুখে শুনান। তখন শ্লোক সংখ্যা দাঁড়াল এক লক্ষ। প্রাচীন ও লিখিত প্রবাদ হলেও এগুলি বিশ্বাস করার প্রয়োজন নেই। তবে প্রাচীন ও মধ্যযুগে যে-কোন চাঞ্চল্যকর স্থানিক ঘটনা ও যুদ্ধ কাহিনী বর্ণনা করত কথক, গায়ক, চারণকবি ভাট ও মাঘধরা বিশেষ করে যুদ্ধকাহিনী বর্ণনা করত যুদ্ধে প্রত্যক্ষদর্শী সারথিরা। সূত বা সারথিরা যুদ্ধোত্তর কালে পেশাদার চারণকবি হিসেবে যুদ্ধকাহিনী রসিয়ে রসিয়ে বর্ণনা করে জীবিকার্জন করত। এই শ্রেণীর লোককবির বা চারণকবির গাথাই কালে রূপে ও রসে, কথায় ও উপকথায়, তত্ত্বে ও তথ্যে পদ্ধতিবদ্ধ ও পুঙ্খবহু হয়ে প্রতিভাধর কবির হাতে বিবৃতি-ও বর্ণনামূলক কাব্য-মহাকাব্যের রূপ লাভ করেছে। ৮০০ বছরের সময় পরিসরে বর্তমান মহাভারত কাহিনীসমূহ ও কাব্য পূর্ণতা পেয়েছে বলেই বিদ্বানদের ধারণা। কাব্যের বিভিন্ন অংশের ভাবে, ভাষায়, ছন্দে ও বর্ণনার পার্থক্যে, বিভিন্ন অংশের অসংগতির সাক্ষ্য, যবন (আইওনীয়ান গ্রীক) ও বৌদ্ধদের উল্লেখ, রামকথার সংযোজনে আর আঞ্চলিক ও কালিক বর্জনে, গ্রহণে, সংক্ষেপণে প্রসারণে ও পরিবর্তনে উত্তর ভারতের ও দক্ষিণ ভারতের পুথি এ ধারণাই সমর্থন করে। মনে হয় কুমারিল (৫ম শতক?) ও বাণভট্টের (৭ম শতক) আবির্ভাবের পূর্বেই মহাভারত বর্তমান আকারে পূর্ণতা লাভ করেছিল। কুরুক্ষেত্র যুদ্ধ ও মহাভারতের আদি অংশ পাণিনিরও জানা ছিল। প্রচলিত বাল্মীকির রামায়ণে প্রথম ও শেষ কাণ্ড মহাভারতের কাহিনীপ্রভাবিত। বৌদ্ধ বিধুরপণ্ডিতজাতক, ঘটজাতক, কুণালজাতক প্রভৃতি কাহিনীও মহাভারতে মেলে। এসব উভয় রচনার সমকালীনতার কিন্তু সম্প্রদায়গত দৃষ্টির পার্থক্যের সাক্ষ্য হিসেবে বিবেচিত হতে পারে। বলেছি, ‘যা নেই ভারতে, তা নেই জগতে’। মহাভারতে রাজনীতি, শাসননীতি, কূটনীতি, ষড়যন্ত্র, ছল-চাতুরী, প্রভারণা-বিশ্বাসঘাতকতা, যুদ্ধ, সন্ধি, প্রেম-প্রীতি-বিশ্বাস-ভরসা, লিঙ্গা-রিরংসা, অসূয়া, প্রতিহিংসা, ক্ষমা, ত্যাগ, তিতিক্ষা, ন্যায়-নীতি, বিবেক-বিচার, অবাধ যৌনচর্চা, নারীহরণ, চুরি, দস্যুবৃত্তি, ছদ্মবেশ, জয়ের উল্লাস, পরাজয়ের গ্লানি, নির্যাতন-লাঞ্ছনার ক্ষোভ, শোক, কাম, ক্ষুধা, বৈরাগ্য, নীচতা, মহত্ব, সততা, সত্যবাদিতা, মিথ্যাবাদিতা, ঔদ্ধত্য, বিনয় প্রভৃতি সর্বপ্রকার মানবিক দোষ-গুণের, চারিত্রিক

^১ অসিত বন্দ্যোপাধ্যায় উদ্ধৃত, ১ম খণ্ড, ৩য় সং, পৃঃ ৫৬৭।

বিভিন্নতার, অনুভবের, বৈচিত্র্যের এবং নৈতিক, শাস্ত্রিক, সামাজিক, রাষ্ট্রিক, দার্শনিক, আধ্যাত্মিক তত্ত্ব ও তথ্যের বিচার-বিশ্লেষণ ও সিদ্ধান্ত রয়েছে। এখানে সর্বকালের সর্বপ্রকার মানুষের বৃত্তি-প্রবৃত্তি সম্ভ্রাত ভাব-চিন্তা ও ধর্ম-অর্থ-কাম-মোক্শ সম্বন্ধীয় চিন্তা-চেতনার, শ্রেয়োবোধের, জীবন চেতনার ও জগৎ-ভাবনার তাত্ত্বিক দার্শনিক ব্যাখ্যা-বিশ্লেষণ। ‘একটা দেশের বহিজীবনে ও অভিজীবনের অযুত তরঙ্গলীলা যদি কোন একখানি কাব্যের মধ্যে প্রতিফলিত হইয়া থাকে, তবে তাহা নিঃসন্দেহে মহাভারত।’^১ রবীন্দ্রনাথের কাছে মহাভারত ‘একটি জাতির স্বরচিত স্বাভাবিক ইতিহাস’।^২ রামেন্দ্রসুন্দর ত্রিবেদীর চোখে ‘মহাভারত বর্ণিত ইতিহাস মানব সমাজের বিপ্লবের ইতিহাস।’^৩ বলেছিল, মহাভারত প্রাসঙ্গিক ও অপ্ৰাসঙ্গিক নানা উপকথার সংযোজনে স্ফীতকায়। এতে মোটামুটি আট প্রকার বিষয় বর্ণিত রয়েছে, ক, কুরু-পাণ্ডবের বিরোধ-বৈরিতা ও কুরুক্ষেত্রে যুদ্ধ, খ, পাণ্ডবদের রাজ্য ও রাজকন্যাজয়, গ, গণ অশ্বমেধ যজ্ঞ-এ সূত্রে ভারতবর্ষের রাষ্ট্রিক-ভৌগোলিক পরিচিতি, ঘ, রাজবংশোচিত কাহিনী ও, মুনি-ঋষি দ্বিজ ও দেবকাহিনী, চ, তীর্থ পরিচিতি, ছ, পণ্ড-পক্ষীর রূপক কাহিনী, জ, রাজনীতি, সমরনীতি, অধ্যাত্মতত্ত্ব, নীতি-শাস্ত্র প্রভৃতি বিবিধতত্ত্ব।

ডক্টর অসিতকুমার বন্দ্যোপাধ্যায়ের ভাষায় মহাভারতে “জয়ধ্বনি ও শ্মশান-সঙ্গীত একসঙ্গে মিলিয়া গিয়া মানব জীবনের অনন্ত বেদনাক্রি, ব্যর্থ পরিণামকে, মুখর আকাজক্ষার নিদারুণ নিঃসঙ্গতাকে বৈরাগ্যের ধূসর আন্তরণে আবৃত করিয়াছে। মহাভারত মানবজীবনের শ্রেষ্ঠ ট্রাজেডি, সফলতার নিষ্ফল পরিণতি, জীবনাসক্তির জৈবিক বৈরাগ্য [রবীন্দ্রনাথের ‘বিজয়ের শেষে সে মহাপ্রয়াণ/ সফল আশ্রয় বিষাদ মহান’]। তাই মহাভারতে— সত্যের, ধর্মের, ন্যায়ের— সাফল্যের মধ্যে পরাভবের বিষণ্ণতা নিহিত রহিয়াছে। কেননা গ্রীক নাট্যকার মানুষের বাঁচিয়া থাকার মধ্যে জয়ী হওয়ার মধ্যে এত বড় নিদারুণ ট্রাজেডি কল্পনা করিতে পারে না। তাই মহাভারতে মানবজীবনের বিষামূর্তের কাহিনী মূর্তিলাভ করিয়াছে।”^৪ মহাভারতম নয়— ‘ভারতম’ বলেও প্রাচীন উল্লেখ মেলে। কিংবদন্তী এই আট হাজার শ্লোকবিশিষ্ট ‘ভারতম’ ক্রমে ২৪ হাজার ও লক্ষ শ্লোক সমন্বিত হয়ে মহাভারত হয়েছে।

২. মহাভারত উত্তরাপথের সম্পদ : ওখানেই তা রচিত। কাজেই উত্তর ভারতের পুথিই স্বেচ্ছাসংযোজনে কলেবরে স্ফীত, ফলে বর্ণিত বিষয়ে স্ববিরোধ, অসামঞ্জস্য ও অসঙ্গতি বৃদ্ধি পায়। পরে দক্ষিণ ভারতে যখন মহাভারত গৃহীত হয়, তখন তা গ্রহণে বর্জনে ও সঙ্গতি সাধনে সুশৃঙ্খল, সুসংকলিত ও সুসম্পাদিত হয়। ফলে দক্ষিণাত্যে প্রজলিত ব্যাসদেবের মহাভারত পাঠককে বিভ্রান্ত করে না, যদিও দক্ষিণাত্যে চালু মহাভারত আয়তনে বৃহৎ ও বর্ণনায় প্রায়ই

^১ অসিত বন্দ্যোপাধ্যায় ১ম খণ্ড, পৃঃ ৫৫৯

^২ ভারতবর্ষে ইতিহাসের ধারা।

^৩ মহাকাব্যের লক্ষণ।

^৪ বা-সা-ই ১ম খণ্ড, ৩য় সং পৃঃ ৫৫৮-৫৯।

পৃথক। বলাবাহুল্য উত্তর ভারতেও বিভিন্ন কালের অঞ্চলের এবং বিভিন্ন আঞ্চলিক হরফের পুথিতে পাঠগত পার্থক্য সামান্য নয়। উত্তর ভারতের মহাভারত আঠারো পর্বে সমাপ্ত, কিন্তু দাক্ষিণাত্যের মহাভারতে পর্ব সংখ্যা চব্বিশ।

জৈনরা মহাভারতের প্রভাব স্বীকার করে হরিবংশ, উত্তরপুরাণ, পাণ্ডুপুরাণ, শত্ৰুঞ্জয় প্রভৃতি রচনা করেছে, কিন্তু বৌদ্ধরা মহাভারতের প্রভাব এড়িয়ে চলেছিল। জাতকই তাদের মহাভারতের অভাব মিটিয়েছে।

ব্যাসদেবের নামে চালু মহাভারত ছাড়া সংস্কৃতে জৈমিনি রচিত অশ্বমেধপর্ব মেলে। একটি মাত্র পর্ব নিয়ে কাব্যটি রচিত বলে এখানে ঘটনা শাখাবহুল ও বর্ণনা পল্পবিত ও দীর্ঘায়িত হয়েছে। কৃষ্ণিবাসী রামায়ণেও জৈমিনিভারত থেকে কাহিনী গৃহীত হয়েছে। বাঙলায় অনেক কবিই অনুবাদে জৈমিনিভারত অনুসরণ করেছেন। এ জৈমিনি যদি বেদব্যাসের শিষ্য হন, তা হলে জৈমিনিভারতও ব্যাস মহাভারতের প্রাচীনতম মূলাংশের সমকালীন রচনা। অবশ্য জৈমিনিভারতেও কাহিনীগত ও বর্ণনাগত কালিক প্রক্ষেপ থাকা সম্ভব ও স্বাভাবিক।

৩. বাঙালীর চোখে মহাভারত

মহাভারতের বিরাতত্ব, জাতীয় মাসনে ও জীবনে এর গুরুত্ব, জাতিসত্তার মর্মমূলে এর স্থিতি, এর জাতীয় আত্মপ্রতীকতা প্রভৃতি সম্বন্ধে আমরা আলোচনা করেছি। বাঙালীরাও মহাভারতীয় কৃষ্ণ ও তাঁর গীতার অনুসারী। তবু বাঙালী মানসে এবং বাঙালীর সমাজে ও ঘরোয়া জীবনে সামগ্রিকভাবে মহাভারতের স্থান পছন্দ মধ্যযুগে সামান্য ও সীমিত। শাস্ত্রগ্রন্থ হিসেবে মহাভারতকে বাঙালীরা সসম্মানে শিরোধার্য বলে মেনে নিয়েছিল বটে, কিন্তু বউ-ঝি়ের ঘরে-সংসারে তার ঘনিষ্ঠ পরিচিতি কামনা করেনি। তার কারণ কালাস্তরে নীতিবোধ ও সমাজ-সংস্কৃতি হয়েছিল পরিবর্তিত এবং পালনীয় নীতিশাস্ত্রের সঙ্গে মহাভারতীয় নীতিশাস্ত্রের পার্থক্য সৃষ্টি করেছিল দুষ্টর ব্যবধান। কুন্তীর, দ্রৌপদীর, রুক্মিণীর, সত্যবতীর কাহিনী কিংবা ব্যাস, ভীম, বিদুর, কর্ণ প্রভৃতির জন্য বৃণ্ডান্ত, ক্ষেত্রজ সন্তান তত্ত্ব, বহুপতিকতা, কানীন মাতৃত্ব প্রভৃতি, এমনকি স্বয়ং কৃষ্ণের অন্যান্য রাজনীতিক কূটকৌশল প্রভৃতি মধ্যযুগের বাঙালির সমকালীন জীবনাদর্শের ও রুচির অনুকূল ছিল না। তাই মহাভারতের পূর্ণাঙ্গ পাঠেও উৎসাহ ছিল না বাঙালীর। এ যাবৎ কেবল তিনজন বাঙালীরই সম্পূর্ণ মহাভারত অনুবাদের অভিপ্রায় ছিল বলে প্রমাণ পাওয়া যায়। এঁদের একজন কবীন্দ্র পরমেশ্বর [অশ্বমেধ পর্ব ছাড়া] সঞ্জয়, অপর জন কাশীরামদাস [যদিও অভিলাষ পূর্ণ হওয়ার আগেই তাঁর মৃত্যু ঘটে।]

আগেই বলেছি, সমকালীন নীতিশাস্ত্রের, রুচির ও জীবনাদর্শের অনুকূল হওয়ায় রাম উপাস্য না হয়েও বাঙালীর কাছে আদর্শ মানুষ ও প্রমূর্ত্ত মনুষ্যত্ব। রামায়ণ তার পারিবারিক-সামাজিক-বৈষয়িক জীবনে আদর্শের প্রতীক ও সৎপ্রেরণার উৎস। আর শাস্ত্র-সংহিতার মর্যাদা পেয়েও মহাভারত তার অন্তরে মননে আশ্রয় পায়নি।

তাই সততার, মহত্বের, ত্যাগের, ন্যায্যের, বীরত্বের, নৈতিক চেতনার অংশটুকুই বাঙালী কবিগণ খণ্ড খণ্ডভাবে অনুবাদ করেছেন। যেমন দ্রোণপর্ব, ভীষ্মপর্ব, নল-দময়ন্তীর আখ্যান, সাবিত্রী-সত্যবান-উপাখ্যান, সুভদ্রাহরণ, অশ্বমেধপর্ব, বনপর্ব প্রভৃতি। ফলে বাঙালীর ঘরোয়া ও মানস জীবনে মহাভারতের প্রভাব সামান্য আর রামায়ণের প্রভাব গভীর ও ব্যাপক, এক কথায় সর্বাঙ্গিক। বিশেষত বাল্যকি রামায়ণ অনুবাদকালে বাঙালী কবিরা বাঙালীর রুচি আদর্শ ও প্রয়োজন সম্মত করে রচনা করেছিলেন, অবশ্য মহাভারতের পর্ব ও আখ্যান অনুবাদেও বাঙালীরা তাই করেছেন।

৪. মহাভারতের বাঙলায় অনুবাদ-প্রেরণা

বাঙলাভাষায় অনুবাদকর্মের সূচনা হয় রাজদরবারে। রাজকর্মচারী গুণরাজখান মালাধর বসু (ছদ্ম) সুলতান রুকনউদ্দীন বারবক শাহর (১৪৫৮-৭৬) আমলে 'শ্রীকৃষ্ণবিজয়' নামে ভাগবত অনুবাদ শুরু করেন ১৪৭২-৭৩ সনে এবং শেষ করেন শামসুদ্দীন ইউসুফ শাহর আমলে ১৪৮১ সনে ['তেরশ পঁচানব্বই শতকে গ্রন্থ আরম্ভন। চতুর্দশ দুই শকে গ্রন্থ সমাপন।'] কৃতিবাসও সুলতান রুকুনউদ্দীন বারবক শাহর শুভেচ্ছা লাভ করেছিলেন। চট্টগ্রামের সেনানী শাসক পরাগল খানের কর্মচারী কবীন্দ্র পরমেশ্বর দাস চৌ-পরাগলের নির্দেশেই 'মহাভারত' রচনা করেন, শ্রীকর নন্দীও তেমনি ছুটি খানের প্রত্যক্ষ আশ্রয়ে ও প্রতিপোষণে 'অশ্বমেধপর্ব' রচনা করেছিলেন। এতে বোঝা যায় বিদেশী বিদ্বানী বিধর্মী শাসক শাসনের সুবিধের জন্যে দেশী লোকদের জাতীয় সত্তার ও জাতীয় আত্মার স্বাক্ষর নিতে আশ্রয়ী ছিলেন। প্রশাসনিক প্রয়োজনও ছিল, শাসিত জনের জীবন চেতনার ও জগৎভাবনার, তথা তার ধর্মতত্ত্ব, শাস্ত্র, ঐতিহ্য, জীবনাদর্শ, আচার-আচরণ, রীতি-রেওয়াজ, ন্যায়-অন্যায়বোধ জানা না থাকলে শাসক-শাসিতের মধ্যে ভুল বোঝাবুঝির অবকাশ থাকে, আশঙ্কা থাকে প্রজার অসন্তোষের, বিক্ষোভের, বিদ্রোহের। তাই ইংরেজরা যেমন করেছিল পরবর্তীকালে, ঠিক তেমনি ব্যবস্থা গ্রহণ করতে হয়েছিল তুর্কীদেরও। তাঁরা হিন্দুর বিধিবিধান জানার জন্যে দরবারে পণ্ডিত এবং প্রশাসনে সাহায্য-সহায়তা করার জন্যে হিন্দুকর্মচারী রাখতেন। যেহেতু হিন্দুর-মন-মনন, আচার-সংস্কৃতি, ঐতিহ্য-ইতিহাস তাদের জাতীয় মহাকাব্য ও শাস্ত্রগ্রন্থ রামায়ণ-মহাভারত-ভাগবত মাধ্যমে জানা সহজ, সেহেতু ভাগবত, রামায়ণ ও মহাভারত অনুবাদে সুলতানেরা পনেরো শতক থেকেই উৎসাহ দান করেন। এর আগে তা সম্ভব ছিল না দু'কারণে-এক, পনেরো শতকের আগে বাঙলা ভাষায় লিখিত সাহিত্য রচনার রেওয়াজ চালু হয়নি; দুই, শাস্ত্র ও দেবকথা বাঙলায় লিপিবদ্ধ করায় পাপভয়জনিত আপত্তি ছিল। 'বদং শত মা লিখ'-এ আশুপাক্য শাস্ত্রের লিখিত অনুবাদের প্রশ্নে দুনিয়ার সব জাতিই মানত। লক্ষণীয় যে গোড়ার দিকে সাহস করে অনুবাদকার্য শুরু করেন দরবারাশ্রিত কায়স্থরাই, কৃতিবাস ব্যতিক্রম মাত্র। গরজও তাঁদের সাহস যুগিয়েছে। লৌকিক দেবতার ও লোকায়াত আচারের দ্রুত প্রসারবোধ লক্ষ্যে উচ্চবিত্তের ও উচ্চবর্ণের হিন্দুর পৌরাণিক ধর্মের কথা গণমানবের মধ্যে প্রচার করার গরজও এ সময়ে অনুভূত হয় তীব্রভাবে।

৫. কবি পরিচিতি

কবীন্দ্র পরমেশ্বর দাস

বিজয় পণ্ডিত, কবীন্দ্র পরমেশ্বর, শ্রীকর নন্দী এবং সঞ্জয়ের ব্যক্তিত্ব ও পরিচিতি নিয়ে ১৮৯৬ খ্রীস্টাব্দে যে বিতর্কের শুরু, আজো পুরো অবসান ঘটেনি তার। ইতিমধ্যে বিজয়পাণ্ডব কথা ও বিজয় পণ্ডিত-সমস্যা মিটে গেলেও কবীন্দ্র পরমেশ্বর ও শ্রীকর নন্দী সমস্যার পুরো সমাধান হয়নি। বিদ্বানদের মধ্যে এখনো দ্বিমতের দুটো দল রয়ে গেছে।

উমেশচন্দ্র বটব্যাল, নগেন্দ্রনাথ বসু, দীনেশচন্দ্র সেন, বসন্তকুমার চট্টোপাধ্যায়, মুহম্মদ শহীদুল্লাহ, মণীন্দ্রমোহন বসু, সুকুমার সেন, অসিতকুমার বন্দ্যোপাধ্যায়, সুখময় মুখোপাধ্যায় এবং পণ্ডিত গৌরীনাথ শাস্ত্রী থেকে সাম্প্রতিককালের ইতিহাসকার অবধি বিদ্বানদের কেউ প্রবন্ধে, কেউ সম্পাদিত গ্রন্থের ভূমিকায়, কেউবা স্বলিখিত ইতিহাসে বিভিন্ন সময়ে এ সমস্যার ও বিতর্কের সমাধান খুঁজেছেন। প্রমাণের স্বল্পতাহেতু আলোচনা হয়েছে সাধারণভাবে যুক্তিপ্ৰধান। এ সূত্রে উল্লেখ্য যে সঞ্জয় সম্প্রতি অনুকারক কবি হিসেবে স্বীকৃতি পেয়েছেন।

পরমেশ্বর দাস সম্বন্ধে একটি পরোক্ষ প্রমাণ সম্প্রতি আকস্মিকভাবে আবিষ্কৃত হয়েছে।

বিশ্বভারতীয় ‘পুথি পরিচয়’ তৃতীয় খণ্ডে সংকলক ডক্টর পঞ্চানন মণ্ডল পনেরো শতকের কবি কবিচন্দ্র মিশ্র রচিত অন্তে খণ্ডিত কাব্য ‘গৌরীমঙ্গল’ এর প্রাণ্ড পুরো পাঠ মুদ্রিত করেছেন, এবং ভূমিকায়ও বিস্তৃত আলোচনা রয়েছে করি ও কাব্য সম্বন্ধে। কবিচন্দ্র মিশ্রের উক্ত ‘গৌরীমঙ্গল’ পাঁচালী একখানি পূর্ণাঙ্গ পুথি প্রায় পঞ্চাশ-ষাট বছর আগে সংগ্রহ করেছিলেন আবদুল করিম সাহিত্যবিশারদ। পুথিটি চট্টগ্রামের এবং ১১৯৬ মঘীসনে তথা ১৮৩৪ খ্রীস্টাব্দে লিপিকৃত। ১-৫২ পত্রে সমাপ্ত। দানসূত্রে এ পুথি বর্তমানে রাজশাহী বরেন্দ্র রিসার্চ মিউজিয়ামে রয়েছে।

বিশ্বভারতীয় ও সাহিত্যবিশারদের পুথির মূল পাঠ অভিন্ন। লিপিকর পরম্পরাজাত প্রমাদ ও বিকৃতি উপেক্ষা করলে পার্থক্য থাকে কেবল গ্রন্থোৎপত্তি অংশে এবং ভগিতায়। সাহিত্যবিশারদ-সংগৃহীত পুথির উপক্রমে আদেষ্ঠা ও প্রতিপোষক পরমেশ্বর দাসের পরিচিতিমূলক স্ততি তো রয়েছেই, তাছাড়া পুথির উনচল্লিশপত্র অবধি প্রায় প্রতি ভগিতায় রয়েছে আদেষ্ঠা পরমেশ্বর দাসের নাম। অথচ বিশ্বভারতীয় পুথির কোথাও পরমেশ্বর দাসের উল্লেখমাত্র নেই।

উভয় পুথিতেই যথাস্থানে রচনাকাল রয়েছে এবং সে রচনাকালও বিদ্বানদের মতে অভিন্ন, যদিও সাহিত্যবিশারদের পুথির রচনাকাল-জ্ঞাপক শ্লোকটির পাঠ প্রমাদযুক্ত ও বিকৃতি-দুষ্ট।

বিশ্বভারতীয় পুথিতে পাই :

নবশশী সুর ইন্দ্র শক পরিমিত
কবিচন্দ্র মিশ্র বলে চণ্ডীর চরিত।

সাহিত্যবিশারদের পুথিতে রয়েছে :

নবসিসু সিন্দু ইন্দু সব নিজেজিত।
কবিচন্দ্র মিশ্র বোলে চণ্ডীর চরিত।

-এর থেকে ডক্টর পঞ্চানন মণ্ডল (নব ৯, শশী ১, সর ৪, ইন্দ্র ১ ধরে) এবং অধ্যাপক সুখময় মুখোপাধ্যায় (নব ৯, শশী ১, ইন্দ্র ১৪ ধরে) অভিন্ন রচনাকাল অর্থাৎ ১৪১৯ শক তথা ১৪৯৭-৯৮ খ্রীস্টাব্দ পেয়েছেন।

বিশ্বভারতীর পুথিতে সমকালীন গৌড় সুলতান সৈয়দ আলাউদ্দীন হোসেন শাহর (১৪৯৩-১৫১৯ খ্রীস্টাব্দ) চার চরণ প্রশস্তি রয়েছে। সাহিত্যবিশারদের পুথিতে লিপিকর প্রমাদে হোসেন শাহর নাম সম্বলিত চরণটি বাদ পড়েছে।

এবার দুটো পুথির গ্রন্থোৎপত্তি অংশ পাশাপাশি উদ্ধৃত করছি :

সাহিত্যবিশারদের পুথি

১. গুরুর চরণ বন্দম পরম ভকতি
ধরণী লুটাইআ বন্দম মাতা নিলাবতি।
বাপের চরণ বন্দম গুণের সাগর
সর্বশাস্ত্রে পণ্ডিত ভারত তৎপর।
বসিষ্ট পণ্ডিত নামে অতি সুচরিত
জাহার বিমল জস জগত বিদিত।

২. পৃথিবীর সার রাজ্য পঞ্চম গৌর নাম
খাণ্ডাএ প্রচণ্ড রাজা প্রতাপেত পাম।
জার তরে কম্পিত সকল নৃপগণ।
মহাসত্য নরপতি প্রজার পালন।

৩. গৌর মধ্যে পুণ্যতির্থ সপ্তগ্রাম নম্র
তপিনির তিরে সপ্ত রিমির বিশ্রাম।
তথা সপ্তরিষি তপ কৈলা মাহা সুখে
তেকারণে সপ্তগ্রাম নাম লোকমুখে।
হরগৌরী চরণে কমল মধুকর
দ্বিজগুরু ভকত ধর্ম্যেত তৎপর।
দানের দারিদ্র হরে সর্বসিক্কিসার
জাহার বিমল জস করি কণ্ঠহার।
পিতা সুত ... ছিল প্রকৃতি সুন্দর
মহাধীর মহাসত্ত্ব বুদ্ধি এ সাগর।
সুবুদ্ধি গম্ভীর ধীর তাহান তনএ
শ্রীপরমেশ্বর দাস মহাশাএ
চণ্ডির চরণ ছারি আন নাহি চিত
পুরাণ ভারতে সুনৈ দেবির চরিত।
চণ্ডি পুজ্ঞে চণ্ডি জপে চণ্ডিভাবে মনে
গোআএ দিবস রাত্রি চণ্ডির দেখানে।

সেই সপ্তগ্রাম মধ্যে রণা নামে পুরী
পূর্বে জাএ জমুনা পশ্চিমে সুরেশ্বরী।
উত্তরেত চণ্ড [চক্র] তির্থ নামে পুণ্যস্থান
দেবচক্রপানি তথা নিত্য অধিষ্ঠান।
দক্ষিণে পবিত্র জল নামে বিদ্যাধরি
জার জল ছুইলে সকল পাপ হরে।
অনেক পণ্ডিত তথা বৈসে মহাজন
কূলে সিলে গুণের নিধান দ্বিজগণ।
নিজ ধর্ম্যে সাবহিত নৃপতি পূজিত
ক্ষেত্রি বৈস্যাগণ বৈসে অতি সুচরিত।
সুদ্রগণ বৈসে বিপ্র সেবনে তৎপর
নৃপতির হিত করে সুবুদ্ধি সাগর।

৪. সর্বগুণে থাকে সেই উৎকল সমাজ
তথাপতি মহামহি [ম] গুণরাজ।
খাণ্ডাএ প্রচণ্ড রাজা প্রতাপে তপন
জার ভয়ে কপিত [কম্পিত] সকল নৃপগণ

৩. গৌড় মধ্যে সপ্তগ্রাম মহাপুণ্য স্থান
ত্রিবিণির তিরে সপ্ত ঋষির বিশ্রাম।
তথা সপ্তমুনি তপ কৈল সুখে
তেকারণে সপ্তগ্রাম বলে লোকমুখে।
সেই সপ্তগ্রাম মধ্যে বালাণ্ডা নামে পুরি
পূর্বে জার যমুনা পশ্চিমে সুরেশ্বরী।
উত্তরেত চক্রতির্থ নাম পুণ্যস্থান
দেব চক্রপানি তথা নিত্য অধিষ্ঠান।
দক্ষিণে পবিত্র জল নাম বিদ্যাধরি
জার জল পরসিলে সকল পাপে তরী।
অনেক পণ্ডিত [ত] থা অনেক মহাজন

৫. একদিন সভামধ্যে বসি মহা এ
কবিচন্দ্র মিশ্র আনি বুলিল বিনএ ।
পাঞ্চালী প্রবন্ধে রচ চণ্ডির চরিত
তোমার কবিত্ব জেন ভ্রমে পৃথিমিত ।
পরম ভক্তি জেন সর্বলোকে পুজে
পুরাণ বচন জেন সাবধানে বুঝে ।
নব সিসু সিন্দু ইন্দু সব নিজোজিত ।
কবিচন্দ্র মিশ্র বোলে চণ্ডির চরিত ।

বিশ্বভারতীয় পুথি

১. দেবদ্বিজ গুরু বন্দো করিয়া ভক্তি
ধরনি লোটাইআ বন্দো মাতা লিলাবতি ।
বাপের চরণ বন্দো গুণের নিধান
সর্বশাস্ত্রে পণ্ডিত ভারথি অধিষ্ঠান ।
সশিষ্য পণ্ডিত নাম অতিসুচারিত
জাহার বিমল যস জগত বিদিত ।
২. পৃথিবীর সার রাজ্যে পঞ্চগৌড় নাম
নৃপতি হুসেন শাহা কলিযুগে রাম

কুলে সিলে তপেন নিধান দ্বিজগণ ।
সর্বশাস্ত্রে পণ্ডিত নৃপতি পূজিত
ক্ষেত্রি বৈদ্য বৈদ্য যতি ষচারী বৈদ্য ।
মুদ্রগণ বৈদ্য দ্বিজ সেবা এ তৎপর
নপগণ হিতাকারি যুবুন্ধি সাগর ।
[৪ সংখ্যক পাঠ নেই]

৫. তথা গুণি সঙে করিয়া সমাজ
কবিচন্দ্র মিশ্র আনিএ বসিলে [ক] কাজ ।
গন্ধমাল্য দিয়া তবে করিল সম্মান
সঙে মিলিয়া বসিলেন পাচালি বিধান ।
পাচালি প্রবন্ধে রচ গৌরীমঙ্গল
তোমার মহিমা জেন ভ্রমে মহিতল ।
ভক্তি করিয়া জেন সর্বলোকে পুজে
পুরাণ বচন জেন সর্বলোকে বুঝে ।
নব সিসু সুর ইন্দু সক পরিমিত
কবিচন্দ্র মিশ্র বলে চণ্ডির চরিত ।

উভয় পুথির পাঠ পরীক্ষা করলে আমরা নিচে লেখা তথ্যগুলো পাই :^১

১. সমকালীন গৌড়সুলতান ছিলেন সৈয়দ আলাউদ্দীন হোসেন শাহ (১৪৯৩-১৫১৯ খ্রীঃ)
২. গৌরীমঙ্গলের রচনারস্ফকাল ১৪৯৭-৯৮ খ্রীস্টাব্দ । রচনাকালজ্ঞাপক শ্লোকটির কবিরচিত পাঠ 'নবশশী সুর ইন্দু' কিংবা 'নবশশী সুর ইন্দু' ছিল ।
৩. সপ্তগ্রামের 'বালাগা' গ্রাম চট্টগ্রামের পুথিতে লিপিকর প্রমাদে 'রগা' হয়েছে ।
৪. সাহিত্যবিশারদের পুথির আদর্শ কোন পুথিতে হোসেন শাহর নামের চরণটি কোন লিপিকরের অনবধানতায় বাদ পড়েছিল । পরবর্তী লিপিকর পদান্তমিল রক্ষার খাতিরে গৌজামিলের আশ্রয় নিয়েছিলেন । ফলে 'নৃপতি হোসেন শাহ কলিযুগে 'রাম' বাদ পড়ায়, প্রথম চরণের 'নাম' এর সঙ্গে পদান্ত মিল দেওয়ার গরজে লিপিকর তৃতীয় চরণের 'প্রতাপে ভপন' কে প্রতাপেত পাম করেছেন । আর আবশ্যিক চতুর্থ চরণটি 'মহাসত্য নরপতি প্রজার পালন' তাকে তৈরি করতে হয়েছে ।
৫. কবিচন্দ্র মিশ্রের পিতার নাম বশিষ্ঠ পণ্ডিত- 'সশিষ্য' বিকৃত পাঠ । মাতার নাম নীলাবতী বা লীলাবতী ।
৬. সাহিত্যবিশারদ-সংগৃহীত ৫২ পত্রে সমাগু পুথির ৩৯ক পত্র অবধি সর্বত্র আদেষ্টার নাম পরমেশ্বর দাস । কোথাও কবীন্দ্র নেই । এবং ৩৯খ-৫২ পত্রের মধ্যে কোন ভণিতাতেই পরমেশ্বর দাসের নাম যুক্ত হয়নি ।

^১ হুলাফর উভয় পুথির পাঠভেদ-নির্দেশক । মৎসম্পাদিত গৌরীমঙ্গল দ্রষ্টব্য ।

৭. ক. কোন এক অজ্ঞাত কারণে গৌরীমঙ্গলের গ্রন্থোৎপত্তি অংশে পরমেশ্বর দাস-পরিচিতি এবং ভণিতায় তাঁর নাম সযত্নে বাদ দেওয়া হয়েছে। বিশ্বভারতীয় পুথি তা-ই প্রমাণ করে।
- খ. অথবা চট্টগ্রামের কোন এক অমরতুলোভী পরমেশ্বর দাস সাহিত্য বিশারদ-সংগৃহীত পুথির আদর্শ পুথিতে লিপিকালে সযত্নে নিজের নাম বসিয়েছেন বন্দনা অংশে ও ভণিতাগুলোতে।

যেভাবেই হোক, দুটো পুথির যে-কোন একটির গ্রন্থোৎপত্তির অংশবিশেষ ও ভণিতা পুনর্লিখিত বা পুনর্নির্মিত হয়েছে তাতে সন্দেহ নেই।

এখন দুটোর কোনটি এবং কেন পরিবর্তিত হয়েছে, তা অনুমান করা যাক।

আমরা গৌরীমঙ্গলোক্ত পরমেশ্বর দাস ও চট্টগ্রামের ‘পরাগলী মহাভারত’ রচয়িতা কবীন্দ্র পরমেশ্বর দাসকে অভিন্ন ব্যক্তি বলে মনে করি। তার কারণ উভয়েই হোসেন শাহর সমসাময়িক ব্যক্তি। সপ্তগ্রাম অঞ্চলের বালাগা গায়ে রচিত কবিচন্দ্র মিশ্রের গৌরীমঙ্গলের চট্টগ্রামে অনুলিখিত পাণ্ডুলিপিতে পরমেশ্বর দাসের নাম মেলে। কবি, কাব্য ও রচনাকাল অভিন্ন। যে যুগে অসাধারণ জনপ্রিয় বা শাস্ত্রসম্পৃক্ত না হলে দেশের এক প্রান্তের পুথি অন্য প্রান্তে পৌছত না, সে যুগে বালাগার ও চট্টগ্রামের পরমেশ্বর দাস অভিন্ন ব্যক্তি না হলে গৌরীমঙ্গল চট্টগ্রামে প্রচারিত হত বলে মনে হয় না। তাই বালাগাবাসী ও চট্টগ্রামে ব্রহ্মসী পরমেশ্বর দাসকে একই ব্যক্তি বলে অনুমান করি। অবশ্য অনুমান কখনো প্রমাণের মর্যাদা পাবে না, তাই এ অনুমানের গুরুত্ব সামান্যই।

এখন ৭ সংখ্যক তথ্যের দ্বিতীয়টি অর্থাৎ চট্টগ্রামের কোন অমরতুলকামী পরমেশ্বর দাস গৌরীমঙ্গলের গ্রন্থোৎপত্তি অংশে ও ভণিতাগুলোতে সযত্নে নিজের নাম বসিয়েছেন— অসম্ভব বা অস্বাভাবিক বলে এ অনুমান বাতিল করা যায়। কারণ তেমন অধ্যবসায়ী জালিয়াত ভণিতা হয়তো পুনর্নির্মাণ করতে পারতেন, কিন্তু অচেনা সপ্তগ্রামের বালাগায় নিবাস ছিল বলে দাবি করলে নাম ও নিবাসের অসঙ্গতি আদেষ্ঠা হিসেবে তাঁর অমরত্বের বড় বাধা হয়ে দাঁড়াত— এ বুদ্ধিটুকু তাঁর থাকার কথা! কাজেই আমরা ৭ সংখ্যক তথ্যের প্রথমটিই সত্য বলে মানব।

বলেছি, সাহিত্যবিশারদ-সংগৃহীত ৫২ পত্রে সমাপ্ত পুথিটির ৩৯ক পৃষ্ঠায় ভণিতায় শেষবারের মতো আদেষ্ঠা পরমেশ্বর দাসের নাম মেলে— পরবর্তী তেরো পাতার ভণিতায় আদেষ্ঠার নাম যুক্ত হয়নি। অর্থাৎ পুথির ঠিক তিন ভাগে আছে প্রতিপোষকের নাম— শেষ ভাগে নেই। আমরা এর একাধিক কারণ অনুমান করতে পারি :

ক. ৩৯ক পৃষ্ঠার পাঠ রচিত হওয়ার পরে আদেষ্ঠা ও প্রতিপোষক পরমেশ্বর দাসের সঙ্গে কবির কোন কারণে সুসম্পর্ক নষ্ট হয় বা বিবাদ বাধে।

খ. ৩৯ক পৃষ্ঠার পাঠ রচিত হওয়ার পরেই পরমেশ্বর দাস চাকরি পেয়ে চট্টগ্রাম চলে যান। তখন কবির ভাতাও বন্ধ হয়ে যায়। ‘ফেলো কড়ি মাখো তেল’ তত্ত্বে আত্মবান বিরক্ত কবি কড়ি ফেলা বন্ধ হল বলে প্রাক্তন প্রতিপোষকের নামে ভণিতায় তেল মাখাও বন্ধ করলেন।

গ. রুষ্ট ও ক্ষুব্ধ কবি পরে তাঁর পাঁচালী থেকে পরমেশ্বর দাসের নাম বাদ দেয়ার জন্যেই সংশোধন করেন গ্রন্থোৎপত্তি অংশ এবং ভণিতাগুলো করেন পুনর্নির্মাণ। আর পরমেশ্বর দাস—

পরিচিতির ও পরমেশ্বর-প্রশস্তির স্থলে গাঁয়ের জনগণের আগ্রহ ও অনুরোধজ্ঞাপক অংশ যোগ করেন।

ঘ. রচনার সঙ্গে সঙ্গেই প্রতিপোষক পরমেশ্বর দাসকে প্রতিলিপি দেওয়া হত বলে পরমেশ্বর দাসের হস্তগত প্রতিলিপির প্রশস্তি ও ভণিতা পরিবর্তন করা সম্ভব হয়নি। বালাজবাসী পরমেশ্বর দাস গৌড়সুলতান হোসেন শাহ থেকে নিয়োগপত্র পেয়ে গৌরীমঙ্গলের এই প্রতিলিপি সঙ্গে নিয়েই চট্টগ্রামে পরাগল খানের অধীনে রাজকার্যে যোগ দেন। তাঁর হস্তগত প্রতিলিপিকে পূর্ণতা দানের জন্যে পরে কোন সময় গৌরীমঙ্গলের শেষাংশও সংগ্রহ করেন পরমেশ্বর দাস। চট্টগ্রামে এভাবেই প্রচারিত হয় সপ্তগ্রামের কবিচন্দ্র মিশ্র রচিত পূর্ণাঙ্গ গৌরীমঙ্গল।

ঙ. কবিচন্দ্র মিশ্রের আচরণে হয়তো পরমেশ্বর দাস বিশেষ ক্ষুব্ধ ও অপমানিত হয়েছিলেন। তাই হয়তো স্বয়ং উদ্যোগী হলেন কাব্যরচনায়। ‘পরাগলী মহাভারত’ তাঁর সেই উদ্যোগেরই প্রসূন। কালিকপ্রথা অনুযায়ী তিনি তাঁর মনোবাঞ্ছা ব্যক্ত করলেন লঙ্কর পরাগল খানের কাছে। লঙ্কর পরাগল খানের আগ্রহে বা আদেশে এবং রেওয়াজ মতো তাঁর দেওয়া ‘কবীন্দ্র’ উপাধি নিয়ে কবীন্দ্র পরমেশ্বর দাস সংক্ষেপে বর্ণনা করেন মহাভারত কাহিনী।

কবিচন্দ্র মিশ্র-রচিত গৌরীমঙ্গলের প্রমাণে ও তৎকালীন প্রাসঙ্গিক অনুমানে বলা যায়,— পরমেশ্বর দাস ধনী-মানী পরিবারের সন্তান। তাঁর পিতা সমাজপতি এবং মহামহিম রূপে সমাজে খ্যাত ও সম্মানিত। তিনি ‘গুণরাজ’ উপাধিধারী অথবা তাঁর নামই ছিল গুণরাজ। এমনি পিতার পুত্রেরও ছিল সমাজে প্রভাব-প্রতাপ। তাই তাঁরও ছিল সভা বা দরবারগৃহ। কেবল তা-ই নয়, তিনি কবি পণ্ডিতেরও প্রতিপোষক ছিলেন— গৌরীমঙ্গল তার সাক্ষ্য, কবিচন্দ্র মিশ্র স্বয়ং তার প্রমাণ। তা ছাড়া বড় ঘরের সন্তান বলেই গৌড় সুলতানের দরবারেরও তিনি অপরিচিত ছিলেন না। তাই দক্ষিণরাড়ের বালাজবাসী গাঁয়ের অধিবাসী পরমেশ্বর দাসকে গৌড়ের সুলতান রাজকার্যে নিয়োগ করে সুদূর চট্টগ্রামে পাঠিয়েছিলেন।

এ প্রসঙ্গে উল্লেখ্য যে চট্টগ্রামের কবি সৈয়দ সুলতান তাঁর নবীবংশ কাব্যে (১৫৮২-৮৩ খ্রীঃ) বলেছেন,

লঙ্কর পরাগল খান আজ্ঞা শিরে ধরি

কবীন্দ্র ভারতকথা কহিল বিচারি।

হিন্দু-মুসলমান তাহা ঘরে ঘরে পড়ে

খোদা-রসুলের কথা কেহ না সোঙরে। (নবীবংশ-ভূমিকা)

অতএব, কবীন্দ্র পরমেশ্বর দাস যে পরাগলী মহাভারতকথার রচয়িতা তার ষোল শতকী সাক্ষ্যও মেলে।

কবীন্দ্র-অনুদিত মহাভারতই যে আসামী বিকৃতি লাভ করে আসামে প্রচারিত হয়েছিল, তার সাক্ষ্য গৌরীনাথ শাস্ত্রী-সম্পাদিত ‘কবীন্দ্র বিরচিত অষ্টাদশপর্ব মহাভারত’ও। রাজবংশী ভাষায় চালু ‘পরমেশ্বরের মহাভারত’ অবশ্য চিরকালের জন্যে আসামের সাহিত্য সম্পদ হয়ে থাকবে। তবে সম্পাদক গৌরীনাথ শাস্ত্রীর কবীন্দ্রকে নরহরির পৌত্র বাণীনাথ কবীন্দ্রপাত্র বলে প্রমাণের জন্যে যেসব যুক্তি প্রয়োগ করেছেন, সেসব আমাদের পাথুরে প্রমাণের ঘায়ে বালির বাঁধের মতো, তাসের ঘরের মতো অস্তিত্ব হারিয়েছে।

ডক্টর সুকুমার সেন ‘পরাগল’ নামটির উৎস সন্ধানে ব্যর্থ হয়ে একটি ব্যাখ্যা দিয়েছেন। ‘পরাগল’ সম্ভবত তুর্কী নাম, বিতঙ্ক উচ্চারণ ‘ফরাগল’। গুলবদন রচিত ‘হুমায়ুননামা’য় এক মওলানা মুহম্মদ ফরাঘলীর নাম মেলে (বাবুর পরিচিতি অংশে)। চট্টগ্রামে পরাগল পরাওল হয়েছে। কর্ণফুলী নদীর একটি প্রাচীন ঘাটের ও একটি খালের নাম যথাক্রমে পরাওলী ঘাট ও পরাওলী খাল। ‘শাহপরী কিসসা’ নামের মধ্যযুগের একটি বাঙলা গ্রন্থের রচয়িতার নাম পোরওয়াল। কাজেই ফরাঘল, পরাগল, পরাওল, পরায়ল, পোরওয়াল হয়েছে বলে মনে হয়। পরাগলপুরে পরাগল খানের বংশধর চৌধুরীরা আজো সম্পদশালী এবং উচ্চশিক্ষিত। কবীন্দ্র পরমেশ্বর দাস ও শ্রীকর নন্দী যে একই লঙ্কর দরবারের দুজন সমকালীন কবি, তা উভয়ের গ্রন্থ দুটোর ‘পরাগলী’ ও ‘ছুটিখানী’ বিশেষণের সুপ্রাচীন ঐতিহ্য থেকেও বোঝা যায়। লোকপ্রচলিত এ নাম দুটোও তথ্যপ্রমাণ হিসেবে গৃহীত হওয়ার যোগ্য। কাব্যসূত্রে প্রমাণ, দুই কবির আদেষ্ঠাও অভিনু নন। পরাগল খানের অগ্রহে কবীন্দ্র পরমেশ্বর দাস পুরো মহাভারত এবং ছুটি খানের [নসরত খানের] আদেশে শ্রীকর নন্দী জৈমিনি অশ্বমেধপর্ব রচনা করেন।

সেকালে বিভিন্ন কবি-রচিত একই বিষয়ক পাঁচালী বা গীতাবলী থেকে শ্রেষ্ঠ বা সুলিখিত অংশ নিয়ে সংকলন তৈরি করতেন গায়ক-কথন-পাঠক-লিপিকররা। গাথাসপ্তসতী, সুভাষিতরঙ্গকোণ, সদুক্তিকর্ণামৃত, দোহাকোষ, চর্যামৃত, বৈষ্ণবপদাবলী, বাইশ কবির মনসামঙ্গল এবং মধ্যযুগের রাগতাল গ্রন্থ প্রভৃতি তাঁর প্রমাণ। এ কারণেই কৃতিবাসী রামায়ণ থেকে মঙ্গলকাব্য অবধি যেকোন জনপ্রিয় কাব্যেও বিভিন্ন কবির রচনার মিশ্রণ মেলে। এ ছাড়াও পুথির জগতের সন্ধানীরা জানেন, -গায়ন-কথন-লিপিকররা ইচ্ছে করে, অজ্ঞাতবশে কিংবা অনবধানতাবশে ভগিতা বদল করতেন কবীন্দ্র পরমেশ্বর দাসের ও শ্রীকর নন্দীর রচনার এবং ভগিতার মিশ্রণ ঘটেছে এভাবেই এবং এ কারণেই। এ সূত্রে স্মর্তব্য যে দুজনই মহাভারতের আদি অনুবাদক। অন্য অনুবাদের অভাবে এ দুটোই জিজ্ঞাসুর অবলম্বন ছিল। এ কারণেই কবীন্দ্রের ‘পাণ্ডববিজয়কথা’ বা ‘ভারতকথা’ এক সময়ে বাঙলার, উড়িষ্যার ও আসামের সর্বত্র প্রচারিত হয়েছিল।

আজকাল অবশ্য কবীন্দ্র পরমেশ্বর দাস ও শ্রীকর নন্দী সম্বন্ধে বিভ্রান্তির অনেক কুয়াশা কেটে গেছে। এখন কেউ যদি দুজনের গ্রন্থের শ্রমসাধ্য সম্পাদনার দায়িত্ব গ্রহণ করেন, তাহলে সব সংশয়-সন্দেহ নির্মূল হবে।

২. পরাগল খান ও ছুটি খান

‘সত্যকলিবিবাদসম্বাদ’ (রচনাকাল ১৬৩৫ খ্রীঃ) ও ‘মকুল হোসেন’ (রচনাকাল ১৬৪৬ খ্রীঃ) রচয়িতা কবি মুহম্মদ খান তাঁর গ্রন্থে তাঁর পিতৃকুল ও মাতৃকুলের পরিচয় দিয়েছেন। ঐরও পিতৃপুরুষ রাস্তি খান। চট্টগ্রামের জোবরা গায়ে রাস্তিখানের নামের দীঘি, মসজিদ এবং মসজিদের দেয়ালসংলগ্ন একটি শিলালিপি (১৪৭৪ খ্রীস্টাব্দে উৎকীর্ণ) রয়েছে। শিলালিপিতে মসজিদ নির্মাতা রাস্তি খানের নাম এবং রুকনউদ্দীন বারকব শাহর প্রশস্তি রয়েছে। রাস্তি খানের উপাধি ছিল মজলিস-ই-আলা। অতএব রাস্তি খান ছিলেন রুকনউদ্দীন বারকব শাহর অধীনে চট্টগ্রামের শাসনকর্তা।

পরাগলী মহাভারতের পরাগল খানকে রাস্তি খানের পুত্র বলে উল্লেখ করা হয়েছে। দেশ-কাল ও পদমর্যাদার দিক দিয়ে পরাগল খানের পিতা রাস্তি খান এবং কবি মুহম্মদ খানের পূর্বপুরুষ রাস্তি খান অভিন্ন ব্যক্তি। উভয়েই চট্টগ্রামের শাসনকর্তা। অতএব, মুহম্মদ খানের পূর্বপুরুষ মিনা খান ও পরাগল খান উভয়েই ছিলেন এই রাস্তি খানের সন্তান। তবে তাঁরা সহোদর না-ও হতে পারেন। সাধারণত পিতৃপুরুষের পরিচয়দানকালে দুপুরুষ আগেকার কোন পুরুষের শাখা-প্রশাখার উল্লেখ বাহ্যাবোধে কেউ করে না। কেবল পিতৃপরম্পরার নামই থাকে। মুহম্মদ খানও রাস্তি খানের অন্য সন্তানের নাম উল্লেখ করেননি, যেমন স্বকালেও করেননি কবীন্দ্র পরমেশ্বর বা শ্রীকর নন্দী। মুহম্মদ খান তাঁর পিতৃব্য বিরাহিত ছাড়া সর্বত্রই কেবল একক পুত্রপরম্পরার নামই লিখেছেন। ছকে কবি মুহম্মদ খান প্রদত্ত বংশলতা এরূপ :

মাহি আসোয়ার (আরব থেকে আগত)

হাতিম

সিদ্দিক

রাস্তিখান-চট্টগ্রাম দেশপতি' = শাসনকর্তা

পরাগল খান [পরাগল মহাভারত সূত্রে বর্ণিত] খান- 'রণে যে ভৃগুপতি রাম'

ছটি খান [ওফে নসরত খান

গাভুর খান- 'যাঁর কীর্তি গৌড়দেশ ভরি'

হামজা খান- মছলন্দ, ত্রিপুর ও পাঠানবিজয়ী
[ষোল শতকের ৪র্থ দশকে বর্তমান]

নসরত খান- 'পার্থসম মহাবীর ও নিজকুলজয়কেতু'

১৫৬৯-৭০ খ্রীস্টাব্দে মৃত্যু

জালাল খান- 'চাটিগ্রামদেশকান্ত'-১৫৮৬

খ্রীস্টাব্দে মৃত্যু

বিরাহিম খান

মুবারিজ খান- 'পার্থসম ধনুর্ধর'

[ওফে ইব্রাহিম] 'সমরে ত ভৃগুপতি রাম'

[১৫৮৬ থেকে উজির]

মুহম্মদ খান- কবি [এবং সম্ভবত নায়েব উজির]

হামজা খান থেকে জালাল খান অবধি সবাই আরাকান রাজ্যের অধীনে চট্টগ্রামের শাসনকর্তা যে ছিলেন তা চট্টগ্রামের ইতিহাস, স্থানীয় ঐতিহ্য বা কীর্তিচিহ্ন-সূত্রে জানা যায়।

ইতিহাসসূত্রে আমরা জানি হোসেন শাহ্ আরাকানরাজের ও ত্রিপুরারাজের সঙ্গে যুদ্ধ করে চট্টগ্রাম (১৫১২ সনে) ও ত্রিপুরার কিছু অংশ অধিকার করেন। এতেই বোঝা যায় রুকনউদ্দীন বারবক শাহর তথা রাস্তি খানের পরে কোন সময়ে সাময়িকভাবে চট্টগ্রাম গৌড়সুলতানের হস্ত চ্যুত হয়। ১৫৩৮-৩৯ খ্রীস্টাব্দের দিকে সম্ভবত চট্টগ্রাম আবার আরাকান রাজ্যের দখলে আসে, যদিও গৌড়সুলতান এবং ত্রিপুরারাজ মধ্যে মধ্যে চট্টগ্রামের উপর হামলা চালাতেন বা নিতান্ত সাময়িক অধিকারও পেতেন। ১৬৬৬ সনেই শায়েস্তা খানের পুত্র বুজুর্গ উমেদ খান আরাকানীদের বিতাড়িত করে উত্তর চট্টগ্রাম স্থায়ীভাবে মুঘল সাম্রাজ্যভুক্ত করেন।

কাজেই আমাদের আপাত অনুমান : ১৫১২ খ্রীস্টাব্দের দিকে গৌড়সুলতান চট্টগ্রাম দখল করেন এবং প্রাক্তন শাসনকর্তা রাস্তি খানের পুত্র পরাগল খানকে লঙ্কর পদ (উজির-সেনাপতি) দিয়ে ফেনী নদীর নিকটস্থ পরাগলপুরে সীমান্ত রক্ষী সেনানী-শাসক নিযুক্ত করেন। কাব্যসূত্রে জানা যায় পিতা পরাগল ও পুত্র ছুটি খান উভয়েই ত্রিপুরারাজের আক্রমণ ঠেকিয়েছেন। চট্টগ্রামের মূল ভূখণ্ডে তখন হয়তো মিনা খান ও তাঁর পুত্র গাভুর খান গৌড়সুলতানের প্রতিনিধিরূপে পর পর শাসনকর্তা ছিলেন। দরবারে কবি পুষে পরাগল-ছুটি খান বিশ্রুত ও অমর। আর কবির স্তুতিবিক্ষিপ্ত মিনা খান-গাভুর খান আজ বিস্মৃত। মনে হয় পরাগল খান ১৫১৯ খ্রীস্টাব্দের মধ্যেই এবং ছুটি খান ওর্ফে নসরত খান ১৫৩০ খ্রীস্টাব্দের মধ্যে যথাক্রমে পরাগলী ও ছুটি খানী মহাভারত রচনা করিয়েছিলেন।

কবীন্দ্রের উক্তি অনুসারে সেনানীশাসক লঙ্কর পরাগল খান বৃদ্ধ। তিনি পুত্র-পৌত্র নিয়ে বসবাস করছেন [‘পুত্র পৌত্রে রাজ্য করে খান মহামতি’]। মিনা খান তাঁর বড় কি ছোট ভাই, তা আমরা জানিনে বটে, তবে তাঁকেও রাস্তি খানের সন্তান হিসেবে তখন বৃদ্ধ বলে অনুমান করাই সম্ভব। বৃদ্ধ পরাগলের জ্যেষ্ঠপুত্র ছুটি খান তখন পুরো প্রৌঢ় না হলেও অবশ্যই যৌবনের প্রান্ত সীমায় বলে মানতে হবে। কেননা আমরা মিনা খানের পৌত্র হামজা খানকে ১৫৩৮-৪০ খ্রীস্টাব্দের দিকে উত্তর চট্টগ্রামের শাসক হিসেবে দক্ষিণ চট্টগ্রামের শাসক খুদাবখশের সঙ্গে দ্বন্দ্ব অবতীর্ণ দেখি। এসব অনুমান মিনা খানের বংশধর ও সতেরো শতকের প্রথমার্ধের কবি (গ্রন্থরচনাকাল ১৬৩৫ ও ১৬৪৬ খ্রীঃ) মুহম্মদ খানের বয়সের সঙ্গে সঙ্গতিপূর্ণ।

বংশলতার সাক্ষ্যে নিঃসংশয়ে বলা চলে যে পরাগল খানেরা বহুপুরুষ ধরে চট্টগ্রামের অধিবাসী-গৌড়াগত বা বহিরাগত নন। কবীন্দ্র পরমেশ্বর দাস পরাগল খানকে ‘রুদ্রবংশ রত্নাকর’ বলে অভিহিত করায় রাস্তি খানকে কেউ কেউ হিন্দুবংশোদ্ভব বলে বিশ্বাস করেন। ‘শ্রীবাংস্য চরিতম’ (১৯১৫ সনে প্রকাশিত) গ্রন্থে লেখক জগচন্দ্র ভট্টাচার্য বিদ্যাবিনোদ তাঁকে আধুনিক পটিয়া অঞ্চলের এক বিদ্রোহী সামন্ত প্রতাপরুদ্রের বংশধর বলে অনুমান করেছেন। আরব থেকে আগত আদিপুরুষ মাহি আসোয়ার ব্রাহ্মণ কন্যা বিয়ে করেন বলে কবি মুহম্মদ খান সূত্রে জানা যায়। সে-বধু রুদ্রবংশীয় ছিলেন বলে অনুমান করে একটি সহজ সমাধান দিয়েছেন অধ্যাপক সুখময় মুখোপাধ্যায়। আমাদের মনে হয় ‘সাহসীযোদ্ধা’ অর্থেই রুদ্রবংশরত্নাকর, ক্ষত্রিয় প্রভৃতি রূপক ব্যবহৃত। তোয়াজস্তুতির ভাষা চিরকালই আতিশয়োক্তি-দুষ্ট।

ক. খান পরাগল সূত দানে কল্লভরু
 পিতার দুর্লভ বড় গুরুভক্তি চারু ।
 চিরজীবী হউক নৃপতি ছুটি খান ।
 বলি কর্ণ দখীচি সমান যার দান ।
 তাহার আদেশ পাঞা পয়ার রচিল
 জয়মুনি (জৈমিনি) পুরাণ গ্রন্থ যেরূপ দেখিল ।
 শ্রীকর নন্দী কহে বিচাঁদিয়া পোখা
 পরম রহস্য ভারতের পুণ্য কথা ।

[illegible]

নসরৎ শাহ তাত অতি মহারাজা
রামবৎ নিত্যপালে সব প্রজা ।
নৃপতি হোসেন শাহ হএ ক্ষিতিপতি
পঞ্চ গৌড়েতে যার পরম যে খ্যাতি ।- শ্রীকর নন্দী

অন্য পাঠ : নসরত সাহ নাম অতি মহারাজা
পুত্র সম রক্ষা করে সকল পরজা ।
নৃপতি হোসেন শাহা তনয় সুমতি
সামদান দণ্ডভেদে পালে বসুমতী- [এ]

তাই উভয় কবির রচনায় ঘন ঘন ছুটি খানের নাম ও প্রশস্তি এসেছে। এবং তা একালে গবেষকদের বিভ্রান্তির কারণ হয়ে দাঁড়িয়েছে। এ বিভ্রান্তির কারণ বিভিন্ন পুথিতে পণ্ডিতদের প্রাপ্ত গায়ন-লিপিকর প্রমাদ জাত কিছু ভণিতা—

১. খান পরাগল সুত পিতৃভক্ত অতি
বাপের সংহতি সে নৃপতি সেনাপতি।—[শ্রীকর নন্দী]
২. চিরকাল জীবন্ত লক্ষর ছুটি খান
যাহার লভিয়া সে প্রেম সন্নিধান ।
শ্রীকর নন্দী এ যে পয়ার রচিল
জৈমিনি কহিলেক যেহেন দেখিল।—[শ্রীকর নন্দী]
৩. লক্ষর পরাগল খানের তনয়
সমরে নির্ভয় ছুটি খান মহাশয় ।
তাহার যতেক গুণ শুনিয়া নরপতি
সমাদিয়া আনিলেক কুতূহল মতি ।
নৃপতি অগ্রেত তার বহুত সম্মান
ঘোটক প্রসাদ পাইল ছুটি খান ।
ত্রিপুর নৃপতি যার ডরে এড়ে দেশ
পর্বত গহ্বরে গিয়া কসিল প্রবেশ ।—[শ্রীকর নন্দী]
৪. লক্ষর পরাগল গুণের সাগর
তাহান আদেশ মালা মাতে আরোপিয়া
শ্রীকর নন্দী এ কহে পাঞ্চালী রচিয়া ।
৫. লক্ষর যে পরাগল প্রণমিল বহুতর
নাম কীর্তি বাড়ে দিনে দিনে ।।
শ্রীকর যে নন্দী কবি তাহার বচন ধরি
রচিলেক পাঞ্চালী প্রকার ।
৬. শ্রীযুক্ত পরাগল খান মহামতি/কুতূহলে পুছিলেক্ত ভারত কাহিনী ।
পুরাণ ভারত কথা পাঞ্চালী রচিয়া/শ্রীকর নন্দী এ কহে পাঞ্চালী রচিয়া । [অসিত বন্দ্যোঃ]
৭. লক্ষর ছুটি খান/কর্ণসম যার দান/মেদিনী মহিমা সম মযার ।
তাহান আদেশ মাথে / যুধিষ্ঠির নরনাথে/ কবীন্দ্রে যে রচিল পয়ার । [ডা.বি. পুথি]
৮. শ্রীচরণ বন্দিয়া অশ্বমেধ সমর্পিয়া
শেষ কহি কবীন্দ্র কৃত সব বিরচিয়া
অশ্বমেধ শেষ আছিল যে কখন
কবীন্দ্র রচিত গাথা লিখিত কারণ । [দীনেশচন্দ্র সেন]

অনুমিত পাঠ : শ্রীচরণ বন্দিয়া অশ্বমেধ সমর্পিয়া
শেষে কহি কবীন্দ্র না কৈল সব বিরচিয়া
অশ্বমেধ শেষ আছিল যে কখন
কবীন্দ্র রচিত গাথা অলিখিত কারণ ।

৯. অশ্বমেধ পুণ্যকথা অমৃত লহরী
পিবন্ত ভকত জনে দুই কর্ণ ভরি ।
লঙ্কর পরাগল খান তনয়
কর্ণসম দাতা ছুটি খান মহাশয় ।
তাহান আদেশ মালা মাখে আরোপিয়া
কবীন্দ্র পরমেশ্বর পাঞ্চগলী রচিয়া ।

১০. অশ্বমেধ যজ্ঞ শত তন্ত্রের সার
কবীন্দ্র পরমেশ্বর রচিল পয়ার ।

১১. তনয় যে ছুটি খান পরম উজ্জ্বল
কবীন্দ্র পরমেশ্বর রচিল সকল-

১২. অশ্বমেধ যথতথ তন্ত্রের সার
কবীন্দ্র পরমেশ্বর রচিল পয়ার ।
লঙ্কর পরাগল খানের তনয়
সংগ্রামে বিজয় খান মহাশয়
অষ্টাদশ ভারতের পুরাণ রাখান
রাত্রি দিন ভারতের কথা অবধান
অশ্বমেধ সমাপিয়া হরষিত মন
স্বর্গেত হইল তবে পুষ্পি বরষণ । [মুদ্রিত কাব্য, পৃঃ ১৪০]

উভয় কবিই যে হোসেন শাহর জীবিতকালেই নব বিজিত চট্টগ্রামের সীমান্তে সামরিক শাসনকেন্দ্র পরাগলপুরে (সৈয়দ সুলতান-লঙ্করের পুরখানি আলিম বসতি/ কবীন্দ্র ভারত কথা রচিল বিচারি ইত্যাদি) বসেই পরাগল খানের অভিপ্রায়ক্রমে কাব্য দুটো রচনা করেছিলেন, তার প্রত্যক্ষ ও পরোক্ষ প্রমাণ পাঁচালী দুটোতেই রয়েছে। অতএব কাব্য দুটো ১৫১৩ থেকে ১৫১৯ খ্রীস্টাব্দের মধ্যে রচিত। শ্রীকর নন্দীর পাঁচালী অশ্বমেধপর্ব সম্ভবত ১৫১৭-১৮ সনে রচিত। গ্রন্থ দুটোর যথাক্রমে পরাগলী ও ছুটি খানী নাম পরবর্তীকালে পাঠকের বা গায়ন লিপিকরেরা চালু করেছেন বলে এ শতকের বিদ্বানরা স্বীকার করেছেন। তবে পিতা-পুত্রের নামে চিহ্নিত ‘পরাগলী’ ও ‘ছুটি’ খানী মহাভারতও দুই কবির দুই আদেষ্ঠা নির্দেশ করে। লোক প্রচলিত এই নামও তথ্য-প্রমাণ হিসেবে গৃহীত হবার যোগ্য।

কাব্যসূত্রে জানা যায় পরাগল ও ছুটি খান উভয়েই রণনিপুণ, সাহসী যোদ্ধা ও বিজয়ী ছিলেন। ছুটি খানও পরে কোন সময়ে রাজ্য পুনরুদ্ধারকারী ত্রিপুররাজকে পরাজিত করেছিলেন। উভয়ের কর্মে ও আনুগত্যে হোসেন শাহ তুষ্ট ছিলেন। ছুটি খান সম্পর্কে শ্রীকর নন্দী লিখেছেন :

দুনিয়ার পাঠক এক হও! ~ www.amarboi.com ~

আরব থেকে এসে চট্টগ্রামে এক ব্রাহ্মণী বিয়ে করেছিলেন। সুখময় মুখোপাধ্যায়ের অনুমান এ ব্রাহ্মণ কন্যা আসলে রুদ্র বংশীয়া ছিল।

কিন্তু ‘রুদ্র বংশ রত্নাকর’ কিংবা ‘ক্ষত্রিয় বংশ’ রূপকার্থেও ব্যবহৃত হতে পারে। সাহসী যোদ্ধা বংশে জন্ম বলেই হয়তো তোয়াজের ভাষায় হিন্দু কবি রুদ্র (তেজস্বী) এবং যোদ্ধা শাসক বংশীয় রূপে ক্ষত্রিয় বলে অভিহিত করেছেন।

কাজেই রাস্তি খানের পুত্র পরাগল খান ও পৌত্র ছুটি খান ওফে নসরত খান চট্টগ্রামবাসীই ছিলেন- গোঁড়াগত নন। এবং তারা ছিলেন ফেনী নদীর তীরে পর্বত গোড়ায় ত্রিপুরারাজ্য সীমার অদূরে সীমান্তরক্ষী সেনানী শাসক।

কবীন্দ্র পরমেশ্বরদাস সংস্কৃতজ্ঞ কবি। কবিত্ব তেমন উঁচু শ্রেণীর না হলেও সুবিন্যস্ত ভাষায় প্রাঞ্জল করে বক্তব্য প্রকাশে তিনি ছিলেন স্বচ্ছন্দগতি। শ্রীকর নন্দীর ভাষা আড়ষ্টতাদুষ্ট এবং কবিত্বগুণেও দরিদ্র।

৩. ষোল শতকের মহাভারত

৩. রামচন্দ্র খান : কাব্যে কবির আত্ম-পরিচয় আছে :

কবির গুরু : কঙ্কগ্রাম স্থান আছে মধ্য রাতা দেশে
গঙ্গার নিকটে গুরু সর্বকাল বসে।
সেই গুরু প্রসাদে মোর শরমে হৈল মন
অশ্বমেধ কথা কহে শমন দমন।

কবির আত্মকথা : রাতা দেশে বসতি আছে এ পুণ্য স্থানে
দণ্ড সিমলিয়া ডাঙ্গা সর্বলোকে জানে।
কায়েত (ব্রাহ্মণ) কুলেতে জন্ম লক্ষর [দণ্ডত] পদ্ধতি
কাশীনাথ জনক জননী পুণ্যবতী
রামচন্দ্র খান কৈল পাঞ্চালী [কবিত্ব]বচন
সপ্তদশ কথা সব শ্লোক [সংস্কৃতে] বন্ধ
মূর্খ বুঝাইতে কৈল পরাকৃত হৃদ।

ভণিতা : জন্ম জন্মান্তরে ভক্তি রহ নারায়ণে
অশ্বমেধ কথা কহে রামচন্দ্র খানে।

পাঠান্তরে : কবি জাতিতে ব্রাহ্মণ নিবাস জঙ্গপুর, পিতার নাম মধুসূদন।

স্বদেশে বসতি ভাগরথী পুণ্যস্থানে
জঙ্গিপুর সহর নাম সর্বলোকে জানে।

রামচন্দ্র খান সম্ভবত সমগ্র মহাভারত অনুবাদ করেছিলেন, তাঁর অবলম্বন ছিল জৈমিনি ভারত। কিন্তু তাঁর কেবল অশ্বমেধ পর্বেরই তিনখানি পুথি এ পর্যন্ত পাওয়া গেছে। রামচন্দ্র খান

গৌড়-সরকারে লঙ্কর ছিলেন। তিনি সম্ভবত সীমান্তরক্ষী সেনানী ছিলেন। চৈতন্যভাগবত সূত্রে জানা যায় চৈতন্যদেবের নীলাচল যাত্রায় তিনি তাঁকে সীমান্ত অতিক্রমণে সাহায্য করেছিলেন। রামচন্দ্র খান স্থানীয় জমিদারও ছিলেন এবং ছত্রভোগে গিয়ে চৈতন্য শিষ্য হন। দুটো পুথিতে রচনাকালও রয়েছে। ডক্টর সুকুমার সেনের মতে শুদ্ধপাঠ হবে ইন্দ্রবেদ ইষু যুগ (১৪৫২/৫৪ শক = ১৫৩২-৩৩/৩৪-৩৫ খ্রীঃ) :

কিংবা ইন্দ্রবেদ যুনি যুগ (১৪৭২/৭৪ শক = ১৫৫০-৫১/৫২-৫৩ খ্রীঃ)

রচনার নমুনা :

পুত্র যোগিনাথ মাতাকে তীর্থ ভ্রমণে পাঠাতে চাইলে মাতা উত্তরে বলেন :

বুড়ি বোলে কিবা কার্য গোবিন্দ সেবিঞা

কিবা কার্য গঙ্গাস্নানে যজ্ঞস্থানে গিঞা

ধর্মকার্যে গৃহকার্য সব নষ্ট হৈব

ধান্য গোধূম শস্য কেবা সম্বরিব।

দধি দুগ্ধ ঘৃত তৈল সব নষ্ট হৈব

দাসীগণ বধূগণ সব ভষ্ট হৈব।

সকল সম্পদ যাবে কথায় মন দেহ

না পারো যাইতে পুত্র আরি না বলিহ।^১

৪. **বিজয় রঘুনাথ**— বিজয় রঘুনাথের 'স্বপ্নমেধ পর্ব'-এর একটি মাত্র পুথি সংগৃহীত হয়েছে। লিপিকাল ১৫৪৬ শক, ১০৩১ সাল ভূষা ১৬২৪ খ্রীস্টাব্দ। কবি উড়িষ্যার রাজা মুকুন্দ দেবের আশ্রিত ও তাঁরই নির্দেশে ভারত পাঁচালী রচনায় হাত দেন। ১৫৬৭-৬৮ খ্রীস্টাব্দের দিকে সুলায়মান কররানী উড়িষ্যা অধিকার করেন। অতএব মুকুন্দের প্রতিপোষণে কবি বিজয় রঘুনাথ তার আগেই কাব্য রচনা করেছেন বলে স্বীকার করতে হবে।

৪. সতেরো শতকের মহাভারত

সঙ্কয়কৃত মহাভারত

ডক্টর দীনেশচন্দ্র সেনই প্রথম সঙ্কয়কৃত মহাভারতের কথা উল্লেখ করেন। তাঁর ধারণায় সঙ্কয়ই বাঙলাভাষায় মহাভারতের আদি অনুবাদক। তিনি কৃতিবাসের সমকালীন অর্থাৎ চৌদ্দশতকের কবি এবং পরে ষোল শতকের প্রথম পাদে তাঁর মহাভারতই সংক্ষিপ্ত আকারে প্রচার করেছিলেন কবীন্দ্র পরমেশ্বর দাস।

প্রাচ্যবিদ্যামহার্ণব নগেন্দ্রনাথ বসু তাঁর সম্পাদিত তথাকথিত 'বিজয় পণ্ডিতের মহাভারত'-এর ভূমিকায় ডক্টর দীনেশচন্দ্র সেনের মত খণ্ডন করে বলেছেন যে বিজয় পণ্ডিতই (তথা এখানকার কবীন্দ্র পরমেশ্বর দাস) মহাভারতের আদি অনুবাদক এবং সঙ্কয় মূলত তাঁর পাঁচালীকে কিছু কিছু স্বরচিত সংযোজনের মাধ্যমে নিজের নামে চালিয়ে দিয়েছেন। "এক ব্যক্তি

^১ ডক্টর সুকুমার সেন ১ম/৭/৩য় পৃঃ ২৫৪-৫৫।

[কবীন্দ্র] রচনা করিয়াছেন, অপর ব্যক্তি [সঞ্জয়] তাহাই নকল করিয়াছেন।” প্রবন্ধকার বসন্ত কুমার চট্টোপাধ্যায়ের মতেও কবীন্দ্রের রচনাই সঞ্জয় ভণিতায় চালু হয়েছিল, “সঞ্জয় মহাভারত ও পরাগলী মহাভারত অভিন্ন গ্রন্থ।”^২

মণীন্দ্রমোহন বসুর মতে কবির প্রকৃত নাম হরিনারায়ণ দেব এবং তার তাখাল্লুস বা কবিনাম সঞ্জয়। আরো কয়েকজন প্রবন্ধকার সঞ্জয় সম্বন্ধে আলোচনা করে কোন গ্রহণীয় সিদ্ধান্ত দিতে পারেননি।

ডক্টর সুকুমার সেন সঞ্জয়কে পরোক্ষ নকলবাজ বলেই মনে করেন। কলকাতা বিশ্ববিদ্যালয় প্রকাশিত (১৯৬৯ সনে) ডক্টর মুনীন্দ্রকুমার ঘোষ সম্পাদিত কবি সঞ্জয় বিরচিত মহাভারত প্রকাশিত হওয়ার পরেও (ক. সুখময় মুখোপাধ্যায় সঞ্জয় ওর্ফে হরিনারায়ণ দেবকে সতেরো শতকের কবীন্দ্র-অনুকারক ভরদ্বাজবংশীয় ব্রাহ্মণ বলে মনে করেন। খ. ডক্টর অসিত বন্দ্যোপাধ্যায়েরও সিদ্ধান্ত এই “কবীন্দ্রের পরে সঞ্জয় নামীয় (ইহা ছদ্ম নাম হইতে পারে, আসল নাম হয়তো হরিনারায়ণ) কোন কবি বা লিপিকার বা পাঁচালী গায়ক কবীন্দ্রের রচনাকে নিজের বলিয়া আত্মসাৎ করিয়া এবং কোন কোন অংশকে একটু আধটু বর্ধিত করিয়া সাজাইয়া গুছাইয়া একখানি নতুন মহাভারতের অনুবাদের কুজ্জ্বলিকা সৃষ্টি করিয়াছেন। (কবীন্দ্রের রচনাকে অবলম্বন করিয়া কোন অল্পমেধাবী লেখক লিপিকার বা পাঁচালী গায়ক পৌরাণিক সঞ্জয়ের নামের অন্তরালে বসিয়া কবীন্দ্রের যশে ভাগ বন্টাইয়াছেন”।^৩

ডক্টর মুনীন্দ্রকুমার ঘোষ দীর্ঘ সাত বছর ধরে কঠোর কায়িক মানসিক শ্রম স্বীকার করে সঞ্জয় বিরচিত মহাভারত সম্পাদনা করেছেন। তিনি প্রাপ্ত সব খণ্ড-অখণ্ড পুথিও সযত্নে পরীক্ষা করেছেন। তাঁরও স্থির সিদ্ধান্ত হচ্ছে ক. কবির নাম সঞ্জয়- হরিনারায়ণ (গতি, বেদ, দেব) নয়।

খ. কবি সঞ্জয় ভরদ্বাজ গোত্রীয় ব্রাহ্মণ এবং সম্ভবত সিলেটের সুনামগঞ্জের অন্তর্গত সুপ্রাচীন ও সুপ্রসিদ্ধ লাউড়ে অদ্বৈতাচার্যাদির একই বংশে জন্ম।

গ. সঞ্জয়ই বাঙলাভাষায় মহাভারতের আদি বা প্রথম অনুবাদক। কবীন্দ্র সঞ্জয়েরই পাঁচালী সংক্ষিপ্ত করে নিজের নামে চালিয়ে দিয়েছিলেন। ডক্টর দীনেশচন্দ্র সেনও এ মতই পোষণ করতেন।^৪

ডক্টর মুনীন্দ্রকুমার ঘোষ ২২৭ পৃষ্ঠাব্যাপী ভূমিকায় প্রাপ্ত সমস্ত উপকরণ সযত্নে একত্রিত করেছেন। এজন্যে বাঙলাসাহিত্যের ইতিহাস পাঠক ও গবেষকমাত্রই তাঁর কাছে কৃতজ্ঞ ও ঋণী থাকবেন। কিন্তু তাঁর ভূমিকা কাঁচা মন, তরলযুক্তি, পুনরাবৃত্তি এবং অপটু অসংহত বিন্যাস-দোষের সাক্ষ্য বহন করে। ২২৭ পৃষ্ঠার এ ভূমিকা ৫০ পৃষ্ঠায় সংহত হতে পারত। পুনরাবৃত্ত তথ্য পাঠককে কেবল বিভ্রান্তই করে, সাহায্য বা উপকৃত করে না।

১. তার প্রথম সিদ্ধান্তের প্রতিকূলে বিভিন্ন পুথিতে হরিনারায়ণের কয়েকটি ভণিতা মিলেছে, হরিনারায়ণ নামের অন্য কোন মহাভারত রচয়িতার সন্ধান না মিললেও ঐ নাম

^২ ১৩৩৪-সা-প-প।

^৩ বা-সা-ই, ১ম খণ্ড, পৃঃ ৬১০, ৬১৩।

^৪ বঙ্গভাষা ও সাহিত্য ৭ম সং ১৪২।

লিপিকরের বলে উড়িয়ে দেয়া যায় না। 'দ্রৌপদী যুদ্ধ' নামের নতুন আখ্যানটির রচয়িতা রামকৃষ্ণ দাস যে নন, (পদবন্ধ রচি রামকৃষ্ণ দাস কএ) তারও প্রমাণ আবশ্যিক। এবং 'সঞ্জয় কবি' নামে রচা পাঞ্চগলী প্রচার'-এর একটি গ্রহণীয় ব্যাখ্যা দরকার।

২. কবি সঞ্জয় ভরদ্বাজ গোত্রীয় ব্রাহ্মণ হতে পারেন কিন্তু 'দেবকুলে (অংশে) উৎপত্তি ব্রাহ্মণ কুমার'- ইনি কবি সঞ্জয় না 'মহাভারত' কথক আদি সঞ্জয়?

সুদূর আর্যাবর্তের মহাকাব্যের একটি চরিত্র রাজা ভগদত্ত যে লাউড়বাসী ছিলেন তা কিংবদন্তী সূত্রে জানার উল্লাস বশে তাঁর পাঁচালীতে সে তথ্য বারবার পরিবেশন করে কবি আনন্দিত হয়েছেন। কবি হয়তো দৈনিক জ্ঞাতিভুক্তচৈতন্য গর্বও বোধ করেছেন, আমরা যেমন স্বদেশী বলে গৌরব বোধ করি অশোক, অজন্তা, তাজমহল, পাণিনি, রবীন্দ্রনাথ প্রভৃতির জন্যে। আর ভরদ্বাজ গোত্রীয় ব্রাহ্মণও বাঙলাদেশে দুর্লভ নয়। কাজেই সঞ্জয় লাউড়বাসী ছিলেন এ নিতান্তই অনুমান। অবশ্য সঞ্জয় যে পূর্ববঙ্গবাসী, তার সাক্ষ্য তাঁর পাঁচালীর প্রতিলিপির পূর্ববঙ্গে সিলেটে, কুমিল্লায় বহুল প্রাপ্তি। এসব অঞ্চলের কোথাও তাঁর বাড়ি ছিল। সঞ্জয় যে মহাভারতের আদি অনুবাদক নন, সৈয়দ সুলতানের উক্তি ছাড়াও অন্য প্রমাণ হচ্ছে- আসামে পশ্চিমবঙ্গে ও উড়িষ্যা তথাকথিত বিজয় পণ্ডিতের বা কবীন্দ্র-শ্রীকর নন্দীর পুথির বহুল প্রচার, এবং গৌরীনাথ শাস্ত্রী সম্পাদিত আসামের কবীন্দ্র মহাভারত সঞ্জয় মহাভারতের পুথি পূর্ববঙ্গের একটা সীমিত অঞ্চলের বাইরে মেলেনি। সরস ও শ্রেষ্ঠ বলে নয়, আদি ও একমাত্র বলেই কবীন্দ্রকৃত মহাভারত উৎসুক গায়ক পাঠকদের অগ্রাহ্য ও প্রয়োজনে তিন প্রদেশে বহুল প্রচারিত হয়েছিল।

৪. কবির অদ্ভুত সঞ্জয় যে গুণযুক্ত সঞ্জয় যে কবির অতি বিচক্ষণ।

সঞ্জয় কহিল কবি ভরিত্রাতা/অথ কবিরাজ যে সঞ্জয়।

ইত্যাকার ভণিতা এবং 'দেবকুলে জন্ম ব্রাহ্মণ কুমার' পরিচিতি দিব্যদৃষ্টিপ্রাপ্ত কুরুক্ষেত্রযুদ্ধের প্রত্যক্ষদর্শী বর্ণনাকারী সঞ্জয়ের, না বাঙালী পাঁচালীকার সঞ্জয়ের তা নিঃসংশয়ে বলা যাবে না।

৫. কবি হরিনারায়ণ দেব যদি সঞ্জয় এই ছদ্মনামে বা ডাকনামে অথবা কবিনামে পাঁচালী লিখবেন বা গাইবেন বলে সংকল্প করে থাকেন এবং সর্বত্র সে নামই ব্যবহার করেন আর কৃষ্টি যদি প্রকৃত নামে দু'একটি ভণিতা দিয়ে থাকেন, তা হলে প্রকৃত নামটি প্রক্ষিপ্ত বলে সিদ্ধান্ত করা সম্ভব নয়। নিঃসংশয় হতে হলে হরিনারায়ণ দেবের 'মহাভারত' বা কোন গায়েন-লিপিকর হরিনারায়ণ দেব-এর নাম অন্য কোন পুথিতে আবিষ্কার করতে হবে। বিশেষ করে সঞ্জয় যদি কবির প্রকৃত নাম হত, তা হলে স্বকীয় স্বাতন্ত্র্য রক্ষার গরজে এতোগুলো ভণিতার দু'একটি স্থলে হলেও (এমনকি ছন্দের খাতিরেও) কবির সঞ্জয় নামের সঙ্গে কুলপদবীও [অদ্ভুত দ্বিজ যুক্ত] হত। তাহলে দু' সঞ্জয়ের ভিন্নতা বা স্বাতন্ত্র্য নির্দেশের জন্যে এমন আকুলভাবে 'সঞ্জয়ে কহিল কথা কহিল সঞ্জয়ের। সঞ্জয় রচিয়া কহে সঞ্জয়ের কথা/ সঙ্কয়ে কহিল কথা সঞ্জয়ে বাখানে। সঞ্জয়ের কথা শুনি সঞ্জয়ের কথা পুনি/সঞ্জয়ে কহিল কথা সঞ্জয়ে প্রকাশে।' এমন সব ভণিতার প্রয়োজন হত না। বাঙালী কবি সঞ্জয় স্বয়ংই এ সব ভণিতা যোগেই পাঠক গবেষক মনে সন্দেহ জাগিয়েছেন। তার প্রকৃত পরিচয় যেন রহস্যাবৃত। যাঁরা সঞ্জয়কে কবিশয লোভে কবীন্দ্র পরমেশ্বর দাসের মহাভারতে নিজের নাম ও রচনা যোগ করেছেন বলে অনুমান করেন,

দ্বিজ বা 'কুলপদবী' ব্যবহার না করার পিছনে ঐ জালিয়াতি বাঞ্ছাই ক্রিয়াশীল ছিল বলে তাঁরা বিশ্বাস করবেন। এমন কিছু অভিসন্ধি যদি না-ই থাকবে, তাহলে হাজারো বার মহাভারতীয় সঞ্জয়ের নাম এতো ঘটা করে উচ্চারিতই বা হবে কেন? অনুবাদ তো আরো অনেকেই নানা গ্রন্থের করেছেন, তাঁরা তো মূল কবির নাম এতো বার উল্লেখের প্রয়োজন বোধ করেননি—

৬. ক. সঞ্জয়ে পয়ারে কথা কহিল জেন মত

হেন মতে কেহ নাহি রচয়ে ভারত।

খ. কর্ণপর্ব সঞ্জয়ে কহিল জেন মত

হেন মত কেহ নাহি রচয়ে ভারত।

এ দুটো ভণিতা সম্বলিত উক্তিই প্রমাণ করে যে সঞ্জয় নিজেও আদি অনুবাদক বলে দাবি করেন না। এর সরল অর্থ তাঁর দাবি, এমন সুষ্ঠু বা বিস্তৃত বা প্রাঞ্জল বা সরস করে আর কেউ অনুবাদ করেনি।

৭. 'ভারত সমুদ্র অতি অন্ধকারময়/প্রদীপ জ্বালিয়া তাতে দিলেন সঞ্জয়/

অতি অন্ধকার যে মহাভারত সাগর/পাঁচালী সঞ্জয়ে তাকে করিল উজ্জ্বল।

—ইত্যাকার বক্তব্য দেখে ডক্টর দীনেশচন্দ্র সেন সঞ্জয়কে আদি কবি বলে মনে করেছিলেন, ডক্টর মুনীন্দ্র ঘোষও তাই বিশ্বাস করেন। উভয়ের যুক্তি অভিন্ন। কিন্তু আমরা যদি চণ্ডীমঙ্গল, ধর্মমঙ্গল বা মনসামঙ্গলের পুঙ্খানুপুঙ্খ কবিদের কাব্য রচনার কারণ বর্ণন সূত্রে দেয়া গতানুগতিক যুক্তি স্বরণ করি, তা হলে এসব কথা মধ্যযুগীয় কবির প্রথাসিদ্ধ বাগাড়ম্বরে বা আত্মসম্মতি বলেই মানতে হবে। এক্ষেত্রে 'ইউসুফ-কৌলোখা' রচয়িতা সঙ্গী, আবদুল হাকিম ও গরীবুল্লাহর স্ব স্ব উক্তি স্মরণ্য। এক্ষেত্রে আরো একটি কথা বিবেচ্য : সেকালে যানবাহনের সুবিধে ছিল না বলে সাধারণ গ্রন্থাদির প্রচার অঞ্চলের সীমা অতিক্রম করত না। এক অঞ্চলের লোক অন্য অঞ্চলের গ্রন্থের নামও শুনতে পেত না। কাজেই অনেকেই স্ব স্ব অঞ্চলে পথিকৃতের গৌরব দাবি করতে পারত। কিন্তু আগেই বলেছি সঞ্জয়ের সত্যতা প্রশ্নাতীত নয়।

এ প্রসঙ্গে সুখময় মুখোপাধ্যায়ও (কালক্রম পৃঃ ২০) বলেন— দীনেশচন্দ্র সেনের “এই যুক্তির ভিত্তি অত্যন্ত দুর্বল। কারণ 'লোক বুঝাইতে' (লোক বুঝিবারে) অনুবাদ করার দোহাই বহু অর্বাচীন কবিও দিয়েছেন। সপ্তদশ শতাব্দীর শেষ পাদে সনাতন ঘোষাল তাঁর ভাষা ভাগবতে লিখেছেন :

ব্যাসের বচনে বোধ নহে সভাকারে/এ হেতু করিতে চাই ভাষা অনুসারে। সূতরাং দীনেশবাবুর যুক্তি থেকে সঞ্জয়ের প্রাচীনতা প্রমাণ হয় না। এমনি প্রথাসিদ্ধ কথা সবাই বলে :

সপ্তদশ পর্বকথা সব শ্রোক বন্ধ/মুখ বুঝাইতে কৈল পরাকৃত হৃদ। (রামচন্দ্র খান)।

শ্লোকবন্দে ব্যক্ত কথা ব্যাস ঋষি মুখে/রচিলো পাঞ্চালী যেন বুঝে সর্বলোকে।^১

ডক্টর সুকুমার সেন উক্ত একটি তত্ত্বও ব্রাহ্মণ সঞ্জয়ের প্রাচীনত্বের বিরোধী। সুকুমার সেনের মতে, “রামায়ণ গান আনুষ্ঠানিক ব্যাপার ছিল, কবিরা সকলেই ব্রাহ্মণ। বাঙ্গালী

^১ পীতাম্বর দাস-সুকুমার সেন পৃঃ ২৫৮।

মহাভারত পাঠ আনুষ্ঠানিক ব্যাপার ছিল না, তাই কবির সাধারণত কায়স্থ, দৈবাৎ ব্রাহ্মণ বা অন্যজাতি।” [পৃঃ ২৪৮/১/পৃ/৩]

অতএব ‘এমত ভারত কথা কহিল সঞ্জয়/গীত হেন গাহে লোক মোহিত হৃদয়। পাতকী তরিতে তবে/নরলোক বিস্তারিতো কহিল সঞ্জয়,— প্রভৃতি কথা প্রথাসিদ্ধ তাই তাৎপর্যহীন। সঞ্জয়ের ভাষা প্রাচীন নয়, ভাবে-ভাষায় ছন্দে কিংবা অলঙ্কার প্রয়োগেও অনন্যতা নেই।

আমাদের ধারণায় সঞ্জয় কবিশ্যপ্রার্থী কোন গায়ন-কবি। কবীন্দ্র মহাভারতই তাঁর অবলম্বন। তাঁর স্বকীয় যোজনাও রয়েছে, এমনকি গায়ন লিপিকর পরম্পরায় পাঁচালীর স্থানিক ও কালিক স্ফীতিও ঘটেছে। সঞ্জয় নকলবাজ বলেই কুলপদবী ব্যবহার করেননি। অথবা তাঁর প্রকৃত নাম হরিনারায়ণ দেব। তাই নামের সঙ্গে কোথাও দ্বিজ সঞ্জয়ও ব্যবহার করেননি। দেবকুলে ভরদ্বাজ গোত্রে জন্ম তাঁর নয়, মহাভারতের প্রথম বক্তা সঞ্জয়ের।

১৭১৪-১৭২৯ খ্রীস্টাব্দের^১ প্রতিলিপিতে যখন সঞ্জয়ের নাম পাওয়া গেছে, তখন সঞ্জয় বা হরিনারায়ণকে সতেরো শতকের লোক বলে স্বীকার করতেই হবে। অবশ্য পুথিতে রাজেন্দ্র দাস, গঙ্গাদাস, ষষ্ঠীবর সেনের রচনাংশও রয়েছে, ২য় পুথিতে আছে কবীন্দ্র নিত্যানন্দ ঘোষ প্রভৃতির ভণিতা। এবং এরকম ভণিতা বিরল বা দুর্লভ হলেও আমরা এসব ভণিতায় আস্থা রাখি :

- ক. হরিনারায়ণ দেব দীন হীন মতি
সঞ্জয়াভিমাণে কৈলা অপূর্ব ভারতী
খ. রচনা বিশেষত নানা রসময়
হরিনারায়ণ দেব বাখানে-সঞ্জয়।^২

সতেরো ও আঠারো শতকে আর যারা মহাভারতের বিভিন্ন খণ্ড বা সম্পূর্ণ অনুবাদ করেছেন তাঁরা দ্বিজ রঘুনাথ, দ্বিজ অভিরাম, দৈবকীনন্দন, রামচন্দ্র খান, নিত্যানন্দ ঘোষ (পূর্ণাঙ্গ), নন্দরাম দাস, অনন্তমিশ্র, দ্বিজ গোবর্ধন, রাজা রামদত্ত, ষষ্ঠীবর সেন, কবিচন্দ্র (শঙ্কর চক্রবর্তী) ভবানী দাস, দ্বিজ শ্রীনাথ দাশ, কাশীরাম প্রভৃতি।

৫. সতেরো শতক

কাশীরাম দাস

মহাভারতের সবচেয়ে জনপ্রিয় কবি কাশীরাম দাস। যদিও তিনি আঠারো পর্ব মহাভারতের মাত্র সাড়ে তিনটে পর্বই রচনা বা স্বাধীন অনুবাদ করেছিলেন, তবু কথক, গায়ন ও লিপিকরের আনুকূল্যে তিনি লোকপ্রিয় গোটা মহাভারত রচক হিসেবেই গত চারশ বছর যাবৎ সাধারণ্যে পরিচিত। উনিশ শতকের গোড়ার দিকে শ্রীরামপুরের মিশনারীরা কাশীরাম দাসের কৃত্যরূপেই

^১ পৃঃ ২৪৮-১ম/পৃ/২য় সং।

^২ সুকুমার সেন/১ম অ/১ম সং, পৃঃ ১২১. পাদটীকা।

^৩ প্রাচীন পুথির বিবরণ, ১ম, ১ম সংখ্যা, ১৪২।

^৪ ঐ।

প্রথম বাঙলা মহাভারত মুদ্রিত করে প্রকাশিত করেন। তখন থেকেই আধুনিক শিক্ষিত সমাজও সমগ্র মহাভারত রচনার গৌরব কাশীরাম দাসকেই দান করে থাকেন।

আধুনিকতর গবেষণায় কাশীরাম দাস সম্পর্কে যে সব তথ্য মিলেছে, সেগুলো সংক্ষেপে এই :

১. ক. কাশীরাম দাসের পিতৃপুরুষের নিবাস ছিল সিদ্ধি গ্রামে— সিঙ্গি গায়ে নয়। কাশীরাম দাস রচিত আদি পর্বে রয়েছে :

ইন্দ্রানী নামেতে দেশ বাস সিদ্ধিগ্রাম (পাঠান্তরে সিঙ্গিও মেলে)

প্রিয়ঙ্কর দাস পুত্র সুধাকর নাম।

তৎপুত্র কমলাকান্ত কৃষ্ণদাস পিতা

কৃষ্ণদাসানুজ গদাধর জ্যেষ্ঠ ভ্রাতা।

অন্যত্র— ইন্দ্রানী নামেতে দেশ পূর্বাপর স্থিতি।

দ্বাদশ তীর্থেতে যথা দেবী ভাগীরথী।

- খ. কাশীরাম দাসের কনিষ্ঠ ভ্রাতা গদাধর দাস 'জগন্নাথ মঙ্গল' পাঁচালী রচয়িতা। তিনিও বলেছেন :

ভাগীরথী তটে বাটী ইন্দ্রায়নী নাম

তার মধ্যে প্রতিষ্ঠিত গণি সিদ্ধিগ্রাম (পাঠান্তরে সিঙ্গি)

অগ্রদ্বীপ গোপীনাথ রায় পুত্রতলে

নিবাস আমার সেই-সুধাকর কমলে।

- গদাধর 'জগন্নাথ মঙ্গলে' বিস্তৃত সংশ্লিষ্টতাও দিয়েছেন, তার পুত্র-পরম্পরায় সংক্ষিপ্ত রূপে এই :

দৈত্যারিদেব-দামোদর দু-বরাজ-মীনকেতন-ধনঞ্জয়-রঘুপতি (পাঠান্তরে বসুপতি) প্রিয়ঙ্কর-সুধাকর-কমলাকান্ত। এবং কমলাকান্তের তিন পুত্র— কৃষ্ণদাস, কাশীরাম দাস ও গদাধর দাস (কমলাকান্তের হলা এ তিন কোঙর— গদাধর)। গদাধর সূত্রে আরো জানা যায় তাঁদের পিতা

“দেব শ্রীকমলাকান্ত তেজিয়া নিবাস

জগন্নাথ দেখিয়া সে ওড়ে কৈল বাস।

অধ্যাপক সুখময় মুখোপাধ্যায় কাশীরামের পৈত্রিক বাড়ি সিদ্ধি গ্রামে ছিল বলে বিশ্বাস করেন। তাঁর যুক্তিগুলো এই : ১. ইন্দ্রানী একসময় প্রসিদ্ধ (বন্দরগঞ্জ নগর) স্থান ছিল। বৃন্দাবন দাসের ও মুকুন্দরামের কাব্যে ইন্দ্রানীর উল্লেখ রয়েছে। এই ইন্দ্রানীর নিকটে ভাগীরথী তীরে সিদ্ধি গ্রাম ২. এবং অগ্রদ্বীপের সংলগ্ন-গ্রাম সিদ্ধি— সিঙ্গি নয়। সিঙ্গি কাটোয়ার কাছে।^১

২. গদাধর সূত্রে আরো জানা যায় তাঁদের পিতা উড়িষ্যা জগন্নাথ দর্শনে গিয়ে সেখানেই বাস করতেন থাকেন। এবং গদাধর কটকের নিকটবর্তী মাখনপুরে রসেই তাঁর 'জগন্নাথ মঙ্গল' রচনা করেন। এতে বোঝা যায় গদাধর পিতৃ নিবাসেই বাস করতেন। কিন্তু কাশীরাম দাস

^১ মধ্যযুগের বাংলা সাহিত্যের কালক্রম, পৃঃ ১৭৯।

হরিহরপুর গ্রামের পুরুষোত্তমপুত্র অভিরাম মুখোপাধ্যায়ের আশীর্বাদ নিয়ে (প্রতিপোষণে?) মহাভারত রচনায় হাত দেন :

হরিহরপুর গ্রাম সর্বগুণধাম
পুরুষোত্তম-নন্দন মুখটি অভিরাম।
কাশীরাম বিরচিল তার আশীর্বাদের।

৩. নারায়ণপুত্র^১ নন্দরাম দাসের [মৃত্যু ১৬৭৭ খ্রীস্টাব্দে] জ্ঞাতি সম্পর্কে জ্যেষ্ঠতাত। কাশীরামদাস হয়তো পরিণত বয়সেই মহাভারত অনুবাদে আগ্রহী হন।

তাই আদি সভা বিরাট বনের কতদূর
ইহা রচি কাশীদাস গেল স্বর্গপুর।^২

এতে মনে হয় বন পর্বের আগেই বিরাট পর্ব অনূদিত হয়। আমরা দেখেছি, গোটা আঠারো পর্ব মহাভারত অনুবাদে আগ্রহ গোড়া থেকেই কোন অনুবাদকের মধ্যে ছিল না। প্রমাণ কবীন্দ্র পরমেশ্বর, শ্রীকর নন্দী প্রমুখ। কেবল নিত্যানন্দ ঘোষ, সঞ্জয় প্রভৃতি কয়জনই মাত্র এ শ্রমসাধ্য কাজে আগ্রহী হয়েছেন। অন্যরা বিভিন্ন প্রিয়পর্বেই অনুবাদ করেছেন। এর প্রধান কারণ মহাভারতজ্ঞ অনেক কাহিনী, রীতি-রেওয়াজ ও নীতি-আদর্শ বাঙালী হিন্দুর ঘরোয়া ও সামাজিক জীবনের নীতি-আদর্শের অনুকূল ছিল না বলে তাঁ লোকসমাজে প্রকাশকাম্য ছিল না। এজন্যেই বেছে বেছে নির্দোষ ও যুগোপযোগী উপদেশাত্মক ও সুনীতিমূলক অংশের বা পর্বের স্বাধীন অনুসৃতির রেওয়াজ চালু হয়। দ্বিতীয় কারণ মহাভারতের বিপুল কলেবরভীতি। রামায়ণের ক্ষেত্রে এরূপ কৃচিৎ ঘটেছে। তৃতীয় কারণ মহাভারতের বিপুল কলেবরভীতি। রামায়ণের নৈতিক পারিবারিক সামাজিক জীবন নির্ধারণ করে। কাশীরাম দাস বেঁচে থাকলেও যে বিপুলকায় সমগ্র মহাভারত অনুবাদ করতেন তা অনুমান করার সম্ভব কারণ নেই। বনপর্বের আগে বিরাটপর্ব অনুবাদ আমাদের এ ধারণাই সমর্থন করে। যদিও বা জ্ঞাতি সম্পর্কের ভ্রাতৃপুত্র নারায়ণ-নন্দন নন্দরাম দাস (যিনি উদ্যোগ, দ্রোণ ও কর্ণ পর্বত্রয় রচনা করেছিলেন) বলেছেন—

১. কাশীরাম দাসই তিঁই জ্যেষ্ঠতাত
মৃত্যুকালে আজ্ঞা কৈল শিরে দিয়ে হাত।
আমু অবশেষে বাপু যাই পরলোকে
রচিতে না পালান্ত পোখা পাই বড় শোকে।
আশীর্বাদ করি আমি বলিহে তোমারে
পাণ্ডব চরিত্র বাপু রচিবা আদরে।^৩ (দ্রোণ পর্ব)

এমনি পাঠ উদ্যোগপর্বেও মেলে

কাশীরাম দাস মহাশয় রচিলেন পোখা
ভ্রাতৃপুত্র হই আমি তিহো খুল্লতাত।

^১ নারায়ণ-নন্দন সেনিয়া রাধাশ্যাম/পাণ্ডব বিজয় বিরচিল নন্দরাম।

^২ অক্ষয়কুমার কয়াল সংগৃহীত পুঁথি-সুখময় উদ্ধৃত, পৃঃ ১৮১।

^৩ উদ্ধৃত- ডক্টর দীনেশচন্দ্র সেন।

প্রশংসিয়া আমারে করিল আশীর্বাদ
 আয়ুত্যাগে আমি বাপু যাই পরলোক ।
 রচিত্তে না পাইল পোখা রহি গেল শোক ।
 ত্রিপথগা যাই আমি কহিয়া তোমায়ে
 রচিবে পাণ্ডবকথা পরম সাদরে ।^৪

খ. জ্যেষ্ঠ তাত কাশীদাস পরলোক কালে
 আমারে ডাকিয়া বলিলেন করি কোলে ।
 শুন বাপু নন্দরাম আমার বচন
 ভারত অমৃত তুমি করহ রচন ।^৫

এসব কথা আক্ষরিকভাবে বিশ্বাস করার কোন ভিত্তি নেই। কারণ নন্দরামও মহাভারতের বাকি অংশ অনুবাদ করেননি। তাঁর তিন পর্বই মেলে। আমাদের ধারণা নন্দরাম পাঠক-কথক-গায়কের আস্থা অর্জনের জন্যেই কাশীরাম দাসের নির্দেশের দোহাই কেড়েছেন।

৪. কাশীরাম দাসের কাব্যরচনার কাল :

কাশীরাম দাসের কনিষ্ঠ ভ্রাতা গদাধর দাস তাঁর জগন্নাথমঙ্গল [বা জগৎমঙ্গল] রচনা করেন ১৬৪২ খ্রীস্টাব্দে।^৬ তার আগেই কাশীরাম মহাভারত রচনা করেন। জগন্নাথমঙ্গল সূত্রে তাও জানা যায় :

কমলাকান্ডের হলু প্রতিন কোঙর
 প্রথমে সে শ্রীকৃষ্ণদাস শ্রীকৃষ্ণ কিঙ্কর ।
 দ্বিতীয় শ্রীকাশীদাস তত্ত্ব ভগবান
 রচিল পাঁচালী ছন্দে ভারত পুরাণ ।
 তৃতীয় কনিষ্ঠ দীন গদাধর দাস ।
 জগৎমঙ্গল কথা করিল প্রকাশ ।

ক. কাশীরাম দাসের বিরাট পর্বে একটি রচনাকাল মেলে :

চন্দ্রবাণ পক্ষ ঋতু শক সুনিশ্চয়
 বিরাট হইল সাক্ষ কাশীদাস কয় ।
 এর থেকে ১৫২৬ শক বা ১৬০৪-০৫ খ্রীস্টাব্দ মেলে ।^৭

খ. আদি পর্বেও একটি রচনাকাল রয়েছে :

শকাব্দা বিধুমুখ রহিলা তিন গুণে
 রুশ্বিনী নন্দ অঙ্কে জলনিধি সনে ।

^৬ সুকুমার সেন উদ্ধৃত, পৃঃ ৪৫-৫৯/১/২য় সং।

^৭ সাহিত্য পরিষৎ পুষ্টিঃ উদ্যোগ পর্ব, পুষ্টি সং ১২৪২. পত্র সং-৩-সুখময় মুখোপাধ্যায় উদ্ধৃত, পৃঃ ১৮৪-৮৫।

^৮ সুখময়, পৃঃ ২০৫।

^৯ সুখময়, ৪ ১৮৩।

-এর থেকে যোগেশচন্দ্র রায় নিম্নরূপ ব্যাখ্যা অনুযায়ী বিধুমুখ-পঞ্চাননশিব, এর তিন গুণ $৫ \times ৩ = ১৫$ । রুশ্বিনী নন্দন অঙ্ক (কামের পঞ্চশর ১৫-এর ৫-এর পর) ৫ কোল- দুই বাহু অর্থে-২ এবং জলনিধি ৪ (সংস্কৃত নিয়মে) ১৫২৪ শক বা ১৬০২ খ্রীস্টাব্দ পেয়েছিলেন।

সুখময় মুখোপাধ্যায় নিম্নরূপ সংখ্যা ধরে-

বিধুমুখ তিনগুণ $৫ \times ৩ = ১৫$, রুশ্বিনী নন্দন-১৩, সাগর-৭ = $১৫১৩ + ৭ = ১৫২০$ শকাব্দ বা ১৫৯৮-৯৯ খ্রীস্টাব্দ বলে মনে করেন। আর ডক্টর সুকুমার সেন : বিধুমুখ-৪, তিন গুণে-৩, রুশ্বিনী নন্দন অঙ্কে ১৫, = ১৫৩৪ শকাব্দ বা ১৬১২ খ্রীস্টাব্দ। যেভাবেই হোক সতেরো শতকের প্রথম ১০-১২ বছরের মধ্যেই যে কাশীরাম দাস সাড়ে তিনটে পর্ব রচনা করেন তাতে সন্দেহ নেই। এসূত্রে নগেন্দ্রনাথ বসুসূত্রে পাওয়া নন্দরাম দাসের মৃত্যুর সনটিও (১৬৭৭ খ্রীঃ বা ১০৮৩ সন) স্মর্তব্য। ১৬৭৭ খ্রীস্টাব্দে যার মৃত্যু তিনি ১৬০৪-০৫ সনেও প্রকট কবিত্বশক্তি সম্পন্ন ২৫-৩০ বছরের যুবক ছিলেন বলে মানতে হবে, যদি মহাভারত রচনাসম্বন্ধীয় কাশীরাম দাসের আরক্ককর্ম সমাপ্তি সম্পর্কিত মৃত্যুপথ্যাত্রী 'কাশীরাম-নন্দরাম সম্বাদের' সত্যতা স্বীকার করতে হয়। সেক্ষেত্রে নন্দরাম অন্তত ১০৫-০৭ বছর আয়ু পেয়েছিলেন- অতএব, হয়, নগেন্দ্রনাথ বসু পরিবেশিত সূত্রে ভুল রয়েছে, অথবা নন্দরাম দাস নিজের মর্যাদা বৃদ্ধির জন্যে গল্প বানিয়েছিলেন।

৫. অক্ষয়কুমার কয়াল আবিষ্কৃত বনপর্বের এক পুথির সাক্ষ্যে জানা যায় : 'শেকরতনয় জিত' বা জিত ঘটক, কাশীরাম দাসের অসমাপ্ত বনপর্ব সমাপ্ত করেন ১৬০৫ শকাব্দে। এ সূত্রে তিনি তাঁর পূর্ববর্তী এক কবির কৃতিরও উল্লেখ করেছেন। জিত বলেছেন :

ধন্য ছিল কায়েস্থ কুলেতে কাশীদাস
চারিপর্ব মহাভারত করিলা প্রকাশ।
আদ্য সভা বিরাতের রচিলা পাঁচালি
তাহা শুনি সর্বলোক ধন্য ধন্য বলি।
পূর্বে তিহোঁ আরম্ভ করিলা এই পুথি
কাল বশে মৃত্যু তার হৈল দৈবগতি।
আগস্ত উপাঙ্গণ (অগস্ত উপাখ্যান) করি হৈল কাল প্রাপ্ত
বনের বিচিত্র কথা নহিল সমাপ্ত।^১

অন্য পুথিতে পাঠান্তরে- তিন পর্ব ভারতের করিলা প্রকাশ।^২

অগসি় আঙ্গণ (অগস্ত আখ্যান) করি হৈল কৃষ্ণপ্রাপ্তি
বনের বিচিত্র কথা নহিল সমাপ্ত।^৩

এই অগস্ত উপাখ্যানেরও কতটুকু কাশীরাম দাস রচনা করেছিলেন তারও সঠিক উল্লেখ পাই কয়াল সংগৃহীত একটি বনপর্বে :

^১ সুখময়, পৃঃ ১৮১।

^২ এ. পৃঃ ১৮০।

^৩ এ. পৃঃ ১৮১।

মুনি কহে কহিলাঙ অগন্ত আখ্যা
 গুনি যুধিষ্ঠির রাজা হরষ বিধান ।
 কাশীদাস কহে এই অমৃত সমান
 কর্ণপথে সাধু নয় সদা কর পান ।
 এতবধি বনপর্ব কাশীদাস কৈল
 অবধান করি সভে একান্তে গুনিল ।
 না হইতে বনপর্ব কথা সমাধান
 কাশীদাস করিলেন স্বর্গের পয়ান ।^৫

তারপর ১৬০৫ শকে জিত ঘটক বনপর্বের বাকি অংশ রচনা করেন :

তেকারণে প্রসঙ্গ বনের যত শেষ
 পাঁচালী প্রবন্ধে কৈল মনের আবেশ ।...
 পঞ্চপুষ্প রস শশি পরিমাণ শক
 পাঁচালি প্রবন্ধেতে শেষ আরণ্যক ।

১৬০৫ (লিপিকর প্রদত্ত সংখ্যা)^৬

(পঞ্চ-৫, পুষ্প-০, রস-৬, শশী-১ হয় বামাগতি-১৬০৫ শকাদ বা ১৬৮৩-৮৪ খ্রীস্টাব্দ)
 জিত ঘটক আরো বলেছেন :

আদি সভা বিরাট বন (অসমাপ্ত) করিল লিখক
 এর চারি পর্ব পুস্তক কাশী দাসি ।
 উদ্যোগ আদি ছয় পর্ব শিবরাম ঘোষি
 ঐশ্বক আদি আট পর্ব চাহিয়া বেড়াই ।

অর্থাৎ শেষ আটপর্ব ১৬৮৩-৮৪ খ্রীস্টাব্দ অবধি জিত ঘটকের জ্ঞাতসারে অনূদিত হয়নি ।

উপরের আলোচনা থেকে আমরা কাশীরাম দাস সম্বন্ধে প্রায় নিশ্চিত যা জানলাম তা এই :

কাশীরাম দাস সিদ্ধি গ্রামের কমলাকান্ত দাসের পুত্র । তাঁর কনিষ্ঠ ভ্রাতা গদাধর দাসও কবি ছিলেন । কাশীরাম দাস আদি, সভা, বিরাটপর্ব এবং বনপর্বের অংশ বিশেষ রচনা করে মৃত্যুবরণ করেন । তাঁর কাব্য রচনাকাল : ১৫৯৮ থেকে ১৬০৫ খ্রীস্টাব্দ অবধি । এই সাড়ে তিন পর্ব রচনা করেই তিনি বিস্তৃত অঞ্চলে লোকপ্রিয় ও প্রখ্যাত হয়েছিলেন । যার ফলে পরে কথক, গায়ন, লিপিকর সবাই অন্যান্য কবির রচিত বিভিন্ন পর্বগুলোও কাশীরাম দাসের রচিত বলে আসরে প্রচার করে একাধারে আসর জমিয়েছেন এবং কাশীরাম দাসকেও অপ্রাপ্য গৌরবে মণ্ডিত ও অমরতা দান করেছেন । এঁদের হাতে ‘কাশীরাম দাস’ তখন ব্যবসায়িক ‘ট্রেডমার্ক’ হিসেবে ব্যবহৃত হয়েছে । উনিশ শতকের গোড়ায় শ্রীরামপুর মিশন প্রথম মুদ্রিত মহাভারত মাধ্যমে এ নামের মাহাত্ম্য ও জনপ্রিয়তা চিরস্থায়ী করেছেন । যে-পাঁচালীর সাড়ে পনেরোটা পর্বই বিভিন্ন সময়ের নানা জনের রচনা, তার কাব্য-সৌন্দর্যের বা অনুবাদের সুষ্ঠুতার আলোচনা

^৫ ঐ, পৃঃ ১৮২ ।

^৬ সুখময়, পৃঃ ১৮৬ ।

নিরর্থক। তা ছাড়া কাশীরাম দাসের লোকপ্রিয় রচনাংশও এতোকাল পরে সর্বত্র অবিকৃত থাকার কথা নয়। - কথক-গায়ন-লিপিকরের মনের ও রুচির ছাপমুক্ত অকৃত্রিম রচনা নিরূপণ সাধনাসাধ্য কর্ম নিশ্চয়ই। এ সূত্রে ডক্টর সুকুমার সেনের একটি মন্তব্য স্বরণীয়। তাঁর মতে “কাশীরাম সংস্কৃত মহাভারত অনুবাদ করেন নাই। কাশীরাম কেন, ঊনবিংশ শতাব্দির আগে কোন বাঙালী কবিই সংস্কৃত মহাভারত রামায়ণের অনুবাদ করেন নাই। তাঁহারা মহাভারত-রামায়ণের কাহিনী অবলম্বন করিয়াছিলেন, এই মাত্র।”^১

সাহিত্য বিশেষ করে কাব্য তথ্য বা জ্ঞানের আকর নয়- ভাবের অবলম্বন এবং অনুভবের ও উপলব্ধির উৎস মাত্র। সাহিত্যে বিশেষ করে কবিতার আক্ষরিক অনুবাদে শিল্প-সৌন্দর্য ও ছন্দ-মাদুর্য বজায় রাখা সর্বত্র সম্ভব হয় না। ফিট-জার্যান্ডের রুবাইয়াতে উমর খৈয়াম’ এ-ক্ষেত্রে স্মর্তব্য। সেজন্যে কাব্য অনুবাদে চিরকাল গ্রহণ-বর্জন সংযোজনের স্বাধীনতা অনুবাদকরা গ্রহণ করেছেন। কোথাও আক্ষরিক, কোথাও ভাবিক, কোথাও ছায়িক অনুবাদের স্বাধীনতা অনুবাদকগণ চিরকালই গ্রহণ করেছেন। তা’ছাড়া দেশান্তরে কালান্তরে প্রয়োজনে আর রুচির পরিবর্তনেও গ্রহণ-বর্জন আবশ্যিক হয়। তাই রামায়ণ-মহাভারত-ভাগবত কিংবা প্রণয়োপাখ্যান অনুবাদে সর্বত্র স্বাধীন অনুসৃতির সাক্ষ্য মেলে। তাই বলে মূল রচনার সঙ্গে একেবারে সম্পর্কবিহীন কেবল শ্রুত কাহিনীর অনুসৃতি বলে অভিহিত করা যাবে না। বস্তুত সব গ্রন্থেই স্থানে স্থানে আক্ষরিক অনুবাদের সাক্ষ্য প্রকট। কাশীরাম দাসেও তা সুলভ। তবে রামায়ণের ক্ষেত্রে বাণীকি রামায়ণ, অধ্যাত্র রামায়ণ, যোগবাশিষ্ঠ রামায়ণ যেমন একই গ্রন্থের উপকরণ হয়েছে তেমনি মহাভারতের ক্ষেত্রেও ব্যাসজৈমিনী মহাভারত কাহিনী মিশ্রিত হয়েছে।

ডক্টর সুকুমার সেনের মতে মহাভারতের এক বা একাধিক বিভিন্ন পর্ব রচয়িতা রামচন্দ্র খান, দ্বিজ রঘুনাথ, পীতাম্বর, অনির্বন্ধি, গোপীনাথ বিশারদ, কবিশেখর গোবিন্দ, শ্রীনাথ, রুদ্ৰদেব, দ্বিজ রঘুরাম, জয়দেব, হরেন্দ্র নারায়ণ, ব্রজসুন্দর, কৌশারী, দ্বিজ বলরাম, বৈদ্যনাথ পরমানন্দ, মহীনাথ শর্মা, রামবল্লভ দাস, লক্ষ্মীরাম, বৈদ্য পঞ্চানন, রামনন্দন, কীর্তিচন্দ্র, মাধবচন্দ্র প্রভৃতি ষোল শতকের কবি। এবং কাশীরাম দাস, নিত্যানন্দ ঘোষ, সঞ্জয়, কৃষ্ণবসু, রামনারায়ণ দত্ত, জয়ন্তদেব, রমাকান্ত, নন্দরাম, শিবরাম ঘোষ, অনন্তমিশ্র, দ্বিজ হরিদাস, ঘন শ্যামদাস, দ্বিজ প্রেমানন্দ, দ্বিজ অভিরাম, কৃষ্ণরাম প্রমুখ সতেরো শতকের কবি আর ষষ্ঠীবর, গঙ্গাদাস সেন, সারণ, সদানন্দ নাথ, গোপীনাথ দত্ত, সুবুদ্ধি রায়, অঘষ্ঠ বল্লভ, দ্বিজ রামলোচন, দ্বিজ গোবর্ধন, কৃষ্ণপ্রসাদ ঘোষ, নিমাই, দৈবকীনন্দন, দ্বৈপায়ন দাস, রামেশ্বর নন্দী, রাজীব সেন, দ্বিজ ঘনশ্যাম, দ্বিজ কৃষ্ণরাম, মহেন্দ্র, রাজারাম দত্ত, হরিদেব বসু, রামেশ্বর দাস, রাজেন্দ্র দাস, লোকনাথ দত্ত, রামনারায়ণ ঘোষ প্রভৃতি আঠারো শতকের কবি।

এসব কবির পুথি আবিষ্কৃত ও সংগৃহীত বটে, কিন্তু কৃতিং কারো পুথি মুদ্রিত হলেও বাকি সবগুলোই অমুদ্রিত। আমাদের এসব পুথি পড়া নেই। কাজেই আলোচনা করা সম্ভব নয়। আর বিদ্বানদের গবেষণালব্ধ ও অনুমিত তথ্য নকল করে দেয়ার কোন সার্থকতা আছে বলেও আমরা মনে করি না। কেননা, শ্রীরামপুর মিশনের বদৌলতে গত পৌনে দু’শ বছর যাবৎ কৃতিবাসী রামায়ণ এবং কাশীদাসী মহাভারতই পাঠ্য ও লোকপ্রিয়। মধ্যযুগীয় আর কোন কবির রামায়ণ-মহাভারত গবেষক ও ইতিহাসকার ব্যতীত অন্য কেউ কখনো পাঠে আগ্রহী হবে, কবির পরিচয়

^১ বা-সা-ই খ ১/অণ/৭৪ ১০৮-০৯/১৯৬৩ সন।

জানতে চাইবে- এমন সম্ভাবনা একেবারেই নেই। কাজেই ইতিহাসের কলেবর বৃদ্ধি করা অসমীচীন বলেই মানলাম। তবু কয়েকজন সম্বন্ধে দু'একটি কথা বলছি :

১. নিত্যানন্দ ঘোষ- কবি নিত্যানন্দ রচিত সভা, ভীষ্ম, শল্য, স্ত্রী শাস্তি প্রভৃতি পর্বের পুথি সংগৃহীত হয়েছে। তিনি পুরো মহাভারত অনুবাদ করেছিলেন কিনা জানা নেই। উনিশ শতকে রাজা পৃথ্বীচন্দ্র রচিত 'গৌরীমঙ্গলে' নিত্যানন্দের উল্লেখ রয়েছে- অষ্টাদশ পর্ব ভাষা কৈল কাশীদাস/নিত্যানন্দ কৈল পূর্বে ভারত প্রকাশ।- এই 'পূর্বে' শব্দ 'কাশীরামের' পূর্বে নির্দেশক কিনা বলা যাবে না। কোলকাতা বিশ্ববিদ্যালয় সংগৃহীত স্ত্রীপর্বের একটি পুথির লিপিকাল ১০৮৩ সন, এটি বঙ্গাব্দ হলে ১৬৭৬-৭৭ খ্রীস্টাব্দে আর মল্লাব্দ হলে (১০৮৩+৬৯৪) ১৭৭৭-৭৮ খ্রীস্টাব্দে এটি লিপিকৃত। পূর্বোক্তটি ধরলে কবি সতেরো শতকের এবং শেষোক্তটি যথার্থ হলে কবিকে আঠারো শতকের বলে অনুমান করা চলে। কাশীদাসী মহাভারতেও নিত্যানন্দ ঘোষের রচনা মেলে। অসিতকুমার বন্দ্যোপাধ্যায় উদ্ধৃতিযোগে নিত্যানন্দকে 'করুণ রস বর্ণনায় সিদ্ধহস্ত' বলে মন্তব্য করেছেন।^১

খ. দ্বিজ অভিরাম, রামচন্দ্র খান, রঘুনাথ ও দ্বিজ হরিদাস রচিত কেবল 'অশ্বমেধ' পর্বই পাওয়া গেছে। আর দৈবকীনন্দনও হয়তো কেবল কর্ণপর্বই রচনা করেছিলেন। এই দৈবকীনন্দন ও বৈষ্ণববন্দনা' রচয়িতা দৈবকীনন্দন অভিন্ন ব্যক্তি কিনা, তা' নিঃসংশয়ে বলা যাবে না। রামচন্দ্র খান ও রঘুনাথ ছাড়া উক্ত কবিগণের সবাই ষোল শতকের কি-না তাও নিশ্চিতভাবে জানা নেই। কৃষ্ণভক্তির বাহুল্য দেখে দ্বিজ হরিদাসকে ষোল শতকের কোন বৈষ্ণব বলেই অনুমান করা চলে।

গ. ঘনশ্যাম (সেন) দাস-বৈদ্য বংশীয় তাঁকে বৈষ্ণব কবি গোবিন্দ দাসের পৌত্র বলেও কেউ কেউ অনুমান করেন। সেক্ষেত্রে এই ঘনশ্যাম ও পদকর্তা ঘনশ্যাম দাসকে অভিন্ন ব্যক্তি বলে মানতে হবে।

ঘ. একটি উক্তি থেকে মনে হয় আঠারো শতকের কবি গঙ্গাদাস সেন সম্ভবত গোটা মহাভারত অনুবাদ করেছিলেন, যদিও তাঁর রচিত খুব কম পর্বই আবিষ্কৃত হয়েছে।

'গঙ্গাদাস সেন কবি রচিলেক সর্ব
শ্লোক ভাঙ্গি রচিলেক অষ্টাদশ পর্ব।

ঙ. শিবরাম ঘোষ- কবি জিত ঘটক সূত্রে জানা যায়-

উদ্যোগ আদি ছয় সর্ব শিবরাম ঘোষি' রচনা করেছিলেন।

শিবরাম ঘোষের আরো দু'খানি গ্রন্থ রয়েছে ১. কালিকামঙ্গল ও ২. একাদশীর পাঁচালী। উক্ত দু'খানি গ্রন্থে তাঁর পিতা-মাতার রাজেন্দ্র ঘোষ ও রাধিকা রাম রয়েছে :

১. রাজেন্দ্র ঘোষের সূত রচিল কৌতুকে!

রাধিকানন্দন শিবরাম ঘোষ ভনে।

(কালিকামঙ্গল)

২. বাপ রাজেন্দ্র ঘোষ রাধিকা জননী

মহাওর দুইজন বন্দো পুট পাণি।

(একাদশীর পাঁচালী)

^১ তথ্য খণ্ড, পৃঃ ৪৫৬।

একাদশীর পাঁচালী আওরঙ্গজেবের রাজত্বকালে ১৬০৩ শকে বা ১৬৮১ খ্রীস্টাব্দে রচিত। শশী-১, রস-৬, শূন্য-০ অগ্নি-৩ শকের বৎসরে/ পাংসা অরং সাহা দিল্লীশ্বর। শশী রস শূন্য অগ্নি (সুখময়) ১৬০৩ শক।

অতএব শিবরাম ঘোষ সতেরো শতকের শেষার্ধের কবি।

ষোল শতক থেকে আঠারো শতক অবধি রচিত মধ্যযুগের যে কোন শাখার বা ধারার রচনায় কালিক ও স্থানিক প্রভাব কিছু না কিছু মেলেই। তা অবশ্য নৈতিক, সামাজিক, সাংস্কৃতিক ও আর্থিক পরিবর্তন সম্বন্ধে অর্থাৎ মধ্যযুগের মঙ্গুরগতি জীবন-জীবিকাপদ্ধতির কালিক ও স্থানিক বিবর্তন সম্বন্ধে তেমন কোন স্পষ্ট ধারণা দেয় না। তবে স্থান ও কাল প্রভাবিত ব্যক্তিপুরুষ কবির মন ও রুচির প্রভাব রচনায় অপ্রকট থাকে না। এ কারণে ভাবে, ভাষায়, ছন্দে ব্যক্তিক বৈশিষ্ট্য যেমন থাকে, তেমনি থাকে কবির রুচি-সংস্কৃতির আভাস। সবটা মিলে প্রতি গ্রন্থেই কালিক ও স্থানিক প্রভাবজ পরিবর্তন আপাত বিরল হলেও লক্ষণীয়। মহাভারতের ক্ষেত্রে তাই ঘটেছে।

AMARBOI.COM

পঞ্চম অধ্যায় প্রণয়োপাখ্যান

১. উপাখ্যান তত্ত্ব

প্রাণী হিসেবে মানুষের কাম ও ক্ষুধা সহজাত। আর জীবনটা হচ্ছে ঐ ক্ষুধা ও কামের বিচিত্র লীলার ক্ষেত্র। যৌথজীবনের প্রয়োজনে মানুষ পরিশোধিত ও নিয়ন্ত্রিত করে ইন্দ্রিয়ের প্রভাব আর ক্রমে ক্রমে অর্জন করে অন্য অনেক গুণ এবং আয়ত্ত করে অনেক কৌশল। সবটাই করে ক্ষুধা আর কামের শোভন, সহজ ও সুন্দর পরিচর্যা জন্মেই। কারণ সুখ আছে ক্ষুধার নিবৃত্তিতে, সুখ আছে কামচর্চায়। সভ্যতার বিকাশের সঙ্গে সঙ্গে অথবা মানবিক অনুশীলনের ক্রমোৎকর্ষের ধারায় মানুষের ক্ষুধা ও কাম স্বকল্যাণ ও সংকীর্ণতা অতিক্রম করে হয়েছে সূক্ষ্ম, পরোক্ষ, বিচিত্র ও সমগ্রচেতনায় পরিব্যাপ্ত। তাই মানুষ আর প্রাণী মাত্র নেই, জীব হলেও সে জীবন-জিজ্ঞাসু ও জীবনবিলাসী। তার নিজের চেতনায় প্রাণ ধারণ করলেও সে প্রাণী নয়, জীবজগতের জীবও সে নয়, সে অলৌকিক সৃষ্টি সে কেবল মানুষ। প্রকৃতিকে এবং প্রবৃত্তিকে দাস ও বশ করেই সে হয়েছে স্বসৃষ্ট, স্বাধীন ও স্বনির্ভর।

আদিতে কিন্তু মানুষ এমনটি ছিল না। সে তখন সত্যিই প্রাণী হিসেবে প্রবৃত্তি পরবশ জীবজগতে বাস করত। সে ছিল বুনো ও বর্বর। এক সময় সে ছিল ফলমূল ভোজী, পরে হাতিয়ারের উৎকর্ষে এক সময়ে মৃগয়াজীবীও ছিল সে। এ স্তরে মানুষের সংখ্যা ছিল কম, ফলমূল-মৃগের অভাব ছিল না কোথাও। তাই ক্ষুধা নিবৃত্তির সমস্যা ছিল না, কিন্তু কামচর্চায় বল-বয়সের প্রশ্ন আছে, আছে পছন্দ-অপছন্দের কথা, আরও আছে সবিল্ল প্রতিযোগিতা প্রতিদ্বন্দ্বিতা। কামুক পুরুষের হৃদয়ঘটিত দুর্বলতার সুযোগে যে শুধু মাতৃপ্রধান-মাতৃকেন্দ্রী সমাজ গড়ে উঠল তা নয়, ব্যক্তিক তো বটেই, কোমী ও পৌত্রীয় বিবাদে এবং রক্তক্ষয়ী লড়াইয়েরও শুরু ঐ নারীকে নিয়েই। নারীসম্প্রোগ নিয়ে প্রথম সংঘর্ষের সংবাদ পাই আদমের আমলে। তাঁর দুই সন্তান হাবিল ও কাবিলের দ্বন্দ্বযুদ্ধে হাবিল হয় নিহত। এই প্রথম রক্তপাত ও নরহত্যা।

তারপর থেকে দুনিয়ার তাবৎ রূপকথার মুখ্য বিষয় হচ্ছে নারীহরণ নারীউদ্ধার কিংবা নারীরত্ন রাজকন্যার সন্ধানে সংকল্পবদ্ধ রাজকুমারের প্রাণপণ প্রয়াস ও জীবনপণ-অভিযান। এ সংগ্রামে দেব-দৈত্য-নর সবাই সমভাবে উৎসাহী। দেব-দানবের যুদ্ধের, নর-দৈত্যের লড়াইয়ের, মানুষে মানুষে সংঘর্ষের আদি কারণ ঐ রূপবতী নারীই। কেবল রূপকথার নয়, লিখিত কাব্য-গাথারও মূল বিষয় ঐ নারীহরণ-নারীউদ্ধার। আকিমা, সারা, বতসা, উষা, শচী, সীতা, সুভদ্রা-রুক্মিণী অসংখ্য দুর্দিকারী দুর্দিকার প্রকটীক ও মধ্যমের লিখিত অলিখিত সাহিত্যের মুখ্য বিষয়।

জরু নিয়ে বিবাদের পর এল জমি। মানুষের সংখ্যা তখন বেড়েছে। কৃষির মাধ্যমে ফসল উৎপাদন ও স্থায়ী নিবাস নির্মাণ শুরু হয়েছে। কাজেই জমির গুরুত্ব অসীম এবং অধিকার রাখা জরুরী। তাই দখল রাখা ও দখল বিস্তারের সংগ্রাম হল শুরু। এ দ্বন্দ্ব সংঘর্ষ শুধু তীব্রই হল না, হল সর্বব্যাপী হল রাজ্যে-সাম্রাজ্যে চিরস্থায়ী।

এরপরে মানবিক শক্তির তথা সভ্যতার আরো বিকাশ-বিস্তার হল, তখন কেনা বেচার, লেনদেনের মাধ্যম হিসেবে চালু মুদ্রা। মুদ্রা বিনিময়ের মাধ্যমে চলল পণ্য বিনিময়। তখন গুরুত্ব পেল জওহর, জেবর, সোনা, রূপা, মণিমুক্তা। এবার আর জরু নয়, জমি ও জওহরই হল দ্বন্দ্ব-সংঘর্ষের কারণ ও বিষয়—এ সবই ছিল প্রাচীন ও মধ্যযুগের সাহিত্যের বিষয় বা উপকরণ।

আজকাল নারীহরণ বীরত্ব বলে নন্দিত নয়, জমি হরণও নিন্দিত, মুদ্রাদি ধাতু-পাথর হরণও গর্হিত বলে বিবেচিত। তবু এসব অপকর্ম বিলুপ্ত না হলেও এসব আর সাহিত্যের মুখ্য বিষয় নয়। একালে নারীর কিংবা পুরুষের হৃদয় হরণ করতে হয়, জমি ক্রয় কিংবা কৃচিং জয় করতে হয় আর মুদ্রা-জওহর-জেবর অর্জন করাই বাঞ্ছনীয়। তাই দুনিয়াব্যাপী আধুনিক সাহিত্যের বিষয় ভিন্ন।

জীবনের জন্যেই, জীবন নিয়েই সাহিত্য, তাই সাহিত্য জীবন থেকে উৎসারিত। এ কারণেই যে কালে জীবন যেমন, সাহিত্য তেমনটি প্রতিফলিত হয়। সাহিত্য হচ্ছে জীবন-বিস্তৃত দর্পণ। এককালে মানুষের বিশ্বাসের জগৎতে দেওদানু-ভূত-প্রেত-জীন-পরী মানুষেরই নিত্যকার প্রতিবেশী ছিল। তার কল্পনার জগৎতে ছিল না শক্তিপ্রতীক দেবতা, তার সংস্কারে ছিল তিথি-নক্ষত্র-দিন-ক্ষণ-লগ্ন-হাঁচি-কাশি-টিকটিকি, শুভাশুভ, ইষ্ট-অনিষ্ট, যাদু, টেবু-টোটোম এবং দৈব-প্রতীকের-আলৌকিকশক্তির নিত্যজালার স্থিতি। তাই প্রাচীন ও মধ্যযুগের সাহিত্যে এ সবকিছুর উপস্থিতি প্রত্যক্ষ এবং প্রভাব স্বীকৃত। এ তাৎপর্যে চিরকালেই সাহিত্য বাস্তব জীবনের ভান-চিত্তা-কর্ম-আচরণেরই প্রতিরূপ। তাই প্রাচীন এবং মধ্যযুগের সাহিত্যে জীবনমুখী কল্পনাপ্রধান নয়। কাজেই সাহিত্যের ইতিহাস একাধারে মানবের মন-মননের, বিশ্বাস-সংস্কারের, কালিক বিবর্তনের, বিকাশের আর বিলুপ্তির ইতিকথাও।

রূপকথায় উপাখ্যানে দৈশিক-কালিক ছাপ থাকলেও মানুষের বৃত্তি-প্রবৃত্তির স্বরূপ, এবং সদৃশ প্রতিবেশে আচরণও অভিন্ন বলে পৃথিবীর যাবতীয় রূপকথার এবং উপাখ্যানের বক্তব্যে আর প্রতিপাদ্য বিষয়ে মিল লক্ষ্য করা যায়। আজকাল লোকবিজ্ঞানীরা এই সামান্য গুণের লক্ষণ ধরে রূপকথার ও উপাখ্যানকে শ্রেণীতে বা বর্গে বিন্যস্ত করেন। তাঁদের পরিভাষায় এ সাদৃশ্যভঙ্গুর নাম 'মটিফ' (motif)।

যে জপের পিপাসায় প্রেম হল জীবন অধিক।

প্রেমের পথ চিরকালই দুর্গম ও দুস্তর। দেহ-মন-আত্মার অভিন্ন ঐকিক ঐকান্তিক প্রয়াসেই কেবল এ সাধনায় সিদ্ধি সম্ভব। তাই লোক-লক্ষর, ধন-সম্পদ সম্বল করে যাত্রা করলেও শেষ পর্যন্ত রাজকুমার হয় নিঃসঙ্গ ও নিঃসম্বল। দেহ-প্রাণ-আত্মার এই কৃষ্ণসাধনায় সঙ্গ-সাক্ষ্য সহায়ক নয়—বাধা। বাহুবল, মনোবল, প্রণয়বাঙ্গা ও রাগনিষ্ঠা পাথেয় করে প্রেমকিকে অতিক্রম করতে হরে মৃত্যুসঙ্কুল 'গিরি-মরু-কান্তার ও দুস্তর পারাবার।' এরই ফলে রূপ রসে, কাম প্রেমে ও মোহ আত্মিক আকর্ষণে হয় উন্নীত। এভাবেই ঘটে প্রেমতীর্থে উত্তরণ।

সোনা যতই জ্বলে ততই বাড়ে তার ঔজ্জ্বল্য, তেমনি বাধাবিপত্তি যতই হয় দুর্লভ্য প্রেমের উপলব্ধি ততই পায় ব্যাপ্তি ও গভীরতা। খাঁটি সোনার মতো দুঃখের দহনেই মেলে খাঁটি প্রেম।

প্রথমে প্রেমের রস বিচ্ছেদে পুড়-এ

আনলে উনাইলে জান হেম গলএ।

দৈহিক পীড়ন, মানসিক নির্যাতন ও আত্মিক অনুশীলনের মাধ্যমেই আসে প্রেমে সাফল্য ও সার্থকতা। তাই বিরহেই হয় প্রেমের বিকাশ। মানুষকে তিলে তিলে নতুন করে সেই অনুভব। এমনি করে প্রেম মানুষকে করে মহৎ, জীবনে দেয় কর্মের প্রেরণা, বাড়িয়ে দেয় আনন্দের ঐশ্বর্য, প্রসারিত করে অনুভবের জগৎ। এ জন্যেই কবি বলেন :

ভাবে সে ভাবকে হএ প্রেমে হএ পিয়া

প্রেমহীন যে জন বিফলে থাকে জিইয়া।

প্রেমই জীবনের মূলধন, জীবনের ভিত্তি ও অবলম্বন। তাই প্রণয়োপাখ্যান মাঝেই প্রেমিক জীবনের দ্বন্দ্ব-সংঘাতময় বেদনামধুর কাহিনী। কাজেই প্রণয়-পথ কুসুমাস্তীর্ণ হতেই পারে না-হতে পারে না ঝঞ্জ ও সহজ। এ জন্যেই প্রণয়োপাখ্যানে ঝড়, দৈত্য, রাক্ষস কিংবা নাগকবলিত হয় নায়ক, এ যুগের নাটক-উপন্যাসের নায়ক যেমন পায় পারিবেশিক বাধা ও মানসিক যন্ত্রণা কিংবা গ্রীক নাটকের নায়ক যেমন হত নিয়তি-নির্যাতিত।

তাই হৃদয়ের রক্তক্ষরা বেদনা, মর্মভেদী কান্দা, প্রত্যাশী আত্মার আর্তনাদ ও ব্যাকুল বাসনাপ্রসূত দাহ প্রেমিকের নিত্যসঙ্গী। এ সঙ্গে প্রাকৈ ধৈর্য ও অধ্যবসায়, লক্ষ্যগত নিষ্ঠার আর আবেগভাজিত প্রাণের প্রেরণা।

অস্তিক মানুষের সৃষ্ট এ সব সাহিত্যে যে জীবন-দৃষ্টি প্রতিবিম্বিত, তা হচ্ছে 'দুখ বিনা সুখ নেই', কিংবা দুর্লভ বস্তু মাঝেই দুঃসমীচ, অথবা 'চেষ্টা বিনা সিদ্ধি নেই, কষ্ট ছাড়া নেই ইষ্ট'(তত্ত্বে আত্মপ্রসূত স্বত্তি। কোন ঐকান্তিক চাওয়া ও আন্তরিক প্রয়াসই ব্যর্থ হবার নয়(এ জীবনসত্যের উপলব্ধি বা স্বীকৃতিই নিয়ন্ত্রণ করে তাদের জীবনযাত্রা। আমাদের দেশী সাহিত্যে রাধা-শুকুন্তলা শর্বরীও এই তত্ত্বের প্রতীক। তখন মানুষের চেতনাও বহির্মুখ ছিল বলে দেব-দৈত্য, শাহ-সামন্ত, উজির-কোটালের নীচের কোন মানুষের জীবনের মর্যাদার বা অস্তিত্বের স্বীকৃতি ছিল না, কেবল নায়ক-নায়িকার সুখ-দুঃখ আনন্দ ছিল আলোচ্য। তাই লক্ষ মানুষ যখন ঝড়ের মুখে নৌকাডুবিতে মরে, তখনও কবি কিংবা পাঠক একটুও দুঃখ অনুভব করে না, ওদের মা-বাপও যে পুত্রহারা হল, সন্তান হল পিতৃহারা, স্ত্রী হল বিধবা সে-চেতনাই জাগত না।

আর একটি কথা। হিন্দুরা মনে করত শিক্ষিত লোকের জন্যে তো সংস্কৃতসাহিত্য রয়েছে। কাজেই অশিক্ষিত লোকদের প্রতিষ্ঠমান লৌকিক দেবতার কথা জানাবার জন্যেই পাঁচালী রচনায় প্রয়াসী হন কবিগণ। এ জন্যে আঠারো শতকের আগে হিন্দু প্রণয়োপাখ্যান রচয়িতার সন্ধান মেলে না। দেশজ মুসলিমরা বিদেশী ধর্মমত গ্রহণ করে জ্ঞাতীদের ও পিতৃপুরুষের ঐতিহ্যকে করল পরিহার। কাজেই দেব পাঁচালী বা রামায়ণ মহাভারতও হল তাদের নবলব্ধ শাস্ত্র সংস্কৃতির পরিপন্থী, অতএব অবশ্য পরিহার্য। তাদের শাস্ত্র-সংস্কৃতির আধার আরবি-ফারসি রইল জনগণের অনায়ত্ত। আর এদিকে মানুষের মনের রসতৃষ্ণা ও মননের চাহিদা অপ্রতিরোধ্য। এ প্রয়োজন-প্রেরণাতেই মুসলিমরা গোড়াতে অনুবাদে অগ্রসর হয়। সেকালের

হিসেবে উত্তর ভারতীয় ভাষা শহুরে শিক্ষিতদের আয়ত্তে ছিল। তাই উত্তরভারতীয় উপাখ্যানই গোড়াতে অনূদিত হতে থাকে— চান্দাইন, মৈনাসৎ, পদুমাবৎ মধুমালৎ প্রভৃতি।

স্বদেশে দেশজ মুসলিমের সংখ্যালঘুতাই তাদেরকে স্বশাস্ত্র-সংস্কৃতি সম্বন্ধে বিপন্নবুদ্ধি দান করেছে, এই Minority complex বশে তারা ছিল স্বাতন্ত্র্য— সচেতন, ফলে আরব-ইরানমুখী। অন্তর্মুখী না হলে কেউ স্বস্থ, সুস্থ ও স্বজনশীল হয় না। বহিমুখিতা কেবল অনুকরণ করতে প্রবর্তনা দেয়। মৌলিক ভাব-চিন্তার উন্মেষের জন্যে আত্মবিকাশের জন্যে প্রয়োজন দেশ-কালগত জীবন-জীবিকা সচেতনতা। জীবনের বাস্তব চাহিদার অনুগত করে জীবন রচনা ও রক্ষণ করতে প্রয়াসী নয় যারা, তাদের পক্ষে সৃষ্টিশীল হওয়া, উদ্ভাবক হওয়া কিংবা আবিষ্কর্তা হওয়া অসম্ভব। মধ্যযুগে, এমনকি অনেকের ক্ষেত্রে এ যুগেও, শাস্ত্র-সংস্কৃতির প্রাণকেন্দ্র আরব-ইরান প্রীতি তাদের করেছে উর্ধ্বমুখী আত্মভোলা, শিথিয়েছে বাস্তব জীবনকে তুচ্ছ জানতে, প্রবর্তনা দিয়েছে আদর্শলোকের অলীক জীবনকল্পনায় বিভোর থাকতে। ফলে তারা পারেনি সৃষ্টিশীল হতে। অনুকৃতিতে ও অনুবাদেই নিঃশেষ হয়েছে তাদের সামর্থ্য ও সম্ভাবনা। জীবননদীর সংকীর্ণ সীমায় প্রাণের আকৃতি তরঙ্গ বৃথা প্রয়াসে আছড়ে পড়ে পড়ে হয়েছে বিলীন, মুক্তপক্ষ বিহঙ্গের মতো চিন্তা-চেতনার, অনুভবের অসীম আকাশে বিচরণের স্বপ্ন কখনো জাগেনি তাদের মনে। তাই আঠারো শতক অবধি আমরা পাইনি কোন মহৎ কাব্য, মানবমনীষার কোন কালজয়ী ফসল। অতএব বাঙালী হিন্দু-মুসলমান সাহিত্যক্ষেত্রে অনলসভাবে বিচরণ করেছে বটে, কিন্তু অগ্রসর হয়নি, ঘুরেছে কিন্তু সম্মুখগতি পায়নি, পরাধীনতাপ্রসূত অন্যান্য কারণও অবশ্য এ সম্বন্ধে স্মর্তব্য।

২. মধ্যযুগের মুসলিম রচিত বাঙলাসাহিত্য ও চট্টগ্রাম

প্রশ্ন জাগে মনের মধ্যে— আঠারো শতকের প্রথমার্ধ অবধি মুসলিম সমাজের বাঙলা সাহিত্যচর্চা আধুনিক চট্টগ্রাম বিভাগে বিশেষ করে চট্টগ্রাম জিলায় সীমিত কেন? গোটা বাঙলাদেশে সেদিনেও অর্থাৎ পনেরো-ষোল-সতেরো শতকে দেশজ মুসলিমের অভাব ছিল না। অথচ সে সব মুসলিমের বাঙলা সাহিত্যঙ্গনে বিচরণের কোন নিদর্শন মেলে না। এদিকে সতেরো শতক অবধি প্রায় পঞ্চাশ জন কাব্য-কবিতা রচয়িতার সন্ধান পেয়েছি আমরা কেবল চট্টগ্রামেই। আর পেয়েছি নোয়াখালিতে একজন, কুমিল্লায় তিনজন কবি। মুসলিম রচিত সাহিত্যে এ আঞ্চলিক বিকাশের নিশ্চিত কোন কারণ আমাদের জানা নেই। তবে কিছু কারণ অনুমান করা অসম্ভব নয়।

১. দেখা যাচ্ছে, যে অঞ্চলে মুসলিম লিখিয়েদের আবির্ভাব ঘটেছে, সে অঞ্চল প্রায় চিরকাল (সাময়িক বিচ্ছিন্নতা অবশ্য ছিল) আরাকান-ত্রিপুরা রাজ্যের অন্তর্গত ছিল। দুই রাজ্যেরই রাজারা ছিলেন ভিন্ন গোত্রের ভিন্ন ভাষার ও ভিন্ন সংস্কৃতির মানুষ। এঁদের রাজ্যের এক অংশের প্রজারা অবশ্য ছিল হিন্দু-মুসলিম বাঙালী। সে কারণে বাঙালী প্রজাদের গৌড়রাজ্যের বাঙালীদের সঙ্গে শাস্ত্রিক-ভাষিক-সাংস্কৃতিক যোগ ছিল ঘনিষ্ঠ। কিন্তু রাষ্ট্রিক বিচ্ছিন্নতার দরুন পারিবেশিক কিছু পার্থক্য বা স্বাতন্ত্র্য অবশ্যই ছিল, এখানকার যন্ত্রনিয়ন্ত্রিত যুগে সংহত পৃথিবীতেও যখন বিভিন্ন রাষ্ট্রের মানুষের জীবনযাত্রা ও জীবনচাচারে নানা পার্থক্য প্রকট, তখন সেকালে স্বাতন্ত্র্য আরো বেশি ছিল বলে মানতে হবে।

২. ভিন্ন গোত্রের বিভাষী শাসকের রাজ্যে ভিন্ন ভাষী ভিন্ন গোত্রের প্রতিবেশীর সঙ্গে ত্রিপুরা-আরাকানে বাঙালী হিন্দু-মুসলিমকে বাস করতে হয়েছে বলেই গৌড়রাজ্যের বাঙালীদের মতো তাদের মধ্যে অলঙ্ঘ্য বার্ষিক স্বাতন্ত্র্য, অপরিহার্য পেশাভিত্তিক জীবন, সার্বক্ষণিক ঘৃণা-বিদ্বেষ ও সুদৃঢ় শাস্ত্রিকশাসন ছিল না। তা ছাড়া বিজাতি-বিভাষীর সংখ্যালঘু প্রজা হিসেবে ভাষা-সাহিত্য সমাজ সংস্কৃতির ক্ষেত্রে স্বাতন্ত্র্য রক্ষার স্বনির্ভর থাকার একটা প্রয়াসও ছিল।

৩. প্রাচীন ও মধ্য যুগে কিছু ব্রাহ্মণ, কিছু বৈদ্য ও কিছু সংখ্যক কায়স্থের মধ্যেই পেশার প্রয়োজনে লেখাপড়ার চল ছিল। অন্যদের শিক্ষার কোন ঐতিহ্য ছিল না। বাঙলার দেশজ-মুসলিমরা যে নিম্নবর্ণের হিন্দু ও নিম্নবিশ্তের নির্জিত বৌদ্ধদেরই বংশধর তা আজকাল আর কেউ অস্বীকার করে না। কাজেই গৌড়রাজ্যের দেশজ মুসলিমদের মধ্যে কৃচিৎ কারো শিক্ষার ঐতিহ্য ছিল। যারা লেখাপড়া করত, তারা শাস্ত্রের বাহন আরবি ও দরবারী ভাষা ফারসি শিক্ষায় ছিল আগ্রহী, তাতে ছিল ঐহিক ও পারত্রিক সুখের ও সিন্ধির আশ্বাস। এ কারণেই ব্রিটিশ আমলেও ১৯২০-৩০ খ্রীস্টাব্দ অবধি পুরানো ধারার মদ্রাসা-শিক্ষার্থীদের মধ্যে কৃচিৎ কারো বাঙলা বর্ণমালা চেনা ছিল।

৪. তা ছাড়া গৌড়রাজ্যের সংখ্যাগুরু হিন্দুরাই দেব-কথার ব্যতীত বাঙলায় কোন রসকথার সাহিত্যচর্চা করেনি। কাজেই গৌড়রাজ্যে সাহিত্যচর্চায় অনুপ্রাণিত হবার মতো অনুকূল প্রতিবেশ ছিল না। ধর্মকথার ভাষায় তথা বাঙলায় লিখিত রূপ দেয়া যেখানে পাপ বলে হিন্দু সমাজেই নিন্দিত, লৌকিক দেবতার মাহাত্ম্য কথ্য ও ব্রাত্যাচার বলে ঘৃণিত, সেখানে গায়ের নগণ্য সংখ্যক নিঃস্ব নির্জিত খেটে খাওয়া মানুষের সমাজে দু'একজন স্বল্পশিক্ষিত আরবি-ফারসি জানা ব্যক্তিই বা মুসলিম শাস্ত্রকথা বাঙলায় লিপিবদ্ধ করে নিশ্চিত জাহান্নাম বরণে উৎসুক হবে কেন! কাজেই গৌড়রাজ্যে আঠারো শতকের প্রথমার্ধ অবধি মুসলিম সমাজে সাধারণভাবে কেউ ধর্মকথা বা প্রেমকথা রচনা করেননি। ধর্ম সম্পৃক্ত বিষয়ে কাব্যরচয়িতা জায়েনউদ্দীন কিংবা শেখ ফয়জুল্লাহকে এ ক্ষেত্রে ব্যতিক্রম বলেই চিহ্নিত করতে হবে। অথবা এঁরা হয়তো আরাকানরাজার প্রজাই, গৌড়রাজ্যে ছিলেন প্রবাসী।

৫. আমরা জানি, প্রাচীন সংস্কৃত কাব্য-নাটক-উপাখ্যান রচিত হবার পরে মৃতভাষা সংস্কৃতের সাহিত্যক্ষেত্রও ছিল অনেককাল বন্ধ। মধ্যভারতীয় আর্যভাষায়ও সাহিত্যচর্চা হয়েছে সামান্যই। তুর্কো-আফগান শাসনকালে দেশজ মুসলমানরাই উত্তর ও দক্ষিণ ভারতে সংস্কৃত সাহিত্যের নানা উপকরণে সাজিয়ে লৌকিক গাথা, রূপকথা, উপকথা ও ইতিকথা প্রভৃতিকে নব্যভারতীয় ভাষায় তথা উত্তরভারতীয় আঞ্চলিক ভাষায় শৈল্পিক রূপ দিতে থাকেন। উষ্টর আবু মহামেদ হবিবুল্লাহ এ প্রসঙ্গে বলেছেন, “প্রাচীন গ্রীসের দর্শন বিজ্ঞানের সাথেই যুরোপকে পুনরায় পরিচিত করানর কৃতিত্ব যেমন মুসলমানের, তেমনিই সংস্কৃত সাহিত্যের উপাদান ও ভাবকে মধ্যযুগের লৌকিক ‘ভাষা’য় রূপদান করে ভারতের সাহিত্যের ঐতিহ্যকে সমৃদ্ধ করার কৃতিত্বও তাদেরই। ভারতীয় ভাষায় কল্পনাশ্রয়ী কাহিনীর ধারা প্রবর্তন আরবি ফার্সি সাহিত্যের অনুপ্রেরণা থেকেই হয়েছে একথা না বললেও চলে।— স্বপ্নে দেখে নায়ক-নায়িকার প্রণয়বিষ্ট হওয়ার প্রাচীনতম ইরানি রোমান্স Zariadres ও Odatis-এর প্রভাব সংস্কৃত সাহিত্যের প্রথম প্রণয়কাহিনী সুবন্ধুর ‘বাসবদত্তা’য় সুস্পষ্ট।”^১

^১ বাঙলা সাহিত্যে উপাখ্যান ৪ ও লেবকাওণী-সাহিত্য পত্রিকা, শীত সংখ্যা. ১৩৬৪ সন. পৃ ২-৩, ৫, বাঙলা বিভাগ, ঢাকা বিশ্ববিদ্যালয়।

দাক্ষিণাত্যে বাহমণী রাজ্যে— বেরারে, বিদরে, আহমদনগরে, বিজাপুরে, গোলকুণ্ডায় ইরানি বংশীয় সুলতানদের উৎসাহে ও প্রতিপোষণে ফারসিতে ও দাখিনী উর্দুতে প্রণয়োপাখ্যান রচনার অনুকূল পরিবেশ তৈরি হয়। ত্রিপুরা-আরাকানের সঙ্গে দাক্ষিণাত্যের রাজনীতিক সম্পর্ক ছিল না বটে, কিন্তু বাণিজ্যিক সম্বন্ধ ছিল ঘনিষ্ঠ আর বিদেশী ব্যবসায়ীর মাধ্যমে, চট্টগ্রামবন্দরকেন্দ্রী সে-সম্বন্ধ উত্তর ভারতের সঙ্গেও ছিল ব্যাপক। এজন্যই হয়তো উত্তর ভারতের ও দক্ষিণ ভারতের হিন্দি-আওধির ও দাখিনী উর্দুর আর ফারসি সাহিত্যের সঙ্গে ঘনিষ্ঠ পরিচয় ঘটে চট্টগ্রামবন্দরের ও রোসাস্গ শহরের কলারসিক পাঠকদের। এবং তাঁরা উৎকৃষ্ট কাব্যগুলো স্বভাষায় অনুবাদ করে স্বদেশী পাঠক-শ্রোতার চিত্তবিনোদনের স্থায়ী ব্যবস্থা করেন। এভাবে আরাকান রাজ্যান্তর্গত চট্টগ্রাম অঞ্চলে এবং এর প্রভাবে ত্রিপুরা রাজ্যে মুসলিমদের মধ্যে সাহিত্যচর্চা অবিচ্ছিন্নভাবে জনপ্রিয়তা ও প্রসার লাভ করে, যা পৌড় রাজ্যে আঠারো শতকের প্রথমার্ধ অবধি হতে পারেনি অনুকূল প্রতিবেশের অনুপস্থিতিতে। তাছাড়া বিজাতি-বিভাষীর রাজ্যে স্বসত্তার স্বাভাব্য রক্ষার গরজও তাদের সাহিত্যচর্চায় প্রণোদনা দান করেছিল।

৬. সাহিত্যক্ষেত্রে দাক্ষিণাত্যের প্রত্যক্ষ প্রভাবের সাক্ষ্য মেলে চট্টগ্রামে রচিত কারবালা ও জঙ্গনামা কাব্যগুলোতে। দাক্ষিণাত্যের তথা আহমদনগরের, বিজাপুরের, গোলকুণ্ডার, বেরারের, বিদরের সুলতানরা ছিলেন ইমামিয়া দলের শিয়া। কারবালাকাহিনী ছিল তাঁদের শাস্ত্রসম্পৃক্ত অবশ্যস্মর্তব্য পবিত্র বিষয়। রাজশক্তির অগ্রহে, প্রচারে ও প্রশ্রয়ে তাঁদের রাজ্যে দেশজ শিয়ার সংখ্যাও বৃদ্ধি পায়, তা ছাড়া ইরান থেকে আগত শাসক-প্রশাসক, সৈনিক-বণিক, ধনী-মানী শিয়া তো ছিলই। ফলে ইরানি প্রণয়োপাখ্যান ছাড়াও মর্সিয়াসাহিত্য, মহররমের তাজিয়া পার্বণ, এবং হযরত মুহম্মদ, হযরত আলী ও হুমায়ূর কানুনিক দিখিজয় ও ইসলাম প্রচারমূলক মাগাজী বা জঙ্গনামাও দাখিনীতে আর ফারসিতে রচিত এবং জনপ্রিয় বিষয় হতে থাকে। সে-তরঙ্গ চট্টগ্রাম বন্দরেও অভিঘাত হানি। জয়কুমরাজার লড়াই, জয়গুণ বিবির কিসসা, হামজার জঙ্গনামা, আলী বা হানিফার দিখিজয়মূলক কাব্য আন্তর্জাতিক বন্দর চট্টগ্রামেও জনপ্রিয় হয় শিয়া সম্প্রদায় না থাকলেও ইসলামের উন্মেষযুগের ও রসুলের আত্মীয়দের কৃতি-কীর্তি হিসেবে। তাই বাঙলায় এগুলোর স্বাধীন অনুসৃতি মেলে ষোল-সতেরো শতক থেকেই, দৌলতউজির বাহরাম খান, সৈয়দ সুলতান, শাহ বারিদ খান, মুহম্মদ খান, আবদুন নবী প্রমুখের কাব্য এ সূত্রে স্মর্তব্য।

৩. ষোল শতকের প্রণয়োপাখ্যান

মনোহর-মধুমালতী উপাখ্যান

এ পর্যন্ত আমরা ছয় জন ‘মনোহর-মধুমালতী’ উপাখ্যান রচয়িতার সন্ধান পেয়েছি : মুহম্মদ কবীর, সৈয়দ হামজা, গোপীনাথ দাস, মুহম্মদ চুহর ও জোবেদ আলী। এঁদের মধ্যে কবি চুহরের কাব্যখানা পাওয়া যায়নি। তাঁর ‘আজরশাহ সমনরোখ’ নামের কাব্যে আত্মপরিচয় অংশে এর উল্লেখ রয়েছে মাত্র। এ কয়জন কবির মধ্যে মুহম্মদ কবীর প্রাচীনতম।

।। গল্পসার।।

কবি মুহম্মদ কবীরের কাব্য থেকে এই চমৎকার উপাখ্যানটির সারাংশ তুলে দিচ্ছি :

কঙ্গিরা রাজ্যের রাজা সূর্যভান ও রাণী কমলাসুন্দরী। মনোহর তাঁদের সন্তান। মনোহর বয়ঃপ্রাপ্ত

হলে রাজা বললেন :

মনে শ্রুধা আছে মোর হৈতে দেশান্তরী ।

রহিতে প্রভুর পদে মোর শির এড়ি ।।

ফলে রাজ্যভার মনোহরের উপর অর্পিত হল । মনোহর এক রাত্রে উদ্যানে নিদ্রামগ্ন ছিল ।
এ সময় কয়েকজন পরীজাদী ভ্রমণকালে তাকে দেখতে পায় । তারা

কুমারের রূপ দেখি বোলে বিপরীত

যথ যথ পরীজাদী হইল মোহিত ।।

মনোহরের যোগ্য নারীর কথা ভাবতে গিয়ে পরীদের মনে পড়ল, 'মহারস রাজ্যের রাজা
বিক্রমঅভিরাম ও রাণী রূপমঞ্জুরীর পরমা সুন্দরী কন্যা মধুমালতীর কথা :

নৌআলি যৌবনি বালি সাজিছে নব রঙ্গে ।

সোনার পোতলা যেন সুতিছে পালঙ্কে ।।

তারপর :

কন্যার পালঙ্ক পাশে কুমার পালঙ্ক ।

পরী সবে থুইলেক নিয়া এক সঙ্গ ।।

নিদ্রা ভঙ্গে উভয়ের আর বিশ্বয়ের সীমা রইল না । কুমার মনোহর মুগ্ধ হয়ে 'এক শশিমুখী
দেখে পালঙ্ক উপর' । মনে মনে সে ভাবে :

রূপে গুণে কুলে শীর্ষে চন্দ্রিমা সমান ।

এ কন্যা মানবী নহে অপসরা জন ।।

পূর্ণ শশী নিব্দে মুখে নিব্দে অরবিন্দ ।

চক্ষে ধরএ জুতি সে রূপের চন্দ ।।

এ রূপবিভা সহ্য করতে না পেরে মনোহর মুগ্ধিত হয়ে পড়ে । মালতী মনোহরের মাথা
কোলে তুলে নিয়ে অভিভূতার মতো বসে রইল । কিছুক্ষণ পরে কুমার চৈতন্য ফিরে পেয়ে বলে
উঠল :

গুন আএ শশিমুখী কমল নয়ান ।

তোমার অঙ্গের ছন্দে বান্ধিলা পরাণ ।।

মনোহর নিজের পরিচয় দিল । কন্যাও বলল সে মহারসরাজবিক্রমের কন্যা, তার মায়ের
নাম রূপমঞ্জুরী এবং তার নিজের নাম মধুমালতী বা মালতী । উভয়েই পরস্পরের রূপে মুগ্ধ ও
প্রেমে আসক্ত । আর প্রণয়ের নির্দশন স্বরূপ তারা পরস্পরের অঙ্গুরী ও পালঙ্ক বদল করল ।
অনেকক্ষণ রঙ্গেরসে অতিবাহিত হওয়ার পর কায়িক অবসাদে তারা আবার ঘুমিয়ে পড়ল আর
ফিরবার পথে পরীজাদীরা কুমারকে যথাস্থানে রেখে দিয়ে গেল । সকালে উঠে উভয়েই রাত্রের
ঘটনা স্মরণ করে হতবুদ্ধি হয়ে পড়ে । ও কি স্বপ্ন, না বাস্তব! অস্থির রাজকন্যা মধুমালতী বিলাপ
শুরু করে দিল :

মুগ্ধ সে চকোর মরি চাঁদের সেবিনী ।

সদাএ আকুল হিয়া তাপিত রোহিণী ।।

এদিকে মনোহরও পাগল হয়ে উঠল। পিতা সূর্যভানের কাছে খবর গেলে তিনি সৈন্যসামন্ত দিয়ে মনোহরকে তার স্বপ্নে পাওয়া সুন্দরীর সন্ধানে প্রেরণ করেন; কিন্তু পথে এক নদী পার হওয়ার সময়ে তার সৈন্যসামন্ত সব মারা পড়ে। মনোহর কোন রূপে রক্ষা পেয়ে এক বনে গিয়ে পৌছে। সে বনে এক দৈত্য 'জটবহর' রাজ্যের রাজা ছত্রসেনের কন্যা 'পায়মা'কে (প্রেমাকে) হরণ করে এনে এক টঙ্গীতে রেখেছিল। পায়মার সঙ্গে মনোহরের সে টঙ্গীতে সাক্ষাৎ হয়। রূপসী পায়মাকে দেখে মনোহর ভাবে :

এক রূপ লাঘি মুঞি হৈলুঁ দেশান্তরী।

আর রূপ চাহে মোর প্রাণ নিতে হরি।।

মনোহর ও পায়মার পরিচয় হল। মধুমালতী পায়মার সখী কথা প্রসঙ্গে এ খবর শুনে মনোহর আশ্বস্ত হল। দৈত্যটিকে কৌশলে বধ করে মনোহর পায়মাকে উদ্ধার করে জটবহর রাজ্যে নিয়ে আসে। পায়মা মালতী ও তার মাকে তাদের বাড়ীতে নিমন্ত্রণ করে আনে। একরূপে মনোহর ও মালতী এখানে মিলিত হবার সুযোগ পায়। মালতীর মা তাদের মিলন স্বচক্ষে দেখে কুলকলঙ্কের ভয়ে মন্ত্র বলে মালতীকে শুকপক্ষী করে ছেড়ে দেন। শুক উড়ে উড়ে বহু দূরে 'মানিক্য রস' রাজ্যে গিয়ে পৌছে। এখানে সে স্থানীয় রাজা তারাচাদের হাতে ধরা পড়ে।

শুকের মুখে পরিচয় পেয়ে তারাচাদ তাকে তার পিতৃরাজ্য 'মহারস'-এ নিয়ে যান। পিতা রাজা বিক্রমঅভিরাম মালিনী বাড়িতে শুক রূপিনী কন্যাকে দেখতে পেলেন। রাজা তারাচাদের মুখে মনোহরের সঙ্গে কন্যার প্রণয় কাহিনী শুনে মনোহরকে এনে তার হাতে কন্যা সম্প্রদানের ব্যবস্থা করেন। তারাচাদের সঙ্গে পায়মার বিয়ের ব্যবস্থাও এ সঙ্গে হয়ে যায়। এখানেই পুথি সমাপ্ত।^১

মূল রচক ও ভাষা

আমাদের পাণ্ডুলিপির দুটো ভণিতা অনুসারে দেখা যাচ্ছে, কবি ফারসি থেকে এ কাব্য অনুবাদ করেছেন :

১. মোহাম্মদ কবিরে কহে মন কুতূহলি।
আছিল ফারসি হুদ রচিল পাঁচালি।।
২. মোহাম্মদ কবিরে কহে মন কুতূহলি।
আছিল ফারসি কিতাব করিল হিন্দুয়ালি।।

ডক্টর মুহম্মদ এনামুল হক চট্টগ্রামের জোরওয়ারগঞ্জ গ্রামের কোন বাড়ীতে একখানি পুথি দেখেছিলেন, তাতে তিনি পুথির সমাপ্তিসূচক একটি শ্লোক পেয়েছিলেন :

এহি সে সুন্দর কিছা হিন্দিতে আছিল।

দেশি ভাষাএ মুঞি পঞ্চালি ভণিল।।

কাজেই কবি ফারসি না হিন্দী থেকে উপাখ্যান গ্রহণ করেছিলেন তা নিশ্চিতরূপে বলবার জো নেই।

^১ বোধ হয় লিপিকর সম্পূর্ণ অংশ লেখেননি।

তবে মনোহর-মধুমালতী নামেই প্রকাশ, কাব্যখানির বিষয়বস্তু ভারতীয়। প্রথমোক্ত ভণিতা দুটোতে কবি বলেছেন, তিনি ফারসি থেকে অনুবাদ করেছেন। শেষে উদ্ধৃতিটির ব্যাখ্যা অন্যরূপও হতে পারে। কবি হয় তো বলতে চেয়েছেন, এ কাহিনী হিন্দীতে ছিল, বাঙলায় ছিল না; তাই তিনি ফারসি থেকে বাঙলায় অনুবাদ করলেন। আমাদের এই অনুমানই হয়তো যথার্থ। কেননা, এমনও হতে পারে যে এই ভারতীয় উপাখ্যানটি নিয়ে কেউ ফারসি ভাষায় কাব্য রচনা করেছিলেন সে-ফারসি কাব্য থেকে কাহিনীটি নিয়ে কবি মুহম্মদ কবীর এ চমৎকার প্রণয় কাব্যটি রচনা করেছেন। 'পাএমা' নামটি সম্ভবত প্রেমা (বতী) বা পদ্মা নামের ফারসি বিকৃতি। কয়েক স্থানে ফাতেমাও লিখিত হয়েছে। তাই মনে হচ্ছে, কবির আদর্শ ফারসি কাব্যই ছিল। অবশ্য গ্রন্থের কোথাও অনুবাদের জড়তা বা উপমাদি অলঙ্কারের অনুবাদের আভাস মাত্র নেই।

কাজী দৌলতের সতীময়না-লোরচন্দ্রানী কাব্যে মনোহর-মধুমালতীর কাহিনীর উল্লেখ দেখা যায় :

মধুমালতীর লাগি বিবাগী হইয়া

মনোহর গেল মা ও বাপ তেয়াগিয়া ।।

মালিক মুহম্মদ জায়সীর পদ্যমাঝে কাব্যে ও মনোহর-মধুমালতীর উল্লেখ রয়েছে। এতে মনে হয় কাহিনীটি অতি প্রাচীন। আমাদের মনে হয় কাহিনীটি মূলত ভোজরাজ দরবারের সঙ্গে সম্পৃক্ত হয়ে উদ্ভূত হয়, ভারতীয় প্রায় উপাখ্যানই বিক্রমাদিত্য ও ভোজরাজ সম্পৃক্ত। 'ভোজবাজি' শব্দটি আজো ভোজরাজের আমলের ঐন্দ্রজালিক প্রভাবের কথা স্মরণ করিয়ে দেয়, যেমন তুক তাক, টোনা প্রভৃতির কল্পায় বৌদ্ধযুগের কামরূপ-কামাখ্যার ডাকিনী-যোগিনীর কথা মনে পড়ে। কাহিনী ভাগে রূপমঞ্জরীর মধুমালতীকে মন্ত্রযোগে গুপ্ত করে দেয়ার বর্ণনা আছে, রূপমঞ্জরী নিজেও পরীকন্যা। এ সব দেখে মনে হয় কাহিনীটি অতি পুরাতন। অবশ্য এ সব ফারসি সাহিত্যের প্রভাবের ফলও হতে পারে। এ কাহিনী সংস্কৃতও ছিল। ১০৬৮ হিজরীতে বিজাপুরের সুলতান আলী আদিল শাহর সভাকবি শেখ নুসরতী এ কাহিনীর 'গুলসনে এশক' নাম দিয়ে সংস্কৃত থেকে দাখিনী হিন্দীতে অনুবাদ করেন।

৪. মুহম্মদ কবীর

সরস্বতী বন্দনা, বাঙলাভাষা অর্থে 'হিন্দুয়ালী' শব্দের প্রয়োগ ভাষার প্রাচীনতাজ্ঞাপক শব্দাবলীর ব্যবহার, কাজী দৌলতের কাব্যে উপাখ্যানটির উল্লেখ, পয়ার ও ত্রিপদী ছন্দে অসমাক্ষর প্রয়োগ প্রভৃতি থেকে আমাদের মনে হয়, কবি মুহম্মদ কবীর আমাদের প্রাচীন কবিদের একজন। উষ্টর মুহম্মদ এনামুল হকও বলেন :

“সন ১১০১ মঘীর (১৭৯৩ খ্রীস্টাব্দ) বৈশাখ মাসে শ্রী আবদুল আলী সাং পরাগলপুর, চট্টগ্রাম অনুলিখিত একখানা মধুমালতী কাব্যের পাণ্ডুলিপি ১৯৩৭ খ্রীস্টাব্দের মার্চ মাসে জোরওয়ারগঞ্জে (চট্টগ্রাম থানা মিরেরসরাই) দেখিবার সুযোগ আমার হইয়াছিল। ইহার শেষভাগের আবশ্যিক অংশটুকু নকল করিয়া লইয়াছিলাম। অনেক চেষ্টা করিয়াও পুথিখানি হস্ত গত করিতে পারি নাই। পুথিখানির শেষ অংশটুকু এই :

মনোহর মালতীর আকুল পিরীত ।
 গাহি সকল লোক মন হরষিত ।।
 এহি সে সুন্দর কিছা হিন্দীতে আছিল ।
 দেশি ভাষাএ মুঞি পঞ্চালী ভণিল ।।
 অন্ত অন্তে অন্তর-এ সিদ্ধু তার পাছ ।
 পঞ্চালী ভণিতে গেল হিজিরার পাঁচ ।।
 পণ্ডিত জনার ঘিন্না মূর্খের গোহারি ।
 শিরে ধরি কাব্য কথা দিলুং সঞ্চারি ।।
 মোহাম্মদ কবিরে কহে ভাবিয়া আকুল
 কি জানি ডুবিব শেষে এই কূল অই কূল ।।

ইহা হইতে দেখা যায়, ৯৯৭ হিজরী অর্থাৎ ১৫৮৮ খ্রীস্টাব্দে পুস্তকটির লেখা সমাপ্ত হয়' কিন্তু ইহার রচনা আরম্ভ হয় আরও পাঁচ বৎসর আগে অর্থাৎ ১৫৮৩ খ্রীস্টাব্দে। সম্প্রতি ইহার রচনার তারিখ লইয়া একটা গোল বাধিয়াছে। মরহুম আবদুল করিম সাহিত্যবিশারদ (মৃত্যু-১৯৫৩ খ্রীস্টাব্দে) সাহেব ১৯৪৯ খ্রীস্টাব্দের ২২শে জুলাই তারিখের পত্রে আমাকে লিখিয়াছিলেন 'সম্প্রতি মধুমালতী পুথির একটি পাণ্ডুলিপি আমার হস্তগত হইয়াছিল ইহার শেষ পত্রে ভণিতার আগে হেয়ালীতে একটা তারিখ ছিল তাহা এই :

অঙ্গ সঙ্গে রহে রস বিন্দু তার পাছ
 পঞ্চালী ভণিতে গেল হিজিরার পাঁচ ।।”

ডক্টর মুহম্মদ এনামুল হক এর নিম্নরূপ পাঠভঙ্গি দিয়েছেন :

অঙ্গ সঙ্গে রহে রস বিন্দু তার পাছ
 পঞ্চালী ভণিতে গেল হিজিরার পাঁচ ।’

এতে ৮৯০ হিজরী বা ১৪৮৫ খ্রীস্টাব্দে পাওয়া যায়; কিন্তু উক্ত দুটো তারিখের মধ্যে একশ বছরের ব্যবধান রয়েছে। কাজেই কোথাও গলদ রয়েছে নিশ্চয়ই। লক্ষণীয় যে শেষ চরণটি উভয় পাণ্ডুলিপিতে অবিকৃত রয়েছে। অতএব ভুল ঐ প্রথম চরণেই লুকায়িত আছে। অবশ্য দুটো পাঠের সমন্বয়ে আরো কয়েকটি পাঠ অনুমান করা যায় :

১. অন্ত সঙ্গে অঙ্গ রএ সিদ্ধু (বা বিন্দু) তার পাছ
 -৯৮৭ বা ৯৮০ = ১৫৭৯ বা ১৫৭২ খ্রীস্টাব্দ
২. অন্ত সঙ্গে অঙ্গ রএ সিদ্ধু (বা বিন্দু) তার পাছ
 -৮৯৭ বা ৮৯০ = ১৪৯২ বা ১৪৮৫ খ্রীস্টাব্দ
৩. অন্ত সঙ্গে রএ রস সিদ্ধু (বা বিন্দু) তার পাছ
 -৮৮৭ বা ৮৮০ = ১৪৮৩ বা ১৪৭৬ খ্রীস্টাব্দ
৪. অন্ত সঙ্গে অঙ্গ রএ সিদ্ধু (বা বিন্দু) তার পাছ
 -৯৯৭ বা ৯৯০ = ১৫৮৯ বা ১৫৮২ খ্রীস্টাব্দ

^১ মুসলিম বাঙ্গলা সাহিত্য : পৃঃ ৯৬-৯৮ ।

যা হোক, আরো পাণ্ডুলিপি পাওয়া না গেলে শেষ কথা বলা যাচ্ছে না; তবে এটা যে ষোল শতকের পরের রচনা নয়, তা একরূপ নিশ্চিতভাবেই বলা চলে।

ডক্টর সুকুমার সেন তাঁর ‘ইসলামী বাংলা সাহিত্যে’ মুহম্মদ কবীরের কাব্য উনিশ শতকের রচনা বলে যে অভিমত প্রকাশ করেছেন, তা ডক্টর মুহম্মদ এনামুল হক উল্লিখিত পাণ্ডুলিপির অনুলেখনের তারিখ অনুসারেই (১১০১ মঘী বা ১৭৩৯ খ্রীস্টাব্দ) নিঃসন্দেহে ভুল প্রমাণিত হল।

আমাদের আলোচ্য পুথিখানা ও অসংগৃহীত পাণ্ডুলিপি দুটো চট্টগ্রামের সম্পদ। এতে হলে হয়, মুহম্মদ কবীর চট্টগ্রামবাসী ছিলেন।

অন্য প্রমাণ হাতে না আসা পর্যন্ত আপাতত তা-ই মনে করা যাক। বিশেষত, গোড়া থেকেই চট্টগ্রামের মুসলমানেরাই বাঙলাসাহিত্য সৃষ্টিতে অগ্রণী, এমনকি পথিকৃৎ ছিলেন। কাজেই মুহম্মদ কবীরের চট্টগ্রামবাসী হওয়ার সম্ভাবনাই বেশি। চট্টগ্রামে প্রচলিত কতগুলো বিভক্তি, প্রত্যয় ও শব্দের কাব্যে প্রয়োগ থেকেও আমাদের অনুমানের সমর্থন মেলে। যেমন, মিখ (-দিকে, পানে), কোনে (-কেকুনি (-কোথায়), লুলালুলি (-মৃদুভাবে মর্দন), ফেলেফ্যারি (-ফ্যালফ্যাল), তু (-থেকে), থু (-থেকে) ইত্যাদি।

মধুমালতীর অন্যান্য রচয়িতা

সৈয়দ হামজার ‘কেছা মধুমালতী’ দেখে মনে হয়, পূর্ববর্তী মধুমালতী কাব্য রচয়িতাগণ মুহম্মদ কবীরের কাব্যখানি অনুসরণ করেননি, তাঁরা সতেরো শতকের হিন্দুস্থানী বা ফারসী কাব্যগুলিকেই আদর্শ করেছিলেন। এখানে সৈয়দ হামজার পুথির সঙ্গে মুহম্মদ কবীরের কাব্যের পাত্র-পাত্রীর নাম ও স্থানগত যে সব বৈসাদৃশ্য রয়েছে তা দেখাচ্ছি :

মুহম্মদ কবীরের কাব্য	সৈয়দ হামজার পুথি
১. মনোহরের ধাত্রীর নাম - ‘পহেজা’	কোন নাম নেই
২. সূর্যভান-কঙ্গিরা দেশের রাজা	সূর্যভান-বঙ্গের প্রধান রাজা
৩. মালতীর সখী-পাএমা বা ফাতেমা	মালতীর সখী-প্রেমা
৪. সূর্যভানের রাজধানী-কঙ্গিরা শহর	সূর্যভানের রাজধানী-বঙ্গ মধ্যে কিল্লরনগর
৫. পাএমার পিতৃরাজ্য-জটবহর	প্রেমার পিতৃরাজ্য-বিচিত্র বিশ্রাম

কবীরের অনুসৃত কাব্য

মধুমালতীর উপাখ্যান মধ্যযুগের আসমুদ হিমাচল ব্যাপী প্রচলিত ছিল। প্রথমে মৌখিক রূপকথার আকারে, পরে অন্তত ষোল শতক থেকে লিখিত ও উপাখ্যানরূপে এটি অত্যন্ত জনপ্রিয় হয়। হিন্দুতে এ উপাখ্যানের প্রথম কাব্যায়ন ঘটে শেখ মুহম্মদ মনব্বন নামের এক কবির হাতে। তিনি ছিলেন চুনার নিবাসী। শেরশাহ শূরের পুত্র সেলিম শাহ শূরের রাজত্বকালে ৯৫২ হিঃ বা ১৫৪৫ খ্রীস্টাব্দে এটি রচিত। শান্তারী তরিকার প্রখ্যাত সূফী শেখ মুহম্মদ গাউস গোয়ালিয়রীর (মৃঃ ৯৭০ হিঃ বা ১৫৬২-৬৩ খ্রীস্টাব্দ) ভক্ত ছিলেন মনব্বন। তাঁর কাব্য আসলে স্রষ্টা-প্রেমের রূপক। এ জন্যে তাঁর কাব্যে বিভিন্ন সূত্রে নানাভাবে প্রেমতত্ত্ব ব্যাখ্যাত হয়েছে।

তার মতে—

প্রথমহি আদি প্রেম পরিবিষ্টি
তৌ পাছে ভই সকল সিরিষ্টি ।
উৎপত্তি সিষ্টি পেম সৌ আদি
সিষ্টি, রূপভর প্রেম সবাদি ।

প্রথমেই প্রবিশ্ট হয়েছিল আদি প্রেম। তারপরে হল সব সৃষ্টি। সেই প্রেম থেকেই সৃষ্টির উৎপত্তি। সৃষ্টিক্রমে সবটাই ভরে তুলল প্রেম অর্থাৎ পুরো সৃষ্টিটাই প্রেমজ। কাব্যটি কেবল তত্ত্বকথার আকার নয়— কবিত্বেরও আধার এরপরে মনোহর-মধুমালতীর রূপকথা প্রণয়োপাখ্যান রূপে বর্ণিত হয়েছে হিন্দী, ফারসি ও দাখিনী উর্দু ভাষায়, যেমন :

১. শেখ নুর মুহম্মদ-মসনবী-ফারসি	রচনাকাল	১০৫৯ হি-১৬৪৯ খ্রীঃ
২. অজ্ঞাত-কিসসা- ই-মধুমালত ওয়া কুঁওর মনুহর ফারসি	„	১০৫৯ হিঃ ঐ
৩. মীর আসকারী-মিহর ওয়া মাহ্-ফারসি	„	১০৬৫ হিঃ ১৬৫৪-৫৫ খ্রীঃ
৪. নাসির আলী-মসনবী	„	১১০৮ হিঃ ১৬৯৬ খ্রীঃ
৫. মাদোদাস (গদ্য) মীকা ওয়া মনোহর	„	১০৯৮ হিঃ ১৬৮৭ খ্রীঃ
৬. অজ্ঞাত (গদ্য) মধুমালতী-মনোহর	„	- -
৭. নুসরতী (কাব্য) গুলশান-ই-ইশক	„	১০৬৮ হিঃ ১৬৫৭-৫৮ খ্রীঃ
৮. চতুর্ভুজ দাস-মধুমালতী	„	-সতেরো শতক।

সৈয়দ আলী আহসান^১ কয়েকটি চরণের বক্তব্যগত শাস্তিক মিল লক্ষ্য করে মুহম্মদ কবীরের মনোহর-মধুমালতী উপাখ্যান মনঝনের কাব্যের স্বাধীন অনুবাদ বা অনুসৃতি বলে নিঃসংশয়ে বিশ্বাস করেছেন। ডক্টর মমতাজুর রহমান তরফদার এ প্রকার সাদৃশ্যকে অনুসৃতি সাক্ষ্য রূপে উপস্থাপিত করার অযৌক্তিকতা ও অসারতা দেখিয়েছেন, তাঁর মতে এই মিল তথ্যগত এবং অনুবাদের নির্দেশক নয়।^২ ডক্টর মমতাজুর রহমান তরফদার তার ‘বাংলা রোমান্টিক কাব্যের হিন্দী আওয়াধী পটভূমি’ গ্রন্থে বিস্তৃত উদ্ধৃতির মাধ্যমে তুলনামূলক আলোচনা করে দেখিয়েছেন যে মুহম্মদ কবীরের অবলম্বন ছিল ১৬৪৯ খ্রীস্টাব্দে অজ্ঞাতনাম কবি রচিত ফারসি কাব্য ‘কিসসা-ই-মধুমালত ওয়া কুঁওর মনুহর।’ এবং যেহেতু অনুসৃত ফারসি কাব্যটি ১৬৪৯ খ্রীস্টাব্দে রচিত, সেহেতু মুহম্মদ কবীরের ‘কাব্যটির রচনাকাল সতেরো শতকের শেষার্ধ বা আঠার শতকের প্রথমভাগ।’^৩

সৈয়দ আলী আহসান হিন্দি কাব্যের সঙ্গে ও ডক্টর তরফদার ফারসি কাব্যের সঙ্গে মিলিয়ে

^১ মধুমালতী উপাখ্যান— সাহিত্য পত্রিকা, ৮ম বর্ষ, সংখ্যা, ১৩৭১, বাঙলা বিভাগ, ঢাকা বিশ্ববিদ্যালয়, পৃঃ ৪১-৪৭।

^২ পদ্মাবতী ও মধুমালতীর রূপক ও সাহিত্যিক ঐতিহ্য : ইতিহাস (ঢাকার ইতিহাস পরিষদের মুদ্রণ) ১ম বর্ষ ১ম সংখ্যা পৃঃ ৩৪-৩৯।

^৩ ঢাকা বিশ্ববিদ্যালয়ের বাঙলা বিভাগ প্রকাশিত, ১৯৭১ সন, পৃঃ ৩২৮-৬৮, ৩৭৫-৭৮।

^৪ বাংলা রোমান্টিক কাব্যের হিন্দী আওয়াধী পটভূমি, পৃঃ ৭৮।

মুহম্মদ কবীরের অবলম্বন মূল কাব্য সম্বন্ধে নিশ্চিত হয়েছেন, কিন্তু তাঁরা কেউ কোন কোন পাত্র-পাত্রীর ও স্থানের নামের ভিন্নতার কোন বিশ্বাসযোগ্য কারণ দেখাতে পারেননি। এবং অনুবাদেও আক্ষরিক অনুসৃতি দেখাতে পারছেন না।

মনঝনের কাব্যই যদি কবীরের অবলম্বন হয়, তা হলে অনুবাদ এমন সংক্ষিপ্ত হলে কেন, প্রেমতত্ত্বই বা বাদ গেল কেন, রূপ-বর্ণনাই বা ভিন্ন হল কেন— এসব প্রশ্নের সন্তোষজনক উত্তর প্রয়োজন। আর 'কিসসা-ই-মধুমালত ওয়া কুণ্ডর মনুহর'ই যদি কবীর অনুবাদ করে থাকেন, তা হলে সে কাব্যটির ও কবির নাম তাঁরও অজ্ঞাত ছিল, তাই কবির ও কাব্যের নাম উল্লেখ করা তাঁর পক্ষে সম্ভব হয়নি। আর অনুবাদেরও মূলানুগত্য নেই।

ডক্টর তরফদারের তুলনার নমুনা এরূপ : রাজপুত্রের জন্মলগ্নে জ্ঞানী ও গণক উপস্থিত হলেন, সূর্যের মতো উজ্জ্বল (শিশুর) কাছে গেল, তারা নাম রাখল মনোহর। সে জগতে সূর্যের চেয়ে উজ্জ্বল হবে, তার ধন, রাজত্ব ও সুখ্যাতি হবে। পনের বছর বয়সে তার কারো জনো হুদয়ে জ্বালাময়ী কামনা দেখা দেবে। একবছর কাল সে তার জন্যে ঘুরবে, পরে ঘরে ফিরবে।

—কিসসা-ই-মধুমালত।

'জন্মলগ্নে ওলিগনে গুণিতে মাগিতে লাগিল', রাশিক্রম পুরাণ দেখে শিশুর নাম রাখিল মনোহর। এ শিশু চন্দ্রের সমান, চন্দ্রমুখীর জন্যে পনেরো বছর বয়সে বিরাগী হবে।

—কবীরের মধুমালতী।

মনঝনের কাব্যেও প্রভাতে পণ্ডিতরা এসে ত্রাশি পরীক্ষা করে এই গণনা করেছে, এ শিশু ছত্রপতি হবে অন্য রাজারা, মুনি গন্ধর্বও তাকে নমস্কার করবে, এ জ্ঞানী যোদ্ধা শ্রেষ্ঠ ক্ষত্রিয় হবে, তার নাম হবে মনোহর, ১৪ বছর ১১ মাস ৯ দিন বয়সে জন্ম স্থানে সূর্য, সপ্তম স্থানে চন্দ্র থাকবে, তখন তার সঙ্গে কোন প্রিয় বরুণ মিলিত হবে। ইত্যাদি ফারসির দ্বিগুণ এবং বাড়লার তিনগুণ দীর্ঘ বর্ণনা রয়েছে।

বিশ্লেষণ করলে বোঝা যাবে তথ্যগত মূল বক্তব্য অভিন্ন। কেবল ভাষাভেদে ব্যক্তিভেদে এবং বর্ণনার প্রথাসিদ্ধ ভঙ্গিভেদে তিন ভাষার কাব্যের একই বিষয়ক বর্ণনা শুধু হুব-দীর্ঘ হয়নি, উপমারও প্রয়োগভেদ এবং ন্যূনাধিক্য ঘটেছে।

আসল কথা মনোহর-মধুমালতী এবং অন্যান্য রূপকথা শত শত বছর ধরে মুখে মুখে কানে কানে চালু ছিল। পনেরো-ষোল-সতেরো শতকে নব্যভারতীয় ভাষায় সে রূপকথাগুলো প্রেমকথা রূপে, অধ্যাত্মতত্ত্বের প্রতীক রূপে, কিংবা নিছক গল্পরসের আধাররূপে গাথায়, মসনবীতে ও কাব্যে রূপায়িত এবং লিপিবদ্ধ হতে থাকে, সে সঙ্গে মধ্যযুগীয় নিয়মে অনূদিত বা অনুসৃতও হতে থাকে। কোন দুইজনের হস্তাক্ষর যেমন এক রকম নয়, তেমনি অনুবাদ-অনুসরণ হলেও কোন দুজনের রচি, বুদ্ধি ও প্রয়োজন-চেতনা অবিকল একরূপ নয় বলে তাঁদের রচনা প্রায় স্বাধীন ও স্বতন্ত্র রূপ লাভ করে।

‘এহি সে সুন্দর কিসসা হিন্দিতে আছিল।

দেশি ভাষাএ মুঞি পঞ্চালি রচিল।।

উক্ত ভণিতা দৃষ্টে মনে হয় মুহম্মদ কবীর জানতেন যে মধুমালতী কিসসার উদ্ভব উত্তর ভারতে, এটি কোন হিন্দিকাব্যের বিষয়ও কি-না তা তাঁর জানা ছিল না।

- আর ১. 'মোহাম্মদ কবিরে কহে মন কুতুহলি
আছিল ফারসি ছন্দ রচিল পঞ্চালি।
২. মোহাম্মদ কবিরে কহে মন কুতুহলি
আছিল ফারসি কিতাব করিল হিন্দুয়ালি।

গ্রন্থোক্ত এ দুটো ভণিতার প্রমাণে মানতেই হবে তাঁর আদর্শ ছিল কোন ফারসি কাব্য। তবে সে ফারসি কাব্য অজ্ঞাত নামা কবির 'কিসসা-ই-মধুমালতী' কিনা তা জোর করে বলা যাবে না। ষোল শতকে রচিত আজ অবধি অনাবিকৃত অন্য কোন ফারসি কাব্যও তাঁর অবলম্বন হতে পারে। দু'দুটো পাণ্ডুলিপিতে যখন রচনাকাল জ্ঞাপক শ্লোক পাওয়া গেছে, তখন সেগুলো লিপিকর প্রমাদে বিভ্রান্তিকর হয়েছে বলে উড়িয়ে দেয়া যায় না। কাব্যের ক্ষুদ্রকলেবর, উপাখ্যানের ঋজুতা, বর্ণনার সরলতা ও সংক্ষিপ্ততা এবং প্রাচীনতা দ্যোতক বহু শব্দের প্রয়োগ প্রভৃতি মুহম্মদ কবীরকে সতেরো শতকের শেষপাদের বা আঠারো শতকের কবি বলে গ্রহণ করার পক্ষে বড় বাধা।

অতএব হয় কিসসা-ই-মধুমালতী আরো একশ বছর আগে রচনা, ১৬৪৯ খ্রীস্টাব্দের নয়, এটি হয়তো লিপিকর প্রদত্ত লিপিকাল। কবিরই নাম নেই যে গ্রন্থে সে গ্রন্থে রচনাকাল থাকার কথা নয়। অথবা কবীরের আদর্শ ছিল অন্য কোন অধুনালুপ্ত বা অপ্রাপ্ত কাব্য। ডক্টর তরফদারই স্বীকার করেছেন যে ১৬৪৯ খ্রীস্টাব্দে রচিত অপর্ব-এই শেখ নূর মুহম্মদ রচিত মসনবী বা ১৬৫৪-৫৫ খ্রীস্টাব্দে রচিত মীর আসকারীর 'মিহর-ও-মাহ' অনুসৃত হয়নি। আসলে কবীর বহুশ্রুত কিসসার বা অনেকবার পাঠিত কাব্যের অনুসরণে সংক্ষেপে গল্পকথনে আগ্রহী ছিলেন—অনুবাদে নয়।

এখন প্রশ্ন ওঠে— কার ফারসি-এ হিন্দী 'কেতাব' দেখে মুহম্মদ কবীর তাঁর কাব্যখানা রচনা করেছিলেন? বাঙলাদেশে কোন পুথিপত্র নেই। আমরা বিভিন্ন পুথিশালার Descriptive Catalogue-গুলো ঘেঁটে দেখছি, সেগুলোর মধ্যে যাদের রচনার খোঁজ পাচ্ছি তারা কেউ সতেরো শতকের পূর্বের নন।

প্রথম হিন্দী রচনার সাক্ষাৎ পাচ্ছি শেখ জুম্মনের মধুমালতীর। এটা সতেরো শতকের গোড়ার দিকে রচনা। দ্বিতীয় হিন্দী রচনাটি শেখ মনঝনের। ইনি ১০৫৯ হিজরী বা ১৬৫০-৫১ খ্রীস্টাব্দে উপাখ্যানটি রচনা করেন।

১৬৪৯ খ্রীস্টাব্দে শেখ জুম্মনের মধুমালতীর ফারসি অনুবাদ করেন নাসির আলী। সম্রাট আওরঙজেবের সভাকবি ও এলাহাবাদের সুবাদার মীর আসকারীও ১৬৫৫ খ্রীস্টাব্দে শেখ জুম্মনের হিন্দী 'মধুমালতী'র ফারসি অনুবাদ করেন। এর কাব্যের নাম মীর ও মা (Mihr-o-Maa)। তাঁর কলমী নাম (তাখাল্লুস) ছিল 'রাযী'। এবং সম্রাট আওরঙজেব থেকে তিনি 'আকিল খান' উপাধি পেয়েছিলেন। জুম্মন মনঝন নামের বিকৃতিও হতে পারে।

বিজাপুরের সুলতান আদিল শাহর সভাকবি শেখ নূসরত 'গুলসনে এশক' নাম দিয়ে ১০৬৮ হিজরী বা ১৬৫৮-৫৯ খ্রীস্টাব্দে মীর আসকারীর (মতান্তরে সংস্কৃত থেকে) 'মীর ও মা'-এর দাখিনী হিন্দী অনুবাদ করেন। আঠারো শতকের কোন সময়ে কবি মুন্সী আলী রিয়া মনঝনের কাব্যখানা অবলম্বন করে আর একখানা ফারসি মধুমালতী কাব্য রচনা করেছেন।

বর্তমানে এখানে আমাদের এর অভিরিক্ত আর কোন সংবাদ সংগ্রহ করার উপায় নেই।

তবে পদুমাবতে মধুমালতী কাহিনীর উল্লেখ থেকে স্পষ্টতই প্রমাণিত হয় যে এ কাহিনী সুপ্রাচীন এবং কবীরের কাব্যের অভ্যন্তরীণ প্রমাণগুলোর আলোকে নিঃসন্দেহে বলা যায়, তাঁর কাব্যখানা ষোড়শ শতকেই রচিত হয়েছিল। কাজেই মুহম্মদ কবীরের আদর্শ ফারসি বা হিন্দী কাব্যখানা কোন্ আদি কবির রচিত ছিল তা জানা গেল না।

সতেরো আঠারো শতকে মনোহর-মধুমালতী উপাখ্যানটি যে ভারতব্যাপী জনপ্রিয়তা অর্জন করেছিল, তা এ যুগের একাধিক ফারসি, হিন্দী ও বাঙলা কাব্য রচনা থেকে সহজেই অনুমান করা যায়।

এবার আমরা বাঙলা ‘মধুমালতী’ কাহিনী রচয়িতাদের কথা সংক্ষেপে উল্লেখ করব।

১. চট্টগ্রামের বাঁশখালী নিবাসী বহুগ্রন্থ প্রণেতা উনিশ শতকের কবি মুহম্মদ চুহর একখানি মনোহর-মধুমালতী কাব্য রচনা করেছিলেন বলে তাঁর ‘আজর শাহ-সমনরোখ’ নামের কাব্যে উল্লেখ করেছেন; কিন্তু কাব্যখানি আজো পাওয়া যায়নি।

২. হুগলীর ভুরসুট পরগণার উদনা নিবাসী কবি সৈয়দ হামজা দোভাষী পুথি সাহিত্যের অন্যতম পথিকৃৎ। দোভাষী পুথির আদি রচয়িতা ফকির শ্রীকান্তদেব। ডক্টর মুহম্মদ শহীদুল্লাহর মতে কবি সৈয়দ হামজা ১১৯৫ সনে তথা ১৭৮৮-৮৯ খ্রীস্টাব্দে মধুমালতী কিসসাখানা রচনা করেন। এ পুথিটি যে তাঁর প্রথম রচনা, তার ত্রুটিময় তাই পুথি থেকে তার আভাস পাওয়া যাচ্ছে :

কবিতার বাত কহি দেলেতে বুঝিতে ছহি
যতেক রসিক বন্ধুগণ।
আছিনু বসন্তপুরে মইনদ্দি মোল্লার ডেরে
সেইখানে করিনু যতন।।
কেছা মধুমালতী জঙ্গনামা আমীরের
জৈগুন পুথি লিখেছিনু আগে।
আল্লাতারা ভাল করে যাহার খায়েস পরে
হাতেম লিখিনু শেষভাগে।।

লক্ষণীয় যে মধুমালতী কাব্যখানা সৈয়দ হামজা অবিমিশ্র বাঙলায় রচনা করেছেন। এ কাব্য রচনা করে জনপ্রিয়তা অর্জনে ব্যর্থ হয়ে কিংবা স্ব-এলাকার লোকের সহজবোধ্য করার জন্যে তিনি তাঁর পরবর্তী কাব্যগুলো দোভাষীরীতিতে রচনা করেছেন, তা জানবার উপায় নেই। সময়ের হিসেবে তাঁর রচনার বিশেষ কোন মূল্য নেই। রচনানৈপুণ্য বা অন্য কোন প্রকারের বৈশিষ্ট্যও নেই।

৩. মনোহর-মধুমালতী কাহিনীর অপর রচয়িতা হচ্ছেন সাকের মাহমুদ উত্তরবঙ্গের রংপুর জেলার ঘোড়াঘাট সরকারের অন্তর্গত মুক্তিপুর পরগণার রিকাইতপুর গ্রামে ১৭৫৯-৬০ খ্রীস্টাব্দে কবি সাকের জন্ম গ্রহণ করেন। তাঁর পিতার নাম শেখ মাহমুদ, পিতামহের নাম (শেখ) কাবিল :

রিকাইতপুর গ্রামে বসতি আমার ।
 মুক্তিপুর নাম বটে শুন পরগনার ।।
 সরকার অশ্বঘাট হিস্যার নওআনী ।
 রাজরাজেশ্বর গৌরনাথ নৃপমণি ।।
 কাবিল-তনয় শেখ মামুদ মোর পিতা ।
 কোনো মণ্ডল জ্যেষ্ঠভাতা মুক্তিপুরের কর্তা ।

ডক্টর সুকুমার সেনের মতে গৌরনাথ বর্ধনকুটীর জমিদার ছিলেন। গ্রন্থ সম্বন্ধে কবি বলেছেন :

মধুমাল্য মনোহর কিতাব নিকটে ।
 পাইয়া পাঁচালী দীর্ঘ রচি কহো ঝাটে ।।
 আনন্দ উৎসব মন ঈদের দিবসে ।
 সপ্তম আশ্বিন মাস তৃতীয়া আকাশে ।।
 একাদশ শত সাল উন অষ্ট আশী ।
 ফারসি বাঙলা ভাষা হৃদয়ে প্রকাশি ।।
 বয়ক্রম শুন মোর কুড়ি পর দুই ।
 বাইশ বছর মাত্র না বুঝি প্রমাই ।।

সুতরাং কবি বাইশ বছর বয়সে ১৭৮১-৮২ খ্রীস্টাব্দে তাঁর কাব্য রচনা করেন।

৪. একজন হিন্দু কবিও ‘মালতী-মনোহর’ উপাখ্যান রচনা করেছেন। তাঁর নাম গোপীনাথ দাস। চট্টগ্রামের বোয়ালখালি ধানার অস্থগতি হাওলা চাকলার পোপাদিয়া গ্রামে তাঁর বাস ছিল।

কবির পরিচয় ও রচনার তারিখ-প্রকরণ :

হরিশ্ৰবণি করহ সকলে কবি গাএ ।
 ভাবিআ গোবিন্দ পদ গ্রন্থ হৈল সায় ।।
 মিত্র পৃষ্ঠে ঋতু নেত্র শক নিরূপণ ।
 প্রথম নিদাঘ মানে নেত্র নিরূপণ ।।
 শনৈশ্চর বাসর বেলা দ্বিপ্রহর ।
 সান্ন হৈল আখ্যান মালতী-মনোহর ।।
 স্বয়ংক্রর গোপীনাথ চট্টগ্রাম স্থান
 তার অন্তঃপাতী গ্রাম হাওলা প্রধান ।।
 সেই জন্মভূম বাস চিরকাল বাস ।
 দৈবের কারণে মম কারাগারে বাস ।।

বলা বাহুল্য তারিখটির পাঠ অশুদ্ধ। শুদ্ধ পাঠ মিএপৃষ্ঠে ঋতু নেত্র সন নিরূপণ হবে, এতে আমরা ১২৬২ বাঙলা সন, তথা ১৮৫৫ খ্রীস্টাব্দ পাচ্ছি।

৫. আর একখানা ‘মধুমাল্য কেছা’ রচনা করেছেন বিশ শতকের প্রথম পাদে দোভাষী পুথিকার জোবেদ আলী। এতে উল্লেখযোগ্য কোন বিশেষত্ব নেই।

৬. কবি নূর মোহাম্মদ রচিত ‘মদনকুমার মধুমাল্য’ পুথির প্রাপ্ত পাণ্ডুলিপিটি খণ্ডিত। ওটাও মনোহর-মধুমালতী কাহিনী ভিত্তিক, কিন্তু কাহিনী আরো পল্লবিত হয়েছে এবং পাত্রপাত্রীর

নামভেদও ঘটেছে। এযুগে মদনকুমার মধুমালী নাটিকা রচনা করেছেন কাজী নজরুল ইসলাম ও জসীমউদ্দীন।

প্রায় একই সময়ে সৈয়দ হামজা, সাকের মাহমুদ এবং মুহম্মদ চুহর ও গোপীনাথ দাসের দ্বারা উপাখ্যানটি রচিত হওয়ায় বোঝা যাচ্ছে, আঠারো-উনিশ শতকে এটা বিশেষ জনপ্রিয়তা অর্জন করেছিল।

সমকালীন সমাজ ও সংস্কৃতির রূপ

মুসলমান কবি যেমন 'বাণী' স্মরণ করে লেখনী ধারণ করেছেন, তেমনি হিন্দুরাজাও মুসলমান ওলী দিয়ে নবজাতকের জন্যে আল্লাহর কাছে প্রার্থনা করাচ্ছেন এবং ভাগ্য গণনা করাচ্ছেন :

ওলিগণে গুণিতে মাগিতে লাগিল।

ভালমন্দ কুমারের সকল গুণিল।।

গুধু-তা-ই নয়, এখন থেকে ভূতপেত্নী গন্ধর্ব নয়, পরীও হিন্দু নায়ক-নায়িকার প্রণয় সহায়। হিন্দুরাজা অভিষেক-উৎসবে মুসলিম পোশাকে ভূষিত হয়েছেন :

মণিকলা পাগ শিরে ধোপা থোপা মুক্তা ঝরে...

সুবর্ণ কাবাই দেহ 'পরে।

দরবারের পরিবেশটাও মুসলিম প্রভাবিত। তাই অভিষেক অস্ত্রে :

রাজা উজিরেহ করিল; মুসলিম।

সেকালে রাজবাড়িতেও 'মঙ্গল' গান হত। তাতে

রাজ্যে যথ লোক ছিল 'মঙ্গল' গনিয়া আইল

নাট গীত বাদ্যের কল্লোলে।

এতে থাকত :

মন্দিরা মৃদঙ্গ কাড়া শিঙা ঢাক দোতার

শঙ্খ সানাইও কর্ণাল ফুকরে।

মধু বেলি চক্ক বাঁশি নানা বাদ্য রাশি রাশি

যথ বাদ্য বাজে জোরে জোরে।।

এমন 'মঙ্গল' গানেও নর্তকীর নাচ ছিল :

নর্তকীর দেখি সাজ মোহ যায় দেবরাজ

নাচে যেন স্বর্গের ইন্দ্রাণী।

গুধু তাই নয়, অন্য লোকেরাও

কেহো নাচে কেহো গাএ কেহো হাসি যন্ত্র বাএ

রঙ্গ ঢঙ্গ কৌতুক অপার।

সে যুগে চিত্রল ছাঁদের কুন্তল, সপ্তছড়ি মুক্তার হার, বিচিত্র কাঞ্চলী, হেমরি শাড়ী, নূপুর কঙ্কণ, বাজু প্রভৃতি রাজঅন্তঃপুরিকাদের অঙ্গভরণ ছিল।

রাজকন্যারও সতীত্ববোধ ও সমাজচেতনা শিথিল ছিল না :

গুনি লোকে দিব লজ্জা হৈলু কলঙ্কিনী ।।

কি মুখে বসিনু মুণ্ডি নারীর সভাত ।

ডাকিনী-যোগিনী প্রভাবজ তুক-তাক-টোনায় বিশ্বাস তখনও প্রবল ছিল। মালতীকে তার মা রূপমঞ্জরী নিজেই মস্ত পড়ে পাখী করে দিলেন। নদীমাতৃক এ দেশের নৌকার বর্ণনা যথার্থই হয়েছে :

নব ইন্দু ছন্দ জিনি নৌকার গঠন ।

আগে পাছে গাছল দোল-এ ঘন ঘন ।।

রজতের বৈঠা সব হেম কেঁরুয়াল ।

চলতি চঞ্চল অতি না ছোএ কিলাল ।।

তবু 'নদী পার হতে সবাই জপে প্রভু নাম' ।

মনোহর-মধুমালতী

বিয়ের আগে মিলিত হচ্ছে। মিলনটা গান্ধবীরীতি সম্মত :

তোক্ষা সনে আদ্যে আন্ধি দৃঢ়কৈ করিছি ।

সেই ধর্ম বাক্য আন্ধি মনেও রাখিছি ।।

অন্যে অন্যে দোহানের ধর্মধর্ম ভেল ।

তবে সে লজ্জার ধস দোহন দূরে গেল ।।^১

বিদ্যাসুন্দর উপাখ্যান

১. কাহিনীর উৎস

বাঙলা বিদ্যাসুন্দর উপাখ্যানগুলো যদিও 'কালিকামঙ্গল' শাখার অন্তর্গত তবু গৌড় সুলতানের অগ্রহে প্রণয়োপাখ্যান হিসেবে রচিত বলে দ্বিজ শ্রীধর কবিরাজের বিদ্যাসুন্দরকে এবং মুসলিম কবি রচিত উপাখ্যান হিসেবে শাহ বারিদ খানের বিদ্যাসুন্দরকে এ অধ্যায়ের অন্তর্ভুক্ত করলাম।

বিদ্যাসুন্দরের সুপরিচিত কাহিনী অবলম্বনে বাঙলা ভাষায় অনেক কবি পাঁচালী বা গীতি-নাট্য রচনা করেছেন। এ কাহিনীর উদ্ভব সম্বন্ধে আজো মতানৈক্য বর্তমান। মহামহোপাধ্যায় হরপ্রসাদ শাস্ত্রী বররুচি নামক কোন কবিকে বিদ্যাসুন্দর কাব্যের [সংস্কৃত] আদি রচয়িতা বলে মেনে নিয়েছেন।^২ অবশ্য তিনিও এ বিষয়ে নিঃসন্দেহ নন। তিনি বিশ্বাস করেন- বিদ্যাসুন্দরের গোড়া কিন্তু গুজরাটের অনহিলপতনে ইংরেজি ১১ শতকে। সেখানে বিলহন নামে একজন কাশ্মীরি পণ্ডিত রাজার মেয়েকে লেখাপড়া শিখাইতেন, ক্রমে তাঁহাদের প্রণয় সম্পর্ক হয় এবং আরও কিছু সম্পর্ক হয়। রাজা টের পাইয়া তাহাকে মারিয়া ফেলিবার আদেশ করেন। সেই সময় তিনি ৫০টি কবিতা রচনা করেন, সেই পঞ্চাশটি কবিতার নাম 'চৌর পঞ্চাশিকা'।^৩

^১ বিবৃত আলোচনার জন্যে মৎসম্পাদিত মধুমালতীর ভূমিকা দ্রষ্টব্য।

^২ বিদ্যাসুন্দর বররুচি প্রণীত, হরপ্রসাদ শাস্ত্রী সম্পাদিত।

^৩ মুখবন্ধ : বলরাম কবিশেখর রচিত কালিকামঙ্গল-চিন্তাহরণ চক্রবর্তী সম্পাদিত।

অধ্যাপক শৈলেন্দ্রনাথ মিত্রও বররুচিকে বিদ্যাসুন্দর কাব্যের আদি রচয়িতা সাব্যস্ত করেছেন।^১ এ কাব্যের কতগুলো শ্লোকের সঙ্গে জীবানন্দ বিদ্যাসাগর সংকলিত ‘কাব্য সংগ্রহের’ তৃতীয় খণ্ডে ধৃত বিদ্যাসুন্দর উপাখ্যানের শ্লোকগুলোর মিল রয়েছে।^২ আবার উক্ত কাব্যসংগ্রহের প্রথম খণ্ডের চৌর-পঞ্চাশিকা ও ২য় খণ্ডের খণ্ডিত বিদ্যাসুন্দর কাহিনীর শ্লোকগুলো একত্র সংগৃহীত হয়ে ঈশান চন্দ্র ঘোষের প্রকাশনায় ১৯৭২ খ্রীস্টাব্দে ‘বিদ্যাসুন্দর’ নামের গ্রন্থকারে প্রকাশিত হয়। কবি রামপ্রসাদের গ্রন্থাবলীর সম্পাদক নন্দলাল দত্ত ভূমিকায় একটি সংস্কৃত বিদ্যাসুন্দর গ্রন্থের উল্লেখ করেছিলেন। উক্ত গ্রন্থের বিষয়বস্তু অধ্যাপক মিত্রের বিদ্যাসুন্দর উপাখ্যানের অনুরূপ। অধ্যাপক মিত্রের গ্রন্থের শ্লোক সংখ্যা ৫৪৫ এবং ঈশান ঘোষের বিদ্যাসুন্দরের বা কাব্য সংগ্রহের, বা রাম তর্কবাগীশের কাব্যসন্দীপনীর বিদ্যাসুন্দরের শ্লোক সংখ্যা ৫৪টার অধিক নয়।^৩ সুতরাং আমরা অধ্যাপক শৈলেন্দ্রনাথ মিত্রের ‘বিদ্যাসুন্দর উপাখ্যান’কে পূর্ণাঙ্গ বলে মেনে নিতে পারি। এবং এভাবে বিদ্যাসুন্দর কাহিনীর আদি রচয়িতা কোন এক বররুচি বলেও প্রমাণিত হচ্ছে।

কিন্তু এ বিদ্যাসুন্দর কাহিনীর ভিত্তি হচ্ছে চৌর-পঞ্চাশিকা বা চৌর-পঞ্চাশৎ নামক ৫০টি শ্লোক সমষ্টি। উক্ত শ্লোকগুলোর রচয়িতা হরপ্রসাদ শাস্ত্রীর মতে কবি বিলহন, রাম তর্কবাগীশের মতে নায়ক সুন্দর নিজে এবং অন্য অনেকের মতে চৌর নামক কবি। এ বিভ্রান্তির অন্যতম কারণ এই যে ‘চৌর’ পঞ্চাশিকা বিদ্যাসুন্দরকাহিনী নিরূপেষ শ্লোক হলেও বররুচির কাব্যে ওগুলো উক্ত কাব্যের অঙ্গরূপ কল্পিত হয়েছে; ফলে ‘চৌর পঞ্চাশিকা’ বিদ্যাসুন্দর উপাখ্যানেরই অন্য নাম রূপে ধারণা হয়ে গেছে। বিলহন কাহিনী ও সাদৃশ্যবশত ‘চৌর পঞ্চাশৎ’ এর অন্তর্গত হয়ে পড়েছে।

পঞ্চাশতের চৌর-কবি ঐতিহাসিক ব্যক্তি ছিলেন। তিনি বাঙালী কবি জয়দেবের সমসাময়িক ছিলেন। “ইহার নাম বহু সুভাষিতের সহিত সংযুক্ত দেখিতে পাই। জয়দেব তাঁহার “প্রসন্ন রাঘব” নাটকের প্রারম্ভে চৌর-কবি সম্বন্ধে প্রশস্তি করিয়াছেন।”^৪

বিলহন বা বিলহনও ঐতিহাসিক ব্যক্তি। তিনিও কবি ছিলেন এবং তাঁর সম্বন্ধেও রাজকন্যার সঙ্গে প্রণয়ঘটিত কাহিনী দাক্ষিণাত্যে প্রচলিত রয়েছে। নানা কারণে মনে হয় বিলহন কাব্য, চৌর-পঞ্চাশিকা এবং বিদ্যাসুন্দর কাহিনীর প্রচার ও প্রসার বাঙলাদেশেই বিশেষভাবে হয়েছিল, এ সম্পর্কে ব্রজেন্দ্রনাথ বন্দ্যোপাধ্যায় ও সজনীকান্ত দাস যা বলেছেন তা প্রণিধানযোগ্য :^৫

‘কল্প রচিত বিদ্যাসুন্দর ছাড়া (এটি সত্যপীর মাহাত্ম্যজ্ঞাপক) বাংলা ভাষায় রচিত প্রায় সকল বিদ্যাসুন্দর কালিকামঙ্গলের অন্তর্গত কাব্য এবং কালী মাহাত্ম্য প্রচার কল্পে রচিত। বিদ্যাসুন্দর উপাখ্যানম্ পুথিতে সূত্রপাতেই “ওঁ নমঃ কালিকায়ৈ” লিখিত আছে এবং তৃতীয় শ্লোকে গ্রন্থকার কালীকে তাঁহার কুলদেবতা বলিয়া উল্লেখ করিয়াছেন। কালিকামাহাত্ম্য এক

^১ *Proceeding of 2nd Oriental Conference, pp. 215-20.*

^২ *বলরামের কালিকামঙ্গল-ভূমিকা।*

^৩ *মিদিবনাথ রায় প্রদত্ত পরিচিতি অনুসরণে ভারতচন্দ্রের গ্রন্থাবলীর (সম্পাদক ব্রজেন্দ্রনাথ বন্দ্যোপাধ্যায় ও সজনীকান্ত দাস লিখিত) ভূমিকা (২য় ভাগ)।*

^৪ *ভারতচন্দ্র গ্রন্থাবলী; (২য় ভাগ) ভূমিকা ব্রজেন্দ্রনাথ বন্দ্যোপাধ্যায় ও সজনীকান্ত দাস।*

^৫ *ভারতচন্দ্র রচনাবলী*

বঙ্গদেশেই বিশেষভাবে প্রচারিত হইয়াছিল, ভারতবর্ষের অন্যত্র আবঙ্গালীদের মধ্যে কালী সাধনা বিরল। বাংলার বাহিরে কালী মাহাত্ম্য প্রচারক কোনও কাব্যই দৃষ্ট হয় না। বিদ্যাসুন্দর কাহিনীও অন্যত্র প্রসার লাভ করে নাই। বরকচির বিদ্যাসুন্দর কাব্যও বাংলাদেশেই অবস্থিত হইয়াছে পুথিও বাংলা অক্ষরে লিখিত। সুতরাং আমরা নিঃসংশয়ে অনুমান করিতে পারি যে, সংস্কৃত বিদ্যাসুন্দর কাব্য কোনও প্রাচীন বাঙ্গালী কবিরই রচনা। গ্রন্থকারের নাম হয়ত বরকচি ছিল, না থাকিলেও তিনি গ্রন্থের প্রাচীনত্ব সম্পাদন করিবার জন্য উক্ত নাম ব্যবহার করিয়াছিলেন।^১

সুতরাং দেখা যাচ্ছে, বাঙলা বিদ্যাসুন্দর পাঁচালী বা গীতিনাট্যগুলোর আদি উৎস হচ্ছে বরকচির সংস্কৃত 'বিদ্যাসুন্দর উপাখ্যানম', এবং এটিই কোন কোন বাঙালী কবির কাছে চৌরের কাহিনী বা চৌর-পঞ্চাশিকা নামে পরিচিত ছিল। তিনি দেশের [চৌরের কাশ্মীর, বিহলনের দাক্ষিণাত্য অনহিলপত্তন এবং বাঙলা বর্ধমান] তিনটি কাহিনীর সাদৃশ্যবশত বিভ্রান্তির ফলে বিভিন্ন কবির মধ্যে দেশ ও নামগত কিছু কিছু পার্থক্য ঘটেছে। নিছক মানবীয় রোমান্স এ কাহিনীটিও মধ্যযুগের পরিবেশে কালিকামঙ্গলের আবরণে আত্মপ্রকাশ করেছে তবু জনসাধারণ একে মানবীয় প্রণয়কাহিনীরূপেই আশ্বাদন করত। তাই একজন মুসলিম কবিও বিদ্যাসুন্দর কাহিনীর মোহে আকৃষ্ট হয়ে কাব্যরচনা করেছিলেন। ইনি কবি শাহবারিদ খান [সাবিরিদ খান]।

এমনিতেই ভারতের প্রাচীনসাহিত্য ও রূপকথায় চুরি-বিদ্যা ও চুরি-কৌশল সম্বন্ধে নানা কথা ছড়িয়ে রয়েছে। চুরি-বিদ্যা অন্যান্য বিদ্যার মতো অর্জন সাপেক্ষ শাস্ত্র বলে পরিগণিত হত। এ শাস্ত্রে দু'খানি গ্রন্থের নাম— সম্মুখ কল্প ও চৌরচর্যা।^২

চুরির পূর্বে চোর কর্তক কালীপূজার কথা 'চেতন্য ভাগবতে' আর ধর্মমঙ্গলেও উল্লিখিত আছে। চোরের মতো সুন্দরের বিদ্যাবিহারে গমন সম্বলিত কাহিনী তাই বোধ হয় কালিকামঙ্গলের অন্তর্ভুক্ত হয়েছে। বিদ্যাসুন্দরের চৌদ্দজন কবির কাব্য এ পর্যন্ত আবিষ্কৃত হয়েছে : দ্বিজ শ্রীধর, শাহবারিদ খান, কঙ্ক, কৃষ্ণ, রাম, প্রাণরাম, বলরাম, গোবিন্দদাস, ভারতচন্দ্র, রাধাকান্ত, রামপ্রসাদ, কবীন্দ্র, মধুসূদন চক্রবর্তী, মদন দত্ত ও নিধিরাম প্রমুখ। এঁদের মধ্যে অনেকেই আঠারো শতকের কবি।

বিদ্যাসুন্দরের চারজন কবির আবিষ্কর্তা আবদুল করিম সাহিত্যবিশারদ। এ চারজনের মধ্যে দ্বিজ শ্রীধর গৌড়ের সুলতান ফিরোজ শাহর (১৫৩২-৩৩) আদেশের তাঁর কাব্য রচনা করেন। গোবিন্দদাস [মুনি অক্ষর বাণ শশী শক পরিমিত। এই কালে রচিত কালিকা-চণ্ডীর গীত।] ১৫১৭ শকে অর্থাৎ ১৫৯৫ খ্রীস্টাব্দে কালিকামঙ্গল রচনা করেন। নিধিরাম আচার্য [শকাব্দ ষোড়শ শতক জলনিধি বসু সময়ে] ১৬৭৮ শকে অর্থাৎ ১৭৫৬ খ্রীস্টাব্দে রচনা করেন বিদ্যাসুন্দর কাহিনী। শাহবারিদ খানের সঠিক সময় পাওয়া যায়নি। অপর কবি কৃষ্ণরাম তাঁর 'কালিকামঙ্গল' সম্ভবত ১৬৭৬-৭৭ খ্রীস্টাব্দে রচনা করেন।

অরং সাহা ক্ষিতিপাল রিপূর উপরে কাল
রামরাজ সর্বজনে বলে
নবাব শায়েস্তা খাঁ অধিকারী সাত গাঁ
বহু সরকার করতলে।

^১ বাংলা মঙ্গল কাব্যের ইতিহাস : আওতায ভট্টাচার্য, ৪৬২ পৃষ্ঠা।

সারাসাসনের নেত্র ভীমান্ধি বর্জিত মিত্র
তেজিয়া ঋষির পক্ষ তবে ।
বিধুর মধুর ধাম রচনাতে কহিলাম
বুঝ শক বিচারিয়া সভে ।।

এর থেকে দীনেশচন্দ্র ভট্টাচার্য ১৫৯৮ শকাব্দ বা ১৬৭৬-৭৭ খ্রীস্টাব্দ পেয়েছেন। আর আন্ততোষ ভট্টাচার্যের মতে রচনাকাল ১৫৮৬ শক বা ১৬৬৪ খ্রীস্টাব্দ।

সুতরাং দেখা যাচ্ছে, দ্বিজ শ্রীধর কবিরাজই বাঙলা বিদ্যাসুন্দর কাহিনীর আদি রচয়িতা। সাহিত্যবিশারদ শ্রীধরের দুটো খণ্ডিত পুথি পেয়েছিলেন, একটায় নয় পাতা ও অপরটায় একপাতা মাত্র ছিল। শা'বারিদ খানের পুঁথিতেও উভয় পৃষ্ঠায় লেখা আটটি মাত্র পাতা আছে। শা'বারিদ খানের অপর দুটো খণ্ডিত কাব্য 'রসুল বিজয়' আর 'হানিফার দিগ্বিজয়' তেও রচনার তারিখ নেই।^২

২. দ্বিজ শ্রীধর কবিরাজ

দ্বিজ শ্রীধর কবিরাজ ফিরোজ শাহর আদেশে তাঁর গ্রন্থখানি রচনা করেন। সুতরাং ফিরোজ শাহ আর কিছু না হোক, পিতামহ আলাউদ্দিন হোসেন শাহ ও পিতা নুসরত শাহর মতো কলারসিক এবং পিতৃ-পিতামহের মতো বাঙলা ভাষা ও সাহিত্যের অনুরাগী ছিলেন।

আবদুল করিম সাহিত্যবিশারদ সংগৃহীত পুঁথি দু'খানি খণ্ডিত হওয়ায় শ্রীধরের কাব্যের কি নাম ছিল তা জানা যায় না, তবে কালিকারঞ্জে রাজারামের পুত্রসন্তান লাভ থেকে নিঃসন্দেহে বলা যায় যে, এ শ্রেণীর অন্যান্য কাব্যের মতো এ কাব্যেরও নাম ছিল কালিকামঙ্গল।

এ কাব্যখানি গীতিনাট্যের আকারে রচিত। এতে অনেক ভাগ আছে। একজন পাত্র প্রবেশ করে তার পরিচয় ও বক্তব্য বলে যাচ্ছে—এ ধরনে লিখিত। কবি সংস্কৃত ভাষায় পাত্র-ও দৃশ্য পরিচিতি দিয়েছেন। একে একথায় 'নেপালে বাংলা নাটকের প্রথম নাটক কাশীনাথের 'বিদ্যাবিলাপ' নাটকের অনুরূপ রচনা বলে অভিহিত করা চলে। শা'বারিদ খানের বিদ্যাসুন্দরও একরূপ রচনা এও আমাদের আলোচ্য 'বিদ্যাসুন্দর' পুঁথিঘরের প্রাচীনতার সাক্ষ্য দেয়। কবি গ্রন্থ রচনার কারণ স্বরূপ বলেছেন :

সাবধান নর লোক পায় যেন মতে ।

দেশীভাষে পদবন্ধে গাহি পরাকৃতে ।।

এখানে লক্ষণীয় যে, ষোলশতকের প্রথম ভাগেও আমাদের দেশীভাষা বাঙলা 'প্রাকৃত' নামে অভিহিত হত।

শ্রীধর যখন ফিরোজ শাহর আদেশের কাব্য রচনায় ব্যাপ্ত, তখনও ফিরোজ যুবরাজ মাত্র, যদিও মধ্যে মধ্যে তিনি ফিরোজকে 'রাজা' এবং 'সাহা' বলে উল্লেখ করেছেন "

ক. শ্রীপেরোজ সাহা বিদিত যুবরাজ ।

কহিল পঞ্চালী ছন্দে ছিরি কবিরাজ ।।

^২ মৎসম্পাদিত শা'বারিদ খানের গ্রন্থাবলীর ভূমিকা দ্রষ্টব্য।

খ. রাজা শ্রীপেরোজ সাহা বিনোদ সুজান।

দ্বিজ ছিরিধর কবিরাজ পরমাণ।।

ফিরোজ শাহ (১৫৩২-৩৩ খ্রীঃ) কয়েক মাস মাত্র রাজত্ব করেছিলেন। সুতরাং নিঃসন্দেহে অনুমান করা চলে যে, ফিরোজ শাহ পিতার রাজত্বকালে (১৫১৯-৩২ খ্রীঃ) দ্বিজ শ্রীধর কবিরাজকে দিয়ে কালিকামঙ্গল রচনা শুরু করিয়েছিলেন। কবি শ্রীধর তাঁর পৃষ্ঠপোষকের প্রতি বিগলিত চিন্ত ছিলেন, তাই আমাদের আলোচ্য আট পাতার খণ্ডিত পুথিতেও আমরা নয়টা ভণিতা পাচ্ছি। কবি ফিরোজ শাহর সভাকবি না হলে ওধু রাজভক্তি প্রদর্শনের জন্যে কখনো সব ভণিতায় ফিরোজ শাহর নামোল্লেখ করতেন না। সম্ভবত 'কবিরাজ' ফিরোজ শাহ প্রদত্ত উপাধি।

যুবরাজ ফিরোজ তাঁর পিতা নুসরত শাহর মতো যুবরাজ থাকাকালে চট্টগ্রামে আগমন করেছিলেন কিনা তা কোন সূত্রে জানা যায়নি। কাজেই দ্বিজ শ্রীধরের পুথি চট্টগ্রামে পাওয়া গেলেও আমাদের অনুমান করতে হবে যে, শ্রীধর কবিরাজ গৌড়েই যুবরাজের সভাকবি ছিলেন। অন্য পুথি অবিকৃত না হওয়া পর্যন্ত শ্রীধর সম্বন্ধে আর কিছু জানবার উপায় নেই। আমাদের বিশ্বাস, শা'বারিদ খান দ্বিজ শ্রীধরের সমকালীন ব্যক্তি। উভয়ের 'বিদ্যাসুন্দর'ই অনুবাদ কাব্য।

উভয়ের উপাখ্যানে ঐক্য এত বেশি যে দুটো কাব্য যে একই কাব্য অবলম্বনে রচিত তা দ্বিধাহীন চিন্তে বলা যায়। কবিদ্বয় মূল কাব্যের প্রায় আক্ষরিক অনুবাদ দিতে প্রয়াস পেয়েছেন।

উভয়ের কাব্য-কাহিনী নাট্যাকারে বর্ণিত হয়েছে। শা'বারিদ খান একটি ভণিতায় স্পষ্টভাবে তাঁর রচনাকে গীতিনাট্য বলে উল্লেখ করেছেন। যথা :

শা'বারিদ খানে ভূমি বিজ্ঞ জন স্থানে
অশুদ্ধ দেখিলে পদ শুধিবা যতনে।।
এ নাট্যগীতিতে তাল না করিবা ভঙ্গ।
এক মনে সুনিলে বাড়িবে মনোরঙ্গ।

এতে মনে হয়, আদিত্যে 'বিদ্যাসুন্দর' উপাখ্যান গীতিনাট্যরূপে প্রচলিত ছিল। অথবা এ উপাখ্যান অবলম্বনে রচিত কোন অজ্ঞাত সংস্কৃত নাটকই তাঁদের কাব্যের উৎস ছিল।

উভয় কাব্যের কুশীলব পরিচিতি, দৃশ্য-সংকেত ও বক্তব্যের মর্ম সংস্কৃতেই প্রদত্ত হয়েছে। প্রতি দৃশ্যের বা সর্গের শীর্ষে সংস্কৃত শ্লোক রয়েছে। কিন্তু উভয় কাব্যের সংস্কৃত্যাংশে বিশেষ অনৈক্য নেই। এতে মনে হয়, সংস্কৃত শ্লোকগুলো কবিদ্বয়ের সুরচিত নয়। উভয়ের শ্লোকে পুরোপুরি মিলও নেই। মনে হয়, আদর্শ সংস্কৃত গ্রন্থের সর্গশীর্ষের শ্লোকগুলো তাঁরা ইচ্ছামত পরিবর্তন করেছেন। বাঙলা গ্রন্থে সর্গশীর্ষে বিষয় বা বক্তব্যের মর্মনির্দেশক সংস্কৃত শ্লোক উদ্ধৃত করা একটি প্রাচীন রীতি। শ্রীকৃষ্ণকীর্তনে আমরা অনুরূপভাবে শ্লোক উদ্ধৃতি দেখতে পাই। উনিশ শতকের বাঙালী সাহিত্যিকদের কেউ কেউ তা-ই করেছেন।

শ্রীধরের কাব্যে চৌর-কাহিনীর উল্লেখ আছে, শা'বারিদের কাব্যে নেই। শ্রীধরের ভাষা সরল, বর্ণনভঙ্গী স্বজ, বর্ণনা কিছু সংক্ষিপ্ত।

আর শা'বারিদের ভাষা শালীন, বিশেষ বৈদগ্ধ্যাশ্রিত এবং গতিশীল। বর্ণনভঙ্গী রসাল ও বর্ণনা কিছু দীর্ঘায়িত।

শ্রীধরের ভাষার প্রাচীনতা বা সংস্কৃতানুগত্য কম, পঞ্চাশত্রে শা'বারিদের ভাষা সংস্কৃতানুগ ও প্রাচীনতার পরিপোষক। উপামা ও অপরাপর অলঙ্কার প্রয়োগে শা'বারিদ খান শক্তির পরিচয় দিয়েছেন, কিন্তু শ্রীধরের সে শক্তি বিরল।

শা'বারিদ খান বিভিন্ন ছন্দ প্রয়োগেও কাব্যে রস-বৈচিত্র্য দান করেছেন। কিন্তু শ্রীধর কবিরাজের কাব্যে ছন্দ-বৈচিত্র্য তেমন নেই। শা'বারিদ খান বৈদম্ব্যপ্রিয় কবি। শ্রীধরের কাব্যেও কবিত্বের প্রভা দুর্লভ্য নয়। শ্রীধরের কাব্যের সর্গ-শীর্ষে রাগ-রাগিণীর নাম আছে। শা'বারিদের কাব্যে নেই।

শা'বারিদ খানের কাব্যে 'কালিকামঙ্গল'।

তবে, এ নাট্যগীতিতে তাল না করিবা ভঙ্গ।
এক মনে গুনিলে বাড়িবে মনোরঙ্গ।।

মুসলমান কবি যে রোমাঞ্চ হিসেবেই এ কাহিনী রচনা করেছেন— কালিকার প্রসাদের কামনায় নয়, তা এ ভণিতা থেকেই স্পষ্ট। হিন্দু কবি হলে ধন, পুত্র বা মোক্ষ লাভের লোভ দেখাতেন।

বিদ্যাসুন্দর কাব্যে সেকালের সমাজ-সংস্কৃতির কিছু খবর মেলে। হিন্দু সমাজে সেবায়, দানে ও ব্রতপালনে লোকের উৎসাহ ছিল। সুন্দরকে ত্রার বছর বয়েসে 'অজ্ঞানের জ্ঞান হেতু হাতেখড়ি দিল' আর পাঁচ বছর বয়েসে বিদ্যাকে 'গুরুস্থানে সমর্পণ কৈল।' বিতর্ক প্রতিযোগিতার মাধ্যমেই বিদ্বানের জ্ঞানের পরীক্ষা হত। রাজ-রাজদার সমাজে 'স্বয়ম্বর' প্রথা চালু ছিল। মালিনীরা ছিল কুটনী। তারা মুন্দের সঙ্গে প্রেমও করত ফেরী।

৩. শাহবারিদ খান ও শ্রী সাবিরিদ খান

আধুনিক কাগজে লিখিত শা'বারিদ খান ভণিতায় চট্টগ্রামের কুলীন পরিবারের পরিচয়জ্ঞাপক একটি 'পদবন্ধ' পেয়েছিলেন সাহিত্যবিশারদ। তা এরূপ :

আদ্য সৃষ্টি কহি জান গুন উপদেশ।
ভাটি মধ্যে বাইশ বাঙ্গালা চাটিগাঁ প্রধান দেশ।
হাওলা, দেয়াঙ্গি মৈষামুড়া কাঞ্চনা মহাম্মদপুর।
হাশিমপুর, বাজালিয়া এই আষ্ট শ্রী।
চক্রশালা বাঁধাইল রাজার নিজ বাড়ী।
তীরাতীরি গোলাগুলি সব গেল উড়ি।
কাঞ্চনা প্রহরী রৈল জমসের চৌধুরী।।
আলি মুন্দার, হাদু মুন্দার, বড়াইয়া মুন্দার ভাই।
ফরমানী মুন্দার পাইল জমিজুড়ি যাই।।
আলি মুন্দার হাদু মুন্দার বড়াইয়া মুন্দার ভং।
হাওলার নিমুন্দার করে নানা রং।
রাজা দিল খোঁআঝাগিরি উজির দিল বাজী।
তের ঘর খোঁআঝার মাঝে সাত ঘর কাজী।।

জগদীশ মনোহর তারা দুই ভাই।
 বর্ধমানী ছেগা পাইল গরুর মাংস খাই।।
 শঙ্খ নদীর দক্ষিণকূলে শঙ্খ নদীরে মোড়।
 সাধু খাঁ সাবেরিদ খাঁ তারা দুই ঘর।।
 মহর্ষ সকল জান রাজার সঙ্গে ছিল।
 সেই সব সকলেরে খোঁয়াঝা গিরি দিল।
 কহে হীন সাবেরিদ খাঁ এহার রহস্য।
 বচনে না ধরে যারে সে নহে মনুষ্য।।

উদ্ধৃত ছড়ায় কবির সমকালীন দক্ষিণ চট্টগ্রামের সম্ভ্রান্ত বংশাবলীর পরিচয় রয়েছে। উদ্ধৃতাংশের মর্ম এই : এক সময়ে পূর্ববঙ্গ ও আসামের কতকাংশ ভাটি নামে পরিচিত ছিল। এই ভাটি ছিল বাইশ পরগনায় বিভক্ত। কর্ণফুলীর পূর্ব-দক্ষিণ তীর থেকে রামু পর্যন্ত অঞ্চলের মধ্যে হাওলা (খরণদীপ), দেয়াঙ্গী (বড় উঠান প্রভৃতি গ্রাম), মৈষামুড়া (শঙ্খ নদের তীরস্থ গ্রাম), কাঞ্চনা (সাতকানিয়া থানার অন্তর্গত গ্রাম), মোহাম্মদপুর, হাশিমপুর (পটিয়া থানার অন্তর্গত গ্রাম) ও বাজালিয়া [সাতকানিয়া থানার অন্তর্গত গ্রাম] এই আটটি সমৃদ্ধ গ্রাম বা চাকলা অবস্থিত।

পটিয়া থানা থেকে দু'মাইল দূরে চক্রশালা গ্রাম। বিরুদ্ধ শক্তির আক্রমণ প্রতিরোধ করে এই চক্রশালাতেই আরাকান রাজ্যের চট্টগ্রামস্থ অধিকারের রাজধানী বা শাসনকেন্দ্র স্থাপিত হয়। কাঞ্চনায় জমশের চৌধুরী সীমান্ত-রক্ষী সেনানী নিযুক্ত হলেন। জামিজুড়ি চাকলায় গিয়ে (জামিজুড়ি গ্রাম এখনও বিদ্যমান) আলি মুন্সার, হার্দু মুন্সার ও বড়াইয়া মুন্সার- এই তিন ভাই মুন্সারী (মুহুন্সারী বা মজুমদারী) ফরমান লার্ড করেন। এই মুন্সারত্রয়ের চেয়ে হাওলা চাকলার নিমুন্সার ঐশ্বর্যে ও বিলাসিতায় শ্রেষ্ঠ ছিলেন। তিনি আরাকানরাজ কর্তৃক 'খোঁয়াঝা' খেতাবে বিভূষিত হন এবং আরাকানরাজমন্ত্রী-জীকে ঘোড়া উপহার দিয়ে সম্মানিত করেন। আরাকান রাজ্যান্তর্গত চট্টগ্রামে সরকারী 'খোঁয়াঝা' খেতাবধারী তেরোটি সম্ভ্রান্ত প্রতিপত্তিশালী জমিদারবংশ ছিল এবং এদের মধ্যে সাতটি কাজী পরিবার ছিল।^১

জগদীশ ও মনোহর ভ্রাতৃত্ব গোমাংস ভক্ষণ করে সমাজে পতিত হলে আরাকানরাজের কৃপায় 'বর্ধমানী ছেগা' (বড় মানী ছেগা-উচ্চ সম্মানজনক উপাধি) পেয়ে দেশে প্রতিষ্ঠা লাভ করেন।

শঙ্খনদের বাঁকের দক্ষিণ তীরে সম্ভ্রান্ত সাধু খাঁ ও শা'বারিদ খাঁ পরিবার দুটোর বাস।

যারা আরাকানরাজের পারিষদ ছিলেন, তাঁরা সবাই 'খোঁয়াঝা' উপাধি লাভ করেন। এ ইতিকথা যারা অবিশ্বাস করে, কবির মতে তারা 'মানুষ' নয়।

এ ছড়ায় অনেক ঐতিহাসিক তথ্য নিহিত রয়েছে। আলি মুন্সার, বড়াইয়া মুন্সার ও নিমুন্সার বংশীয়রা ও বংশখ্যাতি আজো বিদ্যমান। এঁদের অনেকের আভিজাত্য-গৌরবও

^১ চট্টগ্রামের একটি সুপ্রচলিত ছড়ায় আছে :

সাত ঘর কাজী তের ঘর ভুইয়া।

আর সব টেইয়া আর টুইয়া।।

এতে দেখা যায় 'সাত ঘর কাজী, তের ঘর খোঁয়াঝা বা ভুইয়ার অন্তর্গত নয়।

আজো অন্নান। আরাকানরাজ সম্রাট ও পদস্থ ব্যক্তিদের খোঁয়াঝা, পাঁঝা, সাদা, ছুয়ান, ঠাকুর, রোঁয়াঝা প্রভৃতি পদ বা উপাধি দান করতেন।

চক্রশালায় এক সময়ে আরাকান রাজ্যের রাজধানী ছিল। সেই সময়কার সম্রাট ব্যক্তিদের নাম এই ছড়াতে উল্লিখিত হয়েছে।

অতএব, এই ছড়ায় নিশ্চিতই মুঘল বিজয়ের পূর্বকার দক্ষিণ চট্টগ্রামের কথা বর্ণিত হয়েছে। বিশেষত :

চক্রশালা বাঁধাইল রাজার নিজ বাড়ী।

তীরাতির গোলাগুলি সব গেল উড়ি।।

এই চরণদ্বয় কোন প্রতিদ্বন্দ্বী শক্তির উপর আরাকানরাজের আত্মরক্ষামূলক যুদ্ধে জয়লাভের আভাস দান করেছে। সম্ভবত এটি সৈয়দ আলাউদ্দীন হোসেন শাহর চট্টগ্রাম বিজয়কালীন ঘটনার স্মারক।

ইতিহাস সূত্রে জানা যায় : ১৫১২ খ্রীস্টাব্দে ত্রিপুরারাজ ধন্যমাণিক্যের সহযোগিতায় গোঁড়ের হোসেন শাহর পুত্র নুসরত খান উত্তর চট্টগ্রাম দখল করেন, এর পরে কোন সময়ে নুসরত শাহ দক্ষিণ চট্টগ্রামও স্বল্পকালের জন্যে অধিকার করেন। ১৫১৭ সনে আরাকানরাজ দক্ষিণ চট্টগ্রাম আবার মুক্ত করেন। এবং এ সময়ে দক্ষিণ চট্টগ্রামে বর্তমান পটিয়া থানা থেকে দুই মাইল দূরে অবস্থিত চক্রশালায় আরাকানরাজ যতুন শাসনকেন্দ্র স্থাপন করেন। এবং এটি ১৫৮৬ সনে আরাকানরাজের উত্তর চট্টগ্রাম পুনঃবিজয় অবধি শাসনকেন্দ্র থাকে।^২

চক্রশালা পূর্বেও শাসনকেন্দ্র ছিল। বিভিন্ন সূত্রে জানা যায় ‘মহেশ’ রুদ্রের পৌত্র ভারত রুদ্র গোঁড়ের হাবশী আমলে (১৪৮৭-১৫০০ খ্রীঃ) চক্রশালায় স্বাধীন রাজ্য প্রতিষ্ঠা করেন। কিন্তু অনতিকাল মধ্যে আরাকানশক্তি কর্তৃক পরাজিত হয়ে সানুচর ও সপরিজনে বিতাড়িত হন।

এই চক্রশালা সাময়িকভাবে নুসরত কর্তৃক অধিকৃত হয়। ১৫১৭ খ্রীস্টাব্দে আরাকানরাজ কর্ণফুলীর তীর অবধি গোটা দক্ষিণ চট্টগ্রাম সম্ভবত স্বাধিকারে প্রাপ্ত হন। উদ্ধৃত চরণদ্বয়ে এ যুদ্ধের অথবা ১৫২২ খ্রীস্টাব্দে দেবমাণিক্যের দক্ষিণ চট্টগ্রাম অভিযানের আভাস দান করা হয়েছে বলেই আমাদের বিশ্বাস।

অতএব ১৫১৭ খ্রীস্টাব্দের পরে এবং ১৫৮৬ খ্রীস্টাব্দের পূর্বে কোন সময়ে এই ছড়া রচিত হয়েছিল বলে আমাদের নিশ্চিত বিশ্বাস। কিন্তু এই ছড়াকার ও কবি শাহ'বারিদ খান অভিনু ব্যক্তি কি-না বলা যাবে না। বিদ্যাসুন্দর কাব্যে শাহ'বারিদ খান যে আত্মপরিচয় দিয়েছেন তা এরূপ :

পিয়র মল্লিক সূত বিজ্ঞবর শাস্ত্রযুত,
উজিয়াল মল্লিক প্রধান।
তান পুত্র জিঠাকুর তিন সিক সরকার
অনুজ মল্লিক মুসা খান।।

^২ চট্টগ্রামের ইতিহাস (নবাবী আমল)- মাহবুব-উল আলম।

^৩ ক. পরাগলী মহাভারত-জগৎচন্দ্র ভট্টাচার্য বিদ্যাবিনোদ সংগৃহীত পুথি ও তৎসংগৃহীত শ্রীবাংসাচরিতম্। খ. চট্টগ্রামের ইতিহাস (পুরানা আমল) মাহবুব-উল-আলম। গ. মাসিক গৃহস্থ চতুর্থ বর্ষ, অষ্টম সংখ্যা, ঘ. বিত্তৃত্ত বিবরণের জন্যে দৌলত উজীর বাহরাম খানের লায়লী-মজনু কাব্যের ভূমিকা দ্রষ্টব্য।

রসেত রসিক অতি রূপে জিনি রতিপতি
 দাতা অগ্রগণ্য অর্ক সুত ।
 ধৈর্যবন্ত যেন মেরু জ্ঞানেত বাসব গুরু
 মানে কুরু ধর্মে ধর্মসুত ।।
 তান সুত গুণাধিক নানুরাজ মহল্লিক
 জগতে প্রচার যশ খ্যাতি ।
 তান সুত অল্পজ্ঞান হীন সাবিরিদ খান
 পদবন্ধে রচিত ভারতী ।।

এ থেকে বংশলতিকা এরূপ দাঁড়ায় : পিয়ার মল্লিক- উজিয়াল-মুসা-খান-নানুরাজ-সাবিরিদ খান ।

চট্টগ্রামে ফটিকছড়ি থানায় নানুপুর নামে এক গ্রাম আছে। স্থানীয় কিংবদন্তী -মতে নানুরাজার নামানুসারেই গ্রামের নাম নানুপুর হয়েছে। এ নানুরাজা কে- তা কেউ বলতে পারে না। তবে, নানুপুরবাসী এক পরিবার নানুরাজার বংশধর বলে পরিচয় দেন। কবি শা'বারিদ খানকেও তাঁদেরই পূর্বপুরুষ বলে দাবি করেন।

কবি মুসলমানী কায়দায় উর্ধ্বতন চার পুরুষের নামোল্লেখ করেছেন।

উক্ততাংশ থেকে জানা যায়, কবি মল্লিক উপাধি ধারণ করেন না। ঠাকুর উপাধি দৃষ্টে প্রমাণিত হয়, 'জিঠাকুর' আরাকান-রাজসরকারের অধীনেই 'সরকার' ছিলেন। 'ঠাকুর' উপাধি পেয়েছিলেন বলেই তাঁর নামের শেষে 'মল্লিক' লিখিত হয়নি। জিঠাকুর উপাধি মাত্র। তাঁর মুসলমানী নামটি বাছল্যবোধে উল্লিখিত হয়নি।

আমাদের পূর্ব-উদ্ধৃত ছড়ায় দক্ষিণ চট্টগ্রামের কথাই বর্ণিত হয়েছে। নানুপুর উত্তর চট্টগ্রামে অবস্থিত। জিঠাকুর আরাকান রাজকর্মচারী ছিলেন বলেই আমাদের বিশ্বাস। তাঁর পুত্র ও কবির পিতা নানুরাজার নামেই গ্রামের নাম নানুপুর রাখা হয়েছিল বলেই যদি মেনে নিই, তবে সিদ্ধান্ত করতে হয় যে, ১৫১২ খ্রীস্টাব্দে গৌড়ের সুলতান ও ত্রিপুরারাজ কর্তৃক যৌথভাবে উত্তর চট্টগ্রাম বিজিত হলে আরাকানরাজের পদস্থ কর্মচারী 'সরকার' জিঠাকুরের ভাইয়ের পৌত্র শা'বারিদ খান আরাকানীদের সঙ্গে দক্ষিণাঞ্চলে পালিয়ে যান এবং আরাকান অধিকারে সগৌরবে বাস করতে থাকেন। ছড়ায়ও আমাদের সিদ্ধান্তের অনুকূল কথা আছে। যেমন :

শঙ্খ নদীর দক্ষিণ কূলে, শঙ্খ নদীর মোড় ।
 মহর্ত সকল জ্ঞান রাজার সঙ্গে ছিল ।
 সেই সব সকলেরে খোয়াঝাগিরি দিল ।

'মহর্ত সকল জ্ঞান রাজার সঙ্গে ছিল'- এই পংক্তিটি বিশেষ অর্থগর্ভ। এতে রাজার দৃঃসময়ের মহত্ত্বগণ রাজার সহায়ও সঙ্গী ছিলেন বলে ইঙ্গিত করা হয়েছে। সহায়তার পুরস্কারস্বরূপ রাজা তাঁদের খোয়াঝা পদ বা উপাধি দান করেন। সম্ভবত ছড়াউক্ত শা'বারিদ খানই আমাদের কবি এবং তিনিই শঙ্খনদের বাক্যে বাড়ী তৈরি করে বসবাস করেন।

আর একটি ভণিতার দ্বারা (আমাদের অনুমিত পাঠ বিতণ্ডক হলে) এ অনুমান যথার্থ বলে ধারণা হবে। যথা :

সাবারিদ খানে ভণে মধুর পয়ার।

ওনিয়া রসঙ্গ [রসজ্ঞ?] জন হরিষ অপার।।

শেষ চরণের বিস্তৃত পাঠ যদি :

‘ওনিয়া রোসঙ্গ জন হরিষ অপার’ হয়, তবে কবি যে আরাকান রাজ্যান্তর্গত শজ্জ নদের বাঁকে ঘর করেছিলেন, তাতে কোন সন্দেহ থাকে না।

পূর্বেই বলেছি কবির পিতামহের ভাই জিঠাকুর আরাকান রাজকর্মচারী ছিলেন বলে আমাদের বিশ্বাস। অতএব ১৫১২ খ্রীস্টাব্দের পূর্বেই তিনি ও তাঁর ভ্রাতৃস্পুত্র নানু বর্তমান ছিলেন বলে ধরে নিতে হয়। নানুরাজার নামে যখন গ্রামের নাম হয়েছে, তখন ১৫১২ খ্রীস্টাব্দের পূর্বেই তিনি প্রসিদ্ধি অর্জন করেছিলেন বলে মানতে হবে। সম্ভবত ১৫১২ খ্রীস্টাব্দের পূর্বেই তাঁর মৃত্যু হয় এবং ১৫১২-১৭ খ্রীস্টাব্দের সংগ্রামকালে শা’বারিদ খান প্রৌঢ় বয়সের ছিলেন বলে মেনে নিতে বাধা নেই। কারণ, নানুপুরে তাঁর নামের একটি দীঘি আজো বিদ্যমান। এতে এ-ও মনে হয়, শা’বারিদ খান ১৫১২-১৭ খ্রীস্টাব্দের পূর্বে অন্তত একখানা কাব্য রচনা করেছিলেন। যে কোন দিক দিয়ে বিচার করা হোক না কেন, ১৪৮০ থেকে ১৫৫০ খ্রীস্টাব্দের মধ্যেই যে শা’বারিদ খান বর্তমান ছিলেন, সে বিষয়ে আমরা একরূপ নিঃসংশয়।

১৫৮৬ খ্রীস্টাব্দে আরাকানরাজ কর্তৃক উত্তর চম্পৈয়ম বিজিত হওয়ার পরেই সম্ভবত শা’বারিদ খানের বংশধরগণ পিতৃভূমি নানুপুরে গিয়ে বসবাস করতে থাকেন।

কবি শা’বারিদ কেবল পণ্ডিত ছিলেন না, তাঁর ছিল অসামান্য পাণ্ডিত্য-প্রীতি, অপ্রচলিত, দুর্লভ ও বিরল প্রযুক্ত শব্দের প্রতি তাঁর মেহ ছিল প্রায় অপ্রতিরোধ্য। বাঙলা সাহিত্যের অঙ্গনে এ বিষয়ে তাঁর সমমর্মিতা লক্ষ্য করি পদ্যকার গোবিন্দ দাসে ও উনিশ শতকের মধুসূদনে। সুন্দর করে বলার এক নাম যদি সাহিত্য হয়, তা হলে মানতে হবে ধ্বনিসৌন্দর্যই কাব্যের প্রধান উপকরণ, আর ধ্বনি-মাধুর্য সৃষ্টির জন্যে প্রয়োজন ধ্বনি-চেতনা, তথা সূচিত শব্দের সুবিন্যাস। এ ক্ষেত্রে তাঁর চেতনা ভারতচন্দ্রের মতো সামগ্রিক ছিল না। ভারতচন্দ্রে Diction ছিল নিখুঁত। একটা সামগ্রিক আঙ্গিক symmetry, সুরের harmony এবং অঙ্গ ও আত্মার একটি symphony রয়েছে তাঁর রচনায়। ছন্দে-সুরে-রসে-রূপে ও তাৎপর্যে একটি পূর্ণাবয়ব মায়ামূর্তি পাই ভারতচন্দ্রের কাব্যে। শা’বারিদ খানে পাই খণ্ড চেতনার সাক্ষ্য, দুর্লভ শব্দপ্রীতিতেই তাঁর প্রয়াস সীমিত। এ ব্যাপারে মধুসূদনের সঙ্গে তাঁর সাদৃশ্য থাকলেও মধুসূদনের মতো আঙ্গিক শিল্পচেতনা তাঁতে অনুপস্থিত। তবু ষোল শতকের এক বাঙালী কবির যুগ-দুর্লভ এ শব্দচেতনা ও অনন্য সৌন্দর্যে কাব্যিক কথা নির্মিতির এই সযত্ন প্রয়াস, আটপৌরে ভাষাকে নতুন অবয়ব দানের এই আগ্রহ, বিরল শব্দের বহুল প্রয়োগে কাব্যের লাভণ্য বৃদ্ধির এই উৎসাহ আমাদের বিস্মিত করে। শা’বারিদ খান রূপ-সাধক শিল্পী। কাব্যের আঙ্গিক পরিচর্যায় তাঁর প্রযত্ন, কাব্যদেহ নির্মাণে তাঁর বিরল উপকরণ-প্রীতি এবং অঙ্গসজ্জার ও রূপচর্চার প্রবণতা তাঁকে বিশিষ্ট করেছে। আমাদের কাছে গণনীয় ও স্মরণীয় হয়ে থাকবার পক্ষে তাঁর এই স্বাতন্ত্র্যই যথেষ্ট। আমাদের সাহিত্যের পাঁচালী কাব্যধারায় তিনিই প্রথম রূপসচেতন কবি-শিল্পী।

বাঙলা পাঁচালী কাব্যের শৈল্পিক ক্রম-উৎকর্ষ-ধারায় শা’বারিদ খানের দানের গুরুত্ব সবচেয়ে বেশি। কেননা তিনিই প্রথম কাব্যের ভাষাকে লৌকিক ও গ্রামীণ প্রভাবমুক্ত করে

শালীন ও শহুরে সাহিত্যের ভাষায় উন্নীত করতে প্রয়াসী হন। সংস্কৃত শব্দের বহুল প্রয়োগে রচনাকে বৈদগ্ধ্যাশ্রিত করার প্রয়াস তাঁর রচনাতেই প্রথম প্রত্যক্ষ করি। ষোল শতকের দৌলত উজিরে, সতেরো শতকের কাজী দৌলতে ও আলাউরে এবং আঠারো শতকের ঘনরামে ও ভারতচন্দ্রে কাব্যকলার উল্লেখ্য উৎকর্ষ ও বিকাশ সুলক্ষ্য হলেও পথিকৃতির গৌরব শা'বারিদ খানের। এঁর মতো সম্যক বাঈদগ্ধ্য-প্রীতি ছিল আরো দুজনের- একজন মধ্যযুগের পদকর্তা গোরিন্দ দাস, অপরজন উনিশ শতকের মাইকেল মধুসূদন দত্ত। এঁদের অনুসৃত রীতিকে ক্লাসিকরীতি বরতে হয়তো আপত্তি উঠবে না।

শাহ বারিদ খানের 'রসুলবিজয়' ও 'হানিফার দিখিজয়' কাব্য দুটো 'জঙ্গনামা' অধ্যায়ে আলোচিত হবে।

৪. লায়লী-মজনু উপাখ্যান

দৌলত উজির বাহরাম খান

কবির আত্ম-পরিচয় : কবি কিছু আত্মকথা বলেছেন তাঁর কাব্যের উপক্রমে। তাতে রয়েছে তাঁর পীর, পূর্বপুরুষ ও তাঁর নিজের কথা।

হামদ ও না'তের পরে পাই পীরের পরিচয়। পীর সাদর জাহাঁর পুত্র পীর শাহ জুনদ, তাঁর পুত্র পীর মুহম্মদ সৈয়দ। আর এঁরই পুত্র শাহ আসাউদ্দিন (আসহাবউদ্দীন) ছিলেন কবির পীর। কবির ভাষায় পীরের গুণপনা এরূপ :

সিদ্ধিক সমান জাহান হাতিম সমান দান
আসাউদ্দিন দয়াময়

এবং তাঁর নিবাসও ছিল ফতেয়াবাদে:

বঙ্গদেশ মনোহর তার মধ্যে শোভাকর
নগর ফতেয়াবাদ নাম
আসাউদ্দিন পীর নির্মল শরীর ধীর
তথ্যাত বসতি অনুপায়।

পীর-পরিচিতি এখানেই শেষ।

এর পরেই পাই কবির বংশ ও জন্মভূমি চট্টগ্রামের পরিচয়। কবির দেয়া বর্ণনা এরূপ :

পূর্বকালে নরপতি ভুবন বিখ্যাত অতি
আছিল হুসেন শাহাবর
তান রত্ন-সিংহাসন অতি মহা বিলক্ষণ
গৌড়েতে শোভিত মনোহর।
প্রধান উজির তান সুনাম হামিদ খান
তাহার গুণের অন্ত নাই।
অনুশালা স্থানে স্থান মসজিদ সুনির্মাণ
পুঙ্খনী দিলেক ঠাই ঠাই।-
আর, বাতুল আতুর যথ পালিলেস্ত অবিরত
দান ধর্ম করিলা বিশেষ।

তাঁর দানের খ্যাতি শুনে এবং জনপ্রিয়তা দেখে নৃপতির ঈর্ষা হল। তিনি হামিদেদের:

শনিয়া দানের ধ্বনি ক্রোধ হৈল নৃপমণি
ডাকাইয়া আনিলেস্ত তাএ।
এবং কেমত ধার্মিক সার একে একে সপ্তবার
তাহাকে বুঝিল পরীক্ষাএ।

সব পরীক্ষাই অলৌকিক ও অস্বাভাবিক। উজির হামিদ খান যখন সব কয়টি পরীক্ষায় উত্তীর্ণ হলেন, তখন গৌড়ের সুলতান হোসেন শাহ তাঁর :

দেখিয়া ধর্মের সাজ ভালবাসি মহারাজ
তাঁকে প্রসাদ করিলা দুই সিক।

এভাবে উজির হামিদ খান চট্টগ্রামে জায়গীর-স্বরূপ দুটো সিক (পরগনা) লাভ করে সেখানে চলে গেলেন। স্বদেশের মায়া-মুগ্ধ কবি চট্টগ্রামের এক মনোরম চিত্র তুলে ধরেছেন এ প্রসঙ্গে

নগর ফতেয়াবাদ দেখিয়া পুর এ সাধ
চাট্টিগ্রাম সুনাম প্রকাশ
মনোভাব মনোরম অমরাবতীর সম
সাধু সং অনেক নিবাস
লবণাষু সন্নিহিত কর্ণফুলী নদীতট
ভাঙে সাহা বদর আলাম।
আদেশিলা গৌড়েশ্বরে উজির হামিদ খানে
অধিকারী হৈতে চাট্টিগ্রামে।

সেখানে হামিদ খান :

আদ্য রূপে দান ধর্ম করিয়া পুণ্যের কর্ম
আনন্দে রহিলা সেই ঠাম।

এবং, তারপর,

অনুক্রমে বংশ কথ গত্রিলেস্ত এই মত
গৌড়ের অধীন (অদিন) হৈল দূর
চাট্টিগ্রামে অধিপতি হইলেস্ত মহামতি
নৃপতি নেজাম শাহা সুর।
একশত ছত্রধারী সভানের অধিকারী
ধবল অরুণ গজেশ্বর।।
রজনী সময় হৈলে মাণিক্য প্রদীপ জ্বলে
অপরূপ পুরীর অন্তর।

এই নৃপতি নিয়ামশাহর দরবারেই কবির পিতা মুবারক খান ও কবি বাহরাম 'দৌলত উজির' ছিলেন। কবি তাঁর আত্মপরিচয় এভাবে দিয়েছেন :

এই যে হামিদ খান আদ্যের উজির জান
 তাহান বংশেত উৎপত্তি ।
 মোবারক খান নাম রূপে শুণে অনুপাম
 সদাএ ধর্মেত তান মতি ।
 তান প্রতি মহীপাল খেতাব অধিক ভাল
 স্থাপিলেস্ত দৌলত উজির
 সাধু সৎলোক সঙ্গে জনম বঞ্চিত রঙ্গে
 ধর্মরূপে তেজিল শরীর ।
 তান পুত্র ক্ষুদ্র-সম নাম মোর বহরম
 মহারাজ গৌরব অন্তরে ।
 পিতাহীন শিশু জ্ঞানি দয়া ধর্ম মনে মানি
 বাপের খেতাব দিলা মোরে ।

‘চৌতিশা’য় কবি আর একবার নিয়ামের নাম করেছেন :

খ্যাত বিখ্যাত অতি ক্ষমাকর মুখজ্যোতি
 ক্ষিতিত নেজাম শাহা বীর ।

অন্যত্র ‘শাশান বৈরাগ্য’ সর্গে কবি নিজের সম্বন্ধে বলেছেন^১

এবে মোর বৃদ্ধকাল হৈল উপস্থিত
 যুক্তি সুদ্ধি পরাক্রম সকল ক্ষতিত ।

উপরের উদ্ধৃতি থেকে জানা যাচ্ছে, কবির পূর্বপুরুষ হামিদ খান গৌড়ের সুলতান সৈয়দ আলাউদ্দিন হোসেন শাহর (১৪৯৩-১৪১৮ খ্রীস্টাব্দে) প্রধান সচিব ছিলেন। হোসেন শাহ হামিদ খানকে চট্টগ্রাম অঞ্চলে দুই ‘সিক’^২ জমি পরগনা জায়গীর দিয়ে চট্টগ্রামের ‘অধিকারী’ তথা প্রশাসক নিযুক্ত করলে হামিদ খান চট্টগ্রামের স্থায়ীভাবে বাস করতে থাকেন। তারপর গৌড়ে কয়েক বংশীয় রাজার শাসনের অবসানে চট্টগ্রাম হল গৌড়ের অধীনতামুক্ত এবং নিয়াম শাহ হলেন চট্টগ্রামের নৃপতি। অবশ্য ‘ধবল অরুণ গজেশ্বর’ আরাকানরাজ রইলেন ‘সভানের অধিকারী’। অর্থাৎ চট্টগ্রাম তখন আরাকান অধিকারে এবং নিয়াম চট্টগ্রামে আরাকানরাজের নিযুক্ত বা স্বীকৃত শাসনকর্তা। চট্টগ্রামের পূর্বতন শাসক হামিদ খানের বংশধর মুবারক খানকে নিয়াম করলেন তাঁর দৌলত উজির আর মুবারকের মৃত্যুর পর তাঁর পুত্র বাহরাম খান পেলেন সে-পদ। নিয়ামের আমলে নগর ফতেয়াবাদ ছিল রাজধানী। রাজধানীর নামানুসারে গোটা চট্টগ্রামও হত ফতেয়াবাদ নামে অভিহিত। ‘লায়লী-মজনু’ রচনাকালে দৌলত উজির বার্ষিক্য সীমায় উপনীত। গ্রন্থসূত্রে এর অধিক কিছু মেলে না। দৌলত উজিরের আবির্ভাবকাল নিয়ে বিদ্বানদের মধ্যে মতানৈক্য রয়েছে।

ক. ফতেয়াবাদের ঐতিহ্য পাই হোসেন শাহর পুত্র নুসরত শাহ নির্মিত ইমারত ও দীঘি প্রভৃতির শ্রুতিস্মৃতিতে আর কোটের বাড়ির (ফতেয়াবাদে ও জাঁহাপুরে কাঠিরহাট ‘কোটেরহাট’-এর বিকৃত রূপ) ধ্বংসাবশেষে ও কবি বাহরামের উক্তিতে। হোসেন শাহর চট্টগ্রাম বিজয়ের ফলেই যে ফতেয়াবাদ নামের উদ্ভব হামিদুদ্দাহ খানের^৩ এই ধারণায় হয়তো ভুল নেই।

^১ আহাদীসুল খাওয়াননী- J. Long. JASB. 1872

পরাগলপুর, কাঠগড়, জাফরাবাদ ও মাহমুদাবাদের খবর মেলে পরাগলী মহাভারতে, বাহরিস্তান গয়বীতে, কবি দৌলত উজীরের কারবালা সম্বন্ধীয় জঙ্গনামায় ও জনশ্রুতিতে।

খ. শত্ৰুদের দক্ষিণ তীর অবধি অঞ্চল সাধারণভাবে ১৭৫৬ সন পর্যন্ত আরাকান শাসনে ছিল। এ জন্যে এ অঞ্চলের অধিবাসীরা আজো রোসাকী বা রোসাই (রোয়াই) নামে পরিচিত।

শত্ৰুর ও কর্ণফুলীর মধ্যে স্থিত অঞ্চলের শাসনকেন্দ্র ছিল চক্রশালা। কর্ণফুলীর মোহনার অদূরে চট্টগ্রাম শহরের দক্ষিণ-পশ্চিমে কর্ণফুলীর অপর তীরে ছিল দেয়াঙ বা দেবগ্রাম। এখানে ছিল পর্তুগীজদের ঘাটি, গির্জা ও বাণিজ্যবন্দর।

গ. আরাকানরাজেরা চট্টগ্রাম অঞ্চলের সর্বাঙ্গিক কর্তৃত্ব মুসলিম উজীর বা শাসকের হাতে ছেড়ে দিয়ে নিশ্চিন্ত থাকতেন— এমন ধারণা অযৌক্তিক। মাহবুব-উল-আলমের মতে ‘বসউপিউর আমল’ (১৪৫৯-৮২) থেকেই রাজার চট্টগ্রামস্থ অধিকার ‘রক্ষার জন্য রাজার কোন ভ্রাতা বা বিশ্বস্ত আত্মীয় নিযুক্ত হইতে থাকে।’ কাজেই মেঙ রাজাগীর (সলীমশাহ ১৫৯৩-১৬১২) আমলের আগেই এ-প্রথা চালু ছিল। তবে মুসলিম উজীরই সম্ভবত প্রত্যক্ষভাবে শাসনক্ষমতা পরিচালনা করতেন।

আলোচ্য সময়ে আমরা চট্টগ্রাম শহরকেন্দ্রে প্রশাসক রূপে পাই রাস্তি খানের অপর পুত্র মিনা খানের পৌত্র হামযা খান মসনদ-ই-আলাকে (মৃত্যু ১৫৫৫), তাঁর পুত্র নুসরত খানকে (মৃত্যু ১৫৬৭), তাঁর সন্তান জালাল খানকে (মৃত্যু ১৫৮৩) ও তাঁর পুত্র ইব্রাহিম খানকে (আরম্ভ ১৫৮৬)।

এঁরা গোঁড় আরাকান ও ত্রিপুরা রাজ্যের অধীনে (চট্টগ্রাম যখন যার অধিকারে থাকত) উজীর ছিলেন।

ঘ. নিয়ামপুর পরগনা ১৬১৬ সনে মুঘল সেনাপতি কাসিম খানের চট্টগ্রাম অভিযানের পূর্বেও ছিল, তা’ বাহরিস্তান গয়বী থেকে নিঃসংশয়ে জানা যায়। কাসিম খানের আরাকান রাজ্য আক্রমণ প্রসঙ্গে ‘বাহরিস্তান গয়বী’তে নিয়ামপুর সম্বন্ধে বলা হয়েছে : The imperial army (Mughal) halted at the village Nizampur which was a possession of the Mags. The Mags being besieged, its Zamindar accepted the vassalage and came to see ‘Abdun Nabi and the aforesaid village was occupied by the imperial army In spite of the fact that the Zamindar of Nizampur had transferred his allegiance from the Mags to the imperialist, that place went out of possession the village of Nizampur yielding revenue of six hundred rupees (per annum) has also been given up and left in a state of confusion” এই নিয়ামপুর এবং এই সূত্রে বর্ণিত কাঠগড় আজও বর্তমান।^১ নিয়ামপুর একটি পরগনা— মীরেরসরাই থানা পুরো আর সীতাকুণ্ড থানার অধিকাংশ এলাকা এবং অন্তর্ভুক্ত এবং কাঠগড় বাড়বকুণ্ড রেল স্টেশনের নিকটবর্তী একটি গ্রাম। এর থেকে বোঝা যাচ্ছে, ষোল শতকে কোনো এক ধনী ও মানী নিয়াম চট্টগ্রামে ছিলেন, যার নামে হয়শ’ রাজবংশের একটি পরগনা সৃষ্টি হয়েছিল। ইনি যদি শেরশাহের ভাই কিংবা গুরুবংশীয় নাও হন, তবু একজন সামন্ত যে ছিলেন তাতে কোন সন্দেহ নেই। কারণ উদ্ধৃতাংশে সতেরো শতকের

^১ এ তথ্য আমার দৃষ্টিগোচর করেছিলেন শেখ এ. টি. এম. রহুল আমিন।

M. I. Borah, Vol. pp 407, 409, Vol II, p 842

গোড়ার দিকেও পরগনার একজন জমিদার বা সামন্ত পাওয়া যাচ্ছে। বাহরাম যদি আলোচ্য নিয়ামের দৌলত উজীর হন, তা হলে আমাদের নিরূপিত কবির আবির্ভাবকালের সঙ্গে কোন বিরোধ ঘটে না।

ঙ. আমরা দৌলত উজীর বাহরাম খানের অপর গ্রন্থ থেকে নিশ্চিতরূপে জেনেছি, নৃপতি নিয়ামের নিবাস ছিল জাফরাবাদে। প্রদেশপাল শ্রেণীর শাসকের নিবাস হয় শহরেই, গায়ে থাকেন সামন্ত জমিদার। জাফরাবাদ গাঁ নিয়ামপুর পরগনার কেন্দ্রস্থলেই স্থিত। এটি মীরেরসরাই থানার বারইয়ারঢালা রেলস্টেশনের অদূরে আজো বিদ্যমান। আমাদের ধারণায় এই নিয়াম পরাগল-ছুটি খানের পরে ফেনী নদী ও চন্দ্রনাথ পর্বতবেষ্টিত অঞ্চলের সামন্ত শাসক ছিলেন। তাঁর দিওয়ানের (দৌলত উজীরের) তোয়াজের ভাষায় তিনি 'নৃপতি' হয়েছেন। নিয়াম শাহর সময়ে উত্তর চট্টগ্রামে সর্বাঙ্গিক ক্ষমতাসম্পন্ন প্রশাসক ছিলেন হামযা খান মসনদ-ই-আলা। সম্ভবত গিয়াসুদ্দীন মাহমুদ শাহর আমলে নিয়ামের নিয়োগ আর আরাকানরাজ দিখার আমলে (১৫৫৩-৫৫ খ্রিঃ) তাঁর মৃত্যু ঘটে। চট্টগ্রামের প্রধান মুসলিম শাসকের পদবী ছিল 'উজীর'।

চ. কবি জানিয়েছেন, গৌড়ের অধীনতা দূর হবার পরে নিয়াম শাহ নৃপতি হয়েছিলেন এবং তাঁর দৌলত উজীর (দিওয়ান) থাকাকালে তিনি 'শায়িলী-মজনু' রচনা করেছেন। আমরা জানি :

১. ১৩৪৯-৫০ থেকে ১৪৫৯ খ্রীস্টাব্দ অবধি চট্টগ্রাম সাধারণভাবে গৌড় শাসনে ছিল, আবার ১৪৭৪ সনেও চট্টগ্রামে গৌড়ের আধিপত্য দেখি।

২. ১৪৭৪ সনের পরে কোনো সময়ে থেকে ১৫১২ সন অবধি চট্টগ্রাম আরাকান অধিকারে ছিল।

৩. ১৫১২ থেকে ১৫২৫ সন অবধি চট্টগ্রামের অধিকার নিয়ে গৌড়, ত্রিপুরা ও আরাকানের মধ্যে-দ্বন্দ্ব-বিগ্রহ চলে।

৪. ১৫২৫ থেকে ১৫৩৮ সন অবধি চট্টগ্রামে গৌড়-শাসন সুপ্রতিষ্ঠিত দেখি।

৫. ১৫৩৮ থেকে ১৫৫৩ সন অবধি হামযা খান মসনদ-ই-আলার স্বায়ত্তশাসনে বা প্রতিনিধিত্বে আরাকানরাজের প্রভাব কিংবা আধিপত্য প্রত্যক্ষ করি।

৬. ১৫৫৩-৫৫ সনে ছিল গৌড়-সুলতান শামসুদ্দীন শাহ গাজীর অধিকার। ১৫৫৫-৬৭ সনে ছিল ত্রিপুরারাজ বিজয়মাণিক্যের আধিপত্য। ১৫৬৭ সনে সম্ভবত সুলেমান কররানী চট্টগ্রামে সাময়িক অধিকার লাভ করেন। তারপর ১৫৬৭-৭৩ অবধি আবার ত্রিপুরা শাসনে থাকে। ১৫৭৩-৭৫ সনে থাকে দাউদ খান কররানীর দখলে।

৭. ১৫৭৫ থেকে ১৫৮৫ সন অবধি চট্টগ্রামে ত্রিপুরারাজের আধিপত্য ছিল, যদিও তা' নির্দ্বন্দ্ব-নির্বিশ্ব ছিল না। কেননা, আরাকানরাজও চট্টগ্রামে তাঁর দাবি প্রতিষ্ঠার জন্যে ঘন ঘন হামলা চালিয়ে যাচ্ছিলেন।

৮. ১৫৮৬ থেকে ১৬৬৬ সন অবধি চট্টগ্রামে আরাকান শাসন সুদৃঢ় ছিল। অতএব, আমাদের ধারণার নিয়ামশাহ একজন সামন্ত-জমিদার। তাঁর নিবাস ছিল জাফরাবাদ। তাঁর

জায়গীর নিজামপুর নামে আখ্যাত। তিনি হয়তো গুর বংশীয় আফগান ছিলেন অথবা বীর অর্থেই তাঁর নামের সঙ্গে 'গুর' শব্দ যুক্ত হয়েছে। তিনি ছিলেন আরাকানরাজের নিযুক্ত বা স্বীকৃত আঞ্চলিক প্রশাসক। হামযা খান মসনদ-ই-আলা যখন উত্তর চট্টগ্রামের উজীর বা শাসনকর্তা (আনুঃ ১৫৩০-৫৫ খ্রীঃ মৃত্যু) তখন নিয়াম শাহ ছিলেন উক্ত অঞ্চলের সামন্ত-শাসক। তাঁরই দিওয়ান বাহরাম খান তোয়াজের ভাষায় তাঁকে বানিয়েছেন নৃপতি আর নিজে হয়েছেন দৌলত-উজীর। এমনি ব্যাপার আমাদের সাহিত্যে নতুন নয়। ১৫৩৮ সনে গিয়াসুদ্দীন মাহমুদ শাহর পতনের সুযোগে হামযা সম্ভবত স্বাধীনভাবে কিছুকাল উত্তর চট্টগ্রাম শাসন করে পরে আরাকানের আধিপত্য স্বীকার করেন। তাই আমরা অনুমান করি, ১৫৪৩ থেকে ১৫৫৩ সনের মধ্যে 'লায়লী-মজনু' কাব্য রচিত হয়। এটি বাহরাম খানের দ্বিতীয় গ্রন্থ। কারবালা কাহিনীই তাঁর প্রথম রচনা; সে সময়ে তিনি পীরের মুরীদ হননি, তাই পীর আলাউদ্দীনের নাম পাইনে ভণিতায়। এ প্রসঙ্গে উল্লেখ্য, পীর আসাউদ্দীনের পূর্ব-পুরুষ সদরজাহা ও কবি মুহম্মদ খানের মাতামহ সদরজাহা দুই ভিন্ন ব্যক্তি। 'লায়লী-মজনু' রচনাকালে কবি বার্বাক্য সীমায় উপনীত তথা প্রৌঢ়।^১

লায়লী-মজনুর প্রণয় কাহিনী

লায়লী-মজনুর প্রণয়কথা একটি কল্পিত উপাখ্যান। এই অপরূপ উপাখ্যানটি কার মানস-সম্ভ্রুতি তা' জানার উপায় মেলেনি আজো। আরবি সাহিত্যের ইতিহাস এ উপাখ্যান সম্বন্ধে নীরব। লায়লী-মজনু সম্পর্কে কোন কিংবদন্তীও চব্বি-নেই আরবে। অতএব অনুমান করি, এ-কাহিনী আরব উদ্ভূত নয়, যদিও ঘটনাস্থান আরব এবং পাত্র-পাত্রীও আরবীয়। অথচ এমন একটি বানানো উপাখ্যানকেও ঐতিহাসিকতা' দানের প্রয়াস প্রত্যক্ষ করি। কবি আবদুর রহমান জামীর কাব্যে লায়লী উম্মাইয়া বংশীয় খলিফা আবদুল মালিকের (৬৮৫-৭০৫ খ্রীঃ) পদস্থ কর্মচারীর কন্যা। আমীর খসরুর কাব্যের সাক্ষ্যে লায়লী-মজনু ছিল মারওয়ান ইবন হাকামের (৬৮৩-৮৪ খ্রীঃ) সমসাময়িক। এমন কি এই কাব্যে লায়লী-মজনুর বংশ-পরিচয়ও রয়েছে। আমীর খসরুর বর্ণনায় লায়লী ছিল বনি আমর গোত্রীয় কন্যা। তার পিতার নাম মেহেদী, পিতামহ সাদ এবং প্রপিতামহ মেহদী। মজনু ছিল আদির প্রপৌত্র, মোফাহামের পৌত্র এবং মলুহর পুত্র।

ইউসুফ-জোলেখা, লায়লী-মজনু, শিরি-ফরহাদ-এ তিনটি প্রণয়কাহিনী বিশ্ব মুসলিমের ঘরোয়া সম্পদ। এ তাদের কিতাব পড়ে পাওয়া বিদ্যা নয়, পুরুষানুক্রমে ধরে রাখা রিকথ-ঐতিহ্যের সম্পদ। রূপকথার মতো এসব কিসসা-কাহিনী শ্রেণী ও বয়স অবিশেষে সব নারী-পুরুষের মুখে মুখে আজো উচ্চারিত। লায়লী-মজনু ও শিরি-ফরহাদ-খসরুর প্রণয়কথা ইরানে উদ্ভূত এবং সুফী কবিদের লালনে পুষ্ট। প্রেমোন্মত্ত অর্থে বাঙলায় 'মজনু' শব্দের বহুল ব্যবহারও এই লায়লী-মজনু কিসসা শোনার ফল।

বাইবেলে আর কোরানেও পাই ইউসুফ-জোলেখার কাহিনী। কাজেই এটি শামীয় গোত্রের খুব পুরোনো ইতিকথা। ইউসুফের সংযম-সুন্দর চরিত্রমাহাত্ম্য এবং জোলেখার সুগভীর প্রেম ও

^১ তথাসমূহ মৎসসম্পাদিত 'লায়লী-মজনু'র ভূমিকা থেকেই উদ্ধৃত।

কৃষ্ণসাধনাই বর্ণিত বিষয়। এ কাহিনীতে অধ্যাত্মতত্ত্বের তথা মরমীয়া রসের কোন ইঙ্গিত নেই। এক হিসেবে এটি নিছক মানবীয় প্রণয়কথা। সেজন্যেই এ ইতিকথা অবলম্বনে কয়েকখানি কাবাই রচিত হয়েছে মধ্যযুগীয় বাঙলায়। এমন কি শাহ মুহম্মদ সগীর বিরচিত ইউসুফ-জোলেখা (১৩৮৯-১৪১০ খ্রীঃ) আমাদের প্রাচীনতম কাব্যের একটি। প্রসঙ্গত উল্লেখ্য ফারসি-হিন্দুস্থানী প্রণয়কাব্য মাত্রই অধ্যাত্মতত্ত্বের রূপক। কিন্তু বাঙলা অনুবাদে সবকয়টিই মানসিক প্রেমকাব্যে রূপায়িত। এ বাঙালীর পার্থিব জীবনরসিকতার এক সাক্ষ্য। কিন্তু ব্রিটিশ আমলের পূর্বে দৌলত উজীর বাহরাম খান ছাড়া আর কেউ লায়লী-মজনু উপাখ্যান রচনা করেছেন বলে জানা যায় নি। শিরি-ফরহাদের প্রণয় কাব্যও বোধ হয় রচিত হয়নি তখন। এ ব্যতিক্রম সম্ভবত অহেতুক নয়। লায়লী-মজনু ও শিরি-ফরহাদ রাধা-কৃষ্ণ প্রেমের মতো অধ্যাত্মপ্রেমের রূপকান্বিত প্রণয়োপাখ্যান। কাহিনী-দুটো বোধ করি সুফীদেরই সৃষ্ট। ইরানই সুফীমতের বিকাশ ও প্রসার ক্ষেত্র। তাই কিসসা দুটো উদ্ভূত হয় ইরানি ভাষাতেই। সৃষ্টি আশক ও স্রষ্টা মাতৃকের পবিত্র ইশকের ভাষ্যরূপ এ উপাখ্যান দুটোকে মুসলমানরা ধর্মসম্পৃক্ত পরম পবিত্র সত্য ঘটনা রূপেই জানে ও মানে। পাছে নিছক লৌকিক প্রেমকাব্য রূপে গৃহীত হয়ে বাঙলায় এদের গুরুত্ব ও পবিত্রতা নষ্ট হয় এ ভয়েই বোধ করি বাঙলা ভাষায় এসব উপাখ্যান রচনের, পঠনের ও শ্রবণের দুঃসাহস হয়নি কারো। ফলে এমন ঘরোয়া কিসসাও বাঙলা কাব্যের বিষয়বস্তু হতে পারেনি। মধ্যযুগের দৌলত উজীরই কেবল লায়লী-মজনুর লৌকিক প্রণয়-কাব্য রচনা করে অর্জন করেছেন দুঃসাহসিকতার গৌরব।

আজ অবধি বাঙলায় রচিত যে-কয়খানি লায়লী-মজনু উপাখ্যানের নাম জানি সেগুলোর ও রচয়িতাদের নাম দিচ্ছি :

বাঙলা

১. লায়লী-মজনু : দৌলত উজীর বাহরাম খান (১৫৩৫-৫৩ খ্রীঃ)
২. ঐ মহম্মদ খাতের (দোভাষী পুথি ১৮৬৪ খ্রীঃ)
৩. ঐ আবুজদ জহিরুল হক (ঐ -১৯৩০ খ্রীঃ)
৪. ঐ ওয়াজেদ আলী (ঐ-১৯৪৪ ?)

গদ্যে

১. লায়লী-মজনু : মহেশ চন্দ্র মিত্র (১৮৫৩ খ্রীঃ)
২. ঐ শেখ ফজলুল করিম সাহিত্য বিশারদ (১৯০৩)
৩. ঐ আবদুল গফুর সিদ্দিকী অনুসন্ধান বিশারদ।
৪. ঐ শাহাদাত হোসেন।
৫. ঐ মীর্জা সোলতান আহমদ।
৬. ঐ দ্বারকানাথ রায় (১৮৫৯)
৭. ঐ (নাটক) রাজকৃষ্ণ রায় (১৮৯১)

ফারসি

ফারসিতে লায়লী-মজনু কাব্যের আদি রচয়িতা কে তাও আমাদের জানা নেই। তবে দশ শতকের ইরানি কবি রুদকীর (রুদগীর) কবিতাতেই সম্ভবত প্রথম উল্লেখ পাই। এ ছাড়া বিভিন্ন সূত্রে যাদের সন্ধান মেলে, তাদের কালানুক্রমিক নাম দেওয়া হল :

১. নিয়ামী গঙ্গাবী (গিয়াসউদ্দিন আবু মুহম্মদ ইলিয়াস বিন ইউসুফ) ৫৮৪ হিঃ বা ১১৮৮ খ্রীস্টাব্দ।
২. আমীর খসরু (দিল্লী) ৬৯৮ হিঃ বা ১২৯৮ খ্রীঃ।
৩. আবদুর রহমান জামী (ইরান) ৮৮৯ হিঃ বা ১৪৮৪ খ্রীঃ।
৪. আবদুল্লাহ হাতিভী (ইরান) ৯১৭ হিঃ বা ১৫১১ খ্রীঃ।
৫. হিলালী আত্মাবাদী (আত্মাবাদ) ৯৩৯ হিঃ বা ১৫৩৩ খ্রীঃ।
৬. দামিরী (ইরান, শাহ-তামাস্পের সভাকবি) ৯৩০-৮৪ হিঃ ১৫২৪-৭৬ খ্রীঃ।
৭. মীর্জা মুহম্মদ কাসেম কাসেমী গুণাবাদী (খোরাসান) ৯৭৯ হিঃ বা ১৫৭২ খ্রীঃ।
৮. মীর মুহম্মদ আমীর শাহ বোস্তানী ওরফে মীরজুমলা (ইরান, ভারতে শাহজাহান ও আওরঙ্গজেবের সেনানী) ১১০১ হিঃ বা ১৬৮৯ খ্রীস্টাব্দ।
৯. জৈনক হিন্দু কবি (শাহজাহানের আমলে) ১০৫৫ হিঃ বা ১৬৪৫ খ্রীঃ।
১০. আরিফ লাহোরী (আওরঙ্গজেবের নামে উৎসর্গিত গ্রন্থনাম মিহির-ই-ওয়াকফ) ১৬৬০-১৭০৭ খ্রীঃ। এটি মুহম্মদ হবিবর রহমান খান শেরওয়ানীর সম্পাদনায় ১৩৪৫ হিঃ সনে ১৯২৬ খ্রীস্টাব্দে আলীগড় থেকে প্রকাশিত হয়েছে।

হিন্দুস্থানী

১. হায়দর বখশ
২. মুহম্মদ তকীখান : (১৮৬২ খ্রীঃ)
৩. ওলী মুহম্মদ মনজীর : ১৮৬৬ খ্রীস্টাব্দে লাহোরে মুদ্রিত।
৪. আবদুল্লাহ ইবন গোলাম : ১৮৮১ খ্রীস্টাব্দে বোম্বাইয়ে মুদ্রিত। সম্ভবত নিয়ামীর, খসরুর কিংবা আবদুর রহমান জামীর কাব্যকাহিনী ভিত্তি করে কবি দৌলত উজীর বাহরাম খান স্বাধীনভাবে তাঁর কাব্যখানা রচনা করেন। এজন্যে উক্ত তিনটে কাব্যের কোনটার সঙ্গেই তাঁর কাব্যকথার পুরোপুরি মিল নেই।

কাব্যের বৈশিষ্ট্য

মধ্যযুগের সাহিত্যক্ষেত্রে 'লায়লী-মজনু' কাব্য নানাভাবে অনন্য। এ কাব্য বাল্যপ্রমে অভিষেক দুই বিরহী হৃদয়ের রক্তক্ষরা বেদনার জমাট অশ্রু। এর গীতোচ্ছ্বাস, এর কারুণ্য, এর নীতিনিষ্ঠ মানবিকতা অভিভূত করে পাঠককে।

অনুরাগে প্রেমের উন্মেষ, বিরহে তার বিকাশ, কিন্তু মিলনেই তার সার্থকতা। যে-প্রেম মিলনমুখী নয়, তাতে আছে কেবল দাহ, মন-আত্মা-দেহের অপমৃত্যুই তার পরিণাম। লায়লীর ও মজনুর প্রেম বিরহেই অবসিত। দুই দম্পত্যের যন্ত্রণা জমাট হয়ে আছে এ কাব্যে। ‘হাসিতে হাসিতে পিরীতি করিয়া কান্দিতে জনম ভেল’ -লায়লীর ও মজনুর জীবনে এ তত্ত্ব প্রমাণিত সত্য। আলোচ্য কাব্যে বিরহানলে দম্পত্য দুটো হৃদয়ের জ্বালাযন্ত্রণার ইতিকথা পরিব্যক্ত। তাছাড়া লোকে বলে, প্রেম মানুষকে মহৎ করে এই কাব্যের নায়ক-নায়িকা চরিত্রে প্রেমজ মহত্ব দুর্লভ নয়।

আত্মবিশ্বাস, আদর্শনিষ্ঠা, সহনশীলতা প্রত্যয়দৃঢ়তা, তিতিক্ষা, সাহসিকতা এবং নির্যাতন প্রসূত কারুণ্য ও যন্ত্রণাজাত বেদনাই মহৎ কাব্যের চিরন্তন বিষয়বস্তু। এ কাব্যেও আমরা করুণ রসে ও বিয়োগান্ত বিষয়ে কবির অনুরাগ প্রত্যক্ষ করি। তাঁর অপর কাব্য ‘মকুল হোসেন’ বা ‘ইমামবিজয়’ ও ‘কারুণ্যের নির্ঝর’। অতএব, কারুণ্য ও বেদনা লক্ষ্যেই কবি লেখনী ধারণ করেছিলেন। আঘাতে ব্যর্থতার ও হতাশায় ভরা জীবনের রক্ত-ঝরা ক্ষত, হৃদয়ের গভীরতম বেদনা, আর চিন্তের কোমলতম বৃত্তির স্বরূপ উদঘাটন এবং পরিস্ফুটনই কবিরূপ। রুচি দিয়েই মানুষের পরিচয়। কবি যে রুচি নিয়ে আমাদের সমুখে উপস্থিত, তাতে তাঁকে জীবনের গভীরতর রূপ-সচেতন, সংবেদনশীল সহৃদয় ব্যক্তি বলে চিনতে দেবী হয় না। তাঁর শিল্প-রুচি, কবিত্ব ও মনীষা প্রথম শ্রেণীর। তাঁর গোড়ামিমুক্ত উদার সহানুভূতি, দরদী দীল এবং সংযম-সুন্দর অভিব্যক্তি ষোলশতকীর বিরলতায় বিশিষ্ট।

লায়লী-মজনু কাব্যে কাহিনী অত্যন্ত স্বাভাৱিক। ঘটনা বিন্যাসে জটিলতা সৃষ্টির প্রয়াস ছিল অবশ্য। ইবন সালামের পুত্রের সঙ্গে লায়লীর বিবাহে কিংবা লায়লীর রূপ-বহিতে নয়ফলরাজের আত্মহত্যার প্রয়াসে ঘটনাবলী বক্র ও বিপুল হতে পারত, কিন্তু আশু-সমাধান- বুদ্ধির প্রয়োগে কবি অঙ্কুরেই নষ্ট করেছেন সে সম্ভাবনা। ফলে অসম্পূর্ণ ঘটনা ও দৃশ্যের সমাবেশে কাহিনীকে গতিদানের কৃত্রিম আয়োজনে অবসিত হয়েছে কবিকৃতি। যেমন দুই যোগীর উপদেশ ও আশীর্বাদ কামনা, নজদ বনে মজনুর পুনঃ পুনঃ বাস, পুত্রকে ফিরিয়ে আনার জন্যে মজনুর পিতার একাধিকবার নজদ বনে গমন, পর্যায়ক্রমে মজনুর ও লায়লীর বিলাপ প্রভৃতি কাহিনী নির্মাণে কবির অসামর্থ্যের সাক্ষ্য।

লায়লী-মজনু উচ্ছ্বাসপ্রধান কাব্য, হৃদয়াবেগই এর প্রাণ। সেজন্যে এ কাব্যে চরিত্র গড়ে ওঠেনি। কএস-লায়লী দু’জনেই পরম সজ্জন। প্রণয়ে একনিষ্ঠতা ছাড়াও পিতামাতা, সমাজ-ধর্ম রীতি-নীতি প্রভৃতির প্রতি গতানুগতিক আনুগত্যে তাদের জীবন নিয়ন্ত্রিত। দু’জনেই জীবন-চেতনার ক্ষেত্রে প্রেমিক এবং সে কারণে দু’জনেই অস্বাভাবিক উদার ও তিতিক্ষু। এ ছাড়া আর সব রকমে তারা নিতান্ত সাধারণ। নায়ক-নায়িকার যোগ্য কোনো অনন্যত্বে বিশিষ্ট নয়।

পুরুষের তথা নায়কের বারমাসী এ কাব্যের অন্যতম বৈশিষ্ট্য। চৌতিশায় ও বারমাসীতে পুরুষের বিরহ-বিলাপ দেখিনি আর কোনো কাব্যে। ঋতুদে উষার জন্যে পুরুষের বিরহ, মেঘদূতে যক্ষের বিরহ- এ দেশের সাহিত্যে এ তিন নায়কের মধ্যেই দেখি নারীসুলভ বিরহ-বিকার। দৌলতউজীর এই আখ্যায়িকার অভিব্যক্ত করতে চেয়েছেন নর-নারীর হৃদয়ের সহজ ও স্বাভাবিক বেদনা। বলতে গেলে বিলাপে এর গুরু এবং বিলাপেই এর শেষ। মজনুর ও লায়লীর পুনঃ পুনঃ বিলাপ ছাড়াও এখানে রয়েছে লায়লীর মাতার ও মজনুর পিতামাতার বিলাপ, মজনুর

বঙ্কুর এবং লায়লীর সখীর রোদন। তাই একে ‘বিরহকাব্য’ না বলে ‘বিলাপকাব্য’ বলাই হয়তো সঙ্গত। এই কাব্যের নায়ক নায়িকার বিরহ-বিলাপ ও ষড়ঋতুর আবর্তনে তাদের যৌবনোদ্বিগ্ন স্মরণ করিয়ে দেয় পদাবলীর রাধাকে। তবু ডক্টর মুহম্মদ এনামুল হক বলেছেন ‘লায়লী-মজনু’ ফারসি কবি জামীর ঐ নামীয় কাব্যের ভাবানুবাদ। স্থানে স্থানে মূল ঘেঁষা অনুবাদ যেমন আছে, স্বাধীন রচনাও তেমন দেখা যায়।^১

ডক্টর ওয়াকিল আহমদ স্বীকার করেন যে ভিক্ষুকবেশী মজনুর ঘটনা, কুকুর চূষন ও কুকুরের দশগুণ বর্ণনা, নয়ফুলের মতিভ্রম, বিষপ্রয়োগে মজনু হত্যার ষড়যন্ত্র ও মৃত্যু, দ্বারী কর্তৃক মজনুকে হত্যার চেষ্টা, যোগ প্রভাবে দ্বারীকে নিষ্ক্রিয় করা, হেতুবতী-লায়লী সম্বাদ^২ নামে ঋতুপরিক্রমা, যোগী-মজনু সম্বাদ, যোগতত্ত্ব প্রভৃতি কবি বাহরাম খানের স্বকীয় সৃষ্টি। আর কাব্যে বর্ণিত পরিবেশ তো আরব-পারস্যের নয়ই। নিয়ামীর কাব্যের অনেক চরিত্র ও ঘটনা এখানে নেই। তবু তিনি বলেছেন ‘বাঙলার কবি দৌলত উজির বাহরাম খানের লায়লী-মজনুর আখ্যানভাগ নিয়ামীর কাব্যের আখ্যানভাগের কাঠামোর সঙ্গে মোটামুটি মিল আছে। দু’চারটি ঘটনা ও চরিত্রের ক্ষেত্রে পার্থক্য আছে। অন্যত্র কাহিনীর আদলটির সম্পূর্ণ মিল আছে।^৩ আবার নিয়ামীর মূলের সঙ্গে আক্ষরিক মিল দেখাবার চেষ্টাও করেছেন তিনি।’

একজন বলেছেন জামীর কাব্যের অনুসরণ, অন্যজন দেখেছেন নিয়ামী গজাবীর কাব্যের স্বাধীন অনুবাদ।

এ সিদ্ধান্তের বা মন্তব্যের প্রতিবাদে বারবার এক কথাই বলতে হয়, মধ্যযুগের সাহিত্যের অনুবাদ আক্ষরিক হত না, হত কিছু কায়িক, কিছু ছায়িক, কিছু ভাবিক। আর দেশ-কালের ও রুচির প্রয়োজনে গ্রহণ, বর্জন ও সংযোজন স্বাধীনভাবেই চলত। রামায়ণ-মহাভারত প্রভৃতিও এমন স্বাধীন অনুবাদ। আমাদের ধারাবাহিক মুসলিম জগতের ঘরে ঘরে শোনা ও জানা ইউসুফ-জোলেখা, লায়লী-মজনু ও শিরি-ফরহাদ উপাখ্যান বা কারাবালাযুদ্ধ বৃত্তান্ত নিয়ে যে-কোন কাব্যের কবিপাঠকের পক্ষেই স্বাধীনভাবে নতুন কাব্য রচনা করা সহজ। তাই নিয়ামীর (১৮৮০ খ্রীঃ) আমীর খুসরুর (১২৯৮ খ্রীঃ) আব্দুর রহমান জামীর (১৪৮৪ খ্রীঃ) কাব্যেও রয়েছে কাঠামোগত মিল। দৌলত উজির বাহরাম খানের একটা বা একাধিক ফারসি কাব্য পড়া ছিল, আর এ উপাখ্যান মুখে মুখে শোনা তো ছিলই। তাঁর পক্ষে এ কাহিনী নিয়ে কাব্য রচনা করতে অন্য কাব্যের উপর তেমন নির্ভর করার প্রয়োজন ছিল না, বিশেষ করে এ কাব্য ঘটনাবিরল একটি বিলাপকাব্য।

ডক্টর ওয়াকিল আহমদ যে দু’একটি চরণের বক্তব্যগত আক্ষরিক মিল খুঁজে পেয়েছেন, তা নিতান্তই আকস্মিক। এ সম্বন্ধে আমাদের বক্তব্য এই : কাম-প্রেম, আশা-হতাশা, আনন্দ-বেদনা, রোগ-শোক প্রভৃতি চিরন্তন ও সর্বমানবিক অনুভূতির প্রকাশে দেশ-কালের ও ভাষায় ব্যবধান সত্ত্বেও শব্দগত ও ভক্তিগত ঐক্য বা সাদৃশ্য থাকেই। এমনকি উপমাাদি অর্থালঙ্কারেও সাদৃশ্য থাকে। ডক্টর ওয়াকিল যে সাদৃশ্যকে অনুবাদের সাক্ষ্য হিসেবে গ্রহণ করেছেন, তা মানবিক আবেগগত সাদৃশ্য মাত্র।

^১ মুসলিম বাঙ্গলা সাহিত্য ২য় সং, পৃঃ ৯৪

^২ বাংলা রোমান্টিক প্রণয়োপাখ্যান, পৃঃ ১৯৪, ২০০।

^৩ এ পৃঃ ২০১, ২০৫

গল্পসার

দেবধর্ম আরাধনা করে আর্মীর অবশেষে এক পুত্র সন্তান লাভ করলেন। তার নাম রাখলেন 'কএস'। জন্মাবধি তার ছিল রূপানুরাগ। লায়লী ছিল মালিককন্যা। উভয়ে যখন অতিক্রান্ত শৈশবে পাঠশালায় পড়তে গেল, তখনই দু'জনের মধ্যে হল প্রেমের সম্বন্ধ। প্রথমে সহপাঠীর পরে শিক্ষক, মা-বাবা ও চারদিকের সবাই জানল তাদের প্রেমের কথা। তারা দু'জনেই অস্বীকার করল— 'যাবজ্জীবন প্রেম না করিব ভঙ্গ'।

কলঙ্কভয়ে লায়লীর বিদ্যালয়ে যাওয়া বন্ধ করল তার মা, এবং পাছে পত্র লেখে এ ভয়ে মা 'লুকাইলা লেখনী ভাঙ্গিলা মস্যাধার'। এখানেই শেষ নয়,

ঘরের বাহির হৈলে জানিতে কারণ
প্রখর নৃপূর দিলা কন্যার চরণ।

ফলে লায়লীর আর মজনুর

রাবণের চিতাসম জীবন দহএ
শাবণের ধারা জিনি নয়ন বহএ।

এভাবে দু'জন বিরহানলে জ্বলে পুড়ে যন্ত্রণাবিদ্ধ অস্থির জীবন কাটাতে লাগল। একবার ভিখারী বেশে দেখা করতে গেলে কএস লায়লী 'দিশিষ্ট দর্শন দান জুড়ি চারি আঁখি'। কিন্তু লায়লীর পিতা গুণ দিয়ে কএসকে লাঞ্ছিত করল। প্রায়ের চোটে

শোণিত লুপিত মুখ পাষাণ প্রহারে
চন্দ্রিমা উদয় যেন অরুণ আকারে।

অবশেষে কএস মজনু বা পাগলপারা হয়ে গেল, ঘর ছাড়ল, বনে গেল, যোগী হল। লায়লীকে জোর করে বিয়ে দেয়া হল ইবন সালামের পুত্রের সঙ্গে। বাসরে লায়লী হল বিদ্রোহিনী। লায়লীর পিতা একবার সপরিবার যাচ্ছিল শাম দেশে। মজনুর তখন নজদ বনে বাস। এ বনের পাশ দিয়ে যাবার সময়ে লায়লী উটের পিঠস্থ দোলা থেকে গোপনে নেমে পড়ল, আর দেখা করল কএসের সঙ্গে। প্রস্তাব দিল বিয়ের। কএস উত্তরে জানাল :

গুপ্তরূপে তোমাকে করিলে পরিণয়
আরব নগরে লোকে দৃষিব নিশ্চয়।

'চন্দ্রবিনে গগন প্রদীপ বিনে ঘর/পুত্র বিনে জগত লাগএ ঘোরতর'। তাই একবার কএসের পিতা লায়লীর পিতা মালিকের কাছে বিয়ের পয়গাম নিয়ে গেল। কএসের পাগলামির কথা মালিক আগেই শুনেছিল, তাই ছেলে দেখতে চাইল, অতি কষ্টে মজনুকে লায়লীর বাড়ি নেয়া হলে লায়লীর কুকুরকে, অতি সোহাগে চুম্বন করল মজনু। প্রত্যাখ্যান হল বিয়ের প্রস্তাব।

কাজেই বিয়ে হল না, মজনু বলে 'কণ্ঠ শুকাইল মোর পয়োনিধিকূলে'। এর পরে দু'জনেরই অসহ্য দিনগুলো কাটে বিরহ যন্ত্রণায়।

সহজে প্রেমের পীড় তাপিত সদাএ
রূপ রঙ্গ দূরে গেল তনু হৈল ক্ষীণ।

যেসকণে শরীর তেজি আশি চলে যাই
 বারতা জানাইবা মোর মজনুর ঠাই ।
 কহিবা তোমার ভাবে লায়লী দুখিনী
 জন্মিল প্রেমের পীড় হারাইল প্রাণি ।

দুই ভূজ প্রসারিয়া কবর কোলেত লৈয়া
 প্রেমভাবে মজলু সৃজন
 লায়লীর নাম ধরি হাহাকার শব্দ করি
 ততক্ষণে তেজিল জীবন।

এ ধনি আওত বারি বরিখত
চাতক পিউ পিউ নাদ শুনি
বিরহিনীচিত চমকিত
বরিখত বারি এ জগত ভরি
রজনী ভীম আন্ধিয়ারী.
শুনহে ধনি যো বিরহিনী

যুগল নয়নে বহে বারি
ডাউক দর্দূর কলরবত মস্ত মউর
কৈসে জীব নব কামিনী ।
উর হতে পিউ দূর উলূপ উগএ দূর
কৈসে গৌণব যামিনী । ইত্যাদি ।

চৌতিশায় লায়লী-মজনুর বারোমাসীও বর্ণিত হয়েছে। চৌত্রিশটি বাঙলা হরফের এক একটিকে চরণের প্রথম শব্দের আদ্যক্ষর রূপে প্রয়োগ করে বিরহী হৃদয়ের উপর এক এক মাসের বা ঋতুর প্রাকৃতিক প্রভাব বর্ণনার অথবা স্তব-স্তুতির উদ্দেশ্যে এক বা একাধিক চরণ রচনার শৈল্পিক রীতির নাম চৌতিশা বা চৌত্রিশ। বিরহী নায়িকা বা নায়কের সংবৎসরের মানসিক অবস্থায় বা যজ্ঞগার অভিব্যক্তি দানের জন্যে বারোমাসের, বা ষড়্ ঋতুর কিংবা প্রতি চার মাসের প্রকৃতির রূপে বিরহী বিরহিণীর হৃদয়ে যে প্রতিক্রিয়া সৃষ্টি হয়, তা বর্ণিত হয় বারমাসীতে, ঋতুপরিক্রমায় ও হিন্দিসাহিত্যে চৌমাসায়।

সতেরো শতকে রোসাজে বাঙলা সাহিত্য

রোসাজে রচিত বাঙলা সাহিত্যের আলোচনা শুরু করার আগে কয়েকটি বিষয়ে আমাদের ধারণা স্পষ্ট হওয়া প্রয়োজন।

ক. রোসাজরাজ্য পরিচিতি

বার্মার উত্তর-পশ্চিম সীমায় এবং চট্টগ্রামের দক্ষিণে সমুদ্রের তীরে রখইঙ্গ (রক্ষতুঙ্গ?) নামে একটি রাজ্য ছিল। সংস্কৃত রক্ষঃ (রাক্ষস) তুঙ্গ বা টুঙ্গী থেকে এ নামের উৎপত্তি বলে অনুমিত! লামা তারানাত্খের ইতিহাসে 'রখন' নামে এবং আইন-ই-আকবরীতে 'আখরঙ' নামে অভিহিত হয়েছে এ দেশ। বাহারিস্তান গয়বীতে মীর্খা নাথান এ দেশকে ও দেশের মানুষকে আরখঙ ও রখঙ্গী বলে উল্লেখ করেছেন, শেহাবউদ্দীন আলিসের ফাতিয়া-ই-ইবরিয়াতেও 'রখঙ' নামই মেলে। Pelo Vino-র লাতিন ভাষায় রচিত ভূগোলে আরাকান নাম রয়েছে। ফন লিনচটোয়েন অঙ্কিত মানচিত্রে এবং ফ্রায়ার ম্যানব্রিকের গ্রন্থেও মেলে Aracan নাম। এখনো পার্বত্য চট্টগ্রামের একটি এলাকার নাম 'রাইখাইঙ' (Rai Khaing)। মুসলিম রচিত বাঙলা উপাখ্যানে রোকামশহর বা রাজ্য হচ্ছে জীন-পরীদের দেশ। এটিও হয়তো 'রখন'-এর বা রখইঙ-এর বিকৃত রূপ। বার্মার ইতিহাসকার ফেয়ার (Phayre : Aracan) আরাকান নাম এই 'রখইঙ' নামের বিকৃতি বলে উল্লেখ করেছেন। তাঁর মতে উচ্চারণে 'অ'ও 'র'-এর স্থিতি বিপর্যয় ঘটায় ফলেই 'রখঙ' আরাকান হয়েছে।^১

বার্মার মূল ভূখণ্ড ও আরাকানের মধ্যকার দূরত্বক্রম্য পর্বতই আরাকানের স্বাভাবিক ও স্বাধীন সত্তার এবং সমুদ্রসান্নিধ্য তার সমৃদ্ধির কারণ। খ্রীস্টীয় দ্বিতীয় শতক থেকে স্বাধীন-স্বতন্ত্র রাজ্য বলে কথিত আরাকান একেবারে হামলা মুক্ত ছিল না। মাঝে মধ্যে বার্মার রাজাদের আক্রমণে আরাকান রাজারা ধন-জন ও স্বাধীনতা হারিয়েছেন সাময়িকভাবে। আবার মধ্যযুগে পরাক্রান্ত আরাকান রাজারা পূর্ব বাঙলার ঢাকা অবধি তাঁদের আধিপত্য বিস্তার করেছেন কখনো কখনো। চট্টগ্রাম বিশেষত কর্ণফুলীর দক্ষিণ তীর থেকে টেকনাফ অবধি সমগ্র অঞ্চল দশ শতক

^১ JASB Vol. XIII pp. 144, pp 24, Phayre, History of Burma, pp 42-43.

^২ JASB. 1898, Pagsam Jon Zam (Antiquity of Chittagong) Sarat Chandra Das.

^৩ The Land of the Great Image. Ed. Maurice Collis.

^৪ Bhattasali Commemoration Volume, dacca Museum pp. 334-35.

থেকে প্রায় ১৬৬৬ সন অবধি অবিচ্ছিন্নভাবে আরাকান রাজ্যভুক্ত ছিল এবং শজ্জনদ থেকে টেকনাফ অবধি অঞ্চল ১৭৫৬ খ্রীস্টাব্দ পর্যন্ত আরাকান-অধিকারে ছিল বলে জানা যায়। এমন কি ৯৫১ খ্রীস্টাব্দে চট্টগ্রামবিজেতা আরাকানরাজ সুল তাইঙ সন্দ উচ্চারিত চিং-তৌৎপঙ' (যুদ্ধ করা অনায়া) থেকেই চাটিগাঁ-চট্টগ্রাম নামের উৎপত্তি বলে কিংবদন্তী রয়েছে। মধ্যযুগে চট্টগ্রামের অধিকার নিয়ে গৌড়-ত্রিপুরা-আরাকানে মাঝে মধ্যে যুদ্ধ হয়েছে। গৌড় বা ত্রিপুরা কখনো কখনো স্বল্পকালীন দখলও পেয়েছে বটে, তবে আগেই বলেছি ১৬৬৬ সনের আগে উত্তর চট্টগ্রাম এবং ১৭৫৬ সনের আগে শজ্জনদ থেকে টেকনাফ অবধি গোটা ভূখণ্ড মুখ্যত ছিল আরাকান রাজ্যেরই অংশ।^৭

বার্মারাজ পাইইন সিঙ সউ ওরফে মেঙখামঙ-এর আক্রমণে আরাকানরাজ মেঙসামোন ওরফে নরমিখলা ১৪০৪ খ্রীস্টাব্দে রাজ্যচ্যুত হয়ে গৌড়সুলতান গিয়াসউদ্দিন আযম শাহর (১৩৮৯-১৪১০ খ্রীঃ) আশ্রিত হন। এবং গৌড় সুলতান জালালউদ্দিন মুহম্মদ শাহর (১৪১৯-৩১ খ্রীঃ) সহায়তায় ১৪৩০ সনে আরাকানের রাজধানী লঙ্গিয়েতে রাজাসনে পুনরাধিষ্ঠিত হন তাঁবেদার মিত্ররাজা রূপে।^৮ অবশ্য আরাকানের ইতিকথায় সুলতান জালালউদ্দিন মুহম্মদ শাহ নন, সুলতান নাসিরউদ্দিন মাহমুদ শাহ-ই ১৪৩৩ খ্রীস্টাব্দে মেঙ সাউমোনকে আরাকানের সিংহাসন পুনঃপ্রতিষ্ঠিত করেন। সিংহাসন পুনঃপ্রাপ্তি কাল থেকেই আরাকানের গৌড় সুলতানদের তথা তুর্কীদের প্রশাসনিক ও সাংস্কৃতিক প্রভাব প্রবল হতে থাকে, যদিও মেঙ সাউমোনের মৃত্যুর সঙ্গেই আরাকান গৌড়ের স্বাধীনতা থেকে মুক্ত হয়, রাজার মুসলিম নাম ধারণ, মুদ্রায় কলেমা লেখন ও ফারসি হরফের প্রমাণ।^৯ রাজাদের নাম যেমন,

মঙথী- আলী খান
বাসপিউ- কলিমা শাহ
গজপতি বা গজবাদী- ইলিয়াস শাহ
মেঙ মেঙ বা মিন বিন- সুলতান যৌবক শাহ
মেঙ ফালঙ- সিকন্দার শাহ
মেঙ ইয়াজাগী- সলিম শাহ
মেঙ খামঙ- হোসেন শাহ

খ. রোসাঙ নামের উৎপত্তি

নরমিখলা লঙ্গিয়েতে অধিষ্ঠিত হয়েই বার্মারাজার ভয়ে ১৪৩৩ খ্রীস্টাব্দে চট্টগ্রামের রামু বা টেকনাফের শত মাইলের মধ্যে অবস্থিত ম্রোহাঙ-এ (Mrohaung অন্যান্য Mrauk-u) নতুন

^৭ ক. Phayre p. 42.

খ. সৈয়দ সুলতান ও তাঁর গ্রন্থাবলী ও তাঁর যুগ, ১ম অধ্যায়।

গ. চট্টগ্রামের ইতিহাস, পুরানা আমল, মাহবুব-উল আলম।

^৮ JASB. Vol. XIII pt. I, 1844, p. 45.

^৯ Outline of the Burmese History, G.E. Harvey, History of Chittagong, S.M. Ali.

রাজধানী স্থাপন করেন। তখন থেকে ১৭৮৫ খ্রীস্টাব্দ অবধি সাড়ে তিনশ বছর ধরে শ্রোহণ্ডই আরাকানের রাজধানী ছিল। শ্রোহণ্ড বর্তমানে আকিয়াব জিলায় অবস্থিত। এখনকার লোকপ্রচলিত নাম পাথুরে-কেল্লা।

এ শ্রোহণ্ড সাধারণ চট্টগ্রামবাসীর মুখে বিকৃত হয়ে রোহাণ্ড, রোয়াণ্ড হয়েছে। সাধু ভাষায় শ, ষ, স, পূর্ব বাঙলার বুলিতে 'হ' হয়ে যায়। কিন্তু লিখিত ভাষায় 'শ' রক্ষিত হয়। এ বিকৃত কথ্য বা বুলির 'হা'-এর সাদৃশ্য বশে রোহাণ্ড-এর 'হা'-ও 'স' রূপে সম্ভবত লিখিত হতে থাকে। ফলে রোহাণ্ড রোসাং, রোসাঙ্গ হয়েছে। আমাদের অনুমানের নিঃসংশয় সমর্থন মেলে কাজী দৌলত ও আলাউলের উক্তিতে—

১. কর্ণফুলী নদীপূর্বে আছে এক পুরী
রোসাঙ্গ নগরী নাম স্বর্ণ অবতারী— কাজী দৌলত
২. ক্ষিতি তলে অনুপাম রোসাঙ্গ শহর নাম
শস্য মৎস্য সতত পূর্ণিত। * (আলাউল/সয়ফুলমুলুক বদিউজ্জামাল কাব্য)

দ্বিতীয় সাম্রাজ্যের মতো রাজধানী রোসাঙ্গের নামে— গোটা আরাকান রাজ্যকে রোসাঙ্গরাজ্য এবং রাজাকে রোসাঙ্গরাজ নামে অভিহিত করা হয়েছে রোসাঙ্গে রচিত বাঙলা সাহিত্যে। আজো শজ্ঞানদ থেকে টেকনাফ অবধি দক্ষিণ চট্টগ্রাম লোকমুখে রোসাঙ্গ/রোয়াণ্ড এলাকা নামে অভিহিত। এবং ঐ এলাকার অধিবাসীরা সামাজিক পরিচয়ের ক্ষেত্রে উত্তর চট্টগ্রামবাসীর কাছে রোসাঙ্গী বা রোয়াই বলে অবজ্ঞাত। উনিশ শতকের দিকে দক্ষিণ চট্টগ্রামের কবিরা কখনো কখনো আবার মোরঙ্গ (ও শ্রোহণ্ড) নামও ব্যবহার করেছেন :

১. নামে নাম থুইলেস্ত মোরঙ্গ রাঙ্গা পুথি পরিচিতি, পৃঃ ২৪২
২. যত মোরঙ্গ আইসে করএ পৌরব। দুলা মজলিশ

রাজধানী রোসাঙ্গ এখন দক্ষিণ চট্টগ্রামবাসীর কাছে 'পাথুরে-কেল্লা' নামে পরিচিত।

ভাঙা কেল্লার নিদর্শন ও স্মৃতি থেকেই এ নামের উদ্ভব, এটি এখন একটি গ্রাম মাত্র।

গ. রোসাঙ্গে বাঙলাসাহিত্য সৃষ্টির রাজনীতিক, সামাজিক ও সাংস্কৃতিক কারণ

বার্মার আরাকানে চট্টগ্রামে অন্তত আট-নয় শতক থেকে আরবের মুসলিম বণিকদের বাণিজ্য চালু হয়, তা প্রাচীন আরব ভৌগোলিকদের গ্রন্থ থেকে জানা যায়। আরাকানরাজ মহতোইঙ্গ সন্দঅয় (৭৮৮-৮১০) খ্রীঃ-এর আমলেই নয় শতকের প্রথম দশকেই ভাঙা জাহাজের বিপন্ন আরবেরা আরাকানের রনবী বা রামরী দ্বীপে আশ্রিত হয়ে রাজার অনুমতি নিয়ে আরাকানরাজ্যে বাস করতে থাকে বলে ইতিহাস সূত্রে জানা যায়। এ ছাড়া চট্টগ্রাম যখন দশ শতক থেকেই আরাকান রাজ্যের অংশ তখন চট্টগ্রাম হিন্দু-মুসলমান দেশের রাজধানী রোসাঙ্গে ব্যবসা, চাকরী ও অন্য নানা কাজে গেছে এবং বাস করেছে। যেমন রাজ্যের অন্য অংশ চট্টগ্রামে এসেছে এবং বাস করেছে আরাকানী বৌদ্ধরা। এদের বংশধরেরা বড়ুয়া, মুৎসুদী, চৌধুরী উপাধি এবং একালে হিন্দুর মতো সংস্কৃত-বাঙলা নাম ধারণ করে আজো চট্টগ্রাম জিলায় বাস করে। অতএব দ্বিজাতি-মঘ ও বাঙালী অধ্যুষিত আরাকান বা রোসাঙ্গ রাজ্যের রাজধানীতে ও রোসাঙ্গ সরকারে

চট্টগ্রামবাসী অমাত্য, মন্ত্রী থেকে ক্ষুদ্র চাকুরে অবধি সব শ্রেণীর লোক থাকা স্বাভাবিক। এবং অন্যান্য পেশার ও ফিকিরের বাঙালীও সেখানে বাস করার কথা। এখনকার যুরোপ-আমেরিকার লোকেরা যেমন প্রাচ্যের বিদ্যার, চিন্তা-চেতনার ও প্রকৌশল কৃৎকৌশলের অধিকারী বলে আমাদের শ্রদ্ধেয়, মধ্যযুগে তেমনি শ্রদ্ধেয় ছিল আরব-ইরানি-তুর্কী মুঘল শাসকগোষ্ঠীর লোকেরা এবং সে সূত্রে দেশী শিক্ষিত মুসলিমরাও। তাই কাব্যসূত্রে কেবল মুসলিম মন্ত্রীর নাম পাই। হিন্দু মন্ত্রী থাকলেও মুসলিম কবি প্রতিপোষণ পাননি বলে তাঁদের নাম নেননি, যেমন নাম উল্লেখ করেননি কোন মঘমন্ত্রী। রাজনীতিক-ব্যবসায়িক কিংবা বৃত্তিক কাজে রোসাঙ্গে বসবাস করার সঙ্গে সঙ্গেই তাঁদের একটি প্রবাসী সমাজও গড়ে ওঠে। জন্ম, মৃত্যু, বিয়ে ছাড়াও রোগে-শোকে, সুখে-দুঃখে সমস্বার্থে স্বভাবী-স্বজাতির মধ্যে সহযোগিতার অঙ্গীকারে সহাবস্থান প্রয়োজন হয়েছিল, এই সামাজিক গরজেই বাঙালী অমাত্যদের বাঙালী সমাজে মেলামেশা করতে হয়েছে।

পাড়া আছে, সমাজ আছে, নিজেদের আলাদা ভাষা আছে, স্বতন্ত্র বিশ্বাস-সংস্কার আছে, বিশিষ্ট নিয়ম-নীতি আছে, আছে রীতি-রেওয়াজও। কাজেই তাঁদের সামাজিক সাংস্কৃতিক প্রয়োজন পূর্তির জন্যে, মানসচাহিদা পূরণের জন্যে, মনের রসতৃষ্ণা মিটানোর জন্যে সেখানে গুণীজন দিয়ে গান-গাথা-রূপকথা-প্রেমকথা জানানোর, রসকথা শুনার ব্যবস্থা করতে হয়েছে, সৃজনশীল কেউ কেউ নতুন সৃষ্টি দিয়ে তাদের রসতৃষ্ণা নিবৃত্ত করেছে। কাজী দৌলত, আলাউল প্রমুখ প্রণয়োপাখ্যান অনুবাদ করে এবং মাগনঠাকুর দেশী রূপকথার কাব্যায়নে সতেরো শতকের রোসাঙ্গ শহরে বাঙালীর-সংস্কৃতির ও সাহিত্যের স্বর্ণযুগ সৃষ্টি করেছিলেন। এর জের চলেছিল আঠারো-উনিশ শতকের দক্ষিণ চট্টগ্রামে।

ঘ. ‘রোসাঙ্গে বাঙলাসাহিত্য’ নামে যথার্থ্য

রোসাঙ্গে বাঙলা সাহিত্যচর্চার ও সৃষ্টির রাজনীতিক, সামাজিক ও সাংস্কৃতিক কারণ এ-ই। এই সঙ্গে ভিন্‌ভাষী মঘ-বৌদ্ধ রাজাদের কোনই সম্পর্ক নেই। কাজেই আবদুল করিম সাহিত্যবিশারদ ও ডক্টর মুহম্মদ এনামুল হক প্রদত্ত ‘আরাকান রাজসভায় বাঙ্গালা সাহিত্য’ নামটি অসার্থক ও বিভ্রান্তিকর। এ নামটি বাঙলা সাহিত্যের ইতিহাসকারদের বদৌলতে জনপ্রিয়ও হয়েছে, তবু এ নাম তথ্যবিরোধী বলে পরিহার্য। বরং বলা চলে ‘রোসাঙ্গের অমাত্যসভায়’; বাঙলাসাহিত্য, যদিও সব কবি অমাত্য প্রতিপোষিত নন। আবার আলাউল প্রমুখ রচিত সাহিত্যের ‘আরাকানরাজ্যে বাঙলাসাহিত্য’ নামও হবে অযৌক্তিক। কারণ, এঁরা রাজধানী রোসাঙ্গবাসী বা রোসাঙ্গে প্রবাসী কবি। এ সময়ে আরাকানরাজ্যভুক্ত চট্টগ্রামবাসী হিন্দু-মুসলিম অনেক কবিও স্বর্ণায়ে স্বঘরে বসে কাব্য রচনা করেছেন। অতএব, ‘রোসাঙ্গে বাঙলা সাহিত্য’ নামই সঙ্গত ও সমীচীন। নেপাল, কামরূপ ত্রিপুরা বা কোচবিহার রাজ্যে বাঙলা সাহিত্যচর্চা নামও তেমনি সঙ্গত ও সুপ্রযুক্ত।

অতএব, দ্বিজাতি (মঘ ও বাঙালী) অধ্যুষিত আরাকানরাজ্যের বর্মী উপভাষী আরাকানীদের অংশে অবস্থিত রাজধানী রোসাঙ্গে বসে রাজ্যে অপর এক অংশের লোক অর্থাৎ চট্টগ্রামবাসী

স্বজাতীয় রাজকর্মচারীর তথা মন্ত্রীর প্রতিপোষণ পেয়ে বা স্বাধীনভাবে বাঙলাসাহিত্য সৃষ্টি করেছেন মাত্র। ব্যাপারটা পাকিস্তান আমলে পূর্ববাঙলার লোকের করাচীতে বা দিল্লীতে বসে পশ্চিম বাঙলার লোকের বাঙলা লেখার মতো। বিদেশীরা যখন ইংরেজি বা ফরাসি ভাষায় বই লেখেন তখন তা ইংরেজ-ফরাসির আধিপত্যজাত ভাষা-সাহিত্য সংস্কৃতির প্রভাবের সাক্ষ্য হয়ে দাঁড়ায়, এতে ইংরেজ-ফরাসির গৌরবের গর্বের কারণ থাকে। আলোচ্য ক্ষেত্রে ব্যাপারটি সেরূপ নয়, কাজেই বাঙলার বাইরে অবাস্থালীর বাঙলাসাহিত্য চর্চা নয় বলেই রোসান্জে রচিত সাহিত্যের জন্যে আমাদের গৌরব বোধ করার কোন কারণ ঘটে না। ইংরেজি সাহিত্যের ইতিহাসে ম্যাকলে বা কিপলিঙ যেমন ভারতগৌরব নন, তেমনি কাজী দৌলত কিংবা আলাউলও রোসান্জমণি নন।

বলেছি, এক হিসেবে কয়েকজন ছাড়া মধ্যযুগের চট্টগ্রামবাসী কবিমাত্রই আরাকানরাজ্যের বা রোসান্জরাজ্যের কবি। আর তাঁদের মধ্যে কাজী দৌলত, মরদন, আলাউল, মাগনঠাকুর ও আবদুল করিম খোন্দকার রাজধানীর কবি। তফাৎ মাত্র এ-ই। নেপাল, কামরূপ, কোচবিহার ও ত্রিপুরা রাজ্যের বাঙালী কবি সম্বন্ধেও একই রূপ নাম প্রযোজ্য।

আর বাঙলাভাষায় প্রণয়োপাখ্যান রচনার শুরু রোসান্জ নয়, সাধারণভাবে চট্টগ্রামে।

৬. ‘মঘ’ নামের উৎপত্তি

এক সময়ে বৌদ্ধ, জৈন এবং ব্রাহ্মণ্য মতের বাঙলায়, আরাকানে ও বার্মায় প্রচারিত হয়, আরাকানে বার্মায় কেবল বৌদ্ধ মতই টিকে থাকে, অন্যগুলো কালে লোপ পায়। অভিজাত্যলোভী হিন্দুমাত্রই যেমন আর্য ও আর্যাবর্ত উদ্ভূত, বৌদ্ধ মাত্রই তেমনি এই মগধ উদ্ভূত এবং মুসলিম মাত্রই মক্কা-মদিনা-ইরান-সমরখন্দ-বুখারা থেকে আগত বলে দাবি করেন এবং আরাকানরাজ্যের সংস্কৃতভাষায় নিজেদের ও রাজধানীর নাম রাখেন যেমন মহেন্দ্র, সুলতচন্দ্র, নরপতিগী, রাজগী, শ্রীসূর্য, বড় ধর্মরাজা, মুনিধর্মরাজা, চন্দ্রসূর্যধর্ম, শ্রীসুধর্মা, শ্রীচন্দ্রসুধর্মা প্রভৃতি, রাজধানীর নাম বৈশালী, ধন্যাবতী, চম্পাবৎ ইত্যাদি। আরাকানী অক্ষমতায় এগুলো বিকৃতভাবে উচ্চারিত ও লিখিত হয়েছে মাত্র। একসময়ে সাধারণ আরাকানীরাও নিজেদের মগধাগতদের বংশধর বলে পরিচয় দিতে থাকে। ফলে কালক্রমে অবৌদ্ধ চট্টগ্রামবাসীর কাছে (ঢাকার মঘবাজারও এ সূত্রে স্মর্তব্য) মঘ ‘আরাকানী’র ও ‘বৌদ্ধের’ প্রতিশব্দ মাত্র হয়ে দাঁড়ায়। নিরক্ষর অবৌদ্ধ চট্টগ্রামবাসীর নিকট আজ কেবল চট্টগ্রামের বা বার্মার বৌদ্ধ নয়, দক্ষিণ-পূর্ব এশিয়ার মঙ্গোল চেহারার বৌদ্ধ মাত্রই মঘ। এ মঘ বৌদ্ধের প্রতিশব্দ। বলাবাহুল্য এ মগ বা মঘ ‘মগধ’ শব্দজাত। মগধ > মগহ মঘ > মগ। চট্টগ্রামে ও রোসান্জে রচিত বাঙলা সাহিত্যে আমাদের এ ধারণার পাথুরে প্রমাণ রয়েছে। যেমন:

১. রোসান্জ নগর নাম স্বর্ণ অবতারী
তাহাতে মগধ বংশ ক্রমে বুদ্ধাচার।
গনাম শ্রীসুধর্ম রাজা ধর্ম অবতার।

২. মগধ রাজ্যের যথ যন্ত্র অনুপাম [কাজী দৌলত, সত্যেন্দ্রনাথ ঘোষাল সম্পাদিত সতীময়না লোরচন্দ্রানী, পৃঃ ৪৫, ৪৭।]
৩. যাহাকে প্রশংসা কৈলা মগধের পতি [আহমদ শরীফ সম্পাদিত সত্যকলি বিবাদসম্বাদ, পৃঃ ১০০।]
৪. নানা শাস্ত্র পারগ বিদ্বান বিদগধ [আরাকানী ভাষা অর্থে আরবি-ফারসি আর হিন্দুয়ানি মগধ [সপ্তপয়কর, আলাউল]
৫. মগধের সন কহি শুন গুণিগণ- ঐ
৬. মগধের সনের শুনহ বিবরণ- [সতীময়না, আলাউলের অংশ, ঘোষাল, পৃঃ ১০]
৭. মগধের সন সংখ্যা বুঝহ নির্ণয়- [তোহফা, আলাউল, পৃঃ ১২০
আহমদ শরীফ সম্পাদিত]
৮. আধারমানিক মৌজে কদম রসুল ফাজিল সে [আওরা দ্য বারোজ প্রশস্তি, এতিম কাসেম রচিত, বাঙলা একাডেমী পত্রিকা, ভাদ্র-চৈত্র ১৩৬৫ সাল পৃঃ ৩৯, ৪০]
৯. হাড়ি ডোম মগধ জাতি আর যে কুলাজ [ঐ]
তোমার কল্যাণ হেতু মাগে সর্বকাজ।

ফেনীর শেখ মনোহর রচিত ‘শমশের গাজী নামা’য়ও বৌদ্ধ অর্থে মগধ ব্যবহৃত হয়েছে। আরাকানরাজ্যে প্রচলিত সন মঘীসন নামে আজো চট্টগ্রামে চালু রয়েছে— মঘীসন অনুসারেই আজো রাজস্ব দেয়া-নেয়া হয়। সামাজিক কাজে-কর্মেও মঘীসন চলে। চট্টগ্রামে এখনো ভূমির পরিমাণ মঘীকানির (৪০ শতাংশে এক কানি) হিসাবেই চলে। এই মঘী প্রত্যক্ষে আরাকানী অর্থে এবং পরোক্ষে মগধসম্ভূত আরাকানী ‘বৌদ্ধ রাজকীয়’ অর্থে ব্যবহৃত।

আরমাদান পর্তুগীজ দস্যুদের সঙ্গে যখন আরাকানী বৌদ্ধরা হাত মিলায় তখন থেকেই হার্মাদদের মতো মঘেরাও বাঙলায় নিন্দিত ও ঘৃণ্য হতে থাকে। তখন ‘মঘ’ ও ‘মঘের মুলুক’ নতুন অভিধা লাভ করে। আমাদের ভাষায় ও সাহিত্যে এ অভিধা এখনো জনপ্রিয় ও বহুল প্রযুক্ত এবং বাধিধির অন্তর্গত। কাজেই মগ বা মঘ শব্দ সংস্কৃত বা ফারসিজাত বলে অনুমানের কোন সঙ্গত কারণ নেই।

* এমনি আরো দৃষ্টান্ত : শাহ সুজা-দৈব পাকে আইলা রোসাস শহর। ভ্রাতৃসঙ্গে যুঝি আইলা রোসাস শহর। রোসাস দেশেত এক মহাওণবান। সয়ফুলমুলুক বদিউজ্জামাল।— ভুবনে বিখ্যাত আছে রোসাস নগরী-মরদন, রোসাস শহরে এক গ্রাম মনোহর।— দুলা মজলিশ-আবুল করিম খন্দকার। তান নাম ওণ ধাম প্রচার রোসাসে-আইনুদ্দিন (তফসির) [পৃথি পরিচিতি : পৃঃ ২৪১, ২৪২, ৩৪৯ ইত্যাদি]

৮. রোসান্গ শহরের কবি ও কাব্য পরিচিতি

রাজধানী রোসান্গ নগরের প্রথম কবি কাজী দৌলত, দ্বিতীয় কবি আলাউল, তৃতীয় কবি মাগন। কবি মরদন কাজী দৌলতের সমকালীন রোসান্গরাজ্যের কাঞ্চীপুরের কবি। এঁরা সতেরো শতকের কবি। আবদুল করিম খোন্দকার আঠারো শতকের কবি।

১. কাজী দৌলত : রোসান্গ শহরে বসে কাব্য লেখার সময়ে কবি জনস্বানের প্রতি দৃষ্টি রেখে স্বদেশবাসীর উদ্দেশ্যে রোসান্গের অবস্থান নির্দেশ করেছেন :

কর্ণফুলী নদী পূর্বে আছে এক পুরী
রোসান্গ-নগরী নাম স্বর্গ অবতারী।

এর থেকে বোঝা যায়, জনস্বানের নিকটস্থ কর্ণফুলী নদী কবির পরিচিত ও প্রিয়। রাউজান থানা এলাকা এই নদীরই পশ্চিম তীরবর্তী। কবির জন্মভূমি বলে কথিত সুলতানপুর এই রাউজানেরই একটি প্রখ্যাত গ্রাম, এখানে কাজী বংশে দৌলতের জন্ম হয়। পরবর্তীকালে ‘রেজওয়ান শাহ’ নামের অসমাপ্ত কাব্য রচক সুলতানপুর গ্রামবাসী কবি শমসের আলি প্রাসঙ্গিক ভাবে পরোক্ষ দৌলতের কাব্যের প্রতি ইঙ্গিত করেছেন—

খণ্ড গ্রন্থ হতে যদি ছন্দ চুরি করি
বঙ্গভাষা ব্যক্ত আছে বৃথা ধরা পড়ি

সুলতানপুরে বসে আঠারো শতকে কবি ফাজিল নাসির মুহম্মদ সন্নীত শাস্ত্রের বই ধ্যানমালা বা রাগতালনামা (১৭২২ খ্রীঃ) এবং উনিশ শতকে কবি মুহম্মদ মুকিম ‘গুলে বকাউলি’ (উনিশ শতকের প্রথমার্ধে) রচনা করেন। যাঁর অগ্রহে ও প্রতিপোষণে কাজী দৌলত ‘সতীময়না’ রচনা করেছিলেন, আরাকানরাজ্যের মহামাতা সেই আশরাফ খানের নিবাসও ছিল রাউজানের অদূরবর্তী গ্রাম চারিয়ায়। এ গ্রামে এখনো তাঁর দালানের নিদর্শন ও তাঁর নামের দীঘি রয়েছে। চারিয়া গ্রাম এখন হাটহাজারী থানার অন্তর্গত। রাউজান থানার কদলপুর গায়েও লক্ষুর উজির আশরাফ খানের দীঘি তাঁরই স্মৃতি বহন করছে। কাজী দৌলত তাঁর আদেষ্টা ও প্রতিপোষক আরাকানরাজ্যের প্রধান অমাত্য ও লক্ষুর উজির (সৈন্য মন্ত্রী বা সমর সচিব) আশরাফ খানের যে পরিচয় দিয়েছেন, তাঁর ভাষায় তা এরূপ :

ধর্মপাত্র শ্রীযুক্ত আশরাফ খান
হানাফি মজাব ধরে চিশতি খান্দান।
পীরগুরু অভ্যাগত পুষ্পস্ত তৎপর
লোক উপকার করে নাহি আত্মপর।
রাজনীতি লোকধর্ম বুঝন্ত সকল
মিত্রের সহায় করে অরি রসাতল।
মসজিদ পুঙ্খপী দিলা বিবিধ বিধান
শ্যাম তনু যুক্তিমস্ত বচন মিষ্টতা
গুরুমতি ছোট বড় লোকেতে ইষ্টতা।
মহারাজা আয়ুশেষ জানি গুরুমন
তান হস্তে রাজনীতি কৈল সমর্পণ।
শ্রীআশরাফ খান লক্ষুর উজির

সৈন্যসনে অভিষেক করিলা রাজন
মহামাত্যে করিলেক রাজ্যের ভাজন।
মঙ্গল বিধানে সর্ব কৈলা সমর্পণ
বিবিধ প্রসাদ দিলা কল্যাণ কারণ।
হুত্রসমে দিলা সৈন্য-পতাকা দুন্দুভি
স্বর্ণ অঙ্গরাখ দিলা আর বহুমূল্য টুপি।
দশ হস্তী প্রদান দিলেক বহু ঘোড়া
রাজখড়গ সমর্পিলা লক্ষুরী কাপড়া।
সেনাপতি হৈলা নানা সৈন্য অধিপতি
আশরাফ খান নামে শোভা হৈল অতি।
মহাদেবী অনেক ভাবিল সুনিশ্চিত
রাজপুত্র হস্তে দিক সুপাত্র নিশ্চিত।

যাহার প্রতাপব্রজে চূর্ণ অরিশির।
নৃপতি সম্প্রাণে বৈসন্ত দিবারাতি
যথা যাএ রাজা তথা চলন্ত সজ্জতি।

নৃপতিহ পুত্রভাবে হরিষে সাদরে
মহামাত্য করিলেন আশরাফ খানেরে।

H.G. Harvey লিখিত ইতিহাস সূত্রে জানা যায় শ্রীসুর্ধমা [থিরিখুধম্মা] সিংহাসনে অভিষিক্ত হওয়ার পর বছরখানেকের মধ্যেই মৃত্যুবরণ করবেন— গণকের এ ভবিষ্যদ্বাণীর দরুন ষোল বছর (১৬২২-৩৫ খ্রীঃ) রাজত্ব করার পরে সিংহাসনে অভিষিক্ত হন।

‘মহারাজ আয়ুশেষ জানি শুদ্ধমন’ চরণটি উক্ত আশঙ্কারই ইঙ্গিত দান করেছে। তাই মহামাত্য আশরাফকে রাণীর সম্মতিক্রমে রাজা রাজ্যশাসনের দায়িত্ব দিলেন। এর থেকে বোঝা যায় কবি ১৬৩৫ খ্রীস্টাব্দে অভিষেকের পরেই মহামাত্য আশরাফ খানের আগ্রহে সতীময়না রচনা আরম্ভ করেন এবং ১৬৩৮ সনে রাজার মৃত্যুর আগেই কবি আরম্ভ কাব্যের অতি সামান্য অংশ অসমাপ্ত রেখে স্বয়ং মৃত্যুবরণ করেন। অতএব কাব্য রচনাকাল ১৬৩৫-১৬৩৮ খ্রীস্টাব্দের মধ্যবর্তী সময়।

তবে মহাপাত্র আশরাফ মহামতি
আপনা সভাতে আইলা রাজ অনুমতি।
সভাতে বসিলা শ্রীআশরাফ খান
সৈয়দ শেখ আদি মোঘল পাঠান।
স্বদেশী বিদেশী বহুতর হিন্দুয়ান।
ব্রাহ্মণ ক্ষত্রিয় বৈশ্য শূদ্র বহুতর—
শ্রীযুক্ত আশরাফ খান অমাত্য প্রধান
ষোল কলা পূর্ণ যেন চন্দ্রমা সমাম
নীতিবিদ্যা কাব্য শাস্ত্র নানা রসচয়
পড়িলা শুনিলা নিত্য সানন্দ হৃদয়।
হেন মতে সভা করি বসিয়া থাকিতে
কহেস্ত সানন্দ চিন্তে প্রসঙ্গ শুনিতে।

গুজ্জাতী গোহারী ঠেট ভাষা বহুতর
সহজে মহন্ত সভা আনন্দ সাযর।
শেষে পুনি কোতুকে কহিলা মহামতি
শুনিত্তে গোঁরকরাজ ময়নার ভারতী।
কোন মতে হৈলা ময়না পতিব্রতা সতী
ঠেটা চোপাইয়া দোহা কহিলা সাধনে
না বুঝে গোহারী ভাষা কোন কোন জনে।
দেশী ভাষে কহ তাক পাঞ্চালীর ছন্দে
সকলে শুনিয়া যেন বুঝএ সানন্দে।
তবে কাজী দৌলত বুঝিয়া সে আরতি
পাঞ্চালীর ছন্দে কহে ময়নার ভারতী।

আশরাফ খানের আগ্রহ ছিল ‘ময়নার ভারতী’ শোনার। একথার একটি গভীর তাৎপর্য রয়েছে। আজকাল ঠেট-চোপাই-গোহারী ভাষায় রচিত মিয়া সাধনের ‘মৈনাসং’ মেলে, আরো মেলে সর্বপ্রাচীন লিখিত রচনা মৌলানা দাউদের ‘চান্দায়ন-গাথা’। এগুলো ছাড়াও রয়েছে একই বিষয়ক কাব্য চতুর্ভুজ দাস রচিত মধুমালতী কাব্যে মৈনাসং প্রসঙ্গ, খেমদাস শ্রীকীর্ত ‘মৈনাকো সতু’! দাখিলী উর্দুতে রয়েছে কবি গাওয়াসী রচিত ‘কিসসা-ই মৈনা’ এবং হামিদী রচিত ‘অসমং নামা।’ তাছাড়া বিহার, মধ্যপ্রদেশ ও উত্তরপ্রদেশ থেকে গ্রিয়ার্সন, হান্টার, এলুইন প্রমুখ সংগৃহীত গ্রাম্যগাথাও রয়েছে।

সাধনের কাব্যে কেবল মৈনার বিরহ, স্বামীনিষ্ঠা, কৃষ্ণসাধনা, ও সাতনের দ্বীপ রত্নামালিনী প্রদত্ত প্রলোভনের প্রতিরোধপ্রয়াস বর্ণনায় সীমিত। রত্নামালিনী ও ময়নার উত্তরের প্রত্যাশায় রচিত বারমাসীটি একটি উৎকৃষ্ট গীতিনাট্য। লোরকের চন্দ্রানী সংযোগ প্রাসঙ্গিকভাবে উল্লেখিত মাত্র। মৈনা মাথা মুড়িয়ে মুখে কালো হলুদ-রঙ মাখিয়ে গাধার পিঠে চড়িয়ে ঝাটাপিটে করে

^১ বাংলা রোমান্টিক কাব্যের হিন্দী-আওয়াধী পটভূমি— ডক্টর, এম আর তরফদার, পৃঃ ৬৩-৭৭, ৪১৯-২৪।

রত্নাকে নদীর ওপারে তাড়িয়ে দিল। এবং অনুতপ্ত লোরক ও ময়নার মিলনেই সাধনের গ্রন্থ সমাপ্ত। অধ্যাপক সৈয়দ হাসান আসকারী আবিষ্কৃত মানের পাণ্ডুলিপির লিপিকাল ৯১১ হিজরী অথবা ১৫০৫-০৬ খ্রীস্টাব্দ। কাজেই সাধন অন্তত পনেরো শতকের কবি। অতএব কাজী দৌলতের স্বীকৃতি অনুসারেই ময়নার কাহিনী বর্ণনায় তিনি সাধনকেই অনুসরণ করেছেন। এ অনুসরণ কোথাও আক্ষরিক অনুবাদে, কোথাও ছায়া অবলম্বনে এবং কোথাও ভাবানুসরণে পরিব্যাপ্ত। কাব্যের তথ্য সাহিত্যের অনুবাদ দেশকালভেদে নানা প্রয়োজনে এমনি গ্রহণে বর্জনে ও সংযোজনেই হয়ে থাকে। কাজী দৌলতের বারমাসী সাধনের অনুসরণে আঘাট দিয়ে শুরু হয়েছে। কাজী দৌলত বর্ণিত লোরক-চন্দ্রানীর গল্পাংশের সঙ্গে মৌলানা দাউদের মসনবী 'চান্দায়ন'-এর কাহিনীর কিছুটা সাদৃশ্য আছে। এতে মনে হয়, বিহারে ও উত্তরপ্রদেশে ও মধ্যপ্রদেশে চালু আহীর সম্প্রদায়ের প্রাচীন লোকগাথা- লোরিকমল্লের গাথাই উভয়ে অনুসরণ করেছেন। সাদৃশ্যটা এ কারণেই। মৌলানা দাউদের 'চান্দায়ন' লোরক-চন্দ্রানী প্রেমের প্রথম লিখিত গান বা গাথা। ৭৭২ হিজরীতে তথা ১৩৭০-৭১ খ্রীস্টাব্দে স্ম্যাট ফিরোজ শাহর আমলে উজির খান-ই-জাহান জুনা শাহর সম্মানে অধ্যাত্মভাবের এ মসনবী রচিত। 'চান্দায়ন' কাব্যে লোরকের উক্তিভেদেই কাহিনীসার মেলে : আমি জাতিতে আহীর। আমার নাম লোরক, গাউর নগরে আমার নিবাস, চান্দা হচ্ছে সহদেব মহরের কন্যা। তার স্বামী বাবন, আমি তাকে স্বীকৃতি পেয়েছি। আমি বাঁঠাকে যুদ্ধে নিহত করেছি। ঘরবাড়ি ছেড়ে চান্দাকে নিয়ে আমি হরদীপাটনে চলে এসেছি।

দাউদের চান্দা গৌরনগরের রাজা সহদেব মহরের রূপসী কন্যা। চার বছর বয়সে বাবনের (বামনের) সঙ্গে তার বিয়ে হয়। নপুংসক স্বামী দূরে দূরে থাকে। অবশেষে চান্দা বাপের বাড়ি চলে যায়। চান্দার রূপে প্রথমে এক বিদেশী গাইয়ে, মধ্যে রাজা রূপচন্দ, এবং পরে গৌরনগরের বীরযোদ্ধা বিবাহিত লোরক মুগ্ধ হয়। লোরকের সঙ্গে বিবাহিত রাজকন্যা চান্দা পালিয়ে যায় গঙ্গার ওপারে হরদী রাজ্যের দিকে। খবর পেয়ে চান্দার স্বামী আত্মসম্মানের খাতিরে লোরকের সঙ্গে যুদ্ধ করে এবং পরাজিত হয়ে ফিরে যায়। পথে দুবার দুই সাপ চন্দাকে দংশন করে। একবার এক ওঝা আরেকবার এক যোগী তাকে বাঁচিয়ে তোলে পথে লোরককে মাঝি, মহীপতি, অসিপতি, যোগী প্রভৃতি কয়েকজনের সঙ্গে দ্বন্দ্বযুদ্ধে নামতে হয় এবং পরিশেষে হরদীপাটনের রাজার সহায়তায় দুজনে সুখের সংসার পাতে। এদিকে 'সিরজন' নামের বণিকের মাধ্যমে মৈনা তার বারো মাসের বিরহযন্ত্রণার সংবাদ পাঠায় হরদীপাটনে লোরকের কাছে। অনুতপ্ত লোরক ময়নার কাছে ফিরে আসে।

'চান্দায়ন'-এর মধ্যে মধ্যে অনেক স্তবক নেই, অশ্লেষও নেই কয়েকটি স্তবক। মৌলানা দাউদ নিশ্চয়ই দেশজ মুসলিম কবি। তাই তাঁর এলাকার আত্মীয় জাতির লোকগাথাকেই তিনি তাঁর অধ্যাত্মতত্ত্বের রূপক রচনার আধার করেছেন। আর তাঁর ভাষাও তাই আঞ্চলিকতাদুষ্ট। উল্লেখ্য যে রাধাকৃষ্ণ প্রেমকথার উৎসও একই অঞ্চলের ও একই সম্প্রদায়ের লোকসাহিত্য। লোরক-চান্দার উল্লেখিত স্থান গৌরনগর, রোহিনী, হরদী বিহারেই অবস্থিত। (এম. আর. তরফদার পৃঃ ৮৬)। কাজী দৌলত তাঁর কাব্য অবলম্বন করলে নিশ্চয়ই ঋণ স্বীকার করতেন, যেমন স্বীকার করেছেন সাধনের ঋণ। দাউদের কাব্যে লোরক-চান্দাই নায়ক-নায়িকা আর সাধনে ময়নাই নায়িকা, তাই নামও কেবল মৈনাসং। দৌলত দুটো গল্পই সমান গুরুত্বে গ্রহণ করে সম্যক্বে বর্ণনা করেছেন। মধ্যযুগে চিত্রকলার মাধ্যমে লোরক-চান্দার প্রেমকথা এক সময়ে সর্বভারতে পরিচিতি ও জনপ্রিয়তা লাভ করে।

কাজী দৌলতের কাব্যে ময়না রূপে মৈনা, চন্দ্রানী রূপে চান্দা, লোর-লোরক রূপে লোরক, মোহরী রূপে মহর, ছাতন রূপে সাতন, বামন রূপে বাবন এবং রত্না হয়েছে।

যোগীর মুখে চন্দ্রানীর রূপের কথা শ্রবণ, নপুংসক বামনপত্নী চন্দ্রানীকে নিয়ে লোরকের পলায়ন, বামনের সঙ্গে যুদ্ধ ও চন্দ্রানীকে সর্পের দংশন ও যোগীর চিকিৎসা এবং অনেক কাল পরে লোর-চন্দ্রানীর গোহারী প্রত্যাবর্তন আর শুরুতে আছে রাজা লোরকের রাণী ময়নাকে ঘরে রেখে শিকার-সুখের জন্যে বনে গমন, যোগীর মুখে চন্দ্রানীর রূপের কথা শুনে বিবাগী হয়ে যাত্রা— কাজী দৌলতের অনুসৃত সাধনের মৈনাসং দৃষ্টে মনে হয় রত্নার মাথা মুড়িয়ে মুখে চুনকালি মাখিয়ে রত্নাকে নদীর পরপারে তাড়িয়ে দেয়া ও অনুতপ্ত লোরের চন্দ্রানীসহ গোহারী রাজ্যে ময়নার কাছে ফিরে আসার সঙ্গেই কাহিনী সমাপ্ত হয়েছে। কাজী দৌলতের উজ্জিতো ও এ আভাস মেলে দুতী—

‘ময়না সঙ্গে ছাতনকে মিলাইতে নারিল।

লোর ময়না চন্দ্রানী হৈল এক স্থান

সে-সকল কহি শুন আশরাফ খান।’ [মোঘাল, পৃঃ ১১০]

আলাউলের উজ্জিতোও এর সাক্ষ্য রয়েছে—

আশরাফ আজ্ঞা এ দৌলত কাজী ধীর

রচিল চন্দ্রানী কথা অতি সুরচিত।

শেষ খণ্ডে ময়নার কথা করিল প্রকাশ

দুতীর সম্বাদ পদন্তর বারমাস।

সুচারু পয়ার মিলে নানা ছন্দ গীত

একাদশ মাস সাঙ্গ হৈল বিরচিত।

তবে কাজী দৌলত স্বর্গতে হৈলা লীন

খণ্ডত্রয়ী পুস্তক আছিল চিরদিন।

শেষ মতে ময়না কৈল দুতীর দুর্গতি

পুনরপি আসিয়া মিলিল লোরপতি।

এ সকল শেষ কথা অসঙ্গ রহিল।

সুধর্মার শেষে তিন নরপতি চলি গেল।

অতএব আর কয়েক পৃষ্ঠা মাত্র লিখতে পারলেই দৌলত কাজীর কাব্যটি সুসম্পন্ন হত। আলাউল অকারণে অপ্রাসঙ্গিক ‘আনন্দমা-রতনকলিকা’ কাহিনী জুড়ে দিয়ে কাব্যের রসাতাস ঘটিয়েছেন। কাজী দৌলতের ‘সতীময়না’ কাব্যটি আদিসপ্রধান হলেও ভাষায় ছন্দে অলঙ্কারবির সুপ্রয়োগে গোটা মধ্যযুগের একটি অন্যতম শ্রেষ্ঠ রচনা। আজো আমাদের কানে হিন্দি গানের, দোহার ও কবিতার ভাষিক লালিত্য বাঙলার চেয়ে বেশি হয়ে বাজে। এ লালিত্যবুদ্ধি লক্ষ্যে কাজী দৌলতও বারমাসীর কোন কোন পদে ব্রজবুলির আবহ সৃষ্টির চেষ্টা করেছেন।

কাজী দৌলতের ময়নাবতীর বারমাস তথা ‘রত্না-ময়নাবতী সম্বাদ’ বা ‘সাতন-ময়নাবতী’^১ অনুবাদমূলক হলেও মধ্যযুগের বাঙলাসাহিত্য একটি বিশিষ্ট রচনা। এমনি তুল্য রচনা হচ্ছে ষোল শতকের লায়লী-মজনু কাব্যের বারমাসী বা ‘লায়লী হেতুবতী সম্বাদ’। এগুলো নামে বারমাসী, ভাষায় বাঙলা ব্রজবুলি, আঙ্গিকে গীতিনাট্য, বিষয়ে কামজ প্রলোভনের প্রতিরোধ প্রয়াস বা সংযম সাধনা, রত্না-ময়না সম্বাদ আকারেও দীর্ঘতম। আর প্রকারেও অনন্য, দুটোই

^১ স্বস্ত্য ঢাকা বিশ্ববিদ্যালয়ে আবদুল করিম সাহিত্যবিশারদ প্রদত্ত ৪৮৬ সংখ্যক পুথিতে মাদিনীর জ্যেষ্ঠ মাসের উক্তি এবং ৪৭৬ সংখ্যক পুথিতে ময়নার উত্তর কাজী দৌলতের ভণিতায় পুরোটাই মেলে। যদিও আলাউল বলেছেন : একাদশ মাস সাঙ্গ হৈল বিরচিত।

^২ পুথিতে তিন নামই মেলে, পুথিপরিচিতি : আবদুল করিম সাহিত্যবিশারদ দ্রষ্টব্য।

উত্তর-পদুত্তর রূপে অর্থাৎ তাত্ত্বিক বিতর্করূপে বিন্যস্ত। বাঙলা বারমাসী সাহিত্যের আরো দুটো ব্যতিক্রম লক্ষণীয়—একটি মুকুন্দরামের ফুল্লরার বারমাসী— এতে সংবৎসরের দাবিদ্যাদুঃখ বর্ণিত, অপরটি শাহ মুহম্মদ সগীরের ইউসুফ-জুলেখার বারমাসী—এতে ষড়ঋতুর রূপবৈচিত্র্য বিধৃত। আর সব বারমাসীতে নারীর বিরহ বিকারের বর্ণনাই রয়েছে। তবে লায়লী-মজনুতে নায়ক কএসের বিরহযন্ত্রণাও বর্ণিত হয়েছে।

সতীময়না কাব্যে চরিত্রগুলো প্রায় স্বাভাবিক রূপেই চিত্রিত হয়েছে, লোরক, বামন, রত্নামালিনী প্রভৃতি আমাদের চেনা লোক। রত্নাও সুপটু কুটনীকুলের গৌরব। এ কাব্যে ময়নাবতী ও চন্দ্রানী চরিত্র দুটো এ কাব্যের বক্তব্য প্রতীক বা প্রতিপাদ্য বিষয়প্রতীক। ময়নাবতী ও চন্দ্রানী চরিত্র নারী স্বরূপের দু'দিকের দুই কোটির দুটো স্তম্ভ। একদিকে আদর্শবাদ অপরদিকে জীবনবাদ, একজন আদর্শবাদের কাছে— শাস্ত্রনীতির ও সমাজরীতির কাছে জীবনকে বলি দেয়, অপরজন জীবনভোগের নামে সম্ভোগের গরজে আদর্শকে দলিত করে। আদর্শবাদ ও ভোগবাদ, সংযম ও স্বৈরাচার, সতীত্ব ও নারীত্ব, মর্যাদা ও লালসা, ত্যাগ ও ভোগ, ক্ষোভ ও তিতিক্ষা, লোভ ও ক্ষান্তি প্রভৃতির দ্বন্দ্বই চরিত্র দুটোতে কবি সুনিপুণভাবে পরিস্ফুট করেছেন। মানবমনের বৃত্তি-প্রবৃত্তির স্বরূপ উদঘাটনে কামবিষের জ্বালা রূপায়নে কাজী দৌলত নৈপুণ্য দেখিয়েছেন। উপমা, রূপক, উৎপ্রেক্ষাদি অলঙ্কারের ও সুভাষিত বুলির প্রয়োগে ও বহুলতায় মধ্যযুগের বাঙলা সাহিত্যের ক্ষেত্রে কাজী দৌলতের বিরল ও মৌলিক প্রতিভার পরিচয় মেলে।

সতীময়না কাব্যের লোকপ্রচলিত অপর নাম হচ্ছে 'সতীময়না-লোর-চন্দ্রানী'। সতীময়না কাব্যে উপস্থাপিত চিরন্তন মানবিক সমস্যা আজো তেমনিই রয়ে গেছে। আজো প্রশ্ন জাগে— শাস্ত্র সমাজের, নিয়ম-নীতির, রীতি-স্বৈরাজ্যের অনুগত থাকার জন্যেই জীবন কিংবা এ সুন্দর পৃথিবীতে ভোগ-উপভোগের জীবনকে অনুভব ও সার্থক করার জন্যেই জীবনধারণ। ব্যক্তির বা জীবনের জন্যে সমাজ, নাকি সমাজের জন্যে ব্যক্তি বা জীবন! কে ঠকল, জিতলই বা কে ময়না না চন্দ্রানী?—এ প্রশ্নের সর্বসম্মত উত্তর মিলবে না কখনো। পরিশেষে কাজী দৌলতের ভাষায় সব কথার উৎস মানববন্দনা করেই আমাদের আলোচনা শেষ করছি :

নিরঞ্জন সৃষ্টি নর অমূল্য রতন
ত্রিভুবনে নাহি কেহ তাহার সমান।
নর বিনে চিন নাহি কিতবা কোরান
নর সে পরম দেব মস্ততত্ত্ব জ্ঞান।
নর সে পরম দেব নর সে ঈশ্বর
নর বিনে ভেদ নাহি ঠাকুর কিঙ্কর।

এ সূত্রে নরে নারায়ণ ও জীবে ব্রহ্ম দেখার তত্ত্ব স্মর্তব্য।

২. মাগন ঠাকুর

আরাকানরাজ নরপতিগীর (১৬৩৮-৪৫ খ্রীঃ) অমাত্য হিসাবেই মাগন ঠাকুরের সঙ্গে আমাদের পরিচয়। নরপতিগী তাঁর কুমারী কন্যার অভিভাবক করেন মাগনকে। নরপতিগীর ১৬৪৫ খ্রীস্টাব্দে মৃত্যু হলে রাজকুমারীর সঙ্গে মাগন রাজভ্রাতৃস্পুত্র সাউদ মেওদারের বিয়ে দেন এবং

তাকে সিংহাসন দান করেন। এ সময়ে মাগনকে কৃতজ্ঞ রাজদম্পতি মুখ্যমন্ত্রী বা মহামাত্য করেন। আহত আলাউল যখন হার্মাদদের কবল এড়িয়ে রোসাঙ্গে আশ্রিত হন, তখন এই মাগন ঠাকুরই হয়তো রাজ-অশ্বারোহী পদ দিয়ে সাহায্য করেন, পরে তাঁকে বিভিন্ন কলাবিদ রূপে জানতে পেরে তাঁকে সঙ্গীতশিক্ষক বা কাব্যগুরু হিসেবে গ্রহণ করেন, আর অশ্বারোহী সৈনিকের পদ ছাড়িয়ে আলাউলকে কাব্য অনুবাদে নিয়োগ করেন। ‘দুঃখনাশহেতু তান (মাগনের) সঙ্গে দরশন/সতত পোষন্ত আমায় অনু-বস্ত্র দানে/তান সভামধ্যে থাকোঁ হৈয়া সভাসদ (পদ্মাবতী) মাগনের প্রতিপোষণে আলাউল প্রথমে পদ্মাবতী (১৬৫১ খ্রীঃ) এবং পরে সয়ফুলমুলুক বদিউজ্জামাল রচনা আরম্ভ (১৬৫৮ খ্রীঃ) করেন। মাগনের যে ১৬৫৮ সনের শেষে বা ১৬৫৯ সনের গোড়ার দিকে আকস্মিকভাবে মৃত্যু হয়, তার প্রমাণ প্রতিপোষণের অভাবে আলাউল সয়ফুলমুলুক বদিউজ্জামানের অনুবাদ কর্ম ত্যাগ করে মাগনের পীরভাই দৌলত উজির বা অর্থমন্ত্রী সোলায়মানের প্রতিপোষণ পেয়ে তাঁর আদেশে কাজী দৌলতের অসমাপ্ত কাব্য ‘সতীময়না’ পূর্ণাঙ্গ করার কাজে আত্মনিয়োগ করেন ১৬৫৯ খ্রীস্টাব্দে। এ মাগনের পিতার নামও শ্রীবড়ঠাকুর এবং তিনিও ছিলেন রাজার অমাত্য। রাজ্যপাল সৈন্যমন্ত্রী আছিলেন তাত/শ্রীবড়ঠাকুর নাম জগৎ বিখ্যাত। (সয়ফুলমুলুক)

আবদুল করিম সাহিত্যবিশারদ ও আবদুল হক চৌধুরী সূত্রে^১ কবির বংশধরদের পারিবারিক ঐতিহ্য যা জানা যায়, তা এই :

কবি কোরেশী মাগন ঠাকুরের প্রপিতামহ ছিলেন আরব থেকে আগত কোরেশ। তিনি গোড় হয়ে চট্টগ্রামের চক্রশালায় [চাশখালায়] রক্ষা স্থাপন করেন। এ চক্রশালায় বা চাশখালায় মাগনের জন্ম হয়। মাগনের পিতা রোসাঙ্গে গিয়ে রাজকর্মচারীর পদ পান। এবং পিতৃবিরোধের পর চাশখালা থেকে পরিবার কর্মস্থল রোসাঙ্গে নিয়ে যান। মাগন ও তাঁর ভাই ভিকন এভাবে রোসাঙ্গবাসী হলেন। মাগনও রাজকর্মচারী ছিলেন। যথাসময়ে দু ভাইয়ের মৃত্যুর পরে একজন মাগনপুত্র সুজাউল এবং ভিকনপুত্র মুজাহেদ কোন কারণে এক রাজকর্মচারী মঘকে (আরাকানী বৌদ্ধকে) হত্যা করে রাজরোষ এড়িয়ে চট্টগ্রামে পালিয়ে আসেন, এঁদেরই এক পাড়াব্যাপী বংশধর এখন বাস করছেন চট্টগ্রামের রাউজান থানার অন্তর্গত নোয়াজিশপুরে [ওর্ফে ফতেনগরে]। মাগনের ভাই ভিকনের রচিত একটি রাধা-কৃষ্ণ পদ মেলে। এই বংশধর রইসউদ্দীনের গৃহ থেকেই ১৯৩৩ সনে আদ্যন্ত খণ্ডিত চন্দ্রাবতী পুথি বন্ধু মারফত সংগ্রহ করেন ডক্টর মুহম্মদ এনামুল হক। এ বংশের আবুল হোসেন চৌধুরীর জন্যেই সুজাউদ্দীন চৌধুরী ঐ পুথির প্রতিলিপি তৈরি করেছিলেন। পারিবারিক ঐতিহ্যস্মৃতিতে মাগনের কোন মুসলিম নাম নেই, নেই তার পিতার, পিতামহের বা প্রপিতামহের নামও।

এর থেকে মাত্র দুটো তথ্য মেলে— চট্টগ্রাম থেকে মাগনের পিতা রোসাঙ্গে গিয়ে রাজকর্মচারী হয়েছিলেন এবং মাগনের সন্তান চট্টগ্রামে পালিয়ে এসেছিলেন আর কবি কোরেশী মাগনের একটি খণ্ডিত পাণ্ডুলিপিও ঐতিহ্য রক্ষার্থে এ বংশ রক্ষা করেছিল।^২

কোরেশী মাগন রচিত আদ্যন্ত খণ্ডিত চন্দ্রাবতী কাব্যে এগারোটি ভগিতা রয়েছে। এগুলোর মধ্যে পাঁচটিতে ‘কোরেশী মাগন’ এবং ছয়টিতে মাগন’ নাম মেলে। যেমন—

^১ চট্টগ্রামের ইতিহাস প্রসঙ্গে, পৃঃ ১০৫-১৪, ১৫১-৫৮।

^২ বিস্তৃত আলোচনার জন্যে মৎসম্পাদিত ‘চন্দ্রাবতী’র ভূমিকা দ্রষ্টব্য।

১. শুন শুন চন্দ্রসেন রাজা গুণধাম
সান্তাইল কোরেশী মাগন গুণনাম ।
২. রচিল পাঞ্চালী ছন্দে কোরেশী মাগন ।
৩. ক্ষেমাৎ সদয় প্রভু কহিল মাগন ।
৪. শুনি উথলিয়া দুঃখ কান্দএ মাগন ।

প্রথম ভণিতায় ‘কোরেশী মাগন গুণনাম’ কথার সাজ অর্থ মাগন বা ‘কোরেশী মাগন’ সাধারণে তার ডাকনাম বা প্রচলিত নাম— এটি তাঁর ধর্ম-সংস্কৃতি সম্পৃক্ত পোশাকী নাম নয়। অতএব গুণনাম ‘মাগন’ আর কুলনাম ‘কোরেশী’ ছাড়াও তাঁর একটি পোশাকী নাম ছিল। টোনা ঠাকুর, হাবুত রোয়াজা, শেখ পরাণ, হারি, গাভুর ঠাকুর, হিরাগাজি, আজিজ খাঁ রোয়াঝা, আলী হোসেন ঠাকুর, মাগন চৌধুরী, জিঠাকুর, নানুরাজা, শেখ চাঁদ, আউলচাঁদ, মনগাজী, তিতাগাজী, দোনাগাজী, মঙ্গলচাঁদ প্রভৃতি নাম পৃথিতেই মেলে।^১ আর চাঁদ, সুরজ, কালাচাঁদ, শেখ গোপাল, ধীর আলি, হাঁচি, সিরু, সোনা, মনা, ননা, বাচামিয়া, চুন্না মিয়া, ছোট্ট মিয়া, ইধা, বুধা, বেচা, শেখ বাবু, শেখ লাল, শেখ পাঁচু, (পাঞ্জু), শেখ কানাই, শেখ বানু প্রভৃতি নাম আমাদের চারপাশে আজো শুনতে পাই— একেবারে বিরল হয়ে যায়নি।

তা ছাড়া আমরা স্থানীয়সূত্রে জানি আরাকান রাজ্যের চট্টগ্রামে বোয়াঝা, পাঁঝা, সাধা, ছুয়ান, ঠাকুর, সাদিকনানা প্রভৃতি খেতাব বা পদবীধারীর বংশধর আজো বিদ্যমান। এঁদের নামে পটিয়া থানায় আজো পাঁঝারপাড়া (বরলিয়াগ্রাম) সাধার পাড়া (গেড়লা গ্রাম) ছুয়ানপাড়া (লড়িহরা) প্রভৃতি রয়েছে। কাজেই মন্ত্রী ‘ঠাকুর’ উপাধিই পেয়েছিলেন, তাই পিতাপুত্র যথাক্রমে বড় ঠাকুর ও মাগন ঠাকুর নামে সাধারণে পরিচিত ছিলেন। আলাউল ‘মাগন’ নামের একটি পাণ্ডিত্যপূর্ণ ব্যাখ্যা দিয়েছেন পদ্মকান্তী কাব্যে এবং সে সঙ্গে মাগনের বিদ্যাবত্তারও বর্ণনা রয়েছে। যেমন :

এবে তার নামগুণ কর অবধান
রাজসৈন্যমন্ত্রী ছিল শ্রীবড় ঠাকুর
প্রভুত মাগিয়া পাইল কুলদীপ শূর
তেকারণে মাগন ঠাকুর নাম ধরি

এর সঙ্গে তাত্ত্বিক বিশ্লেষণও রয়েছে

মান্যের ‘ম’-কার আর ভাগ্যের ‘গ’-কার
শুভযোগে নক্ষত্রের আনিল ‘ন’-কার
এ তিন অক্ষরে নাম ‘মাগন’ সম্ভবে।

সয়ফুলমূলকেও পাই ‘মহাদেবী’ [মাগনের মাতা] মাগি পুত্র পাইলা প্রভুস্থান
ঠাকুর মাগন নাম থুইলা তে কারণ ।

অতএব মুসলিমের নাম ‘মাগন’ হতে পারত এবং রোসাজে খেতাব ‘ঠাকুর’ও যুক্ত হওয়া স্বাভাবিক। মাগনের জন্ম ‘মহাসত্ত্ব মুসলমান [১ম খলিফা] সিদ্দিকের বংশে। সিদ্দিক বংশেত

^১ পুঁথি পরিচিতি, পৃঃ ৩৯, ৬১, ১০১, ১০৮, ১১১, ১৩৮, ২৪২, ৩৬৬-৬৭, ৪৭১, ৫০৬, ৫৭৯, ৫৯৪ প্রভৃতি।

জন্ম শেখজাদা জাত।' এবং তিনি ছিলেন 'নানাগুণে পারগ মহন্ত কুলশীল।' আর তাঁর বিদ্যাবত্তা এরূপ :

আরবি ফারসি আর মঘী হিন্দুয়ানী
নানা শাস্ত্র পারগ সঙ্গীতজ্ঞাতা গুণী।
কাব্য অলঙ্কার জ্ঞাতা ষষ্ঠম নাটিকা
শিল্পগুণ মহৌষধি নানাবিধ শিক্ষা।

প্রথম খলিফা আবু বকর সিদ্দিকের বংশধর হলে যুগপৎ কোরেশী ও 'শেখজাদা' হওয়া চলে। আর এত বিদ্যা যাঁর এবং যিনি আলাউলের সঙ্গীত ও কাব্য শিষ্য তাঁর পক্ষেই সম্ভব 'চন্দ্রাবতী' কাব্য রচনা। হয়তো মাগন ঠাকুর সংকোচবশে তাঁর কাব্য রচনার কথা গোপন রেখেছিলেন। কিংবা আলাউলের পদ্মাবতী রচনাকালে এ কাব্য রচিত হয়নি এবং সময়ফুলমূলক রচনাকালে রচিত হলেও মাগন তা মৃত্যুর আগে সাধারণ্যে জানাননি। তাই আলাউলের গ্রন্থ দুটোতে মাগন প্রসঙ্গে মাগনের কাব্যের উল্লেখ নেই। আলাউল যখন যাঁর আর্থিক সাহায্য পেয়েছেন, তখন কেবল তাঁরই প্রশস্তি গেয়েছেন, এ জন্যে আলাউলের অন্য গ্রন্থেও এ কাব্যের উল্লেখ নেই।

মাগন ঠাকুরের পীর ছিলেন শাহ মাসুম, মন্ত্রী সোলায়মান ছিলেন মাগনের পীরভাই। কাজেই আলাউল পীর হিসেবে গুরু ছিলেন না, সঙ্গীতশিক্ষক কিংবা কাব্য অলঙ্কার শাস্ত্রেরই উস্তাদ ছিলেন। আলাউলের উক্তি 'আন্ধারে বুলিয়া গুরু কর অবধান।' আলাউলের প্রতি মন্ত্রী সৈয়দ মুসার উক্তি '(মাগন) আছিল তোন্ধার শিষ্য মোর বন্ধজন।' মাগনের কাব্যের পূর্ণাঙ্গ পাণ্ডুলিপি যদি পাওয়া যায়, তা হলেই কেবল তাঁর প্রকৃত পরিচয় সম্বন্ধে নিঃসংশয় হওয়া যাবে। কেননা, রাজপ্রশস্তি, আত্মকথা প্রভৃতি প্রাথমিক বিষয়গুলো তাঁর কাব্যেও থাকার কথা। উপযুক্ত সব তথ্য ও তত্ত্ব জেনে আবদুল করিম সাহিত্যবিশারদ ও মুহম্মদ এনামুল হক কবি কোরেশী মাগন ও মন্ত্রী মাগন ঠাকুরকে অভিন্ন ব্যক্তি মনে করেছিলেন। তাদের মতে :

ক. মন্ত্রী কোরেশী মাগন নানা শাস্ত্রে সুপণ্ডিত ও কলারসিক ছিলেন, কাব্য রচনা করা তাঁর পক্ষে অসম্ভব নয়।

খ. ফাতেমীররা ছাড়া কোরেশগোত্রের অন্যান্য শাখার লোকেরা সাধারণত 'শেখ' নামে পরিচিত। মন্ত্রী মাগন কোরেশ গোত্রের খলিফা আবুবকর সিদ্দিকী বংশীয় শেখজাদা। কবি মাগনও কোরেশবংশ সম্ভূত বলে নিজের পরিচয় দিয়েছেন। অতএব, নামে উভয়েই অভিন্ন।

গ. মন্ত্রী মাগনের নামকরণের আলাউল-ব্যাখ্যাত একটি তাৎপর্য আছে। কবি মাগনও বলেছেন এটি তাঁর গুণনাম।

ঘ. কবি মাগন ভগিতায় দীন, হীন, অধীন প্রভৃতি বিনয়জ্ঞাপক বিশেষণ ব্যবহার করেননি, এটিও রাজমন্ত্রী সুলভ পদ-চেতনার ফল।

ঙ. 'ঠাকুর' রাজপ্রদত্ত উপাধি বলেই কবি মাগন তাঁর নামের সঙ্গে 'ঠাকুর' যোগ করেননি।^২

ডক্টর সুকুমার সেনের মতে মাগনপরিচিতি বিভ্রান্তিকর।^৩ তথ্যের স্বল্পতাই এ বিভ্রান্তির কারণ।

^২ আরাকান রাজসভায় বাঙ্গালা সাহিত্য, পৃঃ ৩০-৩৩।

কোরেশী মাগনের চন্দ্রাবতী কাব্যটি দেশী রূপকথাভিত্তিক। এর সঙ্গে ১৬০৯ খ্রীস্টাব্দে রচিত কবি ওয়াজীর দাখিনী উর্দু কাব্য 'কুতুব মশতরী'র^১ নাকি কাহিনীগত ঐক্য আছে। এতে রূপকথার সব বৈশিষ্ট্য তো আছেই তার উপর রয়েছে প্রণয়কাব্যের দেশীবিদেশী সব উপাদান। এখানে ভোজবিদ্যা বলে মানুষকে পাখি করে রাখা, চিত্রদর্শনে প্রেমে পড়া, ঝড়, সাপ, যক্ষ, রাক্ষস প্রভৃতির কবলে পড়া এবং অরণ্য থেকে অপহৃত পাত্রকন্যা উদ্ধার করা, দুশ্মন্তের মতো স্মৃতিভ্রষ্টতা, সাহসী, অনুগত ও বুদ্ধিমান মন্ত্রীপুত্রের সাহচর্য প্রভৃতি আর উপকাহিনীরও সমাবেশ রয়েছে। এ উপাখ্যানে কিছু অনন্যাতাও রয়েছে (এখানে অপহৃত হয়েছিল পাত্রকন্যা, রাজকন্যা নয়, অপহরণকারীও রাক্ষস বা দৈত্য নয় (যক্ষ, এখানে নায়কের পথের শত্রুও বাঘ, সিংহ, রাক্ষস বা দৈত্য নয়, (যুয্যত নাগ।

ভদ্রাবতীনগরের চন্দ্রসেন রাজার বীরত্বের বীরভান। সে 'সব্যশাস্ত্রে বিশারদ ইন্দ্রের সমান'। মন্ত্রী সঞ্জয়ের পুত্র 'সুত' ছিল তার আবাল্য বন্ধু। সরস্বীপরাজ শুরপালের রূপসীকন্যার নাম চন্দ্রাবতী। বীরভানের রূপগুণের কথা শুনেই এবং তার চিত্রার্পিত রূপ দেখেই সর্বদা 'কুমারের রূপ ধ্যান করে গুণযুতা'। এবং বীরভানকে পতিরূপে পাবার জন্যে 'চন্দ্রাবতী আরাধা দেবত্রিলোচন'। চন্দ্রাবতীর সখী চিত্রাবতী রূপসী চন্দ্রাবতীর এক মনোরম আলেখ্য তৈরি করে তাতে চন্দ্রাবতীর নামধাম লিখে সে নিজেই 'উড়া দিল লইয়া চিত্ররূপ'। এবং ঘুমন্ত 'কুমারের বুকে নিয়া রাখিল স্বরূপ'। তারপর যেমনটি ঘটে, জেগে কুমার ওই চিত্রপট দেখে রূপবতী কন্যার সন্ধানে বিবাগী হয়ে ছোট্টে, নাগের-বাঘের-যক্ষের সঙ্গে দ্বন্দ্ব সংঘর্ষে জয়ী হয়ে, অনেক প্রাকৃতিক দুর্যোগ অতিক্রম করে, ষড়যন্ত্র-দুঃখ-বিপদ উত্তীর্ণ হয়ে অবশেষে চন্দ্রাবতীকে লাভ করে। পৃথি খণ্ডিত হলেও আভাসে বোধহয় রূপবতীর সঙ্গে সুতের এবং চন্দ্রাবতীর সঙ্গে বীরভানের বিবাহোৎসবেই উপাখ্যান সমাপ্ত।

কবিত্বে পাণ্ডিত্যে মাগন প্রথম শ্রেণীর একজন নন বটে, তবে তাঁর ভাষা সুন্দর ও সুবিন্যস্ত, ভঙ্গি ঝঙ্কু এবং কাব্যটি বিভিন্ন রসের ও বিচিত্র ঘটনার সমাবেশের দরুন সুখপাঠ্য। দেশী ঐতিহ্যসম্মত উপকরণে ও আদর্শে তিনি সুপ্রাচীন দৈনিক রীতিতে নির্মাণ করেছেন এ কাব্যসৌধ।

রোসাজ্জের কবি আবদুল করিম খান্দকার, আইনুদ্দীন সম্বন্ধে ধর্মসাহিত্য অধ্যায়ে এবং আবদুল গনি সম্বন্ধে জ্যোতিষ অধ্যায়ে আলোচিত হবে।

চন্দ্রাবতী কাব্যে চিত্রিত সমাজপ্রতিবেশ :

বলেছি 'চন্দ্রাবতী' দেশে প্রচলিত প্রাচীন রূপকথা-ভিত্তিক রচনা। তাই এ কাব্যে হিন্দু সমাজের আবহাই দৃশ্যমান।

ক. হিন্দু নায়িকা চন্দ্রাবতী তাই পতিকামনার 'আরাধা দেবত্রিলোচন'। এবং স্বয়ম্বর হওয়াই রীতি।

খ. চন্দ্রাবতীর সখী চিত্রাবতী কেবল যে চিত্রশিল্পে নিপুণা তা নয়, ভোজবিদ্যাও পটু, আকাশেও উড়ে সে। অন্যত্র 'গুন কন্যা তিলিচামত শঙ্কর বাখান।'

^১ বা. সা. ই. ১ম অণা ৩য়, পৃঃ ৩০০, ৩২৬, ৩৩৫, ৩৪২-৪৩।

^২ বাংলা সাহিত্যের নতুন ইতিহাস (১ম সং), নাজিরুল ইসলাম মোহাম্মদ সুফিয়ান, পৃঃ ২৬৭।

গ. অশ্ববিরলদেশে রাজপুত্র চলে গজারোহণে।

ঘ. এখানকার গিরি-সিন্ধু কান্তারে থাকে নাগ, রাক্ষস, দানব ও যক্ষ। পরী ও দৈত্যকন্যার পরিবর্তে পাই গন্ধর্ব ও রাক্ষস কন্যা।

ঙ. এখানকার গাছে গাছে মেলে জ্ঞানী, প্রজ্ঞাবান ও ভবিষ্যৎদ্রষ্টা ব্যঙ্গমা-ব্যঙ্গমী, গৃধ-গৃধিনী।

চ. বৌদ্ধতন্ত্র-মন্ত্র ও ডাকিনী-যোগিনীর দেশে অসাধ্য সাধন করে মন্ত্রপূত ধনুর্বাণ ও মুনিমন্ত্র। অর্ধচন্দ্রবাণ, গরুড়বাণ, বিষ্ণুচক্রবাণ, গাণ্ডীব প্রভৃতিই হচ্ছে ব্রহ্মাস্ত্র।

ছ. পর্তুগীজ প্রভাবকালে রচিত উপাখ্যানে আমরা দেশী নৌকার নাম পাইনে, পাই জালিয়া, গোরাব প্রভৃতি পর্তুগীজ ডিঙ্গার নাম।

জ. এখানে রাজা সত্যবাদী, আর ধার্মিকের আদর্শ ব্যাস ও যুধিষ্ঠির 'ধর্মবাদী জিভিনিত্য ব্যাস যুধিষ্ঠির'।

ঝ. নায়ক-নায়িকা ও মঙ্গলপাঁচালীর সেই শাপড্রষ্ট দেবসন্তান। বীরভান ও চন্দ্রাবতী 'শিব বলে দুইজন মর্ত্যে আসিয়াছে'। এবং নায়কের যখন সঙ্কট দেখা দেয়, তখন ইষ্টদেবতা স্বয়ং মর্ত্যে এসে করেন ত্রাণের ব্যবস্থা :

শিব বোলে শুনহ কুমার বীরভান

ধনুত জুড়িয়া মার বিষ্ণুচক্রবাণ

এ বুলিয়া চক্র সঙ্গে মন্ত্রপাঁচাল

এবং তারপর 'অলঙ্কিতে শিবদর্শী অন্তর্ধান হৈল।

ঞ. চার বেদ চৌদ্দ শাস্ত্রই সমাজের নিয়ামক।

তত্ত্বকথা ও হেয়ালী

সে-যুগে বুদ্ধি, বিদ্যা, পাণ্ডিত্য ও জ্ঞানের পরীক্ষার বিষয় ছিল তত্ত্বকথা ও হেয়ালী। রাক্ষসের এক্রূপ প্রশ্নের ও পাত্রপুত্র সুতের উত্তরের কিছু নমুনা :

১. কেবা তুমি বসিয়াছ কার তুমি বশ?— যোগরস মৃত্তিকাতে বসে আছি পবনের বশ।
২. সঙ্গতি তোমার বোল কেবা আছে মিত?— সঙ্গে মোর মিত্র আছে বিদ্যাগুণধর।
৩. চন্দ্র সূর্য হোন্তে বড় কার জুতি আছে?— আঁখি হোন্তে পৃথিবীর জুতি আছে কার।
৪. চারি বেদ চৌদ্দ শাস্ত্র পড়ে কি কারণ?— শাস্ত্র পড়ে হিত বিপরীত বুঝিবার।

৩. আলাউল

কবির নাম আলাওল বা আলাউল। বটতলার বুদ্ধিমান প্রকাশকরাই কবিকে কাদেয়ী শাখায় সূফী জেনে সূফী দরবেশের যোগ্য বিশেষণগুলো বসিয়ে 'শাহ সূফী সৈয়দ আলাওল' বানিয়েছে। ঈশান নামের এক কবির রচনায় আলাউল নাম পাওয়া গেছে, নূর কুতব-ই-আলমের পিতার নাম ছিল আলাউল হক, ভুইয়া ঈসা খানের এক ভ্রাতৃপুত্রের নামও ছিল আলাউল খান, অতএব কবির অবিকৃত নাম আলাউল এবং লোকমুখে ও লেখনীমুখে আলাওল হয়েছে— যেমন আতাওল ইমাওল রেজাওল বদিওল হয়।

দুনিয়ার পাঠক এক হও! ~ www.amarboi.com ~

বাঙলা সাহিত্যের ইতিহাসে এবং লোকশ্রুতিতে আলাউল বহু গ্রন্থপ্রণেতা মহাকবি আর বিরল প্রতিভার একজন শ্রেষ্ঠ কবি। আলাউলের এ খ্যাতির উৎস তার ‘পদ্মাবতী’ কাব্যের প্রথমার্শের কয়েক পৃষ্ঠার কাব্যসৌন্দর্য। জেনে অনুরক্ত হওয়ার চেয়ে শুনে ভক্ত হওয়া সহজ। আলাউলের খ্যাতি বিস্তারের ক্ষেত্রেও লোকের হৃদুগপ্রিয়তার পরিচয়ই রয়েছে (রসিক পাঠকের মুগ্ধতার আভাস নেই)।

আলাউল মুখ্যত অনুবাদক। পদাবলীই তাঁর মৌলিক রচনা আর রাগতালনামা প্রচলিত সঙ্গীততত্ত্বের রূপায়ণমাত্র।

‘আনন্দবর্মা রতনকলিকা’ গল্পটি সম্ভবত দেশজ রূপকথারই অনুসৃতি। কাজেই অনুবাদক হিসেবেই বাঙলা সাহিত্যে তাঁর দানের মূল্যায়ন করতে হবে।

আমরা আবেগ বশে আলাউলকে সৃজনপটু কবি হিসেবে উঁচু আসন দিতে চাই। এতে তাঁর মান বাড়ে না, কেননা মূল কবির পাশে তিনি অনেকক্ষেত্রে ক্ষীণপ্রভ হয়ে পড়েন। আলাউলের কৃতির মূল্যায়ন কালে তিনি যে অনুবাদক সেকথা সর্বক্ষণ স্মরণে রাখা প্রয়োজন। আলাউল বহু ভাষাবিদ পণ্ডিত কবি। বাঙলা, মৈথিলি, ব্রজভাষা, ঠেট, খড়্গিবোলি প্রভৃতি বিভিন্ন উত্তরভারতীয় উপভাষায়, আরবিতে, ফারসিতে এবং সংস্কৃতেও তাঁর যুগদুর্লভ ব্যুৎপত্তি ছিল। তা ছাড়া যোগে-তন্ত্রে তাসাউফেও ছিল তাঁর গভীর জ্ঞান। কাব্যক্ষেত্রে তার স্বচ্ছন্দ বিচরণই প্রমাণ করে সে-যুগের আরবি-ফারসি হিন্দি-সংস্কৃত সাহিত্যের সঙ্গে তাঁর যুগোপযোগী পরিচয়ও ছিল গভীর ও ব্যাপক। কাব্যতত্ত্বে, ছন্দবিজ্ঞানে আর অলঙ্কারশাস্ত্রে তাঁর জ্ঞান অনিন্দ্য। কয়েকটি সংস্কৃত ছন্দও তিনি বাঙলায় প্রয়োগ করেন। আর স্তম্ভীতশিক্ষকরূপেই রোসাসে তাঁর পরিচিতি ও প্রতিষ্ঠা হয়েছিল। সত্য বটে উপাখ্যান-প্রেমী কবি আলাউলের মন রূপকথাপ্রবণ। তাই উপাখ্যানে রোমাঞ্চ সৃষ্টির যতটুকু লক্ষ্য তিনি রেখেছেন, ততটুকু দৃষ্টি দেননি বাস্তবতা, স্বাভাবিকতা, মানবিকতা বা চরিত্র চিত্রণের দিকে। অবশ্য এক্ষেত্রে অনুবাদকের স্বাধীনতাও সীমিত। তাছাড়া যুগগত সাহিত্যাদর্শ বা সাহিত্যচেতনাও এ সূত্রে স্মর্তব্য।

মধ্যযুগের গ্রাম্যতার প্রতিবেশে [পদাবলী ব্যতীত] রচিত পাঁচালী কাব্যের যুগে যে অপরিণীলিত রুচির একটা ছাপ ছিল অধিকাংশ কবির ভাষায়, তার থেকে মুক্ত হওয়ার সচেতন প্রয়াস দেখি আলাউলের কবিভাষায়, যে প্রয়াস পরবর্তীকালে প্রত্যক্ষ করি ঘনরামে ও ভারতচন্দ্রে। বাঙলাঋদ্ধি ধ্বনিসুধমায়ুক্ত সংস্কৃত শব্দের বহুল ব্যবহারে ছিল তাঁর প্রবণতা। পদ্মাবতী কাব্যের ভাষা এর সাক্ষ্য : যখন পরিপূর্ণ ঐশ্বর্য বয়সে তাঁর প্রথম ও শ্রেষ্ঠ কাব্য রচনা করেন তিনি দেহ আত্মার প্রযত্নে ও একাগ্রতায়। নিজেই বলেছেন :

আজ্ঞা পাই রচিলুঁ পুস্তক পদ্মাবতী
যথেক আছিল মোর বুদ্ধির শক্তি।

এবং পদ্মাবতীতে ‘স্থানে স্থানে প্রকাশিমু নিজ মন উক্তি’।

দেশকাল নিরপেক্ষ সৃষ্টিভাবের তথা জীবাত্মা পরমাত্মার প্রেম ও অভেদতত্ত্বের রূপক হিসেবে হিন্দি ও ফারসি উপাখ্যানগুলো রচিত। শাহ মুহম্মদ সগীর, দৌলত উজির বাহরাম খান, মুহম্মদ কবীর, আলাউল প্রমুখ সব উপাখ্যান অনুবাদকই বাঙলায় রূপকথার সে-রূপক বর্জন করেছেন অনুবাদকালে। তার কারণ এরা প্রতিপোধকের অবসরকালীন সবাকব উপভোগের উপকরণ হিসেবেই কাব্যগুলো অনুবাদ করেন এবং সাধারণ সাক্ষর ও নিরক্ষর

জনগণের প্রণয়-রসগ্রাহী মানসের তৃষ্ণা মিটানোরই আয়োজন করেছিলেন এভাবে-তত্ত্বকথা বা প্রতিপাদ্য বিষয়ের রূপক সাধারণের কাম-প্রেম-রস উপভোগের পথে বাধা হয়ে দাঁড়াত। সেকালের প্রতিবেশে সাহিত্যে জীন-পরী মানুষ-রাক্ষস-দৈত্য নির্বিশেষে সবাই ছিল প্রেমকাণ্ডাল ও প্রেম-প্রত্যাশী। এ হচ্ছে সাধারণ শাস্ত্রশাসিত সমাজ নিয়ন্ত্রিত বঞ্চিত মানুষের আকাঙ্ক্ষারই বিম্বিত রূপ। তাই এখানে বিশ্বজগতের শক্তিমান প্রাণীমাত্রই প্রেমিক। যেহেতু নারীও ছিল উদ্যমশীল আত্মপ্রত্যাশী বীরের ভোগ্যা, সেজন্যেই শক্তিমান রাক্ষস জীন-দৈত্য আর রাজপুত্র এসেছে নায়ক রূপে, সুন্দরী জীন, পরী ও রাজকন্যা হয়েছে আদর্শ নায়িকা। এ কারণে স্বর্ণ-মর্ত্য-পাতালে সহজ বিচরণে কিংবা সমুদ্র-অরণ্য পর্বত অতিক্রমণে দেব-দৈত্য-রাক্ষস-মানুষের স্থান-কাল-জাত-বর্ণ ধর্মের কোন বাধা নেই। সে-জগতে সাপ হয় শত্রু, বাঘ হয় অরি, দেব-দৈত্য-রাক্ষস হয় প্রতিদ্বন্দ্বী, আবার দেবতা-মৎস্য-পক্ষী হয় সহায়, যোগী বাতলায় বুদ্ধি। এমনি রূপকথার জগতেও তবু আলাউদ্দীনের অন্তর্দাহী জ্বালাধরা সর্বধ্বংসী রূপমুক্ততা এবং তজ্জাত ক্রুরতা, নির্মমতা এবং পরিণামে মহৎ চেতনায় ও চিত্তপ্রশান্তিতে উত্তরণ, পৃথিবীর স্বজাত্য, সত্যীত্ব ও অকুতোভয়তা, গোরা-বাদলের মর্যাদাবোধ, বীরত্ব, স্বদেশপ্রেম ও স্বজাত্যচেতনা আমাদের মুগ্ধ করে। জীন-মানুষের প্রণয়োপাখ্যান সয়ফুলমুলুকেও সায়াদের আনুগত্য, বন্ধুপ্রীতি, আন্তরিকতা ও নির্ভীকতা আমাদের দৃষ্টি এড়ায় না। আনন্দবর্মা, রতনকলিকা, দারা, সিকান্দর প্রভৃতি চরিত্রও একেবারে তুচ্ছ নয়। আলাউল্লের বহু উক্তি সুভাষিত বুলি, আপ্তবাক্য বা প্রবচন রূপে স্বীকৃত হবার যোগ্য, চট্টগ্রাম অঞ্চলে যেগুলো মুখে মুখে চলেও খুব। সর্গশীর্ষের শ্লোকই প্রমাণ করে আলাউল সংস্কৃত জানতেন, পঞ্চাবতীর অনুবাদেই বোঝা যায় তাঁর হিন্দি জ্ঞান, পঞ্চভাষার (আরবি ফারসি পহলবী হিব্রু ও আর্মেনীয়) শব্দ মিশ্রিত কাব্য 'সিকান্দরনামা' অনুবাদই তাঁর পাণ্ডিত্যের সাক্ষ্য। তিনি শিজে কাদেরিয়া শাখার সূফী ছিলেন, দেশ কালের প্রভাবে হিন্দু-বৌদ্ধ যোগে তত্ত্বে দেহভুক্ত ও মুসলিম তাসাউফে তাঁর ছিল সমান ব্যুৎপত্তি। তবু শরীয়তে তাঁর অবহেলা ছিল না, তেহফার অনুবাদই তার প্রমাণ। ধর্মও তাঁর সুমতি ছিল, তাঁর শাস্ত্রনিষ্ঠার, অধ্যাত্মতত্ত্বে জ্ঞানের ও ধার্মিকতার আর অধ্যাত্মসিদ্ধির স্বীকৃতি রয়েছে পীরের খিলাফ প্রাপ্তিতে।

সামন্তঘরের রাজকীয় আবহে লালিত হয়েছিলেন বলে পলো, পাশা প্রভৃতি ক্রীড়ায় যেমন তাঁর অনুরাগ জন্মেছিল, তেমনি সঙ্গীতশাস্ত্রী সঙ্গীতরচক ও গায়ক হিসেবেই হয়েছিলেন তিনি প্রতিষ্ঠিত ও প্রখ্যাত। সঙ্গীতশিক্ষক রূপেই তিনি অমাত্যগৃহে প্রবেশাধিকার পান এবং তাঁর নানা গুণগ্রামের পরিচয় পেয়ে অমাত্যরা তাঁকে আদর-কদর করতে থাকেন। মাগনঠাকুরের বিদ্যাবস্তার যে বর্ণনা আলাউল দিয়েছেন, তা আলাউলের প্রতিও প্রযোজ্য :


আরবি ফারসি আর মঘী হিন্দুস্তানী
নানাগুণ পারগ সঙ্গীত জ্ঞাতা গুণী।
কাব্য অলঙ্কার জ্ঞাতা ষষ্ঠম নাটিকা
শিল্পগুণ মহৌষধ নানাবিধ শিক্ষা।

আলাউল তাঁর সর্বগ্রহেই অল্পবিস্তর আত্মকথা বলেছেন। এগুলোর মধ্যে সমকালীন রাজার নাম, আদেষ্ঠার পরিচিতি প্রভৃতি রয়েছে। পিতার কর্মস্থলেরও উল্লেখ আছে, নেই কেবল আমাদের বাঞ্ছিত অতিপ্রয়োজনীয় তথ্য অর্থাৎ কবির পিতার নাম ও পিতৃভূমির ঠিকানা। তাই আলাউলের জন্মভূমি নিয়ে বিদ্বানদের মধ্যে বিতর্কের শেষ নেই। এ বিতর্কে বুদ্ধিগ্রাহ্য যুক্তি ও অনুমানই তাঁদের সম্মল। আলাউল-পরিচিতির উৎস তাঁর আত্মকথাগুলো পরে উদ্ধৃত করেছি।

এখানে কেবল প্রাপ্ত তথ্যগুলোই বিন্যস্ত করে দিচ্ছি, এ থেকেই আলাউলের বহিজীবন জানা যাবে, আর তাঁর অন্তর্জীবনের পরিচয়তো তাঁর কাব্যেই ফাঁকে-ফুকুরে সুপ্রকটিত।

রাজ পরিচিতি

আরাকানের রাজবংশের ও রাজাদের প্রাসঙ্গিক অংশের পরিচয় ছকে এরূপ :



দুনিয়ার পাঠক এক হও! ~ www.amarboi.com ~

ঈশ্বর দুহিতা তুমি ঈশ্বর ভণিতা ।^১
তোমা বিনু কেবা আছে ঈশ্বর পালয়িতা ।

শিশুপুত্রের পক্ষে—

পুত্রতুল্য করে দেবী রাজ্যের পালন ।
এবং
'তাহান অমাত্য শ্রেষ্ঠ শ্রীযুক্ত মাগন
শিশুকালে বৃদ্ধ রাজা কৈলা সমর্পণ ।
যথেক সম্পদ ধন দুহিতাকে দিলা
তান (মাগনের) হস্তে আনিয়া সকল সমর্পিলা
মুখ্য পাটেশ্বরী যদি হৈলা যশস্বিনী
মুখ্যপাত্র হইলা মাগন গুণমণি ।^২

পিতৃনিযুক্ত অভিভাবক মাগনকে বিধবা রানী মুখ্যপাত্র বা প্রধানমন্ত্রী করে তাঁর সাহায্যে
সন্তানের পক্ষে রাজ্য শাসন করতে থাকেন । বিদ্বানদের সংশয় বিমোচন কল্পে এখানে মাগনেরও
বিস্তৃত পরিচয় দেয়া দরকার ।

রাজসৈন্য মন্ত্রী ছিল শ্রীবড় ঠাকুর
প্রভুস্থানে মাগী পাইল প্রার্থনা করি
তেকারণে (পুত্রের) মাগন ঠাকুর নাম ধরি....

মুসলিম সৈন্যমন্ত্রী শ্রীবড় ঠাকুরের পুত্র মুগুসি ঠাকুর ছিলেন নরপতিগীর বিশ্বস্ত মন্ত্রী এবং
নানাগুণে গুণী । এহেন মাগনকেই বৃদ্ধ রাজা নরপতিগী অল্পবয়স্কা কন্যার অভিভাবক নিযুক্ত
করলেন, যাতে বৃদ্ধ রাজার আকস্মিক মৃত্যুতে কন্যার কোন বিপদ না ঘটে । এ তথ্যের
আলাউল পুনরাবৃত্তি করেছেন এভাবে:

কন্যার শৈশব দেখি ভাবে নরপতি
তাহাকে (মাগনকে) আনিয়া রাজা কন্যা সমর্পিল ।
বৃদ্ধ নরপতি যদি গেল স্বর্গপুরী ।
এই কন্যা হৈল জান মুখ্য পাটেশ্বরী ।
শৈশবের পাত্র দেখি বহু স্নেহভাবি
মুখ্যপাত্র করিয়া রাখিল মহাদেবী ।^৩

এতে একটা সত্য উদঘাটিত হচ্ছে । খদোমেঙতার বা সাদউ মেঙদারের বিবাহ কালেও
সিংহাসনে আরোহণ সময়ে (১৬৪৫ খ্রীঃ) আলাউল রোসাঙ্গে পৌছেননি এবং লোকস্মৃতিতে
বিবাহ ও রাজ্যাভিষেকের উৎসব স্নান হয়ে আসার পরে তিনি রোসাঙ্গে উপস্থিত হন, তাই
রাজাকে রাজপুত্র বলে মনে করেছেন, আবার লোকমুখে রাণী রূপিনী রাজকন্যার

^১ ৩৩ অধ্যাপক সুখময় মুখোপাধ্যায়ের মতে যেহেতু বার্মায় একসময়ে ভাইয়েবোনে বিয়ে চালু ছিল, সেহেতু এ
ক্ষেত্রে নরপতিগীর পুত্র-কন্যায় বিয়ে হয়েছিল । প্রথমত উদ্ধৃত চরণগুলো এক সঙ্গে পড়লে সে অর্থ করা যাবে
না, দ্বিতীয়ত সত্যেরো শতকের মধ্যভাগে আরাকানী বৌদ্ধদের মধ্যে ভাইবোনে বিয়ে চালু ছিল বলে কোন
প্রমাণ নেই । তবু উদ্ধৃত তথ্যগুলো দেখে কেউ ভেবেছেন মাগনই রাজকন্যা বিয়ে করেন (সমর্পণ), কেউ মনে
করেছেন, রাজকন্যা রাজ্যাংশ পেয়েছিলেন : দ্রষ্টব্য : সাহিত্য পরিষৎ পত্রিকা, ১৩৩৩ সাল পৃঃ ৭৯-৮৪ বাঃ
সাহ ইঃ ২য় সং ৫৭৫-৭৫, ৫৮৪, ... কালক্রম ।

প্রভাবপ্রতিপত্তির কথাও শুনেছেন, অথচ উভয়ের প্রকৃত সম্পর্ক নবাগত কবি বুঝতে পারেননি। মনে করেছেন রাজা ও রাজকন্যা ভাই-বোন, স্বামী-স্ত্রী নন :

‘বৃদ্ধ নরপতি যদি গেল স্বর্গপুরী
এই কন্যা হৈল জান মুখ্য পাটেশ্বরী’।

আমাদের অনুমান আলাউল ১৬৪৭-৪৮ খ্রীস্টাব্দের দিকে রোসাস্তে উপস্থিত হন।

আলাউল পরিচিতি

আজ অবধি আলাউলের জীবনবৃত্তান্ত সম্বন্ধে যত প্রশ্ন উঠেছে এবং যতরকমের বিতর্ক রয়েছে আমাদের নিজেদের যুক্তি-বুদ্ধি যোগে তথ্য-প্রমাণ প্রয়োগে আমরা সেগুলো মীমাংসা করতে প্রয়াস পেয়েছি আলাউল রচিত ‘তোহফা’র ভূমিকায়।^১ এখানে কেবল তথ্য-প্রমাণে প্রাপ্ত আলাউল পরিচিতি সংক্ষেপে বিবৃত করছি।

আলাউলের আত্মকথা থেকে নিশ্চিতভাবে জানা যায় যে ফরিদপুরের অন্তর্গত ফতেহাবাদ পরগনার শাসনকেন্দ্র জালালপুর আলাউলের পিতার কর্মভূমি ছিল। তাঁর পিতা পরগনাধিপতি মজলিস কুতুবের অমাত্য তথা উচ্চপদস্থ কর্মচারী ছিলেন। কবির ভাষায় :

গৌড় মধ্যে প্রধান ফতেয়াবাদ দেশ
মধ্যভাগে বহে তার গঙ্গা ভাগরস ...
তাহাতে জালালপুর অতি পুণ্যস্থান
মজলিস কুতুব এই রাজ্যের ঈশ্বর
তাহান অমাত্যসুত ব্রাহ্ম সে পামর।

পিতা জালালপুরে সপরিবারে বাস করলে, জালালপুর আলাউলের জন্মস্থানও হতে পারে এখন যেমন চাকুরীদের সন্তানের জন্মস্থান বাপের কর্মস্থলই। কিন্তু জালালপুরকে কবির পিতৃভূমি বা পুরুষানুক্রমিক বাসস্থান বলার মতো কোন প্রমাণ পাওয়া যায়নি। তবে জালালপুর বা ফতেহাবাদ অঞ্চল কবির জন্মভূমি হলে তাঁর বিভিন্ন গ্রন্থে পুনঃ পুনঃ বর্ণিত ফতেহাবাদ ও পিতার মৃত্যু প্রসঙ্গের মধ্যে কোথাও অবশ্যই উল্লেখিত উল্লেখ থাকত। কিন্তু বর্ণনায় স্পষ্টত ফতেহাবাদকে কেবল পিতার কর্মভূমি বলেই উল্লেখ করা হয়েছে।

আলাউল তাঁর বিভিন্ন গ্রন্থে আত্মকথায় একই তথ্যের পুনরাবৃত্তি করেছেন, তা এই [পিতাপুত্র কোন্ কাজে জলপথে যাচ্ছিলেন তা কিন্তু বলা হয়নি কোন কাব্যেই] :

দৈবগতি কার্যহেতু যাইতে নৌকাপথে
দরশন হইলেক হার্মাদ সহিতে।
শহীদ হইল বাপ বুঝি বহুতর
রণক্ষেত্রে রোসাস্তে আইলুঁ একসর।
রাজ আসোয়ার হৈল এখাত আসিয়া।

পিতাপুত্র কোন্ কাজে জলপথে কোথায় যাচ্ছিলেন তা কিন্তু বলা হয়নি কোন কাব্যেই। হার্মাদের সঙ্গে সংঘর্ষকালে কবির পিতা শহীদ হন। এবং আহত কবি পালিয়ে রোসাস্তে গিয়ে

^১ ‘তোহফা’- আহমদ শরীফ সম্পাদিত, সাহিত্য পত্রিকা, ১ম বর্ষ, শীত সংখ্যা, ১৯৬২ সাল

পৌছেন আর সেখানে অশ্বারোহী সৈনিক হয়ে জীবিকার সংস্থান করেন। রাজ-আসোয়ার মানে রাজার দেহরক্ষী অশ্বারোহী সৈন্য কি-না আমাদের জানা নেই।

রোসাস্কে এ সৈনিকের গুণপনা গুহায়িত রইল না, অচিরেই তিনি সঙ্গীতবিদ ও গায়করূপে সুপরিচিত হলেন এবং সঙ্গীতশিক্ষকরূপেই তাঁর অমাত্যঘরে প্রবেশাধিকার ঘটে। তখন তিনি সৈনিকপদ ত্যাগ করেন।

তালিব আলিম বুলি মুঞি ফকিরেরে

অনু বস্ত্র দিয়া সবে পোষন্ত আদরে।

তারপরে তাঁর কবিত্ব-পাণ্ডিত্যের খ্যাতিও ছড়িয়ে পড়লো। সঙ্গীতশিক্ষক কবি সম্ভবত গান রচনার মাধ্যমেই এ খ্যাতি লাভ করেন। এবং তিনি তারপর এক এক অমাত্যের আশ্রমে ও প্রতিপোষণে এক এক কাব্য রচনা করতে থাকেন ১৬৫১ থেকে ১৬৭৩ খ্রীস্টাব্দ অবধি।

বহু গ্রন্থ রচিলুঁ মোহন্ত সব নামে

মোর বাক্য এথা প্রকাশিলুঁ সর্বঠামে।

মধ্যখানে রাজরোষে পড়ে পঞ্চাশ দিন কারাবাস করেছেন এবং প্রায় এগারো বছর রাজভয়ে কেউ তাঁকে প্রতিপোষণ দেননি। কবির ভাষায় ঘটনাটি এই :

শাহ শুজা রোসাস্কে আইল দৈবগতি।

হতবুদ্ধি পাত্রসহ (শুজাকে) দিল হতমতি।

আপনার দোষ হস্তে (শুজা) পাত্র অবসাদ

মির্জা নামে- এক পানী আমায় হৈল মিথ্যাবাদ।

কারাগারে পৈলুঁ আমি না পাই বিচার-

কারাগার- গর্জবাস (সম) আছিলাম পঞ্চাশ দিবস।

এহি মতে একাদশ (এদশ?) অঙ্গ গঞি গেল।

এ বিপর্যয়ের পরে বৃদ্ধকালে কবি এগারো বছর আর্থিক দৈন্যে ভুগেছিলেন। তখন তাঁর

‘সব ভিক্ষা জীব রক্ষা ক্রেশে দিন যায়।’

অস্থানে পড়িয়া পাইলুঁ বহু অবসাদ

মন্দকৃতি ভিক্ষাবৃত্তি জীবন কর্কশ

পুত্র দারা সঙ্গে মুঞি হৈলুঁ পরবশ।.....

ভিক্ষা করি দেয় পুত্র-দারা রাজকর।

তারপরে মহামাত্য নবরাজ মজলিসের প্রতিপোষণে ১৬৭৩ খ্রীস্টাব্দে কবি ‘সিকান্দরনামা’ রচনা করেন। এটিই তাঁর শেষ গ্রন্থ। এরপরে কত বছর তিনি জীবিত ছিলেন, আমরা তা জানি না। তবে নিশ্চিতভাবে বলা চলে তাঁর কবি জীবনের শুরু ও শেষ হচ্ছে ১৬৫১-৭৩ খ্রীস্টাব্দ।

আগেই বলেছি আমাদের ধারণায় আলাউল সাদউমেদদারের সিংহাসন প্রাপ্তির (১৬৪৫ খ্রীঃ) দু’তিন বছর পরে ১৬৪৭-৪৮ সনের দিকে রোসাস্কে উপনীত হয়েছিলেন। পদ্মাবতী রচনাকালে (১৬৫১ খ্রীঃ) কবি প্রৌঢ়ত্বের শেষ প্রান্তে ছিলেন। তাই আট বছর পরে ১৬৫৮ সনে সয়ফুলমূলক বদিউজ্জামাল রচনারসময়কালে কবি সখেদে বার্ধক্যের কথা বলেছেন-

আজ্ঞা পাই রচিনু পুস্তক পদ্মাবতী
যথেক আছিল মোর বুদ্ধির শক্তি ।
বৃদ্ধকাল হৈল এবে শক্তিটুটি আসে
যৌবনকালের সম মন না উল্লসে । ...

অন্যত্র— বৃদ্ধকালে গ্রন্থকর্ম উচিত না হএ ।

উক্তো দুটো কাব্যই মাগন ঠাকুরের আগ্রহে রচিত । মুখ্যমন্ত্রী মাগন আলাউলের সঙ্গীতশিষ্য হয়তো বা কাব্যশিষ্যও ছিলেন । এ তথ্য আলাউলের ও সৈয়দ মুসা উক্তি নিহিত দেখি :

শ্রীযুত মাগন মনে হৈল অতি সুখ
আস্কারে বুলিলা গুরু কর অবধান ।
মোর মন তোষ এই প্রেমের কথনে
প্রেমের পুস্তক এই সয়ফুলমুলুক ।

মাগনের মৃত্যুতে সয়ফুলমুলুক অসমাপ্ত থেকে যায়, সৈয়দ মুসা তা সমাপ্ত করার জন্যে কবিকে অনুরোধ জানাচ্ছেন এভাবে—

পুস্তকর (সয়ফুলমুলুক) আজ্ঞাকারী শ্রীযুত মাগন
আছিল তোমার শিষ্য মোর বন্ধুজন । ...
বিশেষ সঙ্কটকালে যেই (মাগন) করিছে (কবিকে) রক্ষণ
যোগ্য দরে রাখিয়াছে কড়িয়া পুথিধন ।

আলাউল রাজরোষে পড়ায় অমাত্যদের প্রতিপোষণ হারিয়েছিলেন । দশ-এগারো বছর সপরিবারে দৈন্যের মধ্যে প্রায় অন্তিম কটিয়েছেন । পুত্র দারা সঙ্গে মুঞি হৈল পরবশ/ভিক্ষা করি পুত্র-দ্বারা দেয় রাজকর ।]

এতে মনে হয় ১৬৭৩ সনের দিকে তাঁর ছেলেরা হয় নাবালেগ ছিল অথবা অযোগ্য ছিল । তাই ভিক্ষাবৃত্তিতে তথা অমাত্যদের অনুগ্রহেই তাঁর পরিবারের অনুব্রজ জুটত । এরা কি তাঁর দ্বিতীয় পক্ষের স্ত্রী-পুত্র! কারণ ছয়ের দশকে আমরা তাঁকে বৃদ্ধ বলে খেদ করতে দেখি । সেকালের নিয়মে তিনি জালালপুরে নিশ্চয়ই বিবাহিত ছিলেন । ফলে দুটো সম্ভাবনার কথা মনে জাগে, হয় রোসাঙ্গে প্রতিষ্ঠিত হয়ে কবি পত্নী ও সন্তানদের রোসাঙ্গে নিয়ে গিয়েছিলেন অথবা রোসাঙ্গে বিয়ে করে নতুন সংসার পাতেন । সেকালের প্রতিবেশে দ্বিতীয় অনুমানই গ্রহণযোগ্য । এবং প্রথমা স্ত্রীর সন্তান থাকলে তারা জালালপুরে বাস করতো, অথবা আলাউলের পিতৃ-পুরুষের বাস্তুতে ফিরে গিয়েছিল তা যেখানেই হোক । সিকান্দরনামা সূত্রে প্রমাণ আলাউল ১৬৭৩ সন অবধি রোসাঙ্গশহরে বাস করতেন । অমাত্যদের দানে কিংবা বৃত্তির অর্থে তাঁর সংসার চলত । এমন মানুষ ১৬৬৬ সন থেকে মুঘলশাসিত চট্টগ্রামে ভাতে মরবার জন্যে আসতেই পারেন না । কাজেই চট্টগ্রামে আলাউলের নিবাস কিংবা বংশধর সংক্রান্ত লোকশ্রুতিতে কোন সত্য নেই । বরং এখনকার পাথুরে কেলায় (সাবেক রোসাঙ্গ শহরে) আলাউলের কবর ও মসজিদ রয়েছে বলেও লোকমুখে শোনা যায় । তাছাড়া ‘গুলে বকাউলি’ কাব্যরচক উনিশ শতকের প্রথমার্ধের চট্টগ্রামের রাউজানের অন্তর্গত নয়্যাপাড়া গ্রামের কবি মুকিম পূর্ববর্তী ও সমকালীন কবিদের নামোল্লেখকালে আলাউল সম্বন্ধে সুস্পষ্টভাবে বলেছেন :

‘গৌড়বাসী রৈল আসি রোসাক্সের ঠাম।

কবিগুরু মহাকবি আলাউল নাম।

উনিশ শতকের প্রথমার্ধ অবধি যে লোকশ্রুতি চট্টগ্রামে চালু ছিল, তা’ অবিশ্বাস করার কোন কারণ দেখি না। অতএব আলাউল চট্টগ্রামের লোক নন, অবশ্য ফতেহাবাদও তাঁর পিতৃভূমি নয়। রোসাক্সরাজ্যভুক্ত চট্টগ্রামের মুসলমানরাই আলাউলের পাঠক ছিল বলেই আলাউলের নাম চট্টগ্রামের ঘরে ঘরে এ কালের রবীন্দ্র-নজরুলের মতোই উচ্চারিত হতো, এখনো হয়। এ নাম হাউজহোল্ড ওয়র্ড। আলাউলের উক্তি থেকেই বোঝা যায় আলাউলের পিতৃভূমি চট্টগ্রাম ছিল না, ছিল না রোসাক্সও। এবং মাগন ও আলাউল একই দেশের লোক ছিলেন না :

মাগন তানদেশী যথেক আলিম গুণবন্ত
মান্য করি আনি নিত্য আদরে পূজন্ত।
মুঐঃ পরদেশী এক আলাউল হীন-
রোসাক্সে পড়িলু আসি আপনা কুদিন। [সয়ফুলমুলুক]

সোলায়মানও- পরদেশী গুণী পাইলে আদরে পোষন্ত
মহা হরষিত হৈল পাইয়া আশ্বারে (কবিকে)
অন্নবস্ত্র দানে নিত্য পোষন্ত সাদরে।

আরাকানের রাজধানী আকিয়াবে পাথুরে কেন্দ্রীয় আলাউল সম্বন্ধে সেখানকার সাহিত্যে ইতিহাসে, পুরাতত্ত্বে বা জনশ্রুতিতে কোন কিছু মেলে কি-না সন্ধান করা যেতে পারে। এখানে বসে আর কিছু অনুমানের অবকাশ নেই।

এখানে ছকে আলাউলের রচনাবলী সম্বন্ধে প্রাথমিক তথ্য দেয়া হল :

ক্রমিক সংখ্যা	মূল লেখক/উৎস	রচনার নাম	আদ্যেষ্ঠা অমাত্য	রচনাকাল
১.	মালিক মুঃ জায়সী	পদ্মাবতী	মাগন ঠাকুর	১৬৫১ খ্রীঃ
২.	অজ্ঞাত রূপকথা	রতন কলিকা আনন্দবর্মা আনন্দবর্মা (সতীময়নার পরিশিষ্ট রূপে রচিত)	শ্রীমন্ত সোলায়মান	১৬৫৯ খ্রীঃ
৩.	আলেফ লায়লা	সয়ফুলমুলুক বদিউজ্জামাল	প্রথমাংশ মাগন ঠাকুর শেষ্ঠাংশ-সৈয়দ মুসা	১৬৫৮ খ্রীঃ ১৬৬৯ খ্রীঃ
৪.	নিয়ামী গঞ্জাবী	সগুণয়কর	সৈয়দ মুহম্মদ খান	১৬৬৩ খ্রীঃ
৫.	ইউসুফ গদা	তোহফা	শ্রীমন্ত সোলায়মান	১৬৬৪ খ্রীঃ
৬.	নিয়ামী গঞ্জাবী	সিকান্দরনামা	নবরাজ মজলিস	১৬৭৩ খ্রীঃ
৭.	মৌলিক রচনা	রাগতালনামা		
৮.	ঐ	পদাবলী		

পদ্মাবতী-মধ্যযুগের ভারতে যেসব মুসলমান প্রাদেশিক ভাষায় সাহিত্যচর্চা করেছেন, তাঁদের প্রায় সবারই ধমনীতে মাতৃ বা পিতৃসূত্রে কিংবা মাতৃপিতৃসূত্রে দেশী রক্ত বহমান ছিল।

আমীর খসরুও রাজপুতকন্যার সন্তান। আবদুর রহমান, মোল্লা দাউদ, কুতবন, মনঝন, মিয়া সাধন, মালিক মুহম্মদ জায়সী, উসমান, শেখ নবী, কাসিম শাহ, নূর মুহম্মদ প্রমুখ সব উত্তর ভারতীয় কবির কাব্যে রবিষয়বস্তু হচ্ছে স্থানীয়। এঁরা নিজেরা দেশজ মুসলিমের বংশধর না হলে দেশীভাষা, ছন্দ, কাব্যের আলঙ্কারিক ঐতিহ্য, গল্প-কাহিনী, লোকশ্রুতি এবং লোকাচার ও শাস্ত্র সংস্কৃতি প্রভৃতির সঙ্গে এঁদের এমন অকৃত্রিম অন্তরঙ্গ সম্বন্ধ হতেই পারত না। এঁদের কারো কারো নাম এবং পরিচিতি আমাদের ধারণার সাক্ষ্য ও সমর্থক। এঁদের উদ্ভিষ্ট পাঠকও দেশজ মানুষ। অতএব দেশজ মুসলমান মাতৃভাষায় স্থানীয় বিষয় নিয়ে তাঁদের কাব্য রচনা করেছেন। তাঁদের অনেকেই কাব্যের নামকরণও হয়েছে নায়কার নামেই—মৈনাসত, চান্দায়ন, পদুমাবত, মৃগাবত, ইন্দ্রাবত, মধুমালত, চিত্রাবলী, গুলবকাউলী। পদুমাবত অধ্যাত্মতত্ত্বের রূপক ফারসি প্রেমকাব্যের প্রভাবজ। ইরান রাজের আশ্রিত হুমায়ূনের দিল্লী প্রত্যাবর্তনকাল থেকেই ভারতের রাজনীতিতে, প্রশাসনে ও সংস্কৃতিতে ইরানিদের প্রত্যক্ষ প্রভাব পড়তে থাকে এবং তখন থেকেই ফারসি সাহিত্য-সংস্কৃতির চর্চাও সর্বব্যাপী হয়ে ওঠে।

মধ্যযুগের শাসকরা ছিলেন উত্তরভারতের বা উত্তরভারত হয়ে আসা মানুষ। তাই বাঙলার শাসকদের লিখিত দরবারী ভাষা গোড়ার দিকে কিছুদিন আরবি ও পরে ফারসি থাকলেও কাজকর্ম চলত উত্তরভারতীয় মিশ্রভাষায়। ফলে শিক্ষিত বাঙালীমাত্রই সেদিনও হিন্দুস্থানী ভাষা বুঝত, জানত এবং বলতেও পারত, তা ছিল আজকের মতোই লিঙ্গুয়া-ফ্রাঙ্কা তথা বিভিন্ন অঞ্চলের মানুষের ভাববিনিময়ের কথ্যভাষা। সে যুগের উচ্চশিক্ষায় দরবারী ভাষা ফারসিও ছিল অবশ্য শিক্ষণীয়, শাস্ত্রের ভাষা আরবি বা সংস্কৃতও ছিল অবশ্য পাঠ্য এবং দেশের সাহিত্য-সংস্কৃতির সঙ্গে সম্পর্ক রাখতে হলে দেশী প্রবাদ, প্রবচন, কিংবদন্তী উপাখ্যান ছাড়াও এদেশের ভাব, চিন্তা, সাহিত্য ও সংস্কৃতির চিত্রসাহন সংস্কৃত ভাষা-সাহিত্যের সঙ্গে, তার ছন্দ-কাব্য-অলঙ্কার শাস্ত্রের সঙ্গে প্রত্যক্ষ বা পরোক্ষ সম্পর্ক রাখতেই হত। লিখিত বাঙলা ভাষা-সাহিত্য আগে গড়ে উঠেছে সংস্কৃত ও শৌরসেনী প্রাকৃত অবহট্টের আদলে আর মধ্যযুগে প্রভাবিত হয়েছে ফারসি ভাষা-সাহিত্যের রূপ, রস ও ভঙ্গির দ্বারা। এখন বিকশিত হচ্ছে ইংরেজির প্রভাবে।

আমেঠীতে মালিক মুহম্মদের জন্ম, অযোধ্যার রায়বেরেলী জেলার জায়সনগরে তাঁর দরগাহ বর্তমান। তাঁর মাতৃভাষা আওধী। সম্রাট বাবুরের সময়ে (১৫২৬-৩০) তাঁর আখেরি কালাম নামের গ্রন্থ রচিত এবং সম্রাট শেরশাহের আমলে ৯৪৭ হিজরীতে তথা ১৫৪০ খ্রীস্টাব্দে তাঁর পদুমাবত কাব্যের রচনা আরম্ভ হয়। তিনি চিশতিয়া-নিযামিয়া খান্দানের সূফীসাধক ছিলেন, তাঁর পীর ও মুর্শিদ হচ্ছেন শেখ মুহীউদ্দীন ও শাহ মুবারক বুদলা। তিনি তাঁর রূপককাব্যের ভিত্তি করেছিলেন রাজপুতনায় বহুল প্রচলিত এক লোকগাথাকে—রত্নসেন-পদ্মিনী, পদ্মিনী-দেওপাল ও পদ্মিনী-আলাউদ্দিন কাম-প্রেমগাথা। পদুমাবত কাব্যে এ কাহিনী দীর্ঘায়িত ও পল্লবিত হয়েছে। মালিক মুহম্মদ প্রতিভাবান কবি ছিলেন। তা ছাড়া উত্তরভারতীয় উপভাষার একটা সহজ লালিত্য ও মাধুর্য রয়েছে। সহজ আওধী বুলি ঠেট ভাষায় রচিত গল্পরসপূর্ণ, উচ্চ ও সুস্থ তত্ত্বসম্বিত এ কাম-প্রেমকথা লোকপ্রিয় হয়েছিল। ভাবকের কাছে এ জীবাত্ম-পরমাত্মাবিষয়ক তত্ত্বের আকার, প্রেমিকের কাছে এ প্রেম ও কামতত্ত্ব, সাধারণ পাঠকের কাছে বাস্তব ঘটনাশ্রিত রসকাব্য। জায়সী তাঁর কাব্যের উদ্ভিষ্ট প্রতিপাদ্য ও তাৎপর্য নিজেই জানিয়ে

দিয়েছেন। অবশ্য এ অংশ পদ্যাবতের বহু পুথিতে মেলে না তাই প্রক্ষিপ্ত বলেও কারো কারো ধারণা।

তন চিতউর মন রাজা কীন্হা
হিয় সিংঘল, বুদ্ধি পদুমিনি চীনহা।
গুরু সুআজ্জৈ পংথ দেখাবা
বিনু গুরু জুগত কো নিরুগুণ পাবা।
নাগমতী য়হ দুনিয়া ধংধা
যাঁচা সোই ন এহি বংধা।
রঘব দূত সোই সয়তানু
মায়া আলাউদীং সুলতানু
প্রেমকথা এহি ভাঁতি বিচারহ।

এ অংশ য়ারই রচনা হোক, 'পদ্যাবত কাব্যের যথার্থ তাৎপর্য এতে বিধৃত হয়েছে।

আলাউল জায়সীর পদ্যাবত' কাব্যটির অনুবাদকালে দেশ-কালের চাহিদানুসারে ইচ্ছামত গ্রহণ, বর্জন ও সংযোজন করেছেন, তাই অনুবাদ হয়েছে কোথাও কায়িক বা আক্ষরিক, কোথাও ছায়িক, কোথাও বা ভাবিক। যেহেতু অবসরকালীন চিত্তবিনোদনের জন্য রস-কাব্য হিসেবে কেবল গল্পাংশকেই গুরুত্ব দেয়া হয়েছে এবং সে-সঙ্গে তত্ত্বপ্রতীক দোহার অনুবাদও প্রায়ই বাদ দেয়া হয়েছে, সেহেতু অনুবাদে কাহিনীও হয়েছে অনেক ঝজু। তাছাড়া অনুবাদ বিচারকালে ১৫৪০ খ্রীস্টাব্দে রচিত হাতে লেখা পুথির যে প্রতিলিপি একশ' বছর পরে অযোধ্যা থেকে রোসাঙ্গে আলাউলের হাতে এল, তার পাঠ কিরূপ ছিল এবং কিরূপ থাকা সম্ভব তাও আমাদের আলোচনাকালে স্মরণ রাখা কর্তব্য।

আলাউলের পদ্মাবতী কাহিনীর কাঠামো এরূপ :

সিংহলদ্বীপের রাজা গন্ধর্বসেন, রাণীর নাম চম্পাবতী। তাঁদের পরমাসুন্দরী কন্যা যৌবনবতী পদ্মাবতী তখনো অনুঢ়া। হীরামন নামে পাখির সঙ্গেই সে করে প্রেমালাপ। রাজা এ সংবাদ পেয়ে শুক পাখিকে হত্যার আদেশ দিলেও কন্যার করুণ আবেদনে পাখির প্রাণ রক্ষা পেল। তবু শঙ্কিত পাখি একদিন সুযোগ পেয়ে পালাল। পরে ব্যাধের হাতে ধরা পড়ে এবং নানা হাত ঘুরে এক সময়ে চিতোররাজ রত্নসেনের হাতে আসে। রাজা হীরামনের মুখে পদ্মাবতীর অসামান্য অতুল্য রূপলাবণ্যের কথা শুনে পদ্মাবতীর উদ্দেশে গৃহত্যাগ করলেন। তারপর নানা সমুদ্র পার হয়ে দুর্গম সিংহলে উপস্থিত হলেন। রত্নসেন ও পদ্মাবতী পরস্পরের প্রতি আসক্ত হলেও গন্ধর্বসেন রত্নসেনের সঙ্গে কন্যার বিবাহে রাজি ছিলেন না। অবশেষে হীরামন ও হরপার্বতীর মধ্যস্থতায় বিয়ে হল।

এদিকে পাখির মুখে নাগমতীর দুঃখ-যন্ত্রণার সংবাদ শুনে বিচলিত রত্নসেন পথে নানা ভাবে বিপন্ন হয়েও অবশেষে পদ্মাবতীকে নিয়ে বাড়ি ফিরলেন।

রত্নসেন তাঁর সভাপণ্ডিত রাঘবচেতনকে যক্ষিণীসিদ্ধ যাদুকর বলে পদচ্যুত করেন। পদ্মাবতী করুণাবশে রাঘবচেতনকে তার একটি কঙ্কন উপহার দেয়। দুষ্ট রাঘবচেতন দিল্লীতে সুলতান আলাউদ্দীনকে পদ্মাবতীর রূপ লাভণ্যের কথা জানিয়ে পদ্মাবতীকে চেয়ে পাঠাবার জন্যে প্ররোচিত করে। সুলতান সুজার বা সরজার হাতে পদ্মাবতীকে চেয়ে পত্র পাঠালেন রত্নসেনের

কাছে। ফলে যুদ্ধ হলো অনিবার্য। বারো বছর ধরে তুমুল যুদ্ধ, ষড়যন্ত্র, শঠতা প্রভৃতি চলল। তুমুল যুদ্ধে গোরা ও বাদল নিহত হল। অন্যদিকে সুলতান আলাউদ্দিনের কারাগারে বন্দী রত্নসেনের অনুপস্থিতির সুযোগে কুস্তলনের রাজা দেবপাল কুটনী কুমুদিনীর মাধ্যমে পদ্মাবতীকে পাবার চেষ্টা করে। পরে হৈরথ যুদ্ধে রত্নসেন দেবপালকে নিহত করে প্রতিশোধ নেন। কিন্তু যুদ্ধে আহত রত্নসেনও অচিরে প্রাণত্যাগ করলেন। ফলে তাঁর দুই রানী নাগমতী ও পদ্মাবতী সহমৃত্যু হল।

কয়েকদিন পরই সুলতান আলাউদ্দিন চিতোর দখল করে দেখলেন— সব শেষ এবং তখন তিনি দুঃখিত হলেন। কোন কোন পুথিতে আছে তখন অনুভূত সুলতান পদ্মাবতীর চিতা সালাম করে অর্থাৎ মৃত্যুর প্রতি শ্রদ্ধা জানিয়ে দিল্লীতে ফিরে এলেন। আলাউলের ভাষায় বিষয়-সূত্র এরূপ :

শেখ মোহাম্মদ যখনে রচিল পুথি
সংখ্যা সপ্তবিংশ নবশত
চিতাওর গড়েখর রত্নসেন নৃপবর
শুক মুখে শুনিয়া মহত্ব
যোগী হৈয়া নরাধিপ চলিল সিংহল দ্বীপ
বোলশত কুমার সংহতি
বনখণ্ড বাট উত্তরে সিংহল ঘাট
সিংহল দ্বীপেত গিয়া নানাবিধ দুঃখ পাইয়া
বহুযত্নে পাইল পদ্মাবতী।
পক্ষীমুখে শুনি কথ্য নাগমতী দুঃখবার্তা
পুনি দেশে চলিল নৃপতি
সাগরে পাইয়া ক্রেশ আইলে চিতাওর দেশ
কৈলা বহু উৎসব আনন্দ।
রাঘবচেতন জ্ঞানী অবিস্মিতি কহি বাণী
প্রতিপদে দেখাইল চান্দ।
তত্ত্ব জানি নৃপবর কৈলা তাকে দেশান্তর
যাইতে কৈলা কন্যা দরশন
বহুল আদর মনে করের কঙ্কন দানে
পরিতোষি পাঠাইলা ব্রাহ্মণ।
সোলতান আলাউদ্দিন দিল্লীশ্বর জগজিন
প্রচণ্ড প্রতাপ ছত্রধর
পণ্ডিত ব্রাহ্মণ তথা কহিল কন্যার কথা
শুনি হরষিত নৃপবর।
শ্রীজা নামে বিপ্রবর পাঠাইল দিল্লীশ্বর
কন্যা মাগি দিল্লীশ্বর স্থানে
পদ্মাবতী না পাইয়া শ্রীজা আইল পলটিয়া
শুনি শাহা ফুটু হৈল মনে।

বহুল মাতঙ্গ বাজী চতুরঙ্গ দল সাজি
 গেল চিতাওর মারিবারে
 দ্বাদশ বৎসর রণ তথা ছিল অখণ্ডন
 রত্নসেনে ধরিল প্রকারে ।
 দিল্লীশ্বর পাটে আইল নৃপ কারাগারে থুইল
 তাড়না করিলা নানা ভাতি
 গোরা-বাদিলা নাম ছিলা রত্নসেন ধাম
 মুক্ত কৈল কপট যুক্তি ।
 চিতাওর দেশে আসি বন্ধিলেক সুখে নিশি
 পদ্মাবতী সঙ্গে করি রঙ্গ
 দেওপাল নৃপকথা নাগমতী মুখে তথা
 গুনি নৃপমন হৈল ভঙ্গ ।
 সর্বরাজ্যে তথা গিয়া দওপাল সংহারিয়া
 যুদ্ধক্ষেত্রে আইলে নৃপতি
 সপ্তম দিবসান্তর মৈল রত্ন নৃপবর
 দুই রাণী সঙ্গে হৈল সতী
 পুনি সাজি দিল্লীশ্বর আসি চিতাওর গড়
 চিতাধমু দেখিলা বিদিত
 সতীগতি পদ্মাবতী গুনি শাহা মহামতি
 মনে হৈল পরম দুঃখিত ।'

মালিক মুহম্মদ জায়সী ছিলেন কবি-ভাবে অনুপ্রাণিত মৌলিক কবি, তাঁর কাব্যটি তাঁরই দেহ- মন-আত্মা দিয়ে লালিত মানস-সন্তান, আলাউল হচ্ছেন রসযুক্ত পাঠক ও অনুবাদক মাত্র তাঁর ভূমিকা বড় জোর ধাত্রী। মূলের সৌন্দর্য, লালিত্য ও উৎকর্ষ অনুবাদে আশা করা যায় না। মূলের সঙ্গে মিলিয়ে উৎকর্ষ বিচার করলে অনুবাদের প্রতি অনর্থক অবিচার করা হয়। জায়সী কবি, ভাবুক ও সাধক, তাঁর রচনা আঙ্গিকে চোপস্ট ও দোঁহা। আলাউল কাব্যরসিক। আলাউলের রচনা বর্ণনাত্মক। জায়সীর কাব্যে মেলে ভাবসৌন্দর্য ও তত্ত্বকথা, আলাউলের কাব্যে রয়েছে রসমাদুর্য। আলাউল সংস্কৃত শব্দের, ছন্দের অলঙ্কারের প্রয়োগে সুষম সুন্দর কাব্যসৌধ নির্মাণে ছিলেন নিষ্ঠ। ঈশ্বরশ্রুতি থেকে সিংহলদ্বীপ বর্ণনা বা বিবাহ ও ঋতুবর্ণনা প্রভৃতি অবধি আলাউলের মৌলিক রচনায় তাঁর পাণ্ডিত্যের ও কবিত্বের স্বাক্ষর রয়েছে, অন্যত্রও তাঁর ব্যবহৃত উপমাদি অলঙ্কারে তাঁর রুচি বুদ্ধির ছাপ সুপ্রকট। আলাউল যে জায়সীকে সর্বত্র অনুসরণ করবেন না, তা তিনি গোড়াতেই বলে রেখেছিলেন 'স্থানে স্থানে প্রকাশিমু নিজ মন উক্তি'।

^১ পদ্যাবলি: কাব্যকাহিনীর কোন ঐতিহাসিক ভিত্তি নেই। সবটাই কল্পনাপ্রসূত।— পশ্চিমী উপাখ্যান ও তাহার ঐতিহাসিকতা, ডক্টর কালিকারজন কান্দোগো— প্রবাসী ৩০শ ভাগ, ২য় খণ্ড ৫ম সংখ্যা ফাল্গুন ১৩৩৭ সন। পৃঃ ৬৫৪, ৬৬৩, ৬৫৬-৬৫ এবং প্রবাসী, বৈশাখ ১৩৩৯ সন; এবং 'মালিক মুহম্মদ জায়সী' (উর্দু) পুস্তক-সৈয়দ কলবে মুত্তফা রচিত দ্রষ্টব্য।

আবদুল করিম সাহিত্যবিশারদ পদ্মাবতী রচনার কালজ্ঞাপক' যে দুর্লভ চরণটি পেয়েছিলেন তা এই :

যুগ ভুগ ভাব রস শব্দ নিত্য দশা
যেজন তাহাতে বশ পুরিবেক আশা।

প্রথম চরণের দুটো ভাগ [ক] 'যুগ ভুগ ভাব রস' আর [খ] 'শব্দ নিত্য দশা' হরিদাস পালিতের মতে এখানে ১০১৩ মঘী সন উক্ত হয়েছে। অতএব ১৬৫১ খ্রীস্টাব্দে পদ্মাবতী রচিত। পদ্মাবতী রাজা সাদউ মেহন্দারের (১৬৪৫-৫২) রাজত্বকালে রচিত। কাজেই এ রচনাকাল নিঃসংশয়ে গ্রহণযোগ্য।

মূলের তুল্য না হলেও যেহেতু
বিষতুল্য বচন বচন সুথারস
বচন বচনে পুনি দেব হএ বশ।

অতএব বচনের আধার বলেই পদ্মাবতী আমাদের প্রিয়কাব্য।

সয়ফুলমলুক-বদিউজ্জামাল : রোসাস রাজ্যের মহামাত্য মাগন ঠাকুরের অগ্রহে আলাউল তাঁর দ্বিতীয় গ্রন্থ সয়ফুলমলুক-বদিউজ্জামাল রচনায় হাত দেন। ১৬৫৮ সনে মাগনের আকস্মিক মৃত্যু হয়। প্রতিপোষণের অভাবে তিনি গ্রন্থটি অসমাপ্ত রাখেন। দশ-এগারো বছর পরে পরবর্তী প্রধানমন্ত্রী সৈয়দ মুসা অনুরোধে ও প্রতিপোষণে সজ্ঞা হত্যার নয় বছর পরে তিনি ১৬৬৮-৬৯ সনে সয়ফুলমলুক-বদিউজ্জামাল গ্রন্থের শেষাংশ রচনা করে গ্রন্থটি পূর্ণাঙ্গ করেন।

রচনাকালটি এরূপ : কলা অঙ্গ সন্ত কবি গুন গুণিগণ
মৃগাস গগন রস করিয়া স্থাপন।
অগ্রহায়ণ শুক্লপক্ষ বার বৃহস্পতি
দিবা অর্ধে লেখা হৈল ক্ষেম দোষ মতি।

(মৃগাস-১০, গগন-৭, রস-৯ তথা ১০৭৯ হি: বা ১৬৬৮-৬৯ খ্রীস্টাব্দ)।

এ গ্রন্থের প্রথমাংশে মাগনের প্রস্তাব কবি ভাষায় এরূপ :

শ্রীযুত মাগন মনে হৈল অতি সুখ
আস্বাদে বুলিলা গুরু কর অবধান
ফারসি ভাষাতে এই প্রসঙ্গ পুরাণ-
মোর মন তোষ এই প্রেমের কথনে
প্রেম পুস্তক এই সয়ফুলমলুক।

তারপর সাস্ত্র না হৈতে পুথি (মাগন) পাইল পরলোক।

সৈয়দ মুসা কবিকে বললেন- পুস্তকের (সয়ফুলমলুকের) আঙ্কাকারী শ্রীযুক্ত মাগন
আছিল তোমা শিষ্য মোর বন্ধুজন।

কাজেই উভয়ের খাতিরে গ্রন্থটি পূর্ণাঙ্গ করার নির্দেশ দিলেন কবিকে। যদিও 'বৃদ্ধ কালে গ্রন্থকর্ম উচিত না হএ' তবু অনুরোধ রক্ষা করতে হল।

দোনাগাজী চৌধুরী প্রসঙ্গে বলেছি সয়ফুলমলুক-বদিউজ্জামাল উপাখ্যানের আদি উৎস আলেক-লায়লা। আলাউল বলেছেন তাঁর উপাখ্যানের উৎস ফারসি (ফারসি ভাষেতে এই প্রসঙ্গ দুনিয়ার পাঠক এক হও! ~ www.amarboi.com ~

পুরাণ)। এ ফারসি উপাখ্যান কার রচনা তা আলাউল, দোনাগাজী কিংবা মালে মুহম্মদ জানতেন না। কারণ মহফিল রচিত কাব্যটি ছাড়া অন্য ফারসি কাব্যগুলোতে রচয়িতার নাম নেই। মনে হয় তাঁদের স্ব স্ব আদর্শ ফারসি কাব্যে প্রণেতার বা অনুবাদকের নাম ছিল না, অথবা ফারসি গ্রন্থের নাম তাঁদের শোন ছিল, কিন্তু আয়ত্তে ছিল না, তাঁরা আলেফ-লায়লার শোনা কাহিনীই স্বাধীনভাবে অনুসরণ করেছেন। দোনাগাজী চৌধুরীর, আলাউলের ও উনিশ শতকের মালে মুহম্মদের কাব্যের মধ্যে নামগত ও কাহিনীগত অমিল অনেক, যেমন পার্থক্য রয়েছে আলেফ-লায়লার উপাখ্যানের সঙ্গেও। দোনাগাজীর গল্পে বৈচিত্র্য, থ্রিল ও বিস্তৃতি বেশি, আলাউলের কাব্য তুলনায় হীনপ্রভ, আর মালে মুহম্মদের কাব্য ওই দুটোর সঙ্গে ভাবে-ভাষায়-ভঙ্গিতে তুলিত হবার যোগ্য নয়।^১

রতনকলিকা-আনন্দবর্মা উপাখ্যান : মাগনের আকস্মিক মৃত্যুতে প্রতিপোষকের অভাবে দরিদ্র কবি আলাউল সয়ফুলমুলক-বদিউজ্জামাল রচনা অসম্পূর্ণ রেখে অপর এক অমাত্য শ্রীমন্ত সোলেমানের আদেশে কাজী দৌলতের অসমাপ্ত কাব্য, 'সতীময়না'র সমাপ্তিদানে আত্মনিয়োগ করেন। কারণ তিনি 'অনুব্রত দিয়া নিত্য পোষন্ত সাদরে', আর 'অনুদাতা ভয়ত্রাতা জনক সমান।' সতীময়নার অতি সামান্য অংশই বাকি ছিল-রত্নামালিনীর অভিসন্ধি বুঝে তাকে লাক্ষিত করে বিতাড়ন এবং বিরহিনী পত্নীর দুর্দশার সংবাদে বিচলিত ও অনুতপ্ত লোরকের চন্দ্রানীসহ স্বঘরে প্রত্যাবর্তন এবং ময়নার সঙ্গে মিলন। আলাউল এ সামান্য অংশ লিখে তপ্ত হননি, তিনি অকারণে এক অপ্রাসঙ্গিক উপাখ্যান জুড়ে দিয়ে গ্রন্থের কলেবর স্খীত করেছেন। মানুষের স্ব স্ব ভাগ্যনির্ভরতা ও অদৃষ্টের অখণ্ডনীয়তা বা অমোঘতা প্রতিপাদনই এ গল্পের উদ্দেশ্য। আলাউলের আখ্যায়িকার সংক্ষিপ্তসার এই :

ধর্মবতীপুরীর রাজা উপেন্দ্রদেব তাঁর চার রানী। এঁদের নিয়েই তিনি সমুদ্রতীরে এক সুউচ্চ টঙ্গীতে বাস করতেন। একদিন রাজা কথা প্রসঙ্গে রানীদের বললেন :

আমার ভাগ্যের লাগি তুমি সব সুখ ভোগী
আমি বিনে না জানি কি গতি।
সংসারের নারী জাতি স্বামী ভাগ্যবতী
রাজভাগ্য সবার অধিক
পুরুষ আশ্রয় বিনে নারী সবে কদাচনে
না পারএ বন্ধিতে খানিক।

তিন রানী স্বামীর কথায় সায় দিলেন। কিন্তু চুপ করে রইলেন রানী রতনকলিকা। কৌতূহলী রাজা তাঁর মত জিজ্ঞাসা করলে তিনি সসঙ্কোচে জানালেন—

একজন ভাগ্যে আনে না করএ সুখ
নিজভাগ্য অনুরূপে ভুঞ্জে সুখ ভোগ।
যার যেই কর্মে থাকে কর্ম নিয়োজিত
নিবন্ধেতে আনি থাকে করে নেই রীত।
মোর কর্মে আছে হৈতে রমণী তোমারি
তে কারণে যোগ্য গৃহে হৈলু অবতারি।

^১ তুলনামূলক বিস্তৃত আলোচনার জন্যে আমার সম্পাদিত দোনাগাজী রচিত 'সয়ফুলমুলক বদিউজ্জামাল'-এর ভূমিকা দ্রষ্টব্য, বাঙলা একাডেমী প্রকাশিত, ১৯৭৫ সন।

হৃতদর্প রাজা রেগে বললেন :

যদি বল কর্ম অনুরূপ ফল ফলে ।
ভাসাইয়া চাহি তোমা সমুদ্রের জলে ।
যদি মোর গৃহে পুনি ফিরে আইস তুমি
প্রত্যয় তোমার বাক্য তবে মানি আমি ।

যেই কথা সেই কাজ। রাজা ছয় মাসের খোরপোষ দিয়ে ‘মাঞ্জসে’ করে সাগরে ভাসিয়ে দিলেন গর্ভবতী রানী রতনকলিকাকে। যথাসময়ে সন্তানের জন্ম হলে রানী তার নাম রাখলেন ‘আনন্দবর্মা’। এ আনন্দবর্মাই উপাখ্যানের নায়ক। বহু অলৌকিক ঘটনার পরে আনন্দবর্মা মাকে নিয়ে দেশে আসে এবং পিতা ও আত্মীয় পরিজনদের সঙ্গে তাদের মিলন ঘটে।

আঠারো শতকের কবি রামজয় বা রামজী দাসের ‘শশিচন্দ্রের পুখি’রও উপজীব্য এ উপাখ্যানটি। পার্থক্য রয়েছে কেবল পাত্রপাত্রীর ও স্থানের নামে। শশিচন্দ্রের পুখিতে ঘটনার স্থান কাঞ্চননগর, রাজার নাম বিকর্ণ, রানীর নাম তারাদেবী ও রাজকুমারের নাম শশিচন্দ্র। এতে মনে হয় দুটো ভিন্ন পুখিই তাঁদের অবলম্বন ছিল, অথবা মুখে মুখে চালু লৌকিক রূপকথার প্রতিশ্রুতি থেকেই উভয়ে উপাখ্যান রচনা করেছেন। কারো কাছে তাঁরা ঋণগ্রীকার করেননি, তাতে মনে হয় লোকপ্রচলিত কাহিনীই ছিল তাঁদের অবলম্বন। এ কাহিনী ‘কিং লিয়ার’ নাটক স্মরণ করিয়ে দেয়।

আদেষ্ঠা পরিচিতি ও রচনাকাণ্ড :

আদেষ্ঠা মন্ত্রী শ্রীমন্তসোলেমান মহাশয়গবস্ত ।
মহাহরষিত হৈল পাইয়া আমারে
অনুবস্ত দানে নিত্য পোষন্ত সাদরে ।...
জ্ঞান-উক্তি রসকথা শুনন্ত সতত ...
একদিন প্রসঙ্গ হইল লোর-চন্দ্রানীর কথা
অসাজ রহিল এই রস কাব্য গাথা ।...
হরষেতে আদেশ করিল আমা প্রতি
এই খণ্ড পুস্তক পুরাও মোর নামে ।

আলাউল সতীময়নার সম্পূরক হিসেবে ‘রতনকলিকা আনন্দবর্মা’ উপাখ্যান রচনা করেন।
হিজরী সন :

সিদ্ধ শূন্য দেখিয়া আপন দুই দিকে
সূত কলানিধিরে রাখিলা বাম ভাগে,
মঘীসন, দুই শূন্য মধ্যে যুগ বামে মৃগাসন
সমাণ্ড হইল পঞ্চালিকা অনুপাম ।

১০৭০ হিজরী ও ১০২০ মঘী দুটোতেই ১৬৫৯ খ্রীস্টাব্দই হয়। একেই পরোক্ষ প্রমাণ ধরে আমরা মাগন ঠাকুরের মৃত্যু সন ১৬৫৮ খ্রীস্টাব্দ অনুমান করেছি। মাগনের মৃত্যুর সঙ্গে সঙ্গেই সয়ফুলমূলক রচনা বন্ধ রেখে কবি সতীময়না পূর্ণাঙ্গ করার কাজে হাত দেন।

দুনিয়ার পাঠক এক হও! ~ www.amarboi.com ~

সপ্তপয়কর : সোলেমানের প্রতিপোষণে এটি অনূদিত। নিয়ামী গঞ্জাবীর (১১৪৫-১২০৭ খ্রীঃ) দুটো ফারসিকাব্য আলাউল বাঙলায় অনুবাদ করেছেন : একটি সপ্তপয়কর এবং অপরটি সিকান্দরনামা। নিয়ামী গঞ্জাবীর পুরোনাম নিয়ামউদ্দিন আবু মুহম্মদ ইলিয়াস বিন ইউসুফ নিয়ামী গঞ্জাবী, পিতার নাম ইউসুফ পিতামহ যকী, প্রপিতামহ মুয়াইদ নিয়ামউদ্দীন। কবির মায়ের নাম রইসা। জন্মস্থান গঞ্জা। এটি বর্তমানে রুশ অধিকৃত মধ্য এশিয়ার আরানের একটি শহর। ফারসি সাহিত্যের অন্যতম শ্রেষ্ঠ ও জনপ্রিয় কবি নিয়ামী পাঁচটি কাব্য প্রণেতা। একত্রে এগুলোর নাম ‘খমস’ পঞ্চকাব্যরত্ন।

ফারসি হপ্তপয়কর সাতটি গল্পের সমষ্টি। গ্রন্থের বাঙলা নাম সপ্তপয়কর। গ্রন্থসূত্রে জানা যায় সপ্তপয়কর শাহজাহান-পুত্র সুজা আরাকানে আশ্রিত হওয়ার পরে এবং সম্ভবত নিহত হওয়ার আগে রচিত। যেমন রাজপ্রশস্তি সূত্রে পাই :

দিলীশ্বর বংশ আসি যাহার শরণে পশি
তার সম কাহার মহিমা।

একটি রচনাকালও গ্রন্থে রয়েছে :

মুসলমানি সন কহি শুন শুণিগণ
চন্দ্রশূন্য কলানিধি গ্রহের স্থাপন।

এ তারিখে নিচয়ই লিপিকর প্রমাদ রয়েছে। ‘মুসলমানিসন’-এর স্থলে ‘মগধের সন’ পাঠ ধরলেও ১০১৯ মধী তথা ১৬৫৭ খ্রীস্টাব্দে মেলে মাত্র, কিন্তু এটি ১৬৬০ সনের পরে ১৬৬৯ সনের আগের কোন সন হওয়ার কথা। কারণ সুজা ১৬৬০ খ্রীস্টাব্দে আরাকানে পালিয়ে যান এবং ১৬৬১ সনের গোড়ার দিকে আরাকানরাজ বালখ শ্রীচন্দ্রসুধর্মার (১৬৫২-৮৪ খ্রীঃ) অভিভাবকের হাতে নিহত হন। এ কারণে সুজার মৃত্যুসংবাদ নেই, সিকান্দরনামায় আছে। আর আছে সয়ফুলমুলুকের শেষাংশে। যেমন মৃত্যুর পরপরই সুজার সহযোগী সন্দেহে কবিকে পঞ্চাশদিন কারারুদ্ধ রাখা হয় ‘গর্ভবাস আছিলাম পঞ্চাশ দিবস’ এবং ‘এহি মতে চলি গেল নবম বৎসর’, তারপরে সৈয়দ মুসার আদেশে সয়ফুলমুলুকের শেষাংশ রচনা শুরু করেন। এ রচনা আরম্ভকাল ১৬৬৯ খ্রীস্টাব্দ। সিকান্দরনামায় আছে এ ঘটনার পর এই মতে একাদশ (এদশ?) অব গাওঁ গেল’ অতএব সিকান্দরনামা রচনার আরম্ভকাল ১৬৭২ খ্রীস্টাব্দ।

সপ্তপয়কর রচনায় প্রবর্তনা ও প্রতিপোষণ দান করেন আরাকানরাজের সৈন্যমন্ত্রী বা সমরমন্ত্রী সৈয়দ মুহম্মদ :

তান (রাজার) মুখ্য সৈন্যমন্ত্রী সৈয়দ মুহম্মদ
অঙ্গ দুর্বাদলশ্যাম মুখ পূর্ণশশী।

তিনি নানাশাস্ত্র পরাগ বিদ্বান বিদগধ
আরবি ফারসি আর হিন্দুয়ানী মগধ।
মোহন্ত সঙ্গীত জ্ঞাতা ভাবরসে লীন
অনুব্রত দানে আমা (কবিকে) পোষন্ত সতত।

‘ফারসি-আরবি ভাষা বয়েতের হুন্দ’-এ লিখিত ‘সপ্তপয়কর কথা অতি মনোহর’ বাঙলায় রচনা করে সৈয়দ মুহম্মদকে গুণিয়ে অনুব্রত পাওয়ার ঋণ শোধ করলেন কবি।

বলেছি সপ্তপয়কর মানে সাত গল্প। কাব্যে বর্ণিত উপাখ্যানের কাঠামো এরূপ :

নোমান ছিলেন আরব ও আজমের অধিপতি। তাঁর পুত্রের নাম বাহরাম গোর। জ্যোতিষীর উপদেশে রাজা নোমান পুত্রকে যনমনদেশে রাজত্ব করবার জন্যে পাঠিয়ে দিলেন। তার সঙ্গে ছিল ময়না নামের এক শিল্পী। সে রাজকুমারের জন্যে একটি প্রাসাদেই সাতটি সুরম্য টঙ্গী বা সুউচ্চ কক্ষ তৈরি করে দিল। এক এক টঙ্গীর ছিল এক এক রঙ। অর্থাৎ সাত টঙ্গী ছিল সাত রঙের। কাছে অভিভাবক না থাকায় বাহরাম বিলাসী হয়ে ওঠে, সে মৃগয়ায় ও নাচে গানে মশগুল থাকে। অবশেষে তার অনুপস্থিতিতে পিতার যখন মৃত্যু হল, মন্ত্রী সুযোগ পেয়ে তার পিতৃসিংহাসনে বসে গেল। খবর পেয়ে বাহরাম সৈন্য নিয়ে পিতৃসিংহাসন উদ্ধার করল তো বটেই, সে সঙ্গে অভিযান চালিয়ে চারপাশের সাতটি রাজ্য জয় করে সাতরাজ্যের সাত রাজকন্যাকে বিয়ে করে সাত টঙ্গীতে রাখালো। এরূপে—

আনন্দ উৎসবে রায় যেদিন যে গৃহে যায়
সবে পরে সেই বর্ণ বাস
নৃত্যগীতে অবশেষে গোএলাইলা কেলিরসে
শয়ন সমএ বাহরাম

এমনি করে প্রতি রানীকে এক একটি প্রসঙ্গ বা কাহিনী শোনানোর জন্যে বাহরাম নির্দেশ দেন।

এই মতে সপ্তরাত্রি সপ্তবিজ্ঞা কলাবতী
কহিলেক সপ্ত সুপ্রসঙ্গ।

এভাবে সাত রানী সাতটা চমৎকার উপাখ্যান রাজাকে শুনিয়েছিল, সেগুলোই এ কাব্যে বর্ণিত হয়েছে। সিকান্দরনামা কাব্যটি জঙ্গনামা অধ্যায়ে আলোচিত হয়েছে।

আলাউলের আত্মকথা

আমরা এখানে আলাউলের ‘আত্মকথা’ উদ্ধৃত করে দিচ্ছি। এর থেকে যা পাওয়া যাবে, তাতেই আপাতত তুষ্ট থাকতে হবে।

পদ্মাবতী-

মুলুক ফতেয়াবাদ গৌড়েতে।
তাহাতে জালালপুর অতি পুণ্য স্থান।।
বহু গুণবন্ত বৈসে খলিফা ওলেমা।
কথেক কহিব সেই দেশের মহিমা।।
মজলিস কুতুব তথ্যত অধিপতি।
মুই দীন হীন তান অমাত্য সন্ততি।।
কার্য হেতু যাইতে পশ্বে বিধির ঘটন।
হার্মাদের নৌকা সঙ্গে হৈল দরশন।।
বহু যুদ্ধ আছিল শহীদ হৈল তাত।
রশকতে ভোগযোগে আইলু এখাত।।

কহিতে বহল কথা দুঃখ আপনার।
রোসাঙ্গে আসিয়া হৈলু রাজ আসোয়ার।।
বহু বহু মুসলমান রোসাঙ্গে বৈসন্ত।
সদাচারী, কুলীন, পণ্ডিত, গুণবন্ত।
সবে কৃপা করন্ত সন্তাষি বহুতর।
তালিম আলিম বলি করন্ত আদর।।
মুখ্য পাটেশ্বরীর অমাত্য মহাজন।
সত্যবাদী জিতেদ্রিয় ঠাকুর মাগন।
ভাগ্যোদয় হৈল মোর বিধি পরসন।
দুঃখ-নাশ-হেতু তান সঙ্গে দরশন।।
বহল আদর করি বহল সম্মানে।

সতত পোষন্তু আমা অনুবন্ত দানে ।।
 মধুর আলাপে বশ হৈল মোর মন ।
 তার গুণ-সূত্র হৈল গ্রীবাএ বন্ধন ।।
 গুণিগণ থাকন্তু তাহান সভা ভরি ।
 গীত-নাট-যন্ত্রবাদ্যে রঙ্গ-চঙ্গ করি ।
 নানা সুপ্রসঙ্গ কথা কহিয়া রসদ ।
 তান সভা মধ্যে থাকো হৈয়া সভাসদ ।
 একদিন সভা করি বসিয়ে মাগন ।
 নানারঙ্গ প্রসঙ্গ কহন্তু গুণিগণ ।।
 কেহ গাহে কেহ বাহে কেহ খেলে খেলা ।
 সুধাকর বেড়ি যেন তারাকুল মেলা ।।
 হেনকালে শুনি পদ্মাবতীর কথন ।
 পরম হরিষ হৈল সভাজন মন ।।
 কর্তাএ আদেশ কৈল পরম হরিষে ।
 পূর্ণ দ্বিজরাজ যেন অমিয়া বরিষে ।।
 “এই পদ্মাবতীর সে-সব রস কথা ।
 হিন্দুস্থানী ভাবে শেষে রচিয়াছে পোথা ।
 রোসান্তে অনেকে না বুঝে এই ভাষা ।
 পয়ারে রচিলে পূরে সভানের আশা ।।
 যেহেন দৌলতকাজী চন্দ্রানী রচিল ।
 লঙ্করউজীর আশরফ আজ্ঞা দিল ।।

তেন পদ্মাবতী রচ মোর আজ্ঞা ধরি ।।”
 এ কথা শুনিতে মনে বহু শ্রদ্ধা করি ।।
 তাহান আদেশ-মালা করিয়া মস্তক ।
 অঙ্গীকার কৈলু মুই রচিতে পুস্তক ।।
 বিমর্ষি চাহিলু পাছে মুই অল্প বুদ্ধি ।
 কেমতে জানিমু মুই রচনের শুদ্ধি ।।
 অনেক ভাবিয়া মনে চিন্তিলু উপায় ।
 তান ভাগ্য-যশঃ-কীর্তি আহএ সহায় ।।
 সেই বলে রচিমু পুস্তক পদ্মাবতী ।
 নিজ বুদ্ধি বলে নহে এথেক শক্তি ।।....
 প্রেম-কবি আলাউল প্রভুর ভাবক ।
 অন্তরে প্রবল পূর্ণ প্রেমের পাবক ।।
 বাঙ্খিত পূরণ হেতু গুরু পরসন ।
 অন্ধ চক্ষু জ্যোতিঃ হৈল জ্ঞানের অঙ্গন ।
 কাটিল মনের ঘোর শক্তির কৃপাণে ।
 রসন সরষ হৈল প্রেমের বচনে ।।
 প্রেম-পুথি পদ্মাবতী রচিতে আশাএ ।
 অসাধ্য সাধন মোর গুরুর কৃপাএ ।
 ভকতি প্রণতি করি মাগো এই বর ।
 শুনি গুণিগণ মনে হউক আদর ।।

সয়ফুলমলুক বদিউজ্জামাল-

(মাগন ঠাকুরের আদেশে রচিত প্রথমাংশের ভূমিকা)

হেন মহা মহিম মাগন গুণনিধি ।
 গুণরাশি দিয়া তানে সৃজিলেক বিধি ।।
 রূপে কাম জিনিয়া গুণের নাহি অন্ত ।
 সর্বদেশে ব্যাপিত তান অতুল মহন্ত ।।
 সিদ্ধিক বংশেত জন্ম শেখজাদা জাত ।
 কুলশীলে সৎকর্মে ভুবন বিখ্যাত ।।
 আপনে আলিমাধিক বিদ্যাএ নিপুণ ।
 গুণবন্ত হইলে বুঝএ গুণাগুণ ।
 তান দেশী যথেক আলিম গুণবন্ত ।
 মান্য করি আনি নিত্য আদরে পূজন্ত ।।
 মুঞি পরদেশী এক আলাউল হীন ।
 রোসান্তে পড়িলু আসি আপনা কুদিন ।।
 গৌড় মধ্যে প্রধান ফতেয়াবাদ দেশ ।

অতি পুণ্যবস্ত্র স্থান নাহি পাপলেশ ।।
 বহুল দানিশমন্দ খলিফা ওলামা ।
 আলিমজনের কথা দিতে নাহি সীমা ।।
 হিন্দুকুলে ব্রাহ্মণ সজ্জন সত্যমতি ।
 মধ্যভাগে বহে তার গঙ্গা-ভাগীরথী ।।
 মজলিসকুতুব এই রাজ্যের ঈশ্বর ।
 তাহান অমাত্য সূত মুঞি সে পামর ।।
 দৈবগতি কার্যহেতু যাইতে নৌকাপন্থে ।
 দরশন হইলেক হার্মাদ সহিতে ।।
 শহীদ হইল বাপ যুধি বহুতর ।
 রণক্ষেতে রোসান্তে আইলু একসর ।।
 নিজ দুঃখ কথেক কহিমু বিরচিয়া ।
 রাজা-আসোয়ার হৈলু এখাত আসিয়া ।।

রোসাঙ্গের মোসলেম প্রধান আছে যত ।
 ধর্ম কর্ম বিশারদ অতুল মহত্ব ।।
 তালিব আলিম বুলি মুঞি ফকিরেরে ।
 অনুবস্ত্র দিয়া সবে পোষস্ত আদরে ।।
 তাতে বিধি দুঃখনাশ করিতে কারণ ।
 ঠাকুর মাগন সঙ্গে হৈল দরশন ।।
 মধুর পীরিতি-রসে বশ মোর মন ।
 তান সভাসদ হৈয়া থাকোঁ অনুক্ষণ ।
 আজ্ঞা পাই রচিলুঁ পুস্তক পদ্মাবতী ।
 যথেক আছিল মোর বুদ্ধির শক্তি ।।

বুদ্ধকাল হৈল এবে শক্তি টুটি আসে ।
 যৌবন কালের সম মন না উল্লাসে ।।
 দ্বিতীয় আদেশ মোকে হৈল যেন মতে ।
 সয়ফুলমলুক কথা পুস্তক রচিতে ।।
 তার বিবরণ কহি শুন গুণিগণ ।
 রস-কথা শুনিতে রসিক পুষ্ট মন ।।
 রোসাঙ্গ দেশেত এক মহাগুণবান ।
 রাজার অমাত্য শ্রীযুত সোলেমান ।।
 হেমরত্ন নৃপতির যথেক ভাণ্ডার ।
 সকলের উপরে তাহান অধিকার ।।

এই সোলেমান ও মাগন ঠাকুর পীর-ভাই ছিলেন, তাঁদের পীর শাহ মাসুম। একদিন সোলেমান পীরকে নিমন্ত্রণ করে তাঁর বাড়ি আনলেন, পীরজাদা সৈয়দ মুস্তফা, মাগন ঠাকুর, আলাউল প্রভৃতি এই উপলক্ষে নিমন্ত্রিত হন, ভোজনশেষে পীরজাদা মুস্তফার মুখে সয়ফুলমলুক-বদিউজ্জামালের উপাখ্যান শুনে সবাই মুগ্ধ হন। ফলে—

শ্রীযুত মাগন মনে হৈল অতি সুখ ।
 আক্ষারে বুলিলা গুরু কর অবধান ।
 ফারসি ভাষেতে এই প্রসঙ্গে পুরাণ ।।
 সকলে না বুঝে এই ফারসি কিতাব ।
 পয়ার প্রবন্ধে রচ এই পরস্তাব ।।
 যার আঙা অলজ্য লজ্জিলে হএ পাপ ।
 অনুদাতা ভয়ত্রাতা দুই মতে বাপ ।।
 তাহান আদেশ-মাল্য ধরি শির পাগে ।
 অঙ্গীকার করিলুঁ রচিতে সভা আগে ।।
 শক্তিহীন যদি হয় আমার প্রবল ।
 তান ভাগ্যদীপ্তি হস্তে হইব উজ্জ্বল ।।
 যেই পুঁজি আছে মোর হৃদয় ভাণ্ডারে ।
 এথেকে সাহস কৈলুঁ রচিতে পয়ার ।।
 গুণিগণ চরণে মাগিএ পরিহার ।।
 লাজ ছাড়ি আলাওলে ব্যস্ত করে তারে ।।
 নত মুণ্ড শক্তিহীন জ্ঞানের কৃপাণ ।
 শ্রীমে ছেদি বাক্য-পেছে হও আশুয়ান ।
 প্রেম-কথা শুনি আজ্ঞা কৈলা মহাজনে ।
 মোর মন তোষ এই প্রেমের কথনে ।।
 প্রেমের পুস্তক এই সয়ফুলমলুক ।
 নানা অপরূপ কথা শুনিতে কৌতুক ।।

গুরুপাদি ভজিয়া কহে হীন আলাউল ।
 নামিয়া মনের ঘোর করহ নির্মল ।।

সয়ফুলমলুকের দ্বিতীয়্যাংশ—

(সৈয়দ মুসার আদেশে রচিত)
 এবে অবধান কর সাধু গুণবন্ত ।
 যেনমত রহস্য পুস্তক আদি অন্ত ।।
 আদেশএ মুখ্য পাত্র শ্রীযুত মাগন ।
 সয়ফুলমলুক পুথি করিতে রচন ।
 সাজ না হৈতে পুথি পাইল পরলোক ।
 কথকাল মনে মোর আছিলেক শোক ।।
 তার পাছে শাহ সুজা নৃপকুলেশ্বর ।
 দৈব পরিপাক আইল রোসাঙ্গ শহর
 রোসাঙ্গ নৃপতি সঙ্গে কবি বিসম্বাদ ।
 আপনার দোষ হোন্তে পাইল অবসাদ ।।
 যথেক মুসলমান তার সঙ্গী হৈল ।
 নৃপতির শাস্তি পাইয়া বহুলোক মেল ।।
 মির্জা নামে এক পানী সত্যধর্ম ভ্রষ্ট ।
 নিগ্রহ করিয়া বহু লোক করে নষ্ট ।।
 যার সঙ্গে ছিল তার তিলমন্দ ভাব ।
 অপরাধী করি তারে পাইলেক লাভ ।।
 নিকটে মরণ জানি ইচ্ছাগত পাপ ।
 যে জনে মাগএ আগি নরক মাগে আপ ।।

এজিদ প্রকৃতি সেই দাসীর নন্দন ।
 মিথ্যা কহি কথ লোক করাইছে বন্ধন ।।
 আয়ুমুক্ত সব নষ্ট পড়িল অস্থান ।
 পাপরাশি ধর্মনাশি মৈল শালবাণ ।।
 আক্ষারেহ অপরাধ দিল পাপীছারে ।
 না পাইয়া বিচার পড়িলুম কারাগারে ।।
 বহুল যজ্ঞণা দুঃখ পাইলুম ক্রেশ ।
 গর্ভবাস আছিলাম পঞ্চাশ দিবস ।।
 আয়ুলেশ আক্ষা ছিল রাখে বিধাতাএ ।
 সবভিক্ষা জীবরক্ষা ক্রেশে দিন যাএ ।।
 এই মতে চলি গেল নবম বৎসর ।
 খণ্ডবাক্য আছিল পুস্তক মনোহর ।।
 সৈয়দ মুসা নামে এক পুরুষ মহন্ত ।
 অভিনু বদন রূপ মহাশুণবন্ত ।।
 [অতঃপর সৈয়দ মুসার গুণ বর্ণিত হয়েছে ।।
 আক্ষি বৃদ্ধ ফকিরেরে অতিবহুতর ।
 তালিম আলীম বলি করএ আদর ।।
 দানে পরিপুরন্ত পোষন্ত অনুক্ষণ ।
 প্রেম বশে মান্যরসে বাঁধা মোর মন ।।
 একদিন ডাকিয়া যে আপন আলএ ।
 বহুল করিয়া কহিলা যে মহাশএ ।।
 পুস্তকর আজ্ঞাকারী শ্রীযুক্ত মাগন ।
 আছিল তোমার শিষ্য মোর বন্ধুজন ।।
 খণ্ডবাক্য আছিল পুস্তক মনোহর ।
 সমাপ্ত হইলে রস হএ বহুতর ।।
 আক্ষার গৌরব মনে তাহার বচন ।
 আজ্ঞা করি তোষ যথ পাঠকের মন ।।
 ভাবিয়া উত্তর দিলুঁ শুন দয়ামএ ।
 বৃদ্ধকালে এত্ৰু কর্ম উচিত না হএ ।।
 রচিলুঁ বহুল গ্রন্থ নানা আলাআলা ।
 রহিতে ঈশ্বর ভাবে যুক্ত এই কাল ।।
 বিশেষ অভাবে পরিচিন্তায়ুক্ত মন ।
 মুসার উক্তি—
 “অন্যজন নহ তুমি আলাউল শুন ।।
 যাহার বচনে লোকে পা এ উপদেশ ।
 তাহার এহেন যুক্তি না হএ বিশেষ ।।
 বিশেষ সঙ্কটে যেই করিছে রক্ষণ ।

যোগ্য দরে রাখিছে জুড়িয়া পুশ্বিধন ।।
 তাহান অস্ত্রত মাত্র সতত সম্ভবে ।
 দরিদ্রের নাশে ভয় অধিক বৈভবে ।।
 তুষ্কি না করিলে খণ্ড-বাক্য নহে পোথা
 এরূপে করিতে আর কেবা আছে এথা ।।
 তিন মতে বাক্য সাক্ষ করিতে উচিত ।
 প্রথমে মাগন নিষ্ঠা গুণিগণ বিদিত ।।
 দ্বিতীয় কুমার যে রহিল বন্ধনে ।
 না রচিলে পুস্তক দুঃখ উপজএ মনে ।।
 তৃতীয়ে আক্ষার মন রাখিতে জুয়াএ
 এড়াইতে না পারিবা রচিবা সর্বথাএ ।।”

আলাউল—

মোহন্ত জনের আজ্ঞা লজ্জিতে না পারি ।
 প্রবেশিলুঁ কাব্য-ঘরে করতার স্মরি ।।
 পুস্তক গ্রন্থন-কর্ম সমুদ্র সঞ্চার ।
 গুরু লক্ষ্য ঈশ্বর কৃপাএ হএ পার ।।
 কল্যাণরস গুণ্ড ভাগ্যরে দিব্যরত্ন ।
 বিচারিলে পাই তারে কৈলে বহু যত্ন ।।
 বিশেষ যন্তনে ভাবে যাএ নিশিদিন ।
 বৃদ্ধ হইলুঁ অখনে হইলুঁ বলহীন ।।
 তথাপিহ সত্যবাক্য এড়াইতে না পারি ।
 সঙ্কটে প্রবেশ করি মহন্ত বাক্যধরি ।।

সতীময়না লোরচন্দ্রানী—

অখনে পণ্ডিত সবে শুন দিয়া মন ।
 মোর নিজ বৃত্তান্ত পুস্তক বিবরণ ।।
 গৌড় মধ্যে মুলুক ফতেয়াবাদ শ্রেষ্ঠ ।
 বৈসে সামাজিক লোক উক্তি ভক্তি শিষ্ট ।।
 বিস্তর দানিশমন্দ খলিফা সুজন ।
 আউলিয়া সবেব বহুল গৌরস্থান ।।
 হিন্দুকুল শোত্রিয় যে ব্রাহ্মণ সজ্জন ।
 মধ্যে ভাগীরথী ধারা বহে অনুক্ষণ ।।
 মজলিস কুতুব এথাতে অধিপতি ।
 তাহান অমাত্যসুত মুই হীনমতি ।।
 কার্যহেতু যাইতে পছে নৌকার গমনে ।
 দৈবগতি দেখা হৈল হার্মাদের সনে ।।
 বহু যুদ্ধ করি শহীদ হইল পিতা ।
 রণক্ষতে ভাগ্যবশে আক্ষি আইলুঁ এথা ।।

কথেক আপনা দুঃখ কহিমু প্রকাশি ।
 রাজ আসোয়ার হৈলুঁ রোসাক্ষেতে আসি ।।
 শ্রীমন্ত সোলেমান মহাগুণবন্ত ।
 পরদেশী গুণী পাইলে আদরে পোষন্ত ।।
 মহা হরষিত হৈল পাইয়া আক্ষারে ।
 অনু-বস্ত্র-দানে নিত্য পোষন্ত সাদরে ।।
 তাহান সভাত গুণিগণ অবিরত ।
 জ্ঞান-উক্তি রসকথা শুনন্ত সতত ।।
 একদিন হরিষে বসিয়া গুণনিধি ।।
 জিজ্ঞাসন্ত কাব্য-কথা রসের অবধি ।।
 প্রসঙ্গ হইল লোর-চন্দ্রানীর কথা ।
 অসঙ্গ রহিল এই রসকাব্য গাথা ।।
 সঙ্গ হলে পুস্তক সম্পূর্ণ রস হএ ।
 শ্রোতা পাঠকের মন আরতি পুরাএ ।।...
 এথেক ভাবিয়া সোলেমান মহামতি ।
 হরষেতে আদেশ করিল আক্ষা প্রতি ।।
 এই খণ্ড পুস্তক পুরাও মোর নামে ।
 দৃষ্টি মধু দোহ আনি মিলাও একঠামে ।
 মহন্ত আরতি যে শুনিয়া আলাউল ।
 অঙ্গীকার কৈল ভাবি ঈশ্বরের বল ।।
 তাহান দয়ায় করি বহুত সহায় ।
 বিরচিত্তে কৈলুঁ আশ গুরুর কৃপায় ।।...
 সংসারেত যথ বস্ত্র সৃজিয়াছে বিধি ।
 মনুষ্য করিছে শ্রেষ্ঠ দিয়া কাব্যনিধি ।।...
 নর মধ্যে আলাউল অতি হীন মতি ।
 লঘুবুদ্ধি গুরুতর করিল আরতি ।।...
 মহাজনের আদেশ সহজে পূজ্যমান ।
 অনুদাতা ভয়ত্রাতা জনক সমান ।।...
 শ্রীমন্ত সোলেমান সত্যে-রত্নাকর ।
 শুনিতে সতীর কথা হরিষে অন্তর ।।
 আদেশ-কুসুম তান শিরেত ধরিয়া ।
 হীন আলাউলে কহে পঞ্চলি রচিয়া ।।

সেকান্দারনামা-

এবে অবধান কর গুণী মহামতি ।
 আপনা বৃত্তান্ত কহি পুস্তক উৎপত্তি ।।
 গৌড়মধ্যে মূলক ফতেয়াবাদ ভূমে ।

বৈসে সাধু সৎলোক দেশ মনোরম ।
 অনেক দানেশমন্দ খলিফা সুজন ।
 বহুল আলিম গুরু আছে সেই স্থান ।।
 হিন্দুকুল মহাসভা আছে ভট্টাচার্য ।
 ভাগীরতী গঙ্গাধারা বহে মধ্যরাজ্য ।।
 রাজ্যেশ্বর মজলিস কুতুব মহাশয় ।
 মুই ক্ষুদ্রমতি তান অমাত্য তনয় ।।
 কার্যহেতু পছ ক্রমে আছে কর্মলেখা ।
 দুষ্ট হার্মাদ সঙ্গে হই গেল দেখা ।।
 ব্রহ্ম যুদ্ধ করিয়া শহীদ হৈল বাপ ।
 রণক্ষেত্রে রোসাক্ষে আইলুঁ মহাপাপ ।।
 না পাইলুঁ শহীদ (সইদ, সৈদ) পদ
 ছিল আয়ুলেশ (আয়ুলেশ)
 রাজ আসোয়ার হৈলুঁ আসি এই দেশ ।।
 রোসাক্ষেত মুসলমান যথেক আছন্ত ।
 তালিম আলিম বলি আদর করন্ত ।।
 বহু (রস) গ্রন্থ রচিলুঁ মোহন্ত সব নামে ।
 মোর বাক্য এথা প্রকাশিলুঁ সর্বঠামে ।।
 এই মতে সুখে গোঞাইলুঁ কথকাল
 বিধি বশে অবশেষে পড়িল জঙ্ঘাল ।।
 শাহশুজা রোসাক্ষে আইল দৈবগতি ।
 হতবুদ্ধি পাত্রসব দিল হতমতি ।।
 আপনার দোষ হোন্তে পাএ অবসাদ ।
 এক পাপী আমারেহ দিল মিথ্যাবাদ ।।
 কারাগারে পৈলুঁ আমি না পাই বিচার ।
 যথ ইতি বসতি হইল ছারখার ।।
 শালাসনে মেল যেই দিল অপবাদ ।
 অস্থানে পড়িয়া পাইলুঁ বহু অবসাদ ।।
 মন্দকৃতি ভিক্ষাবৃত্তি জীবন কর্কশ ।
 পুত্রদ্বারা সঙ্গে মুঞি হৈলুঁ পরবশ ।।
 গুণহেতু মহাজনে করন্ত আদর ।
 ভিক্ষা করি দেয় পুত্র-দারা রাজকর ।।
 সৈয়দ শহীদ (সৈয়দ) শাহ রোসাক্ষের কাজী ।
 জ্ঞান অল্প আছে বলি মোরে হৈল রাজী ।।
 দয়াল চরিত্র পীর অতুল্য মহৎ ।
 কৃপা করি দিল মোরে কাদেরী খিলাফৎ ।।...
 আপনা দুঃখের কথা কহিতে অনেক ।

সম্মুখে পুস্তক কথা আছে অতিরেক ।।
 এইমতে একাদশ (এদশ) অন্দ গঞি গেল ।
 পুনরপি ভাগ্য-অংশ প্রকাশিত ভেল ।।
 শ্রীমন্ত মজলিস অতুল মহন্ত ।
 নবরাজ পাইয়া যদি হৈল মহামাত্য ।^১
 মধুর বচন মোর শুনিয়া রসদ ।
 সাদরে আনিয়া আমা কৈল সভাসদ ।।
 অল্পে-বস্ত্রে তুষিয়া পোষন্ত নিরন্তর ।
 তান দানে সুসময়ে শুধি রাজকর ।।
 বহু গুণবন্ত আছে তাহান সভাএ ।
 তথাপিহ মোর বাক্য মনে অনুভাএ ।।
 একদিন মজলিস করি মেহমানি ।
 মহা মহা মুসলমান ভুঞ্জাইল আনি ।।
 ষটরসে ভুঞ্জাইল নানা পাকোয়ান ।
 চর্ব্য, চুষ্য, লেহ্য, পেয় বিবিধ রন্ধন ।।
 চন্দন কঙ্করী আদি গোলাপ সুগন্ধ ।
 কর্পূর তাম্বুলে সভা হইল সুললিত ।
 কেহ কেহ মধুর সুস্বরে গায় গীত ।।
 মজলিসে সকলে করন্ত আশীর্বাদ ।
 “বিধি পুরাউক তোমা মনে যেই সাধ ।।
 আনন্দের স্থলমাত্র তোমার সমীপ ।
 মুসলমানী দীনে তুমি উজ্জ্বল প্রদীপ ।।
 মসজিদ পুঙ্কণী আদি কৈলা পুণ্যকাম ।
 স্বদেশে বিদেশে পূর্ণ তোমা কীর্তি নাম ।।
 সূজনে করএ বৃত্তি অনুরূপ পুণ্য ।
 অশ্বে যার নাম রহে সেই ধন্য ধন্য”
 মজলিস ...
 শুনি মজলিস বাক্য বলিলা সকল
 মসজিদ পুঙ্কণী রহিব কথকাল ।।
 পূর্বকালে মহন্তে করিছে নানা কাম ।
 সবেমাত্র কিতাব গ্রন্থে তান নাম ।।
 মসজিদ পুঙ্কণী নাম নিজ দেশে রহে ।
 গ্রন্থকথা যথাতথ্য আর্তিভাবে কহে ।।
 গ্রন্থ পড়ি সকলের তুষ্ট হই মন ।
 নাম স্মরি মহিমা কহএ সর্বজন ।
 মূর্থ হই পণ্ডিত খলে পাএ জ্ঞান ।

গ্রন্থ সম মহিমা কোথাতে আছে আন ।।
 প্রলয় অবধি রহে শুভ-কীর্তি যশ ।
 নামের মহিমা-বাক্যে সর্ব হই বশ ।।
 হীন জাতি নানা দুঃখে উপাজিয়া মাল ।
 পুঙ্কণী মসজিদ দেয় কথেক বাঙ্গাল ।।
 মহন্তে বিনু গ্রন্থ জ্ঞান না উপার্জএ ।
 স্বদেশে বিদেশে লোকে কীর্তিগুণ গাএ ।
 এখ ভাবি আমার প্রতি করিল আদেশ ।
 মোর নামে গ্রন্থ রচ যত্নে সবিশেষ ।।
 তবে আমি মনেতে ভাবিয়া কৈলুঁ সার ।
 সিকান্দরনামা সম গ্রন্থ নাহি আর ।
 সভা শোভায়ুক্ত কথা নাহিক অধিক ।
 আলিম সভান মনে অমূল্য মাণিক ।।
 মুসাফেত ইঙ্গিতে কহিছে নিরন্তর ।
 বহুল বাড়িছে কথা অর্থ বিচারণ ।।
 নিজামীর আর বাক্য বুঝনে কর্কশ ।
 ভাঙ্গিয়া কহিলে তারে আছে বহু রস ।।
 আমার বচনে মজলিস মহাশয় ।
 রচিবারে আজ্ঞা দিল সরস হৃদয় ।।
 তবে আমি নিবেদিলুঁ হৈল বৃদ্ধকাল ।
 বিশেষত রাজদায় অধিক জঞ্জাল ।।
 নীরস হৈল অঙ্গ না প্রকাশে মতি ।
 তাহা শুনি মজলিসে দয়া হৈল অতি ।।
 দানিয়া ভক্ষ্য-বস্ত্র রাজদায় নিয়ম করিয়া ।
 আর নানাবিধ দানে মন সন্তাষিয়া ।।
 স্থির করি আমারে করিল অঙ্গীকার ।
 ভাঙ্গিয়া বয়েত ছন্দ রচিতে পয়ার ।।
 সমুদ্রে সাঁতার সম গ্রন্থের গ্রন্থন ।।
 বিশেষ পারস্য ভাষা বয়েত ভাঙ্গন ।।
 মহন্ত নিজামী বাক্য ইঙ্গিত আকার ।
 বিশেষত পঞ্চ-ভাষ কিতাব মাঝার ।।
 আরবি ফারসি আদ্য নসরাণী এহদী ।
 পাহলবী সঙ্গে পঞ্চ ভাষের অবধি ।।
 আমি ক্ষুদ্র বুদ্ধি তারে রচিতে অশক্য ।
 কেবল শ্রীমন্ত মজলিস ভাগ্য লক্ষ্য ।।
 ভাগ্যধর উপরে ঈশ্বর কৃপা অতি ।

^১ পাঠান্তর : শ্রীমন্ত নবরাজ অতুল মহন্ত । মজলিস পাইয়া যদি হৈল মহামাত্য ।

চলিতে ত্রিদিব স্থান

পুত্রে কৈলা রাজ্যদান

যারে দেখি লঙ্ঘিত বাসব ।।

সাদউ মেঙদার নাম

রূপেগুণে অনুপাম

মহাবুদ্ধি ভাগ্য অনুরেখ ।

সয়ফুলমূলক রচনাকালে কবির এ ভুল ভাঙে । তখন তিনি বলেছেন :

নৃপতিগিরির কন্যা পরমা সুন্দরী ।
 সাদউমেঙ নৃপের ছিল মুখ্য পাটেশ্বরী ।।
 সাদউমেঙদার যদি গেল পরলোকে ।
 ব্রতধর্ম আচারি রহিল স্বামী শোকে ।।
 শ্রীচন্দ্র সুধর্ম্য নৃপতিক শিশু দেখি ।
 সকল অমাত্যগণ হৈল এক মুখী ।।
 দণ্ডবৎ হইয়া মহাদেবীর গোচর ।
 কহিতে লাগিল। সবে বিনয় উত্তর ।।
 শিশু নৃপে কেমনে পালিব বসুমতী ।
 পুত্রে রাজা করিয়া আপনে পাল ক্ষিতি ।।
 ঈশ্বর দুহিতা তুষ্কি ঈশ্বর বণিতা ।
 তোমাবিনু কেবা আছে ঈশ্বর পালয়িতা ।।

রাজ্যকর্তা পুনি নৃপ হইব যখন ।
 ব্রতধর্ম আচারি দেবী রহিও তখন ।।
 এথেক বিনয় যদি কৈলা পাত্রগণ ।
 পুত্রতুল্য করে দেবী রাজ্যোল পালন ।।
 হেন মত কোথা আর নাহি দেখি শুনি ।
 রাজ্যের ঈশ্বরী রাজগৃহে তপস্বিনী ।।
 তাহান অমাত্য-শ্রেষ্ঠ শ্রীযুত মাগন ।
 শিশুকালে বৃদ্ধ রাজা কৈলা সমর্পণ ।।
 যথেক সম্পদধন দুহিতাক দিল ।
 তান হস্তে আনিয়া সকল সমর্পিল ।।
 মুখ্য পাটেশ্বরী যদি হৈলা যশস্বিনী ।
 মুখ্য পাত্র হইলা মাগন গুণমণি ।

এতে একটা সত্য উদঘাটিত হচ্ছে । সাদউমেঙদার বা খদোমেঙতারের সিংহাসনারোহণের বা রাজ্যাভিষেকের (১৬৪৫ খ্রীঃ) বেশ কিছুকাল পরে (অন্তত দু'বছর পরে) আলাউল রোসাসে পৌছেন বলে মনে হয় । তাই অন্যতরকাল পরে পদ্মাবতী রচনাকালে নরপতিগীর কন্যার ও খদোমেঙতারের বা সাদউমেঙদারের সম্বন্ধটি পুরোপুরি বুঝে উঠতে পারেননি । পদ্মাবতীতে প্রদত্ত রাজপরিচিতি নির্ভুল মনে করা হলে, পাঠকের ধারণা হবে যে ভাইয়ে-বোনে বিয়ে হয়েছিল ।

যখনে আছিল বৃদ্ধ নৃপ অধিপতি ।
 যশস্বিনী কন্যা রাজগৃহে উপনীতি ।।
 রূপেগুণে সুলক্ষণা অতি জ্ঞানবন্ত ।
 ধর্মে মর্মে শুভ কর্মে সুমহন্ত ।
 কন্যার শৈশব দেখি ভাবে নরপতি ।
 এথেক সম্পদ সমর্পিব কার প্রতি ।।
 এক মহাপুরুষ আছিল সেই দেশে ।
 মহাসত্য [সত্ত্ব] মুসলমান সিদ্ধিকের বংশে ।।
 নানাগুণে পারগ মহন্ত কুলশীল ।
 তাহাকে আনিয়া নৃপ কন্যা সমর্পিল ।।

পরমা সুন্দরী কন্যা অতি সুচরিতা ।
 বহুস্নেহে ননৃপতি পোষিলা নিজ সুতা ।।
 বহু ধন রত্ন দিলা বহুল ভাণ্ডার ।
 বহুল কিঙ্কর দিলা বহু পরিবার ।
 বৃদ্ধ নরপতি যদি গেল স্বর্ণপুরী ।
 এই কন্যা হৈল জান মুখ্য পাটেশ্বরী ।
 শৈশবের পাত্র দেখি বহু স্নেহ ভাবি ।
 মুখ্যপাত্র করিয়া রাখিল মহাদেবী ।

এরূপ বিবৃতির দ্বারা আলাউল এতকাল যে শুধু সাধারণ পাঠককে বিভ্রান্ত করেছেন তা নয়, এ যুগে উষ্টর সুকুমার সেন প্রমুখ পণ্ডিত ব্যক্তিগণকেও বিচলিত করেছেন । তাঁদের কেউ বলেছেন রাজকন্যার মুসলমানের সঙ্গে বিয়ে হয়েছিল, কেউ বা বলেছেন রাজকন্যা রাজ্যাংশ পেয়েছিলেন ।

৪. মরদন

মরদন বা মরদান রোসান্সরাজ্যের দ্বিতীয় কবি। তিনিও শ্রীসুধর্মার রাজত্বকালে (১৬২২-৩৮ খ্রীঃ) কাঞ্চীপুরীতে বসে তাঁর কাব্য রচনা করেন। তিনি কোন অমাত্যের প্রতিপোষণ পাননি। কাঞ্চীর বর্ণনা দৃষ্টে মনে হয় এটি রোসান্স শহরে নয়, রোসান্স রাজ্যের অন্তর্গত চট্টগ্রামের একটি গ্রাম বা প্রশাসন কেন্দ্র। এখানে মঘ নেই। কবির তোয়াজ-স্তুতির ভাষায় আরাকান রাজার ও কাঞ্চীপুরীর সম্বন্ধে কিছু অতিকথন আছে। যেমন :

১. ভুবনে বিখ্যাত আছে রোসান্সনগরী
রাবণের যেহেন কনক লঙ্কাপুরী।
শ্রী শ্রীসুধর্ম শাহা তথাত ঈশ্বর
(ধবজ) ছত্র ধবলগত লোক অধিপতি
ধনঞ্জয় সমসর বলবন্ত অতি।-

- আর ২. সে রাজ্যে (রোসান্সরাজ্যে) আছে এক কাঞ্চি নামে পুরী
মুয়ীন মুসলমান বৈসে সে নগরী
আলীম মৌলানা বৈসে কিতাব কারণ
কায়স্থগণ বৈসে সব লেখন পড়ন
ব্রাহ্মণ সজ্জন তাত বৈসে পণ্ডিত
নানা কাব্য রস সব কহে সুসীত।

কবিও হয়তো কাঞ্চীনিবাসী ছিলেন। আমাদের অনুমানের ভিত্তি হচ্ছে নিম্নে উদ্ধৃত চরণগুলো :

সিঞ্চরের কাঙ্ক্ষসিতা (?) প্রণামি তান পদ
তান দুই পুত্র যানি মর্দ মোহাম্মদ (?)
একদিন দুই ভাই বসিয়া থাকিতে
দুই সাধু কথা তবে লাগিলা কহিতে।

শেষের দুটো চরণ দৃষ্টে মনে হয় লোক-প্রচলিত উপাখ্যানই এ কাব্যের অবলম্বন। কবিও বোধ হয় সে আভাসই দিয়েছেন, কাব্যের আরম্ভ এরূপ :

[নসিব] নামা পঞ্চালিকা শুন নরগণ
পূর্বকালে আছিলেক হেন বিবরণ।
প্রমাণ করিয়া কহি পণ্ডিত গোচরণ
পুস্তক যেহেন মতে হৈল উতপন।

‘বিবরণ’ লিখিত পাঁচালী নয়-লোকশ্রুতি। তা হলে উক্ত দুই ভাইয়ের মুখে দুই সদাগরের কিসসা শুনে কবি তা কাব্যে রূপায়িত করেছেন। গল্পের বীজ এই :

পূর্বে দুই সাধু ছিল নগরে সিরাজ
মিতালি করি দেখে পাইল এক লাজ।
যে মতে নাসিরাবিবি (নুরুদ্দিন) বিহা
সেসব বৃত্তান্ত কহি পঞ্চালী রচিয়া।

কবির পীর ছিলেন— সৈয়দ ইব্রাহিম, (পাঠান্তরে ইব্রাহিম খলিল)

সৈয়দ ইব্রাহিম পীর রূপে পঞ্চবাণ

কহে হীন মর্দনে নুরুদ্দিন বাখান।

যদিও কবি 'দুই সাধু কথা', 'নাসিরাবিবি-নুরুদ্দিন বিহা' এবং 'নুরুদ্দিন বাখান' বলে উপাখ্যানটিকে অভিহিত করেছেন, উপাখ্যানটির প্রকৃত নাম মনে হয় 'নসিব নামা' বা নিয়তিকথা বা বিধিলিপি। কবি শমশের আলীর 'রেজওয়ান শাহ' উপাখ্যানের এবং এ 'নসিবনামা' কাব্যের প্রতিপাদ্য বিষয়ে কোন পার্থক্য নেই। দুটো কাব্যেরই লক্ষ্য অদৃষ্টের বা নিয়তির বিধান অমোঘ বা অখণ্ডনীয় বলে প্রমাণ।

আপ্লাএ যে কিছু করে

কেহ খণ্ডাইতে পারে

শর্ত সব নিষ্ফল হইল।

মরদনের কাব্যের মূল বিষয় : সদাগর আবদুল করিমের ও সদাগর আবদুন নবীর মধ্যে ছিল বন্ধুত্ব। উভয়ের স্ত্রী ছিল গর্ভবতী। তারা সে-সময়ে অঙ্গীকার করে যে তাদের দু'জনেরই ছেলে হলে বন্ধুত্ব করাবে, মেয়ে হলে সখ্য পাতাবে এবং ছেলে ও মেয়ে হলে বিয়ে দেবে। দৈবক্রমে আবদুল করিমের সদাগরী নষ্ট হওয়ায় সে অত্যন্ত দরিদ্র হয়ে পড়ল। তাই আবদুন নবী যথাসময়ে অঙ্গীকার অনুযায়ী আবদুল করিমের কন্যা নাসিরাবিবিকে বধু না করে, পুত্র আবদুল সবিরের সঙ্গে আবদুল গনির কন্যার বিয়ের ব্যবস্থা করল। এ সূত্রেই স্বামীকে প্রবোধ দানচ্ছলে দৃষ্টান্ত স্বরূপ আবদুল করিমের স্ত্রী আসামরাজ্যের সদাগর রাজু খানের চার পুত্রের পুরস্কার ও ভাগ্যের উপাখ্যান বর্ণনা করল। এ চারপুত্রের নাম মুসা খান, ঈসা খান, ইসমাইল খান ও এবাদ খান। রাজু খান একদিন পুত্রদের বলল—

'বাপের মায়ের ধন কথদিন খাইব।

আপনা অর্জন ধন খাইলে না ফুরাইব।

তারপর চারপুত্রের ধন উপার্জন সম্পৃক্ত ঘটনাই বিবৃত হয়েছে। 'কর্মভোগ সংসারে এড়াইতে কেহ পারে।' আবদুল করিমের স্ত্রী দ্বিতীয় গল্প আদর্শ বন্ধুত্বের দৃষ্টান্ত :

পূর্বে যে মিসির দেশে দুই মিত্র ছিল

মিত্রের কারণে মিত্র মরণ ইচ্ছিল।

মিসরের সদাগর পেরু খানের কন্যা খাগাবতী মজবে পড়ে, সেখানে জামালও পড়ে। উভয়ের প্রেমের ও সন্তোষের কাহিনী সবিস্তার বর্ণিত হয়েছে। আর জামাল যখন গুপ্ত প্রেমের অপরাধে সুন্দরের মতো মৃত্যুদণ্ড পেল, তখন তার বন্ধু কামাল জামালকে বাঁচানোর জন্যে অপরাধ নিজের ঘাড়ে নিয়ে মৃত্যুদণ্ড গ্রহণ করতে চাইল। জামাল বলে আমি অপরাধী, কামাল বলে আমি।

এরপর দেশের ধার্মিক রাজা নুরুদ্দিনের ফকিরবেশে রাত্রি নগর পরিক্রমা। আবদুল করিমের মুখে তার দুঃখের কাহিনী ও আবদুন নবীর অঙ্গীকারভঙ্গের কথা শুনে ফকিরবেশী রাজা নুরুদ্দিন প্রবোধ দানচ্ছলে পূর্বের এক কিসসা বর্ণনা করলেন :

পূর্বে যেন গরীব হোসেন একজন

ব্যাঘ্র হাতে কন্যা দিয়া পাইল বহুধন।

দুনিয়ার পাঠক এক হও! ~ www.amarboi.com ~

গরীব হোসেন নামে এক মৌলানা মিসরে সোলায়মান বাদশাহর কাছে গিয়ে অর্থাভাবে মেয়ের বিয়ে দেয়ার সমস্যার কথা জানায়। বাদশাহ বলেন— কাল আউয়াল ফজরে অর্থাৎ উষাকালে ‘প্রথমে যাহারে দেখ তোমার দুয়ারে। তাকে কন্যা বিভা দিবা হইয়া নির্ভএ।’

প্রাতে এল মানুষ নয়— এক বুড়ো বাঘ, তাকেই কন্যা সমর্পণ করতে হল। তারপর অনেক অলৌকিক ঘটনা ঘটে। এর পরে রয়েছে মুসা নবী ও তিন নিঃশ্ব জনের কিস্সা : এর তিনজনের একটি বস্ত্র, তাই তারা গর্ভে বাস করে, তাদের জন্যে আল্লাহর কাছে সুপারিশ করেন মুসা যেন তিনজনে তিনটি বস্ত্র পায়, আল্লাহ বলে— ‘আদ্যের লেখন তার কেমনে মিটিব’— তবু মুসার অনুনয়ে আল্লাহ তৃতীয় দিবসে আমি তিন বর দিল। এ বরপ্রাপ্তদেরও কিস্সা রয়েছে। এদিকে ফকিরবেশী রাজা নুরুদ্দিন আবদুল করিমকে অর্থদান করেন, সে-অর্থ মূলধন করে করিম আবার ধনী সদাগর হল। আর পূর্ব শর্তানুসারে ফকিরকে কন্যাদান করল। এ বিয়েতে খুব জাঁকজমক হয়।

নানান দ্রব্য আনিলেক নাহি লেখাজোখা
হেন মতে তেলোয়াই করে সাধু বরে
পান ফুল ফিরাওস্ত প্রতি ঘরে ঘরে।

আর বরও যেন মুসলিম শিবঠাকুর :

মাথাএ যে কাল পাগ গলাএ শিকলি
কান্দেত তুলিয়া লৈল ফাটী কাথাখানি
হস্তে শোভে লাঠিগুটি কান্দে শোভে ঝুটি
কমরবন্দ আছে ঝোড়িয়া কাঁকাল
টেনিয়া (তেনা) পিঙ্কন পরিধান চাদর ফাটা
হাতে জপমালা শেখরে যোগবোটা।
পাএত পাদুকা দিয়া আইল ফকির।
বরের আসনে তবে বসিলা মহাবীর।
হেন মতে বিভা কেলা নৃপতি ফকির।

আর রাত্রি তিন প্রহরেক হৈল জুলুয়া।

আবদুন নবীর পুত্রের বিয়েতে করিম পানফুলসহ নিমন্ত্রণ পেল, পেল মেয়ে-জামাইও। ফকির নাসিরাবিবিকে নবীপুত্র আবদুল সবিরের বিয়েতে যেতে নির্দেশ দেয় :

‘পদাতি হইয়া যাইবা সাধুর দুয়ার
যথা দামাদেরে সবে তেল চড়াএ মুখে
ধূলি চাপি চাহি তুমি বসিবা সমুখে।’

ফলে উনচল্লিশ নারীসহ বিয়ে বাড়ি রওয়ানা হল নাসিরা। এখানেই পাণ্ডুলিপি খণ্ডিত। মনে হয় নাসিরাবিবির সঙ্গেই সবিরের বিয়ে হয়েছিল পরিণামে, যেমনটি হয়েছিল রেজওয়ান শাহর কন্যার সঙ্গে হোসামপুত্রের। আমাদের অবলম্বন দুটো পাণ্ডুলিপির একটি ১-২২ পৃষ্ঠায় খণ্ডিত। অন্যটিও আদ্যন্ত খণ্ডিত। প্রথমদিকের কয়েক পৃষ্ঠা নেই এবং মধ্যে অনেকাংশ বাদ পড়েছে, এবং শেষের দিকেও খণ্ডিত। দুটো পাণ্ডুলিপির মধ্যে ভাষাগত তথা শব্দগত পাঠান্তর অনেক।

মরদন সতেরো শতকের চতুর্থ দশকের মধ্যকার কবি। তাঁর কাব্যের কালগত গুরুত্ব রয়েছে। আল্লাহর লীলা ও নিয়তির অমোঘতাই প্রতিপাদ্য বিষয় হলেও এসব উপাখ্যানেও রোম্যান্সের এবং আদিরসের ভিযান রয়েছে। সে কারণে ধর্মবুদ্ধিসম্পন্ন রসিক মানুষের এ জাতীয় উপাখ্যান প্রিয় হওয়ার কথা। মরদনের কবিত্ব কিংবা পাণ্ডিত্য উল্লেখযোগ্য নয় বটে, তবে লোকশিক্ষালক্ষ্যে বানানো লোকশ্রুতির উপাখ্যানকে স্বাধীনভাবে বিন্যস্ত করে কাব্যে রূপায়িত করার গৌরব তাঁর অবশ্যই প্রাপ্য। এ সূত্রে স্মর্তব্য যে উপাখ্যানের রসকথার মাধ্যমে মুসলিমদের ধর্মবুদ্ধি ও নীতিজ্ঞান দানের জন্যে হিন্দুদের মঙ্গলকাব্য রচনার পাশাপাশি এগুলো রচিত হচ্ছিল। সেদিন স্বতন্ত্র জাত-বর্ণ-ধর্ম ও অঞ্চল ভেদে সাহিত্যকর্মও বিভিন্ন হতো।

মঙ্গলপাঁচালীর সঙ্গে এ ধরনের উপাখ্যানের তুলনা করলেই বিভিন্ন সম্প্রদায়ের ও শ্রেণীর মানুষের জীবনচেতনার ও জগৎভাবনার তথ্য জীবনের মূল্যবোধের, আদর্শের ও লক্ষ্যের আর চাওয়া-পাওয়ার পার্থক্য সুস্পষ্ট হয়ে ওঠে।

৫. শমশের আলী

আবদুল করিম সাহিত্যবিশারদ ও ডক্টর মুহম্মদ এনামুল হকই প্রথম তাঁদের আরাকান রাজসভায় বাঙলা সাহিত্য গ্রন্থে কবি শমশের আলী ও তাঁর রচিত উপাখ্যান 'রেজওয়ান শাহ'র পরিচয় লিপিবদ্ধ করেন। তাঁদের অবলম্বন ছিল চট্টোপাধ্যায়ের ছাপা পুথি। নামে অভিন্ন হলেও উর্দু ও ফারসি 'রেজওয়ান শাহ' উপাখ্যানের সঙ্গে এটির কোন সম্পর্ক নেই। উর্দু ও ফারসি কাব্যটি হচ্ছে রেজওয়ান ও পরী রুহ আফজার প্রণয়িত কাহিনী। উর্দু ও ফারসি দুটো কাব্যের কবি হচ্ছেন ফয়েজ (১৬৮৩ খ্রীঃ) ও মুহম্মদ বাকীর আদা (১৭৯৬ খ্রীঃ)। শেষোক্তটির নাম 'গুলজার-ই-ইশক'। মুদ্রিত পুথিটি আমাদের হাতে নেই। আমাদের এ আলোচনার অবলম্বন ডক্টর মুহম্মদ এনামুল হক সংগৃহীত ১২২৬ মঘীসনে বা ১৮৬৪ সনে অনুলিখিত পুথি। এটি তিনি তাঁদের উক্ত গ্রন্থ মুদ্রিত হবার পর সংগ্রহ করেছিলেন। মুদ্রিত পুথিতে তাঁরা নিম্নোক্ত তথ্যগুলো পেয়েছিলেন :

১. মহাকবি শমশের আলি স্বর্গে হল বাস
খণ্ড কাব্য পুস্তক পুরিতে মোর আশ।
২. জিলে চট্টগ্রাম মধ্যে হাটজারী থানা
সে সাকিনে শমশের মহাকবির
সুলতানপুর মৌজা জানে সর্বজন।
৩. রোসান প্রসঙ্গ আদ্যে শেষে চট্টগ্রাম।

এগুলো আমাদের আলোচ্য পাণ্ডুলিপিতে নেই। প্রথমত এ পাণ্ডুলিপি অক্ষত রয়েছে। কাব্যটিও পূর্ণাঙ্গ। ঈশ্বরশ্রুতি দিয়ে শুরু এবং রেজওয়ান শাহর কন্যা জমিলা খাতুননের সঙ্গে হোসামপুরের বিয়েতে কাব্যকথা সম্পূর্ণতা পেয়েছে। পুথির ৮৫, ৮৭ ১০৬ পত্রে অর্থাৎ শেষাংশে তিনটি ভণিতা রয়েছে। গোড়া থেকে আর কোথাও কোন ভণিতা নেই।

১. ক্ষুদ্রবুদ্ধি জ্ঞানহীন শমশের আলি
রূপকাব্য বিরচিলা করিয়া পঞ্চালী।

২. হীন শমশের কহে

রাজকন্যার পণ নহে।

৩. হীন শমশের আলি কহে হৈলে শুদ্ধভাব

আবশ্যক দুঃখ শেষে হয় বাঞ্ছা লাভ।

কাজেই খণ্ডকাব্য রেখে শমশের আলী স্বর্গে যাননি। আর আছলাম, মোহাম্মদ হাকিম আলীও ছেদতম আলী এ কাব্যে সমাপ্তি দান করেননি। কবির নিবাসও কোথাও উল্লেখিত হয়নি। আর এ পাণ্ডুলিপির আদ্যে রোসান প্রসঙ্গ এবং শেষেও চট্টগ্রাম প্রসঙ্গ নেই। যদিও আদ্যে আল্লাহ ও রসুল প্রশংসিত রয়েছে। গ্রন্থের রচনাকালও নেই। কবির কাব্যের জন্মভূমির, পীরের, পিতামাতার কিংবা সমকালীন রাজার কোন পরিচয় নেই। পরোক্ষ কাজী দৌলতের সতীময়নার উল্লেখ অবশ্য আছে, নায়িকার রূপবর্ণনার প্রারম্ভে কবি বলেছেন :

খণ্ডগ্রন্থ হতে যদি হৃদ চুরি করি

বঙ্গভাষা ব্যক্ত আছে বৃথা ধরা পড়ি।

এ খণ্ডগ্রন্থ হচ্ছে সতীময়না, এবং আলাউল কর্তৃক ১৬৫৯ সনে পূর্ণাঙ্গ করার পূর্বকার উক্তি এটি, আর সতীময়না যেহেতু রোসানে রচিত, কবিও হয়তো ছিলেন রাজধানী রোসানে প্রবাসী এবং কবি যে আরকান রাজ্যান্তর্গত চট্টগ্রামবাসী ছিলেন তাতে সন্দেহের অবকাশমাত্র নেই, কারণ সেযুগে এ সব কাব্যের প্রচার রাজসৌম্য অতিক্রম করেনি। 'আরাকান রাজসভায় বাঙ্গালা সাহিত্য'-এর লেখকরাও এমনি অনুমান করেছিলেন।

এর থেকে কাব্য রচনার কাল ১৬৯৩-৫৮ খ্রীস্টাব্দের মধ্যবর্তী সময় বলে মনে হয়। আবার সতীময়নার উল্লেখ থাকলেও পদ্মাবতীর উল্লেখ নেই। কাজেই ১৬৩৯-৫১ সালের মধ্যকার রচনা বলেও অনুমান করা চলে। তবে এ নিছক অনুমান মাত্র। এখানে পাণ্ডুলিপির লিপিকর প্রদত্ত পুস্পিকা উদ্ধৃত করছি :

সন ১২শ ২৬ মং তারিখে ১৮ বৈশাখ

সমাণ্ড মুনসী শমসের সাহে

বর কৃৎ মুনসী মচকুর (?) ২৬ মগির ভাদ্র

মাস মিত্র হইআছে মিত্র সকলের

প্রাণে সুল মারীআ।

ভগতি শ্রীযুক্ত মুনসী শমসের আলী

সাহেব পীং অযালি চৌধুরী

এই পুস্পিকায় গুরুত্ব দিলে কবিকে উনিশ শতকের

প্রথমার্ধের কবি বলে সনাক্ত করা সম্ভব।

১৮৬৪ খ্রীস্টাব্দে লিপিকার শমশের আলীর পিতার (সন ১২শ ২৬ মঘীর ভাদ্র মাসে) নামও জানেন, এ যদি সত্য হয় তা হলে এ কাব্য উনিশ শতকে রচিত বলে মানতে হবে। 'রেজওয়ান শাহ' উপাখ্যানের প্রতিপাদ্য বিষয় আল্লাহর অখণ্ডনীয় বিধান। এটিই মানুষের অদৃষ্ট বা বিধিলিপি। যা ঘটবার তা ঘটবেই, মানুষের কোন চেষ্টাতেই তা ব্যর্থ করা যাবে না।

মূল কাহিনী হচ্ছে : নিঃসন্তান ছিলেন রাজা রেজওয়ান শাহ ও তাঁর মন্ত্রী হোসাম। উভয়ের ছিল প্রগাঢ় বন্ধুত্ব। ঈশ্বরের কাছে প্রার্থনা করে। স্বপ্নাদিষ্ট হলেন রাজা ধন বিবর্তিয়া দিলে (বাঞ্ছা) পুরাইব ঈশ্বর। রাজার কন্যালাভ ঘটে, সে-সঙ্গে হোসামেরও জন্মে এক পুত্র। বন্ধুত্বের খাতিরে সন্তানের গর্ভবস্থাতেই একের কন্যার সঙ্গে অপরের পুত্রের বিয়ে দেয়ার অঙ্গীকার করে। পরীক্ষা করার জন্যে আল্লাহ রেজওয়ান শাহকে ভিখারী করে দিলেন, মন্ত্রী হোসাম রাজ্য পেয়ে গেল। তখন হোসাম আর অঙ্গীকার অনুযায়ী রেজওয়ানের কন্যাকে বধু করতে চাইল না। দরিদ্র রেজওয়ানকে তাঁর দ্বারী লাক্ষিত করে তাড়িয়ে দিল। রেজওয়ানকে প্রবোধ দানচ্ছলে সিদ্ধা বা ঋষি বা মুনি খোরাসান রাজ ফিরোজ শাহর একটি উপাখ্যান বর্ণনা করল। তাও নিঃসন্তান রাজার প্রার্থনা করে সন্তান লাভ এবং অন্তরীক্ষ বাণী অনুসারে রাজ্য ত্যাগ, মধ্যখানে হীরালাল সদাগর কর্তৃক রানীহরণ, দুই সন্তান হারানো এবং পরে ভিন্ন রাজ্যের নিঃসন্তান রাজার শূন্য সিংহাসন প্রাপ্তি ও স্ত্রী-সন্তানদের সঙ্গে পুনর্মিলন। রেজওয়ান শাহও স্বপ্নাদিষ্ট হয়ে সাত রাজার গুপ্ত ধন মাটির ভেতর থেকে উদ্ধার করে আবার নতুন রাজ্য স্থাপন করে রাজা হলেন, এ সময়ে হোসামকে শাস্তি দিতে চাইলেও ঋষির কথায় ক্ষমা করতে হল। এদিকে বুদ্ধিমান হোসাম তাঁর কনিষ্ঠ ভাই ও মন্ত্রীকে পূর্ব অঙ্গীকার অনুযায়ী ঘটনারূপে পাঠালেন রেজওয়ান শাহর কাছে। দ্বারী হোসামের ভাইকে প্রাসাদে প্রবেশে বাধা দিল, তখন হোসামের ভাই দ্বিতীয় উপকাহিনীটি বিবৃত করে উদ্ভূত সমস্যার পূর্ব দৃষ্টান্তরূপে : এটি হচ্ছে পারস্যরাজপুত্র চন্দ্রপ্রভা ও চীনরাজকন্যা চন্দ্রাবতীর প্রেমাকাহিনী : এক বিদ্রোহটানো সন্ন্যাসীরাণী দেবতার মুখে চন্দ্রপ্রভা জানতে পায় যে চীনরাজের চিররুগ্না কুণ্ডলিনী কন্যার সঙ্গে তার বিয়েই প্রজাপতির নির্বন্ধ। নিয়তিকে ব্যর্থ করার জন্যে রাজকুমার চন্দ্রপ্রভা সদাগরের ছদ্মবেশে রাজকন্যাকে হত্যার উদ্দেশ্যে চীনে গেল, রাজকন্যার ছিল অশ্রু-রোগ, অন্ধকারে কন্যাহত্যা করতে গিয়ে সে অজ্ঞাতে অর্ধ অংশেই অস্ত্রোপচার করে। কন্যা রোগমুক্ত হয়ে পরমাসুন্দরী হয়ে ওঠে। সাত বছর পরে চন্দ্রপ্রভা চীনরাজের আয়োজিত নৃত্যগীত উৎসবে যোগদান করতে গেলে উভয়ের চার চোখের মিলন ঘটে। এভাবে মিলনে সন্তোষে ও বিবাহে সমাপ্ত এ উপকাহিনী। এ গল্প শোনার পরে দ্বারী হোসামের ঘটকরূপী ভাইকে রেজওয়ান শাহর কাছে নিয়ে গেল, ঋষির মধ্যস্থতায় পূর্ব অঙ্গীকার মতো জমিলা-নসরতের বিয়ে হল। ‘আল্লাহ সে কারক মাত্র নর নাম ধরে’ আর ‘ঈশ্বর নিয়ম নহি লড়ে’।

গল্পগুলো বোধ হয় লোকপ্রচলিত উপাখ্যানের আদলে তৈরি, কোন বিশেষ কাব্যোল অনুকৃতি নয়। কবির কবিত্ব-পাণ্ডিত্যও উচ্চমানের নয়। পূর্বোক্ত উর্দু ও ফারসি কাব্য দুটোর খবর জানা ছিল কবির অনুসরণে রচিত নয়, তাই কারো ঋণ স্বীকৃত হয়নি। প্রমাণ কবির উক্তি : এই স্থানে যোগ্য হয় রূপের বর্ণনা কিন্তু আমি শক্তিহীন করিতে রচনা/উর্দুপুস্তকেতে যোগ্য ব্যাখ্যা নাই। পারস্য গ্রন্থেও ব্যাখ্যা অখণ্ড না পাই। খণ্ডস্থ হস্তে যদি ছন্দ চুরি করি। বঙ্গভাষা ব্যক্ত আছে বৃথা উজ্জপড়ি।... দিল্লীর খসরু কবি রচিত পারস্যভাসার ‘শিরি-ফরহাদ’ অবলম্বনের কবি চন্দ্রাবতীর রূপ বয়ান করেন। প্রতি অঙ্গ-প্রত্যঙ্গের রূপ অত্যন্ত যত্নের সঙ্গে বিবৃত। উপমাদি অলঙ্কার সংগ্রহে ও প্রয়োগে সুরূচি, কবিত্ব ও পাণ্ডিত্য প্রদর্শনে প্রয়াস সুপ্রকট, এ কারণে রূপবর্ণনাটি সুদীর্ঘ। সন্তোষচিত্র দানে কবির আদরসে আসক্তিও সুপ্রকট। এ কাব্যে চন্দ্রপ্রভা-চন্দ্রাবতী রোমান্স অংশটিই আকর্ষণীয়। গল্পগুলো উপদেশাত্মক বলেই নীরস।

সতেরো শতকের অন্যান্য উপাখ্যান প্রণেতা

ফারসি-উর্দু-হিন্দি : তুর্কো-আফগান বিজয়ান্তর কিছুকাল ভারতের দরবারী ফরমানাদির ভাষা ছিল আরবি, কুচিং ফারসি। তারপর ক্রমে ফারসিই দরবারী ভাষা হিসেবে চালু হল গোটা ভারতে। পরিণামে কয়েকশ' বছরের মধ্যে ফারসি হরফে ফারসি শব্দবহুল একটি লেখ্য হিন্দুস্তানী লিঙ্গুয়া-ফ্রাঙ্কা বা ভাববিনিময়ের সর্বজনীন মিশ্রভাষাও হল চালু। ষোল শতক থেকে এর একটি আলাদা নামও মিলে গেল- সিপাহি শিবিরে ও বাজারে- উর্দুতে ও উর্দুবাজারে চালু ভাষার নাম হল উর্দু। উর্দু ও হিন্দি বাকরীতির তথা বাক্যগঠন পদ্ধতির দিক দিয়ে একান্তভাবেই নব্যভারতীয় আর্থভাষা। উভয় নামের লেখ্যভাষা মূলত অভিন্ন। পার্থক্য অত্যন্ত স্থূল ও সাম্প্রদায়িক। মুসলিমরা লাহোর থেকে বিহার অবধি অঞ্চলে এবং পাকিস্তানে ফারসি হরফে [কুচিং নাগরী বর্ণমালায়] ফারসি শব্দবহুল [ফারসিতে চালু আরবি-তুর্কি শব্দসহ] উর্দু নামের হিন্দি ব্যবহার করে, যেমন মহব্বত করনে কা খায়েস নেহি হৈ'। আর হিন্দুরা স্বাতন্ত্র্যচেতনাবশে নাগরী অক্ষরে আর্থ-ভারতীয় শব্দবহুল হিন্দি নামে [এর মধ্যে আঞ্চলিক উপভাষা বা বুলি রয়েছে যেমন ঠেট, আওধি, ব্রজভাষা, ভোজপুরী ইত্যাদি] উত্তর প্রদেশের লেখ্যভাষাকে মাতৃভাষা বলে জানে- যেমন 'প্রেম/পেয়ার করলে কা ইচ্ছ নেহি হৈ'। দাক্ষিণাত্যের সুলতানদরবারে ব্যবহৃত ফারসি শব্দবহুল ও ফারসি হরফে লেখা ভাষার নাম 'দাখিনী উর্দু'। এভাবেই উর্দু হিন্দিতে হিন্দু-মুসলমানের সাহিত্যও সৃষ্টি হচ্ছিল। উর্দুওয়ালার হিন্দিতে এবং হিন্দিওয়ালার উর্দুতে কমবেশি অধিকার ছিল। প্রমাণ উত্তর ভারতের মুসলিম কবিদের মৈনাসং, পদুমাং, মৃগাং, মধুমালং, গুলেবকাউলি প্রভৃতি নৌকিক উপাখ্যান গ্রন্থ। কারণ গোড়াতে এর মধ্যে কোন সাম্প্রদায়িক অভিসন্ধি ছিল না। বিদেশাগত শাসকগোষ্ঠীর স্বদেশী স্বজনেরা প্রয়োজনীয় সংখ্যক স্থানীয় শব্দ-সম্পদ ভাজনে অসমর্থ হয়েই ফারসি-তুর্কি শব্দ যোগে যেমন- তেমন করে মনোভাবের অভিব্যক্তি দিতে চেয়েছে। গোড়াতে মিশ্রণের মূলে ছিল এ-ই। কালক্রমে তা দ্বৈধ-দুই স্বাতন্ত্র্যচেতনার অবলম্বন হয়ে দাঁড়ায়। যেমনটি বাঙলাদেশের হিন্দু-মুসলিমের শাস্ত্র-সংস্কৃতির স্বাতন্ত্র্য প্রতীক হয়ে দাঁড়ায়- জল-পানি, লোটা-বদনা, থালা-বর্তন প্রভৃতি। রাজনীতিক স্বার্থে সাম্প্রদায়িক ভেদবুদ্ধির ফলে উনিশ শতকের শেষপাদ থেকে শুরু হয়ে স্বাধীন ভারতে ও পাকিস্তানে হিন্দি হচ্ছে ফারসিবিহীন ও সংস্কৃতঘেঁষা এবং উর্দু হচ্ছে দেশী শব্দঘেঁষা ও ফারসি ঘেঁষা।

আমরা অন্য প্রসঙ্গে আগেই বলেছি উনিশ শতকের আগে সাহিত্যের বিষয়ে, বক্তব্যে ও লক্ষ্যে শাস্ত্রিক, সাম্প্রদায়িক, আঞ্চলিক ও শ্রেণীক ভেদ ছিল। তা সত্ত্বেও দেশজ মুসলিম কবিদের কাব্যের বিষয়বস্তু সংগৃহীত হয়েছে স্থানীয় রূপকথা, উপকথা ও ইতিকথা থেকে, সংস্কৃত কাব্যদর্শ, হিন্দ ও অলঙ্কারতত্ত্বই হয়েছে অনুসৃত আর ভাষা মুখ্যত স্থানীয়, কুচিং ফারসি। পারস্যে পলাতক সম্রাট হুমায়ূনের ভারতে প্রত্যাবর্তন ও দিল্লীর তখতে প্রতিষ্ঠা ঘটে পারস্য রাজের ও ইরানি সৈন্যের প্রত্যক্ষ সহায়তায়। এমনি রাজনৈতিক সহায়তার অবশ্যম্ভাবী পরিণাম স্বরূপ ভারতে ইরানি চাকুরের সংখ্যা ও সংস্কৃতির প্রভাব প্রবল ও অমোঘ হয়ে ওঠে। ফারসি যদিও অনেক আগে থেকেই দরবারী ভাষা, তবু ফারসি সাহিত্যের প্রভাব উত্তর ভারতে ছিল ক্ষীণ। এবার বহু ইরানির সমাবেশের ফলে এবং পরে সাফাভী বংশীয় রাজত্বের অবসানে ভারতে ইরানির সংখ্যা সর্বত্র বৃদ্ধি পায়। কাজেই আকবরের আমল থেকেই দেশজ মুসলিমদের কাব্যের বিষয়রূপে ইরানি উপাখ্যানাদি বিশেষভাবে এবং বেশি করে চালু হল। এ বিষয়গত

প্রভাবতরঙ্গ উত্তরভারতে এবং বাঙলাদেশে ও রোসাস্তে প্রায় সমভাবেই মানুষের মনে-মননে অভিঘাত সৃষ্টি করেছিল। অবশ্য দাক্ষিণাত্যে— বেরারে বিদরে বিজাপুরে আহমদনগরে গোলকুণ্ডায় শিয়া সুলতানের অগ্রহে ও প্রভাবে ফারসি কাব্যের ও ইরানে শিয়াসাহিত্যের চর্চা ও অনুবাদ আগেই চালু হয়।

উপাখ্যানে জীবনচিত্র

আমাদের সাহিত্যে স্বর্গ-মর্ত্য-পাতালের পরিসরে দেব-দৈত্য-রাক্ষস-যক্ষ-গন্ধর্ব-অপ্সরা আগেও ছিল, এবার এদের সঙ্গে যুক্ত হল জীন-পরী-দেও-পরীলোক রোকাশহর কিংবা গুলিস্তা-ইরান প্রভৃতি।

অন্য প্রসঙ্গে বলছি যে সে-যুগের সাহিত্যে পাঠক-শ্রোতার জীবনচেতনার ও জগৎভাবনার স্তর অনুযায়ী তাদের জগতে অবাস্তব অসম্ভবের পরিধি ছিল সীমিত। অলৌকিক অস্বাভাবিক ও অতিপ্রাকৃত ঘটনায় তাদের আস্থা ছিল গভীর, ব্যাপক ও অবিচল। তাই অলৌকিক অতিপ্রাকৃত ঘটনার সমাবেশ প্রায় অপরিহার্য ছিল সাহিত্যে তাদের রসের, বিশ্বাসের ও প্রয়োজনের জগৎ নির্মাণের জন্যে। স্বর্গ-মর্ত্য-পাতালের পরিসরে, নদ-নদী-নগরীর পরিবেশে, জীন-পরী-ভূত-প্রেত-অন্ধারী-কিন্নরীর উপস্থিতিতে, দেব-দৈত্য-রাক্ষ-যক্ষ প্রভৃতির সঙ্গে দ্বন্দ্ব-সংঘাতময় মানবজীবনের বিশেষ করে উচ্চকোটির নায়ক-নায়িকার জীবনের বিচিত্রলীলার বর্ণালি অতিমানবিক কাহিনীই ছিল আমাদের কবিদের অর্ধলক্ষ্য এবং দেবতা-রাজা-উজির-কোটাল প্রভৃতি শাহ-সামন্ত শ্রেণীর মানুষ কিংবা দৈত্য-দানব-রাক্ষস-খোক্ষসের ভাব-কর্ম-আচরণই ছিল বর্ণিতব্য বিষয়, তার নীচে কেউ নামেনি। তাই রাজপুত্রের হাজার হাজার অনুচর ঝড়ো সমুদ্রে ডুবে গেলেও, না কবি, না পাঠক— কাক্ষ্যে মনে বিপন্ন মানুষের করুণ মৃত্যুর ও স্বজনের শোকের কথা জাগেনি, রাজপুত্র বাঁচলেই হুগ! তাঁদের জীবনবোধও ছিল স্থূল। তাঁদের চেতনায় বাহুবল মনোবল আর লিঙ্গা-বাহুগুহাই ছিল নায়ক জীবনের আদর্শ। রূপতৃষ্ণাই ছিল জীবন-প্রেরণার উৎস, সংগ্রামশীলতা ও আত্মপ্রতিষ্ঠাই ছিল সে জীবনের ব্রত এবং জয় আর জরু ও জমি ভোগই ছিল লক্ষ্য। সে-উপাখ্যানের জগতে স্বর্গ-মর্ত্য-পাতাল সঙ্করণে, নদী-গিরি-অরণ্য-মরু-কান্তার অতিক্রমণে, নাগের বাঘের কবল উত্তরণে নায়কের পক্ষে বাধা বিঘ্ন সামান্য। সেখানে পাখি তবুকথা বলে, রাক্ষস প্রতিদ্বন্দ্বী হয়ে দাঁড়ায়, দৈত্য হয় বৈরী, দেবতা করেন প্রত্যক্ষ সহযোগিতা।

দেব-দৈত্য-যক্ষ-রাক্ষ দিয়ে শুরু হলেও ক্রমবিকাশের ধারায় দেব-দৈত্যের জীন-পরীর পাশে মানুষও হলো জিজ্ঞাসার বিষয়। এভাবেই সাহিত্যে মানুষের অলীক আকাঙ্ক্ষার ও কল্পনার জগতে অধিক পরিমাণে মানবিক রস অনুপ্রবিষ্ট হয়। প্রতিযোগিতায়, দ্বন্দ্ব ও সংগ্রামেই জীবনে ক্ষুর্তি, প্রাণের প্রকাশ, চিন্তের উল্লাস। দ্বন্দ্বিক জীবনই মানুষের কাম্য। দুর্বল এ বৃত্তি চরিতার্থ করে ক্রীড়ায়, সবল করে সংগ্রামে। বাহুবল, মনোবল ও বিলাসবাহুগুহাই রূপকথার ও উপাখ্যানের জগতে মানুষের জীবনবেদ। প্রাণশক্তি আর দুর্বীর কামনাই এ জগতে জীবনের নিয়তি। অক্ষ আবেগনিষ্ঠা এবং অকৃত্রিম সিন্ধিবাহুগুহাই এ জীবনের আদর্শ। সংগ্রামশীলতা ও আত্মপ্রতিষ্ঠা এ জীবনের ব্রত এবং ভোগ-উপভোগের সুখই লক্ষ্য। এক কথায় বীরযোগ্য সংঘাতময় বিচিত্র দ্বন্দ্বিক জীবনের উল্লাসই এ সাহিত্যে প্রকাশিত।

সয়ফুলমলুক-বদিউজ্জামাল

আমাদের আলোচ্য সয়ফুলমলুক-বদিউজ্জামাল সে ধরনের রচনা। এরূপ প্রণয়োপাখ্যান হচ্ছে জেবল মলুক-শামারোখ, লালমোতি-তাজলমলুক, আজরশাহ সমনরোখ প্রভৃতি। নামেই প্রকাশ এগুলোর উৎস ফারসি সাহিত্যে এবং আরবি আলফ লায়লা প্রভাবিত। এসব হচ্ছে পরী-মানুষের প্রেম ও পরিণয় কাহিনী। 'সয়ফুলমলুক-বদিউজ্জামাল' আলফ লায়লার বহুল প্রচারিত ও জনপ্রিয় উপাখ্যানগুলোর একটি। আলফ লায়লার ৭৫৭-তম রজনীতে এ উপাখ্যানের শুরু এবং ৭৭৮-তম রজনীতে এর সমাপ্তি। এই রোমাঞ্চকর প্রণয়োপাখ্যান নিয়ে অনেক গ্রন্থ রচিত হয়েছে ফারসি ও তুর্কি ভাষায়। কবিগণ নিজেদের ভাষায় ও নিজেদের কথায় উপাখ্যান বিবৃত করেছেন বটে, কিন্তু এ কাহিনী জগদ্বিখ্যাত বলেই হয়তো কেউ সাহস করে নিজের নাম রচনার সঙ্গে যুক্ত করেননি। তাই ফারসি ও তুর্কি কিসসাগুলো অজ্ঞাতনাম কবিদের। ভারতে, ইরানে ও মধ্য এশিয়ার বিভিন্ন কবি রচিত কয়েকটি তুর্কি-ফারসি পুথি পাওয়া গেছে। এগুলোর মধ্যে দীর্ঘ কাহিনীকে সংক্ষিপ্ত করবার প্রবণতাও লক্ষণীয়। আবার কোন কোন পুথিতে কাহিনী হয়েছে পল্লবিত, এমন কি কাহিনীর জের পর প্রজন্মো টেনে নেয়া হয়েছে।

যুরোপের ও পাক-ভারত-বাঙলার বিভিন্ন গ্রন্থাগারে রক্ষিত পুথিগুলোর মধ্যে তিনটে পুথি উল্লেখ্য : একটি ঢাকা বিশ্ববিদ্যালয়ের পুথিশালায় রক্ষিত ফারসি পুথি। এতে সাইফুলমলুকের পুত্র তাজলমলুকের সিংহাসনারোহণ ও তার মাতা বদিউজ্জামালের আত্মহত্যার কাহিনী বিবৃত। আর একটি গ্রন্থ মুহম্মদ আব্দুর রশিদের সম্পাদনায় নেওলকিশোর কর্তৃক লাহোর থেকে ১৯১০ সালে প্রকাশিত। এই ফারসি কাব্যের রচয়িতা মহফিল। এটি কবির তখলুস বা কলমীনাম। কাব্যের নাম নুসসাহ-ই-খায়ের অল মলুক মশহুর বাহ তুহফাহ অল মলুক। কবির স্বনামে এটিই একমাত্র ফারসি গ্রন্থ। আর আদিলশাহী দরবারের কবি গওয়াসি দাখিনী উর্দুতে সাইফুলমলুক-বদিউজ্জামাল উপাখ্যান রচনা করেন ১৬২৪ খ্রীস্টাব্দে। বাঙলায় আমরা দোনাগাজী, আলাউল ও শায়ের মালে মুহম্মদ রচিত উপাখ্যান পেয়েছি। বাঙলা পুথিতেও কাহিনী কোথাও দীর্ঘ আবার কোথাও হ্রস্বীকৃত।

হাজার পুরানো আলফ-লায়লার এই কিসসার ঔজ্জ্বল্য আজো অশ-ন। আজো এ কাহিনী রোমান্টিক মনের ক্ষুধা মিটায়। চলচ্চিত্র দর্শকরাও মুগ্ধ হয়েছে এই বেদনা-মধুর প্রণয়-চিত্রের প্রেমিক প্রাণময়তায়।

গল্পের রূপ-রেখা : মিসররাজ ছিলেন নবী সোলায়মানের করদ রাজা। তিনি নবীর ধর্মে নিলেন দীক্ষা, সোলায়মান খুশী হয়ে তাঁকে তিনটে উপহার দিলেন আঙটি, কাবাই (আলখল্লা) ও ঘোড়া। তিনটেই অলৌকিক শক্তিধর। আঙটির যাদুবলে দেও-দৈত্য বন্দী রাখা চলে আর রাক্ষস ও দানবের অবধ্য হওয়া যায় এবং গন্ধর্ব-কিনুরও থাকে বশে। আর কাবাইতেই মিসর রাজপুত্র এক ঘুমভাঙা রাতে অপরূপ রূপসী বদিউজ্জামালের অবয়ব দেখে, এবং অশ্বের গুণ হচ্ছে—

অতি লম্ব গতি চলে জিনি জলধার।

অগ্নি জিনি তেজবন্ত বাউ জিনি গতি।

এই তিন উপহার মিসররাজের তিন প্রিয়জনকে দেয়ার নির্দেশ ছিল। সোলায়মান বলেছিলেন 'এক স্থানে তিন দ্রব্য না দিও কাহারে'। রাজকুমারের নাম সয়ফুলমলুক আর

রাজবন্ধু ও মন্ত্রী সালেহর পুত্রের নাম ছিল সায়াদ। সায়াদ কুমারের সহচর ও বন্ধু। ‘দুই মাত্র একপ্রাণ দুই কলেবর’। জন্মও হয়েছিল একই দিনে। ওদের বয়স যেদিন চৌদ্দ বছর পূর্ণ হল, সেদিনই রাজা পুত্রকে আঙটি আর কাবাই এবং সায়াদকে দিলেন অশ্ব। রাজকুমার সে-রাত্রেই শয়নকক্ষে রাখা কাবাইতে অঙ্কিত প্রাণবান তসবীর দেখল আর তখন থেকেই হল বিরহী ও বিবাগী। জামাতে দেখা রূপসীর নাম-ঠিকানা জানা ও তার কাছে পৌঁছা সহজ ছিল না। তাই নৌবহরযোগে বন্ধু সায়াদকে নিয়ে সয়ফুলমলুকের নিরুদ্দেশ যাত্রা হল শুরু রূপসী সন্দর্শন লক্ষ্যে। তারপর সাত সমুদ্রের অনিচ্ছয়ায় পাড়ি জমানো, চীন-কর্তিত-জঙ্গীদেশ ভ্রমণ, এবং মধ্যে ঝড়ের কবলে পড়ে লোকলঙ্কার ও সায়াদকে হারিয়ে বিপন্ন ও নিঃসঙ্গ সয়ফুলমলুক আজব জম্বুর সাগর ও আজব চর কপি রাজ্য, পিপড়ের চর, সরস্বীপ, ওয়াচীন প্রভৃতি অদ্ভুত সব দেশ হয়ে মানুষকে গোলের, দানবের সাগরকন্যার, ভান্নকের, কুমীরের রাক্ষসরাজের কবলমুক্ত হয়ে অবশেষে এক দৈত্যর বন্ধুত্ব লাভ করে তার কাঁধে চড়ে হাজার বছরের দূরত্ব আকাশপথে অতিক্রম করে বদিউজ্জামালের বাপের রাজ্য গুলেস্টাইরামে পৌঁছতে পারল। পথে অবশ্য সায়াদের সঙ্গে আকস্মিকভাবে সয়ফুলের মিলন ঘটে। তারপর আরো বড়-ছোট অনেক বিপদ সঙ্কট উত্তীর্ণ হবার পরে বিশ্বের বহু অতিথির উপস্থিতিতে বিশেষ ধুমধামে জাঁকজমকে বিয়ে হল মনুষ্যসন্তান সয়ফুলমলুকের পরীরাজ শাহাবাল-কন্যা বদিউজ্জামালের সঙ্গে এবং সায়াদের সঙ্গেও বিয়ে হলো সরস্বীপ রাজকন্যা মালেকার। এ-ই হল বিপুল কলেবর কাব্যের দীর্ঘ কাহিনীর রূপরেখা।^১

আলেফ-লায়লার, দোনাগাজীর, আলাউল ও মালে মুহম্মদের উপাখ্যানে বৈসাদৃশ্য অনেক। এতে বোঝা যায় কেউ কারো গ্রন্থের সঠিক অনুসরণ করেননি, কাহিনীর কাঠামোর মধ্যে স্বাধীন অনুসৃতিই সর্বত্র দৃশ্যমান, তার সঙ্গে স্ব স্ব ভাব, কল্পনা, রুচি ও ভঙ্গি-যুক্ত প্রত্যেক কাবাই স্বাতন্ত্র্যে উজ্জ্বল ও কবিত্বে শিথিলে বিশিষ্ট। অবশ্য সব কবির শক্তি যে সমান নয়, তা বলার অপেক্ষা রাখে না। আলাউল ও মালে মুহম্মদের কাব্য যথাস্থানে আলোচিত হয়েছে।

এ কাব্যের সর্বত্রই adventure ও thrill উচ্ছলিত। কালিদাস যেমন মেঘদূতে যক্ষদম্পতির অন্তর্বেদনা বর্ণনাচ্ছলে ভারতবর্ষের প্রকৃতির ও জীবনের পরিচয় দিয়ে গেছেন, এবং এ উদ্দেশ্যেই তিনি মেঘকে বাঁকা পথে পাঠিয়েছিলেন অলকায়, কবি দোনাগাজীও তেমনি প্রকৃতির অদ্ভুত সৃষ্টি সঙ্গে পরিচয় করিয়ে দেবার জন্যেই যেন লেখনী ধারণ করেছিলেন। এখানেও কবি নায়কের অভিসারের বা প্রণয়াভিযানের নিরুদ্দেশযাত্রা বর্ণনার সুযোগে জীব ও উদ্ভিদ জগতের অশ্রুতপূর্ব আশ্চর্য কাহিনী গুনিয়েছেন। কালিদাস তাঁর উদ্দেশ্যের অনুগত করে আকাশের মেঘকে কৃত্রিম উপায়ে চালিত করেছেন। দোনাগাজীও ঝড়ের পর ঝড়ের আশ্রয় নিয়েছেন। কিন্তু ঝড়ো সমুদ্রে তরঙ্গতাড়িত এবং আকাশে ‘সিমুর্গ’ কবলিত সয়ফুলমলুকের পক্ষে সহজ ও স্বাভাবিক হয়েছিল পৃথিবী পরিক্রমা। এ কাব্য পাঠকালে মনে পড়ে যায় যুরোপীয় পর্যটক ও অভিযাত্রীদের কথা। নতুন দেশ আবিষ্কারের নেশায় বেরিয়ে তাঁরাও লাভ করেছিলেন এমনি সব অদ্ভুত অভিজ্ঞতা। যেখানে জ্ঞানের শেষ, সেখানেই কল্পনার ও বিশ্বাসের শুরু; সেকালে মানুষের জ্ঞান ছিল সীমিত, তাই কল্পনা দিয়েই পূর্ণ করতো তাদের জ্ঞানের কোঠা, আর বিশ্বাস তো অজ্ঞতারই সন্তান। তাই সেকালের অনভিজ্ঞ মানুষের জ্ঞান-বিশ্বাস-

^১ বিস্তৃত আলোচনা মং সম্পাদিত ‘দোনাগাজী রচিত সয়ফুলমলুক-বদিউজ্জামাল’ গ্রন্থে দ্রষ্টব্য।

কল্পনার উৎস ও আশ্রয় ছিল সোলায়মানী পুরাণ ও সিকান্দরী জরিব। আবার এ দুটোই যে জিজ্ঞাসু মানুষের কল্পনার প্রসূন, তা বলে দেয়ার অপেক্ষা রাখে না। সেকালে মানুষের জীবন অঞ্চলের সীমায় বদ্ধ থাকত বটে, কিন্তু মনে জানত ও বুদ্ধি দিয়ে বুঝত যে পৃথিবী অনেক বড়। কাজেই লোকালয়ের বাইরে যে জগৎ জ্ঞানে অগোচর, সে-জগতে রয়েছে এমন সব প্রাণী ও উদ্ভিদ যার কেবল কল্পনাই সম্ভব। একেবারেই মিথ্যা কিছু কল্পনা করেনি মানুষ। জীব-উদ্ভিদ জগতে বহু বিচিত্র, ভয়ঙ্কর ও অদ্ভুত সব জীব ও উদ্ভিদ তো সত্যি রয়েছে জলে স্থলে সাগরে সাহায্য পরিব্যাপ্ত হয়ে।

সে-যুগের স্বল্পজ্ঞান মানুষের জীবন ছিল ভয়, বিশ্বাস, বিস্ময় ও কল্পনা নির্ভর। তাদের ভৌগোলিক জ্ঞানে ও তাত্ত্বিকবোধে পার্থক্য ছিল সামান্যই। কাজেই দোনাগাজীর কাব্য অদ্ভুত রসান্বিত নয়, সমকালীন জীবন-চেতনারই প্রতিকৃতি মাত্র। আজকের যুগে এ কাব্য আমাদের কাছে অদ্ভুত-অপ্রাকৃত ও অলৌকিক বলে মনে হলেও সেদিন পাঠকের ও শ্রোতার কাছে এ কাব্য ছিল বাস্তব জীবন রসসিক্ত চেতনা জগতের আলোচ্য। কেননা তাদের চেতনায় স্বপ্নের ও কল্পনার, বিশ্বাসের ও বাস্তবের ব্যবধান আজকের মতো এমন প্রকট ছিল না। তাদের বোধে জীবন ছিল নিয়তি নির্দিষ্ট। কাজেই সাধারণ মানুষের সুখ-দুঃখ, রোগ-শোক, ধন-জন, মান-যশ ছিল আল্লাহর হাতে। অতএব তাদের ধারণায় এসব ক্ষেত্রে মানুষের কোন ভূমিকা নেই তারা কেবল নিমিত্ত-অদৃষ্টের হাতে ক্রীড়নক মাত্র। শিশুর জীবনের এই নিষ্ক্রিয়তা তাদের মনোজগতে ঐশ্বর্যবান দুঃসাহসিক নায়ক সৃষ্টির সহায়ক হয়েছিল, জীবনের বৈষয়িক ভাবনামুক্ত রাজকুমারই তাদের প্রতিভা ও প্রতিনিধি— তাদের বাঞ্ছা রাজপুত্রের মাধ্যমেই সিদ্ধি ও অভিব্যক্তি যুঁজেছে।

সুন্দর ও কদাকার, শান্ত ও হিংস্র, আশ্চর্য ও বিভীষিকাময় স্থলচর, জলচর ও খেচর প্রাণীর বিস্তৃত বর্ণনায় কবির উৎসাহ অশেষ। তরুলতায় আর ফুলফলের বর্ণনায়ও কবির অবহেলা ছিল না। নিসর্গপ্রকৃতির ও প্রাণিজগতের প্রতি কবির এই আকর্ষণ, এই মানসপ্রবণতা ও সাফল্য কবিকে করেছে বিশিষ্ট, কাব্যকে দিয়েছে অনন্যতা। নাতিস্থূল রুচি ও অপরিণত মনীষাসম্পন্ন পাঠকের কাছে কাব্যের আবেদন আজো অশেষ। এ যুগেও উৎকৃষ্ট শিশুপাঠ্য হিসেবে এর অনেক অংশই পাবে বিশেষ কদর।

রোমান্টিক কল্পনার এমন অবাধ বিস্তার মধ্যযুগেও ছিল বিরলতায় দুর্লভ। এ কাব্যে রস আছে, রস-বৈচিত্র্যও আছে, নেই কেবল কাব্যোক্ত নর-নারীর চারিদিকে রঙভেদ। ভালো যারা তারা অতি ভালো, মন্দ যারা তারা নিরেট মন্দ। অবশ্য আত্মার ও আত্মপ্রাণের গরজে ভালোরাও ছলচাতুরীর আশ্রয় নেয়। এ কাব্যে যারা মন্দ তারা কেউ পুরো মানুষ নয়। এদের কেউ কুকুরমুখো, কেউ শুকরমুখো, আবার কেউ বা বানরমুখো নিগ্রো এবং সবাই আরণ্যজন-জঙ্গলী বা জঙ্গী। তবু এদের মধ্যেও দেখতে পাই হৃদয়বান দৈত্য, সঙ্গীতরসিক জঙ্গী, রূপমুগ্ধা নারী যারা মানুষথেকো হয়েও হৃদয়ের সুকোমল বৃত্তির প্রভাব স্বীকার করে। বানর হয়েও সংস্কৃতিবান কিংবা দানব হয়েও শত্রুর গুণমুগ্ধ, সুবিশেষক, শ্রীতিপরায়ণ ও উদার। সবাই স্বধর্মনিষ্ঠ এবং নীতিবোধও তাদের তীক্ষ্ণ ও প্রবল, এমনকি যে-দানব লম্পট তারও। তবু কাব্যোক্ত পাত্র-পাত্রীদের বহিজীবনে বৈচিত্র্য আছে, মনোজগতে কিন্তু তেমন কোন বর্ণালি বিকাশ নেই।

উৎকর্ষ অকুতোভয় নায়কের সম্পর্কেই এসেছে অন্য পাত্র-পাত্রীরা, তার জীবনেই এসেছে বাধাবিপত্তি ও প্রেম-বিরহ-মিলন, তাকে জড়িয়েই কবি বর্ণনা করেছেন সব ঘটনা দৃশ্য ও জীব-উদ্ভিদের কাহিনী, প্রকাশ করেছেন সব বক্তব্য। তাই কোন বর্ণনাই অসঙ্গত ও অপ্রাসঙ্গিক মনে হয় না। তবু কবির বর্ণনায় সর্বত্র অতিশয়তা লক্ষণীয়। তাঁর হাতে কাহিনী বিস্তৃতি পেয়েছে। কবি কথক, বাক-পটু ও আবেগপ্রবণ। সংযত বর্ণনার সৌন্দর্য-বুদ্ধি তাতে অনুপস্থিত। বাক-জাল বিস্তারের আগ্রহই তাঁর বিশেষ প্রবল। এক্ষেত্রে মালে মুহম্মদ সংযতবাক এবং আলাউল মধ্যপন্থার অনুসারী। ফলে দোনাগাজীর কাব্যই বাঙলার সয়ফুলমুলুক-বদিউজ্জামাল' উপাখ্যানের বৃহত্তর গ্রন্থ।

দোনাগাজী চৌধুরীর দেখবার দৃষ্টি, ভাববার মতো হৃদয় ছিল। তাই তাঁর সমাজের আচার-আচরণের রীতিনীতির ও উৎসব-পার্বণের নিখুঁত ও বাস্তব চিত্র অঙ্কিত করতে পেরেছেন তিনি। অবশ্য রাজা-বাদশার ব্যাপার বলে তা অনেক ক্ষেত্রেই আদর্শায়িত। কিন্তু তবু বাস্তবের ছোঁয়ামুক্ত নয়। তা ছাড়া আকর্ষণীয় করে বলার কায়দাও ছিল তাঁর আয়ত্তে। তাঁর বাকভঙ্গির সঙ্গে যুক্ত হয়েছে তাঁর বৈদম্ব্যের প্রভা ও রসিক মন। আর বুদ্ধিদীপ্ত উক্তির আন্তবাক্যের সুউক্তির ও উপমাদির সুপ্রয়োগে ও সুবিন্যাসে তাঁর কাব্য উজ্জ্বল। কবিদের দ্যুতিও সুলভ। সবটা মিলে একটা স্নিগ্ধ সুধমায় এ কাব্য শ্রীতিপদ।

১. দোনাগাজী চৌধুরী

কবি পরিচিতি : সাহিত্যবিশারদ সংগৃহীত দোনাগাজীর সয়ফুলমুলুক-বদিউজ্জামাল পুথির একমাত্র ও প্রাচীনতম পাণ্ডুলিপিতে 'প্রায়ঃসংগৃহীত' বছর আগের] দোনাগাজী চৌধুরীর তিনটে ভণিতা পাওয়া যায় :

১. দোনাগাজী চৌধুরী দোল্লাই নামে দেশ/রচিল বিরহ পুথি চিন্তের আবেশ। তাঃ বিঃ ৫২৪ পৃঃ ৫৮
২. কহে দোনাগাজী শুন দুঃখের কাহিনী /এ হৃদএ জলএ অতি বিরহ আশুনি। ঐ পৃঃ ৯০
৩. কহে দোনাগাজী দুঃখ ধীরে ধীরে যাএ/যাইতে নাহিক শ্রুধা ফিরে ফিরে চাহে। ঐ পৃঃ ১০০

আর অধ্যাপক আলী আহমদ-সংগৃহীত ও বাঙলা একাডেমীতে রক্ষিত দুটো পুথিতে [২৩০ এবং ৪৬২ সংখ্যক] একই প্রসঙ্গে একটি ভণিতা মেলে। যথা- ১. কহে শ্রী দোনাগাজী হিমালের দৃষ্টে/ভোজন করিতে যাএ গজ লৈয়া পৃষ্ঠে। ২৩০ সং।

২. কহে হীন দোনাগাজী নিয়তি নির্দিষ্টে/ভোজনের কালে পুনি গজ রহে পৃষ্ঠে। ৪৬২

আর সব সংগৃহীত অর্বাচীন পুথিতে রয়েছে এক গায়ন-লিপিকার বিরহিম'-এর ভণিতা। লোকটির বিদ্যা-বুদ্ধি ছিল স্বল্প। তাই তাঁর দেয়া চারটি ভণিতাই ভাবে ভাষায় ছন্দে ত্রুটিপূর্ণ। [বাঙলা একাডেমী পুথি : ২৩০, ২৬২, ৪৫৩, ৪৬৩ দৃষ্টব্য] দোল্লাই দেশ বা পরগনা ছিল আধুনিক কুমিল্লা জেলায়। চাঁদপুর মহকুমার 'সোসাইর দ্বীপ' গাঁয়ে কবির বংশধর আছে বলে জেনেছি। পাণ্ডুলিপির প্রাচীনতার সাক্ষ্য, ভণিতার বিরলতা আর

তুরুকি এরা কি ছিল মিসির ফারসি
রুমী ঘোরা সানী তবে আর যথ দাসী।
রুম শাম এরা কি ফারসি হিন্দুস্তান
ইরান তুরান চীন বঙ্গ খোরা সান।

বিভিন্ন দেশ সমন্ধে এরূপ ভ্রান্তধারণার অভিব্যক্তি প্রাচীনতার দ্যোতক বলে মনে হয়। তাই দোনাগাজীকে আমরা অন্তত সতেরো শতকের কবি বলে অনুমান করি। তাঁর চৌধুরী উপাধি থেকে বোঝা যায় তিনি ধনী-মানী ঘরের সন্তান।

২. আবদুল হাকিম

আবদুল হাকিম বহু গ্রন্থ প্রণেতা। বটতলার ছাপাপুথি সূত্রে জানা যায়, নোয়াখালীর সুধারামে ছিল তাঁর পৈতৃক নিবাস। তাঁর পিতা শাহ আবদুর রাজ্জাকও ছিলেন পীর-দরবেশ এবং স্থানীয়ভাবে প্রখ্যাত। তাই কবি ভগিতায় প্রায়ই নিজেকে শাহ রাজ্জাক-নন্দন আবদুল হাকিম বলে পরিচয় দিয়েছেন। এবং ভগিতায় ঘন ঘন পীর মুহম্মদ শাহাবুদ্দীনের নামও যুক্ত করেছেন। এমনকি পীররের নামে স্বরচিত নসিয়তনামার নাম ‘শাহাবুদ্দীননামা, রেখেছিলেন— ‘শাহাবুদ্দীন মুহম্মদ পীর গুণবান/ রাখিলাম শাহার নামে পুস্তকের নাম।’ [শাহাবুদ্দীননামা, পুথিপরিচিতি পৃঃ ২৭৮।] আবদুল হাকিমের সময়েও শাস্ত্র-সম্পৃক্ত কথা বাঙলায় লেখা দৃশ্যীয় তথা পাপজনক বলে মনে করা হতো। তাই আবদুল হাকিম তাঁর শাহাবুদ্দীননামায় বলেছেন :

এলেম প্রদীপে নাশ ঘর অন্ধকার। ...

আরবি পড়িয়া বুঝ শাস্ত্রের বচন।

যথেক এলম মধ্যে আরবি প্রধাম।

আরবি পড়িতে যদি না পার কদাচিত

ফারসি পড়িয়া বুঝ পুরিধাম হিত।

ফারসি পড়িতে যদি না পার কদাচিত

নিজেদেশী ভাষে শাস্ত্র পড়িতে উচিত।

মূল আরবি পড়ে শাস্ত্রকথা জানা উত্তম, তারপরে স্থান ফারসি ভাষার এবং শাস্ত্রকথার ক্ষেত্রে তারপরে স্থান দেশী ভাষায়। তাই কবি বলেন—

আরবি এলম জান শাস্ত্র মুসলমানি

যথেক এলম মধ্যে আরবি বাখানি।

ফারসি এলম হএ আরবি তনএ

আরবি অনুরূপ ফারসি লিখএ।

হিন্দু (বাঙলা অর্থে) শাস্ত্র পুস্তক যে ফারসির নন্দন

পুস্তকে লিখ এ ফারসির বিবরণ।

এ তিন এলম মধ্যে এক নাহি যার

নিশএ তাহার দীন ঘোর অন্ধকার। (পু. পরিচিতি, পৃঃ ২৭৯)

আরবি কিংবা ফারসি বা বাঙলা যে জানে না তার দীন (ধর্ম) বা দিন (দিবস) ঘোর অন্ধকার। এখানে কবির উক্তি থেকে আরো একটি তথ্যের ইঙ্গিত পাওয়া যাচ্ছে হিন্দুশাস্ত্র পুস্তক যে ফারসির নন্দন'। অর্থাৎ দেশীভাষায় রচিত শাস্ত্র গ্রন্থগুলো সাধারণভাবে ফারসি থেকে অনূদিত।

শাস্ত্রকথা বাঙলায় রচনা করে কবি নিন্দিত হয়েছিলেন, তাই 'নুরনামা' রচনাকালে বিক্ষুব্ধ কবি বলেছেন :

দুনিয়ার পাঠক এক হও! ~ www.amarboi.com ~

(আরবিতে) কিতাব পড়িতে যার নাহিক অভ্যাস

সে সবে কহিল মোতে মন হাবিলাষ...

তে কাজে নিবেদি বাঙ্গলা করিয়া রচন

নিজ পরিশ্রমে তুষ্টি আমি সর্বজন।

আরবি-ফারসি শাস্ত্রে নাই কোন রাগ।

দেশী ভাষা বুঝিতে ললাটে পুরে ভাগ।

আরবি ফারসি হিন্দে নাই দুই মত

যদি বা লিখএ আল্লা-নবীর সিফাত।

যেই দেশে যেই বাক্য কহে নরগণ

সেই বাক্য বুঝে প্রভু আপে নিরঞ্জন।

দেশী ভাষা বিদ্যা যার মনে ন জুয়াএ

নিজ দেশ ত্যাগি কেন বিদেশে ন যা এ।

মাতাপিতাসহ ক্রমে বঙ্গত বসতি-

দেশীভাষা উপদেশ মনে হিত অতি। ...

সর্ববাক্য প্রভু কিবা হিন্দুয়ানি

বঙ্গদেশী বাক্য কিবা যথ ইতি বাণী-

আল্লা-খোদা-গোসাই সকল তান নাম

সর্বগুণে নিরঞ্জন প্রভু গুণধাম।

মারফত-ভেদে যার নাহিক গমন

হিন্দুর (হিন্দুস্তানের/বাঙলা) অক্ষর

হিংসে সে সবে গণ।

যে সবে বঙ্গতে জন্মি হিংসে বঙ্গবাণী

সে সব কাহার জন্য নির্ণয় ন জানি।

নিজ দেশী ভাষাএ করি গ্রন্থ সকল'

আমি সব আগে কর সঙ্কট কুশল।'

কিতাব পুস্তক দোহে নাহি ভিন্ন ভেদ

রচিল পুস্তক অক্ষর হিন্দুয়ানী।^২

শাহ রাজ্জাক-নন্দন আবদুল হাকিম নুরনামা, শাহাবুদ্দিননামা (নসিয়তনামা) সভারমুখতা, চারিমোকামভেদ, দোররেমজলিস প্রভৃতি তত্ত্বগ্রন্থ এবং ইউসুফ-জোলেখা ও লালমোতি-সয়ফুলমূলক নামের দু'খানা প্রণয়োপাখ্যান রচনা করেন। ভণিতা-

১. শাহাবুদ্দিন মহম্মদ পীর-গণবান

২. সেই পদ বিনা অন্য নাহি মোর ত্রাণ

আবদুল হাকিম শাহ রাজ্জাকনন্দন।

রচিলেক জলেখার বিরহ বেদন।

৩. শাহাবুদ্দিন মহম্মদ চরণ বন্দিয়া।

আবদুল হাকিম শাহ পাঁচালী রচিয়া। - লালমোতি

শাহ মুহম্মদ সগীর প্রসঙ্গে আমরা ইউসুফ-জোলেখা কাহিনীর উৎস ও কাহিনীর কাঠামো আর প্রতিপাদ্য বিষয় আলোচনা করছি। সগীরের গ্রন্থে 'ইবন আমীন ও চন্দ্রপ্রভা' উপাখ্যান যুক্ত রয়েছে। আবদুল হাকিমের কিংবা শায়ের ফকির গরীবউল্লাহর অথবা উনিশ, বিশ শতকের শায়ের ফকির মুহম্মদ, গোলাম সাফাতুল্লাহ ও সাদেক আলীর কাব্যে ওই উপাখ্যান নেই। ফিরদৌসীর নামে চালু আদি ইউসুফ-জোলেখা ছাড়া আবদুর রহমান (১৪১১-৯২) জামীর ইউসুফ জোলেখাই (১৪৮৩ খ্রীঃ) মুসলিম জগতে বিশেষ জনপ্রিয়তা লাভ করে, যদিও ফিরদৌসীর পূর্বেও অজ্ঞাতনামা দুই কবির অপ্রাপ্ত দুখানি ইউসুফ জোলেখা কিসসা-কাব্য ছিল

^১ পুথির পাঠ : নিজ দেশীভাষা করি গ্রন্থে সকল। পুথি পরিচিতি, পৃঃ ২৬১

^২ অধ্যাপক আলি আহমদ তাঁর সম্পাদিত নুরনামায় উদ্ধৃত শেষ আট চরণ পুথিতে মেলে না- এ যুক্তিতে এ অংশটি প্রকৃষ্ট মনে করেছেন। কিন্তু শাহাবুদ্দিননামার ও নুরনামার বক্তব্য স্মরণে রাখলে এ সন্দেহের অবকাশ থাকে না। তবে অশ্লীল বলে রুচিবান কিংবা বাঙলা ভাষার প্রতি অনুরাগহীন লিপিকার এ অংশ বাদ দিয়েছেন বলেই আমার ধারণা।

বলে ইরানে জনশ্রুতি রয়েছে। পরেও অনেকে গদ্যে ও পদ্যে এ কাহিনী রচনা করেছেন। আবদুল হাকিম জামীর কাব্যই অনুসরণ করেছেন—

মোল্লা জামীর বাক্য শিরেত লইয়া
আবদুল হাকিমে কহে বাঙ্গলা রচিয়া।
ইউসুফ-জোলেখা কিসসা হৈল সমাণ্ড
ফারসি কিতাব ভাঙ্গি বাঙ্গলা পদস্থ। [পু. পরিচিতি, পৃঃ ১৯]

কাজেই শাহ মুহম্মদ সগীর মৌলিকতায়, সৃষ্টিশীলতায় ও কবিত্বে প্রথম ও প্রধান। আবদুল হাকিম জামীর কাব্যের শ্রেষ্ঠ ও সৃষ্ঠ অনুবাদক নন। তবে তাঁর কাব্যে কবিত্বের দ্যুতি দুর্লভ নয়। আর গরীবুল্লাহর কাব্যে নবীর মহিমা ও চরিত্র খর্ব হয়েছে। যথাস্থানে শায়ের কবির গরীবুল্লাহর কাব্য আলোচিত হবে। আবদুল হাকিমের কাব্যে আজিজ মিসির আর জোলেখার প্রেম হচ্ছে :

কুমুদের প্রেম যেন চন্দ্রের সঙ্গতি	গ্রাসিবারে শশধর উঠে প্রতিনিতি।
জলমধ্যে কুমুদ গগনে নিশাপতি।	তেহেন আজিজ প্রেমি জোলেখার উপর
ভূমিপৃষ্ঠে কমলগগনে দিবাকর	ধরিতে না পারে চন্দ্র আপনার কর।
কমলের প্রেম যেন সূর্যের উপর।	একস্থানে আজিজের জোলেখার পিরীত
চকোরের প্রেম যেন চন্দ্রের সহিত	জোলেখা আকাম যেন আজিজ ভূমিত।

এ অংশটি প্রখ্যাত বৈষ্ণবপদ : ভানু কমল বাল্লী-সেহো নহে হেন

হিমে কমল মরে ভানু মুখে রহে
দুঁহ কোড়ে দুঁহ কাঁড়ে বিচ্ছেদ ভাবিয়া ...

ইত্যাদি সহজেই স্মরণ করিয়ে দেয়।

সুবচন আর তন্তুকথাও রয়েছে অনেক, যেমন

১. অকাজে পুষ্পের রূপ মনেত উল্লাস
প্রভাতে বিকাশে পুষ্প সন্ধ্যাতে বিনাশ।
২. তৃষ্ণাকূলে উচিত বিলম্বে জলপান।

লালমোতি-সয়ফুলমলুক

আবদুল হাকিমের অপর প্রণয়োপাখ্যান হচ্ছে লালমোতি-সয়ফুলমলুক। এটিও কোন ফারসি উপাখ্যানের আদলে ও অনুসরণে রচিত।

শুন কহি গুণিগণ কেতাবের লিখন
সত্য জানহ নিশ্চয়।

গল্পের কাঠামো এই : নবী জুলকর্ণ সিকান্দর বাদশাহর পুত্র সয়ফুলমলুক এক পর্যটকের মুখে পশ্চিম দেশের তথা এমরান রাজকন্যার রূপ লাভগ্যের কথা শুনে বিবাগী হয়ে তার সন্ধানে ঘর ছাড়ে। তার সহায় জলদেবতা খাওজা খিজির এবং স্থলদেবতা ইলিয়াস। সমুদ্র উত্তরণে সহায় হয় সর্পরূপী ফিরিত্তা। এমরান রাজ নির্দেশিত ছয়টি পরীক্ষায় যথা ১. সহস্র মণ ওজনের কুঠারের এক কোপে পর্বত আকারের কাষ্ঠ দুখও করা ২. পৃথিবীব্যাপী ছিটানো শস্য কুড়িয়ে দুনিয়ার পাঠক এক হও! ~ www.amarboi.com ~

আবার মেপে দেয়া, ৩. হাজার মণের অনু রেঁধে একা ভোজন করা ৪. মানুষকে কো ঘোড়া বশ করে তার পিঠে চড়া, ৫. পর্বতপ্রমাণ বিপুলকায় হিংস্র গাভীর দুধ দোহন করে পান করা ৬. সহস্রগজ দীর্ঘ ও গভীর কূপ ধন দিয়ে পূর্ণ করা- উত্তীর্ণ হয়ে এমরানকন্যা লালমোতিকে লাভ করে সয়ফুলমলুক এবং এ অভিযাত্রায় রাজকন্যা অপহারী চণ্ডালকে ও সর্পরাজকে সংহার করে রাখবানু নামে কুপিশহরের আমীরজাদীকেও সে পত্নীরূপে গ্রহণ করে স্বদেশে ফিরে দুই রানী নিয়ে সুখে জীবন কাটায় 'লালমতি রাখবানু মানবদুহিতা'। দুই পত্নীর দুটো সন্তানও হলো। লালমোতির সন্তানের নাম জেবলমলুক আর রাখবানুর পুত্রের নাম খুইল কামিলমলুক। পিতামহ সিকান্দর ও পিতামহী রৌসনক (দারাকন্যা) পৌত্রদের পেয়ে আনন্দিত। এ কাব্যের সমাপ্তি ভাগে সয়ফুলমলুকের শ্বশুর-শাওভীগণকে কন্যাদর্শনার্থে স্বরাজ্যে নিমন্ত্রণ করে আনার বর্ণনা রয়েছে। সে-সূত্রে কবি নানা রূপকথার জীনপরীর বিভিন্ন রাজ্যের রাজা-রানীর ও নায়ক-নায়িকার নামোল্লেখ করেছেন নিমন্ত্রণ অতিথি হিসেবে। রাখবানুর ভাই মালিকজাদা শাহপরী, রোকামরাজ্যের ঈশ্বর-এর কন্যা কয়রাপরী, লালপরী, নীলপরী, সবুজপরী, গোলেস্তা এরামের বাদশাহ শাহবালপত্নী রওশনজামাল, সুফিয়ানপুত্র সয়ফুলমলুক ও তার পত্নী শাহবালকন্যা বদিউজ্জামাল, আর তাদের কন্যা মেহেরজামাল, সার্কিস্তানের আসমাপরী, চিত্র-মদ্রাবতী, মৃগমালা, এমরানপত্নী শশিকলা, কুপিরাজ্যের আমীরপত্নী চন্দ্রভান, এলাহাজাপরী-নলিনীকুমার, শ্বেতপরী-রুদ্রদেব, মৃগমালা-চন্দ্রভান প্রভৃতি প্রেমিক-প্রেমিকা। বলা বাহুল্য এসব নর-পরী রাজরানীদের একে অপরের আত্মীয়-কুটুম্ব। লালমোতীপুত্র জেবলমলুক যথাকালে শামারোখের প্রণয়ী হয়।

আমাদের রূপকথার ও প্রয়োগাখ্যানের একটা জগৎ গড়ে উঠেছিল ইরানের বাইরে সুদূর বাঙলাদেশে ফারসি ভাষাসাহিত্যের প্রভাবে। এ সাহিত্যেই মুখ্যত দেশজ মুসলিমদের মিশ্র সংস্কৃতির জগৎ নির্মাণের সহায়ক হয়েছিল। এ সংস্কৃতিজগৎ তৈরির অপর উপকরণ হয়েছে দেশজ শাস্ত্রিক, সামাজিক, পৌরাণিক ঐতিহ্য, এবং সংস্কৃত ভাষা ও সাহিত্যপ্রসূত দৈশিক ছন্দবিজ্ঞান, রাগতাল, অলঙ্কারশাস্ত্র ও সাহিত্যতত্ত্ব। তাই আব্দুল হাকিম অন্যান্য মুসলিম কবিদের মতো যে কেবল দেবতা, যক্ষ, বাসুকী, গঙ্গা, ভাগীরথী, ব্রাহ্মণ, গণক, পুরাণ, গন্ধর্ব, কিন্নরকে নানা প্রয়োজনে স্মরণ করেছেন তা নয়, দেশী দেব-মানবের আদর্শ দাম্পত্য ও প্রণয়কথাও স্মরণ করেছেন, সে সঙ্গে ফারসি সাহিত্যেরও :

জিনিলেক নববালা চন্দ্রের রোহিণী	জিনিল হোসেনবানু বাহরামের নারী
জিনিলেক গঙ্গাগৌরী হরের রমণী।	সুবজাবাগে পরীজাত নৃপতি কুমারী।
জিনিল লীলায় রূপ দ্রুপদকুমারী	জিনিলেক দশানন নারী মন্দোদরী
জিনিল পরম রূপে উষা সুচরিতা	হইল পরম রূপে জিনি শাহাপরী
জিনিল চন্দ্রানী ময়না শোরের বনিতা।	রূপবতী প্রভাবতী জিনিল লীলায়।
জিনিল লীলায় রূপে শচীরম্ভাবতী	জিনিলেক দময়ন্তী পরম রূপসী
জিনিল মোহনরূপে মদনের রতি।	নৌসাদের প্রাণধনি মুখ পূর্ণশশী।


এভাবে যুরোপপ্রভাবিত আধুনিক বাঙলা সাহিত্যের মতোই মধ্যযুগের বাঙলা সাহিত্য ফারসি সাহিত্যের ও ইরানি সংস্কৃতির প্রভাবে ঋদ্ধ হয়েছিল আর সমৃদ্ধ হয়েছিল বাঙালীর তথা ভারতবাসীর মন ও মনন। উদ্ধৃতাংশ থেকে কবি আব্দুল হাকিমের সাহিত্যক্ষেত্রে বিচরণের পরিধিও অনুমান করা যায়।

পাপভায়ে শাস্ত্রের বাঙলাভাষায় অনুবাদে আপত্তি সতেরো শতকের প্রথমার্ধেও অল্পবিস্তর ছিল। আব্দুল হাকিমও শাস্ত্রকথা অনুবাদ করে নিশ্চিত হয়েছেন, বিক্ষুব্ধ কবির উচ্চারিত চরম গালিই তার সাক্ষ্য। ষোল শতকের শেষার্ধ্বে থেকেই ফারসি সাহিত্যের বহুল চর্চা শুরু হয়, আব্দুল হাকিমের ফারসি সাহিত্যের সঙ্গে পরিচয় ছিল নিবিড়, প্রমাণ তাঁর রচিত কাব্য। ষোল শতকের শেষার্ধ্বে থেকেই পর্তুগীজরা প্রবল হয়। পর্তুগীজদের আনীত বলে স্বীকৃত ‘আনারস’ ফলের উল্লেখ (গোলাব জামন আর আনারস ফল) রয়েছে লালমোতি-সয়ফুলমলুক কাব্যে। ষোল শতকের শেষপাদ থেকেই মুসলিম শাস্ত্রগ্রন্থের- ধর্মকথার অনুবাদ আর যোগ-সূফীতত্ত্ব নিয়ে গ্রন্থ রচনার শুরু। আব্দুল হাকিম রচিত শাস্ত্র যোগ ও সূফীতত্ত্ব গ্রন্থ রয়েছে, এবং ভাষার সাধারণ লক্ষণ দেখে মনে হয় হাকিম সতেরো শতকের প্রথম পাদের কবি।

আব্দুল হাকিমের অন্যান্য কাব্য যথাস্থানে আলোচিত হয়েছে।

৩. শরীফ শাহ

লালমোতি-বা লালমতী-সয়ফুলমলুক উপাখ্যান আব্দুল হাকিম ছাড়া আরো দুজন কবি রচনা করেছেন। একজনের নাম শরীফ শাহ এবং অন্যজন গিয়াস খান। এঁরা চট্টগ্রামবাসী ছিলেন। শরীফ শাহ নবীবংশ (রচনারসময়কাল ১৫৮৪/৮৬ খ্রীঃ) সূচয়িতা পীর মীর সৈয়দ সুলতানের পৌত্র।



মোটামুটি হিসেবে সৈয়দ সুলতানের পৌত্রকে আমরা সতেরো শতকের শেষার্ধ্বে পাই। সৈয়দ সুলতানের পৌত্র নুরনামার রচক মীর মুহম্মদ সফী আর দৌহিত্র মুজাফফরও কবি ছিলেন। এঁরা ছিলেন বংশগত পেশায় পীর।

শরীফ শাহর পীর ছিলেন এক হামিদ :

চরণে হামিদ পীর শরীফের শিরে ধীর।^২

শরীফ শাহর পিতৃপরিচয়ও রয়েছে কাব্যে :

শাহ সুলতান সুত সর্বগুণে অলঙ্কৃত (?)
 তানপদে করিয়া ভকতি
 কাজী মনসুর মানি তাহান তনয় জানি
 শরফী যাহার (?) ভবতি।

একটি ভণিতা— মিনতি শরীফ শাহ বিনয় বচন
 শোকে সিকান্দার শাহ করএ কান্দন।

^১ মৎসম্পাদিত সৈয়দ সুলতান : তাঁর গ্রন্থাবলী ও তাঁর যুগ পৃঃ ৫৪।

^২ পৃথি পরিচিতি

শরীফ বলেছেন একদিন বন্ধুদের আড্ডায় 'সয়ফুলমলুক কিসসা পড়ে একজন, কিতাবের মধ্যে এ পূর্ব কথন' দেখে আর শুনে কবি শরীফ শাহ স্বেচ্ছায় এ উপাখ্যান বাঙলায় রচনার বা অনুবাদের দায়িত্ব গ্রহণ করলেন। তার ভাষায় :

সয়ফুলমলুক কিসসা পড়ে একজন	এ মহামহিমা সব মশরিক পতি
কিতাবের দরমেয়ান দেখি অপূর্ব কথন।	ফকির শরীফ ছিল সে সব সংহতি।
সেই মহাশয় যদি কিতাবে পড়িল	কহেস্ত শরীফ হীনে মনেত ভাবিয়া।
যথ দোস্তগণে শুনি হবষিত হৈল।	এ সকল কথা আমি দিমু প্রচারিয়া।
মর্মলোকে এই সব রসবাণী শুনি	মুর্শীদ চরণ শিরে করিয়া বন্দন
প্রচার করিতে যুক্ত এ সব কাহিনী।	লালমতী কিসসা লিখি করিয়া যতন।

আব্দুল হাকিমের উপাখ্যানের সঙ্গে শরীফ শাহর কাব্যের কাহিনীগত ঐক্য রয়েছে, পার্থক্য যা আছে তা রুচি ও শক্তিগত।

আব্দুল করিম সাহিত্যবিশারদ সংগৃহীত শরীফ শাহর কাব্যের তিনখানা পাণ্ডুলিপি একখানায় মাত্র ৩-৯৪ পত্র বিদ্যমান। অন্য দুটোর একটিতে সাতটি এবং অপরটিতে নয়টি পত্র রয়েছে।^১

৪. গেয়াস খান

ইনি রাধাকৃষ্ণপদ, হামজারবিজয় নামের জঙ্গনামা এবং লালমোতি সয়ফুলমলুক উপাখ্যানের রচয়িতা এবং হামজারবিজয় কাব্যে এর মুখ্যনা পরিচয় রয়েছে। কবির পিতা-দরিয়া খান রাজপাত্র তথা পদস্থ রাজকর্মচারী ছিলেন। কবির পিতামহের নাম বুধা খান, আর পীরের নাম বুরহানুদ্দিন। জঙ্গনামা অধ্যায়ের আরম্ভে কিছু তথ্য দ্রষ্টব্য।

৫. মুহম্মদ আকবর

'জেবলমলুক-শামারোখ' উপাখ্যানের সব পুথি এখনকার কুমিল্লা জেলা থেকে সংগৃহীত। তাই মুহম্মদ আকবরকে কুমিল্লা অঞ্চলের লোক বলে অনুমান করা হয়। নায়িকা শামারোখের রূপবর্ণন প্রসঙ্গে কবি আবেগভরে বলেছেন যে শব্দ সম্পদের অভাবে সে রূপের কথা—

কহন না যায় দেখি বাঙ্গলার ভাষে।

ফারসি হইত যদি কহিত বাখানি

কলাঅন্দ বয়সেতে রচিল কাহিনী।

[পুথি পরিচিতি, পৃঃ ১৬০ক ১৩৬]

'কলান্দ'কে চাঁদের ষোলকলা ধরলে ষোল আর নৃত্যগীতাঙ্গি চৌষট্ঠিকলা ধরলে চৌষট্টি বছর বয়সে কবি 'জেবলমলুক শামারোখ' নামে প্রণয়োপাখ্যান রচনা করেন। সেখানে ষোল বছর বয়সে দেশী বা বিদেশী ভাষার শিক্ষা সম্পূর্ণ করা স্বাভাবিক ছিল না। তাছাড়া এ কাব্যে বাঙলা ভাষণের নিদর্শন নেই। যুদ্ধ ও রূপ বর্ণনায় পাকা হাতের ছাপ আছে। কাব্যের প্রারম্ভে

^১ পুথি পরিচিতি পৃঃ ৪৯৯।

^২ ঐ পৃঃ ৪৯৬-৫০০

জ্ঞতি-প্রশস্তি অংশে প্রজ্ঞাবান প্রবীণের উদার মনের পরিচয় রয়েছে। ক্রটি যা-ই থাক প্রশস্তিটি গোটা বাঙলা সাহিত্যেই অনন্য :

বিনএ করিয়া বন্দি ফিরিত্তার পদ	সুন্নিকুলে ফিরিত্তা যে হিন্দুতে নারদ ।
তখত সিংহাসন বন্দি আদ্যার দরবারে	হিন্দুকুলে ঈশ্বর হেন জগতে প্রচারে ।
পয়গাম্বর সকল বন্দি করিয়া ডকতি	হিন্দুকুলে দেবতা হেন হৈল প্রকৃতি
হযরত আদম বন্দি জগতের বাপ	হিন্দুকুলে অনাদির প্রচারে প্রতাপ ।
মা হওয়া বন্দম জগত জননী	হিন্দুকুলে কালীনাম প্রচারে মোহিনী ।
হজরত রসুল বন্দি প্রভুর নিজ সখা	হিন্দুকুলে অবতারি চৈতন্যরূপে দেখা ।
খোয়াজ খিজির বন্দম জলেতে বসতি	হিন্দুকুলে বাসুদেব শূন্যে যে প্রকৃতি ।
আসকা সকল বন্দি নবীর সভাএ	হিন্দুকুলে দোয়াদশ গোপাল ধেয়াএ ।
আউলিয়া আখিয়া বন্দি রক্বানি কোরান	হিন্দুকুলে মুনিভাব আছএ পুরাণ ।
পীর মুর্শিদ বন্দম ওস্তাদ চরণ	হিন্দুকুলে গুরু যেন করএ পূজন ।

[সাহিত্যবিশারদ প্রদত্ত ঢাকা বিশ্ববিদ্যালয়ের ক্রঃ ১৩৮। পুথি সং ৫০৮]

এ বন্দনা 'নিরঞ্জনের রুম্মাবা কলিমাজালাল আর গায়েনের দিখন্দনা' স্মরণ করিয়ে দেয়। এটি ষোল বছরের কিশোরের রচনা হতে পারে না। এ সব তথ্যের ও যুক্তির ভিত্তিতে আমরা এ কাব্য কবির চৌষত্টি বছর বয়সের রচনা বলে নিঃসংশয় বিশ্বাস করি। গ্রন্থশেষে কবি আবজাদ রীতিতে রচনাকাল নির্দেশ করেছেন বলে আবদুল করিম সাহিত্যবিশারদ ও ডক্টর মুহম্মদ এনামুল হক বিশ্বাস করেন—

লিখন সমাও হৈল কাকে ডিম্ব দিল
আরবা অনাসের মধ্যে ভাস্কর ভাসিল।

আরবা অনাসের (অরবতুউনাবীর) মধ্যে ১০৮৪ সংখ্যা মেলে। এটি হিজরী সন হলে ১৬৭৩ খ্রীস্টাব্দ আর ত্রিপুরাব্দ হলেও হয় ১৬৭৪ খ্রীস্টাব্দ। অতএব ১৬৭৩ খ্রীস্টাব্দে এ কাব্য রচিত এবং কবির জন্ম সন ১৬০৯ খ্রীস্টাব্দ। কবির নাম মুহম্মদ আকবর। বটতলার প্রকাশক সৈয়দ মোহাম্মদ আকবর আলি বানিয়েছেন। বইয়ে ভণিতায় সৈয়দ বা আলি মেলে না। যেমন মোহাম্মদ আকবরে কহে /মোহাম্মদ আকবরে কহে গুনহ রাজন। যার যে নিবন্ধ হয়/প্রভুএ মিলাএ তারে আনি।' মুদ্রিত পুথির একস্থানে এরূপ পাঠ মেলে :

মোহাম্মদ কাজেম আলী আগলিয়া আল্লার
তাহার চরণে মোর ভকতি অশার।
অধীন আকবরে কহে পাঞ্চালির ছন্দ।
অবশ্য পূরিবে যার যেমন নিবন্ধ।

মোহাম্মদ কাজেম আলী কোন স্থানীয় দরবেশ— কবির পীর নন। ভণিতায় বৈষ্ণব পদাবলীর প্রভাব রয়েছে :

১. অধীন আকবরে কহে থাক দৈর্ঘ ধরি।
২. অধীন আকবরে কহে স্মর কন্যা বিধি।
৩. অধীন আকবরে কহে মন শান্ত কর।

° সোলেমানী সুলত পুস্তকালয়, ঢাকা, পৃঃ ৯৮।

তার উপাখ্যান কানে শোনা কিংবা বইয়ে পড়া কোন ফারসি উপাখ্যানের আদলে পরিকল্পিত। তাই চামরী দেশ কিংবা কর্ণাট রাজ্যের নাম থাকলেও গল্পের পাত্রপাত্রী দেও-দৈত্য-গন্ধর্ব, পাখি-সাপ-যক্ষ-মোষ-সিংহ আর জীনপরী-মানুষ। স্থানও পৃথিবী আর তার থেকে বাষ্পি বছরের পথ হেমপুর ও কন্দিল-এমরান নামের যক্ষ পরী-দৈত্য রাজ্য। এতে যুদ্ধ আছে, তেলেসমাৎ আছে, ষড়যন্ত্র আছে, তেমনি আছে পাখির কিংবা দৈত্যের সহায়তা। এখানে রূপই প্রেমের ভিত্তি, তাই অনুরাগ জন্মে রূপবান-রূপবতী নারী-পুরুষের সাক্ষাৎমাত্রই। দেশ-কাল নিরপেক্ষ রূপকথার তথা প্রেমকথার রোম্যান্সের আধার হচ্ছে এ ধরনের সব উপাখ্যান। কাব্যের কাহিনীসার এই :

চামরীদেশের প্রতাপে প্রবল রাজা সুলতান মুহম্মদ কর্ণাটরাজকন্যা রতিকলাকে যুদ্ধে পরাজিত করে বিয়ে করে। তাদের সন্তান কাব্যের নায়ক জেবলমুলুক। জন্মের পরেই জ্যোতিষী শাহভান কুমারের ভবিষ্যৎ গণনা করে বলেছিল :

তিন রাজকন্যা সে করিবে পরিণয়	তিন কন্যা সঙ্গে করি চলিয়া আসিতে
যৌবন সময় শিশু পাইবে বহু দুঃখ-	শত্রুরে বিষ দিয়া বধিবেক পথে।
শিকার করিতে যাইবে অতি ঘোর বন	গন্ধর্ব কন্যারে শিশু করিবেক বিয়া
যক্ষকন্যা সঙ্গে তার হবে দরশন।	দ্বাদশ বৎসরে শিশু বিদেশ গমন
কন্যা উদ্দেশিয়া যাই পাইবে লাঞ্ছনা,	পথেতে খাইয়া বিষ অবশ্য মরণ।
পরেতে পাইবে আর কন্যা দুইজনা।	

জেবলমুলুকের প্রাণের বন্ধু আছে উজ্জ্বলপুত্র ফরোখপাল। বারো বছর বয়সেই যক্ষকন্যা নায়িকা শামারোখের সঙ্গে বনে সরোবরতীরে সাক্ষাৎ ঘটে জেবলমুলুকের। শামারোখ ছিল কন্দিল এমরানরাজ কমলকেশরের কন্যা। তাঁর মাতামহ হচ্ছে পৃথিবী থেকে বাষ্পি বছরের পথ হেমপুরের রাজা বলবন্ত কেশর। জন্মের পরেই শিশু শামারোখের রূপে মুগ্ধ দৈত্যরাজ গর্দফোস তার সঙ্গে বিয়ের কথা পাকা করে রাখে। জেবল-শামারোখ প্রথম দেখাতেই পরস্পর প্রেমে অভিভূত। কাজেই বিদায়ের আগেই শামারোখ আঁচলে জেবলের চিত্র এবং জেবল তার পাগড়ীর প্রান্তে শামারোখের চিত্র অঙ্কিত করে রাখল। পরে কন্যার সন্ধানে যাত্রা করে শিরিলব ও সনুবর নামের আরো দুই অনুরাগিণী রাজকন্যাকে বিয়ে করে জেবলমুলুক। বিষক্রিয়া নষ্ট করার দারু জানত জ্যোতিষী শাহভান। বন থেকে সে এক শিকড় এনে অস্ত্রোপচার করে কুমারের উরুতে রাখল। সেই শিকড়ের প্রভাবে বিষ পানের চল্লিশ দিন পরেও ধড়ে প্রাণ থাকে আর শিকড় পিষে রসপান করলে দেহ হয় নির্বিষ। দুবার এভাবে বেঁচে যায় জেবলমুলুক। এমনি করে প্রথাসিদ্ধ উপায়ে কন্যার উদ্দেশ্যে নিরুদ্দেশ যাত্রাপথে বাঘ, সিংহ, সাপ, দেও, রাক্ষস আর তেলেসমাতি প্রভৃতির কবলে পড়ে নানা দুঃখ পেয়ে হেমপুরে শামারোখের সঙ্গে মালিনীর মাধ্যমে মিলন ও বিয়ে হল, আর তার তিন পত্নী নিয়ে বন্ধু ফরোখপালসহ বাড়ি ফিরলো জেবলমুলুক। সঙ্গী ফরোখপালও পথে পিয়ারেখাকে বিয়ে করে সুখী হয়।

এ কাব্যে রূপবর্ণনায় কবির উৎসাহ, যত্ন ও নৈপুণ্য পাঠকের দৃষ্টি এড়ায় না। রাশি তিথি নক্ষত্র লগ্ন, বর-কনের সাজ, উৎসবের নানা আচার যুদ্ধাশ্রের ও অলঙ্কারের বর্ণনায় কবির অবলম্বন ছিল দৈনিক ঐতিহ্য ও আচার। দীপ, ধান, দুর্বা, চন্দন, উলুধ্বনি, দেশী অলঙ্কার, প্রাচীন যুদ্ধাস্ত্র প্রভৃতি তার সাক্ষ্য।

‘জেবলমুলুক শামারোখ’ উপাখ্যানের অপর কবি মুহম্মদ রফিউদ্দীনের জন্ম, কুমিল্লা জেলার নারানএগ গ্রামে। তাঁর পিতার নাম আশরাফ। তাঁর সম্বন্ধে যথাস্থানে আলোচিত হয়েছে।

৬. মুকুল ওর্ফে মঙ্গল

কবি মুকুলের কাব্যের নাম ‘শাহজালাল মধুমাল্য’। এটি একটি প্রণয়োপাখ্যান হলেও মঙ্গলপাঁচালীর আদলে পরিকল্পিত। এটি মূলত দেহতত্ত্ব ও সুফীতত্ত্ব সম্বন্ধীয় গ্রন্থ। মঙ্গলকাব্যের নায়কের মতো এ গ্রন্থের নায়কবিশেষ উদ্দেশ্যে মর্ত্যে প্রেরিত। নায়ক জালালের সহায় ইন হজরতমীর নামে এক সিদ্ধ মহাপুরুষ।

কাব্যে রচনাকাল রয়েছে :

এসব বৃত্তান্ত কথা অনেক আছিল
পুস্তক বিশাল বাড়এ তাহা না লেখিল।
আছিল এ সব কথা আদ্যের বিচার
বাসন্তের সনে তাহা হইল প্রচার।

কবির নিবাস কুমিল্লা অঞ্চলে হলে ১০৭২ সন বিপ্লব হওয়ারই কথা। অতএব ১০৭২ + ৫৯০ = ১৬৬২ খ্রীস্টাব্দে এ কাব্য রচিত। আর এটি বঙ্গাব্দ হলে ১০৭২ + ৫৯৩ = ১৬৬৫ খ্রীস্টাব্দে এবং হিজরী সন হলে ১৬৬১-৬২ খ্রীস্টাব্দে আর মঘীসন হলে ১৭১০ খ্রীস্টাব্দে রচিত। যেভাবেই হোক এ গ্রন্থ সতেরো শতকের সপ্তম দশকের গোড়ার দিকে রচিত। এ সূত্রে কবি পূর্বসূরী সৈয়দ সুলতানকে এবং সমকালের কবি মুহম্মদ খানকে শ্রদ্ধার সঙ্গে স্মরণ করেছেন :

সৈয়দ সুলতান আর মোহাম্মদ খানে
এ সবে করিয়া জ্ঞান মহামান্য জনে।

উক্ত দুজনই চট্টগ্রামের কবি। মুকুলও হয়তো চট্টগ্রামেরই— কুমিল্লার নন।


৭. নওয়াজিস খান

কবি নওয়াজিস খান তাঁর গুলেবাকাউলি’ কাব্যে বিস্তৃতভাবে বংশপরিচয়, আদেটার নাম, পিতৃপুরুষের নিবাসাদি প্রয়োজনীয় সব তথ্য পরিবেশন করেছেন। সংক্ষেপে তার পরিচিতি এরূপ :

প্রপিতামহের পিতা গৌড় হস্তে আসি নিজ গ্রামে গ্রাম বৈসালই কথদূর
গোত্র সনে চাট্টগ্রামে করিলা নিবাস। সংসারে প্রচারে সেই দেশ সিলিমপুর।—
সিলিম খান তাহান নাম সভার প্রধান।— মোড়লী বিষয় পাইল মহারাজ হোস্তে -।

কবির প্রপিতামহের পিতা অর্থাৎ কবির পঞ্চম উদ্ভবতন পুরুষ সলিম খান গৌড় থেকে সগোত্র বা সজাতি চলে এসে চট্টগ্রাম শহরের উপকণ্ঠে নতুন বাস্তু তৈরি করেন এবং তাঁর নামানুসারে গাঁয়ের নাম সলিমপুর বা সিলিমপুর রাখা হয়। এ গ্রাম এখনো বিদ্যমান। তবে কবির পিতা মুহম্মদ এয়ার সলিমপুর ছেড়ে দক্ষিণ চট্টগ্রামে আধুনিক সাতকানিয়া থানার

আমীরাবাদ গায়ে এসে বসতি স্থাপন করেন। কবির বংশধরেরা বর্তমানে সুখচড়ি গায়ে বাস করেন। পুরো বংশলতাটি এরূপ :



নওয়াজিস খানের মুর্শিদ ছিলেন মৌলবী আতাউল্লাহ

শ্রীযুক্ত আতাউল্লা মৌলবী সূজন

খেলাকৃত মুরীদ লৈনু তান স্থান।

নওয়াজিস খান চট্টগ্রামের বর্তমানে বাঁশখালি থানার অন্তর্গত বাণীগ্রামের জমিদার বৈদ্যনাথ রায়ের আধায়ে এ কাব্য রচনা করেন :

১. ধন্য ধন্য আত্মাকর্তা হএ যেজন

যাহার আদেশে হৈল পুস্তক রচন।

শ্রীযুক্ত বৈদ্যনাথ মহানরপতি

ধন্যহেতু সুকল্পনে করিল আরতি।

হীন নওয়াজিস কহে ভাবি নিজ মনে

বকাউলি পুস্তক রচিল তেকারণ।

২. শ্রীযুক্ত বৈদ্যনাথ মহানৃপকুলজাত

দাতা অতি দানী শুদ্ধরীত

তাহান আরতি শুনি হীন নওয়াজিসে

বকাউলি পুস্তক রচিত।

^১ ইনিই আবদুল করিম সাহিত্যবিশারদকে কবির অধস্তন বংশলতা দিয়েছিলেন।

লক্ষণীয় যে এ প্রথম সাহিত্যক্ষেত্রে গায়ে হিন্দু-মুসলিমের আদেষ্ঠা লেখক সম্পর্কের কথা জানা গেল। উনিশ শতকেও চট্টগ্রামে মুসলিম জমিদারকে আদেষ্ঠা এবং হিন্দু কবি মহেশচন্দ্রকে লেখকরূপে দেখেছি।

নওয়াজিস খান যখন কাব্য রচনা করছেন তখন আলাউল শ্রেষ্ঠ কবি হিসেবে প্রখ্যাত ও জনপ্রিয় নওয়াজিসের উক্তি থেকে এ তথ্য জানা যায় :

না রহে ভাগ্যর ধনরত্ন লক্ষাবধি	সপ্তনারী সপ্তকার সুপ্রসঙ্গ কহে।
কবির কবিতা রহে প্রলয় অবধি।	আর কত সুপ্রসঙ্গ বহলে রচিল
এই লাগি মহাজনে কবি সন্তোষএ	প্রলয় অবধি সব পুস্তকে রহিল।
কবি হোন্তে আপনা প্রশংসা নাম রহে।	কে জানিত এ সকল ভাবি চাহ মনে
কে জানিত বহরমগোর কথা রহে	জ্ঞানবন্তু আলাওল রচনা কারণে।

নওয়াজিস খানের পেশা ছিল খোন্দকারী অর্থাৎ মসজিদসংলগ্ন মক্তবের শিক্ষকতা [পাঠানপ্রশংসা] ও পাল-পার্বণে মোল্লার কাজ করা।

অনুগ্রহ প্রাপ্তিলোভে কবি শজ্ঞনদের উত্তরতীরস্থ দোহাজারীর মুঘল সীমান্তরক্ষী সেনানী আধুখানের ও জোরওয়ার সিংহের প্রশস্তি বা কসিদা রচনা করেছিলেন।

তোমা পিতৃ দান দিছে সুফলিত-ভূমি
উচ্চগিরি বন দান মোকে দান-ভূমি।

এরা প্রত্যেকে ছিলেন একহাজার সৈন্যের মনসবদার। এ দুটো রচনায় সাহিত্য বিশারদপ্রদত্ত নাম ‘পাঠানপ্রশংসা’ ও ‘জোরওয়ারসিংহ কীর্তি’। এ ছাড়া নওয়াজিস খান তত্ত্বাবধের গান ও বয়ানাত রচনা করেছেন। সেগুলো যথাস্থানে আলোচিত হবে।

কবির বংশধর আতাউল্লাহ পণ্ডিতসুত্রে সাহিত্যবিশারদ কবির জন্মসন ১০০০ মঘী (১৬৩৮ খ্রীঃ) এবং মৃত্যুসন ১১২৭ মঘী (১৭৬৫ খ্রীঃ) বলে জেনেছিলেন। কিন্তু কবির প্রপৌত্র আতাউল্লাহর পক্ষে প্রপিতামহের জন্মসন জানা সম্ভব নয় দুই কারণে, প্রথমত সে যুগে সাধারণ ঘরে জন্মসনে কোন গুরুত্ব ছিল না বলে লিখে রাখা হত না, সাধারণ মুসলিম ঘরে জন্মপত্রিকাও তৈরি হতো না। তা ছাড়া চার পুরুষ পরে পারিবারিক কিংবদন্তী বা ঐতিহ্যমূলক ও প্রমাণ হিসেবে নির্ভরযোগ্য নয়। তবে মৃত্যুসনটি হয়তো বিশ্বাসযোগ্য হতেও পারে। কিন্তু আমাদের হাতে কিছু পরোক্ষ প্রমাণ^২ রয়েছে :

১. নওয়াজিস খান আলাউলের পরবর্তী।

২. মুঘলবকশী হামীদের কন্যা বিয়ে করেন কবির প্রপিতামহ শরীফ।

৩. বকশী হামীদ স্বয়ং বিয়ে করেন বাজালিয়া গাঁয়ের টোনাঠাকুরের (আরাকানরাজ প্রদত্ত উপাধি ঠাকুর) কন্যা।

৪. গাজী মল্লের কন্যা বিনানু হচ্ছেন কবির পিতামহী।

৫. আদি পুরুষ সলিমখানপ্রাপ্ত ‘মোড়ল’ উপাধি থেকেই এ বংশ মোড়ল [মল্ল] বংশ।

৬. বৈদ্যনাথ রায় ও করিমদাদ ছিলেন কবির অঞ্চলের জমিদার। তাঁর তোয়াজের ভাষায় তাঁরা হয়েছেন নৃপতি।

^২ পৃথি পরিচিতি, পৃঃ ১০৪-১৬, ১৭২-৭৩, ৩০৭-৯।

৭. হাজারী আধুখান ও লছমনসিংহ ১৬৬৬ সনে বুজর্গ ওমেদ খানের চট্টগ্রাম বিজয়ের পরে দোহাজারীতে সীমান্ত সেনানী নিযুক্ত হন। আধুখানে পুত্র শেরজামাল খান আর লছমনসিংহের পুত্র হলেন জোরওয়ার সিংহ। কবি আধুখানের মৃত্যু সংবাদ জানেন- 'আধুখান নৃপতি স্বর্গে চলি গেল।'

কবি আধুখান পুত্র শেরজামালের বিবাহোৎসবের বর্ণনা দিয়েছেন।

৮. 'স' বর্ণ আদ্যক্ষর রূপে প্রয়োগে কোন জমিদার হোসেন ও তাঁর পুত্র রহমত শাহ সম্বন্ধে একটি কসিদা বা প্রশস্তিও হয়তো নওয়াজিস খানের রচনা। এই হোসেন খান ও রহমত খান দেয়াপ্তের জমিদার- কবির ভাষায় নৃপতি। লোকগাথার নায়িকা দেয়াপ্তের বেলচুড়া গায়ের কালাবিবি চৌধুরানীর পূর্বপুরুষ ছিলেন হোসেন খান ও রহমত খান। কবি বলছেন- 'সুরঙ্গে হোসেন নৃপ গেল স্বর্গ স্থান'। এবং রহমত খান জীবিত।

এ সব স্থানীয় ঐতিহাসিক তথ্যের ও লোকশ্রুত পরিবারের পরোক্ষ প্রমাণে বোঝা যায় কবি আঠারো শতকের প্রথমার্ধে বর্তমান ছিলেন। এবং সতেরো শতকের শেষপাদের প্রখ্যাত পরিবারের ও ব্যক্তির খবর রাখতেন।

তাছাড়া আমরা জানি- নওয়াজিস খান কিতাব দেখে তাঁর গুল-ই-বকাউলি রচনা করেছেন-

মহন্তের আজ্ঞা মন-পাটে রাখিয়া
হীন নওয়াজিসে কহে কিতাব দেখিয়া।

এ কিতাব ফারসি ভাষায় রচিত বলেই স্থির হয়। ১৬২৫ খ্রীস্টাব্দে দাখিলী উর্দুতে রচিত একখানা গুলে বকাউলির পাণ্ডুলিপি অযোধ্যার নওয়াবের গ্রন্থাগারে রক্ষিত ছিল বলে শোনা যায়। ফারসি ভাষায় রচিত একমাত্র কবি হচ্ছে শেখ ইজ্জতউল্লাহ বঙ্গালী রচিত বকাউলি। এটি ১৭২২ খ্রীস্টাব্দে রচিত। ১৭৩৮ সনে রচিত উর্দু রেখতাকাব্য 'তুহফা-ই-মজলিসে সালাতিন' এবং ১৭৯৮ সনে রায়হানরচিত উর্দু 'মসনবী খইয়াবান' আর ১৮৫২-৫৩ সনে আমানত রচিত উর্দু নাটক ইন্দারসভা শেখ ইজ্জতউল্লাহর ফারসি গুলেবকাউলিরই অনুসৃতি। দোভাষী শায়ের ফকির গরীবুল্লাহর আগে অর্থাৎ ১৭৬০ খ্রীস্টাব্দের আগে বাঙলায় উপাখ্যানসাহিত্য বিষয়ক যেসব গ্রন্থ অনূদিত হয়েছে, সেগুলো হিন্দি-আওধি কিংবা ফারসি ভাষা থেকেই অনূদিত। কাজেই মনে হয় নওয়াজিসের গুলে বকাউলিও ইজ্জতউল্লাহ বঙ্গালীর গ্রন্থেরই স্বাধীন অনুসৃতি। অতএব, কবি নওয়াজিস খান ১৭৩০ থেকে ১৭৫০ খ্রীস্টাব্দের মধ্যে কোন সময়ে তাঁর কাব্যটি রচনা করেছিলেন বলে অনুমান করা চলে।

তাজুলমুলুক গুলেবকাউলি নায়ক-নায়িকার এ নাম আরবি-ফারসি হলেও কাহিনীটি ভারতীয়। হয়তো কোন মৌখিক রূপকথাই এ কাব্যের উৎস। উত্তর ও মধ্যভারতে নার্সিসাসের মতোই পানির ধারে হলদে বকাউলি ফুল ফোটে, এগুলো চোখের পীড়ায় ঔষধরূপে ব্যবহৃত হয়। অন্ধ পিতার দৃষ্টিশক্তি ফিরিয়ে আনার প্রচেষ্টা থেকেই এই রূপক রোম্যান্সের উৎপত্তি বলে 'ফারহাঙ্গে আফসিয়ার' লেখক সৈয়দ আহমদ মনে করেন।'

^১ বাঙলা সাহিত্যে উপাখ্যান : গুলে বকাউলী- আবু মহামেদ হাবিবুল্লাহ, সাহিত্য পত্রিকা, শীত সংখ্যা ১৩৬৪, ঢা. বি. বাঙলা বিভাগ।

মধ্যভারতে প্রচলিত কোন হিন্দি গল্প কিংবা ১০৩৫ হিঃ বা ১৬২৫ খ্রীস্টাব্দে রচিত দাখিনী উর্দু কাব্যটিই (বর্তমানে অপ্রাপ্য) শেখ ইজ্জতউল্লাহ বঙ্গালীর অবলম্বন ছিল। মুসলিম কবির কাব্যভাবনার অবলম্বন এ ভারতীয় রূপকথাটিতে ইরানি ও ভারতীয় মন-মননের ও পাত্র-পাত্রীর মিশ্রণ ঘটেছে। মুসলিম রচিত অন্যান্য উপাখ্যানে পাত্রপাত্রীর আরবি-ফারসি নাম থাকলেও ধর্ম তারা প্রায়ই অমুসলিম এবং কিছু চরিত্র সংস্কৃত বা ভারতীয় ভাষায় নাম ধারণ করে। এ কাব্যেও তা আছে।

নওয়াজিস খানের কাব্যের কাহিনীর কাঠামো এরূপ : শরকস্তানের জয়নুল মলুকের পঞ্চম পুত্র তাজমলুক। এর জন্মলগ্নে গণকরা বলেছে যে এ পুত্রের বারো বছর বয়সকালে পিতা জয়নুলমলুক দৃষ্টি হারাবেন। এ জন্যে শিশুকে অন্যত্র রাখা হলো, তবু নিয়তি অমোঘ। তাই রাজা মৃগয়ায় গেলে সেখানে অকস্মাৎ পুত্রের দেখা পান আর তৎক্ষণাৎ অন্ধ হয়ে যান। ওঝারা বলল বকাউলি ফুল চোখে লাগালেই এ অন্ধত্ব ঘুচবে। বকাউলি ফুল ফোটে বকাউলি পরীর উদ্যানে। তা কোথায় কেউ জানে না। অতএব বকাউলি ফুলের উদ্দেশ্যে যাত্রা করে তাজমলুক। তার চার ভাইয়ের সঙ্গে তাজল আইয়ারা নামের বেশ্যাকে বিয়ে করে তার ও হেমালা দৈত্যের সহায়তায় বকাউলি ফুল সংগ্রহ করে। কিন্তু তার ভাইরা তার থেকে ফুলগুলো কেড়ে নিয়ে দেশে গিয়ে পিতার দৃষ্টিশক্তি ফিরিয়ে আনেন। এদিকে তাজমলুক ইররাজ্যের ফিরোজশাহর কন্যা বকাওলী পরীর প্রেমে পড়ে, স্ত্রী আইয়ারা, মাহমুদা ও দৈত্য হেমালার সাহায্যে অবশেষে বকাওলিকেও পত্নীরূপে লাভ করে, আবার সিংহলরাজ চন্দ্রসেনকন্যা চিত্রাবতীকেও স্ত্রী রূপে পায়। পরিশেষে পিতা পুত্রেরও মিলন ঘটে। এ কাহিনীর বৈশিষ্ট্য হচ্ছে এতে মনুষ্যদেহের নারীতে, পুরুষে, দৈত্যে, পাষাণের রূপান্তরের ঘটনা ও পুনর্জন্ম নায়ক নায়িকার জীবনে ঘটানো হয়েছে। কামরূপ-কামাখ্যার আর ডাকিনী-যোগিনী অন্মতার মতে আগমনের মতে পরী বকাউলির ইন্দ্রসভায় গমন ও নৃত্য গীতে অংশ গ্রহণও রয়েছে। একটি উপকাহিনীও রয়েছে, বকাউলীর পিতৃব্য ফিরদৌসরাজ মুজাফফর শাহর কন্যা রুহ আফজা দৈত্য কবলিত হয়, তাজমলুক তাকে উদ্ধার করে এবং তাজমলুকের অমাত্য বাহরামের সঙ্গে রুহ আফজার বিয়ে হয়।

আঠারো শতকের চট্টগ্রামবাসী কবি মুহম্মদ আলীও একখানা গুলেবকাওলি রচনা করেছিলেন, আর একখানা গুলেবকাউলি রচনা করেছিলেন উনিশ শতকের প্রথম পাদের কবি মুহম্মদ মুকিম। উনিশ-বিশ শতকের পদ্যে গদ্যে কোলকাতায় আরো ছয়খানা গুলেবকাউলি রোমান্স রচিত হয়। এতেই এ উপাখ্যানের বাঙলায় বিশেষ জনপ্রিয়তার সাক্ষ্য মেলে। এগুলো:

১. গোলেবকাওলি ও তাজলকুমারের পুথি-এরাদত আলী বা উল্লাহ (১৮৪০ খ্রীঃ)
২. গুলেবকাউলি ইতিহাস- উমাচরণ মিত্র ও প্রাণকৃষ্ণ মিত্র (১৮৪৩)
৩. গোলে বকাওলি- আবদুস শুকুর ওফে মানিক মিয়া
৪. (গদ্যেঃ) গোলেবকাওলি- বিজয়নাথ মুখোপাধ্যায় (১৯০৪)
৫. গুলে বকাওলী- সৈয়দ আবদুল মান্নান (১৯৪৯)
৬. নাটক : গোলে বকাওলি- কদরনাথ গঙ্গোপাধ্যায় (১৮৭৮)
৭. গোলে বকাওয়ালী- কুঞ্জবিহারী বসু (১৮৮১)

আঠারো শতকের উপাখ্যান প্রণেতা

১. মুহম্মদ আলী রাজা

মুহম্মদ আলী রাজা বা রাজা দুখানা প্রণয়োপাখ্যানের রচয়িতা। এই কবির জন্ম হয়েছিল ডক্টর মুহম্মদ এনামুল হকের স্বগ্রাম বখতপুরে। এটি চট্টগ্রামের ফটিকছড়ি থানার অন্তর্গত। কবির বংশধরেরা এখনো সে-গ্রামে বাস করেন। বংশধর সূত্রে জানা যায় কবির ১০৫৩ মঘীসনে (১৬৯১ খ্রীঃ) জন্ম এবং ১১২৯ মঘীতে (১৭৬৭ খ্রীঃ) মৃত্যু হয়। এতএব কবি আঠারো শতকের মাঝামাঝি সময়ে তাঁর কাব্য দুটো রচনা করেন। তাঁর 'তমিম গোলাল চতুর্নসিলাল' কাব্যের ভণিতায় তিনি তার নাম তিন রকমে ব্যবহার করেছেন : যেমন-

১. মহম্মদ রাজাএ বোলে নানা রঙ্গ মহীতলে।

২. হীন আলি কএ ভাব মনে মনে

৩. হীন আলি রাজা কএ যেখানে যে মনে লএ।

তাঁর 'মিসরী জামাল' উপাখ্যানের ভণিতায় প্রায়ই মহম্মদ রাজাএ কহে বা 'মহম্মদ রাজাএ বোলে' রয়েছে। 'তমিম গোলাল চতুর্নসিলাল' বটতলায় মুদ্রিত হয়েছিল 'মিসরীজামাল' অপ্রকাশিত।^১

তমিম গোলালের উপাখ্যানের কাঠামো এই: শিমালরাজ ইউসুফজালালের পুত্র তমিমগোলাল আর শিরাজরাজকন্যা চতুর্নসিলাল স্বপ্নে পরস্পরকে দেখে প্রেমে পড়ে এবং উভয়েরই স্বপ্নে গান্ধর্ব মতে বিয়ে হয়। স্বপ্ন ভঙ্গে উভয়েই বিরহী ও ব্যাকুল, মিলনের কোন উপায় জানা নেই তাদের। রাতে মিলন প্রত্যাশায়

প্রতি দিবসে নাসিয়া কন্যা গাথে পুষ্পহার
রাত্রিতে গোলাল চন্দ্র গলেত দিবার।

কিন্তু বিরহিনীর প্রত্যাশা কোন দিনই পূর্ণ হয় না। এদিকে শিরাজরাজ পাঁচটি শর্ত পূরণ সাপেক্ষে কন্যার বিয়ের জন্যে স্বয়ম্বর সভার আয়োজন করলেন। শর্তগুলো এই ১. এক বুনো পার্বত্য ঘোড়াকে বাগ মানিয়ে তার পিঠে আরোহণ ২. শহর ধ্বংসকারী এক অজগর হত্যা, ৩. শিরাজ শহরের মানুষকে রাক্ষসীকে বধ করা ৪. শিরাজ শহরে হামলাকারী দৈত্যকে বন্দী করা এবং ৫. সাত কোটি সৈন্য নিয়ে যে শত্রু রাজা ফি বছর শিরাজনগর লুণ্ঠন করে তাকে পরাজিত করা।

অন্যান্য রাজকুমারের মতো তমিমগোলালও স্বয়ম্বর সভায় হাজির হয় এবং অন্যেরা ব্যর্থতার গ-নি নিয়ে স্ব স্ব দেশে ফিরে গেল, আর বীর তমিমগোলাল ঐ পাঁচটি শর্ত পূরণ করে প্রেয়সী চতুর্নসিলালকে লাভ করে।

মিসরী জামাল

কবির অপ্রকাশিত 'মিসরী জামাল' কাব্যের সম্পূর্ণ পাণ্ডুলিপি পাওয়া গেছে। কুর্বার শহরের অধিপতির নাম আবদুল করিম শাহ, তাঁর রানীর নাম নাসিরা- সুন্দরী-নায়িকা মিসরী জামাল তাদেরই কন্যা। বিমলনগরপতি ছিল শরীফ সুলতান। তারই পুত্র তোরাবহামীম হল এ

^১ পুথি পরিচিতি, পৃঃ ৪২৮-৩০।

উপাখ্যানের নায়ক। চিত্রপট দেখেই উভয়ের মধ্যে প্রেমের সঞ্চার হয়, তারপর এ ধরনের উপাখ্যানে যে সব ঘটনা ঘটে থাকে, সে সব ঘটবার পরে নায়ক-নায়িকার মিলনে এবং নায়কের সঙ্গীক মাতদর্শনে স্বদেশ যাত্রায় কাহিলী সমাপ্ত হয়েছে।

মুহম্মদ আলী রাজার কাব্য দুটো কবিত্বসম্পদে ঋদ্ধ নয়। তত্ত্বকথা দিয়ে কবি কাব্যরসের অভাব পূরণ করতে চেয়েছেন। জগৎ ও জীবন সম্বন্ধে বৈরাগ্যমূলক তত্ত্বকথনে তাঁর আগ্রহ অধিক। 'হামদ' ও 'নাত' দিয়ে তিনি কাব্যরচনা শুরু করেননি, দোভাষী শায়েরদের মতো তিনি গ্রন্থারম্ভ করেছেন প্রভুর নামমাত্র স্মরণ করে। যেমন :

মহাম্মদ রাজা এ কহে প্রভু প্রণমিয়া
মিসিরীজামাল এক পুস্তক রচিয়া।

কবি ভণিতাও বসিয়েছেন ইচ্ছেমতো বর্ণনার আদ্যে, মধ্যে ও অন্তে। যদিও তিনি এ উপাখ্যান দুটোর জন্যে কারুর বা কোন ভাষার ঋণ স্বীকার করেননি, তবু এটি স্পষ্ট যে ফারসি উপাখ্যান বা ফারসি সাহিত্য প্রভাবিত রূপকথাই ছিল তাঁর অবলম্বন। এ দুটো উপাখ্যান অবিকল অনুকৃত হয়নি পরে কখনো।

কবির বৈরাগ্যমূলক দেহতাত্ত্বিক উক্তির একটি নমুনা এরূপ :

নারীর ফান্দে হৈলা বন্দী মিছামায়াজালে ভরণ হৈছিমার পানি শুকাএ বাতাসে।
ছিড়িয়া প্রেমের ডুবি যাইবা কত কালে। ঘরের ধন পরে নিল বোলে হায় হায়
বেলা গেল বৃদ্ধি গেল রৈলা কোন্ আশে ফারাহিলে মাণিক্যধন ফিরিয়া না পায়।

এরই পারিভাষিক অভিব্যক্তি এরূপ

বামেতে যমুনা বেসে ডানেতে ত্রিবেণী মলকুতে নাহিক বাণী জবরুতে মণি
শ্রীগোলাব হাটের মধ্যে বাজে বাদ্যধ্বনি। নাসুতে না শুনি সব পবনের বাণী।
শুকাইল সমুদ্র সব ত্রিবেণী সিদ্ধু মহম্মদ রাজাএ কহে মধুরসে বাণী
লাহুত লবণি জান নাহি এক বিন্দু। প্রেমনগরের বস্তি ছাড়ি দেশে যাইবা তুমি।

বৌদ্ধ ঐতিহ্য অনুসারে ছিল বলেই বাঙলায় সূফীমত ও সূফীসাধনা যোগ-তন্ত্র মতের ও চর্যার কায়াধর্ম ভিত্তিক ছিল।

২. পরাগল

ফরাগল সম্ভবত তুর্কি ভাষার শব্দ। গুলবদনের 'হুমায়ুননামায়' এক মৌলানা ফরাঘলের নাম মেলে। আমাদের ধারণা পরাগল সেই ফরাগলেরই বিকৃতিরূপ। বাঙলা সাহিত্যের ইতিহাসপাঠক মাত্রই গৌড়সুলতান সৈয়দ আলাউদ্দিন হোসেন শাহ (১৪৯৩-১৫১৯ খ্রীঃ)-র চতুগ্রামে নিয়োজিত সীমান্তরক্ষক সেনানী শাসক পরাগল খাঁর নাম জানেন। কবীন্দ্র পরমেশ্বর দাস রচিত পরাগলী মহাভারতই প্রথম বাঙলা মহাভারত।

আমাদের আলোচ্য কবি পরাগল (পুথিতে পোরাওল, পোরাগল) অবশ্য ভিন্ন ব্যক্তি। চতুগ্রামে এক সময়ে পরাগল নাম চালু ছিল। রাউজান এলাকায় কর্ণফুলী নদীর একটি ঘাটের নাম 'পরাওলীঘাট', একটি খালের নাম 'পরাওলী বা পরাগলী খাল।'

আমাদের আলোচ্য কবি পরাগল রচিত কাব্যের দু'খানা পাণ্ডুলিপির একখানায় রয়েছে জীর্ণ ছিন্ন দুটো পত্র, অপরখানায় রয়েছে একটি পত্র। এবং সে পত্রটো কাব্যের শেষপত্র, তাতে রয়েছে গুরুত্বপূর্ণ এ তথ্য :

শাহপরীর কেছা এব সমাণ্ড হৈল

ফারসি কিতাবেতে নেজামী রচিত।

বএত ভাঙ্গি পোরয়াওলে পএআর করিল।

আমাদের অনুমান শাহপরীর এ কিসসা নিয়ামী গঞ্জাবীর (১১৪০-১২০৭ খ্রীঃ) সপ্তপয়করের (১১৯৬ খ্রীঃ) একটি গল্প অবলম্বনে রচিত। পুথির পত্র দুটোর একটি হল কাব্যের কাহিনীর সূচনা নির্দেশক এবং দ্বিতীয় পত্রটোও প্রথমোক্ত পাণ্ডুলিপি কাব্যের সমাপ্তিসূচক। এ দুটো পত্র থেকে উপাখ্যানের রূপরেখার ধারণা পাওয়া যায়। এটিও পরীমানুষের প্রেমকাহিনী। আভাসে বোঝা যায়-রোকামশহরবাসিনী শাহপরীর সঙ্গে কোথাও আকস্মিকভাবে সাক্ষাৎ ঘটে রাজকুমার রূপবানের বা রূপভানের প্রথম দর্শনেই উভয়ের হৃদয়ে অঙ্কুরিত হয় প্রেম। কিন্তু শাহপরী শিগগির অনুভব করে প্রথম দর্শনেই যে প্রেম এবং সহজে প্রাপ্ত যে-প্রেয়সী কোনটাই আদর-কদর পায় না। তাই একদিন কুমারকে কোন ছলে বনে পাঠিয়ে ধাইকে নিম্নোক্ত নির্দেশ দিয়ে-

‘বিনে দুঃখে মোরে পাই তিলেক আদর নাই’

কহিঅ কুমার কোঁবর।

এতেক বুলিয়া সতী উড়া দিল সর্গগতি

আপন মন্দিরে চলি গেল।

এবং শাহপরী যাবার কালে ধাইকে আরো বলে গেল :

কুমারের মনে যদি থাকএ আদর

চলিয়া যাইতে কহিঅ রোকামশহর।

কুমার ফিরে সে ধাইয়ের মুখে সব শুনে

‘অজ্ঞাদিল যুবরাজে ভাগুরীর স্থান

যত ধন আছে মোর আন বিদ্যমান।।

কুমার বোলএ যেবা যাইবা মোর সন

এই ধন বিবর্তিয়া লও সর্বজন।

রোকাম শহরে আমি করিমু গমন

শাহপরী উদ্দেশিয়া তেজিমু জীবন।

এভাবে বিরহী বিরাগী কুমার গিরিদরিকান্তার আর সমুদ্র বহু দুঃখে কষ্টে অতিক্রম করে অবশেষে রোকামশহরে পৌঁছল তার মনে শঙ্কা ছিল- এতকাল পরে শাহপরী তাকে চিনবে কি! কিন্তু-

দেখিয়া কুমারের মুখ যেন রূপবান

জোড় হস্ত করি কন্যা আইল বিদ্যমান।

আল্লাএ সোঙরিয়া বুলিল বচন-

শাহ পরীর মুখ যদি কুমারে দেখিল

আকাশের চন্দ্র যেন হাতে হাতে পাইল।

কুমার অনুযোগের সুরে শাহপরীকে জানাল :

মায়া করি আমরে পাঠাইয়া বনে

আর আমি পছে যত পাইলাম দুঃখ

তুমি আইলা আপনা ভুবনে।

সাগরে ভাসিল অনাহারে।

দুনিয়ার পাঠক এক হও! ~ www.amarboi.com ~

উনিশ শতকের দ্বিতীয় পাদের কবি মুহম্মদ মুকিম তাঁর গুলেবকাউলি কাব্যের উপক্রমে তাঁর পূর্ববর্তী ও সমকালের চট্টগ্রামবাসী কবিদের নামোল্লেখ করেছেন তাতে পূর্বকালের কবি হিসেবে আমাদের আলোচ্য পরাগলের নামও রয়েছে :

হাবুত রোআজা, সে (ক) পরাগ, পরায়ল
ফাজিল নাসির, তাহির সকল।

এর থেকে আমাদের অনুমান শাহপরীর কিসসা প্রণেতা পরাগল সতেরো শতকের না হলেও সুনিশ্চিতভাবে আঠারো শতকের কবি।

আঠারো শতকের শেষপাদের কবি মুহম্মদ আলী রচিত অপ্রাপ্ত শাহপরী মালিকজাদা উপাখ্যানটিও হয়তো নায়কের নামভেদে অভিন্ন বিষয়ক।

৩. মুহম্মদ আলী

কবি মুহম্মদ আলী তাঁর 'হায়রাতুল ফেকাহ' নামের শাস্ত্রগ্রন্থে যে আত্মপরিচয় দিয়েছেন^১, তা থেকে জানা যায় চট্টগ্রামের ওর্ফে ইসলামাবাদের উত্তরে ফটিকছড়ি থানার আসিমনগর এলাকায় অবস্থিত ইদিলপুরে কবির জন্ম। কবি সাধারণে ব্যক্তিক পেশা পরিচয়ে মুহম্মদ আলী মিয়াজী নামে খ্যাত ছিলেন, তাঁর পণ্ডিত খ্যাতিও ছিল। পার্শ্ববর্তী অদূরের লেলাঙ্গ গাঁয়ের জমিদার বা ধনীলোক (কবির ভাষায় লেলাঙ্গ রাজ্যের নৃপতি) ইউসুফ হাফিজের (গৃহশিক্ষক ও মুয়াজ্জিন রূপে) প্রতি পোষণে কবি 'হায়রাতুল ফেকাহ' রচনা করেন এবং হায়রাতুল ফেকাহ আছিল ফারসি কিতাব / করিনু বাঙ্গালা।

এয়ার আলী নামের এক বসিকের অনুরোধে তিনি প্রণয়োপাখ্যান হাসনবানু রচনা করেছিলেন—

শ্রীমন্তে এয়ার আলী গুণবান
রচে মোহাম্মদ আলী আরতি তান।

আর আমীর হোসেন নামের আর এক ব্যক্তির অগ্রহে কবি মুহম্মদ আলী রচনা করেন শাহপরী মালিকজাদা নামের রোমাস।

আমীর হোসেন আরতি কারণ
হীন মোহাম্মদ আলী ভান।

এঁর তিনটে রাধা-কৃষ্ণ বিষয়ক পদও সংগৃহীত রয়েছে। কবি মুহম্মদ আলীর গ্রাম ইদিলপুরে কবি মুনশী মুহম্মদ মুকিম পণ্ডিতে ও জন্ম হয়েছিল।

বহু লোক জ্ঞানবন্ত পণ্ডিতেরও নাহি অন্ত
মুকিম পণ্ডিত সর্বশ্রেষ্ঠ

এ গ্রন্থের এক স্থানে সৈয়দ সুলতানের নবীবংশ গ্রন্থেরও উল্লেখ রয়েছে :

তার কত অন্ধ শেষে খলিফা সৃজিছে
তার সন নিরূপণ নবী বংশে আছে।

^১ ধর্মসাহিত্য অধ্যায় দৃষ্টব্য।

মুহম্মদ আলীর হাসনবানু কিংবা শাহপরী মালিকাজাদা সম্বন্ধে আলোচনা পূর্ণাঙ্গ পাণ্ডুলিপির অভাবে সম্ভব নয়।

৪. মোহাম্মদ আকবর

মুহম্মদ আকবর নামের এক কবির একটি আদ্যন্তখণ্ডিত প্রায় শতক পৃষ্ঠায় প্রণয়োপাখ্যান সাহিত্যবিশারদ সংগ্রহে ছিল। বিষয়বস্তু কাউসশহর রাজ্যের রাজা মনোহরের কন্যা সনুবরের প্রণয়কাহিনী।

৫. মুহম্মদ রফিউদ্দীন

কবির নিবাস ছিল কুমিল্লা জেলার নারাঞা নামের গ্রামে, তাঁর পিতার নাম আশরাফ। কুমিল্লা অঞ্চলের সতেরো শতকের কবি সৈয়দ আকবরের অনুসরণে মুহম্মদ রফিউদ্দীন তার জেবলমূলক-শামারোখ নামের প্রণয়োপাখ্যানখানি রচনা করেছিলেন। তাঁর কাব্যের ভাষা ও ভঙ্গি মার্জিত রুচির পরিচায়ক। নায়ক জেবলমূলক তিন পত্নী নিয়ে শেষ বয়সে সুখীই হয়েছিল:

শিরিলব, শামারোখ আর সনুবর
একপতি কোলে মিলি বঞ্চে পরম্পর।

বিবাদ কলহ নহে সুখের বিরাজ
সুখের নগর ধন্য চামরী সুরাজ।
উজিরেই নিজ সুত আর বধুমুখ
ছেরিয়া সানন্দ মন অধিক কৌতুক।

মুহম্মদ রফিউদ্দীন সম্ভবত আঠারো শতকের কবি।

কবি বিদগ্ধ এবং ছান্দসিক :

১. কোকিলান করে গান মোহজ্জান রঙ্গে
২. স্থাসে হয় আয়ুক্ষয় না কৈল্যে বিচার

সুবাসিত শুনে গীত পুলকিত অঙ্গে।
ভাব ভাল গতকাল আসিবে না আর।

৬. মুহম্মদ আবদুর রাজ্জাক

ইনি 'সয়ফুলমূলক-লালবানু' নামে একখানি প্রণয়োপাখ্যান ত্রিপুরারাজ বলরাম মাণিক্যের ও কৃষ্ণমাণিক্যের (১৭৬০-৮৩) সময়ে রচনা করেন। তাঁর নিবাস ছিল পরগনা রওশনাবাদের অন্তর্গত আধুনিক ফেনীর বেদরাবাদ চাকলায়।

৭. মুহম্মদ জীবন

মুহম্মদ জীবন চট্টগ্রামের বাঁশখালি থানা অঞ্চলের লোক ছিলেন। এ অঞ্চলের পরবর্তী কবি মুহম্মদ চুহর পূর্বসূরী হিসেবে জীবনের যে পরিচয় দিয়েছিলেন তা এই :

মজলিস সিরাজের বংশেত উৎপতি
অলি মুহম্মদ নাম জ্ঞানবন্ত অতি।
তান পুত্র সুচরিত্র কুলের মার্তণ্ড।
শ্রীযুত জীবন মুনসী শাস্ত্রেত প্রচণ্ড।
কৃতির শব্দ তান সংসার পূর্ণিত
রচিল অনেক কাব্য অমিয়া ভাষিত।

কামরূপকুমার কুমারী কালাকাম
রচিল আপনাগুণে অতি অনুপাম।
কন্যা বানুহোসেন নৃপতি বহরম
দৃঢ় রীতে বিরচিল অতি মনোরম।
জাফর আলী নৃপতির মাতুল ঘনান
শাস্ত্রপাঠ অভ্যাস করিল তান স্থান।

অতএব কবি জীবন মুনশী মজলিস সিরাজ নামের কোন প্রখ্যাত ব্যক্তির বংশধর। কিবর পিতার নাম ছিল অলি বা ওলি মুহম্মদ। ধনীমানী জাফর আলীর ঘনিষ্ঠ সম্পর্কের মাতুল ও শিক্ষক ছিলেন কবি জীবন। এ জাফর আলী ছিলেন কবি চুহরের আশয়দাতা ও তাঁর 'আজর শাহ সমনরোখ' কাব্যরচনার আদেষ্ঠ। জাফর আলী প্রথম জীবনে কোলকাতার টাকশালে কাজ করেছেন, পরে চট্টগ্রামে উকিল ছিলেন। জীবন 'রচিল অনেক কাব্য' বলে চুহর উল্লেখ করেছেন বটে, কিন্তু নাম করেছেন মাত্র দু'খানা কাব্যের কামরূপ-কালাকাম এবং বানুহোসেন-বাহরামগোর এবং প্রথমটি অপ্রাপ্ত আর দ্বিতীয়টির একটি খণ্ডিত পাণ্ডুলিপি সাহিত্যবিশারদ সংগ্রহ করেছিলেন।

কবি তাঁর পোষ্টা ও কাব্য রচনা আদেষ্ঠা কাজীকমিশনার আবদুল মজিদের বিস্তৃত পরিচয় দিয়েছেন। কবি চুহরের কাব্যেও এর বিস্তৃত পরিচিতি রয়েছে। কবি জীবন ও কবি চুহর সূত্রে জানা যায় :

ক. আবদুল মজিদের পিতা আবদুল হাকিম চুহরের পিতা ওয়াইজুদ্দীনের পীর ছিলেন, এবং আবদুল মজিদ চুহরের প্রতিপোষক ছিলেন, অতএব আবদুল মজিদ চুহরের পিতার প্রায় সমবয়সী ছিলেন বলে অনুমান করা চলে।

খ. কাজীকমিশনারের পদ ১৮৩৮ খ্রীস্টাব্দে বিলোপ করা হয়। কাজেই আবদুল মজিদ এর আগেকার লোক।

গ. ১৮০৪ খ্রীস্টাব্দে কোলকাতায় টাকশাল স্থাপিত হয়, কবি জীবন মুনশীর ছাত্র ও চুহরের পোষ্টা জাফর আলী এ টাকশালে প্রথম জীবনে চাকুরী করেন। আতএব মজিদ এবং জীবন উভয়েরই ১৮০৪ খ্রীস্টাব্দে আশ্রয় যথাক্রমে কাজীকমিশনার ও কাব্যপ্রণেতা ছিলেন। কাজেই জীবন আঠারো শতকের শেষপর্বে বা শেষ দশকে তাঁর কাব্য বানুহোসেন-বাহরামগোর রচনা করেছিলেন বলে অনুমান করি, যদিও চুহরের 'আজরশাহ-সমনরোখ' কাব্য রচনা কালেও কাজীকমিশনার আবদুল মজিদ উনিশ শতকের প্রথমপাদের গোড়ার দিকে জীবিত ছিলেন। জীবন কবিও তখনো জীবিত।

১. এবে কহৌ পুস্তকের কথা যথাযুক্ত।

বক্তার পারস্যভাস গ্রন্থন ভাঙ্গিয়া

পদবন্ধে ভনে হীন জীবনে রচিয়া।

২. বক্তার পারস্য গ্রন্থ পূর্ব ইতিহাস

সহীন জীবনে পদে করিল প্রকাশ

৩. বানুহোসেনের কাব্য অমৃত সদৃশ ভব্য।

কবি হীন, অজ্ঞান বলে ভণিতায় আত্মপরিচয় দিয়েছেন বারবার। ইরানের বাদশাহ বাহরামের সঙ্গে পরীকন্যা বানুহোসেনের প্রণয় ও পরিণয়ই এ কাব্যের বর্ণিত বিষয়। 'গোরখর নাম জন্ত নিতি আখেছিল। তাহে নূপ নাম হৈল বাহরাম গোর'। এখানেও শ্বেতদেও-র গোখরারোহণে আকাশপথে পরীরাজ্যে গমন, সরোবরতীরে পরীকন্যা বানুহোসেনের সঙ্গে প্রথম সাক্ষাতেই প্রেম ইত্যাদি প্রথাসিদ্ধ ঘটনাবলি রয়েছে। কবি যে রসজ্ঞ ও রুচিবান পণ্ডিত ছিলেন, তার প্রমাণ এ আদ্যন্ত খণ্ডিত কাব্যের সর্বত্র দৃশ্যমান। যেমন :

১. বিরহ কণ্টক হৃদে চক্ষু ফুটে যায়

ধন-প্রাণ জগ-সুখ আসার তাহার।

২. রদমুতি পাঁতি দাড়িমক জিতি

বিধুনিন্দি বক্তখানি।

হাস্য মৃদুতর অতি সুমধুর

আলোকিত হয়ে প্রাণি

চরণের তল সরোজ কমল

হেরি কাম-প্রাণ মজে।

দুনিয়ার পাঠক এক হও! ~ www.amarboi.com ~

কিংবা

৩. রদকুন্দ মুক্তি পাইতি বঙ্কিম বিহাস পীবর নিতম্ব জিত গ্রীবে রত্নহার
লখি মীনকেতন সর্বাঙ্গে হৈল নাশ। শৈল ভেদি যেন গঙ্গা যমুনা সঞ্চার।

শব্দচেতনায়, বাক্যবিন্যাসে, বর্ণননৈপুণ্যে, অলঙ্কারের সুপ্রয়োগে, পরিমিতিবোধে, রুচিশীলতায় ও শালীনতায় কবি মুহম্মদ জীবন ওফে 'জীঅন মুনশী' যে শক্তির পরিচয় দিয়েছেন তা মধ্যযুগীয় ধারার কাব্যে সুলভ নয়। এক কথায় কবিত্বে, পাণ্ডিত্যে সুরুচির ও বাককুশলতার সংমিশ্রণে ও সমন্বয়ে কবি জীবনের 'বানুহোসেন-বাহরামগোর' একখানি সুখপাঠ্য কাব্য।^১

উনিশ শতকের প্রণয়োপাখ্যান রচয়িতা

কোলকাতার বাইরে দেশের অভ্যন্তরে যারা উনিশ শতকেও মধ্যযুগীয় ধারায় সাহিত্যচর্চা করেছেন, তাঁদের সাহিত্য আমাদের চোখে মূল্যহীন এবং কোন ঐতিহাসিক গুরুত্ব থাকলেও তা সামান্য। কেননা ইংরেজ-নিয়ন্ত্রিত মুদ্রাবিনিময় ভিত্তিক নয়া আন্তর্জাতিক বাণিজ্য মাধ্যমে যে নতুন আর্থনীতিক ও আর্থিক জীবন বন্দরনগর ও নতুন রাজধানী কোলকাতায় শুরু হল- যার সর্বগ্রাসী ও আপাত সর্বনাশকর প্রভাব গাঁয়ে-গঞ্জে গভীর ও ব্যাপক হতে থাকল, তার ফলে শ্রীরামপুর মিশনের কিংবা ফোর্ট উইলিয়াম কলেজের এক লক্ষ্যের সীমিত প্রয়াসের কথা বাদ দিলেও ১৮১৮ সন থেকে পত্র-পত্রিকার মাধ্যমে গদ্যে-পদ্যে বিশেষ করে গদ্যে তার প্রভাবজাত অস্পষ্ট কিন্তু নতুন জীবনদৃষ্টি ও জগৎচেতনতা প্রকাশ পেতে থাকে এবং ১৮৪০ সনের পরে বিশেষ করে ১৮৬০ সনের পরে কোলকাতায় বিদ্বানের ও বিত্তবানদের মনোজগতে এক কৃত্রিম লগুন শহরও গড়ে ওঠে। কাজেই উনিশ শতকের দ্বিতীয়পাদ থেকে যারা প্রাচীন ধারায় সাহিত্যচর্চা করেছেন তাঁরা চিন্তা-চেতনার ক্ষেত্রে সমকালীনতা হারিয়েছেন এবং পিছিয়ে পড়া মানুষের মন-মননের প্রতিভা হিসেবেই তাঁদের সাহিত্য বিবেচ্য। উপযোগবিহীন এ সাহিত্য মছন করে যা পাওয়া যায় তাতে পরিশ্রমের ক্ষতি পোষায় না। তবু তাঁদের হিতবুদ্ধি, সংস্কৃতিচেতনা ও নিষ্ঠাসাধনা শ্রদ্ধার সঙ্গে স্মরণীয়, কেননা তাঁদের কোন দোষ ছিল না। কারণ চেতনা-সূর্য তখনো গাঁয়ে গঞ্জে পৌছে নি, তাই তাঁদের ও তাঁদের রচনার পরিচয় সংক্ষেপে লিপিবদ্ধ করছি। প্রসঙ্গত কোলকাতা শহরকেন্দ্রী কবিওয়ালা ও শায়ের সম্বন্ধে এমনি প্রশ্ন জাগতে পারে। তবে যুগসন্ধিক্ষণের- নবযুগের জন্মালগ্নে পুরোনো যুগের ক্ষীয়মান ধারার অবলুপ্তিমূহূর্তের সাহিত্য হিসেবে যুগান্তরলগ্নের ঐতিহাসিক সামাজিক নৈতিক সাংস্কৃতিক ও সাহিত্যিক পরিস্থিতির সাক্ষ্য হিসেবে এগুলো মূল্যবান। বর্ণহিন্দুরা অধিক সংখ্যায় যুরোপীয় বিদ্যা ও সমকালীন বিদ্যুৎ অর্জন করায় হিন্দুসমাজে কবিওয়ালাযুগ ১৮৬০ সনের আগেই অবসিত হয়, আর দেশজ মুসলিমের শিক্ষায় ঐতিহ্যহীনতার দরুন ইংরেজি শিক্ষা মুসলিম সমাজে বিলম্বে অনুপ্রবিষ্ট হওয়ার দোভাষী শায়েরের প্রভাব মুসলিম সমাজে উনিশ শতকব্যাপী তো বটেই, এমনকি বিশ শতকের গোড়ার দুই দশক ধরেও প্রবল ছিল। উনিশ শতকের কবিগান এবং দোভাষী সাহিত্য একই কারণে- সমকালতা ও উপযোগবিহীন বলে তুচ্ছ।

^১ বরেন্দ্র সাহিত্য পরিষৎ পত্রিকা, ১৩৬৭ সন ৪ প্রণয়োপাখ্যানের কবি মুহম্মদ জীবন- আহমদ শরীফ দ্রষ্টব্য।

১. কবি মুহম্মদ চুহর

কবি চুহর প্রধানত পণ্ডিত কবি। ইনি পূর্বসূরীদের পদাঙ্ক সার্থকভাবেই অনুসরণ করেছেন। শাহ বারিদ খানের ও আলাউলের কবিত্ব পাণ্ডিত্যমুগ্ধ ছিলেন তিনি। তাঁর খণ্ড কাব্যের স্থানে স্থানে তার আভাস আছে।

কবি মুহম্মদ চুহরের 'আত্মকথা', থেকে জানা যায় তিনি চল্লিশ বছর বয়সের মধ্যেই 'মনোহর-মধুমালতী', 'কলিমশাহ-দিলারাম', 'সুজন-চিত্রাবতী' ও 'আজর শাহ-সমনরোখ' কাব্য রচনা করেছিলেন। পরবর্তী জীবনে তিনি আরো কাব্য লিখেছিলেন কিনা সে-খোঁজ আজো নেয়া হয়নি। কবি কথিত এ চারখানা কাব্যেরও তিনখানা আজতক পাওয়া যায়নি। হাতে এসেছে মাত্র 'আজর শাহ-সমনরোখ'। তারও একমাত্র পাণ্ডুলিপিটি আদ্যন্ত খণ্ডিত।

ক. কবি পূর্বসূরী হিসাবে পীর-কবি সৈয়দ সুলতান, আলাউল ও কবি মুহম্মদ খানের নামোল্লেখ করেছেন এবং কবির আদেষ্ঠা জাফর আলীর বিদ্যাবত্তা ও পাণ্ডিত্যের তুলনা প্রসঙ্গে কবি শাহ বারিদ খানের নাম করেছেন।

খ. কবি চুহরের পিতা ওয়াইজুদ্দিনের পীর মোল্লা আবদুল হাকিম আর তাঁর দুই পুত্র কাজী আবদুল হামিদ ও কাজী আবদুল মজিদের নামও প্রসঙ্গত উল্লেখ করা হচ্ছে। কাজী আবদুল মজিদ প্রথমে বাঁশখালির পরে দোহাজারীর কাজীকমিশনার ছিলেন এবং এরই আদেশে ও প্রতিপোষণে কবি মুহম্মদ জীবন ওরপে জীঅন মুন্সী কাব্য রচনায় ব্রতী হন। কাজী আবদুল মজিদ ছিলেন চুহরেরও পোষ্টা। আদেষ্ঠা জাফর আলীর ঘনিষ্ঠ সম্পর্কের মাতুল ও গৃহশিক্ষক ছিলেন জীবন।

গ. কবির পীরের নাম মতিউল্লাহ। ইনি দরিদ্র চুহরকে আবাল্য ভাত-কাপড়ে পুষেছেন। তাঁরই অভিপ্রায়ে চুহর কৈশোরে 'মনোহর-মধুমালতী' এবং যৌবনে 'কলিমশাহ-দিলারাম' কাব্য রচনা করেন।

কবির বংশলতা এরূপ- আজমত- কামালমুধা- ইউসুফ- আবদুস শুকুর- ওয়াইজ উদ্দীন- কবি মুহম্মদ চুহর।

ঙ. কাব্য রচনার আদেষ্ঠার 'কুর্সিনামা' : আদেষ্ঠা জাফর আলী চৌধুরী চট্টগ্রামে উকিল ছিলেন। চুহরের তোয়াজের ভাষায় তিনি বাল্যে 'কুমার' ও যৌবনে 'নৃপতি' রূপে বর্ণিত হয়েছেন।

চ. জাফর আলী আরবি শিক্ষক বদিউদ্দিন মিয়াজী, ফারসি শিক্ষক ইমাম শরীফ, বাংলা (হিন্দুয়ানি) শিক্ষক বিজয়পণ্ডিত এবং অন্যতম শিক্ষক ও মাতুল আলি মুহম্মদের পুত্র কবি মুহম্মদ জীবন। জীবন 'অনেক' গ্রন্থের প্রণেতা। চুহর নাম করেছেন মাত্র দুটির 'কামরূপ-কালাকাম' ও 'বানুহোসেন-বাহরাম গোর'।

ছ. কবির প্রতিপোষক জাফর আলী কর্মজীবনের প্রথমে কলকাতা টাকশালে চাকরি করেন এবং অল্পকাল পরে চট্টগ্রামে ওকালতি করতে থাকেন। সম্ভবত জাফর সরকারি উকিল (কোম্পানীর উকিল) ছিলেন। তিনি বয়সে চুহরের ছোট ছিলেন এবং 'তাঁকে ভক্ষ্য বস্ত্র দানে নিত্য' তুষতেন এবং 'গুরুসম মান্যদরে পুত্রসম পুষতেন।' তাঁরই আদেশে অতিক্রান্ত যৌবনে চুহর 'সুজন-চিত্রাবতী' উপাখ্যান লেখেন এবং চল্লিশ বছর বয়সে তাঁরই অভিপ্রায়ে আলোচ্য 'আজর শাহ-সমনরোখ' কাব্যখানি রচনা করেছেন।

দুনিয়ার পাঠক এক হও! ~ www.amarboi.com ~

মতিউল্লাহর নির্দেশে উপাখ্যান দুটি লেখার পরে এবং জাফর আলীর আদেশে কাব্য রচনার আগেই পীর কমিশনার (আবদুল মজিদ) কবির কপালে হাত দিয়েছিলেন; ফলে, কবির মতিচছন্ন হয়। অর্থাৎ দরবেশের হাতের স্পর্শে যে অধ্যাত্ম-চেতনার সঞ্চারণ হল, তার তীব্রতা সহ্য না হওয়ায় কবি পাগল হয়ে যান। পরে সুস্থ হয়ে জাফর আলীর অগ্রহে কাব্য রচনায় আত্মনিয়োগ করেন। 'আজর শাহ-সমনরোখ' রচনার পরে কবি আরো কাব্য লিখেছিলেন কিনা জানবার কোন উপায় আপাতত নেই।

কবির আবির্ভাবকাল

এবার প্রাপ্ত উপাদানের আলোকে কবির আবির্ভাবকাল নির্ণয় করা যাক :

ক. আব্দুল মজিদের পিতা আবদুল হাকিম ছিলেন চুহরের পিতার পীর এবং আব্দুল মজিদ ছিলেন চুহরের আর উকিল জাফর আলীর মাতুল ও গৃহ শিক্ষক কবি জীবনের প্রতিপোষক। অতএব মজিদকে চুহরের পিতার প্রায় সমবয়সী বলে অনুমান করা যায়।

খ. কাজী কমিশনারের পদ ১৮৩৮ খ্রীস্টাব্দে বিলোপ করা হয়, আবদুল মজিদ এর আগেকার লোক। চুহরের বালক বয়সে মনোহর-মধুমালতী রচনার আগেই যে মজিদের আদেশে কবি জীবন 'বানুহোসেন-বাহরামগোর' প্রভৃতি কাব্য রচনা শেষ করেন, তার আভাস আছে চুহরের উক্তিতে :

মনোহর-মধুমালতী প্রেম-গাথা
রচাইল' দিক দিয়ে কমিশনার দাতা।

গ. ১৮০৪ খ্রীস্টাব্দে কোলকাতায় টাকশাল স্থাপিত হয়। এই টাকশালেই জাফর আলী এক সময়ে কাজ করতেন; কাজেই জাফর আলীর আদেশে রচিত প্রৌঢ় চুহরের কাব্য আজর শাহ-সমনরোখ ১৮০৪ খ্রীস্টাব্দের পরের রচনা।

চুহরের মনোহর-মধুমালতী রচিত হওয়ার পরেও মজিদ জীবিত ছিলেন : 'ললাটেত হস্ত দিল পীর কমিশনার' এই উক্তি থেকেই তা জানা যায়।

বাঁশখালি প্রজ্বল্য ভূমি হস্তে সেই কাজী।

দোহাজারী কমিশনারী হইল কর্তা রাজী।

—এ উক্তি থেকে বোঝা যায় মুহম্মদ জীবনের সময়ে মজিদ 'কাজী কমিশনার' নিযুক্ত হয়ে বাঁশখালিতেই কাজে যোগ দেন; আর চুহরের 'আজর শাহ-সমনরোখ' রচনার আগে তিনি সেখান থেকে বদলী হয়ে দোহাজারীর কাজী কমিশনার হন। কাজেই তখনও কাজী কমিশনারের পদ লোপ করা হয়নি। তাহলে আজর শাহ-সমনরোখ ১৮৩৮ খ্রীস্টাব্দের পূর্বেই রচিত।

অতএব চুহর ছিলেন উনিশ শতকের প্রথম পাদের কবি; আর তাঁর পূর্ববর্তী কবি মুহম্মদ জীবন যদি মজিদের বা চুহরের পিতার বয়সী হন, কিংবা চুহরের চেয়ে বিশ-পঁচিশ বছরের বড় হন, তাহলে জীবন আঠারো শতকের শেষপাদে তাঁর কাব্যগুলি রচনা করেছেন বলে নিঃসংশয়ে অনুমান করা যায়।

গল্পসার

আবিজ দেশের রাজা আজর শাহ। রানীর নাম সুনালা। রাজা-রানীর সুখেই দিন যাচ্ছিল; কিন্তু নিঃসন্তান বলে তাঁদের মনে বড় দুঃখ। রাজাই বিচলিত হলেন বেশি। পুত্র না হলে বংশ লোপ পায়। রাজ্য হাতছাড়া হয়ে যায়। তাই আজর শাহ নানা দেশ থেকে গুণী, পণ্ডিত ও দৈবজ্ঞ আনিয়ে ভবিষ্যৎ জানার ব্যবস্থা করলেন। দৈবজ্ঞরা বললেন, রানী সুনালা সন্তান হবে না। অবশ্য রাজা যদি মসরিক রাজকন্যা সমনরোথকে বিয়ে করেন তাহলে পুত্র পাবেন। এক বুড়ো মন্ত্রী ঘটকালিতে সমনরোথের সঙ্গে আজর শাহর বিয়ে হল। এতে রানী সুনালা ঈর্ষা-বিষে জর্জরিত হলেন। তিনি রাজাকে টোনা করে বীর্যহীন করে দিলেন। রাজা দৈবজ্ঞের মুখে সব বৃত্তান্ত শুনে প্রতিষেধকের সাহায্যে আবার সুস্থ হলেন এবং সমনরোথের গর্ভসম্ভার হল। সমনরোথ শিগগির পুত্রবতী হবেন শুনে সুনালা আবার তুচ্ছতাকের আশ্রয় নিলেন; ফলে, সমনরোথের জীবন সংশয় দেখা দিল। কত তবীব, কত দাওয়াই, কত ব্যবস্থা কিছুতেই কিছু হল না। অবশেষে জানা গেল বাগদাদের পীর সফাহান ছাড়া কেউ এ রোগের প্রতিকার করতে পারবেন না। আবার বুড়ো মন্ত্রীর ডাক পড়ল। তিনি ছুটলেন বাগদাদ দেশে। এ রীতিমত অভিযান। পরীরাজ্যে গিয়ে, নানা অঘটন ঘটিয়ে, বহু অসাধ্য সাধন করে তিনি অবশেষে বাগদাদে পৌঁছলেন এবং যথাস্থানে পীরের দেখা পেলেন। এখানেই পুষ্টি ঋণ্ডিত।^১

ভণিতা : ক. বিজ্ঞ নৃপ জাফর আলি পুরুষ উত্তম
 ভণএ চুহর পাই তাহান মরম
 খ. নৃপতি জাফর আলি দুর্নীতি জিনি কর্ণ বলি
 দুঃখীসমী তোষে প্রতিনিতি।
 নৃপতি আদেশে ভাবি চুহর নির্বুদ্ধি কবি
 দাতার দাতব্য কৃতি গায়।

২. কবি বাকের আলী চৌধুরী

বাকের আলী চৌধুরী মধ্যযুগীয় উপাখ্যানের মূলধারার ক্রান্তিকালের কবি। প্রাচুর্যের দিক দিয়ে বিচার করলে আঠারো শতকের শেষার্ধ্বে থেকে উনিশ শতকের প্রথমার্ধকে উপাখ্যানের স্বর্ণযুগ বলা যায়। এ সময়টাতেই বেশিরভাগ ফারসি উপাখ্যানের বাঙলা তর্জমা হয়। ১৮৫০-এর পরে দোভাষী শায়েরদের হাতে যে-সব উপাখ্যান রচিত হয়েছে, তাদের প্রায় সবগুলোই উর্দু-হিন্দির স্বাধীন অনুবাদ কিংবা অনুকৃতি। তখন দরবারী মর্যাদাচ্যুত হওয়ায় ফারসির চর্চা কমে আসছিল, তাই শায়েরদের কেউ হয়তো অনুবাদ করবার মতো ব্যুৎপন্ন ছিল না; ফলে, এ সময় থেকেই ফারসি সাহিত্যের সঙ্গে বাঙালীর যোগসূত্র ছিন্ন হতে থাকে। ১৭৫০ থেকে ১৮৫০ অবধি যারা ফারসি উপাখ্যান অবলম্বন করে কাব্য রচনা করেছেন, তাঁদের মধ্যে এ কয়জনের পরিচয় পাওয়া গেছে : তমীম গোলাল-চতুর্নিসলাল ও মিসরিজামাল রচয়িতা কবি মুহম্মদ আলী রাজা, গুলেবকাউলি রচক মুহম্মদ মুকিম আর মৃগাবতী ও কামরূপ-কালাকাম প্রণেতা মুনশী মুহম্মদ

^১ বিস্তৃত পরিচিতির জন্যে বাঙলা একাডেমী পত্রিকা, পৌষ-চৈত্র, ১৩৬৭ সন দ্রষ্টব্য।

মুকিম, শাহপরী-মালিকজাদা ও হাসনবানু কাব্যের কবি মুহম্মদ আলী, আজরশাহ-সমনরোখ, সূজন-চিত্রাবতী, দিলারাম প্রভৃতি রচক মুহম্মদ চুহর, বানুহোসেন-বাহরামগোর, কামরূপ-কালাকাম প্রভৃতি রচয়িতা মুহম্মদ জীবন, লালমতী-তাজলমুলক রচয়িতা কবি তমিজী মিশররাজকুমার আব্দুল আজিম প্রণেতা ঈশ্বর-গোলাম, মলয়া-মাহমুদ রচয়িতা কাজী হাসমত আলী চৌধুরী এবং আলোচ্য মনুচেহের-মা'সুমা পরী রচক বাকের আলী চৌধুরী।

১১'১৬' পরিমিত কাগজের বই। পত্র সংখ্যা ৩৭৩। হাতের লেখা সুন্দর ও স্পষ্ট। সম্পূর্ণ আছে। পাণ্ডুলিপির আবরণপত্রে নীচের কথাগুলো লেখা হয়েছে :

শ্রীশ্রী হক নাম। মনুচেহের মাহাছিমা পরীর প্রস্তাব। চট্টগ্রাম জিলার রাউজান থানার অন্তর্গত গহিরা নিবাসী মৃত সেখ মাহাম্মদ রফি চৌধুরির পুত্র সেখ মাহাম্মদ বাকর আলী চৌধুরি কৃত আরবি অঙ্করে ছিল। ঐ বাকর আলী চৌধুরীর পুত্র শ্রীযুক্ত সেখ মুন্সি বসারত আলী সাহেবের অনুমতি মতে আমি তাহান পুত্র শ্রী সেখ তোপজ্জল আলীর বকলমে বাঙ্গালা অঙ্করে লিখিত হইল। সন ১২৯৩ বাঙ্গালা মোতাবেক ১২৪৮ মঘী তারিখ ১৩ অম্বাহায়ণ।

অতএব, কবিরই পৌত্র শেখ তোফাজ্জল আলীই লিপিকর এবং লিপিকাল ১২৯৩ সন বা ১২৪৮ মঘী তথা ১৮৮৬ খ্রীস্টাব্দ; আর কবি আরবি হরফেই কার্যখানি রচনা করেছিলেন। আলোচ্য পাণ্ডুলিপিটি কবির বাড়ীতে যত্নে সংরক্ষিত আছে।

সণ্ড সোরা পদে মোর হাজার ছালাম
যা হোস্তে যাহের হৈল ফারসি কালাম
হজরত ওস্তাদ মোর সাদেক মোহাম্মদ
কোটি কোটি নমস্কার তার যুগপদ।
রাঙ্গুনিয়া গেরামেতে তাহান বসতি
পুষ্প বন মধ্যে যেন সুগন্ধি আকৃতি।
বহুল বিস্তর কেছা চতুর্দশ বার
কেতাবেত কহিয়াছে তার পরস্তাব।

তাহান কিঙ্কর মুই মিচকিন অধীন
বাকর আলী মোর নাম সভা হস্তে হীন।
গহিরাতে বসবাস থানা রাউজান
চৌধুরি রফির পুত্র জানে সর্বজনে
মনুচেহের কেছাবাগী ফারসি জবান
কেতাবেতে লিখা আছে তাহার বয়ান।
বাঙ্গালার ভাষে তাকে করিনু পদবন্ধ
সকলে জানিতে হেতু পয়ার সুছন্দ।

এ থেকে জানা যায়, কবি 'সণ্ড সোরাহ'র ফারসি কাব্য অবলম্বনে 'মনুচেহের মা'সুমা পরী' কাব্য রচিত হয়। বাঙলা কাব্যটির কবি প্রদত্ত নাম 'মনুচেহের কেছা'। কাব্যটি চৌদ্দ বাবে সমাপ্ত। কবির উস্তাদের নাম সাদেক মোহাম্মদ। তাঁর নিবাস ছিল রাঙ্গুনিয়া গাঁয়ে। কবির বাড়ী ছিল রাউজান থানার অন্তর্গত গহিরা গ্রামে। জমিদার বংশেই কবির জন্ম। তাঁর সময়েই জমিদারী নিলাম হয়ে যায়। কবির বংশধরেরা আজো গহিরা গ্রামে বাস করেন এবং বিস্তে ও আভিজাত্যে তাঁরা আজো সুখ্যাত।

একটি ভণিতা ও আবরণ পত্রোক্ত বিবৃতির আলোকে কবির কুর্সিনামা দেয়া হল। ভণিতাটি এই :

কহে হীন বাকর আলী রফির নন্দন
গহিরা গেরামে ঘর জানে সর্বজন

দাদা মোর আজিজুল্লা সর্বগুণ ধাম
আবদুল মজিদ মোর পরদাদার নাম।
জমিদারী ছিল মোর গোলাম আজিজ
লঘু হস্তে বেচা গেল নিলামেত নিজ।

আগেই বলেছি, মনুচেহের মা'সুরা পরী উপাখ্যানটি কবি সপ্ত সোরাহর ফারসি কাব্যের অনুবাদ। কবির স্বগ্রামবাসী সফর আলী নামের এক ব্যক্তির অনুরোধেই কবি এ কাব্য রচনায় ব্রতী হন :

শ্রীদেওয়ান আলী সূত সফর আলী নাম
ভাগ্যবন্ত কুলশীল গহিরা গ্রাম

তাহান আরতি মতে বাকর আলী
সমাগু নবম বাব রচিল পঞ্চালী।

রচনাকাল

কাব্যের উপসংহারে তারিখ দেওয়া আছে :

পুস্তক সমাগু হৈল চতুর্দশ ভাগ
বার শত একাদশ অন্দ পঞ্চ মাঘ।

শুভ শুক্রবারে আমি পড়িয়া নামাজ
সমাগু করিলাম এই পুস্তকের কাজ।

চট্টগ্রামে মঘী সনই প্রচলিত; কাজেই ১২১১ অবদ মঘী সনই নির্দেশ করে। অতএব ১২১১ মঘীর ৫ই মাঘ শুক্রবার (১৮৪৯ খ্রীস্টাব্দে) কাব্য রচনা শেষ করে কবি সবিনয়ে পাঠকের হাতে তুলে দেন।

কাহিনীটি সুদীর্ঘ হলেও বৈচিত্র্যহীন। মা'সুরা পরীর প্রতি মনুচেহেরের আসক্তি, তজ্জাত বিকার এবং নানা বাধাবিঘ্ন অতিক্রমণের পর উভয়ের মিলনে কাহিনী সমাপ্ত হয়েছে। কবির ভাষা ও ভঙ্গী সাধারণ।

একটি ভণিতা :

সফরালি আরতি গুনি মনুচেহের কেছা বাণী
কহিলেণ্ড হীন বাকর আলী
বাঙ্গালা দখল হানি ফারসি কালাম জানি
প্রচারিল পয়ার পঞ্চালি।^১

৩. মুহম্মদ মুকিম

মুহম্মদ মুকিম উনিশ শতকের প্রথমপাদের কবি। তাঁর গ্রন্থে চট্টগ্রামের ইতিহাসের নানা উপকরণ রয়েছে বলেই গ্রন্থটি মূল্যবান। গুলে বকাওলির কবির পিতার নাম সৈয়দ মুহম্মদ দৌলত। কবির বাল্যকালে পিতৃবিয়োগ ঘটে। মুহম্মদ মুকিমের জন্ম আঠারো শতকের শেষ পাদে এবং তিনি উনিশ শতকের প্রথম পাদের কবি। গুলে বকাউলি বা তাজুল বকাউলি সম্ভবত কবির একমাত্র রচনা। আলোচ্য কবি মুহম্মদ মুকিমের আদর্শ ছিল ফারসি কাব্য-

নর-পরী প্রসঙ্গ এক ফারসি কিতাব

তাজুল বকাওলি কিসসা ফারসি বয়ান

বঙ্গভাষে মুহম্মদ মুকিম যে ভাণ।

ইজ্জতউল্লাহর কাব্যই ছিল তাঁর অবলম্বন।

^১ বাঙ্গালা একাডেমী পত্রিকা, ১৩৬৮ সন, ৫ম বর্ষ, ১ম সংখ্যা বৈশাখ-আষাঢ়।

কবির পূর্বপুরুষের নিবাস ছিল ফেনীর পশ্চিমভাগে যুগদিয়া দেশে। সেখান থেকে এসে চট্টগ্রামের ফতেয়াবাদে এবং তার পরে ফটিকছড়ি থানার অন্তর্গত আজিমপুর গাঁয়ে কবির এক পূর্বপুরুষ বসতি স্থাপন করেন। তারপরে আর এক পূর্বপুরুষ রাউজান থানার নয়াপাড়া গ্রামে এসে বাস করেন। এ গাঁয়েই কবির জন্ম। কবি রাউজানের জমিদার আলি বা মুহম্মদ আকবর চৌধুরীর গোমস্তা ছিলেন। মনে হয় কবি জমিদার আকবর চৌধুরীর বয়োজ্যেষ্ঠ ছিলেন। তাই গ্রন্থ রচনাকালে কবি আকবর চৌধুরীর তিন পুত্রের নামোল্লেখ করেছেন। যদিও এঁর ছিল পাঁচ পুত্র ও দুই কন্যা। কাজেই কবি উনিশ শতকের প্রথম দুই দশকের মধ্যে গ্রন্থ রচনা সমাপ্ত করেন বলে মনে হয়। কবির মনিব আলী বা মুহম্মদ আকবর চৌধুরীর মৃত্যু হয় ১৮৫৭ খ্রীস্টাব্দে। এবং আকবর চৌধুরীর পুত্র সাদত আলী চৌধুরী ওফেরে হারি মিয়া চৌধুরীর মৃত্যু হয় ১৮৮৬ খ্রীস্টাব্দে। অতএব, মুহম্মদ মুকিমের জন্ম হয়তো আঠারো শতকের শেষার্ধ্বে তখন ইংরেজ নৃপতি যে ফিরিঙ্গির জাত। চিরদিন ইঙ্গরেজ এথা মহিপাল।' উনিশ শতকেই 'চিরদিন ইঙ্গরেজ এথা মহিপাল' বলা সম্ভব।

কবির শিক্ষক ছিলেন এক নজুমউদ্দীন। আর পীর ছিলেন কবি সৈয়দ সুলতানের দৌহিত্র বংশীয় এক মীর বা সৈয়দ মুহম্মদ সৈয়দ।

কাব্যরচনায় কবিকে প্রবর্তনা দিয়েছিলেন শাহ গাজীশিরীফ বংশীয় শাহ আসহাবুদ্দীন এবং মোহাম্মদ তকী ও মোহাম্মদ দানিশ।

মুকিম পণ্ডিত কবি। স্তুতিখণ্ডে হামদ, মাহাত, আসহাব, চারপীর, বারো ইমাম, চৌদ্দ খানদান, সাত আসমান, সাত দ্বীপ, সাত সমুদ্র, সাত খণ্ড ভূমি, পর্বত, রাজসিংহাসন প্রভৃতির বন্দনা রয়েছে। রাজসিংহাসন বর্ণনায় শাহজাহান পুত্রদের বিবাদ ও আওরঙ্গজেবের সিংহাসন প্রাপ্তির বর্ণনাও রয়েছে। তা'ছাড়াও আছে কবির সুবিস্তৃত বংশ পরিচয়। সবচেয়ে মূল্যবান তথ্য হচ্ছে মুকিমের পূর্ববর্তী ও সমকালের মুসলিম কবিদের নামোল্লেখ। পূর্ববর্তী কবি হচ্ছেন : সৈয়দ সুলতান, মুহম্মদ খান, কাজী দৌলত, আলাউল, আবদুন নবী, গিয়াস, মুজাম্মিল, হাবুত রোয়াজা, শেখ পরাগ, পরাগল, ফাজিল নাসির মুহম্মদ, তাহিরহ মুহম্মদ আলী, চামু এবং কবির সমকালের তথা উনিশ শতকের প্রথমার্ধে জীবিত কবিরো হচ্ছেন আলি রজা [১৭৫৯-১৮৩৭] হারি, আলি মিয়া, মুনশী মুহম্মদ মুকিম [ফায়দুল মুকতদী রচনা ১৭৯১ খ্রীঃ], কাজী দানেশ, মুহম্মদ তকী ও মুহম্মদ দানিশ। আর চট্টগ্রামের প্রসিদ্ধ দরবেশ হচ্ছেন শাহ জাহিদ, শাহ পত্নী, শাহ পীর, হাদী বাদশাহ, শাহ সুন্দর ফকির, শাহ সুলতান, শেখ ফরিদ ও বদর।

গুরুত্বপূর্ণ প্রয়োজনীয় অংশগুলো কবির ভাষায় এখানে সংকলন করে দিলাম :

মুকিম আসহাবুদ্দীনের মুখে কিসসা শুনে তাঁর থেকেই নিয়েছিলেন ফারসি কেতাব বাঙলায় অনুবাদের জন্যে :

নর-পরী প্রসঙ্গ এক ফারসি কিতাব
হেরিয়া কহিল মধুভাসে পরস্তাব।

তানপদে নিবেদিয়া লইলুঁ কিতাব
রক্তভাবে কহিবারে গেল মনে ভাব।

কটিকা গ্রামের মোহাম্মদ তকী তথা সর্বশ্রেষ্ঠ হএ....

তাঁর-পদ নমি আজ্ঞা লৈলুঁ কহিতে সুকৃতি।

দুনিয়ার পাঠক এক হও! ~ www.amarboi.com ~

এবং চট্টগ্রাম শহর সংলগ্ন সুলুফবহর গ্রামের

মোহাম্মদ দানিশ নামে বুদ্ধি পরবল

গুণবন্ত মহাধীর প্রায় আলাওল।

তানপদ নমস্কারি লই শুভ বিধি।

—কবি গ্রন্থের অনুবাদ শুরু করেন। এবং শুরুতে পূর্ববর্তী ও সমকালীন কবিদের শ্রদ্ধার সঙ্গে স্মরণ করেন :

তবে প্রণামিবি আমি পূর্বকবি জান
পীর মীর চক্রশাল [বাসী] সৈয়দ সুলতান।
মোহাম্মদ খান বিতর্পন দৌলত কাজীবর
এহি তিন আর এক আছএ তৎপর।
গৌড়বাসী রৈল আসি রোসানের ঠাম
কবিগুরু মহাকবি আলাওল নাম।
আর বৃদ্ধ মহাশয় আবদুল নবী নাম
গয়াছক, মুজাম্মিল সুধীর উপাম।
আলি মোহাম্মদ আর চামু বৃধজন
পূর্বধীর নামে নামে প্রণামী চরণ।

অখনের পণ্ডিত আছএ হখাতখা
হাবুত রোয়াখী, শেখ পরান, পরাগল
ফাজিল নাসির, তাহির সকল।
সেসব প্রণাম করি কহিবাম ভ্রাতা।
শাহা আলী রাজা পদ করিয়া প্রণাম
হারি নাম আলি মিয়া পদেত সালাত
মুনশী নাম মোহাম্মদ মুকিম বন্দিয়া।
অগ্রগামী মিয়া চলিলুঁ পাছে পাছে।
পীরের নাম—
পীর মীর মোহাম্মদ সৈয়দক সালাম।

ভণিতা :

শ্রীযুত মোহান্ত সৈয়দ পীরবর
তানপদ প্রণমিয়া শ্রীলয় মুকিম

কিংবা, শ্রীলয়এক মোহাম্মদ মুকিম রচিত^১

৪. মুনশী মুহম্মদ মুকিম পণ্ডিত

ইনি ছিলেন চট্টগ্রামের ইদিলপুর গ্রামবাসী। ইনিই অপ্রাপ্ত যুগাবতী, কামরূপ-কালাকাম, আইউব নবীর কিসস ও প্রাপ্ত ফায়দুল মুকতবী—এ চারখানা গ্রন্থ প্রণেতা। গুলেবকাউলির কবি মুকিম উনিশ শতকের প্রথমপাদে কেবল ওই একখানা গ্রন্থই রচনা করেছিলেন বলে মনে হয়, ডক্টর মুহম্মদ এনামুল হক নামের সাদৃশ্যে বিভ্রান্ত হয়েছিলেন।^২ মুসলিম ধর্মসাহিত্য অধ্যায়ে এঁর পরিচিতি দৃষ্টব্য।

৫. সৈয়দ মুহম্মদ নাসির

সৈয়দ মুহম্মদ নাসির রচিত আদ্যন্ত খণ্ডিত একখানি, ‘বেনজীর-বদর-ই-মুনীর’ পাওয়া গেছে। এটি সুপরিচিত ফারসি ও উর্দু প্রণয়োপাখ্যানের বাঙলা অনুবাদ বা অনুসৃতি। উর্দু কবি মীর হাসান দেহলভী ১১৯৯ হিজরীতে তথা ১৭৮৪-৮৫ খ্রীস্টাব্দে বেনজীর-বদর-ই-মুনীর উপাখ্যান রচনা করেছিলেন। রাজকুমার বেনজীর এবং রাজকন্যা বদর-ই-মুনীরের প্রেম ও মিলন কাহিনীই বর্ণিত হয়েছে। বিশ শতকে দোভাষী শায়ের শেখ কমরউদ্দীন এ বিষয়ক একখানা

^১ বিস্তৃত বিবরণের জন্য পুঁথিপরিচিতি, পৃঃ ৯৪-১০৪ দ্রষ্টব্য।

^২ মুসলিম বাঙ্গলা সাহিত্য, পৃঃ ২৮৩-৮৭।

এবং আজিমউল্লাহ খান অপর একবানা কাব্য রচনা করেছেন। সৈয়দ মুহম্মদ নাসির ও 'সিরাজ সবিল' রচক কবি সৈয়দ নাসির সম্ভবত অভিন্ন ব্যক্তি। বিস্তৃত বিবরণের জন্যে 'ধর্মসাহিত্য' অধ্যায়ের কবি সৈয়দ নাসিরউদ্দীন প্রসঙ্গ দ্রষ্টব্য।

৬. আজগর আলী পণ্ডিত

'চিনলেম্পতি' নামের এক উপাখ্যান রচনা করেন আজগর আলী পণ্ডিত। চট্টগ্রামের ফটিকছড়ি থানার নানুপুর গায়ে তাঁর জন্ম। তাঁর বংশধরেরা এখনো নানুপুর গ্রামে বাস করেন। কবি মঈ, বাঙলা, হিজরী ও খ্রীস্ট অব উল্লেখ করেছেন প্রথানুসারে হেঁয়ালিতে। তা' থেকে ১২৭৫ বঙ্গাব্দ বা ১৮৮৬ খ্রীস্টাব্দ পাওয়া যায়। ১৯০৫ সনে কবির পুত্র ওবেদুর রহমানের উদ্যোগে বটতলা থেকে ৩৪০ পৃষ্ঠার এ বিপুল কলেবর পুথি প্রকাশিত হয়েছিল। কাব্যে কবির আত্মপরিচিতি রয়েছে। গৌড় থেকে আসেন হাফেজ কালামণি, তাঁর পুত্র পরম্পরা এক্রূপ : হীরাগাজী-এয়ার মোহাম্মদ- আজিজ- মুহম্মদ সাদেক-আজগর আলী (কবি)। তাঁর কাব্যরচনার আদেষ্ঠা ছিলেন স্বগ্রামবাসী মুন্শী আমানুল্লাহ :

মুন্শী আমানুল্লা নাম বাসস্থান সেই গ্রাম
বিদগধ দেশের প্রধান
লেম্পতির সুপ্রসঙ্গ পারস্য কবিতা বঙ্গ
ভাষে কবি দেও রসজ্ঞান।

অতএব চিনলেম্পতি কাব্য ফারসি উপাখ্যানের স্তম্ভসূতি।

১. উনিশ শতকের কুমিল্লার পশ্চিমগাঁওর জমিদার নওয়াব ফয়জুননিসা বেগম আত্মকথামূলক এক বিপুল কলেবর উপাখ্যান রচনা করেন গদ্যে-পদ্যে ১৮৬০-৭০ সনের দিকে। ১৮৭৩ খ্রীস্টাব্দে বইটি মুদ্রিত হয়েছিল। গ্রন্থের নাম 'রূপ জালাল'। আত্মকথামূলক বলেই এটি মৌলিক রচনা।
২. ঈশ্বর গোলাম নামের এক কবি 'মিশররাজকুমার আবদুল আজিমের উপাখ্যান' রচনা করেছেন।
৩. বিশ শতকের গোড়ার দিকে উজির আলি মুন্শী রচনা করেছেন সায়েদ কুমারের পুথি। কবির নিবাস ছিল চট্টগ্রামের পটিয়া থানার নিকটস্থ হাইদগাঁও গ্রামে।
৪. চট্টগ্রামের পটিয়া থানার জঙ্গলখাইন গাঁয়ের ফজলুর রহমান চৌধুরী 'গুলশনে বাহার' নামের প্রণয়োপাখ্যান রচনা করেন ১৩২৬ (?) সনে নিজব্যয়ে মুদ্রিত করেছিলেন।
৫. চট্টগ্রামবাসী কায়ুমউদ্দীন পণ্ডিতের কাব্যের নাম 'চমন বাহার'। এটিও বটতলা থেকে ছাপা হয়েছিল।

৭. কবি তমিজী

প্রতিপোষণ ও সাহিত্যশিল্প

আগেকার যুগে দেশে শিল্প-স্থাপত্যের ও সাহিত্য সংস্কৃতির চর্চা হত ধনী-মানীদের আগ্রহে ও তাঁদের অকুণ্ঠ বদান্যতায়, এবং অকুপণ পৃষ্ঠপোষকতায়। ধনে কাঙাল কিন্তু মনে ধনী বুদ্ধিজীবী কবি পণ্ডিতগণ ধনীর আশ্রয় পেলে খোরপোষের ভাবনা মুক্ত হয়ে মনের দ্বার খুলে দিতেন।

এভাবে যুগযুগ ধরে দেশে দেশে সাহিত্য-শিল্পাদি কলার পরিচর্যা সম্ভব হয়েছে। সে যুগে লেখকেরা ধনীর খেতেন তাই তাঁদের তোয়াজ-তারিফে পঞ্চমুখ হয়ে উঠতেন। এ যুগ গণ-যুগ, জনসাধারণই লেখকের ভোক্তা, তাই এ যুগের সাহিত্য ও শিল্প গণস্বার্থের জয়গানে মুখর। এতেই বোঝা যায়, কারো আশ্রয় ও প্রশ্রয় না পেলে কলাসেবীর চলে না। সেদিনও চলত না, আজো চলে না। ধনীর দানের প্রয়োজন আজো রয়েছে, তবে কালভেদে ধরন পাণ্টে গেছে। আগে ছিল তা ব্যক্তিক, এখন হয়েছে প্রাতিষ্ঠানিক এবং আগে ছিল রাজকীয়, তন্ত্রভেদে এখন হয়েছে সরকারী। আগেকার দিনে ইত্যাকার পোষকতার পশ্চাতে ছিল আভিজাত্য গর্ব, বিলাস ও অনুগ্রহ, আর এ যুগে রয়েছে দায়িত্ব ও কর্তব্যবোধ। গেল শতকের এই সময়টায় মধুসূদনও কলম ধরেছিলেন পৃষ্ঠপোষকতায়। কলার চর্চা ও পরিচর্যা সেকালে তো বটেই, একালেও আভিজাত্যের ও সংস্কৃতিপরাণতার প্রধান পরিচায়ক।

এখানে আমরা বাঙলাসাহিত্যের পোষক একজন জমিদারের সঙ্গে পরিচয় করিয়ে দেব। কালের দিক দিয়ে এ বিদ্যোৎসাহিত্য ও পৃষ্ঠপোষকতা তেমন মূল্যবান না হলেও কীর্তি হিসেবে তা তুচ্ছ নয়।

কক্সবাজার মহকুমার রামু থানার অন্তর্গত 'মিঠাসরাহ' গায়ে ১৮১৫ খ্রীস্টাব্দে আলী হোসেন চৌধুরী ওরফে কালাচাঁদ চৌধুরী (১৮১৫-৬৬) ধনী পরিবারে জন্ম গ্রহণ করেন।

তার বংশলতা এরূপ :

মুহম্মদ রুহুল আমীন- নূরমুহম্মদ- মুহম্মদ আসকর চৌধুরী- রুস্তম আলী চৌধুরী- আলী হোসেন চৌধুরী (জ, ১৮১৫ মৃঃ ১৮৬৬ খ্রীঃ)- আবদুল ফতাহ চৌধুরী (১৮৫৭-৭৮)- এম বদরমদোজা (১৮৭৬-১৯৫১খ্রীঃ)।

জমিদার আলী হোসেন চৌধুরী প্রসিদ্ধ ব্যক্তি ছিলেন। তিনি কালাচাঁদ চৌধুরী নামেই সাধারণ্যে পরিচিত ছিলেন। তাঁর প্রজাহিতৈষণা, বিদ্যোৎসাহিত্য ও বদান্যতা তাঁকে জনপ্রিয়তা ও নৃপতির মর্যাদা দিয়েছিল। তিনি নিজের বাড়িতে দালান, প্রাচীর ও মসজিদ তৈরি করেছিলেন এবং রামুর আলী হোসেন চৌধুরীর হাট ও গর্জননিয়ার হাট প্রতিষ্ঠা করেন; রামুর হাইস্কুল ও মাদ্রাসা তাঁরই কীর্তি। গরীব ছাত্রেরা তাঁর বাড়িতে নিখরচায় খেতে পেত। বহু লোক নিয়ে (জাহাজের আধখানা ভাড়া করে) তিনি দু'বার হজ করেন। চট্টগ্রাম শহরের চন্দনপুরায় তাঁর বাসাবাড়িতে কক্সবাজার অঞ্চলের ছাত্র ও মুসাফিরেরা বিনা ভাড়ায় থাকতে পারত।

আলী হোসেন চৌধুরীর সভার চারজন কবির নাম ও রচনা পাওয়া গেছে। তাঁদের নাম তমিজী, হাজী আলী, ফকির আসকর আলী ও লোকমান আলী। আরো কবির তিনি আশ্রয়দাতা ছিলেন কিনা, আজো জানা যায়নি। উক্ত কবিগণের তোয়াজের ভাষায় তিনি 'ঠাকুর', 'নৃপতি' ও 'সুলতান' হয়ে উঠেছেন। 'ঠাকুর' মগ আমলের উচ্চ সম্মানসূচক উপাধি। এ থেকে আমরা বুঝতে পারি উনিশ শতকের প্রথমার্ধেও দক্ষিণ চট্টগ্রামে রোসাঙ্গ (সংস্কৃতির রেশ ছিল।

আলী হোসেন চৌধুরীর সমকালে কোলকাতায় পাশ্চাত্য আদর্শে বাঙলা গদ্য রচনায় প্রয়াস দেখা দিলেও কোলকাতার বাইরে তখনো পুরোনো ধারায় সাহিত্য সৃষ্টি চলছিল। কাজেই বাঙলার প্রান্তসীমা রামুতেও পুরোনো ধারার পরিচর্যা হচ্ছিল; আর একটি কথা, দোভাষীরীতি যে কোলকাতা অঞ্চলের বাইরে চালু ছিল না, তারও নতুনতর প্রমাণ মিলল আলোচ্য এ চারজন কবির ইসলামী সাহিত্যের ভাষায়।

কবি তমিজী

আলী হোসেনের আশ্রিত কবি তমিজী 'লালমতী-তাজলমলুক' নামে একখানি উপাখ্যান রচনা করেন। তমিজী কবির কলমী নাম (তাখাল্লুস) কিংবা প্রকৃত নাম বোঝা যায় না। পৃষ্ঠপোষকের পরিচয় প্রসঙ্গে তমিজী বলেছেন :

নিধনী আলেম অলি পণ্ডিতের গণ।	পিতা হস্তে এখনেত হাজারে হাজার
অন্ন বস্ত্র ভূমি দানে করএ পালন।।	অসাধিত বহু রাজ্য সাধিল কুমার।।
পিতামহ অবধি ধনের অধিকার।	সর্বগুণে বিশারদ এলম সাগর।
আদ্য হস্তে এবে হৈল শত গুণ ভাণ্ডার।।	গুণী জ্ঞানী 'ধিক মানী রসের নাগর।।
	সুন্দর শরীর যেন মুরতি মদন।
	ফুটিয়াছে চম্পা যেন রস বিনোদন।।

একটি ভণিতা :

ঠাকুর আলী হোসেন ধীর আরতি করিয়া স্থির
রামু গ্রামে বৈসে মহাশয়।
তাহান আরতি শুনি আপনার মনে গুণি
হীন তমিজী ভণএ

অন্যত্র

রস 'দধি গুণধাম' আলি হোসেন নাম
সুআরতি শুনিয়া তাহান।
তাহান পীরিত্তি রসে আর তান উপদেশে
ইনিমতি তমিজীএ ভাণ।।

মরহুম আবদুল করিম সাহিত্যবিশারদ-সংগৃহীত তমিজীর লালমতী-তাজলমলুক উপাখ্যানের পাণ্ডুলিপিখানি আদ্যন্ত খণ্ডিত। যা আছে তারও কয়েকটি পত্র অর্ধ ছিন্ন এবং মধ্যে মধ্যে অনেক পত্র নেই। কাজেই কাহিনীটা পুরো অনুসরণ করা সম্ভব হয়নি, তবে এ কাহিনীর একটি বৈশিষ্ট্য নজরে পড়ে। এ উপাখ্যানের সঙ্গে নবী সোলেমান ও এক বেঙ্গমা পক্ষী জড়িত এবং ঘটনাপ্রবাহের সঙ্গে আল্লাহরও প্রত্যক্ষ যোগ রয়েছে। এ কাহিনীতে বিহঙ্গম চরিত্রের মাধ্যমে নিয়তির বিরুদ্ধে সংগ্রাম ও আত্মপ্রত্যয়পুষ্ট প্রতিরোধ-প্রয়াস মহিমার রূপ নিয়েছে। যদিও নিয়তির বা আল্লাহর ইচ্ছারই জয় হয় সর্বত্র।

নবী সোলেমান মহাপ্রতাপশালী রাজা। তাঁর প্রভাব সর্বত্র :

অষ্টাদশ সহস্র আলম জীবধারী

অনুমতি মানে সবে কিবা দেও-পরী।

একদিন জিবরীল এসে নবীকে জানালেন, মশরেকী রাজ্যের রাজা জেবলমলুকের পুত্র তাজলমলুকের সঙ্গে মগরেরী রাজ্যের রাজকন্যা লালমতীর মিলন হবে। কেননা :

দোহান যোটক প্রভু আর্শেত বাক্সিলা	বিনি বিভা দোহানে জন্মিব ফরজন।
দোহ মধ্যে সম্বন্ধ হইতে আজ্ঞা দিলা।	পঞ্চশত অঙ্গ পশ্বে দ্বাদশ বৎসরে
দোয়াদশ অঙ্গ মধ্যে করিব মিলন	একত্র করিব প্রভু আজ্ঞা অনুসারে।

দুনিয়ার পাঠক এক হও! ~ www.amarboi.com ~

আদ্যস্ত খণ্ডিত পুথি থেকে তমিজীর পরিচয় ও কাব্যের রচনাকাল জানা গেল না, তবে আলী হোসেন চৌধুরীর পরিচয় কবি যেভাবে দিয়েছেন, তাতে মনে হয় তখন আলী হোসেন প্রৌঢ়। কাজেই অনুমান করা যায়, ১৮৫৫ থেকে ১৮৬৫ খ্রীস্টাব্দের মধ্যেই তমিজী উপাখ্যানটি রচনা করেন।

৮. আসাদ আলী চৌধুরী

চট্টগ্রামের রাঙ্গুনিয়া থানার হোসেনাবাদ ওর্ফে খীলমগল ওর্ফে রাজানগর গাঁয়ে আসাদ আলী চৌধুরীর তালুকদার পরিবারে জন্ম। তাঁর পিতার নাম বেচাগাজী চৌধুরী। ৪৫৮ পৃষ্ঠায় সমাপ্ত ও বিপুলকায় প্রণয়োপাখ্যান ১২৫২ মঘীতে বা ১৮৯০ খ্রীস্টাব্দে রচিত—

সন মঘী রাখি এথা তারিখ বানিয়া
কর শর ভুরু গুরু নিয়মে ধরিয়া।
মিথুনের আদ্যপক্ষ ভুবন বিদিত
লিখা অবসান দিলু ভার্গব লুকিত।
(কর-২, শর-৫, ভুরু-২, গুরু-১, ১২৫২ মঘী)।

কবির পীর ছিলেন চট্টগ্রামের পোমরা গ্রামবাসী নজুম। প্রথম চব্বিশ পৃষ্ঠাব্যাপী হামদ, না'ত ও কবির আত্মপরিচয় অংশে কয়েকজন পণ্ডিত সৃষ্ণের বর্ণনাও রয়েছে। কবি কোন লোকপ্রচলিত কাহিনী অবলম্বনে তাঁর 'বিজনন্দিনী' নামের কাব্যে 'নটনন্দিনী রহস্য' উদঘাটন করেছেন। 'বিদগধ ধীর জনে কহিছে কাহিনী'—এ উক্তিই আমাদের অনুমানের ভিত্তি।

৯. খোন্দকার শামসুদ্দীন মুহম্মদ সিদ্দিকী

আধুনিক বাঙলা গদ্য রচনায় মুসলমানদের মধ্যে যারা অগ্রণী ছিলেন, তাঁদের মধ্যে খোন্দকার শামসুদ্দীন মোহাম্মদ সিদ্দিকী অন্যতম। কিন্তু তিনি শুধু গদ্য রচনা করেননি, কাব্যচর্চাও করেছিলেন। তাঁর কাব্যখানার নাম 'ভাব-লাভ'। ভাব-লাভ নামের অর্থ 'উদ্দেশ্যানুসারে সিদ্ধি'।

কাশ্মীর রাজ্যের অধিপতি ছিলেন মুহম্মদ শাহ, তাঁর মন্ত্রী ছিলেন আহমদ। উভয়েই নিঃসন্তান ছিলেন। সন্তান কামনায় সাধনা করে যথাসময়ে সুলতান ও মন্ত্রী উভয়ে পুত্রসন্তান লাভ করলেন। শাহজাদার নাম রাখা হল সৈয়দ আহমদ আর মন্ত্রীপুত্রের নাম রাখা হল নূর আহমদ। সুলতান মন্ত্রীর কাছে 'জবান' দিয়েছিলেন, যদি একের পুত্র এবং অপরের কন্যা হয় তবে উভয়ের বিয়ে দেবেন আর যদি উভয়ের পুত্র বা কন্যা হয় তবে তাদের মধ্যে দোস্তী করিয়ে দেবেন। এভাবে সৈয়দ আহমদ ও নূর আহমদ পরস্পরের অন্তরঙ্গ বন্ধু হলো। তার পরের কাহিনীতে পরী ও মধুমালতীর এবং লোর-চন্দ্রানীর আদল আছে।

'ভাব-লাভ' একটি রোমান্টিক কাব্য। কবির চরিত্র চিত্রণ নৈপুণ্য বা কবিভূক্তি শক্তি উচ্চ দরের নয়, পাণ্ডিত্যও উল্লেখযোগ্য নয়। অবশ্য কাব্য থেকে সেকালের সামাজিক রুচিপ্ৰকৃতিরও কিছু আভাস পাওয়া যাবে। কবির মধ্যে একটু অধ্যাত্মপ্রবণতা আছে। তাই তিনি কাহিনী বর্ণনায় যেখানেই একটু সুযোগ পেয়েছেন, সেখানেই আধ্যাত্মিকতা শুনিয়েছেন। তাঁর কাব্যান্তর্গত বাঙলা ও হিন্দিগানগুলোতে আমাদের উক্তির সমর্থন মিলবে।

কবি শামসুদ্দিন সিদ্দিকীর নিবাস ছিল বর্ধমান জিলায়। তিনি 'উচিত শ্রবণ' নামে গদ্য-পদ্যে অপর একখানি অধ্যাত্মবিষয়ক পুস্তক রচনা করেন। এইটে প্রকাশিত হয় ১২৭১ বাঙলা সনে (১৮৬৫ খ্রীঃ)। এই গ্রন্থেই আমরা তাঁর গদ্য রচনার পরিচয় পাই। মনে হয় তাঁর 'ভাব-লাভ' কাব্যটিতে রয়েছে প্রাচীন ধারার শেষ নিদর্শন। সেকালে পঠিতব্য বিষয়- ফারসি, আরবি, নাগরী, ভৈরবী যত বিদ্যা সব ছিল। উক্ত নিয়মেতে বুদ্ধির বিদ্যাতে সকলেরে শিখে নিল।'

১০. কাজী হাসমত আলী চৌধুরী

কাব্যটির দুটো খণ্ড। প্রথম খণ্ড কয়মুস রাজার সঙ্গে রুম রাজার যুদ্ধ বৃত্তান্ত। এটি ৭৯টি পৃষ্ঠায় সমাপ্ত। দ্বিতীয়টি ৪১ পৃষ্ঠায় খণ্ডিত।

আলোচ্য পাণ্ডুলিপিখানির আবদুল করিম সাহিত্যবিশারদের দেয়া নাম ছিল 'কয়মুচ রাজার কেচ্ছা'। কেননা, পুথিতে কাব্যের নাম নেই। কিন্তু এ নাম বর্ণিত বিষয়ে পরিচায়ক নয়, তাই নায়ক-নায়িকার নামে কাব্যের নাম দেয়া যেতে পারে 'মলয়া-মাহমুদ'।

গোড়াতে ভারতসম্রাজ্ঞী ভিক্টোরিয়ার প্রশস্তি আছে। এ থেকে রচনা কালের আভাস পাওয়া যায় :

আছে বিকুটিয়া (ভিক্টোরিয়া) নারী সভা অধিকারী

বলবন্ত ন্যায়বস্ত্র মহাছত্রধারী।

কবি কাজী হাসমত আলী চৌধুরীর পিতার মৃত্যু হয় মগদের দোয়াদশ শত সপ্ত সনে অর্থাৎ ১২০৭ মঘী সনে বা ১৮৪৫ খ্রীষ্টাব্দে। অতএব ১৮৫৮ খ্রীষ্টাব্দে ভিক্টোরিয়া ভারতের শাসনভার গ্রহণ করার পরে 'মলয়া-মাহমুদ' উপাখ্যানটি রচিত হয়। কবির শিশুকালে তাঁহার পিতার মৃত্যু হয়েছে বলে উল্লেখ আছে অতএব কবি ১৮৩৫ খ্রীষ্টাব্দের দিকে জন্মগ্রহণ করেন।

সুদীর্ঘ ত্রিশ পৃষ্ঠাব্যাপী আত্মবিবরণে কবি অনেক অপ্রয়োজনীয় কথা বলেছেন। এ থেকে জানা যায়, কবি জমিদারসন্তান ও জমিদার ছিলেন। চট্টগ্রাম জেলার ভোজপুর গ্রামে তাঁর নিবাস ছিল। লোকশ্রুতি এই যে, তিনি প্রবলপ্রতাপ জমিদার ও সঙ্গীতজ্ঞ ছিলেন। তিনি 'আলেফ-লায়লা'র বঙ্গানুবাদ করেছিলেন বলেও শোনা যায়। তাঁর 'ফগফুর শাহ' কোন পৃথক রচনা নয়, আলোচ্য 'মলয়া-মাহমুদ' কাব্যেরই দ্বিতীয় খণ্ড। এ কাব্যের প্রথম খণ্ডে বর্ণিত হয়েছে মিসররাজ কয়মুসের সঙ্গে রুমরাজ আবদুল মজিদের যুদ্ধের বৃত্তান্ত এবং দ্বিতীয় খণ্ডে রয়েছে চীনরাজ ফগফুর শাহর কন্যা মলয়াজোহরার সঙ্গে মিসররাজ কয়মুসপুত্র সুলতান মাহমুদের মিলনকাহিনী।

কবির আত্মকথা থেকে তাঁর বংশপীঠিকা পাওয়া গেছে- মহব্বত সাধু- সাদুল্লাহ- আনিস মুহম্মদ- কাজী শাহাবুদ্দীন- হায়দর আলী- কবি হাসমত আলী। দুটো ভণিতা :

১. যুগ হাতে লই মাথে গুরু পদধূলি

২. মস্তক উপরে গুরু যুগপদ ধরি

ওঁথএ মুকতাহার শিশু হাসমত আলী।

রচে হীন হাসমত আলী সুধা সুলহরী।

সম্ভবত কাব্যটি মৌলিক রচনা। কাব্যের কোথাও অনুবাদ বলে উল্লেখ নেই। কাহিনীর পঠনশৈথিল্যও আমাদের এ অনুমানের পক্ষে ইঙ্গিত দান করে।

উনিশ শতকের মাঝামাঝি সময়ের রচনা হলেও কাব্যটিতে ক্রিয়াপদ প্রাচীন রূপে প্রযুক্ত হয়েছে। যেমন— চাহসি, গণসি, করসি প্রভৃতি। ক্রিয়াপদের এরূপ প্রাচীন প্রয়োগ আমরা আঠারো শতকের কবি মুহম্মদ জীবন ও মুহম্মদ দানিশের রচনায়ও দেখেছি। সম্ভবত এ সময়ে কবিসমাজে প্রাচীন রীতির প্রতি অগ্রহ জাগে।

মনে হয় ভাব-লাভ, মলয়া-মাহমুদ, দ্বিজেন্দ্রিনী, আনন্দবর্মা-রতনকলিকা, চন্দ্রাবতী প্রভৃতি প্রচলিত স্থানীয় রূপকথারই কাব্যায়ন। সেজন্যে এগুলোকে বিষয়ে না হলেও বক্তব্যে মৌলিক রচনা হিসেবেও গ্রহণ করা চলে।

আঠারো শতকের প্রণয়োপাখ্যানের হিন্দু রচয়িতা

তুর্কি মুঘলের ও ফারসি সাহিত্যের প্রভাব স্বীকার করে আঠারো শতক থেকে কয়েকজন হিন্দুকবি দেবকাহিনী পরিহার করে প্রণয়োপাখ্যান রচনায় ব্রতী হন। অবশ্য এর আগেই কালিকামঙ্গল নামের আবরণে নিছক রসসাহিত্য সৃষ্টির প্রেরণায় কেউ কেউ বিদ্যা ও সুন্দরের প্রেমকথা রচনায় উৎসাহী হয়ে ওঠেন। আঠারো-উনিশ শতকের যে-কয়টি প্রণয়োপাখ্যান রচয়িতার নাম পাওয়া যায়, তাঁরা হলেন 'চন্দ্রাবলী' রচয়িতা দ্বিজ পত্নপতি, মনোহর-মধুমালতী প্রণেতা গোপীনাথ দাস, শশিচন্দ্রের উপাখ্যান রচয়িতা রামজী বা রামজয় দাস, শীতবসন্তের লেখক বাণীরাম ধর, রূপবান-রূপবতী উপাখ্যানরচক সুনীল মিশ্র এবং সয়ফুলতমিজ-জরুখান রচয়িতা মহেশচন্দ্র দাস।

বিদেশী-বিজাতি-বিভাষী-বিধর্মী এসে দেশ দখল করে চেপে বসলে দেশের মানুষ তা' প্রসন্নচিত্তে সেকালেও বরণ করতে পারত না, যদিও রাষ্ট্রিক ও দৈশিক জাতীয়তাবোধ কিংবা স্বদেশপ্রেম রাজতন্ত্রের সেকালে একালের মতো সুস্পষ্ট ও লক্ষ্যনির্দিষ্ট ছিল না। তবে শাস্ত্রের সমাজের ও আচারের ক্ষেত্রে সে-যুগের মানুষ একালের মানুষের চেয়ে অনেক বেশি স্বাতন্ত্র্যপ্রিয় ও রক্ষণশীল ছিল। এবং স্বধর্মীর ঐক্যচেতনা ছিল প্রবল। বস্তুত এটিই ছিল সে-যুগে সমাজবদ্ধ মানুষের একমাত্র বন্ধনসূত্র।

সিদ্ধুতীরে অধিবাসী অর্থে বিদেশীর দেয়া 'হিন্দু' নামের সাধারণ সূত্রে আবদ্ধ হয়ে একক জাতিচেতনা লাভের পূর্বে ভারতের অধিবাসীরা কোন একক নামে পরিচিতি ছিল না। নিবাসের আঞ্চলিক নামে এবং ইষ্টদেবতার নামেই ছিল তাদের পরিচয়। যেমন শৌরসেনী মাদ্র শাক্ত লিঙ্গায়েত প্রভৃতি।

বিদেশীবিদ্বেষ্টীদের কিংবা স্বাতন্ত্র্যরক্ষাকামীদের মধ্যেও চিরকাল কিছু লোক থাকে যারা ব্যক্তিগত লাভলোভের বশে শাস্ত্রে-সমাজের ও স্বদেশের স্বার্থকে উপেক্ষা করে বিদেশী শাসকদের সঙ্গে জুটে যায়। তুর্কি-মুঘল-ব্রিটিশ আমলে আমরা তেমন লক্ষ লক্ষ মানুষ দেখেছি। এরা বৈষয়িক জীবনে উন্নতির জন্যেই মুখ্যত সরকারের শাসকের সহযোগী হয়, কিন্তু ঘনিষ্ঠ সম্পর্কের ফলে বিদেশী বিজাতির মানসসম্পদ আর ব্যবহারিক সংস্কৃতিও মুগ্ধচিত্তে গ্রহণ ও বরণ করে; তাতে স্বদেশী মনন ও সংস্কৃতিপুষ্ট ও সুষ্ঠুই হয়, ক্ষতি হয় না কিছুই। চাক্ষুষ প্রমাণ হচ্ছে সভ্যতা সংস্কৃতির যুরোপীয় অবদানে আমাদের মানসঋক্তি ও বৈষয়িক বৃদ্ধি।

তুর্কি-মুঘল যুগে কালগত নানা কারণে শাসক-শাসিতদের মনের ও মতের এবং মননের ও সংস্কৃতির প্রাথমিক দ্বন্দ্ব উত্তরণ অস্ত্রে তাদের মিলন ঘটতে দীর্ঘতর সময় গেলেছিল বটে, কিন্তু

মধুরগতিতে হলেও দক্ষিণ ভারতের ভক্তিদর্ম, উত্তর ভারতের সন্তদর্ম প্রভৃতির মাধ্যমে শাসক-শাসিতের সাংস্কৃতিক যোগাযোগ গভীর, ব্যাপক ও সুদূরপ্রসারী হয়েছিল। এবং দেয়া-নেয়ার বিভিন্ন ধারা বিচিত্রভাবে প্রবাহিত হয়ে অবশেষে শাসক-শাসিতের জন্যে প্রায় অভিন্ন জীবনচর্যার মিলনময়দান তৈরি হচ্ছিল সর্বক্ষেত্রে— ভক্তিবাদে, সূফীবাদে, সঙ্গীতে, চিত্রকলায়, স্থাপত্যে, পোশাকে, রাজনীতিতে। এমনি সময়ে এল ইংরেজ। ইংরেজ আমলে যুরোপীয় অবদানে জীবনচেতনার ও জগৎভাবনার ক্ষেত্রে শহুরে জীবনযাত্রায় সে-বাস্তিত্ব অভিন্নতা ও ঐক্য পূর্ণতা পেল— আজ সরকারী ভোজে উৎসবে পার্বণে কিংবা প্রাত্যহিক কাজের দপ্তরে পোশাকে, স্পর্শে ভিন্নতা ও স্বাতন্ত্র্য দুর্লভ্য।

বাঙলাদেশে সাহিত্যক্ষেত্রে চৈতন্যযুগ থেকেই তার গুরু এবং পীর-নারায়ণ ‘সত্যোর’ মাধ্যমে তার বিকাশ আর প্রণয়োপাখ্যান রচনায় তার পরিণতি লক্ষ্য করা যায়। সংস্কৃত হিন্দ ও অলঙ্কার, দেশী রাগতাললয় এবং ফারসি উপাখ্যান ও আঙ্গিক প্রভৃতির মিশ্রণে বাঙলা ভাষার ও সাহিত্যের বিকাশ ত্বরান্বিত হয়।

আমাদের আলোচ্য উপাখ্যান প্রণেতার এ বিকাশের প্রসাদ হিন্দু সমাজে বিতরণ করেন। এ প্রথম সাহিত্যক্ষেত্রে অভিন্ন বিষয়ে অভিন্ন লক্ষ্যে হিন্দু ও মুসলিম লেখক মিলিত হলেন না। কেননা রাধাকৃষ্ণবিষয়ক পদাবলীতে হিন্দু-মুসলিম পদকারীর ভাবগত ও উদ্দেশ্যগত পার্থক্য ছিল, এক্ষেত্রে তা ছিল না। নওয়াজিস খানের গুলেবকাউলির আদেষ্ঠা একজন হিন্দু জমিদার বৈদ্যনাথ রায় আর মহেশচন্দ্র দাসের ‘সয়ফুলজামিজ-জরুখতানে’র আদেষ্ঠা একজন মুসলিম ধনী আশরাফ।

পরিবেশ অনুকূলে ছিল বলেই চট্টগ্রামের হিন্দুরাই প্রথম নিছক প্রণয়োপাখ্যান রচনায় এগিয়ে আসেন।

১. রামজীবনদাস বা রামজয় রচনা করেছিলেন শশিচন্দ্রের কাহিনী। এ উপাখ্যান ও আলাউল রচিত ‘আনন্দবর্মা-রতনকলিকা কিসসা’ অভিন্ন। কেবল কিছু নামভেদ রয়েছে মাত্র। শশিচন্দ্রের পুথিতে রাজ্যের নাম কাঞ্চননগর, রাজার নাম বিকর্ণ, রাজার পিতার নাম গন্ধর্বগত। রানীদের নাম বিষমুখী ও তারাদেবী। কাহিনীর প্রতিপাদ্য বিষয় মানুষ স্ব স্ব ভাগ্যেই চলে। পরিণামে মিলনাত্মক এ কাহিনীতে শেক্সপীয়ারের ‘কিং লিয়ার’ গল্পের আদল রয়েছে। কবি রামজয় বা রামজীবন সম্বন্ধে কিছুই জানা যায়নি। তবে পুথি চট্টগ্রামে প্রাপ্ত এবং উপাখ্যানটিও চট্টগ্রামে চালু অন্য কাব্যকাহিনীর সদৃশ। তাই কবি চট্টগ্রামনিবাসী ছিলেন বলে অনুমান করি।

২. সুশীল মিশ্র

প্রণয়োপাখ্যান মানবজীবনের প্রখরতম ও প্রধানতম বৃত্তি। কাম-প্রেমই বর্ণিত বিষয়, তাতে আনুগমিকভাবে থাকে মানুষের ভাব ও চিন্তা, কর্ম ও আচরণ, প্রীতি ও বিদ্বেষ, প্রেম ও ঘৃণা, আবেগ ও উচ্ছ্বাস, আশা ও প্রত্যাশা, সংবেদনশীলতা ও নিষ্ঠুরতা, ক্ষমা ও প্রতিহিংসা, ক্ষোভ ও তিতিক্ষা, সৌন্দর্য ও বীভৎসতা, কঠোরতা ও কোমলতা প্রভৃতি সর্বপ্রকার বৃত্তি-প্রবৃত্তির প্রকাশ ও প্রয়োগ। রূপবান-রূপবতী উপাখ্যানেও জটিল ও বিস্তৃতপটে মানুষের নানা অবস্থার ও অবস্থানের, জীবনের সম্বলের ও সমস্যার চিত্র রয়েছে।

রূপবান-রূপবতী উপাখ্যান রচনা করেছেন সুশীল মিশ্র। একটি পুথিই আবদুল করিম সাহিত্যবিশারদ সংগ্রহ করেছিলেন। শ্রমকুষ্ঠ লিপিকার প্রারম্ভিক বন্দনাদি ও কবির আত্মকথার অংশ বাদ দিয়েই অনুলিপি শুরু করেছেন, তাতেও জীর্ণপাতায় কালি উঠে যাওয়ায় প্রথম তিন পত্র দুস্পাঠ্য। লিপিকরের হস্তাক্ষর সুন্দর। প্রায় দু'শ সোয়া দু'শ বছরের পুরোনো। ১০'x ৩' পরিমিত তুলোট কাগজে লিখিত। ভণিতা এরূপ :

- ক. শুনরে রসিকজন একচিৎ মন
কহেন সুশীল মিশ্রে অপরূপ কথন।
- খ. বলভদ্র মিশ্র মুনি তাহান তনয় গুণী
সুশীল মিশ্রে তাহা ভণে।

অতএব কবির পিতার নাম বলভদ্র মিশ্র। কবি চট্টগ্রামের বলেই আমাদের ধারণা।

গল্পসার এই : গঙ্কর্ব চিত্রসেন ও চন্দ্রলেখা ইন্দ্রসভায় নৃত্য করবার সময়ে তালভঙ্গ হলে অভিশপ্ত হয়ে মর্ত্য-জীবন লাভ করে। এভাবে চিত্রসেন হল উজ্জয়িনীর বিক্রমাদিত্য রাজার ও রাণী ভানুমতির পুত্র রূপবান আর চিত্রলেখা হল বিদর্ভরাজকন্যা রূপবতী। রূপবান অতিক্রান্ত কৈশোরে বিদর্ভরাজ্যের রাজধানী হেমবতীপুরে গেল সওদাগরের চন্দ্রবেশে, আশ্রয় নিল মালিনীর ঘরে। রাজা নগর পরিক্রমায় বের হয়ে পথে দেখলেন অতুল্যরূপের রূপবানকে। রূপমুগ্ধ রাজা তাকে নিয়ে এলেন প্রাসাদে, উদ্দেশ্য কন্যা সমর্পণে। এদিকে কন্যা রূপবতী রূপ-গুণের কথা শুনে উজ্জয়িনীর রাজপুত্রকেই মনে মনে হৃদয় দ্বন্দ্ব করছে বটে, কিন্তু তখনো চাক্ষুষ করেনি, ফলে প্রাসাদে এলেও, একগুরুর কাছে সহপাঠী হলেও অচেনা ও সাধুবেশী রূপবান অবহেলিত। এদিকে রূপবতীর প্রণয়প্রার্থী হয়েছে মন্ত্রীপুত্র শুদ্ধমতি। প্রণয় প্রত্যাখ্যাত হলে সে আত্মহত্যা করবে জানালে রূপবতী তার সঙ্গে নৌকাযোগে রাতে দেশত্যাগী হতে রাজি হল। ঈর্ষা রূপবান টের পেয়ে শুদ্ধমতিকে কৌশলে সরিয়ে দিয়ে নিজে নৌকায় রূপবতীর প্রতীক্ষায় রইল। যথাসময়ে রূপবতী নৌকায় এসে উঠল, নৌকা ঘাট ছেড়ে চললো। প্রভাতে রূপবতী সবিস্ময়ে দেখল রূপবানকে। তাকে তিরস্কার করলেও তারই সঙ্গী হল নিরুপায় রূপবতী।

তাদের নৌকা ভিড়ল কাঞ্চিপুরনগরে। সে নগরের রাজা বিক্রমসিংহ, রানীর নাম লীলাবতী আর রাজকন্যার নাম প্রভাবতী। এখানে রূপবান দিনে লক্ষটাকা বেতনের চাকরি নিল রাজদরবারে। একশ' নিজের জন্যে রেখে সব টাকাই সে দান করতো ব্রাহ্মণদের। এমনভাবে চলল ছয়মাস। অকস্মাৎ মগধরাজ সুসেন পুত্র ও শত অক্ষৌহিণী নিয়ে এল 'কাঞ্চিপুর জিনিবারে'। তার লক্ষ লক্ষ হাতীর ও কোটি কোটি মহারথীর রব শুনে রাজা বিক্রমসিংহ পালিয়ে বাঁচার সিদ্ধান্ত গ্রহণ করলেন কিন্তু রূপবান তাঁকে অভয় দিল, বলল—

একা রথে সুসেন জিনিম।

সারথি উত্তম জানি রথ এক দেঅ আনি।'

অতুল্য বীর রূপবান সুসেন-পরিচালিত লক্ষ লক্ষ মাগধী সৈন্যকে পর্যুদস্ত ও পরাজিত তো করলই, এমনকি ভূপতিত মগধরাজ সুসেন যখন—

'শরণ লইলুম' করি ডাকি বলিল

তেকারণে মহাবীরে প্রাণে না মারিল।

তুষ্ট ও কৃতজ্ঞ কাঞ্চিরাজ রূপবানকে সিংহাসন দান করতে চাইলে রূপবান সবিনয় জানায়—

মাথে সিংহাসন লইতে না হএ উচিত
তুষ্কি রাজা দেখি আঁকি বাপের সমান।
—না হইব নরপতি কর যুবরাজ।’

যুবরাজ হয়ে রূপবান প্রেমিক রূপবতীর মন জয় করতে পারল না, মালিনীর বাড়ি থেকে যুবরাজ প্রাসাদে নিতে এলে রূপবতী চরম অবজ্ঞায় বলে, ‘সেবকের বাড়ি যাইমু কিসের কারণে।’ যদিও নিরাপত্তার প্রয়োজনে প্রাসাদে বাস করতে গেল নিরুপায় রূপবতী।

এদিকে লীলাবতীর ইচ্ছে কন্যা প্রভাবতীকে রূপবানের কাছে বিয়ে দেয়া। রাজার মনে দ্বিধা— কারণ রাজার ধারণা রূপবতী রূপবানের পত্নী। রানী লীলাবতী ওদের প্রকৃত সম্পর্ক জানার জন্যে প্রাসাদে স্বামীরাজব্রত নামের এক মহোৎসবের আয়োজন করেন, সেখানে পুরীর অভিজাত সব দম্পতির নিমন্ত্রণ— স্ত্রী সেখানে স্বামীকে পানগুয়া যোগাবে। মালিনী পদ্মাবতী অনেক সাধাসাধি করছে পত্নী-পরিচয়ে অর্থাৎ উৎসবে কিছুক্ষণ পত্নীর ছদ্মভূমিকা পালন করে, রূপবানকে আপন সামাজিক অসম্মান থেকে রক্ষা করার জন্যে। রূপবতী অটল, সে বলে—

ভানুমতিপুত্র ছাড়ি আর নাহি মন
দাসের সহিতে না জাইমু রূপবতী।

অবশেষে এ সঙ্কটে পড়ে রূপবান ‘তেজস্বী পরাণ’ মালিনীর মুখে এ কথা শুনে রাজি হল রূপবানের পত্নীর ভূমিকা পালন করতে। উৎসবে দায়ে পড়ে রূপবতী বলে, ‘গুয়া ধর দাস রূপবান’ রূপবানও ‘গুয়া ধরে হরষিত মনে।’

উৎসবের সমাপ্তি পর্বে প্রখ্যাত ‘সুনয়নী’ বেশ্যা মহাসভা মধ্যে নৃত্য করে। নাচ-গান বাজনার নিম্নমান দেখে রূপবতীর মনে অমরাবতীর স্মৃতি জেগে উঠলো সে বলে ‘একি নাচ, একি বাজনা! নাচ হবে চিত্রলেখার মতো, বাজিয়ে হবে চিত্রসেন। অবচেতন প্রেরণায় উভয়ে আসরে নামল। রূপবতী নাচে, রূপবান মৃদঙ্গ বাজায়। আর ‘দেখি সভা মোহ পাএ’। তারপর রূপবান আত্মপরিচয় দিল, রূপবতী জানল— এ-ই তার ধ্যানের পুরুষ, এ-ই তার প্রাণেশ্বর উজ্জানিনগরের রাজকুমার। বিয়ে হল উভয়ের। কিন্তু অকস্মাৎ একদিন চৌদোলে যাওয়ার সময়ে চৌদোলস্থ এক কালসাপের কামড়ে রূপবানের মৃত্যু ঘটে। বাহকেরা রাজভয়ে পালাল মৃতদেহ ফেলেই। বেশ্যা সুনয়নী যাচ্ছিল সে-পথ দিয়েই। মন্ত্রোষদ তার জানা ছিল, সে-ই রূপবানকে বিষমুক্ত করল, কিন্তু রূপবানের রূপমুগ্ধ সুনয়নী তাকে মস্তবলে শুক পাখি বানিয়ে ঘরে নিয়ে গেল ‘মনিষ্য আছিল বীর হৈয়া গেল শুক।’ রাতে স্মৃতিভ্রষ্টপুরুষ বানিয়ে কামকেলি করে, সকালে শুক রূপে খাঁচায় সোনার শিকলে বাঁধে। একমাস পরে ঔষধের ক্রিয়া হ্রাস পেলে রূপবানের পূর্বস্মৃতি জাগল এবং সোনার শিকল ছিড়ে ‘উড়িয়া চলিল বীর পুরীর উদ্দেশে।’ সেখানে সে প্রভাবতীর হাতে ধরা দিল। শুক এখানে প্রভাবতীকে প্রবোধ দানের ছলে ক্রোশগন্ধা সুবাহ যক্ষপতি’ উপাখ্যান শুনিয়েছে। এদিকে ঔষধের প্রভাব শেষ হলে শুকরূপী রূপবান কামিনীমোহন পুরুষ হয়ে গেল। প্রভাবতীর কামসাগরে ডুবিল রূপবান। প্রভাবতী হল অন্তঃসত্ত্বা। প্রভাবতীর অনুরোধে পালাল রূপবান ‘ভূমি পালাইলে প্রভু মোর ঘুচে লাজ।’ কুমোরের বাড়িতে আশ্রয় নিয়েছিল রূপবান, কুমোরের বউও পড়লো তার প্রেমে। এদিকে

সুনয়নীও আবার তাকে ধরল। ওদিকে রূপবতী বিরহে কাতর, প্রভাবতী লাঞ্ছিত। অবশেষে এ চার নারীরই ডাক পড়ল রাজসভায়। রাজা আনুপূর্বিক সব ঘটনা শুনলেন। ফলে কুমোরবউ মুক্তি পেল, নাক চুল কাটা হল সুনয়নীর, বিয়ে হল প্রভাবতীর। রাজকুমার রূপবান রূপবতী-প্রভাবতীকে নিয়ে স্বদেশে গেল- উজানিনগরে আনন্দ আর ধরে না।

কবি সুশীল মিশ্র কাহিনীর কাঠামোর জন্যে কোন পূর্বসূরীর কাছে ঋণী কিনা জানিনে তবে ঘটনার উন্মোচনে যে মুনশীয়ানা আছে, তা স্বীকার করতে হবে। এ কাহিনীর মূলসূত্রটির সঙ্গে ছায়াছবি ‘অগ্নিপরীক্ষা’ গল্পের মিল রয়েছে। ঘটনাবিন্যাসে ও রূপায়নে কবির ফারসি ও সংস্কৃত সাহিত্যে জ্ঞান সুব্যবহৃত হয়েছে। নায়িকা রূপবতী সতীত্বে সংযমে একনিষ্ঠতায় সাহসিকতায় ও ব্যক্তিত্বে সমৃদ্ধ। কবি এ বিপুলকায় উপাখ্যানে তার সামর্থ্যের স্বাক্ষর রেখেছেন।

৩. দ্বিজ পতপতি

চন্দ্রাবলী উপাখ্যানখানি ‘বড় চন্দ্রাবলীর পুথি’ নামে বটতলা থেকে প্রকাশিত হয়েছিল। ভগিতা বদল করে সায়ের মুন্সি মোহাম্মদ আবেদের নামে চালাত (১৩৩৫ বঙ্গাব্দে) মুন্সী মনিরুদ্দিন অ্যাও সঙ্গ নামের প্রকাশক। তবু অনবধানতার দরুন কিছু সাক্ষ্য মুদ্রিত পুথিতে থেকে গিয়েছিল। যেমন :

ক. সবস্বতীপদে মোর কোটি নমস্কার

রচিব চন্দ্রাবলীর পুস্তক করিব প্রচার

খ. কহে দ্বিজপতপতি স্মরিয়া ঈশ্বর

মনুষ্য দুর্লভ জন্ম না হইবে আর্ক

কহে দ্বিজপতপতি কালিকার চরণ গতি

লাচারি রচিল মধুসর বাণী।

পরে অবশ্য পতপতির ‘চন্দ্রাবলী’ কাব্যের পুরোনো পুথিও সংগৃহীত হয়েছে। কালীভক্ত তথা শাক্ত ব্রাহ্মণ কবি পতপতির আর কোন পরিচয় আমাদের জানা নেই। গল্পাংশ এই :

পশ্চিমদেশে কনকা নামে রাজ্য। রাজ্যের ঐশ্বর্যের সীমা নেই। কিন্তু দাম্পত্য জীবনের বারো বছরেও সন্তান হল না বলে রাজারানীর মনে সুখ নেই। অবশেষে রানী কালিকার শরণ নিলেন। কালিকার বরে লাভ করলেন পুত্ররত্ন। সাতবছর বয়সে হল কুমারের হাতেখড়ি এবং সে-

পণ্ডিত ভজিয়া শিখে পণ্ডিতের বিচার

সিঙ্গল পিঙ্গল পড়ে ঝমকে ঝঙ্কার।

ফারসি নাগরী পড়ি হৈল বিশারদ

চারিবেদ চৌদ্দ শাস্ত্র পাইলেক ভেদ।

ইছন্দ পিছন্দ পড়ে পিক বাসলি (?)

স্বর্গের যতেক তারা পাতালের বালি।

এসব শেখার পরে সঙ্গীত শেখার জন্যে কুমার গেল দক্ষিণ বিহারে, কারণ-

বিজয়ানগর নামে দক্ষিণ বিহার

শ্রীবৎস নামে রাজা তাহার অধিকার।

স্বর্ণ-মর্ত্য-পাতালে যত বৈসে জিভুবনে

সেই রাজা বিনে গতি অন্য নাহি জানে।

শ্রীবৎসের কাছে সঙ্গীতশাস্ত্র শিখে রাজকুমার বিশ্বকোতু সঙ্গীতে হল পারঙ্গম।

এদিকে স্বর্গের শ্রেষ্ঠপুরী রত্নময়ে রাজা ছিলেন চন্দ্রসেন। তাঁর ছিল পরমা সুন্দরী পাঁচ কন্যা। তাদের মধ্যেও অন্যান্য ছিল চন্দ্রাবলী। একদিন ইন্দ্রসভায় নৃত্যরতা চন্দ্রাবলীর রূপমুগ্ধ

শুন রানী চন্দ্রাবলী বনভূমি যাও
 অরণ্যেতে যাঞা দস্তে তৃণ-কাটা খাও ।
 বার বৎসর দ্রম তুমি যাঞা অরণ্যেতে

তবে সে খণ্ডিবে শাপ বিশ্বকেতুর হাতে ।
সেই বন মধ্যে আছে কাম সরোবর
তাতে স্নান করিলে শাপ খণ্ডিবে তোমার ।

দ্বিজ পশুপতি পণ্ডিত কবি, ভাষায় তাঁর বৈদ্যের ছাপ সর্বত্র দৃশ্যমান। কাব্যের কাহিনী পরী-মানুষের প্রেমের আদলে পরিকল্পিত। দ্বিজ পশুপতি সম্ভবত আঠারো শতকের গোড়ার দিকের কবি।

৫. বাণীরাম দাস- শীতবসন্ত উপাখ্যান আমাদের সুপ্রাচীন রূপকথা। লোকসাহিত্যের এ উপাখ্যানটি বাণীরাম দাস নিজের ভাষায় নতুন করে বর্ণনা করেছেন মাত্র। গল্পের কাঠামো এই : রাজার স্যোরাণীর ছিল তিন কণ্ঠসিত রোগাপাতলা পুত্র আর দয়োরানীর ছিল দুটো

সুন্দর সন্তান, নাম শীত ও বসন্ত। সুয়োরানী ওদের বিরুদ্ধে নালিশ করলে রাজা ওদের প্রাণদণ্ড দেন, জল্লাদ মমতাবশে ওদের প্রাণদণ্ড কার্যকর না করে, ওদেরকে অরণ্যে ছেড়ে দিয়ে আসে। এক শ্বেতহস্তী এসে শীতকে পিঠে তুলে এক রাজবাড়িতে নিয়ে এল রাজঅমাত্যরা তাকে মৃতরাজার সিংহাসনে বসাল।

এদিকে অসহায় বসন্তকে আশ্রমে আশ্রয় দিল এক সন্ন্যাসী। ওদিকে সুয়োরানী দুয়োরানীকেও টিয়া পাখি বানিয়ে তাড়িয়ে দিয়েছিল। সে ধরা দিল অন্যদেশের এক রাজকুমারীর রূপবতীর হাতে। রূপবতী ঘোষণা করেছিল- যে গজমোতি এনে দিতে পারবে, তাকেই সে বরণ করবে বর রূপে। শীত রূপবতীর এহেন ঘোষণা শুনে ফ্রুদ্ধ হয়ে তাকে বন্দিদান করে রাখল। এদিকে বসন্ত সন্ন্যাসীর ঐন্দ্রজালিক ত্রিশূল যোগে ক্ষীরসাগর শুকিয়ে সাগরের শাদা হাতীকে সোনালী পদ্মে পরিণত করে তার মধ্যস্থ গজমোতি সংগ্রহ করল। পথে মাটি খুঁড়ে তার তিন মৃত বৈমাট্রেয় ভাইকে (সুয়োরানীর সন্তান) রাঙ্গামাছরূপে বাঁচিয়ে তুলে সঙ্গে নিল, পরে শীত-বসন্তের পরিচয় হল। সুয়োরানীর মাছরূপী ছেলেরদেও মানুষ করে দেয়া হল। মাতাপিতা ও রূপবতীকে নিয়ে পাঁচ ভাই সুখে জীবন কাটাল।

৬. উনিশ শতকের কবি মহেশচন্দ্র দে

কবি মহেশচন্দ্র দে (পরে দাস, চৌধুরী) চট্টগ্রাম জেলার পটিয়া থানার অন্তর্গত চাফরা গ্রামের লোক ছিলেন। তিনি তাঁর সয়ফুলতমিজ-জগৎখান' কাব্য রচনা করেন পার্শ্ববর্তী গ্রামের জমিদার আশরাফ আলি চৌধুরীর আশ্রয়ে। কবির কৃতিত্ব এই যে, তিনি ফারসি উপাখ্যানের আদলে দেশী প্রণয়োপাখ্যানের সব নিয়মনীতি ও রীতিরেওয়াজ মেনে ভাষায় ও ভঙ্গিতে কাহিনীবিন্যাসে ও বর্ণনায়, এমনকি প্রশস্তিতেও আলাউলের অনুসারী হয়ে এ ক্ষুদ্রকাব্য কাব্য রচনা করেছেন। উল্লেখ্য যে রাধাচরণ গোপও দোভাষী রীতিতে শায়েরদের এমনি নিখুঁত অনুকরণে রচনা করেছিলেন 'জঙ্গনামা বা ইমামের কিসসা' আঠারো শতকে। আবদুল করিম সাহিত্যবিশারদ-সংগৃহীত আলোচ্য পাণ্ডুলিপিটি কবির স্বহস্তলিখিত। কবির পুত্রের জন্যেই কবি স্বয়ং এ প্রতিলিপি তৈরি করেছেন কাব্য রচনার পনেরো বছর পরে। তখন কবিপরিবারের কুলবাচির ও ধন-মানের উন্নয়ন ঘটেছে, তাই কবি তখন চৌধুরী এবং সন্তান দে চৌধুরী যথালিখিতং স্বয়ং। অত্র পুথির হকদার শ্রীমান বাবু সতীষ চন্দ্র দে চৌঃ পীছরে শ্রীমহেশ চন্দ্র চৌধুরী সাং চাফরা। ইতি সন ১২৪৬ মঘী তাং ২৩ মাঘ বুধবার চাফরা ইস্কুলে লিখন হইল। (১৮৮৪ খ্রীস্টাব্দ)। উল্লেখ্য যে রচয়িতাদেরও বানানবোধ সুষ্ঠু ছিল না, সর্ব বর্ণাঙ্কুরি জন্যে লিপিকরেরা দায়ী নয়। কবি মহেশচন্দ্র সম্ভবত গায়ের প্রাথমিক বিদ্যালয়ের শিক্ষক ছিলেন। পুথির শেষ পৃষ্ঠায় শ্রীমহেশ চন্দ্র চৌঃ-র রাবার মোহরের ছাপ রয়েছে, রয়েছে তাঁর বাঙলায় ও ইংরেজিতে স্বাক্ষর- মহেশচন্দ্র চৌধুরী। M.C. Chowdhury (দুশ্পাঠা) কবির স্বহস্তলিখিত পাণ্ডুলিপি হিসেবে পুথিটি মূল্যবান। এ উপাখ্যানে রচনা আরম্ভের কালও দেয়া রয়েছে :

ধাতা নেত্র ভূজ শশী করিয়া স্থাপন

তবে সে জানিতে পার গুরুর কথন।

অতএব ১২৩১ মঘী সনে তথা ১৮৬৯ খ্রীস্টাব্দে এ প্রণয়োপাখ্যানটি রচিত।

ষষ্ঠ অধ্যায় জগনামা বা যুদ্ধকাব্য

১. জিগীষা

আরবিতে যা মাগাজী, ফারসিতে তা-ই জগ, সংস্কৃতে যুদ্ধ এবং বাঙলায় লড়াই। বাঘ-সিংহের প্রতি ভয়াল বলেই যেমন মানুষের একটা আকর্ষণ রয়েছে, গা-পা বাঁচিয়ে নিরাপদ দূরত্বে থেকে হিংস্র স্থাপদ-সরীসৃপ দেখা যেমন আনন্দজনক, তেমনি ক্ষিপ্রের নিরাপত্তা সম্বন্ধে নিশ্চিত হয়ে অন্যদের লড়াই বা যুদ্ধ দেখা, তার বর্ণনা শোনা সুখকর। এ যুগে যুদ্ধের ধরন বদলে গেছে, বিবর্তিত হয়েছে যুদ্ধাস্ত্র, তবু আজো তরবারীর প্রতীক মান, অশ্বের ও হস্তীর পার্বণিক মর্যাদা আর সেনানিবাসে রণবাদের প্রাচ্যহিক প্রয়োজন ফুরায়নি।

স্বস্ত ও সুস্থ মানুষের চেতনার গভীরে জীবনের যা মূল প্রেরণা তা হচ্ছে জিগীষা, সেই ভিনি-ভিসি-ভিডি। আত্মপ্রত্যয়ী মানুষ বাস্তবে এ জিগীষা চরিতার্থ করে, আত্মপ্রত্যয়হীন দুর্বল মানুষ বিকৃত উপায়ে তা অনুভব উপভোগ করেই থাকে তুষ্ট। বিভিন্নভাবে অপরকে উপকৃত করে ঋণী ও কৃতজ্ঞ রেখেই সাধারণ মানুষ জিগীষা পূরণ করে, অন্যেরা গুণে-মানে-মাহাত্ম্যে শ্রেষ্ঠতর হয়ে কিংবা ধনবলে, জনবলে, বাক্যবলে, জ্ঞানবলে অতুল্য কর্মে-কৌশলে-কৌশলে নৈপুণ্যে উৎকর্ষে অনন্য অজেয় হয়ে মানুষ বিজয়ানন্দ অনুভব করে। আর রাজতন্ত্রের যুগে দিগ্বিজয়ী রাজারা, সেনারা, মল্লারা, পাহলোয়ানরা প্রতিপক্ষের সঙ্গে বাহুবলে কিংবা অস্ত্রযোগে লড়ে জয়ী হয়ে বিজয়গৌরব উপভোগ করত। এ যুগেও সৈনিকরা তা-ই করে, সমুদ্রতলার পর্বতচূড়ার ও গ্রহলোকের অভিযাত্রীরাও এ জিগীষা বীর। মৃত্যুকে যে ভয় পায় না সে-ই বীর।

আজো ব্যক্তিক, পারিবারিক, সাম্প্রদায়িক, জাতিক, রাষ্ট্রিক জীবনে লড়াই-ই- যুদ্ধই জীবনের জয়-পরাজয় নির্ধারণ করে। এ লড়াইয়ের নাম প্রতিযোগিতা, প্রতিদ্বন্দ্বিতা। ধনের-মানের যশের কথার লড়াই, ক্ষমতা ভোগের চিন্তার মতের লড়াই চলছে সর্বদা ও সর্বথা। জেতাই লক্ষ্য।

তাই লড়াই করতে-করতে নয় শুধু লড়াই দেখতেও সুখ। যেখানে প্রতিযোগিতা, যেখানে প্রতিদ্বন্দ্বিতা, যেখানে যুদ্ধ সেখানেই মানুষের উৎসুক দৃষ্টি নিবদ্ধ। তাই যুদ্ধকাব্য লোকপ্রিয়, পৃথিবীর প্রাচীন মহাকাব্যগুলো নয় কেবল, রূপকথাগুলোও রাজকুমারদের প্রাণপণ সংগ্রামের বিপন্ন নায়কের সঙ্কট উত্তরণের এবং বিরুদ্ধ শক্তির বিরুদ্ধে লড়াইয়ের ইতিকথা। কাজেই সাহিত্যেও ছিল মানুষের সর্বদা লড়াইয়ের স্বপ্ন।

২. মাগাজী

হযরত মুহম্মদ স্বয়ং বত্রিশটা যুদ্ধে উপস্থিত ছিলেন। তাঁর জীবৎকালের বদরের ওহুদের খন্দকের ও খয়বরের যুদ্ধ ছিল দৈশিক ও কালিক ইতিহাসে যুগান্তকর। কাজেই সেসব যুদ্ধবিবরণ গাথার ও কাব্যের আকারে ইসলামের উন্মেষ যুগে জনপ্রিয় হয়েছিল- ইসলামেরই বিজয়গৌরব হিসেবে। কিন্তু বাস্তবকে রোমান্টিক করে তোলা সহজ নয়, তাই স্থানান্তরে ও কালান্তরে হযরত মুহম্মদ, হযরত আলী, হামজা এবং আলির পুত্ররূপে পরিচিত হানিফা অনেক কাল্পনিক যুদ্ধের ও বিখিজয়ের নায়করূপে মুসলিম জগতে যুদ্ধকাব্যের ও রূপকথার অবলম্বন। জয়কুম রাজার লড়াই, জয়গুনের কিসসা, হানিফা-কয়রাপরী, সোনাডান, সূর্যউজাল প্রভৃতি এমনি বানানো যুদ্ধ ও প্রেম কাব্য। আবার শাহনামার সঙ্গে পরিচয় ঘটায় ফলে দু'চারটি ইরানি যুদ্ধেরও বাঙলায় কাব্যায়ন সম্ভব হয়।

৩. মার্সিয়া সাহিত্য

মসিয়াকাব্য বা শোককাব্য : যুদ্ধকাব্যের মধ্যে কারবালাযুদ্ধ কাব্যই ষোল সতেরো শতক থেকে বাঙলার মুসলিম সমাজে বিশেষ জনপ্রিয় হতে থাকে। তার কারণ দাক্ষিণাত্যের বাহমনিরাজ্যে বিজাপুরে-বিদরে বেরারে গোলকুণ্ডায় আহমদনগরে ইরানি বংশজ শিয়ারাই সুলতান ও শাসকগোষ্ঠী ছিলেন। শিয়ারা কারবালা যুদ্ধকে স্মরণ করার অবশ্যপালনীয় ধর্মীয় পার্বণ বলেই জানে। চট্টগ্রাম বন্দরের সঙ্গে দাক্ষিণাত্যের শিয়ারাদের ও ইরানি-শিয়ারাদের বাণিজ্যিক সম্পর্ক ছিল, সে-সূত্রে ষোল শতক থেকেই চট্টগ্রাম অঞ্চলে 'মস্কুল হোসেন' [হোসেন নিধন] কাব্য রচিত হতে থাকে, তারপর শিয়া সাফাভী শাসিত ইরানে আশ্রিত হুমায়ূনের দিল্লী প্রত্যাবর্তনের পরে দরবারসূত্রে ইরানের ও ইরানি-প্রভাব প্রবল ও সর্বব্যাপী হতে থাকে। আবার আঠারো শতকে সাফাভী রাজত্বের অবসানে ভারতে বাঙলায় আশ্রিত শিয়া ইরানিদের প্রভাবে মুহররম তাজিয়াদি সহ একটি জনপ্রিয় জাতীয় পার্বণের মর্যাদায় স্থায়ী প্রতিষ্ঠা পায়।

যদিও ইমাম হাসান-হোসেনের প্রতি সমকালে হযরত আলীর ভক্ত-অনুগতদের ছাড়া আর কারো তেমন সমর্থন সহানুভূতি ছিল না, তবু কালক্রমে আল্লাহর বান্দা ও রসূলের নাতি বলেই মুসলিম মাত্রই হাসান-হোসেনের ভক্ত সমর্থক এবং মুয়াবিয়া এজিদের নিন্দুক হয়ে ওঠে। যেহেতু পরবর্তীকালে মুসলিমমাত্রই রসূলের আত্মীয় বলেই তাঁর হতভাগ্য দৌহিত্রদের প্রতি সহানুভূতিশীল হয়ে ওঠে, অর্থাৎ পরাজিত পক্ষের সমর্থক হয়ে যায়, যেহেতু নায়ক বিজয়গৌরব হীন, সেহেতু তার প্রধান রস করুণ হতেই হয়- শোকের বা কান্নার আধার বলেই এ বিলাপপ্রধান সাহিত্যের নাম 'মার্সিয়া সাহিত্য' বা শোকসাহিত্য। বাঙলায়ও আহাজারি শব্দজাত জারীগান বা জারীজঙ্গনামা নামে কারবালাবিষয়ক রচনা অভিহিত হয়।

'কারবালা' যুদ্ধোত্তর যুগে কালিক ব্যবধানের ফলে মুসলিম মাত্রই যে হোসেন ভক্ত হল, তাতে যুক্তির জোরের চেয়ে বহুগুণ বেশি ছিল আবেগের তীব্রতা। তাই হোসেনের ন্যায্য দাবি কিংবা এজিদের অন্যায় যুদ্ধ প্রমাণের যুক্তি কালে কালে নানা মনের এবং মনীষার প্রভাবে সংযুক্তি আর সঞ্চিত হলেও ন্যায্য ও সত্য প্রতিষ্ঠার চেয়েও বড়ো হয়ে ওঠে তত্ত্ব- তা হচ্ছে 'শির দেগা, শের দেগা নেহি দেগা আমামা- শির দেব, শের দেব কিন্তু মান [উক্ষীষ] দেব না, কারণ জানের চেয়ে মান বড়ো, তার চেয়েও বড়ো স্বাধীনতা। হোসেন এজিদের বশ্যতা স্বীকার করলে

অনুগত থাকার অঙ্গীকার করলে ভোগ উপভোগের স্বস্তিকর নিশ্চিত জীবন সুখে কাটাতে পারতেন। কিন্তু তিনি মান ও স্বাধিকার রক্ষার জন্যে প্রাণ দেয়ার শ্রেয়োত্বই মেনে নিয়েছিলেন। সাধারণ শ্রোতার কাছে কারবালাকাহিনীর প্রতিপাদ্য বিষয় হচ্ছে অমানুষ এজিদের সৈন্যদের অমানবিক নিষ্ঠুরতার দরুন তৃষ্ণার্ত অসহায় হোসেনের সপরিবার সপরিজনের করুণ মৃত্যু। ধর্মীয় আবেগজড়িত বলেই কারবালাযুদ্ধ হিন্দুদের কুরুক্ষেত্র যুদ্ধের মতো এক জাতীয় মহাযুদ্ধ। উভয় যুদ্ধেই জীবনের প্রাণের বিনিময়েই ন্যায়ের ও সত্যের প্রতিষ্ঠা ঘটে।

৪. পূর্বকথা

‘কারবালাযুদ্ধ’ কাব্য বুঝবার জন্যে কিছু পূর্বকথা জানা দরকার।

মরুভূ আরব উদ্ভূত ইসলামে রাজতন্ত্র স্বীকৃত নয়। মক্কা-মদিনার ঐতিহ্য অনুসারে সর্দারতন্ত্রেই তারা স্বস্তি খুঁজেছে। গোত্রপতি শেখদের সম্মতি ও আনুগত্য গ্রহণ করেই একজন সমাজপতি বা শাসনকর্তা নিয়োগ ছিল প্রাক-ইসলামি রীতি। সাধারণ কাবার সংরক্ষকই ছিল সমাজপতি। রসুলের প্রয়াণ-মুহুর্তে রাষ্ট্রপতি নির্বাচন নিয়ে চকিচ শব্দটাব্যাপী যে বিবাদ বিতর্ক চলে, তাতে রসুলপ্রতিষ্ঠিত রাষ্ট্রের উত্তরাধিকারী রসুলের জীবিতা কন্যা ফাতেমার স্বামী-সন্তানেরই প্রাপ্য বলে দাবি করেন ফাতেমা, মদিনাবাসীরাও দুর্দিনে ইসলামের সংরক্ষক বলে খিলাফত দাবি করে। এভাবে নানাদল বিভিন্ন মুক্তি দিয়ে খিলাফত দাবি করতে থাকে, অবশেষে প্রায়সর্বজন শ্রদ্ধেয় তেয়াত্তর বছরের বৃদ্ধ হযরত আবুবকরকে ‘খলিফা’ পদ দিয়ে সঙ্কট নিরসন করা হয়। এবং আবু বকরের উচ্চারিত অভিপ্রায় ক্রমে তাঁর মৃত্যুতে নির্ববাদে দ্বিতীয় খলিফা হন হযরত উমর। বারো বছর পরে উমর আততায়ীর হাতে নিহত হলে বিভিন্ন গোত্রপ্রধান শেখেরা কোরআন ও সুন্নাহ অনুসারে শাসনকার্য পরিচালনা করবেন এ অঙ্গীকারের বিনিময়ে হযরত আলীকেই খলিফাপদ দান করতে চাইল। ধার্মিক আলী এ অঙ্গীকার করতে দ্বিধা করায় এবং হযরত উসমান তখনই সাগ্রহে শর্ত মানতে স্বীকৃত হওয়ায় তার আনুগত্যই স্বীকার করল প্রধানরা। একটা সুযোগ হেলায় হাতছাড়া করাতে হযরত আলীকে তাঁর হাশেমী জ্ঞাতিরা তিরস্কার করে। এর ফলেই তৃতীয় খলিফা হযরত উসমান স্বজনপ্রীতি ও শাসনশৈথিল্যের দায়ে বিদ্রোহী মিসরী সৈন্যদের হাতে নিহত হওয়ার পর আলী প্রধানদের সম্মতি ও আনুগত্য গ্রহণের জন্যে অপেক্ষা না করেই দু’তিন প্রধানের সহায়তায় নিজেকে চতুর্থ খলিফা হিসেবে ঘোষণা করেন। এতে প্রদেশপাল জোবায়ের, তালহা, মুয়াবিয়া এমনকি রসুলপুত্রী হযরত আয়েশাও আলীর খেলাফত অঙ্গীকার করেন। এ কারণেই উটের যুদ্ধ (জমলযুদ্ধ) হয়েছিল। অবশেষে সিরিয়ার শাসনকর্তা বা সুবাহদার মুয়াবিয়ার সঙ্গে আলীর একটি চুক্তি হয়। এ চুক্তি অনুসারে প্রথমে আলী পরে মুয়াবিয়া এবং মুয়াবিয়ার মৃত্যুর পরে আলীর পুত্র খেলাফত পাওয়ার কথা। কিন্তু মুয়াবিয়া তার জীবৎকালেই প্রাদেশিক শাসকদের ও প্রভাবশালীদের বশ করে তাঁর খ্রীস্টানপুত্রীপ্রসূত সন্তান এজিদের প্রতি ভারী খলিফা হিসেবে তাদের আনুগত্যের অঙ্গীকার করিয়ে নেন। মুয়াবিয়ার মৃত্যুর পরে দামেস্কে এজিদ খলিফা হয়ে বসলে আলীপুত্ররা এ বিশ্বাস ভঙ্গে কষ্ট হয়ে পিতার প্রাক্তন রাজধানী কুফায় গিয়ে প্রতিরোধ গড়ে তোলার চেষ্টা করেন। ইমাম হাসানের মৃত্যুর পরে হোসেন কুফা যাত্রা করে কারবালায় এজিদ সৈন্য পরিবেষ্টিত হয়ে সপরিজন যুদ্ধে প্রাণ হারান। দুই ব্যক্তির স্বার্থে উভয়ের মধ্যে খিলাফত নিয়ে আপোসচুক্তিই খিলাফতের মৌলনীতি বিরুদ্ধ। কাজেই একপক্ষ চুক্তি বা বিশ্বাস

ভঙ্গ করলেও একে অন্য পক্ষের ন্যায়যুদ্ধ বলা যাবে না, কারণ চুক্তিটি ছিল উভয় পক্ষেরই অধিকারবহির্ভূত ও নীতিবিরুদ্ধ। এ চুক্তি ছিল বংশগত রাজত্ব প্রতিষ্ঠামুখী। মুয়াবিয়া ও তাঁর উমাইয়া জ্ঞাতিরা এবং পরে আব্বাসীয় হাশেমীরা বংশগত রাজতন্ত্র প্রতিষ্ঠা করলেন চিরকালের মত। এভাবে সর্দারতন্ত্র বা সর্দারদের মনোনয়নভিত্তিক খলিফাতন্ত্র বিলুপ্ত হল। গোত্রপ্রধানদের খলিফাতন্ত্র বিলুপ্ত হল বটে, কিন্তু অভাবিত বলেই বংশগত রাজত্বে সিংহাসনের উত্তরাধিকার বিষয়ে কোরআন-হাদিস নীরব। তাই সাড়ে তেরোশ' বছর ধরে দুনিয়ার মুসলিম রাজবংশগুলোতে সিংহাসনের উত্তরাধিকার নিয়ে সন্তান ও নিকট আত্মীয়দের মধ্যে বিবাদ, ষড়যন্ত্র, হত্যাকাণ্ড ও যুদ্ধ অবিরল ছিল।

৫. শিয়া পরিচিতি

'শিয়া' শব্দের আক্ষরিক অর্থ দল বা অনুসারী গোষ্ঠী, হযরত আলি ও মুয়াবিয়ার দ্বন্দ্বকালে দু'জনের দুটো দল গড়ে ওঠে, মদিনায়-কুফায় আলির দল এবং সিরিয়ায়-দামেস্কে মুয়াবিয়ার সমর্থক দল। গোড়াতে দুটোই ছিল রাজনীতিক ক্ষেত্রে সমর্থক দল। বিদ্বান, ধার্মিক ও জ্ঞানী আলির দল ক্রমে ধর্মীয় মতবাদী দলে পরিণতি পায় এবং পূর্বের মতো 'শিয়ৎ আলি সংক্ষেপে শিয়া' নামে পরিচিত হতে থাকে। শিয়াদের মতে রসুলপ্রতিষ্ঠিত ইসলামি রাষ্ট্রের উত্তরাধিকারী রসুলের জীবিতা কন্যা ফাতেমার স্বামী ও সন্তান। এ ধারণাবশে এবং আবদুল্লাহ ইবন সাবাহর প্রচারণায় তারা বেশি করে বক্ষিত আলির ভক্ত ও অনুগত হয়। হযরত আলি নিহত হওয়ায় এবং কিছুকাল পরে কারবালায় আলি-সন্তানও নিহত হওয়ায় শিয়ারা নিজেদের উদ্যোগহীনতার জন্যে বিবেকের দংশন অনুভব করে এবং এভাবে হযরত আলিকে ও হাসান-হোসেনকেই ইসলামের 'অসিহ' ভাবে থাকে। এমনকি হযরত আলিরই নবী বা রসুল হওয়ার কথা-জিবরিলের ভুলেই ওহি হযরত মুহম্মদের কাছে পরিব্যক্ত বা অবতীর্ণ হয় একরূপ বিশ্বাসও কালক্রমে গোড়া শিয়ামনে দানা বাঁধে। এবং আলি ও আলিবংশীয়দের পবিত্র আত্মা বলে মানতে থাকে। শিয়ারা আলিবংশীয় ইমাম জাফর সাদেকের ব্যাখ্যাত ইসলামেরই ধারক, যদিও উপসম্প্রদায়গুলোর মধ্যে মতপার্থক্যও রয়েছে।

আমরা আগেও অন্য প্রসঙ্গে বলেছি যে দাক্ষিণাত্যের শিয়াশাসিত রাজ্যগুলোর সঙ্গে চট্টগ্রাম বন্দরের বাণিজ্য সম্পর্ক ছিল, আরব-ইরানি সওদাগরদের সঙ্গে ছিল এ বন্দরের ঘনিষ্ঠ বাণিজ্যিক সম্পর্ক। কাজেই ইরানি সাহিত্যের ও দাক্ষিণাত্যের ফারসি-উর্দু সাহিত্যের সঙ্গে আরাকান-ত্রিপুরা রাজ্যের মানুষের সরাসরি পরিচয় ঘটে। তার ফলেই চট্টগ্রামে রচিত বাঙলাসাহিত্যের উপর ফারসি-উর্দু এবং উত্তর ভারতীয় ঠেট হিন্দি-আওধি সাহিত্যের গভীর ও ব্যাপক প্রভাব দেখতে পাই। এককথায় চট্টগ্রামে-আরাকানে রচিত বাঙলাসাহিত্য উক্ত ভাষাগুলোতে রচিত সাহিত্যের অনুবাদ-অনুসৃতিমাত্র। ব্যতিক্রম বিরল এবং কচিৎ মৌলিক।

দাক্ষিণাত্যে ইসলামের উদ্ভবযুগের বীরদের নায়ক করে অর্থাৎ হযরত মুহম্মদ, হযরত আলী, হামজা, হানিফা প্রমুখ বীরদের বীরত্ব ও দিগ্বিজয় বর্ণনচ্ছলে কাল্পনিক যুদ্ধ কাব্য রচিত হয়েছে ফারসিতে ও উর্দুতে। তাই দাক্ষিণাত্যেও সিরিয়ারাজ কিংবা ইরাকরাজ জয়কুমের সঙ্গে রসুলের ও আলির কাব্য, হানিফার সঙ্গে চান্দালশাহ কন্যা যয়তুনের বা জয়গুণের লড়াইর কিসসা রচিত হতে দেখি। দাক্ষিণাত্যের প্রভাবে বাঙলায়ও রচিত হয়েছে এসব বিষয়ে কাব্য।

৬. জয়কুম রাজার লড়াই

প্রথম খণ্ডেই আমরা কবি জয়েনউদ্দীন প্রসঙ্গে রসুল বিজয় বা জয়কুম রাজার লড়াইয়ের পরিচয় দিয়েছি। একই বিষয়ে ষোল শতকের সৈয়দ সুলতান, শাহবারিদ খান (সাবিরিদ খাঁ) এবং সতেরো শতকের মুহম্মদ আকিল কাব্য রচনা করেছেন। সতেরো শতকের পরে আর কোন জয়কুম রাজার লড়াই রচয়িতার সন্ধান মেলে না। শাহবারিদ খানের কাব্যের নাম 'রসুল বিজয়'— শাবিরিদ খানে কহে রসুল বিজয়/নবী জয় বাক্যচক্র জঙ্ঘনামা নাম।' বলা বাহুল্য রসুলের সময়ে ইরাক কিংবা সিরিয়া বিজিতই হয়নি। অতএব, এ যুদ্ধ কবিকল্পনাগ্রসৃত। ইসলাম প্রচার উদ্দেশ্যেই এসব দিগ্বিজয় কাহিনী পরিকল্পিত। এক হাতে কোরআন অন্য হাতে তরবারী নিয়ে এসব বীর ইসলাম প্রচার লক্ষ্যে দিগ্বিজয়ে বের হয়েছেন— বিজিত দেশের কাফির রাজাকে ডেকে বলছেন 'হয় সপ্রজা ইসলাম বরণ কর, নয়তো মৃত্যুর জন্যে প্রস্তুত হও।' একথাগুলো সগর্বে উচ্চকণ্ঠে প্রচার করেছেন স্বধর্মগবী কবিগণ। আজকাল তরবারীর সাহায্যে ইসলাম প্রচারিত হয়েছে বলে বিধর্মীরা মন্তব্য করলে মুসলিমরা রুষ্ট ও ক্ষুব্ধ হয়। ফারসিতেই এসব কাব্য রচিত হতে থাকে। পরে উর্দুতে ও বাংলায় অনুসৃত হয়েছে।

উক্ত চারখানা কাব্যের কোনটিরই সম্পূর্ণ পাণ্ডুলিপি আমাদের হাতে আসেনি। তবে খণ্ডের মধ্যেই অখণ্ডের ব্যঞ্জন ও তাৎপর্য মেলে। এক হাতে তরবারী ও আর হাতে কুরআন নিয়ে ইসলাম প্রচার উদ্দেশ্যে রসুল তাঁর শিষ্য ও আত্মীয় বীর আবুবকর, উমর, উসমান, আলি, হামজা, হানিফা, সাইদা, খবাইল প্রভৃতিকে নিয়ে কান্ট্রিক রাজ্যে হানা দেন, বিনাযুদ্ধে ইসলাম কবুল করলে তো সহজেই দ্বন্দ্ব মিটে যায়, নইলে যুদ্ধ বাধে।

জয়কুম রাজার চারপুত্র সালার, মালেকশাহ, খাখান ও কওয়াস অমিত বিক্রমে যুদ্ধ করেও পরাজিত হয়। রসুল পক্ষের বহুবীরের মধ্যে আলি ও হানিফার বীরত্ব বিশেষ করে সুপ্রকট। এ যুদ্ধে স্বয়ং রসুলও অস্ত্রধারণ করেছিলেন। জয়কুম সম্মুখযুদ্ধে সুবিধে হচ্ছে না দেখে গোপনে রণক্ষেত্রে পরিখা (কূপ) খনন করান। কূপে পড়ে আলি যন্ত্রণাগ্রস্ত হন। তারপর কূপ থেকে উদ্ধার পেয়ে আবার যুদ্ধ করে জয়ী হলেন। শাহবারিদ খানের রসুলবিজয়ে পাই, রসুল পক্ষীয় বীর খবাইলের সাথে জয়কুমকন্যার বিয়ের মাধ্যমে কাহিনী সমাপ্ত হয়েছে।

এ চারটি কাব্যের কাহিনী ভাগে কিছু কিছু উপেক্ষণীয় অমিল থাকলেও মূল কাহিনী অভিন্ন। বৈদম্ব্য ও কবিত্বে এঁদের ক্রমিকস্থান এরূপ শাহবারিদ, সৈয়দ সুলতান, জয়েনউদ্দীন ও মুহম্মদ আকিল।

সৈয়দ সুলতানের শাহবারিদ খানের কাব্যে তেমন কোন বৈশিষ্ট্য নেই, তবু শাহবারিদ খানের কাব্য সৈয়দ সুলতানের কাব্য থেকে অধিক সুখপাঠ্য, আর জয়েনউদ্দীনের ও সৈয়দ সুলতানের কাব্যে সাদৃশ্য অনেক। বর্ণিত বিষয়ের অভিন্নতা এবং ঝঞ্জুতাই এর কারণ। মুহম্মদ আকিলের কাব্যও বৈশিষ্ট্য বর্জিত। সৈয়দ সুলতান, শাহবারিদ খান ও মুহম্মদ আকিলের পরিচিতি অন্য অধ্যায়ে দ্রষ্টব্য।

৭. জয়ন্তনের বা জৈন্তনের কিসসা

হযরত আলির পত্নী হনুয়াফা বা হনুফার গর্ভজাত সন্তান মুহম্মদ ইবনুল হনুয়াফা বা মুহম্মদ হানিফা অনেক রোমাসের ও দিগ্বিজয়ের নায়ক। তিনি খলিফা আবদুল মালিকের আমলে

নেতৃস্থানীয় ব্যক্তি ছিলেন। এবং তার আগে তিনি এজিদের অনুগত ব্যক্তি ছিলেন, কিন্তু শিয়ারা তাঁকে এজিদশত্রু ও বীররূপে নানা গাথার নায়ক করেছে। শিয়া প্রভাবে কালক্রমে মুসলিম জগতে ও সাহিত্যে মুহম্মদ হানিফা অনেক কাল্পনিক যুদ্ধকাহিনীর নায়ক এবং অনেক পরাজিত কাফের রাজকন্যার স্বামী। বাঙলাসাহিত্যেও হানিফা, জয়গুন, সোনাভান, মালিকা আকার, সমর্তভান, পবনকুমারী ও সূর্যউদয় প্রভৃতির হৃদয়বিজয়ী নায়ক। ইন্দোনেশীয়ার হামজা-হানিফাও এমনি নানা রূপকথার নায়ক।

দাক্ষিণাত্যের কবি ফজল বিন মুহম্মদ, গুজরাটের ভাবনগরের কবি নুরুউদ্দীন এবং অন্য এক মুহম্মদ হানিফা কিসসা-ই যৈতুন (জৈগুন) বা জঙ্গে যৈতুন উর্দু ভাষায় রচনা করেছেন। এই যৈতুন পাকদামন বিবি হল চান্দাল শাহর কন্যা। বাঙলায় শাহ বারিদ খান রচিত ‘হানিফার দিগ্বিজয়’ (সাহিত্যবিশারদ প্রদত্ত নাম হানিফা ও কয়রাপরী) গ্রন্থে সহিরামরাজকন্যা জয়গুনের সঙ্গে হানিফার যুদ্ধ এবং পরে উভয়ের বিবাহ বর্ণিত হয়েছে। তারপরে হানিফার জীবনসঙ্গিনীরূপে হানিফার বিপদের সহায়রূপে হানিফার অনুরাগিনী পরীকন্যা কয়রা হানিফাকে একান্তভাবে পাবার আশায় স্বরাজ্য রোকামশহরে হরণ করে নিয়ে গেলে জয়গুনই অসমসাহসে ভর করে রোকামশহরে গিয়ে স্বামীকে উদ্ধার করে। এখানে হানিফার দিগ্বিজয় কাব্যের বিষয়সূচী দেয়া হলো : হানিফার পরিচয়, জয়গুন পরিচিতি, জয়গুনের মুক্তি, হানিফার নিরুদ্দেশ যাত্রা, জুনুদশাহর সঙ্গে হানিফার লড়াই, হানিফা ও এম্বাশাহ সহিরাম রাজ্যে হানিফা, পরিখা খনন, হানিফার কূপে পতন, হানিফার উদ্ধার সাধনে জয়গুন, এম্বানরাজ্যে হানিফা ও জয়গুন, কয়রাপরী কর্তৃক হানিফা হরণ, জয়গুনের বিলাপ, জয়গুন ও মোকাবিলের মদিনা গমন, আলির গড়ে শোকের ছায়া, জয়গুনের রোকামশহর যাত্রা, মিনাজশাহের সঙ্গে জয়গুনের দ্বন্দ্ব, দুর্মিক রাজার সঙ্গে জয়গুনের যুদ্ধ, শাহপরী সম্মুখে জয়গুন ও মিলন। এসব যুদ্ধের লক্ষ্য একটাই ... ‘কলেমা পড়িয়া হও মুসলমান। মুক্তি ভাঙ্গিয়া কর মসজিদ নির্মাণ’। এসব অভিযান ছিল অনেকটা অশ্বমেধের মতো। একই বিষয় নিয়ে আঠারো শতকের দোভাষী শায়ের সৈয়দ হামজা ১৭৯৭ খ্রীস্টাব্দে (১২০৪ সালে) জৈগুনের কিসসা বা পুথি রচনা করেছিলেন। সৈয়দ হামজার কাব্যে হানিফা-জৈগুনই নায়ক-নায়িকা। জয়গুনের বিবাহেই কাহিনী সমাপ্ত। যথাস্থানে সৈয়দ হামজা আলোচিত হবেন।

৮. সিকান্দরনামা

নিযামীর সিকান্দরনামা দু’খণ্ডে রচিত। প্রথম খণ্ডের নাম ‘সিকান্দর নামা-ই-বরবী’ (স্থল) অপর খণ্ডের নাম সিকান্দরনামা-ই বাহরি (সাগর)। এ দু’খণ্ডের অপর নাম ইকবালনামা। নিযামী তাঁর গ্রন্থে নায়ককে দিগ্বিজয়ী সিকান্দর, জ্ঞানীপুরুষ সিকান্দর এবং নবী সিকান্দর রূপে চিত্রিত করেছেন। আলাউল অনূদিত সিকান্দরনামার সিকান্দরের দিগ্বিজয় বর্ণিত হয়েছে। এয়ে শুধু পারস্য জয় নয়, আরো যুদ্ধে অনেক দেশ জয়ের কথাও রয়েছে, কাজেই বটতলার প্রকাশকের দেয়া ‘দারা-সিকান্দরনামা’ নাম ভুল। হাতে লেখা পুথিতে রয়েছে ইতি সিকান্দরনামা পুস্তক সমাপ্ত।” ১২৯৫ সালে (১৮৮৮ খ্রীঃ) প্রকাশিত বটতলা সংস্করণে গ্রন্থের নাম ছিল ‘সেকান্দারনামা’, তাছাড়া আলাউলের নিজের উক্তিও গ্রন্থনাম সিকান্দরনামা-

^১ মৎ সম্পাদিত সিকান্দরনামার ভূমিকায় দ্রষ্টব্য পৃঃ ৫৫।

সিকান্দরনামাসম গ্রন্থ নাহি আর।' এ গ্রন্থ যুদ্ধকাব্য বা জঙ্গনামা হিসেবেই এ অধ্যায়ে আলোচিত হচ্ছে। কিন্তু কাব্য রোমান্স বর্জিত নয়, তাই উপাখ্যান হিসেবেও আলোচিত হতে পারতো।

আলাউলের আত্মকথায় প্রকাশ শাহজাহানপুত্র সুজা নিহত হওয়ার এগারো বছর পরে তিনি সিকান্দরনামা রচনা শুরু করেন। সুজা ১৬৬০ সনে রোসান্ন রাজের আশ্রিত হন এবং ঐ সনেরই শেষের দিকে কিংবা ১৬৬১ সনের গোড়ার দিকে [১৭ই আগস্টের অনেক পূর্বে] আরাকান রাজের হাতে প্রাণ হারান। অতএব ১৬৭২ খ্রীস্টাব্দে রচনা সমাপ্ত হয় বলে অনুমান করি। কারণ সপ্তপয়কর, রতন কলিকা, তোহফা, সয়ফুলমুলকের শেষাংশ প্রভৃতি প্রতিটি গ্রন্থই এক বছরের সময় পরিসরে রচনা করেছেন দেখা যায়। এরপর কবি আর কোন গ্রন্থ রচনা করেননি। সিকান্দরনামা রচনাকালেই কবি 'বৃদ্ধ হৈলুঁ অখনে হইলুঁ বলহীন' এবং 'নীরস হৈল অঙ্গ না প্রকাশে মতি'।- বলে আফসোস করেছেন। তাছাড়া তখন তাঁর আর্থিক মানসিক দুর্বস্থা চরমে উঠেছে....

মন্দকৃতি ভিক্ষাবৃত্তি জীবন কর্কশ
পুত্রদারা সঙ্গে মুঞি হৈলুঁ পরবশ।
ভিক্ষা করি পুত্র-দারা দেয় রাজকর।

নবরাজ মজলিসের কাছে-

তবে আমি নিবেদিলুঁ হৈল বৃদ্ধকাল
বিশেষত রাজদায় অধিক জঞ্জাল।
নীরস হইল অঙ্গ না প্রকাশে মতি
তাহা শুনি মজলিসে দয়া হৈল অতি।

দানিয়া ভক্ষ্য বস্ত্র রাজদায় নিয়ম করিয়া
আর নানাবিধ দানে মন সন্তোষিয়া।
স্থির করি আমারে করিল অঙ্গীকার
ভাঙ্গিয়া বয়েত ছন্দ রচিতে পয়ার।

আদেষ্টা ও প্রতিপোষক নবরাজ মজলিসও চন্দ্র সুধর্মার (১৬৫২-৮৪ খ্রীঃ) মহামাত্য ছিলেন-

শ্রীমন্ত মজলিস অতুল মহব্ব
নবরাজ পাইয়া যদি হৈল মহামাত্য।

ইনি 'মসজিদ পুঙ্খলী আদি কৈলা পুণ্য কাম' ফলে স্বদেশে-বিদেশে তাঁর কীর্তি ও নাম ছড়িয়ে পড়ে। মজলিসের আরো অনেক গুণের বর্ণনা রয়েছে। আলাউল তোয়াজপটু কবি, যখন যার নুন খেয়েছেন, তখন বিগলিত চিত্তে কৃতজ্ঞ কবি তাঁর গুণ গেয়েছেন।

যদিও 'সিকান্দরনামা সম গ্রন্থ নাহি আর।
তবে 'নিয়ামীর ঘোর বাক্য বুঝন কর্কশ।
কারণ মহন্ত নিয়ামী-বাক্য ইঙ্গিত আকার
বিশেষত পঞ্চভাষ কিতাব মাঝার।
আরবি ফারসি আদ্য নসরানী এহদী
পাহলবী সঙ্গে পঞ্চভাষের অবধি।
আমি ক্ষুদ্র বুদ্ধি তারে রচিতে অশক্য।

^১ ১৬৬১ সনের ১৭ই আগস্ট বাণিজ্যতরীর নাবিক বিশাখাপত্তন বন্দরে সুজার হত্যা সংবাদ বয়ে আনেন।

তাই আরবি-ফারসি-আর্মেনিয়-হিব্রু-পাহলবী ভাষামিশ্রিত কাব্যে

একেক বয়েত লৈয়া ঝগড়া বহুল
কেহ হএ কেহ নহে বলে বিজ্ঞকুল।
বহু পরিশ্রমে আশ্চি এথেক কহিল
কিমাত্র কথার সূত্র তিল না এড়িল।

অতএব সিকান্দরনামায় আলাউল কেবল কাহিনীসূত্র অবিচ্ছিন্ন রাখার প্রয়াসী নিয়ামী ফারসি সাহিত্যের অন্যতম শ্রেষ্ঠ কবি ছিলেন; সে-কবিভাষার লাভণ্য তর্জমায় বিরল। তাই আলাউলের কাব্যে গল্পসার পাই— কাব্যের সৌন্দর্য ও মাধুর্য তেমন পাইনে। কাব্যে বর্ণিত বিষয় এই : সিকান্দরের জন্ম, আরাব্রর পিতা নকুমাসিসের কাছে শিক্ষালাভ, জঙ্গীযুদ্ধে জয়লাভ, দারার সঙ্গে বিরোধ, দর্পণ আবিষ্কার, দারার সঙ্গে যুদ্ধ ও দারার মৃত্যু, পারস্য জয়, দারাকন্যা রৌসনক-সিকান্দর বিবাহ, সিকান্দরের দিগ্বিজয়—এরাক, বারদা, বারদারনী, নওশাবা-সিকান্দরসম্বাদ, পার্বত্যগড় অধিকার, তিলিসমাত যোগে ধনরত্নরক্ষণ, সরিরজয় 'কয়' রাজার পাট জামদর্শন, ইস্তরখ, খোরাসান, হিন্দুস্থান, কনোজবিজয়, চীন অভিযান, সিকান্দর ও খাগানরাজসম্বাদ, শিল্পকথা, রুচ-সিকান্দরের প্রচণ্ড যুদ্ধ ও সিকান্দরের জয়, আব-ই-হায়াতের জন্যে যাত্রা এবং সিকান্দরের স্বদেশ প্রত্যাবর্তন।^২

আগেই বলেছি, সাদউমেত্তদারের ১৬৫২ খ্রীস্টাব্দে অকালে মৃত্যু হলে রানীর অভিভাবকত্বে শিশুপুত্র শ্রীচন্দ্রসুধর্মা রাজা হন। ১৬৬০-৬১ সনে সুজার আশ্রয় প্রাপ্তি ও নিহত হওয়ার সময়ে চন্দ্রসুধর্মা আট/দশ বছরের বালকমাত্র। এসময়ে আরাকানরাজের প্রধানমন্ত্রী ছিলেন সৈয়দ মুসা, আর সর্বময় ক্ষমতা ছিল রানীর হাতে। নারী ও শিশু এবং মুসলিম মুখ্যমন্ত্রী দেখেই হয়তো আওরঙজেবের ভয়ে পলাতক শাহজাহানপুত্র সুজা রোসাক সিংহাসন দখলে প্রবুদ্ধ হয়েছিলেন এবং ষড়যন্ত্রে ব্যর্থ হয়ে কেবল সপরিজন ও সপরিবার নিহত হননি, বহু মুসলিমের লাঞ্ছনার এবং প্রাণহানির কারণ হয়েছিলেন। বন্দী অবস্থায় বোনদের ইজ্জত বিনষ্ট হওয়ার আশঙ্কায় সুজাপুত্র নিজেই বোনদের হত্যা করেন। মুসলিমপুত্রের বাণিজ্যতরীর নাবিকের মাধ্যমে আওরঙজেবের পক্ষে এ খবর সংগ্রহ করেছিলেন মীল জুমলা ৩০শে আগস্ট ১৬৬১ সনে।^৩

সৈয়দ মুসার পরে নবরাজ উপাধিধারী মহামাত্য বা প্রধানমন্ত্রী মজলিসের সময়েই বয়োপ্রাপ্ত রাজা শ্রীচন্দ্রসুধর্মার অভিষেক অনুষ্ঠিত হয়। রাজপ্রশস্তির পরে অভিষেকের বর্ণনা রয়েছে সাহিত্যবিশারদপ্রদত্ত ঢাকা বিশ্ববিদ্যালয়ে ক্রমিক সং ৫৩৫। পৃথি সং ২৭৬ পাণ্ডুলিপিতে। এটি ১২ সংখ্যক পত্রের পাঠ। ১৩ সংখ্যক পত্রটি না থাকায় অভিষেক বর্ণনা খণ্ডিত হয়ে গেছে।

^২ কাহিনীসার ও মূল্যায়ন মৎসম্পাদিত সিকান্দরনামার ভূমিকায় দ্রষ্টব্য। বাঙলা একাডেমী প্রকাশিত, ১৯৭৭ সন।

^৩ অন্ধ প্রদেশের হায়দরাবাদে রক্ষিত দলিল সূত্রে জ্ঞাত।

রোসান্সরাজের অভিশেক :

। জমকছন্দ ।

হেন ধর্মশীল রাজা অতুল মহত্ব
মজলিস নবরাজ তান মহামত্য ।
রোসান্স দেশে আছন্দ যথ মুসলমান
মহাপাত্র মজলিস সবার প্রধান ।
মজলিস পাত্রের মহত্ব শুন এবে
নরপতি স্বর্গ আরোহণ হৈল যবে ।
যুবরাজে আইসে যবে পাটে বসিবারে
দয়াল চরিত্রে হৈবা সত্য ধর্মবস্ত
সুজনেরে সন্তোষিবা নাশিবা দুরন্ত ।
ক্ষেমা ধর্ম আচরিবা চঞ্চল না হৈবা
পূর্ব অপরাধে কার মন্দ না করিবা ।'

দাণ্ডাই পূর্ব মুখে তক্তের বাহিরে ।
মজলিস পরি দিব্য বস্ত্র আভরণ
সমুখে দাণ্ডাই আগে দড়াএ বচন ।
'পুত্রবৎ' প্রজারে পালিবা নিরন্তর
না করিবা ছলবল লোকের উপর ।
শাস্ত্র-নীতি রাজকার্যে হৈবা ন্যায্যবস্ত
নিবলীরে বল না করৌক বলবস্ত ।
আর নানাবিধ প্রকাশন্ত রাজনীতি
সত্য করিয়া যদি দড়াইল নৃপতি ।
প্রথমে মজলিসে তবে সালাম করএ
শেষে মাতৃকুল আদি সবে প্রণামএ ।

এখানে রাজধর্মের ও রাজকর্তব্যের কথা যেমন আছে, তেমনি রয়েছে একটা মানবসম্পর্কের, মানবিক অনুভূতির, শিষ্টাচারের আর সুরূচির ও সংস্কৃতির একটা উদার মধুর চিত্র । সামাজিকভাবে বয়োজ্যেষ্ঠ হিতকামী হিসাবেই মুখ্যমন্ত্রীকে প্রথমে মজলিসে তবে সালাম করএ ।'

উনিশ শতকের শেষের দিকে দোভাষী কৃষ্ণের শেখ আয়েজউদ্দীনেরও একটি সিকান্দরনামা কাব্য রয়েছে ।

আলাউল-রচিত 'তোহফা' রাগজুলিনামা ও পদাবলী যথাস্থানে আলোচিত হবে ।

৯. আবদুন নবী

শেখ চান্দের রসুলবিজয়, সৈয়দ সুলতানের নবীবংশ আর আবদুন নবীর আমীর হামজা বা হামজার বিজয় এত বিশালাকার গ্রন্থ যে 'থাকুক লেখিবে কেহ পড়িতে লাগে ডর ।' আশী পর্বে সমাপ্ত 'আমীর হামজার বিজয়' ফারসি 'দস্তান-ই-আমীর হামজার' স্বাধীন অনুসৃতি । কবি বলেন—

আমীর হামজা কিসসা ফারসি কিতাব
না বুঝিয়া লোকে মনেত পায় তাপ ।
বঙ্গত ফারসি না জানএ লোক সবে—
এহি হেতু সেই কথা মুঞি রচিবার
নিজ বুদ্ধি চিন্তি মনে কৈলুঁ অঙ্গীকার
অবশ্য— মুসলমানি কথা দেখি মনেহ ডরাই
রচিলে বাঙ্গলা ভাষে কোপে কি গোসাঁই ।
তবে— লোক উপকার হেতু তেজি সেই ভএ
দৃঢ়ভাবে রচিবারে ইচ্ছিলুঁ হৃদএ ।

দুনিয়ার পাঠক এক হও! ~ www.amarboi.com ~

কাব্যের উপক্রমে কবি আত্মপরিচয় দিয়েছেন। তা থেকে জানা যায়, কবি-আরবের হযরত আবুবকর সিদ্দিক বংশজ। কবির পিতার প্রপিতামহ বোধ হয় চট্টগ্রামে বসতি স্থাপন করেন। কবির পিতার পিতামহের নাম শাহদুল্লাহ, কবির পিতার নাম, মুহম্মদ শরীফ। 'মুহম্মদ শরীফ জান। সেই মোর পিতা গুণীচিত।' কবির গ্রামের নাম সিলিমপুর। চট্টগ্রাম শহরের উপকণ্ঠে অবস্থিত এ গ্রামটি কবি নওয়াজিস খানের আদি পুরুষ সলিম খান স্থাপিত।

কবি বলেন— চট্টগ্রামরাজ্য মাজে সিলিমপুর স্থান—

সেই স্থানে আছে মোর ক্ষুদ্র উয়ারী

এই গায়েই বিরচিত পঞ্চালিকা তথা ধর্ম স্মরি।

কাব্যরচনাকালও মিলেছে অসংগৃহীত একখানা পাণ্ডুলিপিতে।^১

ঋতু নিধি অত্র আদি হিজরী রহিল

আমীর হামজার পুথি সমাগু হৈল।

(ঋতু-৬, নিধি-৯, অত্র-০, আদি-১)

অতএব, ১০৯৬ হিজরী সনে বা ১৬৮৫ খ্রীস্টাব্দে (৮ই ডিসেম্বর ১৬৮৪ খ্রীস্টাব্দে ১০৯৬ হিজরী শুরু— আমীর হামজা 'বা' হামজার বিজয়' রচিত হয়।

'বিজয় হামজা নাম পুণ্যকথা অনুপাম'... কবির এই উক্তি থেকেই কাব্যর নাম 'হামজার বিজয়' অনুমান করছি।

আঠারো শতকে বিপুলকলেবর দস্তান-ই-আমীর হামজা অনুবাদ করেন দোভাষী শায়ের ফকির গরীবুল্লাহ (প্রথমাংশ) এবং সৈয়দ হামজা (শেষাংশ)।

হামজা ছিলেন হযরত মুহম্মদের সৈয়োকনিষ্ঠ পিতৃব্য। আবদুল মুত্তালিবের কনিষ্ঠা স্ত্রীর সন্তান। বলে-বীর্ষে তিনি ছিলেন অসাধারণ, এবং ওহদের যুদ্ধে তিনি নিহত হন। কিন্তু যতই দিন গেছে, ইসলামের উন্মেষযুগের এ বীরকে মুসলিমরা ততই বেশি করে স্মরণ ও শরণ করেছে দিখিজয়ী ও রাজকন্যাদের হৃদয়বিজেতা রোমান্টিক নায়ক রূপে। ফলে তাঁর ইসলাম প্রচার লক্ষ্যে পৃথিবী পরিক্রমায় যুদ্ধ, বিজয় ও প্রেম-পরিণয় প্রভৃতি বর্ণিত হয়েছে। কবিদের কল্পনা জগতে নিদ্বন্দ্ব নির্বিঘ্ন বিহারে আকাশ সমুদ্র অরণ্য পর্বত বাধা হয়ে দাঁড়ায়নি। বর্ণিত বিষয়ের সূচী দেখলেই গ্রন্থ সম্বন্ধে ধারণা হবে। ১৪২ অধ্যায়ে দেও-দানু-জীন-পরী, যাদু-টোনা-তেলেসমাত, ইসলাম প্রচার, সি-মোরগাদি নানা অদ্ভুত ও বিরাটকায় পাখি, নরখাদক প্রাণী, নদনদীনগরী, সমুদ্র-অরণ্য-পর্বত-আকাশ-পাতাল, জীন-পরী, দেওরাজ্য। যুদ্ধবিগ্রহ, নারীপ্রেম, নায়িকা তাহমিনা, মেহেরনিগার, জমিলা কর্সিবেগম, হেন্দা এবং বীর লোন্দখোর, রুস্তম হরুম, মরজক, নওশেরওয়া প্রভৃতি বহু বিচিত্র স্থান, পরিবেশ, ঘটনা ও মানুষের সমাবেশে এক বিচিত্র বর্ণালি জগৎ সৃষ্ট হয়েছে।

উমর উম্মিয়া হল প্রাচীন ডনকুইকসোট, কবির ভাষায় সে

ফল নাহি তীর হাতে বেওর কামান

শিয়ালের লেজ ছেড়ে বাওরা সমান।

^১ পুথি পরিচিতি, পৃঃ ৩।

কাঠের তলোয়ার হাতে কাগজের ঢাল

মকবেল হালটি হাসে দেখিয়া খেয়াল।

আমীর হামজার বিজয়ের ফলে—

দেউল দেহারা আর বুতে কৈল ছারকার।

আর সব মুমীন হয়ে ঠাই ঠাই মসজিদে পড়িছে নামাজ।

১০. কবি গেয়াস খান

হামজার বিজয় নামে রসুলের পিতৃব্য বীর আমীর হামজার দিখিজয় বৃত্তান্ত রচনা করেছিলেন গয়াস খান বা গেয়াস খান। এ কাব্য রচনার আদ্যেই ছিলেন এয়ার মুহম্মদের পুত্র নাসির মুহম্মদ। কবির পিতা দরিয়া খান ছিলেন 'রাজপাত্র' তথা পদস্থ রাজপুরুষ। কবির পিতামহের নাম বুধা খান। কবির পীরের নাম বুরহানউদ্দিন। এ বুরহানউদ্দিন, যদি কবি নসরুল্লাহ খোন্দকারের পূর্বপুরুষ হন, তাহলে কবি সতেরো শতকের গোড়ার দিকে বর্তমান ছিলেন। কাব্যটি কবির বৃদ্ধকালের রচনা : 'বৃদ্ধকালে পদ রচি বা দূষিবা তথা'। সম্ভবত পদকার গয়াস আর এ কবি গয়াস খান অভিন্ন ব্যক্তি এবং চট্টগ্রামবাসী। এ কবিও হয়তো আঠারো শতকের।'

১১. নসরুল্লাহ খোন্দকার : শরীয়তনামার আলোচনা সূত্রে জঙ্গনামা ও মুসার সওয়াল রচয়িতা আঠারো শতকের মধ্যভাগের কবি নসরুল্লাহ খোন্দকারের বিস্তৃত পরিচয় দেয়া হয়েছে। তাঁর রচিত প্রথম গ্রন্থ 'জঙ্গনামা' সংগৃহীত হয়মির্শা সাহিত্যবিশারদ প্রায় পঁচাত্তর বছর আগে চট্টগ্রামের আনোয়ারা থানার অন্তর্গত ডুমোরিয়া পায়ের আমীর আলী চৌধুরীর বাড়ীর পাণ্ডুলিপি দেখে কবির ও কাব্যের পরিচিতি লিখেছিলেন। সেটিই আমাদের সম্বল। কবির পীর ছিলেন হামিদউদ্দীন। এ জঙ্গনামায় বর্ণিত বিষয় হচ্ছে হযরত মুহম্মদের সহযোগী হিসাবে রণবীর আলীর কাফির রাজ্য বিজয় ও সপ্তজা রাজাদের ইসলামে দীক্ষাদান। হানিফা-হামজার দিখিজয় ও ইসলাম প্রচার লক্ষেই সংঘটিত। এ সূত্রে জয়কুমরাজার লড়াই সোনাভান, জৈগুন প্রভৃতি কাব্য স্মর্তব্য। এ সব কাব্য যে কাল্পনিক যুদ্ধ নিয়ে রচিত তা বলার অপেক্ষা রাখে না।

১২. শেখ ফয়জুল্লাহই যে 'গোরক্ষবিজয়' রচয়িতা, তারও নিশ্চিত প্রমাণ পাওয়া গেছে। তাঁর 'গাজী বিজয়' ও 'সত্যপীর' গ্রন্থের খবরও সঠিকভাবেই জানা গেছে। গাজী বিজয় আজো সংগৃহীত না হলেও ষোল শতকের কাব্য ও কবি সম্বন্ধে আলোচনা লিপিবদ্ধ রাখা বাঞ্ছনীয়। তাই এ জঙ্গনামা অধ্যায়েও ফয়জুল্লাহ গাজী বিজয় প্রণেতা রূপেই স্মরণ্য। শেখ ফয়জুল্লাহর আবির্ভাবকাল সম্বন্ধেও এখন আর কোন সংশয় থাকার কথা নয়। 'সত্যপীর পাঁচালী' থেকে ডক্টর মুহম্মদ এনামুল হক কর্তৃক উদ্ধৃত নিম্নলিখিত পংক্তি কয়েকটি শেখ ফয়জুল্লাহর রচনা ও আবির্ভাব কাল সম্বন্ধে আমাদের নিশ্চিত ধারণা দিয়েছে :

^১ এ কাব্যের পাণ্ডুলিপিরও মালিক প্রখ্যাত সংগ্রাহক আবদুস সাত্তার চৌধুরী। আমরা পুঁথি পড়তে পায়নি, তাই পূর্ণাঙ্গ পরিচয় দেয়া সম্ভব হয়নি। পুঁথির লিপিকর কালিদাস নন্দীর পিতা মধুরাম এবং মধুরামের পিতার নাম ডুওরাম। | নির্বাস ধলঘাটগ্রাম-চট্টগ্রাম পুঁথির মালিক- মুহাম্মদ জমা [জামান], লিপিকাল ১১৯৫ মঘী তথা ১৮৩৩ খ্রীস্টাব্দ।

গোর্থবিজয় আদ্যো মুনিসিদ্ধা কত
কহিলাম সন্ত কথা শুনিলাম যত
খোঁটা দূরের গীর ইছমাইল গাজী
গাজীর বিজয়ে সেহ মোক হইল রাজী।

এবে কহি সত্যপীর অপূর্ব কথন
ধন বাড়ে শুনিলে পাতক খণন।
মুনি রস বেদ শশী শাকে রহে সন
শেখ ফয়জুল্লাহ ভাগ ভাবি দেখ মন।^২

সূতরাং ‘সত্যপীর পাঁচালী’র রচনাকাল ১৪৬৭ বা ১৪৯৭ শকাব্দ মোতাবেক ১৫৪৫ বা ১৫৭৫ খ্রীস্টাব্দ। গোরক্ষবিজয় তাঁর আদি রচনা এবং গাজী বিজয় তাঁর দ্বিতীয় গ্রন্থ। অতএব, শেখ ফয়জুল্লাহ ছিলেন ষোল শতকের মধ্যভাগের কবি; উষ্টর সুকুমার সেনও সত্যপীর পাঁচালী পেয়েছেন।^৩ অধ্যাপক সুখময় মুখোপাধ্যায় তাঁর ‘বাংলার নাথ সাহিত্যে’^৪ শেখ ফয়জুল্লাহকে ষোল শতকের কবি বলে স্বীকৃতি দিয়েছিলেন; কিন্তু সম্প্রতি তিনি তাঁর প্রাচীন বাংলা সাহিত্যের কালক্রম গ্রন্থে তাঁর পূর্বমত পরিবর্তন করেছেন। এই মত বদলের হেতু তিনিট :
১. গোরক্ষবিজয়ের পাঠের স্থানে স্থানে অর্বাচীন শব্দের প্রয়োগ; ২. ষোল শতকে ‘সত্যপীর পাঁচালী’ রচিত হওয়ার অসম্ভাব্যতা এবং ৩. গোরক্ষবিজয় পুথির উনিশ শতকের আগেকার পাতুলিপির অপ্রাপ্যতা।^৫ তাঁর যুক্তিগুলো যাচাই করে দেখা যেতে পারে : ১. পাঠে শব্দের অর্বাচীনতা যে কবিকেও অর্বাচীন করে তোলে না, তার প্রকৃষ্ট নজির মালাধর বসু, কৃতিবাস ও কয়েকজন আদি পদকর্তা। সবাই জানেন, গোরক্ষবিজয়, ময়নামতীর গান, মনসার ভাসান তথা মধ্যযুগের পাঁচালীগুলো ‘পালা’ হিসেবে গায়নের দ্বারা সঙ্গীত হত, অন্তত ‘কথকতার মাধ্যমেই যে এগুলো বেঁচে-বর্তে ছিল, তা তো অস্বীকার করবার নয়। কাজেই গায়ন, কথক আর লিপিকর যে দুর্বোধ্য ও অপ্রচলিত প্রাচীন শব্দের স্থানের শ্রুতিমধুর প্রচলিত শব্দ বসিয়েছেন, এমনকি প্রয়োজন ও পছন্দমতো কথাও জুড়ে দিয়েছেন, এখন আর তা তথ্য-প্রমাণ দিয়ে বুঝিয়ে দেয়ার অপেক্ষা রাখে না। ২. সেনেরা শতকের শেষের বা ষোল শতকের গোড়ার দিকেই যে বাঙলাদেশে অন্তত উত্তর-পশ্চিমে ও মধ্য বঙ্গে উপদেবতা পূজার প্রচলন শুরু হয়, বিভিন্ন সূত্রে তার আভাস পাওয়া যায়। পালরাজত্বের শেষে দিকে বৌদ্ধধর্মের বিকৃতিতে তন্ত্র-মন্ত্র ও উপদেবতা পূজা প্রচলিত হয়, সহজযান, বজ্রযান, নাথপন্থ প্রভৃতিই তার প্রমাণ বহন করছে। সেন আমলের শেষ সময়ে চণ্ডী-মনসা প্রভৃতি লৌকিক দেবতার প্রাধান্য লোকসমাজে সুপ্রতিষ্ঠিত হয়েছে; গৌড় সুলতানদের শাসনের শেষ ভাগে হিন্দু-মুসলমান স্ব স্ব ধর্মমত ভুলে সত্যপীর-সত্যনারায়ণ, বনবিবি-বনদেবী, কালুগাজী-কালুরায়, বড় খাঁ গাজী-দক্ষিণ রায় এবং ওলা বিবি-শীতলা পূজা শুরু করে। উনিশ শতকে ইংরেজি শিক্ষার প্রভাবে বাঙালী হিন্দু রামায়ণ-মহাভারত পড়ে পৌরাণিক ধর্ম ফিরে পায় এবং ওহাবী আন্দোলনের মাধ্যমে বাঙালী মুসলমানও শরীয়তমুখী হয়ে ওঠে। আদিকাল থেকেই দেখা যাচ্ছে, কোন বহিরারোপিত ধর্মমত যা জীবনাদর্শ বাঙলাদেশে টেকেনি, বাঙালীরা সব সময়ে নিজেদের জীবন-জীবিকার গরজমত ধর্মমত, ইষ্টদেবতা এবং জীবনাদর্শ তৈরি করে নিয়েছে। গৌড়-সুলতানদের শাসনের শেষের দিকেও হিন্দু-মুসলমান এক মিলন-ময়দানে এসে দাঁড়াতে চেষ্টা করে, তাদের এ মিলনরাখী হয় ‘সত্য’ (Truth) এবং প্রমুখ সত্যই যুগপৎ সত্যনারায়ণ ও সত্যপীর রূপে পূজা-শিরনী পেতে

^২ মুসলিম বাঙ্গলা সাহিত্য, মুহম্মদ এনামুল হক, পৃঃ ৮৯।

^৩ বাঃ সাঃ ইঃ ১ম খণ্ড ২য় সং পৃঃ ১০৪৩-৪৪।

^৪ সাহিত্য প্রকাশিকা, ১ম খণ্ড (বিশ্বভারতী)। সুখময় মুখোপাধ্যায়।

^৫ প্রাচীন বাংলাসাহিত্যের কালক্রম, পৃঃ ২৬২-৬৩।

থাকেন। প্রায় শতক সত্যনারায়ণ পাঁচালীকারই সত্যনারায়ণের অপ্রতিহত প্রভাবের সাক্ষ্য দান করছেন। সত্যপীর বা নারায়ণ মুসলিম মানসজাত। তাই শিরনীই তাঁর ভোগ।

বাঙলার বাইরেও এঁর প্রতিষ্ঠা ছিল। লালমোনের কিসসায় সুলতান হোসেন শাহর (১৪৯৩-১৫১৯ খ্রিস্টাব্দ) উল্লেখ রয়েছে, কেউ কেউ সত্যপীরকে হোসেন শাহর রক্ষিতা গর্ভজাত সন্তান বলে বিশ্বাস করেন। হোসেন শাহর নামোল্লেখ, ষোল শতকের কবি (?) কঙ্কের রচনা, সতেরো শতকের কবি কৃষ্ণরাম দাসের রায়মঙ্গল, আঠারো শতকের প্রথমার্ধে কবি ভারতচন্দ্রের সত্যনারায়ণ প্রশস্তি ব্রাহ্মণের ঘরে ব্রাহ্মণের দ্বারা সত্যনারায়ণ পূজিত হচ্ছেন, কাজেই সত্যনারায়ণের পূজা প্রচার কাল সহজেই দেড়শ বছর পিছিয়ে দেয়া যায়, সেকালে যেকোন কিছু প্রচার নিচ্চাই সময়সাপেক্ষ ছিল। প্রভৃতির আলোকে বিচার করলে শেখ ফয়জুল্লাহকে ষোল শতকের কবি বলে স্বীকার করতে দ্বিধা হবে না। বিশেষত কঙ্কের যখন কেউ কেউ এখনো ষোল শতকের কবি বলে স্বীকৃতি দেন, তখন ফয়জুল্লাহকে স্বীকার না করে উপায় নেই। ৩. চট্টগ্রামে মঘীসনই বহুল প্রচলিত। মঘীসন লিখতে ‘সন’ ‘সাল’ প্রভৃতি ব্যবহৃত হত না,— এখনো হয় না, অনেক সময়ে পাশে ‘মঘী’ শব্দটি বসানো হয়। তাই চট্টগ্রামের পুথিতে ‘সন’ বা ‘সাল’ বসালেই বুঝতে হবে তা বাঙলা সন।^১ আবদুল করিম সাহিত্যবিশারদ কর্তৃক সংগৃহীত গোরক্ষবিজয়ের যে পাণ্ডুলিপি খানার লিপিকাল ১১৮৫ সন তা যথার্থ বাঙলা সন। অতএব, এর লিপিকাল যে ১৭৭৮ খ্রিস্টাব্দ অর্থাৎ আঠারো শতক।^২ কাজেই অধ্যাপক সুখময় মুখোপাধ্যায়ের সিদ্ধান্ত তথ্যভিত্তিক নয়।

এখন শুধু একটি বিষয়ই অমীমাংসিত রয়ে গেছে : পদকর্তা মীর ফয়জুল্লাহ আর শেখ ফয়জুল্লাহ অভিন্ন ব্যক্তি কিনা, সে বিষয়ে যিহুসংশয় হবার মত কোন তথ্য বা উপাদান আজও মেলেনি।

পদকর্তা হিসেবে আমরা সর্বত্র মীর (কুচিং মির্জা) ফয়জুল্লাহ নামই পাচ্ছি। আমাদের মনে হয়, শেখ ফয়জুল্লাহর নাম সাদৃশ্যে বিভ্রান্ত হয়ে লিপিকর ‘রাগমালা’র ভণিতায় ‘মীর মির্জা’ স্থলে শেখ বসিয়ে দিয়েছে।^৩ মীর ফয়জুল্লাহ রচিত সুলতান ‘জমজমা’ পুথিও মিলেছে। আপাতত শেখ ফয়জুল্লাহ ও মীর ফয়জুল্লাহকে দুই ভিন্ন ব্যক্তি বলে মনে নেয়াই বোধ হয় যুক্তিসঙ্গত এবং দোভাষী শায়ের ফৈজুল্লাহ ভিন্ন ব্যক্তি। এ সূত্রে প্রথম অধ্যায়ে গোরক্ষবিজয় সম্বন্ধে আলোচনাও স্মর্তব্য।

কারবালায়ুদ্ধ

১৩. দৌলতউজির বাহরাম খান

দৌলতউজির বাহরাম খানের ‘লায়লী-মজনু’ আলোচনা কালে কবি পরিচিতি বিস্তৃত ভাবে দেয়া হয়েছে। দৌলতউজিরের ‘ইমাম বিজয়ে’ পীরের নাম নেই, তাই এটিকে কবির প্রথম রচনা মনে করা হয়। ইমামবিজয় সম্পাদক অধ্যাপক আলী আহমদ^৪ পর্তুগীজ-উক্ত নোগাজিলকে শেরশাহ সুরের ভাই নিজাম-এর বিকৃতি বলে মনে করে না নোগাজিলকে উষ্টর সুনীতিভূষণ কানুনগো

^১ দৃষ্টান্তের জন্য পুথি পরিচিতি দ্রষ্টব্য।

^২ এ পৃঃ ১৩১-৩২।

^৩ এ পৃঃ ৪৫৬, ৪৬৩, ৫৪১, ৬৫৪।

^৪ গ্রান্ড বাঙলা উন্নয়নবোর্ড প্রকাশিত, ১৯৬৯ সন।

nau Khoda > Nakhoda নও-খোদার (নৌকার মালিক, নৌবহরের মালিক) বিকৃতিরূপ বলে মানেন।^৭ এ কারণে আলী আহমদের মতে দৌলতউজির তাঁর গ্রন্থ দুটো ১৫৪৫-৬৫ খ্রীস্টাব্দের মধ্যে, কিন্তু আমাদের ধারণায় ১৫৪৩-১৫৫৩ খ্রীস্টাব্দের মধ্যে রচনা করেন।

ইমাম বিজয়ে গবেষণাসাপেক্ষ একটা মূল্যবান তথ্য রয়েছে :

‘শহর জাফরাবাদ নামে চট্টগ্রাম
তাহাতে বৈসএ পীর বদর আলাম।’-
নৃপতি নিজাম শাহ রাজ্য অধিপতি
যশোবন্ত বলবন্ত শক্তিবন্ত অতি
তাহাকে সেবক হএ দৌলত উজির।

মনে হয়, ফেনী নদীকে চট্টগ্রামের সীমা ধরা হত। এবং আধুনিক মীরেরসরাই সীতাকুণ্ডর মধ্যস্থানে সীমান্তরক্ষী সেনানী শাসকের শাসনকেন্দ্র ছিল। পরাগলের আমলে পরাগলপুরে, নিজামের আমলে নিজামপুরে এবং কোন জাফরের আমলে জাফরাবাদে বা জাফরনগরে এ শাসনকেন্দ্র ছিল, উক্ত সব চাকলাগুলো উত্তর চট্টগ্রামে অবস্থিত। কেন্দ্রীয় শাসক থাকতেন চট্টগ্রাম বন্দর এলাকার সীমায় ফতেহাবাদে। কর্ণফুলীর পূর্ব-দক্ষিণে শাসনকেন্দ্র ছিল চক্রশালায় চকরিয়ায় ও রামুতে।

ইমামবিজয়ের পল্লবিত কাহিনীসার এই : হযরত মুহম্মদের গুণ ও ব্যক্ত শক্তি ও মহিমা, হাসান-হোসেনের জন্মবৃত্তান্ত, এঁদের অপমৃত্যু সম্বন্ধে রসুল-জিবরাইল সম্বাদ, পিতা আলির কাছে হাসান-হোসেনের যুদ্ধবিদ্যা শিক্ষা, এঁদের এঁদের বস্ত্র, পাণী ফিরিতার বৃত্তান্ত, সাপবেশী ফিরিস্তা, ডালিমে বিঘের ও শোণিতের হস্ত, কারবালার মাটি ও রসুল, আগুয়ার মাহাত্ম্য, এজিদের জন্মবৃত্তান্ত, হাশেমী উমাইয়্য পরিচিতি, কারবালায়ুদ্ধ, হোসেন-ভৃত্যের কাহিনী, হোসেনশিবির লুণ্ঠন, বন্দীদের দাম্যেঁকে উপস্থিতি, তাহানার সন্ধান, আলী আজগরের এজিদের নামে খোৎবা পাঠ, মুহম্মদ হানিফা পরিচিতি, এখানে কাব্য খণ্ডিত। পুরো কাব্যটিই অলৌকিক অদ্ভুত ঘটনার আকর। প্রচলিত জনপ্রিয় কাহিনীর কিছু ব্যতিক্রমও রয়েছে এখানে সেখানে। কবির ভাষা সর্বত্র পরিচ্ছন্ন। সুসম্পাদনায় কাব্যটি সুখপাঠ্য হতে পারতো। পরিচিত বিষয়ের পরিচিত ভাষা-ভঙ্গিতে অভিব্যক্তি এ কাব্যেও মেলে। যেমন :

যুদ্ধের তীব্রতা ও ভয়ঙ্করতা বোঝানোর জন্য :

অসুরের রণ কিবা সুরের সঙ্গ্রাম পুত্রক ছাড়িয়া বাপ ধাএ প্রাণ লৈয়া
পৃথিবী মণ্ডল মাঝে হেন মহারণ বাপ ভেজি পুত্র ধাএ না চাহে ফিরিয়া।
মনুষ্য কুলেতে যে না হৈছে কদাচন।

সদ্য বিধবা-

সতী নারী সাহাবানু অতি বিকলিত তনু মুছিলেক শিরের সিন্দুর
ধরনীতে কান্দএ গড়িয়া ভাঙ্গিল হস্তের চুড়ি অঙ্গুরী ফেলিল গুড়ি
আউল মাথার কেশ বাউল মলিন বেশ বেশর করিল পুনি দূর।
সঘনে হানএ নিজ হিয়া কান্দএ দীঘল রাএ প্রাণ বিদরিয়া যাএ
তেজিল কণ্ঠের হার খসাইলা অলঙ্কার হা হা মোর প্রাণের সাক্ষাত।

^৭ JASB, Dhaka, Vol, XXI No. 2 August, 1979. Chittagong During Afghan Rule কলকাতার ‘না-খোদা’ মসজিদ এ নৌও-মালিক নির্দেশকই।

কবিত্বে পাণ্ডিত্যে ও স্বাভাবিকতায় কবির পরিণত বয়সের রচনা লায়লী-মজনুই শ্রেষ্ঠ কাব্য।

১৪. শেখ ফয়জুল্লাহ

গাজীবিজয় এবং গোরক্ষবিজয় রচয়িতা শেখ ফয়জুল্লাহর পরিচয় প্রথম অধ্যায়ে ও উপরে গাজীবিজয় প্রসঙ্গে রয়েছে। এখানে তাঁর রচিত 'যয়নবের চৌতিশা'র পরিচয় দিচ্ছি।

উ, ঙ, ঙ, এতে, গ, য, ড, ঢ, ষ, ঠ, ঙ, " এবং কখনো কখনো ঙ, ঐ, ঔ ব্যতীত অপর চৌত্রিশটি বর্ণের প্রত্যেকটিকে এক বা একাধিক চরণের আদ্যক্ষর রূপে ব্যবহার করে স্তুতি, প্রশস্তি বা নায়ক কিংবা নায়িকার সংবৎসরের বিরহ দারিদ্র্য দুঃখ কিংবা ঋতুবর্ণনার যে রীতি ছিল, তা আলঙ্কারিক পরিভাষায় চৌতিশা বা 'চৌত্রিশা'। এ চৌত্রিশায় বর্ণানুক্রম রক্ষিত হয়নি। তাছাড়া অন্য অনেক কবির মতো ফয়জুল্লাহও খ-ক্ষ, জ-য, শ-স প্রভৃতি প্রয়োগে বা নানাবিভ্রাট ঘটিয়েছেন। এ চৌত্রিশায় হাসানের অপমৃত্যুর পর হাসানপত্নী যয়নবের শোক ও বিরহ-বিলাপ করুণ ভাষায় বর্ণিত হয়েছে। ফয়জুল্লাহ কারবালা কাহিনী নিয়ে পূর্ণাঙ্গ 'জঙ্গনামা' রচনা করেছিলেন কি-না জানা যায়নি।'

১৫. মুহম্মদ খান

সত্যিকালি বিবাদ-সম্বাদ ও মকুল হোসেন কাব্য সৃষ্টিতা মুহম্মদ খান তাঁর মাতৃকুল ও পিতৃকুলের বিস্তৃত পরিচয় লিপিবদ্ধ করেছেন তাঁর মকুল হোসেন কাব্যে। মুহম্মদ খানের জন্ম উজীরশ্রেণীর প্রশাসক বংশে। তাঁর মাতৃকুলও আরব থেকে আগত পীরবংশ। ফলে কবির পিতৃকুল চট্টগ্রামের তিনশ বছরের রাজনৈতিক ইতিহাসের সঙ্গে প্রায় প্রত্যক্ষভাবে ছিল জড়িত। এ জন্যই মুহম্মদ খানের কাব্যের চেয়ে তাঁর আত্মপরিচিতি অংশের গুরুত্ব বেশি।

ঐতিহাসিক গুরুত্ব রয়েছে বলেই আমরা এখানে কবির পিতৃকুল ও মাতৃকুলের দীর্ঘ বর্ণনা উদ্ধৃতি করছি:

মাতৃকুল

I

একমনে প্রণাম করম বারেবার।
কদল খান গাজী পীর ত্রিভুবন সার।
যার রণে পড়িল অক্ষয় রিপুদল।
ভএ কেহ মছিন্ন গেল সমুদ্রের তল।।
একেশ্বর মহিম হইল প্রাণহীন।
রিপু জিনি চাট্টিগ্রাম কৈলা নিজাধীন।।
বৃক্ষডালে বসিছিল কাফিরেরগণ।
সেই বৃক্ষ ছেদি সবে করিলা নিধন।।
প্রণামহৌ তান সুত গুণের সাগর।

তান একদশ মিত্র করম প্রণাম
পুস্তক বাড়এ হেতু না লেখিলু নাম।।
তান একদশ মিত্র জিনিয়া চাট্টিগ্রাম।
মুসলমান কৈলা চাট্টিগ্রাম অনুপাম।।
তাহান প্রেমের সখা অতি গুণবান।।
শএখ শরীফুদ্দিন ত্রিভুবনের জান।।
একমনে প্রণামহৌ সে দুই চরণ।
শিক্ষাগুরু কল্পতরু অতি বিতপণ।।
তাহান পদে ত মোর সহস্র প্রণাম॥

^১ মৎসম্পাদিত যয়নবের চৌতিশা- বাঙলা একাডেমী পত্রিকা, ৩য় বর্ষ, ১ম সংখ্যা, বৈশাখ-শ্রাবণ, ১৩৬৬ সাল
দ্রষ্টব্য।

কুলগুরু কাজী সে আলম নাম ধর॥
মহাসত্য মীর কাজী তাহান নন্দন ।
একমনে প্রণামহোঁ এ দুই চরণ॥
তান সুত গুণযুত খান কাজী নাম ।

II

তান সুত সুতনয় বৃদ্ধি সুবগুরু ।
দুগুণিত জনের প্রতি ভব-কল্পতরু ॥
যার করমেতে ভরি গেল ত্রিভুবন ।
বাবা ফরিদের পদে করম বন্দন ॥
তাহার ঔরসোদ্ভব ত্রিভুবনের সার ।
দশদিক ভরি কীর্তি হইল যাহার ॥
ক্ষেণেকে মক্কাতে চলি যাএ যেই জন
তথা গিয়া সেবন্ত নিরুপ নিরঞ্জন ॥
তিলেকে আসিয়া পুনি চাটিয়াম দেশ ॥
যথাবিধি করতার সেবন্ত বিশেষ ॥
হামিদ আলাম পীর ভুবনের গতি ।
তান দুই পদ বন্দম করিয়া ভকতি ॥
তাহার ঔরসোদ্ভব কুলের কেতন ।
সর্বশাস্ত্রে বিশারদ অতি বিতপণ ॥

III

তাহান নন্দন শ্যাম-সুন্দর শরীর
পূর্ণিমার চন্দ্র মুখ সর্বশাস্ত্রে থির ॥
গৌড়রাজ্য অধিপতি যাকে প্রশংসিলা ।
ভিক্ষুক জনের পতি যাহাকে বুলিলা ॥
চাটিয়াম পতি জান নসরত খান ।
আপনার প্রিয়া সুতা দিলা যার স্থান ॥
বার বাঙ্গালার রাজা ঈসা খান বীর ।
দক্ষিণ-কুলের রাজা আদম সুধীর ॥

IV

শাহা আবদুল ওহাবের করম বন্দন ।
শাহা ভিখারী তানে বোলে সর্বজন ॥
বারে বারে প্রণামহোঁ সে দুই চরণ ।
গুণবান মৃত্যুঞ্জয় নবরসে 'দধি' ।
বহুলপ্রকারে যারে সজিলেক বিধি ॥
নিরন্তন নিরঞ্জন ভাবে সেই জন ।
প্রভুভাবে ঝরে নীর কমল লোচন ॥
অঙ্গে বঙ্গে সকলে পূজএ যার পদ ।
আল্লার কলাম যার হএ কণ্ঠগত ॥


তাহান নন্দন জান সর্বগণালয় ।
করতার ভাবে মগ্ন তাহান হৃদয় ॥
শএখ হামিদ পীর জারেন ত্রিভুবন ।
এক মনে প্রণামিএ সে দুই চরণ ॥

বধিল সে রিপুকুল করিয়া সংগ্রাম ।
আপনেহ স্বর্গবাসী হৈলা পরিণাম ।
শাহা নাসিরুদ্দিন পীর মর্যাদা সাগর
চরণ রাজীবে প্রণামহোঁ বহুতর ॥
তাহান ঔরসে বিবি মানিক্য ধরিলা ।
সর্বসুলক্ষণ শিশু তাতে উপজিলা ॥
পরম উত্তল কান্তি কমললোচন ।
আখেরে কুতুব হেন বোলে সর্বজন ॥
পীর মোকারম নাম ভুবনের সার ।
মাতা সঙ্গে তাহানে প্রণামি বারেবার
তাহামি কনিষ্ঠ সে যে পূজিত ভুবন
পূর্ণ চন্দ্রাধিক মুখ কমললোচন ॥
গৌরান্ন কাঞ্চন-কান্তি উজ্জ্বল নাসাদও ।
দীর্ঘবাহু হেমলতা বিক্রমে প্রচণ্ড ॥

স্নেহভাবে যাহাকে পূজন্ত প্রতিনিধি ।
যাহাকে প্রশংসা কৈলা মগধের পতি ॥
সদর জাঁহা করি যার ভুবনে বাখান ।
পরম পাণ্ডিত্য গুণে রসের নিদান ॥
'পীর মুলুক' যারে বোলে সর্বজন ।
বারে বারে প্রণামহোঁ সে দুই চরণ ॥
একমনে ভাবে যেবা একা নিরঞ্জন ।
ক্ষমাকুল দয়াশীল মধুর বচন ॥

কোরেশী বংশের জান প্রসিদ্ধির হেতু
মহাশয় মাতামহ কুলজয় কেতু ॥
ধবল গজেন্দ্র সেবে বুলি যাহাকে বাখানে
যা হোন্তে পাইল পদ রোসানীর গণে
শাহা আহমদ পীর করম বন্দন ।
উদ্ধারহ মাতামহ পশিলু শরণ ॥
মোহাম্মদ খানে কহে মনে করি সার ।
তুক্ষিমাত্র সহায় নরক হৈতে পার ॥

বংশলতাটি একুপ : শেখ শরীফউদ্দীন-কাজী আলম-মীর কাজী-খান কাজী শেখ হামিদ-
বাবা-ফরিদ-হামিদ আলম-শাহ নাসিরউদ্দীন



পিতৃকুল পরিচিতি

তবে পিতামহ গণ প্রণমিএ এক মন
পিতামহ মাহি আছোয়ার।
সিদ্ধিকের বংশে জন্ম উমরের সদৃশ ধর্ম
লজ্জাএ ওসমান সমসর।
জ্ঞানেতে সদৃশ আলী দানেতে হাতিম বুলি
হামজা সদৃশ বলবান।
শিক্ষাগুরু কল্পতরু সর্ব অস্ত্রশাস্ত্রের গুরু
জন্ম হৈল আরবের স্থান।
আল্লাহর অস্ত্রত করিসে-মৎস্যের পৃষ্ঠেতে চড়ি
চলি ভেলা মাহি আছোয়ার।
গহন সমুদ্র তরি দুই পীর আইলাচলি
হাজী খলিল পীর ওর চাহি পৃথিবীর
ফিরিয়া আসিতে আরবার।
সহরিয়ে তান সঙ্গে পৃথিবী ভ্রমিতে রঙ্গে
চলি ভেলা মাহি আছোয়ার।
আসিতে সমুদ্রতীর সে হাজী খলিল পীর
সিংহ চর্মে কৈলা আরোহণ।
আল্লাহ ফরমান পাই এক মৎস্য আইল ধাই
পৃষ্ঠ পাতি দিলা ততক্ষণ।
সিদ্ধিক তাহান নাম অস্ত্র শাস্ত্রে অনুপাম
বদন কমল কলানিধি।
সর্বসিদ্ধি কল্পতরু পর উপকার চারু
চাট্রগ্রাম দেশের মাঝার।
একাদশ মিত্র সঙ্গে কদল খান গাজী রঙ্গে
দুই পীর বাড়ি লই গেলা।
হাজী খলিলক দেখি বদর আলাম সুখী
অন্যে অন্যে বহুল সম্ভাষিলা।
মাহি আছোয়ার তবে সে দেশ ভ্রমন্ত যবে

দেখিলেস্ত আচার্য নন্দিনী।
রূপে বিদ্যাধরী জিনি সুধা হাসি মধুবানী
নয়ান চকোর কমলিনী।
তান মুখ জুতি দেখি চকোরী ভ্রমর আঁখি
পরস্পর বাঝিলেক দ্বন্দ্ব
বিশি ভাল সীমা কৈল সমুখে নলিনী হৈল
ললাটে শ্রীখণ্ড অর্ধচন্দ্র।
দেখি মাহি আছোয়ার পিতা স্থানে সে কন্যার
মাগিলেস্ত বিবাহ করিতে।
আচার্য না দিল যবে ব্যাঘ্রে আরোহি তবে
বিশ্ব দ্বারে আইলে তুরিতে।
ভএ ধায় বিশ্বগণ আচার্যে ভাবিয়া মন
দান কৈলা আপনা নন্দিনী।
কথকাল ক্রীড়া করি ফিরি দেশে গেলা চলি
পুত্র প্রসবিলা যশস্বিনী।
হাতিম তাহান নাম অস্ত্র শাস্ত্রে অনুপাম
দানে জ্ঞানে দ্বিতীয় হাতিম।
পালন্ত ভিক্ষুক কুল বিক্রমে হামজা তুল
শৌর্য বীর্য দিতে নাহি সীমা।
তান পদ শিরে ধরি পঞ্চগলি রচনা করি
তাহান নন্দন গুণনিধি।
তাহান নন্দনবর রসে যেন রত্নাকর
ধর্মে কর্মে যেন বৃহস্পতি।
সুমেরু সদৃশ থির পার্থসম মহাবীর।
ঐশ্বর্যাদি নৃপ যযাতি।
বংশের প্রসিদ্ধি হেতু নিজ কুল জয়কেতু
জন্ম হৈল প্রচণ্ড প্রতাপ।
গাঙ্গারী-নন্দন মানে কর্ণ বলি জিনি দানে


সত্যবাদী সিদ্ধিক সমান ।
 তান পুত্র জ্ঞানে গুরু দানে কর্ণ মানে কুরু
 রাস্তিখান রূপে পঞ্চবাণ ॥
 চাটিগ্রাম দেশপতি স্বর্ণে যেন শচীপতি
 তাহানে প্রণামি বারেবার ।
 তাহান নন্দন বলি রসে 'দধি বলে শূলী
 দানে হরিচন্দ্র সমসর ॥
 তেজে অগ্নি কোপে যম মানেন কৌরবসম
 রণে যেন ভৃগুপতি রাম ।
 কামিনী মোহন বর অভিনব পঞ্চশর
 মিনাখান রূপে অনুপাম ॥
 তান পুত্র গুণবান ভীমসম বলবান
 কার্তবীর্য সম ধনুধারী ।
 জ্ঞানে গুরু-জ্ঞানে গুরু দানে বলি কল্পতরু
 যার কীর্তি গৌড় দেশ ভরি ॥
 ভিক্ষুক জনের গতি ঐশ্বর্যে যে যযাতি
 দৈর্ঘ্যে বীর্যে গঙ্গীর সাগর ।
 গাভুর খান গুণনিধি থিরে ক্ষিতি রসে 'দধি
 তাহানে প্রণামি বহুতর ।
 করিয়া বিষম রণ জিনিয়া ত্রিপুরাঙ্গণ
 লীলাএ পাঠানগণ জিনি ॥
 শত্রু সব করি ক্ষয় বাহুবলে লভি জয়
 বাপহেস্তে কৈলা রাজধ্বনি ॥
 লইয়া পণ্ডিতগণ শাস্ত্র শুনে অনুক্ষণ
 রঙ্গ ঢঙ্গ কৌতুক অপার ।
 হামজা খান মছলন্দ হাস্যবাণী মকরন্দ
 তাহাকে প্রণামি বারেবার ॥
 মুখ জতি পূর্ণ চন্দ্র হাস্য জিনি মকরন্দ
 অমল কমল দল আঁখি ॥
 দসন মুকতা পাঁতি অধর রঙ্গিম অতি
 তুরুযুগ টালনি দোলনী ।
 দীর্ঘবাহু মধ্যচারু গজগুণ দুই উরু
 চরণ অমল কমলিনী ॥
 নারী-মুখ-পদ্ম-ভঙ্গ সমরে সদৃশ সিংহ
 ভিক্ষুক জনের যেন বাপ ।
 বিজয়ে বিজয় সমবিপক্ষ কুলের যম
 চন্দ্রমুখ সুধা মধু হাস ।
 রূপে কাম সমসর ধীর সুবলিত বর

পুরাত্ন সকল নারী আশ ॥
 প্রজার পালক রাম বাপ হোস্তে অনুপাম
 বাহুবলে শাসিলেন্ত ক্ষিতি ।
 বান্ধব জনের প্রাণ নসরত খান জান
 তান পদে করম মিনতি ॥
 প্রণামি তাহান পদ রচিব পঞ্চালি পদ
 তান পুত্র বলে হলধর ।
 চাটিগ্রাম দেশকান্ত পৃথিবী জিনি ধৈর্যবন্ত
 গাণ্ডীবেরে অর্জুন সমসর ॥
 সান্ত দান্ত গুণদন্ত মর্যাদার নাহি অন্ত
 কৃতান্ত একান্ত কোপগণি ।
 ক্ষেপন্ত করাল শেল নাশন্ত রিপূর কুল
 জ্বলন্ত অনল হেন জানি ॥
 প্রশংসন্ত সর্বদেশ কীর্তি গান্ত সবিশেষ
 মহিষ মারন্ত এক শরে ।
 শৌর্যবন্ত বীর্যবন্ত অনন্ত কি কহিব অন্ত
 একশরে শাদুল সংহারে ॥
 সত্যবন্ত জিনি ধর্ম জ্ঞানবন্ত শিব সম
 প্রজা পালিলেন্ত ধর্ম রাখি ।
 ধর্মে ধর্ম জ্ঞানে গুরু সর্বসিদ্ধ কল্পতরু
 মর্যাদায় সদৃশ রত্নাকর ।
 মধুসম বাক্য জ্ঞান শ্রীযুত রহিম খান
 তাহানে প্রণামি বহুতর ।।
 তাহান অনুজবর পার্থসম ধনুর্ধর
 বলে ভীম ধর্মে যুধিষ্ঠির ।।
 কোপে অগ্নি মানে কুরু দানে কর্ণ কল্পতর
 ক্ষেমাএ পৃথিবী সম স্থির ।।
 শাস্ত্রে অস্ত্রে অনুপাম রূপে অভিনব কাম
 বদন অমল কমলিনী ।
 পর উপকার চারু দ্বিতীয় কল্পতরু
 মধুহাসি অমিয়া সে বাণী ।।
 মধুবাণী সুধা সম হাসি ।
 তেজি গুরুজন ভীতসকল কামিনী চিত
 শ্যাম ঘন মিলিবারে আসি ॥
 কেহ বোলে হর ভএ দেখি আইল কামরাএ
 কেহ বোলে কোথায় অনঙ্গ ।
 এহি মুখ পূর্ণ শশী কেহ বোলে নহে বাসি
 কোথা চান্দ নাহিক কলঙ্ক ॥

কেহ বোলে দিনকর কেহ বোলে বিদ্যাধর
 কেহ বোলে নহে এ সকল ।
 সূরশশী পঞ্চবাণ এহি সে জালাল খান
 রূপে জিনি গেল বিদ্যাধর॥
 সে পদ-পঙ্কজ রেণু শিরে ধরিফাও জু
 রচিলুঁ পঞ্চগলি অনুপাম ।
 তাহান নন্দন বলি বলে ভীম মহাশূলী
 সমবেত ভৃগুপতি রাম॥
 সুমেরু সদৃশ স্থিরদানে জিনি কর্ণবীর
 নতু কিবা হাতিম সমান ।
 বান্ধব পালক রাম রূপে অভিনব কাম
 নতু ষড়াননের সমান॥
 কোপে যুগান্তরের যম তেজশালী হুতাসন

দহএ যেহেন কানন
 শ্যাম নবজলধর যেন স্বর্ণ বিদ্যাধর
 চন্দ্রমুখ কমল নয়ান॥
 নিরঞ্জন অনুষ্কণ ভাবে আবিশ্রাম মন
 তিলেক নাহিক বিস্ময় ।
 কমল নয়ন নীর বহএ যে অনিবার
 মরিতে যে নিরূপ আকার ।
 প্রভু মুবারিজ খান কমল চরণে তান
 প্রণমিএ সহস্রেক বার ।
 তান সুত অল্পজ্ঞান মোহাম্মদ খান জান
 পঞ্চগলি রচিলুঁ শিশুবুদ্ধি ।
 গুন কহি গুলীলোকে অপরাধ ক্ষেম মোক
 গুণ কহিলুঁ সকল সুদ্ধি ।।

ছকে কবির বংশলতা এরূপ :



কবির আদি পিতৃপুরুষ মাহি আসোয়ার এবং হাজী খলিল ও (মাতৃকুলের আদি পুরুষ) শেখ শরীফউদ্দীন যখন চট্টগ্রাম বন্দরে পৌছেন, তখন এক কদর খান গাজী তাঁর এগারো মিত্রের সাহায্যে চট্টগ্রাম জয় করে ইসলাম প্রচারে নিরত। সে সময় পীর বদরও জীবিত, এঁরাই হাজী খলিল ও মাহি আসোয়ারকে সাদরে গ্রহণ করেন। বাঙলার ইতিহাসে বিভিন্ন সূত্রে আমরা জানি সম্রাট মুহম্মদ তুঘলকের আমলে গৌড় তিন খণ্ডে ভাগ হয়ে গেলে এক খণ্ডের প্রথম শাসক বাহরাম খানের মৃত্যু হলে সোনারগাঁয়ে বিদ্রোহী কর্মচারী ফকররা ফখরউদ্দীন মুবারক শাহ নাম নিয়ে সোনারগাঁয়ে স্বাধীন সুলতান হন, যখন ভিন্ন এক কদর খান লখনৌতির শাসনকর্তা এবং মালিক ইজুদ্দীন এহিয়া সাতগাঁওয়ে শাসক ছিলেন। চট্টগ্রাম বিজয়ে ফখরউদ্দীনের সেনাপতি কদর বা কদল খান ছিলেন বলে চট্টগ্রামে বহুল প্রচারিত কিংবদন্তী রয়েছে। ফখরউদ্দীন ১৩৪০ খ্রীস্টাব্দে চট্টগ্রাম জয় করেন, সোনারগাঁ থেকে চট্টগ্রাম অবধি চাঁদপুর-লালমাই দিয়ে একটি সড়ক তিনি নির্মাণ করান, এটি এখনো সর্বত্র নিশ্চিহ্ন হয়ে যায়নি এবং চাঁদপুর-কুমিল্লার লোকের স্থানী উচ্চারণে 'ফররদ্দিনের অর্থ' (ফখরউদ্দীনের পথ) এখনো পরিচিত। ইবন বতুতা এ সময়েই চট্টগ্রামে এসে ফখরউদ্দীনের বিশ্বাসঘাতক প্রতিনিধি শায়দার কথা লিখেছেন। কদর খান সেনাপতি রূপে এবং শায়দা প্রশাসকরূপে একই সঙ্গে চট্টগ্রামে থাকতে পারেন। অন্য সূত্রে জানা যায় এক প্রখ্যাত বদরউদ্দীন বদর-ই-আলমের ১৪৪০ খ্রীস্টাব্দে মৃত্যু হয় বিহারে এবং বিহারের ছোট দরগাহ তাঁরই সমাধি। মুহম্মদ খান-উজ্জ্ব পীর বদর ভিন্ন ব্যক্তি। চট্টগ্রামে কিংবদন্তীর নায়ক বদরপীরের চেরাগ রয়েছে শহরের কেন্দ্রে জামাল খাঁ রোডের মাথায় এবং বকশী বাজারে রয়েছে 'বদরপাতি'। ইনি ঝড়তুষ্ট্রনে দরিয়ার মাঝিমাল্লার অভয় শরণ। একেই মুহম্মদ খান কদর খান গাজী, মাহি আসোয়ার, হাজী খলিল ও শেখ শরীফউদ্দীনের সমকালীন বলে উল্লেখ করেছেন।

শেখ শরীফউদ্দীনের বংশধরদের নাম দেখে মনে হয় তাঁরা শাস্ত্রবিদরূপে কাজীগিরি ও পীরালি দুটোকেই পারিবারিক পেশা হিসেবে বজায় রেখেছিলেন তিন পুরুষ ধরে। পরে কেবল পীর ও ফকিহ হিসেবেই সমাজে উচ্চতম শ্রেণীভুক্ত থাকেন। তার ফলেই পীর-ই-মুলুক শাহ ভিখারী আবদুল ওহাব সদর-ই-জাঁহা চট্টগ্রামের শাসক নসরত খানের জামাতা হতে পেরেছিলেন। আরকানরাজ সাউলা, মেণ্ড সেক ইহা বা মেণ্ডফালঙ প্রশংসিত-আবদুল ওহাব ভিখারীর সহায় বা পীররূপে শাহ ভিখারী চট্টগ্রামের দক্ষিণকূলের রাজা আদমেরও ভাটির রাজা ঈসা খানের শ্রদ্ধেয় (পীর?), বহুজনের প্রখ্যাত পীর হিসেবে 'পীর-ই-মুলুক' এ গুণনামে খ্যাত এবং সরকার প্রদত্ত সদর-ই-জাঁহা পদ বা উপাধিধারী আবদুল ওহাব সদর-ই-জাঁহার কবর রয়েছে পটিয়া থানার পীরখাইন গায়ে। নসরত খানের (মৃত্যু ১৫৬৯ খ্রীঃ) জামাতা ও জালাল খানের (মৃত্যু ১৫৮৬ খ্রীঃ) ভগ্নীপতি আবদুল ওহাব ষোল শতকের শেষপাদ অবধি জীবিত ছিলেন বলে অনুমান করা চলে। আবদুল ওহাবের কন্যাকে বিয়ে করেন জালাল খানের পুত্র মুবারিজ খান। অর্থাৎ কবি মুহম্মদ খানের পিতা ফফাতো বোনকে বিয়ে করেন। কবির আদি পিতৃপুরুষ মাহী আসোয়ার ১৩৪০-৪৫ খ্রীস্টাব্দে চট্টগ্রামে আসেন অনুমান করলে, তাঁর এ দেশী স্ত্রীর গর্ভজাত সন্তান হাতিমের জন্ম ১৩৫০ খ্রীস্টাব্দ ধরলে, তাঁর পুত্র সিদ্দিকের জন্ম সন ১৩৮০ বলে মনে করলে, সিদ্দিক-পুত্র প্রৌঢ় বা বৃদ্ধ 'মজলিস-ই-আলা' উপাধিপ্রাপ্ত রাস্তি খানকে ১৪৭৪ খ্রীস্টাব্দে গৌড়সুলতান রুকনউদ্দীন বাবরক শাহর অধীনে চট্টগ্রাম-শাসক হিসেবে পাওয়া সম্ভব।

আমরা জানি রাস্তি খানের অপর পুত্র পরাগল খান ও পৌত্র ছুটি খান ওফে নসরত খান ফেনী নদীর দক্ষিণপূর্বতীরে গৌড়সুলতান হোসেন শাহর (১৪৯৩-১৫১৯) ও নসরত শাহর (১৫১৯-৩১) আমলে সীমান্তরক্ষী সেনানী তথা লঙ্কর ছিলেন, পরাগলপুরে ১৫১২-১৯ খ্রীস্টাব্দের দিকে কবীন্দ্র পরমেশ্বর দাসের বর্ণনানুসারে আমরা পরাগল খানকে পুত্র-পৌত্র নিয়ে সংসার করতে দেখি। (পুত্র পৌত্রে রাজ্য করে খান মহামতি) মুহম্মদ খানের বর্ণনাদৃষ্টে অনুমান করা চলে যে মিনা খান এবং তাঁর পুত্র গাভুর খানও চট্টগ্রামের কেন্দ্রে বা অন্যত্র শাসক বা প্রশাসক ছিলেন। গাভুর খানের পুত্র হামজা খান (পর্তুগীজদের উচ্চারণে) আমরজা কাম/কাও মসনদ-ই-আলাকে ১৫৩৮ খ্রীস্টাব্দে আমরা গৌড়সুলতান গিয়াসউদ্দীন মাহমুদ শাহর অধীনে উত্তর চট্টগ্রামের (ফতেয়াবাদ কেন্দ্রে) শাসনকর্তারূপে দক্ষিণ চট্টগ্রামের শাসনকর্তা খোদা বখশ খানের সঙ্গে দ্বন্দ্বরত এবং চট্টগ্রাম বন্দর দখলের জন্যে শেরশাহ সুর প্রেরিত নৌবহরের নায়ককে (Nau khoda>Nakhoda-কে পর্তুগীজ উচ্চারিত নোগজিলকে) বিতাড়িত বা বন্দী করবার চেষ্টায় রত দেখি। পর্তুগীজদের সহায়তায় নৌবহর বিতাড়নে তথা নৌসেনাকে বন্দী করতে সমর্থ হওয়ায় তিনি 'পাঠান (শেরশাহ) বিজেতা' এবং ত্রিপুরারাজ দেবমাণিক্যকেও হয়তো চট্টগ্রাম দখল প্রয়াসে প্রতিহত করেছিলেন ও সে অর্থে তিনি 'ত্রিপুরবিজেতা'ও। তারপর নসরত খান ও জালাল খানকে আরাকানরাজের অধীনে আমরা চট্টগ্রামে শাসকরূপে পাই। এঁদের বয়োজ্যেষ্ঠ-কনিষ্ঠ সমকালীন ব্যক্তি হচ্ছেন সদর-ই-জাহা আবদুল ওহাব, দক্ষিণকূলের রাজা আদম এবং বারবাঙ্গালার রাজা ভূইয়া ঈশা খান, বিজয়মাণিক্য, উদয়মাণিক্য ও অমরমাণিক্য, শেরশাহ, মুহম্মদ খান সুর (১৫৫৫ মৃত্যু) গিয়াসউদ্দীন বাহাদুর শাহ (মৃত্যু ১৫৬০) দ্বিতীয় গিয়াসউদ্দীন বাহাদুর (১৫৬৩ মৃত্যু) তৃতীয় গিয়াসউদ্দীন (১৫৬৪), তাজখান কররানী (১৫৬৪ খ্রীঃ) সোলায়মান ও দাউদখান কররানী (১৫৭৬ খ্রীঃ)।

দেখা যাচ্ছে ১৪৭৪ খ্রীস্টাব্দের পূর্ব থেকেই ইব্রাহিম খান (সতেরো শতকের প্রথমার্ধে) অবধি হাতিম-বংশের লোক গৌড়-ত্রিপুরা-আরাকান রাজের অধীনে চট্টগ্রামে শাসক-প্রশাসক পদে প্রায় অবিচ্ছিন্নভাবে নিযুক্ত ছিলেন। এ সূত্রে উল্লেখ্য যে ঐটিলাতা ও অগ্রাসঙ্গিকতা এড়ানোর জন্যেই বংশলতায় পুরুষানুক্রম বর্ণনায় মানুষ একক পূর্বপুরুষের নামই উল্লেখ করে, তারপর প্রয়োজনবোধে কখনো কখনো পিতামহের ভাইয়ের এবং পিতা-পিতৃব্যের নামোল্লেখ করে মাত্র। রাস্তি খানের বংশধররূপে পরাগল-ছুটি খানের নামোল্লেখ না করার কারণ এ-ই। এ সূত্রে জোড়াসাঁকোর ও পাথুরিয়াঘাটার ঠাকুর পরিবারের বিচ্ছিন্নতা এবং স্বাতন্ত্র্যচেতনা স্মর্তব্য।

মুহম্মদ খানের 'মফুল হোসেন' কাব্যটি বিপুলকলেবর। কারবালা সম্বন্ধীয় গ্রন্থগুলোর মধ্যে শ্রেষ্ঠও বটে। এ কাব্য কারুণ্যের নির্ঝর-

মুহম্মদ খানে কহে শুনিতে মরম দহে

পাষণ হইয়া যাএ জল।'

এ কাব্যটি মুহম্মদ খান তাঁর অধ্যাত্মগুরু পীর মীর কবি সৈয়দ সুলতানের অভিপ্রায়ক্রমে তাঁরই 'নবীবংশ' কাব্যের সম্পূরক বা পরিপূরক হিসেবে রচনা করেছিলেন :

শাহ সুলতান পীর কৃপার সাগর-

নবীবংশ রচিছিল পুরুষপ্রধান

আদ্যের উৎপন্ন যত করিলা বাখান

দুই ভাই বিবরণ সমাপ্ত করিয়া

শ্রলয়ের কথা সব দিলু প্রচারিয়া।

অন্তে পুনি বিরচিলু প্রভু দরশন

রসুলের ওফাত রচিয়া না রচিলা
অবশেষে রচিবারে মোক আজ্ঞা দিলা ।
তান আজ্ঞা শিরে ধরি মনেতে আকলি
চারি আসন্নার কথা কৈলুঁ পদাবলী ।

এহা হোস্ত'ধিক কথা নাহি কদাচন ।
দুই পঞ্চালিকা যদি একত্র করএ
আদ্যের অন্তের কথা সন্ধিয়ুক্ত হএ ।

দুই পাঞ্চালিক নবীবংশ ও মক্কুল হোসেন নির্দেশক । মধ্যযুগে আদম থেকে কেয়ামত অবধি সৃষ্টি-স্থিতি-বিলয় সম্বন্ধে ইসলামি ধারার একটা ইতিহাস রচনাই ছিল সৈয়দ সুলতানের মহান ব্রত । হয়তো বার্বাকোর কারণে তিনি তা' সম্পূর্ণ করতে পারেননি, তাঁর অভিপ্রায়ক্রমে তাঁর কবিশিষ্য মুহম্মদ খান গুরুর আরক্ক কর্মে সার্থক সমাপ্তি দান করেন, নবীবংশ রচনার আরম্ভকাল ১৫৮৪-৮৬ খ্রীস্টাব্দ, মুক্কুল হোসেনের রচনাসমাপ্তিকাল ১৬৪৬ খ্রীস্টাব্দ ।

এমনি করে গুরু-শিষ্য দুই কবির প্রযত্নে সৃষ্টিকাল থেকে প্রলয়কাল অবধি বর্ণিত হয়েছে দুই কাব্যে ।

কবির ভাষায় মক্কুল হোসেনে বর্ণিত বিষয়সূচী :

- | | |
|--|--|
| ১. আদি পর্বে ফাতেমার বিবাহ কহিব
দুই ভাইর জনাতবে পাছে বিরচিব॥ | ৯. নবমে ওলিদ পর্ব শুন গুণিগণ
১০. দশমে এজিদপর্ব কহিবাম এবে |
| ২. কহিব দ্বিতীয় পর্বে শুন দিয়া মন
চারি আসহাবার কথা শাস্ত্রের নিদান ।- | ১১. একাদশ পর্ব তার পচাতে কহিব
প্রলয় হইতে যথ অনর্থ হইব । |
| ৩. কহিব তৃতীয় পর্বে হাসানের বাণী
জয়নবকে বিবাহ করিলা মনে গুণি | যেন মতে দজ্জাল-পাপী ভুলাইব নর
যেন মতে আসিয়া পুনি ঈসা পয়গাম্বর । |
| ৪. চতুর্থ মুসলিম পর্ব শুন দিয়া মন | মুহম্মদ হানিফা ইমাম সঙ্গে করি |
| ৫. কহিব পঞ্চম পর্বে যুদ্ধের অবশেষ- | যেমতে পালিবা লোক দজ্জাল-সংহারি । |
| ৬. ষষ্ঠমে হোসেন পর্ব কহিবাম পাছে- | এয়াজুজ মাজুজ সেই দুই বাহিনী |
| ৭. সপ্তমেত স্ত্রীপর্ব কহিবাম পুনি | যেন মতে হিসাব দিবেক সর্বজানি । |
| ৮. অষ্টমেত দূত পর্ব কহিবাম পুনি | |

অতএব ফাতেমার বিবাহ বর্ণনায় কাহিনীর গুরু আর কেয়ামত ও হাশর বর্ণনায় কাহিনীর শেষ ।

বাঙলায় পুণ্যকথা রচনার পাপ-ভীতিও কবির মনে উঁকি দিয়েছে :

হিন্দুস্থানে লোক সবে না বুঝে কিতাব
না বুঝি না গুণি নিত্য করে মহাপাপ ।
তেকাজে সংক্ষেপ করি পঞ্চালি রচিলুঁ
ভালমন্দ পাপপুণ্য কিছু না জানিলু ।-

অবশ্য মোহোরে সবে দিবে আশীর্বাদ
মহাজন আশীর্বাদে খণ্ডিবে প্রমাদ ।
বিশেষ পীরের আজ্ঞা না যাএ লজ্জন
রচিলুম পঞ্চালিকা তাহার কারণ ।

মুক্কুলহোসেন কাব্যে রচনাকালও দেয়া রয়েছে :

মুসলমানি তারিখের দশশত ভেল
শতের অর্ধেক পাছে ঝুতু বহি গেল ।
এবং হিন্দুয়ানি তারিখের শুন বিবরণ

বাণ বাহু শত অক্ষ আর বাণ শত
বিংশ তিন পূর্ণ করি চাহ দিয়া দধি
পঞ্চালিকা পূর্ণ হৈল সে অক্ষ অবধি।
সুরগুরু শেষ দৈত্য গুরু আগে

মিত্র হই কুমুদিনী প্রীতিবর মাগে।
হইয়া নক্ষত্র রূপ উড়ি গেল শশী।
দশদিক প্রসন্ন পাতকীতম নাশি।
মাধবী মাসের সপ্ত দিবস গইল
সেই রাত্রি পঞ্চালিকা সমাপ্ত হইল

এতে মুসলমানি হিজরী- ১০০০ + ৫০ + ৬ = ১০৫৬ হিঃ বা ১৬৪৬ খ্রীস্টাব্দ হয়।

[এ বছর ১৭ই ফেব্রুয়ারি মাসে হিজরী বছর শুরু হয়।]

এবং হিন্দুয়ানি বা শকাব্দ $৫ \times ২ = ১০০০ + ৫০০ + ২০$ (৩ + ৭ = ১৫৬৭ শক তথা
 $১৫৬৭ + ৭৮ = ১৬৪৫$ এবং মাধবী মাসে ১৬৪৬ খ্রীস্টাব্দ হবে। ১৫৬৭
শকের ৭ই চৈত্র বৃহস্পতিবারে অর্থাৎ ১৬৪৬ খ্রীস্টাব্দের ৫ই মার্চ তারিখে।

রচনার সামান্য নমুনা- ইমাম হোসেন নিহত হওয়া মাত্র :

স্বর্গমর্ত্য পাতালে উঠিল হাহাকাহ
কান্দন্ত ফিরিত্তা সব গগন মাঝার।
বিলাপন্ত বভেক গন্ধর্ব বিদ্যাধর
আর্শকুর্সি লওহ আদি কাঁপে থরথর
অষ্টস্বর্গবাসী যত করন্ত বিলাপ
এ সপ্ত আকাশ হৈল লোহিত বরণ
কম্পমান সূর্য দেখি হোসেন নিধন।
ক্ষীণ হৈল নিশাপিত আমীরের শোকে
মঙ্গল অরুণ বন রক্ত মাখি মুখে।

বুধে বুদ্ধি হারাইল গুরু এড়ে জ্ঞান
গুনি কান্দা বত্র গিল্লে পাই অপমান।
জোহরা নক্ষত্র কান্দে তেজি নাট গীত
ফসতেমা জোহরা কান্দে শোকে বিষাদিত।
সমুদ্রে উঠিল ঢেউ পরশি আকাশ।
কম্পিত পর্বত ছাড়ে সঘন নিঃশ্বাস।
কম্পমান পৃথিবী যতেক বরাবর
হইল শোণিত বর্ণ দিক দিগন্তর।
জল তেজে মীনগণ পক্ষী তেজে বাস।
সব কান্দে হাসে ইব্রিস অনাআশ।

একালের কবির 'নীলসিয়া আসমান লালে লাল দুনিয়া' ইত্যাদি এ সূত্রে স্মর্তব্য।
বিপুলকায় গ্রন্থ বলেই মুহম্মদ খানের মজুল হোসেন কাব্যের বিভিন্ন পর্ব- যেমন ক্যোমতনামা,
দজ্জালনামা, হানিফার লড়াই প্রভৃতি আলাদা খণ্ড হিসেবে অনুলিখিত ও পঠিত হত।

ঘ. হামিদ

'সেই কথা কহি আমি রচিয়া পয়ার'
'ফারসি ভাঙ্গিয়া মূর্খে সুখে বুঝিবার'।

এ কবি ফারসি মজুল হোসেন অবলম্বনে তাঁর 'হোসেনসংগ্রাম' কাব্য রচনা করেন তাঁর
নিজের ভাষায় :

শাহ তামাসের চরণ প্রসাদে
তাহান আজ্ঞাএ তবে কহ এ হামিদে।
মজুল হোসেন এক কিতাব আছিল
বাস্তালা করিতে হবে তান আজ্ঞা হৈল। ...
সংগ্রাম হোসেন নাম রাখিলুঁ ইহার।

দুনিয়ার পাঠক এক হও! ~ www.amarboi.com ~

এ শাহ তামাস কবির পীর। কাব্যরচায় প্রবর্তনাও দেন তিনিই। ভণিতায় শাহ তামাসের নাম ঘন ঘন উল্লেখ করা হয়েছে। কাব্যের কবি প্রদত্ত নাম 'সংখ্যাম হোসেন'। নামটিতে নতুনত্ব রয়েছে।

কবি হামিদের প্রাপ্ত পাণ্ডুলিপির লিপিকাল ১১৪৭ বঙ্গাব্দ তথা ১৭৪০ খ্রীস্টাব্দ, এটি সিলেট জিলার ফেঞ্চগঞ্জ অঞ্চল থেকে সংগৃহীত। এ কাব্য আঠারো শতকের উষাকালে কিংবা সতেরো শতকের শেষপাদে রচিত বলে অনুমান করি।

ঙ. হায়াত মাহমুদ

আঠারো শতকের মধ্যকালের কবি হায়াত মাহমুদ বহু গ্রন্থ প্রণেতা। তিনি রংপুর জিলার ঝাড়বিসিলা গ্রামবাসী ছিলেন। ধর্মসাহিত্য অধ্যায়ে তাঁর পরিচয় রয়েছে। জঙ্গনামা কাব্যে তিনি আত্মপরিচয় দিয়েছেন। তাঁর পিতার নাম শাহ কবির বা কবিরউদ্দীন, পিতামহের নাম কিতাবউদ্দীন এবং প্রপিতামহের নাম দোয়া খান। কর্মজীবনে কবি হায়াত মাহমুদ কাজীপদে নিযুক্ত ছিলেন। জঙ্গনামাই তাঁর প্রথম রচনা। পরগনাতি সনে কাব্যে রচনাকাল দেয়া রয়েছে :

শকাব্দ পরগনাতি যাহে বিরচিনু পুথি
সন এগারশ' ত্রিশ সাল^১
হায়াত মাহমুদ বলে মুহম্মদের পদতলে
মোকে দয়া কর সর্বকালে।

১২০২ খ্রীস্টাব্দে পরগনাতিসনের শুরুতেই এ ১১৩০ সাল ভুল। তবে তিনি ১৭২০-৬৯ খ্রীস্টাব্দের মধ্যেই তাঁর গ্রন্থগুলো রচনা করেন। ইতিহাসানুগ করে কারবালা কাহিনী রচনাই ছিল কবির উদ্দেশ্য :

যতেক শুনি' মুঞি পুস্তক বয়াতে তাহা শুনি মনে মোর দ্বিধা সর্বক্ষণ
কত আছে কত নাহি কিতাবের মতে। রচিনু পুস্তক তবে জানিতে কারণ।
নাহি জানে আদ্য কথা নাই পাএ তত্ত্ব

চিত্তউত্থান, আশিয়াবাণী, হিতজ্ঞানবাণী, কামালনসিয়ত, ফকিরবিলাস প্রভৃতি হায়াত মাহমুদের অন্যান্য গ্রন্থ। দৌলতউজির বাহরাম খান, মুহম্মদ খান, হামিদ, হায়াত মাহমুদ ও নসরুল্লাহ খোন্দকার... এ পাঁচজন কারবালা কাহিনী নিয়ে পূর্ণাঙ্গ কাব্য রচনা করেছেন।

চ. জাফর

জাফর সম্ভবত কেবল কারবালা যুদ্ধটি সংক্ষেপে [পাণ্ডুলিপির দশ পাত্রেই^১] রচনা করেছিলেন। কারণ প্রাপ্ত ৩-১০ পাত্রে সমাপ্ত পাণ্ডুলিপির আদ্যের দুই পত্র অপ্রাপ্য বটে, কিন্তু শেষাংশের পাঠ সমাপ্তিজ্ঞাপক। শহীদের লাশ :

একে একে যত সব ওলিগণ আসিল। রসুলেতে হুকুম দিল জিব্রিলে পরাইল
আনিয়া স্বর্গের জল সিনান করাইল। স্বর্গে চলি গেল সবে হোসেনের লৈয়া
বিহিস্তের কাফন লৈয়া জিব্রিল আসিল ভিহিস্তে রহিল সবে হুর সব লৈয়া।

^১ পুথি পরিচিতি, পৃঃ ৫১৩-১৪।

ভণিতা :

১. কহে জাএআফরে হেন পানীগত
মোর দোষ ক্ষেমিবনি প্রভু নিরঞ্জন।
২. সবার স্থানে কহে জাএআফরে
এ জাফর অন্যের রচনার লিপিকরও হতে পারেন।

ছ. আব্দুল আলিম (হালিম)

আর একজন মোহাম্মদ হানিফার লড়াই রচয়িতা কবির নাম আব্দুল আলিম (হালিম?)। তিনি আঠারো শতকের শেষভাগের কবি। কবি নওয়াজিস খান উক্ত বখসী হামিদের ভ্রাতৃসূত মনু চৌধুরীর পুত্র কবি আব্দুল আলিম। তিনি গ্রন্থে আত্মপরিচয় এভাবে দিয়েছেন :

বাঁশখালি গ্রামে জ্ঞান ইলশা যে নাম। অঘোর নরকে তার হইব বসতি।।
বসতি করিয়া আমি থাকি অবিশ্রাম।। সর্ব সৈন্য উঠি গেলে কার্য এই ফল।।
তথা বকসী হামিদ আছিল মোহাবলবন্ত।। ভাবযোগে কান্দি বীরে হইল বিকল।।
তাহান ভ্রাতৃর পুত্র মাং মনু চৌং মোহান্ত।। দেখা দেখি দুই ভাই কান্দে পরস্পর।।
মুঞি ক্ষুদ্র মতি জ্ঞান তাহান তনয়।। যথ জরী সবে মিলি কান্দে উৎকণ্ঠর।।
কবির ভাষা ও বর্ণনাভঙ্গির একটু নমুনা : সন্তোষ চর্য যদি সব খসাইল।।
যদ্যপি করিল দোষ এজিদ দুর্মতি।। মুক্ত হই অঘোর নরকে চলি গেল।।
বল কিবা দোষ কৈল নারীগণ প্রতি।। বাপ ভাই ইষ্ট মিত্র হারাইলুঁ সকল।।
যদ্যপি নবীর বংশ যথেক যুবতী।। নিরবধি দাহ শ্বাস জ্বলন্ত অনল।।
আনি সব বন্দী কৈল এজিদ দুর্মতি।। সেই অগ্নি জ্বল তুমি খুড়া মহাশয়
সেই পাপে শাস্তি তারে দিলা মহামতি।। না দেখি মোহর স্থির প্রাণি না রহএ।।

কবি সর্বত্র একরূপ নীরস কথার মালা গাঁথে গেছেন। তাই বোধ হয় কবি আমাদের মুখ বন্ধ রাখার ব্যবস্থা করেছেন—

মহাজন পাইলে দোষ ঢাকিয়া রাখএ। পুস্তক মাঝার বহু অন্তরু আছেএ।
ক্ষুদ্র জনে পাইলে দোষ প্রচার করএ।। পণ্ডিতে পাইলে দোষ ক্ষেমিবা নিশ্চয়।।
এর পরে আমরা আর কি বলব!

দুটো ভণিতা :

১. এ আব্দুল আলিমে কহে পঞ্চালি
পত্রআর
জয়নুল আবেদিন কথা অমৃতের ধার।
২. আব্দুল হালিমে (আলিম) ভণে
পঞ্চালী পয়ার।
কি কহিমু তা সতান মহিমা অপার।।

জ. নজর আলী

রচিত একখানি পুথি প্রায় সম্পূর্ণ পাওয়া গেছে। কিন্তু ‘কতক আঙুন-পোড়া’ তাই সম্পূর্ণ পাঠোদ্ধার অসম্ভব। পুথিখানি ১০৪ পত্রে সমাপ্ত। কাজেই বেশ বড়ই বলতে হবে। পত্র পেয়ে

হানিফা কারবালা যাত্রা করেন, তারপর পৌছে দেখেন তার আগেই হোসেন শাহাদৎ বরণ করেছেন। ভণিতা :

আমীর হোসেন বাণী বিদরে পাষণ।
শুনিতে মরম দহে নজর আলী ভাণ।

গ্রন্থের শেষাংশ :

নববংশ মুক্তি পাই হরিষ অপার। তার পাছে মদিনাত করিলা গমন।।
বিপক্ষ সকল আদি পাইল সংহার।। মদিনা যাইয়া সব আলির সন্ততি।
স্থির হইল রহিলেস্ত ভাবি নিরঞ্জন। জয়নুল আবেদিনে সব করিলা নৃপতি।

ইত্যাদি

ইনি আব্দুল আলিমের চাইতে অধিক শক্তিমান কবি ছিলেন বলে মনে হয়। ঐর আবির্ভাবকাল অজ্ঞাত।

ঝ. আমানউল্লাহ নামের অপর এক কবি 'মোহাম্মদ হানিফার লড়াই' রচনা করেন। তাঁর একখানি মাত্র খণ্ডিত পুথি সাহিত্যবিশারদ সংগ্রহ করতে পেরেছেন। কবি কোন শতকের লোক তা জানার উপায় নেই। কবি ভণিতায় পিতা ও পীরের নাম বারবার উল্লেখ করেছেন। এতে মনে হয়, তিনি আত্মপরিচয় বিস্তৃতভাবেই দিয়েছিলেন। প্রথম দিকের ১২৯ পত্র নেই, শেষদিকও খণ্ডিত। পুথি দৃষ্টে তাঁকে সতেরো শতকের কবি বলে অনুমান করা যায়। কাব্যে তাঁর ক্ষমতার পরিচয় আছে। তার পিতার নাম মনোহর এবং পীরের নাম মোহাম্মদ লালশাহ। তাঁর ভণিতা :

১. পীরগুরু পদযুগ ধরি শিরস্থান। উত্তর এজিদ যুদ্ধ মনে সঙ্কল্পিয়া।
পিতা মনোহরের পদ করিএ রন্দন। কহে হীনে আমানুল্লা পঞ্চালি রচিয়া।
২. মোহাম্মদ লাল শাহ জরিফ সন্ততি। সুপ্রশংস ভাব যাহার।
কহে হীন আমানুল্লা তাহান আরতি। আমি আমানুল্লা হীন সুভাষী নন্দন ক্ষীণ
৩. মনোহর গুণালয় সে মোর জনক হয়। বিরচিলুম পঞ্চালি লোহর।
কবির রচনার একটু নমুনা—
যখনে আমি়র যুদ্ধে প্রবেশ করিল। না রহিল একে কেহ চিন আত্ম পর।
সর্ববলে দুই সৈন্য তুমুল বাজিল।। মহাঘোরতর হৈল যুদ্ধে দুই বল।
অস্ত্র জালে আবরিল কুক্ষী সৈন্যগণ। সমুদ্র হিল্লোলে যেন উঠএ কল্লোল।।...
মধ্যাহ্নের সূর্য যেন ঝাঁপিলেস্ত ঘন।। ঝিলিমিলি হই গেল অস্ত্রজাল জ্যোতি।
ধূম্রময় হই গেল দিগ দিগান্তর।। যেহেন ভিমসী মধ্যে খন্দোয়ত আকৃতি।।

ইত্যাদি

কবির ভাষা প্রাঞ্জল ও সুবিন্যস্ত। বর্ণনভঙ্গি সুন্দর এবং উপমা-রূপকের-ব্যবহার চমৎকার।

ঞ. আবদুস সোবহান— সম্ভবত উত্তরবঙ্গের কবি, তাঁর মুদ্রিত কাব্যের নাম 'ইমাম সাগর।' এটি সাধুভাষায় রচিত, মনে হয় কবি আঠারো শতকের শেষপাদে কিংবা উনিশ শতকের গোড়ার দিকে এ কাব্য রচনা করেন। বোঝা যাচ্ছে সেকালের লেখক-পাঠকের করুণ রসের চেয়ে বীররসে আকর্ষণ ছিল বেশি। সে জন্যেই কেউ কেউ হানিফার লড়াই, সক্রপের লড়াই

(আলি আহমদ রচিত) রচনা করেছেন, আবদুল হাকিম, আমানুল্লাহ, আবদুল আলিম বা হালিম, নজর আলি প্রভৃতি 'হানিফার লড়াই' রচয়িতা।

আবার বিলাপের কারণেও তাহাদের আগ্রহ কম নয়। তাই সকিনার বিলাপ, যয়নবের বিলাপ, জহরমহরা (মুহম্মদ সুলতান রচিত) প্রভৃতি এবং অন্য অনেকের যেমন আলি আজগরের বারমাসী রচিত হয়েছে। আঠারো, উনিশ ও বিশ শতকের বারমাসী, দোভাষী শায়েরদের রচিত মর্সিয়া সাহিত্য বা কারবালাকাব্যও জনপ্রিয় বিষয় হিসেবে উল্লেখ্য। ফকির গরীবুল্লাহ আঠারো শতকে, উনিশ শতকে রাধাচরণ গোপ ও জঙ্গনামা রচনা করেন। জনাব আলী, মুহম্মদ মুনশী, সাদ আলি ও আবদুল ওহাব [যৌথভাবে] শহীদ-এ-কারবালা রচনা করেছে, খান বাহাদুর হামিদুল্লাহ খানের 'শাহাদৎনামা' দাখিনী উর্দু থেকে অনূদিত। এটি ষোল শতকের শিয়া কবি হোসেন ওয়ায়েজ কাশিফীর 'রওজাতুস সুহাদা'র অনুবাদ। চট্টগ্রাম শহরবাসী হামিদুল্লাহর ভাষা দোভাষী নয়। বিশ শতকে 'জঙ্গনামা' বা শহীদ-এ-কারবালা রচনা করেছেন ওয়াহিদ আলি, মুহম্মদ ইসহাকুদ্দীন, কাজী আমিনুল হক প্রভৃতি। আধুনিক সাহিত্যে মীর মশাররফ হোসেনের বিবাদসিন্ধু, কায়কোবাদের মরমশরীফ কাব্য, আবদুল বারীর কারবালা কাব্য, আবু মা' আলা হামিদ আলির কাসেমবধকাব্য, খয়রাতুল্লাহর কারবালা তরঙ্গ কাব্য প্রভৃতি গদ্যে-পদ্যে অনেক গ্রন্থই রচিত হয়েছে ও হচ্ছে।

উনিশ শতকে রচিত যুদ্ধকাব্য

উনিশ-বিশ শতকে দোভাষী শায়েরা ইসলামের উদ্ভবযুগের অনেক যুদ্ধ নিয়ে উর্দু-ফারসি কাব্য অবলম্বনে বাঙলায় যুদ্ধকাব্য রচনা করেছেন। স্বকালে স্বদেশে স্বজাতি ছিল নির্জিত, ব্রিটিশ শাসিত ও প্রত্যাশ্রুভাবে বিধর্মী জমিদার-মহাজন ও ব্যবসায়ী শোষিত। তাই ইসলামের প্রতিষ্ঠা ও বিজয় কাল স্মরণ করে তারা আত্মপ্রবোধ পেতে এবং আত্মগৌরব অনুভব করতে চেয়েছে। এজন্যে এসব যুদ্ধকাব্য লেখক, পাঠক ও শ্রোতার প্রিয় ছিল। ফলে জনাব আলী লেখেন জঙ্গ-খয়বর ও মজমুয়ে ফতুহশাম, মুহম্মদ খাতের লেখেন জঙ্গ-সোহরাব (শাহনামা অবলম্বনে) সফিউদ্দীন জঙ্গনামা, হাবিবুল হোসেন জঙ্গ-সোহরাব, আজহার আলী জঙ্গ-রসুল ও আলী, দোস্ত মুহম্মদ খয়বরের জঙ্গনামা প্রভৃতি। এঁদের কেউ হচ্ছেন মূল লেখক, কেউবা অনুকারক।

'মজমুয়ে ফতুহশাম' বিশেষ আলোচনার দাবি রাখে, কেননা এটি মুসলিমদের রাজ্য প্রতিষ্ঠার এ রাজ্য বিস্তারের ইতিহাস সম্পৃক্ত রচনা। এতে রয়েছে রোমসাম্রাজ্যের সিরিয়া, বসোরা, প্যালেস্টাইন, মিসর প্রভৃতি দেশে মুসলিম অধিকার প্রতিষ্ঠার ইতিকথা। এ গ্রন্থের অবলম্বনও ছিল আরবি ইতিহাস।

ওয়াকাদী রহমতুল্লা আরবি ভাষাতে

লিখিয়াছিলেন খুব তহকিকের সাথে।

আরবি ইতিহাসের স্বাধীন উর্দু তর্জমা থেকেই জনাব আলির নেতৃত্বে আজিমুদ্দীন আহমদ ও মুহম্মদ মুসা- এ তিনজন এ বিপুলকায় গ্রন্থ বাঙলায় তর্জমা করেছেন। এ গ্রন্থটি চার খণ্ডে সমাপ্ত। প্রথম খণ্ডে ৬৬ দ্বিতীয় খণ্ডে ৬১, তৃতীয় খণ্ডে ৬৩ এবং চতুর্থ খণ্ডে ৩২টি অধ্যায় রয়েছে। প্রথম খণ্ডে খলিফা আবুবকর ও উমরের কৃতি ও কীর্তি বিবৃত, এ অংশের লেখক আজিমউদ্দীন, দ্বিতীয় খণ্ডের অধিকাংশ রচক জনাব আলী। রচনাকাল (১২৯৪ বঙ্গাব্দ বা ১৮৮৭

খ্রীস্টাব্দ) 'বাঙ্গালা বারশ'ত চুরানকই সালে তেসরা ভাদ্রে মাহে বরিশার কালে, খোদার মদদে হৈল এ খণ্ড তামাম ।'

চতুর্থ খণ্ড 'ফতহ-উল মেসের' রচিয়তা জনাব আলী । রচনাকাল ১২৯০ বঙ্গাব্দ ।

এই তক ফতহুল মেসের হৈল সায
বারশ নকই সাল বারই বৈশাখে-
তর্জমা তামাম হৈল খোদার খায়েশ ।
মেসের শাহর একন্দরিয়া তামাম-

আর সব জজিরা আছিল যত দেশ
একে একে দখল করিয়া নিল শেষ-
নবীজির হিজরীবাদে ষোল বছরেতে
রুমশাম মিশর হইল সব ফতে ।

খলিফা হজরত আবু বকর পররাজ্য বিজয়কামী সেনাপতিকে অভিযানের প্রাক্কালে যে উপদেশ দিয়েছিলেন, তা' আজো মানবিক মহত্ত্বের ও মানবতার শ্রেষ্ঠ নিদর্শন রূপে গণ্য । দীর্ঘ হলেও তা উদ্ধারযোগ্য :

ক. সৈন্যদের সঙ্গে ব্যবহারনীতি-

গুন সরদার-

বিদেশেতে তুমি খুব রবে হুশিয়ার
খিমা উঠাইয়া যবে চলিতে থাকিবে
জোরে চলিবার তরে নাহি ধমকাইবে ।
এমত জোরেতে না চালাও সৈন্যগণে
যে চলনে কষ্টবাজে তাহাদের মনে ।
না হও তফাত কভু লঙ্কর হইতে

করিবে কাজের যুক্তি সঙ্গীদের সাথে ।
সকল সময়ে যেন ন্যায়ে লক্ষ্য রয়
খবরদার অত্যাচার যেন নাহি হয় ।
অত্যাচারীগণ কভু শত্রুর উপর
জয়যুক্ত নাহি হয় জানিবে খবর ।

খ. পরাজিত শত্রুর প্রতি ব্যবহারনীতি-

আর এক কথা সদা রাখিবে স্মরণ
শত্রুর উপরে জয়ী হইবে যখন ।
কাহাদের বাচ্চাদিগে আর বুড়া দিগে
না মারিবে, হবে দায়ী খোদার নজদিগে ।
তাহাদের স্ত্রীদিগকে না মারিও আর

খোর্মার গাছের কাছে না যাইও আর
আবাদ ফসল নাহি দিবে জ্বালাইয়া
ফলবতী গাছ নাহি ফেলিবে কাটিয়া ।
সন্ধি বা চুক্তিতে যদি আবদ্ধ হইবে
খবরদার বে-ওয়াফায়ী কভু না করিবে ।

গ. কবি বীরঙ্গনা কীর্তি বর্ণনায়ও উৎসাহী :
নারীগণ নিজ হাতে ধরে তলোয়ার
কাফেরের সাথে লড়ে মদদে খোদার
নারী শক্তি যেই সেথা হইল উদয়
লড়াইয়ের গতি ফিরে গেল সে সময়
জেয়ারে ভগ্নী সে খাওলা নাম যার

উৎসাহী : ইয়ারমুকের যুদ্ধে মুসলিম-
উম্মে হেকিম নামে এক নারী আর ।
লবনী সলমী এই নারী চারিজন
ধরিল ভীষণমূর্তি লড়িল ভীষণ ।-
নারী শক্তি দ্বারা খোদা এয়ারমুক মাঝার
ইসলামের বলবোলা করে এ প্রকার ।

সত্য-কলি-বিবাদ-সম্বাদ বা যুগসম্বাদ

কবি মুহম্মদ খান আমাদের সাহিত্যে প্রথম রূপক কাব্য রচিয়তা । আজকাল বিদ্যাসুন্দর, নলদময়ন্তী, গোরক্ষবিজয় প্রভৃতি উপাখ্যানকেও রূপক রচনা বলে ব্যাখ্যা করার রেওয়াজ চালু হয়েছে । কিন্তু সে-সবের রূপক এমন প্রত্যক্ষ নয়, পাণ্ডিত্যের জোরে ব্যঙ্গার্থ বের করা হয়

মাত্র। যুগসম্মদের রূপক স্পষ্ট। কবি নিজেই বলেছেন :

১. উপদেশ পঞ্চালিকা কবির রচন।
সত্যকলি বিবাদ সম্বাদ বিবরণ।
২. বাক্য উপদেশ হেতু বহুল যতনে।
তেকারণে বিরচিলু' ভাবি নিজ মনে।

রচনাকাল

আনন্দের কথা মুহম্মদ খানের উভয় গ্রন্থের রচনাকাল পাওয়া গেছে। তাঁর প্রথম গ্রন্থ 'সত্যকলি বিবাদ সম্বাদ' বা যুগসম্বাদ। এর রচনাকাল :

দশ শত বাণ শত বাণ দশ দধি। রাত্রি হইয়া গেল পঞ্চালিকা অবধি।।

এতে ১০০০ + ৫০০ + ৫০ + ৭ = ১৫৫৭ শকাব্দ বা ১৬৩৫ খ্রীস্টাব্দ পাওয়া যায়।

সত্য-কলি-বিবাদ-সম্বাদে সবচেয়ে বড় পরিচয় এটি মৌলিক রূপক কাব্য। এ ধরনের রচনা মধ্যযুগের বাঙলা সাহিত্যে নেই। আর সব রূপক কাব্য ... যেমন নল-দময়ন্তী, বিদ্যাসুন্দর, গোরক্ষবিজয় প্রভৃতির রূপকের আবেদন পরোক্ষ। এটির উদ্দিষ্ট তত্ত্ব একেবারে প্রত্যক্ষ ও স্পষ্ট; কাব্যটির কবি প্রদত্ত নাম দুটো ...

'সত্য কলি বিবাদসম্বাদ' ও 'যুগসম্বাদ'

উপদেশ পঞ্চালিকা করিব রচন

সত্য-কলি বিবাদ সম্বাদ বিবরণ।

এবং যুগ সম্বাদের কথা অমৃত বরিষে।

কাব্যটি পাঁচ অধ্যায়ে বিভক্ত। কবির তৃতীয় অধ্যায়ভাগ ও গল্পের কাঠামোর :

- | | |
|---------------------------------------|---|
| ক. প্রথমে সত্যক সত্যাবতী দুই মিলি। | না করিল সন্ধিপত্র আইল পুরোহিত। |
| যেন মতে কলির দুঃশীলা সঙ্গে কেলি।। | নারদের হলে যুদ্ধ হৈল অতুলিত।। |
| সত্য সঙ্গে যুঝিতে কলির আগমন। | খ. দ্বিতীয় অধ্যায়ে দুই সৈন্যের সংগ্রাম। |
| মিত্র কণ্ঠ দূত গেলা নিষেধিতে রণ।। | সত্য-কলি বিবাদ সংবাদ অনুপায়।। |
| কপটে জিনিল সত্যে কলি ধনুর্ধর। | যোগী-সত্যাবতী যেন সম্বাদ ঘুচিল।। |
| মুহুচ্চিত সত্য লই পুনি গেল ঘর।। | ঘ. চতুর্থ অধ্যায়ে পুনি সত্য পাইল জয় |
| গ. তৃতীয় অধ্যায়ে তবে কহিলুঁ কখন। | পুনি মুহুচ্চিত হৈল কলি পাপাশয়। |
| কাঞ্চলি মুখেত শুনি সত্য অচেতন।। | মৃতবৎ কলি লৈয়া দুঃশীলা কান্দিল।। |
| যেন মতে বিলাপিলা সত্যাবতী নারী।। | ভোগী ধনুস্তরী আসি কলি চেতাইল।। |
| সুবুদ্ধি আনিলা গিয়া যোগ্য ধনুস্তরী।। | যোগী সঙ্গে দুঃশীলার আছিল সংবাদ। |
| জ্ঞান-বড়ি দিয়া যোগী সত্যে চেতাইল। | |

ঙ. পঞ্চম অধ্যায়ে পুনি যুদ্ধের বিবাদ।

তৃতীয় [ত্রৈতা?] দ্বাপরে যেন নিবারিল রণ।

লাজ পাই ঘরে গেল কলীন্দ্র দুজন।।

দুনিয়ার পাঠক এক হও! ~ www.amarboi.com ~

ডক্টর মুহম্মদ এনামুল হক ‘যুগসম্বাদে’ কবির পীরের নাম খুঁজে না পেয়ে সিদ্ধান্ত করেছেন মুহম্মদ খান মুরীদ হওয়ার আগেই ‘যুগসম্বাদ’ রচনা করেছিলেন কিন্তু যুগ-সম্বাদের সমাপ্তি অংশে একটি ভণিতায় পীরের নাম আছে, অবশ্য একে কৃত্রিম বা প্রক্ষিপ্ত মনে করার সম্ভব কারণ রয়েছে। প্রথমত গ্রন্থের কোথাও আর পীরের উল্লেখ নেই। দ্বিতীয়ত যে-স্থানে ও যেভাবে প্রায় অসংলগ্ন অবস্থায় ভণিতাটি পাওয়া গেছে, তাতে তাকে কবির রচনা বলে মনে করা যায় না। যেমন :

মুহম্মদ খানে কহে গুরু বিনে কার্য নহে হরষিত পাত্র সব স্তবে জোড় হাত ।
 শিখিবেক গুরুর সাক্ষাৎ । যার যে দেশেতে গেলা তিন নরনাথ ।।
 যুগ সংবাদ যদি সমাপ্ত হইল । সিদ্ধিক বংশেত ভব নব কল্পতরু ।
 হরষিতে মিত্রকণ্ঠ আশীর্বাদ দিল ।। শাহা সুলতান পীর জ্ঞানে গুরুগুরু ।।

তৃতীয়ত গ্রন্থারম্ভে কবি নিজের পীরের স্তুতি করেননি :

একে একে প্রণামহু যথ নবীপদ । গুরুজন পদ শিরে আনন্দে ধরিয়া ।
 যথপীর প্রণামহু খণ্ডাও আপদ ।। উপদেশ পঞ্চালিকা কবির রচন ।
 জনক জননী দোহা প্রণাম করিয়া সত্য কলি বিবাদ সম্বাদ বিবরণ ।।
 কাজেই ডক্টর হকের সিদ্ধান্তই যথার্থ বলে মনে করা যেতে পারে ।

অতএব, মুহম্মদ খান ১৬৩৫ খ্রীস্টাব্দে ‘যুগসংবাদ’ এবং ১৬৪৫ খ্রীস্টাব্দে ‘মজলু হোসেন’ রচনা করেন। এ যাবৎ তাঁর আর কোনো রচনার সন্ধান মেলেনি।

এ কাব্যে সত্য ও কলির রূপকে ন্যায়-অন্যায়, সত্যমিথ্যা ও পাপপুণ্যের দ্বন্দ্ব-সংঘাত ও পরিণাম একটি সরস উপাখ্যানের মাধ্যমে বিবৃত হয়েছে। শুধু তাই নয়, যাতে তত্ত্ব-কথা একঘেয়ে হয়ে না পড়ে তার জন্যে উপ-কাহিনী হিসেবে রোমান্স জুড়ে দেয়া হয়েছে। একটি নামান্তরে বেতালপঞ্চবিংশতির চতুর্দশতম উপাখ্যান, একটি চন্দ্রদর্প-ইন্দুমতী-উপাখ্যান অপর দুটো সূর্যবীর্ষ-চন্দ্রলেখা নামে রূপকথার ও কিশোর রাজার কাহিনী।

‘সত্যের জয় মিথ্যার লয়’ বা পুণ্যের প্রসার ও পাপের ক্ষয় প্রদর্শনই কবির লক্ষ্য হলেও কবি শিল্পীসুলভ সংযম রক্ষা করেছেন এবং বাস্তব জীবনে উপলব্ধ সত্যে তাচ্ছিল্য দেখাননি, পাপও যে পুণ্যকে আচ্ছন্ন ও ঘায়েল করে এবং মিথ্যাও যে আমাদের জীবনে সত্যের উপর জয়ী হয়, (তা যত ক্ষণস্থায়ীই হোক না কেন), সর্বোপরি সত্য ও পুণ্যের পথ যে অপেক্ষাকৃত বন্ধুর ও লাঞ্ছনা-দুষ্ট তা কবি নিপুণভাবে দেখিয়েছেন। এতে কবির জগৎ ও জীবন সম্বন্ধে গভীরতার জ্ঞানও উপলব্ধির পরিচয় পাওয়া যায়।

কবি এক একটা দোষ বা গুণের প্রতীকস্বরূপ এক একটি পাত্র বা পাত্রী সৃষ্টি করেছেন। সেগুলো কিন্তু নিতান্ত জড় প্রতীক নয়, একান্তভাবে রক্ত-মাংসের মানুষ হয়ে উঠেছে। যুদ্ধ বর্ণনায় কুরুক্ষেত্র যুদ্ধের ছায়া আছে।

পাত্র-পাত্রীর নামগুলো যেমনি গণজাপক, তেমনি সুন্দর : কলীন্দ্র, দুঃশীলা, পাপসেন, ভীতসেন, কপটকেতু, দোষণ (দুর্শন) মিথ্যাসেতু, কুপণ, ভোগী, নারদ, মিত্রকণ্ঠ, সত্যকেতু।

বীর্যশালী, ধর্মকেতু, সুখ, সুদাতা, যোগী প্রভৃতি। সত্যের ধ্বজা সূর্য, কলির পতাকা চন্দ্র। এ দুটোও গভীরতর ব্যঞ্জনাসমৃদ্ধ। সূর্য অগ্নিময়... সত্য দাহ আছে, চন্দ্র স্নিগ্ধ ও রমণীয়...পাপ আপাতমধুর।

যোগী-সত্যবতী ও ভোগী-দুঃশীলা সম্বাদে ব্যবহারবিধি নিয়মনীতি, পাপপুণ্য ও সংযমের যে তত্ত্ব ব্যক্ত হয়েছে, তা মানবজীবনের চিরন্তন সমস্যার ইতিকথা।

সত্য-কলি-বিবাদসম্বাদ কবির প্রথম রচনা। এতেই তাঁর হাতেখড়ি। তাই বোধ হয় মফুল হোসেন কাব্যের মতো এতে রসামৃত ধারা সর্বত্র বয়ে চলেনি। অবশ্য বিষয়বস্তুও এর জন্যে অনেকাংশে দায়ী। ভাষা ও তাঁর দ্বিতীয় কাব্যের মতো ললিত মধুর নয়। কিন্তু তবু এ রচনা মফুল হোসেনের কবির অযোগ্য বলা যায় না। রূপ বর্ণনা ও সম্ভোগচিত্র অন্য কবির রচনার তুলনায় হীন-প্রভ নয়। মাঝেমাঝে কবিত্বের বিজুলি ছটারও অভাব নেই। অলঙ্কারাদিও সুপ্রযুক্ত হয়েছে। কয়েকটি প্রাবচনিক বা সুভাষিত বুলির দৃষ্টান্ত দিই :

১. নারী নাহি নৃপতির শূন্য বাসা ঘর
দীপহীন গৃহ যেন না দেখি সুন্দর ।।
২. অতি রূপবতী যেন বিচিত্র সাপিনী।
৩. বহু বহু নষ্ট হইল বাদে পরিবাদে।
সবংশে রাবণ মৈল রামের বিবাদে।
৪. দুক্ষে সিদ্ধে কড় মল না ভেঙ্গে অঙ্গার।
৫. কোথাত অমৃত ফল বানরের ভোগ।
৬. বুদ্ধিএ শশক মারে কেশরী দুরন্ত।
৭. লবণ ভূমিত যেন পুষ্প বৃক্ষ মরে।
৮. যদি ক্ষুধাতুর অগ্নি ধৈর্য-কাষ্ঠ পোড়ে।
লোভের লাকড়ি দেই ওষুধ-বড় লাড়ে।

সত্য-কলির পৌরাণিক দ্বন্দ্ব বাঙালী মানুষেরই নৈতিক-সংস্কারের অঙ্গীভূত। বৃহত্তর অর্থে এ দ্বন্দ্ব সর্বমানবিক ও সর্বকালিক। তাই কবির উদ্দিষ্ট তত্ত্ব সত্য-কলির রূপক ছাড়া আর কিছুতেই এতখানি স্বচ্ছ, সুন্দর ও কার্যকর হতো না।

কবি প্রাসঙ্গিকভাবে তাঁর সমকালীন লোকচরিত্রের যে আভাস দিয়েছেন, তাতেই বোঝা যায় সত্তেরো শতকে আর বিশ শতকে তফাৎ নেই কিছুই। মানুষের অমানুষিকতা আজো তেমনি রয়েছে।^১

^১ এ গ্রন্থে বিধৃত সমাজ-সংস্কৃতি চিত্রের জন্যে মৎপ্রণীত 'মধ্যযুগের সাহিত্যে সমাজ-সংস্কৃতির রূপ' গ্রন্থ দ্রষ্টব্য।

সপ্তম অধ্যায় মুসলিম ধর্মসাহিত্য

গোড়ার দিকের দেশজ মুসলিম সমাজ

তুর্কিবিজয়ের আগেই বাঙলাদেশে প্রচারক দরবেশ প্রবেশ করতে থাকেন 'শেখ শুভোদয়া'র সাক্ষ্যে কিংবা চট্টগ্রামবন্দরে আরব-ইরানি বণিকের বাতায়াতের প্রমাণে আমরা তা জানতে পাই। অতএব তেরো শতকের উন্মেষকাল থেকে উত্তরবঙ্গে তেরো শতকের শেষার্ধ্বে রাঢ়অঞ্চলে এবং চৌদ্দ শতকের গোড়া থেকে পূর্ববঙ্গে ইসলাম প্রচারিত হতে থাকে। প্রচার করেন বিভিন্ন খান্দানের সূফিরা। প্রথম খণ্ডে (পৃঃ ১৫১-৫৯) আমরা তা সংক্ষেপে আলোচনা করেছি। সূফীরা কোরআন হাদিসের নিষ্ঠা অনুসারী নন, তাঁরা তত্ত্বপ্রবণ মরমী। কাজেই সূফী-দরবেশদের হাতে দীক্ষিত দেশজ মুসলিমদের শরীয়তের সঙ্গে সম্পর্ক ঘনিষ্ঠ হতে পারেনি— শাস্ত্রের ভাষা আর বিজ্ঞানের অভাবে।

গায়ে গায়ে দীক্ষিত মুসলিমদের সংখ্যা বৃদ্ধি পেতে, তাদের একটা গ্রামীণ সমাজ গড়ে উঠতে, দেশজ মুসলিমের আরবি শিখে কোরআন-হাদিস-জানা শাস্ত্রী হতে দেশ-কালের প্রতিকূল পরিবেশে সুদীর্ঘকাল প্রয়োজন হয়েছে। ইতিমধ্যে তাদেরকে আল্লাহ-রসুল-কলেমা-সম্বল ইসলাম বরণ করে তুষ্ট থাকতে হয়েছে। শাস্ত্র রইল তিন সমুদ্র তেত্রিশ নদীর ওপারে, নামসার নিরবলম্ব নিরক্ষর মুসলিম-সমাজ গড়ে উঠল গায়ে গায়ে। ফলে নিরুপায় দেশজ মুসলিমরা পূর্বপুরুষের বিশ্বাস-সংস্কারের এবং আচারিক ঐতিহ্যের অবচেতন ও সক্রিয় প্রভাব কিছু কিছু হিন্দু-বৌদ্ধ লৌকিক দেবতা প্রাত্যহিক জীবনযাত্রার অনেক সংস্কার এবং কায়াবাদ ও গুরুবাদ অবলম্বন করে নবলব্ধ স্বধর্ম রক্ষা করলো। বিধানেরা এর নাম দিয়েছেন 'লৌকিক ইসলাম'। আমরা অন্য এক অধ্যায়ে বাঙলার সূফীমতের ও চর্যার স্বরূপ দেখেছি মুজাম্মিলের নীতিশাস্ত্রবার্তায়। মুহম্মদ খানের সত্যকলিবিবাদসম্বাদে নসরুদ্দাহ খোন্দকারের 'শরীয়তনামায়' এবং গৃহগত নানা লোকাচারই^১ শাস্ত্রীয় আচার-আচরণের নামে বিশ শতকের প্রথমার্ধ অবধি টিকেছিল। পনেরো শতকের দিকে হয়তো আরবি ভাষায় ব্যুৎপন্ন শাস্ত্রবিৎ দেশজ-মুসলিম সংখ্যায় নগণ্য হলেও গ্রামাঞ্চলে দুর্লভ ছিল না। মসজিদ গড়ে ওঠার সঙ্গে সঙ্গে আরবি জানা ইমাম-মুয়াজ্জিনের উপস্থিতি জরুরী ছিল। কাজেই গায়ে গায়ে দেশজ মুসলিমের সংখ্যা বৃদ্ধির ও সমাজগঠনের সঙ্গে সঙ্গে আরবি মাধ্যমে শাস্ত্রশিক্ষা ও জ্ঞান প্রয়োজনেই জনপ্রিয় হচ্ছিল, আর মম্বুরগতিরত শাস্ত্রীয় উচ্চশিক্ষা প্রসার লাভ করছিল বলে অনুমান করা চলে।

^১ মধ্যযুগের সাহিত্যে সমাজ ও সংস্কৃতির রূপ গ্রন্থে সূচক্য।

২. অনুবাদে বাধা

তবু ষোল শতকের শেষপাদের আগে শাস্ত্রকথা দূরে থাক, শাস্ত্রসম্পৃক্ত মানুষের কথাও বাঙলায় লিপিবদ্ধ করতে সাহস পায়নি কোন দেশজ মুসলিম। এ পাশ-ভীতি তখনকার পৃথিবীতে ছিল সার্বত্রিক ও সর্বমানবিক। শাস্ত্রোক্ত বাণী মুখে মুখে চিরকালই মানুষ স্বভাষায় ভর্জমা করেছেন শ্রোতাদের জ্ঞানদানের জন্যে। তাতে কিন্তু পাশভীতি জাপেনি কারো মনে। অনুবাদ লিপিবদ্ধ করাতেই ছিল আপত্তি। যুক্তি ছিল— এতে ঐশীবাণীর পবিত্রতা, গুরুত্ব, মূল্য, মর্যাদা এবং সর্বোপরি ক্রিয়াশক্তি নষ্ট হয়, ফলে ঈশ্বর হন রুষ্ট পাশ বাড়ে প্রজার। আসলে সেকালের নিরক্ষর অজ্ঞেয় সমাজে পুরোহিতবর্গের শ্রেণীস্বার্থে শাস্ত্রের একাধিপত্য রক্ষার, এবং সমাজে প্রতিষ্ঠা ও মর্যাদা স্থায়ী রাখার উপায় হিসেবে বিদ্যার ও জ্ঞানের প্রসারবোধ এবং পেশাগত প্রয়োজনে সম্পদ অর্জন লক্ষ্যে মন্ত্রগুণ্ডিই ছিল একমাত্র উদ্দেশ্য। বেদজ্ঞ ব্রাহ্মণদের কথা এ সূত্রে স্মর্তব্য।

হিব্রু থেকে লাতিনে এবং লাতিন থেকে আধুনিক যুরোপীয় ভাষায় বাইবেলের অনুবাদ নিয়ে সতেরো শতক অবধি দ্বন্দ্ব-সংঘাত কিংবা আঠারো পুরাণ আর রামায়ণ-মহাভারত অনুবাদে পনেরো শতক থেকে আঠারো শতক অবধি বাঙালী হিন্দুর আপত্তি জ্ঞাপক গ্রোক-ছড়া এবং শাহ মুহম্মদ সঙ্গীর থেকে আব্দুল হাকিম অবধি কবির দ্বিধাজড়িত ভক্তিই মধ্যযুগীয় এ সর্বমানবিক সমস্যার প্রমাণ।

তবু প্রাকৃতিক নিয়মেই অবচেতন প্রয়োজনের প্রবল প্রেরণায় অবচেতনভাবেই মানুষ ঘোষণা করে দ্রোহ। তখন তার গুরুত্ব ও সুদূরপ্রসারী কিংবা যুগান্তকারী পরিণাম সমকালের কেউ উপলব্ধিও করতে পারে না। এমনভাবে মুসলিম সমাজে শুরু হলো ধর্মসম্পৃক্ত বিষয়ের ও ব্যক্তির বাঙলাভাষার মাধ্যমে আলোচনা, যেমনটি লৌকিক দেবতার প্রতিষ্ঠায় ও জনপ্রিয়তায় বিচলিত, রক্ষণশীল উচ্চবর্ণের উচ্চবিশ্বের ও উচ্চশিক্ষার হিন্দুরা শুরু করেছিল রামায়ণের মহাভারতের ভাগবতের ও পুরাণের অনুবাদ লোকায়ত ধর্মের প্রসারবোধের অবচেতন প্রেরণায় ও স্ববর্ণের কল্যাণকামনায় আপাত দ্রোহীর ছদ্মবেশে। যুগে যুগে কল্যাণবুদ্ধিসম্পন্ন প্রাণসর চিন্তাচেতনার মানুষই বিকাশের ধারা প্রবহমান রাখেন। যারা পুরোনোকে ভালোবাসে, যারা আসলে রক্ষণশীল তাদের মধ্যে যারা বুদ্ধিমান, তারাই নতুনের সঙ্গে আপোস রফার মাধ্যমে পুরোনো নিয়ম-নীতি, আচার-আচরণ, বিশ্বাস-সংস্কার টিকিয়ে রাখার সাধনা করে, তাদেরকে সমকালীন সাধারণ মানুষেরা উদার-প্রগতিবাদী চিন্তাশীল মানুষ বলে জানে ও মানে, তাদেরকেই যুগন্ধর রিফর্মার বা সংস্কারক তথা মুজাদ্দিদ রূপে জাতির বা সমাজের কিংবা শাস্ত্রের সঙ্কটকালে ত্রাণকর্তারূপে চিহ্নিত করে ধন্য করে, নিজেরা হয় কৃতার্থ। এভাবে আপোসকামী রক্ষণশীল হন যুগন্ধর সংস্কারক আর দেশ-কালের মানবিক চাহিদা মিটানোর জন্যে যারা নতুন মত পথ বাতলান, যারা নতুন কথা উচ্চারণ করেন, তাঁরা সমকালীন সাধারণ লোকের কাছে দ্রোহী বলে নিন্দিত।

মধ্যযুগে লৌকিক দেবতার প্রতিষ্ঠাকামীরা ছিলেন দ্রোহী। আর রামায়ণ মহাভারত ও পুরাণ প্রচারকারী ছিলেন বিদ্রোহীবেশী রক্ষণশীল সংস্কারক। মুসলিম সমাজেও তেমনি যারা যোগ-তন্ত্র কায়াতত্ত্ব আর মরমীবাদের সমন্বয়ে সৃষ্টিশরীয়তী হয়েছিল, তারা ছিল ঐতিহ্যবাদী রক্ষণশীল। তারাই সমাজে সতেরো শতকে হয় পীরনারায়ণ সত্যের পূজারী। আর যারা কোরআন-হাদিসের অনুগত করে জীবনরচনায় ছিল উৎসুক, সেদিনকার দেশজ মুসলিম সমাজে

তারা ছিল সমাজকল্যাণকামী প্রগতিশীল দল। কারণ তারা পুরুষানুক্রমে লব্ধ সর্বপ্রকার বিশ্বাস-সংস্কার বর্জনে ছিল বদ্ধপরিকর।

৩. অনুবাদে আয়ত

ষোল শতকের শেষপাদে আরাকানরাজ্যে ও ত্রিপুরারাজ্যে গায়ে গায়ে জনবহুল স্বস্থ ও সুস্থ এক একটি মুসলিম সমাজ গড়ে উঠেছিল। তাদের আত্মপ্রত্যয় ও স্বাতন্ত্র্যবুদ্ধি তাদেরকে শরীয়তী ইসলামের অনুরাগী করে তোলে। তাই এ সময় থেকেই বাঙলার পূর্বদক্ষিণ প্রান্তে শাস্ত্রকথা তর্জমার পাপভয় পরিহার করে, কিংবা সংশয়ে দুর্বল কেউ কেউ দ্বিধাজড়িত হাতে মাতৃভাষায় শাস্ত্রকথা ও শাস্ত্রসম্পৃক্ত কথা লিপিবদ্ধ করে সমাজমানসে যুগান্তর ঘটিয়েছিলেন।

যেহেতু পুরুষানুক্রমে আশৈশবলব্ধ দেশজ কিংবা শাস্ত্রজ ভয়-ভরসার উৎস বিশ্বাস সংস্কারের কালিক-দৈশিক-শাস্ত্রিক রূপান্তর ঘটে বটে, কিন্তু বিনাশ নেই, সেহেতু সব সমাজেই শাস্ত্র ও সংস্কারের মিশ্রণে গড়ে উঠেছে শাস্ত্রীয় নীতি-নিয়ম রীতি-পদ্ধতি। বস্তুত ইংরেজি শিক্ষার প্রসারের ফলে রামায়ণ-মহাভারত পাঠক হিন্দু সমাজে গীতাশ্রয়ী ধর্মমত এবং ওহাবী-ফরায়জী আন্দোলনে ও ইংরেজি শিক্ষার প্রসারে মুসলিম সমাজে শরীয়তী সাধনা প্রতিষ্ঠা পায়। বাঙলায়ও দু'ধরনের ধর্ম সাহিত্য গড়ে উঠেছে। একটি ধারা হচ্ছে— নামাজ, রোজা, হজ, জাকাত, ওজু, ফরজ, ওয়াজিব, সুন্নত, নফল, মেক্তাহাব, মাকরুহ, কাফন, জানাজা, স্নান প্রভৃতি অবশ্য, জ্ঞাতব্য বিষয়ের, অন্যটি হচ্ছে— শাস্ত্রের মাহাত্ম্য, তাৎপর্য, ব্যাখ্যামূলক নীতিকথা, তত্ত্বকথা, নবী-রসুলের চরিত্রকথা, ওলি-দরবেশের জীবনবৃত্তান্ত প্রভৃতি। এবং এগুলোর সবটাই কোরআন-হাদিস কিংবা ইতিহাস-অনুগ নয়, ফেকাহ, ক্বিয়াজ, এজমা, কালাম ছাড়াও অনেক বানানো গল্প কাহিনী ধর্মতত্ত্বকে বিচিত্র, জটিল ও অসামঞ্জস্য করে তুলেছে। এ জন্যে এ সম্বন্ধেও কিছু ঐতিহাসিক আলোচনা প্রয়োজন।

৪. মুসলিম ধর্মসাহিত্যের ধারা

ধর্ম-সাহিত্য সৃষ্টির ক্ষেত্রে বাঙলার মুসলমানও উদাসীন ছিলেন না। তাঁরা জনগণকে ধর্মবুদ্ধি দানের জন্য নানাভাবে চেষ্টা যত্ন করেছেন। রসুলচরিত, নবীকাহিনী, ইসলামের উদ্ভবযুগের বীরবৃত্তান্ত-শরীয়ৎশাস্ত্র, মারফততত্ত্ব, পীর-পাচালী প্রভৃতি রচনা করে তাঁরা ইসলাম প্রচারের গৌরব, স্বধর্মের প্রসারণর্ব এবং ইসলামের শ্রেষ্ঠত্ববোধ গণমনে জিইয়ে রাখবার প্রয়াস পেয়েছেন।

বাঙলায় ইসলামের রূপ

সৃষ্টি ও প্রচারণা দ্বৈততত্ত্বই ইসলামের ভিত্তি। আল্লাহর সঙ্গে মানুষের সম্পর্ক হচ্ছে বান্দার ও মনিবের। 'নিশ্চয়ই আমরা আল্লাহর জন্যে এবং আমরা তাঁর কাছে ফিরে যাব— ইন্না লিল্লাহে অইন্না ইলাহি রাজিউন।' সেজন্যে আল্লাহর অনুগত থাকতেই তথা কোরআন নির্দেশিত বিধি-নিষেধ মেনে চলাতেই মানুষের কর্তব্য সীমিত। মানা না মানার উপর নির্ভর করছে পুরস্কারের বেহেশতী শান্তি ও তিরস্কারের দোজখী শাস্তি। এছাড়া আল্লাহর সঙ্গে মানুষের আর কোন সম্পর্ক

স্পষ্টত স্বীকৃত নয়। এ দিক দিয়ে ইসলাম অত্যন্ত ঋজু ও আচরণসাধ্য ধর্ম। আসলে সব ধর্মেই মৌল অস্বীকার একটিই এবং তা অত্যন্ত সরল— 'ভাল হও আর ভাল চাও।' কিন্তু মানুষের আচরণ কিংবা অনুভূতি তো সরল নয়। তাই কার্যত ব্যাখ্যায় ও ভাষ্যে মৌল শিক্ষা পল্লবিত ও জটিল হয়েছে। বিচিত্র ব্যবহারিক প্রয়োজনে উচ্চ-তুচ্ছ নানা ব্যাপারে হাদিস, ফেকা, উসুল, কলাম, ক্বেয়াজ, এজমা প্রভৃতি বহু উপাস্ত তৈরি হয়েছে। আবার মানসপ্রয়োজনেও জিজ্ঞাসা মননশীল ও অনুভূতিপ্রবণ মানুষ এর উপর নানা সূক্ষ্ম ও জটিল চিন্তাজাল বুনে তাকে সাধারণের বোধাতীত এবং অসামান্য করে তুলেছেন। এভাবে স্থূল হলো সূক্ষ্ম, সত্য হল সুন্দর আর আটপৌরে নীতিকথা ও আশ্রয় মনের বৈভবে ঋদ্ধ হয়ে জীবনের দিগন্তে 'দর্শন' হয়ে জেগে উঠল। এতে করে ভাবুক ও জ্ঞানীর জীবন-ক্ষেত্র হল প্রসারিত। জীবন সূক্ষ্মরসে হল বিদগ্ধ ও নন্দিত, বাড়ল জীবনের মহিমাও। মনুষ্যত্ব পেল জৈব স্থূলতা থেকে মুক্তি। জীবনের নতুন তাৎপর্য খুঁজে পাওয়ার আনন্দে মানুষ নতুন মুক্তদ্বার দিগন্তে পাড়ি জমাল তার সীমা খুঁজে ফেরার বাসনায়। এমনি করে তত্ত্ব ও তথ্যে শাস্ত্রের ও দর্শনের কলেবর হল বিপুল। কিন্তু মুশকিলে পড়ল স্বল্পবুদ্ধি সাধারণ মানুষ। সে মূল নিয়মের বাঁধাপথেও জীবনের স্বাদ পায় না কলুর বলদের মতই হাঁপিয়ে ওঠে জীবন-যন্ত্রণায়। ধর্ম সাধারণের পতন যেমন রোধ করে, তেমনি যে অসামান্য তাকেও পিছুটান দেয়। কারণ রুটিনের হুকে বুদ্ধির কারণ রুটিনের হুকে বুদ্ধির ও চিন্তার স্বাধীনতা নেই। আবার হকের বাইরে পৌঁছা বাড়াবার সাহস কিংবা যোগ্যতাও নেই তার। চেতনার গভীরে সে জীবনের স্বতঃস্ফূর্তির বিপুল সম্ভাবনার স্বপ্ন দেখে, অথচ বাস্তবে জীবনের বিভা ও বৈভব হতে সে থাকে বঞ্চিত। ত্রুণী-জ্ঞানীরা মানবিক কৃপাবশে এগিয়ে এলেন এসব বিড়ম্বিত জীবন ভাগ্যহতদের সাহায্যে। শিশুদেরকে হাঁটতে শেখানোর মতো পঁতা দিয়ে ধর্মের আওতা প্রসারিত করে তাদেরকেও দিলেন জীবনের দু'চারটে বিহারভূমির স্বাক্ষর।

ইসলামে ধর্ম-চিন্তার ক্ষেত্রে বিপ-বের বীজ উগ্ধ হয় উম্মীয়া শাসনকালে। প্রথমেই শাস্ত্রব্যাখ্যায় দ্বি-মতের সৃষ্টি হয়— শিয়া ও সুন্নি মত। এ ব্যাপারে ইরানিরাই অগ্রণী ছিল। এ প্রেরণার উৎস গ্রিক দর্শন আর উপকরণ মিলেছে খ্রিস্টীয়, বৌদ্ধ, জোরাস্ট্রীয় এবং মানীয় দর্শন থেকে। শাস্ত্রকথা ক্রমে দর্শন চর্চার রূপ নিল। আব্বাসীয় যুগে হাসান বসরীর সাগরেন্দ ওয়াসিল উব্ন আতা যুক্তিবাদী মুতায়িলা মত প্রবর্তন করেন। একদল হলেন সংশয়বাদী, এর প্রতিক্রিয়া স্বরূপ দেখা দিল আল আশআরীর (জন্ম ৮৭৩ খ্রীঃ) প্রবর্তিত আশআরীয় মতবাদ। আর এ সব কিছু ছাপিয়ে সর্বগ্রাসী রূপ নিয়ে আবির্ভূত হল মরমীবাদ বা সূফীবাদ। এতে ভারতীয় যোগ ও বেদান্ত দর্শনের প্রভাব অত্যধিক হলেও পূর্ববর্তী সব ধর্মের তত্ত্বচিন্তার নির্যাস নিয়েই এর জন্ম। এর আগে এমনি সমন্বিত চিন্তাধারা আভাস ছিল শিয়াদের ইসমাইলী শাখার মতবাদে। কাজেই সূফীমত প্রসারের পরিবেশও ছিল অনুকূল।

কিন্তু সূফীবাদ বলতে কোন একটি বিশিষ্ট মতকে নির্দেশ করে না। বিভিন্ন তাত্ত্বিকের দার্শনিক চিন্তায় এও বিচিত্র অবয়ব নিয়েছে। কোরআনের কয়েকটি আয়াতের মধ্যে এ মতের সমর্থন খোঁজা হয়েছে। অতএব সূফীদের মতে কোরআনই সূফীমতের একমাত্র উৎস। হাসান বসরী (মৃঃ ৭২৮ খ্রীঃ), রাবিয়া (মৃঃ ৭৫৩ খ্রীঃ), ইব্রাহিম অদহম (মৃঃ ৭৭৭), আবু হাশিম (মৃঃ ৭৭৭), দাযুদ ভূয়রী (মৃঃ ৭৮১), মারুফ করখী (মৃঃ ৮১৫) প্রমুখ আদি মরমী বলে স্বীকৃত। এঁরা সবাই আরবি, সিরীয় বা ইরাকি এবং এঁদের মতবাদ কোন সম্প্রদায় গড়ে তোলেনি। কাজেই ইরানই সূফী মতবাদের বিকাশ ও প্রসারক্ষেত্র। আর জুনুন মিসরীর (মৃঃ ৮৬০) হাতে

সূফী মতবাদ একটি বিশিষ্ট সাধনমার্গ ও তাত্ত্বিকচিন্তারূপে প্রতিষ্ঠা পায়। এখন থেকেই সূফীবাদের দার্শনিক ভিত্তি স্বীকৃতি পেতে থাকে। তারপরে সারা মুসলিমজগতে অল্পকালের মধ্যেই সূফীবাদ ছড়িয়ে পড়ে।

ভারতবর্ষে সাধারণভাবে এগারো শতক থেকে সূফীসাধকেরা প্রবেশ করতে থাকেন। তবে তেরো শতক থেকেই তাঁদের প্রভাব সর্বাঙ্গিক হতে থাকে। তেরো থেকে ষোল শতক অবধি সূফীমত প্রসারের স্বর্ণযুগ। এ সময়ে সূফী সম্প্রদায়ের সংখ্যা চৌদ্দ ছিল বলে প্রসিদ্ধি আছে। তারপরেও এদেশের মাটিতে সূফীমত নতুনতর ও বিচিত্রস্তর অবয়বে গড়ে ওঠে। বেদান্তের, যোগের ও বৌদ্ধ দর্শনের প্রভাবে তা দেশজ রূপ নেয়। এ দেশজ মুসলমানেরা নিজেদের পূর্ব সংস্কার, ঐতিহ্যবোধ ও মানসপ্রবণতা বেশে নতুনকে বরণ করেও পুরোনোকে দূরে সরিয়ে দেয়নি। ফলে সূফীবাদ এক সঙ্কর দর্শনের রূপ নিল। নির্বাণবাদ ফানাকিল্লাহ্‌ হয়ে, সর্বেশ্বরবাদ ব্রহ্মবাদ অদ্বৈততত্ত্বরূপে এবং কুণ্ডলিনী লতীফা নামে সূফীমতে ঠাঁই করে নিল। এই সমন্বিত মিশ্রদর্শন বিভিন্ন সূফী সম্প্রদায়ের উদ্ভব ঘটায়। বহিরাগত চিন্তিয়া, সুহরওয়ার্দিয়া, কাদিরিয়া, নকশবন্দিয়া প্রভৃতি সম্প্রদায়ও এখানে অবিকৃত থাকেনি। আর দেশজ কলন্দরিয়া কবীরপন্থী মাদারিয়া, গওসিয়া প্রভৃতি সম্প্রদায়ও প্রভাবশালী হয়ে ওঠে।

সূফীমত প্রসারের ফলে ইসলাম আর মুসলমানের ধর্ম অভিন্ন রইল না। সূফী সাধকদের কাছে দীক্ষিত মুসলমানের কোরআনের ইসলামের সঙ্গে পরিচয় ছিল সামান্যই। কাজেই মুসলমান ধর্ম নানা সংস্কারের ও ঐতিহ্যবোধের এবং বিভিন্ন দর্শনের মিশ্রণে ও সমন্বয়ে গড়ে উঠেছে। একথা হয়তো নিঃসংশয়ে বলা চলে যে মরমীবাদ কোন ধর্মেরই লক্ষ্য নয়; সব ধর্মেই তা আনুষঙ্গিক এবং এর অনুপ্রবেশও অবশ্যই স্বাভাবিক। কেননা, এ হচ্ছে জিজ্ঞাসু মানুষের জগৎ ও জীবন রহস্যভেদের চিরন্তন বাসনার অপ্রতিরোধ্য প্রকাশ।

ভারতবর্ষে দীক্ষিত মুসলমানদের মধ্যে বৌদ্ধ-হিন্দু সংস্কার তো ছিলই, আর্যপূর্ব যুগের দেশজ সংস্কারও ছিল। এভাবে শরীয়ৎ ও দেশজ আচারের সমন্বয়ে গড়ে উঠেছে ভারতবর্ষের তথা বাঙালী মুসলমানের ধর্ম ও সংস্কৃতি। তাই এদেশে রচিত শাস্ত্রগ্রন্থে অবিমিশ্র শরীয়ৎ কথা পাইনে, মরমীদের বিভিন্ন মোকাম মঞ্জিলের সঙ্গে লৌকিক আচারের পাঁতিও পাই।

মুসলমানের ধর্মবোধ পুরোপুরি কোরআন অনুগত নয় বলেই শরীয়তেই শাস্ত্রের শেষ নয়। তারপরে রয়েছে তরিকত, হকিকত ও মারেফত। এ সবার আবার মঞ্জিল রয়েছে— এগুলো বিভিন্ন সাধনস্তর। যেমন শরীয়ৎ মোকাম-এর মঞ্জিল হল নাসুত (দেহের জগৎ), তরিকত মোকামের মঞ্জিলের নাম মলকুত (বোধির জগৎ) হকিকত মোকামের মঞ্জিলকে বলে জবরুত (শক্তির জগৎ), আর মারেফতের প্রথম মঞ্জিল হল লা'হুত (অহং বিহীন জগৎ) এবং দ্বিতীয় মঞ্জিল হা'হুত (তথা অদ্বৈতসত্তার কিংবা বাক্যবিদ্যাহর স্তর)। যোগীদের যেমন কায়াসাধনই মুখ্য, সূফীদেরও তেমনি কায়াস্থিত মনের বা প্রবৃত্তির (নফস্), হৃদয়ের বা বিবেকের (কল্ব্) এবং প্রাণের বা চৈতন্যের (রুহ্)-উপর কর্তৃত্ব প্রতিষ্ঠাই লক্ষ্য। কর্তৃত্ব প্রতিষ্ঠিত হলে বিমল চৈতন্য উৎপন্ন হয়, এমনি অবস্থা প্রায় ত্রিগুণাতীত। সূফীসাধনা বৌদ্ধ ও ব্রাহ্মণ্য প্রভাবে গুরুবাদ নির্ভর। সদগুরুর পরিনিয়ন্ত্রণ ভিন্ন এ সাধনায় সিদ্ধি নেই। এ প্রভাব এমনি সর্বাঙ্গিক হয়ে উঠেছে যে নিতান্ত শরীয়ৎপন্থীরও পীর ছাড়া চলে না। 'পীর' শব্দের আক্ষরিক অর্থ স্থবির (বৌদ্ধ থের)-জ্ঞানবৃদ্ধ তথা অভিজ্ঞতাঞ্চল প্রবীণ প্রজ্ঞাবান অর্থেই সম্ভবত প্রযুক্ত।

লৌকিক ইসলামে যে সব হিন্দু আচার অনুপ্রবিষ্ট হয়েছে বলে কথিত হয়, আসলে তা গোড়া থেকেই ছিল, নতুন করে গ্রহণ নয়, মূলত বর্জন করাই সম্ভব হয়নি, আর এসব হিন্দুয়ানিও নয়। ভারতবর্ষের আর্যপূর্ব অধিবাসীর বিশ্বাস-সংস্কার ও আচার ব্রাহ্মণ্য ও বৌদ্ধ যুগ পার হয়ে মুসলমান ধর্মাচারেও দৃঢ়মূল হয়ে গিয়েছিল। “এ তথ্য সর্বজনস্বীকৃত যে, আর্য, ব্রাহ্মণ্য বা বৌদ্ধ, জৈন ইত্যাদি সম্প্রদায়ের ধর্মকর্ম, শ্রাদ্ধ, বিবাহ, জন্ম, মৃত্যু প্রভৃতি সংক্রান্ত বিশ্বাস, সংস্কার ও আচারানুষ্ঠান, নানা দেবদেবীর রূপ ও কল্পনা, আহার-বিহারে ছোঁয়াছুঁয়ি অনেক কিছুই আমরা সেই আদিবাসীদের নিকট হইতে আত্মসাৎ করিয়াছি।”^১ ধান, দূর্বা, কলা, হলুদ, পানসুপারী, কলাগাছ, কুলা, ঘট, কড়ি, দই, মাছ প্রভৃতির আনুষ্ঠানিক ব্যবহার আদিবাসীর। এ সব প্রাচীনতম যাদুবিশ্বাসের প্রতীক। এছাড়া বনবিবি, উদ্ধারবিবি, বাঙালিবি, ষষ্ঠী প্রভৃতিও মুসলিমসমাজে ঠাঁই ছাড়েনি। তবু ইসলামের শিক্ষার প্রচণ্ড প্রভাব স্বীকার না করে উপায় নেই। কেননা অসংখ্য বিশ্বাস আচার ও অপরিমেয় আদিম সংস্কারের প্রায় সবগুলোই তো মুসলমানরা ছাড়তে পেরেছিল, যা ব্রাহ্মণ্য ও বৌদ্ধ যুগে সম্ভব হয়নি। এর পশ্চাতে অন্য একটি কারণও অনুমান করা চলে। বাঙলায় তথা ভারতে ইসলাম প্রচারের জন্যে সূফীদের হিন্দু-বৌদ্ধ ঐতিহ্যের মোকাবেলাও করতে হয়েছিল। যোগ-দেহতত্ত্ব ও গুরুনির্ভরতা ছিল এ দেশী লোকের মজ্জাগত। অতএব, এ দুটোর কোন বিকল্প ব্যবস্থা না থাকলে ইসলাম এদের সহজে আকৃষ্ট করতে পারত না।

৫. জিম্মা প্রতিক্রিয়া

পূর্বালোচিত প্রতিবেশের প্রশ্নে বাঙলায় যোগনির্ভর তথা দেহতত্ত্বভিত্তিক অধ্যাত্ম সাধনা অত্যন্ত জনপ্রিয় হয়। বঙ্গত সতেরো শতকের প্রথমপাদ অবধি এই পদ্ধতির সাধনাই ইসলামী অধ্যাত্ম সাধনারূপে স্বীকৃতি পায়। এ কারণেই শেখ ফয়জুল্লাহ গোরক্ষ-বিজয়; সৈয়দ সুলতান ‘জ্ঞান প্রদীপ’, হাজী মুহম্মদ ‘নুরজামাল’, মীর মুহম্মদ সফী ‘নূরনামা’, শেখ চান্দ ‘তালিবনামা’ (শাহদুল্লাহনামা) ও হরগৌরী সন্ধ্যা, আবদুল হাকিম ‘শাহাবুদ্দীননামা’, শেখ মনসুর ‘শির্নামা’ আলি রজা ‘আগম জ্ঞানসাগর’, শেখ জাহিদ ‘আদ্যপরিচয়’, শেখ জেবু ‘আগম’, অজানা-লেখক ‘যোগকলন্দর’, রহিমুল্লাহ ‘তনতেলাওত’, রমজান আলি ‘আদ্যব্যক্ত’, আবদুর রহিম ‘মুহম্মদী বেদতত্ত্ব’, ‘শাহেজুল্লাহ’ খান ‘যোগীকাচ’, শেখ কিনু ‘আশেকী কামাল’ প্রভৃতি যোগপদ্ধতির তত্ত্ব-গ্রন্থ রচনা করেন। এ ধারার গ্রন্থ আমাদের জ্ঞানে ষোল শতক থেকে আজ অবধি রচিত হয়ে চলেছে। বিশেষ করে মুসলিম বাউলেরা [যারা সাধারণ্যে মারফতী বা মুর্শিদপন্থী বলে পরিচিত] এ রীতি আজও ক্ষীণ ধারায় বাঁচিয়ে রেখেছে।

কিন্তু এর বিরুদ্ধে প্রবল প্রতিক্রিয়াও লক্ষ্য করি সতেরো শতকের দ্বিতীয় পাদ থেকে। মনে হয়, তখন গাঁয়ে গঞ্জে মুসলিমসমাজ জনবহুল হয়ে দৃঢ়মূল হয়েছে এবং গণমনে শরীয়তী ইসলামপ্রীতি প্রবল হয়ে উঠেছে। এর আরো তিনটে কারণ অনুমান করি : এক, তখন পর্তুগীজদের দৌরাত্ম্য আরবের সঙ্গে চট্টগ্রাম হয়ে সমুদ্রপথে হজযাত্রীর সংখ্যা বেড়েছে। উত্তর ভারতের হজব্রতীরা এ পথে যাতায়াত করতে থাকে। দুই, সতেরো শতকে ইসলাম আর প্রসারকামী তথা প্রচারশীল ছিল না। তখন মুসলিমরা সমাজ সংগঠনের ও ইসলামের শিক্ষার স্বরূপ অনুধ্যানে হয়তো ব্রতী হয়েছে, আর সমাজ স্থিতিশীল হতে চলেছে। তিন, মুঘলবিজয়ের

^১ বাঙালীর ইতিহাস (আদিপর্ব) নীহাররঞ্জন রায়, পৃঃ ৫৭৬।

ফলে হয়তো তখন উত্তর ভারতের সঙ্গে ঘনিষ্ঠ সম্পর্ক স্থাপিত হয় এবং ওখান থেকে শাস্ত্রবিদ যেমন এদেশে এসেছেন, এদেশী কিছু লোকও তেমন উত্তর-ভারত থেকে শাস্ত্র শিক্ষা করে এসেছেন। এঁরাই হয়তো ইসলামের স্থানিক বিকৃতিতে বিচলিত হয়ে শরীয়তী ইসলাম প্রচারে ব্রতী হন। এর আভাস কিফায়তুল মুসল্লিন গ্রন্থেও মেলে। মৌলবী রহমতুল্লাহ— ‘মুসলমানি দীনকাম শিখায়ত্ত অবিশাম/মুসলমানি করত্ত উম্মল।’ ‘কিফায়তুল মুসলেমিন’ লেখক কবি আশরাফও বলেন :

দীন ইসলাম হেতু এথ যত্ন ভাব।

নহে পঞ্চালিকা কৈলে কি ফল লাভ।

এর ফলেই আলাউল উত্তর-ভারতীয় লেখক ইউসুফ গদার ‘তোহফা’ অনুবাদ করেন। শেখ পরাণ লেখেন কায়দানী কেতাব, তাঁর পুত্র মুতালিব মৌলবী রহমতুল্লাহর প্রবর্তনায় ও সহযোগিতায় ‘কিফায়তুল মুসল্লিন’ রচনা করেন। এভাবে তাঁদের অনুসরণে নেয়াজ লিখেছেন কায়দানী কেতাব, তাঁর পুত্র আশরাফ লিখেছেন ‘কিফায়তুল মুসলেমিন’, খোন্দকার নসরুল্লাহর হাতে পেয়েছি ‘শরীয়তনামা’, ‘হেদায়েতুল ইসলাম’, আবদুল করিম খোন্দকার রচনা করেছেন ‘হাজার মসায়েল ও দুহা মজলিস’ এবং সৈয়দ নাসিরউদ্দীনের ‘সিরাজসবিল’, আবদুল্লাহর ‘নসিয়তনামা’, মুনসী মুহম্মদ মুকিমের ‘ফায়দুল মুকতদী’, বালক ফকিরের ‘ফায়দুল মুকতদী’, কাজী বদিউদ্দীনের ‘কায়দানী কিতাব’, ‘সিফতে ইমুদী’, সৈয়দ নুরুদ্দীনের ‘দাকায়েকুল হেকায়েক’, আইনুদ্দীনের ‘তফসীর’, মুহম্মদ আলীর ‘হায়রাতুল ফেকা’, সোলায়মানের ‘নসিয়তনামা’ প্রভৃতি গ্রন্থ পেয়েছি। গায়ের মুসলমানও যে শরীয়তকথা তথা ইসলাম সম্পর্কে উৎসুক হয়ে উঠেছে, তার আভাস ‘কিফায়তুল মুসল্লিন’ গ্রন্থেও মেলে। এর গ্রন্থোৎপত্তি অংশ স্মর্তব্য।^২

কয়েকজন কবির জীবৎকাল নিরূপণ প্রসঙ্গ

শেখ মুতালিব ‘কিফায়তুল মুসল্লিন’ গ্রন্থের ভণিতায় ‘পরাগতনয়’ ও ‘পরাগনন্দন’ বলে আত্মপরিচয় দিয়েছেন। যেমন :

ক. কিফায়তুল মুসল্লিন শুন দিয়া মন,
বঙ্গ ভাষে কহে শেখ পরান-নন্দন।
সব মসায়েল তিনি (আনি?) করি একত্তর
কহিয়াছে কায়দানী কেতাব ভিতর।
খ. পীর পদে প্রণামিএ সৈয়দ হাসান
মীর মুহম্মদ সফী তাহান নন্দন।
গ. সীতাকুণ্ড গ্রামে শেখ পরাগ সূজন
তাহান নন্দন হীন মুতালিব ভাণ।

ঘ. মৌলবী রহমতুল্লাহ সর্বগুণ ধাম
চতুর্দশ এলেম অবধান অনুপাম।
তাহান আদেশে শেখ পরাণ-নন্দন
হীন মুতালিব কহে শাস্ত্রের বচন।
ঙ. বঙ্গভাষে কহে শেখ পরাগনন্দন।
চ. ওয়াজিব কথা কহি শুন যেই হএ
হীন মুতালিব শেখ পরাণ-তনএ।
ছ. শাস্ত্র কথা কহে সব পরাণ-নন্দন।
জ. আরবীর ভাষে হএ, কর্ম মুসলমানি
হীন মুতালিবে কহে করি বঙ্গবাণী।

^২ যৎসম্পাদিত শেখ মুতালিব প্রণীত ‘কিফায়তুল মুসল্লিন’ দ্রষ্টব্য।

১. পিতা খ্যাতিমান না হলে পুত্র আত্মপরিচয়ে পিতা নামোল্লেখ করতেন না। আর কবি-খ্যাতির চেয়ে অন্য কোন খ্যাতিই বেশি প্রসার লাভ করে না। তাই আমরা মুত্তালিবকে কবি পরাণের পুত্র বলেই মনে করি। বিশেষ করে মুত্তালিবের 'ক' ভণিতায় শেষ পংক্তিগুলো আমাদের অনুমানের স্বপক্ষে ইঙ্গিত দেয়। 'খ' ভণিতায় মীর মুহম্মদ সফীর পিতা সৈয়দ হাসানকে তাঁর পীর বলে উল্লেখ করেছেন। 'গ' ভণিতায় কবির পিতা শেখ পরাণেরও স্বগ্রাম সীতাকুণ্ডের নাম আছে। শেখ মুত্তালিব আরবি 'আবজদ' রীতিতে তাঁর গ্রন্থরচনার কাল নির্দেশ করেছেন :

ক. এসলাম এবাদত নামাজ সমাণ্ড
সেই অনুবন্ধে কহি শুন দিয়া চিত্ত।
সপ্তমে হইল পুনি এবাদত নাম
যেই দিনে সাজ হৈল পুস্তক তামাম।

খ. পুস্তক সমাণ্ড হৈল দীন ইসলাম
কিফায়তুল মুসল্লিন রাখিলাম নাম।

এ থেকে যথাক্রমে ১০৪৮ ও ১০৪৯ হিজরী তথা ১৬৩৮-৩৯ খ্রীস্টাব্দ পাওয়া যায়। শেখ মুত্তালিব শিশুকালে পিতৃহীন হয়েছিলেন বলে উল্লেখ করেছেন। ১৬৩৮ সনে মুত্তালিবকে ৩৫ বছর বয়স্ক এবং মুত্তালিব পিতার যদি মধ্যবয়সের সন্তান হন আর পিতা-পুত্রের বয়সের তফাৎ ৪০ বছর ধরে নিয়ে হিসেব করলে মুত্তালিবের জন্ম সন ১৬০৩ এবং তাঁর পিতার জন্ম সন ১৫৬৩ খ্রীস্টাব্দ বলে অনুমান করা যায়। শেখ মুত্তালিব যদি দশ বছর বয়সে পিতৃহীন হন, তা হলে পরাণের মৃত্যু সন দাঁড়ায় ১৬১৩ খ্রীস্টাব্দ। অতএব পরাণের জীবৎকাল মোটামুটি ১৫৬০-১৬১৫ খ্রীস্টাব্দ বলে মনে করা যায়।

২. শেখ পরাণ দুখানি গ্রন্থের রচয়িতা 'নুরনামা ও কায়দানি কিতাব। শেখ পরাণ তাঁর 'নুরনামায়' সৈয়দ সুলতানের নবীবংশের উল্লেখ করেছেন :

শাস্ত্রনীতি কথা কহি কর অবধান।
ফাতেমাক বিভা কৈল আলি মতিমান
নবীবংশে রচিছন্ত সৈদ সুলতান।

কবি সৈয়দ সুলতান তাঁর বিখ্যাত কাব্য নবীবংশ রচনা শুরু করেন ১৫৮৪-৮৬ খ্রীস্টাব্দে। আবার এই শেখ পরাণই তাঁর কায়দানি কিতাবে হাজী মুহম্মদ ও তাঁর একখানি পুথির নামোল্লেখ করেছেন :

যদি বোল গোর হোস্তে না উঠিব পুনি
কাফির হৈয়া যাইব নরকেতে জানি।
সুরত নামার মধ্যে ইমার সফত
কহিছন্ত হাজী মুহম্মদ ভাল মত।
তে কারণে এথা মুঞি না কৈলুঁ সমস্ত
কিঞ্চিৎ কহিলুঁ মুঞি ইঙ্গিতে বুঝিতে।

এতে মনে হয়, সৈয়দ সুলতান ও হাজী মুহম্মদ শেখ পরাণের জ্যেষ্ঠ সমসাময়িক ছিলেন।

অতএব, আমাদের আগের অনুমান অনুসারে শেখ পরাণ ১৬১০ খ্রীস্টাব্দের মধ্যেই গ্রন্থগুলি রচনা করেছিলেন বলে ধরে নিলে হাজী মুহম্মদ ষোল শতকের শেষ দশকে 'সুরতনামা' রচনা করেছিলেন বলে অনুমান করতে হয়।


^১ পুথি পরিচিতি : পৃঃ ২৯৯, ক্রমিক সংখ্যা : ২৫৭।

৩. এদিকে সৈয়দ সুলতানের পৌত্র শেখ মুত্তালিবের পীর সৈয়দ হাসানের পুত্র ও 'নূরনামা' রচয়িতা শাহ মীর মুহম্মদ সফী হাজী মুহম্মদকে তাঁর পীর বলে উল্লেখ করেছেন^২ :

ক. কহে মীর শাহ সফী আমি দুঃখমতি
এহলোকে পরলোকে সেই দুরগতি।
পিতামহ শাহ সৈয়দ জানহ দরবেশ
কিষ্কিৎ জানাইলুঁ সেই পন্থের নির্দেশ।
খ. বলি পীর কহি দেও আদ্য সমাচার
কিরূপে হইল নূর আল্লার দিদার।

কোন মতে হৈল স্বর্ণ ক্ষেতি উৎপন
কেমতে হইল বোল জীবের সৃজন।
গ. কহে মুহম্মদ সফী হুদে মনে তানে জপি
যার মর্মে সৃষ্টি উৎপন।
পীর হাজী মুহম্মদ শিরে বন্দী তান পদ
পাইতে সে নূরের দরশন।

শেখ মুত্তালিব মীর মুহম্মদ সফীর পিতা সৈয়দ হাসানের শিষ্য ছিলেন। কাজেই মীর মুহম্মদ সফী ও শেখ মুত্তালিব প্রায় সমবয়সী ছিলেন বলে অনুমান করা যায়। অতএব, ছকে ফেলে দেখলে এরূপ দাঁড়ায় :



^২ পুঁথি পরিচিতি : ১৪৮৬-৪।

^৩ মুকিম রচিত তুলে বকাউলিতে এ তথ্য মেলে : তান পুত্র [পৌত্র] শ্রীসৈয়দ মুহম্মদ সৈয়দ

ক. চক্রশালা ভূমি মধ্যে পীরজাদা ঠাম নিজ পীর স্থানে সেই হৈল মুরীদ
সৈয়দ সুলতান বংশে শাহদুদ্রাহ নাম খ. পীর মীর মুহম্মদ সৈয়দ সালাম
একে তান ভাতৃপুত্র দৃতী এ জামাত গ. শ্রীযুত মুহম্মদ সৈয়দ পীরবর
সর্বশাস্ত্র বিশারদ শরীয়ত জ্ঞাতা তান পদ প্রণামিয়া শ্রীলএ মুকিম
নর-পরীভার গ্রন্থ কহে স্কৃতিম।

মুকিমের পীর ছিলেন সৈয়দ সুলতানের প্রদৌহিত্র সৈয়দ মুহম্মদ সৈয়দ

দুনিয়ার পাঠক এক হও! ~ www.amarboi.com ~

সাতটির মধ্যে) নিজেকে শেখ পরাগ-নন্দন বলে পরিচয় দিয়েছেন। তাঁর নিবাস ছিল চট্টগ্রামের সীতাকুণ্ড গ্রামে।

শেখ মুত্তালিব 'কায়দানী কিতাব' নামে একটি পুস্তিকাও রচনা করেছিলেন তাতে তিনি বলেছেন:

পড়িবার অঙ্গে বাপ মরি গেল মোর।	যদি দৃষ্টি কর কতু কোন মহাজন
গৃহবাস বলা আর দুনিয়ার বেভার	আরবি বাঙ্গলা দেখি না ফিরাও মন
বেড়িল আপদে মোর দরস্ মাঝার।	অবুঝ সকলে যেন মতে বুঝ পান
এই জন্য পড়িবারে নারিলুঁ কিস্তর	তেন মতে বুঝাইবারে কহিছে আল্লাএ।
অল্প অল্প জানিলুঁ শরার খবর।	

অতএব, শেখ মুত্তালিব অল্প বয়সে পিতৃহীন হয়ে সংসারের দায়িত্ব গ্রহণ করতে বাধ্য হন। তখন নানা বিপদ সংকটের মধ্যে দিয়ে তাঁর দিন কাটে। সেজন্যে শিক্ষা অসম্পূর্ণ রেখেই তাঁকে মাদ্রাসা (দরস্) ত্যাগ করতে হয়। কবির পীর ছিলেন সৈয়দ সুলতানের পৌত্র মীর মুহম্মদ সফী।

'মহিত, ফতাবিখনিয়া, ফতাবিকোবরা, শরা-বেকায়া, হেদায়া কদুরীকজ্জ, আকায়েদ প্রভৃতি কিতাবের সার সংকলিত হয়েছে কায়দানী কিতাবে। সেই কায়দানীকে মুখ্য অবলম্বন করে রচিত হয়েছে মুত্তালিবের কিফায়তুল মুসল্লিন।

মুত্তালিবের মনেও সে-দ্বিধা, সে-সংশয় এবং স্বেক্সপ আশ্বাসের দ্যুতি :

আরবিতে সকলে না বুঝে ভাল মন্দ	মুসলমানি শাস্ত্রকথা বাঙ্গলা করিলুঁ
তেকারণে দেশীভাষে রচিলুঁ প্রবন্ধ।	বহু পাপ হৈল মোর নিশ্চয় জানিলুঁ।
কিন্তু মাত্র ভরসা আছেএ মনান্তরে	অবশ্য গফুর আল্লা পাপ ক্ষেমিবেক।
বুঝিয়া মুম্বীন দোয়া করিব আমারে।	এসব জানিয়া যদি করএ রক্ষণ
মুম্বিনের আশীর্বাদে পূর্ণ হইবেক	তবে সে মোহোর পাপ হইবে মোচন।

সৈয়দ সুলতানের গ্রন্থেরও বরাত দেয়া হয়েছে দুইবার। একবার

ক. হাওয়া বিবির হায়েজ প্রসঙ্গে :	দ্বিতীয়বার : খয়বর যুদ্ধ প্রসঙ্গে :
নবীবংশে সে সকল প্রসঙ্গ আছেএ	'শবে মেরাজে' আছে যুদ্ধ বিবরণ
পুনি তাক লিখিবারে উচিত না হএ।	পুনি এথা কহি তাক নাহি প্রয়োজন।

সৈয়দ সুলতানের গ্রন্থ তখন এত জনপ্রিয় ও প্রখ্যাত যে গ্রন্থকারের নাম উচ্চারণের প্রয়োজন অনুভূত হয়নি।

শেখ মুত্তালিব 'কায়দানী কিতাব' নামে একটি পুস্তিকা রচনা করেছিলেন। কিফায়তুল মুসল্লিন গ্রন্থের সংক্ষিপ্তসারই পুস্তিকায় বর্ণিত। কবি নিজেই বলেছেন :

শরীয়ত কায়দা এই গুনহ বয়ান।
কহিছি অপর কায়দা কিতাবেতে পাই
নামাজের কায়দা পুনি কহিবারে চাই।

অপর কায়দা অর্থে কিফায়তুল মুসল্লিন গ্রন্থই নির্দেশিত হয়েছে। এ গ্রন্থও ফাজিল মৌলবী রহমতুল্লাহর প্রবর্তনায় রচিত :

উত্তর দেশেতে ছিল ফাজিল মহাজন
তান নাম রহমত কহি সর্বজন।

কিতাব পড়িয়া দেখি বুঝাইল মোরে
মুই হীন দুর্গতিয়া কহি মুখে কারে।

এই পুস্তিকায় কবির কিছু আত্মকথা মেলে :

ত্রিশ রোযা ত্রিশ নিয়ত কহিলাম পুনি
একশত ত্রিশ ফর্জ লস্তু জানি গুনি।
ফাজিলের পদে গিয়া এই কথা শুন
আন্ধি হোন্তে বাড়ি ফাজিল আছে মনে গুন।
কি জানি কি বুঝি আমি কিতাব বেওর
পড়িবার অঙ্কে বাপ মরি গেল মোর।

গৃহবাসে বলা আর দুনিয়ার বেভার
বেড়িল আপদে মোর দরস মাঝার
এ জন্য পড়িবারে নারিলুম বিস্তর
অল্প অল্প জানিলুম শরার খবর।

ঘ. আশরাফ

মধ্যযুগে জনগণকে বাঙলা ভাষার মাধ্যমে দীন-ই-এলম শিক্ষা দিয়ে যারা ধন্য হয়েছেন, শেখ মুহম্মদ নিয়াজসুত আশরাফ তাদের অন্যতম।

নিয়াজ-পুত্র আশরাফ রচিত গ্রন্থের নাম 'কিফায়তুল মুসলেমিন' দুই গ্রন্থের নামের সামান্য সাদৃশ্য থাকলেও বিষয়ে মিল নাই। এই গ্রন্থে বিভিন্ন নামাজের ফজলিয়ত বর্ণিত। বিশেষ করে রমজান মাসে কোন দিনে কিতাবে কত রাকাত অতিরিক্ত নামাজ পড়তে হয় এবং তার ফজলিয়ত বা পূণ্য এবং 'শবে কদর' নামাজের ভীতি ও ফল বর্ণিত হয়েছে। প্রথমদিকে ষোল পত্র নেই। সেজন্যে রচয়িতার পূর্ব পরিচয় পাওয়া যায়নি। পুথির লিপিকাল ১১৫০ মঘী বা ১৭৮৮ খ্রীস্টাব্দ। আশরাফ নিয়াজের পুত্র ও মুহম্মদ আবিদের মুরীদ। ভণিতায় (আগিকেও) শেখ মুত্তালিবের অনুকৃতি রয়েছে। তাঁতে মনে হয় আশরাফ মুত্তালিবের পরবর্তী লেখক। অবশ্য বিপরীত সিদ্ধান্ত গ্রহণেও বাধা নেই। নিয়াজও এক কায়দানী কিতাব রচনা করেছিলেন। মুত্তালিবের পিতা পরাণও কায়দানী কিতাব রচনা করেন। কাজেই উভয় ক্ষেত্রেই পিতা-পুত্রের কৃতি সমান।

আশরাফের ভণিতা :

ক. জনক চরণ চুম্বি আশরাফ বাওয়া
কহন্তু নামাজ কথা রসুলের শরা।
সাফল্য জনম শেখ মোহাম্মদ নেয়াজ
জীববন্তে না তেজিল এ রোজা নামাজ।
তাহান আদেশে ছিরি আশরাফ হীন
কহন্তু নামাজ কথা কারণে মুমীন।

খ. মোহাম্মদ নেয়াজ সুত আশরাফ হীন
কহন্তু পুস্তক কিফায়তুল মুসলেমিন।
তাহান আদেশে ছিরি আশরাফ হীন
কহন্তু কদর কথা কারণে মুমীন।

ঘ. যোগিস তপসী শাহা পরম ভকত
মুহম্মদ আবিদ ছিরি শাহা উলফত।
তাহান আদেশে শেখ নেয়াজ-নন্দন
আশরাফ ক্ষুদ্রে কহে কিতাব কখন।
মুহম্মদ রাজাসুত মহম্মদ নেয়াজ
আশরাফ হীন তান সন্ততি সমাজ।

গ. মোহাম্মদ আবিদ শাহা ভক্ত ভাগ্যবন্ত
নিরবধি ভাবে চিন্তে আখেরের পছ।
কিফায়তুল মুসলেমিন পুণ্যের কখন
মুসলমান হেতু কৈলু পঞ্চালি রচন।
দীন ইসলাম হেতু এথ যত্নভাব
নহে পঞ্চালিকা কৈলে কি ফল কি লাভ।

এ থেকে জানা যায় আশরাফ পিতা নিয়াজের আগ্রহ এবং পীর শাহ মুহম্মদ আবিদের আদেশে কিফায়তুল মুসলেমিন গ্রন্থটি রচনা করেন। আবিদের শ্রদ্ধেয় বন্ধু বা পীর ছিলেন শাহ উলফত।

আশরফের পিতামহের নাম মুহম্মদ রাজা। প্রাপ্ত পুথির পুস্পিকা এরূপ : ইতি কিফায়তুল মোছলেমিন বয়ান সমাপ্ত। পুস্তকর মালিক শ্রী মোহাম্মদ কাছিম পীছরে আবদুল রজ্জক ইবনে জুগীন আখন। সাকীন ইছাপুর মোং ধর্মপুর ইতিসন ১১৫০ মঘী তারিখ ১০ কার্তিক।

১১৫০ মঘীতে অর্থাৎ ১৭৮৮ খ্রীস্টাব্দে লিপিকৃত পাণ্ডুলিপি যখন আমাদের হাতে আছে, তখন আশরাফ যে আঠারো শতকের গোড়ার দিকে অন্তত বর্তমান ছিলেন, তা বিশ্বাস করতে বিশেষ বাধা নেই।

এ গ্রন্থে শব-ই-কদর নির্ণয় সম্পর্কে কিছু বিরলতত্ত্ব ও তথ্য শেখ আবুল হাসানের বরাত দিয়ে পরিবেশন করা হয়েছে। পয়লা রমজান মঙ্গলবার হলে কদর হবে সাতাইশে, বুধবার হলে হবে বাইশে বৃহস্পতিবার হলে হবে পঁচিশে, শুক্রবার হলে হবে ছাব্বিশে, এবং শনিবার হলে কদর হবে তেইশে রমজান।

ঙ. আলাউল

ইউসুফ গদার অতি সংক্ষিপ্ত পরিচয় দিয়েছেন রহমান আলী। অবশ্য সে মোটেই প্রয়োজনীয়নুরূপ নয়। তিনি লিখেছিলেন, — আলিম-ই রব্বানী, চেরাগ ই-দিল্ল শেখ নাসিরুদ্দীন মাহমুদের শিষ্য শেখ ইউসুফ দেহলভী হাদিস ও তফসীরে বিচক্ষণ ব্যাপন্ন ছিলেন। তিনি ‘তোফাতুননেসায়েহ’ নামক একখানি কাব্যগ্রন্থ রচনা করেন। এতে ফরজ, সুন্নত ও শিষ্টাচার সম্বন্ধে আলোচনা আছে। ৭৭৪ হিজরীতে (১৩৭২-৭৩ খ্রীঃ) তাঁর ইন্তিকাল ঘটে।”

শেখ ইউসুফ সিদ্ধ পুরুষ ছিলেন। তাই তাঁর নামের সঙ্গে গ’দা (দরবেশ) উপাধি যুক্ত হয়েছে। তিনি দিল্লীনিবাসী ছিলেন, তাঁর নামের শেষে ‘দেহলভী’ প্রয়োগই তার প্রমাণ। অতএব, তাঁর পুরোনাম ছিল গ’দা শেখ ইউসুফ দেহলভী। ইউসুফের পীর সেকালের ভারতবিখ্যাত দরবেশ ছিলেন। তাঁর পুরো নাম নাসির আল-দীন-মাহমুদ ইবনে এহিয়া ইবনে আবদুল লতিফ অল হোসাইনি অল ইয়াজদী আল আওধী। তিনি ‘চেরাগ-ই-দিল্লী’ উপাধিতেই সমধিক পরিচিত ছিলেন। নাসিরুদ্দীন মাহমুদ ছিলেন হজরত নিয়ামউদ্দীন আউলিয়ার শিষ্য। মহিয়াউদ্দীন খাশানী ও শামসুদ্দীন মুহম্মদ আল-আওধী ছিলেন তাঁর সতীর্থ। তিনি অযোধ্যার লোক, বাস করতেন দিল্লীতে। এখানে ৭৫৭ হিজরীর ১৮ই রমযান রোজ শুক্রবারে (১৩৫৬ খ্রীস্টাব্দে সেপ্টেম্বরে) তিনি দেহত্যাগ করেন।^১ ইউসুফ গ’দার মতে পীর দস্তগীর মাহমুদ নাসির উদ্দীন চেরাগ-ই-আউলিয়া-ই-দেহলভীর মূল নাম মাহমুদ আর নাসিরুদ্দীন প্রভৃতি তাঁর লঘব বা উপাধি।^২ আলাউলের তোহফায় এর সমর্থন আছে।

^১ তাজকিরাত্য়ে উলমেয়ে হিন্দ-রহমান আলি, পৃঃ ২৫৬।

^২ Indian Contribution to the Study of Hadith Literature- Dr. Md. Ishaque p. 63

^৩ তোহফাতুন নেসায়েহ- আবদুল জলিল পেশোয়ারীকৃত সতীক সং ১৩১৭ হিঃ লাহোর।

গ্রন্থোৎপত্তি সম্বন্ধে আলাউল যা বলেছেন, তা এই :

শ্রীযুত ইসুফ গদা মহামন্ত ওলি ।	শ্রীযুত ইসুফ গদা মহা দানেশমন্দ ।
রচিলা বয়েত ছন্দ মনেত আকলি ।।	কিতাব তোহফা নামে রচিলা সুছন্দ ।।
সপ্তশত একাশী বয়েত কৈল সার ।।	শেখ মাহমুদ নামে জান তান পীর ।
রবিউল আখের দশদিন সোমবার ।।	আবুল ফতেহা নামে পুত্র গণবান ।।
তান পদে ভক্তি করি হৈয়া পৃষ্ঠগামী ।	রচিলা তোহফা গ্রন্থ নিমিত্তে তাহান ।।
ঘৃত অবশেষে ঘোলঝাঁকি লৈলু আমি ।	‘তোহফা’ কেতাব জান শরীয়তের ঘর ।
বিশেষ মহন্ত আজ্ঞা না যায় লঙ্ঘন ।	পঞ্চ উপর চল্লিশ দ্বার মনোহর ।।
এ কারণে কষ্ট-পন্থে করিলু গমন ।	আরবি কেতাব হস্তে ফারসি ভাষাএ ।
শ্রীযুত সোলেমান জ্ঞানে সুপণ্ডিত ।	রচিলা বয়েত ছন্দে ইসুফ গদাএ ।।
যদ্যপি সংসারে ভোর প্রভুগত চিত ।।	‘তোহফাতুননেসায়ের’ বাছিয়া থুইলা নাম ।
তাহার আদেশমাল্য শিরেতে ধরিয়া ।	হাদিয়ারে ‘তোহফা’ আরবি ভাষে বলে ।
হীন আলাউলে কহে পঞ্চালি রচিয়া ।।-	মহতেরে দেয় ডালি দিব্যবস্ত্র হৈলে ।।
	এ থেকে ‘তোহফা’ নাম থুইল বাছিয়া ।

অতএব, ইউসুফ গ’দার ‘তোহফাতুননেসায়ের’ও মৌলিক রচনা নয়। এর অবলম্বন কোন আরবি ‘হেদায়া’ যদিও ‘রচিলা বয়েত ছন্দ মনেত আকলি’ আছে তবু আমরা একে ‘স্বাধীন অনুবাদ’ বা ছায়াবলম্বন বলে মনে করতে পারি। কেননা আক্ষরিক অনুবাদ হওয়া সত্ত্বেও আলাউল বলেছেন- (তোহফা) ‘পরিশ্রমে রচিলাম মনে ভাবি উক্তি’। তবে স্থানীয় সমস্যার সমাধান দেবার জন্য কিছু কিছু স্বকীয় যোজনা যে রয়েছে, তাতে সন্দেহ নাই। গ’দার গ্রন্থে বয়েত সংখ্যা ৭৮১।

রচনাকাল :

শেখ ইউসুফ গদা তাঁর গ্রন্থশেষে রচনার সমাপ্তি সন ৭৯৫ হিজরী বলে উল্লেখ করেছেন। যথা -

দরখতম কিতাব ও মোনাজাত আখির শরানিস্ত ।
হফসদনওদ পঞ্জে দিগর হিজরত মোহাম্মদ মোস্তফা ।
আশের রবিউল আখেরী ওয়াক্ত-এ জোহা রোজে কমর ।

আলাউলেও গ’দা প্রদত্ত সনের সমর্থন রয়েছে :

সিদ্ধুশত গ্রহ দশ সন বাণধিক ।
রচিলা ইসুফ গদা তোহফা মানিক ।।
দুইশত অষ্টোত্তর সত্তর বহিল ।
আনিমে পাইল মর্ম ‘আমে’ না পাইল ।।
এবে আম-লোক সবে গ্রন্থ বুঝিবার ।
কহি শুন উপদেশ হৈল যে প্রকার ।।

অতএব, সিদ্ধ-৭ শত-১০০, গ্রহ-৯, বাণ'ধিক (=তৎ অধিক বাণ)-৫, = ৭ (১০০ + ৯ (১০ + ৫ = ৭৯৫ হিজরী বা ১৩৯৩ খ্রীষ্টাব্দ (৭৯৫ হিঃ ১৭ই নবেম্বর ১৩৯২ খ্রীষ্টাব্দ থেকে ৫ই নবেম্বর ১৩৯৩ খ্রীষ্টাব্দ)। উক্ত ৭৯৫ হিজরীর সঙ্গে ২৭৮ হিজরী বছর যোগ করলে ১০৭৩ হিঃ দাঁড়ায়। সুতরাং ১০৭৩ হিঃ (১৬ই আগস্ট ১৬৬২ ৫ই আগস্ট ১৬৬৩ খ্রীষ্টাব্দ) বা ১৬৬৩ খ্রীষ্টাব্দে (১৯৭৩ হিঃ) ৮ই জুলাই থেকে ১৯শে জুলাই ১৬৬৪ খ্রীষ্টাব্দ) আলাউল তোহফা রচনায় আত্মনিয়োগ করেন।

তোহফার রচনা-সমাপ্তিকাল :

পুস্তক সমাপ্ত সং সন মুছলমানি।
রসাসিদ্ধি রামাধির লও পরিমাণি।।
পক্ সাবানের চতুর্দশ দিন সমবার।
সমুখ বরাত নিসি সুব জোগ সার।
পুস্তক সমাপ্ত সংখ্যা শুন মোছলমানি।
রসসিদ্ধি রমধিক লঅ পরিমাণি।
সাবানের চতুর্দশ দিন চন্দ্রবার।
সমুখে বরাত নিসি সুভ জোগ সার।।
তরুণ অরুণ সঙ্গে বেলা দুই জাম।
তত্ত্ব উপদেশ করি পোস্তকের নাম।
আমাদের অনুমিত বিত্তক পাঠ :
পুস্তক সমাপ্ত-সংখ্যা সন মুসলমানি।
রাম সিদ্ধি নবধিক লও পরিমাণি।।
সাবানের চতুর্দশ দিন সোমবার।
সমুখে 'বরাত নিশি' শুভ যোগ সার।।

তরুণ ওরুণ সমে বেলা দুই জাম।
তত্ত্ব উপদেশ এহি পুস্তকের নাম।
মগদের সন সংক্ষ বুঝ নিয়এ।
রিতু জোগ অম্র [অম্র] এক বসন্ত মসএ।
অথবা
মগদের সন সংখ্যা বুঝ নি। এ।
রিতু জোগ অম্র ত জে বসন্ত সমএ।।
ফাযুন মাসে ত জান চতুর্থ বিংশ সম।
সমাপ্ত হইল পোস্তক মনোরম।
তরুণ অরুণ সমে বেলা দুই যাম।
তত্ত্ব উপদেশ এহি পুস্তকের নাম :
মগদের সন-সংখ্যা বুঝ নিয়।
ঋতু যুগ অম্র এক বসন্ত সময়।।
ফাযুন মাসে ত জান চতুর্বিংশ সোম।
সমাপ্ত হৈল এহি পুস্তক মনোরম।।

মুসলমানি সন : রাম-৩ সিদ্ধ-৭, নবধিক (নব অধিক)-১০। অঙ্কস্যা বামাগতি নিয়মে ১০৭৩ বা ১৬৬৪ খ্রীষ্টাব্দ। (১৪ই সাবান বা ২৪ শে ফাযুন, ১০২৬ মঘী হয় ১০ই মার্চ ১৬৬৪ খ্রীষ্টাব্দ।

আর, মঘী সন : ঋতু-৬, যুগ-২, অত্র-০, এক-১। এভাবে ১০২৬ মঘী বা ১৬৬৪ খ্রীষ্টাব্দ হয়। অতএব ১৬৬৩ খ্রীষ্টাব্দের শেষার্ধ্বে তোহফার অনুবাদ কার্য শুরু হয়ে ১৬৬৪ খ্রীষ্টাব্দের প্রথমার্ধ্বে শেষ হয়। এবং তার আগে চন্দ্র যোগ কলানিধি গ্রহের স্থাপন-এর অনুমতি বিত্তক পাঠ : চন্দ্রশূন্য কলানিধি গ্রহের স্থাপন - অনুসারে চন্দ্র-১, শূন্য-০, কলানিধি-১৬, গ্রহ-৯, ১০১৬ + ৯ = ১০২৫ মঘীতে বা ১৬৬৩ খ্রীষ্টাব্দে কবি 'সপ্তপয়কর' রচনা করেন।'

সুতরাং রহমান আলী প্রদত্ত ইউসুফ গ'দার মৃত্যু তারিখটি ভুল।

১ ৬ষ্ঠ অধ্যায়ে সপ্তপয়কর রচনাকাল অনির্দিষ্ট রয়েছে।

তোহফায় কোরআন আছে, হাদিস আছে, ক্ব্যাজ এজমা আছে, আরো আছে লৌকিক বিশ্বাস-সংস্কার সামাজিক রীতিনীতি ও লোকাচার। যথা :

১। বিদ্যা ও আত্মনির্ভরশীলতা সম্বন্ধে :

নানা বিদ্যা পঠ, শিখ, কর দুঃখকাজ। শাক অনু রুক্ষ শুধু যেই মিলে বাও।
লজ্জা না করিও তাহে মাগিলে সে লাজ।। স্বাদ হেতু নৃপতির গৃহেতে না যাও।।
বিদ্যাগুণ না জানিলে ভ্রমে ঘারে ঘারে। মনে ত করিয়া আশা কতক্ষণে খায়।
গর্দভ বলদ সম যে আলস্য করে।। পরগৃহে না থাকিব কুকুরের প্রায়।।
পৃষ্ঠে মুণ্ডে আনিব পর্বত কাষ্ঠ শিলা। পর-গ্রাসে আশা ভাবি না থাকিব মনে।
পরগৃহ অনু হোতে শতগুণে ভাল।। কুকুর সমান তারে দেখে সর্বজন।।
বিয়ে সম্বন্ধে :

(যে নারী) অতি স্থূল, পুষ্টকায়া, অধিক দুর্বল। কেলি-রস হেতু যদি ডাকে প্রিয়ভাসে।
কর পদে লোমাবলী থাকে যে সকল।। করিয়া পীড়ার ছল নিকটে না আসে।।
না ঢাকএ মস্তক, সাক্ষাতে দেএ গালি। (তার চেয়ে) আপনা হারিষে যদি চাহ চিরকাল।
অন্ধকার রাখে গৃহ প্রদীপ না জ্বালি।। কিন্নর-দ্বন্দ্বের দাসী গোড়াইলে ভাল।
দাসী ভাবে মনে করে ঈশ্বরের কর্ম। সদ্গোত্রাসযুক্ত থাকে, বুঝে কার্য-মর্ম।
দাসী সন্তোষ সম্বন্ধে : (বার ১২ নিকাহ)
যদি দাসী কিন্নগৃহে আনে কোন জন। বেচিলে বেচিবে দাসী পবিত্র উদরে।
তৎমাত্র না কর চুম্বল আলিঙ্গন।। মাসাধিক যায় সে চরিত্র বুঝিবারে।
উদর পবিত্র আছে বুঝিয়া মরম। (বার ১৮, সদাগরী)
তার সঙ্গে কেলিরস কর নিভরম।।

ভিখিরীর প্রতি কর্তব্য সম্বন্ধে ইদানীং কোরআন-হাদিসের বাণী সম্বলিত বহু কবিতা রচিত হয়েছে আলাউলের এ অংশ ওসব কবিতার পাশে হীনপ্রভ হবে না।

কৃপা ভাবে ভিক্ষুক করিলে এক দৃষ্টি। ঈশ্বরে বোলএ, 'আমি গেলুঁ তোর ঘারে।
তোমা পরে ঈশ্বরে করিব কৃপা বৃষ্টি। এক গ্রাস ভক্ষ্য তুমি না দিলা আমারে'।
নিজ অঙ্গে দুঃখ সহৈ পর দুঃখ লাগি। ঘর হস্তে কেহ যদি মাঙয়া খেদাএ।
তার সম কেহ নহে প্রভু-কৃপা-ভাগী।। 'মোকে খেদাইলে' হেন বোলএ খেদাএ।।
ঘারে আসি ভিক্ষুকে মাগিলে এক রুটি। গ্রাস এক না দিয়া খেদাএ ভিক্ষুক।
না দিয়া ফিরাএ যদি নষ্ট পরিপাটি। সহস্র বৎসর দোজখেত পাইব দুঃখ।।
(বার ৩০, দান)

লৌকিক সংস্কার সম্বন্ধে :

১. না লেপিঅ ঘর বেড়া গো-লাদ মিশ্রিত।
 ২. পতি পত্নী অনুক্ষণ কলহ করিলে ঘন
- ফেরেস্তা না আসে কাছে জানিহ নিশ্চিত।। গৃহ হতে লক্ষী দূরে যাএ।

চ. মুজাম্মিল

গ্রন্থের কবি-প্রদত্ত নাম নীতিশাস্ত্রবর্তা যথা :

- ক. নীতিশাস্ত্র বর্তা যেবা পড়এ শুনএ
আয়ুযশ বাড়ে তার দারিদ্র্য ঋণএ ।
- খ. নীতিশাস্ত্র বর্তা জান পাষণের রেখ
এ সব জানিলে লোকে জ্ঞান বাড়িবেক ।
- গ. নীতিশাস্ত্র বর্তা যেন মরকত রেখ
ভালে ভাল মন্দে মন্দ হইব পরতেক ।

কবি মুজাম্মিল বলেছেন :

- ক. রচিলেক মুজাম্মিলে হাদিস দেখিয়া
নববস্ত্র পরিবেক দরুদ পড়িয়া ।
আরবি ভাষায় সবে না বুঝে কারণ
সভানে বুঝিতে কৈলু পয়ার রচন ।
- খ. হাজামত বিবরণ হাদিসে দেখিয়া
দেশীভাষে রচিলেক মনে বিমর্সিয়া ।
- গ. আরবির ভাষে লোকেঁ না বুঝে কারণ
দেশীভাষে কৈলুঁ তবে পয়ার রচন ।
যে বলে বলৌক লোকেঁ করিলুঁ লিখন
ভালে ভাল মন্দে মন্দ না যাএ ঋণ ।
- ঘ. শাহা বদরুদ্দীন পীর কৃপাকুল হরি
শতমুখে সেই বাখান কহিতে না পারি
তাহান আদেশমালা মন্তকে ধরিয়া
রচিলেক মুজাম্মিলে মনে আকলিয়া ।
- ঙ. এই বিবরণ কিভাবে লিখন
আছএ আরবিভাষ
আরবি বচন বঙ্গদেশীগণ
সবে না বুঝে বিশেষ ।
নিজ দেশে বুলি ভগিলুঁ পঞ্চালি
লেখিলুঁ হিন্দুয়ান অক্ষরে
তবে সর্বজন এসব কখন
বুঝিবেক মন কুতূহলে ।

অতএব, লোক হিতার্থে কবি পীরের আদেশে আরবি হাদিস গ্রন্থ অবলম্বন করে এ পুথি রচনা করেছেন । আরবি কিতাবটার নামোল্লেখ করেননি তিনি, তবে তাঁর গ্রন্থ যে আরবি বইয়ের হুবহু অনুবাদ নয়, তা কোনো পাঠককে বলে দিতে হবে না । কেননা, কবি যদিও তাঁর রচনাকে কিতাবানুগ বলে দাবী করেছেন :

কিভাবে লিখন আছএ যেমন

শুন কহি সব পঞ্চালি ।

তবু, বাঙলা মাস, ঋতু এবং বাঙালীসুলভ । বহু আচার-আচারণের বর্ণনাই কবির মৌলিকতার স্পষ্ট সাক্ষ্য বহন করেছে ।

পীর প্রশস্তি ও পীরের পরিচয়

কবির পীরের নাম বদরউদ্দীন শাহ । আলোচ্য গ্রন্থের দু জায়গায় পীরের রূপ গুণ বর্ণিত রয়েছে:

- ক. শান্তদান্ত গুণবন্ত যেহেন লোকমান
ধৈর্যবন্ত ধীর স্থির পৃথিবী সমান ।
- খ. ধ্রুপের সাগর গুণে রত্নাকর
রূপে যেন পঞ্চবাণ ।-

প্রসন্ন হৃদয় তান যেহেন মুকুর
কে কহিতে পারে তার বাখানের ওর।
শাহা বদরউদ্দীন পীর কৃপাকুল হরি।
শতমুখে সেই বাখান কহিতে না পারি।
তাহান আদেশ মাল্য মস্তকে ধরিয়া
রচিলেন্ত মুজাম্মিলে মনে আকলিয়া।

শাহ বদরউদ্দীন নিরঞ্জন লীন
ভবকল্পতরু আশা—
চরণ যুগলে হীন মুজাম্মিলে
তোক্ষারে করম ভকতি
মোর মনোরথ গোপত বেকত
তুক্ষি বিনে নাহি গতি।

এ ছাড়া পুথিতে গীরের আর কোনো পরিচয় নেই।

ক. আমাদের ‘আদর্শ’ প্রতিলিপির লিপিকাল ১৬৭৯ শক তথা ১৭৫৭ খ্রীস্টাব্দ। বিশ্ববিদ্যালয়ের ক্রমিক ১১৯ সংখ্যক পুথিতে লিপিকাল না থাকলেও এর কাগজ ও লিপি দেখে মনে হয়, এটি আঠারো শতকের গোড়ার দিকে অনুলিখিত। ক্রমিক ২৩৭ সংখ্যক পাণ্ডুলিপি তত পুরোনো না হলেও এর পাঠ প্রাচীনতার সাক্ষ্য বহন করে। (যেমন বুলোক, লুকে ইত্যাদি) অধ্যাপক আলী আহমদ সংগৃহীত পাণ্ডুলিপিটিও হিন্দুয়ানি রীতিতে অঙ্কিত পত্রে লিখিত এটিও প্রাচীনতায় দ্যোতক।

খ. এ রচনার আর একটি বিশেষত্ব ‘র’ ও ‘ল’ এর প্রদান্ত মিল এটি প্রায় সর্বত্র দেখা যায়। যথা :
ঘর-বহল আখেরে মিলে, গোসলে শরীরে সাজিয়ে ভিতরে, নির্ভরে
আওয়ালে আখেরে, কিস্তরি-পঞ্চালি, কতকুলে-উপরে।

একস্থানে ল-ন-এও মিল দেয়া হয়েছে : সকল-খণ্ডন।

শ্রীকৃষ্ণকীর্তন (প্রকৃত নাম : শ্রীকৃষ্ণ সন্দর্ভ) ‘র’ ও ল-এ এমন পদান্ত মিল প্রচুর রয়েছে।

গ. ‘প্রভু’ অর্থে ‘হরি’ শব্দের ব্যবহারও প্রাচীনতার ইঙ্গিতবহু এবং তাৎপর্যপূর্ণ বলে মনে হয় :

শাহ বদরউদ্দীন পীর কৃপাকুল হরি।

ঘ. কবি বলেছেন :

১. নিজেদের ‘বুলি’ ভণিলু’ পঞ্চালি দেশীভাষে কৈলুঁ পয়ার রচন।
লেখিলু হিন্দুয়ান অক্ষরে।
যে বলে বলোক লোকে করিলুঁ লিখন।
২. আরবির ভাষে লোকেঁ না বুঝে কারণ

মুসলমানের কাছে বাঙলা ছিল ‘হিন্দুয়ানি ভাষা’। ষোল-সতেরো শতক অবধি এ ভাষায় শাস্ত্রকথা লিখন নিন্দনীয় ও পাপজনক ছিল। শাহ মুহম্মদ সগীর (১৩৮৯-১৪০৯) সৈয়দ সুলতান (১৫৮৪-৮৬), হাজী মুহম্মদ (১৫৮০-১৬০০), আবদুল নবী (১৬৮৪), শেখ মুত্তালিব (১৬৩৯) রজ্জাকনন্দন আবদুল হাকিম প্রমুখ কবির রচনায় বাঙলাভাষার প্রতি মুসলমানদের অবজ্ঞার এবং ‘শাস্ত্রকথা’ বাঙলায় লিখনের পঠনের ও কথনের নিন্দার প্রতিবাদ আছে। আঠারো শতকের মুসলমানদের রচনায় এ সমস্যার উল্লেখ দেখা যায় না।^১ এসব তথ্যের পরিপ্রেক্ষিতে মুজাম্মিলকে ষোল শতকের কবি বলে স্বীকার করা চলে।

^১ পুথি পরিচিতি এবং বাঙালী ও বাঙলাসাহিত্য (১ম খণ্ড)।

এবার গ্রন্থবহির্ভূত তথ্যের আলোকে আলোচনা করা যাক :

- ক. গুলে বকাউলির কবি মুকিম (উনিশ শতকের প্রথমপাদ) তাঁর পূর্ববর্তী চট্টগ্রামবাসী কবি হিসেবে মুজাম্মিলের নামোল্লেখ করেছেন :

—আর বৃদ্ধ মহাশয় আবদুল নবী নাম

গআছক, মুজাম্মিল সুধীর উপাম।^১

- খ. পীর বদরউদ্দীন বদর-ই-আলম চট্টগ্রাম আবাদ করেছেন বলে প্রবাদ আছে। তিনি চট্টগ্রামে ইসলাম প্রচার ও মুসলিম অধিকার প্রতিষ্ঠার সহায়ক ছিলেন বলেও কিংবদন্তী রয়েছে। এতে অনুমান করা চলে যে, তিনি চট্টগ্রামে দীর্ঘকাল বাস করেছিলেন। চট্টগ্রাম শহরের বৃকে 'বদরচেরাগ' ও 'বদরপাতি' নামের কৃত্রিম সমাধিটিও আমাদের এ অনুমানের অন্যতম অবলম্বন। কাজেই উক্ত হকের অনুমান ও সিদ্ধান্ত সত্য হতেও পারে। তবে মুজাম্মিল পনেরো শতকের কবি কি-না, সে সম্বন্ধে সন্দেহের অবকাশ থাকলেও তিনি যে ষোল শতকের পরবর্তীকালের লোক নন, সে বিষয়ে সংশয় থাকার বিশেষ কোনো গুরুতর কারণ নেই, এ সত্য বিনা দ্বিধায় উচ্চারণ করা যায়। তাই আমরা মুজাম্মিলকে ষোল শতকের কবি বলে স্বীকার করে নিলাম।

মুজাম্মিলের নীতিশাস্ত্রবার্তায় : গৃহ নির্মাণ, খণ্ডন স্থান, স্নান বাথান, নববস্ত্র, ভূমিকম্পা, চন্দ্রসূর্যগ্রহণ প্রভৃতি বর্ণিত হয়েছে, এখানে বিষয়বস্তুর আভাস দানের জন্য কিছু উদ্ধৃত হল :

গৃহনির্মাণ : ১. শ্রাবণ মাসেত যদি কেহো বাক্সে ঘর
সেই দোষে মরিবে গৃহের ঈশ্বর।
মাধবী মাসে ঈশ্বর মন্দির বান্ধিব
ধনে পুণ্ড্রে লক্ষ্মী সব তাহার বাড়িব।

২. আদিত্য বারে যদি সে গৃহ নির্ম এ
অনলে দহিবে কিবা ঝড়েতে ভাঙ্গএ।
সোমবারে গৃহ যদি বাক্সে কোন নর
সূত না জন্মিব সূতা জন্মিব সে ঘর।।

নববস্ত্র রবিবারে কেহো যদি ফাড়এ বসন
মনো দুঃখ কভু তার না যাএ খণ্ডন।।

এসব সংস্কারে সত্যের, তথ্যের আর প্রত্যক্ষ অভিজ্ঞতার সম্পর্কও যে নেই তা নয়। যেমন আষাঢ় মাসে বাংলাদেশের পল্লী অঞ্চলে বর্ষাকালে এমনিতেই

মনুষ্য থাকিতে যদি নিরমিল ঘর

সেই ঘরেতে মশক হইব বহুল।

মশার উপদ্রব বাড়ে, তার উপর নতুন ঘরের সঁাতসেঁতে মেঝের মশা যে আসর জমাবে, তা তো জানা কথাই।

^১ মৎসম্পাদিত মুজাম্মিল রচিত 'নীতিশাস্ত্রবার্তা' বাঙলা একাডেমী প্রকাশিত, দুটব্য।

আর একটি দৃষ্টান্ত : রাত্রি অল্প খাই দুই বিশ কাণ্ডিক দিব
খর্ব খর্ব কাণ্ডিক দিব হাঁটির সত্বর ।

তুলনীয় : আফটার সাপার ওয়ক এ মাইল ।

মুজাম্মিল যদিও বলেছেন, আরবি হাদিস গ্রন্থই তিনি অনুবাদ করেছেন, তবু তিনিও যে মুফতির আসনে বসে নিজেই বহু ফতোয়া হেঁকেছেন, তার প্রমাণ রচনার সর্বত্রই মিলবে। আসলে কবি বাঙলাদেশের মুসলমানদের আচারিক জীবনশাস্ত্রই রচনা করেছেন।

ছ. আবদুল হাকিম

ইউসুফ-জোলেখা ও লালমোতি-সয়ফুলমলুক নামের প্রণয়োপাখ্যান প্রণেতা শাহ আবদুল রাজ্জাকপুত্র ও পীর মুহম্মদ শাহাবউদ্দীনের মুরিদ কবি আবদুল হাকিম পারিবারিক ঐতিহ্য রক্ষার জন্যে তিন চারখানি ইসলামি তত্ত্ববিষয়ক গ্রন্থ রচনা করেছিলেন : সভারমুখতা, নসিয়তনামা বা শাবাননামা তথা শাহাবউদ্দীননামা এবং দোররেমজলিস। এ সঙ্গে ভণিতাহীন চারিমোকামভেদও তাঁর রচনা বলে অনুমান করা হয়। নূরনামা আদি নূর বা জ্যোতিরূপী হযরত মুহম্মদ সৃষ্টি বিষয়ক রচনা। আবদুল করিম খান্দকারেরও নূরনামা বা নূরফরামিশনামা নামেরও এরূপ একটি রচনা রয়েছে। আবার আবদুল করিম খান্দকারের দুদ্যামজলিস আর হাকিমের দোররে মজলিস একই বিষয়ক রচনা। নসিহতনামারই অপর নাম শাহাবউদ্দীননামা। কবি স্পষ্টত বলেছেন :

আবদুল হাকিম শাহা রাজ্জাক নন্দন হাকিম শাহার (পীরের) নামে

রচিল কিভাবে যেবা ছিল বিবরণ ।

পুস্তকের নাম

শুনিতে বাড়এ পুণ্য বাক্য অনুপাম ।

শাহাবউদ্দীননামার পাণ্ডুলিপি (১১' X ৭') ১৪৫ পত্রে সমাপ্ত। অতএব গ্রন্থটি ছোট নয়। মনে হয় আবদুল হাকিম দরবেশ বা পীর পিতা শাহ রাজ্জাক ও পীর মুহম্মদ শাহাবউদ্দীনের আত্মহেই এ শাহাবউদ্দীননামা বা নসিয়তনামা রচনা করেছেন—

শাহা রাজ্জাক শাহাবুদ্দীন বচন

আবদুল হাকিম শাহা রাজ্জাক-নন্দন

কোটি কোটি প্রণাম করিএ একমন,

রচিল কিভাবে যেবা ছিল বিবরণ ।

এবং তাঁদের উপদেশও গ্রন্থে লিপিবদ্ধ করেছেন :

শাহাবুদ্দীন মোহাম্মদ পীর গুণবান

নসিয়ত কৈল মোরে যেসব প্রকার

মোহর তিমির গৃহে দীপক সমান।—

ভাল মনুষ্যের তরে রচিল পয়ার ।

এ গ্রন্থে নামাজ, রোজা, ধনসম্পদ, নারীর ইচ্ছত, বিদ্যা, কুকুর পোষার পাপ (কুকুর পালএ যেবা কুকুর নন্দন) প্রভৃতি বিষয়ে সুকর্ম ও দুষ্কর্ম কি তা শরীয়ত অনুসারে কবি ব্যাখ্যা করেছেন, পাঠককে বলেছেন—

আএ ভাই শাস্ত্র পড়ি করহ আমল

জীবন যৌবন ধন জান অকারণ

মানব দুর্লভ জন্ম না হইয়া বিফল ।

নিজ গৃহ দীপ্ত কর শাস্ত্রে দিয়া মন ।

তবু সেকালের নিয়মানুসারে কবি কায়াতত্ব এবং কায়সাধনতত্ত্ব হয়তো আলোচনা করেছেন, তার জন্যে প্রয়োজন :

শরিয়ত তরিকত কিবা হকিকত

সাফল্য করিতে নিজ ভবের জনম ।

সাধিয়া এসব অর্জিবারে মারফত ।

সবেরে জানিব মুখ্য আগু জানি কম ।

আল্লাহর নূরে মুহম্মদ সৃষ্টি, তাঁর নূরে জগৎ ও জাগতিক সব প্রাণী ও জড়বস্তু সৃষ্টি-এমনি এক বিশ্বাস মুসলিম মনে বদ্ধমূল। এ নূরতত্ত্ব মূলত অদ্বৈতবাদ ও সূফীমত প্রসূত। মুসলিম সমাজে চালু লৌকিক তত্ত্ব এই : আল্লাহ বলেছেন মুহম্মদকে 'যদি আমি তোমাকে সৃষ্টি না করতাম, তাহলে জগতও সৃষ্টি করতাম না' অর্থাৎ তোমার প্রতি প্রীতিবশেই তোমার খাতিরেই সৃষ্টিকর্মে আমার এ আগ্রহ।

নূরনামায় বর্ণিত পর্বগুলো এই : আল্লাহস্বত্তি, রসূলপ্রশস্তি, বাঙলা ভাষায় গ্রন্থরচনার কৈফিয়ত, নূরনবী মুহম্মদ সৃষ্টি, দশ সমুদ্র সৃষ্টি ও সমুদ্র মধ্যে নূর বীর সাধনা, নূর-ই মুহম্মদ থেকে সৃষ্টি উদ্ভব, চতুর্ভূতের (আর-সাতশ-খাক-রাত) সঙ্গে মুহম্মদের কথোপকথন, কলমপ্রসঙ্গ, কলেমা মাহাত্ম্য, নূরনামা গ্রন্থের মাহাত্ম্য, নূরনামা গ্রন্থের প্রতি ইমামগাজ্বালী ও সুলতান মাহমুদের শ্রদ্ধা, মুহম্মদের অঙ্গপ্রত্যঙ্গ সৃষ্টির রহস্য ও নূরনামা গ্রন্থ পাঠের সুফল। আবদুল হাকিমের নূরনামা আরবির অনুকরণে অভিন্ন নামে হিন্দি গ্রন্থের স্বাধীন অনুবাদ।

আবদুল হাকিম শাহা রজ্জাকানন্দন

বর্চিস পঞ্চালী নূরনবীর সৃজন।

নূরনামা কিতাব দেখি করিল রচন।

কিতাবে বৃত্তান্ত সব আছ এ লিখন।।

হিন্দিগ্রন্থ রচয়িতার নাম অজ্ঞাত। হিন্দিগ্রন্থে গাজ্বালী রয়েছে, হাকিমের গ্রন্থেও অভিন্নরূপে তা বিদ্যমান। এতেই মনে হয় হিন্দি গ্রন্থটিই ছিল আবদুল হাকিমের অবলম্বন। উনিশ শতকের দোভাষী শায়ের মুহম্মদ খাতেরের নূরনামায় গাজ্বালী ও মাহমুদের কথা নেই এবং বর্ণিত বিষয়ে কিছু সাদৃশ্য থাকলেও হাকিমের ও খাতেরের অবলম্বন অভিন্ন গ্রন্থ ছিল না। 'নূরনামা' আরবি 'কুসিদাতুল বুর্দা' শ্রেণীর গ্রন্থের অনুসৃতি।

নূরনামায় বর্ণিত সৃষ্টি উৎস প্রেম। শূন্যকায় আল্লাহ ছিলেন শূন্যে :

শূন্যেত আছিল প্রভু শূন্যময় কায়।

তিমিরে প্রচণ্ড জ্যোতি সয়াল সম্পদ

হেতুমূলে জন্মিলেক প্রেমের অঙ্কুর

প্রভুর পরম বন্ধু নূর মুহম্মদ।

ভাবসিদ্ধি উপজিলা প্রেম বন্ধু নূর।

প্রভু-নূর মুহম্মদকে বলেন :

সৃজন হইলা মোর প্রেমের প্রতাপে।

একেশ্বর নির্বন্ধের আছিলাম আপে।

বাঙলা ভাষায় ধর্মকথা রচনা প্রসঙ্গে কবি-প্রদত্ত যুক্তি :

কিতাব পড়িতে যার নাহিক অভ্যাস।

হিন্দুয়ানী অক্ষরে বয়ানমুসলমানী

সে সবে কহিল মোতে মন হাভিলাষ।

লিখিয়া বুকিল তত্ত্ব পণ্ডিত বাখানি।-

নূরের সৃজন মর্ম আদ্য পরস্তাব

মারফত ভেদে যার নাহিক গমন

গুনিবারে শ্রদ্ধা অতি না বুকি কিতাবে।

হিন্দুর অক্ষর হিংসে সে সবেরগণ।

তেকাজে নিবেদি বাঙালাএ করিয়া রচন
 নিজ পরিশ্রমে তোষ আমি সর্বজন-
 আরবি ফারসি কিবা শাস্ত্র হিন্দুয়ানী
 সর্বশাস্ত্রে লিখে আলা নবীর কাহিনী।-
 যেই দেশে যেই বাক্য কহে নরগণ
 সেই বাক্য বুঝে প্রভু আপে নিঞ্জরন।
 যার যেবা নিজ বাক্যে প্রভু আরাধএ
 পদুত্তর দেন্ত প্রভু আপনে লক্ষএ।-

যেসব বঙ্গত জন্মি নির্ণয় বঙ্গবাণী
 সেসব কাহার জন্য নির্ণয় ন জানি।
 দেশীভাষা বিদ্যা যার মনে ন জুয়াএ
 নিজ দেশ ত্যাগি কেন বিদেশ ন যাএ।
 মাতা পিতামহ ক্রমে বঙ্গত বসতি
 দেশী ভাষা উপদেশ মনহিত অতি।
 নিজ দেশী ভাষা এ করি গ্রন্থ সকল
 আমি সব আগে কর সঙ্কট কুশল।

‘চারিমোকামভেদে’ ভণিতা নেই, সাহিত্যবিশারদ এটিও আবদুল হাকিমের রচনা বলে অনুমান করেছিলেন মাত্র। অনুমানের কারণ ছিল দুটো- চারিমোকামভেদে নসিয়তনামার পাণ্ডুলিপির সঙ্গে একত্রে বাঁধা ছিল, এবং বক্তব্যেও পারস্পর্য বা প্রাসঙ্গিকতা ছিল।

এখানে চারিমোকামভেদ-এর প্রয়োজনীয় অংশ উদ্ধৃত করছি :

শরিয়ত তরিকত হকিকত মারফত
 একে একে সে সকল কহিএ বেকত।
 শরিয়ত কিস্তি তরিকত পাল।
 হকিকত নোঙ্গর মারফত পাতয়াল
 (করুয়াল?)

শরিয়তে কলেমা মুখে কহিব নিচএ
 তরিকতে নামাজ রোজা করিব সদাএ।।
 হকিকতে হালত ধেয়ান নিঞ্জরন
 মরফতে পাইবেক আল্লাক দর্শন।

যোগসাধন :

একে কহি যেই মতে যোগ সাধিবেক
 এচারি মোকামের ভেদ যেমতে পাইবেক।
 প্রথম মোকাম জ্ঞান নাসুত কহএ
 শরিয়ত মোকাম নাম জানিঅ যে তাএ।

শরিয়ত যত কর্ম পূর্বে লিখিয়াছি
 তাহার প্রকৃতি সব আগে প্রচারিছি।
 পুনি কহি যেন মতে সাধক মোকাম
 নাসুত মোকাম জ্ঞান মৃত্তিকার ঠাম।

অন্য সব মোকামকথা শেষ করে কবি হাহুত মোকাম সম্বন্ধে বলছেন :

হাহুত মোকাম কথা সব শূন্যকার
 পীরমুর্শিদের আজ্ঞা নহি আছে তার।

গুণবিচারিতে তাতে নিষেধ আছএ
 তেকারণে সেই কথা নহি বিস্তারএ।

‘চারিমোকামভেদে’ সুফী সাহিত্যের অন্তর্গত দোররে মজলিস এবং দুল্লামজলিস ‘জীবনচরিত’ শাখায় আলোচ্য।

মুহম্মদ আকিলের মুসানামা [সওয়াল সাহিত্য অধ্যায়ে দ্রষ্টব্য] এবং মুহম্মদ খানের সত্যকলিবিবাদসম্বাদ [জঙ্গনামা অধ্যায়ে দ্রষ্টব্য] এক হিসেবে মুসলিম ধর্মসাহিত্যই।

জ. সৈয়দ নুরউদ্দীন

সৈয়দ নুরউদ্দীন আঠারো শতকের শেষার্ধের লোক এবং গ্রন্থগুলো আঠারো শতকের শেষ দশকে ও অন্তিমলগ্নে রচিত। সৈয়দ নুরউদ্দীন ১. দাকায়েক আখবার, ২. রাহাতুল কুলুব বা কেয়ামত নামা, ৩. বুরহানুল আরেফিন বা হিতোপদেশ এবং মুসার সওয়াল রচনা করেছেন।

এখন সংশয়ের কথা এই যে এসব গ্রন্থ অভিনু নামের দুই কবির রচনা, নাকি একজনের? এতকাল আমরা সৈয়দ নুরুউদ্দীনকে চট্টগ্রামবাসী বলে জানতাম এবং তার পিতার নাম আজিজ। সৈয়দ নুরুউদ্দীন কয় আজিজ নন্দন।'

এখন দাকায়েক-এর এক পাণ্ডুলিপিতে এর পূর্বপুরুষ পরম্পরার নাম মিলেছে; গৌড়বাসী সৈয়দ আলি/সৈয়দ রাজা-সৈয়দ মীর এর পুত্র সৈয়দ হাসান।

[চট্টগ্রামের চকরিয়ায় ১৫৭৫ খ্রীস্টাব্দে বসতি স্থাপন করেন।] সৈয়দ আবদুল্লাহ/সৈয়দ আবদুল কাদির /সৈয়দ আতাউল্লাহ/সৈয়দ নুরুউদ্দীন। এ আত্মবিবরণীসূত্রেও কবি সৈয়দ নুরুউদ্দীনকে আঠারো শতকের প্রথমার্ধের কবি বলে সনাক্ত করা সম্ভব। অন্য সূত্রে জানা যাচ্ছে যে চট্টগ্রামের খন্দকিয়া বা আশিরাবাদে কিংবা মির্জাপুরে ছিল কবি সৈয়দ নুরুউদ্দীনের নিবাস। এবং তাঁর পিতার নাম আতাউল্লাহ- আজিজ নয়। ডক্টর খন্দকার মোজাম্মিল হক সৈয়দ নুরুউদ্দীনের গ্রন্থ সম্পাদনা করেছেন।

কবির পীর ছিলেন ঢাকার আজিমপুর দায়রাশরীফের (পীরবাড়ির) সূফী মুহম্মদ দাইমের শিষ্য শাহ মুহম্মদ জাহিদ :

সূফী মুহম্মদ দাইম দরবেশ আল্লার
জাহিদনগরে বসি ভাব করতার।
তান শিষ্য মুহম্মদ জাহিদ দরবেশ

সদায় আল্লার ভাবে মগ্ন তনুশেষ।-
এত যে শাহ জাহিদের পদে যাই
বিক্ত হইলু ও জনোত আল্লার নাম পাই।

দাকায়েক আখবার রচনা শুরু হয় ১১৯৭ সপ্তমাব্দে বা ১৭৯০ খ্রীস্টাব্দে এবং সমাপ্ত হয় ১২০৩ সালে বা ১৭৯৬ খ্রীস্টাব্দে।

'এগারশ' সাতানব্বই সন হৈল যুরে
পুস্তক বাস্তালা কৈলু শুন নর সবে।
পুস্তকের বয়্যাতে যত লিখা যাএ

কদাঞ্চিৎ এক মিথ্যা না বুঝ সভাএ-
বারশ তিন সনে পুস্তক লিখা যাএ
পড়িলে শুনিলে জ্ঞান জন্মিব সভাএ।

দাকায়েক আখবার আরবি 'কঙ্ক দাকায়েক' নামের ফিকাহ গ্রন্থের স্বাধীন অনুবাদ। আরবি গ্রন্থটির রচনাকাল ৭১০ হি বা ১৩১০ খ্রীস্টাব্দ। রচয়িতার নাম হাফিজউদ্দীন আবুল বরকাত আবদুল্লাহ বিন আহমদ নফসী। বর্ণিত বিষয়গুলো বাইশ বাবে বা পর্বে বিভক্ত।

কিতাবেতু রচি কহি পঞ্চালী কখন
বিংশ দুই বার লেখে কিতাব মাজার।
একস্থান সব বাব কহি একবার।

মৃত্যু, মৃত্যুর জিকির, বৃহর তফসীর, প্রাণ হরণ, আজরাইল, ইরিস ও মুমূর্ষুর প্রয়াণ, রুহর দৃষ্ট, সবার, মৃত ও ফিরিজা, গোর-যন্ত্রণা-মনকির নকির, মৃতদেহে প্রাণ প্রাণসঞ্চার, ইস্রাফিল ও সিঙ্গা, বোররাক, মৃতস্নান, কাফন, মৃতের কল্যাণে দান ইত্যাদি উক্ত বাইশ বাবে [দ্বারে] বা পর্বে বর্ণিত। সৈয়দ নুরুউদ্দীনের সব গ্রন্থই কোলকাতার বটতলা থেকে প্রকাশিত হয়েছিল।

ডক্টর মোজাম্মিল হকের মতে মুসার সওয়াল নুরুউদ্দীন রচিত নয়। এবং মুরদানুল আরেফিন-এর অনুবাদই দাকায়েতুল আখবার। আর বুরহানুল আরেফিন মুহম্মদ কামিল। রচনাকাল ১২০৩ সাল।

২. রাহাতুল কুলব (বা কেয়ামতনামা) এটি নাকি মূলত বুরহানুল আরেফিনের অংশ এ

গ্রন্থের অবলম্বন আরবি ও ফারসি অনেক কিতাব :

নানামত তফসীর লেখা ছিল পরস্তাব
রাহাতুল কুলুব নামে আছিল কিতাব ।
কারাহুল বকায়া আর আসহাবুল শাহাদাৎ
উমদাতুল ওয়াইজ আর তাতে ফতেহুল আলি

আবদুর উমদাতুল আজিজ আর হেদায়া
ফাতেহুল আলি আউল উলুমত এর শিবস যাওয়া
কুঞ্জ আরাদি আর সালাত মসউদি
আর বহু কিতাবে রোয়ায়াত সুধি ।
দেশী ভাষে কহিতেছি গুণিগণের ঠাই ।

এ গ্রন্থ উনিশ বাবে তথা দ্বারে বা পর্বে সমাপ্ত ।

১. বাণ ঋতু বসু দিয়া বাব কৈলুঁ সার
একস্থানে সব বাব কহি একবার ।^১

(৫ + ৬ + ৮ = ১৯ বাব)

২. বাণ শর বসু আদি বাবে কৈল সার ।
একস্থানে সব বাব কহিত সুমার ।^২

(৫ + ৫ + ৮ + ১ = ১৯ বাব)

প্রথম বাবে ত জান কেয়ামত বাণী

দ্বিতীয় বাবে ত কেয়ামতের ভয়ভীতি কথা

তৃতীয় বাবেত দোজখের কথা—

এমনি করি কেয়ামত ভিহিস্তের দোজখের কথা, মাতাপিতার কথা, সুদখোরের কথা, রোজা-
নামাজের কথা সুরার কথা, সওয়াব-নামাজ, কোরান পাঠ, রোজার পুণ্য, স্ত্রী-পুরুষের দায়িত্ব,
কর্তব্য, মিথ্যাভাষণ, পরচর্চা, হিংসার বা হাসদের কথা, নেকির বয়ান, ক্ষমা সংযম, নসিয়ত
এবং

নবদশ বাবে শুন নান্য পরস্তাব ।

এই মতে বহু কথা কিতাবে খবর

সে সব রচিতে হয় পুস্তক বিস্তর ।

সৈয়দ নুরউদ্দীনে কহে ভাবি চাহ মন

দুনিয়ার সম্পদ সুখ নিশির স্বপন ।

একটি দুর্বোধ্য রচনা-তারিখ রয়েছে :

সন সংখ্যা বুঝিবেক মনে করি জ্ঞান

চন্দ্র শশী আগে করি গুণ পাছে জ্ঞান

তার পাছে গোর (?) আনি একত্র করিয়া

মঘদের সন সংখ্যা বুঝ বিমর্ষিয়া^৩

(চন্দ্র-১ শশী-১, গুণ-৩, গোর-৮ কবর-০

১১৩১ + ৬৩৮ = ১৭৬৯ খ্রীস্টাব্দ

৩. রাহাতুল কুলুবের অংশ আজ্ঞা ও কেয়ামত বিষয়ক গ্রন্থ । এটির রচনাকাল

‘বারশ তিন’ সনে পুস্তক লিখা যায় ।

পড়িলে শুনিবে জ্ঞান জন্মিবে সবাব ।

বোরহানুল আরেফিন কিতাব দেখিয়া

কহিলুঁ হিতোপদেশে বাঙালা রচিয়া ।

১২০৩ বঙ্গাব্দ হলে ১৭৪৬ খ্রীস্টাব্দই রচনাকাল । এটি তত্ত্ব গ্রন্থ পর্যায়ে আলোচ্য ।

^১ পুষ্টি পরিচিতি, পৃঃ ৭৯-৮০ ।

^২ ঐ পৃঃ ৪৭৮ ।

^৩ পুষ্টি পরিচিতি, পৃঃ ৪৮৮-৮৯ ।

৪. মুসার সওয়াল : মাত্র বারো পাতার এ ক্ষুদ্র গ্রন্থে নবী মুসার ও আল্লাহর জগৎ ও জীবন সম্বন্ধে নানা তত্ত্ব বিষয়ক সংলাপ প্রশ্নোত্তরের মাধ্যমে বর্ণিত। এটি কোন পৃথক গ্রন্থ নয়, দাকায়েকুল আখবারেরই একটি পর্ব-২২তম বাব।

মুসার নিবেদন শুনি প্রভু করতার
কৃপায়ুক্ত হই তবে লাগে কহিবার।
সওয়ালের বিবরণ কিতাবে দেখিয়া।
রচিলেক নুরুদ্দিন প্রভুকে ভাবিয়া।

এ গ্রন্থ সওয়াল সাহিত্যে অন্তর্ভুক্ত। সাহিত্যবিশারদ আবদুল করিম একে দাকায়েকুল আখবারই একটি পর্ব বলে অনুমান করেছেন।

ক. নসরুল্লাহ [খান] খোন্দকার

হযরত আলির যুদ্ধ বৃত্তান্ত 'জঙ্গনামা', 'শরীয়তনামা' ও 'মুসার সওয়াল' রচয়িতা নসরুল্লাহ খোন্দকার চট্টগ্রামের আধুনিক বাঁশখালি থানার অন্তর্গত জলদী গ্রামবাসী ছিলেন। কবি নিঃসন্তান ছিলেন, তবে উক্ত গ্রামে তাঁর সাত্‌বংশীয়রা আজো বর্তমান। কবিরচিত জঙ্গনামা সংগৃহীত হয়নি। তবে আবদুল করিম সাহিত্যবিশারদ আনোয়ারা থানার অন্তর্গত ডুমোরিয়া গাঁয়ের আমীর আলী চৌধুরীর বাড়ির 'জঙ্গনামা' পুথিতে কবির যে দুইটা বংশ পরিচিতি পেয়েছিলেন তা এরূপ :

১. ধৈর্যবন্ত বীর্যবন্ত মর্যাদার নাহি অস্ত
পিতামহ হামিদুল্লাহ খান

তান পুত্র কল্লতরু বোরহানুদ্দীন জগৎগুরু
রূপ তার ইউসুফ সমান।

মহীপাল রোসাক্সের ধবল মাতঙ্গিবর
নিজ মুখে প্রশংসিলা যারে

তান পুত্র মহাবীর অস্ত্রেশস্ত্রে রণে স্থির
ইব্রাহিম খান নাম ধরে।

তান পুত্র জ্ঞানবান শ্রী সুজাউদ্দীন খান
পূণ্যবন্ত সঙ্গে তান মেলা

অনেক গ্রামের পতি যাকে কৃপা করি অতি
নিজ কন্যা সমর্পিয়া দিলা।

২. কল্লতরু জগৎগুরু শাস্ত্রেত বিজ্ঞান
পিতামহ কাজী ইসহাক গুণবান

তান পুত্র শরীফ মনসুর খোন্দকার
রাষ্ট্রদেশ নরপতি নামে ফতে খান
যাকে মান্য করি বসাইল বিদ্যমান
রোসাক্সের নরপতি ভুবন বিখ্যাত
যেবা গেছিলেন দিল্লীশ্বরের সাক্ষাত।
গ্রাম ভূমি আপনার অধীন করিয়া

তান পুত্র রূপবান শ্রীযুত বাবু খান
অবিরত ফকিরিতে মন

তেজিয়া সংসার মায়া প্রভুভাবে চিত্ত দিয়া
করিলেন্ত আগমে গমন।

আছিলেন পুত্র তান শ্রী ইসহাক খান
শরীয়ত খাদেম প্রধান

তান পুত্র শীল ধর্ম সৈদানী উদরে জন্য
শরীফ মনসুর গুণবান।

তান পুত্র অল্পজ্ঞান হীন নসরুল্লাহ খান
পাঞ্চালী রচিল শিশুবুদ্ধি

শুনি সব গুণিগণ কৌতুহল করি মন
ক্ষম মোর দোষ পাও যদি।

আনিলেক দিল্লীশ্বরব্যাহে যেবা গিয়া।

হেন জনে যাহাকে করিয়া আশুয়ান
নমাজ করন্ত সাক্ষ যত মুসলমান।

যাহার মধুরশ্বরে খোতবা শুনন্ত
যাহাকে আলিমসব নিতি প্রশংসন্ত।

তান পুত্র নসরুল্লাহ আমি হীন জ্ঞান
পাঞ্চালী পয়ায়ে কহি গুণিগণ স্থান।

‘শরীয়তনামা’ থেকে ডক্টর আবদুল করিম বিধৃত পাঠ :

ধৈর্যবন্ত বীর্যবন্ত মর্যাদার নাহি অন্ত
নামে হামিদীন মতিমান
গৌড়দেশ বাঙ্গালা নাম রসে কষে অনুপাম
সে ব্যাহপাল উজীর প্রধান ।
তান পুত্র গুণবান অস্ত্রেশস্ত্রে পূজ্যমান
জগে ঘোষে বুরানুদ্দীন নাম
দৈবগতি দেশ ছাড়ি ইষ্টমিত্র সঙ্গে করি
রোসান্ন দেশেত কৈল ধাম ।
তখনে রোসান্ন দেশে কিবা আদ্যে কিবা
শেষে
অশ্ব আসোয়ার না আছিল
হয় গজ বহু সঙ্গে দেখি তানে নৃপ রসে
লঙ্কর উজির তানে কৈল ।

ইব্রাহিম তান সুত রূপেগুণে অদ্ভুত
অশ্ববার কর্মে বিচক্ষণ
সুজাউদ্দীন নাম অস্ত্রেশস্ত্রে অনুপাম
নাম ধরে তাহান নন্দন ।
শেখ রাজা তান পুত্র প্রভুগতে সুপবিত্র
লোকে ঘোষে ফকির মোড়ল
তান সুত গুণধাম কাজী ইসহাক নাম
ছিল দীন তা হস্তে উজ্জ্বল
তাহান ঔরসে কর্ম সৈয়দানী গর্ভে জন্ম
শরীফ মনসুর খোন্দকার ।
নসরুল্লাহ সুত জান (তান) হীনবুদ্ধি পশুজ্ঞান
রচিলেক পঞ্চালী পয়ার ।

‘শরীয়তনামা’ থেকে ডক্টর মুহম্মদ এনামুল হক বিধৃত পাঠ :

ধর্মবন্ত ধৈর্যবন্ত- মর্যাদার নাহি অন্ত
নাম হামিদুদ্দীন খান জান
গৌড়দেশে বাঙ্কু নাম দুইশিক অনুপাম
সৈন্যপাল উজির প্রধান ।
তানপুত্র আশুয়ান অস্ত্রেশস্ত্রে অনুমান
জগ ঘোষে বোরহানুদ্দীন খান
দৈবগতি দেশ ছাড়ি অষ্টমিত্র সঙ্গে করি
রোসান্ন দেশেত কৈল গাম ।
তখন রোসান্ন দেশে কিবা আদ্যে কিবা শেষে
অশ্ব আসোয়ার না আছিল
হয়গজব্যূহ সংখ্য দেখি তানে নৃপমুখ্য
লঙ্কর উজির তানে কৈল ।

ইব্রাহিম তান সুত রূপে গুণে অদ্ভুত
অশ্ববার কর্মে বিচক্ষণ ।
শ্রীসুজাউদ্দীন খান অস্ত্রেশস্ত্রে অনুপাম
নাম ধরে তাহান নন্দন ।
বাবু খান (সেক রাজা) তান পুত্র প্রভুগত
সুপবিত্র
লোকে বলে ফকির মোড়ল
তানসুত গুণবান কাজী ইসহাক খান
তাহার ঔরসকর্ম সৈয়দানী গর্ভে জন্ম
শরীফ মনসুর খোন্দকার
নসরুল্লাহ সুত তান হীনবুদ্ধি অল্পজ্ঞান
রচিলেক পঞ্চালী পয়ার ।

ডক্টর আবদুল করিম ও ডক্টর মুহম্মদ এনামুল হক বিধৃত পাঠে গুরুত্বপূর্ণ পার্থক্য ঘটে :

বাঙ্কু
নৃপরসে
শেখ রাজা
রসেক্ষে অনুপাম
ইষ্টমিত্র

বাঙ্কু
নৃপমুখ্য, রক্ত
বাবুখান ওফে শেখ রাজা
দুই শিক অনুপাম
অষ্টমিত্র

এগুলোর মধ্যে বাঙ্গালা ও বাঙ্কু, রসেকর্ষে ও দুই শিকই বিশেষ গুরুত্বপূর্ণ পার্থক্য। তাহলেও কবি পরিচিতি ক্ষেত্রে এগুলো তেমন বাধা হয়ে দাঁড়ায় না। তবু দুই বিদ্বান স্ব স্ব ব্যাখ্যা বিশ্লেষণে কবি পরিচিতি অত্যন্ত জটিল করে তুলেছেন।^১

সাহিত্যবিশারদ বিধৃত ‘জঙ্গনামা’র কবির বংশপরিচিতি থেকে জানা যায় এক প্রখ্যাত ধর্মীমানী হামিদউদ্দীন খানের পুত্র ইউসুফ সম রূপবান ও গুণবান এবং আরাকানরাজের প্রশংসাপ্রাপ্ত বুরহানুদ্দীন-এঁর পুত্র রণনিপুণ ইব্রাহিম খান-এঁর পুত্র জ্ঞানবান সুজাউদ্দীন খান-এঁর পুত্র মরমী ফকির বাবুখান ওফের শেখ রাজা-এঁর পুত্র ইসহাক খান আলিম ও কাজী ছিলেন-এঁর পুত্র শরীফ মনসুর পেশায় খোন্দকার (মক্তবের শিক্ষক) এবং তাঁর পুত্র আমাদের কবি নসরুল্লাহও পেশায় খোন্দকার ছিলেন। অতএব কবি ছিলেন খানবংশীয়। তাঁর পিতামহ ছিলেন কাজী, তাই সাধারণে ইসহাক কাজীরূপে এবং কবির পিতা ও কবি স্বয়ং বৃত্তি অনুযায়ী খোন্দকার রূপে পরিচিতি ছিলেন। তাই তিন পুরুষ ধরে তারা ‘খান’ রূপে পরিচিত ছিলেন না। এজন্যে ‘নসরুল্লাহ খোন্দকার’ নামই ভগিতায় পাচ্ছি। মনে রাখতে হবে কবি পারিবারিক শ্রতিস্মৃতি সূত্রেই ফতেহ খান ও রোসানের নৃপতির সম্বন্ধে শুনেছিলেন। কাজেই কবির বর্ণিত ব্যক্তিদের অঞ্চলের অন্য এক প্রখ্যাত ব্যক্তি (যিনি দিল্লীর সম্রাট থেকে কয়েকটি গ্রামের মালিকানা সনদ লাভ করেছিলেন) কবির পিতা শরীফ মনসুর খোন্দকারকে বিশেষ সম্মান করতেন এবং শেষোক্ত জমিদার শরীফ মনসুরকে ইমাম করে জামাতে নামাজ পড়াতেন। ‘শরীয়তনামা’ সূত্রে জানা যায়।, কবির পূর্বপুরুষ-হামিদউদ্দীন খান গৌড় দেশে ওফের বাঙলাদেশে (বাঙ্গালানামা) কবির আঠারো শতকে আবির্ভাবের ইঙ্গিতবাহী) ব্যুহপাল বা সৈন্যমন্ত্রী ও প্রধানমন্ত্রী ছিলেন। তাঁর পুত্র বুরহানুদ্দীন দৈবগতি গৌড় ছেড়ে বিপন্ন অবস্থায় সপরিজন (ইষ্টমিত্র) আরাকানরাজ্যে আশ্রিত হয়ে আরাকান রাজের আশ্রয়ে এই প্রথম আরাকান বাহিনীতে অশ্বারোহী সৈন্য সৃষ্টি করে-তিনি লস্কর উজির হন। তাঁর পুত্র ইব্রাহীমও অশ্বারোহী সৈনিক দলে ছিলেন, ইব্রাহিম-পুত্র সুজাউদ্দীনও সৈন্য ছিলেন। সুজাউদ্দীন-পুত্র দরবেশ হলেন, তাঁর পুত্র ইসহাক কাজী হলেন এবং তাঁর পুত্র শরীফ মনসুর ও পৌত্র নসরুল্লাহ হলেন খোন্দকার। কিন্তু সাহিত্যবিশারদ আরো কোন এক সূত্রে নসরুল্লাহর বংশলতা সংগ্রহ করেছিলেন, একটি ফুলক্ষেপ কাগজে লেখা সেটি এরূপ :

গৌড় নামে এক দেশ সুখ ভোগে মহারস	মান্য করি নিকটে বসাইল
তথা বসে এক অধিকার	অশ্ববার সব সঙ্গে রাখিলা নিকটে রঙ্গে
দানে ধর্মে পুণ্যবান অশ্রুশস্ত্রে জ্ঞানবান	লস্কর উজির তানে কৈল।
পাত্র এক আছিল তাহার।	বোরানউদ্দীন নামে সুত রূপেগুণে অদ্ভুত
হামিদউদ্দীন খান নাম রূপে গুণে অনুপাম	হামিদউদ্দীন যদি মৃত্যু পাইলা
নৃপসঙ্গে বিবাদ করিয়া	গজ অশ্বসহ তারে নৃপ মোক্ষ (মুখ্য)
বহু গজ অশ্ব সঙ্গে পুত্র দারা লয়ে রঙ্গে	কৈল্য তারে
চলিলেন সে দেশ ত্যাগিয়া।	বোরানউদ্দীন যদি সে মরিল।

^১ ক. শরীয়তনামা : ডক্টর আবদুল করিম সম্পাদিত, ভূমিকা, চট্টগ্রাম বিশ্ববিদ্যালয়ের বাঙলা বিভাগের পাঠ্যলিপি প্রমিত্যয় প্রকাশিত, চতুর্থ খণ্ড, ১৩৮১ সাল।

খ. মুসলিম বাঙ্গালা সাহিত্য, ডক্টর মুহম্মদ এনামুল হক, পৃ: ১৭০-৭৮।

রোসাঙ্গ দেশেত গেলা নৃপ আগে বাড়াই
নিলা

বিষয় নিলেক যদি কাড়ি
তান পুত্র ইব্রাহিম রণমধ্যে সহি ক্ষেম
বিষয় লইতে চাহে ফিরি।

নৃপতি না দিল যবে অশ্ববার সঙ্গে তবে
বিষয় লইতে চাহে মারি।

নৃপ সঙ্গে যুদ্ধ দিল রণে যদি না আটিল
একে একে হইল নিধন

তান এক পুত্র ছিল লোহারাতে দিয়াছিল
পড়িবারে গুরুর ভবন।

সুজাউদ্দীন খান নাম শিশু বড় গুণধাম
গুরু ধরে ঘরে এই বার্তা পাইল

নৃপ পাইলে সংহারিব জীবন্ত না রাখিব
বাহারছরাহ দেশে রউক যাই
এত ভাবি নৌকা 'পরে যদি পাইল তারে।

সেদেশে ভবনে (?) তারে পাই।

আপন দুহিতা তানে বিহা করাইল যত্নে
তাতে জন্ম রাজুখান হৈল

কাজি ইছাহাক তান পুত্র আবদুল নবী ছোঁই তান পুত্র রোহিয়া চৌং তান পুত্র আবদুল গণি চৌং
তান পুত্র মুনসী আশরাফ তান পুত্র বরকসু চৌং আজগর আলী চৌং তান পুত্র মহব্বত আলী চৌং
তান পুত্র শ্রী শেখ ওয়াজেদ আলী চৌধুরী নিং (নিবাস) জলদী।

পূর্বপুরুষের ছজরার ঠিকানা :

১. আলতাপের বাপের বাঙ্গালা ভাষার ১টি

২. উক্ত মিঞাজীর পার্শিয়ান ভাষার ১টি

৩. মোশারফ আলী চৌং স্ত্রী জুনুর মাতা হইতে তাহান উক্ত চৌধুরী ১টি পূর্ব পৃষ্ঠায় লিখিত
ছজরা সকল নিম্নলিখিত ব্যক্তিগণের নিকট আছে শ্রী মৌলভী ছাদি পীং আছিমদ্দিন
মিঞাজী শ্রী আবদুল বারি মিঞাজী সাকিন চুনতী, থানা-সাতকানিয়া জিলা : চট্টগ্রাম।
ভগিতা দেখে মনে হয় এটি কবির মুসার সওয়ালের অংশ। অথচ অন্য দুই গ্রন্থের
আত্মকথার সঙ্গে সঙ্গতির অভাবও দেখা যাচ্ছে :

১. হামিদউদ্দীন খানই- তাঁর পুত্র বুরহানউদ্দীন নন গৌড়সুলতানের সঙ্গে বিবাদ করে রোসাঙ্গ
রাজার উজির হন।

২. বুরহানউদ্দীনও পিতার মৃত্যুর পরে রোসাঙ্গ দরবারে চাকরী পান, কিন্তু তাঁর অশ্বারোহী
সৈন্যদলের এক অশ্ববার সৈন্য নৃপতিকে বশ করে মৃত বুরহানউদ্দীনের জায়গীর কেড়ে
নেয়। এবং বুরহানউদ্দীনের পুত্র ইব্রাহিম রাজার কাছে সুবিচার না পেয়ে বাহুবলে সম্পত্তি
পুনরুদ্ধার করতে চাইলেন। ফলে পরিবারের সবাই পরাজিত ও নিহত হল।

৩. কেবল গুরুগৃহে থেকে শিক্ষারত পুত্র সুজাউদ্দীনই বেঁচে রইলেন। তাঁর পুত্র রাজুখান-শেখ রাজা বা বাবু খান নন- ছিলেন দরবেশ ফকির মোড়ল নামে খ্যাত, তাঁর পুত্র কাজী ইসহাক ‘শরীয়ত খাদেম’ নামে প্রশংসিত আর তাঁর পুত্র মনসুর ছোট খোন্দকার নামে পরিচিত এবং ইনিই কবি নসরুল্লাহর পিতা।
৪. সুজাউদ্দীনকে রাজভয়ে বাহারসরাহ থেকে নুকিয়ে রাখা হয়েছিল। বাহারসরাহ এলাকা বঙ্গোপসাগরের উপকূল অঞ্চল। জলদীও এ এলাকার অন্তর্ভুক্ত।
৫. সাহিত্যবিশারদ সংগৃহীত আলোচ্য বংশলতা ছজরা-হয়তো পারিবারিক শ্রুতিস্মৃতি থেকে সংকলিত, অথবা পূর্বে কবির রচনা থেকে মুখস্থ করা কিন্তু স্মৃতি থেকে লিপিবদ্ধ করা। তাই ত্রিপদী ছন্দে লিপিবদ্ধ হলেও গচ্ছিশৈথিল্য, ছন্দসিক ক্রটি এবং তথ্যগত বিস্মৃতি এড়ানো সম্ভব হয়নি।
৬. নসরুল্লাহ খোন্দকারের পিতৃব্য আবদুন নবীর বংশ এখনো জলদী গাঁয়ে বাস করছেন, এঁরা সম্ভ্রান্ত ধনী ও মানী। কাজী ইসহাক-আবদুন নবী-রুহুল্লাহ-আবদুল গণি-মুন্সী আশরফ-বকশ চৌধুরী-আজগর আলী চৌধুরী-মহব্বত আলী চৌধুরী-ওয়াজেদ আলী চৌধুরী এঁর বংশধরেরা এখনো জীবিত।
- এ বংশলতিকা দৃষ্টেও নসরুল্লাহ খোন্দকার যে অষ্টাদশ শতকের প্রথমার্ধের লোক, তা নিঃসংশয়ে বিশ্বাস করা চলে।

অতএব, জঙ্গনামা ও শরীয়তনামাসূত্রে কবির পূর্বপুরুষ সম্বন্ধে যে-সব বৃত্তান্ত পাওয়া গেছে সেগুলোই গ্রহণীয় বলে মনে করি।

গ্রন্থনাম শরীয়তনামা। যেমন :

শরীয়তনামা বাণী কর অবধান।

ভণিতা : কহে হীনজ্ঞান নসরুল্লাহ

শরীয়তনামা বাণী অমৃতের ধার।

খোন্দকার।

শরীয়তনামা বাণী অধিক মধুর।

কহে হীন নসরুল্লাহ গুণিগণ ঠাম।

কহে নসরুল্লাহ খোন্দকার পদবন্ধে।

শরীয়তনামায় রচনার সন-মাস-দিন ক্ষণ দেয়া রয়েছে :

এবে কহি তুমি সবে শুন মন দিয়া

অবশ্য দুঃখের ফল দিব নিরঞ্জন।

পুস্তক আদায় সন লওত গুণিয়া।

শরীয়তনামা বাণী লেখা সাক্ষ ডেল

চন্দ্র ঋতু সিদ্ধু পাশে গগনের বাস

সন তারিখ লেখিবারে শ্রদ্ধা বাড়ি গেল

সমুদ্র দিবস আদি হইল ছয় মাস।

চতুর্বিংশ অম্মাণের জোহর সময়।

পুস্তক গ্রন্থন দুঃখ কহন না যায়

বিংশ গ্রহ রমজানের চান্দ্রের নির্ণয়।

মাত্র সেই নারী বালক প্রসবএ।

আছিল ইদের দিন রোজ সোমবার

যত দুঃখ পাইলাম মুখের কারণ

সেদিন হইল লেখা সমাপ্ত সুসার।

চন্দ্র-১, ঋতু-৬, সিদ্ধু-৭, গগন (সপ্ত আসমান)-৭ ১৬৭৭ শক ২৪ অগ্রহায়ণ সোমবারে লেখা শেষ হয়।

তথা ১৭৫৫ খ্রীস্টাব্দের ৯। ১০ই ডিসেম্বরে গ্রন্থ রচনা সমাপ্ত হয়।

বলাবাহুল্য, ১৭৫৫ খ্রীস্টাব্দে ডিসেম্বরের ৯।১০ তারিখে ২৪শে অগহায়ণ সোমবারে ঈদ হয়েছিল এবং সে বছর রোজা হয়েছিল ২৯ টা (বিংশ গ্রহ ২০+৯=২৯)।^১

কবিপ্রদত্ত রচনাকাল যে নির্ভুল তার প্রমাণ গ্রন্থে 'দোহাজারী' গাঁয়ে সংঘটিত সৈন্যদের জেলেনীর কাছে অশ্রীল প্রস্তাব সংক্রান্ত বর্ণনা রয়েছে। 'দোহাজারী' নামের উদ্ভব ১৬৬৬ খ্রীস্টাব্দের পরে। এখানে ১৬৬৬ সন থেকে শজ্জনদের তীরে হাজার সৈন্যের মনসবদার দু'জন মুঘল সীমান্তসেনানী থাকতেন। তাঁরা মুঘল রাজ্যের আরাবান সীমানা পাহারা দিতেন। প্রথম দু'জন হাজারী হচ্ছেন আবু খান ও লছমন সিংহ, এঁদের বংশধররা এখানে পুরুষানুক্রমে বাস করেন। ফলে এগাঁয়ে এখনো এঁদের সৈন্যদের বংশধররা বাস করে। কবির সমকালে চট্টগ্রামে মুসলিম সমাজে কি কি হিন্দু ও বৌদ্ধ (আরাকানী বৌদ্ধ মধ্য আচারও) আচার সংস্কার ও পার্বণ রয়ে গেছে তার সন্স্কাভ বর্ণনা রয়েছে, এবং ইসলামি আচার ও পার্বণ কিরূপ হওয়া উচিত, তাও বিশদভাবে বর্ণিত হয়েছে। রজস্বলা নারীর কর্তব্য, স্নান, পুকুর খনন, কবর, কাফন, শবস্নান, স্মৃতিকা-উত্তর আচার, ঘোমটা-পর্দা অস্পৃশ্যতা, ধূমপান, জাতিভেদ, মহরমের, তাজিয়া, বেনামাজী দরবেশ, পাশাখেলা, আলিমচরিত্র, মারোয়া জলুয়া, গেরুয়া, যৌন-অসংযম প্রভৃতি মানুষের ব্যক্তিক ও সামাজিক জীবনে নিত্য প্রয়োজনীয় জ্ঞাতব্য বিষয়ের আলোচনা রয়েছে শরীয়তনামা গ্রন্থে। শরীয়তের বিধি (আমর) নিষেধই (নেহী) এ গ্রন্থে আলোচিত। কবির ভাষায়—

'আমর' 'মানাই' যত আছে শরীয়তে
সহরিশে কহি আমি শুন রঙ্গচিত্তে।
হুকুম শরীরে শাস্ত্রে আমর বোলএ
মানাবে বোলএ 'নেহী' আরবি ভাষাএ।

৪. আফজল আলি

চট্টগ্রামের সাতকানিয়া থানার বিখ্যাত দরবেশ শাহ রুস্তমের শিষ্য আফজল আলি পীরের আদেশে 'নসিহতনামা' রচনা করেন। পদকার আফজল আলি ভিন্ন ব্যক্তি। তবে অনুমান করি পদকার সৈয়দ আফজল আলি ও পদকার আফজাল আলি অভিন্ন ব্যক্তি হবেন এবং নসিহতনামা প্রণেতা আফজল আলি আঠারো শতকের লোক এবং ভিন্ন ব্যক্তি।

নসিহতনামায় আফজল আলির কিছু আত্মপরিচয় আছে, তা থেকে জানা যায় তিনি চট্টগ্রামের আধুনিক সাতকানিয়া থানার 'মিলুয়া' গ্রামবাসী ছিলেন। তাঁর পিতার নাম ছিল ভংগু ফকির। 'পিতা মোর ভঙ্গু ধৈর্যধর'। পীর শাহ রুস্তমের আশ্রয়েই তিনি নসিহতনামা রচনা করেন। পীর প্রসঙ্গে কবি বলেন :

চাট্টিগ্রাম মধ্যে ছিল ক্ষুদ্র এক গ্রাম
মিলুয়া করিয়া আছে সে গ্রামের নাম।
সেই গ্রামে ছিল এক ফকির আল্লার।
চারি মঞ্জিল-ভেদ দিল করতার।
শাহা সে রুস্তম করি ছিল তার নাম

আল্লাহ হৈল কৃপা গুণে অনুপাম।
গায়েবী মর্তবা প্রভু তাহানে যে দিলা
গায়েবী ভেদ যত কহিতে লাগিলা।
গায়েবী ফকির বলি দেশ দেশান্তর
তান খ্যাতি একে একে হইল প্রচার।

^১ ডক্টর করিম গগন-১ ধরে রচনাকাল ১৭৪৯ খ্রীস্টাব্দ নির্ণয় করেছেন, কিন্তু ১৭৪৯ খ্রীস্টাব্দে অগহায়ণ মাসে ঈদ হয়নি।

এই রস্তুম শাহর রস্তুমের হাট এবং হাটের কাছেই দরগাহ আছে। লোকশ্রুতি রস্তুম তিন-চার শ'বছর আগের লোক। রস্তুমের গায়েবীশ্রুত বাণীই আফজল তাঁর মুখে শুনে লিপিবদ্ধ করেছেন বলে গ্রন্থে উল্লেখ আছে। 'শাহ রস্তুম দুই যুগ অন্ধ ভরি স্বপ্ন দেখিল যতেক, তার অল্প কিছু' কবি এ গ্রন্থে লিপিবদ্ধ করেছেন। ভাষা ও বর্ণন ভঙ্গি বিচারে আফজল আলিকে আঠারো শতকের শেষার্ধের কবি বলে মনে করি। অতএব, শাহ রস্তুমও এই সময়ের লোক হবেন। গ্রন্থ সমাপ্তির পূর্বেই শাহ রস্তুমের মৃত্যু হয় :

মৃত্যুর কথক দিন ফকির আল্লার
বহু উপদেশ কৈল না লিখিল তার।
কৃপার সাগর মুর্শিদ মোক গেল এড়ি।

নসিহতনামার লিপিকরের পুস্পিকা এইরূপ : 'এই পুস্তক লিখিলাম মোসন আলী হীনে। সাজ হৈল ২৪ মঘির ১২ আঘিন দিনে।' হরফ দেখে ১২২৪ মঘী বলেই অনুমান করতে হয়। দ্বিতীয়ত 'মোকাম মঞ্জিলের কথা' রচয়িতা পরিচয় আমাদের জানা নেই। তাঁর গুরু ছিলেন শাহ মইনুদ্দীন—

শাহ মইনুদ্দীন গুরু জ্ঞানের লহরী
কহে হীন মোহসেন আলি গুরুপদ স্মরি।

মোহসেন আলীর রাধা-কৃষ্ণ বিষয়ক পদও পেয়েছি। 'নসিহতনামা'র লিপিকাল আমাদের ধারণায় ১২২৪ মঘী (১৮৬২ খ্রীঃ) সন। এবং লিপিকার, পদকার ও 'মোকাম মঞ্জিলের কথা' প্রণেতা অভিন্ন ব্যক্তি বলেই মনে করি। অতএব মোহসেন আলি উনিশ শতকের মধ্যভাগে বর্তমান ছিলেন।

আফজল আলিকে ষোল-সতেরো শতকের কবি বলে অনুমানের পক্ষে দুটো বাধা আছে। এক, ভাষা অত্যন্ত অর্বাচীন, এবং বক্তব্য গোঁড়া শরীয়তপন্থীর। শরীয়ত-প্রীতি সতেরো শতকের আগে দুর্লভ্য। দুই, লেখকের নিষ্ঠাহীনতা। কোরান-হাদিসের নামে অনেক বানানো আরবি বাক্য তিনি তাঁর উক্তির সমর্থনে প্রয়োগ করেছেন। যে মন্তব্য করেছেন তাতে তাঁকে একজন প্রাচীন সাধক শাহ রস্তুমের সহচর শিষ্য বলে গ্রহণ করতে সংকোচ বোধ করি।

গ্রন্থে তামাক সেবনে কুফল বর্ণিত হয়েছে। তামাক এদেশে সতেরো শতকের আগে চালু হয়নি। তা ছাড়া আফজল আলির একটি উক্তি এরূপ :

বার সন্দীতে জন্মি তের সন্দী পাইছে
সে সকল লোকে দো-আঁসলা হইয়াছে।
তের সন্দীতে জন্ম যে সকল হইব
খানে দজ্জালের নায়েব সে সকল হইব।

এর থেকেও বোঝা যায়, আফজল আলি খ্রীস্টীয় আঠারো শতকের উত্তরাধের তথা হিজরী বারো শতকের শেষার্ধের এবং তেরো শতকের প্রথম পাদের তাহলে তাঁর আনুমানিক জীবৎকাল ১১৫০-১২২৫ হিজরী বা ১৭৩৮-১৮১১ খ্রীস্টাব্দ।^২

^২ মৎসঙ্গাদিত 'নসিহতনামা' দ্রষ্টব্য।

এ. মুহম্মদ ফসিহ

পুথিতে কোন নাম নেই। মরহুম আবদুল করিম সাহিত্যবিশারদ-এর আঙ্গিক ও বিষয়ানুগ নাম 'আরবি ত্রিশ হরফে মুনাজাত' রেখেছিলেন।^১ ডক্টর মুহম্মদ এনামুল হক এর নাম দিয়েছেন 'মুনাযাত'।^২ আঙ্গিকের ও বিষয়ের পরিচায়ক বলে আমরা সাহিত্যবিশারদের দেয়া নামই গ্রহণ করলাম :

আরবির এ ত্রিশ অক্ষরে করি ভার।

মুনাজাত করিবাম গোচরে আল্লার।

একেক অক্ষর প্রতি চতুর্পদ বন্ধে।

মুহম্মদ ফসীএ কহে পয়ারের ছন্দে॥

পুথির শেষে লেখা আছে :

ইতি সমেআপ্ত মুনাজাত সন ১২২২ ব ২৬

আসাড় রোজ রবিবার বেলা দেড় পহর উদয়ে লিখা সময়াপ্ত মনাযাতের সোদ। এর পর ফারসি হরফে মালিক ও লিপিকারের নাম লেখা রয়েছে

মালিক-হাসেম আলী, পিতা শেখ মোহররম খাঁ পরগনা

ভুলুয়া, সাকিনহ-রকানপুর।

লিপিকর-শেখ আলী রজা, পিতা মোহাম্মদ সবির পাটওয়ারী,

পরগনা-ভুলুয়া, সাকিন-হাটহাজরা, জিলা ত্রিপুরা।

এটি নিশ্চয়ই লিপিকরের দেওয়া তারিখ এবং তারিখটি ত্রিপুরাসূচক। কেননা, কবির দেওয়া হলে এটি পদোই লেখা হত, তাই ছিল নিয়ম। আর মুনাজাতটি কবির মূল রচনার শেষাংশ মাত্র। কাজেই কবির দেওয়া সমাপ্তিসূচক তারিখে শুধু মুনাজাতের উল্লেখ থাকতে পারে না এবং পুথিটি ত্রিপুরা অঞ্চলে অনুলিখিত। ওখানে ত্রিপুরাদ চলে। এটিকে চট্টগ্রাম অঞ্চলের পুথি মনে করে পুথির তারিখটিকে মঘী রূপে হয়েছে।^৩ অতএব, লিপিকাল ১২২২ সন ত্রিপুরাদ বা ১৮২২ খ্রীস্টাব্দ।

গ্রন্থারম্ভে আছে :

আর এক কথা কহি শুন গুণিগণ।

চিত্ত দিয়া শুন কহি মোর নিবেদন।

আরবির এ ত্রিশ অক্ষরে করি ভার।

^১ মৎসল্যাদিত 'আরবী ত্রিশ হরফের বয়ান' দ্রষ্টব্য।

^২ মুসলিম বাঙলা সাহিত্য, পৃঃ ২১৮।

^৩ পুথি পরিচিতি, পৃঃ ১০।

এবং দশম পৃষ্ঠায় মুনাযাত শেষে রয়েছে :

মোহাম্মদ ফসীএ কহে শুন গুণিগণ ।
মুনাযাত করিলাম প্রভুর চরণ।
কোরানের মধ্যে আছে এ ত্রিশ হরপ ।
দেশী ভাষে পঞ্চালী কহিলুম স্বরূপ।
এর সব অক্ষর দেখি কোরান মাজার ।
মোল্লা সবে কহিলেক কিতাব সম্ভার।

ফারসির মধ্যে দেখি পণ্ডিতের গণ ।
বাঙালার ভাষে তবে করিল রচন।
যার যেবা ইচ্ছা মতে নানা প্রকার ।
হিত বাক্যে বুঝিবারে কহিছি পয়ারে ।
মুঐঃ ক্ষুদ্র অল্প না পাইএ ওর ।
প্রভুপদে নিবেদিবুঁ হই মতি ভোর।

তেরোতম পৃষ্ঠায় পাছি :

এবে পুনি প্রণামিএ পয়গম্বর গণ ।
আদম প্রভূতি আর রসুলে চরণ।
মুখ্য চারি ফিরিস্তা প্রভূতি যথ আর ।
একে একে প্রণামিও সহস্রেক বার।
হজরত মীরের পদ করি সিরতান ।

যতেক সাধ মধ্যে সেই সে প্রধান।
আওলিয়া আখিয়া যত পীর যে ফকির ।
প্রণামি সে সব পদ রাখি মোর শির ।
তোমরার পদে করি সহস্র বিনএ ।
অধমের প্রতি স্নেহ রাখ মনে।

প্রথমত, আগে কোন কথা না বললে, কবি কখনো 'আর এক কথা' বলে গ্রন্থারম্ভ করতেন না। 'এ ত্রিশ অক্ষরে' কথার মধ্যে আরবি ত্রিশ হরফ সম্বন্ধীয় পূর্ব বিবৃতির স্পষ্ট ইঙ্গিত রয়েছে, দ্বিতীয়ত, একটি মাত্র 'মুনাযাত'কে 'পঞ্চালী' বলে অভিহিত করার কোন সম্ভব কারণ নেই। 'মুনাযাত'ই উদ্দিষ্ট হলে কবি পঞ্চালী ছন্দে কণ্ঠ্যটি প্রয়োগ করতেন। আর, 'মোল্লা সবে করিলেক 'কিতাব' সম্ভার। ফারসির মধ্যে দেখি পণ্ডিতের গণ। বাঙালার ভাষে তবে করিল রচন। এবং 'হিতবাক্যে বুঝিবারে কহিছি পয়ারে।' (চরণগুলোতে আরবি পুরো কিতাব, ফারসি গ্রন্থ, ফসীহর পূর্ববর্তী বাঙালী পণ্ডিতগণের বাঙলা বই ও ফসীহর লেখা বাঙলা রচনার উল্লেখ পাওয়া যাচ্ছে। এতে অনুমান করা চলে, আরবি প্রতিটি হরফের গূঢ়ার্থসূচক ও মহিমাজ্ঞাপক রচনার কথাই কবি এখানে উল্লেখ করেছেন, তৃতীয়ত, 'এবে পুনি প্রণামিএ' কথায় 'এবং প্রণাম্যদের নামসার উল্লেখে সহজেই বোঝা যায়, কবি গ্রন্থের 'উপক্রমে সবিস্তার 'বন্দনা' সেরেছেন। আমাদের এ অনুমানের পেছনে আরো যুক্তি আছে আরবি হরফের মহিমা, কোরানে প্রতি হরফের প্রয়োগসংখ্যা এবং হরফের মারফতী রূপকাদির বর্ণনা সম্বলিত গ্রন্থ আমরা আরো পেয়েছি। এরূপ একটি অংশ (সম্ভবতঃ সতেরো শতকের প্রথম পাদের কবি শেখ পরাণের রচিত) আমরা আলোচ্য মুনাযাতের সঙ্গে সম্বলিতও করেছি।^৪ এ ছাড়া আবদুল নবীর 'কোরাণের কায়দা'^৫ অ-জানা কবির 'কোরান পাঠের ফল'^৬, মোহাম্মদ হোসেনের নামহীন পুথি (মোহাম্মদ হোসেন আপনে খাকসার। তিরিশ হরফের কথা অজুতের মাজার)^৭ কায়মউদ্দীনের 'কোরানের কায়দা' প্রভৃতি এ শ্রেণীরই রচনা। কাজেই আমরা ধরে নিতে পারি যে আলোচ্য মুনাযাত মুহম্মদ ফসীহর ইত্যাকার কোন রচনারই শেষাংশ।

^৪ পুথি পরিচিতি, পৃঃ ৮১।

^৫ এ পৃঃ ৬৮।

^৬ এ পৃঃ ৮৩।

^৭ পুথি পরিচিতি, পৃঃ ২২৬-৯৭।

আঙ্গিক বৈশিষ্ট্য

আঙ্গিকের দিক দিয়ে ফসীহর মুনাজাত আমাদের 'চৌতিশা' জাতের রচনা। বলতে গেলে চৌতিশা বাঙলার এক রকম বিশিষ্ট সাহিত্যসম্পদ। অন্য কথায় বাঙালীর উদ্ভাবিত মৌলিক শিল্পপদ্ধতি। ডক্টর আবুতোষ ভট্টাচার্য বলেন :

ব্রীষ্টীয় ত্রয়োদশ শতাব্দীর দ্বিতীয়ার্ধে বাংলাদেশে রচিত 'বৃহদ্ধর্ম-পুরাণ' নামক একখানি উপপুরাণে মঙ্গলকাব্যের অনুরূপ প্রণালীতে সংস্কৃত ভাষায় রচিত একটি চৌতিশা স্তবের সাক্ষাৎকার লাভ করিতে পারা যায়। আর কোনও গ্রন্থে কিংবা সংস্কৃত পুরাণে অনুরূপ রচনার পরিচয় পাওয়া যায় না। ইহা হইতে মনে হয়, ব্রীষ্টীয় ত্রয়োদশ শতাব্দী হতে বাংলা মঙ্গলকাব্য নিজস্ব রূপ লাভ করিতে আরম্ভ করিয়াছিল।^১

কাজেই এ রীতি সংস্কৃত থেকে পাওয়া নয়। ডক্টর মদনমোহন গোস্বামী বলেন :

বাংলা সাহিত্যে চৌতিশা বহু পুরাতন। আরবি ও ফারসি ভাষায় আলিফ 'বে', 'তে' ইত্যাদি বর্ণক্রমে অনুরূপ রীতিতে কবিতা লিখিবার রেওয়াজ আছে। তদনুসারে উর্দুতেও এই রেওয়াজ আসিয়া গিয়াছে।^২

তাহলে হয়তো এটিই আরবি-ফারসির কাছে বাঙলার আদি ঋণ; কিন্তু তাও প্রত্যক্ষ নয়, পরোক্ষ। আরবিতে ইত্যাকার পদান্ত মিলেরই রেওয়াজ আছে, আদ্যাক্ষরের নয়। তাতে একটি কবিতায় সব হরফের আনুক্রমিক প্রয়োগ থাকে না। আর ফারসিতে বাঙলার মতো আদ্যাক্ষর রূপে বর্ণের ক্রমবিন্যাস প্রথা চালু ছিল বটে, কিন্তু তাও কোন ব্যক্তির একক রচনা রূপে নয়, বিভিন্ন জনের প্রতিযোগিতামূলক যৌথ রচনা। যেমন একজন 'আলিফ' থেকে 'ছে' অবধি হরফ প্রয়োগে কয়েকটি চরণ রচনা করলেন, অপর কবি 'জিম' থেকে 'দাল' পর্যন্ত প্রয়োগ করলেন, আর তৃতীয় কবি আরো কয়েকটি হরফযোগে পদ রচনা করলেন। এভাবেই চলতো এবং তা সাধারণত মুখে মুখেই রচিত হত, লিখিতভাবে নয়। বাঙলার হিন্দু রচিত সাহিত্যে চৌতিশায় স্ত বই বিশেষ প্রচলিত।

মুসলিম রচিত চৌতিশা কিন্তু বারমাসী, বিরহ স্তুতি ও বিলাপ রচনার বাহন হয়েছে। বাঙলা চৌতিশায় চৌত্রিশটি হরফই যে থাকবে, এমন কোন বাঁধা নিয়ম নেই। আদিতে অবশ্য তাই ছিল। নইলে এ নাম হল কি করে? কিন্তু পরবর্তীকালে বর্ণের হ্রাস-বৃদ্ধি ঘটেছে। কেউ কেউ 'অ' থেকে 'ই' অবধি শব্দ-সম্ভব সব বর্ণই চরণের আদ্যাক্ষর রূপে ব্যবহার করেছেন, কেউ বা কেবল বাঞ্ছনবর্ণই গ্রহণ করেছেন। কেউ বর্ণ দিয়ে এক চরণ রচনা করেছেন, কেউ দুই পংক্তি আর কেউবা চার ছয় আট চরণ অবধি চালিয়ে নিয়েছেন।

আমাদের আলোচ্য কবি, মনে হয়, বাঙলা চৌতিশা স্তরের অনুকরণেই আরবি ত্রিশ হরফের মুনাজাত রচনা করেছেন।

সনেট যেমন অন্যান্য কবিতার তুলনায় সচেতন প্রয়াসসাধ্য কিছুটা কৃত্রিম রচনা; কেননা, সনেট রচনায় ভাবের সূষ্ঠ প্রকাশের চাইতে আঙ্গিক সৌষ্ঠবের দিকে বেশি নজর দিতে হয়, সনেটে যেমন আঙ্গিকই প্রধান, তেমনি চৌতিশায়ও কাব্যের আঙ্গিকই কবি-প্রচেষ্টার মুখ্য লক্ষ্য,

^১ বাঙলা মঙ্গল কাব্যের ইতিহাস (৩য় সং) পৃঃ ৭৭।

^২ রামগণাকর ভারতচন্দ্র, পৃঃ ৫১।

ভাবের প্রকাশ গৌণ। তাই চৌতিশা প্রায়ই কৃত্রিমতাদুষ্ট প্রাণহীন রচনা হয়ে দাঁড়ায়; তবু শিল্পকর্ম হিসেবে ভাষা-ভাস্কর্য হিসেবে এর রূপ আছে, মূল্যও আছে এবং আলঙ্কারিক কবির কৃতিত্বের স্বাক্ষর বহন করে এ জাতীয় রচনাই।

ট. কাজী বদিউদ্দিন

কাজী বদিউদ্দিন আঠারো শতকের লোক। তাঁর নিবাস ছিল চট্টগ্রামের পটিয়া থানা-সংলগ্ন বাহুলী গ্রামে। এখানে তাঁর বংশধর আছে। তাঁর এক পূর্বপুরুষের নাম ছিল 'চিকন কাজী'। এখানে সে পাড়াটি চিকন কাজীপাড়া নামে অভিহিত হয়। কাজী বদিউদ্দিন কায়দানী কিতাব, সিফৎ-ই-ইমান প্রভৃতির প্রণেতা।

ক. কায়দানী কিতাব শরা-শরীয়ত বিষয়ক গ্রন্থ। এ গ্রন্থে প্রশ্নোত্তরে ওজু-নামাজ প্রভৃতির নিয়মাবলি আলোচিত।

যেমন অজু মধ্যে কথ ফর্জ কথেক সুনত? কথেক কারণে আর অজু ভঙ্গ হয়?

কথ মসতাহাব কথ মকরুহ কেমনত?

পাঁচ নবী পাঁচ ওয়াক্ত নামাজের প্রবর্তক :

আদম ইব্রাহিম ইউসুফ জানএ

জগিতা- চক্ষু মুখ হস্তে যদি ইশারা করএ

ইসা মুসা পঞ্চ অক্ত নামাজ ওজারি আছএ

কহন্ত বদিউদ্দীন নামাজ ভাঙ্গএ।

খ. সিফৎ-ই-ইমান : মুসলমানের অবশ্য জ্ঞাতব্য শরা-শরীয়ত বিষয়ক শাস্ত্র গ্রন্থ। এ গ্রন্থে কবির আত্মপরিচয় ও শিক্ষকদের নাম আছে :

চক্রশালা পুরান বস্তি জানে সব গ্রাম

তাপোমন্ড ছিল সেই দর্বেশ উপাম।

তাতে এক মৌজা বাহুলী আছে নাম।

তান ঘরে এক পুত্র সৃজন হইল

সেই স্থানে চিকন কাজী করিছে বসতি

তামায়ুদ্দিন খোন্দকার নাম যে আছিল।

উত্তম পুরুষ ছিল ভাগ্যবন্ত অতি।

তাহান ঔরসে জন্মি দেখিএ সংসার।

তান পুত্র আয়ুব শরীফ ছিল নাম

অতএব বংশলতা এরূপ : চিকন কাজী-কাজী আয়ুব শরীফ-তামায়ুদ্দিন কাজী বদিউদ্দিন।

কবির শিক্ষকগণ :

আহমদ শরীফ প্রথম গুরু বুলি

খেতাবচর শুভগ্রাম তাহান বসতি।

জীবের জীবন মোর আঁখির পুতলি।

বাস্তালা অভ্যাস মোর সেই গুরু হতে

অমূল্য রতন গুরু মুহম্মদ নকী

মুখে (মোকে) পাঠ লেখি চিনাইছে

আর গুরু আর্শাদুল্লাহ মুহম্মদ তকী।

নিজ হাতে।

আর গুরু চম্পাগাজী নয়ানের জ্যোতি

বোয়ালখালি থানার অন্তর্গত এই খিতাবচর গ্রামের চম্পাগাজী রাগতালনামার লেখক ও প্রসিদ্ধ সঙ্গীতশিক্ষক ছিলেন। এর কাছেই কাজী বদিউদ্দিন বাঙলা শিখেছিলেন। অতএব উভয়েই আঠারো শতকের লোক। শরীয়তের বিধি-নিষেধ বর্ণনার ফাঁকে কবির মন্তব্য ভাবিয়ে তোলে :

ভরণ কলসী যদি কিন্তু ছিদ্র হএ
বিন্দু বিন্দু ঝরি ঝরি সে ভাণ্ড শুকাএ।

এই মত সকলের আয়ু যাএ চলি।

সিফৎ-ই-ইমানের উৎস :

সিফৎ ইমা নামে এক কিতাব জানএ
ফেতবি জাহিজ হোস্তে নিকালি আছেএ।
উত্তম মসলা সেই কিতাব হেরিয়া

কিহমু সওয়াল কিছু পয়ার রচিয়া।
ফারসিভাষে যারে 'সআল' বোলন্ত
আরবি জবানে তাকে মসলা' কহন্ত।

ভণিতা : ১. কহন্ত বদিউদ্দীনে শুষ্টিয়া পয়ার।

২. সোয়াল আজিম নাম কিতাব হেরিয়া

কহন্ত বদিউদ্দীনে পয়ার রচিয়া।

কেবল 'ফেতাবি জাহিজ' নয়, ও 'সওয়াল আজিম' ও কবির অবলম্বন ছিল।

নামাজ না পড়ি সেই দুশমন হৈল।

নামাজ দ্বীনের খাশা বুলি না জানিল।

কাজী বদিউদ্দীনের সিফৎ-ই-ইমানের অপর এক পাণ্ডুলিপিতে লিপিকর আবদুল আলী (লিপিকাল ১২২৩ মঘী) সর্বত্র স্বনামে ভণিতা দিয়েছেন।

কিতাব দলিল চাহি করিয়া সুমার

পিতা দেবান আলী পণ্ডিত সুজ্ঞান।

হীন আবদুল আলি কহে রচিয়া পয়ার।

সাকিন ইসাপুর যে চাকলাএ ফটিকছড়ি

লেখিলুম পুস্তক হীন আবদুল আলী নামে

মৌজে ঢালকাটা হএ নানুপুর বাড়ি।

আবদুল আলীর পিতা দেবান আলী (মিয়াজী) সম্ভবত নুরনামা' নামের রাগতালের উৎপত্তিকাহিনী রচক ছিলেন।

দিজ (দীন?) দেবান আলী কহে আলীর কাহিনী।

৪. মুহম্মদ জান

মুহম্মদ জান সম্ভবত আঠারো শতকের শেষার্ধের লোক। এর প্রাপ্ত পাণ্ডুলিপি ১২১৪ মঘীতে তথা ১৮৫২ খ্রীস্টাব্দে লিপিকৃত। চট্টগ্রামের কবি। তেরো পরে সমাপ্ত। নামাজের ফজিলত বর্ণিত।

১. মুহম্মদ জান কহে রচিয়া পয়ার।

২. জান মুহম্মদ কহে শুন নরগণ

আকুল হাদিস বাণী শুন দিয়া মন।

কবির বক্তব্য :

সংসারের ভোগ সুখ কিছু নহে সার

যতেক সম্পদ পুনি আনন্দ অপার

যেজনে করএ শ্রদ্ধা অতি গুণাগার।

প্রলয়ের কালে সুখ নাহিক তাহার।

^১ পুঁথি পরিচিতি, পৃঃ ৪৫৬।

সবচেয়ে গুরুতর কথা এই, উনিশ শতকে বাঙলা হরফ না জানা মাদ্রাসা শিক্ষিতদের পড়ার জন্যে আরবি হরফে বাঙলা পুথি লেখা শুরু হয়। কবি মুহম্মদ জ্ঞানের এতে ঘোর আপত্তি ছিল, তিনি বলেন—

আর এক কথা কহি শুন বন্ধুজন
আরবি আঙ্গুলে যদি বাঙ্গালা লিখন।

বুঝি সুঝি কর্ম কৈলে পাপ ঘোরতর
সত্তর নবীর বধ তাহার উপর।^২

ড. আজমত আলি

ইনি লিখেছেন নামাজের কেতাব। এটি ছোট গ্রন্থ নয়। নামাজের নিয়ম, তাৎপর্য ও মাহাত্ম্য বিস্তৃতভাবে বর্ণিত হয়েছে।

কিতাব ফতুবি আর মুক্তসর সাফিতার
লিখিলেক এসব বারতা
শ্রী আজমত আলি হীন লোকে দেখি করে ঘিন
যেন তেন করিলুঁ কবিতা।

ঢ. আবদুল্লাহ

আবদুল্লাহ রচিত 'নসিয়তনামা' আরবি গ্রন্থের অনূদিতঃ

দোয়েতুন নামেহীন মধ্যে আছে যে মরহুম, তাহার বাঙ্গালা করে আবদুল্লাহ অধম।

রসুলের আমলের নানা উপকণ্ঠ বা ইতিবৃত্ত বর্ণনার মাধ্যমে কবি স্বামীর ও স্ত্রীর পারস্পরিক সম্পর্ক, কর্তব্য ও দায়িত্ব সম্পর্কে উপদেশ লিপিবদ্ধ করেছেন। যেমন :

প্রতিনিতি যে নারী বেজার হইয়া নারীমন মৌন দেখি পতি দুঃখ পায়
চিত্তাযুক্ত থাকে নারী দুঃখিত হইয়া। লাহানত সে নারীকে করেন খোদায়।
মনে হয় কবি উনিশ শতকের গোড়ার দিকে লোক।

ণ. শেখ সোলায়মান

সোলায়মান রচিত নসিয়তনামায়ও^৩ স্বামী-স্ত্রীর দাম্পত্য জীবনে পারস্পরিক সম্পর্ক, দায়িত্ব ও কর্তব্য বর্ণিত হয়েছে। এটি ফারসি থেকে অনূদিত। নোয়াখালীর ভুলুয়ায় ছিল কবির নিবাস।

ক. ভুলুয়া শহর জান দিব্য একস্থান মুই হীন জান দোষ ক্ষেমিতে জ্যাএ
শেখ সোলেমান নাম তাহাত প্রধান ফারসিকে বাঙ্গালা করিলুম দুনিয়ায়।
খ. অসিয়তনামা এক কিতাব আছিল বাঙ্গালার ভাষে তাকে করহোঁ রচন।
নারী-পুরুষের কথা তাহাতে লেখিল ভাষাএ ফারসি কেহ নারএ পড়িতে
ফারসি বচন কহি বুঝ সর্বজন বাঙ্গালা রচিলুঁ তবে সকলে পড়িতে।

^২ ঐ পৃঃ ২১৬।

^৩ পুথি পরিচিতি, পৃঃ ৫৯৮।

গ্রন্থে বর্ণিত বিষয় :

একদিন নবীর বিদিত নারী আইল চলিয়া

স্বামীর যতেক দায় নারীর উপর।

বলল— এক নিবেদন কহি তোমার গোচর

ভগিতা : হীন সোলেমান কহে পাঞ্চালী রচিয়া

নারী পুরুষের কিছু কহত খবর।

কার কিংবা দোষগুণ কহ পয়গাম্বর

সোলেমান কহে স্তন আয় নরগণ।

কবি সম্ভবত আঠারো শতকের শেষার্ধ্বে এ গ্রন্থ রচনা করেন। এ সূত্রে উনিশ শতকের দোভাষী শায়ের মুহম্মদ খাতেরের তথ্যতুলন্যে এবং ঢাকার রহমতগঞ্জবাসী মুন্সী গরীবুল্লাহ বেপারী রচিত 'নেকবিবির বয়ান' এবং 'কলিকালের আওরতের বয়ান' স্মর্তব্য।

ত. সৈয়দ নাসির

এই সৈয়দ নাসির আর বেনজীর বদর-ই মুন্সীর রচয়িতা সৈয়দ মুহম্মদ নাসির সম্ভবত অভিন্ন ব্যক্তি। সৈয়দ নাসির দীর্ঘ আত্মকথা লিখেছেন গ্রন্থের উপক্রমে। তা থেকে জানা যায় :

শাহ সূজা আছিলেন নৃপকুলেশ্বর

শাহার সঙ্গতি আইল তেজি নিজ স্থান।

ডাড় সঙ্গে বুঝি আইল রোসঙ্গ শহর।

আমীরাবাদ নামে এক গ্রাম ভাল

সৈয়দ আবদুল গণি ছিল আলিম প্রধান

তথা গৃহবাস করি গোয়াইল কাল।

অতএব, শাহজাহান-পুত্র সুলতান অনুষ্ঠানরূপে কবির পূর্বপুরুষ আলিম আবদুল গণি আরাকানরাজ্যের চত্রেয়ামে এসে আধুনিক সাতকানিয়া থানার অন্তর্গত আমীরাবাদ গায়ে বসতি স্থাপন করেন।

একস্থানে কবি সিরাজকুলুব গ্রন্থের নাম উল্লেখ করেছেন :

সিরাজকুলুব নামে কিতাব আছএ

খন্নাসের বিবরণ লেখিয়া আছএ।

এটি যদি আলি রজা [১৭৫৯-১৮৩৭] রচিত বাঙলা সিরাজকুলুব হয়, তাহলে কবির আবির্ভাব কাল আঠারো শতকের শেষ দুই দশক কিংবা উনিশ শতকের প্রথম পাদ।

এ 'সিরাজ সবিব' অর্থ পথের প্রদীপ। এ গ্রন্থের উৎস আরবি হাদিস।

কবির ভাষায় –

বচন হাদিস নানান কিতাব কখন

সিরাজ সবিব নামে পুস্তক রাখিলুঁ।

অন্যব্যাক্য নহে এই জান গুণিগণ।

সিরাজ সবিব কহে আরবের গণ

গুরু স্মরি নবী ভজি প্রভুতে মাগিলুঁ

পছেন চোরাগ কহে বাঙ্গলা বচন।

সৃষ্টিতত্ত্ব দিয়ে এ কাব্যের শুরু। প্রশস্তি অংশে ইরানি কবি সাদীর ও জামীর এবং বাঙালী কবি সৈয়দ সুলতানের ও আলাউলের নাম রয়েছে :

সৈয়দ সুলতান কবি আলাউল আর

পীর আবদুল ওহাব পীর জ্ঞানের সাগর,

শিক্ষা গুরু আজিজুল্লাহ মৌলবী সাদেক।

এবং গুরু লাঞ্ছনাকারী মুহম্মদ নামের এক অকৃতজ্ঞ ছাত্রের কথা রয়েছে। কবি দরিদ্র ছিলেন, তাঁর উক্তি থেকে বোঝা যায়— খাজনার বিনিময়ে এক টুকরো জমি বন্দোবস্ত নিয়েছিলেন বাস্তভিটে তৈরির জন্যে, কিন্তু শেষ পর্যন্ত তা হয়ে ওঠেনি। একদিন এক মজলিসে পাশের লোকের হাতে হাদিসকথার গ্রন্থ দেখে কবি 'রচিতে পয়ার মুই মনেতে ইচ্ছিলুঁ। সে-মজলিসে জান আলী নামের দৌলতপুরবাসী এক জমিদার বা ধনী লোক ছিলেন, তিনিই—

কহিল মোহর স্থানে সেই মহামতি	বুঝিতে রচ পুস্তক বাঙ্গালা বচন।
রচিবারে গ্রন্থ এই করিয়া আরতি।	রহিব তোমার নাম অবধি প্রলয়।
হাদিস না বুঝে সব আরবি রচন	তান আজ্ঞা অনুদিন করিলুঁ রচন।

তা ছাড়া পুত্রদের শিক্ষা দানও ছিল লক্ষ্য :

সৈয়দ আবদুর রহমান পুত্রের কারণ।	ভণিতা :
বহু শাস্ত্র পড়াইতে নারিলু তাহারে	সৈয়দ নাসির (মুই) হই হীন মতি
তেকারণে রচিলুঁ অল্পে বুঝিবারে।	গুণিগণ পদযুগে করিএ মিনতি।

আলাউলের অনুকরণে কবি পরিচ্ছেদ শেষে মাঝে মাঝে গুরুকে স্মরণ করে উদ্দীপিত হতে চেয়েছেন :

১. আইস গুরু হুদে বৈস প্রদীপের তুল	২. আইস গুরু হুদে বৈস যেন পুষ্পে অলি
জ্ঞানের পতঙ্গ মোর ভ্রমিতে বহল।	তবে মোর জ্ঞান পুষ্পে ফুটিবার কলি।

কবি স্রষ্টার কাছে আত্মনিবেদন করেছেন এছাড়া :

যে চাহ সে কর তুমি আয় নিরঞ্জন	কাষ্ঠের পোতলা সব তেমত নাচএ।
তুই ঢেউ মুই তৃণ আয় জগপতি	যেমতে বাজাএ যন্ত্রী সে বোলে যন্ত্র—
শিল্পীকে অঙ্গুলি ডোরে যে মত নাড়এ	তুই যন্ত্রী মুই যন্ত্র আয় নিরঞ্জন।

বলাবাহুল্য হাদিসের কথা হলেও তাতে লোকাচারের প্রভাবও রয়েছে।

খ. আইনউদ্দীন

রোসাসবাসী এই আইনউদ্দীন 'তফসীর' রচনা করেছেন। 'তফসীর প্রভাবে পাপ করহ মোচন'। বিশেষত এ তফসীর হাদিয়া যাহার। আরবি 'তফসীর হোসেনী ও ফুতুহল আজিজ' তার মুখ্য অবলম্বন।

কবি কাব্যের উপক্রমে অনেকের প্রশংসা গেয়েছেন, আরবি হরফে লেখা প্রাপ্ত পাণ্ডুলিপি^১ দুস্পাঠ্য ও আওনে ক্ষতিগ্রস্ত। রহমত আলী, রাজু (রামু?) নিবাসী জৈনুদ্দীন, 'কিম' গ্রামের ইব্রাহিম ও কাজী-পুত্র আছিরাস এবং মোরস (মোহস?) দ্বীপের বিহারচক্র গ্রামের মুন্সী কাসিম আলি আর ইব্রাহিমের সঙ্গী ফতেহ আলী ও ঈসা আলীর সাহেব ক্যেয়ুক বা ক্যেবুক কাজি।

শ্রীযুত আছিরাস কাজির সন্তান।

শরাজ্জাতা ইব্রাহিম ও ভগ্নীসুতান।

^১ পৃথি পরিচিতি, পৃঃ ৬৪৬-৫৮।

আছিরাস প্রসিদ্ধ ব্যক্তি— ‘তান নামগুণধাম প্রচার রোসাস’। আছিরাস সম্ভবত এর ডাকনাম ‘খ্যাতিচন্দ্র দীপ্তিবর ডাক আছিরাস’। এবং এই আছিরাসের পিতা ছিলেন রোসাস রাজের (কাজী?) অমাত্য—

তান পিতা মহাদাতা অমাত্য রাজার

প্রতিষ্ঠার পতিবর সুবর্ণ হীরার (?)

মনে হয়, আছিরাসের পিতা রাজসভায় কাজি ছিলেন, এবং সে অর্থেই অমাত্য বলা হয়েছে। আছিরাসের ভাগ্নে ইব্রাহিম শরাজ্জানী তথা আলিম ছিলেন। ‘শরাজ্জানে আল্লা তানে করিছে প্রধান’।

ভণিতা ১. দীন হীন আইনুদ্দীন অতি পুণ্যক্ষীণ

২. দীন হীন পুণ্যক্ষীণ পাপী আইনুদ্দীন।

‘তারাবীর নামাজের বিদায় আমার’— কবির এ উক্তি মনে হয় তিনি হাফিজের কোরআন ছিলেন।

১৭৮৫ খ্রীস্টাব্দে আরাকানরাজ্য ধর্মরাজ্যভুক্ত হয়। অতএব রাজধানী রোসাস কেন্দ্রীয় আরাকানেই ১৭৮৫ খ্রীস্টাব্দের পূর্বেই কবি আইনউদ্দীন ‘তফসীর’ রচনা করেন। আঠারো শতকের আরাকানরাজ্যের আর দুইজন কবি হচ্ছেন আবদুল করিম খোন্দকার ও ‘ফালনামা’ প্রণেতা আবদুল গণি। ‘নিকাহ মঙ্গল’ প্রণেতা ও সঙ্গকার (সৈয়দ) আইনুদ্দীন ভিন্ন ব্যক্তি ও চট্টগ্রামবাসী।

দ. বালক ফকির

বালক ফকির ‘ফায়দুল মুকতদী’ নামের শাস্ত্রগ্রন্থ রচনা করেছেন। জন্ম থেকে মৃত্যু অবধি একজন মুসলিমের অবশ্য পালনীয় দায়িত্ব ও কর্তব্য সম্বন্ধীয় তথা নিত্যকার আচার-আচরণ সম্বন্ধীয় গ্রন্থ এটা। আঠারো শতকের দ্বিতীয়ার্ধে মুগাবতী, কালাকাম প্রভৃতি প্রণেতা ইদিলপুরবাসী মুনশী মুহম্মদ মুকিম পণ্ডিতও একটি ‘ফায়দুল মুকতদী’ রচনা করেছিলেন।

গৌড়ের এক ধনী সওদাগর মহব্বতের পুত্র সা’দুল্লাহ চট্টগ্রাম শহরের ত্রিশ মাইল উত্তরে মওলানগরে বসতি স্থাপন করেন। তাঁর পুত্র শিহাবুদ্দিন কাজী প্রথম জীবনে নিমকমহলের দারোগা ছিলেন। আঠারো শতকের শেষ পাদে তিনি দানে-ধর্মে ও বিদ্যায়-বিস্তে প্রখ্যাত ও প্রতিপত্তিশালী ছিলেন।^১ তিনি ফারসিতে একটি ফায়দুল মুকতদী লেখেন। বালক ফকির সেটিই বাঙলায় অনুবাদ করেন। বালক ফকিরের পীর ছিলেন আঠারো উনিশ শতকের কবি দরবেশ জ্ঞানসাগর প্রণেতা আলি রজা (১৭৫৯-১৮৩৭ খ্রীঃ)।

পূর্বের কখন এবে গুন গুণিগণ
যেইমতে হৈল এই কিতাব রচন।
শাহাবুদ্দিন নামে এক আলিম প্রধান
সৈয়দ বংশেত জন্ম অতি গুণবান।

সেই মহামতি তবে ভাবি নিজ চিত।
কুলধর্ম শাস্ত্রনীতি সবে আচরিতে
অল্পজ্ঞানী লোক সবে নিয়ম বুঝিতে
নানাশাস্ত্র হতে এই বাছি বাছি মূল

^১ হাসমত চৌধুরী রচিত ‘মলয়া-মাহমুদ’ কাব্য দৃষ্টব্য।

চাট্টিগ্রাম দেশে ছিল তাহান বসতি ।
সাহসিক ধনবন্ত সুকুলীন অতি ।
ধীর স্থির দেখি সব ফিরিস্গির গণে
বৃত্তি দিয়া ভূষিলেক আদরে সম্মানে ।-

একস্থানে লেখিলেন্ত বচন বহুল ।-
মনে গুণি লেখিলেন্ত ফারসি এবারতে ।-
মুঈজ্জীন ক্ষুদ্রমতি কিতাব কখন
বাঙ্গালা পয়ার ছন্দে করিলুঁ রচন ।

এ কাজে গুরুর প্রবর্তনাও ছিল :

দীন শেষ হৈল এবে যথ মুসলিয়ান
অনাচার করে নিত্য হারাইয়া জ্ঞান ।
তা নিবৃন্তে গুরু আজ্ঞা পাই হীনমতি
পয়ার প্রবন্ধে ইতি লেখিলুঁ ভারতী ।

ফায়দুল মুকতদী এই কিতাবের নাম
বাঙ্গালা পয়ার ছন্দে লেখিলুঁ উপায় ।
শাহ আলি রজা গুরু পদে নমস্কার
বালক ফকিরে ভণে কিতাব বিচারি ।

কাজী শাহাবুদ্দীন ও আলি রজা আঠারো শতকের শেষার্ধের ও উনিশ শতকের প্রথমার্ধের লোক । অতএব, বালক ফকিরও ঐ সময়কার কিংবা উনিশ শতকের গোড়ার দিকের কবি ।

৬. (মুন্সী) মুহম্মদ মুকিম (পণ্ডিত)

ফায়দুল মুকতদীর অপর লেখক হচ্ছেন গুলেবকাউলি রচয়িতা উক্ত ‘মুন্সী নাম মুহম্মদ মুকিম’ এবং ‘হায়রাতুল ফিকাহ’ রচয়িতার স্বগ্রাম ইদিলপুরবাসী ‘মুকিম পণ্ডিত সর্বশ্রেষ্ঠ’ । ফায়দুল মুকতদী সম্ভবত কবির শেষ রচনা । তার আগে জৈন কালাকাম ও মৃগাবতী নামে দুটো প্রণয়োপাখ্যান এবং ‘আয়ুব নবীর কথা’ নামের নৃত্য চরিত্রকথা রচনা করেন । কবির ভাষায়-

প্রেমরসকাব্য কথা সুগন্ধি শীতল
কালাকাম ভাঙ্গি কৈলুঁ পয়ার নির্মল
মোরে আজ্ঞা দিল পীর রচিত পয়ার
দেশীভাষে রঙ্গ কথা লোকে বুঝিবার ।

মৃগাবতী নামে আর পরীর নন্দিনী
মিত্রজনে শুনে সেই অপূর্ব কাহিনী ।
আয়ুব নবীর কথা আছিল কিতাবে
কিষ্কিৎ লেখিলুঁ তাহে প্রকাশি পুরায় ।

কবির কালাকাম, মৃগাবতী ও আয়ুব নবীর কথা আজো সংগ্রহ করা সম্ভব হয়নি । ফায়দুল মুকতদীতে রচনাকাল রয়েছে :

কিতাব হইল সাঙ্গ যেদিন অবধি
প্রকাশি কহিয়ে শুন দিন সন আদি ।
ঋতুবেদ চন্দ্র শত আশী আর নয়

ইতি সার জানমঘী সনের নির্ণয় ।
শ্রাবণের শেষপক্ষ দিন জুমাবার
বেলা অবসানে হৈল পয়ার সুসার ।

এর থেকে ১০৪৬ + ৮০ + ৯ = ১১৩৫ মঘী বা ১৭৭৩ খ্রীস্টাব্দ মেলে । কিন্তু এ সন তাঁর পীর আলি রজার (১৭৫৯-১৮৩৭) বয়সের সঙ্গে সঙ্গতি রক্ষা করে না, তাই বিতর্কপাঠ ‘বেদ ঋতু চন্দ্র শত আশী আর নয়’ হবে বলেই আমাদের বিশ্বাস । অর্থাৎ ৪ + ৬ + ১ শত = ১১০০ + ৮০ + ৯০ = ১১৮৯ মঘী বা ১৮২৭ খ্রীস্টাব্দ । অতএব, কবি উনিশ শতকের প্রথমভাগে তাঁর কাব্যগুলো রচনা করেন । কবি মুন্সী মুহম্মদ মুকিম পণ্ডিত কবি-দরবেশ আলি রজার (১৭৫৯-১৮৩৭) মুরিদ ছিলেন ।

ন. ফয়জুল্লাহ

বাঙলা সাহিত্যে সম্ভবত চারজন ফয়জুল্লাহ ছিলেন । গোরক্ষবিজয়, গাজীবিজয় ও সত্যপীর প্রণেতা শেখ ফয়জুল্লাহ সুলতান জমজমার কবি ফয়জুল্লাহ, পদাবলী রাগতালনামার মীর

ফয়জুল্লাহ এবং সত্যপীর প্রণেতা দোভাষী শায়ের ফৈজুল্লা। কারো কারো মতে মীর ও শেখ ফয়জুল্লাহ অভিন্ন ও বহুগ্রন্থ প্রণেতা। ফয়জুল্লাহর সুলতান জমজমা পুথিতে তিনটে কাহিনী রয়েছে। অর্থাৎ মৃত সুলতান জমজমার শির ও ঈসা নবীর কিসসা ছাড়াও তাতে আরো দুটো উপদেশাত্মক গল্প রয়েছে। একটি হচ্ছে, হযরত মুহম্মদ যখন আয়েশার সঙ্গে দাম্পত্য সুখে নিরুবেগে তন্দ্রাচ্ছন্ন তখন ক্রুদ্ধ আল্লাহ বলেন :

শুন মুহম্মদ তুমি আমা পাসরিয়া সৃজন করিল তোমা আমারে সেবিতে
আছিল শয়ন-সুখে মাঝে নির্ভয় হইয়া— হিত উপদেশ কহি উন্মত পালিতে।
এখন নবীর ঔদাসীনের দরুন কবির উন্মত তোমার নরক যাতন

পাপী কিবা পুণ্যবন্ত সব জনে জন।

তারপর ভীতব্রত রসুল ঘর ছাড়লেন, অনুশোচনা করলেন, ক্ষমা পেলেন। উপদেশ হচ্ছে কর্তব্যে ও এবাদতে উদাসীন ব্যক্তি আল্লাহর ক্রোধের শিকার হয়। তৃতীয় বিষয়টি হচ্ছে :

শুন কহি গুণিগণ প্রলয়ের কালে

পাপ ফলে পাইব দুঃখ শূন্যের সকলে।

হাসরের সময়ে রসুলের উন্মতদের পাপপুণ্যের মাত্রা অনুসারে বিশ ভাগে বিন্যস্ত করা হবে।

যারা নামাজ, রোজা, হজ, জাকাত প্রভৃতি দায়িত্ব পালন করেছে, গুরুজনকে মান্য করেছে, হিংসা, ঘৃণা পোষণ করেনি, পরোপকার করেছে, তারাই প্রথম শ্রেণীর পুণ্যবান।

দ্বিতীয় গল্পটিই হচ্ছে সুলতান জমজমা ও ঈসা নবীর বৃত্তান্ত। একদিন নবী ঈসা পথে এক মৃতলোকের মুণ্ডের দুর্গতি লক্ষ্য করে আল্লাহর কাছে জিজ্ঞাসা করলেন

নিজ মূর দিয়া (মনুষ্য) তনু করিছ সৃজন

অবশেষে এতেক দুর্গতি কি কারণ।

আল্লাহ হুকুমে মুণ্ডধারী ব্যক্তি জীবন্ত হলেন। তিনি ছিলেন সত্ত্বীপের অধীশ্বর প্রজাহিতৈষী দানশীল বিদ্বানানুরাগী আদর্শ রাজা। ইমান ছিল না তাঁর। তিনি ছিলেন গাজী পূজক। তাই চারশ' বছর ধরে সুশাসন করেও মৃত্যুর পরে তাঁর এই দুর্দশা হয়েছে। ঈসা নবীর আবেদনক্রমে আল্লাহ সুলতান জমজমাকে আবার বাদশাহ করলেন এবং ঈসা নবীর শিষ্যরূপে সত্তর বছর প্রজাপালন করে তিনি বেহেস্তের অধিকারী হলেন। এসঙ্গে ষড়মুণ্ড আজরাইল, মৃত্যুযন্ত্রণা, কবর-আজাব, নরকযন্ত্রণা প্রভৃতির ভয়ালতা বর্ণিত হয়েছে। ফয়জুল্লাহ সম্ভবত আঠারো শতকের এবং কুমিল্লা অঞ্চলের কবি।

প. মুহম্মদ কাসিম

মুহম্মদ কাসিম নামে অপর এক কবিও 'সুলতান জমজমা' কাহিনী রচনা করেছিলেন। এ কবিও আঠারো শতকের শেষ পাদে কিংবা উনিশ শতকের গোড়ার দিকে এ উপদেশমূলক গ্রন্থ রচনা করেছিলেন। উনিশ শতকে দোভাষী শায়ের বহুগ্রন্থ প্রণেতা মুহম্মদ খাতের এবং পুস্তক ব্যবসায়ী শায়ের গোলাম মওলাও [আব্দুল গফুর সিদ্দিকী অনুসন্ধান বিশারদের পিতা] এ বিষয়ে পুথি রচনা করেছিলেন।

ফ. হায়াত মাহমুদ

ইনি রংপুর জেলার ঘোড়াঘাটের 'ঝাড়বিশিলা' গ্রামবাসী ছিলেন। ঐর পিতার নাম শাহ কবির। ঘোড়াঘাটে কবির পিতা দেওয়ান ছিলেন। এর রচিত জন্মনামা (১৭২৩ খ্রীঃ), চিত্তউদ্দান বা সর্বভেদবাণী (১৭৩২ খ্রীঃ) হিতজ্ঞানবাণী (১৭৫৩ খ্রীঃ) আমিয়া বাণী (১৭৫৮ খ্রীঃ) এবং কামালনসিয়ত ও ফকিরবিলাস-এ ছয় খানা কাব্য রয়েছে, সেগুলো সম্বন্ধে যথাস্থানে আলোচিত হবে।

এখানে আমরা তাঁর রচিত শাস্ত্রবিষয়ক গ্রন্থ 'হিতজ্ঞানবাণীর' পরিচয় দিচ্ছি। ১১৬০ সালে তথা ১৭৫৩ খ্রীস্টাব্দে কবি বৃদ্ধকালে এ শাস্ত্র গ্রন্থ রচনা করেন পাঠকদের দোয়া পাবার উদ্দেশ্যে :

বৃদ্ধ যোগে ভাবি অতি বিরচিনু এই পুথি
সন এগারশত ষাট সালে
পড়িয়া গুনিয়া সবে আশীর্বাদ করে যবে
মোর গতি হয় অন্তকালে।

ওয়াজেব, একশ ত্রিশ ফরজ, ফরজ নামাজ, কেয়ামত প্রভৃতির শাস্ত্রীয় নানাকথা আলোচিত।

ব. ফৈজুদ্দীন

১৩৮৭ সনের মাঘ-চৈত্র সংখ্যা 'বাংলা একাডেমী পত্রিকা'য় অধ্যাপক সুলতান আহমদ ভূঁইয়া শব-ই-মেরাজ রচয়িতা এক ফৈজুদ্দীন পরিচিতি ও তাঁর আদ্যন্ত খণ্ডিত কাব্য ছেপে দিয়েছেন, ভাষাদৃষ্টে মনে হয় কবি দোভাষী পুথির পাঠক এবং উনিশ শতকের উষাকালে রচিত তাঁর এ কাব্য। তিনি মূলত সৈয়দ সুলতানের গ্রন্থের লিপিকর।

ভ. ননাগাজী

ননাগাজী নামের এক কবি ইব্রিসনামা রচনা করেছেন। ১৫ পত্রের ক্ষুদ্র পুথি। কি কি কাজে কিভাবে মানুষ শয়তানের কবলে পড়ে এবং তার থেকে সাবধান থাকার উপায় প্রভৃতি এ পুস্তি কায় বর্ণিত রয়েছে। ননাগাজী এক বাহাউদ্দিনের আশ্রয়ে ইব্রিসনামা রচনা করেছেন :

হীন ননাগাজী বাহাউদ্দিনের আশ্রয়ে
ইব্রিসের যত কথা হইল আদ্যে।

এ গ্রন্থ আঠারো শতকের শেষ পাদে কিংবা উনিশ শতকের গোড়ার দিকে রচিত বলে মনে হয়। কারণ পাণ্ডুলিপিগুলোর লিপিকাল ১৮৫১, ১৮৫৬ খ্রীস্টাব্দ।

ম. আবদুন নবী

আবদুন নবী নামের এক ব্যক্তি নসিয়তনামা ও কোরানের কায়দা তথা কোরআন পাঠের নিয়মাবলি রচনা করেছেন। আমীর হামজা (১৬৮০ খ্রীঃ) রচয়িতা আবদুন নবী ভিন্ন ব্যক্তি। এ

আবদুন নবীই সম্ভবত গুলেবকাউলির কবি মুকিম উক্ত 'অতি বৃদ্ধ মহাশয় আবদুন নবী'। অতএব আঠারো শতকের শেষার্ধের এ কবি উনিশ শতকের প্রথম পাদে বর্তমান ছিলেন। এক পদকার আকবর আলিই সম্ভবত 'হাদিসের কথা' রচনা করেছেন আঠারো শতকে।

এসব শাস্ত্রগ্রন্থ ছাড়াও উনিশ বিশ-শতকে বটতলার দোভাষী শায়েররা নানা বিষয়ে অনেক শাস্ত্রগ্রন্থ রচনা করে বাঙলার জিজ্ঞাসু মুসলিমদের প্রয়োজন মিটিয়েছেন। কেয়ামতনামার ফকিরচাঁদ, নামাজের কেতাবের আজমত আলী, মফীদুল মুমেনীনের আতাউল্লাহ, আসুরার সালাতের আবদুল কেতাবের আজমত আলী, মফীদুল মুমেনীনের আতাউল্লাহ, আসুরার সালাতের আবদুল ওহাব, মওতনামা ও আজাবুল কবরের আবেদ আলি খাঁ ও আশরাফ আলি খাঁ, নসিয়তনামার আবদুস সামাদ, ফরাজেজনামার ইসমাইল সেরেক্তাদার ও মুয়াজ্জম, নামাজ দরুদ, কবর প্রভৃতির জনাব আলি, একশত বত্রিশ ফরজের মুহম্মদ খাতের, তখীয়তুননিসা, আহাকামুল জুমা, সেরাতুন মুমীন প্রভৃতি রচয়িতা মালে মুহম্মদ প্রমুখের নাম এ ক্ষেত্রে স্মরণীয়।

য. মুজাফফর

কবি সৈয়দ সুলতানের দৌহিত্র চক্ৰগ্রামের প্রাচীন চক্ৰশালীবাসী কবি মুজাফফর 'ইউনানদেশের কথা' নামে এক পুস্তিকার প্রণেতা। কবি সৈয়দ সুলতানের পৌত্র মীর মুহম্মদ সফী এবং শরীফ শাহও কবি ছিলেন।

মুহম্মদ খান রচিত মজুল হোসেন কাব্যের মোহাম্মদ হানিফার লড়াই পর্বের লিপিকর হিসেবে মুজাফফর নিম্নরূপ আত্মপরিচয় দিয়েছেন :

সুলতান দৌহিত্র হীন চক্ৰশালা ঘর মুই হীন অধম যে বুদ্ধি ক্ষুদ্র কহি
কহে হীন মুজাফফরের এজিদ উত্তর। অশুদ্ধ হইলে শুদ্ধ ধীর করে সহি।

মনুষ্যজ্ঞানের পরিমিতি ও মনুষ্যশক্তির তুচ্ছতা এবং আল্লার অপার মহিমার দৃষ্টান্ত স্বরূপ গ্রীক পণ্ডিতদের অহমিকা, দাস্তিকতা এবং পতনের কথাই এ ক্ষুদ্র পুস্তিকার প্রতিপাদ্য বিষয় :

যবে বলে এক আকাশ হইয়াছে পুরান
আর এ কথা কহি শুন গুণিগণ নামাই বদলি দিমু নবী বয়ান।

ইনান (যুনান) দেশের কথা শুন দিয়া মন। ভণিতা :

দেশের লোক বহুল পণ্ডিত হেন কহে মুজাফফর মুসলমানি সার
প্রভুর কুদরুত তারা পারএ গণিত। রোজাতুন নামাজ হোন্তে করিবা উদ্ধার।
একদিন চারিজন বসি একত্তর শেষঃ ইমান দেশের পুথি হৈল আদএ
আকাশ উপরে দৃষ্টি করে নিরন্তর যেবা পড়ে যেবা শুনে বহু পুণ্য পাএ।

'আর এক কথা কহি শুন গুণিগণ' এভাবে আরম্ভ হওয়ায় মনে হয় এটি অন্য কোন পুস্তিকার বা পর্বের অংশ।

২. জিনাত

মধ্যযুগের বাঙলায় খণ্ড কবিতা বিরল। পাঁচালীর উপক্রমে স্তব-প্রশস্তি-বন্দনাদি রয়েছে বটে, কিন্তু স্বয়ংসম্পূর্ণ কবিতা হিসেবে এরূপ বাঙলা রচনার অস্তিত্ব দুর্লভ। হিন্দু-রচিত পাঁচালীতে থাকে নানা দেবদেবীর বন্দনা, মুসলিম লিখিত কাব্যে পাই হামদ (আল্লাহ-স্ততি) না'ত (রসুল প্রশস্তি) এবং আবহাব, পীর ও পিতামাতার উদ্দেশে প্রণাম। আমাদের আলোচ্য স্ততি একটি স্বয়ংসম্পূর্ণ রচনা। এটিই কবিতার স্বাতন্ত্র্যের সাক্ষ্য। আবদুল করিম সাহিত্যবিশারদ এর নাম দিয়েছিলেন জগদীশ্বর স্তোত্র।^১ এ নাম তাৎপর্যপূর্ণ। কেবল ঈশ্বর বন্দনা বললে এ তাৎপর্য অনেকখানিই থাকত অপ্রকটিত। কবিতাটি আসিকে স্তোত্র জাতীয় হলেও কসিদা, বন্দনা, স্তর কিংবা প্রশস্তিমূলক কবিতায় দুর্লভ ভাবচিন্তা একে বিশিষ্ট করে তুলেছে।

৯' x ৭' পরিমিত কাগজের বই। ডান দিক থেকে শুরু। অর্ধছিন্ন ও নিতান্ত জীর্ণবস্থা। ধরতেই পত্র ছিঁড়ে যায় এমনি অবস্থা। লিপিকাল কিংবা লিপিকরের নাম নেই। প্রায় দেড়শ বছরের পুরোনো। ১-১০ পত্রে সমাপ্ত। পুরোপাঠ উদ্ধার করা অসম্ভব।

প্রতিলিপির বয়স যদি দেড়শ বছর হয়, তাহলে কবির আবির্ভাবকাল আঠারো শতকের শেষার্ধ্বে অনুমান করা চলে। ভাষায় অবশ্য প্রাচীনতার ছাপ নেই। এমনকি উনিশ শতকের গোড়ার দিকেও যদি এ কবিতা রচিত হয়ে থাকে, তাহলেও এর মূল্য কমে না। কেননা এতে যে উদার মন ও উন্নত চিন্তার পরিচয় পাই, তা সে যুগে তো বটেই, একালের উচ্চ শিক্ষিতদের মধ্যেও দুর্লভ।

আলোচ্য প্রশস্তিটি নানাগুণে বিশিষ্ট :

ক. এর দুটো ভাগ। প্রথম ভাগের আল্লাহর মহিমা বর্ণন প্রসঙ্গে ধর্মতত্ত্ব ও মানব-বোধের সত্য সম্পর্কে এক উদার ও নিরপেক্ষ দার্শনিক আলোচনা রয়েছে। স্বল্প কথায় গভীর তত্ত্বের প্রাঞ্জল ব্যাখ্যা কবির অসামান্য ধীশক্তির ও প্রকাশ পটুতার পরিচায়ক। দ্বিতীয় ভাগে কবি আল্লাহর করুণা ও পাপ মুক্তি কামনা করেছেন।

খ. প্রথম ভাগে ব্যবহৃত ছন্দ মালঝাঁপ জাতীয় তরলপয়ার। মালঝাঁপে চরণের চতুর্থ, অষ্টম ও দ্বাদশ বর্ণে মিল থাকে। আর তরলপয়ারে থাকে চরণের কেবল চতুর্থ ও অষ্টম বর্ণে মিল। যেমন, মালঝাঁপ : সদাকাল সুরসাল হয় মাল ঝাঁপ। তরল পয়ার :

রীতি এর মিলনের সোপানের ধাপ	চতুর্থেতে অষ্টমেতে থাকে মিল যার
চতুর্থেতে অষ্টমেতে দ্বাদশেতে তার	ভিন্নাকারে বলে তারে তরল পয়ার।
মিত্রাঙ্কর পরস্পর দ্বি-অঙ্কর আর।	

শেষাংশ সাধারণ পয়ারে রচিত।

গ. বিশ্বাসের অঙ্গীকারে ধর্মের উদ্ভব। ধর্মতত্ত্বের ব্যাপারে মানুষ সাধারণভাবে চিরকালই যুক্তিবিরোধী ও বিশ্বাসপ্রবণ, এবং সে কারণে গোড়া ও অসহিষ্ণু। চৈতনিক সংকীর্ণতা ও গ্রহণবিমুখতা ধার্মিকতার অন্যবিধ লক্ষণ। আমাদের প্রাজ্ঞ কবি যুগ-দুর্লভ উদারতার ও মননশীলতার স্বাক্ষর রেখে গেছেন। আন্তিক আর ধার্মিক হয়েও তিনি কত সহজে ধর্মবুদ্ধির

^১ সাহিত্য পত্রিকা : শীত সংখ্যা, ১৩৭৩ সাল, বাঙলা বিভাগ, ঢাকা বিশ্ববিদ্যালয় দ্রষ্টব্য।

অসম্পূর্ণতার কথা দ্বিধাহীনচিত্তে অকপটে ব্যক্ত করেছেন, দেখে বিস্ময় মানি। কবি 'অন্ধ হস্তী' ন্যায় প্রয়োগে তাঁর বক্তব্য পেশ করেছেন। 'অন্ধের হস্তী দর্শন' নামের জনপ্রিয় গল্পের রূপক অবলম্বনে দুটো তত্ত্বের— ধর্মবুদ্ধির ও নাস্তিক্যের— রহস্য প্রকটিত। আটজন অন্ধের একজন ছিল রুগ্ন। যেতে পারল না সে হাতী দেখতে। সাত অন্ধ ফিরে এলো সাত প্রকার ধারণা নিয়ে। আর সাত ভাবে বর্ণনা দিয়ে তারা রুগ্ন অঙ্কটিকে হাতীর স্বরূপ বোঝাতে পেল প্রয়াস। রুগ্ন ব্যক্তিটি দেখল : 'সগু অন্ধ করে দ্বন্দ্ব অনৈক্য কথায়'। তখন তার মনে হল 'তবে হস্তী স্বয়ং নাস্তি'। হাতী যদি প্রকৃতই থাকত তাহলে এদের বর্ণনাও অভিন্ন হত। অতএব সে হল নাস্তিক। তাই সে বলে তোমাদের বর্ণিত রজ্জা কুলা ডাঙা মূলা স্তম্ভ বেড়া বা লাঠি— স্বরূপ হাতী বাস্তবের নয়— কল্পনার, এবং সবকিছুর সমন্বয়ে হাতীর পুতুল তৈরি করে তোমরা ধোঁকা দিচ্ছ লোককে।

হস্তে ঠেলে হস্তী বলে শিশুরা খেলাএ

লোকে বোলে হস্তী চলে লোকেরে ভাড়াএ।

আবার, সব ধর্মের সত্য রয়েছে বটে, কিন্তু পূর্ণাঙ্গ সত্য কোথাও নেই। কোনো একক মানুষের বোধের মধ্যে সত্য পূর্ণাবয়বে ধরা দেয়নি। খণ্ড সত্যকে অখণ্ড রূপে চালিয়ে দেবার ব্যর্থপ্রয়াসে তাদের জীবন ও মনন অপচিত। ধর্মাবদ্বাদের গৌড়ামির, চিন্তাসংকীর্ণতার, গ্রহণবিমুখতার ও অসহিষ্ণুতার মূলে রয়েছে এ সীমিত বোধ ও বুদ্ধি। আল্লাহর পুরো ধারণা দেয়া যাচ্ছে না বলে আল্লাহ নেই বলা যেমন নির্বুদ্ধিতা, আল্লাহ সম্বন্ধে সামান্য বোধকে পূর্ণ জ্ঞান বলে দাবী করাও তেমনি নির্বোধের অহমিকা মাত্র।

প্রত্যেকেই নিজের মত অভ্রান্ত বলেই জানে, কেননা, এর মূলে রয়েছে অন্ধের মতোই স্বতোপলব্ধ সত্যের বীজ। বিশ্বাসের স্ফূর্তি এসেছে এ পথেই। এর ফলেই জেগেছে স্বধর্মে আস্থা, আর পরধর্মে অবজ্ঞা। স্বধর্মনিষ্ঠ ব্যক্তি পরধর্মবিদ্বেষের তথা অন্যধর্মের প্রতি শ্রদ্ধাহীনতার মূলে রয়েছে এসব কারণ। কবি তাই বলেন : 'শাস্ত্রিকের নাস্তিকের ধর্ম সে প্রকার'।

তার কথা মানে কোথা পর্শিয়াছে করে

আত্মকথা সগু বৃথা প্রত্য নাহি করে।

অর্থাৎ একজনের আত্মোপলব্ধ সত্যও অন্যের প্রত্যয় জন্মায় না। একের সত্য অপরের আস্থা অর্জন করে না। কেবল যার যেই শাস্ত্র সেই জানে এই সত্য। কেননা, সবাই 'হস্তে ধরি দেখে করী মুদিয়া নয়ন'। ফলে 'জাতি যত শাস্ত্র তত নানা মত পাতি।' মনুষ্য জীবনের ও সমাজের বিভ্রমনার, অনৈক্যের, বিদ্বেষের, অপ্রেমের ও কোন্দলের বীজও নিহিত এখানেই। ধর্মবোধই লালন করে মানুষের মন-মনন, দান করে রীতি-নীতি আদর্শ, নিয়ন্ত্রিত করে প্রাত্যহিক জীবনের আচার-আচরণ, বিকাশ ঘটায় সামাজিক ও সাংস্কৃতিক জীবনের। কাজেই বিচিত্র ধর্মবুদ্ধিই বিভিন্ন মতের সম্প্রদায় ও নানা দ্বৈতবাদী সমাজ গড়ে তুলেছে। মানুষের জীবনের অর্ধেক দুঃখ-বিপদ এসেছে ধর্মবিচ্যুত থেকে। আজো হয়নি তার অবসান। হবেও না হয়তো কখনো। কেননা সব জানার, সব বোঝার ও সব থাকার অহমিকা থেকে এর উৎপত্তি।

জ্ঞান-অস্ত্রে শাস্ত্র-শস্ত্রে বুঝে পরস্পর

কাজেই, কি আফারে পুজি তারে কি লিখি মহিমা।

ঘ. কবি বলেন,

আদি যার নাহি তার অন্ত্য কোথা পাই
বুঝ সার করতার আদি অস্ত্র নাই।

কবির ধারণায় আল্লাহ লীলাময়ও—

যেই মানে যে না মানে পোষে দুই কুলে

আবার অকারণে, কার মাতা কার ভ্রাতা কার হরে পতি।
শিশু মরে যুবে মরে বৃদ্ধের সাক্ষাত।

কেবল তাই নয়, আঁখি পলে রসাতলে ক্ষেপে সে ভূপালে
সেইক্ষণে সিংহাসনে বসাএ কান্ডালে।
আজি কবে কিবা হবে নাহি বুঝি আজি
অগুস্তটে অপ্রকটে করে ছায়া বাজি।

কেবা জানে কোন স্থানে থাকে সে দয়াল অতএব মহিমার সিন্ধু তার নাহি পাএ কূল
তিন ঘরে নৃত্য করে অসংখ্য পুতুল।

আল্লাহ্ সম্বন্ধে যথার্থ ধারণাও রয়েছে তাঁর :

ছিলে যেন আছ তেন থাকিবে তেমনি। যথা দেখি মহিমা তোমার তথা পাই
কার মধ্যে নহ তুমি কারে ছাড়া নাই আঁখি হৈতে নিকটে ব্রহ্মাণ্ড হৈতে দূর।

আল্লাহ্র অপার মহিমা যে বর্ণনসাধ্য নয়, সে অনিবচনীয়তার কথাও তিনি ইসলামি ভঙ্গিতে
বর্ণন করেছেন (অবশ্য ব্রহ্ম সম্বন্ধেও হিন্দুপুরাণে এমন কথা রয়েছে) :

শক্তি কার কহে তার মহিমার সীমা তবু তার মহিমার অঙ্ক না পুরিবে।
যদি, সিন্ধু জলে বৃক্ষ ডালে লিখি নিরবিধি

ঙ : সৃষ্টিলীলায় বিস্মিত ও বিমুগ্ধ একটি চিত্তের পরিচয় মেলে গোটা 'হামদে'। আল্লাহর
মহিমার অপরিমেয়তার কথা বলতে গিয়ে আলাইল-চিত্তেরও এমনি আকুলি বিকুলি গুনেছি
আমরা পদ্মাবতীর 'প্রভুত্ব'তে।

আত্মত্যাগ-কামনায় কবির দ্বিতীয়াংশে যে স্তব করেছেন, তাও সৌন্দর্য ও বৈশিষ্ট্য বর্জিত
নয়। কবির কণ্ঠে পাই আবদারের সুর, সে সুরে আছে স্বাভাব্য, আছে ভক্ত হৃদয়ের মাধুর্য। কবি
বলেন :

আমি হেন পাপীহ কাহারে নাহি পাই না হের আমারে হের আপনা দাতব্য।
তুমি দেন দাতাহ কোথায় কেহ নাই। আমি পাপী বলিয়া কি দাতব্য ছড়িবে?
তুমি দাতা আমি পাপী যার যে কর্তব্য সকলি তোমার সৃষ্টি কোথা খেদাইবে!?

বিশেষত, যখন আমি দুঃখ পাইলে তোমার লভ্য নাই,
তখন হইলে তোমার দয়া আমি রক্ষা পাই।

কোন পুণ্যকর্মের দাবীতে এই মুক্তি-প্রার্থনা নয়, কবির একমাত্র ভরসা যে তিনি মুমীন :

সৃজিলে ব্রহ্মাণ্ড যেই সখার কারণ
আমি তাকে তোমার প্রেমের সখা মানি

দুনিয়ার পাঠক এক হও! ~ www.amarboi.com ~

আর, তোমাকেহ (আল্লাহকে) আমি দৃঢ় মনে এক জানি।

সাধন-ভজনে অবহেলা সম্পর্কে নিজের সমর্থনে কবির যুক্তি এই :

অন্তরে অনন্ত তুমি অনাদ্যের আদ্য

কাজেই দয়া করে ক্ষমা কর পাপ হর দেহগো নিস্তার।

পরিশেষে সব মুমীনের মতোই কবিও কামনা করেছেন, ইমানের সাথে মৃত্যু :

দীনহীন জিনতের এই মনস্কাম

দেহ ত্যাগে লইয়া তোমার আদি নাম।

চ : আল্লাহর মহিমার অনুধ্যানে কবি আশ্রয় করেছেন ইসলামি ইতিকথা। তিনি এ সূত্রে স্মরণ করেছেন শাদ্দাদ, নমরুদ, ফেরাউন, আবাবিল পাখী, হযরত আদম-হাওয়া, ইউসুফ, সোলায়মান ও রসুল মুহাম্মদের জীবনের গুরুত্বপূর্ণ ঘটনা।

বলেছি এ প্রশস্তি কবিতাটি নানাগুণে অনন্য। ললিতমধুর ছন্দের লাভণ্যে, কবিতার আঙ্গিক সৌষ্ঠবে, উচ্চ দার্শনিক চিন্তার অবতারণায়, আল্লাহর অনির্বচনীয় মহিমার অনুধ্যানে মুসলিম ঐতিহ্যের অনবরত সুপ্রয়োগে, মনের স্বচ্ছতায়, চৈতন্য ঐদার্যে, বুদ্ধির পরিচ্ছন্নতায়, সিদ্ধান্তের ঋজুতায় এবং পরিশ্রুত মননের সামগ্রিক প্রতিফলনে কবিতাটি বিশিষ্ট।

AMARBOI.COM

অষ্টম অধ্যায় সওয়ালসাহিত্য

দেশী মুসলমানের পক্ষে ইসলাম ছিল সুদূরের, শাস্ত্রের ভাষা ছিল অনায়ত্ত, ঐতিহ্য ছিল অজানা। তাই তথ্যে ও তত্ত্বে, জ্ঞেয়ে ও জ্ঞানে, সত্যে ও কল্পনায়, প্রাপ্তিতে ও প্রত্যাশায় তারা সঙ্কত-সামঞ্জস্য রক্ষা করতে পারেনি কখনো। ফলে একদিকে যেমন সূফীমতের আবরণে দেশী ঐতিহ্য তাদের অধ্যাত্ম সাধনা চলেছে, অন্যদিকে তেমনি ইসলামী তত্ত্ব-জিজ্ঞাসাও আকৃষ্ট করেছে তাদের। জীবনের বাস্তব প্রতিবেশের ও আদর্শের জগতের মধ্যে ব্যবধান ছিল দূস্তর। সাথে ও সাধ্যে ছিল না সমতা। তাই জ্ঞেয় ও জ্ঞান-দুই লঘু ও মনগড়া এবং ক্ষেত্রবিশেষ প্রাতিভাসিক।

কিন্তু আমাদের শাস্ত্রীয় মন-মতের ও শাস্ত্রশাসিত সমাজ-সংস্কৃতির বিবর্তনধারায় ইতিহাসের উপকরণ হিসেবে এসব রচনার সূচী তুচ্ছ নয়।

গ্রীক পণ্ডিতদেরও আগের কাল থেকেই প্রশ্নোত্তরের মাধ্যমে বিদ্যাচর্চার ও জ্ঞান আহরণের রীতি চালু রয়েছে। ফলে সেকালের গ্রন্থে গুরু-শিষ্যের কিংবা জিজ্ঞাসুর ও জ্ঞানীর প্রশ্নোত্তরের মাধ্যমেই ঐহিক ও পারত্রিক সব রকমের বিষয় ও শাস্ত্র আলোচিত হত। আঠারো শতক অবধি আমাদের বাঙলা ভাষায়ও উক্ত প্রাচীন রীতির অনুসরণে শাস্ত্রকথা ও তত্ত্বচিন্তা প্রশ্নোত্তরে লিপিবদ্ধ হয়েছে। এমনকি বঙ্কিমচন্দ্রও অনুশীলন গ্রন্থে এ পদ্ধতি অবলম্বন করেছেন।

মুসার সওয়াল, আবদুল্লাহর সওয়াল, মালিকার হাজার সওয়াল, গদা-মালিক সম্বাদ, সিরাজকুলব, হরগৌরীসম্বাদ, তালিবনামা, হায়রাতুল ফিকাহ প্রভৃতি উক্ত রীতিতে লিখিত বাঙলা গ্রন্থ। এই বৈশিষ্ট্যে গুরুত্ব দিয়ে এগুলোকে 'সওয়াল সাহিত্য' নামে চিহ্নিত ও অভিহিত করা অসম্ভব নয়।

একের অভিজ্ঞতাই অপরের কাছে জ্ঞান। কাজেই অভিজ্ঞতায় লভ্য জ্ঞানের বিকাশ ও বিস্তার চিরকালই মহুর। তা ছাড়া অভিজ্ঞতার পৌনঃপুনিকতায় জন্মায় পূর্ণ ও নির্ভুল জ্ঞান, সব ক্ষেত্রে তেমন পৌনঃপুনিক অভিজ্ঞতার সুযোগ ঘটে না। তাই আদি কালের মানুষের নানা বিষয়ক অনেক জ্ঞানই ছিল ত্রান্ত। বৈজ্ঞানিক পরীক্ষার যোগ্যতা তখনো অর্জিত হয়নি। ফলে জগৎ ও জীবন সম্পর্কে যত প্রশ্ন মনে জেগেছে তার বুদ্ধিমায়া ও কল্পনাপ্রসূত উত্তর সন্ধান করেই তাদের সন্তুষ্ট থাকতে হয়েছে। এমনি মনোময় ধারণা ভিত্তিক শাস্ত্র, জ্ঞান, তত্ত্ব ও তথ্য নিয়েই গড়ে উঠেছে মানুষের জীবন-ভাবনা ও জগৎ-চেতনা।

বৈষয়িক প্রয়োজন ছাড়া অন্য প্রয়োজনে সাধারণ মানুষ সাধারণত উদাসীন। তাই জ্ঞান, বিদ্যা ও ভাব-চিন্তার ক্ষেত্রে মানুষ পরবুদ্ধিজীবী ও পরচিত্তানুসারী। তা ছাড়া আজন্ম লালিত বিশ্বাস-সংস্কার ঘূর্ণমায়ায় সঞ্চিত কল্পিত সত্যের প্রভাবের কারণে উন্নীত হতে ধর্মশাস্ত্রীয় বিশ্বাসে

পরিণতি পায়। এ কারণেই আজকের দিনেও মানুষ বিদ্যালয় জ্ঞানকে অবহেলা করে এবং শাস্ত্রোক্ত সত্যকে বরণ করে নিশ্চিত হয়। সুতরাং মানবসভ্যতার শৈশব-বাল্যের সে-সব ধ্যান-ধারণা জগৎ-চিন্তা ও জীবন-ভাবনা আজো পরিচিন্তানুসারী উদাসীন মানুষের চেতনা নিয়ন্ত্রণ করে।

জগৎ ও জীবন সম্পর্কিত যেসব রহস্যজিজ্ঞাসা মানুষকে চিরকাল আকুল করেছে, সেগুলোর শাস্ত্রীয়, কাল্পনিক ও নীতিজ্ঞানপ্রসূত উত্তরদানের চেষ্টা আছে ‘সওয়াল সাহিত্যে’। যেহেতু জগতের ও জীবনের উৎস ও আধার হচ্ছেন স্রষ্টা আল্লাহ, সেহেতু জ্ঞানও আল্লাহশ্রোক্ত। রসুলের মাধ্যমে সে-জ্ঞান প্রচারিত ও প্রচলিত হয় মর্ত্যে। তাই মুসলিম জীবনে হযরত আদম থেকে হযরত মুহম্মদ (সা.) অবধি নবী পরম্পরায় জ্ঞান পরিপূর্ণতা লাভ করে।

মুহম্মদ আকিলের মুসানামা, নসরুল্লাহ খোন্দকারের মুসার সওয়াল, আবদুল করিম খোন্দকারের হাজার মসায়েল, ফয়জুল্লাহর সুলতানজমজমা, শেখ চান্দের তালিবনামা, হরগৌরীসম্বাদ ও শাহদৌলাপীর, মুহম্মদ খানের সত্যকলিবিবাদসম্বাদ, আলি রজার সিরাজকুলব, এতিম আলমের আবদুল্লাহর হাজার সওয়াল, শেখ সাদীর গদা-মালিকা সম্বাদ, সেরবাজের মালিকার হাজার সওয়াল বা ফক্করনামা, সৈয়দ নুরুদ্দীনের মুসার সওয়াল, মুহম্মদ আলীর হায়রাতুল ফিকাহ, আদম ফকিরের জোহরার সওয়াল, মুহম্মদ খাতেরের সাওয়াল ও জওয়াব প্রভৃতিতে মুখ্যত শাস্ত্রীয় জ্ঞান দানের চেষ্টা আছে। সে-জ্ঞান কখনো শরীয়তী, কখনো বা মারফতী। কিন্তু সব ক্ষেত্রে তা ধর্মশাস্ত্রানুগ নয়—লৌকিক বিশ্বাস ও শ্রুতিস্মৃতিভিত্তিক। লেখকদের অসম্পূর্ণ শিক্ষা অধ্যাত্মতত্ত্বে অগ্রহীণ, পীরনির্ভরতা ও দেশগত লৌকিক সংস্কারের প্রভাবই এ বিকৃতির মুখ্য কারণ। তা ছাড়া মুম্বীদের কাছে কোরআনই সব জ্ঞানের ও চিরন্তনতত্ত্বের উৎস ও আধার। এ বিশেষ ভাষ্যপর্বেই হয়তো লেখকেরা সব বিষয়েই প্রায় নির্বিচারে কোরআনের, রসুলের ও আল্লাহর দোহাই বরাত দিয়েছেন। প্রায় ক্ষেত্রেই না জেনে দিয়েছেন, জেনে দিয়েছেন কৃচিৎ। কাজেই তাঁদের পরিবেশিত সত্য ও শাস্ত্র, তথ্য ও তত্ত্ব; তাঁদের অধ্যাত্মচিন্তা, তাঁদের লব্ধজ্ঞান ও তাঁদের অর্জিত ধারণা তাঁদের কল্পনার ও জীবন-ভাবনার প্রসূন মাত্র। সাধারণ সত্য কিংবা বাস্তব তথ্যের সঙ্গে এগুলোর সম্পর্ক পরোক্ষ কিংবা অনির্ণীত।

শাস্ত্রকথার ফাঁকে ফাঁকে অন্য জ্ঞানদানের চেষ্টাও আছে। কিছু ভৌগোলিক কিছু পৌরাণিক, কিছু প্রাকৃতিক জ্ঞানদানের আয়োজন যেমন রয়েছে, ধাঁধা-হেঁয়ালির ব্যবস্থাও তেমনি বিরল নয়। বিদ্যা ও বুদ্ধি পরীক্ষার জন্যে অথবা রহস্যচিন্তা উদ্ভিক্ত করার জন্যেই হয়তো এগুলো দেয়া হয়েছে। এদিক দিয়ে ধাঁধা-হেঁয়ালির উপযোগিতা অবশ্যই স্বীকার্য।

মধ্যযুগের এই গ্রন্থের লেখকরা লোক-শিক্ষকের ভূমিকা নিষ্ঠার সঙ্গে পালন করেছেন। এ দৃষ্টিতে এদের ‘সওয়ালসাহিত্য’কে ‘লোকশিক্ষা গ্রন্থমালা’ নামে চিহ্নিত করা অসঙ্গত নয়। সেকালে কথকতার মাধ্যমে অথবা শ্রুতিস্মৃতির মাধ্যমেই নিরক্ষর মানুষ জগৎ ও জীবন, ধর্ম ও সমাজ, নীতি ও আদর্শ সম্বন্ধে জ্ঞান লাভ করতো। আর এভাবে লব্ধ জ্ঞান-বুদ্ধির আলোকে মানুষ পারিবারিক, সামাজিক, বৈষয়িক, নৈতিক ও ধর্মীয় দায়িত্ব ও কর্তব্য পালনে হত যত্নবান। সেদিক দিয়ে এ সাহিত্যের গুরুত্ব অপরিমেয়। কেননা, এতে মানুষের মনুষ্যত্বের বিকাশ না ঘটলেও সমাজশৃঙ্খলা রক্ষিত হয়েছিল, একটি স্থূল নীতিবোধ ও ধর্মচেতনা মানুষের পতন-পথ রুদ্ধ রেখেছিল।

১. মহম্মদ আকিল

মহম্মদ আকিলের পুথিতে একটি ভণিতা পাওয়া গেছে। এ ছাড়া কবির পরিচয় জ্ঞাপক আর কিছু পাওয়া যায়নি। নানা কারণে আলোচ্য কবি মুহম্মদ আকিলকে আমাদের প্রাচীনতর কবিদের মধ্যে অন্যতম বলে মনে হয়।

এক, ১৭৭৬ খ্রীস্টাব্দে লিপিকৃত পাণ্ডুলিপিই আঠারো শতকে এ পুথির অস্তিত্ব প্রমাণ করে। দুই, প্রায় সমকালীন দুই পাণ্ডুলিপিতে পাঠান্তরের প্রাচুর্য এ গ্রন্থের বহুল চর্চা ও প্রাচীনতার আভাস দান করে। তিন, সতেরো শতকের শেষার্ধের ও আঠারো শতকের এ বিষয়ক গ্রন্থগুলোর নাম মুসার সওয়াল এবং এ জাতীয় অন্যান্য গ্রন্থের সঙ্গেও সওয়াল শব্দটি যুক্ত রয়েছে যেমন, আবদুল্লাহর হাজার সওয়াল, মল্লিকার হাজার সওয়াল ইত্যাদি। এগুলির মধ্যে সওয়াল সংখ্যাও অনেক বেশি। তাই বইগুলো আকারেও বড়। আমাদের আলোচ্য গ্রন্থের নাম 'মুসানামা' এবং এর সংক্ষিপ্ততা ও একাধিক ভণিতার অভাব প্রাচীনতাদ্যোতক। বিশেষ করে সতেরো শতকের শেষার্ধে ও আঠারো শতকে 'মুসার সওয়াল' যখন সওয়ালাদিকা, বিষয়ে বিস্তৃতি ও বৃহদাকার লাভ করেছে, তখন মুসানামার মত সংক্ষিপ্ত গ্রন্থ রচনার প্রয়াস— মনে সহজেই সংশয় জাগায়। চার, এ জাতের অন্যান্য গ্রন্থের সঙ্গে প্রশ্নোত্তরের বিষয়বস্তুতেও এ গ্রন্থের তেমন মিল নেই।

এ সব বিষয় বিবেচনা করে আমরা মুহম্মদ আকিলকে সতেরো শতকের প্রথমার্ধের কবি বলে অনুমান করি। নিশ্চিত প্রমাণ পাওয়া না গেলে তার সম্বন্ধে আর কিছু বলা যাবে না। ক'লে (কে) থু (থেকে) প্রভৃতি শব্দের প্রয়োগ দেখে তাঁকে চাটগাঁর কবি বলে মনে হয়।

আমাদের আলোচ্য গ্রন্থে জগৎ ও জীবন সম্বন্ধে মানব মনের চিরন্তন প্রশ্নের মনোময় উত্তর খোঁজা হয়েছে। কেতাবীদের বিশ্বাস-ইযরত মুসা 'তুর' পর্বতে বসে আল্লাহর কাছে প্রশ্ন করে করে জগৎ ও জীবনের নানা তত্ত্ব জেনে নিতেন। সাঁইত্রিশ শ' বছর আগেকার হযরত মুসার সে তত্ত্বালোচনা আজো প্রাকৃত মনের কৌতূহলাবেগ তৃপ্ত করে। বলেছি জগৎ ও জীবন সম্বন্ধে মানবমনে যে চিরন্তন জিজ্ঞাসা রয়েছে তারই জবাব খুঁজেছেন কবি। মুহম্মদ আকিল প্রাকৃতজনের কবি, তার সিদ্ধান্তও তাই প্রাকৃত মনানুগ। জগৎ ব্যাপারে কবি স্রষ্টার অনন্ত মহিমায় ও সৃষ্টির বিরটিটে অভিত্ত এবং জীবন সম্পর্কে নারী মহিমায় মুগ্ধ।

হযরত মুসা আল্লাহকে প্রশ্ন করেছেন :

যেখনে না ছিল পূর্বে স্বরূপ আকার
কোহ রূপে কথাএ আছিল করতার।

যেখনে না ছিল কিছু দুনিয়া পত্তন
কথাএ আছিল প্রভু কহ নিরন্তন।

আল্লাহ বলেছেন :

যেখনে আছিলাম পূর্বে জান ব্রহ্ম কাএ
অখনেই আছি তথা জান সর্বথাএ।
সেই স্থান এড়ি আঁকি কথাহ না যাই
ত্রিভুবনের লক্ষ্য আঁকি আঁকার লক্ষ্য নাই।
সর্বঘটে আছি আঁকি ভাবি চাহ মন
বাহিরে ভিতরে আঁকি আছি সর্বক্ষণ।

হস্ত নাহি আঁকার নাহিক রূপ রেখ
সূরত সূরত নাহি জানিঅ প্রতেক (প্রত্যক্ষ)
বালি হস্তে ছোট আছি আঁকি সর্বথাএ
হারাইতে না পারি আঁকি জানিঅ নিশ্চয়।
সর্বঘটে আছি আঁকি দৃষ্টি মধ্যে নবী
জল মধ্যে বিন্দু আঁকি ঢেউ মধ্যে পানি।

আঠার হাজার আলম হইব নিধন;
কদাচিত্ না টলিব মোর সিংহাসন । ...
আকাশের তারা যথ সমুদ্রের ধূলি ।...
একস্থানে বসি আন্ধি দেখিও সকল

আন্ধার দর্শন হেতু চাহে যেই জনে
আপনা আতমা সে সেবিব আপনে ।
আতমা চিনিয়া সিদ্ধি ঘরে কৈল সার
নিশ্চয় পাইব সে আন্ধার দিদার ।

আল্লাহর সৃষ্ট জগৎগুলো হচ্ছে হাজার হাজার ডিম্বস্বরূপ । কৌতূহলী মুসা একডিম্বে প্রবেশ করে দেখেন— রবি-শশী, সপ্তসাগর, জল-স্থল-কানন-গগন-দেও-পরী-পক্ষী-নর । এভাবে সতেরো হাজার বছর এক ডিম্বে ভ্রমণ করেও এক ডিম্বেরও 'ওর' বা সমগ্ররূপের নির্ণয় পেল না । কাজেই 'আঠারো হাজার আলমে না জানি কথেক' । কবি জননীর ও জায়ার মাহাত্ম্যও বর্ণন করেছেন । জায়া :

শরীরের অর্ধঅঙ্গ ঘরের রমণী
দুই হস্তে দুনিয়াতে ভাবের ভাবিনী

নারী না থাকিলে পুরুষ কিছু না হএ
নারী-পুরুষ এক জানিঅ নিশ্চিএ ।
পুরুষ আর্ত জান রমণীর হাতে ।।

এছাড়া রয়েছে গুণ-জ্ঞানও পাপপুণ্য সম্বন্ধে সংক্ষিপ্ত ভাষণ । সতেরো শতকের মানসধর্মের সাক্ষ্য হিসেবে মুসানামার মূল্য কম নয় ।

২. শেখ সাদী

এহ্নে কবি শেখ সাদী 'রাজপ্রশস্তি' করেছেন । সেই প্রশস্তি থেকে পরোক্ষে কবির আবির্ভাবকাল ও কাব্যের আনুমানিক রচনাকাল নিরূপণ করা সম্ভব । প্রশস্তির প্রয়োজনীয় অংশ এখানে বিধৃত হচ্ছে :

ত্রিপুরা নামেতে এক আছএ দেশ
এবে আমি কহি কিছু তাহার উদ্দেশ ।
ধর্মবন্ত নরপতি মহিমা সাগর
অবিশ্রান্ত দান ধর্ম করে নিরন্তর ।...

রত্নসেন নামে তথা বৈসে মহারাজা
কুকি মেখল সব করে যার পূজা ।
চম্পা রাএ নাম তাত ধর্ম যুবরাজ
রাজ্যের পালন করে মস্তীর সমাজ ।

ত্রিপুরারাজ রত্নমাণিক্যের সময়ে শেখ সাদী তাঁর কাব্য রচনা করেন । রত্নমাণিক্যের রাজত্বকাল ছিল ১০৯২-১১২২ অথবা ১১১৬ ত্রিপুরার, ভূপেন চক্রবর্তীর মতে ১৬৮২ থেকে ১৭১২ খ্রীস্টাব্দ অবধি । রত্নমাণিক্য মহারাজ রামমাণিক্যের সন্তান । সিংহাসনারোহণ কালে রত্নমাণিক্যের বয়স ছিল পাঁচ বছর । ১৬৯৫ খ্রীস্টাব্দে বয়োপ্রাপ্ত রাজা শাসনভার স্বহস্তে গ্রহণ করেন । রামমাণিক্যের দ্বিতীয় ভ্রাতা জগন্নাথ ঠাকুরের পুত্র চম্পক রায় কিছুকাল রত্নমাণিক্যের প্রথমে দেওয়ান ও পরে যুবরাজ ছিলেন । 'চম্পক বিজয়' গ্রন্থ এই চম্পক রায়ের কীর্তিই বর্ণিত হয়েছে । কিন্তু সে-গ্রন্থ অপ্রকাশিত ও অনালোচিত ।

চম্পক রায় ১৬৮৪ খ্রীস্টাব্দেই যুবরাজ হন এবং বয়োপ্রাপ্ত রাজার আমলে ১৬৯৫ খ্রীস্টাব্দের অনতিকাল পরে কোন সময়ে নিহত হন । এতে মনে হয়, শেখ সাদী ১৬৮৪-১৬৯৫ খ্রীস্টাব্দের মধ্যে তাঁর কাব্য রচনা করেন ।

লোক উপকারী ছিল চম্পারায় ।

ধর্মশীল কীর্তিমন্ত সবে গুণ গায় ।।

-এটি সম্ভবত চম্পক রায়ের মৃত্যুর অব্যবহিত পরের কোন লিপিকারের সংশোধিত পাঠ। অথবা এটিই শুদ্ধ পাঠ। তা হলে মানতে হবে যে চম্পক রায়ের মৃত্যুর পরে কোন সময়ে সাদী তাঁর কাব্য রচনা করেন। অধ্যাপক আলী আহমদ সংগৃহীত [?] একটি খণ্ডিত পুথিতে দুটো অর্থপূর্ণ চরণ পাওয়া যায় :

পড়িয়া বুঝিয়া সব শাস্ত্রের উদ্দেশ

একাদশ বিংশ দুই পুস্তক বিশেষ।

একাদশ বিংশ দুই = ১১২২। এটিকে ত্রিপুরাধ্ব ধরলে ১৭১২ খ্রীস্টাব্দ পাওয়া যায়। ডক্টর মুহম্মদ এনামুল হকও একে রচনার তারিখ ও বঙ্গাব্দ রূপে ধরে ১৭১৫ খ্রীস্টাব্দে ‘গদা-মালিকা’ রচিত হয়েছে বলে স্বীকার করেছেন। অধ্যাপক আলী আহমদও বলেন, “আমরা যদি ধরিয়া লই যে, শেখ সাদী তাঁহার গদা-মালিকা কাব্য ১৬৮৪ (সনের) পরে ও ১৭১৫ খ্রীস্টাব্দের পূর্বে রচনা করিয়াছিলেন তবে সকল সন্দেহ দূর হইয়া যায়।”^১

চম্পক রায় যখন চট্টগ্রামে পলাতক-জীবনযাপন করছেন, তখন এই শেখ সাদীর সঙ্গে তাঁর পরিচয় হয়। আত্মপরিচয় দান প্রসঙ্গে চম্পক রায় সাদীকে বলেছেন :^২

ত্রিপুর বংশেত জন্ম বসি উদয়পুর

জ্ঞাতি সঙ্গে বাদ করি হইছি স্বাধীন।

সাদী নিজে বলেছেন :

শেখ সাদী তাত ক্ষুদ্র একজন

সভাসনে বড় সৈন্যে অতি বিচক্ষণ।

সম্ভবত ধার্মিক সাদীর দ্বারা প্রভাবিত চম্পক রায় দুর্দিনে উপকৃত হয়েছিলেন এবং সৌভাগ্য-উদয়ে তিনি সাদীকে উদয়পুরে এনে রাজদরবারে কোন চাকুরী দিয়েছিলেন। অতএব শেখ সাদীর জন্মভূমি তথা পিতৃভূমি সম্ভবত চট্টগ্রাম।

কবি শেখ সাদী রচিত ‘গদা-মালিকাসম্বাদ’ ও সওয়ালসাহিত্য। অন্যান্য সওয়াল সাহিত্যে মুসা ও আব্দুল্লাহ, আলী ও রসূল মুহম্মদ, হর ও গৌরী, আবদুল্লাহ ও রসূল, শিষ্য ও পীর প্রভৃতির কথোপকথনের মাধ্যমে গুরুতর বিষয় আলোচিত হয়েছে। পাঠকের ও শ্রোতার কৌতূহল জাগাবার উদ্দেশ্যে শেখ সাদী ও কবি সেরবাজ শয়ম্বরকামী বিদুষী রাজী বা রাজকন্যা কর্তৃক বিদ্যা-বুদ্ধির ক্ষেত্রে ভাবী বরের যোগ্যতা পরীক্ষাচ্ছলে প্রশ্নোত্তর পরিবেশন করেছেন। কবির উদ্দেশ্য সফল হয়েছিল। তার প্রমাণ কবি শেখ সাদীর ও কবি সেরবাজের গ্রন্থের পাণ্ডুলিপি কুমিল্লায় চট্টগ্রামে আজো সুলভ। বোঝা যাচ্ছে সন্ধানী পাঠক-শ্রোতা পরম আগ্রহে উক্ত দুটো পুথি পড়েছেন ও শুনেছেন। রোমান্সের মোড়কে নীরস ধর্মকথা শোনানোর এই সদিচ্ছা এ কালের মিষ্টি-ওষুধের কথা স্মরণ করিয়ে দেয়।

এখানে প্রশ্নোত্তরের কিছু নমুনা দিচ্ছি। শাস্ত্র কথায় দলিল হিসেবে নিঃসঙ্কোচে কোরআনের আয়াতের দোহাই দেয়া হয়েছে, যদিও কোরআনে তা কুচিৎ মিলবে। দেশ-দুনিয়ার নানা কথাও প্রশ্নোত্তরে বিধৃত। আর প্রহেলিকাও বিরল নয় :

^১ বাঙলা একাডেমীতে রক্ষিত। ‘বাঙালী কবি শেখ সাদী’ প্রবন্ধ পৃ. ১৬।

^২ মৎসম্পাদিত সওয়ালসাহিত্য গ্রন্থ দ্রষ্টব্যে।

- প্রশ্ন : কোথা হস্তে আসিরাছ কহ তুমি সাচ?
কোন স্থানে থাক তুমি কহ মোর ঠাই?
- উত্তর : পিতার ঔরস আর মাতৃগর্ভ হতে
নানা স্থানে থাকি আমি স্থান স্থিতি নাই।
- প্রশ্ন : কি ষাও এবং কি পান কর?
- উত্তর : খাই আবেরের গম এবং 'গুনা পিই অবিরত'।
আল্লাহর উদ্ভব, রসুলসৃষ্টি ও জগৎ-পসনের দীর্ঘ বর্ণনার পরে—
- প্রশ্ন : তবে পুছে কথা হতে স্বর্গ নরক সৃজন?
- উত্তর : আল্লার গজব দৃষ্টে দোজখ হইছে
কোহতুরের দৃষ্টে ভেহেস্ত নির্মিছে।
- অন্যত্র, (আল্লার গৌরব দৃষ্টে ভেহেস্ত নির্মিছে।)
- প্রশ্ন : তবে পুছে রবি শনী কা হতে জন্মিল?
বীর্ষের উৎপত্তি বোল কিরূপে হইল?
- উত্তর : প্রভুর ধ্যান হইতে তারা (রবী শনী) উপজিল।
নূরের যে অঙ্গ হতে (বীর্ষ) সৃষ্টি করে কহিল।
- তারপর, দিন রজনী, সুমেরু কুমেরু-শ্রেণীর সৃষ্টিতত্ত্ব বর্ণিত।
- প্রশ্ন : আব আতশ থাক হাত কিরূপে হইছে?
- উত্তর : নূরের অঙ্গের ঘর্মে প্রভুএ সৃজিছে;

রিজিক ও দৌলত :

পূর্বদিক হস্তে জ্ঞান রিজিক আইসএ
পশ্চিম দিক হস্তে দৌলত জানিও নিশ্চএ।

দেহের হাড়ের ও রংগের সংখ্যা :

(গদা বোলে তিনশত ষাটখান জ্ঞান।
তিনশত ষাট 'রং' জানিও নিশ্চএ।

মালিকা এবার প্রহেলিকার আশ্রয়ে প্রশ্ন করল :

তবে আর এক কথা পুছে মালিকাএ বৈশ কম নাহি জ্ঞান সমসর তাত।
এক বৃক্ষের বার ডাল আছএ নিশ্চএ। এক পুষ্ঠে 'ছহা' রঙ্গ গুন কহি সার।
এক এক ডালে ধরে ত্রিশ ত্রিশ পাত, এক এক পত্র মধ্যে পঞ্চ পঞ্চ ফুল।

উত্তর হচ্ছে :

বৃক্ষ হল বৎসর, ডাল হল মাস, পাতা হল দিন,
পাতার সাদা কাল রঙ হল দিবা-রাত্রি এবং
পঞ্চফুল হচ্ছে দিনের পাঁচ ওয়াক্তের নামাজ।

প্রশ্ন : কোন্ কোন্ নবী বাদশাহও ছিলেন?

উত্তর : ইউসুফ, সোলেমান, জুলকর্ণ ও মুহম্মদ(এই চারজন।

প্রশ্ন : চিরজীবী কারা?

উত্তর : ঈসা আর ইলিয়াস, আশি আজগর (ইদ্রিস)

খিজির যে পয়গম্বর এই জান চার।

এঁদের মধ্যে ঈশা ও ইদ্রিস যথাক্রমে আকাশে ও স্বর্গে বাস করেন, এবং খিজির জলে এবং ইলিয়াস স্থলে বিচরণশীল।

আরো কিছু তত্ত্বকথা : নামাজ দীনের 'হুনি' বোলএ ফকিরে।

রোজা দীনের টাটি জানিঅ নিশ্চয়।

এলম দীনের 'ছানি' ফকিরে যে কএ।

কলিযুগের প্রধান লক্ষণ হচ্ছে তামাক সেবন :

পদা কহে যেই ক্ষণে কলির প্রবেশ

তামাকু পিবারে লোকে করিব আবেশ।

অন্ন হতে তামাকু জানিব বড় ধন

তামাকুতে বৃদ্ধ বালকের রহিব জীবন।

লজ্জা হারাইব লোকে তামাকুর হতে

হাটিতে চলিতে লোকে পিব পথে পথে।

পিতায় তামাকু পিতে পুত্রে করে আশ

তামাকু তু করিবেক ভুবন বিনাশ।

কলিযুগে অন্যান্য লক্ষণ :

ক. লোকে মিছাকথা কইব দিনে চারিশত বার

বে-ইমান হৈব লোক সংসার সাধার।

খ. নারী পুরুষের মধ্যে ভেদ না থাকিব

পুরুষ নারীর কথা ধরিয়া চলিব।

পুরুষের কথা কতু নারী না ধরিব।

গ. বাপে পুতে দ্বন্দ্ব করিব প্রতিনিত-

ঘ. সোয়ামীর সর্হিতে নারীর না রৈব পিরীত।

ঙ. অকুলীন কুলীন হৈব কুলীন হৈব হীন

চোর উজ্জ্বল রৈব সাধু হৈব মলিন

চ. বিষ্ণু-প্রমাণ জান নর সব হৈব।

আব্বাহ, রসুল ও কোরআনের দোহাই দিয়েই বিশ্বাসযোগ্য করবার জন্যে কবি তাঁর কাব্যকে ফারসি কাব্যের অনুবাদ বলে দাবি করেছেন।

মুঐঃ দাসাধম কিছু কিতাব দেখিয়া

শেখ সাদীএ কহে পাঁচালী রচিয়া।

এক নিবেদন করম সবার চরণ

এমনকি 'কোরান আয়াত পড়ি' ফরিক দেহে চাঁদ-সূর্য-নক্ষত্র-পবন আর রাশি-চক্রের সংস্থিতিও বর্ণনা করে।

ফারসি বাঙ্গালা করি করিলুঁ রচন।

যে সবে কিতাব না পড়িছে পৃথিবীত

সে সকলে বুঝিবার করিলুঁ রচিত।

৩. এতিম আলম

সওয়ালসাহিত্যের অন্তর্গত আর একখানা গ্রন্থ হচ্ছে কবি এতিম আলমের 'আবদুল্লাহর হাজার সওয়াল'। হাজার মসায়ল নামে একই বিষয়ে আবদুল করিম খোন্দকারও অপর একটি কাব্য রচনা করেছেন।

নবুয়ত প্রাপ্তির পর খবদেশের ইহুদী নৃপতি সালামপুত্র আবদুল্লাহকে ইসলাম গ্রহণের আহ্বান জানিয়ে হযরত মুহম্মদ এক পত্র লেখেন। পত্র পেয়ে মুহম্মদের নবুয়তের সত্যতা যাচাই করবার জন্যে আবদুল্লাহ সপ্রজা ও সৈন্য মদিনায় আগমন করলেন। এবং মুহম্মদকে এক হাজার প্রশ্ন করে ও সদুত্তর পেয়ে তিনি সপ্রজা ইসলাম কবুল কবে ধন্য হলেন।

ইসলামোত্তর যুগের উপকথানির্ভর এসব গ্রন্থ মৌলিক রচনা নয়। আরবি-ফারসি গ্রন্থোক্ত কাহিনীর পল্লবিত বাঙলা রূপায়ণ মাত্র। অতএব মূলানুগত্য যেমন রয়েছে, দৈশিক-লৌকিক প্রভাবও তেমনি ঠাঁই পেয়েছে।

আবদুল করিম সাহিত্যবিশারদ এতিম আলমের গ্রন্থের একখানিমাত্র পাণ্ডুলিপি সংগ্রহ করতে পেরেছিলেন। সেটিই আমাদের অবলম্বন। পুথি পরিচিতির ক্রমিক ২৪৯ সংখ্যক বিবরণী এ সূত্রে দ্রষ্টব্য।

এতিম আলম সম্বন্ধে আজো কিছু জানা যায়নি। এই একটিমাত্র আবিষ্কৃত পুথিই তাঁর নাম ও কৃতি স্মরণীয় করে রেখেছে।

কবির পীরের বা মুরশিদের নাম শাহ কুতুব মনওর। 'শাহ কুতুব (মনওর) মোর মুরশিদের নাম।' এবং কবি এ পাঁচালী 'নিজ মনে কল্পি কহে কিতাব হেরিয়া'।

ইহুদী রাজা আবদুল্লাহ গুণী-জ্ঞানী ব্যক্তি ছিলেন। রসুলের আহ্বানপত্র পেয়ে তিনি অভিযানে অহঙ্কারে রুষ্ট বা ক্ষুব্ধ হননি বরং মুসা নবীর বাণী উল্লেখ করে তাঁর প্রজাদেরকে শেষ নবী মুহম্মদের শিষ্যত্ব গ্রহণের পরামর্শ দিলেন।

তিনি বললেন—

আবদুল্লাহর সূত নবী মোহাম্মদ নাম

পৃথিবীতে না হৈছে তাহান সমান।

আল্লাহর পরম সখা গুণে অনুপাম।

যদি সে কহিতে পারে বচন আশ্কার

অবশেষে হইবেক রসুল প্রধান

নিশ্চয় জানিব তারে রসুল আল্লাহ।

প্রশ্ন : কোন্ চারি চিহ্ন বাড়ি (শ্রেষ্ঠ) ভুবন মাঝার?

উত্তর : মানুষ, স্বর্গের তুবাবুক্ষ কোরান এবং ভিহিস্ত।

প্রশ্ন : কোন্ সংখ্যা কার বা কিসের প্রতীক?

উত্তর : এক-আল্লাহ, দুই-আদম-হাওয়া, তিন-তালাক, চার-চার কিতাব, পাঁচ-নামাজ, ছয়-সৃষ্টিপত্তনের ছয়দিন, সাত-আকাশ ও পাতাল, আট-আল্লাহর অষ্ট ফিরিস্তা ইত্যাদি।

অতঃপর দ্বিতীয় পর্বে সৃষ্টিতত্ত্ব সবিস্তার বর্ণিত রয়েছে। সপ্তম আকাশে রয়েছে আবে হায়াতের নদী। তার কাছে আছে আর এক নদী, তার জল সুবাসিত এবং তাঁর নাম 'কমকম'। এক এক আকাশের এক এক রঙ, এক এক অমূল্য পাথরে ও ধাতুতে নির্মিত— এয়াকুত, জমরুদ, রজত, কাঞ্চন, মুক্তা, লাল।

প্রশ্ন : চন্দ্রসূর্য আছে কোন্ আকাশ উপর?

উত্তর : চতুর্থ আকাশ 'পরে আছে দিবাকর

প্রথম আকাশে চন্দ্র থাকএ নিশ্চিত।

আট-স্বর্গ : রজতের নির্মিত দারুসসালাম, এয়াকুতের করার, জমরুদের খয়রুল, জবরুদের ইদ্রিস, মুক্তার চুমাহোজ, মাণিক্যের আদনান, নূরের জিন্নত।

নবীদের পুরুষানুক্রমিক পরিচিতি :

আদম-শিশু-ইসুন-হুনান-মোহালাল-ফর-আক্কাস-মসুয়া-মলক-নূর-শাম-আফতমা-শেখ-হুদ-কাতেয়া-আগুয়াস-তাখুর-তারক-আজর-ইব্রাহিম খলিল-ইসমাইল একদার-হাম-কএস-সজীব-আলাম-বসিয়া-আহুদ-আদ-আদনান-সায়াদ-নজীব-মর্জর-ইলিয়াস-মদক-আদিয়া-কনিয়ান-নজর-মালিক-কএর-গালিব-ওহাব-আদিয়ন-মরত-নসর-কুলাব-কৌস-আবদুল মুনাফ-হাশিম-মুতালিব-আবদুল্লাহ-মুহম্মদ।

এইভাবেই চিরকাল লোকসাধারণ ঐহিক ও পারত্রিক বিষয়ে জ্ঞান লাভ করেছে এবং শাস্ত্রকথারূপে এগুলো নিষ্ঠার সঙ্গে বিশ্বাস করেছেন। তাতে নিয়ন্ত্রিত হয়েছে তাদের জীবন-চেতনা ও জগৎ-ভাবনা।

৪. আলি রজা [১৭৫৯-১৮৩৭]

ইদানীং সাহিত্যক্ষেত্রে আঠারো শতকের কবি আলি রজার নাম সুপরিচিত। আবদুল করিম সাহিত্যবিশারদ তাঁর রচিত সব কয়টি গ্রন্থ সংগ্রহ করেছিলেন। তাঁর রচিত পদাবলী এবং জ্ঞানসাগর প্রকাশিত করে এবং তাঁর সম্বন্ধে প্রবন্ধ লিখে সাহিত্যবিশারদ আলি রজাকে বাঙালী পাঠকের কাছে প্রখ্যাত করে তোলেন। আলি রজা পদাবলী, আগম-জ্ঞানসাগর, ধ্যানমালা (সঙ্গীত শাস্ত্রগ্রন্থ), সিরাজ কুলব রচনা করেছেন। 'ষট্চক্রভেদ' কোন স্বতন্ত্র গ্রন্থ নয়। এটি ধ্যানমালার একটি অধ্যায় এবং আলোচ্য বিষয় রাগসম্পৃক্ত ষড়্ভুক্ত। এটি জ্ঞানসাগরেরও একটি সর্গ।

চট্টগ্রাম জেলার আধুনিক আনোয়ারা থানার ওশখাইন গাঁয়ে ছিল আলি রজার নিবাস। তাঁর পিতার নাম মুহম্মদ শাহি এবং পিতামহের নাম মনোহর আর প্রপিতামহ মুহম্মদ আকবর। তাঁর একাধিক স্ত্রী ও অনেকগুলো সন্তান ছিল। পুত্রদের মধ্যে এর্শাদুল্লাহ ও শরফুল্লাহ পদকার ছিলেন। এঁরা পিতাকেই পীর করেছিলেন। আলি রজা স্বকালে ওয়াহেদ কানু বা কানু ফকির নামে পরিচিত ছিলেন। তাঁর দরগাহ ও বংশধর আজো বর্তমান। আলি রজা ছিলেন গৃহী দরবেশ। পীরালি ছিল তাঁর পেশা। উনিশ শতকের কবি 'ফায়দুল মুকতদী' ও 'জ্ঞানচৌতিশা' প্রণেতা বালক ফকির, ফায়দুল মুকতদী প্রভৃতি বহু গ্রন্থপ্রণেতা মুন্সী মুহম্মদ মুকিম ছিলেন তাঁর মুরিদ বা শিষ্য। আলি রজা সাধক, তাদ্বিক, কবি ও পীর হিসেবে স্বদেশে ও স্বকালে শ্রদ্ধেয় ও প্রখ্যাত ছিলেন। সম্প্রতি কবি আলি রজার পুত্র এর্শাদুল্লাহ পঞ্চম অধস্তন পুরুষ শাহজাদা মাওলানা এস, এম, আবদুল আলীম 'খাবনামা' নামের একখানা ক্ষুদ্র পুথি আমাকে দেখিয়েছেন। এ পুথি রিক্ত হিসেবে প্রাপ্ত তাঁর পারিবারিক সম্পদ। পুথিটি কবির স্বহস্তলিখিত [অটোগ্রাফ] বলে বিশ্বাস করবার মতো কিছু সাক্ষ্য বহন করে। যেমন, কবির ছোট ভাই আব্দুল

খালেকের মৃত্যু তারিখ [১১৫১ মঘী; ২১ শে ভাদ্র শুক্লাবার], কবির পিতা মুহম্মদ সাঁছি ইবনে মনোহরের মৃত্যু তারিখ [১১৪২ মঘী, ২৯শে পৌষ, বুধবার], কবির পীর শাহ কেয়ামউদ্দীন ইবনে আলীউদ্দীনের মৃত্যু তারিখ [১১৫২ মঘী, ২৩ শে পৌষ] কবির কন্যা শুকুরাবিবির মৃত্যু তারিখ [১১৫৩ মঘী, রোজ শুক্লাবার] এবং সর্বোপরি কবির নিজের জন্ম তারিখ লিপিবদ্ধ রয়েছে:

“ইতি সন ১১২১ মঘী তাং ১৭ সতর শ্রাবণ রোজ সোমবার দোপহর তিন ঘরি বাদে জন্ম শ্রী আলি রজা পিছরে মাং ছাছি। সনে ১১৬১ এক সট্টি মঘী তাং ১৫ পোন্দর ভাদ্র, রোজ শুক্লাবার।”

[অতএব কবি ত্রিশ বছর বয়সে জন্ম তারিখ তাঁর স্বরচিত ও স্বলিপিকৃত ‘খাবনামা’ গ্রন্থে লিখে রেখেছেন বলেই বিশ্বাস করতে হয়।]

এ পুথিতেই কবির মৃত্যুর পাঁচ বছর পরে সম্ভবত কবির সাগরেদ বা আত্মীয় কানাইমাদারী গ্রামবাসী এক আবদুল করিম ১২০৫ মঘী সনে কবির মৃত্যুকাল লিপিবদ্ধ করেছেন :

ইতি সন ১১৯৯ মঘী তারিখ ৫ই মাঘ ১৯ শে সউআল রোজ বুধবার বিকাল তিন ঘরি বাদ চার ঘরিতে অফ্রাত পিরানশির সাহ সুপি আলি রজা সাং ওসখাইন ইতি লিং আবদুল করিম কানাইমাদারি ১২০৫ মঘী।

এ তথ্য প্রাপ্তির ফলে আলি রজা সম্বন্ধে আমাদের অনুমানের পালা শেষ হল। এখন আমরা জানলাম সাঁছির পিতা আকবর নন মনোহর আকবর হয়তো মনোহরের পিতার নাম। কবি আলি রজা ১১২১ মঘীতে বা ১৭৫৯ খ্রীষ্টাব্দে জন্মগ্রহণ করেন এবং মৃত্যুবরণ করেন ১১৯৯ মঘীতে বা ১৮৩৭ খ্রীষ্টাব্দে আটাত্তর বছর বয়সে। অতএব আলি রজা আঠারো-উনিশ শতকের কবি।

তাঁর পীর ছিলেন শাহ কেয়ামউদ্দীন। পীরের পিতা শাহ আলাউদ্দীনও ছিলেন পীর। এখনকার কুমিল্লা জেলার হাজীগঞ্জে ছিল পীরের নিবাস। ‘সিরাজ কুলুব’ কবি পীরের প্রশস্তি বিস্তৃতভাবেই গেয়েছেন :

শাহ আলাউদ্দীন সূত মহাশুণবন্ত।	হাজীগাঁও করি ছিল সেই দেশের নাম।
কেয়ামুদ্দীন শাহা তান নাম আছিলন্ত।	সেই শুভ গ্রামে ছিল তাহান বসতি।
ফেনীর দক্ষিণে এক শহর উপাম	সে পীর চরণে মোর সহস্র প্রণতি।

এর থেকে বোঝা যায় ‘সিরাজ কুলুব’ রচনাকালে কবির পীর শাহ কেয়ামুদ্দীন [মৃত্যু ১৭৯০ খ্রীঃ] জীবিত ছিলেন না। অতএব এটি কবির সর্বশেষ রচনা। আগম-জ্ঞানসাগরের ভণিতা দৃষ্টে মনে হয় এগুলো পীরের জীবিত কালে রচিত। কবি আমাদের জানিয়েছেন :

সিরাজ কুলুব নামে আছিল কেতাব	যুহুদ সকলে মিলি করিলা আমল।
উত্তম মসলা তাতে শুদ্ধ পরস্তাব	বিচারি ইঞ্জিল সবে মসলা তুলিয়া
গুরু মুখে এসব যে হাদিস পাইলুঁ	পুছিলেস্ত নবী পদে যুহুদে আসিয়া।
সভানে বুঝিতে ভাল বাঙ্গালা করিলুঁ।	যদি তুচ্ছি হও সত্য রসুল আদ্বার
ইঞ্জিল কেতাবে এই মসলা সকল	এহার উত্তর তুচ্ছি পারিবা দিবার।

মনে হয়, কবি নিজে ‘সিরাজ কুলুব’ কিতাব দেখেননি। তিনি ‘গুরু মুখে’ অর্থাৎ তাঁর পীর শাহ কেয়ামুদ্দীনের মুখে শুনে এ সব ‘মসলা’ বা শাস্ত্রকথা লিপিবদ্ধ করেছেন।

কবি এতিম আলমের 'আবদুল্লাহর হাজার সওয়ালে' আমরা দেখেছি, হযরত মুহম্মদ ইহুদীরাজ সালাম-পুত্র আবদুল্লাহকে স্বপ্রজা ইসলাম গ্রহণের আহ্বান জানিয়ে পত্র পাঠালে প্রজাদের অনুরোধে আবদুল্লাহ মাদিনায় এসে রসুলকে তৌরাতসমর্থিত এক হাজার প্রশ্ন করে তাঁর নবুয়তের যথার্থ্য যাচাই করেছিলেন। স্পষ্টত এখানে কবি আলি রজা বিভ্রান্ত। তিনি ইহুদীর তৌরাতের বদলে নসরাদের ইঞ্জিলের কথা বলেছেন, আবার ইহুদী নেতার নামও তিনি উল্লেখ করেননি। তাছাড়া এই গ্রন্থে তাঁর বক্তব্য বিষয়ও সংক্ষিপ্ত এবং স্বতন্ত্র।

এ গ্রন্থে আলোচ্য একুশটি বিষয় একুশটি মসলায় বিভক্ত। এবং প্রস্তাবনায় সূফীর 'প্রেমতত্ত্ব' আলি ও রসুলের কথোপকথনের মাধ্যমে পরিব্যক্ত।

সিরাজ কুলুবও সওয়ালসাহিত্য। এক ইহুদীর সওয়ালের জওয়াবে রসুল একুশটি তত্ত্ব প্রকাশ করেন। লক্ষণীয় যে এখানে প্রশ্নকর্তা ইহুদীর নাম নেই, ইহুদীরাজ সালাম-পুত্র আবদুল্লাহ-ই সম্ভবত এই অজ্ঞাত ইহুদী। যে-কোন কারণে হোক, কবি ইহুদীর নামে গুরুত্ব দেননি।

কবি প্রথমে আলির প্রতি রসুল মুহম্মদের উপদেশচ্ছলে প্রেমতত্ত্ব (অধ্যাত্মপ্রেম) ব্যাখ্যা করেছেন :

প্রেমভাবে করতারে সৃজিলা রসুল

তেকারণে ত্রিভুবন পিরীতি আমূল।

অতএব, প্রেমভাবে কর আলি পরম সাধনা

প্রেম-মাহাত্ম্য :

ধনের বদলে প্রেম নহে কদাচিত্ত্ব।

বিনি ভাব তপে কার পিরীতি রহিছে।

তনে মনে ভজি করে পরম ভকতি।

ভাব বিনে যোগ নাহি তপ বিনে ধ্যান

প্রেম সম রসখেলা নাহি ত্রিভুবনে

পিরীতি অমৃত ফল না পাকে না ঝরে

পিরীতি কণ্ঠের মালা মরণে না ছাড়ে।

আবদুল্লাহর হাজার সওয়ালের মতো এখানেও জিব্রাইল নেপথ্যে রসুলকে প্রশ্নের উত্তর বাতলে দিচ্ছিলেন।

জিব্রাইল 'মসলা'র ভেদ সব নবীক কহিলা।

একে একে সকল জানিয়া পয়গাম্বর

যুহুদ সবের যে উত্তর পদুত্তর।

এমনি করে পাঁচ-নামাজের, ছয়-সৃষ্টির ছয়দিনের, সাত/স্বর্গের, আট-ফিরিস্তার নয়-মুসানবীলক নয় আয়াতের, দশ-'দশাফর' বীজ মন্ত্রের [দশঅফর] নাম আছএ গোপতা, এগারো-এগারোজন প্রধান নবীর : আদম, নুহ, ইব্রাহিম, ইউসুফ, আযুব, ইউনুস, মুসা, দাউদ, সোলেমান, ঈসা আর মুহম্মদের প্রতীক। বারো : ইমাম-আলি-হাসান-হোসেন-জয়নুল-বাকর-কাফির-তকী-নকী-আশকর-মুসা ও ভাবী ইমাম মেহুদী। এমনি করে সপ্তবিংশ প্রতীক বর্ণিত। এক্ষেত্রে এতিম আলমের বর্ণনা স্মর্তব্য।

অষ্টস্বর্গ : সালাম-করার-খেলদ-মাওয়া নজ্জিম-আদন-জিন্নত-ফিরদৌস,

সপ্ত-দোজখ : জাহান্নাম-তলজি-সুন্না-অসীম-খিরজ-মাছক-হারিয়া।

একবিংশ মসলায় পাঁচ ওয়াক্ত নামাজের উদ্ভবতত্ত্ব বর্ণিত হয়েছে। এখানেই গ্রন্থ সমাপ্ত।^১

শাস্ত্রীয় তথ্য ও জ্ঞানলব্ধ সত্যের পার্থক্য কোন দিনই ঘুচবার নয়। কারণ শাস্ত্রীয় তথ্য ধ্রুব সত্যের প্রতীক। এর হ্রাস নেই, নেই কোন পরিবর্তন। পক্ষান্তরে জ্ঞানলব্ধ সত্যের উন্মেষ, বিকাশ ও বিবর্তন আছে। কেননা জ্ঞান প্রতি মুহূর্তে সত্যকে আবিষ্কার করছে, তার স্বরূপ তুলে ধরছে এবং সেকারণই খণ্ড সত্য পূর্ণতা পাচ্ছে, প্রাতিভাসিক সত্য অপসৃত হচ্ছে।

অতএব শাস্ত্রীয় সত্য হচ্ছে বিশ্বাসভিত্তিক। বিশ্বাস না হারালে সে সত্যের মৃত্যু নেই, সিন্দবাদের ভুতের মতো জগদ্বলের মতো চিরকাল সংস্কার-প্রবণ বিশ্বাসীর মনে-মেজাজে জীবন-চেতনায় ও জগৎ-ভাবনায় তা অনড় হয়ে সংস্থিত থাকে। সংস্কার ও বিশ্বাস প্রত্যয়রূপে প্রতিষ্ঠা পেলে তা ধর্মবোধের রূপ লাভ করে। তখন মানুষের চেতনা হয় বন্ধ্য, মানুষ হয় পোষ্যমানা প্রাণী। এই বন্ধন থেকে আন্তিক মানুষের মুক্তি নেই।

আলোচ্য শাস্ত্রীয় জ্ঞানলব্ধ বিশ্বাসই আন্তিক মানুষের জীবন নিয়ন্ত্রণ করে। তাই মানুষের অনেক দুর্ভোগের উৎস হয়েছে এই মনুষ্যনির্মিত শাস্ত্র। পরীক্ষিত জ্ঞান তাই আজো চিন্তালোকে অবহেলিত। শাস্ত্রানুগত মানুষ চোখ থেকেও অন্ধ, কান থেকেও কালা, মুখ থেকেও বোবা আর মন থেকেও মননহীন। দেশজ মুসলমানের পক্ষে সেকালে ইসলাম ছিল সুদূরের। শাস্ত্রের ভাষা-ছিল অনায়ত্ত, ঐতিহ্য ছিল অজানা। তাই তথ্য ও তত্ত্ব জ্ঞেয়ে ও জ্ঞানে, সত্য ও কল্পনায়, প্রাপ্তিতে এ প্রত্যাশায় তারা সঙ্গতি সামঞ্জস্য রক্ষা করতে পারেনি কখনো। ফলে একদিকে যেমন সূফীমতের আবরণে দেশী ঐতিহ্যে তাদের অধ্যাত্ম সাধনা চলেছে, অন্যদিকে তেমনি ইসলামী তত্ত্বজিজ্ঞাসাও আকৃষ্ট করেছে তাদের। জীবনের বা বাস্তব প্রতিবেশের ও আদর্শের জগতের মধ্যে ব্যবধান ছিল দূতর। মাঝে ও মাঝে ছিল না সমতা। তাই জ্ঞেয় ও জ্ঞান-দুই লঘু ও মনগড়া এবং ক্ষেত্রবিশেষে প্রাতিভাসিক। কিন্তু শাস্ত্রীয় মনের, মতের ও শাস্ত্রশাসিত সমাজ-সংস্কৃতির বিবর্তনধারায় ইতিহাসের উপকরণ হিসেবে এসব রচনার গুরুত্ব কম নয়।

৫. শেখ সেরবাজ চৌধুরী

শেখ সেরবাজ চৌধুরীর ‘ফক্করনামা’র বা ‘মালিকার হাজার সওয়াল’-এর সাহিত্য-বিশারদ-সংগৃহীত পাণ্ডুলিপিগুলোর অধিকাংশই দু’শ বছরের বেশি প্রাচীন। পাণ্ডুলিপির সুলভতায় মনে হয় এ চট্টগ্রামে খুব জনপ্রিয় ছিল। শেখ সাদীর ‘গদা মালিকা সম্বাদের’ও এ গ্রন্থের বিষয়বস্তু অভিন্ন। এখানে নায়কের নাম আবদুল্লাহ, শেখ সাদীর গ্রন্থে নায়ক আবদুল আলিম বা হালিম।

সেরবাজের অবলম্বন ছিল ফারসি কিতাব :

‘ফক্করনামা’ করি এক আছএ কিতাব
কহিমু যথেক কথা আছে পরস্তাব।
সকলে না বুঝে দেখি ফারসি বচন
কহিমু বাঙ্গালা ভাষে বুঝিতে কারণ

^১ মৎসম্পাদিত সওয়ালসাহিত্যে বিবৃত আলোচনা দ্রষ্টব্য।

কবির শিক্ষক ছিলেন হাসানশরীফ, পীর ছিলেন বদিউদ্দীন, গ্রন্থরচনায় আদেষ্ঠা ছিলেন সৈয়দ বায়েজিদ, প্রতিপোষক ছিলেন বৈদ্য (চিকিৎসক) উমর।

১. 'আদ্য গুরু প্রণামিএ শরীফ হাসন।
হাসন শরীফ নাম সেই গুরু অনুপাম
তান পদ শিরেতে ধরিয়া।
২. বদিউদ্দীন জান পীরের যে নাম।
৩. সৈয়দ বাজিদ পদে করই প্রণাম
তাহার আদেশ শিরেতে ধরিয়া
রচিলাম কিতাববাণী মনে বিমর্সিয়া
৪. শেখ সেরবাজ কহে সভানের পদে
রচিলু পঞ্চগলী বৈদ্য উমর প্রসাদে।

অন্যত্র—

ফকর নামা নামে এক কিতাব আছিল
পীরের প্রভাবে কিছু প্রচার করিল।

গ্রন্থের একস্থানে 'চন্দ্রাণীর রূপ দেখি লোর নৃপবর' কথাটি রয়েছে, অন্যত্র রয়েছে সৈয়দ সুলতানের নবীবংশ কাব্যের (১৫৮৪-৮৬) উল্লেখ :

নবীবংশে লেখিয়াছে সৈয়ব কখন
রচিয়া কহিলে কথা নাই কোন ভাল।

লোকশ্রুতি অনুসারে সেরবাজ চৌধুরীবংশীয় ছিলেন। তাঁর গ্রন্থের পাণ্ডুলিপি চট্টগ্রামে সুলভ ছিল, সংগৃহীত পাণ্ডুলিপির কোন কোনটি মনে হয় আঠারো শতকের গোড়ার দিককার। তাই সেরবাজকে সতেরো শতকের শেষার্ধের বা শেষপাদের কবি বলে অনুমান করি। তাঁর কাব্য যত্নে রচিত এবং কাব্যটি কবিত্বসম্পদেও স্বাক্ষর, যেমন মালিকার সখীদের অর্থপূর্ণ কবিত্বদীপ্ত নামগুলো সেরবাজের দেয়া :

রূপে মনোহর বালা গুণে অনুপাম	প্রভাবতী, মৃগআঁখি কমলমঞ্জরী
বাছি বাছি রাখিয়াছে সখীসব নাম।	এ সকল সখী থাকে কুমারীকে ঘেরি।
হীরাধার, চম্পাছড়ী কমলনয়নী	একটি উৎপ্রেক্ষা :
কাজলরেখা যে আর মুকতাদশনী	কুমারীর যুক্তি শুনি হরিষ সকল
	চন্দ্রের উদয়ে যেন বিকালে উৎপল।

পথের ফকির আবদুল্লাহ হাজার প্রণের সঠিক উত্তর দিয়ে রুমরাজ্যের মালিকার স্বামী হবার যোগ্যতা অর্জন করল। উভয়ের খুব জাঁকজমকে বিয়ে হল।

ভাগ্যের লীলায় আস্থাবান কবি বলেছেন :

যাহার রিজিক যথা লই যাএ ধরি।	সে জন যাএ নিদ্রা খাট-সিংহাসন।
যাহার আছিল জান তপেত শয়ন যে ছিল ফকির,	সেই সে আবদুল্লা হৈল রুমের রাজন।

প্রশ্নোত্তরের নমুনা :

১. কলিকালের নারী কিরূপ হবে? প্রশ্নের উত্তরে আবদুল্লাহ বলে

পুরুষ ঘরে খুই নিকলিব নারী

পক্ষ নারীএ এক পুরুষ বরিব

ভয় পাই যে পুরুষ কাকে না চাহিব।

২. মুর্শিদ বড়, না মাতাপিতা বড়?

জনক জননী হোন্তে মুর্শিদ যে বেশ

যাহার প্রসাদে পরমার্থের উদ্দেশ।

সেরবাজের আর দু'খানি রচনা হচ্ছে কারবালার বীর হাসানপুত্র কাসেমের লড়াই এবং ফাতেমার সুরতনামা বা রূপবর্ণনা।

৬. আবদুল করিম খোন্দকার

দুলামজলিস, তমিম আনসারী, নুরফার্মিসনামা প্রভৃতি রচয়িতা আঠারো শতকের আবদুল করিম খোন্দকার হাজারমসায়ল নামে একখানা ক্ষুদ্র আবদুল্লাহর হাজার সওয়ালই রচনা করেছিলেন। ইহুদী রাজ আবদুল্লাহ ইসলাম গ্রহণের আহ্বান পেয়ে মুহম্মদের নবুয়তের সত্যতা পরীক্ষা করার জন্যে তাঁর প্রজাদের অনুরোধে প্রজাদের পক্ষে মুহম্মদকে একহাজার প্রশ্ন করেন। এবং সদুত্তর পেয়ে স্বপ্রজা ইসলাম বরণ করেন। আল্লাহর পরম স্বরূপ সম্বন্ধে জিজ্ঞাসিত হয়ে :

রসূলে বুলিলা শুন এহুদী রাজন

কিবা আছে তার পরে জানে নিরঞ্জন।

কোন সাক্ষি না পাইছি শাস্ত্রে না লেখিছে

প্রভুর রসুল সবে কেহ না কহিছে।

প্রভুর গোপত মর্ম কুদরুত আল্লার

ভীরপরে কহিবারে কি শক্তি আমার।

কবি আবদুল করিম খোন্দকারের পরিচয় দুলামজলিস প্রসঙ্গে চরিতকথা অধ্যায়ে দেয়া হয়েছে।

৭. সৈয়দ নুরুদ্দীন

'দাকায়েকুল হাকায়েক', রুহনামা, রাহাতুলকলুব প্রভৃতি রচয়িতা আঠারো শতকের পীর-কবি সৈয়দ নুরুদ্দীনের পরিচিতি রয়েছে ধর্মসাহিত্য অধ্যায়ে। তিনিও মুসার সওয়াল নামে প্রশ্নোত্তরে একটি ক্ষুদ্র তত্ত্ব রচনা করেছিলেন। কোন ফারসি গ্রন্থ অবলম্বনে কবি অতি সংক্ষেপে 'শরার খবরই' মাত্র লিখেছেন।

এই মতে লিখিয়াছ এ কিতাবে বিস্তর

অল্প অল্প কহিলুঁ শরার খবর।

প্রশ্নকর্তা নবী মুসা-এবং উত্তরদাতা স্বয়ং আল্লাহ :

মুসার নিবেদন শুনি প্রভু করতার

কৃপায়ুক্ত হই তবে লাগে কহিবার।

সওয়ালের বিবরণ কিতাবে দেখিয়া

রচিলেক নুরুদ্দীন প্রভুকে ভাবিয়া।

একটি সওয়াল-জওয়াবের নমুনা :

আর এক রোয়ায়েত শুন পরস্তাব

যেই মতে মুসা নবী পাইল জওয়াব।

প্রথমে সওয়াল মুসা নবীএ পুছএ

এলম পড়িলে তবে কিবা পুণ্য হএ।

এত শুনি করতাএ কহিলেন খবর

রহমত বখশিএ আমি তাহার উপর।

ফেনী এককালে চট্টগ্রাম জেলাভুক্ত ছিল। কবি ফেনী অঞ্চলের লোক।

৮. নসরুল্লাহ খোন্দকার

জঙ্গনামা ও শরীয়তনামার রচয়িতা আঠারো শতকের কবি নসরুল্লাহ খোন্দকারের বিস্তৃত পরিচয় 'ধর্মসাহিত্য' অধ্যায়ে রয়েছে।

মুসার সওয়ালে কোহ-ই-তুরে নবী মুসার সঙ্গে প্রশ্নোত্তরের আকারে এলম, এবাদত, দয়া প্রভৃতি নানা বিষয়ে আল্লাহর আলাপ লিপিবদ্ধ হয়েছে। কবি বলেন মুসার সওয়াল ফারসি ভাষায় ছিল, দেশী লোকেরা ফারসি ভাষাজ্ঞানের অভাবে বুঝতে পারে না বলেই তিনি 'হিন্দুয়ানি' (তথা হিন্দুস্তানী ভাষা বাঙলা) করলেন :

মুসার সওয়াল এক কিতাব প্রধান।	তেকারণে ফারসি করিলু হিন্দুয়ানি।
বাস্তালা না বুঝে এই ফারসি কিতাব	বুঝিবারে বাস্তালে সে কিতাব বাণী।
না বুঝি ফারসি ভাষে পাএ মনস্তাপ।	আপনে বুঝন্ত যদি বাস্তালের গণ
	ইচ্ছাসুখে কেহ পাপে না দেয়ন্ত মন।

ভণিতা :

কহে হীন নসরুল্লাহ মনসুর তনএ
কলিমা তৈয়ব যত মহিমা ধরএ।
পীর : পীর স্থির মহাধীর মুহম্মদ হামিদ।

রচনার নমুনা :

বোলে শুন নামাজ মহিমা
তম পাশি হৈলে নুর উদয় না হৈতে সুর
স্থির নামাজ সে সমা।

কবির উপদেশ :

বাক্য আলাপিতে যদি চাহ প্রভু সন্তে	পঞ্চগানা নামাজ পড়হ একমন
হৃদয়ে মনে কোরান পড়হ মনোরঞ্জে।	সভা করি বস নিত্য নামাজীর সন।

৯. মুহম্মদ আলি

শাহপরি-মালিকজাদা ও হাসনাবানু নামের দুখানা প্রণয়োপাখ্যান প্রণেতা মুহম্মদ আলির পরিচিতি অন্য অধ্যায়ে দিয়েছি। ইনি চট্টগ্রামের ইদিলপুরবাসী ছিলেন। তাঁর 'হায়রাতুল ফিকাহ' নামের ফিকাহ শাস্ত্রগ্রন্থ ফারসি গ্রন্থ অবলম্বনে প্রশ্নোত্তর আকারে রচিত। 'হায়রাতুল ফিকাহ' নামের অর্থ হচ্ছে প্রশ্নোত্তরে ফিকাহ।

আছিল ফারসি কিতাব করিলু বাস্তালা অপূর্ব আছএ যত কিতাবের বাণী
বুঝিতে সকল লোকে কিবা মন্দ ভালা। বিচারিয়া কহি আমি করি হিন্দুয়ানি
এঁর সমকালীন কবি মুন্সী মুহম্মদ মুকিম পণ্ডিতও কবির স্থানবাসী ছিলেন।

প্রশ্নোত্তরের নমুনা এরূপ :

১. একজনে নারী সনে রতি বিলাসিল স্নান বিনে ওজু করি নামাজ পড়িল।
এ লোক ইসলামে সদ্য দীক্ষিত। অজ্ঞতাই স্নান না করার কারণ, কাজেই-
নামাজ দোরস্ত তার কিতাবে বোলএ।

২. বন্দীতে রাখিছে এক মুসলমান (কে) ধরি দুই তিন দিন কিবা রাখে অনাহার।
অল্পজল ভক্ষ্য দ্রব্য না দেয় ভক্ষিবার।

এমনি অবস্থায় তাকে যদি নিষিদ্ধ শূকর মাংস দেয়া হয়, আর সে খায়, তা হলে পাপ হবে কি?
খাইয়া প্রাণ রাখিব তাহার না খাইয়া যুক্ত নহে মৃত্যু হইবার।

কবি শেলাক গায়ের ইউসুক হাফিজের বাড়িতে থেকে তাঁর মসজিদের মুয়াজ্জিন রূপে
কাজ করতেন। তাঁরই অগ্রহে তিনি হারায়তুল ফিকাহ রচনা করেন।

AMARBOI.COM

নবম অধ্যায়

চরিতকথা

মুসলমান কবিগণ এক বিরাট জীবনীসাহিত্যও সৃষ্টি করে গেছেন, প্রচলিত অর্থে জীবনচরিত বলতে যা বোঝায় এগুলো কিন্তু তা' নয়। চৈতন্যদেব ও তাঁর পার্শ্বদেবের চরিতকথাগুলো যেমন একাধারে জীবনী, ইতিহাস, ধর্মতত্ত্ব, দর্শন ও রূপকথা জাতীয় কাহিনীকাব্য এগুলোও তেমনি গ্রন্থ। রামায়ণ, মহাভারত, ভাগবত ও চৈতন্যচরিতগুলোর অনুকরণে এগুলো রচিত। নবীবংশ, রসুলবিজয়, জঙ্গনামা, মকুলহোসেন, হানিফার লড়াই, কাসাসুল আমিয়া, সিয়তুল আমিয়া, হাতেম তাই, আমীর হামজা প্রভৃতি গ্রন্থকে আমরা সম্মিশ্রণভাবে জীবনী-সাহিত্যের অন্তর্ভুক্ত বলে মনে করি।

অলৌকিক, অসাধারণ, অস্বাভাবিক এবং অঘটন ঘটনপটু শক্তিসম্পন্ন না হলে অধ্যাত্মজগতে কেউ কোথাও কোনকালেই মহাপুরুষ বলে স্বীকৃতি পাননি, তাই মহাপুরুষরূপে পরিচিত হবার বাসনা জাগলে বা কাউকে মহামানবরূপে প্রতিষ্ঠিত করতে ইচ্ছা করলে চাই কেরামতি, চাই ঐশ্বর্যের প্রকাশ। কারণ যে তোমার আমার মতো প্রকৃতি-চালিত অসহায় মানুষ, তাকে তোমার আমার চেয়ে বড় বলে স্বীকার করবো কোন নিরিখে! বিশেষত যিনি স্রষ্টার প্রিয়, যিনি স্রষ্টার প্রতিনিধিত্ব করেন, তাঁর অসাধারণত্ব না থাকলে মানায় না। তাই মানুষ চিরকাল অধ্যাত্মবাদীদের মধ্যে অলৌকিকশক্তি ও অসাধারণ-মহিমা খুঁজে ফিরেছে। মানুষ অবিশেষের এই স্বাভাবিক দাবি মেটাবার জন্যে চিরকাল দেশে দেশে ভক্তগণ ভক্তিভাজনের জীবনে ও চরিত্রে সত্য-মিথ্যা সন্দেহ-অসন্দেহ নানা গুণ ও কীর্তি আরোপ করে তাঁকে অতিমানব করে তুলেছে। ফলে মহামানবের জীবনী মনুষ্যচরিত হতে পারেনি, হয়েছে এমন কিছু যা স্বপ্নসম্ভব বা দেব দৈত্য-ফেরেস্তায় শোভন।

মুসলিমরচিত এসব জীবনচরিতগুলোতেও অতিপ্রাকৃত এবং অতিমানবীয় কাহিনীসমূহ রয়েছে। কিন্তু মানুষের মন-বুদ্ধির ও আত্মার বিকাশ না হলে এবং রুচি-সংস্কৃতি ও উচ্চতর জীবনবোধ না থাকলে যা হয়, এখানেও তা-ই হয়েছে। স্বল্পশিক্ষিত আদর্শ-অজ্ঞ বিচার-বিবেচনাহীন এসব কবিদের ইসলাম সম্বন্ধে সম্যক ধারণার অভাবে এঁদের হাতে ইসলামের কিছু অপব্যাখ্যা হয়েছে এবং আদর্শ-চরিত্র ও উন্নতজীবনবোধ না থাকায় মহাপুরুষ চরিত্রে কিছু ব্যজস্ততিও প্রকট হয়েছে।

অধিকন্তু যে কয়জন বাঙালী মুসলমান কবি রসুলচরিত রচনা করেছেন, তাঁদের আদর্শ দেশীয় রাম, কৃষ্ণ ও চৈতন্য। রসুলকে এঁদের চেয়ে শ্রেষ্ঠরূপে চিত্রিত করার প্রেরণাই ছিল মূলে। তাঁদের মানসপটে যে স্থান-কাল ও পরিবেশ ছিল, তাও একান্তভাবে ভারতবর্ষ তথা বাংলাদেশ, কাদেমির মত দেশের একটি অঙ্গ। তাই এঁদের চিত্রিত যে-চিত্র অঙ্কিত

হয়েছে, তাতে ভারতে হিন্দুশক্তির বিরুদ্ধে মুসলমান রাজন্যবর্গের বিগ্রহ-সন্ধির ও হিন্দুদের ইসলাম গ্রহণের ছায়া পড়েছে। অবশ্য কাব্যকাহিনীর উপাদান হিসেবে তা অসার্থক হয়নি।

কিন্তু আমরা ভাবছি, এই যে রসুলের চরিতকথা বলতে গিয়ে কৃষ্ণ, রাম ও চৈতন্য-চরিতের সঙ্গে তাঁর জীবন-কাহিনীর সামঞ্জস্য বিধানের সচেতন প্রয়াসের এবং ইসলামের সঙ্গে হিন্দুয়ানি দর্শন-পুরাণের সাদৃশ্য স্বীকারের মূলে লেখকদের কোন প্রকার মনোভাব কাজ করেছে? একি ইসলামি আদর্শ ও মুসলিম ঐতিহ্যবোধের অভাবের অথবা হীনমন্যতার ও ইসলামপূর্ব সংস্কারের বশ্যতার ফল, না হিন্দু-মুসলমানের মধ্যে পারস্পরিক সমঝোতা-সমঝয় সাধনের সচেতন প্রয়াস? অথবা তুলনায় উৎকর্ষ ও উন্নতমানের দেখিয়ে ইসলামের প্রতি বিধর্মীকে আকৃষ্ট করাও এঁদের হয়তো অন্যতর উদ্দেশ্য ছিল। এ শেষোক্ত অনুমানই সত্যের সন্নিহিত বলে মনে হলেও, অনার্য বাঙালীর প্রাচীন সংস্কার, স্থানীয়, পারিবেশিক প্রভাব, ইসলামী আদর্শের ও ঐতিহ্যবোধের অভাব এবং পরস্পর প্রতিবেশী হিন্দু-মুসলমানের মধ্যে সাংস্কৃতিক ঐক্য ও সম্প্রীতি স্থাপনের (বা রক্ষার) উদার মনোভাব আর ইসলামের শ্রেষ্ঠত্ব দেখিয়ে তার প্রতি আকৃষ্ট করার বাসনা প্রভৃতি এসব বিচিত্র সৃষ্টির মূলে কাজ করেছে।

সৈয়দ সুলতানের জন্মভূমি-পরিচয় এবং সৈয়দ সুলতানের ভাব-শিষ্য কবিগণ ও আবির্ভাবকাল:

সৈয়দ সুলতান যে চট্টগ্রামের চক্রশালাবাসী ছিলেন, তা আজকাল আর প্রমাণের অপেক্ষা রাখে না। কেননা তাঁর নাম নানা প্রসঙ্গে চট্টগ্রামবাসী অনেক কবির মুখেই শ্রদ্ধার সঙ্গে উচ্চারিত হয়েছে। কবির নবীবংশ রচনারস্তের কাল মিলেছে : ‘গ্রহশত রস যুগ-৯৯২-৪ হিঃ (১৫৮৪-৬ খ্রীঃ)’ এছাড়া কিছু পরোক্ষ প্রমাণও রয়েছে যেমন :

১. ‘কিফায়তুলমুসল্লিন’ [১৬৩৯ খ্রীঃ] নামের জনপ্রিয় শাস্ত্রগ্রন্থ প্রণেতা সীতাকুণ্ডবাসী মুত্তালিব কবি শেখ পরাগের পুত্র এবং মীর মুহম্মদ সফীর পিতা সৈয়দ হাসান তাঁর পীর ছিলেন।^১

২. মুত্তালিবের পিতা শেখ পরাগ দু’খানি গ্রন্থের রচয়িতা : নূরনামা ও কায়দানি কেতাব। শেখ পরাগ তাঁর ‘নূরনামায়’ সৈয়দ সুলতানের নবীবংশের উল্লেখ করেছেন :

শাস্ত্রনীতি কথা কহি কর অবধান।

ফাতেমাকে বিভা কৈল আলি মতিমান

নবীবংশে রচিছেন্ত সৈয়দ সুলতান।

কবি সৈয়দ সুলতান নবীবংশ রচনা শুরু করেন ১৫৮৪-৮৬ খ্রীস্টাব্দে। আবার এই শেখ পরাগই তাঁর কায়দানী কিতাবে হাজী মুহম্মদ ও তাঁর গ্রন্থের নামোল্লেখ করেছেন :

যদি বোল গোর হোস্তে না উঠিব পুনি

কহিছন্ত হাজী মুহম্মদ ভাল মত।

কাফির হৈয়া যাইব নরকেত জানি

তেকারণে এথা মুঞি ন কৈলু সমস্ত

সূরত নামার’ মধ্যে ইমার সিফত

কিঞ্চিত কহিলু মুঞি ইঙ্গিতে বুঝিতে।

এতে মনে হয়, সৈয়দ সুলতান ও হাজী মুহম্মদ শেখ পরাগের জ্যেষ্ঠ সমসাময়িক ছিলেন।

^১ ৮ম অধ্যায় দ্রষ্টব্য : মুত্তালিব।

৩. এদিকে সৈয়দ সুলতানের পৌত্র, হাজী মুত্তালিবের পীর সৈয়দ হাসানের পুত্র ও 'নূরনামা' লেখক শাহ মীর মুহম্মদ সফী হাজী মুহম্মদকে তাঁর পীর বলে উল্লেখ করেছেন।^২

সৈয়দ হাসানের পুত্র ছিলেন মীর মুহম্মদ সফী। আর শিষ্য হলেন শেখ মুত্তালিব। অতএব সফী ও মুত্তালিব প্রায় সমবয়সী।^৩

আগেই দেখেছি, সৈয়দ সুলতান ও হাজী মুহম্মদ শেখ পরাগের পূর্বসূরী ছিলেন।

৪. মুহম্মদ খানের 'মুহম্মদ হানিফার লড়াই' পর্বের লিপিকর মুজাফফর উক্ত পুথির যে কয় জায়গায় নিজের ভণিতা যোজনা করে দিয়ে কবিশষ আত্মসাৎ করবার প্রয়াস পেয়েছিলেন (অবশ্য মুজাফফর নিজেও কবি ছিলেন। ইউনান দেশের পুথি তাঁরই রচনা।) তার একটিতে কবি সৈয়দ সুলতানের দৌহিত্র বলে আত্মপরিচয় দিয়েছেন।^৪

৫. লালমোতি সয়ফুলমুলকের কবি শরীফ শাহও সৈয়দ সুলতানের পৌত্র।^৫

৬. চট্টগ্রামের নয়াপাড়া নিবাসী উনিশ শতকের কবি মুহম্মদ মুকিম 'গুলেবকাউলি' উপাখ্যান রচনা করেছেন। সৈয়দ সুলতানের বংশীয় সৈয়দ মুহম্মদ সৈয়দ মুকিমের পীর ছিলেন আর মুকিম কবি-প্রণামে বলেছেন :

এবে প্রণামিব আমি পূর্ব কবি জান

পীর মীর চক্রশালা সৈয়দ সুলতান

৭. 'শির্নামা' রচয়িতা শেখ মনসুরেরও (১৭০৩ খ্রীঃ) পীর ছিলেন সৈয়দ সুলতান বংশীয় শাহ তাজুদ্দীন :

সুলতান বংশের কাস্তি শাহ তাজুদ্দীন

তানপদ পাদুকার রেণু ভুরুদেশ

ভাগ্যফলে হৈলুঁ আমি তাহার অধীন

দিয়া মনে আশা করি আছিএ বিশেষ।^৬

৮. 'আজরশাহ-সমনরোখ' প্রণেতা মুহম্মদ চুহর (১৮০৪-৫০ খ্রীঃ) চট্টগ্রামবাসী কবি প্রণামে বলেছেন :

আদ্যপুরু কল্পতরু সৈদ সুলতান

কবি আলাওল পীর মোহাম্মদ খান।^৭

৯. সতেরো শতকের প্রথমার্ধের পদকার ফতে খানের পীর ছিলেন সৈয়দ সুলতান এবং মনিব ছিলেন ইব্রাহীম খান। তিনি বলেছেন :

কহে ফতে খান, সখি উপায় আছএ নাকি

শ্রীযুত ইব্রাহীম খান

ভবকল্পতরু জানহ আমার পীর মীর শাহ সুলতান।

^২ এ

^৩ এ

^৪ ৮ম অধ্যায় দ্রষ্টব্য।

^৫ ৬ষ্ঠ অধ্যায় দ্রষ্টব্য।

^৬ এ

^৭ ১ম অধ্যায় দ্রষ্টব্য।

^৮ ৬ষ্ঠ অধ্যায় দ্রষ্টব্য।

এই ইব্রাহিম খান সম্ভবত রাস্তি খানের পুত্র মীনা খান-বংশীয় চট্টগ্রামস্থ আরাকানী উজির জালাল খানের (১৫৬৯-৮৫ খ্রীঃ) পুত্র ইব্রাহিম খান। ইনিও চট্টগ্রামে আরাকানী উজির (১৫৮৫ খ্রীঃ) ছিলেন। কবি মুহম্মদ খান তাঁরই ভ্রাতৃপুত্র। ফতে খান অপর একটি পদে আলাওল খান-এর নামোল্লেখ করেছেন। গোটা চট্টগ্রাম ১৫৮৫ খ্রীস্টাব্দ থেকে ১৬৬৫ খ্রীস্টাব্দ অবধি আরাকান শাসনে ছিল। কাজেই উক্ত আলাওল রাজধানী রোসঙ্গপ্রবাসী কবি আলাউল হতে পারেন। ভণিতাটি এরূপ :


কহে ফতেখানি যোহি পাইল ধনি

সোহি পুরুষবর জান।

পুরুল মনোরথ সকল কলাবত

শ্রী আলাওল খান।

উপরে উদ্ধৃত তথ্যগুলো থেকে সৈয়দ সুলতানের একটি বংশলতাও দাঁড় করানো সম্ভব :



সৈয়দ সুলতানের পীর সৈয়দ হাসান সম্ভবত আঠারো শতকের শেষ দশকের কবি সৈয়দ নূরউদ্দীনের প্রমিতামহ সৈয়দ হাসান (গোড় থেকে ১৫৭৫ সনে মনোমারীশাস্ত্র চট্টগ্রামে আগত ও চকরিয়া / আমরাবাদ বাস করেন)

১০. আঠারো শতকের প্রথমার্ধে শমশের গাজী নামে এক দুঃসাহসী ব্যক্তি ফেনী অঞ্চলে এ রাজ্য স্থাপন করেন। তাঁরই কীর্তিকথা বর্ণিত হয়েছে মনোহররচিত 'শমশেরগাজী নামা'য়। সৈয়দ সুলতানের এক বংশধর পীর মীর গাদা হোসেন খোন্দকার শমশের গাজীর পীর ছিলেন।

১১. দুল্লামজলিস (১৭৪৫ কিংবা ১৭৮৫-৮৮ খ্রীঃ) প্রণেতা আবদুল করিম খোন্দকারও সৈয়দ সুলতানকৃত নবীবংশ-এর উল্লেখ করেছেন :

বিশেষ ন কহি আমি আদমের কথা

নবীবংশ পুস্তকেত আছএ ব্যবস্থা।

দুল্লামজলিসে আদম, ইব্রাহিম, লুত, শোএব, আয়ুব, মুসা, সোলেমান, ঈসা, মুহম্মদ প্রমুখ নবী এবং ফাতেমা, আলি, সফী ইউসুফ, খালেদ, বিলাল, হানাস বসোরী, হাসান কোরাইশী, সুলতান আবু সৈয়দ প্রভৃতির এবং রোজা ও বেহেষ্টের বিবরণ আছে।

১২. আঠারো শতকের শেষার্ধের কবি সৈয়দ নাসির তাঁর 'সিরাজ সবিল'^১ নামের গ্রন্থে কবি প্রণামে সৈয়দ সুলতানের নামোল্লেখ করেছেন :

সৈয়দ সুলতান কবি আলাওল আর
দোহ পদে প্রণামিএ হাজারে হাজার ।

১৩. শাহপরী, হাসনবানু প্রভৃতি উপাখ্যান এবং হায়রাতুল ফেকাহ^২ রচক মুহম্মদ আলি তাঁর শেষোক্ত গ্রন্থে 'নবীবংশ'-এর উল্লেখ করেছেন। কবি মুকিমের নামোল্লেখ থেকে প্রমাণ ইনি আঠারো শতকের শেষার্ধের লোক।

তার কত অঙ্গ পরে খলিফা সৃজিছে
তার সন নিরূপণ নবীবংশে আছে ।

১৪. কবি মুকুল ওর্ফে মঙ্গল মঙ্গল কাব্যের আদলে রচিত তাঁর ইসলামের মহিমা জ্ঞাপক উপাখ্যান 'শাহজালাল মধুমালা'^৩ কাব্যে (১৬৬৫ খ্রীঃ) সৈয়দ সুলতান ও মুহম্মদ খানের দোহাই দিয়েছেন :

এসব বৃত্তান্ত কথা অনেক আছিল বাসন্তের সনে তাহা হইল প্রচার ।
পুষ্পক বিশাল বাড় এ দেখি তাহা না লেখিল । সৈয়দ সুলতান আর মোহম্মদ খান
আছিল এ সব কথা আদ্যের বিচার এক সবে করিয়া জ্ঞান মহামান্য জন ।

১৫. 'মালিকার সওয়ারাল বা ফকরনামা' শীখের ভক্তব্রহ্ম লেখক শেরবাজ চৌধুরীও^৪ (সতেরো-আঠারো শতক) সৈয়দ সুলতানের নবীবংশের উল্লেখ করেছেন :

নৃপতি নন্দিনী বালা কৈল জিজ্ঞাসন আবদুল্লাহ বলে, তনু, আয় দণ্ডধর ।
মাতাপিতা বিনে জন্ম বল কোন জন । মাতাপিতা বিনে জন্ম পঞ্চ পয়সম্বর ।
প্রথমে আদম সফি দ্বিতীয় হাওয়ার মাতাপিতা বিনে জন্মে এই পঞ্চজন
তৃতীএ হইল জন্ম নামে সালেহার । নবীবংশে লেখিয়াছে সে সব কখন ।
চতুর্থে হইল জন্ম নামে ইসমাইল রচিয়া কহিলে কথা নাহি কোন ভাল ।
মরিয়ম সূত ইসা পঞ্চমে জন্মিল ।

১৬. রাগমালা ও পদাবলী রচক চট্টগ্রামবাসী চম্পাগাজীও (আঠারো শতক) শ্রদ্ধার সঙ্গে স্মৃতিসাধনার গুরু হিসেবে সম্ভবত সৈয়দ সুলতানকেই স্মরণ করেছেন :

এক গৃহের দশ দুয়ার ধরিয়াছে মুখে শাহ সুলতানপদ মানি চম্পাগাজী কহে
শ্রীমুখের ধ্যান কহিলাম সুখে । লাহতের ডেউ পড়ে মণিক্য পালায় ।

১৭. কব্রবাজারের পেতাগাজী পণ্ডিত ওর্ফে হাসান আলী তাঁর 'জমিদার পরিবার' নামক প্রশস্তি পুস্তিকার (১৩২৪ সনে প্রকাশিত) কবি হিসেবে সৈয়দ সুলতানের নাম শ্রদ্ধার সঙ্গে স্মরণ করেছেন।

^১ ৮ম অধ্যায় দ্রষ্টব্য ।

^২ ৯ম " "

^৩ ৬ষ্ঠ " "

^৪ ৯ম " "

১৮. পীর সৈয়দ সুলতানের ভক্ত শিষ্য কবি মুহম্মদ খান সৈয়দ সুলতানের রূপগুণের বর্ণনা দিয়েছেন :

ইমাম হোসেন বংশে জন্ম গুণনিধি
সর্বশাস্ত্রে বিশারদ নররস দধি ।
শ্যাম নব জলধর সুন্দর শরীর
দানে কল্লতরু পৃথিবীর সম স্থির ।
পূর্ণচন্দ্র দিক মুখ কমললোচন
মন্দ মন্দ মধু হাসি মধুর বচন ।
শাহ সুলতান পীর কৃপার সাগর
সেবক-বৎসল প্রভু গুণে রত্নাকর ।
ভাবে ভবকল্লতরু গুণে রত্নাকর
সিদ্ধিক সিদ্ধিক সম ধর্মেত উমর ।

উসমান-সদৃশ লজ্জা আলি সম জ্ঞান
অসীম মহিমা পীর শাহ সুলতান ।...
উদরেত বৈসে তান জগতের গুণ ।
বিজয় করিলা শাস্ত্র পৃথিবী ত্রিকোণ ।
হৃদয় মুকুর তান নাশে আক্শিয়ার
বহু যত্নে এহি রত্নে কৈলা করতার ।...
নবীবংশ রচিছিল পুরুষ প্রধান
আদ্যের উৎপন্ন যত করিলা বাখান ।
রসুলের ওফাত রচিয়া না রচিলা
অবশেষে রচিবারে মোক আজ্ঞা দিলা ।

মুহম্মদ খানের এ বিবৃতি থেকে যে তথ্য মেলে, তা এই : সৈয়দ সুলতান ফাতেমীয় সৈয়দ ছিলেন। তিনি শ্যামসুন্দর পুরুষ ছিলেন। দানে দয়ায় ও ভক্ত-বাৎসল্যে তিনি ছিলেন অতুলনীয়। তাঁর ছিল আবুবকরের মতো সত্যবাদিতা, উমরের মতো ধার্মিকতা, উসমানের মতো লজ্জা ও আলির মতো জ্ঞান। অসামান্য শাস্ত্রজ্ঞ, অনন্য জ্ঞানীপুরুষ সৈয়দ সুলতান ছিলেন আল্লাহর বিশিষ্ট সৃষ্টি।

সৃষ্টিপত্তন থেকে কেয়ামত অবধি ইসলামী ধারার একটি পূর্ণাঙ্গ ইতিকথা রচনার ইচ্ছে ছিল সৈয়দ সুলতানের। এ পরিকল্পনা অনুযায়ী তিনি আদি থেকে ওফাত-ই-রসুল অবধি ইসলামী ধারার সব কিছুই বর্ণনা দিয়ে লেখনী ত্যাগ করেছেন। মুহম্মদ খানের বাচনভঙ্গি দেখে মনে হয়, ১৬৪৬ সনে মক্কুল হোসেন কাব্য রচনাকালেও সৈয়দ সুলতান বেঁচে ছিলেন। তবু কি কারণে তিনি আরদ্ধ কর্ম-সমাধা করেননি, গুরু-শিষ্য কারো উক্তি থেকে তার হৃদিস মেলেনি। সৈয়দ সুলতানের পীরের নাম সৈয়দ হাসান। কবির পুরো নাম ছিল মীর সৈয়দ সুলতান। পীরের নামানুসারে কবি পুত্রের নাম রেখেছিলেন সৈয়দ হাসান। তাঁর যে পীরালি পেশা ছিল, তা তাঁর উক্তিতে প্রকাশ :

মুঞ্জি যদি গুরুপদে করিলুঁ সেবন
তবে স্থান পাইবেক মোর শিষ্যগণ ।

মুঞ্জি যদি পদবন্ধ না করিতুম সার
মোহোর শিষ্যের হৈব এহেন প্রকার ।

বিশেষ করে সৈয়দ সুলতানের নবীবংশ রচনারস্ত সনটি উক্ত কাব্যের একটি পাণ্ডুলিপিতে পাওয়া গেছে :

লক্ষর পরাগল খান আজ্ঞা শিরে ধরি
কবীন্দ্র ভারত-কথা কহিল বিচারি ।
হিন্দু মুসলমান তাএ ঘরে ঘরে পড়ে
খোদা রসুলের কথা কেহ না সোঙরে ।
এহ শত রস যুগে অন্ধ গোঞাইল
দেশী ভাষে এহি কথা কেহ না কহিল ।

আরবি ফারসি ভাষে কিতাব বহুত
আলি মানে বুঝে ন বুঝে মূর্খ যত ।
দুঃখ ভাবি মনে মনে করিলাম ঠিক
রসুলের কথা যথ কহিমু অধিক ।

এই 'এহ শত রসযুগ' থেকে ৯৯২ বা ৯৯৪ হিজরী সন তথা ১৫৮৪ বা ১৫৮৬ খ্রীস্টাব্দ মেলে। ডক্টর সুকুমার সেন 'দশ শত রসযুগ' পাঠ বানিয়ে সৈয়দ সুলতানকে সত্তেরো শতকের

(১৬৬৪-৬৫) কবি বলে অনুমান করেছেন।^১ কিন্তু মুহম্মদ খানের দীক্ষাদাতা ও কাব্যগুরু সৈয়দ সুলতান মুহম্মদ খানের পরবর্তীকালে লেখক হতে পারেন না। আবার অধ্যাপক আলি আহমদ^২ ও ডক্টর মুহম্মদ শহীদুল্লাহ^৩ 'রস'-এর মান ছয় ধরে ৯৬২ হিজরী সন নিরূপণ করেছেন। পূর্বালোচিত পরোক্ষ তথ্য প্রমাণের উপর আস্থা রেখে আমরা সৈয়দ সুলতান ১৫৮৪-৮৬ খ্রীস্টাব্দে (৯৯২ হিঃ) নবীবংশ রচনায় হাত দেন বলে বিশ্বাস করি। সৈয়দ সুলতান সিলেট জেলার হবিগঞ্জ মহকুমার লক্ষরপুরবাসী ছিলেন বলে দাবি করেন মোহাম্মদ আশরাফ হোসেন সাহিত্যরত্ন ও অধ্যাপক যতীন্দ্রমোহন ভট্টাচার্য।^৪ কিন্তু আমাদের পরিবেশিত তথ্য তাঁদের দাবি সমর্থন করে না। আবার ডক্টর মুহম্মদ এনামুল হকের,^৫ অধ্যাপক আদমউদ্দীনের^৬ এবং অধ্যাপক আলি আহমদের^৭ মতে সৈয়দ সুলতান পরাগলপুরবাসী ছিলেন। কিন্তু তাঁদের ধারণাও পুরো সত্য নয়, অবশ্য কবি পরাগলপুরে সাময়িকভাবে বাস করেছেন।^৮ বিশেষ করে নবীবংশ শুরু করার সময় তিনি পরাগলপুরেই ছিলেন। তাই তিনি বলেছেন :

লক্ষরের পুর খানি আলিম বসতি

মুঐঃ মূর্থ আছি এক সৈয়দ সন্ততি।

পরাগল খাঁ কর্তৃক পরাগলপুর পত্তনের ষাট-পঁয়ষষ্টি বছর পরে (১৫৮৪-৮৬ সনে) সৈয়দ সুলতান 'লক্ষরের পুর'-এর উল্লেখ করেছেন। এতে দুটো গুরুত্বপূর্ণ তথ্যের ইঙ্গিত রয়েছে। এক, ১৬৮৪-৮৬ খ্রীস্টাব্দে পরাগলপুর অত্যন্ত আধ্যাত্মিক শাসনকেন্দ্র ছিল। দুই, তখনো লক্ষর বলতে প্রখ্যাত পরাগল খানই লোকস্মৃতিতে উজ্জ্বল হয়ে রয়েছেন। অথবা এই কেন্দ্রের শাসনভার তখনো লক্ষর উপাধি কিংবা পদবীধারী কর্মচারির উপর ন্যস্ত ছিল। তবে শেষোক্ত অনুমানের অবকাশ অল্প। কেননা আমাদের উদ্ধৃত চরণ দুটো আগেই কবি উল্লেখ করেছেন :

লক্ষর পরাগল খান আজ্ঞা শিরে ধরি

কবীন্দ্র ভারত-তথা কহিল বিচারি।

কাজেই লক্ষরের পুর যে পরাগলপুরই তাতে সন্দেহ থাকে না। অতএব, আমাদের উপস্থাপিত তথ্যে ও সাক্ষ্যে আস্থা রেখে সৈয়দ সুলতানের পৈত্রিক নিবাস ও জন্মভূমি চক্রশালা চাকলার আধুনিক পটিয়ার কোথাও ছিল বলে বিশ্বাস করি।^৯

^১ বাঙ্গলা সাহিত্যের ইতিহাস, ১/অণ, ৩য় সং, পৃঃ ৩৪৩।

^২ ওফাতে রসুল, ভূমিকা।

^৩ বাঙ্গলা সাহিত্যের কথা, ২য় খণ্ড, পৃঃ ১২৩।

^৪ মাসিক সওয়াত, ফাল্গুন, ১৩৪৩ সাল।

^৫ ক. আলইসলাহ, ৮ম বর্ষ ১-৩ সংখ্যা।

খ. ঐ বাঙ্গলার বৈষ্ণবভাবাপন্ন মুসলিম কবি, পৃঃ ১৩০-৩১।

গ. বঙ্গীয় সাহিত্য পরিষৎ পত্রিকা, ১৩৫১ সন, বর্ষ, ৩য়-৪র্থ সংখ্যা।

^৬ ঐ-, ১৩৪১, ৪১ বর্ষ, ২য় সংখ্যা, পৃঃ ৩৮।

^৭ মাসিক মোহাম্মদী, ১৩৫২, বৈশাখ, ২৭২-৭৩।

^৮ ওফাতে রসুল, ভূমিকা, পৃঃ দখ ১।

^৯ মুসলিম বাঙ্গলা সাহিত্য, পৃঃ ১৪৮।

ক. বাঙ্গলা সাহিত্যের কথা-ডক্টর মুহম্মদ শহীদুল্লাহ, পৃঃ ২৯।

খ. মুসলিম বাঙ্গলা সাহিত্য-ডক্টর মুহম্মদ এনামুল হক পৃঃ ১৪৮।

সৈয়দ সুলতান নবীবংশ, জ্ঞানপ্রদীপ ও পদাবলী রচয়িতা এবং জয়কুম রাজার লড়াই নামে একটি স্বতন্ত্র যুদ্ধ কাব্যেরও রচক।

‘জ্ঞানচৌতিশা’ স্বতন্ত্র পুস্তকরূপে চালু থাকলেও তা জ্ঞানপ্রদীপেরই অংশ। সম্ভবত স্মৃতিতে ধরে রাখার সুবিধার জন্যেই জ্ঞানপ্রদীপোক্ত সারকথা চৌতিশায় বিধৃত হয়েছে।

এছাড়া সৈয়দ সুলতান সাধনতত্ত্বানুগ পদাবলীও রচনা করেছেন। তাঁর রচিত প্রাপ্ত পদের সংখ্যা চৌদ্দ।

‘জয়কুম রাজার লড়াই’-এর আরবি হরফে লিখিত একখানা খণ্ডিত পাণ্ডুলিপি পেয়েছিলেন সাহিত্যবিশারদ। ঢাকা বিশ্ববিদ্যালয়ের পুথিশালা থেকে তা কয়েক বছর আগে খোঁয়া গেছে। পুথি পরিচিতিতে (পৃঃ ১৭৪) তার বিবরণ আছে। সম্প্রতি আরবি হরফে লিখিত আর একখানা পাণ্ডুলিপি আমার হস্তগত হয়েছে। সাহিত্যবিশারদ সংগৃহীত পুথিটিতে ছিল জয়কুম রাজার কৃপ খনন থেকে মালেক শাহ বা মুলুকশাহর যুদ্ধক্ষেত্রে আগমন অবধি। আমার পুথিও আদ্যে ও মধ্যে খণ্ডিত। শেষ পত্র দুটো আছে। জয়কুমের রাজ্যসীমায় পৌছে রসুল জয়কুমের কাছে যখন কাসেদ পাঠাচ্ছেন সেখান থেকে শুরু। রসুল-রচিত পর্বের কোন পুথিতেই এ কাহিনী মেলেনি। তাই মনে হয়, এটি কবির স্বতন্ত্র রচনা। কিন্তু এ নিছক অনুমান মাত্র। জয়কুম রাজার লড়াই-এর প্রথমাংশ পাওয়া গেলে হয়তো সহজেই বোঝা যেত এটি স্বতন্ত্র পুস্তিকা কিংবা রসুল চরিতের একটি অংশ।

কাব্যের ‘নবীবংশ’ নামটি ‘রঘুবংশ’ ও ‘হরিবংশ’-এর কথা স্মরণ করিয়ে দেয়। নবীবংশ নামটি একালের আক্ষরিক অর্থে গ্রহণ করলে তাৎপর্যহীন বলে মনে হবে। কেননা এটি প্রথমত কেবল নবী-কাহিনী- তাঁদের কারুর বংশধরের বর্ণনা নয়। অবশ্য ‘নবীবংশ’-কে দরাজ অর্থে আদমবংশধর কাহিনী বলে ধরলে এ নামের কেবল আংশিক যথার্থ্য খুঁজে পাওয়া যায়, কারণ এ কাব্যে তাঁর সব বংশধরের কথা নেই। মনে হয় নবীবংশ’ নামে কবি মুখ্যত নবীপরম্পরা নির্দেশ করেছেন। আমাদের অনুমান সত্য হলে রঘুবংশ’ কিংবা ‘হরিবংশ’ নামের অনুকৃতি এ এক্ষেত্রে অসঙ্গত ও অসার্থক হয়েছে। কেননা, ‘বংশ’-এর যে সামান্য অর্থ চালু রয়েছে, তার সঙ্গে এ অভিধা মেলেনা। সব নবী অভিন্ন গোত্রেরও নন। অতএব ‘বংশ’ শব্দটিকে কুল, পরম্পরা, সমূহ, গণ, বর্গ প্রভৃতি অর্থেই গ্রহণ করতে হবে। এবং এই অভিধায় চিহ্নিত করলেই ‘নবীবংশ’ নামের যথার্থ্য ও সার্থকতা স্বীকার করা সহজ হবে। এই তাৎপর্যে আস্থা রাখলে নামটি রঘুবংশ বা হরিবংশ-এর অনুকৃতি বলেই মনে হবে না।

বাঙালী কবি আরবদেশের চিত্রাঙ্কনে ব্যর্থ হয়েছেন। তাঁর দেশের মানুষ, সমাজ, আচার, আহার্য প্রভৃতিই তাঁর কল্পনাকে ঘিরে রেখেছিল, তাই তাঁর হাতে আমরা মরুভূ আরবের কোন আবহ পাইনে, বাংলাদেশকেই তিনি আরব নামে চালিয়ে দিয়েছেন। অবশ্য কেবল তিনিই নন, অন্য সব কবিই আরবের বিনামূলিতে বাংলাদেশ ও বাঙালীকে তুলে ধরেছেন। যিনি লিখেছেন তাঁর যেমন সে-দেশ ও দেশের মানুষ সম্বন্ধে কোন অভিজ্ঞতা নেই, তেমনি যারা পড়ুয়া ও শ্রোতা তাদেরও কোন ধারণা ছিল না। কাজেই কাহিনীর আবেদন কিংবা কাব্যরস কোথাও ব্যাহত হয়নি। আবার নবীদের সম্বন্ধে বর্ণিত কাহিনীগুলোও সব কাল্পনিক। অবশ্য সেগুলো সৈয়দ সুলতানের বানানো নয়, তাঁর আগে হাজার বছর ধরে ওসব কাহিনী লোক-পরম্পরায় তৈরি ও পল্লবিত হয়ে তাঁর কানে এসেছে। সে-যুগের বিশ্বাস-প্রবণ অজ্ঞ মানুষের সত্যাসত্য

সম্পর্কে প্রশ্ন জাগেনি, সেদিক দিয়েও কাব্যের উদ্দেশ্য ব্যর্থ হয়নি। বিশেষ করে বিশ্বাসের অস্বীকারেই ধর্মের উদ্ভব। কাজেই ধর্ম কথায় যৌক্তিকতা অচল তো বটেই বরং অলৌকিক অস্বাভাবিক কিছু না থাকলে ঐশ্বরিক অভিজ্ঞান মেলে না। এ কারণে স্বর্গ-মর্ত্য-পাতালের পরিসরে ব্যাপ্ত জগতে ও মহৎজীবনে অসামান্যকে প্রত্যক্ষ করাই লোকচরিত্রের বৈশিষ্ট্য। আজো মানুষের চরিত্রে এই প্রবণতা প্রবল। যে আমার মতো প্রকৃতির ও নিয়মের দাস সে আর বাড় কিসে! কাজেই মহত্ব ও অসাধারণত্ব প্রমানের জন্যে অলৌকিককে লোকাবৃত, অসম্ভবকে সম্ভব এবং অস্বাভাবিককে স্বভাবধর্মে প্রত্যক্ষ করাতে হবে। অতএব, কেরামতি দেখাতেই হবে তা যাদু দিয়েই হোক আর টোনা করেই হোক।

তা ছাড়া, অজ্ঞতা বশে সেকালের মানুষ ছিল অতিমাত্রায় কল্পনাপ্রিয়, দৈবনির্ভর ও স্বাপ্নিক। তাদের মনোজগতে বাস্তব অবাস্তবের সীমারেখা ছিল অস্পষ্ট, যুক্তি-বুদ্ধির প্রভাব ছিল সামান্য। তাদের কাছে রূপকথা মনে হতো বাস্তব আর বাস্তব ঘটনাও তাদের বর্ণনায় হয়ে উঠতো রূপকথা। কেননা তারা ভূত-প্রেত দেও-দানুতে বিশ্বাস রাখতো। ঝাড়-ফুঁকে, তুক-তাকে ও দারু-টোনাতে পেত ভরসা। রোগে-শোকে, সুখে-সৌভাগ্যে ও দুর্যোগে-দুর্দিনে তারা অনুভব করতো অলৌকিক শক্তির অদৃশ্য হাতের লীলা। এর ফলেই তাদের বিশ্বাস-সংস্কারের প্রতিচ্ছবি পাই তাদের আচরণে ও সাহিত্যে।

এও স্বীকার্য যে, মানুষের প্রবৃত্তিতেই নিহিত রয়েছে অতিভাষণের বীজ। নিদর্শন পাই তার ভাষায়, তার অলঙ্কার প্রয়োগ-প্রবণতায় ও বাধিধিত্যে। মানুষের এ অতিভাষণেই তো কাব্য-কবিতার জন্ম। আবার, নিন্দায় কিংবা প্রশংসায় মানুষের একই বৃত্তির বা প্রবৃত্তির ভিন্নমুখী প্রকাশ ঘটে। শ্রদ্ধা বা ঘৃণা মানুষকে অতিক্রমণে এবং দোষ-গুণের বিকৃতি সাধনে প্রবর্তনা দেয়। ভক্তিশ্রদ্ধার আতিশয্য যেমন অতিভাষণের প্রবণতা জাগায়, তেমনি ঘৃণার বা অবজ্ঞার আত্যন্তিকতা তিলকে তাল করে দোষের প্রেরণা যোগায়। লোকচরিত্রের এই প্রবণতা শ্রদ্ধায় জনকে করে অতিমানুষ আর ঘৃণাকে বানায় অমানুষ। একারণেই মানুষের ইতিহাস, চরিতকথা এবং কিংবদন্তী যুক্তিবুদ্ধির, বাস্তব-অবাস্তবের এবং সম্ভব-অসম্ভবের সীমা অতিক্রম করে এবং রূপকথাকেও সময়ে সময়ে হার মানায়।

পূর্বে রচিত আরবি-ফারসি নবীকাহিনীকে আদর্শ করে সৈয়দ সুলতান স্বাধীনভাবে তাঁর নবীবংশ রচনা করেছেন। তিনি বাংলাদেশের পটভূমিকায় এঁদের জীবনচিত্র এঁকেছেন।

বিশ্বাসের অস্বীকারেই ধর্মের উদ্ভব ও স্থিতি। 'বিশ্বাসে মিলয় ধর্ম তর্কে বহু দূর' জাতীয় প্রবচনের সৃষ্টিও এ বোধের পরিচায়ক। ধর্মবিধি লোকে ও লোকান্তরের প্রসারিত জীবনের নিয়ন্তা। মানুষের যেখানে অভিজ্ঞতার ও জ্ঞানের এবং আত্মবিশ্বাসের ও আত্মশক্তির শেষ, সেখান থেকেই বিশ্বাসে বিশ্বাসের কল্পনার ও ভীতির শুরু। অতএব, বিশ্বাস মানুষের জ্ঞান, যুক্তি ও বুদ্ধির উর্ধ্বে। যা বাহুবলের আয়ত্তে নয়, যা জ্ঞানের ও যুক্তি-বুদ্ধির অগোচর, তাতেই মানুষের ভয় এবং সেখানে মানুষ দুর্বল ও অসহায়, তাই সে ভীর্ণ। ভীতির থেকে মুক্তির জন্যে চাই শক্তির আশ্রয় ও পোষণ। সে শক্তিও আবার হওয়া চাই আস্থা রাখার মতো, ভরসা পাওয়ার মতো এবং নির্ভর করার মতো অপরিমেয়, অসীম এবং বিশ্বয়কর। তাই এ শক্তির উৎস হবে অপৌরুষেয়, অপার্থিব ও বোধাতীত। নইলে অন্ধবিশ্বাস ও ভরসা রাখা অসম্ভব। মর্ত্য-মানবের মধ্যে যিনি এই অলৌকিক ও অপৌরুষের নিশ্চিত শক্তির নবী-অবতার হবেন না প্রতিনিধিত্ব দাবি করবেন, তাঁর মধ্যে থাকা চাই অসামান্যতা ও অদ্ভুতচরণের শক্তি। তিনি করবেন

অসম্ভবকে সম্ভব, অস্বাভাবিককে স্বাভাবিক এবং অসাধ্যকে আনবেন সাধ্যের মধ্যে। তাই দুনিয়ার তাবৎ জাতির নবী, রসুল, পীর, অবতার, ফকির, সন্ন্যাসীর পক্ষে স্বীকৃতি আদায়ের প্রথম ও প্রধান অঙ্গীকার হচ্ছে ঐশ্বর্য বা কেরামতী প্রদর্শন। হযরত আদম থেকে হযরত মুহম্মদ অবধি ইসলামী ধারার সব নবী-রসুলের জীবন তাই অলৌকিকতা দিয়ে শুরু ও শেষ। কেবল কয়েকজন ব্যক্তি ও ঘটনাস্থলই মাত্র ঐতিহাসিক। অতএব এগুলো ঐতিহাসিক নাম-সার বানানো গল্প।

হযরত মুহম্মদের জীবনেও নব্যুত ও ওহি প্রাপ্তির অভিজ্ঞান স্বরূপ সিনাছাক, চাঁদ দ্বিখণ্ডিতকরণ এবং মে'রাজ ছাড়াও তাঁর আরো নানা মোজ্জাজার কথা ভক্ত-সমাজে ছড়িয়ে পড়েছিল। যেমন আবদুল রহমান ইবনে আবু বকর বলেছেন, একদিন হযরত মুহম্মদ বকরীর কলিজা ও গোষ্ঠ একশ' ত্রিশ জন লোককে পেটপুরে খাইয়েছিলেন, তার পরেও কিছু অবশিষ্ট ছিল।^১ জাতকেও বোধিসত্ত্ব সম্বন্ধে এমনি গল্প পেয়েছি। রসুলচরিতে এবং সহি হাদিসে এমনি নানা অলৌকিক তথ্য ও গল্প ঠাই পেয়েছে।

ভক্তের অভিভূতির আচ্ছন্নতা যেমন মনোময় কল্পনার প্রশ্রয় দেয়, বিদ্বেষের তীব্রতাও তেমনি মনগড়া দোষের ফিরিস্তি বাড়ায়। ফলে ভক্তি-শ্রদ্ধার আতিশয্য যেমন অতিভাষণের প্রবণতা জাগায়, তেমনি ঘৃণা বা অবজ্ঞার আত্যন্তিকতা তিলকে তাল করে দেখার প্রেরণা দেয়।

অতএব, অতিপ্রাকৃত অঙ্গীকারে যহরী প্রমুখ মুম্বিন, ইমাম, মহাদ্বেস ও ঐতিহাসিকগণ যতটা তথ্যনিষ্ঠ ছিলেন বলে অনুমান করি, পরবর্তীকালে ততটা নিষ্ঠা বিরল ছিল। তত্ত্বপ্রবণতার প্রশ্রয়ে তথ্য বিকৃত হয়েছে। যতই দিন গেছে লেখক সংখ্যাও বেড়েছে, কাশাসুল আঘিয়া, মাগাজী আর সিরাতগুলোও সে-সঙ্গে তত্ত্ব উপকথায় ও মোজ্জাজা সংযোজনে স্কীত হয়ে উঠেছে। কল্পনার ও কলবরের সঙ্গে যুক্তগুলোর আকর্ষণও হয়তো বেড়েছে-যার পরিণামে ও পরিণতিতে আমরা দেশী পরিবেশে জয়কুম রাজার লড়াই'র মতো বানানো কাহিনীও পাচ্ছি। কবিল ও তার সন্তানদের হাতে দেখেছি রাম-রাবণের যুদ্ধে ব্যবহৃত অস্ত্র, বেদে মিলেছে হযরত মুহম্মদের নাম, আর পাই তরবারির সাহায্যে উন্মেষ যুগের ইসরাম-প্রচারক বীর রসুল, আলি, হামজা, হানিফা প্রভৃতিকে দেখি একহাতে তরবারি আর হাতে কোরআন নিয়ে কাফেরদেরকে বাহুবল প্রয়োগে দীক্ষিত করতে। এতে অমুসলমানদের কাছে মুসলমানকে করেছেন তাঁরা লজ্জিত, বীরদের করেছেন নিন্দিত, আর ইসলাম হয়েছে অবজ্ঞেয়। এ ব্যাপারে মৌলানা মোহাম্মদ আকরম খানের মন্তব্য মূল্যবান :

‘মহাপুরুষকে ভক্তি করিতে হইলে, তাঁহার জীবনীকে একেবারে বাদ দিয়া গেলেও চলে না, তাই ভক্তগণ খুব সহজে উভয়কূল রক্ষা করার জন্য কতগুলি আজগুবি অনৈতিহাসিক অলৌকিক ও অস্বাভাবিক গল্প-গুজব ও উপকথার আবিষ্কার করেন এবং উচ্চ কণ্ঠে মহাপুরুষের নামের জয়জয়কার করিয়া মনে করিলেন যে, তাঁহাকে যথেষ্ট ভক্তি করা হইল। ক্রমে কথিত কুসংস্কারমূলক উপকথা ও অলৌকিক কেছা-কাহিনীগুলি ... শাস্ত্র হইয়া দাঁড়ায়। (মোস্তফা চরিত পৃঃ ২) পুস্তকে লিপিবদ্ধ হইলেই প্রত্যেক মিথ্যা এবং প্রত্যেক অস্বাভাবিক ও অনৈতিহাসিক কিংবদন্তী ইতিহাসে এবং তাহা হইতে ভুরায় উন্নীত হইয়া ধর্মবিশ্বাসে পরিণত হইতে লাগিল (পৃঃ ১০)।

^১ তজরীদুল বুখারী : বাঙলা একাডেমী প্রকাশিত, হাদিস সং ১১৫৭, পৃঃ ৪৯৩।

এবং আদি জীবনীকার মুহম্মদ বিন ইসহাক (মৃঃ ১৫১ হিঃ) এবং মুহম্মদ বিন ওমর ওয়াক্কেদী (মৃঃ ২৩৭ হিঃ) থেকেই লিখিতভাবে এর শুরু। আবার তকলিদ (অভিমত)-কে রওয়াইত (সাক্ষ্য) বলে চালিয়ে দেয়ার ফলেও বহু মিথ্যা ও বিকৃতি প্রবেশ করেছে। [মোস্তাফাচরিত, পৃঃ ১০২-০৮, ৬-১১]

নবীবংশ পরিচিতি

যে দেশজ মুসলিম সমাজ গাঁয়েগঞ্জে গড়ে উঠেছে, ইসলামী ইতিকথায় ও ঐতিহ্যে সে সমাজকে দীক্ষাদানের উদ্দেশ্যই রচিত হয়েছে কবির নবীবংশ। পরাগলী মহাভারতই কবিকে এসব দায়িত্ব গ্রহণে উদ্বুদ্ধ করে :

এবে পুস্তকের কথা কহিতে জুয়াএ
প্রকাশ্যে সকল কথা মনে নাহি লএ।
লঙ্কর পরাগল খান আজ্ঞা শিরে ধরি
কবীন্দ্র 'ভারত কথা' কহিল বিচারি।
হিন্দুমুসলমান তাহা ঘরে ঘরে পড়ে
খোদা রসুলের কথা কেহ না সোঙরে।
তাই-

গ্রহশত রসযুগে অন্দ গোঞাইল
দেশীভাষে এহি কথা কেহ না কহিল।
দুঃখ ভাবি মনে মনে করিলুম ঠিক
রসুলের কথা যথ কহিমু অধিক।...
কর্মদোষে বন্ধেতে বাঙ্গালী উৎপন
না বুঝে আঙ্গালী সবে আরবি বচন।
আঙ্গালী দীনের বোল এক না বুঝিল।

অতএব সৈয়দ সুলতানই প্রথম ব্যক্তি যিনি সাহস করে নবী-রসুলের ইতিবৃত্ত এবং ইসলামের মর্মকথা বাঙলা ভাষায় রচনা করতে শুরু করলেন। একে তিনি আল্লাহ-রসুলের ও মুসলিম সমাজের প্রতি আলিমের ও পীরের দায়িত্ব ও কর্তব্য বলেই মানলেন :

আল্লাএ বুলিব তোরা আলিম আছিল
মনুষ্যের করিতে পাপ নিষেধ না কৈলা।

আল্লাহর প্রশ্নের উত্তরে পাপী শিষ্য বলবে-

শুরু ভেটিলাম শুরু না জানাইল মোরে।
কাজেই দেশেতে আলিম থাকি যদি না জানাএ,
সে আলিম নরকে যাইব সর্বথাএ।
এহি ভএ ভাবিয়া রচিল নবীবংশ
শুন পাপীগণে যেন পাপে নহে ধ্বংস।

কর্তব্য পালন করতে গিয়ে কবি রক্ষণশীলদের কাছে হলেন নিন্দিত :

সে সবে আপনা বোল না পারে বুঝিতে
পাচালী রচিলাম করি আছএ দৃষিতে।
মুনাফিকে বোলে অন্ধি কিতাবেতু কাড়ি
কিতাবের কথা দিলুঁ হিন্দুয়ানী করি।

কবি এ অকারণ নিন্দা থেকে রেহাই পাবার জন্যে পৃথিবীর বিভিন্ন জাতির- খোরাসানী, যাভানী, চোল, রুমী, এরাকী, সামী, ইয়ামানি, ইরানি, পাঠান প্রভৃতির অনেক দৃষ্টান্ত দিয়ে অবশেষে বলেছেন :

আলিমে কিতাব পড়ি বাখানে যে কালে
হিন্দুয়ানী করি যদি না বাখানি বোলে।
যারে যেই ভাষে প্রভু করিয়াছে সৃজন
সেই ভাব তাহার অমূল্য সেই ধন।

বঙ্গদেশী সকলেরে কিরূপে বুঝাইবে?

আল্লাএ বুলিছে, মুঞি যেদেশে যে ভাষ,
সে দেশে সে ভাষে কৈলুঁ রসুল প্রকাশ।'

শাস্ত্র চিরকালই জনগণের ভাষায় অনূদিত ও ব্যাখ্যাত হয়েছে মুখে মুখে, কেবল লিপিবদ্ধ করণেই ছিল বাধা। মূর্খের নিন্দা অস্বাহ্য করে কবি বলেন-

পয়গম্বর সকলের মহিমা প্রচারিলুঁ
পাপমতি ইব্রিসের অযশ ঘোষিলুঁ।

তোক্ষরা সবার মুঞি জান হিতকারী
ইমা ইসলামের কথা দিলাম প্রচারি।

নবীবংশে বর্ণিত বিষয় :

যে রূপে সৃজন হৈল এ তিন ভুবন
যে রূপে সৃজিল জান সুরাসুর গণ।
যে রূপে আদম হাওয়া সৃজন হৈল
যে রূপে যথেক পয়গাম্বর উপজিল।
বসন্তে এসব কথা কেহ না জানিল
নবীবংশ পাঞ্চগলীতে সকল কহিল।

মুঞি পাপী এ সকল প্রচার করিলুঁ
তোক্ষরা সবার লাগি দর্পণ সৃজিলুঁ।
এ দর্পণ দর্শিলে খণ্ডিব যথ ধন্থ
নিরক্ষিলে দর্পণ জানিবা ভাল মন্দ।

নবীবংশ' রূপ জ্ঞানদর্পণ সৃষ্টি করে কৃতার্থ কবি সগর্বে দাবি করছেন :

মাএ বাপে তোক্ষারে জনম দিয়া গেছে,
দিব্য আঁখি তোক্ষারে দিলাম আন্ধি পাছে।

নবীবংশ রক্ষণ-পঠনের যৌক্তিকতা ও সফল সম্বন্ধে কবি বলেন :

যে সকল মুমীন হএ করুণা হৃদএ
নবীবংশ পুস্তক রাখিতে জুয়াএ

এহি পুস্তক যদি পারে রাখিবারে
আল্লাহ গৌরব হৈব তাহার উপরে।

কবি ভারতীয় প্রতিবেশ স্মরণে রেখে নবীবংশ রচনা শুরু করেন। হিন্দুর সুরাসুর, বেদ, অবতার প্রভৃতি সব কিছুই সত্যতা তিনি সৃষ্টির ও শাস্ত্রের আনুক্রমিক ধারায় স্বীকার করেন। কিন্তু ইব্রিসের প্রভাবে সুরাসুর বিদ্রাস্ত, বেদ বিকৃত, অবতার বিপথগামী, ঈসার কিতাবও বিকৃত। কাজেই একালের সর্বশেষ শাস্ত্র ইসলামই হচ্ছে সর্বজনস্বাহ্য ও বরণ্য ধর্ম। অর্থাৎ সৈয়দ সুলতান ইসলামের সত্যতা ও শ্রেষ্ঠত্ব এবং ব্রাহ্মণ্য ধর্মের বিকৃতিজাত অসারতা ও পরিহার্যতা যুক্তি প্রমাণ যোগে প্রতিপন্ন করতে প্রয়াস পেয়েছেন। তাঁর প্রত্যাশা ছিল এতে দেশজ মুসলিম হবে ইসলামনিষ্ঠ আর হিন্দুও হবে ইসলামের সত্যতায় আকৃষ্ট।

মুসলিম-মনে ঐতিহ্য-চেতনা, আত্মপ্রত্যয় ও স্বধর্মগৌরব জাগ্রত করাই ছিল সৈয়দ সুলতানের মুখ্য লক্ষ্য। তাঁর অভীষ্ট সিদ্ধ হয়েছিল। হিন্দুর জীবনে সমাজ সংস্কৃতিতে রামায়ণ-মহাভারত-ভাগবতের যে ভূমিকা, গুরুত্ব ও প্রভাব ছিল তেমনি ভূমিকা ও প্রভাব ছিল সৈয়দ সুলতান বিরচিত নবীবংশ নামের এই কিসসা-সুল আখিয়ার চট্টগ্রামের মুসলমানদের উপর। এ প্রভাব অবশ্য চট্টগ্রামেই ছিল সীমিত। কেননা মধ্যযুগের সাধারণ মানুষের স্থানিক বিচ্ছিন্নতার ও স্বাতন্ত্র্যের প্রতিবেশে হস্তলিখিত গ্রন্থের অঞ্চলান্তরে প্রচার সহজ ও স্বাভাবিক ছিল না।

মুসলমানদের সাধারণ বিশ্বাস আদম থেকে নবী পরম্পরার সংখ্যা এক লক্ষ চব্বিশ হাজার কিংবা এক লক্ষ চল্লিশ হাজার অথবা দুই লক্ষ চব্বিশ কিংবা চল্লিশ হাজার। এঁদের মধ্যে নাম জানা আছে মাত্র বিশ-পঁচিশ জনের। এবং কেতাবী নবী হচ্ছেন চারজন মাত্র এবং অন্যেরা

স্বপ্নাদিষ্ট নবী। নবীবংশে কবি পীর মীর সৈয়দ সুলতান আদম থেকে ঈসা অবধি মাত্র আঠারোটি কিসসা বা নবীকাহিনী বর্ণনা করেছেন :

সৈয়দ সুলতান পঞ্চালী ভণিল অষ্টাদশ কিসসা নবী সমাপ্ত হৈল।

তারপর দ্বিতীয় পর্ব শুরু করার আগে প্রথম পর্বের শেষে বলেছেন :

এবে শুন যেকুপে জন্মিল মুহম্মদ শুনিলে সে সব কথা খণ্ডি আপদ।

‘নবীবংশের’ ‘হামদ’ অংশে ‘আল্লাহর’ স্বরূপ ব্যাখ্যার চেষ্টা আছে :

আদি অন্ত নাহি তার নাই স্থান স্থিত এবং— রজগুণ ধরি প্রভু সংসার সৃজএ
খণ্ডন বর্জিত রূপ সর্বত্র ব্যাপিত।... সত্ত্বগুণ ধরি প্রভু সংসার পালত্র।
সবার বিদিত আছে না হএ বেকত ... তমগুণ ধরি প্রভু করএ সংহার
শূন্যঘটে শূন্যাকার হইছে প্রকাশ ... এহি তিনগুণে তান মহিমা অপার।
আনলে তপনে রূপ আছএ ব্যাপিত
শীতল সুগন্ধি রূপে পবন বাহিত ...।

ভালমন্দ দুই লীলাময় আল্লাহর সচেতন সৃষ্টি :

সৃজিলেক রাবণক জানকী হরিতে। হরিক সৃজুন করিলেক নিরঞ্জন
রামক সৃজিলা প্রভু রাক্ষস মারিতে। কেহিকলারস ভুজিবারে বৃন্দাবন।

আল্লাহ প্রথমে ছিলেন নিরূপ আকার, তখন ‘আপনাতে আপনার না ছিল প্রচার’। এই অচেতনের মধ্যে লুকিয়ে ছিল চৈতন্যরূপ জ্বলন— ‘পুষ্পেত আছিল যেন গন্ধ ছাপাইয়া’ চৈতন্য লাভ করে তিনি নার্সিসাসের মতো নিজের রূপ দর্শনে নিজের প্রেমে হলেন অভিভূত, এই প্রণয় দৃষ্টি থেকে উদ্ভব হল ঘর্ম :

সেই ঘর্মে পরম আত্মা হৈল যথ চন্দ্র সূর্য আকাশ এসব জন্মিল।
সেই ঘর্মে জন্মিল জীবন্তমা তথ। এবং যার ঘর্মে এসব সৃজিল নৈরাকার
সেই ঘর্মে মহামন্ত্র যথেক জন্মিল নূর মুহম্মদ নাম থুইল তাহার।
আনল বরুণ বারি মুক্তিকা সৃজিল।

পৃথিবীতে সৃষ্টিপত্তন শুরু হল অগ্নিসজ্জাত মারীচ-দম্পতিকে দিয়ে। সুরাসুর তাঁদের সন্তান। কাম ও ক্ষুধা, লোভ ও অসূয়া গোড়া থেকেই পার্থক্য প্রাণীকে অভিভূত করে। ফলে দ্বন্দ্ব-সংঘাত শুরু হয় সৃষ্টির সঙ্গে সঙ্গেই। সুরাসুরে, পাপে ও দ্বন্দ্ব বিরক্ত আল্লাহ পৃথিবীর ফরিয়াদক্রমে ধ্বংস করলেন সুরাসুর, সৃষ্টি করলেন মাটির মানুষ। অসুরের মধ্যে কালনেমি, শুভ্র, নিশ্চন্দ্র, চণ্ড, মুণ্ড, হিরণ্যকশিপু, বলি, সুরের মধ্যে শিব, যোগী, পার্বতী, ব্রহ্মা, বিষ্ণু, ইন্দ্র, কামুকশিব, কূর্ম বরাহ, নরসিংহ প্রভৃতির উল্লেখ রয়েছে। তারপর রয়েছে রাম, পরশুরাম, বালি, সুঘীব, সীতা প্রভৃতির বৃত্তান্ত।

সৃষ্টির প্রথম পর্বে পৃথিবীতে অসুর ও সুর ছিল ‘বৎসর চল্লিশ লাখ চল্লিশ হাজার’, তারপর ফিরিস্তারা ছিল ‘অষ্টদশ লাখ হাজার বিংশতি’ বৎসর। তারপরে তৃতীয় যুগে এক প্রকার নর ছিল ‘বার লাখ অর্ধ আর বিংশতি হাজার’ বছর। এবং ‘পঞ্চশত আদম গঞিল তার মধ্যে। চতুর্থ কালেত হৈল (পঞ্চযুক্ত) অশ্ব অধিপতি। এরা ছিল ‘অষ্ট লাখ বৎসর যে পঁচিশ হাজার’, এরপরেই ‘নয় হাজার ছিয়াশী’ বছর আগে আমাদের যুগের তবে আদম সফি ক্ষিতিত প্রবেশ।’

এহি সব পরস্তাব কোরানে আছিল শুনিলে এসব কথা হরে সব পাপ
দেশী ভাষা করি তারে পঞ্চালি রচিল। জানিবা শাস্ত্রের মূল খণ্ডিবে সস্তাপ।

আদম স্বর্ণ সুখেই ছিলেন, কিন্তু নিঃসঙ্গতার এক অক্ষুট অব্যক্ত বেদনা যেন ছিল তাঁর মনে। আল্লাহ তাঁর অভাব ঘোচালেন। একদিন আদম :

নিদ্রা যাএ মহামতি স্বপন দেবিয়া তখি নিকলিল এক নারী নানা অলঙ্কার পরি
বাম অস্থি হোন্তে এক তান। রহিয়াছে তান বিদ্যমান।

আদমের অবচেতন জীবন-স্বপ্ন সফল হল। দাম্পত্যেই যে মানবজীবনের পূর্ণতা এবং জীবন যে কাম ও ক্ষুধা নিয়ন্ত্রিত, সে তত্ত্ব স্বীকৃতি পেল। কামচর্চার অসংযম এবং ক্ষুধানিবৃত্তিতে লোভের প্রশয়ই পাপ-এ অসংযম ও লোভই হচ্ছে শয়তান-প্রমূর্ত ইব্রিস। তাই নিয়ম সংযমের, রীতি-রেওয়াজের অনুগত থাকাই আল্লাহ আনুগত্যের নামান্তর এবং রিপু চালিত হওয়াই হচ্ছে শয়তানী। পার্শ্ব জীবনে মানুষ রিপুর ও সংযমের দ্বন্দ্ব সदा পিষ্ট। মানুষের সব দুঃখ-যন্ত্রণার মূলে রয়েছে ঐ অসংযমরূপী ইব্রিস। এর সঙ্গে দ্বন্দ্ব করে সদাচারী থাকাই হচ্ছে মানব জীবনের লক্ষ্য। নবীবংশ এই সংযম-সদাচার ও রিপুতাড়িত মানুষের অসংযম-অসদাচরণের ইতিকথা। ভাল-মন্দের, ন্যায়-অন্যায়ের, কল্যাণ-অকল্যাণের এই দ্বন্দ্ব, সংগ্রামে আল্লাহর প্রতিনিধি হচ্ছেন বাণীবাহক নবী আর শয়তানের প্রমূর্ত প্রতীক হচ্ছে মনোজুরি রিপু। প্রলোভন প্রবল হলেই মানুষ পাপ করে-পড়ে শয়তানের খপ্পরে। হাওয়া ও আদমই ইব্রিসের প্রথম শিকার। গন্দুম খাওয়ার আশঙ্ক হচ্ছে যৌনচেতনা, তারই সূচনা দৈহিক স্বজ্জায় 'নাভীতলে দুই কর করি আরোপণ। বৃক্ষপত্র পরিবারে করিলা গমন।' সাপ কামুদ্রিষের প্রতীক। মর্ত্যে আদম-হাওয়া হলেন সন্তানপ্রসূ। অনুশোচনায় সন্তুষ্ট আদম-হাওয়া কবি বলছেন- 'জন্মিতে কারণ আন্ধি সব/তুন্ধি দুই (আদম-হাওয়া) হৈলা বিবসন।'

ব্রীস্টান মতে এ পাপ থেকেই মনুষ্যজন্ম। তাই পাপ ঝলনই মনুষ্যব্রত। তৌরাত মতে আদম-হাওয়ার প্রতি আল্লাহর প্রথম আদেশ- 'মর্ত্যে যাও এবং সন্তান বৃদ্ধি কর।'

আদম-হাওয়া মর্ত্যে হর-পার্বতীর মতো ঘরকন্না শুরু করলেন। আদম কৃষিজীবী। আদম-হাওয়ার ও কাবিল-আকিমার রতিসম্ভোগচিহ্নে রসজ্ঞান ও নৈপুণ্য প্রকট।

বিপুল বিস্তৃত ভুবনে ফল-মূল-মৃগয়াজীবী স্বল্পসংখ্যক মানুষের খাদ্য নিয়ে দ্বন্দ্ব ছিল না, তাই কামনার কাহিনী নারী নিয়েই পৃথিবীর মানুষের মধ্যে ঈর্ষা-অসূয়ার ও দ্বন্দ্বের সৃষ্টি। তাই রূপকথা, মহাকাব্য প্রভৃতি নারীকে কেন্দ্র করেই সৃষ্ট। সুন্দরী বোন আকিমাকে নিয়েই দুই ভাই হাবিল-কাবিলের দ্বন্দ্ব-সংগ্রাম শুরু। আকিমার বিলাপ চৌতিশায় বর্ণিত।

আদমের পর নবী হন তাঁর পুত্র শিশ। কাবিলবংশীয়রা শয়তানের প্রভাবে হল কাফের। তাই নবীর উম্মতদের সঙ্গে গুরু হল তাদের আপোসহীন বিরামহীন দীর্ঘকালীন সংগ্রাম। প্রাচীন পদ্ধতির যুদ্ধে প্রাচীন কাব্যে সুলভ সব অস্ত্রই ব্যবহৃত হয়েছে।

শিশের পরে সমাজপতি ও লোকশিক্ষক নবী হলেন ময়াইল। তাঁর পরে সমাইল এবং তাঁর পরে বারদ। এই বারদপুত্র নবী আখলাক ওফে ইদ্রিস ছিলেন সাক্ষর ও সুপণ্ডিত। ইনিই প্রথম সেলাই করা জামা চালু করেন এবং ইনিই বেহেস্তে যান জীবন্ত অবস্থায়।

ইদ্রিসের পরে নবী হলেন নূহ। একদিন খোস পাঁচড়ার দুর্গন্ধযুক্ত কুৎসিত এক কুকুর দেখে নূহ বললেন- দেখিতে কুশ্চিত রূপ বিকৃত আকার। প্রভু কিসকে সৃজিলা।' এতে আল্লাহ রুষ্ট দুনিয়ার পাঠক এক হও! ~ www.amarboi.com ~

হলেন- অন্তরীক্ষবাণী শুনলেন নূহ-

‘পারনি এমত এক সৃজন করিতে
প্রভুর সৃজন তুমি লাগিলা দৃষ্টিতে
নিন্দিতারে তারে তুমি উচিত না হয়।

অনুতপ্ত নূহ অপরাধের জন্যে শতেক বছর কাঁদলেন। তাই নাম হল তাঁর নূহ [কান্না]।

‘যদি সে রোদনা নবী কৈলা অবিশ্রাম।
তেকারণে ‘নূহ’ হেন হৈল তান নাম।

অন্যত্র আছে- পুত্র না দেখিয়া মাত্র কান্দিতে লাগিলা

তেকারণে ‘নূহ’ নাম তাহার হৈল।

নবীদের প্রাণের দুষমন থাকে। নূহর ছিল দানিয়াল, ইব্রাহিমের ছিল নমরুদ, মুসার ছিল ফেরাউন, কৃষ্ণের ছিল কংস, দাউদের ছিল আনসারী, ঈসার ছিল তউসা এবং মুহম্মদের দুষমন ছিল আবু জেহেল।

কাবিল বংশের দানিয়াল ছিলেন মূর্তিপূজক নৃপতি। পূজা-পার্বণ কালে :

সভান সহিতে রাজা মুরতি পূজএ। কেহ সভা মধ্যে নারী করএ শৃঙ্গার
পুষ্ট অজা আনিয়া দেঅন্ত বলিদান লাজ ভএ এক নাই পশুব্যবহার।
কাঁস করতাল বাহে করি সুরাপান।

‘মূর্তি ভাবি মুক্তিপদ তুমি না পাইবা- নূহ প্রতিবাদ করায় তাঁর উপর রাজকীয় নির্যাতন শুরু হয়। কেননা-

অন্ধ করি বাহারে রাখিয়াছে করতারে।
তাহারে দিবারে চক্ষু কার শক্তি পারে।

অবশেষে প্রাবন সৃষ্টি করে আল্লাহ ধ্বংস করলেন তাঁর বিপথগামী সৃষ্টিকে। তবু নূহর বংশে আবার নূহর পৌত্র আদম হল অনাচারী। এই আদমের বংশে জন্ম হল আর এক দুরাত্মার, নাম তার নমরুদ। তার ‘পরমাই হাজার বৎসর সপ্তশত।’ সে ভূপ্রোথিত সম্পদ পেয়ে:

আত্মবলে পৃথিষিত হৈল অধিপতি। পশ্চিম পূর্বের লোক সকল মিলিল
সামদেশ মারিলা মারিলা তুর্কস্থান দক্ষিণ উত্তর লোক কর যোগাইল।
হিন্দুস্থান মারি পাণী হইয়া প্রধান।

ধনগর্বিত ও ক্ষমতামগ্ন এই সম্রাট নিজেকে আকাশের আল্লাহর চেয়ে শক্তিমান বলে ঘোষণা করল।

নমরুদের-

গৃহ সব রত্তন মণ্ডিত শোভাকার
মাণিক্য জড়িত সেই গৃহের খাম্বার।
খাম্বাত দর্পণ সব মণ্ডিত আছএ
বিবিধ প্রকারে সব দর্পণ দেখএ।
নগরের অন্ত নাই প্রাকার বেষ্টিত
বিবিধ অমূল্য দ্রব্য তথাত শোভিত।

নগরে-

পসারে বসিয়া সব দিব্য নারীগণ
কৌতুক সানন্দ মনে পসার দেঅন।
কপূর তাম্বুল সবে খাঅন্ত সদাএ
চতুর্দিকে অঙ্গের সুগন্ধি বহি যাএ।

কংস, ফেরাউন ও আবু জেহেলের মতো নমরুদও ইব্রাহিমের জন্ম নিরোধের চেষ্টা করে ব্যর্থ হয়। ইব্রাহিমের প্রশ্নের উত্তরে পিতা আজর মৃত্তি ও চন্দ্র-সূর্য পূজার কারণ বলেছেন :

পৃথিবীতে যথ কিছু হএ উতপন তেকারণে চন্দ্র সূর্য সেবে নরপতি
চন্দ্রের সূর্যের তেজে হএত সৃজন। তত্ত্বে প্রভু মনে জানি করএ প্রগতি।'

ইব্রাহিমের উপাস্য সন্ধান আরোহ ন্যায়ের উৎকৃষ্ট নমুনা। 'নমরুদ-ইব্রাহিম' বৃত্তান্ত নবীবংশ কাব্যের একট উৎকৃষ্ট ও প্রধান বৃত্তান্ত। এখানে ওথেলো-ডেসডিমোনার মতোই সারা-ইব্রাহিমের প্রেম। ইব্রাহিমের মৃত্তিভাঙা, ইব্রাহিমের নির্যাতন, নমরুদের দম্ভ, অগ্নিকুণ্ডে নিক্ষিপ্ত ইব্রাহিম, বিবিধ প্রচণ্ড আঘাতেও অক্ষত ইব্রাহিম এবং সারা-হাজরার স্বামী ইব্রাহিম, প্রভৃতি বৃত্তান্ত মহাকাব্য ও মহানটকের উপকরণ। ইব্রাহিম এখানে উন্নতশির বিজয়ী, ধীরোদাত্ত মহানায়ক। এক কথায় তত্ত্বে তথ্যে আদর্শচেতনায় সত্যনিষ্ঠায় লোভে দম্ভে দ্বন্দ্ব ঘৃণায় প্রেমে পীড়নে নির্যাতনে সংকল্পে মনুষ্যত্বে ত্যাগে ক্ষমায় তিতিক্ষায় ইব্রাহিমের জন্ম, জীবন ও মৃত্যু অবিচ্ছিন্নভাবে গ্রথিত। ইব্রাহিমের জীবনবৃত্ত ও বিপুল কলেবর কাব্যের মধ্যমণি। ইব্রাহিম ও নমরুদ যথাক্রমে সত্যের ও মিথ্যার, পুণ্যের ও পাপের, ন্যায়ের ও অন্যায়ের, ভালোর ও মন্দ্রের, সাফল্যের ও বিফলতার, জয়ের ও পরাজয়ের, ঘৃণার ও প্রেমের, সুজনের ও দুর্জনের প্রতীক। এ অধ্যায়ে বাস্তবজীবনের ও সমাজের নানা লম্ব-গুরু অনুভব ও চেতনা, সম্পদ ও সমস্যা, আনন্দ ও যন্ত্রণা অত্যন্ত নিপুণভাবে বর্ণিত রয়েছে।

সে-যুগেরও রাজ্যাভ্যন্তরে প্রবেশ সহজ ছিল না, শুষ্কও দিতে হত। দেহ এবং মালপত্রও পরীক্ষা করা এবং বস্তুর মূল্যায়ন ও শুদ্ধ ধারণা করা হত। চোরা কারবার আর পণ্যপাচারও সুপ্রাচীন, তাই ঘৃণও ছিল চালু।

ইব্রাহিম মিসর থেকে সামদেশে যাবার পথে মিসর সীমান্ত হামস গাঁয়ে—

ঘাট চৌকি থরে থরে দিচ্ছে দূরাচারে (নৃপতি)
ঘাটী না বোলাই সামদেশে যাইতে নারে।
বস্ত্রজাত লই তথা গেলে সাধুগণ
অবিচারে দান লএ লুটে সর্বধন।

এই রাজার আরো বর্বর স্বভাব রয়েছে :

নারী যদি সঙ্গে আনে সাধু সদাগরে
সুচরিতা নারী পাইলে লই যাএ কাড়িয়া।

শুধু তা-ই নয়নের সবে প্রথমে বিবাহ কৈলে নারী

নৃপতি সাক্ষাতে লই যাএ অকুমারী
নৃপতি শৃঙ্গার করে সে নারীক ধরি।

ইব্রাহিম-পত্নী সারাও এ বিপদে পড়েন। পরে অবশ্য সতীর আকুল আবেদনে আল্লাহ রাজাকে অন্ধ ও চলৎ-শক্তি রহিত করলে তিনি উদ্ধার পান। এই রাজা থেকেই রূপসী হাজরাকে 'ডালি' হিসেবে পান ইব্রাহিম এবং ফিলিস্তিনে বায়তুল মুকাদ্দেস নির্মাণ করে তথায় বাস করেন।

এরপর নমরুদকে দমন করার জন্য ইব্রাহিম বাবুল দেশের 'ছোখা' গায়ে সপরিজন বাস করতে থাকেন। নমরুদের সঙ্গে দীর্ঘ দ্বন্দ্বের ও আপোস-চেষ্টার পরিণামে আল্লাহপ্রেরিত 'মশা'র নমরুদের নাসারঞ্জে অনুপ্রবেশের ফলে বিশাল সাম্রাজ্যের অধীশ্বর প্রবল প্রতাপ নমরুদের মৃত্যু হল চরম যন্ত্রণার মধ্যে।

মশা 'রক্তপান করি মজ্জা লাগিল খাইতে।'

সারার আগেই হাজরা হলেন গর্ভবতী। সাপত্নীক ঈর্ষা বশে হাজরাকে বন্ডায় (মক্কায়) নির্বাসন দেয়ার জন্যে প্ররোচিত করলেন প্রথম ও প্রধান পত্নী রাজকন্যা সারা। 'সপত্নীর সম্পদ দেখিতে না পারিমু' সেই নির্জন স্থানে সারা-অভিশ্রুত মৃত্যু হল না হাজার- বরং গড়ে উঠলো জমজম কূপ ও মক্কাশহর।

কবি সারাপুত্র নবী ইসহাককে কিংবা হাজরাপুত্র নবী ইসমাইলকে কুরবানী দেয়ার এমন রোমাঞ্চকর কাহিনী বর্ণনা করেননি বাহুল্যবোধে, হয়তো সবার জানা বলেই। কবির যুক্তি—

ইসহাক ইসমাইল নবী যে সূত

সে দোহান পরস্তাব আছেএ বহুত।

সেসব লিখিলে হএ পুস্তক বিশেষ

তেকারণে না লিখিঁ য়ে আছিল শেষ।

এক লক্ষ চল্লিশ হাজার নবী হৈছে।

একে একে সভানের পরস্তাব রেছে

এক পুস্তকেত এথ লেখিবারে নারি।

তাছাড়া, সব নবীর বাণী মূলত একই—

মূর্তি পূজিতে নিষেধিবারে কারণ

একে একে সজনি হইল নবীগণ।

আল্লাহ কাবিল বংশে এক নবী নাজিল করলেন সে-বংশের লোককে অপকর্ম থেকে বিরত করার জন্যে। ওরা যে শুধু মূর্তি পূজা করে তা নয়—

দারি চুরি অকর্ম করন্ত সর্বজন

পরহিংসা পরমন্দ করে অনুক্ষণ।

এই নবীর নাম হরি (কৃষ্ণ)। শয়তানের প্ররোচনায় মাতুল রাজা কংস ঐকে গর্ভে ও পরে শৈশবে হত্যা করার ষড়যন্ত্র করেও ব্যর্থ হয়। এসব বৃত্তান্ত পাঠক মাত্রেরই জানা আছে। এবার ইব্রিস নবী হরিকে বিভ্রান্ত ও ব্রতভ্রষ্ট করবার জন্যে মুনিবেশে আসরে অবতীর্ণ। সে বলছে—

ক্রুদ্ধ হৈব যে-সব বচনে নিরঞ্জন

হরিকে কহএ পাপী পরমাত্মা করি ...

তুষ্কি হরি জনার্দন ভুবনের সার

তোম্বাকে স্মরণে পাপী হইবে নিস্তার।

মৎস্য রূপ ধরি তুষ্কি ভূবন পালিলা

বরাহের রূপে ক্ষিতি দন্তে আচ্ছাদিলা।

নরসিংহ রূপ ধরি মারিলা অসুর—

কর্ম রূপে ছিলা তুষ্কি পাভাল ভুবনে।

বামনের রূপ ধরি বলিক ছলিলা

রাম রূপ ধরি তুমি রাবণ মারিলা।

এখনে হৈছ তুষ্কি কৃষ্ণ অবতার।

এরপর রাখালরূপে, কালীয়ানাগহস্তারূপে, গোপীবল্লভ সন্তোষপ্রিয় কৃষ্ণরূপে এবং অর্জুনসখা কৃষ্ণরূপে হরির কবিত্বময় বর্ণনা দেয়া হয়েছে। একবার অন্তরীক্ষবাণী হরিকে তাঁর ব্রতের কথা স্মরণ করিয়ে দিল। অন্ততঃ হরি নারীদের থেকে আত্মরক্ষা করবার জন্যে আত্মগোপন করলেন, তখন ওরা তাঁর পিতলের মূর্তি গড়ে রাখল ঘরে ঘরে। অর্জুনকে অনুতপ্ত হরি বললেন—

সমুদ্রের বিষ হইল না হই সাগর। আন্ধি পরমাত্মা নহি জ্ঞানি নিশ্চয়
 সূর্যের কিরণ হই নহি দিবাকর। সভান উপরে প্রভু নিরঞ্জন হই।
 সৃজন হইছি নহি সৃজনিহার (ব্রহ্মা) কথ কথ গুণ মোরে 'ধিক দিয়া আছে
 নর সবে মোর বাক্য মানিবার পাছে।

ব্যর্থকাম হরি অর্জুনকে সঙ্গে নিয়ে দেশ ত্যাগ করলেন। বাহন হল গরুড়। এক জায়গায়
 হরির বৃন্দাবনলীলার অসারতা ও জন্মান্তরবাদের অযৌক্তিকতা ব্যাখ্যাত হয়েছে—

পুনি পুনি একেরে কিসকে পাঠাইব?
 পাপ পুণ্য ফল যদি ভুলিব এখাত
 তবে কেন প্রভু স্বর্ণ নরক সৃজিল?

অর্জুনসহ হরি ব্রহ্মাও পরিক্রম করে আর একবার দেশের লোকদের বোঝাতে চাইলেন—

অর্জুন সহিতে হরি সভান গোচর তুমি যেই মত নর সেই মত আন্ধি
 কহিলা নিয়ম কথা জুড়ি দুই কর। নর হই নর সেব কি কারণে তুমি।

কিন্তু ইরিসের খপ্পরে পড়া মানুষের কাছে হরির আবেদন ব্যর্থ হল। আদসামুদ গোত্রের
 মতো 'এই পাপে হইল যদুবংশের সংহার' এবং 'বিশুদ্ধ বেদপুরাণে নাই সে সব আচার!' ইরিস
 বেদপুরাণ বিকৃত করে 'সে আচার করিল প্রচার।'

নবীবংশের আর একটি প্রধান ও দীর্ঘতর অংশ হচ্ছে মুসা-ফেরাউনের কিসসা। অলিদ
 নামে অজ্ঞাত পরিচয় এক ধূর্তলোক ছলচাতুরী-স্বভাব প্রভৃতি ফিকির প্রয়োগে হলেন মিসরের
 প্রবল-প্রভাপ সম্রাট। বনি ইসরাইলের নবী মুসা-ফেরাউনের আমলে দুর্ভিক্ষপীড়িত কেনানবাসীরা এসে
 বাস করে মিসরে— দাসরূপী এই শাসিত-শোষিত-পীড়িত বিদেশীর দ্রুত জনসংখ্যা বৃদ্ধিতে ভয়
 পায় ফিরোয়ান ও শাসকগোষ্ঠীর 'কিবি'রা। 'মুসার জ্ঞাতিরে বল কিবিএ করিল। পাছে ওরা
 শাসন ক্ষমতা কেড়ে নেয়— এই আশঙ্কায় ফিরোয়ান ওদের পুত্র সন্তানদের জন্ম মুহূর্তেই হত্যার
 নির্দেশ দেয়। দৈবজ্ঞ-গণকের পরামর্শে বিশেষ লগ্নে ইসরাইলদের দাম্পত্যমিলন হল নিষিদ্ধ।
 দৈবজ্ঞের নির্দেশে মুসাহত্যার ষড়যন্ত্র চললো। মুসার জন্ম বৃত্তান্ত ইব্রাহিমের জন্মবৃত্তান্তের
 অনুরূপ। কিন্তু বিধি বাম, তাই এমানপুত্র মুসা বেঁচে গেলেন এবং ফেরাউন-পত্নী আয়েশার
 কোলেই হলেন লালিত। প্রসঙ্গক্রমে কবি এক স্থানে ধনমাহাত্ম্য বর্ণনা করেছেন :

ভিক্ষুক নৃপতি হৈল ধনের কারণ। ধন হোস্তে অকুলীন হঅন্ত কুলীন
 ধন হোস্তে পৃথিষিত নরে মান্য পাএ। বিনি ধনে হএ যথ কুলীন মলিন
 ধন হোস্তে যথ দোষ মহত্ত্ব লুকাএ। ধন হোস্তে কার্য যথ পারে করিবার
 ধন হোস্তে যাইতে পারে স্বর্গের মাঝার।

ফিরোয়ান সিংহাসনে বসে গায়ে গায়ে তরুলতা জন্মিয়ে নতুন বসতি স্থাপন করান। চমক
 পাথরের আকর্ষণ সৃষ্টি করে 'আলগ আসনে পাপী শূন্যত রহিল।' এভাবে সে প্রজার পালনে
 প্রভাপ-প্রভাব বৃদ্ধি করছিল। নিজে যাদুকরের মতো আয়ত্ত করল নানা কৌশল। এবং
 নিজেকেই দাবি করলো উপাস্য বলে। অনেকের আস্থাও লাভ করল। মুসার এক ইসরাইলী
 জ্ঞাতি সামরিকে বেগার খাটাচ্ছিল এক কিবি শাসকগোষ্ঠীর লোক। মুসা লোকটাকে ছেড়ে
 দেয়ার জন্যে কিবিকে অনুরোধ করলেন। কিবি অসম্মত হলে মুসা ক্রোধবশে কিবিকে
 আঘাত করলে সে মারা যায়। ফিরোয়ান রুষ্ট হয়ে মুসাকে হত্যার আদেশ দেয়। ফলে মুসা

মিসর থেকে পালিয়ে যান এবং মদাইলে 'সাহেব' নবীর ঘরে আশ্রিত হন এবং তাঁর কন্যা সফুরাকে বিয়ে করে সাত বছর সেখানেই বাস করেন। এই সাহেব নবী থেকেই মুসা আদমের 'আষা' পেয়েছিলেন। এই আষা 'স্বর্গের বৃক্ষের ডাল সর্বগুণধর'। সাত বছর পরে ছাগলের পাল ও গর্ভবতী স্ত্রী সঙ্গে নিয়ে মুসা মিসর যাত্রা করলেন। পথে লাভ করেন তিনি জমজ কন্যা সন্তান। এবং পথেই অগ্নি প্রতীকে আল্লাহর সাক্ষাৎ পেয়ে আল্লাহর সঙ্গে কথা বলার সৌভাগ্য লাভ করেন। এ থেকেই তিনি 'কলিমুল্লাহ' মুসা নবুয়ত অভিজ্ঞান স্বরূপ এখানেই বাহুতে শেত চিহ্ন লাভ করেন। মুসা ছিলেন তোতলা, তাঁর অনুরোধে তাঁর বাকপটু বলবন্ত ভাই হারুণকেও করা হল, সহকারী নবী এবং মুসাকেও স্পষ্টবাক হবার এবং আল্লাহর সান্নিধ্য লাভের অনুমতি দেয়া হল। কিব্বি ফিরোয়ানকে দমন করার নির্দেশ নিয়ে মিসরে গেলেন মুসা। স্ত্রী-কন্যা আল্লাহর হুকুমে সাহেব নবীর কাছে রেখে এলেই মুসা মিসরে ফিরোয়ানের বিরুদ্ধে যুদ্ধ করেন—

‘চল্লিশ বৎসর মুসা স্ত্রী-কন্যা এড়ি

যুদ্ধ আরম্ভিল নবী প্রভু আজ্ঞা ধরি।

ফিরোয়ান অন্তরে আল্লাহকে মানত, কিন্তু প্রকাশ্যে নিজেকেই দাবি করত উপাস্য বলে। তাই মুসা তাকে প্রথমে আপোসের প্রস্তাব দেন যদি প্রকাশ্যে আল্লাহর প্রতি আনুগত্য স্বীকার করে তাহলে—

১. ফিরোয়ানের চারশ' বছরের আয়ু আটশ বছরের করা হবে। ২. বার্বাক্য ঘুচিয়ে তারুণ্য দেয়া হবে। ৩. আগের অপরাধ ক্ষমা করা হবে। অন্যথায় তাঁর সংহার অনিবার্য। আপাতত মুসার অস্ত্র হচ্ছে আঘাসজাত সর্পকুল। তাই মুসাকে সবাই যাদুকার বলেই জানল— নবী বলে মানল না। যাদুকার এনে ফিরোয়ানও যাদুসূত্র তেরি করাল, কিন্তু মুসার সাপের কাছে যাদু সাপ টিকল না। রাজপত্নী আয়েশাও নবী বলে মেনে নিলেন মুসাকে। ক্রুদ্ধ ফিরোয়ান পত্নী আয়শাকে করলেন হত্যা। ফিরোয়ান ও তার প্রজাদের সমুদ্র জাহাযত করাবার জন্যে আল্লাহ পতঙ্গ ও মশা সৃষ্টি করে দুর্বল করে তুললেন মিসরবাসীদের জীবন। ফিরোয়ান কথা দিয়ে কথা রাখে না। তাই মুসা ফিরোয়ানের যুদ্ধও হল অনিবার্য। মুসাকেও সেইতে হাচ্ছিল দুঃখ লাঞ্ছনা অনেক। অবশেষে আল্লাহর নির্দেশে ইসরাইলদের নিয়ে মুসা সামদেশে পালালেন এক শুক্রবারে। অশ্ব-গজ সৈন্য নিয়ে পশ্চাদ্ধাবন করল ফিরোয়ান রবিবারে। কিন্তু যাত্রা-লগ্ন ছিল অশুভ—

রবিবারে যাত্রা করি চলিলেন দুর্মতি

এহি বারে গেলে দুঃখ হয় সে বহুল।

শুক্র রবি পশ্চিমোত্ত হয় দীপ মূল তাই—

ফিরোয়ান পাপিষ্ঠের ঘনাইল যম।

ফিরোয়ানের সৈন্যদের পোশাক ছিল নীলবর্ণের, অশ্ব ছিল মেঘবর্ণের; মুসার আঘার স্পর্শে নীলসাগরে জাগল রাস্তা। বনি ইসলাইল 'সিদ্ধু মধ্যে পথ দিয়া তরিলা সাগর'। ফিরোয়ান সৈন্য ডুবে মরল। মিসরে মুসার ও ইসরাইলের অধিকার হল প্রতিষ্ঠিত।

এবার মুসার সংগ্রাম শুরু হল ইব্রিসের সঙ্গে। মুসা কুহ তুরে আল্লাহর সঙ্গে আলাপ করতে গেলে ইব্রিস এক কপিল গাভীর উদরে থেকে সবাক গাভী পূজায় প্ররোচিত করল ইসরাইলদের 'তবে দশভাগ নরে পূজিলেস্ত গাভী। রহিলেস্ত দুই ভাগ নিরঞ্জন সেবি।'।

এক নিঃসন্তান বৃদ্ধ সাধুর ভাইপো সম্পত্তি আশুলাভের জন্যে পিতৃব্যকে নিয়ে দুই গাঁয়ের প্রান্তসীমায় গোপনে হত্যা করে। মুসা বলেন— এ কপিল গাভী হত্যা করে মৃতের শরীরে রক্ত—

মাংস নিয়ে ফেললে সাধু প্রাণ পাবে এবং তার হস্তার নাম বলবে। অন্যেরা জীবহত্যা পাপ বলায় মুসা বললেন—

মৃত্তিকা আনল বাবি যথ আদি করি
সদাএ করিতে আছে পরের চাকরি।

পশু পক্ষী মৎস্য আদি খাইতে নরগণ
সৃজন করিয়া দিছে প্রভু নিরঞ্জন।

অতএব, সঙ্গত কারণে জীব বধে দোষ নেই। কৌশলে মুসা পূজ্য কপিল গাভী হত্যা করালেন, সাধু চিহ্নিত করল হস্তাকে। মুসানবীর প্রতি আরো দৃঢ় হল জনগণের আস্থা। তারপরে আছে দৈত্যপ্রায় ওজের বৃত্তান্ত। তারপরে রয়েছে সাধক বলরাম বাউর কিসসা ও তিহারাজ আকিব ও মুসার অভিযান কাহিনী। মুসার অজ্ঞতা-ও অহঙ্কার বিনাশী তত্ত্বকথা রয়েছে মুসা ও খিজিরের ভ্রমণ বৃত্তান্ত অংশে। খিজিরের কাছে মুসার জিজ্ঞাসা—

কি কাজে পরের নৌকা ভাসিয়া আইলা
কি কাজে পরের শিশু ধরিয়া কাটিলা।

পরের দালান কেনে কৈলা সমসর
স্বরূপ করিয়া কহ আশ্চর্য গোচর।

খিজিরের উত্তর এই— নৌকা ফুটো করে না দিলে গরীরের জীবিকার একমাত্র অবলম্বন নৌকাটি রাজার লোকেরা নিয়ে যেত, ধার্মিক মা-বাপের কাফের ছেলে মা-বাপের দুর্ভোগের কারণ হত, দালান ভেঙে গেলে এতিমের জন্যে প্রোথিত ধন লুট হয়ে যেত। মুসার বৃত্তান্ত দীর্ঘ ও সমস্যাবহুল বটে, কিন্তু রোমাঞ্চকর কিংবা ব্যক্তিত্বের প্রভাব যুক্ত নয়।

এরপর পাই দাউদ-সমাইল কিসসা। ইসহাক-ইয়াকুব-ইউসুফ-মুসা-দাউদ-সোলায়মান ইব্রাহিম-সারার বংশোদ্ভূত আর ইব্রাহিম-হাজরার বংশে কেবল ইসমাইল এবং মুহম্মদই নবী। ইসরাইলরা বারবার আল্লাহর হুকুম অমান্য করে বারবার নানা দুর্দশা-দুর্ভোগের শিকার হয়। জালুত নামে এক দুরাত্মা রাজা ইসরাইলীদের ‘ত্বীপুত্র দাস দাসী সব হরি নিল।’ আর ‘অশ্ব উট নিল জানি পূর্ব বৈরী।’

তারা ইসমাইল নবীর কাছে তাদের রক্ষার জন্যে এক প্রবল প্রতাপ রাজা প্রার্থনা করল। আল্লাহ ইউসুফের ভাই ইবন আমীন [বেনজামিন] বংশীয় তালুতকে তাদের রাজা করে দিলেন।

তালুত দুরাত্মা জালুতকে দাউদের সাহসে ও কৌশলে পরাজিত করলেন। জালুত রণে প্রবর্তনা দেয়ার জন্যে দাউদকে নিজের কন্যা ও রাজ্যের অর্ধেক দেয়ার অঙ্গীকার করেছিলেন। কিন্তু ‘অর্ধরাজ্য না দিয়া দুহিতা বিহা দিলা’ এবং কৌশলে দাউদকে হত্যার চেষ্টা করেন। দাউদ খ্রীস্টে টের পেয়ে বহুদিন বনে আত্মগোপন করে রইলেন। তালুতের মৃত্যুর পর দাউদ হলেন রাজা। পয়গাম্বর হিসেবে তিনি চারদিনে চার নীতি চালু করেন (এবাদত, জবুর কেতাব পাঠ, ন্যায় বিচার ও রাজ্য রক্ষার্থ সদা সৈন্য মোতায়েন।

এই দাউদই তাঁর লঙ্কর-পত্নী রূপসী বতসাকে পাবার জন্যে বতসার স্বামী উরিয়ার সুকৌশলে মৃত্যু ঘটান— ‘বারে বারে উরিয়ারে রণে পাঠাইলেন।’ কাহিনীটি মেহেরুন্নেসা-সেলিমের বৃত্তান্ত স্মরণ করিয়ে দেয়। অবশ্য অনুতপ্ত দাউদ এজন্যে ‘অনুক্রমে রুদিলেগু এ দশ বছর’।

দাউদ-পুত্র সোলায়মানের কাহিনী রোমাঞ্চকর। দুনিয়ার তাবৎ পশু-পক্ষী কীট-পতঙ্গের ভাষা জানতেন তিনি। সূক্ষ্মবিচারবুদ্ধিতে এবং ন্যায়বিচারেও তিনি অতুল্য। অলৌকিক অঙ্গুরীয় বলে ও চাবুকের শক্তিতে তাঁর প্রভাব ও তাঁর গতি সর্বত্র অবাধ ও দ্রুত। এবং দেও-পরী-জীন সবাই ছিল তাঁর অনুগত। তাঁর ছিল উড়ন্ত তক্ত। সোলায়মান ছিলেন আদর্শ মানুষ ও নৃপতি।

তিনি কিছুদিন নিজের তৈরি বুড়ি বিক্রি করে জীবিকা অর্জন করতেন এবং ফকিরের সঙ্গে ফকিররূপে, রাজার সঙ্গে রাজারূপে এবং ভিখারীর সঙ্গে ভিখারীরূপে বাস করতে ছিলেন অভ্যস্ত। এমন সময় সোলায়মানের সাধ জাগল দুনিয়ার সব প্রাণীকে নিমন্ত্রণ করে ভোজন করাবার। অথচ রিজিকের মালিক রাজ্জাক।— ‘জীব সকলের মুখিও আহাযের কর্তা। মুখিও বিনে জীব কেহ নারে পালিবার’। কাজেই আল্লাহ নবীর এ বাসনাকে অহঙ্কারীর ঔদ্ধত্য বলে জানানলেন। যদিও সোলায়মান বললেন—

মুখিও যে ভোজন ভুইজাইমু এ সবেরে
সকল তোমার যথ দিয়াছ আক্ষারে।

তবু আল্লাহর বিরূপতায় সোলায়মানের অপরিমেয় বিপুল আয়োজন একমৎস্যের এক গ্রাসও হল না। লজ্জা পেলেন সোলায়মান। পক্ষান্তরে পিপীলিকারাজ মঞ্জুর আল্লাহর আনুকূল্যে সোলায়মানের অগণ্য অনুচর ও সৈন্যদলকে সামান্য খাদ্যেই তুষ্ট করতে পারল—

‘অল্প বস্ত্র অনেক করিতে পারে।’

এরপর বর্ণিত হয়েছে ‘সারা’ রাজ্যের মালেকা রূপসী বিলকিস ও সোলায়মানের কিসসা। পরিচয়ে, আলাপে এবং প্রেমে ও পরিণয়ে এর সমাপ্তি। সোলায়মান তাঁর ‘সপ্তশত অনুচরী তিনশত নারী’র উপরে বিলকিসকে পাটেশ্বরী করে ছিলেন।

এবং এ সকল নারী সঙ্গে করি নৈরপতি
প্রতি দেশ ভ্রমন্ত হৈয়া বাড়ির গতি।

তারপরে রয়েছে অঙ্কুরত রাজকন্যার বৃত্তান্ত। তাঁর পিতৃহস্তা সোলায়মানকে বিয়ে করতে রাজী ছিল না সে। সোলায়মানকে বিয়ে করবার জন্যে ইব্রিসের পরামর্শে রাজকন্যা নবী সোলায়মানকে বিয়ের শর্ত আরোপ করল—

আজ্ঞা দেঅ বাপের মুরতি আঁকি গড়ি
অনুদিন চাহিয়া বাপের সেবা করি।

রূপবতী রাজকন্যা ‘দেখে জ্ঞান নাই কামে অচেতন কলেবর’ সোলায়মান সহজেই রাজী হয়ে গেলেন।

কামুক সোলায়মান অঙ্কুরত রাজকন্যার আবদারক্রমে সোলায়মানের সৈন্যস্বরূপ পতঙ্গকুলকে রাজকন্যার আহায করলেন।

আল্লাহর কাছে প্রার্থনা না করেই সোলায়মান সন্ধান কামনায় ‘একে একে যথ নারী সকল রমিল’ তবু এক নারীই মাত্র ‘প্রসাবিল এক শিশু অর্ধ কলেবর’ এবং তিনি আল্লাহকে স্মরণ না করে ‘সমর্পিল নিজ সুত পালিতে পবনে’।

আবার— উক্ত—‘সব অকর্ম যদি কৈলা সোলেমানে
‘একদিন ধীবরের নন্দিনী যাইতে ইচ্ছিলেস্ত দুঃখ দিতে প্রভু নিরঞ্জে।’
দেখিয়া কুৎসিত রূপ লাগিলা নিন্দিতে।

ইস্তিরাখ দৈত্য কর্তৃক অঙ্গুরীয় হরণের ফলে বিকৃত অবয়ব ক্ষমতাহীন সোলায়মান ঐ ধীবরের চাকরি করে ধীবরকন্যা বিয়ে করে নানা দুর্ভোগ ভুগে পরে আবার আল্লাহর অনুগ্রহ লাভ করেন। সোলায়মান সন্তোষপ্রিয় মানুষ— মহৎমানুষ নন।

এরপরে হারুত-মারুতের প্রিয় ও পরিচিত কাহিনী বর্ণিত হয়েছে। জোহরা চরিত্রে সাহস ও বুদ্ধিমত্তার ছাপ আছে।

তারপরে শুরু হয়েছে জাকারিয়া নবী ও ঈসা নবীর কিসসা। জাকারিয়া সরল ও সাধারণ। ঈসার মহিমার ভিত্তি অলৌকিক শক্তি। এ অংশে মরিয়মই প্রধান চরিত্র- তাঁর মানসিক দ্বিধা, দ্বন্দ্ব, লোকলজ্জা ও নিন্দাভীতি সবিস্তার বর্ণিত।

শেষ স্বর্গে 'ভালমন্দ উদ্ভব তত্ত্ব' শেষ নসিয়ত হিসেবে বর্ণন করে কবি সৈয়দ সুলতান নবীবংশ প্রথম পর্ব শেষ করেছেন।

এবে তন যেরূপে জন্মিব মুহম্মদ

তুনিলে সে সব কথা খণ্ডিব আপদ।

কবি সৈয়দ সুলতান তাঁর সমকালীন যুরোপীয়দের দেখে যে জ্ঞানলাভ করেছিলেন, তাও শয়তানের শিক্ষা বলে বর্ণনা করেছেন :

গ্রামী যথ ডাকিয়া কহিলা দুরাচার	তোরা সবে যেই খাও অনুক্ষণ
লাগিলেস্ত একে একে শাস্ত্র শিক্ষাইবার।	সে জলে পাখাল মার্গ কিসের কারণ।
বুলিলা তোমারা সব বহির্দেশ গেলে	দাগুইয়া প্রস্রাব করিবা নিচএ।
মার্গ আপনার তোরা না পাখালহ জলে।	

বলেছি নবীবংশে সব নাম-জানা নবীরও কাহিনী নেই। মুখ্যত সৃষ্টিপত্তন, আদমের মর্ত্যজীবন, ইব্রিসের প্রথম পার্থিব দুষ্কর্ম হিসেবে ক্ষয়পীড়িত কাবিল কাহিনী, ইব্রাহিম, নূহ ও মুসার কুফরীবিরোধী সংগ্রাম এবং সোলায়মানের অলৌকিক অঙ্গুরীর রোমাঞ্চকর অথচ তত্ত্বসম্বলিত বৃত্তান্তই এ কাব্যে প্রাধান্য পেয়েছে। কিন্তু সর্বত্র আল্লাহ ও ইব্রিস, পাপ ও পুণ্য, ন্যায় ও অন্যায়, সত্য ও মিথ্যা, লিঙ্গ ও সংযম প্রভৃতির দ্বন্দ্বিক অবস্থান সম্ভ্রাত মানবিক তথ্য নৈতিক-সামাজিক সমস্যা ও সমাধান সম্বন্ধে কবি ছিলেন সদাসচেতন ও সতর্ক। এ কাব্যের মূল সার্থকতা মুখ্যত এখানেই। আবার মধ্যযুগীয় কাব্যে যে-সব রস ও গুণ থাকে, তাও এ কাব্যে সর্বত্র সুলভ।

কবি মহৎ উদ্দেশ্যে অর্থাৎ মানুষকে সং-জীবনে প্রবর্তনা দানের জন্যে শ্রমসাধ্য জ্ঞানপুষ্টি এ সুবৃহৎ কলেবর গ্রন্থ রচনা করেছিলেন। প্রাচীন শাস্ত্রীয় জ্ঞান ছাড়াও, তিনি সমকালীন জ্ঞান, প্রজ্ঞা, আগুবাফা, নীতি-আদর্শ, রীতি-রেওয়াজ, তথ্য, তত্ত্ব প্রভৃতি সম্ভ্রাত ও সম্বন্ধে আহরণ ও প্রয়োগ করেছেন। এক কথায় আদর্শ লোকশিক্ষকের ভূমিকা তিনি যোগ্যতার সঙ্গেই পালন করেছেন। তবে দেশান্তরে ও কালান্তরে জীবন-জীবিকা পদ্ধতির পরিবর্তিত পরিবেশে যেহেতু জ্ঞান-প্রজ্ঞা অভিজ্ঞতালব্ধ তথ্য ও তত্ত্ব উপযোগ হারায়, সেহেতু এ গ্রন্থেও স্বীকৃত অনেক তত্ত্ব-তথ্য ও নিয়ম-নীতি শুধু মূল্যহীন নয়, পরিহার্য বলেই মনে হবে। তাতেও অবশ্য এ কাব্যে জ্ঞান ও প্রজ্ঞালব্ধ চিরন্তন মূল্যের অভাব হবে না।

‘রসুলচরিত কাব্য পরিচিতি’

সৈয়দ সুলতান রচিত নবীবংশ গ্রন্থের দ্বিতীয় খণ্ড হচ্ছে রসূল মুহম্মদ চরিত্র। এ খণ্ডে আছে তিনটে পর্ব- উল্লোষ পর্ব, মে'রাজ পর্ব ও ওফাত পর্ব।

সৈয়দ সুলতানবর্ণিত সৃষ্টিতত্ত্বে দৈশিক প্রভাব প্রকট। তিনি বৈদান্তিক অদ্বৈত তত্ত্ব অঙ্গীকার করেছেন সৃষ্টিতত্ত্ব বর্ণনায়

আছিল অখণ্ড প্রভু ‘খণ্ডন’ সহিত
সর্বরূপ একরূপ ছিল শূন্য ঠাম
যথেক আকার ছিল নৈরাকার লীন।

‘ঘর্ম’ থেকেই যে সৃষ্টির শুরু, তা’ও তিনি স্বীকার করেন। আহাদ থেকেই ‘আহমদ’ (হযরত মুহম্মদের)-এর উৎপত্তি ‘আহাদ দুই এক কলেবর’।

তারপর—

আহাদে পাইল যদি আহমদ দরশন
হইয়া ভাবক রূপ কৈলা নিরীক্ষণ।
এবং—
আহমদ রূপে আপনা দেখা পাই
সাধক হইয়া রূপ রহিলা ধোয়াই।

ফলে—

অন্যে অন্যে দৃষ্টি রসে ঘর্ম হৈল তবে
সেই ঘর্মে মহামন্ত্র যথেক জন্মিল
সাতাইশ ব্রহ্মাণ্ড আদি সব উপজিল।
সেই ঘর্মে অষ্টাদশ হাজার আলম
সৃজন করিল প্রভু অতি অনুপম।

জীব-উদ্ভিদ প্রভৃতি সবকিছু সৃষ্ট হল এভাবে। সৃষ্ট হল সর্গে রব্বানুর, সিদ্দাতুল মনতাহা ও তুবা বৃক্ষ। হিন্দুর কল্পতরু ও অসিপত্র স্মর্তব্য।

দেশকালের প্রভাবপুষ্ট মানুষের চিন্তা-চেতনা কখনো নিরবলম্ব হতে পারে না। আরবের নবী-রসুল কাহিনী হলেও এ গ্রন্থে তাই দেশী আস্তব জীবনের নানা বিশ্বাস-সংস্কার, আচার-আচরণ, রীতি-রেওয়াজ প্রতিফলিত হয়েছে কবির বর্ণনায়।

আবদুল্লাহর ও মুহম্মদের রূপ বর্ণনায় তাই সব দেশী অলঙ্কারই ব্যবহৃত। আবদুল্লাহ-আমিনার বিবাহও ছিল এক প্রকার গান্ধর্ব মিলন। সখীরা ‘জোলুয়া দিলেন্ত সব করি ছলাছলি।’ কৃষ্ণের জন্ম মুহূর্তে কংসের কৃষ্ণহত্যার ষড়যন্ত্রের আদলে আবু জেহেলও গর্ভস্থ মুহম্মদকে হত্যার বার্থ ষড়যন্ত্র করেছিলেন। শিশু বদলাদি সব বৃত্তান্তই ভাগবতের মতোই। দৈবজ্ঞগণের নাম ইউসুফ কাহন ও বুর্জুস মেহের।

খদিজা-মুহম্মদের বিবাহ প্রস্তাবে পারিবারিক দ্বিধা-দ্বন্দ্ব, সম্মতি, যৌতুক, ভোজ ও ভোজ্য সামগ্রী প্রভৃতির বর্ণনায় আমাদের ঘরোয়া ও বাস্তব জীবনের চিত্র মেলে।

সুজনি চাদর দিলা বসিতে বিবিগণ খাসী বকরী দুধা আর উষ্ট্র যে প্রধান
হীরা জরি চান্দোয়া যে মাগিকা পেখম। মেজোয়ানী করিলেন্ত এবাজ সমান।
চিনি আদি শর্করা আঙ্গুর খোরমান
ঘৃত মধু দধি দুগ্ধ অমৃত সমান।

সেকালে বরের যৌতুক এবং দুধর কর্মের পুরস্কার ছিল—সোনা, রূপা, রত্ন, পণ্ড, দাস-দাসী, সুন্দরী যুবতী প্রভৃতি। উমরকে রসুল-হত্যায় প্ররোচিত করবার জন্যে যে-সব পুরস্কার দেয়ার প্রস্তাব করা হয়, সেগুলো এই—

যে তারে মারিতে পারে দিমু বহু ধন রূপবতী দাসী দিমু প্রথম যৌবন
একশত উষ্ট্র দিমু বহুল রতন। সুবর্ণ রজত দিমু দশ ‘হামী’ আনি।
রুমী দশ দাসী দিমু হাবসী দশজ

মুহম্মদের নবুয়ত অবিশ্বাসীদের কাছে 'টোনা' বলে ছিল নিন্দিত :

আক্ষি জানি মুহম্মদে টোনা বহু জানে

টোনা করি ভোলাইল সে সবে মন ।

শুন পুত্র মুহম্মদ টোনা কৈল তোরে ।

মুহম্মদ হত্যায় ব্যর্থ উমরকে পিতা খতাব তিরস্কার করলে সদ্য মুসলিম উমর

ক্রুদ্ধ হই উমরে হানিল খর্গাঘাত

কাটিল বাপের মুণ্ড সবার সাক্ষাত ।

পিতৃহত্যা করে উমর দেখালেন নীতি, আদর্শ ও বিশ্বাসের ক্ষেত্রে পিতার সঙ্গেও আপোস চলে না ।

মুনাফেক চরিত্র সবিস্তার বর্ণিত হয়েছে । মুনাফেকের লক্ষণ হচ্ছে :

মুনাফেক সবে মনের দুইভাব : মূর্খে বোলে করতার হৃদে কিছু নাই

মনুষ্যের সমুখে করএ এক রীতি কথা কএ সদাএ আদ্বার দিব্য খাই ।

গোপ্তে আনা কর্ম করে আচার কুচিত ।

রসুলের স্ত্রীদের নাম খোএলদ-কন্যা ও উমর কান্দিলের বিধবা খদিজা, আবু বকর-কন্যা আয়েশা, যয়দ-কন্যা সদা (সউদা), উমর-কন্যা হাম্পসা, সায়াদ-কন্যা মায়মুনা, মরিয়ম, জয়নব, উম্মিয়া-কন্যা সলিমা, সুফিয়ান-কন্যা হাবীরা, হোয়াই-কন্যা সফেরা, মিসরের কিবতী গোত্রীর মরিয়াম (মারিয়া), বনু মুস্তাই গোত্রীয় কন্যা জোবরিয়া ।

পুত্র-কন্যাদের নাম রোকেয়া (প্রথম স্বামী ওতবা), উমর সলিমা (প্রথম স্বামী সএবা এবং উভয়ের পরপর দ্বিতীয় স্বামী উসমান), ফাতেমা (স্বামী আলী) জয়নব (স্বামী আবু আস) । খদিজার গর্ভে চার কন্যা ও তিন পুত্র : কাসিম, তৈয়ব, তাহের, রোকেয়া, জয়নব, উমর সলিমা ও ফাতেমা ।

আবু তালিব মুহম্মদকে রসুল এবং তাঁর বাণী সত্য বলে জেনেও জ্ঞাতিদের উপহাসের ভয়ে ইসলাম বরণ করেননি । তাঁর নিজের উক্তি এরূপ :

মুহম্মদ যে আচার করিবারে বোলে 'বাপের আচার আবু তালিবে এড়িয়া

কর বা না কর শুদ্ধ জানিঅ সকলে । মৃত্যু হৈল ছাওয়ালের আচার করিয়া ।'

তবে কি করিতে নারি আক্ষি সে আচার

লোকে সব শুনি মোরে পারে হাসিবার ।-

মৃত্যুর পূর্বে আবু তালিব মুহম্মদকে জানালেন-

তবে কি জ্ঞাতি ভএ লজ্জা বাসি মন

তবু- নরকেতে না দহিতে খুড়ার শরীর

কৃতজ্ঞ মুহম্মদ চাটিল খুড়ার অঙ্গ জিহ্বাএ নবীর ।

আবু জেহলের গৃহদেবতার দেহস্থ কীটের সাক্ষ্য, হাবল দেবতা বৃন্তান্ত, রসুলের পদরেণুর স্পর্শে অন্ধের দৃষ্টিলাভ, মৃগীর বাকশক্তি, চন্দ্রদ্বিখণ্ডীকরণ, মলয়া নৃপতি, মে'রাজে আস্থাহীন আরবের রূপান্তর, হিয়রতকালীন ঘটনা প্রভৃতি রসুলী মোজেজার প্রমাণ ।

মে'রাজকালে রসুল প্রথম আকাশে আদমকে, দ্বিতীয় আকাশে সময়ঘোষক কুকুটকে, তৃতীয় আসমানে মুসাকে, চতুর্থ আসমানে আজরাইলকে, ষষ্ঠগগনে নরক রক্ষককে এবং সপ্তম গগনে বায়তুল মুকাদ্দেস, মিকাইল, সিদ্দাতুল মনতাহা বৃক্ষ, ভিহিস্ত, নব্বয় প্রভৃতি দেখলেন।

ভিহিস্ত বর্ণনে মানুষের কাম্যসুখ ও ঐশ্বর্য-চেতনার পার্থিবতা ও সীমাবদ্ধতা লক্ষ্যণীয়।

মে'রাজে আদ্বাহর ও রসুলের মধ্যে নব্বই হাজার বিষয়ে আলোপ হয়েছিল—

নব্বই হাজার কথা শুনিয়া রসুল	তৃতীয় তিরিশ যথ বেকত গোপত
হুদএ তরঙ্গ হৈল সমুদ্রের তুল।	করিতে উচিত নহে সে সব বেকত।
তিরিশ হাজার কথা শাস্ত্রে যথ আছে	
তিরিশ হাজার ব্রহ্মজ্ঞান রাখিয়াছে।	

রসুল মুহম্মদের বাণী :

মুহম্মদ বোল এ সেবিতে করতার	নিষেধন্ত মুরতি সেবিতে সভানরে
এক ছাড়ি দুই হেন না জানিঅ আর।	দণ্ডবৎ না করিতে মুরতি গোচরে।
পরদার না করিব মিছা না কহিব	কার সনে অশিষ্ট বচন না কহিব।
দারিচুরি সুরাপান সত্বরে তেজিব।	ওজু করি সদাএ রহিব পবিত্র।
পরহিংসা পরনিন্দা কভু না চর্চিব	লণ্ডভণ্ড না কহিব সভার গোচর।
বিনিদোষে মনুষ্যের প্রাণ বধ কৈলে	মাতৃপিতা গুরু সেবিব সর্বক্ষণ
মজ্জিবেক সেই দোষে নরক কুণ্ডলে।	স্বামী কহিব সে সবেরে কঠোর বচন।
মুনযোরে মধুর বচনে বোলাইব	

বোরাকের আকৃতি—

সেই তুরঙ্গের নাম বোরাক আছিল।	অশ্বের আকার পৃষ্ঠ চলন গম্ভীর
বোরাকের মুখমুণ্ড নরের আকার	চলিলে বিজুলি যেন রহিতে সুধীর।
চিকুর লম্বিত অতি নারীর বেভার।	নীলা কষা জমরুদের বরণ তাহার
বোরাকের দুই কর্ণ উটের চরিত	দেখিতে সুন্দর অতি বড় শোভাকার।
নরের বচন কহে অতি সুললিত।	

ইব্রিস অভিশপ্ত হয় কেবল অহঙ্কারের কারণেই অহঙ্কার উদ্ধত করে, বিনয় ভোলায় ও শ্রেয়োবোধ ভ্রষ্ট করে :

বড়াই করিল দেখি পাইল এই ফল
আপনাক প্রশংসিয়া হৈল রসাতল।

ইহুদী পণ্ডিত আবদুল্লাহ সালামও রসুলের নবুয়ত পরীক্ষা করবার জন্যে তাঁকে কিছু প্রশ্ন করেন। প্রশ্নগুলো ছিল :

১. প্রথমে কি খাইব লোকে ভিহিস্তে যাই? ৩. পুছিলা তৃতীয় কথা যথ নরগণ
২. প্রলয় হতে হইব কেমন আকৃতি? মায়ের বাপের বর্ণ হএ কি কারণ?

এবং রসুলের উত্তর শুনে আবদুল্লাহ সালাম হৈল হরষিত মন।

তবে আর সহস্র সংকেত কথা আনি
রসুলক জিজ্ঞাসিলা যথ মন জানি।

দুনিয়ার পাঠক এক হও! ~ www.amarboi.com ~

আরবি বেনামে দেশী অন্তর্ভ লক্ষণ—

অকুশল দেখি ভাল নহে কদাচন।

দিবসেত উদ্ধাপাত হএ ঘন ঘন

বিনি মেঘে আকাশেতে করএ গর্জন।

গৃধিনী পেচক আর শকুনী শৃগাল

আসিতে সমুখে আশি দেখিছি বিশাল।

বীরের শপথ—

যদি মুহম্মদ না মারিয়ে ঘরে যাম

তবে লাভ মনাত উজার মাথা খাম।

রসুল চরিত পর্বে বদর, ওহদ, তায়েফ, তাবুক ও খয়বরের যুদ্ধ বর্ণিত হয়েছে। প্রসাধন দ্রব্যের নামও মেলে :

আগর চন্দর গুরু কাফুর কেশর

লোবান সিপস্থ আবীর আতর।

সূর্য কাজল দোহ নয়নেত দিলা।

গৃহস্থ মানুষ কবি সৈয়দ সুলতানের শাহ-সামন্তের খাদদ্রব্য সম্বন্ধে ধারণা ছিল না। তাই তাঁর কাছে ‘দুগ্ধ দধি অনু মধুই নরভোগ্য শ্রেষ্ঠ খাদ্য। আঙ্গুর খোর্মাই শ্রেষ্ঠ ফল।’ আর বড়লোকের বাড়ীর বর্ণনাও নিম্নরূপ :

চতুর্দিকে শিলা বেষ্টি মধ্যে চারি পুরী

এক এক পুরী মধ্যে ভিন্ন চারি ঘর

পাষাণের গৃহ সব পরম সুন্দর।

ফাতেমার বিয়েতে চট্টগ্রামের চালু নারীদের দ্বিরাহম্বল নাচগান ‘সহেলা’রও আয়োজন ছিল। উৎসব-উপকরণ মারুয়া, কিমিজর তঁবু, মজামির দীপ, চামর, চান্দোয়া, সিপস্থি (ফানুস), হাউই, লোবান, আগর, চন্দন, ধুন্ধ, হলুদ, তেল, তেলোয়াই গস্তফিরানো, জোলুয়া প্রভৃতির উল্লেখ যেমন রয়েছে, তেমনি রয়েছে দুন্দুভি, কন্নার, ভেউল, কবিলাস, পিনাক, মদঙ্গ, দুছড়ি, বাঁশি, ঢাক, ঢোল, দারি, কাঁসি, দোহারি মোহারি, ঝাঝরি, দব প্রভৃতি বাদ্যের ব্যবস্থা।

যুদ্ধক্ষেত্রেও নারীসঙ্গের যৌক্তিকতা এরূপ :

পুরুষের শোভা নারী পুরুষের হিত

বিনি নারী পুরুষ রহিতে অনুচিত।

আল্লাএ সৃজিছে নারী অনেক যতনে।

অনুদিনে রহিত আপনা পতি সনে।

যে সব পুরুষ নারী না করিয়া থাকে

ইব্রিসেতু এড়াইতে নারে কোন পাকে।

প্রবাসী রসুলের দেশপ্ৰীতি :

জন্মভূমি পুণ্যদেশ দেখিবারে শ্রদ্ধা বেশ

স্মরণে হৃদয় ফাটি যায়।

তার জ্ঞাতি প্রীতি :

হইলে কোন্দল অতি রণেত পড়িব জ্ঞাতি

শোকে প্রাণি দহিব আক্ষার।

রসুলের কন্যাস্নেহ : (ফাতেমা)

১. মোহোর যে প্রাণের প্রাণ তুষ্কি বিনে

নাহি আর

তুষ্কি মোর আঁখির পুতলি

মোর চিত্ত-বৃক্ষ ফল তুষ্কি গন্ধ সুশীতল

হৃদয়লতার তুষ্কি কলি।

২. জীবের জীবন তুষ্কি আঁখির অঙ্গন

হৃদয়-বৃক্ষের ফল গায়ের চন্দন।

খাদিজার নন্দিনী মোর প্রিয়সূতা

আত্মার সুগন্ধি সৌরভ সুচরিতা।

রসুলের শেষ উপদেশ : মুসলিমের দায়িত্ব ও কর্তব্য :

তোস্কা সমাজ হোন্তে যাইতে আছি আন্ধি	পরচর্চা পরনিন্দা মিথ্যা না কহিঅ
কেহ কার অপচয় না করিবা তুন্ধি।	পরধন পরনারী কভু না হেরিঅ।
বিধবা সবেরে তুন্ধি করিবা আদর	রতি ভুঞ্জি গোসল করিঅ সেইক্ষণ
পড়শীরে না বুলিবা কঠোর উত্তর।	মালের জাকাত দিতে না হইঅ বিমন।
পিতাহীন শিশুরে গৌরব অতি করি	পঞ্চওক্ত তুন্ধি সবে নামাজ গুজারি
পালন করিঅ সবে মনে মায়া ধরি।	আল্লার সেবাত মন দিবা যত্ন করি।
বাপের মায়ের বোল না কর লঙ্ঘন	কলেমা কহিঅ নিত্য রোজা একমাস
দোহাজানের পরিচর্যা করিবা সঘন।	দড়াইছে জিব্রিলে আসি মোর পাশ।'

বাঙলা কাসাসুল আশিয়া, রসুলচরিত ও রসুলবিজয়

১. বারোশ' সাতষষ্টি বাঙলা সনে তথা ১৮৬০ খ্রীস্টাব্দে বটতলা থেকে একটি কাসাসুল আশিয়া গ্রন্থ প্রকাশিত হয়। প্রকাশক কাজী সফিউদ্দীনের প্রবর্তনায় হুগলীর শায়ের রেজাউল্লাহ হিন্দি (উর্দু) থেকে এ গ্রন্থ তর্জমা করতে শুরু করেন। তাঁর উক্তি প্রকাশ— 'কাসাসুল আশিয়া ফারসি থাকিয়া যেই হৈয়াছে হিন্দিতে।' তিনি হিন্দি থেকে 'এছলামি বাংলা ভাষে রচনা করলেন লোক হিতার্থে।' নূহ নবীর কাহিনী কিছুটা লেখার পর রেজাউল্লাহর মৃত্যু হয়। তখন সফিউদ্দীনের অগ্রহে কোলকাতার কড়িয়াবাসী আমীরউদ্দীন এ গুরুদায়িত্ব পালন করেন। ষষ্ঠ বালাম [আবুতালেবের সঙ্গে হযরত মুহম্মদের সামদেশে বাণিজ্য যাত্রা] অবধি আমীরউদ্দীনের ভণিতা মেলে। অবশিষ্টাংশ রচনা করেছেন কড়িয়াবাসী অপর কবি আশরাফ। এ বিপুল গ্রন্থের অর্ধেক আমীরউদ্দীনের রচনা। 'কিস্তি' দেখিয়া তাঁরা লিখেছেন বটে, কিন্তু কোথাও হিন্দি মতুর্জমের তর্জমার কিংবা মূল ফারসি গ্রন্থের বা লেখকের নামোল্লেখ করেননি। কাব্যটি দশ বালামে রচিত।

সৈয়দ সুলতানের নবীবংশ থেকে এ গ্রন্থ কলেবরে অনেক বড়। সৈয়দ সুলতানের কাব্যে সব নবীর কাহিনী নেই। কাসাসুল আশিয়ায় এমন অনেক নবীর বিস্তৃত বিবরণ মেলে, যাঁরা নবীবংশে আলোচিত হননি। যথা হুদ (এবং সাদাদ) সালেহ, সিকান্দর (এয়াজুজ মাজুজ), ইসমাইলের কোরবানী, ইয়াকুব, ইউসুফ, ফালতু, সাকুন, শোয়েব (আসহাবে কাহাফ), হারাকিল, নেসা, জেল, কোফেল, খানজেলা, আজির, জরজিস প্রভৃতি এবং চার খলিফার বর্ণনায় [আলির ওফাত অবধি] কাব্য সমাপ্ত। আর নবীবংশে ওফাত-ই-রসুল-এর বিবরণেই শেষ।

কাসাসুল আশিয়ায় ও নবীবংশে বর্ণিত কাহিনী অধিকাংশ ক্ষেত্রেই ভিন্ন দুটো গ্রন্থই সৃষ্টিপত্তন দিয়ে শুরু। মুহম্মদই যে আদি সৃষ্টি, তা দুটো কাব্যেই স্বীকৃত। কিন্তু সৈয়দ সুলতানের মতে পৃথিবীর আদি বাসিন্দা হচ্ছে নররূপী ফিরিস্তা, সুরা-সুর (বেদিক নবী ও মানুষেরা) আর কাসাসুল আশিয়া মতে আগুনে তৈরি জ্বিনেরা। কাহিনীর অনেকের একটি নমুনা দিচ্ছি :

^১ বিস্তৃত আলোচনা আমার সৈয়দ সুলতান-তার গ্রন্থাবলী ও তাঁর যুগ' গ্রন্থে এবং নবীবংশ কাব্যে দ্রষ্টব্য।

নবীবংশে দেখি একদিন হযরত আয়েশার ঘরে তৈলাভাবে বাতি জ্বলেনি, সন্ধ্যার স্বল্পালোকে তিনি তাঁর গায়ের কাপড় সেলাই করছিলেন, অন্ধকার ঘন হলে তিনি সুঁই হারিয়ে ফেলেন। তখন রসুল আয়েশার ঘরে উপস্থিত হন। মুদু হাসবার সময়ে তাঁর দাঁতের প্রভা বিচ্ছুরিত হয়, তাতে গোটা ঘর প্রদীপ্ত হয়ে ওঠে এবং সুঁইও কাপড়ের মধ্যে খুঁজে পাওয়া গেল। এতে বিস্মিতা আয়েশাকে রসুল সগর্ব বললেন, 'এ দাঁতের জ্যোতিতে ভুবন আলো করতে পারি।' এই অহঙ্কৃত বচনের শান্তি পেলেন তিনি ওহুদের যুদ্ধে দাঁত হারিয়ে। আবার, এক ইট আঙনে পুড়িয়ে তপ্ত করে একদিন তাঁর পায়ের তলার ক্ষতের চিকিৎসা করেছিলেন, দহনজ্বালা প্রাপ্ত ইট আল্লাহর কাছে রসুলের বিরুদ্ধে গোহারী করেছিল। ওহুদের যুদ্ধে সেই ইটই রসুল-দন্ত উৎপাটন করে প্রতিশোধ নিল। এ কাহিনী কাসাসুল আমিয়ায় নেই। তার বদলে পাই শত্রুর নিক্ষিপ্ত পাথরে রসুলের দাঁত ভেঙে গেল। তারপর :

টপকিতে ছিল খুন দান্দান হইতে

এয়াকৃত সেরজান পয়দা হইল তাহাতে।

নবীবংশ কাহিনীর উৎস কোরআন বলেই দাবি করেছেন সৈয়দ সুলতান। কাসাসুল আমিয়ায় রওয়াইত ছাড়াও স্থানে স্থানে আয়াত উদ্ধৃত হয়েছে।

২. জনাব আলী

জনাব আলী শেখ ফরিদুদ্দীন আন্তার রচিত তাজকিরাতুল ওলির এবং শেখ নুরুদ্দীন হানafiয়া রচিত ফারসি তাজকিরার মোল্লা হোসেন আশ্চর্যকৃত উর্দু তর্জমা অবলম্বনে কিসাসুল আমিয়া রচনা করেন। উনিশ শতকে দোভাষী শাফের মুহম্মদ খাতেরও দোভাষীরীতিতে তাজকিরাতুল আউলিয়া রচনা করেন। জনাব আলীর গ্রন্থে ইমাম জাফর সাদেক, রাবিয়া বসোরী, ফজিল আয়াজ, ইব্রাহিম আদহাম, বায়েজিদ বিন্তামী, ইমাম আবু হানিফা, ইমাম শাফী, ইমাম আহমদ হামল, বলশর হাফী, জুনায়েদ বাগদাদী প্রমুখ তেতাল্লিশ জন ওলি দরবেশ ও ইমাম প্রভৃতি শাস্ত্রবিদের জীবনকথা ও কৃতি-কীর্তি বর্ণিত রয়েছে।

এ সূত্রে বটতলায় প্রকাশিত দোভাষী পীরপাঁচালীগুলোও চরিতকথা রূপে স্বত্বব্য, যদিও ইসমাইল গাজী, জাফর খান গাজী, পীর সফিউদ্দীন, খান জাহাঁ আলি খান, গোরারচাঁদ প্রমুখ অনেকেই ঐতিহাসিক ব্যক্তিত্ব, সেনানীশাসক ও ইসলাম প্রচারক, তবু লোকমুখে এবং পীরপাঁচালীতে এঁরা রূপকথার নায়ক ও উপদেবতা রূপে কীর্তিত ও চিত্রিত। তাই এ অধ্যায়ে এঁদের সম্বন্ধে রচিত কাব্য আলোচনা করা হল না। অবশ্য আমাদের জানি ভক্তের বা নিন্দুকের রচিত জীবনচরিত সাধারণভাবে অতি কখনদুষ্ট। সত্য অতিরঞ্জিত হলে মিথ্যা হয়, আর অতিরঞ্জিত মিথ্যাই রূপকথা।

৩. মুহম্মদ খাতের

যে'রাজ-নামা ও কাসাসুল আমিয়া লিখছিলেন আর এক দোভাষী শায়ের মুহম্মদ খাতের। ইনি উনিশ শতকের মধ্যভাগের লোক। তাঁর কাসাসুল আমিয়ার মূল জানা যায়। ইসহাক আল নিসাপুরী রচিত কাসাসুল আমিয়ার উর্দু তর্জমা করেন গোলাম নবী ইবনে ইনায়েতুল্লাহ। সেই উর্দু গ্রন্থের বঙ্গানুবাদ করেন মুহম্মদ খাতের। প্রকাশক তাজুদ্দীন মুহম্মদও প্রকাশকালে ভণিতায়

নিজ নাম যুক্ত করে কবিকৃতির দাবীদার হন। মনে হয় রেজাউল্লাহ এবং আমীরউদ্দীন গ্রন্থও গোলাম নবী কৃত উর্দু গ্রন্থের তর্জমা। অন্তত স্থানে স্থানে বক্তব্য অভিন্ন, কেবল ভাষা ভেদ :

আসহাবে কাহাফ : খাতের :

তাহারা কহিল ভাই আমা সবাকার
খানাপিনার কিছু গরজ নাহি আর।
গরজ নাহিক আর দুনিয়া মোকাম
আমাদের ভরসা খালি এলাহির নাম

এই বলিয়া শুইল ফের খন্দকের নীচে
আজ তক আছে শুয়ে কিভাবে লেখিছে।
কেয়ামত তক তারা সেই হালে রবে।

আসহাবে কাহাফ : আমীরউদ্দীন :

বলিতে লাগিল তবে তাহার লাগিয়া।
খানাপিনা আমরা যে নাহি খাব আর
দেলেতে না রাখি কিছু হছরত দুনিয়ার।
আমাদের কাম আছে এলাহির সাথে
থাকিব জেদেগি ভর তারি এবাদতে।

বলিয়া এছাছি বাত শুইলেন সবে
তাহার খবর লেখা আছেত কেতাবে।
আজ তক শুইয়ে আছেন সেইখানে।
উঠিবেন একেবারে হাসর ময়দানে।

রেজাউল্লাহর রচনায় পাই :

প্রথম আসমান হৈল পানির টুকরাতে দ্বিতীয় আসমান তাহা টুকরা হইতে।

এভাবে তৃতীয় আসমান হৈল টুকরাতে সোহার, চতুর্থ আসমান হয় রূপার টুকরার, পঞ্চম আসমান সোনার টুকরায়, ষষ্ঠ আসমান খুরশারিদ টুকরা। আর সপ্তম আসমান এয়াকুতে তৈরি।

তুলনীয় : সৈয়দ সুলতানের কবিতা মুক্তায় হীরায় মাণিক্যে সুবর্ণে এয়াকুতে রজতে ও জমরুদে যথাক্রমে সপ্ত আকাশ গঠিত।

খাতেরের কাসাসুল আখিয়ায় ও নূর ও বিশ্বসৃষ্টির বর্ণনা আছে। এ বর্ণনায় সামান্য পার্থক্য থাকলেও মূলত সৈয়দ সুলতানের, শেখ চান্দের, রেজাউল্লাহর ও খাতেরের বক্তব্য অভিন্ন। বলা বাহুল্য এ সৃষ্টিতত্ত্ব কোরআনানুগ নয়— সূফীতত্ত্বানুগ। সম্ভবত সূফীতত্ত্বের উদ্ভবের ও প্রসারের ফলেই এই তত্ত্ব ইসলামে প্রতিষ্ঠা ও প্রচার লাভ করেছে।

খাতের মে'রাজ-নামাও রচনা করেছিলেন। গ্রন্থটি সম্প্রতি দূস্প্রাপ্য। আমরা সংগ্রহ করিতে পারিনি। সেজন্যে আলোচনা করা সম্ভব হল না।

৪. শেখ চান্দ

শেখ চান্দের পরিচিতি 'সূফীসাহিত্য' পরিচ্ছেদে দেয়া হয়েছে। সম্প্রতি এক প্রবন্ধে^১ শেখ এ. টি. এম. রুহুল আমিন কবি শেখ চান্দ ছোট ফেণী-নদীর তীরবর্তী শেখচাঁদপুরের (কবির স্মারক নাম) অধিবাসী ছিলেন বলে উল্লেখ করেছেন। এখানে নাকি কবির ধনী-মানী বংশধররা আজো বিদ্যমান।

^১ সাহিত্য পত্রিকা, বর্ষা সংখ্যা, ১৩৯০ সাল, বাঙলা বিভাগ 'বাঙলার দুজন সূফীসাধক কবি।' [শেখ চান্দ ও সৈয়দ নূরউদ্দীন]

শেখ চান্দের (সতেরো শতক) রসুল-নামা বা রসুলবিজয় নবীবংশের আদলে রচিত। অবশ্য এটি কেবল হয়রত মুহম্মদেরই চরিত্রগ্রন্থ। এতে সৈয়দ সুলতানের নবীবংশের মতোই সৃষ্টিপন্থন বর্ণিত হয়েছে। আদি সৃষ্টি মুহম্মদ হচ্ছেন নুর-ই-ইলাহি। পুষ্পরূপে তিনি স্বর্গে বিরাজমান ছিলেন। জিব্রাইল সে-ফুল নিয়ে আবদুল্লাহর হাতে দিলে তিনি ঘ্রাণ নিলেন, এরূপে মুহম্মদ আবদুল্লাহকে আশ্রয় করলেন। আবদুল্লাহর অঙ্গ হল সুরভিত, ললাটে তাঁর চাঁদের বিভা, নফলঙ্গ রাজকন্যা তাঁকে দেখে হলেন আসক্ত। তাঁদের গোপন-বিয়ে পড়িয়ে দিলেন ফিরিস্তারা। মুহম্মদের জন্মের পূর্বের ও পরের ঘটনা কৃষ্ণ-বৃত্তান্তের অনুরূপ। এখানে কংসের ভূমিকায় পাই আবু জেহেলকে। কন্যার স্থলে পাই ধাত্রী শিশুকে। হালিমায়-যশোদায়ও তফাৎ সামান্য। শেখ চান্দের গ্রন্থে কেয়ামত অবধি বর্ণিত। এ গ্রন্থে সিরাত ও মাগাজী অর্থাৎ রসুলের জীবনী ও রসুলের যুদ্ধ কাহিনী বর্ণিত। গ্রন্থটি আকারেও বিপুল। সৈয়দ সুলতানের গোটা নবীবংশের চেয়েও বিপুলতর।

সৈয়দ সুলতান যেমন বাঙলার মানস-ও বহিঃ-পরিবেশে নবীদেরকে বিশেষ করে হয়রত মুহম্মদকে হিন্দুধর্মের অসারতা প্রতিপাদন করে ইসলামের উপযোগ প্রমাণের জন্যে নায়ক রূপে দাঁড় করিয়েছেন, শেখচান্দ্রও তা-ই করেছেন। শেখ চান্দের কাছেও 'কাফের' বাঙালী হিন্দুর প্রতিশব্দ মাত্র। উভয় কবির কাছে হিন্দু যেন কাফেরেরই পরিভাষা। তবু শেখ চান্দে বাঙালীয়ানা একটু বেশি। তাঁর তুলিকায় মুহম্মদ বাঙালী আলিম বা পীর ফকির :

নবী মুহম্মদ

শিরেতে দস্তার বান্ধে জুস ছিল পাএ	পাএত পরিল নবী খড়ম এক জোড়া
ডাইন হাতে তসবি জপে আষা হাজে	দেখিতে তাহান বেশ যেন মত বুড়া।
ইজার পিকিল নবী পিরহান পরি	তসবি জপিয়া নবী যাএ ধীরে ধীরে
	রসুলেরে দেখি হাসে যথেক কাফেরে।

রসুলের ইসলাম প্রচারও চলছে যেন বাংলাদেশেই :

ধূতি উতারিয়া তারে ইজার পরাইল	গিলাফ কাড়িয়া তারে পরাইল নিমা
টিকি মুড়াইয়া তারে শিরে টুপি দিল।	

তারপর—

মুসলমান কৈল তারে পড়াই কলিমা।	পুরাণ করিয়া রদ কোরান লইল।
এবং এহি মতে তিন দ্বিজ মুসলমান হৈল	মূর্তিপূজা রদ করি নামাজ পড়ি নিতি।
হরির নাম রদ করি কলিমা করে স্থিতি।	টিকি মুড়াইয়া শিরে টুপি দিল ছদ।
কৃষ্ণনাম রদ করি বোলে মোহাম্মদ	

তিন দ্বিজ মুসলমান হয়ে তাদের জ্ঞাতিদেরও সত্যধর্মে আহ্বান জানায়। বাজি রেখে তারা—

কোরান পুরাণ কৈল আতসে স্থাপন	কোরান বড় বুলি মানিয়া লৈল।
পুরাণ পুড়িয়া গেল কোরান বাহড়িল।	

অতএব সৈয়দ সুলতানের রসুলচরিত অংশের সঙ্গে শেখ চান্দের রসুলবিজয়ের মিলই বেশি। কবিত্ব সম্পদেও শেখ চান্দ সৈয়দ সুলতানের সমকক্ষ। মুহম্মদ ছমি নামে এক দোভাষী

শায়েরও রসুলচরিত রচনা করেছিলেন বলে শুনেছি। (পুঁথি পরিচিত, পৃঃ ৬৬৬)। সম্ভবত আঠারো শতকের শেষপাদে কিংবা উনিশ শতকে উত্তরবঙ্গের কবি গোলাম রসুল ও বুরহানউল্লাহ রসুলরচিত রচনা করেন।

৫. শেখ মনোহর

নোয়াখালি জেলার ফেনী অঞ্চলে সতেরো শতকের শেষভাগে শমশের গাজী নামের এক ব্যক্তি বিশেষ ক্ষমতাশালী হয়ে ওঠেন। তাঁর দৌরাহ্ম্যে ও প্রতিপত্তিতে ত্রিপুরা রাজসরকার ও চট্টগ্রামের নবাবপ্রতিনিধি বিশেষ বিচলিত হয়ে পড়েন। এই শক্তিমান পুরুষের কীর্তি-কাহিনী অবলম্বন করে কবি শেখ মনোহর আঠারো শতকের শেষপাদে 'শমশের গাজীনামা' রচনা করেন। শেখ মনোহরের পীর-ছিলেন :

‘ধীর স্থির মীর পীর সৈয়দ হাসান পীর
সৈয়দ মেন্দী পদ শিরে ধরি।
গাজরি পঞ্চালী গাথা পদক্ষরে তথ্য কথা
মনুহরে ভগন্ত লাচাড়ি।’

শেখ মনোহর তাঁর কাব্য-কাহিনী সংগ্রহ করেন তাঁর পিতামহের কাছ থাকে :

শেখ মনুহর কহে পঞ্চাবলি রচিয়া।
পিতামহ মুখে কাব্যসকল শুনিয়া।।

এ কাব্যটি এক সময়ে ছাপা হয়েছিল। এখন তা দৃশ্যপ্য। শমশের গাজীর বংশধরগণ এখানো ফেনীর রওশনাবাদ পরগনার বুরগুপুর গ্রামে বসবাস করছেন।

পীর শমশের গাজীকে একটি ঘোড়া ও একখানি তরবারি দিয়ে অনুগ্রহ করেন। আরাকানরাজ সৈয়দ সুলতানকে একটি ঘোড়া ও একখানি তরবারি দিয়েছিলেন শমশের গাজীকে প্রদত্ত তরবারিটি সেইটি আর (ঘোড়াটিও আরাকানরাজ প্রদত্ত ঘোড়ারই বংশধর)। পীরের এক অনুচর শমশের গাজীর কাছে গিয়ে বললো :

গদাহোসেন খোন্দকার পাঠাইছে মোরে
তাহান গোচরে আজু নিবারে তোমারে।...
নয়শির হই পীর ভজিলেক গাজী
প্রশংসিল পীর মীর আল্লাহ হৈল রাজি।
তবে তালিব কৈল ভেদাই মঞ্জিল
মারফত ভেদ কহে সকল শিখিল।
দিলেক হাজার তঙ্কা পীর মীর পায়।
পীরও-হাজার তঙ্কা মূল্যের ঘোড়া অস্ত্রবর
গাজীকে খেলাত দিলা কৃপার সাগর।
পীর বোলে শুন কহি পিরুবান সুত
এহি ঘোড়া খড়গ জান কিম্বত বহুত।
বোসাস্তে মগধ রাজা ধার্মিক আছিল।

সৈয়দ সুলতান প্রতি এহি দ্রব্য দিল।
সুলতানে বকসাইল আপনা বেটারে
পর্যাক্রমে আসিয়া ঠেকিল মোর করে।
তাহান বংশের আমি ক্ষুদ্র এক বিন্দু
তপন ভুবন মাঝে সাগরেত ইন্দু।
নাসির যাইব মারা পাইবা জমিদারী
রাজবংশ ভঙ্গে দেশ হইবা অধিকারী।
এহি খড়গ অশ্ব তোমা দিনু মত কারণ
যুদ্ধে বিজয় হৈব জানিও আপন।
গাজীএ বুলিলা পীর কথেক বৎসর।
পীর বোলে পঞ্চ বিংশ জানিও সত্তর।
এ বুলিয়া পীর মীর চলি গেলা দেশ।

তপন ভুবন মাঝে সাগরেত ইন্দু। ইন্দু-১ সাগর-৭ তপন-১২, ভুবন-১৪ থেকে $১৭০০ + ১২ + ১৪ = ১৭২৬$ খ্রীস্টাব্দ পাওয়া যায়। তপন-১, এবং ভুবন-৩ ধরলে ১৭৩১ খ্রীস্টাব্দ হবে। এই ১৭২৬/৩১ খ্রীস্টাব্দে নাসিরের মৃত্যু হলে শমশের জমিদারী পাবেন বলে পীর মীর গদা হোসেন ভবিষ্যদ্বাণী উচ্চারণ করেছিলেন। কাজেই শশশের উক্ত সনেই জমিদার হয়েছিলেন। অতএব ১৭২৬/৩১ খ্রীস্টাব্দের পঁচিশ বছর আগেই শমশের গাজীর সঙ্গে গদা হোসেনের সাক্ষাৎ হয়েছিল। কবি শেখ মনোহরের পিতামহ তাহির উকিল ছিলেন শমশের গাজীর অনুচর এবং ঢাকার নওয়াব দরবারে গাজীর উকিল বা প্রতিনিধি। লোকশ্রুতি মতে শমশের গাজীর অভ্যুত্থানের সময়ে তাহির ঢাকার মদ্যদাস হাট ছিলেন। তিনিই শমশেরকে সনাক্ত করে নওয়াব সরকার থেকে সনদ পাইয়ে দেন। কবি শেখ মনোহর শমশের গাজীকে দেখেননি। তবে দীর্ঘজীবী পিতামহ তাহির উকিলের মুখে শোনা কাহিনীই তিনি গাজী নামায় বর্ণনা করেছেন। শেখ মনোহর ইংরেজ আমলের লোক। তাই খ্রীস্টাব্দ দিয়েছেন। শমশের গাজী ত্রিপুরারাজের পরগনা রওশনাবাদ প্রভৃতি এলাকায় স্বাধীনভাবে রাজত্ব করতে থাকেন। তিনি বিদ্যালয় প্রতিষ্ঠা করে শিক্ষাবিস্তারেও প্রয়াসী হন। কিন্তু পরে নওয়াব বাহিনীর কাছে পরাজিত ও ধৃত হয়ে ঢাকায় নীত হন এবং বন্দীর জীবনযাপন করেন।

৬. মুহম্মদ উজির আলি

কবি মুহম্মদ উজির আলি রচিত ১-৫৪১ পৃষ্ঠায় সমাপ্ত বিপুলকায় পাণ্ডুলিপির নাম 'নসলে উসমান ইসলামাবাদ বা শাহনামা'। মুসলিমদের তৃতীয় খলিফা ও হযরত মুহম্মদের জামাতা উম্মাইয়া বংশীয় হযরত উসমানের বংশপরম্পরার পরিচায়ক এ গ্রন্থ। কবি নিজেও উসমানী, তাই কল্পনাসাধ্য এ গ্রন্থ রচনায় কৃতি অনুপ্রাণিত। ইসলামাবাদে তথা চট্টগ্রামে উসমানীদে আগমন, বসবাস ও সমৃদ্ধির ইতিকথা বর্ণনাই কবির মূল উদ্দেশ্য।

যদিও কবি বলেছেন যে ১. 'তওয়ারিখ ওসমানী যেই আরবী জবান [১৭১৩-১৯ খ্রীঃ]

গদ্য হস্তে পদ্য কৈল নসলি ওসামান'।

২. ওসমান নসল হৈতে পুস্তক রচিল।

তবু কবির ইতিহাসনিষ্ঠায় আস্থা রাখা প্রায় অসম্ভব।

জ্যেষ্ঠভ্রাতা শাহজাদা নাজির আলির অনুমতি নিয়েই কবি এ গ্রন্থ রচনা করেছেন 'ভ্রাতা অনুমতি শিরে রচিল পয়ার।'।

গ্রন্থরচনার আরম্ভকাল ও সমাপ্তিকালও দেয়া আছে :

১. রাম চন্দ্র যুগ বাণ চলিত হিজরী সন

মাহিনা কুমারী পঞ্চদশ

স্মরণ করিয়া গুরু

পুস্তক হইল গুরু

গাহে কবি পয়ার সুরস।

রাম-১, চন্দ্র-১; যুগ-২, বাণ-৫ = ১১২৫ হিঃ বা ১৭১৩ খ্রীস্টাব্দে, ১৫ই কার্তিক তারিখে রচনার গুরু। আর শেষ হয় :

২. সহস্রেক শত রামচন্দ্র হিজরীতে

গ্রন্থ হৈল শেষ মকর 'দধিতে'।

সহস্র ১০০০, শত-১০০ রাম-৩, চন্দ্র-১ ১১৩১ হিঃ বা ১৭১৯ খ্রীস্টাব্দে ৭ই মাঘ তারিখে।

তৃতীয় খলিফা হযরত উসমানের জ্যেষ্ঠপুত্র বদরউদ্দীন আউলীয়া। তাঁরই বংশধর হচ্ছেন লেখক উজির আলি।

খেলাফত পাএ যবে হজরত ওসমান...

ভেজিল কুমার গনি বাগদাদ শহর

তাহান কুমার জ্যেষ্ঠ হজরত বদর

হইল বদরউদ্দীনবদরি ঈশ্বর।...

বড় নেকবক্ত মর্দ মহাধনুর্ধর

কিঞ্চিৎ কহিব শুন সে সব বারতা।

এরপর এমন সব বিষয় বর্ণিত হয়েছে যে সেসব বিষয়-অরণ্যে পাঠক দিশেহারা হয়ে পথ হারায়।

সত্যের, মিথ্যার ও কল্পনার সংমিশ্রণে সাধু ও দোভাষী শৈলীতে এ বিপুলকায় গ্রন্থ রচিত। কবির নিবাস ছিল চট্টগ্রামের হাটহাজারী থানার অন্তর্গত চারিয়া; গাঁয়ে। কবি নিজবংশকে রাজবংশ বানিয়ে স্বয়ং শাহাজাদা হয়ে পিতা বসির মুহম্মদকে ও জ্যেষ্ঠ ভাতা নাজির আলিকে শাহ বা রাজা বলে বর্ণনা করেছেন আর চারিয়া গাঁবে বসিয়েছেন রাজধানী চারিয়া নগর। সম্ভবত কবি পীরবংশীয় ছিলেন এবং পীরালি গদীকেই রাজসিংহাসন বলে দাবি করেছেন।

বর্ণিত বিষয় সূচীতে মিলবে কবির বিকৃত চিন্তার ও চেতনার সাক্ষ্য :

১. ইসলামাবাদের বয়ান ২. শাহজাদা তপ নাজিরের সুকৃতি বর্ণনা ৩. তওয়ারিখ কেতাবের খোলাসা বিবরণ ৪. তওয়ারিখ ওসমানী নসলের নাম ৫. মুহম্মদী খেলাফতনামা কেতাবের বিবরণ ৬. বাগদাদ শহরের তারিখ ও ভূপতির সুকৃতি ৭. এক বাঁদীর নসিয়তে শাহ বদরউদ্দীনের তপ আরম্ভ ৮. বদর আউলিয়ার তপঃ সিদ্ধির কথা ৯. ইসলামখান পীর পরীস্তান আবাদ করে যোগী হওয়ার কথা ১০. হাসন বসরীর বাদশাহ হবার বিবরণ ১১. হযরত আবু বাদশাহ হয়ে ইসলামাবাদ ভ্রমণ করার বয়ান ১২. গোপীচন্দ্রের রায়বারের শাহর কাছে কর দাবি করার বয়ান ১৩. গোপীচাঁদের ইসলামাবাদ আক্রমণ ১৪. দুই রাজার যুদ্ধ ১৫. শাহর পরাজয় গোপীচাঁদের বিজয় ১৬. গোপীচাঁদ তাঁর এক সন্তানকে ইসলামাবাদে পাটে বসাবার বয়ান ১৭. সুলতান আসকারীর ইসলামাবাদে রায়বার পাঠাবার বয়ান ১৮. শাহপুত্রকে রাজ্য দিয়ে ইসলামাবাদে যুদ্ধ করতে যান এবং ঢাকাতে পৌঁছার বয়ান ১৯. হরচন্দ্রের নিকট সুলতানের পত্র লিখবার বয়ান ২০. দুই নৃপের যুদ্ধ ২১. ইসলামাবাদের নসরত জঙ্গের নায়েবী করবার বয়ান ২২. নসরত জঙ্গকে দিল্লিশ্বর বধ করবার বয়ান ২৩. ফিরিস্তিরা ছলনা করে শাহ থেকে জমি ভিক্ষা করার বয়ান ২৪. ফেরব করে ফিরিস্তিরা দিল্লিশ্বরকে কয়েদ করবার বয়ান ২৫. মানরাজার যুদ্ধ ইত্যাদি।

এ যদি উসমান বংশীয়দের পীর-প্রচারক হিসেবে চট্টগ্রামে আগমন, বসবাস ও যুদ্ধ প্রভৃতির ইতিহাস হয়, মুরিদের বসতি অঞ্চলই রাজ্য হয় এবং কাফের ও ভিন্ন মতের সঙ্গে শাস্ত্রীয় বিতর্করূপ যুদ্ধ এবং পরে পর্তুগীজ মিশনারীদের সঙ্গে স্থানীয় লোকের বিতর্করূপ যুদ্ধ ও পর্তুগীজদের সঙ্গে দ্বন্দ্ব-সংঘর্ষের কাহিনীও হয়, তা হলেও একে ইতিহাসের মর্যাদা দেয়া যাবে না। এটি কথায় ও কলেবরে এমন ভীতিপ্রদ যে, 'থাকুক লেখিবে কেহ পড়িতে লাগে ডর।' তবু

আঠারো শতকের দ্বিতীয় দশকের একজন লেখকের সম্মান রাখার জন্যে আমরা এখানে চট্টগ্রামের কবিবর্গিত শাসকপরম্পরার বিবরণ উদ্ধৃত করছি :

হামিদুল্লা নাম এক বড়া জাঁহাবাজ
বগদাদের মহীপাল জনক মিরাজ।
মহাম্মদ লতিফ যে দরবেশ খোদার
ইসলাম আবাদ স্বামী কৈল করতার।
তাহান কুমার তিন মহা ধনুর্ধর
মহাম্মদ সাদক এক, দ্বিতীয় লঙ্কর।
তৃতীয় কুমার নাম লেখে দুইমত
'আশরাফ' লেখে আর 'সিরাজ দৌলত'।
নামেতে হাইদরাবাদ হয় যেই দেশ

সিরাজ দৌলত তথা ছিলেন নরেশ।
মহাম্মদ লতিফ শাহা তপ আরঙিতে
হাক্করি আনিল সুতা সিরাজ দৌলতে।
ইসলাম আবাদ তক্ত কুমারে সঁপিল
সিরাজ দৌলত তথা মহীপাল হৈল।
ঢাকা ও মক্কা সুদাবাদ ইসলাম আবাদ
কুমিল্লাশহর আদি হাইদরাবাদ।
এইসব অধিকার সিরাজ দৌলত।
এলাহি বকশিল তানে মহিমার হদ।

কবির বংশ-পরিচিতি এরূপ :

সাহসিক সোনাগাজী চাএরি (চারিয়া) ঈশ্বর নছল বর্জিত তিন কৈল বেনেয়াজ।

সাহার কুমার চারি জিনি পুরন্দর।
মহাম্মদ জাফর আর মহাম্মদ বহির
মহাম্মদ ওয়াছ আর মহাম্মদ আমীর।
এই চারি সাহাজাদা বড় নামদার।
মহিম করিল ফতে কানন বেহার
বিপিন আবাদ করি বসাএ শহর
অধিকার হৈল চারি রাজ্যের উপর।
বাহির আমীর আর মহাম্মদ ওয়াছ

মহাম্মদ জাফর সাহা হৈল জাঁহাগীর
ছাএরিনগর আর আবাদ আমীর।
মুজাফফর সাহ সুত মহাম্মদ বহির
এলাহি করিল তানে মহা জাঁহাগীর।
বহির সাহার হএ যুগল কুমার।
মহাম্মদ নাজির এক মহাজাহাঁদর।
আর এক সাহাজাদা মহাম্মদ উজির
ভ্রাতা যার মহীপাল করিল কাদির।

ভণিতার নমুনা :

১. শ্রীযুত সাহাজাদা ভূপতি নাজির
রূপগুণ বুদ্ধিমত্তা ভাগ্যবন্ত ধীর।
তাহান অনুজ হীন সাহার কুমার
ভ্রাতা জ্যেষ্ঠ অনুমতি চালে রত্নহার।
অধীন উজির কহে পয়ার মধুর
আশীর্বাদ কর গুনি যতেক ঠাকুর।

২. শ্রীযুত নাজির আলী সাহার কুমার
সুগন্ধি লহরীসমা অমৃতলহর।
যাহার জনক সাহা মহাম্মদ বহির
অনুজ কুমার সাহা সায়ের উজীর।

৭. আব্দুল করিম খোন্দকার

তমিম আনসারী (অগ্রাণ্ড), হাজার মসায়েল ও দুন্লামজলিস [দূররে মজলিস] রচয়িতা আবদুল করিম খোন্দকার তাঁর দুন্লামজলিসে সুদীর্ঘ আত্মকথা রেখে গেছেন। রোসান্ শহরে আছে বন্দর নামে গ্রাম বা অঞ্চল বা নদীঘাট। সে-গ্রামে বাস করে কাজী মুফতি, তালিবুল এলম, ফকির-দরবেশ আর বড় বড় মুসলমান। এরা 'নূপ সঙ্গে কহে কথা করি পরিহাস।' সে-গাঁয়ের

শ্রেষ্ঠপুরুষ আতিবর গাঁয়ে মসজিদ নির্মাণ করিয়ে

বহুজন আলিম আনিয়া একতর
কাহাকে খতিব করে কাহাকে ইমাম
কাহাকে মুসল্লি করি করএ প্রণাম।

শেখ উমরপুত্র আতিবর ছিলেন 'শ্যামলসুন্দর তনু'র সুপুরুষ। তিনি ছিলেন সম্ভবত বিদেশী বণিকদের থেকে বাণিজ্যিকর বা শুদ্ধ আদায়ের কর্তা। এটি বড় চাকরি। আতিবর রোজ ঘোড়ায় চড়ে রাজদরবারে যেতেন, তিনি টাকশালেরও কর্তা ছিলেন :

শ্যামল সুন্দর তনু অশ্বে আরোহণ
প্রতিদিন চলি যায় নৃপের সদন।

তিনি ছিলেন 'নৃপ মন্ত্রী আদি যথ সবে'র দুর্লভ (ভাজন)'।

আতিবরের রোসান্সরাজ প্রদত্ত উপাধি ছিল 'সাদিউক নানা'। 'নানা' শব্দের অর্থ 'শ্যামসুন্দর তনু'।

ভাল নাম পাইয়াছে প্রসাদে রাজার
'সাদিউক নানা' বুলি প্রশংসা যাহার
মঘীভাষে 'নানা' নাম ধরএ যাহারে
শ্যামল সুন্দর তনু দেখিয়া তাহারে।
শ্যামল সুন্দর আতিবর নাম
থুইছে নিজ বাপ মাএ

সাদিউক বোলে যারে বণিক উপর
শ্রেষ্ঠ হই পাইলেন্ত তঙ্কশাল ঘর।
'নানা' নাম থুইলেন্ত মরউঙ্গ।
(মোহর) রাএ।
যত মরউঙ্গ আইসে এরএ গৌরব।

আর এই আতিবরের টাকশাল কর্মে সহায় বা সহকারী ছিলেন মোহর আলি নামের এক ব্যক্তি।

এই আতিবরই দুর্লামজলিস রচনায় প্রবর্তনা দিয়েছিলেন কবিকে। কবির অবলম্বন ছিল সাঈফ আল-জাফর বাহারী রচিত ফারসি কিতাব :

একদিন আমাকে ডাকিয়া সেইজন
পড়াইয়া গুনিলেন্ত কিতাব কখন।
দুর্লামজলিস নামে কিতাব প্রধান
হরষিত হৈল মন গুনিয়া তাহান।
বুলিলা ফারসি ভাষা না বুঝে সকলে
কেহ বুঝে কেহ লোকে গুনিয়া বিকলে।

মনে ভাবো মরিলে না মরে সেইজন
যাহার কীরিতি যশ থাকএ ভুবন।
আর ভাবো পুণ্য আছে পঙ্খ জানাইলে
আশীর্বাদ করিবেন্ত পড়িলে গুনিলে।
তাতে মহাজন আজ্ঞা না যাএ লজ্জন
অঙ্গীকার কৈলুঁ তান মানিলুঁ বচন।

এটি কবির তৃতীয় রচনা। কবি বলেছেন তিনি আগে হাজার মসায়েল ও তমিম আনসারী নামে দু'খানা কাব্য রচনা করেছেন, সম্ভবত ফারসি কিতাব অবলম্বনেই :

আগে দুই লেখিয়াছি কিতাবেত হেরি
হাজার মসায়েল আর তমিম আনসারী

তার পাছে এ পুস্তক করিব রচন।

কবি নিজের বংশ-পরিচয়ও দিয়েছেন :

তবে কিছু কহিমু বংশের পরিচয়
যেই বংশে উৎপন্ন আমার নিচয়।
রমসুল মিয়া নামে প্রপিতা আমার

দিব্যবস্ত্র হৈলে নৃপস্থানে দেঅ আসি।
রোসান্সেত যত সদাগর আইসে যাএ
নৃপের সমুখে নিয়া বচন ফিরাএ।

বিষয়পদবী পাইল প্রসাদে রাজার
 ডিঙ্গার হাসিল যত তাহার কারণ
 লইয়া ডেটএ সব নৃপের চরণ।
 তানপুত্র মছন আলি ডিঙ্গার দোভাষী

তানপুত্র আলি আকব্বর ধরে নাম
 শুদ্ধমতি মহাজন সর্বগুণধাম।
 আমি তানপুত্র আবদুল করিম খোন্দকার
 আশা কৈলু এ কিতাব রচিতে পয়ার।

অতএব কবির পিতামহ রমসুল মিয়া ছিলেন বাণিজ্যডিঙ্গার রাজা-নিযুক্ত হাসিল বা কর আদায়কারী। তাঁর পুত্র মোহসিন আলি ছিলেন দোভাষী [ইন্টারপ্রেটার] ... রাজা ও বিদেশী বণিকের কথোপকথনের অনুবাদক। মোহসিন আলির পুত্র আলি আকবরই কবি আবদুল করিম খোন্দকারের পিতা। গ্রন্থে রচনাকালও রয়েছে, কিন্তু তা কিছু বিভ্রান্তিকর :

১. এবে শুন মুসলমানি সন্ধেত কখন
 এক সহস্র দুইশত আরবাহ সন।
২. সহস্রেক নাইট শতেক সাইত অদ্ আর
 অনুমতি বিগুধ পাঠ- সহস্রেক শতেক সাথে সাত অদ্ আর
 সহস্রেক শতেক সাথে সাত অদ্ আর
 মঘীসন এ লিখন শুন পুনর্ব্বার।

১২০০ হিজরী আর ১১৬৭ বা ১১০৭ মঘী সন অভিন্ন নয়। ১২০০ হিজরীতে ১৭৮-৫-৮৬ খ্রীস্টাব্দ, ১১৬৭ মঘীতে ১৮০৫ এবং ১১০৭ মঘী ১৭৪৫ খ্রীস্টাব্দ হয়।

১২০০ হিজরী শুরু হয় ১৭৮৫ খ্রীস্টাব্দে ৪ঠা নভেম্বর। ১৭৮৫ খ্রীস্টাব্দে আরাকানরাজ্য তথা রোসান্ন বর্মারাজ্যভুক্ত হয়ে যায়। এজন্যে মনে হয় হিজরী সনটি ভুল। কারণ কবির উক্তির সাক্ষ্য বলা চলে রোসান্নবিজ্ঞ হবার পূর্বেই গ্রন্থ রচনা সমাপ্ত হয়। ১১৯৯ হিজরী হলেও হিজরী সনটি শুদ্ধ বলা যেত। তাই আমাদের মনে হয় ১১০৭ মঘীই শুদ্ধ পাঠ। এতে ১৭৪৫ খ্রীস্টাব্দ পাওয়া যায়, তখন আরাকানরাজ্য স্বাধীন ছিল। কবি বর্ণিত প্রতিবেশও এ রচনাকাল সমর্থন করে।

আর কবির পীর ছিলেন হামিদুল্লাহ।
 হামিদুল্লাহ পীর পদে করিয়া ভক্তি
 আতিবর মহাজন লইয়া আরতি।
 মুই হীন আবদুল করিম খোন্দকার
 করিলু বাঙ্গলাভাষে রচিয়া পয়ার।
 সাদিউক আরতি লইয়া পূর্ণবার
 আবদুল করিমে কহে রচিয়া পয়ার।

একটি ভণিতা—
 সাদিউক আতিবর উমর নন্দন
 এই মতে মহানিধি পাউক আপন।
 নৃপের প্রসাদ হৌক তানে প্রতিনিত
 মোহন আলি বরুলা এ করৌক পিরীত
 তাহান আদেশ মানি করিলু রচন।

দুলামজলিস তেত্রিশবাবে (দ্বারে) বা অধ্যায়ে বিভক্ত। হযরত আদম, ইব্রাহিম, লুত, শোয়েব, আয়ুব, মুসা, সোলায়মান প্রভৃতি নবী এবং হাসান বাসোরী, হাসান কোরাইশী ও আবু সৈয়দ প্রভৃতি সাধকদের জীবনের বিশেষ বিশেষ ঘটনা বর্ণনা করে নীতিশাস্ত্র ও ধর্মবিষয়ক এ উপদেশাত্মক এ্যানেকডোট জাতীয় গ্রন্থ রচনা করেছিলেন কবি। এ ছাড়া এ গ্রন্থে রোজা ও বেহেস্তের বৃত্তান্তও বিবৃত হয়েছে। আদম-কথা বলতে গিয়ে কবি সৈয়দ সুলতান রচিত নবীবংশ গ্রন্থের উল্লেখ করেছেন :

‘বিশেষ না কহি আমি আদমের কথা
নবীবংশ পুস্তকেত আছএ ব্যবস্থা।’

সতেরো শতকের কবি রাজ্জাক নন্দন আবদুল হাকিমও একই গ্রন্থের বঙ্গানুবাদ করেছিলেন ‘দুররে মজলিস’ নামে। আবদুল করিম খোন্দকার রচিত ‘নুরনামা’ বা নুরফারামিসনামা এবং রাজ্জাক নন্দন আবদুল হাকিম (১৬ শতক) রচিত ‘নুরনামা’ আদিসৃষ্টি নুররূপী হযরত মুহম্মদ সৃষ্টি বিষয়ক। এই ক্ষুদ্র পুস্তিকা দুটোর বিষয় নবীবংশে বিবৃত হযরত মুহম্মদদের সৃজন কিংবা শেখ চান্দ বর্ণিত নুররূপী মুহম্মদ সৃষ্টিকথা থেকে মূলত ভিন্ন নয়। পার্থক্য কেবল ভাষার। বিভিন্ন কবির স্ব স্ব ভঙ্গিতে বিবৃত। ‘নুরনামা’ রচয়িতা একজন দোভাষী শায়েরের কথাও শোনা যায়। তাঁর নাম মুহম্মদ খান।

৮. নুরুল্লাহ

নুরুল্লাহ রচিত সিফনামা কসিদাশ্রেণীর গ্রন্থ। কয়েকজন ধনী মানী ব্যক্তিকে সমাজে প্রতিষ্ঠিত, প্রখ্যাত ও চিরস্মরণীয় করবার জন্যেই তাঁদের গুণ-মান-মাহাত্ম্য প্রচারের এ প্রয়াস এবং তা নিঃস্বার্থ প্রয়াস ছিল না। যেমন ক্ষেত্রে আলি চৌধুরী কবিকে বলেছেন :

‘মোহোর জামাতা হেতু করহ পয়ার তার সঙ্গে রচ মোর দুহিতার কথা
হেম তস্কার ভূমি দানে তুমিহ তোমার। রূপরেখ যত ইতি সুকৃতি বারতা।’

এভাবে প্রলুব্ধ হয়ে কবি স্থানীয় প্রধান ব্যক্তি জুমন, হাড্ডিচান্দ, সফর আলি, সোনাগাজী, আশরাফ, মুহম্মদ ওলি প্রভৃতি তারিফ-বর্ণনা করেছেন। কসিদা লেখাকে পেশা হিসেবে কবির ছোটভাই কবি আজমতুল্লাহও গ্রহণ করেছিলেন। তাঁর গ্রন্থের নাম ‘সূফী সানাউল্লাহর সিফনামা’।

কবি নুরুল্লাহ ও তাঁর ভাই আজমতুল্লাহর নিবাস ছিল দৌলতপুর গাঁয়ে। এ দৌলতপুর এখন নোয়াখালি জেলার ফেনী মহকুমার অন্তর্ভুক্ত। ১৮৭০ সনে নোয়াখালি জেলা গঠিত হওয়ার পূর্বে ফেনী এলাকার অধিকাংশ ছিল চট্টগ্রাম জেলার অন্তর্গত। উল্লেখ্য যে ফেনীর অপর কবি সৈয়দ নুরউদ্দীনও তাই নিজেকে চট্টগ্রামবাসী বলে উল্লেখ করেছেন।

তাই কবি বলেছেন হীনাতি নুরুল্লা ভণে চাটিগ্রাম স্থল...

দৌলতপুর রাজ্যে মোর এ ক্ষুদ্র উয়ারি। তাতে আশরাফ নামে আছে নরপতি।

কিংবা চাটিগ্রামে আছে রাজ্য সিলোনিয়া খ্যতি।

কবি নুরুল্লাহর পীর ছিলেন সৈয়দ আবু। ‘পীর সৈয়দ আবু পদে সহস্র প্রণাম।’ সামন্ত যুগের অবসানের ও বুর্জোয়া উন্মেষের সন্ধিক্ষণে নতুন ধনীমানী শ্রেণীর উদ্ভব ঘটে। সেই ভুঁইফোড় শ্রেণী মনে সামন্তসুলভ আকাঙ্ক্ষা জাগে প্রভাব প্রতিপত্তি বিস্তারে সমাজে প্রতিষ্ঠা পাবার এবং প্রখ্যাত হবার। তেমন মানুষরাই নুরুল্লাহকে পয়সা দিয়ে নিজেদের সত্য-মিথ্যা প্রশংসা গাইয়ে নিয়েছে। এ গ্রন্থ স্থানীয় ইতিহাসের উপকরণ হিসেবে মূল্যবান।

৯. আজমতুল্লাহ

আজমতুল্লাহ নুরুল্লাহরই ছোটভাই এবং 'সূফী সানাউল্লাহর সিফ্বনামা' রচয়িতা।

আজমতুল্লাহ আদর্শ কবি নুরুল্লাহ :

শ্রীযুত নুরুল্লাহপদ দর্পন করিয়া

শ্রেষ্ঠ ভ্রাতৃ আজ্ঞা চক্ষে অঙ্কন করিয়া

চলিলুম সঙ্কটপথে আল্লাকে স্মরিয়া।

রচিমু পুস্তক মুদ্রিও মনে বিমর্সিয়া।

কবি তাঁর বংশলতা দিয়েছেন :



ইমামনগরবাসী শেখ মুহম্মদ রাজার পুত্র সূফী সানাউল্লাহর পরিচিতি এরূপ :

শেখ মহম্মদ রাজা সর্বগুণধাম

দানেত হাতিম বলে ভাগ্যবন্ত অতি

তান সুত সানাউল্লা হইল উপায়।

ইমামনগরে তান আছএ বসতি।

সূফী সানাউল্লাহর গুণ-মান-মাহাত্ম্য বর্ণনায় শতোর্ধ্ব পত্রের এ পাণ্ডুলিপি শেষ হয়নি, তার সঙ্গে হাদিস ও আরবি রীতি-নীতি শাস্ত্রও বর্ণিত হয়েছে। এ প্রসঙ্গে কবি গ্রন্থোক্ত তথ্য ও তত্ত্ব কিভাবে সংগৃহীত হয়েছে তাও বলেছেন—

আবদুল্লা দরবেশ যে ভুবন বিখ্যাত

তানপুত্র বশিরুল্লা আলিম প্রধান

তানপুত্র গরীবুল্লা আলিম পণ্ডিত।

তাহান মুখেত শুনি কিতাব বয়ান।

আর আদেষ্ঠা ও প্রতিপোষক হলেন সূফী সানাউল্লাহ।

সূফী সানাউল্লা মোকে আজ্ঞা কৈল দান

রচিলুম বাঙ্গালাভাষে হাদিস বয়ান।

তান হস্তে পাই নিত্য বস্ত্র ভৈক্ষ্যন মান

মনে হয় কবি উনিশ শতকের গোড়ার দিকের লোক।

দশম অধ্যায়

চণ্ডীমঙ্গল

১. চণ্ডী পরিচিতি

ব্রাহ্মণ্যধর্ম তথা হিন্দুধর্ম প্রবর্তিত ধর্ম নয় অর্থাৎ কোন ব্যক্তিবিশেষের নেতৃত্বে ও নিয়ন্ত্রণে গঠিত ধর্ম নয়। বহুযুগের বহু মানুষের স্বাধীন মন-মননের ফসল হচ্ছে হিন্দুর শাস্ত্রগ্রন্থগুলো। ফলে এতে আদি কাল থেকে আজ অবধি কাল-পরিসরে হিন্দু ধর্মের তথা ব্রাহ্মণ্যমতের ও শাস্ত্রের যে বিচিত্র রূপান্তর, বিবর্তন, বিকাশ ও বিকৃতি ঘটেছে, তা অনুধাবন করা আজো সম্ভব হয় নি। শাস্ত্রগ্রন্থগুলো ভারতবাসীর চিন্তা চেতনার, সংস্কৃতি-সৃষ্টি-সৃষ্টিকার ক্রমবিকাশধারার রূপ যেমন ধারণ করে, তেমনি বহু যুগের বহু মানবগোষ্ঠীর নানা স্থানিক, সম্মিলিত ও অসম্মিত প্রয়াসের সাক্ষ্যও বহন করে। এ জন্যে মানব সভ্যতার ভারতীয় উন্মেষ-বিকাশের ইতিহাসের উপকরণ এখানে যেমন মেলে, পৃথিবীর আর কোথাও তেমন মেলে না।

আমরা আগেই জেনেছি, বাঙাল্যদেশের মানুষের প্রাত্যহিক জীবনের আচার আচরণ যদিও বাহ্যত উত্তর ভারতীয় কিন্তু বাঙালীর চেতনার গভীরে রয়েছে অস্ট্রিক-মোসলের, সাংখ্যের, যোগের ও তন্ত্রের প্রভাব। তাই তার ধর্মীয় তথা শাস্ত্রীয় ও আধ্যাত্মিক ভাব-ভাবনা সর্বভারতীয় আদলে বিকাশ বিবর্তন পায়নি, স্বতন্ত্র পথে হয়েছে বিবর্তিত। একদিকে যেমন কায়াসাধন প্রাধান্য পেয়েছে, অন্যদিকে তেমনি পার্থিব জীবন-জীবিকার নিরাপত্তা লক্ষ্যে অরি ও মিত্র দেবতার তোয়াজ-স্তুতিই হয়েছে মুখ্য। এটি অবশ্য বাঙালীর ঐতিহ্য-ও জীবন-প্রীতিরই প্রমাণ, তাই অস্ট্রিক-মোসল বাঙালী অনেক দেবতা সৃষ্টি করেছে ঐহিক জীবনের প্রয়োজনে। মনসা, চণ্ডী, বাসুলী, ধর্ম, যক্ষ, শীতলা, ওলা, শনি, পীর-নারায়ণ সত্য প্রভৃতি অনেক দেবতা উপদেবতা ও অপদেবতার তোয়াজ স্তুতি করেই আত্মপ্রত্যয়হীন বাঙালী সংসার সমুদ্রে জীবনের ভেলা ভাসিয়ে রাখে। চণ্ডী এমনি এক আদি সৃষ্টি শক্তিদেবতা-কোল-মুণ্ডা-ওরাঁও সমাজে ইনি চাণ্ডী, প্রচণ্ডশক্তি পূজাঅধিকারী এই নারীর স্বামীর নামও চণ্ড। নামগুলো যেমন অনার্থ, তেমনি দেবকল্পনাও স্থূল। চণ্ড-চণ্ডীর গায়ের রঙ শ্যামলা। উভয়েই দৈত্য-দানব হস্তা প্রলয়ঙ্কর ভয়ঙ্কর শক্তির আধার। সভ্যতার ক্রমবিকাশের ধারায় এই রক্ত-খেকো দানবদলনী নুমুণ্ডমালিনী দেবী দশমহাবিদ্যার প্রতীকে দশরূপ লাভ করে ছিন্নমস্তা, ধূমাবতী, বগলা, মাতঙ্গী, ভৈরবী, কালীর তারা, ষোড়শী, ভুবনেশ্বরী ও কমলা নামে পরিচিতা হন। বাঙালীর মন, মনন ও রুচির উৎকর্ষের অনুপাতে রক্ত-খেকো নুমুণ্ডমালিনী কালিকা আর স্থানিক চণ্ডী ও উমা, শিবানী, পার্বতী, দুর্গা, অনুদা-রূপে কেবল গৌরী নন, তাঁর গুণের রূপান্তরও ঘটেছে। এক সময়ে তিনি সৃষ্টির উৎস পরমাপ্রকৃতি আদ্যাশক্তিরূপে মহিমাম্বিতা হন। চণ্ডী কালো বলে কালী, কালিকা ও শ্যামা-এ আদুরে নাম দুমিহ্নরকর্ষক ঐক্যবদ্ধ অমর, নিলসারদ, শ্যামতদ্রূপ প্রভাবে তাঁর নাম

হলো তারা। সন্তানবৎসলা বলে অথবা বিশালাক্ষী বলে অথবা বাগীশ্বরীরূপে তাঁকে বাসুলীর (বৎসলার) সঙ্গে অভিন্ন করেও কল্পনা করা হয়। দুর্গারূপে শরৎকালে পূজিতা হন বলে তাঁর এক নাম সারদাও। আবার তাত্ত্বিক প্রভাবে তিনি বাগীশ্বরী সরস্বতীর সঙ্গেও অভিন্না, এমনকি হয়তো বৌদ্ধপ্রভাবের কামাখ্যা আর বাসলীও দশমহাবিদ্যার অন্তর্ভুক্ত হয়েছে। হয়তো বৌদ্ধপ্রভাবেই তার স্থূল উগ্র বুনো ভয়ঙ্করী রূপ কমলা করুণাময়ীরূপে বিবর্তন পায়, তখন তিনি অনূর্ণারূপে গৃহস্থবধূ শিবানী। শিবানী দুর্গা-উমারূপে বাঙলাদেশে পূজিতা হতে থাকেন। দুর্গারূপে দশদিক রক্ষার প্রতীক দশপ্রহরণ ধারিণীরূপে দুর্গামূর্তি পরিকল্পিত হয় সম্ভবত চৌদ্দশতক থেকে। বৈষ্ণবপ্রভাবে রক্তখেকো কালীই আবার ভক্তবৎসলা জগজ্জননীরূপে প্রতিষ্ঠা পান বাঙলাদেশে সতেরো-আঠারো শতকে। এভাবে চণ্ডী মাহাত্ম্যজ্ঞাপক চণ্ডীমঙ্গল, দানবদলনী গৌরীমাহাত্ম্যজ্ঞাপক গৌরীমঙ্গল ও সারদামঙ্গলা কালিকা মহিমাজ্ঞাপক কালিকামঙ্গল এবং মাতরূপিনী শ্যামারক্ততির জন্যে শ্যামা সঙ্গীত রচিত হয়েছে। রামকৃষ্ণ পরমহংসের কালীমাতা কেবলই ক্ষমাশীলা ও কল্যাণময়ী শক্তি।

সুতরাং আদি চণ্ডী শতক নামে শতরূপে স্থানিক ও কালিক বিবর্তন লাভ করেছেন। আগেই বলেছি দেবী কল্পনাটাও এক মনের সৃষ্টি নয় বলে চণ্ডী থেকে শ্যামা মায়ে রূপান্তর কোন সরল পথে বা ঝুজ তড়ে সম্পন্ন হয় নি। নানা জনের কল্পনাশ্রুত বলেই বিভিন্ন পুরাণে বিভিন্ন সম্পর্কে ও তাৎপর্যে বিভিন্ন কাল্পনিক কাহিনীর নামকরণে চণ্ডীর রূপ, গুণ ও সম্পর্ক জটাজটিল ও অসমন্বিত রূপ ধারণ করেছে। লেখকের অজ্ঞতা অথবা প্রয়োজনবুদ্ধিই এর জন্যে দায়ী। সুধীভূষণ ভট্টাচার্যের মতে চণ্ডীমঙ্গলের দেবীর মধ্যে উমা, লক্ষ্মী মহিষমর্দিনী চণ্ডী ও সরস্বতীর সমন্বয় সাধিত হয়েছে। তাই মঙ্গলচণ্ডী নামের কারণ স্বরূপ দ্বিজমাধব ও রামদেব, ভবানী দাস প্রমুখ কবি মঙ্গল নামের অপৌরাণিক দৈত্যও সৃষ্টি করেছেন, অর্বাচীন বৃহদ্রম, ভাগবত, ব্রহ্মবৈবর্ত ও মার্কণ্ডেয় পুরাণ আর হরিবংশে চণ্ডীর কাহিনী অন্তর্ভুক্ত হয়েছে।

মঙ্গল শব্দটি বেদেও পাওয়া যায়, আমরা এ গ্রন্থের প্রথম খণ্ডে মঙ্গল সম্বন্ধে আলোচনা করেছি, কল্যাণ কামনায় ঘট বসানো, গান গাওয়া, অনুষ্ঠান করা প্রভৃতি মঙ্গলজনক যাবতীয় আচার আচরণ-নির্দেশক শব্দ এই মঙ্গল। তাৎপর্য চেতনাব্রষ্ট অঙ্গলোক তা' মঙ্গলদৈত্যে, মঙ্গলবারে ও অন্য অনেক রকমে মঙ্গল-এর উৎস খোঁজেন। (যথা ব্রহ্মবৈবর্তপুরাণ থেকে উষ্টর আশ্বতোষ ভট্টাচার্য উদ্ধৃত শে-ক পৃঃ ৪৩২, -৫ম সং)

চণ্ডীমঙ্গলের উপাখ্যান দুটোও অপৌরাণিক কিন্তু প্রাচীন। ভক্তের মঙ্গল কামনায় তাঁকে পূজা করা হয় বলেই তিনি মঙ্গলচণ্ডী। চণ্ডীমঙ্গল কাহিনীতে বৌদ্ধ প্রভাবের নিদর্শনও রয়েছে, শুধু তারা, বাসুলী নামে নয়, দ্বিজ মাধব বা মাধবানন্দের মঙ্গলচণ্ডীর গীতে বল্লুকাবন, বল্লুকানদীতটের কথাও রয়েছে, শিব বল্লুকাতটে বিচরণ করেন, আরো রয়েছে ডাকিনীর কথা। তেমনি রয়েছে চণ্ডীরূপিনী ডাকিনী পূজার কথাও। সবচেয়ে গুরুতর তথ্য এই যে মানিক দত্তের চণ্ডীমঙ্গলে ধর্মগোসাঁঞির নামে সৃষ্টিতত্ত্ব বর্ণিত হয়েছে। বৌদ্ধ আদ্যাই চণ্ডী। অতএব উষ্টর আশ্বতোষ ভট্টাচার্যের ধারণাই যথার্থ বলে মানতে হয়। তিনি বলেন, 'বাংলার লৌকিক শক্তিদেবতাদিগের মধ্যে চণ্ডীর প্রকৃতিই সর্বাপেক্ষা জটিল। ইহার কারণ বিভিন্ন সময়ের বাংলার বিভিন্ন অঞ্চলের বিবিধ স্থানীয় অবস্থা হইতে অনেক সময় পরস্পর স্বতন্ত্র প্রকৃতির যে সকল স্ত্রী-দেবতার পরিকল্পনা করা হইয়াছিল, তাহাই কালক্রমে এক সাধারণ চণ্ডী নামের মধ্যে আসিয়া স্থান লাভ করিয়াছে। পুরাণের মধ্যেও দেখিতে পাওয়া যায়, সকল শক্তিদেবতাই

কালক্রমে শিবের একমাত্র পত্নীরূপে পরিণতি লাভ করিলেও ইহাদের উদ্ভবের ইতিহাস পরস্পর স্বতন্ত্রই ছিল। (বা. ম. কা. ই. ৫ম সং পৃঃ ৪১৬)। সুধীভূষণ ভট্টাচার্য তাঁর সম্পাদিত 'দ্বিজমাধব রচিত মঙ্গলচণ্ডীর গীত'-এর ভূমিকায় মঙ্গলচণ্ডীকে মিশ্রদেবতা বলেই প্রমাণ করতে চেয়েছেন (পৃঃ ১./.-২।।./.) স্বতন্ত্রভাবে চণ্ডীর স্থানিক ও কালিক উদ্ভব ঘটেছিল বলেই নামে ও গুণে চণ্ডীর পার্থক্য কোথাও কখনো ঘোচে নি। কয়েকটি নাম : নাটাইচণ্ডী, ঘোরচণ্ডী, উড়নচণ্ডী, কুলুইচণ্ডী, শুভচণ্ডী (সুচনী) খাড়াচণ্ডী, রথাইচণ্ডী, রণচণ্ডী, উদ্ধারচণ্ডী, ওলাই চণ্ডী, বসনচণ্ডী, অবাকচণ্ডী, কলাইচণ্ডী, ককাইচণ্ডী, ঢোলাইচণ্ডী, মঙ্গলচণ্ডী, বারমেসে মঙ্গলচণ্ডী, নিত্যমঙ্গলচণ্ডী, জয়মঙ্গলচণ্ডী, কুলুই মঙ্গলচণ্ডী, সঙ্কটচণ্ডী, উদয় মঙ্গলচণ্ডী প্রভৃতি। (বা. ম. কা. ই. পৃঃ ৪১৬-১৭)-নামেই প্রকাশ। এঁরা জীবন-জীবিকার বিভিন্দিকের বিবিধ বিপদ-তাড়ন দেবতা। সে কারণেই এঁরা কালিক স্থানিক লৌকিক ও ঐহিক প্রয়োজনের দেবতা। উল্লেখ্য যে চণ্ডী মুখ্যত বরেন্দ্র-রাঢ়-সুন্ধা (উত্তর ও পশ্চিম বঙ্গের) অঞ্চলের দেবতা। চণ্ডী, চণ্ডীতলা ও চণ্ডীমণ্ডপ এখানেই সুলভ। চট্টগ্রাম ও ঢাকা বিভাগে এসব নেই। অবশ্য এগারো-বারো শতকে যে পৌরাণিক চণ্ডীর মাহাত্ম্যকথা আমরা ব্রহ্মবৈবর্ত, দেবীভাগবত, বৃহদ্ধর্ম, মার্কণ্ডেয় পুরাণে ও আরো পরে হরিবংশে পাচ্ছি, সে-চণ্ডীর স্তব বাঙলার সর্বত্র চালু রয়েছে। এবং তিনি উমা গৌরী দুর্গা চামুণ্ডা পার্বতী সারদা মাহেশ্বরী প্রভৃতি রূপে মহিষমর্দিনী, অসুরদলনী (মধুকৈটভ, মহিষ, ধূমলোচন, চণ্ডমুণ্ড, রক্তবীজ, গুপ্ত-নিগুপ্ত প্রভৃতি মর্দিনী) রূপে পাঁচালীতে পরিকীর্তিতা হয়েছেন।

বলা বাহুল্য, যেহেতু মঙ্গল পাঁচালীর লৌকিকদৈবতার ঐহিকজীবনের লাভক্ষতির দেবতা, সেহেতু এখানে দেবতায় ও মানুষে গুণগত কোন পার্থক্য নেই। সবাই এখানে প্রবৃত্তি পরবশ। প্রাচীন ও মধ্যযুগের বাঙলার ও বাঙালীর ধর্মজীবনের ইতিহাস হচ্ছে : এই পার্থিবজীবনে সুখ ও নিরাপত্তাকামী আত্মপ্রত্যয়হীন দুর্বল মানুষের অরি ও মিত্র, উপ ও অপ-দেবতা সৃষ্টির ও পূজার কাহিনী। এর ভেতরে কোন অপার্থিবসুখহং আদর্শ বা লক্ষ্য নেই, আছে এ মাটিকে, এ ঐহিক জীবনকে আঁকড়ে থাকার ও ভালোবাসার সাক্ষ্য। তাই দেবলীলার আবরণে বর্ণিত হয়েছে সমকালীন বাঙলার ও বাঙালীর জীবনের অন্তরঙ্গ ইতিকথা। খুল্লা-ফুল্লা-লহনা-বেহলা-রঞ্জাবতী-লখাই-গৌরী কিংবা দুর্বলা-হীরা-মনসা-চণ্ডী-দুর্গা-পার্বতী-শিব-ধর্ম-চাঁদ-ধনপতি-শ্রীমন্ত-কালকেতু-লাউসেন-কর্ণসেন-কালুডোম-ইছাই ঘোষ-মহামদ-মুরারিশীল-ভাঁড়দত্ত প্রভৃতি সব দেব-মানবই ভালায় মন্দায় দোষে গুণে নামভেদে আমাদেরই চিরকালীন প্রতিবেশী, আমাদেরই ঘরের লোক বা আমরাই। তাই মঙ্গলপাঁচালীতে দেবকথার আবরণে আমরা বাঙলাকে ও বাঙালীকেই দেখি।

চণ্ডীমঙ্গলের 'চণ্ডীই' ক্রমে দুর্গামঙ্গলে দুর্গা, গৌরীমঙ্গলে গৌরী, সারদামঙ্গলে সারদা, কালিকামঙ্গলে কালী, অনুদামঙ্গলে অনুপূর্ণা, এমনকি বাসুলীমঙ্গলে বাসুলী হয়েছেন। এবং সে-সঙ্গে বক্তব্য আর কাহিনীও পরিবর্তিত হয়েছে।

চণ্ডীমঙ্গলের উপাখ্যান দুটোর সারাংশ :

আখ্যটিক খণ্ড। কালকেতুর উপাখ্যান

কলিঙ্গদেশের এক দরিদ্র ব্যাধ। নাম তার কালকেতু। সে শক্তিতে ও সাহসে অতুল্য। ফুল্লরা তার স্ত্রী। পশু-পাখি শিকার করেই সে সংসার চালায়। বনে পশু-পাখির নিরাপত্তার দেবতা হলেন চণ্ডী। তাঁর মনে বাসনা জাগল তিনি মানুষেরও পূজনীয়া হবেন।

কালকেতুকেই তিনি নিম্নবর্ণের সমাজে তাঁর পূজা করানোর ও মাহাত্ম্য প্রচারের যোগ্য ব্যক্তি হিসেবে বেছে নিলেন। চণ্ডী ছলনা করে পর পর কয়দিন অরণ্যের সব শিকার অদৃশ্য করে রাখলেন, ফলে নিঃশ্ব কালকেতু ব্যর্থ হয়ে ফিরে আসে। আর উপোস করে দিন কাটায় স্বামী-স্ত্রী। বিরক্ত ও বিস্কুদ্ধ কালকেতু একদিন শিকারে যাবার পথে দেখল অলক্ষণে গোপিকা। রিক্তহস্তে বাড়ি ফেরার পথে হতাশ কালকেতু গোসাপকে ধনুকের ছিলায় বেঁধে বাড়ী নিয়ে এল খাবে বলেই। কালকেতু হাতমুখ ধোবার জন্যে গেল ঘাটে। ঐ গোসাপ তখন পরমাসুন্দরী নারী রূপ নিয়ে ঘর আলো করে বসে, ফুল্লরা ঘরের দুয়ারে তাকে দেখে ঈর্ষায় ও আশঙ্কায় বিচলিত। তার স্বামীই এ সুন্দরীকে পথ থেকে কুড়িয়ে নিয়ে এসেছে শুনে অধৈর্য হয়ে ঘাটে গেল সে কালকেতুর সঙ্গে বোঝাপড়া করার জন্যে। ফুল্লরাকে দেখে কালকেতু বলে।

শান্তডী ননন্দ নাহি নাহি তোর সতা

কার সনে দ্বন্দ্ব করি চক্ষু কৈলি রাতা।

তারপর স্বামী-স্ত্রী ফিরে এল ঘরে। কালকেতু রূপসীরূপিণী অভয়াকে দেখে বিস্মিত। কালকেতু সচ্চরিত্র ও আদর্শস্বামী। সে সুন্দরীকে চলে যেতে বলল, কিন্তু সুন্দরী নড়তে রাজি হয় না দেখে তার প্রতি তীর ছুঁড়তে উদ্যত হলে মা চণ্ডী স্বমূর্তি ধরে তাকে সাতঘড়া টাকা ও একটি মহামূল্য আঙ্গুরী দিলেন। আর জঙ্গল কেটে গুজরাটনগর পত্তন করার পরামর্শ দিলেন। কালকেতু জঙ্গল আবাদ করে প্রজা বসিয়ে গড়ে তুলল গুজরাটরাজ্য। ভাঁড়দত্ত নামে এক ধূর্তলোক ছিল, সে হতে চাইল কালকেতুর মন্ত্রী। কিন্তু এমন ফন্দিবাজ লোক কালকেতুর পছন্দ নয়। তাই তাকে তাড়িয়ে দিল। অপমানিত ও ক্ষুব্ধ ভাঁড়দত্ত কালকেতু রাজ্য আক্রমণে প্ররোচিত করল প্রতিবেশী কলিঙ্গরাজকে। মুক্তে পরাজিত ও বন্দী হল কালকেতু। কারাগারে কালকেতু চণ্ডীর বন্দনা করল। ভক্তবৎসল কলিঙ্গরাজকে স্বপ্নে নির্দেশ দিলেন কালকেতুকে মুক্তি দিতে আর রাজ্য ফিরিয়ে দিতে। কলিঙ্গরাজ তা-ই করল। কালকেতু ও ফুল্লরা সুখে রাজত্ব করে যথাসময়ে স্বর্গে গেল। এভাবে মর্ত্যে মানুষের মধ্যে চণ্ডীর গুণ-মান-মাহাত্ম্য ও পূজা প্রচারিত হল। বলাবাহুল্য, কালকেতু ও ফুল্লরা ছিল স্বর্গের নীলাম্বর ও ছায়া। চণ্ডীর পূজা প্রচারের জন্যেই ছলনার শিকার হয়ে তাদের মর্ত্যে মানবজীবনধারণ।

বণিক খণ্ড : ধনপতি সদাগরের কাহিনী :

উজানীনগরে ছিল ধনপতি সদাগরের বাস। তার প্রথমা স্ত্রীর নাম লহনা, সে বন্ধ্যা। তাই ধনপতি আবার বিয়ে করল, স্ত্রীর নাম খুল্লনা। লহনার সপত্নীবিদ্বেষ তীব্র। তাই ধনপতি বাণিজ্যযাত্রা করলে লহনা খুল্লনাকে নানা কাজে অকাজে খাটিয়ে নানাভাবে কষ্ট ও যন্ত্রণা দিত।

খুল্লনা বনে ছাগল চরাত। বনে একদিন অন্য মেয়েদেরকে চণ্ডীদেবীর পূজা করতে দেখে খুল্লনাও বাড়ীতে ঘট বসিয়ে চণ্ডীর পূজা করছিল। ধনপতি চণ্ডীপূজা পছন্দ করেনি, সে বিরক্ত হল স্ত্রীর উপর এবং পায়ে ঠেলে ফেলে দিন চণ্ডীপূজার ঘট। তাতেও খুল্লনার চণ্ডীভক্তি অটুট রইল। কিছুকাল পরে ধনপতি আবার বাণিজ্যে বের হল, সিংহলে যাবার পথে অকূল সমুদ্র মধ্যে দেখল 'কমলে কাহিনী' অর্থাৎ পদ্মবাহিকা এক পরমাসুন্দরীকে। এ ছিল চণ্ডীর ছলনা। সিংহলে পৌছে রাজার কাছে ধনপতি এ গল্প করলে রাজা এ অলৌকিক দৃশ্য দেখতে চাইল। ধনপতি তা দেখাতে পারল না, কারণ মহামায়া চণ্ডী তখন অদৃশ্য হয়ে গেছেন। ফলে মিথ্যাবাদী

ধনপতি নিষ্কিণ্ড হল রাজকারাগারে। এদিকে খুল্লনার একটি সন্তান হল, নাম খুইল তার শ্রীমন্ত শ্রীপতি। সে বয়োপ্রাপ্ত হয়ে পিতার সন্মানে বাণিজ্যে গেল সিংহলে। সেও দেখল কমলে কামিনীর অদ্ভুত দৃশ্য। সেও রাজাদেশে নিষ্কিণ্ড হল কারাগারে এবং তার হল শূলে মৃত্যুদণ্ড। এদিকে খুল্লনা স্বামী-পুত্রের কল্যাণে চণ্ডীপূজা করায় তুষ্টা চণ্ডী তাঁর ভূতশ্রেত পিশাচ নিয়ে সিংহলে পৌছলেন শ্রীমন্তকে শূলে চড়ানোর ঠিক পূর্ব মুহূর্তে। চণ্ডীর চেলার অতর্কিত ও অদ্ভুত আক্রমণে সিংহলরাজার সৈন্যরা ছত্রভঙ্গ হয়ে পালাল। সিংহলরাজ দেবীর নির্দেশে শ্রীমন্তের সঙ্গে রাজকন্যা সুশীলার বিয়ে দিল। দেবীর কৃপায় রাজা কমলে কামিনী দেখলে ধনপতিও মুক্ত হল। পিতা, পুত্র ও পুত্রবধূ ছয়ডিসা পণ্য নিয়ে সানন্দে ফিরল উজানীনগরে। এমনকি উজানীর রাজাকেও কমলে কামিনী দেখাল শ্রীমন্ত, রাজা তুষ্ট হয়ে নিজকন্যা জয়াবতীর সঙ্গে শ্রীমন্তের বিয়ে দিল। মর্ত্যে উচ্চবর্ণের হিন্দুর সমাজে অরণ্যের পশু-পাখির দেবতা চণ্ডী এভাবেই পূজনীয়া হলেন। শ্রীমন্তরাও স্বর্গভ্রষ্ট দেবসন্তান।

বিভিন্ন চণ্ডীমঙ্গল পাঁচালীতে উপাখ্যান দুটোর মূল কাঠামো অভিন্ন হলেও দেব-খণ্ডে সামান্য সামান্য পার্থক্য দেখা যায়। যেমন মাদব ও রামদেবের পাঁচালীর মঙ্গল দৈত্যের বৃত্তান্ত। কিংবা মানিক দত্তের পাঁচালীর মূলোচন উপাখ্যান।

২. মানিক দত্ত

কবিকঙ্কণ মুকুন্দরাম চক্রবর্তী পূর্বসূরী বন্দনায় এক মানিক দত্তকে চণ্ডীগীতির আদি বা পূর্ববর্তী কবি বলে বন্দনা করেছেন :

জয়দেব বিদ্যাপতি বন্দো কালিদাস
আদি কবিসাধীকি বন্দিলু মুনি ব্যাস-।^১
মানিক দত্তেরে আমি করিয়ে বিনয়^২
যাহা হৈতে হৈল গীতপথ পরিচয়।

-এ চরণ সাহিত্য পরিষৎ পুথিতে আছে পৃঃ সং ৩৩২-

বন্দিলু গীতের গুরু শ্রীকবিকঙ্কণ-^৩

প্রণাম করিয়া মাতাপিতার চরণ।

রচনার ধরন ও কবির নামবিন্যাস দেখে মনে হয় এটি কোন গায়নের রচনা। যদি মুকুন্দরামের রচনা হয়, তা হলে এর ব্যাখ্যা দু'রকম হতে পারে : হয় মানিক দত্তের নামের কোন সঙ্গীতজ্ঞের প্রবর্তনায় শ্রীকবিকঙ্কণ নামের কোন সঙ্গীত শিক্ষকের কাছে মুকুন্দরাম সঙ্গীত শিক্ষা করেছিলেন, অথবা সঙ্গীতশিক্ষক মানিক দত্তের শিষ্য গায়ন কবিকঙ্কণ মুকুন্দরামকে গায় চণ্ডীগীতের রচয়িতা বলেই গুরু স্বীকার করে বন্দনা করছেন। আজ অবধি এ মানিক দত্ত চণ্ডীগীতির আদি রচক হিসেবে বিদ্বানদের স্বীকৃতি পাচ্ছেন, যদিও এর কোন পুথি আবিষ্কৃত হয়

^১ পাঠান্তর : কৃষ্ণিবাস- কলি সং

^২ পাঠান্তর : দাণ্ডা করিয়ে প্রকাশ-সা. প. পুথি
বঙ্গবাসী সংস্করণেও এ চরণ মেলে।

^৩ বিনয় করিয়া কবিকঙ্কণের চরণ- সা. প. পুথি

নি এবং উক্ত শ্রীকবিকঙ্কণ হচ্ছেন, মেদিনীপুর এলাকার কবি বলরাম। পরবর্তীকালে মানিকদত্ত রচিত চণ্ডীমঙ্গল পাওয়া গেছে। লিপিকাল সম্ভবত ১১৯১ বঙ্গাব্দ তথা ১৭৮৫-৮৬ খ্রীস্টাব্দ। এ কবিও অবশ্য ষোল শতকের শেষার্ধের বা সতেরো-আঠারো শতকের লোক হতে পারেন। ঐর কাব্যে কালকেতুর গুজরটনগরে তাই ফিরিস্তিরও ঠাই হয়েছে— আইল ফিরিস্তিসব বসিল একত্তরে'। এটি যদি প্রসিদ্ধ না হয়, তাহলে এ পাঁচালীর রচনার উর্ধ্বসীমা ষোল শতকের শেষার্ধ। মানিক দত্ত ও বিপ্রদাস পিপলাই, তন্ত্রবিভূতি, মুকুন্দরাম প্রভৃতির মতো ধর্ম নিরঙ্কনের বন্দনা করেছেন। রাঢ় অঞ্চলের বৌদ্ধজ হিন্দ্রা ধর্মঠাকুরের ও শূন্যবাদের বা নির্বাণবাদীদের প্রভাব এড়াতে পারেনি বলেই তাঁদের রচনায় প্রচ্ছন্ন বৌদ্ধ মতের প্রভাব প্রকট। শূন্যপুরাণোক্ত সৃষ্টিতত্ত্ব মানিক দত্তও গ্রহণ করেছেন। মানিক দত্তের পাঁচালীতে কেবল কাহিনীনিষ্ঠ বর্ণনাই রয়েছে, কবিত্ব দুর্লভ্য। একটি চিত্র : ঝগড়াটে লহনার রূপ :

খুল্লনার বচনে লহনা উঠিল জুলিয়া চুলেতে ধরিয়া গালেতে দিল চড়
লড়ু দিয়া চুলের মুঠ ধরিল চাপিয়া। চাপিয়া বসিল খুল্লনার বুকের উপর।
কবি মালদহ অঞ্চলের লোক।

৩. দ্বিজ মাধব বা মাধবানন্দ

দ্বিজ মাধব তাঁর ভগিনী সারদামঙ্গল, সারদাচরিত, সারদাচরণ প্রভৃতি বেশি ব্যবহার করেছেন। কাজেই পাঁচালীর নাম সারদামঙ্গল বা চণ্ডীমঙ্গল হওয়াই বাঞ্ছনীয়। দ্বিজ মাধবের মঙ্গলচণ্ডীর গীতের সব পুথিই চট্টগ্রাম-সন্দ্বীপ-নোয়াখালি থেকে সংগৃহীত। ভাষায় স্থানিক প্রভাব পড়েছে বটে, কিন্তু পশ্চিমবঙ্গীয় বৈশিষ্ট্য একবারে লোপ করা যায় নি। পূর্ববঙ্গের কেউ মঙ্গলচণ্ডীর পাঁচালী রচনা করেন নি। লৌকিক চণ্ডী, চণ্ডীতলা, চণ্ডীমণ্ডপ প্রভৃতি চট্টগ্রাম-নোয়াখালি অঞ্চলে আজো অজ্ঞাত। আমাদের ধারণা দ্বিজ মাধবানন্দ কবীন্দ্র পরমেশ্বর দাসের মতো পশ্চিমবঙ্গের লোক। চাকরী উপলক্ষে চট্টগ্রামে বাস করেন এবং পাঁচালী রচনা করেন। কবির বন্দনা ও আত্মকথা থেকে বোঝা যায় কবি রাঢ় অঞ্চলের নদীয়ার লোক।

বন্দনায়—

প্রথমে বন্দম গুরু ধর্ম নিরঙ্কন... ডাকিনী-যোগিনী বন্দো ধর্মের সভাএ।

আত্মকথা—

পঞ্চগৌড় নামে স্থান পৃথিবীর সার সগুদ্বীপ মধ্যে নদীয়া যে মহাস্থান
একাক্ষর নামে রাজা অর্জুন অবতার। ব্রাহ্মণ ক্ষত্রিয় শূদ্র অনেক প্রধান।
প্রতাপে তপন রাজা বুদ্ধি বৃহস্পতি পরাশর সূত জান মাধব যে নাম
কলিযুগে রামতুল্য প্রজাপালে ক্ষিতি। কলিকালে হৈল জগত অনুপাম।
সেই পঞ্চগৌড় মধ্যে সগুদ্বীপ সার
ত্রিবেণী যে গঙ্গা যথা বহিছে ত্রিধার।

শেষ চার চরণের পাঠান্তর :

সেই মহানদীতটবাসী পরাশর তাঁহার অনুজ [আত্মজ?] আমি মাধব-আচার্য
যাগযজ্ঞ জপে তপে শ্রেষ্ঠ দ্বিজবর। ভক্তিভাবে বিরচিনু দেবী মাহাত্ম্য।
মর্যাদায়ে মহোদধি দানে কল্পতরু
আচারে বিচারে বুদ্ধে সম সুরগুরু।

এতে বোঝা যায় কবির নিবাস ছিল নদীয়ায় (পিতা [বা জ্যেষ্ঠভ্রাতা] পরাশর) এবং দ্বিজ মাধবের সময়েও রাঢ় অঞ্চলে প্রচলিত বৌদ্ধদেবতা ধর্মনিরঞ্জন প্রভাব লোকসংস্কারে ও গণশ্রুতিতে অবিমোচ্য রয়েছে। আদিনাথই যে শিব তাও শ্রুতিতে ভাষ্য। প্রমাণ শিবের বল্লুকাতটে ও বল্লুকাবনে বিচরণ। বড়ুচণ্ডীদাসের শ্রীকৃষ্ণসন্দর্ভেও আমরা ডাকিনী-যোগিনী দেখছি। বিপ্রদাস পিপলাইয়ের মনসামঙ্গলেও রয়েছেন ধর্মনিরঞ্জন। কাজেই অন্তত ষোল শতক অবধি বৌদ্ধসংস্কার ও বৌদ্ধশ্রুতি লোকায়ত জীবনে প্রচলিতভাবে চালু ছিল বলে মানতে হবে। এ কারণেই সতেরো-আঠারো শতকে প্রচলিত বৌদ্ধ হাড়ি-ডোম-বাগদীপূজ্য দেবতা ধর্মঠাকুর ব্রাহ্মণদের পূজনীয় হয়ে উঠতে পারলেন। সম্পাদক সুধীভূষণ ভট্টাচার্যের মতে দ্বিজ মাধবের কাব্যে পুরাণ অপেক্ষা তন্ত্রের প্রভাব অধিক লক্ষিত হয় (পৃঃ ৩.), প্রমাণস্বরূপ তিনি নীলাম্বরের মৃত্যুঞ্জয় জ্ঞান' শিক্ষা গ্রন্থসূত্রে দ্বিজ মাধবের যোগাত্মিক সাধনা ও সিদ্ধি সম্বন্ধীয় উক্তি উদ্ধৃত করেছেন :

হৃদিপদ্মে বসি হংসে করে নানা কেলি ... সুসুম্না প্রধান নাড়ী শরীর মধ্যে বৈসে
শুন শুন কহি তত্ত্ব অয়ে নীলাম্বর ইঙ্গলা পিঙ্গলা তার বৈসে দুই পাশে।
আপনা শরীর চিন্তা হইতে অমর। (পৃঃ ১১১)

আর বলেছেন : তাত্ত্বিক নিয়মে দ্বিজ মাধব সূর্য্যাদি সর্বদেবদেবীর বন্দনা করেছেন। মাধবের পুথিতে যেসব বিষ্ণুবিষয় পদ রয়েছে, সেগুলো চণ্ডীমঙ্গলের অংশ নয়, কথকতার প্রয়োজনে সন্নিবিষ্ট বলে মনে হয়। কেননা ওগুলো চৈতন্যমত প্রভাবিত পদ নয়—সাধারণ গান। মাধবের গীত চৌদ্দ পালায় সমাপ্ত। প্রচলিত নিয়মে এটিও অষ্টবাসরীয় পালা এবং এক মঙ্গলবারে শুরু করে পরের মঙ্গলবারে সমাপ্ত করাই বিধেয়।

রচনাকাল :

'ইন্দু বিন্দু বাণ ধাতা শত নিয়োজিত। দ্বিজ মাধব গাএ সারদাচরিত।' এর থেকে রচনাকাল ১৫০১ শক বা ১৫৭৮-৭৯ খ্রীস্টাব্দ মেলে। কাব্যে অর্জুনসম আকবর বাদশাহর নামও আছে। ১৫৭৫ সনে মুঘল বিজয় ঘটে। অতএব দ্বিজ মাধব হয়তো চণ্ডীমঙ্গলের দ্বিতীয় কবি, স্থানিক দত্ত সম্ভবত প্রথম কবি। এবং কবিকঙ্কন মুকুন্দের কাব্য ১৬০৪ সনের পরে রচিত হলে এটি হবে তৃতীয় কাব্য।

গঙ্গামঙ্গল ও শ্রীকৃষ্ণমঙ্গল রচয়িতা দ্বিজ মাধব অভিনু ব্যক্তি। এ দুই গ্রন্থে কবির মাধবানন্দ নাম মেলে না বটে, তবে শ্রীকৃষ্ণমঙ্গলে প্রাপ্ত :

পরশর নামে দ্বিজকূলে অবতার মাধব তাহার পুত্র বিদিত সংসার।

(এ ভগিনী অভিনু ব্যক্তিত্বের সাক্ষ্য। তবে ভগিনী প্রক্ষিপ্ত হলে এ অনুমান বৃথা হবে। ডক্টর আততোষ ভট্টাচার্য বর্ণিত কিশোরগঞ্জ নিবাসী (পৃঃ ৪৬৫-৬৬) দ্বিজ মাধবের পরিচিতিও বংশপরম্পরা ভিন্ন কোন চৈতন্যভক্ত বৈষ্ণবের বলে মনে হয়। মাধবকবির কবিত্ব কম, কল্পনায়ও আকাশচ্যুত নেই, তাই বর্ণনা বাস্তবঘেঁষা। এ গুণের জন্যে মুকুন্দরাম প্রখ্যাত। এতে মাধবেরও দাবি আছে। উভয়ের পুথিতে চিত্রগত সাদৃশ্য লক্ষ্য করেই রমেশচন্দ্র দত্ত দ্বিজমাধবের কাছে মুকুন্দরাম বহলাংশে ঋণী বলে মনে করেছিলেন। মনে হয় দ্বিজ মাধব সপ্তগ্রামের বাল্যগ্রামনিবাসী ও মহাভারত প্রণেতা কবীন্দ্র পরমেশ্বর দাসের মতো চাকরী বা অন্য

কর্মসূত্রে চট্টগ্রামে প্রবাসী ছিলেন। তাই তাঁর গঙ্গামঙ্গল^১ ও চণ্ডীমঙ্গল চট্টগ্রামে সুলভ, সপ্ত গ্রামাঞ্চলে দুর্লভ।

৪. কবিকঙ্কণ মুকুন্দরাম চক্রবর্তী

মুকুন্দরাম মধ্যযুগের একজন শ্রেষ্ঠ কবি। ষোল-সত্তেরো শতকের সঞ্চিতগল্পের মুকুন্দরাম, সত্তেরো শতকের তৃতীয়পাদের আলাউল এবং আঠারো শতকের মধ্যকালের ভারতচন্দ্র এ যুগের পাঠকের প্রিয়।

মুকুন্দরাম- পরিচিতি এতকাল সরল ও সংক্ষিপ্ত ছিল। সাম্প্রতিক পূর্বকালে তাঁর চণ্ডীমঙ্গলের রচনাকালে ‘শাকে রস রস বেদ শশাঙ্ক গণিতা’ বলে স্বীকৃত হত। অর্থাৎ ১৪৬৬ শকাদ্দে তথা ১৫৪৪ খ্রীস্টাব্দে কিংবা মানসিংহের সুবাদারীকালে এই চণ্ডীমঙ্গল রচিত বলে মেনে নেয়া হত। আর মাহমুদ শরীফ নামের ডিহিদারের উৎপীড়নের ফলে কবির বাস্তবত্যাগ ও তখনকার উড়িষ্যার অন্তর্গত ব্রাহ্মণভূমির শাসনকেন্দ্র আরড়ায় সামন্ত বাঁকুড়া রায়ের আশ্রয় নেয়া এবং সামন্ত পুত্র রঘুনাথ রায়ের শিক্ষক হওয়া কিংবা অন্য শিশুদের পাঠশালার পণ্ডিতপদ লাভ এবং রঘুনাথ রায়ের শিক্ষা বা দীক্ষা শুরু হওয়া আর সে-সময়ে কাব্য রচনা করা, চার সন্তানের পিতা হওয়া প্রভৃতি বর্ণনায় তাঁর জীবনবৃত্তান্ত শেষ হত।

ইদানীং বিদ্বানদের গবেষণালব্ধ বিচিত্র তত্ত্ব ও তথ্য মুকুন্দরাম পরিচিতি ও তাঁর আবির্ভাবকাল সম্বন্ধে নানা সংশয় জাগিয়েছে এবং সেসব সংশয়ের নিরসন প্রায় দুঃসাধ্য করে তুলেছে। আমাদের হাতে কোন নতুন তথ্য নেই। কাজেই সাম্প্রতিকালের তিনজন বিদ্বানের- ডক্টর সুকুমার সেনের, ডক্টর ক্ষুদীরাম দাসের ও অধ্যাপক সুখময় মুখোপাধ্যায়ের নানা বিরুদ্ধ সিদ্ধান্তের পরিপ্রেক্ষিতে আমাদের যুক্তিবুদ্ধি অনুসারে আমরা কবির বুদ্ধিনির্ভর যুক্তিগ্রাহ্য চরিতকথা নির্মাণ করছি।

মুকুন্দরাম চক্রবর্তী শহর সোলায়মানাবাদ ওফে সেলিমাবাদ গোপীনাথ নন্দী নিয়োগীর তালুকে তাঁর প্রজ্ঞারূপে বর্ধমানে দামিন্যা (দামুন্যা) গ্রামবাসী ছিলেন। মুকুন্দরাম যে-সময় বাস্তব ত্যাগ করে তখনকার উড়িষ্যার অন্তর্গত ব্রাহ্মণভূমির আরড়ার জমিদার বাঁকুড়া রায়ের আশ্রিত হন, তখন রাজা মানসিংহ গৌড়বঙ্গ উৎকল মহীপ (বা অধিপ ১৫৯৪-১৬০৬ খ্রীঃ) এবং রাজা মানসিংহের কালে সত্যই ‘ডিহিদার (ছিল) মামুদ শরীপ’। এবং মাহমুদ শরীফের অধীনে তখন উজীর ছিলেন কোন এক প্রখ্যাত রায়ের বা রায়রায়ানের সন্তান রায়জাদা (স্থানীয়ভাবে বহুল পরিচিত)। তিনি অবশ্য পূর্বকার রায়রায়ান রাজপুত্র পত্রদাসের পুত্র কিসুদাস হতে পারেন। কেননা ইতিহাসসূত্রে ১৫৯৫ খ্রীস্টাব্দ থেকে কিসুদাসকে উজীরপদে অধিষ্ঠিত দেখা যায়।

মুকুন্দরাম বর্ণিত

- ক. মাপে কোণে দিয়া দড়া/পনের কাঠার কুড়া
- খ. সরকার খিল ভূমি লিখে লাল/বিনে উপকারে খায় ধুতি
- গ. পোতদার হৈল যম/টাকা আড়াই আনা কম
- পাই লভ্য খায় দিনপ্রতি

^১ আবুল করিম সাহিত্য বিশারদ সম্পাদিত ও বঙ্গীয় সাহিত্য পরিষৎ প্রকাশিত, ১৩২৩ সন।

ঘ. প্রভু গোপীনাথ নন্দী/বিপাকে হইল

বন্দী কোন (সেই) হেতু নাঞি পরিত্রাণ

ঙ. জানদার প্রতি নাছে (সভার আছে)/প্রজারা পালায় পাছে

দুয়ার ছাপিয়ে দিল (দেয়) থানা। -প্রভৃতি সম্বন্ধে

ডক্টর ক্ষুদিরাম দাস অনুমিত ও ব্যাখ্যাত তথ্য-প্রশাণগুলো এই : ইতিহাস সমর্থিত কারণ ছাড়া আকস্মিকভাবে শত শত প্রজার জীবনে এমন বিপর্যয় ঘটতে পারে না। দেশে একেবারে অরাজকতা না চললে সব সরকারী কর্মচারী দলবদ্ধ হয়ে একস্থানে এমন প্রকাশ্যে সুপরিচালিতভাবে ব্যক্তিস্বার্থে পীড়ন চালাতেও পারে না, বিশেষ করে আকবরের রাজত্বে সুবাদার মানসিংহের আমলে। আমরা জানি আকবরই প্রথম তোড়ল মলের নেতৃত্বে ভূমি জরিপের সূচু ব্যবস্থা করান। উদ্ধৃতাংশ থেকে নিঃসংশয়ে প্রমাণিত হয় যে তখন নতুন করে অঞ্চলব্যাপী জমির জরিপ চলছিল এবং ভূমি পরিমাপের নতুন কাঠি নির্ধারিত হয়েছিল। আর সে-সঙ্গে জমির প্রকৃত মালিকের সন্ধান নেয়া হচ্ছিল অকৃত্রিম দলিল দস্তাবেজের সাফল্যে। নিয়োগী গোপীনাথ নন্দী বন্দী হয়েছিল নিশ্চয়ই রাজস্ব ফাঁকি দিচ্ছিল বলে অথবা বিনা দলিলে পরস্ব জবর দখল করে ভোগ করার অপরাধে। তাই তার মুক্তির কিংবা তালুক ফিরে পাবার কোন কারণ বা আশা ছিল না। বহুকাল ভূমিজরিপ ও রাজস্ব ব্যবস্থার সংস্কার না হওয়ায় কৃষক প্রজাদের মধ্যেও হয়তো কবি মুকুন্দরামের মতো এমন পরজমিভোগী বা জবরদখলকারী অনেকে ছিল। এখন জরিপ কালে ধরা পড়লে জমিতে যাবেই, তার উপর জেল-জরিমানা হবে জেনে তেমন প্রজারা সপরিবার পালাচ্ছিল এবং এসব লোক যাতে পালাতে না পারে সে-জন্যে জানদার (watcher বা informer) নিয়োগ করা হয়, এমনকি পালাবে তেমন পরিবারের ঘরের দরজায়ও প্রহরী বসানো হত। সুবাসীদেব ও কবরানীদের আমলে হয়তো রৌপ্য মুদ্রা ওজনে কম ছিল। সর্বভারতীয় মানের বা সাম্রাজ্যে সর্বত্র একই মানের ও ওজনের মুদ্রা চালু হওয়ার ফলে পুরোনো মুদ্রাকে রূপার মাপে ওজন করে টাকায় দশ পয়সা করে ঘাটতি আদায় করছিল। পুরোনো মুদ্রা জমা দেয়ার সময়সীমা বেঁধে দেয়া হয়েছিল মুদ্রার লেনদেন সূচু করার প্রয়োজনেই এবং গুরুত্ব সচেতন কারবার লক্ষ্যে বিলম্বের জন্যে দিনে এক পাই করে জরিমানার ব্যবস্থাও ছিল। রায়জাদা যে ‘বেগে খেদাও’ নীতি গ্রহণ করেছিলেন এবং ‘ব্রাহ্মণ বৈষ্ণবের হৈল অরি’- তার কারণ এ শ্রেণীর লোকই সেকালে নিষ্কর বা লাখরাজ জমি ভোগ করত বেশি এবং এদেরই উৎখাত করা হচ্ছিল বা জমির উপর রাজস্ব ধার্য করা হচ্ছিল। জেলজরিমানার আশঙ্কাকাতর হতভূম মুকুন্দরাম চক্রবর্তী সরকারী ব্যবস্থার ও সরকারী কর্মচারীর উপর দোষ চাপিয়ে তাঁর রচিত গ্রন্থে নিজেকে নির্দোষ মজলুম বলে ছাপাই গেয়েছেন আত্মসম্মান রক্ষার মনুষ্যসুলভ গরজেই। তবু আসল সত্য ঢাকা পড়েনি। দেশের সব তালুকদার বন্দী হয়নি, তাঁর হিতকামী শ্রীমন্ত খাঁ কিংবা (গ্রামভারি বা মোড়ল) গম্ভীর খাঁরাও পালায়নি, পালায়নি মুকুন্দরামের ভাই কবিচন্দ্র কিংবা জ্ঞাতিরা। খিড়কী দোরেও (নাছে) চর বসানো থাকলেও মুকুন্দরাম (জ্ঞাতি) ভাই রমানাথকে পথের সাথী করে স্ত্রী-পুত্র নিয়ে পালালেন। পথে আবার পাথের কেড়ে নিল রূপরায় নামের দস্যু। পথে তেলী যদুকুণ্ড, নিবারণ ও গঙ্গাদাস সাহায্য করল অন্ত ও আশ্রয় দিয়ে।

ভাইলা, মুড়াই নদী, তেউট্যা দারুকেস্বর, পাতুলী, নারায়ণ নদ, পরাশর নদ, আমোদর নদ, গোচডা ও শিলাই হয়ে কবি অবশেষে সপরিবারে আরড়া পৌছলেন। গোচডায় কবি

একেবারে নিঃশব্দ, তখন 'শিশু কান্দে ওদনের তরে'। এবং পুকুরের পাড়ে বসে 'নৈবেদ্য শালুকনাড়া দিয়ে কবি 'পূজা কৈল কুমুদপ্রসূনে'। এমনি ক্ষুধার্ত ও পথশ্রান্ত কবি পুকুরপাড়ে যখন নিদ্রিত, তখন 'চণ্ডী দেখা দিলেন স্বপনে' এবং 'আজ্ঞা দিলা রচিত্তে সঙ্গীত'।

মুকুন্দরাম আগে থেকেই কাব্য চর্চা করতেন। হয়তো কবি ছিলেন বলেই আরড়ায় বিদ্যোৎসাহী ব্রাহ্মণ জমিদারের প্রতিপোষণ প্রত্যাশায় কবি ৭০-৮০ মাইল দূরে অবস্থিত আরড়ার উদ্দেশ্যে গৃহত্যাগ করেন। কবির প্রত্যাশা পূরণ হয়েছিল। কারণ রাজবাড়িতে উপস্থিত হওয়ার সঙ্গে সঙ্গেই বাঁকুড়া রায় :

পড়িয়া কবিত্ববাণী/সম্ভাষিল নৃপমণি/রাজা দিল দশ আড়া ধান।

এবং 'সুত [শিশু] পাঠে কৈল নিয়োজিত।' আর মাধবের পুত্র বাঁকুড়া রায়ের জ্যেষ্ঠপুত্র শ্রীড় 'ধন্য রাজা রঘুনাথ/রূপে গুণে অবদাত' মুকুন্দরামকে 'গুরু বলি করিল পূজিত'। পণ্ডিতকবিকে শ্রীড় রঘুনাথ দর্শন বা স্মৃতি পাঠে শিক্ষাগুরু কিংবা দীক্ষাগুরু রূপেই গ্রহণ করেছিলেন। ১৫৯৬ সনে রঘুনাথ রায় অতিক্রান্ত যৌবনের না হলে ১৬০৪-০৫ খ্রীস্টাব্দে তাঁর যুবকপুত্র মন্দির নির্মাতা চক্রধরকে পাওয়া যেত না। আর রঘুনাথের রাজত্বকালেই এবং তাঁর আগ্রহেই মুকুন্দরাম চণ্ডীমঙ্গল রচনা করেন। এবং সম্ভবত 'রঘুনাথ রায়ই তাঁকে কল্প ভূষিত করে 'কবিকল্পণ' উপাধি দান করেন। কারণ কবি স্বয়ং বলেছেন রঘুনাথ নরপতি গায়েনেরে দিলেন ভূষণ'। গায়েনকে ভূষণ দেয়ার আগে কবিকে ভূষিত করাই ছিল স্বাভাবিক। এ গায়েন ছিল বিক্রমদেবের পুত্র বিনয়সুন্দর। 'ধন্যরাজা রঘুনাথ/প্রকাশিল নতুন মঙ্গল/তাহান আদেশ পান/শ্রী কবিকল্পণ গান'- গায়েনের যোজনা বা প্রাক্কণ্ড না হলে কবির এ উক্তির ভিত্তিতে বলা যায় পিতা বাঁকুড়া রায়ের (১৫৭৩-১৬০২ খ্রীঃ) মৃত্যুর পরে রঘুনাথ রাজা হয়ে (১৬০৩ খ্রীঃ) মুকুন্দরামকে অভয়ার পাঁচালী রচনায় ভূষিতনা দেন। এবং রঘুনাথ ১৬২২-২৩ খ্রীস্টাব্দ অবধি বেঁচে ছিলেন, তারপরে জমিদার ছিলেন তাঁর পুত্র শ্রীধর। কেশিয়াড়ী গ্রামে সর্বমঙ্গলা মন্দিরাগারে উৎকীর্ণ শ্রীড় রঘুনাথের পুত্র যুবক চক্রধর শর্মার ১৫২৬ শকের বা ১৬০৪ খ্রীস্টাব্দের শিলালিপিসূত্রে এবং আরড়া সন্নিহিত সেনাপত গ্রামের জয়চণ্ডীর মন্দিরে প্রাপ্ত আরড়ার তথা ব্রাহ্মণভূমির [দ্বিজাবনীশ-এর] অধিপতি শ্রীধরের ১৫৪৫ শকের বা ১৬২৩-২৪ খ্রীস্টাব্দের শিলালিপির সাক্ষ্য প্রমাণিত হয় যে রঘুনাথ ১৬০৩ থেকে ২২-২৩ খ্রীস্টাব্দ অবধি জমিদারীর মালিক ছিলেন।

কবিকল্পণ মুকুন্দরাম চক্রবর্তীর প্রপ্রপিতামহ তপন ওঝা, প্রপিতামহ উমাপতি, পিতামহের নাম জগন্নাথবিশ্র, পিতার নাম হৃদয়মিশ্র ওর্ফে গুণরাজমিশ্র, ভাইয়ের নাম কবিচন্দ্র, গোত্র সাবর্ণ। দামিন্যার চক্রাদিত্য শিবের ধামাধিকরণী ছিলেন পিতামহ জগন্নাথ মিশ্রের জ্যেষ্ঠভ্রাতা মাধব ওঝা।

মুকুন্দরামের সন্তানসংখ্যা চার(শিবরাম, চিত্রলেখা, যশোদা ও মহেশ-দুইপুত্র দুইকন্যা। জ্যেষ্ঠ শিবরাম ১৬৪০ খ্রীস্টাব্দের আগেই দামিন্যায় ফিরে আসেন, কারণ সেলিমাবাদের শাসক বারাখানের আমলে ১০৪৭ বঙ্গাব্দে তথা ১৬৪০ খ্রীস্টাব্দে কুতুব খাঁ ষোলবিঘা নিষ্কর জমি দান করেন শিবরামকে। আমাদের ধারণা মানসিংহ ১৫৯৪ খ্রীস্টাব্দে সুবাদার হয়ে এলেও ১৫৯৫ সনে কিসুদাস উজির হওয়ার পরেই ভূমিজরীপ ও মুদ্রাসংস্কার শুরু করেন। কিন্তু জরীপ কাজ সময়-সাপেক্ষ, কাজেই দামিন্যাগ্রামে জরীপ ১৫৯৬ খ্রীস্টাব্দে শুরু হলে মুকুন্দরাম সপরিবার ঐ বছরেই পালিয়ে যান, এবং রঘুনাথ রায় (১৬০৩-২৩ খ্রীঃ) পিতৃব্যয়োগের পরে কর্তা হলে

তাঁরই আশ্রয়ে মুকুন্দরাম কাব্যরচনা শুরু করেন। কাজেই কাব্যরচনার শুরু ১৬০৩ খ্রীস্টাব্দের আগে নয় এবং সমাপ্তিও নিশ্চয়ই ১৬২৩ খ্রীস্টাব্দের অনেক আগেই হয়েছিল। তাই অনুমান করি এ বৃহৎ কাব্যের দৃ'খণ্ড ১৬১০-১২ খ্রীস্টাব্দের মধ্যেই শেষ হওয়ার কথা। অতএব, মুকুন্দরাম সতেরো শতকের প্রথম দশকের কবি।

শ্রীকবিকঙ্কণ, কবিকঙ্কণ চক্রবর্তীর মুকুন্দ বা মুকুন্দ চক্রবর্তী কবিকঙ্কণই কেবল ভগিতায় মেলে, পুরো মুকুন্দরাম কোথাও নেই। কবিকঙ্কণ মুকুন্দ যখন আরড়ায় যান, তখন তিনি সন্তানের পিতা। আমাদের অনুমান মুকুন্দের চণ্ডীমঙ্গল রচনাকালেই উক্ত চার সন্তানের অন্তত একজন শিবরাম বিবাহিত। তাই ভগিতায় 'রক্ষ পুত্রে পৌত্রে ত্রিনয়ান'-এ প্রার্থনা পাই। এটি যদি প্রকৃষ্ট না হয়, তা হলে কবির কনিষ্ঠপুত্র মহেশ কিংবা শিবরামের পুত্রই ছিল সে-শিশু, যে কৈদেছিল 'ওদনের তরে।' আর ১৬৪০ খ্রীস্টাব্দে দামিন্যায় ফিরে-আসা শিবরামের বয়স অন্তত ষাট হওয়ার কথা। এভাবে অনুমান করলে সে-বাল্যবিবাহের যুগে মুকুন্দরামের জন্ম ১৫৫৫ সনে হলে এবং তাঁর প্রথমপুত্র শিবরামের জন্ম ১৫৭৫ সনে হলে ১৫৯৬ সনের মধ্যে কবির পৌত্র জন্মাতে পারে।

বাঙালী পাঠক-সমালোচকরা কবিকঙ্কণ মুকুন্দ চক্রবর্তীর প্রশংসা পঞ্চমুখ। কবিকঙ্কণের অনন্যতা তাঁর বাস্তব জীবন-ও প্রতিবেশ চেতনায়, ব্যক্তির ভাব-চিন্তা-কর্ম-আচরণের বাস্তবনিষ্ঠ বাকচিত্রাঙ্কণে, গৃহগতজীবনের নারীর সুখ-দুঃখ, দীর্ঘা-অসুখ, কাম-প্রেম প্রভৃতির সূক্ষ্ম রূপায়ণে, নিম্নবর্ণের ও মধ্যবিত্তের মানুষের জীবিকার গরজে অবলম্বিত ছল-চাতুরীর ও ধূর্ততার বিচিত্র রূপ অঙ্কনে। সবাই বলে মুকুন্দরাম সেকালের ঔপন্যাসিক। অর্থাৎ একালে জন্মাতে তিনি উচ্চমানের ঔপন্যাসিক হতেন—এ ধরনের প্রশংসা অনেকটাই আবেগতাড়িত। যেমন কবিকঙ্কণের আত্মকথায় এঁরা সমকালীন প্রশাসনিক দুর্নীতির বাস্তব ও সত্য চিত্র খুঁজে পান। অথচ এ-কালের গবেষণায় প্রকাশ, এ বর্ণনায় কবির আত্মপক্ষ সমর্থনের প্রয়াসই প্রকট। তা ছাড়া এমনি আত্মকথায় সমকালীন প্রতিবেশ বিবৃত হয়েছে আরো কোন কোন কবির—যেমন কুন্তিবাসের, আলাউলের-আত্মকথায়, অনুদামঙ্গলেও রয়েছে এমন অনেক ঐতিহাসিক বাস্তবচিত্র। কাজেই মুকুন্দরাম এ ক্ষেত্রে তখন আর একক নন। আমাদের সমাজ, সংস্কৃতি ও সাহিত্য সতেরো শতকেও উচ্চমানের ছিল না বলেই মুকুন্দরাম যখন চণ্ডীমঙ্গল লিখে অর্থাৎ ফুল্লরার দারিদ্র্যদুঃখ বর্ণনা করে, কালকেতুর অবয়ব, শক্তি ও সাহস বর্ণনা করে, মুরারিশীলের কাপট্য ও অসততা এবং ভাঁড়দস্তের খলতা ও ধূর্ততা দেখিয়ে আর খুল্লনার সারল্য ও বিদ্বিষ্ট সপত্নীর পীড়নচিত্র দিয়ে পাঠককে মুগ্ধ করছেন, ইংলণ্ডে তখন শেক্সপীয়ার তাঁর নাটকগুলো রচনা করে চলেছেন।

কালকেতুর ও ধনপতির উপাখ্যানও মুকুন্দরামের তৈরি নয়। তাছাড়া মুকুন্দরামের কালে সাহিত্যে বাস্তবজীবননিষ্ঠার কোন গুরুত্ব ছিল না। কবিদের লক্ষ্য ছিল স্বর্গ-মর্ত্য-পাতালের পরিসরে অবাধে সম্ভব-অসম্ভবের, স্বাভাবিক-অস্বাভাবিকের বেড়া-বাধা অস্বীকার করে মুক্তপক্ষ বিহঙ্গের মতো রোমান্টিক কল্পনার আকাশে সানন্দে ও সোৎসাহে ঘটনা ও চরিত্র সঞ্চার করে বেড়ানো। দেশ-কালের সে-কাব্য-রীতির ব্যতিক্রম কি তাঁর সচেতন প্রয়াসের, নতুন জীবন-দৃষ্টির ও জগৎ ভাবনার প্রসূন কিংবা কল্পনার আকাশে পক্ষবিস্তারের অসামর্থ্যের সাক্ষ্য! অর্থাৎ মোরগপাখি উড়তে পারে না বলেই ঘরের চার পাশে বেড়ায়, মুকুন্দরামও কি কল্পনারাজ্যে বিহারের অসামর্থ্যে দরুন তাঁর দামিন্যা-আরড়ায় দেখা মানুষ ও প্রতিবেশ অঙ্কিত করেছেন!

উনিশ শতকের ইংরেজি রোমান্স-ও উপন্যাস পড়ুয়া কোলকাতার বিদ্বানেরাই প্রথম মুকুন্দরামের মধ্যে জীবনের ও প্রতিবেশের উপন্যাস সুলভ বাস্তব দু'চারটে উকিত ও খণ্ডচিত্র পেয়ে মুকুন্দরামকে শ্রেষ্ঠ কবির আসন দেন। সেই থেকে অধ্যাপক-সমালোচকরা কেবল তারিফই করছেন আবেগচালিত হয়ে। অবশ্য মুকুন্দরাম কবি মাধবের কাছে যে নানাভাবে ঋণী, তা রমেশচন্দ্র দত্ত তথ্যপ্রমাণযোগে জানিয়েছিলেন।

কোন প্রশংসাই মুকুন্দরামের প্রাপ্য নয়— এমন কথা কেউ বলবে না। তবে মুকুন্দরাম যে চরম দারিদ্র্য, পরম সুখ, তীব্রতম দুঃখ প্রভৃতির আদর্শায়িত বা আত্যস্তিকতাদুষ্ট চিত্র অঙ্কন করেছেন, তা সুখপাঠ্য হলেও বাস্তব নয়। সব বড় কবির ও ভালো কবির মধ্যেই আগুবাফা, সুভাষিতবুলি, মস্তুর মতো মহৎ ও সত্য কথা কমবেশি থাকে। মুকুন্দরামের মধ্যেও তা রয়েছে এবং সব কবিই দেশ, কাল ও প্রতিবেশ প্রভাবিত। সব কবিরই জ্ঞান ও অভিজ্ঞতাই পুঁজি। কাজেই 'নিয়োগী চৌধুরী নহি না করি তালুক, শিশু কান্দে ওদনের তরে, রায়জাদা ব্যাপারী-বৈশ্যের খেদা, ব্রাহ্মণ-বৈষ্ণবের হৈল অরি, মাপে কোণে দিয়া দড়া পনের কাঠায় কুড়া, লিখভূমি লিখে লাল, বিনি উপকারে খায় ধুতি, টাকায় আড়াই আনা কম, টাকাকের দ্রব্য দশ আনা, ডিহিদার নাহি দিব দেশে, সোনা রূপা নহে বাপা এ বেঙ্গাপিতল।' প্রভৃতি তাঁর প্রতিভার বা সমাজবোধের অসামান্যতার সাক্ষ্য নয়।

সব মঙ্গল কাব্যংশে দেবখণ্ড অর্থাৎ হর-গৌরীর দাম্পত্য ও গার্হস্থ্যচিত্র এবং মনসা চণ্ডী শীতলা বাসুলী কিংবা দক্ষিণরায় সত্যপীর চরিত্র মাধবসুলভ। কাজেই এসব তাঁর কবিত্বের ও পাণ্ডিত্যের শেষ কথাও নয়।

মুকুন্দরামের আখ্যেটিক খণ্ডই শ্রেষ্ঠ। এই সমাজ, সংস্কৃতি, রাষ্ট্র, প্রশাসন প্রজার দায়িত্ব অধিকার ও অবস্থা, বুদ্ধিজীবীর কর, বেসেদের শুদ্ধ, চাষাবাদ ও খাজনা, নগরপত্তন ও বিন্যাস এবং কাছারী কর্মচারী সৈন্য যুদ্ধ প্রভৃতির বর্ণনা আবিশ্যিক হয়েছে ব্যাধ কালকেতুর রাজা হওয়া প্রসঙ্গে। এটি আখ্যানের প্রয়োজনে এসেছে কবির সমাজ, রাষ্ট্র ও জীবিকা সচেতনতার ফলে নয়। তবু এসব রয়েছে বলেই মুকুন্দরাম বাস্তবতার কথা সমকালীন সমাজের সমস্যার ও মানুষের সুখ-দুঃখ, আনন্দ-যন্ত্রণা প্রভৃতির ভাষ্যকার কবি বলে চিহ্নিত ও প্রশংসিত। যদিও এ সব তাঁর সচেতন লক্ষ্যের ও উদ্দেশ্যের অন্তর্গত ছিল বলে বিশ্বাস করা কালের হিসেবে সঙ্গত নয়। কবি মুকুন্দরাম নিজেও নিয়োগী চৌধুরী রাজা মন্ত্রী পাত্র মহাপাত্র কিংবা বেনে মহাজন বিরোধী নন, তাঁর কালকেতু সদয় সুবিবেচক শাসক মাত্র। ধনপতি, শ্রমন্ত কিংবা সিংহলের রাজা প্রভৃতি বিত্তবানদের প্রতি তাঁর কোন সচেতন বিদ্বেষ নেই, তিনি সমাজনীতি কিংবা পীড়নযুক্ত প্রজা সম্বন্ধিত সমাজও কল্পনা করেন না, কালকেতু গরজে পড়েই প্রজা-আকৃষ্ট করবার মতলবেই সদ্য আবাদ-করা জঙ্গলে কৃষকদের নানা সুবিধে দিচ্ছে—এতে বড়জোর ব্যক্তিগত সাময়িক সহনীয়তা, উদারতা কিংবা সহানুভূতি লক্ষ্য করা সম্ভব— কিন্তু নীতি-আদর্শগত কিছু নয়। সতেরো শতকের কবি মুহম্মদ খান রচিত রূপককাব্য 'সত্যকলিবিবাদসম্বাদে' সমকালীন সমাজের, জীবনের ও রীতিনীতির চিত্র এবং বাস্ত্বিত আদর্শের রূপরেখা আরো স্পষ্টভাবে রয়েছে। কবির জ্ঞান ও অভিজ্ঞতাই কাব্যে অভিব্যক্তি পায়। যে-সব সুবিধা প্রজাদের দেবে বলে কালকেতু বুলন মণ্ডলকে জানাচ্ছে—তাঁর সমকালে তাঁর বিপরীত ব্যবস্থাই যে চালু ছিল অর্থাৎ নানা অজুহাতে অর্থ আদায় করা, তাও পরোক্ষে প্রকট হচ্ছে, এজন্যে এ অংশটুকুতে ষোল-সতেরো শতকের জমিদার-প্রজার তথ্য শাসক-

শোষকের ও শাসিত-শোষিতের সম্পর্কের এবং সে-সূত্রে গ্রামীণ সমাজের আর্থিক জীবনের একটি সামগ্রিক চিত্র পাই :

আমার নগরে বৈস যত ভূমি চাষ চষা সালামি বাঁশ গাড়ি নানা বাবে যত কড়ি
তিন সন বহি দিহ কর। নাহি লব তো সবার পাশে।
হালে হালে একতরফা কাহারে না করা শঙ্কা পাবনী পঞ্চক যত গুড়া লোন সানাউত
পাটায় নিশানী মোর ধর ধান্য কাটি কমসে কসুরে
নাহি লব বাউড়ি রয়্যা বস্যা দিহ কড়ি, যত বেচ চাউল ধান তার নাহি লব দান
ডিহিদার নাহি দিব দেশ অন্ধ নাহি বাড়াইব পুরে।

মুকুন্দ-অঙ্কিত মুরারিশীল, ভাঁড়ু দত্ত, ফুল্লরা, লহনা, খুল্লনা এবং চণ্ডীচরিত্রই প্রমাণ করে যে কবি তীক্ষ্ণদৃষ্টিতে লোকের কর্ম ও আচরণ প্রত্যক্ষ করতেন। এ অভিজ্ঞতা ছিল বলে চরিত্রগুলো তাঁর স্বদৃষ্ট ও স্বসৃষ্ট হয়েই বিশিষ্ট ও জীবন্ত হয়েছে।

তাঁর কৃতিত্বের সাক্ষ্য রয়েছে সমাজ, ব্যক্তি, প্রকৃতি, ঘটনা, চরিত্র বর্ণনের প্রাঞ্জলতায় ও স্পষ্টতায়। স্বল্পকথায় বাকপ্রতিমা নির্মাণ এবং উদ্দিষ্ট বক্তব্যের অভিব্যক্তিই শক্তির পরিচায়ক। যেমন : কালকেতু শিকারে ব্যর্থ হয়ে শূন্যহাতে ফিরবার পথে ‘যাইতে মহাবীর খায় বনফুল’।

১. মলিন বদনে চিন্তে ঘরের সম্বল
দুঃখিনী ফুল্লরা আছে মোর প্রতিআশে। ৮. খুড়া তিন গোটা শর ছিল
একখান বাঁশ
২. কি লাগিয়া বীর পাপে দিলা মন
আজি হৈতে হৈলে ভূমি লঙ্কার রাবণ। ৯. হাটে হাটে ফুল্লরা পসরা দিত মাঁস।
ভাঁড়ুর প্রতিজ্ঞা :
৩. শিয়রে কলিঙ্গরায় বড় দুৰাচার
তোমাতে বধিয়া জাতি লইবে আমার। ১০. হরিদন্তের বেটা হও জয়দন্তের নাতি
হাটে যদি বেচাও বীরের ঘোড়া হাতী।
পুনরপি হাটে মাংস বেচিবে ফুল্লরা।
ভাঁড়ুর মায়াকান্না :
৪. মুরারি ধনের পাইয়া ঝাঁস
আসিতে বীরের পাশ
ধায় বেগে খিড়কীর পথে। ১১. খুড়া ভূমি হৈলে বন্দী
অনুক্ষণ আমি কান্দি
বহ তোমার (ভাঁড়ুপত্নী) নাহি খায়
ভাত।
৫. ঘরেতে নাহি পোতদার
কালি দিব মাংসের উদ্যার।
কাষ্ঠ আন্য একভার
একত্র শুধিব ধার
মিষ্ট কিছু আনিব বদর। ১২. সতীন কোন্দল করে
দ্বিগুণ বলিবে তারে
অভিমানে ঘর ছাড় কেনি।
৬. ধর্মকেতু দাদা সনে কৈলুঁ লেনাদেনা
তাহা হৈতে ভাইপো হৈয়াছ সেয়ানা। ১৩. (কালকেতু) গ্রাসগুলি তোলে
যেন তে-আঁটিয়া তাল।
- ভাঁড়ুর পরামর্শ : ১৪. সাপিনী বাঘিনী সত্য পোষ
নাহি মানে
অবশেষে ওই তোরে বধিবে পরাণে।
৭. যখন পাকিবে খন্দ
পাতিবে বিষম দ্বন্দ্ব
দরিন্দ্রের ধানে দিবে লাগা।

১৪. একজন সহিলে কৌন্দল হয় দূর।

১৫. কোপেতে উন্মত্ত হয়্যা
বলা অনুচিত।

১৬. (গৌরী) ক্রোধে কম্পমান
তনু বলেন তখন

জামাতারে পিতা মোর দির ভূমিদান
তাহে ফলে মাষ মুগ তিল সর্ষা ধান।
রাক্ষিয়া বাড়িয়া মাতা কত দেহ খোঁটা
আজি হৈতে তোমার দুয়ারে
দিনু কাঁটা।

৫. দ্বিজ রামদেব

আমাদের ধারণা দ্বিজ রামদেব কোন স্বতন্ত্র কবি নন। কবিযশ লোভে দ্বিজ মাধবের কাব্যের এখানে সেখানে সামান্য পরিবর্তন বা সংযোজন করে ভণিতায় স্বনাম বসিয়েছেন তিনি।

ইনি 'কবি বিধসুত'। কবিচন্দ্রের পুত্র অর্থে গ্রহণ করলেও কোন কিনারা মেলে না। কবি বিধু বা কবিচন্দ্র কোন গ্রন্থ রচয়িতা তা বলা হয়নি, কবিচন্দ্র নামের একাধিক কবির সন্ধান মেলে। তাঁদের মধ্যে এক কবিচন্দ্রমিশ্র ১৪৯৭ খ্রীস্টাব্দে হোসেন শাহর সময়ে তাঁর গৌরীমঙ্গল রচনা করেন। দ্বিজ রামদেব তাঁর সন্তান হতে পারেন না, কারণ তাঁর গ্রন্থ রচনাকাল 'ইন্দু বাণ ঋণি বাণ' অর্থাৎ ১৫৭৫ শকাব্দ বা ১৬৫৩-৫৪ খ্রীস্টাব্দ। পিতা-পুত্রের জীবৎকালে দেড়শত বছরের ব্যবধান থাকতে পারে না। দ্বিজ রামদেব কালকেতুর গুজরাটনগরে কবির নিজের সমকালের 'ফেরাজি, মঘ, তেলঙ্গ, ত্রিপুর' প্রভৃতির জন্যে ঠাই করে দিয়েছেন।

৬. রামানন্দ যতি

আঠারো শতকের শেষার্ধ্বে গোটা মধ্যযুগের বাঙলা সাহিত্যে নীতি, আদর্শ ও রুচির ক্ষেত্রে এক অনন্য দ্রোহীর আবির্ভাব ঘটে। মধ্যযুগে মুদ্রণ-যন্ত্রের অভাবে সাহিত্য সমালোচনা ছিল অভাবিত। তা ছাড়া পাঠক শ্রোতার পক্ষে মৌখিক নিন্দা বাক্য উচ্চারণেও ছিল সংস্কারের বাধা। কারণ কবিগণ ছিলেন সাধারণভাবে দেবতা-অবতারের স্বপাদিষ্ট(কেউ তাঁদের পাঁচালীর নিন্দা করলে কিংবা ক্রটি ধরলে তাকে সবংশ নিধন বা বিনাশ করার আশ্বাস দিতেন কবিকে স্বয়ং আদেষ্টি দেবতা।

এমনি অবস্থায় এক সংস্কারমুক্ত সাহসী রামায়েৎ সন্ন্যাসী মুকুন্দরাম চক্রবর্তীর কাব্যের দোষত্রুটি উল্লেখ করেও মুখ্যত মুকুন্দরাম ও ভারতচন্দ্রের অনুসরণে ও অনুকরণে তাঁর চণ্ডীমঙ্গল রচনা করেন, 'চণ্ডীর আদেশ প্যায়া রামানন্দ কয়'। তা হলে রামানন্দ যতিও পুরো বিদ্রোহী নন বরং প্রতিবাদী কবি। 'গজ বসু ঋতু চন্দ্র শাকে গ্রন্থ হয়।' অতএব তাঁর গ্রন্থের রচনাকাল ১৬৮৮ শক বা ১৭৬৬-৬৭ খ্রীস্টাব্দ। রামানন্দ যতির প্রতিবাদের বা দ্রোহের কারণগুলো এরূপ :

১. পাঁচালিতে আদিরসের আধিক্য :

আদিরস প্রকাশে মূঢ়ের মন মজে

তেজি কবি সকলে সেই রস ভহে।

২. মুকুন্দরামের কাব্যের ক্রটির ফিরিঙ্গি দিয়ে কবি বলছেন :

বুঝা দেখ মুকুন্দের মতে দোষ যত
প্রত্যেকে লিখিয়া আমি বুঝাইব কত ।
যে যে ঠায় লিখিলাম তার বিপরীত
যতি বলে বিবেচনা করিবা পণ্ডিত ।

৩. রামানন্দ করে খেদ... নাহি দেখি বিজ্ঞ লোক

মূর্খের হাতেতে যাবে প্রাণ ।

৪. ছন্দজ্ঞান থাকে যার । থাকে মিত্র অক্ষরের জ্ঞান' কেবল

'সেই করো বিবেচনা' আর 'মূর্খ হৈতে হৈয় সাবধান' ।

৫. এবার যতি-উক্তি মুকুন্দরামের ক্রটির নমুনা দিচ্ছি :

১. মুকুন্দের বিরচন ইন্দ্রপুরে কাঁটাবন
সর্পভূষা শোভে আঁকে পুন্দের কটকে তাকে
দংশিয়া তাকে করিল ব্যাকুল ।

২. কলিস্নেহে গুঞ্জরাট তাহে বাঙ্গালীর হাট
বসিল ছাঙ্গান্ন গাঞি রাঢ়ী ।
না জানে কলিঙ্গ রায় বন কাটাইয়া তায়
কলিকেতু করিলেক বাড়ী ।

৩. কালীদহ পুরে কালী মাকে দেয় এত গালি
হিন্দু নহে মুকুন্দ গাবর ।

৪. চণ্ডী যদি দেন দেখা তবে কি তা যায় লেখা
পাঁচালীর অমনি রচন ।

বুদ্ধি নাই যার ঘটে তারা বলে সত্য বটে
পথে চণ্ডী দিলা দরশন ।

এমনি অনেক অজ্ঞতা, মূর্খতা ও অসঙ্গতির সাক্ষ্য রয়েছে মুকুন্দরামের কাব্যে

তাই— এত দোষ উদ্ধারিতে লোকের চৈতন্য দিতে

চণ্ডী রচে রামানন্দ যতি ।

এবং— লোকহিত হেতু করে ভাষাগীত ।^১

^১ রামানন্দ বিরচিত 'চণ্ডীমঙ্গল'- অনিলবরণ গঙ্গোপাধ্যায় সম্পাদিত, কলিকাতা বিশ্ববিদ্যালয় প্রকাশিত ১৯৬৯ খ্রীস্টাব্দে ।

৭. কৃষ্ণরাম দাস^১

বহু পাঁচালীপ্রণেতা কৃষ্ণরাম দাস মুখ্যত রায়মঙ্গলের কবি হিসেবেই প্রখ্যাত। তাঁর অন্যান্য কাব্য হচ্ছে কালিকামঙ্গল, ষষ্ঠীমঙ্গল, শীতলামঙ্গল ও কমলামঙ্গল। নামেই প্রকাশ এক এক পাঁচালীতে তিনি এক একজন লৌকিক দেবতার মাহাত্ম্য জ্ঞাপক উপাখ্যান বর্ণনা করেছেন। কৃষ্ণরামের 'চণ্ডীমঙ্গল'-এর পুরো পুথি আজো সংগৃহীত হয়নি, কেবল কমলেকামিনী ও অষ্টমঙ্গলার সামান্য অংশ পাওয়া গেছে। একটি ভণিতা এরূপে :

নাম ভগবতীদাস নিমিতা গ্রামেতে বাস
কায়েস্থ কুলেত উৎপত্তি
হইয়া ত একচিত রচিলা চণ্ডীর গীত
কৃষ্ণরাম তাহার সত্ততি।

অন্যান্য কাব্যরচনার ইঙ্গিতও রয়েছে প্রাপ্ত পুথিতে :

কালীর পাঁচালী আদি রচিনু সকল
অধিক যতনে এই চণ্ডীর মঙ্গল।

১৬৬৪ খ্রীষ্টাব্দে তাঁর কালিকামঙ্গল রচিত। অতএব চণ্ডীমঙ্গল সতেরো শতকের শেষপাদে রচিত বলে অনুমান করা অসঙ্গত নয়, প্রাপ্ত অংশেও কিছু আঙবাক্য মেলে :

না থাকিলে নয়ন মুকুরে করে কি?
গায়নের গুণ কি বুঝিতে পারে কালা?
খোজার না হয় সখ্য সুরত প্রসঙ্গে।
সুজনের দৃঢ় বাক যে পাষাণের আঁকা।

৮. মুক্তারাম সেন^২

মুক্তারাম সেনের চণ্ডীপাঁচালীর কবি প্রদত্ত নাম 'সারদামঙ্গল'। চট্টগ্রামের আনোয়ারা থানার দেবগ্রামে ছিল কবির নিবাস। তার গ্রন্থ রচনাকালে চট্টগ্রামের প্রশাসক ছিলেন দেওয়ান মহাসিংহ— 'মহাসিংহ নামে ক্ষেত্রী দেশ-অধিকারী'। এ সময়কার সেনানী ছিলেন 'তেন মত প্রতিসৈন্য লারানন্দরাম'। তাঁর গ্রাম : 'বন্দই জনভূমি দেবগ্রাম নাম।' কবির গোত্র— আদ্য গোত্র-আদ্য সেন ভেষজ বিশ্রাম।' কবির প্রণিতমাহ জয়দেব, পিতামহ নিধিরাম ছিলেন রাঢ়বাসী। রাঢ়বাসী পিতা মধুরামই 'তিন, পুত্র লৈয়া কৈল দেয়াঙ্গ (দেবগ্রাম) বসতি'। 'সেন গোবিন্দ ব্রজলাল মুক্তারাম'। [কবির ভ্রাতৃ বংশধরদের রক্ষিত বংশপত্রিকা সূত্র পূর্বপুরুষ যাদব রায় ও মাধব রায়ের কথা রয়েছে] পিতার সঙ্গেই পশ্চিমবঙ্গের রাঢ় থেকে আগত বলেই দ্বিজমাধব বা রামদেবের মতো চট্টগ্রামে সদ্য নিবসিত মুক্তারাম সেন চণ্ডীমঙ্গল রচনায় আগ্রহী হয়েছিলেন। পুরুষানুক্রমে পূর্ববঙ্গে বা চট্টগ্রামে বাস এমন কেউ 'চণ্ডীমঙ্গল'; তথা কালকেতু ধনপতি আখ্যান দুটো রচনা করেননি।

^১ কৃষ্ণরামদাসের গ্রন্থাবলী : সত্যনারায়ণ ভট্টাচার্য সম্পাদিত, ১৯৫৮ সনে কলি, বিশ্ব প্রকাশিত।

^২ সারদামঙ্গল : আবদুল করিম সাহিত্য বিশারদ সম্পাদিত, বঙ্গীয় সাহিত্য পরিষৎ প্রকাশিত, ১৩২৪ সন।

সারদামঙ্গলে রচনাকালও রয়েছে :

এহ ঋতু কাল শশী শুভ জানি

মুক্তারাম সেনে ভাগ ভাবিয়া ভবানী ।

-গ্রহ-৯, ঋতু-৬, কাল-৬ -শৈশব, বাল্য, কৈশোর, যৌবন, প্রৌঢ় ও বার্ধক্য শশী-১ ।

অতএব ১৬৬৯ শক বা ১৭৪৭ খ্রীস্টাব্দে সারদামঙ্গল রচিত । কবিত্ব সুলভ নয়, তবে কবি মিতবাক ।

৯. দ্বিজ হরিরাম

ইনি কবিকঙ্কণ মুকুন্দ প্রভাবিত একজন কবি । সতেরো শতকের শেষপাদে (১৬৮০ খ্রীস্টাব্দের পূর্বে) শোভাসিংহের (মৃত্যু ১৬৯৬ খ্রীঃ) প্রতিপোষণে দ্বিজ হরিরাম তাঁর চণ্ডীমঙ্গল রচনা করেন । প্রাপ্তপুথির লিপিকাল নাকি ১৬৮০ খ্রীস্টাব্দ । রচনা গতানুগতিক ও বৈশিষ্ট্যহীন । শোভাসিংহের মতো কবিও হয়তো মেদিনীপুরের ঘাটাল অঞ্চলের লোক ।

১০. জয়নারায়ণ সেন

যশোহর থেকে এসে ঢাকার বিক্রমপুরে বাসকারী এক সেনবংশের সন্তান জয়নারায়ণ সেন হরিলীলা রচনা করেন ১৭৭২ খ্রীস্টাব্দে (১৬৯৪ থেকে) । হরিলীলায় বিস্তৃত বংশপরিচিতি ও তাঁর সাহিত্যকৃতির বর্ণনা রয়েছে । তাঁর হরিলীলার সঙ্গে জানা যায় কবি একবার চণ্ডীর পাঁচালীও রচনা করেছিলেন । চণ্ডীমঙ্গল বৈশিষ্ট্যহীন । তবে এ চণ্ডীমঙ্গলে সংযোজিত বাধব-সুলোচনা উপাখ্যান উল্লেখযোগ্য । জয়নারায়ণের চণ্ডীমঙ্গল ১৭৭২ খ্রীস্টাব্দের পূর্বে ১৭৬০-এর দশকে রচিত বলে অনুমান করা চলে ।

১১. ভবানীশঙ্কর দাস

ভবানীশঙ্কর দাসের গীতিরচনার কাল এই-

“ধাতা বিন্দু সাগরেন্দু শকাদিত্য সনে

ভবানীশঙ্কর দাসে পাঞ্চালিকা ভণে ।

(ধাতা-১ বিন্দু-০ সাগর-৭ ইন্দু-১) = ১৭০১ শকে বা ১৭৭৯ খ্রীস্টাব্দ । তাঁর মঙ্গলচণ্ডীর পাঞ্চালিকা চণ্ডীমঙ্গলগীত বা জাগরণ নামেও নাকি পরিচিত । কবি বর্ণে কায়স্থ । চট্টগ্রামের বঙ্গোপসাগর ও কর্ণফুলীর মোহনাস্থ বটতলী গ্রামে পূর্বপুরুষ নরদাসের বংশধর । কৃষ্ণানন্দ ও হৃদয়ানন্দই বসতি স্থাপন করেন । কবির পিতামহ মধুসূদন বটতলী থেকে এসে বর্তমান পটিয়া থানার নিকটবর্তী ছনহরা গায়ে বাস করেন । কবির জন্ম এখানেই । তাঁর কাব্যটি কলেবরে বৃহৎ এবং কবি যে সংস্কৃত ব্যাকরণনিষ্ঠ ও পাণ্ডিত্যপ্রিয় ছিলেন, তার সাক্ষ্য কাব্যের সর্বত্র সুলভ ।

১২. কবীন্দ্র অকিঞ্চন চক্রবর্তী

কবীন্দ্র অকিঞ্চন চক্রবর্তী নামের এক কবির ও কাব্যের পরিচয় দিয়েছেন ডক্টর আশুতোষ ভট্টাচার্য তাঁর মঙ্গলকাব্যের ইতিহাসে (সং ৬, পৃঃ ৫৭৩-৮১) ।

ভণিতা এরূপ : চণ্ডিকার চরণ চিন্তিয়া অনুক্ষণ
রচিলা কবীন্দ্র চক্রবর্তী অকিঞ্চন।

‘চণ্ডিকাদেবীর আদেশে’ মেদিনীপুর জেলার ঘাটাল এলাকার বরদাগ্রামবাসী কবীন্দ্র অকিঞ্চন চক্রবর্তী বর্ধমানের মহারাজা জগৎ রায়ের পুত্র কীর্তিচন্দ্রের বংশধর রাজা তিলকচন্দ্রের পুত্র তেজচন্দ্রের সময়ে চণ্ডীমঙ্গল রচনা করেন। এই তেজচন্দ্র ১৭৭০-১৮৩২ খ্রীস্টাব্দ অবধি মহারাজা বা জমিদার ছিলেন। অতএব আঠারো-উনিশ শতকের সন্ধিকালে অথবা উনিশ শতকের প্রথম পাদে এ কাব্য রচিত। সে কারণেই অষ্টাদশ শতাব্দীর শেষার্ধ্বে অতিক্রান্তকালের অকাল প্রসূন এ কাব্যের আরোচনা নিরর্থক। কবির তিনপুত্র রামদুলাল, রামচন্দ্র ও শিবানন্দ। কবীন্দ্র অকিঞ্চনের ভাঁড়ু আরো দুর্দান্ত :

হাটঘাট হৈল ভাঁড়ুর আঙাকারী
কাপড়ার কাগড় কিনিয়া আনে ছলে
কড়ি নাগে দেয় তারে কলমের বলে।
ধূর্ত বুজ্জো ধান কিনে ধার নাহি শুধে
মাগিলে মালের টাকা মার্যা প্রাণ বধে।

১৩. দ্বিজ জনার্দন

দ্বিজ জনার্দন সম্ভবত আঠারো শতকের কবি। তাঁর চণ্ডীমঙ্গলে কালকেতুর ও ধনপতির উপাখ্যান দুটো সংক্ষিপ্ত ও বাহুল্য বর্জিত। এ জন্যে তাঁকে কোন কোন বিদ্বান প্রাচীনতর কবি বলে মনে করেন। কবির কোন পরিচয় পাওয়া যায়নি।

একাদশ অধ্যায়

মনসামঙ্গল

প্রথমখণ্ডে মনসামঙ্গলের তিনজন আদি কবির পরিচিতি প্রসঙ্গে আমরা চাঁদবেহুলা কাহিনীর অনন্যতর আলোচনা করেছি। মনসামঙ্গলের কাহিনী কর্তৃত্বকামী পরাক্রান্ত দেবতার বিরুদ্ধে আত্মপ্রত্যয়ী স্বাধীনচেতা মানুষের দ্রোহের ও সংগ্রামের ইতিকথা। দেব-মানবের সেই সংগ্রামে মানুষ পরাজিত হয়েছে বটে, কিন্তু বুদ্ধি পেয়েছে মানবিকতার মর্যাদা, মহিমান্বিত হয়েছে মনুষ্যত্ব। একেশ্বরবাদী আত্মপ্রত্যয়ী পরাক্রান্ত তুর্কীদের সঙ্গে পরিচয় মুহূর্তের প্রথম অীভঘাতে শাসক-শাসিতের মানসদ্বন্দ্বের ও মিলনের সন্ধিক্ষণে ক্ষণভ্রমর মতো দেশী লোকের মানসে আত্মশক্তি ও আত্মমর্যাদার যে-চেতনা জাগে, চাঁদ-বেহুলার বিদ্রোহে ও দৃঢ়সংকল্পে তা-ই বিস্ময়কর ঝঙ্কতায়, দৃঢ়তায় ও উজ্জ্বলতায় অভিযুক্ত। তারপরে যখন বিদেশী বিভাষী বিধর্মী শাসকের ও শাসিতের পরিচয় ও সম্পর্ক কালক্রমে প্রাত্যহিকতায় স্নান ও স্বাভাবিক হয়ে এল, তখনো বহুকবির পরিচর্যায় মনসার ও মনসামঙ্গলের জনপ্রিয়তা বাড়তে থাকে বটে, কিন্তু ওই দ্রোহ হারায় তাৎপর্য এবং ওই সংগ্রাম হারায় গুরুত্ব। ততদিনে মনসাত্ত্বি চাঁদ-বেহুলাকে তথা কবিদেরকেও দুর্বল আর অভিভূত করে ফেলেছে। যদিও বর্ণিত উপাখ্যান বাহ্যত অভিন্নই রইল। তবু পুচ্ছগ্রাহিতায় ও গতানুগতিকতায় অবসিত হওয়ার আগে কবি নারায়ণদেবের ও দ্বিজ বংশীদাসের পাঁচালী দুটো কিছু বিশিষ্টতার দাবি রাখে।

১. নারায়ণদেব

নারায়ণদেবের জন্ম হয় রাঢ়ে অথবা বর্তমান কিশোরগঞ্জ মহকুমার তাড়াইল থানার অন্তর্গত বোরগ্রামে। তবে অধিকাংশ বিদ্বানের মতে কবির জন্ম হয় কিশোরগঞ্জ মহকুমার বোরগ্রামে। পূর্বপুরুষ উদ্ধারণ রাঢ় থেকে এসে এখানে বসতি স্থাপন করেন। ভৌগোলিক কারণেই তাঁর কাব্য আসামে চালু ও জনপ্রিয় হয়েছিল, আসামীরা তাঁকে আসামী কবি রূপেই জানে ও মানে। যে-অর্থে মৈথিল কবি বিদ্যাপতি বাঙালীর কবি, সে-তাৎপর্যেই নারায়ণদেব আসামী ভাষার কবি। বাঙলা-আসামে পরিব্যাপ্ত কাব্যের কবি সম্ভবত ষোল শতকের উষাকালেই তাঁর কাব্য রচনা করেছিলেন, যখন আসামী তথা অহমিয়াবুলি বাঙলাভাষা থেকে বিচ্ছিন্ন পয়ে পৃথক সন্তায় আত্মপ্রকাশে ও আত্মপ্রতিষ্ঠায় উদ্যোগী। নারায়ণদেব রচনাকাল উল্লেখ না করলেও সুস্পষ্ট ভাষায় আত্মপরিচয় দিয়েছেন তাঁর গ্রন্থে :

নারায়ণদেব কয় জন্ম মগধ (মূর্খ অর্থে)

মিশ্রপণ্ডিত নহে ভট্ট বিশারদ।

অতিশুদ্ধ জন্ম মোর কায়স্থের ঘর

মৌদগোলাদুমিয়ারদুর্গেই এক কবি।

পিতামহ উদ্ধব নরসিংহ পিতা

মাতামহ প্রভাকর রুগ্মিনী মোর মাতা।

পূর্বপুরুষ মোর অতি শুদ্ধ মতি

বরাহদেবের বংশেই এক কবি।

www.banglabazar.com

বিভিন্ন পুথির সাহায্যে ডক্টর সুকুমার সেন কর্তৃক পুনর্গঠিত পাঠ :

নারায়ণ দেবে কহে জন্ম মগধ	মাতামহ প্রভাবকর রুক্ষিনী মোর মাতা ।
মিশ্রপণ্ডিত নহি ভট্ট বিশারদ ।	বৃদ্ধপিতামহ মোর দেব উদ্ধারণ
শূদ্রকুলে জন্ম মোর সৎকায়স্থ ঘর	রাঢ়দেশ ছাড়িয়া যে আসিলা আপন ।
মৌদগল্য গোত্র গাঞি শুণাকর ।	পূর্বপুরুষ মোর অতি শুদ্ধমতি
নরহরি তনয় হয় নরসিংহ পিতা	রাঢ় ছড়িয়া বোরথামেতে বসতি ।

[১ম খণ্ড পূর্বার্ধ পৃঃ ২২৩ সং ৩ ।]

ডক্টর আশুতোষ ভট্টাচার্য বোরথামে নারায়ণদেবের আঠারোতম প্রজন্মের বংশধরের সন্ধান পেয়েছেন। বংশলতিকা^১ যদি নির্ভরযোগ্য হয়, তা হলে নারায়ণদেবের জন্ম পনেরো শতকের শেষপাদে এবং গ্রন্থরচনা ষোল শতকের প্রথম দশকের বলে অনুমান করা চলে। এ অনুমানের পরোক্ষ সমর্থন রয়েছে কবির গোপ-কৃষ্ণভক্তিতে। ভাগবত ষোলশতকেই বাঙলায় জনপ্রিয় হয়। কাব্যরচনায় স্বপ্নাদেশ প্রসঙ্গে কবি বলেন :

বার বৎসরকালে দেখিলাম স্বপন	আলিঙ্গন দেন মোকে বড় সুখে হাসি ।
মহাপরিশ্রম [?] মনে হইল দরশন ।।	তৎপরে পদ্মা মোরে দেখাইল স্বপন
শিশুকালে গোপরূপে হাতে লৈয়া বাঁশী	কবিত্বের আশা মোর সেই ত কারণ ।

নারায়ণ দেবের কাব্যের নাম 'পদ্মপুরাণ'। এটি তিনভাগে বিভক্ত এবং কাহিনীর তেমন কোন বন্ধনসূত্র নেই। প্রথম ভাগে রয়েছে কবির আত্মকথা ও দেবতাস্তুতি এবং দ্বিতীয়ভাগ পৌরাণিক আখ্যানসমষ্টি, এটিই এ পাঁচালীর প্রধান অংশ। আর তৃতীয় ভাগে বর্ণিত হয়েছে চাঁদ-বেহুলার উপাখ্যান। এ কাব্যের একটি বৈশিষ্ট্য হচ্ছে কবি মনসা-কাহিনীকে পুরাণের মর্যাদায় ও গুরুত্বে উন্নীত ও প্রতিষ্ঠিত করতে চেয়েছেন, কিন্তু গ্রন্থির অভাবে প্রয়াস ব্যর্থ হয়েছে। অপর বৈশিষ্ট্য হচ্ছে প্রত্যাভবনের স্বল্প কাল পরে পুনর্জীবিত স্বামীসহ বেহুলার মর্ত্যজীবনের অবসান বা স্বর্গারোহণ এবং মর্যাদাজ্ঞানসম্পন্ন বিদ্রোহী চাঁদ এক বালিকার কৃচ্ছসাধনার ও সিদ্ধির কাছে আত্মসমর্পণ করেছে— মনসার কাছে নয়, তাই অনিচ্ছায় বেহুলার খাতিরে মনসাকে বাম হাতে প্রণাম করেছে অন্যদিকে মুখ ফিরিয়ে 'পিছ দিয়া বাম হাতে তোমাকে পূজিব।' উন্নতশির বিদ্রোহী চাঁদকে এ মর্যাদা গৌরব আর কোন কবি দেন নি।

অন্য অনেকের জনপ্রিয় পাঁচালীর মতো নারায়ণ দেবের পদ্মপুরাণেও নানা কবির কাব্যাংশ ও ভগিতা সংযোজিত হয়েছে। গায়েন-কথক-লিপিকরই কথক-তাকে রসাল করার প্রয়োজনে নানা কবির উৎকৃষ্টাংশ সংকলন করে ষটকবির কিংবা বাইশকবির মসসামঞ্জলও তৈরি করেছিল পরবর্তীকালে। কাজেই বিভিন্ন কবির একই বিষয়ক পাঁচালীর বিভিন্নাংশের মিশ্রণ গায়েন-কথকদের প্রয়োজনে রেওয়াজে পরিণত হয়েছিল। গায়েন-কথকরাও রচন-বর্জন-সংযোজনের অধিকার রাখত। তাই নারায়ণ দেবের পুথিতে বংশীদাস, জগন্নাথ, যদুনাথ, ষষ্ঠীবর, বিদ্যাধর, রামদাস, মনোহর, শিবনন্দ প্রভৃতি অনেকের ভগিতা মেলে।

নারায়ণ দেবের পদ্মপুরাণ পূর্ববঙ্গে ও আসামে প্রায় সমভাবে চলছে। করুণরসের আধিক্য এবং ব্যঙ্গরসের ভি়ান ও কাব্যকে সুখপাঠ্য করেছে। আর জনপ্রিয়তাই যদি শ্রেষ্ঠত্বের পরিমাপক হয়, তা হলে নারায়ণ দেবকে একজন শ্রেষ্ঠ কবির সম্মান দিতেই হবে।

^১ বাংলা মঙ্গলকাব্যের ইতিহাস, পৃঃ ৩২২, সং-৬

২. গঙ্গাদাস সেন

কবি ষষ্ঠীবর সেনের পুত্র গঙ্গাদাস সেন একখানি অশ্বমেধপর্বও রচনা করেছিলেন। তাতে রচনাকাল রয়েছে—

শর মুনি বেদ শশী শক গণিত কুলপতি সেনসুত কবি ষষ্ঠীবর
যেইমতে অশ্বমেধ রচিত কবিত্ব। সর্বলোকে জানে তান দিনিন্দীপে ঘর।

১৪৭৫ শকে বা ১৫৫৩ খ্রীস্টাব্দে যদি অশ্বমেধপর্ব রচিত হয়, এবং তার কিছু পূর্বে বা পরে মনসার ভাসান রচনা করেছিলেন বলে যদি অনুমান করি, তা হলে ষোল শতকের মধ্যকালে মনসামঙ্গল রচিত হয় বলে নিঃসংশয়ে বিশ্বাস করা চলে। অতএব গঙ্গাদাস সেন ষোল শতকের মধ্যকালের কবি। ঢাকা জেলার আধুনিক জিনারদিই কবির জন্মস্থান দিনিন্দীপ। কবির মনসা পাঁচালীর সম্পূর্ণ পুথি আজো পাওয়া যায় নি।

৩. দ্বিজ বংশীদাস

ময়মনসিংহের কিশোরগঞ্জ মহকুমার পাড়ারী গাঁয়ে দ্বিজ বংশীদাসের জন্ম। রায়ায়ণগাথা রচয়িত্রী প্রখ্যাত কবি ও চন্দ্রাবতী গীতিকার নায়িকা চন্দ্রাবতী এই দ্বিজ বংশীদাসেরই কন্যা। বংশীদাসের মুদ্রিত কাব্য—

জলধির বামেতে ভুবন স্রোতে দ্বার
শকে রচে দ্বিজ বংশী পুরাণ পদ্মার।

—এই রচনাকাল দেয়া রয়েছে—এ থেকে ১৪৯৭ শক বা ১৫৭৫ খ্রীস্টাব্দ মেলে। কিন্তু বংশীদাসের অন্য উক্তিতে এর সমর্থন নেই। বংশীদাস বলছেন তাঁর পূর্ব-পুরুষ :

রাড় হৈতে আসিলেন লৌহিত্যের পাশ
হাজরাডি পাড়ারী গ্রামেতে নিবাস।

কোচরাজ লক্ষ্মণ হাজরাকে ১৫৯৫ খ্রীস্টাব্দের পূর্বে কোন সময়ে পরাজিত করে তাঁর রাজ্যাংশ নিয়ে ঈসা খান এ হাজরাডি পরগনা গঠন করেন। অন্যত্র কবি মঘ ফিরিস্তির উল্লেখও করেছেন।

মঘ ফিরিস্তি যত। বন্দুক পলিতা হাত। একবারে দশগুলি ছুটে
শিলই হাউই দবা। স্থানে স্থানে করে শোভা। গণগোল কাল ক্রিয়া ঠাটে।

কাজেই হাজরাডি পরগনার পাড়ারীনিবাসী দ্বিজ বংশীদাস সতেরো শতকের পথমার্ধের কবি। দ্বিজ বংশীদাস তাঁর গোত্রপরিচয় দিয়েছেন :

বন্দ্যঘটি গাঁই গোত্র রাঢ়ীর প্রধান দাস উদ্ধব ধারা সামবেদ পর।
শাঙিল্য গোত্র বলি যাহার বাখান। বংশবীজ পূর্বে গৌসাই চক্রপাণি
গৌতম মুনির শাখা তৃতীয় প্রবর ভূত ভবিষ্যৎ আদি ত্রিকাল যে জ্ঞানী।

কন্যা চন্দ্রাবতী ও বংশপরিচয় দিয়ে নিবাসনির্দেশ করে দারিদ্র্যের দুঃখ বর্ণনা করেছে :

ধারা স্রোতে ফুলেশ্বরী নদী বহে যায়	কোপ করি সেই হেতু লক্ষী ছাড়ি যায়।
বসতি যাদবানন্দ করেন তথায়।	দ্বিজ বংশী পুত্র হৈলা মনসার বরে
ভট্টাচার্য বংশে জন্ম অল্পনা ঘরনী	ভাসান গাহিয়া যিনি বিখ্যাত সংসারে।
বাঁশের পালার ঘর ছনের ছাউনি।	ঘরে নাই ধান চাল চালে নাই ছানি।
ঘট বসাইয়া সদা পূজে মনসায়।	আকর ভেদিয়া পড়ে উচ্ছিন্নার পানি।

কবি বংশীদাস ভট্টাচার্যের পিতা যাদবানন্দ ভট্টাচার্য মনসার ভাসান গেয়ে জীবিকা অর্জন করতেন। কবিও সে-পেশায় নিয়োজিত ছিলেন, কেনারাম দস্যু গাথাসূত্রে আমরা সে-খবর জানি এবং ওই গাথাই বংশীদাসের কাব্যের এবং গায়ন হিসেবে কবির শ্রেষ্ঠত্বের প্রমাণ। বংশীদাসের চাঁদসদাগর চণ্ডী-পূজক। মনসার পূজায় তার আপত্তি ছিল না। চণ্ডী অসু্যাবশে শিবকন্যা মনসার পূজা করতে নিষেধ করেন ভক্ত চাঁদকে স্বপ্নে দেখা দিয়ে। তাই চাঁদ মনসাবিদেষ্টা। এ কাব্যে সংকল্পে দৃঢ় নির্ভীক চাঁদ দৃষ্ট পৌরুষের প্রমূর্ত্ত প্রতীক। ছয়পুত্র সর্পদংশনে মরল, চাঁদ অবিচল এবং দৃষ্টকণ্ঠে বলে ‘কানীর উচ্ছিন্নপুত্র শীঘ্র কর পার’। শুধু তাই নয়, চৌদ্দ ডিম্বার মৃত মাঝি-মাল্লার আত্মীয়-পরিজনকে কাঁদতে দেয়নি চাঁদ এই বলে যে ‘কাতর হইলুঁ জানি হাসিবেক লঘু কানী/ সেই মোর বড় দুঃখ লাজ।’ বংশীদাসের কাব্যে পৌরাণিক আখ্যানের নিষ্ঠ ও সুদীর্ঘ অনুসৃতি রয়েছে।

৪. সম্প্রতি রায়বিনোদ নামের বা উপাধিদ্বারা এক কবির মনসার ভাসান অভিসন্দর্ভরূপে সম্পাদনা করে প্রকাশিত করেছেন ডক্টর মুহম্মদ শাহজাহান মিয়া। এ কবি টাঙ্গাইল অঞ্চলের এবং একে সতেরো শতকের কবি বলে অনুমান করা হয়েছে। ইনি তাঁর বিপুল কলেবর কাব্যে গল্পের কোথাও কোথাও বয়ানের প্রসঙ্গ ঘটিয়েছেন। তবে কবিত্ব এ কাব্যে সুলভ নয়।

৫. কালিদাস

মনসাপূজা ও মনসামঙ্গল মুখ্যত পূর্ববঙ্গের দান ও সম্পদ। তবু পশ্চিমবঙ্গেও কেউ কেউ সতেরো শতক থেকে মনসামঙ্গল বা পদ্মাপুরাণ রচনা করতে থাকেন। সতেরো শতকের অন্তি মল্লের কবি কালিদাস যদিও বলেছেন : ‘কহে কবি কালিদাস/গৌড়দেশে যার বাস/ বিরচিল মনসামঙ্গল।’ তবু তার কাব্যের স্থানসম্পর্কিত সাক্ষ্য মনে হয় তিনি বর্ধমান-বীরভূম অঞ্চলের লোক। কালিদাসের কাব্য রচিত হয় ১৬১৯ শকে বা ১৬৯৭-৯৮ খ্রীস্টাব্দে।

অঙ্ক [ক্ষ] মুগাঙ্ক শকে (অঙ্ক-৯ মুগাঙ্ক-১ রস-৬) বা ‘গ্রহ বিক্র ঋতু শশী শকের গণন’ (গ্রহ-৯ বিধু-১ ঋতু-৬, শশী-১ = ১৬১৯ শক) এই শকে এই কাব্য করিলুঁ রচনা।’

কার্তিক নামের এক ব্রাহ্মণের আগ্রহে এ পাঁচালী রচিত এবং বহু ভণিতায় গোলকনাথের চরণবন্দনা রয়েছে :

গোলোকনাথের পদপঙ্কজ স্মরণে,

মনসামঙ্গল কবি কালিদাস ভণে।

এ কাব্যে উল্লেখযোগ্য কোন বিশিষ্টতা নেই।

৬. কেতকাদাস ক্ষেমানন্দ

রাড়ের বর্ধমানের কবি কেতকাদাস ক্ষেমানন্দের মনসাবিষয়ক প্রথম মুদ্রিত (১৮৪৪ খ্রীস্টাব্দে) গ্রন্থ হওয়ার ফলে কবি প্রখ্যাত হন এবং কাব্যটি জনপ্রিয় হয়। তা ছাড়া ক্ষেমানন্দই সম্ভবত পশ্চিমবঙ্গে রচিত মনসামঙ্গলের প্রথম কবি। এ কারণেই তাঁর পাঁচালী কোলকাতায় প্রথম মুদ্রিত হবার সৌভাগ্য লাভ করে।

ক্ষেমানন্দ কাব্যক্ষেত্রে কবিকঙ্কণ মুকুন্দরামের অনুকারক অনুসারক ছিলেন। তাঁর আত্মপরিচিতি অংশটি মুকুন্দরামের আত্মকথার আদলে রচিত। ক্ষেমানন্দ বর্ণে বা জাতে কায়স্থ ছিলেন তা দেবীর কাছে তাঁর প্রার্থনা থেকে জানা যায় : 'কেতকার বাণী। রক্ষ ঠাকুরাণী। কায়স্থ যতেক আছে।' প্রথমে মুচিনীর বেশে কেতকা [কেয়া পাতে জন্ম হৈল (তাই) কেতকাসুন্দরী] তথা মনসা কবিকে দর্শন দান করেন এবং পরে ভূজঙ্গভূষিতা, ব্রাহ্মণীরূপে দেখা দিয়ে আদেশ করলেন 'ওরে পুত্র ক্ষেমানন্দ কবিতা কর প্রবন্ধ, আমার মঙ্গল গায়্যা বুল।' কেতকাভক্ত কবি কেতকাদাসরূপে পরিচিত হতে চেয়েছেন। তাই ভণিতায় তিনি কেতকাদাস বা কেতকাদাস ক্ষেমানন্দ। কবিপ্রদত্ত আত্মবিবরণী থেকে কবির আবির্ভাব কাল অনুমান করা সহজ :

গুন ভাই আদ্য কথা দেবী হৈলা বরদাতা
সহায়পূর্বক বিষহরি।
বলভদ্র মহাশয় চন্দ্রহাসের তনয়
তাহার তালুকে ঘর করি।
তাহার রাজ্যতি শেষ চলি গেল স্বর্গদেশ
তিন পুত্রে দিয়ে অধিকার
শ্রীযুক্ত আক্ষর্য রায় পুণ্যের অবাধি তায়
রণে বনে বিজয় সংসার (তাহার)
তিনপুত্র অল্প বয়ঃ প্রসাদ গুরু মহাশয়
তালুকের করে লিখাপড়া
তাহার কলমবশে প্রজার নাহি চাষ চষে
শমননগর হৈল কাঁধড়া।
রণে পড়ে বারা খাঁ বিপাকে ছাড়িল গাঁ
তথ্যেত নীলাম্বর (তথা তেলী লঘোদর)
উত্তরিতে দিল ঘর
হাঁড়ি চাল সিদা গুয়া পান।

যুক্তি করি জননীজনক
দিনকৃতক ছাড়ি যাই তবে সে নিস্তার পাই
সেখানে হইল বড় ঠক।
শ্রীযুক্ত আক্ষর্য রায় অনুমতি দিল তায়
যুক্তি দিল পালাবার তরে
গুনহ মণ্ডল তুমি উপদেশ বলি আমি
গ্রাম ছাড় রাত্রির ভিতরে।
প্রসাদ তাহার পাত্র ইঙ্গিত পাইবা মাত্র
পলাইবে শঙ্কর মণ্ডল
প্রসাদ হরিষ হয়্যা যুক্তি দিল আশ্বাসিয়া
ধান্য কিছু না দিলা সম্বল।
নিজগ্রাম ছাড়ি যাই জগন্নাথ পুর পাই
প্রাতঃকাল নিশি অবসান
নাম তার রায় ভরামল (ভারামল)
তিহৌ দিলেন ফুল (গুয়া) পান আর
গ্রাম তিন খান

রাজা বিষ্ণুদাসের ভাই তাহারে ভেটিতে যাই লিখাপড়া বসতির স্থল।

বারা খান দক্ষিণ রাড়ের সেলিমাবাদের প্রশাসক ছিলেন। ১৬৪০ খ্রীস্টাব্দে বারা খান কবি মুকুন্দরামের পুত্র শিবরামকে বিশ বিঘা জমি দান করে যে দানপত্র দিয়েছিলেন তা পাওয়া গেছে। এর পরে কোন সময়ে বারা খান নিহত হন। এবং বিষ্ণুদাস আর ভারামলও সতেরো শতকের মধ্যভাগের ঐতিহাসিক ব্যক্তিত্ব। কেতকাদাস ক্ষেমানন্দ বৈষ্ণব প্রভাবিত কবি।

অতএব ক্ষেমানন্দ সতেরো শতকের শেষার্ধের বা শেষ পাদের কবি। কেতকাদাস ক্ষেমানন্দের মনসামঙ্গলের বিভিন্ন পালা বহনযোগ্য স্বতন্ত্র পুথিরূপে চালু ছিল। আগেই বলেছি ক্ষেমানন্দের মনসামঙ্গল চাঁদ-বেহুলার প্রথম মুদ্রিত উপাখ্যান বলেই কেতকাদাস-ক্ষেমানন্দ উনিশ শতকে সর্ববঙ্গীয় খ্যাতি ও জনপ্রিয়তা লাভ করেছিলেন। তাঁর কাব্যে কাহিনীবিন্যাসে কিংবা চরিত্রচিত্রণে অথবা কাব্যরসে তেমন কোন নতুনত্ব বা উৎকর্ষ দেখা যায় না। বরং তিনি যে অনুকারক কবি তার নমুনা গ্রন্থের অনেক স্থলেই সুলভ। যথা, মুকুন্দরাম যেমন বাঙ্গাল মাঝিমাল্লার বিলাপের ব্যঙ্গাত্মক বর্ণনা দিয়েছেন (কান্দেরে বাঙ্গাল ভাই বাফোই বাফোই) প্রায় অবিকল তেমনি বর্ণনা মেলে কেতকাদাস-ক্ষেমানন্দের কাব্যেও

বাঙাল কান্দে হুঁদুর বাফে বাফে ধূলায় লোটায়্যা কান্দে আর বাঙাল বলে
মাথায় হাত দিয়া কান্দে যতেক বাঙাল সাত গাট্যা টেনা মোর ভাস্যা গেল জলে।
সকল ডুবিল জলে হৈনু কাঙাল... আর বাঙাল বলে ভাই ঐ তাপে মরি.

আর বাঙাল বলে গেল ছেঁড়া কাঁথাখানি বিদেশে হারানু প্রাণ চাঁদ বান্যার পাকে।

কেতকাদাস ক্ষেমানন্দের চাঁদ যদিও বলে

যে হাতে পূজিনু মুই সোনার পঙ্কেশ্বরী
কেমনে পূজিব তাহে জয় বিষহরি।

কিংবা লখাইর মৃত্যুতে চাঁদ যদিও নাচে এবং বলে

নাচে হেঁতালের বাড়ি লৈয়া...
নির্ভয় হৈনু মনে চেকমুড়ী কানী সনে

এতদিনে বিবাদ ঘুটিল।

তবু ক্ষেমানন্দের চাঁদ নিতান্ত সাধারণ দুর্বলচিত্ত লোভী মানুষ—

‘গলায় কাপড় দিয়া সদাগর দাড়াইয়া
মনসারে বলে স্ততিবাণী....

হারা-মরা পাইনু তোমার আশীর্বাদ
পূজিব তোমার পদ বড় মোর সাধ।

বিদ্রোহী চাঁদের কৃতজ্ঞ চাঁদে পরিণতি আমাদের হতাশ করে।

৭. ক্ষেমানন্দ

অপর এক ক্ষেমানন্দের একটি সংক্ষিপ্ত বেহুলার পাঁচালী পাওয়া গেছে। এটি সম্ভবত আঠারো শতকের শেষপাদে বাঙলা-বিহারের সীমান্ত এলাকার কোন কবিশ্রমপ্রার্থী ক্ষেমানন্দের রচনা। তাই প্রাপ্ত পুথির হরফ দেবনাগরী এবং প্রাপ্তিস্থান মানভূম জেলার লাড়াপাবড়াগ্রাম। সংগ্রাহক বসন্তরঞ্জন রায় বিদ্বদ্ভ্রমভের সম্পাদনায় এ কাব্য প্রকাশিত হয়েছিল ১৯২৩ খ্রীস্টাব্দে (১৩১৬ সালে)।

৮. বিষ্ণুপাল

বর্ধমান-বীরভূম অঞ্চলের অপর এক কবি বিষ্ণুপালের মনসামঙ্গল সম্ভবত আঠারো শতকের শেষে রচিত। বাঙলা-বিহার সীমান্ত এলাকার চাপ যেমন লক্ষণীয়, তেমনই স্থানিক প্রভাবে ধর্মঠাকুরপুত্রেরও চিহ্ন দৃশ্যমান নয়। কাব্যের ভাষা গ্রাম্যতাদৃষ্ট। জনশ্রুতি অনুসারে কবির নিবাস ছিল রানীগঞ্জের নিকটবর্তী সেরগড় পরগনায়। কবি বর্ণে বা জাতে ছিলেন কুমার।

৯. জি রসিকমিশ্র

আঠারো-উনিশ শতকের এ কবির নিবাস ছিল সেনভূম ও মল্লভূমের মধ্যবর্তী আখড়াশাল। কবির উপাধি ছিল কবিকঙ্কণ ও কবিবল্লভ। কবির পিতার নাম শিবপ্রসাদ। পশ্চিমবঙ্গের অন্য অনেক কবির মতো ইনিও ধর্মঠাকুরপুত্র প্রভাবিত কবি। এর মনসাপাঁচালীর নাম জগতীমঙ্গল।

১০. বিজ্ঞ কবিচন্দ্র

ইনিও মনসার আদেশে এক জগতীমঙ্গল রচনা করেন। এক শাহাজাদা রাঢ়ের সেনভূম এলাকায় পানাগড় দুর্গাপুর অঞ্চলে রাঢ়েশ্বর শিবমূর্তির প্রতিষ্ঠাতা বলে লোকশ্রুতি আছে, সম্ভবত কবি সেই শাহজাদাকে তাঁর পূর্বপুরুষ বলে দাবি করছেন :

সাজাদা রাএর বংশে কবিচন্দ্র গায়

মোর সূত রঘুবীরে হইবে সদয়।

কবির বাস ছিল শ্যামদাসপুরে- ‘শ্যামদাসপুরে আছে যাহার বসতি’।

সাজাদার অপর এক বংশধর চিত্তিতপুর নিবাসী ক্ষেমানন্দও মনসামঙ্গলের কবি বা গায়ন ছিলেন।

১১. সীতারাম দাস

ধর্মমঙ্গল পাঁচালী রচয়িতা সীতারাম দাসও একখানি ‘মনসামঙ্গল’ রচনা করেছিলেন। রচনাকাল শশী বিন্দু চন্দ্র বেদ- তথা ১০১৪ মল্লাদ বা ১৭০৯ খ্রীস্টাব্দ। সীতারাম দাসের কাব্যে কেতকাদাস-ক্ষেমানন্দের কাব্যের অনুকৃতি রয়েছে। এ কাব্যের ধর্মঠাকুর অধিদেবতা হিসেবে স্বীকৃত ‘ধর্ম পূজে বিষহরি’।

১২. বিজ্ঞ বানেশ্বর রায়

এঁর কাব্যে রচনাকাল এরূপ :

‘মনসামঙ্গলভাবে প্রথম বৈশাখ মাসে/ শকাব্দা ষোলশ’ একচল্লিশে। অতএব ১৭১৯ খ্রীস্টাব্দে এ গ্রন্থ রচিত। কবির বংশলতা বর্ণিত রয়েছে। কবির পিতার নাম হরিনারায়ণ। কবির কনিষ্ঠ ভাইয়ের নাম সদাশিব এবং নিবাস ‘চম্পকপুরী অকুরাইপুরে’ এবং (জন্ম রায়পুরে)। বিধবা হয়ে অন্যের নিন্দারপাত্রী ও পরিবারের গলগ্রহ হওয়ার চেয়ে স্বপ্তরের গালি-খাওয়া বেহুলা ‘লইয়া প্রাণের নাথ জলে ঝাঁপ’ দেয়াই শ্রেয় মনে করল। কাজেই বেহুলার কোন সংকল্প বা মহৎ প্রেরণা নেই।

১৩. তন্ত্রবিভূতি

পশ্চিমবঙ্গে সতেরো শতক থেকেই চৈতন্যপ্রভাব স্নান ও শিখিল হওয়ার পরে পূর্ববঙ্গীয় আদলে মনসামঙ্গল রচিত হতে থাকে। উত্তরবঙ্গেও এ সময় থেকেই মনসামঙ্গল রচিত হতে দেখি। উত্তরবঙ্গের মালদহের কালিয়াচকাদি অঞ্চলে তন্ত্রবিভূতি নামের কবির মসনাপুরাণ আবিস্কৃত হয়েছে। কবি সম্ভবত তাঁতী বলেই কিংবা তান্ত্রিক মতাবলম্বী বলেই নামের সঙ্গে 'তন্ত্র' যোগ করেছেন। দ্বিজ ও দ্বিজসুত বলেও কবি আত্মপরিচয় দিয়েছেন। নাথ যোগীদের তথা তাঁতীর ব্রাহ্মণ অর্থেই 'এ দ্বিজ' ব্যবহৃত কি-না বলা যাবে না। তন্ত্রবিভূতি ধর্মঠাকুরেরও বন্দনা করেছেন:

প্রথমে বন্দিয়া গাইব ধর্ম নৈরাকার
যাহার সৃজন হৈল জগৎ সংসার।

এঁর কাব্যে শিবও ধর্মঠাকুরের পূজারী।

ধর্মঠাকুরকে এমনভাবে স্মরণ করেছেন বিপ্রদাস পিপলাই, বিষ্ণুপাল, দ্বিজ রসিক, ক্ষেমানন্দ, জগৎজীবন ঘোষাল, সীতারাম দাস প্রমুখ কবিগণও। কাব্যও স্বপ্নাদেশের ফল:

পদ্মার আদেশে গীত পাইল স্বপনে
তন্ত্রবিভূতি গায় মনসার চরণে।

তন্ত্রবিভূতির কাব্য করুণরস প্রধান। দুঃখ-যন্ত্রণা বর্ণনায় কবির আগ্রহ অধিক। তাঁর কাব্যে বেহুলাচরিত্র স্নান। অতি সাধারণ নারীর মতো তার অভিযোগ:

শ্বতরের কারণে নৃপতি প্রাণ হারাইল
এমত তনি নাই বড় অসম্ভব
মনুষ্য হইয়া করে দেব সঙ্গে বাদ।

কাহিনী নির্মাণের ও বিন্যাসের দিক দিয়ে তন্ত্রবিভূতির কাব্য বিশিষ্টতার দাবিদার। বস্ত্রত উত্তরবঙ্গে পরবর্তী দুই কবি জগৎজীবন ঘোষাল ও জীবকৃষ্ণ মৈত্র তন্ত্রবিভূতির কাব্যের স্বাধীন অনুকারকমাত্র।

১৪. জগৎজীবন ঘোষাল

সতেরো শতকের শেষপাদে [প্রাপ্ত প্রতিলিপির লিপিকাল ১১০২ সাল] কিংবা শেষার্ধে রচিত হয় জগৎজীবন ঘোষালের মনসামঙ্গল। জগৎজীবন তাঁর আত্মপরিচয় দিয়েছেন। কবির পিতামহ রূপ রায় চৌধুরী, পিতা জয়ানন্দ, মাতা রেবতী, জ্যেষ্ঠভ্রাতা ঘনশ্যাম, পত্নী পদ্মমুখী এবং নিবাস (বর্তমান পূর্ণিয়া জেলার) কুচিয়ামোড়া গ্রাম, জমিদার প্রাণনাথ ও গোত্র ঘোষাল, 'ব্রাহ্মণ রাঢ়ী কুচিয়া-মোড়াতে বাড়ী। [কোচ আমোরাতে] প্রাণনাথ নরপতি দেশে।' জগৎজীবনও স্বপ্নাদিষ্ট হয়ে কাব্য রচনা করেন। জগৎজীবনের গ্রন্থেও ধর্মরাজই হচ্ছেন জগৎস্রষ্টা। শূন্য পুরাণানুগ সৃষ্টিতত্ত্বও বর্ণিত রয়েছে।

১৫. জীবকৃষ্ণ মৈত্র

নাটোরের রানী ভবানীর আমলে 'মহীপৃষ্ঠে শশী দিয়া বাণ বিধু সমর্পিয়া'- সনে তথা ১১৫১ বঙ্গাব্দে বা ১৭৪৪ খ্রিস্টাব্দে এঁর গ্রন্থ রচিত। জীবনকৃষ্ণের পিতার নাম অনন্ত, মাতার নাম

স্বর্গবালা, পত্নী ব্রজেশ্বরী, নিবাস ছিল বগুড়ার করতোয়া নদীর তীরে লাহিড়ীপাড়া গায়ে। কবির উপাধি ছিল ‘কবিভূষণ’।

কবিভূষণ নাম বাস লাহিড়ীপাড়াগ্রাম।

জীবন মৈত্র চতুর্থের (ডাতার) কনিষ্ঠ।

রানী ভবানীর পুত্র ‘রামকৃষ্ণ রাজা রাজ্যেশ্বর তাহার রাজ্যে বাস। শিক্ষা করি খাই’- এ উক্তি সত্য হলে রানী ভবানীর মৃত্যুর পরে রামকৃষ্ণ রায়ের আমলে এ গ্রন্থ রচিত। তা হলে রচনাকাল ১৭৪৪ খ্রীস্টাব্দ হতে পারে না। ‘রাজ্যেশ্বর’ অর্থে যদি বগুড়া অঞ্চলের মহালের দায়িত্বে নিযুক্ত বোঝায়, তা হলে রামকৃষ্ণ তথায় মায়ের প্রতিনিধি ছিলেন।

১৬. ষষ্ঠীর দন্ত

ষষ্ঠীর দন্ত সম্ভবত সিলেটের গয়গড়বাসী ছিলেন। এ গায়ে তাঁর প্রতিষ্ঠিত উমা-মহেশ্বর মন্দির এখনো বিদ্যমান এবং প্রতি বছর এখানে নাকি ষষ্ঠীর দন্তের স্মৃতিদিবস পালিত হয়। ষষ্ঠীরের কাব্যের ভাষা স্থানিক বুলিদুষ্ট। ষষ্ঠীর সিলেটের একজন জনপ্রিয় কবি ছিলেন। ১৩৪৩ বঙ্গাব্দে ষষ্ঠীরের পদ্মাপুরাণ ফণীন্দ্রচন্দ্র দাস ও গিরিশচন্দ্র দাসের যুগ্ম সম্পাদনায় প্রকাশিত হয়েছিল। বাইশ কবির মনসামঙ্গলে কবির একটি ভূমিতায় স্বামীর ও স্বকূলের উল্লেখ রয়েছে :

শ্রীহট্টের দত্তগ্রাম হয় ষষ্ঠীর ধাম
মাতৃদেবী অতি পুণ্যশীলা
তার গর্ভে জনমিয়া পদ্মাপুরাণ বিরচিয়া
দন্তবংশ কীর্তি প্রকাশিলা।

এ ভণিতার অকৃত্রিমতা বিদ্বানরা স্বীকার করেন না। ডক্টর আশুতোষ ভট্টাচার্য্য ষষ্ঠীর দন্ত সম্বন্ধে নানা উৎস থেকে তথ্য সংগ্রহ করে বিস্তৃত আলোচনা করেছেন। তবু কবির কোন নিঃসংশয় পরিচয় মেলে নি। মনে হয় ষষ্ঠীর আঠারো শতকের শেষপাদের কিংবা মধ্যভাগের কবি।

১৭. রামজীবন বিদ্যাভূষণ

রামজীবন বিদ্যাভূষণ সূর্যমঙ্গল বা আদিত্যচরিত [১৬৩১ শকে রচিত : ইন্দু রাম ঋতুবিধু] রচয়িতা রামজীবন ভট্টাচার্য্য বিদ্যাভূষণের প্রথম গ্রন্থ ‘মনসামঙ্গল’। এটি ‘শর কর ঋতু বিধু শাক’ তথা ১৬২৫ শকে বা ১৭০৩ খ্রীস্টাব্দে রচিত। রামজীবনের নিবাস ছিল চট্টগ্রামের বাঁশখালি থানার বাণীগ্রামে। এর পিতার নাম গঙ্গারাম, পিতৃব্যের নাম নারায়ণ।

আঠারো শতকের ক্রান্তিকালে ও উনিশ শতকে আর যাঁরা মনসামঙ্গল বা পদ্মাপুরাণ রচনা করেছিলেন বলে জানা যায়, তাঁরা হলেন যশোরের দ্বিজ কালীপ্রসন্ন (১৮৬০), সিলেটের রাধানাথ রায়, কোচবিহারের বৈদ্যনাথ, সুসঙ্গের রাজা উনিশ শতকের রাজসিংহ, পূর্ববঙ্গের জগমোহন মিত্র (১৮৪৪), বৈদ্য হরিদাস, কৃষ্ণানন্দ, জ্ঞানকীনাথ, বৈদ্যনাথ, জগন্নাথ,

কবিকর্ণপুর, রামবিনোদ, রামকান্ত, রমাকান্ত, সীতাপতি, কমললোচন, জয়দেবদাস, দ্বিজ বনমাল, বিপ্রদাস, সুখদাস, সুদাম, নন্দলাল, জয়রাম, রথীন্দেবসেন, মধুসূদন, বর্ধমানদাস, আদিত্যদাস, রাধাকৃষ্ণ, যদুনাথ, বলরাম, রঘুনথ, বল্লভ ঘোষ, কমল নয়ন, হরিন্দাস, অনুপ ভট্ট, গোপীচন্দ্র, হৃদয়—শেষোক্ত তেরো জন বাইশ কবির মনসামঙ্গল ‘বাইশা’র অন্তর্ভুক্ত।

প্রথমথ্রে মনসামঙ্গলের কাহিনীর অনন্যতার অনুমিত কারণ বর্ণনা করেছে। চাঁদ-বেহলার বিদ্রোহ ও সংগ্রামের যে একেশ্বরবাদী বিজেতার শাস্ত্রিক, সামাজিক, চারিত্রিক ও সাংস্কৃতিক প্রভাব ছিল, তার ইঙ্গিত দেবার চেষ্টা করেছে। তেত্রিশ কোটি দেবতার তথা বহুদেবতার কাছে বিনাপ্রশ্নে নিঃসঙ্কোচে যারা চিরকাল মাথা নত করেছে, বিপদে সম্পদে অরি ও মিত্র দেবতার প্রতি নিঃশর্ত আনুগত্যে নিশ্চিত ও নির্বিশ্বাস হতে চেয়েছে, সে-মানুষ কেন বলবে—আমি একক দেবতার পুরুষ দেবতার পূজারী—অন্য দেবতার-নারী দেবতার পূজা আমি করব না।

এ দ্রোহ কেবল বাঙলাদেশে চাঁদের মধ্যে নয়, ওই একেশ্বরবাদী বিজেতার সংস্পর্শে এসে দক্ষিণাপথের ও উত্তরাপথের মানুষও মনে-মনে বিচলিত ও চঞ্চল হয়ে উঠেছিল, তারই ফলে শঙ্কর নির্ঘর্ক রামানুজ মধব ভাস্কর বল্লভ রামানন্দ কবির দাদু নানক একলব্য রামদাস রজব বাঙলায় চৈতন্যদেব দেবধর্ম তথা দেবদ্বিজবেদ ত্যাগ করেন। প্রতীচ্যপ্রভাবে উনিশ শতকের রামমোহন প্রমুখ অনেকের মধ্যে এমনি বিচলন, বিদ্রোহ ও নবচেতনা প্রত্যক্ষ করি।

সাহিত্যেও এ বিচলনের প্রত্যক্ষ প্রভাব দেখি। দক্ষিণাত্যের অম্ববক উপাখ্যানেও নারীদেবতা পূজায় অস্বীকৃতি এবং একলিঙ্গ শিব পূজায় আগ্রহ দেখি। চাঁদসদাগর নয় শুধু, ধনপতি সদাগরও নারীদেবতাঘেঁষী। এমনকি শীতলামঙ্গলের চন্দ্রকেতুরও শীতলাদেবীর প্রতি অবজ্ঞা দেখা যায়। কাজেই দক্ষিণাত্যে আরব-বিজয় এবং উত্তর ভারতে তুর্কী বিজয়ই এ নতুন চেতনার ও দ্রোহের কারণ। একেশ্বর বা একক দেবতা ও পুরুষকারই হল তাদের কাম্য। সাহিত্যক্ষেত্রে চাঁদ-বেহলার মধ্যে গৌড়ের দিকে এ দ্রোহ, এ সংগ্রামশীলতা ও অনমনীয়তা, দৃঢ়তা, ধৈর্য ও সাহস যেভাবে প্রমুখ হয়ে উঠেছিল, অবশ্য চণ্ডীমঙ্গলে কিংবা শীতলামঙ্গলে অথবা অন্য মঙ্গল পাঁচালীতে সেভাবে দেখা যায়নি। দ্রোহ না থাকলেও দৃঢ়তা ছিল আর একটি চরিত্রে, তিনি গোরক্ষনাথ। আশুতোষ ভট্টাচার্য যথার্থই বলেছেন ‘বেহলা দুঃখ সহনশীলতায় সীতা ও মৃত্যুর সঙ্গে সংগ্রাম করিবার শক্তিতে সে সাবিত্রী।’ মনসামঙ্গলের কাহিনীকে—মনসাকে বিদেশী বিজাতি শক্তির প্রতীক এবং চাঁদকে নিপীড়িত শাসিত হিন্দুসমাজের প্রতরুপে গ্রহণ করতে কোন কোন বিদ্বান আগ্রহী, এমনকি রবীন্দ্রনাথও লৌকিক দেবতার উদ্ভব সম্বন্ধে এমনি মত পোষণ করতেন। তাঁদের ব্যাখ্যাত তত্ত্ব যথার্থ হলে হাসান-হোসেন পালা ও বেহলার সাধনা তাৎপর্যহীন হয়ে পড়ে।

দ্বাদশ অধ্যায় কালিকামঙ্গল

প্রচণ্ডশক্তির আধার চণ্ডী, তাঁর পুংশক্তি হচ্ছে চণ্ড রুদ্রশিব। এ চণ্ডী বর্ণে কালো, এবং অঙ্গে অবয়বে ধূমাবতী, ছিন্নমস্তা, বগলা প্রভৃতি দশমহাবিদ্যা-প্রতীক হয়ে দশরূপে প্রমূর্ত। এ রক্ত-থেকো দানবদলনী নৃমুণ্ডমালিনী চণ্ডী কালপ্রভাবে মানুষের মন-মননের সভ্যতা-সংস্কৃতির ক্রমবিকাশের সঙ্গে সঙ্গে নানা গুণে-রূপে-মাহাত্ম্যে মণ্ডিত হয়ে অঙ্গে ও অন্তরে বিবর্তন পেয়েছেন। এই অসুরমর্দিনী রক্তপিপাসু নৃমুণ্ডমালিনী বুনা বর্বর মানুষের দেবতাই কালিক ও তাত্ত্বিক পরিবর্তনে গৌরী, পার্বতী, উমা, শঙ্করী, শিবানী, ভুবানী, তারা, কালী, দুর্গা, অনুদা, ক্ষেমঙ্করী প্রভৃতি অষ্টোত্তর শতনামে পূজনীয়া ও পূজ্যনীয়া হয়েছেন এবং নানা পুরাণে ও পাঁচালীতে তাঁর নানা গুণ, বিচিত্র কর্ম ও অনুপম মাহাত্ম্য বর্ণিত হয়েছে। চণ্ডী ও উমা দুটোই অনার্যভাষার শব্দ। কালো বলেই তাঁর ভক্তের দেয়া অদুরে নাম কালিকা বা কালী, রুচিবান ভক্তের দেয়া নাম শ্যামা। কিন্তু চণ্ডী-কালী এবং শ্যামা নামে তাঁর দেহবর্ণ কালো হলেও আর্থদের স্বীকৃতি লাভ করার সঙ্গে সঙ্গেই তিনি সতী, গৌরী, দুর্গা, তারা প্রভৃতি নামে প্রতিষ্ঠা লাভ করেন, কেবল তাই নয়, আদি প্রকৃতি আদ্যাশক্তি রূপে তিনি সৃষ্টির উৎস। এ আদি চণ্ডীই অঙ্গে ও অন্তরে কালিক ও তাত্ত্বিক বিবর্তন পেয়ে চৈতন্যোত্তর যুগে মধুররসের রাধার প্রভাবে সন্তানবৎসলা জগজ্জননীরূপে, রামকৃষ্ণের হাতে সেবা ও প্রীতিপ্রতীক বিশ্বমাতা রূপে প্রতিষ্ঠা পেয়েছেন। কালীরূপে তিনি ভক্তবৎসলা, বঙ্ক্য দম্পতির সন্তানদাত্রী কালিকা বা কালীরূপেই তিনি বিদ্যাসুন্দর প্রণয়োপাখ্যানে আবরণ দেবতা। হিন্দুদের মধ্যে বাঙলায় প্রণয়োপাখ্যান রচনার রেওয়াজ ছিল না বলেই কালিকার বরে রাজরানীর পুত্রসন্তান লাভ, এবং কালিকার উপস্থিতিতে সেই বিপন্ন সন্তানের প্রাণরক্ষা- আদ্যে ও অন্ত্রে এ দুটো তথ্য জুড়ে দিয়েই একটি আদি রসাত্মক কামপ্রেম কথাকে কালিকামঙ্গল নামের আবরণে দেবকথার মর্যাদা ও মাহাত্ম্যদান করা হয়েছে হয়তো শাস্ত্রী-সমাজপতিদের আপত্তি এড়াবার কৌশল হিসেবেই। কাজেই কালিকামঙ্গল কেবল নামে মঙ্গলপাঁচালী, স্বরূপে প্রণয়োপাখ্যান। চণ্ডীমঙ্গলের মনসামঙ্গলের কিংবা ধর্মমঙ্গলের মতো এ মঙ্গল পাঁচালীতে দেবতার পূজাপ্রচার লক্ষ্য নয়। চণ্ডীর গৌরীতে অনুদায় তারায় এবং বৈষ্ণব প্রভাবে জগজ্জননীতে রূপান্তর ঘটেছে। কবিওয়ালাদের তত্ত্বজিজ্ঞাসায় হর-পার্বতী ছিলেন রাধাকৃষ্ণের মতোই অবলম্বন। প্রতীচ্য প্রভাবে চণ্ডীর রামকৃষ্ণের সেবাপ্রতীক বিশ্বমাতায় পরিণতি বাঙালী সংস্কৃতি-সভ্যতার মন-মননের পরিবর্তন ধারারই সাক্ষ্য। এদিক দিয়ে সমাজতত্ত্বের ও সমাজবিবর্তনের ইতিহাসের মূল্যবান উপকরণ যোগাতে পারে চণ্ডী-কালী-সতী-উমা-গৌরী-দুর্গা-তারা প্রভৃতি গুণনামের এ দেবতা সম্বন্ধীয় নান পুরাণকাহিনী ও মূলধারাকালীঠক এক হও! ~ www.amarboi.com ~

প্রণয়োপাখ্যান অধ্যায়ে শাহ বারিদ খান প্রসঙ্গে আমরা কালিকামঙ্গলের প্রথম কবি দ্বিজ শ্রীধর কবিরাজের পরিচয় দিয়েছি। উল্লেখ্য যে বাঙলায় এ প্রণয়োপাখ্যান হোসেন শাহর পৌত্র সৈয়দ আলাউদ্দীন ফিরোজ শাহর অগ্রহেই প্রথম রচিত হয়, দ্বিতীয় কবি শাহ বারিদ খান। তারপরে কালিকামঙ্গল নামের আবরণে শূঙ্গার রসের এ উপাখ্যান রচনা করেছেন অনেক কবি। বস্তুত ধর্মমঙ্গল, মনসামঙ্গল, সত্যনারায়ণ এবং কালিকামঙ্গল পাঁচালী রচনাতেই মধ্যযুগের বেশি সংখ্যক কবি উৎসাহ বোধ করেছেন। আজ অবধি কালিকামঙ্গল তথা বিদ্যাসুন্দর উপাখ্যান রচয়িতা সত্তেরো জন কবির কাব্য পাওয়া গেছে। এরা হচ্ছেন দ্বিজ শ্রীধর কবিরাজ, শাহ বারিদ খান, কঙ্ক, গোবিন্দ দাস, বলরাম চক্রবর্তী, কৃষ্ণরাম, প্রাণরাম রামপ্রসাদ সেন, রামগুণাকর ভারতচন্দ্র, রায়, নির্ধিরাম আচার্য, দ্বিজ রাধাকান্ত, কবীন্দ্র, মদন দত্ত, মধুসূদন চক্রবর্তী, ক্ষেমানন্দ, বিশ্বেশ্বর কবিচন্দ্র।

১. কঙ্ক

বিদ্যাসুন্দরের তৃতীয় কবি সম্ভবত ময়মনসিংহের কবি কঙ্ক। ইনি সত্যনারায়ণ মহাভারতকথা প্রচার প্রসঙ্গেই বিদ্যাসুন্দর কাব্য রচনা করেছেন। কাজেই এটি কালিকামঙ্গল নয়। কবি-কঙ্কের অদ্ভুত চরিত্রকথা কঙ্ক ও লীলা নামের ময়মনসিংহ গীতিকায় বিধৃত রয়েছে। গীতিকায় বর্ণিত সব কথা হয়তো সত্য নয়, তবে তাঁর দারিদ্র্য, প্রভু ব্রাহ্মণের কন্যা লীলার সঙ্গে তাঁর প্রণয়, বর্ণভেদের বাধা এড়ানোর জন্যে তাঁর ইসলাম বরণ ও লীলার রুষ্ট পিতা গর্গ কর্তৃক কঙ্ক-হত্যার চেষ্টা বাস্তব ঘটনা বলেই মনে হয়। কঙ্ক সম্ভবত ষোল শতকের শেষপাদের বা সত্তেরো শতকের প্রথমপাদের কবি ছিলেন। তাঁর কাব্যে ক্ষেত্রন্যাবন্দনা রয়েছে, এ বন্দনা প্রক্ষিপ্তও হতে পারে। ষোল শতকের চৈতন্যভক্ত সত্যনারায়ণভক্ত এবং আদিরসাত্মক বিদ্যাসুন্দর রচক না হবারই কথা। রাজেশ্বরী নদীর তীরবর্তী বিগ্রহাশ্রমে কঙ্কের জন্ম, তাঁর পিতার নাম গুণরাজ, মাতার নাম বসুমতী, কাব্যের নাম পীরের পাঁচালী 'গুরুর আদেশে গাহি পীরের পাঁচালী'।

২. গোবিন্দ দাস

আবদুল করিম সাহিত্যবিশারদ আবিকৃত চট্টগ্রামের দেবগ্রাম (দেয়াঙ) নিবাসী কবি গোবিন্দ দাসের কাব্যে রচনাকাল দেয়া রয়েছে :

মুনি অক্ষর বাণ শশী শক পরিমিত

এইকালে রচিত কালিকাচণ্ডীর গীত।

মুনি-৭, অক্ষর-১, বাণ-৫, শশী-১, ধরে ১৫১৭ শক বা ১৫৯৬ খ্রীস্টাব্দ পাওয়া যায়। ডক্টর মুহম্মদ শহীদুল্লাহর মতে অক্ষর-৫০ হবে, তাঁর সংশোধিত পাঠ 'জান অক্ষর বাণ শশী শক পরিমিত' অনুসারে ১৫৫০ শক বা ১৬২৮ খ্রীস্টাব্দ হয়।^১ এর কাব্যে গুণসার গৌড়ের কাঞ্চননগরের রাজা এবং বিদ্যার পিতা বীরসিংহ রত্নপুরের রাজা, মালিনীর নাম রম্ভা। উপাখ্যান নয়, কালীর মহাভারত প্রচারই এ কাব্যে মুখ্য।

^১ বাংলা সাহিত্যের কথা [মধ্যযুগ], পৃঃ ৪৩৫।

৩. কৃষ্ণরাম দাস

রাঢ় অঞ্চলের আঠারো শতকের শেষপাদের কবি প্রাণরাম চক্রবর্তী কোলকাতার নিমতাবাসী ও রায়মঙ্গল, শীতলামঙ্গল, যষ্টীমঙ্গল, কমলামঙ্গল, লক্ষ্মীমঙ্গল প্রণেতা কৃষ্ণরাম দাসকে 'বিদ্যাসুন্দর' কাব্যের আদি কবি বলেই জানতেন। যথা :

বিদ্যাসুন্দরের এই প্রথম প্রকাশ
বিরচিল কৃষ্ণরাম নিমতা যার বাস।
তাঁহার রচিত গ্রন্থ আছে ঠাই ঠাই
রামপ্রসাদের কৃত আর দেখা পাই।
পরেতে ভারতচন্দ্র অনুদামঙ্গলে
রচিলেন উপাখ্যান প্রসঙ্গে ছলে।

কৃষ্ণরাম তাঁর কাব্যে রচনাকাল দিয়েছেন :

সারসাসানের নেত্র ভীমাক্ষি বর্জিত মিত্র
তেজিয়া ঋষির পক্ষ তবে
বিধুর মধুর নাম রচনাশ্রে কহিলাম
বুঝ শক (সকল) বিচারিয়া প্রভে।

কাব্যরচনাকালে দিল্লীর বাদশাহ ছিলেন আকবর শাহ তথা আওরঙ্গজেব এবং বাঙলার সুবাদার ছিলেন শায়েস্তা খান (১৬৬৪-৭৮ খ্রীঃ)।

আরং সাহা ক্ষিতিস্থাপন রিপূর উপরে কাল
রমিরাজা সর্বজনে বলে
নবাব শায়েস্তা খা আদি করি সাতগাঁ
বহু সরকার করতলে।

উক্ত হৈয়ালি থেকে দীনেশচন্দ্র ভট্টাচার্য পেয়েছেন ১৫৯৮ শক বা ১৬৭৬-৭৭ খ্রীস্টাব্দ। এবং ডক্টর আশুতোষ ভট্টাচার্য পেয়েছেন ১৫৮৬ শক বা ১৬৬৪ খ্রীস্টাব্দ।^২ কবি বিশ বছর বয়সে সারদা ভগবতীর স্বপ্নাদেশে তাঁর এই প্রথম কাব্য রচনা করেন।

৪. প্রাণরাম চক্রবর্তী

রাঢ়ের কবি প্রাণরাম তাঁর কাব্যে কৃষ্ণরাম দাস প্রসঙ্গে ভারতচন্দ্র ও রামপ্রসাদ সেন রচিত বিদ্যাসুন্দর উপাখ্যানের উল্লেখ করেছেন। অতএব তাঁর কাব্যে প্রাপ্ত রচনাকাল নিম্নরূপে প্রমাদদুষ্ট :

বসুদেয় বাণ চন্দ্র শক নিরূপণ
কালিকামঙ্গল গীত হৈল সমাপন।

^২ বাংলা মঙ্গল কাব্যের ইতিহাস, কালিকামঙ্গল অধ্যায়।

বসুদয়-৮৮, বাণ-৫, চন্দ্র-১ = ১৫৮৮ শকাব্দ, অথবা বসুদয় ৮ + ৮ বাণ ৫ চন্দ্র-১ (অঙ্কস্যাবামাগতি প্রযোজ্য নয় ধরলে) ১৬৫১ শকাব্দ হয়। কিন্তু কোনটাই ভারতচন্দ্র রায়ের গ্রন্থরচনাকালের (১৭৫৩ খ্রীঃ) পরবর্তী নয়। প্রাণরাম চক্রবর্তীর উপাধি কবিরত্ন।

৫. বলরাম চক্রবর্তী

কবিশেখর বলরাম চক্রবর্তী সতেরো শতকের শেষ পাদের কবি। তাঁর কাব্যে সুন্দরের পিতাশুণসার দক্ষিণ দেশের মাণিক্যনগরের রাজা এবং সুন্দরের মাতার নাম শুণবতী। বিদ্যার পিতা বর্ধমানরাজ বীর সিংহ। রামপ্রসাদের এবং ভারতচন্দ্রের কাব্যেও বিদ্যার পিতা বর্ধমানের রাজা। কবির পিতামহের নাম চৈতন্য, পিতার নাম দেবীদাস আচার্য এবং মাতার নাম কাঞ্চন।

৬. রামপ্রসাদ সেন

কালীসাহক ভক্ত কবিরঞ্জন রামপ্রসাদ সন্তানবৎসল্য জগজ্জননীরূপা শ্যামার সাধন-ভজন ও কীর্তনসঙ্গীত রচয়িতা রূপেই সর্বজনপ্রিয় ও প্রখ্যাত। তাঁর রচিত কালিকামঙ্গলে বা বিদ্যাসুন্দরে কৃষ্ণরামের কালিকামঙ্গলের অনুসৃতি রয়েছে। তাঁর পাঁচালী কাব্যগুণে উজ্জ্বল নয়, অন্তত ভারতচন্দ্রের কাব্যের তুলনায় ন্মান। তবে তাঁর অঙ্কিত চরিত্রগুলো স্পষ্ট হয়ে উঠেছে। ১৭২০ খ্রীষ্টাব্দে রামপ্রসাদ সেনের জন্ম চব্বিশ পরগনার অন্তর্গত হালিশহরের নিকটবর্তী কুমারহাট বা কুমারহাটি গ্রামে। রামপ্রসাদ সেন জমিদারী সেরেত্তায় হিসাবরক্ষক ছিলেন। কৃষ্ণনগরের মহারাজার বৃত্তিভোগী কবিও ছিলেন তিনি। রামপ্রসাদের পিতার নাম রামরাম সেন।

৭. নিধিরাম আচার্য কবিরত্ন

আবদুল করিম সাহিত্যবিশারদ আবিস্কৃত এ কবি চট্টগ্রামবাসী ছিলেন। তাঁর কাব্যরচনার কাল :
শকাব্দ ষোড়শ শত জলনিধি বসু
দৈববিৎ বিরচিল নিধিরাম শিশু।

দৈবজ্ঞ বা গণক জ্যোতিষী আচার্য ব্রাহ্মণবংশে নিধিরামের জন্ম। ১৬৭৮ শকাব্দে বা ১৭৫৬-৫৭ খ্রীষ্টাব্দে তাঁর কাব্য রচিত। এ কাব্যে সুন্দরের পিতা শুনিসার বা শুনিসার, মাতা কলাবতী, রাজধানী রত্নাবতী। বিদ্যার পিতার নাম বিক্রমকেশরী, মাতার নাম চন্দ্রলেখা এবং রাজধানী উজ্জয়িনী।

৮. রাধাকান্ত মিশ্র

শ্যামামঙ্গল বা শ্যামাসঙ্গীত রচয়িতা দ্বিজ রাধাকান্ত কোলকাতার লোক। ‘শ্যামার সঙ্গীত দ্বিজ রাধাকান্ত গায়’।

তিনি ‘শাকে গ্রহ বসু ঋতু বিধুর গগনে কালে অর্থাৎ ১৬৮৯ শকে বা ১৭৬৭-৬৮ খ্রীষ্টাব্দে বিদ্যাসুন্দর রচনা করেন। এ কাব্যেও বিদ্যার পিতা বীরসিংহ বর্ধমানের রাজা। অতএব বলরাম, রাধাকান্ত, রামপ্রসাদ, ভারতচন্দ্র-এ চার কবির কাব্যে বিদ্যার পিতা বর্ধমানের রাজা। এ কাব্যের মালিনীর নাম বিমলা।

৯. কবীন্দ্র মধুসূদন চক্রবর্তী

কবীন্দ্র ও মধুসূদন চক্রবর্তীকে ডক্টর আশুতোষ ভট্টাচার্য দুই পৃথক কবি বলে মনে করেন। ডক্টর মুহম্মদ শহীদুল্লাহ কবীন্দ্র মধুসূদন চক্রবর্তীর উপাধি বলেই বিশ্বাস করেছেন। এঁর বিদ্যাসুন্দর ব্রতকথার আকারে রচিত— পাঁচালীর আঙ্গিক বা কলেবর পায় নি।

১০. কবীন্দ্র

এঁর পিতার নাম ঘটক চক্রবর্তী (ঘটক চক্রবর্তীসূত) এবং কবি ছিলেন (কৃষ্ণচন্দ্রপদে রত) কৃষ্ণনগরের রাজা কৃষ্ণচন্দ্রের কর্মচারী। এর কাব্যে মধুসূদনের একটি ভণিতা মেলে ‘কহে মধুসূদন রহ ধনি দুইদিন’ এতেই বিদ্বানরা বিভ্রান্ত। কবীন্দ্র ও মধুসূদন অভিন্ন ব্যক্তি কি-না নির্ণয় করা গবেষণাসাপেক্ষ।

১১. মদন দত্ত

এঁর কাব্যের নাম মঙ্গলচণ্ডিকার পাঁচালী। এ কাব্যে বিদ্যার পিতার নাম বিক্রমকেশরী এবং পিতৃরাজ উজ্জানি।

বিদ্যাসুন্দরের কবি বলে ক্ষেমানন্দের ও বিশেষজ্ঞের নাম জানা গেছে, কিন্তু কোন পরিচয় পাওয়া যায়নি।

মৈথিল ভাষায় ১৭২০ খ্রীস্টাব্দে রচিত কেশিনাথের বিদ্যাবিলাপ নাটকে সুন্দর রত্নপুররাজ গুণসাগরের ও রানী কলাবতীর পুত্র আঁস বিদ্যা হচ্ছে উজ্জয়িনীর রাজা বীরসিংহের ও রানী শিলাবতীর কন্যা, মালিনীর নাম সুগন্ধা এবং ভাট মাধব। বিদ্যা ও সুন্দরের এ পরিচিতিই প্রাচীন।

১২. রায়গুণাকর ভারতচন্দ্র রায়

ভূরিশিটের রাজ্যচ্যুত ভূপতি নরেন্দ্ররায়ের পুত্র ‘ব্যাকরণ অভিধান সাহিত্য নাটক অলঙ্কার সঙ্গীত শাস্ত্রের অধ্যাপক এবং পুরাণ-আগম-পারসি-নাগরী বেত্তা’ কৃষ্ণনগরের রাজা কৃষ্ণচন্দ্র রায়ের সভাসদ ভারতচন্দ্রও একখানি কালিকামঙ্গল রচনা করেছিলেন। কিন্তু তাঁর রচিত কালিকামঙ্গল অঙ্গে ও অন্তরে কিঞ্চিৎ ভিন্ন বলে এর কবিপ্রদত্ত নাম ‘অন্নদামঙ্গল’। আদ্যে দেবীখণ্ড এবং অন্তে মানসিংহ খণ্ড একে পুঙ্খপাহিতাদোষ থেকে মুক্ত রেখেছে, মৌলিক কাহিনীর মর্যাদা দিয়েছে এবং কাহিনীকারের অনন্য প্রতিভার দলিলরূপেও এটি স্মরণে রয়েছে। গোটা মধ্যযুগের বাঙলা সাহিত্যের ছয়শ’ বছরের পরিসরে কবি ভারতচন্দ্র নানা কারণে অনন্য এবং তাঁর অন্নদামঙ্গল একক ও অতুল্য। রাজা কৃষ্ণচন্দ্র রায়ের সভাসদ ভারতচন্দ্র রায় ফুলিয়ার মুখটি নৃসিংহের বংশধর। উল্লেখ্য যে কৃতিবাসও ওই বংশীয় এবং একই বংশের দুজনই বাঙলার অতুল্য কীর্তিমান কবি।

আমরা পীরপাঁচালী প্রসঙ্গে বাঙলাদেশের রাজনীতিক পরাধীনতাজাত আর্থিক, সামাজিক ও সাংস্কৃতিক অবক্ষয়ধারার কথা আলোচনা করেছি। সেই অবক্ষয়ের শিকার ছিলেন পরিবেশ-

সচেতন মনীষী ভারতচন্দ্রও- তাঁর ব্যক্তিক, পারিবারিক ও দৈশিক- সাংস্কৃতিক জীবনে।

বর্ধমানের বৃহৎ জমিদারের রোষদৃষ্টিতে পড়ে ভারতচন্দ্রের ক্ষুদ্র জমিদার-পিতা ভূরিশিটের ভূপতি নরেন্দ্র রায় হুতসর্বস্ব হন। ফলে শৈশবে বাল্যে কৈশোরে ভারতচন্দ্রও দারিদ্র্য দুঃখের কবলে পড়েন আর গৃহত্যাগ করে সুদূরে ঘরজামাই হয়ে বেঁচে থাকার ব্যবস্থা করেন। রাজনৈতিক ষড়যন্ত্র, ক্ষমতার লড়াই, শাসন শৈথিল্য, বিদেশীবেনের অবাধ বাণিজ্য, দিল্লীর কেন্দ্রীয় শক্তির অবক্ষয় প্রভৃতির ফলে বাঙলাদেশে প্রশাসনিক বিশৃঙ্খলা ও নৈরাজ্য প্রায় চরম অবস্থায় পৌঁছেছিল। ফলে জনজীবনে ও জীবিকায় ছিল অনিশ্চয়তা, নিরাপত্তার অভাব। প্রশাসনিক অব্যবস্থা ও আর্থিক অনিশ্চয়তা ব্যক্তির সামাজিক জীবন করে বিপন্ন ও বিশৃঙ্খল, এবং সাংস্কৃতিক জীবন করে বক্ষ্যা ও বিকৃত। ভারতচন্দ্রের আবির্ভাব বাঙলার এমন দুর্দিনে-দুর্যোগকালে।

আবালা দুঃখের আঙনে পোড়খাওয়া ভারতচন্দ্র দেশ-কাল-সমাজ-রাজ্যের হাব-ভাব-হালহকিকত জানতেন ও বুঝতেন। কারণ বোঝার দুর্লভ শক্তিও ছিল তাঁর। শাসকের মন মেজাজের আর শাসনের রীতি পদ্ধতির উপরই যে-জনমানবের শান্তি-স্বস্তি-সুখ-সম্পদ নির্ভর করে, তাও তাঁর জানা ছিল। তাই তিনি মুর্শিদাবাদের সমকালীন রাজনীতির ও শাসকের পরিচয় দিয়েই শুরু করেছিলেন তাঁর কাব্যরচনা। এর থেকে এক অশান্ত অস্থির প্রশাসনিক অবস্থার এবং গণমানবের আর্থসামাজিক জীবনে বিপন্নতার আভাস পাওয়া যায় :

সুজা খাঁ নবাবসুত সরফরাজ খাঁ,	আসিয়া করিয়া যুদ্ধ বধিলেক তায়
দেওয়ান আলমচন্দ্র রায় রায়রায়।	তদবধি আলিবর্দি হইলা নবাব
ছিল আলিবর্দি নবাব পাটনায়	‘মহব্বতজঙ্গ’ দিল পাতসা খেতাব।
কটকে মুর্শিদকুলি খাঁ (?) নবাব ছিল	লুঠি নিল নারী গাড়ী দিল বেড়ি তোক
তারে গিয়া আলিবর্দি খেদাইয়া দিল...	শুনি মহব্বতজঙ্গ চলে পেয়ে শোক।...
ভাইপো সৌলজঙ্গে দিলেন দখল	যুদ্ধে হারি পলাইল মুরাদবাঘর...
মুরাদবাঘর তারে ফেলিল ফাটকে	
এবং মহব্বতজঙ্গ- উড়িয়া করিল ছার লুঠিয়া পুড়িয়া।	

তারপর নানা সময়ে ভাস্কর পণ্ডিতের সৈন্যপাতে মারাঠা বর্গীরা ১৬৬৪ শক বা ১৭৪২ খ্রীস্টাব্দ থেকে (শকে আগে মাতৃকা যোগিনীগণ শেষ)

‘লুঠি বাঙ্গালার লোক করিল কাঙ্গাল	পলাইয়া কোঠে গিয়া নবাব রহিল
গঙ্গাপার হৈল বাঙ্কি নৌকার জাঙ্গাল।	কি কহিব বাঙ্গালার যে দশা হইল...
কাটিল বিস্তরলোক গ্রাম গ্রাম পুড়ি	বর্গিতে লুঠিল কত কত বা সুজন
লুঠিয়া লৈল ধন ঝিউড়ী বহুড়ী।	নানামতে রাজার প্রজার গেল ধন।

[১-সুজন নামের এক অর্থপৃথু সাজোয়াল বা তহশীলদার]

দিল্লীতে ভূতের উৎপাত বর্ণনায় ভারতচন্দ্রের সমকালীন বাঙলা ও বাঙালীই তাই প্রতিবিম্বিত হয়েছে :

একি ভূতগত দেশে রে	দাতা ছিল যারা ভিক্ষা মাগে তারা
না জানি কি হবে শেষে রে।	চোর ফিরে সাধু বেশে রে

উত্তম অধম না হয় নিয়ম
কেহ নাহি ধর্মলেশে রে।

যবনে ব্রাহ্মণে সমভাবে গণে
তুল্য মূল্য গজ মেঘেরে।

‘দাতা ছিল যারা ভিক্ষা মাগে তারা’ আর ‘চোর ফিরে সাধু বেশেরে’- ভারতচন্দ্রের সমকালে আক্ষরিকভাবে বাস্তবও সত্য হয়ে উঠেছিল। আমরা জানি সমাজে স্বার্থবাজ, মতলববাজ, দুর্নীতিবাজ, খল, শঠ, মিথ্যুক, হিংসুটে, নিন্দুক, চোর, ডাকাত, বুদীরা অভাব ছিল না কখনো কোথাও। তবে সমাজে ভালো-মন্দের সংখ্যামাত্রতা ও সংখ্যাগুরুতাই শান্তি-সুখ স্বস্তির স্থিতির বা বিঘ্নের কারণ হয়। সমাজে শিষ্টের ও দুষ্টির ভারসাম্য নষ্ট হলেই, দুষ্টির সংখ্যা বৃদ্ধি পেলেই ঘটে প্রশাসনিক, আর্থিক, সামাজিক ও সাংস্কৃতিক বিপর্যয় ও বিকৃতি। ভারতচন্দ্রের কালে যে তা-ই ঘটেছিল- বিশেষ করে মানুষ যে অর্থাভাবে তথা অন্নাভাবে কষ্ট পাচ্ছিল, তার সবচেয়ে বড়ো প্রমাণ কবি স্বয়ং ছিলেন দরিদ্রাক্রিষ্ট- অন্নাভাবগ্রস্ত। তা-ই তাঁর ইস্টদেবতা কালী গৌরী তারা দুর্গা চণ্ডী নন- অন্নদায়িনী অন্নদা অন্নপূর্ণ। এ কারণেই কালিকামঙ্গল তাঁর হাতে হলো ‘অন্নদামঙ্গল’। শিব-পরিবার নয় শুধু, ব্যাসও ভিক্ষাজীবী, অন্নদাপূজা তাঁদেরও করতে হয় অন্ন পাওয়ার আশায়। এখানেই শেষ নয়, বিষ্ণুহোড় দম্পতিও হাভাতে। বিষ্ণুহোড় পত্নীর-

তৈল বিনা চুলে জটা খড়ি গায়
লতাবান্ধা পদ্মপাতে কটি আচ্ছাদন
ঢাকিয়াছে পদ্মপাতে মাথা আর স্তন।

অন্নবিনা কলেবরে অস্থি চর্মসার...
পান রিন্দা পদ্মিনীর মুখে উড়ে মাছি।

গরীবের অনুচিন্তায় ও অনুসংগ্রহ কাজে দিন যায়, কন্দল করবার তাদের সময় কোথায়। ধন-মান-যশের সাধক ঘৃণা-লজ্জা-ভয় কবলিষ্ঠ উচ্চবিস্তার ও পরমশ্রমজীবী উচ্চবর্ণের মানুষই কেবল দেখে-দ্বন্দ্ব ও পরচর্চায় অবসরযাপন করে। অভিজ্ঞতা থেকেই তাই ঈশ্বরীপাটনী জানে যেখানে কুলীনজাতি সেখানে কন্দল এসে যুগে অন্নাভাব এতো তীব্র ছিল যে অনুচিন্তা ছাড়া আর কোন ভোগ-উপভোগ চিন্তা বা আশা আকাঙ্ক্ষা দরিদ্র মানুষের চেতনায় ঠাঁই পায়নি, তাই দেবীর পায়ের ছোঁয়ায় ‘সেউতী হইল সোনা’ দেখে ঈশ্বরীপাটনী যদিও বুঝলো ‘এ ত মেয়ে মেয়ে নয় দেবতা নিশ্চয়’, তবু দেবতার কাছে আলাদীনের মতো ধন-মান-মহল-মহাল কিছুই চাইতে জানল না, সামান্য আশ্বাস পেলেই সে হয় আশ্বস্ত, নিশ্চিন্ত ও খুশী- ‘আমার সন্তান যেন থাকে দুধেভাতে’। এর থেকে বেশি কিছু চাওয়ার-পাওয়ার থাকে না চিরদুর্ভিক্ষক্রিষ্ট বাঙালীর হাভাতের। সেদিন বাঙলা দেশে তেমন দরিদ্র্য ছিল। তাই ১৭৬৯ খ্রীস্টাব্দের বা ১১৭৬ বঙ্গাব্দের মন্বন্তরে বাঙলার দুই-তৃতীয়াংশ লোকের অন্নাভাবে অপমৃত্যু ঘটা সম্ভব ও সহজ হয়েছিল।

নওয়াবের ও ইস্ট ইণ্ডিয়া কোম্পানীর দ্বৈতশাসনে ও শোষণে এবং শাসন-শৈথিল্যে ও কোম্পানী-চাকুরে নির্লক্ষ নির্বিচার লুণ্ঠতরাজের ফলেই বাঙালীর আর্থিক সামাজিক সাংস্কৃতিক জীবন আরো নীতিভ্রষ্ট, পীড়নদুষ্ট, দুর্নীতিবহুল ও পাপ-পঙ্কিল হয়ে উঠেছিল, গ্রামীণ পণ্য-বিনিময়ভিত্তিক আর্থিক জীবন মুদ্রাবিনিময় বহুল হয়ে ওঠায় এবং জীবনযাত্রায় আন্তর্জাতিক বাণিজ্য ও পণ্য প্রভাবে বিপর্যয় সৃষ্টি হওয়ায় নতুন-পুরাতনের অসঙ্গত অসমঞ্জস্য টানা-পোড়নে বাঙালীর গার্হস্থ্য ও আর্থিক জীবন বিপর্যস্ত হয়েছিল। তারই ফলে বন্দরনগরী কোলকাতার হিন্দুসমাজে কবিওয়ালাস এবং মুসলিম সমাজে শায়েরের উদ্ভব ঘটে। তখন গণমানবের দুর্দিন-দুর্ভোগের চরম অবস্থা- পুরোনো জীবনচেতনা ও মূল্যবোধ অপসৃত, নতুন

মূল্যচেতনা অজাত-যুগসন্ধির লগ্নে বন্দ্যো মন-মননের সাক্ষ্য ও স্বাক্ষর হয়ে রইল কবিগান ও দোভাষী পুথি। আমাদের আর্থিক, সামাজিক ও সাংস্কৃতিক জীবনে অবক্ষয়ের পাথুরে প্রমাণ হয়ে রইল এসব দলিল।

ভাষা ও ছন্দের সংহত ও সমন্বিত অবয়বে তাঁর কাব্যদেহ নিখুঁত লাভণ্যে অপরূপ। মধ্যযুগে অনন্য রসিক ছান্দসিক কবি মনীষী ভারতচন্দ্র ছিলেন ‘কবিতা কমলে রবি মহাশয়া’ মধ্যযুগের বাঙলার ‘নরলোকে [তাঁরা] সম নাই’ স্বীকার করতেই হবে। কাব্য ক্ষেত্রে মধ্যযুগের অতুল্য অপ্রতিদ্বন্দ্বী ও সর্বশ্রেষ্ঠ কবি ছিলেন ভারতচন্দ্র। রবীন্দ্রনাথ এ কাব্যকে তাই রাজকণ্ঠের মণিমালায় সঙ্গ্রে তুলিত করেছেন তার ঔজ্জ্বল্যের ও কারুকার্যের জন্যে। তাঁর দেবখণ্ড বা হরপার্বতীর চরিতকথা নামান্তরে বাঙলার গ্রামীণ ক্ষেত-মজুরের বা প্রান্তিক চাষীর গার্হস্থ্য জীবনের সংবৎসবের বাস্তব আলোচ্য। হরগৌরী নারদ ব্যাস প্রমুখ সবাই সর্বগুণ-বিধ্বংসী দারিদ্র্য কবলিত চরিত্র। তাঁরা মহৎ ও বৃহৎ আদর্শভ্রষ্ট অসুস্থ ও অস্বস্থ মানুষ। বিদ্যাসুন্দর সযত্নসৃষ্ট ঘন আদিরসের মনোরম আধার বিশেষ। আর ইতিহাসের দূরগত ধ্বনি শোনা গেলেও মানসিংহ খণ্ড হচ্ছে আগাগোড়াই আবিল-অনাবিল হাস্য-পরিহাসের ভাণ্ডার। এর ভাষা মিশ্র ও লঘু, এর কাহিনী তুচ্ছ ও নির্লক্ষ্য, এর ভঙ্গি অশ্লীল ও বিদ্রূপাত্মক, এর রস ইতরজনভোগ্য। কাব্যের প্রায় সর্বত্রই যেন তিনি বাদর আর বাদরামি দেখাতেই ছিলেন উৎসুক। কবিওয়ালাদের হাতে রাধা-কৃষ্ণ কিংবা হর-গৌরী যে ভাঁড়ের পূর্ণাঙ্গে নেমে এসেছিলেন, তারও শুরু ভারতচন্দ্রে। যে শিল্পী তাজমহল গড়ার দুর্লভ ক্ষমতা রাখতেন, তিনি এভাবে চকবাজারের জলসাগর নির্মাণ করেই রইলেন তুচ্ছ। কৃতী ভাঁড় বা ভাঁড়ামির কবিরূপে যুগন্ধর হয়ে রইলেন তিনি, যুগস্রষ্টার গৌরব থেকে রইলেন বঞ্চিত। দেশের অবক্ষয়কালের শিকার হলেন এক অসামান্য প্রতিভাধর পুরুষ ভারতচন্দ্র। জ্ঞাতি বঞ্চিত রইল এক সম্ভাব্য মহৎ কাব্য থেকে। তবু অন্তদামঙ্গল এক হিসেবে আগাগোড়া মৌলিক রচনা : হর-গৌরীর দাম্পত্য ও গার্হস্থ্য, ব্যাস ও গৌরী আখ্যান, হরিহোড় আখ্যান, বিদ্যাসুন্দর উপাখ্যান, ভবানন্দ কাহিনী, প্রতাপাদিত্য-মানসিংহের ঐতিহাসিক যুদ্ধ কাহিনী প্রভৃতি অনেক মৌলিক উপাখ্যানের সমষ্টি।

ভারতচন্দ্রের প্রথম রচনাও কালপ্রভাবেই সত্যপীরকথা নামের ব্রতকথা। খণ্ড কবিতাও রচনা করেছিলেন তিনি, যেমন বসন্ত, বর্ষা, কৃষ্ণের উক্তি, রাধার উক্তি, হাওয়া, বাসনা, ধোড়ে ও ভেড়ের সমান রূপ বর্ণন, বলি রাজার উক্তি, বৃন্দাবলীর উক্তি, চণ্ডীনাটক (নটীর উক্তি, সূত্রধারের উক্তি, মহিষাসুরের উক্তি, প্রজার প্রতি মহিষাসুরের উক্তি) পত্র প্রভৃতি ছাড়াও তিনি হিন্দিতে ভাটের ও রাজার সংলাপ, আর সংস্কৃতে নাগাষ্টক (১৭৫১ খ্রীঃ) রচনা করেন এবং মৈথিল কবি ভানুদত্তের শৃঙ্গার শাস্ত্রগ্রন্থের তিনটে শ্লোকের, রসমঞ্জরীর (ভাবানুবাদ) ও চৌরপঞ্চাশতের বঙ্গানুবাদ করেন। সংস্কৃত বাঙলা ফারসি এবং হিন্দিভাষার মিশ্রপ্রয়োগে কবিতা রচনা করেও বহু ভাষাবিৎ এ কবি বিভিন্ন ভাষায় তাঁর ব্যুৎপত্তির স্বাক্ষর রাখেন :

শ্যামহিত প্রাণেশ্বর বায়দকে গোয়দ রুবর,
কাতর দেখে আদর কর কাহ মর রো রোয়কে।
রক্তং বেদং চন্দ্রমা, চুঁ লালা চে রেমা
ক্রোধিত পব দেও ক্ষমা, মেট্রিমে কাহে শোয়কে।
যদি কিঞ্চিৎ তুং বদসি দরজানে মন আয়ৎ খোশি।
আমার হৃদয়ে বসি প্রেম করে খোস হোয়কে।

বৈষ্ণব পদ নয়, ছড়া নয়, গানও নয়, বর্ণনামূলক গাথাও নয়, তীতাত্মক খণ্ড কবিতা রচনা শুরুও এক হিসেবে ভারতচন্দ্রের হাতেই। তা ছাড়া ভারতচন্দ্রের গোটা অনুদামঙ্গলে কিংবা রসমঞ্জরীতে স্থানে স্থানে স্তবকে স্তবকে নিখুঁত গীতিকবিতা সুলভ। এ অংশগুলো বিচ্ছিন্নভাবে সংকলিত হলে ভারতচন্দ্রকে আধুনিক গীতিকবিতারও জনক বলে স্বীকার করতে হবে। যেমন বন্দনাংশে বৈষ্ণবপদাবলীর আদলে ললিত মধুর ত্রিপদীতে রয়েছে নানা দেবতার রূপ-গুণের বর্ণনা, কৈলাস বর্ণন, অনুপূর্ণার অধিষ্ঠান, সুন্দর দর্শনে নাগরীগণের খেদ, বিদ্যার বিরহ, অথবা—

- | | |
|------------------------------------|-------------------------------|
| ক. আই আই ওই বুড়া কি | চ. কি বলিলি মাগিনী ফিরে বল বল |
| এই গৌরীর বর লো | ছ. আলো আমার প্রাণ কেমন লো করে |
| খ. আমারে ছাড়িও না ভবানী | জ. করে কব লো যে দুঃখ আমার |
| গ. কেবা এমন ঘরে থাকিবে | ঝ. মোর পরাণ পুতলী রাধা |
| ঘ. আমারে শঙ্কর দয়া কর হে, | প্রভৃতি নানা অংশ স্মৃতিব্য। |
| ঙ. ওহে বিনোদ রায় ধীরে ধীরে যাও হে | |

বলেছি অনুদামঙ্গল কাব্যে বিদ্যাসুন্দর অংশ ব্যতীত সবটাই এক অর্থে মৌলিক রচনা। দেবতাখণ্ডটিও নামে মঙ্গলকাব্য বটে, কিন্তু অনুদামঙ্গলকাব্যের মতো এ অংশের লক্ষ্য মর্ত্যে পূজা প্রচার নয়, এ অংশে তাই কোন মর্ত্যমুখের সম্পর্ক নেই, আছে দেবলোকের হরগৌরীর দাম্পত্য ও গার্হস্থ্য কথা। কাজেই দেবতাখণ্ডটি এদিক দিয়ে অভিনব ও অনন্য। অনুদা যে শিবেরও পূজ্য, এ তত্ত্ব প্রতিষ্ঠায় এর প্রথম অংশ সমাপ্ত। দ্বিতীয়াংশে রয়েছে ব্যাস-কাশীর বৃত্তান্ত। এটিও হরগৌরীর বিরোধ, ব্যাসের দ্রোহ, লাঞ্ছনা এবং পরাভবের কাহিনী। এটিও সাধারণ মর্ত্য মানবসম্পর্কহীন। তারপরে বর্ণিত বিষয় মর্ত্যে পূজা প্রচার লক্ষ্যে স্বর্গের বসুন্ধরকে হরিহোড় রূপে মর্ত্যে প্রেরণ ও হরিহোড়ের পূজার মাধ্যমে অনুদাদেবীর মর্ত্যমানবসমাজে প্রতিষ্ঠা। এ অংশে কন্দল ও দুষ্টভাব যে অনুদার অগ্রিয়, তা-ই প্রতিপাদ্য হয়েছে ‘যেখানে কন্দল দেবী না রন সেখানে’। আবার নলকুবরকে ভবানন্দরূপে মর্ত্যে প্রেরণ এবং তার মাধ্যমে দেবীর দিল্লীর বাদশাহ থেকেও স্বীকৃতিলাভ, অনুদাভক্ত ভবানন্দের ধনে-মানে যশে-সুখে প্রতিষ্ঠা প্রভৃতির বর্ণনায় উপাখ্যান সমাপ্ত।— এ চারটে কাহিনীই ভারতচন্দ্রের তৈরি, যদিও আদল ও উপকরণ মিলেছে নানা পুরাণ ও লোকশ্রুতি থেকে। মানসিংহ খণ্ডটি রচিত হয়েছে অনুদাতা রাজা কৃষ্ণচন্দ্রের পূর্বপুরুষের গৌরবগাথা রূপে তাঁরই অনুক্ত অভিপ্রায়ক্রমে। ভবানন্দ মজুমদারের নায়ক হবার মতো যোগ্যতা ছিল না— তাই ভারতচন্দ্র রাজপুরুষ রাজা মানসিংহকেই নায়ক বানিয়েছেন এবং ইতিবৃত্ত-ইতিহাস বিরল সেকালে ভারতচন্দ্রের শোনা ছিল মাত্র মানসিংহ-প্রতাপাদিত্যের যুদ্ধ এবং প্রতাপাদিত্যের পরাজয় সংবাদ। কাহিনী-বিরল কাব্যরচনা সহজ নয়, অথচ অনুদাতাকে তুষ্ট করতে হবে,— তাই বাঙালী হিন্দুসামন্তের সর্বনাশকারী বিভীষণ প্রায় ভবানন্দকেও লোকস্বার্থ ব্যক্তি রূপে দাঁড় করানোর দায়িত্ব তাঁকে পালন করতে হয়েছে। বুদ্ধিমান ভারতচন্দ্র মিশ্র ভাষায় তুচ্ছ কথায় জাল বুনে ভাঁড়ামির ভিয়ান দিয়ে কৌতুক, পরিহাস ও বিদ্রোপের আভরণে সজ্জিত করে দেবতা ও মানবকে কালী ও কৃষ্ণচন্দ্রকে সুকৌশলে তুষ্ট

করেছেন। অটেল হাসির খোরাক পেয়ে খুশী হয়েছে সরল সাধারণ পাঠকও। এবার সুভাষিতবুলির আশুবাক্যেরও বাক-প্রতিমার কিছু নমুনা দিচ্ছি, এগুলো ভারতচন্দ্রের অসামান্য বুদ্ধি জ্ঞান প্রজ্ঞা অভিজ্ঞতার সাক্ষ্যস্বরূপ—

১. নগর পুড়িলে দেবালয় কি এড়ায়
২. নারী যার স্বতন্তরা
সে জন জীয়েন্তে মরা।
তাহার উচিত বনবাস।
৩. বাণিজ্যে লক্ষীর বাস।
তাহার অর্ধেক চাষ।
রাজসেবা কত খচমচ
৪. বাপে না জিজ্ঞেস।
মায়ে না সন্তাষে।
যদি দেখে লক্ষীছাড়া।
৫. হাভাতে যদ্যপি চায়।
সাগর শুকায়ে যায়।
৬. ঘরে অনু নাহি যার।
মরণ মঙ্গল তার।
তার কেন বিলাসের সাধ।
৭. বাঘের বিক্রম সম মাঘের শিশির।
৮. জনক হইতে স্নেহ জননীর বাড়া
মার কাছে পুত্র যায়
বাটে দিলে তাড়া।
৯. মাতঙ্গ পড়িল দরে।
পতঙ্গ প্রহার করে।
এ দুঃখ পরাণে নাহি সহে।
১০. দৈব রুষ্ট যার। বুদ্ধি নাশে তার।
১১. মন্ত্রের সাধন কিংবা শরীর পাতন।
১২. দুর্দৈব যখন ধরে
ভাল কর্ম মন্দ করে।
১৩. বুড়া বয়সের ধর্ম অঙ্গে হয় রোষ
ক্ষণে ক্ষণে ভ্রান্তি হয় এই বড় দোষ।
১৪. জ্ঞানের সন্ধানে কর অজ্ঞানে কি ফল
১৫. অযোগ্য হইয়া কেন বাড়াও উৎপাত
খুঁয়ে তাঁতি হয়ে দেহ তসরেতে হাত।
১৭. গৃহিণীর পাপপুণ্য ঘর থাকে মজে।
১৮. পর দুঃখ সেই বুঝে আপনা যে বুঝে
১৯. খুলিল মনের দ্বার না লাগে কপাট।
২০. যন্ত্র নহিলে নাহি মিলয়ে রতন।
২১. নীচ যদি উচ্চভাষে
সুবুদ্ধি উড়ায় হাসে।
২২. বাতাসে পাতিয়া ফাঁদ কন্দল ভেজায়।
২৩. বন্ধু নাই কড়ি বই
কড়িতে বাঘের দুধ মিলে।
২৪. বেড়া নেড়ে যেন গৃহস্থের মন বুঝা।
২৫. মৌরব জীবন গেলে কি ফিরে।
২৬. গোড়ায় কাটিয়া মাথায় জল।
২৭. বড় পিরীতি বালির বাঁধ
ক্ষণে হাতে দড়ি ক্ষণেকে চাঁদ।
২৮. যাহার লাগিয়া। চুরি করে গিয়া।
সেই জন কহে চোর।
২৯. মানিকের ছটা কি কাপড়ে যায় বন্ধ।
৩০. পড়িলে ভেড়ার শৃঙ্গে ভাসে
হীরার ধার।
৩১. ভবিষ্যৎ ভাবি কেবা বর্তমানে মরে।
৩২. যুগ হয়ে দিবে কি
সিংহের ঘরে হানা।
৩৩. কার ঘাড়ে দুটো মাথা
এ কর্ম করিবে।
৩৪. সে কহে বিস্তর মিছা
যে কহে বিস্তর।
৩৫. শিলা জলে ডাসি যায়
বানরে সঙ্গীত গায়
দেখিলেও না হয় প্রত্যয়।

১৬. কর্মভূমি ভূমণ্ডল ত্রিভুবনে সার
কর্মহেতু জন্ম লৈতে আশা দেবতার ।
৩৭. ভাবিতে উচিত ছিল প্রতিজ্ঞা যখন ।
৩৮. যে বুঝি চোরের ধন বাটপাড়ে লয় ।
৩৯. ময়ূর চকোর শুক চাতকে না পায়
হার বিধি পাকা আম
দাঁড় কাকে খায় ।
৪০. ভেকে ভুলাইয়া ভ্রূ
পঙ্কে মধু খায় ।
৪১. মিছাকথা সিঁচা জল কতক্ষণ রয় ।
৪২. সাপের মাথায় ভেকেরে নাচায়
কেমন কুটনী সে বা ।
৪৩. না ধরিলে রাজা বধে,
ধরিলে ভূজঙ্গ ।
৪৪. বিপত্তি পড়িলে বুঝি
বুদ্ধি শুদ্ধি যায় ।

৩৬. যার কর্ম তার সাজে ।
অন্য লোকে লাঠি বাজে ।
৪৫. লোভের নিকটে যদি ফাঁদ পাতা যায়
পশুপক্ষী সাপমাছ কে কোথা এড়ায় ।
৪৬. হায় বিধি চাঁদে কৈল রাহুর আহার ।
৪৭. সহসা করিতে কর্ম ধর্ম শাস্ত্রে মানা
৪৮. জন্মভূমি জননী স্বর্গের গরীয়সী ।
৪৯. বাঘের বিক্রম সম মাঘের হিমালী ।
৫০. অসার সংসারে সার শৃঙ্খরের ঘর ।
৫১. অধম উত্তম হয় উত্তমের সাথে
পুষ্প সঙ্গে কীট যেন উঠে
সুর মাথে ।
৫২. দুইশারী বিনা নাহি পতির আদর ।
৫৩. দু'সতীনা ঘরে দাসী অনর্থের মূল,
৫৪. সুয়া যদি নিম দেয় সে হয় চিনি
দুয়া যদি চিনি দেয় নিম হন তিনি ।

বাক প্রতিমার বা জীবন্ত চিত্রের ও বাকপটুতার দৃষ্টান্ত :

১. মেনকা দেখিয়া চেয়ে জামাই লেঙ্গটা
নিবিয়ে প্রদীপ দেয় টানিয়া ঘোমটা ।
২. মেনকা :
ঘরে গিয়ে মহাক্রোধে তাজি লাজ ভয়
হাত নাড়ি গলা তাড়ি ডাক ছাড়ি কয় ।
ওরে বুড়া আটকুড়া নারদ অল্পেয়ে
হেন বর কেমনে আনিলি চক্ষু খেয়ে ।
৩. মেনকা :
নিজ অঙ্গ যদি মোর অঙ্গে মিলাইবা
কোচনীর বাড়ি তবে কেমনে যাইবা ।
৪. শুনিলি বিজয়া জয়া বুড়িটির বোল
আমি যদি কই তবে হবে গণ্ডগোল... ।
শুণের না দেখি সীমা রূপ ততোধিক... ।
সম্পদের সীমা নাই বুড়া গরু পুঁজি

- তখন যে ধন ছিল এখন সে ধন
তবে মোরে অলক্ষণা কন কি কারণ?...
ভিক্ষা মাগি খুদ কণা যে পান ঠাকুর
তাহার ইন্দুরে করে কাটুর কুটুর ।....
করেতে হইল কড়া সিদ্ধি বেটে বেটে
তৈল বিনা চুলে জটা অঙ্গ গেল ফেটে ।
শাঁখা শাড়ী সিন্দুর চন্দন গুয়া পান
নাহি দেখি আয়তি কেবল আচাতুয়া ।
৫. দেবীর ছলনা :
ঝাঁকর মাকড় চুল নাহি আদি সাঁদি
হাত দিলে ধুলা উড়ে যেন কেয়া কাঁদি ।
ভেঙ্গর উকুন নীকি করে ইলি বিলি
কোটি কোটি কান কোটারির কিলিকিলি ।
কোটারে নয়ন দুটি মিটি মিটি করে
চিবুকে মিলিয়া নাসা ঢাকিল অধরে ।...

- রসনা কেবল কথা সিন্দূকের কুঁজি । শতগাটি ছিঁড়া টেনা করি পরিধান ।...
কড়া পড়িয়াছে হাতে অনুব্রত দিয়া ফেলিয়া ঝুপরি লড়ী আহা উহ করে...
কেন সব কটু কথা কিসের লাগিয়া... উকুনোর কামড়েতে হইয়া আকুল
চক্ষু মুদি দুই হাতে চুলকান চুল । গাল ভরা গুয়া পান পাকিমালা গলে
৬. প্রণমিয়া পাটুনী কহিছে জোড়হাতে কানে কড়ি কড়ে রাড়ী কথা কয় ছলে ।
আমার সম্ভান যেন থাকে দুধেভাতে । চূড়া বাস্কা চুল পরিধান সাদা শাড়ী
৭. ঠকভরা দরবার ছলে লয় ঘর ঘর ক্ষুরধার ছুঁতে কাটে মাছি ফুলের চূপড়ী কাঁখে ফিরে বাড়ী বাড়ী ।
চাকুরীর মুখে ছাই ছাড়িতে না পারি ভাই আছিল বিস্তর ঠাট প্রথম বয়সে
বিস্কমি সম হয়ে আছি । এবে বুড়া তবু কিছু গুঁড়া আছে শেষে ।
...
৮. ঘরে গিয়া আর কি দেখিবে ছার বাতাসে পাতিয়া ফাঁদ কন্দল ভেজায়
মিহার সংসার, ভাতার জরা পড়শী না থাকে কাছে কন্দলের দায় ।
সতিনী বাঘিনী শাওড়ী রাগিনী- ১০. তড়িৎ ধরিয়া রাখে কাপড়ের ফাঁদে
ননদী নাগিনী বিষের ভরা । জ্বরীগণ লুকাইতে চাহে পূর্ণ চাঁদে ।
৯. কথায় হীরার ধার হীরা তার নাম অঞ্চলে ঢাকিতে চাহে কমলের গন্ধ
দাঁত হোলা মাজা দোলা হাস্য অবিরাম । মানিকের ছটা কি কাপড়ে যায় বন্ধ ।

আলাউল, ঘনরাম চক্রবর্তী প্রভৃতি সুচারজন কবি সংস্কৃত ছন্দের বাঙলায় প্রয়োগ করবার চেষ্টা আগেও করেছেন এবং সফলও হয়েছেন, তবে ভারতচন্দ্র সংস্কৃত ছন্দের ললিত মধুর বহুল প্রয়োগে বাঙলা ছন্দের দিগন্ত প্রসারিত করেছিলেন- এ সত্য মানতেই হবে । এ কালে রবীন্দ্রনাথ, সত্যেন্দ্রনাথ দত্ত, দ্বিজেন্দ্রলাল রায় ও নজরুল ইসলামই বাঙলা ছন্দে বৈচিত্র্য দান করেছেন ।

১. ভূজঙ্গপ্রয়াত : লটাপট জটাজুট সংঘট্ট গঙ্গা
ছলচ্ছল টলটল কলকল তরঙ্গা ।
ফণাফন ফণাফন ফণীফণ গাজে
দিনেশ প্রতাপে নিশানাথ সাজে ।
২. তৃণকছন্দ : ভূতনাথ ভূতসাথ দক্ষ যজ্ঞ নাশিছে
যক্ষ রক্ষ লক্ষ লক্ষ অষ্ট অষ্ট হাসিছে ।
প্রেতভাগ সানুবাগ ঝম্প ঝম্প ঝাঁপিছে ।
ঘোর রোল গণ্ডগোল চৌন্দলোক কাঁপিছে ।
৩. ছড়ার ছন্দ : উমার মুখ চাঁদের চূড়া বুড়ার দাড়ী শণের লুড়া
ছারকপালে ছাইকপালে দেখে পায় ডর লো ।
উমার গলে মণির হার বুড়ার গলে হাড়ের ভার
কেমন করে ওমা উমা করিবে বুড়ার ঘর লো ।

৪. ছড়ার ছন্দ : গর গর গর গরজে ফণী । দপদপ দপ দীপয়ে মণি
ধক্ ধক্ ভালে অনল । তর তর তর চাঁদমণ্ডল ।
৫. মাত্রিকছন্দ : কলাকোকিল অলিকুল বকুল ফুলে
বসিয়া অনুপূর্ণা মণিদেউলে
কমল পরিমল লয়ে শীতল জল
পবনে ডল ঢল উছলে কূলে ।
৬. তোটক ছন্দ : নৃপনন্দন কামরসে রসিয়া
পরিধান ধুতি পড়িতেছে খসিয়া ।
তরুণী ধরিয়া হৃদয়ে লইল
নলিনী যেন মন্তকরী ধরিল ।

ভারতচন্দ্রের কাব্যে আরো কিছু নতুন ছন্দ :

৭. কোতোয়াল যেন কাল খাঁড়া ঢাল ঝাঁকে
ধরি বাণ খরশান হান হান হাঁকে
চোর ধরি হরি হরি শব্দ করি হয়
কে আমারে আর পারে আর কারে ভয় ।
৮. মালিনী কীল খাইয়া বলিছে দোহাই দিয়া
আমারে যেমন মারিলি তেমন
পাইব তাহার কিয়া ।
৯. হায়রে বিধাতা নিদারুণ
কোন দোষে হইলি বিগুণ ।
আগে দিয়া নানা দুঃখ মধ্যে দিন কত সুখ,
শেষে দুঃখ বাড়ালি দ্বিগুণ ।
১০. কেহ লহ পড়া পঙ্খর গুয়া
কেহ লহ পান কর্পুর গুয়া,
কেহ লহ গন্ধ চন্দন চুয়া
কেহ লহ পাখা জলের ঝারী ।

ভারতচন্দ্রের পূর্বপুরুষপরম্পরা এরূপ : রাজ্য কৃষ্ণ রায়-মহেন্দ্র রায়-গোপী রায়-ভূপতি
রায়-সদাশিব-নরেন্দ্রনারায়ণ-ভারতচন্দ্র রায় ।

রামায়ণের কবি কৃত্তিবাস ও ভারতচন্দ্র উভয়েই ফুলিয়ার সুপ্রাচীন ও সুখ্যাত মুখটি বংশের
সন্তান । বর্তমান বর্ধমান জেলার ভূরসুট (ভুরিশিট, ভূরীশ্রেষ্ঠ) পরগণার পাণ্ডুয়ায় [পেঁড়োয়] এক
ছোট জমিদার নরেন্দ্রনারায়ণ রায়ের চারপুত্রের মধ্যে কনিষ্ঠ পুত্র ছিলেন ভারতচন্দ্র রায় । ১১১৩
বঙ্গাব্দে ১৭০৭ খ্রীস্টাব্দে ভারতচন্দ্রের পেঁড়োয় তথা রাধানগরে জন্ম হয় । ১৭১৩ খ্রীস্টাব্দে
বর্ধমানরাজ কীর্তিচন্দ্রের বিরূপতায় [রাজবল্লভের কার্য কীর্তিচন্দ্র নিল রাজ্য] নরেন্দ্রনারায়ণ
হৃতসম্পদ হয়ে চরম দারিদ্র্যে পতিত হন । ১৭১৭ খ্রীস্টাব্দে ভারতচন্দ্র মঙ্গলঘাট এলাকার
নওয়াপাড়া গ্রামে মামার বাড়িতে থেকে তাজপুর গ্রামের টোলে ব্যাকরণ ও অভিধান পড়তে
থাকেন । এবং অল্প বয়সেই মামার বাড়িতে থাকাকালেই সারদাম্রামের কেশবকুণি আচার্য

পরিবারে বিয়ে করে নিজের পরিবারের বিরাগভাজন হন। কিছুকাল পরে হুগলীর দেবানন্দপুরে প্রথমে হীরারাম রায়ের আশ্রয়ে এবং পরে রামচন্দ্র মুন্সীর বাড়িতে থেকে ফারসি ভাষা আয়ত্ত করেন। এখানেই দুই আশ্রয়দাতার অগ্রহে দুটো সত্যনারায়ণ মাহাত্ম্যকথা রচনা করেন তিনি। রামচন্দ্র মুন্সীর অগ্রহে রচিত সত্যনারায়ণ ব্রতকথা 'সাপ্ত পায় সনে রুদ্র চৌগুণা' অর্থাৎ ১৭৩৭-৩৮ খ্রীস্টাব্দে সমাপ্ত হয়। এর পরে কবি বাড়ি ফিরে এসে সম্পত্তি সম্বন্ধীয় কাজে বর্ধমান রাজদরবারে পরিবারের প্রতিনিধি হিসেবে উপস্থিত হলে কোন কারণে বর্ধমানরাজ তাঁকে কারারুদ্ধ করেন, কারারক্ষীকে ঘুষ দিয়ে বের হয়ে তিনি উড়িষ্যা পালিয়ে যান। উড়িষ্যার মারাঠা প্রশাসক শিবভট্টের অনুগ্রহে শ্রীক্ষেত্রে বাসকালে বৈষ্ণব বৈরাগী হয়ে সদলে বৃন্দাবনে যাবার পথে হুগলীর খানাকুল কৃষ্ণগরে শ্যালিকাপতির সঙ্গে তাঁর সাক্ষাৎ হওয়ায় তাঁকে বাড়ি ফিরতে হয়। তারপরে ফরাসিভাষায় ফরাসী কোম্পানীর দেওয়ান ইন্দ্রনারায়ণ চৌধুরীর সুপারিশে মাসিক চল্লিশ টাকা বৃত্তি পেয়ে কৃষ্ণনগরের জমিদার রাজা কৃষ্ণচন্দ্র রায়ের সভাকবি হলেন ভারতচন্দ্র। এবং বার্ষিক ছয়শ' টাকা রাজস্ব স্থির করে কবি মূলাজোড় গ্রামটি ইজারা নিলেন। মূলাজোড়েই কবি স্থানীনিবাস নির্মাণ করেন। শেষাবধি তিনি কৃষ্ণচন্দ্র থেকে মূলাজোড়ে ঘোল বিঘা এবং পার্শ্ববর্তী গুস্তেগ্রামে একশ পাঁচ বিঘা জমি লাখরাজ ব্রহ্মোত্তর রূপে পেয়েছিলেন। বর্ধমানরাজ কৃষ্ণচন্দ্র থেকে মূলাজোড় পত্তনি নিলে বর্ধমানরাজের গোমস্তা রামদেব নাগ খাজনা আদায় সূত্রে প্রজাদের পীড়ন করতো। ভারতচন্দ্র সংস্কৃত দ্ব্যর্থবোধক কবিতা নাগাষ্টক লিখে রাজা কৃষ্ণচন্দ্রকে এর অত্যাচারের কথা জানিয়ে প্রতিকার প্রার্থনা করেন। নাগাষ্টক ১৭৫১ খ্রীস্টাব্দে রচিত। এ সময়ে ভারতচন্দ্রের বয়স ছিল চল্লিশোত্তর। মনে হয় এরপরেই 'রায়গুণাকর' উপাধি পেয়ে অনুদামঙ্গল কাব্য রচনা শুরু করেন তিনি। 'বেদ লয়ে ঋষি রসে ব্রহ্ম নিরূপিত। সেই শকে এই গীত ভারত রচিত।' অনুদামঙ্গলে কবিপ্রদত্ত এ সন হচ্ছে বেদ-৪, ঋষি-৭, রস-৬, ব্রহ্ম-১ = ১৬৭৪ শকাব্দ বা ১৭৫২-৫৩ খ্রীস্টাব্দ। ১৭৬০ খ্রীস্টাব্দে বহুমূত্ররোগে তিপ্পান বহুর বয়সে প্রৌঢ় ভারতচন্দ্রের মৃত্যু হয়। ভারতচন্দ্রের একপত্নীর তিনপুত্র- পরীক্ষিৎ রামতনু ও ভগবান। ভগবানের বংশধরেরা মূলাজোড়ে আজো বর্তমান।

ভারতচন্দ্র ছিলেন বিদ্বান ও চোখ-কানখোলা পরিবেশ-সচেতন সতর্ক মানুষ। তাঁর মধ্যে জ্ঞান-প্রজ্ঞা-অভিজ্ঞতা সুসংহত ও সমন্বিত হয়েছিল। সমকালীন জনজীবনের সর্বক্ষেত্রে নিয়মনীতির ভ্রষ্টতা এবং এর কারণ ও অনিবার্যতা তিনি উপলব্ধি করেছিলেন, তাই জীবনে সমাজে প্রশাসনে কোথাও বৃহৎ ও মহৎ কোন আদর্শ বা প্রেরণা জ্বিইয়ে রাখা অসম্ভব বলেই মনে ছিলেন। শেষপ্রান্তে না ঠেকা পর্যন্ত যে পতন রোধ করা যাবে না, তাও তিনি বুঝেছিলেন। অনর্থক বলেই তাঁর এতোবড়ো প্রতিভা কোন মহৎ সৃষ্টিতে নিয়োজিত হয়নি বরং বলা চলে কেবল ইয়াকিঁতেই অবসিত হয়েছে। মানুষ ভবিষ্যৎ সুদিনের আশা-ভরসা নিয়েই বাঁচে। হতাশ ভারতচন্দ্রের অনুদামঙ্গল বেপরওয়া বাচলতায় আর অশ্লীল রসিকতায় ভরা। তাঁর কাব্যে দেব-মানব সমভাবে কৌতুকের পরিহাসের ও বিদ্রূপের পাত্র। দেবতারও গুরুগম্ভীর ভাব-কর্ম-আচরণ উপহাসের বিষয়। সবটাই তিনি বর্ণনা করেন লঘুভাবে ও হালকা চালে। তীক্ষ্ণবী মনীষী কবির জ্ঞান-প্রজ্ঞা-অভিজ্ঞতা তবু গুহায়িত থাকেনি, প্রবাদ প্রবচন সুভাষণ আঙবাক্য ছাড়াও অলঙ্কারের অবয়বে অসংখ্য বাকপ্রতিমা মণি-মুক্তোর মতো স্থিরবিজুলির মতো ঝিকমিকি করছে তাঁর কাব্যের সর্বক্ষেত্রে। সাহিত্য জগতের সর্বকালের অনন্য পুরুষ শেখরপীয়ার ছিলেন অসামান্য বাকপটু ও অতুল্য লোকচরিত্রবিৎ- এ আমরা জানি। সীমিতক্ষেত্রে ভারতচন্দ্রও আমাদের গোটা

মধ্যযুগের সাহিত্যঙ্গনে ছিলেন তেমন বাকপটু ও ভাষাশিল্পী। ভাষা ছিল তাঁর হাতে কুমোরের কাদার মতো। কাব্যদেহ নির্মাণে তাঁর ভাষা, ছন্দোবোধ ও শিল্পরুচি ছিল অতুল্য আর বিন্যাসে নৈপুণ্যও ছিল কুমোরের নিপুণ হাতের ও নিখুঁত চাকের মতোই।

বিবিধ অপ্রধান দেবদেবীর পাঁচালী

ক. শীতলা

প্রদাহযুক্ত বসন্তরোগের প্রমূর্ত দেবতার সুভাষিত বিপরীত নাম শীতলাদেবী। উল্লেখ্য যে শীতলা, ষষ্ঠী, ওলা, শনি, দুষ্টা সরস্বতী প্রভৃতি লৌকিক অপদেবতাদের স্থান অর্বাচীন পুরাণেও রয়েছে। প্রাচীন পুরাণেও প্রক্ষিপ্তভাবে ঠাই হয়েছে তাদের। এসব অরিদেবতা বৌদ্ধ যুগেও পূজিত হয়েছেন এমনকি সম্ভবত এরা যাদুবিদ্যাসের যুগেও কোন না কোন নামে ও শক্তিস্বরূপে বিদ্যমান ছিলেন। কেননা এসব অদৃশ্য অরিশক্তি অসহায় রোগভীরু ক্ষতিভীরু ও মৃত্যুভীরু মানুষের শঙ্কা-ত্রাসের কারণ ছিলেন। বিশেষত কোন কোন রোগ যেমন ওলাওঠা ও বসন্ত প্রতিকারহীন মহামারী আকারে দেখা দিয়ে ঘর-গাঁ-গঞ্জ উজাড় করে দিত। কবি নিত্যানন্দ চক্রবর্তী শীতলার উদ্ভব সম্বন্ধে বলেছেন যে রাজা নহুষের পুত্রোষ্টি যজ্ঞ শেষে

যজ্ঞপূর্ণে নিভাইল যজ্ঞের অনল
তাহে জনমিল এক কন্যা সমুজ্জ্বল।...
দেবী কন অগ্নিকুণ্ডে মম জন্ম হইল।
যজ্ঞ শীতলের কালে তোমার জনম
সেহেতু শীতলা নাম তোমার হইল।

ব্রহ্মা বলেন :

উপাখ্যানের মাধ্যমে শীতলামাহাত্ম্য বর্ণিত হয়েছে পাঁচালীতে। শীতলামঙ্গলও মুখ্যত রাঢ় অঞ্চলের সৃষ্টি।

১. নিত্যানন্দ চক্রবর্তীই সম্ভবত শীতলামঙ্গলের আদি কবি। ইনি মেদিনীপুরের অন্তর্গত কাশীজোড়ার রাজা রাজনারায়ণের সভাকবি ছিলেন। কবির ভাষায় :

কাশী জোড়া সৃষ্টি পাড়া অতি বিচক্ষণ
রামতুল্য রাজা তথা রাজনারায়ণ
নিত্যানন্দ ব্রাহ্মণ তাহার সভাসদ
শীতলামঙ্গল রচে পান সুধামত।

রাজনারায়ণের সভায় নানা পুরাণ অনুলিখিত হয়। ব্রহ্মবৈবর্ত পুরাণ ১৬৯৯ শকাব্দে এবং ১৭০৫ শকাব্দে বৃহন্নারদীয় পুরাণ অনুলিখিত হয়। অতএব নিত্যানন্দ এসময়ে অর্থাৎ ১৭৭৭-৮৩ খ্রীস্টাব্দের মধ্যে তাঁর শীতলামঙ্গল রচনা করেছিলেন বলে অনুমান করা অসম্ভব নয়। তাঁর পিতৃপুরুষের পরম্পরা এরূপ : ভবানীমিশ্র-মনোহরমিশ্র-চিরঞ্জীব-মহামিশ্র-চৈতন্য ও নিত্যানন্দ 'গাহে ভেবে শীতলাচরণ।'

২. বল্লভ- আঠারো শতকের প্রথমার্ধের কবি বল্লভের আত্মপরিচয় এরূপ : পুরুষোত্তম চৈতন্য-শ্যাম-গোপাল-শ্রীবল্লভ (কবি)। পূর্বপুরুষের নিবাস ছিল যথাক্রমে হস্তিনানগরে, মান্দারগে এবং পরে বৈদ্যপুরে। এখানেই কবির জন্ম ও নিবাস। ভণিতা : 'শ্রীকবি বল্লভ রস গায়। শ্রীকবি বল্লভ গায় মধুর সঙ্গীত'। ইনি চৌষষ্ঠি প্রকার বসন্ত রোগের বর্ণনা দিয়েছেন।

৩. কৃষ্ণরাম দাস— রায়মঙ্গল, ষষ্ঠীমঙ্গল, কমলামঙ্গল প্রভৃতি পাঁচালী রচয়িতা নিমতানিবাসী কৃষ্ণরামদাসও একখানি শীতলামঙ্গল রচনা করেছিলেন, তাঁর পরিচয় রায়মঙ্গল ও কালিকামঙ্গল সূত্রে পূর্বেই দেয়া হয়েছে।

৪. মানিকরাম গাঙ্গুলী— ধর্মমঙ্গল প্রণেতা মানিকরামও একখানি শীতলামঙ্গল রচনা করেছিলেন। মানিকরামের পরিচয় ধর্মমঙ্গল অধ্যায়ে রয়েছে। মানিরামও দুকুড়্যা কাঁঠাল্যা প্রভৃতি চৌষট্টি প্রকার বসন্তের জ্বালা-যন্ত্রণা বর্ণনা করেছেন।

৫-৬ শ্রীকৃষ্ণকিঙ্কর ও চন্দ্রচূড়— শীতলামঙ্গলের কবি শ্রীকৃষ্ণ কিঙ্কর বর্ধমান রাজ্যে তেজশ্চন্দ্রের রাজত্বকালে (১৭৭০-১৮৩২ খ্রীঃ) বর্তমান ছিলেন। এর পুঁথি মেদিনীপুরের ঘাটাল অঞ্চলেই পাওয়া গেছে। কবি সম্ভবত ওই অঞ্চলনিবাসী ছিলেন। এর পুঁথিতে অপর এক কবির ভণিতাও রয়েছে। যেমন 'বিরচিল চন্দ্রচূড় শীতলার' বরে।

৭. শঙ্কর— মেদিনীপুর জেলার ঘাটালের অপর কবির নাম শঙ্কর। তাঁর একটি ভণিতায় তাঁর মা মাধবীর নাম মেলে :

মাধবী জঠরে জন্ম সদাচেষ্টি গান কর্ম
বিরচিলা শীতলামঙ্গল।

কবির নিবাস জানা যায় এবং রচনাকালও পাওয়া যায়। নিবাস কলাইকুণ্ড চেলুয়া পরগনা এবং রচনা সমাপ্ত হয় 'সন এগার চুয়াল্লিশ সালে শুক্রবার সন্ধ্যাকালে শুক্লপক্ষ আঠাশে অশ্বিন', সেদিন ছিল 'কাতর শঙ্কর বলে। ঝড় বৃষ্টি মহীতর। শীতলা সদয় সেদিন।' অতএব ১১৪৪ বঙ্গাব্দ বা ১৮৩৭ খ্রীস্টাব্দে এ কাব্য রচিত। এরা ছাড়াও দয়াল, অকিঞ্চন চক্রবর্তী, দ্বিজ গোপাল, গঙ্গারাম দত্ত, ঘনরাম, কৃষ্ণনাথ, কুমারপ্রসাদ, রঘুনাথ দত্ত নামের কবিগণও শীতলামঙ্গল রচয়িতা বলে জানা যায়।

খ. ষষ্ঠীমঙ্গল

ষষ্ঠী শিশু সংহারক অরি দেবতা। শীতলা প্রভৃতির মতো তাঁকেও তোয়াজ স্তুতিতে তুষ্ট রেখে পূজা দিয়ে অর্ঘ্য খাইয়ে শিশুজীবনে নিরাপত্তা দানই ষষ্ঠী পূজার ও পর্বের লক্ষ্য। আগেই বলেছি সব লৌকিক দেবতাই কালক্রমে পুরাণে ঠাঁই পেয়েছেন এবং তাঁদের মাহাত্ম্য প্রমাণক উপাখ্যানও বানানো হয়েছে ষষ্ঠীমঙ্গলেও কাহিনী রয়েছে। গায়ে গায়ে ষষ্ঠীদেবীর ষষ্ঠীতলা থাকে। মুসলমানরাও শিশু জন্মের ষষ্ঠী দিনে ষষ্ঠী পূজা করে বা করত এবং আমপাতা পুড়িয়ে শিশুর নাম থুইত এদিনে। ষষ্ঠীও মুখ্যত রাঢ়ে সুশ্রদ্ধ জনপ্রিয় দেবতা। তাই ষষ্ঠীমঙ্গল কাব্যও রচিত হয়েছে পশ্চিমবঙ্গেই।

১. কৃষ্ণরাম দাস— রায়মঙ্গল, শীতলামঙ্গল, কালিকামঙ্গল, লক্ষ্মীমঙ্গল প্রভৃতি রচয়িতা নিমতানিবাসী কৃষ্ণরাম দাস ষষ্ঠীমঙ্গলও রচনা করেছিলেন। তাঁর পরিচয় রায়মঙ্গল প্রসঙ্গে দেয়া হয়েছে। ষষ্ঠীমঙ্গল রচনার কাল 'কবি কৃষ্ণরাম বলে ষষ্ঠীর মঙ্গল। মহী শূন্য ঋতু চন্দ্র শক সংসংসর।' এতে ১৬০৭ শক বা ১৬৮৫ খ্রীস্টাব্দ হয়।

২. রত্নদ্রাম চক্রবর্তী— কবি সম্ভবত দক্ষিণ বঙ্গের বা খুলনা জেলার। কবির পিতার নাম গঙ্গারাম বিদ্যাভূষণ। ষষ্ঠীদেবীর স্বপ্নাদেশ পেয়ে কবি এ পাঁচালী রচনা করেন। তাঁর কাব্যে রয়েছে তেরোটি পালা এবং তিনটে আখ্যান। ইনি সম্ভবত আঠারো শতকের শেষপাদের কবি।

৩. শঙ্কর- মেদিনীপুরের ঘাঁটাল অঞ্চলের অধিবাসী শীতলামঙ্গল প্রণেতা কবি শঙ্কর একখানি ষষ্ঠীমঙ্গলও রচনা করেছিলেন। কবির পিতার নাম সীতারাম। জ্যেষ্ঠভ্রাতার নাম গোবর্ধন, নিবাস রানীবাজারে। 'ষষ্ঠীর আদেশে পাই। শ্রীকবি, শঙ্করে রস গান।' তাঁর ষষ্ঠীমঙ্গলে রচনাকাল রয়েছে 'আদ্য বসু চন্দ্রকলা। এ হেয়ালিতে আদ্য-১ বসু-৮, চন্দ্রকলা-১৬ ধরলে ১৬৮১ শকান্দ বা ১৭৫৯ খ্রীস্টাব্দ হবে রচনাকাল। শঙ্কর বর্ণিত ষষ্ঠীর নাম জলষষ্ঠী।

জলষষ্ঠী নাম মোর জগতে খ্যাতি

প্রথমে করিল পূজা শ্রীহরি-পার্বতী।

ভাষায় ও বর্ণনায় শঙ্কর কবিকঙ্কণ মুকুন্দরাম চক্রবর্তীর অনুকারক। কবিচন্দ্র ও গুণরাজ নামে ষষ্ঠীমঙ্গল রচয়িতা অপর দু'জন কবির নাম জানা গেছে। পরিচয় পাওয়া যায়নি। পীলানিবাসী রামধন নামে উনিশ শতকের প্রথমার্ধে এক-কবিও ষষ্ঠীমঙ্গল রচনা করেন।

গ. সারদামঙ্গল

১. দয়ারাম দাস - সারদামঙ্গলের কবি দয়ারামের নিবাস ছিল মেদিনীপুরের কাশীজোড়ামায়ে। অপর কবি নিত্যানন্দ চক্রবর্তী এ গ্রামের সামন্ত রাজা রাজনারায়ণের সভাসদরূপে শীতলামঙ্গল রচনা করেছিলেন। দয়ারামের প্রপিতামহের নাম রামেশ্বরজিৎ পিতামহ পরীক্ষিৎ এবং পিতা জগন্নাথ।

২. বীরেশ্বর- নামে আর এক কবি সারদা বা সারস্বতীমঙ্গল রচনা করেছিলেন, তাঁর সম্বন্ধে আর কিছু জানা যায় নি।

৩. রাজা রাজসিংহ- ময়মনসিংহ জেলার সুসঙ্গের রাজা রাজসিংহ ভারতীমঙ্গল রচনা করেন আঠারো শতকের শেষার্ধে।

এমনি করে দুর্গামহিমা জ্ঞাপক দুর্গামঙ্গল সূর্যমাহাত্ম্যজ্ঞাপক সূর্যমঙ্গল, গঙ্গামঙ্গল, সুবচনীমঙ্গল, তীর্থমঙ্গল, লক্ষ্মীমঙ্গল, কপিলামঙ্গল, গোসানীমঙ্গল, বরদামঙ্গল প্রভৃতি স্থানীয়ভাবে রচিত হয়েছে, এগুলোর পাঠক সংখ্যা কম। তাই প্রচারও অঞ্চলে সীমিত।

১. সূর্যমঙ্গল বা আদিমঙ্গলের কবি রামজীবন 'ইন্দু রাম ঋতু বিধু' শকে বা ১৬৩১ শকে তথা ১৭০৯ খ্রীস্টাব্দে তার পাঁচালী রচনা করেন। এ রামজীবন মনসামঙ্গল প্রণেতাও। মনসামঙ্গল প্রসঙ্গে এর পরিচয় দেয়া হয়েছে।

২. সূর্যকেই 'অষ্টলোকপাল রূপে গ্রহণ করে' 'অষ্টলোকপাল কথা' রচনা করেছিলেন এক মালাধর বসু। অপর দুই সূর্যমঙ্গল রচয়িতার নাম দ্বিজ কালিদাস ও দ্বিজ লক্ষ্মণ।

গঙ্গামঙ্গল রচনা করেছিলেন ষোল শতকের চণ্ডমঙ্গলের কবি মাধবাচার্য বা মাধবানন্দ, চণ্ডীমঙ্গলের অপর কবি অকিঞ্চন চক্রবর্তী এবং আঠারো শতকের কবি দ্বিজ গৌরঙ্গ, জয়রাম, দ্বিজ কমলাকান্ত, দুর্গাপ্রসাদ মুখোপাধ্যায়, বর্ধমানের কালনা-অধিকাপুর নিবাসী কবি বংশী ঘোষের পুত্র প্রাণবল্লভ। এঁর পাঁচালীর নাম জাহ্নবীমঙ্গল। এটি বর্ধমানরাজ কীর্তিচন্দ্রের সমসময়ে রচিত।

গুণ্ডামঙ্গল বা সুবচনীমঙ্গল রচনা করেছিলেন হয়তো অনেক কবিই। একটি গর্তে জল রেখে একুশটি হাঁস মূর্তি জলে ছেড়ে দিয়ে সুবচনী দেবীর পূজা করা হয় গৃহের ও গৃহস্থের

শুভকামনায়। দ্বিজ মাধবও সুবচনীমঙ্গল রচনা করেছিলেন—

সুবচনীৰ পাদপদ্ম কৰিয়া স্মরণ
রচিল মাধবদ্বিজ অপূৰ্ব কথন।

অন্যপুথির পাঠ— রচিল মাধব দাস অপূৰ্ব কথন।

আমাদের ধারণা চণ্ডীমঙ্গল ও গঙ্গামঙ্গল রচক চট্টগ্রামে কর্মোপলক্ষে কবীন্দ্র পরমেশ্বর দাসের মতো প্রবাসী ষোল শতকের পশ্চিমবঙ্গ সম্পৃক্ত কবি দ্বিজ মাধবই সুবচনীমঙ্গল রচয়িতা। এজন্যেই আবদুল করিম সাহিত্যবিশারদ চট্টগ্রাম থেকেই দ্বিজ মাধবের সব পুথি সংগ্রহ করতে পেরেছিলেন। সুবচনীপূজা বস্তুত পশ্চিমবঙ্গে প্রচলিত লৌকিক দেবতা পূজা। এ দেবতা পূর্ববঙ্গে অজ্ঞাত।

সুবচনী বা শুভদামঙ্গলের অপর জ্ঞাত কবির নাম রামজীবন। এর নিবাস ছিল হুগলী জিলার আরামবাগ মহকুমা এলাকার আরাণ্ডী গ্রামে। শুভদামঙ্গল বা সুবচনীমঙ্গল ক্ষুদ্রাকার পাঁচালী। একখানি তীর্থভ্রমণ বৃত্তান্ত ‘তীর্থমঙ্গল’ নামে রচিত। রচয়িতার নাম বিজয়রাম সেন। নিবাস ছিল তাঁর চব্বিশপরগনা জেলার ভাজনঘাট গ্রামে। বৈদ্যবংশীয় এ কবির সম্ভবত চিকিৎসাবিদ্যায় উপাধি ছিল বিশারদ। কবি বিজয়রাম সেন খিদিরপুরের ধনীব্যক্তি কৃষ্ণচন্দ্র ঘোষালের সহযাত্রী রূপে উত্তর ভারতের যে-সব তীর্থ ভ্রমণ করেছিলেন, সেগুলোর বিবরণ রয়েছে তীর্থমঙ্গলে। ১১৭৭ বঙ্গাব্দে কৃষ্ণচন্দ্র ঘোষাল ঘরে ফেরেন। অতএব ১৭৭০ খ্রীষ্টাব্দের পরে কোন সময়ে এ গ্রন্থ রচিত। কবির ভাষায়—

সাতান্তরি সন্নিহিত আর ভাদ্রপদমাসে
বিশারদে কহে পুঁথি কৃষ্ণচন্দ্রাদেশে।
শিবনিবাসসন্নিধানে ভাজনঘাট ধাম
কৃষ্ণচন্দ্রাদেশে কহে সেন বিজয়রাম।

শৈব কবি বলেন : তীর্থমঙ্গল গানে মনোযোগে যে শুনে
তাহাকে সদয় হন শিব।

এক কবিচন্দ্র মুকুন্দ রচনা করেছিলেন বাসুলীমঙ্গল। গ্রন্থোক্ত রচনাকাল ‘শাকে রস রস বেদ শশাঙ্ক গণিতে, বাসুলীমঙ্গল গীত হৈল সেই হৈতে।’ এতে ১৪৬৬ বা ১৪৯৯ শকাব্দ তথা ১৫৪৪ বা ১৫৭৭ খ্রীষ্টাব্দ পাওয়া যায়। পাঠে প্রমাদ না থাকলে বলতে হবে রাঢ়ের বাসুলীমঙ্গল মুকুন্দরামের চণ্ডীমঙ্গলেরও পূর্বে রচিত। কবিচন্দ্র মুকুন্দের পিতামহ দেবরাজ, পিতা বিকর্তন মিশ্র এবং মাতা হীরাবতী।

মঙ্গল নামে আরো কিছু বৈশিষ্ট্যবিহীন দেবতা মাহাত্ম্যজ্ঞাপক পাঁচালী উনিশ শতক অবধি রচিত হয়েছে। রায়মঙ্গলের কবি কৃষ্ণরামদাসও লক্ষ্মীমঙ্গল রচনা করেছিলেন। এভাবে শিবানন্দ কর রচনা করেন অনুবাদমূলক লক্ষ্মীমঙ্গল। কুমিল্লার শ্রীকাইল গ্রামবাসী ত্রিপুরার এক কবি নন্দকিশোর রচনা করেছিলেন বরদেবদেবীর দেবীর মাহাত্ম্যকথা বরদামঙ্গল। রচনাকাল ১৮১৯ খ্রীষ্টাব্দ।

এমনি আরো রচনা রয়েছে যেমন কপিলামঙ্গল, গোসানীমঙ্গল, কামাখ্যামঙ্গল প্রভৃতি।

ত্রয়োদশ অধ্যায়

শিবমঙ্গল

১. সর্বভারতীয় দেবতা শিব

শিব সর্বভারতীয় ও সর্বজনীন প্রাচীনতম স্থানিক দেবতা। তিনি তাই আদি ও অধিদেবতা দেবাদিদেব মহাদেব স্বয়ম্ভু। সৃষ্টি, স্থিতি ও সংহারের দেবতা তিনি। তাঁর ত্রিশূল এ ত্রিশক্তিরই প্রতীক। সৃষ্টির ও প্রজননের দেবতা হিসেবে তাঁর প্রতীক লিঙ্গ, তাঁর বাহন বৃষ এবং তাঁর ভূষণ সর্প। সৃষ্টির দেবতা হিসেবে তিনি নারীর স্বামী-বর দাতা নন কেবল, শস্য-উৎপাদনের সহায় রোদ-বৃষ্টির দেবতাও। সে সূত্রেই তিনি সূর্য ও বৃষ্টিদাতা। বৃষ্টিবাঞ্ছায় তাই শিবলিঙ্গে স্নানান্তে জলবর্ষণ করা হয়, স্নানকালে করা হয় সূর্যস্তব্ধে শিব ও সূর্য অভিন্ন বলেই শিব কুষ্ঠরোগের নিরাময় দেবতা। এ সূত্রে ওরাও ঐতিহ্যের ধর্মেশ্বর্য বুনো উড়েদের ধরমদেবতা এবং ধর্মঠাকুর স্মর্ভব্য। অস্ট্রিক-দ্রাবিড়-ভেদিত ধারায় সৃষ্টির উৎস পুংলিঙ্গ নয়, - নারী যোনি। তাই শাকাম্বরী দেবীই সৃষ্টিসম্ভবা। ময়েনজোদারোতে শিব-শাকাম্বরী- দু-ই মেলে অর্থাৎ সৃষ্টির উৎস হিসেবে উভয়েই সেখানে আগেই স্বীকৃতি পেয়েছিলেন। পরে এঁরাই চণ্ড-চণ্ডী, শিব-উমা, হর-গৌরী, ভব-ভবানী, বৌদ্ধ প্রজ্ঞা-উপায়, বজ্র-তারার আদিনাথ-আদ্যা প্রভৃতি নানা গুণনামে পরিচিত হন। উল্লেখ্য যে শিব-উমা, চণ্ড-চণ্ডী প্রভৃতি অনার্যভাষার শব্দ।

কালান্তরে স্থানান্তরে এবং শাস্ত্রান্তরে মহাদেবতা শিব-শিবানীর গুণগ্রামের নানা বিস্তার, বিকৃতি ও বৈচিত্র্য ঘটেছে। ফলে শিব হয়েছেন যোগী, তান্ত্রিক, ত্রিগুণাতীত ত্রিকালজ্ঞ অসুরত্রাস কৈলাসবাসী এবং পরমাপ্রকৃতি উমা, গৌরী প্রভৃতি রূপিণী আদ্যাশক্তি হয়েছেন তাঁর পত্নী ও সৃষ্টি সহায়। সর্বভারতীয় ও সর্বগোত্রীয় দেবতা বলেই নানা গোত্রের কল্লিত গুণ ও শক্তি প্রতীক শিবে নানা বিরুদ্ধ ও বিপরীত গুণের সমাবেশ ঘটেছে। একাধারে রুদ্রত্ব [উগ্রতা] শিবত্ব [কল্যাণ] ব্রহ্মচর্য ও বামাচার, যোগ ও ভোগ, ক্ষমা ও ক্রোধ, গার্হস্থ্য ও সন্ন্যাস, মুক্তি ও বন্ধন, সৃষ্টি ও সংহার, রোগ ও নিদান প্রভৃতি তাঁর গুণ ও শক্তি রূপে পরিকল্পিত।

আমরা জানি, অস্ট্রিক-মঙ্গোল-নেগ্রিটো প্রভাবে আদিকাল থেকে ভারতে নারী, পশু, পাখি, বৃক্ষ প্রভৃতি দেবতারূপে পূজা হয়, ক্রমে লিঙ্গ ও যোনিপূজা, জন্মান্তরবাদ, মূর্তিপূজা, মন্দির উপাসনা, ধ্যান প্রভৃতি সুস্পষ্ট তাৎপর্যে ও লক্ষ্যে সর্বজনীন স্বীকৃতির ভিত্তিতে মনে-মননে, শাস্ত্রে আচারে এবং সমাজে-সংস্কৃতিতে প্রতিষ্ঠা পায়। বেদে পুরাণে ও কাব্যে বহুল চর্চার ফলে এ সবার তাৎপর্য মহিমা মাহাত্ম্য এবং জীবনে প্রয়োগ প্রয়োজন বহুধা, বিচিত্র, দ্বন্দ্বিক ও জটিল হয়ে ওঠে। আদিম ধারণার ও পুরোনোর রেশ ও লেশ থেকে গেছে আর কালে কালে স্থানে স্থানে হয়েছে নতুন নতুন সৃষ্টিকার্যের ও রূপধারণের কল্পনার বিবর্তন। মানুষের ভাব

চিন্তা কর্ম আচরণ প্রয়োজনের প্রসূন বটে, কিন্তু মানুষের সৌন্দর্যবুদ্ধি তাকে কল্পনায় অনুভবে অন্তরে রূপ ও লাভণ্যমণ্ডিত করে অঙ্গে অবয়বে দেয় শোভা। এ কারণেই আপাত ও প্রত্যক্ষ প্রয়োজনটাই মন-মানসের গভীরতর প্রয়োজন মেটায়। কালক্রমে অনুদানে পালনের দায়িত্ব শিবপত্নী উমাই গ্রহণ করেন। সন্তান গর্ভের ধারণ, স্তন্য দান এবং লালন যেমন নারীর কাজ, সে সাদৃশ্যে তেমনি বীজধারণ, অঙ্কুরিত করণ এবং ফল উৎপাদনও বসুমাতা পৃথিবীর কাজ বলে বুঝে নেয়া আদি মানুষের পক্ষে কঠিন ছিল না। তাই উমা এক সময়ে অনুস্বরূপ ব্রহ্মের স্থলে অনুপূর্ণা অনুদারূপে প্রতিষ্ঠা পান। অনুদা দুর্গা এখানে শাকাস্ত্রীর বিবর্তিত রূপ-দুর্গাপূজ্যকালীন কলাবধু পূজা এ সূত্রে স্মর্তব্য। এদিকে শিবের গুণনাম ক্রমেই বৃদ্ধি পেতে থাকে, ধ্বংস্তুরী বৈদ্যনাথ ঈশান ত্র্যম্বক ভূতনাথ ভুজঙ্গধর নীলকণ্ঠ গিরিশ, তারকেশ্বর ভৈরব ধৃজটী ব্যোমকেশ চন্দ্রশেখর ত্রিলোচন প্রমথেশ স্বয়ম্ভু ধানুকী পশুপতি শঙ্কর দিকপাল শঙ্কু ত্রিনয়ন গঙ্গাধর রুদ্র প্রভৃতি নানা গুণনামে ও মাহাত্ম্যে বিচিত্র হয়ে ওঠেন শিব।

এভাবে ভারতের বিভিন্ন অঞ্চলে শিবতত্ত্বের বিভিন্ন বিচিত্র বিকাশ ঘটেছে।

২. বাঙলার শিব : লৌকিক ও পৌরাণিক

আমাদের বাঙলায় শিবের দুইরূপ : লৌকিক ও পৌরাণিক। আমাদের বাঙালী শিবের পরিবারে রয়েছে পত্নী শিবানী কন্যা লক্ষ্মী ও সরস্বতী, পুত্র কামদেব ও গণেশ এবং পরিজনের মধ্যে রয়েছে জয়া-বিজয়া এবং নন্দী-ভৃঙ্গী। এ প্রসঙ্গে স্মর্তব্য যে বাঙলাদেশ ভৌগোলিক, শাস্ত্রিক ও সাংস্কৃতিক দিক দিয়ে প্রত্যন্ত অঞ্চল। সব কিছু যথাসময়ে প্রাপ্তসীমায় পৌছে না, প্রান্তিক মানুষের উপর প্রভাবও তাই সাধারণভাবে থাকে অগভীর ও অস্পষ্ট। ফলে বাঙলাদেশ হাভাতে দুই বাঙালী পরিবারের কর্মকুষ্ঠ কামুক নিরুপায় বিমূঢ় গৃহপতির মতো করেই গৃহস্থ শিব পরিকল্পিত। এ শিবকে ভারতের অন্যত্র পাওয়া যায় না। আমরা জানি ঐতিহাসিক যুগে আর্থবর্জিত বাঙলাদেশ ও অবজ্ঞেয় বাঙালী ছিল বিদেশী বিজাতি ও বিভাষী শাসিত-শোষিত তথা মৌর্য-সুঙ্গ-কপ্প, গুপ্ত-পাল-সেন-তুর্কি-মুঘল-ইংরেজ শাসিত। ব্যবসায়, বড়পদে, অর্থকর বিভিন্ন পেশায় এককথায় আত্মবিকাশে তাদের কখনো অবাধ অধিকার ছিল না। তাই শিবের কিংবা অন্যান্য দেবতার গুণ-মান-মাহাত্ম্য কল্পনায়, তাঁদের সঙ্কট সম্পদের ধারণায়, প্রতিবেশ চেতনায় এবং নিজেদের সংকীর্ণ মনের ও সীমিত আকাঙ্ক্ষার মধ্যে কাঙাল মানুষের কাঙাল মানসের পরিচয় সুপ্রকট। শিব যেহেতু দেবাদিদেব মহাদেব, সেহেতু তাঁকে ভুলে থাকা সম্ভব নয়, সম্ভব নয় তাঁকে অন্য দেবতার প্রতিপক্ষ করা। আবার শিব যেহেতু ভোলানাথ আন্ততোষ আনমনা উদার উদাসীন, সেহেতু শিবকে ভয় করার কারণ থাকেনি বরং তিনি হয়েছেন ভালো লাগার ও ভালোবাসার পাত্র। দেব-মানবের অভয় শরণ এ সরল সদয় দেবতা বুঝে না-বুঝে কত মতলববাজ দেব-মানবকে বর দেন, আর সেই শিববরে ত্রিভুবন জিনে কেউ অনর্থ ঘটায় অন্যান্য দেব-মানবের জীবনে ও সমাজে। যোগে তন্ত্রে তত্ত্বে-পুরাণে-কাব্যে তাই শিব-উমাচরিত বর্ণনা হয়েছে আবশ্যিক ও অপরিহার্য। বৌদ্ধ বিলুপ্তির পরে প্রাচ্যবৌদ্ধ ধর্মঠাকুর পূজারীরা নাথযোগীরা তাদের আদ্যাশক্তি আদিনাথ চন্দ্রনাথ কাশীনাথ ভোলানাথকে শিব নামের আবরণে ধরে রেখেছে [ওঁ নিরঞ্জনং নিরাকারং মহাদেবং মহেশ্বরং] আত্মবিস্মৃত বৌদ্ধজ হিন্দুসমাজেও বৌদ্ধ আদিনাথ চন্দ্রনাথ ভোলানাথ প্রভৃতি বিভিন্ন নামে শিবই। আর মূলে

বজ্রসহজযানী প্রচ্ছন্নবৌদ্ধ তথা বৈষ্ণবসহজিয়ারা ও বাউলরা তেমনি প্রজ্ঞা-উপায় বা বজ্র-তারা প্রভৃতিকে রাধা-কৃষ্ণ আলি-ফাতেমা প্রভৃতি নামের আড়ালে স্মরণ করে। সর্বত্রই আদি 'শিব-শক্তি' তত্ত্বের প্রভাব লঘু-গুরুভাবে রয়েই গেছে। তাই শক্তির প্রভাবেই শিব শক্তিমান। আদ্যাশক্তিই শিব-শক্তির উৎস। ফলে শিব প্রায়ই উমা-গৌরী চণ্ডীর অনুগত থাকেন। এবং নানা কাব্যে পুরাণে জগৎ-কারণ কখনো শক্তি আবার কখনো বা শিব। সৃষ্টির উৎস পুংলিঙ্গ কিংবা নারী যোনি সেই বিতর্কিত বিশ্বাসের প্রভাবেই এমন অনিচ্ছিত ধারণার উদ্ভব ও পরস্পর বিপরীত অভিব্যক্তি সম্ভব হয়েছে। বাঙলা দেবমঙ্গল পাঁচালীগুলোতে শিব কুচিং প্রকৃতিস্থ, শক্তিমান, দায়িত্বসচেতন ও ব্যক্তিত্বসম্পন্ন, চণ্ডী উমা কালী গৌরী শিবানী নামের তাঁর পত্নীই সর্বত্র নিয়ন্ত্রী শক্তি। নির্গুণ শিব অবহেলিত, আর তাগবন্ত্যের সগুণ ক্রুদ্ধ শিব, অসুর সংহারক দক্ষ-যক্ষ বিনাশক শিবই কেবল অনন্য ব্যক্তিত্বসম্পন্ন। মঙ্গলকাব্যেরও কোথাও কোথাও শিব পরমারাধ্য—যেমন মনসামঙ্গলে চাঁদের কিংবা চণ্ডীমঙ্গলে ধনপতি সদাগরের। আবার ভারতচন্দ্রের অনুদামঙ্গলে শিব দেবতা তো ননই, এমনকি নিরীহ গৃহস্থ মানুষও নন—কখনো মাথাপাগলা বুড়ো, অবিবেচক স্বামী ও পিতা, কখনো অস্থিরচিত্ত ভিখারী বিদূষক, কখনো বা গাঁজার কামুক। রামেশ্বর ভট্টাচার্যের শিবায়নেও শিব গুণহীন দরিদ্র গৃহস্থ।

লিঙ্গরূপী কিংবা শিলারূপী শিব ক্রমে ত্রিশূলধারী প্রমূর্ত শিবরূপে মন্দিরস্থ হন। ভারতচন্দ্রের বর্ণনায় শিবের আঙ্গিকরূপ ও সজ্জা একগুণে

গলে দোলে মুণ্ডমালা পরিধানে বাঘ ছাল জড়িতদীর্ঘ জটাজুট কণ্ঠে শোভে কালকূট
হাতে মুণ্ড চিতাভস্ম গায় চন্দ্রকলা ললাটে শোভিত
ডাকিনী যোগিনীগণ প্রেত ভূত অর্ষগণ ফণীবালা ফণীহার ফণীময় অলঙ্কার
সঙ্গে সঙ্গে নাচিয়া বেড়ায়। শিরে ফণী, ফণী উপবীত।

বৈরাগ্য প্রবণ শিব আশুতোষ নির্লোভ। বিয়ের সময়ে ধনী স্বস্তর হিমালয় ধনরত্ন হাতীঘোড়া যৌতুক স্বরূপ দিতে চাইলে শিব অসংকোচে বলেন :

কেবল ভিক্ষার অন্ন ঘরে নাহি কড়া
কিমতে পুষিব আমি এই হস্তীঘোড়া।

হিমালয় জামাতাকে জমি দিলেন, তখনো 'শিব মিছে কাজে ফিরে, নাহি চাষবাস।' এমন জামাতাকে শাপড়ী আর কতকাল 'অনুবস্ত্র যোগাইবে বারমাস।' এ কর্মকুষ্ঠ নেশাখোর দায়িত্বহীন পুরুষ যৌতুক প্রত্যাখ্যান করেন, তাঁর আসক্তি ভাঙধূতুরায়। তাই তিনি স্বস্তরকে বলেন, 'ভাঙ্গ থুইয়া খাইবারে দেও একবুলি।'।

তোলা কত বিষ দেও জটা ভাস্কের গুড়া।

যারে খাই যুবা হএ আদ্য কালে বুড়া।

যে-বিরুদ্ধ পরিবেশে পর্যুদস্ত পরাভূত মানুষ আশা-ভরসাহ্যত হয়ে জীবনের মূল্য-মর্যাদা হারিয়ে নিঃসম্মল নির্বিকার জীবনে আপাতত নির্বেদ স্বস্তি উপভোগ করে, আত্মসম্মানবোধ থাকে না বলেই তখন সে-পরিবেশেই তার ভিক্ষায় চুরিতে ও মিথ্যাভাষণে অগ্রহ জাগে। নির্জিত চিরশোষিত পীড়িত বাঙালীর মানসসন্তান এবং জাতীয় প্রতীক ও প্রতিভূ দেবতা শিবঠাকুরও

অঙ্গে অন্তরে তেমনি নিঃশ নির্লক্ষ্য জীবনের প্রথম রূপে চিত্রিত। তাই এ শিব বলেন 'ভিক্ষাদুখে সুখে আছি অকিঞ্চন পণে। চাষ চষে বিস্তর উদ্বগ পাব মনে।'

তাছাড়া অন্য আশঙ্কাও রয়েছে 'বাব করে সকলি বেচিয়া লয় রাজা।'

কন্যা সমর্পণের সময়ে শ্বশুর হিমালয় জামাতার হাত ধরে অনুরোধ করেছিলেন— কুলিনের পো, তোমায় কি বলব আর-আমার কন্যাকে— হাঁটু ঢাকি বস্ত্র দিও পেট পুরে ভাত।' শিব সে অনুরোধ রাখবার চেষ্টা কোনদিনই করেননি। গয়নার আবদার করে স্ত্রী যখন বলেন— লজ্জায় লোকের মাঝে লুকাইয়া রই। হাতনাড়া দিয়া বাড়া কথা নাহি কই— পাছে নিরাভরণ হাত অন্যের চোখে পড়ে এ ভয়ে, তখন অপদার্থ স্বামী লজ্জিত হওয়ার পরিবর্তে রুষ্ট হয়ে আক্ষালন করে বলে— ভিখিরীর ভাষা হয়ে ভূষণের সাধ? বাপ বটে বড়লোক বল গিয়া তারে। জঞ্জাল ঘুচুক যাও জনকের ঘরে।' (রামেশ্বর) শিব কেবল ভাঙ-ধুতুরাসেবী নন, কামুক শিব বাগদিনী-ডোমনী-কোচনী নারীর প্রতিও আসক্ত। এ দুই নেশার প্রভাবে তাঁর কর্মনিষ্ঠা, কর্তব্যবুদ্ধি ও দায়িত্বজ্ঞান বিনষ্ট। তাই স্ত্রীর কিংবা হিতৈষীর ভালো পরামর্শও তাঁর কানে মনে পশে না :

পূর্বে উদাসীন ছিলে গৃহী হলে এবে আর নাঞি আটে গোসাঞি ভিক্ষার ভাত।

আর নাকি ভিক মাগা শোভা করে শিবে। চাষ চষ মহাপ্রভু সুখে অন্ন খাব।

তখন ছিলে দুই প্রাণী এখন পাঁচ সাত

উদাসীন শিব ঘরও ছাড়েন না, গৃহীও হন না। চাষ শুরু করেন, যত্নে শেষ করেন না। পরিবার পোষণের জন্যে ভিক্ষায় যান বটে, কিন্তু ভিক্ষার চাল সংগ্রহে তেমন গা করেন না। খেতে বসে কিন্তু শিব ঘরে ভাত-ব্যাঞ্জন আছে কি নেই তা বিবেচনা করেন না। এ অবিবেচক স্বামী ও পিতা পেট পুরে খেতে চান, গৃহপেটো তিনজনে বারো মুখে পাঁচ হাতে খায়। এই দিতে এই নাই হাড়ী পানে চায়।' গৃহপেটের তৃপ্তি তৃষ্টি নেই) কেবল পাই পাই খাই ভাব। তাই 'আরো অন্ন আন, অন্ন আন বলে হাঁক' দেন। কেবল তা-ই নয়, কন্যাদের কান ফোঁড় উৎসবের প্রয়োজনীয় সামগ্রী যথাসময়ে সংগ্রহ করবেন কথা দিয়েও নিজে নিষ্ক্রিয় নির্বিকার থেকে পত্নী পার্বতীকে সমাজে বিপন্ন ও লজ্জিত করতে এ স্বামীর বাধে না, বলেন 'তেল সিদ্ধুর পান গুয়া পায়ের' লাগবে না, কান ফোঁড় কাজ শেষ হওয়ার আভাস পেলেই নিমজ্জিত মহিলাদের সুমুখে 'আমি দাঁড়াব লেংটা হয়ে'— তখন সব পালাবে। এ পরপ্রবঞ্চনায় কত বড়ো আত্মপ্রবঞ্চনা রয়েছে, রয়েছে কত গভীর দারিদ্র্যের অসহায়তার ও করুণ অসামর্থ্যে রস্বাক্ষর, তা ভাষায় বোঝানো যাবে না। এমনি করে মেয়েকে বারোমাস দুঃখে রাখেন বলেই শান্তুড়ী মেনকা ক্ষুব্ধ হয়ে বলেন— 'লোকে মন্দ বলে বলুক, এবার জামাই এলে মায়ে ঝিয়ে করবে ঝগড়া, জামাই বলে মানব না।'

চিরকাল বিদেশী বিজাতি বিভাষী বিজিত শাসিত ও পীড়িত বলেই নিঃশ নিরন্ন আত্মপ্রত্যয় ও আত্মমর্যাদাবোধহীন বাঙালী কৃষক নিঃসংকোচে পারে ভিক্ষা বৃত্তি গ্রহণ করতে, নির্বিধায় প্রতারণা প্রবঞ্চনা করতে, চুরির হাত পাকাতে আর কৌশলে হিসেবে মিথ্যাভাষণকেই আশ্রয় করতে। বাঙালীর এসব দোষ প্রায় আবহমান কালের। বাঙালী মনীষার প্রসূন এ শিব কল্পনায় বাঙালীর চরিত্রের ও মানসের মুখ্য বৈশিষ্ট্যগুলো প্রতিফলিত হয়েছে।

মূলে সৃষ্টির উৎস 'লিঙ্গ' রূপে কল্পিত শিবের কামুক শিবে রূপান্তর আসলে আদি ধারণাই অবচেতন অনুসৃতিজাত। বলেছি সব মঙ্গলকাব্যের উপক্রমে হর-পার্বতীর বন্দনা ও কিছু

পরিচিতি রয়েছে। শিবায়ন ছাড়াও ভারতচন্দ্রের অনুদামঙ্গলের দেবীখণ্ডে হর-গৌরীর বিবাহ, দাম্পত্য ও গার্হস্থ্য জীবন বিস্তৃতভাবে বর্ণিত। অভাবক্লিষ্ট প্রান্তিক চাষীর বৈষয়িক ও সামাজিক জীবনের বাস্তবানুগ আলোচনা রয়েছে দেবীখণ্ডে। নিত্য-অভাবক্লিষ্ট প্রান্তিক চাষীর বৈষয়িক ও সামাজিক জীবনের বাস্তবানুগ আলোচনা রয়েছে দেবীখণ্ডে। নিত্য-অভাবদুষ্ট পরিবারের মানুষের মন থাকে ক্ষুব্ধ, মেজাজ হয় খিটখিটে, কথায় কথায় বাধে ঝগড়া, মুখে মুখে থাকে ঝোঁটা কট্টে থাকে বিষ, ঠোঁটে থাকে গালি। হর-গৌরীর সংসারেও ছিল তা-ই ভারতচন্দ্রের দেবীখণ্ড কিংবা রামেশ্বররের শিবায়ন আধুনিক গদ্যে রূপায়িত হলে আজকের গ্রামীণ চরিত্র ঘরের ও সমাজের একটা বাস্তবচিত্র সম্বলিত উপন্যাস হয়ে উঠবে বলেই আমাদের ধারণা।

বাঙলার ও বাঙালীর এ লৌকিক শিব নামে দেবতা, ভাবে-চিন্তায়-কর্মে আচরণে আবহমান বাঙালী, তাঁর দাম্পত্যে, তাঁর বৈষয়িক জীবনে, তাঁর সুখে-দুঃখে, হাসি-কান্নায়, লাভ-ক্ষতিতে তিনি অভাবক্লিষ্ট নিঃস্ব নিরন্ন ভ্রষ্টচরিত্র বাঙালী গৃহস্থ। তাই দেবতা থাকেন নি তিনি, নিত্যদেখা, নিত্য জ্ঞানা আত্মীয় বন্ধু পরিজন তিনি, সে জন্যেই তিনি এতো আপন, এতো প্রিয়। তাঁর সঙ্গে গ্রামীণ গৃহী বাঙালীর ধন-মান ও শ্রেণীগত কোন ব্যবধান নেই।

মঙ্গলকাব্যে যে আমরা দেবকথার অবরণে আবহমান কালের বাংলাকে ও বাঙালীকে পাই, তার কারণ বাঙালীর দেবতা বাঙালীরই আশা-আকাঙ্ক্ষার, মনন-চিন্তনের, চাওয়া পাওয়ার প্রমুখ প্রতীক ও প্রতিভূ। এ কারণেই রবীন্দ্রনাথের ভাষায় শিবচরিত্রে ‘বীরত্ব, মহত্ব অবিচলিত ভক্তি ও কটোর আত্মত্যাগের আদর্শ নাই।’ এজন্যেই শিব মাটির মানুষ, দরিদ্র ও কর্মকুষ্ঠ সুখসন্ধানী গৃহী। বাস্তবে নিঃস্ব মানুষের সুখ হচ্ছে মরীচিকা- তাই কামে ভাগে গাঁজায় সিদ্ধিতে আত্মভোলা হয়ে থাকা।

শিবের ছড়া, শিবের গীত, শিবের গাজন, শিবের গম্ভীরাগান ক্রমবিকাশের ধারায় পরিণামে শিবমঙ্গল বা শিবায়ন নামে পূর্ণাঙ্গ পাঁচালী আকারে রচিত হয়েছে সতেরো শতক থেকে। অধিকাংশ কবি অবশ্য আঠারো শতকেরই।

চতুর্থামে পৌরাণিক শিবের মাহাত্ম্য প্রচারে উদ্যোগী হয়েছিলেন অন্তত দুজন কবি চতুর্থাম মৃৎল অধিকারে আসার পরে, একজন রত্নদেবের অপর জন রামরাজা। এঁদের গ্রন্থের নাম যথাক্রমে ‘মৃৎলুন্ধ’ ও ‘মৃৎলুন্ধ’ সম্বাদ।

শিবের গীত গেয়ে শৈব ভিখিরীরা ভিক্ষা করত। ষোল শতকের বৃন্দাবন দাসের চৈতন্যভাগবতে এর সাক্ষ্য রয়েছে :

‘একদিন আসি এক শিবের গায়ন আইল করিতে ভিক্ষা প্রভুর (চৈতন্যের) মন্দিরে
ডমরু বাজায় গায় শিবের কথন। গাইয়া শিবের গীত বেড়ি নৃত্য করে।

রংপুর জেলার নাথযোগীদের মধ্যে যে শিবের ছড়া বা শিবগীতি চালু রয়েছে, তাতে শিবপত্নী চণ্ডীর গয়নাহীনতার ক্ষোভ ও লজ্জার কথা বর্ণিত :

চার ছেইলার মাও হৈলাম তোর ঘরে
দয়া করি চার খানা শাখা নাই পিঙ্কাইস মোরে।
ভাতুর আইসে শ্বশুর আইসে অনুরাঙ্কি দাওঁ তारे
আমার হাত মুড়া, গোসাঁই তা লজ্জা রাগে তোরে।

শূন্যপুরাণে পাই চাষী শিবের বর্ণনা। শিবানী বলছেন :

আম্মার বচনে গোসাঞি তুমি চষ চাষ কাপাস চষহ পরভু পরিব কাপড়
ঘরে অনু থাকিবেক পরভু সুখে অনু খাব কত না পরিব গোসাঁই কেওনা বাগের ছড়।
অন্নর বিহনে পরভু কত দুঃখ পাব।
বাঙালীর ভাত-কাপড়ের চির অভাবের কথাই এখানে পরিব্যক্ত।

বিভিন্ন শাখার মঙ্গলপাঁচালিতেও দক্ষযজ্ঞ বর্ণিত রয়েছে। শিবমঙ্গলও দক্ষ-যক্ষ দিয়ে শুরু। সতীর দেহত্যাগ, হিমালয়ের ঘরে গৌরীৰূপে তাঁর জন্ম, শিবের সঙ্গে বিবাহ, দাম্পত্য, শিবের ভাঙ-গাঁজা-সিদ্ধি-ধুতুরায় আসক্তি, কামুক শিবের দারিদ্র, শিবের কৃষিকর্ম, কামুক শিবের কোচনী-ডোমনী-বাগদিনী প্রীতি, কৃষিকর্মে মশা মাছি জোক প্রভৃতির উপদ্রব, বাগদিনীবেশে গৌরীর ছলনা, দাম্পত্য কলহ, অভিমানে গৌরীর স্বামীগৃহ ত্যাগ, নারদের মধ্যস্থতা, পিতৃগৃহে গৌরী, শাখারীৰূপে শিবের শ্বশুরবাড়ি গমন, পার্বতীকে শাখা পরিয়ে মানভাঙানো এবং পুনর্মিলন প্রভৃতিই শিবমঙ্গলে বর্ণিত বিষয়। এগুলো বলতে গেলে খণ্ডচিত্রের অগ্রথিত সমষ্টি।

৩. কবিগণ

১. রামকৃষ্ণ রায়

শিবমঙ্গলের জ্ঞাত আদি কবি হচ্ছেন রামকৃষ্ণ রায়। ঐর কাব্যে কালিকাপুরাণ, বৃহন্নারদীয়পুরাণ, স্বন্দপুরাণ প্রভৃতি বিভিন্ন পুরাণোক্ত শিবকাহিনী সংকলিত হয়েছে। 'শিবের পরম আজ্ঞা মন্তকে বন্দিয়া' কাব্য রচনার শুরু হলেও সরস্বতীই তাঁকে স্বপ্নে কবিভূষণিত ও কাহিনী যুগিয়েছেন :

'ভারতী দিলেন উক্তি নহে মোর নিজশক্তি/স্বপ্নের ইঙ্গিত অনুগ্রহ।' বন্দনাংশে কবির আত্মপরিচিতি সূত্রে জানা যায় : তাঁর পিতামহ ও পিতামহীর নাম যশচন্দ্র ও নারায়ণী এবং নারায়ণীর সতীনের নাম সরস্বতী। মাতামহের নাম সূর্যমিত্র। পিতা কৃষ্ণদাস এবং মাতা রাধাদাসী। এবং 'কায়স্থ দক্ষিণ-রাঢ়ি বংশেতে উৎপত্তি, তিন গোত্র কশ্যপ আমার দেবতা প্রকৃতি। আর মিরাস বন্দিনু বাস্তব রসপুর দেশ।' ভণিতা-

রামচন্দ্র দাস গায় শিবায়ন। কবিচন্দ্র ভণে শিব হৈল সাক্ষাৎ। দ্বিজগণে রামকৃষ্ণ করে নিবেদন।

রামকৃষ্ণ দাস গান শিবের মঙ্গল শূদ্রের রচনা বলিয়া না করিবে ভ্রম।

কথিত আছে যে ১৬৮৪ খ্রীস্টাব্দে নব্বই বছর বয়সে কবি দেহত্যাগ করেন। বর্ধমানরাজ কৃষ্ণরাম কবির রসপুরের বাস্তব দখল করে কবিকে বাস্তবচ্যুত করার পরই কবির মৃত্যু হয়। রামকৃষ্ণের শিবমঙ্গল সতেরো শতকের প্রথম পাদের ত্র্যস্তিকালেই রচিত বলেই বিদ্বানদের ধারণা। মোট ছাব্বিশটি পালায় বিভক্ত শিবায়সেনর বা শিবমঙ্গলের শেষের দিকে মনসার সমুদ্রমহুনের, বলিরাজার, অগস্ত্যের ও সগর রাজার, গঙ্গার ত্রিপুর ও তারক অসুরের, অন্ধকের, পরশুরামের, রাবণের ও বাণরাজের উপাখ্যানগুলো বর্ণিত হয়েছে। পাঁচালীর মধ্যে কয়েক স্থলে

গদ্যবাক্যে কাহিনীর নির্দেশ রয়েছে। যেমন- ‘পার্বতী ভাগীরথী স্নান করিতে গেলেন এতে সময়ে শঙ্কর মনের দুঃখ নারদকে কহিতেছেন অবধান করহ। মহিষ পর্বত গিয়া পূর্বকল্পের কথা ক্রোধকে কহিতেছেন অবধান করহ’।^১ কবির উপাধি ছিল কমিচন্দ্র। ১৩৪৮ শকে অনুলিপিকৃত পুথির পুষ্পিকায় ‘শ্রীকবিচন্দ্র বিরচিতা শিবসঙ্গীত পুস্তক সমাপ্তা’ পাওয়া যায়।

২. কবিচন্দ্র শঙ্কর চক্রবর্তী

রামায়ণ, মহাভারত, ভাগবত অনুবাদক শীতলামঙ্গল প্রণেতা কবিচন্দ্র শঙ্কর চক্রবর্তী একখানা শিবায়নও রচনা করেছিলেন। তাঁর ভণিতার ধরন এরূপ :

১. শ্রীকবিশঙ্কর গায় হরপদ আশে। ৩. সুকবি শঙ্কর গান ভাবি ত্রিলোচন।
২. শিবের চরণ আশে শ্রীকবিচন্দ্র ভাসে। ৪. হরপদ আছে দ্বিজ কবিচন্দ্র গায়।

কবি মল্লভূমের সামন্ত ‘বীরসিংহ মহারাজা অবনীতে মহতেজা’র সময়ে বিষ্ণুপুর এলাকার পানুয়া গ্রামে বসে ১৬৮০ খ্রীষ্টাব্দে দিকে তাঁর এ পাঁচালী রচনা করেন বলে অনুমান করা হয়। কবির জন্ম হয় পানুয়ার এক ব্রাহ্মণ পরিবারে।

৩. রামেশ্বর ভট্টাচার্য

আঠারো শতকের কবি রামেশ্বর ভট্টাচার্য মুদ্রিত পাঁচালীর মাধ্যমে লৌকিক মিবের সার্থক রূপকার হিসেবে বিশেষ খ্যাতিমান ও জনপ্রিয়। তাঁর পাঁচালীর নাম শিবায়ন বা শিবসংকীর্তন। কবির বংশ পরিচিতি এরূপ : ভট্টনারায়ণ শূনির বংশজ যতি নারায়ণ চক্রবর্তী- গোবর্ধন চক্রবর্তী, পত্নী রূপবতী- রামেশ্বর ও ভাই শঙ্করাম। রামেশ্বরের দুই স্ত্রী- সুমিত্রা ও পরমেশ্বরী, নিবাস অযোধ্যা নগরী এবং পূর্ববাস

‘পূর্ববাস বিষ্ণুপুরে হেমৎসিংহ ভাঙে ঘরে
রাজারাম সিংহ কৈল প্রীত।
স্থাপিয়া কৌশকী তটে বরিয়া পুরাণ পাঠে
রচাইল মধুর সঙ্গীত।

অতএব ঘাটালের যদুপুর গাঁ থেকে বর্ধমানের সামন্ত শোভাসিংহের ভাই হেমৎসিংহ উৎখাত করলে কবি রামসিংহের অনুগ্রহে কৌশকী তীরে অযোধ্যানগরীতে নিবশিত হয়ে রামসিংহের আগ্রহেই পাঁচালী রচনা করেন। মনে হয় শিবায়ন রচনার শুরু রামসিংহের আমলে এবং সমাপ্তি ঘটে তাঁর পুত্র রাজা যশোবন্ত সিংহের আমলে। মেদিনীপুরের কর্ণগড়ের রাজা রঘুসিংহের পুত্র রাজা রামসিংহ, তাঁর পুত্র যশোবন্ত সিংহ- ‘তস্যপোষ্য (যশোবন্তের) রামেশ্বর তদাশ্রয়ে কর্যা ঘর। বিরচিল শিব-সংকীর্তন’। শিবসংকীর্তনে প্রাপ্ত রচনা কালটি লিপিকর প্রমাদদুষ্ট :

‘শকে হল্য চন্দ্রকলা রাম করতলে
বাম হৈল্য বিধিকান্ত পড়িল অনলে।
সেই কালে শিবের সঙ্গীত হৈল সারা।

^১ বাংলা মঙ্গলকাব্যের ইতিহাস : আওতাধ ভট্টাচার্য, ৬ষ্ঠ সং, পৃঃ ২১৮।

১৬৫৬ শকে বা ১৭৩৪-৩৫ খ্রীস্টাব্দে যশোবন্ত সিংহ ঢাকায় দিওয়ান নিযুক্ত হয়েছিলেন বলে রামগতি ন্যায়রত্ন তাঁর ‘বঙ্গভাষা ও সাহিত্য বিষয়ক প্রস্তাব’ নামের গ্রন্থে উল্লেখ করেছেন, ‘বঙ্গভাষা ও সাহিত্য’ গ্রন্থে দীনেশচন্দ্র সেনও ১৭৬৩ খ্রীস্টাব্দে লিপীকৃত শিবায়ন পুথি প্রাপ্তির কথা বলেছেন। ১৭৩৪-৩৫ খ্রীস্টাব্দের পূর্বেও যশোবন্ত সিংহ মুর্শিদকুলি খানের (১৭১২-২৭ খ্রীঃ) অধীনে কোন পদে নিযুক্ত ছিলেন বলে জানা যায়। যশোবন্ত সিংহ কর্ণগড়ে বসেই কবিকে প্রতিপোষণ দেবেন এমন কোন কথা নেই। অতএব যশোবন্ত সিংহের পিতৃ বিয়োগের কিছু কাল পরেই এ কাব্য সমাপ্ত হয়। শকে হল্য চন্দ্রকলা রাম করতলে’-এর থেকে চন্দ্রকলা-১৬, কর-২ তলে (পরে অর্থে) রাম-৩ ধরলে ১৬২৩ শকে বা ১৭০১-০২ খ্রীস্টাব্দে শিবসংকীর্তন রচিত বলে মনে করা অসঙ্গত নয়।

দুটো ভণিতা

১. ভব ভাব্য ভদ্রকাব্য ভণে রামেশ্বর
২. যশোবন্ত সিংহে দয়া কর হরবধু
রচে রাম অক্ষরে অক্ষরে ক্ষরে মধু।

৪. দ্বিজ কালিদাস

দ্বিজ কালিদাস’ ‘কালিকাবিনাস’ নামে এক নিষ্কটরিত রচনা করেন। সংস্কৃতপুরাণ ও কালিদাসের ‘কুমারসম্ভব’ কাব্যের অনুসৃতি রয়েছে এর পাঁচালিতে। এ পাঁচালীতে আগমনী আর বিজয়াগানও রয়েছে। এতে গুরুত্ব দিয়েই হয়তো কবি ‘কালিকাবিনাস’ নাম রেখেছেন তাঁর কাব্যের। কবি সম্ভবত আঠারো শতকের শেষপাদের লোক।

৫. দ্বিজ কালিদাস

দ্বিজ হরিহরপুত্র দ্বিজ মণিরাম ওরফে দ্বিজ সুন্দর বা সুন্দর রায় বৈদ্যনাথমঙ্গল প্রণেতা। কবি সম্ভবত সিলেটবাসী ছিলেন। দেওঘরের বৈদ্যনাথ শিবই বৈদ্যনাথমঙ্গলে বর্ণিত বিষয়। এই বৈদ্যনাথ কুষ্ঠ অন্ধত্ব প্রভৃতি রোগের নিরাময় দাতা :

অন্ধ রোগী জরা ব্যাধি কুষ্ঠেত বিখ্যাত

দরশন মাত্রে মুক্ত করে জগন্নাথ।

স্থানিকপ্রভাবে এ দেবতা সূর্য ও ধর্মঠাকুরের প্রতিক্রম।

৬. লক্ষণ বা বিনয় লক্ষণ

ইনি ‘শিবের গীত’ নামের পাঁচালী রচয়িতা। এটি অঙ্গে ও অন্তরে গীতিকা। কাহিনীও অভিনব। গৌরীর রূপমুগ্ধ চার দৈত্যের মুখে গৌরীর রূপলাবণ্যের কথা শুনে শিব ভঙ্গীকে সঙ্গে নিয়ে পুষ্পাদ্যানের অশোকতরু মূলে এসে পার্বতীকে পেয়ে গান্ধর্ব মতে বিয়ে করেন। গোপন বিয়ের কথা মুনীদের জানা ছিল না বলে তাঁরা গৌরীর সতীত্বে সন্দেহান হন, ফলে পার্বতীকে সীতার

মতোই সতীত্বের পরীক্ষায় উত্তীর্ণ হতে হয়। তারপর শিবের সঙ্গে তাঁর প্রকাশ্যে আনুষ্ঠানিক বিয়ে হলো। উপদেশাত্মক ও গীতিকার কবি আঠারো শতকের শেষের দিকে কিংবা উনিশ শতকের গোড়ার দিকে বর্তমান ছিলেন বলে মনে হয়। আঠারো ও উনিশ শতকের বিজ্ঞ ভগীরথ, রাজা পৃথ্বীন্দ্র, হরিচরণ আচার্য, প্যারীলাল মুখোপাধ্যায়, বিজ্ঞ রামচন্দ্র, প্রাণচন্দ্র, বিজ্ঞ সৃষ্টিধর প্রভৃতিও হরচরিত্র রচনা করেন।

৪. পৌরাণিক শিব : মৃগলুক ও মৃগলুক সন্বাদ

গল্পসার-হস্তিনার রাজা শৈব মুচুকুন্দকে শিব চতুর্দশীতে ব্রত উদ্‌যাপন উপলক্ষে তাঁর রানী এ কাহিনী শুনিয়েছিলেন। শিবপুরাণ, দেবীভাগবত, ব্রহ্মপুরাণ, পদ্মপুরাণ, বৃহন্নারদীয়পুরাণ প্রভৃতিতে শৈব মুচুকুন্দ রাজার প্রসঙ্গ রয়েছে।

ইন্দ্রের শাপে বিদ্যাধর চিত্রসেন মর্ত্যে ব্যাধরূপে জন্মগ্রহণ করে। একই বনে নিত্য শিকারের ফলে অরণ্য পশুবিরল হয়ে উঠেছে। একদিন তাই এক মৃগের পিছু ধাওয়া করতে করতে রাতি হয়ে গেল। ফলে চিত্রসেন স্বাপদ ভয়ে এক বেলগাছে আশ্রয় নিল। তন্দ্রায় পড়ে যাওয়ার আশঙ্কায় জেগে থাকার জন্যেই চিত্রসেন বেলপাতা ফেলছিল ছিঁড়ে ছিঁড়ে। গাছের পাদমূলে ছিল শিবলিঙ্গ। ভক্তবৎসল আশুতোষ শিব আত্মেই মৃগয়ায় সাফল্যের বর দিলেন চিত্রসেনকে। বরপুষ্ট চিত্রসেন এবার তাঁর শাপমুক্তির কারণ স্বরূপ মৃগ-মৃগীরাপী শাপগ্রস্ত ভদ্রসেন ও রত্নাবলীর সাক্ষাৎ পেল। আর তাদের জিনজনেরই শাপমুক্তি হলো।

চট্টগ্রামেই শিবচতুর্দশীর মাহাত্ম্যজ্ঞাপক কাহিনী সম্বলিত মৃগলুক নামের পাঁচালী রচিত হয়।

১. রাম রাজা

মৃগলুক রচয়িতা রামরাজা সম্ভবত সতেরো শতকের প্রথমার্ধের লোক। ঐর মৃগলুক বিভিন্ন পালায় নয় অধ্যায়ে বিভক্ত। ভণিতা সূত্রেই রয়েছে অধ্যায়ের উল্লেখ। যেমন :

১. শঙ্কর কিঙ্কর শিশু রামরাজে গাএ

২. শঙ্কর কিঙ্কর রামরাজ ভণে

মৃগলুক গাইল প্রথম অধ্যাএ।

দ্বিতীয় অধ্যায় নরক লক্ষণে। ইত্যাদি

২. বিজ্ঞ রতিদেব

বিজ্ঞরতিদেব 'মৃগলুক সন্বাদ' প্রণেতা। তিনি গ্রন্থে বন্দনাংশে আত্মপরিচয় দিয়েছেন পিতা গোপনীনাত্ত বন্দম মাতা বসুমতী (বা মধুবতী) ধরণী লুপাইয়া বন্দম যত গুরুজন।

জন্মস্থল সুচক্রদত্তী চক্রশালা খ্যাতি।

অল্পপূর্ণা শান্তডী বন্দম মহেশ শ্বশুর

জ্যেষ্ঠ দুই ভাই বন্দম রাম নারায়ণ

মন্ত্রগুরু দয়াশীল মোক্ষদা ঠাকুর।

এই কবি প্রাচীন আরাকানী শাসনকেন্দ্র চক্রশালা চাকলার সুচক্রদত্তী গ্রামে জন্মগ্রহণ করেন। এ গ্রাম এখন পটিয়া মহকুমার শাসনকেন্দ্র পটিয়া-সংলগ্ন গ্রাম। এ গ্রাম আবদুল করিম সাহিত্যবিশারদের ও বর্তমান লেখকের জন্মস্থল।

শিবচতুর্দশী মাহাত্ম্যাদ্বারা কাব্য আর রচিত হয়নি। লৌকিক শিব কাহিনী কালক্রমে পুরাণ প্রভাবিত হয়ে সরল্য, বাস্তবতা ও মানবিক রূপগুণ হারিয়েছে অস্ত্রে ও অন্তরে। এমনটি ঘটেছে সব মঙ্গলকাব্যদ্বারা। যতই দিন গেছে, বৌদ্ধ প্রভাব হয়েছে স্ত্রান ও ক্ষীণ আর স্মৃতির ও পুরাণের প্রভাব হয়েছে প্রবল, কাহিনীও বিভিন্ন কবির হাতে অল্প-বিস্তর বিকৃত বিশিষ্ট ও বিস্তৃত হয়েছে নানাভাবে। ভাষাও হয়েছে সংস্কৃত শব্দবহুল ও পরিবর্তিত। এটাকে মধ্যযুগীয় নিয়মে ভাষা-সাহিত্যের বিকাশ ও অগ্রগতি হলেই মানতে হবে।

অন্যবিষয়ে নিয়ে একখানা পঞ্চগননমঙ্গল রচিত হয়েছিল। কার্তিকের হাতে পরাজিত তারকবীরের উদ্ধারের জন্যে দেবতাদের অনুরোধে শিব পঞ্চমুখে গান ধরলেন। এ বিগলিত সঙ্গীতলহরী থেকে জন্ম হল ব্যাধির দেবতা পঞ্চগননের। তারপর মনসার মতোই পঞ্চগনন মর্ত্যে অবতীর্ণ হয়ে অবন্তীরাজকে দিয়ে অবশেষে তাঁর পূজা প্রচার করালেন। মণিময় ও মালতী হল এই পাঁচালীর মুখ্য চরিত্র। পঞ্চগননমঙ্গলের কবি দ্বিজ রঘুনন্দন সম্ভবত আঠারো শতকের শেষপাদে এ পাঁচালী রচনা করেছিলেন। কবির গৌরঙ্গ ভক্তি দেখে মনে হয় তিনি বৈষ্ণব ছিলেন। এ পাঁচালীতে একটা বারমাসীও রয়েছে।

AMARBOI.COM

চতুর্দশ অধ্যায় আপোসমুখী : পীর-পাঁচালী

১. শাস্ত্র ও সমাজের বিবর্তনধারা

জীবন-জীবিকার ক্ষেত্রে যখন অনিশ্চয়তা দেখা দিয়েছে, নিরাপত্তা বিঘ্নিত হয়েছে কিংবা বিঘ্নিত হওয়ার আশঙ্কা জেগেছে, তখনই মানুষ বুঝে না-বুঝে প্রাণীসুলভ সহজাত বৃত্তি-বুদ্ধি চালিত হয়েই বেঁচে বর্তে থাকবার জন্যে প্রয়াসী হয়েছে। সভ্যতার ইতিহাস তার সাক্ষ্য। ব্যক্তিজীবনের প্রবৃত্তি যৌথ জীবনেও প্রকটিত হয়ে সামাজিক চিন্তা-চেতনা ও কর্ম-আচরণ পরিচালিত ও নিয়ন্ত্রিত করে। এখনকার বাঙলা নামের ভৌগোলিক এলাকার দু'হাজার বছরের মানুষের জীবন-জীবিকা সম্পৃক্ত চিন্তা-চেতনার ও কর্ম-আচরণের বাহ্য ও স্থূল রূপ আর স্বরূপ অনুধাবন করলে আমরা দেখতে পাব এ অঞ্চলের মানুষও নানা সমস্যার ও যন্ত্রণার মুখে বাঁচার গরজেই সাধ্যমতো একটা উপায় বের করেছে। প্রবলতর শক্তির মোকাবেলায় এ মানুষ কখনো কখনো অরণ্যাশ্রিত হয়েছে, কখনো বা নিজেরা প্রবল হয়ে সমতলে নেমেছে(হয়েছে কৃষিজীবী। মঙ্গোলরা কিরাতীয় জীবন পরিহার করে এবং অস্ট্রিক-ভেড্ডিডরা নিষাধ নাম ঘুচিয়ে হয়েছে কৃষিজীবী ও পশুপালক। অরণ্যচারী মানুষ হয়েছে প্রান্তরবাসী। ক্রমে গড়ে উঠেছে গ্রাম ও নগর। অবসিত হয়েছে গোত্রসর্দারতন্ত্র। শাস্ত্র-সমাজ-সংস্কৃতির ও প্রশাসনের রূপও হয়েছে বারে বারে পরিবর্তিত ও বিবর্তিত।

জৈন-বৌদ্ধ যুগে নন্দরা মৌর্যরা কথরা সুঙ্গরা পুণ্ড্র নিয়ে এলেন আর্যভাষা ও জৈন-বৌদ্ধ ধর্ম আর মগধের ন্যায়নীতি ও প্রশাসন ব্যবস্থা। তারপরে গুপ্তরা রাড়ে পুণ্ড্র বঙ্গে নিয়ে এলেন ব্রাহ্মণ্য স্মৃতি-সংহিতা নিয়ম-নীতি উৎসব-পার্বণ। তৃতীয় তরঙ্গে এলেন পুণ্ড্রের উত্তর-পশ্চিম প্রান্ত সম্ভূত পালের মগধ থেকে আবার বৌদ্ধ শাস্ত্র ও আচার-সংস্কার নিয়ে।

এঁদের ভয়ে যারা বনে-জঙ্গলে আশ্রিত হল, তারা তাদের বিশ্বাস-সংস্কারের শাস্ত্র-সংস্কৃতির, আচার-আচরণের এবং জীবিকাপদ্ধতির স্বাতন্ত্র্য রক্ষা করল। অন্যেরা বিজাতির শাসনে থেকে শাসকের ভাষা-শাস্ত্র-সংস্কৃতি বরণ করে স্বাতন্ত্র্য হারাল। কিন্তু তবু যে-বিশ্বাস-সংস্কারের জন্য তাদের মনে ও মর্মে, তা নির্মূল হল না, ভিন্ন নামে বৌদ্ধযুগে বৌদ্ধসমাজে রয়ে গেল— তারা, যক্ষ, ক্ষেত্রপাল, জাম্বুলী, বৎসলা, আদিনাথ, ধর্মনিরঞ্জন প্রভৃতি নানা নামে ও গুণ-মান-মাহাত্ম্য প্রতীকে। আবার মূলে কর্ণাটদেশীয় দ্রাবিড় সেনেরা যখন হলেন বাঙলার মালিক, তখন তাঁদের ব্রাহ্মণ্য-শাস্ত্র সংস্কৃতির পূজা-পার্বণের ও নিয়ম-নীতির আক্ষরিক রূপায়ণবাঙ্গা স্বধর্মত্যাগী বৌদ্ধদুনিয়রূপধারীরা ব্রাহ্মণ্য সমাজে প্রেরণা যোগায়।

ফলে সেন আমলে আইনের জোরে মানুষের বিশ্বাস-সংস্কারের অভিব্যক্তি ও রূপায়ন বন্ধ করে দেয়া হয়।

বিদেশী-বিধর্মী তুর্কির শানকরূপে আবির্ভাবমূহর্ত থেকেই ক্ষুদ্র রুষ্ট জনগণ স্ব স্ব বিশ্বাসানুগ ও প্রয়োজন-প্রতীক দেবতার পূজায় ও মাহাত্ম্যাকীর্তনে মেতে উঠল- ব্রাহ্মণ্যবাদী উচ্চবিশ্বের ও উচ্চবর্ণের সমাজের প্রভাবে ঈষৎ ভিন্ন-নামে লৌকিক অরি ও মিত্র দেবতার আবার স্ব স্ব মহিমায় ও গুঞ্জল্যে প্রতিষ্ঠিত হলেন। আদিনাথ-চন্দ্রনাথ শিবরূপে, প্রজ্ঞা-উপায় হরগৌরীরূপে, অবলোকিতেশ্বর বিষ্ণুরূপে, জাম্বুনী বিষালাক্ষী মনসারূপে, আদ্যাশক্তির কালী দুর্গারূপে বন্দিত হলেন। পৌরাণিক মর্যাদায় তেরো শতকের উষাকলে এসব দেবতার মাহাত্ম্য কথার মৌখিক উদ্ভব এবং পনেরো শতক থেকে (অর্থাৎ বাঙলায় লেখা সাহিত্যের উন্মেষকালে) লেখ্য বাঙলায় তা লিপিবদ্ধ হতে থাকে।

নানা প্রসঙ্গে এসব তত্ত্ব ও তথ্য আমরা প্রথম খণ্ডে সন্নিবেশিত করেছি।

২. শাস্ত্র ও সমাজ বিপ্লব

কালিক ও স্থানিক প্রয়োজনে শাস্ত্র-সমাজ-সংস্কৃতি তথা চিন্তা-চেতনা ও কর্ম-আচরণ পূর্বোক্ত নিয়মে কালিক ও স্থানিক বিবর্তন লাভ করে। এমনি করে মানবপ্রগতি থাকে অব্যাহত। এমনি লক্ষণীয় গুরুতর বিবর্তন বা পরিবর্তনকেই উদ্ভূত সমস্যার পরিপ্রেক্ষিতে আমরা যুগান্তকারী বিপ্লব নামে আঁড়হিত করতে চাই। বিবর্তন বা পরিবর্তন স্থানিক ও কালিক প্রতিবেশে জীবন-জীবিকার নিরাপত্তার তাগিদে জরুরী হলেও তা যে সবসময়ে কল্যাণকর বা উৎকর্ষসূচক হবে তার কোন নিশ্চয়তা নেই। আমরা গত দুই হাজার বছরের মধ্যে এরূপ কালান্তর ঘটানো বিপ্লব দেখেছি : প্রথমটির অবসান ঘটে মুসলিম মগধসাম্রাজ্যের পতনের সঙ্গেই। দ্বিতীয় বিপ্লব ঘটে গুপ্তরাজদের আমলে রাঢ়ে-পুণ্ড্র ও বঙ্গে। তৃতীয় বিপ্লব ঘটে মগধে বৌদ্ধ পালদের চারশ' বছরের রাজত্বকালে। চতুর্থ বিপ্লব হচ্ছে ব্রাহ্মণ্য বিপ্লব, তা ঘটে সেন রাজত্বে। পঞ্চম বিপ্লব দেখি তুর্কি আমলে লৌকিক দেবতার প্রতিষ্ঠায় ও লোকধর্মের জনপ্রিয়তায় আর ষষ্ঠ বিপ্লব ঘটে চৈতন্য মতবাদের প্রভাবে, সপ্তম বিপ্লব ঘটে ষোল শতকের শেষপাদে মুঘল বিজয়ের ফলে- পীর-নারায়ণ সত্যের উদ্ভবে। এরপরে উনিশ শতকের প্রতীচ্যবিদ্যা প্রভাবে বিপ্লব ঘটে কোলকাতার শিক্ষিত মানুষের মনে-মননে। তাই পীর-নারায়ণ সত্যই হচ্ছেন বাঙালী স্ট্র শ্রেষ্ঠ দেবতা।

আমরা এ অধ্যায়ে কেবল সপ্তম বিপ্লবের কারণ-করণ আলোচনা করব।

৩. শ্রেণী বন্ধ

আমরা জানি এবং মানি যে জীবনই মানুষের ভাব-চিন্তার ও কর্ম-আচরণের উৎস। প্রাণ বাঁচানোর জন্যে অন্ন এবং মনের পুষ্টির জন্যে আনন্দ- জীবনে এ দুটোর প্রয়োজন মানুষের তো বটেই, হয়তো প্রাণীমাত্রেরই রয়েছে। আমরা এ-ও জানি অন্ন ও আনন্দ, জীবিকাসম্পৃক্ত। হাতিয়ারের, যন্ত্রের ও কৌশলের বিবর্তনে জীবিকাপদ্ধতি বদলায়, সে-সঙ্গে বদলায় পরিবার ও সমাজসম্পর্কিত নিয়মনীতি, রীতি-পদ্ধতি আর আচার-আচরণ। ফলে ব্যক্তির সঙ্গে ব্যক্তির দায়িত্ব ও কর্তব্যগত সম্বন্ধও হয় ভিন্নতর। খাদ্যের ও অন্যান্য চাহিদার উৎপাদনের ও

উপভোগের ক্ষেত্রে বুদ্ধির ও শক্তির খেলায় হার-জিতের ফলে দাসযুগ, সামন্তযুগ, বুর্জোয়াযুগ, সমাজবাদীর যুগ কালিক ও স্থানিক ধারায় আবর্তিত হয়েছে এবং কোথাও কোথাও এখনো হচ্ছে।

আজো সমাজে আর্থিক, শৈক্ষিক, বৃত্তিক, শাস্ত্রিক, সামাজিক অবস্থান ভেদে মানুষ নানা প্রতিযোগী ও প্রতিদ্বন্দ্বী শ্রেণীতে বিভক্ত, তাই শ্রেণীতে শ্রেণীতে প্রতিযোগিতা ও প্রতিদ্বন্দ্বিতা অহরহ চলছেই। এর সাধারণ নাম অর্থ-সম্পদের অধিকার নিয়ে শ্রেণীসংগ্রাম।

আজকের জগতে সর্বপ্রকার সম্পদ মুদ্রা-প্রতীকে পরিমেয়, তাই দুনিয়াব্যাপী চলছে কাণ্ডজে নোটের আর মুদ্রারই বিচিত্র লীলা- সে-নিষ্ঠুর লীলায় কারো হয় পৌষমাস আর কারো সর্বনাশ।

আবার রাষ্ট্রসীমার মধ্যকার আসমানের ও জমিনের নীচের সব সম্পদই জাতীয় সম্পদ (ন্যাশনাল ওয়েল্থ)-এ সম্পদের পরিমাণ অনুযায়ীই একটা রাষ্ট্র ধনী বা দরিদ্র বলে চিহ্নিত হয়।

আমাদের উক্ত সপ্তম বিপ্লবের কারণ ও গুরুত্ব বুঝবার জন্যেই উপযুক্ত বিষয়গুলো স্মরণ করা প্রয়োজন এবং এখানেই শেষ নয়, ইতিহাসের অনুসরণে আরো ঘটনার রোমন্থন করে দীর্ঘ কালপ্রবাহ অতিক্রম করার প্রয়োজন হবে।

৪. ষোলশতক থেকে আর্থসামাজিক অবক্ষয়ধারা

১৩৩৮ খ্রীস্টাব্দ থেকে ১৫৩৮ খ্রীস্টাব্দ অবধি বিদেশী তুর্কি শাসকরা এ দেশবাসীর হয়ে স্বাধীনভাবে এদেশ শাসন করেছেন, ইতিহাসে এ দু'শবছর 'স্বাধীন সুলতানী আমল' নামে পরিচিত। এ সময়ে দেশের সম্পদ তত্ত্বা জাতীয় সম্পদ রাজ্যসীমার মধ্যেই হাত বদল হয়েও নিবন্ধ থাকত, বিদেশে পাচার হত না। কৃষ্টি কিছু অর্থ বিদেশী চাকুরেরা তাদের অর্জিত মুদ্রা হিসেবে রাজ্যের বাইরে নিয়ে যেত। কাজেই ব্যক্তিগত আয়-ব্যয়ে ক্রাস-বৃদ্ধি ঘটলেও, সম্পদ হস্তান্তর হলেও, বাণিজ্য মুখ্যত পণ্যবিনিময় নির্ভর ছিল বলে জাতীয় সম্পদ প্রায় অটুট থাকত। এজন্যে স্বাধীন সুলতানী আমল ছিল বাঙলার ও বাঙালীর দেশ ও জাতি অর্থে সমৃদ্ধির কাল সামগ্রিক ও সামষ্টিক হিসেবে স্বাচ্ছন্দ্যের ও সাচ্ছন্দ্যের যুগ। ইলিয়াসশাহী, গণেশশাহী, নাসিরশাহী (২য় ইলিয়াসশাহী) ও হোসেনশাহী রাজত্বের অবসানের সঙ্গে সঙ্গেই বাঙলার ও বাঙালীর সুদিনেরও অবসান ঘটল পরবর্তী চারশ' দশ বছরের জন্যে। স্বাধীন সুলতানী আমলে দেশের সম্পদ দেশে থাকতো, তাই গাঁ-গঞ্জের মানুষেরও আর্থিক সাচ্ছন্দ্য ছিল, ইংরেজদের মতোই নগণ্য সংখ্যক শাসক তুর্কিরা বাস করত শাসনকেন্দ্রে, আর দেশের সর্বত্র অধিবাসীরা ছিল গোড়ার দিকে সবাই হিন্দু, সম্পদ ও শাসন-প্রশাসন ছিল হিন্দুর হাতে, এসময়ে নতুন মানুষ শাসকদের সংস্পর্শে আসার ফলে চিন্তা-চেতনার ক্ষেত্রে শাসিত মনে যে নতুন তত্ত্বের তরঙ্গ সৃষ্টি হল, তার ফলেই বাঙলার মনীষার বিচিত্র বিকাশ ও প্রকাশ ঘটেছিল স্বাধীন সুলতানী আমলে- উনিশ শতকে যেমনটি হয়েছিল প্রতীচ্যবিদ্যার প্রভাবে। এ তত্ত্ব উপলব্ধি করেই বঙ্কিমচন্দ্র বলেছিলেন যে পাঠান আমলে বাঙালী স্বাধীন ছিল, সাম্রাজ্যবাদী মুঘল বিজয়েই অর্থাৎ আকবরের সময় থেকেই বাঙালীর পরাধীনতার শুরু।^১

^১ 'বাঙ্গালার ইতিহাস' এবং 'বাঙ্গালার ইতিহাস সম্বন্ধে কয়েকটি কথা' প্রবন্ধ দুইখণ্ড।

কিন্তু বাঙালীর দুর্দিনের দারিদ্রের শুরু আরো আগে থেকে। ১৫৩৮ খ্রীস্টাব্দে হুমায়ুনের গৌড় অধিকার, এবং কয়েক মাসের মধ্যেই শের শাহর বঙ্গবিজয় ও বঙ্গের দিল্লী সাম্রাজ্যভুক্তি, ১৫৫৪-৬০ খ্রীস্টাব্দে শামসুদ্দীন মুহম্মদ শাহ গাজীর রাজ্যচ্যুতি ও তাঁর পুত্র গিয়াসউদ্দীন বাহাদুর শাহর পিতৃ সিংহাসন উদ্ধার এবং তাঁর পুত্র গিয়াসসুদ্দীন জালাল শাহর রাজত্ব এবং তারপরে অপর সুলতান গিয়াসউদ্দীনকে হত্যা করে ১৫৬০ সনে তাজখান কররানীর ও সোলায়মান কররানীর সিংহাসন অধিকার, ১৫৭৫ খ্রীস্টাব্দে মুঘলবাহিনীর বঙ্গবিজয় প্রভৃতি ১৫৩৮-৭৫ খ্রীস্টাব্দে সাঁইত্রিশ বছরের পরিসর রাজ্যে প্রশাসনিক অস্থিরতা ও বিশৃঙ্খলার কাল।

তারপর যুদ্ধক্ষেত্রে মুঘলদের বিজয় ঘটলেও এবং দাউদ খান কররানী প্রাণ নিয়ে পালাতে গিয়ে ধরা পড়ে নিহত হলেও গোটা বাংলাদেশ মুঘল অধিকারে আসে আরো বিয়াল্লিশ বছর পরে ১৬১৭ খ্রীস্টাব্দে জাহাঙ্গীরের আমলে। ওই বিয়াল্লিশ বছর [হিসেবে দেড়পুরুষ কাল] বাংলাদেশের বিভিন্ন অঞ্চলে ভয়াবহ নৈরাজ্যের কাল। লোকশ্রুতির বারভূঁইয়ারা তখনো মুঘল অনুগত্য স্বীকার করেননি। উসমান খান ছাড়াও ভূষণার মুকুন্দ, যশোরে প্রতাপাদিত্য, ফতেহাবাদের মজলিস কুতুব, শ্রীপুরের চাঁদ-কেদার, খিজিরপুরের ঈশা খাঁ প্রমুখ প্রায় সব সামন্ত জমিদার-জায়গীরদার তখন মুঘলবিরোধী ও স্বাধীন। তখন সব শক্তিরই প্রজাপীড়নের ও প্রজাশোষণের কাল, কেননা তখন মুঘলশাসক ও স্থানীয় ভূঁইয়ারা শাসনের ও শোষণের অধিকার দাবি করেছেন, পালন-পোষণের দায়িত্ব স্বীকার করেননি। এ সময়ে বাঙলার বিভিন্ন অঞ্চলের মানুষের জীবন-জীবিকার কোন নিরাপত্তা ছিল না। অস্থিরতা ও অনিশ্চয়তার মধ্যে শঙ্কিত এবং ত্রস্ত জীবন কাটাতে হয়েছে প্রায় অর্ধ শতক ধরে। ১৬১৭ খ্রীস্টাব্দে সব সামন্ত ভূঁইয়া দিল্লী সরকারের অনুগত হলেন বটে, কিন্তু ততদিনে অন্য উপসর্গও শুরুত্বর হয়ে উঠেছে, এখন থেকে ভূমিরাজস্ব, বাণিজ্যস্বত্ব, আবগারীকর এবং সৈন্যবাহিনীর বেতন প্রভৃতি রূপে বিপুল পরিমাণ অর্থ বাঙলার বাইরে চালান হচ্ছিল আর পর্তুগীজ প্রভৃতি যুরোপীয় বেনেরা বাংলাদেশে অবাধ বাণিজ্য তো করতই, তার উপর পর্তুগীজ দস্যুরা বঙ্গোপসাগরের উপকূলঞ্চলে তো বটেই, ভাগীরথী, পদ্ম মেঘনা শীতলক্ষ্যা প্রভৃতি নদীর তীরাক্ষেপেও বহুদূর ব্যাপী লুটপাট করত, মানুষও ছিল সে লুটের মালের অন্তর্ভুক্ত। পরে পর্তুগীজ হার্মাদদের সঙ্গে জুটে যায় আরাকানী জলদস্যুরাও। ১৬৬৫ খ্রীস্টাব্দ অবধি চলে এ অবাধ লুটতরাজ। সাম্রাজ্যবাদী মুঘলের সুবাদার-ফৌজদার এদের বিতাড়নের তেমন কোন কার্যকর চেষ্টাই করেননি। শাহজাহানের আমলে হুগলীর প্রশাসক দেশের স্বার্থে ইংরেজ কোম্পানীকে বাণিজ্যের অধিকার-বিস্তৃত করতে চাইলেন, কিন্তু উচ্চমূল্যের উপঢৌকন নিয়ে স্বয়ং সম্রাট তাদের অনুমতি দেন।

১৬৬৬ খ্রীস্টাব্দে জানুয়ারি মাসে পুত্র বজ্রগুণ উমেদ খানের নেতৃত্বে বাহিনী পাঠিয়ে আরাকানরাজ থেকে উত্তর চট্টগ্রাম জয় করে ছিনিয়ে নিয়ে শায়েস্তা খান শেষবারের মতো মঘ-হার্মাদ দস্যুর কবল থেকে বাংলাদেশকে মুক্ত করেন। এ যুদ্ধের এবং পূর্বের ও পরের সাম্রাজ্যের বিস্তারমূলক আসাম অভিযান প্রভৃতি নানা যুদ্ধে ব্যয়ও বহন করেছে দুস্থ সুবেদারগণ। সুবাদার শায়েস্তা খান, আজিমুশশান-ফররুখশিয়ার এখানে নুন-গুপারীর একচেটিয়া ব্যবসায় মাধ্যমে বাঙালীর অপরিমেয় অর্থ লুট করেছেন, বণ্ণিত করেছেন দেশী ব্যবসায়ীদের। পুরো সতেরো শতক ও আঠারো শতকের প্রথমার্ধ ছিল যুরোপীয় বেনেদের বাঙলাদেশ লুটেপুটে খাওয়ার ও নেওয়ার কাল।

১৭০৭ খ্রীস্টাব্দে আওরঙজেবের মৃত্যুর পরে বাংলাদেশে দুঃশাসন এবং দেশী-বিদেশীর পীড়ন শোষণ বাড়ল। চার বছরী ছকে বিন্যস্ত সুবাদারী মুর্শিদকুলি খান দিল্লীর কেন্দ্রীয় শক্তির দুর্বলতার সুযোগে পরিণত করলেন বংশানুক্রমিক নওয়াবীতে। সুজাউদ্দীনের আত্মীয় ও অনুগৃহীত হাজি আহমদের ও আলিবর্দীর ষড়যন্ত্রের শিকার সুজাপুত্র সরফরাজ খানকে গিরিয়ার যুদ্ধাভিনয়ে পরাজিত ও নিহত করে ১৭৩৯ খ্রীস্টাব্দে নওয়াব হলেন আলিবর্দী। তাঁকে সতেরো বছরের মধ্যে বারোটা ব্যয়বহুল যুদ্ধ করতে হয়েছে। উড়িষ্যার চৌথ ছাড়াও বার্ষিক বিশ লক্ষ টাকা তুলে দিতে হত মারাঠাদের হাতে। বর্গীর হত্যার ও লুণ্ঠনের শিকার হয়েছে রাঢ় অঞ্চল, তারপরে যেন চলচ্চিত্রের প্রবাহ : সিরাজুদৌল্লাহর তেরো মাসের নওয়াবী ও তিনখানা মারাঠাক যুদ্ধ এবং ঘরে বাইরে ষড়যন্ত্রের পর মীর জাফর আলী খাঁর নওয়াবী, ইংরেজ কর্তাদের ঘুষ দিয়ে জামাতা মীর কাসিম আলীর নওয়াবী লাভ, অর্থের জন্যে জমিদার-মহাজন পীড়ন, যুদ্ধ, পরাজয় ও পলায়ন আর ১৭৬৫ খ্রীস্টাব্দ থেকে ইংরেজ কোম্পানীর দেওয়ানীর ও নওয়াবীর দৈতশাসনরূপ চাপের শুরু, ১৭৭৬ বঙ্গাব্দের [১৭৬৯-৭০ খ্রীস্টাব্দের] মন্বন্তর খাদ্যাভাবে উত্তর ও পশ্চিম বাঙলার তিনভাগের দু'ভাগ অধিবাসীর মৃত্যু।

শাসন করবে কি কেবল শোষণ করবে মনস্থির করে সিদ্ধান্ত গ্রহণ করতে ইস্ট ইন্ডিয়া কোম্পানীর পঁচিশ বছর লেগে গিয়েছিল। অবশেষে কোম্পানী স্থির করল তারা শাসন-শোষণ-লুণ্ঠন এক সঙ্গেই চালাবে। এর ফলেই ভূমিরাজ্য বিষয়ে চিরস্থায়ী বন্দোবস্তের ব্যবস্থা হল ১৭৯৩ খ্রীস্টাব্দে। মুঘল শাসনযন্ত্রের আদলে চার বছরে ছকে গভর্নর-জেনারেলরা সে-থেকেই আসেন-যান গা-বাঁচিয়ে সু-কৌশলে শোষণের শাসনের পণ-পদ্ধতি পাকাপোক্ত করেন। প্রায় শত বছর ব্যাপী কোম্পানী আমল একটুবেই চলছিল। সাম্রাজ্যবাদী মুঘলবিজয়ে বিদেশী যে শোষণের শুরু তা অবসিত হয় ১৯৪৭ খ্রীস্টাব্দে। মুঘল আমলেও সাম্রাজ্যের এ প্রত্যন্ত অঞ্চল শাসন-শোষণে শাসকগোষ্ঠীর আত্মই যত প্রবল ছিল, তত উৎসাহ ছিল না প্রজার পালনে পোষণে দুঃখবিমোচনে। তাই মুঘল আমলেও বাঙলার বিভিন্ন অঞ্চলে প্রতি তিন-চার বছর অন্তর ঝঞ্ঝা-বৃষ্টি-খরার দরুন দুর্ভিক্ষ হত, লোক মরত খাদ্যাভাবে। তবু মুঘল আমলে ভৌগোলিক অবস্থানের কারণে ভূমিরাজ্য বাণিজ্যোৎসুক কিংবা আবগারী করে কিসু কিসু বাঙালীর চাকরি ও ব্যবসায় রূপ ফাঁকে ফুকুরে বাঙলায় থেকে যেত, হাত বদল হয়ে ফিরেও আসত। যদিও দিল্লী তখন সাত সাগরের না হোক তেরো নদীর ওপারের তো বটেই।

ইস্ট ইন্ডিয়া কোম্পানী বরাবরই বিদেশী বিভাষী বিজাতি ও বিধর্মী ও বিধর্মীই রয়ে গেল। বাঙলার তথা ভারতের সম্পদ লুট করাই ছিল তাদের একমাত্র লক্ষ্য- অর্থোপার্জনের জন্যেই এ সুদূর দেশে তাদের আগমন। যে-পয়সা বিলেতে গেছে তা আর কখনো ভারতে ফিরে আসার কারণ ছিল না। তাই কোম্পানীশাসকদের ধ্যান-ধারণা মন-মত পথ-পদ্ধতি ছিল একান্তই লুণ্ঠনর। এ লুণ্ঠ নির্মমভাবে অমানবিকভাবে চলছিল সিপাহিবিপ্লবের পূর্বক্ষণ অবধি। তাদের এ অমানুষিক ও বিচিত্র লুণ্ঠনপদ্ধতি আজ আর কারো অজানা নেই। এর ফলে যে কেবল তিন-চার বছর অন্তর প্রকৃতির বিরূপতাজাত খাদ্যাভাবে হাজার হাজার মানুষের অপমৃত্যু ঘটেছে তা নয়, শোষিত লুণ্ঠিত মানুষ অসহ্য যন্ত্রণায় মরিয়া হয়ে নিশ্চিত মৃত্যুর ঝুঁকি নিয়ে গিয়া পরিবার পরিজনদের বাঁচাবার শেষ চেষ্টায় বিদ্রোহী হয়েছে গায়ে-গঞ্জে, প্রাণ দিয়েছে হাজার হাজার চাষী-মজুর।

১৮৬০ খ্রীস্টাব্দের পরে শিক্ষিত জনতা কিছুটা সচেতন হচ্ছিল, তাই ভিক্টোরিয়া শাসনে শোষণের কৌশল ও পদ্ধতি বদলাতে হল। আগেকার বর্বর নির্মম ও স্থূল রূপ আর রইল না। আর বিশ শতকের গোড়া থেকেই নির্বিঘ্নে নিশ্চিন্তে নিঃশঙ্কে শোষণ করার পথ ক্রমেই সংকীর্ণ ও সীমিত হচ্ছিল জাতিত জনতার উচ্চকণ্ঠ প্রতিবাদের ফলে।

৫. জীবন ও ঐহিকতা

আর একটি কথা, মানুষ মুখে যতই আত্মায়, পরলোকে, জন্মান্তরে ও পাপপুণ্যে আস্থা প্রকাশ করুক না কেন, অমৃতত্বে মোক্ষ ও স্বর্গসুখে যতই আগ্রহ দেখাক না কেন, আসলে তাদের অন্তরে ওসবের কোন অস্তিত্ব নেই। ওসব কেবল সামাজিকভাবে স্বীকৃত আত্মপ্রবোধমূলক বুলিমাাত্র, ওগুলো বৃকের সত্যও নয়, বাস্তব তথ্যও নয়। মানুষ এ জীবনকেই সত্য বলে জানে, এ মাটিকেই বাস্তব বলে মানে। তাই মানুষ এ মাটির উপরই বাঁচতে চায়। এ কারণেই স্বর্গের পথে পা বাড়াতে পরম ধার্মিকও ভয় পায়। বিরক্ত মানুষ মৌহূর্তিক উত্তেজনায় আত্মহত্যা করে জীবনে ইতি ঘটানোর জন্যে— আত্মাকে চিরজীবী করার জন্যে নয়।

মনে আর কোন প্রত্যাশা নেই বলেই এ প্রাণ এত প্রিয়, এ মাটি অপরিত্যজ্য, এ ভুবন এত সুন্দর, এ জীবন অতুল্য। তাই নিঃস্ব মানুষ রুগ্ন মানুষ জরাজীর্ণ মানুষও পরম মমতায় এ মাটি আঁকড়ে বেঁচে থাকতে চায়, দুঃখ-যন্ত্রণায়ও স্থিরচিত্তে মৃত্যু কামনা করে না— আত্মহত্যাও করে না শ্রেয়োচেষ্টনাবশে। বাঁচা বাঁচা বাঁচা, সুখে বাঁচা, নিরাপদে বাঁচা, সুন্দর হয়ে বাঁচা, দর্পে দাপটে বাঁচা, গুণে মানে মহাত্ম্যে বাঁচা, ভয় দেখিয়ে বাঁচা, ভালোবেসে বাঁচা— আবহমান কাল ধরে ব্যক্তি-মানুষের জীবনের এ-ই সচেতন অবচেতন লক্ষ্য। মানুষের সব আশা প্রত্যাশা পূর্ণ হয় না তবু আশা নিয়েই বাঁচতে হয়, পুর জাল জড়িয়ে জীবন-পথে চলতে হয়।

মানুষের ভাব-চিন্তা-কর্ম-আচরণের ইতিহাস হচ্ছে এই আশা, প্রত্যাশা ও স্বপ্নচালিত মানুষের প্রাত্যহিক জীবনের সাফল্যের ও বিফলতার ইতিকথা। এই মানুষের স্থানিক ও সামাজিক জীবনে জীবিকায় যখন সঙ্কট দেখা দেয়, তখন অসহায় অজ্ঞ মানুষ বাঁচবার তাগিদেই অলৌকিক শক্তির শরণ সন্ধান করে। এ শক্তিকে মানুষ স্মরণ ও শরণ করে দেবতা-প্রতীকে। সে-দেবতা অপ-কিংবা উপ-দেবতা হতে পারেন, পারেন অরি কিংবা মিত্র দেবতা হতে। এ ছাড়াও রয়েছে দেও জীন পরী কিংবা দেবতা ও মানুষ বশ করার মন্ত্র ঝাড়-ফুক, তুক-তাক, দারু-টোনা, বাণ-উচাটন, তাবিজ-কবচ, তাগা-মাদুলী প্রভৃতি।

জীবন-জীবিকার সঙ্কটকালে বিচলিত দ্রুত মানুষ প্রচলিত শাস্ত্রে আদর্শে ও জীবতত্ত্বে ভরসা পায় না, আশু মুক্তি ও নিরাপত্তার গরজে নতুন পথ-পদ্ধতি খোঁজে, নতুন উপায় উদ্ভাবনে হয় উদ্যোগী, নতুন কোন শক্তিতে আস্থা রেখে অন্তত মানসিকভাবে চায় আশ্বস্ত হতে, এমনি সামষ্টিক সঙ্কটলগ্নে জন্ম হয় নতুন তত্ত্বের ও নতুন দেবতার। তাই বিদেশী বিধর্মী গুপ্তশাসনে ও শোষণে দুঃখ যন্ত্রণানী-মহাযানী-বজ্রযানী-কালচক্রযানী বৌদ্ধদের দেখি জীবন-জীবিকার সঙ্কট ও নিরাপত্তা প্রতীক নানা অরি ও মিত্র দেবতা সৃষ্টি করতে। এরূপে যক্ষ ক্ষেত্রপাল বৎসলা শ্যামতারা বজ্রতারা অবলোকিতেশ্বর আদিনাথ আদ্যাশক্তি প্রভৃতি অনেক দেবতায় হল বৌদ্ধ-চৈত্য আকীর্ণ। বিদেশী (মাগধী) পাল-শাসনে পর্যুদন্ত বাঙালী বৌদ্ধকে যোগে তন্ত্রে বৈরাগ্যেই তাই জীবনের স্বস্তি সন্ধানী দেখি। চর্যাগীতিতে ও নাথসাহিত্যে বর্ণিত তদু এবং ডাকিনীযোগিনী

ঐতিহ্যই এর সাক্ষ্য। আবার সেনশাসনে রুদ্ধবাক এবং বিদেশী তুর্কি শাসনে অসহায় নির্জিত মানুষ জীবন-জীবিকা ক্ষেত্রে স্তম্ভ ও নিরাপত্তা লক্ষ্যে নানা অরি ও ইষ্ট দেবতা সৃষ্টি করে নিশ্চিত হতে চেয়েছে— চণ্ডী গৌরী কালী দুর্গা যক্ষ বিষহরী ওলা শীতলা মনি ষষ্ঠী গণেশ লক্ষ্মী সরস্বতী প্রভৃতি পূজ্য ও জনপ্রিয় এ কারণেই। লক্ষণীয় যে এসব দেবতা কিংবা মন্ত্র কেবল পার্থক্য জীবনেরই সহায়, ভয়-ভরসার আধার। পারত্রিক মোক্ষ দান এসব দেবতার ও মন্ত্র-তন্ত্রের সাধ্যাতীত। এভাবেই আদিকাল থেকে দেখা যাচ্ছে কোন বহিরাগত ধর্মমত বা জীবনাদর্শ বাংলাদেশে টেকেনি। বাঙালীরা সবসময়ে নিজেদের গরজমতো ধর্মমত, ইষ্টদেবতা এবং জীবনাদর্শ তৈরি করে নিয়েছে।

৬. পীর-নারায়ণ সত্য-এর উদ্ভবতত্ত্ব

সপ্তম বিপ্লবের উন্মেষ ঘোল শতকের শেষপাদে এবং বিকাশ সতেরো শতকে আর পূর্ণতা আঠারো শতকে।

১৫৩৮ সনে শেরশাহর বঙ্গবিজয়, সম্রাট ইসলাম সুরের মৃত্যুতে বাঙলায় প্রশাসনিক কোন্দল ও বিশৃঙ্খলা, ১৫৫৪ থেকে ১৫৭৫ সন অবধি ঘন ঘন শাসকবদল ও যুদ্ধবিগ্রহ, মুঘলবিজয়ের পরে বিয়াল্লিশ বছর ধরে সামন্ত-সম্রাটের ঘাটিক অবস্থান ও তক্তাত নৈরাজ্য আর যুরোপীয় বেনেদের নতুন আন্তর্জাতিক বাণিজ্যনীতির প্রভাব, মঘ-হার্মাদের নদীপথে লুটতরাজ এবং মুঘলদের সাম্রাজ্যিক শোষণ প্রভৃতি জনজীবন দুর্বহ করে তুলেছিল। গায়ে গঞ্জে ব্যক্তিজীবনে সমাজের কিংবা সরকারের উপর ভরসা করবার কিছু ছিল না, জীবন-জীবিকার নিশ্চয়তা-নিরাপত্তা ছিল না বলেই মানুষকে সর্বক্ষণ উদ্বিগ্ন শঙ্কিত থাকতে হত। এমন অবস্থায় গীতায়-কোরআনে ভরসা, মহৎ তত্ত্ব ও আদর্শে আস্থা কিংবা মন্দিরে-মসজিদে বিশ্বাস রাখা সম্ভব হয় না। আশু বিপনুজির জন্যে বিপন্ন মানুষ জরুরী নিদান ও দ্রুত ফলপ্রাপ্তি কামনা করে। জীবনযুদ্ধে পর্যুদন্ত মানুষ পুরোনো শাস্ত্রে ও নীতিআদর্শে আস্থা হারিয়ে বিশ্বাসের নতুন বন্দরে নোঙর ফেলে আশ্বস্ত হতে চায়, এ মনোভাব থেকেই ঘোল শতকের শেষ পাদের ও সতেরো শতকের শোষিত পীড়িত উদ্বিগ্ন মানুষ উদ্ভাবন করে নির্জিত দুস্থ মানুষের এক মিলনমন্ত্র— সে মন্ত্র হচ্ছে ‘সত্য’। যেন শাস্ত্র-সমাজ-সংসার, পুরোনো নিয়মনীতি সব জটাজাটিল মায়াজাল-সব মিথ্যে। অনির্বাণ সত্য ছাড়া আর কিছু নেই, কেউ নেই— যে বা যা দুঃখ-যন্ত্রণা-বিপদ থেকে দীন দুর্বল অসহায় মানুষকে রক্ষা করতে পারে। সত্য নির্ভেজাল অকৃত্রিম। তাই সত্য কাউকে কখনো প্রতারণা করে না। হিন্দুরা বহুদেবতার পূজারী। তাই সত্য হিন্দুর কাছে সহজেই ইষ্টদেবতার প্রতিভূ-প্রতীক নারায়ণ। মুসলিম মনে ছিল নিরাকার একেশ্বর তত্ত্বের প্রবল ধারণা, তাই সত্য তাদের কাছে ‘পীর’। রাজ্যেশ্বর তখন মুসলমান, তাঁর সম্মানে তাই সত্যও উদ্ভাষী আর জনাসূত্রে মুসলমান এবং শিরনীভোজী। ইলাহি ধর্মপ্রবর্তক আকবরের ও জাহাঙ্গীরের উদারতার প্রশ্রয়ও এ পীর-নারায়ণ ‘সত্য’ মতবাদ প্রচারের সাহস যুগিয়েছে পরোক্ষে। নইলে জান-মাল-গর্দান হারাতে কোন না কোন প্রচারক। মনে হয় রাজকীয় সহযোগিতা ছিল না বলেই শাস্ত্রপতিরা ও সমাজসদাঁদেরা সহিষ্ণুতা দেখিয়েছে। বুদ্ধিমানেরা চিরকালই সবকিছু বোঝে। তাই তারা বলে ‘হিন্দুর দেবতা হৈল মুসলমানের পীর। দুই কুলে সেবা লয় হৈয়া জাহির।’ শুনেছি বন্যার তোড়তাড়িত সাপও মানুষের সঙ্গে নিঃশঙ্কে বাস করে

ভেলায়। একদিন স্বস্তিতে ভাতে কাপড়ে বাঁচবার অগ্রহে জীবনযুদ্ধে ক্লান্ত নির্জিত বিপন্ন দীন দুঃখী হিন্দু-মুসলিম বাঙালী 'সত্য' নামের ভেলায় চড়ে বসেছিল, সেদিন ভিন্ন অবয়বের শাস্ত্রের ও মানবসত্যের অভিনুতা অবলীলায় স্বীকৃত হয়েছিল- সেদিন নবী-কৃষ্ণও অভিন্ন আত্মা নন কেবল, অভিন্ন কায়ও ছিলেন :

মক্কায় রহিম আমি অযোধ্যায় রাম।

ফকির হয়ে এমি তোমার কারণ

কলিতে সম্প্রতি আমি সত্যনারায়ণ।

নবী-কৃষ্ণের সমন্বিত রূপ :

অর্ধেক মাথা কালা একভাগে চুড়া টানা

বনমালা ছিলিমিলি তাতে

ধবল অর্ধেক কায় অর্ধনীল মেঘ প্রায়

কোরান পুরাণ দুই হাতে (রায়মঙ্গল : কৃষ্ণরাম দাস)

সত্যনারায়ণ পাঁচালীতে স্বীকার করা হচ্ছে যে 'বিষ্ণু আর বিসমিল্লা কিছু ভিন্ন নয়'।

জীবন-জীবিকার পার্থিব দেবতা 'সত্য'ই আশা-ভরসার ও প্রত্যাশা পূরণের ইষ্টদেবতা বা পীর। তিনি একা কয়দিক সামলাবেন, তাই চেলা দেবতা বা পীর পরিকল্পিত হল। হিন্দুমুসলমানের সুবিধার্থে চেলাদেবতারাও যুগুনামে অভিহিত হলেন। কেবল ব্যতিক্রম দেখি বাঘ-প্রতীক দেবতার ক্ষেত্রে। সেখানে দক্ষিণরায় ও বড়খান গাজী দুই ভিন্ন পীর ও দেবতা। অন্যত্র কুমীর পীর-দেবতা হচ্ছেন কালুগাজী-কালুরায়; এমনি নানা গুণ ও শক্তি প্রতীক দেবতা হচ্ছেন বনদেবী (বনদুর্গা) বনবিবি, ওলাদেবী-ওলাবিবি, বাস্তদেবী-বাস্তবিবি, উদ্ধারদেবী-উদ্ধারবিবি, শীতলাদেবী-শীতলা বিবি, ষষ্ঠীদেবী-ষষ্ঠীবিবি, আর ডাকিনী-যোগিনী এবং কামরূপ-কামাখ্যা অভিন্ন নামে সবার প্রিয় ও প্রয়োজনীয়। জীবনের প্রয়োজনে জল্পিত বলেই এখানে জাতিভেদ কিংবা অস্পৃশ্যতা নেই। তাই মোল্লা শিরনী তৈরি করে আর বামুনও তা হাতের তালুচেটে ঝায় এবং মাথায় হাত মোছে। এ পীর-নারায়ণ সত্যই ষোল শতকের শেষপাদ থেকে বিশেষ করে সতেরো শতক থেকে উনিশ শতক অবধি রাঢ়-বরেন্দ্রের এবং নিম্নবঙ্গের বা দক্ষিণবঙ্গের খুলনা-যশোরের অঞ্চলে ঐহিক মন-মানস নিয়ন্ত্রণ করেছেন। পূর্ববঙ্গে পীর-নারায়ণ সত্যের প্রভাব ছিল পরোক্ষ ও সামান্য। কঙ্কের সত্যনারায়ণ পাঁচালীর মতো কিছু কিছু রচনা ও ক্ষুদ্রগীত অবশ্য পাওয়া যায় এখানেও। তবে উনিশ শতক অবধি ভারতচন্দ্র সহ রাঢ়ের ও দক্ষিণবঙ্গের জ্ঞাত-অজ্ঞাত প্রায় শতক কবি সত্যনারায়ণ পাঁচালী রচনা করেছেন।

দেশের চরম আর্থ-সামাজিক ও প্রশাসনিক দুর্নীতি-দুঃশাসনের ও দুরবস্থার সময়েই ভারতচন্দ্রের আবির্ভাব। তাঁর শৈববে বাল্যেই ঘটে তাঁর পারিবারিক আর্থিক সামাজিক বিপর্যয়। তাই ভারতচন্দ্র আত্ম হারিয়েছিলেন নীতিতে আদর্শে মানুষের সত্যতায় ও মহত্বে। এ জনোই তাঁর কাব্যে দেবতা দিয়ে বানরনাচের আসর বসিয়েছেন, তাই তাঁর কাব্যে শ্রেয়োচেতনা বিরল, নিম্নমানের বেপরওয়া অশ্লীল বাচালতা বেশি। তাঁর কালের রূপ তাঁর ভাষায়-

একি ভূতগত দেশে

না জানি কি হবে শেষে রে।

উত্তম অধম না হয় নিয়ম

কারো নাহি ধর্মলেশ রে

দাতা ছিল যারা ভিক্ষা মাগে তারা

চোর ফিরে সাধু বেশে রে।

যবনে ব্রাহ্মণে সমভাবে গণে

তুল্যমূল্য গজ মেখে রে।

জীবনে জীবিকায় বাঙ্কাসিদ্ধির দেবতা হিসেবে পীর-নারায়ণ সত্যের প্রায় সার্বত্রিক জনপ্রিয়তা ও পূজা সত্যনারায়ণকে পৌরাণিক দেবতার মর্যাদায় প্রতিষ্ঠিত করে। ক্ষুদ্রপুরাণের রেবাখণ্ডে এবং বৃহদ্রমপুরাণে সত্যনারায়ণ সম্ভবত সতেরো শতকের শেষপাদের দিকে ঠাঁই করে নেন। এভাবে কোরআন-হাদিস মানা মুসলিম এবং গীতা-স্মৃতি অনুসারী হিন্দু আত্মপ্রয়োজন ও আপাতপ্রাপ্তি লোভে কাল্পনিক পীর-নারায়ণ 'সত্য'-এর অনুগত হয়। এমনভাবে দুঃখ-দৈন্যের দিনে নিরুপায় হিন্দু-মুসলিম দ্বিধা-দ্বন্দ্ব ত্যাগ করে সমন্বার্থে সহিষ্ণুতায় সহযোগিতায় সহাবস্থান করার উপায় বের করেছিল। এ মিলনসূত্র- এ মিলনময়দান চিরস্থায়ী হলে বাঙালীর শাস্ত্র-সমাজ সংস্কৃতিসম্পৃক্ত গুরুতর দ্বন্দ্ব সমস্যা মিটে যেত। তবু সেদিনকার বাঙলার উত্তর, পশ্চিম ও দক্ষিণবঙ্গে 'সত্য'-তত্ত্ব হিতকর বিপ্লব ঘটিয়েছিল। 'সত্য' বাঙালী-স্টুট শেষ লৌকিক দেবতা।

৭. সত্যপীরের জন্মবৃত্তান্ত

সত্যপীরের শক্তি ও গুণ-মান-মাহাত্ম্য সম্বন্ধে যেমন, তেমনি তাঁর জন্ম সম্বন্ধেও বিভিন্ন বানানো কাহিনী চালু রয়েছে।

শঙ্কর আচার্যের সত্যনারায়ণ পাঁচালী বর্ণিত বৃত্তান্ত এই : আলা (আলাউদ্দিন হোসেন শাহ) বাদশাহর কুমারী কন্যা একটি ফুলের ঘ্রাণ গ্রহণ করলে গর্ভবতী হয় এবং সত্যপীরের জন্ম হয়।

তাহির মাহরুদদের পাঁচালীতে রয়েছে : স্বর্ণবাসিনী চাঁদবিবি মর্ত্যে মালঙ্করাজ ময়দানব বা মইদুলব-এর কন্যা সন্ধ্যাবতীরূপে প্রেরিত হয় সত্যপীরের জননী হবার জন্যেই। কারো কারো মতে সত্যপীর সৈয়দ আলাউদ্দিন হোসেন শাহর (১৪৯৩-১৫১৯) রক্ষিতার গর্ভজাত সন্তান। ডক্টর সুকুমার সেনের ধারণা রাঢ়ের মুর্শিদাবাদেই ক্রমে পীর-নারায়ণ সত্যে রূপান্তরিত হয়েছেন [১ম খণ্ড অপরাধ ৩ সং পৃঃ ৪৫০] ডক্টর সুকুমার সেন চৈতন্যধর্মে গুরুবাদও পীরবাদ প্রভাবিত বলে মনে করেন [ঐ পৃঃ ৪৪৮]। তাঁর মতে হিন্দুর পীরভক্তির উন্মেষ-বিস্তারও ঘটে এ পথেই [ঐ পৃঃ ৪৪৮]।

বাঙলা আর্থ-সম্বলিত বাঙলার প্রথম পীরকাব্য হচ্ছে শেখ শুভোদয়া। পীর-নারায়ণ সত্যের প্রথম পাঁচালীকার ষোল শতকের গোরক্ষবিজয় রচয়িতা শেখ ফয়জুল্লাহ (দোভাষী শায়ের ফৈজুল্লা নন)। সত্যপীর প্রশস্তিকার হচ্ছেন বিদ্যাসুন্দর রচয়িতা কঙ্ক, ধর্মমঙ্গলের কবি রূপরাম চক্রবর্তী এবং রায়মঙ্গল রচক কৃষ্ণরাম দাস প্রভৃতি সতেরো শতকের কবি। সত্যনারায়ণের প্রশস্তি বা পাঁচালী আর যারা রচনা করেছেন, তাঁদের মধ্যে যাদের রচনার সন্ধান মিলেছে, তাঁরা হলেন ১. ভৈরব ঘটক ২. ধর্ম মঙ্গলের কবি ঘনরাম চক্রবর্তী, ৩. রামেশ্বর চক্রবর্তী ৪. অনুদামঙ্গলের কবি ভারতচন্দ্র রায় ৫. ফকিররাম দাস কবিত্বষণ ৬. বিকল চট্টোপাধ্যায় ৭. দ্বিজ গিরিধর ৮. মৌজিরাম ঘোষাল ৯. কৃষ্ণকান্ত ১০. তাহির মাহমুদ (কৃষ্ণ হরিদাস ঐর কাব্যের লিপিকর ও গায়ন) ১১. রামশঙ্কর সেন ১২. শিবচরণ ১৩. দ্বিজ কৃপারাম ১৪. কাশীনাথ ভট্টাচার্য সার্বভৌম ১৫. দ্বিজ রামধন ১৬. দ্বিজ নন্দরাম ১৭. অযোধ্যারাম রায় ওর্ফে কবিচন্দ্র (?) ১৮. দ্বিজ রামভদ্র ১৯. দ্বিজ অমর সিংহ ২০. দ্বিজ জনার্দন ২১. দ্বিজ দ্বিজ রামচন্দ্র ২২. দুর্গাপ্রসাদ ঘটক ২৩. ঈশান গোস্বামী ২৪. নরহরি ২৫. মধুসূদন ২৬. দ্বিজ কালিদাস ২৭. দ্বিজ

বিশ্বনাথ ২৮. গোবিন্দ ভাগবত ২৯. শিবচন্দ্র সেন ৩০. বিপ্রনাথ সেন ৩১. রামকিশোর ৩২. লাল জয়নারায়ণ সেন ৩৩. দ্বিজ রামানন্দ ৩৪. দোভাষীশায়ের ফকির গরীবুল্লাহ ৩৫. আরিফ ৩৬. দ্বিজ রঘুনাথ ৩৭. শ্রীকবিবল্লভ ৩৮. দ্বিজ রামকৃষ্ণ ৩৯. দ্বিজ দীনরাম ৪০. নয়নানন্দ ৪১. দ্বিজ রঘুরাম ৪২. দ্বিজ হরিদাস ৪৩. বিজয় ঠাকুর ৪৪. শিবরাম রাজা ৪৫. দেবকীনন্দন ৪৬. গঙ্গারাম ৪৭. শিবনারায়ণ ৪৮. কুমুদানন্দ দত্ত ৪৯. মুক্তারাম দাস ৫০. বিদ্যাপতি ৫১. কিস্কর ৫২. ফকিররাম ৫৩. কৃষ্ণবিহারী ৫৪. দ্বিজ গুণনিধি ৫৫. লালমোহন ৫৬. দয়াল ৫৭. শঙ্কর আচার্য ৫৮. জয়নাথ বিশী ৫৯. ফৈজুল্লা (১৯ শতক) ৬০. দ্বিজ রঘুনাথ চক্রবর্তী ৬১. ওয়াজেদ আলি (ফকির গরীবুল্লাহর অনুকারক) ৬২. লেংটাফকির ৬৩. শেখ তনু ৬৪. শেরবাজ চৌধুরী ৬৫. খোকনরাম দাস, ৬৬. দ্বিজ রামপ্রসাদ ৬৭. হরেকৃষ্ণ চক্রবর্তী ৬৮. তারিণীশঙ্কর ঘোষ ৬৯. নন্দরাম মিত্র ৭০. দ্বিজ শুকদেব ৭১. বেচারাম ৭২. কৌতুকরাম চট্টোপাধ্যায় ৭৩. কালাচাঁদ ৭৪. জৈমিনী ৭৫. কালীচরণ ৭৬. মথুরেশ ৭৭. নায়ক ময়াজগাজী ৭৮. রামানন্দ প্রভৃতি।
এঁদের মধ্যে কারো কারো নাম নিশ্চিত জ্ঞানের অভাবে পুনরাবৃত্ত হয়েছে। এঁদের মধ্যে কেউ বিশেষ আলোচনার যোগ্য এবং কারো কারো কাব্য সম্পাদিত হয়ে প্রকাশিতও হয়েছে।

১. শেখ ফয়জুল্লাহ

এঁর রচিত তিনখানি পাঁচালী হচ্ছে গোরক্ষবিজয়, গাজীবিজয় (ইসমাইল গাজী রচিত প্রাপ্ত) এবং সত্যপীরবিজয়। ডক্টর মুহম্মদ এনামুল হক বারাসতে অসংগৃহীত সত্যপীরের পুথিতে এ অংশটুকু পেয়েছিলেন :

গোরক্ষবিজয় আদ্যে মুনি সিদ্ধা কৃত	খোঁটা দূরের পীর ইসমাইল গাজী
কহিলাম সভ কথা গুনিলাম যত।	গাজী বিজয়ে সেহ মোক হৈল রাজি।
এবে কহি সত্যপীর অপূর্ব কথন	মুনি রস বেদ শশী শাকে রহে সন।
ধন বাড়ে গুনিলে পাতক খণ্ডন।	শেখ ফয়জুল্লা ভাগ ভাবি দেখ মন।

-মুনি-৭, রস-৯ বেদ-৪ শশী-১ = ১৪৯৭ শকে- ১৫৭৫ খ্রীস্টাব্দে সত্যপীরবিজয় রচিত। এটি তাই পীর-নারায়ণ সত্যের মাহাত্ম্য কথার প্রথম পাঁচালী। শেখ ফয়জুল্লাহ, মীর ফয়জুল্লাহ ও দোভাষী শায়ের ফৈজুল্লা সঙ্ঘে আলোচনা গোরক্ষবিজয় ও জয়নবের চৌতিশা প্রসঙ্গে দ্রষ্টব্য।

পীর-নারায়ণ সত্য মুখ্যত অর্থ-সম্পদের দেবতা। পাঁচালী ছাড়াও সত্যনারায়ণের ব্রতকথাও রয়েছে।

একটি উপাখ্যানের কাঠামো এরূপ : নারায়ণ এক দীন বামুনের কাছে ফকির বেশে উপস্থিত হয়ে তাকে দারিদ্র্য-মুক্তির জন্যে সত্যনারায়ণের শিরনী দেয়ার পরামর্শ দেন। শিরনী দিয়ে ব্রাহ্মণ ধনী হল।

আর একটি উপাখ্যান চণ্ডীমঙ্গলের বণিকখণ্ডের ধনপতি-খুল্লনার আখ্যানের আদলে নির্মিত। সদানন্দ নামের এক সওদাগর সত্যনারায়ণের শিরনী করে এক কন্যাসন্তান লাভ করে। কন্যার নাম চন্দ্রকলা। লক্ষপতি ধনীর কন্যার সঙ্গে হল তার বিয়ে। তারপর স্বস্তর-

জামাতা বাণিজ্য উদ্দেশ্যে সমুদ্রে নৌকা ভাসিয়ে এক রাজ্যের বন্দরে পৌছল। সত্যনারায়ণের পূজা না করে বা শিরনী না দিয়ে বাণিজ্যযাত্রা করায় সত্যপীর ক্রুদ্ধ হলেন এবং সেই রাজ্যের রাজকোষের ধন দেখা গেল তার নৌকায় সত্যের কেরামতির ফলে। চোরাই মাল ধরা পড়ল। সকালে কোটাল শ্বশুর-জামাইকে বেঁধে নিয়ে গেল রাজসভায় এবং দুজনই হলো কারারুদ্ধ। এদিকে চন্দ্রকলা একদিন সত্যনারায়ণের ব্রতকথা শুনে পিতার ও স্বামীর শিগগির বাড়ি ফেরার কামনায় শিরনী মানত করল। আনন্দিত সত্য তখন শ্বশুর-জামাইকে সেই সকালেই মুক্তি দেয়ার জন্যে রাজাকে স্বপ্নে হুমকি ও হুকুম দিলেন।

শ্বশুর-জামাইয়ের নৌকা ভিড়ল বাড়ির ঘাটে। চন্দ্রকলা সত্যের শিরনীর আয়োজন করল বটে, কিন্তু স্বামীদর্শনের জন্যে ব্যাকুল মা-মেয়ে শিরনীর সশ্রদ্ধ ভোজন ও বিলি-বন্টনের আগেই ঘাটের দিকে ছুটল। তাতে সত্যপীর রুষ্ট হয়ে ঘাটেই ঘটালেন ভরাডুবি। স্বামী ডুবে মরল। চন্দ্রকলার মা-বাপের আর মেয়ের কান্নায় ও মর্ছায় বিচলিত সত্যনারায়ণ বৃক্ষব্রাহ্মণ জ্যোতিষী বেশে দেখা দিয়ে বলেন শিরনী এঁটো করে ফেলে আসার দরুনই এ ক্ষতি ও বৈধব্য ঘটল চন্দ্রকলার। জ্যোতিষীর উপদেশে এটো শিরনী খেল মা ও মেয়ে আর ভেসে উঠল জীবন্ত স্বামীসহ ভিক্ষা। পুরোপুরি উপলব্ধ হল সত্যের শক্তি ও মহিমা। সদানন্দ সত্য নারায়ণের শিরনী দিল। দেখাদেখি সব মানুষই শুরু করল সত্যের শিরনী দেয়। অপর একটি উপাখ্যান এরূপ :

দিল্লীর দক্ষিণে মথুরেশপুর শহরে বাস করত এক অতি দরিদ্র কৃষ্ণভক্ত ব্রাহ্মণদম্পতি। একদিন ব্রাহ্মণ ভিক্ষায় বের হয়ে ভিক্ষা তো পেলেই না, অধিকন্তু নানাভাবে লাঞ্চিত হয়ে বিকেল বেলা বাড়ি ফিরবার পথে এক বটতলায় বসে তাঁর ক্ষুধার্ত ব্রাহ্মণীর মুখ স্মরণ করল— বেচারী তার পথ চেয়ে বসে আছে, খালি হাতে কি বলে দাঁড়াবে তার সমুখে। ক্ষোভে দুঃখে আত্মহত্যা করাই স্থির করল ব্রাহ্মণ। এমনি সময়ে ঈশ্বর ভিখিরীর বেশে আবির্ভূত হলেন। তাঁর মাথায় পাগড়ী, গায়ে কড়ি-বোনা জামা, গলায় কিনুকের মালা, কোমরে শিকল হাতে ছাগলের চামড়া, ও থালা আর কাঁধে ঝোলা, অন্য হাতে একটি লাঠি, তিনি শূন্যবুলি ব্রাহ্মণকে বললেন :

মৈঁ ভুখা ফকির হুঁ খিলাও কুছ মুখে।

তামাম দুনিয়া দেখা সবহি ইমাম বুটা

কাঁহা কই খয়রাত না করে এক মুঠা।

আত্মহননের জন্যে তৈরি ব্রাহ্মণ বলল, আমি নিজেই ক্ষুধার্ত ও শূন্যহস্ত। আমার মৃত্যু আসন্ন, কাজেই আমার কাপড়ে প্রয়োজন নেই, আপনি আমার কাপড় নিয়ে যান, বিক্রি করে আহাৰ্য্য ক্রয় করুন। তখন ভিখিরীবেশী ফকির তাকে সত্যপীরের নামে শিরনী দিয়ে দারিদ্র্যদুঃখ ঘোচানোর পরামর্শ দিলেন। কিন্তু তাতে ব্রাহ্মণের আপত্তি, কেননা সত্যপীর মুসলমান, শিরনী দিলে হিন্দুর ধর্ম নষ্ট হবে। ভিখিরীবেশী তখন বললেন, রাম ও রহিম নাম ভেদের আড়ালে অভিন্ন। হঠাৎ এ ভিখিরীকে শঙ্ক চন্দ্র গদা-পদ্ম ধারী বিষ্ণুরূপে প্রত্যক্ষ করল ব্রাহ্মণ। ভিখিরী ব্রাহ্মণকে জানালেন যে তিনিই মন্ডায় রহিম অযোধ্যায় রাম এবং কলিতে সত্যনারায়ণ। সত্যপীর তাকে দুধ-গুড়-আটা-কলার মিশ্রণে শিরনী তৈরি করতে উপদেশ দিয়ে ব্রাহ্মণীর পিতার বেশে বস্ত্রাদি সংসারের নানা সামগ্রী ও খাদ্যদ্রব্য নিয়ে তাদের বাড়ি গিয়ে ব্রাহ্মণীকেও সত্য পূজা করার পরামর্শ দিয়ে অদৃশ্য হলেন।

শিরনী তৈরি হলে প্রতিবেশী ব্রাহ্মণদের ধর্মহানির ভয়ে তা গ্রহণে আপত্তি ছিল। সত্যপীরের কেরামতির বলে ব্রাহ্মণের কুঁড়ে ঘরের স্থলে মুহূর্তে পাকাবাড়ি তৈরি হওয়ায় ব্রাহ্মণেরা শিরনী খেল নিঃসংশয়ে শ্রদ্ধার সঙ্গে এবং সত্যপীরের পূজা করতে লাগল। ব্রাহ্মণদম্পতি হল অতুল ঐশ্বর্যের অধিকারী। দেশবাসীরা হল সত্যপীরের পূজারী।

আরো দুটো উপাখ্যান ‘মদন-কামদেব পালা’ এবং ‘লালমন-এর কিসসা’ আমরা পরে আলোচনা করব।

সত্যনারায়ণের সব পাঁচালীকারের পরিচয় আমাদের জানা নেই।

ভৈরবচন্দ্র ঘটকের সত্যনারায়ণ পাঁচালী রচনাকাল ১৬২২ শক বা ১৭০০-০১ খ্রীস্টাব্দে-‘মোলশত বাইশ শকে করিল রচন। শিবায়ন রচয়িতা রামেশ্বর ভট্টাচার্যের বাড়ি ছিল মেদিনীপুর জেলার ঘাটাল মহকুমার অন্তর্গত ‘সাকিম বরদাবাটী যদুপুর গ্রাম’। রামেশ্বর কর্ণগড়ের জমিদার রামসিংহ ও তাঁর পুত্র যশোবন্ত সিংহের অনুগ্রহপুষ্ট ছিলেন। শিবায়ন রচিত হয় ১৭১০-১১ খ্রীস্টাব্দে (১৬৩২ শকে), কাজেই সত্যপীরের পাঁচালী পরে কোন সময়ে রচিত। ঘনরাম চক্রবর্তীর ধর্মমঙ্গল ১৭১১ খ্রীস্টাব্দে রচিত। কাজেই তাঁর ‘সত্যনারায়ণ রসসিঙ্হু’ এর আগে বা পরে কোন সময়ে রচিত। বীরভূম অঞ্চলনিবাসী বিকল (চট্টোপাধ্যায়) তাঁর সত্যনারায়ণ পাঁচালী রচনা করেন ১৬৩৪ শকে বা ১৭১৩-১৩ খ্রীস্টাব্দে।

-বেদ পূর্বে নেত্র-৩, রস-৬, চন্দ্র-৬ ১৬৩৪ শক ১৭১২ খ্রীস্টাব্দে
তারপূর্বে চন্দ্র-৬, আলো কৈল দিক দশ।

(বেদ-৪, নেত্র-৩, রস-৬, চন্দ্র-৬ ১৬৩৪ শক ১৭১২ খ্রীস্টাব্দে)

বর্ধমান জেলার শাহবাদ পরগণার ভারুহাগ্রামবাসী দ্বিজ গিরিধর ১০৭০ মল্লাব্দে তথা ১৭৬৪ খ্রীস্টাব্দে সত্যনারায়ণ কাব্য রচনা করেন।

দেবগ্রামবাসী দ্বিজ কৃপারাম বর্ধমানরাজ তেজেন্দ্রের আমলে (১৭৭৯-১৮৩২) তীর ‘ক্রিয়াকাণ্ড বারিধি’ নামের গ্রন্থে সত্যনারায়ণ প্রসঙ্গ রচনা করেন। বর্ধমান জিলার নাসিরগ্রামবাসী কবি কাশীনাথ ভট্টাচার্য সার্বভৌম তাঁর পাঁচালী রচনা করেন ১৮১৮-১৯ খ্রীস্টাব্দে [অন্তরীক্ষ বেদ অন্ধি নিশাকর-অন্তরীক্ষ-০, বেদ-৪, অন্ধি-৭, নিশাকর-১ = ১৭৪০ শকে বা ১৮১৮ খ্রীঃ] বর্ধমান অঞ্চলে কবি দ্বিজ রামধন সত্যের পাঁচালী রচনা করেন ১৭৪৭ শকে, ১২৩২ বঙ্গাব্দে তথা ১৮৮২ খ্রীস্টাব্দে। বর্ধমান জিলার অন্যান্য কবি হলেন মৌজিরাম ঘোষাল, কৃষ্ণকান্ত, শিবচরণ, শাহাপুরাননিবাসী রামশঙ্কর সেন ও দ্বিজ নন্দরাম।

সম্ভবত চব্বিশ পরগণার টাকী অঞ্চলের কবি আযোধ্যারাম রায়ের উপাখ্যানে সওদাগর সদানন্দ নয়- রত্নাকর, কন্যার নাম চন্দ্রকলা নয়- সুশীলা এবং জামাতা হলো কাটোয়াবাসী সদানন্দ রায়।

টাকী অঞ্চলের অপর কবি রামভদ্রের পাঁচালীর নাম ‘সত্যদেব সংহিতা’। তাঁর কাব্যে সওদাগর ধনেশ্বর এবং জামাতা চন্দ্রকেতু।

রাজশাহী অঞ্চলের কবি বিশ্বেশ্বরের পাঁচালীতে সদাগরের নাম শঙ্খপতি, কন্যা কলাবতী এবং জামাতা লক্ষপতি আসামের গোয়ালপাড়া এলাকার কবি মুক্তারাম দাসের সত্যনারায়ণ

পাঁচালীতে সত্যানন্দই সত্যের পূজা প্রচারক এবং সত্যানন্দের বাড়ি ব্রহ্মপুত্রনদের তীরবর্তী কাশীপুর। এই কাব্যের রচনাকাল :

চন্দ্রাক্ষর মুনি দিয়া পুষ্প দিবে তায়

শেষে পক্ষাক্ষর দিয়া হৈল যায়।

চন্দ্রাক্ষর-১, মুনি-৭, পুষ্প-০, পক্ষাক্ষর-২ = ১৭০২ শক বা ১৭৮০ খ্রীস্টাব্দে। এবং

রুদ্রাক্ষর পৃষ্ঠে বসু লিখিবে যতনে

পরেতে সমুদ্র লিখি সন হৈল সায়া।

[রুদ্রাক্ষর-১১, বসু-৮, সমুদ্র-৭ = ১১৮৭ বঙ্গাব্দ বা ১৭৮০ খ্রীস্টাব্দ]

রাঢ়ের কবি বিদ্যাপতির সত্যনারায়ণের এক প্রতিলিপির লিপিকাল ১০৯৯ মল্লাব্দ তথা ১৭৯৩ খ্রীস্টাব্দ। কাজেই কবি নিঃসন্দেহে আঠারো শতকের। এর গ্রন্থে বড় খাঁ গাজী, জাফর খাঁ, ইসমাইল গাজী, সফীউদ্দীন বা প্রভৃতি পীরের উল্লেখ রয়েছে।

কৃষ্ণ হরিদাসের নামে যে সত্যপীর পাঁচালী চলে, তা আসলে তাঁর গুরু তাহির মাহমুদের রচনা। কৃষ্ণ হরিদাস গায়ন ও লিপিকর মাত্র। প্রমাণ পুথিতে প্রাপ্ত ভগিতা :

১. তাহের মামুদে ভণে লেখে কৃষ্ণহরি
একবার বল আত্মা নবীর নাম স্মরি।
২. তাহের মামুদে কহে লেখে কৃষ্ণহরী
শিরে যার সত্যপীর কণ্ঠে বাকেশ্বরী।
৩. ছাড়িল মায়ের পুরী হইল বাহির
রচিল নূতন গান মহামুদ (মাহমুদ) তাহির
৪. তাহির মামুদ গুরু শমস নন্দন
তাহার সেবক হয়ে কৃষ্ণহরি গান।

তাহির মাহমুদ রংপুরের ঘোড়াঘাট অঞ্চলের কবি। কবির পিতার নাম শামস (উদ্দীন)।

শ্রীকবিবল্লভের সত্যনারায়ণ পুথি ১৩২২ বঙ্গাব্দে আবদুল করিম সাহিত্যাবিশারদের সম্পাদনায় বঙ্গীয় সাহিত্য পরিষৎ থেকে প্রকাশিত হয়েছিল। পুথি চট্টগ্রাম অঞ্চলে প্রাপ্ত বটে, কিন্তু কবি রাঢ়ের বা দক্ষিণ বঙ্গের লোক বলে মনে হয়। কারণ চট্টগ্রামে ক্ষুদ্র ব্রতকথাই মৌখিকভাবে চালু ছিল, এবং সত্যনারায়ণ বা পীর-নারায়ণ সত্য পূর্ববঙ্গে বা চট্টগ্রামে কখনো সর্বজনীন পীর-নারায়ণ রূপে পরিচিতি বা প্রতিষ্ঠা পাননি। সম্ভবত ঐরই অপর গ্রন্থ শীতলার পাঁচালী। বল্লভের মদন সুন্দর উপাখ্যানে সদানন্দ ও বিনোদ দুই ভাই সমুদ্রে কমলে কামিনীর আদলে কল্পিত এক অদ্ভুত দৃশ্য দেখল—

পাথরের গোর এক ভাস এ দরিয়া এ এবং মৃগছাল পানির উপরে ডাল্যা দিয়ে নৃত্য করে নর্তকী কিনুরে গীত গাএ। চারি ফকির নমাজ করে পশ্চিম মুখ হৈয়া।

^১ অধ্যাপক আবু তালিব আবিদুত : বাঙলা একাডেমী পত্রিকা, -শ্রাবণ-আশ্বিন, ১৩৬৯ সন।

সদাগররা এ দৃশ্য রাজাকে দেখাতে না পেরে কারারুদ্ধ হল। ডাকিনী-যোগিনী-সিদ্ধার কথা আছে এ উপাখ্যানে। ফকির গরীবুল্লাহর মতো শ্রীকবিবল্লভও হাওড়া অঞ্চলের লোক বলে মনে হয়।

রায়গুণাকর ভারতচন্দ্র রায় কৈশোরে সত্যপীর ব্রতকথা ও সত্যনারায়ণ-মহাত্মকথা নামে দুটো ক্ষুদ্র পুথি রচনা করেছিলেন। একটির রচনাকাল রুদ্র চৌগুণা রুদ্র-১১ চৌগুণা-৪ (১১ = ৪৪ (চৌ-৪ গুণা-৩) ১১৪৪ বা-৪৩ বঙ্গাব্দ। সত্যপীর ব্রতকথায় কবি বলেছেন— দ্বিজ ক্ষত্রি বৈশ্য শূদ্র/কলি যুগে ক্রমে ক্ষুদ্র যবনে করিতে বলবান।

ব্রতকথায় আদেষ্ঠা হীরারাম রায় এবং পাঁচালীর আদেষ্ঠা রামচন্দ্র মুন্সী। ভারতচন্দ্র সম্বন্ধে বিম্বৃত আলোচনা কালিকামঙ্গল অধ্যায় দ্রষ্টব্য।

ও পীর সত্য সত্য। ধূয়া

সত্যপীরের জন্ম জাগা (জায়গা) সাফল্য বন্দর।
 সত্যপীরের বানা নামিল জগতের উপর।।
 সত্যপীরের বানারে যেবা করে হেলা।
 হস্ত পদে গৌজ নিকলে চক্ষে হর ঢেলা।।
 ঢেলার ধমকরে গায় হৈল জ্বর।
 আমি ত না জানি বাপু পীরের খবর।।
 মুই যদি জানিতাম বাপু তুমি সত্যপীর।
 আগে দিতাম দুধকলা পাছে দিতাম শির।
 সত্যপীর আর মাণিকপীর এয়ালিলাক্ষ্মী স্মৃত।
 কেহ খায় সাদা সিন্ধি কেহ কলা দুধ।
 কান্দে শ্রীমন্ত গোপাল হাতে লৈয়া দড়ি
 না বেচিবে দধি দুধ গণিব কড়ি।।
 গলায় বসন বান্দি পীরের তোয়ায়।
 অঘোর কানন মাঝে পীরের লাগত পায়।
 পীররে দেখিয়া গোপাল করিল ছালাম।।

আছিল আউলিয়া জাত মুখে চাপ দাড়ি।
 উপস্থিত হৈল গিয়া গোপালের বাড়ী।
 আছিল গোপালের নারী বড় রে সেয়ান।
 প্রত্যুষে স্নেহানে করে দুধের পরমাণ।
 গোপাল নগর যাইয়া পীর মাগে দুধ কলা।
 গোপালে বলে আছ রে, গোপালনী বোলে নাই।
 ঘরে পৈল গোপালনী বাধানত পৈল গাই।
 শতে শতে বাছুর পৈল লেখা জোথা নাই।
 কান্দে শ্রীমন্ত গোপাল হাতে লৈয়া বেনা
 ঘরে আছিল যত ধেনু মুখে এড়ে ফেনা।।
 সত্যভাবে কৈলা দোয়া পড়িয়া কালাম।
 মুই যদি জানিতাম বাপু তুমি সত্যপীর।
 আগে দিমাম দুধ কলা পাছে, দিতাম শির।

এ গাথায় সত্যপীর মুখ্যত গোপজাতির পূজনীয় গো-সম্পদের দেবতা। চট্টগ্রামে এক লেংটা ফকিরের সত্যপীর গীতি চালু ছিল। আর ছিল পটিয়া থানার অন্তর্গত সুচিয়া গ্রামবাসী কবি ফকিরচাঁদের ‘সত্যপীর পাঁচালী’।

২. ফকির গরীবুল্লাহর মদন-কামদেব পালা

ওয়াজেদ আলির নামে প্রচলিত সত্যপীর পুথি তথা মদনকামদেব পালা ফকির গরীবুল্লাহরই রচনা। বটতলার বদৌলতে উড়ে এসে ওয়াজেদ আলী পুথির নামপৃষ্ঠায় জুড়ে বসেছে। পুথির সর্বত্র গরীব ফকিরের ভণিতা রক্ষিত হয়েছে। শুধু পুথির শেষপাদে ওয়াজেদ আলীর ভণিতা রয়েছে :

হীন ওয়াজেদ আলি কহে সবাকে ছালাম।

এই তক হইল ভাই কবিতা তামাম।

গরীবউল্লাহর কয়েকটি ভণিতার নিদর্শন দিচ্ছি :

১. হুকুম সত্যের যে অধীন গরীব গায়।

৪. অধীন গরীব বলে সত্যপীর সখা

২. প্রত্যেক কদমে যে হীন ফকির গায়।

৫. অধীন গরীব গায় গীত সত্যপীরে।

৩. অধীন গরীব কহে সত্যপীরের পায়।

শ্রীকবিবল্লভের মদনসুন্দর পালা আর মদন-কামদেব পালা একই গল্প। ঘটনাসংস্থানও প্রায় অবিকল। দু'এক জায়গায় পার্থক্য লক্ষিত হয়, যেমন শ্রীকবিবল্লভের পুথিতে আছে শুকপক্ষীর মুখে শিরনী দেখা মাত্র সে মনুষ্যরূপ প্রাপ্ত হয়। এর আগে বধু বিমলা জানত না যে শুকপক্ষীই সুন্দর। গরীবউল্লাহর পুথিতে সত্যপীর স্বপ্নে বিমলাকে শুকরূপে সুন্দরের কথা জানিয়ে দিয়ে বলেছিলেন শুকের মাথায় যে শিকড় বাঁধা রয়েছে, তা ফেলে দিলেই শুক মনুষ্যরূপ পাবে। গরীবের পুথিতে কুমতি সুন্দরকে 'লুচা' অপবাদ দিয়েছে এবং ডাকিনী বধু বিমলার নিঃস্বাসে সুন্দর পাখী হয়ে উড়ে গেছে বলেছে। শ্রীকবিবল্লভের পুথিতে সুমতি-কুমতি ভ্রাতৃদ্বয়কে কুরু-পাণ্ডবের শত্রুতার দোহাই দিয়ে বলছে চেয়েছে যে সম্পত্তির শরীক ভাই সুন্দরের মৃত্যুতে 'জঞ্জাল' দূর হয়েছে। গরীবের পুথিতে সুন্দর কয়েক বারই নিহত হয়, কিন্তু শ্রীকবিবল্লভের পুথিতে সেরূপ নয়।

সৈয়দ হামজার মধুমালতীর মতো মদনকামদেব পুথিও প্রায় বিতৃষ্ণ বাঙলায় রচিত। আমরা গল্পটি বর্ণনা করছি :

বাণিয়া কুলেতে জন্ম নাম জয়ধর

তারপর সুন্দরে ডাকিয়া কিছু কহে সওদাগর।...

সাকিন হুগলীতে বাড়ী চন্দননগর।।

তোমাতে পাইনু সত্যপীর ধোয়াইয়া

জয়ধর সওদাগর মরিবার কালে

সত্যপীর স্মরণ কর বিপদের কালে।

মদন কামদেবে সাধু ডেকে কিছু বলে...

সুন্দরে গুপিয়া যাই তোমা দুইজনে।...

মদনকামদেব ভ্রাতৃদ্বয় ছোট ভাই সুন্দরকে আদরে যত্নে পালন করতে থাকে। একবার বাণিজ্যে যাবার সময় সুন্দরকে তারা বলল...

'বাণিজ্য করিতে যাব ভাই দুইজন।

অবোধ নারী জাতি বুদ্ধি ভাল নয়।

ভাউজ দোহারে তুমি করিবে পালন।

বারবার সওদাগর এই কথা কয়।।

সুমতি কুমতি দোহে ঘরে রেখে যাই।'

এইরূপে—

হুসিয়ার হইয়া তুমি ধরে থেক তাই।।

সুন্দরে সপিয়া দিল ঘর আর বাড়ী

যেখানে যা ছিল তার ধন আর কড়ি।

ভাইদের যাত্রার সময় —

সুন্দর কহেন দাদা নিবেদন চরণে।

বধুদ্বয়ও

এক সোয়া পক্ষী এন আমার কারণে।

সুমতি কুমতি কহে রূপের কামিনী।

সোনার আনিও কোটা রূপার চিরুণী।

এরপর মদন ও কামদেব-

সাতডিক্সা সাজাইয়া দাগিল কামান । উপনীত হইল গিয়া গঙ্গা সাগর ।
খুলিল ডিক্সার কাছি খেচিল বাদওয়ান । ডাহিনেতে হিরাপুর বাবুর মোকাম ।
রাখিয়া হুগলীর ঘাট দক্ষিণে বাহিল । ভক্তি করিয়া সাধু করিল সালাম ।।
বাওভরে সাত ডিক্সা বাহিয়া চলিল ।। বাবুর মোকাম সাধু ডাহিনে রাখিয়া ।
লাগমোড়া এড়াইয়া কহিল তখন । কালাপানি এড়াইয়া চলিল বাহিয়া ।
সুমুখেতে তাড়া দেহ ষোল জোড়ার বন ।। পশ্চাতে করিয়া সাধু ওপিচিল্পুরী ।
হিজলির দক্ষিণ দিয়া যায় সওদাগর । দক্ষিণ মুখেতে সাধু ভাসাইল তরী ।।
দিলা মারের ঘাট সাধু পশ্চাতে করিয়া ।। ছয় মাস বাহিয়া সাধু পাইল সহর ।
সফরের ঘাটে ডিক্সা পৌছিল যাইয়া ।। জাহাজি হুকুম পাইয়া করিল লঙ্গর ।।

এদিকে মদনের স্ত্রী সুমতি এবং কামাদেবের স্ত্রী কুমতি 'ছিল দোহে কাউরের (কামরূপের) ডাকিনী' :

'গাছ চলে যায় তারা বিষম গেয়ানি । দিবসে থাকেন দোহে আপনার ঘরে ।
যখন গাছেতে চড়ে মন্ডর পড়িয়া । নিশা ভাগে রাত্রে যায় কাউর সহরে ।।
বাও ভরে চলে গাছ পবন হইয়া ।

রাত্রিকালে সুমতি-কুমতি কাউরে চলে গেছে সত্যপীর এসে সুন্দরকে স্বপ্নে জানিয়ে
দিলেন- তার 'ভাউজ' ঘরে নেই । সুন্দর-

'ভয়যুক্ত হৈয়া উঠে চাহে চারি পানে । এমন সুরূপ নারী বয়সে যুবতী ।
দেখিতে না পায় যবে ভাউজ দুজনে ।। দুই জন কোন খানে গেল এত রাত্তি ।

সুমতি-কুমতি ফিরে আসলে সুন্দর বলে-

তোমার দোহাকার রীত দেখি পরমাদ ।'
হেথা বুঝি নাহি রাখ জীবনের সাধ ।।

স্বামী বাড়ী ফিরলে নিশ্চিত বিপদ জেনে দু'জনে পরামর্শ করে সুন্দরকে মেরে ফেলবার
সিদ্ধান্ত করল :

'মারিয়া ফেলিব চল সাধুর নন্দনে
তারপর তারা- সুন্দরের উপরে মারিল বজ্রবাণ ।

ফলে- 'রূপের মুরারি সাধু রূপের নাই সীমা । পালত্রেতে আছে পড়ে বিষেতে কাতর ।
বিধাতা গড়েছে যেন সোনার প্রতিমা ।। উঠিয়া দেখিল দোহে মরিল সুন্দর ।।
তারপর উভয়ে 'সুন্দরে লইয়া ফেলে গহনের বনে ।'

সত্যপীর সুন্দরকে বাঁচাবার জন্যে বনে গেলেন-

'অনাথের নাথ পীর ভারিয়া গোদায় । মোরদার শরীরে সাধু পাইল জীউ দান ।
বেহেস্তের পানি দিলে সুন্দরের গায় ।। প্রাণ দান পাইয়া সুন্দর ঘরে যায় ।

আবে জমজমার পানি দিলেন দেওয়ান ।

সুমতি-কুমতি তাকে দেখে বিস্মিত হয়ে বলে, ‘মরিয়া না মরে কেন সাধুর নন্দন’। আবার সুন্দরকে কেটে দুটুকরো করে তারা—

মহানন্দে ভরে তারে কলসী ভিতরে।

বনেতে খুদিয়া গাড়া গাড়িল তাহারে।

সত্যপীর এবারও সুন্দরকে প্রাণদান করলেন। সুন্দর ভয়ে আর বাড়ি ফিরে যেতে চায় না দেখে সত্যপীর তাকে ভরসা দিয়ে বললেন—

আমি তোমার আছি সখা কোন বাতে নাহি ধোকা

লিয়ে কাউর দেশেতে বাজার

বেটীর সাথে

মারিলে জেলাব বারবার।

বিভা আমি দেলাব তোমার।।

সুন্দর এবার ঘরে ফিরলে ডাড়াবধূয় তাকে—

কুচি কুচি করে কেটে সাতখান করে

সাতখান সাত ঠাই গাড়িলে যে বনে।।

সত্যপীর আবার তাকে জীবনদান করলেন। এবার সত্যপীর পরামর্শে সুন্দর গোপনে সুমতি-কুমতির ‘চেলগাছে চড়ে কামরূপে পৌছিল।’ সেখানে—

সত্যপীর সুন্দরের সাথে করে লিয়া।

কাউরের রাজসীট পৌছিল আসিয়া।।’

সেখানে রাজকন্যা বিমলার স্বয়ম্বর সভা বসেছে। কাউরের (কামরূপ) রাজার নাম গিরিধর। রানীর নাম অমলা। সত্যপীর রাজকন্যার ইষ্টদেবী চণ্ডীর রূপ ধারণ করে সুন্দরকে বরমাল্য দেবার জন্যে উপদেশ দিলেন রাজকন্যাকে। সুন্দরের সঙ্গে বিমলার বিয়ে হয়ে গেল। কিন্তু সুমতি-কুমতির চেলগাছে করে ফিরতে না পারলে আর স্বদেশে ফিরে যাবার উপায় থাকবে না— স্বপ্নে সত্যপীর থেকে এ নির্দেশ পেয়ে বিয়ের রাতেই ঘুমন্ত রাজকন্যার আঁচলে চিঠি লিখে ‘সুন্দর চলে গেল—

সুন্দর আমার নাম লিখি যে তোমারে।

মাতা দিনবতী মোর পিতা জয়ধর।

হুগলী সহরে ঘর চন্দননগরে।।

মদন কামদেব হয় দুই সহোদর।।

সকাল বেলায় রাজকন্যা বিমলা স্বামীকে না দেখে কাঁদতে লাগল :

কন্যার চক্ষের জলে বদন ভিজিয়া চলে

আঁচলেতে দেখিল লিখন।’

তারপর ঠিকানা ধরে কন্যা স্বামীর উদ্দেশে যাত্রা করল। এদিকে সুমতি-কুমতি সুন্দরকে এবার ‘পক্ষী করে উড়াইল।’

আর—

‘সত্যপীর দিয়া পক্ষী চলিল সফর।

মদনকামদেব যেথা সেই দেশপানে।—

সুন্দরের স্ত্রী রাজকন্যা বিমলা এসে সুমতি-কুমতির সঙ্গে দুঃখে দিন কাটাতে থাকে। তখন সত্যপীর 'শ্বেত মাছি'রূপে আসি কন্যার কান্ধেতে বসি' বললেন :

রাজার নন্দিনী শুন অকারণে কাঁদ কেন মোর নাম বটে সত্যপীর।
পাবে পতি থাক এইখানে। সিন্ধি মান সত্যপীরে ঘরে বসে পাবে তারে

সুন্দর পাইবে তুমি তাহারে আনিব আমি কদাচিত না হবে দেলগির।।

এদিকে সত্যপীরের মায়ায়—

'সোনার বরণ সোয়া [শুয়া] পড়িল যে ধরা।

সুন্দর হইল বন্দ আখটিয়ার কলে।।

মদন-কামদেব সুন্দরের জন্যে সেই শুকপক্ষী হাজার টাকা দিয়ে কিনে বাড়ি ফিরল। সুন্দরের কথা জিজ্ঞাসিত হয়ে কুমতি বলল :

'সুন্দরের রীত সাধু কি জিজ্ঞাস মোরে। না জানি রাক্ষসী সেহ কহি তোমার পাশে।
লুচা পানা করে সেই ফেরে ঘরে ঘরে।। সুন্দর উড়িয়া গেল তাহার নিশ্বাসে।।
মানা যদি করি সাধু নাহি শুনে মানা। তখন— এতেক শুনিয়া সাধু করে হায় হায়
কোথা হৈতে আনিল কামিনী একজনা।। জমিনে পড়িয়া দোহে গড়াগড়ি যায়।।

সুন্দরের জন্য শুক পক্ষী এনেছিল তারা। সুমতি বলল :

'সুন্দরের রমণী ঘরে আছে শশী মুখী
তারে নিয়া দেহ সাধু এই সোয়াপক্ষী'।

মদন বধুকে শুকপক্ষী দিয়ে বলল :

সোয়াপক্ষী আনিবারে কহিল সুন্দর
ইহাকে দেখিয়া শোক কর নিবারণ।

একদিন সত্যপীর এসে বিমলাকে স্বপ্নে বলে গেলেন :

পিঞ্জরায় খসম তেরা সাধুর নন্দন। এলাহি আলামিন আল্লা আপনি খোদায়
সোয়াপক্ষী হইয়াছে শুন বিবরণ।। ইহার খাতিরে মুখে ভেজিল দুনিয়ায়।
মন্তকে শিকড় বাস্কা আছে একখানি। নিয়ত কাঁদবে যেবা আমার দরগায়।
বেহানে খুলিয়া লেহ রাজার নন্দিনী... নিয়ত হাসিল হবে হুকুমে খোদায়।

সত্যপীরের নির্দেশমত বিমলা 'ঔষধ খুলিতে সাধু মানুষ হইল।' বিমলা কৌতুক করে—

তিন ঠাই থরে থরে অনু পসারিল কোথা তোমার ছোট ভাই ডাক না এখন।
বিমলা ভাওর [ভাসুর] দোহে এতেক শুনিয়া কাঁদে ভাই দুইজন
ডাকিতে লাগিল। আছাড়া খাইয়া পড়ে সাধুর নন্দন।
বিমলা কহেন ভাওর তোমরা দুইজন তুমি বহু আসিয়া আমায় শোক দিলে
নেভানো আশুন কেন ফের জ্বালাইলে।

বিমলা স্বামীকে নিয়ে এল, তিন ভাইয়ে মিলন হল। সুমতি-কুমতিকে 'খন্দক' করে জীবন্ত কবর দেয়া হলো। সত্যপীরের শিরনীও করা হল—

মোস্তাজি আসিয়া ফাতেহা করিল তামাম।

সিরনি বাটিয়া দিল হিন্দু ও ব্রাহ্মণে।।

আরিফ রচিত লালমনের কিসসা

লালমনের কিসসা নামের সত্যপীর পাঁচালী রচয়িতা আরিফ আঠারো শতকের শেষভাগে অথবা উনিশ শতকের প্রথমপাদে বর্তমান ছিলেন বলে অনুমান করা চলে। আমাদের যে তিন খানা প্রতিলিপি রয়েছে, তাদের লিপিকাল ১২৭৬ বাঙলা সন, ১২২০ মঘী ও ১২১৯ মঘী। পুথিগুলো চট্টগ্রাম থেকে সংগৃহীত। মঙ্গলকাব্যের অনুকরণে সত্যপীর মাহাত্ম্যও কাহিনীর মাধ্যমে বিবৃত হয়েছে। লালমনের কিসসার সংক্ষিপ্ত সার এই :

কোরব সহরে ঘর হাসেম বাদসার। আর-সৈদ জামাল নামে ছিল সেই সহরে।
হোচন সা বলিআ নাম বেটা ছিল তার।। লালমন বোলে বেটী পয়দা তার ঘরে।
যথা সময়ে লালমন আরবি-ফারসি পড়া শেষ করল।

তারপর-

এক রোজ লালমন হইআ খোসালিত। উলঙ্গ হইল বিবি কোমর হইতে।
গোছল করিতে বিবি চলিল তুরিত।। হোসেন সা বাদসা তাহা পাইল দেখিতে।।
গোছল করিয়া বিবি আইল মোহলে। দেখিয়া বাদশার বেটা বোলে হাএ হাএ।
বাল শুখাইতে গেল বালাখানা 'পরে। খানাপিনা নাই খায় সেই দিন জাএ।।
পাছু পানে ঝারে কেশ হেলাইয়া।
হৃদয় কাচলি তার পরিল খসিয়া।।

'তারপর উভয়ের মধ্যে প্রেম বিনিময় চলতে থাকে। কিন্তু ভয় হোসেনের পিতা বাদশাকে। তিনি এ বিয়েতে রাজি হবেন না। তাই উভয়ে বিয়ে করল গোপনে।

তোমাতে আমাতে কথা আর কেহ নাই। সত্যপীর বলেন :

ইহাতে রহিল সাক্ষি সত্যপীর সাই।। এসেছি তোমার বাটি ভিক্ষার লাগিয়া।
ধরিয়া বাদশার হাত দিল আপন ছেরে। কিন্তু বাদশার বেটা হইল গরম।
আপনার তন বাদশা সুপিনু তোমারে।। সত্যপীরে ফেফে মারে হাতের কলম।...
হাসি পরিহাস কথা কহে দুই জনে। এথেক গুনিয়া কহে সত্যপীর সাঞি।
এদিকে- 'মায়া করি সত্যপীর গেল সেইখানে।। আমরা যে গালি দিলে লালে পাবে নাই।
পীর বোলে লাল সাক্ষি করিছে আমাএ। শাপ দিল সত্যপীর দেলে গোম্বা হইআ।
দোয়া করে আসি যাই হাত দিয়া গাএ।। পাইবে বহুত দুঃখ লালের লাগিয়া।

কয়েকদিন অতিবাহিত হল। পাপকর্ম ছাপা নাই প্রকাশ হইল। তাই বাদশাজাহা বলে :

চল মোরা রাজ্য ছাড়ি পলাইআ যাই। শিরেতে বান্ধিল পাগ মুগলিয়া করি।
মরদানী বেশ করি বান্ধহ কোমর। দোহরা পোসাক লিল লাল সে সুন্দরী।...
রাহার খরচ লহ সোনার মোহর।।
কিন্তু পথ ভুল করে তারা পড়ে ফাঁসিয়াড়ার হাতে।

'তামাম ফেসেড়া গেছে শিকারের তরে।

এক বুড়ি বসি আছে দরওয়াজা উপরে।।

লালমন বাদশাজাদাকে পরামর্শ দিল- পালাবার জন্যে

পুরুষ পরশমনি যেইখানে যাবে...

আমা চেয়ে পাবে কতো সোনার কামিনী

কাজেই না কর বিলম্ব বাদশা ঘোড়া হেঁকে যাও ।

কিন্তু বাদশাজাদা গেল না, বলে :

‘দিআছি দস্ত পিরীত লাগিয়া

কেমনে থাকিব লাল তোমাকে ছাড়িয়া ।

সত্যপীরের শাপ ব্যর্থ হবার নয় । কাজেই একদিন-

ফেসেড়া নন্দন তলওয়াড় হাতে করি নিল ।

মারিয়া সমসের তার শির জুদা কৈল ।

তখন লালমন গোসল করতে গিয়েছিল ।

‘গোছল করিয়া তবে আইলে লালমোন । এথেক গুনিয়া লাল করে হাএ হাএ ।

তাহাকে ডাকিয়া কহে ফেসেরা মোদন । আচমান টুটিয়া যেন পড়িল মাথাএ ।।...

কেটেছি তোমার পতি দেখেগো নজরে । সংসারের মাঝে মোর আর কেবা আছে ।

চলোগো আমার সাথে লিয়া খাবো ঘরে ।। প্রণীত বিনে দাগাইব কার কাছে ।।

চারদিন ধরে নিহত স্বামীর দেহ কোলে করে লালমন বিলাপ করেছে । লালমনের শোকে

সত্যপীর অস্থির হয়ে উঠলেন :

আসা ‘লিল হাতে যে খরোম দেন পাএ । মায়া করে সেইখানে গেল সত্যপীর ।

লাল উদ্ধারিতে যান আপে সত্যপীরে ।

লালের মুখে সব কথা শুনে সত্যপীর বললেন :

মরেছে বাদশার বেটা সত্যপীরের হটে । এক মোন করে ধড়ে লাগাইবে শির ।

একদা করিয়া সিন্ধি সত্যপীরে দিবে । বাঁচিবে বাদশার বেটা সখা সত্যপীর ।

লালমন শিরনী মানল ।

এরূপে- প্রাণ-দান পায় বাদসা বসিল উঠিএ ।

কিন্তু লালমন ও বাদশাজাদা...

‘বাকিয়া ঘোড়ার জিন দোহেতে চলিল । পীর বলে দুঃখ আমি দিবগো লালারে ।।

মানিল সিরনী তাহা বিস্মরিয়া গেল । গোম্বা হইআ শাপ দেন আপে সত্যপীরে ।

রঙ্গ রসে ভুলে গেল নাহি মানে পীরে । ছয়মাস থাক তুমি বন্দখানা ঘরে ।।

সত্যপীরের শাপ বিফল হবার নয় । কাজেই আর একটি বিপদ ঘটে গেল । পথে মৃগাল শহরে লালমন ও বাদশাজাদা এক মালিনীর ঘরে আশ্রয় নিল । দৈবক্রমে সে-শহরের বাদশা সৈয়দ নেহারের ঘোড়া চুরি গেল রাত্রিবেলায় । সেই ঘোড়া ছিল অবিকল লালমনের ঘোড়ার মতো । রাজা সকালে কৌটালকে হুকুম দিলেন-

তাকিদ করিয়া ঘোড়া এনে দেঅ মোর ।

বিলম্ব হইলে কাটা যাবে শির তোর ।।

বাদশাজাদা বাজারে গিয়েছিল। তাই ঘোড়া চুরির অপরাধে পুরুষবেশী লালমন বন্দী হল। বাদশাজাদা মেড়া করে বন্দী করে রাখল মালিনী। ছয়মাস পরে সত্যপীর লাল মনের প্রতি সদয় হলেন—

‘পীর বলে উদ্ধার করিবে যে লালারে।

পীর বলে স্থির হও না কান্দ যুবতী।।

সত্যপীরের মায়ায় এক গণ্ডার এসে শহরে অত্যাচার শুরু করল, কেউ তাকে বধ করতে পারে না— পঁলাইয়া যায় লোক ছাড়া শহর’। অবশেষে রাজা ঘোষণা করলেন—

বাদশা ডাকি বোলে ফের গণ্ডার যে করে জের।

জামাতা করিব তারে বেটি বেহা দিব ফের।।

লাল কোটালকে বশ করে বন্দীখানা থেকে বের হয়ে হত্যা করল গণ্ডার এবং বিয়ে করল বাদশাজাদীকে। তিন দিন পরে লালমনকে রাজকন্যা মেহতাব বলে :

‘কন্যা বলে প্রাণনাথ কান্দ কি কারণে	মাসেক দেঅরে ক্ষেমা খাও মোর কথা।
হাস্য পরিহাস কথা নাহি কহ কেনে।।	পশ্চাতে কহিব কন্যা যথ আছে কথা।।
রোদন করিয়া কিছু লালমনে বলে।	এইরূপে সেইদিন গুজরিয়া গেল।
কি বলিব প্রাণনাথ প্রাণ যে বিকল।।	সত্যপীর বলে লাল এআদ হইল।।

সত্যের মসজিদ তৈরি করে দিল লালমন। বাদশাজাদার সঙ্গে সাক্ষাৎ মানসে নৃত্যগীতের ব্যবস্থা করল নগরবাসীদের জন্য। মালিনীকে ‘মেড়া’ রূপী বাদশাজাদাও এল। বাদশাজাদা লালমনকে চিনতে পেরে মালিনীর অজান্তে মসজিদের দেওয়ালে নিজের দুঃখের কাহিনী লিখে গেল। লালমন সে লেখা দেখে শহরের সব মেড়া হাজির করাল। তারপর মালিনীকে মার দেওয়ায় ‘সে অবশেষে সেই মেড়া মনুষ্য করে দিল।’ লালমন সত্যপীরের শিরনী করল। রাজকন্যা মেহতাকে বাদশাজাদা হোসেন বিয়ে করল। মৃগাল শহরের অপুত্রক বাদশা সৈয়দ নেহারের রাজত্বও পেল হোসেন। ডক্টর সুকুমার সেন-উদ্ধৃত লালমনের কেচ্ছার সঙ্গে আমাদের আলোচ্য পুথির পাঠভেদ প্রচুর। তাই সম্পূর্ণ গল্পটি বিবৃত হল।

কবির কোন বিশেষ পরিচয় গ্রন্থে নেই। ভণিতা এরূপ :

১. পীরের চরণ সেবি রচিলো আরিফ কবি
সঙরিয়া সত্যর চরণ।

২. সত্যের কউসে যে আরিফ কবি গায়।

লাএকে [নায়কে] নেয়াজ গাজী ধরি তোমা পায়।।

৩. দেশড়া দক্ষিণ ঘর তাজপুর মোকাম। (ডঃ সুকুমার সেন)

এতে মনে হয় নেওয়াজ গাজী কবির পীর ছিলেন বা কোন দরবেশ ছিলেন।

কবি দেশড়া অঞ্চলের তাজপুর গ্রামবাসী ছিলেন। কবির ভাষা প্রায় বিশুদ্ধ। কবি সম্ভবত আঠারো শতকের শেষপাদে বর্তমান ছিলেন। আমাদের এ অনুমানের ভিত্তি এই যে আরিফের রচনায় গরীবউল্লাহ ও হামজার প্রভাব নেই।

^১ ইসলামী বাঙ্গালা সাহিত্য দ্রষ্টব্য।

৩. ফৈজুল্লাহ

এবার উনিশ শতকের সত্যপীর পাঁচালী দোভাষী শায়ের ফৈজুল্লাহর কাব্যের বন্দনাংশ উদ্ধৃত করেই পীরনারায়ণ সত্যের পাঁচালীর আলোচনা শেষ করছি। এর বর্ণিত উপাখ্যান রামেশ্বর ভট্টাচার্যে বর্ণিত উপাখ্যানের অনুরূপ। এর বন্দনাংশে হিন্দু-মুসলিমের উদ্ভিষ্ট সত্যপীরকেন্দ্রী মিলন-ময়দান পূর্ণস্বরূপে প্রত্যেক হয়ে উঠেছে :

সেলাম করিব আগে পীর নিরঞ্জন।	সম্মল জাহানে বন্দিব পীর আছে যত
মহাম্মদ মোস্তফা বন্দো আর পঞ্জাতন।	এক লাখ আশী হাজার পীরের নাম
সের আলি ফাতেমা বন্দো একিদা করিয়া	লব কত।
হাসন হোসেন পয়দা হৈল যাহার লাগিয়া।	সম্মল পীরিনী বন্দো বিবিগণ যত
রসুলের চারি ইয়ার বন্দো শত শত	বিবি ফাতেমার কদমে বন্দিব শত শত।
চারিদেহ ইমামের নাম লব কত।	হিন্দুর ঠাকুরগণ করি প্রণিপাত
ইব্রাহিম খলিলের পায়ে করি নিবেদন	খানাকুলের বন্দিব ঠাকুর গোপীনাথ।
বেটার কোরবানী দিল দীনের কারণ।	নামেত বন্দিয়া গাইব ধর্ম নিরঞ্জন
কোরবানী করিয়া দিল ইসমাইল করিয়া	যার ধবল খাট ধবল পাট ধবল সিংহাসন।
সেই হৈতে নিকা বিভা হৈল দুনিয়া।	যমুনার জুটে বন্দো রাস-বন্দাবন
আম্বিয়ার হাসিল বন্দো পলোয়ান দুইজনে	কৃষ্ণরথের বন্দো শ্রীনন্দের নন্দন।
ইসমাইল গাজী বন্দো গড়মান্দারনে।	নব্ব্ব্বাপে ঠাকুর বন্দো চৈতন্য গোসাঞি
বন্দিব (দরদস্তা) পীর কামাএর কুনি	শচীর উদরে জন্ম বৈষ্ণব গোসাঞি
রড়খান মুরিদ মিঞা করির আপনি	কামারহাটির পঞ্চাননে করি নিবেদন
পাড়য়ার (পাড়য়ার) সফী খায়ে করি নিবেদন	দশরথের পুত্র বন্দো শ্রীরাম লক্ষণ
অবশেষে মন্দির সত্ৰপীরের চরণ।	লক্ষ্মী সরস্বতী বন্দো গঙ্গা ভাগীরথী।
সীতা ঠাকুরানী বন্দো আর যত সতী।	যার গর্ভে গোরচাঁদ জন্মিলে আপনি।—
দৈবকী রোহিণী বন্দো শচীঠাকুরানী	গাইল ফৈজুল্লা কবি সত্য পদে মন।

এ বন্দনায় কবির অজ্ঞতার ছাপ আছে, কিন্তু আন্তরিকতায় ও বিশ্বাসে খাদ নেই। সত্যনারায়ণ পুথির আর এক কবি বিদ্যাপতি ও ইসমাইল গাজী, বড়খা গাজী প্রভৃতির প্রশংসা গেয়েছেন।

সত্যপীর পূজার আদি প্রচারক :

ব্রহ্মপুত্র কুলে গ্রাম নামে কালীপুর।	সেহ গ্রামে সত্যানন্দ বৈদিক ব্রাহ্মণ
ব্রাহ্মণ ক্ষত্রিয় বৈশ্য বসতি প্রচুর।।	প্রথম প্রকাশ তাতে সত্যনারায়ণ।

[ডঃ সুকুমার সেন-উদ্ধৃত]

উল্লেখ্য যে, পীর-নারায়ণ সত্য উত্তর এবং দক্ষিণ ভারতেও একেবারে অজ্ঞাত ছিলেন না।

৩। পীর-নারায়ণ সত্যের পাঁচালীর ভাষা

পূর্বেই বলেছি, সত্যনারায়ণকে মুসলিম বলেই বিশ্বাস করা হয় এবং শাসক কিংবা পীর-দরবেশ মুসলমান মাত্রই সাধারণত বিদেশাগত। কাজেই তাঁরা বাঙলা ভাষী নন— তাঁদের ভাষা

হিন্দুস্তানীই হয়। এটিই ষোল-সতেরো শতকের বাঙালীর অভিজ্ঞতাজাত ধারণা। এ ধারণাবেশই মুসলিম সত্যনারায়ণের মুখে কবিগণ ফারসিমিশ্রিত হিন্দি তথা হিন্দুস্তানী ভাষা প্রয়োগ করেছেন। এ সূত্রে উল্লেখ্য যে মাত্র উনিশ শতকের মধ্যভাগ থেই প্রতীচ্য শিক্ষায় সচেতন স্বধর্মীর জাতীয়তায় আত্মবান হিন্দুরা দেবনাগরী অক্ষরে লিখে ও সংস্কৃতশব্দের বহুল ব্যবহার যোগে ‘হিন্দি’ এবং ফারসি হরফে লিখে আর ফারসি শব্দের বহুল প্রয়োগে মুসলিমরা ‘উর্দু’ নামে একই ভাষা দুই নামে দুই বর্ণমালায় চালু রাখে।

পরে এ ধরনের রচনায় মুসলিম চরিত্রগুলোর মুখে বাঙলা-হিন্দুস্তানী মিশ্র ভাষা পুরে দেয়া রেওয়াজে পরিণত হয়, ভারতচন্দ্রের মানসিংহখণ্ড, কৃষ্ণরামদাসের রায়মঙ্গলের বড়ুখা গাজী কিংবা প্যারীচাঁদের আলালের ঘরের দুলালের ঠকচাচা এ প্রসঙ্গে স্বত্বব্য।

দোভাষী সাহিত্যের পরিচিতি প্রসঙ্গে আমরা এ বিষয়ে বিস্তৃত আলোচনা করব। এখানে কেবল পীরপাঁচালীর কবিদের ভাষার নমুনাই বিবেচ্য।

পূর্বেই বলেছি যে-সব হিন্দুকবি সত্যনারায়ণ পাঁচালী রচনা করেছেন, তাঁরা পশ্চিম ও উত্তরবঙ্গের শহর-বন্দর এলাকায় তথা কোলকাতা-মুর্শিদাবাদের রাজশক্তি প্রভাবিত অঞ্চলের অধিবাসী ছিলেন। জয়ে পরাজয়ে জাতির ভাগ্য যেমন রাজধানী থেকেই বিবর্তিত নির্ধারিত ও নিয়ন্ত্রিত হয়, তেমনি নূতন ভাব-চিন্তা, উত্থান-পতন, ভারতচন্দ্র সবকিছুই রাজধানীকেন্দ্র করেই সংঘটিত হয়। পীরপূজা এবং পীরপাঁচালীও তাই এখানেই উদ্ভূত।

একেতো এসব অঞ্চলে স্বাভাবিকভাবেই সুরবারী ভাষা ফারসির অমিত প্রভাব পড়ে, (এখনকার যুগে যেমন শহরগুলোর লোকের উর্দু-ইংরেজির প্রভাব রয়েছে) তাতে আবার উর্দু-ফারসির মাধ্যমে পীরের ও ইসলামের কথা জানাতে হয়েছে বলে অনুবাদের সুবিধার জন্যে উর্দু-ফারসি শব্দ রক্ষিত হয়েছে। তাই এক প্রথম আমরা হিন্দু কবির মধ্যে আরবি-ফারসি শব্দের বহুল ব্যবহারের প্রবণতা দেখতে পাই। কৃষ্ণরামদাস, ভারতচন্দ্র এবং সত্যনারায়ণ পাঁচালীকার মিশ্রীতি অনুসরণ করেছেন বিদ্যাপতি, শ্রীকবিরত্নভ, তাহির মাহমুদ প্রভৃতি কবি এ ক্ষেত্রে মাত্রা ছাড়িয়ে গেছেন। এ সূত্রে অন্যতম সত্যনারায়ণ পাঁচালীকার রায়গুণাকর ভারতচন্দ্রের মানসিংহখণ্ডও স্মরণীয়। তখন থেকেই হিন্দুস্তানী-বাঙলা মিশ্রীতির বা দোভাষী পুথির শুরু। আঠারো শতকের শেষার্ধ্বে ফকির গরীবউল্লাহ (রচনাকাল ১৮৬০-৯০ খ্রীঃ) এঁদেরই অনুসরণ করেছিলেন। ইনিও সত্যপীর-পাঁচালী (মদনকামদেব পালা।) রচয়িতা।

আমরা এখানে বিদ্যাপতি এবং শ্রীকবিরত্নভের ভাষার কিঞ্চিৎ নমুনা তুলে দিচ্ছি :

রায়মঙ্গলে কৃষ্ণরাম দাসের হিন্দির নমুনা :

‘শোনতেহো দক্ষিণরায় এছা দাগাবাজী। কালানলশেরকু তোড়নে কহে কান।

বাঁধকে লে আনছে তবে হাম গাজী।। সিঁতাং দেখনে চাই কেছাই সয়তান।।

ভারতচন্দ্র এঁর অনুকরণেই মানসিংহ অধ্যায়ে মিশ্রভাষা ব্যবহার করেন। বলাবাহুল্য, ভারতচন্দ্র দক্ষিণ রাঢ়ের বসন্তপুরনিবাসী ছিলেন।

বিদ্যাপতির বন্দনাংশ :

‘হইয়া বান্দার বান্দা নুঙাইয়া শিব।

বড় খা গাজী যেই করিল জাহির।।

বন্দিব বড় খা গাজী পীর দস্তগীর।

আজমীর শহরে বন্দিব আজমেরী।

এক দিলে বন্দিব দরদস্তা পীর ।
বন্দিব পেঁড়োর কাছে পীর সুফী খান ।
পাণ্ডার বিচে যা রহেত মোকাম ।।
শাহা ইসমাইল গাজী হড় মান্দারণে ।।
যার নাম জাহির তামাম লোক জানে ।।
বন্দিব দফর খাঁ গাজী ত্রিবেণীর ঘাটে ।
মিঞা মেরু বন্দিব স্বরমপুর পাটে ।
বন্দিব স্করগঞ্জ ত্রিবেণীর পার ।
একে একে বন্দো যত পীর দুনিয়ার ।

মাইতলায় বিধি বন্দো সৈয়দের নারী ।
নাম লইয়া এ-সভার জাহানে যেই যায় ।
চোরঘাটি দক্ষি-দানা দেখিয়া পলায় ।।
হিন্দুর দেবতা বিচে বন্দিলাম শিব ।
একে একে বন্দিব জাহানে যত জীব ।।
বন্দিব সাহেব সত্যপীরের চরণ ।
যাহার হুকুমে করি পাঁচালী রচন ।।
হিন্দু-হয়্যা পীরের মহিমা কিবা জানি ।
হুকুম হৈল যেমন রচিব তেমনি ।

(ডঃ সুকুমার সেন উদ্ধৃত)

শ্রীকবিবল্লভ :

গুনহ বেইমান রাজা বাত কহু তোরে ।
রাখ্যাছ গোলাম মেরা কিসের খাতিরে ।।
সাত হাজারের মার্তা লইয়াছে ভ্যাড়্যা ।
মহল ভিতরে নাচে সাত শত নাড়্যা ।।

হান হান কাট কাট করিয়া ফুকুরে ।
কুধিরের নদী বহে মহল ভিতরে ।।
তামাম শহরে আগ লাগাইয়া দিল ।
জরু জাতি মাল মার্তা জুলিতে লাগিল ।।

[আবদুল করিম সাহিত্যবিশারদ সম্পাদিত পুথি পৃঃ ৪২]

জঙ্গনামা রচয়িতা রাধাচরণ গোপও ভাষায় মিশ্রীতি অনুসরণ করেছেন । (পুথির লিপিকাল ১৮২৭ সাল ।) ইনিও সত্যপীরের ভক্ত ছিলেন ।

বন্দিখানায় যত ছিল হইল খালাস ।
সত্যপীরের পাত্র ভণে রাধাচরণ গোপ ।
ইলাহি কহেন জীবরীল কর আর কি ।
আছমান জমিন ডুবাইছেন রছুলের বি ।।

সিঁতা করিয়া এখন দুনিয়াকে যাও ।
বিবি ফাতেমাকে তুমি যাইএগা সমজাও ।।
কহিও আমার কথা বিবি ফাতেমায় ।
ইমামের দাদ নিজে দিবেন খোদায় ।।

খ. কাল্পনিক ঐতিহাসিক এবং দরবেশ পীরপাঁচালী

১. পূর্ব কথা

অনার্য অস্টিক-ভেজিড মঙ্গোল রক্ত-সঙ্কর সংস্কার-প্রবণতার কথা নানা প্রসঙ্গে অনেক বার বলেছি । বাঙালী জনসাধারণ তাদের উপর আরোপিত বিদেশী-ধর্মের বন্ধন যখনই শ্লথ দেখেছে, তখনই তাদের আদিম সুপ্ত বিশ্বাস-সংস্কার ও তাদের অকৃত্রিম স্বকীয় মননধারা স্বরূপে প্রকাশিত করেছেন । আর্য-অনার্য উপাদানে সৃষ্ট বৌদ্ধধর্ম বাঙলায় বেশী দিন অবিকৃত থাকেনি, ব্রাহ্মণ্যধর্মকে অচিরে অনার্য সংস্কারের কাছে বশ্যতা স্বীকার করতে হয়েছে লৌকিক দেবতাদের ঠাই করে দিয়ে । নিরাকার একেশ্বরবাদী মুসলমানও শেষ পর্যন্ত শুধু আল্লাহর উপর ভরসা করে চলতে পারেনি, বহু পীর-দরবেশ জীবন-ভূত প্রভৃতির সহায়তা তার প্রয়োজন হয়েছে । অবিকশিতচিত্ত আতপ্রত্যয়হীন দুর্বল অনার্য বাঙালীর মধ্যে জৈন ও বৌদ্ধ ধর্ম বিকৃত হয়ে তান্ত্রিক, যোগী, সহজিয়া, ধর্মোপাসক, নাথপন্থী প্রভৃতি বহু সম্প্রদায় গড়ে তোলে । মূল উৎস জৈন-বৌদ্ধের নৈরাভ্যা-নিরীশ্বর-শূন্য ও নির্বাণবাদ । তার সঙ্গে যুক্ত হয়েছে আদিম অস্টিক-

মঙ্গোল সংস্কার। বাঙলায় জৈন-বৌদ্ধ ধর্মের আদি পীঠ অনার্য অধ্যুষিত পুণ্ড্রবর্ধন বা আধুনিক উত্তর বঙ্গ। জৈন-বৌদ্ধ ধর্মের আদি বিকৃতিও এখান থেকেই শুরু। উত্তরবঙ্গে নাথসাহিত্যের খুব প্রসার এবং যোগ-তত্ত্বের বহুল অনুশীলন হয়েছিল। আধুনিক কালেও উত্তরবঙ্গে বাউল-দেহবাদীর প্রভাব প্রতুল। উত্তরবঙ্গে ব্রাহ্মণ্যধর্মের প্রভাব বিস্তৃত হতে থাকলেও এসব বিকৃত জৈন-বৌদ্ধ-ব্রাহ্মণ্য ও আদিম বিশ্বাস প্রভাবিত ধর্মমতাবলম্বীরা মঙ্গোল অধ্যুষিত আসাম অঞ্চলে অর্থাৎ কামরূপ-কামাখ্যায় প্রবল থাকে এবং অনেকে সেখানে আশ্রিত হয়। এবং এখানে নতুন করে তাদের প্রভাব প্রতিপত্তি এতোই বৃদ্ধি পায় যে সেখানকার ডাকিনী-যোগিনী ও দারু-তুক টোনার কথা গোটা বাঙলাদেশে রূপকথার মতো ভয়ঙ্কর, চমকপ্রদ ও রোমাঞ্চকর হয়ে প্রচারিত হয়। উত্তর রাঢ় অঞ্চলও অস্ট্রিক ভেড্ডিড অধ্যুষিত এবং জৈন-বৌদ্ধ ধর্মের অন্যতম পীঠ। এখানেও বৌদ্ধ-হিন্দু ও অস্ট্রিক উপাদানে সৃষ্ট ধর্মদেবতার পূজা প্রচলিত হয়েছিল। বাঙালীর উপর ধর্মঠাকুরের প্রভাবও কম ছিল না। বিপ্রদাস পিপলাই, কবি মুকুন্দরাম, দুর্লভ মল্লিক, তন্ত্রবিভূতি প্রমুখ অনেক কবির পাঁচালীতে ধর্মঠাকুর অন্যান্য দেবতাদের সঙ্গে বন্দিত হয়েছেন।

বাঙালী জনসাধারণ চিরকাল আত্মপ্রত্যয়হীন, দুর্বল ও ভাবপ্রবণ পরনির্ভরশীল শক্তি-উপাসক। এই মনোবৃত্তির ফলেই এরা অলৌকিক অসাধারণ শক্তিসম্পন্ন আশ্রয়দাতা দেবতার সন্ধান ও পূজা করেছে। অপ্রত্যক্ষ দেবতার চেয়ে একারণেই অলৌকিক শক্তিদর প্রত্যক্ষ মানবকে দেবতার আসনে বসিয়েছে। ঐতিহাসিক যুগে এ মানুষপূজার আরম্ভ জৈন-বৌদ্ধ শ্রমণ ভিক্ষু সাধু পূজায় এবং সমাপ্তি যোগী-সন্ন্যাসী-পীর-দরবেশ পূজায়। ধারাটি এরূপ : শ্রাবক-শ্রমণ-যোগী-সিদ্ধা-সন্ন্যাসী-পীর-দরবেশ। অগ্নিরদিকে দেবতাদের মধ্যে শিব-চণ্ডী-মনসা-শীতলা-ধর্মঠাকুর-দক্ষিণরায়-কালুরায় প্রভৃতি এই দু'ধারা এসে অবশেষে মিলিত হয়েছে সত্য-নারায়ণে।

তেরো শতকের প্রারম্ভে যখন প্রসিদ্ধ সূফী দরবেশ জালালউদ্দীন তাবরেজী বাঙলাদেশে আসেন, তখনও তাঁর অলৌকিক শক্তি-সামর্থ্যে মুগ্ধ হয়ে স্বয়ং রাজা লক্ষণসেন ও সভাসদ হলায়ুধ মিশ্র পর্যন্ত তাঁর ভক্ত হয়ে ওঠেন। ইতোপূর্বেও এদেশে সূফী-ফকিরেরা আর্ত-দুস্থের সেবা করেও কেলামতী প্রদর্শন করে করেই ইসলামের প্রতি জনসাধারণের শ্রদ্ধা জাগিয়ে সৃষ্টি করেছিলেন ইসলাম প্রচারের অনুকূল পরিবেশ। স্থানীয় সামন্তের সঙ্গে প্রচারক দরবেশপীরদের দ্বন্দ্ব, অবশেষে সামন্তদের পরাজয়, ইসলামের প্রসার এবং হিন্দু-মুসলিমের সমন্বার্থে সহিষ্ণুতায় সহযোগিতায় সহাবস্থানই হয়েছে বর্ণিত বিষয়।

ষোল শতক থেকে উত্তর ও পশ্চিমবঙ্গে পীরগণ দেবকল্প বা দেবতারূপে পরিকল্পিত হতে থাকেন পূর্বে বর্ণিত বাস্তব কারণেই, সতেরো শতকে উত্তর ও পশ্চিমবঙ্গের হিন্দুসম্প্রদায়ের এক বিরাট অংশ পীরকে ইষ্টদেবতার আসনে প্রতিষ্ঠিত করতে থাকে। তখন এ পীর কোন ব্যক্তিবিশেষ রইলেন না, সত্যপীর বা সত্যনারায়ণ নামে ইনি সর্বজনীন দেবরূপ প্রাপ্ত হলেন। এ সময়ে দক্ষিণ রায়, কালুরায়, বনদেবী (বনদুর্গা) বা বনবিবি প্রভৃতি বিশেষ বিশেষ দেবতাও সমাজে প্রতিষ্ঠা লাভ করছিলেন। এদিকে জাফরখান গাজী সফীউদ্দীন, ইসমাইলগাজী, খান জাহান আলী খান প্রভৃতি ঐতিহাসিক ব্যক্তিগণের শক্তি-সামর্থ্যে মুগ্ধ জনগণ তাঁদেরকেও কাল্পনিক পীর বড় খান গাজী, মানিক পীর, গাজী কালু আর মসলন্দী পীর প্রভৃতির সমাসন দান করল।

ষোল শতকের কবি শেখ ফয়জুল্লাহর গাজীবিজয় ও সতাপীরবিজয়, সতেরো শতকের কৃষ্ণরাম দাসের রায়মঙ্গল, ষষ্ঠীমঙ্গল, শীতলা মঙ্গল ও কমলামঙ্গল এবং রূপরামের ধর্মমঙ্গল থেকে আমরা সিংহসন্দেহে ধারণা করতে পারি যে সতেরো শতক থেকেই বৈষ্ণবপ্রভাবের মন্দার দিনে বাঙালী হিন্দুরা পীরের বিশেষ ভক্ত হয়ে ওঠে। পীরের তথা দরবেশের চরিত্রশক্তি ও কেরামতীর মধ্যে তারা দেবতার স্বরূপ দেখতে পায়, আর সাধারণ সুফী-ফকিরের মধ্যে দেখে আদর্শ সাধক। তাই কবি রূপরাম ধর্মঠাকুরের মাহাত্ম্যকথা বলতে গিয়ে ধর্মকে করেছেন আদর্শ পীর, নিজে হয়েছেন ফকির। হিন্দুদের ফকিরচাঁদ, ফকিরদাস, ফকিররাম প্রভৃতি নাম থেকেও পীর-ফকিরে ভক্তির আভাস পাওয়া যায়।

সতাপীরপাঁচালী রচয়িতা হলেন ষোল শতকে শেখ ফয়জুল্লাহ এবং সতেরা শতকে কৃষ্ণরামদাস, ও বর্ধমান জেলার শাহবাদ পরগনাবাসী দ্বিজ গিরিধর (১৬৬০ খ্রীঃ) আর উত্তর বঙ্গের কবি শামস-নন্দন তাহের মাহমুদ। এঁদের পরে আমরা আঠারো শতকের প্রায় পঁয়তাল্লিশজন পীরপাঁচালী রচকের সন্ধান পাচ্ছি। সত্ৰপীর দক্ষিণরায় কালুরায়, বড় খাঁ গাজী, বনবিবি প্রভৃতি হিন্দু ও মুসলমান দেবতাগণের পারস্পরিক বিরোধ ও মিলনের মধ্যে দিয়ে শাসিত হিন্দুগণ শাসক মুসলমানের সঙ্গে সামাজিক ও ধর্মীয় মতাদর্শের রফা খুঁজেছে। 'বিষ্ণু আর বিসমিল্লা কিছু ভিন্ন নয়।' মক্কার রহিম অযোধ্যার মুমিন অভিন্ন। তাই এ জাতীয় সাহিত্য হিন্দুদের ঘরাই সৃষ্টি হয়েছে বেশি। তবে আঠারো-উনিশ-বিশ শতকে পশ্চিমবঙ্গীয় কয়েকজন মুসলমান করিও কয়েকটি পীরপাঁচালী রচনা করেছেন। উল্লেখ্য যে তুর্কি আমলে যে প্রয়োজনে ও লক্ষ্যে দেবতামঙ্গল পাঁচালী রচিত হয়েছে, মুঘলযুগে সত্যকেন্দ্রী পীর ও উপদেবতা পাঁচালী সেই একই প্রয়োজনে ও উদ্দেশ্যে রচিত। এবার কালান্তরে দেশজ মুসলিমও যোগ দিয়েছে একই লক্ষ্যে। এ সাহিত্য বাঙালী পতনযুগের সাক্ষ্য বহন করছে। এ পুথিগুলোও রচিত হয়েছে কোলকাতা-মুর্শিদাবাদের চতুষ্পার্শ্ববর্তী অঞ্চলে। মানুষ যখন আত্মবিশ্বাস হারিয়ে ফেলে, উচ্চনৈতিক সামাজিক ও ধর্মীয় আদর্শ ধারণ করবার মতো মন বৃদ্ধি বিবেচনাশক্তি রহিত হয়, তখন সে একান্তভাবে ভয়-বিহ্বল হয়ে দৈবনির্ভর ও শক্তিপূজক হয়ে ওঠে।

সতেরো-আঠারো শতকের কোলকাতা-মুর্শিদাবাদ প্রভৃতি উত্তর ও পশ্চিমবঙ্গের হিন্দু বাঙালীর চারিত্রিক ও আধ্যাত্মিক মন্দার দিনে সত্যনারায়ণ ও ধর্মঠাকুর দুর্বল অজ্ঞ অসহায় জনসাধারণের ধর্ম-অর্থ-কাম-মোক্ষ লাভের সহায়রূপে পূজিত হচ্ছিলেন। নওয়াবীর গৌরব-ও প্রসাদ বঞ্চিত দারিদ্র্যক্লিষ্ট বাঙলার দেশজ মুসলমান জনসাধারণও চতুর্ভুজ ফল লাভের সহজ উপায়স্বরূপ হিন্দুদের অনুসরণে ব্যাপকভাবে পীর-পূজা আরম্ভ করে। তারই ফলস্বরূপ আমরা-উনিশ-বিশ শতকে তাদের হাতে কয়েকটি পীরপাঁচালী পেয়েছি।

পালদের পতনযুগে আমরা বৌদ্ধ বজ্জয়ান সহজয়ান তন্ত্রযোগ প্রভৃতি পেয়েছি, সেনরাজাদের দুদিনে পেয়েছি একদিকে চণ্ডী মনসা প্রভৃতি, অপরদিকে শেখ শুভোদয়া গীতগোবিন্দ প্রভৃতি। রাধাকৃষ্ণলীলার এই পঙ্ক থেকে পঙ্কজ হল উত্তরকালের বৈষ্ণবমত। তুর্কি-আফগান পরাজয়ে পেলাম ধর্মঠাকুর, দক্ষিণরায় কালুরায়, বড়খাঁ গাজী, ইসমাইল গাজী প্রভৃতি। আর মুঘলশক্তির পতনে পেলাম বিদ্যা-সুন্দর, কবিগান, দোভাষীসাহিত্য। এ হচ্ছে স্রোতে ভেসে-যাওয়া লোকের তৃণ ধরে বাঁচবার প্রয়াস।

২. পীরদের উৎস

সৃষ্টির ও স্রষ্টার দ্বৈততত্ত্বই ইসলামের ভিত্তি। সৃষ্টির ও স্রষ্টার সমস্ত পৃথক। তাই আল্লাহর সঙ্গে মানুষের সম্পর্ক হচ্ছে আবদ্ ও রব-এর তথা বান্দা ও মনিবের। নিচরই আমরা আল্লাহর জন্যে এবং আমরা তাঁর কাছেই ফিরে যাব। এ জন্যেই আল্লাহর অনুগত থাকতেই অর্থাৎ কোরআন নির্দেশিত বিধি-নিষেধ মেনে চলাতেই মানুষের দায়িত্ব ও কর্তব্য সীমিত। বিধি-নিষেধ মান্য না-মানার উপরই নির্ভর করছে পুরস্কারের বেহেশতী শান্তি ও তিরস্কারের দোজখী শাস্তি।

মুসলিম সমাজে ধর্মচিন্তার ক্ষেত্রে বিপ্লবের উগ্ধ হয় উম্মিয়া শাসনকালে। যখন ইসলাম আরব বহির্ভূত অঞ্চলেও বিস্তৃত, তখন ইহুদী-খ্রীস্টান শাস্ত্র এবং তত্ত্ব ছাড়াও মিশরে সিরিয়ায় ইরাকে ও ইরানের গ্রীক, জোরাস্ট্রীয়, মানী, মজদকী, জিনদিকী বৌদ্ধ ও ব্রাহ্মণ্য নানা তত্ত্বের ও দর্শনের সঙ্গে স্থানীয় মুসলিমদের ঐতিহ্যসূত্রে পরিচয় ছিল গভীর এবং তাদের উপর ঐসব মতবাদের সংস্কারগত প্রভাব অচিরে প্রবল হতে থাকে। ফলে অল্পকালের মধ্যে শাস্ত্র ব্যাখ্যায় হিম্মতের সৃষ্টি হয় : শিয়া ও সুন্নীমত। এ ব্যাপারে সুপ্রাচীন সভ্যতার ও মননের ধারক ও বাহক ইরাকী-ইরানিরাই ছিল অগ্রণী। এ প্রেরণার উৎস গ্রীকদর্শন আর উপকরণ মিলেছে, খ্রীস্টীয়, বৌদ্ধ, জোরাস্ট্রীয় মানীয় দর্শন থেকে। এমন করে ক্রমে শাস্ত্রতত্ত্ব দর্শন-জিজ্ঞাসার স্তরে উন্নীত হল।

আকবাসীয় যুগে হাসান বসোরীর শিষ্য ওয়াসিক ইবন আতা যুক্তিবাদী মুতামিলা মত প্রবর্তন করেন। অন্য একদল হল সংশয়বাদী। এর প্রতিক্রিয়াস্বরূপ আল আশআরী (জন্ম-৮৭৩ খ্রীঃ) প্রচার করলেন এক নতুন মত। প্রবর্তকের নামে এ মত 'আশআরী মত' নামে পরিচিত আর এ সব কিছু ছাপিয়ে সর্বগ্রাসীকরূপ নিয়ে আবির্ভূত হল মরমীবাদ বা সুফীবাদ। সুফীবাদে বান্দা-মনিবের শরিয়ততত্ত্ব হল গৌণ মুখ্য হল প্রেমিক-প্রেমাস্পদতত্ত্ব, মানুষের ও আল্লাহর সম্পর্ক হল আশিক-মাতকের। হাসান বসোরী (মৃঃ ৭২৮ খ্রীঃ) রাবেয়া বসোরী (মৃঃ ৭৫৩) ইব্রাহিম অদহম (মৃঃ ৭৭৭ খ্রীঃ) আবু হাশিম (মৃঃ ৭৭৭ খ্রীঃ) দাযুদ ডয়রী (৭৮১ খ্রীঃ) মারুফ করবী (৮১৫ খ্রীঃ) প্রমুখ আদি মরমী বলে স্বীকৃত। এঁরা সবাই ছিলেন সিরীয় ও ইরাকি এবং এঁদের মতবাদ কোন শিষ্যগোষ্ঠী বা মতবাদী সম্প্রদায় তৈরি করেনি। জুননুন মিশরীই (৮৬০ খ্রীঃ) প্রথম একটি সুনির্দিষ্ট তত্ত্ব দর্শন ও সাধনমার্গ হিসেবে সুফীমতকে গ্রন্থ মাধ্যমে ব্যাখ্যা ও বিন্যস্ত করেন। এরপর থেকেই ইরানে সুফীমতের দ্রুত বিকাশ ও প্রসার ঘটে এবং এক-এক সুফীর শিষ্যগোষ্ঠী পরম্পরায় মতবাদী খান্দান সম্প্রদায় গড়ে ওঠে। তাই সুফীমত বলতে কোন একটি সুনির্দিষ্ট বা বিশিষ্ট মতকে নির্দেশ করে না। জনান্তরে কালান্তরে ও স্থানান্তরে সুফী মত ও চর্যা বহু ও বিচিত্র অবয়ব লাভ করেছে। সুফীবাদ গড়ে উঠেছে পূর্ববর্তী সব ধর্মের তত্ত্বচিন্তার নির্ধারিত নিয়ে। এর আগে এমনি এক সমন্বিত চিন্তাধারার আভাস ছিল শিয়াদের ইসমাইলী শাখার মতবাদে। কাজেই সুফীমত প্রসারের পরিবেশ ছিল অনুকূল।

ভারতবর্ষের সুফীবাদ যেমন বৈদান্তিক অদ্বৈততত্ত্ব প্রভাবিত, তেমনি বৌদ্ধ শূন্য বা নির্ধাণতত্ত্বও হয়েছে এর অবলম্বন আর যোগমাধ্যমে কায়াসাধনই হয়েছে সুফী চর্যার স্বীকৃত পন্থা। তাই ফানা ও বাকা দুটোই সাধ্য। এ গুহ্যসাধনা গুরুনির্ভর। গুরুবাদ বৌদ্ধদেরই দান। পীর ও স্থবির সমার্থক শব্দ। ভারতবর্ষের মরমী মাত্রই তাই গুরুবাদী। এ প্রভাবে পড়েই গৃহীরাও পীর-গুরু ছাড়া ধর্মজীবন কল্পনাও করতে পারে না। মুসলিমদের দরগাহপ্রীতিও বৌদ্ধ স্তুপপূজার প্রভাবজ্ঞ ও ঐতিহ্যবাহী।

এ সূত্রে ভারতবর্ষের মধ্যযুগীয় পাঞ্জ বা পাঁচ পীরতত্ত্বও স্মর্তব্য। এটিও উত্তর ভারতের বিস্তৃত অঞ্চলের হিন্দু-মুসলিমের পীরপূজার ভিত্তি ও উৎস। এ পাঁচপীর ভারতবর্ষের কোন কোন অঞ্চলে ঐতিহাসিক ব্যক্তিত্ব, কোন কোন অঞ্চলে কাল্পনিক, আবার কোথাও কোথাও ঐতিহাসিক ও কাল্পনিক ব্যক্তিত্বের মিশ্রণে গঠিত এবং বিভিন্ন অঞ্চলে ও সম্প্রদায়ে পূজা-শিরনীর পদ্ধতিও আলাদা। ভারতবর্ষের এ পাঁচপীর অর্থাৎ পাঁচ সংখ্যক পীরতত্ত্বের উদ্ভবের মূলে রয়েছে শিয়াদের ‘পাকপাঞ্জতন’ তত্ত্বের অবচেতন প্রভাব। ‘রসুল, আলি, ফাতেমা, হাসান ও হোসেন’— পাকপাঞ্জতন শিয়াদের ভক্তিভাজন এবং কালক্রমে রোগের শোকের মহামারীর ও অসুস্থ-বিশদের সময়ে স্মরণ্য ও শরণ্য শক্তিরূপে কল্পিত ও স্বীকৃত। ভারতবর্ষে মুখ্যত পার্শ্ববর্তী জীবনে জীবিকায় নিরাপত্তায় ও সুখ-সৌভাগ্যের সহায়ক ও মহামারী নিবারক দরবেশপীর বা দৈবশক্তি হিসেবেই পাঁচপীর পূজা, স্মরণ্য ও শরণ্য শক্তিরূপে কল্পিত ও স্বীকৃত। পঞ্চ বা পাঁচ সংখ্যার তাত্ত্বিক তাৎপর্য, পবিত্রতা, শক্তি ও মহিমা প্রাচ্যে— আরবে ইরানে ভারতবর্ষের সর্বত্র সুপ্রাচীনকাল থেকেই স্বীকৃত। পঞ্চানন, পঞ্চবান, পঞ্চতন্ত্র, পঞ্চমকার, পঞ্চভূত, পঞ্চতীর্থ, পঞ্চদেবতা, পঞ্চায়েত, পঞ্চপ্রদীপ, পঞ্চলক্ষণ, পঞ্চমৃত, পঞ্চযজ্ঞ, পঞ্চসতী, ইরানে পাঞ্জতন, আরবে পাঁচ কলেমা, ইমানের পঞ্চাঙ্গ, পাঁচওয়াস্ত নামাজ প্রভৃতি স্মর্তব্য।

সাম্প্রদায়িক মানুষের আশা-প্রত্যাশা অশন-বসন-নিবাস-বিদান পেয়ে মাটি আঁকড়ে বেঁচে বর্তে থাকার মধ্যেই সীমিত। কাজেই তারা তত্ত্ব বোঝে না, কিন্তু তাত্ত্বিক চেনে, নিজেরা সাধনা করে না, কিন্তু সাধকের সন্নিধ্যে আশ্রয় থাকে, তারা নিজদের সিদ্ধিও কামনা করে না, কিন্তু সিদ্ধ সাধকের কেরামতির বা অলৌকিক শক্তির ফল ভোগ করতে উৎসুক। তাই তারা ফকির দরবেশ সাধু সন্ন্যাসী ভিক্ষু শ্রমণ শ্রাবক যোগী ব্রহ্মি বেড়ায়। পার্শ্ববর্তী তথা ঘরোয়া জীবনের রোগ দুঃখ কষ্ট সমস্যা থেকে মুক্তির জন্যে তাঁদের অনুগ্রহ আশীর্বাদ তাবিজ কবচ তাগা মাদুলী প্রার্থনা করে।

৪. কাল্পনিক পীর

কালু-গাজী চম্পাবতী উপাখ্যান— বনবিবি মানিকপীর প্রভৃতির চেয়ে অনেক বেশি জনপ্রিয় এবং বৈষয়িক-জীবন সমাজ, শাস্ত্র ও সংস্কৃতি ক্ষেত্রে অনেক বেশি গুরুত্বপূর্ণ উপাখ্যান হচ্ছে কালু-গাজী-চম্পাবতী। এ উপাখ্যানের রচয়িতা হলেন উনিশ শতকের শায়েব আবদুল গফুর, আবদুর রহিম এবং বিশ শতকের সৈয়দ হালু মিয়া ‘বড়ে গাজীর কেরামতি’ রচনা করেন। আবদুর রহিমের রচিত কবাই শ্রেষ্ঠ এবং জনপ্রিয়। উপাখ্যানের সংক্ষিপ্তসার এই : বিরাটনগররাজ শাহ সিকান্দরের পুত্র জুলহাস পাতাল-পুরীর রাজকন্যা পাঁচতুলাকে বিয়ে করে সেখানেই রয়ে গেল। সিকান্দরের রানী বালরাজকন্যা অজুপা ভেলায় ভেসে আসা একশিশুকে অপত্যস্নেহে পালন করতে থাকে। এ শিশুর নাম কালু। কিছুকাল পরে রানীর একটি ছেলে হল। নাম খুইল তার বড়ই গাজী। কালু-গাজী একসঙ্গেই মানুষ হতে লাগল। দুজনের মধ্যে খুব ভাব। এবং দুজনই ধর্মপ্রাণ। দশবছর যখন গাজীর বয়স, তখন বাদশাহ সিকান্দর তাকে রাজকার্য দেখতে বা শিখতে বললে গাজী রাজত্বে অনীহা প্রকাশ করল। তাই, রাজা কর্তব্যবোধে কঠোরশাসনে রাখল গাজীকে। তাতে কোন পরিবর্তন দেখা গেল না বরং খওয়াজা খিজিরের ও গঙ্গা-দুর্গা-

শিবের স্নেহপ্রাপ্ত গাজী অলৌকিকশক্তির অধিকারী হয়েছে দেখে রাজা গাজীকে শাসন করা বৃথা বলেই মানল। একদিন কালুকে নিয়ে ঘর ছাড়ল গাজী। ততদিনে গাজী বাঘ-কুমীর-জীন-পরীর মান্য হয়ে গেছে। কাজেই কেরামতির ফলে সহজেই এসে গেল সুন্দরবনে। কিন্তু ‘ফকিরের রীত নহে থাকা এক ঠাই।’ তাই চলতে চলতে ক্ষুধার্ত হয়ে দু-ভাই রাজবাড়িতে গেল খাদ্য পাবার আশায় কিন্তু হিন্দু রাজা বা প্রজা কেউ মুসলমানকে আহার্য দিতে রাজি হল না- দু’ভাই বিতাড়িত হয়ে ফিরে এল বনে। অপমানিত কালুর মনে জাগল প্রতিশোধবাস্ত্ব।

অগ্নি যদি লাগি যায় এ রাজার ঘরে এ রাজার লোক সব জাতি যদি দিত
আর যেন লিয়া যায় রানীরে যে ধরে। মনের মানস মোর তবে পূর্ণ হৈত।

আল্লাহ ও বাঞ্হ পূরণে রাজি। কাজেই রাজার বাড়ি পুড়ল, রানীকে জীন হরণ করে বন্দী রাখল মসজিদে। পরাজিত রাজা সপ্রজা ইসলাম গ্রহণ করেই রানী ও রাজ্য ফিরে পেল ‘পাত্রমিত্র যত তার রামনাম ছাড়ি নবীর কলেমা পড়িল।’

তারপর একজায়গায় সাতভাই কাঠুরে কালু-গাজীর সেবা করে তাদের দোয়ান ধনী হয়ে উঠল। সর্পদেবী পদ্মা (মনসা) হল বনবাসী গাজীর ভগ্নী। সোনাপুর হল গাজীর মোকাম।

এবার গাজী-চম্পাবতীর প্রেম ও পরিণয় বৃত্তান্ত। মনোহর-মধুমালতলীর আদল আছে কাহিনীতে দক্ষিণ রায়ের ভক্ত দক্ষিণরাজ্যের রাজা ঞ্চুরায় বা মুকুটরায়, তার রানীর নাম নীলাবতী, কন্যার নাম চম্পাবতী। একরাত্রে পরীরা চম্পাবতীর মহলে নিয়ে গেল ঘুমন্ত গাজীকে। রাত্রে উভয়েরই ভাঙল ঘুম, হল পরিচয়। গাজীকে মুসলমান জেনে চম্পাবতী ক্রুদ্ধ হল বটে, কিন্তু ভাগ্যকে মেনে নিয়ে উভয়েই অনুরী বিনিময় করে আবার ঘুমিয়ে পড়ল। পরীরা শেষরাত্রে ঘুমন্ত গাজীকে রেখে গেল সোনাপুর। সকালে চম্পা মাকে জানিয়ে রাখল রাতের ঘটনা। শিবের কৃপায় চম্পাবতী সর্বক্ষণ গাজীকে প্রত্যক্ষ করছিল, শেষে এমন হল যে চম্পাবতী স্বয়ং ‘গাজীর রূপেতে তখন গাজী হৈয়া গেল।’ এদিকে বিরহব্যাকুল গাজীও অধৈর্য হয়ে কালুকে নিয়ে গেল রাজধানী ব্রাহ্মণনগরে। কাতিপুরে কদমতলায় আস্তানা গেড়ে গাজী কালুকে ঘটক করে পাঠাল রাজসভায়। কালু বরের গুণের কথা বলল :

বুজুরগী দেখিয়া তার কতই ব্রাহ্মণ
পৈতা ছিঁড়িয়া তারা হইল যবন।

তা’ ছাড়া রাজকন্যার সঙ্গে গাজীর প্রেমও রয়েছে। ‘এ কথা শুনিয়া লজ্জায় রাজা নাহি তোলে মাথা’, তবু রুষ্টরাজা ঘটক কালুকে বন্দী করলে কন্যাও পিতার রোমানল এড়িয়ে পালিয়ে রইল। বাঘের পীর বড়খা তখন ভেড়ার অবয়বে সুন্দরবনের বাঘবাহিনী এনে লেলিয়ে দিল ব্রাহ্মণনগরে। স্বমূর্তি ধরে বাঘ রাজবাড়িতে ও নগরে ত্রাস সৃষ্টি করলে রাজা মুকুটরায় ইষ্টদেবতা দক্ষিণরায়কে স্মরণ করে। ফলে দক্ষিণরায়ের সঙ্গে গাজীর ভীষণ যুদ্ধ হয়, সে-যুদ্ধ হানিফা-সোনাভানের যুদ্ধের মতো। বিপন্ন দক্ষিণরায় গঙ্গায় অনুগত কুমীরবাহিনীর সাহায্য চাইলেও গঙ্গা গাজীর বিরুদ্ধে সাহায্য দিতে প্রকাশ্যে সাহাস পেল না। তবে ‘এই কথা কোনমতে গাজী নাহি শনে’ অঙ্গীকার করিয়ে দক্ষিণ রায়ের সাহায্যে কুমীরবাহিনী পাঠাল।

এরপর যুদ্ধের ধরন গেল বদলে, কুমীরের দাপটে বাঘ হটতে লাগল। তখন গাজী প্রচণ্ড রোদ কামনা করল, রোদের অসহ্য তাপে বিব্রত কুমীর ডুবল জলে। গৌরীর বরে দক্ষিণ রায়ের

পক্ষে এল এবার ভূতশ্রেত পিশাচ। এদের ভয়ে আবার ভাগল বাঘ। গাজী আঙনের সাহায্য নিল, আঙনের বেড়া বিস্তৃত হতে দেখে ভূতশ্রেত পিশাচ পালান। এরপরে রায়-গাজী বাধল যুদ্ধ, সে-যুদ্ধে এক পক্ষ ছোঁড়ে গদা, অন্যপক্ষ ছোঁড়ে আষা, কারো হাতে বড়ম, কারো হাতে ছুরি। অবশেষে পরাজিত রায় মাফ চেয়ে বাঁচলেন। ইষ্টদেবতা হার মানলে রাজা মুকুটরায় স্বয়ং নামল যুদ্ধে। রাজপুরীতে ছিল জীয়ককুণ্ড। শত্রুর বাঘসৈন্যের হাতে নিহত সৈন্যকে জীয়ককুণ্ডের জল ছিটিয়ে জীবত করা চলত। কিন্তু বাঘেরা বুদ্ধি করে সে-কুণ্ডে গোমাংস ফেলে অপবিত্র করে দিল। ফলে কুণ্ডের জীবনদানের শক্তি রইল না আর। নিরুপায় রাজা পরাজয় মানল, চম্পাবতীর সঙ্গে বিয়ে হল গাজীর। তারপর গাজী তার জ্যেষ্ঠভ্রাতা জুলহাসকে ও তার পত্নী পাঁচতুলাকে পাতালপুরী থেকে নিয়ে এসে চম্পাবতী ও কালু সমেত পিতামাতার বিরাটনগরে গিয়ে সুখে বাস করতে থাকে।

বড়ম্বা গাজী সুন্দরবনের বাঘের পীর, ইসলাম প্রচারক ও বীর মুজাহিদ। হিন্দুর দেবতার চেয়ে মুসলিম পীরের শক্তি ও মাহাত্ম্য যে বেশি এবং তার ফলেই যে হিন্দুর দেশে হিন্দুসমাজে ইসলাম প্রসার লাভ করেছে এবং মুসলিম যে এ শ্রেষ্ঠত্বের গুণেই হিন্দুর দেশে প্রতিষ্ঠিত হয়েছে, তা প্রমাণ করাই এ ধরনের উপাখ্যান সৃষ্টির মুখ্য উদ্দেশ্য। তা ছাড়া তুর্কিবিজয়ের পরে হিন্দুসামন্তদের সঙ্গে ইসলাম প্রচারক সূফী দরবেশদের দ্বন্দ্ব-সংঘাতের পরোক্ষ সাক্ষ্যও বহন করে এসব উপাখ্যান। বাস্তব সাক্ষ্য রয়েছে বদ্বাল-চিরিতে বাবা আদম কাহিনীতে, সিলেটে গৌরগোবিন্দের ও শাহজালাল শিষ্যদের বৃত্তান্তে; আর শাহ সুলতান বলখীর কিংবদন্তী প্রভৃতিতে।

হিন্দুরচিত পাঁচালীতে দক্ষিণ রায় ও বড়ম্বা গাজী

বড়দেহের বেনে পুষ্পদন্তের নির্দেশ রতাই বাউল্যা তার ছয়ভাই ও একপুত্র নিয়ে সুন্দরবনে গেল ডিঙ্গা তৈরির কাঠ সংগ্রহের জন্যে। বনে দক্ষিণ রায়ের আশ্রয় এক বিপুলকায় বৃক্ষ কেটে রতাই দক্ষিণ রায়ের কোণে পড়ে। রায়ের নির্দেশে তার চেলা বাঘেরা রতাই ও তার পুত্রকে বাদ দিয়ে রতাইয়ের ছয় ভাইকে বধ করল, শোকে দুঃখে আত্মহত্যা করতে চাইল রতাই। এমন সময়ে দক্ষিণ রায়ের অন্তরীক্ষবাণী শোনা গেল : যদি তুমি তোমার পুত্রকে বলি দাও, তাহলে তুমি তোমার ছয়ভাইকে ফিরে পাবে। রতাই পুত্রকে বলি দিল। তুষ্ট দেবতা দক্ষিণ রায় রতাইয়ের ভাইদের ও পুত্রের জীবন ফিরিয়ে দিলেন। রতাইরা কাঠ নিয়ে বাড়ি ফিরল।

বেনে পুষ্পদন্ত ডিঙ্গা নির্মাণ করিয়ে যথাসময়ে বাণিজ্যযাত্রা করল। পুত্রের কল্যাণে তার মা সুশীলা দক্ষিণ রায়ের পূজা দিল, দক্ষিণ রায় বিপদে পুষ্পদন্তকে সাহায্যের আশ্বাস দিলেন। পুষ্পদন্তের বাণিজ্যযাত্রা ও ফিরে আসার কাহিনীটি ধনপতি শ্রীমন্তসদাগর উপাখ্যানের অনুকৃত রূপমাত্র। বেনে পুষ্পদন্তের পিতাও সদাগর এবং বিদেশে নির্বোজ রয়েছে, তার মা সুশীলা স্বামী-বিরহে কাতর। পুষ্পদন্তও পিতার সন্ধানে তৎপর মধ্যসমুদ্রে পুষ্পদন্ত দেখল কমলেকামিনীর মতো এক মায়াপুরী। তুরঙ্গ নগরের রাজা সুরথকে সেও দেখাতে পারল না সে-পুরী। ফলে মিথ্যা বলার অপরাধে পুষ্পদন্তের প্রাণনাশের হুকুম হল। কারাগারে পুষ্পদন্ত দক্ষিণ রায়ের স্তব করে। ফলে বলি দেয়ার জন্যে যখন তাকে শাশানে নেয়া হল, তখন দক্ষিণ রায়ের

দুনিয়ার পাঠক এক হও! ~ www.amarboi.com ~

উনিশ শতকের দোভাষী শায়ের খাতেরের উক্তি থেকে বোঝা যায় পূর্বদেশ বাদাশন অঞ্চলে মুসলিম সমাজেই ছিল বনবিবির বিশেষ প্রতিষ্ঠা।

উপাখ্যানটির রূপরেখা নিম্নরূপ :

১. মক্কার বিরহিম-ফুলবিবি দম্পতি ছিল নিঃসন্তান। তারা আল্লাহ-রসূলের কাছে সন্তান প্রার্থনা করে। অবশেষে নবী গায়েবী আওয়াজ দিলেন—ফুলবিবির কোন সন্তান হবে না, বিরহিম অন্য স্ত্রী গ্রহণ করলে জমজ সন্তান লাভ করবে।

ফুলবিবি পরে প্রকাশ্য এক শর্তে বিরহিমকে বিয়ের অনুমতি দিল। দ্বিতীয় স্ত্রী হয়ে ঘরে এল গোলালবিবি। যথাসময়ে সে হল অন্তঃসত্ত্বা। এবার অসুস্থাদুষ্ট ফুলবিবি তার আরোপিত শর্তানুসারে চাইল গর্ভবতী গোলালবিবির বিজন বনে নির্বাসন।

এ উপাখ্যান হযরত ইব্রাহিম-হাজরা-ইসমাইলের কাহিনীর আদলে কল্পিত। কাজেই বিজন বনে গোলালবিবি যথাসময়ে 'বনবিবি' নামের কন্যা এবং 'জঙ্গলী' নামের পুত্র প্রসব করেন। বলা বাহুল্য মঙ্গলকাব্যের নায়ক-নাকিয়াদের মতো এরাও স্বর্ণভট্ট। গোলাল দুটো শিশু-পালন দুঃসাধ্য মনে করে মেয়েটিকে ফেলে ছেলেটিকে নিয়ে স্থানান্তরে গেল। পরিত্যক্ত মেয়েটিকে বনহরিণী পালন করতে লাগল।

সাত বছর পরে বিরহিমের সঙ্গে প্রথমা স্ত্রী ফুলবিবির বিবাদ ঘটলে বিরহিম গোলালের খোঁজ নিতে এল বনে। অনুবোধ-অভিযোগের শব্দে গোলাল রাজি হল স্বামীর সঙ্গে ঘরে ফিরে যেতে। পুত্র শাহ-জঙ্গলীকে তখন বোন বনবিবি বলেন :

হেকে বলে কোথা যাও শাহ-জঙ্গলী ভাই এক সঙ্গে ছিনু মোরা ভাই বহিনেতে

মা-বাপের তরে আর প্রয়োজন নাই। আমাদের জহুরা হবে আঠারো ভাটিতে।

তাই ভাই-বোন বনে বাদাড়েল রয়ে গেলেন। এবং মক্কায় গিয়ে 'হাসানের আওলাদ হইতে মুরিদ হইয়া' ফাতেমার গোরে জেয়ারত করতে গেলে গায়েবী আওয়াজ উচ্চারিত হল : আঠারো হাজার আলম তাহা সবাকার দর্দ

মা বলে যে ডাকিবে তোমারে

দয়াবান হয়ে তুমি উদ্ধারিবে তারে।

তারপরে রসূলের কবরে গিয়ে প্রার্থনা জানালেন তাঁরা :

'ফকিরের গুরু তুমি খেলাফত দিয়া

গুনে নবী দরগাতে আরজ করিল

বিদায় করহ আমা দোহার লাগিয়া

সেই ঘড়ি খেলকা টুপি আসিয়া পৌছিল।

ভাইবোন আঠারো ভাটিতে ফিরে গেলেন।

এ আঠারো ভাটির বর্ণনায় 'নুন মোম মধু' সমৃদ্ধ সুন্দরবনের চিত্রই অঙ্কিত হয়েছে :

এখানে দক্ষিণরায় ভাটির ঈশ্বর

নুন মোম ঝাড়ি জড়ি বহুত এয়ছাই

নানা শিম্ব কৈল সেই বনে ভিতর

হাট মধু বসায়ছে কত ঠাই ঠাই।

তারপর রয়েছে নতুন দেবতার অধিকার প্রতিষ্ঠার সংগ্রাম। একে গোড়ার দিকে হিন্দু-

পহেলা যাইয়া তুড়ে ডাল এ সকল
তবে মাগো ভাটি-দেশ হইতে দখল ।
রায়মঙ্গল চাঁদখালি শিবাদহে গিয়া
আগে এ সকল ঠাই আমল করিয়া ।

তা বাদে জুড়িবে গিয়া করিবে আসন
সেখা হৈতে আগে না বাড়িবে কদাচন ।
এবং আঁধারমানিক তক্ তাহার
(দক্ষিণরায়ের) আ

এক ঘর্দ এক মেয়ে বৈসে দোহে
উর্ধ্ব মুয়ে হাত তুলে আল্লা আল্লা করে।

এবং আঠারোভাটির বিচে অধিকার যে যে আছে
সবশুদ্ধ হৈর তাবেদার।

ছাটি বাদা বসাইতে চলে গাঁয়ে গাঁয়ে
জঙ্গলী মোকেদ হয় পিছে পিছে ধাএ ।
দক্ষিণেতে এডোজোল সবহন্দ করিয়া

দুনিয়ার পাঠক এক হও! ~ www.amarboi.com ~

অধিকারে। ধনাই দক্ষিণ রায়ের পূজা না দিয়েই ঢুকল গড়খালি বনে। ক্ষুব্ধ ও রুষ্ট দক্ষিণ রায় কালকেতু উপাখ্যানের চণ্ডীর মতোই স্থির করলেন ‘ছাপাইব মোম-মধু যেন নহি পায়’। তিনদিন ধরে বৃথা মধুসন্ধানে শ্রান্ত-ক্লান্ত ও ক্ষুব্ধ ধনাই যখন নৌকায় ঘুমিয়ে পড়ল, তখন দক্ষিণ রায় স্বপ্নে দেখা দিয়ে বলেন- আমি দণ্ডবক্ষ মুনির সন্তান দক্ষিণরায় :

যদি তুমি নরবলি-পূজা পার দিতে

সাত ডিঙ্গা মোম দিব তোমার তরেতে।

এবং দুখিয়া বা দুখেকেই দিতে হবে বলি। কেঁদোখালিতে তাকে বলি দিলেই সাতডিঙ্গা বোঝাই মধু নিতে পারবে সেখান থেকে।

ধনাই-দক্ষিণ রায়ের এ সম্বাদ শুনে দুখে কেঁদে কেঁদে স্মরণ ও শরণ করল মা বনবিবিকে। বনবিবি আবির্ভূত হয়ে দুখেকে অভয় দিলেন- বলি দেয়ার জন্যে তোমাকে যখন দক্ষিণ রায়ের হাতে সঁপে দেবে, তখন তুমি আমাকে ডাকবে আর আমি এসে ‘রায়মণির হাত হতে লিব উদ্ধারিয়া’। দক্ষিণ রায়ের পরামর্শে ধনাই বেশিমূল্যের মোমে ভর্তি করল ডিঙ্গা, মধু যা সংগ্রহ করেছিল তা ফেলে দিল নদীতে।

সেদিন থেকেই

আজ তক সে গাঙ্গের পানি মধু পানি

চার তরফেতে আর পানি হবে লোনা।

তাই নদীর নাম হল ‘মধুখালি’।

কাঠসংগ্রহের নামে দুখেকে বনে নামিয়ে দিয়ে ধনাই বাড়ি ফিরল। এদিকে দক্ষিণরায়

‘হইয়া রাক্ষুসে বোটা বাঘের আকার।

চলিল দুখির তরে করিতে আহার।

ভয়ে দুখে ‘মা’ বলে ডেকে মূর্ছিত হয়ে পড়ল। সেই ডাকে বনবিবি ও শাজঙ্গলী ছুটে এলেন এবং রুষ্টা বনবিবি ভাইকে বলেন দুখের বদলে।

ধরিয়া গরুর গোস্তু খাওয়াও উহায় (দক্ষিণ রায়কে)

জলে-স্থলে ভীষণ যুদ্ধ হল শা-জঙ্গলীর ও দক্ষিণ রায়ের মধ্যে। এও আসলে শাসক-শাসিত হিন্দু-মুসলিমেরই দ্বন্দ্ব-সংগ্রামের রূপক। শাসক মুসলিমের ধর্মের ও শাস্ত্রের শ্রেষ্ঠত্ব প্রমাণের সংগ্রামও বটে এসব।

অবশেষে ভীত-ক্রান্ত রায় ‘হাজির হইল গাজীর নিকটে’। সঙ্কিস্ত্রে বড়গাজী আগে থেকেই দক্ষিণ রায়ের মিত্র ও সৎপ্রতিবেশী। সব শুনে গাজী বললেন : রায়, কাজটাকে ভালো করনি, বনবিবি শা-জঙ্গলী হল আল্লাহর পেয়ারা এবং ‘বড় নেক তন’ ধার্মিক।

শা-জঙ্গলী রায়ের পিছু নিয়ে গাজীর আস্তানায় উপস্থিত হয়ে গাজীকে ধমকে বলে মুসলিম হয়ে তুমি ‘কাফেরের সাথে দুষ্টি বৈস এক সাথে’? গাজী উত্তরে জানান ‘এই যে বামুন ইনি বন্ধু মোর হয়’। জঙ্গলী রায়কে বলল ‘বনবিবি ডাকিয়াছে চলছ তুয়ায়’। গাজীও গেলেন ভীত রায়ের সঙ্গে। গাজী বনবিবিকে স্মরণ করিয়ে দিলেন যে নারায়ণীকে তাঁর ‘সই’ রূপে গ্রহণ করেছিলেন যুদ্ধের পরে। কাজেই নারায়ণীর পুত্র।

‘রায়মণি সই বোটা হইল তোমার।’

তারপরে মাতৃস্বরূপা বনবিবির স্বীকৃত পুত্র হিসেবে দক্ষিণ রাষ্ট্র, বড় ঝাঁ গাজী ও দুখে (দুখিয়া) একে অপরের ভাই রূপে তিন জনেই কোলাকুলি করে। এবং দুখে ভাইকে মা বনবিবির প্রস্তাবক্রমে গাজী বলে : সাত জাড়ি ধন আমি দিব যে উহারে।

আর দক্ষিণ রায় দুখেকে দিলেন আঠারো ভাটির মধ্যে মোম-মধু আহরণের অধিকার। এদিকে ধনাই একা বাড়ি ফিরে রটিয়ে দিল যে দুখে কাঠ কুঁড়োতে গিয়ে বাঘের খাদ্য হয়েছে। বনবিবির অনুগ্রহপুষ্ট দুখেকে বনবিবি বাড়ি পাঠিয়ে দিলেন কুমীরের শিক্কে বসিয়ে। বিদায়ের সময়ে বলে দিলেন— ধনাই বনে এসেছিল বলেই দুখে সৌভাগ্যের অধিকারী, কাজেই ধনাইয়ের সঙ্গে বিবাদে কাজ নেই বরং ধনাইয়ের কন্যা বিয়ে করেই যেন সে সুখী হয়। আর বিশদে পড়লেই যেন বনবিবিকে স্মরণ করে। পুত্রকে ফিরে পেয়ে কৃতজ্ঞ মা পুত্রকে বলে :

বুড়ি বলে বাছা তুমি যাহার কৃপাতে গলায় কুড়ালি বেধে মেয়ে সাত গাঁয়
প্রাণ দান পেয়ে বেঁচে আইলে ঘরেতে। হাজত খয়রাত তার করই তুরাক।

বনবিবির স্বপ্নাদেশ পেয়ে ধনাই তার কন্যা চম্পার সঙ্গে দুখের বিয়ে দিল। দুখের ধনসম্পদ কাজকর্ম দেখবার জন্যে বনবিবির পরামর্শে দুখে যদুরায়কে করল দেওয়ান। দেশের চৌধুরী দুখের এখন সুখের অন্ত নেই। তবু বনবিবির স্মরণে 'রহে দুখে দস্ত জোড়া হাজির খেদমতে'।

এভাবে নায়ক দুখের মাধ্যমে বনবিবি হলেন জহুরা ও প্রতিষ্ঠিতা এক জনপ্রিয় বনদেবী। ইনিও বনের ধনের এবং জান-মালের নিরাপত্তার দেবতা। হিন্দু-মুসলিমের জীবন-জীবিকার মন-মতের ও শাস্ত্র-সংস্কৃতির ক্ষেত্রে বিরোধ-মিলনের চিত্র পীরপাঁচালীতে নয় শুধু, হামজা-হানিকার কথা জৈতুন-সোনাভানের কিসসাতেও রয়েছে। মোহাম্মদ কাভের ও বরনুদ্দীন বনবিবির সম্বন্ধে দুটো পুঁথি রচনা করেছেন। উনিশ শতকের মধ্যকালে কাভের আরে কয়েকটি কাব্য রচনা করেছেন বরনুদ্দীন উনিশ শতকের শেষে কিংবা বিশ শতকের পোড়ার দিকে 'বনবিবি জহুরনামা' রচনা করেছেন।

মানিক পীর

আঠারো শতকের বলে অনুমিত কবি ফকির মুহম্মদের পাঁচালী অবলম্বনে মানিক পীর উপাখ্যান বর্ণনা করছি :

পীর মানিক দেবকল্প কাল্পনিক পীর। ইনি সর্বগ্রকার রোগ-ব্যাধির পীল। দুঃ ও মোরগ হাজত দিয়ে ঐর সেবা করা হয়। আল্লাহ রোগ সৃষ্টি করার পর ফেরেস্তার জগতে ব্যাধিগুলো উপদ্রব শুরু করল, তখন আল্লাহ বাতেন থেকে মানিক পীরকে আহ্বান করে তাঁর হাতে সব ব্যাধি সমর্পণ করলেন :

আর মানিক পীর ব্যাধিগণ লয়্যা যত তাহা বা কহিব কত
যান দেওয়ান দুনিয়া উপরে।

মানিক পীর দুনিয়ার মক্কার উদ্দেশে রওয়ানা হলেন। মানিক পীরের সম্ভা ও আকৃতি তখন নিম্নরূপ :

কালিয়া দস্তান পীর কাকিল শাখায়
নিম্বল ফকির মর্দ ছিদ্দা কঁধা পায়।
ঘন ঘন ঝঞ্জিতলো উড়ে হাতে পায়।

আবল আষা হাতে নিল উঠাইয়া
দম দম মাদার বলে যাএ নেকালিয়া।

আষা ও সোনার খড়ম রেখে মানিকপীর পথে নামাজ পড়ছিলেন। রাখাল দুখিয়া খড়ম চুরি করে নিয়ে বেনের কাছে বিক্রি করে নতুন খাট কিনেছে, খেয়েছে ভাল খাবার। ফকির মানিক খড়ম ফিরে পাবার জন্যে দুখিয়ার বাড়ি গেলেন। দুখিয়ার মা বলে— দুখিয়া সাতদিন ধরে বাড়ি নেই এবং সে কোন খড়ম চুরি করেনি বলে মানিককে বিদায় দিতে চাইল। কিন্তু পীরের তো কিছু অজানা নেই। দুখিয়া অবশেষে অপরাধ স্বীকার করল, বলল ‘নিরুপ বলে আমার বউ জোটে না’। তাই খড়ম বেচে বিয়ে করার মতলবেই সে চুরি করেছে। মানিক পীর বললেন— তুমি আমার খড়ম ফেরত দাও আমি বীরসিংহ রাজার কন্যার সঙ্গেই তোমার বিয়ে দেব। দুখিয়া রাজী হয় না, বলে—

বাগদীর ছেলে আমি গুন শাহজী
বাগদীর মায়া বিভা করি মাছে ভাতে বাব
রাজকন্যা বিভা করি পরাণ হারাব।

অবশেষে দুখিয়াই রাজকন্যার সঙ্গে বিয়ের সম্বন্ধ স্থির করার জন্যে অনুরোধ করল ফকিরকে। ফকির মানিকও এবার :

গলায় পৈতে দিল কপালেতে ফোঁটা
হাথে নিল পাঞ্জিপুথি মাথা ভরা জটা।

—ব্রাহ্মণের বেশে রাজসভায় উপস্থিত হয়ে রাজাকে ধমকে বললেন, বারো বছর বয়সের আইবুড়ো কন্যা রয়েছে তোমার ঘরে

‘তোকে ছুঁএয় পাঞ্জি রাজা জল খায় কে?’

বিয়ের প্রস্তাব উচ্চারণকালে ব্রাহ্মণবেশী ঘটক মানিক অসংকোচে দুখিয়ার পরিচয় দিলেন এভাবে— গঙ্গারাজার পুত্র এসেছে শিকার করতে—

‘দুর্গতনন্দন তার নাম গুন মোর ঠাঞি
অমন কুলীন রাজা আর পাবে নাঞি।

অল্পক্ষণের মধ্যেই সুদূর রাজসভায় গিয়ে বিয়ে স্থির করে দুখিয়ার কাছে ফিরে আসতে দেখে—

‘দুখ্যা কয় ভাল নয় নাড়িয়া ফকির
পথ হৈতে ফিরে আইলে করিয়া ফিকির।

যদি সত্যই বিয়ে ঠিক করে থাক, তা হলে বাগদীর রীতি অনুসারে—

‘হলদি-তেল-ক্ষীর-পিঠা মাঙাইয়া আন’

মানিক পীর দুখিয়ার আবদার মতো তেল-ক্ষীর-পিঠা যোগাড় করলেন। দুখিয়ার দাঁতও রাঙালেন, বাজির আর বাজনারও ব্যবস্থা করলেন, আর বরযাত্রী হল মশালধারী বাঘবাহিনী।

রাজা বাঘবাহিনী দেখে ভীত সন্ত্রস্ত হয়ে ব্রাহ্মণবেশী ঘটক মানিককে বললেন— জামাই আর তুমি আসিবে, বৈরাতে (লোকে) কাজ কি? তাই বাঘদের বিদায় করা হল। এখন রাখালের সঙ্গে রাজকন্যার বিয়ের সময়ে নিরক্ষর রাখাল মস্ত উচ্চারণ করতে না পারলে বিপদ ঘটবে আশঙ্কা করে চতুর ঘটক বলেন :

‘অমন ব্যবস্থা দেখে আমি সবার নাঞি।’ আমাদের তথা বরের প্রথানুযায়ীই হবে বিয়ে—

হাস্যা খেল্যা বিহা হবে বাঁধাবাধি কি—

মাণ্ড কোলে কর্যা বর ঘরে শুবে গিয়া।

কন্যাদায়গ্রস্ত পিতা তাতেই রাজি। বাসর ঘরে হতভম্ব ও ভীত দুখিয়া বধূর—

‘ইন্দের কামিনী জিনি দেখি তনু বেশ

মুটিতে কাঁকালি লুকায় পিঠে ভাসে কেশ।’

—দেখে বধূকে ‘চণ্ডমাতা’ বলে সম্বোধন করে প্রাণ ভিক্ষা চাইল।

রাজকন্যা বুঝল ‘খসম আমার নিশ্চয় পাগল’। ভীত দুখিয়া মেঝে শুইয়ে রাত কাটাল। রাজকন্যা সকালে মাকে সব বৃত্তান্ত জানাল, মা জানাল রাজাকে। রাজা ঘটককে বলেন এসব কি গুনছি? চতুর ঘটক নানা অজুহাত দেখিয়ে জামাইয়ের আচরণের যৌক্তিকতা দেখালেন, দুখিয়ার জবানেও ভর করলেন মানিক :

যেই কথা কওয়ান পীর সেই কথা কয়,

কাজেই এখন দুখিয়া নির্ভয়ে যে-কোন প্রশ্নের সন্তোষজনক উত্তর দিতে পারল। বধু নিয়ে বাড়ি ফেরার আগেই মানিক দুখিয়ার বাড়িঘর ও রাস্তার সোনার করে দিলেন আর তাঁর অনুগত ব্যাধিদের করে দিলেন দুখিয়ার বাড়ির পাইকর-পেয়াদা-দাস-দাসী। আর দুখিয়ার আদি নিবাস কুঁড়েঘরটি হল মানিক পীরের আস্তানা এবং

‘সেই তলিপাতার ঘরে সিদ্ধি ঘুটে খায়’।

রাজা বীরসিংহ এলেন জামাই দুখিয়ার বাড়ি। আদরে আপ্যায়নে এবং জামাইয়ের ঐশ্বর্য দর্শনে তুষ্ট রাজা জামাইকে অর্ধেক পরগনা যৌতুক দিলেন। ক্রমে দুখিয়ার ‘বাইশ লক্ষ পরগনার হৈল রাজত্ব’।

মানিকপীর গেলেন মক্কায় হজ করতে। পীরের নামে শিরনী দিল দুখ্যা। এ উপাখ্যান মানিক পীর অসম্ভবকে সম্ভব করার কেরামতি বা অলৌকিক শক্তিদর পীর। দরিদ্রকে ধনী করেন, কাজেই তিনি ধনের দেবতা। এমনকি তিনি স্বভাবে শিবও। চব্বিশ পরগনার যাদবপুরে মানিক পীরের বার্ষিক মেলা বসে। মেলায় মুসলিমরা মোরগ হাজত বা উৎসর্গ করে রান্না করে খায়। জয়নুদ্দীন রচিত মানিক পীরের জহুরানামায় মানিকপীর দুধবিবির কানীনপুত্র বলে বর্ণিত। হেয়াত মাহমুদের আখিয়াবাণীর বন্দনাংশেও মানিক পীরের কেরামতীর কথা রয়েছে— ‘মানিক পীর শাহপীর বন্দো দুই ভাই। মারিয়া গোঠের গাভী দিয়াছে জিয়াই।’ বিশ শতকেই রচিত নসর শহীদের ‘মানিক পীরের গান’ এবং পিরিজউদ্দীনও রচনা করেছেন মানিক পীরের গান।

মছলন্দ বা মছলন্দী পীর

বিদ্বানদের মতে বৌদ্ধ নাথসাহিত্যের নায়ক মীননাথ বা মৎস্যেন্দ্রনাথই বৌদ্ধজ মুসলিমদের ঋণীতে মছলন্দ বা মছলন্দীপীর বা মোচরা পীর নামে এবং লৌকিক পীররূপে সেবা পাচ্ছেন।

মেদিনীপুর জেলার হিজলীর শাসক তাজখান মসনদ-ই-আলা জয়নুদ্দীন রচিত 'মছলন্দীর গীতি'র নায়ক।

৫. সেনানীশাসক পীর-পাঁচালী

আগেই বলেছি গড়মান্দারগ ও কাঁটাদুয়ার খ্যাত ইসমাইল গাজী ত্রিবেণীর শাসক জাফর খাঁ গাজী, ছোট পাণ্ডুয়ার শাহ সফীউদ্দীন সুলতান, খান জাঁহা আলী খান প্রমুখ ঐতিহাসিক ব্যক্তিত্ব জনসমাজে অলৌকিক শক্তির সিদ্ধসাধক পীররূপে মান্য হয়ে রয়েছেন। এঁদের দরগাহও রয়েছে পশ্চিম ও দক্ষিণ বঙ্গের বিভিন্ন স্থানে। তীক্ষ্ণবুদ্ধি রাজনীতিক ও সূক্ষ্মবুদ্ধি কূটনীতিক সম্রাট আওরঙজেব আলমগীরও সতেরো শতকে তাঁর শাস্ত্রনিষ্ঠার জন্যে জিন্দাপীর রূপে জনসমাজে স্বীকৃত হয়েছিলেন।

১. ইসমাইল গাজী

এঁর চরিত ও মহাত্ম্যকথা রচনা করেছিলেন শেখ ফয়জুল্লাহ ষোল শতকেই (১৫৭৫ খ্রীস্টাব্দের পূর্বে) ইসমাইল গাজী ইতিহাসে খ্যাত ব্যক্তি। তিনি ছিলেন গৌড়সুলতান রুকনউদ্দীন বারবক (১৪৫৯-৭৬ খ্রীঃ) শাহর সেনাপতি। ঘোড়াঘাটের রাজা ভান্দসরায় তাঁর বিরুদ্ধে কামরূপরাজের সঙ্গে সুলতানের বিরুদ্ধে ষড়যন্ত্রের মিথ্যা অপবাদ দিলে রুকনউদ্দীন বারবক শাহর হুকুমে তাঁর শিরচ্ছেদ হয় (১৪৭৪ খ্রীঃ)। তাঁর দেহ সমাধিস্থ হয় হুগলীর ইতিহাসপ্রসিদ্ধ গড়মান্দারগে। এবং তার খণ্ডিত শির সম্মানিত হয় রংপুরের কাঁটাদুয়ারে (খোঁটা দূরে)। ইসমাইল গাজী কোরেশবংশীয় ও মুক্কার আরব ছিলেন। রুকনউদ্দীনের সেনাপতি রূপে তিনি উড়িষ্যার রাজা গজপতিকে এবং কামরূপের রাজা কামেশ্বরকে পরাজিত করে গৌড়ের বশ্যতা স্বীকারে বাধ্য করেন। মুহম্মদ সান্তারী রচিত ফারসি রিসালৎ-উস-মুহুদায় (১৬৩৩ খ্রীস্টাব্দে রচিত) ইসমাইল গাজীর বিস্তৃত পরিচয় রয়েছে। পশ্চিমবঙ্গে ইসমাইল গাজীও পীররূপে মান্য হয়ে রয়েছেন। নানা স্থানে রয়েছে তাঁর দরগাহও। বহু হিন্দু-মুসলিম কবি ও গায়ন বন্দনাংশে ইসমাইল গাজীকে বন্দনা করেন। যেমন সতেরো শতকের ধর্মমঙ্গলের ও মনসামঙ্গলের কবি সীতারাম দাস বলেন 'বন্দো পীর ইসমাইল গড় মান্দারগ'। সতেরো শতকের অন্য এক ধর্মমঙ্গল রচয়িতাও বলেন 'মান্দারগ গড়েতে বন্দিব পীর ইসমাইল'। সত্যপীর রচয়িতা উনিশ শতকের ফৈজুল্লাহও বলেন 'এসমাইল গাজী বন্দো গড় মান্দারগে'।

২. জাফর খান গাজী বা দাফর বা দরাক খান

ইনিও ঐতিহাসিক ব্যক্তিত্ব তেরো শতকের শেষার্ধ্বে দিল্লীর সুলতান রুকনউদ্দীন কাইকউসের (১২৯১-১৩০১ খ্রীঃ) সময়ে উনি ত্রিবেণীতে আসেন এবং স্থানীয় সামন্ত রাজা ভূতবকে পরাজিত করে 'গাজী' উপাধি লাভ করেন। এঁর পুত্র বারা খাঁ বা বরখাঁও ছিলেন ত্রিবেণীর প্রখ্যাত ব্যক্তি। জাফর খাঁ গাজী গঙ্গাস্তোত্র রচনা করেছিলেন বলে জনশ্রুতি রয়েছে। জাফর খানের মহাত্ম্যকথা কেউ লিপিবদ্ধ করেনি বটে, তবে বন্দনাংশে পশ্চিমবঙ্গের কবি-গায়নেরা এখনো তাঁকে শ্রদ্ধার সঙ্গে স্মরণ করেন।

রূপরাম-

ত্রিবেণীর ঘাটে বন্দো দফর খাঁ গাজী।

শা-সফী সুলতান পুথিতে-

জাফর খাঁ গাজী ত্রিবেণী স্থানে

গঙ্গা যারে দেখা দিল ডাক শুনি কানে।

জঙ্গনামায়-

ত্রিবেণীর ঘাটেতে বন্দি নু দরাফ খান

গঙ্গা যার ওজুর পানি করিত যোগান।

জাফর খাঁ ত্রিবেণীতে একটি মসজিদ ও একটি মাদ্রাসা প্রতিষ্ঠা করেছিলেন বলে লোকশ্রুতি রয়েছে। শান্তিপুরের কবি মুজাম্মেল হকের (১৮৫৯-১৯৩২ খ্রীঃ) 'দরাফ খান গাজী' নামে কিংবদন্তী নির্ভর একখানি পুস্তিকা আছে।

৩. শাহ সফীউদ্দীন সুলতান

কথিত আছে যে শাহ সফীউদ্দীন সম্রাট ফিরোজ শাহ তুঘলকের সময়ে ছোট পাণ্ডুয়ায় সেনানী শাসক ছিলেন। স্থানীয় সামন্ত পাণ্ডুরাজাকে তিনি পরাজিত করে গাজী হয়েছিলেন। নদীয়ার শান্তিপুর নিবাসী মহিউদ্দীন ওস্তাদার হিন্দিভাষায় 'শাহ সফীউদ্দীন সুলতান চরিত' রচনা করেছিলেন, তাঁর সে গ্রন্থের দোতাবীরীতিতে অনুবাদ হয়েছিল 'পাণ্ডুরা কিসসা বা শা সফি সুলতান' নামে। হিন্দি জবানেতে সেই কিতাব আছিল/পড়িয়া সকল স্তম্ভে মালুম হৈল। কবির উক্তি অনুসারে

কুতুব জেন্দা রহিল বড় পেঁড়োখামে (নুর কুতবে আলম নৌড়পাণ্ডুরায়)

জাফর খাঁ গাজী রহিলা ত্রিবেণী স্থানে পাঁড়োয়া মকান মাঝে করেন মকান ...

আল্লামার পেয়ারী পীর শা সফী সুলতান শিরনী বতম হয় শাহ সফী নামে।

ছোট পাণ্ডুয়াতে শাহ সফীউদ্দীন গাজীর দরগাহ রয়েছে।

মনে হয় সেনানী শাসকগণ ইসলাম প্রচারে উৎসাহী ছিলেন বলেই পীররূপে কৃতজ্ঞ মুসলিমদের কাছে শ্রদ্ধেয় ও মান্য হয়েছিলেন। সফীউদ্দীনের হাতে পাণ্ডুরাজা পরাজিত হওয়ার আগে সংখ্যালঘু (মাত্র পাঁচ ঘর) মুসলমান পীড়ন পেত :

কাফেরের কাছেতে মোমীন মুসলমান এসলামের কারবার করিতে নারিত

বাঘের নিকটে রইত বকরীর সমান। করিলে পাণ্ডব রাজা সাজা দেলাইত।

অতএব মুসলিমদের পীড়ন-মুক্ত করার জন্যেই 'গাজী' সফী সুলতান জেহাদ করেন।

গল্পাংশটি এরূপ :

একদিন এক মুসলিমপ্রজা পুত্রের জন্মাৎসব উপলক্ষে গোবধ করে। পাড়ার ক্ষুদ্র হিন্দুরা তাই ছেলোটিকেই মেরে ফেলে। শোকগ্রস্ত অসহায় পিতা পাণ্ডুরাজার কাছে নালিশ করতে গেল। রাজা বিচার করলেন না, অবশেষে নিহত ছেলের পিতা দিল্লীর বাদশাহ ফিরোজ শাহর কাছে প্রতিকার প্রার্থনা করল। সম্রাট তাঁর ভাইপো শাহ সফী সুলতানকে পাঠালেন এর প্রতিবিধান

করার জন্যে। সফী এসে বালুহাটায় তাঁবু গেড়ে যুদ্ধে অবতীর্ণ হলেন। কিন্তু পাণ্ডুরাজার বাড়িতে ছিল জীযতকুণ্ড। মরাসৈন্যের গায়ে কুণ্ডের পানি ছিটালে সে বেঁচে ওঠে। কাজেই যুদ্ধে শাহ সফী পেরে উঠছিলেন না, নগরঘোষ নামে এক গোয়ালের মুখে জীযতকুণ্ড রহস্য জেনে তাতে গোমাংস ফেলে জলের গুণ নষ্ট করে দিলেন শাহ সফী। পাণ্ডুরাজা ও তাঁর মন্ত্রীরা সপরিবার গঙ্গায় ডুবে মরল। বহু মুসলিম পেল আয়মা সম্পত্তি :

এনাম জয়গীর পেয়ে শাহ-সফী শাহার

আজ তক করে ভোগ পাড়োয়া মাঝার।

৪. দরবেশগীর

১. **বদরগীর**— বহু কিংবত্তীর নায়ক পীর বদরও ঐতিহাসিক ব্যক্তি এবং আরব থেকে আগত দরবেশ। সতেরো শতকের কবি মুহম্মদ খানের বংশ-পরিচিতি অংশে (অন্যত্র উদ্ধৃত) পীর বদর আলমের কথা রয়েছে, বাহরাম খানের ‘লাইলী মজনু’ কাব্যেও রয়েছে পীর বদরের উল্লেখ। কল্লবাজার-আরাকান ব্যাপী বঙ্গোপসাগরের কূলের নানা স্থানে রয়েছে বদরমোকাম। এ সূত্রেই তিনি মাঝিমান্নার রক্ষাকর্তা দরিয়াপীর বদর হয়েছেন। চট্টগ্রামশহরে জামাল খাঁ রোডের মুখে রয়েছে চেরাগ-ই-বদর, বংশীবাজারের কাছে রয়েছে বদরপাতি নামের দরগাহ। দিনাজপুরের হেমতাবাদে, বর্ধমানের কালনায়, বিহারে বদরউদ্দীন-বদর-ই-আলম ‘দরবেশের দরগাহ’ রয়েছে। চট্টগ্রামের বদর ভেরো শতকের লোক। মনে হয় একাধিক বদর শাহ ছিলেন।

২. **শাহ বদীউদ্দীন মাদার**— বদীউদ্দীন মাদারের জন্ম সিরিয়ায় ১৩১৫ খ্রীস্টাব্দে। জৌনপুর সুলতান ইব্রাহিম শাহীর সময়ে ইমি কানপুরের কাছে মাকনপুরে বাস করতেন। বাঙলাদেশে ইনি না আসলেও তাঁর শিষ্যরা পনেরো শতকের দিকে বাঙলাদেশে বিশেষ জনপ্রিয় ও প্রভাবশালী ছিল, ফলে মাদারী ফকিরদের আড্ডা বা আস্তানা ছিল বাঙলার বিভিন্ন অঞ্চলে। মাদারীপুর, মাদারবাড়ি, মাদারশাহ প্রভৃতি স্থাননাম মাদারীদের স্মৃতি বহন করছে। মাদারী দরবেশেরা হিন্দু-বৌদ্ধ দেবদেবীর অলৌকিক শক্তির প্রতিযোগী ও প্রতিদ্বন্দ্বী ছিলেন। ভূতপ্রেত-দেও-দানাকে এরা মন্ত্রবলে মৃত্যু কূর্মে রূপান্তরিত করে জলাশয়ে বন্দী রাখতেন,— এ বিশ্বাস বেশেই বহু দরগাহর ও আস্তানার সংলগ্ন পুকুরে আজো গজারী-মাদারী মাছ-কচ্ছপ পোষা হয়, জ্যৈষ্ঠ মাসে উত্তরবঙ্গে ‘মাদারের বাঁশ তোলার’ বার্ষিক উৎসব হয় এবং তাতে মাদারের গানের আসরও বসে। উত্তরবঙ্গের নানা স্থানে মুসলিমরা অগ্রহায়ণ ও পৌষ মাসে মাদারের শিবনী করে খায়। মাদারী ফকিরেরা ‘দমমাদার’ বলে (নিরঞ্জনের রুম্মায় দম্পাদার বা দমদার) হুঙ্কার ছাড়ে। কোন কোন বিদ্বান মাদারীদের শিয়া-সুফী বলে অনুমান করেন। শায়ের আবদুর রহিম রচনা করেছিলেন ‘শাহ মাদারের নিকট শাহ মালেকের সওয়াল’ নামের পুথি। এটি প্রমোত্তরে তত্ত্বকথার ব্যাখ্যা।

^১ ক. Social History of the Muslims in Bengal- Dr. A. Karim, PP 113-14.

খ. Husain Shahi Bengal- Dr. M. R. Tarafder P 166.

গ. বঙ্গ সূফী প্রভাব- ডঃ মুহম্মদ এনামুল হক পৃঃ ১৩২-৩৩।

ঘ. বাংলা সাহিত্যের কথা- (মধ্যযুগ)- ডঃ মুহম্মদ শহীদুল্লাহ পৃঃ ৫০২-০৬।

৩. শাহ সুলতান বলখী

নামেই প্রকাশ শাহ সুলতান মাহমুদ মাহী আসোয়ারের জন্ম বলখেই। মহাস্থানগড়ের নিকটে এর দরগাহ রয়েছে। ইসলাম প্রচারের জন্যে তিনি উত্তরবঙ্গে আসেন এবং বগুড়ার স্থানীয় সামন্তরাজা পরশুরাম পালের সঙ্গে তাঁর যুদ্ধ হয়। যুদ্ধে রাজা পরাজিত ও নিহত হন, আর তাঁর ভগ্নী শীলাদেবী করতোয়ায় ঝাঁপ দিয়ে আত্মহত্যা করেন। এখন এ স্থান শীলাদেবীর ঘাট নামে পরিচিত। শাহ সুলতান বলখীর দরগাহের জন্যে সম্রাট আওরঙ্গজেব লাখরাজ জমি দান করেন। করতোয়ার উত্তর-পশ্চিম অঞ্চলে শাহ সুলতান বলখী অন্যতম ইসলামপ্রচারক। আবদুল মজিদ খান শাহ সুলতান বলখীর কেরামতিবহল চরিতকথা রচনা করেছিলেন।

৪. পীর গোরাচাঁদ

এঁর প্রকৃত নাম সৈয়দ আক্বাস আলী। গৌরবর্ণের সুপুরুষ পীরকে হিন্দুরাই আদরে গোরাচাঁদ নামে অভিহিত করে। চব্বিশপরগনার বশিরহাট মহকুমার হাড়োয়া গাঁয়ে এর দরগাহ রয়েছে। প্রতিবছর ১২ই ফাল্গুনে হাড়োয়ার গোরাচাঁদের মেলা বসে। ওইদিন হিন্দু গোয়ালারা বারো মণ দুধ দিয়ে পীরের পাকা কবর ধুইয়ে দেয়। হাড়োয়ায় ও পেয়ারাগাঁয়ে মুসলিম খাদেমরা বাস করেন। প্রখ্যাত পণ্ডিত ডক্টর মুহম্মদ শহীদুল্লাহও ছিলেন এ পীরের পেয়ারা গাঁয়ের খাদেম বংশজ। শেখ লাল ও শেখ জয়েনউদ্দীন রচিত 'গোরাচাঁদ পুঁথি' ছাড়াও পেয়ারাগাঁয়ের খাদেম বংশজ মুনশী মুহম্মদ এবাদুল্লাহও ফারসি চরিতকথা অবলম্বনে 'গোরাচাঁদ' চরিত রচনা করেন ১৩১৭ বঙ্গাব্দে। 'গোরাচাঁদ পীরের কোছা' রচনা করেন মুনশী মুহম্মদ খোদা নেওয়াজ। মক্কায়ে সৈয়দ আক্বাস আলী ওফে গোরাচাঁদের জন্ম। তাঁর পিতার নাম সৈয়দ করিমুল্লাহ। তাঁর কেরামতির অনেক বৃত্তান্ত বশিরহাট অঞ্চলে চালু রয়েছে। গোরাচাঁদ সম্ভবত চৌদ্দ শতকের লোক।

৫. পেয়ার শাহ

বারাসত-বশিরহাট বাজপথের শাখা হাড়োয়ামুখী রাস্তার ধায়ে হাড়োয়ার কাছে [প্রাচীন বালাগা অঞ্চলে] রয়েছে পেয়ার শাহর বিপুলকার দীঘি। দীঘি-সংলগ্ন গ্রামের নামও পেয়ারা, এ নাম পেয়ার শাহরই স্মৃতিবাহী। দু'শ বছর আগে ডক্টর মুহম্মদ শহীদুল্লাহর পূর্বপুরুষ শেখ লাল রচিত পেয়ার শাহর চরিতকথায় পেয়ার শাহকে সুলতান সৈয়দ আলাউদ্দীন হোসেন শাহর (১৪৯৩-১৫১৯ খ্রীঃ) সমকালীন ও প্রিয় অনুচর বলে উল্লেখ করা হয়েছে। হোসেন শাহ পেয়ার শাহকে সুহাই অঞ্চলের চব্বিশ পরগনার বেলেঘাটা এলাকায় শাসনকর্তা নিযুক্ত করেন। স্থানীয় সামন্ত ডিম শাহ পেয়ার শাহর আনুগত্য স্বীকার করেন। বিক্রমপুরের বন্টাল সেন বাবা আদমের বৃত্তান্তের মতো এখানেও পেয়ার শাহর এবং চন্দ্রকেতুর দ্বন্দ্ব, আকস্মিকভাবে পায়রা হস্তচ্যুত হওয়া, রানী কমলার সপরিজন দহে ডুবে আত্মহত্যা প্রভৃতি বর্ণিত রয়েছে। বাম হাজরা বলে একব্যক্তি হোসেন শাহর কাছে পেয়ার শাহর নামে মিথ্যা অপবাদ জানায়, ফলে বাদশার রোষানলে পড়ে পেয়ার শাহ সপরিবার দীঘির জলে আত্মহত্যা করেন।

৬. মোবারক গাজী

পুথির প্রারম্ভ কবি ফকির মুহম্মদ বলেছেন :

শুন ভাই এবে সব কহিয়া জানাই এক্ষণে গাজীর কেছা পাওয়া অতিভার।
মবারক গাজীর কেছা কেহ করে নাই।। ছাপা কি কলমি কেছা ছয় নাহি তার।

কবির এ উক্তি পুরো সত্য নয়। চব্বিশ পরগনা হুগলী-হাওড়া অঞ্চলে গাথা হিসেবে গায়ের লোকের মুখে মুখে কিছুকাল আগে পর্যন্ত মোবারক গাজীর কাহিনী চালু ছিল। এখন দূঃপ্রাপ্য হলেও একেবারে অপ্রাপ্য নয়।

মোবারক গাজীর গাথায় অনেক ঐতিহাসিক উপাদান রয়েছে বলে আমরা কাহিনীটি উদ্ধৃতিসহ বর্ণনা করছি :

‘দিল্লীতে বসতি ছিল চন্দন শাহাব।’ রাজ্যে বর্গীর উৎপাত হচ্ছিল তাঁর সময়ে।
তাই, ভক্ত ‘পরে বসে বাদশা করিল হুকুম। তারপরে কহে বাদশা শুনহে দেওয়ান।
আমার প্রজার ‘পরে এমন জুলুম। বর্গী মারিতে আমি কবি যে ফরমান।

দেওয়ান (উজির) লোক-লব্ধর নিয়ে বর্গীর বিরুদ্ধে যুদ্ধযাত্রা করতেন। কিন্তু পথে এক বুড়া ফকিরের সঙ্গে উজিরের সাক্ষাৎ হল।

বুড়ো ফকির বললেন :
‘তারপরে কহি আমি শুনহ উজির।’ দিল্লীর শহরে হবে দোসরা বাদসাই।
আমাকে জানিবে তুমি আল্লাহ ফকির।। চন্দন শাহা না পারিবে মারিতে বর্গীর।
আমি যাহা কহি তাহা হইবে নিশ্চয়ই দিল্লীর শহরে হবে দোসরা জাহাঙ্গীর।।

উজির ফিরে গিয়ে ফকিরের ডাবিগাথা বাণী জানালেন বাদশা চন্দন শাহকে, শক্তিমদমত্ত বাদশা এতে রুষ্ট হয়ে নিজেই করলেন যুদ্ধ-যাত্রা। যুদ্ধে তাঁর হার হল। তিনি পালিয়ে প্রাণ বাঁচালেন। ঢাকার নবাবের অধীন জায়গীর করে বাদশা চন্দন শাহ সপরিবারের সাথে কিছুকাল বসবাস করার পর আল্লাহ প্রেরিত অলৌকিক শক্তিসম্পন্ন এক পীরের হুকুমে ফকির হয়ে বনেতে ঘাইয়া কুণ্ড বানাইয়া, শাহা রহে সেইখানে।’ উক্ত পীরের সঙ্গে পরামর্শ করে আল্লাহ বেহেশ্তবাসী এক ওলিকে বললেন :

বেহেশ্তের মাঝে আছে অলি একজন। কেতাবে খবর আছে বাইশ আউলিয়া।
আল্লা কহে শুন গাজি কহি যে তোমারে এই কথা শুনিয়া গাজী খোসাল হইল
আমার হুকুমে যাহ চন্দনের ঘরে। এল্লেল্লা বলিয়া যে মুরসিদে ডাকিল।
তখন, ‘পাক দেলে কহে গাজী শোন মোক্তারণ মুরশিদ আসিয়া খাড়া সামনে হইল।
যদি আল্লা যাব আমি চন্দনের ঘরে পীরের হুজুরে গাজী আরজ করিল।
অলি আর না পাঠাইবে দুনিয়ার ‘পরে। আরজ শুনিয়া পীর কহিল ‘গাজীরে
আল্লা বলে গাজি ওলি’ শোন মন দিয়া বিপদে পড়িলে তুমি ডাকিবে আমারে।
তারপরে পীরকে ডেকে আল্লাহ খোসাল হইয়া দিল এক ফুল।

সে-ফুল চন্দন শাহ দেওয়ানের বিবি গুঁকলে তাঁর গর্ভে মোবারক গাজীর জন্ম হয়।

এবং তিনি বয়োপ্রাপ্ত হলে তাঁর পিতার মৃত্যু হয়। তিনি পিতৃশোকে যখন ব্যাকুল, তখন ‘কান্দনা শুনিয়া পীর হইল হাজির’ এবং বললেন :

দেওয়ানা ফকির হও এলাহি ভাবিয়া । এ কথা শুনিয়া গাজী হাত বাড়াইল ।
মুরিদ হও তুমি হইয়া তালকিন । হাত ধরিয়া পীর তালকিন করিল ।।'
এরূপে- জিকির করিয়া গাজী দেওয়ানা হইল ।

এভাবে দিন যায় । কিছুকাল পরে-

কতদিন পরে গাজী বড় দুঃখ পায় । দেখিতে দেখিতে কাগজ নিরখিয়া আঁখি ।
বেলের সিকদার হৈল মন্দিরায় । তিনসনের খাজানা চন্দসার বাকি ।।
লোক জন সঙ্গে করে হৈল রাহাদার । মন্দিরায় বলে কাবিল এই কথা শুন ।
ঘোলের কাছারিতে মন্দিরায় বসিল ।। বেলের চন্দন সায় কাছারিতে আন।
প্রথমে বেলের কাগজ দেখিতে চাহিল ।।

কর্মচারী কাবিল বলে :

ছিল এক চন্দন শাহা সে গিয়াছে মরে । একপুত্র আছে তার পাগলের প্রায় ।

মন্দিরায় বলে- সেই পাগলেরে তুমি এই খানে আন ।

কাবিল পেয়াদা গিয়ে বন্দী করে নিয়ে এল গাজীকে ।

গাজী বলে আজ আমি কাছারিত যাব । মন্দিরায় বসে ছালাম নাহি দিব ।

কাছারিতে পৌছলে- মন্দিরায় বলে গাজী কহি তোমার ঠাই ।

ছালাম মজুরা তুমি আমাকে দিলে নাই ।।

জবাবে গাজী বলেন : 'ছালাম মজুরা আমি পীর্দিব তোমায় ।

বাবাজি করিত কাছারি এইখানে বসে । সকলে ছালাম দিত মিঞাজিকে এসে ।।

গাজীর ঔদ্ধত্যের জন্যে মন্দিরায় হুকুম দিল :

এই অক্ষে বেড়ি দেহ মোবারকের পায় । যতদিন গাজির খাজানা না পাই ।

গাজীকে ঔদ্ধত্যের জন্যে মন্দিরায় হুকুম দিল :

এই অক্ষে বেড়ি দেহ মোবারকের পায় । যতদিন গাজির খাজানা না পাই ।

গাজীকে কয়েদ কর কারাগারে লিয়া । ততদিন গাজীকে ছাড়িয়া দিব নাই ।।

জঙ্গম পাথর ওর বুকেতে তুলিয়া ।

অন্ধকার কারাগারে নতুন প্রদীপে তেলের বদলে নিজের মূত্র দিয়ে গাজী চেরাগ জ্বালানেন-

'মোবারক চেরাগেতে পেসাব করে দিল ।

আল্লাহর হুকমে চেরাগ জ্বলিতে লাগিল।

কারাগারে গাজী আল্লাহ ও পীরকে স্মরণ করতে থাকেন । কিছুদিন পরে পীর ময়নুদ্দিন এসে গাজীকে কারাগার থেকে উদ্ধার করেন । পীর ময়নুদ্দিন গাজীকে দুটো চিতাবাঘ উপহার দিয়ে বললেন- 'বেলের বনেতে যাও, সেইখানে গিয়া রও, দুটি বাঘ সঙ্গেতে করিয়া ।' তারপর গাজী বাঘ দুটোকে সঙ্গে নিয়ে বেলের বনে গেলেন এবং সিদ্ধ পুরুষ হলেন ।

এখন অন্ততঃ মন্দিরায় কাবিলের পরামর্শে-

কুড়ল মণ্ডা গলায় বেঁধে কিয়া জোড়া । মন্দি রায় ধরে এসে গাজীর যে পায় ।

গাজির ছামনে রায় হৈল গিয়া খাড়া ।। অপরাধ ক্ষমা কর গাজী দয়াময় ।।

তারপর গাজীর ভাই দুঃখীর নামে মন্দি রায় লাখরাজ জমি লিখে দিল—

ওই পাট্টা মোবারক হাতে করে নিল ।

তখন মন্দি রায় বলে— বল দেখি বাবা আমার কি হবে উপায় ।

গাজী বলে তোমাদের ভাল হইবে না । হাতীর পায়ের দাবে মরিবে নিশ্চয়ই

গজালের মাঠে মারা যাবে তিন জনা । খোদার কলম ইহা রদ হবে নাই ।

এ সময়ে গায়েবী আওয়াজ হল— শুন গাজি কহি তুঝে যাও হেথা হৈতে ।’

তখন মা-ভাইদের ছেড়ে ‘মক্কায আসিয়া গাজী নামাজ পড়িল’। তারপর সেখান থেকে অপোড়া পৃথিবী মেদনমল্ল পরগণাতে গিয়ে গাজী কৃপণ হেলা খাঁ চৌধুরীর বাড়ীতে দুখভাত চেয়ে খেলেন । হেলা খাঁ চৌধুরীকে বললেন— ‘করিতেছ জমিদারী পচাতে হবে কাজী’। সেখান থেকে বিদ্যাধরী নদীর খেয়াঘাটে গিয়ে মটুক পাটনীকে পার করে দেয়ার জন্যে বলাতে সে বলল নদীতে ঝড়ে উত্তাল তরঙ্গ উঠেছে, এখন খেয়া দেয়া সম্ভব হবে না । তখন গাজী বদরকে স্মরণ করলেন বদর বললেন :

বিসমিল্লাহ বলে হাডের আষা নদীতে নাবাও । আমার স্পর্শে—

আড়াই বাঁক নদীর পানি শুকাইয়া গেল । হাসাজোড়া কুস্তীর আমাকে দিয়া যাও ।

ঝড়ম পায় দিয়া গাজী নদী পার হৈল । আর এক কথা কহি শুন সমাচার ।

তারপর, ডাকিলে দিদার যেন পাই যে তোমার ।।

‘গাজি কহে বদর এই আরজ মোর লও ।

পাটনী কাছে এসে এ সময়ে বলে : ওগো শাহা দয়াময় ঘাট ত আমার নয়

কড়ি কিছু দিতে যে হইল ।

গাজীর কড়ি নেই । গাজী পাগড়ী রেখে গেলেন । বললেন— ভাই দুঃখীর দেখা পেলে তার থেকে কড়ি নিয়ে যেন মটুক তাঁর পাগড়ী ফেরত দেয় । তারপর সেওড়াতলায় রাত কাটিয়ে প্রভাতে দেখলেন— মহেশচন্দ্র ঠাকুর/সঙ্গেতে করিয়া কুকুর/নারায়ণী পূজা দিতে যায় ।’ ব্রাহ্মণ অকারণে চটে গাজীকে অন্যত্র চলে যাবার জন্যে নির্দেশ দিল । এতে জেন্দাপীর বদর রুষ্ট হয়ে ব্রাহ্মণের ব্রাহ্মণী নাইসার দীঘিতে জল আনতে গেলে ‘অষ্ট অলঙ্কার দিয়া । কক্ষে স্বর্ণকুন্ত দিয়া ব্রাহ্মণীকে জলেতে রাখিল ।’ সারাদিন সন্ধান করে ব্রাহ্মণীকে না পেয়ে রাত্রে ব্রাহ্মণ যখন ঘুমিয়ে পড়লো তখন—

‘নারায়ণ স্বপনে বলে ফকিরের পদতলে ফকির বলিয়া দিবে ব্রাহ্মণী বাটী আসিবে

ব্রাহ্মণীর কথা জানাইবে ।

এই কথা নিশ্চয় জানিবে ।

ব্রাহ্মণ খাসী না নিয়ে পাঁঠা নিয়ে গাজীর কাছে যাওয়ায় গাজী রুষ্ট হলেন । ফলে ব্রাহ্মণীকে ফিরে পাওয়া গেল না । গাজী একপে স্থানে স্থানে কেরামতী প্রদর্শন করে চললেন ।

এমনি করে 'মোবারক গাজীর দিনে দিনে বাড়ে জাহির।'

একদিকে 'একরোজ ঢাকার নবাব

মুরসিদ কুলি খাঁ কহে শুনহে উজীর।

যাহাদের খাজনা বাকি কর না হাজির।

ফলে অন্যান্য জমিদারের সঙ্গে বারুইপুরের চৌধুরী জমিদার মদন মল্লেরও দরবারে ডাক পড়ল। দরবারে নীত হবার পূর্বে দেওয়ান ফরিদ লস্করের পরামর্শে পেয়াদাদের ঘুষ দিয়ে সময় নিয়ে মদন রায় গাজীর কাছে গেলেন এবং তাঁর সাহায্য ভিক্ষা করলেন।— 'দওন জোড়া খাসী আমি দিব যে তোমায়।'

গাজী ভরসা দিলেন— আল্লার হুকুমে তেরা বদি নাহি রয়।

সোনার ভ্রমর হয়ে আমি তেরা সঙ্গে যাব।

এদিকে গাজীর মায়ায় মদনরায়ের বাকি খাজনা খাতায় উসুল পড়ে গেল। উজীর দেখল মদনরায়ের খাজনা বাকী নেই তার ভুল হয়ে গেছে। নবাবকে একথা জানালে নবাব উজীরকে ধমক দিয়ে বললেন 'মদনেরে আন গিয়া আশু বাড়াইয়া।' রায় সমাদরে দরবারে অভ্যর্থিত হলেন। তিনি খাজনার দায়ে বন্দী জমিদারদের পরামর্শ দিলেন—

'রায় কহে গাজী বাবার স্মরণ কর।

এবিনে করিয়া তোমরা পূজা মান ভাই।।

তা হইলে তোমরা উদ্ধার পাইতে পার।'

মদনের নির্দেশমত কারাগারে জমিদারগণ গাজীকে স্মরণ করলে গাজী এসে অভয় দিলেন—

প্রভাত কালে তোমরা পাইবে নিস্তার।

তোমাদের বাকি কিছুমাত্র না রহিবে।

এদের খাজনা আশ্চর্যভাবে উসুল পড়ে গেল খাতায়। উজির পড়ল বিপদে। নবাবের কাছে সে কি জবাব দেবে? গাজীর কৃপায় উজিরও রক্ষা পেল। মদনরায়ের নেতৃত্বে জমিদারগণ গাজীর পূজা করেন।

গাজী মদনরায়কে বললেন—

'পুষ্করিনি কাটিতে হবে চল মেরা সাত।

এরূপে—

তখন শুনিয়া রায় কোদাল হস্তে লইল।

জমিদারি করে রায় আনন্দে বসিয়া।

তিন চাপড়া মাটি কাটিতে পানি যে উঠিল।

সোলসত ছাপান্ন বিঘা নাথেরাজ গাজী পায়

রায় কহে গাজী বাবা মাটি কাটিতে না পারি।

সতেরই শ্রাবণ অবধি পানি না হইল।

'গাজী কহে তোমার তিন পুরুষ জমিদারি।

পুষ্করিনির পানি সব শুকাইয়া গেল।

গায়েবী আওয়াজ হল—

শুন শুন গাজী মিয়া কহি তোমার বাবে।

ঘুটুরি গেলে তুমি বহুত পানি পাবে।

কবির পরিচয় ও রচনাকাল কবির ভাষায় দেয়া হল :

ফকির মহম্মদ নাম জানিবে আমার ।	পরগনে মদনমল্ল সবাকৈ জানাই ।।
মুনসি জামালউদ্দিন নাম আমার পিতার ।	বসতি করিতেছি রামনগরেতে ।
আল্লা দিয়াছেন তিনটি পুত্র এখন ।	থানা যে জানিবে ভাই বারুইপুরেতে ।।
প্রধান পুত্রের নাম তোহুদক হোছেন ।	সন ১৩০৯ সাল বাঙ্গালার ।
মেজলার নাম হয় আমির হোছেন ।।	১৪ই কার্তিক রোজ জুম্বাবার ।
তাহার ছোটর নাম রফাকাত হোছেন ।	তামাম হইল কেছা উক্ত তারিখেতে ।।
জেলা ২৪ পরগনা জান সবে ভাই ।	অতএব রচনাকাল ১৯০২ খ্রীস্টাব্দে ।

‘মদন পালা’ নামে আর একখানা গীতি রয়েছে। এতেও বকেয়া খাজনার দায়গ্রস্ত জমিদার মদনরায়ের মোবারগাজীর সহায়তায় শায়েস্তা খানের পীড়ন থেকে মুক্তি বৃত্তান্ত বর্ণিত। মদন রায় ছিলেন চব্বিশ পরগনার রাজপুরের জমিদার।

১৩৩৫ সালের প্রথম সংখ্যা সাহিত্য পরিষৎ পত্রিকায় নগেন্দ্রনাথ বসু ‘সিতাকুণ্ডনিবাসী কলেমন্দি গায়েন থেকে ‘গাজী সাহেবের গান’ বা মোবারক গাজীর উপাখ্যান সংগ্রহ করে প্রকাশিত করেছিলেন। মদনরায়- গাজী সাহেবের কাহিনী তাতে সবিস্তার বর্ণিত হয়েছে। আমাদের পুথিতে তা সংক্ষিপ্ত। কিন্তু ঘটনাবলিতে পার্থক্য নেই। শুধু ঢাকার শায়েস্তা খান স্থলে আমাদের আলোচ্য পুথিতে মুরসিদ কুলি খাঁ পাছিম ঢাকায় নবাব ছিলেন- শায়েস্তা খান, মুরসিদকুলি নন। আমাদের পুথিকার ফকির মুহম্মদ ছিল করেছেন।

‘হরপার্বতী মঙ্গল’ রচয়িতা কবি রামচন্দ্র মুখুটি মদনরায়ের এরূপ পরিচয় দিয়েছেন :

‘জাহ্নুরী পূর্বাভাগ মদনমল্লানুরাগ	তদঙ্গজ শ্রীদুর্গাচরণ ।
অধিপতি শ্রীমদন রায়	সহায় আনন্দময়ী সর্বাংশে হইল জয়ী
নিজে মোবারক গাজী আপনি হইয়া রাজী	শ্রীমতী ‘শ্রীমতী’ যার রানী
বনমাঝে দেখা দিলা তায় ।	করিয়া সমাজ স্থান কতভূমি কৈল দান
সঙ্গেতে সহায় হয়ে নবাবে স্বপন কয়ে	বারুইপুরেতে রাজধানী
শিরোপা পাইল জমিদারী ।	তস্যপুত্র গুণধাম শ্রীকালীশঙ্কর নাম
দণ্ডকুল সমুদ্ভব গোষ্ঠীপতি খ্যাতি রব	অল্পকালে হৈল লোকান্তর ।
কায়স্থকুলের অধিকারী ।	তস্যপুত্র মহাশয় শ্রীরাজবল্লভ হয়
বৃত্তিভোগী কত দিগ পঞ্চম তনয় নিজ	চৌধুরী বিখ্যাত সর্বস্তর ।
কনিষ্ঠ শ্রীরাম বিচক্ষণ ।	শৌর্য বীর্য ধৈর্য ধরা অবিবাদে পালে ধরা
বুঝিয়া কার্যের তত্ত্ব জমিদারী তাহে বর্ত	গাভীর্যেতে রঘুপতি রাম ।
বারুইপুরে এখনো মদনরায়ের বংশধরগণ বাস করছেন ।	

নগেন্দ্রনাথ বসু লিখেছেন- ‘২৪ পরগনায় প্রায় সকল জনবহুল মুসলমান পল্লীতে গাজী সাহেবের আস্তানা আছে, বিশেষত বারুইপুরের চৌধুরী জমিদারগণের (মদনরায়ের বংশধর) যেখানে যেখানে জমিদারী আছে, সেখানে গাজী সাহেবের আস্তানা ও তাঁহার সম্মানার্থে হাজত

দিবার ব্যবস্থা আছে। বারুইপুরের জমিদার ও স্থানীয় প্রজাসাধারণের বিশ্বাস, মোবারক গাজীর কৃপায় রায়চৌধুরী বংশের জমিদারী এখনও বজায় আছে।' এর থেকেই আভাস পাওয়া যাচ্ছে যে কাহিনী যতই পল্লবিত ও বিকৃত হোক মদনরায় গাজী সাহেবের ভক্ত ছিলেন এবং তাঁর দ্বারা বিশেষ উপকৃত হয়েছিলেন- কোন বড় বিপদ থেকে তাঁর সাহায্যে উদ্ধার পেয়েছিলেন- এ সত্য অবশ্য স্বীকার্য।

নগেন্দ্রনাথ বসু লিখেছেন- 'হন্টার সাহেব (স্টাটিস্টিক্যাল একাউন্ট অব বেঙ্গল ভল্যুম ১. পৃঃ ১৯৯) বিদ্যাধরী নদী তীরস্থ হাসাড়া গ্রামের বিবরণ উপলক্ষে মোবারক গাজীর কিছু পরিচয় দিয়েছেন। তিনি রেভিনিউ সার্ভেয়ার্স রিপোর্ট হইতে যাহা উদ্ধৃত করিয়াছেন। তাহা কল্পনাপ্রসূত। গাজী সাহেবের গানে প্রকৃত বিবরণ দেওয়া হইয়াছে। বাঁশড়ার জঙ্গলে যেখানে মোবারক গাজী মোকাম করিয়াছিলেন সেই স্থান 'ঘুটিয়ারী শরীফ' নামে প্রসিদ্ধ, ই, বি রেলওয়ের দক্ষিণ শাখার ক্যানিং যাইবার পথে একটি স্টেশন, শিয়ালদহ হইতে সাড়ে ১৯ মাইল দূরে অবস্থিত, গাজীর উদ্দেশ্যে মানত করিয়া হিন্দু মুসলমান বহুযাত্রী সর্বদাই এখানে আসিয়া থাকে। মেলার সময় গাজী সাহেবের গান হয় এবং প্রায় পঞ্চাশ হাজার লোক সমবেত হইয়া থাকে।... রাজা মদনরায়ের অষ্টম অধস্তন পুরুষ স্বর্গীয় দেবেন্দ্রকুমার রায়চৌধুরী মহাশয়ের মুখে শুনিয়াছি, ঢাকার নবাব শায়েস্তা খাঁর সময়ে রাজা মদনরায় ঢাকায় গিয়াছিলেন।'

নবাব শায়েস্তা খান ১৬৬৪ থেকে ১৬৭৮ খ্রীস্টাব্দ পর্যন্ত ঢাকায় সুবাদার ছিলেন। এবং মোবারক গাজী এ সময়ে অর্থাৎ সতেরো শতকের শেষার্ধ্বে বর্তমান ছিলেন।

৭. একদীল শাহ

চব্বিশ পরগনা জেলার বারাসত মহকুমার আনওয়ারপুরের কাজীপাড়ায় একদিল শাহর দরগাহ রয়েছে। প্রতিবছর পৌষ-সংক্রান্তিতে একদীল শাহর স্মরণে এখানে সাতদিন স্থায়ী মেলা বসে। লোকশ্রুতি অনুসারে একদীল শাহ সম্রাট হুমায়ূনের সময়ে এখানে আসেন এবং সম্রাট জাহাঙ্গীর তাঁর খাদেমদের তিনশ বিঘা পীরোত্তর লাখরাজ জমি দান করেন। এ জমি খাদেম ছুটিমিয়ার বংশধরেরা আজো ভোগ করেন। আশেক মুহম্মদ রচিত একদীল শাহ পুথি ছাড়াও চব্বিশ পরগনা জেলার গেজেটিয়ারেও একদীল শাহর কেরামতির নানা বৃত্তান্ত রয়েছে। আর একটি একদীল শাহ নামের বৃহৎ পালাগান রচনা করেছিলেন শাহ শরফউদ্দীন। প্রাপ্ত পুথির লিপিকাল ১১৯৬ বঙ্গাব্দ বা ১৭৮৯ খ্রীস্টাব্দ। অতএব পুথি আঠারো শতকে রচিত। কবি রঙপুরের ভণিতা এরূপ :

১. রচে শাহ শরফউদ্দীন একদীল পাএ

২. মাগিয়া একদীল পাএ শাহ শরফউদ্দীন কএ।

বাঙলাদেশে কখনো আসেননি তেমন কয়জন মুসলিমজগতে বিখ্যাত দরবেশের কাল্পনিক আস্তানা ও কবর তৈরি হয়েছে চট্টগ্রামে। এঁদের মধ্যে রয়েছেন বড়পীর হযরত আবদুল কাদির জিলানী, হযরত বায়েজিদ বিস্তামী ও শেখ ফরিদ। এঁদের সম্বন্ধেও বিশ শতকে পদ্যে ও গদ্যে চরিতকথা রচিত হয়েছে। শায়ের আবদুর রহিমও শেখ ফরিদের পুথি রচয়িতা।

তাছাড়া তাজকিরাতুল আউলিয়ার অনুবাদ রয়েছে বাঙলায়। অনুবাদ করেছিলেন উনিশ শতকের শেষার্ধ্বে শায়ের জনাব আলি। তিনি করেছিলেন শেখ নূরউদ্দীন হানিফের ফারসি

এছের মোস্তা হোসেন আলীকৃত উর্দু তর্জমার বাঙলা অনুবাদ। এ ছাড়া বিভিন্ন দরবেশচরিত রয়েছে মনসুর হুস্জা (শেখ আমীরউদ্দীন রচিত) শাহকলন্দর (শাহ মুহম্মদ খান্দকার রচিত)। দরগাহর সঙ্গে অলৌকিক শক্তিদর পীরকাহিনীও যেমন আত্মপ্রত্যয়হীন দুর্বলচিত্ত কর্মকৃষ্ঠ মানুষের মানসস্ফুর্ষ পূর্তির অবলম্বনরূপে জনপ্রিয় হয়েছে। তেমনি অসম্ভবের দেয়াল ডিঙানো আলেফলায়লার গল্পও হয়েছিল তাদের অতি প্রিয়। তাই উনিশ-বিশ শতকের অনেক শায়েরই আলেফ-লায়লার বিভিন্ন অংশ অনুবাদ করে জনগণের চাহিদা মিটিয়েছেন। শেখ আয়জুদ্দিন, রওশন আলী, সৈয়দ নাসির আলী, হাবিবুল হোসেন ও মফিজুদ্দিন আলেফ-লায়লার অনুবাদক। এমনি কেরামতিপ্রিয় পাঠক-শ্রোতার কাছে কাসাসুল আমিয়া বা নবী কাহিনীও ছিল প্রিয়। এ কারণে কাসাসুল আমিয়াও কম রচিত হয়নি উনিশ-বিশ শতকে— আমীরউদ্দীন, আশরাফ, রেজাউল্লাহ ও তাজউদ্দীন তর্জমা করেন কাসাসুল আমিয়ার বিভিন্ন অংশ।

AMARBOI.COM

পঞ্চদশ অধ্যায় অবক্ষয়যুগ : যুগসন্ধির কাল

দোভাষী পুথির ভাষা

ছাপাখানা প্রবর্তিত হবার পূর্বেরকার হাতে-লেখা গ্রন্থ মাত্রেরই পুথি নামে পরিচিত ছিল। পুথি শব্দ সংস্কৃত পুস্তিকা শব্দজাত। কাজেই ‘পুথি’ বলতে প্রাচীন অমুদ্রিত গ্রন্থাবলীকেই বোঝানো উচিত। কিন্তু অধুনা কেউ কেউ আঠারো, উনিশ ও বিশ শতকের বাঙলা-হিন্দুস্তানী মিশ্রিত ভাষায় রচিত দোভাষী (দ্বিভাষী) কাব্যগুলোকেই বিশেষ অর্থে ‘পুথি’ নামে অভিহিত করেন। সেজন্যে আমরাও ‘পুথিসাহিত্য’ অর্থে এখানে দোভাষী পুথিই বুঝবো।

দোভাষী পুথির ভাষা সম্পর্কে আলোচনার পূর্বে একটু ভূমিকা প্রয়োজন। আর্য-পূর্ব যুগে বাঙলাদেশে বিভিন্ন গোত্রের যে-সব লোক বাস করতো, তাদের স্ব স্ব ভাষা ছিল বা সর্বজনীন একটি মিশ্রভাষায় (অস্টিক-দ্রাবিড়-মঙ্গোল-বৌদ্ধ-অন্যান্য অনার্য ভাষার মিশ্রণজাত) তারা কথা বলত-এটা আমরা অনুমান করতে পারি। কারণ খ্রীস্টীয় আট শতকে রচিত ‘আর্যমঞ্জরীমূলকল্প’ নামের সংস্কৃত গ্রন্থে বর্ণিত আছে ‘আসুরানাং ভবেৎ বাচা গৌড় পুঞ্জোদভবা সদা।’- আসুরেরা গৌড় ও পুণ্ড্রবর্ধন জাত ভাষা ব্যবহার করে।

বৌদ্ধ ও জৈন ধর্ম নিয়ে যখন ধর্মপ্রচারক ও শাসক হিসেবে মুখ্যত আর্য সংস্কৃতিবাহী ও আর্যভাষা প্রাকৃতভাষী একদল লোক বাঙলাদেশে তাঁদের প্রভাব বিস্তার করলেন, তখন এদেশীয় প্রাচীন অধিবাসীরা অপেক্ষাকৃত উন্নত আর্যভাষীর ধর্ম দর্শন, ভাষা ও সংস্কৃতি বিনা দ্বিধায় গ্রহণ করে নিল,- এও আমরা অনুমান করতে পারি। কারণ, সবল ও উন্নত শাসকজাতির কাছে দুর্বল, বিজিত ও শাসিত জাতির ও শাসিতের সংস্কৃতির পরাজয়, বশ্যতা ও মিশ্রণ চিরকালীন ঐতিহাসিক সত্য ঘটনা।

বাঙলাদেশে যে-আর্যভাষা প্রথম প্রবেশ করেছিল তা বৈদিক বা সংস্কৃত ভাষা নয়, বৌদ্ধ ও জৈন ধর্মের বাণীবাহক পালি বা প্রাকৃত। ভারতের নানা স্থানে যুরোপীয়দের হাতে দীক্ষিত ভারতীয়গণ যেমন ইংরেজিকে তাদের নিজেদের ভাষা রূপে গ্রহণ করে; বাঙালীরাও তেমনি পালি-প্রাকৃতকে মাতৃভাষারূপে বরণ করে। কারণ, তাদের নিজেদের কোন লিখিত ভাষা ও সাহিত্য ছিল বলে কোন প্রমাণ মেলে না। এখনো কোল, মুণ্ডা, কুকী ও নাগাদের কোন বর্ণমালা বা লিখিত ভাষা নেই। কাজেই বাঙালীরা পালিপ্রাকৃতকেই গ্রহণ করে বলে বিশ্বাস করা চলে। সংস্কৃতের সঙ্গে তাদের পরিচয় হতে পারেনি।

উক্ত পালি-প্রাকৃত ভাষায় তাদের নিজেদের ভাষার যে-সব শব্দের প্রতিশব্দ পাওয়া যায়নি, অথবা পালি-প্রাকৃতের যে-সব শব্দ তাদের কাছে অতিসুখকর বা প্রয়োজনীয় ব্যঞ্জনাক্ষর বলে মনে হয়নি, সে-সব শব্দই প্রাকৃত থেকে গ্রহণ করা হয়।

দেশী তথা অ-প্রাকৃত শব্দ পাচ্ছি। কালক্রমে যে আরো বহু শব্দ লুপ্ত হয়ে গেছে, তাতে সন্দেহ নেই।

তারপর বিদেশী মৌর্য ও গুপ্ত শাসনকালে এবং পালরাজাদের আমলে কিছু কিছু সংস্কৃত শব্দ আমদানি হয়ে বাঙালীর ভাষায় স্থায়ীভাবে ঠাই পেল। এরপর ব্রাহ্মণ্যবাদী সেনরাজাদের আমলে এদেশে ব্রাহ্মণ্য ধর্ম ও সংস্কৃতি চর্চার ধুম পড়ে গেলে সংস্কৃত ভাষা ও সাহিত্য বিশেষ প্রভাব বিস্তার করে বাঙালীর উপর, এবং এভাবে বাঙালীর ভাষা সমৃদ্ধ হয়ে ওঠে সংস্কৃত শব্দসম্পদে।

এরপরে আসেন ইসলাম প্রচারকরা ও তুর্কীশাসকরা। এ সময়ে অনিবার্য কারণে ফারসির মাধ্যমে বহু ফারসি, তুর্কি ও আরবি শব্দ স্থায়ী আসন লাভ করে বাঙলা ভাষায়।

এ পর্যন্ত সাহিত্য সৃষ্টির কাজ চলেছে পদ্যে। পদ্য ও গদ্য ভাষায় পার্থক্য বিস্তার। পদ্যে অল্পকথায় স্বল্প শব্দে ও অস্পষ্ট অর্থ্যে কাজ চলে। কিন্তু গদ্যের বাঁধন শ্রুত হলে চলে না এ জন্যে আমরা তুর্কী-মুঘল আমলের দলিল-দস্তাবেজে চিঠিপত্রে আরবি-ফারসি শব্দ মিশ্রিত বাঙলা পদ্যের সাক্ষাৎ পাই। কারণ তখনো গদ্যে সাহিত্য সৃষ্টির প্রচেষ্টা চালু না হওয়ায় গদ্য সৃষ্টির সচেতন প্রয়াস কেউ করেনি। আর একথা কে না স্বীকার করবে যে, সাহিত্যসৃষ্টির প্রয়াস ছাড়া কোন ভাষাই মার্জিত ও শালীন হয়ে উঠতে পারে না। কেননা, মুখের বুলি চিরকাল অপূর্ণ ক্রটিবহুল, তাকে লিপিবদ্ধ করতে হলে অনেক কিছু ঘোষণা করতে হয়— প্রয়োজন হয় অনেক পরিশোধনের। কারণ, শিক্ষিত ও ভাবুক লোকের ভাব-চিন্তা প্রকাশের জন্যে অনেক বেশি শব্দের প্রয়োজন যা মননহীন অশিক্ষিত লোকের ঘরোয়া বা ব্যবহারিক জীবনে কাজে আসে না। এজন্যেই ভাবুক, পণ্ডিত আর মূর্খ-লোকের ভাষায় পার্থক্য থাকে, একটা ব্যঞ্জন সমৃদ্ধ, অপরটা বাক্যার্থ-সর্বস্ব। এ কারণেই চর্য্যচর্য্যবিশিষ্টদের পরেও আমরা প্রয়োজনের তাগিদে বহু সংস্কৃত শব্দ অবচেতন ভাবে বাঙলা-ভাষায় ব্যবহার করেছি। চর্য্যপদের পর থেকে ভারতচন্দ্রের বা তাঁর পরবর্তীকাল পর্যন্ত মধ্যযুগীয় ধারার বাঙলাসাহিত্য সর্বাস্থে বহন করছে তার প্রমাণ।

এ পর্যন্ত কৃষ্টি সংস্কৃত মিশ্রিত ভাষায় কাব্য রচনা করা সম্ভব ছিল, কিন্তু বাঙালী চিরকাল গদ্য ভাষায় কথা বললেও গদ্য রচনা করতে গিয়ে দেখ শব্দ সম্পদের অভাব রয়েছে অপূরণীয়। আরো রয়েছে শব্দের পারস্পরিক অর্থ্যসাধক প্রত্যয় ও বিভক্তির অপ্রতুলতা। তাই যুরোপীয় মিশনারী ও বাঙালী পণ্ডিতগণ যখন ধর্মপ্রচারে, শাসনকর্মে ও ব্যবহারিক প্রয়োজনে বাঙলা গদ্য সৃষ্টির তাগিদ অনুভব করলেন, তখন এ দুটো সমস্যা তাঁদের কাছে দেখা দেয় তীব্র ভাবে।

এখানে বিশেষভাবে স্মরণীয় যে, দুনিয়ার কোন লিখিতভাষা তথা সাহিত্যের ভাষা অকৃত্রিম নয়। বাঙলা পদ্যের ভাষাও অকৃত্রিম ছিল না; অর্থাৎ সাহিত্যের ভাষায় তথা লিখিত ভাষায় কোন কালে, কোন দেশে কেউ ঘরোয়া কথা বলেনি।

আমাদের যে-চলতিভাষায় বা কথ্যভাষায় সাহিত্য রচিত হয় তাও কি অকৃত্রিম! নিতান্ত প্রয়োজনে বাঙলায় কৃত্রিম গদ্য সৃষ্টি হল 'সাধুভাষা' নামে।

বাঙলা গদ্য সৃষ্টি করতে গিয়ে কেউ আরবি-ফারসি বা ইংরেজি ভাষার সাহায্য নেবে তা ভাবা অস্বাভাবিক নিশ্চয়ই। তাই কেরী-রামমোহন-মৃত্যুঞ্জয়-বিদ্যাসাগর-মধুসূদন প্রমুখ সংস্কৃতের আশ্রয় নিলেন। প্রাকৃতজাত বাঙলাকে জ্ঞাতিত্ব সূত্রে তার প্র-প্র-প্রমাতামহী সংস্কৃতের উত্তরাধিকারিণী দাঁড় করিয়ে সংস্কৃতানুগ করে তুললেন বাঙলা ব্যাকরণকে ও শব্দসম্পদকে। এ ছাড়া ব্যবসাদারী ও অনভিজ্ঞ নতুন লেখকদের উপায় বা কি ছিল! বরং এরূপ না করে অন্য

কোন পন্থা গ্রহণ করলে অস্বাভাবিক হত। বস্তুত সে-যুগে সে-অবস্থায় সংস্কৃতের সাহায্য না নিয়ে বাঙলা গদ্যকে একটা সূঁচ ও শালীন রূপ দান করা ছিল অসম্ভব। সে-যুগের কথাই বা বলি কেন, এযুগে আমাদের সাহিত্যে ব্যবহৃত ‘চলতি ভাষায়’ও কি সংস্কৃত শব্দ বাদ দেওয়া সম্ভব হয়েছে? এ ব্যাপারে আমরা হিন্দি উড়িয়া ও আসামী ভাষার দিকে লক্ষ্য করলেও বুঝতে পারব, সংস্কৃত শব্দ আমদানি কেরী-মৃত্যুঞ্জয়-বিদ্যাসাগরের স্বেচ্ছাচারিতার ফল নয়। ভাষাকে সাবলীল করার জন্যে অপরিহার্য ছিল সংস্কৃত ভাষার সাহায্য। অনাত্মীয় আরবি-ফারসি-ইংরেজির চেয়ে রক্ত-সম্পর্কিত সংস্কৃতের সম্পদ আত্মস্থ করা যে সহজ ও শোভন হয়েছে, তা কে অস্বীকার করতে পারে? এখানে স্মরণীয় যে, বাঙলা ভাষার আদিকাল থেকেই আমাদের পদ্য রচনায় প্রয়োজন মতো সংস্কৃত শব্দ গৃহীত হয়েছে। আজকের দিনে ইংরেজি শব্দের পরিভাষাও সংগৃহীত হচ্ছে সংস্কৃত থেকেই।

কিন্তু সংস্কৃত শব্দের প্রয়োগ আর সংস্কৃত রীতির আমদানি যে এক কথা নয়, তা’ প্রথম দিককার লেখকগণ সহজে বুঝে উঠতে পারেননি। ‘আমি ডে’লি মর্নিং ও’অক করি।’ এতে অধিকাংশ শব্দ ইংরেজি হলেও বাঙলা ; ডে’লি হি ও’কস ইন দা প্রভাত।’ –বাঙলা মিশ্রিত হলেও যে ইংরেজি তা কোন শিক্ষিত লোককে বুঝিয়ে বলতে হয় না।

তাই ইংরেজদের প্রয়োজনে ফরমায়েসী গদ্য রচনা করতে গিয়ে পণ্ডিতগণ সংস্কৃত অভিধান ঘেঁটে শব্দ বের করে সংস্কৃত ব্যাকরণানুগ যে-সদ্য সৃষ্টি করলেন তা সেকালের বাঙালী জনসাধারণও গ্রহণ করতে পারেনি হঠাৎ করে কারণ “গৌড়ীয় ভাষাতে অভিনব যুবক সাহেবজাতের শিক্ষার্থে কোন পণ্ডিত (মৃত্যুঞ্জয় বিদ্যালঙ্কার) প্রবোধচন্দ্রিকা নামে যে গ্রন্থ রচিত ছিলেন’ তাঁর ভাষা এবং সংস্কৃত সম্বন্ধে তাঁর ধারণা নিম্নরূপ :

‘অস্মাদির ভাষার যুগপৎ বৈধুরী রূপতামাত্র প্রতীতি সে উচ্চারণ ক্রিয়ার অতি শীঘ্রতা প্রযুক্ত উপর্বোধোভাবান্তিত কোমলতর-বহুল-কমলদল সূচীবেধনক্রিয়া মত এতদরূপে প্রবর্তমান সকল ভাষা হইতে সংস্কৃত ভাষা উত্তমা, বহুবর্ণময়ত্ব প্রযুক্ত একদ্ব্যক্ষব পতপক্ষি ভাষা হইতে বহুতরাক্ষর মনুষ্য ভাষার মত ইত্যানুমানে সংস্কৃত ভাষা সর্বোত্তম ইহা নিশ্চয়।”

কিন্তু আশ্চর্য যে এমন ওকালতির পরেও স্বয়ং মৃত্যুঞ্জয় এ ভাষায় বিশ্বাসী ছিলেন না। তার প্রমাণ পাচ্ছি তাঁর অন্য রচনায় :

“মোরা চাষ করিব, ফসল পাবো, রাজার রাজস্ব দিয়া যা থাকে তাহাতেই বছর বছর শুদ্ধ অন্ন করিয়া খাব, ছেলে-পিতাগুলি পুষিব। যে বছর শুকা হাজাতে কিছু খন্দ না হয়, সে বছর বড় দুঃখে দিন কাটি, কেবল উড়ি ধানের মুড়ি ও মটর মসুর শাকপাতা শামুকগুলি সিজাইয়া খাইয়া বাঁচি। – এ দুঃখেও দুরন্ত রাজা হাজা শুকা হইলেও আপন রাজস্বের কড়াগণাক্রান্তিবিশ্বদুঃখ ছাড়ে না। এক আধ দিন আগে পিছে সহেনা, যদ্যাপিস্যাৎ কখন হয়, তবে তার সুদ দাম বুঝিয়া লয়, কড়াকপদকও ছাড়ে না। যদি দিবার ক্ষেতে না হয়, তবে সোনা মোড়ল পাটোয়ারি ইজারাদার তালুকদার জমিদারেরা পাইকপেয়াদা পাঠাইয়া হাল যোয়াল ফাল হালিয়াবলদ দামড়াগর বাছুর-বকরা কাঁথা পাথর চুপড়ী কুলা ধুচুনী পর্যন্ত বেচিয়া গোবাড়ীয়া করিয়া পিটিয়া সর্বস্ব লয়। মহাজনের দশগুণ সুদ দিয়াও মূল আদায় করিতে পারি না। কত বা সাদ্য সাধনা করি- হাতে ধরি পায়ে পড়ি, হাত জুড়ি, দাঁতে কুটা করি। হে ঈশ্বর দুঃখির উপরেই দুঃখ। ওরে পোড়া বিধাতা আমাদের কপালে এত দুঃখ লিখিস। তোর কি ভাতের পাতে আমরা ছাই দিয়াছি?”

গুধু বিদ্যালঙ্কারই নন, রামমোহন, বিদ্যাসাগর, অক্ষয়কুমার দত্ত, কালিপ্রসন্ন সিংহ, প্যারিচাঁদ মিত্র, বঙ্কিমচন্দ্র প্রমুখ সবাই বাঙলা গদ্যকে স্বাভাবিক ও শালীন করে তুলবার চেষ্টা করেছেন।

রাজা রামমোহন রায় যথার্থই বুঝেছিলেন— “প্রথমতঃ বাঙলা ভাষাতে আবশ্যিক গৃহব্যাপারের নির্বাহযোগ্য কেবল কতকগুলি শব্দ আছে। এ ভাষা সংস্কৃতের যেরূপ অধীন হয়, তাহা অন্য ভাষার ব্যাখ্যা ইহাতে করিবার সময় স্পষ্ট হইয়া থাকে। দ্বিতীয়তঃ এ ভাষার গদ্যে অদ্যাপি কোন শাস্ত্র কিংবা কাব্য বর্ণনে আইসে না। ইহাতে এতদেশীয় অনেক লোক অনভ্যাস প্রযুক্ত দুই তিন বাক্যের (সেন্টেন্স) গদ্য হইতে অর্থবোধ করিতে পারেন না, ইহা প্রত্যক্ষ কানূনের তরজমার অর্থবোধের সময় অনুভব হয়।” (বেদান্তমহত্বের অনুষ্ঠান প্রকরণ)।

“ভিন্ন ভিন্ন দেশীয় শব্দের বর্ণগত নিয়ম ও বৈলক্ষণ্যের প্রণালী ও অর্থের রীতি যে গ্রন্থের অভিধেয় হয়, তাহাকে সেই সেই দেশীয় ভাষায় ব্যাকরণ कहा যায়।” (বাঙলা ব্যাকরণ)।

অতএব রামমোহন ‘এ ভাষা সংস্কৃতের যেরূপ অধীন হয়’ অর্থে সংস্কৃত অভিধানের অধীনতার কথা বলেছেন, ব্যাকরণের নয়। সুতরাং তিনি স্বীকার করেছিলেন বাঙলা ও সংস্কৃত ভাষার প্রকৃতিগত পার্থক্য। তাঁর ব্যাকরণের অপর দুটো উদ্ধৃতি থেকেই আমাদের সিদ্ধান্তের সমর্থন পাওয়া যাবে।— ১. “সংস্কৃত সন্ধি প্রকরণ ভাষায় উপস্থিত করিলে তাবৎ গুণদায়ক না হইয়া বরঞ্চ আক্ষেপের কারণ হয়।” ২. এরূপ (দীর্ঘ সমাসবদ্ধ) পদ গৌড়ীয় ভাষাতে বাহুল্য মতে ব্যবহারে আসে না।”

এমন কি, অত্যধিক সংস্কৃত শব্দের ব্যবহারকেও সংস্কৃত রীতির অনুসরণ বলে আখ্যাত করা চলে না। কারণ সংস্কৃত ভাষায় শব্দ বিচ্ছিন্নভাবে ব্যবহৃত হয় না, পদ্যে ও গদ্যে ব্যবহৃত হয় সন্ধি ও দীর্ঘ সমাসবদ্ধ হয়েই। রূপে দীর্ঘ দূরের অধিক শব্দে সন্ধি বা সমাস সাধারণত হয় না। সুতরাং বাঙলাকে সংস্কৃত শব্দে ভারাক্রান্ত করা চলে বটে, তবে সংস্কৃত বাক্যরীতির অনুগত করা অসম্ভব।

এসব দেখে-শুনেই রামমোহন তাঁর রচনাবলীতে, মৃত্যুঞ্জয় তাঁর প্রবোধচন্দ্রিকার কোন কোন কুসুম কালীপ্রসন্নসিংহ ‘হুতোম প্যাচার নকসা’য় বিদ্যাসাগর ‘বেতাল পঞ্চবিংশতি’তে, প্যারিচাঁদ ‘আলালের ঘরের দুলালে’, বঙ্কিমচন্দ্র লোকরহস্যে কমলাকান্তের দণ্ডের ও সীতারামে বাঙলা গদ্যের একটা বিশিষ্ট রূপদানের প্রয়াস পেয়েছেন।

ইতিপূর্বেও সহজিয়াদের ‘জ্ঞানাদি সাধনা’, গোলকশর্মার ‘হিতোপদেশ’, কেরীর ‘ইতিহাসমালা’, গৌরীকান্তের ‘কামিনী কুমার’, রাজীবলোচনের ‘কৃষ্ণচন্দ্র চরিত্র’, প্রমথনাথ শর্মার ওরফে ভবানীচরণ বন্দ্যোপাধ্যায়ের ‘নববাবুবিলাস’ ও ‘নববিবিবিলাস’, ‘কলিকাতা কমলালয়’, ব্রিটিশ মিউজিয়ামে প্রাপ্ত ‘রূপকথা’, (ডক্টর সুনীতিকুমার চট্টোপাধ্যায়-অবিকৃত), রামরাম বসুর ‘প্রতাপাদিত্য চরিত’, তারিণীচরণ মিত্রের ‘ঈশপের গল্পাবলী’, চণ্ডীচরণ মুন্সীর ‘তোতা ইতিহাস, হরপ্রসাদ রায়ের ‘পুরুষ পরীক্ষা’ রামকিশোর তর্কালঙ্কারের ‘হিতোপদেশ’ প্রভৃতি গ্রন্থে এবং মার্সম্যান, জোস ভরস্টার উইলকিন্স প্রমুখ ইংরেজদের ভাষায় সংস্কৃতানুগত্যের নিদর্শন দুর্লভ। ইতিপূর্বকার চিঠিপত্র ও দলিল-দস্তাবেজের ভাষায় ব্যতীত এসময়কার সাহিত্যিক রচনায় আরবি-ফারসি শব্দের বাহুল্যও দৃষ্টিগোচর হয় না। গুধু ‘প্রতাপাদিত্যচরিতে’ মাত্রাতিরিক্ত আরবি-ফারসি শব্দ ব্যবহৃত হয়েছে।

ফোর্ট উইলিয়াম কলেজের কেরী প্রভৃতি ধর্মপ্রচারের জন্যে ও রাষ্ট্রীয় কারণে জনসাধারণের সহজ-বোধ্য রীতির যে পক্ষপাতী ছিলেন, সেযুগের ইতিহাস তারও ইঙ্গিত দিচ্ছে। অতএব সংস্কৃতানুরাগী পণ্ডিতদের সৃষ্ট ভাষা বাংলাদেশে স্থায়ী হয়নি।

এ পর্যন্ত যা বললাম তাতে বোঝা যাবে, বাংলা ভাষায় গদ্যে ও পদ্যে একটা নিজস্ব রীতি বা শৈলী ছিল। তাতে মাত্র দু'বার বিপর্যয় আসে— একবার দোভাষী রীতির প্রচলনে, আর একবার সংস্কৃত ব্যাকরণানুগ পদ্য রচনার ফলে। এবং কোনটাই টেকেনি।

প্রাণ্ডক্ত গ্রন্থসমূহের ভাষায় গ্রাম্যতাদুষ্ট (slang) শব্দ আর কিছু আরবি-ফারসি শব্দও রয়েছে কিন্তু সমাসবদ্ধ সংস্কৃত শব্দ নেই। অপরিহার্য রূপে কয়েক হাজার আরবি-ফারসি শব্দ বাংলাভাষায় চালু আছে। আরো দু'দশটা শব্দ হয়তো আসবে। কিন্তু তা' প্রয়োজনের তাগিদে স্বাভাবিকভাবেই আসবে, জোর করে চালু করলে চলবে না।

বিদেশাগত তুর্কী-মুঘল শাসকগোষ্ঠী ঘরে তুর্কী, দপ্তরে ফারসি, মসজিদে আরবি এবং সামাজিক ব্যবহারে তুর্কী-ফারসি-আরবি মিশ্রিত হিন্দুস্তানী ভাষা ব্যবহার করতেন। তাই মধ্যযুগে যেমন ব্যবহারিক ও দরবারী জীবনের আরবি-ফারসি-তুর্কী শব্দ ঘরোয়া ও পোষাকী কথায় প্রতিশব্দের বা পরিভাষার অভাবে অপরিহার্যরূপে ব্যবহৃত হয়েছে ইংরেজ আমলেও তেমনি আমাদের কথাবার্তায় অসংখ্য ইংরেজি শব্দ ব্যবহৃত হয়েছে এবং ক্রমে ক্রমে পরিভাষা সৃষ্টি করে ও সংস্কৃত থেকে শব্দ সংগ্রহ করে আমরা ইংরেজি শব্দের ব্যবহার সংকুচিত করেছি, অন্তত সাহিত্যের ভাষায় আমরা পারতপক্ষে ইংরেজি ব্যবহার করিনে। হাসপাতালে admission নেওয়া, স্কুলে কলেজে পড়া, exam দেওয়া, পাস করা, refer করা, report বা return দেওয়া; graduate হওয়া, admit বলা, suggestion নেওয়া প্রভৃতি আজো শিক্ষিত বাঙালীর ঘরোয়া কথাবার্তার ও চিঠিপত্রের ভাষার অপরিহার্য অঙ্গ। কিন্তু সাহিত্যে এগুলোর যে-পরিভাষা গ্রহণ করেছি, তার একটাও বাংলা বা দেশী শব্দ নয়, সবগুলোই সংস্কৃত। যেমন ভর্তি, পরীক্ষা, স্নাতক, প্রবেশিকা, উত্তীর্ণ, বিশ্লেষণ, সমীক্ষণ, পর্যবেক্ষণ প্রভৃতি। এমনকি আরবি-ফারসি ভাষার ঐতিহ্যবাহী মুসলমানদের পরিভাষাও আরবি-ফারসি নয়, বরং সংস্কৃত। এখন যেমন অসাহিত্যিক বাঙালী জনসাধারণ কথাবার্তায় ও চিঠিপত্রে প্রায় প্রতি বাক্যে দু'একটি ইংরেজি শব্দ ব্যবহার করে, তেমনি পূর্বে একরূপক্ষেত্রে আরবি-ফারসি শব্দ ব্যবহার করা হত। এখনকার যুগের জনসাধারণের কথাবার্তায় বা চিঠিপত্রের ভাষা যেমন সাহিত্যে স্থান পায়নি, তেমনি তখনকার যুগের মিশ্র ভাষাও সাহিত্যে স্থান করে নিতে পারেনি, তার প্রমাণ আমাদের সেকালীন পদ্যসাহিত্য। যে-সব আরবি-ফারসি বা ইংরেজি শব্দের প্রতিশব্দ বাংলা-সংস্কৃতে পাওয়া যায়নি অথবা পরিভাষা সৃষ্টি সম্ভব হয়নি, সেগুলো এখনো আমাদের সাহিত্যের ভাষায় চালু রয়েছে এবং খুব সম্ভব থাকবেও।

সুতরাং চিঠিপত্র বা দলিল-দস্তাবেজের অসাহিত্যিক ভাষার প্রমাণে কোন ভাষার গতি-প্রকৃতি নির্ধারণ করতে যাওয়া অসমীচীন। অতএব-কেরীয়-বিদ্যাসাগরীয় প্রচেষ্টার পূর্বে বাংলাসাহিত্যের ভাষা আরবি-ফারসি মিশ্রিত হবার প্রবণতা লাভ করেছিল বলে যারা মনে করেন, তাঁদের ধারণা তথ্য-ভিত্তিক নয়। এযুগে যদি কেউ বলে যে বাংলাভাষা ইংরেজি শব্দের দ্বারা পুষ্ট ও সুষ্ঠু হবার প্রবণতা দেখাচ্ছে তা যেমন ভুল, পূর্ব ধারণায়ও রয়েছে তেমনি ধরনের অসঙ্গতি। বস্তুত বিদেশী বিভাষার শব্দ গ্রহণ যে-কোন ভাষার দীনতারই পরিচায়ক। সগোত্রীয় সংস্কৃতির ঋণ স্বীকার করে বাংলা সে-দীনতা ঘুচিয়েছে; কাজেই বিদেশী শব্দে তাঁর প্রয়োজন সামান্য।

।। ২।।

এবার আঠারো শতকের শেষার্ধ্বে আমাদের জাতীয় অধঃপতন যুগে উর্দু-বাঙলা মিশ্র শৈলীতে রচিত দোভাষীপুথি সম্বন্ধে আমাদের অনুসন্ধানলব্ধ ধারণা পেশ করে আমাদের আলোচনা শেষ করব।

নওয়াব সরফরাজ খান রাজ্য শাসনে উদাসীন ছিলেন। তাঁর শাসনশৈথিল্যের সুযোগে রাজ্যের প্রধানগণ উচ্ছৃঙ্খল, লোভী ও আত্মপরায়ণ হয়ে ওঠে। খলশ্রেষ্ঠ জগৎ শেঠের নেতৃত্বে স্বার্থপর অমাত্যগণ বিহারের নায়েব-সুবাদার আলিবর্দী খাঁকে বসালেন বাঙলার মসনদে। এঁদের সহায়তার নওয়াবী লাভ হ'ল বলে তিনি এঁদের মন যুগিয়ে চলতেন। ফলে এসব স্বার্থপর, উচ্ছৃঙ্খল অত্যাচারী সামন্তগণই ছিলেন প্রকৃতপক্ষে রাজ্যের ভাগ্যনিয়ন্তা। তার উপর বর্গীয় উৎপাত তো ছিলই। শাসক যেখানে দুর্বল, শাসিত সেখানে যথেষ্টাচারী হবেই। সিরাজুদৌল্লাহ্ আমীরদের মন ও মান রক্ষা করে চলতে জানলেন না বা পারলেন না। তাই পলাশীতে ঘটলো অবশ্যসম্ভাবী বিপর্যয়।

মানুষ চিরকাল আদর্শপ্রবণ ও পরানুকারী। ধনে-জনে-মানে যারা প্রধান, জনজীবনে তাদের আচার-আচরণই হয় অনুকৃত। ফলে এ সময়ে দেশব্যাপী স্বার্থপরতার, নীতিহীনতার এবং ভোগের ও নগ্ন লালসার স্রোত বয়ে চলেছিল। ও কদর্যতার স্রোত অবশ্যসম্ভাবী রূপে প্রবেশ করেছিল সাহিত্যেও। এজন্যেই তারল্য, কৃত্রিমতা, বর্ণনায় নিজীবতা- অলংকারের ঘটা ও ছন্দের বহু বিচিত্র সন্ধানর সর্বত্র ভারতচন্দ্রের রচনাকে করেছে কলঙ্কিত। ভারতচন্দ্রের পরে বাঙলার রাষ্ট্রিক, নৈতিক এ সামাজিক অবস্থা আরো খারাপ-আরো ক্রোধান্বিত হয়ে উঠেছিল, সে-প্রমাণ শুধু ইতিহাসে নয়, রয়েছে সাহিত্যেও। আঠারো শতকের এই প্রশাসনিক শৈথিল্যের, রাষ্ট্রিক ভাগ্য-বিপর্যয়ের এবং নীতিহীন বাঙালীর অবনতি-প্রবণ সমাজের বিকৃতির অভিব্যক্তি স্বরূপ আমরা হিন্দুরচিত 'কবিগান', 'পীরপাঁচালী; এবং মুসলিমরচিত 'দোভাষী-পুথি'গুলো পাচ্ছি। হিন্দু কবিরচিত পীরপাঁচালীর অনেকগুলোই দোভাষীপুথির অন্তর্গত। নিবীৰ্য বাঙালীর সামাজিক রুচিবিকৃতি ও নৈতিক অবক্ষয়ের দিনে মানসিক বিপর্যয়ের ও সাংস্কৃতিক বক্ষ্যাত্ত্বের সুযোগে নতুন বন্দর কোলকাতাকে এবং পুরোনো শহর মুর্শিদাবাদকে কেন্দ্র করে হিন্দু ও মুসলমানের গড়ে ওঠে যথাক্রমে উক্ত দু-ধারায় সাহিত্য। হিন্দুদের যেমন ধর্মসম্পৃক্ত কবিগান, সত্যনারায়ণ পাঁচালী, মুসলমানদেরও তেমনি হামজা-হোসেন-হানিফা প্রভৃতির জেহাদ কাহিনী ও পীরদরবেশের উপকথা নিয়ে গড়ে ওঠে এ সাহিত্য। তখন রাজশক্তির লীলাভূমি কোলকাতা-মুর্শিদাবাদের ও এদের সন্নিহিত অঞ্চলের হিন্দু-মুসলমানের আধ্যাত্মিক দেউলেভাবও প্রকট হয়ে ওঠে। মানুষ যখন উচ্চ নৈতিক, সামাজিক ও ধর্মীয় আদর্শ হারিয়ে ফেলে, তখন আত্মবিশ্বাস রক্ষা করে আত্মনির্ভর হতে পারে না। তখন সে হয়ে পড়ে একান্ত ভাবে দৈবনির্ভর, ভীকু এবং শক্তি-পূজক। এজন্যে এ সময়ে এখানকার হিন্দুদের মধ্যে ব্যাপকভাবে প্রচলিত হয় সত্যনারায়ণ, দক্ষিণরায়, কালুরায় ও ধর্মঠাকুরের পূজা। মুসলমানদের মধ্যে মানব ভাগ্য-নিয়ন্তা বলে শ্রদ্ধা-শিরনী পেতে থাকেন সত্যপীর, বড় খাঁ গাজী, ইসমাইল গাজী, মোবারক গাজী, বনবিবি প্রভৃতি। রাজধানীর অধিবাসীরাই সৌভাগ্য-দুর্ভাগ্য দু'টোই সমবাবে ভোগ করে। বাঙলার কলঙ্কিত দুর্দিনের সাক্ষ্যও রেখে গেছে এরাই। এসব আমরা অন্যত্র বিস্তৃতভাবে আলোচনা করেছি।

ইতিপূর্বেও আমরা পালদেব পতন যুগে পেয়েছি রৌদ্র বজ্রযান, সহজযান (তন্ত্র ও যোগ) প্রভৃতি। সেন রাজাদের দুর্দিনে পেয়েছি একদিকে চণ্ডী-মনসা প্রভৃতি অপরদিকে শেখজোদয়া, গীতগোবিন্দ ইত্যাদি। (রাধাকৃষ্ণলীলারূপ পঙ্ক থেকে পঙ্কজ হল বৈষ্ণবমত)। তুর্কি-আফগান পরাজয়ে পেলাম ধর্মঠাকুর, সত্যপীর, দক্ষিণরায়, কালুরায়, বড় ঝাঁ গাজী প্রভৃতি আর মুঘলশক্তির পতনে পেলাম বিদ্যাসুন্দর, কবিগান, পুথিসাহিত্য। এ হচ্ছে স্রোতে ভেসে-যাওয়া লোকের তৃণ ধরে বাঁচবার প্রয়াস।

নওয়াবী আমলে চট্টগ্রামের, ঢাকার, মুর্শিদাবাদের ও কোলকাতার শহরে শহরতলীতে ও তার সন্নিহিত অঞ্চলে সিপাহী রাজকর্মচারী, ব্যবসায়ী এবং আরো নানা পেশার অবাঙালী লোক-লব্ধর এসে বসবাস করেছে। উর্দু-হিন্দি তথা হিন্দুস্তানীই ছিল তাদের মাতৃভাষা। স্বদেশের সঙ্গে যোগাযোগের অভাবে ও দেশীলোকের প্রভাবে বিকৃত হয়ে গেল তাদের বুলি। ওই ভাষা এদেশে অবজ্ঞার্থে খ্যাত হল 'খোষ্টাভাষা' নামে। এখন খোষ্টাভাষী বিদেশীরা প্রাত্যহিক জীবনের পরজে এদেশীয় লোকের ভাষাও আয়ত্ত করল অপটুভাবে। ফলে যে-কারণে (অর্থাৎ প্রয়োজনানুরূপ শব্দসম্পদ আয়ত্ত করতে না পারার ফলে) ফারসি-হিন্দির মিশ্রণে সৃষ্টি হল উর্দু ভাষার, অনুরূপ কারণে উৎপত্তি হল খোষ্টাদেরও একটি বাঙলা ভাষার। এর বিশেষত্ব হচ্ছে বাঙলা শব্দের বিকৃত উচ্চারণ এবং অপরিমেয় হিন্দুস্তানী শব্দের ভাবহার ও বাক-ভঙ্গির প্রয়োগ। এ ভাষা এখনো চালু রয়েছে উক্ত শহরগুলোতে। হিন্দুস্তানী ও বিদেশাগতদের পারস্পরিক অক্ষমতার ফলে ফারসি-হিন্দি মিশ্রিত যে ভাষা চালু হল 'লিঙ্গুয়াফ্রাঙ্কা' হিসেবে, তা ফারসি অক্ষরে লিপিবদ্ধ হয়ে নতুন নামে আলাহিদি ভাষারূপে দাঁড়িয়ে গেল। উর্দুর (তাবু) ভাষা পরিণামে ঘরোয়া বুলিতে পরিণত হল কয়েক কোটি লোকের। কালে সাহিত্যের বাহন হবার গৌরবও অর্জন করেছে উর্দু।

এ ভাবে এর আগেই দক্ষিণ ভারতেও সৃষ্টি হয়েছে দারিনী উর্দু। খোষ্টা বাঙালীরাও হয়তো ফারসি হরফে তাদের মিশ্রবাঙলা লিপিবদ্ধ করে উর্দুর মতো পৃথক একটা ভাষা তৈরি করতে পারতো; কিন্তু বাঙলা দেশে বিদেশাগত হিন্দু-মুসলমানের সংখ্যান্বতর দরুন এবং বাঙলা ভারতের প্রত্যন্ত অঞ্চল হওয়ায় তা সম্ভব হয়নি কিংবা এর জন্য নওয়াবী আমল দীর্ঘায়িত হওয়ার প্রয়োজন ছিল। এ প্রসঙ্গে মনে রাখা প্রয়োজন যে আরবি হরফে অনুলিখিত যে-কয়টি বাঙলা পুথি আব্দুল করিম সাহিত্যবিশারদ কর্তৃক সংগৃহীত হয়েছে, সেগুলো দোভাষীপুথি নয়, সুতরাং 'একে উর্দুর মতো আলাহিদি ভাষা' সৃষ্টির প্রয়াস বলে মনে করবার হেতু নেই। আরবি হরফে বাঙলা লিখবার জন্য স্থানীয় ও পারিবেশিক কারণ ছিল। এগুলো বাঙলাবর্ণজ্ঞানহীন মাদ্রাসা-শিক্ষিত মৌলবীদের জন্যেই প্রতিবর্ণীকৃত। সে-আলোচনা এখানে অবাস্তব।

সুতরাং খোষ্টা বাঙালীর শহুরে বাঙলায় যে-সাহিত্য পলাশীর যুদ্ধের পাঁচসাত বছর পর থেকে কোলকাতা, হাওড়া, হুগলী ও মুর্শিদাবাদ অঞ্চলে রচিত হতে থাকে, তার সঙ্গে ঝাঁটি বাঙালীর কোন যোগ ছিল না। আব্দুল করিম সাহিত্যবিশারদের মতে 'দোভাষী বাঙলা; কোন শিক্ষিত লোকের ভাষা নহে। [বঙ্গভাষা ও সাহিত্য বনাম বঙ্গীয় মুসলমান ১৩২৫ সাল, আল্ এসলাম, ষষ্ঠ সংখ্যা, পাঁচটাকা পৃঃ ৩১৭] চৌদ্দ-পনেরা শতক থেকে বিস্তৃত বাঙলায় যে-সাহিত্য রচিত হচ্ছিল, বাঙালীরা সে-ভাষাশৈলীই সাম্প্রতিক কাল পর্যন্ত অনুসরণ করে করে চলেছে। দোভাষী পুথির কোন প্রভাব যে পল্লীবাসী মুসলিমদের উপর পড়েনি, তার প্রমাণ এদের রচিত পুরোনো বা নতুন গানে, গাথায়, ছড়ায়, রূপকথায়, কাহিনী-কাব্যে সে-ভাষার কোনো নিদর্শন

নেই। আমাদের উক্তির সমর্থন পাওয়া যাবে 'হারামণি'তে, ময়মনসিংহ ও পূর্ববঙ্গ গীতিকায়, প্রবাদ-সংগ্রহে, ভাটিয়ালী-ভাওয়াইয়া-গল্পীরা-ঝুমুর প্রভৃতি গ্রাম্য গানে এবং পাঁচালীগুলোতে।

পত্নী অঞ্চলে দোভাষী পুথি বহুল গঠিত হতো বলে বিশ্বাস করবারও কারণ নেই। চকবাজারে ও শহরে বসতিতে এর উদ্ভব ও প্রচার সীমাবদ্ধ বললে সত্যের বিশেষ অপলাপ হবে না। উনিশ-বিশ শতকে দোভাষী উপাখ্যানগুলো কারা, কাদের আদেশে কোন প্রেরণায় রচনা করেছেন ও করছেন তার উল্লেখ অনেক পুথির সমাপ্তি ভাগে রয়েছে— বটতলার প্রকাশকের আদেশ, আর্থিক প্রেরণা এবং খোঁটা পাঠকদের চাহিদাই রয়েছে এগুলো রচনার মূলে। অতএব এ-সাহিত্যের সঙ্গে বাঙালীর আস্তর বা বাহ্য যোগ কোথায়? অবশ্য বিস্তৃত ভাষায় রচিত ছাপা পুথির অভাবে গায়ের লোকেরাও দোভাষী পুথি পড়েছে-শুনেছে বাধ্য হয়ে কিন্তু সে-ভাষা অনুকরণ করেনি। কাজেই দোভাষী পুথিসাহিত্যের ঐতিহ্যে-উত্তরাধিকারের প্রশ্নই অবাস্তব। কল্যাণকর ইসলামী আবেশ বা মুসলিম ঐতিহ্যের আবহ পুথিতে দুর্লভ ও দুর্লভ্য। দোভাষী পুথির আদি রচয়িতা ফকির গরীবউল্লাহ স্বয়ং ছিলেন পীরপূজারী। দেবগুণাধিকারী কাল্পনিক পীর বড় খান গাজী ছিলেন তাঁর জীবননিয়ন্তা। এখানে উল্লেখযোগ্য যে মুঘল আমলে আগত ধনিক ও বণিক অভিজাত মুসলমানদের ঘরোয়া ভাষা আজো উর্দু, এবং বাঙালী মুসলমানদের রাজনৈতিক নেতা ও মুখপাত্র হয়ে তাঁরাই উনিশ শতকে ও বিশ শতকের গোড়ার দিকে প্রচার করেছিলেন যে বাঙালী মুসলমানদের মাতৃভাষা উর্দু।

সতেরো শতকের কবি কৃষ্ণরাম দাস তাঁর রায়মঙ্গল-সংস্কৃত নাটকের অনুকরণে সংলাপে বাস্তবরূপ দান করবার বাসনায় সত্যপীরের মুখে দিয়েছিলেন হিন্দুস্তানী ভাষা। ভারতচন্দ্র 'রায়মঙ্গলের' সে-দৃষ্টান্ত স্মরণ করেই লিখেছেন

মানসিং পাদসায় হইল যে বাণী। কিন্তু সে-সকল লোকে বুঝিবারে ভারি।।

উচিত যে আরবি ফারসি হিন্দুস্তানী না হবে প্রসাদ গুণ না হবে রসাল।

পড়িয়াছি যেই মত বর্ণিবারে পুথি। অতএব কহি ভাষা যাবনী মিশাল।

কৃষ্ণরামদাস-ভারতচন্দ্র-রামপ্রসাদ ছাড়া বিদ্যাপতি, শ্রীকবিবল্লভ, প্রভৃতি সত্যনারায়ণ পুথি রচয়িতারা এবং 'জন্মনামা' রচয়িতা রাধাচরণ গোপ তাঁদের পাঁচালীতে মিশ্রভাষা প্রয়োগ করেছেন।

বলা বাহুল্য, এঁরাও কোলকাতা সন্নিহিত অঞ্চলের লোক। সত্যনারায়ণ প্রসঙ্গে এ ভাষার নমুনা দেয়া হয়েছে।

সম্ভবত এঁদেরই অনুকরণে ফকির গরীবউল্লাহ ১৭৬০ থেকে ১৭৮০ খ্রীস্টাব্দের মধ্যে তাঁর কাব্যগুলো রচনা করেন।

দ্বিতীয় কবি সৈয়দ হামজা ১৭৮৯-১৮০৫-৮ খ্রীস্টাব্দের মধ্যে রচনা করেছেন তাঁর গ্রন্থগুলো। আঠারো শতকের শেষার্ধ্বে গরীবউল্লাহ-সৈয়দ হামজা— মাত্র এই দু'জন দোভাষী পুথিলেখকের আবির্ভাব হয়েছে। উনিশ শতকে ও বিশ শতকে প্রায় শতাধিক কবি বটতলার প্রকাশকদের অনুরোধে অর্থের বিনিময়ে নানা বিষয়ক পুথির রচনা করে দিয়েছেন। এঁদের অনেকেই পেশাদার লেখক। তাই পুথিগুলো প্রায় সবদিক দিয়েই বিশেষত্ব বর্জিত। পদ্যে কোন রকমে কাহিনী বা বক্তব্য লিপিবদ্ধ হয়েছে মাত্র। বহুস্থল প্রণেতা হিসেবে এঁদের মধ্যে উড়িষ্যার আবদুল মজিদ খান ভূঁইয়া, জনাব আলী, মালে মুহম্মদ, মুহম্মদ খাতের, আবদুল রহিম, মুহম্মদ মুনশী, শেখ আয়েজুদ্দিন, মনিরুদ্দিন প্রভৃতির নাম উল্লেখযোগ্য। এবং এঁদের অনেকেই নিবাস

দক্ষিণরাঢ়ে তথা হাওড়ায়, হুগলীতে ও চব্বিশ পরগনাস্থলে ।

এসব দোভাষীপুথি কাদের জন্যে লিখিত হয়, তার আভাষ পাওয়া যাবে কয়েকটি উদ্ধৃতি থেকে ।- কবি মালে মুহম্মদ তাঁর 'সয়ফুলমূলুক-বদিউজ্জামাল' পুথি রচনার [১৮২৮ খ্রীঃ] কারণ স্বরূপ বলেছেন :

এই পুথি সায়েব ছিল আও যমানায় । তেকারণে অধীন করে চলিত বাঙ্গালা ।
সংস্কৃত সাধু ভাষায় হৈল তৈয়ার ।। রসিক লোকের দেখে বহুত কাগতি ।
পড়িতে বুঝিতে লোকের বড়ই কাছেরা । বারশও পঁয়ত্রিশ সালে লেখি এই পুথি ।।
বারশ' পঁচাত্তর বাঙলা সনে [১৮৬৮ খ্রীঃ] ছগলীর সন্তোষপুরনিবাসী কবি বেলায়েতকে তাঁর 'ফেসানায়ে আজায়েব আঞ্জুমান আরা জানে আলম' রচনা কালে তাঁর বন্ধু সম্বন্ধে যে উপদেশ দিয়েছিলেন তা এরূপ :

বোলচাল সব তুমি লেখ আমাদের । শক্ত শক্ত লভজো কিছু না লেখ আপনি ।।
সকলে বুঝিতে পারে কি কহিব ফের ।। এমত না হয় যেমন আমা সবাকায় ।
রঙ্গিন করিতে তুমি এই যে কাহিনী । মানে পুছে ফিরি মোরা পণ্ডিত সবায় ।।

কোলকাতা শহরের কড়োয়া নিবাসী কবি শেখ আমীরুদ্দিন 'মনসুর হাঙ্গাজ' পুথির প্রারম্ভে লিখেছেন :

মাসাএখ মনসুরের কেছা ফাছিতে । লিখিতে এরাদা হইল খাহেস আমায় ।।
লিখিয়াছিলেন কোন ফাজেল লোকেতে । স্বাঙ্গালা লোকের কেছা শুনিতে বাসনা ।
সেই তো রেছেলা ফের এছলামি বাঙ্গালায় । তেকারণে বাঙ্গালাতে করিনু রচনা ।।

এতেই বোঝা যাবে এঁরা কোন বাঙালীর জন্যে কোন বাঙলায় পুথি রচনা করেছেন। আজ পর্যন্ত যারা দোভাষী পুথি রচনা করে চলেছেন, যারা এ-পুথির প্রকাশক আর যারা পাঠক, তাঁদের সঙ্গে যে শিক্ষিত বা অশিক্ষিত বাঙালীর সাংস্কৃতির ও ভাবগত কোন প্রকার সম্পর্ক নেই, তা কে না স্বীকার করবেন।

এসব পুথি দেখেই সম্ভবত উনিশ শতকের কোলকাতার হিন্দু সাহিত্যিকগণ মুসলমান লেখকের রচনার সমালোচনা প্রসঙ্গে- 'মুসলমান হইয়া এমন বিশ্বদ্ব বাঙলা লিখিয়াছেন' ইত্যাদি উক্তি করতেন। অবশ্য দোভাষী পুথির অধিকাংশ উর্দু সাহিত্যের অনুবাদ। বাঙলা তর্জমায় উর্দু ভাষার প্রচুর আরবি-ফারসি শব্দ ও বাকভঙ্গি রক্ষা করার ফলে কবিদের পক্ষে অনুবাদ কার্য সহজ হয়েছিল। কিন্তু আমাদের পুথিকারদের কেউ কেউ উর্দু-হিন্দি শব্দ এতই বেশি প্রয়োগ করেছেন যে, তাঁদের রচনার কোন কোন অংশ বিকৃত হিন্দুস্তানী বলে ভ্রম হয়।

এখানে আমরা 'ব্রজবুলি' নামের কৃত্রিম ভাষার কথা স্মরণ করতে পারি। মৈথিল ভাষার অনুকরণে বৈষ্ণব যুগে (১৬-১৭ শতকে) ব্রজবুলি (বাঙলা-মৈথিল মিশ্রিত) ভাষায় পদ রচনার রীতি দেখা দেয়, কিন্তু কৃত্রিম বলে তা বাঙলা সাহিত্যে টিকতে পারেনি, শেষ পর্যন্ত পরিত্যক্ত হয়েছে। শুধু তাই নয়, কোন সময়েই বাঙলাদেশে এর বহুল প্রচলন হয়নি। কেবল গোবিন্দদাসই মনেপ্রাণে সাধনা করেছিলেন ব্রজবুলির। ফলে তাঁরা রচনা (পদাবলী) হৃদয়াবেগহীন বাকসর্বস্ব বাক-চাতুর্যে পর্যবসিত হয়েছে- ভাষার ঐশ্বর্য ঘুচাতে পারেনি ভাবের দীনতা। ভাষার যাদুকর হয়েও তাই তিনি আন্তরিকতার অভাবে কবিত্রাণতায় বিদ্যাপতি, চণ্ডীদাস বা জ্ঞানদাসের সমকক্ষ হতে পারেননি। অথচ মৈথিলভাষা (তথা ব্রজবুলি) ছিল বাঙলা

ভাষার বৈপিণ্ডেয় বোন-সহোদরা। এযুগে ভানুসিংহ ঠাকুরের পদাবলীও অনুকৃত হয়নি এজন্যেই। কৃত্রিম ভাষায় হালকা রচনার বিলাস করা চলে, কিন্তু সারবান মহিমময় সাহিত্য সৃষ্টি করা চলে না। অক্ষম লোকের কৃত্রিম ভাষার প্রয়োগের ফলে পুথিসাহিত্য সৌন্দর্য ও শালীনতা হারিয়ে ফেলেছে, গান্ধীরের কথাতো ওঠেই না। বাঙালীর 'ব্রজবুলি' চর্চার পরিণতি থেকে আমাদের শিক্ষা পাওয়া উচিত। ইতিহাসের ইঙ্গিত অবহেলার ফল কখনো শুভ হয় না।

বৈষ্ণব আমলের কৃত্রিম 'ব্রজবুলি' টেকেনি, পুথির কৃত্রিম মিশ্ররীতিও কোথাও স্বীকৃতি পায়নি।

এখানে ভাষা সম্বন্ধে দুটো কথা বোধ করি অপ্রাসঙ্গিক হবে না। কোন ভাষায় বিদেশী শব্দ আসে দু'প্রকারে। প্রথমত, নতুন বস্তু নির্দেশক হয়ে, দ্বিতীয়ত নতুন ভাব-প্রকাশক রূপে। বাঙলা দেশে যে-বস্তু ছিল না বা নেই, সে-বস্তু যদি আসে, তবে তার নামবাচক বিদেশী বিভাষার শব্দ গ্রহণ করতে বাধ্য হই আমরা, দ্বিতীয়ত বাঙালীর মন-মননে যে-চিন্তা বা ভাব পূর্বে জাগেনি- যা-ব্যক্ত হয়নি, সে-সব ভাব-চিন্তা ব্যঞ্জক শব্দও বিদেশী ভাষা থেকে ধার না করে উপায় নেই আমাদের। অকারণে মূল না-জানা ঐতিহ্য ও ব্যঞ্জনবিহীন কতগুলো বোবা শব্দ এসে নিজের মুখের বুলিকে- সাহিত্যের ভাষাকে জড় করে তুলে লাভ কি! বিশেষত যখন ঋণ মাত্রের দৈন্যের পরিচায়ক!

তবে রসবৈচিত্র্য দান করবার জন্যে বা বাস্তবতা দানের জন্যে এক-আধটা চরিত্র-মুখে মিশ্রভাষা বা প্রাদেশিক 'বুলি' বলানো সমর্থন করা যায়। এ রীতিও চালু আছে-যেমন নাটকে গল্পে ও উপন্যাসে বুলিজ সংলাপ দেখা যায়। এতে অবশ্য গভীর ও গুরুতর ভাব প্রকাশ করা চলে না। চরিত্রকে কেবল স্বাভাবিক কিংবা অস্বাভাবিক করে তোলাই লক্ষ্য হয়ে দাঁড়ায়। কিন্তু বিদেশী কাহিনী বর্ণনার জন্যে বিদেশী ভাষাও আমদানি করলে স্বদেশী সাহিত্য সৃষ্টি হওয়া অসম্ভব। আমাদের দোভাষী পুথিও চাই শালীন ভাষায় শালীনসাহিত্য বলে শিক্ষিত সাধারণের স্বীকৃতি পায়নি। যারা বাঙলাকে সংস্কৃতানুরূপে কিংবা ফারসিঘেঁষা করতে চান, তাঁরা বাঙলাভাষাকে রেহাই দিয়ে সহজেই যথাক্রমে হিন্দি বা উর্দুকে বরণ করে নিতে পারেন, তাহলে সব দিক রক্ষা পায়। অবশ্য যে পটভূমিকায় কাহিনী বিবৃত হবে তার স্থানীয় ও সাংস্কৃতিক পরিবেশ সৃষ্টির জন্যে বস্ত্তবাচক বা ঐতিহ্যসমৃদ্ধ বিশেষ বিশেষ শব্দ প্রয়োগে কারো আপত্তি থাকার কথা নয়। যুরোপীয় কথা বর্ণনায় পদ্ম, চকোর খঞ্জন আঁখি, মেঘবরণ কেশ, আলতা-বাঙা পা, কাজল-কালো চোখ প্রভৃতি কেউ আশা করে না। তেমনি ইরানি কাহিনীতে সবাই গোলাপ, বুলবুলি, সুর্মা, দ্রাক্ষা প্রভৃতিরই প্রত্যাশা করে। এতে ভাষা-বিকৃতির আশঙ্কা কেউ করে না।^১

দোভাষী পুথির ইতিকথা

পুস্তিকা'র বিকৃতিতে 'পুথি' শব্দের উদ্ভব। নাসিকা উচ্চারণে হয় 'পুথি। ছাপাখানা প্রবর্তিত হবার আগে গ্রন্থমাত্রই চিহ্নিত হত 'পুথি' অভিধায়। বেদ উপনিষদ রামায়ণ-মহাভারত অথবা

^১ ইরানী ভাষায় ইসলামের মৌল শব্দেরও অনুবাদ হয়েছিল- যেমন : আল্লাহ-খোদা, সালাত-নামাজ, সিয়াম-রোজা, জান্নাত-বেহস্ত, জাহান্নাম-দোজখ, মলক-ফিরিস্তা ইত্যাদি। ইরানের মাধ্যমে এগুলো এদেশেও গৃহীত হয়েছে। কিন্তু ইরানের ভিত্তি নষ্ট হল বলে কেউ ভাবেনি। মুসলিম তমদ্দুনও এতে খর্ব হয়েছে বলে কেউ প্রশ্ন তোলেনি।

জ্যোতিষ-বৈদ্যিক-গণিত শাস্ত্রের গ্রন্থ কিংবা পদ্মাবতী-সতীময়না-সয়ফুলমূলক প্রভৃতি সর্বপ্রকারের গ্রন্থেরই সাধারণ নাম ছিল 'পুথি'। অতএব পুথি ছিল সেকালের গ্রন্থের বা একালের 'বই'-এর প্রতিশব্দ।

ছাপাখানার বহুল ব্যবহার এবং প্রসারের ফলে এদেশে ছাপা বই 'গ্রন্থ', 'পুস্তক কিংবা 'বহি' নামে অভিহিত হতে থাকে, আর হাতে-লেখা পুরোনো গ্রন্থগুলো 'পুথি' অভিধায় নতুন তাৎপর্য লাভ করে। যেমন, কৃষ্ণবাসী রামায়ণের ছাপাকপি হল পুস্তক, গ্রন্থ কিংবা বহি এবং এর হাতে-লেখা পুরোনো প্রতিলিপি অভিহিত হল 'পুথি' নামে। এমনি করে পুথি হয়ে উঠল ইংরেজি ম্যানুসক্রিপ্টের বাঙলা পরিভাষা। হিন্দু সমাজে নতুন-উদ্ভূত পরিস্থিতিতে অভিধা নিরূপণ পর্ব এখানেই শেষ হল। যদিও সাধারণ অর্থে ম্যানুসক্রিপ্ট বা স্ক্রিপ্ট নামে যে-কোন আধুনিক রচনার পাণ্ডুলিপি নির্দেশ করাও অবিহিত নয়।

কিন্তু মুসলিম সমাজে নাম-নিরূপণের জের চলে ১৯৪০ সাল অবধি। তার কয়েকটি কারণ ছিল। প্রথমত ১৮৫০-এর পরে বটতলার মুদ্রণ ও প্রকাশনার ক্ষেত্রে এগিয়ে আসেন বহু মুসলমান। মুসলমান সমাজে তখনো ইংরেজি শিক্ষার প্রসার ঘটেনি বলে, আধুনিক সাহিত্য সৃষ্টির প্রয়াস ও প্রয়োজন দেখা দেয়নি। কাজেই স্বল্প শিক্ষিত ও অশিক্ষিত লোকের চাহিদা মেটানোর জন্যে তারা মধ্যযুগের সাহিত্য এবং মধ্যযুগীয় রসে ও আঙ্গিকে রচিত ফরমাসেই গ্রন্থ ছেপে বাজারে ছাড়তে থাকেন। আবার একই গ্রন্থ শায়েরের নাম পালটে তথা ভণিতা বদল করে ছাপানো অর্থলোভী প্রতিযোগী প্রকাশকদের পেশায় দাঁড়িয়ে গিয়েছিল। এ কারণে ছাপাগ্রন্থেও 'ছহি বড় ... পুথি' কথাগুলো মুদ্রিত থাকতো। তাই এই ছাপা আর হাতে লেখা পুরোনো প্রতিলিপি বা পাণ্ডুলিপির পার্থক্য নির্দেশক শব্দ নির্মাণের কিংবা চয়নের প্রয়োজন অনুভূত হয়। ফলে ছাপাপুথি অর্থে 'পুথি' আর হাতে-লেখা পুথি বলতে 'কলমীপুথি' নাম চালু হল। আবার 'বটতলার পুথি' বলতে মধ্যযুগের এবং মধ্যযুগীয় ধারার যাবতীয় ছাপা গ্রন্থকেই নির্দেশ করে।

তা ছাড়া, অবিমিশ্র বাঙলায় রচিত পুথি এবং মিশ্রভাষারীতিতে লিখিত পুথির পার্থক্য বোঝানোর জন্যে শেখোক্তরীতির পুথিগুলোকে 'দোভাষী পুথি' নাম দেয়া হয়। এই নাম কবে থেকে চালু হল, তা' নিশ্চিত ভাবে বলা যাবে না- তবে মুন্সী রিয়াজউদ্দীন আহমদকে ও মীর মোশাররফ হোসেনকে 'দোভাষী পুথি' কথাটি যেভাবে ব্যবহার করতে দেখি, তাতে মনে হয়, উনিশ শতকের শেষদশকেও তা' নিত্য উচ্চারিত নাম। অবশ্য পাদ্রী লঙ এর নাম দিয়েছিলেন, মুসলমানী বাঙলা(মাবি-মাত্রার ভাষা)।' ক্রমহার্ট, দীনেশচন্দ্র সেন, সুনীতিকুমার চট্টোপাধ্যায়, সুকুমার সেন প্রমুখ মৃত ও জীবিত অমুসলমান বিদ্বানেরা এই নামেই এই রীতির উল্লেখ করেছেন, আজো করেন।

।।২।।

বিশ শতকের তৃতীয় দশক থেকে কাজী দৌলত, আলাউল, সৈয়দ মুহম্মদ আকবর, আবদুল হাকিম, হায়াত মাহমুদ প্রভৃতির অবিমিশ্র বাঙলায় রচিত কাব্যগুলো পুনর্মুদ্রণের আশ্রয় দোভাষীরীতি-প্রিয় প্রকাশকদের কমে যায়, সম্ভবত পাঠক-শ্রোতা মহলেও এগুলো জনপ্রিয়তা হারায়। এর অনুমিত কারণ দুটো। এক, এসব কাব্যের কলেবর স্থূল, ভাষা পরিশ্রুত ও সংস্কৃতঘেঁষা, ভাব ক্ষেত্রবিশেষে দুর্বল, এবং অলঙ্কার বৈদগ্ধ্যাক্ষিত। দুই, দোভাষীরীতি-প্রিয়

প্রকাশকরা-তর্জমা নয় উর্দু রোমান্সগুলোর কাহিনীর সংক্ষিপ্ত পদ্যায়ন প্রকাশ করে ছাড়লেন বাজারে। পাঠক-শ্রোতার বিকল্প পাঠ্য-উপকরণের অভাবেই হয়তো নতুন রীতির পুথিগুলো কিনতে বাধ্য হল, কিংবা দোভাষী পুথির আদর বেড়ে গিয়েছিল তাদের কাছে। কেননা, এগুলো অবসরের এক বৈঠকেই শেষ করা সম্ভব, ভাবের দুর্বোধাতাও ছিল না, ছিল না শব্দের দুর্গহতা। [কারণ শতক হিন্দুস্তানী শব্দের পৌনঃপুনিক প্রয়োগেই এসব পুথি রচিত। ডক্টর সুনীতিকুমার চট্টোপাধ্যায়ের মতে প্রয়োগের আনুমানিক হার শতকরা ৩২টি]। তারপর এই আদলে নানা বিষয়ে আড়াইশ' তিনশ' গ্রন্থ রচিত হয়েছে গত দেড়শ' বছরের মধ্যে। আলাউল প্রভৃতির কাব্যগুলোকে বাজারছাড়া করে এগুলোই।

গণচাহিদা মেটানোর জন্যে রচিত প্রকৃত-জনের ওই সাহিত্য যখন নগর-গ্রামের সর্বত্র চালু, তখন ইংরেজি শিক্ষার প্রসারের ফলে আধুনিক জীবন-চেতনা প্রবল হয়ে ওঠে বাঙালী মুসলিম সমাজে। এই শতকের চতুর্থ দশকেই তার শুরু। মুসলিম সমাজের দারিদ্র্য, মহাজনী জমিদারী ও চাকরীর ক্ষেত্রে হিন্দু-সামাজের একাধিপত্য এবং সুদে-ঘুষে হিন্দু সাধারণের সাক্ষ্য মুসলমানদের ক্ষোভ, ঈর্ষ ও দারিদ্র্যদুঃখ বৃদ্ধি করে।

অর্থোপার্জননের ক্ষেত্রে এই অসম প্রতিযোগিতা হৃদসর্বশ্ব পরাভূত মুসলিম সমাজে রাজনৈতিক চেতনা করে তীক্ষ্ণ আর সংস্কৃতিক্ষেত্রে স্বাতন্ত্র্যবোধ হয়ে ওঠে তীব্র। তখন বাঙলা ভাষা ও সাহিত্য ক্ষেত্রে মুসলিম স্বাতন্ত্র্য-ও ঐতিহ্যসূত আবিষ্কারের প্রেরণাবশে ঢাকা বিশ্ববিদ্যালয়ের ছাত্রসমাজে এবং 'আজাদ' পত্রিকা-অফিসে গড়ে ওঠে 'পাকিস্তান রেনেসাঁ সোসাইটি'। এখানেই শুরু হয় পুথির চর্চা। তঁরাই মুসলিমরচিত আধুনিক সাহিত্য থেকে দোভাষী পুথির পার্থক্য জ্ঞাপক 'পুথিসাহিত্য' নামের পত্রিকা প্রকাশ করেন।

নামটি চালু করেন। তখন এর প্রয়োজন ছিল। কেননা এ ভাষাকেই বাঙালী মুসলমানের মাতৃভাষা তথা ঘরোয়া আটপৌরে ভাষা বলে প্রচার করলেন তাঁরা। কাজেই 'দোভাষীপুথি' বলার আর উপায় ছিল না তাঁদের, সেক্ষেত্রে তাঁদের আন্দোলন ও উদ্দেশ্য দু-ই হত বার্থ!

সে-সময় থেকে গত পঁয়ত্রিশ-চল্লিশ বছর ধরে 'পুথি সাহিত্য' বলতে মুসলমানেরা দোভাষী পুথিকেই নির্দেশ করে। অভিধার দিক দিয়ে 'পুথি সাহিত্য' কথাটি অর্থহীন। কেননা, 'বই সাহিত্য' যেমন হয় না, 'পুথি সাহিত্য'ও হওয়া উচিত নয়, কিন্তু এটি এখন একটি যোগরূঢ় বিশেষ নাম। সেজন্যে আর আপত্তি করা চলবে না। আজ 'পুথি সাহিত্য' আর 'দোভাষী পুথি' সমার্থক এবং একটি অপরটির প্রতিশব্দ।

ইদানীং 'দোভাষী পুথি' নামটার ব্যবহার বেড়ে গেছে। কেননা যে প্রয়োজনে এ নামটি পরিবর্তিত বা লোভ করবার প্রয়াস ছিল, তা এখন অনুপস্থিত। কিন্তু এ রীতিকে 'দোভাষীরীতি' বলতে কোন কোন বিদ্বানের আপত্তি আছে। তাঁদের মতে তথাকথিত দোভাষী রীতিতে মিশ্রণ ঘটেছে আসলে আরবি-ফারসি-তুর্কি-হিন্দুস্তানী ও বাঙলা শব্দের, অতএব দ্বিভাষা নয়, অন্তত পঞ্চভাষার মিশ্রণ রয়েছে। কাজেই একে 'মিশ্ররীতি' আখ্যাত করাই যৌক্তিক।

কিন্তু তাঁদের ধারণা যথার্থ নয়। কেননা, একথা আজকাল কেউ অস্বীকার করে না যে ভারতীয় ভাষায় কোন আরবি শব্দই সোজাসুজি আসেনি, এসেছে ফারসির মাধ্যমে। ফারসি ও তুর্কি এদের ভাষায় গৃহীত হয়েছে শাসকদের প্রয়োগের ও প্রভাবে। ফারসি (কিছ তুর্কি) শব্দের আধিক্যে গড়ে উঠেছে আধুনিক উর্দু ভাষা, আর এর বিপুল প্রভাব রয়েছে হিন্দিভাষায়। এ দুটো আদি সাধারণ নাম ছিল হিন্দুস্তানী এবং মুসলিম আমল থেকেই দিল্লীসাম্রাজ্যে লিঙ্গুয়াফ্রাঙ্কা

হিসেবে চালু ছিল এ ভাষা। এই হিন্দুস্তানী তথা উর্দুর সঙ্গে বাঙলার মিশ্রণে গড়ে উঠেছে আমাদের দোভাষীরীতি। আতএব 'দোভাষীরীতি'ই এর যোগ্য ও যথার্থ অভিধা। একটি উদাহরণ দেয়া যাক। যদি বলি : There stands a rickshaw in front of Gulsitan resturant in the Jinnah A venue- এ বাক্যে জাপানি, ফরাসি, গুজরাটি, ফারসি ও ল্যাটিন শব্দ থাকা সত্ত্বেও একে ইংরেজি বলে জানি ও মানি। শব্দের জাতিনির্ণয় কিংবা ব্যুৎপত্তি নিরূপণ করা বক্তা কিংবা শ্রোতার সাধের ও সাধ্যের অন্তর্গত নয়। অপর ভাষার শব্দ আত্মস্থ করেনি, তেমন ভাষা জগতে নেই। কিন্তু তাতেই কোনো ভাষা মিশ্রভাষা হয় না। দোভাষীরীতিতে মিশ্রণ ঘটেছে বাঙলা ও হিন্দুস্তানীর। আর হিন্দুস্তানীতে আগেই মিশেছিল প্রচুর আরবি-ফারসি-তুর্কি শব্দ ফারসির মাধ্যমে। এখন বিদ্বানের বিশ্লেষণে যদি দোভাষীরীতির ভাষা থেকে অলক্ষ্যে পবিষ্ট আরবি-ফারসি-তুর্কি শব্দ বের হয়, তাতে এ রীতির নাম পালটানোর কারণ ঘটে না। রচনায় আরবি-ফারসি তথা বিদেশী শব্দের বাহুল্যই রচনামূল্যকে 'দোভাষী' করে না, যদি তা-ই হত, তা হলে সত্যেন্দ্রনাথ দত্ত, মোহিতলাল মজুমদার, নজরুল ইসলাম, ফররুখ আহমদ প্রমুখ সবাই 'দোভাষী শায়ের' বলে পরিচিত হতেন। অতএব দোভাষীরীতির বৈশিষ্ট্য অন্যবিধ। একে 'মুসলমানি বা ইসলামি বাঙলা কিংবা খিচুড়ী বাঙলা' বলাও ওই একই কারণে অসঙ্গত।

।।।।।

অন্যত্রও বলেছি, এখানেও বলছি সত্যনারায়ণ এ দেশের লৌকিক দেবতা। মুসলিম প্রভাবেই এ দেবতার উদ্ভব। শাসিত হিন্দু শাসক মুসলমানের স্মৃতি ও প্রসন্নদৃষ্টি লাভের বাঙ্খাবশে এ দেবতা সৃষ্টি করেছে। দেশজ মুসলমানেরা ঐক্যে পীরের মর্যাদা দিতে দ্বিধা করেনি। আসলে প্রমূর্ত 'সত্যই' (truth) সত্যনারায়ণ তত্ত্ব সত্যপীর। সত্যপীরের পূজা-শিরনী উপলক্ষে এদেশের দুঃখী জনগণ এক মিলন-মুমুদনে একত্রিত হতে চেয়েছে, ঝুঁজেছে দুর্যোগে-দুর্ভোগে যজ্ঞগায় নির্যাতনে নিশ্চিত আশ্রয়-জীবন-জীবিকার নিরাপত্তা। সত্যনারায়ণ মূলত মুসলমান পীর, সে-কারণে অবাঙালী,- এ ধারণা ছিল হিন্দুর মনে বদ্ধমূল। তাই সত্তেরো শতকে কবি কৃষ্ণরামদাস যখন রায়মঙ্গল (১৬৮৭) রচনা করেন, তখন দক্ষিণরায়ে প্রতিন্দ্বী বড় খাঁ গাজী এবং উভয়ের মান্যজন সত্যনারায়ণের উক্তিভে ভাঙ্গা হিন্দুস্তানি ও বিকৃত বাঙলা ব্যবহার করেন তিনি। পাত্রপাত্রীর শিক্ষা, সংস্কৃতি ও সামাজিক মর্যাদা অনুযায়ী সংলাপের ভাষা প্রয়োগ নাটকের বিশেষ আঙ্গিক। কৃষ্ণরামদাসের রায়মঙ্গলে এ রীতির অনুসরণ ছিল। তাঁর প্রদর্শিত রীতি প্রায় নিষ্ঠার সঙ্গে অনুসরণ করেছেন সত্যনারায়ণ পাঁচালীর পরবর্তী রচয়িতারা। ভারতচন্দ্র, রামপ্রসাদ প্রমুখ কবি 'বিদ্যাসুন্দর' কাব্যেও মাধবভাটের জবানিত এমনি ভাষা প্রয়োগ করেছেন, যখন মাধবভাট বিদ্যার পণের কথা ঘোষণা করছে উত্তরভারতীয় রাজদরবারগুলোতে। ভারতচন্দ্রের 'মানসিংহ'খণ্ডেও মানসিংহ-জাহাঙ্গীরাদির সংলাপের ভাষা এমনি মিশ্র করে তৈরি। এখানে উল্লেখ্য যে কৃষ্ণরাম, ভারতচন্দ্র, রামপ্রসাদ, বিদ্যাপতি, রাধাচরণ গোপ প্রভৃতি হুগলী বর্ধমান, হাওড়া ও চব্বিশ পরগনার লোক তথা বন্দর এলাকার অধিবাসী।

এভাবে দোভাষীরীতি হিন্দুকবিদের লেখনীপ্রসূত হলেও এর বহুল প্রচলনও জনপ্রিয়তার জন্যে ফকির গরীবুল্লাহর (১৭৬০-৮০) প্রতিভা ও পরিচর্যার প্রয়োজন ছিল। তিনিই প্রথম দোভাষীরীতি প্রয়োগে তাঁর প্রায় সব-কয়টি গ্রন্থ রচনা করেন একেতো তাঁর নিজের বুলি ছিল এ রীতির পরিপোষক, তার উপর ব্রজবুলির মাধুর্য আর উপযোগও হয়তো তাঁর অবচেতন প্রেরণার

উৎস ছিল। তাঁকে প্রথম অনুসরণ করেন সৈয়দ হামজা (১৭৭৭-১৮০৫-৮)। তারপর মালে মুহম্মদ, মুহম্মদ খাতের, আরিফ, জনাব আলী, আবদুল রহিম, মনিরুদ্দিন, আয়েজুদ্দিন, মহম্মদ মুনশী, তাজউদ্দীন, দানিশ, রেজাউল্লাহ, সা'দ আলী, আবদুল ওহাব প্রভৃতি প্রায় শতাধিক শায়ের আজ অবধি আড়াইশ'-তিনশ' কাব্য রচনা করেছেন এ ভাষাশৈলীর প্রয়োগে।

।।৪।।

হ্যালহেড ১৭৭৮ সনে রচিত তাঁর বাঙলা ব্যাকরণের ভূমিকায় বলেছেন, বাঙলা ক্রিয়াপদযোগে আরবি-ফারসি শব্দবহুল বাক্য ব্যবহারই ছিল তাঁর সমকালে [শহুরে লোকের] সংস্কৃতিবানতার পরিচায়ক।

আবার ১৮৫৫ সনে পদ্বী লঙ তাঁর গ্রন্থ-তালিকার (Descriptive Catalogue of Bengali Books) লিখেছেন, আরবি-ফারসিবহুল ভাষা [ভাগীরথী-হুগলী নদীর] মাঝিমাল্লাদের মধ্যেই প্রচলিত এবং এটি 'মুসলমানি বাঙলা', আর এ ভাষায় রচিত সাহিত্য 'মুসলমানি বাঙলা সাহিত্য।'।

সময়ের দিকে লক্ষ্য রাখলে দুটো তথ্যই নির্ভুল বলে মানা যাবে। ১৭৭৮ সনেও দেশে মুসলিম প্রভাব অক্ষুণ্ণ ছিল, তাই সে-যুগের শিক্ষিত হিন্দু-মুসলমান ফারসি মিশ্রিত ভাষায় কথা বলতে গৌরব বোধ করত, আর তা দরবারী ভাষার বহুল চর্চায় স্বাভাবিকও হয়ে উঠেছিল, যেমনটি একালে ইংরেজি শিক্ষিত লোকেরা ইংরেজি মিশ্রিত বাঙলা বলে : 'ডাক্তার blood examine করে report দিয়েছেন, একটা Medicine-ও prescribe করেছেন। কিন্তু তবু মনে হয় exact diagnosis হয়নি। আজকাল হাসপাতালে admission না নিলে ভাল treatment আর regular ও নিখুঁত nursing-এই ব্যবস্থা করা সম্ভব নয়। উনিশ শতকের রাজনারায়ণ বসুদের মতো রুচিবান রক্ষণশীলদের নিন্দা সত্ত্বেও আজো শিক্ষিত লোকমাত্রই ঘরে-বাইরে এমনি মিশ্র ভাষাতেই কথা বলে। ১৮৩৫ সনে ফারসি নিঃশেষে হারায় দরবারী ভাষার মর্যাদা ও অধিকার। আর ১৮৫৫ সনে কোলকাতা শহরে নগণ্য ছিল না ইংরেজিতে উচ্চশিক্ষিত লোকের সংখ্যা। তার উপর সুন্দর গদ্যশৈলী সচেতন ও সুপরিচালিত সাধনা বাঙলাকে কেবল সংস্কৃত ঘেঁষা নয়, - করে তুলেছিল প্রায় সংস্কৃত-সম। কাজেই নগরের মুসলমান ও গঙ্গাভাগীরথীর মাঝিমাল্লাদের মুখেই যে এককালে নগর-বন্দরের বহুল প্রচলিত জনপ্রিয় ভাষা সীমাবদ্ধ হয়ে থাকবে, তাতে বিস্ময়ের নেই কিছু।

।।৫।।

দোভাষী রীতির উদ্ভবের একটি অনুমিত ইতিহাস আছে। যে-কারণে এবং যে-ভাবে উর্দুভাষা অবয়ব পেয়েছে, এও গড়ে উঠেছে অনেকটা সে-ভাবেই।

তুর্কি বিজয়ের পর থেকেই ধীরে ধীরে মুসলিম সংস্কৃতির ও ধর্মে রূপপ্রভাব পড়তে থাকে। এদেশে। তেরো-চৌদ্দশতক থেকেই ফারসি দরবারীভাষা হিসেবে প্রতিষ্ঠা পাচ্ছিল। ফলে জনগণের প্রাত্যহিক জীবনের বুলিতেও নতুন ভাব ও বস্তু নির্দেশক কিছু সংখ্যক ফারসি তুর্কি এবং সেগুলোর মাধ্যমে আরবি শব্দ মিশে যায়। তাই শ্রীকৃষ্ণকীর্তনের সাহিত্যিক ভাষাতেও আমরা পাচ্ছি গোটা বারো ফারসি-তুর্কি শব্দ। এদেশে ফারসির চর্চা বৃদ্ধি পায় মুঘলশাসনকালে; শিক্ষিতমাত্রই একালের ইংরেজি জানা লোকের মতোই জানত ফারসি। তার উপর প্রশাসক ও

পদস্থ চাকুরেরা ছিল সাধারণত উত্তর ভারতীয় ও ইরানি। এদিকে হিন্দুস্তানী ভাষায় বিপুল হয়ে ওঠে ফারসিপ্রভাব এবং কথ্য উর্দু চালু হয় সতেরো শতকের শেষার্ধ্বে থেকেই। পনেরো-ষোল শতকে দক্ষিণ ভারতে দাখিনী উর্দুর উদ্ভবও ঘটে এভাবে।

আবার, গৌড়, পাণ্ডুয়া, চট্টগ্রাম, ঢাকা, মুর্শিদাবাদ প্রভৃতি নতুন-পুরোনো শাসনকেন্দ্রের মতো নতুন-জাগা বন্দর হাওড়া-হুগলী-কোলকাতায়ও ঘটে বিদেশী লোকের সংখ্যাধিক্য। স্থায়ী বাসিন্দাও হয়ে যায় এদের অনেকেই। ফারসি-উর্দুভাষী বিদেশীর প্রভাবে স্থানীয় জনগণের মাতৃভাষাও হতে থাকে বিকৃত। আজো সেই বিকৃত বাঙলা ও বিকৃত হিন্দুস্তানী ভাষা চালু রয়েছে উক্ত সব অঞ্চলে, বিশেষ করে মুসলিম সমাজে। বড়র অনুকরণ করা মানুষের স্বভাব। এ জন্যে বন্দর এলাকার লোক একদা পর্তুগীজ ভাষাও শিখেছিল আত্যন্তিক আগ্রহে। হুগলীতে নাকি ইরানি ব্যবসায়ী শিয়াদের আড্ডা ও বসতি শুরু হয় মুর্শিদাবাদেরও আগে। এবং ইরানি ভাষা ও সংস্কৃতির কেন্দ্র হুগলীর খ্যাতি ছিল দূর-বিস্তৃত। উল্লেখ্য যে দোভাষীরীতির আদি কবি ফকির গরীবুল্লাহও ছিলেন হুগলীর বালিয়া হাফিজপুরের লোক।

ইরানি ভাষার ও সংস্কৃতির প্রভাব সর্বপ্রাচীন ও সর্বাত্মক হয় আঠারো শতকে, যখন উটের পিঠে শেষ তৃণখণ্ডের মতো বাঙলার শাসনভার পেলেন শিয়া মুর্শিদাকুলি খান। বংশানুক্রমিক নওয়াবীতে পরিণত হয় তাঁর সুবাদারী। ইরানে শিয়া সাফাভী বংশীয় রাজত্বের আবসান ঘটে সতেরো শতকে। ফলে কৃপাবিক্ষিত ও পীড়ন-ভীত নুহ-শিয়া তখন দেশত্যাগ করে। শিয়া মুর্শিদাকুলি খানের অনুগ্রহক্রমে বহু বহু ইরানি শিয়া আশ্রয় নেয় বাঙলাদেশে। এ সময়ে শহর অঞ্চলে তথা মুর্শিদাবাদে ও হাওড়া-হুগলী বন্দর এলাকায় ফারসি-উর্দুর ও শিয়া-সংস্কৃতির প্রভাব হয় গভীর ও ব্যাপক। এই প্রভাবেই সাক্ষ্য রয়েছে হালাহেডের উক্তি, চিঠিপত্রের ভাষায়, সত্যনারায়ণ পাঁচালীর ও মুন্সিয়ার জনপ্রিয়তায় এবং পাঞ্জতন পাঁচপীর প্রভৃতির সংস্কারে, মহররমের তাজিয়া-উৎসবের পার্বণিক প্রতিষ্ঠায় আর কোলকাতা-হুগলীর মুসলিম সমাজে ফকির গরীবুল্লাহ প্রবর্তিত দোভাষীরীতির অনুবর্তনে। উত্তরভারতীয় আদলে যখন একটি স্থানিক মুসলিম সংস্কৃতি প্রকাশমান এবং উর্দুর মতো একটি মুসলিম ভাষা সৃজ্যমান, তখন হঠাৎ নতুন দিগন্তের সন্ধান দিল পলাশীর প্রান্তর। পালে লাগল সেই দিগন্তমুখী বাতাস। পরিগামদর্শী স্বস্থ হিন্দুরা বরণ করে নিল নতুনকে; দ্বিধাগ্রস্ত বিদেশাগত উর্দুভাষী সেনানী প্রশাসক অভিজাত মুসলমান আকর্ষণ হারাল পুরাতনে, কিন্তু আগ্রহও জাগল না তাদের ইস্ট ইন্ডিয়া কোম্পানীর অধীনে অসামরিক ফড়ে-বেনে-দালাল-দেওয়ান-গোমস্তার চাকরীর প্রতি, কিংবা নতুন চিন্তা-চেতনায়। তাই অর্ধ শতাব্দী ধরে তারা রইল নিঃস্ব ও বিমূঢ়। তখন তারা মনেও কাঙাল, ধনেও কাঙাল। যে-নওয়াবীর প্রচেষ্টায় একদা শহর-বন্দরে বিদেশাগত শিক্ষিত মুসলমানরা নতুন জীবন-স্বপ্ন রচনা করছিল, তা অলক্ষ্যে লাটগিরিতে পরিণত হওয়ায় এভাবে ব্যর্থ হল তাদের স্বপ্ন। স্বপ্ন উবে গেল, কিন্তু ঘোর কটল না অনেকদিন। যদিও সম্ভাবনাটা উদ্ভাসিত হয়েছিল উত্তর ভারতীয় আদলেই, কিন্তু সৌভাগ্যটা আর মিলল না। কেননা রূপায়ণের আর সাফল্যের সব আয়োজন যখন সমাপ্ত তখন আকাশে দেখা দিয়েছে নতুন সূর্য। নতুন দিনে পুরোনো রচনা অতীতের ঘটনা। পলাশীর প্রান্তরে সূচিত হল মধ্যযুগের অবসান, আর উগ্ধ হল আধুনিক যুগের বীজ।

উল্লেখ্য যে শিক্ষার ঐতিহ্য-বিরহী বাঙলাভাষী দেশই মুসলিম কোলকার্তায় সারা উনিশ শতকেও ছিল মাত্র পাঁচ-দশ হাজার। হিন্দুর তুলনায় নগণ্য হলেও অন্য মুসলিমরা ছিল

উর্দুভাষী। ১৮৩৭ খ্রীস্টাব্দে কোলকাতায় হিন্দু ছিল দেড়লক্ষাধিক, উর্দুভাষী মুসলিম ছিল সতেরো হাজার আর বাঙলাভাষী মুসলিম ছিল চার হাজার।

অতএব দোভাষীরীতির উদ্ভব, পরিচর্যা ও বিকাশক্ষেত্র হচ্ছে কোলকাতার, হাওড়ার ও হুগলীর বন্দর এলাকা। এখানকার এটিই ছিল চলতি বাঙলা। রেজা উল্লাহ (১৮৬১) সালে মুহম্মদ, বেলায়েত ও দানিশ তাই দোভাষী রীতিকে বলেছেন ‘এছলামি বাঙলা’, কেউ অভিহিত করেছেন ‘চলিত বাঙলা’ বলে। এর বিকাশ-ও বিস্তার কাল হল ইংরেজ আমল। যা’ উচ্চবর্ণের অভিজাতের পরিচর্যার অপেক্ষা রাখত, তা-ই নিম্নবিস্তার স্বল্প-শিক্ষিত লোকের অনুশীলনে টিকে রইল শহরের সঙ্কীর্ণ-সীমায়। এ যেন দুধের প্রত্যাশায় ঘোলের সাধনা অথবা দুধের সাধ ঘোলে মেটানো। কেননা এ সাধনায় যাঁরা ব্রতী রইলেন, তাঁদের অসম্পূর্ণ শিক্ষা ও অপরিশ্রুত শিল্পকৃতি যোগ্য ছিল না কোন সম্ভাবনার পথ উন্মুক্ত করার। সামর্থ্য ছিল না তাঁদের লক্ষ্য-চেতনা মনে জাগিয়ে রেখে এগিয়ে যাবার। এ ভাবে ব্যর্থ হল স্বধর্মীর একটি জাতীয় স্বপ্ন, একটি ঈশ্বিত সম্ভাবনা শাসকদের সংস্কৃতি সম্পৃক্ত একটি মহৎ প্রয়াস।

উনিশ শতকের শেষপাদ থেকেই কেবল কোলকাতা, হাওড়া ও হুগলী অঞ্চলের বাইরের লোক বটতলার প্রকাশকদের দ্বারা প্রলুব্ধ হয়ে ফরমায়েসী রচনায় দোভাষী রীতি প্রয়োগ করতে থাকেন। এ রীতি কয়েক বছর আগেও অভিসন্ধি বশে অনুসৃত হয়েছে প্রাকৃত মুসলমানদের জন্যে সৃষ্ট বটতলা সাহিত্যে,— এমনকি মাওলানা আব্দুল হক খানের ‘পাকিস্তান নামা’য় কিংবা কাজী আবুল হোসেনের ‘জিন্নানামায়’ এবং আবুল মন্সুর আহমদের ‘আসমানিপর্দা’য়ও।

গৌড়, পাটুয়া, ঢাকা চট্টগ্রাম, হাওড়া, হুগলী, কোলকাতা, মুর্শিদাবাদ প্রভৃতি শাসনকেন্দ্রের ও বন্দর এলাকা ছাড়া, অন্যান্য অঞ্চলের দেশজ মুসলমানের কথ্য ভাষা তো বটেই, লেখ্যভাষাও চিরকাল অবিশিষ্ট বাঙলা।

।। ৬।।

বিদেশী শব্দের বহুল প্রয়োগ নয়,— হিন্দুস্তানী বাক-ভঙ্গির অনুকৃতিই এ রীতিকে দোভাষী করেছে :

সর্বনাম— তেরা, মেরা, তুঝে, মুঝে ইত্যাদি।

বিশেষণ— এয়াছা, যেয়ছা, তেয়ছা, কেয়ছা, কব, কাহে, এস্তা, কেস্তা, খোড়া, ভি, আভি।

সংখ্যাবাচক— পয়লা, দোছরা, তেছরা প্রভৃতি।

অনুসর্গ বা কর্মপ্রবচনীয়— বিচে, খাতেরে, হুজুরে ইত্যাদি।

হিন্দুস্তানি ক্রিয়াপদ— তোড়, ডাল, ছোড়, নিকার, গির, উতার, ভেজ, কিয়া, পাকড়, ঘুম ইত্যাদি।

ফারসি নামধাতু— খোসালিত, নেওয়াজিয়া, গোজারিয়া ইত্যাদি।

আরবি-ফারসি বহুবচন— বেরাদরান, এজিদান, শহীদান, মোমেনিন, চাকরান।

পুলিঙ্গে স্ত্রী লিঙ্গের প্রত্যয় প্রয়োগ— বাল্লা, প্রিয়া, উদাসিনী।

পুরো হিন্দুস্তানি বাক্যের প্রয়োগ :

তেরা মেরা শাদী হোগা আয়েন্দা জুমারাত। পহেলা দাওত ভেজে রসুল খাতেরে।

কাদের রহিম আন্না রহমানের রহিম, থানা বেগর দো ইমাম বড়া পেরেসান।

আলমের পালনে ওয়ালা হক্কের হাকিম। সেতাবি এ মোছাফেরে লেহ পাকড়িয়া।
নেক কামে রাজি সেহ বদি কামে দেক।

সুন্দর করে বলা কথাই কাব্য তথা সাহিত্য। শায়েরদের রচনায় সে-সৌন্দর্যেরই অভাব। কে না জানে, ধ্বনি-মাধুর্য সৃষ্টি হয় সূচিত শব্দের সুবিন্যাসেই। এ চেতনা স্বল্পশিক্ষিত পুথি শায়েরদের মধ্যে দুর্লভ। তাই অনবরত শব্দের নির্লক্ষ্য বিশৃঙ্খল প্রয়োগে বস্তুব্যের অনর্গল প্রকাশই ছিল তাঁদের লক্ষ্য। ফলে অমার্জিত স্থূল রুচির প্রলেপে ওই ভাষায় এবং ভঙ্গিতে একটা সামগ্রিক অশ্লীলতা যেন প্রকাশমান। অবশ্য এ হচ্ছে বিক্রপ শিক্ষিত মনের কথা। কিন্তু যারা এ সাহিত্যের লেখক আর যাদের জন্যে লেখা তাঁদের মধ্যে এসব ব্যাপারে কোনো বিচলন হয়তো নেই। বহুকালের অনুশীলনে এটিই হয়ে দাঁড়িয়েছে স্বীকৃত ও সমাদৃত রীতি। বিশেষত, বিকল্প রীতি যখন অনুপস্থিত। এবং পাঠকেরও শিক্ষার আর রুচির হ্রাস-বৃদ্ধি হয়নি।

মিশ্রভাষায় হালকা ও ব্যঙ্গ-বিদ্রোপাত্মক রচনারীতির ঐতিহ্য এদেশে সুপ্রাচীন। আমীর খুসরু (ফারসি-হিন্দি), ভারতচন্দ্র (বাঙলা-ফারসি-হিন্দুস্তানি), দ্বিজেন্দ্রলাল, রজনীকান্ত সেন (বাঙলা-ইংরেজি), আহসান হাবীব (দোভাষীরীতি : ফরমান, হকনাম ভরসা, জঙ্গনামা) আবুল মনসুর আহমদ (দোভাষী রীতি : আসমানী পর্দা) প্রমুখ কবির রচনা তার সাক্ষ্য।

আবার ইরানি কবি নিজামীর সিকান্দরনামা এবং বাঙালী কবি সত্যেন্দ্রনাথ দত্ত, মোহিতলাল মজুমদার, কাজী নজরুল ইসলাম, ফররুখ আহমদ প্রমুখ কবির বহু উৎকৃষ্ট কবিতা বিদেশী শব্দবহুল।

অতএব, শব্দের প্রয়োগ-নৈপুণ্য বা কল্পিতার উপরই কাব্যের উৎকর্ষ নির্ভর করে এবং ব্যবহারযোগ্যতাই গুণিত্য ও উপযোগের নিয়ামক পরিমাপক।

দোভাষী শায়েরা প্রাকৃতজনের কবি। তাই পরিশীলিত মানসের শিল্পরুচি সুন্দর ও মহৎ জীবনের মাহাত্ম্যচেতনা কিংবা জীবনজিজ্ঞাসা তাঁদের রচনায় অনুপস্থিত।

দোভাষী সাহিত্য পাঁচটি ধারায় বিভক্ত

ক. প্রণয়োপাখ্যান- সয়ফুলমুলক-বদিউজ্জামাল, ইউসুফ-জোলেখা, চন্দ্রভান, চন্দ্রাবতী, গুল-হরমুজ, গুল-সনোবর, গুলে-বকাওলি, মধুমালতী, মৃগাবতী-যামিনীভান, লায়লী-মজনু, আলেক-লায়লা প্রভৃতি। এগুলো উর্দু গ্রন্থের- কুচিং ফারসি ও হিন্দি-আওধী কাব্যের স্বাধীন অনুবাদ তথা কাহিনীর স্বাধীন অনুসৃতিমূল। এগুলোর মধ্যে রূপকথা শ্রেণীর গল্পকথন প্রয়াস আছে, বাস্তব জীবনবোধের কোনো পরিচয় বা জীবনের কোনো তাত্ত্বিক চেতনার বা রূপের উদ্ভাস নেই। বাঙালী রচিত বা অনূদিত এ সাহিত্যে বাঙলার প্রকৃতি বা সমাজ, বাঙালী জীবনের সমস্যা কিংবা যন্ত্রণা বা উল্লাসের কোনো ছাপ নেই আছে কেবল আঙ্গিকের ও রসের গতানুগতিকতা এবং ব্যক্তিমনের স্পর্শনিরপেক্ষ যান্ত্রিক পরিচর্যা।

খ. যুদ্ধ কাব্য- জঙ্গে খয়বর, জঙ্গে ওহুদ, জঙ্গে বদর, শাহনামা, আমির হামজা, সোনাভান, জৈগুন, কারবালা যুদ্ধ, কাসাসুল আখিয়া প্রভৃতি কাব্যে রসুল, আলি, হামজা, হানিফা, হোসেন প্রমুখ ইসলামের উন্মেষ যুগের বীরদের কাফেরদলন এবং ইসলাম প্রচার কাহিনী বিবৃত। এসব যুদ্ধকাব্যে রোমাসের তথা প্রণয় রসের অবতারণা থাকলেও এগুলো মূলত জেহাদী প্রেরণার কাব্য। কোনো স্বার্থবুদ্ধি নয়-ইসলাম প্রচার-প্রীতিই প্রেরণার উৎস। তাঁদের

এক হাতে কোরআন আর এক হাতে তরবারি, মুখে রয়েছে বেদীনের প্রতি তাঁদের আহ্বান 'হয় কোরআন বরণ কর, নয়তো তরবারীর মোকাবেলা কর।' তারা কাফেরপূজ্য দেবতাদের বিজয়ী প্রতিদ্বন্দ্বী। এসব কাব্যে স্বধর্মের ও স্বজাতির অতীত গৌরব স্বরণে উল্লাসবোধের আভাস আছে অবশ্য, কিন্তু সে-উল্লাস হচ্ছে আত্মপ্রত্যয়হীন নিঃস্ব দুর্বলের আত্মীয়-গৌরবে আত্মপ্রসাদলাভের বাঙালীজাত এবং এতে রয়েছে বর্তমান আর্তনাদকে অতীত আক্ষালনে ঢাকা দেয়ার প্রয়াস-দুর্দিনে আত্মপ্রবোধ ও স্বস্তি পাওয়ার চেষ্টা।

গ. পীর পাঁচালী- পীর-পাঁচালীগুলো মায়েরদের মৌলিক সৃষ্টি, যে-অর্থে মঙ্গলকাব্যগুলো মৌলিক সে-অর্থেই অবশ্য। কেননা, এখানেও রয়েছে পুচ্ছগ্রাহরি অনুসৃতি। পীর পাঁচালী দুই শ্রেণীর : ১. ঐতিহাসিক ব্যক্তিনির্ভর ও ২. কাল্পনিক।

১. মোবারক, গোরাচাঁদ, ইসমাইল গাজী, বাঞ্জা খাঁ গাজী (খান-ই জাঁহা খান), সর্ফি খাঁ গাজী | শাহ শফিউদ্দীন (খাঁ?) ঐতিহাসিক ব্যক্তি। এঁরা হিন্দুর লৌকিক দেবতার প্রতিদ্বন্দ্বী কাফের-মর্দন ও ইসলামপ্রচারক পীররূপে কল্পিত। অতএব এঁরা মঙ্গলকাব্যের দেবতার আদলে সৃষ্ট এবং এঁদের ভূমিকাও অভিন্ন।

২. শাসক-শাসিতের তথা হিন্দু-মুসলমানের ধর্ম-সমস্বয়ের, সম্ভাবের ও শ্রীতির ভিত্তিতে এসব মৌলিক তথা কাল্পনিক পীর সৃষ্ট। জীবনর ও জীবিকার এবং পীড়ন ও নির্যাতনের অভিন্নতাবোধ থেকেই এই শ্রীতি ও মিলন প্রয়াসের জন্ম। তাই এসব পীর হিন্দুদেবতারই প্রতিক্রম : সত্যনারায়ণ-সত্যপীর, কালুরায়-কালীগাজী, বনদেবী-বনবিবি, মহেন্দর-মহলন্দি, ওলাদেবী-ওলাবিবি, দক্ষিণরায়-বড় খাঁ গাজী, উদ্ধারদেবী-উদ্ধারবিবি, বাস্তবদেবী-বাস্তববিবি। এঁদের মধ্যে সত্যপীরই আদি ও প্রধান ঐক্যদূত। তাঁকে কেন্দ্র করেই তৈরি হলো মিলনসেতু। মিলন-ময়দানের তিনিই ইমাম।

ঘ. ধর্মশাস্ত্রীয় রচনা- শরীয়ত ও মারফত বিষয়ক বহু গ্রন্থও রচনা করেছেন এঁরা : মোহাম্মদী বেদতত্ত্ব, ফকির বিলাস, নসিয়তনামা, মুশিদনামা, তম্বিয়াতুননেসা, আহকামুল জুমা, সেরাতুল মুমেনীর, একশত বত্রিশ ফরজ, নামাজ মাহাত্ম্য, হাজার মসায়েল, তরিকতে ইক্কানি, হকিকতে সিতারা প্রভৃতি এ শ্রেণীর গ্রন্থ।

ঙ. বিবিধ- তাজকিরাতুল আউলিয়া, আবুসামা, ইবি-সনামা, যুগীকাচ, ফালনামা, গান, কিয়ামতনামা প্রভৃতি।

প্রণয়োপাখ্যান ছাড়া অন্য শ্রেণীর রচনাগুলো কম-বেশি ধর্মসম্পৃক্ত। এবং প্রাকৃত জনের এ ইসলাম হচ্ছে লৌকিক ইসলাম। অর্থাৎ স্থানকালের প্রভাবজ এবং দেশী মুসলমানের মানসপ্রসূত এ ইসলাম নতুন অবয়বে প্রকাশমান। এই তথ্য মনে রেখে বলা যাবে, দোভাষী সাহিত্য স্বধর্মনিষ্ঠ, আদর্শবাদী ও জাতীয় ঐতিহ্যগর্বী এবং অদ্ভুত কল্পনাপ্রিয় স্বাপ্নিক কবির রচনা। এঁদের অসম্পূর্ণ শিক্ষার দরুন নীতিবোধ ও জীবনাদর্শ সম্বন্ধে একটি লোকায়াত স্থূলবোধের প্রতিচ্ছবি পাই এঁদের রচনায়। দেশ, জাতি ও ধর্মের ইতিকথা, এবং সমাজ-সংস্কৃতির একটি অতি স্থূলবোধ ও রূপ এ সাহিত্যে প্রতিফলিত

অতএব, আঠারো-উনিশ-উনিশ শতকী দোভাষী সাহিত্য আমাদের নগরবন্দর এলাকার মুসলিম জনগোষ্ঠীর মন-মানসের তথা জীবনচর্যার প্রতিচ্ছবি ও প্রতিভূ। এ সাহিত্যেই উনিশ শতকের শেষার্ধ থেকে আজ অবধি শতকরা নিরানব্বইজন অনক্ষর অশিক্ষিত বাঙালী

মুসলমানের মনে জাগিয়ে রেখেছে ইসলামী জীবন ও ঐতিহ্য চেতনা। সাহিত্য রচনার শেষ লক্ষ্য যদি সমাজকল্যাণ হয় তা হলে মানতেই হবে দোভাষী সাহিত্যই গত একশ' বছর ধরে অশিক্ষিত ও স্বল্প শিক্ষিত মুসলমানের জগৎ ও জীবন ভাবনার নিয়ামক। 'এই দিক দিয়ে এ সাহিত্যের সামাজিক ও ঐতিহাসিক গুরুত্ব ছিল অপরিমেয়। এ ভাষাও দাখিনী উর্দু ও উত্তর ভারতীয় উর্দুর মতো একটি মুসলিম ভাষা হতে পারত— এ উল্লাস বোধ, কিন্তু হল না— এ ক্ষোভই দোভাষী রীতি চিরকাল জাগিয়ে রাখবে স্বধর্মী-স্বজাতির সংস্কৃতিপ্রিয় মুসলিম ঐতিহাসিকের মনে।

শায়ের পরিচিতি

দু'শ আড়াইশ দোভাষী-পুথির কিংবা শতাব্দ্ব শায়েরের পরিচয় দেয়ার প্রয়োজন নেই কোন সার্থকতা নেই বলেই। আমরা এখানে যথেষ্ট নমুনা জরিপ স্বরূপ অনেক পুথির ও পুথিকারের পরিচয় দিলাম। তাই কালক্রমিক কিংবা বিষয়গত ধারা রক্ষিত হল না।

১. ফকির গরীবউল্লাহ

দোভাষীপুথির আদি লেখক ফকির গরীবউল্লাহ। সৈয়দ হামজা বলেন : 'পীর শাহা গরীবউল্লাহ কবিতার গুরু/আলমে উজালা যার কবিতার গুরু।' অরক্ষ্য দোভাষীরীতির প্রয়োগের প্রবণতা প্রথম দেখা দেয় সত্তেরো শতকের শেষপাদে ও আঠারো শতকের প্রথমার্ধে সত্যপীর পাঁচালীকার পশ্চিমবঙ্গীয় হিন্দু কবিদের মধ্যে। সত্যপীর পুথির পরিচয় প্রসঙ্গে আমরা এ সম্বন্ধে আলোচনা করেছি।

শাহ গরীবউল্লাহ জন্ম হাওড়ার বাঙ্গিয়ার অন্তর্গত হাফিজপুর গ্রামে। তিনি পিতা শাহ দুন্দীর পহেলা ফরজন্দ। গরীবউল্লাহ ১. হোসেন মঙ্গল (জঙ্গনামার প্রথমংশ) ২. আমীর হামজা (প্রথমংশ) ৩. ইউসুফ-জোলেখা ৪. মদনকামদেবপালা (সত্যপীর মাহাত্ম্যজ্ঞাপক) ও ৫. সোনাভান পুথির রচয়িতা।

ফকির গরীবউল্লাহ বড় ঝাঁ গাজীর ভক্ত ছিলেন। সৈয়দ হামজার কথায় প্রকাশ—

'আল্লার মকবুল শাহ গরীবুল্লা নাম। আছিল রওশানদীল শায়েরী জবান।

বলিয়া হাফেজপুর যাহার মোকাম।। যাহাকে মদদ গাজী শাহ বড়ে খান।।'

গরীব ফকিরের 'আমীর হামজা; ইউসুফ-জোলেখা, হোসেনমঙ্গল বা জঙ্গনামা এবং মদন-কামদেব কাহিনীর বক্তা পীর বদর আর শোভা বড় ঝাঁ গাজী। 'বড় ঝাঁ গাজী কবিকে বাতেনে দর্শন দান করে সম্ভবত কাব্য-রচনায় প্রণোদিত করেছেন :

'গরীব ফকীর কহে কেতাবের বাত। ইউসুফ নবীর বাত শুন মেরা ভাই।।

বাতুনে বড় ঝাঁ যারে দিল মোলাকাত।। তারপর :

বদর বলেন গাজী তোমাকে সমঝাই। আল্লার দরগায় বদর নোঙাইয়া মাথা।

কহিতে লাগিল ইউসুফ-জোলেখার কথা।

ইউসুফ-জোলেখার সমাপ্তিভাগের দুটি শ্লোক দৃষ্টে মনে হয় কবি নবাবী আমলে অর্থাৎ ১৭৭২ খ্রীস্টাব্দের পূর্বেই তাঁর কাব্যটি রচনা করেছিলেন। যেমন—

১. 'আল্লাতাল্লা সালামৎ রাখিবে বাদশারে। ২. গরীর কহেন শাহা নেজামের পায়।

সহি সালামৎ রাখ বাদশার উজিরে। কেতাব মাফিক এস্তা দূর হৈল সায।

এতে প্রমাণিত হয় গরীবউল্লাহ নবাব মীর জাফরের পুত্র নাজিমুদ্দৌলার সময়ে (১৭৬৫-৭২ খ্রীঃ) ইউসুফ-জোলেখা রচনা করেছেন।

গরীবউল্লাহ মদনকামদেবপালা (সত্যপীর মাহাত্ম্যজ্ঞাপক) এখন ওয়াজেদ আলীর নামে চলে, যদিও ভণিতায় সর্বত্র গরীবউল্লাহর নাম রক্ষিত হয়েছে। গরীবউল্লাহর হেসেনমঙ্গলের দ্বিতীয় খণ্ডে এক মোহাম্মদ ইয়াকুব আলীর ভণিতাও যুক্ত রয়েছে এবং আমীর হামজার শেষাংশ সৈয়দ হামজা ১৯৭৯-৯৪ খ্রীস্টাব্দে রচনা করেছিলেন।

গরীবউল্লাহর সোনাভান ঈষৎ পরিবর্তিত হয়ে সৈয়দ হামজা ও ফকীর মোহাম্মদের নামেও চলে। তাঁর ইউসুফ-জোলেখায়ও ফকীর মোহাম্মদের ভণিতা যুক্ত হয়ে বাজারে চালু হয়েছে।

গরীবউল্লাহ সম্ভবত ১৭৮০ খ্রীস্টাব্দ অবধি জীবিত থেকে তাঁর কাব্যগুলো রচনা করেছিলেন। আমীর হামজা থেকে তাঁর রচনার একটু নিদর্শন দিচ্ছি :

বাদশা নওশেরওয়ার কন্যা মেহেরনাগারের রূপবর্ণনা—

মাথায় চাচর কেশ হরপরী জিনে বেশ	কপালে মানিক পটি গাংখিয়া বাঁধেন চুটি
মুখে শোভা চান্দের সমান।	যেন শোভা আকামের তারা।
চাহনি মদনবাণ দেখিলে হারায় প্রাণ	তিলক কপাল পরে চান্দা যেন শোভা করে
ভুরু দুটি যেমন কামান।।	বৃন্দ বান্ধে রূপা সোনার ডোরা।।
গলায় সোনার হার কাঙ্গনের শোভা তার	পায়েতে নূপুর দিল আঁধার উজালা হৈল
আঙু ডিছু শোভা করে মাপা	বেশ যেন জিনিয়া পুতলি।
হেন নখ নাক মাঝে গজমতি তাহে সাজে	ছিরি তার উঠে ভাল আন্ধারেতে হৈল ভাল
ছেরে শোভা কনকের চাঁপা।।	বিজলি সমান ঝিলিমিলি।।

ভাষ্যরীতি অন্যত্র দোভাষী। বচসায় নৈপুণ্য নিতান্ত বিরল, কবিত্ব দুর্বল। চরিত্র চিত্রণের কোন প্রয়াস নেই। আমীর হামজার পুথিতে ইরানের বাদশা নওশেরওয়ার সঙ্গে হামজার যুদ্ধবৃত্তান্ত বর্ণিত হয়েছে। সে-সঙ্গে হামজার বাদশাজাদী মেহেরনাগার লাভের প্রয়াস কাহিনীর অন্যতম আকর্ষণ। ‘ফকির গরীব কহে কেতাব দেখিয়া।’ কাজেই কাব্যটি মূলের স্বাধীন অনুসৃতি।

হানিফা ও ব্রাহ্মণকন্যা সোনাভানের স্বপ্নে মিলন—

‘একদিন স্বপন দেখে বিছওয়ান শুইয়া।।	থাকিতে না পারি আইলুম দেখিতে দিদার।।
হানিফার গায় হস্ত আহাস্তে ফেরায়।।	কাম আনলেতে পুড়ে হইলুম ছারখার।
হানিফা খোওয়াবে কহে তুমি কোন্ জন।	সর্বাস জুড়াও মোর করিয়া বেভার।।
টুঙ্গির সহরে থাকি বুলিল স্বপন।।	নহেতো মরিব পুড়ি আসক আগুনে।
সোনাভান নাম মোর ছিনু আরামেতে।	হানিফা করিল তওবা হাত দিয়া কানে।।
তোমার ছুরত আমি শুনিবু কাসেতে।	তবে যদি নেকা বিহা হয় তেরা সাথে।
সেই হৈতি দিল মেরা আছে বেকারার।	তবে তোর মনের আগ পারি নেভাইতে।

আত্মসংবরণ করা মুশ্কিল, তাই জেগে ওঠে হানিফা সংকল্প করল—

টুঙ্গির সহরে যাব যে করে খোদায়।

শহীদ হোসেন শোকে :

এমামের লোহু গেল আসমান উপরে।

আজি তক সেই মেঘ উঠে আচমানে।...

যখন বসিল কুফর ছাতি উপরে

সিন্দুরিয়া মেঘ হয়ে আচমানে রহিল ।
 আরস কোরস লোহ কলম সহিতে ।
 বেহেস্ত দোজখ আদি লাগিল কাঁপিতে ।
 আচমান জমিন আদি পাহাড় বাগান
 কাঁপিয়া অস্থির কৈল কারবালা ময়দান ।
 আফতাব-মাহতাব আদি কালা হৈয়া গেল

ছের জুদা কৈল যদি এমামের ধড়ে ।
 জানোয়ার হরিণ পাখী কাঁদিতে লাগিল ।।
 বাঘ ভালুক কাঁদে আর মহিষ গগার ।
 বাচ্চারে না দেয় দুধ কাঁদে জার জার ।।
 মোমাছি ভোমর কাঁদে মুখে নাহি মউ ।।
 কাঁখে কুন্ড করি কাঁদে গৃহস্থের বৌ ।।

২. এয়াকুব আলী

সম্ভবত ১০৭১ বাঙলা সনে অর্থাৎ ১৭৬৪ খ্রীস্টাব্দে চব্বিশ পরগনা জেলার বসিরহাট মহকুমার অন্তর্গত জিরিকপুর গ্রামে জন্মগ্রহণ করেন। জীবনের অধিকাংশ সময় বালিয়ায় অতিবাহিত করেন তিনি। ১৭৯৪ খ্রীস্টাব্দে তিনি গরীবউল্লাহর জঙ্গনামার দ্বিতীয়ার্ধে ভণিতায় তাঁর নাম বসিয়ে শায়ের খ্যাতি লাভে প্রয়াসী ছিলেন।

ডক্টর সুকুমার সেন এয়াকুব আলীকে পুথির রচয়িতা বলে স্বীকার করেননি। ডক্টর সেন বলেন— ‘ইয়াকুব আলী আসলে হইতেছেন গরীবউল্লাহর জঙ্গনামার পুথির লেখকমাত্র। মৌলবী আব্দুল গফুর সিদ্দিকী এবং তাঁহার অনুসারীরা যদি ইয়াকুব আলীর পরিচয় ও গরীবউল্লাহর পরিচয় মিলাইয়া দেখিতেন, তবে ইয়াকুব আলীকে জঙ্গনামার প্রাচীন কবি বলিয়া ভুল করিতেন না।’ আমাদের হাতে হস্তলিখিত দুখানি জঙ্গনামা রয়েছে। তাতে কিন্তু গরীব ফকিরের সঙ্গে এয়াকুব আলীরও ভণিতা পাওয়া যাচ্ছে। আবার এয়াকুব আলীর নামে ছাপা পুথিতে গরীবউল্লাহর বহু ভণিতা রয়েছে। জালিয়াতির নমুনা বটতলায় সুলভ। গরীবউল্লাহর সোনাতান সৈয়দ হামজার নামেও চলে, এই সৈন্যতানে আবার ফকির মোহাম্মদের নামও যুক্ত হয়েছে, গরীবউল্লাহর ইউসুফ-জোলেখার ভণিতা বদল করে উক্ত ফকির মোহাম্মদ ইউসুফ-জোলেখার রচয়িতাও বনে গেছেন। ফকির মোহাম্মদ ইমাম চুরির পুথিরও রচয়িতা বলে পরিচিত।

অবশ্য আবদুল করিম সাহিত্যবিশারদ সংগৃহীত ২৫৫ সংখ্যক পুথিতে গরীব ও এয়াকুবের ভণিতা পাওয়া যায়, প্রথম দিকে গরীবের, শেষের দিকে এয়াকুবের। পুথিটি আরবি হরফে লেখা। লিপিকাল ১২৩৩ মথী বা ১৮৭১ খ্রীস্টাব্দ। মনে হয় এটি মুদ্রিত গ্রন্থের প্রতিলিপি।

গরীব ফকিরের ভণিতা :

১. অধীন ফকির কহে কেতাব দেখিয়া
 বাপ নাম শাহ দুন্দি আল্লাহ ফকির ।
 ভাটীর সুলতান গাজী বড় খান পীর ।।
২. বড় খান ভাবিয়া দেলে অধীনে ফকির বোলে
 শাহদুন্দির পয়লা ফরজন্দ ।

এয়াকুবের ভণিতা—
 রসুলের পাও তলে ভরসা কেবল ।
 অধম এয়াকুবে কহে হোছাইন মঙ্গল ।।

সাহিত্যবিশারদের ২৫৬ সংখ্যক ছাপা ‘মুক্তল হোসেন’ গ্রন্থের নাম পৃষ্ঠায় সায়ের মোহাম্মদ এয়াকুব আলী রয়েছে।

পুথির অভ্যন্তরে ফকির গরীবউল্লাহর যেসব ভণিতা আছে, তাদের দুটো তুলে দিচ্ছি :-

১. অধীন ফকির কহে কেতাবের বাত ।
বড় খান গাজী যারে দিল মোলাকাত ।
২. বড়খান গাজী পায় অধীন ফকির কয়
বড়খা হুকুম দিলে অধীন ফকির বলে
কেতাবে বয়ান সবায়॥

এয়াকুবের (?) বন্দনাংশ -

চৌদা খান্দান আর বন্দিनु চারিপীর । উত্তরের মসজিদে মিনারা বিরচিত ।।
ছাতিপরে হাত দিয়া নওয়াইয়া ছির ।। পশ্চিমে তালার যার বিরাজে চারিঘাট ।
সাহা সরফদ্দিন পীর বন্দি আলাচিত । গোছল হামেসা তাতে তাতে মোমিনের ঠাট
হামেসা বান্দেন ছিন বাঘের পিঠেতে ।। মক্কা হৈতে আনিয়া ভরিল তার পানি ।
ত্রিবেণী ঘাটেতে বন্দিनु দফার খান । দেশে দেশে হৈতে লোক আসে এহা গুনি ।।
গঙ্গা যার ওজুর পানী করিতে যোগান ।। ছোট পেড়য়ার নাম বড় পুণ্য স্থান ।
পেড়য়ার সাহা সুফী দুনিয়ার বিহিত । হাজতি সিরিনী সদা আছেত যোগান ।
এয়াকুবের ভগিতা- রাছুলের পদ আশে সহদ লালচে ।
পাঁচালীতে অধম এয়াকুব রস রচে ।।

লিপিকাল ১৮৭১ এবং মুদ্রণকাল ১৮৭৪ সন হলেও মোহাম্মদ ইয়াকুব সম্ভবত একজন কবিশ্যাকামী লিপিকর বা প্রকাশক মাত্র । এ জালিয়াতি পেশা চালু ছিল সেকালের বটতলায় ।

৩. সৈয়দ হামজা

দ্বিতীয় দোভাষী পুথিকার সৈয়দ হামজা আঠারো শতকের শেষ দশকে তাঁর কাব্যগুলো রচনা করে সবচেয়ে বেশি খ্যাতি অর্জন করেছেন । হুগলী জেলার ভুরসুট পরগনার আদুনা বা উদনা গ্রামে তাঁর জন্ম । উষ্টর মুহম্মদ শহীদুল্লাহর মতে কবির ১১৩৯ বাঙলা সালে বা ১৭৩২-৩৩ খ্রীস্টাব্দে জন্ম এবং ১২১৩ সালে ১৮০৮ খ্রীস্টাব্দে মৃত্যু হয় । অতএব কবি পরিণত বয়সেই পরলোক গমন করেন । কবির পিতার নাম হেদায়তুল্লাহ । পিতামহ আবদুল কাদের । কবির দুই পুত্র- কলিমুদ্দিন ও কুতবুদ্দিন ।

আমরা কবির মুহম্মদ কবীরের প্রসঙ্গে সৈয়দ হামজার প্রথম রচনা মধুমালতীর উল্লেখ করেছি । এ কাব্যখানা প্রায় বিস্মৃত বাঙলায় ১৭৮৮ খ্রীস্টাব্দে (বাঙলা ১১৯৫ সালে) রচিত হয়েছিল । কবি জনপ্রিয় আদি দোভাষী পুথিকার ফকির গরীবউল্লাহর অনুসরণ করেছিলেন । গরীবউল্লাহ সৈয়দ হামজার বয়োজ্যেষ্ঠ ও সমসাময়িক ছিলেন । অধিকন্তু উভয়েই ছিলেন নতুন শহর কোলকাতার অদূরবর্তী অঞ্চলের অধিবাসী । ভাষায় দোভাষীরীতির যথার্থ প্রবর্তক ফকির গরীবউল্লাহর রচনাদর্শ গ্রহণ করে সৈয়দ হামজা অভীষ্ট ফল লাভ করেছিলেন, তিনি যশস্বী হয়েছিলেন । তা সত্ত্বেও তিনি তাঁর অক্ষমতা সম্বন্ধে সচেতন ছিলেন । তাই আমীরহামজা পুথির শেষের দিকে কৈফিয়ৎ স্বরূপ বলেছেন-

কবিতা তামাম হৈল ত্রিপদী না লেখা গেল জেন্দগি না হয় এতবার ।।
সারাপুঁথি হইল পয়ার । চাকর পরের ঠাই লিখিতে ফোরসত নাই
সবাকে হইল ধন্দ কবিতা ত্রিপদী ছন্দ এ খাতেরে পয়ারে রচিত ।
যুগ্যতা না আছিল হামজার ।। কোনরূপ বাঙ্গালায় জঙ্গনামা বোঝা যায়

কবির জেওর দিতে খুব ভাতে সাজাইতে তবে যার যেমন উচিত ।

অবশ্য তিনি ত্রিপদী অন্যান্য পুঁথিতে রচনা করেছেন ।

মধুমালতী যে হামজার প্রথম রচনা তার আভাস পাচ্ছি নিচের কথাগুলোতে :

কবিতার বাত কহি দেলেতে বুঝিবে সহি কেছা মধুমালতীর জঙ্গনামা আমীরের
যতেক রসিক বন্ধুগণ জৈগুণ পুঁথি লিখেছিলু আগে ।
আছিলু বসন্তপুরে মাইনন্দি মোল্লা ডেরে আল্লাতাল্লা ভাল করে যাহার খাহেস পরে
সেইখানে করিনু যতন । হাতেম লিখিনু শেষভাগে

সৈয়দ হামজা ১৭৯২ খ্রীস্টাব্দে ফকির গরীবউল্লাহর অসমাপ্ত ‘আমীর হামজা’ পুঁথির দ্বিতীয় খণ্ড রচনায় আত্মনিয়োগ করেন :

বোরহানার মাতারি যে আরক্শের বিচে । বার শও এক শাল বাঙ্গালার শেষে ।
ওতারিয়া ছিল বিবি পাহাড়ের নীচে । কেতাব মিলিল বুঝে বহুত কোশেশে ।।
সেই হদ্দ শায়েরি হয়েছিল আগে । করিনু শায়েরি পুঁথি আখেরী কেছার ।
তারপর—এগার শও নিরানই সাল মাহা মাষে ।। লেখা গেল সাহাদত আমীর হামজার ।
না ছিল ওরক দুই কেতাব আখেরি । বারশও এক সাল আখেরী হিসাবে ।
এ খাতেরে আখেরি লিখিতে হৈল দেরি । বার দিন ছয়মাস হিসাবেতে হবে ।

সুতরাং আমীর হামজা পুঁথি ১১৯৯ সালে আরম্ভ হয়ে ১২০১ সালে তথা ১৭৯৪ খ্রীস্টাব্দে সমাপ্ত হয় । এই কাব্যে হজরত মুহম্মদের পিতৃব্য আমীর হামজার অলৌকিক বীরত্বের উপকথা বর্ণিত হয়েছে । এরপরে আরো দুখানি কাব্য রচনা করেন তিনি । ১২০৪ সালে (১৭৯৭ খ্রীঃ) তিনি জৈগুন বিবির কেছা (যয়তুন বিবি) রচনা করেন । এতে হানিফা ও জৈগুন বিবির যুদ্ধ এবং তার পর হানিফার কাছে জৈগুন বিবির আত্মসমর্পণ ও বিবাহ বর্ণিত হয়েছে ।

আরবের বনি হনুফা বংশীয় বীলু-মুহম্মদ হনুফাই পুঁথির রাজ্যে হজরত আলীর অন্যতম পুত্ররূপে কল্পিত হয়ে মুসলমানি উপকথা-রোমান্সের প্রায় একচ্ছত্র নায়ক হয়ে কীর্তিত হয়েছেন । হানিফার কাহিনী শোনেনি বা নাম জানে না এমন বাল-বৃদ্ধ-বনিতা মুসলমান পাক ভারত বাঙলাদেশে নেই, সম্ভবত দুনিয়াতেও নেই । মুহম্মদ হানিফার সম্ভবত ৭৮ হিজরীতে জন্ম এবং তিনি খলিফা আবদুল মালিকের সময়ে নেতৃস্থানীয় ব্যক্তি ছিলেন । অলৌকিক শক্তিদ্বারা উপকথারাজ্যের জৈগুন-সোনাতান-কায়রাপরী-শাহপরী-সূর্যউজ্জাল (সুরতজামাল) মল্লিকা-পবনকুমারী-সমর্তভান প্রভৃতি পরী-গন্ধর্ব ও মনুষ্যরাজকন্যার পাণি গ্রহণ করেন । এজন্যে তাঁকে দেব-দৈত্যের সঙ্গে রণে, স্বাপদসঙ্কুল বন-জঙ্গল উত্তরণে ও নদনদীনগরীর বাধা উল্লঙ্ঘনে সাফল্য অর্জন করতে হয়েছে ।

হাতেম তাই কাব্য :

মিঞা শাহা এর্জতুল্লা কহিলেন আমায়

হাতেম তাইর কেছা লেখ বাঙ্গালায় ।

সৈয়দ হামজার শেষগ্রন্থ হাতেম তাই । জগদ্বিখ্যাত দাতা ‘হাতেমতাই’-এর জীবনের অলৌকিক-অসাধারণ কাহিনী এতে বর্ণিত হয়েছে । হাতেমতাই-একশও একুশ লিখি তার পাশে শূন্য [তথা ১২১০] সনের ঠিকানা পারে তায় । কাজেই কাব্যের রচনাকাল ১২১০ সাল বা ১৮০৪ খ্রীস্টাব্দ । একটু নমুনা—

বিবি বলে ছাড় তুমি আসেক খেয়াল ।

সাত ছওয়ালের যে জওয়াব দিবে আনি

সাদীর করার মেঝে বহুত জঞ্জাল।

করার কবুল যদি থাকে জিন্দেগানি।

জৈগুনের পুঁথিতে সৈয়দ হামজা নিজের সম্বন্ধে যা বলেছেন তা উদ্ধৃত করে আমাদের আলোচনা শেষ করছি :

ত্রিপদী করিয়া ছন্দ করিয়া তারিখ বন্দ

কলিমদ্দি বড় বেটা কুতুবদ্দি তার ছোটো

লেখা গেল তেইশে আশ্বিনে।

এই দুই মাসুম আমার।

বার শও চারি সালে জুম্মার নামাজ কালে

রসুলের পাও তলে সৈয়দ হামজা বলে।

বাকি সে মাসের সাত দিনে।

ঘর ছিল ভূরসুট অদুনা।

ভূরসুট পরগনা বিচে উদনা বাগের নীচে

সন নিরানই সালে আমার কপাল ফলে

বসবাস কাদিমি মোকাম।

বাড়িতে পড়িল তিন হানা।।

আবদুল কাদের দাদা তার বড় দেলসাদা

চাষবাস যত ছিল বাড়িঘর সব গেল

বাপ মেঝে হেদায়তুল্লা নাম।।

ভরাডুবি হৈল মাঝে মাঠে।

দেলেতে আফসোস বড়া হইয়া যে পাঙ ছাড়া

ভূরসুট পরগননা জান ঘর।

পরগনা বায়েড়া রানাঘাটে

উদনায় পয় বাড়িল বানেতে খাব হইল।

হানিফার পাঙতলে সৈয়দ হামজা বলে

তিনহাত বাড়িল উপর।।

জৈগুনের কিসসার কাঠামো-

জৈগুন নামে বাদশাজাদী এরেম সহরে।

সাদী বেহা কবুল করিব আমি তারে।

কারার করেছে বিবি বাপের হজুরে।।

আমার মহিমে যদি হারে পাহালওয়ান।

মহিমে যে কেহ মোরে পাছাড়িবে জোরে।

করিতে খেদমতগারি হইয়া গোলাম।

বহু বাধাবিল্প অতিক্রম করে ও প্রতিদ্বন্দ্বিতায় সম্মুখ হয়ে হানিফা জৈগুনকে লাভ করেন।

১২০৪ সালে তথা ১৭৯৭ খ্রীস্টাব্দে জৈগুনের কিসসা রচিত।

৪. আবদুল মজিদ ভূইয়া

কবি সৈয়দ হামজার এক কাব্য-শিষ্য বালেশ্বরবাসী আবদুল মজিদ ভূইয়া 'রঙ্গ বাহার' নামের একটি রোমান্স রচনা করেন। তিনি গুরু সৈয়দ হামজাকে চাক্ষুস করেননি। হামজার হাতেমতাই কাব্য পড়ে আবদুল মজিদ এতই মুগ্ধ হন যে তাঁকে কাব্য-গুরু বলে হৃদয়ে স্থান দান করে তাঁরই রচনাদর্শ অনুসরণ করেন :

'বন্দি আমি ওস্তাদের পায়

ওফাত হইয়াছে বহুকাল।

ভূরসুট পরগনা বিচে উদনা বসতি আছে

এয়সা কেহ বাঙ্গালার শায়ের না করে আর

তার মাঝে সৈয়দ হামজায়।।

যবতক দুনিয়া বাহাল।।

কবিতা করিনু শুরু সেই যে আমার গুরু

তার দেশ বাঙ্গালাতে মেঝে ঘর উড়িয়াতে

মোলাকাত নাহি মেঝে সাথে।

বালেশ্বর কটক জেলায়।

তার ধ্যান মনে রাখি কেতাব ছেফত দেখি

বস্তা থানার পাশ কাদিমি মোকাম বাস

হাতেমতাইর কোচ্ছা হৈতে।।

গড়পদা পরগনা বলায়।।

আম্মা তালা তার তরে বেহেশ্ত নসিব করে

কাব্যটি সম্ভবত ১৮৬১-৬৪ খ্রীস্টাব্দের মধ্যে রচিত। দিলরুবা-চারচমন রচয়িতা আবদুল মজিদ খান বা আবদুল মজিদ ভূইয়া সম্ভবত অভিন্ন ব্যক্তি। এ গ্রন্থটি ১৮৬৪ খ্রীস্টাব্দে হবিবি প্রেসে মুদ্রিত হয়। দিলরুবা-চারচমন একটি উপাখ্যান গ্রন্থ। বিশেষ বৈশিষ্ট্য কিছুই নেই।

৫. গরীবউল্লাহ বেপারী

গরীবউল্লাহ নামের কবি 'দিলারাম' উপাখ্যান এবং 'নেকবিবির বয়ান' নামে নারীদের প্রতি ধর্মোপদেশমূলক পুস্তিকার রচয়িতা।

নেকবিবি বয়ানে রয়েছে—

অধীনে গরিবে কহে ভাবিয়া খোদায়। এইখানে হৈল ভাই কিতাব তামাম।
রহমতগঞ্জ ঘর সহর ঢাকায়।। বড় ছোট সভা পরে আমার ছালাম।।
(জয়নুল আবেদিনের নাম ছাপা পুঁথিতেও এ অংশ রয়েছে)

লিপিকার বলেছেন—

গরীবউল্লা বিপারী যে আমার মিতাজী। তানার মেহের করি কিতাব তৈয়ার।
হাজীরাবাগে ঘর বাপ কালু মাঝি। তা সভার ভালা করে প্রভু করতার।
এ হাজারীবাগ ঢাকা শহরের নওয়াবগঞ্জ অঞ্চলে অবস্থিত।

'দীলা রামে আছে'—

'কহে হীন গরীবউল্লা বাপ মেরা রফিক মোল্লা আর এক ভাই মোর নাম জঙ্গু খণ্ডিগর
আখরাতে ভালা তার করিও খোদায় লালবাগে ঘর তার বাদশার কেল্লায়।
অন্যত্র— কহে গরীবুল্লা/গুস্তাদ নেয়ামতুল্লা/সবুরী সকলের ভাল্লা।

অতএব, কবির সংক্ষিপ্ত পরিচয় এই— গরীবউল্লাহ ঢাকা শহরের রহমতগঞ্জবাসী ছিলেন। তাঁর পিতার নাম রফিক মোল্লা। ভাই জঙ্গু কুস্তিগর। নিবাস ঢাকা শহরের লালবাগ কেল্লায়। কবির 'বেপারী' উপাধিতে প্রকাশ— তিনি ধূসরসায়ী ছিলেন। পুথিরচনার সময় বোধ হয় 'মা' বৈচে ছিলেন না, তাই তাঁর নাম উল্লেখ করেননি। কবির গুস্তাদের নাম নেয়ামতউল্লাহ।

গরীবউল্লাহ বেপারী রচিত দিলারাম কাব্যের নমুনা :

এই মতে সাহাজাদা কান্দে জারেজার। হেনকাল কিছু যেন ঠেকিলেক হাতে
মুখেতে কহেন আল্লা করহে নিস্তার।। আঁখি খুলে চেয়ে দেখে করিয়া নজর।
দরিয়ার মওজার টানে খেচে লিয়া যায়। দেখিল কুস্তীর এক তক্তা বরাবর।
বদনে না মিলে জোর করে হায় হায়।—

'দিলারাম' সম্বন্ধে কবির উক্তি—

'হিন্দি কিতাবেতে ছিল কেছা দেলারাম। হিন্দুস্তান দেশে এক আছিল হালওয়ায়।
তাহাতে লিখিয়াছিল এই মত কালাম। শুন তার কথা বাঙ্গালায় লিখে যাই।
রচনা সর্বপ্রকার বিশেষত্ব বর্জিত। নেকবিবির বয়ান থেকে কিছু নমুনা দিচ্ছি :

চারজন ধার্মিক রমণীর কাহিনী গল্পচ্ছলে বর্ণনা করে কবি বলেছেন—

চারি নেক বিবি দেখ এছাই আছিল। ফিরিয়ারে পায় যদি পড়শীর ঘরে।
দেল রোসন হৈল আর নেকনামি রৈল। খছমের গীবত যত করে সভার তরে।
তাহার বয়ান আমি সন্তোকে শুনাই। দুই চারি আওয়াত বসিয়া এক সাথ।
পড়িয়া বিবির তরে শুনাইবে ভাই। ফুসাফুসি করি তারা কহে এহি বাত।।
গরীবুল্লা বোলে আমি কি কহিব আর। কেহ বোলে খছম মোর জেওর দেএ নাই।
কলিকালের আওরাতে লেখি কিছু আর। কামাইর মধ্যে তাই পড়িলেক ছাই।

কবির সতর্কবাণী—

আর এক কথা কহি শুন সব ভাই।

যদি ভাই মনের কথা কবিলারে কবে।

মনের কথা না কহিবা কবিলার ঠাই।

পশ্চাতে আফছোছ করি ভাবিয়া মরিবে।

গরীবুল্লাহ সন্তবত উনিশ শতকের প্রথমার্ধে বর্তমান ছিলেন।

‘ইবলিসনামা’ রচয়িতা মুন্সী গরীবুল্লাহ রোধ হয় ভিন্ন ব্যক্তি। ইবলিসনামা ১২৬৪ সালে বা ১৮৫৭ খ্রীস্টাব্দে প্রথম প্রকাশিত হয়।

৬. মালে মোহাম্মদ

কবি মালে মোহাম্মদ তিনখানা ধর্মবিষয়ক গ্রন্থ ও সয়ফুলমূলুক-বদিউজ্জামাল নামের রোমান্সের রচয়িতা। ইনিও দক্ষিণ রাঢ়ের অধিবাসী। তাঁর গ্রন্থ তিনটির নাম ১. তখিয়াতুন নেছা (ডানবিহন নেসা) প্রকাশকাল ১২৭৩ বাং বা ১৮৬৬ খ্রীস্টাব্দ ২. আহকামুলজুমা রচনাকাল ১২৬৩ বাং বা ১৮৫৩ খ্রীস্টাব্দে এবং ৩. সেরাতুল মুমেনীন প্রকাশকাল ১২৯৬ বাং বা ১৮৮৯ খ্রীস্টাব্দ। সুতরাং কবি উনিশ শতকের দ্বিতীয় পাদ থেকে শেষপাদের মধ্যে জীবিত ছিলেন। তখিয়াতুননেসায় নারীর কর্তব্যাকর্তব্য সম্বন্ধে শরীয়তের বিধি-নিষেধ বর্ণিত হয়েছে।

গ্রন্থোৎপত্তি সম্বন্ধে কবির উক্তি—

‘আমি অতি মুরুক্ষমতি কি জানি সাযরি।

এ লামি কহিত আছি বাঙ্গালা বয়ানী।

কিভাবে ভাগিয়া বস্ত্রে করিতে তৈয়ারী।

মাবে মোহাম্মদ আমি অধীন ফকির।

দেখিলু বাঙ্গালা দেশে বড়ই ফছাদ।

আহাম্মদ নাদান আমি কিজানি সাইর।

আওরত মরদে নিতি করএ বিবাদ।

দেখিএ বাঙ্গালা দেশ বড় গোলমাল।

আল্লাহ হুকুমে নারী করে নাফরমানী।

বেপরদা আওরত লোক চলে বদ চাল।

দীনের খাতেরে দিলু করিয়া তৈয়ারী।

সয়ফুলমূলুক বদিউজ্জামানের শুরু—

এই পুথি সাযের ছিল আশু জামানার।

তেকারণে অধীন করে চলিছ বাঙ্গালা।।

সংস্কৃত সাধু ভাষায় হৈল তৈয়ার।

রসিক লোকের দেখে বহুত কাগতি।

পড়িতে বুঝিতে লোকের বড়ই কছেল্লা

বার শত পয়ত্রিশ সালে লেখি এই পুথি

দেওনীর নাচ— একথা কহিয়া দেওনী লাগিল নাচিতে

বড় বড় হাতীর মাথা গলে দিল গাইথে।।

ঠাটী বিজলী যেমন সাজ মেঘ মাজে।

বানাইয়া পাঠের ছালা পিন্দেয়া সে সাড়ি

হাতী মাথার চুসাচুসি ঠন ঠন বাজে।

নাচিতে লাগিল দেওনী উভে ফাল পাড়ি।।

তারপরে গীত গায় রসের দেওয়ানী।

হাতীর চিকড়ি যেন এমন চেচানী।

বদিউজ্জামালের বারমাসী—

বৈশাখ মাসেতে ফুল ফুটে নানা রাশি

ভোমরায় খায় মধু ফুল মাঝে বসি।।

ভোমরার গুনগুনে দগদে পরাণ

আমার ফুলের মধু কে করিবে পান।।

শ্রাবণ মাসেতে পানি উথলে সাগরে

খাল নালা চলাচল জোয়ারের তোরে।।

অভাগীর যৌবন জোয়ার হৈল কেমন

পতি বিনে সে জোয়ার না হবে বাড়ন।।

সয়ফুলমূলুক-বদিউজ্জামাল কাহিনী প্রণয়োপাখ্যান অধ্যায়ে দ্রষ্টব্য।

৭. আবদুল মজিদ খোন্দকার।

আবদুল মজিদ খোন্দকার ১২৮৮ সালে অর্থাৎ ১৮৮১ খ্রীঃ প্রসিদ্ধ দরবেশ 'সুলতান বলখী'র কাহিনী রচনা করেন। এটা আমীর খসরুর উক্ত নামধেয় ফারসিগ্রন্থের উর্দু অনুবাদের স্বাধীন বঙ্গানুবাদ। কবি বিস্তৃত আত্ম-পরিচয় দিয়েছেন। সে পরিচয় যেমনি দীর্ঘ তেমনি কাল্পনিক। অতি বিখ্যাত চিশতিয়া পীর খান্দানে কবির জন্ম। তাঁর আরো পাঁচটি ভাই ছিল। কবির নিবাস সাহজাদপুর। গ্রন্থোপস্থিতির এইরূপ:

ফারসি জোবানে ছিল এই যে রেছালা। আমাকে কহেন তিনি গুন চাচা জান।
ফারসি ভাঙ্গিয়া আমি করিনু বাঙ্গালা।। সোলতানের পুথি আপে করেন বয়ান।।
আমার দামান্দ এক আহম্মদ নাম। বহুত খাহেস লোগে পুথির করিবে।
তাহার খায়েসে পুথি করিনু আঞ্জাম।। ইয়াদগারি পুথি খান হামেসা রহিবে।।

পুথিখানির প্রকাশক আবদুল গফুর সিদ্দিকীর পিতা গোলাম মওলা। সুলতান বলখী উঁচুদরের সুফী সাধক ছিলেন। কবি আবদুল মজিদের হাতে তিনি অলৌকিক শক্তিধর কাফের-ত্রাস দিখীজয়ী বীররূপে চিত্রিত হয়েছেন। রচনার নমুনা—

‘ফুলের শয্যাতে শাহা করেন শয়ন। ছাতিতে তুলিয়া পাণ্ড দাবে কুতুহলে।
স্তনেতে পায়ের তালু দাবে নারীগণ। সেই যে সোমের খাও লাগে পদতলে।।
আল্লার করুনি এক নারীর শরীরে। পায়েরে পাইয়া দুখ হইল পীড়িত।
একগাছি চুল ছিল স্তনের উপরে।। বিন্দী হইতে চমকিয়া উঠে আচম্বিত।।

তারপর ‘ত্রোখে অগ্নিবরাবর’ হয়ে অপরোধী দাসীর ‘তলওয়ার মারিয়া স্তন কাটিয়া ডালিল’। এতে দাসী কান্নার পরিবর্তে হেসে উঠল। বিস্মিত বাদশা কারণ জিজ্ঞাসা করলে দাসী বলে—

কাকতি করিলাম কত চরণে তোমার। যে জন আরাম এত করে হামেসায়।।
অপরাধ ক্ষমা নাহি করিলা আমার।। তাঁহার কপালে কিবা করেন এলাহি।
এই জন্য হাসি আমি শোন মহাশয়।

দাসীর কথায় চৈতন্যোদয় হল সুলতানের। তিনি মুর্শিদের নির্দেশে রাজ্য ছেড়ে বারো বছর কঠোর সাধনা করে সিদ্ধি লাভ করেন। তারপর বিবাগী হয়ে দেশে দেশে ইসলাম প্রচারে হন রত। এ ব্যাপারে তাঁকে দেও-দানু-জীন ও মনুষ্য রাজার সঙ্গে অনেক যুদ্ধ করে জয়ী হতে হয়। পীরের আদেশে তিনি হিন্দুস্তানে যান:

হিন্দা সন্দীপ তারে কহে তো হিন্দুতে বেহেস্ত সোমান জাগা সেহি ত সহর।।
মুকুতা মানিক সেথা জন্মে নানা মতে।। সারি সারি বৃক্ষ আছে ফুল মধু ভরা।
আগর চন্দন আর পুষ্প মনোহর।। কুকিল সুনাদ করে গুঞ্জরে ভ্রমরা।।

মউরে পেখোম ধরে নাচে তো সুন্দর।।

সুস্বরে মধুর গীত গায় তো কিন্নর।।

এখানে বহু রাজাকে পরাস্ত করে বহু লোককে ইসলামে দীক্ষিত করার পর হিন্দুস্তানের অপর শক্তিধর রাজা পৌষরামের (পরশুরামের) সঙ্গে তাঁর ভীষণ লড়াই বাধে। এ যুদ্ধে সুলতানের নিত্যসঙ্গী ছিলেন বদর। অবশেষে—

‘দেউল দেহার তুড়ে কৈলো ছারখার। ঠাঞি ঠাঞি মছজেদ কতো করিলা নির্মাণ।।
না রাখিল আমূল হিন্দুর দেবতার।। ঘরে ঘরে ঠাঞি ঠাঞি নামাজের কাম।
দেবালয়ে ভাঙ্গি সব বলখী সুলতান। ওলিফা পড়নে আর পড়নে কলাম।

এটিও রসুল-হানিফা-হামজার দিখিজয় ও ইসলামপ্রচার শ্রেণীর গ্রন্থ। এসব কাহিনী রচয়িতাদের মনচ্ক্ষে ভেসে উঠেছিল তুর্কি-মুঘলের বঙ্গ তথা ভারতবিজয় ও ইসলামের প্রসার কাহিনী।

৮. মুহম্মদ মতীন

বর্ধমান শহরের উপকণ্ঠে গোদাগ্রামবাসী মুহম্মদ মতীন (বা আবদুল মতীন) একটি অদ্ভুত গ্রন্থ রচনা করেছিলেন। পুথির লিপিকাল ১২৪৪ সাল। গ্রন্থটির নাম ‘ইসলাম নবী কেছা’। এতে কর্ণ ইসলামরূপে এবং বিষু নবীরূপে কবিওয়ালাদের মতো তর্কে বিতর্কে তত্ত্ব কথা ব্যক্ত করেছেন। মনে হয় কাব্যটি উনিশ শতকের প্রথম পাদে রচিত হয়েছিল। উক্ত পুথির সঙ্গে শরীয়তের বিধিনিষেধমূলক অপর একটি পুস্তিকাও রয়েছে। রচনার নিদর্শন—

‘কান্সালের আরজ মালুম যে তোমাএ। সঙ্গেতে লইলেন নবী জোমেরা নফরে।
রুটি যে তৈয়ার হল ছাহেবের দোগাএ।। একে শুনিলেন যখন ইসলামের বাণী।
করিলেন গমন নবী রাহের উপরে। না করেন ঝিলম্ব ছাহেব চলেন আপনি।।
মতীনে রচিল কেছা আশা নবীর পাএ। আশা রাড়ি হাতে নিলেন খড়ম দেন পাএ।
চড়িনু সবুরের নাএ কাগুরী খোদাএ।। কেরামতের জুকা নিলেন দিস্তার মাথাএ।

(ডঃ সুকুমার সেনের উদ্ধৃতি)

৯. মুহম্মদ দানেশ

হাতেমতাই, চাহার দরবেশ ১৮৬৮ খ্রীস্টাব্দে মুদ্রিত), গোল-ব সানুয়ার বা গুণ ও সনোবর (মুদ্রণকাল ১৮৫৭ খ্রীঃ) এবং নুর-উল-ইমান (মুদ্রণকাল ১৮৫৭-৫৮ খ্রীঃ) রচয়িতা মুহম্মদ দানেশ হাওড়ার শিবপুরবাসী ছিলেন। তাঁর পিতার নাম রফিক মোল্লা।

‘শিবপুর ঘর মেরা গুন হোসমন্দ।

রফি মোল্লার আমি প্রথম ফরজন্দ।।

মুহম্মদ দানেশ বটতলার অন্যতম জনপ্রিয় শায়ের। তাঁর চাহার দরবেশ প্রখ্যাত পুথি। সংস্কৃত পঞ্চতন্ত্রের ফারসি অনুবাদের বঙ্গানুবাদক মুহম্মদ দানিশ ভিন্ন ব্যক্তি, তার নিবাস চট্টগ্রামে। গ্রন্থের নাম ‘জ্ঞানবসন্তবাণী’। কবির রচনায় আলাওলের প্রভাব আছে। তিনি আঠারো শতকের লোক। তাঁর সম্বন্ধে অন্য অধ্যায়ে আলোচিত হয়েছে। রাগমালা ও পদাবলী রচয়িতা এবং মুকিমের গুলেবকাউলীতে উল্লেখিত চট্টগ্রামের দানিশ কাজী আর মুহম্মদ দানিশ দুই ব্যক্তি।

১০. জনাব আলী

বহুগ্রন্থ প্রণেতা কবি জনাব আলী পশ্চিমবঙ্গের লোক। হুগলীর ধ্বসা গ্রামে ছিল তাঁর নিবাস, ধর্মোপদেশে পূর্ণ এ গ্রন্থ। নামাজ-রোজার কথাই বেশি বিবৃত হয়েছে। নাম বোধ হয় নামাজনামা বা নামাজের কথা। কবি ভণিতায় প্রায় সর্বত্র স্বগ্রামের নামও যুক্ত করেছেন। যথা :

১. কহে হীন জোনাব আলী ভাবিয়া গফফার। ধসা গেরামের মাঝে বসতি আমার।
 ২. কহে হীন জোনাব আলী ভাবিয়া সোবহান। ধসা গেরামের বিচে যাহার মোকাম।।
 রচনার নমুনা—

তেরোতে মুকিলের সময় পড়িলে। বিপদের কালে নিকটে দোসরার।
 দোসরার মদদ না চাবে কোন কালে।। মদত চাহিলে ফের হইবে কাফের।।

কবির অপর রচনা জঙ্গনামার প্রকাশকাল ১২৬৮ বাঙলা সন বা ১৮৬১ খ্রীস্টাব্দ। তাঁর জঙ্গনামায় কারবালা কাহিনী বর্ণিত হয়েছে। জঙ্গে খয়বর (প্রকাশিত হয় ১৮৭৮ খ্রীস্টাব্দে)। জঙ্গে খয়বরে বর্ণিত হয়েছে রসুলের উক্ত নামীয় যুদ্ধবৃত্তান্ত। উক্ত দু'খানি ছাড়া কবির অপরাপর গ্রন্থ হচ্ছে তাজকেরাতুল আওলিয়া, মজমুয়ে ফতুহশাম, ফজলিয়াতে দরুদ এবং জিয়ারতে কবর। তাজকেরাতুল আওলিয়া থেকে একটু নমুনা দিচ্ছি :

আজকাল দাগাবাজ ফকিরেরা ঢের। মারফত পাইবে কিসে শরীয়ত ছাড়িলে।
 ঠাণ্ড ঠাণ্ড যথা তথা হতেছে জাহের।। কেতাব কোরানে যাহা না আছে দলীলে।।
 শরীয়তের বরখেলাফ করিয়া বেড়ায়। ওয়াকিব হইয়া হাল আওলিয়া লোকের।
 মারফতী ফকির আমি বলি সে সবায়।। লাঠি মার মাঝে দাগাবাজ ফকিরের।

১১. মুহম্মদ খাতের

হাওড়া জেলার বালিয়া পরগণার অন্তঃপাতী গোবিন্দপুর গ্রামে কবি মুহম্মদ খাতেরের জন্ম ১২৪৬ সালে (১৮৩৯ খ্রীস্টাব্দে) এবং ১২৯৬ সালে (১৮৮৯ খ্রীস্টাব্দে) তাঁর মৃত্যু হয়। তিনি বারোখানি গ্রন্থ প্রণেতা। যথা ১. শাহনামা ১২৮২ সাল ২. একশতত্রিশ ফরজ ১২৮৬ সাল ৩. লাইলীমজনু ১২৭১ সাল ৪. মুগাবতী ৫. যমিনীভান ৫. বনবিবি-জহুরানামা এবং ৬. কাসাসুল আখিয়া ৭. ভূতি নামা ৮. আখবাক্স জুমা ৯. গুল ও হরমুজ ১০. সওয়াল ও জওয়াব ১১. মেরাজ নামা। ১২. জঙ্গে সোহরাব।

এগুলোর মধ্যে-একশত ত্রিশ ফরজ-নিত্য পালনীয় শরীয়ত কথা। লাইলীমজনু, মুগাবতী, যমিনীভান, গুল ও হরমুজ এবং শাহনামা উপাখ্যানকাব্য, কাসাসুল আখিয়া, আওলিয়া কাহিনী, বনবিবি-জহুরানামা হচ্ছে পীরমাহাত্ম্য জ্ঞাপক পাঁচালী। পীরনারায়ণ সত্য, দক্ষিণরায় ও বড়ুখা গাজীর লীলা সম্পৃক্ত কাহিনী এতে বর্ণিত হয়েছে। রচনার নমুনা—

কাসাসুল আখিয়া— ‘পাহাড়তে আছহাব কাহাফের তরে।

ফেরেস্তা রাখিল আল্লা মোকরর করে।। বেহেস্তের পাংখা হতে হাওয়া বহে গায়।
 তাদিগে শোয়াবে তারা করট করিয়া। গর্মি আর সর্দি সেখা না লাগে কাহায়।।
 হামেশা ডাহিনে বামে দিবে ফিরাইয়া।। আল্লার কুদ্রত হতে সেই মকানের।।

রৌদ্র না উপরে আসে কেতাবে জেকের।

সোহরাব নিধনে রস্তমের বাপের শোক :

গুনিয়া এয়াছাই বাত পাহওয়ান কেমন ছোহারাব নাহি দেখিনু নয়নে
 হায় বলে গিরে গেল হইয়া বেহাল। এই দুঃখ রহিবে হাসর তক মনে।
 রস্তমের মায়ের শোক :
 হায় বলে জারি করে ছেরে মারে যা। এই কি আছিল লেখা কপালে আমার

গড়াগড়ি যায় বিবি করিয়া রোদন ।
এদিকে সোহরাবের মা :
গোশ্বা ভরে চলে বিবি হইয়া সওয়ার ।।
কহে আমি নিজে গিয়া করিব লড়াই ।
লইব বেটার দাদ রক্তমের ঠাই ।।
কবি বলেছেন—
রোক্তমের পুরা জঙ্গ যে চাহ শুনিতে ।
বড় শাহানামা লেহ পাইবে দেখিতে ।

দেখিতে হইল চক্ষে মওত পোতার ।
কিন্তু শেষ পর্যন্ত :
তাহমিনা রোক্তমে দোহতে মিলিয়া ।
খুসিতে গোজরান করে হইয়া কারার ।।
এবং— ছুরাত জামাল এক বেটা ফের হৈল ।
এবং ফারামর্জ বলিয়া রাখিল তার নাম ।

১২. আবদুল গনি

কবি আবদুল গনি রচিত ‘ফকির বিলাস’ ১৩৫৬ সালে মুদ্রিত । কবির কোন আত্মপরিচয় পুথিতে নেই । স্রষ্টা, সৃষ্টি এবং সৃষ্টিতত্ত্ব সম্বন্ধে গুঢ় ও গভীর আলোচনা রয়েছে এ পুথিতে । নমুনা :
পীর মুরিদের এবে সন্তাল জওয়াব । নদীতে নাহি ছিল যবে পানি সে মুক্তাতে
আবদুল গনি লিখে মাফিক কেতাব । গাছ যবে নাহি ছিল ফলকে যে তার ।।
প্রশ্ন—মুরিদ কহেন পীর বুঝাইয়া বল । গায়েবেতে রেখেছিল অপে করতার ।
ফুল কে হইল গুরু বিচি কে হইল । সংসার না ছিল যবে নাম ওজিফাতে ।।
ফুল যবে নাহি ছিল বাস কোথা ছিল । ধোয়ান্ন করিয়া বাবা বুঝই দেলেতে ।
দরিয়া না ছিল যবে কোথা ছিল পানি । ধরু যবে নাহি ছিল দুর্বায় দুধ ছিল ।
উত্তর— ফুল যবে না ছিল গন্ধ আছিল বিচেতে । দেহ নাহি ছিল শব্দ শূন্যেত আছিল ।

১৩. বুরহানউল্লাহ

রংপুরের কবি বুরহানউল্লাহ সম্ভবত আঠারো শতকে ‘কেয়ামত নামা’ রচনা করেন, তাঁর পুথির লিপিকাল ১১৫৪ সাল [১৭৪৭ খ্রীঃ] ।
কবির পীর ছিলেন :

মহাশুণবান শেখ দিদার মামুদ । কহে কবি ব্রানউল্যা শুন ধনিগণ ।
তাহার কৃপায় পাই পরম সম্পদ । মন্দ কর্মেতে ধন নষ্ট না কর কদাচন ।।
ভগিতায় কবির নাম— ব্রানউল্লা বা ব্রানউল্যা ব্যবহৃত হয়েছে—

এঁর আরো দু’তিনটে গ্রন্থ রয়েছে । এঁর কাব্য ‘অবধূতরাজার জঙ্গ’ ১৩০০ বঙ্গাব্দে বা ১৭৮৩ খ্রীস্টাব্দে রচিত । কেয়ামতনামাও সম্ভবত এঁর রচনা ।

১৪. মুহম্মদ ইসমাইল

জনমুরিদ-চওদা উজির— কয়েকটি উপদেশমূলক গল্প একটি কাহিনী সূত্রে গ্রথিত হয়েছে ।
‘এমন’ দেশের বাদশাজাদা চারি বেদ চৌদা শাস্ত্র তামাম শিখে এবং ‘সতরঞ্জ গজিকা চৌপড় পঁচিসা’ খেলা ছেড়ে যখন কৈশোরে পদার্পণ করল,

তখন ওস্তাদ দেখে পুথি বিচারিয়া । সাহাজাদার রাশি শুনে নক্ষত্র দেখিয়া
দেখে ভারি কুছায়েত কুমার উপর । প্রাণে বাঁচা দায় তার চৌদা দিন ভিতর ।

তাই ওস্তাদ বললেন—

শুন কহি তত্ত্বতার ওগো রাজনন্দন । গলে ছুড়ি চলে যদি তবু না বলিবা ।।
 চৌদা দিন কারো সঙ্গে কথা না কহিবা । মম বাক্য না শুনিয়া যদি কথা কহ ।
 নিশ্চয় মরিবে তুমি শুনাই বারতা ।।

গুরুজন বা হিতাকাজক্ষীর উপদেশ না শুনলে কি ক্ষতি হয়, তার প্রমাণ স্বরূপ হাঁসের বন্ধু কচ্ছপের উড়বার বয়ান এবং বান্দরের নিধন হবার নকল (কেছা) বর্ণিত হল। রাজকুমারের বিপদ এসেছিল মহল থেকেই। বাদশার পিয়ারা বান্দী জরনেগার—
 চাঁদের মতন/রূপ, যেমন সূর্যের ধূপ/জওয়ানি বাহার অতি তার ।
 মৃগের নয়ন হেন/ভুরু যেমন কামান/মনবান্ধা আছিল সাহার ।।

এই জরনেগার সাহজাদার পিতাকে ছেড়ে সাহাজাদাকেই ভালোবেসেছে ।
 কহি শুন সাহাজাদ তোমার কারণ । হরদম খেদমতে তেরা থাকিব দাসী হইয়া
 দুধের বালক তুমি আছিলে যখন ।। সাহেবকে (রাজাকে) মারিব শেষে বিষ পেলাইয়া ।
 সেই হইতে হৈনু আমি আসক তোমার ।

প্রমাণে পুড়ি আমি হইনু কাবাব । তক্ততাজ যত কিছু সব তেরা হবে ।
 জানন ঠাণ্ডা কর মোর মিলিয়া সেতাব ।। অঙ্গের বস্ত্র ও ইজার বন্দ খুলিয়া ।
 কুমারের কোলে রাড় বসিল যাইয়া ।।

বিমাতা সদৃশ জরনেগারের প্রস্তাবে শাহাজাদা স্বীকৃতি হতে পারেনি। প্রত্যাখ্যাত রুষ্টা জেরনেগার তার বিরুদ্ধে রাজার কাছে মিথ্যা নালিশ করে। স্বয়ং বাদশা ছেলেকে দোষী সাব্যস্ত করলে এক এক করে চৌদ্দদিনে চৌদ্দজন উজির চৌদ্দটি গল্প বলেছেন। গুস্তাদের পূর্বোক্ত দুটো শুদ্ধ মোট ষোলটি গল্প। অবশেষে জরনেগারের ছলনা ধরা পড়ল, হত্যা করা হল তাকে। কবির শক্তি-সামর্থ্যের কোন পরিচয় নেই হইতে। কবির পরিচয় এইমাত্র আছে—
 কেছা জনমুরিদের শোনাই সবার খবর । বসবাস সিবদাহ ধাম ।
 দোস্তা দিবে খাতেরে আমার । স্টেশনের উত্তরে গ্যাস ঘরের দক্ষিণ ধারে
 হীন এসমাইল ভণে সেবি গুরুর চরণে । আছে মেরা কদিমি মোকাম ।
 পুথির রচনা কাল উল্লেখ নেই। বিশ শতকের প্রথমপাদে রচিত হওয়াই সম্ভব।

১৫. মুনসী আশরাফ খাঁ আবেদ আলী খাঁ

‘ছহি বড় মউতনামা ও আজাবল কবর’ প্রথমাংশের রচয়িতা মুনসী আশরাফ আলী খাঁ এবং শেষাংশের কবি মুনসী আবেদ আলী খাঁ। মৃত্যুর এবং মৃত্যুর অব্যবহিত পূর্বের ও পরের অবস্থা বর্ণিত হয়েছে। প্রদর্শিত হয়েছে মুমিনের মৃত্যু, পাপীর মৃত্যু, কাফেরের মৃত্যুকালীন অবস্থাভেদও। প্রথম খণ্ড আজাবল কবর রচয়িতা আশরাফ খানের কোন পরিচয় পুথিতে নেই। রচনা তারিখও নেই। রচনার মূলে রয়েছে :

‘মৌলবী নাজের যেই নামে বড়া নামি । সাহাদত আঙ্গুল মেরা বচনে তাহার ।
 কড়ায়া বিচেতে যার মোকাম কাদিমি । ধরিল কলম জান কাগজ উপর ।।
 কোরান হাদিছ হইতে চুনিয়া চুনিয়া । নাপাক আশরফ বলে যে হবে মমিন ।
 তরজমা করিয়া দিল মেহের করিয়া ।। হাদিছের মানে শুনে করিবে একিন ।।

দ্বিতীয় খণ্ড— ‘মওতনামা’ আবেদ আলীর রচনা। শেষে দুটো স্বরচিত (?) বাউল গান দিয়েছেন। একটার দুটো পংক্তি এই—

মন জাগলে মনের মানুষ থাকবে তোর মনে

প্রেমসাগরে খুঁজে তারে লে ধনি চিনে।

এঁরও কোন পরিচয় পুঁথিতে নেই।

তেরশও পনের সাল চলে বাঙ্গালার।

আবেদের আল্লা নবী বিনে নাহি গতি।

২রা আশ্বিন মাহা রোজ জুম্বাবার।

এই তক হল লেখা করিলাম ইতি।।

অতএব রচনাকাল ১৩১৫ বাঙলা সাল তথা ১৯০৮ খ্রীস্টাব্দ।

১৬. মুনসী আজিমউদ্দীন

‘আসকনামা’ নামের এই পুঁথিতে একটি খাঁটি এবং দুটো ঝুটা ভালবাসার গল্প দিয়ে কবি মানুষকে মিথ্যা মায়া মোহ লোভ থেকে সাবধান থাকবার জন্যে তত্ত্ব উপদেশ দিয়েছেন। কবির মনে কবিত্বের স্পর্শ আছে। ত্রিশ পৃষ্ঠার বই হিন্দি থেকে কবি বঙ্গানুবাদ করেছেন এবং তাঁর মুরশিদের নাম শাহ কেরামত আলী। এছাড়া কবির কোন পরিচয় গ্রন্থে নেই। রচনাকালও জানা গেল না।

এস্কনামা কেতাব যা আছিল হিন্দিতে।

সাহা কেরামত আলি মুরসিদ যাহার।

খাহেস হইল মেরা বাঙ্গালা করিতে।

মাকড়ার জালে যেয়ছা মাফি হয় বন্দ।

আমি অতি মূর্খ মতি না জানি সায়ের।

এস্কের জালেতে যেয়ছা তেয়ছা সবে আছে বন্দ

এড়াইতে না পারিয়া খাহেস লোকের।

পয়গার নব খুসি মাদিকে পাইলে।

চলিত বাঙ্গালা ভাষায় করিনু জাহির।

মউর হাজার কুসি মউরি মিলিলে।

ভুলচুক মাফ মেরা করিবে তকদীর।

আসকের বড় খুসি পাইলে মাসুক।

কহে হীন আজিমদ্দিন ভাবিয়া গফ্যার।

তারপর কবি যথার্থ মাস্তকের একটি গল্প বর্ণনা করেছেন। এক ব্রাহ্মণ কন্যার সঙ্গে মৌলবীর ছেলের প্রেম হল, মিলনে রয়েছে সামাজিক বাধা, মৃত্যু ছাড়া ব্যবধান ঘটবার নয় তা-ই হল। জসীমউদ্দিনের দুলী-সোজনবাদিয়ার মতোই আলিঙ্গনাবদ্ধ মৃত প্রেমিক-প্রেমিকাকে নদীতে ভাসমান দেখা গেল।

হিন্দুস্তানে ছিল এক ব্রাহ্মণের বেটা।

ছুরতের হন্দ তার লিখিতে না পারি।

নবীন বয়সরূপ অতি পরিপাটি।।

সরমে মরিত, রৈলে জোলেখা সুন্দরী।

ছুরাত আছিল কাচা সোনার বরণ।

রূপ এয়ছা দিয়া ছিল জোলেখা সুন্দরী।

আন্দার ঘরেতে যেন চেরাগ রওশন।।

দেখিলে ইউসুফ নবি হইত দেওনা।।

আওরত মরদ যেয়ছা মিলনের কালে।

তেয়ছাই মিলিয়া ছিল ডুবে তারা জলে।।

দ্বিতীয় গল্পটি এরূপ : আরবের এক বাদশা। তিনি ‘হেম্মতে হাতেমতাই জোরেতে রোস্ত ম।’ আর ‘বেটি এক ছিল তার রূপে মনুহার’। এর প্রেমে পড়ল এক ছাত্র।

তালেবেলেম ছিল এক মোক্তব খানেতে।

তাহাতে ডুবিল আসকের দেলজান।।

সেই ওক্কে সেহ গিয়া ছিল বাগেতে।।

বিবিকে দেখিয়া মর্দ আসকে অস্থির।

ফুলের বাহারি দেখে খোসাল অন্তর।

তথায় গিরিল সেই হইয়া বেহোস।।

নজর পরিল তার বিবির উপর।

বিবি বলে দেখ দাসী নজর করিয়া।

ছুরতের নদীতে আসিয়া ছিল বান।

পুরুষ পড়িল মারা আমার লাগিয়া।।

হঁস ওয়ার পরে বাদশাজাদী প্রেমিক ছাত্রটিকে বলল—

শুন মিয়া তালবেলেম তোমাকে বুঝাই। চাটির বিহুওনা পরে তুমি থাক ভাই।
গরীব বেচার তুমি দুনিয়াতে ভাই। ফুলের শয্যাতে আমি শুয়ে নিন্দ যাই।।
এক অক্কে নিয়ামত যাহা খাই আমি। মোন জোগাইতে মেরা না পারিবে তুমি।
জেদ্দেগি ভরিয়া তাহা না দেখেছ তুমি।। 'কাহেকো আমারে লিয়ে হবে পেরেসানি।
তবে—

এক লাখ দিই তুঝে সোনার মোহর। নাদান তোমার মতো কড়ু দেখি নাই।
ঘরে গিয়া সাদী তুমি কর বেরাদর।। আমার সঙ্গেতে যদি রাখিতে মহব্বত।
একথা ওনিয়া মর্দ হইয়া খোসাল। খুসিতে বাদশাই তুমি করিতে আলবাত।
দেলে থেকে উঠাইল বিবির খিয়াল।। দৌলতের লোভে তুমি ভুলিলে মাগুক।
অমনি রাজকন্যা বলল—
শাহাজাদি বলে তেরা আক্কেলেতে ছাই।

লাখ টাকা তো মিললই না, অধিকন্তু রাজকন্যার হুকুমে গাধার পিঠে চড়ে লাক্ষিত হল।

কাজেই— কহে হীন আজিমদি এলাহি ভাবিয়া। আসক ছাদেকে মন রাখ মজাইয়া।।

আল্লাহকে প্রেম করাই মানুষের শ্রেষ্ঠ ধর্ম। তাই কবি মানুষকে আল্লাহর প্রেমিক হবার জন্যে উপদেশ দিয়েছেন। সম্ভবত পুথিখানি বিশ শতকের গোড়ার দিকে রচিত হয়েছিল। এর আর দুখানা গ্রন্থের নাম মজমুয়ে ফতুহশাম ও শরীয়াতুল আইয়াম।

১৭. মোকাম্মেল খাঁ

মালু খাঁ ও রসনুসা পরস্পরকে ভালবাসে। বাড়ি ছেড়ে রসনুসা পালিয়ে আসে মালু খাঁর সঙ্গে এবং উভয়ের বিয়ে হয়। সত্য ঘটনায় এ পুথি লিখিত। ঘটনাস্থল বরিশাল, মালু খাঁ মুন্সী-মোল্লা শ্রেণীর লোক। গ্রাম্য পণ্ডিতদের মতো কূট প্রশ্ন ও প্রহেলিকা আলাপে আমোদ পায় বিদুষী রসনুসার সঙ্গে। তার কূট প্রশ্ন ও প্রহেলিকা সম্বাদের মাধ্যমেই আলাপ ও প্রেম। পরস্পরের বিদ্যাবুদ্ধি যাচাই করবার জন্যে কৌতুকচ্ছলে উভয়ের মধ্যে যেসব উদ্ভট বিষয়ের সওয়াল জওয়াব সেগুলো এ পুথিতে বিধৃত হয়েছে। যেমন—

১. আজব এক মছলা আমি করি জিজ্ঞাসন। ৩. পুরুষের স্তনে কেন দুধ নাহি হয়।
কবুতরের পাও রাঙ্গা কিসের কারণ। ৪. কত নুজামদ কোরানেতে হয়।
২. আর এক ছওয়াল আমি করি যে তোমায়।
নারীলোকের মুখে কেন দাড়ি নাই হয়।

মালু খাঁর পুথি পূর্বেও ছিল। তাই কবি বলেছেন—

মালু খাঁর পুথিখানি/অতি রস মধুবানী/মকাম্মেল লেখে পুনর্বীর।

কবির আত্মপরিচয় :

আমি হীন মোকাম্মেল অধীর লাচার সবার হজুরে এই মোকাম্মেল কয়।
সৈলদা গ্রাম বিচে বসতি আমার। ছোহ খাতা যত মেরা আছে পুস্তকেতে
মহকুমা পিরোজ জিলা বরিশালে দোষ ধরে মাফ দিবে খোদার ওয়াস্তে।
ধানা মেরা নাজিরপুর আছে কালে কালে। সন ১৩৩২ সাল ২০শে অগ্রহায়ণ
রাজ হংস বাবু মোর আছে কলিকাতায় ছাপিয়া করিলাম সায়া জানহ মমিন।
অন্যত্র— মোকাম্মেল নাম মেরা বড় গোনাগার। কবিরাজি পেশা কিছু দিয়াছেন পরওয়ার।

১৮. আবু জহিরুল হক

‘মজনুর পাক রুহ প্রভু সখা ছিল। আল্লার ক্ষেতে মন যে জন রাখিবে।
বেহেস্তে যাইয়া লায়লীর সাথেতে মিলিল।। এইভাবে ভব-নদী পার হয়ে যাবে।।
এক্ষে ছাদেক ছিল দুইজনার মন। লায়লী-মজনু তার প্রেমে রেখেছিল মন।
ছাদেক এক্ষেতে সখা ছিল নিরঞ্জন। বেহেস্ত চলিয়া গেল তাহার কারণ।।

লায়লী-মজনুর প্রণয় কাহিনী বর্ণনা শেষে এই তত্ত্ব কথা শুনিয়েছেন কবি ইরানি সূফীরা বহু আগে থেকেই লায়লী-মজনু, শিরি-ফরহাদ, ইউসুফ-জোলেখা প্রভৃতি প্রণয়কাহিনীর আধ্যাত্মিক রূপক ব্যাখ্যা দিয়ে আসছেন। আমাদের কবি জহিরুল হক সেরূপ একটি ব্যাখ্যা দিতে চেয়েছেন। কবির পরিচয়—

অধীন জহির কহে হুজুরের সবার। গাখিলাম প্রেমমালা আমি বিনা সুতে।
সিরাজগঞ্জ মহকুমায় বসতি আমার। লইয়া পড়িবে যত প্রেমিক গলেতে।
সাহাজাদপুর থানা নুকালি মোকাম। তেরশত ত্রিশ সালে পহেলা আষাঢ়ে।
খোন্দাকার আইনদ্দিন মোর পিতার নাম। সমাপ্ত হইল পুঁথি রোজ শনিবারে।

কবি নিতান্ত শক্তিহীন নন। বারম্বার তাঁর দখল আছে, পুঁথিরে কোথাও আড়ষ্টতার চিহ্ন নেই। পুঁথিখানি প্রায় বিসৃষ্ট বাঙলায় রচিত। এরূপ আরো অনেক পুঁথি রয়েছে যাতে দেখা যায় কবি উর্দু জানেন না, অথচ বটতলার রীতিতে পুঁথি লিখতে গিয়ে প্রথা রক্ষার খাতিরে কয়েকটা শব্দ বারবার প্রয়োগ করেছেন। রচনা কাল ১৩৩০ বঙ্গাব্দ বা ১৯২৩ খ্রীস্টাব্দ।

১৯. শাহ আবদুর রহিম

এর রচিত মোহাম্মদী বেদতত্ত্ব— বিজ্ঞাপনে এর বিষয়বস্তুর ও গুণের সংক্ষিপ্ত পরিচয় দেওয়া রয়েছে :

মারফৎ হকীকত আর হইয়াছে এবারত রঙ্গিন সকল।
বাতুনের শরীয়ত আশক আল্লার। মোশাহেদা মোবারেকা মঞ্জিল মোকাম।
আর যত ভেদ বাত আছে ফকারেতে।। এবাদঅন্দেরগীর ভেদের কালাম।
বহুত হয়েছে লিখা এহি কেতাবেতে।। আশেকী নামাজ রোজা হজ আর জাকাত।
এক্ষের মোজহাবে ইহা বড়ই মাকুল।। ভেদের কলেমা খুব পশীদার বাত।।
দলিলে কোরান আছে হাদীছ রচুল। কিচ্ছা ও কাহানী আদি মেছাল খাতিরে।
বহুত নজীর আছে আশকী কালাম। দোছরা জেলেদে আছে কেতাব আখিরে।
মাসনবী দিওয়ানে যাহা আছেত মদাম। যে ছুরাতে পাওয়া যায় খোদার দিদার।
পয়ার ত্রিপদী আর বাঙ্গালা গজল। এহী কেতাবেতে মেলে সব সমাচার।

শাহ আবদুর রহিম রচিত এ মূল্যবান তত্ত্ব ও তথ্যমূলক গ্রন্থখানির নাম মোহাম্মদী বেদতত্ত্ব। ‘বেদ’ নামকরণের পশ্চাতে দুর্বলতার আভাস আছে। দুই খণ্ড বা জেলেদে গ্রন্থখানি সমাপ্ত। দ্বিতীয় জেলেদে—(প্রথম জেলেদে বর্ণিত তত্ত্ব কথার উদাহরণ স্বরূপ :

কিচ্ছা কাহানী আদি মোছাল খাতিরে।

দোছারা জেলেদে আছে কেতাব আখিরে।।

এছাে ফারসি দিওয়ান, রুবাই ও গজল এবং দোয়া, দরুদ ও সূরা বা আয়াত উদ্ধৃত হয়েছে। বটতলার প্রভাবে দোভাষীরীতি অনুসরণ করলেও রহিম সত্যিই শক্তিমান লেখক।

ধর্মবিষয়ক এই রচনায়ও তাঁর ভাষা প্রাঞ্জলতা এবং ছন্দের লালিত্য হারায়নি। একটু নমুনা—

মওছমে বাহার	পেয়েছি দিদার	আলির বাগান ভবে।
পাপারি রহিতে	খামোশ থাকিতে	ডাকিব কোকিল রবে।
কোন কোকিলারে	কেহ না বাহারে	খামোশ দেখিতে পায়।
আমি অতি হীন	মওছমে অধীন	ডাকিব দলের রায়।।
কোকিল সবার	দলের হরদার	ডাকিয়াছে বহু তার।
আওয়াজেতে তেজ	সিরাজী হাফেজ	দেওয়ানাতে রয় যার।।
তিনিও বাহারে	নীরব না ধরে	ডাক ডাকিয়াছে।
একের জোশেতে	ডাকেন যেমতে	দেখ হেথা আসিয়াছে।।

কবি নিজেও বলেন :

লিখিলাম কেছা যত এহি কেতাবেতে।

সবকথা লিখি নাই শুনি যে ছুরাতে।।

এবারত রঙ্গিনেতে বেশী লিখিয়াছি।

বেরঙ্গে বেমিল কথা কম করিয়াছি।।

দোহরা জেলকদ আজি আরকীমাহার

তেরশত দুই হিজরী রোজ ঝুম্মাবার।।

তামাম হইল লিখা খুতবার সময়।

১৩০২ হিজরীতে তথা ১৮৮৫ খ্রীস্টাব্দে রচনা সমাপ্ত হয়।

কবির কোন আত্মপরিচয় গ্রন্থে পাওয়া গেল না।

মুনশী আবদুর রহিম ও শাহ আবদুর রহিম একই ব্যক্তি হলে ইনিও এগারোখানা পুঁথি প্রণেতা : দীলদেওয়ানা, রূপরাজচন্দ্রাবতী, সুখদেওয়ানা, গাজীর পুঁথি, বিলালনামা, নসিয়তুল খুবী, এক্সেসাদেক, গুলরওশন বিবির পুঁথি, মল্লিকা আকারবিবির পুঁথি, এবং শেখ ফরিদের পুঁথি।

২০. মুনশী আয়েজউদ্দীন আহমদ

গোল আন্দাম বা বায়ান্ন ছাপার নাচ একটি রোমান্স, বিশেষত্ব কিছুই নেই। নর্তকী ও নৃত্যের বর্ণনা আছে বলে পুঁথিতে কয়েকটি সংগীত সংযোজিত হয়েছে। হিন্দি গানও আছে।

ইরানের বাদশা আয়ুব। আর তাঁর উজির আজাহার। উভয়েই নিঃসন্তান। পরে বহু সাধ্যসাধনায় উভয়েই পুত্ররত্ন লাভ করলেন। বাদশাজাদার নাম ইউনুস আর উজিরজাদার নাম মাহজিবী। বাদশাজাদা যৌবনে প্রেমে পড়ল পরীজাদী গুল আন্দামের। পরী কি সহজে মেলে। রাজপুত্র দিওয়ানা হয়ে দেশ ছাড়ল, বন্ধু মাহজিবীকেও যেতে হল। স্বর্গের রাজা ইন্দের নর্তকী লালপরী। তাকে ভালবাসল শাহজাদা। ইন্দ্রপরী রোকাম সহর শিরাজনগর। প্রভৃতিতে নানা বাধা-বিপত্তি অতিক্রম করে অবশেষে বাদশাজাদা লালপরী ও গুল আন্দামকে লাভ করল। উজিরজাদাও ব্যর্থ হল না। সেও সুখী হল গোলফাম পরীকে পেয়ে উভয়ে দেশে এসে উত্তরাধিকার সূত্রে সুখে বাদশাহী ও ওজারতী করতে থাকে। কিছুকাল পরে গোলামের সঙ্গে অবৈধ প্রণয়ের অপরাধে গুল আন্দাম বাদশা ইউনুসের ভালবাসা থেকে বঞ্চিত হয়ে বাগানবাড়িতেও একাকী জীবন কাটাতে লাগল।

কবি আয়েজউদ্দীন আহমদের রচনা বিশেষত্বহীন। একটু নমুনা দিচ্ছি। গুল আন্দামের রূপ-চৌদ্দ পনের সাল বিবির বয়েস।

পাও 'পরে গিরিয়াছে মস্তকের কেশ।
 এয়ছা বাহারের কেশ না হয় বয়ান।
 ছলেতে বান্দিয়া লেয় আশেকের জান।
 যখন বান্দেন খোঁপা কেশ বিনাইয়া।
 ভ্রমর ভ্রমরি বসে আমোদিত হইয়া
 জমিন আহ্মানে যেয়ছা রওশন চাঁদের।

তেয়ছাই চটক আর আছিল মুখের।
 সে মুখ দেখিলে মুনি হাত মারে ছেরে।
 জপমালা ছাড়িয়া বিবির পায়ে গেরে।
 একে মধুভরা চৌঁট তাহে মিঠা কথা।
 শুনিলে দেলেতে হয় আশেকের ব্যথা।।

একটি গানের কিয়দংশ—

ও সে মন রঞ্জণী
 কটাক্ষেতে বধেপ্রাণ, প্রাণ সজনী।
 কবির আত্মপরিচয় ও রচনাকাল—

সে মৃগ আঁখির ছলে প্রেমাশে ভুবন ভূলে
 দেয় প্রাণে অগ্নি জেলে চিত্তহারিণী।

শয়তানি দাগাতে পড়ে খোদাকে ভুলিয়া।
 কেছাকে লিখিনু আমি মসগুল হইয়া।।
 আখেরাতে কি হইবে না জানি খবর।
 দাগাতে পড়িয়া গোনা করিনু বিস্তর।।
 বার শও নব্বাই সাল কার্তিক মাসেতে।
 পাঁচই তারিখ বুধবার দিবসেতে।
 সহর হুগলী জেলা হরিপালা খান।
 তাহার নিকটে আছে বালিগড় পরগনা।
 তাহার মধ্যেতে গ্রাম নামে তালপুর।
 অতএব, ১২৯০ বঙ্গাব্দে প্রকাশক মুন্সী মনিরুদ্দীনের আগ্রহে এ গ্রন্থ রচিত।

সেখানে আজিজখানা জানিবে হুজুর।
 নামেতে গোরাই শেখ দাদাজির নাম।
 বুজরগের বুজরগ তিনি বড় নেকনাম।।
 শেখ কিনু বারাজির এছমে শরীফ।
 চাচাজির নমু মেবা ছিল শেখ তারিফ।
 মুনশী আজাদিন মহাম্মদ মরহুমের
 সর্বদেশে নাম তার আছেত জাহের।
 তেনার ভতিজা মুনশী মনিরুদ্দিন নাম।
 খাহেস তাহার লিখি কেছা গোলান্দাম।।

আয়েজউদ্দিনও বহুগ্রন্থ প্রণেতা, তাঁর রচিত পুঁথিগুলোর নাম : সেকান্দরনামা, পীরবানু শাহজাদী, আলেকলায়লা (অংশ), সতীবিবির কিসসা, মালধুকন্যা ও মুরশিদানামা।

২১. মুহম্মদ আকবর আলী

১৩৩৪ বঙ্গাব্দে রচিত 'অতুল সুন্দরী' একটি ক্ষুদ্র রোমান্স। মেরছিপুর শহরের বাদাশ আর উজির উভয়েই একই দিনে পুত্ররত্ন লাভ করেন। বাদশাজাদার আর উজিরজাদার মধ্যে খুব বন্ধুত্ব। উভয়েই রূপবান—

'ছুরাত চান্দের মত ঝিকিমিকি করে।
 নগরিয়া নারীগণ দেখিয়া দোহারে।

লাগিল এক্ষের তীর আসিয়া বুকেতে।
 আসকে অবশ হৈয়া গিলে জমিনেতে।।

শাহাজাদার যখন বিয়ের বয়স হল ইস্পাহানের রাজকন্যা অতুলা সুন্দরীর সঙ্গে হল তার বিয়ে। শাহাজাদা নওয়াদর তার শ্বশুর ইস্পাহানের বাদশা থেকে মানুষকে 'কাকে' পরিণত করবার বিদ্যা শিখে নেয়। তারপর অতুলাসুন্দরীকে নিয়ে দেশে আসে। মন্ত্রীপুত্র অতুলা সুন্দরীর রূপে মুগ্ধ হয়ে তাকে পাবার জন্যে উপায় সন্ধান করে। সে কৌশলে বাদশাজাদা নওয়াদর থেকে কাকবিদ্যা (কাকচোর খেলা) শিক্ষা করে বাদশাজাদাকেই কাক করে ছেড়ে দেয়। কিন্তু রাজবধূ সতী অতুলাকে কোন প্রকারেই সে বশ করতে পারল না। অতুলা একদিন স্নান করতে গিয়ে কাকরূপী স্বামীর সাক্ষাৎ পেয়ে বহুকষ্টে তাকে আবার মনুষ্য রূপ দান করে

উজিরজাদা গিঠিকে রাখল পাঠা করে। আর-

রোজ রোজ মজরেতে সেই যে পাঠারে।

দশটি পয়জার গুণে মারে তার ছেরে।।

রচনার কোন বৈশিষ্ট্য নেই। কবি রাজদরবারে কাকরূপী নওয়াদরের মুখে হরিনন্দ্র রাজার কেছা বয়ান করিয়েছেন। কবির আত্মপরিচয়-

ময়সনসিংহ জিলা বিচে/সদর মহকুমা আছে/ থাকা কোতওয়ালি এলাকার।

বিজয়নগর গ্রাম বিচে/ একটু ঠিকানা আছে/ অধিনের বসতি সেখানে।

তেরশত চৌত্রিশ সালে/চান্দ্র জমাদিল আউয়ালে/পুথির তারিখ দিনু লিখে।

কেছা তামাম হইল/ রোজ শনিবার ছিল / কার্তিকের বারই তারিখে।।

আল্লা নবী ভেবে দেলে/ আকবর আলী বলে তরাইয়া লিবে পাক সাই।

২২. কাজী আমিনুল হক

পাকিস্তানের পুঁথি রচয়িতা কাজী আমিনুল হক। কবি বলেন :

‘মৌলানা ইমামুদ্দিন মোর বাবাজানে।

হামিদিয়া কুতুবখানা ঢাকা সহরেতে।

চরণেতে চুম্বি শত মির্জাপুর সাকিনে।।

স্বত্বাধিকারী জিনি আছেন তাহাতে

মাননীয় বিদ্যাবন্ত গোলাম আজম

পাকিস্তানের আন্দোলনে কিছু উপকার।।

লিখিবারে এই পুঁথি তাহার হুকুম।

পুঁথি শোতা আর পাঠক ইহাতে

জিন্নালীগ পাকিস্তানের বয়ান করিয়া।

লীগ ও পাকিস্তানের অর্থ পারে বুঝিতে

তাই তারাতরি দেই কেতাব লিখিয়া।

হবে আনন্দিত দীনের অন্তর শতেক।

ইহাতে হয় লীগ যদি সামান্য প্রচার

এতে সূচনা, জিন্নার পরিচয়, মুসলিম লীগের বয়ান, পাকিস্তানের বয়ান ও পাকিস্তানের শেষকথা- এ কয়টি সর্গ রয়েছে। এগুলো পত্নীর নিরক্ষর মানুষের কাছে রাজনীতিক প্রচারণার জন্যে রচিত রাজনীতিক সাহিত্য।

সমাপ্তি এরূপ : পাকিস্তানে-

মিলিমিশি রহিবেন হিন্দু মুসলমানে।।

যাহা কিছু হইবার হবে জন মতে।

ভাত্ভাব হয়ে যাবে দেশের মাঝার।

স্বার্থবাদী ডিষ্টেটার তথা না থাকিবে

দুঃখে সুখে সাথী হবে সকলে সবার

সাম্য ন্যায় গণতন্ত্র গঠিত হইবে।

বাধ্যতামূলক শিক্ষা পাকিস্তানে হবে।

কাজি কহে পাকিস্তানের বিচেতে নিশ্চিত।

সরকারী খরচেতে সকলে পড়িবে।

সবার স্বার্থ ন্যায়ভাবে হইবে রক্ষিত।।

শাসন চলিবে আর গণতন্ত্র মতে।

সমাপ্ত

আহকার কাজী মৌলবী আমিনুল হক সাং, মির্জাপুর জিলা চট্টগ্রাম ৪ঠা আষাঢ় ১৩৫৪ বাংলা।

মৌলানা মোহাম্মদ আকরম খানও প্রচারণার্থ পাকিস্তাননামা পুঁথি বের করেছিলেন।

আমিনুল হক চট্টগ্রামের অধিবাসী বলে দোভাষী রীতি অনুসরণ করতে পারেননি। চেষ্টা সত্ত্বেও ভাষা প্রায় বিশুদ্ধ বাঙলা রয়ে গেছে।

২৩. মোয়াজ্জম আলী

আমীর সদাগর ও ভেলুয়াসুন্দরী- তৈলঙ্গানগরে ভেলুয়ার নিবাস, পিতা মনুহর, মাতা ময়না। ভেলুয়ার সাত ভাই। ভেলুয়া সবার আদরের ধন। আমীর সদাগর বাণিজ্যে এসেছে তৈলঙ্গানগরে। শিকারে বের হয়ে সদাগর ভেলুয়ার পোষা কবুতরকে তীরবদ্ধ করে। আহত কবুতরের জন্যে ভেলুয়া কেঁদে কেঁদে অস্থির হয়ে উঠল। অনুসন্ধানে জানা গেল আমীর সদাগরের তীরেই কবুতর আহত হয়েছে। সাতভাই গেল আমীর সদাগরকে শাস্তি দিতে। উভয় পক্ষ কঁধা কাটাকাটির পরে গুরু করে দিল যুদ্ধ।

ভেলুয়ার মা আমীরের পরিচয় নিয়ে জানল, সে তার ভগ্নীপুত্র। বোনের সঙ্গে প্রতিজ্ঞা করেছিল উভয়ে হবে বৈবাহিক। এখন সেকথা মনে পড়ল। ওয়াদা রক্ষার খাতিরে যোগ্য বর আমীরের হাতে সমর্পণ করল কন্যা ভেলুয়াসুন্দরীকে। ভোলা নামের এক দুর্বৃত্ত ভেলুয়াকে হরণ করে নিয়ে যায়। ভেলুয়াকে 'দুষ্ট ভোলায় হরি নিল কাটলি নগর।' আমীর তার সঙ্গে যুদ্ধ করে ভেলুয়াকে উদ্ধার করে এবং সীতার ও খুল্লনার মতো ভেলুয়ার সতীত্বের পরীক্ষা হয়। সতীত্বের পরীক্ষায় উত্তীর্ণ হয়ে স্বামীর সঙ্গে সুখে জীবনযাপন করতে থাকে ভেলুয়া।

কবির ভাষা প্রায় বিশুদ্ধ বাঙলা, কিন্তু রুচি মার্জিত নয়। গ্রন্থের শেষ ভাগে কয়েকটি গান ও চাণক্য শ্লোক সংযোজিত হয়েছে। কবির বর্ণনাভঙ্গিও সুন্দর নয়। কবির ছন্দজ্ঞানও নেই।

২৪. সাহ সের আলী

কবির ও কাব্যের নাম অভিন্ন। ছহি সের আলী পুথির এমন অদ্ভুত নামকরণ হল কেন কুঝলাম না। গ্রন্থখানা ইসলামি অধ্যাত্মতত্ত্ব বিষয়ক। শরীয়ত-তরিকত-হকিকত-মারফত, আসক, মোকামমঞ্জিল, লতিফা প্রভৃতির স্তর-রূপিত হয়েছে। উদাহরণস্বরূপ বিবৃত হয়েছে কোন কোন নবীর কাহিনীও। লেখকের রচনার একটু নমুনা-

যদি কেহ মোলাকাত চাহেত খোদার। আশক সকল বান্দা মাস্তক পরওয়ারে।

বিনে আশকেতে নাহি পাইবে দিদার।। সে হবে ফকির তারে এই মত চাই।

আশক মাস্তক ভাই বলে কার তরে। এক্ষের পেয়ালা পিয়ে ভুলিবে দুনিয়াই।

পুথিতে কবি কোন আত্মপরিচয় দেননি। রচনাকাল জানা গেল না, বিশ শতকের তৃতীয় দশকের রচনা হওয়া সম্ভব।

২৫. এরাদৎ আলী

এঁর রচিত সূর্য উজাল বিবির আরম্ভ এরূপ :

আল্লা আল্লা বল ভাই যত মুমিনগণ। দেখিয়া আসমানের সূর্য সেই লজ্জা পায়।

সূর্য উজাল বিবির কথা শুনে দিয়া মন।। সূর্য উজাল বিবির এয়ছাই অঙ্গ লাল।

সূর্য উজাল বিবি যদি সূর্য পানে চায়। আসমানের চন্দ্র দেখে হয় ময়লা হাল।।

একদিন হানিফা তার পঞ্চবিবির সাথে খেতে বসে কথা প্রসঙ্গে অন্যতম বিবি জৈগুনের মুখে সূর্য উজাল বিবির [সূর্যের মতো উজ্জ্বল বা প্রদীপ্ত] রূপের কথা শুনে ফকিরের বেশে গৃহত্যাগ করেন তার উদ্দেশ্যে। 'বারকোট্টে আছে বিবি সূর্য উজাল। হানিফা সেদেশে গেল এবং বীরত্ব ও পৌরুষ দেখিয়ে সূর্য উজালকে পত্নী রূপে লাভ করলেন। এভাবে তিনি আগেও

পাঁচটি সুন্দরী লাভ করেছিলেন-

পহেলা করেছে সাদি মল্লিকা আকার । তারপরে করে সাদি বিবি সোনাভান ।
তারপরে করে সাদি জৈগুন সুন্দর ।। পবনকুমারী বিভা করে আপনার জোরে ।
সমর্তবানে করে সাদি জোরে পাহালওয়ান । এই পঞ্চ বিবি দেখ হানিফার ঘরে ।।
পুথিতে রচনাকাল বা কবির পরিচয় নেই । ভগিতা এরূপ :
তামাম হইল পুঁথি উপরে হানিফার । এরাদম বলেন নাম লেহ না আব্বাহ ।
একুশ পৃষ্ঠার এ পুথিটি শুধু 'পয়ারে' রচিত ।

ভগিতা বদল হয়ে এ পুথিটি মুনসী মোহাম্মদ বক্তার খাঁর নামেও বাজারে চালু রয়েছে ।
তবু মনে হয় রচয়িতা এরাদৎ আলীর আরো পুথি রয়েছে বক্তার খাঁ ভূয়া পুথিকার । বক্তার
খানের ভগিতায়ুক্ত পুথি হামিদিয়া প্রেস, চুড়িহাট্টা ঢাকা থেকে ৩১-১০-৪০ইং তাং মুদ্রিত ।
প্রকাশক আবদুল লতিফ আবদুল হামিদ চকবাজার কেতাবপত্রি, ঢাকা ।

২৬. মনিরুদ্দিন

'সুলতান সুফিয়ান সাহে এমরান চন্দ্রবান' একটি প্রণয়োপাখ্যান । কবি নামপৃষ্ঠায় লিখেছেন-
"প্রকাশ থাকে যে মুঙ্গী কমরুদ্দিন সাহেব আমার বন্ধু ছিলেন, এই পুথিখানা আমি রচনা করিয়া
তাঁহাকে ছাপিতে দিয়াছিলাম তিনি আমার নাম পরিকল্পিত করিয়া নিজের নামে ছাপিয়াছেন ।"
একথাগুলো পুঁথির শেষে পদ্যেও লিখিত রয়েছে । এরূপ প্রভারণা ও লেখাচুরি বটতলায় হর-
হামেশাই ঘটেছে ।

'লখব সহরে ছিল বাদশা সুফিয়ান' আশ্রয়ার কাছে প্রার্থনা করে তিনি একটি পুত্ররত্ন
পেলেন । জন্মের পর গণক বললো :
গুণি বলে গুন সাহা এই বিবরণ । তোমা হতে ভাগ্য যশ হইবেক অতি ।
হইবে আপনা পুত্র অতি বিচক্ষণ । কিন্তু এক কষ্ট দেখি গুন নৃপবর ।
পুঁথিবীতে যত শাস্ত্র সাধিবে কুমার । বার বছরের যবে হইবে উন্মদ ।
চারি কুটে হইবেক বাদসাই মাদার । স্বর্গ অপসরি এক নয়ানে দেখিয়া ।
চারিকন্যা বিবাহ করিবে মহামতি । দেওয়ানা হইয়া যাবে রাজ্য তেয়গিয়া ।।

রাজপুত্রের নাম এমরান । একপরী ভোজরাজকন্যা চন্দ্রবানের বেশ ধরে কুমারকে স্বপ্নে
দর্শন দান করে । ফলে এমরান দিওয়ানা হয়ে গৃহত্যাগ করে । অনেক কষ্ট ভোগ করতে হয় ।
কিন্তু সবকয়বারই অসাধ্য সাধন করে জয়ী হয় এবং কৃতিত্ব প্রদর্শন করে চার চার স্ত্রী নিয়ে
পিতৃরাজ্যে সুখে রাজত্ব করতে থাকে । তার চার স্ত্রীর নাম নুরবানু, চন্দ্রবান, মাণিক্যকেশরী,
ফুলমতী । রচনার নমুনা-

কন্যাদের সাজ :

সুবর্ণ জড়িত চাঁদ মাণিক্যের খোপা । কানেড়ে পিপলপাত সুবর্ণের বালি
রতন গুথিয়া দিয়া সাজাইল খোপা ।। লহরে ঝমকা শোনে কণ্ঠে চাপাকলি ।
সিতায় সিন্দুর সিতি পাটি মল মল । বাহু যোগে বাজুবন্দ করতে কাঙ্গন ।
কপালে তিলক ফোটা নয়ানে কাজল । কমরে ছিকল শোভে ভুবন মোহন ।
হাসলি হাসরা গলে রক্ত মুক্তাহার । চরণে নেপুর খাড়া মুকতা প্রবল ।
নাসিকাতে গজমতি মদন ঝঙ্কার । পরনে সোনালিসাড়ি অঙ্গে ঝলমল ।।

২. মনীর-মাহারুসুন্দরী- মুনসী মনিরুদ্দিন আলোচ্য মনীর-মাহারুসুন্দরী নামের প্রণয়োপাখ্যানের রচয়িতা বলে দাবী করছেন। তিনি নিজেই কমরুদ্দিন মুন্সীর বিরুদ্ধে পাঠক সমাজে জালিয়াতির অভিযোগ জানিয়েছেন। কিন্তু এ পুথির সর্বত্র অধীন বা অধীন গরীবের ভণিতা পাচ্ছি। এ গরীবুল্লাহ সম্ভবত 'দিলারাম' ও 'নেকবিবির বয়ান' রচয়িতা ঢাকাশহর নিবাসী গরীবুল্লাহ বেপারী। কবি মনিরুদ্দিন বিনয়বশে অধীন ও অধীনগরীব বলে আত্ম পরিচয় দিলেন কিংবা গরীবুল্লাহর পুথিই স্বনামে চালালেন, সে-সম্বন্ধে আমরা নিঃসন্দেহ হতে পারলাম না।

২৭. মুহম্মদ মুনশী

আলী ও দেলবাহারের কেছা এ প্রণয়কাহিনীটি একটি রূপক ভিত্তি করে গড়ে উঠেছে। আজমশহরে সুলতান আজম নামে এক বাদশা ছিলেন। তাঁর দুটো বেগম। উভয়েই নিঃসন্তান। আল্লাহর হুকুমে মাদার গাজী ফকিরের কাছ থেকে বাদশাহ এক মস্তপুত ফল পেলেন। ছোট বেগমকে না দিয়ে বড় বেগম গোটাফলটি নিজেই খেয়ে ফেলে। হিংসা করার কারণে সে গর্ভবতী হল না, অথচ উক্ত ফলের ছাল খেয়ে ছোট বেগম গর্ভবতী হল। ফলে তার আলি ও দেলবাহার নামে দুটো সন্তান হয়।

বয়োপ্রাপ্ত হয়ে শাহজাদাঘর দেশান্তরে চলে যায়। সেখানে নানা বিপদাপদ উত্তীর্ণ হয়ে নানা দুঃসাহসিক কার্য ও অসাধ্যসাধন করে, রাজকন্যা বিয়ে করে দেশে ফিরে আসে এবং বিমাতার 'গর্দান মেয়ে' মাতার প্রতি জুলুমের প্রতিশোধ নেয়। নিতান্ত বাজে রচনা। পুথির ভাষাকে বিকৃত উর্দু বলা চলে। পুথিতে দু'চারটি গানও আছে। একটি ভণিতা—

মহাম্মদ মুন্সী কহে পুথারি রচিয়া।

২. উম্মর উম্মিয়ার নকল ও ভোজের রাজী— এটি মোহাম্মদ মুন্সীর দ্বিতীয় কেছার পুথি।

'নৌসেরোঙা মদিনাতে করেন বাদশাহ। সাত মুল্লুকের বিচে ফেরেন দোহাই।

এই বাদশা নওশেরঙাকে কেন্দ্র করেই নায়ক উমর উম্মিয়া ও আমীর হামজার কতগুলো অলৌকিক ক্রিয়াকাণ্ডের কথা এই পুথিতে বর্ণিত হয়েছে। আরব্য উপন্যাসের হারুন অর রসিদ আর ভারতের ভোজরাজ ও উজ্জয়িনীরাজ বিক্রমাদিত্য এশিয়ার উপকথার উৎস্বরূপ।

এই পুথির প্রারম্ভে কবি পূর্বসূরী শাহ গরীবউল্লাহ ও সৈয়দ হামজা রচিত দস্তানে আমীর হামজার উল্লেখ করেছেন :

হৈয়েদ হামজা আর সাহা গরীবুল্লা
এদোনো শায়ের ছিল আলম উজালা।
যতদূর গেছে ভাই কবিতার হার
গাখিল কবি তাহার আমির হামজার।
না হবে না হইয়া তেয়ছাই রচনা
যে যাহা করিল তার না হবে তুলনা।
উর্দু বিচে চার জেলেদ কেছা আমিরের
তার বিচে দুই জেলেদ করিল জাহের।

আখেরির কেছা নাহি মিলিল তেনার।
তারপরে লিখি কিছু শোন বেরাদর।
আরজ করিয়া কহি জনাবে সবার।
উমরের কেছা মুখে খাহেস আছিল।
মনোমতে আল্লা তালী মেলাইয়া দিল
মহাম্মদ মুন্সী বলে ভরসা আল্লার।।
জবানে ইয়ারি দেহ কেছা লিখিবার।।

এ ছাড়া কবির পরিচয় বা রচনাকাল পুথির কোথাও পাওয়া গেল না। একটি ভণিতায় কবির মুরশিদের মোকাম জানা গেল 'মহাম্মদ মুনশী মোরসেদের পা তলে কানপুরে মোকাম যাহার।'

তার অন্যান্য রচনার মধ্যে রয়েছে ‘আমীর হামজার দাদ’ ও ‘বদিউজ্জামার লড়াই’ (প্রথম ও দ্বিতীয় বাল্যম)। কবির ভাষায় ১ম ও ২য় বাল্যামের বর্ণিত বিষয়— (এস্তেহার)

যে হইতে বদিওজ্জামা গায়েব হইল। বাপের লৈল দাদ কেমন ছুড়াতে।
 তেনার আহওয়াল যত এতে লেখা গেল।। লড়াই করিয়া কারে কয়েদ করিল
 জোলমাতে কি হইল বদিওজ্জামার। জোরেতে ধরিয়া কারে মুছলমান কৈল।।
 তামাম বয়ান এতে হইল প্রচার।। মহাম্মদ মুন্সী বলে সবাকৈ সালাম।
 ওম্মর উম্মিয়ার এতে বহুত নকল। এইবারে লেখা যায় দোছরা বাল্যাম।।
 শুনিলে রসিক লোক হইবে পাগল জোরে জোওয়ার সেই মত আমীরের।
 বদিওজ্জামাল মর্দ জোলমাতে হইতে। তুড়িল রাফস দেও ধরিয়া জোরেতে।

৩. মুহম্মদ মুনশীর শামনুরিমানের জঙ্গ কাহিনীও ‘শাহনামা’ থেকেই গৃহীত হয়েছে। জগদ্ধিখ্যাত বীর রোস্তুমের পিতামহ শামনুরীমানের অলৌকিক বীরত্ব ও অভিযানাদির কাহিনীই পুথির বর্ণিত বিষয়। বীর শামনুরীমানের পুত্র বীর জাল তার পুত্র রুস্তম তার পুত্র প্রসিদ্ধ বীর সোহরাব। এঁদের নিয়ে বহু রূপকথা উপকথা সৃষ্টি হয়েছে। সেগুলো মুসলিম জগতের সর্বত্র আজো ঘরে ঘরে অসংখ্য বাল যুবা বৃদ্ধ বনিতার আর রোমান্স-পিপাসু সরল চিত্ত মানুষের রস-পিপাসা চরিতার্থ করছে। এ নাতিবৃহৎ গ্রন্থে শামনুরীমানের নর-দানব-জীন-পরী-রাফসের সাথে রণ, প্রণয়, দিগ্বিজয় প্রভৃতি রোমাঞ্চকর-বিস্ময়কর দুঃস্বপ্নবৃত্তি অলৌকিক ও অসাধারণ সব ঘটনা বিবৃত হয়েছে। এককথায় এটি আমীর হামজা বা মোহাম্মদ হানিফা শ্রেণীর রোমান্স গ্রন্থ। পুথিটি মন্দ নয়। বর্ণনাভঙ্গী চলনসই। তবে কবিত্ব-মাধুর্যরহিত। পুথির নায়ক শামনুরীমান নায়িকা পীরদক্ত। উপনায়িকা আছে আরো কয়েকটি। কবির আত্মপরিচয় পুথিতে নেই।

রচনাকাল—‘কেছা তামাম হইল আল্লা নবী সবে বল

দোণ্ডা সবে দিবেন অধীনে।

বারশত নব্বই সালে রবিবার ফজর কালে

উনত্রিশা কার্তিক মাহা দিগে।’ অতএব ১২৯০ বঙ্গাব্দে

বা ১৮৮৩ খ্রীস্টাব্দে রচিত।

মুনশী মুহম্মদ পেশাদার পুথি লিখিয়ে। তাই জোড়াতালি দিয়েই তিনি বিভিন্ন পুথি রচনা করেছেন। নীচে উদ্ধৃত মহল ও নগরকন্যা অংশ অবিকৃতভাবে তাঁর কাঞ্চনমালার কেছায় ও স্থান পেয়েছে। রূপবর্ণনার কিয়দংশ পরীদক্তের বিয়ের সাজ :

কোমরেতে চন্দ্রহার/আহাকি বাহার তার/চন্দ যেন চমকে আছমানতে।

পায়েতে পায়জের দিল/আন্দারে উজালা কৈল/বাজে তাহে চরণ হেলাতে।

মেহেদি পায়ের বিচে / কিবাহার তাহে দিছে /কি কহিব রূপের তুলনা

সে চরণ রামন পেলে/পূজে তারে কুতুহলে/নাহি পূজে দেবতা আপনা।

কি কব তাহার ছাদ /যেন পূর্ণিমার চাঁদ/দপদপ জ্বলেন আন্ধারে।

রূপের ছুওয়ার যেন/ সাগর উথলে হেন/ এয়ছা রূপ বকশিল তাহারে।।

৪. কাঞ্চনমালার কেছা

‘আগুাব সহরে একছিল সওদাগর।

আগুাব বলিয়া নাম আছিল তাহার।।

তার সাতপুত্র। সর্বকনিষ্ঠপুত্র রূপচাঁদ অবিবাহিত রেখে তার তত্ত্বাবধানের ভার ছয় পুত্র ও

পুত্রবধূকে দিয়ে সওদাগর প্রাণত্যাগ করল। পিতার মৃত্যুর পর ছয় ভাই দীর্ঘ ছয়বছর বিদেশে বাণিজ্য করে বাড়ি ফিরে এসে ভাই রূপচাঁদের বিয়ের ব্যবস্থা করল। কালু ঘটক তৈমুসরাজার কন্যার সঙ্গে রূপচাঁদের বিয়ে স্থির করল। তৈমুসরাজার সাতকন্যা। এই সপ্তকন্যাই শাপভট্টা পরী।

এদিকি রূপচাঁদের ষড়্ ভ্রাতৃজায়া খেদ করে—

‘হায়রে রূপচাঁদ যদি সাদি বেহা করে।

ছয় জায় এই মত বলা কথা কের।

আমাদের পানে কভু না চাহিবে ফিরে।।

রূপচাঁদের জুদাইতে যাব মোরা মরে।।

তারা ভেবেচিন্তে রূপচাঁদকে বলল—

‘এই কথা কহ তেরা ভায়েদের তরে।

তাদের উদ্দেশ্যে—

কুচবর্ণ কন্যা আর চুল মেঘ বরণ।

এ রূপের কন্যা নাহি মিলিবে কখন।

না হইলে সাদি না করিব কদাচন।

বিভাওতি নাহিক হইবে রূপচাঁদের।।

কালুঘটক তৈমুসরাজকন্যা কাঞ্চনমালার ছবি নিয়ে সওদাগর-বাড়ি এল। ছবি পড়ল রূপচাঁদের ভাজদের হাতে। তারা রূপসী কন্যার ছবিটিকে ঈর্ষাবশে চুনকীলর সাহায্যে বিকৃত করে দিয়ে রূপচাঁদকে দেখাল এবং আর একটি মারাত্মক উদ্দেশ্যে রূপচাঁদকে তারা পরামর্শ দিল—

তোমার ভাবী স্বতর—

কাজেই—

‘দেবপুরে এগরে তার বড় যাদু জানে।

‘তোমার যে ভাইদিগ করে বিবরিয়া।

যাদুতে ভুলায়ে রাখে শত শত জনে।।

দুই চক্ষুতে সাত পুরু কাপড় বান্ধিয়া।

লিয়া যাবে মোর তরে সাদী দেলাইতে।

‘গোণক এক এনে মোরা, গোনাইয়া হাল তেরা, মালুম হইল প্রকারে,

ছয়মাস দুজনাতে, দেখা শোনা কোনমতে, করিবারে নাহিক পাড়িবে।

যদি দেখা শুনা হয়, এর মধ্যে দুজনায়, একজন, মরিয়া যাইবে।

রূপচাঁদ চোখে পট্টি বেঁধে বিয়ে করেছে। বৌকে দেখেনি, ভাজদের কথা মত সে ধরে নিল যে তার পরিণীতা কুৎসিত তো বটেই, তার উপর— একচক্ষু কানা তার একপদ খোঁড়া ফের তাতে। কাজেই এ রূপহীন স্বামীর থেকে উপেক্ষা পেতে ও জা’দের হাতে নির্মমভাবে লাঞ্চিত হতে থাকে। অবশেষে যখন সব কথা ফাঁস হয়ে গেল, তখন রূপচাঁদের ভাইরা ছয় বধূকে জীবন্ত পুঁতে হত্যা করল। তারপরে তারাও তৈমুস রাজার অপর ছয় কন্যাকে বিয়ে করে সুখী হল।

২৮. সাদ ও ওহাব

‘সহিদে কারবালা’ চার দণ্ডর বা খতে বিভক্ত। যুগ্ম রচয়িতা হচ্ছেন সাদ আলী ও আবদুল ওহাব। হযরত মুহাম্মদের ওফাত থেকে হানিফা-এজিদ নিধন অবধি এ পুথিতে বর্ণিত হয়েছে। পৃথক পৃথক ভগিতা থাকা সত্ত্বেও এ যৌথ রচনায় কার কৃতিত্ব বেশি বলা যায় না। আবদুল ওহাবের ভগিতাই বেশি। সম্ভবত ‘রাগমালা সতীময়না’ রচয়িতা চট্টগ্রামবাসী (মিরেরসরাই)

আবদুল ওহাব এবং আলোচ্য পুথির রচয়িতা একই ব্যক্তি। সাদ আলীরও অন্য রচনা আছে। এখানে আমরা সাদ আলী ও ওহাবের রচনার কিছু নমুনা দিচ্ছি :

হোসেনের পুত্র আবদুল্লাহর শাহাদৎ

হোসেন বলেন বাবা গুন দিয়া মন	লড়িতে লড়িতে শাহা বেতাব হইল
পানির বিহনে সবে যাইতেছি মারা	কুফিরা তলওয়ার মেরে সহিদ করিল।।
আবদুল্লা গুনিয়া এয়ছা চাচার মুখেতে	আবদুল্লা পৌছেন গিয়া বেহস্তখানায়।
আরবার লড়িবারে যান ময়দানেতে।	কহে হীন সাদ আলি ভাবিয়া খোদায়।।

কাসেমের শাহাদৎ

বেদেল হইয়া যত কাফের বেপীর	কাসেম পেয়াদা পাও দেখিয়া উম্মর।।
তীরের চোটেতে অঙ্গ করিল চৌচির।।	নেজা ঘোমাইয়া মারে ছাতির উপর,
ঝাকে ঝাকে তীর এয়ছা কাফের মারিল	এয়ছাই কুওতে গিধি নেজা মেরে ছিল
ঘোড়ার ওজুদ ছারা বাঞ্জারা হইল।।	ছিলা ছেদে পিঠে নেজা বাহির হইল।
জখমি হইয়া ঘোড়া গেরে জমি 'পরে।	কাসেম চলিয়া গেল বেহস্ত মাঝার
লাচার হইয়া সাহা নিচেত ওতরে।।	আবদুল ওহাবেরচে কেতাব ওতার।।

কবিতুলেশহীন একঘেয়ে রচনা। কারবালা কাহিনীতে গুরুত্বানুরূপ ককরণস সৃষ্টিতে কবিদ্বয় ব্যর্থ হয়েছেন।

২৯. শেখ ওমরউদ্দীন ও শেখ কমরউদ্দীন

'খয়রল হাসর' নামের পাঁচালী ভণিতা বদল হয়ে দুজনের নামে চলে। একজন সায়ের 'শেখ কমরউদ্দীন, অপরজন শেখ ওমরউদ্দীন। এ দুয়ের মধ্যে কে প্রকৃত রচয়িতা তা অনুসন্ধানসাপেক্ষ। ইতোপূর্বে আমরা কবি মনিরুদ্দিনের মুখে আমাদের আলোচ্য কবি শেখ কমরউদ্দিনের (পুস্তক প্রকাশক ও বিক্রেতা) বিরুদ্ধে জালিয়াতির নালিশ শুনেছি। এটিও তেমনি পছন্দ নিজের নামে চালিয়েছেন হয়তো।

শেখ কমরউদ্দীন এবং শেখ ওমরউদ্দীন সমমাত্রার ও সমাক্ষর বিশিষ্ট শব্দ, তাই ভণিতায় নাম বদল করাতে ছন্দপতন হয়নি।

দু'পুথির কোথাও কবির আত্মপরিচয় নেই। শেখ ওমরউদ্দীন ভণিতায়ুক্ত পুথির সাঁইত্রিশ সংস্করণ চলছে; কমরউদ্দিনের পুথিতে কোন সংস্করণ উল্লেখ নেই।

রচনার সামান্য নমুনা দিচ্ছি।	হাবিলের জন্যে কবিলের শোক :
হাবিলের ধড় লিয়া বালাতে বাকিয়া।	জানের দোসর ভাই আজ হারাইনু।
বনে বনে ফেরে কবিল কান্দিয়া।।	বনে বনে ফিরি আমি ভায়ের লাগিয়া।
পাগলের মত যেন হেসে হারাইল।	মরা ভাই আপনার গলেতে বাকিয়া।।
ভায়ের দেরেগ শোক কলেজা বিকিল।	হীন খাকছার কহে কমরউদ্দীন নাম।
আহারে প্রাণের ভাই নয়নের তারা।	(হীন খাকছার কহে ওমরউদ্দীন নাম)।
আপনার দোষে আমি হইনু যে হারা	

এ পুথিতে আদমসৃষ্টি থেকে কেয়ামত পর্যন্ত ইসলামি ধারার সংক্ষিপ্ত ইতিহাস বর্ণিত হয়েছে। সৈয়দ সুলতানের নবীবংশ বা শাহনামা ধরনে রচিত। রচনাকাল প্রভৃতি প্রয়োজনীয় কিছু পাওয়া গেল না।

৩০. মুহম্মদ সেকেন্দর আলী বোশারী

গহ্বর বাদশা ও বানেছা পরীর পুথি— একটি রোমান্স। এতে মানুষ পরী ও দৈত্যের সমবায়ে দারু-টোনা-যাদু-মন্ত্র প্রভৃতির সাহায্যে আলফলায়লার মতো কাহিনী সৃষ্টি করা হয়েছে। পশ্চিম দেশের বিখ্যাত বাদশার পুত্র গহ্বর বাদশা কাহিনীর নায়ক। বাদশা প্রথমে শহরবানু নাম্নী এক সওদাগরকন্যা বিয়ে করে। দ্বিতীয় পত্নী কলাবতী। এরপর একদিন শিকারে গেলে বিখ্যাত দৈত্য তাকে অপহরণ করে।

এদিকে কালাউজির সুযোগ পেয়ে সিংহাসন অধিকার করে রানী সহরবানুকে বিয়ে করে এবং গহ্বর বাদশার ছোটভাই সোনাতনকে কয়েদ করে। গহ্বর বাদশার ছোটরানী কলাবতীকেও কালাউজির প্রেম নিবেদন করে এবং সতীকলাবতী তার প্রস্তাব প্রত্যাখ্যান করায় তাকে বনে তাড়িয়ে দেয়।

এদিকে গহ্বর বাদশার সঙ্গে বানেছাপরীর প্রণয় জন্মে, মুংলা দৈত্য গহ্বরকে পরীস্থানে নিয়ে যায়, বানেছা কয়েদ হয়, গহ্বরকে জখা (যক্ষ) দৈত্য সাধুরে নিক্ষেপ করে, সেখান থেকে উদ্ধার পেয়ে অসত্যানগরে যায়, সেখানে গহ্বর কোতওয়াল বিধুর নাক কাটে, এক সওদাগরকন্যা 'তুক' করে গহ্বরকে প্রথমে বিভালা পরে পাখিতে পরিণত করে। সে পাখিকে বন্দী করে চপলা কন্যা, আবার ছাড়া পেয়ে শিকারীর হাতে পড়ে, কলপারী গহ্বরকে আবার মনুষ্যরূপ দান করে। এসব বহু বিষয় জয় করে গহ্বর বাদশা বানেছা পরী, পত্নীদ্বয় ও সন্তানাদি নিয়ে স্বদেশে ফিরে এল। উজির ও সহরবানুকে যথাযোগ্য শাস্তি দেওয়া হল। পুথিতে কবির পরিচয় নেই, নাম পৃষ্ঠা থেকে প্রকাশ কবির নিবাস পীরপুর। অন্যসূত্রে জানা গেল পীরপুর ঢাকা জেলার খিদিরপুর পোস্টাফিস অধীনস্থ একটি গ্রাম। পুথিখানি ৯-৪-৪১ ইং তাং মুদ্রিত। কবি সেকান্দর আলীর সৌন্দর্যবোধ আছে, কবিত্বের স্পর্শ থেকেও তিনি বঞ্চিত নন। মধ্যে মধ্যে কবিত্বের নিদর্শন আছে। রচনার নমুনা—

কলসী ভরিয়া কন্যা রহে দাড়াইয়া	সাহাজাদা দিগে ধনি আড়ে আড়ে চায়।
সাহাজাদার রূপ দেখে নয়ন ভরিয়া।	কোথা হতে আস নাগর এই বৃক্ষ তলে
সাহাজাদা কন্যাপানে না চায় আঁখি মেলি।	কামিনী পাগল করি বাড়ি বসেও জলে।
জল ভরি গৃহে কন্যা গেলেন তবে চলি।	মনে প্রাণে দু-নয়নে যার করি আশা
ঘড়া হাঁড়ি পাতিল যত গৃহে কিছু ছিল	ফুলের মধু নাথ রাং যেন শিশ।।
জল দিয়া পূর্ণ করি সকলি ভরিল।	যৌবন ফুরাল মোর না বসিল অলি।
তাড়াতাড়ি সরোবরে আসে আর যায়।	কে করিব মধুপান কারে দিব জালি।

৩১. মনওয়ার আলী

আলমাস ও গোলরায়হান— নামেই প্রকাশ এটি একটি আখ্যায়িকা, তবু কবি বলেন—
 তাওয়ারিখ বিচে জান লিখিল এছাই। বাদসাদের হকিকত লেখা জাতে থাকে।
 তাহার তরজমা এহি সবাকে শুনাই।। আরবিতে তাওয়ারিখ কহেন তাহাকে।

তারপর বলেছেন—

পাশী ভাষাতে পূর্বে ছিল এ কেতাব আত্মম হুমজ হৈতে আছিল হেজাব
তাহা বাদে হিন্দি বিচে তরজমা হইল ।

চজিতারামপুরের ফজর আলী ভূঁইয়ার পুত্র কবির বন্ধু মুনশী মনসুরের আগ্রহে কবি এ কিসসা বাঙলায় তর্জমা করেন। কবির পিতামহের নাম পিতাগাজী ভূঁইয়া, পিতার নাম নকড়ি ভূঁইয়া, কবির নিবাস ত্রিপুরা [বর্তমান কুমিল্লা] জেলার কাঞ্চনপুর গ্রামে।

পুথির রচনা কাল— আলমাছ গোলের কেছা হইল তামাম।

বারশত নক্বই সালেতে বাঙ্গালার। তেরশত এক সাল হিজরীর সন।
নবমেতে বাণে বাণ গুণে মঙ্গলার। নেত্র চন্দ্র রিতু চন্দ্রজোগেতে গনন।।

গল্পের কাঠামো এই ‘বোগদাদের বাদশা ফিরোজ মিরজান ছয়টি স্ত্রী গ্রহণ করলেন, তবু পুত্র লাভ করলেন না। অবশেষে এক পীর ‘মর্দ’ স্বপ্নে বাদশাকে বলে দিলেন মিসর রাজকুমারীকে বিয়ে করলে তার গর্ভে সন্তান লাভ হবে।

বাদশা মিস রাজকুমারীকে বিয়ে করলেন। এবং যথাসময়ে পুত্র আলমাসের জন্ম হল। এই আলমাস হচ্ছে আখ্যায়িকার নায়ক। গণকের মুখেই তার জীবনবৃত্তান্তের আভাস পাওয়া যাবে—
যখন শিশুর হবে যৌবন বাহর জহরে হালাক হইবে পছেতে খাইয়া। ...
এক নিশি শয্যা ‘পরে শয়ন করিবে। একশত আষ্ট সাল ওমর মাজেরা।
গন্ধর্ব কুমারী এক স্বপনে দেখিবে। দ্বাদশ বয়সের শিশু পরদেশে যাবে।।
এ স্বপন দেখিয়া সাহা উন্মাদ হইবে।। ক্ষুদ্র দুঃখ সুখ আষ্ট দশ যাবে।
অবশেষে যাবে শাহা মুলুক তেজিয়া একুনে ত্রিশ যবে বয়সে হইবে।।
পঞ্চরূপ রামা লই ফিরিয়া আসিবে।

পরীরাজ্য অমরাবতী গন্ধর্বলোক দৈত্যালয় প্রভৃতি নানাস্থানে বিপদাপদ অতিক্রম করে সাফল্যের নিদর্শনস্বরূপ পঞ্চসুন্দরী জমিলাবানু, সোনাতন, চন্দ্রবান, চন্দ্রআরা এবং গোল রায়হানকে বিয়ে করে দেশে ফিরে এল। কাহিনী গতানুগতিক।

এ কাব্যে গোলরায়হান পরীর বারমাসী রয়েছে। নমুনা :

প্রথমে বৈশাখ মাস নতুন বৎসর। সদায় শীতল অঙ্গ মীন যেছা জলে।
রমণী সবার হৈল উল্লাস বিস্তর। আমি অভাগির ক্রমে আছিল এছাই।
বঞ্চিত প্রিয়র সঙ্গে মন কৌতুহলে। বিরহ অনলে সদা জ্বলি হইনু ছাই।

৩২. বেলায়েত হোসেন

ফেছানায়ে আজায়েব বা জানে আলম আঞ্জুমনারা— ফাছানা-ই আজায়েবের ভূমিকায় কবি বলছেন—

‘বারশ’ পাঁচাত্তর সাল ছিল বাঙ্গালার সবার কদমে মোর ছালাম হাজার।
বারই শ্রাবণ মাস রোজ রবিবার। কিন্তু -বারশত উনাশীসাল বাঙ্গলার আখের
তামাম হইল কেতাব ফজলে খোদার। কেতাব প্রকাশ হল হুকুমে কাদের।

‘ফাসানা-ই-আজায়েব’ নামের ফারসি কাব্য অবলম্বনে এ রোমাঞ্চটি রচিত হয়েছে। ফারসি কাব্যটি পনেরো শতকের রচনা। সুফীরা আধ্যাত্মিক রূপক হিসেবে কাব্য-কাহিনীর ব্যাখ্যা

করতেন, যেমন তাঁরা লায়লী-মজনু, শিরি-ফরহাদ প্রভৃতি প্রণয়োপাখ্যানে অধ্যাত্মরূপক আরোপ করেছেন। কাহিনীটি সংক্ষিপ্তসার :

‘যোতন ছরহন্দে এক আচিল সহর। সে-শহরের বাদশা ফিরোজ বক্ত। শাহজাদা জানে আলম। ইনিই কাব্যের নায়ক। শাহজাদা বয়োপ্রাপ্ত হলে তার সঙ্গে মাহেতেলাত’ কুমারীর শাদী হয়, একদিন জানে আলম শিকারে গিয়ে এক ‘তোতা’ পাখি ক্রয় করে, সে তোতার মুখে শাহজাদী আঞ্জুমান আরার রূপ-লাবণ্যের বর্ণনা শুনে তোতা পাখিকে পদপ্রদর্শকরূপে নিয়ে গৃহভ্যাগ করলেন। পথ ভুল করে কিন্তু বিপদগ্রস্ত হয়। দ্বিতীয়বার যাত্রা কালে মালেকা মেহের নাগারের সঙ্গে তার প্রণয় জন্মে। জানে আলম তার এ ভ্রমণকালে পীর মর্দের সাহায্য ও সদিচ্ছা লাভ করেন। যাদু টোনা লড়াই প্রভৃতি পথের বিপদ পীরের সাহায্যে উত্তীর্ণ হয়ে মেহেরনাগারকে ও আঞ্জুমানআরাকে লাভ করে শাহজাদা জানে আলম স্বদেশে ফিরে এল এবং তিন বেগম নিয়ে সুখে রাজত্ব করতে থাকে।

কবির ভাষা মার্জিত নয়। কবিত্বলেশহীন গ্রন্থ। এ গ্রন্থ অনুবাদকালে বঙ্কু কবিকে পরামর্শ দেন :

মূলগ্রন্থে-

বোল চাল তাতে হয় ইছলামি তামাম।	এমত না হয় যেন আমা সবাকায়,
বোল চাল সব তুমি লেখ আমাদের।	মানে পুছে ফিরি মোরা পণ্ডিত সবায়।।
সকলে বুঝিতে পারে কি কহিব ফের।।	দিনেতে মেহনত করি ফোরছত না পাই।।
রঙ্গিন করিতে তুমি এই যে কাহিনী।	রুস্তেতে লিখিব আমি এই যে কেছায়।
শক্ত শক্ত লফজো কিছু না লেখ আপনি।	

‘বোল চাল সব তুমি লেখ আমাদের’-এর সহজ অর্থ এই যে বঙ্কু কবিকে খোষ্টা বাঙলায় কাব্য রচনা করতে অনুরোধ জানাচ্ছে। কারণ কবি এবং কবির বঙ্কু হাওড়া-হুগলীবাসী।

কবির আত্মপরিচয়- কবির প্রপিতামহের নাম এমাম বকশ জমাদার, পিতামহের নাম মুন্শী কফিলউদ্দীন। নিবাস ছিল ধনেখালির নিকটস্থ পিখা গ্রামে। পূর্বপুরুষের আদি নিবাস ছিল হুগলীজেলার সন্তোষপুরে।

৩৩. মোহাম্মদ রওশন আলী

দেলবাহার গোলে গোলজার- একটি প্রণয়োপাখ্যান। কাহিনী গতানুগতিক, কোন বৈচিত্র্য নেই। ভাষাও মার্জিত নয়। বর্ণনৈশলীও প্রশংসনীয় নয়।

টানদেশের বাদশা বহু-সাধনা করে পুত্ররত্ন লাভ করলেন।

সবারকার হইলেক দেলের আরাম। রাখিব আরামদেল নাম ফরজেন্দেব।

তাই, বাদশা নামদার খোশাল খাতের।

বয়োপ্রাপ্ত হয়ে সাহজাদা পারছের (পারস্য) শাহজাদী মালকা হোসেনবানুর তসবীর দেখে প্রণয়াসক্ত হয়ে পারস্য যাত্রা করেন। পথ থেকে লাল ও সবুজ পরী আরামদেলকে দারাব বাদশার মূলুকে নিয়ে যায়। সেখানে বাদশাজাদী রূপসী সনুবরের সঙ্গে দেলআরামের সাদী হয়। কিছুকাল পরে আরামদেলের সঙ্গে ছিমতনপরীর সাক্ষাৎ হয় এবং উভয়ের প্রণয় পরিণয়ে

সমাণ্ডি লাভ করে। আবার পারছের দিকে যাত্রা করল আরামদেল। পথে তেলসমাতের খপ্পরে পড়ে ময়ূর হয়ে থাকতে হল তাকে। বন্ধু মাহসুদ পারস্যে পৌছে শাহজাদী হোসেন আফরোজকে আরামদেলের তসবীর দেখিয়ে আরামের প্রতি তাঁর হৃদয়ে প্রেম জন্মাল। পারস্যের শাহজাদীর অগ্রহে পারস্যরাজের চেষ্টায় ময়ূররূপী আরামদেল আবার মনুষ্যরূপ প্রাপ্ত হয়। এবং কিছুকাল পরে আরামদেল ও হোসেন আফরোজের বিয়ে হয়। তিন বেগম নিয়ে বাদশা আরামদেল আরামে জীবনোপভোগ করতে থাকে। এ তিন রূপসী লাভ করতে তাকে দৈত্য ও মানুষের সঙ্গে কয়েকটি যুদ্ধ করতে হয়। পুথিতে কবির আত্মপরিচয় বা রচনা কাল দেওয়া হয়নি।

৩৪. শেখ আমিরউদ্দীন

মনসুর হালাজ ও শমস তবরজীর কেছা- ভূবন বিখ্যাত দু'জন সূফীসাধকের অলৌকিক ও অর্ধ ঐতিহাসিক জীবনবৃত্ত ও সাধনার কথা এ নাতিশুদ্ধ পুথিতে বর্ণিত হয়েছে। সাধারণের বিশ্বাস মনসুর অদ্বৈতবাসী ছিলেন। এবং শমস তবরজী বিখ্যাত সূফীকবি মসনবী রচয়িতা মৌলানা জালালউদ্দীন রুমীর পীর ছিলেন। এছাৎপত্তির বর্ণনা-

মাসা এখ মনুছরের কেছা ফারসিতে।
লিখিয়া ছিলেন কোন ফাজেল লোকেতে।
সেইতো রেছালা পের উর্দু জবানেতে
ইইল তরজমা কলিকাতা সহরেতে।

আবদুল খালেক নামে মৌলবী ছাহেব।
লিখিয়াছিলেন নজমেতে বেআয়েব।
সেই তো রেছেলা ফের এছলামি বাঙ্গালায়
লিখিতে এরাদা ইইল খাহেস আমায়।

কবির আত্মপরিচয়-

হীন আমীরুদ্দিন আমার নাম ভাই।
কলিকাতা শাহরেতে বসতি সদাই।।
কড়েয়া সাকিন, জেলা চব্বিশপরগনা।

ফকির খানার এই জানিবে ঠেকানা।
ওয়ালদের নাম মেরা শুন দিনদার।।
মরহুম মোহাম্মদ দুঃখি সবাকার।

প্রকাশক কবির পুথিখানি-

দেখিলেন শেখ জমরুদ্দি পড়িয়া।
শেখ জিয়াউদ্দিন বাপের নাম তার।
সুরু করিরেন লিয়া ছাপিবার তরে
বাঙ্গালা লোকের কেছা শুনিতে বাসনা।

বাড়ি তার বন্দিপুরে হুগলী জেলার।
হরিপাল খানার নাম জানিবেন ভাই।
তেকারণে বাঙ্গালাতে করিনু রচনা।।

৩৫. কাজী রায়হানউদ্দীন

গোলে আরজান- একটি রোমান্স। নামপৃষ্ঠায় কাজী রায়হানউদ্দীনের সঙ্গে মুনশী সাদুল্লা সরকারের নামও রচয়িতা হিসেবে উল্লেখিত হয়েছে। কিন্তু পুথির কোথাও সাদুল্লার ভণিতা পাওয়া গেল। সুতরাং আমাদের বিশ্বাস আদ্যন্ত রায়হানেরই রচনা। কাহিনীর সংক্ষিপ্ত কাঠামো :

পশ্চিম তরফে দেশ নামেতে রোখান। ফিরোজ আছিল নাম সেই ত শাহার।।

তার চার বেগম। কারো সন্তানাদি নেই। পীর-প্রদত্ত আম পুত্রার্থে চার বেগম মিলে খাওয়ার কথা। কিন্তু তিন বেগম মিলে সর্ব কনিষ্ঠাকে বঞ্চিত করল, যে-শিলায় ওরা আম পিষে খেয়েছিল, সে-শিলা ধোয়া পানি খেয়ে সর্ব কনিষ্ঠা অন্তঃসত্ত্বা হল। যথাসময়ে সে পুত্র প্রসব করল। সে-পুত্রের নাম রাখা হল জালাল আহমদ। এ-ই কাহিনীর নায়ক।

জমশেদ বাদশার বেটি আরজান তার কর্ণফুল হালিয়ে ফেলে। সে-কর্ণফুল পেল সমুদ্র ভ্রমণে গিয়ে শাহজাদা জালাল। কর্ণফুল দেখেই কর্ণফুলের অধিকারিণীর প্রতি জালাল আসক্ত হয়ে ওঠে। তারপর নানা বিপদ-টোনা-তেলেসমাত থেকে উদ্ধার পেয়ে এবং কয়েকটি যুদ্ধে জয়ী হয়ে জালাল রাজকন্যা আরজানকে বিয়ে করে দেশে ফিরে এল, তার সাহায্যকারী মকবুল ও জোবেদাকে বিয়ে করে হল সুখী। কবির আত্মকথা—

এই তক কেছা মেরা হইল বয়ান।... আম্মাজান খত মেরা লেখে এ প্রকার।
খেয়াল না রহে মেরা কেছা লিখিবারে হাকিমের জুলুমেতে দেশে থাকা ভার।
কেছা লিখিবারে মুখে না ছিল তাকত। যে প্রকারে পার কিছু টাকা পাঠাইতে।
কিরূপে থাকিবে দেশে ঘটিল আপত।। কাছে নদী দামুদর কি বলিব আর

হর সাল বান আসি করে ছারখার।

অবশেষে গুরু মুহম্মদের আগ্রহে কিসসা লেখা শেষ করেন কবি। ভণিতা :
রায়হান অধীন কহে ভাবিয়া রাব্বানা বালিপুর্ন স্বাক্ষরিনেতে যাহার ঠিকানা।
কবির এই সাময়িক কলম ত্যাগের কথা শুনে বোধ হয় সাদুল্লাও রায়হানের রচনায় ভাগ বসাতে চেয়েছিল।

রচনাকাল :

একুশে ফাল্গুনে কেছা গুরু করলাম। বড়নেক ছায়েতেতে তামাম হইল।
এগারই আশাঢ়েতে হইল তামাম। বারশ বিরশী সাল ছিল বাঙ্গালার।
আগে পিছে জান দুই জোমেরাত ছিল।

কবির ভাষা মার্জিত ললিত নয়। বর্ণনশৈলীও প্রশংসনীয় নয়। রচনার নমুনা : কালন্দর শাহার বেটি জোবেদার রূপ :

যৌবন জোয়ারে তার আসিয়াছে বাণ। যোগ ছেড়ে দিয়া সেহ করে হায় হায়।
ছুরত দেখিলে তার যোগী ভুলে যায় কালা নাগ এয়ছা বাল ছেরেতে তাহার
আশক জনার তরে ফাঁসীর আঙ্গার। আখি তার দেখে মৃগ সরমেন্দা হইল
নর গাছ আপনি তার চমক দেখিয়া লঙ্জিত হইয়া মনে বনে পলাইল।
শরমেন্দা হইয়া থাকে ছের বুকাইয়া।

৩৬. আবদুল গফ্ফার

নুরবক্ত নওবাহার— একটি নাতিদীর্ঘ রোমান্স। গ্রন্থে কবি দীর্ঘ আত্ম-পরিচয় দিয়েছেন। প্রয়োজনীয় অংশটি তুলে দিচ্ছি :

হাবড়া জেলার বিচে আমতার থানা আছে জানিবে যে সরহন্দে তার।
চন্দ্রপুর নামে গ্রাম তাহার মাঝেতে ধাম আমার পয়দাস সেই ঠাই।
গোলাম রসুল পিতা অতি দয়াশীল দাতা পুন্নির্কর্মে ছিলেন সদাই।
স্মরণ করি নিরাকার নুরবক্ত নওবাহার আরম্ভ করিনু রচিবারে।

কবির উদ্ভাদ মুনশী সাদতউল্লাহর আগ্রহে কবি এ কিসসা রচনা করেন। পুথির রচনা-তারিখ জানবার উপায় না থাকলেও নিম্নোক্তাংশ থেকে রচনাকাল অনুমান করা সম্ভব।

আবদুল গফ্যার বলে ভাবি করতার সমাপ্ত হইল নুরবক্ত নওবাহার।
আগে একবার ছেপেছিলাম এই পুথি।। বিক্রয় করিনু আমি আপনা ইচ্ছায়।।
এক্ষণেতে মহাম্মদ খাতের যে নাম। ইতি সন ১২৮৮ বার শও অষ্ট আশি সালে।
পুস্তকের সে কারবার করেন মোদাম।। দিলাম ২০ বিশেষ অগ্রহায়ণে খুশী হালে।।
এই পুস্তকের কাপি রাইট যে তায়।

কবি তাঁর কাব্যখানা বিতঙ্ক বাঙলায় রচনা করবার চেষ্টা করেছেন।

কাহিনী এই : আদম দেশের রাজা আলম হোরেরমান এক বাগান তৈরি করেন। পরীরা এসে বাগান থেকে ফুলচুরি করে নিয়ে যেত। কেউ ফুলচোর ধরতে পারে না। অবশেষে রাজপুত্র নুরবক্ত পরীদের সাক্ষাৎ পেল। রাজপুত্র নুরবক্ত প্রণয়িনী নওবাহারকে নিয়ে পরীরাজ্যের ইন্দ্রপুরীতে নানাভাবে কৃতিত্ব প্রদর্শন করে অবশেষে নওবাহার ও তার ভগ্নীদের বিয়ে করে ফিরবার পথে বহরার (বসোরা) রাজকন্যা গোলচেহারাকে শাদি করে স্বদেশে ফিরে এল। এসে ভাইদেরও ক্ষমা করে সুখে রাজত্ব করতে লাগল।

এ উপাখ্যানে ইউসুফ-জোলেখা কাহিনীর আংশিক ছায়া পড়েছে। ঐরূপ অপর দুখানা গ্রন্থ হচ্ছে কালুগাজী-চম্পাবতী ও শাহবীরবল-চন্দ্রভান।

৩৭. দারেমউল্লাহ

গোলে দেওগান্দা-এটি প্রণয়োপাখ্যান।

সোভাবাজারের বিচে চৌহারার কোনে।
গুনো যতো বেরাদর আরোজ আমার। ঠেকানা জানিবে মেরা কাপড়ের দোকানে
তরজমা করিয়া কেছা ফিরোজ সাহার।। খেদমতে খাদেম সেখ ছাএমল্লা নাম।।
গোলে দেওগান্দ বলে রাখিলাম নাম। পরগানে বলিয়া অস্ত্রি মোজাতে মকাম।।

সন ১২৬০। তাং ১৭ আষাঢ়।

গ্রন্থশেখে, কবি পিতৃপুরুষ ও বাসভূমির পরিচয় দিয়ে অবশেষে লিখেছেন—

কহে হীন দাএমল্লা দেলে হএ সাদ। গোলে দেও গান্দা নাম বেতারের দিনু।
কেছা ময়দান মেরা হইল আবাদ। বার সো সাইট সাল মাহে রমজান।
আরজুর দেলেতে আমি তরজমা করিনু। চাঁদের তারিখে পুথি হইলো তামাম।।

৩৮. আবদুল ওহাব

চট্টগ্রামের মীরেরসরাই থানার অন্তর্গত ওয়াহেদপুর গ্রামবাসী তাজুদ্দিন সারং-এর পুত্র আবদুল ওহাব (১২ই শ্রাবণ ১২৫৫ মধীতে রচিত) তাঁর রাগমালা নামের গ্রন্থের শেষে রাগনামা প্রণেতা রঘুনাথ-ভবানন্দ-দানিশ কাজীকে স্মরণ করেছেন :

প্রথমেতে দ্বিজ রঘুনাথ কবির। মধ্যে মধ্যে রচনা করিছে কত গান।।
মধ্যে মধ্যে ভবানন্দে গাহিছে সুন্দর।। নিয়ম করিয়া দিন সময় কাটনি।
তার পাছে দানিচ কাজি অতি জ্ঞানবান। কোনসমে কোন রাগে গাহিব রাগিনী।
সম্ভবত ইনিই শহীদে কারবালার যুগ্মলেখকের একজন।

৩৯. মুহম্মদ মীরন

এনায়েতুল্লাহর ফারসি কেতাব 'বাহার দানেশে'র অনুবাদ করেন কবি মুহম্মদ মীরন। এ গ্রন্থ রচনায় ইনি অনেক লোক থেকে উৎসাহ পেয়েছিলেন। গ্রন্থে আলাউদ্দিনে সন্তুপয়করের মতো সাতটি গল্প আছে। এক শাহজাদা একটি তোতাপাখীর মুখে রাজকন্যা বহরওয়ারবানুর রূপলাবণ্যের কথা শুনে দিওয়ানা হয়ে যায়। তাকে রাজকন্যার মোহ ছাড়িয়ে সুস্থ করবার জন্যে উপদেশচ্ছলে বাদশার আদেশে সাতজন সাতটি কিসসা বলেছেন। মুহম্মদ দানিশের জ্ঞানবসন্ত বাণীও এরূপ গল্পগ্রন্থ।

ভাষা সরল, স্বচ্ছন্দ ও সুন্দর। গ্রন্থ রচনার তারিখ—

সমাণ্ড হইল পুঁথি মিথুনের বাণে। চন্দ্রে দিবাকর অঙ্গে বেদ বেদ রয়।

ভাস্কর তনয় ভনে বেলা অবসানে।। সংক্ষেপে রহিল এই সনের নির্ণয়।।

ডক্টর সুকুমার সেনের মতে রচনাকাল ১২৪৪ সাল বা ১৮৩৭ খ্রীস্টাব্দ।

৪০. আবদুর রহমান

কবি আবদুর রহমান 'সুরুজ্জামাল' উপাখ্যানটির রচয়িতা। ইনি ফরিদপুরবাসী ছিলেন— অধীন রহমান কহে সবাকো ছালাম। জেলা ফরিদপুর বিচে আমার মোকাম।।

কাহিনী কাঠামো এরূপ— সুলতানের শাহজাদা সুরুজ্জামাল একপরীজাদীর প্রেমে পড়ে তাকে গোপনে বিয়ে করে। এদিকে তার পিতামাতা রাজা ও রানী দেখে শুনে দুদমেহের নান্নী পরমা সুন্দরী রাজকন্যার সাথে সুরুজ্জামালের বিয়ে দেন। সপত্নী বিদ্রোহবশে পরীজাদী বিয়ের রাতেই স্বামীর প্রাণহরণ করে। পতিব্রতা দুদমেহের তারপর বেহুলার মতো মৃতকে বাঁচাবার সাধনা করতে থাকে। বেহুলা যেমন দুর্গে শিবকে নৃত্যে তুষ্ট করে লখীন্দরের জীবন ফিরে পেয়েছিল, দুদমেহেরও তেমনি এক তোতাপাখীর সাহায্যে শাহ-পরীর (পরীরাজ্যের রানী) কাছে গিয়ে নালিশ জানাল এবং মিনতিতে শাহপরীর চিন্ত জয় করে স্বামীর জীবন ফিরে পেল। বেহুলা-লখীন্দরের অনুকরণে রচিত কাহিনীতে বিশেষত্ব নেই কিছু। তবু কবি বলেন— আবদুর রহমান বাণী পুষ্প মনোহর। গাঁথিয়া গলেতে পর যতো আছ নর।। ইনি গ্রন্থে কয়েকটি গানও পরিবেশন করেছেন।

পিরীতি-রতনে রাখিবে যতনে পিরীতি গলার হার।

পিরীতি করিয়ে যেইজন মরে সফল জীবন তার।।

কাব্যখানি উনিশ শতকের শেষার্ধ্বে রচিত হয়। কবির অপর রচনা হচ্ছে হাসেম কাজির পুথি'। কবির উপর দোভাষী পুথির প্রভাব পড়েনি। তিনি বিভক্ত বাঙলার কাব্য রচনা করেছেন।

৪১. ফকির মুহম্মদ

কবি ফকির মুহম্মদের ভণিতায় গরীবউল্লাহর ইউসুফ-জোলেখা ও সোনাভান বাজারে চালু রয়েছে বলে পূর্বে উল্লেখ করেছি। ঐর নিজের রচিত তিনখানি গ্রন্থও পাওয়া যায় : একটি ইমামচুরি, অপরদুটি মোবারকগাজীর পুথি ও মানিক পীরের গীত। শেখোক্ত পুথি দুটো 'পীর পাচলী' অধ্যায়ে আলোচিত হয়েছে। এখানে ইমামচুরির পরিচয় দিচ্ছি। পূতনা রাক্ষসী কর্তৃক শিশু কৃষ্ণকে হত্যার চেষ্টার অনুকরণে চৈতন্য ভাগবত প্রভৃতিতে চোর কর্তৃক বালক নিমাইকে হরণ করবার চমকপ্রদ কাহিনী যোজিত হয়েছে। কৃষ্ণ ও চৈতন্য হরণকাহিনীর অনুকরণে

মুসলমান লেখকগণের কেউ কেউ 'ইমামচুরি' কিসসা রচনা করেছেন। এতে বর্ণিত ঘটনা এরূপ – একবার হজরত মুহম্মদ কন্যা ফাতেমার বাড়ি বেড়াতে যান। আসার সময়ে হাসান ও হোসেনকে নিজের বাড়ি নিয়ে আসেন। তাঁর বাড়ি থেকে একদিন বালকদ্বয় নিকটস্থ বাজারে বেড়াতে যায়। সেখান থেকে নদীঘাটে যায়। বালকদ্বয়ের নয়নাভিরাম দেহ কান্দি দর্শন করে এক বিদেশী সওদাগর তাদের ভুলিয়ে জাহাজে তুলে নিয়ে পলায়ন করে, কিন্তু পরিণামে ধরা পড়ে। সদাগরের উদ্দেশ্য–

মহম্মদ বাদসা আছে লেব্ব সহরে।

ভেট দিব বালক আমি লইয়া তাহারে॥

বালকেরা জাহাজ দেখে উল্লাসিত হয়ে ওঠে–

জাহাজ দেখিয়া হাসেন এমাম দুই ভাই। বাহানা করিয়া আন জাহাজ উপরে।।
 এয়ছাই তামাসা মোরা কভু দেখি নাই।। খালাসি ইরাজে সাধু করিল ইসারা।
 পানির উপরে জাহাজ আজগৈবী ভাসে। সেই ঘড়ি সাধুর জাহাজ আইল কেনারা।।
 গলাগলি হৈয়া তারা দুই ভাই হাসে।। অবগত দুইভাই এত কিবা জানে।
 তখন, ইসারা করিল সাধু নায়ের লোকেরে। জাহাজের উপরে তখন হাসে মনে মনে।।

ফকির মুহম্মদের গ্রন্থ দুটো ১২৬৪ সালের তথ্য (১৮৫৭ খ্রীঃ) মুদ্রিত হয়।

৪২. জয়নুল আবেদিন

জয়নুল আবেদিনের 'আবু সামার পুঁথি' ১২৬৪ সাল বা ১৮৬৭ সালে মুদ্রিত হয়। আমাদের হাতে একটি 'কলমি পুঁথি' রয়েছে। এটাকে সম্বল করেই আলোচনা শুরু করছি। এটা তব্বের স্পর্শদুষ্ট একটি গল্পগ্রন্থ। আকারে বড় নয়। বর্ণিত বিষয় খোলেফায়ে রাশেদীনের আমলে কাজীর বিচারবিধি। কাজী তখন হযরত উমর। জয়নুল আবেদিনের রচনা বৈশিষ্ট্যবর্জিত। কবি পশ্চিমবঙ্গবাসী।

সদাচারও ধার্মিকতার জন্যে শেষ পর্যন্ত নায়ক আবুসামা :

বেহেশ্তের মাঝে আবু যাইয়া বসিল। আবু সামার পুঁথি এই হইল তামাম।
 ভগিছেন জয়নুল আবেদিন মুরসিদের পায়। যত মোমিন বল ভাই আল্লা নবির নাম।।
 নেকি জনার বদি যেন না করে খোদায়।।

ইতি সন ১২৬২ সাল। তারিখ ২৭ চৈত্র রোজ মঙ্গলবার। সম্ভবত এটা লিপিকাল। ঢাকাবাসী মুন্সী গরীবুল্লাহর [বেপারীর] নেকবিবির কেচ্ছার নাম পৃষ্ঠায় সায়ের হিসেবে জয়নুল আবেদিনের নাম বসানো হয়েছে, কিন্তু বইতে সর্বত্র রক্ষিত হয়েছে মুন্সী গরীবুল্লাহর ভণিতা।

অধম ফকির বা আদম ফকির কিংবা জয়নুল আবেদিন 'আবুসামার' পুঁথির কে প্রকৃত প্রণেতা নিঃসন্দেহে তা বলা যাবে না।

৪৩. আদম ফকির

আদম ফকিরের কহে এলাহির পায়।

আল্লানবী ভাব দিন রোজ বায়ে জায়।।

আদম ফকিরের অপর একখানি পুঁথি আমাদের কাছে আছে।

পশ্চিমবঙ্গের এই কবি 'জোহরার সওয়াল' নামে ইসলাম ধর্ম সম্পৃক্ত এক রূপকথা এক দরবেশের ও জোহরাবাবির কথোপকথনের মাধ্যমে বর্ণনা করেছেন। আবদুল্লাহর বা মালিকার হাজার সওয়াল, মুসার সওয়াল প্রভৃতি গ্রন্থের অনুরণে এ গ্রন্থ রচিত হয়েছে।

প্রশ্ন ও উত্তরের নমুনা- আরবার কহিল বিবি মনেতে ভাবিয়া।

মোর পবনের মকাম দেও বাতাইয়া।। পলষের মধ্যে দুনিয়া হৈব ছারখার।।

ফকির বোলেন বিবি সকলি অসার। মনের বসতি-রুহ- পবনের বসতি তোন।

তোনের এসতি থাকি শোনহ দিয়া মোন।। ইত্যাদি

কবি সম্ভবত উনিশ শতকের শেষার্ধ্বে বর্তমান ছিলেন।

৪৪. হাবিবুল হোসেন

ছহি বড় জঙ্গে সোহরাব রচয়িতা মুনসী হাবিবুল হোসেন সম্ভবত বিশ শতকের প্রথমদিকে তাঁর পুথিখানি রচনা করেন। প্রকাশকের বিজ্ঞাপন দৃষ্টে বোঝা যায় ১৩২৩ সালের পূর্বেও এ গ্রন্থ মুদ্রিত হয়ে প্রচারিত হয়েছিল। সোহরাব-রস্তুমের যুদ্ধবৃত্তান্ত বর্ণিত হয়েছে। বৈশিষ্ট্য কিছুই নেই। রচনা নমুনা :

রোস্তম বলেন বাদশা কি কহিব আর। নেজা গোর্জ তেগ তীর উপরে তাহার।।

ছোহরাব পাহলওয়ান দেখি বড় জোরওয়ান।। কিছু না আছে তারে করে আলম্পনা।

লোহা হৈতে শক্ত বেশি অজুদ তাহার। তেঁকরণে দেলে মেরা বহুত ভাবনা।।

সোহরাব নিহত হবার পর কবি যা বলেছেন, কবি ফাতেমার ভণিতায় তা মেলে :

অধীন হাবিব কহে এলাহি ভাবিয়া। কি তক্ লিখিব আর দেলে দর্দ পায়।

সোহরাবের হাল সব ব্যান করিয়া।। খেদেতে কলমে মেরা কালি না যোগায়।

৪৫. মনিরউদ্দিন

এক খাবনামার রচয়িতা মনিরউদ্দিন।

বাঙ্গালার লোক সবে তাহা নাহি জানে। বাঙ্গালা করিয়া দিনু সকলে বুঝিতে।

খোয়াব দেখিয়া থাকে দেল পেরেশানে। কহে হীন মনিরউদ্দিন অধম লাচার

এ কারণে আমি হিন্দি কেতাব হইতে। ঢাকা জেলার বিচে বসতি যাহার।

কবি আবার 'মুন্সী তাজউদ্দীনের ভাতিজা অধম'। বইতে বিভিন্ন রকমের স্বপ্নের ব্যাখ্যা দেওয়া হয়েছে। বিশ শতকে রচিত।

৪৬. খোন্দকার আজমতুল্লাহ

'ফাতেমার জহুরানামা বিবিকলসুন্মের মেজামান' গ্রন্থে বর্ণিত বিষয় হচ্ছে হযরত মুহম্মদের অলৌকিক ক্রিয়া বা মো'জেনা প্রভৃতি। ফাতেমার জহুরানামা নাম অসার্থক, কারণ ফাতেমার কথা খুব কমই আছে। রচনাকাল ১৩০০ সাল। কবি বলেন :

কলম ঘোড়ার বাগ জোরেতে ধরিয়া। কলম আমাকে মানা করে বারবার।।

খাহেসের মাঠে আমি দিনু চালাইয়া।। কাঁদিয়া কলম মেরা হৈল জারেজার।

লিখিতে খাহেস ছেফাত নবী মোস্তফার। রছুলের ছেফত লেখে হেন শক্তি কার।।

তবু কবির সাহস আছে। তিনি চেষ্টা করেছেন। কবির দীর্ঘ আত্মপরিচয়ের প্রয়োজনীয়াংশ তুলে দিচ্ছি :

আমার বাপের নাম/শুন যত গুণধাম/শাহা আতাউল্লা খোন্দকার।
আমি আজমতুল্লা হীন/বিদ্যাশূন্য তনু ক্লীণ/কেবল ভরসা পরওয়ার।।
আমার ঠিকানা ভাই/তাহারি লিখিয়া যাই/জেলা বগুড়া মসহর।
থানা তাতে শিবগঞ্জ /কোন বাতে নাহি রঞ্জ/গ্রাম খাড়াদান কৃষ্ণপুর।
কৃষ্ণপুর গ্রামে ঘর/শুন ওহে বেরাদর/এই পুথি করিনু রচনা।
রচনা কাল- বাঙ্গালা তেরশও সাল কার্তিক মাসেতে

খাতেমা হইল কেতাব জুম্মার রোজেতে।

৪৭. দোস্ত মুহম্মদ

জঙ্গনামা রচয়িতা শেখ দোস্ত মুহম্মদ সম্বন্ধে কালীকান্ত বিশ্বাস লিখেছিলেন- শেখ দোস্ত মুহম্মদ আপন গ্রন্থের কোনও স্থানে আত্মপরিচয় দেন নাই, আমরা অনুসন্ধানে যতদূর জানিতে পারিয়াছি তাহাতে কবির বাসস্থান এই রঙ্গপুর জেলার অন্তর্গত পীরগঞ্জ থানার অন্তর্গত বাগদুয়ার গ্রামে ছিল। কবি একজন পারস্য ভাষায় সুপণ্ডিত মৌলবী ছিলেন। সেখানে এখনও তাঁহার আত্মীয় স্বজনরা বসবাস করিতেছে। ... গ্রন্থখানি টুলিভাদহের ম্যারেজ রেজিস্ট্রার মীর সাফাতুলীর নিকটে পাইয়াছিলাম। ইহার পিতার নিকটে গ্রন্থকর্তা কবির পরিচয় জানিতে পারিয়াছি।' (প্রাঃ পুঃ বিঃ রঙ্গপুর সাহিত্য পরিষদ, পত্রিকা ১৩১৫ সাল ২য় সংখ্যা)। ভণিতা দৃষ্টে মনে হয় কবি গায়েনও ছিলেন :

দেখিতে দেখিতে রাত্র গোজরিয়া যায়। দোস্ত মুহম্মদ পুঁথি বিরচিয়া গায়।।

আবার 'কেতাব দেখিয়া দোস্ত মুহম্মদ বলে'। কবি সম্ভবত আটারো শতকের শেষপাদে বর্তমান ছিলেন।

৪৮. হানিফউদ্দিন মুহম্মদ

নছিহত বা সদুপন্যাস- বগুড়া জয়ভোগ নিবাসী হানিফউদ্দিন মুহম্মদ বিরচিত। ১২৯৫ সালে মুদ্রিত। বিভিন্ন বিষয়ের ঋণ কবিতার বই। লেখকের একখানা গদ্য রচনার নাম 'সারকথা বা তত্ত্বকথা'। এটা অধ্যাত্মরসপুষ্ট পুস্তিকা।

আরো অনেক কবির নামের তালিকা দিলাম এখানে :

১. রংপুর জেলার মটুকপুর নিবাসী আমীরুদ্দিন বাওনিয়া উনিশ শতকের প্রথম দশকে আমপারার পদ্যানুবাদ বের করেন। সম্ভবত এটিই প্রথম অনুবাদ।

২. রংপুরের পলাশবাড়ি এখনকার গাইবান্ধা জেলার একটি থানা। এর নিকটবর্তী বালাবামুনিয়া গ্রামের কবি রহিম বক্স 'গোলামিজান আপতাব দস্তান' নামে একখানি কেচ্ছার পুথি ১২৮৭ সালে মুদ্রিত করেন। কবি দোভাষীরীতি অনুসরণ করেছেন।

৩. দোভাষী পুথি 'ইমামসাগর' রচয়িতা বনিজ মুহম্মদ রংপুর জেলার কাকিনা সন্নিহিত গোপালরায় গ্রামের অধিবাসী ছিলেন।

৪. জাকাত রহমান (জাকাত বিষয়ক) ও 'বাবু মিঞার আলাপ' নামের প্রহসন রচয়িতা কাজী ফজলুর রহমান উনিশ শতকের শেষার্ধ্বে বর্তমান ছিলেন। ইনি কাকিনার জমিদারের ফারসি শিক্ষক ছিলেন।

৫. মোনাইয়াত্রা রচয়িতা নাজির মাসুদ সরকার। আদি রচয়িতা তেলেঙ্গা সাহা ফকির। এটি যাত্রাগান জাতীয় রচনা। রংপুর-বগুড়ায় বিশেষ প্রচলিত ছিল।

বগুড়ার কতকগুলো দোভাষী পুস্তকের ও রচয়িতার নাম : [রংপুর সাহিত্য পত্রিকা ৬ষ্ঠ ভাগ ১৩১৫ সাল থেকে।]

৬. হেকেন্দরছানি- আনারউদ্দীন খোন্দকার, বনভেটি,
৭. যোখোদেপাযোগেরগা'- ফতে মণ্ডল, যামিনী পাড়া, শিবগঞ্জ
৮. বাহারে আফছোছ- নিয়ামত আলি খাঁ, বানিয়া দীঘি, দুপচাঁচিয়া
৯. মফিদুল ইসলাম- } :নিফুদ্দিন মিয়া, মালতীনগর
১০. রসুলে বেদাতল
১১. নাছিহাতুল ইসলাম- কেরামত আলী, রামচন্দ্রপুর, শিবগঞ্জ
১২. ধোকাভঞ্জন- রইসউদ্দিন আহমদ, সারিয়াকান্দি,
১৩. কোছনায়ে সোরে কেয়ামত- মোহাম্মদ ইব্রাহিম, শিকারপুর
১৪. ইসলামের চারুশিক্ষা- ফকির মোহাম্মদ, মাটিডালি
১৫. নছিয়তনামা- আব্বাস আলী মিয়া, চকনিতন দুপচাঁচিয়া
১৬. দেল মনছব- মল্লিকা সরকার, হাসনাবাদ, সেরপুর
১৭. নছিয়তে রঙ্গরস বা কেছায়েজানবকস- আরদুস্তরউফ, তেবাড়িয়া নহাটা।

সম্ভবত বহুগ্রন্থ প্রণেতা হায়াত মাহমুদের প্রভাবে উত্তরবঙ্গে বিশেষ করে রংপুরে দিনাজপুরে আঠারো শতকের শেষপাদ থেকে বিশেষ করে উনিশ ও বিশ শতকে দোভাষী কাব্যের আদলে অনেকেই নানা বিষয়ে বড় ছোট মাঝারি কাব্য রচনা করেছেন। এরূপ কয়েকজন কবি ও কাব্য :

১৮. মীর শাহ মনোহর- জমির জঙ্গনামা, সকিনার চৌতিশা [১৮ শতক]
১৯. ফকির চাঁদ- রসুল বিজয় সৈয়দ সুলতানের অনুকারক]
২০. হাদী মুহম্মদ- তুরানশাহজাদার কিসসা [১৯ শতক]
২১. শাহ আশেক মাহমুদ- আশেক মতলবের কিসসা [১৯ শতক]
২২. শেখ আসমতউল্লাহ- ফুলমতিবিবির কিসসা [১৯ শতক]
২৩. গোলাম রসুল- ওফাতনামা ১১৯৭ বঙ্গাব্দ [১৭৯০ খ্রীস্টাব্দে রচিত]
২৪. হায়দরউল্লাহ- হাদিসবয়ান, কাজীনামা, সদাগরের কিসসা [১৯ শতকের শেষপাদে]
২৫. খায়েরউদ্দীন- আশিয়ানামা [১৯ শতক]
২৬. মুহম্মদ রফিক- ইসলামভেদ [ঐ]
২৭. আব্দুল সোবহান- দরবেশ ওয়ায়েজ ও জোবেদা খাতুন [১৯ শতক]

আবদুল করিম সাহিত্যবিশারদ সংকলিত আহমদ শরীফ সম্পাদিত এবং ঢাকা বিশ্ববিদ্যালয়ের বাঙলাবিভাগ প্রকাশিত পুথিপরিচিতি গ্রন্থের পরিশিষ্টে উনিশ-বিশ শতক অবধি মধ্যযুগের কবিদের ও শায়েরদের এবং তাঁদের রচিত গ্রন্থের তালিকা রয়েছে।

খ. কবিওয়ালা ও কবিগান

কথকতার মাধ্যমে ধর্মকথা ও রসবার্তা প্রচারের রেওয়াজ সুপ্রাচীন। শ্রুতিস্মৃতির সহায়ক হিসেবে এবং মাধুর্যসৃষ্টির লক্ষ্যে পদ্যে কথা বলার রীতিও প্রাচীন। হাজার বছর আগেও

আমাদের দেশে কথকরা রামশাচালী, ভারতপাচালী, রাধা-কৃষ্ণ, হর-গৌরী, বিষ্ণু-লক্ষ্মী প্রভৃতির পরিচায়ক ধামালী গান করত। ক্রমে এগুলোর সঙ্গে যুক্ত হয় গোপীচাঁদ ময়নামতী লাউসেন ধনপতি শ্রীমন্ত চাঁদ বেহলা লখীন্দর প্রভৃতির কাহিনী। এসব ছাড়াও নানা সাময়িক ও সমকালীন প্রাকৃতিক রাজনৈতিক সামাজিক এবং ঘরোয়া দ্বৈষ-দ্বন্দ্ব ও প্রণয়-বিরহ নিয়ে নানা গান-গাথা মুখে মুখে রচনা করেছেন গায়ের ও কথকরা। সে-ধারায় চাঞ্চল্যকর সাময়িক বিষয় নিয়ে রচিত লোককবির কবিতাও। পনেরো শতক থেকে যখন উক্ত বিষয়গুলো নিয়ে পাঁচালী লিখিত হচ্ছিল, তখনো কথকতার কিংবা গায়নের আসরের জনপ্রিয়তা হ্রাস পায়নি। [কেননা পাঁচালীগুলোও নৃত্যযোগে গীত হত]।

তখন মুসলমানরাও ইব্রাহিমবীর কুরবানী, আইয়ুববীর দুর্ভাগ্য, মুসা-নবীর সওয়ালা, মরিয়মবির কিসসা, ইউসুফ-জোলেখা, লায়লী-মজনু, শিরি-খুসরু, কারবালা, হাতেম তাই, আমীর হামজা, গাজী প্রভৃতি বিষয়ক কথকতার আসর বসাত। সেকালে কবিমাত্রেরই ছিলেন কথক ও গায়ক। তার লেশ ও রেশ রয়েছে উর্দু মোশায়েরায়।

সওয়ালা-জওয়াব বা প্রশ্ন-উত্তরের মাধ্যমে কথকতার রেওয়াজ আগেও ছিল। সওয়ালকে বা প্রশ্নকে বলে চাপান আর জওয়াবকে বা উত্তরকে বলে 'উত্তোর'। লোককবির অনুগত করে গাওয়া হতো বলে কথকতায় বা পাঁচালীতে আদরস ও অশ্লীলতা কমবেশী চিরকালই ছিল। তাই কৃষ্ণধামালী আর গুণধামালীর ঐতিহ্যও সুপ্রাচীন।

সেকালের দেশে-দুনিয়া আজকের মতো ছিল না। তখন রেডিয়ো-টিভি ও সংবাদপত্র ছিল না। ছিল না ছাপাখানা। অজ্ঞতা ও নিরক্ষরতা ছিল ব্যাপক। বৈজ্ঞানিক আবিষ্কারের অভাবে সুব্যবস্থা ছিল না যানবাহনের। কাজেই দেশ-দুনিয়া আজকের মতো তখনো অথও ও সংহত হয়ে ওঠেনি। তখন এই কথকরা এবং গায়েরাই ধর্মের কথা, ভাবের কথা, তত্ত্বের কথা, সাময়িক ঘটনার ও সমস্যার কথা, জগৎ-জীবন সম্বন্ধীয় জ্ঞানের কথা লোকসমাজে প্রচার করত। এদের মাধ্যমেই হত জনসংযোগ। জনশিক্ষার স্বেচ্ছাবৃত্ত দায়িত্ব ছিল এদেরই। সতেরো শতক অবধি দেশের লোকজীবনে ও জনসমাজে সাহিত্য, সংস্কৃতি ও সঙ্গীত চর্চার মাধ্যম ছিল এই কথকতার ও গানের আসর। কবি, কথক ও গায়ের ছিলেন লোক-শিক্ষক। ধর্ম, সমাজ, নীতি ও বিদ্যা বিষয়ক জ্ঞানদানই ছিল তাঁদের লক্ষ্য। সেই নিরক্ষরতার তামসযুগে শিক্ষার ও জ্ঞানের আলো জ্বালিয়ে রেখেছিলেন তাঁরাই। বিতর্কের মাধ্যমে যুক্তিপ্ৰয়োগে সত্যের উদ্ঘাটন ছিল তাঁদের অন্যতম কর্তব্য। গায়ের অজ্ঞ অশিক্ষিত মানুষের মনে সমাজ-চেতনা, ধর্মবোধ, সংস্কৃতিবাস্তা, কর্তব্যবুদ্ধি ও দায়িত্বজ্ঞান জাগিয়ে জিকিয়ে রাখতেন তাঁরাই। কাজেই লোকজীবনে তাঁদের ভূমিকা ছিল গুরুত্বপূর্ণ।

এমনি ধারায় আঠারো শতকের প্রথম পাদ অবধি চলছিল। কিন্তু বিদেশী বেনেদের দৌরাতে মুঘলশাসনের শৈথিল্যে বাঙালীর আর্থিক সামাজিক ও প্রশাসনিক জীবনে বিপর্যয় শুরু হয় আঠারো শতকের গোড়া থেকেই। এর ফলে লোকজীবনে কিংবা সামন্তসমাজে সুখ-স্বস্তি বা শান্তি-শৃঙ্খলা আর রইল না। জীবনের ও জীবিকার নিরাপত্তা হলো দুর্বল। মুদ্রামাধ্যমে আন্তর্জাতিক বাণিজ্যে সামন্ত-সমাজের বিলুপ্তি ঘটিয়ে নিম্নরঙ্গ নিয়মবদ্ধ জীবনে নিয়ে এল নতুন রীতি-পদ্ধতির অভিঘাত, তখন থেকেই নগর-বন্দর এলাকার জনজীবনে এল হতাশা বিকৃতি ও বিপর্যয়। এ সময়ে শহর-বন্দরের বেনে-ফড়ে-গোমস্তা-দালাল-দেওয়ান-আড়তদার প্রভৃতি

পেশাজীবীরাই প্রভাব-প্রতাপের নতুন মধ্যশ্রেণী। তখন কাঁচা টাকার চমকলাগানো চোখধাঁধানো ভেলকিবাজির নতুন খেলার শুরু। পলাশীর যুদ্ধের পরে ইংরেজ শাসনে তা প্রকটিত হলো চরম আকারে। পুরোনো সামন্তসমাজ গেল ভেঙে। শাহ-সামন্তের আশ্রয়ে ও প্রতিপোষণে যে-সব বিদ্যালয় ও যে-সকল কবি-পণ্ডিত লালিত হতেন, তাঁরা হয়ে পড়লেন নিরবলম্ব। শিক্ষা-সংস্কৃতি-কবিত্ব-পাণ্ডিত্য তখন বিপর্যয়ের ও বিলুপ্তির মুখোমুখি দাঁড়িয়ে। তবু বিপর্যস্ত জীবনেও দেহ-মনের জৈবিক চাহিদাও মেটাতে হয়। তাই এই বিপর্যয়কালে নগরে বন্দরে সাহিত্য-শিল্প-সংস্কৃতির ক্ষেত্রে এক বিকৃতমানস প্রকট হয়ে উঠতে থাকে। ভাঙা হাটে তখন আসর জমিয়েছে স্বল্পশিক্ষিত বিকৃতরুচির অকবির দল। কোলকাতার চুঁচুড়ার চন্দননগরের নগুরে শিল্পীরা তখন তাঁদের কুরুচি ও অক্ষমতা নিয়ে আসর দখল করেছেন। এই কবিরাই তুচ্ছার্থে কবিতাওয়ালাও নয়—কবিওয়ালা নামে অভিহিত হয়েছেন। সংস্কৃতিবান শিক্ষিতদের অবজ্ঞার স্বাক্ষর রয়েছে ঐ নামের মধ্যেই। তাঁদের তর্কের আসরে ধর্মকথা হোক আর প্রণয়কথা হোক—নির্বিচারে অশ্লীল ও আদিরসের বন্যা বইয়ে দিতেন তাঁরা। এই কুরুচির পঙ্কসৃষ্টির জন্যে শহর-বন্দরের শোভাও ছিল দায়ী। এভাবে চলল প্রায় শতক বছর, মোটামুটিভাবে বলতে গেলে ১৭৬০ থেকে ১৮৬০ অবধি। এর মধ্যে সৃষ্টি হল অশ্লীল খেউড়, আখড়াই, হাফ আখড়াই, টপ্পা, প্রণয়সঙ্গীত, ভজন, পাঁচালী প্রভৃতি। এ শত বছরের কবিগান আমাদের দুর্যোগের দুঃস্বপ্নের দুর্দিনের ও দুর্ভাগ্যের সাক্ষ্য হয়ে রয়েছে। তখন কবিওয়ালার ও কবিগানের সমঝদার ছিল স্বল্পবিদ্যার ও স্থূল রুচির নতুন ধনী বেনে-ফড়ে-দালাল-দেওয়ান।

তারপরও কবিগান মরেনি। হিন্দু-মুসলমানের পরিচর্যা ও পরিশীলনে তা আজো ঈষৎ ভিন্নভাবে বেঁচে বর্তে রয়েছে। প্রতীচ্য শিক্ষার বিস্তারের ফলে এদেশের জনজীবনেরও সুরুচি ও সুমতি ফিরে আসে। তখন থেকে কবিওয়ালারা তথা কবিয়ালারাও আবার লোকশিক্ষকের গৌরবময় ভূমিকা পালন করছেন।

তাঁদের সর্ববিষয়ক জ্ঞান তথা সর্বাবিদ্যায় বুৎপত্তি, তাঁদের প্রত্যুৎপন্নমতিত্ব, তাঁদের ন্যায়-প্রয়োগ পটুতা, তাঁদের তর্কনিষ্ঠা, বাকপটুতা, বাকপ্রতিমা নির্মাণের আশ্রয় কৌশল এবং পদ্য রচনার বিস্ময়কর দ্রুততা আমাদের অভিভূত করে। দুই প্রতিপক্ষের বিতর্কে ও ঘোটকে সত্য উদ্ধাসনের আশ্রয় কুশলতা আমাদের বিস্ময়ের বিষয়। যদিও রেডিও সিনেমা ও সংবাদপত্র জনপ্রিয় হয়েছে, তবু কবিরাল ও কবিগানের উপযোগ আমাদের দেশে আজো কম নয়। তাঁরা কেবল ঘরের ও ঘাটের কথাই জানান না, শুধু জীবনের সমাজের ও ধর্মের কথাই বলেন না, বিশ্বের যাবতীয় বিষয়ের—যথা শিক্ষা সংস্কৃতি অর্থনীতি বিজ্ঞান রাজনীতি প্রভৃতির সমস্যাও—আলোচনা করেন। জগতের হেন বিষয় কমই আছে, যাতে তাঁদের বলার অধিকার নেই। এই নিরক্ষরের দেশে কবিরালরা তাই আজো লোক-শিক্ষক, জনজীবনের চারণ কবি।

আঠারো-উনিশ শতকের বন্দর-নগরের কবিওয়ালা

কোলকাতার মুসলিম সমাজে দোভাষী শায়েরের উদ্ভবপ্রসঙ্গে আমরা দেশ-কালগত কারণ ব্যাখ্যা করবার চেষ্টা করেছি। ব্রিটিশ কোম্পানীর নতুন রাজস্ব-ব্যবস্থার ও মুদ্রানির্ভর বাণিজ্যনীতির আকস্মিক প্রয়োগের পুরোনো গ্রামীণ পণ্য বিনিময় ব্যবস্থা ও সামন্তসমাজনীতি দ্রুত ভাঙছিল। এর জন্যে গণমানুষের যে-মানস ও ব্যবহারিক প্রস্তুতি প্রয়োজন ছিল, তা তারা গ্রহণ করতে পারেনি, ফলে নষ্ট হল সামন্তব্যবস্থার স্থিতি ও স্বস্তি, কিন্তু নতুন কোন স্পষ্ট

ব্যবস্থায় স্থিতি পাওয়ার ও স্বস্থ হওয়ার আশ্বাসও ছিল অনুপস্থিত। পুরোনো অপস্ময়মান আর নতুন তখনো অস্পষ্ট ও অনিশ্চিত।

নতুন পুরাতনের সেই গোধূলি লগ্নে সাধারণ মানুষের অবস্থানের, চিন্তা-চেতনার ও কর্ম-আচরণের কথা বলেছেন রবীন্দ্রনাথ তাদেরকে দিবা-রাত্রির মিলন ক্ষণের উদ্ভূত পতঙ্গের সঙ্গে তুলিত করে।

সৃষ্টিশীল গাইয়েরা বাজিয়েরা শায়েরেরা কবিওয়ালারা সামন্ত-প্রতিপোষণের আশা হারিয়েছে, অভিজাত্যকামী নতুন সদাগর-টিকেদার-বেনে-ফড়ে-দালাল-দেওয়ানের আশ্রয়প্রার্থীরা প্রতিপোষণবাহুয় পুরোনো বন্দরনগর ও নতুন রাজধানী শহর কোলকাতায় এসে ভীড় জমাল। মান-যশকামী নতুন কর্তারাও রসিক হয়ে উঠল বটে, কিন্তু ঐতিহ্যের অভাবে রস উপভোগের চালু কাযদা জানা ছিল না তাদের, জানা থাকলেও স্থানভেদে ও শহুরে জীবনযাত্রার পদ্ধতিভেদে সম্ভব হয়নি পুরোনো রাগ-তাল-মান চালু রাখা। কাজেই কালান্তরের গোধূলি লগ্নে কোলকাতা শহরের উপকণ্ঠবাসী গাইয়ে-বাজিয়েরা হাটাপথে জীবিকা-সন্ধানে কোলকাতায় এসে ধনীরসিকের পার্বণিক ও মৌসুমী রসপিপাসা চরিতার্থ করার কাজে লেগে গেল। শায়েরদের ও কবিওয়ালাদের পুরোনো রীতির শিক্ষার ও সংস্কৃতির প্রতি ছিল অবহেলা অর্থকর নয় বলে। নতুন শিক্ষা সংস্কৃতিও চালু হয়নি। তাই নতুন অস্পষ্ট পরিবেশে তাঁরা ছিলেন কিংকর্তব্যবিমূঢ়। ফলে তাঁদের অবস্থা তখন না ঘরকা বা ঘাটকা- ঘরেও নেই ঘাটেও নয়- অনিশ্চিত মাঝখানে। তাই এসব রচনা ভাব-ভাষার ও চিন্তা-চেতনার দিক দিয়ে তুচ্ছ। এগুলো আমাদের দুর্দিনের দুর্ভাগ্যের সাক্ষ্য-প্রমাণরূপে ঐতিহাসিক দলিল হিসাবেই কেবল মূল্যবান। ১৭৬০ থেকে ১৮৬০ খ্রীস্টাব্দ অবধি কোম্পানীর দৌরাভ্যেয় এ সময়-পরিসর ছিল বাঙলার ও বাঙালীর কালরাত্রি।

রবীন্দ্রনাথও কবিওয়ালার ও কবিগণের মূল্যায়নে অপ্রিয়সত্য উচ্চারণ করেছেন; “কিন্তু ইংরাজের নতুন সৃষ্ট রাজধানীতে পুরাতন রাজসভা ছিল না, পুরাতন আদর্শ ছিল না। তখন কবির আশ্রয়দাতা রাজা হইল সর্বসাধারণ নামক এক অপরিণত জ্বলায়তন ব্যক্তি এবং সেই হঠাৎ-রাজার সভায় উপযুক্ত গান হইল কবির দলের গান। তখন যথার্থ সাহিত্যের রস আলোচনার অবসর, যোগ্যতা এবং ইচ্ছা কয়জনের ছিল? তখন নতুন রাজধানীর নতুন সমৃদ্ধিশালী কর্মশ্রান্ত বণিক সম্প্রদায় সন্ধ্যাবেলায় বসিয়া দুইদণ্ড আমাদের উত্তেজনা চাহিত, তাহারা সাহিত্যরস চাহিত না।”

আর কবিওয়ালারও “পূর্ববর্তী গুণীদের গানে অনেক পরিমাণ জল এবং কিঞ্চিৎ পরিমাণে চটক মিশাইয়া তাহাদের ছন্দোবন্ধ সৌন্দর্য সমস্ত ভাঙিয়া নিতান্ত সুলভ করিয়া দিয়া, অত্যন্ত লঘুসুরে উচ্চৈঃস্বরে চারি জোড়া ঢোল ও চারি খানি কাঁসি সংযোগে সদলে সবলে চীৎকার করিয়া আকাশ বিদীর্ণ করিতে লাগিল... তাহার মধ্যে লড়াই এবং হারজিতের উত্তেজনা থাকা আবশ্যক ছিল। সরস্বতীর বীণার তারেও ঝনঝন শব্দে ঝংকার দিতে হইবে আবার বীণার কাণ্ডদণ্ড লইয়াও ঠকঠক শব্দে লাঠি খেলিতে হইবে।” রচনা শিল্পোত্তীর্ণ না হবার কারণ ‘এই গানগুলি ক্ষণিক উত্তেজনার জন্য উপস্থিতমত রচিত।’

বঙ্কিমচন্দ্র চট্টোপাধ্যায় রামবসুর হরুঠাকুরের ও নিতাইদাসের কোন কোন গীতের তারিফ করেও বলেছেন : “কিন্তু কবিওয়ালাদিগের অধিকাংশ রচনা অশ্রদ্ধেয় ও অশ্রাব্য সন্দেহ নাই।” ঈশ্বরগুপ্ত ব্যতীত উনিশ শতকের কোলকাতার আর কেউ করিগানে গুরুত্ব দেননি, কবিওয়ালার প্রতি শ্রদ্ধারভাব পোষণ করেননি। প্রায় সবাই জঘন্য রুচির ও রসের নিন্দা করেছেন। ইংরেজি

শিক্ষিতদের ঘৃণা এবং ক্ষোভ ছিল তীব্র। কবিকে কবিভাওয়ালাও নয়, কবিওয়ালা আখ্যাত করার মধ্যেই এ তীব্র ঘৃণা ক্ষোভ অবজ্ঞা সুপ্রকট।

তবু মানুষের কোন আন্তরিক প্রয়াস, কোন প্রাণের অকৃত্রিম প্রকাশ, কোন হৃদয়ের নিঃসঙ্কোচ অভিব্যক্তি কখনো ব্যথা বা ব্যর্থ হয় না, সত্যের ও অনুভবের অকৃত্রিমতার জোরেই তা অপরের মর্মগ্রাহ্য হৃদয়বেদ্য হয়। কবিওয়ালাদের কারো কারো কিছু রচনাও তাই সাহিত্যপদবাচ্য এবং শিল্পোত্তীর্ণ।

কবিগানের বিষয়বস্তু ধর্ম ও শাস্ত্র সম্পৃক্ত। হরগৌরী রাধাকৃষ্ণ বিষয়ক তত্ত্বকথা ও জীবনকথা এবং লীলারস বিতর্ক-প্রতিযোগিতার মাধ্যমে শোনানো ও প্রচার করাই ছিল লক্ষ্য। কাজেই এতেও সুপ্ত রয়েছে লোকগীতির মাধ্যমে লোকশিক্ষা দানের বাঙ্গ। তবে স্বল্পশিক্ষিত রুচিহীন লোকের মনোরঞ্জন মানসে নিম্নরুচির কবিওয়ালা-রচিত এ সব গান বা কথা ব্যজস্বতি হয়ে উঠেছে প্রায় তাঁদের অজ্ঞাতেই। প্রতিপক্ষকে জন্ম করাই যেখানে বিতর্কের আপাতলক্ষ্য ও তাত্ক্ষণিক প্রয়োজন সেখানে স্বল্পযুক্তি অটেল কুকথায়ুক্ত হওয়াই স্বাভাবিক। কথার তোড়ে রসের তরঙ্গে রঙ চড়ানোর তাগিদে দেবকথাও ক্রমে ইতর রঙ্গরসকথার রূপ নিয়েছে। ফলে কবিগান, সখীসম্বাদ, বিরহাকৃতি ক্রমে খেউরে, হাফ আখড়াইতে, আখড়াইতে ভাঁড়ামিতে, টপ্পাতে, রাগবিলাসে অবসিত হয়েছে। অবশ্য গীতগোবিন্দ, শ্রীকৃষ্ণ-কীর্তন, হরিবংশ প্রভৃতিতে এবং গ্রামাঞ্চলের ধামালী-ঝুমুর-গম্ভীরা প্রভৃতিতে আদিরসের ঐতিহ্যও সুপ্রাচীন। কাজেই এ শহুরে কবিগানের অশ্লীলতা কিংবা রুচিবিকৃতি এদেশে নতুন ছিল না। কাজেই কবিগান প্রায় উন্মেষকাল থেকেই প্রশস্তি [গুরু-দেবগীত....] সখীসম্বাদ, বিরহ ও খেউর দিয়ে শুরু।

গোঁজলা গুই, ভবানীবণিক, রাসু-নৃসিংহ, হরুঠাকুর, কেঁটামুচি, নিতাই বৈরাগী, রামবসু, যজ্ঞেশ্বরী, ভোলাময়রা, অ্যান্টনী ফিরিঙ্গি, নিধুবাবু (রামনিধিগুপ্ত), মোহনচাঁদ শ্রীধরকথক, রূপচাঁদ পক্ষী, দাশরায় প্রমুখ কবিওয়ালা কবিগানের ক্ষেত্রে নানা গুণে দানে যশে অমর হয়ে রয়েছেন।

আঠারো শতকের দ্বিতীয়ার্ধের গোড়ার দিকে কবিওয়ালা যারা ছিলেন, তাদের মধ্যে কেবল গোঁজলা ও তাঁর তিন শিষ্যের—রামজীদাস, লালনন্দলাল, রঘুনাথ দাস—নাম আমাদের কাল অবধি অবিলুপ্ত রয়েছে। আঠারো শতকের প্রথমার্ধেও কবি গান ছিল কি-না জানা নেই। ছিল অনুমান করলে তা পাঁচালী-কথকতার কিংবা যাত্রার অঙ্গীভূত ছিল বলে অনুমান করতে হবে।

গোঁজলা গুইর পরেই পাই কয়েকজন প্রখ্যাত কবিকে, এঁরা হরুঠাকুর, নিতাই বৈরাগী, রামবসু, ভোলাময়রা ও অ্যান্টনী ফিরিঙ্গি। উনিশ শতকের আর যারা খ্যাত প্রখ্যাত ছিলেন রাসু-নৃসিংহ, লক্ষীকান্ত বিশ্বাস, লালু নন্দলাল, রঘুনাথ দাস, নিধুবাবু, কৃষ্ণচন্দ্র চর্মকার (কেঁটামুচি) নীলমণি পাটনী, কৃষ্ণমোহন ভট্টাচার্য, সাতুরায়, গদাধর মুখোপাধ্যায়, ঠাকুরদাস চক্রবর্তী, জয়নারায়ণ বন্দ্যোপাধ্যায়, রাজকিশোর বন্দ্যোপাধ্যায়, গোরক্ষনাথ, নীলুঠাকুর, লক্ষ্মীনারায়ণ, মোহন সরকার, পরাণচন্দ্র সিংহ ভীমদাস মালাকার, ভবানী বেনে, নবাই ঠাকুর, গৌর কবিরাজ নীলকমল, চিত্তামণি ময়রা, রামজীদাস, মাধব ময়রা, সতীনাথ মুখোপাধ্যায়, কবি ঈশ্বর গুপ্ত প্রভৃতির নাম নানাসূত্রে মেলে। পরিচিতি হারিয়ে গেছে অনেকেরই। কোন কোন কবিওয়ালা গান রচক ছিলেন। অন্যেরা অপরের বাঁধা গান গাইতেন মাত্র। অবশ্য একালের সিনেমার গান লেখকের মতো ফরমায়েসী গান বাঁধার পেশাদারী লোকও ছিলেন। গান লেখার তেমন লোক ছিলেন কৃষ্ণমোহন ভট্টাচার্য, রামবসু, নবাই ঠাকুর, গৌর কবিরাজ, রামসুন্দর রায় প্রভৃতি।

প্রখ্যাত হরুঠাকুর ছিলেন কথাকার, সুরকার এবং গায়ক। তাঁর বিখ্যাত চেলার নাম নীলুঠাকুর। ঈশ্বরগুণ আর তাঁর শিষ্য মনোমোহন বসুও গান বাঁধতেন, তাঁরা সুরকার এবং গায়কও ছিলেন। উনিশ শতকের প্রথম তিন দশকে বর্তমান ছিলেন রাসু, হারুঠাকুর, নিতাই (নিত্যানন্দ) বৈরাগী ও রামবসু। এ সময়টা ছিল কবিগানের স্বর্ণযুগ।

গোঁজালা গুঁইয়ের শিষ্য রামজীর শিষ্য ছিলেন ভবানী বেনে আর ভবানী বেনের শিষ্য ছিলেন রামবসু। রঘুনাথ দাসের শিষ্য ছিলেন রাসু ও নৃসিংহ দুইভাই এবং হরুঠাকুর [হরেকৃষ্ণ] আর হরুঠাকুরের শিষ্য ছিলেন নীলুঠাকুর, রামপ্রসাদ ঠাকুর ও ভোলা ময়রা, লালুনন্দলালের শিষ্য ছিলেন প্রখ্যাত নিতাই বৈরাগী ওফে নিত্যানন্দ দাস।^১

অধিকাংশ কবিওয়ালা তাঁতী, গুঁড়ি, মুচি, হাঁড়ি, ময়রা প্রভৃতি বর্ণের ও বৃত্তির হলেও ব্রাহ্মণও ছিলেন অনেক, বিশেষ করে উনিশ শতকের শেষার্ধ্বে। ব্যতিক্রম কেবল অ্যান্টনী ফিরিজি।

১. গোঁজালা গুঁই বিস্মৃত নাম আদি কবিওয়ালাদের একজন। ইনি আঠারো শতকের প্রথমার্ধের লোক। তাঁর তিন শিষ্য রঘুনাথ দাস, রামজীদাস ও লালুনন্দলাল। লালুনন্দলাল আসলে নাকি দুই ব্যক্তি।
২. লালুনন্দলাল ১৭৭৪ সনেও নাকি জীবিত ছিলেন, তাঁর শিষ্য নিতাই বৈরাগী ওফে নিত্যানন্দদাস (১৭৫১-১৮১১)।
৩. রামজীদাস রচিত গান গাইতেন ভবানী বেনে। ভবানীবণিকের জন্ম বর্ধমানের অধিকাকালনা চাকলায় গন্ধবণিক বংশে কলকাতায় নিবাস ছিল বরাহনগরে।
- ৩ক. রঘুনাথদাস 'দাঁড়া' কবিপদ্ধতির প্রবর্তক বলে পরিকীর্তিত।
৪. রাসু ও নৃসিংহ এই দুই ভাইয়ের জন্ম চন্দননগরের গোন্দলপাড়া গাঁয়ে এবং কায়স্থ পরিবারে। এঁদের পিতা আনন্দনাথ ফরাসী সামরিক বিভাগে মুহুরী ছিলেন। এঁদের মাতামহের বাড়ি ছিল চুঁচড়ায়। এঁদের উত্তাদ ছিলেন রঘুনাথদাস। ১৮০৭ সনে রাসুর এবং তার কিছুকাল পরে নৃসিংহের মৃত্যু হয়।
৫. হরুঠাকুর ওফে হরেকৃষ্ণ দীর্ঘাঙ্গীর ১১৪৫ বঙ্গাব্দে বা ১৭৩৮-৩৯ খ্রীস্টাব্দে কোলকাতার সিমলায় ব্রাহ্মণ পরিবারে জন্ম। পিতার নাম কল্যাণচন্দ্র। তিনি ছিলেন একাধারে গীতিকার, সুরকার ও গায়ক। ১৮১৪ খ্রীস্টাব্দে ৭৫ বছর বয়সে তাঁর মৃত্যু হয়। সখীসংবাদ, বিরহ, খেউড় ও লহর বিষয়ক গান রচনায় তিনি কৃতিত্ব দেখিয়েছেন।
৬. কেটামুচি ওফে কৃষ্ণচন্দ্র চর্মকার আঠারো শতকের শেষার্ধ্বে বর্তমান ছিলেন। ইনি যে-সব

^১ কবিওয়ালা সম্বন্ধে বিস্তৃত আলোচনা ও নানা তথ্য পাওয়া যাবে :

ক. ঈশ্বরগুণ রচিত কবিজীবনী : ডক্টর ভবতোষ দত্ত।

খ. কবিওয়ালা : নরহরি কবিরাজ।

গ. প্রাচীন কবিসংগ্রহ : গোপালচন্দ্র বন্দ্যোপাধ্যায় ঘ. গুপ্তরত্নোদ্ধার : কেশবনাথ বন্দ্যোপাধ্যায়

ঙ. বাঙলাসাহিত্যর ইতিবৃত্ত ৪র্থ খণ্ড : ডক্টর অসিতকুমার বন্দ্যোপাধ্যায়।

চ. History of Bengali Literature in the Nineteenth Century : Dr. S. K. De.

ছ. প্রাচীন ওস্তাদি কবিগান : মনুলাল মিশ্র।

জ. প্রাচীন কবিওয়ালায় গান : প্রফুল্লচন্দ্র পাশ প্রভৃতি গছে।

গান বাঁধতেন, সেগুলো অন্যেরা তার কাছ থেকে নিয়ে গাইতেন। শ্রেষ্ঠ কবিওয়ালার জনপ্রিয়তা তিনি অর্জন করেছিলেন।

৭. নিতাই বৈরাগী ওফে নিত্যানন্দদাস বৈরাগীর ১১৫৮ বঙ্গাব্দে তথা ১৭৫১ খ্রীস্টাব্দে চন্দননগরে বৈষ্ণবের ঘরে জন্ম। পিতার নাম কুঞ্জদাস। ১৮২১ খ্রীস্টাব্দে (১২২৮ বঙ্গাব্দে) সন্তর বছর বয়সে তাঁর মৃত্যু হয়। তাঁর তিনপুত্রও ছিলেন কবিওয়াল। ভক্ত বৈষ্ণব নিতাই অর্জিত অর্থে চুঁচড়ায় আখড়া এবং চন্দননগরে মন্দির নির্মাণ করেছিলেন।

৮. রামবসু ওফে রামমোহন বসুর ১৭৮৬ খ্রীস্টাব্দে গঙ্গাভীরে শালিখা গাঁয়ে কায়স্থ বংশে জন্ম এবং ১৮২৮ খ্রীস্টাব্দে অপরিণত বয়সে তার মৃত্যু হয়। তাঁর পিতার নাম রামলোচন বসু। রামবসু সামান্য ইংরেজি জানতেন এবং সওদাগরী অফিসে চাকরী করতেন। গান রচনায় তাঁর দক্ষতা ছিল অসামান্য। তাঁর বাঁধা গান গাইতেন ভবানী বেনে, নীলুঠাকুর, মোহন সরকার, ঠাকুরদাস সিংহ প্রভৃতি অনেক কবিওয়াল।

রামবসু আসরে উত্তর-চাপানোর (প্রশ্নোত্তরের বা উত্তর প্রত্যুত্তরের) মাধ্যমে কবিগানের, ঘোটকের, কবিলড়াইয়ের প্রবর্তক বলে কথিত। আর মোহনচাঁদ বসু ছিলেন হাফ আখড়াই গানের স্রষ্টা। প্রত্যাৎপন্নমতিত্ব ও বুদ্ধিমত্তা, ত্বরিত জবাব দেয়ার মতো যোগ্যতা প্রয়োজন হত এই উত্তর-চাপান পদ্ধতির লড়াইয়ে বা প্রতিযোগিতায়। ঈশ্বরগুণ্ড এঁর ১৪৮টি গান সংগ্রহ করেছিলেন। এ গানগুলো ছিল সখীসংবাদ, বিরহ, খেউর, লহর, সগুমী, শ্যামা ও টপ্পা।

৯. যজ্ঞেশ্বরী ও নীলমণি পাটনী ... যজ্ঞেশ্বরী ছিলেন প্রথমে নীলু ঠাকুরের দলের গানলেখিকা, পরে তিনিও হন কবিওয়াল। তিনি ও নীলমণির পাটনী ছিলেন মহিলা, সে-যুগের সমাজে এ ক্ষেত্রে তাঁরা অতুল্য। নীলমণি পাটনীও গান বাঁধতেন।

১০. রামপ্রসাদ ও নীলুঠাকুর— এঁরা ভোলা ময়রার সমসাময়িক। রামবসুর সঙ্গে রামপ্রসাদের কবিলড়াই খুব জমত। রামপ্রসাদের ভাই নীলুঠাকুরও ছিলেন প্রখ্যাত কবিওয়াল। নীলুঠাকুর প্রথমে হরুঠাকুরের চেলা ছিলেন, পরে উভয়ের বিচ্ছেদ ঘটে এবং নীলুঠাকুর নতুন দল গঠন করেন।

১১. সাতুরায়— ইনি শান্তিপুরে জমিদারী দপ্তরে কাজ করতেন এবং ইনি ছিলেন জমিদার রাজা শিবচন্দ্র রায়ের কবি দলের গীতিকার। স্বয়ং ভোলা ময়রাও ছিলেন এঁর গানের সমজদার ও গ্রাহক।

১২. ভোলা ময়রা— এঁর এক গানে এঁর আত্মপরিচয় রয়েছে :

আমি ভোলা ময়রা তবে যদি কবি পাই/হঠেঁ কড়ু নাহি যাই
নাহি কবি কালিদাস বাগবাজারে করি বাস ভোলা নহে কিছুতেই জন্ম।
হোক বেটো যতই মন্দ
পুজো এলে পুরি মিঠাই ভাজি। জাহাজ ডোঙ্গা সোলা নাও যাহাতে
মিলাইয়া দাও।

অতএব ভোলা ময়রার কোলকাতায় নিবাস এবং তাঁর মিষ্টির দোকানও ছিল। কবির লড়াইয়ে তাঁর প্রতিপক্ষ থাকতেন বলাই সরকার, অ্যান্টনী ফিরিসি ও হোসেন খাঁ। অশিষ্ট ও অশ্লীল কথায় ও গানে প্রতিপক্ষকে ঘায়েল করতে তাঁর দ্বিধা সংকোচ ছিল না। ভোলা ময়রার

প্রায় সমরোদ্ধর বয়সে মৃত্যু হয়।

১৩. হোসেন খাঁর নিবাস ছিল মুর্শিদাবাদে। তাঁকেই আমরা তখনকার একমাত্র মুসলিম কবিওয়ালারূপে পাই, যেমন পাই খ্রীষ্টান ও বিদেশী অ্যান্টনী ফিরিসীকে।
১৪. অ্যান্টনী ফিরিসী ওফে Hensman Anthony। ইনি ছিলেন পর্তুগীজ খ্রীষ্টান। পিতা ফরাসী ফরাসডাক্তার ব্যবসাসূত্রে বাস করতেন। অ্যান্টনীর এক ভাইও ছিল, নাম কেলি বা কালু সাহেব। অ্যান্টনীর ১৮৩৬ খ্রীষ্টাব্দে পরিণত বয়সে মৃত্যু হয়। অ্যান্টনী এক ব্রাহ্মণ কন্যা বিয়ে করেন, সে-সূত্রেই বাঙলার ও বাঙালীর সঙ্গে তাঁর ঘনিষ্ঠতা। তাঁর উক্তি ‘এই বাঙলায় বাঙ্গালীর বেশে আনন্দে আছি।’ ইনি হিন্দুপুরাণ অধিগত করেছিলেন এবং কবিওয়ালা হিসেবে পরতেন ধুতি-চাদর। কবি লড়াইতে তাঁর সাধারণ প্রতিদ্বন্দ্বী থাকতেন ভোলা ময়রা, ঠাকুরসিংহ, রামবসু প্রভৃতি।
১৫. নিধুবাবু ওফে রামনিধি গুপ্ত ছিলেন প্রখ্যাত ও জনপ্রিয় টপ্পালেখক ও গায়ক। তাঁর কবিত্ব খ্যাতিও ছিল দেশব্যাপী। ‘নানান দেশের নানান ভাষা, বিনা স্বদেশীর ভাষা, পুরে কি আশা’- এ তাঁরই প্রখ্যাত উক্তি। নিধুবাবুর রচিত সঙ্গীতসংকলন গ্রন্থের নাম গীতরত্ন। নিধুবাবুর পুত্র জয়গোপাল গুপ্ত ১২৬৩ বঙ্গাব্দে গীতরত্নের দ্বিতীয় সংস্করণ প্রকাশিত করেন। তিনি পিতা সম্বন্ধে সে-সূত্রে নানা উল্লেখও পরিবেশন করেছিলেন। ১৭৪১ খ্রীষ্টাব্দে নিধুবাবু হুগলী জেলার ত্রিবেণী অঞ্চলের চাঁপতা গ্রামে মাতামহগৃহে জন্ম গ্রহণ করেন। তাঁর পিতার নাম হরিণারায়ণ গুপ্ত, তিনি কলকাতায় কুমারটুলিতে চিকিৎসক তথা কবিরাজ ছিলেন। কুমারটুলিতেই ছিল নিধুবাবুর নিবাস। তিনি সেকালের মাণে বিদ্বান ছিলেন। ফারসী, ইংরেজী ও হিন্দি জানতেন তিনি। খেয়াল ও টপ্পা ছিল তাঁর প্রিয় সঙ্গীত। বাঙলা সঙ্গীতে তাঁর উদ্ভাদ ছিলেন শোভাবাজারের রাজা নবকৃষ্ণদেবের সভাসদ কুলুই চন্দ্র সেন। পরপর দুই স্ত্রীর মৃত্যুর পরে ১৭৯৫ খ্রীষ্টাব্দে নিধুবাবু তৃতীয় স্ত্রী গ্রহণ করেন এবং কয়েকটি সন্তানের জনক হন। তিনি প্রথমবয়সে বিহারের ছাপরায় ইস্ট ইন্ডিয়া কোম্পানীর কেরানী ছিলেন, ঘুম গ্রহণের দায়ে তাঁর চাকরী যায়। ১৮৩৯ খ্রীষ্টাব্দের ১০ই এপ্রিল আটানকই বছর বয়সে তাঁর মৃত্যু হয়।
১৬. কালী মীর্জা-এঁর রচিত সঙ্গীতগুলো ‘গীতিলহরী’ নামের গ্রন্থে সংকলিত রয়েছে। ইনিও টপ্পা সঙ্গীতের জন্যেই প্রখ্যাত। ১৭৫০ খ্রীষ্টাব্দের দিকে কালী মীর্জা ওফে কালিদাস চট্টোপাধ্যায়ের গুণিপাড়ায় জন্ম। এঁর ভাইয়ের নাম রঘুনাথ চট্টোপাধ্যায় এবং পিতার নাম বিজয়রাম চট্টোপাধ্যায়। কাশীতে, লক্ষ্মীয়ে ও দিল্লীতে বাসকালে তিনি শাস্ত্র ও বেদান্ত অধ্যয়ন করে এবং মুসলিম উস্তাদের কাছে সঙ্গীত শিক্ষা করে বর্ধমানরাজ প্রতাপচন্দ্রের সভায় ছিলেন কিছুকাল। পরে কোলকাতায় জমিদার গোপীমোহন ঠাকুরের প্রতিপোষণ পান। ১৮১৪ খ্রীষ্টাব্দের অল্পকিছুকাল পরে তাঁর মৃত্যু হয়। মুঘলাই আচার-আচরণ ও আদব-লেহাজ অনুসরণ করতেন বলেই নাকি তিনি লোকমুখে ‘মীর্জা’ নামে খ্যাত হন।
১৭. শ্রীধর কথকও ছিলেন প্রেম ও ভক্তিমূলক টপ্পাকার। ১৮১৬ খ্রীষ্টাব্দে হুগলী বাঁশবেড়িয়া গায়ে পণ্ডিত ও কথক বংশে তাঁর জন্ম। তাঁর পিতা রতনকৃষ্ণ শিরোমণি স্ব-অঞ্চলে

পাণ্ডিত্যের জন্যে প্রখ্যাত ছিলেন। পিতামহ লালচাঁদ বিদ্যাভূষণও ছিলেন প্রসিদ্ধ কথক।
বিখ্যাত- ভালবাসিব বলে ভালবাসিনে সখি, আমায় ধর ধর, ওই যায় যায়, চায় ফিরে
সজল নয়নে প্রভৃতি গান নাকি নিধুবাবুর নামে চললেও আসলে শ্রীধর কথকেরই রচনা।

১৮. রূপচাঁদ দাস পক্ষী- রূপচাঁদ দাস ছিলেন উড়ে। তাঁর পিতার নাম গৌরহরিদাস মহাপাত্র,
নিবাস ছিল উড়িষ্যার চিঙ্কাহদের নিকটে। রূপচাঁদের জন্ম ১৮১৫ খ্রীস্টাব্দে। পাঁচালীতে,
হাফআখড়াইয়ে ও ঘেঁটুগানে ছিল তাঁর আবাল্য আকর্ষণ। যৌবনে তিনি ছিলেন
বাগবাজারের পাঁচালী-দলের মালিক। এ দল পক্ষীরদল নামে ছিল প্রখ্যাত। রূপচাঁদের
নানা-বিষয়ক ২১১টি গান সঙ্গীতরসকল্লোলে সংকলিত রয়েছে। এর গানের ভাষায়,
ভঙ্গিতে ও বিষয়ে ছিল সমকালীনতা। পাঁচালী, হাফআখড়াই, যাত্রা ঢপ, গাজনের সঙ
প্রভৃতি সর্বপ্রকার গানই রচনা করেছিলেন তিনি। কৌতুক রঙ্গ পরিহাস ও ব্যঙ্গ সৃষ্টিতে
ছিল তাঁর অগ্রহ।

১৯. মধুকান ওফে মধুসূন কিন্নর দেশনন্দিত ঢপকীর্তনকার। ১৮৮০ খ্রীস্টাব্দের দিকে তাঁর
মৃত্যু হয়। এ সময়ে ছাত্তাবাবু (আন্তোষদেব), শিবচন্দ্র সরকার, দয়ালচাঁদ মিত্র, জগন্নাথ,
প্রসাদবসুমিত্র, কাশীপ্রসাদ ঘোষ হরিমোহন রায়, মদুনাথ ঘোষ প্রমুখ অনেকেই বাঙলার
সঙ্গীত ক্ষেত্রে কোলকাতা শহরে খ্যাতিমান ছিলেন।

২০. দাশরথিরায়ে ওফে দাশরায়- কবিগানে যেমন গোঁজলা গুঁই ও রামবসু, যাত্রায় যেমন
গোবিন্দ অধিকারী, হাফ আখড়াইয়ে যেমন মোহনচাঁদ বসু, টপ্পায় যেমন নিধুবাবু,
পাঁচালীতে তেমন দাশরায় অতুল। তাঁর আত্মপরিচয় রয়েছে তাঁর রচনায়। তা থেকে
জানা যায় বর্ধমানের অধীন বাঁধমুড়া গাঁয়ে তাঁর নিবাস। পিতার নাম দেবীপ্রসাদ রায়
(শর্মা)। অগ্রদূতের নিকটে পীলা গ্রামে ছিল তাঁর মাতুলালয়। মাতুলের নাম রামজীবন
চক্রবর্তী। ১২১২ বঙ্গাব্দে তথা ১৮০৬ খ্রীস্টাব্দে কাটোয়া অঞ্চলের বাঁধমুড়াগাঁয়ে জন্ম এবং
১২৬৬ বঙ্গাব্দে তথা ১৮৫৯ খ্রীস্টাব্দে দাশরথি রায়ের মৃত্যু হয়। দাশরথি রায়ের গান
গাঁয়ে গঞ্জে ও শহরে নারী পুরুষ নির্বিশেষের প্রিয় ছিল। দাশরায়ের পাঁচালীতে সমকালের
সমশ্রেণীর মানুষের জীবন চেতনার ও জগৎ-ভাবনার, রুচির ও আকাঙ্ক্ষার কিছু
প্রতিবিম্বিত রূপ মেলে। ব্রজমোহন রায়, কৃষ্ণধন দে, নন্দলাল, মনোমোহন বসু প্রমুখ
পাঁচালীর ক্ষেত্রে দাশরথি রায়ের ভাবশিষ্য ও উত্তরসাধক।

বৈষ্ণব পদাবলীর দেশে ভারতচন্দ্র রায়ের কাব্য রচিত হওয়ার হওয়ার পরে কবিগান
সাহিত্যকর্ম হিসেবে নিন্দা ছাড়া প্রশংসা পেতে পারে না। এ হচ্ছে জাতীয় দুর্যোগের
দুর্দিনের ও দুর্ভাগ্যের সাক্ষ্য- গৌরব গর্বের নয়। দেশের মানুষের রাষ্ট্রিক আর্থিক শাস্ত্রিক
নৈতিক, সামাজিক ও সাংস্কৃতিক অবক্ষয় কালে রচিত বলেই প্রাচীন সাহিত্যিক
ঐতিহ্যচেতনায়, আঙ্গিকে, ভাষায়, ভঙ্গিতে, আদর্শে ও রুচিতে এ অপকর্ষ অনিবার্য হয়ে
উঠেছিল।

ষোড়শ অধ্যায়

বিবিধ রচনা

ইতিহাসের উপকরণ : বাস্তব ঘটনানির্ভর রচনা

ক. মানুষমাত্রই দেশ, কাল ও প্রতিবেশের সৃষ্টি। সামাজিক পরিবেশ, নৈতিক চেতনা, শৈক্ষিক মান, আর্থিক অবস্থান, পারিবারিক ঐতিহ্য, ঘরোয়া আচরণ, শাস্ত্রিক নিয়মনীতি, দৈনিক রীতিরেওয়াজ একজন মানুষের মনমেজাজ ও চাওয়া-পাওয়া নির্মাণ ও নিয়ন্ত্রণ করে। জীবিকার ক্ষেত্র এবং জীবনপ্রতিবেশই মানুষের জীবনচেতনা ও জগৎভাবনা সঙ্কীর্ণ খাতে কিংবা বিস্তৃত পরিসরে প্রবাহিত করায়।

এ কারণে মানুষের চিন্তায় চেতনায় মনোমৈজাজে কর্মে আচরণে দেশ-কাল-অবস্থান নিরপেক্ষতা নেই। মানুষের ভাব-চিন্তা-কর্ম-আচরণ, মন-মেজাজ প্রত্যক্ষ বা পরোক্ষ ভাবে স্থানিক কালিক ও ব্যক্তিক প্রয়োজনে অনুপ্রাণিত বা চাহিদায় নিয়ন্ত্রিত। এজন্যে মানুষ যখন এক মানস-চাহিদা পূরণের জন্যে মুক্তপক্ষ বিহঙ্গের মতো দিগন্তহীন দেশ-কাল-ব্যক্তি নিরপেক্ষ কল্পনার আকাশে বিচরণ করে, তখনো সে মাটি ও মানুষের ছোঁয়া একেবারে এড়িয়ে চলতে পারে না। কারণ যে জ্ঞান ও অভিজ্ঞতা তাঁর এ বিহারের পুজি, তাঁর স্বর্গ-মর্ত্য পাতাল পর্যটনের পাথেয়, দেও-দানব-জীন-পরী-ভূত-প্রেত-যক্ষ-রক্ষের জগৎসৃষ্টির সহায়, তা পঞ্চ ইন্দ্রিয়গ্রাহ্য এবং বাস্তবে মাটি ও মানুষ থেকে পাওয়া সম্পদ। তাই দেব-দৈত্যের ও জীন-পরীর জগতে এবং জীবনেও মাটির মানুষের সুখ-দুঃখের আনন্দ-বেদনার আশা-নিরাশার ভয়-ভরসার ছায়াও গভীর আর ব্যাপকভাবেই থাকে। যে বিষয়েই, যার নামেই, যেখানেই, যার কথাই বলা হোক, তা পরোক্ষে দেশ-কালগত মানুষের কথাই হয়ে ওঠে। কারণ মানুষের চিন্তা-ভাবনার ভিত্তি ও উৎসই হচ্ছে জীবন। জীবন জীবিকা-নির্ভর, সমাজ-শাস্ত্র-সরকার নিয়ন্ত্রিত, আর সুখ-দুঃখ, আনন্দ-যন্ত্রণা, ভয়-ভরসা ও আশা-নিরাশা ঘেরা। এ কারণেই মানুষের কর্ম-আচরণ হচ্ছে মানুষের অন্তরের চাওয়া-পাওয়ারই- অনুভব অভিপ্রায়েই বিধিত দর্পণ।

তাই মানুষ যখন রূপকথা বলে, যখন ঘুমের ঘোরে স্বপ্ন দেখে, যখন পথে হাঁটে, যখন খেলায় মাতে, যখন নাচে মজে, তখনো সে আনমনে নিজেকেই বয়ে চলে, আত্মবিশ্মৃতি ঘটে না কখনো।

এ জন্যেই মানুষ প্রতিবেশকে ভুলে থাকতে পারে না। রূপকথা বা পরের কথা বলতে গিয়েও প্রাসঙ্গিক বা আকস্মিক উচ্চারণে সে নিজের কথাও কখনো কখনো বলে ফেলে। তাতেই মানুষের রচনায় চিরকাল আপাত আকস্মিক কিংবা অপ্রাসঙ্গিকভাবে স্বকাল, স্বদেশ ও স্বজন চায়া ফেলেনিহ্নিকার্ত্তিক প্রত্যেক জীবনের বাস্তব ঘটনায় রচনায় বিন্দু হয়ে যায়।

তাই আদিকাল থেকেই আমরা সাহিত্যেও এমনি গুরুত্বপূর্ণ বাস্তব ঘটনা ও ব্যক্তি সম্বন্ধে ছড়িয়ে থাকা বা ছিটকে পড়া কিছু তথ্য পেয়ে যাই। সেগুলো ঐতিহাসিক তথ্য সন্ধানের ও সত্য নিরূপণের সূত্র হিসেবে কাজ করে। কম হলেও ঐতিহাসিক তথ্যের তেমন সূত্র বা উপাদান রচনাতেও মেলে।

শেখ তভোদয়ায়, গীতগাবিন্দে, আর্ঘ্যসপ্তশতীতের, বলালচরিতে কিংবা লক্ষ্মণ সেনের অন্য অমাত্যদের রচনায়, সন্ধ্যাকর নন্দী প্রমুখ কবির রচনায় যেমন নানা ঐতিহাসিক ঘটনার ও ব্যক্তির উল্লেখ ছড়িয়ে রয়েছে, তেমনি বাঙলা রচনায়ও তার অভাব নেই, তবে প্রকৃত ও সুস্পষ্ট সত্য ও তথ্য উদ্ধার করা শ্রম বুদ্ধি-আর সহযোগী উপাদানের প্রাপ্তি সাপেক্ষ।

আমাদের দেশে সাধারণ লোকের ইতিহাসচেতনা ছিল না। সেজন্যে সমকালীন কোন প্রাকৃতিক, সামাজিক, সামরিক কিংবা রাজনৈতিক ঘটনা লিপিবদ্ধ করার আগ্রহ সাধারণত কারো মধ্যে দেখা যায়নি। শ্রুতি-স্মৃতিতে যতদিন টিকল তো টিকলই, নইলে বিস্মৃতিতে বিলীন হয়ে গেল। তাতে ক্ষতি-বৃদ্ধির কিছুই অনুভব করেনি কেউ। এমন কি এ দেশে দরবারী ইতিহাসের সংখ্যাও বেশি নয়। সাধারণভাবে ইতিহাসের গুরুত্বচেতনা ছিল বিরল ব্যাপার। যে কয়খানা দরবারী ইতিহাস মেলে, তাও প্রায় দিল্লীর, সামন্ত সভায় এ প্রয়াস প্রায় দুর্লভ্য এ কারণে আমাদের দেশের অতীত ইতিহাস কখনো পূর্ণাঙ্গ হবে না। কালপ্রবাহে হারিয়ে যাওয়া জীবনধারার ছিটেফোঁটা হয়তো আজো এখানে সেখানে শুভাশ্রয়ী হয়ে রয়েছে। কিন্তু পুরোনো মৃতের ছেঁড়া ভাঙা কঙ্কালের অবয়বের বর্ণ ও রূপ আর কখনো মিলবে না।

তবু কোন দুর্লভ মুহূর্তে অনুভবের স্বর্ণকৌটিল্য কেউ কেউ কোন কোন ঘটনা ঘটনা সঞ্চয় করে রেখেছিলেন। এবং আবেগ বিহবলতায় তা বর্ণনাও করেছেন। এভাবে আমরা ময়মনসিংহ গীতিকায় কিংবা পূর্ববঙ্গ গীতিকায় কয়েকটি ঐতিহাসিক চিত্র পাচ্ছি। গঙ্গারামের মহারাষ্ট্রপুরণ কিংবা সিরাজদ্দৌলার মীরকাশিমের গাথাও এ ধরনের রচনা। এগুলো ছাড়া আরো কিছু কিছু এমনি গান গাথা ইতিহাস ও কিংবদন্তী ছড়িয়ে রয়েছে লোক-সাহিত্যে ও লোক-মুখে।

কিন্তু এসব সৃজনশীল রসিক লোকের রচনা। কথকতার মাধ্যমে পল্লবিত কাহিনী বসিয়ে রসিয়ে বলে শ্রোতার মন জয় করাই ছিল এঁদের মুখ্য উদ্দেশ্য। আমরা জানি সে কহে বিস্তার মিছা যে কহে বিস্তার'। কাজেই বাকজাল বিস্তার করে শ্রোতাকে অভিভূত করাই যেখানে লক্ষ্য, সেখানে তিলকে তাল সত্যকে সুন্দর এবং রূপকে রঞ্জিত করতে হয়। এবং সত্য যেমন অতিরঞ্জিত হয়ে মিথ্যার আকার নেয়, তেমনি মিথ্যাও বাকপটুতায় ও পৌনঃপুনিকতায় সত্য হয়ে ওঠে। কাজেই সৃজনশীল সাহিত্যিকদের রচনায় ইতিহাসের ছায়া মেলে, কায়া থাকে অলক্ষ্য।

‘কবিগণে রচি যদি কহে মিথ্যা কথা/সর্বলোকে সত্য হেন জানএ সর্বথা।’

তবু ইতিহাস বিরল দেশে এরও মূল্য আছে বলে আজ এমনি ঐতিহাসিক কাব্যের পরিচয় তুলে ধরতে চাই।

আমাদের গীতিকায়, ধর্মমঙ্গলে, গৌরান্ধবিজয়ে কিংবা কৃষ্ণিবাসের মুকুন্দরামের কবীন্দ্র পরমেশ্বর দাসের, শ্রীকর নন্দীর, দৌলতউজির বাহরাম খানের, মুহম্মদ খানের, শাবারিদ খানের, আলাউলের, নওয়াজিস খানের, নসরুল্লাহ, খোন্দকারের আত্মকথায়, বৈষ্ণবচরিত গ্রন্থে, ভারতচন্দ্রের অনুদামঙ্গলে, পীরপাচালীতে, ময়মনসিংহ ও পূর্ববঙ্গ গীতিকায়,

শমশেরগাজীনামায়, মহারাষ্ট্রপুরাণে, বিদ্রোহী কুকির কাহিনীতে এবং নানা স্থানিক ও সাময়িক ঘটনা নিয়ে রচিত ছড়া গান, কবিতা ও গাথায় ইতিহাসের উপকরণ ছড়িয়ে রয়েছে এবং ইতিহাস রচনায় ও গবেষণা কর্মে সে-সব সূত্র ও তথ্য ব্যবহৃতও হয়েছে।

লিখিতভাবে হোক কিংবা মুখে মুখে হোক গান চিরকালই রচিত হয়েছে, রচিত হয়েছে ক্ষুদ্র ক্ষুদ্র স্তোত্রও। অন্য ধরনের সাময়িক ঘটনা নিয়ে হয়তো আগেও পদবন্ধ রচিত হত। কালে সেগুলো লোপ পেয়েছে, আমাদের হাতে এসেছে কেবল আঠারো শতকের শেষার্ধের এবং উনিশ শতকের দুচারটে ছড়া, গান ও পদবন্ধ। কালিক নৈকট্যের ফলেই এগুলো চালু ছিল ঐতিহাসিকভাবে সীমিত অঞ্চলে অথবা লিখিত কাগজে ছিল বিনষ্টির অপেক্ষায়।

অথবা কালপ্রভাবে এ ধরনের ব্যক্তির ও ঘটনার গুরুত্বচেনাপ্রসূত সাময়িক রচনায় রেওয়াজ আঠারো শতকের শেষার্ধেই চালু হতে থাকে কোলকাতায় যখন কবিওয়ালাদের আসর জমজমাট এবং কবিওয়ালাদের প্রভাবেই রচিত হতে থাকে আলোড়ন সৃষ্টিকারী বিভিন্ন স্থানীয় বিষয় নিয়ে পদবন্ধ। এ সূত্রে সাময়িক বিষয় নিয়ে রচিত শিক্ষাদান লক্ষ্যে শাস্তিদানমূলক রচনা গাজন-গঙ্গীর কথাও স্মরণ্য। এ পদবন্ধগুলোর বিষয় সাধারণত ব্যক্তি প্রশস্তি গুরুত্বপূর্ণ ঘটনার তথ্য ও পরিণাম বর্ণন, প্রাকৃতিক দুর্যোগ খুন প্রেম প্রভৃতি। রাজার হাতবদলের, জাতবদলের, দেশ বদলের ও ধর্মবদলের ফলে যে নীতি রীতির বদল হল, তাতে ১৭৭২-৮২ সনের মধ্যেই যে কয়েকটি জমিদার-রায়ত বিদ্রোহ ঘটে গেল, তাও গণচেতনার উদ্ভবের, দ্রুত বিকাশের দও মন-মননে যুগান্তরের কারণ হতে পারে। উনিশ শতকের প্রথমার্ধ অবধি রচিত এক্সপ ছড়ার, গানের, গাথার, পাঁচালীর ব্যাপ্তির ক্ষেত্রে মূল্য রয়েছে ইতিহাসের উপকরণ হিসেবে। তারপরে যখন আধুনিক জীবনচেতনা ও জীবনযাত্রা প্রায় পরিপূর্ণভাবে শহরে শহরে গুরু হয়ে গেছে, ছাপাখানার বদৌলতে এইপট্রেই সব খবর লিপিবদ্ধ হচ্ছে, তখনকার রচনা সমকালীনতার অভাবপ্রসূত ও পিছিয়ে পড়া মানুষের অভিব্যক্ত বলে মানতে হবে। সেকারণেই সে-সব রচনাকে প্রতিধ্বিমূলক রচনা হিসেবে কদর করা হয় না, যদিও রচয়িতারা ছিলেন শতকরা পঁচানব্বই জনেরই প্রতিনিধি।

ক. মহারাষ্ট্রপুরাণ বা ভাস্কর পরাভব(কবি গঙ্গারাম হয়তো সব কয়টি বর্গী আক্রমণের বিবরণ সম্বলিত একটি পূর্ণাঙ্গ কাব্য রচনায় হাত দিয়েছিলেন, ভাস্কর-পরাভব অংশ সমাপ্ত হওয়ার পরে কোন কারণে বা আয়ুর অভাবে আর অগ্রসর হতে পারেননি। অথবা কেবল ভাস্করনিধন অবধি রচনাই তাঁর লক্ষ্য ছিল, পছন্দসই দুটো নামের মোহ ত্যাগ করতে পারেননি বলেই দ্বিধাগ্রস্ত কবি দুটো নামই ব্যবহার করেছেন। বিশেষত পুরাণের ও মঙ্গল কাব্যের আদলে ও আবরণে পৃথিবী ব্রহ্মা, শিব ও নন্দীকে জড়িয়ে যে কাহিনীর শুরু তার নাম মহারাষ্ট্রপুরাণ রাখাই কবি সমীচীন মনে করেছেন, আবার মূল ব্যক্ত্যব্যও সুনির্দিষ্ট নামে চিহ্নিত করতে চেয়েছেন, তাই এ 'ভাস্করপরাভব' নাম। গঙ্গারাম [দেব] কায়স্থ বংশীয়। কিশোরগঞ্জ অঞ্চলের 'ধারীশ্বর' গ্রামে তাঁর জন্ম। ওই গাঁয়ে তাঁর জ্ঞাতিরা আজো বাস করে। তিনি জঙ্গলবাড়ির ঈসাখান-বংশীয় জমিদারের কর্মচারী ছিলেন, বিদ্বানদের অনুমান সে সূত্রেই তিনি মুর্শিদাবাদের নওয়াব দরবারে প্রতিনিধি হিসেবে নানা কাজে যাতায়াত করতেন। এবং বর্গীর হাঙ্গামা তিনি হয়তো প্রত্যক্ষও করেছেন অথবা বর্গীর নারী ধর্ষণ, নরহত্যা লুটতরাজের চিহ্ন অগ্নিদগ্ধ ঘর বাড়ি তরুলতা গ্রাম নগর স্বচক্ষে দেখেছেন। তাই তাঁর বর্ণনা প্রত্যক্ষদর্শীর নিরপেক্ষ সাক্ষ্যের মতো বাস্তব ও বিশ্বাস্য।

কলিকাতা বিশ্ববিদ্যালয়ে রক্ষিত পুঁথির পুস্পিকা এরূপ :

‘ইতি মহারাষ্ট্রপুরাণে প্রথম কাণ্ডে ভাস্কর পরাভব শকাব্দা

১৬৭২ সন ১১৫৮ সাল। তারিখ ১৪ পৌষ রোজ শনিবার।’

এ পুস্পিকা যদি লিপিকর প্রদত্ত হয়, তাহলে একাধিক প্রশ্ন জাগে; ১. গ্রন্থে আরো কাণ্ড ছিল, লিপিকর কেবল প্রথম কাণ্ডেরই প্রতিলিপি তৈরি করেছেন। ২. লিপিকর পুঁথির নাম মহারাষ্ট্রপুরাণ এবং সমাপ্তি অংশে ভাস্করপরাভব দেখে এটিকে বড় কাব্যের প্রথম কাণ্ড বলে ভেবে নিয়েছিলেন। ৩. পুস্পিকার ভাষা বিন্যাস ও সন তারিখ বিন্যাস দেখে মনে হয়, এটি কবিরচিত পুস্পিকা নয়। ৪. কাজেই লিপিকাল মূলগ্রন্থ রচিত হবার অব্যবহিত পরের না হোক দু’চার বছরের মধ্যকার বলে মানতে হবে, কারণ ১৭৪১-৪৪ খ্রীস্টাব্দের ঘটনাই কাব্যে বর্ণিত হয়েছে। ১৭৫১ খ্রীস্টাব্দে এ পাণ্ডুলিপি তৈরি হয়ে। যেভাবেই হোক ১৭৫১ খ্রীস্টাব্দে বা তার আগেই ‘মহারাষ্ট্রপুরাণ’ রচিত হয়েছে। ময়মনসিংহ-এর ইতিহাসের লেখক কেদারনাথ বন্দ্যোপাধ্যায় গঙ্গারাম রচিত ‘শুক-সম্বাদ’ ও ‘লবকুশ’ চরিত্র নামের দুটো পুঁথিও কবির জ্ঞাত থেকে সংগ্রহ করেছিলেন।

বগী যদি ‘বর্গীর’ শব্দজ হয়, তা হলে এর অর্থ অশ্বারোহী দস্যু আর ‘বর্গা’, শব্দজ হলে এর অর্থ হবে ভাগী বা ভাগদার— ফসলের বা রাজস্বের ভাগী বা ভাগদার। ১৭৪২ খ্রীস্টাব্দ থেকে ১৭৪৯ খ্রীস্টাব্দ অবধি আট বছর ধরে নওয়াব আলিবর্দীর আমলে মারাঠী বর্গীরা প্রায় প্রতি বছর পশ্চিমবঙ্গের নানা স্থানে ও উড়িষ্যা (ব্রহ্মসীলা চালিয়েছে, নাগপুররাজ রঘুজী ভোঁসলা প্রেরিত বর্গীসর্দার ভাস্কর পণ্ডিত ১৭৪৪ সনে ৩১ শে মার্চ তারিখে আলিবর্দীর ছলনায় ও কৌশলে নিহত হন। ডক্টর অসিতকুমার বন্দ্যোপাধ্যায়ের ভাষায়— “বর্গীয় হাঙ্গামা একদা সমগ্র পশ্চিমবঙ্গের ধনে প্রাণে সর্বনাশ করিয়াছিল। সেই ব্যাপক ক্ষতি ও অত্যাচারের ক্ষতচিহ্ন বাঙালী কোন দিনই ভুলিতে পারে নাই।— বর্গী এলো দেশে এই ছড়া গাহিয়া মায়েরা শিশুদের শাস্ত করিত। বস্ত্রতঃ অর্থনৈতিক, সামাজিক, নৈতিক সবদিক দিয়াই বর্গীর অভিযান বাঙালীর মনে তীব্র ঘৃণা বিতৃষ্ণা ও প্রচণ্ড সন্ত্রাস সৃষ্টি করিয়াছিল। বাঙলায় মারাঠা লুটেরা বর্গী অমানুষিক অত্যাচার চালাইয়া হত্যা ধর্ষণ ইত্যাদি নারকীয় ব্যাপারের অনুষ্ঠান করিয়া সমগ্র পশ্চিমবঙ্গকে শূশানভূমিতে পরিণত করিয়াছিল।” এখানেই শেষ নয়, বার্ষিক বারো লক্ষ টাকা কর এবং উড়িষ্যার চৌথ পাওয়ার শর্তেই এ ধর্ষণ, লুণ্ঠন, হনন ও দহন বন্ধ করেন নাগপুরের রঘুজী ভোঁসলা। প্রায় প্রত্যক্ষদর্শী গঙ্গারামের বর্ণিত বর্গীয় অত্যাচারের রূপ :

১. মাঘে ঘেরিয়া বর্গী তবে দেয়া সাড়া
সোনা রূপা লুটে নেয় আর সব ছাড়া।
কারু হাত কাটে কারু নাক কান
একি চোটে কারু বধএ পরাণ।
ভাল ভাল স্ত্রীলোক যত যত ধইরা লৈয়া যাএ
অঙ্গুষ্ঠে দড়ি বেঁধে দেয় তার গলাএ।
একজনে ছাড়ে তারে অন্য জনা ধরে
রমণের ভয়ে গ্রাহি গ্রাহি শব্দ করে।
এই মতে বর্গী কত পাপ কর্ম কইরা

তবে মাঠে লুটিয়া বর্গী গ্রামে সাধাএ
বড় বড় ঘরে আইসা আগুনি লাগাএ—
কাহকে বাঁধে বর্গী দিয়া পিঠমোড়া
চিং কইরা মারে লাথি পাএ জুতা চড়া।
রূপি দেহ রূপি দেহ বলে বারে বারে।
রূপি না পাইয়া তবে নাকে জল ভরে।
কাহকে ধইরা বর্গী পুকুরে ডুবাএ
ফাফর হইয়া তবে কারু প্রাণ যাএ।—
এমনি-ব্রাহ্মণ বৈষ্ণব যত সন্ন্যাসী ছিল

সেই সব স্ত্রীলোক যত দেয় সব ছাইড়া।

২. মুদা বাণিয়া যত বার হৈতে নারে

লুটে কাটে মারে ছামুতে পাএ যারে।

বগীর তরাসে কেহ বাহির না হএ।—

তবে সব বগী গ্রাম লুটিতে লাগিল

যত গ্রামের লোক সব পলাইল।

যত গ্রামের লোক সব পলাইল।

ব্রাহ্মণ পলাএ পুথির ভার লইয়া

সোনার বাইনা পলাএ কত নিজি হড়পি

লৈয়া

গোহত্যা স্ত্রীহত্যা শত শত কৈল।

গন্ধ-বণিক পলাএ দোকান লৈয়া যত

তামাপিতল লৈয়া কাসারি পলাএ কত।

ভাল মানুষের স্ত্রীলোক যত হাটে নাই পথে

বগীর পলানে পটারি লইল মাথে।

সেক সৈয়দ মোগল পাঠান যত গ্রামে ছিল

বগীয় নাম শুইনা সব পলাইল।—

সিদকার পাটআরি যত গ্রামে ছিল

বগীয় নাম শুইনা সব পলাইল।।

গঙ্গারামের কাব্য নামে পুরাণ হলেও স্বরূপে কবির স্বকালের স্বদেশের রাজনীতি সম্পৃক্ত এক টুকরো ইতিহাস এবং অমানবিক অত্যাচারের একটি বীভৎস চিত্র, একটি তথ্যনিষ্ঠ বিবরণ আর একটি মূলবান দলিল। চট্টগ্রামে বহুল প্রচলিত ‘মালেকাবানু মনু-মিয়ার’ সওলা নামের গাথাও দুই জমিদার পরিবারের মধ্যে বিবাদ সংক্রান্ত বিষয়ে রচিত আর শাবিরিদ খানের পদবন্ধ ও [উপাখ্যান অধ্যায়ে উদ্ধৃত] এ সূত্রে স্মর্তব্য।

খ. পাঠান প্রশংসা— পাঠান প্রশংসা— গুলেবকাউলি উপাখ্যান রচয়িতা নওয়াজিস খানের (মৃঃ ১৭৬৭ খ্রীঃ) পরিচিতি উপাখ্যান অধ্যায়ে রয়েছে, তিনি পাঠান প্রশংসা, জোর ওয়ারসিংহ স্ত্রী এবং গীতাবলীও রচনা করেছিলেন।

১৬৬৬ খ্রীস্টাব্দে বাঙলার সুবাদার শাহজাহান খান তাঁর পুত্র বুর্জা উমেদ খানের সৈন্যপত্রে শজ্ঞানদ অবধি উত্তর ও মধ্য চট্টগ্রাম জয় করেন। তখন শজ্ঞানদের তীরে দু’জন এক হাজারী মনসবদারকে সীমান্তরক্ষী সেনানী নিযুক্ত রাখেন। এদের থানা বা শিবির স্থলটি দোহাজারী নামে খ্যাত হয়। এদের একজন রোহিলাখণ্ডের নওয়াব বাহাদুর খানের পুত্র আধুখান অপরজন লক্ষ্মন সিংহ বা লছমন সিংহ। এদের বংশধরেরা দোহাজারীতেই স্থানীয়ভাবে বাস করতেন। কবি নওয়াজিস খানের নিবাস শজ্ঞানদের অদূরে সাতকানিয়ার সুখছড়ি গায়ে। বৈষয়িক অর্থাৎ জমিজমা বিষয়ক সুবিধাপ্রাপ্তির জন্যেই কবি আধুখানের পুত্র শেরজামাল খানের এবং লছমন সিংহের পুত্র জোরওয়ারসিংহের ক্ষুদ্র কুসিদা বা প্রশস্তি রচনা করেছেন।

পাঠানপ্রশংসায় জমিদারকে কবির কোন পুস্তকের আদেষ্ঠা হবার জন্যে আবেদন জানাচ্ছেন কবি :

শ্রীমুখে আজ্ঞা যদি করে রচিবার

পুস্তক পূর্ণিতা হেন করিমু সত্ত্বর।—

মহাজনে নাম হেতু করে প্রাণপণ

কি করিব রাজপাট কি করিব ধন।—

না রহে ভাগ্যধন রত্ন লক্ষাবধি

কবির কবিতা রহে প্রলয় অবধি।

কবিগণে রচি যদি কহে মিথ্যা কথা

সর্বলোকে সত্য হেন জানএ সর্বথা।

এই লাগি মহাজনে কবি সন্তোষএ

কবি হোন্তে আপনা প্রশংসা নাম রহে।

পৃথক পত্রে^১ স-‘কে আদ্যবর্ণ করে রচিত আরো একটি পদবন্ধ আছে, ভগিতা নেই। তবে

^১ পুথি পরিচিতি, পৃ: ৩৫৭-০৮, ৩০৮-০৯।

^২ পুথি পরিচিতি, পৃ: ৩৫৭-০৮, ৩০৮-০৯।

অনুমান করি, এটিও নওয়াজিস খানের রচিত। এ পদবন্ধে উল্লেখিত একজন হচ্ছেন আঠারো শতকের জমিদার দেয়াড়বাসী হোসেন খান, তিনি বেলচুড়ার প্রসিদ্ধ কালাবিধি চৌধুরীর পূর্বপুরুষ এবং দ্বিতীয় জন হোসেনপুত্র রহমত খান—

সুভস্থান সু-দিয়াঙ্গ সেদেশের নাম— সুরঙ্গে হোসেন নৃপ গেল স্বর্গ স্থান।

সুনাম শ্রীযুত যে হোসেন নাম— সুভপূর্ণ শ্রীযুত রহমত খান।—

সুপুত্র জন্মিল এক (অতুল) বাখান

অন্য এক পত্রে আধু খান হাজারীর পুত্র শের জামাল খানের বিবাহের উল্লেখ রয়েছে^১

তবে আধুখাঁএ মনে চিন্তিতে লাগিল পুত্রে বিবাহ করাইতে মনে ত ইচ্ছিল।

শের জামাল খান বিয়ে করেন আমানত খানের ভগ্নীকে—

শ্রীযুত আমানত খান গুণনিধি শেরজমা খাঁ নৃপতির হৈল রমণী।—

তান ভগ্নী সত্যবতী ছিল একজন আধু খাঁ নৃপতি তবে স্বর্গে চলি গেল।

এ সঙ্গে রয়েছে মঙ্গদনগরের (?) জমিদার 'শ্রীযুত গোলাম আলী সিকদারের তারিফ। এটিও মসজিদের জন্যে ভূমিদান চাওয়ার আবেদনমূলক রচনা :

নাম তোমা শ্রীযুত গোলামালী সিকদার প্রভুর গৃহের হেতু যদি দেও ভূমি।

চৌদিকে প্রশংসা পূর্ণ মহিমা তোমার। 'দীপ্তাধন্য' লোক দেখি কহি বারেবার

আপনার স্থানেত কিঞ্চিৎ মাগি ভূমি ভূমিদান করি কর মহিমা প্রচার।

গ. এবার জোরওয়ারসিংহ প্রশস্তি।^২ কবি বলছেন—

মুই হীন প্রতিদিনে মাগি প্রভু স্থান

শ্রীযুত জোরওয়ারসিংহ হৈতে কল্যাণ।

এ প্রার্থনা নিঃস্বার্থ নয়। জোরওয়ারসিংহ থেকে জমি চান কবি :

তোমা পিতৃ দান দিচ্ছে সুফলিখ ভূমি জোরওয়ারসিংহ নৃপ কৃতি শতগুণ

উচ্চ গিরি বন দান মোকে দেও ভূমি। পদবন্ধ রচি কহে নওয়াজিস খান।

লক্ষণীয় আঠারো শতকের প্রথমার্ধের কবি নওয়াজিস খান প্রশস্তির আকারে নানা বৈষয়িক প্রয়োজনে ঘন ঘন খণ্ড কবিতা রচনা করেছেন, এটি দেশ-কাল বিরুদ্ধ প্রায় নতুন রীতি। আরবি-ফারসিতে কুসিদা বহুল রচিত হয়েছে, স্তুতি-প্রশস্তি বাঙালীরও অজ্ঞাত নয়, তবে এরূপ কাব্যিক প্রসঙ্গ নিরপেক্ষ বিচ্ছিন্ন রচনা বিরল।

আবদুল করিম সাহিত্যবিশারদ পরবর্তীকালের এমনি ব্যক্তিপ্রশস্তিমূলক পদবন্ধও সংগ্রহ করেছিলেন।^৩ যেমন রাধামোহন সেরেস্তাদারের কীর্তি, বখশ আলী ফৌজদারের কীর্তিগাথা। এ দুটোর রচয়িতা চট্টগ্রামের দেয়াড় বা দেব-গ্রামবাসী রামতনু আচার্য। রচনাকাল যথাক্রমে 'চন্দ্র মুনি বেদ ইন্দু বা ১২৪১ বঙ্গাব্দ বা ১৮৩৪ খ্রীস্টাব্দ এবং নিধি বসু ধাতা ইন্দু বা ১১৮৮ মঘীসন বা ১৮২৬ খ্রীস্টাব্দ। এরূপ রচনা হচ্ছে গঙ্গাদাস রচিত 'রাজকুমার বাবুর পরিণাম', দ্বিজ রামচন্দ্র রচিত 'নিত্যানন্দ বৈদ্য'। গুলবানুর বারমাসীতে তার স্বামী আশরাফ মুন্সীর খুনের কথা

^১ পুথি পরিচিতি, পৃ: ১৭২-৭৩, পৃ: ৩৬৮-৬৯। ৫ম. প্রাচীন পুথির বিবরণ, ১ম সংখ্যা।

^২ পুথি পরিচিতি, পৃ: ১৭২-৭৩, পৃ: ৩৬৮-৬৯। ৫ম. প্রাচীন পুথির বিবরণ, ১ম সংখ্যা।

রয়েছে: 'চৈত্রমাসে আশরাফ মুসলী ঘরেতে হৈল খুন।' আবার জলোচ্ছাস, তৃফান, ভূকম্প প্রভৃতি প্রাকৃতিক দুর্যোগ সম্বন্ধেও রচিত হয়েছে পদবন্ধ, এমন কি যুদ্ধ, দাঙ্গা প্রভৃতির বর্ণনাও বিরল নয়।

ঘ. এতিম কাসেম বিরচিত দ্য বারোজ প্রশস্তি— একখানি ক্ষুদ্র খণ্ডিত পুথি। ১১ (৬) পরিমিত কাগজের বই। ১-২২ পত্র বিদ্যমান। পাঠ দেখে মনে হয়, বেশির ভাগই আছে। শেষের দু'চার পাতামাত্র হারিয়ে গেছে।

ঈসাপুর চট্টগ্রামের ফটিকছড়ি থানার একটি গণগ্রাম। সে-গ্রামের জমিদার গিন্নী বিধবা আওরা দ্য বারোজ। তাঁর কাছে জমি যাএগা করেছেন কবি এতিম কাসেম। সে-সূত্রে কবি এ পুথিতে স্বার্থোদ্ধারের জন্যে জমিদার গিন্নী ও তাঁর কর্মচারীদের মন গলানো স্তুতি রচনা করেছেন। তাঁর যাএগার যৌক্তিকতা দেখাতে গিয়ে তিনি ঈসাপুর গ্রামের পুরাকাহিনী শুনিয়েছেন। এ কাহিনীর উপর গুরুত্ব দিয়েই পুথির সংগ্রাহক ডক্টর মুহম্মদ এনামুল হক এবং আবদুল করিম সাহিত্যবিশারদ এ গ্রন্থের নাম রেখেছেন 'ঈসাপুরের ইতিহাস'। কিন্তু পুথিখানির নামে 'ঈসাপুরের ইতিহাস' রাখার কোন সার্থকতা নেই।

কিঞ্চিৎ কহিতে এক নৃপের পয়ার।

লিখিবারে শ্রদ্ধা হৈল মনান্তরে গুণি।

নৃপতির যথ কথা পশ্চাতে কুহিমু।

যথেক কিরীতি তান (নৃপতির) কহিমু

সকল

পয়ার সম্ভার বাক্য আগে প্রচারিমু।।

মনোসূত্রে শুদ্ধি সব করি একস্তর

চোখে না দেখি যারে (নৃপতি) কানৈমাত্র শুনি।

যাচকের রূপে দিমু নৃপতি গোচর।

উদ্ধৃত উক্তিগুলোর ইঙ্গিতের অনুসরণে আমরা পুথির নাম দিলাম 'আওরা-দ্য বারোজ প্রশস্তি।' বলা বাহুল্য, জমিদারই কবির তোয়াজের ভাষায় 'নৃপতি' হয়ে উঠেছিলেন। এক্ষেত্রে আবার নারীই নৃপতি। আওরা দ্য বারোজ পত্নীগোত্রী জমিদার।

এ প্রশস্তির রচয়িতা এতিম কাসেম। সম্ভবত কবির নাম কাসেম। আর 'এতিম' মাতাপিতাহীন দুস্থ অবস্থাসূচক বা বিনয়জ্ঞাপক বিশেষণ :

এতিমের কথা শুন এ দুই শ্রবণ।

দান দিয়া শাস্ত কর এতিমের মন।

এ চরণ দুটির এবং মূল বক্তব্যের পরিপ্রেক্ষিতে এ অনুমান অসঙ্গত নয়। অবশ্য 'এতিম আলম' নামে অপর এক কবির পরিচয় আমরা পেয়েছি।

ঈসাপুর গ্রামের উৎপত্তি সম্বন্ধে চট্টগ্রামে একটি কিংবদন্তী আছে। জনশ্রুতি এই যে ঈসা খাঁ মসনদ-ই-আলা কোন মুঘল সেনাপতি খান-ই-জাহান হোসেন কুলী বেগের সঙ্গে যুদ্ধে পরাজিত হয়ে ১৫৭৬-৭৭ খ্রীস্টাব্দে চট্টগ্রামে পালিয়ে আসেন, যে জঙ্গলাকীর্ণ পাহাড় ঘেঁষা জায়গাটিতে তিনি দু'বছর অজ্ঞাতবাস করেন, তা ঈসাপুর নামে পরিচিত হয়। কবি মুহম্মদ খান মকুল হোসেন কাব্যের উপক্রমে পীর প্রশস্তি অংশে বলেছেন ঈসা খান চট্টগ্রামের শাহ আবদুল ওহাব ওফে শাহ ভিখারী সদর-ই-জাহাঁর ভক্ত বা শিষ্য :

বার বাঙ্গলার রাজা ঈসা খান বীর। স্নেহভাবে যাহাকে পূজন্ত পুতিনিতি। দক্ষিণ কূলের রাজা আদম সুধীর।।

^৩ প্রাক্কণ পৃ: ৬১০।

কাজেই অনুমান করা যায়, ঈসা খাঁ কোন সময়ে পালিয়ে বা পীরের সঙ্গে সাক্ষাৎ করবার জন্যে চট্টগ্রামে গিয়ে যে-স্থানে শিবির স্থাপন করে সানুচর বাস করছিলেন, সে স্থানটি পরবর্তীকালে 'ঈসাপুর' নামে খ্যাত হয়।

সে-কালের যুরোপীয় বিশেষত পর্তুগীজ বণিকদের কেউ কেউ এদেশে জমি কিনে ব্যবসার জন্যে আড়তাঙ্গি স্থাপন করতেন, চাষাবাদ করাতেন, প্রজাও বসাতেন। হয়তো সে সূত্রে জমিদারও হয়ে উঠতেন। আলোচ্য ক্ষেত্রে তেমন একজন জমিদারকে স্তোকবাক্যে খুশী করে কবি তাঁর শৈতৃক সম্পত্তি পুনরুদ্ধারের উপায় খুঁজেছিলেন। কবির পিতার মুৎসুদ্দি (জমিদার তত্ত্বাবধায়ক) বার্ষিক ১১৪ টাকা আয়ের সম্পত্তি আত্মসাৎ করে।

বহুকাল পরে, এবং প্রশস্তি রচনার তিন বছর আগে কবি আবার পূর্বপুরুষের গায়ে ফিরে আসেন— তিন অন্দ ঈসাপুরে মোর স্থানস্থিতি।' কবি বলেছেন :

বলবুদ্ধিহীন হৈলুঁ নাহি মোর লক। অতএব, দান দিয়া শাস্ত কর এতিমের মন।

পৃথিবীতে নাহি মোর করিতে পালক।।

এর পরে 'ঈসাপুর আবাদ কাহিনী' বর্ণিত হয়েছে।

কবি এতিম কাসেম তাঁর জমিদার প্রশস্তি যে ওয়ারের হেস্টিংসের (১৭৭২-৮৫ খ্রীস্টাব্দ) আমলে রচনা করেছিলেন তা 'কুম্পানী সরকারের পরিকল্পনা' শীর্ষক পর্বের বিবৃতি থেকে প্রমাণিত হয়, বিশেষত লর্ড নর্থের 'রেগুলেটিং অ্যাক্ট' (১৭৭৩ খ্রীস্টাব্দ) কার্যকর হওয়ার (অক্টোবর ২৬, ১৭৭৪ খ্রীস্টাব্দ) পরে যে রচিত হয়েছিল সে সম্ভবত পাওয়া যায়। কবির বিবৃতিতে কিছু কিছু ভুল রয়েছে অবশ্য, তবে কবি নয়া শাসন-সুস্থতার মোটামুটি খবর রাখেন। কবি উনিশ শতকের উষাকালেরও হতে পারেন।

দিল্লীর শহরে বীন ডঙ্কা হইলেক ধীর।

কুম্পানী প্রবল হৈল গিরিসম স্থির।।

আল্লার হুকুম হৈল কুম্পানী প্রবল হৈল

ভাটি আদি হৈল অধিকারী।

ভাটি আদি হিন্দুস্থান সর্বদেশ জিনি।

অষ্ট কৌসিল নামে রাখিল কুম্পানী।।

কুম্পানী যাহারে বোলে তার মর্ম কহি।

অষ্টজন মিলি কুম করিলেক সহি।।

এহি অষ্ট জন মিলি করিলেক কুম।

কুম্পানী তাহারে বুলি একই হুকুম।।

সেকালের সুপ্রীম কোর্টের আওতায় সদ্য প্রবর্তিত বিচারব্যবস্থারও উল্লেখ রয়েছে :

সদর চাকুরী আছে কর্ম মুসলমানি।।

'ফাজিল আলিম' সব আনিয়া রাখিছে।

'ফরাজ ফতবা' দিতে নিয়ম করিছে।।

কেতাবে যেমত আছে করএ ইনসাফ।

কবি এ সুযোগে জমিদারকেও তোয়াজ করে নিয়েছেন :

ইঙ্গরেজ যদি হৈল এথা অধিপতি।

তোমার সুকৃতি হৈল দেখি সম জাতি।।

কেননা, ইঙ্গরেজ সকল সঙ্গে বহু হৈল মিল।

আঠারো শতকের শেষপাদের ও উনিশ শতকের গোড়ার দিকের চট্টগ্রামের বহু জমিদারের নামোল্লেখ রয়েছে এ প্রশস্তিতে। এঁদের মধ্যে কয়েকটি পরিবার বিত্তে ও অভিজ্ঞাত্যে আজো খ্যাতিমান। বিবৃতির আলোকে খোঁজ করলে যে উপাদান মিলবে, তাতে চট্টগ্রামের ইতিহাসের

এক অজ্ঞাত ও লুপ্ত অধ্যায় লেখা হতে পারবে।’

৬. **খঙলে কুকির হামলার ইতিহাস**— আমার আলোচ্য পুথিটি মরহুম আবদুল করিম সাহিত্যবিশারদ-সংগৃহীত।

১৮৬৯ খ্রীস্টাব্দে ৩১শে জানুয়ারি (১৬ই মাঘ) সরস্বতী পূজার দিন পার্বত্য কুকিরা বর্তমান ফেনী মহকুমার ছাগলনাইয়া-পরশুরাম অঞ্চলে হানা দিয়ে রক্তে আঙনে এবং ধন জন লুটে এক বিভীষিকা সৃষ্টি করে। তারই রোমহর্ষক বর্ণনা রয়েছে এ পুথিতে। সরকারী প্রতিবেদনেও এর একটি সংক্ষিপ্ত বর্ণনা মেলে।

কৈলাসচন্দ্র সিংহ তাঁর রাজমালায় ‘কুকিজাতির বিবরণ’ অধ্যায়ে এ বিষয়ে বিস্তৃত বর্ণনা দিয়েছেন। কৈলাসচন্দ্র সিংহ এ বিষয়ে রাধামোহন নামের এক লোক কবির রচিত গীতিকার তিনটি অংশের তেইশটি চরণ তাঁর স্মৃতি থেকেই উদ্ধৃত করেছেন। রাধামোহনের গীতিকা সংগৃহীত হয়নি। উদ্ধৃত অংশ থেকে জানা যায়, মাঘ মাসের শনিবারে শ্রীপঞ্চমীর দিন সকালে ত্রিপ্রা কুকিরা ‘দাও শেল হাতে বন্দুকহ কাঙ্কে’ রণে প্রবেশ করে এবং ‘যারে পায় কাটি ফেলায়’ আর ‘ঘর জিনিস লুট করি চালে দেয় আঙন।’ শুধু তাই নয় :

তারা খজা নিল, কুড়াল নিল, আর নিল দাও কাটি

সিন্দুক ভাঙ্গি কাপড় নিল ডালি-ডালি বাছি।

পরদিন রবিবারে এসে আবার শুরু করলো লুটতরাজ। সেদিন যখন কোলা পাড়া গাঁ আক্রমণ করবার জন্যে কুকিরা এগিয়ে যাচ্ছিল, তখন ‘বুড়িলালী’ নদীর গুণাগাজী নামে এক নেতৃস্থানীয় ব্যক্তি বন্দুক ও সিপাই নিয়ে তাদের বাধা দিলেন। ত্রিপ্রা কুকিরা ভয়ে পালাল। এবার গুলি বর্ষণের অনুসরণে ঘটনাটি বর্ণনা করছি।

কুকি সঙ্গে শর্ত করি যথেক রিয়াঙ্গ নারাচ-নালিকা আর ব্রহ্ম অস্ত্র ছাঙ্গ।
—নিয়ে খঙলে নেমে এল রক্তে আঙনে বিভীষিকা সৃষ্টি করে ধনজন লুট করবার জন্যে। সেদিন ছিল শ্রীপঞ্চমী। ত্রিপুরারাজ্যের সীমান্ত মুন্সীরখীলে ছিলেন ত্রিপুরার ফৌজদার ভৈরব। পুজোর উদ্যোগে তিনি ছিলেন ব্যস্ত। কুকি রিয়াঙের অতর্কিত আক্রমণের সংবাদে তিনি প্রতিরোধের ব্যবস্থা না করেই প্রাণ নিয়ে পালালেন। নির্বিঘ্নে কুকি রিয়াঙেরা মুন্সীরখীলে বেপরওয়া হত্যাকাণ্ড চালাতে লাগল :

চৌদিকে ঘিরিয়া বাটে	হস্তে খড়্গ ধরি কাটে	কেহ কেহ মারে ছেল ঘাতে
কার কার কাটে শির	কারে কারে হানে তীর	শির কাটি ফেলায় ভূমিতে।
কাহার বিকিল জানু	কাহার ছেদিল তনু	কার আঁখি করিয়া আকুল
ব্রহ্ম অস্ত্র ধরি মারে	মুখে নাহি শব্দ করে	বলহীন হইল সকল।

তারপর মুন্সীরখীল থেকে ডাকুরা বংশগঞ্জবাজারে গিয়ে বন্দুকের গুলি ছুড়তে লাগল। ফলে, মৃগপতি দেখি যেন মাতঙ্গ পালায়/তেনমতে নরসব প্রাণ লই ধায়।

সরাই কিন্তু পালিয়ে বাঁচতে পালল না :

^১ মৎ-সম্পাদিত পুথিটি বাঙলা একাডেমী পত্রিকায় ২য়-৩য় সংখ্যা ভদ্র-চৈত্র ১৩৬৫ সালে প্রকাশিত। বিস্তৃত আলোচনা সে-সংখ্যায় দ্রষ্টব্য।

পুত্র কন্যা লই ধায় কষ্টকের বলে এবং, নারীসব ধরি ধরি করিল বন্ধন
বন্দুক মারিয়া পানী রাখে সেই খানে। গৃহের অন্তরে যাই লুটিলেক ধন।
তারপর বাজারে অগ্নিসংযোগ করে বসন্তপুরে পোদ্দার বাড়ি লুট করবার জন্যে গেল তারা।
কমল বণিক ছিল সে অঞ্চলের নামকরা ধনী। ডাকুরা তার বাড়ী ঘেরাও করে কমল পোদ্দারকে
হত্যা করে এবং

‘অজস্পুরে প্রবেশিয়া লুটিলেক ধন’ তাহার রমণী ধরি করিল বন্ধন।’

এ হামলায় লুণ্ঠিত হয় পনেরোটি গ্রাম, নিহিত হয় ১৮৫ জন আর ধৃত হয় একশ জন বাঙালী।
এখানে ক্রাসিক্যাল রীতিতে কমল পোদ্দারের স্ত্রীর রূপ বর্ণনা করেছেন কবি :

শ্রীখণ্ড কপাল দেখি চান্দে পাই লাজ খঞ্জনে দেখিয়া আঁখি বনে দিল লুক
ক্ষীণ হই কলঙ্ক ইচ্ছিল দ্বিজরাজ। মধুবানী শুনি পিক ধিক লাজে মুক।
মুখ দেখি পদ্ম মজে জলের মাঝার দশন দেখিয়া মুক্তা ডুবে জল মাঝে
কে দেখি চামরী রহিল বন মাঝে। কণ্ঠরেখা দেখি কমু জলে মজি যায়।
কনক কলস কুচ তাল কুলধিক।

এরপর কুকিরিয়াঙেরা যখন কোলাপাড়া গাঁয়ে হানা দিল, তখন সে গাঁয়ের প্রধান ব্যক্তি
গুণাগাজী বন্দুক ও সিপাহী নিয়ে

স্মরিয়া আশ্রয় নাম চড়ি এক তাজি মহাযুদ্ধে প্রবেশ করিল গুণাগাজী।
মার মার শব্দ হৈল নগর ভরিয়া সেপাই বন্দুক হস্তে লইলে তুলিয়া।
বীর্যহীন যে সকল ধাবন্ত পলায় পাক্কাড়িয়া সর্বজন আনিল সিপাই।
এমনি সময়ে ‘পঞ্চশত সৈন্য সঙ্গে করি মহাবল’ জকিমল এগিয়ে এল কুকি রিয়াঙের
সাহায্যার্থে, এতেও

মৃত্যু প্রতিজ্ঞ করি কিছু না করিয়া মন

মহাযুদ্ধে প্রবেশিল ইসুফ-নন্দন গুণাগাজী।

‘মকর পশিল যেন সমুদ্রের জলে’ কিংবা ‘ঘোটকের মধ্যে যেন খেলায় কেশরী’ তেমনি করে
অরি-ত্রাস গুণাগাজী শত্রু বধ করতে লাগল। এভাবে ‘মৃত্তিকা উপরে হৈল রক্তের বিছানা’।
অবশিষ্ট ডাকুরা প্রাণ নিয়ে পালাল।

যে গুণাগাজী প্রাণের ভয় তুচ্ছ করে কুকি রিয়াঙদের সঙ্গে লড়াই করল, লোকের ধন প্রাণ
রক্ষা করল, তাকেই লোকে দায়ী করল কুকি-রিয়াঙদের আহ্বানকারী বলে। ভাগ্যের এই
পরিহাসের একটি কারণ ছিল। কুকি রিয়াঙেরা হানা দিয়েছিল সোমবারে। তার আগের
বৃহস্পতিবারে গুণাগাজী কোন কারণে উত্তেজিত হয়ে তার এলাকার লোকদের হুমকি দিয়েছিল
যে সে কুকি রিয়াঙদের ডেকে এনে তাদের শায়েস্তা করবে। তার মুখে কথা অমোঘ হয়ে
ফলবে, তা কি সে জানত। কাজেই সরল বিশ্বাসী গ্রামবাসীরা সাহেবকে জানাল :

গুণাগাজী আরাধি আনিল রিয়াঙেরে গুণাগাজী এহি বাক্য সত্বরে কহিল
সূরগুরুবারে গুণাগাজী কহিল ডাকিয়া চন্দ্রবারে আমি সব নিধন হইল।
কাটিবে সকল লোক কুকি আরাধিয়া।

সাহেব গুণাগাজীকে গেরেফতার করিয়ে আনালেন। এভাবে ‘গুণাগাজী বন্ধনে রহিল কতদিন’।
ত্রিপুরা ও নোয়াখালী গ্যাজেটিয়ারে এ ঘটনার কোন উল্লেখ নেই। বর্তমান কুমিল্লা জেলার কোন

ইতিহাস নেই। নোয়াখালীর ইতিহাসও দুঃপ্রাপ্য। তাই এসব সূত্রে কোন তথ্য মেলেনি। কেবল কৈলাসচন্দ্র সিংহের রাজমালাতে এর বিবরণ পাচ্ছি।

‘রাজমালা’য়^১ ত্রিপুরারাজ্যে ফৌজদারের নাম ধরণীসিংহ, রাধামোহনের মতে ধুরন্ধর আর গুলবখশের কাব্যে পাচ্ছি ভৈরব। কুকি-রিয়াম ডাকুদের সরদারের নাম রাজমালায় নেই। গুলবখশের পুথিতে সরদারের নাম জকিমল। গুণাগাজীর কৃতিত্বের প্রশংসা তিন সূত্রেই মেলে।

এই ভীষণ উপদ্রবের যে কারণ সরকারী তদন্তে নিরূপিত হয়েছে, তা কৈলাসচন্দ্র সিংহ উদ্ধৃত করেছেন।

কিন্তু কৈলাস চন্দ্র সিংহ এ হত্যাকাণ্ডে অন্য কারণও বর্ণনা করেছেন। তাঁর মতে ‘ত্রিপুরার পার্বত্য প্রদেশের রিয়াং নামক এক সম্প্রদায় আছে, ইহারা কুকিদিগের ন্যায় তত ভীষণ প্রকৃতির না হইলেও নিতান্ত নিরীহ জাতি নহে। রিয়াংগণ খণ্ডলের বাঙালী মহাজনগণ হইতে সর্বদা টাকা কর্জ করিত। পার্বত্য অনাবৃষ্টিনিবন্ধন প্রায় দুই তিন বৎসর শস্য জন্মে নাই। সুদে আসলে অনেক টাকা দাড়াইল। মহাজনেরা সর্বদা রিয়াংদিগকে টাকার জন্য তাগাদা করিত। তাহারা ইহা অসহ্য বোধে দুখাং ও অন্যান্য কুকিদের সহিত সম্মিলিত হইয়া এই কার্য সম্পাদন করে। ইহাতে কৃষ্ণচন্দ্র ঠাকুর প্রভৃতি রাজবংশীয় কয়েকজন ব্যক্তি সংশ্লিষ্ট ছিলেন। বিখ্যাত কুকি সরদার রতন পুইয়া ইহাদের সঙ্গে যোগদান করেন।

কুকিদিগের অত্যাচারে যে সকল খণ্ডলবাসী সর্বস্বান্ত হইয়াছিল গভর্ণমেন্ট তাহাদিগকে ১৩০০৭ টাকা ক্ষতিপূরণ প্রদান করেন, ইহার অর্ধাংশ ত্রিপুরেশ্বর হইতে গৃহীত হয়।

আমাদের মনে হয়, কৈলাসচন্দ্র সিংহ যথার্থই এ তথ্যই নির্ভরযোগ্য। এই অসভ্য কুকিরা রাজকীয় প্রশ্নে ও রাজবংশীয়দের বড়মন্ত্রের হাতিয়াররূপে ১৩৩৭ খ্রীস্টাব্দ থেকেই ত্রিপুরারাজ্যের ভেতরে ও রাজ্যসীমা অতিক্রম করে চট্টগ্রাম, সিলেট, কাছাড়, মণিপুর ও ত্রিপুরার সমতল অঞ্চলে মাঝে মাঝে উপদ্রব সৃষ্টি করত ত্রিপুরারাজ্যের প্রতি ব্রিটিশ সরকারকে বিরূপ করার মতলবে। উপদ্রব ১৮৯০ খ্রীস্টাব্দ অবধি মাঝে মাঝে সংঘটিত হয়েছে। ব্রিটিশ সরকার নানা কৌশলে কুকিদের এই দুঃপ্রবৃত্তি দমন করেছিল। এজন্যে ব্রিটিশ সরকারেরও প্রায় ত্রিশ বছর সময় লেগেছে।^২

৮. আরো কয়েকটি ঐতিহাসিক ও সামাজিক ঘটনা— ১. চট্টগ্রামে ভূমিকম্প গ্রহণ্তি রচনা করেছেন জগদীশ সিংহ। তিনি বলেন—

এই বাক্য কতদিন স্মরণকারণ/জগদীশ সিংহে কহে তাহার বচন।

ভূকম্প হয়েছিল : নেত্র বসু সাত পুরিয়া সন্ধান/শকাদিত্য সন এই শাস্ত্র পরিমাণ।

নেত্র পাখা দুই চন্দ্র বৈসে এক স্থান/মঘীসন আছিলেক এই পরিমাণ।

অতএব ১৭৮৩ শকে বা ১২২৩ মঘীতে তথা ১৮৬২ খ্রীস্টাব্দে ২৩শে চৈত্র গুরুপক্ষের দশমী তিথিতে শুক্রবারে বেলা চার দণ্ড কালে এ ভূমিকম্প সংঘটিত হয়।

^১ রাজমালা, পৃ: ৩৯১, ৩৬১-৬৭, ৩৫০-৮৫।

^২ বিস্তৃত বিবরণের জন্য মং সম্পাদিত পুথিটি ইতিহাস পত্রিকা, ২য় বার্ষিক সম্মেলন সংখ্যা, ১৩৭৪ সাল দ্রষ্টব্য। ২. প্রাচীন পুথির বিবরণ, ১ম খণ্ড, ২য় সংখ্যা পৃ: ৮।

রণী ধরিতে লোক স্থির হৈতে নারে
পুষ্করিণী হৈতে জল নিকলে বাহিরে ।

স্থানে স্থানে মেদিনী ফাটিয়া উঠে পানি
কত কত স্থানে লোকে হারাইল প্রাণি ।

২. ১২৩৮ মঘীতে বা ১৮৭৬ খ্রীস্টাব্দে চট্টগ্রামের সীতাকুণ্ড মীরেরসরাই থানা অঞ্চলে সামুদ্রিক জলোচ্ছ্বাসে ও ঝড়ে বিপর্যয় সৃষ্টি করেছিল, ওয়াজুদ্দীন চৌধুরী 'গরকীর বচন' নামের [গরকী(জলোচ্ছ্বাস) পদবন্ধে] তা লিপিবদ্ধ করেছেন তিন বছর পরে ১২৮৬ বঙ্গাব্দে :

ভাস্কর দক্ষিণ পানে নেত্র বসাইয়া

তার ডাইনে বসু রাখি যন্তন করিয়া,

(ভাস্কর-১২, নেত্র ৩, বসু ৮ = ১২৩৮ মঘী)

ঋতু বসু দিন বৃষ্টিক মাসের ১৪ই অগ্রহায়ণ লিখন সমাপ্ত । রোজ গুরু-অসুরের তথা গুরুবার ঝড়ের দিন-

শওয়ালের তের রোজ পূর্ণিমার দিনে

প্রথমে যুদ্ধেতে আইল হনুমানের পিতা (পবন)

বারশ আটত্রিশ মঘী কার্তিক পুনি খেণে ।

গৃহ আদি উখারি ভাঙ্গিল বৃক্ষশাখা ।

এলাহি গজব ভেজে বাঙ্গালা জমিনে

জলস্রোত আসি সব ভাসাইয়া নিল ।

রোজ মঙ্গলবার ছিল জান সবজনে ।

৩. ১১৯৯ (১৮৩৭ খ্রীঃ) মঘীসনের^১ চট্টগ্রাম ও নোয়াখালী অঞ্চলে মারাত্মক ঝড় বয়ে যায়, সে ঝড়ে প্রায় সব পরিবারই ধনে প্রাণে ক্ষতিগ্রস্ত হয় ।

সমুদ্র মাঝারে ডেউ হইল বিস্তর

ছুফান হইল অতি খরতর ।

ঝড়ে-তুফানে ক্ষতিগ্রস্ত লোকে খাজনা দিতে না পারায় 'নিলাম করাই কত বেচাইল জমিদারী । ভগিতা নেই । দুটো ঝড়ের কোনটি পদবন্ধে বর্ণিত বোঝা গেল না । ডক্টর সুকুমার সেন ও দ্বিজ দামোদর রচিত, অনিরুদ্ধ গুপ্ত রচিত ও দ্বিজ নফর রচিত বন্যার, এবং ১১৩৭ ও ১২৩০ বঙ্গাব্দের পশ্চিমবঙ্গের বন্যার কবিতার উল্লেখ করেছেন । এবং দ্বিজ দ্বারকানাথের রচনার সামান্য নমুনাও দিয়েছেন ।

মাঠেত ধান ছিল পেয়ে বান আখালি পাখালি,

ছিল ইক্ষু অতি দীর্ঘ চেপে গেল বালি ।

রাজকর কিসে দিব কি খাইব অন্তরে ভাবিয়া,

স্থানান্তরে কেহু গেল দুঃখিত হইয়া ।

ডক্টর সুকুমার সেনও^২ পূর্ব ও পশ্চিমবঙ্গে চালু বিভিন্ন গাথার ও ছড়ার উল্লেখ করেছেন । একটি ছড়ায় বর্ধমানরাজ কীর্তিচন্দ্রের মৃত্যুতে বিলাপ রয়েছে :

জমিদারেরা ছিল দেশে বড়ই অত্যাচারী

বর্গী ভয় হতে আমাদের রাখলে যতনেতে

ভোমার নামে কাঁপত তারা সদাই থরথরি ।

শহরের লোক কান্দে করে হায় হায় ।

ডক্টর সুকুমার সেনোক্ত^৩ অনুপচন্দ্র দত্তের প্রতাপচন্দ্রলীলারসঙ্গীত দেওয়ান মানুন্না মণ্ডল রচিত 'কান্তনামা', কোচবিহারের রাণী রচিত বেহারোদন্ত কীর্তিচন্দ্র সিদ্ধান্ত রচিত 'জাল প্রতাপচন্দ্র' গাথা প্রভৃতি উনিশ শতকের প্রথমার্ধে রচিত ।

^১ পুষ্টি পরিচিতি : পৃ: ১১৭, ৩৬৮ ।

^২ এ

^৩ বাঙালী সাহিত্যের ইতিহাস, ১ম খণ্ড অপর্য, পৃ: ৫১০-১৬ ।

^৪ প্রাক্ত, পৃ: ৫১০-১৬, ৫১২-১৬

১১৯০ বঙ্গাব্দের বা ১৭৮৩ খ্রীস্টাব্দে ঘটনা বর্ণিত হয়েছে উত্তরবঙ্গের জমিদার সীতারাম রায়ের দেওয়ান রামবল্লভ রায়ের চাকরী সংক্রান্ত পদবন্ধে। এটির বিশিষ্টতা এই যে, এ প্রথম প্রজার দাবিতে সরকারের টনক নড়েছিল এবং প্রজার দাবি মেনে আপোস করতে হয়েছিল সরকারকে।^১ নয়আনার জমিদার পক্ষের কবি মহীপুরবাসী কৃষ্ণহরি দাস ‘চন্দ্রপুঠে লিখে গ্রন্থ পুঠে শূন্য’ সনে অর্থাৎ ১১৯০ বঙ্গাব্দে বা ১৭৮৩ খ্রীস্টাব্দে রঙপুরের কালেক্টর গুডল্যান্ডের নির্দেশে বর্ধনকুঠীর নয় আনা সম্পত্তির শরিক জমিদার সীতারাম রামবল্লভকে দেওয়ান নিযুক্ত করেন। দেওয়ান গোপনে জমিদারী নিলাম করিয়ে নিজে জমিদার হবার মতলবে ছিলেন, জমিদার যথাসময়ে টের পেয়ে প্রজাদের কাছে সাহায্যের আবেদন করেন। প্রজারা সরকারের কাছে দেওয়ান রামবল্লভকে পদচ্যুত করার দাবি জানায়। সরকার এ দাবি মেনে নিয়ে প্রজাদের তুষ্ট করেন।

একটি দুইটি করিয়া রায়ত ধরল সারি কাচারি বেড়িয়া রায়ত হল হাজার চারি।
এ হচ্ছে সেকালের জনগণের ‘ঘেরাও’ আন্দোলন। সাহেব দেখল গতিক ভালো নয় :
সাহেব বলে শুন শুন রামবল্লভ রায় দেওয়ান বলে রায়ত সব করতে পারে
রায়তে না ছাড়ে পিছু কি করি উপায়। কাকেও স্বর্গে তোলে কাকে আছড়ে মারে।
রায়ত লইয়া সবার ঠাকুরালি সাহেব বলে আজ হতে দেওয়ান খারিজ হল।
যত দেখ সোনার বালা রায়তের কড়ি।

নোয়াখালীর প্রসিদ্ধ ‘চৌধুরীর লড়াই’ ও ময়মনসিংহ গীতিকা ও পূর্ববঙ্গ গীতিকা, দেওয়ান ফিরোজ খান, চন্দ্রাবতী, কেনারাম, দেওয়ান মদিনা, শাহসুজা প্রভৃতির মতো ইতিহাসের উপকরণ ও সূত্র ধারণ করে।

৬. উনিশ শতকের গোড়ার দিকে ত্রিপুরা রাজ্যের উজির দুর্গামণি ঠাকুর সংস্কৃতে রচিত রাজমালা বাঙলা পদ্যে অনুবাদ করেন, এটিই রাজবংশের রাজ্যের রাজনীতির যুদ্ধ বিগ্রহের সঙ্ক্ষিপ্ত বিবরণ সম্বলিত প্রথম বাঙলা পূর্ণাঙ্গ রাজনীতিক ইতিবৃত্ত। পারিবারিক বিবাদ ও প্রাসাদ ষড়যন্ত্রমূলক গ্রন্থ ‘চম্পক বিজয়’ও এ সূত্রে স্বর্ভাব্য। এর আগে আমরা ভারতচন্দ্র রায়ের অনুদামঙ্গলের উপক্রমে মুর্শিদাবাদে মসনদে নওয়াব বদলের সংক্ষিপ্ত ধারাবিবরণী পেয়েছি। সে সঙ্গে পেয়েছি একটা অস্ত্রির অবস্থার ইঙ্গিতও। বর্গীর লুণ্ঠন, ধর্ষণ, হনন, দহন, ইংরেজের উপস্থিতি, গিরিয়ার ও পলাশীর যুদ্ধ, নওয়াব বদল, কোম্পানী শাসন প্রভৃতি বিষয়ক ছড়া-গান পদবন্ধ, পরবর্তীকালের ফকির-সন্ন্যাসী দ্রোহ, ওয়াহাবী আন্দোলন প্রভৃতি নানা রাজনীতিক সামাজিক ছড়া গান গাথা পাঁচালীর কিছু নমুনা এখানে তুলে ধরছি। আলোচনা বা বিশ্লেষণ অপ্রয়োজনীয়। কেননা এ সব বিষয়ে তথ্যান্বিত বিশ্লেষণাত্মক নানা গ্রন্থ আগেই রচিত হয়েছে।

৭. মদন পালায়^২ : সুবাদার শায়েস্তা খানের প্রজা-পীড়ন চিত্র :

‘কারে কারে ইটের উপর করে রেবেছে খাড়া তামাক খেয়ে গুল কারু ছাপ ধছে গায়।
চাবুকের চোটে কার পোস্ত দিচ্ছে নাড়াচাড়া। লঙ্কা মরিচের ধোয়া কারু নাকে দেয়।—

৮. গিরিয়ার প্রান্তরে মুর্শিদকুলি খানের দৌহিত্র তরুণ নওয়াব সরফরাজ খানের সঙ্গে মসনদলোভী বিশ্বসঘাতক নায়ের নাজিম আলিবর্দীর যুদ্ধ :

^১ বঙ্গীয় সাহিত্য পরিষৎ পুষ্টি সং ৯৩৪, অসিত বন্দ্যোপাধ্যায় উদ্ধৃত, বাঃ সাঃ ইতিবৃত্ত, ৩য় খণ্ড, পৃ: ১২১৯।

মারামারি লেগে গেল গিরিয়ার ময়দানে ভালমন্দ হলে নবাব শহর ছেড় না।
কান্দে বাঙ্গালার সুবাদার হাপুস নয়নে। পড়িল নবাবের তাম্বু ব্রাহ্মণীর স্থানে
পূর্বের করিল মানা জাফর খাঁ নানা আলিবর্দীর তাম্বু পড়ে গিরিয়ার ময়দানে।

৯. পলাশীর আমবাগানে আলিবর্দীর দৌহিত্র সিরাজদ্দৌলার প্রতি সেনাপতি ও আত্মীয়
মীরজাফর আলী খানের বিশ্বাসঘাতকতার ফলে :

কি হলরে জান- ছোট ছোট ভেলেকাগুলি লাল কুর্তি গায়
পলাশীর ময়দানে নবাব হারাল পরাণ। হাঁটু গেড়ে মারে তীর মীর মদনের গায়।
তীর পড়ে ঝাঁকে ঝাঁকে গুলি পড়ে রয়ে মীর জাফরের দাগাবাজীতে গেল নবাবের প্রাণ
একলা মীর মদন সাহেব কত নিবে সয়ে। ফুলবাগে মলো নবাব খোশবাগে মাটি।

১০. রামপ্রসাদ মৈত্রের রচনায় ব্রিটিশস্বত্তি ও বিদ্রোহ :

অপূর্ব শুনহ সবে স্বর্গের যতেক দেবে বিলাতে হৈলা সাহেবরূপী
ছাড়িয়া আহ্নিক পূজা পরিধানে কুর্তি মোজা হাতে বেত শিরে দিলা টুপি
বাহুপলার অভিনায়ে আইলা সদাগর বেশে কৈলকাতা পুরান কুটি আদি
গতামল সুবেদারী শুভ সন বাহান্তরি আংরেজ আমল তদবধি।
এবং শুন সতে এক এক মজা বাঙ্গালার যতেকহ প্রজা ছিল সুবেদারীতে প্রধান
ইতিমধ্যে কোন ধাতা সৃষ্টি কৈল কলিকাতা সাহেবরূপে দেবতা অধিষ্ঠান।
শিরে টুপি মুজা পায় হাতে বেত কুর্তি গায় এক বর্ণ দেখ সভাকার।

১১. মীর জাফরের জামাতাও মসনদলোভে শত্রুর বিরুদ্ধে ক্লাইভের সঙ্গে ষড়যন্ত্রকারী
এবং বাঙলার নওয়াব মীর কাসিম আশ্রিত সঙ্গে ইংরেজের যুদ্ধ :

সাজিল তেলেকা গোরা কুর্তি লালে লাল-
নবাব লুটির কুঠী শহর কলকাতা
সামনে শুলকী গেড়ে ধরল তেড়ে যত তেলেকা গোরা
লড়াই দিতে পালিয়ে গেল মামুদ তকীর ঘোড়া
ফিরিল মামুদ তকী তাহা দেখি দাঁতে কাটে ঘাস।

১২. হেস্টিংসের শত্রুতার শিকার মহারাজ নন্দকুমারের ফাঁসি :

আজগবী এক আইন হয়েছে
কৌশলিদের সাথে হেস্টিন ঝগড়া বাধিয়েছে।
হায় রে হায় একি হল, বামুনের ফাঁসি হল
নন্দকুমার মারা গেল, গুরুদাস ধুলায় পড়েছে।

১৩. বিষ্ণুপুরের রাজা চৈতন্যসিংহের সঙ্গে রাস্তা নির্মাণ নিয়ে হেস্টিংসের দ্বন্দ্ব :

ফেলা এ লাগল মাঠে পালায় ছুটে যত চাষীগণ
বেগার ধরিতে আইল কতশত জন-
যেদিকে যাকে পায় হাতে বেঁধে গোপ্তা মেরে রাস্তাতে খাটায়।

-এ হাপুগানের রচয়িতা মেদিনীপুরের মদনমোহন।

১৪. ১২৬২ বঙ্গাব্দে বা ১৮৫৫ খ্রীস্টাব্দে বীরভূমে সাঁওতাল বিদ্রোহের রাইকৃষ্ণ দাস রচিত পদবন্ধ :

শুভবাবুর (নেতা) হুকুম পেয়ে সাঁওতাল বুঝেছে
বেটারা কোক ছড়িল জড় হইল হাজার হাজার
কখন এসে কখন লুটে থাকা হল ভার ।-
রাখতে মূলুক সলা মূলুক ভাবতেছে কোম্পানী
বেটারদের শক্তি শুনে প্রজাগণে কৈছে ধীরে ধীরে
জিনিস ছেড়ে পালাও না ভাই সবাই থাক ঘরে ।

১৫. রতিরাম দাসের 'জাগগানে' দেবীসিংহ, ইজারাদার প্রভৃতির অত্যাচার-কাহিনী বর্ণিত রয়েছে :

কোম্পানীর আমলেতে রাজা দেবীসিংহ
সে সময়েতে মূলুকেতে হৈব বার টিং ।
রাজার পাপেতে হৈল মূলুকে আকাল
মানীর সম্মান নাই, মানী জমিদার
ছোট বড় নাই, সবে করে হাহাকার ।

শিবচন্দ্রের হুকুমতে সব প্রজা ক্ষ্যাপে
হাজার হাজার প্রজা ধায় এক ক্ষ্যাপে
দেবী করে সিংহ পলাইল দিয়া গাও-ঢাকা
কেউ বলে মুরশিদাবাদ, কেউ বলে ঢাকা ।

আঠারো শতকের শেষ পাদের বলেই এ প্রজাবিদ্রোহ গণপ্রতিরোধ প্রয়াসের প্রতীক হিসেবে ইতিহাসে গুরুত্বপূর্ণ ।

ইজারাদার শোষিত প্রজাদের অবস্থা :
রায়ত প্রজারা সবে থাকে খাড়া হৈয়া
হাত জুড়ি চক্ষুজলে বুক ভাসাইয়া ।

পেটে নাই অন্ন তাদের পৈরনে নাই বাস
চামে ঢাকা হাড় কয়খানা করি উপবাস ।

১৬. বাঙলার পশ্চিমবঙ্গ সিপাহীনেতা উত্তরপ্রদেশ- (কানপুর) বাসী মজনুশাহ ও ভবানী পাঠক ফকির-সন্ন্যাসীর বেশে সানুচর এসে উত্তরবঙ্গে ও ময়মনসিংহের উত্তরাঞ্চলে বার্ষিক লুণ্ঠন চালাতেন। এর শুরু ১৭৬০ খ্রীস্টাব্দে এবং শেষ ১৭৮৬ খ্রীস্টাব্দে। ১৮১৩ খ্রীস্টাব্দে (১২২০ বঙ্গাব্দ) মজনু-বিদ্যেশী পঞ্চানন দাস-রচিত 'মজনুর কবিতা' নামের পদবন্ধে মজনু শাহকে নির্ভুর হিন্দু-পীড়ক দস্যুরূপে চিত্রিত করেছেন : [রঙপুর সাঃ পঃ পত্রিকা, ১৩১৭ সন, ৫ম ভাগ]

মজনু শাহ 'সাহেব সুবার মত চলন সুঠাম
আগে যায় ঝাণ্ডা বানা ঝাটুল নিশান ।
উট গাধা ঘোড়া হাতী কত বোগদা সজ্জিত
যোগান তেলঙ্গা সাজ দেখিতে ভয় অতি ।
চৌদিকে ঘোড়ার সাজ তীর বরকন্দাজি ।
মজনু তাজীর 'পর যেন মরদ গাজী ।-
শুনে সবে এক ভাবে নৌতুন রচনা
বাঙ্গলা নাশের হেতু মজনু বারনা ।
কালান্তক সম বেটাএক কে বলে ফকির
যার ভয়ে রাজা কাঁপে প্রজা নহে স্থির ।

সহজে বাঙ্গালী লোক অবশ্য ভাঙয়া-
আসামী ধরিতে ফকির যায় পাড়া পাড়া-
ফকির আইল বলি গ্রামে পৈল হড়
গাছুরী বেপারী পলায় পাছে ছাড়িয়া গুড় ।
নারীলোক না বন্ধে চুল না পড়ে কাপড়
সর্বশ্ব ঘরে থুইয়া পাথারে দেয় নড় ।
ভাল মানুষের কুলবধু জঙ্গলে পলায়
লুঠেরা ফকির যত পাছে পাছে ধায় ।
বসন কাড়িয়া লয় চাহে আলিঙ্গন
যুবতী কাকুতি করি কি বলে বচন ।

যেদিন যেখানে যাঞা করেন আখড়া ।
একেবারে শতাধিক বন্দুকের দেহড়া ।

তারা বলে ঈশ্বর এহি করুক
মজলু গোলামের বেটা শীঘ্র মরুক ।

১৭. ওয়াহাবী-ফরায়েজী আন্দোলনের নেতাদের সম্বন্ধেও পদবন্ধ, ছড়া ও কবিতা রচিত হয়েছে গোটা শতক ধরে ।

হিন্দুর চোখে তীতুমীর : তীতুমীর শুধু শাস্ত্র-সংস্কারক ছিলেন না, প্রজার হয়ে জমিদারের শোষণ-পীড়নের বিরুদ্ধে লড়িয়েও ছিলেন, তবু চাষী-মজুর হিন্দুও তাঁর পক্ষে ছিল না ।

উত্তরে এক গ্রাম ছিল নামে নারিকেল বেড়ে তাতে হাজার দুই নেড়ে ।
ওরে বুড়ো ওরে বুড়ি আজ গাঁয়ের হাট কেস্তু দিয়ে দাড়ি কাট ।
তীতুমীর বলে আত্মা বানাইলাম বাঁশের কেন্দ্র তাতে আমার নেই হেন্দ্রা
যেমন মাঠে ধান ছিল তেমনই হল মাঠ কেস্তু দিয়ে দাড়ি কাট ।

প্রতিহিংসাপরায়ণদের ভয়ে তীতুর অনুচরদের দাড়ি কাটার বিদ্রোহিত্ব ছড়া এটি ।

খ. ঘেরলে রে নারকের বেড়ে যত ত্যাগেদায়
এবার হেঁদু বলে দাড়ি ফেলে যদি রক্ষা পাই ।

গ. তীতুমীর বাদশা হল হুকুম দিল উজিরের তরে
মেজুদ্দিন উজির হয়ে হুকুম জারি করে ।

হানাফী মুসলিমও তীতুমীরের উপর বিরুদ্ধ ছিল :
নারিকেলবেড়ে গাঁয়েতে একজন ছিল তীতুমীর
শরা শরীয়ত তিনি করিলেন জাহির ।
পীর পয়গাম্বর কুতুব হুজুর কিছই তিনি মানিতেন না
এবার সারলে ইংরেজ মামু, জানে রাখলে না ।

১৮. ওয়াহাবী নেতা মুজাদ্দিদ সৈয়দ আহমদ :

আও জামানার বিচে নওয়াবী আমলে খাতনা করান আর গরুর গোস্ত খেয়ে
ইঙ্গরাজ আমল না ছিল যেই কালে মুসলমান হবে এহা বুঝেছিল দেলে ।
সেই কালে বাজে লোক বাঙ্গলাদেশের হিন্দুদের দেখে শুনে করিত সে কাম
ইসলামি তারিকা না ছিল তাদের শেরেক বেদাতে ছিল ভরিয়া তামাম ।
শরা শরীয়ত জারি ঠিক না আছিল হেন কালে আত্মপাক দয়াল খোদায়
দেখাদেখি লোকে সব করিতে আছিল মোজাদ্দিদ পাঠাইয়া দিল বাঙ্গলায় ।
না জানিত দীন আর ইসলামি ইমান সৈয়দ আহমদ শাহে মোজাদ্দিদ করি
মুখে, খালি ফলাইত সুনী মুসলমান মিটাইল বাঙ্গলার শেরেক কুফরী ।

[জনাব আলী : শহীদ-এ কারবালা]

১৯. সংস্কারক মুজাদ্দিদ কেরামত আলি ও দুধু মিয়া'র মতানৈক্য :

ক. মওলানা দুধু মিয়া পৃথিবী তেঁজিল পূর্বতে দুধু মিয়া'র রায় আছিল তামাম ।
এতকাল মুসলমান একমতে ছিল অধম উজির বলে বঙ্গের এই রীতি
বারশ' পাঁচচল্লিশ সালে হিন্দুস্তানী মোসলেম বিচে দলাদলি এইমাত্র ভিত্তি ।

মওলানা কেরামত আলি আসে বঙ্গে গুনি ।
তিনি আসি জুমা ঈদ আদেশিয়া ছিল
ভবিষ্যতে দু'একজন সেদিকে ঝুঁকিল ।
এইমাত্র কেরামত আলির রায় হইল নাম

মোসলেম রত্নহার : উজির আলি আহমদ।
খ. ও ভাই আল্লা বলরে রসুলের ভাবনা
ফরাজীদের নামাজ পড়া হল এবার মানা ।

২০. খ্রীস্টান মিশনারীর বিরুদ্ধে আপোসহীন বিরামহীন সংগ্রামী মুনশী মেহেরুল্লাহ ও
প্রাক্তন পাদরী জমিরুদ্দিন :

মুনশী মেহেরুল্লাহ' নাম যশোর মোকাম
জাহান ভরিয়া যার আছে খোশ নাম ।
আবেদ জাহেদ তিনি বড় গুণাধার
হেদায়েতে হাদী জান দীনের হাতিয়ার ।
মূলুকে মূলুকে ফেরে হেদায়েত লাগিয়া
হিন্দু-খ্রীস্টান কত লোক ওয়াজ্ঞ গুনিয়া ।
মুসলমান হৈল সব কলমা পড়িয়া

অসার তাদের দীন দিল যে ছাড়িয়া ।
তাঁর সাথে আর এক ছিল নেক্কার
মুনশী শেখ জমিরুদ্দীন গুণের ভাগ্যার ।
সে দোন জাহেদ মর্দ ফজলে খোদার
তেরশত পাঁচ সাল ছিল বাঙ্গলার ।
সেই সালের রমজানের ঈদের সময়েতে
এসেছিল নোয়াখালি শহর বিচেতে ।

[মেহের চরিত]

২১. মহররম : মর্সিয়া :

মহরমের বুনিনাদ শিয়ালোক হতে
বাঙ্গালার মুসলমান ভাবিত সেইমতে ।
জারি ও মর্সিয়া যত গাহিত সকলে
সে-কথা না পাওয়া যায় হাদিসে দলিলে ।
সেই মর্স্যির ভাবে কোন শায়েরেতে

মুফস্স হোসেন লিখে দিলেন ফারসিতে ।
বাঙ্গালার জননামা তর্জমা তাহার
দেশে দেশে জারি খুব আছে সেই প্রকার ।
তাহার বিচেত যত বে-দলিল বাত
নাহি মিলে সাঁচা কিছু দীনের হালাত ।

[জনাব আলি]

২২. মারফতী ফকির :

আজকাল দাগাবাজ ফকিরেরা ফের
ঠাই ঠাই যথা তথা হতেছে জাহের ।
শরীয়তের বরখেলাফ করিয়া বেড়ায়
ওয়াকিফ হইয়া হাল আওলিয়া লোকের
লাঠি মার মাখে দাগাবাজ ফকিরের

মারফতী ফকির আমি বলি সে-সবায় ।
মারফত পাইবে কিসে শরীয়ত ছাড়িলে
কেতাব কোরানে বাহা না আছে দলিলে ।

[তাজকিরাতুল আউলিয়া(জনাব আলি)]

২৩. পীর-পূজার উদ্ভবতত্ত্ব :

হিন্দুর দেবতা হৈল মুসলমানের পীর
দুই কূলে সেবা লয় হইয়া জাহির ।

২৪. দোভাষী রীতি :

ক. এই পুথি শায়ের ছিল আশু জমানার
সংস্কৃত সাধু ভাষায় হইল তৈয়ার ।
পড়িতে বুঝিতে লোকের বড়ই কসেদ্বা

এ কারণে অধীন রচে চরিত বাঙ্গালা ।
রসিক লোকের দেখে বহুত কাকুতি
বারশত পঁত্রিশ সালে লেখি এই পুথি ।

এখানে সাধুরীতিতে রচিত আলাউলের বা দোনাগাজীর গ্রন্থ নির্দেশিত।

[সয়ফুলমূলক-বদিউজ্জামাল : মালে মুহম্মদ, ১২৩৫ সন ১৮২৮ খ্রীঃ]

- খ. চলতি বাঙ্গালায় কেছা করিনু তৈয়ার আসল বাঙ্গালা সবে বুঝিতে না পারএ
সকলে বুঝিবে ভাই কারণে ইহার। এ খাতেরে না লিখিলাম শোন বেরাদরে।
[চাহার দরবেশ : মুহম্মদ দানিশ]
- গ. জরুরী করিয়া তিনি কহিল আমায় এছলামি বাঙ্গালায় কেছা রচনা হইলে
আখিয়া লোকের কেছা কর বাঙ্গালায়। ইহার নাফাতে লোক পউছিবে সকলে।
[কাসাসুল আখিয়া : রেজাউল্লাহ,]

ছ. গোপীদাস রচিত 'চৈতন্যমঙ্গল'

গোপীদাস রচিত 'চৈতন্যমঙ্গল'-এর পুথিখানি ছিল বর্ধমান জেলার জামালপুর থানার অন্তর্গত গুণরাজখান মালাধর বসুর জন্মস্থান কুলীনখামের এক বৃদ্ধার অধিকারে। পুথিখানি ১-৯৮১ পৃষ্ঠায় সমাপ্ত এবং মুখবন্ধ রয়েছে ১-১৫ আনাসংখ্যক পৃষ্ঠাব্যাপী। অতএব পুথিখানি কলেবরে বিপুল। পুথির নাম চৈতন্যমঙ্গল এবং রচয়িতার নাম মোহন্ত ব্রাহ্মণ গোপীদাস এবং এই গোপীদাস নাকি চৈতন্য-সহচর এবং তাঁর তীর্থপর্যটনকালের নিত্যাসক্তী ছিলেন। বর্ণিত বিষয় অন্যান্য জীবনচরিতের মতোই : চৈতন্যদেবের জন্ম, বাল্যলীলা, বিদ্যার্জন, পাণ্ডিত্য, তর্কযুদ্ধে বিজয়ী তর্কিক চৈতন্য, সন্ন্যাস, দেশভ্রমণ, প্রেমধর্মপ্রচার ইত্যাদি। বর্তমানে পুথিখানি নাকি কোলকাতার এশিয়াটিক সোসাইটি অব বেঙ্গল-এর সম্পত্তি। এই চৈতন্যমঙ্গলের আরম্ভের ও সমাপ্তির কাল এই :

১. অঙ্গ বাণ শ্রুতি ইন্দুশক পরিমিত ২. শূন্য রস বেদ যন্ত্রে হৈল সমাপন
আরম্ভ করিনু আমি গ্রন্থ বিরচিত। পড়িবে শুনিবে যত ধার্মিক সুজন।
অতএব রচনা আরম্ভ হয় [অঙ্গ-৮ বা ৬, বার্ন-৫, শ্রুতি-৪, ইন্দু-১] ১৪৫৬-৫৮ শকাব্দে
তথা ১৫৩৪-৩৬ খ্রীস্টাব্দে এবং সমাপ্ত হয় (শূন্য-০, রস-৬, বেদ-৪, যন্ত্র-১) ১৪৬০ শকাব্দে
বা ১৫৩৮ খ্রীস্টাব্দে। একটি ভণিতা-

চৈতন্যমঙ্গল রচে দ্বিজ গোপীদাস। গৌরপদে রহে মতি ইহ মনো আশ।

এ পুথির মুখবন্ধে ১-১৫ আনা পৃষ্ঠার মধ্যে সৈয়দ আলাউদ্দীন হোসেন শাহর প্রশস্তিমূলক পরিচিতি রয়েছে। যদিও কাব্যরচনাকালে তার পুত্র গিয়াসউদ্দীন মাহমুদ শাহই (১৫৩২-৩৮) ছিলেন গৌড়ের সুলতান এবং তাঁর প্রশস্তি থাকাই ছিল স্বাভাবিক। এতে মনে হয় কোন লিপিকর চৈতন্যমঙ্গলের পুরোভাগে যুক্ত করেছেন হোসেন শাহর পরিচিতি। কাজেই এ অংশকে প্রক্ষিপ্ত বলেই মানতে হবে। 'বেদ সিন্ধু নেত্র ইন্দু' শকে অর্থাৎ ১৩৭৪ শকাব্দে তথা ১৪৫২ খ্রীস্টাব্দে হোসেন শাহর জন্ম এবং 'শশী শ্রুতি বেদ ইন্দু' শকে তথা ১৪৪১ শকে বা ১৫১৯ খ্রীস্টাব্দে তাঁর মৃত্যু। মনে হয় কোন লোকশ্রুতি অবলম্বনে পরবর্তীকালের কেউ কোন অভিসন্ধিবশে এ রাজপ্রশস্তি রচনা করেছিলেন।

এমনও হতে পারে যে কবি গোপীদাস আসলে আঠারো শতকেই এ কাব্য রচনা করেছেন, কিন্তু চৈতন্যচরিত্রের আদি রচয়িতার গৌরব পাবার জন্যেই নিজেই চৈতন্যসহচর বলে পরিচয় দিয়েছেন এবং হোসেন শাহর পুত্র গিয়াসউদ্দীন সম্বন্ধে ধারণা না থাকায় কিংবা প্রখ্যাত বলেই চৈতন্যতিরোভাবের পরের বছরেই রচনা আরম্ভের (১৫৩৪ খ্রীঃ) দাবিদার কবি হোসেন-প্রশস্তি

রচনা করেছেন। গোপীদাস-গোপীনাথ পণ্ডিত নন বা গোপীনাথ সিংহ নন (যদি চৈতন্যসহচর ও চৈতন্য-চরিতকার হতেন, তা হলে তাঁর নাম শুধু চরিতগ্রন্থগুলোতে নয়, বিভিন্ন বৈষ্ণবগ্রন্থেও পাওয়া যেত এবং তিনি লোকশ্রুতি সূত্রেও চিরপ্রখ্যাত থাকতেন। বৈষ্ণব-বন্দনায় ও ব্রজমোহন দাসের চৈতন্যতত্ত্বপ্রদীপে তাঁর নাম নেই। কাজেই মনে হয় এ গ্রন্থও জাল, হোসেন প্রশান্তিও বানানো। আমরা পুথি পড়তে পাইনি। বৈষ্ণব সহজিয়ামত চৈতন্যদেবে আরোপ করে তাকে দৃঢ় ভিত্তিক ও গ্রহণযোগ্য করার অভিসন্ধি বশে এ চৈতন্যমঙ্গল রচিত হয়েছিল কি-না পাঠ পরীক্ষা না করে বলা যাবে না। তবে গোপীদাস নামে সহজিয়া গন্ধ রয়েছে। হোসেন শাহ পরিচিতি এখানে উদ্ধৃত হল :

সৈঅদ আস্রাফল মক্কাধামে ঘর ।
সর্ব গুণে গুণাধিত মহাবিদ্যাধর ।।
বেদ সিদ্ধ নেত্র ইন্দু শক পরিমিতে ।
জন্মে সুত তান গৃহে শুক্লা দশমিতে ।।
জন্ম অস্ত্রে সেই জাতক হৈল মাতৃহীন ।
পিতৃকোড়ে চন্দ্রকলা বাড়ে দিন দিন ।
বিধিমত হৈল নাম সৈঅদ হুসন ।
ভাবী কালে হৈলা তেহ জগৎ ভূষণ ।।
শিশুপুত্র লৈআ সাথে ভ্রমিতে ভ্রমিতে
উপনীত হৈলা যাসি রাড়ের পরীতে ।।
বঙ্গভূমে চাঁপপাড়া চন্দ্রসম খ্যাত ।
বসুধায় সুবিদিত সর্বজন জ্ঞাত ।
হর্ষে তথা কৈলা স্থিতি হুসন জনক ।
সুধীজন হাস্যন প্রকাশে পুলক ।
কতদিন হয় লীন আনন্দ কৌতুকে ।
সহসা বিধিল শেল হুসেনের বুকে ।।
তেয়াগিআ জন্মদাতা যান স্বর্গধাম ।
পিতৃহারা হৈয়া শিশু কাঁদে অবিরাম ।
বয়ক্রম অষ্টবর্ষ সবে মাত্র হয় ।
পাথারে ভাসিল শিশু হৈলা নিরাশ্রয় ।।
সেহ স্থানে গুণনিধি পাতসার কাজি ।
কি কহিব এক মুখে তান গুণ রাজি॥
সদাচারী ন্যায়বান দয়ার সাগর ।
ইষ্টনাম জপে সদা উদার অন্তর ।।
নাহি কেহ হুসেনের ইহ চরাচরে ।
হেরি ইহা ব্যথা পান আপন অন্তরে॥
ঠাই দিলা সেহ কাজি লৈআ নিজ ঘরে ।

দয়াবতী পরী তান আরো সমাদরে ।
পুত্র সম স্নেহভরে করিলা পালন ।
বিস্মরিতা পিতৃশোক বালক হুসন ।।
জ্ঞানার্জনে একনিষ্ঠ রহি সর্বক্ষণ ।
ভক্তিভরে গুরুপদে করে অধ্যয়ন ।
কতদিন কাজি গৃহে করিআ যাপন ।
বাল হৈতে যৌবনেতে করে পদার্পণ ।।
শ্রেষ্ঠকুল সমুৎপন্ন হুসন গুণধরে ।
দুহিতা সৌন্দর্য কাজি হরষ অন্তরে ।।
অন্তর্গত যায় হুসন গৌড় নগরে
ধীর নম্র সুচরিত সবে সমাদরে ।।
পাতসার সৈন্যদলে করে যোগদান ।
সৈন্যপত্য লভে পরে হুসন ধীমান ।।
তারপরে মন্ত্রী হৈলা মন্ত্রী হৈতে ভূপ ।
বুদ্ধিবলে ভাগ্য তার প্রকটে স্বরূপ ।।
নৃপতি হুসেনশাহ হন মহামতি ।
পঞ্চ গৌড়েতে ঘোষে পরম সুখ্যাতি ।।
পুত্রসম প্রজাগণে করেন পালন ।
চোর দস্যু রাজ্যে তান না হেরি কখন ।।
স্বর্ণ পায়ে ভঞ্জে অনু নাগরিক গণ ।
চতুর্দিকে জয়ধ্বনি জগৎ ভূষণ ।।
শশী শ্রুতি বেদ ইন্দু পরিমিত শক ।
সৈঅদ হোসেন সাহ নৃপতি-ভিলক
দেহ ত্যাগী আত্মা তান স্বর্গধামে যায় ।
মর্ত্যলোকে নরগণ কাঁদে হায় হায়॥
চৈতন্যমঙ্গল রচে দ্বিজ গোপীদাস
গৌর পদে রহে মতি ইহ মনো আশা॥^১

^১ সৈয়দ আবদুর রহমান ফেরদৌসী লিখিত গ্রন্থ : লেখক সমাবেশ পত্রিকা, কলিকাতা, ৩য় বর্ষ-১২তম সংখ্যা, এপ্রিল, ১৯৮৩ সন দ্রষ্টব্য।

জ. ব্রজমোহন দাস বিরচিত চৈতন্যতত্ত্বপ্রদীপ

ব্রজমোহন দাস বিরচিত 'চৈতন্যতত্ত্বপ্রদীপ' গ্রন্থের একমাত্র পাণ্ডুলিপিই অবশিষ্ট রয়েছে। ওই দুর্লভ একক পুথিটি ঢাকা বিশ্ববিদ্যালয়ের পুথিশালার একটি অনন্য সম্পদ। কেননা বৈষ্ণব মহাজনদের গুরু কিংবা শিষ্য-পরম্পরা নিয়ে বৈষ্ণব সমাজে যে-সর্ব বিতর্ক রয়েছে, তার কিছু কিছু সমাধান মিলবে এ গ্রন্থে। ভাঁজ করা তুলেট কাগজের উভয় পৃষ্ঠে লিখিত। পঞ্চাশ পাত্রে সমাপ্ত। লিপিকার ১৬২৫ শকাব্দ বা ১৭০৪ খ্রীস্টাব্দ। লিপিকর কৃষ্ণবল্লভ শর্মা, পুষ্টিপকা এক্রপ :

ইতি শ্রীচৈতন্যতত্ত্ব প্রদীপে সঙ্গোপাঙ্গ গ্রন্থ সম্পূর্ণ।

শ্রীকৃষ্ণবল্লভ শর্মণ স্বাক্ষরমিদং স্বীকীঞ্চ।

শুভমস্ত্র শকাব্দ ১৬২৫ তেরিখ ১৩ ফাল্গুন।

শ্রীকৃষ্ণ শরনং।

গ্রন্থোৎপত্তি ও রচনাকাল :

প্রণাম করিয়া আগে গুরুর চরণ

শ্রীচৈতন্যতত্ত্ব প্রদীপ সংক্ষেপেতে

দীক্ষ শিক্ষা প্রকাশ কবেহ হইল।

সপ্রমাণে পুরারে কহিব সাধুমতে।

৩৩৪ [১৩৪] অব্দে গুড়াবভারহিক শ্রীচৈতন্যসমুদ্র নিত্যানন্দ সহানেত পাত্রদান ভক্তসঙ্গ কাল।

অতএব, ব্রজমোহন দাস চৈতন্যদেবের শিক্ষা, দীক্ষা ও লীলার প্রকাশকাল বর্ণনার জন্যেই গ্রন্থরচনায় ব্রতী হয়েছিলেন। গ্রন্থের নাম 'চৈতন্যতত্ত্বপ্রদীপ'। প্রমাণিত এবং সপ্রমাণ তথ্যই পরিবেশনের অঙ্গীকারে তিনি গ্রন্থ রচনা আরম্ভ করেন। এতে বোঝা যায়। এ গ্রন্থে তিনি তাঁর সমকালে চালু অনেক তথ্যের ভুল নিরূপণের জন্যে লেখনী ধারণ করেছিলেন। একশ' বছরের মধ্যে শিষ্য-পরম্পরা ও শাখা নির্ণয় নিয়ে ভুল ধারণা বিতর্ক শুরু হয়েছিল। উল্লেখিত অসংখ্য স্পষ্টত ভুল। এটি ১৩৪ চৈতন্যাব্দ হওয়ার কথা। তা হলে ১৬২০ খ্রীস্টাব্দে তিনি গ্রন্থ রচনা শুরু করেন। প্রাপ্ত পুথির লিপিকালই হচ্ছে ১৭০৪ খ্রীস্টাব্দ, কাজেই কবি নিঃসন্দেহে সতেরো শতকের লোক।

ব্রজমোহন দাস তাঁর অনুসৃত ও আদর্শ দুটো গ্রন্থের নাম উল্লেখ করেছেন। একটা মুরারি গুপ্তের 'চৈতন্যচরিত' অপরটি 'শ্রীচৈতন্যভাগবত'। যথা :

চৈতন্য লীলার ব্যাস দাস বৃন্দাবন

মুরারি গুপ্তের শ্রীচৈতন্য রচিত।

শ্রীচৈতন্য ভগবত যে কৈল বর্ণন।

তাহাতে দেখিয়া সূত্র লেখিয়ে কিঞ্চিত।

আদি খণ্ডে মধ্য শেষ খণ্ডে আর

মধ্যখণ্ডে সংকীর্তন প্রকাশ জগতে।

তার সূত্রে সংক্ষেপেতে কবির বিস্তার।

শেষ খণ্ডে ন্যাসীরূপে স্থিতি নীলাচলে

আদি খণ্ডে বিদ্যার বিলাস প্রাধান্যতে

নিত্যানন্দে সমর্পিয়া গৌড় মণ্ডল।

এ অংশ থেকে রচনাকাল অনুমান করা সম্ভব। মুরারি গুপ্তের কড়াচাই চৈতন্যদেবের আদি চরিত্রগ্রন্থ এবং চৈতন্যদেবের জীবৎকালে রচিত। একটি সংস্কৃতে রচিত এবং শ্লোককারে গ্রথিত। এখানে সে শ্লোক-সূত্রের উল্লেখ রয়েছে। ইনি চৈতন্য-জীবনের আদিকাণ্ড তথা সন্ন্যাস জীবন অবধি (গয়া থেকে প্রত্যাবর্তন অবধি) বর্ণনা করেছিলেন। পরবর্তী অংশ নীলাচলে চৈতন্যদেবের অন্তিমকাল অবধি জীবনকথা বৃন্দাবন দাসের ভাগবত থেকেই নেয়া। বৃন্দাবন দাসই চৈতন্যদেবের প্রথম বাঙলাজীবনী রচয়িতা।

ব্রজমোহন দাস তাঁর গ্রন্থের গোড়ায় বৃন্দাবন দাসের গ্রন্থকে 'চৈতন্যমঙ্গল' নামেই উল্লেখ করেছেন, গ্রন্থের শেষের দিকে আবার 'ভাগবত' রূপে বর্ণনা করেছেন।

অতএব ব্রজমোহন দাস সংস্কৃতে ও বাঙলায় রচিত দুটো আদি গ্রন্থ অবলম্বন করেছিলেন তাঁর বক্তব্যের প্রমাণক হিসেবে। সংস্কৃতটি চৈতন্যের জীবৎকালে রচিত। নিত্যানন্দ-শিষ্য বৃন্দাবন দাস প্রধান প্রধান চৈতন্য পার্শ্বদের থেকেই বাঙলাটির তথ্য সংগ্রহ করেছিলেন। এবং চৈতন্যের তিরোভাবের ১৫ থেকে ২২ বছরের মধ্যেই গ্রন্থ রচনা সমাপ্ত করেন।

বৈষ্ণবতত্ত্ব ব্যাখ্যায় প্রমাণ ও সমর্থন সন্ধান করেছেন তিনি পুরাণ, ভাগবত প্রভৃতি থেকে। তাই মনে হয় 'চৈতন্যতত্ত্বপ্রদীপ' রচনাকালে হয় কৃষ্ণদাস কবিরাজের লেখা 'চৈতন্যচরিতামৃত' তাঁর হাতে এসে পৌঁছেনি অথবা তাঁর গ্রন্থ 'চৈতন্যচরিতামৃত'-এর পূর্বে রচিত। তা ছাড়া এ গ্রন্থে চৈতন্যদেবের শিষ্য-উপশিষ্য পরম্পরার যে শাখা-প্রশাখা-উপশাখা বর্ণিত, তাও দীর্ঘ বা দূর বিস্তৃত নয়, চার পুরুষের অধিক নয় কোনটাই। এসব তথ্যে গুরুত্ব দিয়ে আমরা চৈতন্যতত্ত্ব-প্রদীপ ১৬২০ খ্রীস্টাব্দে রচিত বলে অনুমান করি। পদকার বংশীবদন কবির সমকালীন বলে মনে হয়— 'করি শুদ্ধ মন শ্রীবংশীবদন। বন্দহোঁ লোটি ধরনী। যাহার সঙ্গীত রসে এ জগত। মোহিল সকল পুনি' (বন্দনা)।

১. এই গ্রন্থে চৈতন্য পার্শ্বদদের নাম ও নিবাস ২. বৈষ্ণবতত্ত্বের প্রাচীনতার ও উদ্ভবের ইতিকথা ৩. শিষ্য-পরম্পরা ৪. চৈতন্যের আবির্ভাব, শৈশব-বাল্য-সন্ন্যাস ও নীলা-প্রকাশ বর্ণিত রয়েছে।

চৈতন্য পার্শ্বদের নাম-নিবাস এবং বিভিন্ন গুরুর শিষ্য-পরম্পরার ও শাখা-প্রশাখার বর্ণনা সম্বলিত বলেই এ গ্রন্থের ঐতিহাসিক মূল্য অপরিমেয় এবং সে কারণেই গুরুত্বপূর্ণ। হয়তো সত্য পরিচয় উদঘাটিত হলে মিথ্যা পরিচয় প্রসূত গৌরব ও প্রতিষ্ঠা বিনষ্ট হবে আশঙ্কায় এমন একটি গ্রন্থের প্রচার ও খ্যাতি বৈষ্ণব গুরুরা সময়ে পরিহার ও লোপ করতে চেয়েছেন। অথবা বৈষ্ণব সিদ্ধান্ত বিরোধী বলে এ গ্রন্থ বর্জিত হয়েছিল। উল্লেখ্য যে, গ্রন্থটিতে রাগাত্মিকা সাধনার প্রবণতার আভাস আছে। হয়তো এটি সহজিয়াদের আদি গ্রন্থ। অথবা কবি গৌরপারম, বাদী বা 'গৌরনাগরভাবপত্নী'। চৈতন্যতত্ত্বপ্রদীপের প্রথমেই রয়েছে দীর্ঘবন্দনা। বন্দনার প্রথম ও ক্ষুদ্রাংশে রয়েছেন মাত্র : শ্রীকৃষ্ণচৈতন্য, নিত্যানন্দ, সীতাদেবী ও অদ্বৈতাচার্য— এ চারজন। তাতে আবার নিত্যানন্দকে বলরাম ও চৈতন্যকে কৃষ্ণের সঙ্গে তুলনা করা হয়েছে। বন্দনার প্রথমাংশে 'দোয়া— পরে দুই ভাই রাম ও কানাই। কলি অবতারে নাম চৈতন্যনিতাই'। দীর্ঘবন্দনার দ্বিতীয়াংশে রয়েছেন, চৈতন্য, নিত্যানন্দ, অদ্বৈত, শচীদেবী, জগন্নাথ, বিশ্বরূপ, কমলা (চৈতন্য পত্নী) বিষ্ণুপ্রিয়া (পত্নী), নিত্যানন্দ মাতা পদ্মাবতী, পিতা হাড়ই পণ্ডিত, জাহ্নবা (নিত্যানন্দ স্ত্রী), বীরভদ্র, বীরভদ্রপুত্র, অদ্বৈত-পত্নী সীতা, অচ্যুতানন্দ (অদ্বৈত পুত্র) যবন হরিদাস, শ্রীনিবাস পণ্ডিত, মালিনী, নারায়ণী, মুরারি গুণ্ড, গদাধর দাস, মুকুন্দ, রাজা সদানন্দ (বেদ্য) নরহরি, মুকুন্দপুত্র রঘুনন্দন, তাঁর পুত্র কানাই ঠাকুর, রামানন্দ রায় বক্রেশ্বর মিশ্র, রামানন্দ মিশ্র, কাশীশ্বর, বিষ্ণুপুরী, গোবিন্দ গোসাঁই, বড় কৃষ্ণদাস, সার্বভৌম ভট্ট, পরমানন্দপুরী, পণ্ডিত দামোদর, কুলুব মাধব-পুরী, গোপীনাথ পণ্ডিত, চন্দ্রশেখর, নারায়ণ, পীতাম্বর, মুকুন্দ দত্ত, বাসুদেব দত্ত, হরিহর পণ্ডিত, জগন্নাথ আচার্য, নারায়ণ আচার্য, শঙ্কর আচার্য পীতাম্বর আচার্য, শ্রীরাম পণ্ডিত, নীলাম্বর চক্রবর্তী, গঙ্গাদাস বিদ্যানিধি, সদাশিব আচার্য, শ্রীগর্ভ আচার্য, গুরুদাস আচার্য, শ্রীনিধি আচার্য, শ্রীধর পণ্ডিত, কবীন্দ্র আচার্য, দ্বিজ রামদাস,

বনমালী, হলায়ুধ, বিজয়নন্দন আচার্য, ঈশান আচার্য, গুরুডম্বজ আচার্য, গঙ্গাদাস আচার্য, সাধুবর্ষ, আচার্য বল্লভ, বনমালী, কাশীনাথ, দুর্লভ আচার্য, কেশব ভারতী, দামোদর পুরী, কুলুব রাঘবপুরী, পরমানন্দ অবধূত, রামচন্দ্রপুরী, নরসিংহতীর্থ, নৃসিংহানন্দ, সদানন্দ ভারতী, সুখানন্দ, ব্রহ্মানন্দপুরী (যাদব), গোবিন্দপুরী, কেশবপুরী, বিধেশ্বরপুরী, চিদানন্দ, অনুভবানন্দ, প্রবোধানন্দ, কৃষ্ণানন্দপুরী, কাশী মিশ্র, পুরন্দর, জগদানন্দ আচার্য, নীলাশ্বর পণ্ডিত, সনাতন পণ্ডিত, গঙ্গাদাস ভদ্র, বাসুদেব ভদ্র, রামভদ্র, মুকুন্দ ভদ্র, সদাশিব কবিরাজ, বনমালী কবিরাজ, শিবানন্দ সেন, মৌলি সেন, রামতীর্থ কাঙাণ হরি (কবির সমকালীন), রায় চক্রবর্তী (বঙ্গে হএ যার ঘর), (উড়িষ্যার) প্রতাপরুদ্র, রায়পট্টক, শ্রীরামদাস, শ্রীসুন্দরানন্দ, পুরুষোত্তম দাস, গৌরীদাস পণ্ডিত, ধনঞ্জয় পণ্ডিত, কমলাকর পিপলাই, উদ্ধরণ দত্ত, পুরুষোত্তম পণ্ডিত, বড় বলরাম দাস (পদকার), বড়গাছাবাসী কৃষ্ণ দাস (ওফে বিহারী), পরমেশ্বর দাস, মহেশ পণ্ডিত, জগদীশ পণ্ডিত, শ্রীনাথ, জগন্নাথ সূর্যদাস কৃষ্ণদাস গৌরদাস (তিনভাই), গোবিন্দ, মাধবানন্দ, বাসুদেব ঘোষ (তিন ভাই), বৃন্দাবন দাস (চৈতন্যমঙ্গল প্রণেতা), গোপাল বসু, সারঙ্গ ঠাকুর, নৃসিংহ (চৈতন্য দাস), শ্রীবংশীবদন (পদকর্তা), পরমানন্দ অবধূত, কৃষ্ণতীর্থ, অনন্তপুরী, বলরাম দাস (বঙ্গেতে যাহার ঘর), গোকুলানন্দ, রূপ সনাতন গোসাঞি, শ্রীজীব গোস্বামী (রূপ সনাতনের ভাইপো), কবিচন্দ্র ঠাকুর, নাগর যুবাই (সমকালীন), কামদেব, শ্রীল নারায়ণ চক্রবর্তী (কামদেব পুত্র), সাধুবর্ষ ভাগবতাচার্য, শ্রীমৎ গোসাঞি, আচার্য চক্রপাণি ও তৎপুত্র কেশব ও কমলাকান্ত, বিষ্ণুদাস আচার্য, শ্যামদাস আচার্য (ওফে জঙ্গলি)– এঁদের মধ্যে কবির সমকালীনও আছেন অনেকে। কবি নাম শুনেও অনেক অপরিচিত জনের বন্দনা করেছেন। তাই বলা যায় :

অক্ষরানুরোধে আধুনায় বোধে করিল এ গ্রন্থন (বন্দনাংশ)।

বুঝিতে হো নারি অনুভব করি ছোট বড় কোন জন।

অতএব দোষ আশ্রয় অশেষ ক্ষেমিবে মাধব জন (কৃষ্ণভক্ত)

অথ্যে বা পশ্যতে গ্রন্থন ইহাতে না বুঝি কৈল যেমন।

বাঙলায় রচিত দৈবকীনন্দন দাসের বৈষ্ণববন্দনা (২১৪ জন) এবং এক বৃন্দাবন দাসের বৈষ্ণববন্দনা আর সংস্কৃতে রচিত জীব গোস্বামীর বৈষ্ণববন্দনা (২০৩ জন) ছাড়াও সংস্কৃত বৈষ্ণবাবিধানের ও অন্যান্য কয়েকটি ক্ষুদ্র বৈষ্ণববন্দনায় চৈতন্য পার্শ্বদ পরিবর্তনের নাম মেলে। ব্রজমোহনের বন্দনায় (১৬২ জন) বিবৃত নাম ও পরিচয় সেগুলোর সঙ্গে তুলনীয়। বন্দনার পরেই রয়েছে পার্শ্বদদের নাম ও নিবাস।

ব্রজমোহন দাস সম্ভবত 'কানাইগ্রামে; বসে 'জন্ম পাট নিরূপণ' অধ্যায় 'দেখিয়া প্রাচীন খত সংক্ষেপে রচনা' করেছেন।

ক. চৈতন্য পার্শ্বদদের নাম ও নিবাস নিরূপণ :

১. অদ্বৈত গোসাঞি (আচার্য, চৈতন্য নিত্যানন্দের অগ্রজ, জন্ম দীপাশ্বিতা অমাবস্যা কার্তিক মাসেতে।) শান্তিপুর ২. নিত্যানন্দ, একচাকা-খণ্ডপুর। (মাতা পদ্মাবতী, পিতা হাড়ো পণ্ডিত, জন্ম 'মাঘে শুক্ল ত্রয়োদশী ভূমিসূত বারে। বিশ্ববহুর ধরে তীর্থ ভ্রমণ। মথুরায় বিশ্রাম। নদীয়ায় আগমন ও নন্দন আচার্যের ঘরে বাস, পরে শ্রনিবাসের ঘরে বাস) ৩. গদাধর পণ্ডিত। শ্রীরাম

পণ্ডিত। শ্রীনিবাস চন্দ্রশেখর, মুরারি গুপ্ত, শ্রীহট্ট। ৪. পুণ্ডরীক বিদ্যানিধি ও বাসুদেব দত্ত, চাট্টিগ্রাম। ৫. হরিদাস ঠাকুর, বড়গণ। ৬. পরমানন্দ, শ্রীবিষ্ণু পুরীর তীরে। ৭. গদাধর দাস, আজুনিয়া দহ। ৮. শিবানন্দ সেন, কাচোড়া। ৯. নরহরিদাস, রঘুনন্দন, খণ্ড। ১০. রামানন্দ রায়, দ্রাবিড়দেশ। ১১. অভিরাম ঠাকুর, অজ্ঞাত। ১২. সুন্দর হরিদাস, মহিষপুর। ১৩. সদাশিব কবিরাজ, পুরুষোত্তম দাস, বোধখানা। ১৪. জগদীশ পণ্ডিত, ডেকলিয়া। ১৫. সনাতন দত্ত, উদ্ধব দাস, পরমেশ্বর দাস, খড়দহ। ১৬. বলরাম দাস দোগাছা। ১৭. বদনানন্দ, বাগনপাড়া। ১৮. সনাতন, রূপ জীব, ফতিয়ারাজ্য (ফতেয়াবাদ পরগনা)। ১৯. পরমেশ্বর দাস, মহেশ পণ্ডিত, থাণ্ডনিয়া। ২০. ধনঞ্জয় পণ্ডিত, বেনডা।

খ. নদীয়ায় জ্ঞাত মহাজনগণ

১. চারভাই- জগন্নাথ, সূর্যদাস, গৌরদাস, কৃষ্ণদাস এবং সার্বভৌম ভট্টাচার্য, নবদ্বীপ।
২. নারায়ণী ও তাঁর পুত্র বৃন্দাবন দাস আলবাটি। (আলবাটি) নরদ্বীপ।
৩. রত্নেশ্বর আচার্য। গোপীনাথ পণ্ডিত। দামোদর। শঙ্কর পণ্ডিত। নীলাম্বর চক্রবর্তী। নারায়ণ মিশ্র। শ্রীমান পণ্ডিত। সুদর্শন মিশ্র। সদাশিব আচার্য। শ্রীগর্ত। নকুল আচার্য। কবিচন্দ্র চক্রবর্তী। খোলাবেচা শ্রীধর (কৃপা করি প্রভু খোলাবেচা দূর কৈল)। শ্রীনিধি আচার্য। গঙ্গাদাস পণ্ডিত। বিদ্যাবিদ আচার্য। বল্লভাচার্য। হল্লায়ুধ আচার্য। সনাতন। (সর্ববিদ্যাবুধ) পুরুষোত্তম আচার্য, কাশীনাথ মিশ্র। শ্রীচন্দ্র আচার্য। দেবানন্দ। লক্ষ্মণ আচার্য। শিবানন্দ চক্রবর্তী। মিশ্র কবিরাজ (পুরুষোত্তম। জগন্নাথ সেন। বৈদ্য বনমালী দাস। মুন্সিরি। চৈতন্য। এরা নবদ্বীপবাসী।

গ. অন্যান্য অঞ্চলের মহাজন

১. কমলাকর পিপিলাই এবং গোবিন্দ ঘোষ, মাধবানন্দ বাসুদেব ও রাজীব ঘোষ- এই চারভাইয়ের জন্মস্থান চাকদহ। ২. পুরন্দর/রাঘব পণ্ডিত/কাশীশ্বর মিশ্র, পানিহাট। ৩. বাসুদেব/ভাগ দত্ত/ পরমানন্দ গুপ্ত/ঈশান দাস, বানিয়া, চৌড়লিয়া। ৪. রাঘব ভট্ট/রাঘব গোসাঞি/কাশীশ্বর/ হরিভট্ট, দ্রাবিড়দেশ। ৫. কৃষ্ণদাস ওর্ফে কানু, আকাইহাট। ৬. কৃষ্ণদাস, বড়গাছিগ্রাম। ৭. কালিয়া ওর্ফে কৃষ্ণদাস/শ্রীনাথ ওর্ফে মুকুন্দ, মুদাবাজ। ৮. সুবুদ্ধি খান/অনন্ত আচার্য/রঘুনাথ/ কাশীনাথ/মধুপণ্ডিত/তুলসী মিশ্র/ মণি হোড়, গুপ্তপাড়া। ৯. জগদানন্দ/ ভগবতাচার্য পরমানন্দ, বসুধা। ১০. নারায়ণ গুপ্ত/বৈশ্য গঙ্গাদাস /বুদ্ধিমন্ত খান/রঘুনাথ দাস/ জগদীশ দাস, পানিনালা। ১১. গরুড় আচার্য/কাশীশ্বর /বক্তেশ্বর পণ্ডিত, শ্রীকলা। ১২. রামমুকুন্দ/উদ্ধব দত্ত/কৃষ্ণানন্দ পাহাড়পুর। ১৩. সারস্বতাকুর, বড়গণ। ১৪. সুখীব মিশ্র/ গোবিন্দানন্দ/শিবানন্দ পণ্ডিত/ কাশীশ্বর/শিবজীব পণ্ডিত/তপন আচার্য, ফুলিয়াগ্রাম। ১৫. পুরুষোত্তম ব্রহ্মচারী/শ্রীকর/মধুপণ্ডিত, কংসারি সেন/বল্লভ সেন, কাটিশালী। ১৬. মুকুন্দ কবিরাজ শ্রীখণ্ড। ১৭. গোকুলানন্দ/বলরাম সেন, ঘোড়াঘাট। ১৮. রাম চক্রবর্তী যশদলগ্রাম প্রকাশ বেতড়ী। ১৯. রামানন্দ বসু./ গোপাল বসু কুলীনগ্রাম। ২০. গুরুেশ্বর ব্রহ্মচারী/সঞ্জয়/শ্রীমান পণ্ডিত, কুমারভট্ট (হট্ট?)!

ঘ. উৎকলবাসী মহাজন

উড়িয়া বলরাম দাস/জগন্নাথ দাস/ বিপ্রচন্দ্র শেখর/ভট্টনায়ক /বানীনাথ নরসিংহ দাস /হরিদাস/বলরাম হাতী/শিশু কৃষ্ণদাস/ দ্বিজ রামচন্দ্র /মাধব নায়ক ভট্ট ।

ঙ. 'পুরী' শাখার সন্ন্যাসী

রামচন্দ্র পুরী/দামোদর পুরী/সুখানন্দ পুরী/পরমানন্দ পুরী /দ্বিশ্বর পুরী /ব্রহ্মানন্দ পুরী গোবিন্দ ওর্ফে নৃসিংহানন্দ পুরী /কৃষ্ণানন্দ পুরী/রঘুনাথ পুরী/বিশ্বেশ্বর পুরী/রাঘব পুরী/ পুরুষোত্তম পুরী/অনন্ত পুরী/ হরিহরানন্দ পুরী /বিজ্ঞানানন্দ পুরী ।

চ. অন্যান্য শাখার সন্ন্যাসী

অনুভবানন্দ । বিদ্যানন্দ সরস্বতী । শ্রীরাম তীর্থ/কেশব ভারতী । সত্যানন্দ ভারতী, জগন্নাথ তীর্থ । নরসিংহ । বাসুদেব তীর্থ । গরুড় অবধূত । পরমানন্দ অবধূত । এরা 'প্রভুর পারিষদ সব সন্ন্যাস আশ্রমে' । এদের জন্মস্থান অজ্ঞাত । 'ইতি সর্বপাট নির্ণয় ।'

ব্রজমোহন দাস তাঁর প্রতিপাদ্য তত্ত্বের সমর্থনে নিম্নলিখিত গ্রন্থসমূহ থেকে তথ্য, তত্ত্ব ও সাক্ষ্য উদ্ধৃত করেছেন :

তত্ত্বসাগর, ভবিষ্যপুরাণ, ভগবদগীতা, ভাগবৎ, মীতমেনের ব্রহ্মসম্বাদ, নারায়ণ, আদি পুরাণ, কৃষ্ণতত্ত্ব প্রকাশ, কবিকর্ণপুর, প্রবোধানন্দ সরস্বতী রচিত 'চৈতন্যতত্ত্বামৃত' জয়কৃষ্ণদাস রচিত 'বিচার সুধার্ণব', নরহরি দাস রচিত 'শ্রীচৈতন্য' সহস্র নাম, প্রবোধানন্দ সরস্বতী বচন, জীব গোস্বামীর 'শ্রীকৃষ্ণসন্দর্ভ' জয়দেব বচন, বিষ্ণুপুরাণ, বৈষ্ণবতন্ত্র, ব্রহ্মসংহিতা তন্ত্র, বৃহদ্বিষ্ণুপুরাণ, ব্রহ্মসংহিতা, বৃহৎবামন, রসামৃতসিদ্ধি, জয়গোপাল দাসের ভক্তিবাদপ্রদীপ, স্বতন্ত্রাভিধান, ক্রমদীপিকা, সনাতন রচিত 'ভগবতামৃত' ব্রহ্মবৈবর্তপুরাণ, আদি সংহিতা, বিষ্ণুধর্মোত্তর, গৌতমীয়তন্ত্র কৃষ্ণোপনিষদ, নারদপঞ্চরাত্র, কার্তিক মাহাত্ম্য, নারদসঙ্গীতসার সংহিতা, অগ্নিপু্রাণ, হরিবংশ, বৃন্দাবন দাস রচিত 'চৈতন্যমঙ্গল পদ্মপুরাণ মনবুদ্ধিসম্বাদ শ্রীচৈতন্যচন্দ্র বচন, শ্রীধর স্বামীর ভাষ্য, রূপ গোস্বামীর বচন ও শ্রীদশম (বৈষ্ণবতোষিণী), সার্বভৌম ভট্টাচার্যের বচন প্রভৃতি । [পৃথির ২১ক-খ ও ২২ খ পৃষ্ঠায় চৈতন্যতত্ত্বামৃত স্থলে লিপিকর প্রমাদে চৈতন্যচরিতামৃত হয়েছে বলে মনে করি ।]

উক্ত সবগ্রন্থ থেকে রাধা-কৃষ্ণ প্রেমের স্বরূপ ব্যাখ্যা করেছেন কবি । বলা বাহুল্য, ব্রজমোহন দাস রাগাজ্ঞিকা প্রেম-স্বরূপের সমর্থক । রতিরমণ, পরকীয়া প্রভৃতি সহজিয়াতত্ত্ব এখানে আলোচিত । কবি স্পষ্টত সহজিয়া বৈষ্ণব বা গৌরনাগরবাদী ।

নয়ান্দ গোপাল গোপী রাগান্ন স্বভাব অন্তরে কান্তের স্নেহ নিত্য গোপীকার ।
কেহ কারো নাহি তথি সাপত্নীক ভাব । প্রকটেত পরকিয়া হেন ব্যবহার ।

এ তত্ত্বের গুরুত্ব ও মহিমা প্রদর্শনের জন্যে এর প্রাচীনত্বের এবং সর্বজনীন স্বীকৃতির সাক্ষ্য স্বরূপ উপর্যুক্ত বিবিধ শাস্ত্র ও তত্ত্বগ্রন্থ থেকে উদ্ধৃতি দেয়া হয়েছে । এবং সঙ্গে সঙ্গে পদ্যে বঙ্গানুবাদ দেয়া হয়েছে । এ সঙ্গে সখ্য বাৎসল্যাঙ্গি অন্য রসের সুফলও বর্ণিত রয়েছে । বন্দনা, জন্মাপাট ও সর্বপাট নির্ণয়ের পরেই রয়েছে উক্ত 'তত্ত্ব বর্ণনা', তার পরে রয়েছে চৈতন্য পার্শদদের শিষ্য পরম্পরার বর্ণনা । শেষে রয়েছে চৈতন্যদেবের শৈশব, বাল্য ও সন্ন্যাস জীবনের কিছু পরিচয় । চৈতন্যদেব যে রাধাকৃষ্ণের যুগলাবতার, তা প্রমাণের জন্যেই চরিতাংশের

অবতারণা।

ভক্তিকল্পবীজের অঙ্কুর মাধবেন্দ্রপুরীতে, অঙ্কুরপুষ্টি ঈশ্বরপুরীতে এবং ক্রমে তা পল্লবিত তরুতে পরিণত। এবং পরমানন্দপুরী, কেশবভারতী, ব্রহ্মানন্দপুরী, ব্রহ্মানন্দ ভারতী, বিষ্ণুপুরী, কেশবপুরী, কৃষ্ণানন্দপুরী, নৃসিংহতীর্থ ও সুখানন্দপুরী— এই নয়জন ভক্তিকল্পবৃক্ষমূলরূপ। চৈতন্যদেব এই বৃক্ষের আদি স্বক— আপনেনই মহাপ্রভু হইলা আদি স্বক। এবং তার ‘দুই দিকে দুই স্বক অদ্বৈত নিত্যানন্দ’। এর থেকে অসংখ্য শাখা’ শিষ্য-উপশিষ্যের বিস্তার। [তুল : চৈতন্যচরিতামৃত ৯ম পরিচ্ছেদ (পৃঃ ৮৫) মাধবেন্দ্রপুরী, ঈশ্বরপুরী, চৈতন্য, ব্রহ্মানন্দপুরী, কেশবভারতী নৃসিংহতীর্থ, বিষ্ণুপুরী, কেশবপুরী, কৃষ্ণানন্দপুরী, সুখানন্দপুরী।]

চৈতন্য পারিষদ

ক. দুই ভাই শ্রীবাস পণ্ডিত ও শ্রীরাম— দুই ভাইয়ের দুই শাখা। খ. শ্রীপতি ও শ্রীনিধি— দুই সহোদরের ‘চারি ভাইর দাসদাসী পরিজন দুই শাখার উপশাখা স্বরূপ। গ. ‘যার গৃহে কীর্তন প্রভুর দিবস রজনী’ সেই আচার্য রতনের এক শাখা এবং তার শিষ্যপরিকরের উপশাখা। ঘ. আচার্যরত্ন ওফে শ্রীচন্দ্রশেখর। পুণ্ডরীক বিদ্যানিধি। গদাধর পণ্ডিতের শাখা আর শিষ্য-উপশিষ্যের উপশাখা, ঙ. বরুণেশ্বর পণ্ডিতের শাখা। চ. পণ্ডিত জ্ঞানানন্দ। রাঘব পণ্ডিতের শাখা, উপশাখা— মকরধ্বজকর ও তাঁর ভগ্নী দময়ন্তী— প্রভুর স্ত্রিয়দাসী। তাঁর ভোগ সামগ্রী যোগান বারমাসী। ছ. গঙ্গাদাস পণ্ডিত। শ্রীআচার্য পুরন্দর শাখা। জ. দামোদর পণ্ডিত শাখা। ঞ. শ্রীমান পণ্ডিত। গুরুদ্বার ব্রহ্মচারী। নন্দন আচার্য শাখা। ট. মুকুন্দ দত্ত শাখা। ঠ. বাসুদেব দত্ত শাখা। ড. হরিদাস ঠাকুরের শাখা, উপশাখা— কুলীন গ্রামবাসীরা। ঢ. শ্রীরাম (মান) সেন। মুরারি গুপ্ত শাখা। ণ. গদাধর দাস শাখা। ত. শিবানন্দ সেন— তাঁর তিন পুত্রের চৈতন্যদাস-রামদাসের উপশাখা। এর উপশাখা— ব্রজেন সেন। শ্রীকান্ত সেন শাখা। থ. গোবিন্দানন্দ। নন্দন ব্রহ্মচারী। প্রদ্যুম্ন ব্রহ্মচারী শাখা।

১. চৈতন্য কীর্তনিয়া— গোবিন্দ দত্ত, আখরিয়া বিজয় দাস, চৈতন্যসেবক খোলাবেচা শ্রীধর।
২. চৈতন্য স্বেহভাজন— ভগবান পণ্ডিত/জগদীশ পণ্ডিত/হিরণ্য।
৩. পাঠক— পুরুষোত্তম ও সঞ্জয়।
৪. বনমালী পণ্ডিত। বুদ্ধিমত্তা খান/গরুড় পণ্ডিত। গোপীনাথ সিংহ। শ্রীমুকুন্দ/নরহরি/শ্রীরঘুনন্দন/চিরঞ্জীব/সুলোচন/সত্যরাজ রামচন্দ্র যদুনাথ/পুরুষোত্তম/শঙ্কর/বিদ্যানন্দ/বাণীনাথ বসু (চৈতন্যর প্রিয় দাস) এদের কুলীনগ্রামে বাস।
৫. শ্রীরূপ-সনাতন দুই মহাশাখা/অনুপম জীব আদি উপশাখা লেখা।
৬. রঘুনাথ /স্বরূপ /শঙ্করারণ্যচার্য— বড় শাখা এবং মুকুন্দ /কাশীনাথ /গরুড়— উপশাখা।
৭. শ্রীনাথ পণ্ডিত। জগন্নাথ আচার্য। শ্রীনিধি। গোপীকান্ত মিশ্র। ভগবান। সুবুদ্ধি মিশ্র। হৃদয়ানন্দ। কমলনয়ান। মহেশ পণ্ডিত। শ্রীকর। শ্রীমধুসূদন। জগন্নাথ দাস গালিম। শ্রীপুরুষোত্তম। শ্রীচন্দ্রশেখর। দ্বিজ হরিদাস। রামচন্দ্র। ভাগবতাচার্য। শ্রীগোপাল দাস। সারঙ্গ দাস আর্ঘ্য।
৮. জগন্নাথ তীর্থ। বিপ্র জগন্নাথ। গোপাল আচার্য। বাণীনাথ। গোবিন্দ, মাধব ও বাসুদেব (ভাই তিন জনে)— চৈতন্যে নাচায় সংকীর্ণনে।

৯. রামদাস ও অভিরাম নিত্যানন্দের সঙ্গীরূপে- গৌড়ে আইলা'
১০. রামদাস। মাধব। বাসুদেব ঘোষ। গোবিন্দ- প্রভুর সঙ্গে রহিলা হরিষে।
১১. কমলাকান্ত। যদুনন্দ। মাধব আচার্য আর দকৃপাপাত্র জগাই-মাধাই দুই আর্থ।
নবদ্বীপে ভক্তুর কৈল সংক্ষেপে গণন /অসংখ্য চৈতন্যভক্ত নহেত লিখন।

নীলাচলে বারা গেলেন :

১. সার্বভৌম ভট্টাচার্য ও তার ভগ্নীপতি গোপীনাথ আচার্য। কাশী মিশ্র। পদুম। ভবানন্দ-ভবানন্দের পাঁচপুত্র- রামানন্দ রায়; বাণীনাথ পট্ট-নায়ক, কলানিধি, সুধানিধি, গোপীনাথ নায়ক এবং রামানন্দ।
২. রাজা প্রতাপরুদ্র, কৃষ্ণদাস, উড়িয়া ভগবানাচার্য, ব্রহ্মানন্দ ভারতী, শিখি মহাতি, মুরারি মহাতি-চৈতন্য সেবাকারী।
৩. শিখি মহাতির ভগ্নী মাধবী দেবী, ঈশ্বরপুরী, কাশীশ্বর ব্রহ্মচারী, গোবিন্দ- চৈতন্য অনুচর।
৪. কৃষ্ণদাস নামের কুলীন ব্রাহ্মণ চৈতন্যের সঙ্গে দক্ষিণে (উড়িষ্যায়) আসেন।
৫. বলভদ্রাচার্য, বড় হরিদাস, ছোট হরিদাস, রাম ভট্টাচার্য, সিংহেশ্বর উড়িয়া, তপনমিশ্র, রঘুনাথ নীলাম্বর সিহাভট্ট, কমোভট্ট শিবানন্দ দস্তুর ও কমলাকাণ্ড (ইনি পূর্বে গৌড়ে চৈতন্যভৃত্য ছিলেন)।
৬. অম্বৈতাচার্যের পুত্র অচ্যুতানন্দ চৈতন্যের সঙ্গে নীলাচলে বাস করতেন।
৭. নির্ণোম গঙ্গাদাস ও বিষ্ণুদাস নীলাচলে চৈতন্যের সঙ্গে বাস করতেন।
৮. বারাগসীবাসী ভক্ত চন্দ্রশেখর, রঘুনাথের পুত্র তপন মিশ্র, রঘুনাথ মিশ্র (ভট্টাচার্য উপাধি) বাল্যে চৈতন্যের সেবা করেছিলেন। এরা চৈতন্যের সঙ্গে কিছুকাল নীলাচলে বাস করেন, পরে চৈতন্যনির্দেশে বৃন্দাবনে বাস করেন।
অসংখ্য চৈতন্যভক্ত নহেত গণন। বাল্য যুবতী মৃঢ় অন্ধক অবধি! দেখিয়া প্রাচীনমত মহাপ্রভুর শাখা সংক্ষেপে কহিল ইথে নাম মাত্র লেখা।

নিত্যানন্দ শাখা

- বৃক্ষ গুরুতর শাখা নিত্যানন্দ রায় শ্রীবীরভদ্র নিত্যানন্দ সম শাখা
জন্মিল অনেক শাখা প্রশাখা তাহার। যাহার করণ সব নাহি যাএ লিখা।
১. চৈতন্যভক্ত রামদাস ও গদাধরদাস নিত্যানন্দের সঙ্গে গৌড়ে এলেন- রামদাস সখ্যভাবে ও গদাধরদাস গোপীভাবে সাধনা করতেন।
 ২. গৌড়দেশে নিত্যানন্দের দানলীলা 'যার ঘরে সংঘটিত হয়, তাঁর সম্বন্ধে বৃন্দাবন দাস চৈতন্যভাগবতে 'বিবরিয়া লিখিল এই সব বিবরণ।'
 ৩. নিত্যানন্দ, বলরাম ও সদানন্দে ছিল সখ্যভাব। রামদাস, গদাধর, মাধব, বাসুদেব- নিত্যানন্দের কীর্তন-নর্তন সহচর।
 ৪. মাধব ঘোষ মুখ্য কীর্তনিয়া- 'যার গানে নিত্যানন্দ নাচয়ে হরিষে।'
 ৫. 'বাসুদেব করে প্রভুর গীত বর্ণন।'
 ৬. মুরারি 'চৈতন্য দাস শিক্ষা-বেণু বাদক।'

৭. রঘুনাথ বৈদ্য উপাধ্যায়ী- 'যাহার দর্শনমাত্র প্রেমভক্তি পাই।'
৮. সুন্দরানন্দ- 'যার সনে ব্রজনর্ম কৈল নিত্যানন্দ।'
৯. 'অলোকচরিত কমলাকর পিপলাই।' কৃষ্ণদাসের ভাই সূর্যদাস সরখেল। গৌরীদাস পণ্ডিত। পুরন্দর পণ্ডিত। পরমেশ্বর দাস। জগদীশ পণ্ডিত। ধনঞ্জয় পণ্ডিত। মহেশ পণ্ডিত। পুরুষোত্তম পণ্ডিত। বলরাম দাস। যদুনাথ কবিচন্দ্র- এঁরা নিত্যানন্দ শিষ্য-শাখা প্রবর্তক।
১০. দ্বিজ. কৃষ্ণদাস। কালা কৃষ্ণদাস। সদাশিব কবিরাজ। তাঁর পুত্র পুরুষোত্তম দাস। তৎপুত্র কাধি ঠাকুর। মহাভাগবত উদ্ধরণ দস্ত। মহাভক্ত আচার্য বৈষ্ণবানন্দ (-পূর্ব নাম রঘুনাথ)- এঁরা নিত্যানন্দ ভক্ত।
১১. 'বিষ্ণুদাস নন্দন গঙ্গাদাস তিন ভাই। পূর্বে যাহার গৃহে আছিল নিতাই।
১২. পরমানন্দ উপাধ্যায়। জীব পণ্ডিত কৃষ্ণগতচিত্ত পরমানন্দ গুপ্ত। নারায়ণ। কৃষ্ণদাস। মনোহর। দেবানন্দ- 'এ চারি নিত্যানন্দের কিঙ্কর।'
১৩. নকড়ি। মুকুন্দ। সূর্য। মাধব। শ্রীধর। পরমানন্দ-পুত্র জগন্নাথ-মহীধর-শ্রীমন্ত গোকুল দাস। হরিহরানন্দ। শিবানন্দ। মুকুন্দাই। পরমানন্দ (অবধূত) গোপাল। সনাতন। বসন্ত। লাবণী। বিষ্ণাই হাজরা। কৃষ্ণানন্দ। সুলোচন। কংসারি সেন। রামমোহন সেন। রামচন্দ্র কবিরাজ। গোবিন্দ। শ্রীলক্ষ্মীপুত্র। মাধবাচার্য। দামোদর। শঙ্কর। মুকুন্দ শীল। মনোহর দাস। নর্তক গোপাল। রামভদ্র। গৌরান্দ্র দাস। নৃসিংহ। চৈতন্য দাস। মীনকেতন। নারায়ণীপুত্র বন্দারু দাস (যিনি চৈতন্যলীলার যেহেন কলিব্যাস।) এঁরা 'নিত্যানন্দ-শিষ্যশাখার প্রবর্তক' শ্রীবীরভদ্র গোসাঁঞির উপশাখা এবং নিত্যানন্দের উপশাখা অসংখ্য অগণন।'
১৪. ভক্তিকল্প বৃক্ষের দ্বিতীয় ঋক্ক- অদ্বৈত (আচার্য), অদ্বৈত পুত্র অচ্যুতানন্দ কৃষ্ণমিত্র। অদ্বৈতের অন্য দুই পুত্র গোপাল ও বলরাম। রূপ। জগদীশ। এঁদের 'চৈতন্যে বিশ্বাস গৌণ, স্বতন্ত্রাভিমাত্রী। এতেকে অদ্বৈত গোশারী দুইগণ গণি।'
১৫. অদ্বৈত শিষ্য যদুনন্দাচার্য- তাঁর শাখা-উপশাখা অনেক। যথা- ভাগবতাচার্য। বিষ্ণুদাসাচার্য। চক্রপাণি আচার্য। অনন্তবিপ্র নন্দিনী। কামদেব চৈতন্যদাস। দুর্লভ বিশ্বাস। বনমালী দাস।
১৬. 'জগন্নাথকর-ভবনাথকর শাখা- হৃদয়ানন্দ সেন। দাস ভোলানাথ, 'লেখা' যাদব দাস। বিজয় দাস। দাস জনার্দন। অনন্ত দাস। কানু পণ্ডিত। নারায়ণ দাস। শ্রীবৎস পণ্ডিত। হরিদাস ব্রহ্মচারী। পুরুষোত্তম ব্রহ্মচারী। হরিদাস। পুরুষোত্তম পণ্ডিত। রঘুনাথ। বনমালী। কবিচন্দ্র বৈদ্যনাথ। লোকনাথ পণ্ডিত। মুরারি পণ্ডিত। শ্রীহরিচরণ। মাধব পণ্ডিত। বিজয় পণ্ডিত। শ্রীরাম পণ্ডিত।

চৈতন্যদেবের জন্য ঋণ ও তারিখ হচ্ছে :

শকে চৌদ্দশত আর সপ্তবৎসর

ফাঘুনী পূর্ণিমা বা বিসুত জান

বিষ্ণু বিংশতি তৃতীয় বৎসর অন্তর।

ত্রয়োবিংশ দিনে আবির্ভাব ভগবান।

চৈতন্যদেব বহু পাপী-তাপী দুরাচারীকে 'কৃপা' করেছিলেন এবং ধন্যও করেছিলেন অনেককে।
যেমন :

১. শ্রীনিবাসের ভ্রাতৃস্পুত্রী বালবিক্ষা নারায়ণীকে :
শ্রীনিবাস পণ্ডিতের দুহিতা ভ্রাতার/নারায়ণী নাম তার চারি বৎসরের।
মহাভাবময় প্রভু দেখিয়া সম্মুখে/চর্বিত তাম্বুল প্রভু দিল তার মুখে।
'আল রাড়ি' বুলি তেঞি কহে তাহারে/বৃন্দাবন দাস জন্ম যাহার উদরে।
চার বছর বয়স্কা নারায়ণীকে 'আল রাড়ি' বলে সম্বোধন করে ধন্য করেছিলেন।
২. নদীয়ায় কাজীদেরকেও উদ্ধার' করেছিলেন : 'কাজী সব নদীয়ায় ছিল দূরবার। তারে জ্ঞান দিয়া প্রভু করিল উদ্ধার।'
৩. জগাই-মাধাই ব্রাহ্মণ হয়েও মদ-মাংস খায়, ব্রহ্ম-গো-স্ত্রী হত্যা করে। তাদেরও কৃপা করেন তিনি।
৪. ষড় গোস্বামীর প্রধান দুই গোস্বামী বহু বৈষ্ণব-গ্রন্থ প্রণেতা রূপ ও সনাতন দুই ভাইকে উক্ত নামে অভিহিত করেছিলেন চৈতন্যদেবই :
দবীর খাসেরে প্রভু পরিচয় দিলা/প্রভু চিনি দুই ভাই কৃতার্থ হৈলা।
রূপ-সনাতন নাম থুইল দৌহার/ভক্তিগ্রন্থ দৌহে বহু করিল প্রচার।
৫. উড়িষ্যারাজ প্রতাপাদিত্য চৈতন্যদেবের কৃপা (শিষ্যত্ব) পেয়ে ধন্য হয়েছিলেন।
৬. গৌড়মণ্ডলে চৈতন্য-প্রতিনিধি নিত্যানন্দ দুই স্ত্রী নিয়ে সংসার পাতেন এবং পত্নী জাহ্নবী ও পুত্র বীরভদ্র লীলা প্রকাশ করতে থাকেন।
গৌড়দেশে আসি তবে নিত্যানন্দ রায়। বাসু [ধী] জাহ্নবী বিভা করিল তথাএ।
বীরভদ্র গঙ্গাদেবী প্রকাশ লীলাএ।
গ্রন্থ-সমাপ্তিকালে কবি ব্রজমোহন দাসের বক্তব্য :
তিন খণ্ড সূত্র এই সংক্ষেপে কহিল/দিগ দর্শনমাত্র লোকে জানাইল।
শ্রীচৈতন্যভট্ট প্রদীপ সংক্ষেপেতে/কহিল শাস্ত্র সংগ্রহ দেখি সাধুমতে।...
বাণ্দিয়া চৈতন্য চাঁদের চরণ মাধুরী/এ ব্রজমোহন দাস গ্রন্থ পূর্ণ করি।'

৯. রহিমুনিসা রচিত বিলাপ

চট্টগ্রাম জেলায় হাটহাজারী থানার অন্তর্গত মেখল গাঁয়ের স্থানীয়ভাবে প্রখ্যাত জ্ঞান আলি চৌধুরীর পুত্র আহমদ আলি চৌধুরীর পত্নী যুগ-দুর্লভ শিক্ষিতা মহিলা ছিলেন। এবং সে-যুগের নারীতে বিরল কবিপ্রতিভাও ছিল তাঁর। কবির দাদা শ্বশুরের নাম গোলাম হোসেন, শ্বশুরের নাম জ্ঞান আলি এবং স্বামী ছিলেন আহমদ আলি। রহিমুনিসার লিপিকৃত পদ্মাবতীর এবং লায়লী-মজনুর পাণ্ডুলিপিতে পাওয়া গেছে তাঁর 'দ্রাভিলাপ' ও 'দোরদানা বিলাপ' নামের রচনা। এতেই মিলেছে তাঁর পিতৃপরিবারেরও পরিচয়। ঐর পিতামহ বিহারের মুন্সের থেকে স্ট্রট ইণ্ডিয়া কোম্পানীর সঙ্গে মীর কাসিমের (১৭৬১-৬৫ খ্রীঃ) যুদ্ধে পরাজয় ও পলায়নকালেই সর্বস্বান্ত হয়ে চট্টগ্রামে এসে বাস করতে থাকেন এবং চট্টগ্রামে জঙ্গলী শাহ-এ ছদ্মনামে পীরালী করে জীবিকা অর্জন করতেন। জঙ্গী শাহর পুত্র আবদুল কাদের শাহ-ই রহিমুনিসার পিতা। রহিমুনিসার তিন সহোদরের নাম : আবদুল জব্বার, আবদুল সাত্তার ও আবদুল গফুর এবং তাঁর কোন বোন

^১ বিবৃত্ত বিবরণের জন্যে মৎসম্পাদিত চৈতন্যভট্টপ্রদীপ, সাহিত্য পত্রিকা, পীত সংখ্যা ১৩৮৫ সাল, (ঢাকা বিশ্ববিদ্যালয়) দ্রষ্টব্য।

ছিল না। রহিমুননিসার শৈশবেই পিতৃপ্রাণ ঘটে, তাঁর বিদুষী মা আলিমুননিসা তাঁকে লেখাপড়া শেখান, পরে আবুল হোসেন নামের শিক্ষকের কাছে তাঁর শিক্ষা সম্পূর্ণ হয়। রহিমুননিসার পিতামহ চট্টগ্রামে পালিয়ে আসেন ১৭৬৪ সনের মধ্যেই ইংরেজের সঙ্গে মীর কাসিমের যুদ্ধের ও পরাজয়ের কালে। অতএব রহিমুননিসার পিতাকে আঠারো শতকের শেষার্ধ্বে এবং রহিমুননিসাকে উনিশ-শতকের তৃতীয়পাদের গোড়ার দিকে প্রাপ্তবয়স্কা ও কবি রূপে পাই। ১৯১৫ সনে তাঁর মৃত্যু হয়। তিনি ‘রূপজালালের’ কবি নওয়াব ফয়জুননিসার বয়োজ্যেষ্ঠা। কালের দিক দিয়ে না হলেও মহিলাকবির রচনা বলেই তাঁর প্রণীত কবিতার ঐতিহাসিক মূল্য স্বীকৃতি পাবার যোগ্য। তাই আমরা স্থায়িত্ব দেয়ার অভিপ্রায়ে তাঁর কবিতাগুলো সংকলন করে রাখলাম।

প্রণমিএ নিরঞ্জন	মনে স্মরি গুরুজন	বর্ণিতেছি দুষ্কের বাসর
নিবেদিত গুণিপাদ	করু মোরে আশীর্বাদ	দোভাব না হোক মন।
হীন মতি নেচাবর	রহিমুন্নিচা নাম মোর	শুন শুণী হই এক মন
মোর'পরে করতার	যত দিছে দুষ্কভার	সে সকল না যাএ কহন।
ফিরিল ভাগ্যের নিধি	বিমন হৈল বিধি	আচমিতে শিরে বজ্রঘাত
পূর্বজন্মে কৈলুপাপ	সেদোষে ফলিল তাপ	আশাভট্ট হৈলুম অনাথ।
মিষ্টের প্রাণের প্রাণ	ভ্রাতৃ মোর রূপবান	নাম জান আবদুল ছতার
তান'পরে জগপতি	পৌরব হইয়া অতি	পাপ হস্তে করিল নিস্তার।
আহা ভাই গুণসিদ্ধ	রসিকজনের বন্ধু	জ্ঞানের গুরু প্রেমের ওখার
তোমার কৃতির সীমা	কি কহিমু সে উষ্মা	ধীর স্থির সত্যবস্ত সার।
মিষ্টের প্রাণের প্রাণ	ভ্রাতৃ মোর রূপবান	নাম তার আবদুল গফুর

বারমাসী : অম্মাণের পক্ষ [২৪] দিন শুক্রবার শুভ চিন ভ্রাতৃমোর গেল স্বর্গপুর।

ফেলি মাও ভাই বোন	ভ্রাতা মোর সুখ মন	স্বর্গপুরে গেলা মনোরঙ্গ
ভুরুযুগ অতি টান	নয়ান কটাক্ষ সান	স্বরগের ছর মনোভঙ্গ।
ভাবে মগ্ন হই মতি	প্রভু হস্তে মাগি গতি	ভ্রাতৃ মোর লই গেল বরিয়া
পুষল মাসেতে দুখ	কহিতে বিদরে বুক	তোমা শোকে ফাটি যাএ হিয়া।
পূরিলে নিবন্ধ আয়ু	বন্ধন না হএ বায়ু	সেই ছিদ্রে যমে দিল কোল
দিবানিশি অভিপ্রায়	কান্দএ অভাগী মাএ	না শুনিয়া তোমা সুধা বোল।
মাঘল মাসেতে আত্মা	মোরে নিদারুণ হৈলা	ভাই রত্ন করিলা বঞ্চিত
আছিলাম জোড়াভাই	বেজোড়ে করিলা ছাই	হেন ছিল দৈব নিয়োজিত।
ফাগুনে ফিরিল ঋত	অস্থির মোহর চিত	ভাই বিনে জগ আক্খিয়ারি
দুষ্কের জননী তোর	সমর্পিলা কার 'পর	উদাসিনী হৈলা তোমা স্মরি।
চৈতেতে চাতকী ঘন	তৃষিত হইয়া মন	নীর দান মাগে প্রভুস্থান
অনুজ অনুজা তেজি	কার ভাবে গেলা মজি	কেবা তোমা করে আশাদান
বৈশাখ মাসেতে সার	ভাগ্যহীন নাই আর	মোর সম হেন ত্রিভুবন
শিশুকালে মেল বাপ	চিন্তে জ্বলে সেই তাপ	কাটা ঘায়ে যেহেন লবণ।
জ্যৈষ্ঠল মাসেতে মন	দুনা হৈল উচাটন	সুসম্পদ লাগএ কর্কশ

আহা প্রাণাধিক ভাই
 আষাঢ় যে পরবেশ
 মনে দুক্ষ পাইলে ভাই
 শ্রাবণে দাদুরী রব
 বিহরিতে ভ্রাতৃসনে
 ভাদ্রেতে সম্পূর্ণ জল
 না দেখিএ চন্দ্রমুখ
 না পূর্ণিতে কলানিধি
 না কৈলা সংসার সুখ
 আশ্বিনেতে খোয়ায়
 আমার কান্দনি শুনি
 কার্তিকেতে বুদ্ধিহীন
 হেন দৈবে ঘটে কার
 মধ্যযুগে অনেকেই খণ্ড কবিতা হিসেবেও বারমাসী লিখেছেন। রহিমুননিসার বিলাপটিও বারমাসী আঙ্গিকের খণ্ড কবিতা। শাহ-বারিদ খান রচিত বারমাসী যৌবনবতী নারী ও প্রকৃতি বিষয়ক একটি উৎকৃষ্ট খণ্ড কবিতা।^১

রহিমুননিসার আত্মকথা

পদ্মাবতীর লিপিকর হিসেবে পুষ্পিকায় কবিতা নিজের স্বামী-কুলের ও পিতৃপরিবারের পরিচয় দিয়েছেন। এরও রয়েছে ঐতিহাসিক প্রসঙ্গ :

শুন গুণিগণ	হই এক জন	লেখিকার নিবেদন
অক্ষর পড়িলে	টুটা পদ হৈলে	সুখিঅ সর্বজন।
পদ এই রাষ্ট্র	হেন মহাকষ্ট	পুঁথি সতী পদ্মাবতী
আলাওল মণি	বুদ্ধি বলে গুণী	বিরচিল এ ভারতী।
পদের উক্তি	বুঝি কি শক্তি	মুই হীন তিরি জাতি
স্বামীর আদেশ	মানিয়া বিশেষ	সাহস করিলুঁ গাঁথি।
সে পদ হিমল	মন মোর উবাল	ধীরবস্ত্র শুদ্ধ পতি
নাম আর গ্রাম	শুন অনুপাম	বর্ণিমু কিষ্কিত কৃতি।
মেখল দিব্য স্থান	অতি শোভমান	মোহন্ত গুণী বসতি
নিত্য সুখ রস	নহে পাশ বশ	সদা সুআচার অতি।
মোহন্ত প্রধান	রূপে পঞ্চবাণ	গোলাম হোচন বীর
সর্বগুণধারী	মহাদানকারী	ধৈর্যে জিনি যুধিষ্ঠির।
প্রভুর ভাবক	কান্দালী পালক	কুলশীল শুদ্ধ জান
না গুণি সংশয়	সানন্দ হৃদয়	কাটিলেক কাল তান।
তাহান তনয়	অতি গুণালয়	সাহসিক বুদ্ধশালী

^১ মধ্যযুগের কাব্যসংগ্রহ দ্রষ্টব্য।

জ্ঞানবন্ত গুরু	মানে জিনি কুরু	ছিরীযুত জান আলি
পিতৃ হস্তে অতি	তাহান যে কৃতি	প্রচারিল ক্ষিতি মাঝ।
তার ঔরসের	আমদ আলিবর	মোর পতি রসরাজ।
রসিক সমাজ	ব্রতধর্ম কাজ	উপেক্ষা না করে চিত
মোহর যে গুরু	মহা কল্পতরু	অখণ্ডিত উপনীত।
সত্যবন্ত স্থির	জ্ঞানবন্ত ধীর	নাম আবুল হোচন
তান কৃপা দান	নহে মোর স্থান	কিবা যোগ্য বিরচন।
গুণীনের পদ	করিএ ভকত	কর মোরে আশীর্বাদ
স্বামীর সঙ্গতি	থাকিতে পিরীতি	না হৌক যে বিসম্বাদ।
প্রভু করতারে	মুই অভাগীরে	করুণা রহৌক সতত
আন ভাব মতি	নৌক আন পতি	না করৌক লজ্জাগত।
নিজ গোত্র নাম	স্থান আর গ্রাম	কহিএ সব বাখানি
যবে পাও দোষ	না হইঅ রোষ	খেম যত বুধমণি।

রহিমুননিসার পিতৃকুল পরিচিতি

নাম গোত্র বিরচিয়া করিমু বর্ণন
কর্ণগত শুন মন দিয়া কবিগণ।
জংলি সাহা নাম করি গুণে অনুপাম
আহালে কোরেশ বংশে উৎপত্তি তাহান।
তথা বাগদাদ হস্তে আর কত মুস্কেরে আসিল
সে মুলুক নৃপ সঙ্গে বহু যুদ্ধ হৈল
অগ্রগামী হৈয়া ইংরাজে যুদ্ধ দিল
দৈবদশা ফিরিঙ্গির বিজয় হইল।
মুখ্য মুখ্য সবের বহুল রত্ন ধন
লুটিয়া করিল ক্ষয় যত পাপিগণ।
অনেক লাঘবে নিজ জনাভূমি ছাড়ি
চট্টগ্রামে আসিয়া রহিলা বাস করি।
পীর হই শিষ্য কৈল কত কত গ্রাম
প্রকাশ হইল তান যশ কৃতি নাম।...
তাহান ঔরসে মোর পিতা গুণালয়
আবদুল কাদের সাহা নাম সুনিশ্চিত।
গুণজ্ঞাত গুণমতি আওল ফকির
ছুফী খান্দানেতে পীর আছিল সুধীর।...
অবোধকালেতে মোর পিতা স্বর্গে বাস।
সে কারণে শাস্ত্র জ্ঞাতা না হৈলুম অতি।
কিঞ্চিৎ দর্শাইল পুঁথি মাতৃগণবতী।
প্রভুভক্তা সতীত্ববতী জননী অনুপাম
শ্রীমতি আলিমন্নিচা জান তার নাম।

তিনদ্রোতা এক নাম আবদুল জব্বার-
আবদুল ছত্তার আর অতি জ্ঞানমান
পাপকোষ লোভহীন রূপে পঞ্চবাণ
বিংশ বৎসরেতে তান কাল উপস্থিত
স্বর্গপুরে যাই দেহ করিলা লুকিত।
ভ্রাতৃ অনুশোচে হৃদে নাহি পরিত্রাণ
জানিবে এ দুক্ষ মোর যেবা বুধমান।
মোহর কনিষ্ঠ আব্দুল গফুর অজ্ঞান।
গুণীনের পদে আর এই সে আরতি
পতিভক্তি সতীত্ব রাখিতে একমতি।...
অনাথিনী এতিমের নাম শুন গুণী
শ্রীমতি রহিমন্নিচা দুষ্ট কলঙ্কিনী।
পদের অক্ষর ক্ষয় হৈলে কদাচন
দোরসিও তাকে গুণী হই তুষ্ট মন।
পিতাহীন সুতা জানি গৌরব করিবা
দুক্ষিণীর পদ এই শুধরিয়া দিবা।
মহতে ঢাকিয়া রাখে হীন অপরাধ
নিগুণীএ না বুঝিয়া বাড়ায় বিবাদ।
এই পুণ্ডি বিকি যদি করি কদাচিত
নিজ হস্তে দস্তখত দিমু যে নিশ্চিত।
ফেরেব রূপেতে কেহ মালিকি লিখিবা
তার মাতৃতিরি' পরে তেলাক জানিবা।

স্বামী আহমদ আলীর আশ্রয়ে রহিমুননিসা 'দোরদানা বিলাপ' নামে অপর একটি বিলাপ-কবিতা রচনা করেছিলেন। আদ্যে খণ্ডিত শত চরণের এ বিলাপে স্বামীর হাতে নিহত কন্যার জন্যে মা-বাপের ভাই-বোনের বিলাপ বর্ণিত হয়েছে :

মোর কন্যা তোর হস্তে শহীদ হইল।
আপনা তিরী বলি না কৈলা বিচার
নিদোষীরে দোষী করি মর্ম বিদারিল।
তোমা অঙ্গ রক্ত ভাটি উজান ধরিল।
পয়গাম্বরী মুসিবতে আমারে পাড়িল।
পতিজ্ঞাতে লহর নহর বহি যাএ

বনান্তরে থাকি আলি পুষ্পমধু খায়
বৃক্ষমূলে থাকি ভেকে পরিচয় না পায়।
সুজনের সঙ্গে প্রেম মেঘ বৃষ্টি প্রায়
ভাঙ্গিলে সোহাগ পুনি অচিরে জোড়ায়।
কুজনের সঙ্গে প্রেম মাটিয়া কলসী
ভাঙ্গিলে না লয় জোড়া হয় বিদ্যানাশী।

এবিলাপে সুন্দর কথা অনেক রয়েছে :
আঁখির পোতলি কন্যা প্রাণের দোসর।
কোন মেঘে আচ্ছাদিল পূর্ণ শশধর।
জহুরীএ জানে ভাল সুবর্ণের মূল
হীরা মুক্তা নাহি চেনে লোহারের কুল।
ভগিতা :

গোময়ের কীটে কি জানিবে প্রেমশক্তি।
বেজোড়া করিলি কার জোড়ের কৈতর
মোর পুষ্প বৃন্দাবনে কেবা অগ্নি দিল
মোর পুষ্প কাঁচা ডাল কেবা রে ভাঙ্গিল।

ছিরী আহমদ আলী জ্ঞানবন্ত ধীর
মানে মহামন্ত অতি দানে কর্ণ বীর।

স্বামী আশ্রা শিরে পালি লেখি এ ভারতী
রহিমুনিচা নাম জান আদ্যে ছিরীমতি।^১

মনে হয় ইসলামের উন্মেষ যুগের নারী এ দোরদানা। আমরা জানি, করিব স্বহস্তে লিখিত পুথি [অটোগ্রাফ] সুদূর্ভব। রহিমুননিসার স্বহস্তে লিখিত বলেও প্রাপ্তরচনার রয়েছে বিশেষ গুরুত্ব।

এ. তামাকুপুরাণ

রেওয়াজ ছিল না বলেই মধ্যযুগের বাঙলাসাহিত্যে খণ্ড কবিতা দুর্লভ। আবার ব্যঙ্গ-বিদ্রূপ-পরিহাসাত্মক ছড়া-বচন চালু থাকলেও ওই ধরনের খণ্ড কবিতা সুদূর্লভ। তেমন এক বিরল রচনা আলোচ্য তামাকুপুরাণ, প্রণেতা শান্তিদাস। রচনাটি পরিহাসাত্মক, প্রচলিত বিদ্রূপ-বাণও রয়েছে এতে। কিন্তু বাহ্যত একটা ছদ্ম গান্ধীর্যের আবরণ রক্ষিত হয়েছে। এমনি আর দুটো রচনা হচ্ছে আবদুল করিম সাহিত্যবিশারদ আবিস্কৃত 'হক্কা পুরাণ' ও 'তামাকুচরিত্র'। রচয়িতা যথাক্রমে সিতকর্মকার ও সীতারাম। অন্য একটি হচ্ছে নলিনীনাথ দাশগুপ্ত-সংগৃহীত 'তামাকু মাহাত্ম্য', প্রণেতা রামপ্রসাদ।

বিদ্রূপ আরো তীব্র হয়ে ওঠে যখন তামাকুর জন্ম বৃত্তান্তে পৌরাণিক মর্যাদা ও মহিমা আরোপিত হয়, দেবগণের সমুদ্রমহ্নকালে রত্ন-আদি নানা বস্তুর সঙ্গে 'মহাবস্ত্র' তামাকুর বিচিও উদ্ভিত হল। স্বয়ং গদাধর বিষ্ণু তা লুকিয়ে পৃথিবীর উপর ছিটিয়ে দিলেন। এমনি করে স্বর্গ-মর্ত্যের পরিসরে দেবানুগ্রহে মানবকল্যাণে তামাকু ও হক্কার উদ্ভব। তাই পুরাণ নামটি সুপ্রযুক্ত ও সার্থক। আদিতে শব্দটি 'তামাকু' ছিল, 'তামাকু'ই সর্বত্র ব্যবহৃত হয়েছে, একালে আমরা বলি তামাক। টোবাকো-ও ওকারন্ত।

^১ বিস্তৃত পরিচিতি ও পাঠ উষ্টর মুহম্মদ এনামুল হকের মনীষামঞ্জরী (১ম খণ্ড) এবং মৎসম্পাদিত 'লায়লীমজনুর' পরিশিষ্টে দ্রষ্টব্য।

এ পুরাণের প্রবক্তা মুনি শুক এবং শ্রোতা স্বয়ং রাজা পরীক্ষিৎ। অন্য পুরাণের মতো এ পুরাণেও

যেবা লেখে যেবা শুনে পঠে সেই জনে বিশেষ পবিত্র হই ইতিন ভুবনে।

কবি শান্তিদাসের কামনা-‘জন্মে জন্মে থাকে যেন তামাকুতে মতি।’

কেননা, ভারতে আসিয়া যেবা তামাকু না খাএ

প্রাণ গেলে (মরার পরে) সেই জন মহাদুঃখ পাত্র।

আরো ভয়ের কথা, তামাক সেবন অভ্যাস না করে যে মরে, সে

‘পশু হৈয়া জন্মে গিয়া শৃগালি উদর’/‘হুকা হুকা’ বলি ডাক ছাড়ে নিরন্তর।’

‘মক হিরোইক’ কবিতার মতো বলা চলে এটিও একটি মক রিলিজিয়াস কবিতা। এখানেই এর অনন্যতা।

ভাঙ-চুচু চরস-গাজা-রস-ধেনো প্রভৃতি নানা নেশায় এ দেশের মানুষ আবহমান কাল থেকে অভ্যস্ত হলেও তা’ ছিল একান্তভাবে ব্যক্তিগত উপভোগের বস্তু। এবং সেগুলো কখনো তেমন ঘৃণ্য বা নিন্দনীয় ছিল না। বরং দেবভোগ্য বলে অনুকরণীয় ছিল। এক রকম সামাজিক স্বীকৃতিও ছিল। কিন্তু তামাক তেমন নেশাকর নয়, মনও তেমন মাতিয়ে তোলে না, সম্বিং হারাবার তো আশঙ্কাই থাকে না। মধ্যযুগেই এই নতুন ঔষধির এ দেশে আমদানি। সম্ভবত এও পর্তুগীজদের দান। শোনা যায় রাজা-বাদশাহের মধ্যে সম্রাট জাহাঙ্গীরই প্রথম তামাকসেবক। এতেই বোঝা যায়, তামাকে নেশা না থাকলেও আড়ম্বর ছিল, এ ছিল পুরোপুরিই বিলাস-ব্যসন প্রকাশের অন্যতম বাস্তব অবলম্বন। আভিজাত্যের, ধনের ও মানের বড়াই, পদাধিকারের দর্প ও দাপট এবং মজলিসে সামাজিক আড়ম্বর প্রকাশের প্রতীক রূপে সুদীর্ঘ সুন্দর জরি-জড়ানো নল ও কলিময় রৌপ্যখচিত সুগোল কলিকায়ুক্ত দামী বৃহৎ ধাতব হুকায় ধূমপান বা সুগন্ধ তামাক সেবন একটি আনুষ্ঠানিক রীতির মর্যাদা পায়। ফলে অধিকারীভেদ স্বতোই স্বীকৃত হয়। তাই অন্যান্য নেশা-সেবনের ক্ষেত্রে আদব-কায়দার প্রশ্ন কখনো গুরুতর ছিল না বটে, কিন্তু তামাক সেবনের মতো নির্দোষ বিলাসের বেলায় সামাজিক এবং সাংস্কৃতিক বিধি-নিষেধ ও নিয়ম-নীতি কঠোরভাবে মেনে চলা আবশ্যিক হয়ে ওঠে। এতে গুরুজনের, মান্যজনেরই একচেটিয়া সামাজিক ও মজলিসি অধিকার।

সস্তা, সহজলভ্য, সুসেব্য ও শারীরিক ক্ষতির আশঙ্কাবিহীন হওয়ায় তামাক সেবন শিগগিরই গণ-অভ্যাসে পরিণতি পেল। বলতে গেলে এমন দেশ-জাত-বর্ণ-ধর্ম নিরপেক্ষ গণসেব্য বস্তু বোধ হয় দ্বিতীয়টি নেই। গণ-ব্যবহারে তামাক ও হুকা দুই মূল্য ও মর্যাদা হারিয়ে সাধারণ ও সামান্য হয়ে ওঠে। তখন তালের গুড়-মাখা তামাক বাঁশ, মৃৎপাত্র ও নারিকেল খোল কিংবা কেবল কলিকা আশ্রিত হয়ে গণ-দাবি মেটাতে থাকে। তবু কিন্তু গুরুজনের মান্যজনের সামনে সেবনের নৈতিক বাধা অপসৃত হল না। আজকের বিড়ি-সিগার-সিগারেটের যুগেও সে-বাধা জগদ্বল হয়েই রয়েছে। আরো অনেক ব্যাপারের মতো তাৎপর্য হারিয়েও মধ্যযুগ এক্ষেত্রেও অনড় হয়ে অবিচল মহিমায় বিরাজ করছে। কাজেই সামাজিক ক্ষেত্রে প্রকাশ্যে তামাক সেবনের অধিকার-অনধিকার পারিবারিক ও সামাজিক মর্যাদা ও পদাধিকার ভেদের পরিমাপক। বয়স, সম্পর্ক, যোগ্যতা ও পদবীভেদে এ অধিকারভেদ সর্বস্তরের মানুষের স্বীকৃতি পেয়ে আসছে। কথায় বলে ‘মানলে পর্বতের চূড়া না মানলে ভাঙা নায়ের গুড়া’, কিংবা ‘মানেতো উচ্চ, না মানেতো তুচ্ছ।’ আমরা মানি বলেই তামাকসেবনও নীতি-

সংস্কৃতির অপরিহার্য অঙ্গ, শিষ্টাচারের মাপকাঠি এবং স্থান-কাল-পাত্রের আপেক্ষিকতা-নির্ভর।
ঘরে-সংসারে-সমাজে সর্বত্রই অশনে-বসনে আসনে এই অধিকারভেদ আজো গুরুত্ব পায়।
হুক্মার উদ্ভবেও রয়েছে দেবলীলা ও দৈব দান।

হুক্মা বানাইতে ব্রহ্মা দিল কমণ্ডলু

শিবে দিল লিঙ্গ আর ধুতুরায় ফুল।

তাতেই হল খোল-নৈচা-কলকে। তারপর জাহ্নবী হলেন জল, কৃষ্ণ দিলেন বাঁশী, বাসুকী
স্বয়ং হলেন নল। আর 'রহিল নরিচা যেন ব্রহ্ম সমসর।' রূপ-ও মূল্য ভেদে হুক্মার নাম হল
আলবোলা, ফর্সি, গুড়গুড়ি, গড়গড়া, ডাবা প্রভৃতি।

হুক্মা টানে টানে বাদ্যের মতো যে ধ্বনি তোলে, তারও মহিমা-মাহাত্ম্য অশেষ। এক
হুক্মার ধ্বনি হরিসংকীর্তনের, দুটোর ধ্বনি গঙ্গাস্নানের পুণ্য বিলায়; এমনি করে হুক্মার
সংখ্যাবৃদ্ধিতে কাশী-বারানসী-গয়া-প্রয়াগ দর্শনের পুণ্য মেলে। ছয়ে মেলে অশ্বমেধ যজ্ঞের
পুণ্য। আটহুক্মার ধ্বনিতে স্বর্গ আসে হাতে, আর 'নব হুক্মা হৈলে বিষ্ণু' প্রত্যক্ষ হন।

উৎসবে-পার্বণে-তোজে সব উপকরণ থাকলেও 'তামাকু রহিত হৈলে কার্য না জুয়াএ।'
তামাকুর প্রধান গুণ 'বারেক তামাকু খাইলে শ্রম শান্তি হএ।' ক্ষুধা তৃষ্ণা-তাপের দুঃখও 'বারেক
তামাকু খাইলে সকল পাসরে।' তামাকুর শ্রেষ্ঠ দান-সাম্যভাব। এতো বড়ো সাম্য সংস্থাপক
আর কোন বস্তু নেই। তামাক-খোরের

তচি অতচি নাহি স্নান স্নান

একজন আনএ শতেক জনের আহার।

রাত্রি দিবা ভেদ নাহি, নাহি কুলজ্ঞান।...

হুক্মার জানিঅ ভাই সেই অভিপ্রায়

জগন্নাথ দ্বারে নাহি জাতির বিচার

এক হুক্মার জলেতে শতেক জনে খায়।

তামাক যে কেবল জাত-বর্ণ-ধর্মের ভেদ ঘুচায়, তা নয়, লজ্জা-সঙ্কোচ-শরম আর সংযমও
ঘুচিয়ে দেয় :

তামাকু খাইতে লজ্জা নাহি কদাচিত।

বাপের হুক্মা পুত্রে নেয় ভাইর হুক্মা ভাই

বাপে খাএ তামাকু পুত্র বলে দেও।

তামাকুর লজ্জা জানি শুরু-শিষ্যে নাই।

একটান খাই আমি পাছে তুমি নেও।

এমন শরম-সংকোচ-সংযম-ভাঙা বলেই 'গোবিন্দ নাম ভুলানো' তামাকের উদ্ভবে 'এহি
ভুবন পবিত্র হয়েছে, হয়েছে ধন্য আর তামাকু খাইয়া সুখী হইল সর্ব লোক।'

ক. কবি শান্তিদাস

ঢাকা বিশ্ববিদ্যালয়ের পুথিশালায় রক্ষিত শান্তিদাসের তামাকুপুরাণের লিপিকাল ১২৪১ সন তথা
১৮৩৪ খ্রীস্টাব্দ। প্রান্তিস্থান- গ্রাম আড়াই হাজার, জিলা ঢাকা। মালিক বা সংগ্রাহক বসন্ত
কুমার চক্রবর্তী। সুতরাং পুথি ঢাকার ওই অঞ্চলের হওয়ারই সম্ভাবনা। রচয়িতাও সম্ভবত ওই
অঞ্চলের লোক। ভাষা ও ভঙ্গি দৃষ্টে মনে হয় তামাকুপুরাণ আঠারো শতকের শেষে কিংবা উনিশ
শতকের প্রথম পাদে রচিত। অতএব রচয়িতা শান্তিদাসেরও জীবৎকাল আঠারো শতকের
শেষার্ধ ও উনিশ শতকের প্রথম ছিল বলে অনুমান করা চলে।

খ. আফজল আলি

আঠারো শতকের চট্টগ্রামবাসী কবি আফজল আলি (আনুঃ ১৭৩৮-১৮১১ খ্রীস্টাব্দ) তাঁর
নসিয়তনামায় গাঁজা-তামাকুর ধূমপানের পাপ ও তামাকু সেবনের পরিণাম বর্ণনা করেছেন।

এটি সমাজপতির ও শাস্ত্রবিদের পাঁতি-ফতোয়া-নীতি বা শিক্ষামূলক গভীর রচনা ।
 মুসলমান হিন্দু আর যত জাতি আর স্বপ্নের জামাতা বন্ধু এক নলে খাএ
 সকলে করএ ভক্ষণ না করে বিচার । সেই নলে মাগ খাএ জান সর্বথাএ ।
 সংসারেত যে সকলে তামাকু পিয়এ জ্ঞানবন্ত মুসলমান যে সকল হএ
 অন্তরে কালির বর্ণ হইয়া আছএ তবে কেন হেন চিজ ভক্ষণ করএ ।
 তামাকুর পায়রবি করিয়া পঞ্চজন তামাকু যে সবে পিএ রুহ্ 'ছেহা' তার
 মুচি হস্তে কতল করিব নিরঞ্জন । সে-দোষে না পাইব দেখ রসুল আল্লার ।
 তামাকু যে ক্ষতি করে, যেবা মাখি দিছে, কোরান হাদিসে চাহ করিয়া বিচার ।
 যে জনে ভরিল হুকা, যেবা অগ্নি দিছে । আর স্বপ্ন দেখিলেন্ত গাঁজা যে পিয়ন
 আর যে সকল ভক্ষে- এই পঞ্চজন সে সবে সর্ব অঙ্গ ইব্রিস বাহন ।
 হিসাবেতে 'ছেহা' বর্ণ হইব বদন । সে সবে সঙ্গতি যে মেলা করিবার
 কিবা ভাল কিবা মন্দ নাহি বিচারএ নিষেধ করিছে নবী হাদিস মাঝার ।
 এক নলে মুখ দিয়া সকলে ভক্ষএ ।

গ. শেখ সাদী

আঠারো শতকের কবি শেখ সাদী তাঁর 'গদা-মালিকী' নামের তত্ত্বজিজ্ঞাসা গ্রন্থে তামাক
 সেবনকে কলিকালের লক্ষণ বলে অভিহিত করেছেন।
 গদাএ কহে যেইক্ষণে কলির প্রবেশ লজ্জা হারাইব লোকে তামাকুর হতে
 তামাকু পিবারে লোকের করিব আবেশ। ছোটিয়া যাইতে লোক পিব পথে পথে ।
 অন্য হতে জানিবে তামাকু বড় ধন পিতায় তামাকু পিতে পুত্র করে আশ
 তামাকুতে বৃদ্ধ বালকের রহিব জীবন। তামাকুখ করিবেক ভুবন বিনাশ ।
 তাছাড়া খাইতে না ভরে পেট মিছা ফাঁক ফুক ।
 'লজ্জা হারাইব লোকে তামাকুর হতে'—এটাই সম্ভবত কলিকালের লক্ষণ ।

ঘ. দ্বিজ রামানন্দ

বিশ্বভারতী থেকে প্রকাশিত ডক্টর পঞ্চানন মণ্ডল সংকলিত 'পুথি পরিচয়'-এর ১ম খণ্ডের ৬৯
 পৃষ্ঠায় 'গাঁজা ও তামাকুর' একটি গান সংকলিত হয়েছে। গানটির রচয়িতা দ্বিজ (ন্যাড়া)
 রামানন্দ। 'পল্লীকবির সম্পূর্ণ স্বতঃস্ফূর্ত রচনা কৌতুক রসের কবিতার ভালো ও পুরানো
 উদাহরণ বলিয়া রচনাটি সবিশেষ মূল্যবান।' পঞ্চানন মণ্ডল, পৃঃ ৬৯। তামাকু :
 মা মৈলে জেন গুড়াকু তামাকু পাই । ধুয়া কুশ পটো টেন্যা ফেলা
 উঠি অতি নিশি ভোরে ইঁকাটি লইয়া করে কোঁচর তামাকু গুড় দিয়া পিণ্ডি দেয় তাই ।
 গোয়ালি দুয়ারে দুয়ারে উকুট্যা বেড়াই ছাই । দ্বিজ রামানন্দে ভনে স্থান দিয়া শ্রীচরণে
 কয়্যা জাব তনয়েরে মৈলে জখন শ্রাদ্ধ করে জোড়া নলে তামাকু খাইয়া স্বর্গে চলা জাই ।
 বঞ্চিত-বিড়ম্বিত জীবনে অভাব-বঞ্চনা-পীড়নক্লিষ্ট মনে তামাকু সেবনের মুহূর্তগুলো শান্তি-সুখের
 প্রলেপ বুলায় । আর স্বহু ও সুহু ধনী-মানীকে ধূমপান দেয় স্নিগ্ধ প্রশান্তি । গাঁজা :
 মনের গৌরবেতে চিনলি না রে অরে গাঁজাখোর । ধুয়া ।
 গাঁজার পাতা জলে ভাসে দেখি ভাপি হাঁসে

আর এক ভাঙ্গি ওরো জাহাদ এইল মোর।

ভাঙ্গা ঘরে সুঞা থাকে গগনেতে তারা দেখে

আর এক ভাঙ্গি উঠ্যা বলে বালাখানা মোর।

রামানন্দ নাড়ায় বলে এক ছিলুম গাঁজা খাইলে চক্ষে হয় ঘোর।

যদিও ‘গাঁজা কারণ বারি’র মতোই পবিত্র ও সাধন-সহায়। কেননা গাঁজা মহাদেব-সেব্য। তামাকের অর্বাচীন উদ্ভব তাকে দেবভোগ্য হবার সৌভাগ্য ও সম্মান থেকে বঞ্চিত রেখেছে।

আবদুল করিম সাহিত্যবিশারদও একথানা ‘হুকাপুরাণ’ সংগ্রহ করেছিলেন। এই পুরাণ রচয়িতা সিত কর্মকার। ১-৮ পৃষ্ঠায় সমাপ্ত। লিপিকাল “ইতি সন ১২২১ মঘি, তারিখ ২৯ ভাদ্র।” অর্থাৎ ১৮৫৯ খ্রীস্টাব্দের ১৩ই সেপ্টেম্বর।

শান্তি দাসের ও সিত কর্মকারের রচনায় সাদৃশ্য অনেক। এতে বোঝা যায় গাঁজা-তামাকের দেশ-প্রচলিত নিন্দা-বিদ্রূপকেই তাঁরা ভাষা দিয়েছেন, এ তাঁদের চিন্তাপ্রসূত নয়। তাই স্বকীয়তার দাবিদার হতে পারেন না তাঁরা। এ লৌকিক রসবোধের গৌরব কোন ব্যক্তি বিশেষের নয়—লোকসমাজের। তবে শান্তিদাসের চেয়ে সিত কর্মকারের ভাষা ও ভঙ্গির উৎকর্ষ অবশ্য স্বীকার্য। তা ছাড়া রচনা কলেবরেও সামান্য বড়ো। সিত কর্মকারের রচনাও উনিশ শতকের গোড়ার দিককার বলেই মনে হয়।

‘সমুদ্র মথনে যবে গেল দেবগণ’ তখন ‘পঞ্চম মধুকে জন্মে তামাকুর বিচি।’ এখানে কেবল গদাধর নন, তামাকুর বিচি ‘দেবগণে হরিলেক যাবু যেই রুচি।’ যদিও অবশ্য

“নেশাখোরে নেশা খাইয়া হএ হতজ্ঞান এবং বাপে তামাকু খাএ পুত্রে বোলে দেঅ আপনার জ্বীকে দেখে মাএর সামান। আর জন্মিতা তামাকু খাএ চাহেন স্বত্তরে।

মাকে মালি পাড়ে অসর বাপকে বলে শালা।”

সিত কর্মকারও হুকা-তৈরির রর্ণনা দিয়েছেন, এবং তা’ শান্তিদাসের দেয়া বিবরণের মতোই। উপসংহারে কবি বলেন :

ভারতে জন্মিয়া যেবা তামাকু না খাএ, পরলোকে জন্ম হএ শৃগাল উদরে।

অন্তকালে সেই পাপী স্বর্গেত না যাএ। ‘হুকা হুকা বলি ডাক ছাড়ে উচ্চস্বরে।

তবে তামাকু সেবন না করেও স্বর্গের প্রত্যাশা করা যায়, যদি ‘তামাকুপুরাণ এই গুনে কোন জনে’ এবং ‘এক মনে শুনিলে সে স্বর্গপুরে যাএ।’

আবদুল করিম সাহিত্যবিশারদ সীতারাম রচিত ‘তামাকু চরিত’ নামের পুথিরও আবিষ্কর্তা [প্রাচীন পুথির বিবরণ ২য় সংখ্যা, পৃঃ ৮...]

আর অধ্যাপক নলিনীনাথ দাশগুপ্ত এক কবি রামপ্রসাদ রচিত ‘তামাকু মাহাত্ম্য’-এর পরিচিতি দিয়েছেন, এর চরণ সংখ্যা ১২০ এবং লিপিকাল ১২০৮ সাল-১৮০১ খ্রীস্টাব্দ। অতএব রচনাকাল আঠারো শতকের শেষার্ধ। এঁর রচনায় ‘তামাকুর বীজ শিব জটা হৈতে’ স্থলিত। আর এক হুকা যথায় সেহি সালগ্রাম হয়ে দুই হুকা লক্ষ্মীনারায়ণ

তিন হুকা যেবা দেখে নেহি যায়ে স্বর্গরোথে কি কহিব তার পুণ্যফল চারি হুকা যথা বসি সেহি গঙ্গা বারানসী সেহি বৃন্দাবন নীলাচল।

তামাকুকে অবজ্ঞা করে সীতা, হরিশ্চন্দ্র রাজা, বলিরাজা, রাবণ, দুর্যোধন প্রভৃতি হতসর্বস্ব।

ট. মুহম্মদ দানিশ

‘গুলেবকাউলি’ রচয়িতা উনিশ শতকের কবি মুহম্মদ মুকিম তাঁর পূর্ববর্তী ও সমকালীন কবি ‘প্রণামে’ দু’জন দানিশ-এর উল্লেখ করেছেন। উভয়েই তাঁর বয়োজ্যেষ্ঠ। তবে দু’জনের নামে সামান্য পার্থক্য আছে। একজন মুহম্মদ দানিশ :

শহর উত্তরে ‘সুলুব বহর’ মধ্যান। গুণবন্ত মহাধীর প্রায় আলাওল।। ...
মহাগুণবন্ত এক আছে সেই স্থান।। অন্যে অন্যে প্রীতিবাসি আমি তথা যাই।
মোহাম্মদ দানিশ নামে বুদ্ধি পরবল। নানা পরস্তাব পড়ি বঞ্চি এক ঠাই।।
অপরজন কাজী দানিশ :

অখনের পণ্ডিত আছে যথাতথ্য। মুনসী নাম মোহাম্মদ মুকিমে বন্দিয়া।
সেসব প্রণাম করি কহিলাম গাথা।। শ্রীযুত দানিশ কাজী পদ প্রণমিয়া।
কাযী দানিশ পদাবলী ও রাগমালা রচনা করেন। মুহম্মদ দানিশ রচনা করেন ‘জ্ঞানবসন্ত-বাণী’। মুকিমের উক্তিভেদে প্রকাশ দানিশ ধার্মিক ও আলাউলের সমকক্ষ পণ্ডিত ছিলেন। মুকিমের সঙ্গে তাঁর বিশেষ হৃদয়তা ছিল এবং মুকিম সে-সূত্রে মুহম্মদ দানিশের বাড়ী গিয়ে তাঁর সঙ্গে কাব্যালোচনা করতেন। ‘সুলুব-বহর’ চট্টগ্রাম শহরের উপকণ্ঠস্থ গ্রাম। এখানেই মুহম্মদ দানিশের নিবাস ছিল। দানিশের পিতার নাম আরব (আলী)।

জ্ঞানবুদ্ধি পুস্তকের বাণী সুধাময়। রচএ দানিশ হীন আরব অন্তনয়।।

দানিশের পীরে নাম সয়্যিদ সিরাজউদ্দীন :

পীর সৈদ সিরাজদ্দিন যুগপদে হই লীন রচএ দানিশ সুপয়ার। দানিশের উক্তি থেকে জানা যায়, তিনি আরবি বা ফারসি কোন কেতাব অবলম্বন করে তাঁর কাব্যখানি রচনা করেছিলেন :

এবে সে সমাগু হৈল শশি শূন্য বাব। কহিব ‘রুদ্দক’ বাব হেরিয়া কিতাব।।

এ’ কাব্যখানির পাণ্ডুলিপি মরহুম আব্দুল করিম সাহিত্যবিশারদ সংগ্রহ করেছিলেন। এই একটি মাত্র পাণ্ডুলিপিও খণ্ডিত। ২৫-১৫৭ পত্র বিদ্যমান থাকলেও মধ্যে মধ্যে অনেকগুলো পত্র নেই। পুথির কোন নাম পাওয়া যায়নি। ভণিতার অনুসরণে সাহিত্যবিশারদ কাব্যটির নাম দিয়েছেন ‘জ্ঞানবসন্ত-বাণী’। ভণিতা এরূপ :

৩. জ্ঞান-বসন্ত-বাণী কস্তুরীর বাস। ৩. জ্ঞান-বুদ্ধি পুস্তকের বাণী সুধাসম।

রচএ দানিশ শিশু পঞ্চলির ভাষ। রচএ দানিশ শিশু অপার উত্তম।।

২. প্রেম পরস্তাব হীন দানিশে ভগএ।

অতএব, পুস্তকের নাম ‘জ্ঞান-বুদ্ধি-বাণী’ কিংবা ‘জ্ঞান-বসন্ত-বাণী’ হওয়াই সম্ভব।

কাব্যখানি বিভিন্ন ‘বাবে’ তথা অধ্যায়ে বিভক্ত। ২য় থেকে ১৩শ ‘বাব’ অবধি আছে। এটি উপদেশাত্মক পঞ্চতন্ত্র শ্রেণীর কাব্য।

এক রাজপুত্র অজ্ঞাতনামা রাজকুমারীর প্রেমে উন্মত্ত হয়ে উঠল তার চিত্ত উপশমের জন্যে তার হিতৈষীরা নারীজাতির চারিত্রিক দোষ ও নারীপ্রেমের বিকার ও অসারতা দেখবার জন্যে একটার পর একটা গল্প বলেছে। গল্পগুলো সুন্দর ও নীতি-গর্ভ। পড়তে পড়তে ‘আলেফলায়লা’, ‘পঞ্চতন্ত্র’, ‘পুরুষপরীক্ষা’ ‘বেতাল পঞ্চ-বিংশতি’, ‘বত্রিশসিংহাসন’ এবং শেষ ‘সা’দীর ‘গুলিস্তা-বুস্তার’ কথা মনে পড়ে।

দানিশ পণ্ডিত-কবি। কাব্যাদর্শে তিনি ছিলেন মুহম্মদ খান ও আলাউলের অনুসারী। তাই তাঁর রচনায় এদের কাব্যকলার অনুরণন শুনতে পাই। কবি ‘লগ্নিকা ছন্দে’ নায়িকার রূপ-ব্যাখ্যা

করেছেন এভাবে :

বিমল ললাট বাল্য শশী	লাজে বনে গেল শশি-বাহনা।...
হেরি বলিহার দেবীশচী।	দন্ত মুক্তাপীতি তড়িত হাস
নিষ্কলঙ্ক মুখ পূর্ণিচা চান্দ	সুধামুখী সুধা বলিয়ে ভাষ।
ভাবক বান্ধিতে জোলফ ফান্দ।	কমল অধর কুসুম দল
বক্রতা যুগল ভ্রু বিষম	তামূল বিহীনে 'ধিক ধরল।...
রতিপতি চাপ না হয় সম।	উরু সুগঠ কদলিকা ফুল
পূর্ণ দেবাসন সুলোচনা	চম্পক কলিকা বিংশ অঙ্গুল।

তার এ-ধরনের বর্ণনায় আলাউলের প্রভাব সুস্পষ্ট। আলাউলের 'সিকান্দরনামা'র ভণিতা-রীতির অনুকরণ দেখা যায় মুহম্মদ দানিশের ভণিতায় :

আইস শুরুমণি দেঅ সুরা হীনাতি দানিশে সিন্ধে অমৃত
 'জীন' বধ বাণী রচি পুরা। রসিকে পান করে জানি হিত।

'সিরাজ-সবিল' রচয়িতা সৈয়দ মুহম্মদ নাসিরও ইত্যাকার অনুভূতির উদ্দীপনসূচক ভণিতা দিয়েছেন।

দানিশের এরূপ কবিত্বের ও পাণ্ডিত্যের পরিচয় তাঁর কাব্যের সর্বত্র ছড়িয়ে আছে। তিনি আর কোন কাব্য রচনা করেছিলেন কি-না, জানা যায়নি। মুকিমের উল্লেখ থেকে নিশ্চিত রূপে জানা যায় যে দানিশ উনিশ শতকের প্রথম পাদদেশ কবি। উনিশ শতকের কবি হলেও তাঁর ভাষায় পুরোনো কালের রূপ বিধৃত হয়েছে, যেমন তাক, নারীক, পতিক এবং বসিছোঁ, বহিছোঁ, গাসন্তি প্রভৃতি।

কবি মুহম্মদ দানিশের 'জ্ঞান বসন্ত-বাণী'তে যে-সব কাহিনী বর্ণিত হয়েছে। সেগুলো এ যুগের সুখপাঠ্য। কবি যে তাঁর রচনাকে 'জ্ঞানবৃদ্ধি বাণীর পুস্তক' বলে উল্লেখ করেছেন, তাতেও অত্যাতি নেই।

৪. নিকাহমঞ্জল

আদিম কৌম সমাজে মাতৃ বা ক্ষেত্র প্রাধান্যের অবসানে গড়ে ওঠে পিতৃ বা বীজ প্রধান সমাজ। ক্ষেত্র ও বীজ অবশ্যই কৃষিজীবনের অভিজ্ঞতা থেকে গৃহীত। বিবাহরীতি প্রবর্তনের ফলেই যে ম্যাট্রিয়ার্ক্যাল তথা মাতৃ-প্রধান সমাজের বিলুপ্তি ঘটেছে-এমন অনুমান অসঙ্গত নয়। কেননা, বিবাহ-রীতি এক বিশেষ সমাজ-চিন্তার প্রসূন। এই চিন্তার সহজে উন্মেষ হয়নি। এও এক বিশেষ সমস্যার মুখে মানবিক বোধ-বুদ্ধির ও রুচি-সংস্কৃতির অবদান।

আদিম মানুষ যতদিন প্রাণীবিশেষই ছিল, ততদিন কাম ছিল নির্ভেজাল দৈহিক। আর মানবিক বৈশিষ্ট্যের উন্মেষ ঘটায় সঙ্গে সঙ্গে তার চোখে রঙ ধরে- তার মধ্য জাগে রূপতৃষ্ণা। এর পর কেবল বিপরীত লিঙ্গের মানুষ হলেই তার চলে না, সঙ্গে আকর্ষণীয় রূপ এবং যৌবনও চাই। শক্তিমান পুরুষ রূপসী ও যৌবনবতী ধর্ষণে হল প্রয়াসী। জরু নিয়ে পুরুষে পুরুষে দ্বন্দ্ব সংগ্রামের এভাবেই হয় শুরু। তার অনেক পরে আসে জমি ও জেবর নিয়ে মারামারি-হানাহানির পালা- তা অবশ্য জীবিকা-বিরল জনবহুল সভ্য সমাজের ব্যাপার।

এই প্রাণধ্বংসী দ্বন্দ্ব-কোন্দল-সংঘাত থেকে পারম্পরিক নিরাপত্তার অভিপ্রায়ে মানুষে যে বিবাহ-রীতি চালু করেছে- নিঃসংশয়ে তেমন অনুমান করা অযৌক্তিক নয়। তখনো প্রবর্তিত

ধর্মের যুগ আসেনি। কাজেই এ হচ্ছে এক প্রকার সামাজিক চুক্তি যার নাম দেওয়া যায় Policy of non-interference, কারো সঙ্গে কেউ জুটে গেলে সেই যুগলের জীবন নির্বিশ্ব রাখা, তাদের উপর থেকে অন্যের আকর্ষণ ও দাবি পরিহার করা এবং তাদের পারস্পরিক সম্মোহে সামাজিক স্বীকৃতি দান প্রভৃতি সেই নিরাপত্তানীতির অন্তর্নিহিত শর্ত। কোন্দল-হনন এড়ানোর এই আশ্রয় বুদ্ধি থেকেই সমাজ, সভ্যতা, সংস্কৃতি, নীতিবোধ ও কল্যাণচিন্তা প্রভৃতির জন্ম।

সর্বপ্রাণবাদী যাদুবিদ্যাসী মানুষ সেদিনও নিশ্চয়ই কোন অদৃশ্য শক্তির দোহাই মেনেছে, শপথ নিয়েছে কোন শক্তির নাম উচ্চারণ করে এবং কোন ট্যাবুও হয়েছে সর্বজনমান্য।

যেহেতু মানুষের কোন বিশ্বাস-সংস্কারের মৃত্যু নেই এবং যুক্তিবুদ্ধি কোন ভীকৃতাকেই অতিক্রম করতে পারে না, সেহেতু পরবর্তীকালের প্রবর্তিত ধর্মের আশ্রয়ে, সৌন্দর্যপ্রিয় মনের প্রশ্রয়ে, এবং বিকশিত সমাজের প্রাচ্যই সেই আদিম মিলনলগ্নের নানা আকৃতি আজো রূপান্তরে ও সূক্ষ্মতায় পরিবর্তিত তাৎপর্যে ও নতুন লাভণ্যে আমাদের সমাজে দৃশ্যমান হয়ে সংস্থিত।

সভ্যতর সমাজে স্বয়ম্বর প্রথা সেই আদিম নীতির পরিস্রুত রূপায়ণ মাত্র। যতই দিন গেছে স্থূল সম্মোহ-বাঞ্ছা রুচির ও লজ্জার প্রলেপেও পেলবতায় মধুর ও উন্নততর জীবনবোধের ও সমাজসংস্থার ভিত হিসেবে সূক্ষ্ম ও সুন্দর হয়ে উঠেছে। এই বৈবাহিক সম্পর্কের মাধ্যমেই গড়ে উঠেছে আত্মীয় সমাজ গোত্রীয়চেতনা ও কৌমজীবন। এই রক্তের বন্ধনে পবিত্রতা ও আনুগত্য আরোপিত হয়ে তা ঐহিকপারত্রিক জীবনের অন্যতম নিয়ন্ত্রী শক্তিরূপে স্বীকৃত হয়েছে। ফলে দাম্পত্য সুখ, বৈষয়িক স্বাচ্ছন্দ্য, ঘরোয়া দায়িত্ব ও কৃতব্য, পারিবারিক বন্ধন, সন্তান উৎপাদন, ধর্ম সাধনা, সামাজিক দায়িত্ব ও অধিকার প্রভৃতি নানা নীতি ও কৃতি সম্পৃক্ত হয়ে বিবাহপ্রথা আজকের জীবনযাত্রীর একান্ত অবলম্বন হয়ে উঠেছে।

জমি ও জরু চিরকালই বীরভোগ্য সাহিবল, আত্মপ্রত্যয়, সাহস ও ভোগবাঞ্ছা যার আছে, সেই বীর। নারীরাও তেমন বীরেই হয়ে আকৃষ্ট। এককালে বীরেরা নারী হরণ করত, কায়িক শক্তি প্রয়োগেই প্রতিষ্ঠা করত নিজের অধিকার। তাই বিয়েতে দোর-আগলে বরকে বাধা দেয়ার রেওয়াজে সেই কৃতি ও স্মৃতি আজো আচারিক মর্যাদায় রক্ষিত।

উৎসব-পার্বণ কালে মেলায় জীবন-সাথী বেছে নেয়ার রেওয়াজও সুপ্রাচীন। সাধারণের স্বয়ম্বরসভা ওই মেলাই। জলক্রীড়া, রাশীবন্ধন, মাল্যদান, পাণিগ্রহণ, হোলি প্রভৃতির মাধ্যমে যেমন পাত্র-পাত্রী নির্বাচিত হত, তেমনি অবিচ্ছেদ্যতার শপথ নেয়া হত—চন্দ্র, সূর্য, বৃক্ষ, ফুল, পশু, পাখি প্রভৃতি সাক্ষী রেখে। আবার রজ্জু কর্তন করে, মৃৎ-পাত্র ভেঙে কিংবা গাট-ছড়া বেঁধে এই বন্ধনের অমোঘতার ও স্থায়িত্বের প্রতীকী অনুষ্ঠানও সম্পন্ন করা হত। তা ছাড়া দীর্ঘ আয়ু, স্থায়ী প্রীতি, প্রতুল খাদ্য, অমিত প্রজনন, অগ্নান যৌবন, অব্যাহত বৃদ্ধি বাঞ্ছাপূর্তি প্রভৃতির প্রতীক হয়েছে দূর্বা, ধান, মাছ, আমপাতা, কলাগাছ, পূর্ণকুণ্ড প্রভৃতি। গুড কামনায়, নিরাপত্তার প্রয়োজনে এবং আনন্দের আয়োজনে মানুষ প্রতীকের ও অনুষ্ঠানের সংখ্যা অনেক অনেক বাড়িয়েছে।

বিবাহোৎসবে এ আগ্রহের মূল কারণ হয়তো মনস্তাত্ত্বিক। শৃঙ্খার রসে বঞ্চিত ও কৃতার্থ-সবাই সমভাবে উৎসাহী। এ ক্ষেত্রে তৃপ্তি-অতৃপ্তি দুই সমভাবে বেদনা-মধুর এবং চির নতুন ও সার্বক্ষণিক। তাই বিয়ে মাত্রই কেবল বর-কনের পক্ষে নয়, পরিচিত পরিজন সবার পক্ষেই আনন্দের। সেজন্য সম্পদগত সামর্থ্যানুসারে বিবাহোপলক্ষে আনন্দের আয়োজন বিবাহপ্রথারই সমকালীন। তারই ফলে বিবাহোৎসব আচারের ও অনুষ্ঠানের সংখ্যাধিক্যে বিভিন্মতায় ও

বৈচিত্র্য সামাজিক মহোৎসবের রূপ পেয়েছে। নাচ-গান-পান-ভোজন ছাড়াও এর আচারিক ও আনুষ্ঠানিক রীতি পদ্ধতি ধর্মের ও বিশ্বাসের অন্তর্ভুক্ত হয়ে অপরিহার্য সামাজিক দায়িত্বে ও কর্তব্যে উন্নীত হয়েছে। তাই বিবাহের পূর্বে দীর্ঘ দিন ধরে এ উৎসব চলত এবং আজো চলে। আজ কাল অবশ্য নানা কারণে বিবাহোৎসবে উৎসব হয়ে গেছে ঝুজু ও স্বল্পস্থায়ী।

আলোচ্য ‘পদবন্ধ’গুলোতে দু’শ বছর আগেকার বিবাহোৎসবের একটি অনুষ্ঠানের বর্ণনা রয়েছে। মুসলিম ঘরেই ছিল তা জনপ্রিয়। ‘শাহ-নজর’ কালে অর্থাৎ বর কনের মিলন লগ্নে এ সব ক্রীড়ার মাধ্যমে অপরিচয়ের শরম ও সংকোচ পরিহার করা সহজ হত। সখা-সখী ও ঠাট্টার সম্পর্কের আত্মীয় পরিজনের উপস্থিতিতে হাস্য পরিহাসের মাধ্যমে বাসরের মধু মিলনের প্রস্তুতি পর্ব এভাবে হত অতিবাহিত।

বর কনের শুভ সাক্ষাতের জন্যে তৈরি হত সুসজ্জিত মঞ্চ। উপরে থাকত চাঁদোয়া। এই মঞ্চগৃহের নাম ‘মারোয়া’। আর এই শুভ সাক্ষাৎ বা শাহ নজরের নাম ‘জোলুয়া’। এ সময় বর-কনেকে অভিনন্দিত করে যে-গান সমবেত কণ্ঠে গীত হত তার নাম জোলুয়াগীতি। সখা সখীর উপস্থিতিতে বর-কনে তখন পুষ্প স্তবক নিক্ষেপ করে পরস্পরের প্রতি। গেড়ুয়া [গেণ্ডুয়া] মানে স্তবক। [তুল : ফুলের গেড়ুয়া সম্বন্ধে সুফএ-বৈষ্ণব পদ] পুষ্প লোফালুফিতেও অবশ্য হারজিৎ ছিল, এ অনেকটা এয়ুগের ‘ভলিবল’ খেলার মতো। এর মধ্যে রাধা-কৃষ্ণের রাস ও হোলির প্রভাবও ছিল। তারপর বর-কনে উভয়ে খেলত পাশা। তখনও হত বরের যোগ্যতা যাচাইয়ের সুযোগ। তা ছাড়া বর ঠাকানো ধাঁধা হেঁয়ালির এবং বরকে জন্ম করার নানা ফন্দি ফিকিরের ব্যবস্থাও থাকত।

আবদুল করিম সাহিত্যবিশারদ (১৮৭১-১৯৫৩ খ্রীস্টাব্দে) তাঁর এক প্রবন্ধে আফসোস করে বলেছেন, ‘পূর্বকালে মুসলমানের বিবাহে বর-কনার মধ্যে পাশা খেলা ও গেরোয়া খেলা অনুষ্ঠিত হইত। ... এইসব অনুষ্ঠান বড় আমোদজনক, আমার ছোটকালে পাশা খেলা দেখিয়াছি— মনে পড়ে, কিন্তু গেরুয়া খেলা দেখি নাই...সেকালে এক একটা বিবাহে দীর্ঘদিন ধরিয়া কত রকমের কত আনন্দ উৎসব হইত। অধুনা তাহা কল্পনার বস্তু হইয়াছে। ...এখন এ দুইটি খেলার একটারও প্রচলন নাই। দৈত্যের (ইংরেজের) আগমনে অধুনা সকল রকম আনন্দ উৎসব দেশ হইতে নির্বাসিত হইয়াছে। কি সুখের দিন দৈত্যেরা আমাদের নষ্ট করিয়াছে। এ জীবনে টাকার হয় আড়ি [৯৬ সের] ধান্য ও তিন আড়ি (৪৮ সের) চাউল দেখিয়াছি আর আজ দেখিতেছি টাকায় পাঁচ সের ধান্য [মণ আট টাকা] ... ও সওয়া সের চাউল।” [‘কাফেলা’ কাজী নজমুল হক সম্পাদিত সাপ্তাহিক পত্রিকায় ১৩৫৮ সনে প্রকাশিত ‘গেরোয়া খেলা’ প্রবন্ধ]

সংস্কার প্রত্যয়ে উন্নীত হলে তা ধর্মীয় বিশ্বাস ও আচরণের অন্তর্ভুক্ত হয়। এ ক্ষেত্রেও বাসরের পূর্ব ক্ষণে কলেমা তমজিদ, সুরা ফাতেহা, কদর ও এখলাস এবং আন্তগাফার পড়তে হবে এবং এই ...

“পঞ্চকর্ম না করি যে বিছানাতে যাএ পুত্র কন্যা যথ জন্মে তত পাপ হএ।

মুসলিম দাম্পত্যের আদর্শ হচ্ছেন— আলি ও ফাতেমা। তাই দম্পতিকে হিতাকাজক্ষীরা আশীর্বাদ করে :

“আলি-ফাতেমার যেহেন আছিল পিরীতি, তেন মত রহি যাউক দোহান আকৃতি।”

মধ্যে ও শেষে দুটো ভণিতায় আইনুদ্দীনের নাম মেলে। প্রথম, তৃতীয় ও চতুর্থ অংশে কারো নাম নেই। অবশ্য আইনুদ্দীনকেও পদক্ষেপ রচয়িতা বলার কোন সার্থকতা নেই। আসলে

লোক প্রচলিত প্রাচীন পদবন্ধ তিনি লিপিবদ্ধ করেছেন মাত্র। এক সৈয়দ আইনউদ্দীন পদাবলী রচনা করেছেন। সম্ভবত এই দুই ব্যক্তি অভিন্ন।

জোন্সুয়া গাহন :

এবে কহি শুন সবে রসিক সজ্জন
দামাদ কন্যার প্রতি জুলুয়া গাহন।
গেরোয়া খেলহ শাহা আনন্দিত হৈয়া
'শোকরানা' কহ শাহা এই কন্যা পাইয়া।
প্রথমে কনক পদ্মে গেরোয়া খেলাও
এ রস কৌতুকে শাহা গেরোয়া ফিরাও
দ্বিতীএ গেরোয়া খেল রঙ্গিন বান্ধুলি
যুবতী ফিরাও পুনি নিজ কাস্ত বুলি।
তৃতীএ গেরোয়া খেল মারুয়া গোলাল
যুবতী ফিরাও পুনি যেন লাগে ভাল।
চতুর্থ গেরোয়া খেল সতী কনকের জুতি
পাশা :

তজ্জেতে বসিয়া শাহা খেল পাশা শাইর
কেহ হারাএ কেহ পাত্র সুবর্ণ কটোর।
দামাদ কন্যাএ খেলে পাশা দেখ পরতেক।
দ্বিতীএ পাশার ডাল পড়িয়া গেল ধুয়া
দামাদ কন্যাএ খেলে পাশা পিঞ্জরের শুয়া।
তৃতীএ পাশার ডাল শাহা পড়িয়া গেল চির
চতুর্থে পাশার ডাল পড়িয়া গেল চারি
পঞ্চমে পাশার ডাল পড়ি গেল পাঁচ
ষষ্ঠমে পাশার ডাল পড়ি গেল ছয়
দামাদ কন্যাএ খেলে পাশা যেন লাগে খোশ
দামাদে গেরুয়া মারে সর্বলোকে দেখে
প্রথমে গেরুয়া বুলি হিসাবেতে লেখে।
ফুলের যে মাঝে আছে ফুলের পঞ্চ ভাই

ফিরাইয়া খেলা সতী পুরাউক আরতি।
পঞ্চমে গেরোয়া খেল চম্পা নাগরাজ-
ষষ্ঠ গেরোয়া খেল মালতী নবমুখি
সপ্তমে গেরোয়া খেল পুষ্প বিরাজিত
অষ্টমে গেরোয়া খেল মন কুতুহলে
মুণিমুক্তা রত্নহার দেঅ কন্যার গলে।
এ শ্রী অঙ্গুরী যদি কন্যারে কর দান
লোকে যেন ধন্য ধন্য করুক বাখান।
গেরোয়াল দূরে করি পতিপত্নী মিলিয়া
'সরবত' 'তামূল' খাও পাটেতে বসিয়া।

কন্যাএ হান্নিলে দিব ততেক বৈটার
প্রথমে পাশার ডাল শাহা পড়িয়া গেল এক
গেড়ুয়া খেলেরে শাহা চান্দোয়া জামাই।
তাহান পুষ্পের গেরোয়া পাইয়া তুলি লইল
ফিরিইয়া দেয় কন্যা দামাদের হাতে।
বেল ফল কদম্ব আর চম্পা নাগেশ্বর
দামাদে গেরুয়া খেলে দেখিতে সুন্দর।
চারি গাছ রামকলা আমের হরতি
ফিরাইয়া গেরুয়া খেলে পুরাউক আরতি।
শাহা দামাদ 'দামাদ বুলিরে তোন্ধারে
গেরুয়া ভূষণ শাহা দেউরে কন্যারে।
তোমার শ্রীঅঙ্গুরী যদি কন্যাএ পাএ
মা-বাপ ছাড়িয়া কন্যা শাহার সঙ্গে যাএ।'

ড. একটি প্রখ্যাত বৈষ্ণব পদরহস্য

চণ্ডীদাসের নামাঙ্কিত একটি তথাকথিত বৈষ্ণবপদের প্রসঙ্গবিচ্যুত শেষাংশ একটি পরমতত্ত্বের আধাররূপে অতিমহৎ তাৎপর্যে শিক্ষিত এবং মরমী বাঙালীর মুখে মুখে উচ্চারিত হয়। আবেগতাড়িত তত্ত্বপ্রবণ বাঙালী লিখিয়েরাও সুযোগ সুবিধে মতো তা উদ্ধৃত করেন। বহুশ্রুত পদাংশটি এই 'শুনহ মানুষ ভাই। সবার উপরে মানুষ সত্য। তাহার উপরে নাই।' পূর্ণ পদটির সন্ধান খুব কম বিদ্বানই রাখেন, এবং তাঁরাও বাঙালীর মধুর ও মহৎ মোহ ভাঙাবার মতো নিষ্ঠুর হতে চান না।

^১ বিকৃত আলোচনা ও পাঠ মৎসম্পাদিত 'সওয়াল সাহিত্য' গ্রন্থে দ্রষ্টব্য।

‘রাধাকৃষ্ণ’ নামাঙ্কিত হলেই ‘বৈষ্ণবপদ’ হয় না। অর্থাৎ রাধাকৃষ্ণ বিষয়ক পদমাত্রই গৌড়ীয় বৈষ্ণবের সাধনে-ভজনে-কীর্তনে ব্যবহারযোগ্য নয়।

আমাদের আলোচ্য দুর্লভ পুরো পদটি এরূপ :

স্বরূপ বিহনে	রূপের জনম	কখন নাহিক হয়।
অনুগত বিহনে	কার্যসিদ্ধি	কেমনে সাধকে কয়।।
কেবা অনুগত	কাহার সহিত	জানিব কেমনে শুনে।
মনে অনুগত	মঞ্জুরী সহিত	ভাবিয়া দেখহ মনে।।
দুই চারি করি	আটটা আঁখর	তিনের জনম তায়।
এগার আঁখরে	মূলবস্তুর জানিলে	একটি আঁখর হয়।।

[১. অষ্টসখী, ২. পিরীতি, ৩. দশ ইন্দ্রিয় ও মন, ৪. সেবা, ৫ কৃ = কৃষ্ণ।]

চণ্ডীদাস কহে শুন মানুষ ভাই
সবার উপরে মানুষ সত্য তাহার উপরে নাই।

পদটি আদি-অন্তে বিন্যাসগত অসঙ্গতি লক্ষণীয়। ৬। ৬। ৮ অক্ষরের পদবিন্যাস শেষ তিন চরণে রক্ষিত হয়নি। ছয় অক্ষরের ‘চণ্ডীদাস কহে’ এর পাশে ছয় অক্ষরের অন্য একটি পদ থাকার কথা। সেটি বাদ পড়েছে। ফলে আট অক্ষরের পরবর্তী চরণকে ‘শুনহ মানুষ ভাই’ পূর্ব চরণের শেষাংশে রূপে বসানো হয়েছে। ফলে কবিতাটির ছন্দোগত সঙ্গতি রক্ষিত হয়নি শেষ তিনটি চরণে। তা ছাড়া বক্তব্যগত আকস্মিকতা এবং অসামঞ্জস্যও সচেতন পাঠকের দৃষ্টি এড়ায় না। ‘এগার অক্ষরে। মূলবস্তু জানিলে। একটি আঁখর হয়।’ অর্থাৎ দেহস্থ চৈতন্যহার (ইন্দ্রিয়) ও চৈতন্যের (মন) উৎস হচ্ছে কৃ তথা কৃষ্ণ। এরপরে আকস্মিক ও প্রাঙ্গনিকভাবে মনুষ্যতত্ত্ব উচ্চারিত হয়েছে। ছয় অক্ষরের ‘বিলুপ্ত চরণাংশটি থাকলে হয়তো অর্থগত ও ছন্দোগত এ ত্রুটি থাকতো না। বিলুপ্ত পদাংশটি অনুমানে পূরণ করলে এরূপ দাঁড়াবে :

চণ্ডীদাস কহে (দেহে কৃষ্ণ রহে)
শুনহ মানুষ ভাই।
তাই সবার উপরে মানুষই সত্য
তাহার উপরে নাই।।

অথবা শেষের তিনচরণ প্রক্ষিপ্ত!

দেহাত্মতত্ত্বের এ পদটি আমাদের ধারণায় এবং বিশেষজ্ঞদের মতে কোন সহজিয়া কবির রচিত।^১

চ. সঙ্গীত শাস্ত্র

ইসলাম-পূর্বযুগে অন্য মানুষের মতো আরবেরাও ছিল সঙ্গীতপ্রিয়। আরবি ভাষায় গিনা, মুসিকা এবং সামা এই- তিনটি শব্দ সঙ্গীত বাচক। আরবে পেশাদার গায়িকারা অভিহিত হত কইনাৎ

^১ আমার শিক্ষক শ্রদ্ধেয় অধ্যাপক জনার্দন চক্রবর্তী আমাকে ১.২.৮১ তারিখে লিখিত তাঁর এক পত্রে জানিয়েছেন ‘বগেন্দ্রনাথ [মিত্র] হরেকৃষ্ণ [মুখোপাধ্যায়] ও বিমানবিহারী [মজুমদার] হালের সংস্করণগুলিতে পদটি এঁরা ধরেন নি। এঁরা বিশেষজ্ঞ, প্রত্যেকের সঙ্গেই আমার পদটি নিয়ে আলোচনা হয়েছে। পদটি গ্রন্থ-চৈতন্য চণ্ডীদাসের বলে এঁরা বিশ্বাস করেন নি।... তবে বর্তমানে পদটি সম্পর্কে আমার নিজস্ব সংশয়ের কারণ ঘটেছে।... বর্তমান পদটিতে একাধিক মানবিকভাগস্বী নাস্তিকতার আভাস’।

^২ বিতৃত আলোচনা ১৯৮১ সালের ঢাকা বিশ্ববিদ্যালয় পত্রিকার জুন সংখ্যায় মং-লিখিত প্রবন্ধে দ্রষ্টব্য।

কিংবা কিয়ান নামে। দেশী গায়িকা ছাড়াও আবিসিনিয়া থেকেও আসত অনেক গাইয়ে মেয়ে। ইসলাম-পূর্বযুগের সঙ্গীত যন্ত্রের মধ্যে আমরা মিযহার, মি যাকা, কুসাবা, মিযমার এবং ডাক, সুর, নাকাড়া, তবলা (অতবল) সঙ্গ, জলাজিল প্রভৃতির নাম পাই। মক্কার উকায়-এ যে বার্ষিক মেলা হত, তাতে গোটা আরবের গোত্রগুলো জড়ো হত নিজেদের শৈল্পিক উৎকর্ষ দেখাবার জন্যে। মুয়াল্লাকাগুলো এখানেই হত গীত বা আবৃত্তি। তখনকার আরবে যাদুকার গণকরাও তাদের পেশা চালাত গানের মাধ্যমেই। হজ্জ উদযাপনের সময়েও গান চলত, তার রেশ রয়েছে তাহলিল ও তালবিয়ায়। 'আসবিক সবির কয়মা নুঘির' এ আয়াত এখানে সুর করেই পড়া হয় মীনার ইফাদা করবার সময়। আযানও ইসলাম পূর্বযুগের প্রথার অনুসরণ। নারীর জন্য পর্দা প্রথা চালু না থাকায় রসুলের আমলেও নারীরা উৎসবে পার্বণে যুদ্ধে গানে বাজনায়ে অংশ গ্রহণ করত। ওহুদের যুদ্ধেও নাকি রণগীতি গেয়েছিল নারীরাই।

দেবতা ও উপদেবতার অনুগ্রহ লাভের জন্যেও গায়িকার গানই কার্যকর বলে মনে করা হত। এ জন্যে তাদের অপর নাম ছিল দজিনা বা মদজিনা। তাই ইসলাম পূর্বযুগের আরবের নারীর প্রভাব সম্বন্ধে আর, এ, নিকলসন বলেছেন (Wise women inspired the poets to sing and warriors to fight' কাফেলায় কিংবা সরাইখানাতেও গায়িকা পোষা হত। আবুল ফারাজ ইসফাহানীর কিতাবুল আগানি, ইবন আবদুর বিবহির (মৃত্যু : ৯৪০ খ্রীঃ) ইকদুল ফরিদ, ভৌগোলিক আল মাসুদীন 'কিতাবু আতরিহ ওয়াল ইশরাফ' প্রভৃতি পুরোনো গ্রন্থে এবং কোরআনে হাদিসে নানা প্রসঙ্গে কয়েকজন প্রখ্যাত গায়িকের নাম আমরা জানতে পাই : নাদির বিন হারিস, মালিক বিন খোবায়ের, হরায়রা বিনায়াদা, বিলাল হাবসী, শিরিন, সারা, করায়না, কুরিল্যা, আমর হামজা প্রভৃতি।

আমরা ইসলাম পূর্বযুগের আরবে উৎসবে পার্বণে হজে অনাবৃষ্টিতে অজন্মায় দুর্ভিক্ষে দেবতার আবাহনে, যুদ্ধে, যাদুতে ও ভাগ্যগণনায়, গানের প্রয়োগ দেখেছি। তা' ছাড়া প্রাত্যহিক জীবনে আনন্দের উপকরণ হিসেবে শুভীখানায়, সরাইতে ও কাফেলায় পেশাদার গায়িকা পোষার রীতিও ছিল অবাধ। এসব গায়িকার সবাই আরব ছিল না, আবিসিনিয়া, গ্রীস ও ইরান থেকেও আসত। এমন কি রসুলের আমলের যুদ্ধে ড্রামবাদক ছিলেন একজন ভারতীয়, তাঁর নাম বাবা ঝধিহফরশ।

এতে বোঝা যায়, আরবেরা সঙ্গীতপ্রিয় জাতি। কাজেই ইসলামোত্তর যুগে সঙ্গীতবিমুখ হওয়া তাদের পক্ষে কষ্টসাধ্য কিছু সাধনার মতোই দুষ্কর ঠেকেছিল। ফলে প্রবৃত্তির প্রতিকূল সংগ্রামে তারাও বেশীদিন আত্মরক্ষা করতে পারেনি। অবশ্যম্ভাবী রূপে শুরু হল খোঁজাখুঁজি ও ব্যাখ্যা নিরীক্ষা কোরআন হাদিসের সমর্থন লাভের আশায় এবং অতীষ্ট ফল লাভে দেয়ী হল না। কোরআন থেকেই সমর্থন করা হল সঙ্গীতে নানা আয়াতের অনুমোদনের আভাস-ইঙ্গিত :

ক. নিচয় গাধার ডাকই সবচেয়ে ঘৃণ্য স্বর।

খ. তিনি ইচ্ছেমতো তাঁর সৃষ্টিতে বৃদ্ধি করেন সুন্দর স্বর।

গ. এবং কোরআনে আকর্ষণীয় করে পড়।

এমনি আরো অনেক আয়াত থেকে পরোক্ষ ইঙ্গিত সংগ্রহ করে সঙ্গীতের সমর্থনে ভাষ্য তৈরি হয়েছে। আবার একই পদ্ধতিতে সঙ্গীতবিরোধী তথ্যও উদ্ধার করেছে সঙ্গীতবিমুখ গোঁড়ারা।

২.

সুফীরা প্রেমধর্মে বিশ্বাসী। কিতাব উল লুন্হায় আবু নসর সারাজ এবং ‘এহিয়া উল উলুম’ ও ‘ফিমিয়া-ই-সাদত’ গ্রন্থ দুটোতে ইমাম গাজ্জালী সঙ্গীতের তাত্ত্বিক তাৎপর্য ব্যাখ্যা করেছেন। আচারবাদীদের কাছে যা গর্হিত, মরমীদের কাছে তা-ই কাম্য। এখানেই যাহের ও বাতেনের পার্থক্য। ফাসেকী ও সাদেকী তত্ত্বের উদ্ভব। অতএব তাত্ত্বিক ব্যাখ্যায় সঙ্গীতে যে মানবমনের একটি মহত্তর প্রকাশ ঘটে, তা স্বীকৃত হয়।

গাজ্জালীর মতে (কিমিয়া) সঙ্গীত হচ্ছে পাষণে নিহিত সুপ্ত আগুনের মতো। ঘর্ষণে শিলা থেকে যেমন আগুন বের হয়, এবং তা গোটা অরণ্য দগ্ধ করে, তেমনি সঙ্গীতের স্পর্শে আত্মার আগুন জ্বলে ওঠে। সোনা যেমন আগুনে পুড়ে বিসৃত ও রূপবান হয়, তেমনি হৃদয়কে সঙ্গীতের আগুন মুকুরে পরিণত করে যার মধ্যে প্রতিবিম্বিত হয় জগতের সৌন্দর্য। এ সৌন্দর্যের রূপভেদে তাত্ত্বিক নাম জমাল, হুসেন ও তনাসুব। সঙ্গীত সৌন্দর্যচেতনাকে পূর্ণতার দিকে এগিয়ে নেয়।

যদিও হযরত আয়েশা প্রমুখের দোহাই ও নজির দিয়ে ঈদে বিবাহোৎসবে সঙ্গীতকে বৈধ বলার চেয়ে অবৈধ বলার পক্ষে যে তথ্য ও প্রমাণ বেশি তা কেউ সহজে অস্বীকার করে না।

অবশ্য পাপ বলে জেনেও যেমন মানুষ লোভের বশে আর দশটা অপকর্ম করে, মুসলমানরাও তেমনি মানুষ হিসেবে ফাসেকী জেনেও সঙ্গীতকে পরিহার করতে পারেনি। তাই তুর্কীশাসনের গোড়া থেকেই ভারতবর্ষেও সঙ্গীত মুসলিম সমাজে প্রশ্রয় পায়।

ইসলামের উদ্ভবের মাত্র কয়েক বছর পূর্বেই উম্মাইয়াদের আমলে মুসলমানদের মধ্যে সঙ্গীতচর্চা শুরু হয়। অবশ্য ইসলামেও স্বরমাধুর্যে মর্যাদা আরোপিত হয়েছে। নামাজে শিরিন সুরে কেরাত পড়ার সামর্থ্য ইমামের অন্যতম যোগ্যতা বলে স্বীকৃত। কিন্তু তবু গোঁড়া শরীয়তপন্থী কোনকালেই সঙ্গীতকে সুনজরে দেখেনি। তা সত্ত্বেও এর সর্বমাসী মায়াবী প্রভাব থেকে দূরে থাকা সম্ভব হয়নি অনেকের পক্ষেই। হযরত খাজা মঈনউদ্দীন চিশতি (১১৪২-১২৩৮ খ্রীঃ) ও তাঁর শিষ্যরাই মনে প্রাণে সঙ্গীতকে সাধনের ভজনের ও আত্মবোধনের মাধ্যম করেছিলেন। আর আমীর খুসরুই আরবি ইরানি ও তুর্কি সুরের ও সঙ্গীতের সঙ্গে ভারতিক সঙ্গীতের মিশ্রধারার আদি স্রষ্টা।

৩. বাঙলা ভাষায় সঙ্গীতশাস্ত্র

সুরের ও ছন্দের সঙ্গে মানবমনের নিত্যকালের যোগ। সুরের ও ছন্দের সাধনায় মানুষের মনুষ্যত্বের একতম বিকাশ; রাস্তাশালালিটির স্মরণ, কারণ সুর ও ছন্দ সৃষ্টির মূলে রয়েছে সৌন্দর্য স্পৃহা যার অপর নাম দেয়া যায় সংস্কৃতিপরায়ণতা। তাই মানুষের ক্রিয়ামাত্রাই একটা ছাঁদ গড়ে ওঠে, একটা সৌন্দর্য ফুটে ওঠে, একটা সুর বেজে ওঠে। আমরা বিশেষ ছাঁদে হাঁটি, বিশেষ সুরে কাঁদি, বিশেষ চণ্ডে ভ্যাংচি কাটি, বিশেষ ভঙ্গিতে কথা বলি, বিশেষ স্বরে বিনয় করি। আমাদের সুর করে বিলাপ, সুর করে গান, সুর করে পড়া, সুর করে এবাদত। আমাদের ছাঁদে আলাপ, তালে কাজ। এই সুর ও ছাঁদ ছাড়া কি জীবনসাধনা বা জীবনোপভোগ চলতে পারে! তাই মানুষের অন্যতম সাধনা সুর ও ছাঁদ সৃষ্টির সাধনা। এটারই অন্য নাম সংস্কৃতিসাধনা।

আনন্দের অবলম্বন বা উপকরণ হচ্ছে সৌন্দর্য। তাই মানুষের দেহে-মনে-আত্মায় স্বভাবে ব্যবহারে, সমাজে সন্কারে, আচারে বিশ্বাসে, ঘরে বাইরে, ধর্মে রাষ্ট্রে রয়েছে সৌন্দর্য-প্রীতি। যা কিছু ভাবতে বলতে শুনতে করতে রিপূর প্রণোদনা থাকে, তা-ই ক্ষতিকর, তা-ই অসুন্দর, তা-ই পরিহার্য। আর সৌন্দর্য-সৃষ্টি করাই হচ্ছে মনুষ্যজীবনের চরম লক্ষ্য। এদের মধ্যে সবচেয়ে সহজ এবং সবচেয়ে সুন্দর হচ্ছে সংগীতের সুর। গান কানে কানে মধু বর্ষণ করে, প্রাণে প্রাণে প্রতিধ্বনি তোলে, মনে মনে মোহ জাগায়, আত্মায় আত্মায় প্রেম যোগায়। এর প্রভাব আশু, প্রত্যক্ষ ও অসাধারণ বিশ্বয়কর, মনোহর ও ভয়ঙ্কর। মন-মাতানো, ভাব-জাগানো, ভয়-ভাঙানো প্রীতি-বহানো আর বিদ্রোহ-ভোলানো গান। মানুষের মনে থাকা চাই সুর, কাজে থাকা চাই শোভা। সংগীতের চেয়ে উৎকৃষ্ট মানব-ভাগ্য কোন বস্তু দুনিয়াতে আছে কি? বস্তুত, প্রকৃতির সৃষ্ট ফুল আর মানব সৃষ্ট সুরের প্রতি কোন মানুষেরই স্বাভাবিক বিরূপতা নেই।

তাই শাস্ত্রের কঠোর প্রতিকূলতা সত্ত্বেও মুসলমানেরা সংগীতচর্চায় বিরত থাকেনি বা থাকতে পারেনি। মানুষের সহজ জীবনবোধ ও সহজাত বৃত্তিই মানুষকে সংগীতের দিকে আকৃষ্ট করে। অবশ্য রক্ষণশীল শরীয়তপন্থী মুসলমানেরা সংগীত সহ্য করতে পারে না। কিন্তু ভারতবর্ষে ইসলাম প্রচারিত হয়েছিল মুখ্যত সুফীদের দ্বারা, তাঁরা কখনো সংগীত পরিহার করেননি। মুসলমানরা সংগীত চর্চায় উৎসাহও পেয়েছিলেন প্রধানত এ সুফীদের কাছ থেকেই।

ভারতবর্ষে মুসলিমদের সঙ্গীত মাধ্যমে এ সাধনপদ্ধতির আদি প্রবর্তক সম্ভবত হযরত খাজা মঈনুদ্দীন চিশতী (১১৪২-১২৩৮ খ্রীঃ) বা তাঁর পীর হযরত উসমান হাকয়ী। হযরত চিশতী ১১৬৫ বা ১১৯৩ খ্রীস্টাব্দ থেকে ভারতবর্ষে ইসলাম প্রচার করতে থাকেন। তিনি এবং তাঁর শিষ্যেরা “সামা” গান গেয়ে গেয়ে সঙ্গীত-প্রেমে তন্ময় ও অজ্ঞান হয়ে পড়তেন বলে শোনা যায়। হযরত চিশতীর অনুকরণেই হযরত মওলানা জালালউদ্দিন রুমী। (১২০৭-৭০ খ্রীঃ) ও তাঁর শিষ্যবর্গ নৃত্য-গীতের মাধ্যমে আল্লাহর যিকর-দা'রা বা হালকা করতেন বলে কথিত হয়। ভারতে পরবর্তীকালে মাধবেন্দ্র পুরী এবং চৈতন্যদেব ও তাঁর শিষ্যবর্গ এরূপ নামসংকীর্তনকালে নাচগান করতেন এবং ভাবাতিশ্যে মুগ্ধিত হয়ে পড়তেন। এটি স্পষ্টত চিশতী তুরীকা প্রবর্তিত পদ্ধতির অনুকরণ। কাজেই আমরা ধরে নিতে পারি যে মুসলিমরা কোনো যুগেই সংগীত চর্চা থেকে বিরত হয়নি।

মানস-প্রয়োজনে ও জৈব-ধর্মের তাগিদে নৃত্য ও সংগীত মানবসমাজে স্বতঃউদ্ভূত। সে কারণেই কৌমসমাজে আর্ট ও রিসুয়াল অভিন্ন। আদি সমাজে গান ছিল কর্মেরই অঙ্গ-মুখে গান হাতে কাজ—আজো ছাদ পেটানকালে গান অপরিহার্য। এভাবে জীবনকে কলার অনুগত করে, কিংবা কলাকে জীবনানুগ করে সাধনার শুরু হয়েছে কবে থেকে তা কেউ বলতে পারে না। তবে জানা অতীতের গোড়ার দিকের কুয়াশার প্রলেপেও যা ঢাকা পড়েনি, তা হচ্ছে এই কলাশিল্পের ও অধ্যাত্মজীবনবোধের অঙ্গাসী সম্পর্ক। তাই চিত্রকলা, ভাস্কর্য, নৃত্য ও গীতি এমন কি স্থাপত্যও একই উৎসের ইঙ্গিত দেয়। সংগীতের সঙ্গে জীবনের এমনি গভীর যোগ রয়েছে বলেই ইসলামের সুকঠোর নির্দেশ আরবেরা বেশিদিন মেনে চলতে পারেনি।

তাই গোড়া মুসলিম সুলতান সিকান্দর লোদী কিংবা নিষ্ঠাবান গোড়া শরীয়তপন্থী সম্রাট আওরঙ্গজেবও প্রথম জীবনে সংগীত বিমুখ হতে পারেননি। পরে ১৬৮৮ খ্রীস্টাব্দে শা'ফী মুযাহাবে দীক্ষিত হয়ে আওরঙ্গজেব সংগীতবিরোধী হন।

৪.

মধ্যযুগের ভারতবর্ষেই সঙ্গীতশাস্ত্রের উৎকর্ষ ঘটে। যেহেতু বাঙলাদেশেও সব ভারতীয় সঙ্গীতের ও সঙ্গীতশাস্ত্রের চর্চা হয়েছে, এবং তা অনুকৃতও হয়েছে, সেহেতু এখানে এ আলোচনা অপ্রাসঙ্গিক হবে না। মধ্যযুগের ভারতিক সংগীতকলার উন্নয়ন ক্ষেত্রে রাজা-বাদশাহর প্রতিপোষণের পরোক্ষ দান অসামান্য। এদের মধ্যে সম্রাট আলাউদ্দীন খিলজী (১২৯৬-১৩১৬), গোয়ালিয়ারের রাজা মানসিংহ তনবার (১৪৮৬-১৫১৭) কাশ্মীরের সুলতান জয়নুল আবেদীন (১৪১৬-১৫৬৭), গুজরাটের সুলতান বাহাদুর শাহ (১৫২-৩৭) জৌনপুরের সুলতান হোসেন শাহ শর্কী (১৪৫৭-১৫০০) সুলতান সিকান্দর লোদী (১৪৮৯-১৫১৭) মালোয়ারের সুলতান বাজ বাহাদুর ও রানী রূপমতী (১৫৫৪-৬২), বাবুর (১৫২৬-৩২), ইসলাম শাহ সুর, আদির খান সুর, আকবর (১৫৫৬-১৬০৩) জাহাঙ্গীর, শাহজাহান, প্রথম বাহাদুর শাহ (শাহ-ই-বেখবর) জাহান্দর শাহ, মুহম্মদ শাহ (সদারডিলা), অযোধ্যার নবাব ওয়াজেদ আলী শাহ প্রমুখের দান অপরিমেয়। আবার এদের মধ্যে মানসিংহ তনবার, হোসেন শাহ শর্কী, রাজবাহাদুর ও মুহম্মদ শাহ- এ চারজনের দান তুলনাহীন। শেষোক্ত তিনজন প্রখ্যাত গায়ক এবং কথা ও সুরশ্রুতি ছিলেন। ক্ষিতিমোহন সেন বলেন, “ভারতীয় সংগীতকলায় মুসলমান সাধকদের দানের তুলনা হয় না। তাঁহারা দারুণ দুর্দিনে শতাব্দীর পর শতাব্দী এই সংগীতবিদ্যাকে শুধু বাঁচাইয়া রাখেন নাই, দিন দিন ইহাকে নানা ঐশ্বর্যে মহান করিয়াও তুলিয়াছেন। আলাউদ্দিন খিলজী, আকবর, জৈনপুরের সুলতান শর্কী, মুহম্মদ শাহ রঙিলা, নবাব কলবে আলি, নবাব বাজিদ আলী (অযোধ্যার নবাব) প্রভৃতি বাদশা-নবাবদের উৎসাহের তুলনা হয় না। গোয়ালিয়রের রাজা মান তোমর (মানসিংহ তনবার বা তনোয়ার) ও রেওয়ার রাজা রাজারামের কথাও এই সঙ্গে স্মরণীয়।”

গীতিকার গায়ক ও সুরশ্রুতদের মধ্যে আমীর খুসরুর দান অবিস্মরণীয়। ইনি যে কেবল আরবি ইরানী ও তুর্কি সংগীতের সঙ্গে ভারতিক সংগীতের সমন্বয় সাধনা করেন তা নয়, নিজেও নানা রাগরাগিনী, বিভিন্ন তাল এবং কয়েকটি বাদ্যযন্ত্র (সেতার তবলা তবর ও ঢোলক) সৃষ্টির গৌরব অর্জন করেছেন। তাঁর সমসাময়িক তেলিঙ্গানাবাসী প্রখ্যাত গায়ক নায়ক গোপালও অসামান্য প্রতিভাধর ছিলেন, জৌনপুররাজ হোসেন শাহ শর্কী খেয়াল গানের শ্রষ্টারূপে অমরত্ব লাভ করেছেন। তাঁর পিতামহ ইব্রাহিম শাক শর্কীব (১৪০১-৪০) প্রস্তুতনায় বিখ্যাত সংগীত গ্রন্থ “সংগীত শিরোমণি” সংকলিত হয়। এ ছাড়া তিনি আরো রাগরাগিনী প্রবর্তন করেন। নায়ক পাণ্ডে, নায়ক লোহাঙ্গ, নায়ক মাহমুদ, নায়ক করন, নায়ক গোপাল, নায়ক বখশ, নায়ক ভানু, নায়ক ধুন্দে, মুরবিজ খান, মহাপাত্র নরহরি, বাবা রামদাস, স্বামী হরিদাস, নায়ক বৈজু, তানসেন, লালখান গুণসমুদ্র, নাদ আলী খান, রঙ খান, শেখ বাহাউদ্দীন, শেখ মুহম্মদ, মিয়া দলু, গুণসেন, হামীর সেন, খুরম-মখু, মিশ্রি খান ধারী, গুনখান, রওজা কাওয়াল, দীরঙ্গ খান, পরভেজ, জাহাঙ্গীর দাদ, কবীর কাওয়াল, মুহীব খান, সওয়াদ খান, ওলি, রহিম দাদ, গোপচোপ, রাজা ইদ সিং রাজা রামশাহ, সুরদাস, বিলাস খান, তানতরঙ, নায়ক সূর্য (চারজু), প্রবীন খান, সোবহান খান, বিচিত্র খান, চাঁদ খান, মিয়া চাঁদ, বীরমণ্ডল, সিহাব খান, নিয়াজি কাওয়াল, লালা বাঙালী, নিয়ামত খান সদারঙ, শেখ মঈনুদ্দীন, ফিরোজ খান, মুহম্মদ আলী খাঁ

^১ ভারতে হিন্দু-মুসলমানের যুক্তসাধনা, পৃঃ ১০৬-৭।

হররঙ, টপ্পা গানের প্রবর্তক গোলাম নবী প্রমুখ অনেকেই তেরো শতক থেকে আঠারো শতক অবধি সংগীতকলাকে তাঁদের অবদানে ঋদ্ধ করে গেছেন।

মধ্যযুগের ভারতবর্ষে কাশ্মীর, ওজরাট, আগ্রা, দিল্লী, রামপুর, জৌনপুর ও লঙ্কৌই ছিল সংগীত-কলা চর্চার শ্রেষ্ঠ কেন্দ্র। আর মধ্যযুগে ভারতবর্ষে সংগীতকলার উৎকর্ষের মূলে রয়েছে প্রথমত ও মুখ্যত মুসলমানেরই দান। তাঁরা নানা রাগতাল সৃষ্টি তো করেইছেন বাদ্যযন্ত্রও তৈরি করেছেন অনেকে। যেমন ঘিচক, তমুরা কানুন উদ, নই, ঢফ, নাকাড়া, ঢোল, সেতার, রবাব, চণ্ড, নহবত, সরোদ (সরহদ) তবলা (অতবল-আরব্য যন্ত্র) প্রভৃতি। সানাই, নাকাড়া ও নহবতের গৎ বা তালও এ সময়ে উৎকর্ষ লাভ করে।

সংগীতের ক্ষেত্রে ধর্মের প্রয়োজনেও হিন্দুরা যা করতে পারেনি, আনন্দের আয়োজনে মুসলমানেরা তার শতগুণ করেছে। উঠতি আর পড়তির পার্থক্য এখানেই। স্বাধীনতার মহিমা আর পরাধীনতার অভিশাপ এখানে স্পষ্ট। শাসকের প্রাণ-প্রাচুর্য নব নব উন্মেষশালিনী হবে আর শাসিতের লক্ষ্যহীন জীবন বক্ষ্যা থাকবে; এইতো ইতিহাসের সাক্ষ্য। জ্ঞান-বিজ্ঞান ও সংস্কৃতি ক্ষেত্রে এমনি ব্যাপার আমরা ইংরেজ আমলেও প্রত্যক্ষ করেছি।

অবশ্য ভজন-কীর্তনের মাধ্যমে হয়েও সংগীতকলার বিকাশ হয়েছে, গড়ের হাটি, মনোহরশাহী, রেনেটী চণ্ডের কীর্তনে কিংবা মীরাবাই, স্বামী হরিদাস, বাবা রামদাস ও তাঁর ছেলে সুরদাস প্রমুখের ভজনে সুর তালের বিকাশ লক্ষ্যগ্ণী।

৫.

মুসলিমরা ভারতীয় সংগীততত্ত্ব বিষয়ক পার্সি গ্রন্থ ও ফারসি, হিন্দুস্তানি ও বাঙলায় রচনা করেছেন কিংবা করিয়েছেন। এগুলোর মধ্যে তাঁদের নিজস্ব উদ্ভাবন, ব্যাখ্যা ভাষ্য ও বিশ্লেষণ থাকলেও মূলত সংস্কৃত সংগীততত্ত্ব এবং সংস্কৃত গ্রন্থই ছিল তাঁদের অবলম্বন। এমনি কয়েকটি গ্রন্থের নাম করছি এখানে। সঙ্গীত গ্রন্থ 'কাঞ্চল তুহফ' রচিত হয় ১৩৫৫ খ্রীস্টাব্দে। জৌনপুরের সুলতান ইব্রাহিম শকীর (১৪০১-৪০ খ্রীঃ) প্রবর্তনায় সংকলিত হয় 'সংগীত শিরোমণি', কাশ্মীররাজ জয়নুল আবেদীনের (১৪১৬-৬৭) অধঃ 'মগক বা গগক' নামে সংগীতগ্রন্থ রচনা করেন লুদীভট্ট। হাম্মাদ ওফে এহিয়া কাবুলি সুলতান সিকান্দর লোদীর আমলে (১৪৮৯-১৫১৭) রচনা করেন 'লহজত-ই-সিকান্দরী'। গোয়ালিয়ররাজ মানসিং তনবারের (১৪৮৬-১৫১৭) নির্দেশে 'মান কৌতুহল'-এর অংশবিশেষ সংস্কৃতে রচনা করেন নায়ক মাহমুদ। ১৫১৮ সনে রচিত হয় 'রাগা-ই হিন্দ', কবি আলমের 'মাধবানল কাম কন্দলা' আকবরের আমলে রচিত। ইব্রাহিম আদিল সুরের 'নব রস' রচিত হয় ১৬০৮ সনে। ১৫৬০ সনে রচিত হয় তানসেনের 'সংগীতসার ও রাগকলা'। শাহজাহানের আমলে 'সহসরস' (১৬২৮-৫৮) আর 'মিফতাবুস সরুর' (১৬৭৩) রচিত হয় আওরঙযীবের আমলে। 'রাগদর্পণ' (১৬৫৮ বা ১৬৬১) ও 'মান কৌতুহল' ফারসিতে তর্জমা করেন মির্জা ফকীরুজ্জাহ (১৬৬১-৬৪)। 'নয়মাতুল আসরাম' (১৬৮৮-১৬৭১?) রচনা করেন মীর আহমদ; 'মীরাতুল খিয়াল' (১৬৫৮-১৭০৭) রচক হচ্ছেন শের মুহম্মদ খান। 'তুহফুতুল হিন্দ' (১৬৫৮) রচনা করেন সিরাজ খান ইবনে ফখরুদ্দীন আহমদ। এ ছাড়াও রয়েছে নিশাত আরা ও শাহনওয়াজ খান রচিত 'মিরাত-ই-আফতাবনামা', মুহম্মদ লাল খান বরনীর 'মউজ-ই-মুসিকি', মুরাদ আলী আওরঙ-বাদীর 'আইয়াজ-ই-খুস-কুবী', রাজা নওয়াব আলীর 'মুয়ারিক-উল-নাঘমাত' (উনিশ শতক) মুহম্মদ

রাজা খানের 'নাঘমাতুল আসিফী' (১৮১৩), অযোধ্যার নবাব ওয়াজেদ আলী শাহর 'নজো', আবুল ফজলের আইন-ই-আকবরী (তৃতীয় খণ্ড সংগীত বিষয়ক) প্রভৃতি। মির্জা রওশন জামী ১৭২৪ খ্রীস্টাব্দে 'সংগীত পারিজাত' তর্জমা করেন ফারসিতে। ১৮৩৪ সালে হাকিম সালাওয়াত আলী খার সংগীত গ্রন্থ রচিত হয়। 'রিসালা-ই-মুসিকি' 'রিসালা-দর ইল্লত-ই-মুসিকি' নামে আরো দুখানা সংগীত গ্রন্থ আছে। আর রাগদর্পণ, মানকৌতুহল ও তুহফতুল হিন্দ এগুলোর মধ্যে শ্রেষ্ঠ গ্রন্থ।

পণ্ডিত ক্ষিতিমোহন সেনশাস্ত্রী বলেন 'ভারতে হিন্দু-মুসলমানের সাধনাগত যোগ বহুকালের। ভগবৎ প্রেমে, ভক্তিতে, চিত্রশিল্পে, স্থাপত্যশিল্পে, জ্যোতিষ চিকিৎসাদিশাস্ত্রের, কাব্য সাহিত্যে, সামাজিক উৎসবাদিতে কোথায় সেই যুগ দেখা যায় নাই? আর সব ক্ষেত্রে বাদ দিয়া শুধু সংগীতের ক্ষেত্রে দেখিলেও দেখা যায়, উভয়ের সাধনাগত যোগ বিস্ময়কর। ...ভারতীয় সংস্কৃতি কোন বিশেষ একটি মাত্র দলের সাধনার ফলে গড়িয়া উঠে নাই। এই সংস্কৃতির মধ্যে আর্য-আর্যেতর বৈদিক-অবৈদিক কাহার সাধনা নাই? তারও পরেকার শক-হুন যবনাদির (গ্রীক) সাধনাও ইহাতে প্রভূত পরিমাণে রহিয়া গিয়াছে।'^১

আরবি, ইরানি ও ভারতিক সংগীতে হেলেনীয় প্রভাবের কথা আজকাল অস্বীকৃত নয়। এই সূত্রে হয়তো এ তিন দেশের সংগীতে কিছু কিছু মৌলিক মিল ছিল, তাই মুসলমানেরা তুর্কিবিজয়ের অতি অল্পকালের মধ্যেই ভারতিক সংগীত আত্মস্থ করতে পেরেছিল, তার প্রমাণ পাচ্ছি শার্লদেবের (১২১০-৪৭) গ্রন্থ 'সংগীত রত্নাকর' তুরস্কতোড়ি ও তুরস্কগোড়ি রাগের উল্লেখ এবং আমীল খুসরু কর্তৃক দেশী-বিদেশী রাগতালের সহজ ও নিপুণ সমন্বয় সাধনে। তিনি ঘনম, খরা, ফরমনা, মুজির, মুয়াযিক, সিনম, সাজগরি, উশশাক, ইমান, জলুলা, যিলফ, সাহানা, সুহিল, কওয়াল, কৌল, তরানা, প্রভৃতি স্রষ্টা বলে খ্যাত। তালের মধ্যে খামাসা, সওয়ারি ফিরোদস্ত, সরফরদা, জাটপুস্তআরা, চৌতারা, সুলফকতা, রুমরা প্রভৃতি তাঁর কীর্তি বলে কথিত। আর যন্ত্রের মধ্যে সেতার, তবলা, রবার ঢোলক তাঁর উদ্ভাবন বলে পরিচিত। ইমন থেকে কল্যাণ পুরিয়া, ভূপালি, বেলা-বলী, বেহাগ, ঝিঝিট ও ইমনী এবং বাহার, আমাইয়া, অড়ানা, সোহিনী, সুহি, সুঘরই, মারু, গুজরাটের বাহাদুর শাহর টোড়ী, হোসেন শাহ শকীর জৌনপুরী টোড়ী, খেয়াল, হোসেনী কানড়া, হিজ্জেজ, কাফিটোড়ী, গোলাম নবীর টপ্পা, তানসেনের মিয়া সারঙ্গ, মিয়ামদ্বার, পিলু এবং ঝিঝিট, এমনি করে সাত সারঙ্গ, নও নট বারো মদ্বার, তেরো টোড়ী, আঠারো কানহড়া, ক্রমে গড়ে ওঠে মুসলমানদের হাতে। তানসেন সম্বন্ধে বলা হয়— আকবর বাদশাহ যেমন নরপতি, তেমনি তানসেন হলেন তানপতি। খয়রাবাদের লোকগীত থেকেই নাকি জৌনপুরের সুলতান হোসেন শাহ শকী 'খেয়াল' সৃষ্টি করেন, তেমনি পান্ডাবের রাঙ্গ অঙ্কলের উল্টাচালের সংগীত থেকেই গোলাম নবী টপ্পা (শেরী) প্রবর্তন করেন। এভাবে আমীর খুসরু থেকে যা শুরু হয়েছে, তা আজো শেষ হয়নি। আজো বিখ্যাত সংগীতবিদ ও উদ্ভাদ বলতে প্রায় সবাই মুসলমান। তাঁদের অনেকেই তানসেন বংশীয় বা তাঁদের শিষ্যাগোষ্ঠীয়। রাগরাগিণীর সৃষ্টিতে, বাদ্য-যন্ত্রের উদ্ভাবনে ও সংগীত শাস্ত্রগ্রন্থ রচনায় আজো পাক-ভারতের মুসলমান প্রায় অপ্রতিদ্বন্দ্বী।

^১ প্রাচ্য, পৃঃ ৭৫-৭৬।

৬.

আগেই বলেছি, ভারতীয় সংগীতে বিদেশী প্রভাব যতই পড়ুক, আর তাতে তার অবয়ব যতই রূপান্তর লাভ করুক, তার আত্মাটি দেশীই ছিল, কেননা, সুর কখনো ভাষা ও ধ্বনি নিরপেক্ষ হতে পারে না। সেজন্যেই বিদেশী রাগ-রাগিণী দেশী ভাষা ও তার ধ্বনির আধারে ধরা না দিয়ে পারেনি। এ অনিবার্য কারণে সংস্কৃত সংগীত গ্রন্থগুলোই ছিল সবার আদর্শ। কিন্তু সর্বসম্মত স্বরলিপি সম্বলিত না হওয়ায় তা কোনো বৈজ্ঞানিক পদ্ধতি অবলম্বনের সহায়ক হয়নি। ফলে শ্রেণীবিন্যাসে, ব্যাখ্যায় ও ধ্যানে বিস্তর মতানৈক্য দেখা যায়, সংস্কৃতে প্রায় দুশোর মতো (১৭০ খানার মতো আবিষ্কৃত হয়েছে) সংগীত গ্রন্থ রয়েছে। এই গ্রন্থাৱণ্য থেকে সর্বসম্মত ধ্যান ও ব্যাখ্যা উদ্ধার করে সংগীত-তত্ত্বের একখানা বৈজ্ঞানিক আলোচনা গ্রন্থ রচনা করা অতিবড় পণ্ডিতের পক্ষেও দুরূহ। অবশ্য মান কৌতুহল, সংগীত শিরোমণি, মউজ-ই মুসিকি, কিংবা আইন-ই-আকবরী (তৃতীয় খণ্ড) প্রভৃতি সংকলন গ্রন্থে সে-চেষ্টা বারবার হয়েছে। তবু কেবল জটিলতাই বেড়েছে। এর কারণ সংগীততত্ত্ববিদের মনন যত গভীর ও সূক্ষ্ম ছিল, বিজ্ঞানবুদ্ধি তত প্রবল ছিল না, তার উপর স্বরলিপির মাধ্যমে প্রায়োগিক জ্ঞানদানের পদ্ধতি কখনো গৃহীত হয়নি বলে তাত্ত্বিক সংজ্ঞা ও ভাষা কেবল বিভ্রান্তই করেছে। কোন রাগরাগিণীর স্বরূপকে সুনির্দিষ্ট না করে অনির্দেশাই করে তুলেছে। সংগীতশাস্ত্র কোনদিনই সংগীতশিক্ষার সহায়ক হয়নি। গুরু-শিষ্য পরম্পরায় অনুশীলনই শিক্ষার একমাত্র বাস্তব প্রণালী ছিল।

এর ফলে গুরু যা স্বৈচ্ছায় দিয়েছেন বা দিতে পেরেছেন, সেটুকুতেই শিষ্যকে তুষ্ট থাকতে হয়েছে। সেজন্যে গুরু-শিষ্যের পারস্পরিক সম্মান ও যোগ্যতাই ছিল শিক্ষা দানের ও গ্রহণের নিয়ামক ও পরিমাপক। সে-ক্ষেত্রে যোগ্যের সঙ্গে যোগ্যের যোগে সুফল ফলেছে, বিশেষ রাগরাগিণীতে বিশেষজ্ঞ পাওয়া গেছে, কোন নির্দিষ্ট সুরে কণ্ঠ বা যন্ত্রসংগীতে বিশিষ্ট গায়ক বা বাদক মিলেছে। কিন্তু সংগীত শাস্ত্রজ্ঞ পণ্ডিত কিংবা সর্বসরজ্ঞ শিল্পীর আবির্ভাব হয়েছে কম। শিখতে সময়ে অপব্যয় হয়েছে অপরিস্রব এবং প্রতিভাবান ছাড়া সংগীত সাধারণের ছিল অনায়াসে। এ যুগে অল্প আয়াসেও চলনসই সংগীতশিক্ষা যে কোন ছেলেমেয়ের পক্ষেই সম্ভব হচ্ছে। অথচ সে যুগে অর্ধ জীবনের নিবিষ্ট সাধনার প্রয়োজন ছিল। একালে পণ্ডিত বিষ্ণুনারায়ণ ভাতখন্ডে তাঁর অবিস্মরণীয় অবদান হিন্দুস্থানী সংগীতপদ্ধতিতে এবং রাজা নওয়াব আলী তাঁর ‘মুয়ারিফুল নাঘমাত’-এ আমাদের সংগীতশাস্ত্রকে সংগীত বিজ্ঞানের রূপ দিয়েছেন। আগের সংগীতশাস্ত্র বিরূপ জটিল, বহুধা বিভক্ত, অবিন্যস্ত ও বিচিত্র ছিল, তার প্রমাণ মেলে মানকৌতুহলে আশী হাজার রাগরাগিণীর অস্তিত্বের স্বীকৃতিতে। এর একটা বিবরণ পাই লাল খান বরনীর ‘মওজ-ই-মুসিকি গ্রন্থে’।^২

৭.

মধ্যযুগে গোটা ভারতবর্ষব্যাপী যখন সংগীতচর্চার বান ডেকেছে, তখন বাঙলার অবস্থা কী? বাংলাদেশের কোন অবদানের কথা তো শুনতে পাইনে। একমাত্র ‘লালা বাঙলী’ ছাড়া কোন বাঙালীর নামও মেলে না। এর নিশ্চয়ই কোন কারণ আছে। আমাদের অনুমিত কারণগুলো এই : এক, ফারসির পরেই উত্তর ভারতীয় ভাষাই দরবারী মর্যাদা ও লিঙ্গুয়াফ্রাঙ্কা হবার সুযোগ

^২ হিস্টি অব ইণ্ডো-পাক ম্যাজিক : ডক্টর আবদুল হালিম, পৃঃ ২১-২৩।

পেয়েছে। সে-জন্যে সে-ভাষাতেই সংগীতকলার অনুশীলন হয়েছে। সে-ভাষায় অনধিকারী প্রত্যন্ত অঞ্চলের বাঙালীর পক্ষে যানবাহন বিরল সে-যুগে নতুন সংগীতকলা আয়ত্ত করা সম্ভব হয়নি। দুই, উত্তর ও দক্ষিণ ভারতে সংগীতের অনুশীলনের ও উৎকর্ষের মূলে রয়েছে বিভিন্ন দরবারের প্রতিপোষণ। কিন্তু বাঙলাদেশে বাঙালী বাদশাহ ছিলেন না কখনো, কাজেই বাঙলাভাষায় সংগীত সাধনার অনুকূল পরিবেশ কখনো গৌড় সুলতানের দরবারে সৃষ্টি হয়নি। এবং সামন্তদের অধিকাংশও ছিল অবাঙালী। তিন, বাঙলাভাষা লেখ্য ও সাহিত্যের ভাষা হিসেবে বিকশিত হবার মুখেই বৈষ্ণব ধর্মান্দোলন শুরু হয়, ফলে, তাঁদের সাধনের ভজনের ও কীর্তনের জন্যে বিশেষ ধরনের গান রচিত হতে থাকে। সে-স্রোতে অবৈষ্ণবও গা ভাসিয়ে দিতে বাধ্য হয়। নইলে গানের দেশ বাঙলায় কালোয়াত জনাবো না কেন। তবু যে দেশের লোকের ঘটে ঘটে সতেজ প্রাণ এবং গোলায় গোলায় ধান না থাকলেও গলায় গান রয়েছে, যে দেশে সহজিয়া, কীর্তন, বাউল, ভাটিয়ালি, গম্ভীরা, ঝুমুর প্রভৃতি সংগীতের প্রাবল্য বয়ে গেছে, সে দেশে কেন যে উচ্চাঙ্গের সংগীত, বড় বড় কালোয়াত, সংগীত শাস্ত্রকার এবং রাগ, তাল ও বাদ্যযন্ত্রের উদ্ভাবকের আবির্ভাব ঘটেনি, তা ভেবে আশ্চর্য হতে হয়।

তাই বলে বাঙালী সংগীতবিমুখ ছিল না। দেশী বাদশাহবিহীন ও সামন্ত বিরল হয়েও তারা সাধ্যমত এক্ষেত্রে নিজেদের স্বাক্ষর রেখে গেছে। বাঙালীর হিন্দুরা সংস্কৃতে সংগীত শাস্ত্রগ্রন্থ রচনা করেছেন, বাঙলায়ও কিছু কিছু করেছেন। মুর্শিদাবাদের মুর্শিদ আলী খান কানহীলা এ বিষয়ে সংস্কৃতে ও ফারসিতে কোন গ্রন্থ রচনা করেছিলেন কি-না সে সন্দ্বিষ্ট কেউ করেননি, কিন্তু তাঁরা সংস্কৃত গ্রন্থের অনুসরণে বাঙলায় বহু রাগ তালের গ্রন্থ রচনা করেছেন। তবে মধ্যযুগে যে নতুন জিজ্ঞাসা ঔৎসুক্য ও রসতৃষ্ণা উত্তর ভারতে সুবর্ণের অশেষায় রসিকদের আকুল ও একাগ্র সাধনায় নিমগ্ন করেছিল, সে-রেনেসাঁস বাঙালীর হৃদয়কে উদ্বেল করেনি। বাঙালীর প্রাণের ঐশ্বর্য তখন বৈষ্ণব ও সুফী আন্দোলনের মাধ্যমে ভাগবত উৎকর্ষের নিবৃত্তি সাধনের ছিল নিরত, এ ছাড়া উপায়ও ছিল না। পার্থিব সম্পদে বঞ্চিত হয়ে অপার্থিব ধনে ধনী হওয়ার মানস প্রয়াস না করলে চলত না, জীবনে তো একটা অবলম্বন চাই! কাজেই আমাদের সংগীতকলা নতুনের স্পর্শ বিশেষ পায়নি, প্রায় গতানুগতিক ধারাতেই চলছিল। তারই প্রমাণ ছড়িয়ে রয়েছে রাগতালের নানা গ্রন্থে। তবু সূর্য উদয় হলে যেমন তার রশ্মি ছিদ্রপথেও প্রবেশ করে, তেমনি আমাদের সংগীতকলায়ও সৃষ্টির অঙ্কুর মাঝে মধ্যে দেখা গেছে, তার প্রমাণ পাচ্ছি কিছু কিছু মিশ্র রাগরাগিণীর প্রয়োগে, যা হয় রাগ ছত্রিশ রাগিণীর অতিরিক্ত। যেমন ধানসী বেগরা, ধানসী দীপিকা, ধানসী কৈদার, ধানসী দ্রৌপদী, তিবরিয়া ধানসী, দিগর ধানসী, ধানসী বেরুনী, মালসী বেরুনী, দিগর মালসী, দিগর রামক্ৰিয়া, দিগর আশাবরী, বেরুনী সিন্দুরা, গৌড় সিন্দুরা, দিগর গৌড় সিন্দুরা, করুণা ভাটিয়াল, নাগোখা ভাটিয়াল, আকুমারী ভাটিয়াল, রাগজলালী, দৈওগিরি রাগ, কল্যাণ-জালালী, তুড়ি, গুঞ্জরী-কৈদার, কামোদ ভাটিয়াল, পরহ কামোদ, রাগ পরহ বহু-ভূপালি, পঞ্চম সিন্দুরা, তুড়িপরহ, তুড়ি কৈদার, তুড়িগুঞ্জরী কৈদার, তুড়ি গৌড়ী, আসোয়ারী, রাগ সারঙ্গ, সুহি সারঙ্গ, সুহি সিন্দুরা, সুহি বেলায়ার, বেউর পুরী ভাটিয়াল, ভাক্সা কানড়া, মাটিয়াল বৈরাগী, নট গান্ধার, শ্রীগান্ধার, গান্ধার পঞ্চম ইত্যাদি এবং আরো কয়েকটি রাগ-উপরাগের বাঙলা গানে প্রয়োগে।

৮.

বলেছি, সুফী সম্প্রদায়ের মাধ্যমেই মুসলিম সমাজে সংগীতকলার চর্চা প্রতিষ্ঠা পায়, আর সংস্কৃত সংগীতশাস্ত্রই তাঁদের আদর্শ ছিল। সংস্কৃত সংগীতশাস্ত্রে সংগীতের পৌরাণিক উদ্ভব কাহিনী বর্ণিত রয়েছে। সংগীতও শিবপ্রোক্ত, তাঁর কাছ থেকে ব্রহ্মা নারদ ইন্দ্রসভা কৃষ্ণপাখি, বানর প্রভৃতি হয়ে মর্ত্য মানুষের কাছে এসেছে নারদ, ব্যাস, কর্ণ, মতঙ্গ, সোমেশ্বর, কঙ্কিনাথ, ভরত, দত্তিল প্রমুখ ঋষি-রসিকের আশ্রয়ে ও অনুশীলনে। এঁদেরকে জড়িয়ে সংগীতকলার উদ্ভব সম্বন্ধে বিচিত্র সব কাহিনী গড়ে উঠেছে। মুসলমান সংগীততাত্ত্বিকরা এ কথা অরণ্যে দিশেহারা হয়ে পড়েছিলেন তো বটেই, তাতে আবার জাতিভিমানের অপবৃদ্ধি বশে সংগীতকলার ইসলামী উদ্ভব কল্পনা করতে যেয়ে এক হাস্যকর খিচুড়ি তত্ত্ব সৃষ্টি করেছেন। যেমন আলী রজা বলেন :

(শঙ্কর) গোপ্ত ব্যক্ত মহামন্ত্র রসুলের হোতে। ভাবিনী ভাবক হই শঙ্কর সাক্ষাতে ।।
চারি বেদ চৌদ শাস্ত্র করিলা জগতে ।। তারপর শঙ্কর প্রণামি নবী মর্ত্যে আসিল ।
বহু কথকাল সেই আছিল গোপেতে ।। বেকত সকল কথা সভাত কহিল ।।
কিন্তু একদিন আলীর অনুরোধে নবী গুপ্তত্ব ও মন্ত্র আলীকে জানিয়ে দিলেন, আলী সে-
মহামন্ত্রের তেজ সহ্য করতে না পেরে নবীর পরামর্শে সে-মন্ত্র রেখে এলেন গভীর অরণ্যে ।
এদিকে 'মন্ত্র গুনি কম্পি গিরি বহে জলধার।' বৃষ্টিবারে লাগলেন্ত বৃক্ষেত উঠিয়া ।
মহাজলাকার হেল জঙ্গল ভিতরে ।। সাফাইতে বৃক্ষ ঘাতে যথ হনুমান ।
সে জল খাইল যথ বনের বানরে ।। উদর ছিড়িয়া কথ তেজিল পরাগ ।
জলাপানে হনুমানে মহামন্ত্র হইয়া ।

কিন্তু 'গাছে বানরের 'রগ' (শিরা, নাজ) সব রহে টানা দিয়া।' এবং যখন বসন্ত ঋতু এল, আর—

সে রগে লাগিল যদি মলয়া বাও
কহিতে লাগিল তালযন্ত্র রাও ।
বসন্ত সমীর সেই রগেতে লাগিল
ঋতু রাগ তাল নানা যন্ত্র নিঃসরিল ।
দগর নাগর (নাকাড়া) ঢোল যথ বাদ্যধ্বনি
রবাব, দোতারা বংশী, সানাই বেগুনি ।
তারপর, আর দিন নবী কহে মর্ত্তজার ঠাই
মন্ত্র যথা ছাড়ি দিছ দেখে তুমি যাই ।
নবীর আদেশে আলি সেই বনে গেল
ঋত রাগ যন্ত্র তথা বাজিতে দেখিল ।
নানা রাগ যন্ত্র তথা বাজিতে দেখিল ।
নানা রাগ যন্ত্র দেখি মহানন্দ আলি
সকল শিখিল শাহা হৃদয়ে আকলি ।

ভেউর কন্নালা যথ রস বাদ্য রঙ্গ
পিণাক ডম্বুর বেণু কর্তাল মৃদঙ্গ ।
নহবত ঝঞ্ঝকরি বাদ্য যথেক সংসারে
ব্যক্ত কৈল হনুমান হোন্তে করতারে ।
রাগতাল গোপতে আছিল হর পাশ
হনুমান হোন্তে হৈল সংসারে প্রকাশ ।
সারিন্দা করিল মৃত কপি অঙ্গ আনি
বানরের চর্মে দিল সারিন্দার ছানি ।
বানরের রগ দিয়া রবাব সাজায়—
সারিন্দার মন্ত্র শাহা প্রথমে শিখিল
পাছে রাগ তাল সব অভ্যাস করিল ।

বিবৃত অংশে দেখা যাচ্ছে আল্লাহই শঙ্কর বা' শিব। তিনি হযরত মুহম্মদকে বেদাদি চতুর্দশ গুপ্ত-ব্যক্ত শাস্ত্রে ও মন্ত্রে জ্ঞান দান করেন। হযরত আলী এ জ্ঞানের উত্তরাধিকার পান এবং তাঁর অক্ষমতায় ও হনুমানদের আত্মদানে রাগতাল বসন্ত সমীর সহযোগে পৃথিবীতে

প্রচারিত হয় এবং নর মধ্যে আলীই আবার আদি সংগীতজ্ঞ। সংগীত যে ভাগবত উৎকর্ষার তথা অধ্যাত্মজিজ্ঞাসা নিবৃত্তির ও সাধানার বাহন, তাও আলী রজা স্পষ্ট করেই বলেছেন :

আলি হোন্তে সে সকল সন্ধ্যাসী ফকিরে জীবন্ত যথ আছে ভুবন ভিতর
শিখিল সকল যন্ত্র রহিল সংসারে । সর্বঘণ্টে যন্ত্র বাজে গীতের সুন্দর ।
ভাবের বিরহে সব শান্ত হৈতে মন । ঘণ্টে গোপ্ত যন্ত্রগীত যোগিগণ বুঝে
রাগতাল কৈল প্রভু সংসারে সৃজন । তে কারণে সর্ব জীবে সে সবারে পূজে ।
গীততন্ত্র জনি মহামুনি ভ্রম যাএ গীতযন্ত্র সুন্দর বজায় যে সকলে
সর্ব দুঃখ দূর হয় গীত যন্ত্র রাএ মহারসে ভুলি প্রভু থাকে তার মেলে ।
গীতযন্ত্র মহামন্ত্র বৈরাগীর কাম শুদ্ধভাবে ভূবি নৃত্য করে যেই জনে
রাগমন্ত্র মহায়ন্ত্র প্রভুর নিজ নাম । গীতরসে মজি প্রভু থাকে তার সনে ।

অপর একজনও বলেন :

কহে হীন দানিশ কাজী ভাবি চাহ সার ছয় ঋতু তার সঙ্গে চলে প্রতিনিতি ।
রাগযন্ত্র নাদ সব ঘণ্টে আপনার । রাগ-ঋতু অন্ত যদি পারে চিনিবার
অষ্টাঙ্গ তন মধ্যে আছএ যে মিলি জীবন মরণ ভেদ পারে কহিবার ।
তনাস্তরে মন বেশী করে নানা কেলি । কিবা রঙ্গ কিবা রাগ কিবা তার রূপ
মোকামে মোকামে তার আছএ যে স্থিতি ধ্যানেতে মগ্নিয়া দেখে ঘণ্টে সর্বরূপ
মুসলিম সমাজে সংগীতচর্চা যে সুফীপ্রভাবেরই ফল, আমাদের সে-অনুমান উক্ত চরণ কয়টি দ্বারা প্রমাণসিদ্ধ হল ।

৯.

রাগের বই ‘রাগনামা’ বা ‘রাগমালা’ তালসম্বন্ধীয় গ্রন্থের নাম ‘তালনামা’ বা ‘তালমালা’ এবং রাগ ও তালের মিশ্রগ্রন্থের নাম ‘রাগতালনামা বা মালা’। আবদুল করিম সাহিত্যবিশারদ সংগৃহীত পুথির মধ্যে উনিশখানি ‘রাগনামা’ বা ‘রাগমালা’ তেরো খানি ‘রাগতালনামা’ রয়েছে। এগুলো ছাড়া ডক্টর মুহম্মদ এনামুল হকের কাছেও ‘বাঙলা একাডেমী’তে রয়েছে কয়েকখানি রাগ ও তালের পুথি। এসব গ্রন্থের রচয়িতা চট্টগ্রামবাসী হিন্দু ও মুসলমান। মধ্যযুগে চট্টগ্রামে সংগীতের অনুশীলন হয়েছিল এবং বহু মুসলমান সংগীতচর্চায় ব্রতী হয়েছিলেন। এসব মুসলমান সাধারণ্যে ‘পণ্ডিত’ নামে পরিচিত হতেন তাঁরাই দেশের স্ব স্ব মণ্ডলীতে সংগীতবিদ্যা শেখাতেন। চট্টগ্রামে নমঃশূদ্র শ্রেণীর হাড়িরা ও ডোমেরাই সাধারণত বাদ্যকরের পেশা নিয়ে থাকে। উক্ত ‘পণ্ডিত’ আখ্যাদারী মুসলমান সংগীত বিশারদেরাই এসব হাড়ি ডোমকে গানবাজনা শেখাতেন। চট্টগ্রামে একরূপ বহু পণ্ডিতের নাম আজো লোপ পায়নি : চম্পাগাজী পণ্ডিত, কমর আলী পণ্ডিত, বংশ আলী পণ্ডিত, হারি (স) পণ্ডিত, গুলবংশ পণ্ডিত, কাদের বংশ পণ্ডিত, ওয়ারিশ পণ্ডিত, পরান পণ্ডিত, ফাজিল নাসির মুহম্মদ পণ্ডিত প্রমুখ আজো লোকস্মৃতিতে বিদ্যমান রয়েছেন। এদের কেউ কেউ সংগীতগ্রন্থও রচনা করেছিলেন।

রাগতালনামাগুলো প্রায়ই সংকলন গ্রন্থ। এক এক রাগরাগিণীর দৃষ্টান্তস্বরূপ যে সব পদ উদ্ধৃত হয়েছে, সেগুলো নানা জনের রচনা থেকে উৎকলিত। তবে ফাজিল নাসির মুহম্মদের ‘রাগমালা’ (১৭২৭ খ্রীস্টাব্দে রচিত) এবং আলি রজার (১৭৫৯-১৮৩৭ খ্রীঃ) ‘ধ্যানমালা’ এ সবার ব্যতিক্রম। এরা ধ্যানের ভাষ্য রচনায় আর কারো সাহায্য নেননি, তবে দৃষ্টান্তস্বরূপ পদ বা গান উদ্ধৃত করেছেন নানা কবির।

দুনিয়ার পাঠক এক হও! ~ www.amarboi.com ~

শার্দেবের 'সংগীত রত্নাকারে' রাগের যে সংজ্ঞা দেওয়া হয়েছে তাই উদ্ধৃত করে আমাদের বক্তব্য শেষ করব।

স্বরবর্ণ বিশিষ্টেন ধ্বনিভেদেন বা জন :

রজ্যতে যেন কথিতঃ স রাগ সম্যতঃ সতাম ।।

অথবা যোসৌ ধ্বনি বিশেষস্ত্বরবর্ণ বিদুরষিতঃ।

রঞ্জকো জন চিস্তানাং স রাগঃ কথিতো বুধৈঃ ।।

সন্ধিসু পাঠক আমার 'মধ্যযুগের রাগতালনামা' গ্রন্থে বিস্তৃত আলোচনা ও ভারতীয় সঙ্গীতশাস্ত্র গ্রন্থাবলীর তালিকা পাবেন।

গ. ফালনামা

দুর্বল মানুষ মাত্রই অদৃষ্টবাদী। আত্মপ্রত্যয়হীন দুঃখী ও হতাশ মানুষ অদৃষ্টবাদী ও ভাগ্যনির্ভর না হয়ে পারে না। হিন্দুসমাজে জ্যোতিষগণনা সামুদ্রিক গণনা, রাশি গণনা এবং হস্তরেখা গণনা প্রভৃতিকে বিজ্ঞান বলেই মানা হয়। জন্ম মুহূর্তেই জাতকের ভাবী জীবনের সবকিছু জানার বোঝার কৌতূহল হিন্দুদের জন্মপঞ্জিকা বা কোষ্ঠী নির্মাণে অনুপ্রাণিত করেছে। এ শ্রেণীর জ্যোতিষী ব্রাহ্মণ গ্রহবিপ্র বা যোগী বা আচার্য নামে অভিহিত হয়। বঙ্কিমচন্দ্র তাঁর উপন্যাসগুলোর কাহিনী নির্মাণে ও নিয়ন্ত্রণে জ্যোতিষগণনা লব্ধ নিয়তিকে শিল্পসুন্দর করে সার্থকভাবে কাজে লাগিয়েছেন। বাঙলাদেশে মুসলিমসমাজ মাস দিন ক্ষণ তিথি নক্ষত্র লগ্ন হিন্দুপ্রভাবে হিন্দুদের মতোই মানে। আগেকার দিনে ধনীঘরের মুসলিমরাও ব্রাহ্মণ ডেকে নবজাতকের ভাগ্য গণাত এবং কোষ্ঠী কন্যাত। পৃথিবীর সর্বত্র গণক এবং ভবিষ্যদ্বক্তা ও ভবিষ্যৎদ্রষ্টা বলে দাবিদার লোক চিরকাল ছিল এবং এখনো রয়েছে। নিয়তির অমোঘতা ব্যর্থ করার মন্ত্র ও উপায় তাদের জানা আছে বলে তারা দাবি করে, এর ফলেই আসন্ন বিপদ থেকে নিষ্কৃতি পাবার জন্যে বিপদ এড়ানোর জন্যে তাবিজ কবচ, তুক তাক, ঝাড় ফুক, খতম, স্তন্যন প্রভৃতির ব্যবস্থাও করে এসব গণক জ্যোতিষ ভবিষ্যদ্বক্তারা। এ জন্যে অবশ্য গুণীন, বেদে সম্প্রদায়, তিব্বতী গুণীন, মোল্লা পুরুতও রয়েছে। এটিই এক সময়ে তাদের জীবিকা ও পেশা ছিল।

ফালনামা হচ্ছে নিত্যন্ত ভাগ্যপরীক্ষা, অনেকটা লটারির মতোই। ভাগ্যগণনা পদ্ধতি ও দুর্ভাগ্য এড়ানোর উপায় ফালনামায় বর্ণিত, বাঙলা ফালনামা ফারসি উর্দু গ্রন্থের অনুবাদ বলে দাবি করা হয়।

যেমন আবদুল গনি বলেন :

কিতাবেতে দেখি ফালনামা বিবরণ

করিবুঁ বাঙ্গালা ভাষা পয়ার বন্ধন।

কোকিল, শুক, সাচন প্রভৃতি, পক্ষীর ভূমিকা, মাস দিন, তিথি, ক্ষণের প্রভাব এবং বিভিন্ন কাজ আরম্ভ কালের শুভাশুভ প্রভৃতি এ সব গ্রন্থে বর্ণিত।

১. আবদুল গনি ফালনামা রচয়িতা আবদুল গনি আত্মপরিচয় দিয়েছেন।

তিনি রোসান্জ অঞ্চলের লোক। আবদুল গণির পিতার উমরদরাজ ও পিতামহ আলিমবর।

রোসান্জ দেশেত জ্ঞান 'মংছ' দিব্য ঠাম

তান সুত গুণযুত আলিমবর নাম

নানাজাতি বৈসে তথা অতি অনুগাম।

তান পুত্র উমরদরাজ গুণধাম।

বল্লিক গ্রামেত ছিল শেখ মহাজন
হাসান খলিফা নাম জানে সর্বজন
উমর, মুহম্মদ রফি, সৈয়দ সুলতান (?) প্রভৃতিও ফালনামা রচয়িতা।

তাহান নন্দন মুঞি হীন জ্ঞান জান
হীন আবদুল গনি নাম কর অবদান।

১. উমরের রচনার নমুনা :

নহস আকবর কথা কর অবধান।

ভগিতা কিতাবে দেখিয়া গৃহ দহনের বাণী
শিশু যে উমরে কহে এ সব কাহিনী

চান্দেব তিখি অষ্টমীতে ত্রিশে

২. মুহম্মদ রফি : এই ঘরে উঠিলে ফাল সিদ্ধি নহে কাম

অষ্টদশে ত্রয়োবিংশে আর অষ্টবিংশে।

মুহম্মদ রফি এ কহে সহস্র সালাম।

২. হোসেন ফকির : হোসেন ফকির ভারতীয় রাশি-গণনার বিবরণই রচনা করেছেন, কিন্তু তাতে মুসলিম রঙ লাগানো চেষ্টাও রয়েছে :

আর এক কথা কহি শুন নরগণ
বার রাশি নবগ্রহ করি এ লিখন।
একদিন নিরঞ্জন ভাবি নিজ মনে

জিব্রাইল স্থানে তবে কহিল আপনে।
নিরঞ্জন বাক্য শুনি জিব্রিল চলিল।
নবী সোলেমানের যে নিকটে আসিলা।

নবী সোলেমান তাঁর অনুগত দেও ডেকে বললেন- ‘দেও সব দুষ্ট দেও মানুষের ক্ষতি করে, তাদেরকে আমার কাছে হাজির কর।’

‘দেও সবে আনি দিল নবীর চরণ দৃষ্ট দেওরা- সেইদিনে গুণি সবে ভাবি নিজমন
সেই দেও স্থানে নবী বুলিলা বচন।

রাশিরাশি নবগ্রহ করিলা লিখন।

শনিবারে জন্ম হলে কুম্ভরাশি, রবিবারে জাতক তুলারাশি, সোমবারের কুম্ভরাশি, মংগলবারে জন্ম হলে সিংহরাশি, বুধবারের ধনুরাশি, শুক্রবারের ককট রাশি, এবং শুক্রবারে জন্মালে বৃশাশি। কবি আলি রজার পুত্র ও পদকার সরাফতউল্লাহ এ পুথির লিপিকার, লিপিকাল ১২১৬ মঘী বা ১৮৪৪ খ্রীস্টাব্দ।

রচনার নমুনা : মেঘরাশি :

প্রথমে কহিব মেঘরাশির লক্ষণ
যেইমত কিতাবেত আছ এ লিখন।
শুন এই রাশি যদি নরসব হএ
তাহার নির্ণয় বাণী কহিব নিশ্চএ।
সুন্দর বদন হএ জানিঅ তাহার
সদাএ বয়ানে তার বচন সুসার।
পবন আলস্য তার বহল নিশ্চিত
তাহার আকৃতি হএ অগ্নির চরিত।
ক্রোধেত চঞ্চল হএ ক্ষেমাতে পাথর
ধর্ম কর্ম কৈলে কিছু মনের অন্তর।

এ রাশির অঙ্গে নিত্য তাবিজ থুইব
তবে সে তাহার অঙ্গ কুশলে থাকিব।
এবে কহি ফাড়া তার শুন গুণিগণ
এক মাস অঙ্গ আর দ্বাদশ পূরণ।
আর ফাড়া বিংশ অঙ্গ আর বিংশ তিন
একাশী বৎসর তার রাশি মধ্যে চিন।
একাশী বৎসর যদি পূর্ণ হৈল তার।
মরণ হৈব তার তেজিব সংসার।
এ রাশি পুরুষ নারী হএ একমান।
তেকারণে দুইবার না কৈল লিখন।

তাহারে দিবারে দুঃখ দেয় সব ফিরে
তাবিজ লিখিয়া যত্নে রাখ অঙ্গ ‘পরে।

ভগিতা :
হোসেন ফকিরে বোলে কিতাব হেরিয়া

আরবীভাষে এক তাবিজ দেখিলুং

সিংহ রাশি যেইমত কহিব রচিয়া ।

তেকারণে বাঙলা অন্ততে না লিখিলুং ।

৩. লোকসাহিত্য

বৈচিত্র্যহীন নিস্তরঙ্গ প্রাত্যহিক জীবনে সংঘটিত আকস্মিক ঘটনার তাৎক্ষণিকপ্রভাবে সংবেদনশীল মানুষের কণ্ঠে জেগে ওঠে ঘটনার প্রকৃতি অনুসারে আনন্দের কিংবা বেদনার গান। লোকসাহিত্যের উদ্ভব এমনি আকস্মিক ঘটনার অভিঘাতজাত আন্তরিক অনুভূতির অভিব্যক্তিহেই। তাই সে-সাহিত্যে জীবনের আনন্দ উল্লাস ও বেদনা-বিলাপ পরিব্যক্ত। হতাশা-প্রত্যাশাও তাই অঙ্গঙ্গীভাবে জড়িয়ে থাকে ছড়ায় গানে গাথায় উপকথায় রূপকথায় ব্রতকথায় ইতিকথায় আর প্রবাদে প্রবচনে ও কিংবদন্তীতে।

প্রাকৃতজনের মৌখিক রচনাকে বলে লোকসাহিত্য। 'লোক'-এর ইংরেজী প্রতিশব্দ 'Folk' বলেই মানি। 'লোক' এর বাঙলা অভিধা প্রাকৃতজন, অর্থাৎ যে মানুষ কোন কৃত্রিম উপায়ে শিক্ষা-সংস্কৃতি অর্জন করেনি- জন্মসূত্রে যে প্রকৃতি ঘরোয়া পরিবেশে ও সামাজিক প্রতিবেশ থেকে ভাব চিন্তা কর্ম আচরণ অনুকরণ করেছে সে-ই 'লোক' অবজ্ঞার্থে অপরিণীলিত অজ্ঞ অনক্ষর মানুষ।

লোকসাহিত্যও ব্যক্তিবিশেষের রচনা। তবে তা মানুষের মুখে মুখে উচ্চারিত হয়ে কানে কানে শ্রুত হয়ে শ্রুতিস্মৃতি রূপে চালু থাকে বলেই মূল রচয়িতার ভাব-ভাষা ও ভঙ্গি অবিকৃত থাকে না, জনান্তরে স্থানান্তরে ও কালান্তরে কেবল রূপান্তর লাভ করে অঙ্গে ও অন্তরে। তাই এগুলোতে মূল রচয়িতার নাম রচনা কিংবা সমাজ সৃষ্টি বলে অভিহিত করা হয়।

ছড়া গান গাথা রূপকথা উপকথা ইতিকথা রহস্যকথা বিংবদন্তী প্রবাদ প্রবচন ধাঁধা তত্ত্বকথা, ভূত-প্রেত-দেও-দানু-যক্ষ-রক্ষ-পক্ষী সম্বন্ধে উপাখ্যান, দেবতাবিশেষক কল্পিত আখ্যায়িকা প্রভৃতি লোকসাহিত্য সংজ্ঞার অন্তর্ভুক্ত। এক হিসেবে প্রাচীন ও মধ্যযুগীয় লিখিত সাহিত্যের উপাদান উপকরণও যুগিয়েছে এ মৌখিক লোকসাহিত্যই। এ তাৎপর্যে রামায়ণ মহাভারত শাহনামা আলেফনায়লা ইলিয়াড প্রভৃতির উপকরণ ছিল মৌখিক রচনাই, লোকস্মৃতি-শ্রুতি থেকে গৃহীত। অন্যপ্রাণীদের মতো যেহেতু মানুষও প্রাণিজগতের এক শ্রেণীর প্রাণী, সেহেতু স্থান, কাল বর্ণ, ধর্ম নির্বিশেষে সব মানুষের সহজাত বৃত্তি-প্রবৃত্তি অভিন্ন। তবে দুটো হাতের বদৌলত মানুষকে যেহেতু প্রকৃতি-নির্ভর থাকতে হয়নি, কৃত্রিম উপায়ে জীবিকা অর্জন ও জীবনযাপন তার পক্ষে সম্ভব হয়েছে, সেহেতু অগ্রহ ও উদ্যম নিয়ে বুদ্ধিযোগে অনুশীলন-পরিশীলন মাধ্যমে প্রসারিত আকাঙ্ক্ষাবশে হাতিয়ারের উৎকর্ষ সাধন করে জীবন ও জীবিকাপদ্ধতি বিস্তারে মানুষ অনুপ্রাণিত হয়েছে, যদিও সবাই সমভাবে বিকাশ বিস্তার লাভ করতে পারেনি ভৌগোলিক প্রতিবেশ ও ঔপকরণিক প্রতিকূলতার কারণে। আজকের এ মুহূর্তেও পৃথিবীর এক অঞ্চলে, রাষ্ট্রে বা দেশেও বিভিন্ন গোত্রের বর্ণের ধর্মের শিক্ষার ও আর্থিক অবস্থানের মানুষ সভ্যতা সংস্কৃতির উঁচুনিচু বিভিন্ন স্তরে রয়ে গেছে। কিন্তু মানবিক মৌল বৃত্তি-প্রবৃত্তি শিক্ষার, সভ্যতার সংস্কৃতির প্রভাবে নির্মূল হয় না, সুগুভাবে কিংবা গুপ্তভাবে থেকেই যায়, কখনো লুপ্ত হয় না। তা-ই প্রলোভন প্রবল হলে, সঙ্কট আসন্ন হলে, প্রাণ বিপন্ন হলে মানুষের সহজাত রিপু কাম-ত্রোধ-লোভ মোহ মদ মাৎসর্য প্রকট হয়ে ওঠে। এমনি অবস্থায় দেশ-কাল-পাত্র ভেদ নেই। বা দুনিয়ার মানুষের এ ক্ষেত্রে প্রজাতিক ভাব চিন্তা কর্ম আচরণ

অভিন্ন। তা-ই লোকসাহিত্য আলোচনায় আজকাল ‘মটিফ’ বিন্যাস ও বিশ্লেষণ জরুরী বলে মনে করেন বিদ্বানরা ও সমাজবিজ্ঞানীরা। আমরা এ গ্রন্থে লোকসাহিত্য আলোচনা করব না, কেবল গাথার তথা পূর্ববঙ্গে সংগৃহীত গীতিকাগুলোর বৈশিষ্ট্য সম্বন্ধে দু’চারটে কথা বলব— ভিন্ন প্রয়োজনে।

লোকসাহিত্যের জনের মতো মৃত্যুও রয়েছে। যা’ লোকের চিন্তা-চেতনার ও অভিজ্ঞতার অনুগত নয়, তা সৃষ্টি হলেও টিকে থাকে না। এককথায় জীবন-জীবিকা সম্পৃক্ত, গভীর অনুভবসম্পন্ন কিংবা নিবিড় অভিজ্ঞতাপ্রসূত প্রবচন, আশ্বাস, ঘোঁসা, প্রবাদ, তত্ত্বকথা, বিশ্বাস-সংস্কার, ভয়-ভরসাই কেবল চিরায়ু বা দীর্ঘায়ু হয়ে বেঁচে থাকে। তবে কালে কালে জনে জনে ভাষা বদলায়, এমনকি ভাবেরও প্রসার কিংবা সংকোচন ঘটে। এ ক্ষেত্রে ডাকের ও বনার বচনের ভাষা ও ভাব পরিবর্তন কিংবা মৈথিলকবি বিদ্যাপতির বাঙলায় চালু পদাবলী স্মর্যব্য।

লোকরচনা বা লোকসাহিত্য মাত্রই আঞ্চলিক। কেননা অশিক্ষিত মানুষের ভাষা আঞ্চলিক বুলি-নির্ভর। তা অন্য অঞ্চলের মানুষের পক্ষে অবোধ্য দুর্বোধ্য বা অননুकरणीয় বলেই তার রূপ-রস-মাদুর্য অন্যদের আকৃষ্ট করে না। কাজেই লোকসাহিত্য চিরকালই অঞ্চলের সীমায় থাকে নিবদ্ধ। ময়মনসিংহগীতিকা কিংবা পূর্ববঙ্গগীতিকার সুসংস্কৃত ও পরিমার্জিত হয়ে লিপিবদ্ধ ও মুদ্রিত না হলে বাঙলাদেশের সর্বজনীন ও উপভোগ্য সাহিত্য রূপে গৃহীত হত না এ লোকগাথাগুলো। বাঙলার প্রত্যন্ত অঞ্চলের সাহিত্য হলেই এ গাথাগীতিকাগুলো। কাম-প্রেম দুটোই শাস্ত্র ও সমাজ দ্বোহী বৃত্তি-প্রবৃত্তি। কাজেই এ হচ্ছে দ্বোহীমানুষের কাহিনী। এই গাথাগীতিকাগুলো আমাদের লোকমানসের ও সোচ্ছলসমাজের অনন্য অতুল্য সৃষ্টি। প্রচলিত শাস্ত্র ও সমাজ নিয়ম ও নীতি, রীতি ও রেওয়াজ-জীহ্বত জবিন-জিজ্ঞাসার এবং প্রাণধর্মের প্রসূন এ সব ঘটনা ও চেতনা। শাস্ত্রচেতনা, সমাজনীতি ও প্রয়োজ বুদ্ধি উপেক্ষা করে সবকিছুর উপরে হৃদয়বৃত্তিকে— প্রাণের চাহিদাকে গুরুত্ব দেয়া, হৃদয়ের মূল্য-মর্যাদাকে শাস্ত্রের ও সমাজের উপরে ঠাঁই দেয়া, পারত্রিক জীবনের গুরুত্ব অস্বীকার করে ঐহিক বাস্তবজীবনে ও প্রয়োজনে মূল্য ও মহিমা আরোপ, জীবনে মাটির ও মানুষের, কামের ও প্রেমের, নীতিবোধের ও আদর্শ চেতনার, ক্ষমার ও ত্যাগের, লোভের ও রিরংসার, ঘেমের ও স্বন্দের, ক্রিয়ার ও প্রতিক্রিয়ার গুরুত্ব ও বাস্তবতা এই লোকগাথাতেই প্রথম অসংকোচ অভিব্যক্তি পায়। সংস্কৃত কিংবা বাঙলা লিখিত সাহিত্যে এমনটি দেখা যায় না। সমাজ-শাস্ত্রকে তুচ্ছ জেনে এ গণমানবেরা উচ্চ করে তুলে ধরেছিল হৃদয়বৃত্তিকে। হৃদয়ানুভূতির উপর পীড়নই হচ্ছে নিষ্ঠুরতম নির্যাতন। সে-নির্যাতনের ইতিকথাই হচ্ছে গীতিকাগুলো। লোকে বলে নারীরা রূপে কামে প্রেমে বিভ্রান্ত পুরুষকে ভেড়া বানিয়ে রাখে, কিন্তু গীতিকায় দেখি পুরুষের হাতে নানাভাবে নির্যাতিতা ও বিভ্রান্তি নারীর সারি।

এখানে নিস্তরঙ্গ ঘরোয়া জীবনে দেশ প্রচলিত পূর্বলব্ধ বা প্রিকনসিড ধারণাবশে জীবনের করুণতম ট্র্যাজেডী ঘটে যায়— বাইরের কোন আলোড়ন বা সংঘাত ছাড়াই যেমনটি ঘটেছে দেওয়ান-মদিনায়। এখানে সৎ-সন্তান সম্বন্ধে বিমাতার শোনা আশঙ্কা আর দুলালের আকস্মিক অভিজাত্যচেতনাই ঘটাল জীবনে বিপর্যয়।

মহয়া-নদেরচাঁদের জীবনের ট্র্যাজেডীর মূলে রয়েছে বর্ণ ও পেশা চেতনা আর রিরংসা। সর্বত্যাগী হয়েও সর্বশর্তে রাজি থেকেও প্রেমিক নদেরচাঁদের প্রেম ও প্রাণ মৃত্যুতে অবসিত। এমনি হৃদয়ঘটিত কাম-প্রেমের শিকার হয়ে কেউ হয়েছে বিবাগী, কেউ হারিয়েছে প্রাণ, কেউ

হারিয়েছে সতীত্ব, কেউ পেয়েছে কেবলই দাহ, কেউ পেয়েছে অকারণ কলঙ্কের ডালি। সুখ পায়নি তেমন কেউ। সুখের ও সম্ভাবনার স্মৃতি-সম্বল জীবনে দহনজ্বালা ও যন্ত্রণাই হয়েছে সার। তাই আমরা লীলা-কাজলরেখা-চন্দ্রাবতী-আয়নাবিবি-মহুয়া-মলুয়া-ভেলুয়া-সখিনা-সোনাই প্রভৃতির কথা ভুলতে পারিনে।

সুখ-সাক্ষ্যের চিত্র নয়, দুঃখ-যন্ত্রণা-ব্যর্থতার কথাই সাহিত্যের শ্রেষ্ঠ উপকরণ। এ কারণেই জগতের শ্রেষ্ঠ সাহিত্য, শ্রেষ্ঠ শিল্প, শ্রেষ্ঠ কাব্য ও শ্রেষ্ঠ নাটক ট্রাজেডী বা বেদনাজ্ঞাপক কিংবা বিয়োগান্ত- এ জন্যে শ্রেষ্ঠ সাহিত্য পাড়ে শুনে মনে হয় শেষ হয়েও হল না শেষ, রেশ গুঞ্জন তোলে মনে মননে।

বহুমনের পরিচর্যা, নানা রুচির মানুষের কালিক পরিমার্জনা গাথাগুলোর ভাব-ভাষা-ভাষা-ভঙ্গির আর উপমাদি অলঙ্কারের উৎকর্ষ গাথাগুলোকে শিল্পসুন্দর সাহিত্য স্তরে উন্নীত করেছে। এগুলো যেহেতু অকৃত্রিম ও আন্তরিক অনুভূতির ঋজু বহিঃপ্রকাশ, সেহেতু এগুলোর আবেদন সংবেদনশীল মনের গভীরে ঠাঁই করে নেয়। প্রাত্যহিক জীবনেও যে-কোন মানুষের অকৃত্রিম অনুভূতি- কেবল মুখের ভাষায় নয়- চোখে-মুখেও অভিব্যক্তি পায় এবং তা শ্রোতার হৃদয়বেদ্য ও মর্মভেদী হয়। অশিক্ষিত গ্রাম্য কবি-গায়ক-কথকদের এসব মৌখিক রচনাও অকৃত্রিম অনুভূতির ও অভিজ্ঞতার প্রসূন বলেই তিন-চারশ' বছর ধরে লোকপ্রিয় হয়ে লোকচর্যা টিকে থেকেছে। শাহ সূজা, দেওয়ান ফিরোজ, চন্দ্রাবতী প্রভৃতি যে সতেরো শতকের রচনা, তা প্রমাণের অপেক্ষা রাখে না। এসব ঐতিহাসিক ব্যক্তিত্বের সমকালে না হলে ইতিহাস-বিরল সে-যুগে স্মৃতিমুছন করে কেউ এসব গাথা রচনা করতে পারত না। প্রত্যক্ষ জীবন ও প্রতিবেশ থেকে গৃহীত বলেই গাথায় ব্যকুল বাকপ্রতিমা বা চিত্রকল্প এমন সুপ্রযুক্ত ও চমকপ্রদ, যা অনেক উৎকৃষ্ট কাব্যেও দুর্লভ। যাদের কাহিনীর প্রতি আকর্ষণ নেই, তারও এসব বিশিষ্ট বাকপ্রতিমার প্রতি অবশ্যই আকৃষ্ট হবে এবং কবির শক্তি-সামর্থ্যে বিস্ময় মানবে। সাধারণ পাঠকের তো কথাই নেই, ডক্টর দীনেশচন্দ্র সেন সম্পাদিত গীতিকার তারিফ রোম্যারোনা থেকে রবীন্দ্রনাথ অবধি সবাই উচ্ছসিত উচ্চকণ্ঠে করেছেন। রবীন্দ্রনাথ-উচ্চারিত প্রশংসা এরূপ : মৈমনসিং থেকে যে-সব গাথা সংগ্রহ করা হয়েছে তাতে বেজে উঠেছে বিশ্ব সাহিত্যের সুর। মানুষের চিরকালের সুখ-দুঃখের প্রেরণায় লেখা সেই গাথা। যদি বা ভিড়ের মধ্যে গাওয়া হয়েও থাকে, তবু এ ভিড় বিশেষ কালের বিশেষ ভিড় নয়। তাই, এ সাহিত্য সেই ফসলের মতো যা গ্রামের লোক আপন মাটির বাসনে ভোগ করে থাকে বটে, তবুও তা বিশ্বেরই ফসল- তা ধানের মঞ্জরী।'- লোকসাহিত্য হয়েছে এ বিশ্বজনের চিরমানবের সাহিত্য, চিরমানবের সম্পদ। কারণ মানুষের হৃদয়ের চিরকালের আর্তি এতে অভিব্যক্ত। গাথাগুলো একাধারে নারী-নির্যাতনের ও নারী-মহিমার প্রচারকাব্যও। উনিশ শতকের আগে নারীর প্রতি এত শ্রদ্ধা বা মমতা সুলভ ছিল না জীবনে কিংবা শাস্ত্রে ও সমাজে। এবার আমরা কিছু বাকপ্রতিমা কবিতুময় সুভাষণ উদ্ধৃত করছি :

পঞ্চ ফুলের মাঝে রে যেমন রসিক ভ্রমর/আঁখির উপরে কন্যাররে খেঁচিছে কামান।/
সাপের মাথায় যেমন থাইক্যা জলে মণি/ আন্ধাইর ঘরে থুইলে কন্যা জলে কাঞ্চা সোনা/
মুখেতে ফুইট্টা উঠে কনক চাঁপার ফুল। / লজ্জা নাই নির্লজ্জা ঠাকুর লজ্জা নাইরে তোর
/ গলায় কলসী বাইন্দা জলে ডুইব্যা মরি। / কোথা পাব কলসী কন্যা কোথা পাব দড়ি /
তুমি হও গহীন গাঙ আমি ডুইব্যা মরি। / বিনা সূতে গাথা মালা আমার লাগিয়া / সাপে

যেমন পাইল মণি পিয়াসী পাইল জল। / নদেরচাঁদ ও মহয়া : চান্দ সুরুজ যেন ঘোড়ায় চড়িল। / আমার বন্ধু চান্দ-সুরুজ কাঞ্চা সোনা জ্বলে / তাহার কাছে সুজন বাদ্যা জুনি যেমন জ্বলে। / কৈতর তৈরীর মত তারা দোনজন / যৌবন জোয়ারের জল আইল দরিয়ায়। / সাপে চিনে মণি আর, বেঙে বাইরার পাণি। / কাউয়ার বাসাৎ কুকিলের ছান মানিল পোষ। / যার সনে মজে মন বাদ বিচার নাই / কোন জনে সুখ পায় দুধ বেচি মদ খাই। / পানির সঙ্গে তেল মিশে না, চিনির সাথে নুন। / জাঁউরা সাপের মত করে ফোঁস ফোঁস। খাজুরিয়া মাথার চুল দাঁড়ি মোচ লাখা / হাত পা যেমন তার জারুর গাছের খাখা। / বাঘের মতন খাবা যে তার সিংহের মতন গলা / মৈষের মতন দৃষ্টি যে তার হাতীর মতন চলা। / মায়ে কান্দে বুক কুটি চুল ফেলায় ছিড়ি। / নাকের রক্তে ভাসে বৌয়ের বকের কাঁচুলি। / মেওয়া মিশ্রি সকল মিঠা মিঠা গন্ধাজল / তার থাক্যা মিঠা দেখ শীতল ডাবের জল। / তার থাক্যা মিঠা দেখ দুঃখের পরে সুখ / তার থাক্যা মিঠা যখন ভরে খালি বুক। / তার থাক্যা মিঠা যদি পায় হারানো ধন / সকল থাক্যা বেশি মিঠা বিরহে মিলন। / পান ফুল দিয়া কন্যায় তুইল্যা লও ঘরে / পুত্র আমার বাঁইচ্যা থাক লোহার কাঠি হৈয়া। / স্বগচিহ্না রোগচিহ্না সংসারচিহ্না দড় / যৈবন কালের পিরীত চিহ্না সকল চিত্তার বড়। / জলের যৈবন লৈয়া আঘাৎ মাস আইল। / সাক্ষী হইও চান্দ সুরুজ দিবস রজনী/ গাঙের পাড়ের হিজল গাছ শুন আমার কথা / গাঙের পাড়ের কেওয়া ফুল ফুইট্যা রইছ ডালে/সাক্ষী হইও নদীনালা আর ষষ্ঠপাখী / অভাগী সোনাইয়ে দিল কালবিধাতা ফাঁকি। / সত্য কথার বায়ু সাক্ষী আর ত সাক্ষী নাই। / দেখিতে যুবতীকন্যা পূর্ণিমার চান্দ। / রূপেতে জিনিয়াছে দেওয়ানি রতিন মদন। / চান্দ যেন ভাস্যা যায় কংস নদীর পাকে। / কৈতরা কৈতরী যেম্বা মুখে মুখ দিয়া। / বড় সুখ পাইল কন্যা কাননে আসিয়া। / মস্তক না রইল যদি কিসের কাম চূলে / বন্ধু যদি না মিলিল কি করিব কূলে। / চিড়িং মাছের সালুন আর গিরিচাঁইলের ভাত। / প্রথম যৈবন রূপ বাতাসে খেলায়। / অনাভাবে কেহ বেচে স্ত্রী-পুত্র কেহ বেচে মাইয়া / নিজের অন্তরের দুঃখ পরকে বুঝান দায়। / মনের মধ্যে নানান কথা নানানভাবে উঠে / সরা চাপা দিলেরে ভাত যে করে ফুটে। / দেব পূজার ফুল তুমি / তুমি গঙ্গার পানি / আমি যদি ছুঁই কন্যা হৈবা পাতকিনী। / স্নান কইরা মালিনী ফিরে চলে ঘরে / ভিজা কাপড়ে সোনার যৈবন বাইয়া বাইয়া পড়ে। / যে বৃক্ষের তলে যাই ছায়া পওনের আশে / পত্র ছেদ্যা রৌদ্দ লাগে দেখ কপাল দোষে। / আশা গেল বাসা গেল আর কিসের লাগ্যা বাঁচিরে। শাউনিয়া নদী যেমন কূলে কূলে পানি / অঙ্গে নাহি ধরে রূপ চম্পকবরণী। / সুন্দর বদন লীলার ফোটা পদ্মফুল / হাঁটিয়া যাইতে লীলার মাটিতে পড়ে চুল। / চাচার চিকণ কেশ লীলার বাতাসেত উড়ে / বর্ষাতিয়া চান্দে যেমন ক্ষণে আবে ঘিরে। / হাঁটিয়া যাইতে কন্যার যৌবন পড়ে ঢলি। / ফুটিয়া বনের ফুল থাকে যেমন বনে। / সাধিলে না থাকে যৈবন যত্নে নাহি আইসে। সঙ্গীতে বনের পশু সে-ও বশ থাকে / ভাটিয়াল গানেতে ঝরএ বৃক্ষের পাতা। / তোমার লাইগা ছিকায় তোলা গামছাবান্ধা দৈ / গামছা বান্ধা দৈ রে বন্ধু শালিধানের চিড়া / তোমারে খাওয়াইব বন্ধু সামনে থ্যাক্যা খাড়া। / মাটিতে পড়িলে কেহ নাহি তুলে ফুল। / দুগ্ধ দিয়া কালসাপে করিনু পোষণ। / বিষম চিত্তার কীট পশিল অন্তরে। / তোমারে দেখিব আমি নয়ন ভরিয়া / তোমারে লইব আমি হৃদয়ে তুলিয়া। / মূনির হইল মতিভ্রম হাতীর খসে পা / ঘাটে আস্যা বিনা ঝড়ে ডুবে সাধুর না। / বিনামেঘে হৈল যেন শিরে বজ্রঘাত। / অমৃত ভাবিয়া আমি খাইয়াছি গরল।

উদ্ধৃতি দীর্ঘ হল। গাথাগুলোতে চন্দ্রনাথ দে'র ও দীনেশচন্দ্র সেনের পরিমার্জনার ছাপ পড়েছে, ওগুলো আর অকৃত্রিম লোকসাহিত্য নেই প্রভৃতি মত ও মন্তব্যের প্রতিবাদস্বরূপ সুন্দর কথাগুলো উদ্ধৃত হল। এসব গ্রামের কবি-কথক-গায়কের অনুভব ও অভিজ্ঞতার বাণীরূপ বলেই আমাদের ধারণা। এই গীতিগুলোর আর এক বৈশিষ্ট্য এগুলো হিন্দু-মুসলমানের মিশ্র রচনা, এবং বিষয়ে ভাষায় ভঙ্গিতে শব্দপ্রয়োগে এবং একইভাবে বিভিন্ন গাথায় প্রায় একই ভাষায় অভিব্যক্তির পৌনঃপুনিকতা আমাদের স্মরণ করিয়ে দেয় যে হৃদয়ের কথায় জাত-জন্ম-বর্ণ-ধর্মের ও সামাজিক-সাংস্কৃতিক অবস্থানের ব্যবধান ঘুচে যায়। আর এমনি অবিকল অনুকৃতিও লোকসাহিত্যের লক্ষণ।

এ গাথাগীতিকাগুলো যে লোকরচনা-কোন কোন গাথায় রচয়িতার ভণিতা থাকা সত্ত্বেও তার প্রমাণ 'কঙ্ক ও লীলা' গাথাটি। এখানে চারজন কবি-কথক-গায়কের ভণিতা মেলে, এ চারজন হলেন নয়ানচাঁদ ঘোষ, শ্রীনাথ বানিয়া, রঘুসুত ও দামোদর দাস। একটি গাথা চারজন রচনা করতেই পারেন না, কাজেই এঁরা গায়ন-কথক। লিপিকৃত, গাথায় শ্রুতিধর লিপিকর আসরে যেমনটি শুনেছে, তেমনটি লিপিবদ্ধ করেছে অথবা গয়ন-কথকদের ব্যবহৃত পাতড়া থেকেই চন্দ্রকুমার দে ভণিতাসহ গাথার বিভিন্ন অংশ সংগ্রহ করেছিলেন। এ অনুমান সঙ্গত ও সত্য হলে মনসুর বয়াতি, নয়ানচাঁদ ঘোষ, দ্বিজ কানাই চন্দ্রাবতী প্রভৃতি বিভিন্ন গাথারচয়িতা বলে স্বীকৃত হলেও আসলে তাঁরাও গায়ক-কথক। তাঁদের জনপ্রিয়তার দরুন আর স্বনামে ভণিতা প্রয়োগজাত বিদ্রান্তির ফলে কালক্রমে লোকে এসব গাথা তাঁদের রচনা বলেই মনে রেখেছে।

আর একটি কথা, লোকসাহিত্য আমাদের ঐতিহ্য, - সম্পদ নয়। লোকসাহিত্য নিয়ে সগর্ব আঞ্চালনেরও কোন যৌক্তিকতা নেই। আর আজকের এ মুহূর্ত অবধি লোকসাহিত্য সৃষ্টি করার ও চালু রাখার কৃত্রিম শহুরে প্রয়াস অনর্থক ও নিন্দনীয় বলেই পরিহার্য।

প্রথমত, 'লোক' অভিধাটি হচ্ছে অবজ্ঞাজ্ঞাপক। লোক মানে অশিক্ষিত, অমার্জিত অজ্ঞ, গ্রাম্য প্রাকৃত জন, মনুষ্যসুলভ কোন কৃত্রিম অনুশীলনে পরিশীলনে যার কোন মানস-উৎকর্ষ ঘটেনি, প্রাণীর মতোই প্রকৃতির কোলে প্রাকৃতিক প্রতিবেশভিত্তিক যার জীবন। কাজেই 'ফোকলোর' মানে এই প্রাকৃত মানুষের প্রবৃত্তিচালিত এবং প্রায় অবচেতন জৈবপ্রেরণায় অর্জিত ব্যবহার, হাতিয়ার ও জীবিকা পদ্ধতির সামূহিক সম্বল ও সম্পদ, বিশ্বাস ও আচরণ, রীতি ও রেওয়াজ, নীতি ও নিয়ম। কাজেই 'ফোক, ফোকলোর, ফোকলিটারেচার- লোক, লোক ঐতিহ্য, লোকসাহিত্য, লোকজীবন প্রভৃতি কথার মধ্যে প্রচ্ছন্ন অবজ্ঞা রয়েছে। এ অনেকটা অস্পৃশ্যদেরকে গান্ধীর হরিজন নাম দেয়ার মতো, এতে পূর্ণমানুষ হিসেবে অস্পৃশ্যরা স্বীকৃত নয়, নারায়ণের জীব হিসেবে অনুকম্পা যোগ্যমাত্র।

লোকজীবন, লোক-সংস্কার, লোক-মন, লোকমনন, লোকসৃষ্টি ও ব্যবহৃত ব্যবহারিক সামগ্রী, লোকমানসপ্রসূন সাহিত্য ও শিল্প সবকিছুই অশিক্ষিত পটভূমির ও অসামর্থ্যের সাক্ষ্য। শিক্ষায় সংস্কৃতিতে সভ্যতায় অগ্রসর যুরোপে লোকজীবন ও লোক-সংস্কৃতি আজ অবসিত। আমাদের দেশ দারিদ্র্যদুষ্ট ও অশিক্ষার অন্ধকারে আচ্ছন্ন বলে আজো আমাদের শতকরা আশিজন মানুষ লোকজীবন অতিক্রমণে অক্ষম। এটি মর্যাদাজ্ঞানসম্পন্ন যে-কোন শহুরে

শিক্ষিত মানুষের পক্ষে লজ্জার ও ক্ষোভের বিষয়, কেননা এটি জাতীয় দৈন্যের ও জাতীয় সংস্কৃতি-সভ্যতার নিম্নমানের ও অপকর্ষের পরিচায়ক। আমাদের কাম্য হবে আরো রবীন্দ্রনাথ-আরো লালন সাঁই নয়।

লোকজীবন ও লোক-সংস্কৃতি বিষয়ক সবকিছুরই অবশ্য ঐতিহাসিক মূল্য রয়েছে সমাজ-বিজ্ঞানী ও ইতিহাসবিদের কাছে। অতীত যুগের মানুষের জীবনযাত্রার রূপরেখার ও জীবন-জিজ্ঞাসার এবং সমাজ-বিবর্তনের ধারার সন্ধান পেতে হলে তথাকথিত লোকসমাজের বাহ্যবস্তুর ও মানসসম্পদের আলোচনা আবশ্যিক। কালিক ও স্থানিক বিচারে গোত্রগত বা জাতিগত উৎকর্ষ-অপকর্ষের তুলনামূলক বিশ্লেষণও বাঞ্ছনীয়।

কিন্তু আজকের দিনে শিক্ষিত শহুরে ধনী-মানীরা নিজেদের জন্যে গাড়ি বাড়ি ফোন ফ্যান ফ্রিজ ও হরেক রকম তার-বেতার যন্ত্র কামনা করছে যখন, এবং নিজেদের পরিচিত অতীত গোপন করতে আর যুরোপীয় আদলে জীবন রচনায় ও যাপনে যখন ব্যগ্র, তখন তার প্রতিবেশীর জন্যে চিরস্থির মধ্যযুগীয় জীবনযাত্রা কামনা করা- যাতে তারা শন-নাড়া-বেড়ার ঘরে বাস করে চিরকাল অজ্ঞ অনক্ষর থেকে জেলেনৃত্যে কৃষাণনৃত্যে সাপুড়েনৃত্যে হাপুতে গাজনে গম্ভীরায়-ঝুমুরে-ছইয়ে তুট থাকে এবং শহুরে লোকদেরকে উৎসবে পার্বেণে যাতে অবজ্ঞার হাসি হাসাতে পারে- এক অমানবিক চেতনা বই কিছুই নয়। কাজেই লোকসাহিত্যের সৃষ্টি ও পুষ্টি আজো যাদের কাম্য তারা মাটির ও মানুষের মিত্র নয়, দেশ-জাত-মানুষের প্রতি প্রীতিহীন এমন ব্যক্তি সুরুচির বা ভব্য মনের বিবেকবান মানুষও নয়।

বলেছি, আমাদের কাম্য আরো রবীন্দ্রনাথ আরো লালন ফকির নয়। এ সূত্রে উল্লেখ্য যে কোন দেশের ও কোন সমাজের মানুষের শ্রেয়োচেতনাপ্রসূত পরিশ্রুত ভাব-চিন্তা-কর্ম-আচরণের অভিব্যক্তি রূপই তার সংস্কৃতি, তার শ্রেষ্ঠ গুণের ও কর্মের প্রকাশই তার সংস্কৃতি। যেমন দারুকারচারণশিল্প, সাহিত্য, চিত্রশিল্প, নৃত্য সংগীত প্রভৃতি সুকুমার-ললিতাদি চৌষট্ঠিকলায় এবং মনুষ্যপ্রীতি, সংযম ও সৌজন্য, দায়িত্ব ও কর্তব্যচেতনা, ন্যায় ও শ্রেয়োবোধ প্রভৃতি শ্রেষ্ঠ মানস-সম্পদে অধিকারই হল সংস্কৃতি। ভব্যসমাজের সংস্কৃতি সমাজের শ্রেষ্ঠ মানুষের ব্যক্তিগত সাধনার ফল ও মনীষার অভিব্যক্তি বা প্রসূন। কিন্তু লোকসংস্কৃতি এ সংজ্ঞাতুক্ত নয়। কোন দেশের, কালের ও সমাজের প্রাকৃতজনের অর্জিত আচরণে, কৌশলে, নৈপুণ্যে এবং কর্মে ও আচরণে, বিশ্বাসে ও সংস্কারে প্রকাশিত প্রাত্যহিক জীবনযাত্রাপদ্ধতির সামগ্রিক, সামুহিক ও সামষ্টিক রূপই বা জীবনচারই হচ্ছে লোকসংস্কৃতি। এ তাৎপর্যে লোকসংস্কৃতি হচ্ছে অনুকৃত ও অনুসৃত রীতিনিয়মের আবর্তিত গণরূপ।

লোকসাহিত্য, লোকশিল্প, লোকসংস্কৃতি নয়- এ যুগের কাম্যসাহিত্য হচ্ছে গণসাহিত্য, এ যুগের কাম্যসঙ্গীত গণসঙ্গীত, এ যুগের কাম্য সংস্কৃতি হচ্ছে গণসংস্কৃতি আর এ যুগের কল্যাণতত্ত্ব হচ্ছে গণকল্যাণ। তাই এ যুগের রাজনীতিও হচ্ছে স্বাধিকার প্রতিষ্ঠা লক্ষ্যে গণআন্দোলন- গণবিপ্লব। লক্ষ্য হচ্ছে অবিশেষ মানুষের জীবনযাত্রার মান উন্নয়ন আর আত্মার স্বাধীন বিকাশ।

আরো একটি কথা, মধ্যযুগের লিখিত বাঙলাসাহিত্য, সংস্কৃত ও ফারসি ভাষা-সাহিত্যের প্রভাব সত্ত্বেও উঁচুমানের ছিল না। মৌখিক লোকসাহিত্যে এবং ছন্দোবদ্ধ ও অলঙ্কারখচিত শিল্পসম্মত লিখিত সাহিত্যে পার্থক্য ছিল সামান্য। সে-ব্যবধান মুখ্যত ছিল ভাষাগত, নইলে রসগত রুচিগত বুদ্ধিগত চিন্তাগত আদর্শগত ও লক্ষ্যগত তফাৎটা দূস্তর ছিল না, তাই

মধ্যযুগের লিখিত ও মৌখিক সাহিত্যে আঞ্চলিক ও সাম্প্রদায়িকতার সুস্পষ্ট ছাপ থাকা সত্ত্বেও ছিল জনসাহিত্য- জনতার সাহিত্য অর্থাৎ সাক্ষর-নিরক্ষর কিংবা জাত-জন্ম-বর্ণ-ধর্ম নির্বিশেষে জনগণবোধগম্য ও বোধগত সাহিত্য। কাজেই উপভোগের আনন্দ থেকে বঞ্চিত হত না কেউ। এ তাৎপর্যে লোকসাহিত্য ছিল শিল্পসম্মত লিখিত সাহিত্যেরই অংশ। তখন সবটাই ছিল বাঙলার ও বাঙালীর সাহিত্য।

১৮০১ খ্রীস্টাব্দ থেকে কিংবা ১৮১৮ খ্রীস্টাব্দ থেকে অর্থাৎ ফোর্ট উইলিয়াম কলেজের গদ্য চর্চা থেকে অথবা সংবাদপত্র প্রচারকাল থেকেই নতুন শহুরে জীবন-চেতনা বাঙালীকে বৈস্তিক ও বৈষয়িক জীবনের অন্যান্য ক্ষেত্রের মতো- সাহিত্য ক্ষেত্রেও দ্বিধাবিভক্ত করে দিল- মানুষকে শিক্ষিত ও অশিক্ষিত, গ্রাম্য ও শহুরে, নতুন ও পুরোনো, ইংরেজি শিক্ষিত ও আরবি ফারসি-সংস্কৃত শিক্ষিত-দুই শ্রেণীতে চিহ্নিত করেনি শুধু, মধ্যখানে বিচ্ছিন্নতার প্রাচীর, অপরিচয়ের ব্যবধান ও অনাত্মীয়তার বাধাও করেছে চিরস্থায়ী। শিক্ষিত বাঙালীর আধুনিক সাহিত্যের শিল্পের সংস্কৃতির ও মননের বিচিত্র বিকাশ, প্রকাশ ও উৎকর্ষ কোটি কোটি স্বল্পশিক্ষিত ও অনক্ষর বাঙালীর কোন কাজে লাগেনি, করেনি তাদের কোন কল্যাণ, দেয়নি তাদের কোন আনন্দ, ছড়ায়নি তাদের মানসে কোন চিন্তার বীজ, মুক্ত করেনি তাদের চেতনার কোন দিগন্ত। অতএব শিক্ষিত বাঙালীর যা কিছু চিন্তা ও চেতনা, অভীষ্ট ও অশিষ্ট, কৃতি ও কীর্তি সবটাই শিক্ষিত শ্রেণীর প্রয়োজন ও স্বার্থ সম্পৃক্ত- গণমানবের অস্তিত্বই সেখানে অস্বীকৃত।

AMARBOI.COM

সপ্তদশ অধ্যায়

সাহিত্যে বিধৃত সমাজ ও সংস্কৃতির রূপরেখা

১. দুনিয়ার যে-কোন সমাজ-সংস্কৃতির বর্তমান রূপের আড়ালে রয়েছে প্রাণী হিসেবে আদি ও আদিম স্তরের বিদ্যা-বৃদ্ধি-জ্ঞান-প্রজ্ঞা-যুক্তি-সংস্কারবিরহী মানুষেরা বেঁচে থাকার গরজে প্রায় অবচেতন প্রেরণায় আত্মপ্রতিষ্ঠার ও আত্মপ্রসারের যে প্রয়াস চালাত তার লেশ ও রেশ, তাতে অবশ্যই ছিল না আত্মপ্রত্যয় কিংবা সাহস। তাই তারা তাদের জীবন-জীবিকার নিরাপত্তার বাঙ্কাবশে কল্পনা করত মিত্র ও অরি শক্তির অস্তিত্ব তথা থেকেই উদ্ভূত হয়েছেন দেবতা, উপদেবতা ও অপদেবতা। তাই মানুষের প্রাত্যহিক স্থূল জীবনের কৃটিং মানস-চেতনার অবলম্বন হয়েছে জন্মের, মৃত্যুর, রোগের, শিকারের, শস্যের নিয়ন্তারূপ প্রাকৃতশক্তি তথা মিত্র ও অরি দেবতা। যেহেতু তোয়াজে-তোষামুদে শত্রু-মিত্র দেবতাকে বশে রেখেই বাঁচার সাধনা করেছে মানুষ, সেহেতু জীবন ও জীবিকা এবং জন্ম-মৃত্যু-রোগ সম্বন্ধীয় যাবতীয় বিশ্বাসে-সংস্কারে, আচারে-আচরণে পৃথিবীব্যাপী ভব্যবর্বর আরণ্য-শহরে মানুষে মৌলিক মিল রয়েছে আজো। ভারত-মিশর-মেক্সিকো বা এশিয়া-য়ুরোপ-আফ্রিকা-অস্ট্রেলিয়া-আমেরিকা কিংবা অস্ট্রিক, দ্রাবিড়, রেড ইণ্ডিয়ান, অর্থ-অনার্য, প্রভৃতি দেশে বা মানুষে মিল রয়েছে দেব কল্পনার, পূজা-পার্বণের ও উদ্দেশ্যের ক্ষেত্রে। যেমন শস্যদেবতা সবদেশেই ছিল বা আছে, তেমনি রোগের ও মৃত্যুর দেবতা, অরণ্যে আছে মৃগয়াদির বনদেবতা, বৃক্ষের দেবতা ছিলই, আর ছিল সৃষ্টির দেবতা নানা নামে সূর্য, এবং টোটেম ট্যাবু যাদু ও সর্বপ্রাণবাদও এ সূত্রে স্বত্বব্য। সে-সবের লেশ ও রেশ কোন-না কোন আকারে বা আচারে রয়ে গেছে সভ্যতম সমাজেও। আমাদের একালের বাঙালীর ঘরোয়া ও সামাজিক নানা বিশ্বাসে-সংস্কারে, আচারে-আচরণে ওঁরাও-মুণ্ডা-হো-সাঁওতাল-মঙ্গোল-ভেডডিড-দ্রাবিড়ের অনুকৃতি, অনুসৃতি ও সাধারণ প্রভাব আজো দুর্লক্ষ্য নয়।

কিন্তু এখানে নৃতাত্ত্বিকের বা লোক-বিজ্ঞানীর কিংবা সমাজবিজ্ঞানীর মতো সমাজ-সভ্যতা-সংস্কৃতির ক্রমবিকাশের ধারার স্বরূপ বিশ্লেষণ আমাদের উদ্দেশ্য নয়, সাহিত্যে ও অন্যান্য সূত্রে পাওয়া তথ্যগুলো বিবৃত করাই আমাদের লক্ষ্য।

২. সেকালে সাধারণের কাছে ভবনের বাইরের ভূবন ছিল অজ্ঞাত। স্বল্পচাহিদার অজ্ঞ মানুষের গ্রামীণ জীবন ছিল স্বনির্ভরতার প্রতীক। কুয়োর মাছের মতো সংকীর্ণ পরিসরে তাদের ব্যবহারিক জীবন হত আবর্তিত। কল্পভ্রমে মিটিয়ে নিত বিশাল পৃথিবীকে জানার কৌতূহল। তাই অলৌকিক অস্বাভাবিক ভৌতিক দৈবিক চেতনাই ছিল তাদের সম্বল। জীন-পরী-দেও-দৈত্য-রাক্ষস-পক্ষী-মুক্ত-প্রভৃতি প্রাণী ছিল তাদের মনসজীবনের প্রতিবেশী। যাদু ও দৈবশক্তি

ছিল তাদের ভয়-ভরসার হেতু ও অবলম্বন। শাস্ত্র, সমাজ ও সরকার নিয়ন্ত্রিত জীবন ছিল নিয়মের নিগড়ে বাঁধা। তাই চিন্তা-চেতনা ছিল স্থিতিশীল তথা গতিহীন ও অপরিবর্তিত। এ কারণেই কালিক ব্যবধানের সামাজিক সাংস্কৃতিক জীবনের পার্থক্য ছিল প্রায় দুর্লভ্য।

যাতায়াতের সুবিধে ছিল না বলে একই দেশে অভিন্ন শাস্ত্রীয় সমাজের মধ্যেও অঞ্চলভেদে সামাজিক সাংস্কৃতিক আচারিক ও সাংস্কৃতিক পার্থক্য থাকত প্রকট। তাই অভিন্নরূপে কোন দেশ-কাল প্রত্যক্ষ করা সহজে সম্ভব হত না। কাজেই প্রাচীন ও মধ্য যুগে সর্ববঙ্গীয় সামাজিক, আচারিক ও সাংস্কৃতিক নিয়মনীতি ও রীতি-রেওয়াজ নিত্যন্ত শাস্ত্রীয় না হলে কৃটিং কদাচিৎ দেখা যেত। এমনকি কোন কোন দেবতাও ছিলেন নিত্যন্ত আঞ্চলিক এবং সাম্প্রদায়িক। ধর্মঠাকুর বাসুলী চণ্ডী যক্ষ ক্ষেত্রপাল প্রভৃতি স্মর্তব্য।

কাজেই আমাদের সংগৃহীত ও বিন্যস্ত সংস্কৃতিচিত্রও সার্বত্রিক ও সার্বজনিক নয়। তা ছাড়া শাস্ত্রিক, শৈক্ষিক ও আর্থিক অবস্থান ভেদে জাত-বর্ণ ভেদ, আচার-আচরণ ভেদ তো ছিলই। তবু জানবার বুঝবার সুবিধের জন্যে সামান্যীকরণেও সাদৃশ সন্ধানের প্রয়াস পেয়েছি-বিজ্ঞানসম্মত তথা যৌক্তিক না হলেও মানসসম্পদ হিসেবে এ চিত্রও বৃথা বা বার্থ হবে না।

আর এ কথা বলার অপেক্ষা রাখে না যে বিশ্বের কোথাও বহুধর্মাবলম্বী অধ্যুষিত কোন দেশেই অভিন্ন বিশ্বাস-সংস্কার, আচার-আচরণ, নিয়মনীতি, রীতি-পদ্ধতি, খাদ্যসামগ্রী, এমন কি একইরূপ পোশাকও থাকে না সব সম্প্রদায়ের। মুন্সিং-বার-ক্ষণ-তিথি-নক্ষত্র-লগ্ন প্রভৃতির গুভাশুভ চেতনাও অভিন্ন নয় সবার। কাজেই বাঙলাদেশেও হিন্দু-মুসলিম-বৌদ্ধ-খ্রীষ্টানের শাস্ত্র-সমাজ-সংস্কৃতি, বিশ্বাস-সংস্কার, আচার-আচরণ, নিয়মনীতি, রীতিপদ্ধতি, জীবনযাত্রার রূপ প্রভৃতির মধ্যে লঘুগুরু পার্থক্য রয়েছে, তবু আমরা সামান্য লক্ষণ ধরেই আলোচনা করছি। কেননা আকাশ ও মাটি, ঝড় ও বৃষ্টি, রৌদ্র ও শৈত্য তো অভিন্ন, হাট-বাট-মাঠ-ঘাট তো অভিন্ন। তাই আমাদের উদ্দিষ্ট হচ্ছে প্রতিবেশনিয়ন্ত্রিত জীবনচিত্র।

৩. বিদেশী, বিজাতি, বিধর্মী ও বিভাষী শাসক মুসলিমের সামাজিক সাম্য ও মানুষের জীবনের আর কৃতির মূল্যবোধ নিপীড়িত নিম্নবর্ণের হিন্দুমনে যে-জীবনচেতনা এবং কর্মের ক্ষেত্রে যে-প্রসারিত দিগন্তের সম্ভাবনা জাগিয়ে দিল, তার ফলে হিন্দুসমাজে ভাঙন ধরে। এর প্রতিকার প্রয়াসে ভারতের দিকে দিকে ধর্ম সমন্বয় ও ঐক্যের বাণী উচ্চারিত হ'তে থাকে। রামানন্দ, কবীর, নানক, রামদাস, বল্লভাচার্য, চৈতন্যদেব প্রমুখের নাম এ ক্ষেত্রে বিশেষ স্মরণীয়।

বাহ্যত ধর্মশাস্ত্রে ও ধর্মচরণে অধিকার প্রাপ্তি, সামাজিক জীবনে মর্যাদা লাভ, এবং পেশার ক্ষেত্রে প্রসারের প্রয়াসে এ ধর্মআন্দোলন শুরু হলেও আসলে হিন্দুর ধর্ম ও সমাজ রক্ষার এবং ইসলামের প্রসার রোধের অবচেতন চেষ্টাই ছিল এর মূলে। অনতিকাল পরে দণ্ডধর মুসলিমশক্তির প্রসারে বাধা দানের কিংবা সম্ভব হ'লে মুসলিম বিভাঙনের সচেতন প্রয়াস হিসেবেও এ প্রচেষ্টা প্রকট হয়ে ওঠে। বৈষ্ণব আন্দোলনে এ মনোভাবের আভাস আছে, আর শিখ সম্প্রদায়ে তা সক্রিয় প্রয়াসে পরিণতি লাভ করে। কিন্তু এসব ইতিহাসবেত্তা বিদ্বানের বিশ্লেষণ ও ভাষ্য। গণ-দৃষ্টিতে নতুন পরিবেশে অজ্ঞ মানুষের হৃদ-অরণ্যে যে-মুক জিজ্ঞাসা ও বোবা বেদনা গুমরে উঠেছিল, তা এ সম্ভদের বাণীর মাধ্যমেই দিশা পেল-পেল ভাষা। এ ক্ষেত্রে কবীর (১৩৮০-১৪৪০) ও নানকের (১৪৬৯-১৫৩৯) দানই সবচেয়ে বেশি। কবীরের বাণীতে ছিল দুই ধর্মের তাত্ত্বিক সমন্বয় ও দুই জাতির মানস ঐক্য বিধানের ইঙ্গিত। এদিক

দিয়ে গণ-মানবের 'দিল-কা বাত' যথার্থই অনুধাবন করেছেন তিনি এবং অভিব্যক্তি দিয়েছেন তাদের বন্ধ বাসনার। দুই হৃদয়-সাগরের মাঝখানে দাঁড়িয়ে মজমু-অল বাহরাইন ঘটানোর মহৎ কৃতিত্ব তাঁরই। এভাবে কবীর হৃদয়ক্ষেত্রে সমঝোতার সহিষ্ণুতার ও মিলনের যে-বীজ বপন করলেন, তা-ই পরবর্তীকালে সাধক নানকের সমাজসমন্বয় প্রয়াসে বিশেষ ফলপ্রসূ ও কার্যকর হয়। কবীর হৃদয়-অরণ্যকে উদ্যানে পরিণত করলেন, আর নানক সমাজ-জীবনে সমন্বয় ও ঐক্য সাধনের জন্যে যে-মিলন-ময়দান রচনা করলেন, তা শাসক-শাসিতের দ্বৈত জীবনে অনেকখানি মাধুর্য ও লাভণ্য দান করেছিল। আর এসব সম্ভের বাণীর, কৃতির ও আচরণের প্রভাব সর্বাঙ্গিক এবং সর্বব্যাপী যে হয়েছিল, তার সাক্ষ্য পরবর্তী কালের ইতিহাস সগৌরবে বহন করেছে। ষোল শতকে গোটা ভারতের সাংস্কৃতিক ইতিহাস তাই এক অপরূপ স্নিগ্ধ লাভণ্যের প্রলেপে উজ্জ্বল ও আকর্ষণীয়।

এসব নানা কারণে ষোল শতক ভারত-ইতিহাসে অত্যন্ত গুরুত্বপূর্ণ। এ শতক ভারতমনীষার পরিণতি ও পরিণামের কাল এবং সে-কারণেই অনন্য ও অসামান্য গৌরবের যুগ। যুরোপীয় বণিকেরা এ শতকেই এ দেশের সঙ্গে প্রত্যক্ষ বাণিজ্য সম্পর্ক স্থাপন করে। শাসক-শাসিতের মানস ও সংস্কৃতির সম্পর্কও এই শতকেই ঘনিষ্ঠ ও দৃঢ়ভিত্তিক হয়। এ শতকে তাই রেনেসাঁসের যুগও বলা চলে। শতকের শেষার্ধ্বে আকবরের শাসনকাল। তাঁর প্রজ্ঞাদৃষ্টি, ধর্মসমন্বয়ের মাধ্যমে এক জাতি গড়ে তোলার ভিত রচনায় তাঁর প্রচেষ্টা, তাঁর শিক্ষাসংস্কার, তীর্থ ও জিজিয়া কর পরিহার, হিন্দু-মুসলমানের মধ্যে সমাজ-সম্মত বৈবাহিক সম্পর্ক প্রবর্তনে উৎসাহ দান, কৃষির উন্নতি ও কৃষকের মজল সাধনের চেষ্টা, সতীদাহ নিবারণ প্রয়াসে কর্মচারী নিয়োগ প্রভৃতি দেশে ও সমাজে নতুন জীবনের ও জীবনবোধের সৃষ্টি করল। আকবরের অধিকার সারা ভারতব্যাপী ছিল না সত্য, কিন্তু তাঁর উদারনীতি ও প্রবুদ্ধ জীবনের প্রভাব পড়েছিল ভারতের সর্বত্রই।

ধর্ম ও আচার সমন্বয় প্রয়াসে আকবর নিজে example is better than precept নীতি গ্রহণ করেন। তিনি রাজপুত-কন্যা বিয়ে করেছিলেন। তিনি সূর্য ও অগ্নি স্তব করতেন। শাবান চাঁদের পূর্ণিমায় ব্রাহ্মণদের দ্বারা রাখিবন্দন উৎসবের প্রবর্তনও করেন তিনি।^১ ইলাহি ধর্মের প্রবর্তকও তিনি। তাঁর পুত্র জাহাঙ্গীর দীপালি ও শিবরাত্রি উৎসব পালন করতেন। তিনি পিতৃশ্রাদ্ধও করেন সিকান্দ্রায়।^২

ভারতে পৌত্তলিকতার প্রভাবে দেশজ মুসলিমসমাজে নানা বে-ইসলামী বিশ্বাস-সংস্কার ও আচার-আচরণ থেকে গিয়েছিল, তা বিদেশাগত সংখ্যালঘু মুসলিম পরিবারেও সংক্রমিত হয়। বিশেষ করে হিন্দুকন্যা বধূরূপে পরিবারে গৃহীত হলে বধূদের মাধ্যমে হিন্দুয়ানী আচার-সংস্কার মুসলিম ঘরে প্রবর্তিত হয়। মুঘলহরেমও এর ব্যতিক্রম ছিল না। একারণে জাহাঙ্গীরের আমলে ভারতের কোথাও কোথাও মুসলিম সমাজেও সতীদাহ প্রথা চালু ছিল।^৩ দারানিশকোহও মজমু-অল-বাহরাইন রচনা করে সমন্বয়ের উপায় খুঁজেছেন। আকবর নারীশিক্ষায়ও ছিলেন উৎসাহী। ফতেপুর সিক্রীর মহলে তিনি একটি নারী বিদ্যালয়ও প্রতিষ্ঠা করেছিলেন।^৪ সতীদাহ নিবারণে আকবরের প্রয়াসের কথা আকবরনামায় পাই : "But since the country had come under the rule of his gracious Majesty (Akbar); inspectors had been appointed in every city and district, who were to watch carefully over these

two cases : To discriminate between them and to prevent any women being forcibly burnt." বার্নিয়ারের চিঠিতেও এর উল্লেখ রয়েছে।^৭

৪. এবার বাঙলাদেশের কথা বলি। বিজয়ী বিজাতি, বিধর্মী ও বিদেশী শাসকগোষ্ঠীর সংস্পর্শে এদেশের হিন্দুসমাজেও নানা পরিবর্তন হয়েছে। বিদ্বানেরা বলেন দাক্ষিণাত্যের শঙ্কর, ভাস্কর, নিম্বার্ক, রামানুজ, মধ্ব, বল্লভ এবং উত্তর ভারতের রামানন্দ, কবীর, নানক, দাদু, রামদাস, চৈতন্য প্রমুখের বৈষম্যবিহীন মানবতাবোধ ও ধর্মতত্ত্ব ইসলামের প্রভাবপ্রসূত।^৮

মুসলিম সংস্পর্শে আসার পর উত্তর ভারতের মতো বাঙলার হিন্দুসমাজেও ভাঙন ধরে। মুসলিম সমাজের সাম্য, ভ্রাতৃত্ব ও পেশা গ্রহণের স্বাধীনতা এবং কর্মসূত্রে ভাগ্য পরিবর্তনের অবাধ সুযোগ (এসব বৌদ্ধসমাজেও কিছুটা ছিল, কিন্তু তা তখনও বিস্মৃত অতীতের কল্পচিত্র মাত্র) প্রভৃতি দেখে নিম্নশ্রেণীর হিন্দুমন বিচলিত হয়ে ওঠে। বাঙলায় ও বিহারে নিম্নশ্রেণীর হিন্দুরা ইসলামের প্রচায়ে জীবনের নতুন দিগন্ত দেখতে পেল। ধর্মান্তর যখন ব্যাপকহারে শুরু হল, তখন স্মার্ত রঘুনন্দন, রঘুনাথ শিরোমণি, শূলপাণি, বৃহস্পতি প্রমুখ শাস্ত্রবিদ হিন্দু-শাস্ত্রের বিধি-নিষেধের সংস্কার সাধন করে হিন্দুসমাজকে ভাঙনের কবল থেকে রক্ষা করতে প্রয়াস পেলেন। নুলু পঞ্চানন 'গোষ্ঠী কথা' রচনা করে বর্ণবিন্যাস সুনিয়ন্ত্রিত ও দৃঢ়ভিত্তিক করার প্রয়াসী হলেন। জাতিমালা কাছারী নামে এক পরিষৎ প্রতিষ্ঠা করেও জনগণকে সমাজশাসনে রাখবার চেষ্টা করা হয়।^৯

এতো করেও যখন ভাঙন রোধ করা সম্ভব হলো না, তখন বিশ্বস্তর মিশ্র উত্তর ভারতের সন্ত ধর্মের অনুসরণে এবং সুফীমতের অনুকরণে স্বাধী-কৃষ্ণ রূপকে প্রেমধর্ম প্রচার করেন। এতে ইসলামের প্রসার রোধ করা সম্ভব হয়েছিল। যে-সব সুযোগ-সুবিধার লোভে ইসলামের প্রতি আকর্ষণ জেগেছিল, সেগুলোর সব কুয়টিই চৈতন্যপ্রবর্তিত সমাজে মানুষের মৌলিক অধিকার হিসেবেই স্বীকৃতি পেল।

সাম্য [কীর্তন] যিকর [নামজপ], হাল [দশা] দারিদ্র্য, বিনয়, আর্তের সেবা, সহিষ্ণুতা, ক্ষমা বর্ণহীন সমাজ, তালুক, নারীর পুনর্বিবাহ প্রভৃতি বাহ্য আচার-আচরণেও সুফী বৈষ্ণবে মিল অনেক। তাছাড়া গঙ্গায় সন্তান বিসর্জন, মদ্যপান, নর ও পশু বলি, সতীদাহ প্রভৃতি সুপ্রাচীন ব্রাহ্মণ্যপ্রথা আর সংস্কারও মুসলিম প্রভাবেই বর্জিত হয়।^{১০}

চৈতন্যচরিতামৃত^{১১} পীর ও কাজীর সঙ্গে চৈতন্যদেবের শাস্ত্রীয় বিতর্কের বিবরণ রয়েছে এবং তাঁর শিক্ষাষ্টক মন্ত্বেও রয়েছে সুফীপ্রভাব। এতে মনে হয় ইসলাম তথা সুফীতত্ত্বে চৈতন্যদেবের অধিকার ছিল। এভাবে হিন্দুর ধর্মজীবনে, দৃঢ়মূল হয় মুসলিম প্রভাব।

আবার, এক জায়গায় প্রভাব পারস্পরিক হওয়াই স্বাভাবিক। তাই সাধারণের তো কথাই নেই, এমনকি বাঙলার নওয়াবও হিন্দুয়ানীপ্রভাব এড়াতে পারেননি। নওয়াব আলিবর্দীর ভ্রাতুষ্পুত্র শাহমতজঙ্গ ও সৌলতজঙ্গ মোতিঝিলে, সিরাজদ্দৌলা মনসুরগঞ্জে এবং মীরজাফর গঙ্গাতীরে হোলি-উৎসব পালন করতেন।^{১২} মীরজাফর মৃত্যুশয্যায় কিরীটেস্বরীর পাদোদকও পান করেছিলেন।^{১৩}

সাহিত্যে মুসলমানেরা রামায়ণ-মহাভারতের ও মঙ্গলকাব্যের প্রভাবে হিন্দু পুরাণের বহুল ব্যবহার করেছেন— কাহিনী নির্মাণে ও উপমাদি প্রয়োগে। আর বৌদ্ধ যোগ-তত্ত্বের ও বেদান্তের প্রভাব পড়েছে সুফী বাউলের সাধনায়।^{১৪}

সতাপীর, বড়খাগাজী, কালুগাজী, বনবিবি, ওলাবিবি, উদ্ধারবিবি প্রভৃতি লৌকিক পীর দেবতার প্রভাবও পড়েছে নিম্নবস্ত্রের মুসলমানদের উপর সবচেয়ে বেশি। আবদুল গফুরের গাজীনামায় গঙ্গা, দুর্গা, পদ্মা, শিব প্রভৃতি গাজীর আত্মীয় বলে বর্ণিত।^{১০} 'De Tassy-র মতে হিন্দুর দেবপূজায় আর মুসলমানের পীর ও দরগাহ পূজায় কোনো পার্থক্য নেই'।^{১১} সম্ভবত দেবপূজার সংস্কারবশেই পীরপূজাকে অবলম্বন করে পার্শ্ববর্তী জীবনের স্বপ্নি বুজেছেন মুসলিমরা।^{১২}

যবনসম্পর্কদোষে হিন্দুসমাজে লোক একেবারে পতিত হত না। অত্তুতচার্যের রামায়ণে পাই এক পাঁতি : বল করি জাতি ল'এত যবনে/ছয়গ্রাস অন্ন যদি করায় ভক্ষণে/প্রায়শ্চিত্ত করিলে জাতি পায় সেই জনে'। দেবীবর ঘটক প্রভৃতিও যবনসম্পর্কদুষ্ট হিন্দুকে স্বসমাজে রাখার জন্যে নানা ব্যবস্থা রেখেছেন।

আর একথা না বললেও চলে যে, কারো সংস্কৃতি কখনো অবিমিশ্র থাকে না। কেননা ধর্ম কেবল মানস-জিজ্ঞাসা নিবৃত্তির উপকরণ নয়, ব্যবহারিক বিধিও তথা জীবনের আচার-আচরণ বিধিও। ধর্ম যদি বিদেশী হয়, তা হলে ধর্মসূত্রে পাওয়া সংস্কৃতিও বিদেশী। আবার শাসকগোষ্ঠীর সংস্কৃতির প্রভাব থেকেও নিষ্কৃতি নেই। শাসক যদি বিদেশী ও বিজাতি হয়, তা হলে বিদেশী বিজাতি সংস্কৃতিরও মিশ্রণ ঘটে। তা ছাড়া যেখানেই নতুন ভাব-ভাবনা, কিংবা প্রাত্যহিক জীবনে অপরিস্রব বা বিলাসে প্রয়োজন তেমনি কোনো সামগ্রী আবিস্কৃত কিংবা তৈরি হয়, তাও গ্রহণ না করে পারা যায় না। কিন্তু তা সত্ত্বেও স্থানিক সংস্কৃতি লুপ্ত হয় না, কেবল জটিলতা ও রূপান্তর লাভ করে মাত্র। স্থানিক আবহাওয়া, খাদ্যবস্তু, প্রাত্যহিক প্রয়োজনীয় উপকরণাদির প্রাচুর্য ও বিরলতা, উপযোগ প্রভৃতিই স্থানিক সংস্কৃতি বর্জন বা বিস্মৃতির বড় বাধা। যেমন বাঙালী ভাত, মাছ, শাক, পিঠা, গুড়, বাঁশ, বেত ত্যাগ করতে পারে না। যেখানে বছরে নয়মাস ভূমি জলসিক্ত থাকে, সেখানে লুঙ্গি ধুতি, শাড়ি পরিহার করা অসম্ভব। গ্রীষ্মে দেহ যে-দেশে ঘর্মাক্ত হয়, সেখানে জামা গায়ে রাখা দুঃসাধ্য।

বৃত্তিগত শ্রেণীবিন্যাস

যজ্ঞযুগের আগে সমাজে ব্যবহারিক দ্রব্য ও বিলাস-সামগ্রী তৈরি হত মানুষের হাতে। তখন এক এক প্রকার বস্তু তৈরির জন্যে এক এক শ্রেণীর লোক থাকত, তারা গোত্রীয় পেশা হিসেবে পুরুষানুক্রমে একই বৃত্তি ধরে থাকত। ফলে সমাজে কৃষিকার্য থেকে কারু-দারু ও চারু শিল্প অবধি সব কাজের জন্যেই ভিন্ন ভিন্ন বৃত্তিজীবী গোষ্ঠী ছিল। কামার, কুমার, ছুতার, নাপিত, তাঁতী, ধোপা, মোল্লা, পুরুত প্রভৃতি সবাইকে নিয়েই দেশ ও সমাজ। এ-ব্যাপারে ভারতবর্ষে কালিক বা স্থানিক পার্থক্য বিশেষ ছিল না। তা হিন্দুসমাজে ধন ও বর্ণ-বৈষম্য সৃষ্টি করেছিল আর অন্য সমাজে করেছে কেবল ধন ও মান বৈষম্য। হিন্দু সমাজের বৃত্তিজীবীদের পেশা বদলালেও সমাজকাঠামো বর্ণবৈষম্যের দরুন অবিচ্ছিন্ন আছে। মুকুন্দরাম দেশজ মুসলমান বৃত্তিজীবী সমাজের একটি বর্ণনা দিয়েছেন :

রোজা নামাজ না করিয়া কেহ হৈল গোলা	তীরকর হয়্যা কেহ নির্মএ শরে।
তাঁসন করিয়া নাম ধরাইল জোলা।	কলন্দর হয়্যা কেহ ফিরে দিবারাতি।
বলদে বাহিয়া নাম বলয়ে মুকেরি	কাগজ কুটিয়া নাম ধরাইল কাগতি
পিঠা বেচিয়া নাম ধরাইল পিঠারী।	বসন রাঙ্গাইয়া কেহ ধরে রঙ্গরেজ
মৎস্য বেচিয়া নাম ধরাইল কাবারী	লোহিত বসন শিরে ধরে মহাতেজ।

নিরন্তর, মিথ্যা কহে নাহি রাখে দাড়ি । সুনত করিয়া নাম বোলাইল হাজাম,
 বানা বাক্সিয়া নাম ধরে সানাকার গোমাংস বেচিয়া নাম বোলায় কসাই
 জীবন উপায় তার পাইয়া তাঁতি ঘর । কাটিয়া কাপড় জোড়ে দরজির ঘটা ।
 পট পড়িয়া কেহ ফিরে নগরে

এমনি লবণনির্মাতা মূলুঙ্গি, পান উৎপাদক বারুই, পালকী-বাহক কাহার । অবশ্য কাঞ্চনে
 কৌলিন্য অর্জনের সুযোগ সবসমাজেই সবসময়েই ছিল । অতএব সমাজে আসল বৈষম্য ছিল
 ধনী-নির্ধনে, আতরাফে-আশরাফে বা অভিজাত-অনভিজাতে এবং সম্পদ, শিক্ষা, সংস্কৃতি, বৃত্তি
 ও বংশভেদে কেউ ঘৃণ্য ও অবজ্ঞেয়, কেউবা শ্রদ্ধেয় ও মান্য ছিল । মুকুন্দরাম ইজারপরা
 বিদেশাগত মুসলিমসমাজের একটি স্থূল অথচ আদর্শায়িত চিত্রও দিয়েছেন :

ফজর সময়ে উঠি	বিছায়া লোহিত পাটি	পাঁচ বেরি করএ নামাজ
ছিলিমিলি মালা ধরে,	জপে পীর পেগাম্বরে	পীরের মোকামে দেই সাঁজ ।
দশ বিশ বেরাদরে	বসিয়া বিচার করে	অনুদিন কিতাব কোরান
সাঁজে ঢালা দেই হাতে	পীরের শিরনী বাঁটে	সাঁখে বাজে দগড় নিশান ।
বড়ই দানিশমন্দ	কাহাকে না করে হন্দ	প্রাণ গেলে রোজা নাহি ছাড়ি
ধরএ কছোজ বেশ	মাথে নাহি রাখে কেশ	বুক আছাদিয়া রাখে দাড়ি ।
না ছাড়ে আপন পথে	দশ রেখা টুপি মাথে	ইজার পরএ দঢ় করি
যার দেখে খালি মাথা	তা মনে না কহে কত	সারিয়া চেলার মার বাড়ি ।

ক. ধন হোস্তে অকুলীন হয়ন্ত কুলীন বিনি ধনে ছয় যথ কুলীন মলিন ।

খ. নির্ধন হইলে লোক জাতি না আদরে, ফলহীন বৃক্ষে যেন পক্ষী নাহি পড়ে ।

ধনবন্ত মুখক পূজএ সর্বলোক ।

গ. কৃতী ও কীর্তিমান পুরুষ-সে-ই, যে দোলাঘোড়া চড়ে, আর দশবিশ জন যার
 আগেপাছে নড়ে ।'

আসলে সমাজে বেনামাজী, চোর ডাকু, লম্পট, মিথ্যাবাদী জুয়ারী প্রভৃতি সবই ছিল । সৈয়দ
 সুলতানের শিষ্য কবি মুহম্মদ খান তাঁর 'সত্যকলি বিবাদ সম্বাদে,' পাপমতি মানুষের বর্ণনা
 দিয়েছেন, সৈয়দ সুলতান ইব্রিসের ভূমিকা বিশ্লেষণ করে পাপকর্মাদি দেখিয়েছেন, আলাউল
 'তোহফা'য় পাপকর্মের কথা বলেছেন । সমাজে তাঁদের বর্ণিত পাপকর্ম ও খল চরিত্র বিরল ছিল
 না, নইলে নসিহাতের প্রয়োজন থাকত না ।

হিন্দু সমাজে বৃত্তিনির্ভর শ্রেণীর নাম আঠারো শতকের কবি ভারতচন্দ্রের বর্ণনায় নিম্নরূপ :

ব্রাহ্মণ মণ্ডলে দেখ বেদ অধ্যয়ন	বেনে মণি গন্ধ সোনা তাঁসারী শৌখারী ।
ব্যাকরণ অভিধান স্মৃতি দরশন ।	গোয়লা তাম্বুলী তিলি তাঁতি মালাকার
ঘরে ঘরে দেবালয় শপথ ঘটাব	নাপিত বারুই কুরী কামার কুমার ।
শিব পূজা চণ্ডীপাঠ যজ্ঞ মহোৎসব ।	আগরি প্রভৃতি আর নাগরী যতেক
বৈদ্য দেখে নাড়ী ধরি কহে ব্যাধিভেদ	যুগী চাষা ধোপা চাষী কৈবর্ত অনেক ।
চিকিৎসা করয়ে পড়ে কাব্য আয়ুর্বেদ ।	সেকরা ছুতার সুরী ধোপা জেলে গুড়ী
কায়স্থ বিবিধ জাতি দেখে রোজগারী	চাঁড়াল বাগদী হাড়ী ডোম মুচি গুড়ী ।
কুরমী কোরঙ্গা পোদ কপালী তেয়র	বাইজী পটুয়া 'কান কসবী যতেক
কেলি কলু ব্যাধ বেদে মালী বাজিকর ।	ভাবক ভক্তির ভাঁড় নর্তক অনেক ।

[বিদ্যাসুন্দর (অন্নদামঙ্গল) পুরবর্ণন]

বিভিন্ন ক্ষেত্রে সংস্কৃতির মান

১. শিক্ষা

মনে রাখতে হবে শিক্ষায় দাস শ্রেণীর এবং নিম্নবর্ণের বৃত্তিজীবীর অধিকারই ছিল না। এদের শিক্ষায় অধিকারজাত ঐতিহ্য গড়ে ওঠেনি বলেই পরে মুঘল আমলে ও ইংরেজ আমলে অধিকার ও সুযোগ পেয়েও তারা ঐতিহ্যের অভাবে লেখাপড়ায় আগ্রহী হয়নি।

বিদ্যাচর্চা সভ্যতার ভিত্তি এবং সভ্য সমাজের মৌল কর্তব্যের একটি। ইখতিয়ারউদ্দীন মুহম্মদ বখতিয়ার খিলজী দেশজয়ের পরেই লখনৌতে মাদ্রাসা প্রতিষ্ঠা করেছিলেন। N.N. Law তাঁর 'Promotion of Learning during Muhammadan Rule' গ্রন্থে বলেছেন : The Muhammadan invasions of India marked the beginnings of momentous changes not only in the social and political spheres but also in the domain of education and learning (p. xiv). সুফী-দরবেশ ও আলীমের খানকা, মসজিদ, এতিমখানা, লস্করখানা প্রভৃতির সঙ্গে মক্তব মাদ্রাসাও স্থাপন করতেন, ব্রাহ্মণদেরও সন্তানদের শাস্ত্র শেখানো পেশার জন্যে অপরিহার্য ছিল। তাই টোলে ও মক্তব মাদ্রাসাতে সাধারণ শাস্ত্রশিক্ষায় নজর ছিল বেশি। কায়স্থবৃত্তির জন্যে অবশ্য দরবারী ভাষা, গণিত তথা Knowledge of three R's—ও অবহেলা পায়নি। আকবরের শিক্ষাসংস্কারে দেখতে পাই 'His Majesty orders that every schoolboy should first learn to write the letters of the alphabet and also to trace there several forms. He ought to learn the shape and name of each letter, which may be done in two days, when the boy should proceed to write the joint letters. The boys should learn some prose and poetry by heart— Care is to be taken that he learns to understand everything himself, but the teacher may assist him a little The teacher ought especially to look after five things: knowledge of the letter, meaning of words, the hemistich, the verse, the former lesson Every boy ought to read books on morals, arithmetic, the notation peculiar to arithmetic, agriculture, mensuration. geometry, astronomy, physiognomy, household matters, the rules of Government, medicine, logic, the Tabii, riyazi, itahi sciences and history, all of which may be gradually acquired. এই পদ্ধতি shed a new light on schools and cast a bright lustre over Madrasahs,"

আবার, হিন্দুদেরও শাস্ত্র আর বিদ্যাচর্চার কেন্দ্র ছিল মিথিলা। তা যখন তুর্কি বিজয়ের পর ভেঙে গেল, তখন নবদ্বীপই হলো ব্রাহ্মণ্য শাস্ত্র ও সংস্কৃতি চর্চার এবং বিদ্যার্জনের কেন্দ্র। নব্যন্যায়, স্মৃতির নতুন ভাষা ও গৌড়ীয় নববৈষ্ণবমত এখানেই সৃষ্টি হয়। নবদ্বীপের বুদ্ধিজীবী হিন্দুরা হিন্দুজাতির রাজনৈতিক অভ্যুত্থানের স্বপ্নও দেখতেন। তারই অভিব্যক্তি পাই 'গৌড়ে ব্রাহ্মণ রাজা হবে হেন আছে' উক্তি। বৃন্দাবনদাসের 'চৈতন্যভাগবতে' নবদ্বীপে বিদ্যাচর্চার এবং পড়ুয়ার আধিক্যের কথা শুনি :

পড়ুয়ার অন্ত নাহি নবদ্বীপ পুরে ...

নবদ্বীপে পড়ি লোক বিদ্যারস পায়।

একো অধ্যাপকের সহস্র শিষ্যগণ। ...

অতএব পড়ুয়ার নাহি সমুচ্চয়

সভে মহাঅধ্যাপক করি গর্ব ধরে
বালকেও ভট্টাকার্য সনে কক্ষা করে।
নানাদেশ হৈতে লোক নবদীপে যায়
এর আগে বৌদ্ধযুগে বাঙালীর বিদ্যা চর্চার কেন্দ্র ছিল নালন্দা, উড়িড়য়ানা বিক্রমশীলা প্রভৃতি।
কাজেই বাঙলার সংস্কৃতির উৎস ও আদর্শ উত্তর ভারতই। দেশে-দেশান্তরে পণ্ডিতরা তর্কযুদ্ধে
জয়ী হয়ে দিগ্বিজয়ী পণ্ডিতরূপে সম্মানিত ও প্রখ্যাত হতেন। আর ঘরোয়া ও সামাজিক
পরিবেশে শ্রুতিস্মৃতির মাধ্যমে লোকশিক্ষার ব্যবস্থাও ছিল। উপকথা ইতিকথা কিংবদন্তী
রূপকথা ছাড়াও ডাক-খনার বচন, আশুবাণ্য, চাপকাণ্ডোকা, সাদীর বয়েত, প্রবাদ, প্রবচন এবং
কথকতা, গায়নের আসর ও মৌলবীর ওয়াজ প্রভৃতি ছিল লোকশিক্ষার বাহন বা মাধ্যম।

বর্ণে-বিন্যস্ত হিন্দু সমাজে শাস্ত্রীয় আচার পালনের জন্যেই ব্রাহ্মণ পণ্ডিতের প্রয়োজন।
কাজেই বিদ্যার বিভিন্ন শাখার ব্যুৎপন্ন পণ্ডিত না থেকেরি পারে না। ব্রাহ্মণের বৃত্তিই হচ্ছে যজন-
যাজন। কাজেই পেশার খতিরেই তাদের বিদ্যার্জনের প্রয়োজন ছিল, তাই বলে ব্রাহ্মণমাত্রই
শিক্ষিত ছিল না, আবার শূদ্রাদির শাস্ত্রেও শিক্ষায় (কেননা ব্রাহ্মণ, কায়স্থ বা বৈদ্য অস্পৃশ্যকে
পাঠদানে সম্মত ছিলেন না) অধিকার ছিল না বলে সমাজের বহু লোক পুরুষানুক্রমে অশিক্ষিত
থাকত। বর্ণহিন্দুদেরও শাস্ত্রশিক্ষায় অবাধ অধিকার ছিল না।

কাজেই তাদের কাছারীতে কাজ পাবার মতো সাধারণ বিদ্যা অর্জনের (কাঠাকালি
বিঘাকালি সুদ ও মণ কষা পণকিয়া প্রভৃতি) দিকেই লক্ষ্য থাকার কথা। তুর্কীবিজয়ের পরে
ব্রাহ্মণ-ভীতিমুক্ত হাড়ি ডোম বাগদী কৈবর্ত প্রভৃতি অস্পৃশ্য বর্ণের লোকদেরও কেউ কেউ কিছু
কিছু লেখাপড়া শেখে। দেশী মুসলিমরাও সংস্কৃত শিখত। বিশেষ করে কবিদের পক্ষে এভাবেই
সম্ভব হয়েছে মুসলিম রচিত বাঙলা সাহিত্যে উপমাদি অলঙ্কার হিন্দুর রামায়ণ-মহাভারত ও
পুরাণাদি থেকে নেয়া। বৌদ্ধদের মধ্যে কিছু ভিক্ষু বিশেষ করে শাস্ত্রে পাণ্ডিত্য অর্জনে আগ্রহ
রাখতেন চণ্ডীমঙ্গলে মুকুন্দরাম পড়ুয়ার পাঠ্যতালিকা দিয়েছেন।^{১৮} দেশের বিভিন্ন স্থানে টোল ও
চতুষ্পাঠী ছিল মদ্রাসা ছিল উচ্চবিশ্বের মুসলিম অধ্যুষিত অঞ্চলে এবং মসজিদে মসজিদে ছিল
মক্তব। বখতিয়ার খিলজী দেশজয়ের পরেই লখনৌতীতে মদ্রাসা প্রতিষ্ঠা করেছিলেন।^{১৯} সে
আদর্শ অনুসৃত কিংবা সে-প্রচেষ্টা মুসলিম অধ্যুষিত অঞ্চলে অনুকৃত হবে এ-ই স্বাভাবিক।
পরোক্ষসূত্রে বাঙলাদেশের মুসলিম শিক্ষাসম্পর্কিত যে চিত্র পাই, তাতে এ অনুমান অযৌক্তিক
নয়। বিপ্রদাস পিণ্ডলাই বলেন— মুসলমানেরা শিখাএ নামাজ ওজু সদাই মক্তব রঞ্জু,
মুকুন্দরাম বলেন 'যত শিশু মুসলমান তুলিল মক্তব স্থান মখদুম পড়া এ পঠন।'

আঠারো শতকের 'শমসের গাজীনা'য় আছে শমসের গাজী প্রতিষ্ঠিত বিদ্যালয়ে আরবি,
ফারসি ও বাঙলা পড়ানো হতো।^{২০} দয়াময়ের 'সারদামঙ্গল' পাই :

চারি শাস্ত্রে সমুদয় পড়াবে সকল, নাগরি ফারসি কিবা বাঙ্গালা উৎকল।

সেকালে বাঙলা বিহার উড়িয়া নিয়েই গঠিত ছিল সুবাহ বাঙলা। তাই চাকরী পাবার
জন্যে বাঙলা, উড়িয়া, নাগরী (হিন্দুস্তানী) ফারসি— এ চার ভাষা জানতে হত। ধর্মমঙ্গলের কবি
নরসিংহ বসুর (১৭১৪ খ্রীঃ) পিতামহী তাঁকে 'বাঙ্গালা পারসী, উড়ী পড়াল্যা নাগরী'। অপর
কবি প্রভুরাম (১৭৪২-৩৩ খ্রীঃ) বলেন :

কাছেতে কায়স্থ কত করে লেখাপড়া
বাঙ্গালা সভার শোভে কাগজের গড়া।

বাঙ্গালা পড়ায়ে উড়ী নাগরি সুন্দর
লেখায় উত্তম সব যার যে দণ্ডর।

চীনা দূতের দোভাষী মাহ্য়ান (১৫ শতক), বলেছেন : The language of the people is Bengali, Persian is also spoken here^{১১} 'সৈয়দ সুলতানের' লঙ্করের পুরখানি আলিম বসতি' উক্তি 'শাসনকেন্দ্রে বিদ্যার বহুল চর্চার আভাস মেলে। দৌলত উজির বাহরাম খানের 'লায়লী মজনু' কাব্যে পুত্রের শিক্ষা ব্যাপারে আধুনিক পিতার উদ্বেগই লক্ষ্য করি :

সদায় অনেক শ্রুধা জনক মনএ

ভাগ্যবন্ত পুরুষের বিদ্যা অলঙ্কার।

সর্বশাস্ত্রে বিশারদ হৈতে তনএ।

বিদ্যা সে গলের হার বিদ্যা সে শৃঙ্গার।

চোয়াড়িতে লায়লী-মজনু প্রভৃতি বালক-বালিকার বিদ্যাভ্যাসের বর্ণনায় গায়ের অধিকাংশের ছেলেমেয়ে যে পাঠশালায় পড়তো, তার আভাস আছে। মনোহর রচিত শমশেরগাজীনায়ায় দেখি :

তোলাব খানায় ছাত্র শতক রাখিয়া

শিখাইল ছাত্রগণে বাঙ্গালার বাণী।

গাজিপালে সে সকল অনুবস্ত্র দিয়া।

ঢাকা হৈতে মুনসী আনি পারসি পড়ায়

সুন্দিপের অক্ষ এক হাফেজ আনিয়া

হেনমতে নানা ভাষাএ এলেম শিখায়।

কোরান পড়ায় সবে পুণ্যের লাগিয়া।

দিন মধ্যে নিয়ম করিল হেন মতে

হিন্দুস্থান হৈতে এক মৌলবি আনি

দশ দশ দণ্ড ধরি দুভাবে পড়িতে

আরবি এলেম ছাত্রগণে শিখাইল।

ভোর রাত্রি চারিদণ্ড আগাজে প্রহর।

জুগদিয়া হৈতে এক গুরুবর আনি

পাঠের সুময় করি দিল গাজিবর।

এতে আঠারো শতকে শিক্ষকের তথা শিক্ষিত লোকের দুর্লভতার সাক্ষ্যও রয়েছে।

আলাউলের তোহফায় 'এলম' এর মাহাত্ম্য পরিস্ফুটিত হয়েছে। এর মধ্যে শিক্ষাদান সম্পর্কে ইসলামের নির্দেশের প্রতিধ্বনি শুনি :

গুরুএ শিশুরে যদি বিসমিল্লাহ পড়াএ

সপ্তদিন আলিমের সেবে যেই নর।

গুরু মাতাপিতা শিশু বিহিস্তেত যাএ

করিলে প্রভুর সেবা হাজার বৎসর

হাজার আবিদ নহে আলিম সমান

হাজার শহীদ পুণ্য পায় সেই নর।

কহিছে পয়গম্বরে হাদিসে খবর

কাজেই হিন্দুটোল, বৌদ্ধবিহার এবং মাদ্রাসা কম থাকার কথা নয়। তবে সে যুগে লেখাপড়ার বহুল চর্চা কোথাও ছিল না। বিদ্যালয়েও ছাত্রমাত্রেরই বিদ্যা অর্জিত হয় না। আর মক্তব টোল থাকলেই সবাই সন্তানকে শিক্ষা দানে আগ্রহী হয়, তাও নয়। কোনো রষ্ট্রীয় বাধ্যবাধকতা না থাকলে লেখাপড়ার মূল্য ও মর্য বৃদ্ধি সন্তানকে বিদ্যালয়ে পাঠায় না সবাই। আজকের দিনেও তা দুর্লভ। পণ্ডিতের ও পাণ্ডিত্যের কদর ছিল রাজদরবারে। বিদ্বানেরা রাজদরবারে ঠাই পেতেন, পেতেন খেতাব ও খেলাত।

নারীশিক্ষাও সমাজে অজ্ঞাত ছিল না। সম্রাট আকবর তাঁর ফতেপুরসিক্রীর মহলে নারীশিক্ষার জন্যে বিদ্যালয় প্রতিষ্ঠিত করেছিলেন।^{১২} মালোয়া-রাজ গিয়াসুদ্দীনের ১৫,০০০ হেরেমবাসিনীর মধ্যে শিক্ষিকাও ছিল।^{১৩} মুঘল শাহজাদীদের প্রায় সবাই উচ্চশিক্ষিতা ছিলেন। এদেশে মেয়েদের শিক্ষাদানের প্রথা সুপ্রাচীন।^{১৪} লীলাবতী প্রভৃতির নাম এক্ষেত্রে স্মরণ্য। বাংলাদেশেও মহিলা কবিদের নাম এ প্রসঙ্গে উল্লেখ্য। মক্তবে ছেলেদের সঙ্গে মেয়েদেরও প্রাথমিক শিক্ষাদানের (অন্তত কোরআন পাঠ শিক্ষা) প্রথা ইসলামের সমকালীন। নারীশিক্ষা যে ছিল তার প্রমাণ কবি চন্দ্রাবতী, কবি রহিমুনিসা ও হীরামনি বা হরিবরের ঝি প্রভৃতি।^{১৫} ঐরা

সাধারণ পরিবারের মহিলা। সৈয়দ সুলতানের নবীবংশে পাই বিদুষী ঘোশী কন্যার কথা : সে নারী পণ্ডিত ছিল যথ মর্ম বুঝি পাইল।

বিদুষী ঘোশীকন্যার বর্ণনা রয়েছে দোনাগাজীর সয়ফুলমূলক-বদিউজ্জামাল কাব্যেও। মুকুন্দরামের চণ্ডীমঙ্গল দেখি লহনার খুলনার ও লীলাবতীর পত্রলেখার মতো বিদ্যা ছিল। বাস্তবেও কবি চন্দ্রাবতীকে হরিবরের ঝিকে আঠারো শতকের রানী ভবানীকে প্রিয়মদাদেবীকে আনন্দদেবীকে বৈজয়ন্তীদেবীকে এবং হট্ট (রূপমঞ্জরী) বিদ্যালঙ্কারকে সংস্কৃতজ্ঞ বিদুষীরূপে পাই। গোবিন্দচন্দ্রের গানে ময়নামতীর মুখে শুনি : পাঠশালে পড়ি আমি যাই নিকেতন।

শিক্ষা বলতে সে যুগে ধর্ম শিক্ষা দানই মুখ্য ছিল বলে^{১০} ব্রাহ্মণের ও অব্রাহ্মণের, হিন্দুর ও মুসলমানের বিদ্যালয় পৃথক ছিল। সাধারণত পণ্ডিতের ঘরে টোল, আলিমের ঘরে বা মসজিদে মজ্বব থাকত।^{১১} পাড়ার ছেলেমেয়েরা পণ্ডিত আলিমের বাড়ী গিয়ে পড়ত।^{১২} শিক্ষার্থীরা সামান্য দক্ষিণা বা নজরানা দিত। তাও অনেকে সময়ে কড়িতে নয়, ফসল তোলার মৌসুমে শস্যের বার্ষিক বরাদ্দে। আবার কোনো কোনো মসজিদেও সকালে মজ্বব বসত।^{১৩} কোথাও কোথাও স্থানীয় বিদ্যোৎসাহী ধনী বা জমিদার গুরুকে, উস্তাদকে বা পণ্ডিতকে, মৌলবীকে সামান্য বৃত্তিদান করতেন। ভূমিদান রীতিও চালু ছিল।^{১৪}

যারা টোলে মাদ্রাসায় শাস্ত্রীয় শিক্ষা গ্রহণ করতেন, তাদের জন্যে আলাদা পাঠশালা বা চতুষ্পাঠী ছিল। এরূপ বিদ্যালয়ে সাধারণত ব্রাহ্মণের বর্ণহিন্দু সম্ভানই পড়ত। এগুলোও পণ্ডিত বা উস্তাদের ব্যক্তিগত প্রচেষ্টায় প্রতিষ্ঠিত হত। তবে গায়ের লোক সহযোগিতা করত। কোথাও কোথাও বিত্তবান লোকের অর্থসাহায্যে উচ্চ শিক্ষার টোল ও মাদ্রাসা স্থাপিত হত। সে-সব বিদ্যালয়ে একাধিক শিক্ষক থাকতেন।

তবে ব্যক্তিগত বিদ্যালয়ই ছিল বেশি।^{১৫} আমরা চৈতন্যভাগবতে দেখতে পাই, নবদ্বীপের পণ্ডিতেরা নিজেদের ঘরে ঘরেই টোল খুলেছিলেন। মুসলিম ঐতিহ্য-সূত্রে শুনি, শেখ, আলিম, খোন্দকার ও সূফীরা নিজেদের ঘরে বসেই পাঁচ দশজন ছাত্র পড়াতেন। তাঁরা একাধারে ছাত্রের পোষাক, উস্তাদ এবং পীর মুশীদ ছিলেন।^{১৬}

শিক্ষকের মর্যাদা

সেকালে ধর্মীয় বিধিসূত্রেই গুরু-উস্তাদের অতুলনীয় মর্যাদা ও সম্মান ছিল। তার বেশ আজো অনুভূত হয় স্কুলে-কলেজে। পণ্ডিত মৌলবী মুনশী উস্তাদ মোল্লা খোন্দকার গায়ের উৎসবে-পার্বণে ও বিবাহে শাস্ত্রীয় অংশ সম্পন্ন করতেন। মুরগী জবেহ, ফাতেহা পাঠ, জানাজার ইমামতি, মসজিদে মুয়াজ্জিনের ও ইমামের কাজ করতেন। তাঁদের ভূমিকা কবির ভাষায় নিম্নরূপ :

মোল্লা পড়ায় নিকা	দান পায় শিকা শিকা	দোয়া করে কলেমা পড়িয়া।
করে ধরি খর ছুরি	কুকুড়া জবাই করি	দশগুণা দান পায় কড়ি
বকরি জবাই যথা	মোল্লায়ে দেই মাথা	দান পায় কড়ি ছয় বুড়ি। ^{১৭}

হিন্দু পণ্ডিতও পৌরোহিত্য, পাতিদান, কোষ্ঠীতৈরি, ভাগ্যগণনা ও শ্রাদ্ধাদি শাস্ত্রীয় অংশ সম্পন্ন করতেন।

ছাত্র-শাসন পদ্ধতি

সে-যুগে প্রাথমিক শিক্ষান্তরে বালক-কিশোর শিক্ষার্থীদের দুর্ভোগের অন্ত ছিল না। ছাত্রেরা শিক্ষকের চোখে ছিল গুরু-গাধারও অধম। শিক্ষাদানের জন্যে লাঠৌষধি প্রয়োগ তাঁরা অপরিহার্য মনে করতেন। সে-শাস্তি ছিল প্রায় অমানুষিক। তার জের বিশ শতকের গোড়ার দিকেও ছিল। শাস্তির নামও বিচিত্র : নাড়ুগোপাল (হাত-পা জড়ো করে রাখা, অনেকটা kneel down-এর মতো), কপাল চিড়া (ধান বা কাঁটা দিয়ে কপাল কেটে বা ফুটো করে রক্ত ঝরানো), সূর্যমুখ (প্রখর সূর্যের দিকে মুখ করে থাকা) প্রভৃতি। আবার বিছুটি পিঁপড়ে প্রভৃতি গায়ে লাগিয়ে দেয়া হত। দয়াময়ের^{৯৪} 'সারদামঙ্গল' আছে :

শিখিতে না পারে তবু শিখাইতে না ছাড়ে কভু কভু বাক্সা রাখে বুক বসে রয়
মারিয়া বেতের বাড়িএ ঠেঙ্গা করে। উচিত করএ শাস্তি যেদিন যে হয়।^{৯৫}

লেখাপড়ার উপকরণ

ক. কলম

সেকালে বালক-বালিকার লেখনী ছিল কঞ্চির তৈরি। আর বয়স্কদের কলম হত হাঁসের, শকুনের ও ময়ূরের পালকের। পালকের কলমেও শিল্পসৌন্দর্য কম থাকত না।

- খ. কালি তৈরির কয়েকটি পদ্ধতি ও উপকরণ^{৯৬}
- ক. কাজল গোমূত্র রায়ের জল ভঙ্গ ভেলা দিয়ে তোল
পীত কাঠ দিয়ে রসি তোটে পত্র নী তোটে মসি।
- খ. লোধ লাহা লোহার গুড়ি আকস্মিক যবার কুড়ি
গাবের ফল হরিতকী ভঙ্গাজনি আমলকী
বাবলা ছাল জাঁটির রস ডালিম ছেছে করিবে কষ
ভেলায় কর্যা ঝক আলি চারি যুগ না উঠবে কালি।^{৯৭}
- গ. তিন ত্রিফলা শিমুল ছার ছাগ দুক্ষে দিয়া তেলা
লোহা দিয়া লোহায় ঘসি মসি বলে অকাট বসি।^{৯৮}

বালক-বালিকারা লিখত কলাপাতায় (ধূলায় খড়ি ও কুটা দিয়েও লেখানো হতো)। আর অন্যেরা লিখতো তালপত্রে, ভূর্জপত্রে, বাকলে, পশুচর্মে, তেরট ও তুলোট কাগজে। মাহয়ান বাঙলাদেশে মসৃণ তুলোট কাগজের বহুল ব্যবহার দেখেছিলেন।^{৯৯} গোবিন্দচন্দ্রের গানেও আছে কাগজের উল্লেখ।^{১০০}

ছাত্র ও শিক্ষকেরা বসতেন চাটাই, পাটি, ফরাস, কুশাসন প্রভৃতির উপর। সেকালে ছাপাখানা ছিল না, চীনাদের আবিষ্কৃত ছাপা কল যুরোপে ব্যবহৃত হল, আমাদের দেশের লোক এই কলে গুরুত্ব দিল না। গ্রন্থগুলো পাণ্ডুলিপির আকারে চালু ছিল, প্রতিলিপি তৈরি করবার জন্যে পেশাদারী লিপিকর থাকতো। আঠারো শতকের গোড়ার দিক অবধি পাণ্ডুলিপি অগ্রথিত কাগজে লিখিত হত। তখন পাতার মধ্যস্থলে ডোর দিয়ে বাঁধবার জন্যে ফাঁকা স্থান থাকতো। আঠারো শতক থেকে মুসলিম সমাজে গ্রন্থ আধুনিক পুস্তকের আকারে বাঁধাই হতে থাকে। মুসলমানেরা ডানদিক থেকেই লিখত। হিন্দুরা চিরকাল অগ্রথিত পাণ্ডুলিপি তৈরি করত। মধ্যখানে সূত্র বা ডোররূপ গ্রন্থি দিয়ে বাঁধবার ব্যবস্থা ছিল বলেই পাণ্ডুলিপির নাম গ্রন্থ। যেমন

পুস্তক তথা চামড়ায় লিখিত হতো বলে পাণ্ডুলিপির অপর নাম ছিল পুস্তক বা পুস্তিকা। এর থেকেই পুথি ও পোখা নামের উৎপত্তি।

পাণ্ডুলিপিতে পাঠ নির্দেশের জন্যে পড়ুয়ারা ময়ূরপুচ্ছ প্রভৃতির নিশানা ব্যবহার করত। মুসলিম আমলে বিদ্যাচর্চার বহুল প্রচলন হয়, আর জিজ্ঞাসুক জ্ঞান দানের অগ্রহ বৃদ্ধি পায়। হিন্দুসমাজে জ্ঞান ও বিদ্যাঅর্জনে অধিকার ভেদ স্বীকৃতি হত। ফলে জ্ঞান-ও মন্ত্র ভণ্ডি একটি সাধারণ ব্যাপার ছিল। তাই যদুনাথ সরকার বলেন, "We owe to the Muhammadan influence the practice of diffusing knowledge by the copying and circulation of books, while the early Hindu writers, as general rule, loved to make a secret of their production."^{৪০}

আলাউল, মাগনঠাকুর প্রভৃতির পরিচিতি থেকে জানা যায়, শাস্ত্রচর্চা ছাড়াও ফারসি, সংস্কৃত, হিন্দি প্রভৃতি ভাষা এবং যৌনশাস্ত্র, নাট্যশাস্ত্র, কাব্য, অলঙ্কার সঙ্গীত প্রভৃতি শাস্ত্র ও কলা উচ্চশিক্ষার অন্তর্ভুক্ত ছিল। আর বাঙলায় সাংখ্য যোগ, তন্ত্র, নবান্যায়, ব্যাকরণ, স্মৃতির ভাষ্য প্রভৃতি সাংহে পঠিত হতো হিন্দু সমাজে।

২. চিকিৎসাবিদ্যা

ধর্মশাস্ত্র, এবং বিষয়কর্মে ও রাজকার্যে প্রয়োজনীয় বিষয়াদি ছাড়া আর যা বৃত্তি হিসেবে শিখতে হ'ত, তা চিকিৎসাবিদ্যা। হিন্দুদের মধ্যে শ্রেণী হিসেবে বৈদ্যেরাই আয়ুর্বেদ তথা চিকিৎসাশাস্ত্র অধ্যয়ন করত। মুসলমানেরা ইউনানী চিকিৎসাবিদ্যার তথা ভিকিয়াশাস্ত্র শিক্ষা করে হেকিম বা তবির হত। চট্টগ্রামের বৌদ্ধরা মঘা তথা বর্মী চিকিৎসা শাস্ত্র আয়ত্ত করে চিকিৎসা ব্যবসায় চালাত। শিশু চিকিৎসাবিদ্যা ও নারীচিকিৎসক চট্টগ্রামে আরাকানী শাসনের শ্রেষ্ঠ দান।

এ যুগের মতো সেকালে ঔষধের দোকান ছিল না। কাজেই চিকিৎসকেরা ঔষধও তৈরি করতেন, কবিরাজী তথা আয়ুর্বেদিক চিকিৎসাই বিশেষ জনপ্রিয় ছিল বলে মনে হয়। চট্টগ্রামে শিশুরোগে মহিলা চিকিৎসকের মঘাশাস্ত্রই বিশেষ কার্যকর বলে মনে করা হত। হোমিওপ্যাথিক চিকিৎসা জনপ্রিয় হওয়ার ফলে এখন মঘা-শিশুচিকিৎসারীতি লোপ পাচ্ছে।

এছাড়া সেকালে কুসংস্কারের আধিক্যবশত মুসলিম ঝাড়-ফুক ও দারু, মঘা, দারু টোনা তুকতাক-উচাটন, হিন্দুয়ানি মন্ত্র ও ঝাড়, তাবিজ-কবচ, তাগা-মাদুলি অত্যন্ত জনপ্রিয় ছিল। জ্বর থেকে মস্তিষ্কবিকৃতি অবধি সর্বপ্রকার রোগেই এসব ঝাড়-ফুক-তুক-তাক প্রযুক্ত হত। দেও-তাড়নেরও ছিল মন্ত্রপুত দারু এবং রোগেও বার-তিথি-ক্ষণের প্রভাব স্বীকৃত হত।^{৪১}

তাই চিকিৎসকেরা ছাড়াও সাধু-সন্ন্যাসী-যোগী-পীর-ফকিরেরাও নানা আধি-ব্যাধির চিকিৎসা করত : মোল্লার বচন এখন কাজির মনে লয়

তাবিজ লিখিয়া তখন সকলেই লয়।^{৪২} ফিরিত্তা সকলে তন্ত্রমন্ত্র শিখাইলা (নবীবংশ)

কলেরা-বসন্ত প্রভৃতির জন্যে হিন্দু-মুসলমান ও বৌদ্ধ নির্বিশেষে অপদেবতার পূজা শিরনী দিত, এখনো দেয়। ষষ্ঠী, শীতলা, ওলা ও মা ঘণিনীর সংস্কার আজো প্রবল।

ক. কচ্ছপের নখ আন কুন্তীরের দাঁত

কোটরের পেঁচা আন গোধিকার আঁত [চণ্ডীমঙ্গল]

খ. কাকড়ার বাম পাও, ইন্দুরের পিণ্ড

পেঁচার বাম চক্ষেরে ক'র কাজল রঞ্জিত [দ্বিজবংশীদাস]

এছাড়া তুকতাক, দারু-টোনা-উচাটন, বাণ-তাবিজ-কবচ তাগা-মাদুলি প্রভৃতি বশীকরণে ও শত্রু নিপাতে বৌদ্ধ ডাকিনী-যোগিনী ধারায় আজো জনপ্রিয়। বিশেষ করে পার্বত্য চট্টগ্রামের ও নেপালের আসামের বৌদ্ধরা আজো এসব গুহ্যবিদ্যায় সিদ্ধ বলে লোকের বিশ্বাস। দারু টোনার আর বিষের ও রোগের মন্ত্রের পুঁথি বাংলাদেশের সর্বত্র মেলে।^{৪৪} এগুলো সুপ্রাচীন। যদিও অজ্ঞ লোকের হাতে পড়ে বিকৃতিও ঘটেছে অনেক।

আর আমাদের দেশে সেকালের লোক-বিশ্বাসে অধিকাংশ লোণেরই উৎপত্তি ছিল ভূত, জীন, পরী, দেও ও কুনজর থেকেই। সত্যকলিবিবাদসম্মতদের গার্হস্থ্যবিধি নামের অধ্যায়ে এমনি নানা রোগের চিকিৎসাবিধি বর্ণিত রয়েছে।^{৪৫} গোয়েলেরা এখনো গায়ে পত্ত-চিকিৎসক আর নাপিতেরা ছিল অস্ত্র-চিকিৎসক।

৩. খাদ্য

হিন্দু-মুসলমান খাদ্য ব্যাপারে ধর্মীয় বিধি-নিষেধ মেনে চলতো। বৌদ্ধ ও নমঃশূদ্রদের আহাৰ্য্য ব্যাপারে বিশেষ স্বাধীনতা ছিল। তারা শূকর, গরু, মোরগ ও নানা পাখীর মাংস খেত। বিশ শতকে হিন্দু-সংস্কৃতির প্রভাবে পড়ে তারা শূকর, গরু ও মোরগাদি খাওয়া ছেড়েছে। ডাল, মাছ, শাক তরকারী ও ভাতই বাঙালীর প্রাত্যহিক খাদ্য। এরই বৈচিত্র্য সৃষ্টিতে হয় বত্রিশ ব্যঞ্জন।^{৪৬} চণ্ডীমঙ্গলে ও অন্য কয়েকটি কাব্যে রান্নার বিস্তৃত বর্ণনা রয়েছে।^{৪৭} কাঁজি বা আমনি ছিল গরীবের হালকা নেশায়ুক্ত পানীয়।^{৪৮} নিম্নস্তরের লোকেরা হয়তো ইঁদুর, গোসাপ, শূকরাদি জীব-মাংস ভক্ষণ করত। কোন কোন বৌদ্ধ সিদ্ধা কেবল কচু শাক খেতেন। কাঁকড়া ও কচ্ছপ আজো বর্ণহিন্দুর প্রিয় খাদ্য। আহারের সম্বন্ধে আরম্ভে নিমক শেষে মিষ্ট দ্রব্য খা- (তোহফা)।

বাঙালীর পিঠা প্রধানত চালের গুড়ো, তালের ইক্ষুর ও খেজুরের গুড়, রস শর্করা, তেল, কুচিং ঘি, তাল, কলা, দুধ প্রভৃতির যে-কোনো দুটো-তিনটির সংমিশ্রণে তৈরি হয়। এছাড়া চালভাজা মুড়ি মোয়া চিড়া বাতাসা প্রভৃতিও সুপ্রাচীন। এগুলোর মধ্যে স্বাদ-বৈচিত্র্য থাকলেও নৈপুণ্য বা উন্নত রুচির পরিচয় দুর্বল। বাঙালীর কৃতিত্ব (বিশেষ করে হিন্দুর) রয়েছে দুধের রূপান্তর ঘৃত, দধি, মাখন, ঘোল, সন্দেশ, পায়েস, রসগোল্লাদি নানামিষ্টান্ন তৈরিতে।^{৪৯} 'ওদন পায়েস পিঠা। পঞ্চাশ ব্যঞ্জন মিঠা। অবশেষে ক্ষীর খও কলা।'

কুল, আম, আমলকী প্রভৃতির আচার (সালাদ) তৈরির পদ্ধতি মুসলমানদের নিজস্ব।^{৫০} কিন্তু হিন্দুরা কাসুন্দি আমসি প্রভৃতি নানা জাতীয় টক করত।^{৫১} গরীবের ডাল ভাত, গরীব বিদেশী মুসলমানের ডাল-খোসকাই ছিল প্রাত্যহিক খাদ্য। আবার গরীবের খিচুড়ি আর নিরামিষভোজীর^{৫২} খিচুড়িতে পার্থক্য ছিল, যদিও সব শ্রেণীর লোকেই পছন্দ করত খিচুড়ি।^{৫৩} আবুল ফজল বলেছেন বাঙালী মাছ ভাত খায়,^{৫৪} যদিও মুসলমানেরা মাংসপ্রিয় ছিল।^{৫৫}

আর তুর্কী ও মুঘলাই-রুটি, বিরিয়ানী, খিচুড়ি, কোর্মা-পোলাও কালিয়া কবাব, কোণ্ডা ও মদ্য প্রভৃতি উচ্চবিত্তের লোকের পার্বণিক খাদ্য হিসেবে চালু ছিল, সে-সঙ্গে নানা মশলার ব্যবহারও।^{৫৬} দরিদ্রের খাদ্য : খুদ, জাউ, মুসুরী-সুপমিশ্রিত লাউ, আলু, ওল-পোড়া, কচু করপ্পা আমড়া ইত্যাদি। (কবিকঙ্কণ : কালকেতুর খাদ্য) ম্যানরিক বলেছেন, গরীবেরা ভাত নুন ও শাক এবং সামান্য কিছু তরকারীর ঝোল খেত, কুচিং কদাচিং দই মিষ্টি পেত। মাছ মাংস তাদের পক্ষে দুর্বল ছিল। পান্তা ভাতের আমানিই ছিল তাদের সুলভ পানীয়।

ফলের মধ্যে আম, কাঁঠাল, কলা, নারিকেল, আখ, পরে পেঁপে, আনারস প্রভৃতি ছিল সুলভ। দুধজাত ননী ঘোল মাখন সন্দেশ প্রভৃতি ছাড়াও— পিঠার মধ্যে খাজা মোয়া, (মাদক), নাড়ু, খাঁড়, পুলি, ছানাবড়া ফেনি (বাতাসা) লাফরা, কদম, দুধশাকর (পায়েস) ক্ষীরসা, শিখারিনী (ঘি-দই গুড় আদা দিয়ে তৈরি— সুকুমার সেন) পাটিসাপটা, চিতল, ধূয়াপিঠা, জলাপিঠা, পাকোয়ান, চালের রুটি, চিড়া, মুড়ি, শিরনী, তালপিঠা, বড়া পিয়াজ প্রভৃতি নানা খাদ্যবস্তু চালু ছিল বিভিন্ন সম্প্রদায়ের ও নানা অঞ্চলের লোকের মধ্যে। উৎসবে পার্বণে হিন্দুরা কেয়াপত্র, কলার খোলা, ডোঙ্গা প্রভৃতিই পাত্র হিসেবে ব্যবহার করত। নিরামিষ ভোজনে : দশপ্রকার শাক নিষ শুকুতার ঝোল/মরিচের ঝাল, ছানাবড়া, বড়ী ঘোল/মোচাঘন্ট মোচাভাজা/ এবং ফলবড়ী ফলমূলে বিবিধপ্রকার-ব্যঞ্জনের ব্যবস্থা থাকত। [চৈতন্যচরিতামৃত, মধ্যলীলা ১৫তম পরিচ্ছেদ এবং অন্ত্য ১০ম পরিচ্ছেদ দ্রষ্টব্য]

৪. পোশাক

আবুল ফজল বাঙালীর আটপৌরে পোশাক সম্বন্ধে বলেছেন Naked wearing only a cloth about the lions^{২৭} ম্যানরিকের বর্ণনায় পাই, গরীবেরা হাঁটর 'পরে খাটো সাদা কাপড় পরত, মাথায় বড় পাগড়ী ও পায়ে জুতা থাকত।

বাঙালী হিন্দুরাও সেকালে পাগড়ী পরত। তবে সাধারণ গ্রাম্য লোকেরা কৌপীন বা গামছা পরত, খালি গায়ে থাকত, হাটে বাজারে উৎসব পার্বণ কালে ধুতি চাদর পরত। হিন্দু ধনীদেব পোশাক 'কেবল ধীরের কাম/বস্ত্র বড় অনুগ্রহ' প্রাণশক্তি টানিলে না ছিড়ে/রাজার যোগ্য বসন/ না পায়ে সামান্য জন/ অনেক শক্তি ইহা/কিনি/ বড়ই দুর্লভ চটের ভূনি/ এবং একখানা কাছিয়া পিন্ধে/ আর খানা মাথায় বান্ধে। আর খানা দিল সর্বগায়। [বিজয়গুপ্ত]

হিন্দুর পোশাক হচ্ছে ধুতি, উত্তরীয় বা চাদর। গরীবের ছিল গামছার মতো খাটো কাপড়, কৌপীন, নারীর শাড়ি। মাথা নগ্ন রাখা এবং খালি পায়ে চলাই এদের রীতি। কেবল সম্রাট এবং ব্রাহ্মণ শ্রেণীর লোক কাঠের পাদুকা পরতেন।

সাধারণ মুসলিম তহবন, কুর্ভা টুপী বা পাগড়ী পরত, পরে আরাকানী প্রভাবে লুঙ্গী ধরেছিল, চট্রগ্রামে বৌদ্ধ ও মুসলিম নারীরা আরাকানী প্রভাবে থামী পরত এবং উত্তরীয়ের মতো গামছা গায়ে দিত, আজো দেয়, আর্থিক অবস্থা সচ্ছল হ'লে জুতা-মোজাও পরত। বর্ণ হিন্দুর কাঠের পাদুকা সুপ্রাচীন। গরীব বৌদ্ধ ও মুসলিম মেয়েরা পাতলা কাঁথাও থামীর মতো পরে পরে লজ্জা নিবারণ করত। অরণ্য ও পর্বতবাসী নারীরা বুক থেকে ঝোলানো একটি কাপড়ই পরে।

পূর্ববঙ্গগীতিকায় (পৃঃ ১৪) আছে :

১. পরন্নেতে তহমান কালা কুর্ভা গায় মাথার উঅর (উপর) টুপি (টুপি)।

২. পাজামা নিমা টুপী পরি কটিবন্দ। [দ্বিজবংশীদাস]

৩. কোশা মোজা পর যদি জরদ পরিও। অঙ্গুরী নিদানে প্রাপ্তি রাখ নিজ করে। (তোহফা)

শিক্ষিত উচ্চবিত্তের এবং সরকারি চাকুরে মুসলমান ইজার (পাজামা) কাবাই চাপকান, পাগড়ী, শামলা, নাগরা জুতা ও মোজা পরতেন। বার্বোসার বর্ণনায় সম্রাট শাসকগোষ্ঠীর মুসলমানের

গায়ে পাতলা সূতি আলখাল্লা, কাপড়ের দোয়াল, গলাবন্দ, হাতে (খাপে ঢাকা) ছোড়া, মাথায় পাগড়ী, আঙ্গুলে রত্নখচিত অঙ্গুরীয় থাকতো। তারা আরামপ্রিয় অমিতব্যয়ী ভোজনবিলাসী বহুপত্নীক, মন্দ্যপায়ী ও সঙ্গীতপ্রিয় ছিল। তারা হামাম বা হাউজে স্নান করত।^{৭৭}

চীনাঙ্গের জানা যায়, মুসলমানেরা (নিশ্চয়ই বিদেশগত শিক্ষিত ও ধনীরা) মাথায় সাদা সূতি পাগড়ী, গায়ে লম্বা সূতির সাদা আলখল্লা এবং পায়ে ভেড়ার চামড়ার উপর সোনালী জরির কাজ করা জুতো পরত। নারীরা পরত কামিজ ও সূতি কিংবা সিল্কের ওড়না। তারা এমনিতেই গৌরবর্ণা। সেজন্যে প্রসাধনদ্রব্য ব্যবহার করত না। তাদের কানে মণিখচিত আঙটা, গলায় হার এবং মাথায় খোঁপা থাকত। হাতে নানা প্রকার খারু চুড়ি বালা কঙ্কণ প্রভৃতি এবং হাতের ও পায়ে আঙুলে অঙ্গুরীয় পরত।^{৭৮} এ বর্ণনা অবশ্য বাঙালী মেয়ের নয়, গৌড়ের তুর্কি হেরমের।

দরবেশরা পরত কালো আলখাল্লা। 'সেই স্নেহ মধ্যে এক পরম গম্ভীর কালবস্ত্র পরে সেই লোকে কহে পীর।'^{৭৯}

তাদের পাগড়ীও ছিল, মোদ্রা-মৌলবীরা ইজার ও পাগড়ী পরতেন।^{৮০} তাঁরা সাদা পোশাকই পছন্দ করতেন। জালালউদ্দীন তাবরেজীও কালো আলখাল্লা পরতেন বলে শেখশুভোদয়ায় উল্লেখ আছে। সাধারণ বাঙালী হিন্দুর মাথায় কোন আবরণ ছিল না।

ধার্মিক মুসলমানেরা চুল চেঁছে ফেলতো।^{৮১} আগে নেড়া মাথাওয়ালা বৌদ্ধ ভিক্ষুদের ব্রাহ্মণ্যবাদীরা অবজ্ঞা করে বলত নেড়ে। বৌদ্ধ বিপ্লবের পর নেড়া মাথার সুফীরা এবং পরে সে-সূত্রে অবজ্ঞায় মুসলমানেরা নেড়ে নামে অভিহিত হয়। চৈতন্যোত্তর যুগে বৈষ্ণব বৈরাগী আর সহজিয়ারাও পরিচিত হয় নেড়ানেড়ী নামে।^{৮২}

হিন্দুর চটক ধুতি এবং গরদের ধুতি, মেয়েদের ময়ূরপেখম, আগুন পাট, কালপাট, আসমানতারা, হীরামন, নীলাম্বরী, যাত্রাসিন্ধি, খুএগ নেত, মঞ্জাফুল, অগ্নিফুল, মেঘডুমুর, মেঘনাল, গঙ্গাজলি প্রভৃতি শাড়ি। বেলনপাটের শাড়ি, নেতের শাড়ি প্রভৃতি বহুমূল্য পার্বণিক পোশাক। মেয়েরা কাঁচুলি এবং অন্তরীস বা ছায়া পরতো।^{৮৩} আরো ছিল মুক্তামণি, কনকলতা, আনন্দাই, ধূপছায়া, পবনবাহার, লক্ষ্মীবিলাস, বসন্তবাহার, উদয়তারা, বাগুচরী শাড়ী।

নারীর প্রসাধন সামগ্রী হচ্ছে কস্তুরী, চন্দন, অশুর, কুমকুম, সূর্য্য কাজল, আতর, মেহদী, সিন্দূর – হিন্দুর নাবায়ণতৈল, বিষ্ণুতৈল কেশের গোড়ে দিয়া প্রভৃতি।^{৮৪} স্নানের সামগ্রী ছিল হলুদ, কুসুম, চুল ধোয়ার জন্যে আমলকীর গুড়া ধূপ দিয়ে চুল শুকানো, চন্দন দিয়ে দেহ লেপন প্রভৃতিও ধনী ঘরের নারীর মধ্যে চালু ছিল। বৈষ্ণব পদাবলীর রাধা-কৃষ্ণের আদর্শ সজ্জাই হিন্দুর সজ্জা। নতুন কাপড় পরা ও পুরানো কাপড় ছাড়ার ব্যাপারে নানা কুসংস্কারও ছিল। এক্ষেত্রেও বার-তিথি-ক্ষণের প্রভাবে বিশ্বাস ছিল গভীর।^{৮৫}

সতেরো শতকের কবি রূপরামের ধর্মমঙ্গল কাব্যে মুসলিম যোদ্ধার পোশাকের এরূপ বর্ণনা পাই :

পরিল ইজার খাসা নামা মেঘমালা

কাবাই পরিল দশদিক করে আলা।

পামরি পটুকা দিয়া বান্ধে কোমরবন্দ ...

কাল ধল রাজা টুপি সভার মাথে

রামের ধনুক শর সভাকার হাথে।

সকল বচনে তারা সঙরে খোদায়

একবুটি পাইলে হাজার মি খায়।

শিক্ষিত ও সংস্কৃতিবান অভিজাত চট্টগ্রামবাসী জমিদার পুণ্ডরীক বিদ্যানিধির ঘরোয়া জীবনচিত্র থেকে ষোল শতকের উচ্চবিত্ত লোকের জীবন ধারণের মান সম্বন্ধে আভাস মেলে :
 দিব্যখট্টা হিঙ্গুলে পিস্তলে শোভা করে দিব্য আলবাটি দুই শোভে পাশে
 দিব্যচন্দ্রাতপ তিন তাহার উপরে পান খায় গদাধর দেখি দেখি হাসে ।
 তহি দিব্য শয্যা শোভে অতি সূক্ষ্মবাসে দিব্য ময়ূরের পাখা লই দুইজনে কত
 পট্ট নেত বালিস শোভে চারি পাশে । বাতাস করিতে আছে দেহে সর্বক্ষণে ।
 বড় ঝারি ছোট ঝারি গুটি পাঁচ সাত কি কহিব যে বা কেশভারের সংস্কার
 দিব্য পিতলের বাটা পাকা পান তাত । দিব্যগন্ধ আমলক বহি নাই আর ।
 পনোরো-ষোল শতকে তাকে কৃতিপুরুষ সমুখে বিচিত্র এক দোলা সাহেবানা ।^{৬৮}
 মনে করা হত : যে দোলা ঘোড়া চড়ে দশ বিশ জন যার আগে পাছে নড়ে ।^{৬৯}

যোগীর কানে কুণ্ডল, গায়ে বিভূতি, কটিতে কৌশীন, কাঁধে কাঁথা ও ঝুলি থাকত । নাথ ও বৌদ্ধ যোগীরা মাথা নেড়া করত আর শৈব যোগীদের মাথায় থাকত জটা ।^{৭০}

সমাজের শিক্ষিত উচ্চবিত্তের হিন্দুরা রাজ-সরকারের চাকরী নিয়ে সৈন্যদলে ভর্তি হয়ে কিংবা দেশের শাসক-সমাজের সংস্কৃতির অনুকরণে মুসলমানি পোশাক, আদব-কায়দা প্রভৃতি গ্রহণ করে কবি, জয়ানন্দ হিন্দুর (ব্রাহ্মণের) দাড়ি রাখা, মুসলমানী পড়া, জুতামোজা পরা, বিধবা ও ব্রাহ্মণের মৎস্যপ্রীতি, জগাই-মাধাইর গোমাংস ভক্ষণ প্রভৃতির জন্যে ক্ষোভ প্রকাশ করেছেন । ষোল শতকের কবি মুহম্মদ কবীর হিন্দুরাজার পোশাক এবং রাজপ্রাসাদের মুসলিম সাংস্কৃতিক আবহের বর্ণনা দিয়েছেন ।^{৭১}

৫. অলঙ্কার

মেয়েরা মাথায় সিঁথিপাট, টিকলি, কণ্ঠে হাঁসুলি, টাকার ছড়া, তাবিজের ছড়া, হার হাতে কঙ্কণ, বালা, তাড়, চুড়ি, ঝাড়, পঁচি, অঙ্গদ, নাকে কোর, বাদবোলাক, ডালবোলাক, নাকমাছি, কানে কানফুল, করমফুল, ঝুমকা, কুণ্ডল, কানবালা, বালি, পায়ে পাজব, পাসুলি, নূপুর, ঘুংঘুর, হাত-পায়ের আঙ্গুলে অঙ্গুরীয়, মল, উনচট^{৭২} বাহতে তাড়, বাজু, কেবুর, জসম, গ্রীবায় গ্রীবাপত্র, হাতের পাতার উপর আঙুল সংলগ্ন রতনচুড়, কটিতে নীবিবন্ধ, কিঙ্কিনী, চন্দ্রহার প্রভৃতি ধারণ করত ।^{৭৩}

আঙ্গুলে নালিকা গোলাপ নূপুর সুছন্দ ললাটে টিকলি বিন্দু শোভে মনোহর
 কটিতে কিঙ্কিনী হস্তে বাহ বাজুবন্দ । খোপায় বেলন পুষ্প জাদ মুক্তাছড়
 গলে দোলে রত্ন চন্দ্রহার চন্দ্রজ্যোতি পৈটন বেলন শাড়ি বহুমূল্য ধরে
 নাসায় বেশের চক্র শোভে গজমোতি হার ঢাকন ঘোঁঘট লক্ষ্যে কাঁচুলি উপরে ।^{৭৪}
 যুগল শ্রবণে দোলে রতন কুণ্ডল
 সবিতার রঞ্জিকা মধ্যে খরিকা উন্মল ।

হার ছিল ত্রিছড়ি, সপ্তছড়ি । মল্লতোড়র, রাকপাতা, মল, মকরখাড়, বঙ্করাজ^{৭৫} প্রভৃতি পায়ে শোভা পেত । শেখ ওভোদয়ায় তালপাতার কুণ্ডল বা কানফুলের উল্লেখ আছে । শঙ্খ ও সিন্দূর হিন্দু এয়ের প্রতীক হয়ে উঠেছিল ।

ধনী ঘরের মেয়েরা মণি-মুক্তা খচিত, নানা কারুকার্য সমন্বিত বহুবিচিত্র আকৃতির অলঙ্কার পরত। আর গরীবেরা সাধ্যানুসারে রূপার ও পিতলের জেরে হত সজ্জিত। বাঙলাকাব্যে নারীর রূপ বর্ণনাসূত্রে নানা অলঙ্কারের বর্ণনা রয়েছে। খোপারও ছিল বিচিত্র গড়ন, নাম ছিল চিত্রল, কানড়ী, বেহারী, দেবমহলী প্রভৃতি। কর্ণাট দেশীয় ছাঁদে (কানড়া) বাঁধা খোপার সৌন্দর্যের কথাও সর্বত্র উল্লেখিত হয়েছে। খোপায় মণিমুক্তা ছাড়াও ফুল জড়ানো হতো। নারীর শাড়িও ছিল বিচিত্র সব নাম। কাঁচুলির বৈচিত্র্যের আর সৌন্দর্যের উল্লেখও রয়েছে সর্বত্র।

কবি মুহম্মদ কবীর (১৫৮৮ শ্রীঃ) সুন্দরীর চিত্রল ছাঁদের খোপা, অলঙ্কারে মণির খোপা, শীর্ষে সিন্দুর, চোখে কাজল, কানে কানড়দেশীয় কুণ্ডল, নাকে সোনার বেশর, গলায় সগুছড়ি মুক্তাহার, বুকে বিচিত্র কাঞ্চুলি, করে কঙ্কণ, আঙ্গুলে আঙ্গুরী, পায় নুপুর, পরনে হেমরি শাড়ি এবং জরি পাড়ের বর্ণনা দিয়েছেন।

সুরঙ্গ অঙ্গে জরি পাড় ঝরি পড়ে, ঝরি ঝরি পড়ে রূপ পালঙ্ক ভাসি যায়।^{৭৬}

পুরুষরাও বাহুতে কবচ ও বাজু এবং বাহুতে, গলায় ও কটিতে তাবিজ, কানে কুণ্ডল, হাতে বলয় ও গলায় একছড়ি হার পরত।^{৭৭} সাধারণত লোক গলায় কালো তাগা রাখত, আর ধার্মিক মুসলমানরা খিলালের প্রয়োজনে (সুন্নত হিসেবেও) লোহার বা পিতলের খিলালশলাকা গলায় ঝুলিয়ে রাখত।

৬. নারী

বর্ণ হিন্দুরাও মুসলিম প্রভাবে পর্দা করত। আরবোসা সম্ভ্রান্ত ও সকল সচ্ছল মুসলমান নারীর পর্দা ও অবরুদ্ধ জীবনের কথা উল্লেখ করেছেন এবং বলেছেন এরা স্ত্রীর সঙ্গে সদ্ভাবহার করে আর সাধ্যমতো সোনা-রূপার অলঙ্কার ও সিন্ধের পোশাক পরায়। আরবোসার মতে প্রত্যেকেরই তিন-চারটে অথবা সাধ্যানুসারে আরো বেশি স্ত্রী থাকত।^{৭৮}

মুসলমানরা হিন্দুর মেয়ে ও বিধবা বিয়ে করত।^{৭৯} জোলা, বেদে প্রভৃতি নিম্নশ্রেণীর যে-সব মুসলিম মেয়েরা পর্দা মানত না, তারা পুরুষের সঙ্গে গোত্রীয় পেশায় যোগ দিত। জোলা বিধবারা পূর্ব সংস্কার বশে নিরামিষ খেত।^{৮০} সাধারণ মুসলমানদের মধ্যে স্ত্রীর উপর শারীরিক পীড়ন ও তালাক দান বহুল প্রচলিত ছিল।^{৮১} স্বস্তর বাড়িতে বধূদের অধিকার বাঁদী-গোলামের চেয়ে বেশি ছিল না। শাশুড়ী-ননদের মন যুগিয়ে চলতে না পারলে স্বামীর ঘর করা সব সময় সম্ভব হত না। অবশ্য স্বামী প্রভৃতি গুরুজনকে বধূরা ধর্মীয় সংস্কার বশে মেনে চলত। হিন্দুসমাজের প্রভাবে মুসলমান মেয়েরা স্বামী এবং গুরুজনদের নাম উচ্চারণ করত না। বাইরে যেতে ভদ্র ঘরের মেয়েরা বোরখা এবং অন্যেরা ব্যবহার করত ছাতা।

হিন্দুসমাজে গৌরীদান অর্থাৎ অনুর্ধ্ব আট বছরের মেয়েকে বিয়ে দেয়ার রেওয়াজ চালু ছিল। বারো বছর বয়সের মধ্যে বিয়ে দিতেই হত, অন্যথায় সামাজিক নিন্দা, পাপ ও অকল্যাণের ভয় ছিল। তবু কুলীন ঘরে বয়স্কা অনুঢ়া মেয়ে দেখা যেত। হিন্দুপ্রভাবে মুসলিমসমাজেও বাল্যবিবাহ বিশেষভাবে চালু হয়। ম্যানরিক-এর মতে হিন্দুর সমাজে এক পত্নী গ্রহণই সাধারণ রেওয়াজ হয়ে দাঁড়ালেও বহুপত্নীক লোকের সংখ্যাও নগণ্য ছিল না। বিশেষ করে কুলীনেরা বহু পত্নী গ্রহণ করত।^{৮২} সতীদাহ প্রথা খুব প্রবল না হলেও^{৮৩} চালু ছিল।

প্রাত্যহিক জীবনে কোনো স্বাধীন সত্তা ছিল না বলেই মেয়েদের বাপের বাড়ি ছিল, শ্বশুর বাড়ি থাকত, কিন্তু নিজের বাড়ি কখনো হ'ত না। বৃদ্ধা নারীর মুখেও তাই বাপের বাড়ি কিংবা শ্বশুরের ভিটের কথাই শোনা যেত।

৭. বিবাহ

সতীত্ব যে অস্পৃষ্ট দেহ, অনাসক্ত মন নয়— এ ধারণা বশে হিন্দু ও মুসলিম গৌরীদান প্রথার প্রভাবে অল্প বয়সেই ছেলে-মেয়েদের বিয়ে দিত। র্যালফ ফিচ বলেছেন, আট-দশ বছরের বালকের সঙ্গে পাঁচ ছয় বছরের বালিকার বিয়ে চালু ছিল।^{৬৪} দ্বিজ শ্রীধর কবিরাজে বিদ্যাসুন্দর কাব্যে দেখি— বিদ্যাকে আট বছর বয়সে বিয়ে দেবার চেষ্টা হচ্ছে। এমনি শিশুদেরও সখের বিয়ে দেবার রীতি চালু ছিল।^{৬৫} সব সমাজেই বিয়েতে যৌতুক ও পণ প্রথা চালু ছিল। মুকুন্দরামের চণ্ডীমঙ্গলেই পাই :

পণের নির্ণয় কৈলা দ্বাদশ কাহন
ঘটকালি পাবে ওরা তুমি চার পণ।
পাঁচ গণ্ডা ওরা গড় পাঁচ সের

এহা দিলে আর কিছু না কহিবা ফের।
অথবা, আমি যে নির্ধন কিছু দিতে শক্তি নাই।
কন্যামাত্র দিব পঞ্চ হরিতকী দিয়া।^{৬৬}

এ হচ্ছে গরীবের বিয়ে। ধনীর বিয়ের প্রস্তাবে আছে :

বহুমূল্য ধন দিমু রজত কাঞ্চন
প্রদীপ সমান দাস রুমী একশত
শতেক হাবসী দিমু যেন প্রতিপদ
দুইশত উট দিমু শতেক তুরঙ্গ

পঞ্চোত্ত বৃষ দিমু পঞ্চাশ মাতঙ্গ।^{৬৭}
ধন নষ্ট করে পুত্র কন্যার বিভায়।^{৬৮}
মোল্লাও পড়ায়্যা নিকা/দান পায় শিকারিকা
দোয়া করে কলমা পড়িয়া (মুকুন্দরাম)।

মুসলিম সমাজে কন্যাপণ এবং হিন্দু সমাজে বরপণ বিশেষভাবে চালু ছিল। সেকালে পণ ও অলঙ্কারের ব্যাপারে বর ও কনে পক্ষ পরস্পরকে প্রতারণা করতে চাইত (সম্ভবত দারিদ্র্যবশত, অবশ্য অভাবে করতে করতে তা স্বভাবে ও রেওয়াজে পরিণত হয়েছিল)। তাই বিবাহসভায় ঝগড়া-বিবাদ, এমনকি মারামারি অবধি হ'ত। হিন্দুর বিবাহে নানা আচার^{৬৯} আছে বলে বিবাহোৎসবের রেশ কয়েকদিন ধরেই থাকে। লখন্দর-বেহুলা কাহিনী তৈরি হওয়ার পর থেকে এর প্রভাবে প্রথম রজনীকে হিন্দুরা কালরাত্রি বলে ভয় করে। মুসলিমদের বিয়েতেও কয়েকটা ভোজনোৎসবের অবকাশ ছিল। ঘরবাড়ি দেখা, বর দেখা, কনে দেখা, গায়ে হলুদ তেলোয়াই, বিবাহবাসর, ওয়ালিমা, [বউ-ভাতা] মেহদী লাগানো, বাজি পোড়ানো, মেয়েলি নাচগান, পুতুল নাচ, বাজিগরের খেলা প্রভৃতি উৎসবের অঙ্গ ছিল।^{৭০} ভোজনোৎসব করার সাধ্য থাকত না বলে দরিদ্ররা খই, কলা, পায়েস, ফিরনী, শিরনী, পান-সুপারী, তেল-সিন্দুর দিয়েই অতিথিদের আপ্যায়িত করত, চৈতন্যভাগবতে চৈতন্যদেবের বিবাহের পূর্বাপর বিস্তৃত বর্ণনা রয়েছে। এতে সাধারণ দরিদ্র ব্রাহ্মণপরিবারের বিবাহচিত্র মেলে, তেমনি চৈতন্যদেবের দ্বিতীয় বিবাহে মেলে ধনীঘরের বিবাহোৎসবের বর্ণনা।

এমনি করে বিবাহোৎসবে গৃহস্থের সাধ্যমতো খানাপিনারও ব্যবস্থা থাকত। ঘড়াকাঁজি বা আমনি তথা হালকা হাড়িয়া মদও উৎসবে খাওয়া হ'ত। রঙের অভাবে কাদা ছোড়াছুঁড়ি করে আনন্দিত উত্তেজনার অভিব্যক্তি দেয়া হ'ত। বিবাহের জন্যে কলাগাছ পোতা হত মঙ্গলঘট বা

কলসের মুখে অম্রসার বসানো হত, মঞ্চ তৈরি হত, মঞ্চের নাম ছিল মারোয়া, মারোয়ামঞ্চেই হত শুভদৃষ্টি বিনিময়। মঞ্চের উপরে চাঁদোয়া বা ছত্র থাকত, মেঝে আঁকা থাকত আলপনা। দুইপক্ষের সখী-বন্ধু-আত্মীয়রা ঠাট্টায় মঞ্চরায় ও নানা রঙ্গরসে আসর ও বাসর আনন্দে উল্লাসে মাতিয়ে তুলত। এর নাম ছিল জোলুয়া বা জুলুয়া দিলেস্ত দীয়া (দীপ) করি হুড়াহুড়ি। 'বর-কনের মধ্যে পাশাদি ক্রীড়া হত, গেঁড়ুয়া বা গেঁড়ুয়া (কাঠের বল বা ফুলের স্তব লোফালুফি) খেলাও হত- বর-কনের সংকোচ শরম ভাঙার জন্যেই ছিল এ-ব্যবস্থা। মুসলিম বর-কনের অন্যবাড়িতে অভ্যর্থনার বা সংবর্ধনার ব্যবস্থাও হত, এর নাম 'গন্তফিরানো'। কালো অস্ত্রিকরা গায়ে হলুদ মেখে স্নান করে গাত্র-বর্ণ উজ্জ্বল করে। আলপনা-আঁকা কুলায় বা ডালায় খাদ্য প্রতীক ধান ঢাউল, প্রাণের প্রতীক দূর্বা, আশার প্রতীক দীপ, শক্তির প্রতীক ঘটমুখে অম্রসার, বৃদ্ধির প্রতীক কলাগাছ প্রভৃতি, এবং কনের বাড়িতে প্রজনন প্রতীক দই-মাছ প্রেরণ ও বরের যাত্রার সময়ে বরের কোলে শিশুবসানো প্রভৃতি বিবাহ সম্বন্ধীয় আদিম যাদু-সংস্কার। বারবোসা বাঙালীদের বহুপত্নীক ও উপপত্নীক বলে জানতেন। পর্দাপ্রথাও কঠোর ছিল বলে উল্লেখ করেছেন।

ঘরে-সংসারে বধূর কার্যত কোনো মর্যাদা ও অধিকার ছিল না বলে কনের মা-বাপকে চিরকাল জামাতাপক্ষের মন যুগিয়ে চলতে হত। 'যদি মারে ঝাঁটা তবু না ছাড়ে ঝিয়ের ঘাটা'।— ইত্যাকার ছড়া-প্রবচনে এর আভাস রয়েছে। কন্যার পিতৃহিসেবে রাজার আর ভিখারীর একই অসহায় অবস্থা। জামাই বিদায়ের কালে শ্বশুরের মিনতি:

কুলীনের পোকে অন্য কি বলিব আমি সখী :

কন্যার অশেষ দোষ ক্ষমা করো তুমি নারীজাতি অপরাধী পায় পায় দোষ

আঁঠু ঢাকি বস্ত্র দিহ পেট ভরি ভাত অপরাধ না লইবে না করিবে রোষ।

প্রীতি করা যেহেন জানকী কন্যাস্বামী।^{৯৭} কন্যাদায় আজকের মতো সেদিনও বড় দায় হিসেবেই গণ্য ছিল^{৯৮}: যোগ্য যার ঘরে, ক্ষুধা তৃষ্ণা নাহি তারে, নিরবধি মনে মনস্তাপ।^{৯৯} চট্রগ্রামের বৌদ্ধ সমাজে ও তার প্রভাব মুসলিম সমাজে নারীরাও বরযাত্রী হত।

আজকের মতোই হিন্দু বৌদ্ধ মুসলমান সবাই কুলায় ধান, দূর্বা হরিদ্রা রেখে অম্রকিশলয় দিয়ে মঙ্গলঘট বসাত, জ্বালত মঙ্গলদীপ। বহির্ঘরে কলাগাছ পুঁতে পাশে রাখত মঙ্গলকলস। এ ছিল অনুষ্ঠানের শুভ সূচনার মঙ্গলিক। এ ছাড়া হিন্দুদের পাদ্য অর্ঘ্য প্রভৃতি মঙ্গলাচার তো ছিলই।

পূর্তনীজ সমাজেও বিবাহিতা নারীরা পর্দা করত, বাইরে যেত আচ্ছাদিত পালকীতে করে। কোটশিপের বা বিবাহপূর্ব মেলামেশারও রেওয়াজ ছিল না। নারীরা মূল্যবান পোশাক ও অলঙ্কার পরত। একাকী বদ্ধ ঘরে থাকতে হত বলে তারা গান বাজনা ও সাজ-সজ্জা প্রিয় ছিল এবং প্রায়ই গোলামচাকরের সঙ্গে প্রণয় সম্পর্ক স্থাপন করত।^{১০০} ধনীরা উপপত্নী রাখত ও বারাস্তনা পুষত। তার জের উনিশ শতক অবধি ছিল।^{১০১} মুসলমানদের ক্রীতদাসী সঙ্কেতে কোন শাস্ত্রীয় বাধা নেই। তাই ধনী জমিদারের থাকত নজরী ও নজরীজাত সন্তান। এটি রেওয়াজে পরিণত হয়েছিল। তাই এতে লজ্জার বা লুকোবার ছিল না কিছুই। এদের পত্নীদেরও এসব সহ্য ও স্বীকার করবার মানসিক প্রস্তুতি থাকত। সেজন্য দাম্পত্যে ও পারিবারিক জীবনে হয়তো বিশেষ কোনো অশান্তি বা বিপর্যয় ঘটত না। তাই বোধ হয় তোহফার মতো শরীয়ৎ শাস্ত্রের গ্রন্থেও অসঙ্কেতে উচ্চারিত হয়েছে :

যদি দাসী কিনি গৃহে আনে কোনজন বেচিলে বেচিব দাসী পবিত্র উদরে
 তুরামাত্র না কর চুম্বন আলিঙ্গন। মাসিক অবধি লও চরিত্র বুঝিবারে।
 উদর পবিত্র আগে বুঝিয়া মরম আপনা হরিষ যদি চাহ চিরকাল
 তার সঙ্গে কেলিরস কর নিভরম। কিনিয়া সুন্দর দাসী গোএরাইলে ভাল।

রূপকথায় আখ্যায়িকায় উপাখ্যানে গীতিকায় প্রেম অভিপ্রেত ও প্রশংসিত বিষয় হলেও সমাজে প্রেম নিষিদ্ধ গর্হিত ও নিন্দনীয় ছিল। সামাজিক ও শাস্ত্রিক বাধা না থাকায় মুসলিমরা অমুসলিম নারী ভালো লাগলেই ভালোবাসত এবং আপোষে বা জোরে অমুসলিম নারী বিয়ে করত কোন কোন শক্তিমান ও বিত্তবান ব্যক্তি। কিন্তু রক্ষণশীল হিন্দু সমাজে সে ব্যবস্থা না থাকায় জাতিচ্যুত হওয়ার ভয়ে কেউ অহিন্দু নয় শুধু, অসবর্ণের নারীও বিয়ে করত না সহজে। প্রবৃত্তি ও প্রলোভন প্রবল হলে অবশ্য কেউ কেউ স্বধর্মত্যাগ করে মুসলিম নারী বিয়ে করেছে, তেমন এক ঐতিহাসিক ব্যক্তি হচ্ছেন ইসা খানের পিতা কালিদাস গাজদানী ওর্ফে রাজা সোলায়মান।

৮. আদব কায়দা

আদব-লেহাজ-তবিয়তে সংস্কৃতির মুখ্য প্রকাশ। আলাউলের তোহফায় মজলিসে আচরণবিধির উল্লেখ আছে। এছাড়া অন্য কোথাও বিশেষ কিছু পাওয়া যায় না। সাধারণভাবে গুরুজনের সঙ্গে নম্র ব্যবহার করা, গুরুজনের চোখে চোখ রেখে কথা না বলা, জুতো পায়ে গুরুজনের কক্ষে প্রবেশ না করা, গুরুজনের কাছ থেকে চলে আসতে হলে পিছু হটে আসা, গুরুজন ও মান্য জনের সামনে তামাক না খাওয়া, বাম হাতে কিছু দেয়া-নেয়া না করা, মজলিসে মান্যজনের সঙ্গে উচ্চকণ্ঠে ও উচ্চ শিরে কোনো কথা না বলা, মজলিসে এক সঙ্গে খাওয়া শুরু করা এবং এক সঙ্গে শেষ করা, মান্যজনের অগ্রে আগে না চলা, গুরুজন বা মান্যজনের দেহের স্পর্শ বাঁচিয়ে চলা এবং বয়োজ্যেষ্ঠ লোকদের নাম ধরে না ডেকে অমুকের মা-বাপ বলা, খাবার সময়ে ছোট গ্রাস ধরা, ঠোট বন্ধ রেখে চিবানো, বাসনে অল্প করে ভাত তরকারি নেয়া এবং গুছিয়ে রাখা, পা দেখিয়ে বা ছড়িয়ে না বসা প্রভৃতি সামাজিক আদব-কায়দার অন্তর্গত ছিল।^{১০} হিন্দুরাও এসব রীতি পদ্ধতি মেনে চলত। মুসলমান সমাজেও কদমবুসি পদধূলি গ্রহণ প্রথা চালু ছিল।^{১১}

ভদ্রলোকেরা পারিবারিক জীবনেও এসব বিশেষ গুরুত্ব সহকারে যত্নের সঙ্গে মেনে চলত। অশিক্ষিত ও নিম্নশ্রেণীর লোকেরা উৎসবে পার্বণে মজলিসে এসব রীতিনীতি মেনে চলার চেষ্টা করত। উচ্চবর্ণের মুসলমানের আদব-লেহাজের কথা বলেছেন এক বিদেশী পর্যটক : মজলিসে তাঁরা কথা বলতেন in every low vice, with much order, moderation, gravity and sweetness, often they speak into each other's ear and they put the end of their shoulder-sash or their right hand in front of their mouth for fear of inconveniencing each other with their breath.^{১২}

বাঙালীর চরিত্র সম্বন্ধে বিদেশীদের ধারণা ভাল ছিল না। De Laet বলেছেন তারা Subtle but depraved character এবং চুরি ডাকাতির জন্যে কুখ্যাত। তাদের নারীরাও অপকর্মান্বিতা ও দুর্বিনীতা। Schouten-এর মতে Lechery and foul commerce are ordinary things in the whole of India. But in Bengal and some other

countries, in this respect, things are even worse than elsewhere. গধহংরয়ব-এর চোখে বাঙালীরা a languid race and pusillanimous meon spirited and cowardly” তারা শক্তের ভক্ত নরমের যম, তাদের কাছে যে মারে সে ঠাকুর, যে না মারে সে কুকুর।

ঘরোয়া ও পারিবারিক জীবনে, সামাজিক ব্যবহারে আর কর্মক্ষেত্রে ও রাজদরবারে যেসব নীতি, কর্ম, রোগ, নিদ্রা, দান, জনসেবা, জীবিকা, আচরণ এবং আদব-কায়দা আদর্শ ও বাস্ত্বিত বলে বিবেচিত, যেমন অনহঙ্কার, নম্রতা, কুলধর্ম ও কুলাচার, প্রজার দায়িত্ব ও কর্তব্য, সৈন্যের প্রতি রাজব্যবহার (নৃপহস্তে সৈন্য যদি মন দুঃখ পায়। রামবুদ্ধি হয় সব রাত্রিতম প্রায়) প্রজার সতর্কতা (যেই বস্ত্র উপরে রাজার যায় মন। সে বস্ত্র আপনে না রাখিব কদাচন) প্রভৃতি বহু বিষয়ে উপদেশ রয়েছে কবি মুহম্মদ খানের সত্যকলিবিবাদসম্বাদ’ কাব্যে, আলাউলের ‘তোহফা’য় আর নসরুল্লাহ খোন্দকারের ‘শরীয়ৎনামা’য়।

৯. লোকচরিত্র

মদে ও মাগে উচ্চবিস্তের লোকের সীমাহীন আসক্তিও ছিল।^{১০০} তাদের মর্যাদা বোধশূন্যতা এবং বীর্যহীনতা তথা ভীকৃত্যও গধহংরয়ব-এর (১৬২৮-২৯) দৃষ্টি এড়ায়নি। তিনি বলেছেন তারা easily acustom themselves to captivity and slavery. Bowrey (১৬৬৯-৭৯ খ্রীঃ) বাঙালী ব্রাহ্মণের মনীষার তারিফ করেছিলেন।^{১০১} জোহান্নেস দ্য ল্যায়েট (Joanes de Laet) ১৬৩০ খ্রীস্টাব্দে বলেছেন যে বাঙালীরা চালাকচতুর কিন্তু তাদের স্বভাব মন্দ, তারা চুরি ডাকাতিতে আসক্ত এবং তাদের নারীরা লজ্জাহীন ও অসতী। সতেরো শতকে গুটেন (Gautier Schouten) বলেছেন : বাঙালীরা অধিক লাম্পট্য ও দুর্নীতিপ্রবণ। ইবনে বতুতা কামরূপের মানুষের শ্রমসাধ্যাকাজের শক্তি, যদিও অনুরাগের ও ভোজবাজীতে দক্ষতার খ্যাতির কথা উল্লেখ করেছেন। পর্যটক ওয়াং তা য়ুয়ান বাঙালীদের পরিশ্রমী, কৃষিজীবী সং ও সম্পদশালী এবং আচরণে ও প্রথাপদ্ধতিতে ধার্মিক বলে জেনেছিলেন। মাহুয়ান (বা কও হুংলঙ) রচিত গ্রন্থে বাঙালার মানুষ, পোশাক ও আচার-আচরণ সম্বন্ধে ভুল তথ্য ও অতিশয়োক্তি রয়েছে। বারবোসা বাঙালী ধনীদেব বহুপত্নীক বা উপপত্নীক বলে জানতেন এবং তিনি বলেছেন নারীদের তারা দামী পোশাকে ও গয়নায় সাজিয়ে রাখে বটে, তবে ঘরের বের হতে দেয় না। তোমে পিরেস (১৫১২-১৯ খ্রীঃ) বাঙালীদের তীক্ষ্ণ বুদ্ধি, স্বাধীনতাচেতা, কিন্তু, অসাধু বড় ব্যবসায়ী বলে জানতেন। তিনি আরো বলেন তারা ঘন ঘন রাজা হত্যা করে নতুন রাজা বানায়। সুমাত্রায় (পার্সে) ও মালাক্কায় ধৃত অসাধু ও বিশ্বাসঘাতক বাঙালীরা এত ঘৃণ্য যে কোন লোককে অপমান করতে তারা তাকে ‘বাঙালী’ বলে অভিহিত করে। মাল্লাকার অধিকাংশ বাঙালী জেলে ও দর্জি। তাদের কেউ কেউ নানা গর্হিত কাজ করে। সম্রাট বাবর বাঙালীদের ব্যক্তির নয়, সিংহাসনের অনুগত বলেই জানতেন। একজন বাঙালী ইতিহাসবেত্তা বিদ্বানের ধারণায় প্রাচীন বাঙালী চরিত্র এরূপ : ‘শাস্ত্রচর্চায় ও জ্ঞানচর্চায় বুদ্ধি ও যুক্তি অপেক্ষা প্রাণধর্ম ও হৃদয়াবেগের প্রাধান্য ... আবর্তন ও বিপ্লব দুঃসাহসী সমন্বয় স্বাঙ্গীকরণ ও সমীকরণ যেন বাঙ্গালীর চারিত্রিক বৈশিষ্ট্য, সনাতনত্বের প্রতি একটা বিরাগ যেন বাঙালার ঐতিহ্য ধারায় ... বাঙালীর বৃত্তি যথার্থত বৈতসী, যে আদর্শ যে ভাবস্রোতের আলোড়ন, ঘটনার যে তরঙ্গ যখন

আসিয়া লাগিয়াছে, বাংলাদেশে তখন বেতস লতার মত নুইয়া পড়িয়া অনিবার্যবোধে তাহাকে মানিয়া লইয়াছে এবং ক্রমে নিজের মত করিয়া তাহাকে গড়িয়া লইয়া, নিজের ভাব ও রূপ দেহের মধ্যে তাহাকে সমন্বিত ও সমীকৃত করিয়া লইয়া আবার বেতস লতার মতই সোজা হইয়া স্ব-রূপে দাঁড়াইয়াছে। যে দুর্মর অন্তর্নিহিত প্রাণশক্তি বেতস গাছের, সেই দুর্মর প্রাণশক্তিই বাঙ্গালীকে বারবার বাঁচাইয়াছে।^{১০২} বাঙালীর বৌদ্ধ ও ব্রাহ্মণ্য ধর্ম এবং ইসলাম গ্রহণের এবং গ্রহণ করে আন্তরিকভাবে বরণ না করার রহস্য এবং জৈব জীবনের তাগিদে তাকে প্রয়োজন মতো রূপ দেয়ার তত্ত্ব এখানেই নিহিত। বিভিন্ন বৌদ্ধ যান, যোগ, দেহতত্ত্ব, কায়াসাধন ও পার্থিব জীবনের মিত্র ও অরিদেবতার পূজা প্রবণতার কারণও এই :

‘প্রাচীন বাঙ্গালীর হৃদয়াবেগ ইন্দ্রিয়ালুতার ইঙ্গিত তাহার প্রতিমা শিল্পে এবং দেব-দেবীর রূপ কল্পনায় ধরা পড়িয়াছে। ... সিদ্ধারা বলতেন বিরাগাপেক্ষা পাপ আর কিছু নেই, সুখ অপেক্ষা পুণ্য নাই। ... অরূপের ধ্যান এবং বিশুদ্ধ জ্ঞানময় অধ্যাত্ম সাধনার স্থান বাঙ্গালী চিত্তে স্বল্প ও শিথিল। ... বাঙালীর বুদ্ধি, একটা শাণিত দীপ্তিও লাভ করিয়াছিল ... বাঙ্গালী তাহার এই বুদ্ধির দীপ্তিকে সৃষ্টি কার্যে নিয়োজিত করে নাই। ... তখন (মুসলিম বিজয়কালে) রাষ্ট্রে, ধর্মে শিল্পে, সাহিত্যে, দৈনন্দিন জীবনে যৌন অনাচার নির্লঙ্ঘন্য কামপরায়ণতা, মেরুদণ্ডবিহীন ব্যক্তিত্ব, বিশ্বাসঘাতকতা, রুচিভারল্যা এবং অলঙ্কার বাহুদ্যের বিস্তার।’^{১০৩}

আমাদের ধারণায় বাঙালী স্বভাবে নানা বিরুদ্ধগুণের সমাবেশ রয়েছে, ভাবপ্রবণতা ও তীক্ষ্ণবুদ্ধি, ভোগলিপ্সা ও বৈরাগ্য, কর্মকুষ্ঠ ও উচ্চভিলাষ, ভীরুতা ও অদম্যতা, স্বার্থপরতা ও আদর্শবাদ, বন্ধনভীরুতা ও কাঙালপনা প্রভৃতি দ্বন্দ্বিক গুণই বাঙালী চরিত্রের বৈশিষ্ট্য।

বাঙালী ভাবপ্রবণ ও কল্পনাপ্রিয়। উচ্ছ্বাস ও উদ্বেজনাতেই এর প্রকাশ। তার হাসিকান্নাক্রোধ সবকিছুই মাত্রাতিরিক্ত ও সাময়িক। তার গীতিপ্রবণতার উৎস এখানেই। সে কালোপিপড়ের মতোই স্বাতন্ত্র্যে, ধূর্ততায় ও অস্থিরতায় আত্মা রাখে। তাই সে ধূর্তমি যত জানে বুদ্ধির সুপ্রয়োগ তত জানে না। ফলে আত্মরক্ষার ও স্বার্থপরতার হীন প্রয়োগে তার তীক্ষ্ণবুদ্ধি কলুষিত হয়, আত্মপ্রতিষ্ঠায় মহৎ প্রয়াসে প্রযুক্ত হয় না। আত্মরতি তার এতই প্রবল যে স্বতন্ত্র জীবন-প্রচেষ্টায় সে সদা উন্মুখ, তাই তার সঙ্গশক্তি নেই। ব্যবহারিক জীবনের উন্মুগনে সে একতার ও বুদ্ধির অবদান গ্রহণে অসমর্থ।

ভাবপ্রবণ বলেই বাঙালী মুখে তথা তত্ত্বচিন্তার ক্ষেত্রে আদর্শবাদী ও বৈরাগ্য ধর্মী, কিন্তু প্রবৃত্তিতে সে একান্তই অধ্যাত্মবাদীর ভাষায় ‘বস্তুবাদী’ গণ-কথায় ‘জীবনবাদী’ আর নীতিবিদের চোখে ‘ভোগবাদী’। দার্শনিক ভাষায় বলতে গেলে বাঙালী ভোগী এবং ভোগমোক্ষবাদী। এজন্যে বাঙলাদেশে জীবনবাদ বা ভোগবাদ অধ্যাত্মচিন্তার উপর বারবার জয়ী হয়েছে। তাই নৈরাধ্য নিরীশ্বরবাদী নির্বাণকামী বাঙালী চৌদ্ধ যোগ-তাত্ত্বিক দেহসাধনায় অমর হতে চেয়েছে। জীবনকে জগৎকে সে ভালবেসেছে। এ মর্ত্যপ্রীতিই তাকে অনুপ্রাণিত করেছে বৌদ্ধ চৈতন্যকে দেবদেবীর আখড়া বানাতে এবং নির্বাণের নয়, জীবনের ও জীবিকার, আরামের ও বিলাসের বরদাতা দেবতারূপে তাঁদের পূজা করতে।

বাঙালী ভোগলিপ্সু বটে, কিন্তু সে কর্মকুষ্ঠ, তাই পৌরুষের দ্বারা আত্মপ্রতিষ্ঠার বা জীবনোপভোগের প্রয়াস তার ছিল না। মহাজ্ঞান, তুক-তাক, ডাকিনী-যোগিনী প্রভৃতির দ্বারা

খিড়কী দোর দিয়ে জীবনের ভোগ্য সম্পদ আহরণের অপপ্রয়াসই তার কর্মাদর্শ তথা জীবনের লক্ষ্য ছিল। পাল আমল এমনি করে কাটল।

আবার সেনআমলে উত্তর ভারতিক ব্রাহ্মণ্যবাদ দৃঢ়মূল করার প্রয়াস হল, তখনো একই কারণে মায়াবাদ তথা জ্ঞানবাদ, পরব্রহ্মপ্রীতি কিংবা জীবাআরহস্য প্রভৃতিতে সে কোনো উৎসাহ বোধ করেনি। পরলোকে প্রসারিত জীবনে বস্ত্ত পরমাত্মায় তার কোনো আস্থা ছিল না। তাই সে চণ্ডী (অন্নদা বা দুর্গা) মনসা, শীতলা, ষষ্ঠী, শনি, সরস্বতী প্রভৃতি মিত্র ও অরি দেবতা সৃষ্টি করে তাঁদের পূজা দিয়ে জীবিকার ব্যাপারে স্বস্তি খোঁজে।

আবার একই উদ্দেশ্যে ইসলামোত্তর যুগে বিশেষ করে মুঘল আমলে হিন্দুর পুরোনো ধর্মের জীর্ণতায় এবং ইসলামের নির্দেশের প্রতি অবহেলায় গণমানসে সত্যপীর-সত্যনারায়ণ, বনবিবি-বনদেবী, কালুগাজী-কালুরায়, বড়খা গাজী-দক্ষিণ রায়, ওলাবিবি, শীতলাদেবী, বাস্তববিবি-বাস্তবদেবী প্রভৃতি জীবন-জীবিকার নিরাপত্তা সহায়ক দেবতা প্রতিষ্ঠা পান। বৈষ্ণব সমাজের বিকৃতিও এ একই মানসিকতার ফল। অতএব কোন বৃহত্তর ও মহত্তর সাধনা বাঙালীর কোনো কালেই ছিল না। চৈতন্যাদি মহাপুরুষের আবির্ভাব তাই ব্যতিক্রম এবং আকস্মিক। চৈতন্যের ও রামকৃষ্ণের মতের প্রচার ও প্রসারক্ষেত্র তাই বাঙলাদেশ নয়। বলেছি বাঙালী একান্তভাবে জীবনসেবী ও ভোগবাদী। এজন্যে সে তুচ্ছ জেনেছে আত্ম-পরমাত্মাকে, স্বর্গ-নরককে করেছে অবহেলা।

যেখানেই সে ভোগের সামগ্রী দেখেছে, সেখানেই তার লুক্ক চিত্ত কাঙাল হয়েছে। পৌরুষ তার ছিল না। ভীরুতা ও কর্মকুষ্ঠা তার মস্তকোপিত। তাই জীবন ধারণের প্রয়োজনে দেব-নির্ভর অথবা অপ্রাকৃত শক্তি ও উপায় সন্ধান ছিল তার লক্ষ্য। তবে লোভের তীব্রতায় এবং ক্রান্ত জীবনের মমতায় কখনো কখনো সে ক্ষণকালের জন্যে মরীয়া হয়ে বিরুদ্ধশক্তির সঙ্গে যুদ্ধে নেমেছে, সে সাহস দেখিয়েছে। কিন্তু জৈবধর্মের প্রতিকূল নিছক অধ্যাত্মচিন্তা তাকে প্রলুব্ধ করেনি, তবু তার প্রাণপ্রাচুর্যের ও স্বাধীন মননের লক্ষণ ফুটে উঠেছে তার স্বধর্মে ও স্বভাবে সুস্থিরতায়। বহিরাগত কোন মতাদর্শই সে কোনোদিন মনে প্রাণে বরণ করেনি। এ স্বাতন্ত্র্য ও অনমনীয়তা একালে দেশে-বিদেশে তার মর্যাদা অবশ্যই বাড়িয়েছে।

১০ নেশা

নারী-পুরুষ নির্বিশেষে তামাক সেবন করত। রসিক কবির 'তামাকপুরাণ' এবং হুজুরপুরাণ রচনা করেছেন। ১০৩ চৌদ্দশত দরবেশ চলে আরবোলা হাতে।^{১০৪}

আঠারো শতকের কবি শেখসাদীর 'গদা-মালিকা' কাব্যে তামাক সেবনকে কলিকালের লক্ষণ বলা হয়েছে :

গদাএ বলে যেই ক্ষণে কলি করিল প্রবেশ/তামাকু পিবারে লোকে করিব আবেশ। অন্য হতে জানিব তামাক বড় ধন/তামাক বৃদ্ধের বালকের রাখিব জীবন। লজ্জা হারাইব লোকে তামাকের হাতে/হাঁটয়া যাইতে লোকে পিব পথে পথে খাইতে না ভরে পেট মিছা ফাঁকফুক।

এ ছাড়া গাজা মাংস ও মদ (করণবারি)^{১০৫} শৈব-শাক্ত সমাজে ধর্মীয় বিধির অজুহাতে বিশেষ জনপ্রিয় ছিল। 'মদ্য-মাংস দিয়া কেহ যক্ষ পূজা করে।' গাজার চলই ছিল বেশি। পান-

শুপারী ভক্ষণ ছিল মুখশুদ্ধির উপায় এবং জনগণের অন্যতম বিলাস। পান-শুপারী দিয়েই আগন্তুককে আপ্যায়ন করা হত।^{১০৬} আমানি, খেনো, তালো, ও খেজুর মদ লোকপ্রিয় ছিল। গাঁজা ছাড়াও অনেকে চরসে ও চুপুতে ছিল আসক্ত।

১১ গান বাজনা

গান-বাজনাও হিন্দু-মুসলিম সমাজে সমান লোকপ্রিয় ছিল। চট্টগ্রামে হিন্দু ও মুসলিম রচিত রাগতালের ও গানের বহু গ্রন্থ মিলেছে। বিশেষ করে কলন্দরিয়া, চিশতিয়া কাদিরিয়া খান্দানের সুফীদের আশ্রয়ে গান-বাজনার বহুল চর্চা হয় মুসলিম সমাজে। প্রায় সব মুসলিম কবিই গান রচনা করেছেন, রাগ-তালের গ্রন্থও রচনা করেছেন অনেকেই।^{১০৭} এক সময়ে বৈষ্ণব পদাবলীর জন্যেও চারটি সুর তৈরি হয়—গড়েনহাটি, রেনিটি, মনোহরশাহী এবং মান্দারনী।

মন্দিরা মৃদঙ্গ কাড়া শিঙ্গা ঢাক দোতারা শঙ্গ সানাই কর্ণাল ফুকরে।

মধুবেলি চক্কাঁশি নানা বাদ্য রাশি রাশি যথ বাদ্য বাজে জোরে জোরে।

এছাড়া ডম্বর, শঙ্খ, সানাই, বীণা, বেণু, সিঙ্গা পিনাক, পাখোরা, দোহরা মোহরা, ভেরী, মৃদঙ্গ, ঝাঝরা, করতাল, তবলা, মুরলী, রবাব, সেতার, বেহালা, ভেউল, কাঁসা, তাম্বুরা, কবিলাস, মন্দিরা, ভাঙ্গরি, ভুঙ্গ প্রভৃতি তো ছিলই উচ্চরিক্তের ঘরে। আলাউল তো প্রথমজীবনে সঙ্গীত শিক্ষকই ছিলেন। তিনি কথা, সুর এবং তালও যোজনা করতে পারতেন, গাইয়ে তো ছিলেনই। কাব্য তথা পাঁচালী মাত্রই গীত হত। পাঁচালী গানই সর্বত্র চালু ছিল এবং জনপ্রিয় ছিল।

বেশ্যা, পেশাধারী নর্তকী ছাড়াও মেয়েরা মেয়েদের মেয়েলী (সহেলা) গান গেয়ে নাচত।^{১০৮} অন্য লোকেরা সঙ্গীত ও নৃত্য একেবারে অজ্ঞ ছিল না। হাড়ি হোম বাগদীরাও ছিল গাইয়ে বাজিয়ে :

কেহো নাচে কেহো গায় কেহো হাসি যন্ত্র বায় রঙ্গ চঙ্গ কৌতুক অপার।

—মুহম্মদ কবীর

চীন সূত্রে বাঙালীদের সম্বন্ধে জানা যায়—

The Bengalees are good singers and dancers to enliven drinking and feasting.^{১০৯}

১২. খেলাধুলা

পাশাখেলা সর্বস্তরের লোকের মধ্যে নারীপুরুষ নির্বিশেষে চালু ছিল। অনেকটা এ যুগের তাসখেলার মতোই, সর্বত্র জনপ্রিয়ও ছিল। ধনপতি সদাগর রাজার সঙ্গে ‘ব্রাতিদিন খেলে পাশা’ গেড়ুয়া (গেতুয়া) খেলাও কাঠের বল বা ফুলের স্তবক লোফালুফি চালু ছিল। পর্তুগীজরা আসার পরে তাসখেলাও চালু হয়। চোগা বা পলো খেলা চালু ছিল দরবারের ওমরাহ-সামন্তদের মধ্যে। কুস্তী বা মল্লক্রীড়া (দোসর যমের দুত/বৈসে যত রাজপুত/ মল্ল বিদ্যা শিখে অবিরত) আর চাঁচরী (শ্রীকৃষ্ণকীর্তনোক্ত) খেলাও ছিল। হা ডু ডু, কানামাছি, বুড়ীছোয়া, দাড়িয়াবান্দা, খেলাতো ছিলই। তাছাড়া দেহগঠন ও ব্যায়ামচর্চাও ছিল, আরো ছিল শক্তিচর্চার অবলম্বন লোহার বল চূর্ণ করা, বৃকে বেলভাঙা, সরিষার থেকে মুঠি দিয়ে তেল বের করা, মুঠির

আঘাতে নারিকেল ভাঙা প্রভৃতির বর্ণনা রয়েছে মানিক গাঙ্গুলীর ধর্মমঙ্গলে আর সাপের নাচ, বানরের নাচ, খঞ্জনের নাচ, বুলবুলির বা পায়রার লড়াই, আর মোরগের মোষের ও ঘাঁড়ের লড়াইতো দেখানো হতই।

যাদুকর বহুরূপ কসরৎশিল্পী প্রভৃতিও ছিল, দীর্ঘ বাঁশ হাতে দড়ির উপর দিয়ে হাঁটা প্রভৃতি এবং পোষা বাঘ-ভালুক নিয়ে নানা লোমহর্ষক খেলা দেখানো হত। এসব খেলায় শিল্পা শজ্ঞা ঘণ্টা ডঙ্ক ডুগডুগি, ডম্বর বিষাগ মৃদঙ্গ প্রভৃতিও বাজানো হত।

১৩. দাসপ্রথা

দেশে দাস প্রথা চালু ছিল। মানুষ বেচা-কেনা হত। অনেক সময় দলিল^{১১০} করেই বেচাকেনা হত তাছাড়া, গরু-ছাগলের মতো বাজারেও বিক্রয় হতো। বিগত শতকেও ভাগলপুরের বাজারের মানুষ বেচা-কেনা হতো বলে শুনেছি। সমাজে বাদী-গোলামের সংখ্যাখিকোই অভিজাত্য ও ঐশ্বর্যের পরিমাপ হতো।^{১১১} বেচা-কেনা বন্ধ হলেও ১৯৩০ সন অবধি ভদ্রলোকদের গোলাম ছিল।

১৪. ঘরবাড়ী

সামন্ত্যুগে এমনকি বিশ শতকের গোড়ার দিকেও সামন্ত-জমিদারদের চোখে প্রজারা ছিল দাসের মতোই। তাদের বিনা অনুমতিতে নিজের ভিটেতে ঘর-বাঁধা, গাছকাটা পর্যন্ত চলত না। আর্থিক সাচ্ছল্য থাকলেও ইচ্ছে মতো জুতো-পোশাক পরা চলত না। পাকা ইটের ঘরও নির্মাণের অধিকার ছিল না। তাই গাঁয়ে-গায়ে সাধারণ মানুষের ইট-পাথরের ঘরবাড়ি ছিল না, শাহ-সামন্ত-জমিদার-সদাগর নির্মিত পট্টা মন্দির-মসজিদ ছিল কুচিং কোথাও।

রাজধানীতে ইট-পাথরের দালান কোঠা অবশ্যই ছিল। জমিদার-সামন্ত বাড়িও ছিল পাকা। কিন্তু সাধারণের বাড়ি ছিল মাটির ও বাঁশের তৈরি। কুঁড়েঘর ও পাতার বা পর্ণগৃহের ঐতিহ্যও সুপ্রাচীন। কল্পবাজার অঞ্চলে কাঠের সুলভতার ফলে এবং আরাকানের ও পার্বত্য অঞ্চলের প্রভাবে কাঠের বাড়ি ছিল। আধুনিক সীতাকুণ্ড এলাকার কাঠগড়ে আরাকানীদের কাঠনির্মিত দুর্গ ছিল।^{১১২}

সদ্বীপে ফতেখান ও আবু তোরাব চৌধুরী বাঁশের দুর্গ নির্মাণ করেছিলেন। গত শতকের তীতুমীরের বাঁশের কেল্লা প্রখ্যাত। আবুল ফজল বলেন : Their houses are made of bamboos, some of which are so constructed that the cost of single one will be five thousand rupees.^{১১৩} বীর্জা নাথান ওপারীগাছ দিয়ে যশোরে ত্রিতল গৃহ নির্মাণ করেছিলেন।^{১১৪} বাঁশের ঘর দোচালা ও চৌচালা হতে পারে। দোচালা ঘরের চাল হাতীর পিঠের আদলে তৈরি হত (ধনী লোকের আট চালা হত)। জলের মাঝখানে জনটুঙ্গী নামে বিলাসগৃহ এবং এ যুগের প্যাভিলিয়নের মতো হাওয়াখানাও তৈরি করত বিলাসী ধনীরা। ঘরের সমুখের কক্ষকে হাতিনা, মধ্যের কক্ষকে পিড়া (চৈতন্য ভাগবতেও পিড়া inner apartment অর্থে ব্যবহৃত হয়েছে) এবং পেছনের কামরাকে আওলা বলে। এই আওলা অনেক সময়ে রান্নাঘর ও ভাঁড়ার ঘর হিসেবে ব্যবহৃত হয়। বৈঠকখানাকে দেউরী বা কাছারী চট্টগ্রামে ছাড়া অন্যত্র হিন্দুসমাজে চণ্ডীমণ্ডপ বলা হয়।

রূপরামের ধর্মমঙ্গল সূত্রে জানা যায়, চৌচালা ও বাঙ্গালো (Bungalow) ঘর জনপ্রিয় ছিল। চণ্ডীমঙ্গলের ফুল্লরার বারমাসীতে গরীবের ঘরদোরের বদহাল প্রত্যক্ষ করেছি। Tavernier ঢাকার সূত্রধরদের ঘরবাড়ি সম্বন্ধে মন্তব্য করেছিলেন : properly speaking only miserable huts of bamboo and mud' সদুক্তিকর্ণামৃত গ্রন্থের একটি শ্লোকে :

‘চলৎ কাষ্ঠং গলৎ কুভ্যামুত্তানতৃণ সঞ্চয়ম।

বাতুপদার্থিমত্তুকাকীর্ণ জীর্ণং গৃহং মম’- এমনি দরিদ্র গৃহের চিত্র পাই। দুর্ভিক্ষ, ভিখারী, চোর প্রভৃতি শব্দ যখন যে-কোন ভাষায় সুপ্রাচীন, তখন দারিদ্র্য থেকে মানুষের কোন কালে ও দেশে মুক্তি ছিল না। কেবল অনুপাতের তারতম্য ছিল। ম্যানরিক বলেছেন, এ দেশের গরীবের চারটির বেশি মাটির হাড়ি সরা সানকিও ছিল না।^{১৫} ‘প্রাচীন বাঙ্গলা ও বাঙ্গালী’ এবং ‘মধ্যযুগের বাঙ্গলা ও বাঙ্গালী’ গ্রন্থে ডক্টর সুকুমার সেন বাঙালীর দারিদ্র্যের তথ্যনির্ভর প্রমাণ উপস্থিত করেছেন। গৃহনির্মাণে ও গৃহপ্রবেশে বার-তিথি-ক্ষণের প্রভাব স্বীকৃত হত।^{১৬} সচ্ছল গৃহস্থ ঘরে ও ধনী ঘরে কারুশিল্পজাত আসবাবপত্র ছিল। তেমনি ছিল সোনা রূপা-পিতল-কাঁসার তৈজসপত্র। অন্যদের থাকত মাটির হাড়ি সরা সানকি পাতিল খোলা ও কাঁসা-পিতলের থালাবাটি।

১৫. মুদ্রা ও বিনিময়

বাংলাদেশ চিরকাল আন্তর্জাতিক বাণিজ্যকেন্দ্র। অধিবীর নানা দেশের বাণিজ্য তরী ভিড় জমাত চট্টগ্রাম তমলুক সপ্তগ্রাম প্রভৃতি বন্দরে। কাজেই বিনিময় ব্যবস্থাও ছিল বিভিন্ন। দ্রব্যের মুদ্রামান দুটোই চালু ছিল, যদিও পাল-সেন আমলের মুদ্রা মেলেনি। কাজেই ভিন্ন রাজ্যের মুদ্রাও চলেছে, কড়িও চলত।^{১৭} কড়ির চক্র উনিশ শতকে এবং বিশ শতকেরও প্রথম দশকে ছিল এবং বুড়ি-গণ্ডা-পণ ও কাহনের হিসাবে মূল্যমান নির্ধারিত হত।

১৬. কৃষি শিল্পদ্রব্য

বাংলাদেশে ধানই প্রধান সম্পদ। এছাড়া পার্বত্য অঞ্চলে তুলার চাষ হত এবং কাঠ মিলত। লক্ষা, ইক্ষু, সুপারী প্রভৃতি জনগণের প্রয়োজনানুরূপ উৎপন্ন হত। শিল্প দ্রব্যের মধ্যে গুড় চিনি বস্ত্র লবণই উল্লেখ্য। নৌকা ও জাহাজ^{১৮} নির্মাণও তারা করত। পার্বত্য সেগুন, জারুল, গর্জন কাঠ তাদের রপ্তানি দ্রব্যের অন্তর্ভুক্ত ছিল।

১৭. ব্যবসায় বাণিজ্য

চট্টগ্রামবাসীর নৌ-বিদ্যা বিশেষ নৈপুণ্য ও খ্যাতি ছিল।^{১৯} গোটা বাংলার ও কামরূপের (আসামের) উত্তরভারতের নেপালের ও তিব্বতের পণ্যদ্রব্য আমদানি ও রপ্তানি হত তমলুক, সাতগাঁও, বাঙলাবন্দর, হুগলী, চট্টগ্রাম প্রভৃতি বন্দর দিয়ে। কামরূপের চন্দন, উত্তরভারতের গম, যব, সুতি ও সিল্কের কাপড়, মসলিন, কাঠ, চামড়া, চাউল প্রভৃতি এসব বন্দর দিয়েই হ’ত রপ্তানি। সেযুগের বর্ণে ও বৃত্তিতে বিন্যস্ত সমাজে বিভিন্ন বৃত্তিজীবীরা স্ব স্ব পেশা নিয়েই থাকত, কাজেই ব্যবসা-বাণিজ্য উচ্চবিস্তার লোকদেরই পেশা ছিল। আর কৃষক ও পেশাজীবী স্থানীয় বাজারেই তাদের উৎপন্ন বা শিল্পদ্রব্য বিক্রয় করে সম্বষ্ট থাকত। উক্ত সব বন্দরের ব্যবসায়ীরা

কেবল বাঙালী ছিল না, ছিল মধ্য এশিয়ার, ইরানের, ইরাকের, আরবের উত্তরভারতের। এবং ষোল শতক থেকে যুরোপীয়রাই ব্যবসা-বাণিজ্যের মালিক ছিল। আমদানির দ্রব্যের একটি আদর্শায়িত চিত্র :

১. সদাগরে বোলে শুন দাঁড়ি-মাঝি ভাই	পশুবস্ত্র আদি তোলে তশরের জোর।
দ্রব্য সব নৌকায় তোল দেশে চলি যাই।	শঙ্খ চন্দন তোলে মুক্তা রাশি রাশি
চাঁদের চামর তোলে তার নাই ওর	তামা পিতল তোলে নানা জাতি ফল ...
মুক্তা শর্করা তোলে মনে মনে হাসি।	নানা জাতি বস্ত্র তোলে নানা উপকার
আর যথ দ্রব্য তোলে তার নাই সীমা	সুবাসিত জল তোলে করিতে আহার।
লবঙ্গ জাতি ফল তোলে কি কহিমু মহিমা।	

কবিকঙ্কণ মুকুন্দ চক্রবর্তীর চণ্ডীমঙ্গলে বিনিময় পণ্যের একটা তালিকা এরূপ :

ফরঙ্গ বদলে তুরঙ্গপাব নারিকেল বদলে শঙ্খ/বিড়ঙ্গ বদলে লবঙ্গ দিবে সুষ্ঠের বদলে টঙ্ক।
/তুরঙ্গ বদলে মাতঙ্গ পাব পায়রার বদলে গুয়া/গাছফল বদলে জায়ফল দিবে বয়ড়ার বদলে গুয়া। /সিন্দুর বদলে হিংসুল দিবে গুয়ার বদলে পলা/পাট শণ বদলে ধবল চামর কাচের বদলে নীলা।/লবণ বদলে সৈন্ধব দিবে জোয়ানি বদলে জিরা/ আকন্দ বদলে মাকন্দ দিবে হরিতাল বদলে হীরা।/ চণ্ডের বদলে চন্দন দিবে পাণের বদলে গাড়া/সুতার বদলে মুক্তা দিবে ভেড়ার বদলে ঘোড়া।

আরো আছে মাষ মুসারি তণ্ডুল বদরি বুররাট বাটুলা চিনা গোধুম মাড়িয়া তিল ছোলা ইত্যাদি। তালিকায় অতিশয়োক্তি রয়েছে নিশ্চয়ই, তবে এর প্রত্যেকটিই যে আমদানি বা রপ্তানি পণ্য তাতে সন্দেহ নেই।

সে-যুগে একালের মতো বিরাট বিপুল বুর্জোয়া সমাজ বা মধ্যবিত্ত সমাজ গড়ে ওঠেনি, সামন্তসমাজে গোমস্তা বেনেরাই ছিল তথাকথিত মধ্যবিত্ত ও মধ্যশ্রেণী আর সবাই ছিল প্রান্তিক চাষী, ক্ষেতমজুর ও দাসশ্রেণীর লোক এবং আরো ছিল কামার কুমার তাঁতী নাপিত ধোপা হাড়ি ডোম বাগদী কৈবর্ত প্রভৃতি বৃত্তিজীবী যাদের পক্ষে ধনসম্পদে ঋদ্ধ হওয়া কখনো সম্ভব ছিল না। এ কারণেই মঙ্গলকাব্যে কিংবা ইবনে বতুতার চৌদ্দশতকে প্রদত্ত দ্রব্যমূল্য বা ইতিহাসে (১৭২৯ খ্রীঃ) বিধৃত দ্রব্যমূল্য নিতান্ত নগণ্য। টাকায় উৎকৃষ্ট সর্ক চাল ১ মণ ১০ সের, মোটা চাল মিলতো ৭ মণ ২০ সের, তেল মিলতো ২১-২৪ সের, ঘি ১০-১১ সের (১৭২৯ খ্রীঃ)।

বারবোসা (১৫১৪ খ্রীঃ) সম্ভবত সোনারগাঁকেই বাঙ্গালা শহর বলে অভিহিত করেছিলেন, কেননা র‍্যালফ ফিচ ও তোম পিবেস বর্ণিত সোনারগাঁর সঙ্গে বারবোসা বর্ণিত সিটি অব বাঙ্গালার মিল আছে।^{১২১} রাজধানীর নামে রোমসাম্রাজ্য বা দিল্লী সাম্রাজ্য যেমন অভিহিত হত, তেমনি হয়তো বাঙালা শহর (সিটি অব বাঙ্গালা) নামে বঙ্গরাজ্যের রাজধানী বা বাণিজ্যবন্দরকে নির্দেশ করা হয়েছে। এ শহর হয় চট্টগ্রাম নয়তো সোনারগাঁও অথবা সন্দ্বীপ বন্দর হওয়ার কথা। তোম পিরেস উড়িষ্যারাজ্যের বন্দরের নামে উড়িষ্যা বলে উল্লেখ করেছেন (সুখময়, বাংলার ইতিহাস পৃঃ ৩৫৬ দ্রষ্টব্য)।

তোম শিরেসের চোখে বাঙালীরা বড় বেনে জাত আর তীক্ষ্ণবুদ্ধির এবং স্বাধীন প্রকৃতির বটে, তবে সব বাঙালী বেনেই অসাধু ব্যবসায়ী এবং বাঙলাদেশ অতিশয় সমৃদ্ধ।

বারবোসা বলেন, "All of these are great merchants and they possess great ships after the fashion of Mica, others there are from China which they call Juncos which are of great size and carry great cargoes. With these they sail to Choramandel, Malaca, Camatra, Pegu, Cambaya and Ceilon and deal in goods of many sorts with this country and many other."^{১২২}

Ralph Fitch বলেন "Sinnergaon (Sonargaon) is a town six leagues from serrccpore (Sreepur, Dacca) where there is the best and finest cloth made of cotton that is in all India great store of cotton cloth goeth from hence and much rice where-with they serve all India, Ceilon, Pegu, Malaca, Sumatra and many other places."^{১২৩}

অতএব, উভয়েই বলেছেন, সিংহল, পেগু, মালাক্কা, সুমাত্রা, কাষে, করমণ্ডল ও ভারতের বিভিন্ন অঞ্চল প্রভৃতি নানাস্থান থেকে বাণিজ্য তরী বাঙ্গালা শহর বা সোনারগাঁয়ে আসত। বারবোসা বলেছেন চীনা বাণিজ্য তরীর নাম ছিল জাঙ্কো এবং অন্য বিদেশী বাণিকদের তরীগুলো ছিল আরবি জাহাজের আদলে তৈরি।

সোনারগাঁয়ে চট্টগ্রাম হয়েই যেতে হত। কেন্দ্রীয় গঙ্গামুখ তখন চট্টগ্রামের অদূরেই ছিল।^{১২৪} কাজেই ষোল শতকে চট্টগ্রাম বন্দরের রূপধর্ম প্রমুখ ছিল। বিপ্রদাস, বিজয়গুপ্ত কিংবা মুকুন্দরাম বাঙালার বহির্বাণিজ্যের ও অভ্যন্তরীণ বাণিজ্যের যে বর্ণনা দিয়েছেন, তাতে অতিশয়োক্তি কম। Ralph Fitch যখন চট্টগ্রামে যান (১৫৮৫ সন) চট্টগ্রাম তখন আরাকান অধিকারে এবং একটি সমৃদ্ধ বন্দর। চট্টগ্রাম বন্দরের তুলা, চন্দন, (মুসাফর-ঘৃতকুমারী -aloe) চাউল প্রভৃতি আবিসিনিয়ায়, গ্রীসে, আরবে, ইরানে এবং পূর্ব ভারতীয় দ্বীপপুঞ্জে ও চীনে রপ্তানি হ'ত। এক কথায়, সে যুগের পৃথিবীর বাণিজ্য কেন্দ্র ছিল চট্টগ্রাম। পেরিপ্লাস, আর ভৌগোলিক সোলেমান, মাসুদী খোদাদদবেহ প্রমুখ দ্য বারোজ, বার্থেমা, ফিচ, ইবন বতুতা, মার্কোপলো, মাছ্যান প্রভৃতির এবং বিভিন্ন চীনা বাণিজ্যমিশনের বর্ণনার মধ্যে এ বন্দরের আন্তর্জাতিকতার ও সমৃদ্ধির প্রমাণ মেলে। ষোল শতকে পর্তুগীজেরা এদেশের সঙ্গে আরব-ইরানি বাণিজ্য গায়ের জোরে তথা লুটতরাজের মাধ্যমে বন্ধ করে দেয়।^{১২৫}

বারবোসা এদেশের উৎপন্ন দ্রব্যের নামও করেছেন : তুলা, ইক্ষু, আদা, লঙ্কা, কমলালেবু, লেবু, শুষ্কফল প্রভৃতি এবং প্রাণীর মধ্যে ঘোড়া, গরু, মেঘ প্রভৃতি বহু পশু পাখির সুলভতার কথা বলেছেন।

শিল্পদ্রব্যের তালিকায় আছে : মিহি ও রঙিন বস্ত্র, সারবাস্ত (শিরবন্দ?) মামোলা, দোগায়জা (দোগজী?), চৌতার (চাদর), বিতিলহা প্রভৃতি বস্ত্র এবং চিনি প্রভৃতি। মাছ্যানের বর্ণনায়ও বিচিত্র সুতি কাপড়ের কথা আছে : চি চিহ, মানচে-তি, শ-না-কিচ, হিন-চি তুঙ-তালি।^{১২৬} ইবন বতুতা কাপড়ের এবং মার্কোপলো চিনির কথা বলেছেন। বারবোসা খোজা

(Eunuch) করা সম্বন্ধে লিখেছেন : হিন্দুর সন্তান ক্রয় করে ব্যবসায়ীরা খোজা করত খোজারা অন্দরে চাকর, সৈনিক এবং শাসনকার্যে নিযুক্ত হত।^{১২৭}

১৮. যুদ্ধ ও যুদ্ধাঙ্গ

ভেতো ভীতু বাঙালীর নিন্দা সুপ্রাচীন। যঃ পলায়তি সঃ জীবতি নীতির অনুসরণে ভয়ে যুদ্ধক্ষেত্র থেকে ভেগে যাওয়াই তাদের নীতি। মধ্যযুগ থেকে উনিশ বিশ শতক অবধি প্রাচীন ধারার পাচালীতে বা প্রণয়োপাখ্যানে কিংবা দোভাষী পুথিতে যুদ্ধ ও যুদ্ধাঙ্গ রামায়ণ-মহাভারতের আদলেই বর্ণিত। এ ক্ষেত্রে সব কবিই ধ্রুপদী রীতি-নিয়ম মেনে চলেছিলেন। যদিও তাঁদের তীরধনুক বর্ষাবল্লম শাল ও তীর নিক্ষেপযন্ত্র আরদা, মঞ্‌হালিক, কামান, বন্দুক, কিরিচ, ছোরা, তরবারী প্রভৃতির ব্যবহার মুঘল যুগে তাঁদের অজ্ঞাত ছিল না। চতুরঙ্গ বাহিনী থাকত বটে। তবু দ্বন্দ্বযুদ্ধ, মল্লযুদ্ধ, গদাযুদ্ধ, দৈরথযুদ্ধ, বাণযুদ্ধই হয়েছে বর্ণিত। কাজেই যুদ্ধ বর্ণনায় কবিমাত্রই ছিলেন কুরুক্ষেত্রযুদ্ধের অনুকারক ও অনুসারক। অস্ত্রও ছিল সেকালের সুতরাং যুদ্ধবর্ণনা ছিল একান্তই কাল্পনিক। অস্ত্র ছিল খড়গ বর্ষা নারাচ নালিকা গদা, শল্য, গুল, মুষল, মুদগর, ভূষণী তোমর, পাশ, চক্র, টঙ্কার, অসি, খঞ্জর, বাণ। বাণ ছিল, বহুপ্রকারের অগ্নিবাণ চন্দ্রবাণ অর্ধচন্দ্রবাণ, সিংহবাণ, সর্পবাণ, দিব্যবাণ, গজবাণ, বরুণবাণ, মেঘবাণ প্রভৃতি।

যোদ্ধার পোশাকের কিছু কিছু বর্ণনাও মেলে শোহার জিরাই কাবাই পাগড়ী শিরজ্ঞাপ, কোমরবন্দ ইজার টুপি ঢাল বর্ম ইত্যাদি। রায়ের আগডোম, বাগডোম, ঘোড়াডোম- অগ্রগামী ডোমসৈন্য পার্শ্বচর ডোমসৈন্য ও অশ্বারোহী ডোমসৈন্যের অস্তিত্ব ও ঐতিহ্য স্মরণ করিয়ে দেয়। এদের হাতে বালা, কানে সোনা কোমরে ঘাঘর, গলায় ওড়ের মালা, হাতে ধনুক, পিঠে তুগে বাণ।

পরিলা ইজার খাসা নাম মেঘমালা

কাবাই পরিলা দশদিক করে আলা

পাসরি পটিকা দিয়ে বান্ধে কোমরবন্দ এবং মুঘল সৈন্যদের কাল ধল রাস্তাটুপি সবাকার মাথে আর তাদের পায়ে মোজা। - যুদ্ধবাদ্যের নাম ঢাক ঢোল কাড়া নাকাড়া দামামা ভেউর বিউগল।

১৯. লোকাচার ও কুসংস্কার

মুহম্মদ খানের 'সত্যকলিবিবাদসম্বাদ'-এ (পৃঃ ২১৮-২৪) এবং মুজমিলের 'সায়্যাৎ নামায়' লোকাচার ও নানা কুসংস্কারের বর্ণনা এবং আচারিক ও আনুষ্ঠানিক কর্তব্যাদির নির্দেশ রয়েছে। যেমন গৃহনির্মাণ, গৃহপ্রবেশ, স্নান, নতুন বসন পরিধান, রোগ, ভূত-জীন দেও তাড়ন, ব্যবসায়-বাণিজ্যের শুভাশুভ, ঝাড়ন-ফুক-মস্তের প্রয়োগ বিধি, ঋতু, মাস দিনক্ষণ তিথি-নক্ষত্রের শুভাশুভ, প্রভৃতির বর্ণনা আছে।^{১২৮} এগুলো চট্টগ্রামবাসীদের তথা বাঙালীর প্রাত্যহিক জীবনের আচার-বিশ্বাসের অন্তর্ভুক্ত ছিল। দু'একটি নমুনা দিই :

গৃহ নির্মাণ :	বৈশাখে উত্তম বড়	যদি কেহ নির্মে ঘর ধনে জ্বনে রাখে অনুক্ষণ
	জ্যৈষ্ঠ মন্দখতিশয়	মিত্র সব শত্রু হয় আষাঢ়ে না রহে চতুষ্পদ।
স্নান :	সোমে-গুরু ধন বারে	মঙ্গলে যে স্নান করে আউ টুটি চিন্তা উপজয়।

রোগ :	রবিবারে রোগ হয়	সপ্তদিন মহা ভয় কিবা পঞ্চ দিবস সংশয় ।
	কৃষ্ণ কুরকুটী দিব	দানে বিঘ্ন খণ্ডাইব বুধবারে রোগ হয় যার ।
ভূতদৃষ্টি :	ভূতদৃষ্টে হয় জান	অজা-বৃষ দিব দান । ^{১২৯}
	ঘোড়ার কপালে লোমের ধূয়া, কালো মুরগী, ময়ূরপুচ্ছ, হিঙ্গুল, কস্তুরী, শস্যধূম, জুতর শুড়ো	
	কালোমাটি, গাভীর হাড়, মাছের পিত্ত, হলুদ চিলের মাংস, প্যাঁচার নখ, কালো বিড়াল, কালো	
	মোরগের বিষ্ঠা, গন্ধক প্রভৃতিও দারুণটোনার ও বিভিন্ন ভৌতিক রোগের চিকিৎসার উপকরণ ।	
বসন পরিধান :	নববস্ত্র শুক্রবারে	পিন্ধিলে উত্তমবারে চিন্তাহোস্ত্রে পরিত্রাণ মনে
	নববস্ত্র ফাড়ি যবে	এহি রবিবারে তবে ফাড়ি শাস্ত্রের পরমাণে ।

এ ছাড়া বৌদ্ধ (মঘা) ও হিন্দু গণক, আচার্য জ্যোতিষের কোষ্ঠী, রাশি ও হস্তরেখা গণনা এবং মুসলিম নজুমের ফালনামা তথা ভাগ্যগণনার প্রতি মানুষেরা আস্থা ছিল। বর্ষশেষে ও নববর্ষে অর্থাৎ চৈত্র-বৈশাখ মাসে আচার্যব্রাহ্মণরা গ্রহবিপ্ররা ও গণকেরা ঘরে ঘরে গিয়ে পরিবারের সবারই ভাগ্য গণনা করত আর ধান-চাল ও অর্থ উপার্জন করত। মুসলমানেরা ফালনামা তথা অদৃষ্ট গণনার পুথি রচনা করেছেন। সেকালের অজ্ঞ মানুষের সত্যপ্রীতি কুসংস্কারভিত্তিক ছিল। তারা সত্য নির্ণয়ে পানিপড়া, চালপড়া, নলচালা, বাটিচালা প্রভৃতি মন্ত্ৰচালিত পদ্ধতির অনুরাগী ছিল। এগুলোতে আদিকালেক্তি অগ্নি আসন অঙ্গুরী সর্প, লৌহ তুলা এবং ধর্মধর্ম পরীক্ষা এ অষ্টপরীক্ষার রেশ ও ঐতিহ্য রয়েছে।^{১৩০} ডাকিনী-যোগিনী ঝাড়ফুক তুক-তাক বাণ-উচ্চাটন তাবিজ-কবচ-তাগা-মাদুলী দারু-টোনা বশীকরণ প্রভৃতিতে বাঙালীর বিশ্বাস সুপ্রাচীন এবং এগুলো মগোলীয় ঐতিহ্যের স্মারক। ভূতের ও জীনের আসরে প্রেতদৃষ্টি প্রভৃতিতে বিশ্বাস আজো প্রায় অটুট। কায়াসিদ্ধি ভূতসিদ্ধি খেচরসিদ্ধি প্রভৃতি তত্ত্বও সুপ্রাচীন।

এখানে উল্লেখ্য যে দেশজ-মুসলমানদের মধ্যে বৌদ্ধ হিন্দু পিতৃপুরুষের আচার-সংস্কার, রীতি-রেওয়াজ, তত্ত্বচেতনা ও মনন-ধারা থেকে গিয়েছিল যেমন অবিমোচ্য হয়ে বৌদ্ধজ হিন্দু সমাজে রয়ে গেছে বৌদ্ধ বিশ্বাস, সংস্কার, আচার ও দেবতা। নিরক্ষর নির্জ্ঞান মানুষের শাস্ত্রের সঙ্গে প্রত্যক্ষ সম্পর্ক থাকে না- আচারিক সম্পর্কই তাদের ধর্মতত্ত্বা মেটায়। সাংখ্য যোগ তন্ত্র চেতনা ছিল সুপ্রাচীন বাঙালীর মর্মমূলে। তাই বৌদ্ধ যুগে বৌদ্ধপ্রভাব স্বীকার করে এবং ব্রাহ্মণ যুগে ব্রাহ্মণ্য আবরণ গ্রহণ করে আর দেশজ মুসলিমসমাজেও চালু ছিল ইসলামি আবরণ নিয়ে এবং এখনো রয়েছে। এ জন্যেই নাথগীতিকা, গোরক্ষবিজয় ও যোগতত্ত্ব বৌদ্ধ-হিন্দু-মুসলিম নির্বিশেষে সবার প্রিয় ও প্রয়োজনীয়। তাই সহজিয়া-বাউলমতই বাঙালী মাত্রেরই আদি মতের আধুনিক রূপ। এ জন্যে বৌদ্ধ-হিন্দু যোগতন্ত্রের এবং দেশজ মুসলিম সুফীতত্ত্বের লক্ষ্যে ও সাধন পদ্ধতিতে মৌল সাদৃশ্য বিদ্যমান।

আঠারো শতকের উষাকালে কবি নসরুল্লাহ খোন্দকার তাঁর রচিত ‘শরীয়ৎনামা’ গ্রন্থে দেশজ মুসলিমের ঘরোয়া, সামাজিক ও শাস্ত্রিক জীবনে বৌদ্ধ হিন্দু প্রভাবের বাস্তব বর্ণনা দিয়েছেন সক্ষোভে। যেমন মুসলিম কন্যা বা বধূ প্রথম রজস্বলা হলে বাজনা বাজিয়ে সহেলার ও নৃত্যাদির অনুষ্ঠান করা হত। রজস্বলা নারীকে ছুঁলে অন্যদের স্নান করে পবিত্র হতে হত। রজস্বলা হিন্দু নারীর মতো মুসলিম নারীরও ৫/৭ দিন পরে নাগিত দিয়ে নখ কাটিয়ে পরিধেয় বস্ত্র ধোপার বাড়ি পাঠিয়ে গোবরজলে ঘর লেপন করে শুদ্ধির ব্যবস্থা করা হত। প্রসূতি ও আঁতুড় ঘর সম্বন্ধে হিন্দুর মতোই অপবিত্রতার ধারণা ছিল তাদের। মাখায় করা ডালায় বা

কুলার ধান দুর্বা ঘট আশ্রমের নিয়ে গাঁয়ের বউ-ঝিরা শিরনীর জন্যে ভিক্ষা চেয়ে ঘারে ঘারে ফিরত। মৃতদেহও অপবিত্র মনে করা হত। মৃতের পরিবারের লোকেরা নাপিত ডেকে চুল-দাড়ি খেঁড় করাত, নারীরাও কাটাত নখ। শিশুর কল্যাণে ঘণ্টার বদলে নিমরিয়া পীর-এর উদ্দেশ্যে মোরগ বলি দিত। সূর্যমুখী কলার নৈবেদ্য দিয়ে ব্রাহ্মণের দ্বারা পুষা (পুষ্কর) দেবতার পূজা দিত, মহালক্ষ্মীর নামে বলি দিত হাঁস। হাঁসের রক্ত ছিটিয়ে দিত ধানের গোলায়। আবার 'কেহ কেহ শূকর চণ্ডীরে দেওস্ত হাঁস'। কদলী-তণুল আটা কাঁচা দুধ তৈরি অপক্ক শিরনী ফাতেহা দিয়ে গলায় ভূণ বেঁধে সে-শিরনী খেত ওরা। বৌদ্ধদেবতা (আরাকানী) মঘিনীকে ছাগল উৎসর্গ করত, পুস্কর বা রাস্তা নির্মাণকালেও মঘদের মতো 'বিঘুর ভিতরে অকুপ করএ। বিঘুব-সংক্রান্তি র দিনে মুসলিমরা গৃহপালিত গরু ছাগলকে গলায় ও শিঙে ফলের মালা দিয়ে সাজাত এদিন কেউ কেউ অঙ্গে হলুদ ও চন্দন মাখত। মঘদের (চট্টগ্রামবাসী ও আরাকানী বৌদ্ধদের) মতো মুসলিম বরও মাথায় 'কুসুমের বন' নামের সোনার টুপি পরত আর 'ধূপ-ধান্য-পিঠা-কলা-শিলাপূর্ণ বরগালা রাখা হত বর-কনের সুমুখে। বিয়ের সময়ে মারোয়া বাধত, জুলুয়া দিত আর গেড়ুয়া (গেড়ুয়া কাঠের বল) খেলত, পাশা খেলত/সেকালের মুসলিম চাষীরা 'হাল পালন' ব্রত পালন করত। আষাঢ়ের প্রথম সপ্তাহে বসুমতীকে রজঃস্বলা মনে করত বলে প্রথম সাতদিন 'হল' কর্ষণ থেকে বিরত থাকত। চাষীরা যাদু প্রতীক ডিম কিংবা জামগাছের ডাল জমির কেন্দ্রস্থলে পুঁতে প্রথম চাষ আরম্ভ করত। আর শব-ই-বরাতের রাতে মৃত পূর্বপুরুষের কল্যাণ লক্ষ্যে এক এক জনের নামে এক এক জোড়া ভাত বা এক এক জোড়া রুটি কলাপাতায় রেখে উৎসর্গ করত 'পূজা-যেন রাখি থাকে বুতের সাক্ষাৎ।'

তুর্কি আমলে রাজকীয় সমর্থন হারিয়ে হিন্দুর শাস্ত্রী ও সমাজপতি অসহায় হয়ে পড়েছিল। ফলে সমাজে নিয়ম-নীতি রীতি-রেওয়াজ ও শাসন-শৃঙ্খলা মানা লোকের সংখ্যা হ্রাস পেতে থাকে। তাই বিষ্ণুক্ক ব্রাহ্মণ বলে :

বৃক্ষলতা ফল হয়ে রাজা স্নেহজাতি
মৎস্য মাংসে এক হৈলে বিধবা যুবতী
রাজা নাহি পালে প্রজা স্নেহের আচার
দুই তিন চারি বর্ণে হৈল একাকার।

দেবতা ব্রাহ্মণ হিংসা করে স্নেহ জাতি
ক্ষেত্রীযুদ্ধে শক্তিহীন নাহি যতি সতী।
গো-পোষণ বলি যজ্ঞ ছাড়িলা বিশ্বদেবা
শূদ্রসব ছাড়িলেক ব্রাহ্মণের সেবা।

২০. জনগণের আর্থিক অবস্থা

প্রাচীনকালে নয় শুধু, মধ্যযুগেও এমনকি উনিশ শতকেও সাধারণ বাঙালীর জীবনযাত্রা ছিল নিম্নমানের। জীবনে তঞ্চর ব্যবহার করেনি বা তঞ্চ হাতে পায়নি কর্ষণ-কাড়ি-কপর্দকই চিরসঞ্চল তেমন দরিদ্রলোকই ছিল দেশে ও সমাজে সংখ্যাগুরু। সদুক্তিকর্গামৃত, সুভাষিত রত্নকোণ আর্ঘ্যসপ্তশতী, শেখ শুভোদয়া, চর্যাগীতি, বৃন্দাবনাকর, বাসনামঞ্জরী, সুভাষিতাবলী প্রাকৃতপৈঙ্গল ও মধ্যযুগের সাহিত্য প্রভৃতি সূত্রে তা আমরা জানতে পাই। পর্যটক টমাস বাউরী (১৬৬৯-৭৯) এদেশে এক টাকার মূল্য ৩২০০ কড়ি দেখেছিলেন। বর্তমান সময়ে ছিল ১০৫২০ কড়ি। অন্যান্য পর্যটক সূত্রেও মানুষের দারিদ্র্যের খবর মেলে।

সে-যুগে হিন্দুসমাজে বৃত্তিভিত্তিক শ্রেণীবিভাগ অলঙ্ঘ্য ছিল। দেশজ মুসলিম সমাজের মধ্যেও পেশাভিত্তিক শ্রেণীবিভাগ প্রায়ই ছিল : জোলা, বেদে, বারুই, হাজাম, নিকেরী, কুমার

প্রভৃতি। কাজেই চামার, কামার, কুমার, নাপিত, ধোপা, মোল্লা, পুরুত, শজ্জ-বণিক, গন্ধবণিক, হাড়ি, ডোম, জেলে, পালকী-বাহক 'কাহার', তাঁতী প্রভৃতির বংশানুক্রমিক আর্থিক অবস্থার হ্রাস-বৃদ্ধি লক্ষণীয়ভাবে হওয়ার কারণ ছিল না। সেকালে সাধারণ মানুষের জীবনযাপন প্রণালী ছিল ঋজু। অনাড়ম্বর জীবনে ভাত-কাপড় ছাড়া চাহিদা ছিল সামান্য। তারা বছরের অধিকাংশ সময় খালি গায়ে থাকত, চিরকাল নগ্নপায়ে জীবন কাটাত। সোনার অলংকার ধারণে কিংবা ইট-পাথরের ঘর নির্মাণে না-সহ্য কুসংস্কারজাত তীতি ছিল, তা ছাড়া সামন্ত-জমিদাররাও উচ্চবর্ণের লোকেরা তথাকথিত ছোটলোকদের এসব অধিকারে বঞ্চিত রাখত। অভিজাতরাও তাদের উন্নত জীবনযাপনের ঔদ্ধত্য সহ্য করত না। এক কথায় এরা ছোট ঘরে ছোট মন নিয়ে থাকত, জনাসুত্রেই কর্মজীবন ও ভাগ্য নিয়ন্ত্রিত হত তাদের। পুরুষের কৌপীন ও গামছাই ছিল আটপৌরে পরিধেয়, হাটে-বাজারে কিংবা কুটুম্ববাড়ি যেতে হলেই কেবল ধুতি-তহবন, চাদর-কুর্তা, ছাতা লাঠির প্রয়োজন হ'ত। তাও অনেক সময় পরিজন-প্রতিবেশী থেকে ধারে পাওয়া যেত। জমিদারদের শাসন ক্ষমতা ছিল বলেই দাপট ছিল অপরিমেয়। রায়তের জমিতে অধিকারও দৃঢ় ছিল না। ফলে জনগণ জমিদারের অর্ধ-দাসের মতোই ছিল। হজুরের কাজকর্মে এদের বেগার খাটতে হত, আর অন্যত্রও হজুর-মজুরের সম্পর্ক বান্দা-মনিবের সম্পর্কের চাইতে উন্নত ছিল না।

অভির্ভূতি, অনাবৃষ্টি, বন্যা, অগ্নিকাণ্ড প্রভৃতি প্রাকৃতিক দুর্যোগে এবং রোগ, মহামারী প্রভৃতি প্রাণনাশকর বিপদ আপদে এরা প্রায়ই নিঃশেষ হয়ে পড়ত। ফলে এদের আর্থিক জীবনে চিরকালই অনিশ্চয়তা ছিল। কাজেই দেশের অধিকাংশ লোক গরীব ছিল। রোগে দুর্ভিক্ষে মহামারীতে তারা মারা পড়ত। এজন্যে সেকালে একালের মতো জনসংখ্যা দ্রুত বৃদ্ধি পেত না। তাদের সর্বোচ্চ কামনা ছিল 'আমার সন্তান যেন থাকে দুধে-ভাতে'। কেননা উচ্চাকাঙ্ক্ষার কোনো উপায় ছিল না সমাজ-ব্যবস্থায়। এজন্যেই সম্ভবত দেশে চোর-ডাকাতের উপদ্রব ছিল। রাহাজানি হত। এমনকি জমিদার ও ব্রাহ্মণরা পর্যন্ত চুরি ডাকাতি করত। পরের যুগের দেবীসিংহ শোভাসিংহ প্রভৃতির কাহিনী সবাই জানে। চৈতন্যভাগবতে বৃন্দাবনদাস ব্রাহ্মণসন্তানের চুরি-ডাকাতি পেশার উল্লেখ করেছেন। আর ভিথিরী ও ভেকধারী তো ছিলই। বৌদ্ধভিক্ষু, বৈষ্ণব, শৈব এবং কলন্দর ভেকধারী ভিথিরী সম্মানিত ভিক্ষুক ছিল। মুসলমানেরাও ভিথিরীকে বলে ফকির।

একদিন আসি এক শিবের গায়ন

আইল, করিতে ভিক্ষা প্রভুর মন্দিরে

ডমরু বাজায় গায় শিবের কথন

গাইয়া শিবের গীত বেরি নৃত্য করে।

তখনো উচ্চবর্ণের লোকদের ধনী বা দরিদ্র হবার পথ খোলাই ছিল। রাজ-সরকারেও বিভাগে চাকুরী গ্রহণ, বিভিন্ন ব্যবসা চালানো, দালানী ও উৎকোচ গ্রহণ প্রভৃতি নানাভাবে ধনোপার্জন সম্ভব ছিল। আবার লাম্পট্য, জুয়া, বিলাসিতা প্রভৃতির মাধ্যমে গরীব হওয়াও ছিল সহজ। বস্ত্রত অশিক্ষিত কৃষিজীবী গৃহস্থরা ডাল-ভাত ও শাক-তরকারীতে তুষ্ট থাকত বলে এবং পোশাক পরিচ্ছদাদির প্রয়োজনবোধ করত না বলেই^{১৩} সমাজে সচ্ছল জীবনযাপন করত। এরাই ছিল এ যুগের ভাষায় মধ্যবিত্ত। আর চাকুরে ও বেনেরা মুৎসুদ্দিরা ও জমিদারেরা ছিল উচ্চ মধ্যবিত্ত বা সেকালের মধ্যশ্রেণী। কেননা বড় চাকরী ও জায়গীর পেত সামন্ত-শাসকগোষ্ঠীর

অবাঙালীরাই। ফলে বাঙালীর ধর্মীয় ও আর্থিক সমাজ-কাঠামো প্রায় অপরিবর্তিত ও সমাজ অবিচল ছিল। মুকুন্দরাম অঙ্কিত ফুল্লরার ও মোল্লার^{১০২} জীবন-জীবিকার চিত্র, বিজয়গুপ্ত প্রদত্ত জোলা-সঙ্কীর্ণ চার পণ কড়ির বর্ণনা^{১০৩} এবং ইবন বত্তুতা বর্ণিত বাজারদর^{১০৪} থেকে বোঝা যায় দেশের সাধারণ লোক দরিদ্র ছিল। এ সূত্রে মনে রাখতে হবে হোটেল ইন্টারকন্টিনেন্টাল বা সোনারগাঁও ঢাকা শহরের ঝঙ্কির প্রতীক বা পরিমাপক হলেও জনগণের সঙ্গে তার কোন যোগ নেই।

গুপ্ত আমলের মুদ্রা অনেক মিলেছে, কিন্তু পাল ও সেন আমলের কোন মুদ্রা আজো অবিষ্কৃত হয়নি। অথচ আমদানি না হোক রপ্তানি বাণিজ্য তাদের অবশ্যই চালু রাখতে হয়েছিল। এরা হয়তো বহির্বাণিজ্যে পণ্যকে বা রূপার কিংবা সোনার কাঠিকেই বিনিময় মাধ্যম করেছিলেন, আর বাজারে চালু রেখেছিলেন কড়ি অথবা নিম্নমানের কোন ধাতুর মুদ্রা। একালের দুর্বল রাষ্ট্রগুলোর মতো বাণিজ্যক্ষেত্রে বাঙলার কোন প্রভাব ছিল না বলে কিংবা এ দেশে সোনা-রূপার খনি ছিল না বলে মুদ্রা তৈরি না করে পাল-সেনেরা নিত্যান্ত মিশ্রধাতুর মুদ্রা চালু করেছিলেন হয়তো এবং কালে লোকের ঔদাসীণ্যে বিলুপ্ত হয়েছে সেগুলো। তুর্কি আমল থেকে নিয়মমতো ও নিয়মিত স্বর্ণ ও রৌপ্য মুদ্রা তৈরি হত, সব স্বাধীন সুলতান-বাদশা-ই স্বনামে মুদ্রা তৈরি করাতেন, কারণ এ ছিল স্বাধীন ও সার্বভৌম ক্ষমতার প্রতীক।

মসলিন রেশম লবণ সুপারি গুড় চিনি মরিচ ক্যাসীস প্রভৃতি কয়েকটি পণ্য বাঙলাদেশেরই ছিল বটে, কিন্তু প্রায় গোটা উত্তরভারতের দেশগুলোর তিব্বতের আসামের পণ্যসামগ্রীও তমলুক, সপ্তগ্রাম, বাঙ্গালাশহর, চট্টগ্রাম, হুগলী ও কোলকাতা বন্দর দিয়ে বিভিন্ন কালে বিদেশে রপ্তানি হত। বাঙালী নির্মিত নৌকা-জাহাজও বিদেশে চালান যেত।

এ ক্ষেত্রে একালে সেকালে কোন পার্থক্য দেখা যায় না। উৎপাদক-শিল্পী শ্রমিকরা ছিল চিরদরিদ্র ও বঞ্চিত। মালিক-বণিক-ফড়ে দালালরাই বেচাকেনার মজা লুঠতো। কাজেই মসলিন নির্মাতা, তাঁতী রেশম কর্মী কিংবা জাহাজনির্মাতা একালের চা-শ্রমিক বা খনি-মজুরের মতোই ছিল দীন দুঃখী। কাজেই ব্যবসায়ীর ঐশ্বর্য কিংবা বন্দরের অটল অজস্র চালু মুদ্রা জনসাধারণকে ধনী করেনি। জমি যার ধান তার। কাজেই ধানাদি শস্যও চাষী-মজুরকে দুর্ভিক্ষের কবল মুক্ত করেনি কখনো। সেকালে ঝাড়া-খরা-বন্যার ফলে ৩/৪ বছর অন্তর আঞ্চলিক দুর্ভিক্ষ প্রায় স্বাভাবিক ব্যাপার ছিল। তাই স্বল্পচাহিদার খালি গা-পায়ের মানুষের খাদ্যের অভাব ঘোচেনি কখনো।

চৌদ্দ শতকের (১৩৪৫-৪৬ খ্রীঃ) ইবন বত্তুতা দ্রব্যমূল্য এখানে অত্যন্ত কম বলে উল্লেখ করেছেন, টাকায় আট মণ ত্রিশ সের চাল কেনা যেত এবং এটাই বাঙালী ক্রেতার চোখে চড়া দাম। তিন টাকায় দুগ্ধবতী গাভী মিলত, এক টাকায় আট মোরগ, টাকায় পনেরোটি পায়রা, চার টাকায় চৌদ্দ সের চিনি বা চৌদ্দ সের ঘি পাওয়া যেত; আর দুই টাকায় পাওয়া যেত ত্রিশ হাত কাপড়। অতএব বাঙালীরা দরিদ্র ছিল। টাকা ছিল দুর্বল। চীনা পর্যটক ওয়াং তা মুয়ান বলেছেন বাঙালীরা কৃষিজীবী, বছরে তিনটে ফসল ফলায়। তারা পরিশ্রমী। বাঙলাদেশে দ্রব্যসামগ্রীর দাম কম-সস্তা। টাকা নয়, কড়িই ছিল বেচা-কেনার মাধ্যম। এক টাকার সমান

ছিল ১০৫২০টা কড়ি। টমাস বাউরীর সময়ে [১৬৬৯-৯৭ খ্রীঃ] ছিল ৩২০০ কড়ি। অতএব টাকা ছিল দুর্লভ। মাহুয়ানের (কও ছুঙ লিঙ) গ্রন্থে বাঙালীর জাহাজের ও জাহাজনির্মাণ ব্যবসার কথা রয়েছে আর আছে আন্তর্জাতিক বাণিজ্যের উল্লেখ। রূপার টাকা থাকলেও কড়িই মুদ্রা হিসেবে চালু ছিল। উৎপন্ন দ্রব্য ছিল- গম, তিল, ডাল, জোয়ার, আদা, সরিষা, পিঁয়াজ, ভোঙ, কোয়াস, কলা, আম, কাঁঠাল, আখ, সেগুন, নারকেল, ধান প্রভৃতি, তালের ও খেজুরের রস থেকে তৈরি হত মদ। ছয় রকমের উৎকৃষ্ট সূতী কাপড়ও এরা বুনতো, গাছের ছাল দিয়ে কাগজ তৈরি করত গুটিপোকা পুষে রেশমের চাষও করত। এ ছাড়াও মানুষ পোশাক ও আচার সম্বন্ধে এ গ্রন্থে কিছু অতিশয়োক্তি ও ভুল তথ্য রয়েছে। চীনাদূত ফেই শিন বলেন বাঙলাদেশের (গৌড়ের) লোকেরা যেমন সম্পদশালী তেমনি সৌজন্যেও সুন্দর, তাদের চরিত্রও মহৎ। দেশের লোকেরা ব্যবসায় করে, দেশের মাটি উর্বর, বছরে দুবার ধান পাকে। নারীপুরুষ ক্ষেতে কাজ করে এবং কাপড় বুনেন। এরা টাকার বদলে কড়ি ব্যবহার করে। এরা কাপড়, চিনি, ঘি রপ্তানি করে (অন্যান্য রপ্তানিদ্রব্য বাঙলার নয় বলে বাদ দিলাম) বারবোসার বাঙলা-শহর যদি চট্টগ্রাম বন্দর কিংবা সন্দ্বীপ বন্দর হয়, তা হলেই বলতে হবে এখানে বড় বড় জাহাজ নির্মিত হত এবং এ বন্দরে সেদিন পৃথিবীর নানাদেশের ব্যবসায়ী-ভারতীয় যুরোপীয় চীনা হাবসি ইরানি আরবি প্রভৃতি আসত। বারবোসা বাঙলার সাদা চিনি ও কাপড়ের তারিফ করেছেন। বাঙলার আদা, কমলালেবু, লেবু, আর বড় মোরগ ও মোরগের উল্লেখও করেছেন তিনি। তিনি এ-ও বলেছেন যে খোজা বানিয়ে দাসব্যবসাও করে বাঙলার সদাগরেরা।

গ্রাম্যসমাজ

গ্রামের অশিক্ষিত লোক সমাজ, ধর্ম ও পুরুষানুক্রমিক সংস্কার মেনে চলায় অভ্যস্ত ছিল। এসব ব্যাপারে বিদ্রোহ করার কথা তাদের মনেও জাগত না। গায়ে সর্দার তথা মাতব্বর ছিল। গোষ্ঠীপতির নির্দেশে ও পরামর্শে এক এক গোষ্ঠীর লোক পরিচালিত হত। আবার গোটা পাড়ার বা গাঁয়ের একজন বা একাধিক সমাজপতি, সর্দার বা মতব্বর থাকত। তাদের নির্দেশে ঝগড়া-বিবাদে মীমাংসা হ'ত। কিংবা তারাই বিচার করে শাস্তি বা খালাস দিত। বিবাহ, শ্রাদ্ধ বা জিয়াফত প্রভৃতি অনুষ্ঠানও তাদের কর্তৃত্বে ও নেতৃত্বে সম্পাদিত হ'ত। বিদ্রোহী কিংবা অপরাধীকে, (কায়িক শাস্তি দান অসম্ভব হলে) নাপিত ধোপা ও মোল্লা-পুরুত বন্ধ করে, সমাজে পতিত তথা একঘরে করে রাখা হ'ত। এটি অত্যন্ত অপমানজনক চরম শাস্তি। পতিত বা একঘরে লোকের সঙ্গে কেউ সহযোগিতা করত না। ধোপা, বাদ্যকর, কামার, স্বর্ণকার প্রভৃতি হিন্দু-মুসলিম সমাজের যোগসূত্র স্বরূপ ছিল। এদের মধ্যে নাপিতের ভূমিকা ছিল বহু বিচিত্র। মুসলিম সম্ভানের জন্য থেকে বিয়ে অবধি সব অনুষ্ঠানে সে ছিল অপরিহার্য। সর্বদেশে নাপিতেরা বাচাল বলে চিরকালীন কুখ্যাতি আছে। নাপিত যথার্থ অর্থে নরসুন্দর, সে পরিবারের সুখ-দুঃখের সাথী সে অনেক রোগের চিকিৎসক, নানা খবরের ভাগ্যরী। নাপিতকে ধোপাকে (সাদা কাপড়ের ব্যবহার বেশি ছিল বলে) আর মোল্লাকে ও (হিন্দুর) পুরুতকে বার্ষিক ধান্য দানের বিনিময়ে সবাইকে অবশ্যই নিযুক্ত রাখতে হ'ত। ধনীরা ভূমিদানের বিনিময়ে এদের সেবা

পুরুষানুক্রমে করত। ধর্মীয় অনুষ্ঠানপার্বণ এবং সামাজিক-বৈবাহিক উৎসবাদি অবশ্য করণীয় ছিল। অন্যথায় নিন্দায়, স্থায়ী কলঙ্কের লজ্জায় এবং সমাজপতির শাসনে জীবন হয়ে উঠত দুর্বহ।

উপসংহার

মধ্যযুগের সাহিত্যে যথার্থ কিংবা পূর্ণাঙ্গ বাস্তব সমকালীন সমাজচিত্র মেলে না। সাহিত্যে আদর্শায়িত বা অতিকথনদুষ্ট কল্পনাপুট চিত্রই মেলে। তা ছাড়া মূল বর্ণিতব্য বিষয়ের সঙ্গে প্রাসঙ্গিক না হলে শাস্ত্র সমাজ সংস্কৃতি সম্বন্ধীয় বিষয়ের কিংবা বিশ্বাস সংস্কারের নীতি-নিয়মের ও রীতি-রেওয়াজের পূর্ণাঙ্গ চিত্র অঙ্কিত হয়নি। প্রাসঙ্গিকভাবে অযত্নে বলা কথা থেকেই আমরা যুক্তি-বুদ্ধি খাটিয়ে একটা সামগ্রিক মানস কিংবা বাস্তবচিত্র কল্পনা করে নিতে চাই। ফলে সে-কল্পচিত্র কখনো কায়ারূপে কখনো কঙ্কাল আকারে কখনো বা মায়া রূপেই আমাদের চোখে প্রতিভাত হয়।

তা ছাড়া সে-যুগের সাহিত্য ছিল দেব-দৈত্য-নর বা রাজা-বাদশা-সামন্ত-সর্দার নিয়ে স্বর্গমর্ত্যপাতালের পরিসরে বাস্তব-অবাস্তবের সীমা ছাড়িয়ে লৌকিক অলৌকিকের বাধা অতিক্রম করে মনোময় কল্পলোক রচনার লক্ষ্যে নিয়োজিত। একালের গল্প উপন্যাস নাটক প্রবন্ধের মতো সমকালের ও স্বস্থানের জগৎ-জীবন-জীবিকা নিয়ে কিংবা শাস্ত্র-সমাজ-সংস্কৃতি নিয়ে কিংবা বাস্তব জীবনের সমস্যা-সম্পদ ব্যাঙ্গানন্দ-যন্ত্রণা নিয়ে রচিত নয় বলে এ সাহিত্যে বাস্তব জীবনপ্রতিবেশ কিংবা জীবনচিত্র দুর্লভ। কৃষ্ণ কখনো কবির অনবধানতায় অজ্ঞতায় কল্পনারদৈন্যে সমকালীন প্রতিবেশ জগৎকীর জন্যে উকি দিয়েছে মাত্র। তাই আমাদের লোকাযত জীবনে, লোকাচারে, লোকসংস্কারে, লোকবিশ্বাসে লোকপ্রচলিত প্রথায়পদ্ধতিতে ও অনুষ্ঠানে যে আদিম যাদুবিশ্বাস ও সংস্কার, আচার ও রীতিনিয়ম অবিকৃতভাবে কিংবা ঈষৎ রূপান্তরে রয়ে গেছে, সে তথ্য আমরা লিখিত সাহিত্যে পাইনে, পাই লোক-সাহিত্যে, লোক-আচারে, গ্রামীণ উৎসবে, পার্বণে, অনুষ্ঠানে, নানা আচারে ও রীতি-পদ্ধতিতে। আলপনায়, লোকনৃত্যে উলুধ্বনিতে, গাজনের মতো পার্বণিক লোক-সঙ্গীতে, গম্ভীরায়, ঝুমুরে, গাজীরগানে আর একতারা দোতারা শিঙ্গা ঝাঁপি ভেঁপু মন্দিরা খঞ্জনী, ঢাক, ঢোল প্রভৃতি লোকবাদ্যে, আঁতুড় ঘরের আচারে, ষষ্ঠীপূজায়, সাধভক্ষণে, গায়েহলুদে, পানিভরণে কিংবা কলাগাছে, আত্মসার মুখে জলপূর্ণ ঘটে, ধানে দূর্বায় হলুদে, দীপে, ধূপে ধূনায় তেলে সিন্দুরে, ফিরনী-পায়েসে, পান-সুপারিতে মারোয়ায় জুলুয়ায়, গেঞ্জিয়া-পাশাখেলায়, দুধমাছ তত্ত্বে এবং তুকতাকে দারুটোনায় বাণে যাদুতে উচ্চাটনে বশীকরণে, বসুমতীপূজায়, কুমারীর বীজবপনে, পানিমাঙনে, বনের দেবী-বিবি পূজায়, মহামারীর দেবতাপূজায় আমাদের অট্টিক-মঙ্গোল পূর্বপুরুষের বিশ্বাস-সংস্কারের ঐতিহ্যের স্বাক্ষর ও সাক্ষাৎ মেলে।

নানা প্রসঙ্গে আগেও বলেছি এখানেও বলি দুর্গোৎসবে ষষ্ঠীর কলা-বৌ নব-পত্রিকা পূজা, শবরোৎসব, নবান্ন, পৌষপার্বণ হোলি, চড়ক, গাজন প্রভৃতি এবং কুলায় বা ডালায় খাদ্যের সাচ্ছল্যের প্রাণের ও সৃষ্টির বা বংশবৃদ্ধির প্রতীক দূর্বী হলুদ ধান চাউল কলা নারিকেল পান

সুপারি তৈল সিন্দূর, হিন্দুদের উলুধ্বনি শঙ্খধ্বনি, আলপনা, গোময়, পঞ্চগব্য, অরুন্ধন, অম্বুবাচী, দধিমঙ্গল, খইছিটানো প্রভৃতি বাঙালী আচার। লক্ষীর ঝাঁপি স্নানযাত্রা ঝুলনযাত্রা রথযাত্রা বাঙালীর পার্বণ আর ধর্মঠাকুর মনসা চণ্ডী ওলা শীতলা বাসুলী জাহ্নুলী ক্ষেত্রপাল যক্ষ পীর-নারায়ণ সত্য ও তাঁর চেলাদেবতা প্রভৃতি বাঙালীর সৃষ্টি।

পাদটীকা

১. Ain-I-Akbari II. Tran : Jarret, edited by J. N. Sarkar p. 184.
২. The Muhammadan of Eastern Bengla : JASB. vol. LXIII pt. III 1894, p. 34
৩. ক. History of India etc : Elliot and Dawson. vol. VI
খ. Waqiat-I-Jahangiri, p. 375
গ. British Policy and Muslim Education in Bengal. A. R. Mallick, p. 7.
৪. Promotion of learning during Muhammadan Rule : N. N. Law, p. 201.
৫. Bernier's letter to M. Chapelain, dated Oct. 4 1667 A. D.
৬. ক. Influence of Islam on Indian culture : Dr. Tarachand.
খ. ভারতীয় দর্শন : উপেন্দ্রনাথ ভট্টাচার্য।
গ. বাঙলার নব জাগৃতি : বিনয় ঘোষ।
৭. বাঙালার জাতীয় ইতিহাস : নগেন্দ্রনাথ বসু, ১ম খণ্ড, পৃঃ ১৮৪।
৮. ক. বঙ্গে সূফী প্রভাব
খ. পূর্ব-পাকিস্তানে ইসলাম ডক্টর মুহম্মদ এনামুল হক।
গ. মুসলিম কবির পদসাহিত্য : আহমদ শরীফ
৯. আদি ও মধ্যলীলা।
১০. ক. British Policy etc, A. R. Mallick, p. 5.
খ. Seir : Vol. I, pp. 94-95.
১১. ক. History of the Bengal Subah : K. K. Datta : Vol. I, pp. 94-95
খ. Seir, vol, II, p. 258.
১২. গ. Bengali Literature : J. C. Ghose, P. 82.
১৩. বাঙালা সাহিত্যের ইতিহাস : সুকুমার সেন ১ম খণ্ড, ২য় সংস্করণ পৃঃ ৯২৫।
১৪. On Certain Peculiarities in the Mohammadanism of India. Asiatic Journal, vol. VI. 1831, p. 353.
১৫. The Muhammadans of Eastern Bengal : James Wise : JASB. vol. LXIII, pt. IIIx 1994, p. 24.

১৬. চণ্ডীমঙ্গল :

পড়য়ে শ্রীপতি দত্ত বুঝায় শাস্ত্রের তত্ত্ব-পঞ্জিকা টীকা, ন্যায়কোষ, সন্ধি উজ্জ্বল বৃত্তি, বামনদণ্ডী, পিঙ্গল, ভারবী ও মাঘের কাব্য, ভট্টি, অভিধান, জৈমিনীভারত, মেঘদূত, নৈষধচরিত, কুমারসম্ভব, রামায়ণ, সাহিত্যদর্পণ প্রভৃতি। এবং দ্বিজ বংশীদাসের মনসামঙ্গল, (ধনুস্তরীওঝা) বঙ্গ সাহিত্যপরিচয় পৃঃ ২১৭। হরিরামের চণ্ডীকাব্য পৃঃ ৩১৫। ব্যাকরণ, অভিধান, সাহিত্য, নাটক, অলঙ্কার আদি সাধ্যসাধন সাধক (অন্নদামঙ্গল)।

১৮. Minhaj, p. 151. History of Bengal, D. U. vol. II, p. 14. Social History of the Muslims of Bengal : Dr. A. Karim p. 42.

১৯. বঙ্গসাহিত্যপরিচয় : দীনেশচন্দ্র সেন, ২য় খণ্ড, পৃঃ ১৮৫৪।

২০. Coins and Chronology of the Independent Sultans of Bengal : N. K. Bhattasali, p. 170.

২১. Promotion of Learning during Muhammadan Rule : N.N. Law, P. 202

২২. idid, p. 201.

২৩. গোবিন্দচন্দ্রের গান : পাঠশালা পড়ি আমি যাই মিক্তেন

ষোলশত যোগী লইয়া মৌরু গমন। [ময়নামতীর উক্তি]

২৪. তোহফা : যাব 'এলম'।

২৫. পূর্বে উদ্ধৃত : মুকুন্দরাম, বিপ্রদাস, পিপলাই, বৃন্দাবন দাস।

২৬. চৈতন্যভাগবত : পৃঃ ১০, ৩৫, ৪৯।

২৭. Social History of the Muslims of Bengal : Dr. A. Karim, P. 44-45.

২৮. idid, p. 45

২৯. idid, pp. 66-67, 72, 82.

৩০. মধ্যযুগের কাব্য সংগ্রহ : মরদন, পৃঃ ১৫৮।

৩১. চণ্ডীমঙ্গল, মুকুন্দরাম চক্রবর্তী : বঙ্গবাসী সং পৃঃ ৮৬।

৩২. ক. Adam's Education Report : 1835.

খ. Aspects of Bengali Society From old Bengali Literature : Dr. Tamonash Chandra Dasgupta, p. 172.

৩৩. বঙ্গসাহিত্য পরিচয় : দীনেশচন্দ্র সেন, পৃঃ ১৩৮৪-৮৫।

৩৪. ক. খ-পুঁথির পরিচয় : পঞ্চনন মণ্ডল, বিশ্বভারতী, ১ম খণ্ড, পৃঃ ১৯১, ২য় খণ্ড।

৩৫. প্রাচীন পুঁথির বিবরণ : আবদুর করিম, ২য় সংখ্যা, পৃঃ ১০৫।

৩৬. Coins and Chronology etc : N. K. Bhattasali : p. 171. Aspects of Bengali Society : T. N. Dasgupta : Chapter : Education.

৩৭. বঙ্গসাহিত্য পরিচয় : ১ম খণ্ড, পৃঃ ৭১।

৩৮. India through the Ages : p. 52.

৩৯. ক. Bengal under Akbar and Jahangir : Dr. Tapan Kumar Roy Chowdhury, pp. 146-48.

খ. পদ্মাবতী [মাগন প্রশস্তি]।

৪০. সত্যকলিবিবাদসম্বাদ : পৃঃ ২১৯, ২২০-২১।

৪১. পদ্মাপুরাণ : বিজয় গুপ্ত : বসন্তকুমার ভট্টাচার্য সম্পাদিত, পৃঃ ৬১।

৪২. পুঁথি পরিচয় (১ম ও ২য় খণ্ড) : পঞ্চানন মণ্ডল, বিশ্বভারতী।

৪৩. ক. সত্যকলিবিবাদসম্বাদ : আহমদ শরীফ সম্পাদিত, পৃঃ ২১৯-২৪।

খ. চণ্ডীমঙ্গল।

৪৪-৪৫ চণ্ডীমঙ্গল, পৃ. ৫১০-১৬, মনসামঙ্গল : নারায়ণ দেব পৃঃ ৪৮, বিজয় গুপ্ত পৃঃ ৯৬-৭
চৈতন্য ভাগবত পৃঃ ১৫৮, ১৭৮, ১৮২।

৪৬. শূন্যপুরাণ : চারু বন্দ্যোপাধ্যায় সম্পাদিত।

৪৭. গোরক্ষ বিজয় : ভূমিকা, পঞ্চানন মণ্ডল।

৪৮. সৈয়দ সুলতান : ১০-ক পরিচ্ছেদ দ্রষ্টব্য। সত্যকলিবিবাদ : পৃঃ ১৭৯।

৪৯. Manrique : Quoted in Social and Cultural Hist. of Bengal : Dr. A. Rahim pp. 290, 359.

৫০. গোবিন্দদাসের পদাবলী : তাহার যুগ : পৃ. ৪৮৬।

৫১. Ralph fitch : Purchas-His pilgrims X, pp. 174-75.

৫২. বিজয়গুপ্ত : পৃ. ১৩৩। Op. cit-Dr. A. Rahim, p. 291.

৫৩. Ain : vol. II. J. N. Sarkar, p. 132.

৫৪. Manrique : op. cit, Dr. A. Rahim, p. 190. Visva

Bharati Annals vol. I. 1945, pp. 96-134, মুকুন্দরাম : পৃঃ ৩৪৫

৫৫. ক. Bengal under Akbar and Jahangir : Tapan Kumar Roy Chowdhury p. 193-94.

খ. Visva Bharati Annals. vol. I. 1945, Dr. P. C. Bagchi, pp. 96 134.

গ. মুকুন্দরাম : পৃঃ. ৩৪৫।

৫৬. Ain-I-Akbari : vol p. 134

৫৭. Manrique I. p. 62-64.

৫৮. কৌশা মোজা পর যদি জরদ পরিও

অঙ্গুরী নিদানে প্রাপ্তি রাখ নিজ করে।-তোহফা : বার ৪০।

পাজামা নিমা টুপী পরি কটিবন্দ- দ্বিজবংশী দাস : বঙ্গসাহিত্য পরিচয় পৃঃ ২১৬।

৫৯. Book of Duarte Barbosa. II. pp. 147-48. জোহফা (বাব, ৪০)।
৬০. Visva Bharati Annals vol. I. 1945. p. 122.
৬১. চৈতন্যচরিতামৃত।
৬২. ক. দস্তার জুব্বা পরি আষা করি হাতে... তসবী আঙ্গুলেতে-শেখচান্দ : সাহিত্য পরিষৎ পত্রিকা ১৩৪৩, পৃঃ ১০৪। Bengal under Akbar and Jahangir p. 20.
খ. মনসাবিজয় : বিজয়গুপ্ত।
৬৩. ক. মুকুন্দরাম : ধরয়ে কখোজ বেশ মাথে নাহি রাখে কেশ
বুক আচ্ছাদিয়া রাখে দাঁড়ি। - পৃঃ ৩৮৮।
খ. Visva Bharati Annals : 1945, vol, I, pp. 96-134. (Chinese Account).
গ. Coins and Chronology etc : N. K. Bhattasali, p. 170
৬৪. বাংলার বাউল ও বাউল গান : উপেন্দ্রনাথ ভট্টাচার্য।
৬৫. সূক্ষ্ম রক্ত বস্ত্র ধনি ভিতরে পরিল। তাহার উপরে নীল বসন ধরিল (রাধা)। - যদুনন্দন দাস, শাড়ির নাম : ঠাকুরমার ঝুলি- দক্ষিণারঞ্জন মিত্রমজুমদার। নওয়াজিস খান- মধ্যযুগের কাব্য সংগ্রহ পৃঃ ১৯৭। আলাউল, কাজুলারেখা, চণ্ডীমঙ্গল, মানিকচন্দ্র রাজার গান- চটক, মটক। জগজ্জীবন ঘোষাল- মনসামঙ্গল। Aspects of Bengali Society : pp. 270-88.
৬৬. ক. নারায়ণ তৈল বিষ্ণু তৈল কেশের গোড়ে দিয়া- মনসামঙ্গল : জগজ্জীবন ঘোষাল।
খ. কুঙ্কুম চন্দন গন্ধ কাপড়েছে কয়।
গ. সর্বাস্ত্রে লেপিয়া দিল সুগন্ধি চন্দন- কৃষ্ণিবাস।
ঘ. সৈয়দ সুলতান : ১০-ক পরিচ্ছেদ দ্রষ্টব্য : ফাতেমার বিবাহে কনে সজ্জা।
ঙ. শাবারিদ খান : রসুল বিজয় : কস্তুরী চন্দন করে বিলেপন হরিয়ে কুমারী অঙ্গে।
শিখোঁত সিন্দুর... গ্রন্থাবলী - পুথি পরিচিতি পৃঃ ৪৮২।
চ. শাহ মুহম্মদ সগীর : কস্তুরী কুমকুম বিন্দু কপালে তিলকচন্দ চন্দনে চর্চিত অঙ্গ কেশর সুগন্ধি সজ্জ।
সাহিত্য পরিষৎ পত্রিকা ১৩৪৩, পৃঃ ১৫৩।
৬৭. ক. সত্যকলি বিবাদসম্বাদ-বসন (পৃঃ ২২০)
খ. নীতিশাস্ত্রবার্তা বা সায়াৎনামা : মুজাম্মিল, পুথি পরিচিতি পৃঃ ১৪৩।
৬৮. চৈতন্যভাগবত : পৃঃ ১২৭।
৬৯. মধ্যযুগের বাঙলা ও বাঙালী : সুকুমার সেন, পৃঃ ৫১।
৭০. ক. গোবিন্দচন্দ্রের গান।
খ. দ্বিজ বংশীদাসের পদ্মাপুরাণ।
গ. সৈয়দ সুলতান : শিবের যোগীবেশ : ১০-ক পরিচ্ছেদ দ্রষ্টব্য।

৭১. ক. মধুমালতী-ভূমিকা।

খ. চৈতন্যমঙ্গল।

৭২. ঊনচট উঝটিকা পায়ের উপরে যত্ন উঝটিকা দিল- যদুনন্দন দাস।

৭৩. ক. Aspects of Bengali Society, Introduction p. XXV II, chapters II and IV.

খ. Bengal under Akbar and Jahangir : pp. 194-94.

৭৪. নওয়াজিস খান : গুলবকাউলি : মধ্যযুগের কাব্য সংগ্রহ পৃঃ ১৯৭।

৭৫. ছোট ছোট বালকের মকরখাড়ু পায়- বিজয়গুপ্ত। রাতুলচরণে মল্লতোড়ল : শ্রীকৃষ্ণকীর্তন : চণ্ডীদাস। চরণে শোভে মণিময় বঙ্করাজ- শেখচন্দ।

বাক পাতা মল পায়- দ্বিজপতপতি, চন্দ্রাবলী। হিয়ার উপরে পরে বঙ্করাজ পাতা-বংশী বদনের পদ।

৭৬. মধুমালতী পৃ : ৮। কাব্যে সুন্দরীর রূপ বর্ণন প্রসঙ্গেই অলঙ্কারের (ও শাড়ীর) নাম মেলে। সৈয়দ সুলতান আকিমা-সারা-ফাতেমা প্রভৃতির রূপ বর্ণন প্রসঙ্গেই (১০-ক পরিচ্ছেদে দ্রষ্টব্য) অলঙ্কার ও প্রসাধন দব্যের নাম উল্লেখ করেছেন। শেখচন্দ তাঁর রসুলবিজয়ে আমিনার রূপ বর্ণনায় (সাহিত্য পরিষৎ পত্রিকা ১৩৪৩ সন পৃঃ ১০৩) তিলক ও চন্দনের বিন্দু, মণিরত্ন হার, মণিময় বঙ্করাজ, মুক্তাখচিত কেশর, মণিময় কুণ্ডল, কেয়ূর, কঙ্কণ, কনক নূপুরের উল্লেখ করেছেন। শাহ মুহম্মদ সগীর জোলেখা প্রসঙ্গে (সাহিত্য পরিষৎ পত্রিকা ১৩৪৩ সন পৃঃ ১৫৩) হার, কঙ্কণ, তাড়, অঙ্গুরী; কিঙ্কিনী ও নূপুরের বর্ণনা দিয়েছেন। দৌলত উজির লায়লীর রূপ বর্ণনায়। (পৃঃ ২৩) রত্নমণিখচিত বেণী, চন্দন তিলক ও সিন্দুরশোভিত ললাট, মণিখচিত সোনার বেশরযুক্ত নাসা, কাজলে উজ্জ্বল নয়ন, মেহেদীরঞ্চিত নখ এবং সগুছড়ি হার, কনক কিঙ্কিনী, বাজুবন্ধ কঙ্কণ অঙ্গুরী ও ‘আভরণ বিবিধ ধাতব’- এর উল্লেখ করেছেন। দোনাগাজী, মুহম্মদ খান, শাহ বারিদ খান প্রমুখ সব কবির কাব্যেই এমনি বর্ণনা মেলে।

৭৭. ক. Aspects of Bengali Society. Op. cit; PXXVIII chapters. 11 and IV.

খ. Bengal under Akbar and Jahangir, pp. 164-95.

গ. মুকুন্দরাম : কালকেতু।

৭৮. Book of Duarte Barbosa pp. 147-48.

৭৯. বিপ্রদাস, মুহম্মদ খান, বিজয়গুপ্ত।

৮০. মনসা বিজয় : বিজয়গুপ্ত পৃঃ ৫৯-৬০। বসন্তকুমার ভট্টাচার্য সম্পাদিত।

৮১. বিপ্রদাস, ‘ক্রমে ক্রমে বদলিনু এগার ভাতার’।-ভারতচন্দ্র।

৮২. Manrique-II. অষ্টৈতাচার্য, নিত্যানন্দ প্রভৃতির দুই স্ত্রী ছিল।

৮৩. ক. ময়নামতী, চৈতন্যমাতা শচীদেবী ও বেহুলা স্মৃতি।

খ. Bernier, Bengal in the 16th Century : J. N. Dasgupta C. U. 1914, pp. 44-45, footnote.

গ. 'শিশুযুবা অবলা যাহার পতি মরে

বিধবা হইয়া সে থাকয় নিজ ঘরে'। মনসামঙ্গল : ক্ষেমানন্দ, কলিঃ বিঃ ১৯৪৯, পৃঃ ২৬১।

৮৪. *England's Pioneers in India* : edited by J. Horton, Lyley, pp. 95-96.

৮৫. কাঞ্চনমালা, রূপভান প্রভৃতি রূপকথা স্মর্তব্য।

৮৬. চৈতন্যভাগবত : পৃঃ ৬০।

৮৭. লায়লী-মজনু : দৌলতউজির পৃঃ ৬৮।

৮৮. চৈতন্যভাগবত : পৃঃ ১১।

৮৯. অধিবাস, বৃদ্ধি, ষোড়শমাতৃকা প্রভৃতি।

৯০. ক. সৈয়দ সুলতান : ফাতেমার বিবাহ।

খ. শাবারিদ খান। রসুল বিজয়।

৯১. শিবায়ন : রামেশ্বর ভট্টচার্য।

৯২. মনোহর-মধুমালতী : সৈয়দ হামজা, এবং সিকান্দর নামা : আলাউল। সিকান্দরের হাতে রোকসানাকে তুলে দিতে গিয়ে এমনি অনুনয় করেছিলেন দারা মহিষী।

৯৩. ঐ-সৈয়দ হামজা।

৯৪. *Bengal under Akbar and Jahangir* : p. 225.

৯৫. রামভনু লাহিড়ী ও তৎকালীন বঙ্গসমাজ : শিবনাথ শাস্ত্রী।

৯৬. ইজার না পিন্দ উঠা, পাগড়ী না বান্দ বৈঠা

না হাঁটির বৃদ্ধ আগে না বসিব উর্ধ্বভাগে

নারীর নাম ধরি না বোলাএ (বার ৪৯-তোহফা)

মজলিসে গেলে মৌন ধরিয়া বসিব

বিনি জিজ্ঞাসনে কোন কথা না কহিব।

পুছিল উত্তর দিব আদব প্রমাণে : (বার-২২) তোহফা।

৯৭. সৈয়দ সুলতান (পরিচ্ছেদ ১০-ক), মুসলমান কবিদের ভণিতায় পীরের চরণ বন্দনা স্মর্তব্য।

৯৮. Quoted from *Bengal under Akbar and Jahangir* : p. 202.

৯৯. ক. De Leet গ. Bowrey ড. Schouten

খ. Manrique ঘ. Shihabuddin Talish.

১০০. গোবিন্দদাসের পদাবলী ও তাঁহার যুগ, বিমানবিহারী মজুমদার। পৃঃ ৪৪৮-৪৯।

১০১. *Bengal under Akbar and Jahangir*.

১০২. বাঙ্গালীর ইতিহাস : আদিপর্ব পৃঃ ৮৫২-৫৬।

১০৩. তামাকুপুরাণ : এ গ্রন্থের ১৭তম অধ্যায় দ্রষ্টব্য ।
১০৪. মনসামঙ্গল : দ্বিজ ষষ্ঠীবর : বঙ্গসাহিত্য পরিচয় : পৃঃ ২৫৪ ।
১০৫. ধনীরা এবং সৈন্যেরা খুব মদ পান করত- সুফিয়ানের বাহিনী (সৈয়দ সুলতান), প্রতাপাদিত্য । History of Bengal, D. U. II, P. 221.
১০৬. ক. Social and Cultural History of Bengal; Dr. A. Rahim p. 297. চৈতন্যমঙ্গল ।
খ. মদ ছিল চার প্রকারের খেনো, নারকেলী, (জলজ গুলোর) তালের ও ফলবীজের ।
Visva Bharati Annals, vol. I, 1945. pp. 96-134.
১০৭. মুসলিম কবির পদসাহিত্য ও রাগতালনামা ।
১০৮. ক. সৈয়দ সুলতান (১০-ক পরিচ্ছেদ) ।
খ. শাবারিদ খান : রসুল বিজয় : পুথি পরিচিতি পৃঃ ৪৮২ ।
গ. মঙ্গল চাঁদ : শাহজালাল মধুমালী । মধ্যযুগের কাব্য সংগ্রহ : পৃঃ ১৯২-৯৪ ।
১০৯. Visva Bharati Annals, vol. pp. 96-104.
১১০. একখানা দলিল আমার নিকট আছে-লেখক ।
১১১. ক. Barbosa. p. 147. খ. বিজয়গুপ্ত : বসন্তকুমার সম্পাদিত পৃঃ ৬১ ।
খ. Coins and Chronology etc. Bhattasali, p. 136.
গ. Ibn Battutah IV p. 212.
১১২. Baharistan Ghyabi. Vol II.
১১৩. Ain-I- Akbari Vol IIp. 134-J. N. Sarkar
Manrique : IO. P. 128.
বাঙ্গালীর ইতিহাস (আদিপর্ব) পৃঃ ৫৫০ ।
১১৪. Baharistan Ghyabi- I. p. 138-39.
১১৫. ক. Bengal under Akbar and Jahangir : p. 197.
খ. Manrique I. p. 64.
১১৬. ক. মুজাম্মিল : সায়াৎনামা : পুথি-পরিচিতি : ১৪৩-৪৫ ।
১১৭. ক. Mahuan's Account of Bengal : JRAS, 1895, p. 530.
খ. Visva Bharati Annals 1945. vol, I. pp. 117, 123, 125
১১৮. ক. Mahuan's Account of Bengal. JYAS, 1895, p. 530.
১১৯. History of Burma, p. 141.
১২০. আব্দুল করিম সাহিত্যবিশারদ প্রদত্ত সত্যাপীর পাঁচালী, সংখ্যা ১৬৩/৯ পৃঃ ৬৮
'বাংলা পুঁথির তালিকা' বরেন্দ্র রিসার্চ মিউজিয়াম ।
১২১. ক. বার্বোসার দৃষ্টিতে বাংলাদেশ : ইতিহাস, ৬ষ্ঠ খণ্ড, ৪র্থ সংখ্যা, ডক্টর মমতাজুর রহমান

- খ. New Values : Vol. X No. I, 1959 pp. 20-23.
১২২. ক. ইতিহাস : ৬ষ্ঠ খণ্ড, ৪র্থ সংখ্যা : ১৩৬৩ সন, পৃঃ ২৩০।
খ. The Book of Duarte Barbosa II, Footnote, pp. 135- 47.
১২৩. ইতিহাস : পৃঃ ইতিহাস : ২৩১। Relpi Fiotch : Purchas : His Pilgrims X 1905 p. 185 (Glasgow)
১২৪. Ain-I-Akbari : Jarret : edited by J. N. Sarkar.
১২৫. Portuguese in Bengal : A. J. Compos. pp. 328-38.
১২৬. ক. বাঙ্গালীর ইতিহাস, পৃঃ ১৭৯।
খ. JRAS 1895. PP. 531-32.
১২৭. Book of Duarte Barbosa, II, p. 147.
১২৮. সায়াৎনামা [নীতিশাস্ত্রবার্তা] : পুথি পরিচিতি : পৃঃ ১৪৩-৪৬। সত্যকলিবিবাদসম্বাদ : পৃঃ ২১৭-২০।
১২৯. মস্তপূত হিন্দুল, কতুরী, শস্যধূম, জতুরগুড়া, গাভীরহাড়, কালোমাটি, মাছের পিঙ্গ, হরিদ্রা, গন্ধক এবং কালো বিড়াল, কুন্ধুটি প্রভৃতির বিষ্ঠা ভূত ও দেও-র ঔষধ।
সত্যকলিবিবাদসম্বাদ পৃঃ ২২০-২৪।
১৩০. ক. Aspects of Society etc : T. N. Dasgupta.
খ. মস্ত্রের পুথি : পুথি পরিচয় (বিশ্বভারতী), বাঙ্গালা প্রাচীন পুথির বিবরণ : আবদুল করিম।
১৩১. মাটির হাড়ি, সরা, বেলুন, পাড়িল, খোড়া, খন্দা, বাচি, সানকি, কণ্ডি, ঘড়া, ঝিনুক ও নারকেলের মালাই ছিল তৈজসপত্র। আসবাবের মধ্যে সচ্ছল গৃহস্থের একটি সিদ্ধুক থাকত মাত্র।
১৩২. চণ্ডীমঙ্গল : বঙ্গবাসী সং পৃঃ ৮৬।
১৩৩. বিজয়গুপ্ত : বসন্তকুমার সম্পাদিত পৃঃ ৬১।
১৩৪. History of Bengal, D. U. Vol II. pp. 101-2.

পরিশিষ্ট-১

বাঙলা সাহিত্যের কয়েকজন চট্টগ্রামী কবি

আবির্ভাবকাল নিরূপণের সহায়ক একটি মামলার রায়।

[সংগ্রাহক চট্টগ্রামের সামাজিক ইতিহাস প্রণেতা গবেষক আবদুল হক চৌধুরী]

চট্টগ্রামের রাউজান গ্রামের একটি মসজিদের ভূসম্পত্তি সংক্রান্ত একটি জটিল মামলায় রায় এ দলিলটি। এ মামলায় জড়িত অনেক লোকের মধ্যে মুহম্মদ জাফর চৌধুরী, আকবর চৌধুরী, শাহবিবি, সাদত চৌধুরী প্রমুখ কয়েকজনের নাম উল্লেখ করেছেন কবি মুহম্মদ মুকিম তাঁর 'গুলে বকাউলি' নামের অনুবাদিত উপাখ্যানে। কবি স্বয়ং আকবর চৌধুরীর, জমিদারী শেরেস্তায় কর্মচারী ছিলেন। এ কবি কাব্যে বিস্তৃতভাবে তাঁর বংশপরিচয় দিয়েছেন চট্টগ্রামে আবির্ভূত এবং জ্ঞাত পূর্ববর্তী ও সমকালীন সব মুসলিম কবির নাম সবিশেষণ উল্লেখ করেছেন। এমনকি কবি আলাউল সম্বন্ধেও বলেছেন 'গৌড়বাসী রৈল আসি রোসাক্সের ঠাম।'

আবদুল করিম সাহিত্যবিশরাদ ও ডক্টর মুহম্মদ এনাযুল হক মনে করতেন মুহম্মদ মুকিম আঠারো শতকের কবি। তাই মুকিম বর্ণিত তাঁর সমকালের কবিদেরও তাঁরা আঠারো শতকের কবি বলে জানতেন ও মানতেন। এ দলিলটি কবি মুহম্মদ মুকিমের প্রশংসিত আকবর চৌধুরীর মসজিদ সংক্রান্ত মামলার রায়। এ মামলা ১৮৪৭ থেকে ১৮৪৯ সন অবধি চলে। এ সময়ে কবি মুহম্মদ মুকিম সম্ভবত জীবিত ছিলেন না। এই অনুমানে বলা চলে মুকিমের নয়াদাড়া গায়ে জন্ম হয় আঠারো শতকের শেষপাদে আর-মুহম্মদ হয় উনিশ শতকের দ্বিতীয় পাদের কোন সময়ে, যখন আকবর চৌধুরী পাঁচ সন্তানের মধ্যে মাত্র তিন সন্তানের পিতা, এ তিন সন্তানের নাম তিনি তাঁর কাব্যে অঙ্কিত করে রেখেছেন। কবি যে উনিশ শতকেই যৌবন ও শ্রৌড়ত্ব প্রাপ্ত হয়েছিলেন তা তাঁর 'ইংরেজ নৃপতি কে ফিরিজির জাত। চিরদিন ইংরেজ এথা মহিপাল'— উক্তি থেকেও প্রমাণিত হয়। কবি তাঁর শিক্ষকের পীরের কাব্যে প্রণোদনাদাতা হিতৈষীদের এবং চট্টগ্রামের দরবেশদেরও নামোল্লেখ করেছেন। তাঁর পূর্ববর্তী কবিরা হচ্ছেন সৈয়দ সুলতান, মুহম্মদ খান, কাজী দৌলত, আলাউল, আবদুন নবী, গিয়াস, মুজাম্মিল, হারুত রোয়াজা [সম্ভবত কল্পবাজার এলাকার কোন রোসাক্সীবংশীয় বাঙলাভাষার কবি] শেখ পরাগ, পরাগল, ফাজির নাসির মুহম্মদ, তাহির, মুহম্মদ আলী ও চামু আর কবি মুহম্মদ মুকিমের সমসাময়িক জীবিত কবি তথা উনিশ শতকের প্রথমার্ধের জীবিত কবিরা হচ্ছেন আলি রজা [১৭৫৯-১৮৩৭], হারি, আলি মিয়া, মুনশী মুহম্মদ মুকিম [ফয়দুল মুকতদী রচক ১৭৯১ খ্রীঃ] কাজী দানেশ, মুহম্মদ তকী ও মুহম্মদ দানিশ। শেষোক্ত জনেরা যে আঠারো শতকের শেষ পাদ থেকে উনিশ শতকের প্রথমার্ধ অবধি কালের মধ্যেই জীবিত ছিলেন এবং কাব্য রচনা করেছিলেন তা একরূপ নিঃসংশয়ে বলা চলে।

এবার এ দলিলে প্রাপ্ত একটি গুরুত্বপূর্ণ তথ্য পরিবেশন করছি। এতে কবি 'আলাউল'র

জীবনীসংক্রান্ত ভ্রান্তি চিরকালের মতো নিঃসংশয়ে নিরসন হবে।

১. শাহবিবি কবি আলাউলের কন্যা ছিলেন না, শাহবিবি ছিলেন রাউজানের জমিদার আমীর মুহম্মদ চৌধুরীর পত্নী, তাঁদের পুত্রের নাম এ দলিলে উক্ত মুহম্মদ জাফর চৌধুরী, চট্টগ্রামে বহুল প্রচলিত 'মালেকাবানু মনুমিয়া' নামের সঁওলা বা লোকগীতির নায়িকা মালেকা বানু এঁদের কন্যা নন।

২. 'শুনে বকাউলি' উপাখ্যান প্রণেতা কবি মুহম্মদ মুকিম উনিশ শতকের মধ্যভাগে জীবিত ছিলেন। অতএব, তিনি তাঁর কাব্যে 'অখনের' [এখনকার] কবি বলে যাদের নাম উল্লেখ করেছেন, তারা সবাই উনিশ শতকের মধ্যযুগের সাহিত্যধারার কবি। এ রায় আবিষ্কারের আগে যাদের আঠারো শতকের কবি বলে উল্লেখ করা হত।

পরিশিষ্ট-২

অনেককাল থেকেই ইসলাম পছন্দ কিছু রাজনীতিসচেতন বিদ্বান, অধ্যাপক, বুদ্ধিজীবী এবং ইতিহাস লেখক প্রচার করে বেড়াচ্ছেন যে একসময়ে আরবী বা ফারসী উর্দু হরফে বাঙলা লেখা হত। প্রমাণ প্রায় ত্রিশটা আরবী হরফে শিল্পীকৃত পুথি আবদুল করিম সাহিত্যবিহারদের ও উত্তর মুহম্মদ এনামুল হকের সংগ্রহে রয়েছে। এ পুথিগুলোর সাক্ষ্য-প্রমাণে আস্থা রেখে তাঁরা নিঃসংশয় সিদ্ধান্তে পৌঁছেছেন যে ব্রিটিশ রাজত্ব প্রতিষ্ঠিত হওয়ার আগে আরবী হরফে বাঙলা লেখা মুসলিম সমাজে অস্তুত বহুল প্রচলিত ছিল। এ মতে, মন্তব্যে ও সিদ্ধান্তে কোন তত্ত্ব, তথ্য ও সত্য নিহিত নেই।

আসলে সবাই জানেন যে প্রায় ১৯৩০ সন অবধি মাদ্রাসায় বাঙলা ভাষার কোন স্থান ছিল না। কেননা ধর্মশাস্ত্র গ্রন্থগুলো আরবীতে লিখিত, টীকা-ভাষ্য লেখা থাকত সতেরো শতক অবধি কেবল ফারসীতে এবং তারপর থেকে আজ অবধি ফারসীতে এবং উর্দুতেও যুগপৎ টীকা-ভাষ্য মুদ্রিত হয়। কিন্তু পাঠদান করেন একালের শিক্ষকরা উর্দু ভাষার মাধ্যমে, একারণেই বাঙালী গৃহস্থ ঘরের শিক্ষার্থীরাও বাঙলা বর্ণমালার সঙ্গেও পরিচিতি হতে পারত না।

মাদ্রাসা শিক্ষান্তে স্বল্পশিক্ষিত মোল্লারা-খোন্দকারেরা কিংবা উচ্চ শিক্ষিত মৌলভী আলেম ফাজিল-কামিল পাশ কোন কোন সাহিত্যরসিক জিন্দাসুপাঠক বাঙলায় লিখিত প্রণয়োপাখ্যান ও শাস্ত্রগ্রন্থ পাঠে আগ্রহী হয়ে বাঙলা ও আরবী-ফারসী হরফ জানা লিপিকর নিয়োগ করে বাঙলা কাব্যের লিপান্তর করাতেন। এই হল আরবী হরফে বাঙলা লেখা চালু হওয়ার ইতিবৃত্তান্ত। বহুল প্রচলন ছিলই না, নিতান্ত বিরল প্রয়াসে এই প্রমাণ এগুলো কেননা আজ অবধি নানাজনের সংগৃহীত হাজার দুয়েক মুসলিম রচিত পুথির পাণ্ডুলিপির মধ্যে মাত্র ত্রিশটার মতো খণ্ডিত বা সম্পূর্ণ পাণ্ডুলিপি পাওয়া গেছে। তা ছাড়া বাস্তব প্রমাণও মিলেছে। মূল কাব্য বাঙলা হরফে রচিত, আদেষ্ঠার নির্দেশে অর্থের বিনিময়ে বাঙলা পুথির লিপান্তর হচ্ছে আরবীতে।

১. চট্টগ্রামের কবি মুহম্মদ জান আরবী হরফে বাঙলা লেখা চরম পাপকর্ম বলে মনে করেছেন। ১২১৪ মঘীতে বা ১৮৫২ লিপিকৃত এর 'নামাজ মাহাত্ম্য' বয়ানের

পুথিতে তিনি বলেছেন 'আরবী আঙলে যদি বাঙলা লিখন/সত্তর নবীর বধ তাহার উপর।' [মৎসম্পাদিত পুথি পরিচিতি : পৃঃ ৪৫৬]

২. নসরুল্লাহ খোন্দকারের 'শরীয়তনামা'র লিপিকর বলেছেন :

কন [কোন] হরফে কন [কোন] 'লফজ' ন বুঝি অর্থ

বাঙলা অক্ষর হেরি আরবীর পুস্ত। [লিপিকর : আলি জান]

৩. হীন আফতাব উদ্দীন কহে আল্লা নবী

পূর্বের বাঙ্গালা অক্ষর আমি করিলাম আরবী।

ছেহাই [কালী] খারাপ ছিল কাগজ পাতন [পাতলা]

তেকারণে অক্ষর যে না হৈল উজ্জ্বল।

[মৎসম্পাদিত সৈয়দ সুলতান রচিত 'রসুল চরিত' : পৃঃ ৭০০]

বলা বাহুল্য আঠারো শতকের শেষার্ধ্বে ও উনিশ শতকে বাঙলা ভাষাচর্চা বটতলায় বেড়ে গেলে সুদূর অজ্ঞ পাড়াগাঁয়েও জিজ্ঞাসু সাহিত্য বা পুস্তকপাঠক মোল্লা-মৌলভী মাতৃভাষায় লিখিত কাব্যের প্রতি কৌতূহলী হয়ে বাঙলা বর্ণজ্ঞানহীন বলে আবুদীতে তথা ফারসী হরফে লিপ্যন্তর করান। কারণ এ পুথিগুলোর লিপিকাল সাধারণভাবে উনিশ শতকের প্রথমার্ধ বা দ্বিতীয়ার্ধ। [পুথি পরিচিতি দ্রষ্টব্য]

পরিশিষ্ট-৩

আঠারো শতকের চট্টগ্রামে

মুসলিমদের দেশজ আচার-সংস্কার

হযরত আলীর 'জঙ্গনামা' ও 'মুসার সওয়াল' রচয়িতা কবি নসরুল্লাহ খোন্দকার 'শরীয়তনামা'ও রচনা করেছিলেন। কবির নিবাস ছিল চট্টগ্রামের বাঁশখালি উপজেলার জলদী গাঁয়ে। তাঁর 'শরীয়তনামা' রচিত হয় ১৭৫৫ খ্রীস্টাব্দে ৯ই ডিসেম্বর। কবির নিজের ভাষায় :

চন্দ্র ঋতু সিদ্ধ পাশে গগনের বাস

সমুদ্র দিবস আদি হৈল ছয়মাস

শরীয়তনামাবাগী লেখা সাজ ভেল

সন তারিখ লেখিবারে শ্রদ্ধা বাড়ি গেল।

চতুর্বিংশ অম্মানের জোহর সময়

বিংশ গ্রহ রমজানের চান্দের নির্ণয়।

আছিল ঈদের দিন রোজ সোমবার

সেদিন হইল লেখা সমাণ্ড মুসার।

অতএব, চন্দ্র-১, ঋতু-৬, সিদ্ধ-৭, গগন [সাত আসমান]- ৭=১৬৭৭ শকের ২৪শে অগ্রহায়ণ সোমবারে রচনা সমাপ্ত হয়। উল্লেখ্য যে সে-বছর রোজা হয়েছিল উনত্রিশটা, ঈদ হয়েছিল সোমবারে। কবি নসরুদ্দাহ খোন্দকারের বিস্তৃত পরিচিতি রয়েছে ডক্টর আবদুল করিম সম্পাদিত ‘শরীয়তনামা’র ভূমিকায় আর আমার ‘বাঙালী ও বাঙলা সাহিত্য’ গ্রন্থে।

‘শরীয়তনামা’ আপাতদৃষ্টে শাস্ত্রীয় আচার-আচরণ বিষয়ক গ্রন্থ বটে, তবে এর গুরুত্ব রয়েছে অন্য কারণে। কবি প্রাসঙ্গিকভাবে মুসলিমদের ঘরে-সংসার-সমাজে চালু লৌকিক ও স্থানিক লোকায়ত বিশ্বাস-সংস্কার ও লোকাচারের বাস্তব বর্ণনা দিয়েছেন। তা থেকে আঠারো শতকের মধ্যকালের দেশজ মুসলিমদের জীবনযাত্রা পদ্ধতির জীবনাচারের একটা জীবন্ত চিত্র মেলে। এরূপ আলেখ্য অন্য কোন গ্রন্থে এমন প্রত্যক্ষভাবে নেই। পরোক্ষ চিত্রও সুলভ নয়, কুচিৎ কোথাও আভাসিত হয়েছে মাত্র।

এবার এখানে মুসলিম ঘরের ও সমাজের অমুসলিম আচার-সংস্কারগুলোর পরিচয় কবির অনুসরণে কবির ভাষায় তুলে ধরিছি।

১. সকালে মুসলমানরাও গোবর-জলে ঘরের মেজে ও বেড়া লেপন করত হিন্দুদের মতোই। এতে তাদের কোন অপবিত্রতাবোধ জাগত না। এ সম্বন্ধে কবির নসিহত বাক্য এরূপ:

গোবরে লেপন্ত ঘর কাফের আকাশ
গোবর না-পাক জান শাস্ত্র মাফার।...
গোমল মনিষ্যের বিচার সমান।
এ থেকে না লিপ লক্সে যেবা মুসলমান।

২. বেদীনদের মতো মুসলমানরা আরো এক কুৎসিত কর্ম করে। কুমারী যখন প্রথম রজঃস্রা হয়, তখন তাকে অপবিত্র মনে করা হয় এবং তাকে ছুঁলেই স্নান করতে হয়। এখানেই কিন্তু শেষ নয়, স্পর্শ করার পাপ জ্বলনের জন্যে উপাস করতে হয়। কয়েক সন্ধ্যা :

কুমারীক কেহ যদি ছোঁএ পুষ্পকালে
কত সন্ধ্যা উপাস রাখএ তিরি কূলে।
কুমারীক কেহ যদি ছোঁএ পুষ্পকালে
সেনান করিতে দৃষ্ট সকলেরে বলে।...
নিশ্চয় জানিঅ এহি হিন্দুর আচার।

রাজঃস্রা কুমারী সপ্তাহান্তে স্নান করলেই পবিত্র হয় না। ধোপা-নাপিত ডাকতে হয়, স্নান করাতে হয় পার্বণিক অনুষ্ঠানের মাধ্যমে এবং সহেলা তথা গান-বাজনার আসর বসিয়ে কুমারীর রজঃস্রা হওয়ার সুসংবাদও প্রচার করতে হয় :

পঞ্চ কিবা সপ্তদিনে ‘দুই’ খেলাওন্ত
ধোপা নাপিতারে আনি শুদ্ধ করাওন্ত।
শুদ্ধ করাই নিয়া জলে করে সেনান
সহেলা গাওন্ত অনাদীনের সমান।
ঢোল বাজাই যুবক সব্বারে জানাওন্ত
আমার কুমারী বধূপুষ্প দেখিছন্ত।

ইসলামে রজঃশ্বলা নারী অপবিত্র নয়, তবে- 'মাত্র রজঃশ্বল অপবিত্র জান তারে', সেজন্যেই এ সময়ে 'নামাজ-রোজা' হারাম।

৩. এমন কি গর্ভবতী নারী শিশু প্রসব করার পরে প্রসূতির হাত-পা'র নখ নাগিত দিয়ে কাটিয়ে তবে তাকে পবিত্র হল বলে গ্রহণ করে :

গর্ভবতী নারী যদি শিশু প্রস্তুত
বেদীনি নাগিত্য আনি নউখ খুটাওন্ত।

৪. খরা-মহামারী প্রভৃতি বিপদ এড়ানোর জন্যে ঘরে ঘরে চাল ভিক্ষা করে বারোয়ারী শিরনী অপদেবতার নামে অর্ঘ্য দেয়ার রেওয়াজ সেকালের মুসলিম সমাজেও ছিল। বউ-ঝিরাই দ্বারে দ্বারে ডালা-কুলায় ধান-দুর্বা ও আত্মসরা সমেত ঘট রেখে দ্বারে দ্বারে ভিক্ষা করত,- এও ছিল একপ্রকার পার্বণিক-মাস্তলিক উৎসব অনুষ্ঠান। এ সম্বন্ধে কবির উক্তি :

কত কত তিরিগণে ডালা শিরে দিয়া
ইরিসের পূজা জানি ধান্য তথা দিয়া।
চূতডাল ঘট রাখি শিরেত লওন্ত
নানামতে বাস পিন্দি দেখিতে মহন্ত।...
শাত্রে বলএ তারে পাপিষ্ট অধর্ম।...
নারীর উচিত রহিব্যবহৃত স্থান।

৫. সেকালেও সৈনিকরা নারীবর্জিত প্রবাসে কর্মজীবনে দেহ-মনের অপ্রতিরোধ্য ক্ষুধার তাড়নায় বারান্দার অভাবে সময়-সুযোগ-সুবিধে মস্ত্রেশ্বরী-ধর্ষণ করত। কবি সে বিষয়ে প্রত্যক্ষদর্শীর বিবরণ দিয়েছেন :

একদিন দোহাজারী শহরেতে রঙ্গে
বসিছিলাম কতজন অশ্ববার সঙ্গে।...
হেন কালে এক নারী মৈচ্ছ্য লই আইল।...
এক আসোয়ার তাকে বোলে হাসি হাসি
গুণ্ডস্থল নাম লই কহন্ত প্রকাশি।...
দান কর আএ নারী ভূঞ্জিতে সুরতি
তোর সোয়ামী হস্তে আমি বলবন্ত অতি। ইত্যাদি

দই কেনার ছলে সৈনিক গোয়ালিনী ধর্ষণ করে :

হস্ত ক্ষেপি ধরিলেক গোপালিনীর হাত
মুখ 'পরে হস্ত বাড়াইল কর মাথে।
সেবক ডাকিয়া তবে কৈল সমর্পণ
অস্তঃপুরে দিতে বোলে করিয়া যতন
অস্তঃপুরে নিল যদি আপনে চলিল
শিলার মন্দির স্থানে না জানি কি কৈল্য।

সৈনিকের যুক্তি :

আমরা সকল নিতি দেশে দেশে ফিরি
নিজ গৃহ নারী ছাড়ি হই দেশান্তরী

আপনার নারী রাখিবারে শক্তি নাই
তেকারণে রতি ভুঞ্জি যার নারী পাই।

৬. যেখানে শবকে স্নান করানো হয়, সে-স্থানকে চন্দ্রিশ দিন যাবৎ বেড়া দিয়ে ঘিরে রাখা হয় এবং সেখানে একভাণ্ড পানি রাখা হয়। এ কাজও শরীয়তবিরোধী। কবি বলেন—

গোসলের স্থানে যদি বেড়া দি' থাকএ
ভাণ্ড ভরি জল রাখি চান্দোয়া টাঙএ।
মুরক্ষ সকলে তারে 'লহদ' বোলএ
'লহদ' ন হএ সেই ন জানি কহএ।...
এই দোষে মৃত 'পরে হইব লাঞ্ছন।

আসলে 'লহদ' হচ্ছে : গোরের পশ্চিমে খুদি রাখে মণ্ডতারে

আরবের ভাষে বোলে লহদ তাহারে।

—এ এক আরব-প্রথা, মৃত্যুর পরে কবরে মৃতদেহের পরিবর্তন দেখার কৌতূহল নিবৃত্তির জন্যেই ছিল এ ব্যবস্থা।

৭. যে কক্ষে কারো মৃত্যু হয়, সে কক্ষকেও মুসলিমরা কাফেরদের মতো অপবিত্র মনে করে এবং যারা মৃতের বাড়ি যায়, শব দেখে, তারা সবাই নিজেদের অপবিত্র মনে করে এবং স্নান করেই স্ব স্ব বাড়িতে প্রবেশ করে :

মৃত্যু লক্ষ্যে পায় হইবা সংসারের সিদ্ধ
এহেন মরারে কেনে অশুদ্ধ বোলন্ত।
মৃতের গৃহেরে বুলে মৃত ইষ্টজন
অপবিত্র হএ বোলে কাফের ধরন।

৮. তা ছাড়া কাফেরদের মতো তারাও যমের ভয়ে থাকে অস্থির ও শঙ্কিত। তাই মৃতের আত্মীয়-স্বজন পরিজনরা তিষ্ঠ সর্বজী মুখে দিয়েই আহাৰ্য গ্রহণ করে আর যমের গতিরোধ করার জন্যে ঘরে পুতে লৌহখণ্ড বা পেরেক :

তার [মৃতের] ঘরে কেহ বোল তিতা বা দেওস্ত।
তিতা অন্ন খাইলে বোলে কেহ ন মরিব
তিতা বলে মৃত্যু বোলে কাছে ন আসিব।...
শুনিয়াছি কাফের মুখে কেহ যদি মরে
তাহারে দহিয়া যদি ফিরি আইসে ঘরে।
তিতা ভক্ষি লোহা দেওস্ত ভাণ্ডে করি সেনান
যুগপদতলে যত্নে রাখন্ত পাষণ।

৯. হিন্দুদের মতো ঘরে জন্ম-মৃত্যু সময়ে-মুসলমানরাও কিছু রীতি-নিয়ম মেনে চলে। হিন্দুরা 'মরা বিয়ালা'য়—

ইষ্টজন মরে কিবা শিশু প্রসবএ
রাঙ্কনের ভাণ্ড সব নিকালি ফেলাএ।'
নিরামিষ খাএ কর্ম (শ্রাদ্ধ) করন্ত যাবন্ত
মৃত-কর্ম করিত করাই হাজামত।

এমনিভাবে মুসলিমরাও শুধু চুল-দাড়ি-নখ ক্ষৌরী করিয়েই তুষ্ট থাকে না। নবজাতকেরও মৃতের খবর নাপিতের মাধ্যমে আত্মীয়-কুটুম্বের বাড়ীও পাঠায়, না পাঠালে আত্মীয়-স্বজন বরং অপমানিত-অবহেলিত বোধ করে, অসন্তুষ্ট হয় :

তৃতীয় দিবস যদি হইল মরার
নাপিত আনিয়া বোলে খেউর করিবার
আপনে করিয়া খেউর ইষ্ট ঘরে ঘরে
খেউর হেতু যত্নে পাঠাওন্ত নাপিতারে।
ইষ্ট কুটুম্বের ঘরে নাপিত না দিলে
অতি অসন্তোষ হএ সবে তারে বোলে।
মরা-বিয়ালা-নখ কাটানের ইষ্ট গেল
তেকাজে আমার ঘরে নাপিত না দিল।
কুটুম্ব হইত যদি নাপিত পাঠাইত
কন মুখে যাই তার ঘরে অন্ন খাইত।

১০. লাশ বইবার জন্যে খাট তৈরীর ও কবরের উৎসর্গকার ছাদ নির্মাণের জন্যে বাঁশের ব্যবহার বিষয়েও ছিল অদ্ভুত লৌকিক সংস্কার। যেমন,

কেহ বোলে মণ্ডতার খাট সোঁধাইতে
বাঁশ কিবা গাছ নারে আগা-গোড়া দিতে
এক মুখী দিলে আর কেহ ন মরিব
আগা-গোড়া দিলে বোলে সকল মরিব।

১১. নবজাতকের জন্যে নিমরিয়া পীরের [মৃত্যুহীন পীর] নামে কুক্কুট গোপনে বলিদান করা হত :

বালক জন্মিলে এক কুক্কুট রাখএ
নিমরিয়া পীর নামে ফাতেহা করাএ।
সেই কুক্কুটের মাংস রান্ধে এক মতে
গৃহের বাহিরে বলে নারে নিকালিতে।
নানান প্রকারে বলে না পারে রাক্ষিতে
অভ্যাগত ভিক্ষুকেরে না পারএ দিতে।
যাহারে ভক্ষ্যায় ভক্ষ্যায়ন্ত গৃহান্তরে।

১২. সেকালে মুসলিম ঘরে ব্রাহ্মণেরও আবশ্যিক ডাক পড়ত নানা কাজে। জন্ম পঞ্জিকা, ভাগ্যগণনা প্রভৃতি ছাড়াও পুষাকর্মাদিতেও ব্রাহ্মণের সহায়তার প্রয়োজন হত। একদিন লোক এসে কবিকে বলে :

মোহোর সাক্ষাতে আসি বোলে হাসি হাসি
সূর্যকদলীয় [সূর্যমুখী] কথা কহন্ত প্রকাশি,

ব্রাহ্মণেরে নিয়া দিব পূজার কারণ
পূজা কৈলে মনোরথ সিদ্ধি ততক্ষণ ।...
পুষাকর্মে ব্রাহ্মণেরে দিই আমরাএ ।

১৩. কেউ কেউ কলা, চালের গুঁড়ো ও কাঁচা দুধ নিয়ে আরাধা শিরনী তৈরী করে এবং শিরনী ফাতেহা করার সময়ে তৃণ গলে বেঁধে রাখে। এসব কাফেরদেরই রীতি। কত কত মুসলমান :

১

কদলী তুণুল আটা কাঁচা দুধ আনি
এসব একত্র করি ফাতেহা করন্ত
সহরিসে লোক সবে তাহাকে খাওন্ত ।...
ফাতেহা করিতে শিরনী কত কত মূর্খে
তৃণ এক গলে বান্ধে বহুল আতঙ্কে ।

২

কেউ বলে- যত আউশ ধান্য আছে সংসার মাঝার
ফাতেহাতে ন লাগএ ন পারে দিবার ।...
যেই খাইতে পারে সেই ফাতেহা দিতে পারে
আউশ কিবা শাইল তাত কি বিচারে ।

অগ্রহায়ণ-পৌষ মাসে গোলায় ধান তুলবার মুহূর্তে মুসলমানও মহালক্ষ্মীর কাছে হাঁস বলি দিয়ে রক্ত ছিটিয়ে-ছড়িয়ে দেয় গোলায় ভেতরে :

আর এক পাপকর্মী কেহ কেহ করে
মহালক্ষ্মী হাঁস-রক্ত দেওন্ত গোলাঘরে ।

এমনকি কেউ কেউ শূকর চণ্ডীর নামেও হাঁস বলি দেয় :

কেহ কেহ শূকর চণ্ডীরে দেওন্ত হাঁস ।

১৪. এখানেই শেষ নয়। মঘিনী [আরাকানী বংশোদ্ভূত চট্টগ্রামবাসী বৌদ্ধ নারী-পুরুষ মাত্রই মঘ] ও কাফের দিয়ে এরা বিভিন্ন উপলক্ষে পূজাও করায় :

আর কত মুসলমানে অকর্ম করন্ত
অন্য জাতি হস্তে যতে পূজা করাওন্ত
মঘিনীরে ছাগল দেওন্ত কিবা জানি
জাগরান দেওন্ত অন্য জাতি হস্তে আনি ।

১৫. বিষুর কালে অর্থাৎ চৈত্র সংক্রান্তির সময়ে মুসলিম নারীরা শিবের গাজনের অনুকরণে এবং বিবাহোৎসবে নাচে-গায় :

১

আর বহু মোহন্ত জনের তিরি কুলে
নটীর সদৃশ নটী বেটি বিবা কালে ।
সেসবের সোয়ামী সব ভূত কিবা পণ্ড
নিজ নারী খেলিতে দেওন্ত আইলে বিষু ।

২

আপনার তিরি কন্যা সভাত পাঠাওনত
 ভিন্ন পুরুষের সঙ্গে খেলিতে দেওন্ত ।
 বিষুর দিবসে কিবা বিবাহের কালে
 জ্ঞাতিগণ ডাকিয়া আনন্দ কুতূহলে ।
 সিন্ধুত [ধেনোবা কাঁজিমদ] ভৈক্ষ্যন্ত কিবা হরিষ অন্তর
 নারী বা পুরুষ সব হই একান্তর ।
 হলদি ক্ষেপন্ত যেন মঘধ ধরান
 হাসন্ত গাহন্ত নটী নটকের গণ ।
 পুরুষ নারী আর নারী পুরুষ সঙ্গে
 শঙ্কা পরিহরি সবে খেলে মনোরঙ্গে ।

১৬. নয় শতক থেকে ১৬৬৬ খ্রীস্টাব্দ অবধি চট্টগ্রাম সাধারণভাবে ছিল আরাকান রাজ্যভুক্ত বা রোসান্ধরাজ্যভুক্ত। তাই সমর-শাসন ও ব্যবসায়িক প্রয়োজনে আরাকানীরা চট্টগ্রামে এসেছে, এবং তাদের অনেকেই এখানে স্থায়ীভাবে বসবাস করেছে। চট্টগ্রামের বৌদ্ধরা ওই আরাকানীদেরই বংশধর এবং 'মঘ' নামে সুপ্রসিদ্ধ। চট্টগ্রামী মুসলমানের আচারে-আচরণে ও খাদ্য তৈরীতে তাই কিছু আরাকানী প্রভাব ছিল। এরূপ দুটো সংস্কারের প্রভাবের কথা কবি এখানে উল্লেখ করেছেন। একটি হচ্ছে অন্যের বাড়ীতে কোন কুমারী আকস্মিকভাবে প্রথম রজঃস্রাব হলে সে-বাড়ী অপবিত্র হল বলে মনে করা হত। সে পাপের জন্যে গৃহস্থ সম্পদচ্যুত হয়ে দরিদ্র হুঙ্কাওয়ায়ার আশঙ্কা থাকত :

আর নব বধু কিবা কাহার কুমারী
 কুসুম [রজঃফুল] দেখএ যদি পড়শীর বাড়ি ।
 গৃহ নষ্ট হৈল বলে গৃহের ঈশ্বরী ।
 'তার হেতু মোহোর সম্পদ নিব হরি ।'
 গোধনের রজঃ ফেক সিদ্ধ সেই জল
 আনি দিলে গৃহ হৈব পবিত্র নির্মল ।

১৭. রাস্তা ও পুকুর খননেও ছিল বছর-তিথি-লগ্নের সংস্কার। যেমন :

পুষ্করিণী খোদাএ কিবা জাঙ্গাল দেওন্ত
 বিষুর ভিতরে কেনে অকূপ করন্ত ।
 সম্পূর্ণ খোদান যেবা কিবা নহি হএ...
 যুগল বছর হৈলে বলে বছ দোষ ।

১৮. মুসলমানেরাও বিষুর দিনে করত স্নান-পবিত্র ও পাপমুক্ত হওয়ার বাঙ্খায়। আর সেদিন গরু-ছাগলের শিঙে ও গলায় পরাত ফুলের মালা, গায়ে মাখত চন্দন ও হলুদ। মঘদের মতো নতুন বছর বরণের ও পুরোনো দুঃখ-গ্লানি-অবসাদ মুছে ফেলার জন্যে এমনি সব পার্বণিক অনুষ্ঠান ছিল জনপ্রিয় :

আর এক অপকর্ম হিন্দুর ধরান
 বিষুর দিবসে লোকে করন্ত সেনান।
 বৃষের অজার শিরে গলে দেওন্ত ফুল
 পশুর সমান কর্ম করন্ত বহুল
 কেহ কেহ হলদি চন্দন লাগাওন্ত
 বিন্দু বিন্দু নানামতে অঙ্গেতে দেওন্ত।...

এ সব কর্মে- বহু পুণ্য মঘদের শাস্ত্রের মাঝার।
 গৃহের যাবর সব একত্র করিয়া
 বিষুর প্রভাতে অগ্নি দেওন্ত জ্বালিয়া।
 স্নান করি তিতা ভক্ষি খেলাওন্ত রঙ্গে
 একত্রে যুবক রঙ্গে যুবতীর সঙ্গে।
 এ সকল কর্ম জান হিন্দুর ধরান
 বছর হইলে শেষ বছর দহন।
 সে শব মরিলে যেন অগ্নিতে দহন্ত
 বছরেরে দহি তিতা ভক্ষণ করন্ত।

১৯. হিন্দুদের মতো মুসলমানেরাও বিয়েতে ও রথনাডি উৎসবে ঢোলাদি বাজনার ব্যবস্থা করে :

প্রথমে আনিয়া ঢুলি টোল বাজাওন্ত
 আকাশ পাতাল আদিসব কাঁপাওন্ত।
 শাস্ত্রে মানা ঢোল বাহি বিবাহ করিতে।...
 ঢোলের আওয়াজ বোলে যতদূর যাএ
 দেও পরী ভূত প্রেত প্রাণ লইয়া যাএ।

২০. এখানেই শেষ নয়, বিয়ের প্রাক্কালে বরকে গায়ে হলুদ মেখে স্নান করানো প্রভৃতি কর্মে ও অনুষ্ঠানে রয়েছে নারীরই অবিসম্বাদিত অধিকার। এও হচ্ছে বেদীনের প্রভাবজাত আচার :

দামাদকে গোসল করাএ তিরিগণে
 হলুদ দেওন্ত কেনে মূর্খের বচনে।
 হলুদ অঙ্গেতে দিলে শাস্ত্রে বহু দোষ।

তাছাড়া বর-সাজেও রয়েছে মণী-প্রভাব ও আচার। পত্রে-পুষ্পে আচ্ছাদিত শোবার টোপ পরায় বরের মাথায়, তাতে মুখও পড়ে ঢাকা। এবং ধান-দূর্বী-ধূপ-কলা-পিঠা-শিলা সমেত বর-বধূর-বরণ-ডালাও রাখে :

মঘদের কর্ম নহে শাস্ত্রের অন্তরে
 নিমিষ্টা (?) শোবার নির্মে মাত্র এক বন
 অধিক নিকুঞ্জবন যেহেন কানন।
 কুসুম বলিয়া তারে শিরেতে দেওন্ত

সুগন্ধি সৌরভ পুষ্প তারে ন দেওন্ত।
 আর এক ডালা ভরি ভূত পূজাখানি
 ধূপ ধান্য পিঠা কলা শিলা ভরি আনি।
 দামাদ-কন্যার আগে আনিয়া রাখন্ত
 যুগ-করে ধূপ দিয়া অধিক পূজন্ত।

এবং বর-বধূর প্রথম সাক্ষাৎ অনুষ্ঠানে পুরনারীরা বের্পদা হয়ে নানা ধরনের ঠাট্টা-মস্করায়,
 রঙ্গ-রসে ও নাচে-গানে মেতে ওঠে :

১

চতুর্দিকে বেড়ি যত কামিনীর গণ
 উচ্চস্বরে সহেলা গাওন্ত রঙ্গমন।
 কেহ কেহ মহা ঠারে মুখ কুটি হাসন্ত
 ভিন্ন পুরুষের মুখ নিজে দেখাওন্ত।
 নটীগণ হস্তে শ্রেষ্ঠ সে সবে গীত
 ভিন্ন পুরুষের মন হএ উছলিত।
 এ জন্যেই— তিরিলোকে সহেলা গাহিলে বহু পাপ!

২

এক ঢোল বাজাওন্ত সিন্ধুত বৈষ্ণব
 আর পুনি তিরিগণে সহেলা গাহন্ত।...
 বেনামাজী শরাবী মিথ্যে মত্ত ভাঙী
 এ সবে ঘরে নুতাইবা কিবা ঢঙ্গী।

২১. বিয়ের সময়ে ‘মারোয়া’ নামের মঞ্চ তৈরী করে, তাকে সাত নাল সূতো দিয়ে বেঁটন
 করে রাখে এবং মাচার নিচে জল ভরা কলসী রাখে। এটিও কুফরী কর্ম :

আর পত্রধারী বহু কাঁচা বাঁশ আনি
 মারওয়া নির্মাত্ত ইরিসের বাসাখানি।
 চতুর্দিকে সগুনল সূতায় বেড়িয়া
 ঠামে ঠামে মু ছহি [?] বহু দেওন্ত ঢুলাইয়া।
 মারওয়ার বার্থা নাহি শাস্ত্র মাঝার
 মুসলমান কর্ম নহে কাফের সবার।
 সত্ত্বর করি কলসী ভরিয়া আনি জল
 অতি মান্য করি রাখে মারওয়ার তল।
 চারি পাশে ভ্রমি ভ্রমি গাহন্ত সুস্বরে
 কলসী ‘মানাই’ গুনাওন্ত ইরিসরে।

এক কলসীর জলে-ঘটজলে কনে দামাদকে একত্রে স্নান করায়...

ঘটজলে দামাদকে সেনান করাইবার
 আর দু হানরে একত্র নারীকুলে।

মান করাএ কেনে কলসীর জলে ।
 কলসির বার্তা নাহি শাস্ত্রের মাঝার
 আবার— যদি সে কন্যার ঘরে শাহ্ [বর] চলি যাএ ।
 নাপিত দিয়ে— মুগ্ধকেশ কাটাইয়া আঙ্গুল খুঁটাএ ।

তারপর সেখানে আবার গেড়ুয়া বা গেণ্ডুয়া তথা ফুলের স্তবক বা অন্য কিছু গোলক নিয়ে
 বর-কনের মাথার উপর দিয়ে লোফালুফি খেলা করে যুবক-যুবতীরা :

আর যত নবীন যৌবন তিরিগণ
 সমান বয়সী কত যুবকের সন ।
 কুমার কুমারী দুহ মুখামুখি করি
 গেড়ুয়া ধরন্ত দোহানকে উয়া [ঝু-দাঁড় করিয়ে] করি
 উচ্চস্বরে মহা ঠারে গেড়ুয়া ধরন্ত ।
 আর, জুলুয়ার ছেলে ভিন্ন নারীর বদন—
 হাসি হাসি রতিভাবে করে নিরীক্ষণ
 ভিন্ন পুরুষের মুখ দেখি নারীগণ
 এক লক্ষে পাইল যেন স্বর্গের দরশন ।
 মুখ কুটি হাসিয়া চক্ষু ভ্রূঙ্গী বাঁশ তুলি
 মনপুরী হরে নিতি রক্তিরসে ভুলি ।

আর সেখানে নতুন বর-কনে পাশা ও গেড়ুয়া খেলার মাধ্যমেই অপরিচয়ের ও
 নবপরিচয়ের-শরম মুক্ত হত :

বর-কনে দোহানেরে মুখোমুখি বসাইয়া
 পাশা খেলাওন্ত কুপুরুষে যুক্তি দিয়া ।
 ভিন্ন নারী পুরুষ হৈয়া একত্তর
 খেলা ছলে হাসলাম করন্ত বিস্তর ।

২২. হিন্দু-প্রভাবে মুসলিম সমাজেও আশরাফ-আতরাফ চেতনা প্রবল ছিল, তাই :

১

কত কত মৌলানায় ফতোয়া দেওন্ত
 ধীবরের ঘরে খাইতে নিষেধ করন্ত ।...
 আরো বোলে শাস্ত্র মাঝে মৎস্য ন বেচিবার
 যেবা বেচে তার ঘরে নারে খাইবার ।

২

কেহ বোলে তেলী কিবা হাজামের ঘরে
 কিবা মৎস্য বেচে কিবা যেবা মৎস্য মারে ।
 সে সবে ঘরে বোলে খাইতে ন পারে ।

আরো ছিল বিধর্মীর প্রতি ঘৃণা ও বিদ্বেষ :

একহি হুকাতে কিবা একহি টেমিতে
মঘদের সঙ্গতি লইছ ধূম্র নিতে
নিজ জাতি সম অন্য জাতিরে জানন্ত ।...
মঘদের সঙ্গতি যদি ধূম্র নিতে পারে
কিসকে ভক্ষণ নাহি পারে ভক্ষিবারে
সে সবে কন্যা কেনে বিভা ন করন্ত
আপন দুহিতা সেসবে ন দেওন্ত ।

তাছাড়া ধূম্রপানও গর্হিত অভ্যাস :

হুকা একে এড়ে আর জনে লয় ।

২৩. মহরমের সময়েও মুসলিমরা প্রায় পৌত্তলিক হয়ে যায় :

হাসান হোসেন মূর্তি নির্মান্ত যন্তনে
পড়শী সবেরে আনি পূজা করাওন্ত
নাচি গাহি তির সকলেরে শুনাওন্ত ।

২৪. চাষাবাদ-বিষয়ে দেশজ মুসলিম সমাজে কতগুলো আদিম ও আদি যাদু বিশ্বাস সংস্কার ও রীতি-রেওয়াজ থেকে গিয়েছিল। যেমন আষাঢ়ে সপ্তম দিনে পৃথিবীর রজঃস্বলা হয়, রজঃস্বলা অবস্থায় রমণ যেমন নিষিদ্ধ, তেমনি হলকর্ষণও অবাস্তিত :

আষাঢ়ের সপ্তমিশ্বরজঃ পৃথিবীতে
উদরথু ভগ্নস্থলী নিকারে বাহিরে ।
তেকারণে সপ্তদিনে হাল ন জুড়িব ।
রজঃস্বলা হৈলে নারী পারেনি রমিতে
রজঃস্বলা কালে ভূমি চষিব কেমনে ।...

মুসলমানেরা— হিন্দু সব দেখাদেখি পালন্ত সকল ।

মুসলমানেরাও বছরের প্রথম হল কর্ষণ মুহূর্তে একটা 'ডিম' জমির মাঝখানে রেখে চারদিকে চষতে থাকে। আবার কেউ কেউ কালোজামের ডাল জমির মাঝখানে বসিয়ে চাষ শুরু করে। এবং ওইদিন গৃহস্থ কোন প্রতিবেশীকে কোন দ্রব্য দান বা ধার স্বরূপ দেয় না :

কত কত মুসলমানে হাল নামাইতে
ডিম এক মধ্যে রাখি চষে চারিভিতে ।
কেহ কেহ জাম ডাল কুপি মধ্যভাগে
চারিপাশে হাল জুড়ে যেন চক্র লাগে ।...
যেদিন লামান্ত হাল কিবা জল চলে
কিবা গুছি লয় কিবা ধান্য আগা লৈলে
কেহ দ্রব্য খুঁজিলে সেদিনে ন দেওন্ত ।

২৫. মৃত আত্মীয়দের কল্যাণে ফাতেহা দেয়ার মধ্যেও রয়েছে নানা কুসংস্কার। যেমন এক একজন আত্মীয়ের নাম উচ্চারণের সঙ্গে সঙ্গেই :

মৃত্তিকার কুজা এক সমুখে রাখিব
এক নামে এক জোড়া রুটি তুলি দিব।...
আর কেহ অনু যদি ফাতেহা করান
এক পত্র বিছাইব পবিত্র স্থান।
অল্প অল্প ঠাই ঠাই অনু রাখি তাতে
পূজা যেন রাখি থাকে বুতের সাক্ষাতে।

এভাবে- নামে নামে শতে শতে ফাতেহা দেওন্ত।

নসরুল্লাহ খোন্দকার আঠারো শতকের চট্টগ্রামের মুসলিমদের প্রাত্যহিক জীবনযাত্রায় তাদের দেশজ ঐতিহ্যের, বিশ্বাসের, সংস্কারের ও আচারের যে-সব আদিম ও আদিম রূপ রয়ে গেছে, সে-সবের সাক্ষাৎ বর্ণনা দিয়েছেন। এতে রয়েছে গোময়ের পবিত্রতার সংস্কার, রজস্বলা সম্বন্ধে একাধারে অপবিত্রতার সংস্কার এবং কুমারীর প্রথম যৌবন-সূচনার রজঃস্রাবে-সানন্দে সামাজিক অনুষ্ঠান মাধ্যমে উৎসব করার রেওয়াজ, মৃতের সংস্কার-সম্বন্ধীয় নানা আচার, মৃত্যুভীতিজাত অপবিত্রতার সংস্কার ও যম-প্রতিরোধ প্রসঙ্গে তিত্ত সবজি ভক্ষণ ও দ্বারে লৌহ স্থাপন, মুসলিমদের বিষুব-সংক্রান্তি আনুষ্ঠানিকভাবে পালন, বিদায়ী বছরের গ্রানি-দুঃখ-ক্ষতি ভুলবার জন্যে এবং নতুন বছরকে সানন্দে স্বাগত জানানোর জন্যে মানস ও ব্যবহারিক প্রস্তুতি, ষষ্ঠীর বিকল্প নিমরিয়া পীরের শিরনী, মঘিনীদেবীর ও মহালক্ষ্মীর বলি, পুষাকর্মে ও অন্য কয়েক পার্বণে মুসলিম ঘরে ব্রাহ্মণের ভূমিকা প্রভৃতির এবং সর্বোপরি মুসলিম ঘরে বিয়ের আচার-অনুষ্ঠানের নিখুঁত ও সামগ্রিক বিবরণ দিয়েছেন কবি। বর-কনের গায়ে হলুদে, নারীর বিশেষ ভূমিকার, বর-বধূর প্রথম সাক্ষাতে মিলনে ও বাসরে নারীদের পার্বণিক ও আনুষ্ঠানিক ভূমিকার এবং মারোয়া বাঁধা, গেড়ুয়া খেলা, বর-বধূর পাশা খেলা, জোঁলুয়া দেয়া [বর-কনের মিলন ঘটানো] প্রভৃতির নিখুঁত চিত্র মেলে এ গ্রন্থে। চাষাবাদে চাষীর অবশ্য পালনীয় রীতি নিয়মের বর্ণনাও আছে। তাছাড়া রয়েছে উৎসবে-পার্বণে, নারী-পুরুষের অবাধ মেলামেশার রীতিরেওয়াজের, 'সিফত' নামের ভাতজাত তরল কাঁজি মদ-পানে নারী-পুরুষের সমাজসম্মত নির্দোষ অধিকারের, নাচে-গানে গৃহস্থদের 'বউ-বি'র স্বীকৃত অধিকারের ও অংশগ্রহণের বর্ণনা।

এ সঙ্গে পাই পেশাভেদে সমাজে আশ্রাফ-আতরাপের স্থিতি। তেলী-হাজাম-বীবর ছিল ঘৃণ্য পেশাজীবী।

এসব কেবল লৌকিক ও লোকায়ত বিশ্বাস-সংস্কারের ও আচার-আচরণের বাস্তব বিবরণ হিসেবে নয়, শাস্ত্রিক, সামাজিক ও সাংস্কৃতিক ইতিহাসের রূপেও অত্যন্ত মূল্যবান।

তুর্কতাক-দারু-টোনা-বাণ-উচ্চাটন, তাবিজ-কবচ-মন্ত্র-মাদুলী, রোগ, শুভকর্মের গৃহ-নির্মাণের ও বস্ত্র পরিধানের তিখিলগু, দেওতাড়ন মন্ত্র, বিয়ের আচার-অনুষ্ঠান এবং এরূপ আরো কিছু আদিম-আদি যাদু-টোটেম বিশ্বাসসম্পৃক্ত আচার-সংস্কারের বর্ণনা মেলে আরো দুটো গ্রন্থে- মুহম্মদ খানের 'সত্যকলিবিবাদ সম্বাদে'ও এবং মুজাম্মিলের 'নীতিশাস্ত্রবার্তা' অন্যান্য গ্রন্থেও প্রাসঙ্গিক বর্ণনায় এমনি বিশ্বাস-সংস্কারের ও আচারের ছিটে-ফোঁটা তথ্য মেলে।

এসব লৌকিক আচার-সংস্কার যে কেবল চট্রগ্রামে ছিল তা নয়, গোটা বাঙলাদেশের দেশজ মুসলিম সমাজে এমনি স্থানিক প্রভাবজ আচার-বিশ্বাস চালু ছিল। উনিশ শতকের শেষপাদে রচিত ইসলাম সম্বন্ধীয় অনেক দোভাষী পুথিতেই মুসলিম সমাজে চালু নানা আচার-সংস্কারের বর্ণনা রয়েছে। আব্দুল আজিজ রচিত 'তরিকা-ই-মুহম্মদীয়া' (১২৮৩ সন) এবং সমীরউদ্দীন লিখিত 'বেদার-আল-গাফিলিন' (১২৭৫ সন) পুঁথিদুটো এ ক্ষেত্রে বিশেষভাবে উল্লেখ্য। ওয়াহাবী-ফরায়েজী আন্দোলন কালেও :

“হজরত মাওলানা কেরামত আলী মরহুম মগফুরের আগমনের পূর্বে বঙ্গের অধিকাংশ মুসলমান পৌত্তলিকতামূলক কুসংস্কারের সমাচ্ছন্ন হইয়া পড়িয়াছিল।... মুসলমানগণ নামাজ, রোজা প্রভৃতি ধর্মকর্ম ছাড়িয়া দিয়া, নানা প্রকার হিন্দু দেবদেবীর পূজা অর্চনায় প্রবৃত্ত হইয়াছিল। মনসাপূজা, শীতলাপূজা, ষষ্ঠীপূজা, সতাপীরের পূজা, কালীর নামে পাঠ্য উৎসর্গ এসমস্ত কার্য মুসলমান জনসাধারণ মধ্যে বিশেষরূপে বদ্ধমূল হইয়া পড়িয়াছিল। তদ্ব্যতীত পীরপূজা, দরগাপূজা, দরগাঘরে নানারূপ বেদাতীকার্য, মহরমের সময় তাজিয়াদারী, জারিগান, গাজীর গীত ইত্যাদি শত শত প্রকার ধর্মবিগর্হিত কার্যের অনুষ্ঠান হইত। বিবাহ, খুৎনা ও স্ত্রীলোকের প্রথম রজঃশ্রা উপলক্ষে জঘন্য আমোদ-প্রমোদ-বাদ্য বাজনা প্রভৃতি বিশেষরূপে অনুষ্ঠান হইত।”৪

একালে যুরোপীয় জ্ঞানের, বিজ্ঞানের, যন্ত্রের, কৃৎকৌশলের প্রসারে ও প্রসাদে মানুষ শাস্ত্রীয় বিশ্বাস-সংস্কারের ও আচার-আচরণের ক্ষেত্রে উদার ও উদাসীন হয়েছে। ফলে শাস্ত্রনিষ্ঠার ক্ষেত্রে শৈথিল্য আসায় লৌকিক বিশ্বাস-সংস্কারেও এসেছে অবহেলা ও অনাস্থা, তবু ওয়াহাবী-ফরায়েজী আন্দোলনের দাবী এই ক্ষেত্রে অবশ্য স্বীকার্য। ১২৮৩ সালে [১৮৭৬ সনে] আব্দুল আজিজ রচিত 'তরিকা-ই-মুহম্মদীয়া'য় ওয়াহাবী আন্দোলনের ফলে—

‘ঘরে ঘরে দীন জারি/করে লোকে লেখাপড়ি।

এবং— ‘মসজিদ নামাজ রোজা

গায়ে গায়ে হৈল তাজা’—বলে উল্লেখ করা হয়েছে।

তবে সমকালের মানুষ দেখে মনে হয়, আসলে আন্তিক মানুষ বিশ্বাসের যুগ ও জগৎ শত চেষ্টায়ও পুরো অতিক্রম করে যুক্তির যুগে ও জগতে কখনো মানসস্থিতি পায় না। কারণ আন্তিক মানুষের ভাব-চিন্তা ও কর্ম-আচরণ বিশ্বাস ও আস্থা [Belief and Faith] নিয়ন্ত্রিত। আধুনিক সুশিক্ষিত সংস্কৃতিবান আন্তিক মানুষ তাই দ্বৈধসত্তায় কিংবা নানাক্ষেত্রে বিধাঘন্ডে ভোগে। কেননা বিজ্ঞানের ও যুক্তির জগতে তার মানস-প্রবাস ঘটে ঘন ঘন। তবু কূর্মের বর্মের মতো তার নিশ্চিত ও নিশ্চিন্ত স্থিতি বিশ্বাসেরও আস্থার ইমারতে আর কূর্মের মতোই যুক্তির ও বিজ্ঞানের আড়িনায় তার চোখ-মুখ-মন-মাথার অনুপ্রবেশ ঘটে কেবল ক্ষণিকের জন্যেই, তবে তাতে তার বিশ্বাসের দুর্গ ভাঙ্গে না বটে, কিন্তু চিড় খায়, আস্থাও টুটে না বটে, তবে নড়বড়ে হয়—নিবিড় বা গাঢ়-গভীর থাকে না। একালের শিক্ষিত মানুষ তাই, পোঁজামিলে মধ্যপন্থী-ঘরেরও নয়, খাটেরও নয়, যখন যেমন, তখন তেমন। তাই চাঁদ একাধারে ও যুগপৎ উপগ্রহ ও অধ্যাত্ততত্ত্বের আধার।

ষোল শতকের শেষপাদ থেকেই বিশেষ করে গত দু'শ বছর ধরে শিক্ষিত মুসলিমরা স্বধর্মীয় আচারে-সংস্কারে বাঙালীত্ব ঘুচিয়ে দেশজ মুসলিমদের দেশ-কালহীন শরীয়তপন্থী-বৈশ্বিক মুসলিম করার চেষ্টায় রয়েছেন নিরন্তর।

তথ্যসমূহ

১. পাণ্ডুলিপি : চট্টগ্রাম বিশ্ববিদ্যালয়ে বাঙলা সাহিত্য সমিতি প্রকাশিত গবেষণা পত্রিকা, ১৯৭৪ সন, পৃঃ ১৫৩-৩০৫
২. পৃঃ ৬২৮-৩৫, এবং ডক্টর মুহম্মদ এনামুল হক রচিত 'মুসলিম বাঙলা সাহিত্য' দ্রষ্টব্য।
৩. আমার 'মধ্যযুগের সাহিত্যে সমাজ ও সংস্কৃতির রূপ' গ্রন্থটি দ্রষ্টব্য।
৪. ১২৯৯ বঙ্গাব্দের আষাঢ় সংখ্যা 'ইসলাম প্রচারক' পত্রিকা থেকে 'উনিশ শতকে বাঙালী মুসলমানের চিন্তা-চেতনার ধারা' [২য় খণ্ড] গ্রন্থে ডক্টর ওয়াকিল আহমদ-উদ্ধৃত, পৃঃ ৭৮ [ঢাকার এশিয়াটিক সোসাইটি প্রকাশিত 'ডক্টর মুহম্মদ এনামুল হক স্মারক গ্রন্থ'ভুক্ত আমার লিখিত প্রবন্ধ, ১৯৮৫ সন।]

AMARBOI.COM